

書叢本基學國

集翁放陸

(一)

著游陸



行發館書印務商

書叢本基學國

集翁放陸

(一)

著游陸

行發館書印務商

傳

陸游，字務觀，越州山陰人。年十二，能詩文。蔭補登仕郎。鎮廬薦送第一。秦檜孫填適居其家，檜怒，遣主司明年試禮部主事。復置游前列，檜顯黜之。由是爲所嫉。檜死，始赴福州寧德簿。以薦者除敕令所刪定官。時楊存中久掌禁旅，游力陳非便。上嘉其言，遂罷存中。中貴人有市北方珍玩以進者，游奏：陛下以損名齋，自經籍翰墨外，屏而不御。小臣不體聖意，輒私買珍玩，虧損聖德。乞嚴行禁絕。應詔言，非宗室外家，雖實有助勞，毋得輒加王爵。頃者有以師傅而領殿前都指揮使，復有以太尉而領閤門事。瀆亂名器，乞加訂正。遷大理寺司直。兼宗正簿。孝宗卽位，遷樞密院編修官。兼編類聖政所檢討官。史浩黃祖舜薦游善詞章，語典故召見。上曰：游力學有聞，言論剴切，遂賜進士出身。入對，言：陛下卽卽位，乃僭詔令以示人。之時，而官吏將帥一切翫習，宜取其尤沮格者，與棄棄之。和議將成，游又以書白二府曰：江左自吳以來，未有捨建康他郡者。駐蹕臨安，出於權宜，形勢不固，饋餉不便。海道逼近，凜然意外之憂。一和之後，盟誓已立，動有拘礙。今當與之約，建康臨安，皆係駐蹕之地。北使朝聘，或就建康，或就臨安。如此，則我得以暇時建都立國，彼不我疑。時龍大淵會覲用事，游爲樞臣。張燾言：覲大淵招權植黨，熒惑聖聽。公及今不奮，異日將不可去。燾遽以聞。上詰語所自來。燾以游對。上怒，出通判建康府。尋易隆興府。言者論游交結臺諫，鼓唱是非，力說張浚用兵，免歸。久之，通判夔州。王炎宣撫川陝，辟爲幹辦公事。游爲炎陳取進之策，以爲經略中原，必自長安始。取長安，必自隴右始。當積粟練兵，有變則攻，無則守。吳玠子玘代掌兵，頗驕恣。



傾財結士。屢以過誤殺人。炎莫誰何。游請以玠子拱代挺。挺曰。拱怯而寡謀。遇敵必敗。游曰。使挺遇敵。安保其不敗。就令有功。愈不可駕馭。及挺子曦僭叛。游言始驗。范成大帥蜀。游爲參議官。以文字交。不拘禮法。人譏其頹放。因自號放翁。後累遷江西常平提舉。江西水災。奏撥義倉賑濟。檄諸郡發粟以予民。召還。給事中趙汝愚駁之。遂奉祠。起知嚴州。過闕。陸辭。上諭曰。嚴陵山水勝處。職事之暇。可以賦詠。自適。再召入見。上曰。卿筆力回幹甚善。非他人可及。除軍器少監。紹熙元年。遷禮部郎中。兼實錄院檢討官。嘉泰二年。以孝宗光宗兩朝實錄成。三朝史未就。詔游權同修國史實錄院同修撰。免奉朝請。尋兼祕書監。三年。書成。遂陞寶章閣待制。致仕。游才氣超逸。尤長於詩。晚年再出。爲韓侂胄撰南園閱古泉記。見讜清議。朱熹嘗言其能太高。迹太近。恐爲有力者所牽挽。不得全其晚節。蓋有先見之明焉。嘉定二年卒。年八十五。

本書係用萬有文庫版本
印行原裝分訂廿四冊每
冊面數各自起迄今合訂
四冊面數仍舊讀者鑒之

陸放翁集總目

第一册

傳

渭南文集目錄

渭南文集卷第一至卷第十

第二册

渭南文集卷第十一至卷第二十

第三册

渭南文集卷第二十一至卷第三十

第四册

渭南文集卷第三十一至卷第四十

第五册

渭南文集卷第四十一至卷第五十

渭南文集跋

第六册

劍南詩集序

劍南詩集目錄

第七册

劍南詩集目錄

第八册

劍南詩集卷第一至卷第四

第九册

劍南詩集卷第五至卷第九

第十册

劍南詩集卷第十至卷第十三

第十一册

劍南詩集卷第十四至卷第十七

第十二册

劍南詩彙卷第十八至卷第二十二

第十三册

劍南詩彙卷第二十三至卷第二十八

第十四册

劍南詩彙卷第二十九至卷第三十四

第十五册

劍南詩彙卷第三十五至卷第四十

第十六册

劍南詩彙卷第四十一至卷第四十六

第十七册

劍南詩彙卷第四十七至卷第五十三

第十八册

劍南詩彙卷第五十四至卷第五十九

第十九册

劍南詩藁卷第六十至卷第六十六

第二十冊

劍南詩藁卷第六十七至卷第七十三

第二十一冊

劍南詩藁卷第七十四至卷第七十九

第二十二冊

劍南詩藁卷第八十至卷第八十五

劍南詩藁跋

放翁逸藁目錄

放翁逸藁二卷

第二十三冊

南唐書序

南唐書目錄

南唐書十八卷

南唐書音釋

第二十四冊

老學菴筆記十卷

家世舊聞

齋居紀事

陸放翁集 一 總目

五

陸放翁集

渭南文集目錄

卷第一

表二十首

天申節賀表

會慶節賀表二

瑞慶節賀表

光宗冊寶賀表

皇帝御正殿賀表

皇太子受冊賀表

賀明堂表

謝明堂赦表

謝赦表

謝賜曆日表二

福建到任謝表

江西到任謝表

陸放翁集

渭南文集 目錄

嚴州到任謝表

除寶謨閣待制謝表

轉太中大夫謝表

謝致仕表

落職謝表

逆議授首稱賀表

牋七首

光宗冊寶賀太皇太后牋

皇帝御正殿賀皇后牋

皇帝御正殿賀皇太子牋

皇太子受冊賀皇后牋

賀皇太子受冊牋

逆議授首賀太皇太后牋

逆議授首賀皇后牋

一

卷第二

南宮表賤二十五首

丞相率文武百僚請建重明節表三

立皇后丞相率文武百僚稱賀壽皇表

賀皇帝表

賀皇太后賤

賀壽成皇后賤

賀皇后賤

文武百僚謝春衣表

重明節明慶寺丞相率百僚啓建道場疏

開起

滿散

進疏

會慶節明慶寺丞相率百僚啓建道場疏

開起

滿散

進疏

文武百僚謝冬衣表

會慶節丞相率文武百僚賀壽皇表

丞相率文武百僚賀至尊壽皇聖帝冬至表

表

丞相率文武百僚賀皇帝冬至表

丞相率文武百僚請皇帝聽樂表

丞相率文武百僚賀皇太后受册賤

丞相率文武百僚賀壽成皇后受册賤

丞相率文武百僚上皇帝賀三殿受册表

丞相率文武百僚賀壽皇正旦表

丞相率文武百僚賀皇帝正旦表

卷第三

劉子十首

蠟彈省劄

論選用西北士大夫劄子

代乞分兵取山東劄子

上二府論事劄子

上殿劄子三

擬上殿劄子

上二府乞勿受慶雲圖劄子

上二府論都邑劄子

卷第四

劄子十二首

上殿劄子三

乞祠祿劄子

上殿劄子二

上殿劄子二

除修史上殿劄子

乞致仕劄子三

卷第五

奏狀八首

天申節進奉銀狀

辭免賜出身狀二

條對狀七條

奏筠州反坐百姓陳彥通訴人吏冒役狀

除寶謨閣待制舉會黜自代狀

辭免轉太中大夫狀

薦舉人材狀

卷第六

啓十二首

謝解啓

賀台州曾直閣啓

賀會祕監啓

賀謝提舉啓

賀禮部曾侍郎啓

賀辛給事啓

答福州察推啓

賀何正言除左司諫啓

賀湯丞相啓

除刪定官謝丞相啓

謝內翰啓

謝諫議啓

卷第七

啓十六首

謝會侍郎啓

刪定官供職謝啓

賀黃樞密啓

除編修官謝丞相啓

謝參政啓

謝賜出身啓

答人賀賜第啓

賀張都督啓

問候洪總領啓

答鈴轄啓

問候葉通判啓

答吳提宮啓

賀葉提刑啓

賀呂知府啓

上陳安撫啓

上史運使啓

卷第八

啓十六首

答發解進士啓

答廖主簿發解啓

上三府乞宮祠啓

賀吏部陳侍郎啓

賀甯陽陳右相啓

謝王宣撫啓

通判夔州謝政府啓

謝洪丞相啓

上王宣撫啓

謝晁運使啓

謝夔路監司列薦啓

答薛參議啓

答衛司戶啓

與何蜀州啓

答交代楊通判啓

與趙都大啓

卷第九

啓十六首

與成都張閣學啓

答勾簡州啓

與蜀州同官啓

賀薛安撫兼制置啓

與李運使啓

上鄭宣撫啓

賀葉樞密啓

除制司參議官謝趙都大啓

賀葉丞相啓

賀薛參政啓

與交代陳太丞啓

與儲運使啓

答蕭守林文卿啓

與建寧蘇給事啓

與本路郡守啓

福建謝史丞相啓

卷第十

啓十七首

上趙參政啓

上安撫沈樞密啓

賀泉州陳尙書啓

答建寧陳通判啓

答漳州石通判啓

江西到任謝史丞相啓

謝趙丞相啓

謝王樞使啓

謝錢參政啓

謝侍從啓

謝臺諫啓

與本路監司啓

答本路郡守啓

答寄居官啓

賀葛正言啓

賀周參政啓

賀謝樞密啓

卷第十一

啓二十三首

賀禮部鄭侍郎啓

答撫州發解進士啓

賀施中書啓

上丞相參政乞宮觀啓

知嚴州謝王丞相啓

謝梁右相啓

謝周樞使啓

謝黃參政啓

謝施參政啓

謝臺諫啓

謝葛給事啓

答交代陳判院啓

嚴州到任謝王丞相啓

謝梁右相啓

謝周樞使啓

謝臺諫啓

謝監司啓

答方寺丞啓

賀王提刑啓

與汪郎中啓

與沈知府啓

賀留樞密啓

賀蔣中丞啓

卷第十二

啓十五首

賀賈大諫啓

賀謝殿院啓

賀周丞相啓

賀施知院啓

賀丘運使啓

賀蔣尙書出知婺州啓

除直華文閣謝丞相啓

陸放翁集 一 渭南文集 目錄

修史謝丞相啓

賀謝丞相除少保啓

賀張參政修史啓

除寶謨閣待制謝丞相啓

謝費樞密啓

致仕謝丞相啓

答權提刑啓

答胡吉州啓

卷第十三

書九首

代二府與夏國主書

上執政書

上虞丞相書

上辛給事書

答刑司戶書

答劉主簿書

與尉論捕盜書

答陸伯政上舍書

答王樵秀才書

卷第十四

序十七首

容齋燕集詩序

京口唱和序

送關漕詩序

雲安集序

送范西叔序

東樓集序

范待制詩集序

持老語錄序

師伯渾文集序

晁伯谷詩集序

長短句序

徐大用樂府序

呂居仁集序

佛照禪師語錄序

趙祕閣文集序

方德亨詩集序

會稽志序

卷第十五

序十七首

施司諫註東坡詩序

達觀堂詩序

梅聖俞別集序

楊夢錫集句杜詩序

陸伯政山堂類彙序

普燈錄序

澹齋居士詩序

傅給事外制集序

開聲錄序

周益公文集序

宣城李虞部詩序

曾裘父錄集序

送巖電道人入蜀序

邢芻甫字序

曾溫伯字序

天童無用禪師語錄序

陳長翁文集序

卷第十六

碑六首

成都府江濱廟碑

行在寧壽觀碑

嚴州烏龍廣濟廟碑

德勳廟碑

泰州報恩光孝禪寺最吉祥殿碑

陸放翁集 一 渭南文集 目錄

洞霄宮碑

卷第十七

記十三首

雲門壽聖院記

寧德縣重修城隍廟記

灑亭記

煙艇記

復齋記

青州羅漢堂記

鎮江府城隍忠佑廟記

黃龍山崇恩禪院三門記

王侍御生祠記

東屯高齋記

樂郊記

對雲堂記

靜鎮堂記

卷第十八

記十一首

藏丹洞記

籌邊樓記

銅壺閣記

彭州貢院記

撫州廣壽禪院經藏記

成都犀浦國寧觀古楠記

書巢記

景迂先生祠堂記

圓覺閣記

能仁寺捨田記

常州開河記

卷第十九

記十首

明州育王山買田記

建寧府尊勝院佛殿記

紹興府修學記

重修天封寺記

嚴州重修南山報恩光孝寺記

會稽縣重建社壇記

廣德軍放生池記

鎮江府駐劄御前諸軍副都統廳壁記

法雲寺觀音殿記

會稽縣新建華嚴院記

卷第二十

記十首

居室記

邵武縣興造記

諸暨縣主簿廳記

婺州稽古閣記

智者寺興造記

常州奔牛開記

盱眙軍翠屏堂記

上天竺復菴記

東籬記

嚴州釣臺買田記

卷第二十一

記十首

仁和縣重修先聖廟記

湖州常照院記

法慈懺殿記

東陽陳君義莊記

廬帥田侯生祠記

吳氏書樓記

靈祕院營造記

橋南書院記

心遠堂記

萬卷樓記

卷第二十二

銘七首

梅子真泉銘

司馬溫公布被銘

金崖硯銘

延平硯銘

蠻谿硯銘

錢侍郎海山硯銘

桑澤卿磚硯銘

贊二十四首

崔伯易畫像贊

東坡像贊

王仲信畫水石贊

鍾離真人贊

呂真人贊二

僧師源畫觀音贊

宏智禪師真贊

大慧禪師真贊

已菴禪師真贊

塗毒策禪師真贊二

佛照禪師真贊

大洪禪師贊

中巖園老像贊

奉聖淳山主年八十有四放翁爲作真贊

芋菴宗慧禪師真贊

廣慧法師贊

數淨人求僧贊

錢道人贊

放翁自贊四

記事一首

記太子親王尹京故事

卷第二十三

傳三首

姚平仲小傳

族叔父元巖傳

陳氏老傳

青詞六首

紹興府衆會黃錄青詞

江西祈雨青詞

謝雨青詞

嚴州祈雨青詞

謝雨青詞

保安青詞

疏二十一首

天申節樞密院開啓道場疏

滿散道場疏

天申節功德疏二

瑞慶節功德疏七

祈雨疏

謝雨疏

道宮謝雨疏

嚴州祈雨疏三

嚴州施大斛疏

嚴州謝雨疏

嚴州謝雪疏

嚴州久雪祈晴疏

卷第二十四

疏二十九首

法雲寺建觀音藏殿疏

開元寺重建三門疏

安隱寺修鐘樓疏

重修光孝觀疏

圓通寺建僧堂疏

重建大善寺疏

道像五藏疏

鷲峰寺重建三門疏

重修大慶寺疏

福州請仁王堅老疏

福州請九峰圓老疏

福州請聖泉穎老疏

能仁請昕老疏

雍熙請最老疏

鄉士請妙相講主疏

千秋觀修造疏

光孝請廓老疏

雍熙請機老疏

雍熙請錫老疏

求僧疏二

紫霄宮女童徐居慶求披戴疏

成都大聖慈寺念經院僧法慧爲行者雷

印定求度牒疏

雍熙請倫老疏

梁氏子求僧疏

孫餘慶求披戴疏

陶山菴行者求化度牒疏

傅妙齡求僧疏

葉可忻求僧疏

祝文二十三首

鎮江謁諸廟文

祭富池神文

福建謁諸廟文

福州城隍昭利東嶽廟祈雨文

福州謝雨文

福州準赦禱諸廟文

福州歐治池龍鱓溪河口五龍祈雨祝文

福州閩王閩忠懿王祈雨祝文

嚴州謁諸廟文

謁大成殿文

謁社稷神文

嚴州秋祭祝文

嚴州祈雨祝文三

嚴州馬目山祈雨祝文二

嚴州祈晴祝文

嚴州謝雪祝文

嚴州久雪祈晴祝文

嚴州廣濟廟祈雨祝文

嚴州謝雨祝文

嚴州戊申謝蠶麥祝文

卷第二十五

勸農文三首

夔州勸農文

丁未嚴州勸農文

戊申嚴州勸農文

雜書十二首

書通鑑後二

書賈充傳後

書郭崇韜傳後

書安濟法後

書空青集後

書浮屠事

書渭橋事

書包明事

書神仙近事

書屠覺筆

書二公事

卷第二十六

跋四十首

翼廟賜馮侍中詩

高宗聖政草

高宗賜趙延康御書

高宗御書二

今上皇帝賜包道成御書崇道卷類

跋尹耘師書劉隨州垂

跋唐御覽詩

跋文武兩朝獻替記

跋吳禪師蒙泉銘

跋修心鑑

跋邵公濟詩

跋坐忘論

跋查元章書

跋高象先金丹訣二

跋天隱子二

跋造化權輿

跋老子道德古文

跋已菴語

跋武威先生語錄

跋關著作行記

跋司馬子微餌松菊法

跋周茂叔通書

跋岑嘉州詩集

跋二賢像

跋山谷先生三榮集

跋硯錄香法

跋唐修撰手簡

跋蔡君謨帖

跋瘦鶴銘

跋西崑酬唱集

跋歷代陵名

跋溫庭筠詩集

跋王君儀待制易說

跋崔正言所書書法要訣

跋後山居士詩話

跋佛智與升老書

跋古栢圖

卷第二十七

跋四十九首

跋中和院東坡帖

跋漢隸

跋晁百谷字欒

跋陵陽先生詩草

跋荆公詩

跋續集驗方

先左丞使遼語錄

跋朝制要覽

跋東坡問疾帖

跋東坡詩草

跋孫府君墓誌銘

跋蘇魏公百韻詩

跋家藏造化權輿

跋三蘇遺文

跋兼山先生易說二

跋鄭虞任昭君曲

跋傅正議至樂菴記

跋中興間氣集二

跋齊驅集

跋柳柳州集

跋說苑

跋章氏辨誣錄

跋釣臺江公奏議

先太傅遺像

跋高康王墓誌

跋半山集

跋李深之論事集

跋李莊簡公家書

跋之采先生棄

跋吳夢予詩編

跋松陵集三

跋王仲言乞米詩

跋金齋集

跋韓非子

跋卻掃編

跋彩選

跋陝西印章二

跋詩彙

跋祕閣續帖張長史率意帖

跋王深甫先生書簡二

跋郭德誼墓誌銘二

跋郭德誼書

卷第二十八

跋四十一首

跋後山居士長短句

跋蘇氏易傳

跋資暇集

跋法帖二

跋蘭亭樂毅論并趙岐王帖

跋蔡肩吾所作遼府君墓誌銘

跋原隸

跋京本家語

跋李徂徠集

跋劉文老使君義居遺戒

跋無逸講義

跋東坡帖

跋東坡祭陳令舉文

跋劉凝之陳令舉騎牛圖

跋東坡七夕詞後

跋張監丞雲莊詩集

跋淵明集

跋陸史君廟籤

跋巴東集

跋呂侍講歲時雜記

跋許用晦丁卯集

跋李涪刊誤

跋歸去來白蓮社圖

跋釋氏通紀

跋毛仲益所藏蘭亭

跋魏先生草堂集

跋王輔嗣老子

跋前漢通用古字韻編

跋胡少汲小集

跋曉師顯應錄

跋范巨山家訓

跋張安國家問

跋坐忘論

跋唐盧肇集

跋居家雜儀

跋皇甫先生文集

跋南堂語

跋注心賦

跋朱新仲舍人自作墓誌

跋黃魯直書

卷第二十九

跋四十一首

跋蘭亭序

跋李少卿帖

跋樂毅論

跋李朝議帖

跋東方朔畫贊

跋李虞部與范忠宣公啓

跋范文正公書

跋東坡帖

跋盧衷父絕句

跋四三叔父文集

跋王右丞集

跋歐陽文忠公疏草

跋盤澗圖

跋爲琛師書維摩經

跋東坡諫疏草

跋東坡代張文定上疏草

跋楊處士村居感興

跋朱氏易傳

跋晁以道書傳

跋嵩山景迂集

跋任德翁乘桴集

跋洪慶善帖

跋蒲郎中易老解

跋陸子彊家書

跋子聿所藏國史補

跋火井碑

跋韓晉公牛

跋畫橙

跋臨帖

跋米老畫

跋潘函老帖

跋薊林帖

跋陳魯公所草親征詔

跋蔡忠懷送將歸賦

跋東坡書籀

跋范元卿舍人書陳公實長短句後

跋謝師厚書

跋雲丘詩集後

跋呂舍人九經堂詩

跋韓忠獻帖

跋高大卿家書

卷第三十

跋四十首

跋諸晁書帖

跋南城吳氏社倉書樓詩文後

跋六一居士集古錄跋尾

跋林和靖詩集

跋米元暉書先左丞海岱樓詩

跋蘇丞相手澤

跋韓幹馬

跋義松

跋林和靖帖

跋東坡集

跋陶靖節文集

跋三近齋餘錄

跋望江麴君集

跋吳越備史二

跋僧帖

跋柳師帖

跋松陵倡和集

跋潘虛

跋呂成叔和東坡尖叉韻雪詩

跋花間集二

跋韓晉公字母續

跋韓立道所藏蘭亭序

跋龔氏金花帖子

跋曾文清公奏議彙

陸放翁集 一 渭南文集 目錄

跋曾文清公詩彙

跋魚計賦

跋徐待制詩彙

跋周益公詩卷

跋樊川集

跋周侍郎奏彙

跋周侍郎尋姊妹帖

跋鮑參軍文集

跋南華真經

跋與周監丞書

再跋皇甫先生文集後

跋漢文帝後元年三月詔

跋張魏公與劉察院帖

跋世父大夫詩彙

卷第三十一

跋四十七首

跋魯直書大戴踐阼篇
跋唐昭宗賜錢武肅王鐵券文
跋司馬端衡畫傳燈圖
跋呂伯共書後
跋張敬夫書後
跋劉戒之東歸詩
跋秦淮海書
跋柳書蘇夫人墓詩
跋朱希真所書雜鈔
跋爲子通書詩卷後
跋呂文靖門銘
跋傅給事竹友詩藁
跋陳伯予所藏樂毅論
跋伯予所藏黃州兄帖
跋詹仲信所藏詩藁
跋陳伯予所藏蘭亭帖

跋坡谷帖
跋山谷書陰真君詩
跋呂尙書帖
跋傅給事帖
跋熊舍人四六後
跋臨汝志
跋尼光語錄
跋程正伯藏山谷帖
跋張待制家傳
跋柳氏訓序
跋祠部集
跋消災頌
跋肇論
先楚公奏檢
跋宗元先生文集
跋韓子蒼語錄

跋孟浩然詩集

跋出疆行程

跋李衛公集

跋徐節孝語

跋趙渭南詩集

跋石鼓文辨

跋西崑酬唱集

跋兼山家學

跋淮海後集

跋張季長中庸辨釋

跋法書後

跋李太白詩

跋重廣字說

跋巖壑小集

跋王元澤論語孟子解

卷第三十二

陸放翁集 一 渭南文集 目錄

墓誌銘四首

右朝散大夫陸公墓誌銘

陳君墓誌銘

費夫人墓誌銘

曾文清公墓誌銘

卷第三十三

墓誌銘五首

青陽夫人墓誌銘

陸孺人墓誌銘

浙東安撫司參議陸公墓誌銘

山陰陸氏女墓誌銘

傅正議墓誌銘

卷第三十四

墓誌銘四首

尙書王公墓誌銘

楊夫人墓誌銘

陸郎中墓誌銘

知興化軍趙公墓誌銘

卷第三十五

墓誌銘三首

夫人孫氏墓誌銘

奉直大夫陸公墓誌銘

中丞蔣公墓誌銘

卷第三十六

墓誌銘六首

呂從事夫人方氏墓誌銘

夫人陳氏墓誌銘

承議張君墓誌銘

朝奉大夫石公墓誌銘

方伯翥墓誌銘

留夫人墓誌銘

卷第三十七

墓誌銘五首

朝議大夫張公墓誌銘

王季嘉墓誌銘

石君墓誌銘

夫人陸氏墓誌銘

程君墓誌銘

卷第三十八

墓誌銘四首

朝奉大夫直祿閣張公墓誌銘

山堂陸先生墓誌銘

監丞周公墓誌銘

夫人樊氏墓誌銘

卷第三十九

墓誌銘二首

求志居士彭君墓誌銘

吏部郎中蘇君墓誌銘

墓表五首

陸氏大墓表

詹朝奉墓表

孫君墓表

何君墓表

孺人王氏墓表

壙記一首

令人王氏壙記

卷第四十

塔銘八首

祖山主塔銘

定法師塔銘

良禪師塔銘

高僧猷公塔銘

別峰禪師塔銘

海淨大師塔銘

陸放翁集

一 渭南文集 目錄

松源禪師塔銘

退谷雲禪師塔銘

卷第四十一

祭文二十一首

皇太后靈駕發引祭文

祭梁右相文

祭龔參政文

祭魯國太夫人文

祭王侍御令人文

祭祝永康文

祭劉樞密文

祭蔣中丞夫人文

祭趙提刑文

祭勤首座文

祭許辰州文

祭韓無咎尙書文

祭胡監丞文

祭丘運使母夫人文

祭曾原伯大卿文

祭大姪文

祭十郎文

祭朱元晦侍講文

祭方伯蕃文

祭張季長大卿文

祭周益公文

哀辭二首

尤廷之尙書哀辭

沈子壽母趙夫人哀辭

卷第四十二

天彭牡丹譜

花品序第一

花釋名第二

風俗記第三

致語六首

天申節致語三

徐稚山給事慶八十樂語

致語二

卷第四十三

入蜀記第一 乾道五年十二月六日起六年六月三十日止

年六月三十日止

卷第四十四

入蜀記第二 七月一日起十六日止

卷第四十五

入蜀記第三 七月十七日起八月七日止

卷第四十六

入蜀記第四 八月八日起二十六日止

卷第四十七

入蜀記第五 八月二十七日起十月五日

卷第四十八

止

入蜀記第六十月六日起二十七日止

卷第四十九

詞六十七首

赤壁詞

浣沙溪二首

青玉案

水調歌頭

浪淘沙

定風波

南鄉子二首

滿江紅二首

感皇恩二首

好事近十二首

鷓鴣天七首

陸放翁集

一 渭南文集 目錄

蕙山溪二首

木蘭花

朝中措三首

臨江仙

蝶戀花三首

釵頭鳳

清商怨

水龍吟

秋波媚二首

采桑子

卜算子

沁園春三首

憶秦娥

漢宮春二首

月上海棠二首

烏夜啼八首

真珠簾

好事近

卷第五十

詞六十三首

柳梢青二首

夜遊宮二首

安公子

玉蝴蝶

木蘭花慢

蘇武慢

齊天樂二首

望梅

洞庭春色

漁家傲

繡停針

桃園憶故人五首

極相思

一叢花二首

隔浦蓮近拍二首

昭君怨

雙頭蓮

南歌子

豆葉黃二首

醉落魄

鵲橋仙三首

長相思五首

菩薩蠻二首

訴衷情二首

生查子二首

破陣子二首

上西樓

點絳脣

謝池春 三首

一落索 二首

杏花天

太平時

戀繡衾 二首

風入松

眞珠簾

風流子

雙頭蓮

鷓鴣天

蝶戀花

陸放翁集

渭南文集

卷第一

天申節賀表


化國之日舒以長。運啓千齡之盛。天子有父尊之至。心均萬寓之驩。即週期慶申壽祝。中賀恭惟太上皇帝陛下。宅心清靜。受命溥將。協氣熏爲太平。華夷銜莫報之德。孫謀以燕翼。子宗社修無疆之休。誕敷錫於下民。丕靈承於上帝。臣方馳使傳。阻綴朝班。望降表於雲霄。敢恨微蹤之遠。被頌聲於金石。尙希薄技之陳。

會慶節賀表

有王者興。爰啓丕平之運。使聖人壽。敢忘胥戴之誠。中賀恭惟皇帝陛下。蕩乎無名。建其有極。干戈載戢。恩加遼碣之區。囹圄一空。治格成康之上。歛時百福。享國萬年。臣迹滯遐陬。心馳魏闕。紀虹渚電樞之慶。莫廁諸儒。演龍宮慈笈之文。徒修故事。

又

帝生商而立子。有開必先。民戴舜以同心。無遠弗届。乾端肇闢。嶽貢交修。中賀臣早以湖海之微生。親見唐虞之盛典。蓬轉逾二十年之久。每注想於冕旒。嵩呼上千萬壽之時。獨阻陪於簪笏。茲膺郡寄。復在王



幾目瞻佳氣之鬱葱耳聽驩聲之洋溢永言疎賤已極光榮恭惟皇帝陛下煥乎其有藝文粲然而興周道三朝圖籍將還榮河溫洛之都萬里車書已軼碣石榆林之壤以仁政廣華夷之德澤以豐年奉郊廟之牲牲凡曰含齒戴髮之儔均被綸肌浹髓之賜光御無疆之曆益培有永之年臣猥以分符莫追造闕簫韶方奏徒傾就日之心歌頌可陳尙刻齊天之石

瑞慶節賀表

虹流電繞適當聖作之辰鼉拊嵩呼共效壽祺之祝敢傾丹悃仰扣睿聰中賀恭惟皇帝陛下德當乾符躬有聖瑞東漸西被偉聲教之混同上際下蟠極仁恩之溥漉帝生商而立子民戴舜以同心歷考前聞執逾盛際臣生逢千載仕歷四朝獻貢川珍猥預駿奔之末齋飛魚躍承依洪造之中

光宗冊寶賀表

龜食筮從考廟方嚴於典冊仗全樂備都人咸覲於禮容聖教茂昭驩聲旁達中賀恭惟皇帝陛下道參穹壤德肖祖宗稽周王小毖之求躬虞帝終身之慕父傳歸子有光盛舉於兩朝天定勝人果見太平於今日乃咨元老大臣之參訂兼采議郎博士之討論勒崇垂鴻極高蟠厚臣在列視龍飛之旦袖書奏麟趾之篇際遇特殊等夷罕及既莫預曲臺之議又阻從屬車之塵徒有悃誠形於夢想

皇帝御正殿賀表

蕭傳清蹕端御昕朝德上際而下蟠澤東漸而西被中賀恭惟皇帝陛下體天廣覆如日正中率禮無違永歎歲月遷流之速嚮明而治勉答臣民愛戴之心詎太史涓吉之辰采率常縣絕之議對揚宗社之福

爰舉公卿之觴。兩曜清明。四方拊舞。臣農疇齒。帝所夢遙。華袞光臨。雖莫望火龍黼黻之盛。黃麾備設。尙想聞金石絲竹之音。

皇太子受冊賀表

明詔建儲。永爲宗社之本。正銜發策。顯答神祇之心。國勢奠安。輿情闡澤。中賀。恭惟皇帝陛下。若稽古訓。駿惠先猷。壽考億年。誕膺不蔽之福。本支萬世。坐擁無疆之休。存心養性之事。天修身齊家而治國。追舉有邦之慶。益昭知子之明。臣跡遠周行。心馳魏闕。命大史卜日之吉。徒聞播告之傳。遣上公持節以行。莫預觀瞻之盛。儻未辭於聖代。尙自力於聲詩。

賀明堂表

農扈屢豐。協氣方流於縣宇。合宮大享。曠儀遂舉於中天。驛置星馳。嵩呼雷動。伏以聖神在御。祈報間行。肆嚴長至之祠。一舉上辛之典。惟茲宗祀。實在季秋。旣得萬國之驩心。宜罄一精之嘉薦。中賀。恭惟皇帝陛下。範圍元化。斧藻太平。采皇祐之舊章。茂建中和之極。稽紹興之新制。用適古今之宜。上帝顧歆。殊休叢委。臣官廢遐微。心繫明廷。考漢家汶上之圖。嗟莫陪於潤色。繼周頌我將之作。尙自力於形容。

謝明堂赦表

明堂總章。舉曠儀於路寢。鈎陳羽衛。敷大號於端闕。德協穹祇。春回海縣。中謝。恭惟皇帝陛下。道繩祖武。政酌民言。乾文仰法於房心。肇稱鉅典。解澤默符於雷雨。一洗衆愆。統和天人。空虛囹圄。臣適乘使傳。遠在遐陬。奉五百里之驛書。徒深菴扞。上千萬年之聖壽。莫綴臯趨。

謝赦表

宣布仁恩發揚孝治觀人心之鼓舞知天意之協從中謝恭惟皇帝陛下躬舜禹之資履會閔之行損又損而至道老吾老以及人一日三朝雖極寧親之大養四方萬里尙憂庶獄之亡辜內廣惠心旁流霈澤雨露所被囹圄一空臣適以守藩恭聞半號雖與民欣戴如瞻咫尺之天然受命禱祈實勞方寸之地

謝賜曆日表

春秋以王而次春不顯體元之妙閏月定時而成歲適當頒曆之辰治象一新歡聲四溢中謝恭惟皇帝陛下道兼倫制化被堪輿念王業之艱難每急農桑之務察天心之仁愛尤深水旱之憂誠意既孚嘉生竝應呼嵩高之萬歲幸觀昌期陳泰階之六符不勝大願

又

詔班新曆雖舉彝章地近清都獨先下拜恩光旁燭小已知榮中謝臣聞堯授人時實前民用漢得天統克協帝心方當重熙累洽之盛時宜謹體元居正之大典恭惟皇帝陛下凝圖丕赫受命溥將齊七政於璿璣昭示太平之象調四時之玉燭用待來歲之宜爰勅有司以幸天下臣偶叨牧養獲與布宣職思其憂勸課督殫於綿力年運而往功名更感於初心

福建到任謝表

咸造在廷甫遂朝宗之願奉使有指遽叨臨遣之榮大造難名餘生曷報中謝伏念臣么然薄命起自窮閭偶以元祐之黨家獲與紹興之朝士真人有作景運方開適當寧歎息人才之實難顧一時豪傑號召

而未至。首蒙引對。面錫殊科。遭逢稀闊之知。聳動邇遐之聽。豈期塞薄。旋困沉綿。卒緊全度之恩。俾獲退藏之分。侵尋半世。轉徙兩川。三爲別乘之行。再忝專城之寄。五十之年已過。非復壯心。八千之路來歸。况如昨夢。敷陳淺拙。應對參差。惟譴黜之是宜。豈超遷之敢望。此蓋伏遇皇帝陛下。道兼倫制。澤被堪輿。念臣留落有年。尚未除於狂態。憐臣馳驅無地。空竊抱於愚忠。願雖末路之孤蹤。猶玷外臺之高選。臣謹當力思守道。深戒濼官。禮樂遠有光華。旣大踰於素望。靖英好是正直。庶少答於鴻私。

江西到任謝表

疏恩趣召。靡待一人之言。改命遣行。猶備四方之使。丹衷欲鼓。雪涕先傾。中謝伏念。臣稟資迂愚。立身竊貌。偶竊鞶組之餘暇。妄窺述作之淵源。纍然自力於簡編。老之將至。過矣見稱於流輩。轉而上聞。頃入對於燕朝。實親承於睿獎。然而異恩賜第。弗由場屋之選掄。特旨造廷。非出公卿之論薦。已分亟投於閑散。豈期重累於生成。此蓋伏遇皇帝陛下。立賢無方。用人唯己。一洗拘攣之積弊。廣收魁傑之遺才。施及妄庸。亦蒙省錄。甫停追詔。邇昇使釐。凡曰自結於上知。皆俾無蹈於後害。海嶽之內。纖塵墜露。何所用之。父母之愛幼子。童孫。蔑以加此。驅馳入境。威權填膺。重念臣樸學守株。孤身弔影。素乏蚺蜥蠅子之助。孰爲輪囷蟠木之容。愴餘日之安歸。抱微誠而永歎。方天子建中和之極。用告成功。雖文史近卜祝之間。亦思自效。尚憑長育。不遂棄捐。所願預草漢家檢玉之文。未敢遽同堯民擊壤之作。剝肝自訴。伏願何辭。疾痛飢寒。仰而呼天。誓靡求於世俗。齋戒沐浴。可以事帝。冀終望於清光。

嚴州到任謝表

穿延和之細仗。而咫尺天。佩新定之左符。秩二千石。叨塵過分。感懼交懷。中謝臣聞明主恩深。書生命薄。唐帝之知李白。一官不及於生前。漢皇之念相如。遺稿徒求於身後。況如臣輩。莫望昔人。猥緣一技之卑。嘗綴百僚之末。雖簪笏久違於所調。乃姓名猶在於淵衷。乘傳來歸。兩奉召還之旨。懷章欲上。頭蒙趣對之榮。親降玉音。俯憐雪鬢。勞其久別。蓋寵嘉近侍之所宜。勉以屬文。實臨遣守臣之未有。茲蓋伏遇皇帝陛下。睿謨冠古。英斷如神。肆筆成書。千載獨高於聖學。刺經作制。諸儒絕企於清光。以臣夙被化於明時。憐臣未廢書於晚歲。將激昂其素志。故闕略於往愆。臣敢不戴使。愚使過之恩。念有社有民之寄。憩棠陰而聽訟。期無墜於家聲。及瓜戍而代歸。尚少酬於君賜。

除寶謨閣待制謝表

陪乘雋以登瀛。已慙薄陋。扈六飛而上雍。遽踐高華。恩重命輕。感深涕實。中謝伏念臣材非異稟。家本至寒。蒼雅遺書。守先臣之孤學。莊騷奇作。誦諸老之舊聞。竊慕隱居求志之風。尤恥譁世取名之事。年運而往。道阻且長。仕止爲貧。適遇四朝之盛際。老猶不死。遂爲六聖之遺民。豈期垂盡之時。更被非常之遇。置之儒館。命以信書。特寬尸素之重誅。不待汗青而加賞。茲蓋伏遇皇帝陛下。道兼倫制。學備誠明。體穹穹厚厚之仁。躋蕩蕩巍巍之治。風行雷動。號令靡隔於幽遐。魚躍鸞飛。人材不遺於疏賤。雖耄期之已迫。尚覆育之愈深。臣敢不口誦訓辭。心銘德澤。入預甘泉之筆。褒儻效微勞。歸尋杜曲之桑。麻終祈洪造。

轉太中大夫謝表

信史奏篇。獲紀兩朝之盛恩。書馳驛。躡躡四品之崇。方醴賞之既行。欲牢辭而弗敢。始終忝幸。俯仰兢慙。

中謝伏念臣身出窮閭。家承孤學。披肺肝而自力。雖有素懷。賜骸骨以歸休。已更累歲。昨被出綸之命。起參載筆之遊。強旣昏廢忘之餘。均筆削討論之責。食常忘事。但憂尸素之當誅。成本因人。乃以汗青而受寵。茲蓋伏遇皇帝陛下。奉先思孝。守位曰仁。夙受命於皇天。克肖其德。肆纂圖於列聖。無疆惟休。永懷弓劍之藏。每切羹牆之慕。爰求遺老。俾誦舊聞。而臣猥以耄期。恭承訓勉。愴大父詩書之業。久已寂寥。讀元豐文獻之言。至於感泣。雖迫蓋棺之日。敢忘結草之酬。

謝致仕表

持糞甘泉。已竊逢辰之幸。挂冠神武。又叨歸老之榮。加恩俯念於耄年。延賞特頒於申命。伏讀絲綸之語。曷勝犬馬之情。中謝伏念臣家本窮閭。世承孤學。雖遇千齡之盛際。初無一日之微勞。白首光陰。躡冠登瀛之選。青雲步武。亟陪上雍之班。屬預奏於信書。遂祈歸於故里。奉祠雖伏。竊食靡安。茲涪貢於忱辭。始恭承於俞旨。至於特捐異數。增賁衰門。顧令么微。獲被榮耀。茲蓋伏遇皇帝陛下。仁參化育。道極範圍。繼粟繼肉。以養賢才。祝鯁祝噎。以禮耆耄。思正元之朝土。寤寐不忘。念山陰之老人。生存無幾。越拘繫於令甲。聳觀聽於薦紳。簡編有光。世類知勸。而臣抱痾牀第。絕望闕廷。賤息何能。亦忝及親之祿。素風未墜。豈無報國之期。

落職謝表

叨榮罪大。念舊恩深。僅鐫筆橐之華。猶保桑榆之景。仰慙鴻造。下愧公言。中謝伏念臣本出故家。初無他技。每自求於遠宦。豈有意於虛名。命之多艱。動輒爲累。強起僅餘於數月。退歸又閱於六年。齒豁頭童。心

黜形瘵。叫關請命。蒙恩久許。乞骸。飾巾待終。視世已同於逆旅。敢謂寬平之邦憲。尙令漸盡於里居。此蓋伏遇皇帝陛下。勵精大猷。惠養遺老。念臣生當全盛。被六聖之涵濡。憐臣仕遇中興。荷三宗之識拔。雖名薄責。益示殊私。臣敢不祇誦訓詞。痛懲宿負。尸居餘氣。永無再瞻軒陛之期。老生常談。莫敢仰戴丘山之意。

逆曦授首稱賀表

天無私覆。實均父母之仁。邦有大刑。爰下風雷之令。英斷若神明之速。成功無晷刻之淹。氛祲澄清。頌聲洋溢。中賀。臣伏以高皇有作。王室中興。方犬戎窺蜀。以憑陵。賴驍將奮身而守衛。念功無已。分闔相承。仰累朝寵數之非常。雖舉族糜捐而曷報。豈圖小醜。自取參夷。僭服自如。改元無憚。受封割地。已北通獯鬻之庭。置戍奪符。欲東扼罌唐之險。罪不勝於擢髮。誅寧貸於闔門。肆推曠蕩之恩。實自聖神之造。恭惟皇帝陛下。德配天地。功光祖宗。覽圖籍而動容。每念兩京之未復。奉廟祧而竄涕。不忘九世之深讐。蠢茲雛卵之微。自投鼎鑊之地。人情共憤。天討遂加。菑隨以賜。諸侯。雖特寬於漢法。頭顱之行萬里。已大震於戎心。遙知羣醜宵遁之餘。無復竝塞秋防之警。臣身歸南陌。名寓西清。馳驛四傳。徒快鯨鯢之戮。造朝旅賀。莫趨鸚鷺之班。

光宗冊寶賀太皇太后牋

諏穀旦於清臺。誓龜允協。奉鴻稱於考廟。典册有嚴。慶襲重開。驩騰函寓。恭惟太皇太后殿下。道同先后。德著累朝。閱天下義理之深。體坤元光大之盛。密扶睿斷。纂修列聖之治功。備述先猷。啓迪一人之達孝。

舉時大典。紹國成規。臣歛迹還東。馳心拱北。紳綈雜選。遙瞻濟濟之賀班。宮闕碧曉。徒寄區區之夢境。

皇帝御正殿賀皇后

聖治聿新。爰正路朝之御。邦儀丕舉。實繫內助之功。盛典告成。函生胥慶。恭惟皇后殿下。道隆任姒。化洽邦家。方當寧之朝。羣臣惟聖時克。宜中壺之介。萬壽與天同休。內騰六寢之驪。外副萬方之望。臣久遠近著。獲遇昌辰。聽九賓之臚傳。莫陪拊舞。望五雲之宮闕。徒極傾輸。

皇帝御正殿賀皇太子

清蹕肅九賓之儀。方臨當寧。寶觴奉萬壽之祝。尤屬儲宮。邦家有光。華裔同慶。恭惟皇太子殿下。道隆孝友。性極誠明。以大學爲家傳。一洗俗儒章句之陋。以密贊爲子職。豈獨寢門櫛縷之恭。相此多儀。實先百辟。某久嬰沉疾。已迫頽齡。想廣殿之崇嚴。莫陪襜翼。占前星之明潤。徒極傾馳。

皇太子受冊賀皇后

壺政憂勤。協贊上聖。登三之治。母慈願復。遂開東宮。明兩之祥。汗簡光華。函生鼓舞。恭惟皇后殿下。道光圖史。化被宮闈。嗣先后之徽音。體柔祇之厚載。媿納之降。二女允謂盛時。周臣之止。九人實資內助。迨此建儲之命。益知僊極之尊。臣自去通甌。久安故里。願齡耄矣。莫陪執玉之趨。鉅典煥然。不勝拭目之喜。

賀皇太子受冊

父慈子孝。集大慶於我家。日吉時良。發正銜之顯冊。國勢重於九鼎。驪聲達於四方。恭惟皇太子殿下。秉德淳明。宅心虛靜。英姿達識。事洞照於幾先。強記博聞。言必稽於古訓。躬守累朝仁恕之訓。日侍兩宮。辟

穆之顏。歷考古初。實爲創見。某夙叨四品。垂及九齡。爲國老農。莫筮濟濟。鷓鴣之列。逢時盛典。尙懷區區犬馬之心。

逆曦授首賀太皇太后牋

叛臣干紀。敢萌負固之心。密詔行誅。不待崇朝之久。慶關宗社。喜溢宮庭。臣伏以參井之墟。古今重地。方高帝東巡之始。實羣胡南牧之秋。爰有驍雄。服勞疆圉。惟列聖念功之意。每示優隆。度故臣誓報之心。豈有窮已。蓋茲微孽。亦荷異恩。入居宿衛之聯。出任師干之寄。天所勛者順。乃懷悖逆之圖。人不食其餘。自擬藏夷之醜。尙全遺族。實出上恩。恭惟太皇太后殿下。坤厚資生。母儀燕翼。每道先朝之家法。助成聖主之性仁。懸在天之靈。故誅其孽。而無赦。廣及物之澤。故宥其族。而弗疑。臣久屏窮閭。猶叨近侍。用三有宅。欣逢湯德之寬。於萬斯年。莫預堯封之祝。

逆曦授首賀皇后牋

逆臣負固。上貽正宁之憂。密詔行誅。不待靈旗之指。勳高古昔。喜溢宮庭。伏以分闔專征。本倚世臣之舊。野心叵測。輒干邦憲之嚴。妖禽自取於覆巢。靡草獨枯於長夏。尙加矜貸。曲示涵容。故雖同產之親。止用徙鄉之典。恭惟皇后殿下。道光媯汭。德配坤元。侍膳慈闈。克謹晨昏之奉。焦心中壺。每分宵旰之勞。及此成功。允爲大慶。登裔夷之觀聽。增竹帛之光華。臣久已歸耕。莫陪入賀。身修家齊。國治實由內助之功。天時地利。人和行覩外攘之烈。

卷第二

丞相率文武百僚請建重明節表

飛龍在天。方仰君臨之德。流虹繞渚。實開聖作之祥。宜紀昌辰。用彰盛際。恭惟皇帝陛下。承謨不顯。受命溥將。致養三宮。備本朝之家法。參決萬務。得率土之民心。正守初臨。積陰頓解。於赫明離之象。益昭出震之符。臣等不勝大願。請以九月四日爲重明節。伏望皇帝陛下。俯察羣情。亟頒俞旨。施尊名。建顯號。修穹旻發祥之期。披皇圖稽帝文。伸臣民歸美之報。著之令甲。副在有司。邦家增光。天下幸甚。

又

受命若帝之初。宜邦彝之悉舉。盛德如天之覆。豈人欲之或違。比馨忱辭。願標令節。來回聰聽。曷慰羣情。伏以紀千秋之名。雖由唐舊。允長春之請。則在宋興。況今非獨循累代之成規。蓋亦以此修重華之大慶。顯號缺而未講。盛旦鬱而弗彰。謙雖益光。禮則未稱。伏望皇帝陛下。茂昭鉅典。亟發德音。漢殿尊榮。親奉玉卮之壽。周行拊蹈。各陳金鏐之書。豈惟光簡冊之傳。實以副天下之望。

又

淵聽未回。確爾執謙之意。忱辭屢叩。默然歸美之誠。彝典不可以久稽。衆心不可以屢哂。敢控鳴喙之請。再干穆稷之光。竊以民之戴君。自古有訓。禮之飾治。後世尤詳。惟大德得其名。故因誕彌而紀節。雖先王未之有。亦容增益之隨時。當渚虹樞電之辰。受岳貢川珍之集。乃同常日。夫豈人情。今者博士議郎固執於廷。秩宗奉常各揚其職。必期得請。瞻敢自安。伏望皇帝陛下。聖度兼容。大明委照。帝辭三祝。足昭挹損。

之懷。臣同一心。終冀允俞之命。

立皇后丞相率文武百僚稱賀壽皇表

北宮移仗。方瞻與子之明。中禁正名。復奉齊家之訓。化行縣宇。驩動羣心。中賀恭惟至尊壽皇聖帝陛下。盛德日新。聖圖天廣。雖名持守。躬創業垂統之艱。不憚憂勤。示詒謀燕翼之法。乃者獨觀道妙。將就葆頤。猶崇朝親發於德音。謂初政莫先於內治。茂建壺則。所以垂萬世之典常。大明人倫。所以移四方之風俗。臣等獲塵朝著。親奉睿謨。發冊昕廷。共仰光華之典。稱觴廣殿。益深抃舞之情。

賀皇帝表

寶運紹開。椒塗首建。典冊以時而告具。善龜協吉而弗違。慶集宮庭。權傳海宇。中賀伏以聖人有作。追參堯舜禹之盛時。壺範增光。上配姜任。姒之至德。矧惟內助。始自初潛。稽女史彤管之言。廣周南關雎之化。茲正中宮之位。號實出壽皇之訓。謨玉音誕敷。汗簡登載。求於前世。邈矣未聞。顧家國之榮懷。宜神祇之安樂。恭惟皇帝陛下。仁參蒼昊。德被黔黎。永惟大學齊家之端。先誠其意。推原春秋謹始之義。以御于邦。故當天臨之初。務先坤載之厚。臣等身逢華旦。目覩彌文。燕至祀祿。行慶則百男之祐。雞鳴問寢。敢祝於萬年之休。

賀皇太后賡

聖子問安。方極蘭陔之養。神孫正內。肇新椒掖之華。母道彌尊。人情溢喜。中賀恭惟皇太后殿下。抱神以靜。藏心於淵。德修蠅蝓。護之中。化行崑崙。磅礪之外。唐虞盛際。迺出一家父子之親。任姒徽音。仍見三

朝婦姑之法。方且享宗社莫安之福。視本支蕃衍之祥。於古有光。與天無極。臣等幸逢熙運。獲綴清班。至哉坤元。實首彝倫之敝。養以天下。益觀孝治之隆。

賀壽成皇后牋

盛德繼承。爰本親傳之妙。中宮崇建。式光就養之尊。慶集禁庭。驩傳海宇。中賀。恭惟壽成皇后殿下。婦功飭備。母道含洪。躬老氏之儉慈。享周家之福祿。密贊乾剛之斷。神器有歸。助成離照之明。天心允答。惟每思於靜順。故備極於安榮。袞龍兼綵服之紆。榆翟煥玉卮之奉。貴無倫敵。日以舒長。簡冊燁其有光。風俗爲之不變。臣等偶逢熙運。獲相多儀。坤順承天。喜徽音之克嗣。孫又有子。知壽祉之無窮。

賀皇后牋

誕受丕基。方正寧凝。旋之始。協修陰教。舉路朝發冊之儀。厚載有光。羣情咸悅。中賀。恭惟皇后殿下。慶鍾勳闕。道媿皇家。輔佐積勳。實自龍潛之日。休祥有衍。早符熊夢之占。壽皇所以親發於德音。聖主所以深資於內助。副筭奉三殿之養。大練受六宮之朝。震耀簡編。感移風俗。臣等預聞鉅典。實激歡悰。法地所以法天。仰戴坤儀之至德。事母同之事父。曷勝絮抃之微誠。

文武百寮謝春衣表

寶運紹開。方謹人時之授。龍光下逮。俾均春服之成。榮被簪紳。歡騰拜舞。中謝。恭惟皇帝陛下。凝圖丕赫。撫運重熙。租稅所儲。靡專一己之奉。寒暑有賜。式厚羣臣之恩。所以恤其澣濯之私。蓋將責其忠嘉之報。雖舊章之是舉。實初政之當先。臣等獲綴班聯。恭承錫予。去女工之蠶。已觀府庫之充。遺天下之衣。願廣

乾坤之施。

重明節明慶寺丞相率百僚啓建道場疏

開起

乾端澄肅。時爰及於杪秋。離照光明。運方隆於中夏。敢輸誠悃。仰祝壽齡。皇帝陛下。恭願宜君宜王。時萬時億。泰元增漢帝之筮。配天其休。洪範錫神禹之疇。與民同福。

滿散

肅霜協令。方觀萬寶之成。繞電告祥。實契千齡之會。飭供既周於月律。殫誠爰集於廷紳。冀憑靈祇之勸。仰報照臨之德。皇帝陛下。恭願政敷有截。壽格無疆。天地人之三才。共扶輿運。堯舜禹之一道。永茂函生。

進疏

大易明兩作離。允符繼照之盛。太極函三爲一。誕擁無疆之休。壽何待於禱祠。運自臻於照洽。恭演仙真之秘旨。實輸臣子之至情。皇帝陛下。恭願化冒羣倫。治借邃古。奉親備天下之養。履位處域中之尊。至誠之道。可以前知。方卜億萬年之永命。諸福之物。莫不畢至。豈止百千所之上聞。

會慶節明慶寺丞相率百僚啓建道場疏

開起

有開必先。天地肇興於景運。無遠弗屆。華夷畢効於賁琛。況在周行。敢稽壽祝。至尊壽皇聖帝陛下。伏願道超古昔。化洽黔黎。端居無黃屋之心。旣高揖遜。萬乘致綵衣之養。彌極尊榮。

滿散

電樞肇紀。適逢震夙之期。月珥告周。滂鑿延鴻之禱。雖嘉祥之自至。願歸美之敢稽。至尊壽皇聖帝陛下。伏願福等河沙。壽躡劫石。堯仁舜孝。治功永煥於青編。天大佛尊。辟表長臨於黼辰。

進疏

天爲羣物之祖。可謂極尊。壽居五福之先。實歸上聖。脫屣親傳於大寶。頤神方御於殊庭。敢率羣倫。恭培睿算。至尊壽皇聖帝陛下。伏願誕膺。戩穀端拱。稔清以八千歲。而爲春。永享舒長之景。卜七百年而過曆。茂隆貽燕之祥。

文武百僚謝冬衣表

霜露既降。著孟冬始裘之文。法制具存。舉九月授衣之令。進趨襜翼。拜舞光華。中謝。恭惟皇帝陛下。大廈并包。至仁滂漉。及是月也。初有祁寒之虞。念無衣兮。俾膺好賜之厚。疏恩榮於在列。斥府庫之餘藏。臣等猥荷選掄。獲密錫予。觀萬界農桑之業。共樂時平。誦羣臣幣帛之詩。誓圖忠報。

會慶節丞相率文武百僚賀壽皇表

錫羨無疆。丕顯生商之旦。成功不處。適當命禹之時。熙運親逢。羣情胥慶。中賀。恭惟至尊壽皇聖帝陛下。仁涵動植。道配堦輿。詩書所稱。何有加。卓爾規模之大。唐虞之際。斯爲盛。超然揖遜之風。積勤致玉業之成。端拱視天民之阜。豈特極高而蟠厚。固已勒崇而垂鴻。臣等誤冀周行。久陶聖化。蓬萊隔弱水三萬里。獲進謁於殊庭。上古有大椿八千秋。冀默符於睿算。

丞相率文武百僚賀至尊壽皇帝冬至表

化國之日舒以長。一陽初復。天子之父尊之至。萬壽維祺。亞歲肇新。羣心胥悅。中賀。恭惟至尊壽皇帝陛下。道兼倫制。化極範圍。剛長而亨。周測土圭之景。功成則退。堯無黃屋之心。薰然慈孝之兼隆。允矣古今之莫及。方且內享視膳。問安之大養。外騰重熙累洽之頌聲。風動華夷。光昭竹帛。臣等幸逢盛際。獲造昕廷。斗建子以定時。是爲嘉會。星拱辰而在列。同罄丹誠。

丞相率文武百僚賀皇帝冬至表

一之日以授時。黃鐘合律。萬斯年而介福。赤伏膺符。慶集邦家。驩騰海寓。中賀。恭惟皇帝陛下。仁同乾覆。道協時乘。旦復旦以重光。邦圖有永。新又新而不倦。帝德難名。默觀造化之機。自得財成之妙。清心省事。成歸根本之功。任賢去邪。體進陽消陰之象。臣等幸逢熙運。獲邇威顏。和氣先回。豈待葭灰之應。豐年已兆。敢陳雲物之占。

丞相率文武百僚請皇帝聽樂表

祖廟寧神。歲游更於燧火。禮經有制。時當備於簫韶。敢控微衷。上干淵聽。伏以中月而禪。壽皇已循不易之規。逾年改元。聖主方受惟新之命。儻未舉鈞天之奏。何以慰率土之懷。伏望皇帝陛下。俯察忱辭。仰稽典故。欲聞五聲八音六律。以復朝廷之常。親帥三公九卿諸侯。共致慈闈之請。笙鏞以間。而人神喜。琴瑟在御。而心體安。茂昭庶政之惟和。執謂太平之無象。奉萬年之觴於廣殿。及此首春。撞千石之鐘於大庭。震於四海。

丞相率文武百僚賀皇太后受册牋

獻歲發春。太史奏元龜之吉。展采錯事。東朝慶大典之成。佳氣一新。驩聲四溢。中賀恭惟壽聖皇太后殿下。聰明睿智。壽富康寧。踐履艱難。佐高廟廓清之烈。遵行恭儉。啓壽皇詒燕之圖。肆因初元。祇奉顯册。蠶篆蟲魚之古。樂陳鐘磬之和。內而百官有司。方屏息而觀盛事。外則萬方黎獻。咸拜手而頌閔休。載稽前聞。可謂盡美。臣等偶叨在列。獲際升平。有子而又有孫。共仰本支之盛。視今猶之視昔。前知竹帛之傳。

丞相率文武百僚賀壽成皇后受册牋

宮壺塗椒。德配重華之盛。册書鏤玉。禮行路寢之嚴。聖孝益隆。輿情交慶。中賀恭惟壽成皇后殿下。儉慈性稟。柔順躬行。至哉坤元。象服早光於內治。養以天下。寢門方奉於母儀。今者稽參六籍之文。博盡諸儒之議。建此顯號。邁於前聞。仰惟貴無敵而富無倫。是謂仁之至而義之盡。臣等偶緣在列。獲遂逢時。紀嬀洵塗山之興。幸窺簡牘。繼生民思齊之作。尚播聲詩。

丞相率文武百僚上皇帝賀三殿受册表

重慶有光。仰東朝之慈愛。雙親竝奉。極北內之尊榮。正歲肇新。彌文告備。邦家之喜。夷夏所同。中賀伏以堯舜禹之相承。蓋非一姓。姜任妣之善繼。又不同時。參稽前聞。孰擬昭代。恭惟皇帝陛下。奄有萬寓。統和三靈。由至公大義。膺寶運之傳。講禮威盛。容伸天下之養。太史灼龜。而獻兆曲。臺縣絕而具儀。黃麾之仗。夙陳簪紳在列。白玉之册時舉。金石充庭。既已隆孝道而通神明。固將禮高年而厚風俗。新又新而進德。老吾老以及人。臣等誤被選掄。獲塵班著。雖潤色討論於大典。每甄稽古之疎。然登降跪拜於路朝。實竊

逢辰之幸。

丞相率文武百僚賀壽皇正旦表

道妙混成。太極著兩儀之本。天端更始。三朝受萬國之歸。慶集有邦。歡騰率土。中賀恭惟至尊壽皇聖帝。陛下濬哲稽古。清明在躬。握乾符闡坤珍。難名蕩蕩之德。系唐統接漢緒。誕受丕丕之基。以海宇之富而蹈巢由高世之風。以父子之親而行堯舜曠代之事。迨此獻歲發春之日。實緊考圖數貫之時。史冊增華。縉紳太息。臣等幸承睿獎。獲覩昌期。鵷行畢集於大庭。共喜威顏之近。龍袞恪趨於小次。更知榮養之尊。丞相率文武百僚賀皇帝正旦表

堯授舜。舜授禹。方瞻繼照之明。正次王。王次春。茂舉履端之慶。乾坤開闢。日月光華。中賀恭惟皇帝陛下。德上際而下蟠。化東漸而西被。改元定號。稽列聖之舊章。發政施仁。撫重熙之景運。內有可封之俗。外無不諱之戎。方且采諸儒之議。以制朝儀。陳九奏之音。以爲親壽。頒朔靡殊於遐邇。受圖高拱於穆清。治功卓然。海內幸甚。臣等誤膺睿獎。獲綴通班。戮力同心。永惟春秋五始之義。拜手稽首。敢奏天子萬年之詩。

卷第三

蠟彈省劄癸未二月二府請至都堂撰

朝廷今來特憚大信明大義於天下。依周漢諸侯及唐藩鎮故事。撫定中原。不貪土地。不利租賦。除相度於唐鄆海泗一帶。置關依函谷關外。應有據以北州郡歸命者。卽其所得州郡。裂土封建。大者爲王。帶節。

度鎮撫大使。賜玉帶金魚。塗金銀印。其次爲郡王。帶節度鎮撫使。賜笏頭金帶金魚。塗金銅印。仍各賜鐵券。旌節門戟。從物。元係蕃中姓名者。仍賜姓名。各以長子爲節度鎮撫留後。世世襲封。永無窮已。餘子弟聽奏。充部內防團刺史。亦令久任。將佐比類。金人官制。升等換授。其國置國相一員。委本國選擇保奏。當降真命。餘官准此。七品以下。聽便宜辟除。土地所出。並許截留。充賞給軍兵祿養官吏等用。更不上供。每歲正旦一朝。三年大禮一助祭。如有故聽遣留後或國相代行。天申會慶節。止遣國官一員。將命。應刑獄生殺。並委本國照紹興勅令。參酌施行。更不奏案。合行軍法者。自從軍法。四京各用近畿大國兼充留守。朝廷惟於春季遣使朝陵。餘時止用本處官吏侍祠。每遇朝貢。當議厚給茶棗香藥等充回賜。以示撫存。遇一國有緊急。諸國迭相救援。如開斥生地。俘獲金寶。並就賜本國。仍永不置監司帥臣及監軍等官。候議定。各遣子弟一人入覲。當特賜燕勞。畢。卽時遣回。機會之來。時不可失。各宜勇決。以稱朝廷開納之意。

論選用西北士大夫劄子

臣伏聞天聖以前。選用人才。多取北人。寇準持之尤力。故南方士大夫沉抑者多。仁宗皇帝。照知其弊。公聽竝觀。兼收博采。無南北之異。於是范仲淹起於吳。歐陽修起於楚。蔡襄起於閩。杜衍起於會稽。余靖起於嶺南。皆爲一時名臣。號稱聖宋得人。之盛。及紹聖崇寧間。取南人更多。而北方士大夫復有沉抑之歎。陳瓘獨見其弊。昌言於朝曰。重南輕北。分裂有萌。嗚呼。瓘之言。天下之至言也。臣伏觀方今。雖中原未復。然往者衣冠南渡。蓋亦衆矣。其間豈無抱才術。蘊器識者。而班列之間。北人鮮少。甚非示天下以廣之道也。欲望聖慈。命大臣近臣。各舉趙魏齊魯秦晉之遺才。以漸試用。拔其尤者而任之。庶上遵仁祖用人之

法下慰遺民患舊之心。其於國家必將有賴。伏惟留神省察。取進止。

代乞分兵取山東劄子

臣等恭觀陛下特發英斷。進討京東。以爲恢復故疆。牽制川陝之謀。臣等獲侍清光。親奉睿旨。不勝欣抃。然亦有惓惓之懇。不敢隱默者。竊見傳聞之言。多謂虜兵困於西北。不復能保京東。加之苛虐。相承民不堪命。王師若至。可不勞而取。若審如此說。則弔伐之兵。本不在衆。偏師出境。百城自下。不世之功。何患不成。萬一未至。盡如所傳。虜人尙敢旅拒。遺民未能自拔。則我師雖衆。功亦難必。而宿師於外。守備先虛。我猶知出兵京東。以牽制川陝。彼獨不知侵犯兩淮。荆襄以牽制京東邪。爲今之計。莫若戒敕宣撫司。以大兵及舟師十分之九。固守江淮。控扼要害。爲不可動之計。以十分之一。遴選驍勇。有紀律之將。使之更出迭入。以奇制勝。俟徐鄆宋亳等處撫定之後。兩淮受敵處少。然後漸次那大兵前進。如此。則進有關國拓土之功。退無勞師失備之患。實天下至計也。蓋京東去虜巢萬里。彼雖不能守。未害其疆。兩淮近在畿甸。一城被寇。尺地陷沒。則朝廷之憂復如去歲。此臣所以夙夜憂懼。寢不能瞑。而爲陛下力陳其愚也。且富家巨室。未嘗不欲利也。然其徒欲賈于遠者。率不肯以多貲付之。其意以爲山行海宿。要不可保。若傾囊而付一人。或一有得失。悔其可及哉。此言雖小。可以喻大。願陛下留神察焉。臣等誤蒙聖慈。待罪樞筦。攻守大計。實任其責。伏惟陛下照其愚忠。臣等不勝幸甚。取進止。

上二府論事劄子 壬午六月五日

某伏見大理寺奏北界蒙城縣官邢珪罪狀。竊緣有司之議。據其侵犯邊城。殺害義旅。雖置極典。未足當

罪。然既已具奏。則當有特旨。恐與有司之議不可同日而語。何者。有司謹守律令。朝廷當斷以大義故也。按邢珪生於涿易。非祖宗涵養之人。仕於僞界。非國家祿使之吏。身有官守。一旦危急。力雖不及。猶能死守。雖情於逆順。不知革面。然春秋之義。天下之善一也。若遂誅之。恐非所以勸天下之爲人臣者。襄陳之際。儻爲一言。貸其草芥。微命以示中國禮義。實非小補。又慮議者以謂張安國殺耿京事。與此略同。恐啓寬貸之路。無以慰歸附之人。則某謂不然。張安國中國人。又嘗受旗勝招安。見利而動。賊殺耿京。反覆。豈猶罪惡明白。與珪實爲不類。兼邢珪所犯。在未被大赦蕩滌之前。張安國所犯。在已受旗勝招安之後。伏乞鈞察。

上殿劄子三首壬午十一月。

臣恭惟陛下天縱聖智。生知文武。御極之初。內出大號。所以加惠於海內甚溥。猶以爲未足也。乃八月戊子。寬恤之令繼下。至誠惻怛。纖悉備具。歡欣之聲。達於遠邇。可謂盛矣。然今既累月。不知有司皆已推而致之民乎。若猶未也。是不免爲空文而已。無乃不可乎。又有大不可者。陛下初卽大位。乃信詔令以示人之時。前日數十條。或曰當寬典憲。或曰當議根治。或曰當議顯戮。可謂丁寧切至。赫然非常之英斷也。若復爲官吏將帥一切翫習。漫不加省。一旦國家有急。陛下詔令戒敕之語。將何加此。而欲使人捐肝腦以衛社稷乎。周官冢宰。以正月之吉。始和布治於邦國都鄙。垂象之法。徇以木鐸。曰。不用法者。國有常刑。正月。周正。今之十一月也。正歲。夏正。今之正月也。自十一月至正月。若未甚久而申敕告戒。俟以刑辟。已如此其嚴。今命下累月。而有司或恬然不以爲意。臣竊惑之。欲望聖慈。以所下數十條者。申諭中外。使恪意。

奉行毋或失墜。仍命諫官御史及外臺之臣精加考覈。取其尤沮格者與衆棄之。不惟聖澤速得下究。亦使文武小大之臣。發然知詔令之不可慢。如此實聖政之所當先也。伏惟留神省察。取進止。

又

臣聞夏尚忠。商尚質。周尚文。三者迭用。非以爲異。因時制宜。有不得不然者。臣竊觀太祖太宗之世。法度典章。廣大簡易。律令可以禁奸。無滋彰之患。文移可以應務。無叢委之弊。君臣上下。如家人父子。論說徑直。誠意洞達。所詳者大。所略者小。事易舉。功易成。其氣象風俗。人物議論。至於今可考也。太平既久。日趨於文。放而不還。末流愈遠。浮虛失實。華藻害道。雖號爲粲然備具。而文移書判。增至數倍。居官者窮日之力。實不暇給。猾吏奸人。乘隙以逞。其始也。所詳者小。所略者大。其極也。并小者不復能詳。則一切兩弃。聽吏之所爲而已。太上皇帝中興大業。當宁歎息。思有以救之。於是漸加訂正。以還其舊。兩省復通。爲一。以革浮滯之風。寺監幾省其半。以去支離之害。簡禮容。刪律令。規模措置。蓋欲悉除繁文。復從祖宗之質。而後已有司奉承。未能盡如本指。此陛下今日所當力行不可緩也。臣愚欲望聖慈。明詔輔臣。使帥其屬。因今六曹寺監百執事所掌。講求祖宗舊制。以趨於廣大簡易之域。繁碎重複。無益實事者。一皆省去。使小大之臣。咸有餘力。以察紆去蠱。修舉其職。則太平之基。自此立矣。元祐中。司馬光請改三省職事。一如昔日中書之制。蘇轍亦請收昔日三司之權。悉歸戶部。則臣所謂因今所掌。以求祖宗舊制。誠不爲難。願陛下力行。何如。爾。干冒天聽。伏深戰慄。取進止。

又

臣竊觀周自后稷公劉以來。積德深遠。十世長久。爲之子孫者。宜皆取法焉。然而獨曰饑刑文王。又曰饑式刑文王之典。漢自高帝創業。其後嗣亦多賢君。然史臣獨曰漢言文景。美矣。至武帝之功烈。猶以不遵文景之恭儉爲恨。唐三百年。一祖三宗。皆號盛世。而太宗正觀政要之書。獨傳寶以爲大訓。元祐中學士范祖禹亦曰。祖宗長天愛民。子孫皆當取法。惟仁宗在位最久。德澤深厚。結於天下。誠能專法仁宗。則成康之隆。不難致也。嗚呼。祖禹之言。天下之至言也。迨我太上皇帝躬履艱難。慨然下詔。專法仁祖之政。且竊聞燕閑。惟考觀仁祖政事。是以於萬斯年。無疆惟休。亦享仁祖垂拱之福。可謂盛矣。陛下紹休聖緒。正當師太上專法仁祖之意。申命邇英進讀之臣。日以寶訓反覆敷繹。以究微意。仍命輔臣。政事法度。一以仁祖爲法。臣將見陛下福祿川至。治效日見。年穀屢豐。四夷率服。慶曆皇祐之盛。復見於今。雖遐方絕壤。皆當梯航而至矣。況中原故地。其有不復者哉。臣不勝至願。伏惟聖慈留神省察。取進止。

擬上殿劄子壬午准備論對會內禪遂不果上。

臣觀小姦之詩。見成王孜孜求助。特在初載。意其臨天下之久。閱義理之多。則當默識獨斷。雖無待於羣臣可也。及考之書。然後知其不然。舜伐三苗。年九十有三。聞伯益一言。則退而敷文德。舞干羽。無一毫自用之意。武王受貢粢。年九十有一。召公作訓。累數百言。武王納之。不以爲過。嗚呼。爲人臣而不以舜武王望其君者。不恭其君也。伏以陛下生知之聖。度越百王。稽古之學。博極墳典。歷試諸難。身濟大業。更事閱理多矣。自公卿大臣。皆陛下四十年教養所成。況於小儒賤士。見聞淺陋。曾何足以仰清光。備顧問哉。然其所陳。則未必無尺寸之長。何者。舉吏部之籍。摺紳之士。幾人。其得見君父者。幾人。白首州縣。而不得一

望闕問者多矣。則凡進見之人。固宜夙夜殫思。竭誠以幸千載之遇。雖其間有論事梗野。不達大體者。究其設心。亦願際會。犯威顏以徇俗。捨富貴以取名。臣竊謂無是理也。欲望陛下昭然無置疑於聖心。克己以來之。虛心以受之。不憚捨短而取長。以求千慮之一得。庶幾下情得以畢達。羣臣無伯益召公之賢。陛下以舜武王之心爲心。則是聖德巍巍。過於舜武王矣。如其屈萬乘之尊。躬日昃之勞。願於疎遠之言。無大施用。姑以天地之度容之而已。是獨言者一身之幸也。干冒天威。臣無任惶怖俟罪之至。

上二府乞勿受慶雲圖劄子癸未者

伏覩尙書省劄子。知闕州呂游問奏慶雲見。并圖一軸。奉聖旨。降付編類聖政所。仰見主上聖孝。推美太上皇帝之心。然竊聞太上皇帝建炎之初。京東進芝草。親詔却之。盛德煌煌。光映簡冊。今乃以慶雲見爲聖政。恐非太上皇帝之本意。兼闕州所奏。專以慶雲見於普安郡。及在主上卽位前一日。爲受命之符。諛佞牽合。不識大體。政與京東芝草相類。若受而不却。雖不報行。其誰不知。深恐自此草木之妖。氛氣之極。緯候之說。歌頌之文。紛紛來上。却之則自啓其端。不却則遂將成俗。欲望鈞慈。以太上皇帝却芝草故事。委曲奏陳。主上剛明英斷。必有以處此矣。干冒鈞嚴。不勝恐怖之至。

上二府論都邑劄子

某自頃奏記。迄今累月。自顧賤愚。不肖無尺寸可以上補聰明。而徒以無益之事。上勤省閣。實有罪焉。故久不敢以姓名徹左右。今者偶有拳拳之愚。竊謂相公所宜聞者。伏冀少留觀覽。幸甚幸甚。伏聞北虜累書請和。仰惟主上聖武。相公威名。震疊殊方。足以致此。而天下又方厭兵。勢且姑從之矣。然某聞江左自

吳以來。未有捨建康他都者。吳嘗都武昌。梁嘗都荊渚。南唐嘗都洪州。當時爲計。必以建康距江不遠。故求深固之地。然皆成而復毀。居而復徙。甚者遂至於敗亡。相公以爲此何哉。天造地設。山川形勢。有不可易者也。車駕駐蹕臨安。出於權宜。本非定都。以形勢則不固。以餽餉則不便。海道逼近。凜然常有意外之憂。至於讖緯俗語。則固所不論也。今一和之後。盟誓已立。動有拘礙。雖欲營繕。勢將艱難。某竊謂及今當與之約。建康臨安皆係駐蹕之地。北使朝聘。或就建康。或就臨安。如此。則我得以閑暇之際。建都立國。而彼旣素聞。不自疑沮。黠虜欲借以爲辭。亦有不可者矣。今不爲後且噬臍。至於郡邑措置。當有節目。若相公以爲然。某且有以繼進其說。不一二年不拔之基立矣。某智術淺短。不足以議大計。然受知之深。不敢自以疎遠爲疑。干冒鈞聽。下情恐懼之至。

卷第四

上殿劄子

臣聞善觀人之國者無他。惟公道行與否爾。書曰。毋虐罔獨。而畏高明。詩曰。柔亦不茹。剛亦不吐。此爲國之要也。若夫虐罔獨畏高明。茹柔吐剛。而能使天下治者。自古未之有也。朝廷之體。責大臣宜詳。責小臣宜略。郡縣之政。治大姓宜詳。治小民宜略。賦歛之事。宜先富室。征稅之事。宜覈大商。是之謂至平。是之謂至公。行之一邑。則一邑治。行之一郡。則一郡治。行之天下。而治不逮於古者。萬無是理也。伏見朝廷頃因人言。必顯有功狀。乃畀職名。行之數年。而大臣近侍不得職者幾人。帥臣監司之加職者又比比而有。至

於銓曹格法所以厄小官者。則未嘗少弛張也。慶典之行。所及至廣。貼職以上。例皆甄復。雖阿附秦氏得罪者。亦在焉。至於常調孤遠。固多久絀刑憲者。今更赦令。雖使皆得罷被銓法拘繫。必不如是之曠蕩也。無乃責大吏反略。而責小臣反詳乎。郡縣之吏。不能自立。親望揣摩。惟強是畏。豪右雖犯重辟。官吏貪者黜者。則公與之爲市。廉者懦者。則又自營曰。得無反爲所害乎。凡嫁禍平人。誣罪僮奴者。皆有司爲之道也。凶年饑歲。雖貧富俱病。然富者利源至多。貧者惟守田畝。孰爲當恤。視郡縣之庭。鞭笞流血。杻械被體者。皆貧民也。吳蜀萬里。關征相望。富商大賈。先期遣人懷金錢。以賂津吏。大舸重載。通行無苦。終更小官。造廷進士。垂囊蕭然。齋糧有限。而稽留苛暴。略不之恤。如是謂之平可乎。謂之公可乎。臣昧死伏望陛下。推至平至公之道。自朝廷始。然後下詔戒敕四方。而繼之以誅賞。不過歲月。治效自見。惟在陛下軌之。重如山嶽。堅若金石。爾苟卿論關國之說曰。兼并易能也。堅疑之難。夫豈獨兼并哉。凡爲政。施行之甚易。堅疑之甚難。臣區區之言。陛下或以爲萬有一可采焉。敢併以堅疑爲獻。取進止。

又

臣伏讀御製蘇軾贊。有曰。手扶雲漢。幹造化機。氣高天下。乃克爲之。嗚呼。陛下之言。典謨也。軾死且九十年。學士大夫徒知尊誦其文。而未有知其文之妙在於氣高天下者。今陛下獨表而出之。豈惟軾死且不朽。所以遺學者。顧不厚哉。然臣竊謂天下萬事。皆當以氣爲主。軾特用之於文爾。趙普氣蓋諸國。故能成混一之功。寇準氣吞醜虜。故能成却敵之功。范仲淹氣壓靈夏。故西討而元昊款伏。狄青氣懾嶺海。故南征而智高殄滅。至於韓琦。富弼。文彥博之勳勞。唐玠。包拯。孔道輔之風節。大抵以氣爲主而已。蓋氣勝事

則事舉氣勝敵則敵服勇者之闢富者之博非有他也直以氣勝之耳今天下才者衆矣而臣猶有憂者正以任重道遠之氣未能盡及古人也方無事時亦何所賴此一旦或有非常陛下擇羣臣使之假銳而董二軍擁節而諭萬里雖得賢厚篤實之士氣不素養臨事惶遽心動色變則其舉措豈不誤陛下事耶伏望萬機之餘留神於此作而起之毋使委靡養而成之毋使沮折及乎人才爭奮士氣日倍則緩急惟陛下所使而已且吳蜀閩楚之俗其渾厚勁朴固已不及中原矣若夫日趨於拘窘怯薄之城臣實懼國勢之寢弱也不勝私憂犯分獻言恭惟陛下裁赦取進止

又

臣聞天下有無窮之變而有必然之理惟默觀陰察能得其理則事變之來雖千態萬狀可以坐制而無虞矣天下之變最幽眇倉卒不可測知者莫如雷霆鬼物然雷霆冬伏而春作鬼物晝隱而夜見則其理之必然有不待智者而知之矣今朝廷內無權冢世臣外無強藩悍將所慮之變惟一金虜虜禽獸也譎詐反覆雖其族類有不能測而臣竊以謂是亦有可必知者夫何故寬猛之相繼如寒暑晝夜之必相代也故自金虜猖獗以來靖康建炎之間窮凶極暴則有紹興之和通和既久則有辛巳之寇寇而敗亡則又有隆興之和今邊陲晏然枹鼓不作逾二十年與紹興通和之歲月略相若矣不知此虜終守和約至數十年而終不變邪將如晝夜寒暑必相代也且虜非中國比也無君臣之禮無骨肉之恩惟制之以力劫之以威則羸能少定今力儘勢削有亂而已其亂不起於骨肉相殘則起於權臣專命又不然則奸雄襲而取之耳三者有一焉反虜酋之政以悅其國人且何爲哉雖陛下聰明英睿自有所處然臣竊觀

士大夫之私論。則往往幸虜之懼以爲安。不知通和已二十餘年。如歲且秋矣。而謂衣裘爲不必備。豈不殆哉。大抵邊境之備。方無事時觀之。事事常有餘。一旦有變。乃知不足。伏望陛下與腹心之臣力圖大計。宵旰弗怠。繕修兵備。搜拔人才。明號令。信賞罰。常如羽書狎至。兵鋒已交之日。使虜果有變。大則掃清燕代。復列聖之誓。次則平定河洛。慰父老之望。豈可復如辛巳倉卒之際。敵兵保江。凜然更以宗社爲憂。邪。臣世食君祿。且蒙陛下省錄姓名。已二十餘年。念無以報天地父母之大恩。故其陳於陛下者。惟懼不盡。而不知狂愚之爲大罪也。取進止。

乞祠祿劄子 戊申四月。

照對某昨任主管成都府玉局觀。將滿。陳乞再任。蒙恩差知嚴州。於淳熙十三年七月三日到任。郡政乖刺。雨澤不時。上勞宵旰。死有餘責。賴蒙朝廷哀矜。山郡瘠土之民。重賜蠲放。廣行賑恤。上格和氣。下安衆心。入秋得雨。陸種倍收。六縣竝無流徙人戶。今春以來。雨暘尤爲調適。二麥繼熟。民間亦以爲所收倍於常年。賑濟訖事。稍紓吏責。某雖去替不遠。實緣年齡衰邁。氣血凋耗。夏秋之際。痼疾多作。欲望鈞慈。特賜矜憫。許令復就玉局微祿。養癯故山。及天氣尙涼。早得就道。實爲至幸。

上殿劄子

臣恭惟陛下躬聖人之資。履天子之位。而致養三宮。承顏左右。盛事赫奕。冠曠千古。尙何待塵露之增。山海哉。顧臣竊抱惓惓之愚。不敢輒默。伏惟陛下下聖孝純至。稟於天性。皆在潛邸。及登儲宮以來。夙夜孜孜。何嘗頃刻不以壽皇爲心。壽皇罷朝而悅。進膳而美。則陛下欣然喜動於色。壽皇罷朝而不悅。進膳而少。

味。則陛下愀然愛見於色。方是時。徒能喜之愛之而已。今則致親之悅者。責在陛下。其可以不深念乎。所謂悅親之道。非薦旨甘奉輕暖也。非晨昏定省。冬夏溫清也。非千門萬戶之宮。鈞天籟韶之樂也。惟在陛下得天下之愛戴。以寧壽皇之心而已。難鳴而攬衣。辨色而視朝。必曰此昔者問安之時也。今以萬機之繁。不能日朝重華。歉然於懷。豈有限極。然闕問安之常禮之小也。致天下之治。孝之大也。吾其力爲其大者乎。此固壽皇所望於陛下。亦天下所望於陛下也。治功已成。中外無事。陛下時備法駕。率羣臣上萬年之觴。豈非天下之大慶。不然。太史或以災異上聞。四方或以寇盜來告。壽皇聞之。萬分有一微輟玉食。陛下雖居萬乘之貴。孰與解憂哉。臣昧死願陛下於進退人才。罷行政事之際。率以是爲念。自三思十思。以至百思。不爲過也。自一日五六日。至於旬日。不爲緩也。謀及卜筮。謀及卿士。謀及庶人。不爲廣也。一有小失。豈獨上勞宵旰。壽皇亦與焉。故陛下今日憂勤恭儉。百倍於古帝王。乃僅可耳。譬如臣民之家。上有尊親。則所以交四鄰。訓子弟。備饑饉。禦盜賊。比之他人。自當謹戒百倍。何則。彼亦懼憂之及其親也。犬馬小臣。貪於增廣聖孝。不知言之涉於狂妄。冒犯天威。伏候斧鉞。

又

臣聞詩曰。上天之載。無聲無臭。人君與天同德。惟當清心省事。澹然虛靜。損之又損。至於無爲。大臣不得而窺所好。則希合苟容之害息。小臣不得而窺所好。則諂諛側媚之風止。不以從其所好而加賞。則儉人伏。不以逆其所好而加罪。則端士進。玩好無益之物。不好則不接於目。談諧敗度之言。不好則不聞於耳。大抵危亂之根本。讒巧之機芽。紆邪之罅隙。皆緣所好而生。臣下雖有所偏好。而或未至大害者。無奉之

者也。人君則不然。絲毫之念。形於中心。雖未嘗以告人。而九州四海。已悉向之矣。況發於命令。見於事爲乎。且嗜好之爲害。不獨聲色狗馬宮室寶玉之類也。好儒生而不得真。則張禹之徒。足以爲亂階。好文士而不責實。則韋渠牟之徒。足以敗君德。其他可推而知矣。昔者漢文帝及我仁宗皇帝。所以爲萬世帝王之師者。惟無所嗜好而已。恭惟陛下。龍飛御極之初。天下傾耳拭目之時。所當戒者。惟嗜好而已。無有作好。違王之道。天之所以錫神禹也。伏惟陛下。留神省察。實天下幸甚。取進止。

上殿劄子已酉四月十二日

臣聞王者以一人之身。臨制四海。人情錯出。事變遽至。惟靜以俟之。則心虛而明。惟重以持之。則體大而正。無偏聽之過。無輕舉之失。天何言哉。舜何爲哉。後世士大夫學術卑陋。識慮偏淺。顧謂王者得位。必有以聳動天下。於是厭常喜新之論興。飾智駭俗之政作。衆人之所喜。而君子之所深憂也。臣伏見陛下自在潛邸。以至龍飛御宇。三十年間。天下之事。何所不習。雖日出百令。固亦易爾。乃謙恭退託。而安靜無爲。沉潛淵默。而聰明不作。上則承壽皇之睿謨。下則盡羣臣之公議。及乎議有未決。徐而斷之。政有當行。從而舉之。理愜事允。出臣下思慮之表。有心者誠服。有口者頌歎。則所謂靜與重者。陛下旣得之矣。嗚呼。一郡一邑之長。視事之始。尙且以新奇眩衆。以敏速釣名。陛下有天下之利勢。而不用。有聖智之絕識。而不施。超越羣倫。奚啻萬億。而或者方以聳動天下爲獻。此固兒童之見。而陛下所不取也。竊恐羣臣獻此說者。寔多。雖陛下決不取。然臣不勝惓惓愛君之愚忠。思有以堅聖心。而廣初政。昔魏鄭公憂正觀之政漸不克終。蘇轍亦謂但如元祐之初足矣。若夫進銳退速。能動耳目之觀聽。而無至誠惻怛之心。以終之。如

明皇之焚錦繡。德宗之放馴象。實陛下之龜鑑也。故臣願陛下圖事揆策。不厭於從容。行賞議罰。無取於快意。兢兢業業。常如此三月之間。則成康文景之盛。復見於今日矣。犬馬小臣。出位妄言。冒犯天威。臣無任

又

臣聞天下有定理。決不可易者。飢必食。渴必飲。疾必藥。暑必簞。豈容以他物易之也哉。臣伏觀今日之患。莫大於民貧。救民之貧。莫先於輕賦。若賦不加輕。別求他術。則用力雖多。終必無益。立法雖備。終必不行。以臣愚計之。朝廷若未有深入遠討。犂庭掃穴之意。能於用度之間。事事裁損。陛下又躬節儉。以勵風俗。則賦於民者。必有可輕之理。緩急之備。固不可無。姑以歲月徐爲之可也。如是。則和氣浹洽。必無水旱之災。驩聲洋溢。必無盜賊之警。何慮國用之不足邪。設使裔夷弗賓。侵犯王略。所謂率其子弟。攻其父母。直可舞干羽而格之。爾頃者。建炎紹興。戡定變亂之日。一切賦斂。有非承平之舊者。高宗皇帝宵旰焦勞。每欲俟小定而悉除之。故詔令布告天下曰。惟八世祖宗之澤。豈汝能忘。顧一時社稷之憂。非予獲已。止俟捍防之隙。首圖蠲省之宜。臣幼年親見民誦斯詔。至於感泣。雖傾貲以助軍興。而不敢愛。旋屬國家多故。逆亮畔盟。雖所蠲已多。終未仰稱聖意。壽皇聖帝臨御以來。所以節用裕民者。皆繼承高宗蠲省之指也。則陛下今日。豈可不以爲先務哉。臣昧死欲望聖慈。恢大度。明遠略。詔輔臣計司。博盡論議。量入而用。量用而取。可蠲者蠲。可省者省。富藏於民。何異府庫。果有非常。孰不樂輸。以報君父淪肌浹髓之恩哉。若有事之時。既竭其財矣。幸而無事。又曰儲積以爲他日之備也。雖恢復中原。又將曰邊境日廣矣。屯戍日衆

矣。則斯民困弊。何時而已邪。瀆犯天威。罪當萬死。惟陛下裁赦。取進止。

除修史上殿劄子

臣伏見真宗皇帝至道三年冬。修太宗實錄。至明年咸平元年八月而畢。甫九閱月。修書者錢若水柴成務宗度吳淵楊億五人而已。書成。又詔重修太祖實錄。至明年六月而畢。亦甫九閱月。修書者王元之梁灝趙安仁李宗諤四人而已。臣竊考之。太祖討澤潞。取揚州。平吳滅蜀。定荆楚。下五嶺。太宗撫有吳越。蕩定汾晉。用師薊門。問罪夏臺。皆大舉動。業廣事叢。議論煩委。兵機戎政。攻守餽餉。功罪黜陟之事。可謂夥矣。至於制禮作樂。明刑治曆。修廢官舉墜典。革五季之弊。復漢唐之盛。側席求治。可謂勤矣。宜其摹寫日月。形容造化。雖累歲不成。而奏書之速。不淹三時。上足以慰羹牆之思。下足以厭薦紳之望。非獨此數人者。畢精竭思之力也。意者當時命令重刑賞。必尊君體國之俗成。凡史官絀繹之所須者。上則中書密院。下則百司庶府。以至四方萬里郡國之遠。重編累牘。如水赴海。源源而集。然後以耳目所接。察隧碑行述之諛辭。以衆論所存。刊野史小說之謬妄。取天下之公。去一家之私。而史成矣。九閱月而奏書。臣誠未見其爲速也。臣乞身累年。忽蒙聖恩。起之山澤之間。使與聞大典。旣不累以他職。又特寬其朝謁。責委之意。可謂重矣。然臣之愚。虛有欲陳者。未敢遽以仰瀆天聽。而略具梗概於前。欲乞聖慈。明詔大臣。俟臣供職。有所陳請。擇其可者。出自朝廷。主張施行。如臣不能自力。曠職守。負聖知。則竄極之刑。所不敢避。取進止。

乞致仕劄子癸亥

臣輒冒重誅。仰于洪造。伏念臣生逢千載。仕歷四朝。晚蒙旒扈之知。爰錫弓旌之召。濫司汗簡。擢長仙蓬。

曾未幾時。頭躋近列。雖願輸於塵露。願已迫於桑榆。記問荒疎。文辭衰退。重負夜行之責。難貪晝接之榮。又況與奏成書。獲經審覽。時則可矣。敢少緩於控陳。天實臨之。冀俯從於懇款。伏望聖慈許臣守本官職。依前致仕。

又癸亥

臣近緣實錄院進書已畢。具奏乞守本官職。依前致仕。準尙書省劄子。奉聖旨不允者。伏念臣學緣病廢。志與年衰。步蹇弗支。髮存無幾。出入躡行之內。惕然有覩於面顏。追參豹尾之間。觀者亦爲之指目。豈容冒昧。久竊寵榮。敢干咫尺之威。洊貢再三之請。萬籤黃卷。恨已負於初心。十具烏甕。冀獲安於故里。伏望聖慈特賜開允。

又甲子

臣輒傾愚懇。仰達聖聰。伏念臣衰賴餘齡。已開九秩。遭逢盛際。逮事四朝。擢實周行。初出高皇之獨斷。進登法從。晚蒙陛下之異知。朝歲強顏。秋毫無補。及瀝乞身之請。更蒙優老之除。久此叨塵。豈勝危懼。雖天地之恩未報。而犬馬之力已窮。杜曲桑麻。儻遂扶犁之初願。灞橋風雪。更尋策蹇之舊遊。誓教訓於子孫。用報酬於君父。伏望聖慈許臣守本官職致仕。

卷第五

天申節進奉銀狀

陸放翁集 一 渭南文集 卷五

效頌祝於萬年。適逢盛際。備貢獻於九牧。敢竭敬誠。前件限。祇率典章。遽參包羅。大廷旅百。愧非第山。抗海之琛。神嶽呼三。但切就日望雲之意。

辭免賜出身狀

准尚書省劄子奉聖旨。賜進士出身者。孤遠小臣。比蒙召對。從容移刻。褒稱調諭。至於再三。仰惟天地父母之恩。固當誓死圖報。惟是科名之賜。近歲以來。少有此比。不試而與。尤爲異恩。揣分量材。實難忝冒。欲望敷奏。特賜追寢。以安冗散之分。

又

近蒙恩賜進士出身。嘗具狀乞行追寢。以謂科名之賜。近歲以來。少有此比。不試而與。尤爲異恩。揣分量材。實難忝冒。今月六日。准尚書省劄子奉聖旨。不許辭免。螻蟻至微。曲煩申論。雷霆在上。其敢飾辭。然義有未安。若不自列。強顏冒寵。獲罪愈大。蓋特賜科名。雖有故事。必得非常之人。乃副非常之舉。甚非所以重儒科。杜佯門也。重念某一介疎賤。行能亡取。比蒙召對。面加調獎。退而感激。至於涕泗。今者但使獲安。冗散之分。以效尺寸之勞。則於上報主恩。不敢憚死。

條對狀

准今月六日詔書節文。令侍從臺諫取當今弊事。悉意以聞。退率其屬。極言毋諱。臣恭依詔旨。條具下頃。一有國之法。當防其微。人臣之戒。尤在於僭。異姓封王。僭之尤者也。蓋封王始於漢初。天下未定。權宜之制。然韓彭英盧。皆以此敗。漢亦幾至大亂。遂與羣臣盟曰。非劉氏不王。後世懲創其失。魏晉隋唐。皆起章

昧有天下。豈無功臣。止於公侯而已。國初趙普有社稷大功。亦未嘗生加王爵也。唐將封王。始於安祿山。而本朝則始於童貫。此豈可法。而比年以來。濫以爲常。識者莫不憂之。欲乞聖慈。明詔有司。自今非宗室外家。雖實有勳勞。毋得輒加王爵。藏之金匱。副在有司。永爲甲令。實宗社無疆之福。

一伏見比來朝廷。遣小臣幹辦於外。既銜專命。又無統屬。造作威福。矜誇事權。所在騷然。理有必致。如措置酒坊。招捕海賊。未有毫髮成效。而擾害之事。已歷滿聞聽。則此事害多利少。可以無疑。若以輕君命。失國體言之。則雖有厚利。亦不可行。臣謂如此二事之類。止當專委戶部長貳。轉運司及安撫使。提點刑獄。措置如其不職。自有典憲。誠不足一一上煩聖慮。昔祖宗置走馬承受。本欲便於奏報耳。而小人恃勢日增。歲長。及改稱廉訪使者。則監司帥守。反出其下。敗亂四方。危及社稷。實走馬承受之未流也。可不畏哉。此事乞陛下與輔臣長慮遠計。亟行廢罷。若止如近日改易其人。及令聽安撫使節制之類。根本未除。終必爲害。若朝廷或有大事。勢須遣使。即乞於廷臣中。遴選材望。庶幾不負任使。不啓弊端。實天下之幸。

一自古有國。設官分職。非獨下不得僭上。上亦不得侵下。所以正名分也。公師之官。將相之位。人臣之至貴。天子所尊禮。非百官有司比也。方宣和間。王黼以太宰而行。應奉司蔡攸以三孤而直保和殿。紊亂之事。遂爲禍萌。中興以來。所宜痛革。而頃者遂有以師傅而領殿前都指揮使者。天下固已怪矣。近復有以太尉而領閣門事者。閣門古之中涓。太尉服章班列。蓋視二府。瀆亂名器。莫此爲甚。欲乞聖慈。詔輔臣議之。例加訂正。著爲定制。亦革弊所當先也。

一伏覩詔書委監司條具部內知州治行仰見陛下撫恤百姓欲使各安田里之意然臣竊謂惟賢乃可以知賢而無瑕者乃可以議人不審今之監司皆已賢乎若猶未也且夕臧否來上而按行黜陟無乃未可乎雖使諫官御史劾奏其不當者然人之識見自有分限若本無才智又無學術乃使品藻賢否而劾其不當是猶強盲者使察秋毫而責其不見也臣欲望聖慈令三省具諸路監司姓名精加討論其不足當委寄者例皆別與差遣選有才智學術之士代之則前日之詔不爲空文既一清監司之選又審知郡守之政實今日先務也

一伏覩律文罪雖甚重不過處斬蓋以身首異處自是極刑懲惡之方何以加此五季多故以常法爲不足於是始於法外特置凌遲一條肌肉已盡而氣息未絕肝心聯絡而視聽猶存感傷至和虧損仁政實非聖世所宜遵也議者習熟見聞以爲當然乃謂如支解人者非凌遲無以報之臣謂不然若支解人者必報以凌遲則盜賊蓋有滅人之族者矣蓋有發人之丘墓者矣則亦將滅其族發其丘墓以報之乎國家之法奈何必欲稱盜賊之殘忍哉若謂斬首不足禁奸則臣亦有以折之昔三代以來用肉刑而隋唐之法杖背當時必亦謂非肉刑杖背不足禁奸矣及漢文帝唐太宗一日除之而犯法者乃益稀少幾致刑措仁之爲效如此其昭昭也欲望聖慈特命有司除凌遲之刑以明陛下至仁之心以增國家太平之福臣不勝至願

一臣恭以陛下仁心惻怛聖澤深廣四方萬里之遠昆蟲草木之微生成長養惟恐或傷近者天下奏獄雖盜賊奸蠹罪狀已明一毫可寬悉蒙原減豈有無辜就刑而不加恤者臣是以不量疏賤敢昧死有請

夫宦侍之臣，自古所有。然晚唐以來，始進養子。童幼何罪，橫擢刀鋸，古制宮刑之慘，纔下大辟一等。是雖顯有負犯，猶在所矜。而況於童幼乎？向使宿衛不足，供奉闕人，暫開禁防，尙爲有說。今道路之言，咸謂員已倍充，司局皆溢，而日增歲加，未聞限止。誠恐非陛下愛人恤物，養育羣生之意也。臣伏觀太祖皇帝開寶四年，詔內侍官年三十無養父，聽養一子，并以名土宣徽院。遠者抵死，真宗皇帝咸平中，復申前詔。仁宗皇帝嘉祐四年，又詔入內侍省權罷進養子。三聖詔令，炳如丹青，遵而行之，實在陛下。且方今聖政日新，入無苑囿之觀，出無逸遊之好，諸軍無承受，諸路無走馬，中人所領，不過兩宮掃除之職而已。願久弛成憲，以從其私，干犯至和，虧損仁政，臣雖甚愚，猶知其不可也。伏惟聖慈少留聽焉。

一自古盜賊之興，若止因水旱饑饉，迫於寒餓，曠聚攻劫，則措置有方便，可撫定，必不能大爲朝廷之憂。惟是妖幻邪人，平時誑惑良民，結連素定，待時而發，則其爲害未易可測。伏緣此色人處處皆有，淮南謂之二禱子，兩浙謂之牟尼教，江東謂之四果，江西謂之金剛禪，福建謂之明教，揭諦齋之類，名號不一，明教尤甚。至有秀才吏人軍兵亦相傳習，其神號曰明使，又有肉佛骨佛血佛等號，白衣烏帽，所在成社，僞經妖像，至於刻板流布，假借政和中道官程若清等爲校勘，福州知州黃裳爲監雕，以祭祖考爲引鬼，永絕血食，以溺爲法水，用以沐浴，其他妖盪，未易概舉。燒乳香，則乳香爲之貴，食菌蕈，則菌蕈爲之貴，更相結習，有同膠漆。萬一竊發，可爲寒心。漢之張角，晉之孫恩，近歲之方臘，皆是類也。欲乞朝廷戒監司守臣，常切覺察，有犯於有司者，必正典刑，毋得以習不根，經教之文，例行闊略，仍多張曉示，見今傳習者，限一月，聽齋經像衣帽，赴官自首，與原其罪，限滿重立賞許，人告捕，其經文印版，令州縣根尋，日下焚

毀仍立法。凡爲人圖畫妖怪及傳寫刊印明教等妖妄經文者，並從徒一年論罪。庶可陰消異時竊發之患。

奏筠州反坐百姓陳彥通訴人吏冒役狀

臣近因民間詞訴勘會，引本路筠州百姓陳彥通，因訴事夾帶，稱高安縣押錄陳諒，經兩次徒杖罪，斷罷不合冒役事。其本州於淳熙六年十月內，以爲陳彥通所論冒役不實，遂引用乾道六年八月二日臣僚陳請妄訴冒役科反坐刑名，仍引在法諸州縣收斂公人，會因犯罪勤停，謂於法不該收斂及未該收斂者，放罷編配，再行投募充役者，許人告諸州縣收斂公人於令格有違者，徒二年。公人依法不該收斂，而隱落過犯，或改易姓名，別行投募者，准此。將百姓陳彥通決脊杖十三。臣竊詳反坐之法，本謂如告人放火，而實不會放火，告人殺人，而實不會殺人，誣詔善良，情理重害，故反其所坐。然有司亦不敢卽行，多具情法，奏取聖裁。今愚民無知，方其爲奸胥猾吏之所屈抑，中懷冤憤，訴之於官，但聞某人會以罪勒罷，又有許告指揮，則遂於狀內夾帶冒役之語。村野小民，何由身入官府，親見案牘，小有差誤，亦當未減，以通下情。縱使州郡欲治其虛妄，驀越之類，亦自有見行條法，笞四十至杖八十極矣。與反坐之法，有何干涉。若一言及吏人冒役，便可招撫置之徒罪，則百姓被害，豈復敢訴吏何其幸，民何其不幸也。自昔善爲政者，莫不嚴於取吏，厚於愛民。今乃反之事，屬倒置，兼見今諸處冒役吏人，雖究見是實，亦不過從杖罪科斷罷役而已。未有卽置之徒罪者，豈有百姓訴吏人冒役，却決脊杖之理。臣本欲卽按治筠州官吏，又緣有上件乾道六年八月二日臣僚陳請到指揮，顯見因此陳請，致得州郡憑藉用法深刻，臣蒙恩遣使一路出

目聖知拔擢。苟有所見。不敢隱默。欲望聖慈。更賜詳酌。如以臣所奏爲然。卽乞特降睿旨。寢罷乾道六年八月二日。因臣僚陳請所降指揮。庶使百姓不致枉被深重刑責。且下情獲通。胥吏稍有畏憚。天下幸甚。

除寶謨閣待制舉會黯自代狀

准令。侍從授告訖。限三日內。舉官一員充自代者。右臣伏覩從政郎總領淮東軍馬錢糧所準備差遣。會黯克承家學。早取世科。操行可稱。文詞有法。臣實不如。舉以自代。

辭免轉太中大夫狀

中大夫充寶謨閣待制提舉江州太平興國宮陸某狀奏。臣以修進兩朝實錄。今月二十三日。伏准告命。授臣太中大夫。依前充寶謨閣待制。提舉江州太平興國宮者。序進一階。雖循故事。擢登四品。實出殊私。勞薄賞醜。入微恩重。而況臣遭逢頗異。涉歷淺深。四朝管綴於廷紳。八十更持於從臺。惟寵光之永絕。庶視息之少延。敢控愚衷。冀回鴻造。

薦舉人材狀

太中大夫充寶謨閣待制致仕臣陸某。近承紹興府牒。備承尙書吏部符。准都省劄子。奉聖旨。節文。令前侍從各舉人材三兩人。臣爲已致仕累年。竊慮與在外侍從。見任藩郡及宮觀人事體不同。遂具申審。今准都省劄子。照得寶謨閣待制致仕俞激。薦舉萬夢實等。訖劄送臣照會者。臣切見宜教郎知臨安府臨安縣。鑿豐材識超卓。文辭宏膽。從政郎前隨州州學教授王田。學問淹貫。議論開敏。以上並可備文字之職。文林郎監潭州南嶽廟趙蕃。力學好修。杜門自守。入仕以來。惟就祠祿。今已數任。若將終身。或蒙朝廷

稍加識拔。足以爲靜退之勸。抑躁競之風。於聖時不爲無補。如或不如所舉。甘坐責罰。

卷第六

謝解啓

倦遊場屋。分已歸耕。首置賢書。出於過聽。得非其分。榮不蓋慚。伏念某行己迂疎。稟資窮薄。生逢聖代。豈願老於漁樵。性嗜古文。了不通於世俗。因息四方之志。專爲一壑之謀。比遊都城。適睹明詔。復踴躍而自獻。信習氣之難除。內負初心。外慙舊友。然而廢放已久。盡忘科舉之章程。得失既輕。頗有山林之氣象。譬之進昌歎於玉食。陳侏儒於燕朝。方以怪而見珍。故雖樸而不廢。恭惟某官行爲世表。經爲人師。早學長安。識子雲之奇字。晚遊吳會。得中郎之異書。心術正而無邪。文章簡而有法。憤雕蟲之積弊。疑草野之可收。遂致庸虛。輒先豪俊。自知不稱。敢辭同進之爭名。所懼流言。竊謂主司之好異。其爲愧悚。實倍尋常。

賀台州曾直閣啓

恭審寵辭使節。移鎮便藩。上待老成。惟恐弗當其意。士聞靜退。自消競進之心。凡有識知。誰不驩喜。恭惟某官淵乎似道。清而有容。古學名家。鬱爲諸儒之領袖。高文擅世。坐還兩漢之風流。蚤踐清華。屢當要劇。民依愷悌之政。吏畏道德之威。不言而令已行。寡欲而人自化。好直無矯枉之過。爲善無近名之嫌。歷考平生。追配古人而奚愧。中更俗吏。益知儒者之有功。比由真館之宴閑。起奉外臺之委寄。翔而後集。汎然敢辭。子房避三萬戶之封。晏容至六百石而去。當宁爲之太息。舉朝仰其高風。故擇名邦。示優耆德。然而

公議所屬。久安實難。第恐賜環之來。弗容坐席之暖。某早嘗問道。晚益受知。春服方成。恨又違於師範。郡齋猶冷。冀深衛於生經。

賀會秘監啓

恭審趣登文陛。進冠蘭臺。簡冊光華。孰謂太平之無象。薦紳歎息。共欣大老之來歸。誠爲中外之榮觀。非復門闌之私慶。竊嘗聞諸耆舊。昔在祖宗。朝有道德魁偉之臣。士鄙刑名功利之學。政術既斥。夫卑陋。國勢自極於尊安。豈惟右文飾治之方。是亦折衝消萌之要。至於主盟儒道。典領書林。必求名勝之宗。尤極清華之選。不圖近歲。頓異前規。老吏亦驚。茲豈膏粱之地。遺編何罪。至遭鋒鏑之腥。廷範之汗清流。哥奴之非時望。較之於此。誠何足言。天未墜於斯文。上眷求於舊德。恭惟某官。文貴乎道。氣合於神。學稽古以知天。心集虛而應物。舊聞入洛之盛事。疑於古人。追數過江之諸賢。屹然獨在。雖身居湖海之遠。而名滿覆載之間。友化人而遊帝居。願肯復求於外物。登泰山而小天下。蓋嘗俯陋於諸儒。昨者法宮決事之初。起於琳館燕居之際。力歸使節。自乞守符。觀其勇退於急流。真若無意於斯世。迫功名之不救。凜風節之愈高。姑復領袖館閣之遊行。卽几杖廟堂之上。某自惟幸會最辱。知憐。識度關之雲。距今十載。從浴沂之樂。終後諸生。孤蹤愈遠於師門。精意空馳於夢想。

賀謝提舉啓

伏審顯膺帝制。起擁使華。雖輿論歎然。謂未究大賢之蘊。然用人如此。誰不知公道之行。恭惟某官。躬真獨簡。貴之資。蘊篤實誠明之學。早並遊於洛下。晚獨步於江東。談笑多聞。文章爾雅。履常應變。雖與時而

循行。據古守經。蓋絕世而獨立。風采聞於天下。勞烈簡於上心。自去清班。久安真館。付功名於昨夢。若無
意然。顧富貴之迫人。恐不免耳。迨法宮之決事。付便郡以優賢。曾未踰年。已聞報政。入膺三接之寵。出臨
千里之畿。明詔始傳。吾黨相慶。以謂名流之施設。當有前輩之規摹。班超之策平。平陽城之考下下。至於
俗吏乃求奇功。所願一洗簿書之塵。庶幾少稱臺閣之望。此自明公之所及。豈須賤子之具陳冒瀆之深
慚惶無措。

賀禮部曾侍郎啓

恭審顯奉制書。進司邦禮。所養既厚。萬鍾亦何足言。衆望所歸。九遷猶以爲緩。惟是老成之用。式昭至治
之符。凡有識知。誰不驩喜。竊考六官之制。本皆三代之餘。惟宗伯之清華。極近臣之遴選。誠使此地常得
其人。則朝廷日尊。自弭未形之患。論議守正。亦折羣邪之萌。一昨多艱。浸忘大體。刑名錢穀。獨號劇曹。文
物異常。僅同虛器。蓋道由時而升降。官以人而重輕。苟凡材非據於其間。則舊章何恃而不廢。孰謂斯文
之幸。復聞公議之伸。恭惟某官直哉惟清。淵乎似道。心至虛而善應。名弗求而愈高。紬繹六經。推明上世
之絕學。度越兩漢。追配先秦之古文。早並遊於洛中。晚獨步於江左。人誦其德。家有其書。使少貶於諸公。
已亟升於華貫。願久幽而彌厲。凜自信之不回。上屢與見晚之嗟。公猶懷勇退之志。勉收功業於無復意
之後。起踐富貴於不得已之餘。黃髮皤然。德容穆若。昔者慶曆之盛。側席而致衆賢。元祐之初。加璧而聘
諸老。今茲盛事。可謂無慚。然猶漸進於省中。未足大慰於天下。竊謂德齒之貴。宜登師保之崇。入則几杖
三雍之間。出則卷繡百工之上。使勳貴斂衽。長楊館之清。朝野洗心。化毛公之儉。紀話言於竹帛。肖形像

於丹青垂之無窮。然後爲稱。某頃陶善誘。嘗辱異知。雖借勢於王公大人。非迂愚之敢及。惟侍坐於先生長者。尚夢寐之不忘。迷聞綸繡之傳。獨阻門闕之慶。仰懷曩遇。不勝下情。

賀辛給事啓

恭審光奉制書。就升鉅鎮。用人惟己。上方詢事而考言。知我其天。公豈枉尋而直尺。世不容而何病。道有命而後行。雖殿藩猶屈於經綸。然親擢益知於眷注。繹紳頌歎。道路驩欣。伏聞先王相我後人。上天爲生賢佐。若時大任之降。將啓非常之元。故必雍容回翔。以養其康濟之才。排擯斥疎。以積夫邇遐之望。遺之險艱。以勵其志。待之耆老。以全其能。周公居東。歸相成王之善治。謝傅高臥。晚爲江表之宗臣。勳名卒至於偉然。物理殆非於偶爾。恭惟某官。氣守剛大。性資方嚴。其在朝廷。有金玉王度之益。其位嶽牧。有股肱帝室之勞。指朋黨於蔽蒙。膠漆之時。發奸蠹於潛伏。機牙之始。庭叱義府。面折公孫。可否一語。而不移利害。十年而後。驗人服其識。家誦其言。皓首來朝。方共推於宿望。丹心自信。寧少貶於諸公。洗鄙夫患失之風。增善類敢言之氣。頽仰無媿。進退兩高。不可諛者。忠邪之情。不可揜者。是非之實。出守未幾。見思已深。惟是謀帥之難。孰先舊德之舉。然而方政機之虛席。宜召節之在途。開慰斯民。始自今日。某迂愚不肖。窮薄多奇。雖道德初心之已非。猶節義大闕之可勉。側聞休命。深激懦衷。輒忘奏記之狂。蓋出執轡之慕。仰祈閱量。曲貸嚴誅。

答福州察推啓

識面卜鄰。固常懷於鄙志。杜門掃軌。殊未接於英游。於此相逢。慨然永歎。恭惟某官。城南舊望。江左名流。

高韻照人清言絕俗過眼不再真讀五車之書落筆可驚倒流三峽之水豈有如公之人物猶令隨牒於海邦政恐驛召之行弗容席暖之久某奔馳斗粟流落二年久親柱後之憲文高束牀頭之周易政須名理之語一洗簿書之塵

賀何正言除左司諫啓

恭聞親詔登用大賢以白首魁偉之臣膺明時諫諍之任善類相慶公道遂行竊以逆指犯顏人疑於甚難而君子謂之易盛朝治世衆安於無事而識者以爲憂然非身居獻替之官與夫素著中外之望雖抱此識何自而言邈乎太平之難逢考之前史而可見以正人遺聖主實惟祖宗敷佑之心而公議在朝廷豈非廟社無疆之福恭惟某官心潛百聖學貫羣經老成之風師表一世直養之氣充塞兩儀立朝寬大而持平論事雍容而守正虛舟觸物此自信其無心怒髮衝冠彼安知夫有體居多聖政之助始明儒者之功非獨誠僞不可以欺要之忠邪久而自判上眷既厚人望又歸遂當登四輔之聯豈久置七人之列某頃以樸學嘗預諸生雖在泥塗猶是門闕之舊物竟無名第亦竊場屋之虛聲敢俟明公勳業之成勉繼與人歌頌之作不足爲報姑盡此心

賀湯丞相啓

恭審顯膺典冊進冠公台廷告未終摺紳相慶郵傳所及夷夏歸心煥君臣嘉會之逢侈廟社無疆之福恭惟某官民之先覺國之宗臣精義探繫表之微英辭鼓天下之勳至誠貫日歷萬變而志意愈堅屹立如山決大事而喜愠不見一昨力辭重任之降屈居次輔之聯三年有成九功惟敘方當詔令之誕布執

測謀謨之所從。凡有大政事之慰斯民。咸曰右丞相之告於上。雖家置一隊以頌德。士予千金而示恩。竊揆其情。未至於此。蓋廟堂之寄。代天而理物。帷幄之算。經遠而折衝。平居用小大之材。欲其披肝膽以自盡。一旦付疆場之事。欲其捐性命而不辭。自非有以素服衆心。則將誰與共濟大業。晉文側席於子玉。回紇下拜於汾陽。王商以忠譽立朝。則單于不敢仰視。平津以婦嬖充位。則淮南謂若發蒙。自昔論世之盛衰。莫如置相之當否。譬猶震風凌雨之動地。夏屋愈安。鴻流巨浸之稽天。方舟獨濟。人望所屬。國體自尊。今者大明弼亮之勳。正席辯章之任。守文致理。將見隆古極治之時。應變制宜。必有仁人無敵之勇。聖主以此屬元輔。學者以此望真儒。行或使之。天所命也。某猥以孤遠。辱在記憐。如其少道衣食之憂。猶能頌中興之盛德。必也遂老江湖之外。亦自號太平之幸民。窮達皆出於恩私。生死不忘於報稱。

除刪定官謝丞相啓

收置鈞陶。固已踰於素望。責功鉛槧。仍俾効其寸長。神觀頓還。塵埃一洗。欲鼓丹衷之感。不知危涕之橫。伏念某。獨學寡聞。倦遊不遂。瀾翻記誦。愧口耳之徒勞。跌宕文辭。顧雕蟲而自笑。低回久矣。感歎悽然。使有一人之見知。亦勝終身之不遇。然而稟資至薄。與世寡諧。在鄉閭。則里胥亭長之所叱訶。仕州縣。則書佐鈴下之所蹈藉。聲名湮晦。衣食空無。方所向而輒窮。已分甘於永棄。侵尋末路。邂逅殊私。招之於衆人。鄙遠之餘。挈之於半世。浮沉之後。既賞音於一旦。又誦句於諸公。豈料前史之美談。乃獲此身之親見。茲蓋伏遇某官。斯民先覺。吾道宗師。大學誠明。上下同流於天地。至仁溥博。遠近一視於華夷。和氣行禮樂之間。治道出政刑之外。惟公故無所不取。惟大故無所不容。訖令頑鈍之資。亦預甄收之數。重念某家世

儒學。非有旂常鍾鼎之勳。交友漁樵。又無金張許史之助。特緣薄技。獲齒諸生。形顧影以知歸。口語心而誓報。死而後已。天實臨之。

謝內翰啓

來自遠方。驟參要局。知其愛閔而多病。故爲滴俗吏之塵。勇於悼屈而哀窮。故使汗清流之未繫。禁近吹噓之過蒙。廟堂選拔之優。俯仰以思。愧懼交至。伏念某讀書有限。識字不多。歲月供簿領之勞。衣食奪山林之志。窮雖已甚。狂不自懲。性本懦弱。輒妄希於骨體。仕由資蔭。乃深惡於膏粱。坐此涇阨而莫收。未忍依違而少貶。比遊輦轂。久困氛埃。望見車騎之雍容。傳誦文章之闕麗。不勝慕鄉。求備使令。門牆纒許。其一登聲價已增於十倍。夫富貴外物。惟事賢可謂至榮。父子雖親。然相知猶或不盡。曾是疎遠。至孤之迹。又無瓌奇可喜之能。不自省其何繇。乃遽叨於斯遇。非常之幸。從古罕聞。此蓋伏遇某官自明而誠。養氣以直。行著四方之防範。文專一代之統盟。勤於教人。務傳聖師之道。廣於求士。用報睿主之知。豈謂孤生亦蒙至意。稱於天下曰知已。惟復間然。雖使古人而復生。未易當此。惟誓堅於名節。庶不辱於恩私。

謝諫議啓

來自遠方。驟參要局。因書生鉛槧之業。使效尺寸之長。脫俗吏簿領之煩。曲從疎野之性。儻非恩舊。每賜揄揚。自顧缺然。何以得此。伏念某讀書有限。識字不多。歲月供道路之勞。衣食奪山林之志。窮雖已甚。狂不自懲。材本懦弱。輒妄希於骨體。仕由資蔭。乃深嫉於膏粱。衆惡所叢。孤生餘幾。自頃竝遊於場屋。亦嘗辱遇於宗師。徒竊虛聲。莫酬眞賞。一斥遂甘於蹭蹬。殘年絕望於鶻騰。此在常情。所宜顯棄。豈謂并容之

度未移宿昔之私。既許瞻君子盛德之容。淵乎似道。又使知大人接物之際。歡然有恩。訖致庸虛。誤蒙甄錄。此蓋伏遇某官養氣以直。自誠而明。大學中庸發揮千歲之旨。生民清廟主盟一代之文。吾道由此而復傳。善人有恃而不恐。施及區區之舊物。不忘眷眷之深情。求麤稱於門牆。惟益堅於名節。死而後已。天實臨之。

卷第七

謝曾侍郎啓

結綬彈冠。既過尋常之望。懷鉛抱甕。獲輸尺寸之長。永言卵翼之恩。忽焉涕淚之集。伏念某讀書有限。與世無緣。吟梁甫於草廬。倒天吳於短褐。借助於金張許史。既家世之不爲。從事於米鹽簿書。又生平之未學。一昨奔馳薄宦。流落殊方。土風頓異於中州。宿疾遽侵於壯歲。食有蠶蛇之異。醫無鍼石之良。凜然懷性命之憂。不暇計飢寒之迫。毀車殺馬。逝從此以徑歸。賣劍買牛。分餘生之永已。豈謂始終之不棄。俯憐緩急之誰投。出泥塗而濯清風。披泉扃而起白骨。稱於天下曰知已。顧豈在於他門。雖使古人而復生。亦難勝於此賜。茲蓋伏遇某官盡心知性。惟道集虛。氣塞天地之間。辭編詩書之策。授業解惑。務廣先師之傳。揚善進賢。用爲聖主之報。廣則或至於難。恕則不責其全。是致瘡虛。亦汗題品。然而仰觀明公之勇退。每蹈前哲之難能。超軼絕塵。優游卒歲。雖賢愚之甚遠。願師慕之敢忘。誓當力戒它岐。益堅素守。禍福有命。豈其或置於胸中。名節儻全。是則不辱於門下。終期末路。可復斯言。

刪定官供職謝啓

拔茅以征。冒處清流之末。及瓜而往。曾無累月之淹。恩重如山。威深至骨。伏以刑措不用。邈矣成康之隆。法家者流。肆於秦漢之際。以吏爲師。而先王之澤熄。以律爲書。而聖人之道微。是以鄙夫深文而不知還。儒者高談而靡適用。惟我國家之制。克合古今之宜。置局而總以弼臣。拔材而列之官屬。必有遠關盛衰之法。以授有司。故非深達體要之人。不預此選。豈容惜甚。亦在數中。茲蓋伏遇某官學極誠明。才全經緯。道樞善應。萬變不外於吾心。仁風遠翔。庶物悉陶於和氣。矜憐墜緒。收拾遺材。致茲流落之餘。被此生成之賜。某敢不討尋廢忘。激勵懦庸。念彼三尺法安出哉。要必通於古。隨否則一獄吏所決耳。尙奚取於諸生。冀收毫髮之勞。庶逃俯仰之媿。

賀黃樞密啓

恭審顯膺制書。進貳樞府。威望之重。宗社所憑。天其相有求之圖。日以冀中興之治。竊以朝廷之政。屬在惟懼之臣。方無事之時。雍容坐談。則夫人而皆可應。一旦之變。酬酢曲當。非有道者不能。歷觀昔人。蓋鮮全美。王導之襟量。而學不至。德裕之術略。而器未優。故晉卒安於江東。唐莫追於正觀。有志之士。太息於斯。恭惟某官。心正意誠。任重道遠。躬卓行於苟且。自恕之俗。推絕學於散缺不全之經。凜然一家之言。發乎千載之闕。加之博極墳史。得興亡治亂之由。綜練典章。識沿革始終之際。氣足以攝姦慝。明足以察忽微。其在掖垣。惟公議是達。其侍經幄。惟王道是陳。果由師錫之同。入總本兵之寄。然而方時多故。爲計實難。夷狄鴟張。肆猖狂不遜之語。邊障狼顧。懷震擾弗寧之心。東有淮江之衝。西有楚蜀之塞。降附踵至。人

心雖歸。而強弱尙殊。踊躍請行。士氣雖揚。而勝負未決。堅壁保境。則曷慰後來之望。關國復土。則又有兵連之虞。竊惟明公素已處此。某頃聊官屬。獲侍燕居。每妄發其臆慮。輒誤蒙於許可。雖輟食竊憂於謀夏。而荷戈莫效於防秋。敢督糜捐。以待驅策。

除編脩官謝丞相啓

揆才無似。得祿已優。不知何取於聖時。顧使輒塵於清選。旣難稱塞。但有慚惶。伏念某學術空疎。文詞朴拙。頃遊場屋。未能絕出於原夫。久返山林。但欲追酬於款乃。至於手編簡冊。身綴鸚鵡。豈惟忘魏闕之心。固已息邯鄲之夢。敢圖一旦。輒越稠人。與聞國典之權。與猥備樞廷之掾。史此蓋伏遇某官斯民先覺。盛世元臣。亮天以格物之誠。化俗用修身之道。雖江海至廣。固無待於細流。念燕雀兼容。亦何傷於大廈。故令濫進。以廣旁求。然而某天賦甚窮。自量尤審。層臺起於累土。雖深知獎拔之心。浮屠成於合尖。冀終遂迂愚之分。敢忘惕勵。用對陶成。

謝參政啓

揆才無似。得祿已優。不知何取於聖時。顧使輒塵於清選。旣難稱塞。但有慚惶。伏念某至拙無能。下愚不肖。分章析句於蓬樞。壘牖之下。學但慕於俚儒。娛憂紆悲於山巔水涯之旁。文不供於世用。比坐啼號之迫。浪爲衣食之謀。投檄無緣。強顏可笑。橋踰淮而爲枳。竊自慨然。泥出井而作塵。望胡及此。手編簡冊。身綴鸚鵡。筆研重尋。氛埃一洗。茲蓋伏遇某官至仁無間。大德有容。文兼衆作。而不以窮人識高。一代而樂於成物。雖江海至廣。本無待於細流。念燕雀兼容。亦何傷於大廈。致茲久困。遂得少通。然而某天賦甚窮。

自量尤審。層臺起於累土。雖深知獎拔之心。浮圖成於合尖。冀終遂迂愚之分。敢忘惕勵。用對陶成。

謝賜出身啓

明廷錫對晨趨甲帳之嚴。親札疏恩。暮拜丙科之寵。感深涕隕。媿極汗流。竊以國家取士之方。固非一路。學者進身之始。又惡多岐。故祖宗非私於俊造之科。而公卿罕出於選舉之外。至膺特詔。尤號異人。頗詩足以配絃歌。則梅堯臣出於皇祐。文章足以垂竹帛。則王安國起於熙寧。或友朋借譽。而不以爲私。或兄弟當塗。而莫之或議。厥繇至當。故可無慙。如某者。才樸拙而無奇。學迂疎而寡要。自悲薄命。久擯名場。敢謂一朝。遂叨賜第。門外之袍立鵠。恍記少時。詔中之字。如鴉猶疑夢事。茲蓋伏遇某官股肱王室。領袖儒林。以謂設一目之羅。蓋非得爵之道。至於售千金之骨。抑明市駿之心。寧借妄庸。以風四方。不忍拘繫。而廢一士。某敢不討尋舊學。企慕前修。儒者之弊。勞而無功。誓少求於實效。聖君所行。卽是故事。將時得於遺材。敢仰賀公道之興。非獨敘私情之謝。

答人賀賜第啓

比對明廷。狼塵特舉。兩章控避。莫回天地之恩。一紙來臨。復拜友朋之賜。未知稱塞。積有慚惶。伏念某才本迂疎。識尤淺暗。頃遊場屋。首犯貴權。旣憎糠播之偶前。復惡瓦樞之輒巧。詎劉賈之下第。空辱公言。與李賀而爭名。幾成奇禍。敢期末路。復齒清流。晨趨甲帳之嚴。暮拜丙科之寵。此蓋伏遇某官學窮游夏。文禮卿雲。槐花黃而竝遊。每記帝城之舊。荔子丹而共醉。未忘閩嶺之歡。特假溢言。俾膺異選。千名記佛。雖叨學者之光榮。一日看花。寧復少年之意氣。但懷感佩。未易敷陳。

賀張都督啓

恭審誕膺冊書首冠樞府。運籌決勝。遂定廟謨。假鉞督中外之軍。仍專闔寄。傳聞所遠。欣抃惟均。恭惟某官降命應期。自天生德。許國本事親之孝。化民用克己之仁。早際聖神。徧居將相。書虞淵取日之績。恍若古人。詠東山零雨之詩。適當初政。屬邊烽之尙警。煩幕府之親臨。玄黃之篚爭歸。亦白之囊幾息。果游膺於徽數。用卒究於宏規。仰惟列聖之恩。實被中原之俗。耕田鑿井。舉皆涵養之餘。寸地尺天。莫匪照臨之舊。豈無必取之長算。要在熟講而緩行。顧非明公。誰任斯事。不惟衆人引頸以歸。實固亦當守慮。心而仰成。某獲預執鞭。欣聞出綽。斗以南仁傑而已。知德望之素尊。陝以東周公主之宜。勳名之益大。雖不敢紀殊尤於竹帛。尙或能被一二於絃歌。胃瀆之深。震惶無措。

問候洪總領啓

借勢於王公大人。夙懷志願。侍坐於先生長者。適有黃綠。仰偉度之兼容。撫孤蹤而知幸。伏念某至愚不肖。甚拙無能。一官初迫於飢寒。百慮更成於疾疢。綬鷲鷲會朝之列。自傷勸鶴之摧頹。望魚龍變化之塗。獨類寒蠶之藏縮。比求祠廟。歸掃丘墳。猶出佐於近藩。實大踰於素望。始終微倖。進退慚惶。恭惟某官材擅國華。德推世美。崇論欲議。質諸鬼神而不疑。大册高文。編之詩書。而無愧。歷風波並起之峻。挺金石可開之賦。雍容回翔。而愈高康濟之資。排擯斥疎。而彌積邇遐之望。天將降於大任。上惟圖於奮人。荷從橐於西清。方俟論思之益。擁使壇於北固。猶煩道德之威。某竊覬須臾。欽承約束。快威鳳景星之觀。幸執過焉。辱高山流水之知。儻其自此。

答鈴轄啓

列屬樞廷自不安於清選。佐州京峴猶誤被於明恩。方修候問之恭。已拜絨騰之賜。情文甚竊。感愧兼深。伏惟某官胄出山西。書傳圯上。綠沉金鎖。雖勇略之無前。綏帶輕裘。亦風流而自命。茲膺帝眷。暫總兵符。遂容顛顛之餘。獲廁遊從之末。春容方麗。戎幕多閑。冀加衛於寢興。用大符於頌禱。

問候葉通判啓

列屬樞廷自不安於清選。佐州京峴猶誤被於明恩。敢謂窮途。獲親耆德。恭惟某官性資直諫。學術淵源。愷梯宜民。固已高於治績。忠誠許國。曾未究於遠猷。行膺召節之嚴。趣上禁途之峻。雖仰觀翔翥。鳳凰方覽於德輝。然猶幸須臾。虎鼠同稱於相屬。春容方麗。燕寢多閑。冀調與止之宜。用副傾依之素。

答吳提宮啓

伏蒙講修拜禮。惠示函書。温乎其容。若加親。粲然有文。以相接。雖快景星之觀。終慙明月之投。伏惟某官華國英材。通家舊好。未嘗少貶於公卿。勢位之地。願乃獨厚於江湖。顛碎之人。賣劍買牛。念即歸於農畝。乘車戴笠。尚永記於交盟。

賀葉提刑啓

伏審顯奉靈書。改臨畿服。坐於廟朝而施利澤。雖尙鬱於遠猷。送以禮樂而有光華。實寔隆於睿眷。傳聞之始。聞慰實深。恭惟某官學造宮庭。行尊防範。開議兩朝之望。高文百世之師。入踐掖垣。有斧藻聖謨之益。出乘使傳。有宣道王意之勞。周旋百爲。終始一節。鳳凰之翔千仞。雖瞻仰詠歎之實同。虎豹之守九關。

終排擯斥疎而莫進。竊惟大任之降。將啓非常之元。必使備歷於阻難。所以終成其器業。今者承邊鄙宿兵之後。加夏秋積潦之餘。疾癘相熏。流連未止。憂軫上頰於宵旰。撫摩方屬於忠賢。伏聞親奉尺一之書。下慰億兆之望。坐席未暖。握節遽行。蓋將訪災沴之由。施寬平之政。挈之溝壑之內。厝諸衽席之安。老稚聚觀。感涕相屬。迨及嘉猷之告。宜膺共政之求。某人去門牆。寢疎賤。履樞衣函丈。每懷問道之誠。負弩前驅。卽下望塵之拜。其爲欣抃未易敷陳。

賀呂知府啓

恭審光膺中詔。洊昇左符。協於師言。出自上意。凡在部封之內。舉同抃舞之情。恭惟某官襟量恢闊。文辭卓偉。飛書走檄。名早震於華夷。仗節擁旄。功每書於竹帛。比屬邊烽之靜。力辭宮綸之嚴。雖北闕之書至。於屢上。然東山之志。寧許遽從。果被睿知。復膺重寄。仁風穆若。方回比屋之春。威望凜然。先破巨奸之膽。某自欣末路得附餘光。不汝疵瑕。固荷包荒之度。令公喜怒。敢招越分之尤。惟殫惕勵之誠。用對眷知之好。

上陳安撫啓

佐州北固。麥甫及於再嘗。易地南昌。瓜未期而先代。雖千里困奔馳之役。幸一官託覆護之私。伏念某孤學背時。褊心忤物。方牽聯而少進。已恐懼而遽歸。偶充振鷺之廷。自知非稱。不失屠羊之肆。其又奚言。比自列於私嫌。遂再汙於除目。始終微俸。俯仰慚惶。恭惟某官道極誠明。器函康濟。閱議兩朝之望。高名百世之師。經術淵源。造大學中庸之妙。文章簡古。在先秦兩漢之間。久以臺省之英。出試蕃宣之績。雖弗容

而君子乃見公初無欣戚之殊。然必進而朝廷始尊。國寶繫安危之重。佇閒休命。大慰衆心。某再掃餘塵。增光末路。顧才能之有限。加疾疢之未平。先生琴瑟書冊在前。類卒門人之業。小子洒掃應對則可。敢曠別駕之功。

上史運使啓

佐州北固。麥甫及於再嘗。地易南昌。瓜未期而先代。雖千里困道途之役。幸一官在部封之中。伏念某學本小知器。非遠用。昨侵尋於薄宦。偶比數於諸公。除目雖類。不出百僚之底。駭機忽發。首居一網之中。謂宜永放於窮閭。猶得出丞於近郡。復緣私請。更冒明恩。超超空凡馬之羣。實非能辦。默默反屠羊之肆。其又奚言。僥倖非常。慚惶莫諭。恭惟某官英姿山立。大度淵淳。不媿於天而不作於人。卓矣誠身之學。有考於前而有驗於後。大哉致主之言。顧自信之甚明。雖不容而何病。使事有指。姑少試於澄清。治具畢張。要終頌於經濟。某小舟已具。漫刺將前。雖多病懷歸。徒費噓枯之力。然至仁逮下。實寬東溼之憂。

卷第八

答發解進士啓

郡騎來臨。方快景星之先觀。雄文授贊。更慚明月之暗投。藏去爲榮。幸甚過望。伏惟解元先登。材高衆雋。學富三餘。將鴻漸於天廷。姑龍驤於學海。豈圖羈宦。適與榮觀。萬里搏風。莫測雲程之遠。一第瀾子。行聞桂籍之傳。欣佩兼懷。敷宣罔既。

答廖主簿發解啓

都騎來臨。方快景星之先覩。雄文授贊。更慚明月之暗投。藏去爲榮。幸甚過望。伏惟某官文高藝圃。行著鄉評。雖數奇如李廣之封。猶強飯有廉頗之志。賈勇千人之敵。策勳百戰之餘。豈意羈遊。與觀盛事。故將軍羨。校尉知久。鬱於壯圖。斲天子用老舍人。宜即膺於顯擢。其爲贊喜。莫究占言。

上二府乞宮祠啓

白首而困下吏。久安佐郡之卑。黃冠而歸故鄉。輒冀奉祠之樂。恃廊廟并容之度。忘江湖遠屏之蹤。敬布忱誠。仰干造化。伏念某。讀書有限。與世無緣。歲月供簿領之勞。衣食奪山林之志。拊心自悼。顧影知慚。儻少道於飢寒。誓永投於閑散。頃以牽聯而少進。惕然恐懼而弗寧。亟辭振鷺之廷。徑返屠羊之肆。優游食足。敢陳楚些之窮。衰疾土思。但抱越吟之苦。伏望某官。因材授任。與物爲春。察其愚無所能。乏細木侏儒之用。哀其窮不自活。捐太倉紅腐之餘。特假閑官。使安晚節。棄寶憲如孤雛。死鼠寧足矜憐。譬杜牧以白骨遊魂。少加恤養。某謹當收身末路。沒齒窮山。玩仙聖之微言。樂唐虞之盛化。杜門掃軌。固莫望於功名。却粒茹芝。冀竊成於道術。雖無以報。猶不辱知。

賀吏部陳侍郎啓

恭審顯膺帝昫。進武天官。成命甫行。羣情交慶。若用人每皆如此。則公論寧復間然。竊以自昔撫運而有邦。孰不好賢而願治。然賢能之進。常齟齬而不合。治安之會。亦稀闊而難遭。京房事漢。則見謂小忠。孔子去魯。則自以微罪。有志之士。太息於斯。方今主上。詞無置之憂。基。恢有爲之遠略。思求人傑。俾代天工。當

饋歎無爾曹。其傳斯訓。恥君不及堯舜。今得其人。采四海之公言。實六卿之要地。將期共政。以責奮庸。恭惟某官。道大而氣剛。才全而業鉅。方登臺閣。則已挺然稱輔相之器。及試岳牧。則又卓爾著藩垣之勞。履及京師。名震天下。使能少貶。久已趣還。顧乃周旋四鎮之間。淹歷五年之久。積排擯斥疎而莫置。殆艱難險阻之備。更道之將興。理不輕畀。豈惟論思獻納。陳萬世之策。遂將經綸康濟。致三代之隆。某早出門牆。晚依幕府。誨言在耳。盛德銘心。駕下澤之車。雖已安於微分。磨活溪之石。尙擬頌於中興。

賀蒲陽陳右相啓

恭審廷闕大號。位冠羣公。識者咨嗟。益信道行之有命。聞而興起。共知天定之勝人。某嘗因故老之言。竊考昭陵之治。乾坤大度。固兼容而罔間。日月之照。實無隱而弗臨。小人雖有倖進。而善類常多。詖論亦或抵巇。而公議終勝。故士氣屢折而復振。邦朋既久而自消。謬譎昌言。天下誦道輔仲淹之直。巍巍成績。史臣書韓琦富弼之賢。固嘗端拜於遺風。豈意親逢於盛旦。恭惟某官。名蓋當代。材高古人。瑰偉之器。足以遺大而投艱。精微之學。足以任重而道遠。方孤論折羣邪之銳。蓋一身爲衆正之宗。徇國忘家。惟天知我。論去草者絕其本。宜無失於事機。及驅龍而放之。沮果不動於聲氣。卓矣回天之力。孰曰拔山之難。積此茂勳。降時大任。豈獨明公視嘉祐之良弼。初無間然。亦惟聖主享仁祖之治功。殆其自此。某孤遠一介。遠離累年。登李膺之舟。恍如昨夢。遊公孫之閣。尙覲茲時。敢誓糜捐。以待驅策。

謝王宣撫啓

杜門自屏。誤膺物色之求。開府有嚴。更辱招延之指。銜恩刻骨。流涕交頤。伏念某。獨學寡聞。倦遊不遂。瀾

蘇誦說。愧口耳之徒勞。跌宕文辭。顧雕蟲而自笑。頃預朋來之列。適逢聖作之辰。王音親錫於儒科。奎翰特嘉於樸學。曾未乾於韶墨。已亟遠於周行。病骨支離。遭塗顛沛。驚馬空思於十駕。沉舟坐閱於千帆。方所向而輒窮。已分甘於永棄。侵尋末路。邂逅賞音。招之於衆人鄙遠之餘。挈之於半世奇窮之後。夫富貴外物。唯事賢可謂至榮。父子雖親。然相知猶或不盡。會是疏遠至孤之迹。又無瓌奇可喜之能。不知何由坐竊殊遇。稱於天下。曰知己。誰或間然。雖使古人而復生。未易當此。此蓋伏遇某官民之先覺。國之宗臣。精義探繁。表之微英。辭鼓海內之動。至誠貫日。踐危機而志意愈堅。屹立如山。決大事而喜懼不見。雖表相請行於淮右。然蕭公宜在於關中。姑訖外庸。卽登魁柄。凡一時之薦寵。極多士之光華。豈謂迂疎亦加采錄。某敢不急裝俟命。碎首爲期。運筆颯颯。而草軍書。才雖盡矣。持被刺刺而語婢子。心亦鄙之。尙力著於微勞。庶少伸於壯志。

通判夔州謝政府啓

貧不自支。食粥已踰於數月。幸非望及。彈冠忽佐於名州。孰知罪戾之餘。猶在憫憐之數。銜恩曷報。撫己知慚。伏念某少也畸人。長而獨學。好莊周齊物之說。樂以忘憂。讀嵇康養生之篇。慨然有志。秉心不固。涉世淺深。兒女忽其滿前。裴蓋至於併日。屢求吏隱。冀代躬耕。亦嘗辱記其姓名。固欲稍畀之衣食。費元化密移之力。不知幾何。悼孤生一飽之艱。適至如此。卒叨薄祿。實謂殊私。此蓋伏遇某官輔轂帝猷。權衡國論。開公孫之東閣。共欣多士之彙征。解晏子之左驂。不忍一夫之獨廢。召來和氣。力致隆平。惟是魚復之故城。雖號烏蠻之絕塞。乃如別駕。實類閑官。况惓惓方起於徒中。宜凜凜過虞於意外。固弗敢視馬曹而

不問亦每當占紙尾而謹書。豈有勞能自表見。念昔竝遊於英俊。頗嘗扞思於文辭。既嗟氣力之甚卑。復恨見聞之不廣。今將窮江湖萬里之嶮。歷吳楚舊都之雄。山巔水涯極詭異之觀。廢宮故墟。弔興廢之迹。動心忍性。庶幾或進於彖分。娛憂紆悲。亦當勉見於言語。儻纔傳於後世。猶少答於深知。過此以還。未知所措。

謝洪丞相啓

薄技効官。曾是青袍之朝士。明恩起廢。更爲朱綬之山人。雖莫與於鴻鈞。猶竊陶於盛化。敢修尺牘。敬布寸心。伏念某承學孤生。輟耕漫仕。頃輸勞於鉛槧。嘗廁迹於紳綬。再歲京華。每有鳧雁少多之歎。一時士類。或爲草木臭味之同。因遭衆口之鑿。金孰信淡交之如水。訖由寬貸。得遂退藏。幸未抵於投荒。乃復汚於除吏。竝蓋伏遇某官應期降命。同德格天。以淵源之學。潤色皇猷。以直大之氣。折衝世變。彝鼎方書於偉籍。濤瀾忽起於畏塗。際嘉會之風雲。將開平治。畀凶人於豺虎。亟正譏誣。乃顧近藩。暫勞臥護。鋤穢競勸。流連已見於四歸。絃誦相聞。風俗殆期於一變。俯念編氓之賤。嘗居部吏之間。假之餘光。使不終廢。而某自安隱約。久困沉絛。和堯民擊壤之歌。徒欣末路。刻唐士齊天之頌。尙俟他時。

上王宣撫啓

薄命遭回。阻竝遊於簪履。丹誠精確。猶結戀於門牆。敢辭蹈萬死於不測之途。所冀明寸心於受知之地。伏念某稟資凡陋。承學空疎。雖肝膽輪囷。常慕昔賢之大節。迺齒牙零落。猶爲天下之窮人。撫劍悲歌。臨書浩歎。每感歲時之易失。不知涕泗之橫流。昨屬元臣。暫臨西鄙。獲廁油幕。衆賢之後。實輕玉關萬里之

行奮厲欲前。駕馬方思於十駕。羈窮未懲。沉舟又閱於千帆。傷弱植之易搖。悼鴻鈞之難報。心危欲折。髮白無餘。如輸勞効命之有期。顧隕首穴胸而何憾。茲從剡曲。來次夔關。雖未覘於光躔。已少紓於志願。此蓋伏遇某官應期降命。生德自天。器宇魁閎。鍾太行黃河溫厚之氣。文章鉅麗。有慶曆嘉祐太平之風。取人不棄於小材。論事每全於大體。念茲虛薄。奚足矜憐。然遭遇異知。業已被展前之薦。使走趨遠郡。豈不爲門下之差。儻回曩昔之恩。俾叨分寸之進。窮子見父。可量悲喜之懷。白骨成人。盡出生全之賜。過此以往。未知所裁。

謝晁運使啓救火後發舉狀

事出權宜。弗及先言。而後救。恩加慰藉。乃煩竝蓄。而兼收。甫定驚魂。已橫感涕。伏念某灰心賤士。焦尾餘生。學纔比於聚螢。智莫階於束緼。偶緣羈宦。獲託餘光。別駕治中。已負曠瘼之責。祝融回祿。更慚備禦之疎。方炎官熱屬之鼎來。實杯水與薪之弗救。煙埃蔽日。梗缶交塗。鬱攸遽駭於黔廬。倉卒僅知於顧府。焦頭爛額。本資衆力之同。露蓋暴衣。至屈使華之重。惟當治罪。寧可論功。此蓋伏遇某官造道精深。宅心誠敬。曲記熒熒之迹。特收赫赫之威。憐異燕之幾焚。脫池魚於必死。弗用玉璫。方勤人事之修。等與牛車。俾離火宅之怖。某敢不仰思難稱。俯愧無勞。深念客言。更謹徒薪之戒。廣儲水器。常如濡模之時。過此以還。未知所措。

謝夔路監司列薦啓

意象巖然。揣分方安於下吏。龍光異甚。交章遽上於公車。莫測何由。但知難稱。伏念某久嬰替病。見謂散

材。偶從諸老先生之遊。竊得前言往行之略。可咨今事。少年誤竊於虛名。力洗陳言。晚節方慚於大學。一來楚破。再閱王春。惟體重於藩方。故職均於曹掾。占名惟謹。幸逃有蟹之嘲。竊祿甚微。屢起無魚之歎。豈期僉論。驟及孤蹤。遂令枯槁之餘。漸有敷榮之望。此蓋伏遇某官器魁磊。議極崇。欲雖持秋霜夏日之嚴。每廓滄海洪河之量。大呼相和。或容醉吏之狂。重聽何傷。曲恕鬻丞之老。雖深知其無用。亦竝采而不遺。某敢不強怨求仁。質直好義。庶幾夙夜。或免小人之歸。猶有鬼神。尙圖國士之報。

答薛參議啓

伏審光奉制書。來參戎幙。山川信美。久嗟人物之寂寥。車騎甚都。一聳吏民之瞻視。極知趣召之在邇。猶幸小留而後東。恭惟某官器度清真。風規高亮。驥行千里。騰驥本結於主知。虎拒九關。排斥遂收於朝蹟。惟是雄豪之氣。寓於鉅麗之文。南弔沉湘。西廣論蜀。顧臥龍之遺蹟。有化鶴之故城。雖左官共歎於滯淹。然絕景政煩於彈壓。某久疎麈尾之誨。喜聞鷓首之來。聯遠遊之詩。固莫追於大手。續郊居之賦。猶小異於庸人。

答衛司戶啓

彈冠巫破。早欽三語之賢。振柁蜀江。首拜尺書之寵。情文兩厚。感作兼深。伏惟某官自立修名。蚤收上第。千人所見。其推高明。揀達之才。一座盡傾。行接醴藉。雍容之論。豈獨有光於吾黨。固將增重於此州。至於庸慙文法之疎。一振廉隅之壞。非俗吏所爲也。微君子其能乎。願疾其驅。用諧所冀。

與何蜀州啓

漂流萬里。可知已老之頭顱。贊貳一城。復得本來之面目。將就脂車之役。敢稽削牘之恭。伏念某小智自私。大惑莫解。自收朝蹟。久困宦遊。冒別駕治中者三州。假軍諮祭酒者數月。老驥伏櫪。雖未歇於壯心。逆風揮船。終不離於舊處。忘栖栖之可笑。復挈挈以此來。恭惟某官曠度清真。高標峻潔。體道自得。有見於參倚之間。受氣至剛。不移於毀譽之際。顧公言之允稔。知追詔之方行。敢意窮途。猥塵上佐。然某比緣多病。深願少閑歲計之有餘。當守平生之素志。治行其無事。更歸長者之餘風。

答交代楊通判啓

瓜戍及期。幸仁賢之爲代。萍蹤無定。恨候問之未遑。敢謂勞謙。特先榮翰。伏惟某官淵乎似道。直哉惟清。風致雖高。不廢應酬於衆務。文詞甚麗。要皆原本於六經。所宜問津於黃扉青瑣之間。何至涉筆於赤甲白鹽之下。卽聞號召。遂陟清華。某猥以陳人。偶叨末契。道途迫遽。僅能占報於記曹。舟艣軻載。弗獲往迎。於市盃。歸依之素。敷敘奚碑。

與趙都大啓

涪被臺移。攝陪幕辯。方刻章而俟報。輒懷檄以徑前。迫於奇窮。作此頑鈍。冒世俗之所憫笑。賴門下以爲依歸。伏念某下愚無知。大惑不解。罪宜永斥。朝蹟已收者十年。身困遠遊。車轍幾環於萬里。比官巴硤。旋客塞垣。歲月不知其再周。形影相顧。而自悼支離病骨。無毀而亦消。羈旅危魂。雖招而未返。念惛惛之安往。復挈挈以此來。豈忘慙羞。實特矜憫。老馬已甘於伏櫪。敢望長途。窮猿方切於投林。況依茂蔭。斯蓋伏遇某官資函英達。學蘊淵源。早奮奇謀。蓋處囊而立見。晚更劇任。真遊刃以無前。寶儲直中。禁之嚴。玉節

寄西陲之重。曲憐狂簡。自致漂流。每假借於餘談。爲經營其一飽。致茲小憩。盡出大恩。某敢不痛洗。昨非。姑休疲役。松陵笠澤。雖賒故國之歸期。錦江草堂。聊竊老師之補處。

卷第九

與成都張閣學啓

薄遊萬里。最爲天下之窮。攝守一官。猥與幕中之辯。將搆擊而就食。敢削牘以告行。伏念某下愚難移。大惑莫解。光陰晚晚。已逾不惑之年。簪領沉迷。猶在無聞之地。嗟征途之可厭。捨舊館而疇依。爲晏平仲執鞭。既云素願。就謝仁祖乞食。寧復自疑。茲承行省之移。遣備大藩之屬。雖刻章之未報。輒懷檄以徑前。冒行世俗之譏訶。實恃門闕之知獎。老馬已甘於伏櫪。敢望長途。窮猿方切於投林。況依茂蔭。恭惟某官學函經濟。洞極誠明。秉心無邪。不媿於俯仰之際。體道自得。有見於參倚之間。學倡諸儒。惠加多士。雖困窮之自取。亦提挈而不遺。照隱察微。每能得之濠上。哀窮悼屈。幾若推之溝中。施及孤生。亦叨異顧。某敢不暫休疲役。痛洗昨非。陪蓮幕之英遊。雖知遲暮。居草堂之補處。尙竊光華。

答勾簡州啓

近被臺移來陪幕。辯以海內孤寒之迹。假天涯獨冷之官。但虞譏訶。誰肯慰藉。忽奉華箋之況。豈勝末路之榮。伏念某性資冥頑。問學衰廢。留落殊方者累歲。奇窮舉世而一人。雖夢寐思歸。類澤國春生之雁。而巾瓶無定。如雲堂旦過之僧。比叨闈屬之招。實過野人之分。方刻章而待報。忽捧檄以徑前。久矣倦遊。幸

妓小憩。此蓋伏遇某官風猷凝粹。志節清真。念偃偃浪迹之安歸。假甕醪餘談而借助。遂容萍梗。暫息逾途。惟此意之甚恩。實衰谷之則見。而某自覺晚景。久歇壯心。理刻曲之歸舟。方從此日。卜浣花之絕境。敢效先賢。

與蜀州同官啓

去國十年。飽作江湖之夢。佐州萬里。又寬溝壑之憂。伏惟某官材術清通。風猷凝粹。雖小試向淹於遠業。而盛名已著於僉言。俯念孤蹤。方厄黃腸之閔。特詒妙翰。俾生枯枿之春。靖言留落之餘。曷副吹噓之意。感慙交集。敷敘奚殫。

賀薛安撫兼制置啓

恭審璽封綠底。疏恩遙下於霄宸。曠建碧油。開府全臨於井絡。周邦咸喜。舊觀復還。民望息肩之期。士知託命之所。竊以江淮駐蹕。勝人在天定之時。梁益宿兵。擊首有尾應之勢。儻事權之少削。則脈絡之不通。宜得股肱之良。用增臂指之重。至於旁連荆豫。外撫戎蠻。亭障騫騰。東軼巴渝之阻。關河重複。西當秦隴之衝。蓋有應變於立談之間。豈容稟令於千里之外。維時詔旨。實契事機。恭惟某官淵博有傳。方嚴不撓。欲言崇議。卓爲百世之師。傑作雄辭。散落四夷之遠。人則首處六官之長。出而遍膺十乘之華。進用雖速。而人猶恨其滯淹。位望愈崇。而心益持於挹損。函湖海胸懷之大。負廟堂器業之優。將究顯庸。果膺隆委。關中既留蕭丞相。上遂寬西顧之憂。江左自有管夷吾。人共望中興之盛。而況絲綸之命。適茲弧矢之期。維嶽降神而生。申不應風雲之會。夢帝賚弼。而得說。造觀袞纁之歸。某去國十年。佐州萬里。博倚服弓刀。

之役。雖恨迫於衰遲。思裾陪簪履之塵。尙欣承於閑燕。歸依之至。敷釋奚殫。

與李運使啓

伏審抗章力請優詔曲從。雖暫勞論蜀之行。然益見回天之力。恭惟某官致知格物。學道愛人。親承西洛之正傳。獨殿中朝之諸老。至於盤礴遊戲之翰墨。嬉笑怒罵之文章。過黃初而有餘。嗟正始之復見。飛騰捷路。耻煩狗監之吹噓。散落遐荒。寧付鷄林之鑑裁。比下九天之號召。已傾四海之觀瞻。不俟駕行。命義雖存於大戒。可以理奪。忠孝果得而兩全。方帥閩之猶虛。以計司而兼莅。仰惟臺省清華之宿望。加以山林高逸之雅懷。一琴一龜。預想鈴齋之靜。三薰三沐。尙陪藥市之遊。過此以還。未知所措。

上鄭宣撫啓

伏審顯膺大號。出董成師。自陝以西。咸舞歌於德化。從天而下。卽震疊於威靈。豈惟翰海玉關馳奏捷之音。將見博士議郎上策勳之典。士心闡懌國勢尊安。竊以當今秦蜀之權重。無與比中原祖宗之地。久猶未歸。旣天定而勝人。宜王明之受福。非得太行黃河山川所鍾之傑。誰復慶曆嘉祐華夏太平之基。先王克相後人。上帝爲生賢佐。雖遠猷辰告。暫違帳殿之深嚴。然大臣暑行。式慰轅門之篋望。復河關其自此。知龜筮之悉從。恭惟某官氣壓羣公。才周萬務。識若著龜之先見。論如山嶽之不搖。湖海襟懷。正在大床之獨臥。兩堂風采。未妨一壑之初心。茲輟近司。來恢遠略。弼臣同德。何難運帷幄之籌。眞儒爲邦。寧止學俎豆之事。已慶登壇而授鉞。謫觀推轂而出師。先天下而深憂。方遠同於文正。卽軍中而大拜。豈專美於熙寧。某流落無歸。棲遲可歎。青衫去國十載於茲。白首佐州一人而已。願尙賒於委骨。猶復覲於伸眉。仰

跋光塵。雖阻服弓刀之役。鋪張勳業。或能助金石之傳。過此以還。未知所措。

賀葉樞密啓

恭審顯膺明詔。進武鴻樞。道大材全。固視功名爲餘事。任隆位重。蓋倚精神之折衝。衆志交孚。太平可冀。伏聞今昔有不移之形勢。華夷有一定之土疆。故彼不可越燕薊而南侵。猶我不能跨遼碣而北守。堯舜尚無冠帶百蠻之理。天地豈忍糴腥諸夏之區。又況以本朝積累而當荒陋崛起之小夷。以陛下神武而討衰弱僅存之虜虜。重以軍民之憤切。加之廟祏之威靈。當一震於雷霆。宜坐消於氛祲。夫何玩寇。久使逋誅。九聖故都。視同秦隄。兩河近地。進若登天。莫宣方叔之壯猷。更類棘門之兒戲。坐殫民力。執奮土心。上方撫髀而喟然。公宜出身而任此。恭惟某官負沈雄邁往之略。躬英發絕人之姿。撫卷慨慷。夙有四方之大志。立朝開濟。晚收九牧之重名。果副簡求。肆當柄任。以元龍湖海之氣。參子房帷幄之籌。北斗以南。一人誰其倫擬。長安之西。萬里行矣。清夷某。譏面莫先。託身最早。側聽延登之渥。自悲淪落之餘。雖意氣摧藏。非復雕鷲離風塵之望。然飢寒蹙迫。猶懷驚馬懸棧豆之思。敢敬布於微誠。覲少回於曩睇。

除制司參議官謝趙都大啓

攝郡壘之左符。已逾素望。備賓僚之右席。復玷明恩。雖可知已。老之頭顱。猶幸得本來之面目。伏念某下愚不肖。至拙無能。陪蓬嶠之後塵。最爲薄命。省桃源之昨夢。恍若前身。泛然不繫之舟。莫知稅駕之地。豈圖末路。更污除書。蓋將問道質疑。求備老聃之役。豈獨壁燒染翰。預廣嚴武之詩。樂哉斯行。幸甚過望。玆蓋伏遇某官學窺聖域。望冠時髦。根於高明。用以忠恕。執詩書之正印。司翰墨之衆盟。富貴不驕。有偉聞

宗之百世。誠明自得。屢班漢詔之六條。方當日有九遷之榮。何難身兼數器之地。施及萍蓬之孤迹。亦叨俎豆於羣英。但不稱之是虞。豈辱知之敢望。已遵臺榭。卽發山城。紀文饒戎幕之談。當從茲日。窺逸少蘭亭之帖。或在暮春。過此以還。未知所措。

賀葉丞相啓

恭審誕告大廷。延登真相。永惟夷夏戴宋之舊。思見太平。時則祖宗在天之靈。爲生質佐。海內幸甚。國勢歸然。某少從史氏之游。竊習星官之說。去歲之杪。垂象有開。太微紫垣。忽一新於景氣。神州亦縣。將淺復於提封。曾未閱時。遽聞休命。昭哉天人精禋之際。見於君臣會遇之初。恭惟某官鍾河嶽英靈之姿。應乾坤開泰之運。器函魁碩。論極崇鉞。萬卷讀書。盡是經綸之蘊。十年遇主。獨高康濟之功。比邇井絡之歸。式贊斗樞之重。俄進陪於大政。果首建於永圖。股肱良哉。耻君不及堯舜。期月可也。致治庶幾。成康方將。修未矣長樂之故宮。築馬邑雁門之絕塞。與植禮樂於僮仆之後。整齊法制於搶攘之餘。威憐殊鄰。玉蓋受涓橋之謁。治借蓬古。金泥增岱嶽之封。然後遨遊謝傅之東山。偃息蕭何之甲第。委成功而不處。享眉壽於無窮。某遠寄殊方。久孤隆眷。驥老伏櫪。知難效命於馳驅。狐死首丘。但擬祈哀於造化。

賀龔參政啓

恭審光膺明詔。進貳政機。爲治不難。其道願何如耳。用人若此。吾國其庶幾乎。傳聞四方。驩喜一意。某聞公論未嘗盡廢。常恐不在於朝廷。小人豈必無材。惟患與聞於國事。誠使元臣大老。守紀綱而不紊。近習外戚。保富貴而有終。政一出於廟堂。權弗移於貴倖。豈圖坐消於外侮。固將馴致於太平。孰成伊尹格天。

之功。其在孟子敬王之學。恭惟某官材負超軼。器局恢闊。造道深。故能泛應而不窮。進身正。故敢盡言而無諱。建久安之勢。成長治之業。已收効於立談。開泰正之路。塞羣枉之門。曾不勞於變色。薦紳相賀。史冊有光。然而仁人先天下而憂。重矣。自任賢者。備春秋之責。艱哉。克終某十年。獨荷於異知。萬里敢虛於忠告。輒因尺牘。罄寫寸誠。未死殊方。或見丕天之偉績。猶期末路。終爲盛世之幸民。

答交代陳太丞啓

撫銅人而歎息。方感舊遊。拾竹馬之棄遺。偶叨新命。曾馳書之未暇。愧飛翰之鼎來。恭惟某官。鴻漸賢關。鳳儀朝著。傑作紀永和之會。邈矣風流。清言繼正始之音。超然名勝。初叱乘輅之馭。已勤側席之思。峻陟容臺。濼階清禁。某自憐末路。獲踵後塵。君遣使而有光華。卽載驅於原野。匠誨人而以規矩。尙竊望於門墻。

與錢運使啓

奔走九年。僅補州麾之選。來歸萬里。遽叨使傳之華。踰分已多。置慙無所。伏念某稟資甚陋。賦命多艱。跌宕文辭。本是書生之常態。蹉跎名宦。獨爲天下之畸人。比由西蜀之歸。獲俟東華之對。進趨梗野。占奏空疎。謂擠斥之是宜。豈超逾之敢望。此蓋伏遇某官道參聖域。學擅經邦。愛惜人材。每陰借之餘論。維持公道。尤深憫於窮途。致此妄庸。亦叨臨遣。某服膺已久。擁簪有期。大匠之規矩。可師。方日親於弱丈。小夫之竿牘。自見。姑少述於萬分。

答南劍守林少卿啓

比解邊城。狼叨使傳。顧惇惇之寡助。宜掣擊而亟行。揣分已隘。置愬靡所。伏念某百罹薄命。九折窮途。跌宕文辭。已困諸生之小技。沉迷簿領。又無俗吏之能聲。乃者來歸。頽然遲暮。進趨梗野。占羨空疎。宜居擯斥之科。敢辱光華之命。茲蓋伏遇某官道該聖蘊。學擅經筵。獨倡諸儒。躬伊尹天民之先覺。與憐末路。念正元朝士之無多。致此妄庸。亦叨臨遣。某方圖馳問。已辱詒書。墨妙筆精。雖喜窺於近製。頭童齒豁。更自感於殘年。

與建寧蘇給事啓

奔走九年。僅補州廳之選。來歸萬里。遽叨使傳之華。泰冒過優。慙惶莫喻。伏念某多奇薄命。子立孤生。小智自私。守紙上區區之精粕。大惑不解。蹈人間洶洶之風波。比由隴蜀之歸。獲奉宣溫之對。樸學不足以恭承清問。蕪辭不足以罄寫丹衷。謂擯斥之是宜。何超躐之敢望。此蓋伏遇某官材高而善下。道峻而兼容。哀元祐之黨家。今其餘幾。數紹興之朝士。久矣無多。曲借餘光。少伸末路。某逃遠燕語。喜望提封。大匠之規矩可師。方亟趨於函丈。小夫之竿牘自見。姑少述於萬分。

與本路郡守啓

比奉宸綸。躡乘使傳。方懼誤恩之及。敢勤流問之先。伏念某潦倒寒生。沉迷薄宦。曲江禁柳。早旅食於京華。東閣官梅。晚狂吟於蜀道。偶然不死。復此來歸。豈期顛顛之餘。亦玷光華之選。此蓋伏遇某官天資甚茂。朝望素高。俯憐萍梗之孤蹤。每借齒牙之餘論。諭令留落。忽有超逾。某弛擔云初。登門尙阻。川途悠邁。敢辭叱馭之行。風度清真。先想凝香之地。

福建謝史丞相啓

大鈞播物萬化悉付之無心。小已便私。一官獲從於所欲。可謂難遭之會。空懷莫報之恩。伏念某早出門闈。嘗塵班綴。士於知己。寧無管鮑之情。人之多言。誣爲牛李之黨。旣逡巡而自引。因委棄而莫收。晚參戎幕之遊。始被邊州之寄。知者希則我貴矣。何嫌流俗之見排。加之罪其無詞乎。至以虛名而被劾。甫周歲律。復畀守符。曾未綰於印章。已遽膺於號召。行能亡取。資望尙輕。便朝纔畢於對揚。使指遂叨於臨遣。此蓋伏遇某官兩朝元老。千載眞儒。以道德性命訓迪人材。以禮義廉耻維持國勢。哀窮悼屈。如伐木故舊之不遺。懷昔感今。異積薪後來之居上。遂容屏瑣。猶被甄收。某敢不敬散視豐凶之宜。阜通去農末之病。觀近臣以其所主。期無負於深知。非俗吏之所能爲。或麤施於素學。過此以往。未知所裁。

卷第十

上趙參政啓

造于王廷。旣盡除於宿負。試以使事。復躡被於明恩。豈惟寬溝壑之憂。遂亦有桑榆之望。大鈞難報末路。知榮伏念某固陋不通。迂疎寡合。雖抱宿道鄉方之志。了無赴功趨事之能。迨從幕府之遊。始被邊州之寄。方漂流於萬里。望飽暖於一廛。豈圖下石之交。更起鑠金之謗。素無實用。以爲頽放。則不敢辭。橫得虛名。雖曰僥倖。而非其罪。甫周歲律。再畀守符。曾未綰於印章。已遽膺於號召。遂以羈旅入朝之始。首預光華遣使之行。此蓋伏遇某官造德精微。宅心忠厚。念錦里十年之卜築。已是蜀人。憐萍蹤萬里之來歸。特

稱漢節。蕭然遲暮。被此恩榮。某敢不敬散視豐凶之宜。阜通去農末之病。觀近臣以其所主。期無負於深。知非俗吏之所能爲。或盡施於素學。過此以往。未知所裁。

上安撫沈樞密啓

造于王廷。既盡除於宿負。試以事。復躡被於明恩。豈惟寬濶整之憂。遂亦有桑榆之望。懸汗爲之浹背。感涕至於交頤。伏念某固陋不通。迂疎寡合。雖抱宿道鄉方之志。了無赴功趨事之能。自屏跡於寬閑。已。頽心於榮進。徒中起廢。方蒙。槩道之除。望外召還。忽奉燕朝之對。然而進趨梗野。論奏空疎。徒叨三接之榮。莫陳一得之慮。循名責實。所宜伏司。敗之誅。含垢匿瑕。特俾玷外臺之寄。茲蓋伏遇某官望隆而善下。道峻而兼容。哀元祐之黨家。令其餘幾。數紹興之朝士。久矣無多。曲借餘光。少伸末路。某敢不求民疾苦。絕吏竝緣。敬散視時。益廣倉箱之積。阜通助國。庶無農末之傷。過此以還。未知所措。

賀泉州陳尙書啓

恭審顯奉。蠶書起臨瀋府。廟堂虛位。固宜大老之遂歸。嶽牧得人。聊見太平之有象。恭惟某官道參聖域。德冠民彝。下視諸公。負元龍湖海之豪氣。獨尊九牧。擅諸葛宇宙之大名。風雲自際於明時。金石靡渝於素履。超然去國之久。綽有高世之風。雖力避寵名。亟欲急流而勇退。顧睿求舊德。未容袖手而旁觀。姑暫起於名邦。卽延登於政路。某久遠德宇。喜聽除音。承顏接辭。恍不殊於曩日。質疑問道。尙自慰於窮途。

答建寧陳通判啓

伏審顯膺新渥。出貳潛藩。遂聞旌旆之臨。宜有神明之相。伏惟某官風規高秀。德宇粹夷。含英咀華。早預

蓬萊道山之選。飛英騰茂。暫爲治中別駕之行。雖澹然克守於家風。顧籍甚難淹於國器。卽聞追詔。遂陟顯途。某託契至深。開緘竊喜。自憐下客。久孤國士之知。猶冀殘年。及見郎君之貴。

答漳州石通判啓

伏審被命佐州。涓辰視印。士心甚鬱。謂敘經濟以惠小邦。天意孰知。蓋儲名望而須大用。伏惟某官好是正直。擇乎中庸。崇論欲言。挺松柏貫四時之操。高文大冊。擅江河流萬古之名。謂宜凌厲以橫翔。乃復逡巡而小却。使爲治中。乃展驥耳。雖暫試於外庸。不有君子。其能國乎。當亟還於近列。某未遑馳問。先辱寄聲。祭竈而請比鄰。歎高懷之莫測。烹魚而得尺素。藏妙語以爲榮。

江西到任謝史丞相啓

詣行在所。方承命以北馳。駕使者車。復改轅而西上。訓誦甚寵。地望加優。本宜使之省循。乃更增其僥倖。伏念某性資鄙陋。學問荒唐。雖慕長者之餘風。豈聞君子之大道。早親函丈。偶竊緒餘。曾未免於鄉人。乃見待以國士。知憐覆護。殆塵沙曠劫之難逢。頽墮摧藏。無絲髮微勞之上報。昨者甫還吳會。卽使甌閩。超躋既多。便安尤極。徒以久違於公袞。悵然願事於師門。山川間之日月逝矣。方坐馳於夢想。忽祇奉於詔追。深惟幸會之非常。但懼奔馳之弗及。夫何奇蹇。更累生成。方仇怨造言。投鼠不思於忌器。乃保全極力。舍牛寧廢於覺鍾。此蓋伏遇某官偉量包荒。深仁篤舊。念招之來而麾之去。若匪近於人情。謂舍其短而取其長。猶可勝於官使。故推餘潤。以及枯菱。而某筋力疲於往來。疾恙成於屢異。實疑問首自憐。卒業之何時。詎過戴恩。尙冀收身於末路。

謝趙丞相啓

詣行在所。方承詔以北馳。駕使者車。復改轅而西上。仰戴公朝之寬大。重爲遠吏之光華。伏念某。拳曲散材。聳牙末學。衣食不繼。自竄夔楚之邦。齒髮衰。倦遊隴蜀之境。惟習氣未忘於筆硯。每苦心自力於文詞。藏之名山。本欲纘傳於後世。待以國士。豈期親遇於鉅公。記憶不忘。詔除屢下。雖復顛隕於薄命。要爲比數於明時。而況仍皇華臨遣之榮。易江表清閑之處。優遊甚適。僥倖難名。此蓋伏遇某官。誕保民彝。堅持國是。致君密勿。偉治具之必張。望古慨慷。閱道術之將裂。務廣人文之化。仰扶主斷之明。念此窮途。爲之擇地。更令破萬卷之讀。或可成一家之言。某敢不開益舊聞。激昂懦意。稍竊簿書之暇日。試求學問之新功。構楹侏儒。儻未捐於大匠。雕蟲篆刻。尙少進於故時。庶仰答於聖知。亦竊酬於鈞播。過此以往。未知所裁。

謝王樞使啓

詣行在所。方承詔以北馳。駕使者車。復改轅而西上。訓詞甚寵。地望加優。伏念某。拳曲散材。遽回末路。浪遊山澤。不知歲月之屢遷。篤好文辭。自是書生之一癖。斐然妄作。本以自娛。流傳偶至於中都。鑒賞遂塵於乙夜。既閱期年之久。兩膺召節之頒。雖改命於半途。尙乘輅於名部。始終僥倖。進退光榮。茲蓋伏遇某官。謨明弼諧。任重道遠。以國士待我。卓爲特達之知。於古人求之。每極吹噓之論。詔除屢下。器使不遺。雖云薄命之顛隕。要是公朝之記省。某敢不竊簿書之暇日。求學問之新功。構楹侏儒。儻未捐於大匠。雕蟲篆刻。尙少進於曩時。庶仰答於上恩。亦竊酬於鈞播。過此以往。未知所裁。

謝錢參政啓

諸行在所方承詔以北馳。駕使者車。復改轅而西上。訓詞甚寵。地望加優。伏念某少苦賤貧。長更憂患。名場蹭蹬。幾白首以無成。宦海漂流。願青衫而自笑。不圖遠戍。乃誤明恩。一麾在巴蜀之間。萬里促宣溫之對。清光只尺。容獎再三。略有司資格之常。備奉使詢謀之選。方虞官謫。又辱詔追。半道遵行。雖歎棲遲之薄命。頻年記錄。要爲比數於公朝。茲蓋伏遇某官培植衆材。主張公論。憐其跋前疐後。姑令全進退之宜。謂其尺短寸長。或可責馳驅之効。曲加杖拭。俾竊便安。某謹當增所不能。修其可願。侵尋遲暮。雖嗟已失於東隅。激勵衰疲。尙及未先於朝露。

謝侍從啓

祈天請命。冀循省於叢祠。便道之官。復馳驅於近甸。始終僥倖。俯仰兢慙。伏念某鄙朴不材。荒唐寡學。生逢盛際。無尺寸之可稱。久戍遠方。乞斗升而自活。昨蒙臨遣。已劇超逾。但虞薄祐之難勝。寧復異恩之敢望。未溫坐席。遽辱賜環。初疑誤報者再三。俄乃真承於尺一文。詞吏事何者。竊堪物論。人情居然不允。非賴密加於覆護。固難終道於顛隄。此蓋伏遇某官義薄九天。量容百輩。念器盈則覆。推轂無所復施。然令出推行。反汗豈其得已。遂容末路。獲忝優除。雖愧招麾之頻。亦驚弔賀之速。而某昨緣奔走。積困沉綿。顧影獨悲。豈久堪於從宦。服勤不怠。尙少贖於空餐。

謝臺諫啓

祈天請命。冀循省於窮閭。便道之官。復馳驅於近甸。始終僥倖。俯仰兢慙。伏念某鄙朴不材。荒唐寡學。生

逢盛際。無尺寸之可稱。久戍遠方。賴斗升而自活。昨蒙臨遣。已劇超逾。但虞薄祐之難勝。寧復異恩之敢望。未溫坐席。遽辱賜環。初疑誤報於姓名。俄乃真承於詔命。人才吏事。何者盡堪。自計旁觀。居然不允。敢謂并包之廣大。更令進退之從容。此蓋伏遇某官山立英姿。海涵偉量。盡言劇論。雖震發於朝端。用恕持平。每保全於士類。遂容末路。獲忝優除。俯伏以思。論報何所。而某昨緣奔走。積困沉綿。顧影獨悲。豈久堪於從宦。服勤不怠。尙少贖於空餐。

與本路監司啓

詣行在所。方奉詔以北歸。駕使者車。復改轅而西上。稍息道途之役。獲全溝壑之身。揣分已踰。置慙靡所。伏遇某類。然運暮。久矣漂流。戍隴十年。形容盡變。還吳萬里。交舊半空。騎馬而聽朝雞。已冥心於昨夢。賣刀而買耕犢。將掃軌於窮閭。敢謂頻年。屢膺嚴召。既衆知其不可。亦自揆之甚明。所期獨往於山林。乃得本來之面目。此蓋伏遇某官英姿山立。大度海涵。愛惜人材。每陰借之餘論。維持公道。尤深憫於窮途。施及妄庸。未忘記者。某登門維舊。擁篲有期。大匠之規矩。可師。卽趨函丈。小夫之竿牘。自見。姑致萬分。

答本路郡守啓

末路賜環。本出聖知之舊。半途畀節。尙承寵命之新。揣分實逾。置慙靡所。伏念某易搖弱植。無用散材。輟環天下。而老於行寧。非薄命。舟近神山。而引之去殆。有宿緣。方力丐於退藏。乃更叨於臨遣。此蓋伏遇某官指南公議。推轂時髦。顧雖流落之餘。亦在擢揚之末。某方勤馳傳。未卜登門。頌詠之私。敷宣罔既。

答寄居官啓

賜環半道易節回轅。去閩中瘴癘之區。得江表清閑之地。優游甚適。僥倖難名。此蓋某官義重臚臚。情深推轂。每假揄揚之助。俾叨臨遣之榮。黃撫幹嬰。紫列云。老夫耄矣。而無能。寧有澄清之効。君子居之。而何陋。尚陪名理之餘。范幹提云。尺素驚傳。喜論交之未替。一樽相屬。悵道舊之何由。陳檢法云。汨沒簿書。敢冀澄清之効。從容談笑。尙爲衰晚之光。

賀葛正言啓

恭審纒直北扉。方演出綸之命。拾遺西省。遂輸補袞之忠。上虛佇於嘉言。士共歸於碩望。恭惟某官英辭擅世。偉識絕人。諸老先生聞名而願交。學士大夫望風而知敬。警書羣玉之府。視草承明之廷。比傳夜對之從容。屢動天顏之忻懌。主聖臣直。共知千載之逢。言聽諫行。獨任七人之責。木從繩而必正。石投水以奚難。某屬以乘輅阻陪。賀厦比年十漸。必盡告於吾君。一日九遷。將孰先於門下。其爲拚躍。罔罄敷陳。

賀周參政啓

恭審顯奉廷揚。進陪國論。號令渙焉可述。乃專討論潤色之功。疇咨若時登庸。遂處輔弼疑丞之位。國有隆儒之盛。士知稽古之榮。伏以典謨實列於六經。臣主難逢於千載。高文大冊。或託之不得其人。老師宿儒。有死而莫見於世。維時鴻碩之彥。早冠清華之途。成功告於神明。大業刻之金石。發德音。下明詔。大哉王言。建顯位。施尊名。震於方外。一變猥醜枝駢之體。復遺雄深瀨噩之風。縉紳竊誦而得師。夷狄傳觀而動色。顧於昭代。可謂殊勳。雖箕穎之志屢陳。然辛渭之求焉往。恭惟某官任重而宏毅。護明而弼諧。以窮深測遠之才。坐酬衆務。以極高蟠厚之氣。陰折遐衝。至於擅世之英辭。本皆全德之餘事。僅少施於一二。

已見謂於崇敏。豈容卷懷經濟之圖。遂欲袖手寬閑之地。公毋困我。初爾留行之言。上誠知人。亟下延登之命。然易問者聖君之眷。難居者天下之名。方仰對於龍光。願益思於挹損。茂迪謙尊之吉。永爲善類之依。

賀謝樞密啓

恭審顯膺出綍。進貳本兵。蠻夷奪氣而息謀。朝野動容而相慶。恭惟某官英猷經遠。敏識造微。秉心如金石之堅。論事若權衡之審。主知千載。際聖世之風雲。言責三年。極人才之涇渭。士恃公平而不恐。上嘉孤直之無朋。遂由常伯之聯。進貳中樞之任。較一時之同進。得喪孰多。付四海之僉言。忠邪自見。固將力回薄俗。盡見明謨。網漏吞舟。示太平之寬大。雲與膚寸。澤庶物之焦枯。豈惟康濟於茲時。固足饑刑於後世。某早迂記省。晚荷甄收。雖知薄命之多奇。猶復誦言而不置。使駑馬妄思於十駕。而沉舟未羨於千帆。求之古人。可謂曠世難逢之會。報以國士。敢忘終身自勵之心。

陸放翁集

渭南文集

卷第十一

賀禮部鄭侍郎啓

恭審筆橐陞華。資論思於禁路。絲綸出令。兼潤色於皇猷。其知儒術之益尊。孰謂太平之無象。恭惟某官。好是正直。擇乎中庸。大册高文。固已寫之琬琰。崇言欲議。皆可質於鬼神。殆將與日月而爭光矣。止當雷霆而獨立。惟上聖克勤於總攬。察羣臣各盡於才能。謂其代予言。既久。煩於鴻碩。求能典朕禮。宜無易於老成。況以南省之要司。仍寓西垣之舊直。惟時異數。實冠清途。然而文闕國之盛衰。官以人而輕重。籲俊尊上帝。豈止在玉帛鐘鼓之間。斂福錫庶民。其必有典謨訓誥之盛。視古無愧。非公而誰。所冀復如三代禮樂大備之時。抑亦追還兩漢文辭爾雅之體。願雖老矣。尙及見之。

答撫州發解進士啓

士論推賢。方恨定交之晚。鄉書擢秀。遽勤授贊之恭。恭惟某官。與學海涵。英姿玉立。山川信美。生大儒名世之邦。絃誦相聞。陶聖主右文之化。將鷗搏於宦海。姑鴻漸於名場。某偶此乘軺。遂叨勸駕。宸廷射策。豈惟慶榜帖之馳。藏室警書。尙及見雲霄之舉。解魁云藉。甚聞名。方恨定交之晚。斐然繼秀。遽勤授贊之恭。

賀施中書啓

陸放翁集 二 渭南文集 卷十一

伏審蓬壺清閣。早冠羣仙之遊。詞掖高華。旋觀一佛之出。得人之盛。吾道有光。恭惟某官。秉德醇明。宅心夷粹。高文大冊。非復騷人墨客感寓之詞。崇論宏言。盡得宗廟朝廷嚴重之體。久矣絕世而獨立。固難袖手而旁觀。況今聖政之新。方建太平之業。推明天子惻怛愛民之旨。開慰海內奔走鄉化之心。德意達於四夷。號令媿乎三代。清議所屬。匪公而誰。且甘泉均號於從臣。而西省獨稱於政本。國橋潤色。雖概取儒學之長。山甫將明。必深通天下之務。正官名者。蓋已百祀。稱職業者。凡有幾人。夏乎其難。理若有待。動心駭目。自茲觀大手筆之傳。創牘濡毫。又當慶真學士之拜。

上丞相參政乞宮觀啓

年運而往。益知涉世之艱。職思其憂。獨幸侍祠之樂。倦倦微志。懇懇自陳。伏念某。擁腫凡材。齟牙曲學。既無甚高論。足以諱世。豈有它繆巧。用以致身。隨牒半生。問津萬里。雖奮圖微報。不勝狗馬之心。而俯迫頽齡。已罹霜露之疾。壯志纒然而欲盡。殘骸悴爾以難支。拉朽摧枯。競爲排陷。哀窮悼屈。孰借聲光。敢圖廊廟之尊。未棄門闌之舊。曲憐不逮。力謂無他。至於跌宕之文。辱在褒稱之域。二百年無此作矣。固難稱慳於獎。知萬戶侯。豈足道哉。私亦激昂於衰懦。然而揣數奇之薄命。懼徒費於鴻鈞。與其度越羣材。留朱雲於東閣。曷若稍捐薄祿。置陶令於北窗。伏望某官仁風翺及物之恩。赫日照覆盆之陋。念前跋胡而後蹇。尾惟當自屏於江湖。方上昭天而下漏泉。忍使獨擠於溝壑。假以毫端之潤。輒其林下之譚。某謹當刻骨戴恩。剝心慕道。誦丹臺之蕊笈。少尉素懷。拜玉局之冰御。用華晚景。

知嚴州謝王丞相啓

故里浮沉竊玉局。再期之祿。公朝杖拭。付桐江千里之民。瓜戍非遙。竹符甚寵。感淪病骨。愧溢衰顏。伏念某元祐黨家。紹興朝士。池魚淺濶。本思自放於江湖。社稷支離。久已難施於斤斧。蘇治生之素拙。因從官以忘歸。頃自吳中。久留劍外。顧彼衣冠之所萃。頗以文字而相從。方深去國之悲。敢有擇交之意。流偶殊於涇渭。風自隔於馬牛。睚眦見憎。本出一朝之忿。排擠盡力。幾如九世之讐。孰是羈孤。孰爲別白。縱免投荒之大罰。亦宜置散以終身。且定遠未歸。惟望玉關之生入。輕車已老。猶護北平之盛秋。豈有朝爲閭閻廢斥之人。暮竊畿輔承宣之寄。茲蓋伏遇某官學窮笑與。勳塞堪輿。南山巖巖。冠公師之重任。赤鳥几几。同宗社之閒休。念人才之實難。悼士氣之不振。挺陶至廣。收拾無遺。方與物以皆春。憫向隅之獨泣。愛和輿論。闊略彝章。起安國於徒中。較恩未大。還管寧於海外。爲力尙輕。而某少非列於通才。晚徒專於僕學。棄雞肋而猶惜。雖仰戴於深仁。續鳧脛則自悲。恐難逃於薄命。

謝梁右相啓

故里投閑。久竊奉祠之祿。清時起廢。遽叨出守之榮。挈於九折之途。置之一飽之地。感深至骨。涕溢交頤。伏念某鄉校孤生。京塵下吏。學徒盡力。徐而察之。則鶴退飛。仕已冥心。非敢後也。而馬不進。頃者南遊七澤。西上三巴。繆見推於文辭。因頗交其秀傑。愛憎遂作。譽毀相乘。肆爲部黨之讒。規勸朝端之聽。雖漸能忍事。聽唾面之自乾。猶競起浮言。至攪髮而莫數。瀕洞風波之上。流離道路之旁。幸逢傲日之中天。固宜潦水之歸壑。矧此江山之郡。介於吳越之間。先世嘗臨。尙有召伯憩棠之愛。提封甚溷。僅同賈臣衣繡之歸。冀爾何堪。居然非稱。此蓋伏遇某官身扶昌運。手幹化鈞。一氣肅魚。咸遂飛潛之性。衆材采楠。各安小

大之宜。俯憐爨下之餘。嘗沐筆端之潤。摧頹雖久。省錄未忘。謂人士舍之則藏。固當慕昔賢顯晦之節。然朝廷養非所用。何以待異時緩急之求。既啓迪於淵衷。遂變和於輿論。而某年齡抵此。意氣蕭然。律召東風。雖幸春回於寒谷。手遮西日。敢希身列於修門。

謝周樞使啓

起由散地。付以名州。朝迹久疎。忽喜長安之近。成期未及。先寬方朔之創。靖言孤蹤。可謂過望。伏念某。竊飄窮巷。土木殘骸。早已孤危。馬一鳴而輒斥。晚尤顛沛。龜六鑄而不成。羽翮摧傷。風波震蕩。薄祿作無窮之祟。虛名結不解之讐。鄙生自謂非狂。甚矣見知之寡。韓愈何恃敢傲。若爲取怒之深。乘下澤之車。忽過半生。掛神武之冠。今無多日。偶然未死。得此少伸。制出西垣。地連右輔。顧視必恭之梓。阡陌相望。封培勿剪之棠。鄉閭太息。此蓋伏遇樞使丞相。學優聖域。道覺民先。卓爾爲衆正之宗。毅然開孤進之路。自太公已久。望子。仰關宗廟之靈。有夷吾可無復憂。盡釋薦紳之慮。方廣求於雋傑。乃首記其姓名。生物功深。奚啻吹律。召東風之妙。回天力大。未覺挾山超北海之難。而某少頗激昂。老猶矍鑠。志士弗忘在溝壑。固當堅馬革裹尸之心。薄福難與成功名。第恐有猿臂不侯之相。

謝黃參政啓

病餘喘分。斲續食於叢祠。望外疏恩。俾牧民於近郡。感深雪涕。漸劇辭顏。伏念某。早歲多艱。晚途益困。岷嶓嶮絕。身行禹貢之書。雲夢蒼茫。口誦楚騷之句。未葬支離之骨。辱招羈旅之魂。八千之路。雖還。五十之年。已過。視荒荒而益廢。髮種種以堪哀。斷港絕潢。徒有朝宗之願。朽株枯木。何施造化之功。雖存溝壑之

餘生已是簪紳之棄物。驚宿愆之盡洗。知孤迹之少安。如絲如綸。命出西垣之潤色。有民有社。地連右輔之封圻。矧復嚴瀨遺祠。桐山故隱。企高風之如在。顧俗狀以自慚。此蓋伏遇參政相公。黼黻皇猷。權衡國是。兼仰規模之大。天知議論之公。謂設廉恥以遇羣臣。士斯自好。且蹈仁義則爲君子。人亦何常。務與惟新。不求其備。某謹當銘膺感德。擢髮思愆。弱羽遶枝。姑低回於晚景。靈丹點藥。儻邂逅於初心。

謝施參政啓

起由散地。畀以專城。命出詞垣。仰戴絲綸之寵。名居節鎮。俯慚章綬之華。偃僂拜恩。譔諱敘感。伏念某薄才綿力。多病早衰。竊慕長者之餘風。每思砥礪未聞君子之大道。徒益顛危。零丁稷下之遊。寂寞漳濱之臥。尚無漂母哀王孫而進食。況有故人憐范叔而贈袍。牛欲覺鐘。誰其弗忍。婦非束緼。何以自還。敢期累年不振之蹤。忽有一旦殊常之遇。光生分表。喜溢情涯。惟茲山水之邦。自昔詩書之俗。脩門在望。曾無日近之嗟。先世嘗隨。獲慰露濡之感。此蓋伏遇參政相公。至仁善下。盛德兼容。一引坐。一解顏。士託終身之重。三吐哺。三握髮。野無片善之遺。賢能借勢以騰騰。孤遠望風而傾屬。自悲蓬梗。獨遠門闌。向使不爲萬里之行。固亦久在諸生之末。誦文章於方冊。竊喜得師。聞道義於萬紳。亦嘗願學。既積精誠之至。果歸甄治之公。旅進無階。歎空馳於清夢。餘年有幾。懼終負於初心。

謝臺諫啓

賁念代耕之祿。懇乞奉祠。恩開使過之門。復令治郡。方窮閭之待盡。非公議而疇依。慚極駢顏。感深雪涕。伏念某遭回薄命。顛頓餘生。肄業荒唐。小學僅通於蒼雅。屬辭卑弱。奇文徒慕於莊騷。髮種種以將童。心

搖搖而欲折。食粥動逾於累月。陳絳或至於隆冬。不能引分以掛冠。廉隅已喪。更復貪榮於懷綬。愧懼可知。況此名城。今爲近輔。九霄嘉氣。日未運於長安。千載遺祠。星嘗從於帝座。孰爲之地。使有此行。蓋伏遇某官偉量海涵。英姿山立。正言云義。急嗷枯仁。允念舊。衆惡之而必察。俯憐久困於風波。今老矣而無能。尙使少紓於溝壑。爲國廣旁求之路。示人無終棄之才。曾是妄庸。曲蒙全護。除書已下。徒叨灑洗之恩。羸疾益侵。無復激昂之日。

謝葛給事啓

杜門訟六十年之非。久安散地。起家忝二千石之重。忽奉明恩。驚覺垢之漸除。扶衰殘而下拜。舍人云。起自窮閭。叨臨近郡。爲農爲圃。三年之次。不治如絲如綸一字之囊。過寵伏念某學由病廢。仕以罪歸。冥心鷓鷯之行。投迹雞豚之社。海三山之縹緲。釣鼈已媿於初心。楚七澤之蒼茫。瘴兕亦成於昨夢。但欲負耒慕許行之學。豈復叩角歌甯戚之詩。偶逢公朝使過之時。躡畀近郡承流之寄。所冀過矣。自揆茫然。天際鬱葱。望九重之雲氣。道周蔽帝。掃四世之棠陰。得遂此行。孰爲之地。此蓋伏遇侍講給事道本文王之正學。師孟氏之醇。騰茂實而蜚英聲。久隆上睹。息邪說而距敵行。遂擅儒宗。方與萬物而皆春。不忍一夫之獨泣。某偶階未契。遂借餘光。舍人云。議論四方之望。文章百世之師。餘跌激水之斗升。窮鱗悉逝。屬藻生靈於膚寸。甘澤無窮。方與萬物而皆春。不忍一夫之獨泣。而某適有懷章之幸。首叨批筆之榮。雖飯豆羹藜。不敢望功名於老大。然書紳銘座。尙思復玷缺之艱難。

答交代陳判院啓

病求玉局。但懷優游卒歲之心。恩昇祠廬。獲繼超軼絕塵之迹。方自嫌於通問。乃遽辱於移書。公真快哉。我則陋矣。伏念某少而落魄。老益迂疎。顛覆關河。萬里客岷嶓之境。馳驅節傳。三年使閩楚之郊。迨此退歸。顏然遲暮。投贖已安於蟹舍。起家忽奉於魚符。此蓋伏遇某官秉節以貫四時。瑞世而翔千仞。經行早推於庠序。謀猷晚著於朝廷。謠誦上聞。豈獨最列城之課。規模甚遠。又足爲來者之師。某偶幸懷章。遂將接武。雖取棄竹馬。望英躡以增慚。然獲舊青氈。在衰門而甚寵。發春伊始。坐獻多閑。願遵輔養之宜。卽慶禁嚴之拜。

嚴州到任謝王丞相啓

懇求祠祿。乃叨使郡之除。甫及戍期。亟奉燕朝之對。身旣復歸於鈞播。衆知未棄於明時。伏念某淺智褊能。薄才綿力。棲遲屏迹。但欲射猛虎以終殘年。辛苦著書。不足藏名山而俟後世。偶爲貧而求仕。旋觸罪以免歸。雁食無儲。鷄衣不補。凡百君子。悠悠非特達之知。平生故人。往往處嫌疑之際。欲言誰聽。投老奚歸。豈期廟堂任使之公。挈出溝壑漂流之地。此蓋伏遇某官孟韓道統。伊呂王功。黼黻聖猷。謂言之不文。則行之不遠。甄陶士類。每捨其所短而取其所長。慨念孤生。已侵暮境。儻使抱所聞而不試。則將齋遺恨於無窮。何止屢陳於斧展之前。蓋亦昌言於搢紳之上。故雖久斥。亦復漸收。而某已知悔童子之雕蟲。未免守古人之糟粕。決無可用寧不自知。續鍾釜之祿。以待掛冠。嘗面祈於大造。効尺寸之勞。而垂汗簡。悵永負於初心。

謝梁右相啓

王局二年已竊代耕之祿。桐廬千里復叨起廢之恩。望辟表之顛昂。撫編氓之繁夥。退惟忝冒。徒積兢慙。伏念某四壁寒家。一簞賤土。刻舟求劍。固匪通材。懲羹吹蠶。已消壯志。比由蟹舍起領魚符。永言久斥之餘。亦有少伸之望。然而察簿領稽違之細。撻吏胥隱伏之微。一皆非其素知。又不可以遽習淵明之寄事。外已迫頽齡。安國之擢徒中。曷勝煩使。此蓋伏遇某官才全經緯。氣塞堪輿。博取衆材。屢抗延英之論。宏開公道。靡須光範之書。施及妄庸。未忘夙昔。溫飽一門之衣食。洗滌累歲之罪愆。使爲全人。以畢餘日。某敢不好是正直。擇乎中庸。戒舞智以賊民。寧取椎魯少文之誚。務盡心於折獄。庶無冤枉失職之嗟。苟不辱知其敢言報。

謝周樞使啓

入望清光。出臨近郡。天威不遠咫尺。旣諧就日之心。父命惟所東西。況被牧民之寄。感恩至矣。揣分茫然。伏念某下愚難移。大惑莫解。不能高飛遠舉。求避橫目之民。乃復直情徑行。自掇噬臍之悔。永言窮薄。數蹈邁回。毀靡待於德高。災非由於福過。斷雲零落。敢懷出岫之心。病鶴攤襪。忽忝乘軒之寵。此蓋伏遇某官道窮寔與。氣塞堪輿。南山之石巖巖。帝資宿望。綈袍之意戀戀。士感誠言。哀細德之嶮微。開鴻鈞之塊。比念茲積穢。雖擢髮而有餘。察彼衆譏。亦吹毛之已甚。未加顯棄。聊復少收。雖不在於英材樂育之中。實創見於薄俗相挺之際。而某扶衰自笑。迫老宜歸。無復入關西日舉釣竿之手。惟希度世東封。謁玉輅之塵。傾倒具陳。慚惶無措。

謝臺諫啓

挂洪景之衣冠。宜還故里。懷賈臣之印綬。尙冒明恩。觸熱卽途。扶衰領郡。伏念某身常短褐。家本衡門。一官惟妻子之謀。萬里極關河之遠。景翳以將入。餘日幾何。芳菲非其彌章。素心空在。比者竊冰銜於玉局。築雲屋於鏡湖。惟俟引年。遂將沒齒。散地方斬於因任。除書忽昇於專城。宮闕中天。有就日望雲之幸。鄉閭接壤。逾過家上冢之榮。此蓋伏遇某官望重朝綱。學通國體。收眞才於水落石出之後。坐銷浮僞之風。察定理於舟行岸移之時。盡黜譏誣之巧。稍收久廢。用示至公。某謹當勉効微勤。堅持素守。吏犯法而法在。先務去奸。政近民則民歸。敢忘用恕。或竊逃於大譴。庶少答於深知。

謝監司啓

挂洪景之衣冠。宜還故里。懷賈臣之印綬。尙冒明恩。觸熱卽途。扶衰領郡。伏念某身常短褐。家本衡門。一官惟妻子之謀。萬里極關河之遠。景翳以將入。餘日幾何。芳菲非其彌章。素心空在。比者竊冰銜於玉局。築雲屋於鏡湖。惟俟引年。遂將沒齒。散地方斬於因任。除書忽昇於專城。宮闕中天。有就日望雲之幸。鄉閭接壤。逾過家上冢之榮。此蓋伏遇某官學貫經邦。望隆國器。繡衣持斧。姑小試於使輶。豹尾屬車。卽超登於禁路。尙容衰頽之迹。暫託澄清之餘。某謹當勉効微勤。堅持素守。吏犯法而法在。先務去奸。政近民則民歸。敢忘用恕。或竊逃於大譴。庶少答於深知。

答方寺丞啓

年運而往。悵久隔於英遊。道阻且長。忽恭承於榮問。情文甚寵。衰晚增光。伏念某笠澤漁家。紹興朝士。捫參歷井。久因客遊。煮海摘山。屢乘使傳。既罪愆之未洗。復衰疾之相乘。骨相宜窮。頭顱可揣。穿延和之細

仗恍若隔生。分新定之左符。更叨起廢。此蓋伏遇某官義存推轂。德重匿瑕。哀其顛頽之百罹。借以揄揚之一諾。遂明共理之寄。亦及歸耕之餘。而某緣病廢書。迫貧隨牒。能古文何用於今世。徒慚長者之見知。居是邦不非其大夫。殊匪小人之所望。佇奉丁寧之誨。用寬瘵曠之虞。

賀王提刑啓

恭審繡衣玉節。肅王畿風憲之嚴。寶畫奎文。新內閣圖書之直。方攬澄清之壺。已騰謠誦之聲。恭惟某官學道愛人。至誠格物。德秉民彝之粹。才推國器之英。中外踐揚。自際風雲之會。始終操履。靡移金石之堅。將階言語侍從之除。洊被禮樂光華之遣。欽恤副九重之指。平反奉一笑之春。始訖外庸。即躋近列。計乘輶之未幾。旋頒詔以趣歸。某意廣才疎。心勞政拙。伏懼志在千里。悵暮景之已侵。巢林不過一枝。幸卑棲之有託。

與汪郎中啓

去蜀歸吳。已侵尋於晚境。乞祠得郡。尚記錄於明時。夙戒行臚。已臨僻邑。方竊依仁之幸。敢稽告至之恭。伏念某笠澤農家。紹興朝士。捫參歷井。久困客遊。煮海摘山。屢乘使傳。旣罪愆之未洗。復衰疾之相乘。骨相宜窮。頭顛可揣。穿延和之細仗。恍若隔生。分新定之左符。更叨起廢。恭惟某官義存推轂。德重匿瑕。哀其顛頽之百罹。借以揄揚之一諾。遂容共理之寄。亦及歸耕之餘。而某扶僮以來。罔功是懼。快景星之先觀。雖尚阻於瞻承。分鄰燭之餘光。遂密依於覆護。其爲慰幸。曷究敷陳。

與沈知府啓

乘傳江皋。偶同一道。分符畿內。復幸鄰邦。公將假道於虞。僕其得御於李。胡交臂而失此。亟削牘而布之。恭惟某官厚德鎮浮。英姿邁往。富貴固有命矣。未嘗枉尺以自謀。將相豈無種哉。方且搏風而直上。雖仰急流之勇退。寧容袖手而旁觀。果奉明綸。起臨近甸。豐年高廩。想謠誦之已聞。燕寢清香。知文書之益簡。願精調於列鼎。卽歸覲於凝旒。瞻詠之私。敷宣曷既。

賀留樞密啓

恭審行玉關之萬里。方喜邁歸。陳秦階之六符。亟聞殊躋。地禁處承明之邃。任崇參宥密之嚴。成命誕揚。師言允穆。切以藝祖鑒五代之弊。不偏重於中書。裕陵新六官之名。亦旁開於西府。豈獨並隆於文武。固將兼注於安危。至以明詔特預於訏謨。尤爲本朝久虛之盛舉。中原多故。首用神忠憲之偉人。聖政方新。則有虞雍公之近事。或名光於竹帛。或位極於廟堂。恭惟某官躬閱深魁。碩之資。負剛大直方之氣。早推雅望。寢歷近班。以至公服小人。故雖疎而不怨。以大節事明主。故旣去而見思。世方譟譟以自營。公固落落而難合。迨此寵光之自至。益知儼險之徒勞。淵乎一心。應彼萬事。七擒七縱。已成服遠之功。三起三留。果有處中之命。方且端委冠鈞衡之位。挽河洗夷虜之塵。復列聖在天之贊。據遺民泣血之憤。某幸身未死。見國中興材館旁招。雖莫陪於下土。涪溪深刻。尙自力於斯文。

賀蔣中丞啓

伏審願膺帝制。進總臺評。公道大開。在廷爲之相賀。正人益進。吾國殆其庶幾。仰惟廟社之休。非復門闥之慶。某聞人情不遠。立朝誰樂於抨彈。仕者自謀。干世本求於遇合。皆使從容而徐進。自非怨嫉之所歸。

一居三院七人之官。遂任四海九州之責。至於諫大夫之助成主德。中執法之振肅朝綱。知不可以不言。言不可以不盡。雷霆在上。獨立自如。鼎鑊當前。直趨不避。始也負當世之名。而人不我捨。今也居得言之地。則責將誰歸。卓乎偉人。更此重任。恭惟某官。英姿邁往。與學造微。論必盡忠。得堪輿剛大之氣。仕常思退。有耕釣高逸之風。位逾達而謙有加。權益隆而量莫測。姑小煩於繩蕭。卽進與於弼諧。豈惟斯民被化。於春風和氣之中。亦使多士吐氣於青天白日之下。今其始矣。幸執甚焉。某嘗辱王翰卜鄰之榮。妄懷貢禹彈冠之喜。崇言欲議。已觀魁磊光信史之傳。過計私憂。妄有一二爲執事之獻。儻少寬於斧鑕。尙嗣布於腹心。

卷第十二

賀賈大諫啓

恭審顯膺一札之放首冠七人之選。主賢臣直。國勢蹙然。言聽諫行。天下幸甚。某聞昔在本朝之官制。參稽前代之舊章。南臺不置大夫。中憲任紀綱之重寄。北省久虛常侍。諫坡率遺補以盡規。選求既艱。畀託尤重。故政在中書。而常開言路。事由獨斷。而不廢爭臣。仰觀十一聖家法之傳。茲爲三百年治功之本。繼昔之盛。非公而誰。恭惟某官。學造精微。器函闊遠。許國弗渝於夷險。憂時如抱於渴飢。造膝告猷。浩浩江河之決。傾心愛士。拳拳涇渭之分。慨然死生禍福不入於中。常若天地鬼神實臨其上。以今日陳善閉邪之效。成異時贊元經體之功。同出此心。夫孰能禦。某侵尋暮景。踰躐孤生。迹本甚疎。妄欲依歸於公道。分

當永棄特蒙杖拭於窮途。何以仰答門闕特達之知。惟有稍陳郡縣利病之實。儻少寬於斧鑕。尙嗣布於腹心。

賀謝殿院啓

恭審顯膺帝制。進貳臺端。手縮衷以逡巡。久已抱獨立無朋之操。髮衝冠而憤切。自茲皆盡言不諱之時。在庭聳觀有識相慶。伏以御史分職。本以論事任耳目之司。忠臣設心。蓋欲去邪爲宗社之福。抗雷霆而獨立。凜山嶽之不搖。非以近名。固將竭節。天子爲之改容而垂聽。大臣不敢持必而自私。國有紀綱。治自形於四海九州之遠。士篤名義。效或見於數世百年之餘。今茲孰配於古人。識者固歸於門下。恭惟某官道德醇備。議論正堅。灰寒木槁。而譽益高。鯁擊鵬搏。而才乃見。默究朝廷之利病。盡得源流。徐觀天下之是非。若指白黑。放斥者有愧心。而無怨。更革者雖害己。而謂然。太平之功。指日可待。某僥尋暮景。蹭蹬孤生。迹本甚疎。妄欲依歸於公道。分當永棄。特蒙杖拭於窮途。何以仰答一見特達之知。惟有稍陳千里利病之實。儻少寬於斧鑕。尙嗣布於腹心。

賀周丞相啓

恭審夢卜襲祥。揚王庭而渙號。典冊備物。熙帝載以宅師。國其庶幾。民以寧登。實惟宗社無疆之祐。非復門闕旅賀之常。竊以時玩久安。輒生天下之患。國無遠略。必有意外之虞。方今風俗未淳。名節弗勵。仁聖焦勞於上。而士夫無宿道嚮方之實。法度修明於內。而郡縣無赴功趨事之風。邊防寢弛於通和。民力坐窮於列戍。每靜觀於大勢。懼難待於非常。至若靖康喪亂。而遺平城之憂。紹興權宜。而蒙渭橋之恥。高廟

有盜環之通寇。乾陵有斧柏之逆僭。江淮一隅。夫豈仗衝久留之地。梁益萬里。未開腹心不貳之臣。文恬武嬉。戈朽鉞鈍。謂宜博采衆謀之同異。然後上咨廟論之崇嚴。非素望之偉然。誰出身而任此。恭惟某官降神維嶽。生德自天。居安資深。學洞六經之韞。探蹟索隱。識窮萬務之微。蓋嘗獨立以當雷霆。何止貴名之揭日月。運籌帷幄。每當上心。端委廟堂。遂持國柄。玉燭肇時和之慶。雲龍協聖作之辰。清未中央樂之宮。將肅六飛之御。築碣石榆林之塞。永奠四夷之封。於古有光。自今以始。某側聞盛舉。實抃歡聲。惟百口之飢寒。豈無竊覲。披四方之英俊。願付至公。庶未死之餘生。覩太平之盛際。

賀施知院啓

恭審誕布明綸。進專籌幄。用真儒而無敵。翊扶宗社之基。得大老以來歸。開慰華夷之望。恭惟某官英委邁往。精識造微。居安資深。韜六藝淵源之學。任重道遠。炳兩朝開濟之心。明辯足以折遐衝。果敢足以斷幾事。自初拔用。迄此延登。大節全名。松柏挺歲寒之操。同心一德。風雲協聖作之期。堪輿清夷。星緯明潤。致太平其自此。將魁柄之焉歸。難暫入於脩門。竊有聞於行路。謂明公之得政。以人物爲最先。自隆師尹。南山之隴。復見平津東閣之盛。揚庭薦拔。造膝開陳。凡人所難。以身獨任。今雖總本兵之地。願益尸善類之盟。公能以士而報國家。士亦以身而歸門下。某侵尋暮境。顛頓偏州。志氣已衰。無復獻狗盜雞鳴之技。文辭自力。尙能助裨官野史之傳。過此以還。未知所措。

賀丘運使啓

恭審上印帥藩。乘輅畿甸。得人若是。則吾國其庶幾乎。先聲隱然。非俗吏之所能也。公論爲之。慰懼大用。

此其權輿。伏以寬猛異施。古今莫一。子產號衆人之母。用於鄭而弗救。陵夷申商爲法家者流。弊至秦而卒。以類覆。歷考簡編之跡。莫先儒術之功。惟蹈君子之時中。斯得古人之大體。方其尊瞻視。正顏色。教化固已有成。雖使空罔。晝夜冠法。令其誰敢犯。恭惟某官。英姿邁往。敏學造微。夷途早踐於高華。隆委偏當於繁劇。所臨輒治。雖千變萬化而不窮。自守弗阿。終特立獨行之如此。上將引而自近。公其有以告猷。某早陪談燕之餘。誤辱賞知之異。敢圖幕境。獲備屬城。閭里亡聊。每攬涕下。催科之筆。事功靡著。更忍懸修候問之賤。尙加惠於始終。俾羸全於進退。歸依之切。敷釋奚殫。

賀蔣尙書出知婺州啓

恭審解中執法以暫均勞佚。拜大宗伯而入侍禁嚴。雖若不得其言。固亦未爲弗用。乃抗投閑之請。力斲就養之榮。詔諭靡從。藩條初布。上倚承宣之績。士高廉退之風。恭惟某官。直哉惟清。淵乎似道。懇款許國。肝膽凜其輪囷。慷慨疾邪。山嶽爲之震動。進率由於獨斷。節早見於盡言。未移桑蔭之淹。入總柏臺之峻。國方增九鼎之重。身已如一葉之輕。魯人獲麟以爲不祥。雖愛憎之叵測。塞翁失馬未必非福。抑倚伏之何常。某幸託里門。獲趨賓席。身世等蒯菅之棄。孰閱餘生。姓名託甄冶之公。尙須異日。

除直華文閣謝丞相啓

秩視大蓬。已竊垂車之寵。恩加蓬閣。更叨出綬之榮。初聞道路之傳。猶謂姓名之誤。迨茲被命。重以懷慚。伏念某承學迂疎。稟資蕞陋。幼生京洛。尙爲全盛之編氓。長綴班聯。曾是中興之朝士。福未容於盈管。崇已駭於燒城。西征至岐鳳之間。南成掠甌閩之境。晚僅升於省闈。旋卽運於鄉關。鶴歸遼天。狐死丘首。蓬

戶十移於歲律。幔亭四闕於祠宮。久遂屏居。非始挂冠之日。盡捐半俸。真爲納祿之人。豈期垂盡之光陰。忽玷殊常之惠澤。復緣詔札。併竊身章。里巷聳觀。共仰恩光之下燭。兒孫扶拜。不知衰涕之橫流。茲蓋伏遇某官降命。應期奮庸。熙載神無方易。無體心獨運於道樞。尺有短寸。有長士悉歸於鈞播。雖迫崦嵫之景。亦歸塊土之公。而某意氣空存。筋骸已憊。草具明堂辟雍之禮。雖遭甚盛之時。塗竄清廟生民之詩。其在方來之雋。

修史謝丞相啓

七十告老。暫待盡於山林。尺一召還。恍復瞻於觀闕。內祠祿厚。信史事嚴。容孤迹於其間。知鴻鈞之有自。恭以高皇之盛德。大業雖號中興。而實同開創之難。孝廟之內修。外攘躬享太平。而不忘恢復之志。治蹟古昔。威震裔夷。俄屬鼎成之悲。肆修麟止之緒。固已網羅軼事。潤色皇猷。備述巍巍蕩蕩之功。曲盡業業兢兢之指。豈繫遲暮。能與討論。伏念某天予散材。家承孤學。生逢盛旦。蒙六聖之涵濡。身綴清班。被四朝之譏拔。常恐倏先於朝露。遂將莫報於秋毫。豈期及耄之餘齡。猥得効勤於大典。茲蓋伏遇某官材全經緯。氣塞堦輿。平生陳謨決策之言。煥乎可誦。十載知人安民之績。底於有成。殊鄰款塞。而奉琛。多士鄉風。而釋羈。內而臺閣。極稽古禮文之選。外而郡縣。有宜民愷悌之風。肇闢大公至正之途。不棄偏能一曲之士。故如某輩。亦在數中。謹當益黃見聞。更勤采賸。老驥伏櫪。脩途已非其所堪。小草出山。薄効尙期於自見。

賀謝丞相除少保啓

恭審命出淵衷。廷揚顯冊。人主之論一相。方寄腹心。少保茲爲三公。益隆體貌。傳聞所逮。驩頌惟均。恭以某官謨明弼諧。任重道遠。協天心於崑崙。勞勩之際。動必有成。隆主眷於螭螭。變濩之中。言無不用。自登近輔。允迪大猷。疇咨雖首於羣公。謙畏不殊於一日。每稽首而遜稷契。終選衆而舉伊臯。三年有成。四海用乂。農扈告豐。登之候。戎韜臻。偃息之期。熙運方興。周召並爲於師保。衆心所繫。平勃均任於安危。是宜大號之繼敷。昭示元臣之同體。羣生成遂。協氣橫流。謹乃憲而屢省。則成孰測化鈞之妙。本無事而庸人實擾。始知靜治之功。某獲綴清班。欣逢盛事。無好無惡。而遵王路。共欣聖政之大成。不愆不忘。而由舊章。更冀廟謨之無倦。敢効涓塵之助。輒干礎斧之誅。冒瀆實深。兢惶罔措。

賀張參政修史啓

恭審誕布明綸。總提鉅典。固已動鷓鷯行之喜色。而況在牛馬走之後塵。不能自己於寸誠。是敢冒陳於尺牘。恭惟某官自天生德。降命應期。闡溫厚爾雅之文。經緯萬象。蘊超軼絕塵之識。鎮撫四夷。位居台鼎。而有山澤清臞之容。禮絕摺紳。而無王公駢泰之意。心虛靜而觀復。道冲用而不盈。周公太公。方隆夾輔之望。堯典舜典。更專點竄之功。實以衰衣黃閣之尊。下兼蘭臺石室之事。在天三后。巍乎下臨。作宋一經。信矣無憾。某偶蒙簡拔。獲預討論。已侵投老之殘年。何補不刊之信史。仰傳巖之霖雨。幸預在廷。歸杜曲之桑麻。尙勞泚筆。想典刑於諸老。已媿空疎。竭精力於是書。敢忘策勵。

除寶謨閣待制謝丞相啓

册府秩清。偶至鼇峯之頂。禁途地密。遂穿豹尾之中。雖造化之至公。實恩憐之曲被。欲敝丹衷之感。莫知

雪涕之橫。伏念某雖起耕疇。盛傳家學。書藏屋壁。尚擻斥而不容。跡遜園廬。豈榮華之敢望。虛名作祟。聚
勝成雷。幸於先狗馬塞溝壑之前。遂其賜骸骨歸卒伍之請。任子以世其祿。寓直以華其行。固已負未學
耕飾巾待盡。身遠民服。口誦農書。從故里漁樵之遊。拜高年羊酒之賜。忽從廢置。遂奉詔除。所愧忝大門
之官。敢竟奪匹夫之志。惟俟奏篇之御。卽伸告老之誠。簡牘未終。絲綸已降。半生淹泊。沉舟真閱於千帆。
一旦遭逢。開印適當於三日。已扶衰而拜命。旋曳蹇以造庭。茲蓋伏遇某官德懋忱恂。化均塊壤。作成土
類。兼小大而不遺。勸相皇家。浪異同於無迹。澤東漸而西被。功上際而下蟠。才或取於寸長。罪不捐於一
眚。故雖么麼。亦被生成。某敢不頂踵知恩。冰霜勵節。少不自力。坐沉廢者半生。老當告休。悵報酬之無地。

謝費樞密啓

猥被恩綸。躡持從窳處內閣。諷咨之地。繼大門揚歷之榮。揣分奚堪。置慚靡所。伏念某百罹薄命。九折窮
途。迹久困於多言。年已侵於大耋。都門屢入。壯遊恍似於前身。冊府再來。衆吏多非其舊。識扶衰殘而就
列。刮賢曠以紉書。非徒莫揜於旁觀。每亦不勝其自媿。惟埃奏篇之御。卽伸請老之誠。敢謂遭逢。曲蒙
拔。茲蓋伏遇某官道尊皇極。學統聖傳。雖吐哺握髮之勞。曾靡遺於一士。然引坐解顏之遇。願豈在於他
人。每屈崇嚴。不移疇昔。爰自東壁圖書之府。俾躋西清鸞鷲之班。驥伏櫪以悲鳴。羆誰念者。犬砥丹而仙
去。今乃似之。某燈火尙親。箠瓢未厭。修世官而不墜。益體上恩。繼家學於淺衰。或傳來裔。庶幾瞑目無愧
初心。

致仕謝丞相啓

優詔許歸。已荷乾坤之造。異恩及幼。更霑雨露之私。非公台力假於敷陳。則草野何從而甄錄。感銘刻骨。涕泗交頤。伏念某。少乏通材。晚嬰羸疾。史闈八月。常懷惕白之慚。祠祿三時。滂上引年之請。初但虞於頹瀆。旋曲被於矜從。而況從中。明降於德音。任子特逾於常制。桑榆已迫。俾華垂白之年。豚犬何能。遽有拾青之幸。里閭歎息。門戶敷榮。茲蓋伏遇某官。降命應期。奮庸熙載。告猷於內。時已措於太平。祝鯁在前。禮每加於諸老。疊疊誠明之學。巍巍忠厚之風。坐格華裔之寧。有光簡冊之載。故推餘澤。俯及衰門。重念穉兒。雖非異稟。善和之書。幸在敢虛。棄於光陰。太常之第。可收尙仰。酬於長育。

答權提刑啓

伏審抗章請外。攬轡入東。謂宜因對而復留。故欲馳書而未敢。遽先垂問。莫喻愧心。恭惟某官。英識造微。宏材經遠。學術得前。言往行之要。議論有羣公先正之風。踐揚早歷於清華。雖能自見。寄任靡辭於叢委。刃每有餘。茲乃勇退。急流旁觀。袖手明刑。以弼五教。誦詩而使四方。雖暫試於外庸。願豈符於僉囑。還節施於少府。行被詔追。司筆藁於甘泉。孰居公右。某退依耕隴。密邇臺綱。躬豈弟以宜民。既蒙賜矣。用春秋而決獄。行且見之。頌詠惟深。敷陳罔既。

答胡吉州啓

伏以累疏乞歸。既拜賜骸之命。華旆贊喜。更煩泚筆之勞。異書憐老學之勤。厚幣篤嘉賓之禮。願惟衰悴。曷稱眷私。伏惟某官。絕識超然。英聲藉甚。簡編插架。早推師友之淵源。紳佩在廷。旋慶君臣之際遇。茲暫煩於共理。卽歸告於嘉猷。而某已返農疇。愈賒門戟。噓枯甚寵。徒藏櫝以爲榮。詠德雖深。愧占辭之莫既。

卷第十三

代二府與夏國主書癸未正月二十一日二府請至都堂奏

隆興元年正月二十二日特進尙書左僕射同中書門下平章事兼樞密使信國公陳康伯等謹致書夏國主殿下。昔我祖宗與夏世修盟好。豈惟當無事時。共享安平之福。亦惟緩急同休戚。恤裁患。相與爲無窮之託。中更變故。壤地阻絕。雖玉帛之聘。弗克往來。然朝廷未嘗忘祖宗之志也。乃者皇天悔禍。輿圖寔歸。會今天子紹登寶位。慨然西顧。宣諭大臣曰。夏二百年與國也。豈其不念舊好而忘齊盟哉。某等恭以國主英武聰哲。聞於天下。是敢輒布腹心於執事。願留神圖之。惠以報意。當告於上。議所以申固歡好者。同心協慮。義均一家。永爲善鄰。傳之萬世。豈不美歟。有少幣儀。具如別幅。伏惟炤察。不宣。某等謹白。

貼黃前件事。宜臣等雖已面陳。緣利害至大陸下。反覆看覽。故敢出具此奏。

上執政書辛巳四月。

某官閣下文人之在天下。用之。徒以爲治世之觀。大平之飾。不用。則亦已耳。非如兵刑錢穀之吏。不可一日無也。然爲國者。每每收取。不忍棄去。豈固爲是不急哉。蓋天下之事。惟此爲最難。非誠好之。捐三二十年之勤。耗心疲力。彫瘁齒髮。飲食寢夢。悲歎得喪。一在於是者。殆未易可以言工。信工矣。然且高不足以爲功名。下不足以得財利。塵編蠶繭。束而藏之。幸世有知此道者。歎息稱工。嗚呼。可謂鈍哉。以天下之至勤苦。爲天下之至鈍。待千萬中一二人之知。此賢公卿以人物爲己任者。所以不忍棄也。某小人生無他

長。不幸束髮有文字之惑。自上世遺文。先秦古書。晝讀夜思。開山破荒。以求聖賢致意處。雖才識淺闇。不能如古人迎見逆決。然譬於農夫之辨菽麥。蓋亦專且久矣。原委如是。派別如是。機杼如是。邊幅如是。自六經左氏離騷以來。歷歷分明。皆可指數。不附不絕。不誣不紊。正有出於奇舊。或以爲新。橫驚別驅。層出間見。每考觀文詞之變。見其雅正。則纓冠肅衽。如對王公大人。得其怪奇。則脫帽大叫。如魚龍之陳前鼻。盧之方勝也。間輒自笑曰。以此娛憂。舒悲忘其貧病。則可耳。持以語人。幾何其不笑且罵哉。誠不自意。諸公聞之。或以爲可。書生所遭如此。雖窮死足以無憾矣。然師墓下風而未得一望履。烏此心歉然。不敢違。寧恭惟明公道德風節。師表一世。當功名富貴之會而不矜。踐山林鐘鼎之異而不變。非大有得於胸中。其何以能此。夫文章小技耳。然與至道同一關捩。惟天下有道者。乃能盡文章之妙。此某所以忘其賤且愚。而願有聞於左右也。

上虞丞相書

某聞才而見任。功而見錄。天下以爲當。君子曰。是管仲相齊。衛鞅相秦之法耳。有人於此。才不足任。功不足錄。直以窮故哀之。天下且以爲過。君子則曰。是三代之俗。周公孔子之政也。何也。彼有才。吾賴其才。因以高位處之。彼有功。吾藉其功。因以厚祿報之。上持祿與位以御其下。下挾才與功以望其上。非市道乎。故齊秦用之。雖足濟一時之急。而俗以大壞。君子羞稱焉。若夫三代之俗。周公孔子之政。則不然。無才也。無功也。是直無所用也。無所用之人。雖窮而死者。百千輩。何損於人之國哉。自薄者視之。尚奚恤。君子顧深哀之。視其窮。若自我推以與之。之不敢安也。矜憐撫摩。衣之食之。曰。彼有才。有功者。何適而不遇。吾所

急者其惟無所用而窮者乎。此心父母也。推父母之心。以及於天下無所用之人。非聖賢孰能哉。謂之三代之俗。周公孔子之政。則宜。故王霸之分。常在於用心之薄厚。而昧者不知也。恭惟大丞相道學精深。力量廣大。庶幾以周公孔子之政。而復三代之俗者。渾渾巍巍。不可窺測。平時挾功恃才。錙銖較計者。皆自失退聽。若某之愚。不才無功。留落十年。乖隔萬里。而終未敢自默。特曰。身之窮。大丞相所宜哀耳。某行年四十。有八家世山陰。以貧悴。逐祿於甕。其行也。故時交友。疎緡錢以遺之。峽中俸薄。某食指以百數。距受代不數月。行李蕭然。固不能歸。歸又無所得食。一日祿不繼。則無策矣。兒年三十。女二十。婚嫁尚未敢言也。某而不爲窮。則是天下無窮人。伏惟少賜動心。指一官以祿之。使粗可活。甚則使可具裝以歸。又望外則使可舉一二婚嫁。不賴其才。不藉其功。直以其窮可哀而已。此氣象。自秦以來。世以功利相高。沒不見者。累二千年。今始見於門下。所願持之不搖。行之不疑。則豈獨某之幸哉。

上辛給事書

某官閣下。君子之有文也。如日月之明。金石之聲。江海之濤瀾。虎豹之炳蔚。必有是實。乃有是文。夫心之所養。發而爲言。言之所發。比而成文。人之邪正。至觀其文。則盡矣。決矣。不可復隱矣。燭火不能爲日月之明。瓦釜不能爲金石之聲。潢汗不能爲江海之濤瀾。犬羊不能爲虎豹之炳蔚。而或謂庸人能以浮文眩世。烏有此理也哉。使誠有之。則所可眩者。亦庸人耳。某聞前輩以文知人。非必鉅篇大筆。苦心致力之詞也。殘章斷葉。憤譏戲笑。所以娛憂而舒悲者。皆足知之。甚至於郵傳之題詠。親戚之書牘。軍旅官府倉卒之間。符檄書判。類皆可以洞見其人之心術才能。與夫平生窮達壽夭。前知逆決。毫芒不失。如對蒹桴而

指白黑如觀人面而見其目衡鼻縱不待思慮搜索而後得也。何其妙哉。故善觀晁錯者不必待東市之誅。然後知其刻深之殺身。善觀平津侯者不必待淮南之謀。然後知其阿諛之易與。方發策決科時。其平生事業已可望而知之矣。賢者之所養。動天地開金石。其胸中之妙。充實洋溢。而後發見於外。氣全力餘。中正闊博。是豈可容一毫之僞於其間哉。某束髮好文。才短識近。不足以望作者之藩籬。然知文之不容僞也。故務重其身而養其氣。貧賤流落。何所不有。而自信愈篤。自守愈堅。每以其全自養。以其餘見之於文。文愈自喜。愈不合於世。夫欲以此求合於世。某則愚矣。而世遂謂某終無所合。某亦不敢謂其言爲智也。恭惟閣下以臯陶之謨。周公之誥。清廟生民之詩。啓迪人主而師表學者。雖鄉殊壤絕。百世之下。猶將想望而師尊焉。某近在屬部。而不能承下風。望餘光。則是自絕於賢人君子之域矣。雖然。非敢以文之工拙爲言也。某心之爲邪爲正。庶幾閣下一讀其文而盡得之。唐人有曰。士之致遠。先器識而後文藝。是不得爲知文者。天下豈有器識卑陋。而文詞超然者哉。狂率冒犯。死有餘罪。

答邢司戶書

五月二十六日。笠澤陸某頓首再拜。復書司戶迪功足下。某辱賜書。及聖人之道與古作者之文章。又以世之稱師弟子。而徒事科舉。求利祿者爲羞。卓乎偉哉。非某所敢仰望萬一也。某少之日。學文而不工。及其老。妄意於道。亦未敢謂得也。身且弗給。而何以及人。及庸衆人且弗能。其況有以助足下乎。惶恐惶恐。雖然。足下顧我厚。某其敢有所弗盡。吾曹有衣食祭祀婚嫁之累。則出而求祿。恐未爲非。既不免求祿。則從事於科舉。恐亦未爲可憾。科舉之文。固亦尊王而賤霸。推明六藝而誦說古今。雖小出入。要其歸亦何

負於道哉。若言之而弗踐。區區於口耳。而不自得於心。則非獨科舉之文爲無益也。近時頗有不利場屋者。退而組織古語。剝裂奇字。大書深刻。以眩世俗。考其實。更出科舉下遠甚。讀之使人面熱。足下謂此等果可言文章乎。尙不可欺。僕輩安能欺足下哉。故自科舉取士以來。如唐韓氏。柳氏。吾宋歐氏。王氏。蘇氏。以文章擅天下者。莫非科舉之士也。此無他。徒以在場屋時。苦心耗力。凡陳言淺說之可病者。已知厭棄。如都市之玉工。珉玉雜治。積日既久。望而識之矣。一旦取荆山之璞。以爲黃琮蒼璧。萬乘之寶。珉其可復欺邪。凡今不利場屋而名古之文者。往往多未嘗識珉者也。又安知玉哉。乃如足下識之可謂精矣。當棄珉剖玉而已。至於聖人之道。足下往昔朝夕所講習者。豈外於是言之而必踐焉。心之而不徒口耳焉。無餘道矣。某文既不工。聞道又甚淺。則今所以進於左右者。其果近乎。一讀置之。無重吾過。不宜。

答劉主簿書

某才質愚下。又兒童之歲。遭罹多故。奔走避兵。得近文字最晚。年幾二十。始發憤欲爲古學。然方是時。無師友淵源之益。凡古人用心處。無所質問。大率以意度。或中或否。或始疑其非。終乃大信。或初甚好之。已而徐覺不可者多矣。然亦竟不知所謂是。且非者卒何如也。方竊媿歎。不意如足下學術文章。足以雄長一世者。乃不鄙其愚。而欲與之交。惠然見臨。賜之以言。以爲可與言古學者。文詞偉麗。讀之惕然。夫道遇乞人。責之千金。足下固過矣。然遂謂足下爲非。則不可。往者前輩之學。積小以成大。以所有易所無。以能問於不能。故其久也。汪洋浩博。該極百家。而不可涯涘。如足下所稱諸公。蓋皆如是也。至中原喪亂。諸名勝渡江。去前輩尙未甚遠。故此風猶不墜。不幸三二十年來。士自爲哇眇甚狹。己所未知者。輒訕薄之。

以爲不足學。排抑沮折。惟恐不力。詆窮經者。則曰傳註已盡矣。詆博學者。則曰不知無害爲君子。嗚呼。陋哉。夫世既未有仁智之足如孔孟而師焉。則亦各出所長。相與講習。從其可者。去其不可者。自六經百氏。歷代史記。與夫文詞議論。禮樂耕戰。鐘律星曆。官名地志。氏族物類之學。今四方之士。亦不可謂無人。雖不能兼該衆長。要爲各有所得。往往皆捐數十年之功。耗心疲力。彫頰齒髮而爲之。豈可易哉。如足下之所已得者。某願就學焉。其未者。願願與足下從諸君子。歷探其所有。足下亦宜盡發所淳蓄。以與朋友共之。某所聞誠最淺薄。亦願再拜以進。惟足下與諸君子之所決擇。使前輩風俗。由吾輩復少振。而狹陋之病。不遂沉痼。豈細事哉。屬兩目苦眩。未得面陳。而先以書布謝。惶恐惶恐。

與尉論捕盜書

某昨暮聞以逐盜遽出。雖小事。亦有難處置者。此十許人皆負重辟。相與竄伏山林中。昏夜伺便。小劫比官知之。則已分散跳匿。無次舍旗鼓。可以物色求。無編裨部伍。可以策畫破。無糧可燒。無巢穴可窮。驟集忽散。如鬼物然。又實小盜。官兵計其不能爲甚害。所以久不獲也。今未言能萬一。朝至大盜。但無辜之民。時時遭劫。亦不可云細事。方其劫時。執縛恐迫。計民之冤。與遭大盜。亦有何異。今日偶見一退卒說此事。頗若可采。不敢效庸人以非職事故。默默不以告卒。言此十許人雖出沒合散不常。似難遽獲。然晝必食。夜必息。得金帛必賣。劫掠往來。至近亦須行四五里。豈有都無一人見之之理。蓋自頃民言見賊。官輒意其與賊通。捕繫笞掠。久之無所得。始釋去。是官自塞耳目。爲賊計則多。爲捕賊計則疎矣。一二年來。民間懲創此事。雖與賊交臂而過。歸家嚙默。不敢以語比鄰。而況於告官乎。故官兵動息。賊皆先知。而賊雖近

在十步內。官兵終不得知。某思其言。實中事情。亦嘗竊度之。環三縣弓手土兵。爲人幾何。逐捕十許賊。連歲弗獲。不可不思其故也。四境無事。秋稼如雲。誰肯爲賊囊橐者。縱有。亦不應人人皆然。吾輩儒者。當有大略。願足下曠然無疑於胸中。不當效武夫俗吏。但知守故常也。夫戰而獻賊。自三代以來用之。不可謂非古。然近世至賊殺平人。以爲功。靖康建炎間。不勝其弊。始更制。凱還勿獻賊。使將校列上功最而已。由是妄殺之禍。十去八九。然則三代聖人之遺法。尙可改以省事。而況近歲。妄庸者所爲乎。自今有言見盜者。當一切慰藉遣去。卽度其不妄。或纔有補。則又稍旌別之。雖目前未得力。但使人人敢言見賊。賊蹤跡益露。勢益窮蹙。遠不過數月。獲矣。足下試熟策之。秋暑野次自愛。

答陸伯政上舍書

九月六日。某再拜復書伯政學士宗友兄閣下。卽日初寒。伏惟尊候萬福。春中蒙見顧。衰疾無聊。不得款承。絕塵邁往之論。至今悒悒。忽賢郎上舍攜所貺書及新詩來。已深開慰。又得雜著詩文一編。置百事讀之。所以開益。殆非一端。古聲不作久矣。所謂詩者。遂成小技。詩者果可謂之小技乎。學不通天人。行不能無愧於俯仰。果可以言詩乎。僕紹興末。在朝路。偶與同舍二三君。至太一宮。聞中有高士齋。皆名山高逸之士。欣然訪之。則皆扁戶出矣。裴回老松流水之間。久之。一丫髻童負琴引鶴而來。風致甚高。吾輩相與言曰。不得見高士。得見此童。亦足矣。及揖而問之。則曰。今日董御藥生日。高士皆相率往獻香矣。吾輩遂一笑而去。今世之以詩自許者。大抵多太一高士之流也。不見笑於人。幾希矣。而望其有陶淵明杜子美之餘風。果可得乎。雜文數篇。多甲寅以來所著。言論風旨。皆非同乎俗合乎世者。與平甫書用意尤至。則

石守道李泰伯氣格相上下。而師友淵源。未可以望吾伯政也。然所以告平甫者。尚恐有所含蓄。不欲盡發。此非面莫究。昨日兒子自城中來。知方伯嘗已卒。天乎。有是哉。計老兄亦同此哀也。賢子表表超絕。當爲名士。不止取科第而已。奉爲宗家。贊喜無已。黃精奇妙。感激千萬。匆匆不旣所欲言者。亦坐老體耳。漸寒珍重珍重。

答王樵秀才書

十一月二日。山陰陸某再拜復書。先輩足下。貢舉之法。擇進士入官者爲考試官。官以考試名。當日夜專心致志。以去取士。不可兼蒞他事。則又爲設一官。謂之監試。監試。官不復擇。蓋夫人而可爲也。甚至法吏流外。平日不與清流齒者。亦得爲之。故又設法曰。監試。毋輒與考校。則所以待監試可知矣。某鄉佐洪州。適科舉歲。當以七月到官。遂泊舟星子灣。幾月。聞已鎖院。不敢進。非獨畏監試事煩實亦羞爲之。今年在夔府。府以四月試。試前嘗白府帥。願得移疾。已見許矣。會部使者難之。某驚弱。畏以避事得罪。遂罷勉入院。某與諸試官皆不相識。惴惴恐其以侵官犯律。令見詬。自命題至揭榜。未嘗敢一語及之。不但不與也。間偶見程文。一二可愛者。往往遭塗抹疵詆。令人氣湧如山。然歸臥室中。財能向壁歎息。蓋再三熟計。雖復強聒。彼護短者決不可回。但取詬耳。若可回。雖詬固不避也。如足下之文。又不止可愛。誠可敬且畏者。而一旦以疑黜。此豈獨足下不能無言。雖試官與拔解諸人。亦噴噴稱屈。某至是直欲以蠱官不與者。試自恕。其可乎。將因紹介再拜請罪於門牆。而未敢也。不圖足下容之察之。更辱賜書。講佐朋友之好。而以前者不能無言爲悔。方是時。使足下遂能無言。固大善。然士以功名自許。非得一官。則功名不可致。雖

決當黜。尙悵不能已。況以疑黜乎。某往在朝。見達官貴人免去。不憂沮者蓋寡。彼已貴。雖免。貴固在其所失。孰與足下多。然猶如此。今乃責足下以不少動心。亦非人情矣。前輩有錢希白。少時試開封。得第二。希白豪邁。自謂當第一。乃詣闕上書。詆主司。當時不以爲大過。希白卒爲名臣。夫科舉得失。爲重。高下細事耳。希白不能忍其細。而責足下默默於其重者。可不可邪。是皆已往事。不足復言。區區仰歎足下才氣。思有以奉廣。故詳及之。某吳人。凡吳之陸。皆同譜。所謂四十九枝譜是也。如龍圖公。雖差遠。顧尙可紀。則於足下。亦有瓜葛。蒙教篇。尤感。且暮詣見。先此爲謝。

卷第十四

容齋燕集詩序

廖宣仲葺其燕居之室曰容齋。既成。置酒落之。舉觴屬客曰。吾聞東郭順子之爲人。人貌而大。清而容物。吾雖不能。而竊慕焉。諸君以爲何如。或曰。方公盛壯時。以郡文學高第入爲博士。公卿盡傾名流。彥士執贄求見者。肩摩而袂屬。車騎雍容。行者趨避。議論英發。聞者傾聽。傲色不至於目。嫺言不接於耳。方是時。容物固無甚難也。及轉徙江湖。白首下吏。舍於邸者。爭席。過於途者。相誰何。則公之容固難矣。至於羅口語。挂吏議。少年之喜謗。前輩者。闕然成市。公猶容之。則豈不甚難哉。敢問所以能此者何也。宣仲笑曰。是亦有道焉。可容者。吾以其情容之。不可容者。吾以其人容之。故吾遇客而驩然。遇酒而醺然。遇怒罵。如風葉之過吾前。候蟲之鳴吾旁也。子欲聞其說乎。方子之飲酒也。俳諧者箕踞。角觥者裸裎。子何以不

怒豈不以其爲此者非媿耶。此吾所謂以其情容之也。世有服讒蒐慝。習於爲惡。勇於爲不義者。誠若可疾矣。吾則徐思之曰。彼君子邪。固不至此。彼小人邪。此固小人之常。而吾以動心。則去彼亦無幾何耳。此又吾所謂以其人容之也。二者可容。何所不容。而子獨何怪於是。坐客媿且歎曰。吾儕誠小人哉。某在衆人中。尤號褊率。蓋屢歎也。酒酣。客皆賦詩。而屬某爲敘。旣不得辭。則因以識其媿。將覽觀之。以自儆焉。

京口唱和序

隆興二年閏十一月壬申。許昌韓無咎以新番陽守來省太夫人於潤。方是時。予爲通判郡事。與無咎別蓋逾年矣。相與道舊故。問朋遊。覽觀江山。舉酒相屬。甚樂。明年改元乾道。正月辛亥。無咎以考功郎徵。念別有日。乃益相與遊。遊之日。未嘗不更相和答。道羣居之樂。致離闕之思。念人事之無常。悼吾生之不留。又丁寧相戒。以窮達死生毋相忘之意。其詞多宛轉深切。讀之動人。嗚呼。風俗日壞。朋友道缺。士之相與如吾二人者。亦鮮矣。凡與無咎相從者六十日。而歌詩合三十篇。然此特其略也。或至於酒酣耳熱。落筆如風雨。好事者從旁掣去。他日或流傳樂府。或見於僧窗驛壁。恍然不復省識者。蓋又不可計也。潤當淮江之衝。予老益厭事。思自放於山巔水涯。與世相忘。而無咎又方用於朝。其勢未能遽合。則今日之樂。豈不甚可貴哉。予文雖不足與無咎並。傳要不當以此廢而不錄也。二月庚辰。笠澤陸某務觀序。

送關漕詩序

李固杜喬臧洪之死。士以同死爲榮。范文正之貶。士以不同貶爲恥。今著作之免歸也。御史以風聞言之。天子以無心聽之。與前事固大異。而坐客賦詩或危之何也。風俗異也。某旣列名衆詩之次。又承命作序。

二罪當併按矣。乾道六年十二月七日。笠澤陸某序。

雲安集序

濟南治歷城。漢故縣也。帶灤水而表歷山。其山川雜見於春秋。孟子史記諸書。舜之遺迹。蓋至於今可考。士生其間。多通儒名。卿秀傑之士。而以筆墨馳驚相高。往往多清麗雄放警絕之詞。與山川稱。若今夔府。連帥王公是已。公自少時。寓祕閣。直晚由尙書郎。長三院御史。出牧於夔。實督陝中十五郡。資忠厚。故政令簡。心樂易。故民夷親。乃因暇日。登臨矚望。徘徊太息。弔丞相之遺祠。想拾遺之高風。醉墨淋漓。放肆縱橫。實爲一代傑作。願夔雖號大府。而荒絕瘴癘。戶口寡少。曾不敵中州一下郡。如某輩又以憂患留落。九死之餘。才盡志衰。欲強追逐。公後而不可得。向使公當承平時。爲并爲雍。爲鎮爲定。盡得四方賢士大夫。以爲賓客。相與覽其河關之勝。以騁筆力。則公衆作森列。豈特此而已哉。雖然。是猶未也。必極公之文。絃歌而薦郊廟。典冊而施朝廷。然後曰宜。今乃猶嘯詠於荒山野水之濱。追前世放逐羈旅之士。而與之友。雖小夫下吏。或幸得之。於虜是可歎歎。公以乾道七年八月移牧永嘉。行有日。奉節令右從政郎晉慈安高寔公在郡。文章若干篇。爲雲安集。且屬通判州事左承議郎山陰陸某爲序。十月二十六日序。

送范西叔序

乾道壬辰二月。予道益昌。始識范東叔。後月餘。遂與東叔兄西叔爲僚於宣威幕府。又三月。西叔以樞密使薦。趣召詣行在所。二君皆中書侍郎。榮公孫也。昔榮公對策於治平。爭詔獄於熙寧。論河事邊事刑名。敕令於元祐。雖用舍或小異。而要皆不合。故用不極其材。以沒沒。又列黨籍。其門戶爲世排誣。諱惡者。

幾四十年。又四十年。而西叔兄弟始復奮發。爲蜀知名士。世之論盛衰者。謂人定勝天。天定亦勝人。子獨鄙此說。夫盛衰皆天也。人何與焉。天將禍人之國。則小人得志而君子廢。其將福之也。則君子見用而小人絀。國有禍福。而君子無屈伸。彼區區者。乃誠謂天與人。以衆寡疾徐爲勝負。豈不可悲也哉。九月丁丑。西叔始東下。同舍相與臨滌水。置酒賦詩。而屬子爲序。夫吾曹之望於西叔。所以繼榮公者。豈獨爵位隆赫。文辭行中朝而已哉。雖然。子與西叔。皆黨籍家也。旣以勵西叔。亦以自勵。且勵吾東叔云。

東樓集序

余少讀地志。至蜀漢巴夔。輒悵然有遊歷山川。攬觀風俗之志。私竊自怪。以爲異時。或至其地。以償素心。未可知也。歲庚寅。始泝峽。至巴中。聞竹枝之歌。後再歲。北遊山南。憑高望鄂。萬年諸山。思一醉曲江。漢陂之間。其勢無繇。往往悲歌流涕。又一歲。客成都。唐安。又東至於漢嘉。然後知昔者之感。蓋非適然也。到漢嘉。四十日。以檄得還成都。因索在筭得古律三十首。欲出則不敢。欲棄則不忍。迺斂藏之。乾道九年六月二十一日。山陰陸某務觀序。

范待制詩集序

石湖居士范公待制。敷文閣來帥成都。兼制置成都潼川利夔四道。成都地大人衆。事已十倍他鎮。而四道大抵皆帶蠻夷。且北控秦隴。所以臨制捍防。一失其宜。皆足致變。故於呼吸顧盼之間。以是幕府率窮日夜力。理文書。應期會。而故時巨公大人。亦或不得少休。及公之至也。定規模。信命令。弛利惠。農。選將治兵。未數月。聲震四境。歲復大登。幕府益無事。公時從其屬及四方之賓客。飲酒賦詩。公素以詩名。一代故

落紙墨未及燥。士女萬人。已更傳誦。被之樂府。絃歌。或題寫素屏團扇。更相贈遺。蓋自蜀置帥守以來。未有也。或曰。公之自桂林入蜀也。舟車鞍馬之間。有詩百餘篇。號西征小集。尤雋偉。蜀人未有見者。盡請於公。以傳。屢請而公不可。彌年乃僅得之。於是相與刻之。而屬某爲序。淳熙三年上巳日。朝奉郎成都府路安撫司參議官兼四川制置使司參議官山陰陸某序。

持老語錄序

持禪師。明州鄞人。世爲士。一旦棄髮鬚。學佛。得法於白牛卿。初住餘姚法性。數年忽謝去。越牧欲以雍熙邀致。疑不就。試一問之。師欣然曰。願卽得檄。牧大喜。師懷負包笠。卽日徒步入院。秉節如金石。說法如雷霆。雖從之遊者。不過四五十輩。而名震吳越。盡交一世名卿賢大夫。予先君會稽公知之最深。予時甫數歲。侍先君旁。無旬月不見師。至今想其抵掌笑語。瞭然在目前。夷粹真率。真山林間人也。後又徙居雪竇。護聖二山。年德益高。如徑山杲公輩。皆以丈人行尊事之。其滅也。談笑如平時。蓋以真率爲佛事者。邪得法弟子。子詢行光如寂。廣勳。或出世說法。或遁迹衆中。皆不幸早逝去。而法揚用璋。獨在揚。於是亦住護聖。巋然爲叢林耆宿。璋老且病。猶自力刻師語錄。且合辭屬予爲序。師可謂有子矣。予以先君故。不敢辭。淳熙六年五月二十五日。山陰陸某序。

師伯渾文集序

乾道癸巳。予自成都適犍爲。識隱士師伯渾於眉山。一見。知其天下偉人。予旣行。伯渾餞予於青衣江上。酒酣浩歌。聲搖江山。水鳥皆驚起。伯渾飲至斗許。予素不善飲。亦不覺大醉。夜且半。舟始發。去至平羌。酒

解得大軸於舟中。則伯渾醉書。紙窮墨燥。如春龍奮鬣。奇鬼搏人。何其壯也。後四年。伯渾得疾。不起。子懷祖。集伯渾文章。移書走八千里。乞余爲序。嗚呼。伯渾自少時。名震秦蜀。東被吳楚。一時高流。皆尊慕之。願與交。方宜撫使臨邊。圖復中原。制置使并護梁益兵民。皆巨公大人。聞伯渾名。將聞於朝。而卒爲忌者所沮。夫伯渾既決不肯仕。卽無沮者。不過有司歲時奉粟帛牛酒勞問。極則如孔叡徐復瑩。賜散人號。書其事於史而已。於伯渾何失得。而忌已如此。鄉使伯渾出而事君。爲卿爲公。則忌者當益衆。排擊沮撓。當不遺力。徒比景。輸左校。殆未可知。安得如在眉山。躬耕婦織。放意山水。優游以終天年邪。則伯渾不遇。未見可憾。或曰。伯渾之才氣。空海內無與比。其文章英發。鉅麗。歌之清廟。刻之彝器。然後爲稱。今一不得施。顧退而爲山巔水涯。娛愛紆悲之言。豈不可憾哉。予曰。是則有命。識者爲時惜。不爲伯渾歎也。淳熙某月某日。山陰陸某序。

晁伯答詩集序

傅密居士東里晁公伯答詩四百六十有一篇。其孫教授君百談集爲四卷以授予。請序卷首。伯答少以文學稱。自其諸父景迂具茨先生。皆歎譽之。諸公貴人亦往往聞其名。顧黨家不敢取靖康之元。黨禁解。伯答召爲開封掾。且顯用矣。阻兵不能造朝。比乘輿過江。中原方兵連不解。士大夫多以甲兵錢穀進。故家名流。乃見謂不切事機。伯答落江湖者數年。久之雖起。乘傳嶺海。復坐微文斥。卒棄不用以死。而伯答傲睨憂患。不少動心。方扁舟往來吳松。嘯歌飲酒。益放於詩。其名章秀句。傳之士大夫。皆以爲有承平臺閣之風。蓋晁氏自文元公以大手筆用於祥符天禧間。方吾宋極盛時。封泰山。禮百神。歌頌德業。冶金伐

石極文章翰墨之用。汪洋滄瀆。五世百餘年。文獻相望。以及建炎紹興。公獨殿其後。又少時所交。皆中州名勝。講習磨礱之益深矣。是豈囊書生聞見局陋者。敢望其涯哉。伯谷學問膽博。胸中恢疎。勇於爲義。視死生禍福無如也。至他文亦皆豪奇。不獨其詩可貴。尙力求而盡傳之。伯谷諱公邁。仕至某官。淳熙七年十一月十七日。山陰陸某序。

長短句序

雅正之樂微。乃有鄭衛之音。鄭衛雖變。然琴瑟笙磬猶在也。及變而爲燕之筑。秦之缶。胡部之琵琶箏篪。則又鄭衛之變矣。風雅頌之後。爲騷。爲賦。爲曲。爲引。爲行。爲謠。爲歌。千餘年後。乃有倚聲製辭。起於唐之季世。則其變愈薄。可勝歎哉。予少時汨於世俗。頗有所爲。晚而悔之。然漁歌菱唱。猶不能止。今絕筆已數年。念舊作終不可捨。因書其首以識吾過。淳熙己酉。炊熟日。放翁自序。

徐大用樂府序

古樂府有東武吟。鮑明遠輩所作。皆名千載。蓋其山川氣俗。有以感發人意。故騷人墨客。得以馳騁上下。與荊州邯鄲巴東三峽之類。森然竝傳。至於今。不泯也。吾友徐大用家本東武。呼吸食飲於邗淇之津。蓋有以相其軼思者。故自少時。文辭雄於東州。比南歸。以政事議論。顯聞薦紳。願不肯輕出其文。以沽世取富貴。三十年猶屈治中別駕。澹然莫測涯涘。獨於悲權離合。郊亭水驛。鞍馬舟楫間。時出樂府辭。瞻蔚頓挫。識者貴焉。或取其數百篇。將傳於世。大用復不可。曰。必放翁以爲可傳。則幾矣。不然。姑止。予聞而歎曰。溫飛卿作南鄉九闕。高勝不減。夢得竹枝。詎今無深賞音者。予其敢自謂知君哉。獨感東武山川。旣墮胡

虛中而大用之才久伏不耀。故爲之一言。紹熙五年三月庚寅。笠澤陸某務觀序。

呂居仁集序

天下大川莫如河江。其源皆來自蠻夷荒忽遼絕之域。累數萬里。而後至中國。以注於海。今禹之遺書。所
謂岷積石者。特記禹治水之迹耳。非其源果止於是也。故爾雅謂河出崑崙虛。而傳記又謂河上通天漢。
某至蜀窮江源。則自蜀岷山以西皆岷山也。地斷壤絕。不復可窮。河江之源。豈易知哉。古之學者。蓋亦若
是。惟其上探虜義。唐虞以來。有源有委。不以遠絕。不以難止。故能卓然布之天下。後世而無媿。凡古之言
者。皆莫不然。自漢以下。雖不能如三代盛時。亦庶幾焉。宋興。諸儒相望。有出漢唐之上者。迨建炎紹興間。
承喪亂之餘。學術文辭。猶不愧前輩。如故紫微舍人東萊呂公者。又其傑出者也。公自少時。既承家學。心
體而身履之。幾三十年。仕愈躓。學愈進。因其暇。盡交天下名士。其講習探討。磨礱浸灌。不極其源不止。
故其詩文。汪洋閎肆。兼備衆體。間出新意。愈奇而愈渾厚。震耀耳目。而不失高古。一時學士宗焉。晚節稍
用於時。在西掖。嘗兼直內庭。草趙丞相鼎制。力排和戎之議。忤秦丞相檜。秦公自草日曆。載公制辭。以爲
罪。而天下益推公之正。公平生所爲詩。既已孤行於世。嗣孫祖平。又盡哀他文。凡若干首。爲若干卷。而屬
某爲序。某自童子時。讀公詩文。願學焉。稍長。未能遠遊。而公捐館舍。晚見曾文清公文清謂某。君之詩淵
源殆自呂紫微。恨不一識面。某於是尤以爲恨。則今得託名公集之首。豈非幸歟。慶元二年九月既望。中
大夫提舉建寧府武夷山沖佑觀山陰陸某謹序。

佛照禪師語錄序

拙庵禪師以佛法際遇孝宗皇帝問答之語既刻金石傳天下久矣晚菴居阿育王山中其徒相與盡莫五會所說法凡數萬言爲五卷遺侍者正球走山陰澤中請某作序某曰拙庵之道棟梁大法無語可也拙菴之語雷霆百世無錄可也又何以序爲哉然五會之外別有一會數萬言之外別有一句是可錄是不可錄諸人試下語若也道得老農贊歎有分慶元三年九月壬子陸某謹序

趙祕閣文集序

漢孝武帝好文淮南王安以高帝孫爲諸侯王而學問文辭在漢庭諸儒甲乙中其所著大小山至與雅頌離騷竝魏陳思王唐太白長吉則又以帝子及諸王孫落筆妙古今冠冕百世河出崑崙虛首四瀆經天下以入于海彼源委固自不同無足異也宋興宗室深居宮中不與外庭接故雖博學軼材不得著見然以詩文飛白書詔藏祕府者亦不乏人熙寧元豐間始與羣臣竝進於朝積數十年而德麟伯山屬文莫妙寔見推於諸公間矣漢王五世孫祕閣公諱不拙字若拙少以進士奮主司及流輩皆伏其工初苦貧無以養乃教授諸生以自給其勤苦殆有非婁人子所堪者旣得第猶不廢也晚入蜀爲州遂持使者節學益不厭文益妙予行南充閬中小益至成都歷山郵津亭及浮屠老子之處見寫碑巨板多公遺文每觀之至忘食已而故尙書孫公仲益端明汪公聖錫侍御王公龜齡文益出於世往往見公名字於其間許與甚至然後知天下自有公論也公之子善發善零皆取世科善發字正己尤以文學稱其爲漢州判官也囊公之文萬里請予於山陰澤中曰願有以冠篇石願公平生知己久已凋落予材下徒以後死不得讓媿可量哉慶元六年三月丁巳中大夫直華文閣致仕賜紫金魚袋山陰陸某序

方德亨詩集序

詩豈易言哉。才得之天而氣者。我之所自養。有才矣。氣不足以御之。淫於富貴。移於貧賤。得不償失。榮不蓋媿。詩由此出。而欲追古人之逸駕。詎可得哉。予自少聞莆陽有士曰方德亨。名豐之才甚高。而養氣不撓。呂舍人居仁何著作。指之皆屈行輩。與之遊。德亨晚愈不遭。而氣愈全。觀其詩。可知其所養也。既歿若干年。待制朱公元晦。以書及德亨之詩示予於山陰。曰。子爲我作德亨集序。往時有方响者。與德亨同族。爲予言。德亨遇疾。卒於臨安逆旅。垂困。猶能起坐。正衣冠。手自作書。與其族人官臨安者。使買棺。棺至。乃歿。色辭不異平日。非養氣之全。能如是乎。請以是爲序。慶元六年四月丁酉。山陰陸某序。

會稽志序

昔在夏禹。會諸侯於會稽。歷三千歲。而我高宗皇帝御龍舟。橫濤江。應天順動。復禹之跡。駐蹕彌年。定中興之業。羣盜削平。強虜退遁。於是用唐幸梁州故事。陞州爲府。冠以紀元。大駕旣西。幸而府遂爲股肱。近藩。稱東諸侯之首。地望蓋視長安之陝洛。汴都之陳許。所命牧守。皆領浙東安撫使。其自丞相執政來。與去而拜丞相執政者。不可遽數。而又昭慈聖烈皇后及永祐以來。四陵攢殿。相望於鬱葱佳氣中。朝謁之使。臚銜鞞擊。中原未清。今天下鉅鎮。惟金陵與會稽耳。荆揚梁益。潭廣皆莫敢望也。則山川圖謀。宜其廣載備書。顧未暇及者。解數十年。大卿沈公作賓。待制趙公不迹。繼爲守。皆慨然以爲己任。乃與通判軍事施君宿安。撫司幹辦公事李君兼韓君茂卿。及郡士馮景中。邵持正。陸子虞。王度。朱龜等。上參禹貢。下考太史公。及歷代史。金匱石室之藏。旁及爾雅本草。道釋之書。稗官野史。所傳。神林鬼區。幽怪恍惚之說。素

漢晉唐以降金石刻歌詩賦詠殘章斷簡廢有遺者若父老以口相傳不見於文字者亦間見層出積勞累月乃成是雖本之圖經圖經出於先朝非藩郡所可附益乃用長安河南成都相臺之比名會稽志會稽爲郡雖遷徙靡常而郡本以山得名又禹所巡也故卒以名之而屬某爲之序嘉泰元年二月庚子中大夫直華文閣致仕陸某謹序

卷第十五

施司諫註東坡詩序

古詩唐虞廣歌夏述禹戒作歌商周之詩皆以列於經故有訓釋漢以後詩見於蕭統文選者及高帝項羽草孟楊惲梁鴻趙壹之流歌詩見於史者亦皆有註唐詩人最盛名家者以百數惟杜詩註者數家然槩不爲識者所取近世有蜀人任淵嘗註宋子京黃魯直陳無己三家詩頗稱詳贖若東坡先生之詩則援據閎博指趣深遠淵獨不敢爲之說某頃與范公至能會於蜀因相與論東坡詩慨然謂予足下嘗作一書發明東坡之意以遺學者某謝不能他日又言之因舉二三事以質之曰五畝漸成終老計九重新掃舊巢痕遙知叔孫子已致魯諸生當若爲解至能曰東坡竄黃州自度不復收用故曰新掃舊巢痕建中初復召元祐諸人故曰已致魯諸生恐不過如此耳某曰此某之所以不敢承命也昔祖宗以三館養士儲將相材及官制行罷三館而東坡蓋嘗直史館然自譴爲散官削去史館之職久矣至是史館亦廢故云新掃舊巢痕其用字之嚴如此而鳳巢西隔九重門則又李義山詩也建中初韓會二相得政盡收

用元祐人。其不召者亦補大藩。惟東坡兄弟猶領宮祠。此句蓋寓所謂不能致者二人。意深語緩。尤未易窺測。至如車中有布乎。指當時用事者。則猶近而易見。白首沉下吏。綠衣有公言。乃以侍妾朝雲嘗歎黃師是仕不進。故此句之意。戲言其上僭。則非得於故老。殆不可知。必皆能知此。然後無憾。至能亦太息曰。如此誠難矣。後二十五年。某告老居山陰澤中。吳興施宿。武子出其先人司諫公所註數十大編。屬某作序。司諫公以絕識博學名天下。且用工深。歷歲久。又助之以願君景蕃之該洽。則於東坡之意。蓋幾可以無憾矣。某雖不能如至能所託。而得序斯文。豈非幸哉。嘉泰二年正月五日。山陰老民陸某序。

達觀堂詩序

朝請郎致仕吳公景先少嘗從洛川先生朱公希真問道。朱公爲名所居堂曰達觀。手書以遺之。且賦詩一章。屬之曰。子爲人深靜簡遠。不富貴。必壽考。故吾以此事相期。景先出仕五十年。不求速化。不治生產。位僅至二千石。晚爲東諸侯客。遂引年以歸。距八十不遠。望其容貌。不腴不瘠。視聽步趨。如五六十人。非得朱公密傳親付。殆不能爾。朱公之逝甚異。世以爲與尹先覺譙天授蘇養直俱解化僊去。則吾景先亦其流亞歟。自朱公賦詩後。士大夫繼作凡若干篇。屬予爲序。嘉泰二年十一月癸丑。放翁陸某務觀序。

梅聖俞別集序

宛陵先生遺詩及文若干首。實某官李兼孟達所編輯也。先生嘗吾宋太平最盛時官京洛。同時多偉人巨公。而歐陽公之文。蔡君謨之書。與先生之詩。三者鼎立。各自名家。文如尹師魯。書如蘇子美。詩如石曼卿輩。豈不足垂世哉。要非三家之比。此萬世公論也。先生天資卓偉。其於詩。非待學而工。然學亦無出其

右者。方落筆時。置字如大禹之鑄鼎。練句如后夔之作樂。成篇如周公之致太平。使後之能者欲學而不得。欲贊而不能。況可得而譏評去取哉。歐陽公平生常自以爲不能望先生。推爲詩老。王荆公自謂虎圍詩不及先生。包鼎畫虎之作。又賦哭先生詩。推仰尤至。晚集古句。獨多取焉。蘇翰林多不可古人。惟次韻和陶淵明及先生二家詩而已。雖然。使本無此三公。先生何歎。有此三公。亦何以加秋毫於先生。予所以論載之者。要以見前輩識精論。公與後世妄人異耳。會李君來請予序。故書以予之。嘉泰三年正月己卯。山陰陸某序。

楊夢錫集句杜詩序

文章要法在得古作者之意。意既深遠。非用力精到。則不能造也。前輩於左氏傳太史公書韓文杜詩。皆熟讀暗誦。雖支枕據鞍間。與對卷無異。久之。乃能超然自得。今後生用力有限。掩卷而起。已十七三四。而望有得於古人。亦難矣。楚人楊夢錫才高而深於詩。尤積勤杜詩。平日涵養不離胸中。故其句法森然可喜。因以暇戲集杜句。夢錫之意。非爲集句說也。本以成其詩耳。不然。火龍黼黻手。豈補綴百家衣者邪。予故爲表出之。以告未深知夢錫者。嘉泰三年正月丁亥。笠澤陸某序。

陸伯政山堂類稿序

古之學者。始於家塾。鄉校。而貢於天子之辟雍。始於抱關擊柝。而至於公卿。始於賦物銘器。師旅會盟之辭。而至於陳謨作誥。其所遇雖不同。然於明聖人之道。闡性命精微之理。則一也。周衰。道術裂於百氏。士各以所見著書授徒。於是稽之堯舜。禹文王。周公孔子之遺書。始有大不合者。今六經散缺不全。而諸子

之書。則往往具在。又其辭怪偉辯麗。足以動蕩世之耳目。乃欲學者之文辭一合於道。而不悖戾於經。可謂難矣。吾宗伯政諱煥之唐丞相文公希聲之九世孫文公上距丞相元方五世中間子孫遇五季之亂。獨不失譜。至今世次皆可序述。伯政家世爲儒。力學篤行。至老不少衰。所爲文皆本六經無一毫汨於釋老。雖其徒有從之求文者。伯政尊所聞。猶毅然不爲之貶。至如楊公時近世名儒。獨以立論少入釋老。伯政正色斥之。不遺餘力。使死而有知。吾伯政有以見周公孔子矣。其孤集遺文爲二十卷。來請余爲序。伯政之文可稱述者衆。余獨言其學術文辭之正以序之。尙不失斯人之本意。又進其子孫云。嘉泰四年二月丁巳。笠澤陸某謹序。

普燈錄序

粵自曠大劫來。至神應迹。開示天人。未有不以文字語言相授者。今七佛偈。是其一也。至於中夏。則三十萬年之前。包犧氏作。已畫八卦造書契矣。釋迦之興。固亦無異。今一大藏教。可謂富矣。乃獨於最後舉華示其上足弟子迦葉。迦葉欣然一笑。不立文字。不形言語。謂之正法眼藏。師舉華而傳。弟子一笑而受。既書之木葉。旁行之間矣。亦未見其與古聖異也。豈謂之文而非文。謂之而言而非言邪。昔有景德傳燈三十卷者。蓋非文之文。非言之言也。此門一開。繼者相望。其尤傑立者。續燈廣燈二書也。然皆草創簡略。自爲區別。雖聖君賢臣之事。有不能具載者。獨旁見間出於諸祖章中。識者以爲恨。吳僧正受始著普燈。凡十有七年。成三十卷。前日之恨。毫髮無遺矣。而尤爲光明崇顯者。我祖宗之明詔睿藻。哀集周悉。一一皆有據依。足以傳示萬世。寶爲大訓。其有功於釋門最大。方且上之御府。副在名山。而又以其副示某。俾得紀

述梗槩於後。某自隆興距嘉泰五備史官。今雖告老。待盡山澤。猶於祖宗遺事。思以塵露之微。仰足山海。不自知其力之不逮也。嘉泰四年三月乙酉。太中大夫充寶謨閣待制致仕山陰縣開國子食邑五百戶。賜紫金魚袋陸某謹序。

澹齋居士詩序

詩首國風。無非變者。雖周公之幽亦變也。蓋人之情。悲憤積於中而無言。始發爲詩。不然。無詩矣。蘇武李陵陶潛謝靈運杜甫李白。激於不能自己。故其詩爲百代法。國朝林逋魏野以布衣死。梅堯臣石延年秦不用。蘇舜欽黃庭堅以廢細死。近時江西名家者。例以黨籍禁錮。乃有才名。蓋詩之與本如是。紹興間。秦丞相檜用事。動以語言罪士大夫。士氣抑而不伸。大抵竊寓於詩。亦多不免。若澹齋居士陳公德召者。故與秦公有學校舊。自揣必不合。因不復與相聞。退以文章自娛。詩尤中律呂。不怨不怒。而憤世疾邪之氣。凜然不少回撓。其不坐此得禍。亦僅脫爾。及秦氏廢始稍起。爲吏部郎。爲國子司業。祕書少監。遽沒於官。後四十餘年。有子知津爲高安守。最其詩得三卷。屬某爲序。某少識公於山陰。方公召還。嘗以詩贈別。及公爲郎時。故相湯岐公一日語公曰。陸務觀別君詩。方傳世。非公之賢。何以發其語如此。時紹興己卯歲也。因高安之請。重以感歎。某於是年八十有一矣。開禧元年九月。太中大夫寶謨閣待制致仕山陰縣開國子食邑五百戶。賜紫金魚袋陸某序。

傅給事外制集序

國家自崇寧來。大臣專權。政事號令。不合天下心。卒以致亂。然積治已久。文風不衰。故人材彬彬。進士高

第及以文辭進於朝者亦多稱得人。祖宗之澤猶在。黨籍諸家爲時論所貶者其文又自爲一體精深雅健。追遠唐元和之盛。及高皇帝中興。雖披荆棘。立朝廷。中朝人物悉會於行在。雖中原未平。而詔令有承平風。識者知社稷方永。太平未艾也。故給事中傅公以是時典西省文書。得名尤盛。公天資忠義。絕人。自東夷寇逆。滔天。建炎中。大駕南渡。虜吞噬不遺力。幾犯屬車之塵。公眇然奮生。位未通顯。獨涕泗感激。請提孤軍。橫遏虜衝。衛乘輿。論功埒諸大將。及駐驛會稽。公遂爲浙東帥。始隱然有大臣望。雖擯斥不容。而士論愈歸。及在東省。御史力誣去之。然猶知公爲一代大儒。蓋公論不可揜如此。公遺文百餘卷。嗣孫稱實甚。手自鈔錄。以傳後世。未能竟。乃先緝外制數百篇。屬某爲序。公之文固天下所願見而取法。某未成書時。公過先少師。每獲出拜侍立。被公教誨。詎今七十餘年。幸猶後死。得論序公文。亦幸矣。某聞文以氣爲主。出處無媿氣。乃不撓。韓柳之不敵。世所知也。公自政和訖紹興。閱世變多矣。白首一節不少屈於權貴。不附時論。以苟登用。每言虜言畔臣。必憤然扼腕裂眦。有不與俱生之意。士大夫稍有退縮者。輒正色責之。若讐。一時士氣爲之振起。今觀其制告之詞。可鑒見也。公諱崧卿。字子駿。於虜賢哉。開禧元年九月某日。太中大夫充寶謨閣待制。致仕山陰縣開國子食邑五百戶。賜紫金魚袋。陸某謹序。

開覽錄序

元豐初。置武學。先太師以三館兼判學事。今學制規模多出於公。而策問亦具載家集中。後百餘年。某從子朴作開覽錄若干篇。論孫吳遺意。欲上之朝。且乞序於某某儒。且老非能知武事者。朴許國自奮之志。亦某所愧也。乃從其請。開禧元年十一月丁卯。陸某序。

周益公文集序

天之降才固已不同。而文人之才尤異。將使之發冊作命。陳謨奉議。則必畀之以閎富淹貫溫厚爾雅之才。而處之以帷幄密勿之地。故其位與才常相稱。然後其文足以紀非常之事。明難喻之指。藻飾治具。風動天下。書黃麻之詔。鏤白玉之牒。藏之金匱石室。可謂盛矣。若夫將使之闢道德之原。發天地之秘。放而及於鳥獸蟲魚草木之情。則畀之才亦必雄渾卓犖。窮幽極微。又畀以遠遊窮處。排擯斥疎。使之磨礱齟齬。瀕於寒餓。以大發其藏。故其所賦之才。與所居之地。亦若造物有意於其間者。雖不用於時。而自足以傳後世。此二者。造物豈真有意哉。亦理之自然。古今一揆也。大丞相太師益公。自少壯時。以進士博學宏詞。疊二科起家。不數年。歷太學三館。予實定交於是時。時固多豪雋不羣之士。然落筆立論。傾動一座。無敢嬰其鋒者。惟公一人。中雖暫斥。而玉煙劍氣三秀之芝。非窮山腐壤所能湮沒。復出於時。極文章禮樂之用。絕世獨立。遂登相輔。雖去視草之地。而大詔令典冊。孝宗皇帝猶特以屬公。於虜。聖主之心。亦如造物。非私公以富貴。蓋大官重任。不極不久。則無以盡公之才也。公既薨。逾年。公之子綸。以公遺文號省齋文稿者。屬予爲之序。公在位久。崇論宏議。豐功偉績。見於朝廷。傳之夷狄者。何可勝數。予獨論其文者。墓有碑。史有傳。非集序所當及也。開禧元年十二月甲子。太中大夫寶謨閣待制致仕山陰縣開國子食邑五百戶。賜紫金魚袋陸某謹序。

宣城李虞部詩序

宣之爲郡。自晉唐至本朝。地望常重。來爲守者。不知幾人。而風流吟詠。謝宣城實爲之冠。生其鄉者。幾人。

而歌詩復古。梅宛陵獨擅其宗。此兩公蓋與敬亭之山俱不磨矣。故宣之士多工於文。而五七字爲尤。工唐有李推官。以詩名當代。其家傳遺詩得數百篇。以詩考之。蓋與皮陸同時歟。自推官後。世世得能詩聲。當元豐間。有虞部公作詩益工。推官清新警邁。極鍛鍊之妙。而虞部則規模思致。宏放簡遠。自宛陵出。如劉子駿文學。不盡與父同。議者亦不能優劣之也。予得其兩世遺編於虞部之曾孫臨海太守兼字孟達。孟達固詩人。蓋淵源二祖。而能不媿者。推官虞部之家世諱字。與其學術行治。蓋各見於其墓刻家牒。予獨志其詩云。開禧三年六月丙午。太中大夫寶謨閣待制致仕渭南縣開國伯食邑八百戶賜紫金魚袋陸某謹序。

曾裘父詩集序

古之說詩曰言志。夫得志而形於言。如臯陶周公召公吉甫。固所謂志也。若遭變遇讒。流離困悴。自道其不得志。是亦志也。然感激悲傷。憂時閔己。託情寓物。使人讀之。至於太息流涕。固難矣。至於安時處順。超然事外。不矜不挫。不誣不慙。發爲文辭。沖澹簡遠。讀之者遺聲利。冥得喪。如見東郭順子。悠然意消。豈不又難哉。如吾臨川曾裘父之詩。其殆庶幾於是乎。予紹興己卯庚辰間。始識裘父於行在所。自是數見其詩。所羨愈深。而詩亦加工。比予來官臨川。則裘父已沒。欲求其遺書。而子蒙恩召歸。至今以爲恨。友人趙去華彥種寄裘父艇齋小集來。曰願序以數十語。然裘父得意可傳之作。蓋不止此。遺珠棄璧。識者與歎。去華爲郡博士。尙能博訪之。稍增編帙。計無甚難者。敢以爲隨。裘父諱季狸。及與建炎過江。諸賢游。尤見賞於東湖徐公。嘉定元年二月丁酉。山陰陸某序。

送巖電道人入蜀序

王衍一生甜象富貴乃以口不言錢自高巖電本張氏子施藥說相不受人一錢乃自稱姓錢以滑稽玩世古今相反有如此者忽來告放翁言將西入蜀乃書以遺之他日到青城大峨眉霧中鶴鳴諸名山見孫思邈朱桃椎張四郎余朱先生姚小太尉譙天授尹先覺輩有問放翁安否者可出此卷相與一笑

邢芻甫字序

衛詩美武公之德一章曰瞻彼淇澳綠竹猗猗終之曰有匪君子終不可諼兮淇大川也見淇而思武公可也王芻薦竹草之微者亦見而思焉則思之至矣此所謂終不可諼兮者歟吾友邢子名淇請字於予予復之曰士之仕者能使一國一邑之人安其政而無怨疾嘲譏亦已難矣况見其鄉閭而咨嗟追慕豈不甚難哉今衛人於武公見其地而思之見其草木而思之見其草之微者如王芻薦竹而思之況遇其子孫又將何如哉人不我忘於我何加然使人不怨疾嘲譏又咨嗟追慕久而不忘必有以得之矣故爲士者於此不可不知勉也請字子曰芻甫芻甫勉之仕而使一國一邑之人不忘相處而使鄉閭黨友不忘相與記其行事以爲法傳其言論風指誦習而勉於善豈不美哉嘉定元年四月己未山陰陸某序

曾溫伯字序

堯舜去今遠矣其言傳於今者蓋寡惟直而溫與寬而栗之言再見焉方是時教化之所覃人才之所慕全德如夔臯陶所言是豈戒其不足哉至商周之間始有得聖人之清聖人之和者清近直和近溫則既分而爲二矣若漢汲長孺事君無隱天下爲之直然去古之全德又益以遠贛川會君黯方其入家塾也

大父大卿公用蘇子由張芸叟字其子孫例。字之曰溫伯。蓋以古全德訓之。有其義而亡其說。溫伯請於予曰。願有以補之。以終大父之意。予慨然歎曰。自大卿至溫伯。三世傳嫡。德亦克肖。其有以承此訓矣。序其敢辭。嘉定元年五月辛酉。山陰陸某序。

天童無用禪師語錄序

慮義一畫。發天地之祕。迦葉一笑。盡先佛之傳。浮名一默。會點一唯。丁一牛刀。扁一車輪。臨濟一喝。德山一棒。妙喜一竹。篋子皆同。此關係。但恨欠人承當。天童無用禪師。蓋卓爾能承當者。未見妙喜大事已畢。豈有住山示衆之語。可累編簡哉。放翁謂若不投之水火。無有是處。惟韓退之所云。火其書。其語差似痛快。又恐退之亦止是說得耳。五百年後。此話大行。方知無用與放翁却是同參。嘉定元年秋九月丙辰序。

陳長翁文集序

漢之文章。猶有六經餘味。及建武中興。禮樂法度。粲然如西京時。惟文章頓衰。自班孟堅已不能望太史公之淳深。崔蔡晚出。遂墮卑弱。識者累歎而已。我宋更靖康禍變之後。高皇帝受命。中興雖艱難。顛沛文章獨不少衰。得志者司詔令。垂金石。流落不偶者。娛憂紆憤。發爲詩騷。視中原盛時。皆略可無媿。可謂盛矣。久而澁微。或以纖巧摘裂爲文。或以卑陋俚俗爲詩。後生或爲之變而不自知。方是時。能居今行古。卓然傑立於頽波之外。如吾長翁者。豈易得哉。其子師文來乞予爲長翁集序。乃寓吾歎以慰其子。且以慰長翁於地下云。長翁高郵陳氏諱造。字唐卿。嘉定二年三月丁巳。渭南伯陸某務觀序。

卷第十六

成都府江濱廟碑淳熙四年五月一日。

自古水土之功莫先乎禹紀其事莫備乎禹貢之篇禹貢之所載莫詳乎江漢曰嶓冢導漾東流爲漢又曰岷山導江某嘗登嶓冢之山有泉涓涓出兩山間是爲漢水之源事與經合及西遊岷山欲窮江源而不可得蓋自蜀境之西大山廣谷筇笏起伏西南走蠻夷中皆岷山也則江所從來尤荒遠難知而漢過三澨至大別之麓亦卒附江以達於海故江爲四瀆之首三代典祀秩視諸侯而楚大國亦以爲望有事必禱祠焉可謂盛哉成都自唐有江濱廟其南臨江唐末節度使高駢大城成都廟與江始隔歷五代之亂淫昏割裂神弗受職廟亦弗治宋興乾德三年平蜀越八年當開寶六年有詔自京師繪圖遣工修大廟制傑閣廣殿脩廊邃宇聞於天下慶曆七年故太師忠烈潞公以樞密直學士來作牧則又築大堂竝廟東南以爲徹祭飲福之所而廟益宏麗矣厥後雖屢繕治有司不力寔以大壞上漏旁穿風雨入屋支傾直罅苟偷歲月淳熙二年六月今尹敷文閣待制范公之始至也躬執牲幣祇肅祀事既退讀開寶中修廟碑惕然改容曰此太祖皇帝之詔敢弗虔南出登堂見忠烈公之識則又歎曰潞國子自出也敢弗嗣始有蒼廟意矣會歲旱公潔齋以禱曰三日而雨且大治祠宇以報如期高下洽足歲以大穰公饒私餘蠻夷順服乃自三年某月庀工訖四年五月廟成總其費木以章計者八千一百二十有八竹以箇計者四萬九千四百七十輒甃釘以枚計者十八萬七千七百二十有四丹青黝堊以斤計者一萬八千有七梓匠役徒以口計者二萬三千八百爲屋二百有九間牆六千八百七十尺廟之制度復還開寶慶曆

之盛而有加焉。於是府之屬吏來請其刻文麗牲之石。且繫以詩。詩曰。
井絡之躡。下應岷山。蟠踞華夷。江出其間。奔蹶三峽。放於荆揚。我考禹跡。九州茫茫。千礎之宮。肇自開寶。
吏靡嚴恭。庭有葦草。范公來止。事神是力。廟未克成。當食太息。江流東傾。於海朝宗。廟成公歸。與江俱東。
壯哉湯湯。環我蜀城。萬古不竭。亦配公名。

行在寧壽觀碑

紹興二十年十月。詔賜行在三茆堂名曰寧壽觀。因東都三茆寧壽院之舊也。初。章聖皇帝。建會靈觀。實
爲崇奉之始。至是高宗皇帝。方躋天下於仁壽之域。尤垂意焉。迺命道士蔡君大象。知觀事。蒙君守亮副
之。許其徒世守。又命中貴人劉君敷典。領置吏胥。給清衛兵。略用大中祥符故事。後十年。敷遂請棄官。專
奉寧壽香火。詔如所請。賜名能翼。改左右街都道錄。仍領觀事實。又用至道中內侍洪正一故事。上心眷
顧。每示優假。如此。然迨今。歲月寢久。未有紀之金石。以侈上賜者。紹熙五年六月。知觀事冲素大師邵君
道俊。始礪石來。請某爲文。傳示後世。某實紹興朝士。屢得對行殿。同時廷臣。零落殆盡。某適後死。獲以草
野之文。登載盛事。顧不幸歟。伏觀寧壽觀。實居七寶山之麓。表裏湖江。拱輔宮闕。前帶馳道。後枕崇阜。盡
得都邑之勝。廣殿中峙。脩廊外翼。雲章寶室。鐵帙富麗。浩浩乎道山蓬萊之藏也。鐘經二樓。羣飛霄漢。飄
飄乎化人中天之居也。金符象簡。羽流畢集。進趨有容。肅恭齋法。濟濟乎茹靈芝。飲沆瀣之衆也。導以霓
旌。節以玉磬。侍者翼從。以登講席。琅琅乎徹九天震十方之音也。祐陵之御畫。德壽重華之宸翰。煥乎河
嶽之圖書也。鴻鐘大鼎。華寶劍楮。遂良吳道子之遺跡。卓乎祕府之怪珍也。榮光異氣。夜燭天半。所以

扶衛社稷安鎮夷夏者。於是乎在。非他宮館壇宇可得而比。永惟我高宗皇帝。實與三菲君。自渾沌溟滓開闢之初。亦明龍漢浩劫之前。俱以願力。應世濟民。雖時有古今。迹有顯晦。其受命上帝。以福天下。則合若符券。及夫風御上賓。威神在天。與三十六帝翺翔太虛。三菲君亦與焉。時臨熙壇。顧享明薦。用敷佑於我聖子神孫。降福發祥。時萬時億。於庠休哉。某既述觀之所。繇興且繫之。以銘曰。

炎祚中否。開真人。以大誓願。濟下民。左右虛皇友三真。坐令化國風俗淳。乃營斯宮示宿因。丹碧崑巖天與鄰。神君龍虎呵重闔。鯨鐘橫擡震無垠。錦旛寶蓋高嶙峋。天華龍燭晝夜陳。歷載九九符堯仁。超然脫屣侍帝晨。遺澤滲漉萬萬均。歲豐兵偃無吟呻。咨爾衆士嚴冠巾。以道之真治子身。服膺聖訓常如新。神霄往從龍車塵。

嚴州烏龍廣濟廟碑

山川之祀。自虞書以來。見於載籍。與天地宗廟竝。或謂山川與雲雨。澤枯槁。宜在秩祀。非必有神主之。以予考之。殆不然。維嶽降神。生甫及申。山川之神。降而爲人。與人死而爲山川之神。一也。豈幸而見於經。則可信。後世則舉不可信邪。柳宗元死爲羅池之神。其傳甚怪。而韓文公實之。張路斯自人爲龍。廟於潁上。其傳尤怪。而蘇文忠公實之。蓋二神者。所傳雖不可知。而水旱之禱。卓乎偉哉。不可泯沒。則二公亦不得而揜也。予適蜀。見李冰張惡子廟於離堆梓潼之山。皆血食千載。非獨世未有疑者。蓋其靈響暴著。亦不容置疑者矣。嚴州烏龍山廣濟廟之神。曰忠顯仁安靈應昭惠王。舊碑以爲唐貞觀中人。姓邵氏。所記甚詳。雖幽顯殊隔。不可盡質。然神靈動人如羅池。變化不測如潁上。歷數百年未嘗少替。而朝廷之所褒。

顯吏民之所奉事。亦猶一日。此烏可以幸得哉。至於紹興辛巳東海之師。羣胡見巨人皆長丈餘。弋戟塵
施。出沒煙雲間。則相告曰。烏龍神兵至矣。或降。或遁。去無敢枝梧者。是又與東晉八公山及慶歷嘉嶺神
之事相埒。然彼皆在近境。而此獨見於山海阻絕數千里之外。豈不尤異也哉。不得韓蘇之文以侈大其
傳。而邦人進士沈免顧以屬筆於某。辭卑事偉。有足恨者。迺作送迎神詩一章。使併刻之。實慶元五年十
月甲子也。其辭曰。

王之生兮。值唐初基。龍翔於天兮。英雄是資。獨沉草萊兮。默不得施。嶢然萬仞兮。胸中之奇。使得小試兮。
冒白刃而攀朱旗。丈夫戰死兮。固亦其宜。死於不遭兮。精神曷歸。王亦何懟兮。人則爲悲。烏龍之山兮。跨
空巍巍。築傑屋兮。奉祠。釀桂兮。羞芝。彈箜篌兮。吹參差。王捨斯民兮。逝何之。錫以祉兮。燕及悻。瘳。歲屢豐
兮。長無凶。饑擁羽蓋兮。駕玉螭。時節來饗兮。民之依國。有征誅兮。克相王師。長戈大纛兮。肅肅陰威。掃平
河雒兮。前功弗墜。隆名顯爵兮。永世有辭。

德勳廟碑

自古王者。經綸草昧。戡定亂略。必有熊鰲之士。不貳心之臣。內任心膂之寄。外宣股肱之力。而廟謨國論
密賴以決。實兼將相之任者。在我高宗皇帝時。有若太師循忠烈王張公。實維其人。粵自高宗。歷試於外。
開大元帥府。總天下兵。首以山西豪傑。入侍帷幄。龍飛順動。避狄南渡。公則有扶天夾日之功。蕭牆聲起。
羣公暗拱。公則倡勤王復辟之大策。氣稜內侵。戎馬乘突。公則奮却敵禦侮之奇略。巨盜乘間。羣兇和附。
公則建剪除安輯之成績。由是不數年間。國勢安強。夷虜奪氣。諱和而一二重將。未還宿衛。論者咸以爲

非長久計。公則率先請罷宣撫使事。奉朝請。車再上。引義懇款。於是議始定。士大夫咸謂其得大臣體。而高宗亦每謂之腹心舊將。又曰。從來待卿如家人。又曰。是人與他功臣相去萬萬。蓋高宗蹈履艱危。身濟大業。沉機獨智。燭微察遠。以爲方海內橫流。巡幸四方。暴衣露蓋。周衛單寡。非如中都高拱。黽蝸蟻渡之。居江流阻艱。海道阨危。非如平時安行。清蹕馳道之中。不有如公者。協心同德。均禍福。共安危。譬之一家。父兄有急。子弟不召而自至。譬之一身。頭目有患。手足不令而自力。則天下之計。將以誰諉。袁盎謂絳侯功臣。非社稷臣。則社稷臣與功臣果異。建炎以來。功臣則有矣。至可名社稷臣者。非公而誰。故國家所以褒表崇異。常出等夷之上。非私恩也。及配享高宗廟庭。其次偶居其後。或者疑焉。是不然。唐名將前曰英衛。後曰李郭。衛公汾陽之勳德。巍如泰山。終不以姓名次序爲歎。欽宗皇帝下詔褒顯故老。而范文正實次司馬文正之下。司馬公之賢。不過與范公等。范公輔政先數十年。聲詩所載。以配夔萬。而顧乃居次。世豈以此爲有抑揚之意哉。公之曾孫鏗。三世傳嫡長。始築廟於居第之東。廟成。以高宗御書德勳二字爲廟之名。自忠烈以下爲三室。忠烈之配曰秦國夫人魏氏。漢國夫人章氏。第二室曰少傅公諱子厚。配曰漢國夫人蕭氏。第三室曰少師公諱宗元。配曰楚國夫人劉氏。維忠烈王勳業之詳。與夫世諱字系官爵。葬有碑。諡有誥。史有傳。此不復載。顧廟祭宜有歌詩。刻於麗牲之碑。乃作詩曰。

宋傳九聖。高宗是承。化龍渡江。天開中興。維忠烈王。翼從帝旁。捐身棄孥。獨當豺狼。煙塵未息。變生肘腋。首倡義師。氣沮金石。大業復隆。退不矜功。雪涕引罪。身衛行宮。國有大難。我則出捍。功成愈謙。將士畏歎。既空盜藪。屢虜淮右。柘臯之捷。梁楚無寇。河雒將平。虜長乞盟。亟上虎符。就第王城。茂勳明德。爛然史冊。

燕及家國。匪王孰克。築廟作主。三室同宇。歲時奉享。豐豆碩俎。國有世臣。家有元孫。咨爾後人。祇栗廟門。秦州報恩光孝禪寺最吉祥殿碑

天下無不可舉之事。亦無不可成之功。始以果。終以不倦。此事之所以舉。而功之所以成也。海陵通川之間。自建炎後。爲盜區戰場。中雖息兵。然猶鬼嘯狐嘯。於藜莠瓦礫中。自官寺民廬。皆略具爾。未幾復有紹興辛巳虜禍。前日之略具者。又踐蹂燔燒。滌地而盡。乾道淳熙以來。中外無事。函養滋息。且以國力興黃之。迨今四十年。而城郭邑屋。尙未能復承平之舊。至於浮圖之廬。又非郡縣所急。或盛或衰。皆在仕者所不問。則其舉事若尤難者。嗚呼。是特不遇浮圖之傑耳。信有之。未見其果難也。秦州報恩光孝禪寺。是已寺始爲天寧萬壽寺。今名蓋用紹興詔書改賜。亦火於辛巳之變。有祖彥師者。復葺之。未成而化。中間曠易主者。至紹熙中。今長老德範師。應轉運陳公。損之之請。而至。寺雖蠱建。而大役多未之舉。有巨鐘千石。方寺壞於兵時。樓焚。鐘墮。扁而不壞。範始至。奮曰。鐘不壞。寺將興之符也。吾舉事。將自鐘始。乃建樓百尺。以棲鐘。鐘始鑄。歲在乙卯。至是三乙卯矣。而樓成人咸異之。遂議佛殿。殿之役最大。度費錢數千萬。見者縮頸曰。使可爲豈。至今日邪。範曰。不然。吾當與有緣者力成之。不敢以難故止。已而有居士劉洪首施錢五百萬。施者不勸而集。積爲四千萬有奇。乃伐木於黃岡。蔽流而下。方役之興。以關征爲權。常平使者王公寧聞之。曰。斯殿以資永祐。陵在天之福。孰敢議者。吾當任其事。於是所至皆爲弛禁。殿以崇成。爲重屋八楹。東西百三十六尺。南北九十六尺。高百一十尺。佛菩薩阿羅漢三十有一軀。會王公去。而後使者韓公挺取華嚴經語。書殿之顏。曰。最吉祥殿。範又爲闕六楹。以奉今天子。昔在潛邸。賜前住持覺深碧雲二

大字閣之廣袤雄麗。亦略與殿稱。餘若方丈寢堂。廚庫水陸堂兩廡。累數十年不能成者。皆不淹歲而備。最其費爲緡錢二十萬。在它人若寢食不遑暇。純獨終日從容。倡道以進。其徒一馨歎。一顧視。皆具第一義。學者往往得入。而其師別峯之法。遂盛行於江淮間矣。凡一寺內外。莫不粲然復興。是殿實爲之冠。慶元六年夏四月。範使其書記蜀僧祖興來求予作碑。予既盡述其始末。且爲之銘。銘曰。

海陵與區名寰中。長淮大江爲提封。於皇徵祖御飛龍。臣民薦福遐邇同。是邦巍然千柱宮。中有廣殿奉大雄。瓌材蔽江西徂東。波神呵護如雲從。璇題藻井翔虛空。丹碧髹堊無遺工。劫火不能壞。鴻鐘雷震鯨吼聲。隆隆層閣閼奉龍。鸞蹤榮光夜起騰長虹。徵祖聖德齊天崇。澤覃草木函昆蟲。咨爾梵衆極嚴恭。照運共慶千載逢。餘福漸被兼華戎。長佑慶厯消兵烽。

洞霄宮碑

造化之初。昆侖旁薄。一氣旣分。天積氣於上。地積塊於下。明爲日月。幽爲鬼神。聚爲山嶽海濱。散爲萬物。萬物之最靈爲人。人之最靈爲聖哲。爲仙真。而道爲天地萬物之宗。幽明鉅細之統。此處羲黃帝老子所。以握乾坤司變化也。其書爲易六十四卦。道德五千言。陰符西昇度人。人生神之經。列禦寇莊周關喜之書。其學者必謝去世俗。練精積神。棲於名山喬岳。略與浮圖氏同。而篤於父子之親。君臣之義。與堯舜周公孔子遺書無異。浮屠氏蓋有弗及也。臨安府洞霄宮。舊名天柱觀。在大滌洞天之下。蓋學黃老者之所。庶其來久矣。至我宋。遂與嵩山崇福宮。獨爲天下宮觀之首。以寵輔相大臣之去位者。亦有以提舉洞霄召拜左相者。則其地望之重。殆與昭應景靈醴泉萬壽太一神霄寶籙爲比。它莫敢望。在眞宗皇帝時。始制

詔改宮名。賜金寶牌。又賜仁和縣田十有五頃。奉齋醮。悉除其租賦。至政和間。宮以歷歲久。穿壞漫漶。徽宗皇帝降度牒三百。命兩浙轉運司復興葺之。歲度童子一人爲道士。建炎中。又廢於兵火。高宗皇帝中。興大業。開之。嘗宁太息。乃紹興二十五年。以皇太后之命。建昊天殿。鐘樓經閣。表以崇閎。繚以脩廡。費出慈寧宮。梓匠工役。具於修內步軍司。中使臨護。犒賜踵至。旣不以命有司。而山麓之民。亦晏然不知有役。一旦告成。金碧之麗。光照林谷。鐘磬之作。聲摩雲霄。見者疑其天降地涌。而神運鬼輸也。可謂盛矣。及上脫屣萬幾。頤神物表。遂以乾道二年。自德壽宮行幸山中。駐蹕累日。勅太官進蔬膳。親御翰墨。書度人經。以賜自有天地。卽有此山。殊尤之迹。未有若此者。慶元六年九月。葆光大師宮都監潘三華。與知宮事高守中。同知宮事水丘居仁。以告山陰陸某。曰。願有紀以爲無窮之傳。某以疾未能屬稿。後三年。同知宮事王思明。與其徒李知柔。航濤江入東。繼以請。乃敍載其本末如此。且爲之銘曰。在宋祥符。帝錫之書。乃作昭應。比隆羲圖。元豐景靈。列聖攸居。元祐上清。以祝帝儲。棟宇煌煌。煥於天衢。徽祖神霄。誕彌九區。迨我高皇。東巡於吳。瞻言天柱。鎮茲行都。警蹕來臨。神明翊扶。乃御幄殿。穆清齋居。天日下照。雨露普濡。迨今遺民。注望屬車。三聖嗣興。光紹聖謨。千礎之宮。賽騰太虛。寶磬鴻鐘。震於江湖。肆作頌詩。用紀絕殊。

卷第十七

雲門壽聖院記

雲門寺自晉唐以來名天下。父老言昔盛時。繚山竝谿。樓塔重複。依巖跨壑。金碧飛踊。居之者忘老。寓之

者忘歸。遊觀者累日乃徧。往往迷不得出。雖寺中人或旬月不相覩也。入寺稍西石壁峯爲看經院。又西爲藥師院。又西繚而北爲上方。已而少衰。於是看經別爲寺曰顯聖。藥師別爲寺曰雍熙。最後上方亦別曰壽聖。而古雲門寺更曰淳化。一山凡四寺。壽聖最小。不得與三寺班。然山尤勝絕。遊山者自淳化歷顯聖。雍熙酌煉丹泉。闌筆倉。追想葛稚川王子敬之遺風。行聽灘聲。而坐蔭木影。徘徊好泉亭上。山水之樂。饜飫極矣。而亭之旁始得支徑。逶迤如線。脩竹老木。怪藤醜石。交覆而角立。破崖絕澗。奔泉迅流。噉呀而噴薄。方暑。凜然以寒。正晝仰視。不見日景。如此行百餘步。始至壽聖。嶄然孤絕。老僧四五人。引水種蔬。見客不知拱揖。客無所主而去。僧亦竟不知辭謝。好奇者或更以此喜之。今年予來南。而四五人者相與送予。至新谿。且曰。吾寺舊無記。願得君之文。磨刻崖石。予異其朴野。而能知此也。遂與爲記。然憶爲兒時。往來山中。今三十年。屋益古。竹樹益蒼老。而物色益幽奇。予亦有白髮久矣。願未知予之文辭亦能少加老否。寺得額以治平某年某月。後九十餘年。紹興丁丑歲十一月十七日。吳郡陸某記。

寧德縣重修城隍廟記

禮不必皆出於古。求之義而稱揆之心而安者。皆可舉也。斯人之生。食稻而祭先嗇。衣帛而祭先蠶。飲而祭先酒。畜而祭先牧。猶以爲未。則凡日用起居所賴者。皆祭。祭門祭竈。祭中雷之類是也。城者以保民。禁奸通節內外。其有功於人最大。願以非古黜其祭。豈人心所安哉。故自唐以來。郡縣皆祭城隍。至今世尤謹。守令謁見。其儀在他神祠上。社稷雖尊。特以令式從事。至祈禳報賽。獨城隍而已。則其禮顧不重歟。寧德爲邑。帶山負海。雙巖白鶴之嶺。其高摩天。其險立壁。負者股栗。乘者心掉。飛鸞關井之水。濤瀾洶湧。蛟

歸出沒。登舟者涕泣與父母妻子別。已濟者同舟更相賀。又有氣霧之毒。蟻龜蛇蠶守宮之蠱。郵亭逆旅。往往大暑。牆壁以道出寧德爲戒。然邑之吏民。獨不得避。則惟神之歸。是以城隍祠比他邑尤盛。祠故在西山之麓。紹興元年。知縣事趙君說之始遷於此。二十八年五月。權縣事陳君據復壇築之高。明壯大稱邑人尊祀之意。既成。屬某爲記。某曰。幽顯之際。遠矣。惟以其類可感。故古之祭者。必思其所嗜好。夫神之所以爲神。惟正直。所好亦惟正直。君儻無愧於此。則攝澗谿之毛。挹行潦之水。足以格神。不然。豐豆碩俎。是詔以求福也。得無與神之意異邪。既以勵君。亦以自勵。又因以勵邑人。八月一日。右迪功郎主簿陸某記。

濬亭記

濬山道人廣勤。廬於會稽之下。伐木作亭。苦之以弗名。之曰濬亭。而求記於陸子。吾聞鄉居邑處。父兄子弟。相扶持以生。相安樂以老。且死者。民之常也。士大夫去而立朝。散之四方。功名富貴。足以老而忘返矣。猶或以不得車騎冠蓋。雍容於途。以夸其鄰里。而光耀其族。媼爲憾。惟浮屠師一切反此。其出遊。惟恐不遠。其遊之日。惟恐不久。至相與語。其平生則計道里。遠近歲月。久暫以相高。嗚呼。亦異矣。勤公之心。獨不然。言曰。吾出遊三十年。無一日不思濬。而適不得歸。未嘗以遠遊夸其朋儕。其在濬亭。語則濬也。食則濬也。煙雲變滅。風雨晦冥。吾視之若濬之山。樵牧往來。老稚嘯歌。吾視之若濬之人。疏一泉。移一石。藝一草。木。率以濬觀之。恍然不知身之客也。夫人之情。無不懷其故者。浮屠師亦人也。而忘其鄉邑父兄子弟。無乃非人之情乎。自堯舜周孔。其聖智千萬於常人矣。然猶不以異於人情爲高。浮屠師獨安取此哉。則吾

勤公可謂篤於自信而不移於習俗者矣。故與爲記。紹興三十年十二月十二日記。

煙艇記

陸子寓居得屋二楹。甚隘而深。若小舟然。名之曰煙艇。客曰：異哉！屋之非舟，猶舟之非屋也。以爲似舫，舫固有高明奧麗踰於宮室者矣。遂謂之屋。不可不邪。陸子曰：不然。新豐非楚也，虎賁非中郎也。誰則不知。意所誠好而不得焉，竊得其似，則名之矣。因名以課實。子則過矣。而予何罪。予少而多病，自計不能效尺寸之用於斯世。蓋嘗慨然有江湖之思，而飢寒妻子之累，劫而留之。則寄其趣於煙波洲島蒼茫杳靄之間。未嘗一日忘也。使加數年，男勝鉏犂，女任紡績，衣食靡足，然後得一葉之舟，伐荻釣魚，而買芟芟入松陵，上嚴灘，歷石門沃洲，而還泊於玉笥之下。醉則散髮扣舷爲吳歌，顧不樂哉。雖然，萬鍾之祿，與一葉之舟，窮達異矣。而皆外物，吾知彼之不可求，而不能不眷眷於此也。其果可求歟。意者使吾胸中浩然廓然，納煙雲日月之偉觀，攬雷霆風雨之奇變，雖坐容膝之室，而常若順流放櫂，瞬息千里者，則安知此室果非煙艇也哉。紹興三十一年八月一日記。

復齋記

仲高於某爲從祖兄。某蓋少仲高十有二歲。方某爲童子時，仲高文章論議已稱成材，冠峨帶博，車騎雖容。一時名公卿皆慕與之交。諸老先生不敢少之，皆謂仲高仕進且一日千里。自從官御史，識者惟恐不得如仲高者爲之。及其丞大宗正，出使一道，在他人亦足稱美仕。在仲高則謂之蹉跌不偶可也。顧曾不煖席，遂遭口語。南遷萬里，凡七閱寒暑，不得內徙。與仲高親厚者，每相與燕遊，輒南望歎息出涕。因罷酒。

去。如是數矣。然客自海上來。言仲高初不以遷謫瘴癘動其心。方與學佛者遊。落其浮華。以反本根。非復昔日仲高矣。聞者皆愴然。自以爲不足測斯人之淺深也。隆興元年夏。某自都還里中。始與兄遇。視其貌。淵乎似道。聽其言。簡而盡。所謂落浮華。反本根者。乃親見之。嘗對榻語至丙夜。謂某曰。吾名吾燕居之室曰復齋。子爲我記。某自念少貧賤。仕而加甚。凡世所謂利欲聲色。足以敗志汨心者。一不踐其境。兀然枯槁。似可學道者。然從事於此數年。卒無毛髮之得。若仲高馳騁於得喪之場。出入於憂樂之域。而自得者乃如此。非深於性命之理。其孰能之。某蓋將就學焉。敢極道本末。以爲復齋記。

青州羅漢堂記

隆興改元秋九月。某訪故人弈公於青山之下。與弈公別。蓋十有餘年矣。聞某至。曳杖出迎。松間踰蹠。如殘雪覆頂。相與握手。訪問朋舊。且悲且喜。既至其居。脩廊邃屋。曲折皆有意。已而入法堂之東室。忽見澗壑巖竇。飛泉迅流。菩薩阿羅漢。翔遊其中。使人如身在峨眉天台。應接不暇。弈公從旁笑曰。此吾使工人幻爲之者也。始王君某築是庵於墓左。以資其先人之福。而請吾居焉。王君閉門讀書。未嘗少貶於世。願於吾獨委曲周盡。吾亦感其意。爲之留而弗去者十年。凡此土木金碧。以爲像設供養之具者。積費千金。王君無絲毫計惜。而吾之心志亦竭於是矣。子爲我記。嗚呼。某不天。少罹閔凶。今且老矣。而益貧困。每遊四方。見人之有親而得致養者。與不幸喪親而菲祭之具。可以無憾者。輒悲痛流涕。愴然不知生之爲樂也。聞王君之事。既動予心。又况弈公勤勤之意乎。記其可辭。明年七月一日。甫里陸某記。

鏡江府城隍忠祐廟記

漢將軍紀侯以死脫高皇帝於滎陽之圍。而史失其行事。司馬遷班固作列傳。弗載也。維宋十一葉天子駐蹕吳會。改元乾道。正月甲子。右中奉大夫直敷文閣知鎮江府方滋言。府當淮江之衝。屏衛王室。號稱大邦。自故時祠紀侯爲城隍神。莫知所以始。然實有靈德。以庇其邦之人。禱祈瞻顧。昭答如響。紹興隆興之間。虜比入塞。金鼓之聲。震於江壖。吏民不知所爲。則惟神之歸。雖虜畏天子威德。折北不支。退舍請盟。府以無事。至於流徙蔽野。兵民參錯。而居處弗驚。疾癘以息。則神實陰相之。吏其敢貪神之功。以爲己力乎。謹上尙書。願有以褒顯之。以慰父兄弟之心。越三月癸丑。有詔賜廟額曰忠祐。詔下而方公爲兩浙轉運副使。右朝散大夫直徽猷閣呂公擢來知府事。修上之賜。五月癸亥。大合樂。盛服齋莊。躬致上命。神人協心。霧雨澄霽。靈風肅然。來享來臨。於是呂公以屬某曰。願有紀焉。某惟紀侯忠奮於一時。而暴名於萬世。功施於漢室。而見褒於聖宋。身隕於滎陽。而血食於是邦。士惟力於爲善而已。豈有有其善而不享其報者乎。吏之仕乎是邦者。必將有事於廟。有事於廟者。必將有考於碑。其尙知所勉焉。毋爲神羞。六月癸未記。

黃龍山崇恩禪院三門記

自浮屠氏之說盛於天下。其學者尤喜治宮室。窮極侈靡。儒者或病焉。然其成也。無政令期會。惟太平久。公私饒餘。師與弟子四出丐乞。積累歲月。而後能舉。其壞也。無衛守誰何。一日寇至。則立爲草莽丘墟。故天下亂則先壞。治則後成。予於是蓋獨有感焉。黃龍山方南公時。學者之盛名天下。而其居亦稱焉。中更夷狄盜賊大亂之後。學者散去。施者弗至。昔之閔壯鉅麗者。嘗委地矣。自庚申訖丁亥。二十餘年之間。乃

能粲然復興。樓塔殿閣。空翔地踴。鐘魚之聲。聞十餘里。法席之盛。殆庶幾南公時。是非兵革之禍不作。遠
方之氓。蕃息阜安。得以其公賦私養之餘。及於學佛者。則此山且爲虎狼魍魎之所宅矣。而安能若是哉。
禪師升公於其寺門之成也。屬予爲記。予謂升公方以身任道。起其法於將墜。門蓋未足言。獨書予所感。
使凡至山中者。皆知前日之禍亂。嘗如此。而國家之覆轍。函育斯民。若是其深。吏勤其官。民力其業。相與
思報上之施焉。升公豈不得所願哉。乾道三年正月十四日。左通直郎陸某記。

王侍御生祠記

乾道七年二月。知夔州濟南王公新作貢院。成。越三月。夔歸。萬施梁山。大寧六郡之士。不謀同辭。曰。夔雖
號都督府。而僻在巴峽。無贏財羨工。公之爲是役也。寸寸銖銖。心計而手度之。累月乃成。形容爲耀。髮爲
盡白。其德於士。豈有旣邪。蓋思所以報者。乃相與築祠於院之東堂。畫像惟肖。又相與屬予記之。予曰。公
之施厚矣。祠未足報也。士則曰。吾等將日夜勉於學。父兄詔子弟於家。長老先生訓諸生於鄉。期有以應
有司之求。如是。足乎。予曰。未也。郡國貢士於天子。天子命近臣與館閣文學之士。選其尤者。而親策之於
廷。策旣上。天子爲親第其名。謂之進士。進士將相儲也。自是而起於朝。其任政事。毋伏嘉言。毋醜衆正。其
任言責。毋比大吏。毋置宵人。其任百執事。守節秉誼。宿道鄉方。毋懷諛。毋服讒。使天下稱之。史臣書之。曰
是夔州所貢士也。士以是報公。公以是報天子。迺可無媿。而予於記亦無愧辭矣。若何。皆曰。唯敢不力。乾
道七年三月十五日。左奉議郎通判軍州主管學事兼管內勸農事陸某記。

東屯高齋記

少陵先生晚遊夔州。愛其山川，不忍去。三徙居，皆名高齋。質於其詩曰：次水門者，白帝城之高齋也。曰依藥餌者，瀼西之高齋也。曰見一川者，東屯之高齋也。故其詩又曰：高齋非一處。予至夔數月，弔先生之遺迹，則白帝城已廢爲丘墟，百有餘年。自城郭府寺，父老無知其處者。況所謂高齋乎？瀼西蓋今夔府治所。畫爲阡陌，裂爲坊市。高齋尤不可識。獨東屯有李氏者，居已數世。上距少陵財三易主。大曆中，故勞猶在。而高齋負山帶谿，氣象良是。李氏業進士名襄，因郡博士雍君大椿屬予記之。予太息曰：少陵天下士也。早遇明皇肅宗，官爵雖不尊顯，而見知實深。蓋嘗慨然以稷卨自許，及落魄巴蜀，感漢昭烈諸葛丞相之事，屢見於詩，頓挫悲壯，反覆動人。其規模志意，豈小哉！然去國寢久，諸公故人熟視其窮，無肯出力。比至夔，客於柏中丞嚴明府之間，如九尺丈夫，俛首居小屋下，思一吐氣而不可得。予讀其詩，至小臣議論絕老病客殊方之句，未嘗不流涕也。嗟夫！辭之悲乃至是乎？荆卿之歌，阮嗣宗之哭，不加於此矣。少陵非區區於仕進者，不勝愛君愛國之心。思少出所學，佐天子，與正觀開元之治，而身愈老，命愈大，謬坎壈且死，則其悲至此，亦無足怪也。今李君初不踐通塞榮辱之機，讀書絃歌，忽焉忘老，無少陵之憂，而有其高少陵家東屯不泮歲，而君數世居之，使死者復生，予未知少陵自謂與君孰失得也。若予者，仕不能無媿於義，退又無地可耕，是直有慕於李君爾。故樂與爲記。乾道七年四月十日，山陰陸某記。

樂郊記

李晉齋一日圖其園廬持示余曰：此吾荊州所居名樂郊者也。荊州故多賢公卿，名園甲第相望。自中原亂，始以吳會上流，常宿重兵，而衣冠亦遂散去。太平之文物，前輩之風流，蓋略盡矣。獨吾樂郊日加葺，文

竹奇石。蒲萄來禽。芍藥蘭茝。菱芡菡萏之富。爲一州冠。其尤異者。往往累千里致之。子幸爲我記。子官峽中。始與晉壽相識。長身鐵面。舌吐鴻暢。遇事激烈奮發。以全軀保妻子爲可鄙。其意氣豈不壯哉。及爲客置酒。出佳侍兒。陳書畫琴奕。相與嬉嬉。則雍容都雅。風味乃甚可愛。雖梁宋間少年貴公子不能過。蓋其多材藝。知弛張如此。然自少時不喜媒聲利。有官不仕。窮園林陂池之樂者。且三十年。每自謂泉石膏肓。及來夔州。諸公始大知之。合薦於朝。議者謂晉壽當以少伸於世爲喜。而晉壽顧不然。獨眷眷於樂郊。不忍暫忘。嗚呼。出處一道也。仕而忘歸。與處而不能出者。俱是一癖。未易是泉石。非鐘鼎。諸公之薦。蓋矜晉壽膏肓。而使爲世用。異時晉壽成功而歸。高牙在前。千兵在後。擅畫繡之榮。以資斯園。荆楚多秀民。尙有能賦其事者乎。乾道七年六月十日。笠澤陸某記。

對雲堂記

巫故郡。自秦以來見於史。其後罷郡。猶爲壯縣。杜少陵扁舟下白帝。過焉。爲賦歸字韻五字詩。詩傳天下。由是巫縣名益重。宋建中靖國之元。黃太史始脫鉤黨。自蜀之荆。訪少陵遺迹。客縣治之東堂。留字壁間。有坐臥對南陵雲山陰晴變態之語。距乾道辛卯。逾一甲子。無舉出者。鄧城李德修來爲令。風流儒雅。翮翮佳公子。因廢址作堂。與客落之。舉酒屬山陰。陸務觀曰。子爲予名。且記復興之歲月。務觀既取太史語名之。且曰。僕行年五十。閱世故多矣。所謂朝夕百變者。奚獨雲山哉。一日進此道。幻譬消。情塵滅。眞實相見。雖魏乎天地。浩乎古今。變壞不停。與浮雲遊塵。空華皆暈。初無少異也。德修方吏退時。清坐堂上。試以僕言觀之。德脩名普。務觀名某。臘月乙卯之夕。大醉中。秉燭梅花下記。

靜鎮堂記

四川宣撫使故治益昌。樞密使清源公之爲使也。始徙漢中。卽以郡治爲府。郡自兵火漶地之後。一切草創。卽至未幾。凡營壘廐庫吏士之廬。皆築治之。使堅壯便安。可以支久。而府獨仍其故。西偏有便坐。日受羣吏謁見。與籌邊治軍。燕勞將士。靡不在焉。而其壞尤甚。公旣留三年。官屬數以請。始稍加葺。易其傾撓。徹其蔽障。不費不勞。挾日而成。會上遣使持親詔。賜黃金匱寶。珍劑。以彰殊禮。公遂據詔中。靜鎮坤維之語。名新堂曰靜鎮。而命其屬陸某記之。某辭謝不獲命。則再拜言曰。以才勝物易。以靜鎮物難。以靜鎮物。惟有道者能之。泰山喬嶽之出雲雨。明鏡止水之照毛髮。則靜之驗也。如使萬物並作。吾與之逝。衆事錯出。吾爲之變。則雖弊精神。勞思慮。而不足以理小國寡民。況任天下之重乎。歲庚寅。某自吳適楚。過廬山。東林山中道人爲某言。公嘗憩此院。閉戶面壁。終夏不出。老宿皆愧之。則公之剗心受道。蓋非一日矣。世徒見公馳騁於事功之會。而不知公枯槁澹泊。蓋與山棲谷汲者無異。徒見公以才略奮發。不數歲取公輔。而不知公道學精深。尊德義。斥功利。卓乎非世俗所能窺測也。而上獨深知之。故詔語如此。傳曰。知臣莫若君。詎不信哉。雖然。某以爲今猶未足見公也。虜暴中原久。腥聞於天。天且悔禍。盡以所覆界上。而公方矜亮神武。紹開中興。異時奉鑾駕。奠京邑。屏符瑞之奏。抑封禪之請。卻涓橋之朝。謝玉關之質。然後能究公靜鎮之美云。乾道八年七月二十五日。門生左承議郎權四川宣撫使司幹辦公事兼檢法官陸某謹記。

卷第十八

藏丹洞記

漢嘉郡治之西偏望雲樓東有石穴。天將雨輒出雲氣。予疑而發之。則石室屹立。室之前地中獲瓦缶。燻矮貯丹砂雲母奇石。或爛然類黃金。意其金丹之餘也。悉斂而積藏。輸諸府庫。誠識惟謹。予嘗讀丹經言古得道至人藏丹留於名山。非當仙者輒不見。雖見亦輒變化。今是丹不藏名山。而近在官寺之側。予以塵垢衰病之餘。又輒見之。是與丹經之說大異。或謂丹藏於此遠矣。方上古未爲城邑時。西望三峨。東帶大江。山川秀傑。蓋宜爲仙真鍊藥騰舉之地。至予輒見之者。豈神物隱見有時。而予適逢其時。與丹之伏而不見者常多。見者常寡。雖嵇叔夜葛稚川不免齋恨以覓。而予願得見焉。茲非幸與。乾道九年秋八月辛未。山陰陸某記。

籌邊樓記

淳熙三年八月既望。成都子城之西南。新作籌邊樓。四川制置使知府事范公舉酒屬其客。山陰陸某曰。君爲我記。按史記及地志。唐李衛公節度劍南。實始作籌邊樓。廢久。無能識其處者。今此樓望犍爲。樊道黔中。越雋諸郡。山川方域。皆略可指。意者衛公故趾。其果在是乎。樓旣成。公復按衛公之舊圖。邊城地勢險要。與蠻夷相入者。皆可考信不疑。雖然。公於邊境。豈真待圍而後知哉。方公在中朝。以洽開強記。擅名一時。天子有所顧問。近臣皆推公對。莫敢先者。其使虜而歸也。盡能道其國禮儀。刑法職官宮室城邑制度。自幽薊以出。居庸松亭關。並定襄五原。以抵靈武朔方。古今戰守離合得失。是非一皆究見本末。口講

手畫委曲周悉。如言其闕內事。雖虜者老大人。知之不如是詳也。而況區區西南夷。距成都或不過數百里。一登是樓。在目中矣。則所謂圖者。直接故事而已。請以是爲記。公慨然曰。君之言過矣。予何敢望衛公。然竊有幸焉。衛公守蜀。牛奇章方居中。每排沮之。維州之功。旣成而敗。今予適遭清明寬大之朝。論事薦吏。奏朝入而夕報可。使衛公在蜀。適得此時。其功烈壯偉。詎止取一維州而已哉。某曰。請併書公言。以詔後世。可乎。公曰。唯唯。九月一日記。

銅壺閣記

天下郡國。自譙門而入。必有通達。達於侯牧治所。惟成都獨否。自劍南西川門以北。皆民廬市區軍壘。折而西。道北爲府。府又無臺門。與他郡國異。考其始。盡自孟氏國除。矯霸國之僭侈而然。至蔣公堂來爲。故乃南直劍南西川門西北。距府五十步。築大閣曰銅壺。事書於史。崇寧初。以火廢。政和中。吳公拭因其矩。復移大之。雄傑閎深。始與府稱。淳熙二年夏六月。今敷文閣真學士范公。以制置使治此府。始至。或以閣壞告。公曰。失今不營。後費益大。於是躬自經畫。趣令而緩期。廣儲而節用。急吏而寬役。一旦崇成人。徒駭其山立。羣飛。纍然摩天。不知此閣已先成於公之胸中矣。夫豈獨閣哉。天下之事。非先定素備。欲試爲之。事已紛然。始狼狽四顧。經營勞弊。其不爲天下笑者。鮮矣。方閣之成也。公大合樂。與賓佐落之。客或舉觴壽公曰。天子神聖。英武蕩清中原。公且以廊廟之重。出撫成師。北舉燕趙。西路司并。挽天河之水。以洗五六十餘年腥羶之污。登高大會。燕勞將士。勒銘奏凱。傳示無極。則今日之事。蓋未足道。識者以此知公舉大事不難矣。其可闕書。四年四月己卯。朝奉郎主管台州崇道觀陸某記。

彭州貢院記

國家三歲一貢士。天子先期爲下詔書，與郊祀天地埒，及試於禮部。既中選矣，天子親御殿發策詢天下事，第其高下，又親御殿賜以科名，其禮可謂重矣。蓋以爲所與共代天理物，而守宗廟社稷於無窮者，實是在是也。然則郡國貢士，顧可不重邪？彭州舊無貢院，每科舉輒寓佛祠，祠乃在城外，士不以爲便。淳熙三年，知州事王公敦詩通判州事鄧公樞始采進士穆滂陳仲山楊倫蘇松等議，取廢驛故地爲貢院。凡郡之士奔走後先，肩袂相屬，暨堅材良山積雲，委自正月壬子至七月癸亥訖事，用緡錢萬五千六百有奇。役工稱是重門大堂，高閣邃深，繚以脩廡，沈沈翼翼，分職庀事，各有攸處。既成，王公徙利州，路轉運判官書來，屬予爲記。鄧公又繼以請，明年正月朝奉大夫王公序來知州事，則又以請。予發書歎曰：俗壞久矣，上下相戾，後先相傾者，天下皆是也。今彭之士大夫與王公鄧公謀同心協，若出一人，固已異矣。後王公事不出己，而不忘其成，不揜其能，惟懼後之無傳，可不謂賢哉！使士之貢於朝而仕者，授時之宜，從人之欲，以舉萬事，如王公鄧公視人之善，若己有之，如後王公則利澤被元元，勳業垂竹帛，將執禦焉，士尚知所勉哉！四年五月丁未，朝散郎主管台州崇道觀陸某記。

撫州廣壽禪院經藏記

淳熙己亥冬十二月，予使江西，治在撫州。其東是爲廣壽禪院，每出輒過焉。僧守璞方爲輪藏，予之始至也，纔屹立十餘柱，其上未瓦，其下未甃，其旁未垣，經未甃，其止山立，其作雷動，神呵龍負，可怖可愕，丹堊金碧，殆無遺功，而守璞儼然燕坐，爲其徒說出世間法，土木梓匠之間，不至丈室，若未嘗有是役者，比

明年冬十一月予被命詣行在所。璞乃礪石乞予爲記。予慨然語之曰：子棄家爲浮屠氏，祝髮壞衣，徒跣行乞，無冠冕軒車府寺以爲尊也。無官屬胥吏徒隸以爲奉也。無鞭笞刀鋸圍圍桎梏與夫金錢粟帛爵秩祿位以爲刑且賞也。其舉事宜若甚難，今顧能不動聲氣於期歲之間，成此奇偉壯麗百年累世之迹。予切怪士大夫操尊權，席利勢，假命令之重，耗府庫之積，而翫歲燭日，事功弗昭，又遺患於後，其視子豈不重可愧哉！既諾其請，又具載語守樸者以觸吾黨云。是月十九日朝請郎提舉江南西路常平茶鹽公事賜緋魚袋陸某記。

成都犀浦國寧觀古楠記

予在成都嘗以事至沈犀。過國寧觀，有古楠四，皆千歲木也。枝擾雲漢，聲挾風雨，根入地不知幾百尺。而陰之所庇，車且百兩。正晝日不穿漏，夏五六月暑氣不至，凜如九秋。成都固多壽木，然莫與四楠比者。予蓋愛而不能去者彌日。有石刻立廡下，曰：是仙人蘧君手植。予歎曰：神仙至人，手之所觸，氣之所呵，羸疾耆起，盲聵者愈，榮茂枯朽，而金玉瓦石不難。況其親所培植哉！久而不槁不死，固宜。欲爲作詩，文會多事，不果。嘗以語道人蘧昌老，真叟以爲恨。予旣去蜀三年，而昌老以書萬里屬予曰：國寧之楠，幾伐以營繕，郡人力全之，僅乃得免，懼卒不免也。君爲我終昔意，予發書且歎且喜，夫勿翦惡業，恭敬桑梓，愛其人及其木，自古已然。姑以蜀事言之，則唐節度使取孔明祠柏一小枝爲手板，書於圖志，今見非誣。蔣堂守成都，有美政，止以築銅壺開伐江濱廟一木，坐謠言罷，亦書國史。且王建孟知祥父子，專有西南窮土木之侈，沉犀近在國城數十里間，而四楠不爲當時所取，彼猶有畏而不敢者，況今聖主以恭儉化天下，有夏

禹卑宮室。漢文罷露臺之風。專闢方面。皆重德偉人。豈其殘滅千歲遺迹。侈大棟宇。爲王孟之所難哉。意者特出於吏胥梓匠。欺罔專恣。以自爲功而已。使有以吾文告之者。讀未終篇。禁令下矣。然則其可不書。淳熙九年六月一日。朝奉大夫主管成都府玉局觀山陰陸某記。

書巢記

陸子既老且病。猶不置讀書。名其室曰書巢。客有問曰。鵲巢於木。巢之遠人者。燕巢於梁。巢之襲人者。鳳之巢。人瑞之。鳩之巢。人覆之。雀不能巢。或奪燕巢。巢之暴者也。鳩不能巢。伺鵲育雛而去。則居其巢。巢之拙者也。上古有有巢氏。是爲未有宮室之巢。堯民之病水者。上而爲巢。是爲避害之巢。前世大山窮谷中。有學道之士。棲木若巢。是爲隱居之巢。近時飲家者流。或登木杪。酣醉叫呼。則又爲狂士之巢。今子幸有屋以居。牖戶牆垣。猶之比屋也。而謂之巢。何邪。陸子曰。子之辭辯矣。願未入吾室。吾室之內。或栖於楨。或陳於前。或枕藉於床。俯仰四顧。無非書者。吾飲食起居。疾痛呻吟。悲憂憤歎。未嘗不與書俱。賓客不至。妻子不覲。而風雨雷電之變。有不知也。間有意欲起。而亂書圍之。如積槁枝。或至不得行。則輒自笑曰。此非吾所謂巢者耶。乃引客就觀之。客始不能入。既入又不能出。乃亦大笑曰。信乎其似巢也。客去。陸子歎曰。天下之事。聞者不如見者知之爲詳。見者不如居者知之爲盡。吾儕未造夫道之堂。與自籬籬之外。而妄議之。可乎。因書以自警。淳熙九年九月三日。甫里陸某務觀記。

景迂先生祠堂記

明州船塢新作故侍讀晁公祠成。監場事襄陽王君鉛。因通判州事丹陽蘇君玘移書某爲之記。自春徂

秋。凡十許書。請不倦。某於公爲彌甥。方踉蹌學步時。已獲拜公。則今於爲記。誠不當以薄陋辭。謹按公諱說之。字以道。一字伯以。父自號景迂。生元豐元祐間。已爲知名士。崇寧後。坐上書邪等。斥不得立朝。臨民故連爲祠廟。篋庫吏。其爲船塢。則大觀政和間也。寓舍直桃華渡。而官寺有亭曰超然。公方爲世僂人。士夫遇諸途。噤莫敢語。況有拜牀下者。簿書稍暇。則以讀書爲樂。時時見於文章。如汪伯更。哀辭。祭鄒忠公文。皆傳天下。亦間與爲佛學者。延慶明智師遊。論著所謂天台教。至今其徒以爲重。雖然。此猶未足言公也。公之學深且博矣。於易自商瞿。下至河南邵先生。於書自伏生。下至秦山姜先生。於詩雜以齊魯韓三家。不楛於毛鄭。於春秋考至賈誼董仲舒。不膠於啖趙。其所引據。多先秦古書。藏山埋冢之秘。卓乎獨立。確乎自信。雖引天下而與之爭。不能奪。卒成一家之說。與諸儒並傳。向非擯斥。疏置於荒遠寂寞之地。如在船塢時。則雖公之敏。此功未易成也。於庠士之業。日。豈皆馳騫於富貴功名哉。繁精神於事爲之末。謀衣食於涯分之外。忽焉不知老之至者多矣。登堂而望公之風采。讀記而稽公之學術。其亦可自省哉。公之文章。本二百卷。中原喪亂後。其家復集之。益以南渡至歿時所作。纔得六十卷。而士大夫猶未盡見也。郡人能言公舊事者。曰。一日。部使者來治船事。詰責甚峻。公從容對曰。船待木乃成。木非錢不可致。今無錢致木。則無船適宜。使者爲發愧去。觀公平生大節。一言折庸人之駭。蓋不足書。而郡人所願書。故亦不敢略云。淳熙十年九月丁丑。朝奉大夫主管成都府玉局。觀山陰陸某記并書。

圓覺閣記

淳熙十年某月某日。徑山興慶萬壽禪寺西閣落成。會是歲某月某日。詔賜住持僧寶印御注圓覺經。且

命某爲之序。於是道俗咸曰。賜經與閣成同時。宜勝曰。圓覺之閣。且刻石以侈盛事。於是又咸曰。陸某宜爲記。寶印以衆言來。諭某於山陰大澤中。某蹴然不敢辭。恭惟聖天子以聰明睿智之資。體堯蹈舜深造。道妙悟一心於萬法之中。既已博極皇墳。帝典。義圖。魯史之祕。而象胥所傳。木葉旁行。亦莫不究極。以大圓覺爲我世界。悼士之陋。多岐。歧智。昧乎大同。乃以萬機之餘。親御訓釋。凡二十士之所問。調御之所說。佛陀波羅之所譯。宗密之所注。裴休之所言。皆冰釋縷解於宸筆之下。十日並照。物無遁形。百川東歸。海無異味。如旣望月。無有缺減。如大寶鏡。莫不照了。東夷南蠻。西戎北狄。霜露所墜。日月所照。莫不共此大圓覺中。魯之逢掖。楚之黃冠。竺乾之染衣。視髮。平時相與爲矛盾。爲冰炭者。亦莫不共在此大圓覺中。不偏不欠。不迷不謬。垂之千萬億世。亦莫不然。而寶印以山林枯槁之士。名微九重。得以大覺禪師。懷璉入侍。仁宗皇帝故事。覲清光。承聖問。受好賜。序鉅典。又此閣壯麗。首冠一山。費至三十萬錢。其落成也。適當賜經之時。山川動色。神龍踴躍於庠。盛哉。方閣之未建也。東偏有千僧閣。紹興中大慧禪師宗杲。法門之傑。方住山時。衆盜千數。故以是名閣。然自今觀之。雖阿僧祇衆。猶爲有限。量也。豈若圓覺之廣大無邊也哉。顧某衰且病。學問廢落。文思局澁。而名山盛事。本末闕闕。非區區筆力所能演述。實以爲愧。懼云。淳熙十年十一月十四日。朝奉大夫主管成都府玉局觀陸某記。

能仁寺捨田記

淳熙十三年三月乙巳。承節郎河東薛純一。詣紹興府。自言生長太平。蒙被德澤。念亡益縣官。不勝悽悽。報國之心。願以家所有山陰田千一百畝。歲爲米千三百石。有奇。入大能仁禪寺。祝兩宮聖壽。安撫使龍

關丘公視牒異之間所以然純一曰昔漢卜式上書願輸家財半助邊且曰天子誅匈奴愚以爲賢者宜死節有財者而輸之如此可滅也今天子垂拱稽清北虜褻服歲時奉貢純一弗獲傾資備軍興一日喪故因像教爲兩宮祈年誠愚戇不識法令罪死不宥願言之朝卽伏斧鑕不敢悔於是龍圖公嘉其意爲上尚書戶部純一乃因寺之住持僧子所來告予請撰次本末爲記予辭謝不可則語之曰子雖列在男爵曩嘗舉進士試禮部繼今能益修其業以自致於顯榮則所以報國者豈若是而已雖然足已以勵風俗助教化使貪冒者廉怠忽者奮享祿賜而忘報者愧豈不可書也哉田之頃畝賦役及別以錢權其子本以待凶歲則具書於碑陰俾後有考焉五月十三日記

常州開河記

隋疏大渠自今京口毗陵始蘇嘉興以抵於臨安初以備巡幸而後世因爲漕運大利故得不廢渠貫毗陵城中徐行東注獨南水門受荆溪之水爲惠明河醜爲二股皆會於金斗門慶曆中太守國子博士李公餘慶始疏顧塘河益引惠明水注之漕渠顧塘地勢在漕渠後故俗又謂之後河崇寧初太守給事中朱公彥復增濬之方是時毗陵多先生長者以善俗進後學爲職故儒風蔚然爲東南冠及余公中霍公端友皆策名天下士第一則說者遂歸之後河曰是爲東南文明之地鄒忠公方居鄉士所尊事而化服者忠公避不敢居因以後河實之而爲作記淳熙十四年今太守林公下車逾年既尊禮其諸老先生延見其秀民所以表勵風俗而激勵儒學者日夜不敢少息絃歌之盛殆軼於承平時矣而或以後河告者亦不廢也後河自崇寧後不治者積數十年中更兵亂民積瓦礫及治家棄滓故地益堅确夏六月林公

乃蒐閑卒。捐羨金。分命其屬治之。不淹旬。渠復故道。袤若干。深若干。脩若干。乃以書屬予曰。願記其事。予謂渠之興。自爲一郡之利。不必爲士之舉。有司者設。然城南衣冠。以杜固鑿而頓滅。則後河成廢。與士之舉。有司者相爲盛衰。亦自有理。太王遷岐。成王都洛。皆觀川原。咨卜筮。其由來蓋尙矣。則林公兼取焉。顧不可哉。士益勉之。以毋負公之意。公名祖洽。字子禮。明州鄞人。世以經行顯。云渠成之歲。十二月二日記。

卷第十九

明州育王山賈田記

紹興元年。高皇帝行幸會稽。詔明州阿育王山廣利禪寺。上仁宗皇帝。賜僧懷璉詩頌親札。念無以鎮名山。懋衆志。乃奮佛頂光明之塔。以賜。又申以手詔。特許賈田贍其徒。逾五十年。未能奉詔。佛照禪師德光。以大宗師自靈隱歸老。是山慨然曰。僧寺毋輒與民質產。令也。今特許勿用。令高皇帝恩厚矣。其可弗承。且昔居靈隱時。壽皇聖帝召入禁闈。顧問佛法。屢賜金錢。其敢爲他費。乃盡以所賜及大臣長者居士脩供之物。賈田歲去穀五千石。而遺學者義鉢。求記於陸某。某方備史官。其紀高皇帝遺事。職也。不敢辭。惟茲四明表海大邦。自嘉祐紹興。兩賜宸翰。雲漢之章。下飾萬物。於是山君波神。効珍受職。鼉虺蛟鱉。頭伏退聽。惡氣毒霧。收斂澄廓。萬里之舶。五方之賈。南金大貝。委積市肆。不可數知。陂防峭壁。年穀登稔。於序盛哉。今德光又廣上賜。斬兩宮之壽。植天下之福。無疆惟休。時萬時億。刻之金石。於是爲稱。咨爾學者。安食其間。明已大事。傳佛大法。報上大恩。將必有在。不然。不耕而食。旣飽而嬉。厲民以自養。豈不甚可愧哉。

淳熙十六年十一月二十四日朝議大夫尙書禮部郎中兼實錄院檢討官陸某記。

建寧府尊勝院佛殿記

建寧城東永安尊勝禪院。成於唐僖昭間。壞於建炎之末。稍葺於紹興之庚申。自佛殿始。方是時。院大壞。塗地。趣於復立。以慰父老心。故不暇爲支久計。未四十年。遽復頽圯。適懷素者來。爲其長老。乃慨然曰。殿大役也。舍是弗先。吾則不武。乃廣其故基。北南西東各三尺。意氣所感。助者四集。瓌材珍產。山積雲委。其最巨者。石痕村之杉。脩百有三十尺。圍十有五尺。其餘蓋稱是。凡費錢三百萬有奇。而竹木輒斃。黜堊之施者。工人役夫之樂助者。不在是數。其成之歲月。淳熙戊申冬十一月庚子也。越四年。紹熙辛亥五月。予友人方君伯謨。移書爲懷素求文爲記。予爲之。言曰。世多以浮屠人之舉事。誚吾士大夫。以爲彼無尺寸之柄。爲其所甚難。而舉輒有成。士大夫受天子爵命。挾刑賞予奪。以臨其吏民。何往不可。而熟視蠹弊。往往憚不敢舉。舉亦輒敗。何邪。予謂不然。懷素之來。爲是院。固非有積累明白之效。佛殿方壞。而院四壁立。今日食已。始或謀明日之食。懷素坐裂瓦折楨。腐柱頽垣之間。召工人。持矩度。謀增大其舊。計費數百萬。未有一錢儲也。使在士大夫。語未脫口。已得狂名。有心者疑。有言者謗。逐而去之。久矣。浮屠人則不然。方且出力爲之先後。爲之輔翼。爲之禦侮。歷十有四年。如一日。此其所以譸然有所成就。非獨其才異於人也。以十四年言之。不知相之拜者幾人。免者幾人。將之用者幾人。黜者幾人。禮樂學校。人主所與對越。天地作士。善俗與夫貨財刑獄足用。而弼教藩翰之臣。古所謂侯國者。大抵倏去忽來。更不勝紀。彼懷素固自若也。則其有成。曷足怪哉。且懷素之爲是院。不獨致力於佛殿。凡所謂堂寢之未備者。廊廡之朽敗者。

皆一新之。今老矣。無他徒意。使不死。復十四年。或過十四年。皆未可知也。則是院之葺。又可前知邪。而士大夫深凜拘拘。擇步而趨。居其位不任其事。謹藏靈明。傳以相誘。顧得保祿位。不蹈刑禍。爲善自謀。其知恥者。又不過自引而去爾。天下之事。竟執任之。於康是可歎也已。懷素三衢人。少從道行禪師游。能得其學。伯讓名士。繇甯陽人。六月甲申。中奉大夫提舉。建寧府武夷山冲佑觀。陸某記。

紹興府脩學記

八卦有畫三墳有書。經之原也。典教有官。養老有庠。學之始也。歷世雖遠。未之或異。不幸自周季以來。世衰道微。俗流而不返。士散而無統。亂於楊墨。賊於申韓。大壞於釋老。爛漫橫流。不可收拾。始有重編累簡。棊以巨輪。象龍萬人。飾黃金珂。璧怪珍之物。誘駭愚稚。而六經淺微。穹閣傑屋。上靡霄漢。黜聖崇丹。窮極工技。其費以億萬計。而學校弗治。自周衰至五代。幾二千歲。而後我宋誕生。天命崇經立學。以爲治本。十有二聖。一心。罔或怠忽。然竊嘗考之。方周盛時。天子所都。既竝建四代之學。而又黨有庠。遂有序。畿內六鄉。鄉有黨。百五十六。遂有鄙。如黨之數。遂序黨庠。蓋互見之。則是千里之內。爲序十有二。爲庠三百。何其盛也。今畿內之郡。皆僅有一學。較於周不及百之二。而又不治。則爲之牧守者。得無任是責邪。會稽拱行在所。爲東諸侯之冠。宜有以宜聖化。倡郡國。而學未稱。給事中括蒼王公信來。爲是邦政。成令行。民物和樂。臺榭弗崇。陂池弗廣。而惟學校是先。燕遊弗親。廚傳弗飾。而惟養士是急。下車未久。輿殿崇閣。邃宇脩廊。講說之堂。絃誦之舍。以葺以增。不日訖事。以其饔飧未足也。則爲之售常平之田。以其見聞未廣也。則爲之求四方之書。食有餘積。書罕未見。然公猶以爲慊。曰。上丁之禮。服器未復古也。又爲之新冕弁衣裳。

帶紳佩鳥之屬。自邦侯至諸生。各以其所宜服。鼎俎尊彝豆籩簠簋之屬。自始奠至受胙。各以其所宜用。無一不如禮式。公迺齋心。脩容。來宿於次。賓明陟降。揖遜。進退。踴起。俯首屏氣。如懼弗克。禮成。士僉曰。公以躬行先我。我處於鄉。弗篤於孝悌忠信。出而仕。弗勉於廉清正直。不獨不可見公。仰天俯地。其何心。見父兄長老。其何辭。教授陳君自強與諸生。以其言來告曰。願有紀某老病。不獲奉俎豆。以從公後。喜士之能承公也。於是乎書。紹熙二年九月癸酉。中奉大夫提舉建寧府武夷山冲佑觀陸某記。

重修天封寺記

淳熙丙午春。予以新定牧。入奏行在所。館於西湖上日。與物外人遊。多爲予言。淨慈有慧明師者。歷抵諸方。如汗血駒。所至蹴蹋。萬馬皆空。方是時。知其得法。而不知其能文。後四年。予屏居鏡湖上。明來訪予。談道之餘。縱言及文辭。卓然僂偉。非凡子所及。方是時。知其能文。而不知其有才。明既從予遊。累日。乃曳杖負笠。入天台山。爲天封主人。是山也。巖嶂嶄絕。爲天台四萬八千丈之冠。林麓幽邃。擅智者十二道場之勝。然地偏道遠。遊者旣寡。施者益落。明居之彌年。四方問道之士。以天封爲歸。植福樂施者。踵門還至。雖卻不可。於是自佛殿經藏。阿羅漢殿。鐘經二樓。雲堂庫院。莫不畢葺。敞爲大門。緣爲高垣。周爲四廡。屹爲二閣。來者以爲天宮。化成人力所能也。又哀其餘。作二庫。曰資道。曰博利。以供僧及童子。緝荒之用。彼庸道人日夜走衢路。丐乞聚畜。蓋未必能辦此。明方爲其徒。發明大事。因緣錢帛穀粟之間。不至丈室。而其所立。乃超卓絕人如此。豈非一世奇士哉。予嘗患今世局於觀人。妄謂長於此者。必短於彼。工於細者。必略於大。自天封觀之。其說豈不淺陋可笑也哉。會明以書來求予文。記其寺之廢興。因告以予說。使併

刻之。庶幾覽者有所做焉。紹熙三年三月三日。中奉大夫提舉建寧府武夷山沖佑觀山陰縣開國男食邑三百戶陸某記。

嚴州重修南山報恩光孝寺記

浙江自富春沂而上。過七里瀾桐君山。山益秀。水益清。烏龍山崛起千仞。鱗甲爪鬣。蜿蜒盤踞。嚴州在其下。有山直州之南。與烏龍爲賓主。烏龍以雄偉。南山以秀遠。形勢壯而風氣固。是爲太宗皇帝高宗皇帝受命賜履之邦。登高四望。則樓觀雉堞。鸞騰縶帶。在鬱葱佳氣中。兩山對峙。紫翠重複。信天下名城也。南山報恩光孝禪寺。實爲諸刹之冠。質於地志及父老之傳。唐末。有僧結廬於山之麓。名廣靈菴。慶曆中。始斥大之。爲廣靈寺。紹聖中。易禪林佛印大師希祖實爲第一代。始徙寺於山巔。今寺是也。崇寧中。賜名天寧萬壽。紹興中。易今名。初郡長者江氏爲塔七級。與寺俱燬於宣和之盜。厥後文則來居而寺復。法琦來助而塔建。及得智廓仲玘。而學者雲集。廓不期年示滅。凡今之營繕崇成者。皆玘也。如來大士有殿。演法會齋有堂。安衆有寮。棲鐘有樓。寢有室。遊有亭。浴有泉。又以餘力爲門。爲廡。爲庫。爲垣。爲磴。路爲禦。侮力士之像。未五六年。百役踵興。無一弗備。郡人童天祐。天錫。方珍。出貲爲最鉅。老僧智貴。傾其衣囊。助施爲尤難。若夫以宿世願力。來爲外護。取郡之積木以終成之者。太守殿中侍御史冷公世光也。寺之役旣成。冷公適有歸志。遂奉祠以去。豈非緣法哉。予亦嘗來爲守。廓及玘。皆予所勸請。則於是山不爲無夙昔緣。故玘來求予爲記。予行天下多矣。覽觀山川形勝。考千載之遺迹。未嘗不慨然也。晚至是邦。觀烏龍似赤甲白鹽。南山似錦屏。一水貫其間。紆餘澄澈似渭水。而南山崇塔廣殿。層軒脩廓。山光川靄。鐘鳴鯨吼。遊

者動心過者駭目又甚似漢嘉之凌雲蓋兼天下之異境而有之騷人墨客將有徒倚太息援筆而賦之者予未死尙庶幾見之紹熙四年二月庚申記

會稽縣重建社壇記

古者侯國地之別三爵之等五皆有宗廟社稷秦黜封建置郡守縣令於是古之命祀惟社稷尙存陵夷千餘載士不知學古吏不知習禮其祀社稷徒以法令從事畿封壇壝服器牲幣一切苟且取便於事無所考法宋興文物寔盛自朝廷達於下州縣邑社稷之祀略皆復古不幸中更犬戎之禍兵氛南被吳楚中興七十年郡縣之吏往往惟餉軍羽盜簿書訟獄爲急及吏以期告漫應曰如今至期又或移疾弗至雖朝廷所班令式或未嘗一視況三代之舊典禮乎會稽之爲邑實奉陵寢且在安撫使提點刑獄提舉常平治所有將迎造請之役有符檄期會之煩敕使內家及宗室近屬一歲屢至亭傳道路舟車徒役一有不治責在會稽者十居八七故令於祀事尤不遑暇縣社在禮神坊曰社曰稷曰風師曰雨師曰雷神凡五壇皆弗不治祀則芟舍以爲次凡祀之費一出於吏雨則寓於吳越王祠之門承議郎四明王君時會之來爲令始至周視壇所喟然歎曰幸爲政於此得有人民社稷事孰大於是者迺卽其地爲垣八十丈築屋四楹有門以時其啓閉有庫以儲其器物用宋之樾豐之枌榆故事藝松五十又稽合制度稿秸莞席幣篚樽俎豆籩簠簋勺羸莫不如式棗盛酒醴牲牢莫不供給獻有次祝有位齋有禁省饌食爵奠幣飲福望燎望瘞有儀祝事各以其日王君祇敬齋栗與其僚從事禮成而退無違者會稽歲比不登及是雨暘時若歲以大豐民歌於途農扠於野皆曰吾令致力於神神實饗答吾其可忘於是父老子弟相

與告子請記其事。予曰：爲政之道與他知先後緩急之序而已。王君設施知所先急如此，雖欲不治，得乎？雖然，是皆朝廷以班郡縣者，王君特能舉之，爾後來者願獨不能邪？故予詳記始末，所以告無窮也。慶元二年五月二十日，中大夫提舉建寧府武夷山冲佑觀山陰縣開國男食邑三百戶陸某記。

廣德軍放生池記

古者臣之愛其君，何其至也。其禱祈之辭曰：受天百祿，曰子孫千億，曰如南山之壽，一語言，一飲食，未嘗忘君。然不聞有以羽毛鱗介之族，祈其君之福者。蓋先王盛時，山澤有虞，川林有衛，漁獵有時，數罟有禁，洋洋乎浩浩乎物各遂其生養之宜，所謂澆陂竭澤者，蓋無有也。所謂相啣以溼，相濡以沫者，蓋未見也。至於後世，德化弗行，厲禁弗施，廣殺厚味，暴殄天物，放而不知止，舍耒耜而事網罟者，日以益衆。於是有所以放生名池，用祝壽祺者，而唐顏真卿之石刻始傳於世。宋興，十三聖相繼，以深仁盛德，極高蟠厚，鳥獸魚鼈咸若矣。而四方郡國，猶相與築陂儲水，修放生故事，所以廣聖澤之餘，有不敢忽者。惟廣德軍舊以郡圃後池爲之地隘，水泉淺涸，不與事稱。承議郎曾侯臬，以慶元二年來領郡事，顧而太息，嘗以事至子城西，稍雨，得巨溪者，延袤百步，泓渟澄澈，蒲柳列植，藻荇縈帶，水光天影，盪靡上下，爲一郡絕景。侯因其故而加治焉，築屋於其會，名曰溪堂。民不勞，財不費，煥然告成。重明節率僚吏放鱗介千計，望行在拜手稽首，禮成而退。父老童穉，縱觀興歎，以爲廣德爲郡以來，逾二百年所未之有。侯移書笠澤陸某，俾爲記。某復之曰：侯奉天子詔來爲守於此，一賦役非其時，一訟獄非其情，窮僻下里，匹夫匹婦有一愁歎，侯之責也能不負此責。然後足以對揚天子休命，而致歸美報上之意。放生之舉，蓋賢守善其職之一事爾。豈

特是而止哉。期年政成，將屢書之。中大夫提舉建寧府武夷山冲佑觀山陰縣開國男食邑三百戶陸某記。

鎮江府駐劄御前諸軍副都統廳壁記

鎮江府駐劄御前諸軍副都統武功大夫和州防禦使潘川夏侯君，書來諗予於山陰澤中曰：吾軍有都統爲一軍大將，內以屏衛行在外，以控扼梁楚，隱然一長城也。又置副都統一員，以佐其長，智勇相資，寬猛相濟，有事則或居或行，更出迭歸，無事則同籌共畫於帳中，而制敵於千里之外，其任可謂重矣。而副都統自設官以來，今三十有八年，歷官十人，再至者一人，未有壁記。後將無所攷質，予爲我書而刻其姓名，可乎？予與夏侯君南北異鄉，東西異班，出處壯老異致，然每見其撫劍抵掌，談中原形勢，兵法奇正，未嘗不太息，恨不與之周旋於軍旅間也。君亦謂予非齷齪老書生，以兄事予，甚敬。則今日之請，尙何辭然？今天子神聖文武，承十二聖之傳，方且拓定河洛，規恢燕趙，以卒高皇帝之武功，則宿師江淮，蓋非久計。夏侯君亦且與諸將移屯玉關之西，天山之北矣。予雖老，尙庶幾見之。慶元四年正月甲子，陸某記。

法雲寺觀音殿記

浙東之郡，會稽爲大，出會稽城西門，循漕渠行八里，有佛剎曰法雲禪寺。寺居錢塘會稽之衝，凡東之士大夫仕於朝，與調官者，試於禮部者，莫不由寺而西，錢往迎來，常相屬也。富商大賈，揆施掛席，夾以大瓣明珠，大貝翠羽，瑟瑟之寶，重載而往者，無虛日也。又其地在鏡湖下，灌漑滄泄，最先一邦，富比封君者，家相望也。故多施者，寺易以興。然建炎庚戌，胡虜之禍，亦以近官道，首廢於火，一瓦不遺。主僧曰道亨，爲一

方所信。度弟子三十二人。慨然自任。以興復之事。未成者十七而沒。其後有自修者。始爲三月。去經藏等子。適得華嚴般若涅槃寶積數百卷。以施之。草創未畢。而修謝去。自是寺以不得人。又廢。乃身作伐鐘鼓不鳴。白衣棲居之。屠牛牧豕。莫敢執。何初先楚公爲尙書左丞。請於朝。以證慈及法雲爲功德院。歲度僧一人。三年間。證慈得其二。法雲得其一。故太傅與楚公祠堂肖像具存。予自蜀歸。始言於府。請逐白衣。而命契葬者。主之。彝與亨俱東陽人。人固已喜。而彝又有器局才智。居之。且二十年。創佛殿及像設。費甚厚。談笑而成。重建三門。翼以兩廡。巍然大利矣。彝沒。予以告府。牧尙書葉公。以其弟子道澤繼之。澤少年。志節清苦。言議英發。人皆畏其嚴。而服其公。於是予以大屋四楹。施以爲觀音大士殿。雖然。尙未易成也。澤即日走四方。謀之三年。遂建殿。殿之雄麗。冠於一刹。予又施以禪月所畫十六大阿羅漢像。龜於兩壁。觀者起敬。施者踵至。自火於庚戌。及今庚申。實七十載。殆若有數然。卒成之者。繫彝與澤父子積勤不懈之力也。予嘗謂事物廢與。數固不可逃。而人謀常參焉。予遊四方。凡通都大邑。以至遐陬夷裔。十家之聚。必有佛刹。往往歷數百千歲。雖或盛或衰。要皆不廢。而當時朝市城郭。邑里官寺。多已化爲飛埃。鞠爲茂草。過者弔古興懷。於狐嘯鬼嘯之區。而佛刹自若也。豈獨因果報應之說。足以動人。而出其財力。亦其徒堅忍強毅。不以豐凶難易變其心。子又有孫。孫又有子。必於成而後已。彼之不廢固宜。予因彝與澤之事。而有感焉。併載其說。士大夫過而稅駕者。讀之。其亦有感也夫。慶元五年秋七月庚午記。

會稽縣新建華嚴院記

會稽五雲鄉有山曰黃琢。山之麓。原野曠。水泉冽。岡巒抱負。崑嶂森立。而地蕪不治者。不知幾何年。或謂

古嘗立精舍以待天衣雲門遊僧之至者有石刻具其事。其後寺廢石亡。獨龜趺猶在。父老類能言之。慶元三年有僧士馬君正卿聞而太息。乃與其弟崧卿以事親收族之餘貲買地築屋擇僧守之。凡僧若士民之道出於此者皆得就憩。猶以爲未廣也。則爲堂殿門廡倉庖廡。凡僧居之宜有者悉備。而殖產使足以贍足其徒。猶懼其不能久也。告於府牧丞相高公。以華嚴院額徙置焉。可謂盡矣。而其意猶未已也。曰年運而往或者欺有司而寓其孳。則院廢矣。家世隆替不可常。萬分一有子孫以貧故規院之產。侵院之事。則僧散矣。於是因其同學於佛者朝奉郎致仕曾君迅叔。邇來請予文刻之石。庶來者知此院經理之艱勤。則不忍寓其孳。子孫知乃祖乃父志願之堅確。則不忍規其產。侵其事。設若有之。而至於有司。則賢守善令必有以處此。雖至於數百千歲。此院猶不廢也。予報之曰。僧居之廢興。儒者或謂非吾所當與。是不然。韓退之著書至欲火其書。廬其居。杜牧之記南亭。盛贊會昌之毀寺。可謂勇矣。然二公者卒亦不能守其說。彼浮圖突兀三百尺。退之固喜其成。而老僧挈柁無歸。寺竹殘伐。牧之亦賦而悲之。彼二公非欲納交於釋氏也。願樂成而惡廢。亦人之常心耳。則君之志叔邇之請。與予之記之也。皆可以無愧矣。慶元五年八月甲子中大夫致仕山陰縣開國男食邑三百戶陸某撰并書丹。

卷第二十

居室記

陸子治室於所居堂之北。其南北二十有八尺。東西十有七尺。東西北皆爲窗。窗皆設籬障。視晦明寒燠。

爲舒卷啓閉之節。南爲大門，西南爲小門，冬則析堂與室爲二，而通其小門以爲奧室。夏則合爲一，而闔大門以受涼風。歲暮必易腐瓦，補罅隙以避霜露之氣。朝哺食飲，豐約惟其力，少飽則止，不必盡器。休息取調節氣血，不必成寐。讀書取暢適性靈，不必終卷。衣加損視氣候，或一日屢變，行不過數十步，意倦則止。雖有所期處，亦不復問客至，或見或不能見，問與人論說古事，或共盃酒，倦則亟捨而起。四方書疏，略不復道。有來者，或亟報，或守累日不能報。皆適逢其會，無貴賤疎戚之間，足跡不至城市者，率累年少不復言。舍後及旁，皆有隙地，薜花百餘本，當敷築時，或至其下，徜徉坐起，亦或零落已盡，終不一往。有疾亦不汲汲近藥石，久多自平。家世無年，自曾大父以降，三世皆不越一甲子。今獨幸及七十有六，耳目手足未廢，可謂過其分矣。然自記平昔於方外養生之說，初無所聞，意者日用亦或默與養生者合，故悉自書之，將質於山林有道之士云。慶元六年八月一日，山陰陸某務觀記。

邵武縣興造記

太平興國五年，詔即建州邵武縣置邵武軍，而縣爲屬。其治在軍之東。建炎三年，盜起閩縣，邵武亦被兵。焚官寺民廬，略盡。紹興十年，作譙門。十六年，作守丞治所。於是學宮軍壘，圉倉廩，以次皆復。其舊獨縣故地廢爲教場，而縣寓尉廨。至二十一年，知縣事業遂始復。縣治未及成，安撫使用兵官王存之請，即日撤除。滌地皆盡，而縣徙寓武陽驛。乾道六年，知縣事尤昂始作縣門，他猶未暇及。慶元四年，宣義郎史君定之來爲縣，始至而歎曰：縣古子男國也，因時之治忽，政之善否，以爲盛衰。自建炎己酉，訖今歲在戊午。

凡七十年。自高宗皇帝至今天子。歷四聖。寬賦薄征。休養生元。歲且屢豐。公饒私餘。生齒繁滋。考之九域。圖郡戶八萬七千九百有奇。今增五萬四千二百有奇。爲戶十四萬二千一百有奇。可謂盛矣。而邵武一邑。獨當戶五萬六千四百有奇。爲郡境十之四。則吾邑顧不又盛哉。而反寓其治於傳舍。詔勅法令。圖志符檄。護藏不嚴。棲列無所。決訟問囚。延見丞佐與賓客之來者。其地皆褊迫庫陋。仰漏旁穿。非所以宣布德澤。示民以上下之分也。念非所先。姑置弗議。比爲政期。年家無弗伸之冤。庭無弗直之訟。善無濫刑。惡無佚罰。太守趙侯不謹。知君爲深。君所設施。郡未嘗以勞撓焉。以故君之政成。民之俗變。有所爲。輒其成之。於是始有意於新縣治矣。會得吏靈與用度之餘。爲錢百餘萬。自五年七月甲午鳩工。至十月己巳落成。出令有所燕息有次。勞資有館。胥吏徒役。咸有寧宇。貨布器物。各司其局。事立令行。老稚舞歌。視承平舊觀。有如焉。而木章竹箇。瓦甍髹丹。悉視時低昂。交手畀予。梓匠朽斲。百工之來者。得直皆如私家。訖事。民不及知。吏不得沿以爲奸。非君之才。有餘。顧能若是哉。堂之名有九。曰畫簾。曰無私。曰近民。曰仁平。曰居敬樓。曰瞻雲軒。曰讀書。曰如水亭。曰海棠。其扁榜多君自書。有筆法。其命名之意。卽其地可知。故不詳著。君蓋故丞相太師魏公之孫。予魏公客也。故君與趙侯皆以記縣之興造爲請。予受知魏公時。甫壯歲。爾俯仰四十餘年。同時賓客凋喪略盡。而予偶獨後死。見君以才稱於世。且猶能秉筆有所紀述。亦可謂幸矣。故不復辭。慶元六年九月癸酉。中大夫直華文閣致仕陸某記。并書。

諸暨縣主簿廳記

建炎紹興間。予爲童子。遭中原喪亂。渡河沿汴。涉淮絕江。間關兵間以歸。方是時。天子暴衣露蓋。櫛風沐

雨巡狩四方。曾不期月休也。大臣崎嶇於山海阻險之地。草行露宿。不敢告勞。亦宜矣。況於州牧郡守以降。達條一廛以治其事者。相望。又況降而爲縣令丞簿者哉。及王室中興。內外竊定。然郡縣吏寓其治於郵亭民廬。僧道士舍者。尚比比皆是。積累六七十年。四聖相授。天下日益無事。兵燹歲登。用度饒餘。然後皆得稍復承平之舊。至於縣。則有迨今苟且因循者。主簿在縣官中。卑於令丞。而冷於尉。非甚有才。則其舉事爲尤難。若諸暨主簿丁君崇者。可謂才矣。君海陵人也。今居吳。世有顯人。爲吏精察。而平恕。學工文辭。而不忽簿書期會之事。嘗兼攝丞。久之。得添給。不取一錢。皆用以新主簿之廨。諸暨舊無丞。元豐間。置丞。徙主簿以居之。而主簿更得廨。乃故鹽墮。藉溼支傾。殆不可居。然閱百二十年。爲主簿者。凡幾人。至君乃更新之。不亟不徐。不侈不陋。不費所公。不斂於民。竹簡木章。瓦甃丹堊。不蠹不苦窳。不漫漶。堂後舊有池。自君來。比二歲。產異蓮。駢跗。邑人謹傳。以爲君且通貴之祥。相與名其池上之亭曰雙蓮。君故不喜怪。而邑人之意如此。亦足知其得民也。君與予之子子虞遊。乃因子虞請記歲月。予不得辭也。昔我藝祖肇造區夏。當乾德六年二月癸亥。嘗詔郡縣吏代歸者。皆上其官舍敝壞。或與葺之數於有司。以爲殿最。於辱。祖宗明詔。具在汗簡。而近世乃有相戒以爲非急務。且徒速謗者。獨安取此哉。予嘗備太史牛馬走。獲窺金匱石室之藏。故敢併記之。以曉他在仕者。嘉泰元年十月二十七日。中大夫直華文閣山陰縣開國男食邑三百戶致仕陸某記。

婺州稽古閣記

大觀二年九月乙丑。天子旣大興學校。舉經行之士。於是詔天下州學經史閣。皆賜名稽古。婺州稽古閣

者。本以閣之下爲講堂。而閣用大觀詔書易名。紹興中學廢於火。及再建講堂。雖復其故。不暇爲閣。至嘉泰元年。太守丁公逢。乃卽講堂後得舊直舍地以爲閣。而請於今參知政事許公大書其顏。公書宏偉有漢法。於是閣一日而傳天下。丁公旣代去。曾公臬來爲郡。閣之役尙未旣也。於是窗戶闌楯瓦髻梁丹粲然皆備。又爲兩廡。達於講堂。高廣壯麗無遺力。南山在其上。雙谿在其下。煙雲百變。朝暮獻狀。閣之後有仰高堂。舊祠資政宗公澤尙書梅公執禮中書舍人潘公良貴三公皆郡人。有忠義大節而祠庫陋且弗葺。曾公微而大之。始奕奕與閣稱。曾公以邦人之請。及州學教授潘君夢得所敘。移書史官山陰陸某。願記其始末。時方修孝宗光宗兩朝實錄。業大事叢。而奏篇有程久。乃能如曾公之請。夫堯舜禹臯陶。書紀其事。雖不同。然未嘗不同者。稽古也。稽古必以書。前乎堯舜之書。其易之始。畫與典墳乎。易之畫。幸在至今。而三墳五典。自楚倚相以後。不聞有能盡讀者。世所共歎也。雖然。今讀易不能知伏羲之心。讀典謨不能知堯舜禹臯陶之心。雖典墳盡在。亦何益於稽古。故予以爲士能玩易之畫。與身親見虞羲等。反覆盡心於典謨。與身親見堯舜禹臯陶等。能親見聖人而不能佐其君。與聖人之治理。豈有是哉。士之放逸惰儻。不力於學者。固所不論。學而不親見聖人。猶未學也。親見不疑。而不用於天下。則有命焉。進則不負所學。退則安吾命。而無愠。斯可仰稱大觀詔書。與賢守復閣之意矣。士尙勉之。嘉泰二年閏月二十五日。中大夫直華文閣提舉佑神觀兼實錄院同修撰兼同修國史陸某謹記。

智者寺興造記

婺州金華山智者廣福禪寺。浮圖氏所謂梁樓約法師道場。國朝開寶九年。始爲禪寺。自淨悟禪師全肯。

傳三十七代二百餘年。至慶元之五年。而仲玘實來。方是時。事廢不舉。地蕪不養。棟橈柱腐。垣斷甃缺。若不可復爲者。玘植杖而四顧曰。智者之爲寺。天造地設者至矣。而人事不能充焉。故寢壞至於此。天其使我與此地歟。乃諏諸爲地理學者。則其言與玘略合。蓋寺在金華山之麓。峰嶂屹立。林岫間出。日月映蔽。風雲吞吐。而前之形勢無以留之。如王公大人南嚮坐帷幄中。宜其前有列鼎大牲之養。盛禮備樂之奉。賓客進趨。檳相襁翼。將吏武士。執轡執何。然後爲稱。今乃巍然獨坐。而侍衛者皆奔趨而去。則其威重無乃少損乎。於是始議鑿大池。潑水於門梁。其上通大路。而增門之址。高於故三之二。異時所謂奔趨而去者。皆肅然就列。恪然執事。則王公大人之尊。於是始全。則其施置建立。號令賞罰。亦何可少訾邪。方議之初。或謂門有大木數十。必盡去。乃可興池役。而木所從來久。以是未決。忽一夕大風。木盡拔。若有鬼神相其役者。其亦異矣。玘之來百役。皆作。修廊傑閣。虛堂廣殿。至於棲衆養老之室。庖福帑庾之所。繕爲垣牆。引爲道路。莫不美於觀。而便於事。後雖有能者。無以加焉。玘有道行。爲其後所宗。而才智器局。又卓然不凡。如此。故薦紳多喜道之。予又與有夙昔。且嘗記其嚴州南山興造之盛。故玘今又從予。求作智者興造記。而予友人寧遠軍節度使提舉佑神觀姜公邦傑。復以手書助之。請未及屬稿。而邦傑歿。予尤感焉。雖不敏。不敢辭也。今茲之役。池爲大。故書之。特詳。嘉泰三年十月二十九日記。

常州奔牛開記

岷山導江。行數千里。至廣陵丹陽之間。是爲南北之衝。皆疏河以通饒餉。北爲瓜州開。入淮汴。以至河洛。南爲京口開。歷吳中以達浙江。而京口之東。有呂城開。猶在丹陽境中。又東有奔牛開。則隸常州武進縣。

以地勢言之。自創爲饑河時。是三閘已具矣。蓋無之。則水不能節。水不節。則朝溢暮涸。安在其爲饑也。蘇翰林嘗過奔牛。六月無水。有仰視古堰之歎。則水之苦涸固久。地志概述本末而不能詳也。今知軍州事。趙侯善防字若川。以諸王孫來爲郡。未滿歲。政事爲畿內最。考古以驗今約。己以使人裕民。以東吏不以難止。不以毀疑。不以費懼。於是郡之人僉以閘爲請。侯慨然。是其言。會知武進縣。丘君壽薦來白事。所陳利病益明。侯旣以告於轉運使。且亟以其役專畀之丘君。於是凡閘前後左右受水之地。悉伐石於小河。元山爲無窮計。舊用木者皆易去之。凡用工二萬二千石。二千六百錢。以繕計者八千。米以斛計者五百。皆有奇。又爲屋以覆閘。皆宏傑牢堅。自鳩材至訖役。閱三時。其成之日。蓋嘉泰三年八月乙巳也。明年正月丁卯。侯移書來請記。予謂方朝廷在故都時。實仰東南財賦。而吳中又爲東南根柢。語曰。蘇常熟。天下足。故此閘尤爲國用所仰。遲速豐耗。天下休戚在焉。自天子駐蹕臨安。牧貢戎贊。四方之賦輸。與郵置往來。軍旅征戍。商賈貿遷者。途出於此。居天下十七。其所繫豈不愈重哉。雖然。猶未盡見也。今天子憂勤恭儉。以撫四海。德教洋溢。如祖宗時。齊魯燕管秦雍之地。且盡歸版圖。則龍舟仗衛。復沂淮汴。以還故都。百司庶府。熊羆貔虎之師。翼衛以從。戈旗蔽天。舳艫相銜。然後知此閘之功。與趙侯爲國長慮遠圖之意。不特爲一時便利而已。侯吾甥也。請至四五不倦。故不以衰耄辭。三月丙子。太中大夫充寶謨閣待制致仕。山陰縣開國子食邑五百戶。賜紫金魚袋陸某記。

盱眙軍翠屏堂記

國家故都汴時。東出通津門。舟行歷宋亳宿泗。兩隄列植榆柳槐楸。所在爲城邑。行千有一百里。汴流始

合淮以入於海。南舟必自盱眙絕淮。乃能入汴。北舟亦自是入楚之洪澤。以達大江。則盱眙實梁宋吳楚之衝。爲天下重地。尙矣。粵自高皇帝受命。中興。駐蹕臨安。歲受朝聘。始詔盱眙進郡。除館治道。以爲迎勞宿餞之地。而王人持尺一牘。懷柔殊鄰者。亦皆取道於此。於是地望益重。城郭益繕。治選任牧守。重於曩歲。及吳興施侯之來。爲知軍事也。政成俗阜。相地南山。得異境焉。前望龜山下。臨長淮。高明平曠。一目千里。草木蔽虧。鳧雁翔泳。蓋可坐而數也。乃築傑屋。衡爲四楹。縱爲七架。前爲陳樂之所。後有更衣之地。而傍又有麗牲擊鮮。與夫吏士更休之區。翼室修廊。以陪以擁。斷削髹丹。皆極工緻。最二十有六間。而堂成。旣取米禮部芾之詩。名之曰翠屏。且疏其面勢於簡。繪其棟宇於素。走騎抵山陰澤中。請記於予。侯與予故相好也。予聞方國家承平時。其邊郡遊觀。有雅歌之堂。萬柳之亭。以地勝名天下。雖區脫間。猶能詠歎。以爲盛事。然嘗至其地者。皆謂不可與淮水南山爲比。翠屏之盛。又非雅歌萬柳可及。則亦宜有雄文傑作。以表出之。而予之文不足稱也。雖強承命。終以負愧。侯名宿字武子。於是爲朝散郎直祕閣開禧元年春正月癸酉記。

上天竺復菴記

嘉泰二年。上天竺廣慧法師築退居於寺門橋南。名之曰復菴。後負白雲峯。前直獅子乳竇。二峯帶以清溪。環以美箭嘉木。凡屋七十餘間。寢有室。講有堂。中則爲殿。以奉西方像。設殿前關大池。兩序列館。以處四方學者。炊爨瀉浴。皆有其所。床敷巾鉢。雲布鱗次。又以爲傳授講習梵唄之勤。宜有遊息之地。以休其暇日。則又作園亭流泉。以與學者共之。旣成。命其弟子了懷走山陰鏡湖。上從予求文。以記歲月。予告之。

曰進而忘退。行而忘居。知趨前而昧於顧後者。士大夫之通患也。故朝廷於士之告歸。每優禮之。而又命有司察其尤不知止者。以勵名節而厚風俗。士猶有不能決然退者。又况物外道人。初不踐是非毀譽之途。名山大衆。以說法爲職業。愈老而愈尊。愈久而人愈歸之。雖一坐數十夏。何不可者。如法師道遇三朝。名蓋萬衲。自紹熙至嘉泰十餘年間。詔書褒錄。如日麗天。學者歸仰。如泉赴壑。非有議其後者。而法師慨然爲退居之舉。傾竭囊裝。無所顧惜。雖然。以予觀之。師非獨視天竺之衆。不啻弊屣。加以歲年。功成行著。遂爲西方之歸。則復菴又一弊屣也。死生去來。無常。予老甚矣。安知不先在寶池中。俟師之歸。語今日作記事。相與一笑乎。開禧元年三月三日記。

東籬記

放翁告歸之三年。闢舍東蕪地。南北七十五尺。東西或十有八尺而贏。或十有三尺而縮。插竹爲籬。如其地之數。種五石瓮。瀦泉爲池。植千葉白芙蓉。又雜植木之品若干。草之品若干。名之曰東籬。放翁日婆娑其間。撥其香以臭。擷其穎以玩。朝而灌。莫而鋤。凡一甲坼。一敷榮。童子皆來報惟謹。放翁於是考本草。以見其性質。探離騷。以得其族類。本之詩爾雅。及毛氏郭氏之傳。以觀其比興。窮其訓詁。又下而博取漢魏晉唐以來。一篇一詠。無遺者。反覆研究。古今體制之變革。間亦吟諷爲長。謠短章。楚調唐律。酬答風月。煙雨之態度。蓋非獨娛身目。遣暇日而已。昔老子著書。末章自小國寡民。至甘其食。美其服。安其居。樂其俗。鄰國相望。雞犬之聲相聞。民至老死不相往來。其意深矣。使老子而得一邑。一聚。蓋真足以致此於虛。吾之東籬。又小國寡民之細者歟。開禧元年四月乙卯記。

嚴州釣臺買田記

嘉泰四年詔以嚴州久不治命朝散郎直祕閣浙西路安撫司參議孫公叔豹爲知州事公至數月州以大治聞獄無淹繫庭無滯訟幙府閑暇符檄簡少榜笞之聲不聞於屏外向之逋賦伏罰皆以時舉倉有餘粟府有餘帛公天資近道不樂燕遊歌舞優戲之奉又不喜以土木無益之事勞其民治事少休則宴坐別室自夜至旦鹽醜而出終歲如一日獨念初赴郡過七里瀨漢嚴先生釣臺下讀唐興元中崔儒釣臺記以爲上有平田百畝足以力耕下臨清流足以垂釣今投釣之地具在而田則亡有乃以屬縣令訪之則田亦具在旁有流泉雖大旱不竭可給灌溉而或者輒有之公乃遣語以當歸田直而取田以爲先生歲時祭享之奉其人難之公歎曰光武欲與先生共天下而先生不屑也千有餘歲後吾乃欲必取百畝之田以奉祀事乎且吾教化未孚而遽望人以穰耕遜畔難矣因置不問會有沒官田又從榜買民田足百畝除其泛科斂以畀浮屠之奉祠者又卽祠之右創爲佛院棲鐘於樓匱經於室僧廬客館略皆有所度歲入可以食其徒七人而樵汲之役又在其外則先生之祠可以永世不廢乃藝美石請記於予予曰嚴名城也自大駕巡幸臨安以朝士出守者與夫入對行殿被臨遣而來者大抵多取道於富春入謁亭下有高山仰止之歎而恨祠屋墜壞椒桂不以時薦往往咨嗟躊躇久而後去及其下車則日困於簿書米鹽將迎燕勞之事忽焉忘前日之言寒暑再更復上車去則又過祠下負初心戴愧面而去者袂相屬也聞孫公之舉得無少自咎哉予二十年前蓋嘗來爲此邦亦自咎者之一也故喜道孫公之舉且以勵來者云開禧元年十二月辛未太中大夫寶謨閣待制致仕山陰縣開國子食邑五百戶賜紫金魚袋

陸某記。

陸放翁集 二 渭南文集 卷二十

九十二

陸放翁集

渭南文集

卷第二十一

仁和縣重修先聖廟記

聖人之道位天地育萬物可謂大矣。然常寓之於宮室。祭器服虔數之間。非如後世佛老子廢禮棄樂。掃除名分。務爲玄默寂滅。浩然不可致詰也。夫子生於周。故其尊以爲師者。文王周公也。使夫子生於今。有不奉孔子顏子孟子以爲先聖先師者乎。則今之卽學校以春秋舍奠於先聖先師者。非獨甲令也。方先朝學校盛時。縣有學。與郡等。後以海內多事。縣學往往廢壞。而所以奉先聖先師者。亦苟而已。知臨安府仁和縣事謝君庭玉。獨慨然以爲急務。重責寢食不敢安。捐己之公租錢二十萬。以經始。會得廢寺。當沒官錢。以佐其費。又取吏舍以益其址。自開禧元年十二月。至二年正月。廟乃告成。最其費爲錢五十萬。吾夫子被袞服冕。巍然當坐。旣悉如舊制。配享從祀。亦皆就列。出入有門。陟降有階。設燎有庭。三獻及受。胙瘞幣皆有位。儲峙祭器。則又有庫。是歲二月。上下將有事於廟。吏言異時。惟丞以下執事。令以劇劇率不行。謝君曰。豈有是哉。於是告於府。肅恭齋明。以時訖事。且來告。請記其始末。天子中興大業。講太平典禮。方自學校始。學校之設。方自兩赤縣始。則茲廟又學校之權輿也。其可闕書。三年正月戊寅。太中大夫寶謨閣待制致仕渭南縣開國伯食邑八百戶賜紫金魚袋陸某記。

湖州常照院記

昔在高宗受命中興全功至德聖神武文昭仁憲孝皇帝龍興河朔克濟大業祀宋配天三十有六年涵養生齒其數無量遺弓故劍羣臣皆當追慕號泣思所以報在天之靈至千萬世無怠無斁而況山林外臣以道藝供奉仗內嘗被異禮厚賜者乎鎮江府延慶寺僧梵隆以異材瞻學高操絕藝自結上知不由先容得對內殿先是隆師固已結廬於湖州青山號無住精舍一時名士如葉左丞夢得葛待制勝仲汪內翰藻陳參政與義皆爲賦詩勒銘傳於天下矣至是詔賜菴居於萬松嶺金地山江濤湖光映帶几席壽藤老木岑蔚天矯隆師方力辭願歸故巢既至悅其地且侈上賜輜然願留久之示化上爲悵然不懌賜金歸葬故山及孝宗皇帝嗣位又命創常照院於無住故址以隆師弟子上首至叶嗣其事賜田以贖其徒又命充丁亥丁未本命道場以祈兩殿之福高宗皇帝御德壽宮賜御書寂而常照照而常寂八字以示名院本指且賜天申金剛無量壽閣扁榜及紫檀刻佛號如來閣榜悉御書也又一再賜萬機暇日所臨晉王羲之帖二十二紙唐陸柬之蘭亭詩一卷及米芾史略帖一卷題圍扇二柄又賜白金助建立於是院悉崇成有釋迦文殊普賢十六阿羅漢殿左則觀音大士道場右則法輪藏室食息有堂鐘經有樓熏浴炊爨儲積各有其所鍵椎鼓鐘器亦備足至於遊息臨眺種藝疏鑿莫不極思致區處之妙而西巖尤爲勝絕曠快之地叶師以老疾請罷院事屏居西巖今皇帝詔從之且命改院爲禪院專以仰薦高宗神遊世擇其徒有道行者嗣住持事而本澄首被是選實嘉泰四年甲子歲之四月也叶師乃來告曰願有述焉其實紹興朝士歷事四朝三備史官名列策府諸儒之右則與隆師及其子孫雖道俗迹異而

被遇則同。今叶澄父子晨香夜燈，梵唄禪定，雖世外枯槁，亦有以伸其圖報萬一之意。某則不然，飽食而安居，日復一日，飾巾待終而已。視叶澄豈不有媿哉！故遂秉筆而不敢辭。上以紀三朝眷遇山林學道者之盛德，下以識某媿云。開禧三年二月壬子謹記。

法慈懺殿記

東出慶元府五十里，曰小溪。有僧舍曰法慈院。院創於唐咸通中，舊號鳳山院。歷五季至宋興院，常不廢。治平二年始賜今名。雖世以院僧主之，然其徒多出遊四方，學經論，問祖師第一義，或終其身不歸。淳熙十四年，老宿及後來者始議作懺殿，而如戒等十輩願盡力營之，久而不成。十人或死，或緣不偶，獨如戒智玻行慈誓不怠廢，必遂其始願，行乞勞苦，積細微以成高大。於是施者牆立，助者麇至，聞者興歎。見者起敬。木章竹箇，山積雲委，伐石於山，陶甓於窰，丹漆黝墨，致於四方。以紹熙壬子三月癸酉始土工。明年八月庚申，始匠事。十一月土木皆告成。南北八丈六尺，東西五丈八尺，而棟之高四丈一尺，耽耽奕奕，窮極藝巧。雖慶元多名山，巨剎，然懺堂之盛，未有加法慈者。奉釋迦於中，而左則彌勒，右則無量壽。又以天地鬼神之像陪擁四旁，於序亦盛矣。院僧因餘姚普明院僧則華求予爲記，則華嘗遊蜀，予識之於成都。今三十餘年，以故舊不忍拒也，乃爲之書，而刻施者姓名於碑陰云。

東陽陳君義莊記

東陽進士陳君德高，因吾友人呂君友德來告曰：德高不幸早失先人，舉進士，又輒斥念昔先人進德高輩於學，蓋將使之事君，使之字民，以廣我先人之志。今雖自力，而不合於有司之繩尺，如其遂負所期望。

付託。生何面以奉祭享。死何辭以見吾親於地下。不獲施於仕進。爲時雨爲豐年矣。獨不可退而施於宗族乎。於是欲爲義莊。略用范文正公之矩度。而稍增損之。以適時變。敢求文於執事者。且載其凡於碑陰。予復之曰。美哉。吾子之志也。人之情。於其宗族。遠則疏。而彌遠則益疏。而至於忘之。蓋以身爲親疏。而不以先人爲親疏也。視兄之子。已或不若己之子。己之子與兄之子。自吾父視之。有異乎。能以父之心爲心。則己之子與兄之子。且不知其同異矣。推而上之。大父之孫。爲從父兄弟。曾大父之曾孫。爲從祖兄弟。又推而上之。至於無服。雖天下長者。不能無親疎之殺矣。於尊制。服不得不若是也。若推上世之心。愛其子孫。欲使之衣食給足。婚嫁以時。欲使之爲士。而不欲使之流爲工商。降爲皂隸。去爲浮圖老子之徒。則一也。死而有知。豈以遠而忘之哉。義莊之設。蓋基於是。然舉天下言之。能爲是者有幾。非以爲不美而不爲也。力不足也。若陳君者。自其先人勤勞節約。以致饒餘。而陳君不敢私有之。其地在塋頭昭福寺之傍。初期以千畝。今及十之七。而吾地在塋頭者止此。比鄰感其義。皆欲期年間貿易以成之。又植桑畜牛築陂。以豐衣食之源。其說見碑陰。又有最當慮者。吾子之心。則盡矣。後人或貪而專利。或嗇而吝出。或夸而廣費。或挾長挾仕。挾有力之助。而敗約。非有司者別白之。則莊且壞。不支。府牧邑長丞掾曹吏及鄉之卿大夫先生處士。其必綱維主張之。使久而如一日。陳氏布衣也。其貲產非能絕出一鄉之上。而義倡於鄉。如此。吾徒仕於朝於四方。雖未必皆厚祿。然聞陳氏之風。而不知媿且慕者。豈人情也哉。於是併書以遺焉。君之先君子蓋諱士澄。字彥清。云。開禧三年七月辛丑記。

廬帥田侯生祠記

開禧二年八月，詔以開封田侯琳爲淮南西路安撫使，兼知廬州，節制淮西軍馬。時虜方入塞，侯旣受命，謂廬州爲淮西根本，而古城又爲州之襟要，堅守廬州，則淮西有太山之安，修復古城，則廬州有金城湯池之固。異時議者知守南城而已，古城不復繕治，一日有警，如有太阿之利而不持，鐔柄七尺之軀而授人腰領，幾何其不敗也。古城雖不甃，而其實峭堅，利以禦寇，且西北堅城，多止用土，雖潼關及赫連氏統萬城，亦土爾，乃躬臨視之，芟夷草棘，則城果屹如石壁，戈戟皆廢，衆始駭服。於是增陴浚濠，大設樓櫓，又有月城，亦得地利，而卑不可恃，則又爲築羊馬城，厚六尺，高倍之，且爲重壑，設釣橋，而月城亦不可復犯矣。然自興役至訖事，不三閱月，將士爭奮，民不與知，一旦巍然，若役鬼神，可謂奇偉不世之功矣。城甫畢，虜果大入，道執鄉民，問知侯在是，相顧曰：「殊不知乃鐵面將軍也。」蓋虜自王師攻蔡州時，已習知侯名，未戰氣先奪矣。乘城拒守甚力，夜遣偏將自屯所攻其營，殺傷數千人，萬戶死者二人。侯聞捷，曰：「是且伏兵東門，夜攻吾水柵，以幸一勝。」乃提親兵隨所向禦之，莫不摧破。虜知廬州不可近，遂解而趨和州。侯又亟遣親信間道督光州成將，斷橋梁，燒賊艦，絕其饋道，奪俘虜，復取安豐軍。又遣萬騎由梁縣援和州。會和州亦堅壁，虜窮，乃盡遜。侯又出兵濠州，以戰車敗虜屯兵，戰車久不用，侯以意爲之，果取勝。策勳，真拜達州刺史。且以車制頽之諸軍，侯猶不敢自以爲功。方益修水門之備，濬河深二丈，乃得昔人撤星橋橫巨兩城間，始知昔固有此舉，遂益植新椿而城之。其崇五丈有奇，樓櫓稱焉。將吏士民聚而謀曰：「侯之所立如此，郡人無以報萬一，則不可。」相與築生祠於城中，而移書於予，請書歲月，予以衰疾辭。比書復來，則侯捐館舍矣。請旣益堅，予亦痛若人之不淑，而不獲卒大勳業也。故采之僉論，以敘其始末。昔劉涇城水浴。

趙立城山陽。滬所遇非堅敵。立雖死事。而不能全其城。猶皆廟食。載在祀典。況如侯之功。光明卓絕如此。則祀典之請。必有任其事者。尙繼書之。以垂示後世。爲忠義之勸云。嘉定元年春二月己巳謹記。

吳氏書樓記

天下之事。有合於理而可爲者。有雖合於理而不可得爲之者。士於可爲者。不可不力。力不足。則合朋友鄉閭之力而爲之。又不足。告於在任者以卒成之。成矣。又慮其壞。則吾有子。子又有孫。孫又有子。雖數千百世。吾之志猶在也。豈不賢哉。彼不可得爲之者。則有命焉。有義焉。不知命義。徒嗷嗷紛紛。奚益。故君子不爲也。然爲此者。寡也。或易之爲彼者。輒可以得名於流俗。故士之爲此者。寡也。吾友南城吳君仲與其弟倫。初以淳熙之詔。建社倉。其詳見於侍講朱公元晦所爲記。其後又以錢百萬。剏爲大樓。儲書數千卷。會友朋教子弟。其意甚美。於是朱公又爲大書書樓二字。以揭之。樓之下。曰讀書堂。堂之前。又爲小閣。閣之下。曰和豐堂。旁復有二小閣。左則象山陸公子靜書。其顏曰南牕。右則艮齋謝公昌國書。其顏曰北牕。堂之後。築木軒。則又朱公實書之。於庠。亦可謂盛矣。蓋吳君未命之士。爾爲社倉。以惠其鄉。爲書樓。以善其家。皆其力之所及。自是推而上之。力可以及一邑。一郡。一道。以至謀謨於朝者。皆如吳君自力而不俟。則民殷俗儉。兵寢刑厝。如唐虞三代。可積而至也。吳君兄弟爲是。迄今已五十六年。使皆壽考康寧。則倉與樓皆當益治。鄉之民生業。愈給足安樂。日趨於壽富。而君之子弟。孝悌忠信。亦皆足以化民善俗。是可坐而俟也。然年運而往。天人之際。有不可常者。則又當有以垂訓於無窮。予讀唐李衛公文饒平泉山居記。有曰。鬻平泉者。非吾子孫也。以平泉一木一石與人者。非佳子弟也。平泉特燕遊地。木石之怪奇者。亦

奚足道而其言且如此況義倉與書樓乎後之人讀吾記至此將有渙然汗出霰然涕下者雖百世之後常如吳君時有不難者矣嘉定元年五月甲子記

靈祕院營造記

出會稽城西門舟行二十五里曰柯橋靈祕院自紹興中僧海淨大師智性築屋設供以待遊僧名接待院久而寢成始徙廢寺故額名之海淨年九十坐八十三夏而終以其法孫德恭領院事恭少嘗學於四方有器局迨今二十年食不過一簞衣不加一稱而惟衆事是力夕思晝營心揆手畫施者自至魔事不作用能於二十年間或改作或增葺光明偉麗毫髮無憾上承先師遺志下爲子孫基業闕堂傑閣房奧廊序棲鐘之樓橫經之堂館客之次下至庖廚滌浴無一不備爲屋僅百間自門而出直視旁覽道路繩直而原野砥平一遠山在前孤峭奇秀常有煙雲映帶其傍下地者以爲在法百世不廢且將出名僧今院纔一傳其興如此後烏可量哉院之崇成也恭來請記曰先師之塔公實與之銘今院當有記非公誰宜爲哉予報之曰子廬於此凡東之會稽四明與西入臨安者風颿日相屬也彼其得志於仕宦獲利於商賈者寧可計邪有能家世相繼支久不壞如若之爲父子者乎有能容衆聚族燮和安樂如若之處兄弟者乎至於度地築室以奢麗相誇斤斧之聲未停丹堊之飾未乾而盛衰之變已遽至矣亦有如若之安居奠處子傳之孫孫又傳之子者乎此無他彼其初與若異也雖曰有天數然人事常參焉人事不盡而誘之數於庠其可哉嘉定元年夏五月庚申記

橋南書院記

吾友西安徐載叔，豪雋人也。博學善屬文，所從皆知名士，方其少壯時，視功名富貴猶勞內物，一第直流，我爾然出遊三十年，蹭蹬不偶，異時知己零落且盡，家資本不薄，載叔常囊囊視之，權衡俯仰，算籌衡縱，一切不能知，惟日夜從事於塵編蠹簡中，至食不足不問也。中年卜居城中，號橋南書院，地僻而境勝，屋庫而人傑，清流美竹，秀木芳草，可玩而樂者不一而足。載叔高臥其中，裾不曳刺，不書，客之來者日益衆，行者交跡，乘者結轍，訶殿者籠坊陌，雖公侯達官之門不能過也。名不可妄得，客不可強致，載叔蓋有以得此於人矣。乃者數移書於予，請記所謂橋南書院者，嗟乎！漢梁伯鸞入吳，賃舂於皋，伯通廡下，至今吳有皋橋，蓋以伯鸞所寓得名。載叔之賢不減伯鸞，而橋南乃其居，則後世不蕪沒泯矣。尙何待記？然載叔之請不可終拒也，乃爲之書。嘉定元年夏六月庚寅，山陰陸某務觀記。

心遠堂記

大卿朱公以開禧元年築第於昭武城東，取陶淵明詩語，名其堂曰心遠。旣成，與士大夫落之，而以書來告曰：子爲我記。始嘉泰壬戌，予蒙恩召爲史官，朱公丞秘書，日相從甚樂，公去爲御史，予領監事，閑劇異趣，會見甚疏，然每與同舍焚香煮茶於圖書鐘鼎之間，時時言及公，未嘗不相與興懷絕歎也。明年國史奏御之明日，予乞骸骨而歸，俄而公亦自寺卿得請外補，不復相聞者累歲，比書來，予方臥病，作而言曰：朱公真可人哉！士得時遇主，施其才於國，退居閭里，閒暇之日，爲多樽俎在前，琴弈迭進，欣然自得，悠然遐想，問餽宴樂，以修親舊，夙昔之好，講解誦說，以垂後進，無窮之訓，進退兩得，可謂賢矣。予獨相望累千里，不得持一觴爲公壽，且慶斯堂之成，願方以爲歎，今乃得以不腆之文，自託於後世，亦可謂幸矣。嘉

定元年秋七月甲子記。

萬卷樓記

學必本於書。一卷之書。初視之。若甚約也。後先相參。彼是相稽。本末精蘊。相爲發明。其所關涉。已不勝其衆矣。一編一簡。有脫遺失次者。非考之於他書。則所承誤而不知。同字而異註。同辭而異義。書有隸古音。有楚夏。非博極羣書。則一卷之書。殆不可遽通。此學者所以貴夫博也。自先秦兩漢。訖於唐五代以來。更歷大亂。書之存者。旣寡。學者於其僅存之中。又鹵莽焉。以自便其怠惰。因循曰。吾懼博之溺心也。豈不陋哉。故善學者。通一經而足。藏書者。雖盈萬卷。猶有憾焉。而近世淺士。乃譚藏書如鬪草。徒以多寡相爲勝負。何益於學。嗚呼。審如是說。則秦之焚書。乃有功於學者矣。昭武朱公敬之粹於學。而篤於行。早自三館。爲御史。爲寺卿。出典名藩。尊所聞行。所知亦無負於爲儒矣。然每恹然自以爲歎。益務藏書。以棲於架。藏於櫝。爲未足。又築樓於第中。以示尊閣傳後之意。而移書屬予記之。予聞故時藏書如韓魏公萬壽堂。歐陽竟公六一堂。司馬溫公讀書堂。皆實萬卷。然未能絕過諸家也。其最擅名者。曰宋宣獻李邯鄲。呂汲公王仲至。或承平時已喪。或遇亂散軼。士大夫所共歎也。朱公齒髮尙壯。方爲世顯用。且澹然無財利聲色之奉。儻網羅不倦。萬卷豈足道哉。予聞是樓南則道人三峰。北則石鼓山。東南則白渚山。煙嵐雲岫。洲渚林薄。更相映發。朝暮萬態。公不以登覽之勝名之。而獨以藏書見志。記亦詳於此。略於彼者。蓋朱公本志也。嘉定元年秋七月甲子記。

卷第二十二

梅子真泉銘

距會稽城東北七里。有山曰梅山。山之麓有泉。曰子真泉。遊者或疑焉。智者及道人求笠澤漁父爲之銘。銘曰。

梅公之去漢。猶鷓夷子之去越也。變姓名。棄妻子。舟車所通。何所不閱。彼吳市門人。偶傳之。而作史者。因著其說。儻信吳市而疑斯山。不幾乎執一而廢百。梅公之去。如懷安於一方。則是以頸血丹莽之斧鉞也。山麓之泉。甘寒澄澈。珠琲玉雪。與子徊徘徊。酌泉飲之。亦足以盡公之高。而歎其決也。

司馬溫公布被銘

公孫丞相布被。人曰詐。司馬丞相亦布被。人曰儉。布被可能也。使人曰儉不曰詐。不能也。此銘予二十歲時作。今傳以爲秦少游非也。

金崖硯銘

我遊三峽。得硯南浦。西窮梁益。東掠吳楚。揮灑淋漓。鬼神風雨。百世之下。莫予敢侮。

延平硯銘

延平雙龍去無迹。收斂光氣。鍾之石聲。如浮磬。色蒼璧。予文日衰。愧匪敵。

蠻谿硯銘

斯石也。出於漢嘉之蠻谿。蓋夷人佩刀之礪也。琢於山陰之錢湖。則放翁筆墨之瑞也。質如玉。文如穀。則

黔龍尾之羣從。而瀉韞玉之仲季也。

錢侍郎海山硯銘

雲濤三山。飾此怪珍。誰其寶之。天子侍臣。煌煌繡衣。福我遠民。一字落紙。活億萬人。勿謂器小。其重千鈞。從公遄歸。四海皆春。

桑澤卿磚硯銘

古名硯以瓦。今名硯以甄。瓦以利於用。甄以全其天。甄乎甄乎。寧用之鈍而保其全乎。尙無媿之。日陳於前。放翁銘桑甥澤卿硯。熙熙二年六月九日。老學庵書。

崔伯易畫像贊

崔公名公度。字伯易。高郵人。劉相沆舉賢良方正。不赴。以任爲三班差使。韓魏公薦之。詔易文資爲國子監直講。亦辭。元祐中。再召爲郎。又皆固辭。補外郎。諸公力白於朝。強起爲國子司業。訖不肯復出。爲郡。以起居郎祕書少監召。亦不肯起。紹聖中。復以爲祕書少監。辭如初。遂請宮觀。尋致仕。予喜其白首一節。乃求畫像於高郵。而爲贊曰。

古之君子。學以爲己。可行則行。可止則止。仕以行義。止以遠恥。世衰道微。豈復知此。蚩蚩始學。青紫思拾。萬馬竝馳。孰能獨立。始雖弗急。後亦汲汲。我思崔公。涕泗橫集。

東坡像贊

我遊鈞天帝之所都。是老先生。玉色敷腴。顧我而歎。閱世垢濁。笑謂侍仙。昇以靈藥。稽首徑歸。萬里天風。

碧山巉然月墮江空。

王仲信畫水石贊

亡友王仲信爲予作水石一壁。仲信下世二十年，乃爲之贊。恨仲信之不及見也。其詞曰：導江三峽，神禹之蹟。王子寫之，洵洵滅壁。後三十年，塵暗苔蝕，澹墨色之欲盡。尙觀者之慘慄，或曰：是學蜀兩孫者，非邪？放翁曰：吾但見其有歐陽信本、柳誠懸之筆力也。

鍾離真人贊

五季之亂，方酣於兵。叱嗟風雲，卓乎人英。功雖不成，氣則莫奪。煌煌金丹，糝糠陶葛。

呂真人贊

一粒之粟，有國有民。二升之釜，浩渺嶙峋。我遊巴陵，始識公面。青蛇鏗然，求之不見。

又

天下家家畫呂公，衣冠顏鬢了無同。勸君莫被丹青誤，那有長繩可繫風。

僧師源畫觀音贊

三世如來同一闕，大士亦作補陀夢。佛子無財可修供，尺紙寸毫俱妙用。寶纓天冠儼四衆，長年造極筆愈縱。唯師魯公爲作頌，十方世界俱震動。

宏智禪師真贊

死諸葛走生仲達，死姚崇賈生張說。看渠臨了一著子，諸方倒退三十里。

大慧禪師真贊爲昭覺文老作。

平生嫌遮老子說法口巴巴地。若是靈利阿師。參取畫底妙喜。

卮庵禪師真贊爲處良長老作。

灑灑落落五十年。一句不說祖師禪。妙喜堂中正法眼。等閒滅在瞎驢邊。

塗毒策禪師真贊

骨相瓌奇。風神蕭散。貌肅而和。語盡而簡。畫得者英氣逼人。畫不得者頂門上一隻眼。

又

塗毒不自讚。留待三山老。試問卿上人。讚好莫讚好。海中忽起劫初風。北斗柄折須彌倒。

佛照禪師真贊

名動三朝。語行四海。撒手歸來。雲山不改。人言大覺同龕師。云老僧掩彩。

大洪禪師贊

髮長無心剃。衣破無心補。大洪山上有賊。大洪山下有虎。非但白刃殺盡兒孫。更能一口吞卻佛祖。

中巖圓老像贊

我遊中巖拜師於牀。巍巍堂堂。風舉龍驤。公住無爲。訪我成都。雄辯縱橫。玉色敷腴。別未十日。梁木告摧。我如飛蓬。萬里南來。孰謂窮山。乃瞻儀形。牆壁說法。況此丹青。

奉聖淳山主年八十有四。放翁爲作真贊。

兩住名山一老禪。目光如電照人天。行藏不用占蓍草。卦氣全來二十年。

芋庵宗慧禪師真贊

煨榾榾芋。打塗毒鼓。舌本雷霆。毫端風雨。

廣慧法師贊

東土震旦。西方極樂。一編草鞋。到處行脚。

敷淨人求僧贊

光雍頭淨洗鉢。頭頭拈起頭頭活。有時與。有時奪。受用現前活鱖鱖。敷道者。一短褐。欠箇什麼更要惡水。潑將錯就錯。也不妨。只在直那經手發。道敷淨人求伽陀。見施主求買度牒。爲說此數語。嘉泰辛酉四月十日。放翁書。

錢道人贊

枿欄冠。青芒屨。上天下天不騎鶴。喚作神仙渠不肯道。是凡人我又錯會稽城中且賣藥。

放翁自贊

遺物以貴吾身。棄智以全吾真。劍外江南。飄然幅巾。野鶴駕九天之風。澗松傲萬木之春。或以爲跌宕湖海之士。或以爲枯槁隴畝之民。二者之論雖不同。而不我知則均也。淳熙庚子。務觀自贊。時在臨川。年五十有六。

又

名動高皇。語觸秦檜。身老空山。文傳海外。五十年間。死盡流輩。老子無才。山僧不會。

又

皮葛其衣。巢穴其居。烹不糝之藜羹。駕禿尾之草豕。聞雞而起。則和寧戚之牛歌。戴星而耕。則稽泆勝之農書。謂之瘠則若腴。謂之澤則若灑。雖不能草泥金之檢。以紀治功。其亦可挾兔園之冊。以教鄉閭者乎。周彥文令畫工爲放翁寫真。且來求贊時年八十。

又

進無以顯於時。退不能隱於酒。事刀筆不如小吏。把鋤犁不如健婦。或問陳子何取而告其傷。曰。是翁也。腹容王導輩數百。胸吞雲夢者八九也。陳伯予命畫工爲放翁記願。且屬作讚。時開禧丁卯。翁年八十三。

記太子親王尹京故事

隋齊王暕尹河南。唐秦公世民尹京兆。衛王重俊爲洛州牧。皆親王尹京故事也。然尙未甚以爲重。後唐秦王從榮以長子爲河南尹。又爲天下兵馬大元帥。故當時遂以尹京爲儲貳之位。至晉天福中。鄭王重貴。周廣順中。晉王榮。皆尹開封。用秦王故事也。國朝太祖皇帝建隆二年七月。以太宗皇帝爲開封尹。開寶末。太宗嗣位。纔八日。卽以齊王廷美爲開封尹。後封秦王。太平興國七年。秦王出爲西京留守。自是開封不置尹。止命近臣權知府而已。權知府自李符始。雍熙二年。始以陳王元僖爲開封尹。蓋是時太宗元子。楚王元佐被疾廢。則陳王亦儲君也。淳化三年薨。後二年。眞宗皇帝自襄王爲開封尹。後封壽王。至道元年。正東宮議者謂尹有品秩。非太子所宜兼領。乃改判府事。自後唐以來。雖以尹京陰爲儲副之位。

然皆藩王。以太子判京府。則自至道始也。故事。開封尹之上。有牧。雖具員。而初未嘗置。國朝惟親王。乃除尹。餘但爲權知府事。自太祖至徽宗。八朝百七十年。未嘗改。蔡京爲相。始建議置尹。尹非獨故事。須親王。乃除。又太宗真宗。藩藩所領人。臣所宜避。天下皆罪京之不學。其後宣和末。欽宗皇帝。自東宮爲開封牧。是時已有尹。尹之上。惟有牧。故以命之。然牧故事。序位在太子少保之下。御史大夫六曹尙書之上。亦非太子所宜兼。蓋有司失考。至道判府之制也。尹之下。故事有少尹。位在少府將作少監之下。太子少詹事之上。後唐秦王時。嘗以劉陟爲之。而建隆以來。率不置。惟置判官。推官各一員。或二員。通掌府事。並以常參官充。親王爲尹。則判官以給諫充。今太中大夫以上。推官差降焉。真宗爲尹時。判官二員。推官三員。蓋特置也。或問太宗以來。尹京則謂之南衙。何也。曰。開封府治所。本在正陽門南街東。然太宗爲尹。乃就管邸視事。晉邸又在內。及府治之南。故曰南衙。亦曰南宮。秦王許王因之。及真宗爲尹。太宗以秦王許土皆不利。始命遷就府治焉。

卷第二十三

姚平仲小傳

姚平仲。字希晏。世爲西陲大將。幼孤。從父古養爲子。年十八。與夏人戰。賊底河。斬獲甚衆。賊莫能枝梧。宣撫使童貫召與語。平仲負氣不少屈。貫不悅。抑其賞。然關中豪傑皆推之。號小太尉。睦州盜起。徽宗遣貫討賊。貫雖惡平仲。心服其沉勇。復取以行。及賊平。平仲功冠軍。乃見貫曰。平仲不願得賞。願一見上耳。貫

愈忌之。他將王淵、劉光世皆得召見。平仲獨不與。欽宗在東宮知其名。及卽位。金人入寇。都城受圍。平仲適在京師。得召對福寧殿。厚賜金帛。許以殊賞。於是平仲請出死士。礮營擒虜帥以獻。及出。連破兩寨。而虜已夜徙去。平仲功不成。遂乘青驃亡命。一晝夜馳七百里。抵鄧州。始得食。入武關。至長安。欲隱華山。顧以爲淺。奔蜀。至青城山。上清宮。人莫識也。留一日。復入大面山。行二百七十餘里。度采藥者莫能至。乃解縱所乘驃。得石穴以居。朝廷數下詔物色求之。弗得也。乾道淳熙之間。始出。至丈人觀道院。自言如此。時年八十餘。紫髯鬱然。長數尺。面奕奕有光。行不擇崖。暫荆棘。其速若奔馬。亦時爲人作草書。頗奇偉。然祕不言得道之由云。

族叔父元燾傳

族叔父元燾。名寤。一字居安。自山陰徙家餘姚。性恭謹。純厚。閉門力學。不妄與人交。尤好樂律。每言樂所以成人。才今世所用。皆胡部。雖鄭衛亦不得聞。況韶濩乎。因考按古關雝鹿鳴諸詩。抑揚皆合音律。時時自歌之。中正簡古。聞者興起。欲上書請用之。鄉飲酒會。疾病不果。所居瀕江。一室蕭然。數十年間。几席書冊琴樽之屬。皆未嘗易。好飲酒。然不肯自釀。或餽以家所醞。亦辭不取。曰。法不可也。其謹如此。有子洙。登進士第。爲鹽官尉。迎養官舍。期年。洙卒。元燾護其喪歸。亦能自釋。久之。以疾卒。年七十。與元燾同時。有鄭從革者。名鼎之。丹徒人。自三舍法行。已在鄉校。能自刻苦。口誦手鈔。日常兼數人。然試有司。輒黜。從革亦不以黜故少怠。終始如一。日事父篤孝。建炎中。客山陰。遇寇。從革欲奉父避之。父不聽。從革乃束帶立牀。煎藥糜粥。奉湯液。悉如平時。寇至。則迎門拜泣。曰。父老不能去。惟哀憐之。寇爲感動。乃署其門。使其屬勿

犯終亂定。父子俱得全。年六十餘。貧益苦。比卒。衣衾不能具。而一鄉皆推其賢云。

陳氏老傳

會稽五雲鄉陳氏老。年近八十。生三子。有孫數人。皆業農。惟力耕致給。足凡兼井之事。抵質買販。以取贏者。一切不爲。耕桑之外。惟漁樵畜牧而已。子孫但略使識字。不許讀書。爲士婚姻。悉取農家。非其類。皆拒不與通。室廬不妄增。一椽器用。皆朴質。堅壯。不加漆飾。衣惟布襦裙。取適寒暑之宜。行之四五十年如一日。子孫亦皆化之。無違。陳氏所居。在刺涪山下。地名曰南溪。云陸子曰。予嘗悲士之仕者。若苟名位而已。則爲負國。必無負焉。則危身害家。愛其父母。有所不免。耕稼之業。一捨而去之。復其故。甚難。予先世本魯墟農家。自祥符間去而仕。今且二百年。窮通顯晦。所不論。竟無一人得歸故業者。室廬桑麻。果樹溝池之屬。悉已蕪沒。族黨散徙四方。蓋有不知所之者。過魯墟。未嘗不太息興懷。至於流涕也。聞陳氏事。因爲述其梗槩。傳之。庶觀者有感焉。

紹興府衆會黃錄青詞

上帝福善禍淫。雖各繇於類應。大道回轍起死。或俯徇於哀祈。敢露忱詞。仰干聰鑒。伏念臣等所居紹興府地。連三輔。人雜五方。任職居官。當閭閻之太半。鮮衣美食。昧稼穡之所從。習俗莫遷。神明積譴。方凶饑之薦至。加疫癘之相乘。疾痛呻吟。未及三醫之調。焄蒿淒愴。已悲萬鬼之鄰。念升濟之無方。敢號呼而有請。伏望少回洪造。一洗衆辜。逝者脫泉路之冥冥。生者安王氏之皞皞。天職生覆。地職形載。敢忘夙夜之歸。冬無愆陽。夏無伏陰。永冀生成之賜。

江西祈雨青詞

天惟至仁。久寬水旱之譴。吏實有罪。仰畀陰陽之和。旣閔雨之歷時。敢叩關而請命。伏念臣濫膺上指。出使近畿。深惟冥頑固陋之資。莫副惻怛丁寧之訓。徒積勤於夙夜。冀無負於幽明。然而風采不足以馨服。豪強惠愛不足以撫綏。鰥寡政媮。曷日田疇曠。陂澤之修。訟積淹時。囹圄困桁楊之繫。務均力役。而或蔽於所見。思廣賑恤。而或緣以爲奸。旣莫致於善祥。懼卒罹於饑饉。是用誡辰之吉。稽首以陳。伏望推善貸之慈。霽曲成之惠。雖有司曠職。宜伏雷霆之誅。然比屋何辜。流爲溝壑之瘠。若復未回於洪造。遂將絕望於有秋。敢殫皇皇哀迫之誠。冒懇懇吁嗟之禱。庶格九霄之澤。少紓一道之憂。稼穡順成。儻僅蒙於中。熱里閭疾苦。誓靡墜於上。

謝雨青詞

旱大甚以是虞。不遑啓處。天蓋高而可叩。思罄精誠。方祇祓於齋場。已亟霑於膏澤。尙懼豐凶之未決。敢忘祈報之交修。仰企叢霄。少回冲馭。伏願哀黎民之匱食。宥衆吏之瘵官。申敕有神。更終大惠。一穀不升。謂曠豈勝。夙夜之憂。三日以往。爲霖實賴。乾坤之造。

嚴州祈雨青詞

歲律肇新。農功伊始。居者慮陰淫陽伏之寇。耕者懷旱乾水溢之虞。仰惟上穹。職是元化。俯遂羣黎之育。式均六氣之平。敢卽熙壇。恭陳薄薦。所冀歲豐民樂。寬九重宵旰之憂。賦足刑清。道衆吏簡。書之責。敢忘揚勵。仰對生成。

謝雨青詞

天九關之在上。精誠可以徹聞。雨三日而成霖。枯槁爲之盡起。恭陳薄薦。冒貢丹衷。伏念臣領此僂州。迨今累月上。無以布宣。寬大而道屯膏之咎。下不能撫摩凋瘵。而格解澤之施。踟躕靡遑。吁嗟上訴。敢謂叢霄之應。曾無挾日之淹。月離畢以示期。山出雲而效職。風靈下擊。澗整交流。井汲如初。家享一瓢之樂。粟儲可繼。士寬半菽之憂。商旅通行。道途鼓舞。彼有遺秉。此有滯穗。方將均惠於憚齋。冬無愆陽。夏無伏陰。更冀默消於疾癘。敢忘兢惕。仰對生成。

保安青詞

道垂光而下濟。罔不與慈。情至敬則無文。惟當直訴。伏念臣少多罪垢。晚乏功能。寓形遼迫於九齡。定著遂階於四品。先世被追榮之典。已冠三孤。諸兒荷延賞之恩。例霑寸祿。首坐滿盈之久。自擬災釁之來。時涉夏秋。疾生經絡。有藥必試。靡神不祈。呻吟之聲。晨暮不絕。惟歸誠於洪造。或少道於往愆。么然微衷。萌以自列。伏望曲回聰聽。俯佑殘軀。俾耄及之餘生。獲奠居於故社。耕桑安樂。父子團樂。天實無私。敢汲汲希望外之福。人誰不死。願熙熙須數盡之期。

天申節樞密院開啓道場疏

得道者上爲皇。啓帝闕之廣大。有德者得其壽。當化日之舒長。率籲衆情。虔伸善祝。光堯壽聖。太上皇帝。伏願三靈介祉。九廟儲休。無黃屋之心。雖退藏於淵默。如南山之壽。冀茂對於天祺。

滿散道場疏

惟天其申命用休。誕御無疆之曆。有德者必得其壽。共輸歸美之誠。敢叩梵宮。仰申善願。光堯壽聖太上皇帝陛下。伏願頤神物外。布澤寰中。福祿萬年。丕介雁鴻之祉。本支百世。永奉詒燕之謀。

天申節功德疏

得吾道而上爲皇。算自齊於箕翼。有天下而傳之子。福方凝於華夷。敢因震夙之期。申致延鴻之祝。恭惟光堯壽聖太上皇帝陛下。聰明時憲。清淨無爲。黃屋非心。共仰堯仁之大。玉卮爲壽。益瞻漢殿之尊。光堯壽聖太上皇帝。恭願茂對昌辰。丕承景貺。以聖傳聖。增光奕世之休。爲天中天。永享萬方之奉。

又

得道上爲皇。誕受泰元之冊。重華協於帝。光臨孝治之朝。敢殫向日之誠。仰祝後天之算。尊號陛下。恭願又新湯德。不顯文謨。日舒以長。燕處益探於衆妙。道冲而用。陰功廣被於羣生。

瑞慶節功德疏七

有開必先。天地肇開於景運。無遠弗屆。華夷畢效於貢珍。矧備邇聯。敢稽壽祝。皇帝陛下。伏願誕膺戮毅。端拱穆清。以八千歲而爲春。永御舒長之景。卜七百年而過曆。用符愛戴之誠。

又

誕彌厥月。丕昭震夙之期。長發其祥。共致雁鴻之祝。皇帝陛下。恭願後天難老。如日正中。紹十二聖之睿。謨開三百年之景運。金泥玉檢。肇修稀闕之儀。楛矢石砮。永享貢輸之盛。

又

叨榮禁路。千齡獲遇於聖明。歸老故山。一飯敢忘於君父。敬修梵供。仰祝堯年。皇帝陛下。恭願光照大千。壽域時萬。繼統燕無爲之治。御邦躋有道之長。上際下蟠。永享化國舒長之日。東封西祀。嗣修太平稀闊之儀。

又

節紀千秋。實踵開元之盛。神呼萬歲。濟膺嵩嶽之祥。願雖遜迹於丘園。敢息馳誠於軒陛。皇帝陛下。伏願道極高而蟠厚。治成五而登三。碣石河源。盡復興輿圖之舊。泰山梁甫。嗣修檢玉之儀。

又

惟皇之極。欣逢熙洽之辰。於萬斯年。共效雁鴻之祝。敢趨淨域。薦控丹衷。皇帝陛下。伏願允叶帝心。誕膺神策。化東漸而西被。功上際而下蟠。降德於衆兆民。坐致唐虞之治。上瑞至千百所。永符箕翼之祥。

又

聖思念舊。猶叨四品之崇。景運開先。敢後萬年之祝。皇帝陛下。恭願當宁撫盈成之業。垂衣紹積累之休。朔易南訛。綿鋤纒於率土。東漸西被。會玉帛於中朝。

又

恩霑遺老。幸聯上雍之班。身遇明時。敢後祝堯之請。皇帝陛下。恭願乾端廣大。日綬正中。髦鬣奉九譯之琛。農扈告三登之候。應帝王之運。故聰明睿智。足以有臨。集天地之祥。皆算數譬喻所不能及。

祈雨疏

九秋伊始，百穀將登。念零雨之稍愆，率羣情而致禱。仰惟慈蔭，曲鑒丹誠。三日爲霖，俯慰雲霓之望。大田多稼，上寬宵旰之憂。

謝雨疏

諸佛願心，本常存於澤物。衆生業果，或自召於凶年。民愚無良，吏惰不職。駭驕陽之作害，閱零雨之弗時。內罄寸誠，方吁嗟而遍禱。起瞻四野，已枯槁之一蘇。自惟莫格於太和，乃至上勤於慧力。敢忘祗報，用答鴻慈。

道宮謝雨疏

上帝至仁，本不忘於澤物。下民胡罪，幾坐致於凶年。由官吏之惰偷，致政刑之疵癘。驕陽作害，零雨弗時。內罄寸誠，方吁嗟而仰禱。起瞻四野，已枯槁之盡蘇。自惟莫格於太和，迺至顛干於鴻造。敢忘祗報，用答好生。

嚴州祈雨疏

倬彼雲漢，尙愆霖雨之期。害於黍盛，俯劇淵冰之懼。敢輸丹悃，仰叩_冥慈。冀占離畢之祥，少追屯膏之咎。

又

時雨少愆，上勞宵旰。詔音亟下，恭致禱祈。敢冀_冥慈，誕敷惠澤。

又

龜占墨而尚遠，凜有屯膏之懼。龍蟠泥而未舉，方緊解澤之施。冀軫誠慈，曲成樂歲。俯慰闔境雲霓之望，上寬溷吏宵旰之憂。

嚴州施大斛疏

早魃為虐，念莫釋於衆憂。飯香普熏，敢恭陳於淨供。伏願雲從龍而效職，月離畢以告祥。解澤亟行，屯膏一洗。如來施無量食，既靡間於聖凡。史臣書大有年，庶上寬於宵旰。

嚴州謝雨疏

時雨愆期，方軫焦勞之慮。佛心從欲，遽蒙霑澤之施。敢擇良辰，敬伸昭報。

嚴州謝雪疏

萬邦屢豐，幸際中天之熙運。平地尺雪，鬱為嗣歲之嘉祥。敢忘淨供之陳，修覺慈少謝之祝。尚祈垂佑益介純禧。

嚴州久雪祈晴疏

時雪屢應，已占嗣歲之登。春氣未和，寧免所寒之怨。敢趨梵宇，仰叩冥慈。冀日麗於層霄，俾民安於比屋。上寬旰食，俯慰輿情。

卷第二十四

法雲寺建觀音藏殿疏

補落伽之道場。秦蕪已久。修多羅之妙典。函匱僅存。先師每志於經營。四衆亦思於協助。天時默定。佛事將成。伏望巨公大人。居士長者。深戒著鞭之後。共合浮圖之尖。庶得萬瓦鱗差。修梁虹舉。紺容輝日。梵唄陵雲。結難值之勝因。作無窮之壯觀。

開元寺重建三門疏

巍然古剎。實居大府之喉衿。卓爾高閣。復爲一寺之眉目。歷數百載。極祇園之盛。乃七十年。猶劫火之殘。伏望大發積藏。亟成鉅麗。梁椽丹於久廢。偉扁榜之一新。雨霽塵清。碧瓦勢凌於霄漢。霧開日出。金鋪光射於康莊。還壯觀於承平。垂美名於不朽。

安隱寺修鐘樓疏

金鐘大鏞。蓋以聲爲佛事。雄樓傑閣。宛在水之中央。歷歲既深。須人乃復。敢徧投於信士。祈同結於勝緣。浮翠流丹。儻復還於鉅麗。撞昏擊曉。實大警於沉冥。

重修光孝觀疏

天覆地載之間。飲啄皆由於道蔭。跛行喙息之類。涵濡悉荷於國恩。豈獨忠義之心。人人具有。抑亦生成之賜。物物皆同。永惟光孝之道場。實薦徽皇之懿御。神祠佛刹。尙營繕之相望。琳館珍臺。豈修崇之可後。某等叨恩冠褐。比職宮庭。敢忘夙夜之勤。冀復規模之舊。既修先朝之遺迹。遂新大府之榮觀。

圓通寺建僧堂疏

如來香飯。取時已遣化人。開士鉢單。展處又須得所。營茲華屋。延我勝流。念非極棟宇之功。何以稱龍象。

之衆。木魚哮吼。千僧開也在下風。露柱證明。九梁星直須退步。

重建大善寺疏

劫火之壞大千。雖云有數。長者之施。億萬要豈無時。儻阿練若。礎了大緣。則宰堵波亦還舊觀。可謂非常之舉。惟須不退之心。

道像五藏疏

道雖與貌。固非耳目口鼻之施。天本無心。尙何肝膽肺腸之有。旣云肖像。蓋亦同人。願共發於信心。不須疑著。庶亟成於盛事。垂示無窮。

鷲峯寺重建三門疏

建寺年深。築門役鉅。雖不下禪牀相接。用此何爲。然倒騎佛殿出來。少它不得。伏望念古阿蘭若之勝地。結檀波羅密之大緣。或備土木輒變之材。或施勳聖髮丹之費。初發心處。已有諸聖證明。一落筆時。自然大地震動。

重修大慶寺疏

佛出本爲一大緣。初無差別。越城昔有六尼寺。五已丘墟。惟大慶之名藍。實故唐之遺址。茲蒙賢牧。命復舊規。方廣募於衆財。冀亟成於偉觀。魔王魔民。魔女。蠢空蜂蟻之區。法鼓法炬。法幢。一新龍象之衆。儻承金諾。敢請冰銜。

福州請仁王堅老疏

勇退急流。雖具衲子參尋之眼。旁觀袖手。要非邦人嚮慕之誠。爰擇名藍。往迎高士。某人芙蓉正派。真歇諸孫。默觀已得於本心。自重每輕於外物。不合則去。蹈儒士之難能。知我者希。得老氏之所貴。付越山於昨夢。聽石嶺之猿來。野鶴溪雲。豈有去留之迹。齋魚粥鼓。一隨宿昔之緣。

福州請九峯圓老疏

鬧籃裏入頭。不妨奇特。懸崖邊撒手。只要承當。須遇作家。方了此事。某人參臨濟正法眼。得補陀大辯才。雖則跛跛挈挈。走諸方。不認昭昭靈靈。作自己。伏請如雲出岫。似月印潭。放下鉢袋衣囊。打起齋魚粥鼓。直到佛祖不知處。猶是半塗。且向父母未生前。試道一句。

福州請聖泉類老疏

少室玄機。陽岐正脈。最端的處。只要言下承當。有多少人。盡向面前蹉過。某人談鋒峻峭。心地圓明。當初向竹篋子頭。偶然築著磕著。而今踞寶華玉座。選甚胡來漢來。便須拈起鉗鎚。打開窠臼。以鐵酸醪。普供大眾。與木上座。同演宗風。鐘鼓鏗鎗。旛幢炳煥。豈惟流輩。知不由兔徑之高。要使師翁。發撞破煙樓之歎。

能仁請昕老疏

視世如菴摩勒果。雖外物之本輕。說法如優曇鉢華。要應時而出現。久已名行於海內。豈容身隱於雲根。敬虛金布之園。往致空飛之錫。某人材高龍象。辯震雷霆。潛闖嶺者十年。遇寒巖而一笑。始初歎賞。明窗下特地安排。最後懇懇。鉢筓子親自分付。幸念先師之遺語。亟爲故人而遠來。要傳無盡燈。當觀第一義。

雍熙請最老疏

山陰道中。萬壑水依舊潺湲。雲門寺裏一爐香。久成寂寞。忽於旁邑。得此高人。某人立雪飽參。隔江大悟。通威音以前消息。踞毗盧向上機關。血指汗顏。諸方不供一笑。搏風擊水。萬里始自今朝。豈惟續且庵家。傳更喜得可齋道伴。

鄉士請妙相講主疏

雜華說教。猶日照山。大士應緣。如雲出岫。某人英姿邁往。雋辯絕倫。早集布金之園。久造笑雲之室。伏望俯從衆志。來繼道場。且要於談笑間。取上方香積之飯。然後以神通力。成夜摩觀史之宮。

千秋觀修造疏

一曲澄湖。千秋古觀。瓊樓玉宇。正須月斧之修。蕊笈琅函。未極雲章之奉。至於傑閣翬飛於天半。長橋虹臥於波心。皆擬繕營。用成絕勝。況丞相肇新於真館。與邦人仰禱於帝齡。覆載之間。共陶化日。髮膚之外。皆是聖恩。願垂不朽之名。更效無疆之祝。

光孝請廊老疏

孤峯頂上。一口吞三世如來。七里瀨邊。隻手接十方柄子。既是隨緣自在。便須信手承當。某人號真作家。有大力量。拈起拂子。且與陸大夫同學宗風。放下鉢囊。不妨陳尊宿暫爲鄰舍。

雍熙請機老疏

諸方到處。只解抱不哭孩兒。好漢出來。須會打無麵餅。既舉起一枝拂子。勘破四海禪和。某人心地超然。

談鋒備甚。最初遊歷。倒卻門前刹竿。末後承當。分付先師鉢袋。十年涵養。一旦闡揚。請木上座作先馳。拈鐵酸。賺施大衆。鯨鐘鼙鼓。無非塗毒家風。蘿月谿雲。盡是放翁供養。

雍熙請錫老疏

瞿唐峽。激湍堆。萬里不生寸草。若耶谿。雲門寺。三人卽是叢林。要看雲居錫上座。點檢諸方。須與宣城陸大人。激揚此事。某人得來孤峻。用處縱橫。巍巍堂堂。麗麗落落。半月崑戴。起簣子好泉亭。脫下草屨。水宿山行。平日只成露布。刀耕火種。從今別是生涯。

求僧疏

掀禪牀。拗拄杖。雖屬具眼。厮兒搭袈裟。展鉢盂。卻要護身符子。伏望尊官長者。達士通人。共燃續慧命燈。不惜判虛空筆。起難遭想。結最勝緣。向僧堂前。喝參。幸離俗諦。以比丘身得度。敢負厚恩。

又

佛有八萬四千法門。出家最勝。僧受二百五十大戒。利物無邊。方今雲門諸山。莫如淨智一境。必度優婆塞。俾成比丘僧。巍巍堂堂。聿觀龍象之衆。雍雍肅肅。不匏旂檀之林。儻許結緣。願垂淑筆。

紫霄宮女童徐居慶求披戴疏

雲山棲隱。雖從金門羽客之遊。冠珥焚修。尚欠白水真人之力。敢輸微懇。仰叩高闕。伏望推博施之心。植衆妙之本。仙桂乞得支機石。既遇有緣。天風飄下步虛聲。是爲報德。

成都大聖慈寺念經院僧法慧爲行者雷印定求度牒疏

拈華會上。正法眼。雖是自明。刻草殿前。護身符少。伊不得。故鄉踰八千里路。空手要七十萬錢。欲辦大緣。莫嫌俗氣。從此鉢盂兩度溼。受賜不貨。忽然平地一聲雷。酬恩有在。

雍熙請倫老疏

脩竹茂林。久作蘭亭之客。青鞵布襪。忽尋秦望之盟。此有宿因。寧容力避。某人渡河香象。跋浪長鯨。初得法於室中。耳聾三日。晚抽身於林下。壁觀九年。道價雖高。世緣未契。方公言之共歎。亦勝地之將興。百草頭祖師。本來知見。一毫端寶刹。今日神通。但辦肯心。必無難事。

梁氏子求僧疏

名家有千里駒。本意折一枝桂。忽厭魯章甫。擬著僧伽黎。可謂人英。堪承佛種。長者若能成就。放翁爲作證明。

孫餘慶求披戴疏

孤雲野鶴。山林自屬閑身。布襪青鞵。巾褐本來外物。伏念心久游於塵外。迹尙寄於人間。傳翕雖然頭戴道冠。王恭終要身披鶴氅。直須白水真人力。共了青谿道士緣。

陶山菴行者求化度牒疏

昔於如來所發心。蓋非一世。今以比丘身得度。夫豈小緣。況貞白先生昇僊之區。實文昌左轄植福之地。遍投信施。庶獲圓成。七條九條。二十五條。儻無魔障。一佛二佛。百千億佛。當共證明。

傅妙蘇求僧疏

四十劫前記作佛。已定出家。百尺竿頭坐底人。正須進步。茲述懷懣之請。敬趨赫赫之門。伏望王公大臣。長者居士。揮雲煙於紙上。運財寶於庫中。出現優鉢曇花。成就僧伽黎相。十方諸佛同聲讚。可謂勝緣。一日鉢盂兩度開。敢忘大施。

某可忻求僧疏

七寶布施作福。止屬有爲。一人發心歸源。方名大事。非賴賢豪之助。曷弘清淨之緣。所冀見聞。各懷喜捨。續佛壽命。成苾芻不壞之身。爲國焚修。效芥石無疆之祝。

鎮江謁諸廟文

某以隆興改元夏五月癸巳。自西府掾出佐京口。明年春二月己卯至郡。洪惟上恩。不可量數。敢不夙夜。祗揚圖稱所蒙區區之心。神其監之。

祭富池神文

某去國八年。浮家萬里。徒慕古人之大節。每遭天下之至窮。登攬江山。徘徊祠宇。九原孰起。孤涕無從。雖薄奠之不豐。冀英魂之來舉。

福建謁諸廟文

某聞聰明正直。神之所以爲神也。靖共爾位。好是正直。吏之所以事神也。一戾於此。神且殛之。其何福之敢望。某蒙恩出使一道。告至之始。祗慄於祠下。

福州城隍昭利東嶽廟祈雨文代

陸放翁集、三 渭南文集 卷二十四

三十一

閩之風俗。祭祀報祈。比他郡國最謹。以故祠廟之盛。甲於四方。斧斤丹堊。靡有遺巧。重門傑閣。煥然相望。則神之所以福其人者。亦宜與他郡國異。而自夏訖秋。驕陽爲害。水泉淺涸。草木焦卷。多稼彌野。將茂而槁。夫幽顯之際。雖遠。然豈有享其奉而不恤其害者。惟神聰明。宜動心焉。

福州謝雨文代

吏受命天子。牧養百姓。神受命上帝。保衛一方。其實則均。然而祠宇貌像。孰與府寺之雄。犧牲醴幣。孰與康饋之厚。巫覡尸祝。孰與官屬之盛。吏惰政弛。無以格豐年之祥。不自責而望神。宜拒而弗享矣。區區之禱。曾未信宿。雲與東山之麓。雨被千里之內。雷發而不怒。風行而不疾。那那靈靈。如哺如乳。起視四野。莫不霑足。愁歎之聲。變爲歡謠。嗚呼。吏之愧於神多矣。酒冽牲肥。樂歌送迎。匪報也。以識吏之愧也。

福州進赦禱諸廟文代

乙未。詔書慈寧殿服藥。敷大宥於四方。分命郡國。禱山川神示之。在典祀者。惟神受職。欽承上意。

福州歐冶池龍鱗谿河口五龍廟祈雨祝文代

繚垣閩宇。瀦水灌木。窈然而幽。陰者。龍之神也。升天御雲。濟世澤物。霑然而成功者。龍之仁者也。聰明正直。有禱必應者。又其所以食於民也。歷時不雨。黍盛將害。則龍亦何心視民之窮。如越人之視秦也。變化呼吸。轉災爲豐。在龍之力。其易如指之屈伸也。犧牲醴幣。吏之所以報龍者。其敢怠而弗親也。

福州閩王閩忠懿王祈雨祝文代

維神之生。禦災捍患有功德於此邦之人。沒而祀之。非獨父老子弟。不忘神之功德。意者神亦眷眷於此。

邦沒而不已也。歷時不雨，稼穡將害。吏雖不言，神其忍安視弗拯邪？雖然，敢不以告。

嚴州謁諸廟文

新定爲郡，地陝民貧，而回祿馮夷，數見譴告。市邑蕭然，至今未復。某蒙恩來守是邦，宜知所報。如或黷貨以厲民，淫刑以飾怒，事燕遊以廢政，納請謁以撓法，是宜卽罪於有神。死不敢悔，使其能靈踐今茲之言，則神亦宜哀矜之。調節雨暘，驅逐癘疫，使與吏民仰戴明神之休。牲酒鼓歌，以時來報，豈不幽顯各得其職哉。

謁大成殿文

某聞之夫子曰：言不忠信，行不篤敬。雖州里行乎哉？某家世山陰，被命來守，不三舍而至。殆與古之仕於其國者無以異，然一於忠敬有所不力，則吏與民且合其智詐澆浮以欺其守，豈不殆哉？視事之始，款謁先聖先師，非獨以令甲也，敢告夙夜祗懼之意。

謁社稷神文

某蒙上恩來守新定邦，雖小有社稷焉，其敢不恪以獲戾於神，敬以到郡之三日，周視壇壝。

嚴州秋祭祝文

秋有祀，國之典也。筮日之良，爰舉祀事。牲酒樂歌，靡敢不飭。惟爾有神，來格來歆。惠我吏民，神亦永饗。典祀。

嚴州祈雨祝文

新定爲郡。介於谿山之間。雨暘少愆。輒能病稼。戊申水溢。方禱於神。曾未再旬。復以旱告。吏政無以格陰陽之和。而惟神之瀆。羣趨廟庭。僕僕亟拜。神固不以吏罪而棄斯民。吏獨無愧於神乎。尙力厥事。以蓋茲鬼神其監臨之。

又

甲辰。詔旨以閔雨命郡守致禱。惟神受職。欽承上命。

又

某被命來守。幸及終更。不敢以去郡有期。怠荒厥事。屏逐暴吏。慰安疲民。稽於幽明。儻道咎責。而嘉穀方秀。時雨未溼。維神正直。宜監於茲。敢列忱辭。恭俟嘉澤。

嚴州馬目山祈雨祝文

維神有祠。茲山尙矣。唐刺史韓泰。以禱雨獲應。載新廟貌。今又四百餘年。而未列命祖。無以慰父老祝史之心。今茲旱勢已極。某雖愚蒙。恩假守得。以專達於朝。敢與爾神期。以三日。甘澤霑足。稿苗復興。當列奏乞封。以修神之威靈。願以守郡。不獲親行。謹遣迪功郎建德縣主簿汪仲儀。卽事祠下。而某帥郡僚。望拜於軍門。僮以俟命。

又

考於圖志。得神之威靈。而致禱焉。旣累日矣。誠弗能格。雖間得小雨。地不及濡。塵不及斂。而赫日復出矣。然父老之言。以爲比夕雲物。多起神之祠傍。意者神哀憫斯民。終有以活之也。敢復以請。悽悽之誠。神尙

鑒之。

嚴州祈晴祝文

雨勢未止。溪流暴溢。民慮官寺。倉庫獄戶。皆有意外之憂。惟神聰明。亟俾開霽。約束漲水。以時返壑。某與吏民。其敢忘報。

嚴州謝雪祝文

四時冬爲元英。閭里毋虞於癘疫。平地尺爲大雪。麥禾預卜於豐穰。敢忘薄薦之陳。少答明神之賜。尙祈孚佑。永保安寧。

嚴州久雪祈晴祝文

雪雖嘉瑞。過則爲災。春氣未和。民屢告病。郡政乖刺。惟神之歸。尙祈興哀。以卒大賜。牲酒之報。其敢弗虔。

嚴州廣濟廟祈雨祝文

不雨且再旬矣。井泉涸竭。蔬菽告病。閭巷講救焚之備。郡庭決爭汲之訟。秋陽益熾。疾癘將作。吏雖愚。猶知恐懼。豈神之聰明而忘之乎。出雲興雨。以一洗之。神之德於斯民。豈有旣哉。

嚴州謝雨祝文

比承詔旨。致禱靈祠。果遂感通。沛然甘澤。敢涓吉日。祇報靈休。

嚴州戊申謝蠶麥祝文

乃者蠶老而未繭。麥秋而未穫。天作霪雨。將害於成。惟神降康。陰沴消弭。牲登於俎。酒湛於觴。維以薦誠。

匪敢言報。

卷第二十五

夔州勸農文

仰惟天子臨遣牧守。每以務農勸課之指。丁寧訓敕。雖遐陬僻邑。如在畿甸。惟懼一穀之不登。一夫之失職也。峽中之郡。變爲大。其於奉明詔以倡屬郡。慰濟民者。尤不敢不勉。繼自今。不縱培克。不長麗訟。不傷爾力。不奪爾時。爾父兄弟。其亦恭承天地惠澤。毋爲惰遊。毋怠東作。毋失收斂。毋媿蓋藏。勤以殖產。儉以足用。有司與民。交致其愛。使公私之蓄。日以富饒。無貽朝廷宵旰之憂。豈不臧哉。

丁未嚴州勸農文

蓋聞農爲四民之本。食居八政之先。豐歉無常。當有儲蓄。吾民生逢聖世。百穀順成。仰事俯育。各遂其性。太守幸得以禮遜相與從事於此。故延見高年。勞問勸課。致誠意以感衆心。非特應法令爲文具而已。今茲土膏方動。東作維時。汝其語子若孫。無事末作。無好終訟。深陂廣耜。力耕疾耘。安豐年而憂歉歲。太守亦當寬期會。簡追胥。戒興作。節燕遊。與吾民共享無事之樂。而爲後日之備。豈不美哉。

戊申嚴州勸農文

蓋聞爲政之術。務農爲先。使衣食之饑充。則刑辟之自省。當職自蒙朝命。來剖郡符。雖誠心未格於豐穰。然拙政每存於撫字。觴酒豆肉。曷嘗妄蠶於邦財。銖漆寸絲。不敢輒營於私利。所冀追胥弗擾。墾闢以時。

春耕夏耘，仰事俯育，服勞南畝，各終鷹襲之功，無犯有司，共樂符長之日。今者土膏既勸，穡事將興，敢延見於耆年，用布宣於聖澤，清心省事，固守令之當爲，曠土游民，亦父兄之可恥，歸相告戒，務遵承上以寬當守之深憂，下以成提封之美俗。

書通鑑後

司馬丞相曰：天地所生，財貨百物，止有此數，不在民則在官，其說辯矣。理則不如是也。自古財貨不在民，又不在官者，何可勝數？或在權臣，或在貴戚，近習或在強藩大將，或在兼并，或在老釋，方是時也，上則府庫殫乏，下則民力窮悴，自非治世，何代無之？若能盡去數者之弊，守之以悠久，持之以節儉，何止不加賦，而上用足哉？雖捐賦以予民，吾知無不足之患矣。彼桑弘羊輩，何足以知之。然遂以爲無此理，則亦非也。

又

周世宗既服江南，諭使修守備。通鑑以爲近於大邦，畏其力，小邦懷其德，是比之文王也。方是時，世宗將有事於燕晉，其謀以爲若南方有變，雖不能爲大害，然北伐之師，勢亦不得不還，故先思有以安江南之心，又疲其力於大役，使不得動。比北伐成功，江南折簡可致矣。此世宗本謀也。遽謂之近於文王，豈不過哉？然世宗之謀，則誠奇謀也。蓋先取淮南，去腹心之患，不乘勝取吳蜀楚粵，而舉勝兵以取幽州，使幽州遂平，四方何足定哉？甫得三關，而以疾歸，則天也。其後中國先取蜀南粵江南吳越太原，最後取幽州，則兵已弊於四方，而幽州之功卒不成，故雖得諸國，而中國之勢終弱，然後知世宗之本謀爲善也。

書賈充傳後

言一也。情則三也。其惟論兵乎。自古惟用兵最多異論。以其有是三者也。禍機亂萌。伏於隱微。人知兵之利。不知其害。有識者焉。逆見而力止之。王猛之於秦是也。投機之會。轉盼已移。而常人關於事機。私憂過計。馮道之於周是也。猛固賢矣。道雖闇。猶有愛國之心焉。至於賈充。當晉武時。力沮伐吳之舉。至請斬張華。則何說哉。自漢之季。百數十年間。庸人習見。南北分裂。謂爲故常。赤壁之役。以魏武之雄。乘破竹之勢。而大敗塗地。終身不敢南鄉。充之心。蓋竊料吳未可下。因爲先事之言。以徼後日之福。而不料天下之遂一也。要之戰危事也。以舜爲君。禹出師。不能一舉而定三苗。以唐太宗自將。李勣在行。不能遂平區區之高麗。故爲充之說者。常有利焉。此人臣之陰爲身計者。所以多出於此也。馮道不足言矣。王猛賈充之論。所謂差毫釐而謬千里者。可不察哉。

書郭崇韜傳後

後唐莊宗初得天下。欲立愛姬劉氏爲后。而韓夫人正室也。伊夫人位次在劉氏上。莊宗雖出夷狄。又承天下大亂。禮樂崩壞之際。然顧典禮人情。亦難其事。未知所出。羣臣雖往往阿諛。亡學術。然亦無敢當其議者。豆盧革爲相。郭崇韜爲樞密使。崇韜功高。迹危。思爲自安計。而革庸懦無所爲。惟諂崇韜以自安。因相與上章言劉氏當立。於是莊宗遂立劉氏爲后。劉氏旣立。贖貨盡。政殘賊。忠良天下遂大亂。莊宗以弑。崩李氏之子孫殲焉。嗚呼。革不足言矣。崇韜佐命大臣。忠勞爲一時冠。其請立劉氏。非有他心也。不過謂天子所寵昵而自結焉。將賴其助以少安而已。然唐之亡。實由劉氏。是亡唐者崇韜也。後唐之先。皆有勳勞於帝室。晉王克用百戰以建王業。莊宗因之。遂有天下。同光之初。海內震動。幾可指麾而定矣。而崇韜

顧區區之私，引劉氏以覆其社稷，而滅其後嗣，宗廟之靈，其肯赦之乎？崇韜卒以盡忠赤其族，革亦無罪，誅死豈非天哉？昔唐高宗欲立武昭儀爲后，大臣褚遂良等力爭以爲不可者，皆得禍，獨李勣勸成之，窮極富貴而死，自謂得計矣。及武氏得志，唐高祖太宗之子孫，誅戮幾盡，而勣雖已死，亦卒以孫敬業故，發墓剖棺，夷其宗族，遂良等雖得禍，不至此也。天理之不可逃如此。雖然，豈獨天理哉？彼勣與崇韜，皆武夫烈士，勇於報德，乃以此心揣婦人，以爲自安之奇策，安知婦人之性，陰狡忍毒，果於背德，方其得志自肆，若豺虎然，豈復思得立之所自哉？然則二人之禍，雖微，天理固有不可逃者矣。悲夫。

書安濟法後

當安濟坊法行時，州縣醫工之良者，憚於入坊，越州有庸醫曰林彪，其技不售，乃冒法代它醫，造安濟今日傳容平當來，則林彪也。明日丁資當來，又林彪也。又明日僧寧當來，亦林彪也。其治疾亦時効，遂以起家。然里巷卒不肯用，比安濟法罷，林彪已爲溫飽家矣。年八十餘，乃終，開禧乙丑四月七日，務觀書。

書空青集後

建中靖國元年，景靈西宮成，詔丞相曾公銘於碑，以詔萬世。碑成，天下傳誦，爲宋大典。且歎曾公耆老，白首而筆力不少衰如此。建炎後，仇家盡斥，曾公文章始行於世，而獨無此文，或謂中更喪亂，不復傳矣。淳熙七年，某得曾公子寶文公遺文於臨川，然後知其寶文公代作。蓋上距建中八十年矣。嗚呼！文章鉅麗，闕偉至此，使得用於世代，王言頌成功，施之朝廷，薦之郊廟，孰能先之，而終寶文公之世，士大夫莫知也。汪翰林平生故人，及銘其墓，惟曰始爲家賢子弟，中爲時勝流，晚爲能吏，是豈足以言公哉？公家世固以

文章名天下。又自少時所交。皆諸父客。天下偉人。出入試用。亦數十年。朋舊滿朝。然世猶不盡知之如此。況山林之士。老於布衣。所交不出閭巷。其埋沒不耀。抱材器以死者。可勝數哉。可勝歎哉。九月十九日。山陰陸某書。

書浮屠事

浮屠師宗杲。宛陵人。法一汴人。相與爲友。資皆豪傑。負氣好遊。出入市里自若。已乃折節。同師蜀僧克勤。相與磨鷲浸灌。至忘寢食。遇中原亂。同舟下汴。杲數視其笠。一怪之。伺杲起去。亟視笠中。果有一金釵。取投水中。杲遠亡。金色頗動。一叱之曰。吾期汝了生死。乃爲一金動邪。吾已投之水矣。杲起整衣作禮曰。兄與宗杲師也。交益密。於康世多詆浮屠者。然今之士有如一之能規其友者乎。藉有之。有如杲之能受者乎。公卿貴人。謀進退於其客。客之賢者不敢對。其不肖者則勸之進。公卿亦以適中其意而喜。謀於子弟亦然。一旦得禍。其客其子弟。則曰。使吾公早退。可不至是。而公卿亦歎曰。向有一人勸吾退。豈至是哉。然亦晚矣。

書渭橋事

中大夫賈若思。宣和中。知京兆櫟陽縣。夏夜。以事行三十里。至渭橋。夜漏欲盡。忽見二三百人。馳道上衣。幘鮮華。最後車騎旌旄。傳呼甚盛。若思遽下馬。避於道傍民家。且使從吏詢之。則曰。使者來按視都城。基漢唐故城。王氣已盡。當求生地。此十里內已得之。而水泉不壯。今又舍之矣。語畢。馳去如飛。時方承平。若思大駭。明日還縣。亟使人訪諸府。則初無是事也。若思。河朔人。自櫟陽從蔡靖。辟爲燕山安撫司管勾櫟

宜文字靖康中自燕遜歸入尙書省爲司封郎而卒陸某曰河渭之間奧區沃野周秦漢唐之遺跡隱轉故在自唐昭宗東遷廢不都者三百年矣山川之氣鬱而不發藝祖高宗皆嘗慨然有意焉而羣臣莫克奉承予得此事於若思之孫逸祖豈關中將復爲帝宅乎虜暴中原積六七十年脛閒於天王師一出中原豪傑必將響應決策入關定萬世之業茲其時矣予老病垂死懼不獲見故私識若思事以示同志安知士無脫輓輅以進說者乎

書包明事

包明者不知其鄉里少爲兵事湯岐公自樞密至左相明常在府紹興末岐公以御史論罷故例一府之人皆罷遇拜執政則往事焉久之御史中丞汪公澈拜參知政事一府皆往汪公蓋前日劾岐公者也於是明獨不肯往曰是嘗論擊吾公者持何面目事之雖妻子飢寒不之顧未幾以病死方岐公貴時所薦達士大夫多矣至其失勢不反噓以媚權門者幾人且岐公平日待明非有異於衆人也汪公之拜一府俱往非獨明也明而往事汪公非有負也泥塗賤隸又非清議所及而其自信毅然不移如此蓋有古烈士之風矣書其始末使讀者有感焉

書神僊近事

昔道士侯道華喜讀書或問其意答曰天上無凡俗神仙後果騰舉而去呂洞賓陳搏賀元施肩吾皆本書生近歲有誰定雍孝閔尹天民亦皆以儒士得道定今百二十餘歲故在青城山中采藥道人有見之者讀易尚不輟也孝閔或自稱木先生往來沔鄂間天民客青城儲福宮一日大罵所與往來道士卽閉

門睡。道士明且相率謝之。而門不啓。壞壁視之。危坐死矣。方相與驚歎。俄失所在。此三人者皆顯人。故其事傳。閭巷山澤之士。名迹湮晦。本不爲人知者。又可悉數哉。予從子慧綽。爲浮屠。爲予言。豫章西山香城寺之傍。有野人身被綠毛。每雨霽。多坐石上。暴日見人輒避去。追之不可及。有識者曰。此馬祖弟子亮座主者。乃知長生久視之道。人人可以得之。初不必老氏之徒也。因書置座右。以自勵云。

書屠覺筆

建炎紹興之間。有筆工屠希者。暴得名。是時大駕在宋。都在廣陵。又南渡。幸會稽錢塘。希嘗從駕。自天子公卿朝士。四方士大夫。皆貴希筆。一筒至千錢。下此不可得。晁侍讀以道作詩稱譽之。有吳先生師中字茂先。得其筆。以一與先少師希之技。誠絕人。入手卽熟。作萬字不少敗。莫能及者。後七十餘年。予得其孫屠覺筆。財價百錢。入手亦熟。可喜。然不二百字。敗矣。或謂覺利於易敗而速售。是不然。價旣日削矣。易敗則人競趨它工。覺固不爲書者計。獨不自爲計乎。乃書希事。庶覺或見之。

書二公事

鄭介夫名俠。以剛直名天下。晚居福清。自號一拂居士。布衣糲食。而雜植華木於舍傍。鴈詠自適。客至必與飲。多不過五爵。蔬果之外。一肉而已。遇貧士過者。亦薄贖之。止於千錢。飲具皆白鐵。或遺以銀盃。辭不取。好強客弈棋。有辭不能者。則留使旁觀。而自以左右手對局。左白右黑。精思如真敵。白勝則左手斟酒。右手引滿黑勝反是。如是幾二十年。如一日。謝昌國名諤。嘗問道於頤正郭先生。居臨江。名其廬曰良齋。晨興。烹豆腐菜羹一釜。偶有肉。則糲切投其中。客至。亦不問何人。輒共食。有貧士及醫卜之類。飯已。輒語

之曰。吾無錢子君。豈欲詩乎。取幅紙作絕句贈之。以爲常。二公皆予所鄉慕也。予貧甚。欲學介夫辦五盃。千錢亦復未易。又不解弈棋。或可力貧學昌國耳。書之座右。當徐圖之。紹熙之元十二月八日。九曲老樵書。

卷第二十六

真廟賜馮侍中詩

某家舊藏孝嚴殿繪像。先正侍中馮公在焉。冠劍偉然。與太行黃河氣象相埒。每稽首歎曰。侍中輔相兩朝。更天下大變。而社稷奠安。夷狄褻服。勦穰萬里。無犬吠之警。有以也夫。晚待罪新定。公之孫頤出示章。聖皇帝賜詩。又以想見一時盛事。恨不生其時。俯伏沙隄。旁窺望風采云。

高宗聖政草

某被命修光堯皇帝聖政。草創凡例。網羅放逸。雖寢食間。未嘗置也。然不敢以稿留私篋。暇日偶追記得。此命兒輩錄之。隆興二年十月一日。左通直郎通判鎮江軍府事陸某記。

高宗賜趙延康御書

右知金壇縣趙君師愚。錄高宗賜其大父延康公書。及延康移僞楚書。共爲一編。以示史官陸某。某曰。延康在宣和靖康間。聲望風采。震耀一時。及守宛丘。百戰禦狂虜。卒全其城。視唐代張巡許遠。顏真卿。皆過之。來朝行在高皇。蓋欲以左轄命之。議者謂宗室輔政。非故事。遂止。方公之南徙也。謝表有云。臣本支百。

世侍從三朝。又云堅壁以保近畿。慨前功之俱廢。登壇而陪盛禮。懷憂遇以自憐。讀者悲之。某又嘗於公從孫師嚴有翼家。見公建炎奏議稿一編。皆人所至難言者。不知此稿皆在鑑堂集中否。或可訪於有翼院中。以補逸遺。敢併以告。嘉泰癸亥歲三月丙申。臣某謹識。

高皇御書二

臣某少時與胡尚書之子杞。同學於雲門山中。見高皇帝賜尚書御題扇。曰。文物多師古。朝廷半老儒。蓋黃體也。與此手詔絕相類。後數年。蒙收召。得面天顏。距今四十四年矣。伏讀寶涕。不知所云。嘉泰癸亥五月一日。史官臣陸某謹題。

又

臣某伏觀高皇帝御天下幾三十年。進用諫官御史。皆出聖選。故往往相輔。其不合者。猶爲侍從。乃去。如施公財。任遺補。卽出守小郡。蓋無幾人。則其犯顏拂指。不撓於權倖。可以想見。而上之知人。受盡言。有仁祖用范仲淹。唐介之風矣。惜乎施公遠逝去。不及召用於庫。悲夫。開禧乙丑九月一日。故史官陸某謹書。

今上皇帝賜包道成御書崇道卷類

開禧某年某月甲子。皇帝親御翰墨。書崇道卷三字。賜妙行先生。臣包道成。以示故史官臣陸某。將刻之石。具載歲月及被賜之由。示天下後世。臣某竊聞臣道成實晉陵人。少學黃老之說。以劬身濟衆爲事。寓跡都城三十餘年。築堂以居。凡以黃冠褐衣至者。靡不館之。往來千人。蓋嘗有神僊異人混於衆中。道成

獨默識之而不言。會稽光孝觀。故名乾明。天聖間。章獻明肅皇后遣中使築之。久壞不葺。道成談笑復其舊。凡都城橋梁道路。皆力治之。費至緡錢百餘萬。建東嶽廟。吳山上既成。又即其傍築室。以奉真武。左江右湖。氣象雄麗。而道院屹立於廡外。鐘磬步虛之聲。在雲霄間。都人爲之心駭神悚。於是皇帝聞而異之。故有扁榜之賜。臣某犬馬之年。駿駸九十。獲在聖主仁壽域中。且嘗獲紬繹三朝金匱石室之藏。今雖篇老。猶幸未病廢。得以紀稀闊盛事。豈非幸哉。開禧二年歲在丙寅三月某日。太中大夫充寶謨閣待制致仕山陰縣開國子食邑五百戶賜紫金魚袋臣陸某昧死稽首再拜謹書。

跋尹耘師書劉隨州集

傭書人韓文持束紙支頭而睡。偶取視之。劉隨州集也。乃以百錢易之。手加裝緘。紹興二十五年正月八日陸某記。

尹耘師耕鄉里前輩。與九伯父及先君游。此集蓋其手抄云。紹熙元年七月望。某再跋。

跋唐御覽詩

右唐御覽詩一卷。凡三十八。二百八十九首。元和學士令狐楚所集也。按盧綸墓碑云。元和中。章武皇帝命侍臣采詩。第名家得三百一十篇。公之章句奏御者居十之一。今御覽所載。綸詩正三十二篇。所謂居十之一者也。據此。則御覽爲唐舊書不疑。然碑云三百一十篇。而此纔二百八十九首。蓋散逸多矣。姑校定訛謬。以俟完本。御覽一名唐新詩。一名選集。一名元和御覽云。紹興乙亥十一月八日。吳郡陸某記。

跋文武兩朝獻替記

學者當以經綸天下自期此書不可不見也。但傳本繆誤，幾不容讀。以它書尋繹之，十得四五云。紹興丙子臘日，務觀題。

跋泉禪師蒙泉銘

右妙喜禪師爲良上人所作蒙泉銘一首。往予嘗晨過鄒禹功博士，坐有僧焉。予年少氣豪，直據上坐。時方大雪，寒甚，因從禹功索酒，連引徑醉。禹功指僧語予曰：「此妙喜也。予亦不辭謝，方說詩論兵，旁若無人。妙喜遂去。其後數年，予老於憂患，志氣摧落，念昔之狂，痛自悔責，然猶冀一見，作禮懺悔，孰知此老遂棄世而去邪？雖然，良公蓋一世明眼衲子，不知予當時是，卽今是。試爲下一轉語。」隆興改元十一月五日，笠澤漁隱陸某書。

跋修心鑑

右高祖太傅公修心鑑一篇。初，公生七年，家貧未就學，忽自作詩，有神仙語，觀者驚焉。晚自號朝隱子。嘗退朝，見異人行空中，足去地三尺許，邀與俱歸，則古仙人嵩山栖真先生肩吾也。因受鍊丹辟穀之術。尸解而去。然其術祕不傳，今惟此書尙存。某既刻版傳世，并以七歲吟及自贊附卷末。庶幾篤志方外之士讀之，有所發焉。亦公之遺意也。隆興二年七月二日，元孫某謹書。

跋邵公濟詩

先子入蜀時，與邵子文遇於長安，同遊興慶池，有詩倡酬，相得驩甚。夜讀公濟詩，超然高逸，恨未嘗得識世舊與文盟也。乾道元年五月十八日，笠澤漁隱陸某書。

跋坐忘論

司馬子微師體玄先生潘師正體玄師昇玄先生王遠知昇玄師真白先生華陽隱居陶弘景故體玄語子微曰吾得陶隱居正一法逮汝四世矣乾道二年天慶節借玉隆藏室本傳漁隱子手記

跋查元章書

李份事士大夫謹以故得書帖多不可數然閱其書至不敢與他札借藏者元章吏部一人而已份一束耳知敬元章如此豈知元章仕於朝既不容去而居幕府又不容自引於數千里外赤甲白鹽之間乃少安嗚呼亦可歎也夫丙戌上元後三日漁隱書

跋高象先金丹歌

右玉隆萬壽觀本序言有注解而不傳亦不知序者爲何人也丙戌二月八日務觀書

又

國初有高象先淳化中爲三司戶部副使少從戚同文學與宗度許驥陳象輿郭成範王礪滕涉齊名不言其所終亦不知其鄉里恐卽此人然序言名先字象先又似別一人神仙隱顯不可必知聊記之耳辛亥炊熟日書

跋天隱子

最後易簡漸門二說非天隱子本語他日錄本當去之丙戌三月中休傳本於玉隆萬壽宮漁隱東坡先生以爲天隱子真司馬子微所著也傳本後二十五年紹熙庚戌冬至日書

跋造化權輿

先楚公著埤雅，多引是書，然未之見也。乾道三年孟夏十八日，傳自玉隆藏室，甫里陸某謹題。

跋老子道德古文

右漢嚴君平著道德經指歸古文，此經自唐開元以來，猶傳明皇帝所解，故諸家盡廢。今世惟此本及貞觀中太史令傅奕所校者尙傳，而學者亦罕見也。予求之踰二十年，乃盡得之。玉笈藏道書二千卷，以此爲首，漁隱陸某題。乾道二年十月十日。

跋已菴語

乾道庚寅十月入蜀，舟過公安二聖，見祖珠長老，得此書。珠自言南平軍人，得法於已菴云。

跋武威先生語錄

豐清敏公爲中執法，論事上前，曰：司馬光呂公著皆忠賢，何爲引赦復官，赦當及有罪耳，無罪何赦也？繼祖曰：光等變先帝法度，非罪乎？清敏公頓首曰：誠當變，無可罪者。方元符建中間，衆正畢集於朝，天下喁喁，想望太平。清敏公與陳忠肅公俱極諫，官御史之選，而所以言則有婉直之異。吾先大父楚公，每以爲二公之論皆不可廢，蓋忠肅似孟子說齊，而清敏似伯夷諫周，其歸一也。今觀武威先生之論，又甚似清敏百世之下，志士仁人，得此書讀之，當有太息流涕者矣。乾道七年立秋日，山陰陸某書。

跋關著作行記

著作關公出使峽中，風采峻甚，仕者人人震慄，莫敢仰視。某以孤生起舉籍，萬里佐州，淺闇滯拙，自期且

汰去。而關公獨厚遇之。舉酒賦詩。談臺閣舊事。忘其位之重也。公免歸之明年。某以事至臥龍山。咸平寺長老惠璉言。公往有行記。今將刻之石。因屬某書其末。某曰。方關公之門可炙手時。此書伏不出。今公歸臥青城山中。賓客解散。形勢一變。而璉方刻其書。爲不朽計。嗟乎。足以愧士大夫矣。乾道七年七月七日。左奉議郎通判夔州軍州主管學事陸某謹識。

跋司馬子微餌松菊法

乾道初。予見異人於豫章西山。得司馬子微餌松菊法。文字古奧。非妄庸所能附託。八年。又得別本於蜀青城山之丈人觀。竊戒手校。傳之同志。十二月六日。笠澤漁翁陸務觀書於玉華樓。

跋周茂叔通書

濂谿之生也。世但以佳士許之耳。旣死。蒲左轄作誌。黃太史作詩。其稱述亦不過如此。向使無二程先生。後世豈知濂谿爲大儒。傳聖人之道者邪。以此知士之埋沒無聞者。何可勝計。乾道壬辰十二月十五日。成都驛南窗書。

跋岑嘉州詩集

予自少時。絕好岑嘉州詩。往在山中。每醉歸。倚胡牀。輒令兒曹誦之。至酒醒。或睡熟。乃已。嘗以爲太白子美之後一人而已。今年自唐安別駕來。攝犍爲。旣畫公像齋壁。又雜取世所傳公遺詩八十餘篇刻之。以傳知詩律者。不獨備此邦故事。亦平生素意也。乾道癸巳八月三日。山陰陸某務觀題。

跋二賢像

右孟貞暉歐陽率更二像皆唐人筆墨北湖者吳則禮子傳也無悔者劉霽無言也最後實先君會稽公茶山先生曾文清公書萬里羈旅不自意全撫卷流涕乾道九年九月既望刻石置漢嘉月樹上山陰陸某識

跋山谷先生三榮集

予集黃帖得贈元師及王周彥三詩甚愛之有黃淑者家三榮見而笑曰紹興中再刻本也舊石方黨蔡時已磨毀矣乃出此卷曰是舊石本其筆力精勁蓋如此因錄藏之淳熙之元二月二日務觀書

跋硯錄香法

硯錄舊有本而亡之香法蓋未之見師房者濟南衛昂也娶婆婆先生崔德符女晚官巴峽死焉乾道辛卯冬予得此編於巫山縣師房手鈔也已腐敗不可讀乃錄藏之後三年淳熙之元二月三十日蜀州漱玉南窗務觀書

跋唐修撰手簡

某之曾外大父質肅唐公守并州故給事中呂公實爲幕客質肅爲人方嚴少許可或面折人臨川王和甫同時在幕中每言見唐公退輒汗滿握然遇呂公特歎他客莫敢望也淳熙元年某在蜀州得質肅仲子修撰公與給事手帖讀之蓋元祐初修撰使河北給事爲御史時也書論黃河市易辭指激烈無一語及其私與世俗責報父客至有違言者何其遠哉修撰字君益元祐中建議棄渠陽城紹聖初坐貶團練副使元符建中之間起守許昌方治事得報召蔡京撫案憤咤即日疽發背卒某不及拜公而先夫人爲

言公大節如此。敢併記之。以遺給事之孫教授君云。七月二十三日。山陰陸某謹書。

跋蔡君謨帖

近歲蘇黃米芾書盛行。前輩如李西臺宋宣獻蔡君謨蘇才翁兄弟書皆廢。此兩軸君謨真行草隸皆備。石在仙井。可寶也。淳熙元年九月八日。蜀州手裝。

跋瘞鶴銘

瘞鶴銘。予親至焦山摹之。止有此耳。殘璋斷珪。當以真爲貴。豈在多邪。淳熙之元九月一日。蜀州重裝。

跋西崑酬唱集

通直郎張玠。河陽人。呂汲公家外甥。藏書甚富。淳熙二年正月八日夜讀此集。燈架忽仆。壞書。時傳畢方。一日。豈歐尹諸人亦有靈邪。記之爲異時一笑。

跋歷代陵名

三榮守送來。近世士大夫所至。喜刻書版。而略不校讎。錯本書散滿天下。更誤學者。不如不刻之愈也。可。以一歎。淳熙乙未立冬。可齋書。

跋溫庭筠詩集

先君舊藏此集。以華清宮詩冠篇首。其中有早行詩。所謂雞聲茅店月。人跡板橋霜者。久已墜失。得此集於蜀中。則不復見早行詩矣。感歎不能自己。淳熙丙申重陽日。某識。

跋王君儀待制易說

王公易學。雖出於葆光張先生。然得於心者多矣。建炎間。胡騎在錢塘。明越俱陷。王公端居於殿。曰。虜決不至此。且狼狽而歸。自此窮天地不復渡江矣。其妙於易數蓋如此。淳熙丁酉元日。山陰陸某書於錦官閣下。

跋雀正言所書書法要訣

德符詩名一代。書則未之見也。觀此編中字。瘦健有神采。亦類其詩。乃知前輩未易以一技名也。戊戌重午。務觀書。

跋後山居士詩話

談叢詩話皆可疑。談叢尙恐少時所作。詩話決非也。意者後山嘗有詩話而亡之。妄人竊其名爲此書耳。後山二子。豐登。登過江爲會稽曹官。李鄴降虜。登亦被驅以北。悲夫。淳熙戊戌十月二十四日可齋。

跋佛智與升老書

此一編。佛智禪師與其法子寒巖升公書也。議論超卓。殆非世儒所及。三復歎仰。淳熙己亥三月九日。建安雙清堂書。

跋古柏圖

此圖吾家舊藏。予居成都七年。屢至漢昭烈惠陵。此柏在陵旁廟中。忠武侯室之南。所謂先主武侯同闕宮者。與此略無小異。則畫工亦當時名手也。淳熙六年龍集己亥六月一日。陸某識。

卷第二十七

跋中和院東坡帖

此一卷皆蘇仲虎尚書所藏。鑒定精審。無一帖可疑者。刻石在成都大聖慈寺中和勝相院。淳熙六年六月十七日陸務觀題。

跋漢隸

漢隸十四卷。皆中原及吳蜀真刻。淳熙己亥。集於建安公署。友人莆陽方士蘇伯壽。親視裝褫。故無一字差謬者。六月二十一日。山陰陸某書。

跋晁百谷字敘

名者士所願也。而或懼太早。何哉。吾測之審矣。少而得名。我不能不矜。人不能不忌。以滿假之心。來譏嚮之口。幾何其不躓也。吾元歸年甫二十。筆力扛鼎。不患無名。患太早耳。雖然。洪道方力張其名。而吾獨欲其退避揜覆。元歸未必樂也。異時出入朝廷。更歷世故。會當思吾言也。夫。淳熙庚子二月三日。山陰陸某書。

跋陵陽先生詩草

右陵陽先生韓子蒼詩草一卷。得之其孫籍。先生詩擅天下。然反覆塗乙。又歷疏語所從來。其嚴如此。可以爲後輩法矣。予聞先生詩成。既以予人。久或累月。遠或千里。復追取更定。無毫髮恨。適止。則此草亦未必皆定本也。大歇菴詩一章。徐師川作。而先生手錄之。亦足見其無昔人爭名之病矣。故附見卷中。淳熙

庚子四月二十二日笠澤陸某書。

跋荆公詩

右荆公手書詩一卷前六首贈黃慶基後七首贈鄧鏞石刻皆在臨川淳熙七年七月十七日陸某謹題。

跋續集驗方

予家自唐丞相宣公在忠州時著陸氏集驗方故家世喜方書予宦遊四方所獲亦以百計擇其尤可傳者號陸氏續集驗方刻之江西倉司民爲心齋淳熙庚子十一月望日吳郡陸某謹書。

先左丞使遼語錄

右先楚公使遼錄一卷三十八伯父手書伯父自幼被疾以左手書然筆力清健如此平生凡鈔書至數百卷云淳熙八年四月五日某謹識。

跋朝制要覽

先君會稽公晚歲喜觀此書間爲子弟講論因革率至夜分先君捐館舍三十有四年統得此於故廬伏讀悲哽敬識卷末淳熙八年龍集辛丑十一月二十五日山陰陸某書。

跋東坡問疾帖

東坡先生憂其親黨之疾委曲詳盡如此則愛君憂國之際可知矣其曰勿使常醫弄疾天下之至言讀之使人感歎彌日淳熙九年五月乙未甫里陸某書。

跋東坡詩草

東坡此詩云。清吟雜夢寐。得句旋已忘。固已奇矣。晚謫惠州。復出一聯云。春江有佳句。我醉墮渺莽。則又加於少作一等。近世詩人。老而益嚴。蓋未有如東坡者也。學者或以易心讀之。何哉。淳熙九年五月二十日。玉局祠吏陸某書於鏡湖下鷗亭。

跋孫府君墓誌銘

方五代割裂時。自一郡以上。非其國子弟。則大將功臣也。士大夫仕爲令掾者。已爲達官。錢氏土境尤盛。而孫公至專城。蓋其國顯人也。觀杜公所述。亦誠有以得之矣。淳熙壬寅立秋日。甫里陸某。

跋蘇魏公百韻詩

右首一卷。丞相魏公謝事歸第。且八十時所作也。蘇端明賀趙清獻公得謝啓云。念平生之百爲。一無可恨。某於魏公亦云。淳熙壬寅立秋日。吳郡陸某謹識。

跋家藏造化權輿

右造化權輿六卷。楚公舊藏。有九伯父大觀中題字。淳熙壬寅得之。故第廢紙中。用別本讐校。而闕其不可知者。兩本俱通者。亦具疏其下。六月四日。山陰陸某謹記。

後十有四年。慶元元年八月十二日。重校。凡三日而畢。時年七十一。

跋三蘇遺文

此書蜀郡呂商隱周輔所編。周輔入朝爲史官。得唐安守以歸。未至家。暴卒。可悲也。淳熙十一年正月十一日。務觀識。

跋兼山先生易說

郭立之從程先生遊最久。程先生病革，猶與立之有問答語，著於語錄。而尹彥明獨謂立之自黨論起，即與程先生絕，死亦不弔祭。蓋愛憎之論也。立之子雍，字子和，屏居峽中，屢聘不起，亦著易說，得其家學。蓋程氏易學立之父子實傳之。淳熙甲辰二月三十日，甫里陸務觀云。

後六年得謝昌國所贈頤正先生辨尹公說，乃知予此言麤合也。頤正，卽雍也。己酉八月二十八日某書。

跋鄭虞任昭君曲

自張文潛下世，樂府幾絕。吾友鄭虞任作昭君曲，如羊車春草空芊芊，及重瞳光射搔頭偏之類，文潛殆不死也。但願夕烽長不驚甘泉，妾身勝在君王前，能道昭君意中事者。淳熙甲辰三月二十三日，甫里陸某書。

跋傅正議至樂菴記

伏波將軍困於壺頭，曳病足土室中，以望夷賊。左右哀之，莫不爲流涕。定遠侯在西域三十年，老思土。上書自言，願生入玉門。關詞指甚哀，彼封侯富貴矣。然戚戚無聊乃如此。其他盈滿輒隄，畏禍憂誅，願爲布衣不可得者，又何可勝歎。然則富貴果不如貧賤之樂邪？曰：此自富貴者言之耳。貧賤之士，仕則無路，處則無食，自非有道君子，其憂又有甚者矣。正議傅公在學校二十年，聲震京師，同舍生去爲公卿者，袂相屬。而公始僅得一第，旣仕矣，適時艱難，妄男子往往起閭巷，取美官，公又棄不用，則亦何自樂哉？及讀所作至樂菴記，自道其胸中恢疎磊落，所以樂而忘憂者，文辭辯麗，動人有列禦寇莊周之遺風。然後知

公蓋有道者。或曰：使天以富貴易公之樂，公其許之乎？予曰：公所以處貧賤者，則其所以處富貴也。顏回之簞瓢，周公之衮纁，一也。觀斯文者，蓋以是求之。淳熙十一年七月十六日，山陰陸某謹書。

跋中興間氣集

高適字仲武，此乃名仲武，非適也。評品多妄，蓋淺丈夫耳。其書乃傳至今，天下事出於幸，不幸固多如此。可以一歎。淳熙甲辰八月二十九日，放翁書。

高適字仲武，此集所謂高仲武，乃別一人名仲武，非適也。議論凡鄙，與近世宋百家詩中小序可相甲乙。唐人深於詩者多，而此等議論乃傳至今，事固有幸不幸也。然所載多佳句，亦不可以所託非其人而廢之。

跋齊驅集

此集刻版於宣和三年，方是時，黨禁猶未解，文士蓋僅有見者，故本多誤。然好事者冒法刻之，亦奇矣。淳熙甲辰重午日，陸務觀書。

跋柳柳州集

此一卷，集外文，其中多後人妄取他人之文，冒柳州之名者，聊且哀類於此。子京。

右三十一字，宋景文公手書，藏其從孫最家。然所謂集外文者，今往往分入卷中矣。淳熙乙巳五月十七日，務觀校畢。

跋說苑

李德芻云。館中說苑二十卷。而闕反質一卷。曾鞏乃分修文爲上下。以足二十卷。後高麗進一卷。遂足。淳熙乙巳十月六日。務觀書。

跋章氏辨誣錄

徽宗皇帝盛德大度。自秦漢以來。人主莫能及者。尤在友愛蔡王。寬貸章惇。而史臣不能發明。可爲太息。淳熙丙午十月望。陸某謹題。

跋釣臺江公奏議

某乾道庚寅夏。得此書於臨安。後十有七年。蒙恩守桐廬。訪其家。復得三表及贈告墓志。因併刻之。以致平生尊仰之意。淳熙十三年十一月十日。有六日。笠澤陸某書。

先太傅遺像

先太傅皇祐中以吏部郎中直昭文館。自會稽移守新定。期年。請老。得分司西京以歸。迄今百四十年。而某自奉祠玉局。起爲是邦。實繼遺躅。於是知建德縣事蘇君林以父老之請。築祠宇於兜率佛寺。淳熙十四年春正月丙辰。備車旗儀物。大合樂奉遺像於祠。且以公自贊道帽羽服像刻之。堅珉。慰邦人無窮之思。朝隱子蓋公自號云。元孫朝請大夫權知嚴州軍州事陸某謹書。

跋高康王墓誌

王岐公文章闕麗。有西漢風。而宋常山公書法森嚴。實傳鍾張古學。方裕陵致孝寶慈。極天下養。故並命兩公彰顯高氏先王功烈。以詔萬世。可以爲寵光矣。中更亂離。而墨本寶藏如新。殆有神物護持云。淳熙

十四年二月三日笠澤陸某謹識。

跋半山集

右半山集二卷，皆荆公晚歸金陵後所作詩也。丹陽陳輔之嘗編纂刻本於金陵學舍，今亡矣。淳熙戊申上巳日笠澤陸某書。

跋李深之論事集

唐丞相司空李公深之論事集，有兩本，其一本七卷，無序，其一本一卷，史官蔣偕作序，然以序考之，則偕所序蓋七卷者也。淳熙戊申四月十九日笠澤陸某識。

跋李莊簡公家書

李丈參政罷政歸鄉里時，某年二十矣。時時來訪先君，劇談終日，每言秦氏，必曰：咸陽憤切慷慨，形於色，辭一日平旦來，共飯，謂先君曰：聞趙相過嶺，悲憂出涕，僕不然，謫命下，青鞵布襪行矣，豈能作兒女態邪？方言此時，日如炬，聲如鐘，其英偉剛毅之氣，使人與起，後四十年，偶讀公家書，雖徙海表，氣不少衰，丁寧訓戒之語，皆足垂範百世，猶想見其道青鞵布襪時也。淳熙戊申二月己未笠澤陸某題。

跋之罘先生藁

肩吾文忠公四世孫，博學工文章，與予蓋莫逆也。晚來行在，諸公貴人頗知之，欲引置要津，有毀之者，肩吾既不偶，乃調桂陽令去。客姑蘇，未繫舟，暴疾一夕死，哀哉！嘉父隴爲人，肩吾沒後數年，始以進士起家。淳熙戊申秋社日放翁書。

跋吳夢子詩編

山澤之氣爲雲降而爲雨。勾者伸。秀者實。此雲之見於用者也。子嘗見早歲之雲乎。嵯峨突兀。起爲奇峯。足以悅人之目。而不見於用。此雲之不幸也。君子之學。蓋將堯舜其君民。若乃放逐顛顛。娘悲舒憂。爲風爲騷。亦文之不幸也。吾友吳夢子。彙其歌詩數百篇於天下名卿賢大夫之主斯文盟者。翕然歎譽之。未以示余。余愀然曰。子之文。其工可悲。其不幸可弔。年益老。身益窮。後世將曰。是窮人之工於歌詩者。計吾吳君之情。亦豈樂受此名哉。余請廣其志曰。窮當益堅。老當益壯。丈夫蓋棺事始定。君子之學。堯舜其君民。余之所望於朋友也。娛悲舒憂。爲風爲騷而已。豈余之所望於朋友哉。淳熙十五年十一月二十六日。甫里陸某書。

跋松陵集三

淳熙十六年四月二十六日。車駕幸景靈宮。予以禮部郎兼膳部檢察。賜公卿食。訖事作假。會陵陽韓籍寄此集來。云東都舊本也。欣然讀之。時寓輒街巷街南小宅之南樓。山陰陸某務觀手識。

此集蔡景繁舊物。復嘗歸韓子蒼。子蒼之孫籍以遺予。蓋百年前本也。

景繁元豐中嘗爲開封推官。此所題開封南司者是也。景繁二子居厚居易。此題居厚者。其長也。景繁臨川人。而韓子蒼居臨川。故得此書。務觀手記。

跋王仲言乞米詩

仲言貸米。本自欲就魯肅輩人。而良齋又戒以勿取陶胡奴米。仲言治己可謂嚴。而良齋告之。亦可謂忠。

矣。數年來，仲言以貧甚，客長安中，豪子貧給殊厚，今春忽捨去，主人叩首乞少留，不可，豈獨能踐初言，亦不負良齋期待矣。淳熙己酉四月二十七日陸某務觀書。

跋金奩集

飛卿南鄉子八闋，語意工妙，殆可追配劉夢得竹枝，信一時傑作也。淳熙己酉立秋，觀於國史院直廡，是日風雨，桐葉滿庭，放翁書。

跋韓非子

右韓非子一卷，紹興丁卯，先君年六十時，傳吳越才老本，後四十有二年，淳熙己酉，某重裝而藏之。時年六十，有五月十九日，史院東閣手藏。

跋卻掃編

此書之作，敦立猶少年，故大抵無紹興以後事。淳熙己酉十一月十四日，書於儀曹直廡。

跋彩選

紹興甲戌七月三日，子宅過此，彩選畢景，丙子二月五日，同季思訪務觀雲門山草堂，復爲此戲。子宅記紹興十九年正月十有七日，友人王仲言父自京江來，以是書爲贈，餘醮菴記。

官制，左右丞不爲平章事，自侍郎拜者，皆躡蹻尙書，此書蓋失之。

子宅季思下世，忽已數年，予今年六十有七，覽此太息，然子方從事金丹，丹成，長生不死，直餘事耳。後五百年，過雲門草堂，故址思昔作彩戲，豈非夢邪。紹熙元年上元日，放翁書。去子宅題字時三十年矣。

跋陝西印章二

紹熙庚戌正月十九日夜閱故書得此追思在山南時已二十年同模惟周元吉閻才元章德茂張季長及余五人尙亡悉爾拊卷累歎放翁題又十有五年當嘉泰之四年歲在甲子因暴書再觀則元吉才元德茂又皆物故數年矣季長在蜀累歲不得書存亡有不可知者而予年已八十感歎不能已八月十六日務觀書

跋詩稿

此予丙戌以前詩二十之一也及在嚴州再編又去十之九然此殘稿終亦惜之乃以付子聿紹熙改元立夏日書

跋秘閣續帖張長史率意帖

此一帖在故簽書樞密王倫家倫出使時得之故都予少日嘗見之紹熙改元五月甲子甫里陸某識時年六十有六距初見時四十有五年矣

跋王深甫先生書簡二

深甫先生以治平二年七月二十八日卒而此卷末答其弟容季書是年六月一日相距無兩月矣悲夫紹熙元年六月望陸某書

此畫朝夕觀之使人若居嚴師畏友之間不敢萌一毫不善意

跋郭德誼墓誌銘

仲晦先生識郭公墓。或恨其太簡。然吾夫子銘季札曰於虜。有吳延陵季子之墓。財十字耳。至今傳以爲寶。彼賣菜求益之論。可付一歎。紹熙二年正月二十三日陸某謹書。

又

顏魯公麻姑壇記。東坡先生經藏記。皆有大字小字兩本。蓋用羊叔子峴山故事。千載之後。陵谷變遷。尚冀其一存爾。德誼之名。固自不朽。然吾元晦爲斯人計。亦至矣。豈希呂兄弟孝愛篤至。有以發之邪。紹熙二年正月壬申。澤笠陸某識。

跋郭德誼書

予童子時嘗避兵東陽山中。距今六十年。予長德誼三歲。計其年可以相從而不及也。觀此遺墨。爲之太息。紹熙二年正月二十三日。澤笠老漁陸某謹書。

卷第二十八

跋後山居士長短句

唐末詩益卑。而樂府詞高古工妙。庶幾漢魏。陳無已詩妙天下。以其餘作辭。宜其工矣。顧乃不然。殆未易曉也。紹熙二年正月二十四日。雪中試朱元亨筆。因書。

跋蘇氏易傳

此本先君宣和中入蜀時所得也。方禁蘇氏學。故謂之毗陵先生云。紹熙辛亥七月二十日。陸某識。

跋資暇集

吾家舊有此本。先左丞所藏。書字簡樸。疑其來久矣。首日隴西李斥文濟翁編。斥字猶成文也。久已淪墜。忽尤延之寄刻本來。爲之愴然。紹熙二年十一月二十九日陸某識。

跋法帖

此本嘗見之。清勁可愛。及移之石。乃爾失真。拙工誤人如此。乾符元年十一月乃改元。此云三月。何邪。蔡君謨用螭字類字俱非。又何邪。紹熙三載正月二十二日。三山下漚亭書。

又

魯公書殊不類。紙乃煙熏。周副之語尤俚俗。羅紹威用羅氏世寶印。犯唐諱。益可疑。跋語詩句亦鄙甚也。君謨豈至是哉。惟錢希白字奇古可喜。然非題顏帖。乃剪它軸附卷後耳。

跋蘭亭樂毅論并趙岐王帖

某恭聞太宗皇帝天縱聖學。跨軼百王。萬幾之餘。尤留神翰墨。文昭武穆。世受筆法。有若岐簡獻王得稿書之妙。蓋其爲學上稽三代兩漢。以象其高古。下專以晉右將軍王羲之爲法。以極其變化。所藏魯公作文王尊彝。伯禽祀文王之器。紹聖間詔取藏祕閣。宣和博古圖亦列於他周器上。又政和中關中發地得竹簡。皆東漢討羌書檄。字作草草。好事者爭取。而王獨多獲之。則王之窮深造微。豈寒窶書生所及哉。至蘭亭脩禊序樂毅論。又王所愛玩。天下名本王之於書。名尊一代。固無足異。今周器漢札。雖不可復見。而脩禊序樂毅論。如魯靈光巋然獨存。意有神物護持。非適然也。王遺墨藏家廟者。今雖僅存。某嘗獲觀。皆

奇麗超絕。動心駭目。往時米芾於書少許可。獨推王以爲能學古人。語在芾所著書畫史。王之孫不流。以從官長東諸侯。懼書家不能盡見。是奇蹟。迺詎良工。併刻樂石。置會稽郡齋。而屬某書其後。惟王歷事累朝。典司宗盟。嘉言善行。不可勝載。文章尤長於詩。有唐人餘風。此特論其書而已。紹熙四年正月辛卯。中奉大夫提舉建寧府武夷山冲佑觀山陰縣開國男食邑三百戶陸某謹書。

跋蔡肩吾所作遼府君墓誌銘

蔡迨肩吾與予同官。隸爲郡文辭。字畫皆過人。自蜀入吳。持予書。見友人許昌韓无咎。无咎時爲吏部侍郎。薦之甚力。且有除命矣。蜀士有排之者。肩吾遂從銓部得桂陽令。行至吳門。暴死舟中。每念之。未嘗不流涕也。不識肩吾者。讀此文亦足知其不凡矣。遼昌老字真叟。亦佳士。蓋與肩吾爲方外友云。紹熙癸丑立夏日。澤笠陸務觀書。

跋原隸

故吏部郎宇文卷臣所著。卷臣爲郎數月。坐口語。亟去。晚守臨邛廣漢。有能名。然亦以謗紕。遂卒於家。可哀也。紹熙癸丑四月二十一日。老學菴書。

跋京本家語

本朝藏書之家。獨稱李鄴公。宋常山公所蓄。皆不減三萬卷。而宋書校讐。尤爲精詳。不幸兩遭回祿之禍。而方策掃地矣。李氏書屬靖康之變。金人犯闕。散亡皆盡。收書之富。獨稱江浙。繼而胡騎南騫。州縣悉遭焚劫。異時藏書之家。百不存一。縱有在者。又皆零落不全。予舊收此書。得自京師。中遭兵火之餘。一日。

於故篋中偶尋得之。而蟲齧鼠傷。殆無全幅。綴緝累日。僅能成帙。乃命工裁去四周所損者。別以紙裝背之。遂成全書。嗚呼。予老嫗目昏。雖不復讀。然嗜書之心。固未衰也。後世子孫。知此書得存之如此。則其餘諸書。幸而存者。爲予寶惜之。紹興戊午十月七日。雙清堂書。

後五十有七年。復脫壞。不可挾。子聿亟裝緝之。持以相示。方先少保書此時。某年十四。今七十矣。不覺老淚之濡睫也。紹熙甲寅閏月四日。第三男中大夫某謹識。

跋李徂徠集

中野去魯歸周三詩。可以追媲。退之琴操。而世不甚傳。使予得見李公。當百拜師之。不特願爲執鞭而已。紹熙甲寅六月二日書。

跋劉文老使君義居遺戒

祥符中。天子封禪。講墜典。以文太平。詔求孝義之門。於是天下以名聞者數十家。遠不過十世。獨吾鄉裘承詢。自齊梁以來。十九世如一日。郡國莫先焉。吾亡友劉文老。當上一子世其祿。而長子復辭。以予其季。蓋文老所未嘗命者。於未嘗命者如此。況其所命者乎。將見世世守遺訓不墜。十九世豈足道哉。紹熙甲寅中秋日。陸某識。

跋無逸講義

按實錄。元祐五年二月壬寅。邇英閣講畢。無逸篇。詔詳錄所講以進。今後具講義。次日別進。壬寅是月七日也。與此卷首所云面奏乞候講畢錄進。乃不同。恐當以此爲正。紹熙五年八月十日。陸某謹識。

跋東坡帖

此碑蓋所謂橫石小字者邪。頃又嘗見壁石本，字亦不絕大，數簡行筆，尤奇妙可貴。與成都西樓十卷中所書郭熙山水詩，頗相甲乙也。紹熙甲寅十月二十三日，務觀題。

跋東坡祭陳令舉文

東坡前後集祭文凡四十首，惟祭賢良陳公辭指最哀，讀之使人感歎流涕。其言天人予奪之際，雖若出憤激，然士抱奇材絕識，沉壓擯廢，不得少出一二，則其肝心疑爲金石精氣，去爲神明，亦烏足怪。彼憤憤者固不知也。紹熙甲寅十二月二十九日，笠澤陸某謹書。

跋劉凝之陳令舉騎牛圖

公卿貴人方黃金絡馬，傳呼火城中時，欲如二公騎牛山谷，蕭散遺物，固不可得。若予者，仕旣齟齬，及斥歸，欲買一黃犢代步，其費二萬有畸，作欄蓄童，又在此外，遂一笑而止。徒有此生，猶著幾兩屐之歎，乃知二公風流，亦未易追也。紹熙甲寅十二月二十九日，陸某識。

跋東坡七夕詞後

昔人作七夕詩，率不免有珠櫳綺疏惜別之意。惟東坡此篇，居然是星漢上語，歌之曲終，覺天風海雨逼人。學詩者當以是求之。慶元元年元日，笠澤陸某書。

跋張監丞雲莊詩集

虜覆神州七十年，東南士大夫視長淮以北，猶僮荒也。以使事往者，不復黍離麥秀之悲，殆無以慰答父

老心今讀張公爲奉使官屬時所賦歌詩數十篇。忠義之氣鬱然爲之悲慨。彌日。慶元改元。九月二十七日。陸某書。

跋淵明集

吾年十三四時。侍先少傅居城南小隱。偶見藤床上有淵明詩。因取讀之。欣然會心。日且暮。家人呼食。讀詩方樂。至夜。卒不就食。今思之。如數日前事也。慶元二年。歲在乙卯。九月二十九日。山陰陸某務觀書於三山龜堂。時年七十有一。

跋陸吏君廟籤

昔者龐德公未會入州府。襄陽蒼舊閭。處士節獨苦。豈無濟時策。終竟畏羅罟。林茂烏有歸。水深魚知聚。舉家隱鹿門。劉表焉得取。

射洪陸吏君廟。以杜詩爲籤。極靈。余自蜀被召東歸。將行。求得此籤。後十四年。乃決意不復仕官。愧吾宗人多矣。紹熙辛亥十二月十日。山陰陸務觀書。

跋巴東集

予自乾道庚寅入蜀。至淳熙戊戌東歸。九年間。兩過巴東。登秋風白雲二亭。觀萊公手植槽。未嘗不慨然流涕。恨古人之不可作也。又有七年慶元丙辰六月二十四日。山陰陸某書。時年七十二。

跋呂侍講歲時雜記

承平無事之日。故郡節物及中州風俗。人人知之。若不必記。自喪亂來七十年。遺老凋落無在者。然後知

此書之不可闕。呂公論著。實崇寧大觀間。豈前輩達識。固已知有後日邪。然年運而往。士大夫安於江左。求新亭對泣者。正未易得。撫卷累歎。慶元三年二月乙卯。澤笠陸某書。

跋許用晦丁卯集

許用晦居於丹陽之丁卯橋。故其詩名丁卯集。在大中以後。亦可爲傑作。自是而後。唐之詩益衰矣。悲夫。慶元丁巳六月四日。放翁識。

跋李涪刊誤

王行瑜作亂。宗正卿李涪盛陳其忠。必悔過。及行瑜傳首京師。涪亦放死嶺南。疑卽此人也。丁巳七月十六日識。

跋歸去來白蓮社圖

予在蜀得此二卷。蓋名筆規模龍眠。而有自得處。季子子聿手自裝褙藏之。慶元丁巳中秋前三日。放翁識。

跋釋氏通紀

予少時避兵東陽山中。有沈師者。丞相恭惠公之裔。近有僧來往天衣山。自言歐陽文忠公家。今又得脩公所著釋氏通紀觀之。則建炎樞臣盧公諸孫也。近世不以世類求人。名門大家。散而爲方外道人者多矣。如脩公既棄衣冠。猶能博學強記。寓史氏法。於是書亦賢矣。夫慶元丁巳重九日。放翁陸某務觀識。

跋毛仲益所藏蘭亭

龍乘雲氣而上天。鳳凰翔於千仞。吾見舊定本蘭亭。其猶龍鳳邪。慶元丁巳十一月二十日。笠澤陸某務觀書。

跋魏先生草堂集

按國史。野陝人沈存中筆談。以爲蜀人居陝州。不知何所據也。予在蜀十年。亦不聞野爲蜀人。筆談蓋誤也。慶元戊午。得之書肆。十月十九日。龜堂病叟手識。時年七十有四矣。

跋王輔嗣老子

晁以道謂王輔嗣老子題曰道德經。不析乎道德而上下之。猶近於古。此本乃已析矣。安知其他無妄加竄定者乎。慶元戊午十月晦書。

跋前漢通用古字韻編

古人讀書多。故作文時。偶用一二古字。初不以爲工。亦自不知孰爲古。孰爲今也。近時乃或鈔綴史漢中字入文辭中。自謂工妙。不知有笑之者。偶見此書。爲之太息。書以爲後生戒。己未三月二十四日。龜堂識。

跋胡少汲小集

少汲之兄名僧孺。字唐臣。在元祐紹聖間。亦知名士也。少汲十詩中一篇。所謂阿兄驚世才者是也。周秀實名蔚。予亡姑之子。及與元祐前輩游。紹興十六七年。猶亡恙。有文集數十卷。王性之作序。少汲倡酬最多。班班見於此集。秀實有子名疊。文者。乃翁每稱其類異。自先少師捐館。兩家相去地遠。不復相聞。每爲之惻愴於懷也。因讀少汲小集。併書之。慶元己未七月一日。老學菴書。

跋曉師顯應錄

法華之爲書。天不足以喻其大。海不足以喻其深。利根之士。一經目。一歷耳。自不能捨。雖舉天下沮之。彼且不動。尙何勸相之有哉。然人之根性利鈍。蓋有如天淵者。善知識諄諄告語。誘之以福報。懼之以禍罰。亦有不得已者。譬之世法。道德風化。固足坐致唐虞三代之治矣。而賞以進善。罰以懲惡。亦烏可廢哉。觀曉師顯應錄者。當作是觀。慶元己未立秋日。山陰陸某書。

跋范巨山家訓

人莫不愛其子孫。愛而不知教之。猶弗愛也。人莫不思其父祖。思而不知奉其教。猶弗思也。使爲人父祖者。皆如范氏之先。爲人子孫者。皆如吾友巨山。世其有不興者乎。吾所謂興者。天地鬼神與之。鄉人慕之。學者尊之。是爲興。不然。雖門列戟。床堆笏。德弗稱焉。何興之有。巨山之子。旣以文章擢高科。公卿將相之儲也。故予思廣其意。而書其家訓。後如此。巨山父子不以予爲老悖。則將有感也夫。巨山名中立。其子名薰。慶元己未八月晦。山陰陸某謹書。

跋張安國家問

東坡先生書遍天下。而黃門公所藏至寡。蓋常以爲易得。雖爲人持去。不甚惜也。紫微張舍人書帖。爲時所貴重。錦囊玉軸。無家無之。今大宗伯兄弟。自爲知己。家書往來。蓋以百計矣。相稱相勉。期以遠者。亦何可勝計。而今所存財五紙耳。方紫微亡恙時。豈亦以爲易得。故多散逸邪。某昔者及爲紫微客。今老病臥家。而大宗伯猶以世舊寄此卷。命寓姓名於後。某自乎玉列筵。數三十六年之間。摧頽抵此。紫微若尙在。

而見之且不能識則大宗伯尙何取哉。授筆至此慨然不知衰涕之集也。慶元五年十一月戊申。笠澤陸某書。

跋坐忘論

此一篇刻虛谷刻石在廬山。以予觀之。司馬子微所著八篇。今昔賢達之所共傳。後學豈容置疑於其間。此一篇雖曰簡略詳其義味。安得與八篇爲比。衆旣謂出於子微。乃復指八篇爲道士趙堅所著。則堅乃子微以前人。所著書淵奧如此。道書仙傳。豈無姓名。此尤可驗其妄。予故書其後。以祛觀者之感。己未十一月二十一日。放翁書。

跋唐盧肇集

予嘗嘗讀春州而集中誤作青州。蓋字之誤也。題清遠峽觀音院詩。作青州遠峽。則又因州名而妄竄定也。前輩謂印本之害。一誤之後。遂無別本可證。真知言哉。病馬詩云。塵土臥多毛。已暗風霜受。盡眼猶明足。爲當時佳句。此本乃以己爲色。猶爲光。壞盡一篇語意。未必非妄校者之罪也。可勝歎哉。慶元庚申二月三日。放翁燈下書。

跋居家雜儀

王性之言熙寧初有朝士集於相藍之燒朱院。俄有一人未至。問之。則王元澤也。時荆公方有召命。衆人問舍人不堅辭否。元澤言。大人亦不敢不來。然未有一居處。衆言居處固不難得。元澤曰。不然。大人之意。乃欲與司馬十二丈卜鄰。以其修身齊家。事事可爲子弟法也。某聞此語六十年矣。偶讀居家雜儀。遂識

之。慶元庚申五月四日書。

跋皇甫先生文集

右一詩。在浯溪中興頌傍石間。持正集中無詩。詩見於世者。此一篇耳。然自是傑作。近時有容齋隨筆亦載此詩。乃云。風格殊無可采人之所見。恐不應如此。或是傳寫誤爾。慶元六年五月十七日龜堂書。

跋南堂語

予入蜀時。南堂入滅已久。獨有一二弟子在。然皆破齋犯律。諸禪皆詆訾之。予亦以乘毀意薄其爲人。及其死也。乃卓然穎脫。人亦不得而議。是誠未易測也。庚申五月壬戌書於龜堂。

跋注心賦

世之未通佛說者。觀此亦得其梗概矣。慶元庚申七月庚申龜堂老人書。

跋朱新仲舍人自作墓誌

秦丞相擅國十九年。而朱公竄嶠南者十有四年。僅免僇仆於炎瘴中耳。以此胸中浩然無愧。將終自識其墓。辭氣山立。向使公諂附以苟富貴。至暮年。世事一變。方憂愧內積。惟恐聞人道其平日事。其能慨然奮筆自敘如此乎。慶元六年秋社日笠澤陸某謹書。

跋黃魯直書

老子曰。豫兮若冬涉川。猶兮若畏四鄰。山谷此卷。蓋有得於此。慶元庚申重九日笠澤陸某書。

卷第二十九

跋蘭亭序

觀蘭亭當如禪宗勘辨。入門便了。若待渠開口。堪作什麼。識者一開卷已見精蘊。或者推求點畫。夢以耳鑿。瞞俗人則可。但恐王內史不肯爾。余平生見佳本亦多。然如武子所藏。不過三四。真可寶也。慶元庚申重九日笠澤陸某書。

跋李少卿帖

宣城李氏自推官至今八九世。詩人不絕。蓋時有如少卿者。振起之也。慶元庚申九月二十日笠澤陸某書。

跋樂毅論

樂毅論橫縱馳騁。不似小字。瘞鶴銘法度森嚴。不似大字。此後世作者所以不可仰望也。庚申重九。陸某書。

跋李朝議帖

胡唐臣憎孺少汲直孺兄弟。爲江西名士。其朋友亦皆知名。朝議公蓋其一也。慶元庚申重九日。陸某書。

跋東方朔畫贊

元豐間。有德州士人攜畫贊示東坡。自言二百年前本家藏數世矣。東坡爲題之曰畫贊世多本。惟德州者第一。君所藏又爲德州第一。或曉之曰。此言君是德州人耳。其人雖不伏。亦大笑止。因觀武子所藏。聊

識卷末。慶元六年九月甲子。陸某務觀書。

跋李虞部與范忠宣公啓

某家藏先大父遺書。其積背多當時士大夫殘啓。刺字不過曰尙書左丞。或曰左丞中大而已。數十百人無一人異者。此建中靖國之元也。上距元祐又十餘年。風俗淳厚可知。況丞相忠宣公與虞部李公之相與親厚者乎。宜其不爲諂也。諸公或以今日耳目求之。過矣。夫慶元庚申九月二十一日。陸某書。

跋范文正公書

觀文正范公書札。如欲與韓魏公同薦李泰伯。見其進賢之誠。戒余安道石守道避禍。見其愛惜人材之意。於處賢哉。然泰伯卒棄不用。安道守道。俱陷患難。或至死不解。志士仁人。至今以爲歎。信乎明哲保身之難也。慶元庚申九月二十九日。笠澤病叟陸某書。

跋東坡帖

成都西樓下有汪聖錫所刻東坡帖三十卷。其間與呂給事陶一帖。大略與此帖同。是時時事已可知矣。公不以一身禍福。易其憂國之心。千載之下。生氣凜然。忠臣烈士。所當取法也。予謂武子當求善工。堅石刻之。與西樓之帖。並傳天下。不當獨私囊褚。使見者有恨也。

跋盧衷父絕句

客懷耿耿自難寬。老傍京塵更鮮歡。遠夢已回窗不曉。杏花同度五更寒。
直衷父絕句。衷父名蹈。青社人。今寓健爲郡。夾江縣佳士也。

跋四三叔父文集

先楚公捐館時叔父未成童。已從章貢黃先生安時學喪禮。覆講無小差。蓋天資精敏如此。謹附書於遺文之後。以示後人。

跋王右丞集

余年十七八時讀摩詰詩最熟。後遂置之者幾六十年。今年七十七。永晝無事。再取讀之。如見舊師友。恨間闕之久也。嘉泰辛酉五月六日龜堂南窗書。

跋歐陽文忠公疏草

慶曆之盛。蓋庶幾漢文景矣。而賢人君子猶如是之難。文忠公之奏議。非獨不明諸公之議也。身亦墮排陷中。滌州之謫是已。於庠悲夫。嘉泰二年人日笠澤陸某書。

跋盤澗圖

紹興己卯庚辰之間。予爲福州決曹。延平張仲欽爲閩縣大夫。朝暮相從。後四年。予佐京口。仲欽佐金陵。數以檄往來於鍾阜浮玉間。把酒道舊甚樂。又二十年。予使閩中。仲欽間居延平。數相聞。方約相遇。而予蒙恩召遠。遂有死生之異。言之悵然。仲欽之子爲西和守。寄此軸來求詩。蓋又二十餘年。予年七十有七矣。嘉泰改元歲辛酉五月十九日。陸某書。時予納祿已三年。居會稽山陰之三山。

跋爲琛師書維摩經

鄉僧琛上座求予書維摩詰所說法。欲刻石施四衆。以薦其母。會予病。不能卽如其請。琛十返不厭。孝哉。

此僧吾徒所樂從也。乃力疾爲書。嘉泰壬戌正月二十一日。放翁書。

跋東坡諫疏草

天下自有公論。非愛憎異同能奪也。如東坡之論時事。豈獨天下服其忠。高其辯。使荆公見之。其有不撫几太息者乎。東坡自黃州歸。見荆公於半山。劇談累日不厭。至約卜鄰。以老焉。公論之不可揜如此。而紹聖諸人。乃遂其伎心。投之嶺海必死之地。何哉。此疏藏馮氏三世八十年矣。真可寶哉。嘉泰壬戌二月七日。笠澤陸某謹書。

跋東坡代張文定上疏草

張安道實一時偉人。以其論新法。諫用兵。則不得不爲忠。以其力排吳育。深惡石介。歐陽文忠公。司馬文正公。斥之於前。呂正獻公。抑之於後。則似有可議者。然東坡此疏。則自與日月爭光。安道之爲人。不與焉。元祐初。盡起舊老。安道獨置不問。近臣請加恩禮。亦不報。更奪其宣徽使。議者以爲多出正獻公之意云。嘉泰壬戌二月七日。笠澤陸某謹書。

跋楊處士村居感興

一壺村酒膠牙酸。十數胡斂徹骨乾。隨著四婆裙子後。杖頭挑去賽蠶官。右畢仲荀景儒所記楊處士詩也。四婆。卽處士之配也。蘇嬌。季真家有處士夫妻像。野逸如生。恨不曾傳摹得之。它日見蘇氏子孫。尙可畢此志也。嘉泰癸亥。放翁書於三山老學菴北窗。

跋朱氏易傳

易道廣大非一人所能盡。堅守一家之說未爲得也。元晦尊程氏至矣。然其爲說亦已大異。讀者當自知之。嘉泰壬戌四月十二日老學菴識。

跋晁以道書傳

晁以道著書專意排先儒。故其言多而不通。然亦博矣。凡予家所錄本多得於以道孫子闔。子闔本自多誤。予方有吏役。故所錄失誤又多。不暇校定。及謝事居山陰。欲得別本參考。又不能致。可恨也。壬戌四月十八日老學菴記。時年七十八。

跋嵩山景迂集

景迂鄜時排閔詩云。莫言無妙麗。士稚動金門。蓋鄜人善作土偶兒。精巧雖都下。莫能及宮禁。及貴戚家爭以高價取之。喪亂隔絕。南人不復知。此句遂亦難解。可歎。嘉泰壬戌四月二十四日。放翁識。

跋任德翁乘梓集

德翁感遇篇云。言行身不用。無迺我所欲。長沙地卑溼。正可高閣足。其議賈生。可謂善矣。所抱如此。排擯至死。天下之不幸也。壬戌五月一日老學菴書。

跋洪慶善帖

某兒童時。以先少師之命。獲給掃洒丹陽先生之門。退與子威講學。則兄弟如也。每見子威言洪成季慶善學行。然皆不及識。今獲觀慶善遺墨。亦足少慰衰病廢學。負師友之訓。如愧何。嘉泰二年五月丁卯。陸某謹題。

跋蒲郎中易老解

易學自漢以後浸微。自晉以後與老子並行。其說愈高。愈非易之舊。宋興。有酸棗先生以易名家。同時。神豹林亦開門傳授。傳至邵康節。遂大行於時。然康節欲以授伊川程先生。乃拒弗受。而伊川每稱胡安定。王荊公易傳。以爲今學者所宜讀。惟此二家。王公乃自毀其說。以爲不足傳。著論悔之。易之難知如此。夜讀蜀蒲公易傳。老子解。喟然歎曰。公於易與老子。蓋各自立說。迹若與晉諸人同。而實異也。書以遺其族孫申仲。試以予言請問。信何如也。嘉泰二年九月丁卯。笠澤陸某書。

跋陸子彊家書

吾友伯政持其先君子家問來。讀之。累日不厭。使學者皆能如此。孰得而嘗病之。雖有嘗者。吾可以無愧矣。乃令子聿鈔一通。置篋中。時覽觀焉。嘉泰壬戌十月二十三日。宗人某書。

跋子聿所藏國史補

子聿喜蓄書。至輟衣食。不少吝也。吾世其有與者乎。嘉泰壬戌閏月幾望。放翁記。時年七十有八。以同修國史兼祕書監居六官宅第六位。

跋火井碑

予昔在征西幕府。嘗得小校言。火山軍地枯燥。不可耕。鋤犁入地不及尺。烈火隨出。今江吳間。穿地尺餘。則見水。北人聞之。亦未必信也。夜讀蜀彭君火井碑。乃知天地間何所不有。亦喜彭君之善記事也。嘉泰壬戌閏月十有五日。山陰陸某務觀書。

跋韓晉公牛

予居鏡湖北渚。每見村童牧牛於風林煙草之間。便覺身在圖畫。自奉詔納史。逾年不復見此。寢飯皆無味。今行且奏書矣。奏後三日。不力求去。求不聽。輒止者。有如此。嘉泰癸亥四月一日。笠澤陸某務觀書。

跋畫橙

嘉泰癸亥四月十六日。兩朝實錄將進書。予以史官兼祕書監。宿衛於道山堂之東直舍。茶罷取此軸摩挲久之。覺香透指爪。此物著霜時。予歸鏡湖小園久矣。山陰陸某務觀書。

跋臨帖

此書用筆靄靄多態度。如雙鉤鍾王遺書。可寶藏也。笠澤陸務觀跋。時年七十九。當嘉泰癸亥四月二十八日。居於六官宅老學行菴。

跋米老畫

畫自是妙迹。其爲元章無疑者。但字卻是元暉所作。觀者乃并畫疑之。可歎也。嘉泰癸亥四月二十九日。陸務觀書。

跋潘函老帖

潘函老詩妙絕世。恨不見其字。今見此卷。無復遺恨矣。癸亥五月一日。笠澤陸某書。

跋鄉林帖

先少師使淮南。實與鄉林向公爲代。鄉林作雅熙堂於廡中。堂之前有井。泉甘寒。宜茶。洪駒父聞之。寄詩

云。何如喚取陸鴻漸。石鼎風爐來試茶。詩與除代堂帖同日到。鄉林大以爲異。手書報先少師。今尙在也。伏觀公移文奏牘稿。大節貫金石。然諸公所書已可傳世。贅書之亦屋下架屋耳。而某家世所傳。足補雍林逸事者。則不可不書以遺後人。嘉泰三年五月十日。陸某謹書。

跋陳魯公所草親征詔

紹興辛巳壬午之間。某由書局西府掾。親見丞相魯公經綸庶務。鎮服中外。有人所不可及者。然猶不知此詔爲出於公也。後四十有三年。某行年且八十。偶幸未先犬馬。獲見公手稿於康公之謙厚不伐。與露才揚己者。相去何啻千萬哉。追憶盛德大度。如巨山喬嶽。凜然猶在目前。爲之隕涕。嘉泰三年五月十二日。門人前史官陸某謹書。

跋蔡忠懷送將歸賦

予讀送將歸之賦。爲之流涕。不爲蔡氏也。宋興百餘年。累聖致治之美。庶幾三代。熙寧元祐所任大臣。蓋有孟楊之學稷契之忠。而朋黨反因之。以起。至不可復解。一家之禍。福曲直不足言也。爲之子孫者。能力學進德。不爲偏蔽。則承家報國。皆在其中矣。嘉泰三年五月十五日。山陰陸某書於浙江亭。

跋東坡書髓

成都西樓下石刻東坡法帖十卷。擇其尤奇逸者爲一編。號東坡書髓。三十年間。未嘗釋手。去歲在都下。脫敗甚。乃再裝緝之。嘉泰三年歲在癸亥九月三日。務觀老學菴北窗手記。

跋范元卿舍人書陳公實長短句後

紹興庚申辛酉間。予年十六七。與公實遊。時予從兄伯山。仲高。葉晦叔。范元卿。皆同場屋。六人者蓋莫逆也。公實謂予小陸兄。後六十餘年。五人皆已隔存歿。予年七十九。而公實郎君詹字伯廣者出此軸。恍然如與公實元卿聯杖屨。均茵憑也。爲之太息彌日。因識其末。雖然。使死而有知。吾六人者安知不復相從。如紹興間乎。會當相與挈手一笑。尙何歎。嘉泰癸亥十月二十九日。笠澤釣叟陸某書。

跋謝師厚書

謝師厚。早歲與歐陽兗公。王荆公。梅直講。江記注諸人遊。名甚盛。晚更踰躄。居穰下二十餘年。學愈進。文章愈成。獨後諸公死。子情。惓。甥黃魯直。皆知名天下。然年運而往。士大夫鮮能知師厚者。今觀吾友傅漢孺所藏其上世墓刻。實師厚遺文。至送行詩。雜之宛陵詩中。殆不可辨。字則宋宣獻父子之流亞也。爲之太息。嘉泰癸亥立春後四日。笠澤陸某書。時年七十九。

跋雲丘詩集後

宋興詩僧不愧唐人。然皆因諸巨公以名天下。林和靖之於天台長吉。宋文安之於凌雲。惟則。歐陽文忠公之於孤山。惠勤。石曼卿之於東都。祕演。蘇翰林之於西湖。道潛。徐師川之於廬山。祖可。蓋不可殫紀。潛可得名最重。然世亦以蘇徐兩公許之。太過爲病。餘則徒得所附託。故聞後世。非能巋然自傳也。予觀雲丘詩。平淡閑暇。蓋庶幾可以自傳者。政使不遇呂居仁。蘇養真。朱希真。王性之。范至能。亦決不泯沒。況如予者。烏足爲斯人重哉。其徒覺淨以遺稿來。求題其後。十款吾門不厭。故爲之書。嘉泰四年二月乙巳。笠澤陸某書。

跋呂舍人九經堂詩

前輩以文章名世者名愈高則求者愈衆故其間亦有徇人情而作者有識之士多以爲恨如呂公九經堂詩蓋自少時與昭德尊老諸公師友淵源講習漸漬所得又爲其子孫而發故雄筆大論如此於序凍乎其可敬畏也哉嘉泰四年六月庚子陸某書

跋韓忠獻帖

方彞霄犯邊時忠獻王首當禦戎重任功冠諸公後入輔帷幄陳謨畫策駕馭人材鎮服虜情自曾集賢以降皆協贊而已觀此帖可概見也嘉泰四祀六月辛丑故史官山陰陸某謹識

跋高大卿家書

子長大卿娶予表從母之女故自少時相從後又同入征西大幕情分至厚讀此數書如見其長身蒼髯意象軒舉也嘉泰甲子歲夏六月壬寅放翁陸某書

卷第三十

跋諸晁書帖

某之外大母清豐君實巨茨先生女兒而墓刻則景迂先生所作故某每見昭德及東眷中表每感信也況今行年八十飾巾待盡伏讀此卷其情可知嘉泰甲子六月既望山陰陸某謹識

跋南城吳氏社倉書樓詩文後

南城吳君子直兄弟作社倉。略倣古者斂散之法。築書樓。用爲子孫講習之地。其設意深遠。流俗殊未易測也。或者乃謂吳氏捐貲。以爲社倉。凶歲免民於死徙。其有德於人甚大。後世當有興者。子孫不學。則不足以承之。此其築書樓之意。使吳氏之意信出此。乃市道也。市道不可以交鄉黨自好之士。其可以與天交乎。吳君之意蓋曰。吾爲是舉。非一世也。吾兄弟他日。要當付之後人。人不可知。吝則畜出。貪則漁利。怠荒則廢事。雖面命之。或不聽於遺言。何有惟學則免是三者之患。而社倉雖百世可也。此吾兄弟之本指。若夫富貴貧賤。我且不能自知。乃爲後人謀。而責報於荒忽。不可致詰之地。亦愚矣。吳君遺書行千餘里。示予以社倉本末。因及諸公書樓紀述。予慨然歎以爲知吳君兄弟心者。莫予若也。故書之。嘉泰四年六月某日。山陰陸某書。

跋六一居士集古錄跋尾

始予得此本。刻畫精緻。如見真筆。會有使入蜀。以寄張季長。及再得之。纔相距數年。訛闕已多。知古人欲傳遠者。必託之金石。有以也。夫嘉泰甲子六月二十二日。笠澤陸某謹識。

跋林和靖詩集

和靖人物文章。初不賴東坡公以爲重。況黃秦哉。若李端叔者。尤不足錄。讀竟使人浩歎。書之所以慰和靖於泉下也。嘉泰甲子六月二十四日。放翁識。

跋米元暉書先左丞海岱樓詩

右米侍郎元暉書先大父題海岱樓詩一首。春秋公羊傳曰。山川有能潤於百里者。天子秩而祭之。觸石

而出。膚寸而合。不崇朝而徧雨乎天下者。惟泰山爾。故大父云。起爲霖雨從膚寸。蓋言徧雨天下之澤。自膚寸而始也。米所書誤以從爲成。遂失本意。可爲太息。嘉泰四年秋八月壬寅。山陰陸某書於三山老學菴。

跋蘇丞相手澤

某之先大父左丞平生所尊事願學者。惟丞相魏公。每爲門生言國朝輔相。德量歸然。莫如魏公與王文貞公。且所謂築太平之基。壽宗社之脈。養天下之氣者。他相雖賢。莫敢望。觀此奏稿。可概見也。嘉泰四年秋八月丙辰。山陰陸某謹識。

跋韓幹馬

大駕南幸。將八十年。秦兵挑馬。不復可見。志士所共歎也。觀此畫。使人作關輔河渭之夢。殆欲置涕矣。嘉泰甲子十月二十一日。山陰陸某書。

跋義松

黃子邁之爲蓮城。以最聞。予以相距遠。不能知其詳。然草木無知。造物無心。太平無象。其所感猶如此。則是邑之民。其有以不友不敬。至庭造獄者乎。予將求諸邑人而紀之。未暇也。嘉泰甲子歲十一月甲子。山陰陸某書。

跋林和靖帖

祥符天禧間。士之風節文學名天下者。陝郊魏仲先。錢塘林君復二人。又皆工於詩。方是時。天子修封禪。

告太平。有二人在。天下麟鳳芝草不足言矣。君復書法。又自高勝絕人。予每見之。方病不藥而愈。方飢不食而飽。忽得觀上竺廣慧法師所藏二帖。不覺起敬。立法師能捐一石刻之山中。使吾輩皆得墨本。以刮目散懷。亦一奇事也。嘉泰甲子歲十二月丁卯。山陰陸某務觀書。

跋東坡集

此本藏之三十年矣。嘉泰甲子歲十二月。遺燼幾焚之。予緝成編。比舊本差狹小。乃可愛。遂目之曰焦尾本。云十四日。山陰陸某書。

跋陶靖節文集

張績季長學士。自遂寧寄此集來。道中失調護。前後皆有壞處。遂去之。而存其偶全者。未有年譜辨正。別緝爲編。云開禧元年正月四日。務觀書。

跋三近齋餘錄

右外兄元城王正夫所作。正夫名從。元豐中書舍人震字子發之子。仕至上饒守。云開禧改元正月庚申。務觀識。

跋望江麴君集

徐常侍鼎臣送望江張明府詩云。無使千年後。空傳麴令名。則麴令之名。在唐著矣。開禧改元歲乙丑二月二十七日。山陰陸務觀書。時年八十有一。

跋吳越備史

錢氏諱佐。故以左爲上。凡官名左字者。悉改爲上。此書所謂上右者。乃左右也。

又

吳越在五代及宋與。最爲安樂少事。然廢立誅殺猶如此。方斯時。吾家先世守農桑之業於魯墟梅市之間。無一人仕於其國者。眞保家之法也。開禧乙丑九月四日。山陰陸某書於三山書巢。

跋僧帖

方外之士。發揚其先德。累世不懈。吾輩亦可少愧矣。開禧乙丑九月五日。陸某書贈觀師。余年八十一。其家四世矣。安得不爲陳人乎。因以寓歎。

跋卿師帖

本朝小楷。至宋宣獻後。僅有道士陳碧虛一人。今見吾里中前輩卿師所書。則蕭散小不逮碧虛。而法度森嚴無魏者。亦名筆也。後人善藏之。開禧元年乙丑歲九月丁亥。山陰陸某務觀題。時年八十有一。

跋松陵倡和集

皮襲美當唐末。遜於吳越。死焉。有子光業。爲吳越相。子孫業文。不墜家聲。至襲美四世孫公弼。以進士起家。仕慶曆嘉祐間。爲韓魏公所知。雖不甚貴顯。亦當世名士也。方吳越時。中原隔絕。乃有妄人造謗。以謂襲美墮節於巢賊。爲其翰林學士。新唐書喜取小說。亦載之。豈有是哉。比唐書成時。公弼已死。莫與辨者。可歎也。開禧元年九月十四日。山陰陸某務觀書於松陵倡和集之後。

跋潛虛

學者必通易。乃能以其緒餘通玄。玄既通矣。又以其餘及虛。非可以一旦驟得也。劉君談虛如此。則其於易與玄可知矣。司馬丞相乃謂已學不足知易。故先致力於玄。蓋謙云耳。開禧乙丑十一月十八日笠澤陸某書。

跋呂成叔和東坡尖叉韻雪詩

古詩有倡有和。有雜擬追和之類。而無和韻者。唐始有之。而不盡同。有用韻者。謂同用此韻耳。後乃有依韻者。謂如首倡之韻。然不以次也。最後始有次韻。則一皆如其韻之次。自元白至皮陸。此體乃成。天下靡然從之。今蘇文忠集中有雪詩。用尖叉二字。王文公集中。又有次蘇韻詩。議者謂非二公莫能爲也。通判澧州呂文之成叔。乃頓和百篇。字字工妙。無牽強湊泊之病。成叔詩成後四十餘年。其子栻乃以示予。予固好詩者。然讀書有限。力尠薄。觀此集。有愧而已。乃書集後。而歸其本。呂氏開禧元年乙丑十一月丙申。笠澤陸某務觀書。

跋花間集

花間集。皆唐末五代時人作。方斯時。天下岌岌。生民救死不暇。士大夫乃流宕如此。可歎也哉。或者亦出於無聊故邪。笠澤翁書。

又

唐自大中後。詩家日趨淺薄。其間傑出者。亦不復有前輩闕妙渾厚之作。久而自厭。然格於俗尚。不能拔。出。會有倚聲作詞者。本欲酒間易曉。頗擺落故態。適與六朝跌宕意氣。差近。此集所載是也。故歷唐季五

代詩愈卑。而倚聲者輒簡古可愛。蓋天寶以後。詩人常恨文不迨。大中以後。詩衰而倚聲作。使諸人以其所長。格力施於所短。則後世執得而議。筆墨馳騁。則一能此不能彼。未易以理推也。開禧元年十二月乙卯。務觀東籬書。

跋韓晉公母幘

予平生見三尤物。王公明家韓幹散馬。吳子副家薛稷小鶴。及此子母牛是也。不知未死間。尙復眼中有此奇偉否。開禧二年四月甲子。陸務觀老學菴北窗書。

跋韓立道所藏蘭亭序

觀此本蘭亭。如見大勳業鉅公於未央庭中。大冠若箕。長劍拄頤。風采凜凜。雖單于不覺自失。況餘子有不汗洽股栗者哉。開禧丙寅歲四月十有三日。陸某年八十二。

跋龔氏金花帖子

右龔氏家藏其先世金花帖子。嘉泰中。陳翰林考實史牒。以爲先書姓名散報。始於端拱中。宋太素尙書知貢舉時。自建隆至端拱。取士已久。始克舉此故事。然子按宋公有追念策名時詩。凡千言。略云。吉音來碧落。帖子報紅牋。清夜驚神王。隴明到省前。風中宮漏盡。日出榜繩懸。宋公蓋建隆二年進士。則國初已有前一夕報帖之事。唐制初未嘗廢。若曰五代草創。止用紅牋。至端拱初。乃加金華。如唐時。則亦細事耳。不得云始舉唐故事也。世必有知者。予復書此於後。以待博洽君子云。開禧丙寅夏四月丙寅。山陰陸某書。

跋會文清公奏議稿

紹興末賊亮入塞時茶山先生居會稽禹跡精舍某自勅局罷歸略無三日不進見見必聞憂國之言先生時年過七十聚族百口未嘗以爲憂憂國而已後四十七年先生曾孫黯以當日疏稿示某於今某年過八十仕忝近列又方王師討殘虜時乃不能以塵露求補山海真先生之罪人也開禧二年歲在丙寅五月乙巳門生山陰陸某謹書

跋會文清公詩稿

河南文清公早以學術文章擅大名爲一世龍門顧未嘗輕許可某獨辱知無與比者士之相知古蓋如此方西漢時專門名家之師衆至千餘人然能自見於後世者寡矣揚子惟一侯芭至今誦之故識者謂千人不爲多一人不爲少某何足與乎此讀公遺稿不知衰涕之集也開禧丙寅歲五月乙巳門生笠澤陸某謹識

跋魚計賦

某恭聞徽祖宣和末將下罪己詔學士王孝迪當直不召顧謂輔臣曰非小字不能作遂召肅愍公公初不在北門既至辭以非職守不許遂授以聖意下筆覆置不數刻進御今載在國史與三代訓誥並驅蓋千百年間詔令所未有也晚讀魚計賦瞻麗超軼如此則施之大手筆固宜絕人遠甚某嘗見公遺像於友人趙恬家英氣如生恨不得獨拜牀下致欣慕之意今得記所聞於賦後亦幸矣開禧二年六月己巳笠澤老民陸某謹書

跋徐待制詩稿

予以乾道庚寅入蜀。幾十年而歸。故人在朝者。惟許昌韓无咎。握手道舊。因相與論當世知名士。无咎獨稱待制徐公。以爲文辭辨論。有貞元和間諸賢之遺風。恨予不及識。因誦其詩句。信奇作也。後三十年。徐公之子植。以遺稿一編示予。屬以序引。予與待制雖出處不同時。然嘗歎愛其筆墨。則亦願託名卷首。而待制之文。既於火所餘。財百之二。則序亦無自作。乃姑書此。附於後。它日得全書。紬繹其妙處而論載之。尙未晚也。開禧二年六月某日。山陰陸某書。

跋周益公詩卷

紹興辛巳。予與益公相從於錢塘。去題此詩時十一年。予年三十七。益公少予一歲。後二年。相繼去國。自是用捨分矣。今益公捨我去。所不知者。相距幾何時耳。開禧丙寅九月二十五日。山陰陸某謹識。

跋樊川集

唐人詩文。近多刻本。亦多經校讐。惟牧之集。誤繆特甚。予每欲求諸本訂正。而未暇也。書以示子適。尙成吾意。開禧丙寅十一月二十七日。放翁書。

跋周侍郎奏稿

某生於宣和末。未能言。而先少師以畿右轉輸饑軍。留澤潞。家寓滎陽。及先君坐御史徐秉哲論罷。南來壽春。復自淮徂江。間關兵間。歸山陰舊廬。則某少長矣。一時賢公卿與先君遊者。每言及高廟盜環之寇。乾陵斧柏之憂。未嘗不相與流涕哀慟。雖設食。率不下咽。引去。先君歸。亦不復食也。伏讀侍郎周公論事。

勝子猶想見當時忠臣烈士憂憤感激之餘風。於虜建炎紹興間國勢危蹙如此。而內平羣盜。外捍強虜。卒能披草莽立社稷者。諸賢之力爲多。某故具載之。以勵士大夫。儻人人知所勉。則北平燕趙西復關輔。實度內事也。開禧丁卯歲正月丁亥。故史官陸某謹書。

跋周侍郎尋姊妹帖

方建炎多故。羣盜如林。士大夫家罹禍。有盡室不知在亡者。觀周公所書。可爲流涕。六七十年来。在仕在野。皆安其生。養老者。字幼者。藏死者。可不知所自邪。尙勉思所以報。開禧三年正月丁亥。山陰陸某書。

跋鮑參軍文集

鮑明遠。宋元嘉中人。比陶淵明謝靈運。差爲晚出。然與靈運詩名相埒。體製亦頗相類。故世稱鮑謝云。開禧三正九放翁書。

跋南華真經

南華真經并音二册。籤題皆友人莆陽方伯謨書。伯謨下世已二年矣。哀哉。開禧丁卯二月四日。老學菴識。

跋與周監丞書

某頃得監丞公書。作報如此。後二十餘年。公家持以來。屬以題數字於後。乃爲記歲月。公諸子多賢。不幸有早世者。今惟主簿君以力學承其緒。他日仕途。有嶄然頭角者。必吾主簿君。恨耄期已迫。不及見之耳。開禧三年三月丙子。渭南伯陸某書於山陰澤中老學菴。

再跋皇甫先生文集後

司空表聖論詩有曰。愚嘗覽韓吏部詩。其驅駕氣勢。掀雷決電。撐扶於天地之垠。物狀其變。不得鼓舞而徇其呼吸也。其次。皇甫祠部文集外所作。亦爲遒逸。非無意於深密。蓋或未遑爾。據此。則持正自有詩集。孤行故文集中無詩。非不作也。正如張文昌集無一篇文。李習之集無一篇詩。皆是詩文各爲集耳。表聖直以持正詩配退之。可謂知之。然猶云未遑深密。非篤論也。予讀之。蓋累歎云。開禧丁卯四月二十一日。某再書。

跋漢文帝後元年三月詔

漢文此詔與詩之七月書之無逸何異。吾以此知文景太平之有自也。雖然。豈獨爲天下哉。十室之邑。千金之產。儻能思是言。其有至於喪敗者乎。庚申五月十七日。陸某書。

跋張魏公與劉察院帖

與人同功。人用而已。捨君子不敢言勞。與人同舉。人免而已。窮君子不敢逃責。非能異夫人也。理固如是也。不然。則亡恥已。使御史公無恙。得予此說。其將以爲能知言乎。

跋世父大夫詩稿

世父大夫公。自幼得未疾。以左手作字。性喜鈔書。嘗鈔王岐公華陽集百卷。筆筆無倦意。豈特其書可貴重哉。亦可見其爲人矣。

陸放翁集

渭南文集

卷第三十一

跋魯直書大戴踐阼篇

上古之文幸不泯者，率非後世所可及，不必壞魯壁發汲冢而得之，乃可信也。丹書之辭如此，武王之銘如此，雖微大戴禮載之，可置疑哉。某鄉先生傅公子駿爲學者言，洪範自無偏無黨，至歸其有極三十二字，皆古所傳爲人君之常訓。箕子申以告武王，吳棫才老著尙書裨傳以爲得此說於虞仲琳少崔少崔學於傅公，此三十二字與丹書三十九字一傳於箕子，一傳於師尙父，武王敬受力行之，卜世卜年之永有所自矣。開禧三年五月辛卯，故史官陸某識於黃太史所書踐阼篇後，以遺廬陵彭君孝求。

跋唐昭宗賜錢武肅王鐵券文

某按唐昭宗乾寧四年遣中使焦楚錚賜吳越武肅王鐵券，以八月壬子至國，是歲武肅始兼領鎮東節，出師大敗淮南兵十八營，定婺睦蘇湖州，而鐵券適至，蓋其國始盛時也。及忠懿王入朝，以其先王所藏玉册鐵券置之祖廟，不敢以自隨。淳化元年杭州悉上之於朝，時忠懿王已薨，太宗皇帝復以册券賜王之子安僖王惟濬，安僖王薨，券歸文僖公惟演，文僖公薨，券傳仲子霸州防禦使晦，霸州侍仁宗皇帝，燕間帝問先世所賜鐵券，欲見之，霸州并三朝御書以進，帝爲親識御書之末，復賜焉。文僖之孫開府公景

璩尚秦魯國大長公主。某年十二三時，嘗侍先夫人，得謁見大主，鐵券實藏臥內，狀如箭瓦。今七十餘年，乃得見錄本於武肅諸孫樞家。後十字，蓋文僖手書。某家舊藏文僖書帖，亦有押字，皆與此同。武勝軍節度使印，則文僖尹洛時所領鄧州節鉞也。開禧三年六月乙巳，山陰陸某謹書。

跋司馬端衡畫傳燈圖

司馬六十五丈，抱負才氣，絕人遠甚。方少壯時，以黨家不獲施用於時，欲有以寓其胸中浩浩者，遂放意於畫。落筆高妙，有顧陸遺風。某嘗以通家之舊，親聞其論畫，衰終日如孫吳談兵，臨濟趙州說禪，何其妙也。每恨是時不能記錄一二，以遺後之好事者。今獲觀傳燈圖，恍如接言論風指，時稽首太息，不能自已。開禧丁卯歲十月丁未，山陰陸某謹題。

跋呂伯共書後

紹興中，某從會文清公遊。公方館甥呂治先，日相與講學。治先有子未成童，卓然穎異，蓋吾伯共也。後數年，伯共已有盛名。從之學者以百數，不幸中道奄忽，而予幾九十，尚未死，攬其遺墨，大抵忠信篤敬之言也。爲之涕下。開禧丁卯歲十二月乙巳，山陰陸某書。

跋張敬夫書後

陸興甲申，某佐郡京口。張忠獻公以右丞相督軍過焉。先君會稽公嘗識忠獻於掾南鄭時，事載高皇帝實錄。以故某辱忠獻，願遇甚厚。是時敬父從行，而陳應求參贊軍事，馮園仲查元章館於予廨中，蓋無日不相從。迨今讀敬父遺墨，追記在京口相與論議時，真隔世事也。開禧丁卯十二月乙巳，山陰陸某書。

跋劉戒之東歸詩

乾道中予與戒之同在宣撫使幃中同舍十四五人宣撫使召還予輩皆散去范西叔字文叔介最先下世其餘相繼凋落至開禧中獨予與張季長猶存今春季長復考終於江原予年開九秩獨幸未書鬼錄偶得戒之郎君市征君所藏送行詩觀之恍然如隔世事也爲之流涕丁卯十二月乙丑渭南伯陸某書於山陰老學菴

跋秦淮海書

黃豫章秦淮海皆學顏平原真行豫章晚尤自稱許淮海則退避不肯以書自名亦各行其志也嘉定改元四月己酉山陰陸某書

跋柳書蘇夫人墓誌

近世注杜詩者數十家無一字一義可取蓋欲注杜詩須去少陵地位不大遠乃可下語不然則勿注可也今諸家徒欲以口耳之學揣摩得之可乎書家以鍾王爲宗亦須升鍾王之堂乃可置論耳爾來書法中絕求柳誠懸輩尙不可得書其可遽論哉然予爲此言非獨觸人亦不善自爲地矣覽者當粲然一笑也嘉定元年四月己酉陸某書

跋朱希真所書雜鈔

朱先生與諸賢當建炎間裔夷南牧羣盜四起時猶相與講學如此吾輩生平世安居鄉里乃欲飽而嬉可乎嘉定之元四月乙酉陸某書於山陰老學菴時年八十有四

跋爲子通書詩卷後

子通持正紙求錄詩期年矣。以乃翁衰疾不忍迫蹙。予更以此念之。爲寫終此卷。然此兒近者時時出所作。皆大進論建安黃初以來至元和後詩人。皆有本末。歷歷可聽。吾每爲汗出。因併記之。嘉定戊辰歲五月乙巳。放翁書。時年八十有四。

跋呂文靖門銘

一言可以終身行之者。其恕乎。此聖門一字銘也。詩三百。一言以蔽之。曰思無邪。此聖門三字銘也。其簡且盡如此。學者苟能充之。雖入聖域不難矣。丞相中國文靖呂公作門銘。自忠孝十有八字。廣吾夫子之訓。以遺後人。某得本於公元孫祖平。敢再拜書其後。致願學之意。嘉定元年夏五月辛亥。山陰陸某謹識。

跋傅給事竹友詩稿

王逸少寫經換鵝。給事傅公籠鵝換竹。二者皆山陰勝絕事。然換鵝事。人皆能道之。換竹事。未甚著。鄉人以爲恨。獨某曰。是不足怪也。逸少志在物外。不肯輕爲世用。故換鵝事。易傳。給事方南渡之初。忠義大節。爲一時稱首。雖困於讒誣。用之不盡。然至今聞其風者。可立衰懦。則換竹事。固應不傳。蓋所見於世者大也。給事遺文百卷。今藏祕閣。某領策府時見之。嘉定元年七月庚申。陸某謹識。

跋陳伯予所藏樂毅論

世傳中山古本蘭亭之流。帶右天五字。有殘闕處。於是士大夫所藏蘭亭。悉然。又謂樂毅論古本至一海宇止。於是凡樂毅論亦至海宇而亡。其餘妄僞亂真。大抵如此。今伯予此軸皆佳。後一本尤敷腴可愛。未

可以海字爲定論也。嘉定戊辰歲七月己未。山陰陸某務觀書。時年八十有四。

跋伯予所藏黃州兄帖

某之從父兄故黃州使君遺墨。伯予書其後。發揚大節至矣。伏讀感涕。不知所云。先兄諱沈。字子東。仕至朝奉大夫。嘉定元年七月己未。山陰老民陸某謹書。

跋詹仲信所藏詩稿

予平生作詩至多。有初自以爲可。他日取視。義味殊短。亦有初不滿意。熟觀乃稍有可喜處。要是去古人遠爾。詹仲信何處得予斷稿以見示。爲之嬰歎。乃題其後歸之。嘉定改元六月壬辰。山陰陸某務觀書於三山老學菴。年八十四。

跋陳伯予所藏蘭亭帖

予監定此本。自是絕佳。然亦不必云唐舊刻也。卷末數跋。皆吾友王君玉所錄黃太史魯直語。竊恐未必然。蓋周孔無過。蘭亭筆法亦無過。學者步亦步。趨亦趨。猶或失之。豈可以輕心慢心觀之哉。若以夫子嘗自謂有過。孟子云周公之過。遂據以爲周孔有過。乃醉夢中語也。嘉定改元十月庚午。陸某書。

跋坡谷帖

先大父左轄元祐中。自小宗伯自諱守穎。逾年移南陽。而蘇公自北扉得穎。與大父爲代。此當時往來書也。書三幅。前後二幅。藏叔父房。其一幅。則從伯父彥遠得之。亡兄次川又得於伯父。此是也。傳授明白。可以無疑。而或者疑其出於摹倣。識真者寡。前輩所歎。嘉定元年十二月乙亥。山陰陸某謹識。

跋山谷書陰真君詩

此石刻在夔州漕司白雲樓下。黃書無出其右者。嘉定己巳四月辛卯。放翁書。

跋呂尙書帖

右尙書呂公給事傅公往來書二卷。書曰。昔先正保衡。作我先王。語曰。起予者商也。蓋臣當有以作其君。弟子當有以起其師。而況朋友之際乎。二公可謂無負於古道矣。使此書廣傳。安知百世之下無興起者。嘉定己巳秋七月辛亥。山陰陸某謹識。

跋傅給事帖

紹興初。某甫成童。親見當時士大夫。相與言及國事。或裂眚嚼齒。或流涕痛哭。人人自期以殺身翊戴王室。雖醜裔方張。視之蔑如也。卒能使虜消沮。退縮。自遣行人請盟。會秦丞相檜用事。掠以爲功。變恢復爲和戎。非復諸公初意矣。志士仁人。抱憤入地者。可勝數哉。今觀傅給事與呂尙書遺帖。死者可作。吾誰與歸。嘉定二年七月癸丑。陸某謹識。

跋熊舍人四六後

裕陵見伯通外制。手批付中書曰。熊本文詞。朕自知之。荆公亦曰。讀熊君奏報。如面相語。

跋臨汝志

歐陽澈字德明。撫州臨川人。徙崇仁。金虜犯闕。上書請身使虜庭。馭親王以歸。不報。建炎初。伏闕上書論大臣誤國。太學生陳東亦上書。所言略同。遂併誅二人。年三十一。車駕渡江。贈承事郎。紹興初。贈朝奉郎。

秘閣修撰官其三子賜田十頃

跋尼光語錄

予登豫章西山其上蓋有光禪師塔焉。及來成都。又得師所說法要。博辯奇偉。雷霆一世。猶有蜀忠文公立朝堂堂。不撓於死生禍福之遺風。信其爲范氏女子也。笠澤漁隱陸某。

跋程正伯所藏山谷帖

此卷不應攜在長安逆旅中。亦非貴人席帽金絡馬傳呼入省時所觀。程子他日幅巾筇杖。渡青衣江。相羊喚魚潭瑞草橋清泉翠樹之間。與山中人共小巢龍鶴菜飯。掃石置風爐。煮蒙頂紫苗。然後出此卷共讀。乃稱爾。

跋張待制家傳

待制公躋於仕宦。晚途僅得一郎吏。而感激國難。冒兵渡河北行。忠義之氣。可沮金石。方其客死靈丘。寓骨雲中時。雖夷狄異類。亦爲賈涕也。今其家淺微。一孫未去。天官侍郎選公卿大夫。乃未有表出之。以爲忠義勸者。誠某所不識也。

跋柳氏訓序

方玘之爲是書也。際已長矣。詩曰。誨爾諄諄。聽我藐藐。悲夫。

跋祠部集

祠部叔祖詩文。至今皆不傳。此小集。得之書肆。蓋石氏所藏也。某謹識。

跋消災頌

高道傳言此頌蓋武陵張尊師作。尊師亦號白雲子。豈以此故遂誤爲子微乎。玉笈齋書。

跋肇論

高僧傳肇公化時年三十一耳。所著書乃傳百世。吾曹老而無聞。可愧也。

先楚公奏檢

舊有海陵時錄白元本。巨編大字。有先左丞親書更定處。今不復存。此本紹興中先少師命筆史傳錄者。

某識。

跋宗元先生文集

宗元先生吳貞節。唐史有傳。以歌詩名天寶中。此一卷蓋見雲章寶室云。放翁書。

跋韓子蒼語錄

此故人范季隨周士所記也。周士沒後數年得之於其子。然余舊聞周士道韓公語極多。尙恐所記不止

於此當更訪之。

跋孟浩然詩集

此集有示孟郊詩。浩然開元天寶間人。無與郊相從之理。豈其人偶與東野同姓名。晁伯以謂岳陽樓

止有前四句。亦似有理。

續考之。伯以之說蓋不然。大抵浩然四十字詩。後四句率覺氣索。如洞庭寄閩九歲暮歸南山之類皆然。

杜少陵評浩然詩云。新詩句句盡堪傳。豈當時已有此論。故少陵爲揀之邪。
適越留別譙縣張主簿詩。初云。得與故人會。後云。浮雲去吳會。此亦是吳與會稽也。

跋出疆行程

此一書。蓋陳魯公出使時官屬所記。不知爲何人也。文詞雖鄙淺。事頗詳洽。故錄之。
淳熙己酉秋。錢愷之子端忠爲金部外郎。予在儀曹。與之同廊。日會食。嘗問此書誰所作。端忠云。刁廡也。
廡字文叔。頗有文。不應鄙淺如此。恐未必然也。放翁書。

跋李衛公集

韋執誼之爲人。順宗實錄及唐書載之甚詳。正人所唾罵也。今觀李衛公祭文。稱譽之乃如此。衛公之言。
固過矣。史官所書。無乃亦有溢惡者乎。毀譽之可疑如此者。長矣。可勝歎哉。執誼作相時。實錄言嘗選中。
書侍郎同平章事。而史不書。衛公又以爲僕射。雖小節。亦聊附見於此。

跋徐節孝語

仲車名在天下。孰不知尊仰者。雖無蘇公所云可也。況它人乎。此集前後所載。悉當削去。陸某識。

跋趙渭南詩集

唐人如韋蘇州五字。趙渭南唐律。終身所作多出此。故能名一代云。

跋石鼓文辨

予紹興庚辰辛巳間。在朝路。識鄭漁仲。好古博識。誠佳士也。然朝論多排詆之時。許至三館借書。故館中。

尤不樂云。

跋西崑酬唱集

祥符中嘗下詔禁文體浮豔。議者謂是時館中作宣曲詩。宣曲見東方朔傳。其詩盛傳都下。而劉揚方幸。或謂頗指宮掖。又二妃皆蜀人。詩中有取酒臨邛遠之句。賴天子愛才士。皆置而不問。獨下詔諷切而已。不然亦殆哉。

跋兼山家學

予始得此書時。猶未識昌國。後五年始同朝。詳觀其爲人。誠法度之士。間相與論學。輒忘昏且。乃知其得於和先生者深矣。昌國名其所居曰良齋。亦以嗣兼山之學歟。

跋淮海後集

悼王子開五詩。賀鑄方回作也。子開名蘧。居江陰。既死。返葬趙州臨城。故有和氏干將之句。方回詩。今不多見於世。聊記之以示後人。放翁。

跋張季長中庸辨擇

此書大概似陳瑩中初著尊堯集。識者當自得之。

跋法書後

法書一編。付子通。能熟觀之。亦可得筆法之梗概矣。

跋李太白詩

此本頗精。今當塗本雖字大可喜。然極謬誤。不可不知也。

跋重廣字說

字說凡有數本。蓋先後之異。此猶非定本也。

跋巖壑小集

朱希真夜熱坐寺庭五字一篇。及病虎過酒樓二古詩。皆出同時諸人上。

跋王元澤論語孟子解

元澤之歿。詔求遺書。荆公視篋中。得論語孟子解。皆細字。書於策之四旁。遂以上之。然非成書也。

卷第三十二

右朝散大夫陸公墓誌銘

陸氏自漢以來。爲天下名族。文武忠孝。史不絕書。比唐亡。惡五代之亂。乃去不仕。然孝弟行於家。行義修於身。獨有古遺法。世世守之。不以顯晦易也。宋興。歷三朝數十年。秀傑之士畢出。太傅始以進士起家。楚公繼之。陸氏衣冠之盛。寔復如晉唐時。往往各以所長見於世。而材略偉然可紀者。如公是也。公諱宋字元珍。曾祖吏部郎中直昭文館。贈太傅諱翰。太傅兩子。伯曰萬載。縣令諱琪。縣令生宿州符離縣主簿贈朝奉大夫儼。仲曰國子博士贈太尉諱珪。實生楚公。仕至尙書左丞。諱佃。公楚公第五子。大夫早卒。無嗣。子楚公。命公後焉。任爲假承務郎。調台州寧海縣丞。行令事。遇事立決。老吏宿姦。畏懼縮栗。不敢輒動。巫

以淫祀惑民。悉捕實於法。習俗爲變。會省丞官。父老送公出境。爭贖金帛。公拒之不可。至或泣下。乃取絲一鈞。歷杭州仁和縣尉。越州司工曹。事以舉爲蘇州長洲縣。縣號繁劇。且久不治。公至。從容如無事。而縣以大治。以最遷郎。就命通判真州事。發姦伏。申冤枉。號稱神明。州多大陂澤。用事者方興水利。官吏人人懷希望。意謂且得厚賞。公獨不肯與人莫測也。而覆覈多誕。遂置詔獄。惟公獨免。盜起青溪。張甚。至出大兵。監司知公長於治劇。共薦爲隨軍勸計官。軍食漕浙江。公建議。潮汐贏縮不可必。請令士卒各持三日糧。舟至龍山。果失期。賴以無乏。而主將怒。護舟吏欲立斬之。莫敢爭者。公獨慨然曰。江行與平地異。非吏罪。且戮二人。衆必大駭。怯者求死。強者委舟竄。立敗事矣。乃議分所載。募民陸輦。以行。舟遂輕。皆以時會。雖沙磧滯瀨。無害也。衆多其謀。而主將終以戾其意。不說。凡與軍事者。皆超擢。獨公更爲通判。登州徙制置發運司幹當公事。未赴。除江南東路轉運判官。實代兄中散公寘。當時以爲榮。部中饑。公便宜留上供米六十萬石。損直予民。而繼於他郡。官無所亡失。而民賴以濟。避親嫌。移提舉京畿常平等事。與轉運提點刑獄。皆置司。陳留會金人犯京師。遊騎突至。轉運提點刑獄倉卒避去。故事。兩司皆兼提舉將兵及保甲。而常平司非與也。及是。公獨不動。以便宜招集燕山戍卒數千。雜以保甲。日夜部勒習教。命舊將張憲統之。扼據要害。虜旣不能犯。而潰卒亦不爲亂。措置號令。赫然有大將風采。因問道上章。自劾。且乞曠軍。詔釋罪。從所請。方是時。虜剽掠四出。陳留適當其衝。微公幾殆。議者謂宜出入兵間。以盡其材。而公罷歸矣。屏居常州無錫縣。讀書賦詩。以自適。初甚貧約。公才具高。旣不仕。因治產業。甫數年。家大贍足。然取予有大略。不務苛碎。凶年賑貸。至傾倉庾。無少計惜。鄰里疾病嫁娶喪葬。有弗給者。不特告而贖之。然必

以暮夜曰吾畏人知也。蓋公雖退而家居。然有所爲。猶卓卓如此。使得盡其材於多故時。視古所謂功名之士。豈遠哉。初太傅遇異人。得祕訣。服氣。仙去。公晚而嗣其學。起居康寧。齒髮不衰。疾已革。猶不亂。以紹興十八年閏八月四日卒。年六十有一。官至右朝散大夫。遺命葬太湖之東大浮山之原。以宜人徐氏。祔宜人。尙書禮部員外郎君平之女。有賢德。善筆札。文辭。先公二十有九年卒。四男子。演某官。仕以廉直稱。亦以故不得志。後公十一年卒。滄某官。按某官。道某官。一女子。適某官。段彬。孫若公。既葬。十有五年。滄等始屬公。從子某爲銘。銘曰。

以公之材。遭時艱虞。馳聘功名。公蓋有餘。世方尙法。豪傑斥疎。亦或知之。旁睨歎歎。卒斂智略。老於里閭。二十三年。燕及悼孤。大浮之原。其下震澤。春秋奉祠。世世無斁。

陳君墓誌銘

建炎四年。先君會稽公奉祠洞霄。屬中原大亂。兵侵南及吳楚。謀避之遠遊。而所在盜賊充斥。莫知所鄉。有惟悟道人者。東陽人。爲先君言。同邑有陳彥聲。名宗譽。其義可依。其勇可恃。彥聲事親孝。父死。貲百萬。悉推以予弟。脫身躬耕。復致富饒。宣和中。盜發旁郡。東陽之民。有將應之者。賴彥聲爲言。逆順禍福。得不從亂。安撫使劉忠顯公。因命悉將其鄉之兵。彥聲設方略。明部伍。盡出家貲。激使用命者。有潰卒阻林莽。且數百人。彥聲馳一馬。自往招之。皆感泣。願効死。東陽當橫潰中。而能獨全不爲盜區者。彥聲之力也。劉公奇其材。欲官之。辭不肯受。至建炎初。羣盜四合。州縣復以禦賊事屬彥聲。方是時。所立尤壯偉。及論賞。則又固辭。先君聞之大喜曰。是豪傑士。真可託死生者也。於是奉楚國太夫人。間關適東陽。彥聲越百里。

來迎旗幟精明士伍不諱。既至屋廬器用無一不具者。家人如歸焉。居三年乃歸。彥聲復出境餞別。泣下霑襟。已而先君捐館舍。子兄弟遊宦四方。念無以報之。每惕然不自安。乾道二年。子歸自豫章。一日有衰經來見者。則彥聲之子愔也。泣曰。先君晚歲。竟以前功補承信郎。遇登極恩。遷承節郎。盱眙軍守。嘗奏爲沿淮巡檢。不赴。不幸以去年三月某日歿矣。享年七十四。將以今年十一月某日葬於積騰山之原。遺言求銘。嗚呼。是蓋嘗有德於子家者。義不可辭。彥聲曾大父用之。大父希觀。父李娶羅氏。以子回授恩封孺人。六男子。恂。忱。懌。懌。恪。恂。忱。皆吉州助教。懌。成。忠。郎。新。差。監。光。化。軍。在。城。都。酒。稅。女。一。人。適。貴。州。助。教。盧。敏。求。孫。男。二。十。二。人。溥。泳。源。淮。汜。滉。深。潛。澆。淳。淡。汲。瀟。涓。皆。業。進。士。滋。汪。潭。準。淇。濤。洋。尚。幼。孫。女。二。十。人。適。進。士。王。官。范。庭。艾。胡。詠。保。義。郎。路。光。祖。進。士。葛。少。伊。晏。剛。中。左。迪。功。郎。婺。州。武。義。尉。應。振。曾。孫。男。女。三。十。二。人。元。孫。一。人。子。聞。彥。聲。既。得。官。赴。銓。離。立。庭。中。吏。操。牘。唱。姓。名。彥。聲。大。不。樂。卽。日。棄。去。其。自。愛。重。又。有。士。大。夫。所。愧。者。則。其。得。銘。亦。不。獨。以。與。之。有。雅。素。而。已。銘。曰。

亂能全其鄉。功名非其願也。富能燕其族。公侯非其羨也。一辱於銓史。而揜耳疾走。終身弗見。則吾儕區區釋耕而干祿者。非可賤也夫。

費夫人墓誌銘

故建平守蜀費公樞。有女子。子曰法謙。字海山。年十有七。歸於今右宣教郎晉張君琬。三十有八年。年五十五而沒。沒百二十三日而葬。葬再歲而銘。銘之歲。實乾道八年。而作銘者。君之友吳陸某也。君少爲進士。有場屋聲。既壯。屢屈於禮部。乃以從父任入官。又躋躓幾二十年。故時同爲進士者。今丞相葉公自大

司馬使西鄙。奏君爲其屬。君願太夫人春秋高。將辭不行。夫人曰。行矣。妾在側。君奚憂。於是盡斥奩中之
藏。具滷醢滑甘。以時進饋。奉盥授。比平日加謹。雖有疾。強自持不怠。至疾平。太夫人或終不知君得夙
夜王事。而無內憂者。夫人力也。君嘗自楚歸蜀。上忠州。獨珠灘。觸石舟敗。舟人皆失魂魄。夫人獨不動。徐
謂君曰。與君平生皆俯仰無愧。何至溺死。已而果全。上下交慶。而夫人乃澹然無甚喜色。某曰。夫人篤孝
君姑。以成其夫之賢。蓋有古列女風。至臨死生之變。而不以動心。則雖學士大夫。有弗及者。然求其所以
能至是者。亦自孝敬始而已。夫人生四人。男曰宗望。宗康。女曰海月。海雲。先夫人四十餘日卒。孫祖
義銘曰。嗚呼。有宋孝婦費夫人之墓。

曾文清公墓誌銘

公諱幾。字吉父。其先贛人。徙河南之河南縣。曾祖識。秦州軍事推官。妣祖氏。寧晉縣君李氏。祖平。衡州軍
事判官。贈朝散大夫。妣慈。利縣君劉氏。考準。朝請郎。贈少師。妣魏國太夫人孔氏。公有器度。舅禮部侍郎
孔武仲。秘閣校理。平仲。歎譽以爲奇童。未冠。從兄官鄆州。補試州學爲第一。教授孫總。亦贛人。異時讀諸
生程試。意不滿。輒曰。吾江西人。屬文不爾。諸生初未諭。及是。持公所試文。矜語諸生曰。吾江西人之文也。
乃皆大服。已而入太學。屢中高等。聲籍甚。會兄弼提舉京西南路學事。按部溺死。無後。特恩補公將仕郎。
公以太夫人命。不敢辭。試吏部銓。中優等。賜上舍出身。擢國子正。兼欽慈皇后宅教授。遷辟雍博士。兼編
修道史。檢閱官。時禁元祐學術甚厲。而以剽剝積闕。熟爛爲文。博士弟子。更相授受。無敢異。一少自激昂。
輒擯弗取。曰。是元祐體也。公獨憤歎。思一洗之一日。得經義絕倫者。而他場已用元祐體。見黜。公爭之。不

可明日會堂上出其文誦之一坐聳聽稱善爭者亦奪氣及啟封則內舍生陳元有也元有遂釋褐文體爲少變學者相賀改宣義郎入秘書爲校書郎道士林靈素以方得幸尊寵用事作符書號神霄籙自公卿以下羣造其廬拜受獨故相李綱故給事中傅巖卿及公俱移疾不行出爲應天少尹尹故相徐處仁敬待公公嘗決疑獄徐公謝曰始從諸君儒者乃精吏道如是邪一日有中貴人傳中旨取庫金而不齎文書徐公用府寮議將姑許之公力爭至謁告不出徐公雖不果用而尤以此服公丁內艱服除主管南外宗室財用靖康初提舉淮南東路茶鹽公事女真入寇都城受圍太府鹽鈔無自得商賈不行公乃便宜爲太府鈔給之比賊退得緡錢六十萬喪亂之餘國用賴是以濟而公不自以爲功也改提舉荆湖北路茶鹽公事羣盜大起湖北諸郡皆破獨辰沅靖三州僅存有封樁鹽公以與蠻獠貨易得錢數鉅萬間道上行在所賊孔彥舟據鼎州川陝宣撫使司幕官有傅雱者輒假彥舟湖北副總管彥舟因自稱官軍而殺掠四出自若也俄以總管檄公求鹽給軍食官屬震恐請與以紓禍公卒拒不予其後有爲鼎澧鎮撫使者怙權暴橫復欲得鹽公曰使吾畏死則輸彥舟矣亦卒不予以疾乞閑主管臨安府洞霄宮起爲福建路轉運判官未赴改廣南西路廣南支那賦入悉隸轉運司歲度所用給之吏緣爲姦公獨親其事吏不得與文書下諸郡愜服徙江南西路提點刑獄公事改兩浙西路故太師秦檜用事與虜和士大夫議其不可者輒斥公兄爲禮部侍郎爭尤力首斥而公亦罷時秦氏專國柄未久猶憚天下議復除公廣南西路轉運副使以慰士心徙荆湖南路賊略科起郴州宜章縣郴道桂陽皆警且度嶺詔湖北宣撫司遣將逐捕賊引歸宜章之臨武峒宣撫司遂以平賊聞公獨奏其實朝廷始命他將討平之主管台州

崇道觀起提舉湖北茶鹽未赴。改廣西轉運判官。公雖益左遷。然於進退從容自若。人莫能窺其涯。復主管崇道觀。寓上饒。七年。讀書賦詩。蓋將終焉。紹興二十五年。檜卒。太上皇帝當寧。慨然盡斥其子孫。嬖鄙而收用者。舊與一時名士。十一月。起公提點兩浙東路刑獄。公老矣。而精明不少衰。去大猾吏張錦。一路稱快。明年。知台州。公娶錢氏。有郡酒官者。夫人族子也。大爲姦利。且恣橫。患苦里閭。公亟捕繫獄。奏廢爲民。黃巖令用兩吏爲囊橐。以受賕。吏持之。令不勝怒。械吏置獄。一夕皆死。公發其罪。或以書抵公曰。左丞相客也。公治益急。亦坐廢。踰年。召赴行在所。力以疾辭。除直祕閣。歸故官。數月。復召。既對。太上皇帝勞問甚渥。曰。聞卿名久矣。公因論士氣不振。旣久。陛下興起之。於一朝。矯枉者必過直。雖有折檻斷鞅。牽裾還笏。若賣直沽名者。願皆優容獎激之。時太上懲秦氏專政之後。開言路。獎孤直。應詔論事者衆。公懼或有以激訐獲戾者。故先事反覆極論。以開廣上意。太上大悅。除祕書少監。先是少監選輕士。至不樂入館。公旣以老臣自外起用。名震京都。及入朝。鬢須皓然。衣冠甚偉。雖都人老吏皆感歎。以爲太平之象。於是公去館中三十有八年矣。舉故事。與同舍賦詩飲酒。縱談前輩言行。臺閣典章。從容每竟日。故相湯思退嘗語客曰。恨進用偶在前。不得當斯時。從會公遊也。其爲薦紳敬慕如此。擢尙書禮部侍郎。初。公兄楸。歷禮部侍郎。至尙書。兄開亦爲禮部侍郎。至是。公復繼之。衣冠尤以爲盛事。二十七年。吳越大水。地震。公極論消復災變之道。及言賑濟之令。當以時下。太上皆嘉納。時將郊祀。公力請對。言臣老筋力弗支矣。陛下郊天。若禮官失儀。亦足辱國。太上曰。卿氣貌不類老人。姑爲朕留。公再拜謝曰。臣無補萬分。一惟進退。有禮尙不負陛下。拔擢不然。且爲清議罪人。乃以集英殿修撰。提舉洪州玉隆觀。又三歲。除敷文閣待制。元

顏亮盜塞。下詔進討。已而虜大入。或欲通使以緩其來。公方病臥。聞之奮起。上疏曰。遣使請和。增幣獻城。終無小益。而有大害。爲朝廷計。當嘗膽枕戈。專務節儉。整軍經武之外。一切置之。如是。雖北取中原可也。且前日陛下降詔。諸將傳檄。數金人君臣。如罵奴耳。何詞復和邪。今上初受內禪。公又上疏。累數千言。大概如前疏。而加詳。既封奏。具衣冠。遡闕再拜。乃發。公自宣義。郎十一遷爲左中大夫。至是以卽位恩。遷左太中大夫。執政欲起公入侍。經筵度不可致。乃以公子逮爲提點浙西刑獄。以便養。隆興二年。公上章謝事。遷左通議大夫。致仕。莊文太子立。羣臣爲父後者。得加封其親。公子逢請於朝。而有司疑公官高。詔特遷左通奉大夫。乾道二年五月戊辰。卒於平江府。逮之官舍。享年八十三。爵至河南縣開國伯。食邑至七伯戶。公平生燕居。莊敬如齋。至沒不少變。九月辛酉。逢等葬公於紹興府山陰縣鳳凰山之原。詔贈左光祿大夫。有司諡曰文清。娶故翰林學士錢總之孫朝請。郎東美之女。封魯國太夫人。男三人。逢。朝散大夫。尚書左司郎中。逮。朝奉大夫。充集英殿修撰。知湖州。迅。通直郎。主管台州崇道觀。女一人。嫁右朝散郎。知吉州呂大器。孫男七人。槃。迪。功。郎。監戶部贍軍。烏盆。酒。庫。東。承。務。郎。新。知。平。江。府。長。洲。縣。梁。從。政。郎。監。戶。部。贍。軍。諸。暨。酒。庫。槃。迪。功。郎。監。建。康。府。提。領。所。激。賞。酒。庫。槃。宣。教。郎。葉。修。職。郎。監。明。州。支。鹽。倉。棠。迪。功。郎。新。湖。州。長。興。縣。尉。孫。女。九。人。長。適。從。事。郎。衢。州。江。山。縣。丞。李。孟。傳。次。適。通。直。郎。新。通。判。揚。州。軍。州。事。朱。輅。次。適。宣。義。郎。新。浙。東。提。舉。常。平。司。幹。辦。公。事。詹。徽。之。次。適。從。政。郎。新。婺。州。金。華。縣。丞。邢。世。材。次。適。宣。教。郎。幹。辦。行。在。諸。軍。審。計。司。葉。子。強。次。適。修。職。郎。呂。祖。儉。次。適。文。林。郎。湖。州。長。興。縣。丞。丁。松。年。次。適。迪。功。郎。前。明。州。慈。谿。縣。主。簿。王。中。行。次。適。迪。功。郎。監。衢。州。比。較。務。張。震。曾。孫。男。女。十。三。人。公。貫。通。六。經。尤。長。於。易。論。

語風興。正衣冠。讀論語一篇。迨老不廢。孝悌忠信。剛毅質直。篤於爲義。勇於疾惡。是是非非。終身不假人。以色列詞。少師捐館舍。公才十餘歲。已能執喪如禮。終喪不肉食。及遭內艱。則既祥猶蔬食。凡十有四年。至得疾頽胸乃已。每生日。拜家廟。未嘗不流涕也。平生取與。一斷以義。三仕嶺外。家無兩物。或求沉水香者。雖權貴人不與。守台州。以屬縣竝海。產蚶菜。比去官。終不食。初佐應天時。元祐諫臣劉安世亡。悉歸禁方。厲仕者不敢闖其門。公獨日從之遊。論經義及天下事。皆不期而合。避亂寓南嶽。從故給事中胡安國。推明子思孟子不傳之絕學。後數年。時相倡程氏學。凡名其學者。不歷歲取通顯。後學至或僑託于進。公源委實自程氏。願深閉遠引。務自晦匿。及時相去位。爲程氏學者益少。而公獨以誠敬倡導學者。吳越之間。翕然師尊。然後士皆以公篤學力行。不譁世取寵爲法。公治經學道之餘。發於文章。雅正純粹。而詩尤工。以杜甫黃庭堅爲宗。推而上之。繇黃初建安。以極於離騷雅頌。虞夏之際。初與端明殿學士徐俯。中書舍人韓駒。呂本中。游。諸公繼沒。公巋然獨存。道學旣爲儒者宗。而詩益高。遂擅天下。有文集三十卷。易釋象五卷。他論著未詮次者尙數十卷。某從公十餘年。公稱其文辭有古作者餘風。及疾革之日。猶作書遺某。若永訣者。投筆而逝。故公之子以銘屬某。會某客巴蜀。久乃歸。銘之歲。實淳熙五年。去公之歿十二年矣。

銘曰。

聖人旣沒。道裂千歲。士誦遺經。用鮮弗戾。孰如文清。得於絕傳。耆期躬行。知我者天。秉禮蹈義。篤敬以終。病不惰始。大學之功。仕豈不逢。施則未究。刻銘於丘。維以詔後。

卷第三十三

青陽夫人墓誌銘

有宋蜀人天池先生譚公諱篆字拂雲之夫人青陽氏并研人大父知歸州事泰實生五丈夫子以幼子古繼其弟春是爲夫人之考夫人歸譚氏不及事舅獨事君姑太安人太安人則歸州之女子子於夫人爲姑夫人夙夜婦道不以親故少懈天池與其考隆山先生諱望字勉翁皆以文章名一代取友皆天下士亦繼以進士起家然得年皆不盈五十志遠年局未嘗問家人產業方天池歿時一子曰季壬甫生十年毅然獨立而天池亦無兄弟譚氏不絕如線太安人傳家事已久夫人幼讀書了大義於是行其所知自處儉薄而不以貧憂其姑躬履艱難而不以事累其子外父母家而一意立譚氏門戶太安人饋服非其手調葦纒紉不以進親客至夫人視庖厨刀匕惟謹及卽席則立侍姑側終日不休酒糞潔豐果蔬芳甘奉盥授帨肅祇無諱客歸皆太息祝其女婦願庶幾夫人萬一而夫人歎然常愧力不足也斥賣簪襪遣季壬就學夜課以書必漏下三十刻乃止間則爲道隆山天池言行以磨礪之及季壬稍長與人交則誨之曰某可師某可友某當絕勿與通故季壬名其堂曰願學室曰勝己私皆夫人所以訓也夫人享家廟如養姑之孝字孤嫠如愛子之恩蓋其節行法度士君子莫能加焉季壬舉進士拔解太安人尙無恙夫人不自喜而爲太安人喜及擢第拜廟夫人猶涕泣曰先姑不及見矣觀者皆感動惻愴後以德壽宮慶壽恩得封亦以是不敢樂也初季壬解褐爲崇慶府府學教授凡四年徙成都府吏部以僑寓格不下執政爲奏復還崇慶以便養命至而夫人棄其孤矣初命教成都今樞密使周公貳大政知子與季壬友

以書來告曰石室得人矣季王有學行爲諸公大人所知蓋如此以故士皆慕與之交而夫人墓道之碣乃萬里來屬予於山陰鏡湖上義不可辭夫人諱字及年與其他在法當書者皆已見內誌懼於再告故獨述其大節而已自周以降禮教日衰爲女子者不聞姆師之訓圖史之戒聞巷尼媪交煽其間非天資淑柔則悻驚齷昏貪黷悍驕不復知供養祭祀爲婦職者固其所也夫人奮乎千載之下獨不移於俗矯矯自立如此於摩賢哉予與季壬實兄弟如也故述孝子之意以作銘其辭曰

淳熙十祀冬十月丙申孤季壬奉先夫人之柩祔於天池先生之藏平生相倚爲命兮未嘗輕去吾親之傍日將夕而未返則倚門其皇皇今也山空無人凜乎欲霜鳥獸紛其號鳴木葉貫兮草黃吾親不見其孤兮悲生死之茫茫兒不能奉養於泉塗兮肝心裂而涕滂茹哀忍死兮庶其顯揚維友予銘兮後百世而彌芳

陸孺人墓誌銘

孺人山陰陸氏曾大父某國子博士贈太尉大父某承奉郎考某迪功郎明州司法參軍母同郡齊氏孺人年若干嫁爲承議郎知梧州高郵桑公莊之妻端靖淑柔讀書略知大義自其在父母家已得孝名見治絲枲輒趨與共事法曹與齊夫人皆異之建炎間法曹避兵天台而承議適攝縣主簿事故時兩家已繼爲婚姻情好甚篤因以孺人歸焉承議旣罷主簿以亂故不克北歸因寓近縣山中凡四十年間雖出仕歲滿輒歸居山之日多於在官衣食嘗不足孺人處之超然自幼奉佛法戒擊鉢終身不犯嘗舟行沂汧遇老桑門丐錢孺人亟施之且問曰師何許人老如此尙行乞邪對曰居天台兄弟十八人我獨好遠

遊。故抵此。汝與我有宿契。他日當爲鄰。及是寓居適近石橋。一日登應真閣。修茶供。至第三尊者。驚歎曰。此吾汗舟所見也。承議嘗爲西安令。有振婦以事繫獄。念釋之未果。孺人夢白衣人告曰。因且字子矣。且以告承議。呼乳醫。脈之而信。卽脫械。予假使歸。果以是夕產。孺人事佛之驗。至如此。然奉家廟。盡孝盡敬。朝夕定省如事生。凡祭祀烹飪滌濯皆親之。至累夕不寐。承議平生所與遊。多知名士。每客至。輒信宿留。孺人執刀匕。白首無倦色。曰。此婦職也。近世閨門之教略。妄以學佛自名。則於祭祀賓客之事。皆置不顧。惟私財賄以徇其好。曰。吾微福於佛也。於摩挲婦。所以承先祖。主中饋。顧乃使之微佛福而止耶。安得以孺人之事告之。承議有兄之子。妻士人陳汝翼。貧無以生。孺人力贊承議挈之歸。同爨十五年。使其子與己子俱就學。遂中名第。而孺人諸子皆好修。世昌從諸公問學。不以貧奪其志。人以爲積善之報。孺人得年七十有四。以淳熙十二年正月己丑卒。丈夫子三人。長之瑞。早卒。次則世昌。次世茂。女子子四人。徐廷煥。顧淵。陳寬。吳植。其甥也。明年某月甲子葬於天台之太平鄉朴壩。祔承議之墓。世昌實來請銘。孺人於子爲從祖姊。其敢辭。銘曰。

廟祭賓享。維婦之職。媿驚狼麋。盡我壺則。孰如孺人。耆老益恭。名山崇崇。闕此幽宮。

浙東安撫司參議陸公墓誌銘

紹興初。詔修元祐故事。命大臣近侍以十科舉士。翰林學士承旨知制誥孫公近。首舉右迪功郎陸靜之。文章典麗。可備著述。科方詔之下也。孫公一時辭宗。主盟翰墨。自三館諸儒與進士高第。願得一言者。袂相屬也。公年財二十餘。以門蔭入官。初未爲人知。而孫公獨歎譽稱薦之。一旦出千百人右。於是中朝名

勝士莫不知陸伯山。慕與之交。而公仲弟升之仲高。亦以文章有名。號二陸。仲高遂登進士丙科。公業春秋及賦。再試禮部。乃輒斥。因不復踐名場。而一意欲以才略致通顯。然愈不偶。以老豈非命邪。公會稽山陰人。曾大父珪。國子博士。贈太尉。大父似。中大夫。考長民。左朝請大夫。尚書右司員外郎。兩世皆贈金紫。光祿大夫。公以父任。補將仕郎。調信州上饒縣。台州天台縣主簿。皆不赴。監潭州南嶽廟。徙措置戶部贖軍酒庫所幹辦公事。又不赴。徙江南東路轉運司。淮南西路轉運司。幹辦公事。知台州寧海縣。部使者挾私憾。中公以法。鍛鍊累月。無所得。然猶坐徵文衝替。起知臨安府。臨安縣。主管台州崇道觀。通判隆興府。建康府。資當守郡。會得重聽疾。不能奉臨遣。乃爲浙東路安撫司參議官。官至朝散大夫。服三品。淳熙十四年六月癸酉卒。享年七十七。娶季氏。先公二十年卒。贈宜人。子二人。子墨。前台州寧海縣主簿。子堃。嘗以公納祿恩。補官。女子二人。長適鄉貢進士石正大。餘尙幼。子墨子堃。將以九月丙午葬。公於會稽縣上臯尙達立言。立柔。孫女五人。長適鄉貢進士石正大。餘尙幼。子墨子堃。將以九月丙午葬。公於會稽縣上臯尙書塢。以季宜人耐。實來請銘。公平生不大試於事。故可傳載者少。然在寧海。有姬訴子不孝二十條。公遽呼姬問之。情不能置。一辭。遽問爲書者。則姬之女壻實爲之。案驗辭服。一邑驚以爲神。佐建康。會久旱。力請於府爲火備。已而火屢作。皆以有備不爲災。士民至今誦之。晚既久。不仕。日誦左氏傳。史記。前漢書。率盡兩卷。不以寒暑疾恙少廢。有疑義。客至。輒講之。前五年。忽作治命百餘言。戒家人勿用浮屠法及厚葬。比終。無大疾。疾已亟。猶起坐堂上。觀書如平生。徐闔書危坐。遂逝於庫。亦奇矣。銘曰。

士患不材。材患莫知。既或之知。又弗克施。在昔所歎。天嗇其壽。毫釐不試。將孰歸其谷。

山陰陸氏女女墓銘

淳熙丙午秋七月。予來牧新定。八月丁酉。得一女。名閭孃。又更名定孃。予以其在諸兒中最穉。愛憐之。謂之女女。而不名。姿狀瓌異。疑重。不妄啼笑。與常兒絕異。明年七月。生兩齒矣。得疾。以八月丙子卒。藪於城東北澄谿院。九月壬寅。卽葬北岡上。其始卒也。予痛甚。灑淚棺衾間。以是送吾女聞者。皆慟哭。女女所生母楊氏。蜀郡華陽人。銘曰。

荒山窮谷。霜露方墜。被荆榛兮。於摩吾女。孤冢巋然。四無鄰兮。生未出房。與死棄於此。吾其不仁兮。

傅正議墓誌銘

公諱某。字凝遠。其先爲北地清河著姓。後徙光州。爲固始人。唐廣明之亂。光人相保聚。南徙閩中。今多爲大家。而傅氏之祖曰府君。實與其夫人林氏。始居泉州晉江縣。生五子。長子卒。謀葬。有異人告以葬聖姑山之右。而徙其居。仙遊羅山之麓。林夫人有高識。悉用其言。宋興。仙遊隸興化軍。而傅氏鉅公顯人。始繼出矣。若夫德修於家。教行於鄉。而身不及用者。亦在其子孫。如公是也。公之大父程。父嵩。以累舉進士。推恩閉門教子。不肯仕。累贈奉直大夫。公奉直第二子。幼有美質。讀書日數千言。學爲文。輒驚其長老。崇寧中。甫年十八。入大學。聲名籍甚。試中高第。然猶幾二十年。乃以上舍登第。調滄州無棣縣主簿。會女真陷全燕。乘虛南下。兩河皆震。吏士相顧無人色。或委官去。郡檄公餉軍。公南方書生。平生不習金鼓。初成意公難之。而公得檄卽行。不暇秣馬。冒兵往來。軍賴以無乏。虜出塞。會公亦遭奉直憂。始南歸。終喪得南劍州順昌縣尉。時所在盜起。縣民亦相挺爲亂。公素得士心。徐設方略。窮其窟穴。未幾悉平。部使者欲言之。

朝公辭而出。弓手有謀叛者。語其徒曰。奈累傅公何。比公罷去。盜遂作。殺掠暴甚。邑人以不留公爲悔。調泉州安溪縣丞。改宣教郎。猶安其官。不求徙。有自吏部擬注來代者。始徙南安縣丞。其恬於仕進如此。南安大饑。民棄子者相屬。公請於州。出常平錢米。設安養院於延福僧舍。乳湏糜粥湯液。皆不失其宜。明年歲豐。悉訪其所親歸之。曩時縣之貧民鬻業者。輒減其戶產。以求速售。或業盡而賦獨存。官責之急。至死徙相踵。公旣得其弊。一切以肥磽定賦。民之冤失職者。皆得直。治最一路。遷知晉江縣。會詔造戰艦。他郡縣吏多並緣煩擾。事亦不時集。公獨不以誘吏躬督其役。勞費視他邑省殆半。而事獨先期辦。安撫使張忠獻公聞於朝。特減磨勘年。遂爲茶事司幹辦公事。公於是行能已爲時所知。秩滿。造行在所。願不數見公卿。赴銓。得通判南劍州。而歸。將之官。以紹興二十一年六月十一日感疾不起。享年六十有八。積寄祿官。至左朝奉大夫。累贈正議大夫。公亡恙時。自發書卜葬於白石之南。雖月日莫不有治命。至歿。悉遵用焉。娶林氏。正議大夫豫之女。封宜人。今累封太淑人。六子。淡。奉議郎。知漳州漳浦縣。汝。朝散郎。江南西路提舉常平茶鹽公事。淇。朝散大夫。直龍圖閣。兩浙西路提點刑獄公事。洵。澆。舉進士。奉議。莅官有家法。不幸與洵澆皆早世。常平以材望擢使一道。而龍圖嘗位列卿。實中朝宿德。皆且柄用矣。士大夫以爲公積行累功之報。四女。長適進士林。維。次適龍溪縣尉陳希錫。次適進士林若思。次適進士林若公。初。龍圖使浙東。實治會稽。而某爲郡人。始從龍圖遊。獲觀公文章。豪邁絕人。而其詩尤工。龍圖又爲某言。公當官至廉。爲縣時。有小吏持官燭入中閫。公顧見。立遣出。仕官三十年。先疇無一壘之增。老猶力學不厭。行其所知。未嘗以窮達累心。飢者輟食濟之。病者治藥療之。所居之傍。有路達泉州。而林谷阻險者四十餘里。

行旅告病公率親黨塹山伐石易爲夷途人至今誦焉疾革猶戒諸子曰吾平生無愧類仰歿後汝曹居官主清治家主嚴奉先主敬收族主恩造次顛沛必主忠信能用吾言雖貧賤猶爲有德君子不然獵取光顯奚爲哉語終遂瞑方龍圖言此時固已屬某以發揚潛德會徒節浙西後逾年乃以狀來請銘銘曰築野宵夢相武丁死不泯亡騎列星後世繼起三千齡義冠相望立漢廷公入太學奮由經躋證晚乃駕筭篋抱才不試歸泉扃二妙山立尙典刑公雖埋玉有餘馨印綬三品告諸冥馬鬣之封怕青青杏爾雲來視斯銘

卷第三十四

尙書王公墓誌銘

寶謨閣直學士正議大夫致仕贈銀青光祿大夫王公旣葬之二年孫宿來請於公之里人陸某願次公出處請證於有司某辭不獲旣以狀授其家宿復來泣且言曰古之葬以碑封因識於碑則碑固在墓外後世隧葬識於隧中非古也吳會稽之葬弗隧則雖已葬刻石墓旁實爲近古惟丈人之銘某辭旣旣嘗狀公之行願更求名卿巨人以信後世宿復泣言近世固有旣爲狀而復爲之碑者丈人何獨謂謙某用是不果固辭惟公諱佐字宣子會稽山陰人曾大父諱仁大父諱忠世有隱德考諱俊彥以進士起家經行尊顯爲時醇儒仕至左宣義郎太平州州學教授贈至特進兩娶同郡葉氏追贈同安永寧郡夫人同安實生公幼而穎異不羣七歲特進爲講孟子卽能復講不遺一言退無矜色特進歎曰吾家積善百

年。當有與者。是子其當之乎。十八補大學生。二十有一。以南省高選奉廷對爲第一。方唱名時。趨拜進止。群華中度。高宗皇帝喜勳玉色。授承事郎。簽書平江軍節度判官廳公事。未赴。召爲祕書省校書郎。時秦丞相檜專政。其子熿。以薦執政。提舉祕書省。館中或趨附以爲捷徑。公獨簡默嚴重。未嘗妄交一語。嘗語同舍曰。唐三館故事。丞相與赤縣尉均爲學士。安得妄自屈哉。熿聞不能平。噉言者論去之。逾年。請祠祿。爲主管台州崇道觀。丁特進憂。服除。會秦丞相死。熿亦斥逐。起家拜祕書郎。兼玉牒所檢討官。遷尙書吏部員外郎。右司郎闕。以公兼領。秦丞相夫人王氏。陳乞舊所得恩數之未用者。自稱冲真先生。公持白執政曰。婦人安得此名。向者誤恩。有司不能執。爲失職。今當追正。然王氏封兩國夫人。蓋祖宗以寵親王之配。及外家尊屬者。何可輒引以階僭素。當併奪之。執政不能聽。但寢其請而已。後王氏死。卒奪先生號。識者猶恨不盡用公初議。同安夫人墓在山陰。爲盜所發。公即日不待命。奔赴至墓。一日獲盜。公與母弟左司公公袞欲手殺之。親戚爲言。此在法固當死。不患讎恥不雪。乃告於有司。公旣赦葬。猶不忍去墓。所朝旨趣還不得已。造朝逾月。獄成。盜不死。左司公憤切。手戮盜。挈其首詣郡。自繫待罪。公適乞盡納官以贖弟罪。詔給舍議。給事中楊公椿等共議曰。春秋之義。義復讎。公袞無罪。佐納官之請。可勿許。詔曰。給舍議是。於是趣公就職。如初。紹興二十九年二月。拜起居郎。遇事直前獻納。多所裨益。未兩月。以臺評罷。然言者詆公甚峻。至請投竄。而上終保全之。命守外郡。遂知永州。公自初仕。卽在館閣。未嘗一日歷州縣。到郡。每決事。吏皆抱牘立數步外。不呼。不敢輒進。公親與民語。有冤者得盡其言。誕謾者一再詰。皆詞窮折服。自謂嘗受罰。公適延見諸生。勞問者年。凡可美民俗。勵士節者。舉之無遺。又言。永之士衆於道州。而解名。

財及道四之一。願詔有司稍均之。庶無失士。徙知吉州。廬陵號江西劇郡。人疑公且困於事。不得復閑暇。公至。爲政如零陵時。不知有閑劇之異。而事亦頓省。治聲聞於行在。詔直寶文閣。逾年。徙知明州。仍命入奏。而張丞相浚力薦公。及王侍郎十朋。張舍人孝祥。以爲可大用。既對。壽皇聖帝諭以且有親擢。既退。除中書門下省檢正諸房公事。兼權戶部侍郎。公力辭。且言臣昨面奏。乃者戶部以江東歲歉。有江西和糴之令。臣在江西。實見一路決不能獨出百五十萬石。而關子茶藥乳香之屬。既不能售。必至抑配。其爲民病。且甚於江東之饑。今臣若不自揆。貪榮冒受。而實未有以爲策。他日固不敢逃。聽然民力國計。將何以支。願復補外。或止供檢正職事。詔不允。仍兼侍講。湯丞相思退。以首相領江淮都督。請公參其軍謀。公爲湯公言。虜方議和。而以兵入吾境。此非其會本旨。蓋用事者幸一勝以遂所求。當選驍將精卒。乘其驕惰。急擊之。彼以敗聞。則用事者且得罪。吾可從容制之矣。會湯公去位。公亦罷參謀。方是時。疆場未靖。調兵遣戍。用度日窘。且諸路歲頗不登。公從容應變。窒漏察欺。事無不集。而民間泰然。如無事時。會永寧夫人臥疾。懇求奉祠。改權吏部侍郎。請不已。乃復以直寶文閣知宣州。徙知建康府。行宮留守。建康自車駕行幸。建爲別都。居守多執政。及侍從。久次者。惟公以威望被親擢。中外皆知上之任公。意妖人朱熹明。崔先生挾左道。與軍中不逞輩謀不軌。且久。及公至。相與謀曰。是不可欺。少緩必敗。不如先事發。乃共約以春大閱日起事。雖極詭秘。而公已盡得其陰謀。一日坐帳中決事。命捕爲首者至前。略詰數語。卽責短狀。特斬之。而流其徒數人於嶺外。餘置不問。僚屬方候見於客次。無一人知者。見公擲筆乃異之。而妖人已誅矣。公方閱案牘。治他事。如平時。良久。延見賓僚。乃退。無一毫異於常日。又徙知平江。隆興二府。未赴。會知

上元縣李允升坐賄。前事未作。已丐尋醫去。而讒者謂公縱有罪。坐削官。居建昌軍。讒者去。上察守臣連坐。未有公比。且數思其才。復官。主管台州崇道觀。俄起知饒州。又復直寶文閣。知揚州。入對。勞問甚渥。留爲宗正少卿兼權戶部侍郎。上祀南郊。命公玉輅執綬。凡所顧問。占對瞻敏。上甚悅。有褒嘉語。於是疾公者益衆。史侍郎正志爲發運使。坐奏課不實。謫。有欲爲史分謗者。乃併罷公。而發運司事。公始末未嘗與。且嘗論其徒擾無補。至是乃併得罪。逾年。主管台州崇道觀。起爲福建路轉運判官。徙知潭州。連進祕閣修撰。集英殿修撰。淳熙六年正月。郴州宜章縣民陳嗣竊發。俄破道州之江華。桂陽軍之藍山。臨武。連州之陽山。縣旬日。有衆數千。彬道連。永。桂陽軍皆警。公奏乞荆鄂精兵三千。未報。公度不可待。而見將校無可用者。流人馮湛適在州。公召與語曰。君能有功。不特雪前辜。且遂爲朝廷用。北鄉校復。自此始矣。湛請行。公曰。請行易耳。今當不俟奏報。以兵相付。既受此命。即以羣盜授首爲期。一有弗任。軍法非某敢貸也。遂檄馮帶元管權湖南路兵馬鈐轄。統制軍馬。卽日令湛自選潭州廂禁軍及忠義寨凡八百人。卽教場督師。遣行。仍命凡兵之分屯諸州縣者。皆聽湛調發。違慢皆立誅。又出軍令牌付湛。軍士所過。秋毫無民。及臨敵不用命。或旣勝而攘賊金帛。使得竄逸者。皆必行軍法。上奏以擅遣湛待罪。且請亟發荆鄂軍。又私念湛有善戰名。賊必遁入廣南。思得勁兵遏其衝。而廣南非所部。未有以爲計。會受命節制討賊軍馬。而前一日。又奉詔會合諸路兵。乃合二命爲一。稱節制會合諸路兵馬。檄廣南權鋒軍兵官黃進。張喜。分屯要害。賊知湛至。而廣南守備已嚴。乃驅載所掠輜重。由間道歸宜章。轉運司聞之。卽移諸州。以爲賊已窮蹙。自守巢穴。毋以備禦妨農。公得報曰。是不獨害捕寇。且必惑朝廷。乃檄轉運司及諸州。以爲賊未嘗

敗。何謂窮蹙。其巢穴旁接三路七郡。林善深阻。出入莫測。何謂自守。復奏言。遣馮湛之後。事方有緒。若遽弛備。賊必更猖獗。愚民且有附和而起者。非細事也。因堅乞前所請。荆鄂軍從之。已而果聞賊方作。備甚盛。遣入溪嗣買毒藥之。可爲藥箭者。公赫然以蕩滅爲期。且奏向者。連州受賊首李暉降。賞犒備足。未幾復亡去爲賊。今陳嗣之次首領是也。以此知不一意討捕。容其不死。湖廣之憂未艾。俟誅賊首而脅從。未爲晚也。樞密院猶謂當先招降。上獨是公策。命公躬至軍前。節制公即日戒行。師徒不譁。耕隴市肆之人。莫有知者。既至宜章。命湛以四月二十三日移屯何卑山。湛請進兵。日不答。惟給以合符。曰符至即行耳。二十九日夜半。始發兵符。命湛及鄂州軍統領夏俊。五月朔日詰旦。分五路進兵。賊初詐降。實欲繕治寨柵。阻險以抗官軍。公得其情。督兵甚峻。及馳入隘口。賊果立寨柵。未及成。聞官軍至。狼狽出戰。既敗。又退失所憑。乃皆潰走。是日奪空岡寨。駐兵十二渡。賊之起也。假唐源淫祠以誑其下。曰殺所虜一人。祭神。至是斬像。焚其祠。湛遂誅陳嗣。函首來獻。已而李暉以下。誅獲無遺。宥其脅從。發倉粟振貸安輯之。案功行賞。悉如初令。且上其事於朝。振旅而還。詔以公忠勞備著。起拜顯謨閣待制。湛亦由此復進用。俄徙公知揚州平江。遂知臨安府。公力辭曰。人各有能有不能。天府臣所不能爲也。方祖宗時。用人莫重於三司。開封高選賢傑。號將相之儲。豪右懼其威望。莫不斂避。故得人爲多。巡幸以來。用人益輕。惟能媚奉權貴。則爲稱職。沿襲非一日矣。若使方拙自守者爲之。猶推舟於陸。決不可行。縱臣欲降心下氣。周旋其間。賦性既定。如燥濕之不可移。終有不能自抑者。徒速頽墮而已。奏三上。不得請。遂就職。入對。上褒勉甚寵。特賜金帶。進工部侍郎。兼知臨安府。進權工部尚書。而尹京猶如故。兼侍講。久之。進侍讀。遂權戶部尚書。

知淳熙十一年貢舉公尹京逾三年又兼版曹故時以冗劇日夜不得休公處之超然閑暇事皆立辦貴臣權家斂手不敢干以私民間利病無巨細罷行之或可施於四方者則疏其事以聞多見施行歲饑畿內小民或以農器蠶其抵粟於大家苟紓目前明年皆有失業之憂公乃出令斷自東作之日先以還之俟蠶麥訖事而歸其子本大家不遵令小民負約不以時償皆坐罪令下農家相慶識者以爲與呂文靖公建請不稅農器事相埒他日且爲名相上亦自器異之嘗因夜直召對出御書三都賦序以賜蓋倚以拓定中原之事會長子病卒公力乞奉祠上察其不可留命以寶文閣直學士出守公復力申前請得提舉江州太平興國宮以歸執永寧夫人喪服除提舉隆興府玉隆萬壽觀鳳翔府上清太平宮紹熙元年八月自製壙記又爲治命凡沐浴斂葬之節莫不備具時公方康強無疾人或怪之二年二月十一日晨起猶讀書理事如平時俄暴感風眩遂卒享年六十有六寄祿官自承事郎積遷至正奉大夫封自山陰縣開國男至開國伯食邑自三百戶至九百戶致仕進正議大夫遺表上贈銀青光祿大夫以卒之歲十一月四日葬於山陰縣天樂鄉竺里峯之原公娶同郡高氏早卒繼室括蒼季氏亦先公若干年卒皆追封碩人子男二人履常承奉郎監淮西總領所建康府西酒庫克常承奉郎知台州天台縣丞皆前卒女四人長適温州平陽縣主簿梁叔括叔括卒再適提舉湖北路常平茶鹽張孝曾次適通判建康府會槩今存者惟適會氏女而槩卒矣孫男二人宿承務郎某某官孫女二人尙幼公以英傑邁往之資自學校科舉時已卓然出千萬人上仕雖至侍從所施設會未究一二閑居九年憂患或出意料而公所養愈剛大不爲事變之所折困人莫窺其涯一日嘗語某曰里中或謂僕以誅殺衆故多難不知僕爲人除害

也。湖湘鄉者盜相踵。今遂掃迹者二十年。綿地數州。深山窮谷之氓。得以滋息。而僕以一身當禍。謹萬萬無悔。於康公可謂知命者銘曰。

維宋中興。三聖相承。公聽並觀。以出賢能。公奮於幽。有德有勳。知我者天。用我者君。蹈義秉節。迄至耆艾。山立在庭。以道進退。大夏方建。拱把毓材。豈茲棟梁。萬牛莫回。生或忌之。亦歎其死。我銘弗誣。用誌太史。

楊夫人墓誌銘

鄆爲東方大邦。宋興以來。多名公卿。雖擯不仕。及仕而不顯者。如穆參軍。修士。兵部建中學。易劉先生。跋皆既死而言立。化行於家。至今學者尊焉。建炎南渡。人物寢衰矣。而山堂輩先生。諱庭芝。經爲人師。行爲世範。德義之化。自家人始。凜然克配。前數公先生之仲子。處士諱漫之夫人。曰武義楊氏。年二十有一而嫁。二十有三而字。二十有六而寡。寡四十有三年。年六十有八而卒。卒一年而葬。望處士之墓。實紹熙五年十一月丙申也。夫人自爲鞏氏婦。事山堂及君姑。餼夫人一步趨。一語言。悉皆鞏氏家法。耳目濡染。又皆天下長者事。故行成德進。山堂以爲稱吾家婦。宗黨媿戚鄰里。皆取法焉。處士先山堂不祿。當是時。夫人尙盛年也。遂誓不再行。二子伯始。學步。踉蹌不踰闕。仲尙襁褓。及能言。夫人皆親授以孝經。論語。毛詩。國風。爲之講。聲形正。章句具有師法。二子未從外塾。而於幼學之事。各已通貫。精習卓然。爲奇童矣。其後子益長。夫人身任家事。不以荒其子之業。故皆舉進士。中其科。然夫人不喜子之得祿。所以教而進之者。父師莫加焉。於康非是。母固不能成其子。非鞏氏家法。亦不能成是婦也。予少時。猶及見趙魏秦晉齊魯士大夫之渡江者。家法多可觀。雖流離九死。中長幼遜悌。內外嚴正。肅如也。距今未五十年。散處四方。寢

不能如故時。久而不變。如鞏氏者。蓋鮮矣。夫人曾大父瓊。大父彬。父伸卿。皆不仕。子曰豐。從事郎。江南京路提點刑獄司幹辦公事。饒奉議郎。知徽州歙縣事。孫復亨。慈孫陽孫。耦孫。孫女七。皆處。豐來請銘。銘曰。鞏氏之先。化行閨門。我觀夫人。典則具存。夫人之賢。實應圖史。有如不信。視其二子。東有茂履。處士所藏。雖不克。爾鬱乎相望。

陸郎中墓誌銘

公諱沅。字子元。會稽山陰人。曾大父珪。國子博士。贈太尉。大父佃。中大夫。尚書左丞。贈太師。楚國公。考實。右中散大夫。贈少師。公於某爲從父兄。某蓋少公十五歲。方爲童子時。公已學成行著。以兩浙轉運司進士。試禮部不中。試博學宏詞又不中。乃以世賞試吏部。再爲第一人。所與交。多一時知名士。每見某必諄諄道其所與其學。日夜磨礱浸灌。以希古人者。曰時然。進之時。然莊氏名革。早死不顯。而進之則故相湯歧公也。及歧公以文章專業相高皇帝。公猶沈浮州縣。久之。乃得監行在都進奏院。監尚書六部門。歧公每見。必留公道。往昔相從講習時事。抵掌笑語。公輒俛首。踧躅自引去。歧公亦歎息。以爲不可親疏。後鞏躡進至大官者。相望。公願處百僚底。自若也。歧公免相。門下士多牽聯。以鼻斥未去者。亦不自安。公獨澹然如平時。人亦莫指議者。初少師自山陰徙四明。已數十年。婚姻皆在焉。蓋四明人也。會史魏公入爲參知政事。爲右丞相。與公實姻家。少相從。魏公亦器待公。而公未嘗數謁見。朝士亦莫知其相國親且厚也。監門歲滿。遷太府寺丞。權尚書戶部郎。久次當爲真矣。而公亟求歸養。得提舉兩浙市舶權知舒州。提舉福建市舶。遭母益國夫人憂。以歸。初通判泉州者。嘗有所請。以法拒之。公去。而提點刑獄兼權舶司事。通

判者因就提點刑獄以危法中公公平日以恭謹聞又方以舉職被賞遷一官朝論右之公雖得臯猶傅輕比於是公劇門絕交遊誦佛書以夜繼日多至萬卷不復言再仕亦絕口不及仇家對客清談而已自束髮至老無一日廢書尤長於詩閑澹有理致在場屋時以賦稱老猶自喜子孫及族黨從之講貫皆有師法公爲人夷雅曠遠與人言惟恐傷之然遇事必力行所知無所撓屈嘗爲丹徒丞朝廷用言者遣使籍江上沙田立稅額使指甚厲吏莫敢違亦或從而張虛數以爲功使者至郡聞人人稱公詳練乃檄與偕往公既極論其不可又爲詩陳民情詩流傳至朝廷遂止不行沙人礪石刻其詩今猶可考其使福建也有中貴人所親皇甫甲者輒諷公以珍貨別進公正色拒之戒典客者他日謁至勿復通其不阿類如此公仕自修職郎至朝奉大夫而廢二十三年以紹熙五年四月六日卒享年八十有五娶盧氏封宜人先公十二年卒享年亦八十有五六子曰梓通直郎知寧國府宣城縣先公十二年卒曰格舉進士曰之瑞國學免解進士曰橦曰橦曰之詳皆舉進士一女適文林郎監淮東總領所羅場樓鈞六孫曰炳曰煥曰炎曰煊曰燮曰燮四孫女諸孤以慶元元年九月二十五日遵治命返葬於會稽澇塢望少師墓百步來且屬某爲銘銘曰

仕蹟於時年登耄期執奪孰與理莫可推銘識於幽孰知我悲

知興化軍趙公墓誌銘

慶元二年八月辛亥朝請郎新知興化軍事趙公以疾卒於第越十月庚午葬於會稽會稽五雲鄉湯家坂之原明年九月乙卯諸孤案夫等墨其衰見子於郡西南澤中泣且言曰先君之葬將請銘於執事以

大事之日迫。方伏苦塊間。不能自通。今幸踰年。未即死。敢以承事。郎簽書平江軍節度判官廳公事莫君子純之狀來告。惟公幸許之。某等即死無憾。予以老疾辭。請益。牟維公文學治行。皆應銘法。而寀夫實嬰予從孫女。與其弟同時中進士科。爲鄉里后來之秀。乃卒。與銘謹按公諱彥真。一名彥能。以淳熙新制。改名。胄出宣祖昭武皇帝之後。曾大父諱叔澹。贈武康軍節度使。洋川郡公。大父諱賚之。武經大夫。浙東路兵馬鈐轄。贈右朝請大夫。考諱公懋。左朝請大夫。知臨江軍。贈太中大夫。公少純篤。從故侍御史王公十朋。學王公。嘗得中書舍人張公孝詳書。不欺室榜。持以遺公。所以期公者甚遠。公益自奮。雖舉進士。蓋不止爲科舉而已。然同時爲進士。亦皆推之。遂中其科。調撫州錄事參軍。以太中公喪。解官歸。除喪起爲信州弋陽縣丞。終更調建寧府觀察。推官薦者如格。改宣教郎。知寧國府宣城縣。未赴。以內艱罷。除喪。知平江府吳縣。通判袁州。知興化軍。朝廷知公者寔多。謂且用矣。而得郡未及。赴。遽至大故。公之將赴撫州。錄事參軍也。太中公戒之曰。汝任治獄。人死生所繫也。可不勉乎。公再拜受教。既就職。束吏甚嚴。視囚之寒暑飢渴。慘然不啻在己。囚以故皆輸其情。曰。不忍欺吾父也。會部使者以事付獄。有冤狀。而使者方怒。風指甚厲。人皆謂乖其意。且得譴。吏尤惶恐。即欲捶掠成之。公叱吏去具。列其冤。使者爲屈。因欲薦公。公亦終不就也。太中聞之。太息曰。吾有子矣。及在建寧幕。南劍州將樂沙縣諸寨。軍食不時給。羣卒空壘。來訴於轉運司。趙公公頌。謝公師稷爲使。乃檄公行。公馳至沙縣。與其令調財。得三千緡。明日召卒於庭。閱籍。自下給之。軍吏及卒長皆不得一搖手。衆乃大服。比至將樂。給之如沙縣。亦皆大服。於是議者謂公所試者小。然猶能表表如此。他日功名事業。詎可測哉。郡守鄭公伯熊。知公最深。有疾。不以郡事屬其貳。而

言於使者。請檄公攝守。疾革。獨延公至臥內。屬以草乞致仕奏。其知之如此。高宗皇帝永思陵橫宮事興。公適爲吳縣轉運司。調取洞庭膏石。期會迫。不可遽辦。公即日涉湖至其地。召石工泣諭之曰。先皇帝櫛風沐雨。惡衣菲食。爲天下攘強虜。除大盜。輕賦薄役。汝曹數十年安居樂業。亦知所自乎。今官取此石。欲何用。而汝曹尙可顧望不竭。於是民趣役。不待督責。先期告畢。使者欲上其勞於朝。公力辭曰。此臣子職也。袁州積彫弊。公佐其守。窮利病根源。一切罷行之。郡爲一振。民困於坊場。官弊於護運。皆久不能革。公奮曰。小民知目前之利。不知後日之害。一陷於坊場。則富者貧。貧者大壞。非死徒不得免。乃取尤者白守。請於戶部。蠲除之。挺繫收檄。一旦幾空。郡人驩呼。以爲昔所未有。護運異時多。以所遣官非其人。故多蠹害。公一切精擇才吏。其以權貴請託來者。皆力拒絕之。抵公去。所發漕運四十萬緡。不費一錢。造朝得知。輿化軍。未及到郡而卒。享年五十有四。公篤學。工文辭。有集五卷。易集解五卷。他所著。未成編者尙多。初。太中通判饒州。有江州統軍官王益者。坐事下吏。更江州鄂州。鞠治獄成。而家以冤聞。由是復命。太中鞠之。得冤狀。明白。益賴以不死。而太中以決疑獄。進秩除郡。未幾。捐館舍。益之家。人懷太中之德。無已。乃厚載金帛。以助葬。爲請公固辭不受曰。非吾先人之志也。益家人泣而去。蓋公之清德類此。然常畏人知。故子亦不得而悉書也。公娶李氏馮氏。皆早世。贈安人。今皆從葬。徐氏封安人。四子二女。皆李出。康夫迪功。郎隆興府武寧縣主簿。先公十一年卒。案夫從政郎。隆興府南昌縣丞。齋夫從政郎。臨安府於潛縣尉。忒夫未仕。女長嫁從事郎。新平江府常熟縣尉。劉祖邁。次未行二孫。時敏。時哲。銘曰。以公之才。何適不宜。晚始專城。政弗克施。天嗇其報。子孫是貽。匪筮匪龜。眎我銘詩。

卷第三十五

夫人孫氏墓誌銘

夫人孫氏會稽山陰人。四世祖河。觀文殿學士戶部侍郎。諡威敏。有傳國史。曾祖之文。朝議大夫。主管杭州洞霄宮。累贈正奉大夫。祖延直。奉議郎。通判。肝貽軍。贈朝散郎。考綜。宣義郎。致仕。母同郡梁氏。夫人幼有淑質。故趙建康明誠之配。李氏以文辭名家。欲以其學傳夫人。時夫人始十餘歲。謝不可。曰。才藻非女子事也。宣義奇之。乃手書古列女事數十授夫人。夫人日夜誦。服不廢。既笄。歸今文林郎寧海軍節度推官蘇君瑒。逮事舅姑左右。就養唯謹。凡組織縫紉烹飪調絮之事。非出其手。舅姑弗悅。舅姑歿。夫人執喪哀終喪。事家廟如生。祭薦豐潔。中度疾已革。猶條秋祭。不知其力之憊。推官女兄實朝議大夫直顯謨閣呂公正己之夫人。性堅正。善持家法。凡家人必責以法度。不知者以爲過嚴。至夫人能事之。則終身怡怡。未嘗少忤。宗黨間既稱譽夫人之賢。又以知呂夫人非難事者也。紹熙四年。從推官官臨安。以其年七月辛巳。疾終於官舍。夫人平生奉浮圖氏。能信踐其言。及處生死之際。盥濯易衣。泰然不亂。世外道人有所不逮。亦賢矣。享年五十有三。五子瀛。太學生。泃。河濱。潞。皆卓然自立。能世其家。董推官與夫人善。訓督之力也。二女長適修職郎通州錄事參軍王易簡。次尙幼。孫男二人。曰暹。幼未名字。予世家山陰。先太尉邊夫人實與威敏夫人爲女兄弟。予與宣義外兄弟也。少時交好甚篤。今夫人年逾五十而歿。予乃及銘其際。則予安得不老銘曰。

猗與夫人。率德不惰。舅姑宜之。曰善事我。移其事姑。以奉女公。雍雍肅肅。既和且恭。相夫以正。教子以嚴。施於先後。以遜以謙。一病不復。奄其告終。我作銘詩。用詔亡窮。

奉直大夫陸公墓誌銘

吳郡陸氏。方唐盛時。號四十九枝。太尉枝最盛。唐末。自吳之嘉興。東徙錢塘。吳越王時。又徙山陰魯墟。宋祥符中。贈太師諱軫。以進士起家。仕至吏部郎中。直昭文館。太傅生國子博士贈太尉諱珪。太尉生尙書左丞贈太師楚國公諱佃。太師生中散大夫贈少師諱寘。少師八子。皆以文學政事自奮。公諱洸。字子光。少師第四子。紹興初。以蔭補登仕郎。調右迪功郎。浦江縣尉。歷衢州司法參軍。徽州司法參軍。湖北路轉運司幹辦公事。知玉山縣。江淮等路坑冶司主管文字。通判通州。知荆門軍。提舉江南西路常平茶鹽公事。江南西路提點刑獄公事。主管建寧府武夷山冲佑觀。遂致仕。積官至奉直大夫。賜紫金魚袋。封陳留縣開國男。食邑三百戶。以慶元元年十月丙寅卒於私第。享年七十有二。初。少師避建炎之亂。益東徙居明州鄞縣之橫溪。猶返葬山陰。至公兄弟。遂有即葬鄞縣者。故公以三年十二月庚午葬於縣之豐樂鄉西嶼之原。諸孤請銘於公從弟某。某則少公一歲。兒時分梨共棗。稍長。同入家塾。實知公比他人爲詳。公天資穎異。數歲能屬文。舉進士。運拔兩浙轉運司解。又爲江東轉運司解首。然卒不第。公不以黜有司。治經考古。益不少懈。爲吏窮日夜。勤其官。未嘗事燕遊。所至上官委以事。公至忘寢食。寒暑以趨事。赴功在玉山時。劾剷蠹弊。根原窟穴。毫髮必盡。正俸外。他增給悉棄不取。比代去。計其數凡六十餘萬。故諫官尹穡有別業在縣。歲往來邑中。尹爲人喜議論。仕者多憚之。公不爲勳尹。願敬公。每日子光清足。以肅吏。惠

足以養民。諸邑求其比。殆未見也。自荆門回。奏事殿上。所陳合指。皆即日施行。明日。孝宗皇帝對輔臣稱公之才。丞相王魯公力薦之。遂擢江西常平使者。到官。治便坐於廳事之後。治事退。足迹不履中闕。揭所治錢穀出納之最於壁。列案皆簿書。終日坐臥其間。目閱手披。窒罅漏。嚴期會。官屬吏胥奔走承命不暇。不旬月。事大治。一道肅然。歲旱。公一先事爲備。得米百萬斛。吏不能一毫爲奸。五州之民。訖無流殍。於是特進一官。遂除提點刑獄。且進用於朝。會有臨江軍民習儀卿爲其奴所殺。獄成。則謂儀卿弟宜卿實使之。宜卿既服。復以寃告。凡八移鞫。皆然。最後特以命公。公始得其情。宜卿實無使之之迹。奴亦無異辭。遠近稱神明。明事上刑部。刑部以爲疑。言諸朝。移大理寺窮治。久。自卿以下。亦不能與公異。宜卿竟不死。公既以自請得奉祠而歸矣。於是益知奉法守官之難。不復有仕進意。甫七十。即上書告老。始終進退之際。可謂無愧矣。公娶林氏。吏部侍郎保之女。三男子。桂。修。職。郎。監秀州蘆澀鹽場。已卒。椿。迪。功。郎。臨安府臨安縣主簿。棣。迪。功。郎。徽州歙縣西尉。二女子。長。適。迪。功。郎。平江府司戶參軍詹。次。女。適。從。政。郎。監。楚。州。鹽。城。縣。鹽。場。耿。開。孫。男。焯。焯。焯。焯。皆。進。士。孫。女。適。文。林。郎。新。監。台。州。支。鹽。倉。宋。安。雅。餘。尙。幼。銘。曰。邇。余。道。兮。晚。乃。逢。握。使。節。兮。撫。困。窮。發。積。勸。兮。忘。歲。凶。以。經。決。獄。兮。平。反。之。功。人。不。我。知。兮。道。則。通。歸。築。室。兮。老。於。東。位。列。卿。兮。善。始。終。服。三。品。兮。五。等。之。封。植。櫬。鬱。鬱。兮。起。墳。崇。崇。閱。百。世。兮。過。者。必。恭。

中丞蔣公墓誌銘

公諱繼周。字世修。初。周公相成王。封元子伯禽於魯。是爲魯公。別子伯齡封於蔣。其後子孫因以國爲氏。至漢。有蔣詡。十世孫休。自樂安徙義興陽羨縣。始爲吳人。裔孫仲相。唐宣宗僖宗。故蔣氏益大。宋興。有堂。

爲仁宗待臣之奇執政徽宗初。芾相孝宗。皆不去陽羨。而公之先獨益東徒。家處州青田縣。曾祖球。贈通奉大夫。祖禮。父仔。宜教郎。致仕。贈中散大夫。公天資警邁。七歲賦牧童詩。有奇思。遂精詞賦。十四棄其業。習戴氏禮。期年輒通貫。諸老先生自謂莫及。一日。先生有欲勉成之者。期以間處。曰。吾將有以發子公先時往俟之甚謹。先生喜曰。子誠可教。士當務學。才不足恃也。子於書能博觀而得要。則善如其未也。當勉之。毋以才自足。蹈吾所悔。公再拜謝。自是窮日之力。無所不讀。人罕見其面。遂舉進士。中其科。調衢州常山縣主簿。試教官。中選。歷太平州州學。臨安府府學教授。改宣教郎。入爲太學正。會省官。添差簽書鎮東軍節度判官廳公事。復入爲司農寺主簿。召試館職。擢祕書省正字。進校書郎。祕書郎。兼國史院編修官。實錄院檢討官。遭中散公憂。服除。起知舒州。陛辭。改宗正丞。初公在館中。得對所論甚衆。其間因論和糴省運。孝宗皇帝大悅。曰。卿文絕類。陸贄省運誠不難行。又曰。朕將用卿。卿果有越事赴功之意乎。公遂巡退避。久之。上亦默然。方是時。士大夫銳於進取者衆。得上一語。自謂結主知。往往遂投合以取大官。公獨若不敢當上意者。故至是。財得補郡。然上終賢之。辭曰。上問卿往年論事。朕謂似陸贄。今七年矣。卿尙能記否。舒州待次幾年。公以三年對。上曰。卿家貧母老。豈得待遠次。當除卿行在職事官。公謝曰。臣事君。猶子事父。固願朝夕膝下。然幹蠱於外。亦子職也。敢有所擇。上益察公靜退。乃大悅。卽有是命。改祕書丞。兼國史院編修官。權吏部郎官。公還朝。逾二年。杜門絕造。諸公貴人。以爲簡我。將假他事出之。會蔡懋犯。氏公因對言。氏者。郢也。驛傳宜備非常。不掩旬。都進奏院果災。上諭輔臣曰。蔣某博學善論事。卿知其人否。皆對以不詳知。上乃自禁中索班簿閱之。將作監闕。卽命除公已而命下。則少監也。蓋有密以資淺爲。

言者上終不快。未幾遷將作監。遂兼太子侍讀。然所以屬公者。顧不在是。方試太學諸生。未出院。除右正言。實淳熙十年九月也。十一年正月。同知貢舉。有禮記義。絕出流輩。已見黜。公力主之。拔置高等。及啓封。則吳人衛涇也。已而廷對。遂爲第一。十二年二月。兼侍講。八月。遷右諫議大夫。十三年九月。遷御史中丞。公任諫官中執法。凡五年。知無不言。初。上受內禪。收召四方名士。舉集於朝。其間議論。或過爲激昂。貴近不便之。於是妄言方秦檜當國時。避於除授。一人或兼數職。亦未嘗廢事。又可省縣官用度。於是要官多不補。而收召絕稀。公首論之曰。往者權臣用事。專進私黨。廣斥異已。故朝列多闕。至有一人兼數職者。今獨何取此。朝臣俸祿有限。侍從卿監郎中。以至百司。月計其俸。乘除百緡而已。假使省二十員。不過月省二千緡。是特一二節度使俸耳。其省幾何。而遺才乏事。上下交病。且一官治數司。而收其稟。裴延齡用以欺唐德宗也。孰倡此議者。請得其人。詰之。其言蓋指貴臣。人服其敢言。時著令。賊吏必坐舉官。旣屢施行矣。有將億者。以賊坐臬。而舉官獨置不問。公劾之曰。此非有所避。則有所芘耳。同舉異罰。法且由是廢上。悅命有司。舉行如初。詔進士黃光大上書。送台州聽讀。公極論其不可。且曰。臣旣樸愚。不長於言。人之有言。又不能開導。以廣言路。實有愧焉。太史奏日中有黑子。公言。日象君德。豈容陰慝。乘之大臣之蒙蔽。外夷之侵軼。後宮之私調。宦者之用事。下民之困窮。皆其應也。願陛下仰觀天文。俯察人事。以消羣陰之萌。會地震。公復反覆論奏。而加詳焉。將行郊禮。上春秋澆高。或以陟降拜跪爲勞。公言。今距冬至則踰半年。願陛下清心省事。養性導和。毋強疲勞。毋過燕樂。飲酒以和氣。不可以無節。而飲過度之酒。服藥以養生。不可以無疾。而服伐性之藥。自今以往。宜若神祇在其上下。祖宗臨其左右。誠意所加。幽明並助。將不勞

而成禮矣。上悉嘉納。議者亦翕然以爲得耳目之體。有女冠請於皇太子妃。以久廢上清宮額。徙置其居。因爲住持。祝妃本命女冠入謝。禁輿適有他女冠祝中宮。本命者同列庭中。爭長舊例。以住持者爲首。事聞。上取文書毀之。初不知有舊額也。皇太子皇恐不敢入朝。羣臣不知所爲。公乃抗言。徙廢額置他寺。觀天下皆有之。然女冠自不應入宮。今當一切禁絕。僧尼道士女冠。勿使得入而已。上悅。曰。卿此奏善。處朕父子間矣。封以付東宮。明日皇太子入謝。上歡甚。皇太子今太上皇帝也。亦遣人謝曰。非公慮不及此。方是時。上以暇日。時御佛書。間召其徒入對。或自內東門賜肩輿以入。故公因以爲諫。自是遂無所召。士論歸重。都下喧傳遊奕軍統制官筈百姓娠婦。至墮胎。公上章彈之。詔大理寺鞠治。同時又有故內人陸覲姬者。訴其夫恃爲閹門官。無故棄逐。且據有其貲。公請窮治其人。自計下吏詞且窮。乃遣人妄誑公曰。且暮且除簽書樞密矣。公叱遣之。論愈力。會考殿試進士。此兩人者相與合力。於是大理具獄。以爲所筈乃軍妻。公爲風聞不實。即日統制官者復還故官。且賜金帶。而覲姬所訴亦得不治。考試畢。公方再抗章。詔遷禮部尙書。辭不拜。出知婺州。未幾。以母喪解。紹熙元年。除喪。復還徙寧國府。加煥章閣待制。徙太平州。比四年。易三郡。適遇水旱。公力行賑恤之政。寢食不置。所條上者。皆盡利害之實。其大略曰。臣夙夜訪求。荒政言者萬端。然大指不過廣儲畜一事。爾有備。則拙者亦能集事。不然。雖智何益。中外服其論。故奏多見聽。其以常平椿管通融賑民。蓋得請乃行。又旋已補足。且災傷五分。許賑糶。方高宗時。已屢著之。春秋頒矣。常平使者。顧劾以爲罪。或曰。是爲其所親報。宿怨。公盡自言於朝。公曰。吾初不計此。人臣奉行寬大。詔令。寧過無不及。天下豈無公論。會使者召用。公卒以口語罷歸。卜居嚴州。得屋僅庇風雨。頽垣壞甃。悠

然自適讀書且暮不輟。時從其耆老而訓其子弟。若未嘗貴達者。初公任言責累年。排擊不避權豪。至士大夫有以誣得謗傷者。輒語同舍曰。夷考其人平日恐不至此。及廣詢之。果不合。故一時在朝寒遠孤進之士。得以自保。而四方賢牧伯皆得究其設施。不爲怨仇所搖。及公治郡。善政爲一路最。所遭乃如此人。爲公憤悒。而公未嘗見之色。辭於虛。非學問之力。疇克至此。居嚴逾年。稍起。提舉江州太平興國宮。俄感疾。以通議大夫致仕。遂卒。實慶元二年十一月二十一日也。享年若干。娶梁氏。故戶部尙書汝嘉之孫。封碩人。五男子。綸。修職郎。台州司法參軍。緯。宣義郎。知徽州休寧縣丞。承奉郎。維。將仕郎。紳。承務郎。二女子。朝散郎。通判溫州湯宋彥。進士。梁至其壻也。五孫男。一孫女。皆幼。諸孤將以某年某月某日葬公於處州某縣某原。以某獲從公遊。屬以銘。不敢以衰耄辭。銘曰。

孝宗龍興。大哉爲君。聖意圖回。羣才駿奔。於時語公。爾朕自知。今且巨用。欽哉勿違。公屹如山。却立弗前。曰。臣實愚。敢先衆賢。帝初不怡。久乃太息。是予所求。忠厚諒直。乃長諫垣。乃丞御史。陳謨譎諛。國論所倚。一去不復。白首外藩。晚蹟於讒。浩然丘園。維始及終。進德彌劬。勒銘墓隧。萬世是詔。

卷第三十六

呂從事夫人方氏墓誌銘

維申國呂氏。自五代至宋。歷十二聖。常有顯人。忠孝文武。克肖先世。婚姻多大家名胄。婦姑相傳以德。先後相勉以義。富貴不驕汰。雖甚貧。喪祭猶守其舊。養上撫下。恩意曲盡。雖寓陋巷環堵之屋。鄰里敬化服。

之。猶在京師故第時。於康盛哉。從事郎諱大同之夫人方氏。嚴州桐廬人。曾大父楷。尚書駕部員外郎。大父蒙朝散郎尚書屯田員外郎。父元矩。朝散郎。知建州。建州之歿。夫人尚幼。事母已爲宗黨所稱。年二十有一來歸。生一男一女。而從事不祿。夫人能篤禮孝義。哀死字孤。爲子求師擇友。日夜進其業。而教其女以婦事。皆訖於成。不幸得年不長。四十有九而卒。於淳熙三年。祖平猶未仕也。及祖平通朝籍。以宗祀恩。贈從事通直郎。夫人亦追封孺人。故祖平每言。輒賈涕曰。祖平不天。不得以斗升之祿。養吾親。視斯世尙何聊。惟圖所以慰親於九原者。在墓隧之文乎。遂來告某於山陰澤中曰。願有述。某亦早失先親。與吾子之憾無異也。行年八十。每思之。殆欲忘生。則吾子之悲哀。其實能深知之。其敢愛一日之勞。不以成吾子之悲乎。初從事葬於信州上饒縣明遠鄉之德源山。以潦水蓄墓趾。改卜於舊墓少東二百步。實慶元二年十二月庚申。而夫人初沒時。祖平寔不能以柩祔從事墓。乃卽婺州武義縣明招山祖墓之旁葬焉。自改葬從事。諷日奉夫人歸祔。而筮未得吉。祖平於是爲承議郎。知興化軍。仙遊縣事。女嫁朝請郎添差通判鎮江府。曾棐。孫男樗年。孫女萊孫。銘曰。

卜吉。

夫人陳氏墓誌銘

紹熙慶元之間。予以故史官屏居鏡湖上。有東陽進士呂友德。自太學來與予遊。問學論議文辭。皆有源流。而衣冠進趨甚偉。予固異之。訪於東陽人。則曰。是清潭呂君紹義之子。呂君蓋賢有德。而其配陳夫人。

又賢。生三子。孟則友德。仲定夫。季友之。孟固奇士。仲季亦有聲學校場屋間。能稱其兄者也。自是友德不
闕歲。必一過。子過必見其進。子老病謝客。無貴賤。多不能接。獨友德來。欣然倒屣。不知疾痛之在體也。歲
戊午十月壬午。忽墨其衾。經叩予門哭。且言。母夫人不幸。以八月戊子歿矣。得年六十有五。卜用十二月
壬申。葬於孝順鄉蟠谷之原。以其家君之命。徵銘於予。予方病。亦不勝悲。不敢以病爲解。乃按從事。郎陳
君輔。狀序次爲銘。夫人與呂君同邑人。曾大父懿。大父嚴。父子淵。皆鄉長者。夫人幼孤。女功不待教。而能
稍長。佐其母。經紀家事。如成人。大父猶無恙。奇之。爲擇所歸。得呂君。旣嫁。事舅姑。以孝聞。女妹適人。傾其
嫁時。囊裝無少靳。積勤儉。以裕財。隆祭享。以盡孝。厚振施。以立義。呂氏之與夫人。之助爲多。處事明果。雖
呂君有不能回者。諸子獻疑。亦堅守初意。不爲變。曰。後當如是。及事定。一如夫人言。人人歎服。其後呂氏
家益康。大第千礎。堂寢尤宏麗。而夫人願自挹損。齋居玩道。卽東偏汛掃一室。肅然如老釋之廬。或終日
不出。闕如是。歷十餘年。呂君與諸子。屢勸其歸堂中。皆不可。然絲枲絨纒之事。至老猶自力。暇日。勉諸子
以學。授諸婦以家事。諄諄不倦。雖古賢婦。殆無以加。不幸一日不疾。而臥醫藥。至皆卻之。曰。吾固無疾也。
已而遂不復語。諸子方就試。馳歸省疾。領之而已。神宇泰定。超然就脫。及有司以友德名上禮部。報至。夫
人不及見矣。可哀也已。夫人三女。嫁吳一夔。徐僑。徐鼎。皆良士。孫男四人。銘曰。

承議張君墓誌銘

山盤水紆。龜食簞從。吉日壬申。宅是幽宮。表表三子。奮繇詩書。維夫人之賢。有以基之。

君諱鎮。字深父。年三十有八。慶元三年十一月壬辰病卒。以四年九月庚申。孤某葬君於臨安府西湖佛

首山之原。因其伯父寺丞功父繼。以君之友太學內舍生陳公道原狀。請銘。予與功父交二十年。信重其言。而陳君所敘文。亦甚美。可考據。遂與爲銘。君家秦之三陽。曾大父安民。靖難功臣。太師靖江寧武靜海軍節度使。清河郡王。追封循王。諡忠烈。配饗高宗皇帝廟庭。大父諱子厚。左武大夫。康州刺史。帶御器械。贈少傅。考諱宗元。通議大夫。敷文閣待制。贈少師。君幼而穎異。強記好學。少師遇郊祀。恩任爲承事郎。稍長。主管建昌軍仙都觀。遭少師憂。未除。而母夫人繼卒。君執喪。累年毀瘠。幾不可識。族人以不勝喪爲憂。共諭勉之。始稍自抑。然終喪猶羸甚。歷兩浙轉運司。明州造船場。簽書安豐軍判官廳公事。江淮荆浙福建廣南路都大提點坑冶鑄錢司。檢踏官監總領。淮西江東軍馬錢糧所。太平惠民局。積官承議郎。君之爲船場人。或唁其非勳閥所宜處。君謝之曰。景迂鬼以道先生所嘗爲也。吾處之。懼弗稱。敢薄之邪。訖代去。不以卑冗怠其事。自守以下。皆歎譽之。晚官藥局。尤號閑冷。顧無所施。其才又素簡儉。遠聲色。獨以書自娛。時屬文辭。見志。然未嘗妄出以示人。所居帷屏壁門。皆有銘。以自警戒。其文尤高。沒後。始或見之。皆驚其才。服其識。以爲使未死。得享中壽。其所至。詎可量哉。孰謂不幸年止於此。君嘗以進士試禮部。見黜。不以黜有司。亦遂不復踐場屋。諸公貴人多知之。然仕常從銓。與寒士竝進。至終其身。其靜退乃天性。妾楊氏。太師和王存中之孫。繼室以潘氏。少保安慶軍節度使邵之孫。皆封孺人。子男一人。渥將仕郎。有賢稱。女一人。與孫伯東皆幼。銘曰。

君家勳德奕世傳。圖像麟閣侍甘泉。佳哉公子何翩翩。才當用世不永年。有美樂石可磨鐫。百世之下知此賢。

朝奉大夫石公墓誌銘

公諱繼曾字與宗周武王之弟康叔封於衛五世生靖伯邑於石是爲石氏之始祖而會稽新昌之石實自青之樂陵南徙距公二十三世其詳見於世譜左朝議大夫累贈正奉大夫諱端中朝散大夫大理正出爲福建路參議諱邦哲迪功郎温州平陽縣主簿累贈朝奉大夫諱祖仁公之三代也公幼穎異入家塾日誦千言過目不再寺正築堂名博古藏書二萬卷每撫公歎曰吾是書以遺爾無恨矣客至待左右進退應對唯謹客悚然不敢童子視之曰石氏與未艾也朝議捐館舍時公尙未生遺言吾致仕得任子恩當以子適曾孫公旣生補明州文學調黃州黃陂縣尉以便養親監潭州南嶽縣歷臨安縣新城縣主簿楚州司理參軍監行在編估打套局門監建康府戶部贍軍西酒庫知饒州德興縣兩浙轉運司主管文字提轄行在文思院未及造朝以疾卒於家享年五十有八自迪功郎十遷至朝奉大夫公事親孝執喪如禮毀瘠幾不可識除喪久之乃復居官守法以廉自勵俸入可以受可以無受必辭餽贖可以取可以無取必卻徇公而忘私約己而裕物捐利而篤義爲主簿新城時謹簿書扼吏奸以善其職聞移於潛丞邑民謹於境上曰奈何奪我主簿久乃涕泣辭去在楚州治獄尤詳明屬縣尉一日獲盜十輩意且得贖賞同僚爲言君雖恕然不可縱盜公正色對曰盜誠不可縱罪亦不可入囚辭亦不可不盡同僚退相顧曰尉賞不諧矣然憚其正不敢復言獄成真盜財伍人餘破械遣去部使者趙公思尤賢公一路有疑獄滯訟輒以委公公治之無遺察雖受罰者皆稱其平德興壯縣俗喜負氣健鬪而終訟公始下車歎曰是不可以柱後惠文治也於是爲政一本於教化有兄弟宗族爭訟者輒對之泣下多感愧而去俗爲

一變。繕治學宮。聚經史。豐饌羞。尊延耆老。而賓友其秀民。又創小學以誘進。其童子誦書之聲。聞於行路。會科詔下。德輿與薦送者二十有三人。比他邑爲最盛。縣之遠郊。貧民憚多子。或不能全。公舉行胎養之令。置保伍以察之。甚悉。而盜攘因不得輒發。其政大抵類此。郡以上聞。勢孤無爲援者。不報還朝。使吏部得兩浙漕司屬官。公澹然無滯留色。浙江西陵渡。舊設官護舟楫。歲久不復擇人。其弊叢出。歲有覆溺。公建言。請各命文臣一員。察其勤惰。以爲陞黜。且渡舟一。置備舟二。以翼之。雖有惡風怒濤。可無大害。江之津官。舊爲築舍數十區。爲待渡之所。後輒廢。往來有暴衣露蓋之患。公亦請以官廩屋復之。事有施行者。皆至今爲利。而議者惜其不盡用也。公雖以任子入仕。然志在繼世科。嘗貢禮部。不合。有司退而力學。著書。比卒。遺稿可次第者數十卷。多可行世。娶郭氏。封安人。先公一歲卒。丈夫子三。曰正大。正誼。正權。皆舉進士。而正大亦嘗至禮部。女子子九。已嫁者五。鄉貢進士郭溪。修職郎新邵武軍司戶參軍趙善驥。從政郎新隆興府府學教授王益之。國學進士孫之淵。國學進士劉敏文。其壻也。諸孤將以卒之明年。慶元六年正月丙午。葬於山陰縣。謝墅之原。以安人祔前葬。來請銘。銘曰。

方伯蕃墓誌銘

伯蕃甫。姓方氏。名士綏。一名伯休。莆陽人。曾大父會。事徽宗皇帝。出入榮顯。顯謨閣待制。贈少師。大父昭。左朝請大夫。嘗入尚書省。爲駕部郎中。父豐之。右迪功郎。監建州豐國監。中書舍人呂公居仁。著作郎何公晉之。皆屈年輩與之遊。紹興間。有名士方德亨者是也。予嘗序其文。今行於世。伯蕃甫所自出。曰兵部。

尚書呂公安老。尚書以臨大節不撓。死淮西之難。載在國史。伯耆甫遭父憂。時財十二歲。從太夫人依外家。居邵武軍。執喪已能無違禮。而事太夫人及庶祖母。以孝謹稱。入小學。與他童子從師授經。既退。意不滿。爲朋儕剖析義理。師聞之。悚然自失。旣冠。遊鄉校。試屢在高等。聞侍講朱公元晦倡道學於建安。往從之。朱公之徒數百千人。伯耆甫年尙少。而學甚敏。不數年。稱高弟。因徙家從之。於崇安五夫籍路之上。所以熏陶器質。涵養德業。磨礱浸漬。以至於最大高明者。蓋朱公作成之妙。而伯耆甫有以受之也。伯耆甫旣見朱公。卽厭科舉之習。久之。遂自廢。不爲進士。專以傳道爲後學師。六經皆通。尤長於易。亦頗好老子。嘗歎曰。老子之言。蓋有所激者。生於衰周。不得不然。世或黜之。以爲申韓慘刻。原於道德。亦過矣。又曰。釋氏固夷也。至於立志堅決。吾亦有取焉。其博學兼取。不以百家之駁辨所長如此。亦足見其資之寬裕。忠厚與世俗異也。伯耆甫晚得脾弱之疾。春夏之交。輒作。不能食者彌月。乃已。慶元五年夏。病如常歲。至五月庚申。忽命家人爲之總髮。旣畢。取鏡自照。正冠危坐而歿。得年五十有二。娶黃氏。曹氏。男女各三。男曰不。曰立。曰平。女嫁張益。劉學稼。幼未行。明年卜葬於武夷山石門寺之原。六月。丕書來請銘。其辭指甚哀。予雖老病昏眊。亦重違孝子之意。且伯耆甫之賢。固頗有所述。遂不敢辭。初。德亨之文。豪邁警絕。人莫能追及。而伯耆甫之作。則閑澹簡遠。有一唱三歎之音。世莫能優劣之也。工於書。自篆籀分隸行草諸體。皆極其妙。又能講其時世之變。與圖方腴瘠之法。聽之終日忘倦。遺稿數百篇。與它著書甚衆。不等方輒之。未成。好方技。治疾有奇驗。能逆決生死。著傷寒括要。亦未成。嘗謂予曰。士貧。惟賣藥可爲。然子孫繼爲之。有意且欺。則不免害人。不若不爲之愈也。大抵伯耆甫多才藝。所能輒過人。其思慮精詣。又若此。然在伯

嘗甫。皆不足言。故不詳著。銘曰。

方氏三徙。而不出閩。君從朱公。始爲建人。武夷山麓。鬱有封樹。車過必式。曰是爲伯嘗甫之墓。

留夫人墓誌銘

慶元六年十月。余之友信安徐廣。赴告其母夫人之喪於山陰澤中。曰。廣不天。早失先人。先人無他子。廣於母氏。相恃爲命。稍長。娶婦韓。廣出游。獲從一時知名士學問。母氏與婦韓治家事。以待廣歸。廣雖游。不敢甚遠。母氏壽而康。間有小疾。則馳歸省到家。往往已愈。母氏見廣所與諸公論議辨質文章。則大喜曰。使汝嘗在吾傍。詎有是哉。今年六月。廣客都下。得報母氏有疾。廣即日歸。行二日而遭大變。至家已無及矣。俯仰天地。豈能生存。大事未終。不敢致毀。惟是幽隧之銘。敢請於執事。廣忍死以須。執事忍卻乎。按狀。夫人姓留氏。常山之馬。樞人曾大父。唐大父永父師古。世爲儒。夫人適西安人徐君諱國潤。徐君一鄉善士。其卒也。故尙書謝公諤狀其行。而內相洪公邁誌其葬。不知徐君者。以二公許與。可信其賢。夫人資端重。色莊言厲。然遇慢己者。輒退自省。曰。吾其有以致之。舅姑御家嚴。夫人左右無違。嫁女妹。凡已嫁時。服飾粧澤無所惜。與先後處。自始逮終。歡如一日。凡徐君行事。見稱於族黨閭里者。多夫人相之。而廣之學識卓然。聞於世者。抑又夫人教誨之力也。是可得銘矣。夫人享年七十生丈夫子一。廣也。女子子三。知武當縣劉鎔。新知樂安縣劉璿。前監太平縣稅韓朴。其甥也。孫男曰魯。孫女長適進士翁時敏。餘二尙處卒之歲。某月某日。葬於清平鄉官榿山。耐徐君之墓。銘曰。

三代益遠。世廢女史。豈無淑人。曾莫之紀。玉埋於泉。孰知貞暨。我文尙傳。夫人與焉。

卷第三十七

朝議大夫張公墓誌銘

於摩士有才足以任重責成謀足以折衝經遠而不見知於人不獲用於時者世固有矣人猶未以爲憾也至於知之而不盡用之而不極利安元元之功卒不克見則後世讀其事至於悲傷歎息有不能自己者某自壯歲客遊四方獲識其豪傑如朝議大夫張公其殆是已公諱郊字知彥和州烏江人曾大父諱延慶大父諱補蓄德深厚然皆不仕父諱幾才尤高以子貴贈金紫光祿大夫公少用兄待制邵出使恩授右迪功郎調開化尉兼主簿歷平江府西比較務監南嶽廟平江府錄事參軍全椒令復監南嶽廟監行在激賞酒庫所糯米場樞密院編修官通判建康府主管台州崇道觀主管淮西轉般倉監登聞檢院太府寺丞知真州鄂州提舉江南東路常平茶鹽公事復主管崇道觀建寧府武夷山冲佑觀積九遷至朝奉大夫遂請老以子遇郊祀恩積四封至朝議大夫公爲人魁磊不凡學問識其大者臨事前見逆決若燭照龜卜無秋毫無滯他人極思慮不能可否者公一言處之常有餘裕初爲編修官公府吏素容養習爲奸利無所畏忌視掾屬無如也公因事時白發其甚不可者羣吏縮栗至相語以公白事爲憂未幾坐臺評免歸孝宗皇帝受內禪虜猶窺江淮上慨然思卻虜復中原廟堂共謀拔擢人材分任兩淮事築城浚隄什伍民兵漕上江之粟以儲兵食乃自散地起公主管淮西轉般倉然初議乃欲概付以淮西邊事不獨治倉庾也會更用大臣所議不果行乃以公監鹽院丞大府無深知公者求試外出守儀真得對

言臣疎賤。歷州縣。願熟民間事。今蒙恩使治郡。不敢不力。惟淮南新被虜禍。民散徙未還。臣當體聖意。安輯撫摩。察其蠹弊。一皆上聞。惟陛下省察。如臣不任職。固不敢逃罪。前守員琦。獻羨緡八萬。皆文具。實不有一金。公到郡。悉以實聞。訖得免輸。俄詔兩淮郡守及部使者。各上用錢券利害。公力言。券用於四蜀。最盛之地。故能流轉。然猶有弊。今兩淮凋瘵如此。諸郡賴以給用度者。不過酒稅。新爲戰場。無復土產。可以貿易。獨賴錢幣而已。若用券商賈且不行。何以爲郡。時議者多妄揣時事。謀開邊隙。公密奏虜盟固不足恃。然其主孱懦。懲故酋敗盟之失。方幸無事。其任事之臣。又皆齷齪。日事琴奕。無遠略可知。我若惑浮言。遽動。不惟力有未給。又激彼使生事。朝廷且盱食矣。上頗採用其說。公因言。真爲楊楚之衝。當城此郡。以固人心。度費緡錢十萬。米三千斛。而郡有上供。與經制羨數。可得大半。止乞給降三萬緡。發傍近屯兵二千人。臣身自督役。不再閱月。可成。旣得請。果以四十有四日告畢。樓櫓屹立。而民不與知。上聞。益知公可用。代歸入對。所陳又合上指。乃有武昌之命。入辭。上慰諭曰。卿真州之政不苟。鄂上游重地。是以委卿。卿便宜體此意。到郡有事。第奏來御前。當遣金字牌報卿。公感奮益盡力。鄂爲江湖間一都會。總領轉運及都統制三司鼎立。異時多縱肆。雖幃府僚屬。皆下視郡守。公素剛介。難犯。人固已震畏其名。及視事。衣冠視瞻甚偉。號令設施皆當。人心由是莫不敬憚。而軍中猶倔強自如。縱羣卒入市。視民及郡兵。有長身中。度程者。輒毆以往。公捕至郡庭。呼吏作奏。軍吏羅拜請後。不敢自是。訖公去。無敢犯。都統入朝。有營卒夜挾刀貨於富室。脅使不敢言。公廉得之。馳入提舉軍事張平家。平素以兄事公。呼家人置酒。公曰。我來正欲飲。但當得劫富民者行軍法。乃快飲爾。平惶恐。立捕治如公言。妖人吳興居屬邑。有詔命捕。公求得著。

捕盜者唐青厚資給之。且授以方略。遣行。而方士皇甫坦挾禁與勢。爲私請。公弗聽。俄獲與以獻。及公還朝。上首問獲與之狀。公謝曰。妖人在郡境。不卽置法。至煩詔命。臣乃有息。然唐青實盡力。賞未償勞。敢昧死以爲請。蜀士以喪歸。遇名盜破舟殺人。又欲斷其棺。公厚賞捕之。竟伏法。由是江路清夷。有誤觸舟者。柁師大言曰。今張公在此。汝尙敢爾邪。歲大疫。公爲之營醫藥。以全否。爲醫殿最。餓給之食。死予之。轉民家一牛。死貨錢三萬以買犢。治聲聞於行在。及使江東。公言部中旱饒。南康尤甚。濟之當如救焚拯溺。今當奏事。往返且兩月。請先馳至部。議所以賑卹者。又條上其事甚悉。上皆從其請。事略定。乃入對。且以聞。上惻然曰。何以使吾民得食。至麥熟邪。公又具以計畫對。上勞勉遣行。會詔諸路諸郡陳事之不便於民者。公因言歲饑。民流。去年渡江而北者。殆數百萬。至淮南亦無所得食。死者相枕藉。今僅中熟。而郡縣不度民力。督常賦及私負甚厲。加之造寨屋。教民兵。行和糴。羈馬棚。鑄錢幣。未見其利。已不勝其擾。願發德音。一切罷之。此數事有主之者。施行方力。而公盡言。乃如此。武臣提點刑獄。估權侵官。公略不爲屈。職業所及。必力爭得直。乃已。至甚不可者。又以互察法劾上之。其人懼。乃與池州守相附結。排公。願上素知公。譖不得行。歲滿請奉祠而歸。初待制。治命以遺恩官。諸姪仲兄祕。闕公。祕不取。以予公之子。初不告也。公聞亦固辭。而乞官孤姪孝嚴。寓家蕭山。收養孤嫠。與同甘苦。視所居之鄉。如其宗黨。進善人。誨責其有過者。俗爲一變。門當吳越大道。有病於旅。死於行。公以私財療治。斂瘞之。無遺力。歲惡。飢民爭歸公。公爲設食。不可數計。然用度初不給足。食或不肉也。間無事。時出門尙羊。扶一童立里巷。老稚遙見。稽首祝之。曰。願吾父壽百千歲。爲窮民歸。淳熙十六年八月七日晨。關戶。有方外十二人來謁。公接之。如平時。將食。

曰吾今日病不能同汝食家人請命醫公不許且麾使去家人行數步回視之奄然逝矣享年八十有七娶余氏進士芾之女封恭人贈碩人先公三年卒諸孤以公捐館之明年十月二十有八日奉公之喪與碩人合葬於慶元府鄞縣桃源鄉西山之原子六人孝伯朝請大夫權禮部尚書兼侍講兼實錄院同修撰孝仲承議郎京西南路安撫司幹辦公事孝叔孝季未官而卒孝穉從事郎監嚴州神泉監孝開從事郎新差管押紹興府石堰慶元府鳴鶴鹽場袋鹽女四人修職郎高得中進士王孝友其壻也其二早卒孫六人守之宜之約之及之即之能之孫女十有五人初公兄弟皆負異材惟待制稍顯榮然皆不得盡行其志祕閣之子中書舍人孝祥以進士第一起家出入朝廷二十年文學議論政事隱然號中興名臣亦未四十而卒公晚遇主又壽最高亦竟不用識者謂天嗇其報將大興張氏後而公之陰德在人其後亦當太今尚書公忠孝文武方極柄用公既以通議大夫告第矣追榮且繼下然後知識者之言爲驗某生晚不及拜待制之門若祕閣及中書則辱知厚甚晚始識公於武昌公又特期之遠不惟以祕閣中書故也時方葺南樓公朝夕召與燕飲慨然語曰吾南樓天下壯觀要得如子者落之子之來造物以厚我也謝不敢當今尚書之客皆一時賢傑其巨筆鴻藻皆足以慰公於九泉而尚書獨以誌墓屬某豈猶以公遺意邪用是不敢辭銘曰

世患無才才大輒棄萬里之塗方駕而稅若時張公表表國器入掾樞庭謗讒亟至兩城一節所至大治抱負萬億出微一二猶或忌之竟以讒躓言歸江濱風雨財蔽聃然耄期化被閭里天其知我報在嗣子教忠之榮四品告第尚有寵褒震耀一世爰勒斯銘式賁幽隧

王季嘉墓誌銘

予自尙書郎罷歸屏居鏡湖上。郡牧部使者多不識面。至縣大夫以耕釣所寄。尤避形迹。弗敢與通。惟兩人曰山陰張君橐。會稽王君時。會相從。驩然如故交。張君端亮英達。不幸卒於官。王君尤淵粹有守。官滿造朝。來別予。悵然語之曰。贈行當以言。願足下自愛。毋以用舍媿初心。敗晚節。君曰。是我志也。及見除書。從天官銓調湖南轉運司主管文字以去。方是時。大臣多知君賢。近臣或奏疏薦君。而揚歷久。且嘗爲邑以最聞。近比當得美官。君一不顧。方上書論進退。人才當考實。不宜以近似斥善士。已而迂道來過。予喜津津。見眉宇曰。某於是粗能不負公所期矣。予作而答曰。僕不失言。足下不失己。皆可賀也。及卒。予聞訃。歎驚。爲朝廷惜此一士。亦竊喜君仕雖躓而志達也。會其子前葬。來求銘。因敘而銘之。君字季嘉。慶元府奉化縣人。曾大父起。大父元發。皆布衣。考中立。以君有列於朝。再贈至宣教郎。君自少時事親孝。戶兄悌。處鄉里學校。從師擇友甚嚴。言語舉動。忠敬有法。與兄時敘同登。乾道五年。進士第。仕自台州司事。參軍。歷袁州州學教授。監行在左藏西庫。知紹興府會稽縣。最後終於長沙。自迪功郎。七遷至朝散郎。賜緋魚袋。初。魏惠憲王判明州累年。君移書丞相史魏公。言國家早建儲宮。以定天下之本。而魏王偃藩在外。天下皆以爲當然者。父子異宮。天下爲家。東藩之守。猶異宮也。然父子兄弟之情。終若有間。雖曲加恩禮。豈若用故事。使得日奉朝謁。外庭濟濟。示天下以公。內庭熙熙。從家人之樂。哉。史公讀之。太息稱善。會魏王薨。言不果行。觀君此書。使得居中任用。其補國家。化天下。必有大過人者矣。有識之士。恨君之不遇也。會稽歲霖潦。郡方督已蠲之賦甚急。君持不可守不聽。乃袖告身。易服立庭中。力爭守爲之奪氣。民賴以紓。

遂修社倉之政。因立保伍。以察不悌情。遊不逞者。風俗一變。會營奉永阜陵。吏按舊比。抱文檄如山。環案立。君徐視。去十之七。餘不可已者。召民面給錢粟。與爲期會。於是民不知役。而事悉集。君所至設施。多可稱述。論事亦多識大體。予所書。特其章章可備史官之求者。若廉於貨財。簡於自奉。不納妄餽。不受羨俸。此在君爲不足言。故皆略之。君銳意經學。有易詩書論語訓傳。鄉飲酒辨疑。凡數十百卷。文辭簡古。尤喜爲詩。與范文穆公及尤延之。楊廷秀。倡酬諸公皆推之。有秦菴存稿三十卷。病已亟。猶強起拱手端坐。無情容。顧家人曰。吾學易。晝夜之理甚明。遂卒。享年六十有四。慶元六年正月丙申也。娶楊氏。封安人。淑柔孝恭。晚益好靜。安於死生。有學士大夫所難者。先君一歲卒。男女各五。男宗廣。以君遺恩入官。宗大。大學生。宗朴。早卒。宗野。宗愚。女長。嫁進士楊琪。迪功郎沈黯。進士杜思問。進士孫之穎。幼尙處。孫男五人。與點。與回。與賜。與文。與求。孫女七人。皆尙處。諸孤將以十二月甲午。奉君及安人之柩合葬於某地之原。銘曰。

君才雋偉。天所授。早篤於學。晚益富。年過六十。是亦壽。道悠運促。志弗究。子孫森然。敏而秀。如芝在庭。曠在廡。樂丘植。頌日高。茂盛德表。表宜有後。

石君墓誌銘

會稽之姓石爲大君諱允德。字迪之。會稽剡人。梁開平中。分剡爲新昌。君之籍在焉。爲新昌人。五世祖開府儀同三司待旦。以學行爲范文正公所禮。子孫又多賢爲聞人。而石氏益爲名家。君曾祖景恭。祖端怡。父圖南。獨皆不列仕籍。然邑人皆推以爲賢長者。至君繼以好學。謹行事。後母至孝。舉鄉進士。亦每在選。

中。然卒不遇以死。吾嘗觀一邦一邑之士。其犯法觸禁。流離困踣者。非必皆其身不善也。問其先往往喪節而貴者也。否則不義而富者也。否則養交黨。事類舌。飾詐售偽。以取名譽者也。其仕而達。處而給足。且有才子令孫者。非必皆其身之賢也。問其先往往正直而不遇者也。否則廉讓而貧者也。否則篤學守道而不爲人知者也。若君之家世。庶幾於正直廉讓篤學守道者歟。君又能繼之。而滋不遇。君先世寡兄弟。至君亦子立。而君乃生四子。皆不墜詩書之業。天之報將有在矣。君薄於自奉。厚於賓友。所居財蔽風雨。而作東園。有大堂方池。爲宴客之地。客至把酒賦詩。奕棋投壺。或終日迺休。平居尤樂施惠。嘗葬不舉之喪。遺失時之女。晚與族人吏部公畫。問議同作義莊。以給族之貧者。會吏部下世。君乃與其子提刑宗昭。將終爲之。而君又歿。提刑亦歿。善之辭克舉如此。於慮悲夫。君歿以慶元六年四月癸丑。享年四十九。娶許氏。朝散郎知辰州從龍之女。子孝本。孝施。孝聞。孝積。皆進士。女孟。嫁太平州司戶參軍趙時儒。仲季未行。諸子將以嘉泰元年十二月甲申。葬君於仙桂鄉大姥山之原。實祔大墓。來請銘。銘曰。

維石畜德世克嗣。至君宜顯迺復躡。報不在身在後裔。天之昭昭其可恃。

夫人陸氏墓誌銘

夫人陸氏。吳興人。曾大父某。大父某。皆爲薦紳士大夫。父某。有學行。爲進士。母劉氏。同郡戶部侍郎劉公峯之女。劉公蓋與進士君遊甚久。夫人幼有美質。懿行。旣笄。嫁金谿人。故通直郎黃君齊。黃君仕至靖州軍事判官。以歿。夫人持家教子。有法度。廟享賓燕。合禮。嫁娶不苟。里中多稱之。遇疾。雖篤不亂。起坐。豐櫛。正衣冠。乃歿。其歿以慶元六年十一月己未。享年六十七。上距黃君捐館舍三十六年。初葬以嘉泰二年。

十月壬午。實耐黃君之墓。夫人三男子。曰甲。曰庚。曰丙。一女。嫁陸縝。四孫。自勉。自得。自立。自防。一孫女。子與夫人皆吳人。夫人之先徙吳興。而子家徙山陰。其實一族也。而縝又子從子。故其孤以朝奉郎通判江州黃君榮之狀來請銘。銘曰。生蒼溪。嫁汝水。夫善士。又有子。家方興。孫嶷嶷。葬得銘。永弗毀。

程君墓誌銘

君諱宏濟。字志仁。兵部尚書諱瑀之子。尚書鄉里世次。家有譜。墓有碑。國史有傳。君生於宣和六年。客有得古劍於武夷山中。以獻尚書。已而君生。遂以劍命之。幼讀書。記誦博敏。號奇童。十二能爲詩。有老成氣。紹興初。尚書以給事中。勸講通英殿。敷釋古義。開廣上聽。以濟中興之業者甚衆。君概聞其說。輒嘆息不已。一夕夢道君皇帝大駕南還。且以告尚書。尚書悲慨爲賦詩。他日以示中書舍人傅公崧卿。傅公抱負大節。常思捐肝腦死國家。與尚書尤厚。讀詩感歎曰。忠義出天資。非勉強可至。吾輩老矣。使後生皆如此。兒寤寐不忘國事。尚何慮讎恥之不雪哉。十年。以宗祀恩。授右承務郎。久之不調官。或勸之仕。皆不從。秦丞相檜亦嘗以問尚書。君尤不謂可。凡再爲監南嶽廟。法不許復請。乃命以江南西路安撫司屬官。尚書壽終。君哀慕過人。除喪。監通州金沙鹽場。秦丞相用事久。數起羅織獄。士大夫株連被禍者。袂相屬也。廉得尚書所著論語說。擿近似語。以爲訕。禍且叵測。母夫人憂懼。不知所爲。君侍左右。無俄頃捨去。且慰解言。先人逮事三朝。上所眷禮。必且蒙矜。有願毋戚。戚。母夫人賴以少安。君雖竟坐罷官。然母子居家如平日。同時得罪。莫得與比。蓋高宗皇帝終保全之。如君所料。久之起家爲江南西路轉運司幹辦公事。時李

莊簡公光自海南歸舟下瀟湘而病君曰吾先友也且兒時蒙公知得一見死不恨亟謁告往遊兼程抵江州則李公至蘄州薨矣君吊祭盡哀歷江南西路提舉常平司幹辦公事遭內艱除喪監建康府權貨務乾道元年六月丙戌以疾卒年財四十有二官止通直郎明年五月庚申葬於番陽縣鑿山之原夫人臨川黃氏吏部郎季岑之女六男子有功宣教郎故通判秀州有孚朝散郎戶部牒賞酒庫所主管文字有元進士有徽太學內舍生充國子監小學教諭當赴殿試正奏名有初有大皆進士二女子長適進士鮑庭揆次適黃州黃岡縣尉臧誨一孫苴始子自蜀召歸出爲江南西路常平使者進士程君有章字文若以五字詩爲贊卓然有元和遺風予刮目視之自是二十餘年間數相見及見於臨安程君已入太學更名有徽字晦之才名動一時卽君第四子也來屬予銘君墓不獲以衰病辭銘曰古士奚學惟忠暨孝君雖不試志弼名教中蹈嶮艱凜不回撓咨爾後人是則是倣

卷第三十八

朝奉大夫直祕閣張公墓誌銘

公諱瑄字子律寧州真寧縣人其先爲邠寧望族世以學行著或居邠或居寧居邠之後故吏部侍郎兼侍讀舜民爲元祐名臣居寧者則公之大父太中大夫也諱居擢元祐六年進士第元符三年徽宗皇帝嗣位下詔求言太中時爲黔州彭水令上疏切直出數百人以上而數百人者得其副亦歎以爲不可及會蔡京入相取奏疏次第之置奸黨上等特降官衛替永不許改官數年遂卒於沉廢後以子仕登朝累贈

至今官實生朝請大夫通判永州事諱通則公之考也亦累贈至中奉大夫中奉遭亂南渡從大將岳少保飛爲之屬身先將士屢與金虜鏖戰走其名王大酋策功進官方慨然以功名自許會朝廷與虜和中奉去夔府調知岳州巴陵縣有異政久之佐永州以歿識者謂用不究其才後當有與者公始以郊祀恩入官調贛州會昌縣主簿未幾以材選攝事與國丞信豐令皆閱歲會昌與梅州比境梅移文捕逃卒卒已亡去巡檢司乃發卒圍其所親李杞舍杞雄其鄉以爲恥詎聚謀亂令託辭委縣去以印屬公公不爲動械巡檢卒繫獄親爲檄諭杞以禍福杞皇恐聽命縣賴以無事與國有婚訟久不決公察其婦人不類良家一問引服信豐俗悍輻賦率不以時吏亦以此擾之至相率抱贖自固吏計窮即以民拒官爲言公曰豈有是哉馳至近村憩僧廬中以善言招其鄉之爲士者及父老與之酒食從容曰稅賦豈可終負然已失時姑使吾得十二藉手若何皆踊躍而去更相告即日皆集如約公去而之他鄉悉如之旬日歸報太守洪公邁異其能方薦於朝而忌者間之於部使者遂止調潭州右司理參軍有老卒夫婦居牙城中白晝爲何人所屠而掠其貲卒有義子兵官疑之執送州且以同處之卒及牧羊兒爲證既繫獄公親詰之皆詞服公察其寃他日取牧羊兒寘壁間引義子者與他重囚雜立庭中出兒問孰爲殺老卒者惜無以對乃入白州請揭厚賞募告真盜不閱日獲之則卒王青也捕至具伏且得其貲於市庫無遺即日釋義子去湘鄉縣械鋪卒張德上州以爲手刃其叔祖公引至前語之曰茲罪十惡赦宥所不及汝兄與叔祖同居汝暫自外來有何憾而戕之德泣曰因來省叔祖不得見兄以疾告就視則死而非疾也方愕眙兄與里正及鄰人共謀執誣之且以言脅誘謂決不死今乃知死矣因稱寃不已公亟呼其兄與對兄情

得語塞。遂伏辜。他死囚類此得不死者十有七人。終不言賞。府帥林公栗以直得名。臨事剛果。小人揣知之。有榜於州治門。言提轄官者爲帥謀。將稱兵。林公怒。闔門徧呼吏卒。驗其書。一兵典者與榜出一手。親詣不服。乃以付僉廳。苛慘雖至。終不服。乃屬公。卽僉廳鞠問。公寬之。而諭使以情言。且許以不死。始具言提轄官橫甚。爲所患者之狀。度不可訴。故出下策。爲此榜。以爲不及帥。則無以激其怒。不知乃陷重辟。公問於六局兵。人人言同。公乃白帥。且求寬其罪。林公大怒。嘻笑。必誅之。公一日凡十餘進。力爭。曰。帥所以屬某者。欲得其情也。今得其情而失信。則有司自是不復可鞠獄矣。爭至暮。林公亦悟。蹤隸嶺外而已。民有訴一冤死而十年不見理者。訴於提點刑獄馬公大同。馬公以屬公。公閱其獄。皆謂震死。公獨得其死狀。實以鬪毆。非震也。公曰。罪固有所歸。然歲月久。屢更赦令。當從末減。馬公強果自信。下吏莫敢與爭。公獨不爲屈。又有訟者。馬公直判。委公勘某罪。公力陳其不可。馬公皆霽威嚴。如公請識者。兩善之。公每白事。姓名歲月及事之名數。曲折皆成誦在口。無一遺者。馬公始亦疑。因強記一條。驗之。牘皆合。乃大歎服。自謂不逮。又調常德府武陵縣丞。政事益明習。攝縣及府從事者。凡再閱歲。紹熙中。武陵大水。犯縣城。不沒者三版。門不得闔。水且入城。公時方攝縣。亟命實土於布囊。以窒門。俄而水定。乃設方略。募舟救民。且親載粟。戶給之。泥行露宿。無所憚。獨開賦輸。一切必以實。吏不得一搖手。民忘其災。縣三里港。灌漑甚廣。久弗治。數遇枯旱。公爲築之。不愆期。訖事。因治他陂塘。無遺利。迨今賴焉。以薦者及格。改宣教郎。知隆興府奉新縣。縣有營田。征賦比他爲最薄。民競耕之。久而營田罷。以霽於民。履畝取稅。比舊已增。俄而復命折粟帛以緡錢。共低昂。或至十百民。皆破家不能輸。令屢以病告。不見聽。公力請又不聽。則欲棄官去。會

帥張公杓來。是公言始奏獨之。戶千有九十。皆若更生。楊公萬里記其事。他與除利害。勸農桑。築陂防。興學校。不可勝載。所部及府俱以其事論薦於朝。而王公大人亦自知公乃命主管官告院。進將作監主簿。太府寺丞。方公在朝。子右史舍人翔翔三館。俄擢從班。父子相望於班列中。客至門見公。便坐從容。聞國朝故事。前輩履行後生所未聞者。人人壓足。退而見舍人碩大雋傑之資。同時進用爲國光華。史冊所載。殆無以進焉。而公了不以自滿。方勤其官。如仕州縣時。文思院火。告身綾無在者。士大夫不以時得告身。公時在告院。建言援故例。便宜以雜華綾紵目前從之。藥局舊隸太府。積奸弊至衆。公日夜窮極弊原。髮櫛而糲析之。都人無貴賤。皆得善藥。方擢眞要官。而近比厄於未爲郡。公亦小疾。思彷彿外藩。力請去。乃知嘉興府中貴人籃氏。殖產於崇德縣。名田過制。而役不及。有鍾淳者。糾之。籃迫期去。產以規免。官吏欲許之。公判曰。兩家物力相去遠甚。而籃又白脚。必如法。乃可。一郡稱快。故人子乘舟方醉。縱從者與將官朱樗年忿爭。交訴於府。公察故人子不直。治其從者不少貸。民張璿得臨安營妓。與之歸。遂欲棄妻出子。其兄止之。復悖兄。兄以告官。公爲逐妓歸臨安。且以大義開諭之。於是璿爲兄弟夫婦父子如初。其爲政有古循吏風。類如此。且摘發隱伏。照了如神。良民雖相與化服。而奸豪之譏作矣。改主管建寧府武夷山冲佑觀。公怡然命駕去。郡人錢公孜。鄉之老成人。嘗以書抵其舅某公。機曰。張公廉直有守。近時鮮及。今乃遽去。此無他。吾鄉士民福薄耳。歸過國門。右史方請外。乃橫舟北關。需同載而歸。會右史被命使金國。右史將懇奏辭行。公不許。曰。使事不可辭。我留此待汝。自薊門回。乃偕去。未晚也。遂寓錢塘門外張氏園。甫再旬。右史既渡淮。而北公女孫醜老生十歲。暴得疾。醜老慧而孝。公甚愛之。朝暮親撫視。因亦感疾。比

其天家人不敢告。而公揣知之曰。吾與此孫偕逝矣。遂卒。享年六十有四。上始聞公疾。革以子方遠使。加直祕閣。蓋異恩也。公自宣教郎七遷至朝奉大夫。賜緋魚袋。娶韓氏。魏忠獻王元孫通直懿賢之女。封恭人。三子嗣真。從事郎。新州新興縣尉。先公七年卒。嗣祖苦學得心疾。未能仕。其季則朝散大夫侍立修注官兼實錄院檢討官。國史院編修官。善堂小學教授。嗣古也。一女適宣教郎新知太平州蕪湖縣趙汝鏗。三孫烜煜舉進士。幼未名。公資磊落恢疎。與人交洞然無城府。而默察其賢否。邪正無能遜者。善則稱之不遺餘力。不善則苦言規之。雖慍不恤也。初中奉公遭亂去秦。生公於襄陽。遂卜居宜春。公仕宦五十年。先疇之外不增一壘。比右史奉公喪歸。至無屋可廬。其清約如此。右史卜以開禧元年八月丙申葬公於袁州宜春縣歸化鄉宜化里大富嶺趙家衝之原。以王君克勤之狀來屬某爲銘。某與舍人同爲史官。因得從公遊。義不可以耄疾辭。銘曰。

彭原之張與邪相望。邪遷杜城。元祐之英。彭原綿綿。獨處不遷。至太中公。得譴以忠。中奉履艱。有功兵間。傳家禾與。益以才稱。剛不容世。方用而墮。是生記注。麟儀鳳翥。父子在廷。國有典刑。子聘於幽。公逝不留。上聞歎息。加錫祕職。生誰不終。賁耀無窮。刻銘隧道。百世是告。

山堂陸先生墓誌銘

陸氏之遺譜曰。漢太中大夫賈生仕爲豫章都尉。葬於吳胥屏亭。始爲吳人。至晉侍中贈太尉玩。生始。始生萬載。萬載生子真。子真生惠澈。惠澈生閑。閑生兒。兒生丘。丘公生探。探生山仁。山仁生玄之。玄之生元生。元生。生景融。景融後四世曰文公希聲。仕唐爲戶部侍郎。同中書門下平章事。文公生崇。崇生德遷。

猶居吳。遭唐季之亂。始徙家撫州之金谿。德遷生有程。有程生演。演生處士諱載。配曰周氏。處士生贈宣
教郎諱賀。配曰孺人饒氏。宣教生從政郎諱九思。配曰孺人賜冠。載彭氏。從政生山堂先生諱煥之。字伯
章。一字伯政。生而穎異。端重。五歲入家塾。坐立語默。悉有常度。讀書自能質問。出長者意表。與季父象山
先生九淵生同年學。同時先生不敢以年均狎季父。象山則朋友視之。磨礪浸灌。甚至十三學。爲進士。卽
有聲十六諸父。開以大學。先生一聞。輒窮深造。極其指趣。而文章機杼。自成一家。宿士見之多自貶。以
爲不可及。屢貢禮部。皆不合。學益成。文章益奇。閱世學多淪於異端。尤務自拔出。以張吾道。意所不可。雖
名儒顯人。爲時所宗者。必力斥之。恨力之不足也。諸父雖繼以進士起家。亦不用於時。象山晚爲朝士。陸
陸百寮底。旋復斥死。先生滋信其道之窮。蓋將退耕於野。著書傳世。而未及也。以嘉泰三年十月戊子卒。
年六十。有四諸孤。以是年十二月乙酉葬。先生於某鄉之福林。娶陳氏。鄱陽人。有賢行。先十八年卒。子男
三。治濬。浹治。篤於養。先生出遊。賴以經理家事。無後憂。濬遊太學。有雋才。而器度淵粹。可喜。浹方就學。女
五項。點朱曰邁。鄧文子其壻也。皆良士。餘二尚處。先生葬日。追幽隧之銘。未刻。旣葬二年。濬以先生之友
晁君百談之狀來請銘。某旣嘗序先生文章。所謂山堂集者。而先生多朋游。不應併以銘見。屬因辭焉。
連三年。請益勤。乃敘而銘之。銘曰。
陸姓入漢。祖好時兮。迨及豫章。始南徙兮。吳晉至唐。世見史兮。斷自文公。三百祀兮。傳世八九。皆可紀兮。
雖不公卿。世爲士兮。後乃浸大。名實偉兮。培養旣久。產杞梓兮。維時伯章。繼以起兮。白首篤學。未見止兮。
攘斥異端。正而不詭兮。天不少留。使耄齒兮。伯章之志。在其子兮。我銘於隧。亦以諒兮。

盛丞周公墓誌銘

公諱必正字子中曾祖諱衍朝奉郎祖諱說左朝散大夫曾贈太師秦國公會祖妣郭氏祖妣潘氏李氏張氏俱贈秦國夫人考諱利見左朝請郎贈金紫光祿大夫妣尚氏贈鄴郡夫人世居鄭州管城縣祖秦公通判吉州遇亂不能北歸因家焉光祿與弟秦公諱利建皆世以進士擢第公與從父弟丞相益公諱必大成童俱入家塾學行修立俱以世科自期已而益公策名又舉博學宏詞如其志公乃不偶始以祖遺澤補將仕郎易迪功郎監潭州南嶽廟亦嘗貢至禮部久之調袁州司戶參軍適歲早盜起分宜尉巡檢捕之皆不能獲安撫龔公茂良聞公至召問計公曰此皆飢民羣聚貸粟以自活耳桀黠爲之倡者財一二輩可以計取餘必自散龔公乃檄公往捕至則諭以禍福解散其黨而陰募鄉豪授之策俾擒致盜首於是盜盡得坐誅者二人而已龔公復委公以荒政當是時自郡至屬邑流民盈集公日夜行視凡累月全活鉅萬諸司共薦於朝孝宗皇帝召對便殿論奏合上指諭以將褒用遂改宣教郎知建昌軍南豐縣南豐劇邑也公遇事明敏常有餘民柏氏夜被盜併殺守藏奴賊逸去公物色求之果獲面詰猶不承搜其家得白金器一篋既至倒奩出之因聞其聲卽引服淨梵寺有盜夜斬關入既獲公察其非盜挺出之立賞捕真盜僧恨甚以公爲故出訴之郡郡方以他事怒公卽逮所縱囚繫鞠甚峻囚不能自伸并邑吏皆重坐未幾獲真盜送郡拒不肯治公乃以白諸司雖治猶久不決御史聞之奏徙大理乃得實如公所言邑賦色目極繁以入償出不足者猶四萬緡率苛征預借苟道吏責公至一切罷之且以其實言於轉運司得稍脫邑賴以蘇鄉校久不治公凡可以補弊起什者一切爲之甫滿秩詔赴都堂審察除主

管官告院進軍器監丞會益公參知政事公請外知舒州陸辭所陳又合指命公卹民隱修武備開田萊并究鼓鑄利害先是同安宿松兩監歲鑄鐵錢三十萬緡言者以爲擾既損其半而監亦遽廢亟復會歲薦饑又命罷鑄故臨遣及之公至郡乃知地產鐵炭民以不售爲患而兵工失業亦或轉而爲盜故當歲尤宜鼓鑄以聚民條上便宜詔命復鑄且省宿松監入同安公奉行尤有術公私皆便又奏自昔鼓鑄未始殺以鉛止因議者謂入鉛之錢不可爲兵始殺鉛以鑄臣嘗親視之鉛之精者爲飛煙其滓惡下墜鑪底與鐵初不相爲用亦嘗以入鉛不入鉛錢較其堅脆及冶爲兵初無異徒使處信兩州歲歲輓運謂宜廢夾鉛之制又奏郡歲輸上供緡錢五萬八千舊皆倚辦於常賦不足則取征權之贏以補之乾道間守臣偶以羨餘爲民代輸租稅一年而來者因躓爲例會征權之贏不能當其半餘三萬趣辦於坊渡二十九所今諸場舊餘鐵炭及民所貸錢凡一萬五千緡若取以爲鑄本可歲得三萬緡代舒民上供悉罷坊渡之征百世利也事俱施行大修學宮如在南豐時又立文翁廟於學立周將軍廟於城南皆舒人也復故隄城北以禦潛溪漲溢民田數千畝復爲膏腴因作四橋於北西東門之外其一公自捐俸爲之州民號周公橋郡東南有烏石陂分其流旁則爲石塘陂烏石之民欲專其利乃壅水使不得行石塘之田歲以旱告公命懷寧令丞視之得實圖上於州公按圖自以意定水門高下甫去壅水未尺餘得古舊迹與所高下不少差陂利始均石塘民喜至感泣乃歌曰烏石陂石塘陂流水濺濺有盡時思公無盡時徒知贛州過闕上諭曰聞贛兵悍驕死徙之餘今亦無幾可勿復補儻尙循故習卿當便宜行事朕將以他郡兵更戍公對守臣古號郡將今結銜云知軍州事苟有過臣自當臨幾應變不敢勞聖慮上喜明日語

宰相曰。周必正有器識。似其弟。謂益公也。至郡。江西副總管錢卓。本起行伍。暴人也。入境。下令諸校將。以翼日部肄其子弟。選補軍額。初不以告郡。會卓請見。公詰其率意力止之。且微諭以上指。錢驚謝。然意不悅。乃漏公言於諸校將。激使詣郡。訴公徐曉之。如所以告卓。辭指明辯。卒皆帖服。無敢譖者。卓貢二水來。自郡南夾城東西流。皆有浮梁以濟。而城南獨以舟渡。溪惡。或至覆溺。公始作南橋。又治道路。以石易甃。最數百丈。與國縣之安陂。溉田六十頃。水勢自上奔突。故難築。而易壞。壞且五十年。公命復之。費不及民。擢提舉江東常平茶鹽公事。入奏。遠道玉山縣。縣有徐田陂。其渠瀕江。數決。將徙渠。則地主不可。將徙陂。而下。則柘陂居下流。懼爲己害。復不可。交訟於公。公諭徐田民買地鑿渠。倍離其直。柘陂民遂幡然。無斬色。不三日。渠成。溉田三百餘頃。民大感悅。江自陂而下。避礙析爲兩支。其一掠縣壩而去。歲久岸潰。民居其濱者。聞公修渠以利民。乃遮道自言。公爲相水之衝。爲石隄。民欣賴之。相與繪公像。祠於玉虹橋側。歲時奉牲酒。抵今不懈。舊法沒官之產。以畀民耕。而歸其租於常平。及是。議臣請鬻田。以價充糶。本公言如此。則常平儲愈匱。請除新令。光宗皇帝從之。因并行於諸路。池州舊試貢士。率寓景德寺。隘不能容。士病之。會闕守。公兼領郡事。始作貢院。植八桂於門。名其門曰擢桂。是歲。貢士五人。而三奏名。士以爲公之賜。言者訛於間言。誣玉山之役。以爲擾罷歸。主管建寧府武夷山冲佑觀。上章納祿。不許。再命武夷祠。而公歸志已決。告老益力。乃許致仕。公自江東還。闔門屏外事。讀書賦詩者累年。益公少公一歲。亦謝事歸第。相與置酒高會。無少間。時人比漢二疎。益公歿。公哭之慟。不復有世間意。開禧元年十一月。且感疾不起。享年八十一。娶向氏。文簡公五世孫。封恭人。前公一年卒。男二人。縱蚤夭。綱今爲修職郎。前潭州醴陵主

簿一女。適進士胡楸。孫男二人。頌。穎。皆將仕郎。孫女一人。尚幼。恭人之歿也。葬廬陵縣齊澤鄉金鳳山。卹大墓之東。至是。乃以十二月庚申奉公柩合葬焉。維公仕自迪功郎。積遷至奉直大夫。爵管城縣開國男。服三品。公孝友最篤。歸自龍舒。築第於永和鎮。聚族共爨。弟姪蚤世。育其孤如己子。伯氏宜春守。出妾之子世修。流落贛境。公訪得之。爲治產築室於永豐。蓋伯氏志也。其處閨門。率如此。鄰人有寓旁近者。皆歲饋之。剛介有守。不以進退累心。方家居時。前後當國數公。多與公有雅故。數問公安否。公應之泊然。益公屢推恩數以貶公。亦辭不受。善屬文。尤長於詩。孝宗皇帝嘗訪當代詩人於胡忠簡公銓。忠簡首稱公。數文開直學士程公大昌。亦稱公文學操行之美。晚取莊周息黜補劓之說。名其堂曰乘成。因以自號。有文集三十卷。書有古法。四方豐碑巨扁。多出公筆。既葬。綱以朝奉大夫新知真州郭君贊之狀來求銘。某與益公定交五十年。且嘗遇公於臨川。適重九日。同集擬峴臺風度話言。尙可想也。而女孫又歸公之從子。紀情好厚矣。銘其敢辭。銘曰。

夫人樊氏墓誌銘

廬陵隱君子宣溪王英臣之夫人樊氏。同郡永新人。曾大父佐。大父仲文。舉行皆見推於其里中。父才。字子明。尤以賢著聞。敬其里之長老。而教其子弟。環數縣從之。決曲直。雖所不與。亦皆厭服。往往內省而從。義爲善士矣。二男五女。獨奇夫人。以爲吾門亦將賴焉。及少長。女工婦儀。未習而能。事親左右無違。及笄。歸英臣君。舅南鵬。交友傾一世。食客塞門。君姑不幸早沒。二長子亦不得年。家婦養居。悲傷齋居。不能與

賓祭事。亞婦又父母奪志。獨夫人佐英臣。仰事俯育。凡祭祀燕享。將迎慶吊婚姻之事。一皆身任之。英臣隱操達識。見於楊公廷秀誌銘。先夫人十五年捐館舍。夫人不以家事累諸子。使皆得用其力於學。暇則勉以道義名節。不獨責其仕進起家也。及琳以進士策名。又嘗有列於朝。出爲大縣。文章得盛名。然後薦紳間愈知英臣及夫人之賢。夫人母壽百歲。夫人無一日不遣人問起居。珍膳良劑。必出其手。終身不少怠。又請於朝。得封卒如子明之言。夫人以宣和五年五月某日生。以開禧二年十一月甲辰卒。享年八十四。卒之明年三月甲申。葬於廬陵縣齊澤鄉山寺岡之原。子男四人。長卽琳也。宣教郎新知潭州衡山縣。次揚杲。揚烈。揚暉。皆進士。女二人。迪功郎辰州敘浦縣主簿張履。免解進士曾需。二女及履皆已卒。孫男八人。霽之。彬之。勝之。濠之。得之。冲之。隆之。豐之。嘗試吏部。孫女九人。培則迪功郎新道州江華縣主簿張淵。進士左利見。戴元崇。曾克寬。易應龍。彭舜牧。劉侃。劉治元。曾克愿。利見。克寬。亦皆嘗貢禮部。曾孫女各七人。尙幼。琳予友也。遣一介行千七百里。持書抵予於山陰澤中。以臨安府府學教授危君楨之狀來求銘。予年八十三。不敢以老疾辭。銘曰。

卷第三十九

求志居士彭君墓誌銘

廬陵太和有士曰彭君。惟孝。字孝求。曾大父述。大父琮。父汝弼。三世皆篤於爲善。鄉人過其門。乘車者式。

吏部郎中蘇君墓誌銘

公諱玘。字訓直。泉州同安人。其高大父翰林侍讀學士諱某。曾大父觀文殿大學士太子太保諱某。兩世皆贈太師封魏國公。大父諱某。朝請郎。贈金紫光祿大夫。考諱某。中散大夫。贈正議大夫。兩魏公皆厚德重望。仕至公卿。登載國史。至光祿正議。仕雖不甚通顯。而學術風節。皆挺挺爲時聞人。游公定夫。銘光祿墓。而正議之銘。則韓公无咎作。兩公皆重許。可然於稱述。猶歉然若不能盡者。正議三子。公最長。而正議之配。碩人歐陽氏。實充文忠公之孫。公生出既異於人。又天資嗜學。恂恂孝悌。才雖高而不以驕人。處羣衆中。退然若不能者。及遇事奮發。切中事機。於古有考。於後可傳。而公色辭愈謙。下衆或不知其出於公也。初以叔祖待制致仕。恩補將仕郎。調右迪功郎。嚴州遂安尉。會正議通判平江府。正議嘗爲樞密院計議官。同僚胡公銓。上書詆斥時相。胡公既貶竄。正議亦株連去國。不調者久之。及來平江。適王昉爲守。揣時相意。日窺伺正議。正議廉且公。無所肆毒。既去。而正議權府事。適中丞常公同卒於海鹽。公爲文歡之。語頗及時相。昉得之曰。此奇貨可以逞。卽爲告密之舉。時相大怒。嗾御史劾奏。且曰。常同師德之友。壻且其子。玘之婦翁。遣玘致祭。以庫金二千緡賄之。雖究得誣狀。正議猶徙汀州。公坐停官。及時相死。正議起於久廢。公亦復官。調台州黃巖縣主簿。台四邑。黃巖爲大。綿地百萬畝。吏與豪民爲市戶籍。惟出鄉有秩手官。莫能稽考。公日夜紬繹。吏不得欺。雖數十年。蠹弊皆洞見。貧下始得職。徙淮西安撫司。書寫機宜文字。又以辟書從舅侍郎方公某。使金國。裨助既多。又以其暇。繫日爲書。凡山川城邑人情風俗。登載詳密。史官蓋有取焉。歸而知衢州常山縣。其治抑豪右。伸貧弱。下令簡而信。用刑明而寬。前日轅公上不以時

者。皆期而至。又因定陽一鄉民病於役。與義役厝置。井井有理。至今爲利。它鄉人不病者亦置之。其慮心裕民如此。歲饑。出倉粟振糶。不待上命。民賴以不死。徙徐遣吏市米於吳。視常平舊藏。悉如其故。政旣成。願縣學久葺不治。乃力葺之。進秀民於學。以禮延鄉老先生爲之表倡。士亦自知勉勵。儒風益盛。至於橋梁道路。厩置委積。產蔘醫藥。莫不爲之經理。而於掩骼殮死。長養孩幼。尤篤。後數十年。士民追論之。猶感涕也。召赴郡堂審察。監行在摧貨務。郡茶場公事親盡。孝惟恐毫髮不當親意。繼遭家難。執喪毀瘠。注血食米不馨。鹽酪蔬果皆不御。終喪期如一日。朋友規以於禮爲過。輒痛哭以對。規者亦爲慘憤。至除喪。久之。容貌猶不能復故。通判明州。在官二年。歷兩守。政事獄訟不苟合。亦不爲崖異。然有一微事。士民輒譁曰。此出於蘇公也。城東有造船場。晁公以道坐元符上疏。錮不許親民。來爲船官。所著書及文章最多。邦人至今言晁朝散公。慨然爲築祠立碣。致其師尊之意。陳忠肅公嘗譎於明。而豐清敏公明人也。公又言於郡。立二公祠於學宮。風勵學者。其所建類非庸衆人所及。如此會歲歉。常平使者朱公元晦檄公。屬以一郡荒政。客米自海道至者多。公請於朱公。請發積錢廣糴。以爲後備。朱公爲聞於朝。如其請。又建築定海縣崇丘河灌四千頃。公爲之親駕。不避風雨。歷五月而後成。還朝。除知衢州。大臣薦公才可用。乃改常州。常股肱郡。守符蓋不輕畀。及入對。所陳皆當上意。且行矣。會有間言。乃改知泰州。泰亦名城也。公下車已六十。殊無倦意。祀社稷。陟降。監薦恪敬不懈。學校釋奠。器服有不如禮令者。一皆正之。盡買國子監書。以惠諸生。王公明叟墓在郡境。遣郡僚致奠。人士爲之興起。旣擢爲尙書吏部郎。分職侍郎。西銓。吏長縮不敢肆。孤遠微眇。悉得自伸。譽望日著。以紹熙三年五月某甲子。遇疾捐館舍。享年六十有四。寄祿至朝。

請大夫。八月庚申，葬於會稽陶山西塢。祔正議墓。妻常氏，封宜人，以賢稱於族黨。先公一年卒。丈夫子二人，濠、文林郎，新知衢州常山縣，有志節，執喪如公喪。考妣時，濠將仕郎，女子二人，長嫁承直郎常州晉陵縣丞徐邦傑，次尙處孫男女二人，男曰隨，與其妹皆尙幼。公家世顯於累朝，天資穎異，讀書一過目，輒不忘。尤長考訂異同，其於官名、地里、軍制、民賦，雖甚細微，皆能講畫窮盡，無所放執。屬文有體制，筆法簡遠，其尺牘尤爲時所珍愛，往往藏去。少從張公子韶、徐公端立、汪公聖錫遊，皆期之甚遠。晚學於朱公元晦，盡門人禮。元晦亦稱其善學。初，公從父有著魏公談訓者，未及成，或附益之，正議嘗以爲有可更定者，而未及書。公卒成之，藏之家塾，又著魏公年譜一卷，累歲乃成。識者貴之。公既歿之年，濠乃以呂君祖儉狀來請銘。某會大父太尉隧銘，實出魏公，而正議之銘，則其實書之。又少時獲獨拜正議於床下，退而與公相從甚久。山陰之居，又俱在城西，南相望煙水間，扁舟往來，交好不薄，故爲之銘。銘曰：維相魏公，克有全德。當奮三世，是生訓直事賢友仁。政則宜民，晚纓爲郎，志不盡信。陶山之腋，松栝孔碩，峨峨高丘，過者必式。

陸氏大墓表

山陰陸氏大墓，九里袁家嶼。曰二評事諱忻，配李氏，祔。是爲某之七世祖。九評事諱郇，配范氏，祔。是爲某之六世祖。光祿卿贈太子太保諱昭，配福昌縣君，贈昌國夫人李氏，祔。是爲某之五世祖。九評事家前少右，有小家，或以爲孺子。昌國冢傍，又有冢，差小，或以爲其婦，不可考也。四世祖太傅公，始別葬焦塢，而元配靖安縣君贈崇國夫人吳氏，猶祔大墓。紹聖九年，先大父楚公，懼遠失傳，墓上皆立石表，自是距今

又九十五年。中更兵亂。惟太保家可識。餘皆迷不知處。歲時祭於太保冢前而已。淳熙十二年三月。或爲某言。鄉民鉏麥。得石表草間。蓋陸氏祖墳。亟往視之。則二評事冢也。幸不毀。乃從父老參訂。不三日。盡得之。石表皆在。封識如新。而地多爲人冒沒。聞某至。迭相質證。於是侵地皆歸。培冢築垣。關道栽木。而陸氏大墓皆復其故。某老矣。羣從有曾孫行。其視二評事已十世。世益遠。則大墓守護或益怠。故具書始末於石。以告後之人。淳熙十二年正月日。朝請大夫權知嚴州軍州事某謹書。

唐朝奉墓表

新定遂安縣詹氏爲郡望族。自光祿公諱良臣。以死勤事。被褒顯。書其事於國史。少保公諱大方。純誠質厚。爲中興贊輔。熏陶漸漬。子孫皆以學行顯聞。雖未必皆至貴仕。而學行淵粹。論議堅正。師友稱其賢。鄉閭服其化。身歿而不泯。若故朝奉郎諱靖之。字康仲。及其子承奉郎諱長民。字子齊者。是矣。某謹按家傳。及質之鄉人所傳。朝奉公以少保遇郊祀恩。補承務郎。歷浙東安撫司主管機宜文字。監潭州南嶽廟。婺州金華常州宜興縣丞。浙東提舉常平司幹辦公事。通判靖州。卒於官舍。年五十二。葬淳安縣仁壽鄉拜山之陽。初。將赴金華。而代者以私故。欲遷延。而重於自言。既遣吏來迓。公始聞之。亟出避。吏至。家人告以適他郡。後數月。乃往。郡委以受輸。而公所親有居部內者。貧不能及期。公亟代之輸。民聞之。莫敢後。矜有筮者徐生。嘗倉卒繫獄。無妻孥。有田數畝。預書券屬其友鬻之。友鬻而有其直。徐生出訟於有司。久不決。公詰以數語。得其情。宜與到官。纔再閱月。會兄得疾甚篤。丐歸視疾。郡不許。乃棄官歸。郡督還甚厲。公卒不可。曰。寧坐法。不忍有負於孝悌也。人服其決。郡亦卒無以罪。浙東茶鹽司司寮有慢公者。公置不較。及

其人遇疾卒。妻前死，男女皆幼稚，貧甚，斂具歸裝。一切皆出公力，又爲營其葬。及嫁孤女之費，無憾而後已。公雖閑居，無厚積餘藏，然勇於爲義，有婚姻不能舉，及疾病死喪之急，慨然助之，忘其力之不足也。所親鄭椿年官於嚴，公以嫌不數見。一日椿年卒，有子在外，名以似宗，而未及以歸。及卒，有致仕恩，族子自其鄉來，衰絰而入，將冒取官。公力排出之，求得似宗。卒官之，公所爲大率類此。不可概舉。古所謂可以屬孤託死者，公真其人也。公娶王氏，封安人，賜冠帔。後公四年卒，子七人，長民，承奉郎。前公三年卒，阜民，文林郎，新寧海軍節度推官。表民，出繼公弟微之。仕至從事郎，常州無錫縣丞。卒，定民，少有疾，亦已卒。又民，從事郎，前楚州司戶參軍。養民，仁民，未仕。女子二人，朝請郎，前通判湖州，曾槃，朝散大夫，直華文閣，前淮南轉運副使，石宗昭，其壻也。孫七人，強學，好學，好問，好禮，好謙，好修，好信，承奉君，以少保遺表，恩補承務郎。遷承奉郎，歷監紹興府都稅院，鎮江府排岸兼拆船公事。卒於家，享年二十七。葬祔世墓之次。君所至勤其官，在紹興時，府遣官檢察，所遣者無以爲功，則肆爲侵剝，行道爲之咨嗟。君與爭，不聽，卽自劾去。故時鍊江排岸官，兼掌總領所逋欠綱運官吏。君至，閱視，凡八九十輩，皆飢寒疾病，或父死而督其子。君慨然爲之言，皆得挺繫以去。未幾，屬疾，謁告歸省，郡持不可，比得請，則疾已篤矣。朝奉公見其癯瘠，驚問，故以實告。且曰：懼爲親憂，故不敢左右。聞者皆感，自是疾遂不可爲。而君每見父母，輒以有癯告，痛楚則忍不發聲。懼親之聞也。君從吾友呂祖謙，伯恭學，伯恭門人數百。君以孝謹好學，屢見稱嘆。比卒，伯恭哀之，見於歌辭。雖位下而年不遐，亦可不泯矣。娶馮氏，子一人，強學，初朝奉公之子阜民，以父兄遺事屬子爲墓表。且曰：願共爲一碑，而疑古未有比。予謂石元懿公熙載及其子文定公中立，實同一碑，故相蘇魏

公所爲也。是爲比。後世尙有考焉。慶元某年某月某日。中大夫直華文閣致仕山陰縣開國男食邑三百戶賜紫金魚袋陸某撰。

孫君墓表

會稽餘姚縣有士曰孫君。名椿。年字永叔。其先山陰人。當仁宗皇帝時。有諱沔者。仕至樞密副使。有忠直名。諱威敏。威敏之弟曰洞。洞生儼。始東徙。餘姚儼生玃。玃生繹。繹生速。君之考也。以君貢南省。遇慶壽。恩補修職郎。實始聚書館。士人以善其子弟。子弟多自奮於學。而君尤知名。間遊四方。從老師宿儒受學。尤好左氏春秋。班氏漢書。司馬氏通鑑。平居至忘寢食。遇其得意。時時著說。以發明三家奧指。多世儒所不及。又從長老及有識者講國家兵興以來。理亂得失之故。某事可法。某事可戒。至於淮江以北。極於司并。幽薊山川險要。及前代用師。餽糧道路所出。言之莫不詳盡。聽者忘倦。使君得至人主前。口論手畫。極利害。是非之實。以感悟上聽。安知不見拔用而成功名哉。士固有幸不幸。未易以成敗論也。晚預特奏名。人皆謂公且遇合。乃復以不合有司意。入下第。時有詔例補嶽祠。君辭焉。然君年未六十。識者以爲學識如此。安知終不合。而君不幸死矣。君雖終不合以死。然君家可紀者多。尤篤於孝友。兄早死。諸孤猶極負。父母哀之。君曰。某在。兄不亡也。父母爲損哭泣。君於是奉養嫂。撫孤姪。盡敬盡愛。父母旣終。視平日加篤。立義居法度。寬裕而密察。可久不廢。兩院子弟。分授諸經。擇名師。遣從學。朋遊亦謹擇。以故皆有學行。可稱。姊適里中胡氏。夫婦皆早卒。君撫孤。恩意甚備。不幸其孤又早夭。君益哀憐之。復爲立後。胡氏之祭。聚君力得。不絕。晚。敝范文正公義莊之制。贍其族。長幼親疎。咸有倫序。歲以爲常。有餘。又以及媼戚故舊。無遺。

力紹熙中歲旱米價日翔君悉發廩貸里人明年稼登糶賤來償者止受其米如初貸之數有鬻屋廬將散而之四方者君必貸之以錢如鬻屋之數曰所得幾何奈何捨鄉里而去以此旁近無流徙者縣並海隄防數決在仕者欲沃湖募人耕其中積粟爲築隄費君爭不可曰捍海固利矣沃湖則無以灌漑歲且饑利不補害請出私金率鄉里共營之隄可成卒如君言而湖利亦得不廢君之所爲大概類此觀者可知其磊落不凡矣君享年五十有九以慶元五年二月壬申卒卜以明年十二月甲申葬於龍泉鄉澄清之原娶吳氏子四人之宏之亮之穎皆有學行之宏之亮嘗同試禮部女一人歸迪功郎衢州州學教授史彌忠亦知名士既納銘窆中又來請文以表墓上於虛義修而命室施豐而報嗇維報不貳亦不在亟尙其後人克肖君德慶元六年十月中大夫直華文閣致仕陸某表

何君墓表

詩豈易言哉一書之不見一物之不識一理之不窮皆有憾焉同此世也而盛衰異同此人也而壯老殊一卷之詩有淳漓一篇之詩有善病至於一聯一句而有可玩者有可疵者有一讀再讀至十百讀乃見其妙者有初悅可人意熟味之使人不滿者大抵詩欲工而工亦非詩之極也鍛煉之久乃失本指斲削之甚反傷正氣雖曰名不可幸得以名求詩又非知詩者纖麗足以移人夸大足以蓋衆故論久而後公名久而後定嗚呼難哉予固不足爲知此道者亦致其意久矣顧每不敢易於品藻蓋彼皆廣求約取極數十年之力僅得其所謂自喜者以示人而我乃欲一覽而盡其可乎何君名遠字思順能詩終身不不足而卒後予友人曾樂道輩仲至始介思順之子羨以遺稿屬予表墓且言思順平生欲見予而不果

故有斯請。予年近九十，病臥鏡湖上。凡以文章來者，積架上，不能省。一日，取思順詩讀之，不覺起坐。太息曰：「今世豈無從事於此者？如思順，蓋未易得也。不以字害其成句，不以句累其全篇，超然於世俗毀譽之外，予之恨不一見其人，甚於其人之願見予也。」思順曾大父諱粹中，大父諱汝能，父諱松，東陽東陽人。以嘉泰三年九月十一日卒，年五十有一。兩娶郭氏，皆先卒。以開禧元年十一月二十日合葬於仁壽鄉陂頭山之原。子一人，女長適進士郭概，次尙幼。開禧二年四月戊寅，太中大夫寶謨閣待制致仕山陰縣開國子食邑五百戶賜紫金魚袋陸某表。

孺人王氏墓表

孺人王氏，名中，字正節，濰州北海人。曾大父諱競，朝議大夫直祕閣，大父諱慎修，迪功郎，贈中奉大夫。父諱嶠，贈承事郎，字季夷，負天下才名。孺人嫁司馬文正公元孫龍圖閣待制諱伋之仲子通直郎新權發遣信州軍州事遵司馬君，亦有文學政事，稱其家。登用於朝，孺人實相之人，謂季夷雖坎壈不偶以死，而三子皆知名士。夫人復以賢婦稱，天所以報善人，亦昭昭矣。司馬君簽書學海軍節度判官公事，孺人不幸遇疾卒。時嘉泰三年二月初二日也。得年四十有四。司馬君來赴告曰：「亡婦不逮事君姑，其事舅及少姑，皆盡孝，執喪中禮，而哀有餘。至除喪，猶不能自抑。司馬大族也，孺人承上接下，肅敬慈恕，既歿，哭之皆哀。以開禧二年十二月壬申葬於會稽山陰清嶺北塢之原。三子拓棟、操，二女尙幼，予與待制及季夷少共學，情好均兄弟。兩公又皆娶予中表孫氏，則表孺人之墓，宜莫如予。乃泣而書之。」太中大夫寶謨閣待制致仕山陰縣開國子食邑五百戶賜紫金魚袋陸某書。

令人王氏城記

於康令人王氏之墓中大夫山陰陸某妻蜀郡王氏享年七十有一封令人以宋慶元丁巳歲五月甲戌卒七月己酉葬祔君舅少傅君姑魯國夫人墓之南岡有子子虞烏程丞子龍武康尉子恢子坦子布子聿孫元禮元敏元簡元用元雅曾孫阿喜幼未名

卷第四十

祖山主塔銘

嘉州天王禪院景倫師有二弟子孟曰紹覺仲曰紹祖倫且老嘆曰孰能問法南方以大吾門者乎於是覺請行曰不可使師有恨祖請留曰老人不可以莫養也覺南遊得法居蘄州五祖山而祖左右就養先意承志終身不去倫欲新其廬祖則雨濡曰炎出入閭巷累年崇成鬱爲寶坊倫飲食往來者祖則高圍大庖床敷潔溫凡至者如歸焉皆曰倫師可謂有子矣祖既老亦有二弟子曰海慧海澄慧萬里走閩中求大藏經以歸祖不及待而澄實送終其撰次祖行實以求子銘者慧弟子法琳也是倫師不獨有子子又有孫何其盛哉世所謂學士大夫蹈義秉禮終其身者或鮮矣況至四世閱百年而不失者乎予於是有感焉祖姓楊氏字繼遠世居龍游歿以乾道四年十月某甲子年七十五葬以五年二月某甲子銘曰峨帽之麓鬱鬱方墳維爾有承以弋吾文

定法師塔銘

淳熙四年，予自梁益還吳，蓋西遊九年矣。耆老凋落，朋舊散徙，無與晤語。而少年學問日新，議論鋒出，亦莫與顧。爲之慷慨不樂。一日有叩戶者，攝衣迎之，則所謂惠定法師也。風骨嶸嶸，如太華之立雲表。議論袞袞，如黃河之行地中。爲予談諸經，辭指精詣，往輒破的。窮日夜不休。予作而曰：公生肇，一輩人予懼不足，以辱公友也。會予復出仕，又三年，迺還。屏居鏡湖之西，略無十日不過予。霰雪風雨，往往留不去。予方以譴斥退，亦安於不遇。意者相從湖山間，以老而師不幸死矣。其徒來乞銘，師字寧道，姓王氏，世爲紹興山陰人。幼歲從錢清保安院子堯道人得度，出遊四方。從道隆師會景崇三師，授華嚴義，盡得其說。至超然自得，出入古今，不妄隨，不苟異。三師蓋莫能屈也。衆請住戒珠省院，未幾棄去。時大慧禪師宗杲說法，阿育王山師慨然往造其居，所聞益廣。學者宗之，起住妙相、徒觀音、復還省院，皆蕭然小刹。羹藜飯豆，人不堪其枯槁。然著書不少，較若金剛般若經解法界觀圖會三歸一章，莊嚴論已盛行於世。餘在稿者，猶數十百篇。以淳熙八年十二月二十四日，焚香說偈示滅。年六十八，僧夏四十八。九年十二月十八日，葬於錢清。得法弟子妙定了洪，了悅，得度弟子了知，了端，了達。初師著金剛解成，持以示予，語之曰：昔德山見龍潭，言下悟，盡焚金剛疏鈔，公見大慧而歸，更著此解，與德山執優，師笑不答。豈魯之善學柳下惠者歟。銘曰：

木葉旁行，九譯而東。維此雜華，衆經之宗。肇自有唐，世以名家。師如巨舟，極其津涯。著書至死，此亦奚求。承其師傳，以絕爲羞。我徂弔之，遺書滿室。喟然作銘，用愧逢掖。

良禪師塔銘

禪師處良字遂翁。會稽山陰劉氏子。紹興五年。甫九歲。以童子得度。十三歲遊諸方。僅勝衣笠。路人爲之驚嘆。初爲妙喜禪師宗杲侍者。又從己菴禪師道顏爲書記。遂翁英邁玉立。遊二師間。皆受記別。餘事能文詞。善筆札。諸方翁稱良書記。然亦以議論儼核。不少假借。不爲諸方所容。一妄比丘。輒得名山壯刹。遂翁獨陸陸衆中。嘗居嘉興法喜院。舉香爲己菴嗣。蕭然數僧。食財半菽。再歲。退廬會稽海上。今太常尤公延之守臨海。起遂翁領紫雲。復以縣大夫不樂棄去。久之。領崑山薦巖資福寺。遂以疾逝。淳熙十四年六月戊寅也。遺言藏骨廬山智林寺。寺己菴與遂翁所同建也。逝之日。手書求銘於予。銘曰。山棲谷汲。利欲靡及。孰擗使躡道成。謗集廬阜。峨峨浮屠。岌岌吾識。其封身沒名立。

高僧猷公塔銘

宋山陰有高僧曰子猷。字脩仲。晚自號笑雲老人。宏材博學。高行達識。卓然出一世之表。雖華嚴其宗。而南之天台。北之慈恩。少林之心法。南山之律部。莫不窮探歷討。取其妙以佐吾說。雖浮屠其衣。百家之書。無所不讀。聞名儒賢士。雖在千里之遠。必往交焉。篤行義。勵風操。嚴取與。一得喪。接物簡而峻。不屈於富貴。有以供施及門者。苟禮不足。雖累百金。輒拒不取。於虛賢哉。脩仲出陳氏。生七歲。從同郡大善寺晏時爲童子。十有二歲。祝髮受具。習華嚴經論於廣福院。擇交得其學。又游錢塘。見惠因院師會。博盡所疑。二師皆自以爲弗迫。遂還山陰。說法於城東妙相院。僅二十年。學者常百餘人。脩仲厭其近城市。思居山林。乃捨衆。遷於梅山。上方學者不肯散去。而院隘不能容。相與言於府。願迎脩仲還妙相。於是法席加盛於昔。所著書大行於世。院亦益葺。號爲壯刹。大慧禪師宗杲過而異之。爲留偈壁間。然脩仲竟棄去。學者猶

不捨。又說法者三。最後住姜山。閱三年。喟然嘆曰。老矣。將安歸邪。亟囊書歸梅市。結菴以老。淳熙十六年八月二十有六日。忽命舟。遍別平日所往來者。明日晨起說法。遂坐逝。壽六十有九。又三日。火化。得舍利。五色粲然。弟子卽菴之。西建塔。奉靈骨。及舍利。以葬。脩仲度弟子四人。戒海。戒先。戒明。戒堅。戒先。傳家學。而四方之學者。得法出世。又有七人。隱於衆者。蓋以百數。脩仲之道。其傳又可涯哉。戒明來乞銘。銘曰。予嘗觀古高僧。窮幽闡微。能信踐之。不爲利誑。不爲勢撓。未嘗不與學士大夫同也。考脩仲之爲人。可謂有古高僧之風矣。吾子之銘。非獨以厚故人。蓋亦天下之公也。

別峯禪師塔銘

南山自長安秦中。西南馳。爲嶠。爲嶮。嶮東行。紆餘起伏。歷蠻夷中。跨軼且千里。然後秀偉特起。爲三峯。摩星辰。蓄雲雨。龍蟠鳳翥。是名峨嵋山。通義隄爲二郡。實在其下。人鍾其氣。爲秀民傑士。出而仕者。固多以功業文章。擅名古今。至於厭薄紛華。棄捐衣冠。木食澗飲。自放於塵垢聲利之外。而不幸爲人知。不能遂其隱操。亦卒至於光顯榮耀者。如別峯禪師是也。師名寶印。字坦叔。生爲龍游李氏子。世居峨嵋之麓。少而奇警。日誦千言。然不喜在家。乃從德山院清遠道人得度。自成童時。已博通六經。及百家之說。至是復從華嚴起信諸名師。窮源探賾。不高出同學。不止論說雲泉湧衆。請主講席。謝不可。圓悟克勤禪師有嗣法上首安民號密印禪師。說法於中峯道場。迺挈一笠往從之。一日。密印舉僧問巖頭起滅不停時。如何巖頭叱曰。是誰起滅。師豁然大悟。自是室中鋒不可觸。密印恨相得之晚。會圓悟自南歸成都。昭覺乃遣師往省。因隨衆入室。圓悟舉從上諸聖。以何法接人。師舉起拳。圓悟曰。此是老僧用者。孰爲從上諸聖。

用者。師卽揮拳。圍悟亦舉拳相交。大笑而罷。圍悟嘆異之曰。是子他日必類我師。留昭覺三年。密印猶在中峯。以堂中第一座致師。師辭。密印大怒曰。我以法得人。人不我傳。尙何以說法爲。欲棄衆去。衆皇恐。亟趨昭覺。羅拜懇請。圍悟亦助之請。始行。道望日隆。學者爭歸之。雖圍悟密印。不能捨也。久之南遊。見滄山佛性。秦福殿。月菴果疎山草堂。皆目擊而契。或以第一座留之。師潛遜。以免。最後至徑山。見大慧杲。大慧問曰。上座從何處來。師曰。西川來。大慧曰。未出劍門關。與汝三十棒了也。師曰。不合起動和尙。時徑山衆千七百。雖耆宿名衲。以得棲笠地爲幸。願爲師獨掃一室。堂中皆驚。大慧南遷。師亦西歸。始住臨邛。鳳皇山。舉香嗣密印。歷住廣漢。崇慶。武信。東禪。成都。龍華。眉山。中巖。復還成都。住正法。道旣盛行。士大夫亦喜從之遊。築都不會菴。松竹幽邃。暇日。名勝畢集。聞師一言。皆自謂意消。稍或間闊。輒相語曰。吾輩鄙吝萌矣。其道德服人如此。俄復下碇。抵金陵。應菴華方住蔣山。館師於上方。白留守張公燾。舉以代己。師聞卽日發去。會陳丞相俊卿來爲金陵。以保寧延師。俄徙京口。金山。學者傾諸方。金山自兵亂後。雖屢葺。莫能成。至是始復。大興如承平時。而有加焉。異時居此山。鮮踰三年者。師獨安坐十五夏。潭帥張公。孝祥嘗延以大滄山師。與張公雅。故念未有以卻。而京口之人。自郡守以降。力爭之。卒返。潭使魏憲。憲王牧四明。虛雪竇來請。師度不可辭。迺入東。凡住四年。樂其山林。有終老之意。而名益重。被敕住徑山。淳熙七年五月也。七月。至行在所。至尊壽皇聖帝降中使。召入禁中。以老病足蹇。賜肩輿於東華門內。賜食於觀堂。引對於選德殿。特賜坐。勞問良渥。師因舉古宿云。透得見聞。覺知受用。見聞覺知。不墮見聞。覺知。上悅曰。此誰語。師曰。祖師皆如此提倡。亦非別人語。上爲微笑。時秋暑方熾。師再欲起。上再留。使畢其說。迺退。後十

餘日。又命開堂於靈隱山中。使齋賜御香。恩禮備至。十年二月。上製圓覺經注。遣使馳賜。且命作序。師適築大開祕奉。以修土恩。師老益厭住持事。門人懼其遠遊不返。相與築菴於山北。俟其歸。今上在東宮。晝別峯。二大字榜之。十五年冬。奏乞養疾於別峯。得請。明年上受內禪。取向所賜宸翰。識以御寶。復賜焉。紹熙元年冬十一月。忽往見。今住山智策。告別策。問行日。師曰。水到渠成。歸取幅紙。大書曰。十二月七日夜雞鳴時。如期而化。奉蛻質返寺之法堂。留七日。顏色精明。鬚髮皆長。頂溫如沃湯。是月十四日。葬於別峯之西岡。壽八十有二。臘六十有四。得法弟子梵牟。宗性道奇。智周慧海。宗璨等。得度弟子智穆。慧密等。百四十有七人。有慧綽者。山陰陸氏子。當以蔭得官。辭之。從師祝髮。又得記。薊遷迹巖岫。終身不出。師既示寂。上爲敕有司。定諡曰慈辯。且名其塔曰智光菴。曰別峯極方外之龍師。說法數十年。所至門人集爲語錄。晚際遇壽皇。被宸翰。咨詢法要。皆對使者具奏。將化。說偈尤奇偉。已別行於世。此不悉著。三年三月。法孫宗愿。走山陰鏡湖。屬某銘師之塔。某與師交最久。嘗相約還蜀。結茆青衣。喚魚潭上。今雖老病。義不可辭。銘曰。

圓悟再傳。是爲別峯。坐十道場。心法之宗。淵識雄辯。震驚一世。矯乎人中龍也。海口電目。旋期稱道。卓乎澗壑。松也。叩而能應。應已能默。渾乎金鐘大鏞也。師之出世。如日在空。升於陽谷。不爲生隱。於崦嵫。其可。以爲終乎。

海淨大師塔銘

乾道中。史魏公以故相牧會稽。嚴重簡貴。士大夫非素負才望。莫得登其門。願每召靈祕院僧。智性與語。

有大興造。輒以付之。性公時年且七十。亦輒受命不辭。已而事皆井井有條理。邦之人始服魏公之知人。雖方外道人任之亦能舉其事如此。又嘆性公之不負所知也。及淳熙末。予還朝。典南宮。屢奏兼領祠部。而會稽守言靈祕院本遼條表丈地。智性以孤身力成之。今爲名利。請以其徒守之。報可。予雖會稽人。然自魏公去。不復見性公。乃驚嘆曰。是道人尙在邪。又五年。予臥疾鏡湖上。性公法孫德恭來告曰。公以紹熙三年六月五日示化。將奉遺骨塔於小夾山。且來請銘。性公本會稽山陰蔡氏子。七歲從廣福院崇教大師慧超視髮。九歲賜紫方袍。號海淨大師。坐八十三夏。住靈祕五十一載。年九十度弟子七人。厚永宗慶。宗亮。宗振。宗懋。宗寶。宗一。孫四人。德和。德恭。德興。德椿。曾孫二。人行昭。行聞。銘曰。龜食箬從。宅此山阿。陵谷有遷。吾銘不磨。

松源禪師塔銘

松源禪師名崇岳。生於處州龍泉之松源吳氏。故因以自號。自幼時已卓犖不羣。處羣兒中。未嘗嬉宕。稍長。聞出世法。慕嚮之。年二十三。棄家。衣掃塔服。受五戒於天明寺首造靈石妙禪師。繼見大慧杲禪師於徑山。久之。大慧陞堂。稱蔣山。應菴華公爲人徑捷。師聞之。不待旦而行。既至。入室未契。退愈自奮勵。中夜自舉狗子無佛性話。豁然有得。卽以扣應菴。舉菴世尊有密語。迦葉不覆藏。師云。鈍置和尙。應菴厲聲一喝。自是朝夕咨請。應菴大喜。以爲法器。說偈勸使祝髮。棟梁吾道。隆興二年。師始得度於臨安西湖白蓮精舍。自是徧歷江浙諸大老之門。卒當其意。乃浮海入閩。見乾元木菴永禪師。一日辭木菴。欲往黃檗。木菴舉有句無句如藤倚樹。師云。裂破木菴云。瑯琊道好一堆爛柴。師云。矢上如尖。如是應酬。數反。木菴

云。老兄下語老僧。不過如此。祇是末在。他日拂柄在手。爲人不得。驗人不得。師云。爲人者。使博地凡夫。一超入聖域。固難矣。驗人者。打向面前過。不待開口。已知渠骨髓。何難之有。木菴舉手云。明明向汝道。開口不在舌頭上。後當自知。逾年。見密菴於衢之西山。隨問卽答。密菴微笑曰。黃楊禪師。切於明道。至忘親食。密菴移住蔣山華藏徑山。皆從之。一日。密菴入室。次問傍僧。不是心。不是佛。不是物。師侍側。豁然大悟。乃云。今日方會木菴道。開口不在舌頭上。自是機辯縱橫。鋒不可觸。木菴又遷靈隱。遂命師爲堂中第一座。旋出世於平江澄照。爲密菴嗣。遷江陰之光孝。無爲之治父。饒之薦福。明之香山。平江之虎丘。皆天下名山。惟治父最寂寞。又以火廢。師一臨之。四方名衲踵至。棟宇亦大興。人謂師能使所居山大慶元丁巳年。適靈隱虛席。僉曰。安得岳公來乎。果被旨以昇師。驪聲如潮。居六年。道盛行。得法者衆。法席爲一時冠。而師有棲隱之志。卽上章乞罷住持事。上察其誠。許之。退居東菴。俄屬微疾。猶不少廢。倡道。忽垂一則語。以驗學者曰。有力量人。爲甚麼擡腳不起。開口不在舌頭上。又貽書嗣法香山光睦雲居善開。傳以大法。因書偈曰。來無所來。去無所去。警轉玄關。佛祖罔措。跣跡而寂。實嘉泰二年八月四日也。得年七十有一。坐夏四十。奉全身塔於北高峯之原。塔成之四年。香山遣其侍者道孚。以銘屬某。某方謝事。居鏡湖上。年過八十。病臥一榻。得書。不覺起立曰。亡友臨川李德遠。浩實聞道於應菴。蓋與密菴同參。李德遠每與某談。參問悟入時。機緣言句。率常達旦。今讀師語。峻峭嶄峩。下臨雲雨。如立千仞之華山。翫天駕空。駭心眩目。如錢塘海門之濤。虎豹股栗。屋瓦震動。如漢軍昆陽之戰。追思德遠所言。然後知師真臨濟正宗。應菴密菴之真子孫也。銘曰。

臨濟一宗。先佛正傳。應菴父子。以一口吞金圈栗蓬。晚授松源。松源初心。論劫參禪。於一笑中。疾雷破山。坐八道場。衆如濤瀾。金鏃脫手。碎首裂肝。彼昏何智。萬里鐵關。後十大劫。摧山湮川。法力所持。此塔歸然。

退谷雲禪師塔銘

佛照禪師有嗣子曰淨慈報恩光孝退谷禪師。名義雲。生於福州閩清黃氏。世爲士。禪師幼入家塾。成童入鄉校。穎異有聲。旣冠。遊國學。因讀論語中庸有所悟。入後開龜峯山堂。淳禪師說法。遂自斷出家。從山堂祝髮。徧遊江湖。至吳見鐵菴一大禪爲侍者。一日室中問國師三喚侍者。話師亟舉手掩其口。又問曰。侍者三應。又作麼生。師拂袖徑出。鐵菴大喜。時佛照倡道靈隱。師往依之。及佛照移育王。師從其行。歷十年爲堂中第一座。佛照聞其說法。嘆曰。此子提倡。宛如雪堂行和尚。吾鉢袋有所付矣。遂出住香山。居五年。徙台州光孝。又徙鎮江甘露。會平江虎丘萬壽皆欲延師。師聞萬壽頗廢。卽欣然就之。淮南轉運使虞公儻。又以長蘆來招師。與虞公有雅故。又從之。會育王虛席。朝命師補其處。時佛照方居東菴。父子日相從。發明臨濟正宗。學者雲集。會有魔事。師卽捨衆退居香山。蓋將終焉。而朝命又起。師說法淨慈。恩光赫奕。郡邑聳動。一日。領衆持鉢畿邑。是夕。寺災無遺宇。比師歸。獨三門巋然。在瓦礫中。師不動容曰。成壞相尋。亦豈有常。今日之壞。安知不爲四衆作福之地哉。天子聞之。出內庫金以賜。自重臣貴戚以下。傾囊贖金。惟恐居後。未期年。廣殿邃廡。崇閣傑閣。蓋愈於前日矣。於是上爲親御翰墨。書慧日閣三大字。賜之開牖。二年五月。師示微疾。六月朔早。辛亥。作偈別衆曰。意鳥猝嗟。萬人氣索。佛法向上。何曾踢著。臨行業識茫茫。一任諸方十度。遂寂。後九日。弟子處約等奉全身塔於寺之東北隅。世壽五十八。僧夏三十五。住山

十九載。度弟子四十有畸。學者集師語爲七會錄。行於世。師初欲以復佛殿屬予記之。未及而棄世。於是處約等以西堂可宜禪師之狀來求予銘。適予老疾弗克就。宣公又以書來固請。而師之侍僧處訥者留逾年不肯去。辭指懇款。予爲之嘆曰。師之在育王也。將新僧堂。而陰陽家以爲法所禁。將不利於主人。師奮不顧。排衆說力爲之。堂成而魔果作。遂去。陰陽家之說使人拘而多畏。然其法本出流俗。不待師之明知其妄決矣。雖或適中終爲不足信也。又師在淨慈遭火患。淋地皆盡。度非金錢畧億萬。且假以歲月。必不能成。師談笑盡復舊觀。議者或以爲師之才用絕人。見於此者則亦陋矣。此事若澄觀輩則可稱大善知識。直遊戲爾。師所以獨立一世者豈直以此哉。師示衆有曰。烏道孤危。玄關妙密。在曹洞宗旨亦奇矣。若較臨濟。直是天地懸隔。此足以知師能繼圓悟妙喜佛照之大作用者。自有所在也。銘曰。

猗歟雲公。自儒衣奮。爲東菴子。無示無問。上距圓悟。四世而近。龍象蹴踏。獅子奮迅。或造其室。目不容瞬。丹碧南山。蓋其游刃於談笑。頭變化。規璣。以此論師。其殆未盡。譬如觀海。剛以尺寸。我銘不磨。百世其信。

陸放翁集

渭南文集

卷第四十一

皇太后靈駕發引祭文

風御上賓。玉衣永闕。生。堯鈞弋。尙懷帝武之祥。從禹會稽。遵孝寢園之下。母慈罔極。坤載無疆。方同軌之。畢來。悵東朝之已遠。然而艱難契濶。歸慰聖主。問安之誠。壽考康寧。躬享先后。莫致之福。陰功陽德。上際下蟠。歷邃古而罕聞。知聖心之無憾。臣藩維有守。愴慕徒深。目斷栢城。神馳靈御。敢修饋奠之禮。少致攀號之心。

祭梁右相文

人之生世。如雲之出於山川。雲不自用。用之者天。降爲甘澤。散爲豐年。抑有時而弗用。則輪困磅礪。或卷或舒。以自適於野水之涯。荒山之巔。彼雲無心。豈有用舍之異。出處之偏哉。公之在朝。道大材全。不爲世變。不爲物遷。顯相廟郊。華袞金蟬。太平之功。溢於簡編。謝病而歸。大節愈堅。從容邇英。抗議慨然。曰我非堯舜之道。不敢以陳於前。孰謂萬鍾之祿。不足顧留。遂委之而仙乎。抑公之學。得聖所傳。視生死爲一區。等華屋於荒阡乎。又豈如雲之旣散。廓然太虛。則前日用舍。初不足以爲愚賢乎。酒不盈觴。肉不揜豆。獨區區之詞。寫其肺肝者。公豈捐之乎。

祭龔參政文

某官劔南公在廊廟書從驛來如奉色笑哀窮悼屈忘其不肖歲戊戌春某辱號召歸未及都公歿荒微山川阻脩萬里孤旒官事有守不遑往弔寓哀一觴公乎來醢

祭魯國太夫人文

嗚呼昔先太師遜世懷寶播慶於家生我元老維少傅公秉德逢辰長養成就則繫夫人少傅在朝衰衣繡裳帝錫夫人御醴長章少傅在藩豹尾玉節帝錫夫人兼金重帛僉曰盛哉其榮則多夫人曰嘻其報伊何帝虛元弼方屬少傅於時夫人以疾卽路煌煌安輿少傅實從天祐德人華其初終某受恩門闌義均子姓晚偕婦息升堂修敬萬里羈宦忽承哀音東望永懷碎裂寸心送車轉轉傾動鄉鄰隕涕羞奠形留神往

祭王侍御令人文

惟靈生自大家來嬪德門象服有輝娣媵如雲相我御史克勤藻蘋諸子甚材頎然薦紳世所願懷執如夫人惟是孤生實忝外姻萬里焉依如在鄉鄰遺此不淑慘然酸辛辜餽之微侑以斯文

祭祝永康文

嗟我與公萬里羈單人孰知之所恃者天庶幾白首相從鄉關追談梁益把酒笑歡云胡不淑一病莫還遺孤子立未逮冠婚謂天可恃公宜百年玉裂竹折喟其永歎公守導江齧蘗飲泉凜凜色詞請謁莫干人或謗嘲公守益堅雖昔君子終此實難云持此歸何憾九原公喪之東丹旆翩然我病莫與撫枕涕漣

矢辭羞莫尙慰營魂。

祭劉樞密文

嗚呼公乎。有文有武。無仁有智。立朝無助。以直自遂。聲氣不動。而折萬里之衝。從容一言。而決盈庭之議。蓋人所難。公之所易。仰天俯地。一念不愧。秋毫未安。寢食忘味。輕失富貴。而重朋友之責。自屈達尊。而伸白屋之士。蓋人之所忽。公之所畏。昔歲癸未。某始去國。見公西省。凜然正色。顧雖不肖。竊師公直。流落得歸。公與有力。舟過金陵。公疾已亟。命之不淑。旋聞易簀。祭不及時。實負盛德。尙想平生。出涕橫臆。

祭蔣中丞夫人文

維靈出由德閥。克配儒先。從容圖史之規。肅敬蘋蘩之薦。是生耆哲。來瑞明時。大邦開賜沐之封。列鼎極循陔之養。奄聞不淑。靡究遐齡。窀穸有期。川途云邈。雖莫綴千車之盛。顧敢稽一酌之恭。仰冀靈魂俯歆誠意。

祭趙提刑文

惟靈早以茂異。起膺簡求。逢時休明。爲國壽駕。建牙淮服。擁節王畿。方期來朝。遽以疾遘。挂冠決去。共高靜退之風。易簀亟聞。何勝殄瘁之感。某早託通家之好。晚逢攬轡之行。揮麈軒昂。恍如昨日。拊棺播痛。莫喻孤懷。敢陳一奠之恭。少敘九京之訣。

祭勤首座文

我之與公。義則師友。情骨肉也。相從十年。談道賦詩。藝松菊也。別雖數月。使來自東。書相續也。比獨怪公。

書詞諄諄。若予屬也。嗟哉已矣。愼然野鶴。尚在目也。卵塔告成。欲往不果。身桎梏也。上愧道義。下負交情。淚可掬也。龍文之茗。沉水之薰。薦甘瓠也。懷舊之心。有如丘山。此一粟也。

祭許辰州文

惟靈美操懿行。達識英辭。筆陣掃千人軍。早擢太常之第。胸中吞九雲夢。耻裁光範之書。抱沉英之歎者十年。分共理之憂者兩郡。人之不淑。生也有涯。旅館招魂。一朝今古。孤舟反葬。萬里風濤。豈知故里之交。遽作夜臺之別。魂兮未遠。鑒此哀誠。嗚呼哀哉。

祭韓无咎尙書文

兄之初載。甚躓而艱。逢亂客吳。萬里孤鶩。文方日衰。蕩爲狂瀾。組織纖弱。各自譖賢。士睨莫救。兄勇而前。陋巷一室。日旰未饘。誦書鼓琴。志操益堅。落筆天成。不事雕鐫。如先秦書。氣充力全。壯年相從。願閱我孱。曰是有志。許以周旋。我自蜀歸。兄典三銓。邂逅都門。掣手歎然。兄牧東陽。我走閩山。曠不相值。今五六年。我病早衰。願未及泉。兄之壽康。一朝先顛。餉酒踵門。乃酌柩前。嗟嗟造物。孰尸此權。豈其好惡。亦與俗遷。微官有守。喪車莫攀。尊鯽之奠。敝訣終天。

祭胡監丞文

惟公文學。足以發身。政事足以宜民。人則不合。何罪於神。乃者起家。往守宜春。臨別慨然。握手江津。曾未逾月。乃以訃聞。舟載銘旌。返其鄉枌。臺省袞袞。公獨逡巡。室家嘻嘻。公獨悲辛。我雖晚交。甚知公真。適苦肝腸。莫弗及親。尙想平生。寓哀斯文。

祭丘運使母夫人文

昔先大夫懷寶里閭。沒世不耀。乃以其孤。屬之夫人。道德是詔。故河圖公。文學政事。望在廊廟。榮養五鼎。眉壽百年。其德彌劭。高識超然。朱門畫戟。視若蓬蓬。再入都城。曾未溫席。翮其歸旆。方歲之惡。公私交病。冀寬賦調。而河圖公。遽以憂歸。道路相弔。我登門闕。情均甥姪。宜送宅兆。官守所廢。矢辭傷悲。薦此清醪。

祭會原伯大卿文

惟靈淵乎似道。敏而好學。韋編鐵硯。雪窗螢几。不足以言其勤。冢書壁簡。銅牆鬼炊。不足以名其博。文辭典奧。論議超卓。不使直承明之庭。猶當置諸天祿之閣。時方越拘擊。以用人公。奚彼之不若。而乃老於惠文之冠。弗預甘泉之囊。痛結慈闈。悲纏華萼。凡閭巷之故交。想話言之如昨。聞訃相弔。摧然涕落。羞一醪以祖行。冀九原之可作。

祭大姪文

汝實先少傅之長孫。岳州使君之嫡子。早列仕籍。垂五十年。夫婦二人。更相爲命。嶺海萬里。淪謝不還。收骨於灰燼之中。藏構於松楸之次。頰冤痛酷。賈涕何言。歿而有靈。歆此薄醪。

祭十郎文

自汝不幸。早世將二十年。乃克祔葬於先少師魯國夫人塋兆之南岡。距汝母令入墓尤邇。汝而不泯。豈不得所願哉。感念疇昔。悲痛何言。

祭朱元晦侍講文

某有捐百身起九原之心。有傾長河注東海之淚。路脩齒耄。神往形留。公歿不亡。尙其來鑿。

祭方伯蕃文

予與伯蕃別於武夷。予五十有五齒髮未衰。伯蕃蓋方壯耳。顧後日猶長未知別之悲也。俯仰二十有一年。卒不相遇。而伯蕃遂捨我而何之乎。予年垂八十。如朝露之將晞。與伯蕃別尙復幾時。生也相遇。猶不可必。死遊地下。果可期乎。予言之及茲。涕不可止。伯蕃尙能有知也乎。

祭張季長大卿文

於虜世之定交。有如某與季長者乎。一產眠下。一家山陰。邂逅南鄭。異體同心。有善相勉。闕遺相箴。公醉巴歌。我病越吟。大笑劇談。坐客皆瘖。公旣造朝。衆彥所欽。我南入蜀。九折嶽崕。公以憂歸。我亦陸沉。久乃相遇。垂涕霑襟。宿好未遠。舊盟復尋。駕言造公。公已來臨。我倡公和。如鼓瑟琴。送我東歸。握手江潯。欲行復尼。頓足噫喑。是實古道。乃見於今。公還爲卿。華路駸駸。我方畏讒。潛恐不深。公去我召。如商與參。涉邈天涯。一書萬金。我自史閣。進長書林。迫老亟退。突不暇黔。亦嘗挽公力。微弗任。比乃聞公。請投華簪。旋又聞訃。天乎難讎。玉樹永闕。壘柏已森。何時復聞。正始遺音。瀆酒絮中。不及手斟。英魂如生。豈忘來歆。於虜哀哉。

祭周益公文

某紹興庚辰。始至行在。見公於途。欣然傾蓋。得居連牆。日接嘉話。每一相從。脫帽褰帶。從容笑語。輸寫肝肺。鄰家借酒。小圃鉏菜。榮榮青燈。瘦影相對。西湖弔古。竝轡共載。賦詩屬文。頗極奇淫。淡交如水。久而不

壤各謂知心絕出流輩別二十年公位鼎鼐我方西遊荷戈窮塞歸得臺郎旋又坐廢公亦策免久處於外見不可期使我形瘵斯文日卑公則巖岱士昏于智公則蓍蔡公老不衰雷霆百代每得手書字細如芥癡兒駭女問及瑣碎孰爲一病良醫莫差赴告鼎來震動海內奔赴不遑涕泗澎湃豈無尊鯽致此薄酌辭則匪工聊寄悲慨

尤延之尙書哀辭

帝藝祖之初造兮紀號建隆煥乎文章兮躡揖遜之遐蹤詔册施於朝廷兮萬里雷風灑灑噩噩兮始掃五季之雕蟲閱世三傳兮車書大同黃麾繡仗兮駕言東封繼七十二后於蓬古兮勒崇垂鴻吾宋之文抗漢唐而出其上兮震耀無窮柳張穆尹歐王曾蘇名世而間出兮巍如華嵩雖宣和之蠱弊與建炎之軍戎文不少衰兮殷殷隆隆太平之象兮與六龍而俱東余自梁益歸吳兮愴故人之莫逢後生成市兮摘裂剽掠以爲工遇尤公於都城兮文氣如虹落筆縱橫兮獨殿諸公晚乃契遇兮北扉南宮塗改雅頌兮蹈躡軻雄余久擯於世俗兮公顧一見而改容相期江湖兮斗粟共春別五歲兮晦顯靡同書一再兮奄其告終於康哀哉孰抗衣而復公兮呼伯延甫於長空孰誦些以招公兮使之捨四方而歸徠乎郢中孰醉荒丘兮露草霜蓬孰闔虛堂兮寒燈夜蛩文辭益衰兮奇服危茸天不憖遺兮黼黻火龍嗟局淺之一律兮彼寧辨夫瓦釜黃鐘話言莫聽兮孰知我衷患難方殷兮孰恤我躬焄蒿不返兮吾黨孰宗死而有知兮惟公之從

沈子壽母趙夫人哀詞

嗚呼。人孰無母。母孰無子。母以壽終。子克終養。亦可紓無窮之悲矣。維吾子壽。自初遭艱。晝夜號泣。匪淚。伊血。羸乎莫支。陸堂帛祭者。不忍聞其聲。得書赴告者。不忍觀其辭。子壽蓋曰。不孝孤少。罹凶。父喪。母。罄無遺。可耕。母子相依。及遊太學。母客京師。冬令母寒。晝令母飢。飢無一囊。寒無一襲之衣。不孝孤。雖食於學官。羹餼在前。歎息而靡撫。所讀書而與之。誓曰。編絕則輯。字灑則補。寧死於書傍。不敢畏難。苟止。以負吾母之慈。如是十年。幸賜第於太常。歸而拜母。相持以泣。淚盡日。妾。母前子後。告於先墓。庶幾吾父聞之。而寬其九泉之思也。於虜。此子壽之既言。而其未言者。蓋可推矣。奉身以道。義發身以書。詩。文章。博於不朽。節行全而無虧。士患無志。不患無位。士患無才。不患無恃。子壽之志。所以事親者。蓋其所以事君。子壽之才。願猶屈而未施。親則日遠。時節奉祀。如將見之。一言一行。足以顯揚吾親者。苟有怠忽。是以吾親爲歿而亡知也。子壽之令名。與天壤同弊。則親賢與焉。刻諫千字。置守萬家。蓋不足進於斯也。子壽之存於胷中而未言者。予得陳之。非獨慰吾子壽。蓋以爲天下孝子之詒哀哉。

卷第四十二

天彭牡丹譜

花品序第一

牡丹在中州洛陽爲第一。在蜀。天彭爲第一。天彭之花。皆不詳其所自出。土人云。曩時永寧院有僧。種花最盛。俗謂之牡丹院。春時。賞花者多集於此。其後花稍衰。人亦不復至。崇寧中。州民宋氏張氏蔡氏宣和。

中。石子灘楊氏皆嘗買洛中新花以歸。自是落花散於人間。花戶始盛。皆以接花爲業。大家好事者。皆竭其力以養花。而天彭之花。遂冠兩川。今惟三井李氏。劉村毋氏。城中蘇氏。城西李氏。花特盛。又有餘力治亭館。以故最得名。至花戶連畛相望。莫得而姓氏也。天彭三邑皆有花。惟城西沙橋上下。花尤超絕。由沙橋至棚口崇寧之間。亦多佳品。自城東抵濠陽。則絕少矣。大抵花品近百種。然著者不過四十。而紅花最多。紫花黃花白花。各不過數品。碧花一二而已。今自狀元紅至歐碧。以類次第之。所未詳者。姑列其名於後。以待好事者。

狀元紅 祥雲 紹興春 燕脂樓 金腰樓 玉腰樓 雙頭紅 富貴紅 一尺紅 鹿胎紅
文公紅 政和春 醉西施 迎日紅 彩霞 疊羅 勝疊羅 瑞露蟬 乾花 大千葉
小千葉

右二十一品紅花

紫繡毬 乾道紫 潑墨紫 葛巾紫 福嚴紫

右五品紫花

禁苑黃 慶雲黃 青心黃 黃氣毬

右四品黃花

玉樓子 劉師哥 玉覆盂

右三品白花

歐碧

右碧花

轉枝紅 朝霞紅 灑金紅 瑞雲紅 壽陽紅 探春毬 米囊紅 福勝紅 油紅 青絲紅
 紅鵝毛 粉鵝毛 石榴紅 洗粧紅 蹙金毬 間綠樓 銀絲樓 六對蟬 洛陽春 海
 芙蓉 膩玉紅 內人嬌 朝天紫 陳州紫 袁家紫 御衣紫 斬黃 玉抱肚 勝瓊 白
 玉盤 碧玉盤 界金樓 樓子紅

右三十三品未詳

花釋名第二

洛花見紀於歐陽公者。天彭往往有之。此不載。載其著於天彭者。彭人謂花之多葉者。京花。單葉者。川花。近歲尤賤。川花實不復售。花之舊裁曰祖花。其新接頭。有一春兩春者。花少而富。至三春。則花稍多。及成樹。花雖益繁。而花葉減矣。狀元紅者。重葉深紅花。其色與鞞紅潛緝相類。而天姿富貴。彭人以冠花品多。葉者謂之第一架。葉少而色稍淺者。謂之第二架。以其高出衆花之上。故名狀元紅。或曰舊制進士第一人。即賜茜袍。此花如其色。故以名之。祥雲者。千葉淺紅花。妖豔多態。而花葉最多。花戶王氏謂此花如雲狀。故謂之祥雲。紹興春者。祥雲子花也。色淡佇。而花尤富。大者徑尺。紹興中始傳。大抵花戶多種。花子以觀其變。不獨祥雲耳。燕脂樓者。深淺相間。如燕脂染成。重趺累萼。狀如樓觀。色淺者。出於新繁。勾氏色深者。出於花戶宋氏。又有一種。色稍下。獨勾氏花爲冠。金腰樓。玉腰樓。皆粉紅花。而起樓子。黃白間之。如

金玉色與燕脂樓同類。雙頭紅者。竝蒂駢專。色尤鮮明。出於花戶宋氏。始祕不傳。有謝主簿者。始得其種。今花戶往往有之。然養之得地。則歲歲皆雙。不爾則間年矣。此花之絕異者也。富貴紅者。其花葉圓正而厚。色若新染未乾者。他花皆落。獨此抱枝而槁。亦花之異者。一尺紅者。深紅。顏近紫色。花面大幾尺。故以一尺名之。鹿胎紅者。鶴領紅子。花色紅微帶黃。上有白點。如鹿胎極化工之妙。歐陽公花品有鹿胎花者。乃紫花。與此頗異。文公紅者。出於西京潞公園。亦花之麗者。其種傳蜀中。遂以文公名之。政和春者。淺粉紅花。有絲頭。政和中始出。醉西施者。粉白花。中間紅暈。狀如酡顏。迎日紅者。與醉西施同類。淺紅花中。特出深紅花。開最早。而妖麗奪目。故以迎日名之。彩霞者。其色光麗。爛然如霞。疊羅者。中間瑣碎。如疊羅紋。勝疊羅者。差大於疊羅。此三品皆以形而名之。瑞露蟬。亦粉紅花。中抽碧心。如合蟬狀。乾花者。粉紅花。而分蟬旋轉。其花亦富。大千葉。小千葉。皆粉紅花之傑者。大千葉無碎花。小千葉則花萼瑣碎。故以大小別之。此二十一品。皆紅花之著者也。紫繡毬。一名新紫花。蓋魏花之別品也。其花葉圓正。如繡毬狀。亦有起樓者。爲天彭紫花之冠。乾道紫色稍淡。而暈紅。出未十年。潑墨紫者。新紫花之子花也。單葉深黑。如墨。歐公記有葉底紫近之。葛巾紫。花圓正而富麗。如世人所戴葛巾狀。福嚴紫。亦重葉紫花。其葉少於紫繡毬。莫詳所以得名。按歐公所紀。有玉版白。出於福嚴院。土人云。此花亦自西京來。謂之舊紫花。豈亦出於福嚴耶。禁苑黃蓋。桃黃之別品也。其花閑淡高秀。可亞姚黃。慶雲黃。花葉重複。郁然輪囷。以故得名。青心黃者。其花心正青。一本花往往有兩品。或正圓如毬。或層起成樓子。亦異矣。黃氣毬者。淡黃檀心花。葉圓正。向背相承。數腴可愛。玉樓子者。白花。起樓高標。逸韻自然。是風塵外物。劉師哥者。白花帶微紅。多至數百。

葉纖妍可愛。莫知何以得名。玉覆盃者。一名玉炊餅。蓋圓頭白花也。碧花止一品。名曰歐碧。其花淺碧。而開最晚。獨出歐氏。故以姓著。大抵洛中舊品。獨以姚魏爲冠。天彭則紅花以狀元紅爲第一。紫花以紫繡毬爲第一。黃花以禁苑黃爲第一。玉花以玉婁子爲第一。然花戶歲益培接。新特間出。將不特此而已。好事者尙屢書之。

風俗記第三

天彭號小西京。以其俗好花。有京洛之遺風。大家至千本。花時自太守而下。往往卽花盛處。張飲。密幙車馬。歌吹相屬。最盛於清明寒食時。在寒食前者。謂之火前花。其開稍久。火後花則易落。最喜陰晴相半時。謂之養花。天栽接剔治。各有其法。謂之弄花。其俗有弄花一年。看花十日之語。故大家例惜花。可就觀。不敢輕翦。蓋翦花。則次年花絕少。惟花戶則多植花。以俸利。雙頭紅初出時。一本花取直至三十千。祥雲初出。亦直七八千。今尙兩千。州家歲常以花餉諸臺。及旁郡。蠟蕐筠籃。旁午於道。予客成都六年。歲常得餉。然率不能絕佳。淳熙丁酉歲。成都帥以善價私售於花戶。得數百苞。馳騎取之。至成都。露猶未晞。其大徑尺。夜宴西樓下。燭焰與花相映發。影搖酒中。繁麗動人。嗟乎。天彭之花。要不可望洛中。而其盛已如此。使異時復兩京。王公將相。築園第以相誇尙。予幸得與觀焉。其動蕩心目。又宜何如也。明年正月十日。山陰陸某書。

天中節致語

得吾道而上爲皇。方探真詮之妙。有天下而尊歸父。適當孝治之隆。肆均湛露之恩。用修流虹之瑞。恭惟

皇帝陛下。德高遠古。澤被絲區。神武應期。三紀撫紹。開之運。希夷玩志。兆民傾愛。戴之誠。爰輯上儀。式彰華旦。山呼萬歲。驩已浹於神人。花覆千官。慶更同於中外。臣獲預梨園之法部。遙瞻鳳闕於丹霄。敢采民謠。恭陳口號。

宮殿紅雲捧紫皇。河清電繞擁休祥。壺中常占青春在。物外方知浩劫長。畫立龍旗風不動。曉開瓊笈遠飄香。堯年豈特封人祝。動地驩聲遍萬方。

又

樞電效祥。不顯生商之旦。霈雲示惠。肆均在鎬之恩。喜溢鸞鷲。光生俎豆。伏惟皇帝陛下。聖神廣運。垂拱無爲。躬堯舜之性仁。致成康之刑措。克肖其德。天惟申命。用休非求於民。人皆同心。以戴號令。雷風之鼓舞。文章日月之昭明。修甲觀之昌期。疏瑤池之廣宴。山呼萬歲。花覆千官。激澗上樽。味挹金莖之露。悠颺法曲。聲留玉宇之雲。臣等生值聖時。身參樂府。敢緣歸美之義。廣載太平之詩。

廣殿遙聞警蹕音。觚稜曉色尙沉沉。半空瑞鶴爐香馥。一點紅雲繡座深。夷夏驩聲歸羽舞。乾坤和氣入薰琴。欲知聖德齊堯舜。迥闕爭傾萬國心。

又

有王者興。應繞電流虹之瑞。使聖人壽。實敷天率土之心。欣逢震夙之期。恭致龐鴻之祝。伏惟皇帝陛下。聰明稽古。歷數在躬。聖澤上際而下。蟠容化東。漸而西。被追景德。祥符之治。萬寓不平。御紫宸垂拱之朝。四夷入貢。爰錫霈雲之宴。用均湛露之恩。臣等端遇清時。遙瞻丹闕。聽虞帝簫韶之奏。同極驩情。綴漢家

樂府之詩。敢陳薄技。

嘉會千齡豈易逢。環聲俱集未央宮。九重鳳闕曠瞻日。百尺龍旗掩苒風。奇瑞屢書圖牒上。太平長在詠歌中。區區擊壤雖無取。意與生民既醉同。

徐稚山給事慶八十樂語

伏以就第而賜安車。爰及常珍之歲。爲酒以介眉壽。宜伸善頌之誠。恭惟致政龍學給事。東省近臣。西清宿望。體鍾和氣。生元祐之盛時。道合聖君。贊隆興之初政。抗議每先於諸老。遺榮靡顧於萬鍾。雖容疎傅之歸。行見謝公之起。至若薰金比訓。庭玉生輝。出將使指之榮。入奉色難之養。膺茲全福。屬我耆英。維降嶽之嘉辰。當發春之令月。廟堂舊弼。紆華袞以臨觴。臺閣名卿。煥繡衣而在席。式歌且舞。俾熾而昌。上對台顏。敢陳口號。

欲知主聖本臣忠。傾盡嘉謨沃舜聰。同載方如周呂尙。安車不數漢申公。日烘盎盎花光暖。燭映鱗鱗酒浪紅。白首同朝各強健。莫辭爛醉答春風。

致語二

伏以碧油紅旆。有嚴幕府之容。瑠俎華觴。用飾輿情之喜。恭惟某官。西清禁從。東省名臣。據古守經。凜北斗泰山之望。黜浮崇雅。粲銘鍾篆鼎之辭。行表縉紳。言書簡冊。雍弗容然後見君子。顯未起何以慰蒼生。適茲謀帥之辰。誰處耆英之右。佩麟符而就鎮。獨屈經綸。穿豹尾以還朝。佇聞趣召。某官爰申宴樂。式奉笑談。士民踴躍而仰瞻。將吏奔馳而卽事。諸金石鏗鏘之奏。盛魚龍曼衍之觀。上對治塔。敢陳口號。

曾立蛾眉禁省班。至今風采照金鑾。縱橫筆陣千人廢。浩蕩辭源萬頃寬。落紙煙雲紛態度。照人冰玉峙高寒。從容坐嘯香凝寢。說與賓僚拭目觀。

又

西顯司辰。素商紀節。涓日初開於幕府。肆筵式奉於皇華。恭惟某官。節槩清真。風規簡亮。過眼不再。盡讀五車之書。落筆可驚。早冠萬人之勇。文久傳於後學。名疑親於昔賢。凜臺柏之生風。煥使星之下燭。繡衣持斧。威聲方肅於列城。豹尾屬車。趣召行參於法從。某官爰開燕豆。款奉談犀。畫棟珠簾。納九秋之爽氣。金樽玉酒。醉一道之歡聲。仰對台塔。敢陳口號。

涼月參差白露溥。請看賓主罄清歡。麟符玉節交相映。風竹鸞絲殊未闌。百穀方登倉庾足。七州無事里閭安。樽前莫惜山頽玉。四者能兼自古難。

卷第四十三

入蜀記

乾道五年十二月六日。得報差通判夔州。方久病。未堪遠役。謀以夏初離鄉里。

六年閏五月十八日。晚行夜至法雲寺。兄弟餞別。五鼓始決去。

十九日黎明。至柯橋館。見送客。已時至錢清。食亭中。涼爽如秋。與諸子及送客。步過浮橋。橋堅好。非昔比。亭亦華潔。皆史丞相所建也。申後至蕭山縣。憩夢筆驛。驛在覺苑寺旁。世傳寺乃江文通舊居也。有大碑。

葉道卿文。寺額及佛殿榜。皆沈容遠所書。有碑亦容遠書。尤精古。又有毗陵人戚舜臣所畫水。蓋佛後座大壁也。卒然見之。覺濤瀾洶湧可駭。前輩或謂之死水。過矣。縣丞權縣事紀旬尉曾榮來。曾原伯逢招飲於其子榮麻中。二鼓歸。原伯復來。共坐驛門。月如晝。極涼。四鼓解舟。行至西興鎮。

二十日黎明渡江。江平無波。少休仙林寺。寺僧爲開館設湯飲。遂買小舟出北關。登漕司所假舟於紅亭。稅務之西。夜無蚊。

二十一日省三兄。

二十二日至二十四日。皆留兄家。

二十五日晚。葉夢錫侍郎銜招飲。案間設礬山數盆。望之如雪。

二十六日晚。芮國器司業。購招飲。同集仲高兄詹道子大著。亢宗。張叔潛。編修淵。坐中國器云。頃在廣東作漕。有提舉茶鹽石端義者。性殘忍。每捕官吏繫獄。輒以石鹽木枷枷之。蓋木之至堅重者。每曰。木名石鹽。天生此爲我用也。其後石坐罪。竟荷校云。

二十七日。

二十八日。同仲高出闌門。買小舟泛西湖。至長橋寺。予不至。臨安八年矣。湖上園苑竹樹。皆老蒼。高柳造天。僧寺益蒼。而舊交多已散去。或貴不復相通。爲之絕歎。

二十九日。沈持要檢正樞招飲。邂逅趙德莊少卿彥端。晚出湧金門。竝湖繞城。至舟中。

三十日。

六月一日早移舟出開。幾盡一日始能出三閘。船舫櫛比。熱甚。午後小雨。熱不解。泊糴場前。

二日禺中解舟。鄉僕來言。鄉中閔雨。村落家家車水。比連三年。頗稔。今春父老言。占歲可憂。不知終何如也。過赤岸班荆館。小休前亭。班荆者。北使宿頓及賜燕之地。距臨安三十六里。晚急雨。頗涼。宿臨平。臨平者。太師蔡京葬其父準於此。以錢塘江爲水。會稽山爲案山。形如駱駝。葬於駝之耳。而築塔於駝之蓋。蓋葬師云。駝負重則行遠也。然東坡先生樂府固已云。誰似臨平山上塔。亭亭迎客西來送客行。則臨平有塔亦久矣。當是蔡氏葬後增築。或遷之耳。京責太子少保制云。託祝聖而飾臨平之山是也。夜半解舟。

三日黎明。至長河堰。亦小市也。魚蟹甚富。午後至秀州崇德縣。縣令右從政郎吳道夫。丞右承直郎李植。監秀州都稅務右從政郎章湜來。舊聞戴子微云。崇德有市人吳隱。忽棄家寓旅邸。終日默坐一室。室中惟一臥榻。客至共坐榻上。或載酒過之。亦不拒。清談竟日。隱初不學問。至是間與人言易數。皆造精微。亦能先知人吉凶壽夭。見者莫能測也。因見吳令問之。云皆信然。今徙居村落間矣。是晚行十八里。宿石門。火警如山。明日之熱可知也。

四日熱甚。午後始稍有風。晚泊本覺寺前。寺故神霄宮也。廢於兵火。建炎後再修。今猶甚草創。寺西廡有蓮池十餘畝。飛橋小亭。頗華潔。池中龜無數。聞人聲皆集。駢首仰視。兒曹驚之不去。亭中有小碑。乃郭功甫元祐中所作。醉翁操。後自跋云。見子瞻所作未工。故賦之。亦可異也。

五日早抵秀州。見通判權郡事右通直郎朱自求。員外通判右承事郎直祕閣趙師夔。方務德侍郎滋。務德留飯。飯罷。還舟小憩。極熱。謁樊自強主管。樊自牧教授。廣印皆茂實。吏部子聞人伯卿教授。阜民茂德。

刪定子。二樊居城外。居第頗壯。茂實晚歲所築。尙未成也。隔水有小園。竹樹脩茂。荷池渺瀰。可喜。池上有堂曰讀書堂。遊寶華尼寺。拜宣公祠堂。有碑。缺壞磨滅之餘。時時可讀。蘇州刺史于頔書。大略言秘書監陸公齊望始作尼寺於此。其後漸濫。兄弟又新之。後又有賢妹字敬香。陸氏嘗有女子爲尼云。然不言宣公所以有祠者。家語遺類此。證謬譌。溺者則宣公之父也。老尼妙濟。大師法淳。及其弟子。居白留蝦茶。且言方新祠堂也。移舟北門宣化亭。晚復過務德飯。

六日。右奉議郎新通判荆南呂援來。援字彥能。進士。聞人網來。網字伯記。方務德館客。自言識毛德昭。德昭名文。衢州江山縣人。居於秀子兒時從之甚久。德昭極苦學。中年不幸病盲而卒。無子。綱言其盲後。猶終日危坐。默誦六經。至數千言不已。可哀也。赴郡集於倅廡中。坐花月亭。有小碑。乃張先子野雲。彼月來花弄影。樂章云。得句於此亭也。晚赴方夷吾導之集於陳大光縣丞家。二樊呂倅皆在。大光字子充。榮中諫議孫。居第潔雅。末利花盛開。

七日早。遍辭諸人。赴方務德素飯。晚移舟出城。泊禾輿館前。館亦頗闊壯。終日大雨不止。招姜醫師家人及綯。

八日雨霽。極涼如深秋。遇順風。舟人始張帆。過合路。居人繁夥。賣鮓者尤衆。道旁多軍中牧馬。運河水泛。溢高於近村地。至數尺。兩岸皆車出積水。婦人兒童。踣作。亦或用牛。婦人足踏水車。手猶續麻。不置。過平望。遇大雨暴風。舟中盡溼。少頃。霽。止宿八尺。聞行舟有覆溺者。小舟叩舷賣魚。頗賤。蚊如蠶。蠶可畏。九日晴而風。舟人懲昨夕狼狽。不敢解舟。日高方行。自至崇德。行大澤中。至此始望見震澤。遠山午間。至

吳江縣。渡松江。風極靜。濯庵竹樹益茂。而主人死矣。知縣右承議郎管統。尉右迪功郎周邛來縣治。有石刻曾文清公漁具圖詩。前知縣專柳禮所刻也。漁具比松陵倡和集所載。又增十事云。託周尉招醫鄭端誠。爲統綯脰脈。皆病暑也。市中賣魚鮓頗珍。晚解舟中流。回望長橋層塔。煙波渺然。真若圖畫。宿尹橋登橋觀月。

十日。至平江。以疾不入。沿城過盤門。望武丘樓塔。正如吾鄉寶林。爲之慨然。宿楓橋寺前。唐人所謂半夜鐘聲到客船者。

十一日。五更發楓橋。曉過漕野。居人極多。至望亭小憩。自是夾河皆長岡高壟。多陸種菽粟。或灌木叢篠。氣象窘隘。非楓橋以東比也。近無錫縣。始稍平曠。夜泊縣驛。近邑有錫山。出錫。漢末識記云。有錫天下兵。無錫天下清。有錫天下爭。無錫天下寧。至今錫見輒拚之。莫敢取者。

十二日。早謁喻子材郎中。樽子材來謝。以兩夫荷轎。不持胡床。手自授謁云。知縣右奉議郎吳澄來。晚行夜四鼓。至常州城外。

十三日。早入常州。泊荆谿館。夜月如晝。與家人步月驛外。綯始小愈。

十四日。早見知州右朝奉大夫李安國通判右朝奉郎蔣誼。員外倅左朝散郎張堅。堅。文定公綱之子。教授左文林郎陳伯達。員外教授左從政郎沈瀛。司戶右從政郎許伯虎來。伯達字兼善。瀛字子壽。皆未識。子壽仍出近文一卷。伯虎字子威。余兒時筆硯之舊也。至東嶽廟觀古檜。數百年物也。又小憩崇勝寺納涼。遂解舟。甲夜過奔牛閘。宋明帝遣沈懷明擊孔覲。至奔牛築壘。卽此也。閘水湍激。有聲甚壯。遂抵呂城。

開自祖宗以來天下置堰軍止四處而呂城及京口二開在焉。

十五日早過呂城開始見獨轅小車過陵口見大石獸偃仆道傍已殘缺蓋南朝陵墓齊明帝時王敬則反至陵口慟哭而過是也余頃嘗至宋文帝陵道路猶極廣石柱承露盤及麒麟辟邪之類皆在柱上刻太祖文皇帝之神道八字又至梁文帝陵文帝武帝父也亦有二辟邪尙存其一爲藤蔓所纏若繫縛者然陵已不可識矣其旁有皇業寺蓋史所謂皇基寺也疑避唐諱所改二陵皆在丹陽距縣三十餘里郡士蔣元龍子雲謂予曰毛達可作守時有賣黃金石榴來禽者疑其盜捕得之果發梁陵所得夜抵丹陽古所謂曲阿或曰雲陽謝康樂詩云朝日發雲陽落日到朱方蓋謂此也。

十六日早發丹陽汲玉乳井水并在道旁觀晉寺名列水晶色類牛乳甘冷熨齒并額陳文忠公所作堆玉八分也寺前又有練光亭下闕練湖亦佳境距官道甚近然過客罕至是日見夜合花方開故山開過已月餘氣候不齊如此過夾岡有二石人植立岡上俗謂之石翁石媪其實亦古陵墓前物自京口抵錢塘梁陳以前不通漕至隋煬帝始鑿渠八百里皆濶十丈夾岡如連山蓋當時所積之土朝廷所以能駐蹕錢塘以有此渠耳汴與此渠皆假手隋氏而爲吾宋之利豈亦有數邪過新豐小憩李太白詩云南國新豐酒東山小妓歌又唐人詩云再入新豐市猶聞舊酒香皆謂此非長安之新豐也然長安之新豐亦有名酒見王摩詰詩至今居民市肆頗盛夜抵鎮江城外是日立秋

十七日平旦入鎮江泊船西驛見知府右朝散郎直祕閣蔡洸子平都統慶遠軍節度使成閔通判右朝奉大夫章汝右朝奉郎陶之真府學教授右文林郎熊克總領司幹辦公事右承奉郎史彌正端叔

十八日右奉議郎簽書節度判官廳公事葛郇觀察推官右文林郎徐務滋司戶參軍左迪功郎楊冲焦山長老定園甘露長老化昭來。

十九日金山長老寶印來字坦叔嘉州人言自峽州以西灘不可勝計白傅詩所謂白狗到黃牛灘如竹節稠是也赴蔡守飯於丹陽樓熱特甚堆冰滿坐了無涼意蔡自點茶頗工而茶殊下同坐龍教授建寧人云建茶舊雜以米粉復更以薯蕷兩年來又更以楮芽與茶味頗相入且多乳惟過梅則無復氣味矣非精識者未易察也申後移舟出三閘至潮開而止。

二十日遷入嘉州王知義船微雨極涼。

二十一日

二十二日郡集衛公堂後圃比舊唯增染香亭飲半登壽丘普照寺終宴壽丘者宋高祖宅有故井尚存寺本名延慶隆興中復泗州有普照寺僧奉僧伽像來歸寓焉因賜名普照寺僑置僧伽道場東望京山連亘抱合勢如繚牆官寺樓觀如畫西闕大江氣象極雄偉也。

二十三日至甘露寺飯僧甘露蓋北固山也有狠石世傳以爲漢昭烈吳大帝嘗據此石共謀曹氏石亡已久寺僧輒取一石充數游客屢拏太息僧及童子輩往往竊笑也拜李文饒祠登多景樓樓亦非故趾主僧化昭所築下臨大江淮南草木可數登覽之勝實過於舊遊迨左迪功郎新太平州教授徐容容字子公泉州人此山多峭崖如削然皆土也國史以爲石壁峭絕誤矣。

二十四日

二十五日早。以一罇壺酒。謁英靈助順王祠。所謂下元水府也。祠屬金山寺。寺常以二僧守之。無他祝史。然勝云。賽祭豬頭。例歸本廟。觀者無不笑。初紹興末。元顏亮入寇。樞密葉公審言。督視大軍。守江。禱於水府。祠請事平。奏加帝號。既而不果。隆興中。虜再入。有近臣申言之。議者謂四瀆止封王。水府不應在四瀆上。乃但加美稱而已。廟中遇武人王秀。自言博州人。年五十一。元顏亮寇邊時。自河朔從義軍。攻下大名。以待王師。既歸朝。不見錄。且自言孤遠。無路自通。歎歎不已。是晚。欲出江。舟人辭以潮不應。遂宿江口。二十六日。五鼓發船。是日。舟人始伐鼓。遂游金山。登玉鑑堂。妙高臺。皆窮極壯麗。非昔比。玉鑑蓋取蘇儀甫詩。云。僧於玉鑑光中坐。客蹋金鷲背上行。儀甫果終於翰苑。當時以爲詩譏。新作寺門。亦甚雄覆。昔年伯壽篆額。然門乃不可泊舟。凡至寺中者。皆由雄跨閣。長老寶印言。舊額仁宗皇帝御。飛白。張之。則風波洶湧。蛟鼉出沒。遂藏之寺閣。今不復存矣。印住山近十年。興造皆其力。寺有兩塔。本曾子宣丞相。用西府俸所建。以薦其先者。政和中。寺爲神霄宮。道士乃去塔。上相輪而屋之。謂之觀羅霄臺。至是五十餘年。印始復爲塔。且增飾之。工尙未畢。山絕頂有吞海亭。取氣吞巨海之意。登望尤勝。每北使來聘。例延至此亭。烹茶。金山與焦山相望。皆名藍。每爭雄長。焦山舊有吸江亭。最爲佳處。故此名吞海以勝之。可笑也。夜風水薄。船聲有聲。

二十七日。留金山。極涼冷。印老言。蜀中梁山軍鷲鷲。爲天下第一。

二十八日。夙興。觀日出江中。天水皆赤。真偉觀也。因登雄跨閣。觀二島。左曰鶴山。舊傳有栖鶴。今無。有右曰雲根島。皆特起不附山。俗謂之郭璞墓。奉使金國。起居郎范至能。至山。遣人相招。食於玉鑑堂。至能名

成大聖政所同官相別八年。今借資政殿大學士提舉萬壽觀侍讀爲金國祈請使云。午間過瓜洲。江平如鏡。舟中望金山樓觀重複。尤爲鉅麗。中流風雷大作。電影騰掣。止在江面去舟財丈餘。急繫纜。俄而開霧。遂至瓜洲。自到京口無蚊。是夜蚊多。始復設幃。
二十九日泊瓜洲。天氣澄爽。南望京口。月觀甘露寺水府廟。皆至近。金山尤近。可辨人眉目也。然江不可橫絕。放舟稍西。乃能達。故渡者皆遲回久之。舟人以帆繫往姑蘇。買帆是日方至。檣高五丈六尺。帆二十六幅。兩日間。閱往來渡者。無慮千人。大抵多軍人也。夜觀金山塔燈。

卷第四十四

入蜀記

七月一日黎明。離瓜洲。便風掛帆。晚至真州。泊鑿遠亭。州本唐揚州揚子縣之白沙鎮。楊溥有淮南。徐溫自金陵來。覲溥於白沙。因改曰迎鑾鎮。或謂周世宗征淮時。諸將嘗於此迎謁。非也。國朝乾德中。升爲建安軍。祥符中建玉清昭應宮。卽軍之西北小山。置冶鑄玉。皇聖祖太宗四聖像。旣成。遣丁謂李宗諤爲迎奉使副。至京。車駕出迎。肆赦。建軍曰眞州。而於故冶築儀眞觀。政和中。修九域圖志。又名曰儀眞郡。舊以水陸之衝。爲發運使治所。今廢。

二日見知州右朝奉郎王察。市邑官寺。比數年前頗盛。攜統游東園。園在東門外里餘。自建炎兵火後。廢壞滌地。漕司租與民。歲入錢數千。昔之闊壯巨麗。復爲荆棘荒墟之地者四十餘年。乃更葺爲園。以記考。

之。惟清醮堂。拂雲亭。澄虛閣。蠶復其舊。與右之清池。北之高臺。尙存。若所謂流水橫其前者。湮塞僅如一帶。而百畝之園。廢爲蕪畦者。尙過半也。可爲太息。登臺望下蜀諸山。平遠可愛。裴回久之。過報恩光孝寺。少留。辛巳之變。儀真焚蕩無餘。而此寺獨存。堂中僧百人。長老妙湍。常州人。

三日。右迪功郎監稅務。聞人堯民來。堯民茂德。刪定之。兄子以恩科入官。北山永慶長老。纘常來郡。集於平易堂。遍游澄瀾閣。快哉亭。遂至壯觀。以歸。壯觀舊有米元章所作賦石刻。今亡矣。初。問王守儀真觀去城遠近。云在城南里許。方怪與國史異。既歸。亟往游。則信城南也。有老道士出迎。年七十餘。自言廬州人。能述儀真本末。云舊觀實在城西北數里。小土山之麓。祥符所鑄。乃金銅像。并座高三丈。以黃麾全仗道門。隨節迎赴京師。皆與國史合。故當時樂章曰。范金肖像。申嚴奉宮。館狀羣飛。萬靈拱衛。瑞煙披提。柳映黃麾。道士又言。賜號瑞應福地。則史所不載也。今所謂儀真觀者。昔黃冠入城。休憩道院耳。晚大風。舟人增纜。

四日。風便。解纜挂帆。發真州。岸下舟相先後。發者甚衆。煙帆映山。縹緲如畫。有頃。風愈厲。舟行甚疾。過瓜步山。山蜿蜒蟠伏。臨江起小峯。巔巉峻。絕頂有元魏太武廟。廟前大木可三百年。一井已。嘗傳以爲太武所鑿。不可知也。太武以宋文帝元嘉二十七年南侵。至瓜步。建康戒嚴。太武鑿瓜步山爲蟠道。於其上設鹿廬。大會羣臣。疑卽此地。王文公詩所謂囊祠瓜步認前朝。是也。梅聖俞題廟云。魏武敗志歸。孤軍駐山頂。按太武初未嘗敗聖俞誤。以佛狸爲曹瞞耳。山出瑪瑙石。多虎豹害人。往時大將劉寶。每募人捕虎於此。周世宗伐南唐。齊王景達自瓜步渡江。距六合二十里。設柵亦此地也。入夾行數里。沿岸園囿。疇衍沃廬。

舍竹樹極盛。大抵多長蘆寺莊。出夾望長廬樓塔重複。自江淮兵火。官寺民廬。莫不殘壞。獨此寺之盛。不減承平。至今日常數百衆。江面渺瀰。無際殊可畏。李太白詩云。維舟至長廬。日送煙雲高。是也。晚泊竹篔簹。有居民二十餘家。距金陵三十里。

五日。大風將曉。覆袂衾晨起。淒然如暮秋。過龍灣。浪湧如山。望石頭山不甚高。無峭立江中。繚繞如垣牆。凡舟皆由此下。至建康。故江左有變。必先固守石頭。真控扼要地也。自新河入龍光門。城上舊有賞心亭。白鷺亭。在門右。近又創二水亭。在門左。誠爲壯觀。然賞心爲二亭所蔽。頗失往日登望之勝。泊秦淮亭。說者以爲鍾阜艮山。得庚水爲宗廟水。秦鑿淮。本欲破金陵。王氣然庚水反爲吉。天下事。信非人力所能勝也。見留守右朝請大夫祕閣修撰唐瑒。通判右朝散郎潘恕。建康行宮。在天津橋北。橋琢青石爲之。頗精緻。意其南唐之舊也。晚小雨。右文林郎監大軍倉王烜來。王言京口人。用七月六日爲七夕。蓋南唐重七夕。而常以帝子鎮京口。六日輒先乞巧。翌旦馳入建康。赴內燕。故至今爲俗云。然在太宗皇帝時。嘗下詔。禁以六日爲七夕。則是北俗亦如此。此說恐不然。

六日。見左朝散大夫太府少卿總領兩淮財賦沈夏武。秦軍節度使建康諸軍都統郭振。右宣教郎知江寧縣何作善。右文林郎觀察推官褚意來。作善字百祥。意字誠叔。晚見秦伯和侍郎。伯和名墳。故相益公楡之孫。延坐畫堂。棟宇闕麗。前臨大池。池外卽御書閣。蓋賜第也。家人病創。託何令招醫劉仲寶視脈。七日早遊天慶觀。在冶城山之麓。地理家以爲此山脈絡。自蔣山來。不可知也。吳晉間城壘。大抵多因山爲之。觀西有忠烈廟。卽壺廟也。以嵇紹及壺二子眈眈配食。紹死於惠帝時。在壺前。且非江左事。而以配

壘非也。廟後叢木甚茂，傳以爲壘墓。墓東北又有亭，頗疎豁，曰忠孝亭。亭本南唐忠貞亭，後避諱改焉。忠貞壘，證今日忠孝，則并以其二子死父難也。雲堂道士陳德新，字可久，姑蘇人，頗開敏，相從登覽久之。遂出西門，游清涼廣慧寺，寺距城里餘，據石頭城下。臨大江，南直牛頭山，氣象甚雄，然壞於兵火。舊有德慶堂，在法堂前，堂榜乃南唐後主撮襟書，石刻尚存，而堂徙於西偏矣。又有祭悟空禪師文，曰：保大九年歲次辛亥九月，皇帝以香茶乳藥之奠，致祭於右街清涼寺。悟空禪師，按南唐元宗以癸卯歲嗣位，改元保大。當晉出帝之天福八年，至辛亥，實保大九年。當周太祖之廣順元年，則祭悟空者，元宗也。建康志以爲後主，非是。長老寶餘，楚州人，留食，贈德慶堂榜墨本，食已，同登石頭，西望宣化渡，及歷陽諸山，真形勝之地，若異時定都建康，則石頭當仍爲關要，或以爲今都城徙而南，石頭雖守無益。蓋未之思也。惟城旣南徙，秦淮乃橫貫城中，六朝立柵斷航之類，緩急不可復施。然大江天險，都城隨之，金湯之勢，比六朝爲勝，豈必依淮爲固邪？左迪功郎新湖州武康尉劉煒，右迪功郎監比較務李膺，來煒、秦伯和館客也。言秦氏

衰落可念，至屢典質，生產亦薄，問其歲入幾何，曰：米十萬斛耳。

八日晨，至鍾山道林真覺大師塔，焚香。塔在太平興國寺上寶公所葬也。塔中金銅寶公像，有銘在其膺。蓋王文公守金陵時所作，僧言古像取入東都啓聖院，祖宗時每有祈禱，啓聖及此塔，皆設道場，考之信然。塔西南有小軒，曰木末，其下皆大松，髯甲天矯如蛟龍，往往數百年物，木末蓋後人取王文公詩木末北山雲冉冉之句名之。建康志謂公自命此名，非也。塔後又有定林菴，舊聞先君言，李伯時畫文公像於菴之昭文齋壁，著帽束帶，神彩如生。文公沒，齋常扃閉，遇重客至，寺僧開戶，客忽見像，皆驚發，覺生氣逼。

人寫照之妙如此。今菴經火。尺椽無復存者。予乙酉秋。嘗雨中獨來遊。留字壁間。後人移刻崖石。讀之感歎。蓋已五六年矣。歸途過半山。少留。半山者。王文公舊宅。所謂報寧禪院也。自城中上鍾山。此爲中途。故曰半山。殘毀尤甚。寺西有土山。今謂之培塿。亦後人取文公詩所謂溝西顧。丁壯擔土爲培塿名之也。寺後又有謝安墩。文公詩云。在冶城西北。卽此是也。

九日至保寧戒壇二寺。保寧有鳳皇臺。攬輝亭。臺有李太白詩云。三山半落青天外。二水中分白鷺洲。今已廢爲大軍甲仗庫。惟亭因舊趾重築。亦頗宏壯。寺僧言。亭勝本朱希真蘇書。已爲俗子易之。法堂後有片石。瑩潤如黑玉。乃宋子嵩詩題云。鳳臺山亭子。陳獻司空鄉貢進士宋齊丘。司空者。徐知誥也。後改姓名曰李昇。是爲南唐烈祖。而齊丘爲大臣。後又有題字云。昇元三年。秦勅刻石。蓋烈祖既有國。追念君臣相遇之始。而表顯之。昇齊丘雖皆不足道。然當攘奪分裂橫潰之時。其君臣相遇。不如是。亦不能相成。其功業也。戒壇額曰崇勝戒壇寺。古謂之瓦棺寺。有閣因岡阜。其高十丈。李太白所謂鍾山對北戶。淮水入南榮者。又橫江詞。一風三日吹倒山。白浪高於瓦棺閣是也。南唐後主時。朝廷遣武人魏丕來使。南唐意其不能文。卽宴於是閣。因求賦詩。不攬筆成篇。末句云。莫教雷雨損基局。後主君臣皆失色。及南唐之亡。爲吳越兵所焚。國朝承平二百年。金陵爲太府寺。觀競以崇飾土木爲事。然閣終不能復。紹興中有北僧來居。講惟識百法論。誓復興造。求偉材於江湖間。事垂集者屢矣。會建宮闕。有司往往輒取之。僧不以此動心。愈益經營。卒成廬舍。那閣平地高七丈。雄麗冠於江東。舊閣基相距無百步。今廢爲軍營。秦伯和遣醫柴安恭來視家人瘡。柴邢州龍岡人。晚褚誠叔來。誠叔嘗爲福州閩清尉。獲盜應格。當得京官。官不忍以

人死爲己利。辭不就。至今在選調。又有爲它邑尉者。亦獲盜。營賞甚力。卒得京官。將解去。入郡。過刑人處。輒掩目大呼。數日。神志方定。後至他郡。見通衢有石幢。問此何爲。從者曰。法場也。亦大駭。叫呼。幾墜車。自此所至。皆迂道以避刑人之地。人之不可有媿於心如此。移舟泊賞心亭下。秦伯和送藥。

十日早。出建康城。至石頭。得便風。張帆而行。然港淺而狹。行亦甚緩。宿大城岡。金陵岡隴重複。如梅嶺岡。石子岡。余讀如蛇婆岡。尤其著者也。居民數十家。亦有店肆。

十一日早。出夾。行大江。過三山磯。烈洲。慈姥磯。采石鎮。泊太平州江口。謝玄暉登三山。還望京邑。李太白登三山望金陵。皆有詩。凡山臨江。皆曰磯。水湍急。篙工併力撐之。乃能上。然今年閏餘秋早。水落已數尺矣。則盛夏可知也。三山自石頭及鳳凰臺望之。杳杳有無中耳。及過其下。則距金陵財五十餘里。晉伐吳。王濬舟師過三山。王渾要濬議事。濬舉帆曰。風利不得泊。卽此地也。是日便風。擊鼓挂帆而行。有兩大舟。東下者。阻風泊浦。激見之大怒。頓足詬罵不已。舟人不答。但撫掌大笑。鳴鼓愈厲。作得意之狀。江行淹速。常也。得風者。矜而阻風者。怒。可謂兩失之矣。世事蓋多類此者。記之以寓一笑。烈洲在江中。上有小山曰烈山。草木極茂。密有神祠。在山巔。慈姥磯。磯之尤峻。絕峭立者。徐師川有慈姥磯詩。序云。磯與望夫石相望。正可爲的對。而詩人未嘗挂齒。牙。故其詩云。離鸞只說閨中恨。抵憤誰知目下情。然梅聖俞護母喪歸宛陵。發長蘆江口詩云。南國山川都不改。傷心慈姥舊時磯。師川偶忘之耳。聖俞又有過慈姥磯下。及慈姥石。石崖上竹鞭詩。皆極高奇。與此山稱采石一名牛渚。與和州對岸。江面比瓜洲爲狹。故隋韓擒虎平陳及本朝曹彬下南唐。皆自此渡。然微風。輒浪作不可行。劉賓客云。蘆葦晚風起。秋江鱗甲生。王文公云。

一風微吹萬舟阻。皆謂此磯也。磯卽南唐樊若冰獻策作浮梁。渡王師處。初若冰不得志於李氏。詐祝髮爲僧。廬於采石山。鑿石爲竅。及建石浮圖。又月夜繫繩於浮圖。棹小舟急渡。引繩至江北。以度江面。既習。知不謬。卽亡走京師。上書。其後王師南渡。浮梁果不差尺寸。予按隋煬帝征遼。蓋嘗用此策。渡遼水。造三浮橋於西岸。旣成。引趨東岸。橋短丈餘不合。隋兵赴水接戰。高麗乘岸上擊之。委鐵杖戰死。始斂兵。引橋復就西岸。而更命何稠接橋。二日而成。遂乘以濟。然隋終不能平高麗。國朝遂下南唐者。實天意也。若冰何力之有。方若冰之北走也。江南皆知其獻南征之策。或請誅其母妻。李煜不敢。但羈置池州而已。其後若冰自陳母妻在江南。朝廷命煜護送。煜雖憤切。終不敢違。厚遺而遣之。然若冰所鑿石竅及石浮圖。皆不毀。王師卒用以繫浮梁。則李氏君臣之暗且怠。亦可知矣。雖微若冰。有不亡者乎。張文潛作平江南議。謂當縛若冰送李煜。使甘心焉。不然。正其叛主之辜而誅之。以示天下。豈不偉哉。文潛此說。實天下正論也。予自金陵得疾。是日方小愈。尙未能食。夜雨。

十二日早。移舟泛姑熟溪五里。泊閱武亭。初詢舟人云。江口泊船處。距城二十里。須步乃可入。及至閱武。乃止在城闔之外。微猷閣直學士左朝請郎知州周元特操。聞予病。與醫郭師顯俱來視疾。自都下相別。迨今八年矣。太平州。本金陵之當塗縣。周世宗時。南唐元宗失淮南。橋置和州。於此。謂之新和州。改爲雄遠軍。國朝開寶八年。下江南。改爲平南軍。然獨領當塗一邑而已。太平興國二年。遂以爲州。且割蕪湖繁昌來屬。而治當塗。與興國軍同時建置。故分紀年以名之。

十三日。通判右朝請郎葉夢。員外通判左朝奉郎錢同仲。耕軍事判官左文林郎趙子顯。知當塗縣右通

直郎王權來。午後入州見元特呼郭醫就坐間爲予切脈。且議所用藥。州正據姑熟溪北。土人但謂之姑溪。水色正綠而澄澈如鏡。鱗鱗往來可數。溪南皆漁家。景物幽奇。兩浮橋悉在城外。其一通宜城。其一可至浙中。姑熟堂最號得溪山之勝。適有客寓家其間。故不得至。又有一酒樓。登望尤佳。皆城之南也。往時溪流分一支貫城中。湮塞已久。近歲嘗浚治。然惟春夏之交暫通。今七月已絕流矣。李太白集有姑熟十詠。予族伯父彥遠嘗言東坡自黃州還。過當塗。讀之撫手大笑曰。贖物敗矣。豈有李白作此語者。郭功父爭以爲不然。東坡又笑曰。但恐是太白後身所作耳。功父甚慍。蓋功父少時詩句俊逸。前輩或許之。以爲太白後身。功父亦遂以自負。故東坡因是戲之。或曰。十詠及歸來乎笑矣乎。僧伽歌。懷素草書歌。太白舊集本無之。宋次道再編時。貪多務得之過也。

十四日晚晴。開南窗觀溪山。溪中絕多魚。時裂水面躍出。斜日映之。有如銀刀。垂釣挽罟者彌望。以故價甚賤。僮使輩日皆糜飫。土人云。此溪水肥宜魚。及飲之。水味果甘。豈信以肥故多魚邪。溪東南數峯如黛。蓋青山也。

十五日早。州學教授左文林郎吳博古敏叔。員外教授左文林郎楊恂信伯來。飯已。遊黃山東嶽廟。廣福寺。遂登凌歊臺。嶽廟棟宇頗盛。本謂之黃山大監廟。大監者不知何神。蓋淫祠也。今旣爲嶽廟。而大監反寓食廡下。廣福本壽聖寺。以紹興壬午詔書改額。殿屋二十餘間。殘僧三四人。蕭然如古驛。主僧惠明。溫州平陽人。凌歊臺。正如鳳皇雨花之類。特因山巔名之。宋高祖所營。面勢虛曠。高出氛埃之表。南望青山。龍山九井諸峯。如在几席。龍山卽孟嘉登高落帽處。九井山有桓玄僧位壇。稍西江中二小山相對。云東

梁西梁也。北戶臨和州新城。樓櫓歷歷可辨。蓋自絕江至和州。財十餘里。李太白有黃山凌歊臺送族弟
泛舟赴華陰詩。卽此地也。臺後有一塔。塔之後又有亭。曰懷古云。余初至當塗。飲姑熟溪水。喜其甘滑。已
而遍飲城中水。皆甘。蓋泉脈佳也。
十六日。郡集於道院。歷遊城上亭榭。有坐獻亭。頗宜登覽。城澤皆植荷花。是夜月白如晝。影入溪中。搖蕩
如玉塔。始知東坡玉塔臥微瀾之句爲妙也。

卷第四十五

入蜀記

十七日。郡集於青山李太白祠堂。二教授同集。祠在青山之西北。距山尙十五里。墓在祠後。有小岡阜起
伏。蓋亦青山之別支也。祠莫知其始。有唐劉全白所作墓碣。及近歲張真甫舍人所作重修祠碑。太白烏
巾白衣錦袍。又有道帽。鑿裘。侑食於側者。郭功甫也。早飯罷。遊青山。山南小市有謝玄暉故宅基。今爲湯
氏所居。南望平野極目。而環宅皆流泉奇石。青林文篠。真佳處也。遂由宅後登山。路極險巖。凡三四里有
兩道人持湯飲。迎勞於松石間。又里許。至一菴。老道人出迎。年七十餘。姓周。濰州人。居此山三十年。類
如丹鬚。鬚無白者。又有李媪。八十矣。耳目聰明。談笑不衰。自言嘗得異人祕訣。菴前有小池。曰謝公池。水
味甘冷。雖盛夏不竭。絕頂又有小亭。亦名謝公亭。下視四山。如蛟龍奔放。爭赴川谷。絕類吾鄉舜山。但舜
山之巔。豐沃夷曠。無異平陸。此所不及也。亭北望正對歷陽。周生言。元顏亮入寇時。戰鼓之聲。震於山中。

云。夜歸舟次。已一鼓盡矣。坐間。信伯言桓溫墓亦在近郊。有石獸石馬。製作精妙。又有碑。悉刻當時車馬衣冠之類。極可觀。恨不一到也。

十八日。小雨。解舟出姑熟。溪行江中。江溪相接。水清濁各不相亂。挽行夾中三十里。至大信口。泊舟。蓋自此出大江。須風便乃可行。往往連日阻風。兩小山夾江。卽東梁西梁。一名天門山。李太白詩云。兩岸青山相對出。孤帆一片日邊來。王文公詩云。崔嵬天門山。江水遶其下。梅聖俞云。東梁如仰靈。西梁如浮魚。徐師川云。南人北人朝暮船。東梁西梁今古山。皆得句於此也。水滸小兒賣菱芡。蓮藕者甚衆。夜行堤上。觀月大信口。歐陽文忠公于役志。謂之帶星口。未詳孰是。于役志蓋譚夷陵時所著也。

十九日。便風。過大小楊山磯。奇石巖絕。漁人依石挽罾。宛如畫圖。間所見過鼻磯。在大江中。聳拔特起。有道士結廬其上。政和中。賜名寧淵觀。舊說鼻磯有鼻能害人。故得名。方郡縣奏乞觀額時。惡其名。因曰磯。在水中。水常沃石。故曰澆磯。今觀屋亦二十餘間。然止一道人居之。相傳有二人。則其一輒死。故無敢往者。至蕪湖縣。泊舟吳波亭。知縣右通直郎呂昭問來。按漢丹陽郡有蕪湖縣。吳陸遜屯蕪湖。又杜預注。春秋。楚子伐吳。克鳩茲。亦云在蕪湖。至東晉。乃改名于湖。不知所自。王敦反。屯于湖。今故城尙存。又有玩鞭亭。亦當時遺迹。唐溫飛卿有湖陰曲。敘其事。近時張文潛以爲晉書所云帝至于湖。陰察營壘。當以于湖爲句。飛卿蓋誤讀也。作于湖曲以反之。劉夢得歷陽書事詩。敘道中事云。望夫人化石。夢帝日環營。蓋夢得自夔州移牧歷陽。過此邑也。邑人云。數年前。邑境有盜。發大墓。棺槨已壞。得鏡及刀劍之屬甚衆。甃塋有大將軍墓四字。或疑爲敦墓云。

二十日寧國太平縣主簿左迪功郎陳炳來見。泛小舟往謝之。則寓寧淵觀下院。以提刑司檄來督大禮。錢帛寧淵在鼻磯。隔大江。故置下院於近邑。道流十餘壇。宇像設甚盛。有觀主何守誠者。今選居太一宮矣。炳字德先。婺州義烏人。自言其從姑。得道徽宗朝。賜號妙靜練師。結廬萬仙峯下。平生不火食。惟飲酒啗生果。爲人言禍福。死生無毫釐差。每風日清和。時輒掩關獨處。或於戶外竊聽之。但聞若二嬰兒聲。或歌或笑。往往至中夜方止。莫有能測者。年九十。正旦。自言四月八日當遠行。果以是日坐逝。每爲德先言。汝有仙骨。當遇異人。後因得疾。委頓有皖山徐先生來。餌以藥。卽日疾平。徐因留教以絕粒訣。德先父母方望其成名。固不許。然自是絕滋味。日食淡湯餅及飯而已。如此者六年。益覺身輕。能日行二百里。會中第。娶妻復近葦血。徐遂告別。臨行語德先曰。汝二紀後當復從我。究此事。德先送至路上。方呼舟欲渡。徐褰裳疾行水上而去。呼之不復應。德先至今悵恨。有棄官入瀟皖之意。予遂遊東寺。登王敦城。以歸。城竝崖峭絕處。下觀行舟。望之使人寒心。亦奇士也。江中江豚十數出沒。色或黑或黃。俄又有物長數尺。色正赤。類大蜈蚣。奮首逆水而上。激水高三二尺。殊可畏也。宿過道口。

二十一日過繁昌縣。南唐所置。初隸宣城。及置太平州。復割隸焉。晚泊荻港。散步堤上。遊龍廟。有老道人守之。台州仙居縣人。自言居此十年。日伐薪二束賣之。以自給。雨雪則從人乞。未嘗他營也。又至一菴。僧言隔港卽銅陵界。遠山巔然。臨大江者。卽銅官山。太白所謂我愛銅官樂。千年未擬還。是也。恨不一到。最後至鳳凰山。延禧觀。觀廢於兵燼者四十餘年。近方興葺。羽流五六人。觀主陳廷瑞。婺州義烏縣人。言此

古青華觀也。有趙先生，荻港市中人，父賣茗，先生幼名王九，年十三，疾亟，父抱詣青華，願使入道。是夕，先生夢老人引之登高山，謂曰：我陰翁也。出柏枝啗之，及覺，遂不火食。後又夢前老人，教以天篆數百字，比覺，悉記不遺。太宗皇帝召見，度爲道士，賜冠簡，易名自然，給裝錢遣還。遂爲觀主，祥符間，再召至京師，賜紫衣。改青華額曰延禧。先生懇求還山養母，得歸。一日，無疾而逝，門人葬之山中，行半途，棺忽大重，不可舉。其母曰：吾兒必有異命，發棺果空，無尸。惟劍履在耳。遂卽其處葬之。今塚猶在，謂之劍塚。自然國史有傳。大概與廷瑞言頗合。惟劍塚一事無之。荻港蓋繁昌小城市也。歸舟已夜矣。

二十二日過大江，入丁家洲夾，復行大江，自離當塗，風日清美，波平如席，白雲青嶂，相遠映帶，終日如行圖畫，殊忘道途之勞也。過銅陵縣不入，晚泊水洪口，江湖間謂分流處爲洪，王文公詩云：東江木落水分洪是也。

二十三日過陽山磯，始見九華山。九華本名九子，李太白爲易名。太白與劉夢得皆有詩，而劉至以爲可兼太華女兒之奇秀。南唐宋子嵩辭政柄，歸隱此山，號九華先生，封青陽公。由是九華之名益盛。惟王文公詩云：盤根雖巨壯，其末乃修纖，最極形容之妙。大抵此山之奇，在修纖耳。然無含蓄敦大氣象。與廬阜天台異矣。岸傍荻花如雪，舊見天井長老彥威云：廬山老僧用此絮紙衣，威少時在惠日，亦爲之。佛燈珣禪師見而大噴云：汝少年，輒求溫暖如此，豈有心學道邪？退而問兄弟，則堂中百人，有荻花衣者，財三四，皆年七十餘矣。威愧恐，亟除去。泊梅根港，巨魚十數，色蒼白，大如黃犢，出沒水中，每出水輒激起沸白成浪，真壯觀也。

二十四日。到池州。泊稅務亭子。州唐置。南唐嘗爲康化軍節度。今省。又嘗割青陽。隸建康。今復故。惟所置銅陵。東流二縣。及改秋浦爲貴池。今因之。蓋南唐都金陵。故嘗塗蕪湖。銅陵。繁昌。廣德。青陽。并江寧。上元。溧陽。溧水。句容。凡十一縣。皆隸畿內。今建康爲行都。而纔有江寧等五邑。有司所當議也。李太白往來江東。此州所賦尤多。如秋浦歌十七首。及九華山青溪白筍。陂玉鏡潭諸詩是也。秋浦歌云。秋浦長似秋。蕭條使人愁。又曰。兩鬢入秋浦。一朝颯已衰。猿聲催白鬢。長短盡成絲。則池州之風物可見矣。然觀太白此歌。高妙乃爾。則知姑熟十詠。決爲贗作也。杜牧之池州諸詩。正爾。觀之亦清婉可愛。若與太白詩並讀。醉醜異味矣。初。王師平南唐。命曹彬分兵自荊州順流東下。以樊若冰爲鄉導。首克池州。然後能取蕪湖。當塗。駐軍采石。而浮橋成。則池州今實要地。不可不備也。

二十五日。見知州右朝議大夫直祕閣楊師中。通判右朝奉郎孫德芻。遊光孝寺。寺有西峯。聖者所留。鐵笛。聖者生嘗吳武王。楊行密時。陽狂不羈。好吹笛。能役鬼神。蛟龍嘗寓池州乾明寺。乾明卽光孝也。及去。留笛付主事僧。笛似銅鐵而非。色綠而瑩潤如綠玉。不知何物。僧懼爲好事者所奪。郡官求觀之。輒出一。凡鐵笛充數。予偶與監寺僧有舊。獨得一見。有石刻沈敷達所作西峯銘。文辭古雅可愛。恨非其自書也。僧言貴池去城八十里。在秀山下。江之一支。別匯爲池。四隅皆因山石爲岸。產鯉魚。金鱗朱尾。味極美。本以此得貴池之名。秀山有梁昭明太子墓。拱木森然。今池州城西有神甚靈者。曰九郎。或云九郎卽昭明。晚登弄水亭。杜牧之所賦詩也。亭殊不葺。然正對清溪。齊山景物絕佳。州雖瀕江。然據岡阜。上頗難得水。二十六日。解舟。過長風沙。羅刹石。李太白江上贈竇長史詩云。萬里南遷夜。郎國三年歸。及長風沙。梅聖

俞送方進士遊廬山云長風沙浪屋許大羅刹石齒水下排歷此二險過湓浦始見瀑布懸蒼崖卽此地也又太白長干行云早晚下三巴預將書報家相迎不道遠直到長風沙蓋自金陵至此七百里而室家來迎其夫甚言其遠也地屬舒州舊最號湍險仁廟時發運使周湛役三十萬夫疏支流十里以避之至今爲行舟之利羅刹石在大江中正如京口鶴峯而稍大白石拱起其上叢篠喬木亦有小神祠旂竿不知何神也西望羣山靡迤巖嶂深秀宛如吾廬南望鏡中諸山爲之累歎宿懷家淚懷姓也吳有尙書郎懷敘見顧雍傳

二十七日五鼓大風自東北來舟人不告乘便風解船過雁翅夾有稅場居民二百許家岸下泊船甚衆遂經皖口至趙屯未朝食已行百五十里而風益大乃泊夾中皖口卽王師破江南大將朱令贇水軍處趙屯有戍兵亦小市聚也是日大風至暮不止登岸行至夾口觀江中驚濤駭浪雖錢塘八月之潮不過也有一舟掀簸浪中欲入夾者再三不可得幾覆溺矣號呼求救久方能入北望正見皖山太白江上望皖山詩云巉絕稱人意巉絕二字不刊之妙也南唐元宗南遷豫章舟中望皖山愛之謂左右曰此青輞數峯何名答曰舒州皖山時方新失淮南伶人李家明侍側獻詩曰龍舟千里颺東風漢武潯陽事正同回首皖公山色好日斜不到壽盃中元宗爲悲憤歎歎故王文公詩云南狩皖山非故地北師淮水失名王計其處當去此不遠也夜雨

二十八日過東流縣不入自雷江口行大江江南羣山蒼翠萬疊如列屏障凡數十里不絕自金陵以西所未有也是日便風張颿舟行甚速然江面浩浩白浪如山所乘二千斛舟搖兀掀舞纔如一葉過獅子

磯一名佛指磯。薜壁百尺。青林綠篠。倒生壁間。圖畫有所不及。猶恨舟行北岸。不得過其下。旁有數磯。亦奇峭。然皆非獅子比也。至馬當。所謂下元水府山。勢尤秀拔。正面山脚。直插大江。廟依峭崖。架空爲閣。登降者。皆自閣西崖腹。小石徑。捫蘿側足而上。宛若登梯。飛甍曲檻。丹碧縹緲。江上神祠。惟此最佳。舟至石壁下。忽晝晦。風勢橫甚。舟人大恐失色。急下颿。趨小港。竭力牽挽。僅能入港。繫纜同泊者四五舟。皆來助牽。早間同行一舟亦蜀舟也。忽有大魚正綠。腹下赤如丹。躍起。施旁高三尺許。人皆異之。是晚果折橋破帆。幾不能全。亦可怪也。入夜。風愈厲。增十餘纜。迨曉方少定。

二十九日。阻風馬當港中。風雨凄冷。初御袂衣。有小舟冒風濤來。賣薪菜豕肉。亦有賣野麩肉者。云獵蘆場中所得。飯已。登南岸。望馬當廟。北風吹人勁甚。至不能語。既暮。風少定。然怒濤未息。擊船終夜有聲。八月一日。過烽火磯。南朝自武昌至京口。列置烽燧。此山當是其一也。自舟中望山。突兀而已。及拋江過其下。嵌巖竇穴。怪奇萬狀。色澤瑩潤。亦與它石迥異。又有一石不附山。傑然特起。高百餘尺。丹藤翠蔓。羅絡其上。如寶裝屏風。是日風靜。舟行頗遲。又秋深潦縮。故得盡見。杜老所謂。幸有舟楫遲。得盡所歷妙也。過澎浪磯。小孤山。二山東西相望。小孤屬舒州宿松縣。有戍兵。凡江中獨山。如金山。焦山。落星之類。皆名天下。然峭拔秀麗。皆不可與小孤比。自數十里外望之。碧峯巖然孤起。上干雲霄。已非它山可擬。愈近愈秀。冬夏晴雨。姿態萬變。信造化之尤物也。但祠宇極於荒殘。若稍飾以樓觀亭榭。與江山相發輝。自當高出金山之上矣。廟在山之西麓。額曰惠濟。神曰安濟夫人。紹興初。張魏公自湖湘還。嘗加營葺。有碑載其事。又有別祠在澎浪磯。屬江州彭澤縣。三面臨江。倒影水中。亦占一山之勝。舟過磯。雖無風。亦浪湧。蓋以

過人世徒以載於文選故貴之耳自漢魏之間駸駸爲此體極於齊梁而唐尤貴之天下一律至韓吏部柳柳州大變文格學者翕然慕從然駢儷之作終亦不衰故熙載錯號江左辭宗而拳拳於簡棲之碑如此本朝楊劉之文擅天下傳夷狄亦駢儷也及歐陽公起然後掃蕩無餘後進之士雖有工拙要皆近古如此碑者今人讀不能終篇已坐睡矣而沉效之乎則歐陽氏之功可謂大矣若魯直云惟有簡棲碑文章巋然立蓋戲也

卷第四十七

入蜀記

二十七日郡集於南樓在儀門之南石城上一曰黃鶴山制度闊偉登望尤勝鄂州樓觀爲多而此獨得江山之要會山谷所謂江東湖北行畫圖鄂州南樓天下無是也下闕南湖荷葉彌望中爲橋曰廣平其上皆列肆兩旁有水閣極佳但以賣酒不可往山谷云凭欄十里菱荷香謂南湖也是日早微雨晚晴二十八日同章冠之秀才甫登石鏡亭訪黃鶴樓故址石鏡亭者石城山一隅正枕大江其西與漢陽相對止隔一水人物草木可數唐沔州治漢陽縣故李太白沔州泛城南郎官湖詩序云白遷於夜郎遇故人尚書郎張謂出使夏口沔州牧杜公漢陽令王公觴於江城之南湖其後沔州廢漢陽以縣隸鄂州周世宗平淮南得其地復以爲軍太白詩云誰道此水廣狹如一疋練江夏黃鶴樓青山漢陽縣大語猶可聞故人難可見形容最妙黃魯直嘗征江夏縣睡起漢陽城亦此意老杜有公安送李晉肅入蜀余下沔鄂及登舟將適漢陽詩而卒於耒水可恨也漢陽負山帶江其南小山有僧寺者大別山也又有小別謂

今畫岳氏父子事之。史志道招飲於發運廨中，登高遠亭，望廬山，天氣澄霽，諸峯盡見，志道出新鼓鑄鐵錢。

五日，郡集於庾樓，樓正對廬山之雙劍峯，北臨大江，氣象雄麗，自京口以西，登覽之地多矣，無出庾樓右者，樓不甚高，而覺江山煙雲皆在几席間，真絕景也。庾亮嘗爲江荆豫州刺史，其實則治武昌，若武昌南樓名庾樓，猶有理。今江州治所，在晉特柴桑縣之湓口關耳，此樓附會甚明，然白樂天詩固已云潯陽欲到思無窮，庾亮樓南湓口東，則承誤亦久矣。張芸叟南遷錄云：庾亮鎮潯陽，經始此樓，其誤尤甚。

六日甲夜，有大燈毬數百，自湓浦蔽江而下，至江面廣處，分散漸遠，赫然如繁星麗天，土人云：此乃一家放五百椀，以禳災祈福，蓋江鄉舊俗云。

七日往廬山，小憩新橋市，蓋吳蜀大路，市肆壁間多蜀人題名，並溪喬木，往往皆三二百年物，蓋山之麓也。自江州至太平興國宮三十里，此適當其半，是日車馬及徒行者，憧憧不絕，云上觀，蓋往太平宮焚香，自八月一日至七日乃已，謂之白蓮會，蓮社本遠法師遺迹，舊傳遠公嘗以一日借道流，故至今太平宮歲以爲常。東林寺亦自作會，然來者反不若太平之盛，亦可笑也。晚至清虛菴，菴在撥雲峯下，皇甫道人所居，皇甫名坦，嘉州人，出遊旁郡，獨見其弟子曹彌深，登紹與煥文閣，實藏光堯皇帝御書，又有神泉清虛堂，皆宸翰題榜，宿清虛西室，曹君置酒堂中，炙鹿肉甚珍，酒尤清醇，夜寒可耐火。

卷第四十六

過人世徒以載於文選故貴之耳自漢魏之間駸駸爲此體極於齊梁而唐尤貴之天下一律至韓吏部柳柳州大變文格學者翕然慕從然駢儷之作終亦不衰故熙載錯號江左辭宗而拳拳於簡棲之碑如此本朝楊劉之文擅天下傳夷狄亦駢儷也及歐陽公起然後掃蕩無餘後進之士雖有工拙要皆近古如此碑者今人讀不能終篇已坐睡矣而沉效之乎則歐陽氏之功可謂大矣若魯直云惟有簡棲碑文章巋然立蓋戲也

卷第四十七

入蜀記

二十七日郡集於南樓在儀門之南石城上一曰黃鶴山制度闊偉登望尤勝鄂州樓觀爲多而此獨得江山之要會山谷所謂江東湖北行畫圖鄂州南樓天下無是也下闕南湖荷葉彌望中爲橋曰廣平其上皆列肆兩旁有水閣極佳但以賣酒不可往山谷云凭欄十里菱荷香謂南湖也是日早微雨晚晴二十八日同章冠之秀才甫登石鏡亭訪黃鶴樓故址石鏡亭者石城山一隅正枕大江其西與漢陽相對止隔一水人物草木可數唐沔州治漢陽縣故李太白沔州泛城南郎官湖詩序云白遷於夜郎遇故人尚書郎張謂出使夏口沔州牧杜公漢陽令王公觴於江城之南湖其後沔州廢漢陽以縣隸鄂州周世宗平淮南得其地復以爲軍太白詩云誰道此水廣狹如一疋練江夏黃鶴樓青山漢陽縣大語猶可聞故人難可見形容最妙黃魯直嘗征江夏縣睡起漢陽城亦此意老杜有公安送李晉肅入蜀余下沔鄂及登舟將適漢陽詩而卒於耒水可恨也漢陽負山帶江其南小山有僧寺者大別山也又有小別謂

風逸韻尙可想見。白公嘗以文集留草堂。後屢亡逸。真宗皇帝嘗令崇文院寫校。包以斑竹帙。送寺。建炎中又壞於兵。今獨有姑蘇版本一帙。備故事耳。草堂之旁。又有一故趾。云是王子醇樞密菴基。蓋東林爲禪苑。始於王公。而照覺禪師常總實第一祖。總公有塑像。嚴重英特人也。宿東林。

九日。至晉慧遠法師祠堂。及神運殿焚香。憩官廳堂中。有耶舍尊者劉遺民等十八人像。謂之十八賢。遠公之側。又有一人執軍持待立。謂之辟蛇童子。傳云。東林故多蛇。此童子盡拾取。投之蘄州。神運殿本龍潭。深不可測。一夕。鬼神塞之。且運良材以作此殿。皆不知實否也。然神運殿三字。唐相裴休書。則此說亦久矣。官廳重堂。邃廡廚廡備設。壁間有張文潛題詩。寺極大。連日遊歷。猶不能徧。唐碑亦甚多。惟顏魯公題名。最爲時所傳。又有聰明泉。在方丈之西。卓錫泉。在遠公祠堂後。皆久廢不汲。不可食。爲之太息。食已。游西林乾明寺。西林在東林之西。二林之間。有小市曰雁門市。傳者以爲遠公雁門人。老而懷故鄉。遂髣髴雁門邑里。作此市。漢作新豐之比也。西林本晉江州刺史陶範捨地建寺。紹興十五六年間。方爲禪居。編小非東林比。又絕弊壞。主僧仁聰。閩人。方漸興葺。然流泉泠泠。環遶庭際。殊有野趣。正殿釋迦像。著寶冠。他處未見。僧云。唐塑也。殿側有慧永法師祠堂。永公蓋遠公之兄。像下一虎偃伏。又有一居士立侍。不知何人。方丈後有塼塔。不甚高。制度古朴。予登二級而止。東廂有小閣曰待賢。蓋往時館客之地。今亦頽弊。東林寺舊額皆牛奇章八分書。筆力極渾厚。西林亦有顏魯公題名。書家以爲二林題名。顏書之冠冕也。舊聞廬山天池塼塔初成。有僧施經二匣。未幾塔震一角。經亦失所在。是日。因登望以問僧。僧云。誠然。或謂經乃刺血書。故致此異。又云。今年天池火。尺椽不遺。蓋旁野火所及也。晚復取太平宮路。還江州。

過人世徒以載於文選故貴之耳自漢魏之間駸駸爲此體極於齊梁而唐尤貴之天下一律至韓吏部柳柳州大變文格學者翕然慕從然駸駸之作終亦不衰故熙載錯號江左辭宗而拳拳於簡棲之碑如此本朝楊劉之文擅天下傳夷狄亦駢儷也及歐陽公起然後播蕩無餘後進之士雖有工拙要皆近古如此碑者今人讀不能終篇已坐睡矣而沉效之乎則歐陽氏之功可謂大矣若魯直云惟有簡棲碑文章巋然立蓋戲也

卷第四十七

入蜀記

二十七日郡集於南樓在儀門之南石城上一曰黃鶴山制度闊偉登望尤勝鄂州樓觀爲多而此獨得江山之要會山谷所謂江東湖北行畫圖鄂州南樓天下無是也下闕南湖荷葉彌望中爲橋曰廣平其上皆列肆兩旁有水閣極佳但以賣酒不可往山谷云凭欄十里菱荷香謂南湖也是日早微雨晚晴二十八日同章冠之秀才甫登石鏡亭訪黃鶴樓故址石鏡亭者石城山一隅正枕大江其西與漢陽相對止隔一水人物草木可數唐河州治漢陽縣故李太白河州泛城南郎官湖詩序云白遷於夜郎遇故人尚書郎張謂出使夏口河州牧杜公漢陽令王公觴於江城之南湖其後河州廢漢陽以縣隸鄂州周世宗平淮南得其地復以爲軍太白詩云誰道此水廣狹如一疋練江夏黃鶴樓青山漢陽縣大語猶可聞故人難可見形容最妙黃魯直嘗征江夏縣睡起漢陽城亦此意老杜有公安送李晉肅入蜀余下河鄂及登舟將適漢陽詩而卒於耒水可恨也漢陽負山帶江其南小山有僧寺者大別山也又有小別謂

各忠所事。神靈共食。皆可以無媿邪。徹奠自祠。後步至旌教寺。寺爲酒務及酒官廨。像設斂置一屋。盡逐去僧輩。亦事之已甚者。富池蓋隸興國軍。

十四日。曉雨過一小石山。自頂直削去半。與餘姚江濱之蜀山絕相類。拋大江。遇一木楸。廣十餘丈。長五十餘丈。上有三四十家。妻子雞犬白碓皆具。中爲阡陌。相往來。亦有神祠。素所未覩也。舟人云。此尙其小者耳。大者於楸上鋪土作蔬圃。或作酒肆。皆不復能入夾。但行大江而已。是日逆風挽船。自平旦至日昃。纒行十五六里。泊劉官磯旁。蘄州界也。兒輩登岸。歸云。得小徑。至山後。有陂湖。渺然蓮菱甚富。沿湖多木芙蓉。數家夕陽中。蘆藩旁舍。宛有幽致。而寂然無人聲。有大梨欲買之。不可得。湖中小艇采菱。呼之亦不應。更欲窮之。會見道旁設機。疑有虎狼。遂不敢往。劉官磯者。傳云漢照烈入吳。嘗橫舟於此。晚觀大龍浮沉水中。

十五日。微陰。西風益勁。挽船尤艱。自富池以西。沿江之南。皆大山起伏如濤頭。山麓時有居民。往往作棚持弓矢。伏其上以伺虎。過龍眼磯。江中拳石耳。磯旁山上有龍祠。晡後得便風。次蘄口鎮。居民繁錯。蜀舟泊岸下甚衆。監稅秉義郎高世棟來。舊在京口。識之。言此鎮歲課十五萬緡。雁翅歲課二十六萬緡。夜與諸子登岸。臨大江觀月。江面遠與天接。月影入水。蕩搖不定。正如金虬。動心駭目之觀也。是日買熟藥於蘄口市。藥貼中皆有煎煮所須。如薄荷烏梅之類。此等皆客中不可倉卒求者。藥肆用心如此。亦可嘉也。十六日。過新野夾。有石瀨茂林。始聞秋鶯。沙際水牛至多。往往數十爲羣。吳中所無也。地屬興國軍。大治縣。當是土產所宜。爾晚過道士磯。石壁數百尺。色正青。了無竅穴。而竹樹迸根。交絡其上。蒼翠可愛。自過

小孤臨江峯嶂。無出其右。磯一名西塞山。卽玄真子漁父辭所謂西塞山前白鷺飛者。李太白送弟之江東云。西塞當中路。南風欲進船。必在荆楚作。故有中路之句。張文潛云。危磯插江生。石色擘青玉。殆爲此山寫真。又云。已逢斌媚散花峽。不泊艱危道士磯。蓋江行惟馬當及西塞。最爲瀟險難上。拋江泊散花洲。洲與西塞相直。前一夕。月猶未極圓。蓋望正在是夕。空江萬頃。月如紫金盤。自水中涌出。平生無此中秋也。

十七日。過回風磯。無大山。蓋江濱石磯耳。然水急浪湧。舟過甚艱。過蘭溪。東坡先生所謂山下蘭芽短。浸谿者。買鹿肉供膳。晚泊巴河口。距黃州二十里。一市聚也。有馬祈寺。吳大帝刑馬壇。傳云。吳攻壽春。刑白馬祭江神於此。自蘭谿而西。江面尤廣。山阜平遠。兩日皆逆風。舟人以食盡。欲來巴河。糴米極力牽挽。日皆行八九十里。蘇黃門譚高安東坡先生送至巴河。卽此地也。張文潛亦有巴河道中詩云。東南地缺天連水。春夏風高浪捲山。

十八日。食時方行。晡時至黃州。州最僻陋。少事。杜牧之所謂平生睡足處。雲夢澤南州。然自牧之王元之出守。又東坡先生張文潛謫居。遂爲名邦。泊臨臯亭。東坡先生所嘗寓。與秦少游書。所謂門外數步卽大江是也。煙波渺然。氣象疎豁。見知州右朝奉郎直祕閣楊由義通判右奉議郎陳紹復。州治陋甚。廳事僅可容數客。倅居差勝。晚移舟竹園步。蓋臨臯多風濤。不可夜泊也。黃州與樊口正相對。東坡所謂武昌樊口幽絕處也。漢昭烈用吳魯子敬策。自當陽進駐鄂縣之樊口。卽此地也。

十九日早。游東坡。自州門而東。岡壘高下。至東坡。則地勢平曠。開豁東起一壘。頗高。有屋三間。一龜頭。曰

居士亭。亭下面南一堂。頗雄。四壁皆畫。雪堂中有蘇公像。烏帽紫裘。橫按筇杖。是爲雪堂。堂東大柳。傳以爲公手植。正南有橋。勝曰小橋。以莫忘小橋流水之句得名。其下初無渠澗。遇雨則有涓流耳。舊止片石布其上。近輒增廣爲木橋。覆以一屋。頗敗人意。東一井曰暗井。取蘇公詩中走報暗井出之句。泉寒熨齒。但不甚甘。又有四望亭。正與雪堂相直。在高阜上。覽觀江山。爲一郡之最。亭名見蘇公及張文潛集中。坡西竹林。古氏故物。號南坡。今已殘伐無幾。地亦不在古氏矣。出城五里。至安國寺。亦蘇公所嘗寓。兵火之餘。無復遺迹。惟遠寺茂林啼鳥。似猶有當時氣象也。郡集於棲霞樓。本太守閻丘孝終公顯所作。蘇公樂府云。小舟橫截春江。臥看翠壁紅樓起。正謂此樓也。下臨大江。煙樹微茫。遠山數點。亦佳處也。樓頗華潔。先是郡有慶瑞堂。謂一故相所生之地。後毀以新此樓。酒味殊惡。蘇公齋湯蜜汁之戲。不虛發。郡人何斯舉詩亦云。終年飲惡酒。誰敢督郵然。文潛乃極稱黃州酒。以爲自京師之外。無過者。故其詩云。我初謫官時。帝問司酒神。曰此好飲徒。聊給酒養真。去國一千里。齊安酒最醇。失火而得雨。仰戴天公仁。豈文潛謾黃時。適有佳匠乎。循小徑繚州宅之後。至竹樓。規模甚陋。不知當王元之時。亦止此邪。樓下稍東。卽赤壁磯。亦非岡爾。略無草木。故韓子蒼待制詩云。豈有危巢與栖鶻。亦無陳迹但飛鷗。此磯圖經及傳者。皆以爲周公瑾敗曹操之地。然江上多此名。不可考。質李太白赤壁歌云。烈火張天照雲海。周瑜於此敗曹公。不指言在黃州。蘇公尤疑之。賦云。此非曹孟德之困於周郎者乎。樂府云。故壘西邊。人道是當日周郎赤壁。蓋一字不輕下如此。至韓子蒼云。此地能令阿瞞走。則真指爲公瑾之赤壁矣。又黃人實謂赤壁曰赤鼻。尤可疑也。晚復移舟菜園步。又遠竹園三四里。蓋黃州臨大江。了無港澳可泊。或云舊有澳。郡官厭。

過客，故塞之。

二十日曉，離黃州。江平無風，挽船正自赤壁磯下過，多奇石，五色錯雜，粲然可愛。東坡先生怪石供是也。挽行十四五里，江面始稍狹，隔江岡阜，延袤竹樹葱蘢，漁家相映，幽邃可愛。復出大江，過三江口，極望無際，泊咸磯港。

二十一日過雙柳夾，回望江上，遠山重復深秀，自離黃，雖行夾中，亦皆曠遠，地形漸高，多種菽粟蕎麥之屬，晚泊揚羅汛，大隄高柳，居民稠衆，魚賤如土，百錢可飽二十口，又皆巨魚，欲覓小魚飼貓，不可得。

二十二日，平旦微雨，過青山磯，多碎石及淺灘，晚泊白楊夾口，距鄂州三十里，陸行止十餘里，居民及泊舟甚多，然大抵皆軍人也。

二十三日，便風掛帆，自十四日至是，始得風，食時至鄂州，泊稅務亭，賣船客舫，不可勝計，銜尾不絕者數里，自京口以西，皆不及。李太白贈江夏韋太守詩云：萬舸此中來，連帆過揚州。蓋此郡自唐爲衝要之地，夔州逐兵來參，見知州右朝奉郎張郛之彥，轉運判官右朝奉大夫謝師稷，市邑雄富，列肆繁錯，城外南市亦數里，雖錢塘建康不能過，隱然一大都會也。吳所都武昌，乃今武昌縣，此州在吳名夏口，亦要害，故周公瑾求以精兵進住夏口，而晉武帝亦詔王濬唐彬，既定巴丘，與胡奮王戎共平夏口，武昌順流長驚也，自江州至此七百里，派流雖日得便風，亦須三四日。韓文公云：益城去鄂渚，風便一日耳。過矣，蓋退之未嘗行此路也。

二十四日早，謝漕招食於漕園光華堂，依山亭館十餘，不甚葺，晚郡集於奇章堂，以唐牛思黯嘗爲武昌

節度使也。

二十五日。觀大軍教習水戰。大艦七百艘。皆長二三十丈。上設城壁樓櫓。旗幟。金鼓鞀鞞。破巨浪。往來捷如飛翔。觀者數萬人。實天下之壯觀也。

二十六日。與統紆同遊頭陀寺。寺在州城之東隅石城山。山繚繞如伏蛇。自西巨東。因其上爲城。缺壞僅存。州治及漕司。皆依此山。寺毀於兵火。汴僧舜廣住持三十年。與蒼略備。自方丈西北。躡支徑。至絕頂。舊有奇章亭。今已廢。四顧江山井邑。靡有遺者。李太白江夏贈韋南陵詩云。頭陀雲外多僧氣。正謂此寺也。黃魯直亦云。頭陀全盛時。宮殿梯空級。藏殿後有南齊王簡棲碑。唐開元六年建。蘇州刺史張庭圭溫玉書。韓熙載撰碑陰。徐鍇題額。最後云。唐歲在己巳。武昌軍節度觀察留後知軍州事楊守忠重立。前鄂州唐年縣主簿祕書省正字韓夔書碑陰云。乃命猶子夔。正其舊本。而刊寫之。以是知夔爲熙載兄弟之子也。碑字前後一手。又作溫字不全。蓋南唐尊徐溫爲義祖。而避其名。則此碑蓋夔重書也。碑陰又云。皇上鼎新文物。教被華夷。如來妙旨。悉已徧窮。百代文章。罔不備舉。故是寺之碑。不言而與。按此碑立於己巳歲。當皇朝之開寶二年。南唐危蹙日甚。距其亡六年。爾熙載大臣。不以覆亡爲懼。方且言其主鼎新文物。教被華夷。固已可怪。又以窮佛旨。舉遺文。及興是碑。爲盛誇誕妄認。真可爲後世發笑。然熙載死。李主猶恨不及相之。君臣之感如此。雖欲久存。得乎。唐制節度使不在鎮。而以副大使或留後居任。則云知節度事。此云知軍州事。蓋漸變也。唐年縣本故唐時名。梁改曰臨夏。後唐復晉。又改臨江。然歷五代。鄂州未嘗屬中原。皆遙改耳。故此碑開寶中建。而猶曰唐年也。至江南平。始改崇陽云。簡棲爲此碑。駢儻卑弱。初無

過人。世徒以載於文選。故貴之耳。自漢魏之間。屢屢爲此體。極於齊梁。而唐尤貴之。天下一律。至韓吏部。柳柳州。大變文格。學者翕然慕從。然駢儷之作。終亦不衰。故熙載錯號江左辭宗。而拳拳於簡樸之碑。如此。本朝楊劉之文。擅天下。傳夷狄。亦駢儷也。及歐陽公起。然後播蕩無餘。後進之士。雖有工拙。要皆近古。如此碑者。今人讀不能終篇。已坐睡矣。而況效之乎。則歐陽氏之功。可謂大矣。若魯直云。惟有簡樸碑。文章歸然立。蓋戲也。

卷第四十七

入蜀記

二十七日。郡集於南樓。在儀門之南石城上。一曰黃鶴山。制度閎偉。登望尤勝。鄂州樓觀爲多。而此獨得江山之要會。山谷所謂江東湖北行畫圖。鄂州南樓天下無是也。下闕南湖。荷葉彌望。中爲橋。曰廣平。其上皆列肆。兩旁有水閣。極佳。但以賣酒。不可往。山谷云。凭欄十里。菱荷香。謂南湖也。是日早微雨。晚晴。二十八日。同章冠之秀才甫。登石鏡亭。訪黃鶴樓故址。石鏡亭者。石城山一隅。正枕大江。其西與漢陽相對。止隔一水。人物草木可數。唐沔州治漢陽縣。故李太白沔州泛城南郎官湖詩序云。白遷於夜郎。遇故人尙書郎張謂。出使夏口。沔州牧杜公漢陽令王公。觴於江城之南湖。其後沔州廢。漢陽以縣隸鄂州。周世宗平淮南。得其地。復以爲軍。太白詩云。誰道此水廣。狹如一疋練。江夏黃鶴樓。青山漢陽縣。大語猶可聞。故人難可見。形容最妙。黃魯直嘗征江夏縣。睡起漢陽城。亦此意。老杜有公安送李晉肅入蜀。余下沔。及登舟。將適漢陽詩。而卒於耒水。可恨也。漢陽負山帶江。其南小山。有僧寺者。大別山也。又有小別。謂

之二別云黃鶴樓。舊傳費禕飛升於此。後忽乘黃鶴來歸。故以名樓。號爲天下絕景。崔灑詩最傳。而太白奇句得於此者尤多。今樓已廢。故址亦不復存。問老吏云。在石鏡亭南樓之間。正對鸚鵡洲。猶可想見其地。樓榜李監篆。石刻獨存。太白登此樓。送孟浩然詩云。孤帆遠映碧山盡。惟見長江天際流。蓋帆樯映遠山。尤可觀。非江行久不能知也。復與冠之出漢陽門遊仙洞。止是石壁數尺。皆直裂無洞穴之狀。舊傳有仙人隱其中。嘗啓洞出游。老兵遇之。得黃金數餅。後化爲石。東坡先生有詩紀其事。初不云所遇何人。且太白固已云。頗聞列仙人。於此學飛術。一朝向蓬海。千載空石室。今鄂人謂之呂公洞。蓋流俗附會也。有道人。涇州人。結廬洞側。設呂公像。其中洞少南。卽石鏡山麓。巖頑石也。色黃赤。皴皴了不能鑑物。可謂浪得名者。由江濱堤上還船。民居市肆。數里不絕。其間復有巷陌。往來憧憧。如織蓋。四方商賈所集。而蜀人爲多。

二十九日早。有廣漢僧世全。左縣僧了證。來附從人舟。日昃。移舟江口。回望堤上樓閣重複。燈火歌呼。夜分乃已。招醫趙隨爲靈照視脈。

三十日黎明。離鄂州。便風掛帆。沿鸚鵡洲南行。洲上有茂林神祠。遠望如小山洲。蓋禰正平被殺處。故太白詩云。至今芳洲上。蘭蕙不敢生。梁王僧辯擊邵陵王綸軍至鸚鵡洲。卽此地也。自此以南爲漢水。禹貢所謂蟠冢導漾。東流爲漢者。水色澄澈可鑑。太白云。楚水清若空。蓋言此也。過謝家磯。金雞洲。磯不甚高。而石皆橫裂。如累層壁。得縮項鱸魚。重十斤。泔中有聚落。如小縣。出鱸魚。居民率以賣鮮爲業。晚泊通濟口。自此入沌。沌讀如篆。字書云。水名。在江夏。過九月。則沌涸不可行。必由巴陵至荊渚。

九月一日始入沔。實江中小夾也。過新潭。有龍祠。甚華潔。自是遂無復居人。兩岸皆葭葦彌望。謂之百里荒。又無挽路。舟人以小舟引百丈。入夜財行四十五里。泊葦葦中。平時行舟多於此。遇盜通濟。巡檢持兵來警。遽不寐。達旦。

二日東岸葦稍薄。缺時見大江渺瀰。蓋巴陵路也。晡時。次下郡。始有二十餘家。皆業漁釣。蘆藩茅屋。宛有幽致。魚尤不論錢。自此始復有挽路。登舟背望。竟陵遠山。泊白白。有莊居數家。門外皆古柳。侵雲。

三日自入沔。食無菜。是日始得菘及蘆。服然不肯斷根。皆刈葉而已。過八疊。汊口皆有民居。晚泊歸子保。亦有十餘家。多桑柘榆柳。

四日平旦始解舟。舟人云。自此陂澤深阻。虎狼出沒。未明而行。則挽卒多爲所害。是日早見舟人焚香祈神。云告紅頭須。小使頭。長年三老。莫令錯呼。錯喚。問何謂長年三老。云梢工是也。長讀如長幼之長。乃知老杜長年三老。長歌。莫白晝攤錢。高浪中之語。蓋如此。因問何謂攤錢。云博也。按梁冀能意錢之戲。注云。即攤錢也。則攤錢之爲博。亦信矣。過網步。有二十餘家。在夕陽高柳中。短籬陋屋。小艇往來。正如畫圖所見。沔中之最佳處也。泊畢家池。地勢爽塏。居民頗衆。有一二家。雖茆茨結廬。而窗戶整潔。藩籬堅壯。舍傍有果園。甚盛。蓋亦一聚之雄也。與諸子及二僧步登岸。遊廣福永固寺。闐然無一人。東偏白雲軒。前橙方結實。雖小而極香。相與烹茶。破橙抵暮。乃還舟中。畢家池。蓋屬復州玉沙縣滄浪鄉云。

五日泊紫涓。

六日過東場。並水皆茂竹高林。隄淨如掃。雞犬閑暇。鳧鴨浮沒。人往來林樹間。亦有臨渡喚船者。使人悅。

然如造異境。舟人云。皆村豪園廬也。泊雞鳴。

七日泊港江。

八日早次江陵之建寧鎮。蓋沌口也。晉王澄棄荊州。別駕郭舒不肯從。澄東下。乃留屯沌口。陳侯安都討王琳至沌口。皆此地也。阻風。大魚浮水中無數。凡行沌中七日。自是泛江入石首縣界。夜觀隔江燒蘆場。煙焰。巨天如火城。光照舟中皆赤。

九日早。謁后土祠。道旁民屋。苦茹皆厚尺餘。整潔無一枝亂。挂帆拋江行三十里。泊塔子磯。江濱大山也。自離鄂州。至是始見山。買羊置酒。蓋村步以重九故。屠一羊。諸舟買之。俄頃而盡。求菊花於江上人家。得數枝。芬馥可愛。爲之頹然。徑醉。夜雨極寒。始覆絮衾。

十日阻風雨。遣小舟橫絕江面。至對岸買肉食。得大魚之半。又得一烏牡雞。不忍殺。畜於舟中。俄有村翁持菱萌一束來餉。不肯受。直遣人先之。變晚晴。開船窗觀月。

十一日舟行望西南一角。水與天接。舟人云。是爲潛軍港。古嘗潛軍伺敵於此。遙見港中有兩點正黑。疑其遠樹。則下不屬地。久之漸近。可辨。蓋二千五百斛大舟也。又有水禽雙浮江中。色白類鵝。而大。楚人謂之天鵝。飛翥絕高。有弋得者。味甚美。或曰。卽鵠也。泊三江口水淺。舟行甚艱。自此遂不復有山。太白詩。山隨平野盡。江入大荒流。蓋荊渚所作也。

十二日過石首縣。不入石首。自唐始爲縣。在龍蓋山之麓。下臨漢水。亦形勝之地。杜子美有送石首薛明府詩。卽此邑也。泊藕池。

十三日泊柳子夜過全證二僧舟中聽誦梵語般若心經此經惟蜀僧能誦

十四日次公安古所謂油口也漢昭烈駐軍始更今名規模氣象甚壯兵火之後民居多芻竹然芻屋尤精緻可愛井邑亦頗繁富米斗六七十錢知縣右儒林郎周謙孫來湖州人游二聖報恩光孝禪寺二聖謂青葉髻如來婁至德如來也皆示鬼神力士之形高二丈餘陰威凜然可畏正殿中爲釋迦右爲青葉髻如來左爲婁至德號二聖三像皆南面予按藏經駒字函梁羅浮殊童子成道爲青葉髻如來青葉髻如來再出世爲樓至如來則二如來本一身耳有碑言邑人一夕同夢二神人言我青葉髻婁至德如來也有二巨木在江干我所運者俟鄩行者來令刻爲我像已而果有人自稱鄩行者又善肖像邑人欣然請之像成人皆謂酷類所夢然碑無年月不知何代也長老祖殊南平軍人寺後有廢城髻髯尙存圖經謂之呂蒙城然老杜乃曰地曠呂蒙營江深劉備城蓋玄德子明皆屯於此也老杜曉發公安詩注云數月憩息此縣按公移居公安詩云水煙通徑草秋露接園葵而留別公安太易沙門詩云沙村白雪仍含凍江縣紅梅已放春則是以秋至此縣暮冬始去其曰數月憩息蓋爲此也泊弭節亭馴鷗低飛往來竟日不去

十五日周令說縣本在近北枕漢水沙虛岸摧漸徙而南今江流乃昔市邑也又云縣有五鄉然其不及二千戶地曠民寡如此民耕尤苦隄防數壞歲歲增築不止晚攜家再遊二聖寺衆寮有維摩刻木像甚佳云沙市工人所爲也方丈西有竹軒頗佳珠老說五祖法演禪師初住四面山子然獨處凡二年始有一道士來問道乃請作知事又三年僧寶良來與道士朝夕參叩皆得法於是演公之道溲爲人知而四

方學者始稍有至者。雖其後門人之盛稱天下。然終身不過數十衆。珠聞此於其師。已卷顏禪師。荊州絕無禪林。惟二聖而已。然蜀僧出關。必走江浙。回者又已。自謂有得。不復參叩。故語云。下江者疾走如煙。上江者鼻孔撩天。徒勞他二佛。打供了不見一僧坐禪。

十六日。過白湖。渺然無津。拋江至升子舖。有天鵝數百。翔泳水際。日入。泊沙市。自公安至此六十里。自此至荊南。陸行十里。舟不復進矣。老杜詩云。買薪猶白帝。鳴榔已沙頭。劉夢得云。沙頭檣干上。始見春江闊。皆謂此也。

十七日日入後。遷行李過嘉州。趙青船。蓋入峽船也。沙市堤上居者。大抵皆蜀人。不然。則與蜀人爲婚姻者也。

十八日。見知府資政殿學士劉恭父珙。通判右奉議郎權嗣衍。左宣教郎陳孺。荆南圖經以爲楚之郢都。梁元帝亦嘗都焉。唐爲江陵府。荆南節度。今因之。然牧守署衙。但云知荆南軍府。與永興河陽正同。初無章義。但沿舊而已。

十九日。郡集於新橋馬監。監在西門外四十里。自出城。卽黃茅彌望。每十餘里有村。疇數家而已。道遇數十騎。縱獵獲狐兔。皆繫鞍上。割鮮藉草而飲。云襄陽軍人也是。日極寒如窮冬。土人云。此月初已嘗有雪。二十日。倒橋竿。立棚牀。蓋上峽。惟用棚及百丈。不復張帆矣。百丈以巨竹四破爲之。大如人臂。予所乘千六百斛舟。凡用棚六枝。百丈兩車。

二十一日。劉帥丁內艱。分遊兵之半負肩輿。自山路先歸夔州。是日。重霧四塞。

二十二日五鼓赴能仁院。建會慶節道場。中夜後舟人祀映神屠一豕。

二十三日奠劉帥母安定郡太夫人卓氏。劉帥受弔禮與吳人同。

二十四日見左朝奉郎湖北安撫司主管機宜文字牛達可。右奉議郎安撫司幹辦公事湯衡。右朝奉郎安撫同幹辦公事趙蘊。

二十五日右文林郎知歸州興山縣高祁來。

二十六日修船始畢。骨肉入新船。祭江瀆廟。用壺酒特豕。廟在沙市之東三四里。神曰昭靈孚應。威惠廣源。蓋四瀆之一。最爲典祀之正者。然兩廡淫祠尤多。蓋荆楚舊俗也。司法參軍右迪功郎王師點錄其叔祖君儀待制訟卦講義來。君儀嚴州人。師事先大父。精於易。然遺書不傳。講義止存一篇而已。然亦其少作也。

二十七日解舟。擊鼓鳴鑼。舟人皆大噪。擁堤觀者如堵牆。泊新河口。距沙市三四里。蓋蜀人修船處。

二十八日泊方城。有嘉州人王百一者。初應募爲船之招頭。招頭蓋三老之長。願直差厚。每祭神得胙肉。倍衆人。旣而船戶趙清改用所善程小八爲招頭。百一失職快快。又不決去。遂發狂赴水。予急遣人拯之。流一里餘。三沒三踊。僅得出。一招頭得喪。能使人至死。況大於此者乎。

二十九日阻風。

十月一日過瓜洲壩倉頭百里洲。泊沱滢。皆聚落。竹樹鬱然。民居相望。亦有村夫子聚徒教授羣童。見船過。皆挾書出觀。亦有誦書不輟者。沱江別名。詩江有沱。禹貢岷山導江。東別爲沱。是也。滢則爾雅所謂春

秋夏有水。冬無水曰澗也。

二日泊桂林灣。全證二僧陸行來云。沿路民居。大抵多四方人。土著財十一也。舟人殺猪十餘口祭神。謂之開頭。

三日舟人分昨行差晚。與兒輩登隄觀蜀江。乃知李太白荆門望蜀江詩。江色綠且明。爲善狀物也。自離塔子磯。至是始望見巴山。山在松滋縣。泊灌子口。蓋松滋枝江兩邑之間。松滋晉縣。自此入蜀江。枝江唐縣。古羅國也。江陵九十九洲在焉。晉柳約之羅述甄季之聞桓玄死。自白帝至枝江。卽此地也。歐陽文忠公有枝江山行五言二十四韻。蓋文忠赴夷陵時。自此陸行至峽州。故其望州坡詩云。崎嶇幾日山行倦。卻喜坡頭見峽州。灌子口一名松滋渡。劉賓客有詩云。巴人淚應猿聲落。蜀客船從鳥道回。

四日過楊木寨。蓋松滋有四寨。曰楊木車羊高平稅家云。泊龍灣。

五日過白羊市。蓋峽州宜都縣境上宜都唐縣也。謁張文忠公天覺墓。殘伐墓木橫道。幾不可行。天覺之子直龍圖閣茂已卒。二孫一有官病狂易。一白丁也。初作墓江濱。已而不果葬。改葬山間。今墓是也。而舊墓亦不復毀。啟隧道出入。中可容數十人坐。有道人結屋其旁守之。道人出一石刻草書云。莫將外物尋奇寶。須問眞師決汞鉛。寄八瓊張子高。鍾離權始自王屋遊都下。弟子浮玉山人來乞此字。今又將西還。丹元子再請書卷之末。紹聖元年仲冬望日。權卽世。所謂鍾離先生。子高卽天覺。丹元子卽東坡先生。與之隣倡者。後有魏泰道輔跋云。天覺修黃籙醮法成。浮玉山人謂之曰。上天錄公之功。爲須彌山八瓊洞主。宜刻印謝帝而佩之。天覺不以爲信。故浮玉又出鍾離公書爲證。後丹元子又爲天覺求書卷末。又有

徐注者跋云。天覺舟過真州。方出謁。有布衣幅巾者。徑入舟中。索筆大書。閑人呂洞賓來謁。張天覺十字。擲筆即去。而天覺適歸。墨猶未乾。注真州人云。親見之。墳前碑樓壁間。有詩一篇云。秋風十驛望台星。想見冰壺照坐清。霖雨已回公且駕。挽鬚聊聽野王箏。三朝元老心方壯。四海蒼生耳已傾。白髮故人來一別。卻歸林下看昇平。蓋魏道輔贈天覺詩。後人所題者。唐立夫舍人亦有一詩。末句云。無碑堪墮淚。著句與招魂。宜都知縣右文林郎呂大辨來泊赤崖。

卷第四十八

入蜀記

六日。過荆門十二碛。皆高崖絕壁。巖巖突兀。則峽中之險可知矣。過倍望五龍及雞籠山。嵯峨正如夏雲之奇峯。荆門者。當以險固得名。碛上有石穴。正方高可通人。俗謂之荆門。則安也。晚至峽州。泊至喜亭下。峽州在唐爲硤州。後改峽。而印文則爲陝州。元豐中。郎官何洵直建言。陝與陝相亂。請改鑄印文。從山事。下少府監。而監丞歐陽發言。湖北之陝州。從阜從夾。夾從雨。入陝西之陝州。從阜從夾。夾從雨。兩人偏旁不同。本不相亂。恐四方謂小府監官。皆不識字。當時朝士之議。皆是發。而卒從洵直言。改鑄云。至喜亭記。歐陽公撰。黃魯直書。

七日。見知州右朝奉大夫葉安行字履道。以小舟遊西山甘泉寺。竹橋石磴。甚有幽趣。有靜練洗心二亭。下臨江山頗疎豁。法堂之右。小徑數十步。至一泉。曰孝婦泉。謂姜詩妻龐氏也。泉上亦有龐氏祠。然歐陽

文忠公不以爲信。故其詩曰：叢祠已廢，姜祠在。事迹難尋，楚語訛。又此篇首章云：江上孤峯蔽綠蘿。初讀之，但謂孤峯蒙藤蘿耳。及至此，乃知山下爲綠蘿谿也。又至漢景帝廟及東山寺，景帝不知何以有廟於此。歐陽公爲令時，有所雨文，在集中。東山寺亦見歐陽公詩。距望京門五里，寺外一亭，臨小池，有山如屏環之。頗佳。亭前冬青及柏，皆百餘年物。遂至夷陵縣，令見縣左從政郎胡振廳，事東至臺堂。郡守朱虞部爲歐陽公所築者，已焚壞。柱礎尙存，規模頗雄深。又東，則祠堂亦簡陋，肖像殊不類，可歎。廳事前一井，相傳爲歐陽公所浚，水極甘寒，爲一郡之冠。井旁一柵，合抱，亦傳爲公手植。晚郡集於楚塞樓，遍歷爾雅臺錦幃亭，亭前海棠二本，亦百年物。爾雅臺者，圖經以爲郭景純註爾雅於此。又有絳雪亭，取歐陽公千葉紅梨詩，而紅梨已不存矣。

八日，五鼓盡，解船過下牢關。夾江千峯萬嶂，有競起者，有獨拔者，有崩欲壓者，有危欲墜者，有橫裂者，有直坼者，有凸者，有窪者，有罅者，奇怪不可盡狀。初冬草木皆青蒼不彫，西望重山如闕，江出其間，則所謂下牢谿也。歐陽文忠公有下牢津詩云：入峽山漸曲，轉灘山更多。卽此也。繫船與諸子及證師，登三游洞，躡石磴二里，其險處不可著脚。洞大如三間屋，有一穴通人過，然陰黑峻險，尤可畏。繚山腹，樞僂自巖下，至洞前，差可行。然下臨溪潭，石壁十餘丈，水聲恐人。又一穴，後有壁可居，鍾乳歲久垂地若柱。正當穴門，上有刻云：黃大臨弟庭堅，同辛紘子大方，紹聖二年三月辛亥來遊，旁石壁上刻云：景祐四年七月十日，夷陵歐陽永叔，下缺一字，又云：判官丁下，又缺一數字。丁者，寶臣也。字元珍。今丁字下二字，亦髣髴可見。殊不類元珍字。又永叔但曰夷陵，不稱令。洞外溪上，又有一崩石偃仆，刻云：黃庭堅弟叔向子相姪，築同道。

人唐履來游觀辛亥舊題如夢中事也建中靖國元年三月庚寅按魯直初謫黔南以紹聖二年過此歲在乙亥今云辛亥者誤也泊石牌峽石穴中有石如老翁持魚竿狀略無少異

九日微雲過扇子峽重山相掩政如屏風扇疑以此得名登蝦蟆碛水晶所載第四泉是也蝦蟆在山麓臨江頭鼻吻領絕類而背脊跑處尤逼真造物之巧有如此者自背上深入得一洞穴石色綠潤泉泠泠有聲自洞出垂蝦蟆口鼻間成水簾入江是日極寒巖嶺有積雪而洞中溫然如春碛洞相對稍西有一峯孤起侵雲名天柱峯自此山勢稍平然江岸皆大石堆積彌望正如濬渠積土狀晚次黃牛廟山復高峻村人來賣茶菜者甚衆其中有婦人皆以青斑布帕首然頗白皙語音亦頗正茶則皆如柴枝草葉苦不可入口廟靈感神封嘉應保安侯皆紹興以來制書也其下卽無義灘亂石壅中流望之可畏然舟過乃不甚覺蓋操舟之妙也傳云神佐夏禹治水有功故食於此門左右各一石馬頗卑小以小屋覆之其右馬無左耳蓋歐陽公所見也廟後叢木似冬青而非莫能名者落葉有黑文類符篆葉不同兒輩亦求得數葉歐詩刻石廟中又有張文忠一贊其詞曰壯哉黃牛有大神力聳聚巨石百千萬億劍戟齒牙礪碓江側壑激波濤險不可測威脅舟人駭怖失色到羊醢酒千載廟食張公之意似謂神聚石壑流以脅人求祭饗使神之用心果如此豈能巍然廟食千載乎蓋過論也夜舟人來告請無擊更鼓云廟後山中多虎聞鼓則出

十日早以特豕壺酒祭靈感廟遂行過鹿肉虎頭史君諸灘水縮已三之二然湍險猶可畏泊城下歸州秭歸縣界也與兒曹步沙上回望正見黃牛峽廟後山如屏風巖嵯峨插天第四壘上有若牛狀其色赤

黃前有一人如著帽立者。昨日及今早。雲冒山頂。至是始見之。因至白沙市慈濟院。見主僧志堅。問地名。城下之由。云院後有楚故城。今尚在。因相與訪之。城在一岡阜上。甚小。南北有門。前臨江水。對黃牛峽。城西北一山。蜿蜒回抱。山上有伍子胥廟。大抵自荆以西。子胥廟至多。城下多奇石。如靈璧湖口之類。十一日。過達洞灘。灘惡。與骨肉皆乘。橋陸行。過灘。灘際多奇石。五色粲然可愛。亦有文成物象。及符書者。猶見黃牛峽。廟後山。太白詩云。三朝上黃牛。三暮行太遲。三朝又三暮。不覺鬢成絲。歐陽公云。朝朝暮暮。見黃牛。徒使行人過此愁。山高更遠望。猶見不是黃牛。滯客舟。蓋謠謂朝見黃牛。暮見黃牛。一朝一暮。黃牛如故。故二公皆及之。歐陽公自荆。潛赴夷陵。而有下牢三游。及蝦蟆碇。黃牛廟詩者。蓋在官時來游也。故憶夷陵山詩云。憶嘗祇吏役。鉅細悉經觀。其後又云。荒煙下牢戍。百仞塞溪湫。蝦蟆噴水簾。甘液勝飲。耐亦嘗到黃牛。泊舟聽猿狖也。晚泊馬肝峽口。兩山對立。修篁摩天。略如廬山。江岸多石。百丈繁絳。極難過。夜小雨。

十二日。早過東瀟灘。入馬肝峽。石壁高絕。處有石下垂如肝。故以名峽。其傍又有獅子巖。巖中有一小石。蹲踞張頤。碧草被之。正如一青獅子。微泉冷泠。自巖中出。舟行急。不能取嘗。當亦佳泉也。溪上又有一峯。孤起秀麗。略如小孤山。晚抵新灘。登岸宿新安驛。夜雪。

十三日。舟上新灘。由南岸上。及十七八。船底爲石所損。急遣人往拯之。僅不至。沉然銳石穿船底。牢不可動。蓋舟人載陶器多所致。新灘兩岸。南曰官漕。平聲。北曰龍門。龍門水尤湍急。多暗石。官漕差可行。然亦多銳石。故爲峽中最險處。非輕舟無一物不可上下。舟人冒利。以至此。可爲戒云。遊江濱北廟。廟正臨龍。

門。其下石罅中有溫泉。淺而不涸。一村賴之。婦人汲水。皆背負一全木盎。長二尺。下有三足。至泉旁。以杓挹水。及八分。卽倒坐旁石。束盎背上而去。大抵峽中負物率著背。又多婦人。不獨水也。有婦人負酒賣。亦如負水狀。呼買之。長跪以獻。未嫁者。率爲同心髻。高二尺。插銀釵至六隻。後插大象牙梳。如手大。十四日留驛中晚。以小舟渡江南。登山至江濱南廟。新修未畢。有一碑。前進士曾華旦撰。言因山崩石壅。成此灘。害舟不可計。於是著令自十月至二月。禁行舟。知歸州尙書都官員外郎趙誠聞於朝。疏鑿之。用工八十日。而灘害始去。皇祐三年也。蓋江絕於天聖中。至是而復通。然灘害至今未能悉去。若乘十二月。正月水落。石盡出時。亦可併力盡鑿去。銳石然灘上居民。皆利於敗舟。賤賣板木。及滯留買賣。必搖沮此役。不則賂石工。以爲石不可去。須斷以必行。乃可成。又舟之所以敗。皆失於重載。當以大字刻石置驛前。則過者必自懲創。二者皆不可不講。當以告當路者。

十五日舟人盡出所載。始能挽舟過灘。然須修治。遂易舟。離新灘。過白狗峽。泊舟與山口。肩輿遊玉虛洞。去江岸五里許。隔一溪。所謂香溪也。源出昭君村。水味美。錄於水品。色碧如黛。呼小舟以渡。過溪。又里餘。洞門小。纔袤丈。旣入。則極大。可容數百人。宏敞壯麗。如入大宮殿。中有石成幢。蓋旛旗。芝草竹筍。仙人龍虎鳥獸之屬。千狀萬態。莫不逼真。其絕異者。東石正圓如日。西石半規如月。予平生所見巖竇。無能及者。有熙寧中謝師厚峯巖起題名。又有陳堯咨所作記。敍此洞本末。云唐天寶中。獵者始得之。比歸。已夜風急。不可秉燭炬。然月明如晝。兒曹與全師皆杖策相從。殊不覺崖谷之險也。

十六日。到歸州。見知州右奉議郎賈選子公通判左朝奉郎陳端彥民瞻館於報恩光孝寺。距城一里許。

蕭然無僧。歸之爲州。纔三四百家。負臥牛山。臨江。州前卽人鮮蠻。城中無尺寸平土。灘聲常如暴風雨。至隔江有楚王城。亦山谷間。然地比歸州差平。或云楚始封於此。山海經。夏啓封孟。除於丹陽城。郭璞註云。在秭歸縣南。疑卽此也。然史記成王封熊繹於丹陽。斐駟乃云在枝江。未詳孰是。十七日。郡集於望洋堂。玩芳亭。亦皆沙石犖确之地。賈守云。州倉歲收秋夏二料。麥粟秬米。共五千餘石。僅比吳中一下戶耳。

十八日。初得艤船。羗小。然底闊而輕。於上灘爲便。

十九日。郡集於歸鄉堂。欲以是晚行。不果。訪宋玉宅。在秭歸縣之東。今爲酒家。舊有石刻宋玉宅三字。近以郡人避太守家諱。去之。或遂由此失傳。可惜也。

二十日。早離歸州。出巫峯門。過天慶觀。少留。觀唐天寶元年碑。載明皇夢老子事。巴東太守劉瑄所立。字畫頗清逸。碑側題當時郡官吏胥姓名。字亦佳。又有周顯德中。荆南判官孫光憲爲知歸州。高從讓所立碑。從讓蓋南平王家子弟。光憲亦知名。國史有事迹。蓋五代時。歸峽皆隸荆渚也。殿前有柏。數百年物。觀下卽吒灘。亂石無數。飯於靈泉寺。遂登舟。過業灘。亦名灘也。水落舟輕。俄頃遂過。

二十一日。舟中望石門關。僅通一人行。天下至險也。晚泊巴東縣。江山雄麗。大勝秭歸。但并邑極於蕭條。邑中纔百餘戶。自令廩而下。皆茅茨。了無片瓦。權縣事秭歸尉右迪功郎王康年。尉兼主簿右迪功郎杜德先來。皆蜀人也。謁寇萊公祠堂。登秋風亭。下臨江山。是日重陰微雪。天氣飄飄。復觀亭名。使人悵然。始有流落天涯之歎。遂登雙柏堂。白雲亭。堂下舊有萊公所植柏。今已槁死。然南山重複。秀麗可愛。白雲亭

則天下幽奇絕境。羣山環擁，層出間見。古木森然，往往二三百年物。欄外雙瀑，瀉石澗中。跳珠蹙玉，冷入人骨。其下是爲慈溪，奔流與江會。予自吳入楚，行五千餘里，過十五州，亭榭之勝，無如白雲者。而止在縣。靡聽事之後，巴東了無一事。爲令者可以寢飯於亭中，其樂無涯。而闕令動輒二三年，無肯補者。何哉？二十二日，發巴東，山益奇怪。有夫子洞者，一竇在峭壁絕高處，人迹所不可至。然髮髯若有欄楯，不知所謂夫子者何也。過三分泉，自山竇中出，止兩派。俗云三派有年，兩派中熟一派，或絕流饑饉，泊疲石。夜雨二十三日，過巫山，凝真觀，謁妙用真人祠。真人，卽世所謂巫山神女也。祠正對巫山峯巒，上入霄漢。山脚直插江中。議者謂太華衡廬皆無此奇，然十二峯者不可悉見。所見八九峯，惟神女峯最爲纖麗奇峭，宜爲仙真所託。祝史云：每八月十五夜，月明時，有絲竹之音，往來峯頂。山猿皆鳴，達旦方漸止。廟後山半有石壇，平曠。傳云夏禹見神女，授符書於此。壇上觀十二峯，宛如屏障。是日天字晴霽，四顧無纖翳。惟神女峯上有白雲數片，如鸞鶴翔舞，裴徊久之不散，亦可異也。祠舊有鳥數百，送迎客舟。自唐夔州刺史李貽詩已云：羣鳥幸昨餘矣。近乾道元年，忽不至，今絕無一鳥，不知其故。泊清水洞，洞極深，後門自山後出，但驟關。水流其中，鮮能入者。歲旱，祈雨頗應。權知巫山縣左文林郎冉徽之尉右迪功郎文庶幾來。

二十四日早，抵巫山縣。在峽中，亦壯縣也。市井勝歸峽二郡，隔江南陵山極高大，有路如線，盤屈至絕頂，謂之一百八盤。蓋施州正路。黃魯直詩云：一百八盤擲手上，至今歸夢繞羊腸。卽謂此也。縣廡有故鐵盆，底銳似半鑿，狀極堅厚，銘在其中。蓋漢永平中物也。缺處鐵色光黑，如佳漆。字畫淳質，可愛。玩有石刻魯直作益記。大略言建中靖國元年，予弟叔向嗣直，自涪陵尉攝縣事，予起戎州來寓縣廡。此益舊以種蓮。

余洗滌乃見字。云遊楚故離宮。俗謂之細腰宮。有一池。亦當時宮中燕遊之地。今湮沒略盡矣。三面皆荒山。南望江山奇麗。又有將軍墓。東晉人也。一碑在墓後。跌陷入地。碑傾前欲壓字。纔半存。

二十五日。晡後至大谿口泊舟。出美梨。大如升。

二十六日。發大谿口。入瞿唐峽。兩壁對聳。上入霄漢。其平如削成。仰視天。如疋練。然水已落。峽中平如油。盡過聖姥泉。蓋石上一罅。人大呼於旁。則泉出。屢呼。則屢出。可怪也。晚至瞿唐關。唐故夔州。與白帝城相連。杜詩云。白帝夔州各異城。蓋言難辨也。關西門正對巖。預堆堆碎石積成。出水數十丈。土人云。方夏秋水漲時。水又高於堆數十丈。肩輿入關。謁白帝廟。氣象甚古。松柏皆數百年物。有數碑。皆孟蜀時所立。庭中石筍。有黃魯直建中靖國元年題字。又有越公堂。隋楊素所創。少陵爲賦詩者。已毀。今堂近歲所築。亦甚宏壯。自關而東。卽東屯少陵故居也。

二十七日早。至夔州。州在山麓沙上。所謂魚復永安宮也。宮今爲州倉。而州治在宮西北。甘夫人墓西南。景德中。轉運使丁謂。薛顏所徙。比白帝頗平曠。然失關險。無復形勢。在瀼之西。故一曰瀼西。土人謂山間之流。通江者曰瀼云。州東南有八陣磧。孔明之遺迹。碎石行列如引繩。每歲江漲。磧上水數十丈。比退。陣石如故。

卷第四十九

赤壁詞招韓無咎遊金山。

陸放翁集 五 渭南文集 卷四十九

禁門鐘曉。憶君來朝路。初翔鸞鵠。西府中臺推獨步。行對金蓮宮燭。燧繡華幘。仙葩寶帶。看卽飛騰速。人生難料。一尊此地相屬。回首紫陌青門。西湖閑院。鎖千梢脩竹。素壁棲鴉應好在。殘夢不堪重續。歲月驚心。功名看鏡。短髮無多綠。一歡休惜。與君同醉浮玉。

浣沙溪和無咎韻

嬾向沙頭醉玉瓶。喚君同賞小窗明。夕陽吹角最關情。忙日苦多閑日少。新愁常續舊愁生。客中無伴怕君行。

又南鄖席上

浴罷華清第二湯。紅綿撲粉玉肌涼。娉婷初試藕絲裳。鳳尺裁成猩血色。螭奩熏透麝臍香。水亭幽處捧霞觴。

青玉案與朱景參會北道

西風挾雨聲翻浪。恰洗盡黃茆瘴。老慣人間齊得喪。千巖高臥。五湖歸棹。替卻凌煙像。故人小駐平戎帳。白羽腰間氣何壯。我老漁樵君將相。小槽紅酒。晚香丹荔。記取蠻江上。

水調歌頭多景樓

江左占形勝。最數古徐州。連山如畫。佳處縹渺著危樓。鼓角臨風悲壯。烽火連空明滅。往事憶孫劉。千里曜戈甲。萬竈宿貔貅。露霑草。風落木。歲方秋。使君宏放。談笑洗盡古今愁。不見襄陽登覽。磨滅遊人無數。遺恨黯難收。叔子獨千載。名與漢江流。

浪淘沙丹陽浮玉亭席上作。

綠樹暗長亭。幾把離尊。陽關常恨不堪聞。何況今朝秋色裏。身是行人。清淚滄羅巾。各自消魂。一江離恨恰平分。安得千尋橫鐵鎖。截斷煙津。

定風波遺賢道上見梅。贈王伯謫。

軟帽垂鞭送客回。小橋流水一枝梅。衰病逢春都不記。誰謂。幽香卻解逐人來。安得身閑頻置酒。攜手。與君看到十分開。少壯相從今雪鬢。因甚流年羈恨兩相催。

南鄉子

歸夢寄吳檣。水驛江程去路長。想見芳洲初繫纜。斜陽。煙樹參差認武昌。愁鬢點新霜。曾是朝衣染御香。重到故鄉交舊少。淒涼。卻恐它鄉勝故鄉。

又

早歲入皇州。樽酒相逢盡勝流。三十年來真一夢。堪愁。客路蕭蕭兩鬢秋。蓬嶼偶重遊。不待人嘲我自羞。看鏡倚樓俱已矣。扁舟。月笛煙篴萬事休。

滿江紅

危堞朱欄。登覽處。一江秋色。人正似。征鴻社燕。幾番輕別。繾綣難忘當日語。淒涼又作它鄉客。問鬢邊。都有幾多絲。真堪織。楊柳院。秋千陌。無限事。成虛擲。如今何處也。夢魂難覓。金鴨微溫香縹渺。錦茵初展。情蕭瑟。料也應紅淚伴秋霖。燭前滴。

又夔州催王伯禮侍御尋梅之集。

疎蕊幽香禁不過。晚寒愁絕。那更是巴東江上。楚山千疊。軟帽閑尋西瀼路。鞦韆笑向南枝說。恐使君歸去。上鑿坡。孤風月。清鏡裏。悲華髮。山驛外。溪橋側。悽然回首處。鳳凰城闕。顛顛如今誰領路。飄零已是無顏色。問行廚。何日喚賓僚。猶堪折。

感皇恩 伯禮立春日生日。

春色到人間。綵旛初戴。正好春盤細生菜。一般日月。只有僂家偏耐。雪霜從點鬢。朱顏在。溫詔鼎來。延英催對。鳳閣鸞臺看。除拜對衣裁穩。恰稱毳紋新帶。箇時方旋了。功名債。

又

小閣倚秋空。下臨江渚。漠漠孤雲未成雨。數聲新雁。回首杜陵何處。壯心空萬里。人誰許。黃閣紫橪。築壇開府。莫怕功名欠人做。如今熟計。只有故鄉歸路。石帆山脚下。菱三畝。

好事近 寄張真甫。

羈雁未成歸。腸斷寶箏零落。那更凍醪無力。似故人情薄。瘴雲蠻雨暗孤城。身在楚山角。煩問劍南消息。怕還成疎索。

又

風露九霄寒。侍宴玉華宮闕。親向紫皇香案。見金芝千葉。碧壺仙露醞初成。香味兩奇絕。醉後卻騎丹鳳。看蓬萊春色。

又次宇文卷目詞

客路苦思歸。愁似蠶絲千緒。夢裏鏡湖煙雨。看山無重數。
尊前消盡少年狂。慵著送春語。花落燕飛庭
戶。歎年光如許。

又

歲晚喜東歸。掃盡市朝陳迹。揀得亂山環處。釣一潭澄碧。
賣魚沽酒醉還醒。心事付橫笛。家在萬重雲
外。有沙鷗相識。

又

華表又千年。誰記駕雲孤鶴。回首舊曾遊處。但山川城郭。
紛紛車馬滿人間。塵土汗芒屨。且訪葛仙丹
井。看巖花開落。

又

揮袖別人間。飛躡峭崖蒼壁。尋見古僊丹竈。有白雲成積。
心如潭水靜無風。一坐數千息。夜半忽驚奇
事。看鯨波曠日。

又

溢口放船歸。薄暮散花洲宿。兩岸白蘋紅蓼。映一簑新綠。
有沽酒處便爲家。菱芡四時足。明日又乘風
去。任江南北。

又登梅仙山絕頂望海

陸放翁集 五 渭南文集 卷四十九

揮袖上西峯。孤絕去天無尺。拄杖下臨鯨海。數烟颿歷歷。貪看雲氣舞青鸞。歸路已將夕。多謝半山松。吹解慙慙留客。

又

小倦帶餘醒。澹澹數椽斜日。驅退睡魔十萬。有雙龍蒼壁。少年莫笑老人衰。風味似平昔。扶杖凍雲深處。探溪梅消息。

又

覺箇有緣人。分付玉壺靈藥。誰向市廛深處。識遼天孤鶴。月中吹笛下巴陵。條華赴前約。今古廢興何限。歎山川如昨。

又

平旦出秦關。雪色駕車雙鹿。借問此行安往。賞清伊脩竹。漢家宮殿劫灰中。春草幾回綠。君看變遷如許。況紛紛榮辱。

又

秋曉上蓮峯。高躡倚天青壁。誰與放翁爲伴。有天壇輕策。鏗然忽變赤龍飛。雷雨四山黑。談笑做成豐歲。笑禪龍柳栗。

鷓鴣天 送葉夢錫

家住東吳近帝鄉。平生豪舉少年場。十千沽酒青樓上。百萬呼盧錦瑟傍。身易老。恨難忘。尊前贏得是

淒涼。君歸爲報京華舊。一事無成兩鬢霜。

又 馮萌驛作。

看盡巴山看蜀山。子規江上過春殘。慣眠古驛常安枕。熟聽陽關不慘顏。慵服氣。嬾燒丹。不妨青鬢戲人間。祕傳一字神仙訣。說與君知只是頑。

又

梳髮金盤剩一窩。畫眉鸞鏡暈雙蛾。人間何處無春到。只有伊家獨占多。微步處。奈嬌何。春衫初換麴塵羅。東鄰鬪草歸來晚。忘卻新傳子夜歌。

又

家住蒼煙落照間。絲毫塵事不相關。樹殘玉瀝行穿竹。卷罷黃庭臥看山。貪嘯傲。任衰殘。不妨隨處一開顏。元知造物心腸別。老卻英雄似等閑。

又

插脚紅塵已是顛。更求平地上青天。新來有箇生涯別。買斷煙波不用錢。沽酒市。採菱船。醉聽風雨擁簑眠。三山老子真堪笑。見事遲來四十年。

又

嚮向青門學種瓜。只將漁釣送年華。雙雙新燕飛春岸。片片輕鷗落晚沙。歌縹渺。鱗嘔啞。酒如清露鮮如花。逢人問道歸何處。笑指船兒此是家。

又薛公蕭家席上作。

南浦舟中兩玉人。誰知重見楚江濱。憑教後苑紅牙版。引上西川綠錦茵。纔淺笑。卻輕嗔。淡黃楊柳又催春。情知言語難傳恨。不似琵琶道得真。

慕山溪送伯禮。

元戎十乘出次高唐館。歸去舊鷓行。更何人齊飛霄漢。瞿唐水落。惟是淚波深。催鼻鼓。起牙橋。難鎖長江斷。春深籠禁。紅日宮。輒暖。何處望音塵。黯消魂。層城飛觀。人情見慣。不敢恨相忘。梅驛外。蓼灘邊。只待除書看。

又遊三榮龍祠。

窮山孤壘。臘盡春初破。寂寞掩空齋。好一箇無聊底我。嘯臺龍岫。隨分有雲山。臨淺瀨。蔭長松。閑據胡牀坐。三盃徑醉。不覺紗巾墮。畫角喚人歸。落梅村。籃輿夜過城門漸近。幾點妓衣紅。官驛外。酒壚前。也有閑燈火。

木蘭花立春日作。

三年流落巴山道。破盡青衫塵滿帽。身如西瀼渡頭雲。愁抵瞿唐關上草。春盤春酒年年好。試戴重簷判醉倒。今朝一歲大家添。不是人間偏我老。

朝中措梅。

幽姿不入少年場。無語只淒涼。一箇飄零身世。十分冷淡心腸。江頭月底。新詩舊夢。孤恨清香。任是春

風不管也曾先識東皇

又代譚得稱作。

怕歌愁舞嬾逢迎。粧晚託春醒。總是向人深處。當時枉道無情。關心近日。啼紅密訴。剪綠深盟。杏館花陰恨淺。畫堂銀燭嫌明。

又

琴瑟離鼓。餞流年。燭焰動金船。綵燕難尋前夢。酥花空點春妍。文園謝病。蘭成久旅。回首凄然。明月梅山笛夜。和風禹廟鶯天。

臨江仙離果州作。

鳩雨催成新綠。燕泥收盡殘紅。春光還與美人同。論心空眷眷。分袂卻匆匆。只道真情易寫。那知怨句難工。水流雲散各西東。半廊花院月。一帽柳橋風。

蝶戀花離小益作。

陌上簫聲寒食近。雨過園林。花氣浮芳潤。千里斜陽鐘欲暝。憑高望斷南樓信。海角天涯行路盡。三十二年。無處無遺恨。天若有情終欲問。忍教霜點相思鬢。

又

桐葉晨飄蛩蛩夜語。旅思秋光。黯黯長安路。忽記橫戈盤馬處。散關清渭應如故。江海輕舟今已具。一卷

又

水漾萍根風卷絮。倩笑嬌顰。忍記逢迎處。只有夢魂能再遇。堪嗟夢不由人做。夢若由人何處去。短帽輕衫。夜夜眉州路。不怕銀缸深繡戶。只愁風斷青衣渡。

敘頭鳳

紅酥手。黃藤酒。滿城春色宮牆柳。東風惡。歡情薄。一懷愁緒。幾年離索。錯錯錯。春如舊。人空瘦。淚痕紅。迴蛟綃透。桃花落。閑池閣。山盟雖在。錦書難託。莫莫莫。

清商怨馮夢騷作

江頭日莫痛飲。乍雪晴猶凜。山驛淒涼。燈昏人獨寢。鴛機新寄斷錦。飲主事。不盡重省。夢波南樓。險雲堆一枕。

水龍吟榮甫作

樽前花底尋春處。堪歎心情全減。一身萍寄。酒徒雲散。佳人天遠。那更今年。瘴煙蠻雨。夜郎江畔。漫倚樓橫。笛。隔窗看鏡。時揮涕。驚流轉。花落月明庭院。悄無言。魂消腸斷。憑肩攜手。當時曾效。畫梁栖燕。見說新來。網縈塵暗。舞衫歌扇。料也羞顛顛。慵行芳徑。怕啼鴛見。

秋波媚七月十六日晚登高興亭望長安南山

秋到邊城角聲哀。烽火照高臺。悲歌擊筑。憑高酌酒。此興悠哉。多情誰似南山月。特地莫雲開。瀟橋煙柳。曲江池館。應待人來。

又

曾散天花蕊珠宮。一念墮塵中。鉛華洗盡。珠璣不御。道骨仙風。東遊我醉騎鯨去。君駕素鸞從。垂虹看月。天臺采藥。更與誰同。

采桑子

寶釵樓上粧梳晚。嬾上鞦韆。閑撥沉煙。金縷衣寬睡鬢偏。鱗鴻不寄遼東信。又是經年。彈淚花前。愁入春風十四絃。

卜算子咏梅

驛外斷橋邊。寂寞開無主。已是黃昏獨自愁。更著風和雨。無意苦爭春。一任羣芳妬。零落成泥碾作塵。只有香如故。

沁園春三疊橫塘閣小宴

粉破梅梢。綠動萱叢。春意已深。漸珠簾低卷。筠枝微步。冰開躍鯉。林暖鳴禽。荔子扶疎。竹枝哀怨。濁酒一尊和淚斟。憑欄久。歎山川冉冉。歲月駸駸。當時豈料如今。漫一事無成。霜鬢侵看。故人強半沙堤黃閣。魚懸帶玉貂。映蟬金許國。雖堅。朝天無路。萬里淒涼。誰寄音。東風裏。有灞橋煙柳。知我歸心。

又

一別秦樓。轉眼新春。又近放燈。憶盈盈倩笑。纖纖柔握。玉香花語。雪暖酥凝。念遠愁腸。傷春病思。自怪平生殊未曾。君知否。漸香消蜀錦。淚漬吳綾。難求繫日長繩。況倦客飄零。少舊朋。但江郊雁起。漁村笛笛。

寒缸委燼。孤硯生冰。水繞山圍。煙昏雲慘。縱有高臺常怯登。消魂處。是魚牋不到。蘭夢無憑。

又

孤鶴歸飛。再過遼天。換盡舊人。念壘藥枯塚。茫茫夢境。王侯螻蟻。畢竟成塵。載酒園林。尋花巷陌。當日何曾輕負春。流年改。歎園腰帶剩。點鬢霜新。交親散落如雲。又豈料。如今餘此身。幸眼明身健。茶甘飯軟。非惟我老。更有人貧。躲盡危機。消殘壯志。短艇湖中閑采蓴。吾何恨。有漁翁共醉。谿友爲鄰。

憶秦娥

玉花驄。晚街金轡聲。瓊聲瓊瓏。閑欵烏帽。又過城東。富春巷陌花重重。千金沽酒酬春風。酬春風。笙歌園裏錦繡叢中。

漢宮春 張園賞游案作。閩故蜀燕王宮也。

浪迹人間。喜聞猿楚峽。學劍秦川。虛舟汎然不繫。萬里江天。朱顏綠鬢。作紅塵無事神仙。何妨在。鶯花海裏。行歌閑送流年。休笑放慵狂眼。看閑坊深院。多少嬋娟。燕宮海棠夜宴。花覆金船。如椽畫燭。酒闌時百炬吹煙。憑寄語。京華舊侶。幅巾莫換貂蟬。

又 初自南鄭來成都作。

羽箭雕弓。憶呼鷹古壘。截虎平川。吹笳暮歸野帳。雪壓青氈。淋漓醉墨。看龍蛇飛落蠻牋。人誤許。詩情將略。一時才氣超然。何事又作南來。看重陽藥市。元夕燈山。花時萬人樂處。歌帽垂鞭。聞歌感舊。尙時時流涕尊前。君記取。封侯事在。功名不信由天。

月上海棠成都城南有蜀王舊苑多梅皆二百餘年古木。

斜陽廢苑朱門閉。吊興亡。遺恨淚痕。裏淡淡宮梅也。依然點酥。剪水凝愁處。似憶宣華舊事。行人別有。淒涼意。折幽香誰與寄千里。佇立江皋。杳難逢隴頭歸騎。音塵遠。楚天危樓獨倚。宣華故蜀苑名。行人別有

又

蘭房繡戶厭厭病。歎春醒和悶甚時醒。燕子空歸。幾曾傳玉關邊信。傷心處。獨展團窠瑞錦。熏籠消歇。沉煙冷。淚痕深展。博看花影。漫餘香怎禁他。峭寒孤枕。西窗曉。幾聲銀瓶玉井。

烏夜啼

金鴨餘香尚煖。綠窗斜日偏明。蘭膏香染雲鬢膩。釵墜滑無聲。冷落鞦韆伴侶。闌珊打馬心情。繡屏凝斷瀟湘夢。花外一聲鶯。

又

簷角楠陰轉日。樓前荔子吹花。鷓鴣聲裏霜天晚。疊鼓已催衙。鄉夢時來枕上。京書不到天涯。邦人認少文。移省開院自煎茶。

又

我校丹臺玉字。君書蕊殿雲篇。錦官城裏重相遇。心事兩依然。攜酒何妨處處。尋梅共約年年。細思上界多官府。且作地行仙。

又

世事從來慣見。吾生更欲何之。鏡湖西畔秋千頃。鷗鷺共忘機。

一枕蘋風午醉。二升菰米晨炊。故人莫

又

素意幽棲物外。塵緣浪走天涯。歸來猶幸身強健。隨分作山家。

已趁餘寒泥酒。還乘小雨移花。柴門盡

又

園館青林翠樾。衣巾細葛輕紈。好風吹散霧微雨。沙路喜新乾。

小燕雙飛水際。流鶯百轉林端。投壺聲

又

從。宦元知漫浪。還家更覺清真。蘭亭道上多脩竹。隨處岸綸巾。

泉冽偏宜雪茗。杭香雅稱絲蓴。俯然一

又

執扇嬋娟素月。紗巾縹渺輕煙。高槐葉長陰初合。清潤雨餘天。

弄筆斜行小草。鉤籀淺醉閑眠。更無一

真珠簾

山村水館參差路。感羈遊。正似殘春風絮。掠地穿簾。知是竟歸何處。鏡裏新霜空自憫。問幾時。鸞臺鼈署。

遲莫。謾憑高懷遠。書空獨語。自古儒冠多誤。悔當年。早不扁舟歸去。醉下白蘋洲。看夕陽鷗鷺。菰菜鱸魚都棄了。只換得青衫塵土。休顧。早收身江上一簑煙雨。

好事近

混迹寄人間。夜夜畫樓銀燭。誰見五雲丹籠。養黃芽初熟。春風歸從紫皇遊。東海宴陽谷。進罷碧桃花。賦賜玉塵千斛。

卷第五十

柳梢青故蜀燕王宮海棠之盛爲成都第一今屬張氏

錦里繁華。環宮故邸。疊萼奇花。俊客妖姬。爭飛金勒。齊駐香車。何須幙障帷遮。寶盃浸。紅雲瑞霞。銀燭光中。清歌聲裏。休恨天涯。

又乙巳二月西與贈別

十載江湖。行歌沽酒。不到京華。底事翩然。長亭煙草。衰鬢風沙。憑高目斷天涯。細雨外。樓臺萬家。只恐明朝。一時不見。人共梅花。

夜遊宮肥夢寄師伯渾

雪曉清笳亂起。夢遊處。不知何地。鐵騎無聲望似水。想關河。雁門西。青海際。睡覺寒燈裏。漏聲斷。月斜窗紙。自許封侯在萬里。有誰知。鬢雖殘。心未死。

又宮詞

獨夜寒侵翠被。奈幽夢不成還起。欲寫新愁淚幾紙。憶承恩、歎餘生。今至此。蘇蘇燈花墜。問此際、報人何事。咫尺長門過萬里。恨君心似危欄、難久倚。

安公子

風雨初經社。子規聲裏春光謝。最是無情。零落盡、薔薇一架。況我今年。顛願幽窗下。人盡怪、詩酒消聲價。向藥爐經卷。忘卻鶯窗柳樹。萬事收心也。粉痕猶在香羅帕。恨月愁花。爭信道如今都罷。空憶前身。便面章臺馬。因自來、禁得心腸怕。縱遇歌逢酒。但說京都舊話。

玉蝴蝶 玉忠州家席上作。

倦客平生行處。墜鞭京洛。解佩瀟湘。此夕何年。來賦宋玉高唐。繡簾開。香塵乍起。蓮步穩。銀燭分行。暗端相。燕羞鶯妬。蝶擾蜂忙。難忘芳樽頻勸。銷寒新退。玉漏猶長。幾許幽情。只愁歌罷月侵廊。欲歸時、司空笑闕。微近處、丞相噴狂。斷人腸。假饒相送。上馬何妨。

木蘭花慢 夜登青城山玉華樓。

闌邯鄲夢境。歎綠鬢、早霜侵。奈華岳燒丹。青谿看鶴。尚負初心。年來向、濁世裏。悟真詮。秘訣絕幽深。養就金芝九畹。種成琪樹千林。星壇夜學步虛吟。露冷透瑤簪。對翠鳳披雲。青鸞避月。宮闕蕭森。琅函一封。奏罷。自鈞天帝所有。知音卻過蓬壺。噓傲世間。歲月駸駸。

蘇武慢 唐西安湖。

澹靄空濛，輕陰清潤，綺陌細塵初靜。平橋繫馬，畫閣移舟，湖水倒空如鏡。掠岸飛花，傍簷新燕，都似學人無定。歎連年戎帳，經春邊壘，暗凋顏鬢。空記憶、杜曲池臺，新豐歌管。怎得故人音信。羈懷易感，老半無多。談塵久閉，犀柄，惟有翛然筆牀茶竈。自適筍輿，煙艇待綠荷遮岸。紅蕖浮水，更乘幽興。

齊天樂左稿道中。

角殘鐘晚，關山路，行人乍依孤店。塞月征塵，鞭絲帽影，常把流年虛占。藏鴉柳暗，歎輕負鶯花，謾勞書劍。事往關情，悄然頻動壯遊念。孤懷誰與強遣。市壇沽酒，酒薄怎當愁。顰倚瑟妍詞，調鉛妙筆，那寫柔情。芳豔征途，自厭況、煙斂蕪痕，雨稀萍點。最是眠時，枕寒門半掩。

又三樂人日遊龍洞作。

客中隨處，閑消悶，來尋嘯臺龍岫。路斂春泥，山開翠霧，行樂年年依舊。天工妙手，放輕綠、萱牙淡黃楊柳。笑問東君，爲人能染鬢絲否。西州催去近也，帽簷風軟，且看市樓沽酒。宛轉巴歌，淒涼塞管，攜客何妨頻奏。征塵暗袖，漫禁得梅花，伴人疎瘦。幾日東歸，畫船平放溜。

望梅

壽非金石，恨天教老向、木程山驛。似夢裏來到，南柯這些子光陰。更堪輕擲，戍火邊塵。又過了，一年春色。歎名姬駿馬，盡付杜陵苑路豪客。長繩漫勞繫日，看人間、俛仰俱是陳迹。縱自倚英氣凌雲，奈回盡鷗程。鐵鷺驚翻，終日憑高，悄不見、江東消息。算沙邊，也有斷鴻，情誰問得。

洞庭春色

壯歲文章。暮年勳業。自昔誤人。算英雄成敗。軒裳得失。難如人意。空喪天真。請看邯鄲當日夢。待炊罷黃梁。徐欠伸。方知道。許多時富貴。何處關身。人間定無可意。怎換得玉鱸絲。且釣竿漁艇。筆牀茶竈。閑聽荷雨。一洗衣塵。洛水秦關千古後。尙棘暗銅駝。空愴神。何須更。慕封侯定遠。圖像麒麟。

漁家傲 寄仲高

東望山陰何處是。往來一萬三千里。寫得家書空滿紙。流清淚。書回已是明年事。寄語紅橋橋下水。扁舟何日尋兄弟。行徧天涯真老矣。愁無寐。鬢絲幾縷茶煙裏。

繡停針

歎半紀。跨萬里。秦吳頓覺衰謝。回首縛行英俊。並遊咫尺。玉堂金馬。氣凌嵩華。負壯略。縱橫王霸。夢經洛浦。梁園覺來。淚流如瀉。山林定去也。卻自恐說著少年時話。靜院焚香。閑倚素屏。今古總成虛假。趁時婚嫁。幸自有湖邊茅舍。燕歸應笑客中又。還過社。

桃園憶故人 并序

三榮郡治之西。因子城作樓觀。曰高齋。下臨山村。蕭然如世外。余留七十日。被命參成都戎。曠而去。臨行。徙倚竟日。作桃源憶故人一首。

斜陽寂歷柴門閉。一點炊煙時起。雞犬往來林外。俱有蕭然意。衰翁老去疎榮利。絕愛山城無事。臨去畫樓頻倚。何日重來此。

又懸壺道中

欄干幾曲高齋路。正在重雲深處。丹碧未乾人去。高棟空留句。
斷鴻煙渚。知我頻回顧。離離芳草長亭暮。無奈征車不住。惟有

又

一彈指頃浮生過。墮甌元知當破。去去醉吟高臥。獨唱何須和。
利名韞鑠。世界元來大。殘年遠我從來我。萬里江湖煙舸。脫盡

又

城南載酒行歌路。冶葉倡條無數。一朵輕紅凝露。最是關心處。
歲華何許。芳草連天暮。鶯聲無賴催春去。那更兼旬風雨。試問

又題華山圖

中原當日三川震。關輔回頁畏葸。吳豎可正真。日望中興重。
華山千仞。依舊無人問。秋風霜滿青青鬢。老卻新豐英俊。雲外

極相思

江頭疎雨輕煙。寒食落花天。翻紅墜素。殘霞暗錦。一段淒然。
更看漫空相趁。柳絮榆錢。惆悵東君堪恨處。也不念冷落樽前。那堪

一叢花

樽前凝佇漫魂迷。猶恨負幽期。從來不慎傷春淚。爲伊後滴滿羅衣。那堪更是。吹簫池館。青子綠陰時。

圓廊簾影畫參差。偏共睡相宜。朝雲夢斷，知何處，倩雙燕說與相思。從今判了，十分願，願要箇人知。

又

仙姝天上自無雙。玉面翠蛾長。黃庭讀罷，心如秋水，閉朱戶。愁近絲簧。窗明几淨，閑臨唐帖，深炷寶奩香。人間無藥駐流光。風雨又催涼。相逢共話清都舊，歎塵劫、生死茫茫。何如伴我，綠篔青籟，秋晚釣瀟湘。

隔浦蓮近拍

飛花如趁燕子，直度簾櫳裏。帳掩香雲暖。金籠鸚鵡驚起，凝恨慵梳洗。粧臺畔，麝粉纖纖指。寶釵墜。才醒又困，厭厭中酒滋味。牆頭柳暗，過盡一年春事。看畫高樓，怕獨倚、千里孤舟何處煙水。

又

騎鯨雲路倒景，醉面風吹醒。笑把浮丘袂，寥然非復塵境。震澤秋萬頃，煙霏散、水面飛金鏡。露華冷。湘妃睡起，鬢傾斂。墜慵整。臨風舞處，零亂塞鴻清影。河漢橫斜，夜漏永。人靜吹簫，同過綠嶺。

昭君怨

畫永蟲聲庭院，人倦嬾搖團扇。小景寫瀟湘，自生涼。簾外蹴花雙燕，簾下有人同見。寶篆坼宮黃，炷熏香。

雙頭蓮呈范至能待制

華鬢星星，驚壯志成虛。此身如寄，蕭條病驥，向暗裏消盡當年豪氣。夢斷故國山川，隔重重煙水。身萬里，舊社凋零，青門俊遊誰記。盡道錦里繁華，歎官閣晝永，柴荆添睡。清愁自醉，念此際、付與何人、心事縱

有楚施吳橋。如何時東逝。空悵望。館美菰香。秋風又起。

南歌子 送周機宜之益昌

異縣相逢晚。中年作別難。暮秋風雨客衣寒。又向朝天門外話悲歡。瘦馬行霜棧。輕舟下雪灘。烏奴山下。一林丹。爲說三年常寄夢魂間。

豆葉黃

春風樓上柳腰肢。初試花前金縷衣。嫋嫋娉娉不自持。曉粧遲。畫得蛾眉勝舊時。

又

一春常是雨和風。風雨晴時春已空。誰惜泥沙萬點紅。恨難窮。恰似衰翁一世中。

醉落魄

江湖醉客。投盃起舞遺烏帽。三更冷翠霏衣濕。嫋嫋菱歌。催落半川月。空花昨夢休尋覓。雲臺麟閣俱陳迹。元來只有閑難得。青史功名。天卻無心惜。

鵲橋仙

華燈縱博。雕鞍馳射。誰記當年豪舉。酒徒一一取封侯。獨去作。江邊漁父。輕舟八尺。低篷三扇。占斷蘋洲。煙雨鏡湖元自屬閑人。又何必君恩賜與。

又

一竿風月。一簑煙雨。家在釣臺西住。賣魚生怕近城門。況肯到紅塵深處。潮生理。擢潮平。繫纜潮落港。

歌歸去。時人錯把比嚴光。我自是無名漁父。

又夜聞杜鵑

弗簷人靜。蓬窗燈暗。春晚連江風雨。林鶯巢燕。總無聲。但月夜常啼杜宇。催成清淚。驚殘孤夢。又揀深枝飛去。故山猶自不堪聽。況半世飄然羈旅。

長相思

雲千重。水千重。身在千重雲水中。月明收釣筒。頭未童。耳未聾。得酒猶能雙臉紅。一尊誰與同。

又

橋如虹。水如空。一葉飄然煙雨中。天教稱放翁。側船蓬。使江風。蟹舍參差漁市東。到時聞暮鐘。

又

面蒼然。鬢皤然。滿腹詩書不直錢。官閑常晝眠。晝凌煙。上甘泉。自古功名屬少年。知心惟杜鵑。

又

暮山青。暮霞明。夢筆橋頭艇子橫。蘋風吹酒醒。看潮生。看潮平。小住西陵莫較程。尊絲初可烹。

又

悟浮生。厭浮名。回視千鍾一髮輕。從今心太平。愛松聲。愛泉聲。寫向孤桐誰解聽。空江秋月明。

菩薩蠻

江天淡碧雲如掃。蘋花零落蓼絲老。細細晚波平。月從波面生。漁家真箇好。悔不歸來早。經歲洛陽城。

鬢絲添幾莖。

又

小院蠶眠春欲老。新巢燕乳花如掃。幽夢錦城西。海棠如舊時。當年真草草。一櫺還吳早。題罷惜春詩。鏡中添鬢絲。

訴衷情

當年萬里覓封侯。疋馬戍梁州。關河夢斷何處。塵暗舊貂裘。胡未滅。鬢先秋。淚空流。此生誰料。心在天山。身老滄洲。

又

青衫初入九重城。結友盡豪英。蠟封夜半傳檄。馳騎諭幽并。時易失。志難成。鬢絲生。平章風月。彈壓江山。別是功名。

生查子

還山荷主恩。聊試扶犁手。新結小茆茨。恰占清江口。風塵不化衣。鄰曲常持酒。那似宦遊時。折盡長亭柳。

又

梁空燕委巢。院靜鳩催雨。香潤上朝衣。客少閑談麈。鬢邊千縷絲。不是吳蠶吐。孤夢泛瀟湘。月落聞柔櫓。

破陣子

仕至千鍾良易，年過七十常稀。眼底榮華元是夢，身後聲名不自知。營營端爲誰。幸有旗亭沽酒，何妨繭紙題詩。幽谷雲蘿朝採藥，靜院軒窗夕對棋。不歸真箇癡。

又

看破空花塵世，放輕昨夢浮名。蠟屐登山真率飲，筇杖穿林自在行。身閑心太平。料峭餘寒猶力，廉纖細雨初晴。苔紙閉題谿上句，菱唱遙聞煙外聲。與君同醉醒。

上西樓一名相見歌

江頭綠暗紅稀，燕交飛，忽到當年行處，恨依依。灑清淚，歎人事，與心違。滿酌玉壺花露，送春歸。

點絳脣

采藥歸來，獨尋茆店，沽新釀。暮煙千嶂，處處聞漁唱。醉弄扁舟，不怕黏天浪。江湖上，遮回疎放，作箇閑人樣。

謝池春

壯歲從戎，曾是氣吞殘虜。陣雲高，狼烽夜舉。朱顏青鬢，擁雕戈西戍。笑儒冠自來多誤。功名夢斷，卻泛扁舟吳楚。漫悲歌、傷懷弔古。煙波無際，望秦關何處。歎流年、又成虛度。

又

賀監湖邊，初繫放翁歸棹。小園林時時醉倒。春眠驚起，聽啼鶯催曉。歎功名、誤人堪笑。朱橋翠徑，不許

京塵飛到。挂朝衣東歸欠早。連宵風雨。捲殘紅如掃。恨梅前送春人老。

又

七十衰翁。不減少年豪氣。似天山。淒涼病驥。銅駝荆棘。灑臨風清淚。甚情懷。伴人兒戲。如今何幸。作箇故谿歸計。鶴飛來。晴嵐暝翠。玉壺春酒。約羣仙同醉。洞天寒露。桃開未。

一落索

滿路遊絲。飛絮韶光將暮。此時誰與說新愁。有百轉流鶯語。頽仰人間。今古。神仙何處。花前須判醉扶歸。酒不到劉伶墓。

又

識破浮生虛妄。從人譏謗。此身恰是弄潮兒。曾過了千重浪。且喜歸來無恙。一壺春醪。雨簑煙笠。傍漁磯。應不是封侯相。

杏花天

老來駒隙駉駉度。算只合狂歌醉舞。金盃到手君休訴。看著春光又暮。誰爲情柳條繫住。且莫遣城笳催去。殘紅轉眼無尋處。盡屬蜂房燕戶。

太平時

竹裏房櫳一徑深。靜悄悄。亂紅飛盡。綠成陰。有鳴禽。臨罷蘭亭無一事。自修琴。銅爐鼻息。海南沉。洗塵襟。

戀繡衾

不惜貂裘換釣篷。嗟時人誰識放翁。歸權借樵風穩。數聲聞林外暮鐘。幽棲莫笑蝸廬小。有雲山煙水萬重。半世向丹青看喜如今身在畫中。

又

無方能駐臉上紅。笑浮生擾擾夢中。平地是冲霄路。又何勞千日用功。飄然再過蓮峯下。亂雲深吹下暮鐘。訪舊隱依然在。但鶴巢時有墮松。

風入松

十年裘馬錦江濱。酒隱紅塵。萬金選勝鶯花海。倚疎狂驅使青春。吹笛魚龍盡出。題詩風月俱新。自憐華髮滿紗巾。猶是官身。風樓常記當年語。問浮名何似身親。欲寄吳淞說與。這回真箇閑人。

真珠簾

燈前月下嬉遊處。向笙歌繡叢中相遇。彼此知名。纔見便論心素。淺黛嬌蟬風調。別最動人時。時儻願歸去。想閑院深院。調絃促柱。樂府初翻新譜。漫裁紅點翠。閑題金縷。燕子入簾時。又一番春暮。側帽燕脂坡下過。料也記前年崔護。休訴。待從今須與好花爲主。

風流子 一名內家嬌

佳人多命薄。初心慕德耀。嫁梁鴻。記綠窗睡起。靜吟閑詠。句翻離合。格變玲瓏。更乘與素紈留喜墨。纖玉撫孤桐。蟾滴夜寒。水浮微凍。鳳牋春麗。花研輕紅。人生誰能料。堪悲處。身落柳陌花叢。空羨畫堂鸚鵡。

深閉金籠，向寶鏡鸞斂。臨粧常晚，繡齒牙版，催舞還慵。腸斷市橋月笛，燈院霜鐘。

雙頭蓮

風卷征塵，堪歎處，青驄正搖金轡。客襟貯淚，漫萬點如血，憑誰持寄。佇想豔態幽情，壓江南佳麗。春正媚，怎忍長亭，匆匆頓分連理。目斷淡日平蕪，煙濃樹遠，微茫如舊。悲歡夢裏，奈倦客又是關河千里。最苦唱徹驪歌，重遲留無計，何限事，待與丁寧，行時已醉。

鷓鴣天

杖屨尋春苦未遲。洛城櫻筍正當時。三千里外歸初到，五百年前事總知。吹玉笛，渡清伊。相逢休問姓名誰。小車處士深衣叟，曾是天津共賦詩。

蝶戀花

禹廟蘭亭今古路。一夜清霜，染盡湖邊樹。鸚鵡杯深君莫訴。他時相遇知何處。冉冉年華留不住。鏡裏朱顏，畢竟消磨去。一句丁寧君記取。神仙須是閑人做。

跋

先太史之文。於古則詩書左氏。莊騷史漢。於唐則韓昌黎。於本朝則曾南豐。是所取法。然稟賦宏大。造詣深遠。故落筆成文。則卓然自爲一家。人莫測其涯涘。蓋今學者皆熟誦劍南之詩。續稿雖家藏。世亦多傳。寫惟遺文自先太史未病時。故已編輯。而名以渭南矣。第學者多未之見。今別爲五十卷。凡命名及次第之旨。皆出遺意。今不敢紊。乃鈔梓溧陽學宮。以廣其傳。渭南者。晚封渭南伯。乃自號爲陸渭南。嘗謂子適曰。劍南乃詩家事。不可施於文。故別名渭南。如入蜀記。牡丹譜。樂府詞。本當別行。而異時或至散失。宜用廬陵所刊歐陽公集例。附于集後。此皆子適嘗有疑而請問者。故備著于此。嘉定十有三年十一月壬寅。幼子承事郎知建康府溧陽縣主管勸農事子適謹書。

放翁富于文辭。諸體具備。惜其集罕見于世。馬氏通考載渭南集三十卷。今不傳。邇來吳中士夫。有抄而祕其本者。亦頗無詮次。紹興郡有刻本。去入蜀記。濶增詩九卷。據翁命子云。詩家事不可施于文。況十僅一二耶。既得光祿華君活字印本渭南文集五十卷。乃嘉定中翁幼子適編輯也。跋云。命名次第。皆出遺意。但活板多謬多遺。因嚴加讎訂。并付剞劂。自秋徂冬。凡六月而書成。湖南毛晉記。

劍南詩彙序

前輩有欲補詩史一字之闕。終莫適其當者。夫發言寓意。未必惟一字之工。或者窮思畢慮之弗逮。人才相去。乃爾遠耶。太守山陰陸先生劍南之作。傳天下。眉山蘇君林收拾尤富。適官屬邑。欲鈔本爲此邦盛事。迺以纂次屬師尹。亦旣斂衽肅觀。則浩渺闕肆。莫測津涯。掩卷太息者久之。獨念吾儕日從事先生之門。間有疑闕。自公餘可以從容質正。幸來者見斯文大全。用是不敢辭。劍南詩稿六凡九十四首。續稿三百七十七首。蘇君於集外得一千四百五十三首。凡二千五百二十四首。又口七首。釐爲十卷。總曰劍南。因其舊也。文字傳襲失真。類不滿人意。其如此書得之所見。有以傳信而無疑。若夫發乎情性。充乎天地。見乎事業。忠憤感激。憂思深遠。一念不忘君。先生之志。且有當世巨公爲之發揮。非師尹敢任。淳熙十有四年臘月。幾望門人迪功郎監嚴州在城都稅務括蒼鄭師尹謹書。

陸放翁集

劍南詩彙目錄

卷第一

別會學士 送仲高兄宮學秩滿赴行在 題閭郎中溧水東臯園亭 和陳魯山十詩以孟夏
草木長 透屋樹扶疎爲韻十首 看梅絕句五首 春晚簡陳魯山 寄酬會學士學宛陵先生
體比得書云所寓廣教僧舍有陸子泉每對之輒奉懷 夜讀兵書 二月二十四日作 送會
學士赴行在 霧夜觀月 新夏感事 留題雲門草堂 送韓梓秀才十八韻 送陳德邵宮
教赴行在二十韻 朱子雲園中觀花 酬妙湛開梨見贈妙湛能棋其師璘公蓋嘗與先君遊
云 次韻魯山新居絕句二首 寄陳魯山二首 戲題江心寺僧房壁 泛瑞安江風濤貼然
平陽驛舍梅花 渡浮橋至南臺 出縣 還縣 雨晴遊洞宮山天慶觀坐間復雨 寄陳
魯山正字 航海 海中醉題時雷雨初霽天水相接也 溪行二首 自來福州詩酒殆廢北
歸始稍稍復飲至永嘉括蒼無日不醉詩亦屢作此事不可不記也 東陽道中 東陽觀醮醮
送李德遠寺丞奉祠歸臨川 送王嘉叟編修出佐南昌 送王龜齡著作赴會稽大宗丞二
首 送杜起莘殿院出守遂寧 和曾待制遊兩山三首 雨中出遊夜歸 謝李平叔郎中問
疾 聞武均州報已復西京 喜小兒輩到行在 病起寄會原伯兄弟 送湯岐公鎮會稽

周洪道學士許折贈館中海棠以詩督之 送七兄赴揚州帥幕 閏二月二十日遊西湖 劉
太尉挽歌辭二首 過林黃中食柑子有感學宛陵先生體 玉牒所迎駕望見周洪道舍人
送梁諫議 以石芥送劉韶美禮部劉比饜酒勁甚因以爲戲二首 出都 會原伯屢勸居城
中而僕方欲自梅山入雲門今日病酒偶得長句奉寄 村居 看山 夏夜泛舟書所見 秋
陰 盆池 比從人覓酒皆酸薄戲作此詩 買魚二首 秋雨 晨起偶題 悲秋 寄張真
父舍人二首 幽居 法寶蓮師求竹軒詩 欲遊五峯不果往小詩寄瑩老 謝王彥光提刑
見訪并送茶 送查元章赴夔漕 逍遙 病中簡仲彌性唐克明蘇訓直 送王景文 送呂
彥升參謀 无咎郡齋燕集有詩末章見及敬次元韻 次韻无咎別後見寄 晚泊慈姥磯下
二首 七月十四夜觀月 夜宿陽山磯將曉大雨北風甚勁俄傾行三百餘里遂抵雁翅浦
望江道中 秋夜讀書每以二鼓盡爲節 往在都下時與鄒德章兵部同居百官宅無日不相
從僕來佐豫章而德章亦謫高安感事述懷作歌奉寄 寄答綿州楊濟伯左司 送全州趙都
曹 病中作 夜夢從數客雨中載酒出遊山川城闕極雄麗云長安也因與客馬上分韻作詩
得遊字 去年余佐京口遇王嘉叟從張魏公督師過焉魏公道免相嘉叟亦出守莆陽近辱書
報魏公已葬衡山感歎不已因用所遺拄頰亭詩韻奉寄 自詠示客 醉中歌 寄陶茂安監
丞 燒香 寒食臨川道中 上巳臨川道中 寄別李德遠二首 初夏道中 示兒子 重
五同尹少稷觀江中競渡 過玉山辱芮國器檢詳留語甚勤因寄此詩兼呈韓无咎右司 隨

意 寄龔實之正言、遊山西村 觀村童戲溪上 雨霽出遊書事 殘春 家園小酌二首
寄王嘉叟吏部 夜讀隱書有感 上虞逆旅見舊題歲月感懷 舜廟懷古 題十八學士
園 統分稻晚歸二首 衰病二首 霜風 小酌 十月苦蠅二首 丫頭巖見周洪道以進
士入都日題字 獨學 霜月 寄黃龍升老 贈進賢劉令 書室名可齋或問其義作此告
之 寄酬楊齊伯少卿

卷第二

自笑 夜聞松聲有感 十二月一日二首 春日二首 僧房假榻 聞雨 休日有感 題
徐子禮宗丞自覺齋 送張叔潛編修造朝四首 有感 澗松 將赴官夔府書懷 送芮國
器司業二首 春陰 投梁參政 宿楓橋 晚泊 金山觀日出 弔李翰林墓 雨中泊趙
屯有感 黃州 武昌感事 夜思 哀郢二首 江陵道中作 石首縣雨中繫舟戲作短歌
初寒 醉歌 秋風 塔子磯 重陽 早寒 公安 沙頭 大寒出江陵西門 江夏與
章冠之遇別後寄贈 題江陵村店壁 馬上 水亭有懷 移船 將離江陵 六言 江上
旅食 滄灘 松滋小酌 晚泊松滋渡口二首 荆門冬夜 繫舟下牢溪游三游洞二十
八韻 三游洞前巖下小潭水甚奇取以煎茶 扇子峽山腹有草開小亭極幽邃意其非俗人
居也 蝦蟆碚 黃牛峽廟 過夷陵適值祈雪與葉使君清飲談括蒼舊游既行舟中雪作戲
成長句奉寄 泊虎頭灘下 過東瀟灘入馬肝峽 新安驛 秣歸醉中懷都下諸公示坐客

憩歸州光孝寺寺後有楚冢近歲或發之得寶玉劍佩之類 飲罷寺門獨立有感 泛溪船
至巴東 巴東遇小雨二首 秋風亭拜寇萊公遺像二首 巴東令廨白雲亭 謁巫山廟兩
廡碑版甚衆皆言神佐禹開峽之功而詆宋玉高唐賦之妄余亦賦詩一首 聞猿 瞿唐行
入瞿唐登白帝廟 登江樓 雪中臥病在告戲作 雪晴 玉笈齋書事二首 記夢 瀨西
山寺 蹋磧 寒食 晚晴書事呈同舍 鄉中每以寒食立夏之間省墳客夔適逢此時懷
然感懷二首 試院春晚 倚闌 自詠 午興 風雨中望峽口諸山奇甚戲作短歌 夜坐
庭中 新蔬 初夏懷故山 初夏新晴 定拆號日喜而有作 睡起 四月二十九日作
苦熱 拆號前一日作 暴雨 西齋雨後 急雨 晚晴聞角有感 夏夜起坐南亭達曉不
復寐 夜登白帝城樓懷少陵先生 假日書事 林亭書事二首 遊臥龍寺 久病灼艾後
獨臥有感 秋晚病起 秋思 一病四十日天氣遂寒感懷有賦 登城 夔州重陽 追懷
曾文清公呈趙教授趙近嘗示詩 謝張廷老司理錄示山居詩二首 秋晴欲出城以事不果
南窗 遣興 九月三十日登城門東望悽然有感 初冬野興 東屯呈同遊諸公 別王
伯高 書驛壁二首 醉中到白崖而歸 十二月十九日晚巫山送客歸回望西寺小閣標榜
可愛遂與趙郭二教授同遊抵夜乃還楚鄉偶得長句呈二君

卷第三

飯三折舖舖在亂山中 小市 酒無獨飲理 畏虎 戲題 驕龍瀑布 題梁山軍瑞豐亭

馬上 鄰山縣道上作 鄰水延福寺早行 岳池農家 過廣安弔張才叔諫議 果州驛
留樊亭三日王覺民檢詳日攜酒來飲海棠下比去花亦衰矣二首 柳林酒家小樓 南池
唐長慶中南池新亭碑在漢高帝廟側亭已失所在矣 聞杜鵑戲作 鼓樓舖醉歌 登慧
照寺小閣 春雨 風雨中過龍洞閣 驛舍海棠已過有感 籌筆驛 嘉川舖遇小雨景物
尤奇 老君洞 大安病酒留半日王守復來招不住送酒解醒因小飲江月館 金牛道中遇
寒食 曉發金牛 山南行 南鄭馬上作 和高子長參議道中二絕 次韻張季長題龍洞
次韻子長題吳太尉雲山亭 送劉戒之東歸 周元吉蟠室詩 送范西叔赴召二首 寄
鄧公壽 簡章德茂 自三泉泛嘉陵至利州 木瓜舖短歌 夜抵葭萌惠照寺寓楊小閣
太息二首 閩中作二首 遊錦屏山謁少陵祠堂 仙魚舖得仲高兄書 自閩復還漢中次
益昌 驛亭小憩遣興 再過龍洞閣 自笑 三泉驛舍 嘉川舖得檄遂行中夜次小柏
歸次漢中境上 沔陽夜行 道中累日不肉食至西縣市中得羊因小酌 初離興元 自興
元赴官成都 書事 雨中過臨溪古墩 南沮水道中 長木晚興 遣興 長木夜行抵金
堆市 赴成都泛舟自三泉至益昌謀以明年下三峽 壬辰十月十三日自閩中還興元遊三
泉龍門十一月二日自興元適成都復攜兒曹往遊賦詩 予行蜀漢間道出潭毒關下每憩羅
漢院山光軒今復過之悵然有感 棧路書事 雪晴行益昌道中頗有春意 思歸引 誌公
院在劍門東五里院東石壁間有若僧負杖者杖端髻髻有刀尺拂子之狀 劍門道中遇微雨

劍門關 劍門城北回望劍關諸峯青入雲漢感蜀亡事慨然有賦 丹芝行 過武連縣北
柳池安國院煮泉試日鑄顧渚茶院有二泉皆甘寒傳云唐僖宗幸蜀在道不豫至此飲泉而愈
賜名報國靈泉云三首 宿武連縣驛 初入西州境述懷 綿州魏成縣驛有羅江東詩云芳
草有情皆礙馬好雲無處不遮樓戲用其韻 卽事 青村寺 行綿州道中 越王樓二首
東津 東山 綿州錄參軍廳觀姜楚公畫鷹少陵爲作詩者 羅江驛翠望亭讀宋景文公詩
鹿頭關過龐士元廟 遊漢州西湖 嚴君平卜臺 梅花 拜張忠定公祠二十韻 成都
歲暮始微寒小酌遣興 再賦梅花 登塔 先主廟次唐貞元中張儼詩韻三首 睡起書事
西郊尋梅 分韻作梅花詩得東字 宇文子友開予有西郊尋梅詩以詩借觀次其韻 海
棠 簡南禪動長老 和譚德稱送牡丹二首 初到蜀州寄成都諸友 自蜀州暫還成都奉
簡諸公 摩訶池 三月十七日夜醉中作 嘉祐院觀壁間文湖州墨竹 春晚書懷三首
偶憶萬州戲作短歌 驛舍見故屏風畫海棠有感 思政堂東軒偶題 荔枝樓小酌二首
嘉陽官舍奇石甚富散葉無領略者予始取作假山因名西齋曰小山堂爲賦短歌 望雲樓晚
興 護國天王院故神霄玉清萬壽宮也廢圯略盡而規模尙極壯麗過之有感 登荔枝樓
再賦荔枝樓 能仁院前有石像丈餘蓋作大像時樣也

卷第四

謁凌雲大像 凌雲醉歸作 獨遊城西諸僧舍 西林院 聽事前紫薇花二本甚盛戲題絕

句 同何元立蔡肩吾至東丁院汲泉煮茶二首 癸巳夏旁郡多苦旱惟漢嘉數得雨然未足也立秋夜三鼓雨至明日晡後未止高下霑足喜而有賦二首 晚登望雲二首 立秋後十日風雨凄冷獨居有感 晦日西窗懷故山 秋日懷東湖二首 小山之南作曲欄石磴繚繞如棧道戲作二篇 得成都諸友書勸少留嘉陽戲作 道院 醉中感懷 玻璃江一首 夜思 雨夜懷唐安 迎詔書 秋夜遣懷 送客至江上 雨中至西林寺 休日登花將軍廟小樓 深居 秋夜獨醉戲題 感事 醉鄉 夜讀岑嘉州詩集 次韻師伯渾見寄 社前一夕未昏輒寢中夜乃得寐 晚雨 社日 夜雨感懷 八月二十二日嘉州大閱 九月六夜夢中作笑詩覺而忘之明日戲追補一首 重九會飲萬景樓 久客書懷 初報嘉陽除官還東湖有期喜而有作 聞勾龍司戶會客山亭送酒殺及橄欖并簡諸同僚 九月十六日夜夢駐軍河外遣使招降諸城覺而有作 何元立示九日詩臥病累日乃能次韻 成都行 聞虜亂有感 醉歌 初塞 木山 寒夜遣懷 嘉陽絕無木犀偶得一枝戲作 雨後登西樓獨酌 喜晴 曉出城東 寶劍吟 十月一日浮橋成以故事宴客凌雲 聞王嘉叟計報有作出城至呂公亭按視修堤 登樓 醉中作四首 觀大散關圖有感 嘉州守宅舊無後園因農事之隙爲種花築亭觀甫成而歸戲作長句 連日扶病領客殆不能支枕上懷故山偶成 余往與宇文叔介同客山南今年叔介客死臨安十月十一日夜忽夢相從取架上書共讀如平生讀未竟忽辭去留之不可曰欲歸校藥方旣覺泫然不能已因賦此詩 金錯刀行 言懷

十月十九日與客飲忽記去年自錦屏歸山南道中小獵今又將去此矣 冬日 十月十四
夜月終夜如晝 下元日五更詣天慶觀寶林寺 梅花四首 西園 胡無人 公無渡河
長門怨 長信宮詞 銅雀妓 得韓無咎書皆寄使虜時宴東都驛中所作小閣 曉坐 斷
碑歎 夜行至平羌憩大悲院 迓益帥馬上作 蜀酒歌 十一月八日夜燈下對梅花獨酌
累日勞甚頗自慰也 醉後草書歌詩戲作 古藤杖歌 歲晚書懷 累日倦甚不能觸客睡
起戲作 種花 雨中登樓望大像 迎救呈王志夫李德孺師伯渾 冬日 雨中睡起 十
二月初一日得梅一枝絕奇戲作長句 無題 快晴 獨坐 十二月十一日視築隄 題龍
鶴菜帖 春愁曲 荀秀才送蠟梅十枝奇甚 離嘉州宿平羌 瑞草橋道中作 遊修覺寺
晚步湖上 暮春 池上醉歌 四月五夜見螢 塞上曲 夜聞塔鈴及泉聲

卷第五

曉歎 苦筍 月下作二首 小宴 小閣納涼 晨雨 湖上筍盛出戲作長句 雨後集湖
上 過大蓬嶺度繩橋至杜秀才山莊 宿杜氏晨起遇雨 翠園院 野飯 化成院 慈雲
院東閣小憩 遊靈鷲寺堂中僧闌然獨作禮開山定心尊者尊者唐人有問法者輒點胸示之
時號點點和尚 桃源 白塔院 急雨 東湖新竹 睡起試茶 五月五日蜀州放解榜第
一人楊鑑具慶下孤生愴然有感 病酒新愈獨臥蘋風閣戲書 神君歌 讀胡基仲舊詩有
感 夏日湖上 對酒歎 病後暑雨書懷 雨聲 同何元立賞荷花追懷鏡湖舊遊 小樓

怡齋 龍湫歌 月夕 蒸暑思梁州述懷 湖上晚歸 秋聲 觀小孤山圖 飲酒 北
窗梧葉坐間落四五有感 神山歌 久雨 古意 自唐安之成都 度笮 故袍 寓寶相
有作 寓驛舍 題字文子友所藏薛公鶴 宴西樓 月中歸驛舍 江濱池醉歸馬上作
離成都後却寄公壽子友德稱 晨至湖上二首 池上見魚躍有懷姑熟舊遊 六月二十五
日曉出郊 作雨不成終夜極涼時去立秋五日也 池上晚雨 五十 記夢 凭欄 聽琴
秋思 醉書 樊氏莊龜泉 書懷二首 秋思三首 東園晚步 秋夜讀書戲作 太平
花 日暮至湖上 秋興 秋色 秋聲 觀長安城圖 雨中作 夜讀了翁遺文有感 雷
龍眠畫馬 秋夜池上作 秋雨 臥病 夢入禪林有老宿方隱座或云通悟禪師也 蜀
州大閣 放懷亭獨立有感 九月三日同呂周輔教授遊大邑諸山 次韻周輔道中二首
憩黃秀才書堂 夜宿鵲鳴山 次韻周輔霧中作 山中得長句戲呈周輔并簡朱縣丞 擣
藥鳥 出山 平雲亭 高秋亭 九日小疾不出 九日試霧中僧所贈茶 我有美酒歌
次韻師伯渾見寄 自江源過雙流不宿徑行之成都 過綠楊橋 五鼓自笮橋入府 客多
福院晨起 雨中出謁歸晝臥 長歌行 夜食炒栗有感 秋夜懷吳中 遊三井觀 仙遊
閣 寓居小菴纔袤丈戲作 送華師從劍州張祕書之招

卷第六

江上對酒作 自嘲 暮歸馬上作 臨別成都帳飲萬里橋贈譚德稱 夜宿二江驛 涉白

馬渡慨然有懷 瑞草橋 將之榮州取道青城 丈人觀 題丈人觀道院壁 宿上清宮
自上清延慶歸過丈人觀少留 長生觀觀月 儲福觀 龍門洞 布金院 離堆伏龍祠觀
孫太古畫英惠王像 登灌口廟東大樓觀岷江雪山 郫縣道中思故里 宿江原縣東十里
張氏亭子未明而起 戲詠西州風土 宿彭山縣通津驛大風鄰園多喬木終夜有聲 眉州
郡燕大醉中間道馳出城宿石佛院 雙柏 戍卒說沉黎事有感 平羌道中望峨眉山慨然
有作 次韻何元立都曹贈行 次韻楊嘉父先輩贈行 入榮州境 井研道中 賴牟鎮早
行 初到榮州 城上二首 西樓夕望 醉中懷眉山舊遊 登城望西崕 甲午十一月十
三夜夢右臂踊出一小劍長八九寸有光旣覺猶微痛也 齋中夜坐有感 晚登橫溪閣二首
昭德堂晚步 龍洞 客中夜寒戲作長謠 高齋小飲戲作 太液黃鶴歌有引 自唐安
徙家來和義出城迎之馬上作 乙未元日 別榮州 聞仲高從兄訃 夏日過摩訶池 早
行 天申節前三日大聖慈寺華嚴閣燃燈甚盛遊人過於元夕 喜雨 夜聞浣花江聲甚壯
暑行憩新都驛 早發新都驛 謁諸葛丞相廟 自漢州之金堂過沈氏竹園小憩坐間微
雨 自小雲頂上雲頂寺 馬上微雨 彌牟鎮驛舍小酌 遊彌牟菩提院庭下有凌霄藤附
古楠其高數丈花已零落滿地 樓上醉歌 伏日獨遊城西 五鼓送客出城馬上作 寓舍
書懷 夜登城樓 試茶 成都大閱 書懷 遊大智寺 看月睡晚戲作 成都書事二首
雙溪道中 牛飲市中小飲呈坐客 自警 午寢 白髮 明日午睡至暮復次前韻 醉

中長歌 對酒 人日飲昭覺 上元前一日 上元二首 喜譚德稱歸 春感 春晴暄甚
遊西市施家園 花時遍遊諸家園十首 曉過萬里橋 自合江亭涉江至趙園 春晴

卷第七

題明皇幸蜀圖 春寒連日不出 馬上偶成 夜宴 觀音院讀壁間蘇在廷少卿兩小詩次韻二首 錦亭 晚起 雨 春晚書懷 出朝天門繚長堤至劉侍郎廟由小西門歸 夜分讀書有感 中夜聞大雷雨 春殘 武擔東臺晚望 行武擔西南村落有感 小飲房園飯昭覺寺抵暮乃歸 自芳華樓過瑤林莊 書懷 遊東郭趙氏園 卜居二首 馬上 夜登江樓 書歎 三月一日府宴學射山 對酒 題直舍壁 遊園覺乾明祥符三院至暮遊合江園戲題 三月十六日作 食齋三首 次韻范文淵 題醉中所作草書卷後 登子城新樓遍至西園池亭 小疾謝客 歸耕 聞孫巖老挂冠歎仰之餘輒賦長句 松驢行 遣興 野意 雨中登安福寺塔 過野人家有感 幽居晚興 飯保福 觀華嚴閣僧齋 閒中偶題二首 病中戲書三首 病起書懷二首 寺樓月夜醉中戲作三首 晚過五門躬耕 晚興 夏夜大醉醒後有感 合江夜宴歸馬上作 齋居書事 午夢 江濱池納涼 晚步 姚將軍靖康初以戰敗亡命建炎中下詔求之不可得後五十年乃從呂洞賓劉高尚往來名山有見之者予感其事作詩寄題青城山上清宮壁間將軍儻見之乎 客自鳳州來言岐雍間事悵然有感 席上作 水亭偶題 避暑江上 夏白紵并序 二首 久旱忽大雨

涼甚小飲醉眠覺而有作 明日開霽益涼復得長句 夜讀東京記感事 書歎 睡起
飯罷碾茶戲書 夢遊山水奇麗處有古宮觀云雲臺觀也 月下醉題 野外劇飲示坐中
與青城道人飲酒作 銅壺閣望月 連日得雨涼甚有作 待青城道人不至 劍客行
夜宴即席作 宿沱江彌勒院 學射道中感事 遊學射觀次壁間韻 昇仙橋遇風雨大至
憩小店 龍桂 芳華樓夜宴 遣興 六月九日夜步月至朝翼觀 十日夜月中馬上作
百歲 獨飲醉臥比覺已夜半矣戲作此詩 蒙恩奉祠桐柏 和范待制月夜有感 和范待
制秋興三首 和范待制秋日書懷二首

卷第八

遊學射山遇景道人 城東醉歸深夜復呼酒作此詩 融州寄松紋劍 歲晚 玉京行 步
出萬里橋門至江上 晚步 數日寒頓減頗有春意感懷賦短歌 春愁 歲暮感懷 梅花
寺居夙興 萬里橋江上習射 關山月 出塞曲 戰城南 讀書二首 晚過保福 偶
過浣花感舊遊戲作 夜讀唐諸人詩多賦烽火者因記在山南時登城觀塞上傳烽追賦一首
平明出小東門觀梅 寺居睡覺二首 樓上醉書 醉題 初春出遊 芳華樓夜飲二首
東門外遍歷諸園及僧院觀遊人之盛 城東馬上作二首 丁酉上元二首 後陵永慶院
在大西門外不及一里蓋王建墓也有二石幢猶當時物又有太后墓琢石爲人馬甚偉 小飲
趙園 和范舍人書懷 和范舍人病後二詩末章兼呈張正字二首 江路見杏花 夜聞雨

聲 海棠二首 張園海棠 登劍南西川門感懷 和范舍人永康青城道中作 宿上清宮
登上清小閣 小鵝長生觀飯已遂行 新津小宴之明日欲遊修覺寺以雨不果呈范舍人
二首 眉州驛舍睡起 送范舍人還朝 過魚蛇市小寺 眉州作 過修覺山不果登覽
青城縣會飲何氏池亭贈譚德稱 題菴壁 幽居二首 浣花女 七月八日馬上作 江樓
夜登小南門城上 野步至青羊宮偶懷前年嘗劇飲于此 月夜江濱池納涼 華亭院僧
房二首 乾明院觀畫 登城 秋日登仙遊閣 自詠 雜詠四首 大醉歸南禪弄影月下
有作 訪楊先輩不遇因至石室 病酒戲作 訪昭覺老 晝臥 晚步江上 夜坐 夜行
悲秋 城北青蓮院方丈壁間有畫燕子者過客多題詩予亦戲作二首 睡起 天涯 暇
日行城上同行追不能及 感秋 雙流旅舍三首 早行至江原 安仁道中二首 八月十
四夜三叉市對月 豐橋旅舍作 文君井 白鶴館夜坐 南津勝因院亭子 登邛州譙門
門三重其西偏有神仙張四郎畫像張蓋隱白鶴山中 書寓舍壁二首 次韻使君吏部見贈
時欲遊鶴山以雨止 西巖翠屏閣 幽居院 中溪 天台院有小閣下臨官道予爲名曰玉
霄 山中小雨得宇文使君簡問嘗見張仙翁乎戲作一絕 雨中山行至松風亭忽澄霽 贈
宋道人 自山中泛舟歸郡城 次韻宇文使君山行 同王無玷羅用之訪臨邛道士墓 登
太平塔 中夜投宿修覺寺 絕勝亭 雲谿觀竹戲書二絕 九月十日如漢州小獵於新都
彌牟之間投宿民家 獵罷夜飲示獨孤生三首 自廣漢歸宿十八里草市 東郊飲村酒大

醉後作 九月十八夜夢避雨叩一僧院有老宿年八十許邀留甚勤若舊相識者夢中爲賦此詩 秋晚登城北門

卷第九

秋興 夜飲 暮秋二首 夜雨有感 道室 飯罷戲作 初冬夜宴 冬夜醉歸復小飲
病酒述懷 數日暄妍頗有春意予閒居無日不出遊戲作 遣興 趙將軍井序 江樓醉中
作 曳策 謁漢昭烈惠陵及諸葛公祠宇 遙夜 遠遊 大雪歌 簡譚德稱 排悶 夜
意三首 玉局觀拜東坡先生海外畫像 心太平菴 訪客至西郊 得都下八月書報蒙恩
牧斂州 晚起二首 江樓吹笛飲酒大醉中作 晚登子城 夙興出謁 十一月三日過升
仙橋作三絕 遣興 草堂拜少陵遺像 青羊宮小飲贈道士 夜寒二首 書懷 記夢二
首 醉中出西門偶書 訪客不遇 劍客行 故蜀別苑在成都西南十五六里梅至多有兩
大樹天矯若龍相傳謂之梅龍予初至蜀嘗爲作詩自此歲常訪之今復賦一首丁酉十一月也
閒意 飲罷夜歸 江亭冬望 大風登城 書雨 一笑 歲晚懷鏡湖舊隱慨然有作
華髮 歎息 冬至 城南尋梅四首 書歎 感興二首 暮冬夜宴 枕上 謁石犀廟
江上散步尋梅偶得三絕句 漣漪亭賞梅 芳華樓賞梅 浣花賞梅 蜀苑賞梅 大醉梅
花下走筆賦此 之廣都憩鐵像院 廣都江上作 宿龍華山中寂然無一人方丈前梅花盛
開月下獨觀至中夜 次韻張季長正字梅花 次韻季長見示 廣都道中呈季長 看梅歸

卷第十

馬上戲作五首 別後寄季長 中夜對月小酌 客愁 詩酒 道室夜意 道室晨起 城南王氏莊尋梅 遊萬里橋南劉氏小園 過笮橋道中龍祠小留 道上見梅花 倚樓 寄王季夷 丁酉除夕 正月二日晨出大東門是日府公宴移忠院 小飲落梅下戲作送梅立春 初春出遊戲作 初春遣興三首 予年十六始識葉晦叔於西湖上後二十七年晦叔之弟聲叔來為臨邛守相遇於成都晦叔沒久矣訪其遺文略無在者乃賦此詩 初春探花有作 遊諸葛武侯書臺 觀花 張園觀海棠 月夕 夜飲卽事 夜宴賞海棠醉書 二月十六日賞海棠 卽席 東歸有日書懷 眉州披風榭拜東坡先生遺像

訪青神尉廨借景亭蓋山谷先生舊遊也 舟過玉津 敘州三首 瀘州使君巖在城南一里深三丈有泉出其左晉中律呂木龍巖相距亦里許黃太史所嘗遊憩也 南定樓遇急雨 夜泊合江縣月中小舟謁西涼王祠 風順舟行甚疾戲書 舟中對月 漁翁 涪州道中 涪州 北巖 平都山 忠州禹廟 忠州醉歸舟中作 雨中遊東坡 龍興寺弔少陵先生寓居 遊萬州岑公洞 萬州放船過下巖小留 白帝泊舟 醉中下瞿唐峽中流觀石壁飛泉 暮次秭歸 歸州重五 屈平廟 楚城 新灘舟中作 舟出下牢關 峽口夜坐 峽州甘泉寺 峽州東山 江上觀月 初發夷陵 舟中夜坐 初到荊州 醉歸 出遊 大堤阻風 初發荊州 泊公安縣 劉郎浦夜賦 小雨極涼舟中熟睡至夕 岳陽樓 再賦

一絕 乘大風發巴陵 通濟口 醉書 南樓 黃鶴樓 頭陀寺觀王簡栖碑有感 夜熱
舟中偶書 燈下讀書 泊三江口 自雪堂登四望亭因歷訪蘇公遺迹至安國院 月下
步至臨臯亭 發黃州泊巴河遊馬祈寺 舟行蘄黃間雨霽得便風有感 南烹 泊蘄口泛
月湖中 初見廬山 六月十四日宿東林寺 舟過小孤有感 雁翅夾口小酌 長風沙
泛小舟姑熟溪口 明日再遊又賦 過采石有感 將至金陵先寄獻劉留守 登賞心亭
夜泊龍廟回望建康有感 將至京口 荆谿館夜坐 沂谿 歸雲門 月下自三橋泛湖歸
三山 懷成都十韻 湖村秋曉 夜夢與字文子友譚德稱會山寺若餞予行者明日黎明得
子友書感歎久之乃作此詩 寒夜 偷閒 冬夜聞雁有感 書懷 湖中暮歸 題齋壁
新葺門屋 吾廬 冬夜泛舟有懷山南戎幕 夢至成都悵然有作二首 月夕 將入閩夜
行之雲門 山中觀殘菊追懷眉山師伯渾 自雲門之陶山肩輿者失道行亂山中有茅舍小
塘極幽邃求見主人不可意其隱者也 冬夜聽雨戲作二首 適閩 欲行雨未止 比作陳
下瓜麴釀成奇絕屬病瘍不敢取醉小啜而已 大雨中離三山宿天章寺 早飯干溪蓋干吉
故居也 贈楓橋化城院 老僧 雙橋道中寒甚 行牌頭奴棹之間皆建炎未避賊所經也
早發奴棹 題繡川驛 夜行宿湖頭寺 衢州道中作 過靈石三峯二首 宿仙霞嶺下
道中病瘍久不飲酒至魚梁小酌因賦長句 宿魚梁驛五鼓起行有感二首 夢藤驛二首
梅花絕句十首

卷第十一

對酒 遣興 建安雪 雪晴至後園二首 開元暮歸 書懷 遊鳳皇山 園中雜書四首
 烹茶 病中久止酒有懷成都海棠之盛 北齋 出塞曲 思故山 送錢仲耕修撰 建
 寧重五 雨晴至園中 夏日三首 發書畫還故山戲書 白髮 懷譚德稱 客思二首
 建安遺興六首 病起偶到復菴 前有樽酒行二首 遊南塔院 感懷 雨夜 夜坐偶書
 長歌行 雨夜不寐觀壁間所張魏鄭公砥柱銘 客談荆渚武昌慨然有作 書懷 平生
 自詠 池亭夜賦 雨夜偶書 思歸 客懷 伏中官舍極涼戲作 夢與劉韶美夜飲樂
 甚 暑夜 客意 夜香 柴懷叔殿院世綵堂 月夜 雙清堂夜賦 采蓮三首 橋南納
 涼 芒屨 荔子絕句二首 官舍夙興 書懷 風月 大將出師歌 婕妤怨 移疾 病
 中懷故廬 夏夜不寐有賦 綠淨亭晚興 憶山南二首 夕雨二首 試茶 莆陽餉荔子
 初秋書懷 建州絕無芟意頗思之戲作 憶昔 客思 初秋夢故山覺而有作四首 寓
 歎 雙清堂醉臥 辭書 憶唐安 秋懷二首 晝臥聞碾茶 月下獨行橋上 夜意 秋
 夜書懷 思故廬 雨夜 北窗哦詩因賦二首 傲裝 追感梁益舊遊有作 莆陽昭武延
 平送兵漸集戲書 別建安絕句三首 初發建安 宿北巖院 書感 長汀道中 黃亭夜
 雨 遊武夷山 泛舟武夷九曲溪至六曲或云灘急難上遂回二首 崇安縣驛 過建陽縣
 以雙鵝贈東觀道士為長生鵝觀俯大溪鵝得其所矣武夷險絕處有仙船架崖壁間數日前大

風吹墮船木數寸堅硬如石子偶得之皆此行奇事也各賦一詩 紫谿驛二首 鵝湖夜坐書
懷 信州東驛晨起 玉山縣南樓晚望 玉壺亭 步過縣南長橋遊南山普寧院山高處有
塔院及小亭縹緲可愛恨不能到 枕上感懷 晚過招賢渡 臥輿 奏乞奉祠留衢州皇華
館待命 寓舍偶題 夙興 夜坐 偶得石室酒獨飲醉臥覺而有作 午睡 贈柯山老人
寓館晚興 葉相最高亭 婺州州宅極目亭 謝演師送梅二首 訪毛平仲問疾與其子
适同遊柯山觀王質爛柯遺跡 月巖 弋陽縣驛 弋陽道中遇大雪 雪中感成都 雪後
苦寒行饒撫道中有感 對酒二首 梅花 雪中尋梅二首 江上梅花

卷第十二

擬峴臺觀雪 舊在成都初春無事日訪昭覺保福正法諸刹甚可樂也追懷慨然因賦長句
園中賞梅二首 正月十五日出郊至金石臺二首 六日小飲園中光景鮮妍紅梅已坼恍記
在果州偶得絕句 聞雁 撫州上元 登擬峴臺 燈夕有感 庚子正月十八日送梅 初
春懷成都 春雨 雨中遣懷二首 晚晴 春晚 春晚坐講忽夢泛舟飲酒樂甚既覺悵然
有賦 遣興 老去 雨夜 簡黎道士 臨川絕無佳酒時得一醉戲書 醉中懷江湖舊遊
偶作短歌 三月二十一日 天祺節日飯罷小憩 思歸 齒痛有感 南窗睡起二首 初
夏 讀程秀才詩 晨起 雨夜 得京書或怪久不通問 水亭 醉眠 感舊七首 晝臥
聞百舌 寄呂博士 遊疎山 疎山東堂晝眠 山中作 觀蔬圃 東堂晨起有感 金谿

道中 小憩前平院戲書觸目 遣興 雨後獨登擬峴臺 數日訴牒苦多憊甚戲作 與黎
道士小飲偶言及會文清公慨然有感 念歸 五月十一日夜且半夢從大駕親征盡復漢唐
故地見城邑人物繁麗云西涼府也喜甚馬上作長句未終篇而覺乃足成之 雨夜二首 焚
香晝睡比覺香猶未散戲作二首 仲夏小旱方致禱忽大雨連日江水爲漲喜而有作 冒雨
登擬峴臺觀江漲 雜庭草 蛺蝶詞 大雨躡句既止復作江遂大漲二首 燒丹示道流
書感 夏日 寄統 自訟 夏日晝寢夢遊一院間然無人簾影滿堂惟燕蹋箏絃有聲覺而
聞鐵鐸風響珍然殆所夢也邪因得絕句 虛堂 夢仙 自嘲 長歌行 對酒 自詠 夏
日睡起 所居堂極涼雖三伏常有秋意也偶得長句 雨後露坐小酌 日暮南窗納涼 中
夜起登堂北小亭 登擬峴臺 夜意 道院遣興 夜行至白鹿泉上 堂中以大盆漬白蓮
花石菖蒲儻然無復暑意睡起戲書 初秋 書懷五首 狂吟 聞雨 初秋小疾效俳諧體
雨後極涼料簡篋中舊書有感 秋夜 鈔書 晚自白鹿泉上歸 秋旱方甚七月二十八
夜忽雨喜而有作 秋日小雨有感 書李商叟秀才所藏會文清詩卷後 碧海行 道院遣
興 夜酌 言懷 送客城西 雨夜 病中作 社日小飲晚到東園 秋晚登擬峴望祥符
觀 秋思 病目廢書 感昔二首 視陵至崇仁村落 馬上 寄周洪道參政二首 北窗
登擬峴 休日 別張教授歸獨登擬峴 晚晴至索笑亭 新釀熟小酌索笑亭 乾道初
予自臨川歸鍾陵李德遠范周士送別是日宿戰平風雨終夕今自臨川之高安復以雨中宿戰

平悵然感懷二首 村舍小酌 白塔道中乘臥輿行 宿城頭鋪小飲而睡 豐城村落小憩
再題 發豐城縣 豐城高安之間憩民家景趣幽邃慨然懷歸 宿華嚴寺 寄奉新高令
高安州宅三詠三首 與高安劉丞遊大愚觀壁間兩蘇先生詩

卷第十三

宿黃仙觀兵火焚蕩之餘惟一殿突兀猶在黃仙蓋與許旌陽同時飛昇者 玉隆得丹芝 贈
西山老人 病酒宿土坊驛 十一月上七日蔬飯驛嶺小店 進賢驛感懷 入臨川境馬上
作 別楊秀才 發臨川 早行 白干舖別傅用之主簿 過茶菓舖青松朱戶前臨大道絕
似西陲亭驛悵然有作 青溪道中行古松間因少留瀹茶而行 弋陽縣江上書觸目 乾封
驛早行 過江山縣浮橋有感 衢州早行書懷 航頭晚興二首 行至嚴州壽昌縣界得請
許免入奏仍除外官感恩述懷 桐廬縣泛舟東歸 予欲自嚴買船下七里灘謁嚴光祠而歸
會灘淺陸行至桐廬始能泛江因得絕句二首 漁浦二首 蕭山 辛丑正月三日雪 正月
二十八日大雪過若耶溪至雲門山中 雪中登雲泉上方 衝雪至餘慶覺林雪連日不止
大雪歌 雪霽歸湖上過千秋觀少留 二月四日作 新築山亭戲作 春晴出遊 題山家
壁 春晚風雨中作 北窗 山中晚興 夜登山亭 西村醉歸 自詠 閒中頗有四方之
志偶得長句 道興二首 醉題 小園四首 步虛四首 醉中登避俗臺 立秋前三日夜
坐庭中偶賦 南堂臥觀月 夜坐獨酌 夜興 月夜泛小舟湖中三更乃歸 無題二首

自山中夜行還湖上 大風新秋 月夕睡起獨吟有懷建康參政 病瘥後偶書 秋日聞蟬
感秋 南軒 夜坐 新涼書事 聞蟬思南鄭 憶昔 病中夜興 秋夜 謝張時可通
判贈詩編 酬莊器之賢良見贈 舟過樊江憩民家具食 舟中作 九月三日泛舟湖中作
霜天晚興 九月六日小飲醒後作 書悲二首 中夜起出門月露浩然歸坐燈下有賦
新寒 幽居 醉中步月湖上 東村 西村 題張幾仲所藏醉道士圖二首 山園草間菊
數枝開席地獨酌 湖村月夕四首 卯酒徑醉走筆 山中望籬東楓樹有懷成都 暮秋有
懷王四季夷 幽居 有懷 對酒 初冬 晝寢夢一客相過若有舊者夷粹可愛既覺作絕
句記之 書歎 督下麥雨中夜歸 霜曉肩輿行湖上 杜門 橫塘 書事寄良長老 食
薺十韻 冬暖頗有春意追憶成都昔遊悵然有作 忽忽 醉書山亭壁 十月旦日至近村
蔬圃絕句七首 冬夜不寐至四鼓起作此詩 蔬圃 夢中作 村居酒熟偶無肉食煮菜
羹飲酒 辛丑十月諸公餽酒偶及百榼戲題長句 灌園 幽居 日出入行 午醉徑睡比
覺已甲夜矣 簡蘇訓直判院莊器之賢良 醉眠曲 冬夜二首 夜話贈華師 臥病 書
懷病中絕句六首 蔬圃雜詠五首 卯飲醉臥枕上有賦二首

卷第十四

十月二十六日夜夢行南鄭道中既覺恍然攬筆作此詩時且五鼓矣 雨晴步至山亭欲遂遊
東村不果 喜晴 對食 不睡 睡 憶荊州舊遊 五雲門晚歸 冬暖 歲暮 雪夜二

首 禪室 炭盡地爐危坐至夜分戲作 夜汲井水煮茶 雪後尋梅偶得絕句十首 寄朱元晦提舉 村居冬日 寓天慶觀有林使君年八十七方燒丹云一黍米大可化汞一斤爲黃金梅道人年八十五善醫 宿天慶道院 贈林使君二首 冬夜 宴坐 夢中作 夜寒遣興 雪後出遊戲作 歲暮 記夢 立春後三日作 短景 風雨旬日春後始晴 乍晴風日已和泛舟至扶桑埭徘徊西村久之 晨起南窗晴日可愛戲作一絕 攜壺尊醉梅花下 城西接待院後竹下作 夜飲示坐中 夜從父老飲酒村店作 壬寅新春 幽居春夜 讀書 晨起 昔在成都正月七日聖壽寺麻子市初春行樂處也偶晨興聞鄰村守麻有感 獨孤生策字景略河中人工文善射喜擊劍一世奇士也有自峽中來者言其死於忠涪間感涕賦詩 早春對酒感懷 曉出湖邊摘野蔬 游飢之餘復苦久雨感歎有作 春晴泛舟 攜一尊尋春湖上 晦前二日夜欲曉自湖中歸對殘月獨酌 春曉有感 夜觀秦蜀地圖 久雨小飲 有懷獨孤景略 春雨復寒遣懷 春遊 海棠 寄仗錫平老借用其聽琴詩韻 五月十四日夜夢一僧持詩編過予有暴雨詩語頗壯予欣然和之聯巨軸欲書未落筆而覺追作此篇 新塘觀月 觀張提刑周鼎 口占送巖師還大梅護聖 八月十四日夜湖山觀月 十五夜月色皎然有頃雲生遂不復見 夜聞秋風感懷 玉局歌 醉歌 閉門 草書歌 野飲夜歸戲作 夜泊水村 幽居 與鄰翁登山亭 無題 遣興 夢宴客大樓上命筆作詩既覺續成之 新塘夜歸 古風三首 累日無酒亦不肉食戲作此詩 讀書 自妙相歸

卷第十五

將至杜浦堰舟中作 秋興 哀北 琵琶 三江舟中大醉作 短歌行 悲秋 步至西村

題接待院壁 九月晦日作四首 陶山遇雪覺林遷菴主見招不果往 哭王季夷 樊江

晚泊 蛾眉村旅舍作 娥江野飲贈劉道士 丈亭遇老人長眉及肩欲就之語忽已張帆吹

笛而去 寓舍聞禽聲 春晚 題鑿師釣臺圖 仗錫平老具舟車迎前大衣印老印悉遺還

策杖訪之作絕句奉送兼簡平二首 湖邊曉行 久雨杜門遣懷 梅雨陂澤皆滿 夜意二

首 幽事 對酒戲作 夏雨 軍中雜歌八首 夏夜舟中聞水鳥聲甚哀若曰姑惡感而作

詩 暮歸舟中二首 夏夜四首 北渚 夏日五鼓起戲書 雨夜 小立 徙倚 居山

秋興二首 八月五日夜半起飲酒作草書數紙 秋雨漸涼有懷與元三首 秋風曲 送宣

書記并寄其兄疊才二公 起晚戲作 飲村店夜歸二首 雨夜感懷 寄葉道人 月下小

酌 讀袁公路傳 鄰曲小飲 秋夜觀月二首 枕上 秋夕大風松聲甚壯戲作短歌 明

河篇 夜聞鄰家治稻 浪迹 夜步庭下有感 題酒家壁 題書齋壁 贈貓 秋夕 秋

雨排闥十韻 小舟航湖夜歸書觸目三首 幽居書事二首 晚齋二首 雨後散步後園二首

示客 甲子晴 後一日復雨 紹興庚辰余遊謝康樂石門與老洪道士痛飲賦詩既還山

陰王仲信爲予作石門瀑布圖今二十有四年開圖感歎作二首 雨中遣懷 秋思 秋雨歎

雨中小酌 衰病有感三首 雨止頓寒遂有時意 秋晴出遊 悲秋四首 久雨道懷

野步書觸目 月下 九月十日 秋晴園中山禽絕多有感而賦 燈籠 舟過南莊呼村老
與飲示以詩二首 秋夜獨過小橋觀月 紹興中與陳魯山王季夷從兄仲高以重九日同遊
禹廟後三十餘年自三橋泛舟歸山居高雨霽望禹廟樓殿重復光景宛如當時而三人者皆
下世子亦衰病無聊慨然作此詩 雜興四首 予秋夜觀月得瘡疾枕上賦小詩自戲 後春
愁曲并序 秋花歎 寄題朱元晦武夷精舍五首 病思 病愈 病中忽有眉山士人史君
見過欣然接之口占絕句 初寒 出塞曲 無題 道室即事 夙興 長安道 記夢 冬
夜讀書 遊仙五首 過鄰家 山園晚興 初冬出扁門歸湖上 新寒小醉睡起日已高戲
作 太息 冬夜讀書 晚步 村舍 野步至近村 夜坐油盡戲作二首 歲暮 幽居感
懷 山中夜歸戲作短歌 狂歌 遲暮 種秫 擁爐 冬夜吟 讀書罷小酌偶賦 移花
遇小雨喜甚爲賦二十字 書生歎 冬夜醉解殘燈熒然起讀書至明賦詩十韻 夜行 遊
淳化寺 餘慶出遊夜歸 遊前山 齋前獨坐戲作 晚同僧至谿上 僧飯 山店賣石榴
取以薦酒 平水小憩 自若耶溪舟行航鏡湖而歸 宴坐 遊山歸偶賦 六十吟 舒悲
山園晚興 獨立 深悔二首 遠興 張功甫許見訪以詩堅其約

卷第十六

夜夢與數客觀畫有八幅龍湫圖特奇客請予作詩其上書數十字而覺不復能記明旦乃追補
之亦髣髴夢中意也 泛舟 夜聞大風感懷賦吳體 骨相 有感二首 城西晚眺 苦寒

夙興 冬夜讀書甚樂偶作短歌 冬夜月下作 感憤 蓬戶 行後園 曉出遇獵徒有
 作 贈道侶 六言四首 作雪未成自湖中歸寒甚飲酒作短歌 題傅神 閏月三夜舍西
 觀新月 獨夜 晚出偏門 蕙政 答鄭虞任檢法見贈 舟中曉賦 野興二首 月夜有
 感 落魄 遣興 湖村野興二首 看鏡 塞上 舟過會稽山下因繫舟遊近村迨暮乃歸
 八日偶遊民家小園有山茶方開 過杜浦橋二首 上元日晝臥 莊器之作招隱閣項平
 父諸人賦詩予亦繼作 春夜讀書感懷 宿能仁寺 寄題方伯謨遠菴 雨中宿石帆山下
 民家 中夜雨露月色入戶起飲酒一杯作絕句 贈石帆老人 溪上醉吟 囚山 小園
 鄉人或病予詩多道蜀中遊樂之盛適春日遊鏡湖共請賦山陰風物遂卽杯酒間作四絕句却
 當持以誇西州故人也四首 病中 病起 小築 記夢 久雨排悶 雨中泊舟蕭山縣驛
 夜漏欲盡行度浮橋至錢清驛待舟 江頭十日雨 柯橋客亭二首 小雨舟過梅市 曉
 枕 巢菜井序 吳娘曲 感舊 晨起閒步 初夏同桑甥世昌過鄰家寓歎 春夏雨暘調
 適頗有豐歲之望喜而有作 聞虜會遁歸漠北 初夏遊凌氏小園 偶得北虜金泉酒小酌
 二首 無題 戲贈 題少陵畫圖像 閒居書事 登臺遇雨避於山亭晚霽乃歸 村居書
 觸目 訪醫 夏夜讀書自嘲 夏日小宴 送紫髯女道士四明謝君二首 醉中夜自村市
 歸 城北夜 秋夜舟中 日晚散步湖上遇小雨 安期篇 曉望海山 山園草木四絕句
 賽神曲 夜中起讀書戲作二首 秋夜出門觀月 雨中買酒鏡湖酒樓 聞虜政衰亂掃

蕩有期喜成口號二首 甲辰中秋無月十七夜獨儼然達旦 悲秋 農家秋晚戲詠 病中

作 秋夜讀書 病起 晨起 秋夜 雨中寄東村 山寺 天王廣教院在葢山東麓予年

二十餘時與老僧惠迪遊路無十日不到也淳熙甲辰秋觀潮海上偶繫舟其門曳杖再遊恍如
隔世矣 江月歌 初寒書懷 歲暮 晨興 村飲 夜半讀書罷出門徙倚久之歸賦長句

曝書偶見舊藁有感 崑崙行 一室 得所親廣州書 幽居戲詠 幽事

卷第十七

初冬雜題六首 閉戶 十月四日夜記夢 西路口山店 題海首座俠客像 送綽姪住菴

吳興山中二首 冬夜與溥菴主說川食戲作 仗錫平老自成都回見訪索怡雲堂詩 野飲

樊江觀梅 山亭觀梅 射的山觀梅二首 別梅 憶梅 新晴午枕初起信筆 乙巳早

春 小雨 南的遇大風雨 春晚至山中因訪陳道人 小隱 春興 曾仲躬見過適遇予

出留小詩而去次韻二絕 睡起 病起 山居戲題二首 芒種後經旬無日不雨偶得長句

久雨喜晴十韻 盆池 月中過蜻蜓浦 六峰項里看采楊梅連日留山中 雨中自項里

夜至新塘捨舟步歸二首 夜聽竹間雨聲 泛三江海浦 獨酌有懷南鄭 秋日泛鏡中憩

千秋觀 秋夕虹橋舟中偶賦 秋思 自嘲 豐年行 秋夜泊舟亭山下 初秋山中作

秋夜讀書有感 晚涼登山亭 夜步 感秋 病中作 送猷講主赴李明府姜山之招 雨

中排悶 秋夜歌 病起鏡中見白髮此去七十無十寒暑矣偶得長句 初寒冥坐 溪行二

首 讀書 自嘲用前韻 病中久廢遊覽悵然有感 新釀熟小飲二首 題徐淵子環碧亭
 亭有茶山曾先生詩 雜興三首 大雪 遣興 委轡 雪中作 夢筆驛 舟中感懷絕句
 呈太傅相公兼簡岳大用郎中三首 西興泊舟 錢清夜渡 夜歸 江北莊取米到作飯香
 甚有感 感興 新春 新年 遊鏡湖 初春晚晴 偶讀山谷老境五十六翁之句作六十
 二翁吟 自開歲略無三日晴戲作長句 置酒梅花下作短歌 梅花已過聞東村一樹盛開
 特往尋之慨然有感 思蜀 書憤 南窗擊黃柑獨酌有感 久雨驟晴山園桃李爛熳獨海
 棠未甚開戲作 臨安春雨初霽 延和殿退朝口號二首 簡楊庭秀 飲張公父園戲題扇
 上 夜泛西湖示桑甥世昌 小舟過御園二首 自真珠園泛舟至孤山 真珠園雨中作
 還家二首 初歸偶到近村戲書 題跨湖橋下酒家 春遊至樊江戲示坐客 暮春 天華
 寺前遇縣令過避之入寺僧皆晝睡 偶得海錯侑酒戲作 雨晴遊香山 春遊絕句 夜行
 玉筍樵風之間宿龍瑞 開傅氏莊紫笑花開急棹小舟觀之 遊法雲寺觀彝老新葺小園
 鹹蠶十韻 長門怨 遣興 晨坐道室有感 晝臥 雨晴 宿石帆山下二首 小雨泛鏡
 湖 小憩村舍 平水 初夏山中 雨後 雲門溪上獨步 雲門過何山 明覺院 自雲
 門至上竈欲遊一二僧菴以雨不果 自上竈過陶山 四月 初夏閒居卽事 夜汲 排悶
 初夏夜賦 新霽城南舟中夜興 泊舟二首 飲伯山家因留宿 夜泛蜻蜓浦 晨起看
 山飲酒 枕上偶賦 自詠 題齋壁四首

卷第十八

丙午五月大雨五日不止鏡湖渺然想見湖未廢時有感而賦 遊鄞 泊上虞縣 發丈亭二首 明州 水亭獨酌十二韻 坐客有談狄魚眼睡之美者感歎而作 衰病不復能劇飲而多不見 察戲作此詩 或以予辭酒爲過復作長句 行路難 千峰樹宴坐 喜雨二首 五鼓 官居戲詠三首 倦眼 拜旦表 早自烏龍廟歸 上丁 新秋 殘年 休日行郡圃 登北榭 小酌 焚香作墨瀋決訟吏皆退立一丈外戲作此詩 齋中閒詠 秋夜聞雨 自詠 秋懷 不寐 醉中戲作 頻夜夢至南鄭小益之間慨然感懷二首 夜雨枕上 雨夜 安流亭俟客不至獨坐成詠 秋興二首 燕堂獨坐意象殊憤憤起登子城作此詩 秋雨北榭作 次韻王給事見寄 病中夜半 卽事 歲晚懷故人 焉耆行二首 丙午初冬得心腹痛疾大下而愈羸耗不支方在告臥燕堂東偏聞民間前一夕被盜者慨然有感 因王給事回使奉寄 病告中遇風雪作長歌排悶 冬夜戲作 夜坐二首 遣興 登紫翠樓 丙午十月十三夜夢過一大家傍人爲余言此荆軻墓也按地志荆軻墓蓋在關中感歎賦詩 病起小飲 冬夜讀書 夜坐觀小兒作擬毛詩欣然有賦 郡齋偶書三首 燈下閱吏牘有感 過放生池追懷江公民表諫議池蓋公所創也 園中絕句二首 戲作 縱筆三首 病中偶得名酒小醉作此篇是夕極寒 晨讀道書 後園獨步有懷張季長正字 老將效唐人體 書憤 晨起 雪 歲晚書懷 晨過天慶 冬夜 比得朋舊書多索近詩戲作長句

休日感興 病中偶書 寒夜 雪中獨酌 送客 新晴 出城 立春日送客郊外 大雪自夜至旦欲午始晴 雪夜有感 雪中忽起從戎之興戲作四首 十二月二十七日祭風師歸道中作 春晴 丁未正月春色已粲然露坐高風堂北觀種花 燕堂春夜 早春池上作 感興 東齋偶書 丁未上元月色達曉如晝予齋居屬貳車領客 自郊外歸北望謹樓 馬上作 還舍 杏花 兩京 贈表弟江參議 讀書 夜登千峯榭 旬日公事頗簡喜而有賦 聞鼓角感懷 社日小飲二首 昔日 新晴 倚闌 寄徑山印禪師 園中歸戲作 春曉東郊送客 暮春歎 曉雨二首 登千峯榭 晚春園中作 北窗 浮生 小壘 大閱後一日作假 自嘲 曉出東城 初夏遇休日園中閒賦 小雨出西門五里至東嶽廟 初夏燕堂睡起 晡後領客僅見燭而罷戲作短歌 讀宛陵先生詩 書歎

卷第十九

曉出南山 聞韓无咎下世 官居書事二首 夏日北榭賦詩奕棋欣然有作 謁告歸臥晚登子城 送使客出郊夜歸過市樓 秋夜登千峯榭待曉 九月初郊行 衰病 書意 秋懷 過村店有感 嚴州大閱 後園閒步 照潺湲閣下池水 秋郊有懷四首 夙興 聽事望馬目山 秋興二首 久無暇近書卷慨然有作 嚴州多菊然率過重陽方開或舉東坡先生菊花開時即重陽之語余謂此猶是未忘重陽者恐此花不肯也戲作一絕 地僻 吏責 張時可直閣書報已得請奉祠雲臺作長句賀之 累日文符沓至悵然有感三首 大風

冬夜讀書 再用前韻不以次 思歸 喜小兒病愈二首 初冬風雨驟寒作短歌 余年二十時嘗作菊枕詩頗傳于人今秋偶復采菊縫枕囊悽然有感二首 陶淵明云三徑就荒松菊猶存蓋以菊配松也余讀而感之因賦此詩 蕎麥初熟刈者滿野喜而有作 有自蜀來者因感舊遊作短歌 東吳女兒曲 雨夕 晚遊東園 小雨 初寒在告有感三首 馬上作 冬夜聞角聲二首 塞上曲 荊州歌 冬夜讀書 寓歎二首 燕堂東偏一室頗深暖盡日率困於吏牘比夜乃得讀書其間戲作三首 懷鏡中故廬 書感 對酒 夢歸 蜀使歸寄青城上官道人 寄城都籙道人 寄邛州宋道人 小齋壁間張王子喬梅子真李八百許旌陽及近時得道諸仙像每焚香對之因賦長句 芳草曲 烏龍廟 寒夜移疾二首 寒夜讀書三首 有爲子言烏龍高峻不可到處有僧巖居不知其年予每登千峯樹望之慨然爲作二詩 楊庭秀寄南海集二首 夜坐示桑甥十韻 夢回 醉中草書因戲作此詩 閒步至鞠場值小雪 張季長學士自興元遣人來因詢梁益間事悵然有感 東齋夜興 烏龍雪 曉出東城馬上作 與建子振孫登千峯樹觀烏龍雪 述懷二首 到嚴十五晦朔郡醜不佳求于都下旣不時至欲借書讀之而寓公多祕不肯出無以度日殊惘惘也 雨中獨酌 被酒徑臥比覺已五鼓矣 燈下讀玄真子漁歌因懷山陰故隱追擬五首 送客至望雲門外 題城南堂二首 故山葛仙翁丹井有偃松覆其上天矯可愛寄題 估客樂 楚宮行 妾命薄 晚登千峯樹 晝睡 胸次鬱鬱偶取枯筆作狂草遂成長句 休日與客燕語旣去聽小兒誦

書因復作草數紙 寄譙先生 寄姚太尉 累日多事不復能觀書感歎作此詩 北窗讀
范文正瀟灑桐廬郡詩戲書 箚中偶得去年二月都下數詩 感寓 征婦怨效唐人作 雪
寒夜 縱筆二首 歲晚盤尊索然戲書 立春前四日謝雪方拜天慶庭中雪復作 桐江
行 屢雪二麥可望喜而作歌 丁未除夕前一日休暇感懷二首 假中閉戶終日偶得絕句
三首 除夜雪二首 戊申元日 初春感懷 閉閣 濕浚閣小立 睡起至園中

卷第二十

上書乞祠 春殘 三月二十日晚酌 次前韻 北窗閒詠 休日留園中至暮乃歸 北窗
病起 自東津泛舟至桐溪 遊客至大浪灘上 郊行 夏雨 雨中作 醉題 有懷青城
霧中道友 梅雨初晴遊客東郊 晚歸 休日登千峯樹遇大風雨氣象甚偉 雨中獨坐
奮識姜邦傑于亡友韓无咎許近屢寄詩來且以无咎平日倡和見示讀之慨然作此詩附卷末
釣臺見送客罷還舟熟睡至覺度寺 泛富春江 宿漁浦 沂小江飯舟中 乞祠久未報
七月十日到故山削瓜淪茗儵然自適 曉興 感秋 秋夜有感 五鼓入城 飯罷忽鄰
父來過戲作 秋夜讀書 夜坐忽聞村路報曉鐘牌二首 白雲自西來過書巢南窗 贈竹
十韻 雜感五首 入城寓榻開元 夜出偏門還三山 四鼓酒醒起步庭下 感憤秋夜作
反感憤 東齋 雨夜四鼓起坐至明 夜讀兵書 老歎 秋霽 齋中聞急雨 老病追
感壯歲讀書之樂作短歌 閒中戲書三首 采藥 過飲講主桑價精舍 自桑價泛舟歸三

山 訪野人家 塞上曲四首 硯湖井序 泛湖 寓蓬萊館二首 夜還驛舍 舟中大醉
偶賦長句 行飯至新塘夜歸 雲門 感舊 若耶溪上二首 秋雨頓寒偶書 新晴泛舟
至近村偶得雙鰾而歸 上書乞祠輒述鄙懷 泛湖上雲門 書歎 枕上作 老病無復宦
情或者疑焉作此示之 拄杖 北望 歲晚感懷 大雨中作 繫舟平水步 初到行在
還都 宿監中偶作 四鼓出嘉會門赴南郊齋宮 題張野夫監簿大招圖 簡譚德稱監丞
致齋監中夜與同官縱談鬼神效宛陵先生體 夜歸 次韻鄭唐老 五鼓赴太社獵祭
己酉元日 送潘德久使薊門 我夢 晨起有感 南省宿直二首

卷第二十一

夜歸樽街巷書事 馬上作 行在春晚有懷故隱 儀曹直廬 讀書 小昭慶院講僧舊在
都下與之相從今沒已久見畫像於院中作詩弔之 晨入省中偶書 春晚 觀潮 新晴馬
上 過六和塔前江亭小憩 春夕睡覺 送霍監丞出守盱眙 寄題徐載叔秀才東莊 入
省 出省 和周元吉右司過弊居追懷南鄭相從之作 尤延之侍郎屢求作遂初堂詩詩未
成延之去國因以奉送 送張野夫寺丞牧涪州 史院書事 病中數辱曾無逸架閣見問今
日忽聞徙居走筆奉簡因致卜鄰之約 喜楊廷秀秘監再入館 次韻和楊伯子主簿見贈
簡何同叔 去國待潮江亭太常徐簿宋卿載酒來別 醉中作行草數紙 雪夜小酌 卽事
到家旬餘意味甚適戲書 兩後復小雪 鯉魚行 雪夜作 晨起 野饋 醉中浩歌罷

戲書 朝雨 春雨二首 記夢 野興二首 杭州夜歸二首 或問余近况示以長句 估

客有自蔡州來者感悵彌日二首 初夏郊行 重午 夏日 睡起見楊花滿庭偶書 梅雨

醉歌 醉書秦望山石壁 秋夜 夜意 蝸廬 予十年間兩坐斥罪雖擢髮莫數而詩爲

首謂之嘲詠風月既還山遂以風月名小軒且作絕句二首 題梅漢卿醉經堂 得親舊書問

近况以詩代書報之 放逐 月下野步 自詠 午睡起遇急雨 夜雨暴至 睡起作帖數

行 新秋 秋興二首 幽居 山居食每不肉戲作 自笑 世上 夜歸偶懷故人獨孤景

略 秋夜自近村歸 夜聞蟋蟀 秋夜風雨暴至 月下小酌 鄰曲有未飯被追入郭者憫

然有作 吾廬 飲酒望西山戲詠 小院 發篋得故人書有感 秋光 晚秋風雨 幽居

二首 故山四首 秋晚弊廬小葺一室過冬欣然有作 小室晚酌 冬晚山房書事二首

村居日飲酒對梅花醉則擁紙衾熟睡甚自適也 山居疊韻 寓歎三首

卷第二十二

贈惟了侍者二首 題湖邊旗亭 醉臥道邊覺而有賦 寓懷四首 喜事 甜羹 縱筆四

首 自嘲解嘲二首 春雨絕句六首 雨中臥病有感 舟中作 山園 開虜亂 題千秋

觀懷賀亭 禹祠 樊江 東關二首 練塘 娥江市 宿野人家 舟中遺懷 歸次樊江

夜過魯墟 有感 遊石帆玉笥石旗諸山 信步近村 寒食省九里大墓 平水道中

五雲橋 小雨雲門溪上 雲門獨坐 泛湖至東涇三首 舟過梅塢胡氏居愛其幽邃爲賦

一詩 北窗 聞蛙 晚春感事四首 山居 四月三日同子坦子聿遊湖中諸山 梅仙塢
小隱 盟雲 示兒 村居初夏五首 城東逆旅 江村初夏 舟中作 東關二首 少微
山 舟行至織女潭 書歎 小園獨立 觀蘇滄浪草書絹圖歌 睡起書觸目 曉雨初霽
夏雨 自東涇度小嶺聞有地可卜菴喜而有賦 露坐 自笑 夜賦 書懷 醉後作小
草因成長句 雨中作 詠史 登鵝鼻山至絕頂訪秦刻石且北望大海山路危甚人迹所罕
至也 六七月之交山中涼甚 幽居三首 園中雜詠三首 夏雨 夏夜二首 予所居南
並鏡湖北則陂澤重復抵海小舟縱所之或數日乃歸 王給事餉玉友 晚興 村圃

卷第二十三

七月一日夜坐舍北水涯戲作 病後登山亭 覽鏡 遣懷 開元寺小閣十四韻 寄題趙
寬之主簿慈順堂 郊居二首 新秋感事二首 八月一日微雨驟涼 秋雨三首 月下獨
坐 秋日步至湖桑埭西 秋社二首 秋思六首 以事至城南書觸目 舍西夕望 題城
侍者峴山圖 題城侍者剡溪圖 晚秋農家八首 湖上小閣 苦雨歎 遣懷 道石井序
三首 蘭亭 小葺村居 書陶靖節桃源詩後 有叟 不寐 遙夜 秋晚思梁益舊遊
三首 紹熙辛亥九月四日雨後白龍挂西北方復雨三日作長句記之 蔬圃 農家 自喜
重九後風雨不止遂作小寒三首 城南上原陳翁以賣花爲業得錢悉供酒資又不能獨飲
逢人輒強與其醉辛亥九月十二日偶過其門訪之敗屋一間妻子飢寒而此翁已大醉矣殆隱

者也爲賦一詩 甜羹之法以菘菜山藥芋菜蕪雜爲之不施醃醬山庖珍烹也戲作一絕 暮
秋書事 早自偏門入城晚出南堰門以歸 初寒 小舟自紅橋之南過吉澤歸三山二首
得猫於近村以雪兒名之戲爲作詩 晝睡 戲詠閑適 寓歎二首 獨夜 記九月二十六
日夜夢 夢海山壁間詩不能盡記以其意追補四首 當食歎 睡鄉 晨興 初冬從父老
飲村酒有作 懷南鄭舊遊 冬夜讀書 余爲成都帥司參議成將軍漢卿爲成都路兵鈐相
從無虛日余被召出蜀漢卿坐法謫居于涪旣得自便因卜築爲涪人今年廣漢僧祖成來山陰
乃言嘗至永嘉樂清縣柳市之廣福寺有黃先生寓寺中煉丹及見則漢卿也余聞之感歎不已
爲賦此詩 雜題六首 思蜀四首 散吏 題刻溪瑩上人梅花小軸 夜夢遊驪山 枕上
五更讀書示子 夜坐 臥龍

卷第二十四

野步晚歸 並山東南閑步至野人吳氏居乃歸 晝睡 連日有雪意戲書 兩蜀故人寄余
閬中左縣題名石刻來皆二十餘年矣悵然有感 歲晚 夢斷 雨聲 農家 夜行湖上
冬夜讀書忽聞雞唱 梅花絕句十首 閉戶 小園竹間得梅一枝 梅花絕句二首 得林
正父察院書問信甚勤 以長句寄謝 蔬食戲書 歎俗 晚飯罷小立門外有作 觀梅至
花溼高端叔解元見尋二首 春雪 舟過季家山小泊 送王成之給事 山家 送傑上人
歸成都二首 落魄 春晴出遊 題瑩上人二畫二首 和張功父見寄二首 山家暮春二

首 讀王季夷舊所寄詩 題庠閣黎二畫二首 入雲門小憩五雲橋 黃訪小店野飯示子
坦子聿 山園 入城至郡圃及諸家園亭遊人甚盛 次韻范參政書懷十首 春晚村居雜
賦絕句六首 沽埭西酒小酌 戲詠村居二首 戲詠閑適三首 夜與兒子出門閑步 老
景 初夏 晨起 月夜短歌 小軒 愛閑 靜院 雨晴 讀史有感 暮歸 仰首座求
鈍菴詩 壁老求笑菴詩二首 浴罷 夜坐水次 六月十四日微雨極涼 十五日雲陰涼
尤甚再賦長句 水亭晚眺 自詠 立秋前四日夜泛舟至跨湖橋 信筆三首 示兒 青
山白雲歌 小市 蓬萊館午憩 夢遊散關渭水之間

卷第二十五

秋夜 世事 夜半池上作 秋夜將曉出籬門迎涼有感二首 夏秋之交久不雨方以旱爲
憂忽得甘澍喜而有作 藥圃 書歎 夜興 閑中頗自適戲書于客座 新涼夜坐有作
荷花二首 醉中作 題齋壁 老將二首 白髮 小雨 秋日郊居八首 七月十七日大
雨極涼 雨中作 秋興三首 雨夜南堂獨坐 夜不能寐復呼燈起坐戲作 喜晴 枕上
新作南門 寄成漢卿將軍 病臥 晚晴 秋雨初晴有感 獨飲 小築 示兒 新晴
晨起坐南堂書觸目 壬子八月癸卯大風雨拔木飄瓦通夕不能寐 秋雨不止排悶 用
短 覽鏡有感 哭徑山策老 松風 醉歌 秋夜讀書有感 瀘州亂 東鄰築舍與兒輩
訪之爲小留 夜坐 西鄰亦新葺所居復與兒曹過之 有術士過門謂余壽及九十 晚眺

秋日焚香讀書戲作 九月一日夜讀詩稿有感走筆作歌 上書乞再任冲佑 秋晚歲登
戲作二首 舟中望禹祠蘭亭諸山 夜觀嚴光祠碑有感 閑趣 壬子九日登山小酌 舍
北望水鄉風物戲作絕句 新黏竹隔作暖閣 禹跡寺南有沈氏小園四十年前嘗題小閣壁
間偶復一到而園已易主刻小閣于石讀之悵然 贈鏡中隱者 月夜作 記夢 感舊 小
園 初冬 閑中樂事二首 小舟 九月二十三夜小兒方讀書而油盡口占此詩示之 今
年立冬後菊方盛開小飲 行飯暮歸 晝眠 睡覺聞兒子讀書 余得木杖于秦望山中今
三十年矣隴蜀萬里未嘗相捨戲賦長句贈之 步至近村 五鼓不得眠起酌一盃復就枕
醉倒歌 冬夜 默坐 日暮 遣興 泛舟 夜讀范至能攬轡錄言中原父老見使者多揮
涕感其事作絕句 初冬掃東山之麓置數石于喬松巨竹間以眺西山甚自適也 南堂脊記
乃已三十年偶讀之悵然有感

卷第二十六

醉臥松下短歌 霜草 冬夜草村東 小園 書適二首 狂夫 白髮 檢舊詩偶見在蜀
日江濱池醉歸之篇悵然有感 十一月四日風雨大作二首 冬日觀漁獵者 雨晴 病起
奉祠 假寐見海山異甚作小詩記之 松下縱筆四首 拜勅口號二首 閑居 十一月
十八日蒙恩再領冲佑鄰里來賀謝以長句 題老學菴壁 冬晴日得閑遊偶作 示元禮
書巢冬夜待旦 醉後莊門望西南諸山 著書 探梅 歲暮風雨二首 自夏秋置甚慨然

有感 題四仙像四首 自責 自解 午睡起消搖園中因登山麓薄暮乃歸 羣兒 久疾
灼艾小愈晚出門外 夙興弄筆偶書 縱筆 冬晴閑步東村由故塘還舍作二首 十二月
八日步至西村 夜聞湖中漁歌 忽得京書有感 晚步門外書觸目 親舊書來多問近況
以詩答之 開書篋見韓无咎書有感 夜大雪歌 寄宇文成州 示子聿 雪 夜坐 春
雨 夢與數客劇飲或請賦詩予已大醉縱筆書一絕覺而錄之 世事 二子 謝郭希呂送
石洞酒 飲酒 無題 雨雪兼旬有賦 北窗睡起 立春 曉枕 落梅二首 閑居無客
所與度日筆硯紙墨而已戲作長句 壬子除夕 癸丑正月二日二首 避世行 稽山農
牧牛兒 讀書未終卷而睡有感 早春新晴 枕上聞禽聲 感舊 夜雨三首 初晴野步
明日復雨排悶二首 小室 浮世 紅梅二首 湖上 晴甫一日復大風雨連日不止遣
懷 癸丑上元三夕皆大雨雪 寓歎 幽興 緜梅三首

卷第二十七

僧廬 春日 春遊 懷昔 記夢 春陰 睡起行至門外有賦 早春四首 醉吟三首
贈劉改之秀才 蓬門 龍鍾 送佛照光老赴徑山 春社有感 春社四首 村夜 山園
遣興 次韻陳機宜見贈 野意 戒殺 余年四十六入峽忽復二十三年感懷賦長句 山
行 雨中排悶 杜敬叔寓僧舍開軒松下以盧瀨名之來求詩 贈徑山錫書記 五月一日
作 春夏之交衰病相仍過芒種始健戲作 自嗟 枕上述夢 雨中排悶 小軒夏夜涼甚

偶得長句呈杜叔高秀才 憶昔 夏日晚興 老翁 因甚戲書歲晚 戲詠山陰風物 老健 六月晦日作 喜雨 門外納涼 贈蘇趙夏兄弟 癸丑七夕 共語 書歎 秋曉倚闌 癸丑七月二十七夜夢遊華嶽廟二首 僕頃在征西大幕登高望關輔樂之每冀王師拓定得卜居焉暇日記此意以示子孫 讀陶詩 秋夜感舊十二韻 幽居 醉題 雨涼小飲 戲作 題齋壁 書憤 秋興 雨夜排悶二首 秋日出遊戲作二首 雨中夕食戲作三首 自警 寄方瞳胡先生 雨夕焚香 秋雨初霽徙倚門外有作 雨中作 贈老雞二首 秋晚閑步鄰曲以予近嘗臥病皆欣然迎勞 雨夜 醉臥道傍 枕上聞急雨二首 得趙若川書因寄 夢至洛中觀牡丹繁麗溢目覺而有賦 閑居對食書媿二首 秋夜獨酌 風雲交作戲題 自嘲 書室 數日秋氣已深清坐無酒戲題長句 五更起坐 谿上雜言 厭事 方池 癸丑重九登山亭追懷頃在興元常以是日獵中梁山下樂甚慨然賦詩予是生六十有九年矣

卷第二十八

感懷四首 出遊二首 讀杜詩偶成 秋夜卽事 物有可歎者因戲作數語以識之 老懷 對酒 東村散步有懷張漢州 晚寒自東村步歸 排悶六首 初寒病中有感 放歌行 山頭石 有客 幽居五首 野興四首 買油 繫舟二首 初冬至近村 古築城曲四首 山園 將軍行 古別離 寄子真 泛舟自中堰入湖 夜歸舟中作 蓬萊閣聞大風

小出塞曲 冬日園中作 登山亭 拄杖歌 冬晴 冬夕二首 十月十五夜對月 久
疾三首 舍北望牛頭山山有延勝寺先太傅書室在焉六年前嘗泛小江往遊寺焚於陸寇書
堂無復存矣 十月十九日大風作寒閉戶竟日 寄天封明老 村居二首 十月下旬暄甚
戲作小詩 霜天雜興三首 連日風雨寒甚夜忽大風明旦遂晴 懷昔 寄題王俊卿看山
堂二首 絕歎 風雨 晚過鄰曲 莫仲謙挽詞 病起 晚興 贈粉鼻 與兒輩論李杜
韓柳文章偶成 夢至小益 懷紹興間往還諸公 磨納道衣 溪上作二首 小憩 癸丑
十一月下旬溫煖如春晦日忽大風作雪 占城櫻竹拄杖 西城 東城 斯道 病起山居
日有幽事戲作二首 蝸廬 冬夜讀書二首 十二月九日枕上作 記夢三首 鏡湖女

陸放翁集

劍南詩集目錄

卷第二十九

水村曲 石洞餽酒 病退 偶書 讀史 飲石洞酒戲作 霜寒 賽神曲 涼州行 望夫石 江村道中書觸目 采蓮曲 兀坐頗念遊歷山水戲作 五雜俎二首 漁扉 詠史 烏棲曲 古別離 書歎 十二月二十六夜聽雨 起晚 陳少監餉澄清堂酒 雪中作 甲寅元日子七十矣酒間作短歌示子 七十 正旦後一日 立春 老境 偶懷小益南鄭之間悵然有賦 再用前韻不佞次 北坡梅開已久一株獨不著花立春日忽放一枝戲作 八日 夜讀呂化光文章拋盡愛功名之句戲作 遇術士飲以卮酒 閒趣 正月二十日晨起弄筆 春夜讀書 春晴泛湖入城 書齋壁二首 春日睡起 老病謝客或者非之戲作 永日無一事作詩自怡 窗前作小土山藝蘭及玉簪最後得百合併種之戲作 泛舟觀桃花五首 新闢小園五首 上巳小飲追憶乾道中嘗以是日病酒留三泉江月亭悵然有感 晚步門外散懷二首 欲出遇雨 飢坐戲詠 蔬食 山亭 久不得張漢州書 春晚村居 遊雲山諸蘭若 與子坦子聿遊明覺十四韻 淨智西窗 小僧乞詩 西窗睡起 平水 三月二十五夜達旦不能寐二首 園中小飲 舟中夕望 四月一日作 舟行過梅市

卷第三十

山園雜賦四首 西窗 山頭鹿 夏四月渴雨恐害布種代鄉鄰作插秧歌 雲童童行
董逃行 閔雨二首 喜雨 初夏 村舍 烏啼 感舊 讀書至夜半燈盡欲睡慨然有感
遺興 農舍 四月晦日小雨 泛舟過吉祥 書歎 五月得雨稻苗盡立 薄碎遺懷

五月十一日夜坐達旦 題陽關圖 新暑書事 時雨 示客 南堂默坐 夏日 小酌
夏夜二首 看鏡二首 明妃曲 思遠遊 太息 六月二十六日夜夢赴季長招飲 夜分
不寐起坐園中至旦 露坐 晨起 散步東邨 早秋四首 七月二十一日午睡夢泛江風
濤甚壯覺而有賦 幽居戲贈鄰曲 遺興二首 步至湖上寓小舟還舍五首 送王仲言倅
秦州絕句二首 醉中作 秋夜書感 八月三日驟涼有感 南堂與兒輩夜坐 泛舟至魯
墟 園蔬薦村酒戲作 雨夕排悶二首 雨中作 讀易 郊行夜歸有感 醉歌 買酒
秋雨歎 憂國 夜意 大風雨中作 題齋壁二首 窮途 貧病 秋晚四首 山村書所
見二首 三年前嘗與兒輩步過東涇小嶺得勝處可營別墅貧不能成偶復至其地悵然有感
園中秋夕 秋晴每至園中輒抵暮戲示兒子 醉睡初覺偶作 汪茂南提舉挽詞二首
謝徐居厚汪叔潛攜酒見訪 喜鄭唐老相過 秋晚散步門外 寄徐秀才斯遠并呈莊賢良
器之 閒中 秋霽 晨起 筵篋謠二首 寄季長少卿 悶極有作 自詠 夢范參政 乞
奉祠未報食且不繼 山寺 大師魏國史公挽歌詞五首 三峽歌九首 十月三日泛舟湖

中作 早行 晚泊 遣懷 舟行戲書

卷第三十一

久雨 偶得長魚巨蟹命酒小飲蓋久無此舉也 泛舟湖山間有感 望永思陵二首 精蟹
霜夜三首 書室明煖終日婆娑其間倦則扶杖至小園戲作長句二首 初冬 買屐 十
月晦日作 贈道友五首 示子聿 老境 予就居三山在鏡湖上近取舍東地一畝種花數
十株疆名小園因戲作長句 被命再領沖佑有感 冬夜戲書三首 幽居二首 送蘇召叟
秀才入蜀效宛陵先生體 寄題哲上人漫堂 冬夜獨酌 夜坐燈滅戲作 艾如張 上之
回 雜詠園中菓子四首 閉戶二首 連日大寒夜坐復苦飢戲作短歌 園中對酒作 孝
宗皇帝挽詞三首 小兒入城 夜坐三首 縱筆五首 郊行夜歸書觸目 閉戶 十一月
五日夜半偶作 晴和出遊湖山間 病思 寄子虞 紙閣午睡二首 夜分復起讀書 效
蜀人煎茶戲作長句 書逆旅壁 嬾趣 閒中富貴二首 書近況寄蜀中道舊 醉中自贈
明日自和 雪中至近村 歲暮感懷以餘年諒無幾休日愴已迫爲韻十首 桐江哲上人
以端硯遺子聿纔寸餘而質甚奇天將雨輒先流泚予爲效宛陵先生體作詩一首 立春前三
日作 贈應秀才 春耕 首春連陰 夜坐 新春 得季長追懷南鄭幕府慨然有作 正
月十一日夜夢與亡友譚德稱相遇於成都小東門外既覺慨然有作 送陳吏部還朝 觀棋
春行 雨霽春色粲然喜而有賦 幽思 贈持鉢道人 柳二首 山園雜詠五首

卷第三十二

雨夜書感二首 鏡湖 舟中戲書 春晚懷山南四首 春晚書齋壁 七十一翁吟 山茶
一樹自冬至清明後著花不已 晨起 春晚雜興六首 齋中雜題四首 老疾戲自贈 夜
坐聞湖中漁歌 上巳書事 對酒 自規 窮居有感 春夏之交風日清美欣然有賦三首
夜歸 農家歎 三月十一日郊行 初夏行平水道中 初夏幽居偶題四首 晨起 小
園 幽居 夜賦 閒中書事二首 初夏十首 四月旦作時立夏已十餘日 春夏之交鳴
鳥百族惟布穀聲最悲急動人戲作十韻 倚杖 野步 竹窗晝眠 騰騰 幽棲二首 睡
起 愁坐忽思南鄭小益之間二首 四月十三夜四更起讀書 夏雨初霽題齋壁 東窗
聞鼻 雨中示子聿 山園屢種楊梅皆不成枇杷一株獨結實可愛戲作長句 夢遊山寺焚
香煮茗甚適既覺悵然以詩記之 夏日 巢山二首 四月二十三日作二首 觀月 溽暑
晨起 閒思二首 梅天 夜坐 麥熟市米價減鄰里病者亦皆愈欣然有賦 雨中作
夜雨 乙卯重五 夏夜風雨極涼枕上口占 窮居 思蜀 五月二十三夜記夢 送葉尙
書 路傍曲三首 贈汪叔潛 出遊

卷第三十三

立秋後四日雨 夙興 存養堂爲汪叔潛作 感昔二首 病稍平示兒輩 野堂四首 七
月下句得疾不能出戶者十有八日病起有賦 夢有餽地黃者味甘如蜜戲作數語記之 秋

夜二首 病起憊甚有歎 小舟晚歸二首 夜坐 幽事 病後衰甚非籃輿不能出門感歎
 有賦 秋思 題村店壁 病去 白首 書病 舍北晚眺二首 夜闌篋中書偶得李德遠
 數帖因思昔相從時所言後多可驗感歎有作 登東山 貧樂 乙卯重九 縱步近村 題
 齋壁 范參政挽詞二首 病後往來湖山間戲書 秋夜遣懷 初冬暄甚 贈湖上父老十
 八韻 初冬感懷二首 讀杜詩 記九月三十日夜半夢 小舟遊近村捨舟步歸四首 蜀
 僧宗傑來乞詩三日不去作長句送之 羲農 冬夜不寐 十月 讀易二首 聞雁 悲歌
 行 村飲 鏡湖西南有山曰外山民某氏居之其居少西小潭受飛泉羣山環合真異境也爲
 作短歌 十月十七日子生日也孤村風雨蕭然偶得絕句予生於淮上是日平旦大風雨駭人
 及子墮地雨乃止二首 遊山舟中遇風雨戲作 一齒動搖似不可復留有感 山行 老學
 菴 枕上偶成 舍北閒望作六字絕句 題菴壁二首 縱筆三首 十月二十八日夜雞初
 鳴時夢與數女仙遇其一作詩示予頗哀怨如人間語惟末句稍異予戲之曰若無此句不可爲
 神仙矣其一從傍戒曰汝當勿忘此規作詩者甚有愧色予頗悔之既覺賦兩絕句以解嘲二首
 山行二首 貧甚作短歌排悶 過張王行廟 秋月曲 卽事 悲歌行 讀李泌事偶書
 晨起 喜雨 閒趣 自警 雨後二首 窗黑 雨止行至門外戲作 野飲 兩夜有懷張
 季長少卿 雨中熟睡至夕二首 憶昔 燈下看梅 程泰之尙書挽詞二首 兩夕獨酌書
 感 白首 客言來自上臯道中以其語作一絕 睡起

卷第三十四

歲暮 殘臘二首 一壺歌五首 屢疾 新歲 早春 太古 春夜 正月六日作 寄題
吳斗南翫芳亭 春初驟暄一夕梅盡開明日大風花落成積戲作三首 讀老子傳 示元用
春思 春望 丙辰上元前一日 夜雨思枯蒼遊 春陰 寒夜歌 正月十六日園中偶賦
陵霄花 懷舊六首 夜坐 入城舟中作 寓蓬萊館 過能仁光孝寺欲訪听老會府中
遊客遂不果入 夜二鼓留西城門歸三山 讀杜詩 蘇軾光節推挽歌詞 村翁 寄子布
落花 南窗 排悶 過鄰家戲作 看花 閒趣 春盡遣懷 二友 半丈紅盛開 感
事四首 豐年行 四月一日夜漏欲盡起坐達旦 蓬萊行 馮縣丞挽歌詞 幽居初夏四
首 出蜀十九年故交零落殆盡慨然有作 憶天彭牡丹之盛有感 五月七日夜夢中作二
首 急雨 夜中步月 晨起 枕上聞布穀聲 雨夜 杖黃 卽事 失鶴鷄 贈童道人
蓋與予同甲子 上方鉢老求宿蘆詩宿蘆蓋所寓室名以其似漁舟也 夜坐園中至夜分
六月二十四日夜分夢范至能李知幾尤延之同集江亭諸公請予賦詩記江湖之樂詩成而覺
忘數字而已 晨起 村飲示鄰曲 醉歸 二愛并序 蜻蜓浦 題韓蓮鹽竹隱堂絕句三
首 哭杜府君 初秋夜坐 冥坐自午至暮 舟中詠落景餘暉暉輕橈弄溪渚之句蓋孟浩
然耶溪泛舟詩也因以其句爲韻賦詩十首

卷第三十五

浮生 秋夜 秋夜紀懷三首 書懷 林居秋日 七月二十四作 枕上作時聞臨海四明
皆大水 書懷 秋陰至近村 閒居自述 秋雨初霽試筆 幽懷 雨後出門散步二首
秋夜示兒輩 七十二歲吟 雨夜讀書二首 秋晚 新菊二首 九月二十八日五鼓起坐
抽架上書得九域志泫然有感 題橋南堂圖 題吳參議達觀堂勝蓋朱希真所作也僕少
亦辱知於朱公故尤感慨云 舍北搖落景物殊佳偶作五首 自嘲 作夢 夜坐 北園雜
詠十首 龜堂獨坐遣悶二首 復竊祠祿示兒子 隴頭水 雪歌 春近 望永阜陵 初
拜再領祠宮之命有感 醉中信筆作四絕句既成權觀者不知野人本心也復作一絕五首
臘月十九日午睡覺復酣臥至晚戲作 睡起至園中 北園籬外散步 歲暮獨酌感懷 盆
池 對食 贈澄 海棠圖 丁巳正月二日雞初鳴夢至一山寺名鳳山其尤勝處曰味軒子
爲賦詩既覺不遺一字 初春 雨中作三首 縱筆 題慧老芋巖 立春日 病中作二首
立春日二首 北望 上元夜作 長歌行 讀書 枕上作 書志 夜賦 晚步 漁歌
殘夢 書憤二首 小舟遊西涇度西岡而歸 春行 姜總管自築墓舍名蘭菴求詩 湖上
今歲遊人頗盛戲作四首 賞花至湖上 暮春二首 暮春

卷第三十六

九里 清明 一百五日生 送李憲被召舊與其先侍郎遊從 初夏 幽居 閒適 病中
夜賦 閒身 書感 衰病 雜題六首 自傷 雨後絕涼偶作 村居 久雨 七十三吟

會稽 泛舟 夜觀子虞所得淮上地圖 水村 題巷壁二首 晚歸舟中作 送嚴居厚
 棄官歸建陽溪莊 次朱元晦韻題殿居厚溪莊圖 夢中遊禹祠 感懷 酒熱 病起遊近
 村 秋夜讀書示兒子 秋晚書感 王成之給事挽歌辭二首 書南堂壁二首 秋晚 晨
 起待子聿歸 信筆二首 龜堂東窗戲弄筆墨偶得絕句五首 次呂子益韻 舍北行飯書
 觸目二首 明日復得五字二首 十一月二十二日夜待子聿未歸 南窗 幽居 春近山
 中卽事三首 雪夜感舊 將進酒 歲暮懷張季長 謝朱元晦寄紙被二首 送王季嘉赴
 湖南漕司主管官 菴中夜興 初春欲散步畏寒而歸 憶昔 戊午元日讀書至夜分有感
 二首 雜感十首 歎老 朝飢食齋麵甚美戲作二首 漁隱堂獨坐至夕 讀書 北望
 蘭 古梅 山脚散步由舍北歸三首 寄題連江陳氏拂石軒 得張季長書以大蓬見稱蓋
 以子寄祿官視昔秘書監也因作五字寄之 病足累日不能出門折花自娛 書意 新燕
 北巖采新茶用忘懷錄中法煎飲欣然忘病之未去也 連日至梅仙塢及花溼觀桃花抵暮乃
 歸二首

卷第三十七

病中作 題郭太尉金州第中至喜堂 暮春 小園新晴二首 春晚感事二首 春晚園中
 作 題夷堅志後 幽居 聞鳥聲有感二首 與子虞子坦坐龜堂後東窗偶書 行年 東
 窗小酌二首 西林傳耄主求定菴詩二首 夏日五首 夜酌 夏夜四首 泛舟 感舊六

首 書喜 自詠 露坐二首 親舊或見嘲終歲杜門戲作解嘲 北窗 新秋以窗裏人將
老門前樹欲秋爲韻作小詩十首 食新有感貧居久蔬食至是方稍得肉 秋夕露坐作 有
年 大雨 東西家 予自春夏屢病至立秋而愈作長句自賀 七月十一日雨後夜坐戶外
觀月 王與道尙書挽詞二首 初秋 感秋 北窗試筆 秋思四首 新涼二首 自遣
自規 感舊四首 秋日獨酌 夙興 身世 憶昔 豐歲 村居 中秋夜半後無雲而月
色微淡尤爲絕景 夜賦 遠興 秋養 寄題周丞相平園 雨三日歌 戲作治生絕句
龜堂雜題四首 偶讀陳無己芍藥詩云一枝剩欲簪雙髻未有人間第一人蓋晚年所作也爲
之絕倒戲作小詩 村舍 雨中作 江郊 閒趣三首 小飲 作字 晝眠起偶賦 小舟
過吉澤效王右丞 湖山雜賦五首 太息四首 學書 晚興 秋晴見天際飛鴻有感 初
寒獨居戲作 夢觀牡丹 書喜三首 小飲罷行至湖塘而歸 病雁 澤居 秋穫歌 戊
午重九 重九懷孤景略 晨鏡 秋齋遣懷 屏迹 初寒 風雨 龜堂自詠二首 閒
居初冬作 病中排悶 季秋已寒節令頗正喜而有賦

卷第三十八

秋懷 吳體寄張季長 嘲畜貓 立冬日作 初冬 醉題 新作火閣二首 舍北行飯
遣興二首 舟中三首 雨夜感舊 夜聞落葉 閉門 祠祿滿不敢復請作口號三首 過
鄰家 舍北野望四首 書感 冬夜爐邊小飲 龜堂獨酌二首 冬夜作短歌 病愈 自

遣 感舊二首 寒雨中偶賦二首 壽考如富貴 午飯二首 題王仲信畫水石橫幅 治
園 冬日感興十韻 冬日出遊十韻 思蜀三首 作雪二首 戲詠山家食品 耕罷偶書
兩夜 菴中晨起書觸目四首 三山杜門作歌五首 老境二首 記戊午十一月二十四
夜夢 六經示兒子 舍北晚步 對酒 夜坐求酒已盡喟然有賦 食粥 寒夜 梅花六
首 三山下居今三十有三年矣屋陋甚而地有餘數世之後當自成一村今日病少間作詩以
示後人二首 南園觀梅 歲盡苦寒 己未新歲 歲首書事二首 初春 菴中獨居感懷
三首 戲作貧詩二首 春日園中作 中春連日得雨雷亦應候 雨後微陰光景益奇復得
長句 春日小園雜賦二首 簡鄰里 客叩門多不能接往往獨坐至晚戲作 園中偶題四
首 北窗偶題四首 沈園二首

卷第三十九

戲贈園中花 春思 贈燕 雨闕示兒子 讀晉書 春晚苦雨 燕 夜雨 寒食日九里
平水道中 春晴自雲門歸三山 予數年不至城府丁巳火後今始見之 晚自北港泛舟還
家 書懷 初夏 小築 喜雨 晨起 五月初病體益輕偶書 己未重五 五月七日拜
致仕勅口號二首 致仕後即事十五首 讀後漢書二首 新裁道帽示帽工 新製道衣示
衣工 兩翁歌 五月中連夕風雨氣候如高秋枕上有賦 前詩感慨頗深猶吾前日之言也
明日讀而悔之乃復作此然亦未能超然物外也 雨後過近村 銘座 致仕後述懷六首

蝶 戲贈酒榼 題菴壁二首 泛舟澤中夜歸 書嬾 晨起 夜坐 白樂天詩云倦倚繡
牀愁不動緩垂綠帶鬢髮低遼陽春盡無消息夜合花前日又西好事者畫之爲倦繡圖此花以
五六月開山中多于茨棘人殊不貴之爲賦小詩以寄感歎 蟬蟬行 望霽 久雨路斷朋舊
有相過者皆不能進 散步至三家村 村東晚眺二首 露坐二首 致仕後歲事有望欣然
賦詩 夜聞姑惡 村舍雜書十二首 逃暑小飲熟睡至暮二首 夜坐庭中達旦 讀前輩
詩文有感 自嘲 予讀元次山與瀼溪鄰里詩意甚愛之取其間四句各作一首亦以示予幽
居鄰里四首 東山避暑用轆轤體 喜雨 得故人書偶題 喜雨歌 老學菴井 長歌行
七月二日夜賦 自述二首 項羽 曹公

卷第四十

夜雨 昔人有畫醉僧醉道士醉學究者皆見于傳記及歌詩中予暇日爲各賦一首 次季長
韻回寄 溪上小酌 齋中夜賦 讀舊豪有感 新秋 陳阜卿先生爲兩浙轉運司考試官
時秦丞相孫以右文殿修撰來就試直欲首送阜卿得予文卷擢置第一秦氏大怒予明年旣顯
黜先生亦幾蹈危機偶秦公薨遂已予晚歲料理故書得先生手帖追感平昔作長句以識其事
不知衰涕之集也 書喜二首 幽居 雜興四首 贈鷺 贈鶴 東堂睡起 五鼓起坐待
旦 功名 搔首 小雨釣歸 曉賦 急雨 遣興四首 讀林逋魏野二處士詩 紙墨皆
漸竭戲作 讀隱逸傳 泛舟至東村 自詒 野興 讀書 客有見過者旣去喟然有作二

首 秋陰 八月九日晚賦、燕坐 村飲四首 秋雨益涼寫興、薪米偶不繼戲書 牧牛
兒 與兒子至東村遇父老共語因作小詩 微雨午癡夢憇道傍驛舍若在秦蜀間慨然有賦

晨起對鏡 村思 秋夜 醉中書懷 次韻鄭盱眙見寄并簡其甥劉君 書齋壁 一老

戲用方外語示客 秋晚三首 次金溪宗人伯政見寄韻 新寒二首 村鄰會飲 試筆

二首 孤村 絕祿以來衣食愈不繼小兒力圖之殊未有涯予謂不若痛節用爾示以此詩

予宿疾多已失去獨氣痛時作賦詩自寬 秋懷十首末章稍自振起亦古義也 九月七日子

坦子聿俱出斂租穀雞初鳴而行甲夜始歸勞以此詩 醉題隸西酒家二首 秋晚 省事

晨起頗寒飲少酒作草數幅 往事 步至東莊 秋思二首 讀退之人不知古今馬牛而襟

裾之句有感 病愈看鏡 讀韓致光詩集 逆旅書壁二首 初寒老身頗健戲書二首 子

龍求煙雨軒詩口占絕句二首

卷第四十一

居室甚隘而藏書頗富率終日不出戶二首 無酒歎 讀書 醉賦 掩扉 六經二首 舟

中作 秋晚二首 西窗獨酌 冬初薄霜病軀益健欣然有賦 一錢 燈下讀書戲作 遊

近山 示兒子 寄溧陽周丞文璞周寄詩卷殊可喜 旅思 東村步歸二首 觀方外書

午睡初起二首 暮秋遣興二首 種蔬 起晚戲作 老歎 新治暖室 暖閣 自詠 夜

坐 初冬有感二首 題酒家壁 冬初出遊二首 早飯後戲作二首 擬古四首 東村二

首 倚闌 霜寒不能出戶偶書 冬晴與子坦子聿遊湖上六首 夢蜀 歲晚二首 讀老子 貧病 洪雅葛仙硯 冬日讀白集愛其貧堅志士節病長高人情之句作古風十首 十一月四日夜半枕上口占 齋中弄筆偶書示子聿 飢寒吟 病愈小健戲作二首 祭竈與鄰曲散福 湖水愈縮戲作 夜坐 夢中作遊山絕句二首 大姪挽辭 書幸二首 退居北望感懷 白髮 老歎 作竹籬成因把酒其間戲題四十字 新養白雞毛羽如玉殊可愛 新籬 龜堂雜興十首

卷第四十二

己未冬至 冬至夜坐作短歌 新裁短褐接客以代戎服或以爲慢戲作 冬夜 書感 書意 試茶 對酒懷丹陽成都故人 三山卜居三十有四年矣老身七十有五兒輩亦頗宦學未爲非吉也偶作五字示諸兒 村興 枕上 得建業倅鄭覺民書言虜亂自淮以北民苦徵調皆望王師之至 雨夜讀書 夢中作 題傳神 紀懷 新作柴門戲書 炊飯 愛閒 與子聿讀經因書小詩示之 登東山 己未歲暮 冬夜讀書示子聿八首 幽興 寓歎 夢題驛壁 新春 庚申元日口號六首 視東臯歸 晚步舍東 人日東園 逆旅行 小雨初霽 獨夜 忍窮 開歲半月湖村梅開無餘偶得五詩 老病 三二年來夜夢每過吾廬之西一士友家觀書飲酒方夢時亦自知其爲夢也二首 上元雨 雜興二首 初春書喜 幽居無一事 贈道流 病中作 病愈偶書 小圃獨酌 飯罷戲示鄰曲 春日六首 新

晴野步 湖上作二首 夜行過一大姓家值其樂飲戲作 枕上作二首 悽悽行 春薺

答客 閒中自詠二首 甲申雨 今歲遊花溼差晚戲作 枕上口占三首 贈謝正之秀才

連日往來湖山間頗樂即席有作 贈猫 歎老 殘春 東村 晚步舍北歸 記夢 寄

題揚州九曲池 投老 茅亭 貧甚賣常用酒杯 春晚泛湖歸偶賦

卷第四十三

東園小飲四首 病退頗思遠遊信筆有作 春晚閒步門外 嘲布穀 題齋壁 龜堂晚興

長干行 養生 園中觀草木有感 恩賜龜紫二首 自警 獨夜 雨夕枕上作 喜晴

觀運糧圖 宇文袞臣吏部予在蜀日與之遊至厚契闊死生二十年矣庚申三月忽夢相從

如平生愴然有賦 阿姥 初夏 讀書 喜晴 初夏北窗二首 書適 幽居初夏四首

獨醉 獨立 高臥 趙彥膚修撰挽辭 讀香奩集詩戲效其體 野步至村舍暮歸 述悲

江東韓漕晞道寄楊庭秀所贈詩來求同賦作此寄之 雨夜 小橋 自笑 入梅 雨夜

燕 午枕 項里觀楊梅四首 夜歸 五月十一日睡起 示客 雨中作 舟中遣興

自嘲 齋中雜興十首 夏五月方閱雨忽大風雨二百未止二首 遣興二首 六月一日

曉賦 露坐 夜賦 乙夜納涼 五鼓 老態 枕上聞風鈴二首 寄贈湖中隱者 觀畫

山水 六月十八日立秋未旦起行山園口占 新秋 晨起自山園歸書室 初秋小雨 出

遊 對酒 自勉 新涼 醉中題民家壁 秋景 舟中作 雜興四首 自詠閒適 近村

暮歸 秋興 讀史有感三首

卷第四十四

讀何斯舉黃州秋居雜詠次其韻十首 讀蘇叔黨汝州北山雜詩次其韻十首 新治火開

枕上作二首 初睡起有作 示友 述懷 枕上二首 病足久敗遊山之興山中道人多見

問戲作示之 舟中作 追懷胡基仲 十月八日九日連夕雷雨 西村 感事示兒孫 或

遺木瓜有雙實者香甚戲作 十月 初晴 梅花五首 對酒戲詠 冬夜 冬晴稍理舊學

有感於懷 葺小圃及東齋 讀經示兒子 出遊不果 夢行秦晉間有作 聞雞鳴自警

嘲子聿 馬上口占 幽居 感事 初寒 寄題季長飾菴 對食書媿 戲題酒家壁三首

十月二十八日夜風雨大作 夜寒燃火有感 農事休小膏東園十韻 開東園路北至山

脚因治路傍隙地雜植花草六首 連日治圃至山亭又作五字四首 寒夜 掩卷有感 閒

遊 野寺 三江 讀老子 新泉絕句二首 風雨 題菴壁二首 讀仙書作 讀淵明詩

寒夜枕上 新晴出門閒步 聞笛 鳴禽 食晚 午坐戲詠 戲詠鄉里食物示鄰曲

歲暮貧甚戲作 汪叔潛教授挽辭 汪給事太夫人程氏挽辭 太恭人諱氏挽辭 路乾

寒夜 乍晴至園中

卷第四十五

十二月三日夜橋上看月 流年 山家五首 小舟白竹篷蓋保長所乘也偶借至近村戲作

二首 稻飯 殘臘二首 書志 數日不出門偶賦三首 寄題嚴君厚仲釣軒 寄趙昌甫
 并簡徐斯遠 南園觀梅 老身 獨處 醉中歌 排悶 庚申十二月二十一日西和州健
 步持子布書報已取安康襄陽路將至九江矣悲喜交懷作長句二首 園中作 足疾 歲暮
 書懷二首 除夜 修路 金丹 平昔 二月三日春色粲然步至湖上 計子布歸程已過
 新安入畿縣界 東園觀梅 喜得建茶 春雨 春雨二首 初春感事二首 道室書事
 先少師宣和初有贈晁公以道詩云奴愛才如蕭穎士婢知詩似鄭康成晁公大愛賞今逸全篇
 偶讀晁公文集泣而足之 春日雜題六首 春日暄甚戲作 春日 書室獨夜 追感往事
 五首 書意二首 清都行有序 春來食不繼戲作 紹興辛酉年十七矣距今已六十年
 追感舊事作絕句 獨坐視老奴灌園 雨晴風日絕佳徙倚門外三首 春遊 春雨三首
 書懷 三月十六日至柯橋迎子布東還二首 題施武子所藏楊補之梅 食野菜二首 子
 十許歲即往來雲門諸山今復與諸子來追念悽然 雲門道中 龍瑞 禹寺 寄題張仲欽
 左司槃湖 園中晚興 送陳希周赴安福令 春晚久雨排悶 甲子日晴 三月二十日兒
 輩出謁孤坐北窗二首 春盡記可喜數事 立夏前二日作 老民二首 貧甚自勵 衡門
 遊法雲 舟中作 貧居 初夏野興三首

卷第四十六

孟夏方渴雨忽暴熱雨遂大作 小池 衡門 海上作 朝飢示子聿 養氣 示友 早涼

熱睡 初夏 夏雨 倚樓 晚興二首 晨雨 戲作絕句以唐人句終之二首 述懷 閒中自
詠 晨興 自詠二首 西村 漁父 放歌行 苦貧 晨起至參倚齋示子聿 夏夜對月
夏夜 五月十日曉寒甚聞布穀鳴有感 老歎 閉戶 長飢 山齋書事 贈道流 避暑
松竹間 連日大雨門外湖水渺然 午睡 窮居 梅雨 村居書事 閒中信筆二首其一
追和陳去非韻其一 追和王履道韻二首 題齋壁 夏日雜題八首 夏雨歎 物外雜題八
首 過村舍 晝臥初起書事 夜雨有感 偶作夜雨詩明日讀而自笑別賦一首 舍西晚
眺示子聿 自詠 讀唐人樂府戲擬思婦怨 南堂納涼二首 中庭納涼二首 待旦二首
晨興二首 晚涼述懷 湖塘晚眺二首 小集 出門與鄰人笑談久之戲作四首 魚池
將酒車水注之一齒動搖已久然餘皆墜甚戲作 晚至新塘 夜泛湖中 立秋後作 覽
鏡 早秋南堂夜興 菱歌 聞角 湖隄 秋旦 龜堂晨起 柳橋秋夕 道室雜題四首

卷第四十七

儒生 秋夜 寺閣 秋暑夜興 漁父 省事 新涼書懷四首 七月十七晚行湖塘雷雨
大作 七月十八夜枕上作 梅市 秋思 小舟湖中夜歸追和孟浩然夜歸鹿門歌 酒盡
燒香 自述二首 風雨 白露前一日已如深秋有感二首 東村晚歸 秋望 郭西 舍
北 夜坐示子聿 柳橋晚眺 秋興五首 嘉泰辛酉八月四日雨後殊凄冷新雁已至夜復
風雨不止是歲八月一日白露二首 近村民舍小飲 閒適二首 夜歸二首 自詠 老歎

秋社 晨起 中夜睡覺兩目每有光如初日歷歷照物晁文元公自謂養生之驗予則偶然
 耳感而有作 錢道人不飲酒食肉囊中不畜一錢所須飯及草屨二物皆臨時乞錢買之非此
 雖強與不取也二首 枕上 山園書觸目 苦貧戲作 秋曉書感 秋夜 村舍二首 天
 涼時往來湖山間有作 雨夜歎 病足晝臥夢中譚諄乃誦尙書也既覺口占絕句二首 新
 買啼雞 幽棲二首 秋日雜詠八首 望永阜陵 排悶 秋日晨起 出遊暮歸戲作 自
 詒 出蜀日嘗遣僧則華乞籤於射洪陸使君祠使君以老杜詩爲籤予得道與詩五首中第二
 首其言教戒甚至退休暇日因用韻賦五首 悲歌行 秋夜讀書 對食戲詠 懷昔 偶得
 雙鯽二首 秋懷十首以竹藥閉深院琴樽開小軒爲韻 示客 秋晚村舍雜詠二首 臥病
 累日羸甚偶復小健戲作三首

卷第四十八

縱筆四首 村興 賽神 小立 窮老 晚步舍東 述野人語二首 戲答野人二首 建
 安陳希周官海南爲予致兩拄杖其一促節竹其一枕榔也 排悶 九月十二日折菊 表姪
 江珙種竹名筠坡來求詩 微雨 秋晚寓歎六首 秋晚湖上 縱遊歸泊湖橋有作 九月
 十八日至山園頗有春意 明日又來天微陰再賦二首 雨後至近村二首 雨復作自近村
 歸 雨寒戲作 衡門晚眺 不寐 示子虞 弊廬 予未冠卽交諸名勝今無復在者感歎
 有作 夜雨 題嚴州王秀才山水枕屏 小飲示座中 搖蕩吟 插花 雨過行視舍北菜

園因望北村久之三首 居三山時方四十餘今三十六年久已謝事而連歲小稔喜甚有作
幽居 曉晴肩輿至湖上 戲作野興六首 道室書事 行飯至湖桑堰東小市 負日戲作
遊西村 初冬 遣懷 策杖 汲東山下井 園中作二首 園中 短篷 自適 堂東
小室深丈袤半之戲作 獨處二首 探梅至東村 讀史 漁翁二首 寓言三首 夜四鼓
睡覺起行簷間觀新作南籬 客去追記坐間所言 疇昔 飲牛歌 牧羊歌 生日子聿作
五字詩十首爲壽追懷先親泫然有作 園中書觸目 養生 齋中雜興二首 江上 追憶
征西幕中舊事四首 冬夜 冬日 冬朝 冬暮 風月 落葉 邪風 擁爐不出輒終日
自嘲 嘲梅未開

卷第四十九

自嘲 解嘲 野興 枕上 遠遊 晚遊 夜坐 酒熟醉中作短歌 冬夜讀書有感 散
步湖上至野人家 對食戲詠 昨非 遼初 小雨偶出鄰里小兒競隨吾後不知其意何也
書喜 書房雜書二首 寒夕 讀經 讀史 讀劉賁策 雨霰作雪不成大風散雲月色
皎然 中夜苦寒 示子孫二首 早梅 縱筆二首 歲暮雜感四首 自責 懷舊用昔人
蜀道詩韻 出遊 辛酉冬至 冬至後一日書 客至 子聿入城 降魔 冬日二首 客
去 自勉四首 午晴至園中 七姪歲暮同諸孫來過偶得長句 苦寒 閒中書適二首
復湖 梅花絕句四首 跋馮氏蘭亭二首 十二月二日夜夢與客竝馬行黃河上憩於古驛

二首 倚樓 讀書 讀史 閒遊 日暮 省事 雪中作 夢韓无咎王季夷諸公 晴窗
 讀書自勉 冬夜讀史有感 大寒 自詠 晚興 雪後寒甚 雪晴步至舍傍 訪隱者
 村野 初夜 雙松 兀兀 殘曆 戒言 聞松風有感 遣興二首 有道流過門留與之
 語頗異口占贈之 閒記老境二首 小飲梅花下作 門外野望 自題傳神 歲暮貧甚戲
 書 晚晴閒步鄰曲間有賦 讀書示子聿二首 十二月二十九日夜半雨雪作披衣起聽
 辛酉除夕 除夕

卷第五十

開歲 箕卜 梅花絕句六首 立春前一日作 立春日 送子龍赴吉州掾 正月五日出
 遊 六日雲重有雪意獨酌 閒甚戲作 莫笑 初春雜興五首 春曉 書感 壬戌正月
 十四日 十五日 高枕 送施武子通判 老學菴自規 雨夜 子聿以剛日讀易柔日讀
 春秋常至夜分每聽之輒欣然忘百憂作長句示之 記夢 夜賦 杜叔高秀才雨雪中相過
 留一宿而別口誦此詩送之 曉賦 雪後龜堂獨坐四首 二月一日作 過東鄰歸小憩
 寄呂子和南廂 自述 呂氏子夔郎求詩 新晴 晚步湖堤歸偶作 春來食不足戲作
 散步湖隄上時方瀟湖水面稍渺瀰矣 老學菴 春晚 龜堂雨後作 書感 後書感 村
 居書喜 中春偶書 夜泊 東岡櫻桃已過殊不知 別嚴和之二首 齋中雜題四首 春
 晚 社日小飲 山茶 春夜 春遊 北窗睡起 北窗懷友 舟中作二首 湖村春興

卷第五十一

鄰餉 久雨 登山 讀易 村居書事二首 春晚書村落間事 雜興六首 南堂獨坐
春雨示鄰曲 讀書 新晴賞牡丹 對酒 病起遇晴有作 定命 假山小池二首 春欲
盡天氣始佳作詩自娛 自詠 西村勞農 題廬陵蕭彥毓秀才詩卷後二首 舍北溪上垂
釣 三月二十二日作

書感 寒食 西村暮歸 舍外彌望皆青秧白水喜而有賦 寄題太和陳誠之秀才遠明樓

蝸舍 東岡 首夏 贈曾溫伯邢德允 自述三首 示客 對食戲作二首 對酒戲作

二首 夏初湖村雜題八首 溪上露坐 北齋書志示兒輩 作盆池養科斗數十戲作 枕

上 晨起 喜晴 讀夏書 幽栖 閒詠園中草木六首 夜雨 晨起 放翁 過鄰家

東園 曉出至湖桑埭 雨夜觀史 雨復作 園中 湖上遇道翁乃峽中舊所識也 老學

菴北作假山既成即雨彌月不止 苦雨二首 五月初作 游西村贈隱者 彷徨 碌碌

讀陳蕃傳 夏日晨起 醉舞 北窗微陰 夏夜 村居 晚興 溪上 貧甚戲作長句示

鄰曲 縱筆 入都 開局 感舊 贈陸伯政 雨夜 自局中歸馬上口占 秋雨 秋夜

求月桂 秋思二首 史院書懷 楚辭所謂桂數見於唐人詩句及圖畫間今不復見矣作

二絕句屬山僧野人試求之 雨夜 九月初作四首 暮秋 重九不出遣懷 暇日 憶三

山 示子聿 車中作 初寒偶出 史院晚出 贈洞微山人 九月十四日夜雞初鳴夢一

故人相語曰我爲蓮華博士蓋鏡湖新置官也我且去矣君能暫爲之乎月得酒千壺亦不惡也
既覺惘然作絕句記之 初寒對酒 午晴試筆 夜吟二首

卷第五十二

閒詠二首 遊張園 客至 客去 無客 次韻黃宮教見贈 書直舍壁二首 韓太傅生日
懷故山 西齋遣興 兩夜作 掩戶 臥疾 晚歸 寂寂 獨坐有懷杜伯高 李允蹈
判院送酒四斗予答書乃誤以爲二斗作小詩識愧 感舊贈超師 雜書四首 送子虞赴金
壇丞 今日史課偶少暇戲作五字 入局 縱筆四首 送襄陽鄭帥唐老 掩門四首 自嘲
乍晴出遊 送客至湖州市 題史院壁四首 寄二子 訪客至北門抵暮乃歸 恩除秘
書監 寄題儒榮堂 夙興 館中書懷 雜興十首以貧堅志士節病長高人情爲韻 送任
夷仲大監 謝韓實之直閣送燈二首 道山直舍 館中營繕方一新而右文殿生芝草甚異
戲述淵明鴻漸遺事 雪夜 直舍獨坐思成都 歎老 冬曉 有懷梁益舊遊 孤坐無
聊每思江湖之適 夢韓无咎如在京口時旣覺枕上作短歌 出東城竝江而歸 子聿欲暫
歸山陰見乃翁作惡遂不行贈以此詩 題趙生畫 題宣律師畫像 暇日弄筆戲書三首
立春前後連日風雨 武林 立春後十二日命駕至郊外戲書觸目三首 春夜 訪客至近
郊 車中作 倦飛 遣興 癸亥正月十日夜夢三山竹林中筓出甚盛欣然有作

卷第五十三

謝徐志父帳幹惠詩編 河橋晚歸 謝王子林判院惠詩編 紹興癸亥余以進士來臨安年十九明年上元從舅光州通守唐公仲俊招觀燈後六十年嘉泰壬戌被命起造朝明年癸亥復見燈夕遊人之盛感歎有作 出謁晚歸 思歸示子聿 上元後連數日小雨作寒戲作四首

出湧金門 書志示子聿 入春念歸尤切有作 書房雜詠二首 獨立思故山 寓歎

後寓歎 新歲頗健寄青城故人 新年七十有九 春日訪客於逆旅及郊寺感而有賦 二月二日夢中作 對酒作 西湖春遊 春晚用對酒韻 題館中直舍壁 春晚懷故山 春日效宛陵先生體四首 局中春興 久客 幽居 春日絕句八首 歎老 春雨中偶賦 戲詠落花 思歸示兒輩 東軒花時將過感懷二首 江亭 對食 飽食 記夢 初夜 暫就枕 次林伯玉侍郎韻賦西湖春遊 湖中微雨戲作 與兒輩泛舟遊西湖一日間晴陰屢易 贈呂次翁 得子聿到家山後書 題齋壁三首 小飲 贈傳神水鏡 春晚 天竺 曉行二首 初見石榴花 夢遊三首 江亭晚思 上章納祿恩畀外祠遂以五月初東歸五首 江亭 題三茆邵道士雲隱二首 受外祠敕 感寓二首 肉食 贈成封州 予以壬戌六月十四日入都門癸亥五月十四日去國而中有閏月蓋相距正一年矣慨然有賦二首 雨中別同朝諸公二首 出城 宿北錢清 老伶 舟行錢清柯橋之間 寓蓬萊館 乍自京塵中得歸故山作五字識喜 初歸雜詠七首

卷第五十四

湖上急雨 夏日獨居 溪上夜釣 幽事 夙興 文章 閒遊四首 夏日 蜻蜓浦夜泊
幽興 避暑近村偶題 南堂夜坐 立秋前一夕作 憶昔 自嘲 夜坐庭中 養生
飲酒近村 遊山四首 聞蛩二首 入秋遊山賦詩略無間日戲作五字七首識之以野店山
橋送馬蹄爲韻 村居四首 六藝示子聿 七月十七夜五更起坐至旦 嘗懷四首 湖上
秋夜 書感 示兒 書適二首 放慵 登臨 寓歎 居家 舟中作 築舍 雜感 五首
送陳懷叔赴上臬酒官卻還都下 歸三山入秋益涼欣然有賦 子聿至湖上待其歸 晚
行舍後 秋夜讀書有感二首 治圃 村醉 病臥 書悔 航海 黃犢 秋夜 目昏頗
廢觀書以詩記其始時年七十九矣 假山擬宛陵先生體 秋興二首 湖上夜歸 晨起
飯飽晝臥戲作短歌 孤學 自嘲 試筆 秋思三首 晨起偶得五字戲題葉後 野步
喜晴 自箴 自喜 自詒二首 對酒示坐中 秋晚衰疾稍平聊識喜懷 偶出至近村
書宛陵集後 鄉居 重九無菊有感

卷第五十五

記東村父老言 試筆 曠懷 夢行小益道中二首 秋樹 雜感六首 柳橋秋夜 訪隱
者不遇 蒼檜 農家歌 君子非好異 獨登東巖 灌園 晨起 龜堂 蜀漢 客有言
太山者因思青城舊遊有作 遊近村 疎雨 秋曉 癸亥初冬作 兀坐久散步野舍 法
雲寺 小徑登東山繞行自西北至溪上 美睡 逆旅 東園 雜感四首 渡頭 小飲賞

菊 與兒輩小集 舍北晚眺 書室獨處欣然有詠 冬初至法雲 感憤 記老農語 村
舍 自述 泊舟湖橋酒樓下 菴中雜書四首 連日暴下齷然不支戲作 大風 野輿二
首 若耶村老人 霜曉 山澤 遠遊 北窗 醉題 幽居 連陰欲雪排悶 示子聿
項里溪上見珍禽曰溪鵲相隨數十步不去 冬夜對書卷有感 項王祠 入城 出城 不
入城 年年矣作短歌遣興 先大父以元祐乙亥寓居妙明僧舍後百餘年當嘉泰癸亥游復假
榻一夕感歎成詠 志學 晚行舍北 幽居述事四首 十一月五夜風雪寒甚燃薪取煖戲
作五字 魯墟 曉雪二首 養生 夜讀羣仲至閩中詩有懷其人 獨意 十一月十三日
夜作 故人趙昌甫久不相聞寄三詩皆傑作也輒以長句奉酬 夢中賦早行 兀兀 哺猿
與子坦子聿元敏犯寒至東園尋梅 示諸孫 題齋壁二首 雜言示子聿 夜坐聞大風
歸老 懷舊絕句三首

卷第五十六

道室雜詠三首 偶與客飲客去戲作 故里 齟齬 冬夜 枕上 寒暑 長溪東山容老
索月谷幽賞詩二首 梅 歲晚幽興四首 寄題胡基仲故居 雪夜 聽雪爲客置茶果
獨夜 寄題王才臣山居 夜賦 雪後二首 寒夜讀書 對食戲作六首 甲子立春前二
日作 家居自戒六首 感貧 鄰曲 送客 夜寒起坐待早 信手翻古人詩隨所得次韻
二首 甲子歲元日 初春書懷七首 初春紀事二首 送子虞吳門之行 法雲僧房 陌

上 獨立 春陰 閒味 閒虜亂代華山隱者作 春日 寄子虞 送子坦 送子邁 醉
 眠初起書事 見蜂采檜花偶作 對酒戲詠二首 夜興 老甚自詠二首 夜過魯墟 園
 中小飲 幽居春晚二首 梅花過後遊西山諸菴 梅仙塢花逕觀桃李 家園賞花 聞金
 雞陸伯政下世 一春風雨大半有感 山行贈野叟二首 雲門道中 讀書有感 六門雜
 興九首 春晚出遊六首

卷第五十七

北窗 幽居雜題四首 題旅舍壁二首 出行湖山間雜賦四首 上巳 筍絕句 贈蘇召
 叟 贈趙去華 道室述懷 春晚雨中作 晚行湖上 欲卜菴居未有勝地作詩識之 東
 窗遣興 獨酌 舟中作 衰疾 示兒 野興 閒遊四首 炊米不繼戲作 暮行 小雨
 二首 送辛幼安殿撰造朝 初夏 自警 枕上 野步至近村 書懷示子邁 三月三十
 夜聞杜宇 夜大雨連明晨起乃知之 閒虜亂次前輩韻 壯士吟次唐人韻 衰疾 書日
 用事二首 初夏出遊 初夏晝眠 農事稍閒有作 夜雨 朝晴 北窗 遊山戲作 遣
 興二首 細雨 初暑 夙興 新堂 卽席四首 生涯 落花 四月廿二日微雨中次前輩
 韻 夜雨 夏日 久雨二首 舟中 繫船 復雨 書適 村社禱晴有應 題北窗二首 晝
 坐聞牆外人聲殊敗幽思戲作 晨起行園中 蒼舍 次韻林伯玉登臥龍 道室雜詠六首
 湖塘夜歸 東軒 夏日 斫脰 野飯 村酒 避雨 雨中短歌 散懷 南堂 門屋

納涼 幽居 露坐 暑中久不把酒盆池千葉白蓮忽開一枝 欣然小酌因賦絕句二首

卷第五十八

老馬 大熱 大雨 午睡 書意 卜居三山已四十年矣暇日有感聊賦五字二首 北窗

睡起已亭午終日涼甚有賦 殘雨 溪上避暑二首 龜堂避暑 旅舍偶題 溪月 砑

愚 雜興十首 病瘧兩作而愈 露坐 戲詠 初秋書感 湖上 枕上 書懷 游昭牛

圖 唐希雅雪鵲 菖蒲 吾廬東北皆修竹茂林羽族來栖者不可數計感而有作 秋夜聞

蘭亭天章寺鐘 閔雨 徒行短歌次前輩韻 江樓次前輩韻 七月四日夜賦 出近村歸

偶作 送子修入闕 書志 秋雨 雨後涼甚 屏迹二首 書事四首 雨後 幽居 書

事 秋夜感遇十首以孤村一犬吠殘月幾人行爲韻 草書歌 自傲 新秋二首 憫俗

塊坐齋中有感 新涼示子遙時子遙將有臨安之行 秋雨二首 講學 野興四首 示元

敏 八月四日夜夢中作 明日復理夢中意作 又明日復作長句自規 示子孫 秋夕

徂歲 村居遣興三首 甲子秋八月偶思出遊往往累日不能歸或遠至榜縣凡得絕句十有

二首雜錄入稿中亦不復詮次也

卷第五十九

遊山 對酒 遣舟迎子遙因寄古風十四韻 重寄子遙 飯後偶題 秋興二首 舍北行

飯 舍南野步 感昔五首 病齒 揮手 過鄰家 甲子秋八月丙辰雞初鳴時夢劉韶美

示詩八篇高古可愛明且作此詩志之 山居 歸老 送子坦赴鹽官縣市征 寄子坦 書
感 自扁門歸 遣興 詩酒 晚秋野興二首 舟中口占 閉門 暮秋六首 農舍四首
九月十日夜獨坐 述意 小疾自警 白龍 學易二首 閒中作 枕上 出遊五首
家居三首 贈隱者二首 貧中自戲 風雨夜坐 示村醫 秋雨 雜興六首 江亭 晚
歸 懷昔 初寒示鄰曲 夢中作并序 初寒二首 鉏菜 對酒 夜臥久不得寐復披衣
起呼燈作草書數紙乃復酣枕明且作此詩記之 孤雲 自閔 贈雞 子通爲其長兄置酒
予亦與焉作五字示之 太息三首 代鄰家子作 山行 行過西山至柳姑廟晚歸 月夕
幽居有感 寒夜將旦作 舍北獨步 山村道中思蜀 不如茅屋底四首 菜羹 十月暄
甚人多疾十六日風雨作寒氣候方少正作短歌以記之 冬夜題齋壁 自遣 蕩蕩 晨起

卷第六十

述懷 甲子歲十月二十四日夜半夢遇故人于山水間飲酒賦詩既覺僅能記一二乃追補之
二首 舟中夜賦 舟中曉賦 漁家 遠遊 與兒孫小飲 遂初 與村鄰聚飲二首 夜
坐示子虞 行飯暮歸 寒雨中夜坐 枕上 卽事二首 雜感六首 閒中自嘲 暇日坐
山麓松石間作 得子虞臨安舟中書因寄 書喜二首 老學菴夜興 感昔七首 孤村
村舍書事 小菴居食 冬至 夜坐示子通兼示元敏 客懷 雜書幽居事五首 題齋壁
探梅 新移竹栽喜于得雨而池中鷓鴣乃以水溢而去戲以長句記之 讀宛陵先生詩

勉學 道室試筆六首 治心 夜夢遇老人于松石間若舊嘗從其遊者再拜敘間老人亦
酬接甚至云 過鄰家 村飲 市飲 社飲 舟中作 風雲晝晦夜遂大雪 大雪 雪夜
雪齋 雪後 夜寒與客燒乾柴取煖戲作 排悶 席上有舉呂居仁詩者因次其韻示坐
客 予使江西時以詩投政府丐湖湘一麾會召還不果偶讀舊稿有感 柳橋 鷗 鷺 感
物 甲子歲暮 出遊至僧舍及逆旅戲贈絕句二首 歲暮出遊 出遊所至皆欣然相迎口
占示之 題旅舍壁 野人舍小飲 自近村歸 夢華山 歲暮與鄰曲飲酒用前輩獨酌韻
山中飲酒 客亭 除夜

卷第六十一

乙丑元日 元日讀易 自開歲陰雨連日未止 枯菊二首 村舍雜興五首 夜興 示鄰
曲 夢中作 春雨 草堂 道室 旅次有贈 雜感五首以不愛入州府爲韻 自詠絕句
八首 風月吟 年光 龜堂 春晴 閉門二首 有所感 八十一吟 高吟 湖上作
賞花 園廬 乍晴行西村 書歎 新製小冠二首 書逆旅壁 倚樓二首 小雨 書歎
邊雞柵歌 春興 小園 二月晦日夜夢欲卜居近邑道遇老父告以不利欣然從之 新
晴病中作 示子適 窮居 春晚自近村歸 開孫滿月 小築 春晚歎 鷗鴉 舍東四
詠 示元敏 暮春四首 書感 晨起出南堂 春晚小飲 殘春二首 聞山步有虎 久
雨初霽 初夏幽居雜賦七首 雨 自閑 蔬食 讀阮籍傳 杜宇行 捕虎行 遣興

三齒墮歌 龜堂初暑 衰歎 初夏閒步村落間 夜興

卷第六十二

寄十二姪 出塞四首借用秦少游韻四首 命駕 遊山遇雨 東籬雜題五首 書事二首

乙丑重五二首 夏夜枕上 石帆夏日二首 仲夏風雨不已 幽居 齒落 雨中排悶

逆境 夜興 寄題李季章侍郎石林堂 流年 雨中鋤藥 自嘲 世事 悲齒落自解

送十五郎適臨安 幽居夏日二首 大雨 思雲門 夏夜 觀身 養氣 日用 村市

醉歸 夏日感舊四首 雨後 東軒 寄子虞子通 寄張季長 夏夜二首 讀趙昌甫詩

卷 海氣 村居 戒殺 庭中夜賦 秋近 歎老 殘暑得小雨頗涼 乙丑夏秋之交小

舟早夜往來湖中戲成絕句十二首 初秋四首 秋陰出遊 杜宇 養生 初秋夜賦二首

殘年 記夢 村飲 老饕 對食作 七月十九日大風雷雨電 湖上 欲雨 秋懷四

首 食新 予初仕爲寧德縣主簿而朱孝開景參作尉情好甚篤後十餘年景參下世今又幾

四十年忽夢見之若平生覺而感歎不已 讀書 諭鄰人三首 示小廝二首

卷第六十三

秋雨 江村二首 山行 天王寺迪上人房五十年前友人王仲信同題名尙在 東窗偶書

二首 乙丑七月二十九日夜分夢一士友風度甚高一見如宿昔出詩文數紙語皆簡淡可愛

讀未終而覺作長句記之 示子邁 小雨 舟中作二首 漁父二首 讀書示子邁 秋夕

醉中錄近詩因題卷後 貧甚戲作絕句八首 自傲二首 雨後極涼 醉題 秋感 鼠
敗書 秋望 秋夕 出遊 病中戲詠 書喜 春耕 秋思絕句六首 秋興 寓歎 北
窗 閒思 秋光 秋夜思南鄭軍中 湖上 讀王摩詰詩愛其散髮晚未簪道書行尙把之
句因用爲韻賦古風十首亦皆物外事也 夢行益昌道中有賦 自規 幽興 記前輩語
貧居卽事六首 自詠 枕上作 秋曉聞禽聲五韻 對酒二首 示鄰里 重示 雨夜起
行室中 閏月辛酉壬戌連日風雨癸亥早晴 秋思二首 閒遊三首 對鏡 幽居書事二
首 偶與客話峽中舊遊 讀老子次前韻 作籬 寓歎 衡門感舊 客中作 讀書示子
通 老懷 沉緜 遊近村二首 小亭 記夢二首

卷第六十四

養疾 客從城中來 暮秋中夜起坐次前韻 閒遊 自規 自笑 泛舟至鏡湖旁小市
懷舊 道院述懷二首 秋雨二首 聽雨 畏事 刈穫後書事一首 秋夜五鼓初起坐堂
上至旦 習嬾自咎 雨衣枕上作 晚飯後多至門外並溪而歸 文章 枕上口占 乙丑
九月三日晚雨驟晴西南新月如玉鉤重陽以八月置閏菊花粲然滿園喜甚作一絕記之 寓
歎 村興 夜聞埭東賣酒鼓聲諱甚 燈下晚殮示子適 秋晚書懷二首 初寒 黃昏小
雨中慙慙蒼頭在傍云初未嘗得瞑子乃甚適若熟寐者作五字記之 乾道之初十居三山今
四十年八十有一感事抒懷 視東臯歸小酌一首 梅市道中一首 古寺 夢中作二首

舟行魯墟梅市之間偶賦 衰疾 惜昔 雨後寒甚 入冬病體差健而貧彌甚戲作 蜀漢

新開小室 初冬絕句二首 卽事六首 閒吟 自遣 記乙丑十月一日夜夢二首 縱

遊 村居書事六首 湖堤暮歸 題揚本姜楚公廕二首 書巢五詠 感遇六首 幽興

題詹仲信所藏米元暉雲山小幅二首 詹仲信以山水二軸爲壽固辭不可乃各作一絕句謝

之二首 有所懷 自嘲老態 十月十四夜夢與客分題得早行 紹興中予初仕爲寧德主

簿與同官飲酒食蠶房甚樂五十年有餽此味者感歎有賦酒海者大勸盃容一升當時所尙也

病中兩夜 讀呂舍人詩追次其韻五首 菴中晚思 枕上 冬夜 雜興二首。

卷第六十五

稽山行 贈論命周雲秀才 自嘲 自寬 唐虞 幽事絕句六首 寄題廬陵王晉輔先輩

桂堂 寄題王晉輔專春堂 鼠屢敗吾書偶得狸奴捕殺無虛日羣鼠幾空爲賦此詩 讀唐

書忠義傳 病後作 山中 夜思 晨起 老態二首 枕上 贈過門道人 道院雜興四

首 山村經行因施藥五首 歎老 卽事二首 自賀 天氣作雪戲作 家風 十二月二

日夜夢遊沈氏園亭二首 江干 獨行過柳橋而歸 戲遣老懷五首 對鏡 晨起 吾年

過八十二首 述志二首 排悶 舟中作 丙寅元日 新晴 新歲 簡邢德允 簡蘇邵

叟 東村 新曆歎 雪中二首 早春出遊二首 東籬三首 村市醉歸 村夜 旅思

對酒作 遊東村 晨起 夢中作 春雨四首 村店 久雨薪炭食飲俱不繼戲作 溪上

謝君寄一壘春雨圖求詩爲作絕句二首 二月一日夜夢 新晴二首 望永思陵 燈下
小酌 春遊二首 春日雜賦五首 悲歌行 梅市暮歸三山 龜堂偶題二首 泛湖

卷第六十六

園中作 寄題求志堂 贈過門道人 春晚二首 梨花三首 農桑四首 自嘲 春晚二
首 門戶 晨起 出遊四首 曳杖 自詠 雜興五首 雜感六首 雨聲 書感 書意
讀唐書 雜題四首 栽牡丹 夜聞姑惡 哭開孫 晚春東園作二首 禽聲 秦皇酒
壺下垂釣偶賦 出遊歸鞍上口占 閒詠 雨 立夏 孤寂 明日觀孤寂詩不覺大笑作
長句自解 初夏出遊三首 自詠 五更聞雨思季長 醉中作 溪園 初夏閒居八首
子坦今秋鹽官市征當滿作絕句寄之 子通調官得永平錢監待次甚遠寄詩寬其意蓋將與
之偕行也 送韓立道守池州 野興四首 東齋雜書十二首 梅市 初夏幽居四首 泛
舟至近村茅徐兩舍勞以尊酒 再次前韻 題陳伯予主簿所藏秦少游像 入梅并序 北
窗雨中作 戲書觸目 四月二十八日作二首

卷第六十七

倚筇 薄暑 晝寢二首 睡起二首 林間書意二首 示子通 追涼小酌 暑夜泛舟二
首 短歌行 小江 歸興二首 自春來數夢至閩中蒼溪驛五月十四日又夢作兩絕句記
之二首 自嘲二首 雨霽 大雨 社飲 采藥有感 觀邸報感懷 送子通至梅市而歸

述閒 幽居 午暑 舟過道士莊 晨興 對酒 泛舟 地僻 東軒 季夏雜興四首
夏夜暑毒不少解起坐庭中二首 素飯 老態自遣 耒陽令曾君寄示譜農器譜二書求
詩 雨夜 柴門 賽神 菖蒲二首 迂拙 夏夜 夏末野興二首 示子孫 夜雨 劇
暑 六月十夜風月佳甚起坐中庭有作 古井 菴中紀事用前輩韻 急雨 舍東追涼
酒藥 六月十七日大暑殆不可過然去伏盡秋初皆不過數日作此自遣 急雨遽涼 縱遊
深山隨所遇記之四首 感中原舊事戲作 小涼 村居 城東 初秋露坐作短歌 池上
秋稼漸登識喜 野渡用前韻 秋後一日風雨 感事 久無客至戲作 乍涼 閒趣
溪上 秋詞三首 秋思 老學菴北窗雜書七首 親舊見過多見賀強健戲作此篇 小病
兩日而愈 秋興二首 日用四首

卷第六十八

七月十一日見落葉 龜堂一隅開窗設榻爲小憩之地 南門晚眺 進德 次韻邢德允見
贈 秋懷十首 出遊二首 東窗獨坐書懷 書歎 荷鋤 病臥 秋夜獨坐聞里中鼓吹
聲 老歎 草堂 齋中讀書罷有感 雨欲作步至浦口 鏡湖有鳥名水鳧鳴於春夏間若
曰打麥作飯偶有所感而作 自述 秋興十二首 秋夕書事二首 薄粥 拄杖 小築二
首 一編 埭北 風雨 解嘲 識喜 寓興 老馬行 農家 對酒作 秋分後頓淒冷
有感 卽事示子遙 醉中絕句二首 種麥 秋晚二首 秋穫後卽事二首 行飯至湖上

晨出 老境 憶昔 自嘲 解嘲 新寒 夜歸 夢中作 自勵 九月一日未明起坐
小疾偶書 初寒晨起 霜降前四日頗寒 題驛壁 閒遊 貧舍寫興二首 秋晚雨中
作 待旦 夜意 湖村 連夕熟睡戲書 小軒 曉寒 次韻朝陵葉院察見寄 書意
九月下旬卽事 城南 舟中記夢 送周郎 村舍得近報有感 貧歎 明日復作一首自
解 子虞調官行在寓齋圍巷初冬遯寒甚作絕句寄之二首

卷第六十九

初冬步至東村 南門散策二首 思北鄰韓三翁西鄰因菴主南鄰章老秀才二首 二毀
大風不能出戶 晚菊 舍南雜興三首 自詒二首 風霜 十月 記夢 幽興 夜聞雨
聲 訪山家 自法雲回過魯墟故居 旅舍 書几試筆 道室偶書 觀渡江諸人詩 村
居閒甚戲作二首 夜投山家四首 聞西師復華州二首 舟中 得趙昌甫客子及子通詩
飯後登東山 東村 石堰村 袖手 幽居遣懷三首 湖上晚歸 宿村舍 村飲二首
食野味包子戲作 醉中作 感老 寺壁偶題 贈道流 冬夕閒詠 飯後自嘲 感舊
二首 村老留飲 醉歌二首 力耕 春近 夜坐聞鼓聲 小室 老景 夜坐 晨起
貧述 自述 十一月廿七日夜分披衣起坐神光自兩臂出若初日室中皆明作詩志之 歲
暮遣興二首 道室卽事四首 泛舟過金家埭贈賣薪王翁四首 冬晴 寄隱士 幽事
去新春纔旬餘霽色可愛 作雪遇大風遂晴 冬夜 書意三首 山房 卽事六首 戍兵

有新婚之明日遂行者予聞而悲之爲作絕句二首 夢中作 啜茶示兒輩 雨中示鄰里
記出遊所見 立春前七日聞有預作春盤邀客者戲作 春前六日作

卷第七十

立春後作 舟中 小園春思二首 禹祠 今年開歲三日上元三夕立春人日皆大晴 題
野人壁 小市 柳 見事 夜雨 自詒 初春幽居二首 自勉 春遊 晝坐 正月十
六日送子虞至梅市歸舟示子適 聞百舌 畜一雞報曉聲清圓而鳴每晚戲書絕句 書村
落間事 行歌 開歲頗思江湖遊適 憶昨三首 排悶 識喜 枕上作 近村 讀史二
首 羸臥 春感 八十三吟 小園花盛開 出遊歸臥得雜詩八首 感舊 寄龔立道
寓歎 春晚二首 幽事二首 讀李杜詩 煙波卽事十首 茅舍 子適入城三宿而歸獨
坐淒然示以此篇 暮春新路至湖上示元敏 閱雨 春和初遷坐堂中 春晴暄甚花開略
無餘矣賦以寓感 春晚 春陰溪上小軒作 散策至湖上民家 枕上聞雨聲 聞里中有
鬪者作此示之 春寒 石帆山下 餘寒 自九里平水至雲門陶山歷龍瑞禹祠而歸凡四
日八首 春早得雨二首 春晚二首 春晚南堂晨起二首 見鶴補巢戲作 子素不工書
故硯筆墨皆取具而已作詩自嘲 春晚卽事四首 懷昔 書感 夜中獨步庭下

卷第七十一

憶昔 雜詠十首 曉思 幽居二首 幽居卽事九首 醉歸二首 書南堂壁二首 五月

雨 蠶麥 早至園中 憶雲門諸寺 韓士曾與宗字光祖以其居賓館谷園來求詩 以菜
 茹飲酒自嘲 五月二十一日風雨大作 寄題栝蒼陳伯予主簿平楚亭 卽事 梅雨初霽
 夏日雜題六首 晚興 急雨 聽雨 窮居戲詠 讀窮居五字慨然有感復作一首自解
 蒙恩封渭南縣伯因刻渭南伯印 題門壁 雨霽 西村晚歸 連日雲興氣濁雨意欲成
 西南風輒大作比夜月明如晝 考古 殘春無幾述意二首 南堂晨坐 記悔 東園晚興
 晨起行園中 雷雨 戲書燕几二首 喜雨 閒適 早晴 剪牡丹感懷 偶觀舊詩書
 歎 聞蜀盜已平獻誠廟社喜而有述 晚雨 雨晴 起晚自嘲 閒中偶詠二首 晚步湖
 塘少休民家 獨酌罷夜坐 雨中出門閒望有作 示二子 道室秋夜二首 醉題 自詠
 二首 秋晴 門外獨望 貧歌 秋晚雜興十二首 霜風 贈丐士 贈目眇者

卷第七十二

閒遊所至少留得長句五首 晚雨 翌日早晴 一雨二十日 入夏多雨雖止復作六月甲
 寅始大晴 題尊信齋并序 夏日雜詠四首 夏日四首 苦熱 予頃遊青城數從上官道
 翁遊暑中忽思其人 龜堂 夢中作二首 秋近頗有涼意 夜坐中庭涼甚 東偏小室去
 日最遠每爲消暑之地戲作五字 野寺 南堂雜興八首 新秋往來湖山間四首 北岷
 小室消暑 秋雨中作 目昏有感 幽居 初秋卽事二首 山庖 題道傍壁二首 訪野
 老 書適 憶蜀 生涯四首 對食作 曉思 戲書 梅市舟中作 孤店 過魯墟先太

傳舊隱 步月 拄杖示子適 讀道書 秋日睡起 書意 寄題龔立道崑山樓閒堂 秋
雨書感二首 弄筆 睡覺作二首 秋思十首 秋來苦貧戲作 晚晴 對月二首 出近
村晚歸二首 秋晚 犬雞 賣藥翁 書里中事 書室雜興四首 秋感 秋夜二首

卷第七十三

秋日村舍二首 村遊 吳歌 秋感二首 紹興辛未至丙子六年間予年方壯每遇重九多
與一時名士登高於戴山字泰閣距開禧丁卯六十年憂患契闊何所不有追數同遊諸公乃無
一人在者而予猶強健慘愴不能已賦詩識之 結茅 老健 幽居卽事二首 秋晚書感
小市暮歸 寓歎三首 題僧菴 哭季長二首 魔境作頗思遠適賦此自遣 枕上 讀幽詩
北窗 小圃醉中作 秋冬之交雜賦六首 海山 飲村酒 觀諸將除書 捫腹 醉歌
自歎 村翁 不寐 書志 東偏紙閣初成 小豎醉 雜興四首 示兒孫輩 雜賦六
首 幽居 連日作陰頗有雨雪意 山房 梅市暮歸 法雲寺 郊居 作雪不成獨詠
閒雁 泛舟至蜻蜒浦小泊漁村 散策門外隣叟怪其瘦 書警二首 園中 冬晴行園中
二首 懷青城舊遊 晚立 志喜 窮居 冬暖園中萱草蕪然海棠亦著花可愛作路浚井
皆近事也 卽事示兒輩 小雨頗寒 題舍壁二首 仲冬書事 醉舞 思獨二首 次韻
李季章參政哭其夫人七首 試筆 屠希筆 寒夜吟 記夢 霜夜二首 歲暮 與野人
散策門外 十一月十一日夜聞雨聲 自述二首 歲暮老懷 書況

卷第七十四

書道室壁 書志 雪夕 書枕屏四首 二友 寄五郎兼示十五郎 鄰曲相遇 東窗
 曉寒 小雪 書感 家釀頗勁戲作 食齋極甚美蓋蜀人所謂東坡羹也 雜興四首 幽
 情 醉歌 霜冷 讀書雜言 東嶺 書戒 書齋壁 雪意 山房 晨起 兩雁 書文
 稿後 題唐執中書樓 歲晚六首 雀啄粟 老翁 寄子虞 雜詠四首 曉起折梅 累
 日濃雪作雪不成遂有春意 晚晴出行近村閒詠景物 道室戲詠 書感三首 臘月 雪
 作 卽事 或遺以兩大瓢因寓物外興 歲未盡前數日偶題長句五首 余得蘆竹拄杖于
 舍傍民家似蘆非蘆堅勁輕滑色如栗玉入手錯然微有聲它杖莫及作五字唐律記之 八十
 四吟二首 歲暮六首 書感 書適 學道 舟中作 得蜀信 送蘇趙叟赴省試 新春
 感事八首終篇因以自解 自歎 初春二首 簡傅十八官 開歲愈貧戲詠 戊辰立春日
 二首 早春出遊 春寒 園居 郊行 野望 晨起 午坐

卷第七十五

自警 春雨 春寒 自喜二首 簡湖中隱者 短歌示諸稚 王子猷謂竹爲此君白樂天
 謂酒爲此君子野處無客每對竹獨酌得小詩 會稽行 野飲 作野飲詩後一日復作此篇
 反之 春晴二首 遺興二首 開歲屢作雨不成正月二十六日夜乃得雨明日行家圃有賦
 書屋壁二首 與兒孫同舟泛湖至西山旁醵酒家遂遊任氏茅菴而歸 日暮自大匯村歸

八十四吟 晚步至湖上 春陰 題野店壁 題寺壁 題幽居壁二首 思夔州二首

梅開絕晚有感二首 園中晚飯示兒子 自詰 野飲 茆亭 身世 家有兩瓢分貯酒藥

出則使一童負之戲賦五字句 禹寺 旅遊二首 貧歎 東窗四首 近村 石帆山下作

且起二首 書況 閒中戲賦村落景物二首 子好把酒常以小戶爲苦戲述 春日對花

有感 出遊遇雨而返二首 記閒 二感 題柴言山水四首 草亭獨坐 修居室賦詩自

警 遜迹 春晴登小臺 魯墟舟中作 貧病戲書二首 又作二首自解 挾書一卷至湖

上戲作 謝客相過 書幸 書歎 古興二首各五韻 病中有述二首各五韻 黃鶉吟

恩封渭南伯唐詩人趙嘏爲渭南尉當時謂之趙渭南後來將以予爲陸渭南乎戲作長句 幽

居 肩輿至湖桑墟 半俸自戊辰二月置不復言作絕句二首 頭風戲作 茆齋 耕桑

春遊四首 蔬飯 海棠歌 園中作 書意三首 晚春二首

卷第七十六

湖上 卽事 東籬雜書四首 山行 稻陵 雨夜思子虞 醉中示客 散髮 病中觀辛

夷花 小艇 雜題四首 閒遊 病起初夏 衡門獨立 雨夜 山麓 北齋 禽言四首

道院偶述二首 初夏書感 贈邢芻甫 昔從戎南鄭日范西叔爲子書小臥屏今三十有

八年矣悵然有懷 小雨 遣興二首 初夏喜事 夢蜀 閒遊二首 初夏二首 野興二

首 自笑 喜晴 過鄰曲 題蘇虞叟巖壑隱居縱筆二首 北窗卽事二首 感物 園中

卷第七十七

把酒鄰曲二首 書憂 門外獨立 感事六言八首 幽居記今昔事十首以詩書從宿好林
園無俗情爲韻 喜雨 初夏雜興六首 對酒作 獨坐閒詠二首 水亭二首 書興 書
感二首 暑雨二首 池亭夏晝二首 頌歲從南鄭屢往來與鳳間暇日追懷舊遊有賦 掃
除小園未竟歸臥 暑中北窗晝臥有作 竊懷二首 自貽四首

得雨霑足遂有豐年意欣然口占 浴罷閒步門外而歸 初晴 枕上二首 讀史 今歲六
月望後一日立秋比常年涼意差早 獨坐 貧病 涉溪 卽事四首 野性 閒行 伏中
熱不可過中夜起坐作詩寄五郎 暑中自遣 夜坐中庭 夜坐門外示子通 夜坐小飲
閒思 書村店壁 幽居 立秋前九日大雨涼甚二首 寄太湖隱者 讀史四首 病戒
夏夜納涼 銘座 獨坐絕句二首 初秋驟涼 新涼 書幸 獨遊 記夢 初秋自述
秋暑夜起追涼二首 小築 喜雨二首 秋夜 白鷗 靜室 秋興 欲雨二首 雜感十
首以野曠沙岸淨天高秋月明爲韻 秋思十首 雞犬二首 秋來瘦甚而益健戲作 秋夜
秋興 閒詠 人壽至耄期 訪野人 重蟲效宛陵先生體 吹笛 書幸 感事 晚晴
農家 寓歎二首 雨夜 秋懷四首 小室 贈道侶 舟中醉題二首 出遊暮歸 園
中作

卷第七十八

陸放翁集 七 劍南詩集 目錄

感舊 東園 秋夜 驛壁偶題二首 夜起思子虞 秋日次前輩新年韻五首 仲秋書事

十首 步履 後死 思刻 故里 野意 意行至神祠酒坊而歸 訪村老 戲題僧巷

書意二首 南塘晚步記鄰里語 稽山道中二首 讀近人詩 琴劍 戲題 溪上小雨

晚聞庭樹鴉鳴有感 秋夜齋中二首 識媿 秋雨 秋來益覺頑健時一出遊意中甚適雅

賦五字十首 遊近山僧菴 喜晴 阿通自閩中歸甫九歲頗有老成之風作此詩示之 農

家六首 讀老子有感 鄰人送菰菜 書喜 秋日徙倚門外久之 雙蝶 法雲寺上座求

詩 詹仲信出示卜居詩佳甚作二絕句謝之 夜雨 晚秋出門戲作二首 消搖 堅頑

遣懷四首 初寒 閒行至西山民家 夜與子通說蜀道因作長句示之 村舍七首 登山

西望有懷季長 山行 二樂 村女 示子邁 聞新雁有感二首 山村獨酌 小園獨酌

卷第七十九

秋思四首 覽鏡 雨晴 秋盡自遣二首 晝臥 獨坐 書感 舟中夜賦 舍傍晚步二

首 自詠二首 初冬 霜晴 初寒 題傳神 書感 宋都曹屢寄詩且督和答作此示之

獨飲 簡湖中隱者 初冬雜詠八首 老歎 小園 冬夜思里中多不濟者愴然有感

宿近村 梅村野人家小憩 寄陳伯子主簿 夜坐憶剡溪 道上見村民聚飲 小江 短

歌行 初寒 對鏡 書劍 城南道中有感 寄子虞兼示子邁 一年老一年 自東岡緣

出舍北 有客 陳伯子見過喜予強健戲作 東陽郭希呂呂子益送酒 夜坐 兩日意殊

卷第八十

不憚作短歌自遣 戲書日用事 獨立 夢中江行過鄉家賦詩二首既覺猶歷歷能記也
病中夜思 得子虞書言明春可歸 雜賦十二首 散懷 書壁二首 冬日齋中即事六
首 冬日排悶二首 法雲寺 自法雲歸 枯菊 聞吳中米價甚貴二十韻 寒夜偶懷壯
遊書感 夢曾文清公 睡覺 湖邊小聚 雨二首 雨後快晴步至湖塘 兩日寒雨作雪
不成夜忽大雨遂晴 歲窮 凍坐 古意二首 雪意復作 醉書

排悶 湖山尋梅二首 作雪寒甚有賦 書嬾 讀唐人愁詩戲作五首 讀書至夜分感歎
有賦 擁爐 隱趣 冬夜舟中作 湖山九首 齒髮 古謂不如意事十常八九雖出于好

功名者之言閒中亦未免此歎戲作七字一首 幽居歲暮五首 過湖上僧菴 夜坐戲作短
歌 書歎二首 夜暮自湖上歸 晚步湖隄 夜寒 感舊 小雪 十二月十日暮小雪即

止二首 遣興 貧居時一肉食爾戲作 臘月十四日雨 節物 讀書 春近 讀陶詩
夜雨寒甚 寄趙昌甫 稽山雪 招鄰父啜菜羹 讀論語 晨起 雪後 示福孫并示喜

曾 微疾 簡僧求秦望山拄杖 遊山步二首 雪晴欲出而路澗未通戲作二首 春日
示兒輩 雪後煎茶 夢中作 破屋歎 戊辰歲除前五日作新歲八十有五矣 晨起復睡

梅二首 小疾治藥偶書二首 子通讀書常至夜分作此示之 歲暮作 除夕 己巳元

日 初春 新年書感 開歲連日大雪 飲酒 詩酒 人日雪 春寒二首 雨雪久無來

客亦不能出作長句排悶 書毫 初春遣興 讀書 雜興四首 後雜興四首 自詠二首

晚窗

卷第八十一

遠遊二十韻 對酒 夜雨 己巳正月十八九間雪復大作不止 寄子虞 書夢 示子通

對食有感二首 雪夜三首 初春 春日雜興十二首 小齋乘竹輿至柳姑廟而歸 春

曉 肩輿歷湖桑堰東西過陳灣至陳讓堰小市抵暮乃歸二首 書適 陳讓堰市中遇吳氏

老自言七十六歲與語久之及歸送予過市猶戀戀不忍去 午炊 古風二首 肩輿至石堰

村 睡起遣懷 春晴 書感 野興 野步二首 稽山 緋桃開小酌 夜中獨步 春寒

復作 大雨排悶二首 室中屏去長物戲作 對酒 曝舊畫 予以淳熙戊戌歲自蜀歸時

年五十四今三十有二年矣猶然強健得小詩自賀 花下小酌二首 夜酌 數日不作詩

幽居示客二首 春日登小臺西望 醉賦 卽事 落花 春日 戲詠園中春草二首 二

月二十四日夜大風異常 雨夜與鄰翁飲用前輩韻 雜感四首 讀史二首 出遊二首

夜興戲作 酒熟書喜 湖上 春晚 食酪 六言六首 書意示子孫 暮春龜堂卽事四

首 莫辭酒 懷友 蘭亭道上四首 殘年 春老 睡起 自規 夜聞雷雨大作

卷第八十二

賞小園牡丹有感 山居 閒詠五首 讀樂天詩 讀許渾詩 時鳥 齒髮歎 送春 初

卷第八十三

夏二首 初夏即事 古壽人至聞五郎頗有老態作長句自遣 郊行 小園 初夏雜興五首
 首 思子虞 偶思蜀道有賦 書意 贈倪道士二首 哭李孟達 送黃文叔守福州 初
 夏雜詠五首 卽事 漁扉 山行見三十年前題名悵然有賦 山房 縱筆四首 窗下戲
 詠三首 隸西小聚 老歎 衰甚書感 山行過僧菴不入 山行 夜窗 送邢芻甫入閩
 二首 從邢芻甫求桃竹拄杖 老癯 遠東 行東山下至南巖 書幸 放言 晚步門外
 夏夜 甕池 種菜四首 白首 東窗遣興三首 北窗 小酌 夏日十二首 睡起
 雨中作 感物二首 舟中有賦 晨起獨行綠陰間 獨坐遜菴避暑菴在大竹林中二首
 短歌行 山寺 明日復欲出遊而雨再用前韻 暇日登東岡 暴雨 幽事二首

病起雜言 雨後二首 示客 蒸溽作雨排悶 夏中雜興六首 卽事八首 夏日幽居
 枕上 題望海亭在臥龍絕頂 露坐小隱 小憩臥龍山亭 晚涼 夏日六言四首 招
 客看山 舟中作 清暑 五月下旬大熱晦日夜得雨明且涼甚 黃氏冲和堂 暴雨 書
 意三首 浴罷 水鄉泛舟二首 閒詠 江樓夜望 連日作雨苦熱 門外追涼 夏夜泛
 溪至南莊復回湖桑歸 雨後殊有秋意 寓規三首 新涼二首 追涼至安隱寺前 湖上
 夜賦二首 書適 羸老 卽事 晚興 郊行 喜雨 劉道士贈小葫蘆四首 自傲 雨
 中 書歎二首 題畫薄荷扇二首 秋興四首 晝睡 得子虞濠上書 庭草 文章 秋

日遣懷八首 自傲二首 生世 秋雨 思蜀 病思 術家言子今歲畏四五月而秋尤甚
自初秋小疾屢作戲題長句 秋夕書事二首 小疾三首 病中作 縱筆二首

卷第八十四

自立秋前病過白露猶未平遣懷二首 聖門 書齋壁 病後小健戲題 新晴 夢中作二
首 疾小愈縱筆作短章 病少愈偶作二首 書生 古驛 夜讀劉伯倫傳戲作 湖上晚
望 村居卽事三首 夜興 夢華山 寓歎四首 嘉定己巳立秋得膈上疾近寒露乃小愈
十二首 病中臥聞春聲二首 病小減復作三首 病思六首 病中自遣三首 八月二十
三夜夢中作 病少間作 秋晚幽居 病中思出遊 九月初作 四日夜雞未鳴起作 臥
病雜題五首 讀華陀傳 家山 九月十一日疾小間夜賦二首 一病七十日 西郊 蔬
食 乙巳秋暮獨酌四首 秋晚 病中遣懷六首 六言二首 野興 遠遊 反遠遊 病
著 梅市 梅市書事 病減 幽居卽事二首 羸疾 九月二十五日雞鳴前起待旦 秋
夕排悶十韻 宴坐二首 小室 舟次浦口 開爐 散懷二首

卷第八十五

子虞當以十月離泥上喜而有作 病來 舟中晨起 江村 兀兀 道懷 柯山道上作
病後自詠 十月九日 三三孫十月九日生日翁翁爲賦詩爲壽 江路 初冬二首 夜坐
二首 殘菊 久病 病小愈喜晴 租稅 初寒 呻吟 山墅 十月二十四日夜夢中送

廬山道人歸山 病後晨興食粥戲書 贈僧二首 遊山三首 農圃歌 贈拄杖 贈貓
宮詞 病中雜詠十首 雪 自笑 絕句 題藥囊 末題二首 病中示兒輩 夢中行荷
花萬頃中 示兒

2

74 138

(5)




書叢本基學國

集翁放陸

(二)

著游陸



行發館書印務商

書叢本基學國

集翁放陸

(二)

著游陸

行發館書印務商

陸放翁集

劍南詩彙

卷第一

別曾學士



兒時聞公名，謂在千載前。稍長誦公文，雜之韓杜編。夜輒夢見公，恍若明在焉。起坐三歎息，欲見亡繇緣。忽聞高軒過，驩喜忘食眠。袖書拜轅下，此意私自憐。道若九達衢，小智若鑿穿。所願瞻德容，頑固或少痊。公不謂狂疎，屈體與周旋。騎氣動原隰，霜日明山川。馳繫不得從，瞻望抱悵悵。畫石或十日，刻楮有三年。賤貧未即死，聞道期華顛。他時得公心，敢不知所傳。

送仲高兄宮學秩滿赴行在

兄去游東閣，才堪直北扉。莫憂持橐晚，姑記乞身歸。道義無今古，功名有是非。臨分出苦語，不敢計從違。

題閻郎中溧水東臯園亭

省中地禁清晝長，侍史深注薰籠香。榮名挽公公不住，東臯歸去栽花忙。麤麤華髮映朱紱，同舍半已排雲翔。正如少陵入嚴幕，本自不用尙書郎。向令封侯佩金印，不然草詔直玉堂。萬鍾會作夢幻過，三徑空歎松菊荒。樂天十年履道宅，贊皇一夕平泉莊。公看富貴定何物，一笑乃復坐此妨。東臯樂哉日成趣，簪花起舞當自強。知公能容賤子狂，請賦式微之二章。



和陳魯山十詩以孟夏草木長。遶屋樹扶疎爲韻。

言語日益工。風節顛弗競。杞柳爲栝樅。此豈真物性。病夫背俗馳。梁甫時一詠。奈何七尺軀。貴賤視趙孟。

又

唐虞亦人耳。四海可高謝。哀哉斗升故。諂妄兩憑架。心明物自賓。能整故能暇。會當棄人事。面壁度九夏。

又

大父昔在朝。騰上唯恐早。淡然清班中。灰寒而木槁。議論主中和。人才進者老。至今下馬墳。不生刺人草。

又

櫻酪事已過。角黍配夏熟。尙憶少小時。綵縷繫腕玉。此生本幻戲。衰態轉限足。三郎老無慘。始解歎絲木。

又

門無容車高。庭止旋馬廣。富貴固易耳。正恐卿歟長。時情競脂韋。家法獨骯髒。靜處看紛紛。栝樅勞俯仰。

又

至人貴其身。不使事物遠。捐身易富貴。明珠彈飛鳥。我願稱善人。題作墓上表。從來尺鷃樂。不羨飛鴻矯。

又

匆匆過三十。夢境日已蹙。誰知歎亡羊。但有喜得鹿。本來作何面。認此逆旅屋。逢人吹布毛。出世不忍獨。

又

杜門殊省事。百巧輸一粗。燒香淨掃地。袖手了朝暮。君看瓦握手。端自勝金注。塵機早見貸。不待雞竿樹。

又

萬物備於我。本來無欠餘。寒儒可憐生。西抹復東塗。斯文如大廈。傾壞要力扶。犬子真鼠輩。辛苦賣子虛。

又

風花憐寂寞。起舞爲我娛。舉酒謝風花。吾道殊不疎。汝開何自有。汝落何自無。居然會此理。吾汝皆如如。

看梅絕句

梅花宜寒更宜陰。摩挲拄杖過溪尋。幽香著人窠管領。不信如今鐵石心。

又

梅花樹下黃茆丘。古人尙能愛花不。月淡煙深聽牧笛。死生常事不須愁。

又

荒陵十畝浴鳧鳴。折葦枯蒲寒意深。何處得船滿載酒。醉時繫著古梅林。

又

一物不向胸次橫。醉中談話坐中傾。梅花有情應記得。可惜如今白髮生。

又

老子舞時不須拍。梅花亂插烏巾香。尊前作劇莫相笑。我死諸君思此狂。

春晚簡陳魯山

春工我輩人。可許不待面。欲老更增奇。原野紅綠遍。向來苦摧傷。零雨雜飛霰。豈知袖此手。天定乃徐見。

吾齋萬花間。輕衫稱團扇。飛花點書冊。戲蝶遊几研。吾衰未忘情。小句亦倩綯。持問陳元龍。試乞語一轉。

寄酬會學士學宛陵先生體。比得書云所寓廣教僧舍有陸子泉。每對之輒奉懷。

庭中下乾鶉。門外傳遠書。小印紅屈蠅。兩端黃蠟塗。開絨展矮紙。滑細疑卵膚。首言勞良苦。後問逮妻孥。中間勉以仕。語意極勤渠。字如老瘠竹。墨淡行疎疎。詩如古鼎篆。可愛不可摹。快讀醒人意。垢癢逢爬梳。細讀味益長。炙穀出膏腴。行吟坐臥看。廢食至日晡。想見落筆時。萬象聽指呼。亦知題詩處。綠井石髮蘇。公閑計有客。煎茶置風爐。倘公無客時。濯纓亦足娛。井名本季疵。思人理豈無。居然及賤子。媿謝恩意殊。幾時得從公。舊學鋤荒蕪。古文講聲形。誤字辨魯魚。時時酌井泉。露芽奉瓢盂。不知公許否。因風報何如。

夜讀兵書

孤燈耿霜夕。窮山讀兵書。平生萬里心。執戈王前驅。戰死士所有。恥復守妻孥。成功亦邂逅。逆料政自疎。陂澤號飢鴻。歲月欺貧儒。歎息鏡中面。安得長膚腴。

二月二十四日作

棠梨花開社酒濃。南村北村鼓琴琴。且祈麥熟得飽飯。敢說穀賤復傷農。崖州萬里竄酷吏。湖南幾時起臥龍。但願諸賢集廊廟。書生窮死勝侯封。

送曾學士赴行在

二月侍燕觴。紅杏寒未拆。四月送入都。杏子已可摘。流年不貸人。俯仰遂成昔。事賢要及時。感此我心惻。欲書加餐字。寄之西飛翮。念公爲民起。我得怨乖隔。搖搖跋前旌。去去望車輶。亭郵鬱將暮。落日澹陂澤。

敢忘國士風。涕泣效臧獲。敬輸千一慮。或取二三策。公歸對延英。清問方側席。民瘼公所知。願言寫肝膈。向來酷吏橫。至今有遺孽。織羅士破膽。白著民碎魄。詔書已屢下。宿蠹或未革。期公作醫和。湯劑窮絡脉。士生恨不用。得位忍辭責。併乞謝諸賢。努力光竹帛。

露夜觀月

雲重真愁無散時。可憐不奈一風吹。清輝如此那休得。誰誤虛空作許癡。

新夏感事

百花過盡綠陰成。漠漠爐香睡晚晴。病起兼旬疎把酒。山深四月始聞鶯。近傳下詔通言路。已卜餘年見太平。聖主不忘初政美。小儒惟有涕縱橫。

留題雲門草堂

小住初爲旬月期。二年留滯未應非。尋碑野寺雪生屨。送客溪橋雪滿衣。親滌硯池餘墨漬。臥看爐面散煙霏。他年遊宦應無此。早買漁蓑未老歸。

送韓梓秀才十八韻

束髮走場屋。始得從君遊。燈火都城夜。風雨湖上秋。追隨不隔日。巖壑窮探搜。摩挲石屋背。搖兀開門舟。酒酣耳頰熱。意氣蓋九州。夜臥相踢語。狂笑雜嘲謳。但恐富貴逼。肯懷貧賤憂。人事信難料。百戰竟不侯。我老農圃間。君落天南陬。相逢會稽市。感歎歲月遒。君從上都來。倘逢舊朋儔。我窮本天命。於人寧有求。但念侯君房。不知尙癡不。君聞拊手笑。怪我狂未瘳。其談平生舊。只欲苦死留。如何忽決去。病瘴送無由。

秋風墜桐葉。新霜犯貂裘。君聽馬蹄聲。中有千里愁。

送陳德邵宮教赴行在二十韻

相從何必早。白頭或如新。登門雖尙疎。數面自成親。昨者始見公。凜然鬚如銀。敗席留煮茗。寒廳無雜賓。平生事賢意。寸心渴生塵。樂哉得所從。貧病忘吟呻。恭惟大雅姿。信是邦國珍。廣文舊官長。二紀轉鴻鈞。恩仇快報復。禍福出笑嚬。同舍事容悅。腰佩玉麒麟。羣諛更得志。後來如積薪。於時公淡如。位屈道則伸。法宮親決事。收召極海濱。人才方雜沓。公仕益遼巡。欲以貴視公。公豈慕要津。欲以窮託公。公豈私賤貧。頗欲述古誼。勸公勿愛身。此又公所存。豈待賤子陳。高輿泊江渚。歲晚風雨頻。願言添衣裘。寒陰能薄人。

朱子雲園中觀花

我鬢忽已白。君顏非復朱。花前一盃酒。不樂復何如。暮看枝上花。已覺不如早。富貴當及時。吾輩奈何老。我歌君起舞。竟日爲君留。安知花無情。不解替人愁。長安二三月。花滿上林中。祝君早得意。歸轡聽瓊瓏。

酬妙湛園梨見贈妙湛能葢其師璘公蓋嘗與先君遊云

昔侍先君故里時。僧中最喜老璘師。高標無復鄉人識。妙寄惟應弟子知。山店煎茶留小語。寺橋看雨待幽期。可人不但詩超絕。玉子紋枰又一奇。

次韻魯山新居絕句

求得軒車心愧天。不如窮死却陶然。君曾布衣尙可活。那有日興須萬錢。

又

短牆缺處插疎籬。巷劣容車堂對陂。天下有公殊可賀。坐中著我不妨奇。

寄陳魯山陳時調官都下。

諸公貴人識面稀。胸中璀璨漫珠玑。卽今舉手遮西日。應有流塵化素衣。舊學極知難少貶。吾儕持此欲安歸。夜來風雨空堂靜。忽憶燈前語入微。

又

天下無虞國論深。書生端合老山林。平生力學所得處。政要如今不動心。舊友幾年猶短褐。謫官萬里少來音。願公思此寬羈旅。靜勝炎曦豈易侵。

戲題江心寺僧房壁

史君千騎駐霜天。主簿孤舟冷不眠。也與史君同快意。臥聽鼓角大江邊。是夕新永嘉守亦宿此寺。

泛瑞安江風濤貼然

俯仰兩青空。舟行明鏡中。蓬萊定不遠。正要一颿風。

平陽驛舍梅花

江路輕陰未成雨。梅花欲過半沾泥。遠來不負東皇意。一絕清詩手自題。

度浮橋至南臺

客中多病廢登臨。聞說南臺試一尋。九軌徐行怒濤上。千艘橫繫大江心。寺樓鐘鼓催昏曉。城落雲煙自古今。白髮未除豪氣在。醉吹橫笛坐榕陰。

出縣

匆匆簿領不堪論。出宿聊寬久客魂。稻糞牛行泥活活。野塘橋壞雨昏昏。樵籬護藥纔通徑。竹笕分泉自
遍村。歸計未成留亦好。愁腸不用遠吳門。

還縣

霽色清和日已長。綸巾蕭散意差強。飛飛鷗鷺陂塘綠。鬱鬱桑麻風露香。南陌東村初過社。輕裝小隊似
還鄉。哦詩忘却登車去。枉是人言作吏忙。

雨晴遊洞宮山天慶觀坐間復雨

近水松篁鎖翠微。洞天宮殿對清暉。快晴似爲醱醑計。急雨還妨燕子飛。道士晝閑丹竈冷。山童曉出藥
苗肥。拂床不用勤留客。我困文書自怕歸。

寄陳魯山正字

平生交遊中。陳子我所敬。初猶似豪舉。晚乃抱澗靜。獨觀心地初。皎若虛室鏡。人知自渠事。道行君有命。
青衫二十年。老色上鬢髮。偶然預收召。瘦馬趁朝請。退食輒杜門。不省求捷徑。似聞石渠書。雖黃久未定。
丁字猶恨曲。朋字竟須正。願君試思之。魚魯何足訂。

航海

我不如列子。神遊御天風。尙應似安石。悠然雲海中。臥看十幅蒲。鬢髮若張弓。潮來湧銀山。忽復磨青銅。
飢鶻掠船舷。大魚舞虛空。流落何足道。豪氣蕩肺胸。歌罷海動色。詩成天改容。行矣跨鵬背。弭節蓬萊宮。

海中醉題時雷雨初霽天水相接也

羈遊那復恨，奇觀有南溟。浪蹴半空白，天浮無盡青。吐吞交日月，瀆洞戰雷霆。醉後吹橫笛，魚龍亦出聽。

溪行

蓬蕩鳴春雨，帆蒲掛暮煙。買魚尋近市，覓火就鄰船。愁臥醒還醉，灘行却復前。長年殊可念，力盡逆風牽。

又

冒雨牽何急，爭風力不餘。逢人問墟市，計日買薪蔬。煙寺高檐出，山舍一老鋤。枕書醒醉裏，短髮不曾梳。

自來福州詩酒殆廢，北歸始稍稍復飲。至永嘉括蒼，無日不醉詩，亦屢作此事，不可不記也。

尊酒如江綠，春愁抵草長。但令閑一日，便擬醉千場。柳弱風禁絮，花殘雨漬香。客遊還役役，心賞竟茫茫。

東陽道中

風歎烏帽送輕寒，雨點春衫作碎斑。小吏知人當著句，先安筆硯對溪山。

東陽觀醮醮

福州正月把離杯，已見醮醮壓架開。吳地春寒花漸晚，北歸一路摘香來。

送李德遠寺丞奉祠歸臨川

送騎擁東城，煙帆如鳥輕。道行端有命，身隱更須名。盱食煩明主，胡沙暗舊京。臨分一襟淚，不獨爲交情。

送王嘉叟編修出佐南昌

玉殿求衣早，鸞臺退食遲。君看多故日，寧是棄言時。小作南州計，方觀急詔追。歸來上霄漢，莫遣此心移。

送王龜齡著作赴會稽大宗丞

有越踰千載。何人不宦遊。向來惟一范。眞足壯吾州。高躅今誰繼。先生獨再留。登堂弔與廢。想像氣橫秋。

又

大將上兵符。軍容備掃除。恭惟陛下聖。方采直臣書。忽報分司去。還尋入幕初。宗藩雖奮識。莫遣得親疎。

送杜起莘殿院出守遂寧

羽檄聯翩晝夜馳。臣憂顧不在邊陲。軍容地密寧嘗議。陛下恩深不忍欺。白簡萬言幾慟哭。青編一傳可前知。平生所學今無負。未歎還鄉兩鬢絲。

和曾待制遊兩山

翰林碑立崔嵬上。待制詩題杏籥間。人天八萬四千塔。便合推爲第一山。

右題育王山明月堂

疎鐘迎客到溪亭。碧瓦朱欄相照明。想得松陰排萬衲。籃輿放處恰詩成。

右題天童山宿鸞亭

攀石捫蘿到更幽。玲瓏咫尺嬾窮搜。旁人不會當時意。爲欠門生作伴遊。

右題天童山更幽亭且以未到玲瓏爲恨

雨中出遊夜歸

小雨南山路。今朝思出遊。難從子規請。寧遣竹雞憂。野店寒饒柿。煙津晚喚舟。歸來對燈火。未恨溼衣裘。

謝李平叔郎中問疾

吏部朝回早，幽人病始蘇。過門迂問訊，欹枕聽傳呼。綠瘦重裁帽，因衰學染鬚。投詩發公笑，試想此形模。

聞武均州報已復西京

白髮將軍亦壯哉，西京昨夜捷書來。胡兒敢作千年計，天意寧知一日回。列聖二恩深雨露，中原故國盡風雷。懸知寒食朝陵使，驛路梨花處處開。

喜小兒輩到行在

阿綱學書蚓滿幅，阿繪學語鶯囀木。截竹作馬走不休，小車駕羊聲陸續。書窗澆壁誰忍噴，噓噓也復可憐人。却思胡馬飲江水，敢道春風無戰塵。傳聞賊棄兩京走，列城爭爲朝廷守。從今父子見太平，花前飲亦勿飲酒。

病起寄會原伯兄弟

意象殊非昨，筋骸劣自持。衰如霜後木，愁抵盎中絲。風雪書來少，江山夢到遲。出門還惘惘，倚杖獨移時。

送湯岐公鎮會稽

吳越東西州，浙江限其中。黃旗高十丈，大舟凌虛空。郡人送留守，郡吏迎相公。江心波濤壯，帳下鼓角雄。樂哉公何憾，廷論則未同。永懷前年秋，羣胡方嘯兇。閭左發薊北，戈船滿山東。舊盟願未解，誰敢嬰其鋒。公時立殿上，措置極雍容。南荒竄驕將，京口起元戎。奮動與宿貴，屏氣聽指蹤。規模一朝定，強虜終歸窮。當時謂易耳，未見回天功。及今始大服，咨嗟到兒童。天心佑社稷，主聖肖祖宗。旌節早來朝，笑談折邊衝。

周洪道學士許折贈館中海棠以詩督之
嫋嫋柔絲不自持。更禁日炙與風吹。仙家見慣渾閑事。乞與人間看一枝。

送七兄赴揚州帥幕

初報邊烽照石頭。旋聞胡馬集瓜州。諸公誰聽芻蕘策。吾輩空懷畝蕪憂。急雪打窗心共碎。危樓望遠涕俱流。豈知今日淮南路。亂絮飛花送客舟。

閏二月二十日遊西湖

西湖二月遊人稠。鮮車快馬巷無留。梨園樂工教坊優。絲竹悲激雜清謳。追逐上下暮始休。外雖狂醒樂則不。豈如吾曹淡相求。酒肴取具非預謀。青梅苦筍助獻酬。意象簡樸足鎮浮。尙慙一官自拘囚。未免正馬從兩騎。南山老翁亦出遊。百錢自挂竹杖頭。

劉太尉挽歌辭

羌胡忘覆育。師旅備非常。南服更旄節。中軍鑄印章。馳書諭燕趙。開府冠侯王。赫赫今何在。門庭冷似霜。

又

堅壁臨江日。人疑制敵疎。安知百萬虜。銳盡浹旬餘。智出常情表。功如定計初。云何媚公者。不置篋中書。

過林黃中食柑子有感學宛陵先生體

博士得黃柑。甚愛不忍擘。持獻太夫人。遠附海上舶。故山饒氛霧。可使酒盃窄。豈無荔枝好。壓飲恐不摘。相去三千里。無異娛旁側。乃知母子意。更遠未嘗隔。我昨往見君。從容弄書冊。藥分臘劑香。茶泛春芽白。

主意願未厭。筐筥自搜索。敢謂甘旨餘。亦及此下客。霜包纔三四。氣可壓千百。重是慈孝物。不敢吐其核。甘寒雖遶齒。悲感已橫臆。半生無歡娛。初不爲溼阮。

玉牒所迎。駕望見周洪道舍人。

自卜河橋宅。清談喜屢陪。今年見騰蹕。不恨老氛埃。曉放宮門鑰。霜影輦路槐。班回獨小立。爲待繡鞍來。

送梁諫議

湖海還朝白髮生。懶隨年少事聲名。極知憂國人誰及。細看無心語自平。歸訪鄉人忘位重。乍辭言責覺身輕。籃輿避暑雲門寺。應過幽居聽水聲。游有菴居在雲門。流泉遶屋諫議舊所愛賞。

以石芥送劉韶美禮部劉比釀酒勁甚因以爲戲

古人重改陽城驛。吾輩欣聞石芥名。風味可人終骨體。尊前真見魯諸生。

又

長安官酒甜如蜜。風月雖佳懶舉觴。持送盤蔬還會否。與公新釀鬪端方。

出都

重入修門甫歲餘。又攜琴劍返江湖。乾坤浩浩何由報。犬馬區區正自愚。綠熟且爲蓮社客。伴來喜對草堂圖。西廂屋了吾真足。高枕看雲一事無。

曾原伯屢勸居城中而僕方欲自梅山入雲門今日病酒偶得長句奉寄

惜得僧房似釣船。兼旬散髮醉江天。酒能作病真如此。窮乃工詩却未然。閑似白鷗雖自許。健如黃犢已

無緣秋高更欲移家去。先寄雲門屋數椽。

村居

富貴功名不擬論。且浮舴艋寄煙村。生憎快馬隨鞭影。寧作癡人記劍痕。樵牧相諳欲爭席。比鄰漸熟約論婚。晨春夜績吾家舊。正要遺風付子孫。

看山

小喜茆茨紫翠間。今年偷得半年閑。門前木落須霜曉。且看西南一角山。

夏夜泛舟書所見

山房猶復畏炎蒸。長掩柴門媿老僧。兩槩去搖東浦月。一龕回望上方燈。鷺飛宿鳥時呼侶。騰起長魚有脫罾。夜半歸來步松影。真成赤腳踏層冰。

秋陰

陂澤秋容淡。郊原曉氣清。雨來鳩有語。社近燕無情。拄杖扶腰痛。漁舟照眼明。苦吟緣病輟。隨意或詩成。

盆池

門外江濤湧雪堆。埋盆作沼亦何哉。兒曹不解渠翁意。新脫風波嶮處來。

比從人覓酒皆酸薄戲作此詩

酒盡聊憑折簡求。不知人要博涼州。牆隅棄置空三歎。露下螢飛奈此秋。

買魚

臥沙細肋何由得。出水纖鱗却易求。一夏與僧同粥飯。朝來破戒醉新秋。

又

兩京春齋論斤賣。江上鱸魚不直錢。斫膾擣齋香滿屋。雨窗曉起醉中眠。

秋雨

漫道秋來雨。那無一日晴。只供高枕臥。不放小窗明。書冊頻開闔。山瓢任濁清。長年諳世味。不是故逃名。

晨起偶題

城遠不聞長短更。上方鐘鼓自分明。幽居不負秋來睡。末路偏諳世上情。大事豈堪重破壞。窮人難與共功名。風爐歛鉢生涯在。且試新寒芋糲羹。

悲秋

煙草淒迷八月秋。荒村絡緯戒衣裘。道人久欠修行力。平地閑生爾許愁。

寄張真父舍人

諸公方袞袞。無地著斯人。萬里夔州守。中朝禁省臣。孤帆秋上峽。五馬曉班春。想見懷明主。登臨白髮新。

又

天上紫微省。鶯花繞直廬。逢時身鼎貴。憂國鬢先疎。顏頰元當棄。牽聯也得書。猶能下榻否。擬卜灑西居。

幽居

翳翳桑麻巷。幽幽水竹居。緜緜一獠婢。樵汲兩蠻奴。雨挾清砧急。籬懸野蔓枯。鄰村有鬻子。吾敢歎空無。

法寶璉師求竹軒詩

南軒竹色映谿光。不減吾州五月涼。猶恨秋來鷗鷺少。須君更爲築橫塘。

欲遊五峯不果往小詩寄瑩老

東來恨不見湯休。千首清詩儻許求。要與茶山燈下讀。莫令侍者作蠅頭。茶山老人謂曾待制。

謝王彥光提刑見訪并送茶

邇英帷幄舊儒臣。肯顧荒山野水濱。不怕客嘲輕薄尹。要令我識老成人。飄回鼓傳東城暮。酉列登香一笑新。遙想解醒須底物。隆興第一整源春。

送查元章赴夔漕

柳色西門路。看公上馬時。亦知非久別。不奈自成悲。白髮劉賓客。青衫杜拾遺。分留端有待。剩賦竹枝詞。

道遙

臺省諸公日造朝。放慵別駕媿逍遙。州如斗大真無事。日抵年長未易消。午坐焚香常寂寂。晨興署字亦寥寥。時平更喜戈船靜。閑看城邊帶雨潮。

病中簡仲彌性唐克明蘇訓直

移疾還家暫曲肱。依然耐久北窗燈。心如澤國春歸雁。身是雲堂早過僧。細雨佩壺尋廢寺。夕陽下馬弔荒陵。小留莫厭時追逐。勝社年來冷欲冰。三君皆有歸志。故云。

送王景文

張公遠如此海內共悲辛。逆虜猶遺種。皇天奪老臣。深知萬言策。不愧九原人。君近嘗與策。風雨津亭暮。辭君淚滿巾。

送呂彥升參謀

楚塞蕭條久宿師。參謀承詔上丹墀。苦言到口真當發。聖度如天莫自疑。萬里寄聲長不達。一尊相屬豈前期。遙憐霜曉朝衣冷。深愧江城睡足時。

无咎兄郡齋燕集有詩末章見及敬次元韻

城樓畫角吹晚晴。梅花墮地草欲生。綺盤翠杓春滿眼。我胡不樂君將行。君歸吾黨共增氣。往往怪我衰涕橫。我來江干交舊少。見君不啻河之清。北風共愛地爐暖。西日同賞油窗明。微吟劇醉不知倦。坐閱漢臆逾周正。君文雄麗擅一世。凍凍武庫藏五兵。酸寒如我每自笑。顧辱刻畫爲虛聲。乃知好士如好色。遇合不必皆傾城。君方與世作水鏡。如此過許人將驚。千金敝帶有定價。周玉鄭鼠難強名。失言議罰不可緩。敬白府主浮金觥。君看失脚踏落塵土。豈復毫髮餘詩情。自傷但似路旁堠。雨剝風摧供送迎。

次韻无咎別後見寄

平日盃行不解辭。長亭况是送君時。幾行零落僧窗字。何限流傳樂府詩。歸思恰如重醞酒。歡情略似欲殘棊。龍蛇飛動無由見。坐媿文園鬢思遲。詩來彌月乃能和答。故云。

晚泊慈姥磯下二首

山斷峭崖立。江空翠靄生。漫多來往客。不盡古今情。月碎知流急。風高覺笛清。兒曹笑老子。不睡待潮平。

慈姥磯頭月。纖纖照酒盃。素秋風露重。久客鬢毛催。宿鳥驚還定。飛螢闔復開。平生四方志。老去轉悠哉。

七月十四夜觀月

不復徵雲滓。太清浩然風。露欲三更開。簾一寄平生。快萬頃空江。著月明。

夜宿陽山磯。將曉大雨北風甚。勁俄頃行三百餘里。遂抵雁翅浦。

五更顛風吹急雨。倒海翻江洗殘暑。白浪如山潑入船。家人驚怖篙師舞。此行十日苦滯留。我亦蘆葦厭鳴榔。書生快意輕性命。十丈蒲帆百夫舉。星馳電騖三百里。坡隴聯翩雜平楚。船頭風浪聲愈厲。助以長笛槳鼙鼓。豈惟澎湃震山嶽。直恐瀕洞連后土。起看草木盡南靡。水鳥號鳴集洲渚。稽首龍公謝風伯。區區未禱煩神許。應知老去負壯心。戲遣窮途出豪語。

望江道中

吾道非邪來曠野。江濤如此去何之。起隨烏鵲初翻後。宿及牛羊欲下時。風力漸添帆力健。鱗聲常雜雁聲悲。晚來又入淮南路。紅樹青山合有詩。

秋夜讀書每以二鼓盡爲節

腐儒碌碌歎無奇。獨喜遺編不我欺。白髮無情侵老境。青燈有味似兒時。高梧策策傳寒意。壘鼓擘擘迫睡期。秋夜漸長飢作祟。一盃山藥進瓊糜。

往在都下時與鄒德章兵部同居百官宅無日不相從僕來佐豫章而德章亦謫高安感事述懷
作歌奉寄

巷南巷北秋月明。東家西家讀書聲。官闕出局各無事。冷落往往思同盟。出門相尋索一笑。亦或邂逅因俱行。黃中掀髯語激烈。韶美堅坐書縱橫。子充清言喜置酒。亦梨綠柿相扶檠。寒燈耿耿地爐暖。宮門風順聞疎更。故交一作霜葉散。外物已付秋毫輕。兩窮相遭世界有。我與鄒子俱南征。豫章高安本一郡。挂帆起柁無三程。簿書衮衮不少借。懷抱鬱鬱何由傾。明年君歸我亦去。早卜三畝開柴荆。軟紅舊路莫重躡。二升脫粟同煨鑪。

寄答綿州楊齊伯左司

磊落人爲磊落州。滕王閣望越王樓。欲憑夢去直虛語。賴有詩來寬旅愁。我老一官書紙尾。君行千騎試遨頭。遙知小寄平生快。春酒如川炙萬牛。

送全州趙都曹

霜葉無停聲。脂車有行色。正悲南浦秋。又送清湘客。啼飢兒頰紅。待養親髮白。努力事上官。世路日已迫。

病中作

豫章瀕大江。氣候頗不令。孟冬風薄入。十室八九病。外寒客肺胃。下溼攻脚脛。俗巫醫不藝。嗚呼安託命。我始屏藥囊。治疾以清靜。幻妄消六塵。虛白全一性。三日體遂輕。成此不戰勝。長年更事多。苦語君試聽。

夜夢從數客雨中載酒出遊山川城闕極雄麗云長安也因與客馬上分韻作詩得遊字

有酒不謀州。能詩自勝侯。但須繩繫日。安用地埋憂。射雉侵星出。看花乘獨遊。殘春杜陵雨。不恨溼貂裘。去年余佐京口。遇王嘉叟從張魏公。督師過焉。魏公道免相。嘉叟亦出守。莆陽近辱書報魏公已。

葬衡山感歎不已因用所遺拄頰亭詩韻奉寄

河亭挈手共徘徊。萬事寧非有數哉。黃閣相君三黜去。青雲學士一麾來。中原故老知誰在。南嶽新丘共此哀。火冷夜窗聽急雪。相思時取近書開。

自詠示客

衰髮蕭蕭老郡丞。洪州又看上元燈。羞將枉直分尋尺。寧走東西就斗升。吏進飽諳符紙尾。客來苦勸摸牀稜。歸裝漸理君知否。笑指廬山古澗藤。廬山僧近寄藤杖甚奇。

醉中歌

吾少貧賤真臞儒。貪食嗜味老不除。折腰斂版日走趨。歸來聊以醉自娛。長餅巨榼羅盃孟。不須漁翁勸三閤。牛尾膏美如凝酥。貓頭輪困欲專車。黃雀萬里行頭顱。白鵝作鮮天下無。潯陽糖蟹徑尺餘。吾州之薄尤嘉蔬。珍盤餽飣百味俱。不但項黹與腹腴。悠然一飽自笑愚。願爲口腹勞形軀。投効行矣歸園廬。莫厭糲飯嘗黃菹。

寄陶茂安監丞

永州太守鬢毛殘。鬢辮猶能起據鞍。徵士雖思賦松菊。隱居未可挂衣冠。功名夢境元非實。歌舞山城且自寬。也勝鍾陵窮別駕。閉門無客遣憂端。

燒香

茹芝卻粒世無方。隨食江湖每自傷。千里一身曩泛泛。十年萬事海茫茫。春來鄉夢憑誰說。歸去君恩未

敢忘一寸丹心幸無愧。庭空月白夜燒香。

寒食臨川道中

百卉千花了不存。墮溪飛絮看無痕。家人自作清明節。老子來穿綠暗村。日落啼鴉隨野祭。雨餘荒墓上頽垣。道邊醉飽休相避。作吏堪羞甚乞墀。

上已臨川道中

二月六夜春水生。陸子初有臨川行。溪深橋斷不得渡。城近臥聞吹角聲。三月三日天氣新。臨川道中愁殺人。纖纖女手桑葉綠。漠漠客舍桐花春。平生怕路如怕虎。幽居不省遊城府。鶴軀苦瘦坐長飢。龜息無聲惟默數。如今自憐還自笑。斂版低心事年少。儒冠未恨終自誤。刀筆最驚非素料。五更欹枕一悽然。夢裏扁舟水接天。紅蕖綠芰梅山下。白塔朱樓禹廟邊。

寄別李德遠

蕭蕭風雨臨川驛。邂逅連床若有期。自起挑燈貪夜話。疾呼索飯療朝飢。皆記前日相從時事。卽令明月共千里。已占深林巢一枝。惜別自嫌兒女態。夢騎羸馬度芳陂。德遠所居名秣陂。

又

李侯不恨世賣友。陸子那須錢買山。出牧君當千里去。歸耕我判一生閑。中原亂後儒風替。黨禁興來士氣孱。復古主盟須老手。勉追慶曆數公閒。

初夏道中

桑間甚熟麥齊腰。鶯語惺惚野雉驕。日薄人家晒蠶子。雨餘山客買魚苗。豐年隨處俱堪樂。行路終然不自聊。獨喜此身強健在。又搖團扇著絺蕉。

示兒子

父子扶攜返故鄉。欣然擊壤詠陶唐。墓前自誓寧非隘。澤畔行吟未免狂。雨潤北窗看洗竹。霜清南陌課劬桑。秋毫無者非君賜。回首修門敢遽忘。

重五同尹少稷觀江中競渡

楚人遺俗閱千年。簫鼓喧呼鬪畫船。風浪如山蛟鱗橫。何心此地更爭先。

過玉山辱茵國器檢詳留語甚勤因寄此詩兼呈韓无咎右司

遼東歸老白襦裙。名字何堪遣世聞。便謂與公長契闊。不知留語故慙慙。詩章有便猶應寄。祿米無多切莫分。舊見檢詳俸甚薄。故有此戲。倘見右司煩說似。每因風月愴離羣。

隨意

隨意上漁舟。幽尋不預謀。清溪欣始泛。野寺憶前遊。豐歲雞豚賤。霜天柿栗稠。餘生知有幾。且置萬端憂。

寄龔實之正言

臺省諸公歲歲新。平生敬慕獨斯人。山林不恨音塵遠。夢寐時容笑語親。學道皮膚雖脫落。憂時肝膽尙輪囷。至和嘉祐須公了。乞向升平作幸民。

遊山西村

莫笑農家臘酒渾。豐年留客足雞豚。山重水複疑無路。柳暗花明又一村。簫鼓追隨春社近。衣冠簡朴古風存。從今若許閑乘月。拄杖無時夜叩門。

觀村童戲溪上

雨餘溪水掠堤平。閑看村童戲晚晴。竹馬踟躕衝淖去。紙鸢跋扈挾風鳴。三冬暫就儒生學。村人惟冬三月遊兒童。入小學。千耦還從父老耕。識字粗堪供賦役。不須辛苦慕公卿。

雨霽出遊書事

十日期雨一日晴。拂拭拄杖西村行。清溝泠泠流水細。好風習習吹衣輕。四鄰蛙聲已闌闌。兩岸柳色爭青青。辛夷先開半委地。海棠獨立方傾城。春工遇物初不擇。亦秀燕麥開蕪菁。菁花如雪又爛熳。百草紅紫那知名。小魚誰取置道側。細柳穿頰危將烹。欣然買放寄吾意。草萊無地蘇疲氓。

殘春

殘春醉著釣魚菴。花雨娛人落半巖。豈是天公無皂白。獨悲世俗異酸鹹。妄身似夢行當覺。談口如狂未易鍼。已作沉舟君勿歎。年來何止閱千帆。

家園小酌

旋作園廬指顧成。柳陰已復著啼鶯。百年更把幾盃酒。一月元無三日晴。鷗鷺向人殊耐久。山林與世本無營。小詩漫付兒曹誦。不用韓公說有聲。

又

滿林春筍生無數。竟日鷓鴣來百回。衣上塵埃真一洗。酒邊懷抱得頻開。池魚往者憂奇禍。社稷終然幸散材。世事紛紛心本懶。閉門豈獨畏嫌猜。

寄王嘉叟吏部

宿負煩公議。隆寬荷聖時。江湖真送老。藥餌且扶衰。撫事驚年往。懷人有夢知。敢嗟貧到骨。飲水誦君詩。
嘉叟有漁隱堂詩。

夜讀隱書有感

平生志慕白雲鄉。俯仰人間每自傷。倦鶴摧頽寧望料。寒龜蹙縮且支牀。力探鴻寶尋奇訣。剩采青精試秘方。常鄙臞仙老山澤。要令仰首看飛翔。

上虞逆旅見舊題歲月感懷

舴艋爲家東復西。今朝破曉下前溪。青山缺處日初上。孤店開時鶯亂啼。倦枕不成千里夢。壞牆閑覓十年題。漆園傲吏猶非達。物我區區豈足齊。

舜廟懷古

雲斷蒼梧竟不歸。江邊古廟鎖朱扉。山川不爲興亡改。風月應憐感慨非。孤枕有時鶯喚夢。斜風無賴客添衣。千年回首消磨盡。輸與漁舟送落暉。

題十八學士圖

晴日昏隴東南傾。雷塘風吹草木腥。平時但忌黑色兒。不知乃有虬鬚生。晉陽龍飛雲滂滂。關洛萬里即

日平東征歸來脫金甲。天策開府延豪英。翠書閑暇永清晝。響履光彩明華星。高參伊呂列佐命。下者才氣猶崢嶸。但餘一恨到千載。高陽繆公來竄名。老奸得志國幾喪。李氏誅徒連孤嬰。向令亟念履霜戒。危亂安得存勾萌。衆賢一佞禍尙爾。掩卷涕淚臨風橫。

統分稻晚歸

出裏一簞飯。歸收百把禾。勤勞解堪忍。餘暇更吟哦。歲惡增吾困。家貧賴汝多。村醪莫辭醉。藁芋學眠皤。
是日作芋羹。

又

薄酒不自酌。夕陽須汝歸。橘包霜後美。豆莢雨中肥。路遠應加飯。天寒莫減衣。老懷憂自切。道眼看皆非。

衰病

衰病不浪出。閉門煙雨中。葦花添絮暖。葑火試爐紅。湖村采老壽。作火甚妙。仕宦蠹窠夢。功名馬耳風。山翁但更事。人看作神通。

又

病除猶老健。雨止得冬晴。覓句嗟心在。鈔書試眼明。朝寒添布褐。晚步出柴荆。外喜終無益。兒曹且力耕。

霜風

十月霜風吼屋邊。布裘未辦一絀綿。豈惟飢索鄰僧米。真是寒無坐客氈。身老嘯歌悲永夜。家貧撐拄過凶年。丈夫經此寧非福。破涕燈前一粲然。

小酌

樂著貧猶設杯。孟老更耽宗。文樹雞欄。靈照挈蔬籃。徑醉眼花亂。高眠鼻息酣。覺來寒日晚。落葉擁茱萸。

十月苦蠅

村北村南打稻忙。浮雲吹盡見朝陽。不宜便作晴明看。撲面飛蠅未退藏。

又

十月江南未擁爐。癡蠅擾擾莫嫌渠。細看豈是堅牢物。付與清霜爲掃除。

丫頭巖見周洪道以進士入都日題字

烏巾白紵躡京塵。瑤樹瓊林照路人。西省歸來名蓋代。兩行墨色尙如新。

獨學

師友彫零身白首。杜門獨學就誰評。秋風棄扇知安命。小炷留燈悟養生。踵息無聲酣午枕。舌根忘味美晨烹。少年妄起功名念。豈信身閑心太平。黃庭經閑暇無事心太平。

霜月

枯草霜花白。寒窗月影新。鷺鴉時繞樹。吠犬遠隨人。出仕譏銷骨。歸耕病滿身。世間輸壞衲。切莫勸冠巾。

寄黃龍升老

讀書萬卷裂襦衣。黃金可成棄不爲。快哉天馬不可羈。開口便呼臨濟兒。諸方蹴踖莫支持。吾州一老偶得之。升嗣佛智翁公。閉門夜付僧伽黎。明日聲價羽檄馳。弟子不必不如師。黃龍所立尤瑰奇。空山鬼火

號狐狸。築屋千礎食萬緇。癡人不解公遊嬉。嫉怒塵碎門前碑。世衰道喪士自欺。山林亦復藏駭機。長語寄公公試思。吾輩救此當何施。

贈進賢劉令

簿領塵埃裏。超然見鳳麟。性疎忘顧忌。學大有經綸。正論雖頻接。高標豈易親。向來相識晚。吾黨欠斯人。

書室名可齋。或問其義。作此告之。得福常廉。禍自輕。坦然無愧亦無驚。平生祕訣今相付。只向君心可處行。

寄酬楊齊伯少卿

楊卿人材金百鍊。岐公座上初識面。十年萬事不須說。猶喜歸來且強健。題詩想見初削瓜。寄到茆堂已歸燕。辭殿意密敢輕讀。呼兒炷燈重把卷。即今相望幾千里。何日蟬聯語忘倦。就令有使即寄書。豈如無事長相見。

卷第二

自笑

自笑平生醉後狂。千鍾使氣少年場。那知病葉先摧落。卻羨寒龜巧縮藏。藥物及時希老健。山家隨日了窮忙。凶年坐待新春麥。莫厭清吟雪夜長。

夜聞松聲有感

清晨放船落星石。大風吹颿如箭激。回頭已失廬山雲。卻上吳城觀落日。夜深龍蹄擊祠門。入木數寸留爪痕。明朝就視心尚慄。腥風卷地雷靈奔。歸船買酒持自慰。性命平生驚屢戲。固知神怒有定時。波紋盡作魚鱗細。如今衰病臥林垞。霜覆茆簷月滿庭。松聲驚破三更夢。猶作當時風浪聽。余丙戌七月自京口移官豫章。冒風濤自星子解舟。不半日至吳城。山小龍廟。

十二月一日

病愈都忘老。晴和已似春。畦蔬青長甲。塘水綠生鱗。酒盃論交密。丹爐作夢新。窮居那敢恨。幸遠庾公塵。

又

東風吹斗柄。暖律變嚴凝。草色迷殘燒。溪流帶斷冰。兒書春日勝。女翦上元燈。莫笑蒲龕睡。山翁怯歲增。

春日

老夫一臥三山下。兩見城門送土牛。貧舍春盤還草草。暮年心事轉悠悠。湖光漲綠分煙浦。柳色搖金映市樓。藥餌及時身尚健。無風無雨且閑遊。

久拋朝幘懶重彈。華髮蕭然二寸冠。不恨淒涼侵晚境。猶能語笑向春盤。銀盃酒色家家綠。藟笠煙波處處寬。一片梅花無復在。卻嫌新煖換餘寒。

僧房假榻

過盡青山喚渡船。晚窗洗脚臥僧氈。剡債平日清游願。更結來生熟睡緣。吞啄漸稀如老鶴。鳴聲已斷似

寒蟬旁觀莫苦嘲癡鈍。此妙吾宗祕不傳。

聞雨

慷慨心猶壯。蹉跎鬢已秋。百年殊鼎鼎。萬事祇悠悠。不悟魚千里。終歸貉一丘。夜闌聞急雨。起坐涕交流。

休日有感

少年從宦地。休日喜無涯。坐上強留客。街頭旋買花。開軒儘汛掃。脫帽共諠譁。村巷朋遊絕。逢春祇自嗟。

題徐子禮宗丞自覺齋

末俗紛紛只自護。惟公肯向靜中觀。閒看此事從何得。正自它人著力難。茶熟松風生石鼎。香殘雲縷透蒲團。江湖多少癡禪衲。蹋破青鞵覓話端。

送張叔潛編修造朝

此士名高北斗南。眼中獨許我同參。匆匆卻作臨分恨。一月何曾笑二三。

又

簡牘清閒勝校讐。題詩應肯寄夔州。東廚羊美聊堪飽。北面鈴稀莫強愁。東廚密院廚也。羔羊最珍。北面房行邊事。每聞鈴聲馳至。則知有警。

又

北窗銅碾破雲腴。捫腹儼然一事無。安用雁行排院吏。正須魚貫看胡奴。院吏視屬官。俗甚。每軍中解降。胡至密院。屬官先見之。

又

芒屨年來漸懶穿。閉門日日只高眠。今朝出送張夫子。借得南鄰放鴨船。

有感

雲矇重重不易尋。庖廚性命走山林。但令有月同幽夢。更用何人識苦心。流輩漸稀知死近。髮毛無色覺愁侵。平生自許忘情者。頗怪燈前感慨深。

澗松

藥出山來爲小草。楸成樹後困長藤。澗松鬱鬱何勞歎。卻是人間奈廢興。

將赴官夔府書懷

病夫喜山澤。抗志自年少。有時緣龜飢。安出丐鶴料。亦嘗廁朝紳。退懦每自笑。正如怯酒人。雖愛不敢釀。一從南昌免。五歲嗟不調。朝廷每哀矜。幙府誤辟召。終然斂孤迹。萬里遊絕徼。民風雜莫徠。封域近無詔。淒涼黃麋宮。峭絕白帝廟。又嘗聞此邦。野陋可嘲諠。通衢舞竹枝。譙門對山燒。浮生一夢耳。何者可慶弔。但愁瘴氣襲。把鏡羞自照。夔民多瘞無者十財一二耳。

送芮國器司業

此心知我豈非天。雙鬢皤然氣浩然。曾見灰寒百僚底。真能山立萬夫前。洛城霜重聽宮漏。霽水雲深著釣船。拈起吾宗安樂法。人生何處不隨緣。

又

往歲淮邊勝未歸。諸生合疏論危機。人材衰靡方當慮。士氣崢嶸未可非。萬事不如公論久。諸賢莫與衆心違。還朝此段宜先及。豈獨遺經賴發揮。

春陰

春風浩蕩作春陰。弱燕歸來不自禁。白塔昏昏纔半露。青山淡淡欲平沉。妾茸細雨初驚溼。屐齒新泥忽已深。直怕樓高生客恨。不因病起倦登臨。

投梁參政

浮生無根株。志士惜浪死。雞鳴何預人。推枕中夕起。游也本無奇。腰折百僚底。流離鬢成絲。悲咤淚如洗。殘年走巴峽。辛苦爲斗米。遠衝三伏熱。前指九月水。回首長安城。未忍便萬里。袖詩叩東府。得拜求望履。平生實易足。名幸污黃紙。但憂死無聞。功不挂青史。頗聞匈奴亂。天意殄地豕。何時嫖姚師。大刷渭橋恥。士各奮所長。儒生未宜鄙。覆甃草軍書。不畏寒墮指。

宿楓橋

七年不到楓橋寺。客枕依然半夜鐘。風月未須輕感慨。巴山此去尙千重。

晚泊

半世無歸似轉蓬。今年作夢到巴東。身遊萬死一生地。路入千峯百嶺中。鄰舫有時來乞火。叢祠無處不祈風。晚潮又泊淮南岸。落日啼鴉戍堞空。

金山觀日出

繫船浮玉山。清晨得奇觀。日輪擘水出。始覺江面寬。遙波盛紅鱗。翠靄開金盤。光彩射樓塔。丹碧浮雲端。詩人窘筆力。但詠秋月寒。何當羅浮望。湧海夜未闌。

弔李翰林墓

飲似長鯨快吸川。思如渴驥勇奔泉。客從縣令初何有。醉忤將軍亦偶然。駿馬名姬如昨日。斷碑喬木不知年。浮生今古同歸此。回首桓公亦故阡。桓溫冢亦在當塗。

雨中泊趙屯有感

歸燕羈鴻共斷魂。荻花楓葉泊孤村。風吹暗浪重添纜。雨送新寒半掩門。魚市人煙橫慘淡。龍祠簾鼓鬧黃昏。此身且健無餘恨。行路雖難莫更論。

黃州

局促常悲類楚囚。遷流還歎學齊優。江聲不盡英雄恨。天意無私草木秋。萬里羈愁添白髮。一帆寒日過黃州。君看赤壁終陳迹。生子何須似仲謀。

武昌感事

百萬呼盧事已空。新寒擁褐一衰翁。但悲髮色成枯草。不恨生涯似斷蓬。煙雨淒迷雲夢澤。山川蕭瑟武昌宮。西遊處處堪流涕。撫枕悲歌興未窮。

夜思

露泣啼墮草。潮生宿雁汀。經年寄孤舫。終夜託丘亭。楚澤無窮白。巴山何處青。四方男子事。不敢恨飄零。

哀郢

遠接商周祚最長。北盟齊晉勢爭強。章華歌舞終蕭瑟。雲夢風煙舊莽蒼。草合故宮惟雁起。盜穿荒冢有狐藏。離騷未盡靈均恨。志士千秋淚滿裳。

又

荊州十月早梅春。徂歲真同下阪輪。天地何心窮壯士。江湖從古著羈臣。淋漓痛飲長亭暮。慷慨悲歌白髮新。欲弔章華無處問。廢城霜露溼荆榛。

江陵道中作

山川雜吳楚。氣候接秋冬。水落魚可拾。霜清裘欲重。鄉遙歸夢短。酒薄客愁濃。白帝何時到。高吟醉臥龍。

石首縣雨中繫舟戲作短歌

庚寅去吳西適楚。秋晚孤舟泊江渚。荒林月黑虎欲行。古道人稀鬼相語。鬼語亦如人語悲。楚國繁華非昔時。章華臺前小家住。蒹葭雨漏秋風吹。悲哉秦人真虎狼。欺侮六國囚侯王。亦知興廢古來有。但恨不見秦先亡。開窗酌汝一盃酒。等爲亡國秦更醜。驪山冢破已千年。至今過者無傷憐。

初寒

船尾寒風不滿旗。江邊叢祠常掩扉。行人畏虎少晨起。舟子捕魚多夜歸。蒹葭翻翻帶宿雨。葦花漠漠弄斜暉。傷心到處聞礮杵。九月今年未授衣。

醉歌

老夫櫓竿插蒼石。水落岸沙痕數尺。江南秋盡未搖落。櫛葉離楓葉亦赤。楚人自古多悲傷。道傍行歌猶感激。野花碧紫亦滿把。澗果青紅正堪摘。客中得酒薄亦好。江頭爛醉真不惜。千古興亡在目前。鬱鬱關河含暝色。飢鴻垂翅掠舟過。此意與我同悽惻。三撫闌干恨未平。月明正照頽烏嶺。

秋風

秋風吹客櫓。節物歎遐方。歲事忽云暮。吾行殊未央。霜清漢水綠。日落楚山蒼。此去三巴路。無猿亦斷腸。

塔子磯

塔子磯前艇子橫。一窗秋月爲誰明。青山不減年年恨。白髮無端日日生。七澤蒼茫非故國。九歌哀怨有遺聲。古來撥亂非無策。夜半潮平意未平。

重陽

照江丹葉一林霜。折得黃花更斷腸。商略此時須痛飲。細腰宮畔過重陽。

早寒

河郭猶殘暑。荆巫已早寒。潦收灘正白。霜重葉初丹。節物元非惡。情懷自鮮歡。暮年更世事。唯有醉江干。

公安

地曠江天接。沙隕市井移。避風留半日。買米待多時。蝶冷停菰葉。鷗馴傍檣枝。昔人勸業地。搔首歎吾衰。

縣有呂子明舊城。

沙頭

游子行愈遠。沙頭逢暮秋。孫劉鼎足地。荆益犬牙州。鼓角風雲慘。江湖日夜浮。此生應衰衰。高枕看東流。

大寨出江陵西門

平明羸馬出西門。淡日寒雲久吐吞。醉面衝風驚易醒。重裘藏手取微溫。紛紛狐兔投深莽。點點牛羊散遠村。不爲山川多感慨。歲窮遊子自消魂。

江夏與章冠之遇別後寄贈

騎鶴仙人不可呼。一樽猶得與君俱。未應湖海無豪士。長恨乾坤有腐儒。壯歲光陰隨手過。晚途衰病要人扶。淒涼江夏秋風裏。況見新豐舊酒徒。

題江陵村店壁

青旆三家市。黃茆十里岡。蓬飛風浩浩。塵起日茫茫。馳騁多從獸。鉏耰少破荒。行人相指似。此路走襄陽。

馬上

燈前薄飮陳鹽盞。帶睡強出行江隄。五更落月移樹影。十月清霜侵馬蹄。荒陵嚙噓已度雁。小市嚶嚶初鳴雞。可憐萬里覓歸夢。未到故山先自迷。

水亭有懷

漁村把酒對丹楓。水驛憑軒送去鴻。道路半年行不到。江山萬里看無窮。故人草詔九天上。老子題詩三碛中。笑謂毛錐可無恨。書生處處與卿同。

移船

沙際舟銜尾，相依作四鄰。暮年多感慨，分路亦酸辛。折竹占行日，吹簫賽水神。無勞問亭驛，久客自知津。

將離江陵

暮暮過渡頭，旦旦走隄上。舟人與關吏，見熟識顏狀。癡頑久不去，常恐遭誚讓。昨日倒橋干，今日聯百丈。買薪備雨雪，儲米滿瓶盎。明當遂去此，障袂先側望。卽今孟冬月，波濤幸非壯。潦收出奇石，霧卷見疊嶂。地險多崎嶇，峽束少平曠。從來樂山水，臨老愈跌宕。皇天憐其狂，擇地令自放。山花白似雪，江水綠於醜。竹枝本楚些，妙句寄悽愴。何當出清詩，千古續遺唱。

六言

三巴亦有何好，萬里翩然獨尋。本意爲君說破，消磨夢境光陰。

江上

江上霜寒透客衣，閉窗羸臥不支持。羈孤形影真相弔，衰颯頭顱已可知。潦縮穩經行雨峽，竹疎曠見挂猿枝。清樽可置須勤醉，莫望功名老大時。

旅食

霜餘漢水淺，野迥朔風寒。炊黍香浮甑，烹蔬綠映盤。心安失粗糲，味美出艱難。惟恨虛捐日，無書得縱觀。

滄灘

百夫正謹助鳴榔，舟中對面不得語。須臾人散寂無譁，惟聞百丈轉兩車。嘔啞啞車轉急，舟人已在沙際立。霧斂蘆村落，照紅雨餘漁舍炊煙溼。故鄉回首已千山，上峽初經第一灘。少年亦慕宦遊樂，投老方

知行路難。

松滋小酌

西遊六千里。此地最淒涼。騷客久埋骨。巴歌猶斷腸。風聲撼雲夢。雪意接瀟湘。萬古茫茫恨。悠然付一觴。

晚泊松滋渡口

此行何處不艱難。寸寸強弓且旋彎。縣近歡欣初得菜。江回徙倚忽逢山。繫船日落松滋渡。跋馬雲埋澗澗關。未滿百年均是客。不須數日待東還。

又

小灘拍拍鷓鴣飛。深竹蕭蕭杜宇悲。看鏡不堪衰病後。繫船最好夕陽時。生涯落魄惟耽酒。客路蒼茫自詠詩。莫問長安在何許。亂山孤店是松滋。

荆門冬夜

常飢龜老欲無腸。臥聽寒更自短長。香椀得閑聊作伴。酒盃因病頗相忘。有情窗罅恰通月。耐冷鱗枝多得霜。歷盡風波知險阻。平生錯羨捕魚郎。

繫舟下牢溪游三游洞二十八韻

舊觀三峽圖。常謂非人情。意疑天壤間。豈有此崢嶸。畫師定戲耳。聊欲窮丹青。西游過沔鄂。莽莽千里平。昨日到峽州。所見始可驚。乃知畫非妄。卻恨筆未精。及茲下牢戍。峯嶂畢自呈。下入裂坤軸。高峯插青冥。角勝多列峙。擅美有孤撐。或如釜上飯。或如坐後屏。或如倨而立。或如喜而迎。或深如螺房。或疎如窗櫺。

巖蘿冠冕古，婀娜髻鬟傾。其間絕出者，虎搏蛟龍窟。崩崖凜欲墮，脩梁架空橫。懸瀑瀉無底，終古何時盈。幽泉莫知處，但聞珩珮鳴。怪怪與奇奇，萬狀不可名。久聞三游洞，疾走忘病嬰。竇穴初漆黑，僂僂捫壁行。方虞觸蟄蛇，類見一點明。扶接困僮奴，恍然出瓶罌。穹穹厦屋寬，滴乳成微泓。題名歐與黃，雲蒸蒼蘚平。穿林走驚鷹，拂面逢飛颺。息倦盤石上，拾樵置茶鑪。長嘯答谷響，清吟和松聲。辭卑不堪刻，猶足寄友生。

三游洞前巖下小潭水甚奇取以煎茶

苦徑芒屨滑不妨，潭邊聊得據胡床。巖空倒看峯巒影，磻遠中含藥草香。汲取滿瓶牛乳白，分流觸石珉聲長。囊中日鑄傳天下，不是名泉不合嘗。

扇子峽山腹有草閣小亭極幽邃意其非俗人居也

絕境慰人心，誰家住玉岑。亂雲生翠竇，密雪灑青林。高閣臨空豁，孤亭隱邃深。定知非俗士，躑躅不容尋。

蝦蟆碚

不肯爬沙桂樹邊，朶頭千古向巖前。巴東峽裏最初峽，天下泉中第四泉。留雪飲冰疑換骨，掬珠弄玉可忘年。清游自笑何曾足，疊鼓琴琴又解船。

黃牛峽廟

三峽東江流，崖谷互吐納。黃牛不負重，雲表恣蹴蹋。吳船與蜀舸，有請神必答。誰憐馬遣期，百歲創未合。施師浪奔走，烹飪陳酒榼。紛然餽神餘，羹膾爭嘔噎。空庭多落葉，日暮聲颯颯。奇文衆可辨，高古篆籀雜。村女賣秋茶，簪花髻鬢匝。襍兒著背上，帖妥若在榻。山寒雪欲下，虎出門早闔。我行忽至此，臨風久嗚咽。

過夷陵適值祈雪與葉使君清飲談括蒼舊游既行舟中雪作戲成長句奉寄

巴楚夷陵酒最醇。使君風味更清真。少年恨不從豪飲。薄宦那知託近鄰。本擬笙歌娛病客。卻催雨雪惱行人。朝來凍手題詩寄。莫笑欹斜字不勻。

泊虎頭灘下

大舟已泊燈火明。小舟猶行聞艫聲。虎頭崔嵬鹿角橫。人生實難君勿輕。

過東瀨灘入馬肝峽

書生就食等奔逃。道路崎嶇信所遭。船上急灘如退鷁。人緣絕壁似飛猱。口誇遠嶺青千疊。心憶平波綠一篙。猶勝溪丁絕輕死。無時來往駕艸艘。中小船謂之艸艘。

新安驛

孤驛荒山與虎鄰。更堪風雪暗南津。羈遊如此真無策。獨立悽然默愴神。木盡汲江人起早。銀釵簇髻女粧新。蠻風弊惡蛟龍橫。未敢全誇見在身。

秣歸醉中懷都下諸公示坐客

長謠爲子說天涯。四座聽歌且勿譁。蠻俗殺人供鬼祭。敗舟觸石委江沙。此身長是滄浪客。阿日能爲鮑暖家。坐憶故人空有夢。尺書不敢到京華。

憩歸州光孝寺寺後有楚冢近歲或發之得寶玉劍佩之類

秣歸城畔蹋斜陽。古寺無僧晝閉房。殘珮斷釵陵谷變。苦荊架竹井閭荒。虎行欲與人爭路。猿嘯能令客

斷腸。寂莫倚樓搔短髮。剝題新恨付巴娘。

飲罷寺門獨立有感

一邑無平土。邦人例得窮。淒涼遠嫁婦。顛顛獨醒翁。今古關干外。悲歡酒醖中。三巴不搖落。搔首對丹楓。
州有風大夫及明妃祠。

泛溪船至巴東

谿船莫嫌迮。船迮始相宜。兩槳行何駛。重灘過不知。荒村寇相縣。破屋屈平祠。不奈新愁得。啼猿挂冷枝。

巴東遇小雨

暫借清溪伴釣翁。沙邊微雨溼孤蓬。從今詩在巴東縣。不屬灞橋風雪中。

又

西遊萬里亦何爲。欲就騷人乞棄遺。到此宛然詩不進。始知才分有窮時。

秋風亭拜寇萊公遺像

江上秋風宋玉悲。長官手自葺茅茨。人生窮達誰能料。蠟淚成堆又一時。

又

豪傑何心後世名。材高遇事卽崢嶸。巴東詩句澶州策。信手拈來盡可驚。

巴東令麻白雲亭

寇公壯歲落巴蠻。得意孤亭縹緲間。常倚曲闌貪看水。不安四壁怕遮山。遺民雖盡猶能說。老令初來亦

愛閑。正使官清貧至骨。未妨留客聽潺湲。

謁巫山廟兩廡碑版甚衆。皆言神佐禹開峽之功。而誕宋玉高唐賦之妄。予亦賦詩一首。

真人翳風駕蛟龍。一念何曾與世同。不爲行雲求弭謗。那因治水欲論功。翱翔想見虛無裏。毀譽誰知瀟濁中。讀盡舊碑成絕倒。書生惟慣諂王公。

聞猿

瘦盡腰圍不爲詩。良辰流落自成衰。也知客裏偏多感。誰料天涯有許悲。漢塞角殘人不寐。渭城歌罷客將離。故應未抵聞猿恨。況是巫山廟裏時。

瞿唐行

四月欲盡五月來。峽中水漲何雄哉。浪花高飛暑路雪。灘石怒轉晴天雷。千艘萬舸不敢過。篙工柁師心膽破。人人陰拱待勢衰。誰敢輕行犯奇禍。一朝時去不自由。山腹空有沙痕留。君不見陸子歲暮來夔州。瞿唐峽水平如油。

入瞿唐登白帝廟

曉入大谿口。是爲瞿唐門。長江從蜀來。日夜東南奔。兩山對崔嵬。勢如塞乾坤。峭壁空仰視。欲上不可捫。禹功何巍巍。尙覩鑄鑿痕。天不生斯人。人皆化魚龍。於時仲冬月。水各歸其源。漚瀕訖中流。百尺呈孤根。參差層巒屋。邦人祀公孫。力戰死社稷。宜享廟貌尊。丈夫貴不撓。成敗何足論。我欲伐巨石。作碑累千言。上陳躍馬壯。下斥乘驃昏。雖慚豪偉詞。尙慰雄傑魂。君王昔玉食。何至歆雞豚。願言采芳蘭。舞歌薦清尊。

登江樓

已過瞿唐更少留。小船聊繫古夔州。瞿唐關即唐夔州也。簿書未破三年夢。杖屨先尋百尺樓。日暮雲
迷峽口。歲窮奮火照關頭。野人不解徵官縛。尊酒應來此散愁。

雪中臥病在告戲作

面裂愁出門。指直但藏袖。誰云三峽熱。有此凜冽候。殷勤愧雪片。飛舞爲我壽。方驚四山積。已見萬瓦覆。
豈惟寒到骨。遂覺疾在膝。地爐熾薪炭。噤坐連昏晝。梅花真強項。不肯落春後。俗人愛桃李。苦道太疎瘦。
清芬終見賞。此事非速售。已矣吾何言。高枕聽簷溜。

雪晴

臘盡春生白帝城。俸錢雖薄勝躬耕。眼前但恨親朋少。身外元知得喪輕。日映滿窗松竹影。雪消竝舍鳥
烏聲。老來莫道風情減。儻向煙蕪信馬行。

玉笈齋書事

莫笑新霜點鬢鬚。老來卻得少工夫。晨占上古連山易。夜對西真五嶽圖。叔夜曾聞高士囑。孔賓豈待異
人呼。眉間喜色誰知得。今日新添火四銖。

又

雪霽茆堂鐘磬清。晨齋枸杞一杯羹。隱書不厭千回讀。大藥何時九轉成。孤坐月魂寒徹骨。安眠龜息浩
無聲。剩分松屑爲山信。明日青城有使行。時傳道人欲歸青城。

記夢

夢裏都忘困晚途。縱橫草疏論遷都。不知盍挽銀河水。洗得平生習氣無。

淩西

千載淩西路。今年著腳行。匆匆衰已具。渺渺恨難平。絕壁猿啼雨。深枝鶻報晴。亦知憂吏責。未忍廢詩情。

山寺

籃輿送客過江村。小寺無人半掩門。古佛負牆塵漠漠。孤燈照殿雨昏昏。喜投禪榻聊尋夢。嬾爲啼猿更斷魂。要識人間盛衰理。岸沙君看去年痕。峽漲時水高數十丈。至冬盡落。

蹋磧

鬼門關外逢人日。蹋磧千家萬家出。竹枝慘戚雲不動。劍器聯翩日將夕。行人十有八九瘦。見慣何曾羞。顧影江邊沾酒沙。上臥峽口月出風吹醒。人生未死信難知。顛顛夔州生鬢絲。何日畫船搖桂楫。西湖却賦探春詩。

寒食

峽雲烘日欲成霞。灩水生紋淺見沙。又向蠻方作寒食。強持卮酒對梨花。身如巢燕年年客。心羨游僧處處家。賴有春風能領略。一生相伴遍天涯。

晚晴書事呈同舍以下十七首皆試院作。

魚復城邊夕照紅。物華偏解惱衰翁。巴鶯有恨啼芳樹。野水無情入故宮。許國漸疎悲壯志。讀書多忘嫺。

新功因君共語增惆悵。京洛交遊欲半空。

鄉中每以寒食立夏之間省墳客。夔適逢此時。悽然感懷。

松陰繫馬啟朱扉。柵枚青紅正此時。守墓萬家猶有日。及親三釜永無期。詩成護寫天涯感。淚盡何由地
下知。富貴賤貧俱有恨。此生長廢蓼莪詩。

又

手持綠酒酌蒼苔。今歲何由正馬來。清淚不隨春雨斷。孤吟欲和暮猿哀。皂貂破弊歸心切。白髮淒涼老
境催。誓墓只思長不出。松門日日手親開。

試院春晚

病思蕭條掩綠罇。閑坊寂歷鎖朱門。故人別久難尋夢。遠客愁多易斷魂。漫漫晚花吹漢岸。離離春草上
宮垣。此生飄泊何時已。家在山陰水際村。

倚闌

故山未敢說歸期。十口相隨又別離。小雨初收殘照晚。闌干西角立多時。

自詠

朝衣無色如霜葉。將奈雲安別駕何。鐘鼎山林俱不遂。聲名官職兩無多。低昂未免聞雞舞。慷慨猶能擊
筑歌。頭白伴人書紙尾。只思歸去弄煙波。

午興

漸轉廊腰日。徐來峽口風。殫漿便北客。淖粥稱衰翁。槐晚織織綠。榴殘續續紅。責輕仍飽食。三歎愧無功。

風雨中望峽口諸山奇甚戲作短歌

白鹽赤甲天下雄。拔地突兀摩蒼穹。凜然猛士撫長劍。空有豪健無雍容。不令氣象少淖落。常恨天地無全功。今朝忽悟始歎息。妙處元在煙雨中。太陰殺氣橫慘澹。元化變態含空濛。正如奇材遇事見。平日乃與常人同。安得朱樓高百尺。看此疾雨吹橫風。

夜坐庭中

人靜風囊慢。更闌露滋衣。暗窗飢鼠齧。空廡冷螢飛。歲月背人去。鄉閭何日歸。脫巾還感歎。殘髮不勝稀。

新蔬

黃瓜翠苜最相宜。上市登盤四月時。莫擬將軍春薺句。南京名價有誰知。

初夏懷故山

鏡湖四月正清和。白塔紅橋小艇過。梅雨晴時插秧鼓。蘋風生處采菱歌。沉迷簿領吟哦少。淹泊蠻荒感慨多。誰謂吾廬六千里。眼中歷歷見漁蓑。

初夏新晴

曲徑泥新晚照明。小軒纔受一牀橫。翩翩乳燕穿簾影。蔌蔌新篁解箨聲。藥物屏除知病減。夢魂安穩覺心平。深居不恨無來客。時有山禽自贊名。

定拆號日喜而有作

陸放翁集 八 劍南詩集 卷二

小雨如絲落復收。悄無人語但鳴鳩。挽鬟預想諸兒喜。倒指猶爲五日留。滿案堆書惟引睡。侵天圍棘不遮愁。爲農父子長相守。誤計隨人學宦遊。

睡起時閉試院中已月餘矣。

深閉重門謝簿書。日長添得睡工夫。水紋竹簾涼如洗。雲碧紗幮薄欲無。半吐山榴看著子。新來梁燕見將雛。夢回茗碗聊須把。自掃桐陰置瓦爐。

四月二十九日作

假館猶三日。還家甫四旬。昏眸雲霧隔。衰鬢雪霜新。尊酒雖慵近。病目止酒。囊詩却未貧。但愁門有客。流汗強冠巾。

苦熱

萬瓦鱗鱗若火龍。日車不動汗珠融。無因羽翮氛埃外。坐覺蒸炊釜甑中。石磻寒泉空有夢。冰壺團扇欲無功。餘威向晚猶堪畏。浴罷斜陽滿野紅。

拆號前一日作

飄零隨處是生涯。斷梗飛蓬但可嗟。稚子歡迎先入夢。從兵結束待還家。食眠屢失身多病。憂愧相乘髮易華。隔日寄聲爲薄具。石榴應有未開花。

暴雨

風怒欲掀屋。雨來如決隄。孤燈映窗滅。羈鳥就簷棲。暑令方炎赫。秋聲忽慘淒。傳聞漲江水。已斷漢東西。

西齋雨後

香枕灰深微炷火。茶鑪聲細緩煎湯。百年浮世幾人樂。一雨虛齋三日涼。簾外微風斜燕影。池邊殘照斂蒼房。紗櫺石枕蕭然臥。付與今宵幽夢長。

急雨

陰雲屯硤口。急雨過城頭。白舫投沙峽。青帘捲市樓。漂搖爭閭戶。壅溢共疏溝。抽得驅蠅手。題詩慰旅愁。

晚晴聞角有感

暑雨初收白帝城。小荷新竹夕陽明。十年塵土青衫色。萬里江山畫角聲。零落親朋勞遠夢。淒涼鄉社負歸耕。議郎博士多新奏。誰致當時魯二生。

夏夜起坐南亭達曉不復寐

風露青冥近九秋。脫巾扶杖冷飈颺。曲闌影外巴山月。畫角聲中楚塞愁。巢燕竝棲高棟穩。潛魚時躍小池幽。悠然坐待江城曉。紅日將昇碧霧浮。

夜登白帝城樓懷少陵先生

拾遺白髮有誰憐。零落歌詩遍兩川。人立飛樓今已矣。浪翻孤月尚依然。升沉自古無窮事。愚智同歸有限年。此意淒涼誰共語。夜闌鷗鷺起沙邊。

假日書事

萬里西來爲一飢。坐曹日日汗霑衣。但嫌愛畏妨人樂。不恨疎慵與世違。雕檻迎陽花併發。畫梁避雨燕

雙歸放懷始得閑中趣。下馬何人又叩扉。

林亭書事

吏退林亭夏日長。烏紗白紵自生涼。透簷密葉帷三面。覆水青萍錦一方。約束蠻僮收藥富。催呼稚子曬書忙。平生幽事還拈起。未覺巴山異故鄉。

又

期會文書日日忙。偷閑聊得臥方牀。花藏密葉多時在。風度疎簾特地涼。野艇空懷菱蔓滑。冰盆誰弄藕絲長。角聲喚覺東歸夢。十里平湖一草堂。喚中絕無菱藕。

遊臥龍寺

曉發魚復走瞿唐。沙頭喚渡倚胡牀。兩人爭趁五更市。我亦來追六月涼。殘星欲盡尚歷落。明河已淡餘蒼茫。翻翻林表鴉鵲語。渺渺煙邊鷗鷺行。過江走馬十五里。小寺殘僧真蕞爾。投鞭入門爲一笑。僻陋稱雄有如此。君不見天童徑山金碧浮虛空。千衲梵唄層雲中。

久病灼艾後獨臥有感

白帝城高暮柝傳。幽窗搔首意蕭然。江邊雲溼初橫雁。牆下桐疎不庇蟬。計出火攻傷老病。臥聞齋墮歎蠻煙。諸賢好試平戎策。斂退無心競著鞭。

秋晚病起

心靜病良已。倚然巾屨輕。灰深地爐煖。日出紙窗明。宿雨全消瘴。新霜曠得晴。井梧殊可念。無葉送秋聲。

秋思

魚復城邊逢雁飛。白頭羈客恨依依。遠遊眼底故交少。晚歲人間樂事稀。雲重古關傳夜柝。月斜深巷擣秋衣。官閑況是頻移疾。藥鼎榮榮臥掩扉。

一病四十日天氣遂寒感懷有賦

幽人病起鬢毛殘。硤口樓臺九月寒。暮角又催孤夢斷。早霜初染一林丹。鄉閭乖隔知誰健。懷抱淒涼用底寬。麴米春香雖可醉。灑西新橘尙餘酸。

登城

簿領無時了。登臨亦快哉。樓危壓城起。硤迤東江來。病瘴拋書帙。思鄉泥酒盃。天寒水盡落。灘頭已崔嵬。

夔州重陽

夔州鼓角晚淒悲。恰是幽窗睡起時。但憶社醅投菊蕊。敢希朝士賜萸枝。山川信美吾廬遠。天地無情客鬢衰。佳日掩門君莫笑。病來紗帽不禁吹。

追懷曾文清公呈趙教授趙近嘗示詩

憶在茶山聽說詩。親從夜半得玄機。常憂老死無人付。不料窮荒見此奇。律令合時方帖妥。工夫深處卻平夷。人間可恨知多少。不及同君叩老師。

謝張廷老司理錄示山居詩

顛顛經年客瘴鄉。把君詩卷意差強。古人三語猶嗟賞。況是珠璣滿錦囊。

又

老覺人間萬事非。但思茆屋映疎籬。秋衾已是饒歸夢。更讀山居二首詩。

秋晴欲出城以事不果

古人已去不可回。今人日夜歸泉臺。浮生細看只此是。到死自苦何爲哉。矜名飾詐竟一世。忍寒觸熱忘其駭。不令金樽映翠杓。坐待白骨生蒼苔。清秋九月瘴如洗。白鹽千仞高崔嵬。荒庭落葉不可掃。惟有叢菊爭先開。灑西黃柑霜落爪。溪口赤梨丹染腮。熊肪玉潔美香飯。鮮鬪花穠宜新醅。南窗病起亦蕭散。甚欲往探城西梅。一官底處不敗意。正用此時持事來。

南窗

流落逢知少。疎慵迂俗多。悶拈如意舞。狂叩唾壺歌。巴酒禁愁得。金丹奈老何。南窗好風月。聊復此婆娑。

遣興

酒量愁翻減。詩聲老轉低。日高羹馬齒。霜冷駕雞栖。已判功名迂。寧論簿領迷。賴無權入手。軟弱實如泥。

九月三十日登城門東望悽然有感

減盡腰圍白盡頭。經年作客向夔州。流離去國歸無日。瘴癘侵人病過秋。菊蕊殘時初把酒。病中久止酒。秋末方能少飲。雁行橫處更登樓。蜀江朝暮東南注。我獨胡爲淹此留。

初冬野興

關北關南霜露寒。灑東灑西山谷盤。篋紋細細吹殘水。龍背時時出小灘。衰髮病來無復綠。寸心老去尚

如丹逆胡未滅時多事。卻爲無才得少安。

東屯呈同遊諸公

十月霜彫楓樹林。清溪白石稱幽尋。按行老子誅茆地。惆悵孤臣許國心。走馬平沙嫌路近。傳盃小閣喜寒侵。也思試索梅花笑。凍蕊疎疎欲不禁。

別王伯高

冷落何人肯見尋。斷絃塵匣愧知音。傾家釀酒猶嫌少。入海求詩未厭深。薄宦簿書常袞袞。中年光景易駸駸。香奩贈別非無意。共約跣趺看此心。

書驛壁

猿叫舖前雪欲作。鬼門關頭路正惡。泥深三尺馬蹄弱。霜厚一寸客衣薄。朝行過棧暮渡笮。夜投破驛火煜爚。人生但要無媿怍。萬里竄身元不錯。

又

峽中山多甲天下。萬疇千峯通一罅。峒民無地習耕稼。射麋捕虎連晝夜。女兒薄命天不借。青燈獨宿江邊舍。黎明賣薪勿悲吒。女生豈有終不嫁。

醉中到白崖而歸

醉眼朦朧萬事空。今年痛飲漢西東。偶呼快馬迎新月。卻上輕輿御晚風。行路八千常是客。丈夫五十未稱翁。亂山缺處如橫線。遙指孤城翠霧中。

十二月十九日晚巫山送客歸回望西寺小閣縹緲可愛遂與趙郭二教授同遊抵夜乃還楚鄉
偶得長句呈二君

送客沙頭落日催遙看重閣更同來清尊與悶都傾盡是日所攜酒俱飲鷓鴣馬和詩總勸回願頓遠遊
悲騎省豪華前事記草臺歸時燈火參差晚自脫征衣拂帽埃

卷第三

飯三折舖舖在亂山中

平生愛山每自歎舉世但覺山可玩皇天憐之足其願著在荒山更何怨南窮閩粵西蜀漢馬蹏幾歷天
下半山橫水掩路欲斷崔嵬可陟流可亂春風桃李方漫漫飛棧凌空又奇觀但令身健能強飯萬里只
作遊山看

小市

小市門前沙作堤杏花雖落不露泥客心尙壯身先老江水方東我獨西暫聽軒窗仍汛掃遠遊書劍亦
提攜子規應笑飄零惜故傍茆簷盡意啼

酒無獨飲理

酒無獨飲理常恨欠佳客忽得我輩人豈計晨與夕少年事虛名歲月駒過隙自從老大來一日亦可惜
精丘未易辦小計且千石頽然置萬事天地爲幕布人生如刀礪磨盡要有日不須荷鍤隨況問幾兩屐

畏虎

滑路滑如苔。澀路澀若梯。更堪都梁下。一雪三日泥。泥深尚云可。委身餓虎蹊。心寒道上跡。魄碎茆葉低。常恐不自免。一死均豬雞。老馬亦甚畏。憚憚不敢嘶。吾聞虎雖暴。未嘗窺汝棲。孤行莫不止。取禍非排擠。彼讒實有心。平地生溝谿。哀哉馬新息。蓋成珠犀。

戲題

走馬平欺刺繡坡。放船橫截亂絲渦。從來倚箇心平穩。遇險方知得力多。

蟠龍瀑布

遠望紛珠纓。近觀轉雷霆。人言水出奇。意使行人驚。人驚我何得。定非水之情。水亦有何情。因物以賦形。處高勢趨下。豈樂與石爭。退之亦隘人。強言不平鳴。古來賢達士。初亦願躬耕。意氣或感激。邂逅成功名。

題梁山軍瑞豐亭

我行都梁窘風雪。史君喜事能留客。瑞豐亭上一尊酒。渺渺郊原水初白。峽中地褊常苦貧。政令愈簡民愈淳。本來無事只畏擾。擾者才吏非庸人。都梁之民獨無苦。須晴得晴雨得雨。史君心愛稼如雲。時上斯亭按歌舞。歌闌舞罷史君醉。父老羅拜豐年賜。聖朝尚實抑虛文。縱產芝房非上瑞。

馬上

殘年流轉似萍根。馬上傷春易斷魂。烘煖花無經日蕊。漲深水過去年痕。迷行每問樵夫路。投宿時敲竹寺門。不信太平元有象。牛羊點點散煙村。

鄰山縣道上作

微雨晴時出驛門。亂鶯啼處過江村。挽花醉袖霑餘馥。迎日征鞍借小溫。客路一身真弔影。故園萬里欲招魂。鬢毛無色心猶壯。藉草悲歌對酒尊。

鄰水延福寺早行

化蝶方酣枕。聞雞又著鞭。亂山徐吐日。積水遠生煙。淹泊真衰矣。登臨獨惘然。桃花應笑客。無酒到愁邊。酒偶盡。市酤不可飲。

岳池農家

春深農家耕未足。原頭叱叱兩黃犢。泥融無塊水初渾。雨細有痕秧正綠。綠秧分時風日美。時平未有差科起。買花西舍喜成婚。持酒東鄰賀生子。誰言農家不入時。小姑畫得城中眉。一雙素手無人識。空村相喚看纒絲。農家農家樂復樂。不比市朝爭奪惡。宦遊所得真幾何。我已三年廢東作。

過廣安弔張才叔諫議

春風疋馬過孤城。欲弔先賢涕已傾。許國肺肝知激烈。照人眉宇尚崢嶸。中原成敗寧非數。後世忠邪自有評。歎息知人真未易。流芳遺臭盡書生。

果州驛

驛前官路埃塵疊。歎息何時送我歸。池館鶯花春漸老。窗扉燈火夜相依。孤鸞怯舞愁窺鏡。老馬貪行強受鞭。到處風塵常撲面。豈惟京洛化人衣。

留樊亭三日王覺民檢詳日攜酒來飲海棠下比去花亦衰矣
留落猶能領物華名園又作醉生涯何妨海內功名士共賞人間富貴花

又

石衝尉家錦步障移在樊家園館中醉到花殘呼馬去聊將俠氣壓春風

柳林酒家小樓

桃花如燒酒如油緩轡郊原當出遊微倦放教成午夢宿醒留得伴春愁
遠途始悟乾坤大晚節偏驚歲月遒記取晴明果州路半天高柳小青樓

南池杜詩所謂安知有蒼池萬頃浸坤軸者今已盡廢

二月鶯花滿闕中城南搔首立衰翁數莖白髮愁無那萬頃蒼池事已空
陂復豈惟民食足渠成終助霸圖雄眼前碌碌誰知此漫走叢祠乞歲豐池上有漢高帝廟

唐長慶中南池新亭碑在漢高帝廟側亭已失所在矣

池廢新亭亦已無遺碑半滅臥春蕪文章綺靡雖非古今代詞人不辦渠

聞杜鵑戲作絕句

半世羈遊厭路岐憑鞍日日數歸期勞君樹杪丁寧語似勸飢人食肉糜

鼓樓舖醉歌

書生迫飢寒一飽輕三巴三巴未云已北首趨褒斜匆匆出門去裘馬不復華
短帽障赤日烈風吹黃沙

假裝先晨雞。投鞭後昏鴉。壯哉利闢間。崖谷何給。地荒多牧卒。往往聞盧笳。我行春未動。原野今無花。稚子入旅夢。挽鬚勸還家。起坐不能寐。愁腸如轉車。四方丈夫事。行矣勿咨嗟。

登慧照寺小閣

少年富貴已悠悠。老大功名定有不。歲月消磨閱亭傳。山川遼遠弊衣裘。殺身有地初非惜。報國無時未免愁。局促每思舒望眼。雖非吾土強登樓。

春雨

江頭一夜雨。曉路無新花。我今爲陳人。感此重歎嗟。羲和挾兩曜。疾走不可遮。古今俛仰間。那暇惜物華。

風雨中過龍洞閣

飄然醉袖怒人扶。箇裏何曾有畏塗。卷地黑風吹慘澹。半天朱閣插虛無。闌邊歸鶴如爭捷。雲表飛仙定可呼。莫怪衰翁心膽壯。此身元是一枯株。

驛舍海棠已過有感

淒涼古驛官道傍。朱門沈沈春日長。暄妍光景老海棠。顛風吹花滿空廊。物生榮槩固其常。惜哉無與持一觴。遊蜂戲蝶空自忙。豈知美人在西廂。我雖已老猶能狂。佇立爲爾悲容光。盛時不遇誠可傷。零落逢知更斷腸。

籌筆驛有武侯祠堂

運籌陳迹故依然。想見旌旗駐道邊。一等人間管城子。不堪譙叟作降虜。

嘉川鋪遇小雨景物尤奇

一春客路厭風埃。小雨山行亦樂哉。危棧巧依青嶂出。飛花併下綠巖來。面前雲氣翔孤鳳。腳底江聲轉疾雷。堪笑書生輕性命。每逢險處更徘徊。

老君洞有石刻。載唐明皇幸蜀見老君於此。

丹鳳樓頭語未終。崎嶇蜀道復相逢。太清宮闕俱煨燼。豈亦南來避賊鋒。

大安病酒留半日。王守復來招不往。送酒解醒因小飲。江月館江驛春醒半日留。更煩送酒爲扶頭。柳花漠漠嘉陵岸。別是天涯一段愁。

金牛道中遇寒食

乍換春衫一倍輕。況逢寒食十分晴。鶯穿驛樹惺惚語。馬過溪橋蹀躞行。畫柱綵繩喧笑樂。豔粧麗服角鮮明。誰知此日金牛道。非復當時鐵馬聲。紹興初摩大入至金牛而逝。

曉發金牛

客枕何時穩。忽忽又束裝。快晴生馬影。新暖拆花房。沮水春流綠。嶓山曉色蒼。阿瞞狼狽地。千古有遺傷。自金牛以西。皆明皇幸蜀路。

山南行

我行山南已三日。如繩大路東西出。平川沃野望不盡。麥隴青青桑鬱鬱。地近函秦氣俗豪。鞦韆蹴鞠分朋曹。苜蓿連雲馬蹄健。楊柳夾道車聲高。古來歷歷興亡處。舉目山川尙如故。將軍壇上冷雲低。丞相祠

前春日暮。國家四紀失中原。師出江淮未易吞。會看金鼓從天下。卻用關中作本根。

南鄭馬上作

南鄭春殘信馬行。通都氣象尚崢嶸。迷空遊絮憑陵去。曳線飛鸞跋扈鳴。落日斷雲唐闕廢。德宗詔山南
比兩京。淡煙芳草漢壇平。近郊有韓信拜大將壇。猶嫌未豁胸中氣。目斷南山天際橫。或中置見安南

和高子長參議道中二絕

梁州四月晚鶯啼。共憶扁舟卷畫谿。莫作世間兒女態。明年萬里駐安西。

又

豐年食少厭兒啼。覓得微官落五谿。大似無家老禪衲。打包還度棧雲西。

次韻張季長題龍洞

我昔謁紫皇。翳風騁虬龍。俯不見塵世。浩浩萬里空。謫墮向遠遊。忽到漢始封。西望接蜀道。北顧連秦中。壯哉形勝區。有此蜿蜒宮。雷霆自韃鞮。環玦亦瓊瓏。石屋如建章。萬戶交相通。來者各有得。盡取知無從。憑高三歎息。自古幾英雄。老我文字衰。揮毫看諸公。

次韻子長題吳太尉雲山亭

參謀健筆落縱橫。太尉清樽賞快晴。文雅風流雖可愛。關中遺虜要人平。

送劉戒之東歸

去國三年恨未平，東城況復送君行。難憑魂夢尋言笑，空向除書見姓名。殘日半竿斜谷路，西風萬里玉關情。蘭臺粉署朝回晚，肯記羸官數寄聲。

周元吉蟻室詩

天下有廣居，非阿房建章。賓饑日及月，闔關陰與陽。山川坦然平，何者爲藩牆。孔公暨瞿聃，同坐此道場。哀哉世日隘，肝膽分界疆。蹙縮戰蝸角，崎嶇走羊腸。周先早得道，所證非復常。小室古城隅，宛如野僧房。能容人天衆，雜沓來燒香。三萬二千人，各據獅子牀。實際正如此，切忌錯商量。須彌芥子話，今夕當舉揚。

送范西叔赴召

天涯流落過重陽，楓葉搖丹已著霜。衰病強陪蓮幕客，淒涼又送石渠郎。杜陵雁下悲徂歲，笠澤魚肥夢故鄉。便恐從今長隔闊，舊交新貴例相忘。

又

欲駕征車勸小留，南山南畔更逢秋。數聲過雁催行色，一盞昏燈話別愁。自昔文章關治道，卽今臺閣要名流。白頭尙作書癡在，贖乞朱黃與校讎。

寄鄧公壽

高標瑤樹與瓊林，靈府清寒出苦吟。海內十年求識面，江邊一見卽論心。紛紛俗子常成市，齶齶微言孰賞音。聞道南池梅最早，要君攜手試同尋。

簡章德茂

殊方邂逅豈無緣。世事多乖復悵然。造物無情吾輩老。古人不死此心傳。冷雲黯黯朝橫棧。紅葉蕭蕭夜滿船。箇裏約君同著句。不應輸與瀟湘邊。

自三泉泛嘉陵至利州

日日遭途處處詩。書生活計絕堪悲。江雲垂地灘風急。一似前年上峽時。

木瓜舖短歌

鼓樓坡前木瓜舖。歲晚悲辛利州路。當車礪礪石如屋。百里夷途無十步。溪橋缺斷水留沙。崖腹崩頽風拔樹。虎狼安尾擇肉食。狐狸豎毛啼日暮。冢丘短草聲窸窣。往往精靈與人遇。我生胡爲忽在此。正坐一飢忘百慮。五更出門寒裂面。半夜燎衣泥滿袴。妻孥八月離夔州。寄書未到今何處。餘年有幾百憂集。日夜朱顏不如故。卽今臺省盛諸賢。細思寧是儒冠誤。

夜抵夔州惠照寺寓楊小閣

亭驛驅馳腴肉消。故山歸夢愈迢迢。夜行觸尉那能避。旦過隨僧不待招。雨後風雲猶慘澹。霜前草木已蕭條。衰遲事事非平日。醉裏題詩亦復聊。

太息宿青山舖作

太息重太息。吾行無終極。冰霜迫殘歲。鳥獸號落日。秋砧滿孤村。枯葉擁破驛。白頭鄉萬里。墮此虎豹宅。道邊新食人。膏血染草棘。平生鐵石心。忘家思報國。卽今冒九死。家國兩無益。中原久喪亂。志士淚橫臆。切勿輕書生。上馬能擊賊。

又
淒淒復淒淒。山路我攀躋。僕病臥草間。馬困聲酸嘶。脫兔截道奔。窮狄上樹啼。崩湍一何哀。下落萬仞谿。昏黑投孤戍。洗我衣上泥。下愚不可遷。大惑終身迷。仕宦十五年。曾不飽糠粃。客路少睡眠。月白聞號雞。欲行且復止。虎來茆葉低。

閩中作

殘年作客遍天涯。下馬長亭便似家。三疊淒涼渭城曲。數枝閑澹閩中花。巖旆授管相逢晚。理髮熏衣一笑譁。俱是邯鄲枕中夢。墜鞭不用憶京華。

又

挽住征衣爲濯塵。閩州齋釀絕芳醇。鶯花舊識非生客。山水曾遊是故人。遨樂無時冠巴蜀。語音漸正帶咸秦。平生賸有尋梅債。作意城南看小春。

遊錦屏山謁少陵祠堂

城中飛閣連危亭。處處軒窗臨錦屏。涉江親到錦屏上。卻望城郭如丹青。虛堂奉祠子杜子。眉宇高寒照江水。古來磨滅知幾人。此老至今元不死。山川寂寞客子迷。草木搖落壯士悲。文章垂世自一專。忠義凜令人思。夜歸沙頭雨如注。北風吹船橫半渡。亦知此老憤未平。萬竅爭號悲泄怒。

仙魚舖得仲高兄書

病酒今朝載臥輿。秋雲漠漠雨疎疎。閩州城北仙魚舖。忽得山陰萬里書。

自閔復還漢中次益昌

北首褒斜又幾程。駟雲未放十分晴。馬經斷棧危無路。風掠枯茆颯有聲。季子貂裘端已弊。吳中菘菜正堪烹。朱顏漸改功名晚。擊筑悲歌一再行。

驛亭小憩遣興

淡日微雲共陸離。曲闌危棧出參差。老松臨道閱千載。杜宇號山連四時。漢水東流那有極。秦關北望不勝悲。郵亭下馬開孤劍。老大功名頗自期。

再過龍洞閣

天險龍門道。霜清客子遊。一筇緣絕壁。萬仞俯洪流。著腳初疑夢。回頭始欲愁。危身無補國。忠孝兩堪羞。

自笑

自笑謀生事事疎。年來錐與地俱無。平章春韭秋菘味。拆補天吳紫鳳圖。食肉定知無骨相。珥貂空自誑頭顛。惟餘數卷殘書在。破篋蕭然笑獠奴。

三泉驛舍

殘鐘斷角度黃昏。小驛孤燈早閉門。霜氣帽深摧草木。風聲浩蕩卷郊原。故山有約頻回首。末路無歸易斷魂。短髮蕭蕭不禁白。強排幽恨近清樽。

嘉川舖得檄遂行中夜次小柏

黃旗傳檄趣歸程。急服單裝破夜行。肅肅霜飛當十月。離離斗轉欲三更。酒消頓覺衣裘薄。驛近先看炬

火迎渭水函關元不遠。著鞭無日涕空橫。

歸次漢中境上

雲棧屏山閱月遊。馬蹄初喜躡梁州。地連秦雍川原壯。水下荆揚日夜流。遺虜孱孱寧遠路。孤臣耿耿獨私憂。良時恐作他年恨。大散關頭又一秋。

沔陽夜行

夜發沔陽驛。坡陁岡阜重。月斜欹帽影。霜重溼裘茸。野岸鳴枯葉。煙林度曉鐘。梁州明日到。一笑解衰容。

道中累日不肉食。至西縣市中得羊。因小酌。門外倚車轅。頽然就醉昏。棧餘羊絕美。壓近酒微渾。一洗窮邊恨。重招去國魂。客中無晤語。燈燼爲誰繁。

初離興元

夢裏何曾有去來。高城無奈角聲哀。連林秋葉吹初盡。滿路寒泥踢欲開。笠澤決歸猶小憩。錦城未到莫輕回。炊菰斫膾明年事。卻憶斯遊亦壯哉。

自興元赴官成都

平生無遠謀。一飽百念已。造物戲飢之。聊遣行萬里。梁州在何處。飛蓬起孤壘。憑高望杜陵。煙樹略可指。今朝忽夢破。跋馬臨漾水。此生均是客。處處皆可死。劍南亦何好。小憩聊爾爾。舟車有通塗。吾行良未止。

書事

生長江湖狎釣船。跨鞍塞上亦前緣。雲埋廢苑呼鷹處。雪暗荒郊射虎天。醪酒芳醇偏易醉。胡羊肥美了。

無羶揚州雖有東歸日。閉置車中定悵然。

雨中過臨溪古墩

道邊相送驛邊迎。水隔山遮似有情。歲晚無聊莫相笑。君方雨立我泥行。

南沮水道中

破舍臨湍瀨。罾船聚小潭。山形寒漸瘦。雪意暮方酣。久客情懷惡。頻來道路諳。家山空悵望。無夢到江南。

長木晚興

沮水嶓山名古今。聊將行役當登臨。斷橋煙雨梅花瘦。絕圃風霜柰葉深。末路清愁常袞袞。殘冬急景易駸駸。故巢東望知何處。空羨歸鴉解滿林。

遣興

貂裘破弊色淒涼。塞上歸來路更長。老驥嘶鳴常伏櫪。寒龜藏縮正支牀。彫零客路新霜鬢。掃灑先師舊草堂。九折阪頭休絕歎。世間何地不羊腸。

長木夜行抵金堆市

夜行長木村。重霧雜零雨。溼螢黏野蔓。寒犬吠雲塢。道壞交細泉。亭廢立遺堵。時時過農家。燈火照鳴杵。嗟予獨何事。無歲得安處。卽今窮谷中。性命寄豺虎。三更投小市。買酒慰羈旅。高詠東山詩。悵望懷往古。

赴成都泛舟自三泉至益昌謀以明年下三峽

詩酒清狂二十年。又摩病眼看西川。心如老驥常千里。身似春蠶已再眠。暮雪烏奴停醉帽。秋風白帝放

歸船飄零自是關天命。錯被人呼作地仙。

壬辰十月十三日自閩中還興元遊三泉龍門十一月二日自興元適成都復攜兒曹往遊賦詩勝地惜輕別短筇成後遊門呀一境異木落四山秋野鷓翔深竇蟻蛟擅古湫棧危縈峭壁橋迴跨奔流白雨穿林至腥風卷地浮真成起衰病不但洗孤愁登陟知難再吟哦爲小留回頭卽萬里雪滿戴谿舟予行蜀漢間道出潭毒關下每憩羅漢院山光軒今復過之悵然有感

山光軒上幾閑遊潭毒關前又小留。麥隴雪苗寒剗剗柘林風葉暮颼颼。馬行劍閣從今始。門泊吳船亦已謀。醉眼每嫌天地迤。盡將萬里著吾愁。

棧路書事

危閣聞鈴馱湍流見磴船。汲江人負盎騎馬客蒙氈。梨美來秦地。橙香接楚天。癡頑殊耐事。隨處一欣然。

雪晴行益昌道中頗有春意

杜陵雁下歲將殘。疋馬西遊雪擁關。顛顛敢忘雙關路。淹遲遍看兩川山。春回柳眼梅鬚裏。愁在鞭絲帽影間。安得黃金成大藥。爲人千載駐顏顏。

思歸引

善酒不如穩乘舟。善騎不如謹持轡。妙於服食不如寡欲。工於揣摩不如省事。在天有命誰得逃。在我無求直差易。散人家風脫糾纏。煙蓑雨笠全其天。繩絲老盡歸不得。但坐長飢須俸錢。此身不堪阿堵役。寧待秋風始投檄。山林聊復取熊掌。仕宦眞當棄雞肋。錦城小憩不淹遲。卽是輕舸下峽時。那用更爲麟閣

夢從今正有鹿門期。

誌公院在劍門東五里院東石壁間有若僧負杖者杖端髻髻有刀尺拂子之狀

江東爭奪纏妖祿。哀哉斯民亂方甚。錦幘老人蓋古佛。現身爲作大慈蔭。蕭蕭八十尙兒癡。藤蓋鐘螺關中禁。當時此老默笑渠。大法棟梁身獨任。杖頭示人三轉語。開口喪身如飲鴆。紛紛放弒但可憐。何曾爲汝陳符識。

劍門道中遇微雨

衣上征塵雜酒痕。遠遊無處不消魂。此身合是詩人未。細雨騎驢入劍門。

劍門關

劍門天設險。北鄉控函秦。客主固殊勢。存亡終在人。棧雲寒欲雨。關柳暗知春。羈客垂垂老。憑高一憶神。

劍門城北回望劍關諸峯青入雲漢感蜀亡事慨然有賦

自昔英雄有屈信。危機變化亦逡巡。陰平窮寇非難禦。如此江山坐付人。

丹芝行

劍山峨峨插穹蒼。千林萬谷蟠其陽。大丹九轉古所藏。靈芝三秀夜吐光。如火非火森有芒。朝陽欲升尙煌煌。何由斯取換肝腸。往駕素虬朝紫皇。

過武連縣北柳池安國院袁泉試日鑄顧渚茶院有二泉皆甘寒傳云唐僖宗幸蜀在道不豫至

此飲泉而愈賜名報國靈泉云

滴瀝珠璣翠壁間。遭時曾得奉龍顏。欄傾甃缺無人管。滿院松風晝掩關。

又

行殿淒涼迹已陳。至今父老記南巡。一泓寒碧無今古。付與閑人作主人。

又

我是江南桑杏家。汲泉閑品故園茶。只應碧缶蒼鷹爪。可壓紅囊白雪芽。日鑄貯以小瓶蟻紙丹印封之。
願清貯以紅藍練蠶。皆有歲貢。

宿武連縣驛

平日功名浪自期。頭顛到此不難知。宦情薄似秋蟬翼。鄉思多於春繭絲。野店風霜假裝早。縣橋燈火下程遲。鞭寒熨手戎衣窄。忽憶南山射虎時。

初入西州境述懷

我無飛仙術。御氣周八極。寸步常依人。艱哉萬里役。自行劍關南。大道平如席。日高徐駕車。薄暮亦兩驛。及茲山愈遠。原野若加闊。茂樹冬不凋。寒花晚猶拆。昔我卜遠遊。至蜀龜輒食。弛裝有定處。嗚呼豈人力。頗傳岷山下。清淑無癘疫。土風尚豪舉。意氣喜遠客。薪米家可求。借書亦易得。思吳雖不忘。所願少休息。吾聞古達人。雅志在山澤。豈無及物心。但恨俗褊迫。攬德雖成留。引去常勇決。駭機滿人間。著腳無上策。

綿州魏成縣驛有羅江東詩云。芳草有情皆礙馬。好雲無處不遮樓。戲用其韻。

老夫乘興忽西遊。遠跨秦吳萬里秋。尊酒登臨逼山寺。歌辭散落滿江樓。孤城木葉蕭蕭下。古驛灘聲漲。

韻流未許詩人誇此地。茂林脩竹憶吾州。

卽事

渭水岐山不出兵。卻攜琴劍錦官城。醉來身外窮通小。老去人間毀譽輕。門發誰豪空自許。屠龍工巧竟何成。雅聞嶓下多區芋。聊試寒爐玉糝羹。

青村寺

十年淹泊望修門。臨水登山幾斷魂。短髮星星身欲老。小樓微月宿青村。

行綿州道中

三年客江峽。萬死脫魚鼈。平地從今始。窮塗敢復論。圍碁棋局整。坡壩海濤翻。瘦憤應多恨。泥塗伏短轡。

越王樓

上盡江邊百尺樓。倚欄極目暮江秋。未甘便作衰翁在。兩脚猶堪躡九州。

又

蒲萄酒綠似江流。夜燕唐家帝子樓。約住管絃呼羯鼓。要渠打散醉中愁。

東津

歲暮涪江水歸壑。白沙渺然石壑确。蜀天常煥少雪霜。綠樹青林不搖落。闌干詰曲臨官道。煙靄參差望城郭。打魚斫脰修故事。豪竹哀絲奉歡樂。莫樂於新相知。美人一笑回春姿。四方本是丈夫事。安用一生無別離。

東山

今日之集何佳哉。入關劇飲始此回。登山正可小天下。跨海何用尋蓬萊。青天肯爲陸子見。妍日似趣梅花開。有酒如涪綠可愛。一醉直欲空千壘。駝酥鵝黃出隴右。熊肪玉白黔南來。眼花耳熱不知夜。但見銀燭高花耀京華。故人死太半。歡極往往潛生哀。聊將豪縱歷憂患。鼓吹動地聲如雷。

綿州錄參軍廳觀姜楚公畫鷹少陵爲作詩者

我來訪古涪之濱。不辭百罔翼一真。走馬朝尋海樓館。斫脰夜醉魴魚津。越王高樓亦已換。俯仰今古堪悲辛。督郵官舍最卑陋。棟橈楹腐知幾春。巋然此壁獨亡恙。老槎勁鬪完如新。向來劫火何自免。叱呵守護疑有神。妖狐九尾穴中國。共置不問如越秦。天時此物合致用。下韓指呼端在人。會當原野灑毛血。坐令萬里清煙塵。老眼還憂不及見。詩成肝膽空輪囷。

羅江驛翠望亭讀宋景文公詩

撲馬征塵拂不開。高亭歇帽一徘徊。蜀山地暖稀逢雪。閩歲春遲未見梅。陂水近人無鷺下。煙林藏寺有鐘來。宋公出牧曾題壁。錦段雖殘試剪裁。

鹿頭關過龐士元廟

士元死千載。凄惻過遺祠。海內常難合。天心豈易知。英雄今古恨。父老歲時思。蒼薜無情極。秋來滿斷碑。

遊漢州西湖

房公一跌叢莽毀。八年漢州爲刺史。邊城鑿湖一百頃。島嶼曲折三四里。小巷靜院穿竹入。危榭飛樓壓

城起空濛煙雨媚。松楠顛倒風霜老。霞章日月苦長身。苦閑萬事不理看湖水。向來愛琴雖一癖。觀過自足知夫子。畫船載酒凌湖光。想公樂飲千萬場。歎息風流今未泯。兩川名醖避鴉黃。鴉黃漢中酒名。蜀中無能及者。

嚴君平卜臺

先生久已蛻氛埃。道上猶傳舊卜臺。乞得寒泉濯肝肺。真成萬里不虛來。臺後有大井名通仙井。相傳君平所浚。

梅花

家是江南友是蘭。水邊月底怯新寒。畫圖省識驚春早。玉笛孤吹怨夜殘。冷淡合教閑處著。清臞難遣俗人看。相逢剩作樽前恨。索笑情懷老漸闌。

拜張忠定公祠二十韻

張公世外人。與蜀偶有緣。天將靖蜀亂。生公在人間。厥初大盜興。樂禍迭相延。天子輟玉食。貴臣擁戎旂。生殺出喜怒。死者常差肩。公曰此何哉。從之吾欺天。河流觸地軸。砥柱屹不遷。脅從盡縱捨。飛章交帝前。上意竟開悟。至仁勝兇殘。貴臣不極賞。追還黜其權。安危關社稷。豈惟蜀民全。後來有阿童。握兵事開邊。晚策陸州功。上公珥金蟬。勢張不可禦。北鄉挑幽燕。神京遂丘墟。迄今天步艱。時無忠定公。孰能折其奸。我來拜遺祠。喬木含蒼煙。死者不可作。慨然衰涕潛。憤切感虜禍。慷慨思公賢。春秋送迎神。誰爲歌此篇。

成都歲暮始微寒小酌遣興

革帶類移紗帽寬。茶鑪欲熟篆香殘。疎梅已報先春信。小雨初成十月寒。身似野僧猶有髮。門如村舍強名官。鼠肝蟲臂元無擇。遇酒猶能罄一歡。

再賦梅花

老來愛酒膽狂顛。況復梅花到眼邊。不怕幽香妨靜觀。正須疎影伴癡仙。松筠共歎冰霜晚。桃李從教雨露偏。此去西湖八千里。破愁一笑得無緣。

登塔

冷官無一事。日日得閑遊。壯歲千尺塔。攝衣上上頭。眼力老未減。足疾新有瘳。幸茲濟勝具。俯仰隆九州。雪山西北橫。大江東南流。晝棟雲氣涌。鏗鏘風聲遒。旅懷忽惻愴。涕下不能收。十年辭象魏。萬里懷松楸。仰視去天咫。絕叫當聞不。帝關守虎豹。此計終悠悠。

先主廟次唐貞元中張儼詩韻

猾賊挾至尊。天命矜在己。豈知高帝業。煌煌漢中起。

又

吳蜀本唇齒。悲哉乃連兵。盡銳下三峽。誰使復兩京。

又

洛陽化爲灰。棘生銅駝陌。討賊志不成。父老泣陵栢。廟在襄陵側。

睡起書事

京華豪飲釀千鍾。濯錦江邊怯酒濃。烈士壯心雖未減。狂奴故態有誰容。折梅著句聊排悶。閉戶焚香剩放慵。午枕如雷君莫怪。西風吹夢過吳松。

西郊尋梅

西郊梅花矜絕艷。走馬獨來看不厭。似羞流落蒙市塵。寧墮荒寒傍茆店。儻然自是世外人。過去生中差一念。淺舉常鄙桃李學。獨立不容鶯蝶覘。山礬水仙晚角出。大是春秋吳楚僭。餘花豈無好顏色。病在一俗無由砭。朱欄玉砌渠有命。斷橋流水君何欠。嗟余相與頗同調。身客劍南家在剡。淒涼萬里歸無日。蕭颯二毛衰有漸。尙能作意晚相從。爛醉不辭盃激盪。

分韻作梅花詩得東字

淺寒離落清霜後。疎影池塘淡月中。北客同春俱稅駕。南枝與我兩飄蓬。從來遇酒千鍾少。此外評花四海空。惟恨廣平風味減。坐看徐庾擅江東。

宇文子友聞予有西郊尋梅詩以詩借觀次其韻

拾遺遺跡付緇郎。槁葉凝塵欲滿堂。已恨鱗蠱孤勝踐。更堪風雨病幽芳。蘭蓀千古有同調。蜂蝶一春空自忙。馬上得詩歸絕歎。故園三徑久成荒。

海棠范希元圖

誰道名花獨故宮。謂故蜀燕王宮。東城盛麗足爭雄。橫陳錦障闌干外。盡吸紅雲酒醜中。貪看不辭持夜燭。倚狂直欲擅春風。拾遺舊詠悲零落。瘦損腰圍擬未工。老杜不應無海棠詩意。其失傳爾。

簡南禪勸長老

宦遊處處是君恩。歸去無期莫更論。眼正修行新有力。心空憂患已無根。鉢盂分我雲堂飯。拄杖敲君竹院門。屈宋向來堪一笑。故鄉何戀更招魂。

和譚德稱送牡丹

洛陽春色擅中州。檀暈鞵紅總勝流。顛顛劍南人不管。問渠情味似儂不。

又

吾生何拙亦何工。憂患如山一笑空。猶有餘情被花惱。醉搔華髮倚屏風。

初到蜀州寄成都諸友

流落天涯鬢欲絲。年來用短始能奇。無材藉作長閑地。有激留爲劇飲資。萬里不通京洛夢。一春最負牡丹時。壁牋報與諸公道。罨畫亭邊第一詩。

自蜀州暫還成都奉簡諸公

不染元規一點塵。行歌偶到錦江濱。淋漓詩酒無虛日。判斷鶯花又過春。客路柳陰初墮絮。還家梅子欲生仁。更須作意勤相過。要信年光屬散人。

摩訶池

摩訶古池苑。一過一消魂。春水生新漲。煙蕪沒舊痕。年光走車轂。人事轉萍根。猶有宮梁燕。銜泥入水門。
蜀宮中舊泛舟入此池曲折十餘里今府後門雖已爲平陸然猶號水門。

三月十七日夜醉中作

前年膾鯨東海上。白浪如山寄豪壯。去年射虎南山秋。夜歸急雪滿貂裘。今年摧頽最堪笑。華髮蒼顏羞自照。誰知得酒尚能狂。脫帽向人時大叫。逆胡未滅心未平。孤劍床頭鏗有聲。破驛夢回燈欲死。打窗風雨正三更。

嘉祐院觀壁間文湖州墨竹

石室先生筆有神。我來拂拭一酸辛。敗牆慘澹欲無色。老氣森嚴猶逼人。慣閱冰霜元耐久。恥隨兒女更爭春。紛紛可笑空摹擬。爾輩毫端萬斛塵。

春晚書懷

吹盡郊原萬點紅。燕梁考室亦怱怱。老來偏覺歲華遒。客裏忽驚春事空。病有藥方僂肘後。懶無詩句付囊中。歸心日夜隨江水。只欲東門覓短篷。入吳者皆自小東郭登舟。

又

經春淹泊錦官城。作箇歸期苦未成。老向軒裳增力量。病於風月減心情。官閑有味緣高臥。酒貴無憂爲細傾。憶探梅花如昨日。西齋榆莢與階平。

又

老客天涯心尙孩。惜春直欲挽春回。長繩縱繫斜陽住。右手難移故國來。暑近蚊雷先隱轡。雨前蝗埽正崔嵬。茹芝却粒終無術。萬事惟須付一盃。

偶憶萬州戲作短歌

峽中天下最窮處。萬州蕭條誰肯顧。去年正月偶過之。曾爲巴人三日住。南浦尋梅雪滿舟。西山載酒雲生屨。至今夢聽竹枝聲。燈火紛紛驛前路。殘春猶客蜀江邊。陳迹回思一愴然。漸老定知歡漸少。明年還復憶今年。

驛舍見故屏風畫海棠有感

厭煩只欲長面壁。此心安得頑如石。杜門復出歎習氣。止酒還開慙定力。成都二月海棠開。錦繡裏城迷巷陌。燕宮最盛號花海。霸國雄豪有遺迹。猩紅鸚綠極天巧。疊尊重跗眩朝日。繁華一夢忽吹散。閉眼細思猶歷歷。憂樂相尋豈易知。故人應記醉中詩。夜闌風雨嘉州驛。愁向屏風見折枝。

思政堂東軒偶題

纈愁酒病兩無聊。小篆吹香已半消。喚起十年閩嶺夢。賴桐花畔見紅蕉。蘇桐。嘉州謂之百日紅。

荔枝樓小酌

碧瓦朱欄已半摧。強呼歌舞試樽罍。邦人莫訝心情懶。新出鶯花海裏來。

又

病與愁兼怯酒船。巴歌聞罷更悽然。此身未死長爲客。回首夔州又二年。

嘉陽官舍奇石甚富散棄無領略者予始取作假山因名西齋曰小山堂爲賦短歌

昔人何人愛巖壑。爲山未成儲華碩。散落支床壓酒槽。大或專車小拳握。幽人邂逅爲絕歎。脩綆趣取寒

泉溜峭峯幽竇相吐吞。翠嶺丹崖渺聯絡。石不能言意可解。問我胡爲憐寂寞。人間興廢自有數。昔棄何傷今豈樂。斯言妙矣予則陋。敢對石友辭爵爵。爲君寬作十日留。在眼便同真著脚。

望雲樓晚興

小閣東南獨詠詩。此生終與世差池。夕陽明處蒼煙合。棲燕歸時畫角悲。人與江山均是夢。心非風月尙誰知。舊交幾歲音塵隔。三撫闌干有所思。

護國天王院故神霄玉清萬壽宮也廢圯略盡而規模尙極壯麗過之有感

太霄帝君神霄府。一日璽書行海寓。築宮奔走誰敢後。萬牛挽材山作礎。步虛夜半落雲間。玉聲漶漶鸞鶴舞。帝師丞相領使名。侍晨校籍紛如雨。洛陽臨淮小睥睨。御史立表投裔土。從來桑門喜嘲競。舉國冠巾噤無語。古傳東海會揚塵。君看此地亦荆榛。霓旌仙仗空遺塔。磬缺臺傾知幾春。牧兒驅牛齧庭草。誰記劍佩來朝真。斜陽却上筍輿去。溝水泠泠愁殺人。

登荔枝樓

平羌江水接天流。涼入簾櫳已似秋。喚作主人元是客。知非吾土強登樓。閑憑曲檻常忘去。欲下危梯更小留。公事無多廚釀美。此身不負負嘉州。薛能詩不負嘉州只負身。

再賦荔枝樓

只道文書撥不開。未妨高處獨徘徊。山橫瓦屋披雲出。水自牂牁裂地來。暝入簾陰吹細雨。涼生樓角轉輕雷。癡頑也擬忘鄉國。不奈城頭暮角哀。

能仁院前有石像丈餘蓋作大像時樣也

江開欲開千尺像雲龜先定此規模斜陽徒倚空三歎嘗試成功自古無

卷第四

謁凌雲大像

出郭幽尋一笑新。徑呼艇子截煙津。不辭疾步登重閣。聊欲今生識偉人。泉鏡正涵螺髻綠。浪花不犯寶
跌塵。一泉泓然正在帶下。每歲漲水不能及佛足。始知神力無窮盡。丈六黃金果小身。觀無量壽經云。或
現小身丈六八尺。

凌雲醉歸作

峩帽月入平菴水。歎息吾行俄至此。謫仙一去五百年。至今醉魂呼不起。玻瓈春滿琉璃鐘。玻瓈卷眉州
酒名。宦情苦薄酒興濃。飲如長鯨渴赴海。詩成放筆千觴空。十年看盡人間事。更覓麴生偏有味。君不見
蒲萄一斗換得西涼州。不如將軍告身供一醉。

獨游城西諸僧舍

我是天公度外人。看山看水自由身。蘚崖直上飛雙屐。雲洞前頭岸幅巾。萬里欲呼牛渚月。一生不受廣
公塵。非無好客堪招喚。獨往飄然覺更真。

西林院

一邦盡對江邊像。試比西林總不如。院門對大像。最正。羣玉蕭森開土宅。五雲飛動相君書。寺額五字。廣相。裴微書。道美可愛。磴危漸覺山爭出。屐響方驚開半虛。安得棄官長住此。一盃香飯薦珍蔬。

聽事前紫微花二本甚盛戲題絕句

紅藥紫微西省春。從來惟慣對詞臣。問因自是簷官分。無奈名花解笑人。

同何元立蔡肩吾至東丁院汲泉煮茶

一州佳處盡裴回。惟有東丁院未來。身是江南老桑苧。諸君小住共茶盃。

又

雪芽近自裁。啖得不減紅囊顧。渚春旋置風爐清。樹下它年奇事記三人。

癸巳夏旁郡多苦旱。惟漢嘉數得雨。然未足也。立秋夜三鼓。雨至明日晡。後未止。高下霑足。喜而有賦。

有賦

畫簷鳴雨早秋天。不喜新涼喜有年。眼裏香杭三萬頃。寄聲父老共欣然。

又

五十衰翁髮半華。猶能把酒醉天涯。絲毫美政何曾有。惟把豐年贈漢嘉。

晚登望雲

一出修門又十年。聳流多已珥金蟬。衰如蠶葉秋先覺。愁似鱖魚夜不眠。聲路疎槐迎鶴處。苑城殘日泛湖天。君恩未報身今老。徒倚危樓一泫然。

又

晚來煙雨暗江干。烽火遙傳畫角殘。看鏡功名空自許。上樓懷抱若爲寬。青楓搖落新秋令。白髮淒涼舊史官。飽見少年輕宿士。可憐隨處強追歡。

立秋後十日風雨淒冷獨居有感

急雨鳴瓦溝。尖風入窗罅。紗籠耿青燈。寂寂新秋夜。誰言簿領中。乃復有此暇。稍繙書冊讀。已念灰火跨。那知是羈客。恍若在家舍。睡晚且熟眠。洗沐官有假。明日晦日也。

晦日西窗懷故山

今朝休日仍無客。茶罷西窗臥解衣。白髮已侵殘夢境。綠苔應滿舊漁磯。桃源雞犬塵凡隔。杜曲桑麻夢想歸。賴有小山聊慰眼。幽篁叢桂雨霏霏。

秋日懷東湖

小關東頭罨畫池。秋來長是憶幽期。身如巢燕臨歸日。心似堂僧欲動時。病思羈懷惟付酒。西風落日更催詩。故知歲暮常多感。不獨當年宋玉悲。

又

罨畫池邊小釣磯。垂竿幾度到斜暉。青蘋葉動知魚過。朱閣簾開看燕歸。歲晚官身空自閱。途窮世事巧相違。邊州客少巴歌陋。誰與愁城略解圍。

小山之南作曲欄石磴繚繞如棧道戲作二篇

羈遊隨處得哦詩。掃溉軒窗每恨遲。已幻小山寬客恨。更添危磴作兒嬉。偶留塞上掌無數。徑返湖邊已
有期。誰遣化工娛此老。幽花微拆綠苔滋。

又

吏退庭空刺得閑。一窗如在翠微間。半崖綵棧遊秦路。疊障生雲入剡山。真有巖居臨絕壑。但無漁艇繫
寒灣。躋攀自苦君休笑。寸步何曾不險艱。

得成都諸友書勸少留嘉陽戲作

一坐五十日。癡頑良可哀。新涼爲醉地。少訟作慵媒。市柳風煙慘。汀蘋歲月催。遠官從漫浪。垂老懶低回。
市柳汀蘋皆屬唐安。

道院

四壁長苔痕。經旬掩綠樽。雨聲清夢境。燈影伴吟魂。搖落悲徂歲。漂流憶故園。擬騷無傑語。千古愧湘沅。

醉中感懷

早歲君王記姓名。只今顛顛客邊城。青衫猶是鷓鴣行。白髮新從劍外生。古戍旌旗秋慘淡。高城刁斗夜
分明。壯心未許全消盡。醉聽聽檀槽出塞聲。

玻瓈江眉州共飲亭蓋取東坡共飲玻瓈江之句追懷舊遊戲作以補西州樂府。

玻瓈江水千尺深。不如江上離人心。君行未過青衣縣。妾心先到峨眉陰。金罍共釀不知曉。月落煙渚天
橫參。車輪無角那得住。馬蹄不方何處尋。空憑尺素寄幽恨。縱有綠綺誰知音。愁來只欲掩屏睡。無奈夢

斷聞疎碓古樂府安得雙車輪。一夜生四角。唐人詩云。長安塵土中。馬蹄圓重重。那馬蹄不方何處認那蹄。

一夜思

蒼顏華髮久低摧。歎息何堪歲月催。殘暑已隨團扇去。新涼還傍短檠來。月痕澹澹侵苔砌。雲葉蕭蕭覆水臺。籜領沈迷無日了。試憑詩思洗氛埃。

雨夜懷唐安

歸心日夜逆江流。官柳三千憶蜀州。小閣簾櫳頻夢蝶。平湖煙水已盟鷗。螢依溼草同爲旅。雨滴空階別是愁。堪笑邦人不解事。區區猶借陸君留。蜀人舊語謂唐安有三千官柳。四千琵琶。溼螢依草。沒梅宛陵詩。

迎詔書

憶瞻變仗省門前。扇影鞭聲下九天。寂寞嘉州迎詔處。忽聞鼓吹却悽然。

秋夜遣懷

江雲傍簷山雨細。羈客空堂臥荒翳。心如秋燕不安巢。迹似春萍本無柢。官身奔走何時定。病眼蒙籠惟欲閉。壯遊不復記墜鞭。夜語誰能懷擁髻。詩情已減但微吟。酒戒漸堅纔小嗜。從今更擬著幽禪。半世佞眞誤計。

送客至江上

多事經旬不出城。今朝送客此閑行。郊原遠帶新晴色。人語中含樂歲聲。天際斂雲山盡出。江流收漲水初平。故園社友應惆悵。五歲無端棄耜耕。

雨中西林寺

胸中荆棘費鉏耘。正藉幽尋暫解紛。不盡長江來畫玉。半空飛閣對凌雲。昏昏橫鶴憑軒見。杳杳疎鐘隔岸聞。珍重山僧迎客意。蜻蛉一縷起微熏。小軒下臨羊江。發源自大渡河。

休日登花將軍廟小樓

林間縹緲出層樓。欄角蒼茫萬頃秋。曾是胸中著雲夢。不妨此地少遲留。

深居

作吏難堪簿領迷。深居聊復學幽棲。病來酒戶何妨小。老去詩名不厭低。零落野雲寒傍水。霏微山雨晚成泥。自憐甫里家風在。小摘殘蔬遶廢畦。

秋夜獨醉戲題

弊袍羸馬遍天涯。恰似伶優著處家。社壘嫩醅初泛蟻。寒缸殘燼自成花。幽窗照影烏巾折。醉手題詩淡墨斜。莫恨久爲賊下客。江湖歸去得雄誇。

感事

清班曾見六龍飛。晚落天涯遠日畿。邊月空悲新雪鬢。京塵猶染舊朝衣。江山壯麗詩難敵。風物蕭條醉絕稀。賴有東湖堪吏隱。寄聲籬菊待吾歸。

醉鄉

醉鄉卜築亦佳哉。但苦無情白髮催。癡欲煎膠黏日月。狂思入海訪蓬萊。辭巢歸燕先秋去。泣露幽花近社開。莫惜傾家供作樂。古人白骨有蒼苔。

夜讀岑嘉州詩集

漢嘉山水邦。岑公昔所寓。公詩信豪偉。筆力追李杜。常想從軍時。氣無玉關路。公詩多從戎。西邊時所作。至今蠶簡傳。多昔橫槊賦。零落財百篇。崔嵬多傑句。工夫刮造化。音節配韶護。我後四百年。清夢奉巾屨。晚途有奇事。隨牒得補處。羣胡自魚肉。明主方北顧。誦公天山篇。流涕思一遇。

次韻師伯渾見寄

眉山漢嘉東西州。估船日到津頭。不得講書一行字。倚遍臨江百尺樓。黃鐘大呂忽復見。繡段英瑤何足酬。願約青神王夫子。來醉萬景作中秋。

社前一夕未昏輒寢中夜乃得寐

祠事當行懼不任。未昏強臥擁孤衾。三更自笑元無睡。萬事從來忌有心。簷角河傾秋耿耿。牀頭蟲語夜愔愔。若耶溪上蘋花老。倦枕何人聽越吟。

晚雨

蕭瑟度橫塘。霧微映繚牆。壓低塵不動。瀉急土生香。聲入楸梧碎。清分枕簟涼。回頭忽陳迹。簷角挂斜陽。

社日

白穀登場酒滿卮。神林簫鼓晚清悲。蟬依疎柳長言處。燕委空巢大去時。幼學已忘那用忌。鄉俗小兒女
平日忌習業微聾自樂不須醫。古謂社酒治聾。傷心故里雞豚集。父老逢迎正見思。

夜雨感懷

老來每惜歲峰巖。幾爲巴歌判宿醒。白帝草生時入夢。錦官花重更關情。簾疎夜雨侵燈暈。枕冷秋風遞
角聲。定許何時理歸棹。酒狂猶解賦蕪城。

八月二十二日嘉州大閱

陌上弓刀擁寓公。水邊旌旆卷秋風。書生又試戎衣窄。山郡新添畫角雄。都奮止角四枝。近方增如式。早
事樞庭虛費策。晚遊幕府媿無功。草間鼠輩何勞磔。要挽天河洗洛嵩。

九月六夜夢中作笑詩覺而忘之明日戲追補一首

吾家笑疾自士龍。我才雖卑笑則同。紛紛世事何足計。盡付撫掌掀髯中。清樽可醉風月好。虛空萬象皆
絕倒。問君此笑是喜不道得老夫輸一籌。

重九會飲萬景樓

粲粲黃花手自持。登高聊答此佳時。纖雲不作看山祟。斗酒聊寬去國思。落日樓臺頻徙倚。西風鼓笛倍
淒悲。彭城戲馬平生意。強爲巴歌一解頤。是日作竹枝歌舞。

久客書懷

行役飽看山。沉綿剩得閑。忘憂緣落魄。耐老爲癡頑。射虎臨秦塞。騎驢入蜀關。芳洲蘭可佩。幽磴桂堪攀。

欸乃聲饒楚，陔隅句帶蠻。嘉州帶袁董，諸蠻悠然長自遣。故里幾時還。

初報嘉陽除官還東湖有期喜而有作

塞上經秋幾醉醒，羈愁減盡鬢邊青。烽傳八詔登樓看，歌奏三巴忍淚聽。好語忽聞還印綬，歸心先已繞林垌。呼兒結束從今日，鵲語燈花故有靈。景夕燈有花，今早鵲聲遠舍，皆紀實事。

聞勾龍司戶會客山亭送酒殺及橄欖并簡諸同僚

東山如高人，吾輩豈易見。君獨不出門，終日與相面。陰晴煙雨月，朝暮知幾變。聞君交不瀆，冠佩未嘗燕。弛張要有時，一笑山未變。高秋得佳日，折簡喚諸彦。風流非俗飲，歌舞參筆硯。但恨五日尹，阻造三語掾。余方臥疾，清樽遣分似霜果，亦可薦爛醉。君勿辭，光景真掣電。

九月十六日夜夢駐軍河外遣使招降諸城覺而有作

殺氣昏昏橫塞上，東竝黃河開玉帳。畫飛羽檄下列城，夜脫貂裘撫降將。將軍櫜上汗血馬，猛士腰間虎文張。階前白刃明如霜，門外長戟森相向。朔風卷地吹急雪，轉盼玉花深一丈。誰言鐵衣冷徹骨，感義懷恩如挾纊。腥臊窟穴一洗空，太行北嶽元無恙。更呼斗酒作長歌，要遣天山健兒唱。

何元立示九日詩臥病累日乃能次韻

何郎戲寫菊花秋，落筆縱橫豈易酬。豪士乃能爲老伴，寓公那得稱遨頭。早衰不耐危亭冷，夜冷凭誰著。李綱杆得疾數日，獨臥空齋畫角愁。病起尙思尋宿約，一樽從子醉東樓。

成都行

倚錦瑟。擊玉壺。吳中狂士遊成都。成都海棠十萬株。繁華盛麗天下無。青絲金絡白雪駒。日斜馳遣迎名
姝。燕脂褪盡見玉膚。綠鬟半脫嬌不梳。吳綾便面對客書。斜行小草密復疎。墨君秀潤瘦不枯。風枝雨葉
筆筆殊。月浸羅襪清夜徂。滿身花影醉索扶。東來此歡墮空虛。坐悲新霜點鬢鬢。易求合浦千斛珠。難覓
錦江雙鯉魚。

聞虜亂有感

前年從軍南山南。夜出馳獵常半酣。玄熊蒼兕積如阜。赤手曳虎毛毳毳。有時登高望鄴杜。悲歌仰天淚
如雨。頭顱自揣已可知。一死猶思報明主。近聞索虜自相殘。秋風撫劍淚汎汎。維陽八陵那忍說。玉座塵
昏松柏寒。儒冠忽忽垂五十。急裝何由穿袴褶。羞爲老驥伏櫪悲。寧作枯魚過河泣。古樂府枯魚詩云。枯
魚過河泣。何時復還入。作書與鮪鱗相教誨。出入。

醉歌

我飲江樓上。闌干四面空。手把白玉船。身遊水精宮。方我吸酒時。江山入胸中。肺肝生雀鬼。吐出爲長虹。
欲吐輒復吞。頗畏驚兒童。乾坤大如許。無處著此翁。何當呼青鸞。更駕萬里風。

初寒

江路常逢雨。山城早得寒。蘭凋初解佩。菊老尙加餐。嘉陽有樂園。以八九月盛開。節物知何負。情懷自解
歡。浮生看已熟。不必夢邯鄲。

木山

枯楠千歲遭風雷。披枝折幹吁可哀。輪囷無用天所赦。秋水初落浮江來。嵌空宛轉若耳鼻。峭瘦拔起何崔嵬。珠宮貝闕留不得。忽出洲渚知誰推。書窗正對雲洞啓。叢菊初傍幽篔簹。是間著汝頗宜稱。摩挲朝暮真千回。天公解事雨十日。洗盡泥滓滋莓苔。一丘一壑吾所許。不須更慕明堂材。

寒夜遣懷

臨觴本不飲。憂多自成醉。四方行萬里。不見埋憂地。憶昔入京都。寶馬搖香鬃。酣飲青樓夜。歌聲在半空。去日不可挽。華髮忽垂領。娟娟峨眉月。相對作淒冷。月落照空牀。不寐聽寒蠶。早知憂隨人。何用去故鄉。

嘉陽絕無木屋偶得一枝戲作

久客紅塵不自憐。眼明初見廣寒仙。只饒籬菊同時出。尙占江梅一著先。重露溼香幽徑曉。斜陽烘蕊小窗妍。何人更與蒸沉水。金鴨華燈惱醉眠。

雨後登西樓獨酌

老覺人間無一欣。強尋高處看歸雲。天空列嶂開圖畫。水落寒江學篆文。四海道途行泰半。百年光景近中分。交遊賴有麴生在。正向愁時能策勳。

喜晴

西風吹雨冷淒淒。道上行人白晝迷。聊挾重雲取朝日。未容嘉穀臥秋泥。年豐郡府疏文檄。蠻道邊亭息鼓聲。寄語農家莫遊惰。冬閑正要飽鉏犁。

曉出城東

渺渺長江下估船。亭亭孤塔隱蒼煙。不堪異縣蕭條地。更遇初寒慘澹天。巾場已茂歸有約。寶篋未足去無緣。包羞強索侏儒米。豪舉何人記少年。

寶劍吟

幽人枕寶劍。殷殷夜有聲。人言劍化龍。直恐興風靈。不然憤狂虜。慨然思遐征。取酒起醉劍。至寶當潛形。豈無知君者。時來自施行。一匣有餘地。胡爲鳴不平。

十月一日浮橋成以故事宴客凌雲

陰風吹雨白晝昏。誰掃雲霧升朝暾。三江水縮獻洲渚。九頂秀色欲塞門。西山下竹十萬箇。江面便可馳車轍。巷無居人亦何怪。釋未來看空山村。竹枝宛轉秋猿苦。桑落微灑春泉渾。衆賓共醉忘燭跋。一徑卻下綠雲根。走沙人語若潮卷。爭橋炬火如星繁。肩輿睡兀到東郭。空有醉墨留衫痕。十年萬事俱變滅。點檢自覺惟身存。寒燈夜永照耿耿。臥賦長句招羈魂。

聞王嘉叟訃報有作

嗚呼嘉叟今信死。哭君寢門淚如水。我初入都都不妄交。傾倒如君數人耳。籠燈蹋雪夜相過。劇論懸河駭鄰里。地爐燔栗美芻豢。石鼎烹茶當醪醴。上書去國何勇決。作詩送君猶壯偉。十年偶復過都門。君方草制西垣裏。鬢鬢班白面骨生。心頗疑君遽如此。函來例不候達官。每欲寄聲中輒止。隻雞絮酒縱有時。雙魚素書長已矣。生前客屢紛滿戶。身後人情薄於紙。懸知海內莆陽公。謂陳丞相獨念遺孤爲經紀。

出城至呂公亭按視修堤

翠鷲橫山澹日昇。孤亭聊借曲欄憑。霜威漸重江初縮。農事方休役可興。重阜護城高歷歷。千夫在野築登登。寓公僅踵前人迹。伐石西山恨未能。西州築堤。檝竹貯江石。不三年。輒壞。蓋謂如吳中取大石鑿成。則可支久。異日當有辨此者。

登樓

從來好境遍人間。無奈勞生自欠閑。江近時時吹白雨。樓高面面看青山。歌聲哀怨傳三峽。行色淒涼帶百蠻。嘉陽近諸蠻。流落愛君心未已。夢魂猶綴紫宸班。

醉中作

晚途豪氣未低摧。一飲猶能三百盃。爛爛目光方似電。駒駒鼻息忽如雷。

又

鶴鶴孤飛萬里風。偶然來憩大峨東。持盃露坐無人會。要看青天入酒中。

又

曾賜琳腴白玉京。狂歌起舞蜀人驚。却騎黃鶴橫空去。今夕垂虹醉月明。

又

畫角三終夜未闌。醉憑飛閣喜天寬。月明滿地江風急。吹落幽人紫綺冠。

觀大散關圖有感

上馬擊狂胡。下馬草軍書。二十抱此志。五十猶癯儒。大散陳倉間。山川鬱盤紆。勁氣鍾義士。可與共壯圖。

坡陁成陽城。秦漢之故都。王氣浮夕靄。宮室生春蕪。安得從王師。汛掃迎皇輿。黃河與函谷。四海通舟車。士馬發燕趙。布帛來青徐。先當營七廟。次第畫九衢。偏師縛可汗。傾都親受俘。上壽太安宮。復如正觀初。丈夫畢此願。死與螻螻殊。志大浩無期。醉膽空滿軀。

嘉州守宅舊無後園。因農事之隙。爲種花築亭。觀甫成而歸。戲作長句。

吾州山水西州冠。正欠雄樓并傑觀。奇峯秀嶺待彈壓。明月清風須判斷。三峨舊不到郡齋。創爲詩人供几案。煙雲舒卷水墨圖。草木青紅錦繡段。一時冠蓋共登臨。百年父老俱驚惋。榮回舞袖試弓彎。宛轉歌聲學珠貫。佳人蜂蝶爭遶鬢。上客龍蛇看揮翰。寓公雖作一月留。梅發東湖歸思亂。兒戲聊成此段奇。陳迹應留後人歎。明朝艇子泝平羌。卻伴謫仙遊汗漫。

連日扶病領客。殆不能支。枕上懷故山偶成。

已強迂疎。假印章。更扶衰病主盃觴。功名已判初心負。豪俠都無故態狂。靜覺此身猶外物。懶思與世永相忘。清泉白石生來事。曲几明窗味最長。

余往與宇文叔介同客山南。今年叔介客死。臨安十月十一日夜。忽夢相從。取架上書共讀。如平生讀。未竟。忽辭去。留之不可。曰欲歸校藥方。既覺。泫然不能已。因賦此詩。

羈魂顛顛遠相尋。跼斷肩寒帶苦吟。歸校藥方緣底事。知君死抱濟時心。

金錯刀行

黃金錯刀白玉裝。夜穿浮扉出光芒。丈夫五十功未立。提刀獨立顧八荒。京華結交盡奇士。意氣相期共

生死千年史策恥無名。一片丹心報天子。爾來從軍天漢濱。南山曉雪玉嶙峋。嗚呼楚雖三戶能亡秦。豈有堂堂中國空無人。

言懷

蘭碎作香塵。竹裂成直紋。炎火熾崑岡。美玉不受焚。孤生抱寸志。流離敢忘君。釀桂餐菊英。潔齋三沐熏。執云九關遠。精意當徹聞。捐軀誠有地。賈勇先三軍。不然齋恨死。猶冀揚清芬。願乞一棺地。葬近要離墳。

十月十九日與客飲忽記去年此時自錦屏歸山南道中小獵今又將去此矣

去年縱獵韓壇側。玉鞭自探南山雪。今年痛飲蜀江邊。金盃卻吸峨眉月。竹枝歌舞新教成。淒怨傳得三巴聲。城頭筵觀出雲雨。峨眉正與闌干平。酒酣詩就擲盃去。醉蹋玻瓈江上路。懸知幽壠斷橋邊。已有梅花開半樹。

冬日

短景忽忽過。新寒齋齋來。客遊聊戲耳。世事亦悠哉。綠動連村麥。香吹到處梅。錦城花柳窟。歸去看春回。

十月十四夜月終夜如晝

月從海東來。徑尺鎔銀盤。西行到峨眉。玉宇萬里寬。幽人耿不寐。弄影清夜闌。五城十二樓。縹渺香霧間。不知何仙人。亭亭倚高寒。欲語不得往。悵望冰雪顏。叩頭儻見哀。容我躡素鸞。掬露以爲漿。屑玉以爲餐。冷泠漱齒頰。皓皓濯肺肝。逝將從君遊。人間苦無歡。

下元日五更詣天慶觀寶林寺

朝罷琳宮謁寶坊。強扶衰疾具簪裳。擁裘假寐監輿穩。夾道吹煙燹炬香。樓外曉星猶磊落。山頭初日已蒼涼。鳴騶應有高人笑。五斗驅君早夜忙。

梅花

老厭紛紛漸鮮歡。愛花聊復客江干。月中欲與人爭瘦。雪後偷憑笛訴寒。野艇幽尋驚歲晚。紗巾亂插醉更闌。尤憐心事淒涼甚。結子青青亦帶酸。

又

月地雲階暗斷腸。知心誰解賞孤芳。相逢只怪影亦好。歸去始驚身染香。渡口耐寒窺淨綠。橋邊凝怨立昏黃。與卿俱是江南客。剩欲尊前說故鄉。

又

玄冥行令肅冰霜。牆角疎梅特地芳。屑玉定煩修月戶。堆金難買破天荒。了知一氣環無盡。坐笑千林凍欲僵。力量世間誰得似。挽回歲律放春陽。

又

折得名花伴此翁。詩情恰在醉魂中。高標不合塵凡有。尤物真窮造化功。霧雨更知仙骨別。鉛丹那悟色塵空。前身姑射疑君是。問道端須順下風。

西園

半掩朱門薜徑斜。翠屏繡谷忽谿谿。高高下下天成景。密密疎疎自在花。江近夕陽迎宿鷺。林昏殘角促

歸鴉。吾舟已繫津南岸。喚客猶能一笑譁。

胡無人

鬚如蝟毛。面如紫石稜。丈夫出門無萬里。風雲之會立可乘。追奔露宿青海月。奪城夜踰黃河冰。鐵衣度磧。雨颯颯。戰鼓上隴雷憑憑。三更窮虜送降款。天明積甲如丘陵。中華初識汗血馬。東夷再買霜毛鷹。羣陰伏。太陽昇。胡無人。宋中興。丈夫報主有如此。笑人白首蓬窗燈。

公無渡河聞雅安守溺死於嘉陵江代其家人作

大莫大於死。生親莫親於骨肉。河不可憑兮。非有難知。言之不從兮。繼以痛哭。望雲九井兮。白浪嗟峨。剝肝瀝血兮。不從奈何。秋風颯颯兮。紙錢投波。從公於死兮。下飽蛟鼉。

長門怨

寒風號有聲。寒日慘無暉。空房不敢恨。但懷歲暮悲。今年選後宮。連娟千蛾眉。早知獲譴速。悔不承恩遲。聲當徹九天。淚當達九泉。死猶復見思。生當長棄捐。

長信宮詞

憶年十七兮。初入未央。獲侍步輦兮。恭承寵光。地寒祚薄兮。自貽不祥。讒言乘之兮。鼻鼾日彰。禍來嗟峨兮。勢如壞牆。當伏重誅兮。鼎耳劍鋸。長信雖遠兮。匪棄路旁。歲給絮帛兮。月賜稻粱。君舉玉食兮。犀箸誰嘗。君御朝衣兮。誰進熏香。婕妤才人兮。儼其分行。千秋萬歲兮。永奉君王。妾雖益衰兮。尚供蠶桑。願置繭館兮。組織玄黃。欲訴不得兮。仰呼蒼蒼。佩服忠貞兮。之死敢忘。

銅雀妓

武王在時教歌舞。那知淚灑西陵土。君已去兮妾獨生。生何樂兮死何苦。亦知從死非君意。偷生自是慙天地。長夜昏昏死實難。孰知妾死心所安。

得韓无咎書寄使虜時宴東都驛中所作小闕

大梁二月杏花開。錦衣公子乘傳來。桐陰滿第歸不得。金轡玲瓏上源驛。上源驛中搥畫鼓。漢使作客胡作主。舞女不記宣和粧。廬兒盡能女真語。書來寄我宴時詩。歸鬢知添幾縷絲。有志未須深感慨。築城會據拂雲祠。唐中受降城在拂雲祠。

曉坐

低枕孤衾夜氣存。披衣起坐默忘言。瓶花力盡無風墮。爐火灰深到曉溫。空臺時時聞鼠齧。小窗一一送鴉騾。悠然忽記幽居日。下榻先開水際門。

愛

斷碑歎興元姚節度園以折碑爲石筍。文猶可識。蓋梁蕭懿墓碑。簡文爲太子時撰。書法遺美可愛。

二齋同起南蘭陵。正如文叔與伯升。至今人悲大蕭死。齋恨不見梁家興。崇崇之陵久爲谷。豈惟羣盜分珠玉。斷碑槎牙棄道邊。文字班班猶可讀。剝剝苔蘚一悽然。俯仰人間幾變遷。世人作碑君勿哂。千載園林須石筍。

夜行至平羌憩大悲院

憶昨遊天台。夜投石橋宿。水聲亂人語。炬火散山谷。穿林有驚鶴。截道多奔鹿。今夕復何夕。此境忽在目。蒼茫陵十里。清淺溪數曲。微霜結裘茸。落葉拂帽屋。下馬憩村寺。頽然睡清熟。覺來窗已白。殘燈猶煜煜。迓益帥馬上作。

馬上遙看江上山。白雲紅樹畫圖間。經年簿領無休日。却向忙中得少閑。

蜀酒歌

漢州鵝黃鸞鳳雛。不驚不搏德有餘。眉州玻瓈天馬駒。出門已無萬里塗。病夫少年夢清都。曾賜盧皇碧琳脫。文德殿門晨奏書。歸局黃封羅百壺。十年流落狂不除。遍走人間尋酒壚。青絲玉瓶到處酤。鵝黃玻瓈一滴無。安得豪士致連車。倒瓶不用杯與盃。琵琶如雷聒坐隅。不愁渴死老如。

十一月八日夜燈下對梅花獨酌累日勞甚頗自慰也

奔走人間無已時。夜窗喜對出塵姿。移燈看影憐渠瘦。掩戶留香笑我癡。冷豔照杯欺麴蘖。孤標逼硯結冰漸。本來難入繁華社。莫向春風怨不知。

醉後草書歌詩戲作

朱樓矯首隘八荒。綠酒一舉累百觴。洗我堆阜蟬噪之胸次。寫爲淋漓放縱之詞章。墨翻初若鬼神怒。字瘦忽作蛟螭僵。寶刀出匣揮雪刃。大剝破浪馳風樞。紙窮擲筆霹靂響。婦女驚走兒童藏。往時草檄喻西域。颯颯聲動中書堂。余嘗草丞相魯公以下與夏國主書於政事堂。一收朝跡忽十載。西掠三巴窮夜郎。山川荒絕風俗異。賴有酒美猶能狂。醉中自脫頭上幘。綠髮未許侵微霜。人生得喪良細事。執謂老大多

悲傷。

古藤杖歌

我有古藤杖。天矯蛟龍形。生於峭壁絕磴上。乃是會稽山陰之蘭亭。歷吳入楚上巴峽。北遊直看秦山青。夜飛或隨暴雨去。日歸常帶流蔡腥。與子扶攜各老大。勿復狡獪誇神靈。惜惜從此常倚壁。聽我夜誦黃庭經。

歲晚書懷

殘歲堂堂去。新春鼎鼎來。夢移鄉國近。酒挽壯心回。驛律初催柳。晴光併上梅。東湖有歸日。衰抱得頻開。已遣人迎新守。

累日倦甚不能觴客睡起戲作

粉闌紅鶯罇俎薄。不如止酒得安眠。無心已破浮生夢。有力聊輕造化權。脫髮滿梳真老矣。斷香鬢几故儻然。晚知古佛中邊語。正合蒙莊內外篇。

種花

西園作戲喚春回。桃李陰陰三萬栽。不是無心看開遍。錦江煙柳待歸來。時將還成都。

雨中登樓望大像

去年寒雨中。騎驢度劍閣。今年當此時。臥聽邊城柝。巍巍千尺像。與我兩寂寞。交遊閱四海。此老差可託。但當頻自省。諸惡誓莫作。時時一憑高。相望要不作。桑間戒三宿。堅坐豈渠樂。却應輸老夫。新春買芒屨。

迎教呈王志夫李德孺師伯渾

平明擅騎傳詔函，帝意欲與東皇參。青城回仗國人喜，金雞啣赦天恩覃。吾君愛民靡不到，黃紙字密如吳蠶。紀元故事極用九，聖政盡美方登三。教書改明年元，嗟余久已去魏闕。夢想豹尾猶毳毼，過郊一月方拜赦。始知身落天西南，歡呼已怪衰病愈。蹈舞更覺春風酣，何當與子歸共載。二月起柁江如藍。

冬日

幸是元無了事癡，偷閑聊復學兒嬉。午窗弄筆臨唐帖，夜几研朱勘楚詞。山暖已無梅可折，江清猶有蟹堪持。舊交乖隔音塵斷，安得歌呼共一卮。蜀中惟嘉州有蟹。

雨中睡起

礫礫寒禽無定棲，纖纖小雨欲成泥。松鳴湯鼎茶初熟，雪積爐灰火漸低。一氣推移均野馬，百年蒙覆等醯鷄。青山黃葉蘭亭路，憶喚鄰翁共架犁。

十二月初一日得梅一枝絕奇戲作長句今年於是四賦此花矣

高標已歷萬花羣，尙恐嬌春習氣存。月兔搗霜供換骨，湘娥鼓瑟爲招魂。孤城小驛初飛雪，斷角殘鐘半掩門。盡意端相終有恨，夜寒燄玉倩誰溫。

無題

晝閣無人晝漏稀，離涼病思兩依依。欽梁雙燕春先到，筇柱羈鴻暖不歸。迎得紫姑占近信，裁成白紵寄征衣。晚來更就鄰姬問，夢到遼陽果是非。

快晴

地關天開斗柄回。今朝紅日逼池臺。新陽蘇醒春前柳。輕暖醫治雪後梅。瓦屋螺青披霧出。錦江鴨綠抱山來。衰翁也逐兒童喜。旋撥文書近酒盃。

獨坐

巾帽欲傾短髮稀。青燈照影夜相依。窮邊草木春遲到。故國湖山夢自歸。茶鼎松風吹謾謾。香奩雲縷昔辭辭。羸驂敢復和鑿望。只願連山苜蓿肥。

十二月十一日視築隄

江水來自蠻夷中。五月六月聲摩空。巨魚穹龜牙鬚雄。欲取閩市爲龍宮。橫隄百丈臥霽虹。始誰築此凍平公。今年樂哉適歲豐。吏不相倚勇赴功。西山大竹織萬籠。船舸載石來亡窮。橫陳屹立相疊重。置力尤在水爾東。我登高原相其衝。一盾可受百箭攻。蜿蜒其長高隆隆。截如長城限羗戎。安得椽筆記始終。插江石崖堅可礮。

題龍鶴菜帖東坡先生元祐中與其里人史彥明主簿書云。新春龍鶴菜羹有味。舉箸想復見憶耶。

先生直玉堂。日羞太官羊。如何夢故山。曉枕春蔬香。春蔬尙云爾。況我舊朋友。萬里一紙書。殷勤問安否。先生高世人。獨恨不早歸。坐令龍鶴菜。猶愧首陽薇。

春愁曲客話成都戲作。

虛叢至今三十餘萬歲。春愁歲歲常相似。外大瀛海環九洲。無有一洲無此愁。我願無愁但歡樂。朱顏綠鬢常如昨。金丹九轉徒可聞。玉兔千年空擣藥。蜀姬雙鬢姪姪嬌。醉看恐是海棠妖。世間無處無愁到。底事難過萬里橋。

荀秀才送蠟梅十枝奇甚爲賦此詩

與梅同譜又同時。我爲評香似更奇。痛飲便判千日醉。清狂頓減十年衰。色疑初割蜂脾蜜。影欲平欺鶴膝枝。插向寶壺猶未稱。合將金屋貯幽姿。

離嘉州宿平羌

初挈囊衣宿水村。蕭然一掃舊巢痕。本來信手忘工拙。卻爲無心少怨恩。自笑遠遊諧馬上。已營小築老雲根。淡煙疎雨平羌路。便恐從今入夢魂。

瑞草橋道中作

經年簿書無少暇。款段今朝欣一跨。瑞草橋邊水亂流。青衣渡口山如畫。老翁醉著看龍鍾。小婦出窺聞。姪姪荒陂吹笛晚。呼牛古路倚梯晨。采柘殘花零落不禁折。香草丰茸如可藉。郵亭慈竹筍穿籬。野店蒲萄枝上架。功名垂世端有數。利欲昏心喜乘罽。羈窮自笑豈人謀。開放每欲從天借。草根蟲語祇自悲。風裏蓬征安稅駕。祖師補處浣花村。會傍清江結苒舍。

遊修覺寺

上盡蒼崖百級梯。詩囊香碗手親攜。山從飛鳥行邊出。天向平蕪盡處低。花落忽驚春事晚。樓高剩覺客

魂迷。興闌掃榻禪房臥。清夢還應到剡溪。

晚步湖上

雲薄漏春暉。湖空弄夕霏。沾泥花半落。掠水燕交飛。小倦聊扶策。新晴旋減衣。幽尋殊未已。畫角喚人歸。

暮春

忙裏偷閑慰晚途。春來日日在東湖。凭欄投飯看魚隊。挾彈驚鴉護雀雛。俗態似看花爛漫。病身能鬪竹清癯。一樽是處成幽賞。風月隨人不用呼。

池上醉歌

我欲築化人中天之臺。下視四海皆飛埃。又欲造方士入海之舟。破浪萬里求蓬萊。取日挂向扶桑枝。留春挽回北斗魁。橫笛三尺作龍吟。腰鼓百面聲轉雷。飲如長鯨海可竭。玉山不倒高崔嵬。半酣脫幘髮尙綠。壯心未肯成低摧。我妓今朝如花月。古人白骨生蒼苔。後當視今如視古。對酒惜醉何爲哉。

四月五夜見螢

蜀州官居富水竹。四月螢火遶梁飛。流年迫人不相貸。客子倦遊何日歸。

塞上曲

三尺鐵如意。一枝玉馬鞭。笑把出門去。萬里行無前。當道何崔嵬。云是玉門關。方當置屯守。征人何時還。馬色如雜花。鎧光若流水。肅肅不敢譁。遙望但塵起。日落戍火青。煙重塞垣紫。回首五湖秋。西風開芙蓉。夜聞塔鈴及泉聲。

山泉瀉幽竇。塔鈴搖天風。清音無時盡。靜夜尤瓏瓏。嗟我走紅塵。市聲聒欲聾。多生耳根業。賴此一洗空。
夢騎白鳳凰。佩玉朝珠宮。覺來撫枕歎。月滿草堂中。

陸放翁集

劍南詩集

卷第五

曉歎

一鴉飛鳴窗已白。推枕欲起先歎息。翠華東巡五十年。赤縣神州滿戎狄。主憂臣辱古所云。世間有粟吾得食。少年論兵實狂妄。諫官劾奏當竄殛。不爲孤囚死嶺海。君恩如天豈終極。容身有祿愧滿顏。滅賊無期淚橫臆。未聞合桃薦宗廟。至今銅甌沒荆棘。幽并從古多烈士。悒悒可令長失職。王師入秦駐一月。傳檄足定河南北。安得揚鞭出散關。下令一變旌旗色。

苦筍

藜藿盤中忽眼明。駢頭脫襖白玉嬰。極知耿介種性剛。寺前乃與主具主。茂見魂數茶眉無。肉束兒靈勿多取。人才自古要養成。放使干霄戰風雨。

月下作

池上迎微風。柏間蹋涼月。冷然醉夢醒。一洗煩惱熱。嗟予世外人。火食常嘔噎。易求雲表露。難覓太古雪。況欲試祕方。瓊漿和玉屑。俛首居俗間。愁若鷹在韁。惟茲眼月芒。比歲稍得缺。但今天無雲。豈復計圓缺。玉鉤定誰挂。冰輪了無轍。詩成獨高詠。靈府炯澄澈。

又
畏暑不巾襪。步月櫂短筇。瘦身髮鬢鬢。顧影如孤松。徑幽盤闔開。池漲魚險鳴。飛泉穿北垣。珠玉相撞舂。東湖更奇絕。百畝銀初鎔。但能抱琴往。絕恨欠鶴從。重露傾荷盤。微風墮芙蓉。歡言美清夜。縹緲吹疎鐘。空中飛仙人。粲然冰雪容。笑我老塵世。不記瑤臺逢。

小宴

洗君鸚鵡盃。酌我蒲萄醕。冒雨鶯不去。過春花續開。英雄漫青史。富貴亦黃埃。今夕湖邊醉。還須秉燭回。

小閣納涼

侵牀月白病全蘇。掠面風清酒欲無。渺渺塘陰下鷗鷺。蕭蕭秋意滿菰蒲。縱輸煙渡橫孤艇。也勝京塵暗九衢。莫遣良工更摹寫。此詩端是臥遊圖。

晨雨

揮汗驅蚊廢夜眠。清晨一雨便愴然。涼生池閣衣巾爽。潤入園林草木鮮。青蕝雲腰開闔茗。翠甃玉液取寒泉。飯餘一枕華胥夢。不怪門生笑腹便。

湖上筍盛出戲作長句

鱗纖穿苦瑇瑁簪。按行日夜待成林。養渠百尺干霄氣。見我平生及物心。剩插藩籬愛玉折。豫期風雨聽龍吟。明年又徙囊衣去。誰與平安報好音。

雨後集湖上

野水交流自滿畦。芳池新漲恰平堤。花藏密葉多時在。鶯占高枝盡日啼。繡袂寶霜催結束。金尊翠杓共提攜。白頭自喜能狂在。笑裏巖巖落醉題。

過大蓬嶺度繩橋至杜秀才山莊

度笮隔千仞。梯山躡半空。溼雲朝暮雨。陰壑古今風。亭觀參差見。闌干詰曲通。柳空叢篠出。松偃翠蘿蒙。負籠銀釵女。鋤畚鶴髮翁。何由有餘俸。小築此山中。

宿杜氏晨起遇雨

怪藤十圍蔽白日。老木千尺干青霄。水泛夏灘竹作舫。陸行跨空繩繫橋。陰陰古屋精靈語。慘慘江雲蛟鏘。騎吾道非耶行至此。諸公正散紫宸朝。

翠園院

曉入翠園寺。擁門千萬峯。山空鳥自命。林茂鹿相從。嫋嫋風中笱。昏昏雲外鐘。將歸與未盡。清嘯倚長松。

野飯

蕙實炊明珠。苦筍饌白玉。輪囷斲區芋。芳辛采山藪。山深少鹽酪。淡薄至味足。往往八十翁。登山逐奔鹿。可憐城南社。零落依澗曲。面餘作詩瘦。趨拜尚不俗。杜氏自譜以爲子美。下映留一子守院。花舊樂其後。避成都亂。徙眉州大壩。或徙大蓬云。病夫益倦遊。頗願老窮谷。是家吾所慕。食菜如食肉。時能喚鄰里。小壘酒新漉。何必懷故鄉。下箸厭雁鷺。

化成院

翠圍至化成。七里幾千盤。肩輿掀滯淖。歎息行路難。緣坡忽入谷。蜿蜒蒼龍蟠。孤塔插空起。雙栴當夏寒。飛展到上方。漸覺所見寬。前山橫一几。稻陂白漫漫。肥僧大腰腹。呀喘趨迎官。走疾不得語。坐定汗未乾。高人遺世事。跣趺穴蒲團。作此望塵態。豈如返巾冠。日落聞鹿鳴。感我平生歡。客遊殊未已。芳歲行當闌。

慈雲院東閣小憩

橫閣院東偏。倚然拂榻眠。香濃煙穗直。茶嫩乳花圓。巖倚團團柱。筒分細細泉。憑誰爲題版。榜作小壺天。遊靈鷲寺堂中僧闕然。獨作禮開山。定心尊者尊者。唐人有問法者。輒點胸示之時。號點點和尚。半世吳松理釣絲。蜀山著脚豈前知。雲堂已散三三衆。卯塔空尋點點師。戴雪數峯臨峭絕。浮花一水舞淪漪。寺四圍雪山下。臨桃源。勞生未盡能重到。應掃流塵讀此詩。

桃源

木缺橋橫一徑微。斷煙殘鶴晚霏霏。十年倦客明雙眼。五月遊人換夾衣。翠峽東成寒練靜。蒼崖澗落素蛟飛。爾來自笑癡頑甚。著處吟哦不記歸。

白塔院時小雨初霽

冷翠千竿玉。浮嵐萬幅屏。凭欄避微雨。挈笠遇歸僧。殘日明樓角。屯雲擁塔層。溪山屬閑客。隨意倚枯藤。

急雨

炎炎赤日當空燒。簿書圍坐如居鑿。黑雲壓簷忽峩峩。急雨鼎來風駕潮。彈壓早氣蘇枯焦。祝融退聽不敢驕。父老歌舞看稻苗。殺雞買酒更相邀。我亦巾褐涼蕭蕭。酒醒點滴聞梧蕉。珍簟不御扇罷搖。安用萬

里登凌畝

東湖新竹

插棘編籬謹護持，養成寒碧映淪漪。清風掠地秋先到，赤日行天午不知。解箨時聞聲簌簌，放梢初見葉離離。官閑我欲頻來此，枕簟仍教到處隨。

睡起試茶

笛材細織含風漪，蟬翼新裁雲碧帷。端谿硯璞斲作枕，素屏畫出月墮空江時。朱欄碧甃玉色井，自候銀餅試蒙頂。門前剝啄不嫌渠，但恨此味無人領。

五月五日蜀州放解勝第一人楊鑑具慶下孤生愴然有感

甲午五月之庚寅，淵魚躍起三江津。震雷霹靂雨夜達，晨我知決定非凡鱗。人生富貴不逮親，萬鍾五鼎空酸辛。少年得祿羞常珍，調節滋味躬爨薪。徹食奉盥授帨巾，此樂豈復論賤貧。嗟我不孝負鬼神，俯仰二紀悲如新。仕宦空飽息與殫，左右供養無復辰。子行射策對楓宸，綵衣楚楚曠華紳。沂江亟歸娛老人，切勿著意長安春。

病酒新愈獨臥蘋風閣戲書

用酒驅愁如伐國，敵雖摧破吾亦病。狂呼起舞先自困，閉戶垂帷真廟勝。今朝屏事臥湖邊，不但心空兼耳靜。自燒沉水淪紫筍，聊遣森嚴配堅正。紫筍蒙頂之上者，其味尤重。追思昨日乃可笑，倚醉題詩恣豪橫。逝從屈子學獨醒，免使曹公怪中聖。

神君歌謠英顯廟作

泰山可爲礪。東海可揚塵。惟有壯士志。死生要一伸。我夢神君自天下。威儀奕奕難具陳。飛龍駕車不用馬。詞前殿後皆鬼神。奇形詭狀密如魚鱗。鱗鱗鬢鬢爭扶車輪。黑霧白旄。其來無垠。黃霧紫氛。合散輪囷。考錄魍魎。號呼吟呻。約束蛟螭。天矯服馴。後車百兩。載美人。巾構鮮麗。工笑顰。金尊翠杓。溢芳醇。琵琶篋。篋飾怪珍。世間局促常悲辛。神君歡樂千萬春。嗚呼。生不封侯死廟食。丈夫豈得抱志長默默。

讀胡基仲舊詩有感

少日飛騰翰墨場。暮年相見尙昂藏。沈沙舟畔千帆過。剪鬪籠邊百鳥翔。訪古每思春竝轡。說詩仍記夜連牀。匆匆去日多於髮。不獨悲君亦自傷。

夏日湖上

烏帽筇枝散客愁。不妨胥史雜沙鷗。迎風枕簟平欺暑。近水簾櫳探借秋。茶竈遠從林下見。釣筒常向月中收。江湖四十餘年夢。豈信人間有蜀州。

對酒歎

鏡雖明。不能使醜者妍。酒雖美。不能使悲者樂。男子之生。桑弧蓬矢射四方。古人所懷何磊落。我欲北臨黃河。觀禹功。犬羊腥羶塵漠漠。又欲南適蒼梧。弔虞舜。九疑難尋。眇聯絡。惟有一片心。可受生死託。千金輕擲重意氣。百舍孤征赴然諾。或攜短劍隱紅塵。亦入名山燒大藥。兒女何足顧。歲月不貸人。黑貂十年弊。白髮一朝新。半酣耿耿不自得。清嘯長歌裂金石。曲終四座慘悲風。人人掩淚無人色。

病後暑雨書懷

髮毛蕭颯疾初平。雲物輪囷氣未清。水漲小亭無路到。雨多幽草上牆生。窗昏頓減讎書課。屋老時聞墮瓦聲。止酒亡聊還自笑。少年豪飲似長鯨。

雨聲

暑氣滿天地。薄暮加煩促。清風吹急雨。集我北窗竹。竹聲蕭蕭固自奇。況得雨聲相發揮。令人忽憶雲門寺。半夜長松墮雪時。

同何元立賞荷花追懷鏡湖舊遊

少狂欺酒氣吐虹。一笑未了千觴空。涼堂下簾人似玉。月色冷冷透湘竹。三更畫船穿藕花。花爲四壁船爲家。不須更踏花底藕。但嗅花香已無酒。花深不見畫船行。天風空吹白紵聲。雙槳歸來弄湖水。往往湖邊人已起。卽今憔悴不堪論。賴有何郎共此尊。紅綠疎疎君勿歎。漢嘉去歲無荷看。

小樓

吾州近在西山麓。雪山萬仞臨冰谷。小樓森森閱三伏。清簾疎簾對碁局。肌膚淒凜起芒粟。肝肺嶢嶢疊瓊玉。香泉向夕初罷浴。桐竹生風吹細縠。九衢憧憧車聲轂。黃塵赤日汗可掬。還家欲休客陸續。借與此詩令一讀。

怡齋

東湖仲夏草樹荒。屋古無人亭午涼。萱房微呀不見日。筍籜自解時吹香。野藤蟠屈入窗罅。溼菌扶疎生

屋梁跨溝數椽最幽翳。漲水及檻雨敗牆。靜涵青蘋舞藻行。閑立白鷺浮鴛鴦。芙蓉雖瘦亦瀾漫。照眼翠蓋遮紅粧。水紋珍簾欲卷卻。團團素扇嬾復將。天風忽送塔鈴語。喚覺清夢遊瀟湘。

龍湫歌

環湫巨木老不花。齋淪千尺龍所家。爪痕入木欲數寸。觀者心掉不敢譁。去年大旱綿千里。禾不立苗麥垂死。林神社鬼無奈何。老龍欠伸徐一起。隆隆之雷浩浩風。倒卷江水傾虛空。鱗間出火作飛電。金蛇夜掣層雲中。明朝父老來賽雨。大巫吹簫小巫舞。祠門人散月娟娟。龍歸抱珠湫底眠。

月夕

我昔隱天台。夜半遊句曲。弄月過垂虹。萬頃一片玉。煙艇起菱唱。水風吹釣絲。更欲小徙倚。恐失初平期。今年遊青城。三十六峯巒。白雲反在下。使我毛骨寒。天如玻璃鍾。倒覆溼銀海。素壁行其間。草木盡光彩。姮娥顧我笑。手撫玉兔兒。莫怪世人生白髮。秋風桂老欲無枝。

蒸暑思梁州述懷

宜和之末予始生。遭亂不及遊司并。從軍梁州亦少慰。土脈深厚泉流清。季秋嶺谷浩積雪。二月草木初抽萌。夏中高涼最可喜。不省舉手驅蟲蟲。藏冰一出賣滿市。玉環堆積寒嶒嶸。柳陰夜臥千駒馬。沙上露宿連營兵。胡笳吹墮漾水月。烽燧傳到山南城。最思出甲成秦隴。戈戟徹夜相摩聲。兩年劍南走塵土。肺熱煩促無時平。荒池昏夜蛙閣閣。食案白日蠅營營。何時王師自天下。雷雨瀕洞收樓槍。老生衰病畏暑溼。思卜鄠杜開柴荆。

湖上晚歸

地僻多幽事。官閑慰古心。晚花藏密葉。新筍補疎林。碩果哇丁獻。芳醪稚子斟。碧雲遮日盡。歸路更蕭森。

秋聲

人言悲秋難爲情。我喜枕上聞秋聲。快鷹下韝爪背健。壯士撫劍精神生。我亦奮迅起衰病。唾手便有擒胡興。弦開雁落詩亦成。筆力未饒弓力勁。五原草枯首宿空。青海蕭蕭風卷蓬。草罷罷捷書重上馬。卻從鑿下遼東。

觀小孤山圖

江平風不生。鏡面渺千里。軻峨萬斛舟。遠望一點耳。大孤江中央。四面峭插水。小孤特奇麗。丹翠凌雲起。重樓邃殿神之家。帳中美人粲如花。遊人徒倚欄干處。俊鶻橫江東北去。

飲酒

陸生學道欠力量。胸次未能和盎盎。百年自笑足悲歡。萬事聊須付酣暢。有時堆阜起嶢嶢。大呼索酒澆使平。世間豈無道師與禪老。不如閉門參麴生。朋舊年來散如水。惟有鑿杓同生死。一日不見令人愁。晝夜共處終無尤。世言有毒在麴蘖。腐腸穿腸凝血脈。人生適意卽爲之。醉死愁生君自擇。

北窗梧葉坐間落四五有戲

高梧一葉脫。便覺秋不遠。晨起髮滿梳。吾衰孰云晚。古來追電足。歷塊或小腕。金鼓噪陳間。此任豈驚蹇。女子則多怨。丈夫當自反。默觀髮患穢。推見生死本。山林嫌獨往。臺省亦袞袞。會稽歸去來。臯橋住差穩。

神山歌

吾聞海中五神山。其根戴以十五鼈。一朝六鼈被釣去。岱輿員嶠沉洪濤。尚餘三山巋然在。當時不沒爭秋毫。如何蓬萊又已淺。忽見平地生藜蒿。伏羲迄今幾萬歲。世事如火煎油膏。娶妻不敢待翁命。治水無暇憐兒號。避諱奔楚僅得免。歷聘返魯終不遭。老聃關尹亦又死。人實危脆無堅牢。有口惟可飲醇醪。有手惟可持霜螯。勿令他人復笑汝。後有萬世來滔滔。

久雨

昏昏風雨暗東湖。恰似梅黃四月初。高樹送聲鶯客枕。小池分溜入清渠。飛蛟屏迹知何在。團扇生塵已暗疎。須信西遊有奇事。今年三伏夜觀書。

古意

繩足餽飢鷹。鷹飽意未平。伏櫪豈不安。老驥終悲鳴。士生固欲達。又懼徒富貴。素願有未伸。五鼎淡無味。茅屋秋雨漏。稻陂春水深。長歌傾濁酒。舉世不知心。

自唐安之成都

出門猶苦雨。度壑喜新晴。日正車無影。風高蓋有聲。疎疎稚苗立。鬱鬱晚桑生。宿醉行猶倦。無人爲解醒。

度笮江原縣

翩翩飄飄笮受風。行人疾走緣虛空。回觀目眩浪花上。小跌身裏蛟涎中。汗沾兩握色如菜。數乘此險私自怪。九折元非叱馭行。千金空犯垂堂戒。此身老大足悲傷。歲歲天涯憶故鄉。安得畫船明月夜。滿川歌

吹入盤闈。盤闈姑蘇二門名。

故袍

青衫猶是國工裁。破篋塵侵手自開。莫笑渾如霜葉開。兩朝曾見聖君來。

寓寶相有作

掃地鏡面清。燒香雲氣潤。道人敬愛客。危坐目不瞬。童子髡兩髦。經禪亦精進。我來願同龕。歡喜無少吝。臨堂坐夜分。佛燈看墮燼。清晨爽如秋。攝衣相問訊。道在氛埃表。此語其殆信。永愧小阮高。超然棄鬢鬢。從子綽棄其婦。爲僧廬山。

寓驛舍予三至成都皆館于是

閉坊古驛掩朱扉。又憩空堂綻客衣。九萬里中鯤自化。一千年外鶴仍歸。邊庭數竹饒新筍。解帶量松長舊圍。惟有壁間詩句在。暗塵殘墨兩依依。

題宇文子友所藏薛公鶴

仙人騏驥絕世稀。卵生凡禽似而非。宮保妙筆窮化機。縞衣玄裳真令威。千年華表聊一歸。回首幸脫乘軒譏。啄吞不恨菰米微。從吾曹遊安得肥。

宴西樓

西樓遺跡尚豪雄。錦繡笙簫在半空。萬里因循成久客。一年容易又秋風。燭光低映珠幃麗。酒量徐添玉頰紅。歸路迎涼更堪愛。摩訶池上月方中。

陸放翁集 九 劍南詩集 卷五

月中歸驛舍六月十四日

歲歲常爲錦水行。驛前雙楫慣逢迎。草深閑院蟲相語。人靜空廊月自明。病起酒徒嘲小戶。才衰詩律媿長城。何時卻泛耶溪路。臥聽菱歌四面聲。

江濱池醉歸馬上作

久住西州似宿緣。笙歌叢裏著華顛。每嗟相見多生客。卻憶初來尙少年。迎馬綠楊爭拂帽。滿街丹荔不論錢。浮生何處非羈旅。休問東吳萬里船。

離成都後卻寄公壽子友德稱

蕭條常閉爵羅門。點檢朋儕幾箇存。吾道將爲天下裂。此心難與俗人言。逢時尙可遺三代。掩卷何由作九原。寄語龜城舊交道。新涼殊憶共清尊。

晨至湖上

劍南無劇暑。長夏更宜人。啼鳥常終日。幽花不減春。荷香浮綠酒。藤露落烏巾。莫作天涯想。儻然夢裏身。

又

園古逢秋好。身閑與懶宜。空堂賞疎豁。重閣望參差。竹粉有新意。松風含古姿。低回慙祿米。官事少於詩。

池上見魚躍有懷姑熟舊遊

雨過回塘漲碧漪。幽人閑照角巾欹。銀刀忽裂圓波出。宛似姑溪晚泊時。

六月二十五日曉出郊

劍南作客歲再淹，正如病翼遭糲黏。短衣射虎性所樂，不耐齷齪垂車幃。今晨偶出得一快，欣然意若脫楚錡。曉星已疎更磊磊，殘月欲盡猶纖纖。雞鳴已與夜漏斷，鴉起似逐朝陽暹。揚鞭走馬忘老憊，自笑狂疾何由砭。

作雨不成終夜極涼時去立秋五日也

雲映星芒澹，風闌雨腳回。體輕知病去，氣爽喜秋來。疎放拋烏帽，歌呼覆綠盃。東歸定何日，灑灑欲崔嵬。

池上晚雨

烏紗白葛一枝筇，審畫池邊遡晚風。雲葉初生高樹外，雨聲已到亂荷中。憑闌頓覺氛埃遠，回首方知暑毒空。閱世萬端惟小忍，何人更事似衰翁。

五十

五十未名老，無如衰疾何。肺肝空激烈，顏鬢已蹉跎。夜宴看長劍，秋風舞短蓑。此身如砥柱，猶足閱頽波。

記夢

夢泛扁舟禹廟前，中流拂面風泠然。樓臺縹緲知幾疊，雲物點綴多餘妍。蓮房夾蓄采無主，漁歌菱唱聲滿川。夢中了了知是夢，卻恐燕語來驚眠。弄撓顧謂共載客，乖離不記經幾年。卽今相逢兩幻質，轉盼變滅如飛煙。斯言未竟客大笑，人生寓世豈獨堅。元章嘉叟君所見，一別丹旌俱翩翾。君知夢覺本無異，勿爲畫翹流錢涎。我慙俛首夢亦新，尚覺湘良鳴船舷。

凭欄

蟬暝晚尤壯。鴉栖久未安。不成浮舴舨。故作凭闌干。露重傾荷盞。風尖蹙芙蓉。新秋動歸思。更覺五湖寬。

聽琴

疎籬曲檻蘋風涼。細腰美人藕絲裳。綠藤水文穿矮牀。玉指纖纖彈履霜。高林鶯囀日正長。幽洞泉鳴夜未央。哀思不怨和而莊。有齊淑女禮自防。世人但惑青樓倡。琵琶篋篋雜胡羌。試聽一曲醒汝狂。文姬指法傳中郎。

秋思

烈日炎天欲不禁。喜逢秋色到園林。雲陰映日初蕭瑟。露氣侵簾已峭深。衰髮凋零隨槁葉。苦吟淒斷雜疎碁。鴈來不得中原信。撫劍何人識壯心。

醉書

似閑有棒錢。似仕無簿書。似長免事任。似屬非走趨。病能加餐飯。老與酒不疎。婆娑東湖上。幽曠足自娛。時時喚客醉。小閣臨紅蕖。釣魚斫銀絲。擊蒟見玉膚。檀槽列四十。遺聲傳故都。豈惟豪兩川。自足誇東吳。但恨詩不進。槩荒失耘耨。何當掃纖豔。傑作追黃初。

樊氏莊龜泉

曳尾穹龜不負圖。一泓寒碧照庭除。醉中只合長來此。臥聽蠻童放轆轤。

書懷

楚澤巴江兩鬢殘。夕陽又是倚闌干。敢言日與長安遠。惟恨天如蜀道難。客枕五更歸夢短。新詩千首後

人看青簾白舫何時發。醉聽琵琶興已闌。唐安絃索爲雨川冠。

又

西風蕭瑟晚吹衣。又見亭臯木葉飛。已是中年頻作惡。更堪秋日送將歸。時何守選首城黃塵顏鬢無人識。青史功名與願違。彊把一盃還徑醉。羈懷何必不依依。

秋思

大面山前秋笛清。細腰宮畔暮灘平。吳橋楚柁動歸思。隨月巴雲空復情。萬里風塵舊朝士。百年鉛槧老書生。水村漁市從今始。安用區區海內名。

又

巢燕成歸秋景奇。顏容老子醉哦詩。山晴更覺雲含態。風定閒看水弄姿。痛飲何由從次道。竝遊空復憶安期。天涯又作經年客。莫對青銅恨鬢絲。

又

西風吹葉滿湖邊。初換秋衣獨慨然。白首有詩悲蜀道。清宵無夢到鈞天。迂疎早不營三窟。流落今寧直一錢。把酒未妨餘興在。試憑絲管饒流年。

東園晚步

久客天涯憶故園。強名官寺只衡門。秋桐蘂遍無全葉。古柳吹斜出半根。痛飲每思尊酒窄。微官空羨布衣尊。何時定下三巴去。思臥孤舟聽斷猿。

秋夜讀書戲作

別駕生涯似蠶魚。簡編垂老未相疎。也知賦得寒儒分。五十燈前見細書。

太平花花出劍南似桃。四出千百包。耕莘成桑。天聖中。獻至京師。仁宗賜名太平花。

扶杖踉蹌出京華。頭白車書未一家。宵旰至今勞聖主。淚痕空對太平花。

日暮至湖上

籃輿晚繞湖。樂此新秋涼。粉落竹方老。紅凋荷更香。天宇無纖雲。仰視鴻鵠翔。小樓久不登。撫檻悲慨慷。浮生寄一夢。共盡無彭殤。況我數月客。轉眼促去裝。願作兒女態。裴徊惜流光。簷角迎夜月。林間送斜陽。四年已五遷。終歲常遑遑。安得一茆屋。歸老樵風旁。會稽山南有溪名樵風。其上卽若耶。

秋興

無處逢秋不黯然。驛前斜日渡頭煙。吟肩雅與寒驢稱。歸夢頻爭社燕先。百歲猶穿幾兩屐。千詩不及一囊錢。故應身世如團扇。已向人間耐棄捐。

秋色

一段淒涼傍酒盃。中年剩作楚囚哀。迢迢似伴明河出。慘慘如隨落照來。客路半生常淚眼。鄉關萬里更危臺。夢汀荻浦江南岸。自入秋來夢幾回。

秋聲

蕭蕭拂樹過中庭。何處人間有此聲。漲水雨餘晨放閣。騎兵戰罷夜還營。閑憑曲几聽雖久。彌撫哀絃寫

不成。暑退涼生君勿喜。一年光景又嶢嶢。

觀長安城圖

許國雖堅鬢已斑。山南經歲望南山。橫戈上馬嗟心在。穿壑環城笑虜孱。諫者言虜穿壑三重環長安城。
日暮風煙傳隴上。秋高刁斗落雲間。三秦父老應惆悵。不見王師出散關。

雨中作

方驚歲更端。不覺秋已孟。雖云暑毒埃。無奈風雨橫。荷空湖面闊。葉脫樹枝勁。百卉亦已衰。非復昔華盛。
遊子老忘歸。一榻臥衰病。欲談無客來。向壁弄塵柄。

夜讀了翁遺文有感

秋雨蕭蕭夜不眠。挑燈開卷意凄然。吾曹自欲期千載。世論何曾待百年。當日公卿笑迂闊。卽今河洛污腥羶。陰陽消長從來事。玩易深知屢絕編。公有易傳。

雷

君不見冬月雷。深藏九地底。寂默如寒灰。紛紛槁葉木盡脫。蠢蠢蟄戶蟲爭坯。堅冰積雪一朝盡。風搖天邊斗柄回。雷聲卻擊九地出。殷殷似挾春俱來。魚龍振鱗熟睡醒。桃李一笑韶顏開。候耕老農喜欲舞。掀泥百草知誰催。惟嗟婦女不解事。深屋揜耳藏嬰孩。吾聞陰陽有常數。非時動靜皆爲當。無人爲報阿香道。時來何至勞卿推。

龍眠畫馬

陸放翁集 九 劍南詩稟 卷五

國家一從失西陲。年年買馬西南夷。瘴鄉所產非權奇。邊頭歲入幾番一。佞教皮。崔嵬瘦骨帶火印。離立。欲不禁風吹。圍人太僕空列位。龍媒汗血來何時。李公太平官京師。立仗慣見渥洼姿。斷縑歲久墨色暗。逸氣尙若不可羈。賞奇好古自一癖。感事憂國空餘悲。嗚呼安得毛骨若此三千疋。銜枚夜度桑乾磧。

秋夜池上作

短髮颺颺病骨輕。臨池閑看露荷傾。月明何與浮雲事。正向圓時故故生。

秋雨

西山雲千重。東園泥一尺。可憐牆下路。十日無履迹。空庭桐葉盡。古登土花碧。坐憶江湖間。病鴈溼羽翮。寒窗向人青。衰髮垂領白。孤吟更不寐。聊伴候蟲噴。

臥病

人生寓一氣。血脈日夜流。秋毫或差隔。百體若相仇。嗟予少多艱。衣食拙自謀。方寸叢百慮。如箭集射侯。奔走連數歲。呻吟劇茲秋。生死亦何有成壞。同一漚。胡爲不自愛。森然起戈矛。一笑衆安滅。霜天鷹睨鷂。呼兒屏藥囊。吾疾今其瘳。

夢入禪林有老宿方陸座或云通悟禪師也

塵埃車馬何憧憧。驪頭鼠目厭妄庸。樂哉夢見德人容。巍巍堂堂人中龍。舉頭仰望太華峯。攝衣欲往路無從。忽然夢斷難再逢。空記說法聲如鐘。

蜀州大閤八月二十七日

曉束戎衣一悵然。五年奔走遍窮邊。平生亭障休兵日。慘澹風雲閱武天。戍隴舊遊真一夢。渡遼奇事付他年。劉琨晚抱聞雞恨。安得英雄共著鞭。

放懷亭獨立有感

葦叢枯倒蓼花紅。小立東湖更向東。委肉本知居几上。翦翎何恨著籠中。一筇信脚乾坤迥。百榼澆愁窟辱空。誰道窮途知舊少。此心念念與天通。

九月三日同呂周輔教授遊大邑諸山

大邑知名杜叟詩。山中仍值菊花時。節旄落盡羈臣老。腓肉生來壯士悲。豪舉每嫌盃綠淺。癡頑頗怪費絲緜。廣文別乘官俱冷。相伴寬爲五日期。

次韻周輔道中

山靈喜我馬蹄聲。正用此時秋雨晴。日淺風斜江上路。蘆花也似柳花輕。

又

從來重九如寒食。天氣微陰正自佳。莫問茱萸賜製士。一尊隨處有黃花。

憩黃秀才書堂

吾生如虛舟。萬里常泛泛。終年厭作客。著處思繫纜。道邊何人居。花竹頗閑淡。門庭淨如拭。窗几光可鑑。堂上滿架書。朱黃方點勘。把茅容卜鄰。老死更誰憾。

夜宿鶴鳴山山齋張天師學道之地事與史合

西遊萬里已關天。采藥名山亦宿緣。老柏千霄如許壽。幽花泣露爲誰妍。苔黏石磴攔蘿上。燈耿雲房掃榻安。想得仙翁索米術。一生留此弄寒泉。索米謂五斗米法。

次韻周輔霧中作

一日籃輿十過溪。丹莢黃菊及佳時。端居恐作他年恨。聯轡聊成此段奇。側磴下臨重澗黑。亂雲高出一峯危。何時關輔胡塵靜。大華山頭更卜期。

山中得長句戲呈周輔并簡朱縣丞

鶴鳴山空無鶴來。青霞障深天壁開。千巖角逐互吞吐。一峯拔起矜崔嵬。日光微漏潭見底。青霞嶂碧玉潭。首霧中佳處。水氣上薄雲成堆。幽禽飛鳴報客至。奇樹璀璨知誰栽。花藤怪蔓白晝暗。奔猿落狖無時哀。路窮尚躡一千級。忽見密竹藏樓臺。共言神僧昔住此。至今光景如天台。檣笳負笠出復沒。喜動婦人驚提孩。高人何至作狡獪。無乃翫世聊相談。不然學道窮實際。詎捨正大崇奇瓊。儒林丈人學擅世。餘事尙壓蔡與崔。名山未死可再到。此士一失難重陪。贊府摘山事如織。擺撥領客何奇哉。境幽神館不可住。歸倩玉手傳金盃。朱君有待兒。許爲客出。

擣藥鳥霧中有此鳥。鳴聲清絕。正如杵藥。

白髮無情日日生。散愁聊復作山行。幽禽似欲朝衰病。故學禪房杵藥聲。

出山

出山似與高人別。回首時時一悵然。它日再來緣要熟。遍題名姓綠巖邊。

平雲亭大邑

滿榼芳醪何處傾。金龜背上得同行。天垂綠野三邊盡。雲與朱闌一樣平。煙樹微茫疑誤墨。風松蕭瑟有新聲。黃花未吐無多恨也。勝湘纍拾落英。

高秋亭大邑

三日山中醉復醒。徑歸回首愧山靈。從今惜取觀書眼。長看天西萬疊青。

九日小疾不出

病厭追遊懶舉觴。今年閉戶作重陽。香煙裊裊閑綵几。書卷紛紛靜滿牀。斜日更增秋慘淡。黃花應怪客淒涼。長安光景還如昨。誰醉醉城南。杜曲旁。昔官都下。每以九日遊西湖諸寺。

九日試霧中僧所贈茶

少逢重九事豪華。南陌雕鞍擁鈿車。今日蜀州生白髮。瓦爐獨試霧中茶。

我有美酒歌

我有美酒起自斟。勸君一卮爲君吟。素衣未遂京塵化。綠鬢已受吳霜侵。三巴塗路何嶽嶽。五溪霧濤多毒淫。虎豹夜嘯裂崖谷。魍魎盡出矜山林。身如槁葉墮幽窞。管管何啼千尺深。無因剖胸出此心。一寸孤忠天實臨。

次韻師伯渾見寄

窮鄉久客易消魂。短髮秋來白幾分。夢泛扁舟鏡湖月。身騎瘦馬劍關雲。萬釘寶帶知何用。九轉金丹幸

有聞欲與先生同此計。會營茅舍近江濱。伯渾隱龍山。僕亦有結茅菴津之志。

自江源過雙流不宿徑行之成都

斷笮飄飄挂渡頭。隨江立馬喚漁舟。少城已破繁華夢。老境聊尋汗漫遊。斜日驛門雙塔立。早霜風葉一林秋。詩材滿路無人取。準擬歸驄到處留。

過綠楊橋

過縣東馳十里遙。行吟不覺度谿橋。磴輪激水無時息。酒旆迎風盡日搖。半掩店門燈煜煜。橫穿村市馬蕭蕭。秦吳萬里行幾遍。莫恨尊前綠鬢凋。

五鼓自簇橋入府

曉月有餘光。秋樹無濃影。野煙浩無際。陂路行愈永。堰聲何澎湃。露氣正淒冷。忽然客愁破。更覺詩律整。昔人千載意。忙裏一笑領。山林豈難歸。吾計自不猛。

客多福院晨起

萬籟傳響徹修廊。喚起衰翁曉夢長。萬事可憐隨日出。一生常是伴人忙。馳驅深厭交飛蓋。息偃何時靜炷香。四到錦城身愈老。更堪重入少年場。

雨中出謁歸晝臥

宿雨盈車轍。秋風漲帽霜。愛閑惟兀兀。應俗苦紛紛。病眼添花暈。醜顏散縵紋。歸來炷香臥。窗底看微雲。

長歌行

人生不作安期生。醉入東海騎長鯨。猶當出作李西平。手梟逆賊清舊京。金印煌煌未入手。白髮種種來無情。成都古寺臥秋晚。落日偏傍僧窗明。豈其馬上破賊手。哦詩長作寒猿鳴。興來買盡市橋酒。大車磊落堆長餅。哀絲豪竹助劇飲。如鉅野受黃河傾。平時一滴不入口。意氣頓使千人驚。國雖未報壯士老。匣中寶劍夜有聲。何當凱還宴將士。三更雪壓飛狐城。

夜食炒栗有感。漏舍符朝。朝士往往食此。

齒根浮動歎吾衰。山栗炮燂療夜飢。喚起少年京輦夢。和寧門外早朝來。

秋夜懷吳中

秋夜挑燈讀楚辭。昔人句句不吾欺。更堪臨水登山處。正是浮家泛宅時。巴酒不能消客恨。蜀巫空解報歸期。瀟橋煙柳知何限。誰念行人寄一枝。

遊三井觀

三井久知名。暇日偶一訪。棟宇壞欲盡。基址尙闕壯。畫牆皆國工。煙雲儼天仗。旌旄亞戈戟。佩玉雜弓棍。太古實傑作。筆落九天上。吳生名擅世。睥睨未肯讓。規模遠有考。意象豪不放。最奇老癯仙。骨立神愈王。石恪雖少怪。用筆亦跌宕。兩姝淡蛾眉。非復火食狀。塵埃久侵蝕。風雨無蓋障。好事未易逢。寧能久亡恙。雍洛劫火餘。妙迹盡凋喪。斯遊恐難繼。佇立增惜愴。

仙遊閣

張公一去二百載。傑閣依然橫竈中。徙倚看碑仍看畫。時聞柏子落秋風。

寓居小菴纔表丈戲作

早衰甚畏寒。颼颼厭空館。登閣望東菴。亭亭長一撇。欣然願暫寓。竹底門可款。外看礙蠟毛。仰視覆鵝卵。席纔置。錐地。牖若窺天管。瓦爐香不去。菅屨衾易暖。頗疑漁菴結。又類土室窳。家具止囊衣。弛擔著亦滿。客來勿嗔陋。老我善用短。猶能設胡牀。相喚共茗椀。

送華師從劍州張祕書之招

三年相伴錦江頭。一日翩然不可留。官冷蓬門無客戀。時清劍閣有僧遊。關山默數來時路。風月懸知別後愁。禪版經龕有餘暇。頻登高處望西州。

卷第六

江上對酒作

把酒不能飲。苦淚滴酒觴。醉酒蜀江中。和淚下荆楊。樓邊壓溢口。山川蟠武昌。石頭與鍾阜。南望鬱蒼蒼。戈船破浪飛。鐵騎射日光。胡來卽送死。詎能犯金湯。汴洛我舊都。燕趙我舊疆。請書一尺檄。爲國平胡羌。

自嘲

華子中年百事忘。稽生仍坐懶爲妨。病於榮宦冥心久。老向端閑得味長。對客欲談還憤憤。讀書纔過已茫茫。青縑帳暖黃紬穩。聊借東菴作睡鄉。

暮歸馬上作

石筍街頭日落時。銅壺閣上角聲悲。不辭與世終難合。惟恨無人處見知。寶馬俊遊春浩蕩。江樓豪飲夜淋漓。醉來剩欲吟梁父。千古隆中可與期。

臨別成都帳飲萬里橋贈譚德稱

成都城南萬里橋。蘆根蘋末風蕭蕭。暝花碾草鈿車小。駐坡騫潤青驄驕。入門翠徑絕窈窕。臨水飛觀何崑曠。判無功名著不朽。惟仗詩酒寬亡聊。迎霜早已足雉兔。微冷便欲思狐貂。喜看縷膾盤箸恨。欠斫蟹加橙椒。坐中譚侯天下士。龍馬毛骨矜超遙。烏犀白紵謫仙樣。但可邂逅不可招。今年一戰馘餘子。風送六翻凌青霄。美人再拜乞利市。醉墨飛落生蛟綃。我衰於世百無用。十年不趁含元朝。華纓肯傍蕭颯鬢。寶帶那束龍鍾腰。祝君好去事明主。日望分喜來漁樵。遊談引類亦細事。寄酒且解相如消。

夜宿二江驛

雞鳴原前風折樹。夜到雙流雨如注。犂皮溼透點不明。旋設篝爐燎衣袴。重城回首一夢散。錦障氈車渺無處。新聲猶傍耳邊來。殘酒半隨風力去。飛觴縱飲亦何樂。憤憤不堪長閉戶。丈夫要爲國平胡。俗子豈識吾所寓。

涉白馬渡慨然有懷

我馬顧影嘶。忽涉白馬津。雖非黃河上。撫事猶悲辛。太行之下吹虜塵。燕南趙北空無人。袁曹百戰相持處。犬羊堂堂自來去。

瑞草橋

柘葉隨風雪意驕。檐頭雙兔過歸樵。宿醒未解題詩懶。虛過風流瑞草橋。

將之榮州取道青城

倚天山作海濤傾。看遍人間兩赤城。青城山一名赤城。而天台之赤城乃予舊遊。自笑年年隨宦牒。不如處處說閑行。草痕沙際猶餘綠。楓葉霜餘已帶頰。歸去遺堪吃兒輩。錦囊三十六蟾燐。

丈人觀

黃金篆書扁朱門。夾道巨竹屯蒼雲。崖嶺劃若天地分。千柱耽耽壓其垠。纓冠肅謁丈人君。廣殿空庭吹寶薰。摩挲畫橋手爲皴。異哉山蕘與土積。物怪蠶鬘冠丘墳。仙人佩玉雜脫粉。手盤貂冠最不羣。欲去不忍恨日曛。道翁采藥晝夜勤。松根茯苓獲兼斤。人之植立彊骨筋。狗杞羣吹聲猶猶。山爐小飯吹幽芬。朱顏不飲常自醺。我亦宿誦五千文。一念之差隨世紛。逝將從翁走如麋。隱書秘訣何由聞。

題丈人觀道院壁

斷香浮月聲聲殘。木影如龍布石壇。偶駕青鸞塵世窄。閑吹玉笛洞天寒。奇香滿院晨炊藥。異氣穿巖夜浴丹。却笑飛仙未忘俗。金貂猶著侍中冠。孫太古畫范長生作。舉手盤貂輝像神。氣尤奇逸。

宿上清宮

九萬天衢浩浩風。此身真是一枯蓬。盤蔬采掇多靈藥。關道攀躋出半空。累盡神仙端可致。心虛造化欲無功。金丹定解幽人意。散作山椒百炬紅。夜中山谷火熒然。俗謂聖燈。意古藏丹所化也。

自上清延慶歸過丈人觀少留

再到蓬萊路欲平，却吹長笛過青城。空山霜葉無行迹，半嶺天風有嘯聲。細棧跨雲縈峭絕，危橋飛柱插澄清。玉華更控青鸞住，要倚欄干待月明。玉華樓名。

長生觀觀月

碧天萬里月正中，清夜弭節長生宮。廣寒忽墮人間世，但怪步虛聲散瑤臺空。四山沉沉萬籟寂，天矯髯龍舞娛客。弭貂老仙期不來，獨倚欄干吹玉笛。道人不怕九霄寒，銀闕冰壺處處看。天台四萬八千丈，明年照我扶藜杖。

儲福觀廣玉真公主修真之地

路轉屏風疊，雲藏帝子家。窮幽行壑确，息倦倚榭牙。綠蘚封茶樹，清霜折藥花。世無勾漏令，誰此養丹砂。

龍門洞

我來香積寺，清晨歷龍門。孤峯撐蒼昊，大壑裂厚坤。古穴吹腥風，峭壁挂爪痕。水浮石楠花，崖絡葛蒲根。橫策意未厭，袞袞探其源。絕境豈可名，恨我詩語煩。須臾蒼雲合，便恐白雨翻。東走得平野，萬里扶桑暎。

布金院

萬里西來了宿緣，憑鞭欹帽過年年。山寒院落開爐月，霜重郊原斲芋天。淺碧鱗鱗人度杓，長空杳杳鳥銜煙。夜投蕭寺清無寐，樓角三更月滿川。

離堆伏龍祠觀孫太古畫英惠王像

岷山導江書禹貢，江流蹴山山爲動。嗚呼秦守信豪傑，千年遺迹人猶誦。決江一支溉數州，至今禾黍連

雲種孫翁下筆開生面。岌嶭高冠摩屋棟。徒木遺風雖峭刻。取材尙足當世用。寥寥後世豈乏人。尺寸未施。譏已衆。要官無責空賦祿。軒蓋傳呼真一閥。奇勳偉績曠世無。仁人志士臨風慟。我遊故祠九頓首。夜遇神君了非夢。披雲激電從天來。赤手騎鯨不施鞿。

登灌口廟東大樓觀岷江雪山

我生不識柏梁建章之宮殿。安得義冠侍遊宴。又不及身在滎陽京索間。猿甲橫戈夜酣戰。胸中迫隘思遠遊。泝江來倚岷山樓。千年雪嶺闌邊出。萬里雲濤坐上浮。禹迹茫茫始江漢。疏鑿功當九州半。丈夫生世要如此。齋志空死能無歎。白髮蕭條吹北風。手持卮酒酹江中。姓名未死終磊磊。要與此江東注海。

郫縣道中思故里

衰髮不勝簪。馳驅豈復堪。客魂迷劍外。歸思滿天南。江路灘聲壯。雲停雪意酣。空懷小巖碧。細酌破吳柑。

宿江原縣東十里張氏亭子未明而起

寸廩驅人卒歲勞。一官坐失布衣高。劍南十月霜猶薄。江上五更雞亂號。孤枕擁衾尋短夢。青燈照影著征袍。客愁相續無時斷。那得并州快剪刀。

戲詠西州風土

衍沃綿千里。融和被四時。蠶叢角歌吹。石室盛書詩。綠樹藏漁市。清江遶佛祠。吾行更堪樂。載酒上臺頤。

宿彭山縣通津驛大風鄰園多喬木終夜有聲

木欲靜。風不止。子欲養親不留夜。誦此語涕莫收。吾親之沒。今幾秋。尙疑捨我而遠遊。心冀乘雲反故丘。

再拜奉觴陳膳羞。陶器治米聲叟叟。木甌炊麩香浮浮。華蓋屑桂調甘柔。稚鼈羹雁長魚膾。夜敷枕席脫
衾裯。晨起薰籠進衣裘。哀樂此志終莫酬。有言不聞九泉幽。北風歲晚號松楸。哀哉萬里爲食謀。

眉州郡燕大醉中間道馳出城宿石佛院

玻璃春作江水清。紫玉簫如雛鳳鳴。漏聲不聞看施燭。俠氣未減欺飛觥。單車萬里信有數。二年三過事
忘情。斂頭玉茗妙天下。坐上見白山茶格韻高。絕瓊花一樹真虛名。酒酣忽作檀公策。問道絕出東關城。
清歌未斷去已遠。回首樓環空崢嶸。貂裘狐帽醉走馬。陌上應有行人驚。徑投野寺睡正美。魚鼓忽報江
天明。

雙柏

雙柏屹相向。剛嚴如巨人。龍吟風雨夕。山立雪霜晨。閱世易成古。列心不復春。扶頤要力量。歲晚莫全身。
戍卒說沉黎事有感。

亭障曾無閑歲寧。頻聞夷落犯王靈。孤城月落冤魂哭。百里風吹戰血腥。瘴重厭看茅葉赤。春殘不放柳
條青。焦頭爛額知何補。弭患從來貴未形。

平光道中望我眉山慨然有作

白雲如玉城翠嶺出其上。異境忽墮前心目。久薄濛濛別來二百日。突兀喜亡恙。飛仙遙舉手。喚我一稅轅。
此行豈或使屏迹事幽曠。何必故山歸。更破萬里浪。

次韻何元立都曹贈行元立用陳後山送蘇公詩韻

嘉榮東四川。此別不爲遠。徘徊凌雲寺。決去未遑忍。登高望故人。煙樹參差見。懸知今日夢。不隔重城鍵。
下主相從意。百年有未滿。結巢青城雲。期子在歲晚。

次韻楊嘉父先輩贈行

貞元舊朝士。太學老諸生。半世不偶諧。殘年正飄零。危坐但愁悲。一笑黃河清。佳客如晨星。俗子如春萍。
奇哉今日事。諸賢送東征。吸酒盃當空。綴詩筆勿停。明發復百憂。君聽馬蹄聲。

入榮州境

一起一伏黃茅岡。崔嵬破丘狐兔藏。炯炯寒日清無光。單單終日行羊腸。村落聚看如鷲壘。亦有銀釵伏。
短簷黃旗飄。鼙鼓其鏜。畫角鳴咽吹斜陽。長筇汲井熬雪霜。轆轤啞啞官道傍。渺然孤城天一方。傳者或。
云古夜郎。其民簡朴。士甚良。千里鬱爲詩書鄉。閉閣掃地焚清香。老人處處是道場。

井研道中

窮冬景方促。下嶺路微平。地瘦竹無葉。風乾茅有聲。客遊空自入。歸計與誰評。尙喜長亭下。雲穿夕照明。

賴牟鎮早行

孤燈照影聽初雞。攬轡情懷倍慘悽。雪作未成雲意鬧。茅荒無際客魂迷。觸寒手指藏猶裂。畏嶮圖書棄。
不攜。老去有文無賣處。等閑題遍蜀東西。

初到榮州

亂山缺處城樓呀。雙旗蕭蕭晚吹笳。煙深綠桂臨絕壑。霜落殘瀨鳴寒沙。廢臺已無隱士嘯。遺宅上有高。

人家鈴齋下榻約僧話。松陰枕石放吏衙。盃羹最珍慈竹筍。餅水自養山薑花。地爐堆獸熾石炭。瓦鼎號
蜩秋煎茶。少年遠遊無百里。一飢能使行天涯。豈惟慣見蓬婆雪。直恐遙泛星河槎。故巢肯作兒女戀。異
境會向鄉間誇。一盃徑醉幘自墮。燈下髮影看鬢髿。

城上

雙雙黃鸝臥斜陽。葉葉丹楓著早霜。沙水自鳴如有恨。野花無主爲誰芳。郭筒味醜愁滿甲。巴曲聲悲怯
斷腸。賴有生平管城子。不妨驅使答風光。

又

濯錦豪華夢不通。歸然孤疊亂山中。行歌滿道知人樂。露積連村見歲豐。萬瓦新霜掃殘瘴。一林丹葉換
青楓。鴉黃名醜何由得。且醉盃中琥珀紅。榮州酒亦而勁甚。鴉黃廣漢酒名。

西樓夕望

夜郎城裏歎途窮。賴有西樓著此翁。溪鳥孤飛寒靄外。野人參語夕陽中。蒼天可恃何曾老。白髮緣愁却
未公。俗態十年看爛熟。不如留眼送歸鴻。

醉中懷眉山舊遊

勁酒少和氣。哀歌無歡情。故鄉不敢思。登高望錦城。錦城那得去。髣髴臺隴路。遙知尊前人。指我題詩處。
我雖流落夜郎天。遇酒能狂似少年。想見東郊攜手日。海棠如雪柳飛綿。漢嘉術者袁牧童。謂予明年春
分後。當還西州。

登城望西崦

登城望西崦。數家斜照中。柴荆晝亦閉。乃有太古風。慘淡起炊煙。寂歷下釣筒。土瘦麥苗短。霜重桑枝空。恐是種桃人。或有采芝翁。何當宿樓上。月明照夜春。

甲午十一月十三夜夢右臂踊出一小劍長八九寸有光既覺猶微痛也

少年學劍白猿翁。曾破浮生十歲功。玉具挂頤誰復許。蒯緱彈缺老猶窮。牀頭忽覺蛟龍吼。天上方驚牛斗空。此夢怪奇君記取。佩刀猶得世三公。

齋中夜坐有感

荒山爲城溪作壕。風鼓巨木聲翻濤。鴟梟乘屋彈不去。狐狸欺人怒豎毛。雨來紅鶴更可惡。爭巢一似嬰兒號。城孤屋老草木茂。正坐人少此輩豪。急呼五百具舂鐻。欲掀窟穴窮腥臊。忽然語罷却自笑。殘年何至與汝塵。澆花江色綠如黛。春波澹澹浮輕舸。行當繫纜柳陰下。仰聽鶯語傾香醪。

晚登橫溪閣

樓鼓聲中日又斜。憑高愈覺在天涯。空桑客土生秋草。野渡虛舟集晚鴉。瘴霧不開連六詔。俚歌相答帶三巴。故鄉可望應添淚。莫恨雲山萬疊遮。

又

犖确坡頭筇竹枝。西臨村路立多時。賣蔬市近還家早。煮井人忙下麥遲。幾多鹽井秋冬收。薪茅取盡病客情。懷常怯酒。山城老景盡供詩。晚來試問愁多少。只許高樓橫笛吹。

昭德堂晚步

笑喚枯筇踢夕陽。探春聊作靜中忙。高枝鵲語如相命。自是每聞我自香。寺後新潭花世矣。塵來曠寺麗
城荒。講仙未必無遺恨。老欠題詩到夜郎。

龍洞在榮州東南一里許。

峭崖磨天如立壁。柁根橫走松倒植。呀然一岫驚倒人。空洞坡陁三百尺。幽陰宜爲異物託。角爪痕存猶
可識。想當蟠螭未奮時。腥風逼人雲觸石。一朝偶爲旱歲起。卷海作雨飛霹靂。向來伊呂正如此。辛渭千
年有遺迹。我欲酌酒招蜿蜒。安用辛苦常行天。太平洋內多豐年。歸來故祠聽管絃。

客中夜寒戲作長謠

孤翁癡鈍如寒蠅。霜夕不眠愁嚴凝。寢衣觸體起芒粟。鼻息噓潤成冰凌。瑟瑟默默數嚴譟。耿耿獨看幽
窗燈。支牀龜老共夜永。號月難冷同晨興。白狐紫貂了不暖。何況蜀錦并吳綾。靜思忽得安樂法。人生所
欠絮與繒。十年一衲尙可過。不信請視匡山僧。

高齋小飲戲作

梅花又發鬼門關。坐覺春風萬里寬。荔子陰中時縱酒。竹枝聲裏彊追歡。丁年漢使殊方老。子夜吳歌昨
夢殘。白帝夜郎俱不惡。兩公補處得憑欄。予五年間自蜀客楚。

太液黃鵠歌有引

漢始元元年春二月。黃鵠下建章宮。太液池中。公卿上壽。賜諸侯王列侯宗室金錢。子夜讀漢

書追作歌一首

建章宮裏春風寒。太液水生池面寬。中人馳奏黃鶴下。龍旗豹尾臨池看。芹香藻暖鶴得意。左右從官呼萬歲。須臾傳詔宴公卿。驩聲如雷動天地。時平宮省遊樂多。黃鶴刷羽涵恩波。小臣珥筆龍墀下。願繼前朝天馬歌。

自唐安徙家來和義出城迎之馬上作

身如林下僧。處處常寄包。家如梁上燕。歲歲旋作巢。豈惟人所憐。顧影每自嘲。眼看佳山水。不得結把茅。造物困豪傑。如視餓虎哮。要令出精神。感激使叫呌。頗思投筆去。走馬盤雲旂。三更冒急雪。大戰梁楚郊。

乙未元日除夕得制司檄催赴官

五十人間老大身。更堪從此數新春。琴瑟漏鼓催窗色。急急文書動驛塵。病後光陰常自惜。客中節物爲誰新。壯心已向郵亭盡。自揣頭顱莫問人。

別榮州正月十日

浮生歲歲俱如夢。一枕輕安亦可人。偶落山城無事處。暫還老子自由身。嘯臺載酒雲生屨。仙穴尋梅雨墊巾。便恐清遊從此少。錦城車馬漲紅塵。嘯臺在富義門外一里。號孫登嘯臺。雙溪王氏有石穴。黃太史勝曰地仙洞。

聞仲高從兄訃

去國萬里遊。發書三日哭。久矣吾已衰。哀哉公不淑。寄書墨未乾。玉立在我目。天高鬼神惡。生世露電速。

丹心抱忠貞，白首悲放逐。九關不可叫，百身何由贖。文章果何罪，一斥獨不復。上壽阿母前，悔不早碌碌。

夏日過摩訶池

烏帽翩翩白紵輕，摩訶海上試閑行。淙淙野水鳴空苑，寂歷斜陽下廢城。縱轡迎涼看馬影，袖鞭尋句聽蟬聲。白頭散吏元無事，却爲興亡一愴情。

早行

笮馬踐槐影，紗籠吹蠟香。憑鞭尋斷夢，側帽受微涼。病骨更疎放，衰懷罷激昂。道邊雙石筍，笑我伴人忙。

天申節前三日大聖慈寺華嚴閣燃燈甚盛遊人過於元夕

萬瓦如鱗百尺梯，遙看突兀與雲齊。寶籬風定燈相對，綺陌塵香馬不嘶。星隕半空天宇靜，蓮生陸地客心迷。歸途細踏槐陰月，家在花行更向西。予官居在花行距寺數里。

喜雨五月二十二日

黃塵赤日欲忘生，一夜新涼滿錦城。雨急驟增車轍水，泥深漸壯馬蹄聲。蚊蠅斂迹知無地，燈火於人頗有情。市遠雞豚不須問，小畦稀甲已堪烹。

夜聞浣花江聲甚壯

浣花之東當笮橋，奔流激橋橋爲搖。分洪初疑雨蛟舞，觸石散作千珠跳。壯聲每挾雷雨橫，巨勢潛借鼉鼉驕。夢回聞之坐太息，鐵衣何日東征遼。銜枚度磧沙颯颯，盤槩斷隴風蕭蕭。不然投檄徑歸去，短篷臥聽錢塘潮。

暑行憩新都驛

細細黃花落古槐。江暈不雨轉輕雷。長空鳥破蒼煙去。落日人從綠野來。散策意行尋水石。脫巾高臥避氛埃。羈遊未羨端居樂。看月房湖又一回。

早發新都驛

喔喔江村雞。迢迢縣門漏。河漢縱復橫。繁星明如晝。愛涼趣上馬。未曉閱兩堠。高林起宿鳥。絕澗落驚犬。寺樓插蒼煙。沙泉瀉幽竇。我行忽萬里。坐歎關河溜。官如廣文冷。面作拾遺瘦。今年盍歸哉。勿落春雁後。謁諸葛丞相廟。羈幸八陣原上。

漢中四百天所命。老賊方持太阿柄。區區梁益豈足支。不忍安坐觀異姓。遺民亦知王室在。閭位那干天統正。公雖已沒有神靈。猶假賊手誅鍾鄧。前年我過沔陽祠。再拜奠俎衰淚迸。潔齋請作送迎詩。精忠大義神其聽。

自漢州之金堂過沈氏竹園小憩坐間微雨

修修萬竹壓康莊。碧玉椽圍一尺彊。雪節煙梢誰暇賞。馬蹄車轍可憐忙。帽邊忽墮吹香句。肘後舊傳醫俗方。更覺清遊天所借。坐來飛雨度橫塘。

自小雲頂上雲頂寺

素衣雖成緇。不爲京洛塵。躍馬上雲頂。欲呼飛仙人。飛仙不可呼。野僧意甚真。煎茶清澗下。童子拾墮薪。我少本疎放。一出但坐貧。縛袴屬囊韉。哀哉水雲身。此地雖暫寓。失喜忘吟呻。故溪歸去來。歲晚思鱸葦。

馬上微雨

三日觸毒暑，衣垢背汗浹。今且殊蕭然，涼雨吹醉頰。瘦松無橫枝，蠶竹少全葉。落蓮乃可念，滋泣如放妾。豈惟人意適，我馬亦振鬣。遠村有歸人，清溪爭晚涉。

彌牟鎮驛舍小酌

郵亭草草置盤盂，買果煎蔬便有餘。自許白雲終醉死，不論黃紙有除書。角巾熱雨蟬聲外，細葛含風日落初。行遍天涯身尚健，却嫌陶令愛吾廬。

遊彌牟善提院庭下有凌霄藤附古楠其高數丈花已零落滿地

絳英翠萼亦佳哉，零亂空庭碼瑙盃。遍雨新花天有意，定知閑客欲閑來。佛經云：天風吹萎花，更雨新好者。

樓上醉歌

我遊四方不得意，陽狂施藥成都市。大瓢滿貯隨所求，聊爲疲民起憔悴。飄空夜靜上高樓，買酒捲簾邀月醉。醉中拂劍光射月，往往悲歌獨流涕。刻却君山湘水平，斫却桂樹月更明。太白詩：刻却君山好，平鋪湘水流。老杜詩：斫却月中桂，清光應更多。丈夫有志苦難成，修名未立華髮生。

伏日獨遊城西

幕府重來老令威，山川良是昔人非。癡兒已遣了官事，伏日元知當早歸。避熱幽花房自斂，迎秋高樹葉先飛。論詩敢補先師處，僭拂江頭舊釣磯。

五鼓送客出城馬上作

夜漏餘十刻。涼颼如九秋。灘聲聒酒醒。月色照人愁。落魄悲孤宦。龍鍾怯遠遊。此生那可料。六歲劍南州。

寓舍書懷

借得茅齋近竹橋。羈懷病思兩無聊。春從豆蔻梢頭老。日向蘼蕪齒上消。葦竹曉兼風力橫。高梧夜挾雨聲厲。書生莫倚身常健。未盡凌煙鬢已凋。

夜登城樓

天上何蒼蒼。四序浩旋斡。異哉今年熱。炊霽不可活。夜分睡復起。搖筆腕欲脫。彊登城西樓。月露渺空闊。憑欄弄清影。涼颼入蕉葛。溼螢沾草根。驚鶻起木末。亦知難久留。襟袍資一豁。人事迭廢興。天理交予奪。義和不停取。去若弦上筈。此熱會當衰。歲晚備裘褐。

試茶

蒼爪初驚鷹脫鞵。得湯已見玉花浮。睡魔何止避三舍。歡伯直知輸一籌。日鑪焙香懷舊隱。谷籬試水憶西遊。銀餅銅碾俱官樣。恨欠織纖爲捧甌。

成都大閱

千步毬場爽氣新。西山遙見碧嶙峋。令傳雪嶺蓬婆外。聲震秦川渭水濱。旗脚倚風時弄影。馬蹄經雨不沾塵。屬囊縛袴毋多恨。久矣儒冠誤此身。

書懷

萬里馳驅坐一飢。自憐無計脫塵韉。身留幕府還家少。眼亂文書把酒稀。客路更逢秋色晚。故山空有夢魂歸。芋羹豆飯元堪飽。錯用人言恨子威。

遊大智寺

脫髮紛滿梳。衰顏不堪照。百年忽已半。去日如過燒。平生功名心。上馬無燕趙。爾來閱世故。萬事驚錯料。豈無舊朋儔。聯翩半廊廟。誰能伴此老。泝峽聽猿叫。錦城得數公。意氣如再少。偷閑訪野寺。繫馬追一笑。新精厭玉狸。畏酒亦復釀。古股黓醜豪。壞壁冠佩肖。摩挲宋公詩。句法歎高妙。正如霓裳曲。零落得遺調。歸途繚長堤。掠面霜氣峭。佳遊不可忘。落筆君勿誚。

看月睡晚戲作

香火課夙興。風月留晚睡。直言散吏閑。亦未盡無事。舊聞雲臺翁。高枕閱塵世。至今青嶂間。鼻息亂松吹。平生寡嗜好。所願究此味。千年一欠伸。笑看巖花墜。

成都書事

劍南山水盡清暉。濯錦江邊天下稀。煙柳不遮樓角斷。風花時傍馬頭飛。毫羹筍似稽山美。斫膾魚如笠澤肥。客報城西有園賣。老夫白首欲忘歸。

又

大城少城柳已青。東臺西臺雪正晴。鶯花又作新年夢。絲竹常聞靜夜聲。廢苑煙蕪迎馬動。清江春漲拍堤平。尊中酒滿身彊健。未恨飄零過此生。

雙溪道中

曉山笮橋門。天低日未暝。綠波寒淡淡。白霧遠昏昏。古路亂車轍。行人驚雁羣。征塗不須厭。蓬轉本無根。

牛飲市中小飲呈坐客

牛飲橋頭小市東。店門繫馬一尊同。已能自置功名外。尙欲相期意氣中。褐擁紫茸迎曉日。酒醺紅浪醉春風。從今共約無疎索。行外梅花欲搭公。

自警

乳烹佛粥遠如許。菜簇春盤行及時。草木欣欣渠得意。乾坤浩浩我何私。懷材所忌多輕用。學道當從不自欺。且暮置規君勿怪。修身三省自先師。

午寢

眼邊朦朧不自支。欠伸常恨到牀遲。庭花著雨晴方見。野客敲門去始知。灰冷香煙無復在。湯成茶椀徑須持。頽然却自嫌疏放。旋了生涯一首詩。

白髮

我生實多邁。九折行晚途。憂傷日熏心。驚見頰與顙。稍生秋風時。競出寒雨餘。星星初尙稀。皤皤不可除。昔如春柳妍。今作霜蓬枯。蓬枯有再綠。念我豈得如。平昔樂方外。固與功名疏。投鐻三歎息。金丹豈無書。

明日午睡至莫復次前韻

酒力醺然入四支。華胥稅駕不應遲。殘年已覺衰難彊。萬事無如睡不知。幸有琴書供枕藉。安能冠帶更

支持紅爐過盡灰如雪。獨守青燈坐畫詩。

醉中長歌

闌干斗柄搖天東。人間一夜回春風。注桃染柳歲相似。惟我衰顏非昔紅。可憐逢春不自感。更欲使氣驚兒童。煙郊射雉錦臆碎。水亭供鱸金盤空。歸穿南市萬人看。流星突過連錢驄。高樓作歌醉自寫。墨光燭焰交長虹。人生未死貴適意。萬里作客元非窮。故人夜直金鑾殿。僵臥獨聽宮門鐘。

對酒

扇邊生怕庾公塵。索笑來遊錦水濱。四野雲齊初釀雪。一枝梅動已催春。綠尊有味能消日。白髮無情不貸人。商略此生何所恨。太平時得自由身。

人日飲昭覺

天涯羈旅逢人日。病起消搖集寶坊。雪水初融錦江漲。梅花半落綠苔香。家山松桂年年長。幕府文書日日亡。自笑餘生有幾許。一卷借與得深藏。

上元前一日

異縣客遊久。今年春事遲。峭寒增酒價。微雨惱燈期。老態人未覺。孤愁心自知。停車呼病婦。彊出伴諸兒。

上元

細細香塵暗六街。魚鱗淺碧暮雲開。新粧褰幕全身見。誤馬隨車一笑回。酒釀頓忘風力峭。夜長猶恨漏聲催。京華舊侶彫零盡。短鬢成絲心未灰。

又

病起衰顏非昔紅。偷閒聊與少年同。一規寒玉挂樓角。千點華星來坐中。久成遺民雖困弊。承平舊蹟尙繁雄。歸時瘦馬堪覓影。定有遊人笑此翁。

喜譚謙稱歸

少鄙章句學。所慕在經世。諸公薦文章。頗恨非素志。一朝落江湖。彌漫得自恣。討論極王霸。事業窺莘渭。孔明景略闊。却立顧賊視。從人無一欣。對食有三咽。譚侯信豪雋。可共不朽事。天涯再相見。握手更枝淚。欲尋西郊路。斗酒傾意氣。浩歌君和我。勿作尋常醉。

春感

少時狂走西復東。銀鞍駿馬馳如風。眼看春去不復惜。只道歲月來無窮。初遊漢中亦未覺。一飲尙可傾千鍾。又魚浪藉漾水濁。獵虎蹴躡南山空。射期命中萬人看。毳門對植雙旗紅。華堂却來弄筆硯。新詩醉草誇坐中。劍關南山纔幾日。壯氣摧縮成衰翁。雪霜蕭颯已滿鬢。蛟龍鬱屈空蟠胸。鄰園杏花忽爛熳。推枕彊起隨遊蜂。遙看百匝幾歎息。吹紅洗綠行恩恩。暮年逢春尙有幾。常恐春去尋無踪。青錢三百幸可辦。且判爛醉酩酊筭。

春晴隨基遊西市施家園

稅駕名園半日留。遊絲飛蝶晚悠悠。驟暄不爲海棠計。長晝只添鸚鵡愁。老去自驚詩酒減。客中偏覺歲時遒。東風好爲吹歸夢。著我松江弄釣舟。

花時遍遊諸家園

看花南陌復東阡，曉露初乾日正妍。走馬碧雞坊裏去，市人喚作海棠顛。

又

爲愛名花抵死狂，只愁風日損紅芳。綠章夜奏通明殿，乞借春陰護海棠。

又

翩翩馬上帽簷斜，盡日尋春不到家。偏愛張園好風景，半天高柳臥溪花。

又

花陰掃地置清尊，爛醉歸時夜已分。欲睡未成欹倦枕，輪囷帳底見紅雲。

又

宣華無樹著啼鶯，惟有摩訶春水生。故老能言當日事，直將宮錦裹宮城。

又

枝上猩猩血未晞，尊前紅袖醉成圍。應須直到三更看，畫燭如椽爲發輝。

又

重萼丹砂品最高，可憐寂寞棄蓬蒿。會當車載金錢去，買取春歸亦足豪。小東門外有千葉朱砂海棠一

株奇麗絕代，在荒園中，人罕見者。

又

絲絲紅萼弄春柔。不似疎梅只慣愁。常恐夜寒花索寞。錦茵銀燭按涼州。

又

飛花盡逐五更風。不照先生社酒中。輸與新來雙燕子。啣泥猶得帶殘紅。今年二月二日社而海棠已過

又

海棠已過不成春。絲竹淒涼鎖暗塵。眼看燕脂吹作雪。不須零落始愁人。

曉過萬里橋

曉出錦江邊。長橋柳帶煙。豪華行樂地。芳潤養花天。擁路看欹帽。窺門笑墜鞭。京華歸未得。聊此送流年。

自合江亭涉江至趙園

政爲梅花憶兩京。海棠又滿錦官城。鶉藏高柳陰初密。馬涉清江水未生。風掠春衫驚小冷。酒潮玉頰見微頰。殘年飄泊無時了。腸斷樓頭畫角聲。

春晴

一庭舞絮關身輕。百尺遊絲弄午晴。靜喜香煙縈曲几。臥驚玉子落紋枰。新春易失遽如許。薄宦忘歸何似生。安得一船東下峽。江南江北聽鶯聲。

卷第七

題明皇幸蜀圖

天寶政事何披猖，使典相國胡奴王。弄權楊李不足怪，阿瞞手自裂紀綱。八姨富貴尙有理，何至詔書襲五郎。天寶末，下詔雪張易之兄弟，盧龍賊騎已洶洶，丹鳳神語猶琅琅。人知大勢危，蠱卵天稔奇禍如崩。牆臺省諸公獨耐事，歌詠功德卑虞唐。一朝殺氣橫天末，疋馬西奔幾不脫。向來諂子知幾人，賊前稱臣草間活。劍南萬里望秦天，行殿春寒聞杜鵑。老臣九齡不可作，魚蠹蛛絲金鑑篇。

春寒連日不出

海棠花入燕泥乾，梅子枝頭已帶酸。老去嬾尋年少夢，春分不減社前寒。著書敢望垂千載，嗜酒猶須隱一官。正是閑時無客過，小庭斜日倚闌干。

馬上偶成

城南城北紫遊韉，盡日閑行看似忙。刺水離離葛葉短，連村漠漠豆花香。夕陽有信催殘角，春草無情上繚牆。我亦人間倦遊者，長吟聊復愴興亡。

夜宴

酒浪搖春不受寒，燭花垂盡忽堆盤。山川路邈人將老，絲管聲逾夜向闌。四海交朋更聚散，百年光景雜悲歡。自憐病眼猶明在，更把名花半醉看。是夕得范希元家曉海棠數枝，繁盛一城所無。

觀音院讀壁間蘇在廷少卿兩小詩次韻

揚鞭暮出錦官城，小院無僧有月明。不信道人心似鐵，隔城猶送擣衣聲。

又

老去癡頑不受譏，姓名身後更須傳。世間商賈無歸處，只合長齋繡佛前。

錦亭

天公爲我齒頰計，遣飲黃甘與丹荔。又憐狂眼老更狂，令看廣陵芍藥蜀海棠。周行萬里逐所樂，天公於我元不薄。貴人不出長安城，寶帶華纓眞汝縛。樂哉今從石湖公，大度不計鬪丞虜。夜宴新亭海棠底，紅雲倒吸玻璃鍾。琵琶絃繁腰鼓急，盤鳳舞衫香霧溼。春醪凸盡燭光搖，素月中天花影立。遊人如雲環玉帳，詩未落紙先傳唱。此邦句律方一新，鳳閣舍人今有樣。

晚起

新晴窗日弄春妍，幌小屏深意自便。長恨病多妨痛飲，却緣客少得安眠。雛鶯故故啼簷角，飛絮翩翩墮枕前。欲著衣裳還懶起，重尋殘夢一悠然。

雨

映空初作繭絲微，掠地俄成箭鏃飛。紙帳光暈饒曉夢，銅鑪香潤覆春衣。池魚鱗鱗隨溝出，梁燕翩翩接翅歸。惟有落花吹不去，數枝紅溼自相依。

春晚書懷

萬里西遊爲覓詩，錦城更付一官癡。脫巾漉酒從人笑，拄笏看山頗自奇。疎雨池塘魚避釣，曉鷺窗戶客爭飛。老來怕與春爲別，醉過殘紅滿地時。

出朝天門繚長堤，至劉侍郎廟由小西門歸。

曉從北郭過西城，十里沙堤似席平。澹日向人供帽影，微風傍馬助鞭聲。歡情寂寂隨年減，俗事紛紛逐日生。到處每求佳水竹，晚途牢落念歸耕。

夜分讀書有感

光陰百歲已中分，擬結茅茨老白雲。萬里誰憐新臥疾，九重猶記舊能文。枕邊得句題屏疊，馬上看山隔帽簷。終恨無勞糜廩粟，夜窗聊策讀書勳。

中夜聞大雷雨

雷車駕雨龍盡起，電行半空如狂矢。中原腥羶五十年，上帝震怒初一洗。黃頭女真撼魂魄，面縛軍門爭請死。已聞三箭定天山，何啻積甲齊熊耳。捷書馳騎奏行宮，近臣上壽天顏喜。閤門明日催賀班，雲集千官摩劍履。長安父老請移蹕，願見六龍臨渭水。從今身是太平人，敢憚安西九千里。

春殘

石鏡山前送落暉，春殘回首倍依依。時平壯士無功老，鄉遠征人有夢歸。首宿苗侵官道合，蕪菁花入麥畦稀。倦遊自笑摧頹甚，誰記飛鷹醉打圍。

武擔東臺晚望

顛顛西窗已一翁，登高意氣尚豪雄。關河霸國興亡後，風月詩人醉醒中。病起頓驚雙鬢改，春歸一掃萬花空。欄邊徙倚君知否，直到吳天目未窮。

行武擔西南村落有感

騎馬悠然欲斷魂。春愁滿眼與誰論。市朝遷變歸蕪沒。磯谷旣舒互吐吞。一徑松楠遙見寺。數家雞犬自成村。最憐高冢臨官道。細細煙莎遍燒痕。有大家高數丈。旁又一家差小。莫知何代人也。俗號太子墓。

小飲房園

宦遊到處卽忘家。況得閑身管物華。疎索故人緣病酒。折除厚祿爲看花。泥新高棟初巢燕。萍匝荒池已集蛙。斟酌人生要行樂。燈前起舞落烏紗。

飯昭覺寺抵暮乃歸

身墮黃塵每慨然。攜兒齋散亦前緣。聊憑方外巾盂淨。一洗人間七箸羶。靜院春風傳浴鼓。畫廊晚雨溼茶煙。潛光寮裏明窗下。借我消搖過十年。

自芳華樓過瑤林莊

春晚江邊草過腰。雨餘樓下水平橋。名花未落如相待。佳客能來不費招。欄角峭風羅袖薄。柳陰斜日玉驄驕。此身醉死元關命。敢笑聞雞趁早朝。

書懷

詩不能工浪得窮。幾年袞袞看諸公。摧頽已作驢伏櫪。留滯敢嫌船逆風。消日劇蕪疎竹下。送春爛醉亂花中。倚樓看鏡俱癡絕。贏得煙蓑伴釣翁。

遊東郭趙氏園

清晨呼馬出。馭吏請所之。錦城浩如海。我亦無與期。有花卽入門。莫問主人誰。下馬據胡牀。傲脫忘詞議。

人言白頭翁，胡爲尙兒癡。老翁故不癡，借花發吾詩。詩句帶花香，東風不敢吹。徘徊雙蛺蝶，許汝鼻端知。
卜居
歷盡人間行路難。老來要覓數年閑。供家米少因添鶴，買宅錢多爲見山。池面紋生風細細，花根土潤雨斑斑。借春乞火依鄰里，剩釀村醪約往還。

又

南浮七澤弔沉湘，西泝三巴掠夜郎。自信前緣與人薄，每求寬地寄吾狂。雪山水作中瀟味，蒙頂茶如正焙香。儻有把茅端可老，不須辛苦念還鄉。

馬上

春殘馬上意，佺偁縱轡微吟過數坊。綠樹成帷連藥市，清流如帶繞毬場。城荒鼓角增悲壯，苑廢雲煙尙莽蒼。堪笑年來向詩嬾，還家古錦只空囊。

夜登江樓

平生胸中無滯留，曠然獨與造物遊。天風駕我周寓縣，夜半忽過江邊樓。樓前茫茫天地闊，萬頃月浸空江秋。雲階無塵鸞鶴舞，玉笛裂石魚龍愁。肺肝澄澈納灑氣，毛髮慘慄臨寒流。世間回首眞一夢，誰能更念酬恩讎。

書歎

早得虛名翰墨林，謝歸忽已歲時侵。春郊射雉朝盤馬，秋院焚香夜弄琴。病酒閉門常兀兀，哦詩袖手久

情惜。浮沉不是忘經世。後有仁人識此心。

三月一日府宴學射山

北出昇仙路。少東據鞍自笑老。從戎百年身世。酣歌裏。千古功名感慨中。天遠僅分山髣髴。霧收初見日。瞳矓。橫空我欲江湖去。誰借冷然禦寇風。

對酒

閑愁如飛雪。入酒即消融。好花如故人。一笑盃自空。流鶯有情亦念我。柳邊盡日啼春風。長安不到十四載。酒徒往往成衰翁。九環寶帶光照地。不如留君雙頰紅。

題直舍壁

文書那得廢哦詩。羞作羣兒了事癡。付與後人評此老。一丘一壑過元規。

遊園覺乾明祥符三院至臺

成都再見春事殘。雖名閑官實不閑。門前車馬鬧如市。案上文檄高於山。有時投罽輒徑出。略似齊客偷秦關。日斜僕夫已整駕。願景欲駐愁嘲訕。豈知今朝有此樂。放浪一笑開衰顏。抽身黃塵烏帽底。得意翠木清泉間。凄凄危磴窮犖犖。洗耳古澗纔淙潺。豈惟頓覺宇宙廣。政爾一散腰脚頑。似聞青城縹緲處。待我歸緜仙官班。倏鷹解條卽萬里。豈比倦翼方知還。

遊合江園戲題

朱朱白白池臺間。好風妍日開未殘。我來覓醉苦草草。常恨不如花意閑。山雞飛起亂花落。下上青林穿

翠整世間動步。卽有拘常恨。不如禽意樂。人言功名恐不免。我願徜徉娛歲晚。熟計淫書理白魚。何如綠
獵牽黃犬。成都四郊如砥平。安得雙鞭馳出城。鞞飛塵起望不見。從騎尋我鳴鶴聲。

三月十六日作

石筍街西風景幽。醉眠萬事付悠悠。倦遊我已七年客。促駕春無三日留。枝上蝶稀紅藥老。舍中蠶起綠
桑柔。功名墮甌誰能問。羞作飢鷹夜掣鷗。

食齋

日日思歸飽蕨薇。春來齋美忽忘歸。傳誇真欲嫌荼苦。自笑何時得瓠肥。

又

采采珍蔬不待畦。中原正味壓蓴絲。挑根擇葉無虛日。直到開花如雪時。

又

小著鹽醃助滋味。微加糞桂發精神。風爐歛鉢窮家活。妙訣何曾肯授人。

次韻范文淵

簞瓢氣已壓膏粱。不傍朱門味更長。細看高人忘寵辱。始知吾輩可憐傷。巖扃勾漏新丹竈。香火匡廬古
道場。剩欲與君堅此約。它年八十鬢眉蒼。近有術者言僕壽過八十。

題醉中所作草書卷後

胸中磊落藏五兵。欲試無路空崢嶸。酒爲旗鼓筆刀槊。勢從天落銀河傾。端溪石池濃作墨。燭光相射飛

縱橫須臾收卷復把酒。如見萬里煙塵清。丈夫身在要有立。逆虜運盡行當平。何時夜出五原塞。不聞人語聞鞭聲。

登子城新樓遍至西園池亭

狂夫無計奈狂何。何況登臨逸興多。千疊雪山連瀟博。一支春水入摩訶。吟餘騎省霜侵鬢。釣罷玄冥雨滿蓑。逐虜榆關期尚遠。不妨隨處得婆娑。

小疾謝客

小疾深居不喚醫。消搖更覺勝平時。癡人未害看周易。名士真須讀楚辭。綠徑風斜花片片。畫廊人靜雨絲絲。晚來頓覺清羸甚。自置篝爐煮粟糜。

歸耕

隨牒人間鬢欲疎。歸耕且復補東隅。餽炊地碓新舂米。衣拆天吳舊繡圖。有圃免煩官送菜。叩門翻喜吏徵租。不愁問字無來客。惟欠揚雄宅一區。

聞孫巖老挂冠歎仰之餘輒賦長句

聖賢在世龍行天。出處何至爲物牽。後人競作駒伏轅。未死奄奄如九泉。郭孫公者山澤仙。嶮巖玉骨寒入肩。哦詩調苦亂嘒蟬。燥墨瘦字醜不妍。諸公好之挽使前。六丁力盡山巖然。奏書告老不待年。脫手徑上陵山巔。吾儕一官自糾纏。俛首鞭箠不自憐。彊欲作詩誦公賢。事偉辭卑難並傳。

松驥行

驪行千里亦何得，垂首伏櫪終自傷。松閣千年棄澗壑，不如殺身扶明堂。士生抱材願少試，誓取燕趙歸君王。閉門高臥身欲老，聞雞相蹴涕數行。正令啜嚅死牀簀，豈若橫身當戰場。半酣浩歌聲激烈，車輪百轉盤愁腸。

遣興

鶴料無多又掃空，今年真是浣花翁。放教綠酒關身事，留得朱顏在鏡中。挾彈園林芳徑雨，投竿窗檻小溪風。癡頑自笑歸何日，家在東吳更向東。

野意

小東門外曳筇枝，白葛烏紗自一奇。閑客逍遙無吏責，茂陰清潤勝花時。茶經每向僧窗讀，菘米仍於野艇炊。便覺眼邊歸路近，鏡湖禹廟見參差。

雨中登安福寺塔俗謂之黑塔

平生喜登高，醉眼無疆界。北顧極幽并，東望跨海岱。喟然撫手歎，從古幾成敗。英雄如過鳥，城郭但遺塊。今朝上黑塔，千里曠無礙。忽驚風霆掣，坐覺天地晦。急雨挾龍腥，溽暑爲摧壞。皇天念蟠鬱，令我寄一快。那知書生狂，自倚心眼大。更思駐潼關，黃河看如帶。

過野人家有感

縱轡江皋送夕暉，誰家井臼映荆扉。隔離犬吠窺人過，滿箔蠶飢待葉歸。吳人直謂桑日葉，世態十年看闌熱。家山萬里夢依稀，躬耕本是英雄事，老死南陽未必非。

幽居晚興

借鉏斷藥喜微香。汲井澆花趁晚涼。胸次何曾橫一物。尊前尙欲笑千場。錦江秋雨芙蓉老。笠澤春風杜若芳。歸去自佳留亦樂。夢中何處是吾鄉。

飯保福

筵雨雲低未放晴。閉門作病億閒行。攝衣丈室參耆宿。曳杖長廊喚弟兄。飽飯卽知吾事了。免官初覺此身輕。歸來更欲誇妻子。學煮雲堂芋糝羹。

觀華嚴閣僧齋閣下自四月初至七月末日飯僧數千人。

拂劍當年氣吐虹。暗鳴坐覺朔庭空。早知壯志成癡絕。悔不藏名萬柄中。

閑中偶題

楚澤巴山歲歲忙。今年睡足向禪房。只知閑味如茶永。不放羈愁似草長。架上讀書那復看。牀頭周易亦相忘。客來拈起清談麈。且破西窗半篆香。

又

久矣雲衢斂羽翰。退飛更覺一枝安。七千里外新開客。十五年前舊史官。花底清歌春載酒。江邊明月夜投竿。癡頑直爲多更事。莫怪胸懷抵死寬。

病中戲書

五十忽過二。流年消壯心。避人便小疾。移竹喜微陰。洗甕閑瀉酒。焚香靜斲琴。鏡中青鬢在。切莫遣愁侵。

又
微疾餒餘災。時須藥裏開。禽驚杵聲去。蜂認蜜香來。閉戶知長日。全生幸散材。晚涼幽興動。彊到竹邊回。

又
食筍動衰疾。清羸逾兩旬。藥囊隨臥起。詩句雜吟呻。架足書籤蠹。窗凝酒榼塵。免從官乞假。且喜是閑身。

病起書懷

病骨支離紗帽寬。孤臣萬里客江干。位卑未敢忘憂國。事定猶須待闔棺。天地神靈扶廟社。京華父老望和鑾。出師一表通今古。夜半挑燈更細看。

又

酒酣看劍凍生風。身是天涯一秃翁。捫蝨劇談空自許。聞雞浩歎與誰同。玉關歲晚無來使。沙苑春生有去鴻。人壽定非金石永。可令虛死蜀山中。

寺樓月夜醉中戲作

素壁徐升天宇閑。連峯積雪蒼茫間。樓臺是處可見月。無此巉巖羣玉山。

又

水精盞映碧琳腴。月下泠泠看似無。此酒定從何處得。判知不是文君壺。

又

海山縹緲玉真妃。貪看冰輪不肯歸。樓上三更風露冷。旋圍步障換羅衣。

陸放翁集 九 劍南詩藁 卷七

五十五

晚過五門

五門路四月乳鴉啼綠樹。閑遊但喜日初長。薄暑始知春已去。樓頭風高舞雙旗。畫角聲中日還暮。馬蹄
特特無斷時。老盡行人路如故。

躬耕

莫笑躬耕老蜀山。也勝榮把仰園官。喚回癡夢塵機息。空盡閑愁酒地寬。無復短衣隨李廣。但思微雨過
蘇端。十年世事茫如海。輸與閑人靜處看。

晚興

老病愁趨畫戟門。天教高臥浣花村。山林獨往雜屠釣。世界皆空誰怨恩。禪祕要經言觀空之法。自一城
一國一世界。至三千大千世界。皆空。千卷蠹書忘歲月。一尊濁酒信乾坤。與來倚杖清江上。斷角疎鐘正
斂昏。

夏夜大醉醒後有感

少時酒隱東海濱。結交盡是英豪人。龍泉三尺動牛斗。陰符一編役鬼神。客遊山南夜望氣。頗謂王師當
入秦。欲傾天上河漢水。淨洗關中胡虜塵。那知一旦事大繆。騎驢劍閣霜毛新。卻將覆甃草檄手。小詩點
綴西州春。素心雖願老巖壑。大義未敢忘君臣。雞鳴酒解不成寐。起坐肝膽空輪囷。

合江夜宴歸馬上作

零露中宵溼綠苔。江郊縱飲亦荒哉。引盃快似黃河瀉。落筆聲如白雨來。纖指醉聽箏柱促。長檠時看燭

花摧頭顱自揣應虛死。馬上長歌寄此哀。

齋居書事

慵養金丹換鬢鬚。微霜正要稱清癯。平生風露充蟬腹。到處雲山寄鶴軀。道室焚香勤守白。虛窗點易靜研朱。自知世事難諧偶。不待幽人夜見呼。

午夢

苦愛幽窗午夢長。此中與世暫相忘。華山處士如容見。不覺仙方覺睡方。

江濱池納涼

雨過荒池藻荇香。月明如水浸胡牀。天公作意憐羈客。乞與今年一夏涼。

晚步

屏居無俗事。薄暮行溪園。斷續風蟬噪。俯仰露葉翻。月出照西壁。參差見蒼痕。新沐嬾不櫛。清冷入髮根。臨流揮羽扇。對月傾芳尊。寄謝南昌尉。何必隱市門。

姚將軍靖康初以戰敗亡命建炎中下詔求之不可得後五十年乃從呂洞賓劉高尙往來名山有見之者予感其事作詩寄題青城山上清宮壁間將軍儻見之乎

造物困豪傑。意將使有爲。功名未足言。或作出世資。姚公勇冠軍。百戰起西陲。天方覆中原。殆非一木支。脫身五十年。世人識公誰。但驚山澤間。有此熊豹姿。我亦志方外。白頭未逢師。年來幸廢放。儻遂與世辭。從公遊五嶽。稽首餐靈芝。金骨換綠髓。歛然松杪飛。

客自鳳州來言岐雍間事悵然有感

表裏山河古帝京。逆胡數盡固當平。千門未報甘泉火。萬耦方觀渭上耕。前日已傳天狗墮。去年十一月天狗墮長安聲甚大。今年寧許佛狸生。會須一洗儒酸態。獵罷南山夜下營。

席上作

綠波畫槳滌花船。清簾疎籬角黍筵。一幅葛巾林下客。百壺春酒飲中仙。散懷絲管繁華地。寄傲江湖浩蕩天。浮世升沉何足計。丹成碧落珥貂蟬。青城山中有孫太古畫碧落待中范長生舉手雙貂蟬像特妙。

水亭偶題

涼樹闌拈玉笛吹。十年疎放負明時。溝中木斷誰曾問。空裏蓬征自不知。金井梧桐生畫寂。綠池蘋藻弄風漪。人生行樂從來事。此理何須更細推。

避暑江上

苦熱厭城市。初夜臨江湍。風從西山來。頗帶積雪寒。堰聲靜尤壯。噴薄如急灘。頓遠車馬喧。更覺衣裳單。斷岸吐缺月。恨不三更看。且隨螢火歸。城扉欲橫關。

夏白紵井序

古有四時白紵。亦有止作一時者。丙申五月在成都。烈暑可畏。戲作夏白紵二首。

雲母屏薄望如空。水精簾疎不礙風。美人獨立何所似。白玉芙蓉秋水中。素綃細織冰蠶縷。清寒不受人間暑。晚來浴罷綠窗閑。自把新詩教鸚鵡。

又

翔鸞矯矯離風塵。眼明見此絕代人。紗窗弄筆消永日。臨得黃庭新逼真。飛樓縹緲今何夕。月與玉人同一色。下簾不爲九霄寒。自要玲瓏看團壁。

久旱忽大雨涼甚小飲醉眠覺而有作

暑雨蕭蕭滴夜長。曉窗探借九秋涼。金荷淺酌閑傳酒。銀葉無煙靜炷香。舒雁且爲賒死計。鳴鳩便欲策勳忙。散人亦未全無事。枕藉琴書滿一牀。

明日開霽益涼復得長句

睡起東窗照眼明。朝陽爛熳作新晴。已聞雨斷空階滴。更覺風從細葛生。蛺蝶飛來停酒榼。石榴飄落糝棋枰。四時好處閑方覺。不枉今年住錦城。

夜讀東京記

海東小胡辜覆冒。敢據神州竊名號。幅員萬里宋乾坤。五十一年讎未報。煌煌藝祖中天業。東都實宅神明隕。卽今犬豕穴宮殿。安得旄頭下除掃。寶玉大弓久不獲。臣子義敢忘巨盜。景靈太廟威神在。北鄉慟哭猶可告。壯士方當棄軀命。書生詎忍開和好。孤臣白首困西南。有志不伸空自悼。

感事

青鬢當時映綠衣。堯功曾預記巍巍。玄都春老人何在。華表天高鶴未歸。流輩凋疎情話少。年光遲暮壯心違。倚樓不用悲身世。倦鷁無風亦退飛。

書歎

三代藏寶器，世守參河圖。埋湮則已矣，可使列市區。文章有廢興，蓋與治亂符。慶曆嘉祐間，和氣扇大鐘。數公實主盟，渾灑配典謔。開闢始歐王，當奮逮會蘇。大駕初渡江，中原皆避胡。吾猶及故老，清夜陪坐隅。論文有脈絡，千古著不誣。俯仰四十年，綠髮霜蓬枯。孤生尊所聞，秉節不敢渝。久幽士固有，速售理則無。世方亂珉玉，吾其老江湖。

睡起

睡味清酣鼻息輕，碧幃文簾喜涼生。片雲過處失籬影，急雨來時聞瓦聲。索虜尙憑三輔險，散關未下九天兵。白頭漫倚詩豪在，手掣鯨魚意未平。

飯罷碾茶戲書

江風吹雨暗衡門，手碾新茶破睡昏。小餅戲龍供玉食，今年也到浣花村。

夢遊山水奇麗處有古宮觀云雲臺觀也

神遊忽到雲臺宮，太華彩翠明秋空。曲廊下闕白蓮沼，小閣正對青蘿峯。林間突兀見古碣，雲外縹緲聞疎鐘。褐衣紗帽瘦如削，遺像恐是希夷翁。窮搜未遍忽驚覺，半窗朝日初瞳矓。卻思巖然五千仞，可使常墮胡塵中。小臣昧死露肝鬲，願扈鑿馮臨峭嶂。何當真過此山下，百尺孺孺龍旗風。

月下醉題

黃鵠飛鳴未免飢，此身自笑欲何之。閉門種菜英雄老，彈劍思魚富貴遲。生擬入山隨李廣，死當穿冢近

要離一樽彊醉南樓月。感慨長吟恐過悲。

野外劇飲示坐中

悲歌流涕遣誰聽。酒隱人間已半生。但恨見疑非節俠。豈忘小忍就功名。江湖舟楫行安往。燕趙風塵久未平。飲罷別君攜劍起。試橫雲海翦長鯨。

與青城道人飲酒作

君不見太傅晚歲具海舟。歸欲極意東山遊。翰林偶脫夜郎譴。大醉賦詩黃鶴樓。兩公窮達何足道。同是逸氣橫清秋。我無一事行萬里。青山白雲聊散愁。有酒不換西涼州。無酒不典鸚鵡裘。不作王猛傲脫坐。捫麤不作寧戚悲。歌起飯牛。五雲覆鼎金丹熟。笙鶴飄然戲十洲。

銅壺閣望月

銅壺閣上看明月。身在千尋白銀闕。十年肺渴今夕平。皓然胸次堆冰雪。恨無仙掌出雲表。更取墜露和玉屑。夜闌三歎下危梯。明日人間火雲熱。

連日得雨涼甚有作

九淵龍起跨蒼茫。聊爲西州洗亢陽。曉看空濛知歲稔。夜聞點滴覺心涼。紗幮不下蚊蠅靜。焙火微溫書畫香。睡足何須雲夢澤。如雷鼻息撼鄰牆。

待青城道人不至

我亦從來薄世緣。偶然采藥到西川。慵追萬里騎鯨客。且伴千年化鶴仙。金鼎養丹曠海日。玉壺取酒醉

江天朝來坐待方平久，讀盡黃庭內外篇。

劍客行

我友劍俠非常人，袖中青蛇生細鱗。騰空頃刻已千里，手決風雲驚鬼神。荆柯專諸何足數，正晝入燕誅逆虜。一身獨報萬國讎，歸告昌陵淚如雨。

夜宴卽席作

宣華葦路牧牛羊，摩訶龍池草茫茫。宮殿翠盡餘繚牆，南風遠吹禾黍香。草間白骨橫秋霜，何由喚起醒一觴。髮人走死聲利場，我獨感此惜流光。蘋花開時風榭涼，美人標綉如鸞翔。幾年舜日樂未央，非子之故爲誰狂。

宿沱江彌勒院

雨足陂塘溢，庭空草樹荒。衰年愁客路，野寺憩衣囊。蛙吹喧孤枕，蚊雷動四廊。青燈照無寐，寂寞數更長。

學射道中感事

學射山前宿雨收，籃輿啞軋自生愁。得閑何惜傾家釀，漸老真須秉燭遊。道廢尙書猶乞米，時來校尉亦封侯。自憐白首能豪在，車轍何因遍九州。

遊學射觀次壁間詩韻

走遍人間鬢尙青，爾來樂事滿餘齡。傍潭秋爽鉏甘菊，登嶽春隄采茯苓。閑倚松蘿論劍術，靜臨窗几勸丹經。殿光本是逃名者，安用天文動客星。

昇仙橋遇風雨大至憩小店

觸熱真疑墮火灰。雨如飛鏃亦佳哉。空江魚鼈從龍起。平野雷霆擁馬來。正怪橫吹屋茅盡。俄聞下擊澗松摧。晚來日漏風猶急。臥看柴扉闔復開。

龍挂

成都六月天大風。發屋動地聲勢雄。黑雲崔嵬行風中。凜如鬼神塞虛空。霹靂迸火射地紅。上帝有命起伏龍。龍尾不卷曳天東。壯哉雨點車軸同。山摧江溢路不通。連根拔出千尺松。未言為人作年豐。偉觀一洗芥蒂胸。

芳華樓夜宴

射虎將軍老不侯。尚能豪縱醉江樓。笙歌雜沓娛清夜。風露高寒接素秋。少日壯心輕玉塞。暮年幽夢墮滄洲。人間清絕沅湘路。常笑靈均作許愁。

遣興

老子從來薄宦情。不辭落魄錦官城。生前猶著幾兩屐。身後更須千載名。樓外雪山森曉色。井邊風葉戰秋聲。一尊尚有臨邛酒。卻爲無憂得細傾。邛州字文吏部餽酒絕佳。

六月九日夜步月至朝真觀

朝斗真人有舊祠。追涼老子曳筇枝。從來步月難爲客。此夕聽琴合有詩。竹院沉沉聞漏永。玉繩耿耿看星移。慙慙更作重來約。迨及冰輪未缺時。

十日夜月中馬上作

身遊碧海跨鯨魚。心似寒冰貯玉壺。衣溼三更清露墜。眼明萬里片雲無。橫空孤鶴曾相識。散髮飛仙定可呼。老向人間無復意。逝將從此謁清都。

百歲

百歲紛紛易白頭。一年鼎鼎又清秋。壯心空似驥伏櫪。病骨敢懷狐首丘。屠釣論交成酒隱。山林高臥得天遊。莫悲晚節功名誤。卽死猶堪贈醉侯。

獨飲醉臥比覺已夜半矣戲作此詩

澤畔元非慕獨醒。散人一飲費經營。也知世少蘇司業。安得官如阮步兵。醉著面顏驚少壯。澆餘胸次失醇醪。更闌莫厭殘燈火。臥聽空廊絡緯聲。

蒙恩奉祠桐柏

少年曾綴紫宸班。晚落危途九折艱。罪大初聞收郡印。恩寬俄許領家山。羈鴻但自思煙渚。病驢寧容著帝閑。回首觚稜渺何處。從今常寄夢魂間。

和范待制月夜有感

檣枋正復異鷗飛。等是垂頭受帶纜。坐客笑談嘲遠志。故人書札寄當歸。醉思葦菜黏篙滑。餓憶鱸魚墜釣肥。誰遣貴人同此感。夜來風月夢苔磯。

和范待制秋興

策策桐飄已半空。啼燈漸覺近房櫳。一生不作牛衣泣。萬事從渠馬耳風。名姓已甘黃紙外。光陰全付綠尊中。門前剝啄誰相覓。賀我今年號放翁。

又

睡臉餘痕印枕紋。秋衾微潤覆爐熏。井桐搖落先霜盡。衣杵淒涼帶月聞。佛屋紗燈明小像。經奩魚蠹蝕真文。身如病驥惟思臥。誰許能空萬馬羣。

又

山澤沉冥氣尙豪。鬢絲未遽歎蕭騷。已忘海運鯤鵬化。那計風微燕雀高。萬里客魂迷楚峽。五更歸夢隔胥濤。故知有酒當勤醉。自古寧聞死可逃。

和范待制秋日書懷二首。游自七月病起。蔬食止酒。故詩中及之。

閑窗貝葉對旁行。不覺城笳報夕陽。嗜酒步兵猶未達。拂衣司諫亦成忙。室無摩詰持花女。囊有娑婆等價香。欲與衆生共安隱。秋來夢不到鱸鄉。陳文惠公松江詩云。西風斜日鱸魚鄉。傳本或誤作香字。張文潛嘗辨之。

又

故人無字寄相思。敢向窮途怨不知。老病已全惟欠死。貪嗔雖斷尙餘癡。數莖雪鬢江湖遠。九轉金丹日月遲。畚粟山苗俱可飽。明年東去隱峨眉。

卷第八

遊學射山遇景道人

肩輿適青郊，飛屐登翠麓。餘霜未炫瓦，晨日初掛木。推門覓黃冠，避客似奔鹿。雖無與晤語，清坐意亦足。豈知逢此士，曠度超世俗。欣然同一笑，齒頰粲冰玉。探囊贈奇草，甘香勝芍菊。試臨清鏡照，衰髮森已綠。出門恣幽討，老仙有遺躅。丹竈雖已空，藥丸遍山谷。嗟予迫遲暮，冠蓋厭追逐。結茅遠人境，此計亦已熟。若人真我友，玉宇當共讀。客來不知處，雞犬望雲屋。

城東醉歸深夜復呼酒作此詩

冬夜走馬城東回，追風逐電何雄哉。五門鼓動燈火鬧，意氣忽覺如章臺。歸來脫靴靴滿霜，月明如水浸野堂。梅花滿手不可負，催熾獸炭傳清觴。書生所懷未易料，會與君王掃燕趙。只慙老不禁寒，臥載輜車君勿笑。

融州寄松紋劍

十年學劍勇成癡，騰身一上三千尺。術成欲試酒半酣，直躡丹梯削青壁。青壁一削平無蹤，浩歌卻過蓮花峯。世人仰視那得測，但怪雪刃飛秋空。老胡畏誅奉約束，假息漁陽連上谷。願聞下詔遣材官，恥作腐儒常碌碌。

歲晚

歲晚城隅車馬稀，偷閑聊得掩荆扉。征蓬滿野風霜苦，多稼連雲雁鶩肥。報國有心空自信，結茅無地竟

安歸浣花道上人誰識。華表千年老令威。

玉京行觀煉丹作。

玉京清都奉紫皇。赤明開皇劫茫茫。有路坦如馳康莊。惜哉背之趨死鄉。絳陵朱兒朝吐光。森然箭鏃攢玉牀。潔齋山棲賦不祥。朝餐夕食芝朮香。靈囊藥笈出祕方。日精月華鍊陰陽。爐開沐浴時日良。清夜玉杵聞琳房。服之刀圭換肝腸。三十六帝參翱翔。下視一笑爭奪場。纍纍枯冢壓北邙。

步出萬里橋門至江上

久坐意不懌。掩卷聊出遊。一筇吾事足。安用車與驄。浮生了無根。兩踵躡百州。常憶航巨海。銀山卷濤頭。一日新雨霽。微茫見流求。在福州泛海東。蜀見流求國。西行亦足快。縱獵南山秋。騰身刺猛虎。至今血濺裘。命薄每自笑。校尉略已侯。短劍隱市塵。浩歌醉江樓。頗疑屠博中。可與共奇謀。丈夫等一死。滅賊報國讎。徙倚萬里橋。寒日墮前洲。

晚步

院荒有古意。僧少無人聲。徘徊楠陰下。賞此落日明。著書亦何急。寂寞身後名。今年復止酒。歌舞陳空甍。不如且消搖。出門隨意行。看竹入廢園。望江上高城。纖纖素月出。靄靄蒼煙橫。此夕當復奇。嶽山吹玉笙。數日寒頓減。頗有春意感。懷賦短歌。

微陰寒不力。破臘春暗動。林梢報梅白。水際聞鳥哢。羈鴻漸整翮。一一勞目送。應憐飛蓬客。猶作浣花夢。平生江淮間。裘馬事豪縱。豈知老畏死。齋鉢受蔬供。忍饑每自笑。小飲未敢痛。何以慰寂寥。臥聽壓春甕。

春愁

春愁茫茫塞天地。我行未到愁先至。滿眼如雲忽復生。尋人似瘴何由避。客來勸我飛觥籌。我笑謂客君罷休。醉自醉。倒愁自愁。愁與酒如風馬牛。

歲暮感懷

征塵十載暗戎衣。虛負名山采藥期。少日覆甍曾草檄。卽今橫槊尙能詩。昏昏殺氣秋登隴。颯颯飛霜夜出師。會有英豪能共此。鏡中未用歎吾衰。

梅花

冰崖雪谷木未芽。造物破荒開此花。神全形枯近有道。意莊色正知無妄。高堅政要飽憂患。放棄何遽愁荒遐。移根上苑亦過計。竹籬茅屋真吾家。平生自嫌亦自許。妙處可譏不可誇。金樽翠杓未免俗。篝火爲試江南茶。

寺居夙興

閑居無一事。睡少自夙興。空庭翠霧合。高樹紅日昇。曳杖透四廊。悄然不逢僧。廚煙俄漠漠。魚鼓亦登登。晨粥香滿堂。梁肉坐可憎。匡山在何許。吾將買行藤。

萬里橋江上習射

坡隴如濤東北傾。胡牀看射及春晴。風和漸減雕弓力。野迴遙聞羽箭聲。天上機槍端可落。草間狐兔不須驚。丈夫未死誰能料。一箭他年下百城。

關山月

和戎詔下十五年。將軍不戰空臨邊。朱門沉沉按歌舞。廐馬肥死弓斷弦。戍樓刁斗催落月。二十從軍今白髮。笛裏誰知壯士心。沙頭空照征人骨。中原干戈古亦聞。豈有逆胡傳子孫。遺民忍死望恢復。幾處今宵垂淚痕。

出塞曲

佩刀一刺山爲開。壯士大呼城爲摧。三軍甲馬不知數。但見動地銀山來。長戈逐虎祁連北。馬前曳來血丹臆。卻回射雁鴨綠江。箭飛雁起連雲黑。清泉茂草下程時。野帳牛酒爭淋漓。不學京都貴公子。唾壺塵尾事兒嬉。

戰城南

王師出城南。塵頭暗城北。五軍戰馬如錯繮。出入變化不可測。逆胡欺天負中國。虎狼雖猛那勝德。馬前嗚啞爭乞降。滿地縱橫投劍戟。將軍駐坡擁黃旗。遣騎傳令勿自疑。詔書許汝以不死。股栗何爲汗如洗。

讀書

面骨崢嶸實欲疎。退藏只合臥蝸廬。自嫌尙有人間意。射雉歸來夜讀書。

又

歸老寧無五畝園。讀書本意在元元。燈前目力雖非昔。猶課蠅頭二萬言。時方說小本通鑑。

晚過保福

陸放翁集 九 劍南詩藁 卷八

堂靜僧閑普請疎。爐紅氈暖放參餘。蓮花池上容投社。椰子身中悔著書。茶試趙坡如潑乳。芋來犀浦可專車。放翁一飽真無事。擬伴園頭日把鉏。

偶過浣花感舊遊戲作

憶昔初爲錦城客。醉騎駿馬桃花色。玉人攜手上江樓。一笑鉤簾賞微雪。寶釵換酒忽徑去。三日樓中香未滅。市人不識呼酒仙。異事驚傳一城說。至今西壁餘小草。過眼年光如電掣。正月錦江春水生。花枝缺處小舟橫。閑倚胡牀吹玉笛。東風十里斷腸聲。

夜讀唐諸人詩多賦烽火者因記在山南時登城觀塞上傳烽追賦一首

我昔遊梁州。軍中方罷戰。登城看烽火。川迴風裂面。青燐竝略谷。隱翳連鄠縣。月黑望愈明。雨急滅復見。初疑雲罅星。又似山際電。豈無酒滿尊。對此不能嚙。低頭媿虎韉。零落白羽箭。何時復關中。卻照甘泉殿。

平明出小東門觀梅

知心多別離。慰眼易零落。東風吹梅花。爛漫照城郭。晴日千堆雪。偏宜馬上看。逢迎無幾日。不惜犯春寒。明年花發時。我在兩京道。花香固無盡。我亦未遽老。脫帽髮如漆。看花心未灰。平戎那得妨持酒。會有詩傳劍外來。

寺居睡覺

虛窗寂寂夜三更。燈斂殘光避月明。老嬾只貪春睡美。媿聞童子誦經聲。

又

心地安平曉夢長。忽聞魚鼓動修廊。披衣起坐清羸甚。想像雲堂魚粥香。僧雜菜餌之屬作粥名魚粥。

樓上醉書

丈夫不虛生世間。本意滅虜救河山。豈知躑躅不稱意。八年梁益凋朱顏。三更撫枕忽大叫。夢中奪得松亭關。中原機會嗟屢失。明日茵席留餘潛。益州官樓酒如海。我來解旗論日買。酒酣博籥爲歡娛。信手鼻盧喝成采。牛背爛爛電目光。狂殺自謂元非狂。故都九廟臣敢忘。祖宗神靈在帝旁。

醉題

裘馬精狂錦水濱。最繁華地作閑人。金壺投箭消長日。翠袖傳盃領好春。幽鳥語隨歌處拍。落花鋪作舞時茵。悠然自適君知否。身與浮名若箇親。

初春出遊

春風初來滿刁州。江水照人如潑油。犢車芳草南陌頭。家家傾貲事遨遊。萬里橋西繫黃驄。爲君一登散花樓。半長齋廢觥籌。興來忽典千金裘。小桃婀娜弄芳柔。紅蘭苗芽滿春洲。壚邊女兒不解愁。鬪草穠罷還藏鉤。可憐世人自拘囚。盎中乾坤舞蜉蝣。百年苦短去日遄。問君安用萬戶侯。

芳華樓夜飲

春風射雉苑城旁。走馬還來入醉鄉。夜暖酒波搖燭焰。舞回粧粉鑠花光。浮生一笑常難必。此樂七年未易忘。莫作五陵豪俠看。奚奴歸路有詩囊。

又

結客追遊亦樂哉。城南城北古池臺。香生赭汗連錢馬。光溢金船撥雪醅。難覓長繩磨日住。且憑羯鼓喚花開。一春政使渾無事。醉到清明得幾回。

東門外遍歷諸園及僧院觀遊人之盛

馬上哦詩畫醉鞭。東城南陌去翩翩。微風蹙水魚鱗浪。薄日烘雲卵色天。隔屋鳩鳴閑院落。爭門花簇小輜駟。病來久已疎杯酌。春物撩人又破禪。

城東馬上作

古寺名園處處行。翩然南陌復東城。手柔弓燥獵徒喜。耳熱酒酣詩興生。月似有情迎馬見。鶯如相識向人鳴。塵華病眼還三歎。猶擬中原看太平。

又

割鮮藉草醉春醪。仰看鳴鶴百尺高。杜老何妨希稷契。孔明本自陋袁曹。邊頭插羽無傳檄。篋裏盤鵝有舊袍。寄語長安衆年少。妓圍不似獵圍豪。

丁酉上元

突兀毬場錦繡峯。遊人女士擁千重。月雖雲海飛金鏡。燈射冰簾掣火龍。信馬隨車紛醉俠。賣薪買酒到耕農。今年自笑眞衰矣。但覺憑鞍睡思濃。

又

鼓吹連天沸五門。燈山萬炬動黃昏。美人與月正同色。客子折梅空斷魂。寶馬暗塵思輦路。釣船孤火夢

江村古來漫道新知樂。此意何由可共論。

又

放翁也入少年場。一笑燈前未歇狂。翠袖成圍欺月冷。氈車爭道覺塵香。蠻酥點綴春風早。楚餌留連夜漏長。結騎莫辭侵曉色。昔人萬里看西涼。

後陵永慶院在大西門外不及一里蓋王建墓也有二石幢猶當時物又有太后墓琢石爲人馬甚偉

陵闕淒涼俯舊邦。根流袞袞似長江。穿殘已歎金鳧盡。缺落空餘石馬雙。攬飯飢烏占寺鼓。避人飛鼠上經幢。阿和乳臭崇韜耄。堪笑昏童束手降。

小飲趙園

少年結騎厭追歡。漸老方知一笑難。邂逅偶能成午醉。登臨未覺怕春寒。高林橫鶴丹青幅。亂蝶爭花錦繡園。滿眼風光索彈壓。酒盃須似蜀江寬。

和范舍人書懷

歲月如奔不可遮。卽今楊柳已藏鴉。客中常欠尊中酒。馬上時看檐上花。末路淒涼老巴蜀。少年豪舉動京華。天魔久矣先成佛。多病維摩尙在家。

和范舍人病後二詩末章兼呈張正字

放衙元不爲春醒。澹蕩江天氣未清。欲賞園花先夢到。忽聞簷雨定心驚。香雲不動熏籠暖。蠟淚成堆斗

帳明關隴宿兵胡未滅。祝公垂意在尊生。

又

士生不及慶曆初。下方元祐當勿疎。請看蛟龍得雲雨。豈比烏雀馴階除。舍人起視北門草。學士歸著東觀書。劍外老農亦吐氣。釀酒畦花常晏如。

江路見杏花

我行浣花村。紅杏紅於染。數樹照南陂。一林藏北嶼。雖慚嶺梅高。繁麗豈易貶。雨絲飛復止。雲葉低未斂。似嫌風日緊。護此燕脂點。身閑得縱觀。無語吾所歎。

夜聞雨聲

高簷夜雨瀉淋漓。起擁寒衾旋炷香。春事豈堪頻破壞。客愁不可復禁當。長餅磊落輸郭醜。輕騎聯翩報海棠。著意物華君莫笑。世間得喪更茫茫。

海棠

十里迢迢望碧雞。一城晴雨不會齊。今朝未得平安報。便恐飛紅已作泥。

又

蜀地名花擅古今。一枝氣可壓千林。譏彈更到無香處。常恨人言太刻深。

張園海棠

洛陽春信久不通。姚魏開落胡塵中。楊州千葉昔曾見。已歎造化無餘功。西來始見海棠盛。成都第一推

燕宮池臺掃除凡木盡。天地眩轉花光紅。慶雲墮空不飛去。時有絳雪縈微風。蜂蝶成團出無路。我亦在走迷西東。此園低樹猶三丈。錦繡卻在青天上。不須更著刀尺裁。乞與齊奴開步障。

登劍南西川門感懷

自古高樓傷客情。更堪萬里望吳京。故人不見暮雲合。客子欲歸春水生。瘴癘連年須藥石。退藏無地著柴荆。諸公勉畫平戎策。投老深思看太平。

和范舍人永康青城道中作

風驅雨壓無浮埃。騁驪千騎東方來。勝遊公自輩王謝。淨社我亦追宗雷。岷山樓上一徙倚。如地始闢天初開。廓然眼界三萬里。山一體。涇水一杯。世間幻妄幾變滅。正自不滿吾曹哈。丈夫本願布衣老。達士詎畏蒼顏催。君看神君歲食羊四萬。處處棄骨高成堆。西山老翁飽松麩。造物賦子何遼哉。

宿上清宮

永夜寥寥憩上清。下聽萬壑度松聲。星辰頓覺去人近。風雨何曾敗月明。是夕山下風雨絕。頂月明達曉。早歲文辭妨至道。中年憂患博虛名。一菴儻許西峯住。常就巢仙問養生。上官道人巢居山中。

登上清小閣

樓觀參差倚晚晴。偶然信腳得閑行。欲求靈藥換凡骨。先挽天河洗俗情。雲作玉峯時特起。山如翠浪盡東傾。何因從此橫空去。笙鶴飄然過洛城。

小憩長生觀飯已遂行

清絕長生觀。再遊疑後身。人間空石劫。物外自壺春。道士青精飯。先生烏角巾。回頭增悵望。倦馬撲征塵。

新津小宴之明日欲遊修覺寺以雨不果呈范舍人

風雨長亭話別離。忍看清淚濕燕脂。酒光搖蕩歌雲暖。不似西樓夜宴時。

又

新津渡頭船欲開。山亭準擬把離盃。不如意事十八九。正用此時風雨來。

眉州驛舍睡起

平生百無能。一嬾每自喜。胡爲八年間。逐食走萬里。身如盤汞轉。心似爐丹死。事君未免媿。富貴不如已。雨餘古驛涼。晝寐無錯履。澹然得高臥。睡思極清美。心平了無夢。驚覺何自起。尙嫌漆園蝶。肯作南柯螻。斜陽生木影。龍蛇滿窗紙。煎茶儻已熟。一笑問童子。

送范舍人還朝

平生嗜酒不爲味。聊欲醉中遺萬事。酒醒客散獨悽然。枕上屢揮憂國淚。君如高光那可負。東都兒童作胡語。常時念此氣生瘴。況送公歸覲明主。皇天震怒賊得長。三年胡星失光芒。旄頭下掃在旦暮。嗟此大議知誰當。公歸上前勉畫策。先取關中次河北。堯舜尙不有百蠻。此賊何能穴中國。黃扉甘泉多故人。定知不作白頭新。因公併寄千萬意。早爲神州清虜塵。

過魚蛇市小寺

六月苦多雨。肩輿走江村。過市居人集。陟險兵子喧。日暎休野市。汛掃開北軒。霧氣如蒼虬。天矯出洞門。

溪清見白石，糾結菖蒲根。游魚去甚健，投餌棄不吞。嗟予獨何爲，貪祿忘故園。馳驅不自恤，面有風沙痕。俯仰二十年，竟孤明主恩。寄謝衆君子，努力蘇元元。

眉州作

扁舟久不泛蟆津，常恐黃塵解污人。爛醉破除千日漉，予不至眉山三年矣。狂吟判斷四州春，此行自成。那歷永康，唐安至眉山。汀洲漸歎蘋花老，風露初嘗荔子新。便欲騎鯨東海去，勝游未忍別峨眉。

過修覺山不果登覽

前日泛江時，雨昏失南山。今日迎我馬，鬢髻擁髻鬢。白塔映朱閣，問見青林間。問我豈忘之，揚鞭亟西還。西還亦聊爾，行矣來憑欄。擾擾紅塵中，豈無一日閑。會復廣此詩，大書榜其顏。但恐厄風雨，清游天所慳。

青城縣會飲何氏池亭贈譚德稱

赤日黃塵行路難，青城縣裏得偷閑。十年去國悲霜鬢，六月登樓望雪山。醉客千言猶落筆，美人斗酒未醺顏。憑誰喚住譚夫子，更與徘徊水石間。

題菴壁

偶向城南卜草廬，二年浪迹寄樵漁。大林獨臥豪猶在，萬衆橫行策竟疎。清濁戲分春甕酒，朱黃閱勘夜窗書。衰顏安用頻看鏡，日日元知有不如。

幽居

殊方飄泊向誰論，小住僧廬亦所欣。得飽罷揮求米帖，愛眠新著毀茶文。摘蔬籃小露清露，斲藥鉏輕帶。

溼雲從此生涯足幽事。宦遊虛用半生勤。

又

刻曲故廬歸未得。暫從地主借茅茨。桃花春水夢不到。菰菜秋風心自知。強健猶穿幾兩屐。榮華正似一
鈎絲。此心炯炯無人會。煙雨蒼茫獨立時。

浣花女

江頭女兒雙鬢丫。常隨阿母供桑麻。當戶夜織聲咿啞。地爐豆麩煎土茶。長成嫁與東西家。柴門相對不
上車。青裙竹筍何所嗟。插髻燦燦牽牛花。城中妖朱食而覆。爭嫁官人豈高華。青驪一出天之涯。年年傷
春抱琵琶。

七月八日馬上作

溝水浸新月。街槐生碧煙。明河七夕後。倦馬五門前。小市燈初鬧。高樓鼓已傳。賦詩寬客恨。哦罷卻凄然。

江樓

急雨洗殘瘴。江邊閑倚樓。日依平野沒。水帶斷槎流。擣紙荒村晚。呼牛古巷秋。腐儒憂國意。此際入搔頭。

夜登小南門城上

曳杖上江城。清宵破二更。月回高樹影。風壯急灘聲。野艇魚罾舉。優場炬火明。湖塘正如此。回首憶柴荆。
予故山在鏡湖之南

野步至青羊宮偶懷前年嘗劇飲於此

錦官門外曳枯筇。此地天教著放翁。萬事元無工拙處。一官已付有無中。擎雲柏樹瘦蛟立。繞郭江流清鏡空。欲把酒盃終覺嬾。緩歌曾醉落花風。

月夜江濱池納涼

微逕荒城曲。叢祠野水邊。月能從我醉。風欲駕人仙。靜看黏螢草。遙聞采芡船。熱官那有此。留滯莫尤天。

華亭院僧房

半闌朱門見綠苔。幽花仍傍小山開。劍南七月暑未退。明日更攜棋簞來。

又

悠悠馬上困思茶。休歇僧房到日斜。殿背無人綠鏡滿。小盆零落珊瑚花。

乾明院觀畫

唐年蘭若占閑坊。名畫蕭條半在亡。簌簌踈篁常似雨。陰陰古屋自生涼。入門疊鼓初催講。喚馬斜陽欲滿廊。顯晦熟思真有數。萬金奇跡棄頽牆。院中有黃筌花竹幾二十壁。多已壞矣。

登城

我登少城門。四顧天地接。大風正北起。號怒撼危堞。九衢百萬家。樓觀爭岌業。臥病氣壅塞。放目意頗愜。永懷河洛間。煌煌祖宗業。上天祐仁聖。萬邦盡臣妾。橫流始靖康。趙魏血可蹀。小胡事遠略。爲國恃剽劫。自量勢難久。外狃中已憚。籍民備勝廣。陞戟畏荆聶。誰能提萬騎。大呼去聲。擁馬鬣。奇兵四面出。快若霜掃葉。植旗朝受降。馳驛夜奏捷。豺狼一朝空。狐兔何足獵。遺民世忠義。泣血受汗膏。繫箭射我時。往椒五

陵俠。

秋日登仙遊閣

馬蹄連早暮。車塵細如霧。誰知此路邊。高閣下風馭。頗傳秋月夕。語笑聯杖屨。始知仙與人。混迹無異處。我來想鸞鶴。稽首祈一顧。飛仙不可見。惟與白雲遇。白雲如有情。傍我欄角住。借問何山來。雲驚卻飛去。

自詠

華髮蕭蕭居士身。江頭風雨折烏巾。無人問字尤宜嬾。有吏徵租未是貧。薄宦儻來難倚仗。舊交漸少每酸辛。敲門且復尋僧話。要結他生物外因。

雜詠

青羊宮中竹暗天。白馬廟畔柏如山。琴尊處處可消日。車馬紛紛自欠閑。

又

石犀廟墺江已回。陵谷一變吁可哀。即今禾黍連雲處。當日帆檣隱映來。

又

微風飄飄芋葉白。落日漠漠稻花香。出門縱轡何所詣。萬里橋南追晚涼。

又

世事盛衰誰得知。惠陵煙草掩柴扉。陵邊人家叢竹裏。燈火喧呼迎婦歸。

大醉歸南禪弄影月下作

昔我髮姓名，釣魚散花洲。有船不用楫，江急聽自流。卽今客錦城，醉過百花樓。天風吹筍輿，快若凌空遊。月露浩無際，指點隘九州。君看塵土中，頗有此樂不。題詩碧玉簡，飛仙相答酬。酒醒墮何處，樓臺海山秋。

訪楊先輩不遇，因至石室。

訪客客已去，追涼成獨行。衣冠嚴漢殿，草木拱秦城。古磬蒼苔滑，空庭落日明。出門還憶恍，列屋打碑聲。

繼東卽石經堂。

病酒戲作

新秋風月佳，數夕破酒戒。飲少輒醉眠，衰早頗自怪。高春未離枕，眩轉疑屋壞。家人具雞豚，熟視不能噉。尙無千里尊，敢覓鏡湖蟹。一盃苦蕒齋，價直娑婆界。

訪昭覺老

久矣耆年能送迎，喜聞革履下堂聲。遊山笑我蕩直去，過夏憐君太瘦生。庭際楠陰疑晝寂，牆頭鶻語報秋晴。功名已付諸賢了，長作閑人樂太平。

晝臥

秋暑侵人氣力微，燒香高枕掩齋扉。弄姿野蔭晴猶斂，作態江雲晚未歸。身外極知皆夢事，世間隨處有危機。故山松菊今何似，晚矣淵明悟昨非。

晚步江上

萬里橋邊帶夕陽，隔江漁市似清湘。山林獨往吾何恨，車馬交流渠自忙。高柳陰中扶拄杖，平沙穩處擲

胡牀故人京國無消息。安得相攜笑此涼。

夜坐

大風橫吹斗柄折。迅雷下擊山壁裂。放翁閉戶寂不聞。楞嚴卷盡燈花結。

夜行

紅藤拄杖扶衰病。村北村南破夜行。閑繞長堤逐螢火。戲臨荒沼問鼙聲。倦遊但有笭筇興。久客真諳櫂櫓情。安得故人同一醉。三更城上看河傾。

悲秋

一拋蓑笠雪溪舟。八載梁州復益州。纔破繁華海棠夢。又驚搖落井梧秋。曉班無復趨行殿。晚境惟思老瘵丘。病肺經旬疎酒盞。愁來惟是上南樓。

城北青蓮院。方丈壁間有畫燕子者。過客多題詩。予亦戲作二絕句。

一雙掠水燕來初。萬點飛花社雨餘。辛苦成巢君勿笑。從來吾亦愛吾廬。

又

明窗短壁拂蛛絲。常是江邊送客時。留滯錦城生白髮。不如巢燕有歸期。

睡起

閉身喜午睡。睡起日猶早。茂竹青入簷。幽花紅出草。苔錢亦滿砌。護惜不忍掃。宦情本自疎。此地可忘老。

天涯

天涯到處自生愁。游子征塵暗弊裘。燈火青檠五門夜。風煙索莫二江秋。帝城漫誦新詩句。客路難逢舊
輩流。送老把茅須早決。此生何止四宜休。

暇日行城上同行追不能及

疾步登城殊未衰。欣然一笑擲筇枝。正當閑似白鷗處。不減健如黃犢時。秋野煙雲橫慘淡。暮天樓閣倚
參差。高吟醉舞忘歸去。乞與丹青畫怪奇。

感秋

西風繁杵擣征衣。客子關情正此時。萬事從初聊復爾。百年強半欲何之。畫堂蟋蟀怨清夜。金井梧桐辭
故枝。一枕淒涼眠不得。呼燈起作感秋詩。

雙流旅舍

孤市人稀冷欲冰。昏昏一盞店家燈。開門拂榻便酣寢。我是江南行腳僧。

又

西風黃葉滿江村。瘦馬來穿渡口雲。動地傳呼逢醉尉。誰何禁殺故將軍。

又

每因餽肉歎身閑。聊欲勤勞鞍馬間。黑稍黃旗端未免。會衝風雪出榆關。

早行至江原

喔喔鳴雞促起程。翻翻飛鷺導孤征。節旄盡落歸猶遠。帶眼頻移瘦自驚。小市蕭條黃葉滿。斷橋零落綠

蒼生居人猶復多愁思。何況天涯倦客情。

安仁道中

千古臨邛路。飄然偶獨遊。病身那迫老。遠客更禁秋。水退橋未葺。渡閑船自流。飛騰付年少。回首思悠悠。

又

三驛未爲遠。衰翁愁出門。食程多卒卒。失眠每昏昏。天大圍平野。江回隔近村。何時有餘俸。小築占雲根。

八月十四夜三叉市對月

去年看月籬邊樓。雲罽微光如玉鉤。主人不樂客歎息。清歌空送黃金舟。今年看月三叉市。纖雲不作良宵祟。素娥命駕洗客愁。我亦傾杯邀共醉。風露萬里方渺然。冰輪無轍行碧天。盈盈耿耿意無盡。月不忍落人忘眠。一言欲報廣寒殿。茅簷華屋均相見。明年萬事不足論。但願月滿人常健。

豐橋旅舍作

我本山林人。心期在塵表。出門消底物。兩屨萬事了。羣兒何足愠。爲爾常悄悄。今朝山中路。更喜相識少。三叉市人醉爭席。豐橋逆旅留饋食。小婦梳髻高一尺。梭聲札札當戶織。

文君井

落魄西州泥酒盃。酒酣幾度上琴臺。青鞋自笑無羈束。又向文君井畔來。相如琴臺在成都城中。文君井在邛州。相傳爲卓氏故宅。

白鶴館夜坐

竹聲風雨交。松聲波濤飈。我坐白鶴館。燈青無晤言。廓然心境寂。一洗吏卒喧。袖手哦新詩。清寒魏雄渾。屈宋死千載。誰能起九原。中間李與杜。獨招湘水魂。自比竟寧寫。幾人望其藩。蘭空香幽翠。聖旨帝奇真。豈知雲海中。九萬擊鵬鷗。更闌燈欲死。此意與誰論。

南津勝因院亭子

南江平無風。如鏡新拂拭。漁舟不點破。激激千頃碧。闌干西北角。雲散山爭出。陂陁競南走。翠入窗戶窄。江山不世情。作意娛此客。豈無尊中酒。豪飲非宿昔。明當還成都。塵土埋馬跡。後巖在眼中。飛去無羽翼。後巖在鳳凰山後七八里山水尤奇絕。

登邛州譙門門三重其西偏有神仙張四郎畫像張蓋隱白鶴山中

浮雲在腳底。千里在眼邊。攀躋忽至此。倚柱眩欲顛。車馬細如螻。紛紛衢路間。嗟汝何爲者。馳驅窮歲年。我本澹蕩人。此心實愛閑。向來出處際。不媿咫尺天。風吹哦詩聲。十里搖西山。懸知老仙翁。爲我一粲然。

書寓舍壁

天與癡頑不解愁。未埋病骨且閑遊。山於拄杖橫時看。路到芒屨破處休。初擬燒丹住南嶽。卻因學劍客西州。秋風巾褐添蕭爽。又作臨邛十日留。

又

落佩頽冠慣放慵。經旬寓館古臨邛。西偏取路橫穿竹。北向開門倒看松。醉後蹇驢歸薄暮。閑來支枕睡高舂。鶴鳴山谷曾遊處。剩欲扶犁學老農。鶴鳴一名鶴鳴在邛之大邑縣。

次韻使君吏部見贈時欲遊鶴山以雨止

蟆頤江上約同行。白鶴峯前辱寄聲。青史功名男子事。後堂歌舞故人情。午甌誰致葉家白。春甕旋撥郎官清。登覽不嫌鳩喚雨。十年芒屨慣山程。

西巖翠屏閣

把酒孤亭半日留。西巖獨擅鶴山秋。也知絕境終難賦。且喜閒身得縱遊。鶴起危巢時磔磔。鹿鳴深澗暮呦呦。人生適意方爲樂。甲第朱門祗自囚。

幽居院

久墮塵沙裏。幽尋始此行。侵雲千嶂合。披草一僧迎。薜潤泉時滴。崖傾竹倒生。登高忽平曠。回首失巒嶷。老矣猶孤客。歸哉念耦耕。結廬殊未定。此地頗關情。

中溪

散人無俗事。日日山中行。今朝中溪寺。妙絕不可名。幽處萬木合。忽然千頃平。綠黛染晴嶂。白雲如玉城。巖花勸小酌。天風吹獨醒。雖無九臯鶴。奇哉此松聲。我如折翼鵬。回盡九萬程。脫屣擲拄杖。於此錢餘生。

天台院有小閣下臨官道予爲名曰玉霄

竹輿衝雨到天台。綠樹陰中小閣開。勝作玉霄君會否。要知散吏按行來。予所領崇道觀蓋在天台山中。玉霄峯下。

山中小雨得字文使君簡問嘗見張仙翁乎戲作一絕

張仙挾彈知何往，清嘯穿林但可聞。拾得鐵丸無處用，爲君打散四山雲。
張四郎常挾彈，視人家有災疾者輒以鐵丸擊散之。

雨中山行至松風亭忽澄霽

煙雨千峯擁髻鬟，忽看青嶂白雲間。卷藏破墨營丘筆，卻展將軍著色山。

贈宋道人

我不如昔人，騎鶴上九天。玉簡奏事虛皇前，平生齋養氣盡全。兩腳馳走輕如煙，鳥道懸崖忽飛蹇。戲擲短劍聲鏗然，轉盼跳下千仞淵。已復取劍升層巔，騰猿俊鶴爭後先。飢食松花掬飛泉，金骨綠髓漸凝堅。口哦七字黃庭篇，西來欲訪挾彈仙。丹經劍訣更精研，嗟哉一失五百年。作詩付子勿妄傳。

自山中泛舟歸郡城

我呼小艇浮南津，落日亂山衝半輪。背船雙鷺低掠水，下灘峭風冷逼人。中流回望始太息，煙中白塔高嶙峋。適從彼來忽在此，老夫拄杖捷有神。尉曹堆盤笠澤膾，秀才瀉榼中山春。豈惟外物不挂眼，醉後兀爾忘吾身。朝冠行卽挂神武，買犢遂欲耕峨岷。金丹自喜日日長，白髮未許年年新。擁橋炬火遠已闕，歸舍睡息清而勻。明朝笑謂同載客，有腳莫踏東華塵。

次韻宇文使君山行

城中望西山，爽氣固可致。不如山中行，衣屨染濃翠。使君資高逸，鐵馬奏橫吹。平郊何曠蕩，修竹亦清闕。既聞蘇門嘯，遂挹浮丘袂。似嫌太清絕，開宴盡主意。戲留楚臺雲，寶曆鬪妾媚。珠貫按歌聲，泉湧發詩思。

歸來殊不倦。吏牘閱千紙。卻笑江左人。把酒輒遺事。下客亦未衰。尙可提萬騎。安能學胡公。危苦寄鶴翅。仙人胡安學。道西巖。跨鶴上昇。山以此得名。

同王無玷羅用之訪臨邛道士墓

樂天詩句本嘲談。那有人從碧海來。五百年間逢好事。披榛來訪此崔嵬。

登太平塔

我從平地來。忽寄百尺巔。眼力與脚力。初不減少年。漸高山愈出。杳杳浮雲煙。舉手捫參旗。日月磨螭旋。天風忽吹衣。便欲從此仙。且復下梯去。著書未終篇。

中夜投宿修覺寺

陸走崔嵬水下瀧。客中更復客它邦。晚離方井雲藏市。夜渡新津火照江。人語紛紛投野寺。牀敷草草寄僧窗。五更風雨妨歸夢。臥看殘燈吐半缸。

絕勝亭

蜀漢羈遊歲月侵。京華乖隔少來音。登臨忽據三江會。飛動從來萬里心。地勝頓驚詩律壯。氣增不怕酒盃深。一琴一劍白雲外。揮手下山何處尋。

雲谿觀竹戲書二絕句

氣蓋冰霜勁有餘。江邊見此列仙瓊。清寒直入人肌骨。一點塵埃住得無。

又

溪光竹色兩相宜。行到溪橋竹更奇。對此莫論無肉瘦。閉門可忍十年飢。

九月十日如漢州小獵於新都彌牟之間投宿民家

適從邛州歸。又作漢州去。天低慘欲雪。遊子悲歲暮。十年辭京國。疋馬厭道路。陸火炎高岡。江雲暗空成。角弓塞始勁。霜鶻飢更怒。邂逅成小獵。尺箠聊指呼。北連武侯祠。南並稚子墓。合圍蹙窮鹿。設伏截狡兔。壯哉帶箭雉。耿介死不顧。吾寧暴天物。戰法因得寓。黃昏過民家。休馬燎裘袴。割鮮盛燔炙。毛血灑庭戶。老嫗亦復奇。汛掃邀我駐。丈夫儻未死。千金酬此遇。

獵罷夜飲示獨孤生

客途孤憤只君知。不作兒曹怨別離。報國雖思包馬革。愛身未忍貨羊皮。呼鷹小獵新霜後。彈劍長歌夜雨時。感慨卻愁傷壯志。倒瓶濁酒洗餘悲。

又

關輔何時一戰收。蜀郊且復獵清秋。洗空狡穴銀頭鶴。突過重城玉腕騮。賊勢已衰真大慶。士心未振尙私憂。一樽共講平戎策。勿爲飛鳶念少游。

又

白袍如雪寶刀橫。醉上銀鞍身更輕。帖草角鷹嗥兔窟。腥風羽箭作鴉鳴。關河可使成南北。豪傑誰堪笑死生。欲疏萬言投魏闕。燈前攬筆涕先傾。

自廣漢歸宿十八里草市

陸放翁集 九 劍南詩藁 卷八

月黑叩店門。燈青坐牀簀。飯糲雜沙土。菜瓊等草棘。泰然均一飽。未覺異玉食。我豈兒女哉。口腹爲怨德。古人恥懷祿。不仕當力穡。從今扶犁手。終老謝翰墨。

東郊飲村酒大醉後作

丈夫無苟求。君子有素守。不能垂竹帛。正可死隴畝。邯鄲枕中夢。要是念所有。持枕與農夫。亦作此夢否。今朝樸林下。取醉村市酒。未敢羞空囊。爛漫詩千首。

九月十八夜夢避雨叩一僧院有老宿年八十許邀留甚勤若舊相識者夢中爲賦此詩

畫簷急雨傾高秋。夜投丈室燈幽幽。蒼年擁毳雪滿頭。拂拭牀敷邀我留。離猊戲擲香出喉。蓬蓬結成蒼玉毳。蟄童揭簾待者憂。觸散香煙當罰油。

秋晚登城北門

幅巾藜杖北城頭。卷地西風滿眼愁。一點烽傳散關信。兩行雁帶杜陵秋。山河與廢供搔首。身世安危入倚樓。橫槊賦詩非復昔。夢魂猶繞古梁州。

卷第九

秋興

成都城中秋夜長。燈籠蠟紙明空堂。高梧月白繞飛鶴。衰草露溼啼寒螿。堂上書生讀書罷。欲眠未眠偏斷腸。起行百匝幾歎息。一夕綠髮成秋霜。中原日月用胡曆。幽州老翁著柘黃。滎河溫洛底處所。可使長

作游襄鄉。百金戰袍。鵬鶴盤三尺劍。鋒霜雪寒。一朝出塞。君試看。且發寶雞。暮長安。

夜飲

引劍酣歌亦壯哉。要君共覆手中盃。秋鴻陣密橫江去。暮角聲酣戰雨來。莫恨皇天無老眼。請看白骨有青苔。中年倍覺流光速。行矣西郊又見梅。

暮秋

時序中年速。風霜客路長。孤愁巴月白。清夢楚山蒼。燈暗秋銜壁。鐘疎夜殷床。端居有微祿。不敢恨殊方。

又

萬里歸無策。八年淹此留。羞蒙子公力。寧倦長卿遊。聽雨瀟湘夜。飛鷹鄆杜秋。更須論富貴。此計亦悠悠。

夜雨有感

北風吹雨暗江郊。十月僧廬補葺。病馬敢希三品料。驚禽聊借一枝巢。少待諸老爭求識。晚歲殊方罕定交。閉戶不妨新得趣。丹經盈篋手親抄。

道室

一室冷如水。人疑在定僧。手稱丹竈火。紗護佛龕燈。食減形雖槁。心虛氣自凝。平生坐忘論。字字欲銘膺。

飯罷戲作

南市沽濁醪。浮螿甘不壞。東門買醜骨。醃醬點橙齏。蒸雞最知名。美不數魚蟹。輪困犀浦芋。磊落新都菜。飲廣老饕賦。畏破頭陀戒。泥子齒日疎。大樹敢屢噉。杜老死牛齕。千古懲禍敗。閉門餌朝霞。無病亦無債。

初冬夜宴

絲管紛紛燭滿堂。鼻盧擲罷夜飛觴。惟犀風定歌雲暖。香獸煙濃漏箭長。泛菊已成前日夢。探梅又續去年狂。醉歸自笑摧頽甚。冷逼貂裘怯曉霜。

冬夜醉歸復小飲

野外歸來晚。空庭露氣新。乍晴雲妬月。多病酒欺人。倚杖行吟久。投盃起舞頻。早梅消息動。春事漸關身。

病酒述懷

閑處天教著放翁。草廬高臥竹橋東。數莖白髮悲秋後。一醜青燈病酒中。李廣射歸關月墮。劉琨罷罷塞雲空。古人意氣憑君看。不待功成固已雄。

數日暄妍頗有春意予閑居無日不出遊戲作

小春花蕾索春饒。已有暄風入紫貂。村路雨晴鳩婦喜。射場草綠雉媒嬌。苑邊結客飛金勒。樓上誰家弄玉簫。莫怪夕陽歸獨後。早梅喚我度谿橋。蜀宣華苑在麻詞池上。

遣興

香舊日凋謝。將如此老何。邁拈如意舞。狂叩唾壺歌。郡縣輕民力。封疆恃虜和。功名莫看鏡。吾意已蹉跎。

趙將軍并序

客爲予言靖康建炎間。關中奇士趙宗印者。提義兵擊虜。有衆數千。所向輒下。虜不敢當。會王師敗於富平。宗印知事不濟。大慟於王景略廟。盡以金帛散其下。被髮入華山。不知所終。予感

其事爲作此詩。

我夢遊太華。雲開千仞青。壁山瀉黃河。萬古仰巨靈。往者禍亂初。氛祲於太寧。豈無臥雲龍。一起奔風靈。時事方錯謬。三秦盡羶腥。山河銷王氣。原野失大刑。將軍散髮去。短劍斷茯苓。定知三峯上。爛醉今未醒。

江樓醉中作

淋漓百榼宴江樓。秉燭揮毫氣尚遒。天上但聞星主酒。人間寧有地埋憂。生希李廣名飛將。死慕劉伶贈。醉侯戲語佳人頰。一笑錦城已是六年留。退之詩云。越女一笑三年留。

曳策逆房園作

慈竹蕭森拱廢臺。醉歸曳策一徘徊。紛紛落日牛羊下。黯黯長空霰雪來。三峽猿催清淚落。兩京梅傍戰塵開。客懷已是淒涼甚。更聽城頭畫角哀。

謁漢昭烈惠陵及諸葛公祠宇

雨止風益豪。雪作雲不動。淒涼漢陵廟。衰草臥翁仲。畫妓空笙竽。土馬闕編韉。壤沃黃犢耕。柏密幽鳥啼。尙想忠武公。身任社稷重。整整渭上營。氣已無岐雍。少須天意定。破賊寧患衆。興亡信有數。星隕事可痛。陵邊四五家。茆竹居接棟。手皸紙上箔。居民皆以遺紙爲業。酷熱酒鳴壺。雖嗟生理微。亦足追飢凍。劉葛固雄傑。閱世均一夢。論高常近迂。才大本難用。九原不可作。再拜臨風慟。

遙夜

遙夜雨聲急。惜惜窗戶幽。開編弄舜在。得句鬼神愁。同俗愚儒鼻。容身壯士羞。燈殘不成睡。曉角動南樓。

遠遊

遠遊行復歲華新。嬾學劉郎問大鈞。一點不蒙稽古力。十分合作臥雲身。苦寒與酒頓增價。小雨爲梅先辟塵。擬佩一壺江路去。花邊醉墮白綸巾。

大雪歌 累日作雪竟不成 賦此篇

長安城中三日雪。潼關道上行人絕。黃河鐵牛僵不動。承露金盤凍將折。虬鬚豪客狐白裘。夜來醉眠寶釵樓。五更未醒已上馬。衝雪卻作南山遊。千年老虎獵不得。一箭橫穿雪皆赤。空爭死作雷吼。震動山林裂崖石。曳歸擁路千人觀。燭髓作枕皮蒙鞍。人間壯士有如此。胡不來歸漢天子。

簡譚德稱

幼與骨相稱山巖。自要閑遊不避譏。錦里先生爲老伴。玉霄散吏是頭銜。探春苑路花鬢帽。看月江樓酒滿衫。惟恨題詩無逸氣。媿君陣馬與風颿。

排悶

世事何知與願違。十年高臥看羣飛。獵園花市無人問。漁艇煙村有夢歸。銀燭焰長搖酒浪。寶刀佩穩壓戎衣。君看白首寒窗客。俠氣縱橫亦未非。

夜意

名姓人誰記。形骸老漸侵。酒慳停劇飲。詩退負高吟。雨隔疎更斷。雲藏古院深。衰遲常兀兀。惆悵少年心。

又

心清知睡少，氣定覺神凝。但有一無媿，何妨百不能。燈昏如隔霧，研冷欲生冰。兀爾遺身世，東窗待日升。

又

瘴地晨霜薄，郊墟暮雨昏。啼螿如有恨，微火解相溫。末路真無策，孤忠敢自言。輪囷肝膽在，白首倚乾坤。

玉局觀拜東坡先生海外畫像

商周去不還，盛哉漢唐宋。蘇公本天人，謫墮爲世用。太平極嘉祐，珠玉始包貢。公車三千牘，字字爰飛動。氣力倒犀象，律呂諧鸞鳳。天驥西極來，矯矯不受韉。飛騰上臺閣，廢放落雲夢。至寶不侵蝕，終亦老侍從。晚途遷海表，萬里天宇空。豈惟騎鯨魚，遂欲跨蟬螻。心空物莫撓，氣老筆愈縱。糝棘郊祀歌，遠友清廟頌。我生雖後公，妙句得吟諷。整衣拜遺像，千古尊正統。

心太平菴余取黃庭語名所寓室

天下本無事，庸人擾之耳。胸中故湛然，忿欲定誰使。本心倘不失，外物真一體。困窮何足道，持此端可死。空齋夜方中，窗月淡如水。忽有清磬鳴，老夫從定起。

訪客至西郊

城城敗葉飛，黯黯寒雲低。村墟與市里，觸目一悽悽。今日病體輕，駕言適城西。丹柿滿野店，青帘出江隄。獵騎載雉兔，樵檐懸鷄雞。居人各自得，使我念故谿。故谿不敢說，況復朝金閨。傷哉鬻雪翁，歲晚猶牧羝。下愚不自還，大惑終身迷。君恩何由報，力耕愧黔黎。

得都下八月書報蒙恩牧絳州

陸放翁集 九 劍南詩彙 卷九

九十五

鳳城書到錦江邊。故里歸期愈渺然。上山川初入夢。壺中日月尚經年。方輪落落難推轂。倦馬駸駸怕著鞭。未佩魚符無吏責。看花且作拾遺顛。戊期尙在明年冬。

晚起

寶劍捐書絕世緣。掩關高枕送流年。久從道士學躡息。誰管門生嘲腹便。化蝶飛時嗟昨夢。睡蛇去後喜安眠。欠伸看起東窗日。也似金鑿過八韞。

又

學道逍遙心太平。幽窗鼻息撼牀聲。柳花無蒂螢氈煖。龜甲有紋繒帳明。候起兒童陳鹽櫛。笑衰人客聞柴荆。此生睡足無餘念。安用元戎報五更。

江樓吹笛飲酒大醉中作

世言九州外。復有大九州。此言果不虛。僅可容吾愁。許愁亦當有許酒。吾酒釀盡銀河流。酌之萬斛玻璃舟。酣宴五城十二樓。天爲碧羅幕。月作白玉鉤。織女織慶雲。裁成五色裘。披裘對酒難爲客。長揖北辰相獻酬。一飲五百年。一醉三千秋。卻駕白鳳驂。班虬下與麻姑戲。玄洲錦江吹笛餘。一念再過劍南應小留。

晚登子城

江頭作雪雪未成。北風吹雲如有營。驅車出門何所詣。一放吾目登高城。城中繁雄十萬戶。朱門甲第何嵒嶮。錦機玉工不知數。深夜窮巷聞吹笙。國家自從失河北。煙塵漠漠暗兩京。胡行如鬼南至海。寸地尺天皆苦兵。老吳將軍獨護蜀。坐使井絡無機槍。名都壯邑數千里。至今不聞戎馬聲。安危自古有倚伏。相

持默默非敵情，棘門灑上勿兒戲。犬羊豈憚渝齊盟。

夙興出謁

嗜酒狂無敵，居家嬾有餘。苦寒愁手版，美睡付肩輿。覓句吟哦慣，逢人省識疎。亦知歸去好，無地著蝸廬。

十一月二日過升仙橋作

早過升仙不暇炊，橋邊買麩療朝飢。紛紛滿座誰能識，大似新豐獨酌時。

又

鬣手金鞭天馬駒，冰河雪谷笑談無。只言燕趙多奇士，豈必書生盡腐儒。

又

橋邊沙水綠蒲老，原上煙蕪黃犢閒。老子真成興不淺，憑鞍歸夢遶家山。

遣興

蓬壺舊隱已微茫，浪迹紅塵樂未央。縱酒山南千日醉，看花劍外十年狂。新詩刻燭驚詞客，駿馬追風戲鞠場。要是世間男子事，不須臺省競飛翔。

草堂拜少陵遺像

清江抱孤村，杜子昔所館。虛堂塵不掃，小徑門可款。公詩豈紙上，遺句處處滿。人皆欲拾取，志大才苦短。計公客此時，一飽得亦罕。阨窮端有自，寧獨坐房瑄。至今壁間像，朱綬意蕭散。長安貂蟬多，死去誰復算。

青羊宮小飲贈道士

青羊道士竹爲家。也種玄都觀裏花。微雨晴時看鶴舞。小窗幽處聽蜂衙。藥爐宿火焚殘燧。醉袖迎風獵獵斜。老我一官真漫浪。會來分子淡生涯。

夜寒

清夜焚香讀楚詞。寒侵貂褐歎吾衰。輕冰滿研風聲急。忽記山陰夜雪時。

又

斗帳重茵香霧重。膏粱那可共功名。三更騎報河冰合。鐵馬何人從我行。

書懷

武擔山上望京都。誰記黃公舊酒壚。宿負本宜輸左校。寬恩猶聽補東隅。一官漫浪行將老。萬卷縱橫只自愚。甫里松陵在何許。古人投劾爲尊鱸。

記夢

烏巾白紵憶當年。抵死尋春不自憐。顛顛劍南雙鬢改。夢中猶上暗門船。

又

團臍霜蟹四腮鱸。樽俎芳鮮十載無。塞月征塵身萬里。夢魂也復醉西湖。

醉中出西門偶書

古寺閑房閉寂寥。幾年耽酒負公朝。青山是處可埋骨。白髮向人羞折腰。末路自悲終老蜀。少年常願從征遼。醉來挾箭西郊去。極目寒蕪雉兔驕。

訪客不遇

風急斜吹帽，泥深亂濺衣。杜門常畏罵，訪客卻空歸。老馬舉蹄懶，枯槐無葉飛。馳驅幾時了，散髮憶苔磯。

劍客行

世無知劍人，太阿混凡鐵。至寶棄泥沙，光景終不滅。一朝斬長鯨，海水赤三月。隱見天地間，變化豈易測。國家未滅胡，臣子同此責。浪迹潛山海，歲晚得劍客。酒酣脫匕首，白刃明霜雪。夜半報讎歸，斑斑腥帶血。細讎何足問，大恥同憤切。臣位雖卑賤，臣身可屠裂。誓當函胡首，再拜奏北闕。逃去變姓名，山中餐玉屑。故蜀別苑在，成都西南十五六。里梅至多有，兩大樹天矯若龍。若龍相傳謂之梅龍，予初至蜀嘗爲作

詩自此歲常訪之，今復賦一首，丁酉十一月也。

昔年曾賦西郊梅，茫茫去日如飛埃。卽今衰病百事懶，陳迹未忘猶一來。蜀王故苑犁已遍，散落尙有千雪堆。珠樓玉殿一夢破，煙蕪牧笛遺民哀。兩龍臥穩不飛去，鱗甲脫落生莓苔。精神最遇雪月見，氣力苦戰冰霜開。羈臣放土耿獨立，淑姬靜女知誰媒。摧傷雖多意愈厲，直與天地爭春回。蒼然老氣壓桃李，笑我白髮心尙孩。微風故爲作嫵媚，一片吹入黃金臺。

閑意

柴門雖設不曾開，爲怕人行損綠苔。妍日漸催春意動，好風時捲市聲來。學經妻問生疎字，嘗酒兒斟澆澆盃。安得小園寬半畝，黃梅綠李一時栽。

飲罷夜歸

陸放翁集 九 劍南詩集 卷九

老病畏多酌，退閑愁夜行。市燈疎欲盡，樓月澹初生。露冷莎蛩咽，天高塞雁征。歸來差自喜，擁被聽疎更。

江亭冬望

霜落江澗水，見魚偶來徙。倚草亭孤，雪天黯淡常如晚。煙樹微茫，直欲無。下澤乘車終碌碌，上方請劍漫區區。擬將疎逸消豪氣，尋罷酒徒尋獵徒。

大風登城

風從北來不可當，街中橫吹人馬僵。西家女兒午未粧，帳底爐紅愁下牀。東家喚客宴畫堂，兩行玉指調絲簧。錦繡四合如垣牆，微風不動金猊香。我欲登城望大荒，勇欲爲國平河湟。才疎志大不自量，西家東家笑我狂。

書雨

仲冬候始寒，丙夜天正黑。雨來挾風助，吼擊不遺力。聲如拔高山，勢若伐強國。初憂老柏折，遂恐石筍踣。乾坤本無心，百神各效職。蛟龍鬪歲暮，豪橫理莫測。農功幸已成，龍怒亦會息。屋漏何足言，袖手姑默默。

一笑

半醉微吟不怕寒，江邊一笑覺天寬。莫愁艇子急衝雨，何遜梅花頻倚闌。萬事任從皮外去，百年聊作夢中觀。放翁縱老狂猶在，倒盡金壺燭未殘。

歲晚懷鏡湖舊隱慨然有作

公府還家鬢未秋，鏡湖南畔決歸休。讀書精舍豈輕出，采藥名山成遠遊。白墮興來猶小醉，青精材足更

何求。俗間毀譽惟堪笑。常隘韓公咎斗牛。

華髮

華髮蕭蕭老蜀關。倦飛可笑不知還。人生只似駒過隙。世事莫驚雷破山。光景半銷樽酒裏。英豪或隱博徒間。車帷閉置真何樂。書劍飄然未厭閑。

歎息

國家圖籙合中興。歎息吾寧粥飯僧。賣劍買牛豈可足。裹裘爲袴豈曾能。楚邊討賊雲蔽墨。夜讀兵書雨灑燈。安得龍媒八千騎。要令窮虜畏飛騰。

冬至

歲月難禁節物催。天涯回首意悲哀。十年人向三巴老。一夜陽從九地來。上馬出門愁斂版。還家留客盃傳杯。探春漫道江梅早。盤裏酥花也鬪開。

城南尋梅得

老子今年爛賦詩。風光料理鬢成絲。青羊宮裏春來早。初見梅花第一枝。

又

黯淡江天雪欲飛。竹籬數掩傍苔磯。清愁滿眼無人說。折得梅花作伴歸。

又

青煙漠漠暗西村。問訊梅花置一尊。冷淡生涯元不惡。卻嫌吹火合工圓。成都故事合江圖。官梅開及五

分卸病君頓客來遊。

又

籬邊細路竹間庵。一段風流擅劍南。吾國以香爲佛事。客來試向鼻端參。

書歎

歷盡危塗井與參。鬢毛飽受雪霜侵。平生不可俗子眼。後世誰知吾輩心。河洛方行胡正朔。山林虛度醉光陰。浩歌未闕先投枕。衰病常憂感慨深。

感興

少小還喪亂。安意憂元元。忍飢臥空山。著書十萬言。賊亮負函貸。江北煙塵昏。奏記本兵府。大事得具論。請治故臣罪。深絕衰亂根。言疎卒見棄。袂有血淚痕。爾來十五年。殘勝尙遊魂。遺民淪左衽。何由雪煩冤。我髮日益白。病骸寧久存。常恐先狗馬。不見清中原。

又

高帝王蜀漢。天下豈易圖。幡然用其鋒。項羽不支梧。嗟余昔從戎。久戍南鄭墟。登高望夕烽。咫尺咸陽都。羣胡本無政。剽奪常自如。民窮訴蒼天。日夜思來蘇。連年況枯旱。關輔尤空虛。安得節制帥。弓刀肅馳驅。父老上牛酒。善意不可孤。諸將能辦此。機會無時無。

暮冬夜宴

官機錦茵金燧鳳。舞娃斂履雙寶重。寶爐三尺香吐霧。畫燭如椽風不動。主人愛客情無已。箏聲未斷歌

聲起亦知百歲等朝露。便恐一歎成覆水。爐紅酒綠春爲回。坐上梅花連夜開。堂前只尺異氣候。冰合平池霜壓階。

枕上

枕上三更雨。天涯萬里遊。蟲聲情好夢。燈影伴孤愁。報國計安出。滅胡心未休。明年起飛將。更試北平秋。

謁石犀廟

閑過石犀祠。登堂一歎歎。江回陵谷變。碑斷市朝非。有王蜀時修廟。拜錢荒園連。寒壘斜陽映。夕霏興亡俱。昨夢惆悵跨驢歸。

江上散步尋梅偶得三絕句

小園風月不多寬。一樹梅花開未殘。剝啄敲門嫌特地。緩拖藤杖隔籬看。

又

鐘殘小院欲消魂。漠漠幽香伴月痕。江上人家應勝此。明朝更出小南門。萬里橋門一名小南門。

又

小南門外野人家。短短疎籬綠白沙。紅稻不須鸚鵡啄。清霜催放兩三花。

澹漪亭賞梅

判爲梅花倒玉卮。故山幽夢憶疎籬。寫真妙絕橫窗影。徹骨清寒蘸水枝。苦節雪中逢漢使。高標淨畔見湘雲。詩成怯爲花拈出。萬斛塵襟我自知。

芳華樓賞梅

素娥竊藥不奔月。化作江梅寄幽絕。天工丹粉不敢施。雪洗風吹見真色。出籬藏塢香細細。臨水隔煙情脈脈。一春花信二十四。縱有此香無此格。放翁年來百事惰。唯見梅花愁欲破。金壺列置春滿屋。寶鬢斜簪光照坐。百榼淋漓玉屏飛。萬人辟易銀鞍過。不惟豪橫壓清臞。聊爲詩人洗寒餓。

浣花賞梅

老子人間自在身。插梅不惜損烏巾。春回積雪層冰裏。香動荒野水濱。帶月一枝低弄影。背風千片遠隨人。石家樓上貪吹笛。肯放朝朝玉樹新。

蜀苑賞梅

十里溫香撲馬來。江頭還見去年梅。喜開剩欲邀明月。愁落先教掃綠苔。跌宕放翁新醉墨。淒涼廢苑舊歌臺。盛衰自古無窮事。莫向昆明歎劫灰。

大醉梅花下走筆賦此

閉門坐歎息。不飲輒千日。忽然酒興生。一醉須一石。檐頭花易老。旗亭酒常窄。出郊索一笑。放浪謝形役。把酒梅花下。不覺日既夕。花香襲襟袂。歌聲上空碧。我亦落烏巾。倚樹吹玉笛。人間奇事少。頗謂三勅敵。酒闌江月上。珠樹挂寒壁。便疑從此仙。朝市長掃迹。醉歸亂一水。頓與異境隔。終當騎梅龍。海上看春色。梅龍蓋蜀苑中故物也。

之廣都慈鐵像院

歲暮天苦寒。風雨復乘之。道邊得古寺。欣然具晨炊。瘦樹立中庭。斷蔓絡短籬。小僧爲設爐。童子燒稿枝。坐令手足柔。髭鬚失冰澌。敬禮龕中像。盡讀廡下碑。少年志四方。故里了不思。晚知行路難。更覺遊子悲。一官始巴剌。刻曲歸何時。置之勿復道。爛醉忘天涯。

廣都江上作

微波不搖江。纖雲不行天。我來倚杖立。天水相澄鮮。平遠望不盡。日落自生煙。梅花耿獨立。雪樹明前川。好風吹我衣。春色已粲然。東村聞酒美。買醉上漁船。

宿龍華山中寂然無一人方丈前梅花盛開月下獨觀至中夜

梅花如高人。枯槁道愈尊。君看空谷豈。比倚市門。我來整冠佩。潔齋三沐熏。亦思醉其下。燕靖忍澣君。敬抱綠綺琴。玄酒挹古罇。月明流水閑。一洗世濁昏。摸寫香與影。計君已厭聞。老我少傑思。尙喜非陳言。

次韻張季長正字梅花

倚橋臨水似催詩。戲伴鵝黃上柳絲。萬里西湖驚斷夢。二年東閣憶幽期。游曾官唐安。插瓶直欲連金樹。簪帽憑誰揀好枝。一味淒涼君勿歎。平生初不願春知。

次韻季長見示

倚遍南樓十二欄。長歌相屬寓悲歡。空懷鐵馬橫戈意。未試冰河墮指寒。成敗極知無定勢。是非元自要徐觀。中原阻絕王師老。那敢山林一枕安。

廣都道中呈季長

天上石渠郎。能來伴楚狂。風霜朝並鬢。燈火夜連牀。江水不勝綠。梅花無賴香。劇談那得住。出處要平章。

看梅歸馬上戲作

平明南出笮橋門。走馬歸來趁未昏。漸老更知閑有味。一冬強半在梅村。

又

本爲梅花判痛飲。卻嗅梅香消宿醒。日欲落時始上馬。青羊宮前聞發更。

又

一點不雜桃李春。一水隔斷車馬塵。恨不來爲清夜飲。月中香露溼烏巾。

又

江路疎籬已過清。月中霜冷若爲情。不如折向金壺貯。畫燭銀燈看到明。

又

江郊車馬滿斜暉。爭趁南城未闔扉。要識梅花無盡藏。人人襟袖帶香歸。

別後寄季長

俗子俗到骨。一搥已溷人。不知此曹面。何處得許塵。我非作崖塹。汝自不可親。道途逢使君。令我生精神。頓墮江山麗。更覺風月新。對牀得晤語。傾倒夜達晨。亟起忘縛袴。小醉或墮巾。繚出錦城南。問訊江梅春。煎茶憩野店。喚船截煙津。淒涼弔廢苑。蕭散誇閑身。暮歸度略約。月出水鱗鱗。思君去已遠。此會何由頻。

中夜對月小酌

今夕復何夕。素月流清輝。徘徊入我堂。化作白玉墀。栖鳥滿高樹。空庭結煙霏。可憐如許景。早眠人不知。我幸與周旋。一醉那得辭。整我接羅巾。斟我翡翠卮。清愁不可耐。三嗅梅花枝。

客愁

騎馬出門無所詣。端居正爾客愁侵。蒼顏白髮入衰境。黃卷青燈空苦心。天下極知須雋傑。書生何恨死山林。消磨未盡胸中事。梁甫時時尚一吟。

詩酒

酒灑凌晨醉。詩狂徹旦歌。憫憐蝸左角。嘲笑螻南柯。風月隨長笛。江湖入短裘。平生會心處。最向漆園多。

道室晨起

寒泉漱酒醒。午夜誦仙經。茶鼎聲號蛭。香盤火度螢。齋心守玄牝。閉目得黃寧。寄語山中友。因人送茯苓。

紙帳晨光透。山爐宿火燃。雞鳴猶喔喔。鴉起已翩翩。形槁寒巖木。心凝古澗泉。何須更臨鏡。斷是一癡仙。

城南王氏莊尋梅

酒池積槁葉。茆屋圍疎籬。可憐庭中梅。開盡無人知。寂莫終自香。孤貞見幽姿。雪點滿綠苔。零落尙爾奇。我來不須晴。微雨正相宜。臨風兩愁絕。日暮倚筠枝。

遊萬里橋南劉氏小園

佳園寂無人。滿地梅花香。閑來曳拄杖。臘月日已長。朱橋架江面。欄影搖波光。奇哉小垂虹。夢破鱸魚鄉。

汀鷺一點白。煙柳千絲黃。便欲喚釣舟。散髮歌滄浪。可憐隔岸人。車馬日夜忙。我歸門復掩。寂歷挂斜陽。

過雀橋道中龍祠小留

江邊龍廟何年作。白浪花中插朱閣。朝暾漸上宿霧收。春氣已動晨霜薄。我來倚欄一悵然。蘆花滿空如柳綿。安得身為雙白鷺。飛上灘頭卻飛去。

道上見梅花

載酒房湖風日美。探梅喜折一枝新。今朝忽向街頭見。萬萼千跗俗卻春。

倚樓

滅盡朱顏白髮新。高樓徙倚默傷神。未酬馬上功名願。已是人間老大身。太史周南方臥疾。拾遺劍外又逢春。一杯且爲江山醉。百萬呼盧迹已陳。

寄王季夷

平生吾子最知心。巴隴飄零歲月侵。萬里喜聞身尚健。五更惟有夢相尋。插花意氣狂如昨。中酒情懷病至今。共約暮年須強飯。天台廬阜要登臨。

丁酉除夕

浮生過五十。光景如飛鴻。寒暑俛仰間。四序忽已終。殊方感飄泊。晚境嗟龍鍾。桃符與爆竹。嬾復隨兒童。不寐非守歲。燕坐夜過中。氣定神自凝。海日何曠曠。豈惟三彭透。坐覺六入空。徂年勿惆悵。閱世方無窮。

正月二日晨出大東門是日府公宴移忠院

成都春事早。開歲已暄妍。檐尾傳盃後。遨頭出郭前。爭門金駟裏。滿野繡鞦韆。白髮花邊醉。何妨似少年。

小飲落梅下戲作送梅一首

零落梅花不自由。斷腸容易付東流。與人又作經年別。問月應知此夜愁。已是狂風卷平野。更禁橫笛起危樓。何時小雪山陰路。處處尋香繫釣舟。

立春

鬢毛蕭颯寸心灰。生怕新年節物催。幸是身閑朝睡美。忽聞鼓吹打春回。

初春出遊戲作

綠窗百舌喚春眠。問柳尋花意已便。京洛化衣無夢去。邯鄲觀伎有詩傳。銅壺閣下閑欹帽。石鏡坊前戲逐鞭。酒醒人間君勿誚。定勝山澤作臞仙。

初春遣興始於志退休而終於飽飽許國之忠亦臣子大義也

爛熟思來怕熱官。退飛心地喜輕安。栖魚正可取熊掌。食肉何須知馬肝。放眼柳梢初暗動。褪花梅子已微酸。典衣剩作江頭醉。莫謂天涯苦鮮歡。

又

大隱悠悠未棄官。俸錢雖薄卻心安。人方得意矜蝸角。天豈使予爲鼠肝。佳日劇蕪忘旅恨。短衣馳射壓儒酸。小桃楊柳爭時節。載酒江頭罄一歡。

又

白髮淒涼故史官。十年身不到長安。卽今天末弔形影。何日上前傾肺肝。孤憤書成詞激烈。五噫歌罷意辛酸。此懷欲說無人共。安得相攜素所歡。

子年十六始識葉晦叔於西湖。上後二十七年。晦叔之弟聲叔來爲臨邛守。相遇於成都。晦叔沒久矣。訪其遺文。略無在者。乃賦此詩。

故人零落久山丘。誰記京華第一流。曹霸揮毫空萬馬。庖丁投刃解千牛。相逢夢境何勞記。追想清言未免愁。雷電取將遺稿盡。他年虛有茂陵求。

初春探花有作

燈山昨夢歎怱怱。便恐新春過眼空。千縷未搖官柳綠。一梢初放海棠紅。金羈絡馬閑遊處。彩筆題詩半醉中。流落天涯何足道。年年常策探花功。

遊諸葛武侯書臺

沔陽道中草離離。臥龍往矣空遺祠。當時典午稱猾賊。氣喪不敢當王師。定軍山前寒食路。至今人祠丞相墓。松風想像梁甫吟。尙憶幡然答三顧。出師一表千載無。遠比管樂蓋有餘。世上俗儒寧辦此。高臺當日讀何書。

觀花

我遊西川醉千場。萬花成圍柳著行。紅錦地衣舞霓裳。翠裙繡袂天寶粧。清歌一發無留觴。嫋嫋餘聲染杏梁。黃金絡馬照路光。自護羅羅觀海棠。搜奇選勝日夜忙。不惟燕宮碧雞坊。暮歸奚奴負錦囊。路人爭

看放翁狂

張園觀海棠

朝陽照城樓。春容極明媚。走馬蜀錦園。名花動人意。嚴妝漢宮曉。一笑初破睡。定知夜宴歡。酒入妖骨醉。低鬟羞不語。困眼嬌欲閉。雖豔無俗姿。太息真富貴。結束吾方歸。此別知幾歲。黃昏廉纖雨。千點裏紅淚。

月夕

醉從東郭歸。散髮臨前楹。呼僮淨埽地。勿使駭月明。庭空臥松影。簷迥送鐸聲。鐘斷心境寂。露下毛髮清。出門碧霧合。九陌無人行。坐令錦官城。化作白玉京。

夜飲卽事

天涯久客我何堪。聊喜燈前得縱談。磊落金盤薦糖蟹。纖柔玉指破霜柑。燭圍寶馬人將起。花壓紗巾酒正酣。更作茶甌清絕夢。小窗橫幅畫江南。

夜宴賞海棠醉書

便便癡腹本來寬。不是天涯強作歡。燕子歸來新社雨。海棠開後卻春寒。醉誇落紙詩千首。歌費纏頭錦百端。深院不聞傳夜漏。忽驚蠟淚已堆盤。

二月十六日賞海棠

常年春半花事竟。今年春半花始盛。衰翁不減少年狂。走馬直與飛蝶競。妍華有露洗愈明。纖弱無風搖不定。莫放飄零作紅雨。剩看情笑臨粧錦。深梅枯槁墮巖谷。山杏輕浮真妾媵。欲誇絕豔不勝說。縱欠濃

香何足病。華燈銀燭搖花光。翠杓金盃影。西興夜鬪。或事獨凄然。繁枝空折誰堪贈。

卽席

解鞅名園眼倍明。殷勤翠袖勸飛觥。海棠紅杏欲無色。蛺蝶黃鸝俱有情。去日不留春漸老。歸舟已具客將行。倦遊短髮無多綠。生怕尊前唱渭城。

東歸有日書懷

萬里橋邊白版扉。三年高臥謝塵鞿。半窗竹影蒹葭去。滿棹蘋風釣伴歸。看鏡已添新雪鬢。聽雞重拂舊朝衣。故人零落今無幾。華表空悲老令威。

眉州披風榭拜東坡先生遺像

蜿蜒回顧山有情。平鋪十里江無聲。孕奇蓄秀當此地。鬱然千載詩書城。高臺老仙誰所寫。仰視眉宇寒嶸嶸。百年醉魂吹不醒。飄飄風袖筇枝橫。爾來逢迎厭俗子。龍章鳳姿我眼明。北扉南海均夢耳。謫墮本自白玉京。惜哉畫史未造極。不作散髮騎長鯨。故鄉歸來要有日。安得春江變酒從公傾。

陸放翁集

劍南詩彙

卷第十

訪青神尉廨借景亭蓋山谷先生舊遊也

造朝下白帝。弔古遊青神。城頭三間屋。聊得岸我巾。元祐太史公。世寧有斯人。瘴煙侵玉骨。老作宜州民。至今杖履地。來者猶酸辛。密竹翳已空。喬木亦半薪。陂池獨渺然。中有鷗鷺馴。人生能自足。一尉可終身。三歎下城去。捩柁春江津。

舟過玉津

玻璃江上送殘春。疊鼓催颿過玉津。蜀苑鶯花初破夢。巴山風月又飄身。隔巾久已忘朝幘。短劍惟思隱市塵。莫倚諸公容此老。西曹那許吐車茵。

敘州

畫船衝雨入戎州。縹緲山橫杜若洲。須信時平邊堠靜。傳烽夜夜到西樓。州治西樓。

又

文章何罪觸雷霆。風雨南谿自醉醒。八十年間遺老盡。壞堂無壁草青青。無等院山谷故居。

又

楚施吳檣又遠遊。浣花行樂夢西州。千尋鐵鎖還堪恨。空鎖長江不鎖愁。鐵江亭。

瀘州使君巖在城南一里深。三丈有泉出其左。音中律呂木龍巖。相距亦里許。黃太史所嘗遊憩也。

雲間刁斗過邊州。沙際丘亭巖客舟。漲水方憂三峽險。短筇猶作兩巖遊。蛟龍矯矯拳雲起。翠嶺泠泠繞榻流。未死人生誰料得。會來攜客試茶甌。

南定樓遇急雨

行過梁州到益州。今年又作度瀘遊。江山重復爭供眼。風雨縱橫亂入樓。人語朱離逢鬪獠。棹歌欸乃下吳舟。天涯住穩歸心嬾。登覽茫然卻欲愁。

夜泊合江縣月中小舟謁西涼王祠

懸瀑雪飛舞。奇峯玉麟岫。搖碎一江月。來謁西涼神。我雖不識神。知是山水人。不敢持笏來。極褻整幅巾。出我囊中香。羞我南谿蘋。杯湛玻璃春。盤橫水精鱗。出門意恂恂。煙波浩無津。安得結菲地。與神永爲鄰。

風順舟行甚疾戲書

昔者遠戍南山邊。軍中無事酒如川。呼盧鳴雉連暮夜。擊兔伐狐窮歲年。壯士春蕪臥白骨。老夫晨鏡悲華顛。可憐使氣尙未減。打鼓順流千斛船。

舟中對月

百壺載酒遊凌雲。醉中揮袖別故人。依依向我不忍別。誰似峨眉半輪月。月窺船窗挂淒冷。欲到瀘州酒

初醒江空裊裊釣絲風。人靜翩翩葛巾影。哦詩不睡月滿船。清寒入骨我欲仙。人間更漏不到處。時有沙禽背船去。

漁翁

江頭漁家結茆廬。青山當門畫不如。江煙淡淡雨疎疎。老翁破浪行捕魚。恨渠生來不讀書。江山如此一句無。我亦衰遲慚筆力。共對江山三歎息。

涪州道中

遠客喜歸路。清遊逾昔聞。雨添山翠重。舟壓浪花分。洛叟經名世。張侯勇冠軍。郡境有伊川先生故居及張益德祠。懷人不可覲。袖手對爐熏。

涪州

古壘西偏曉繫舟。倚欄搔首思悠悠。欲營丹竈竟無地。地盡丹砂不見荔枝空。遠遊官道近江多亂石。人家避水半危樓。使君不用勤留客。瘴雨蠻雲我欲愁。太守招飲辭不往。

北巖有程正叔先生祠堂

艤船涪州岸。攜兒北巖遊。搖櫂橫大江。蓑裳躡高樓。雨昏山半失。江漲地欲浮。老矣寧再來。爲作竟日留。烏帽程丈人。閉戶本好修。駭機一朝發。議罪至竄投。黨禁久不解。胡塵暗神州。修怨以稔禍。哀哉誰始謀。小人無遠略。所懷在私讎。後來其鑑茲。賦詩識巖幽。

平都山忠州豐都縣

名山近江步。蠖展得閑行。奔鹿衝人過。藏丹徹夜明。唐碑多斷蝕。梁殿半欹傾。洞口雲常湧。蒼牙柏再榮。行逢負籠客。臥聽送船聲。乞我誅卯地。靈苗得共烹。

忠州禹廟

古郡巴蠻國。空山夏禹祠。鴉歸暗庭柏。巫拜薦江離。草蔓青緣壁。苔痕紫滿碑。欲歸頻悵望。回棹夕陽時。

忠州醉歸舟中作

耿耿船窗燈火明。東樓飲罷恰三更。不堪酒渴兼消渴。起聽江聲雜雨聲。垂首道塗悲驛老。滿懷風露覺蟬清。蘭亭禹廟山如畫。安得飄然送此生。

雨中遊東坡

木蓮花下竹枝歌。歡意無多感慨多。更恐他年有遺恨。曉來衝雨上東坡。

龍興寺弔少陵先生寓居

中原草草失承平。戍火胡塵到兩京。扈蹕老臣身萬里。天寒來此聽江聲。以少陵詩考之。蓋以秋冬間寓此州也。寺門開江聲甚壯。

遊萬州岑公洞岑公隋時人。居此二十年。得道仙去。

大業征遼發閩左。軍興書檄煎膏火。此時也復有閑人。自引巖泉拾山果。後六百歲吾來遊。洞中正夏淒如秋。乳石床平可坐臥。水作珠簾月作鈎。十年神遊八極表。浮名坐覺秋豪小。試問岑公迎我不。鶴飛忽下青松杪。

萬州放船過下巖小留

畫船四月滿旗風，飲散匆匆鷁首東。
醉裏偏憐江水綠，意中已想荔枝紅。
斷碑零落莓苔遍，幽澗涼潺潑路
筠通。一疋寧無好束縑，憑誰畫此碧玲瓏。

白帝泊舟

客路閑無事，津亭爽有餘。
峽江春漲減，灩岸夜燈疎。
老矣孤舟裏，依然十載初。
倦遊思稅駕，更覺愛吾廬。

醉中下瞿唐峽中流觀石壁飛泉

吾舟十丈如青蛟，乘風翔舞從天下。
江流縹緲白鹽動，灩澦浮波真一馬。
主人滿酌白玉盃，旗下畫鼓如春雷。
回頭已失瀨西市，奇哉一削千仞之蒼崖。
蒼崖中裂銀河飛，空裏萬斛傾珠璣。
醉面正須迎亂點，京塵未許化征衣。

暮次秭歸

朝披南陵雲，夕揖建平樹。
啼鴉隨客櫓，落日滿孤戍。
惡灘不可說，石芒森如鋸。
浪花一丈白，吹沫入窗戶。
是身初非我，底處著憂怖。
酒酣一枕睡，過盡蛟鱗怒。
欣然推枕起，曳杖散千步。
殷勤沙際柳，記我維舟處。

歸州重五

鬪舸紅旗滿急湍，船窗睡起亦閒看。
屈平鄉國逢重五，不比當年角黍盤。
屈平祠在州東南五里歸鄉沔，
畫平故居也。

屈平廟

委命仇讎事可知。章華荆棘國人悲。恨公無壽如金石。不見秦嬰係頸時。

楚城

江上荒城猿鳥悲。隔江便是屈原祠。一千五百年間事。只有灘聲似舊時。

新灘舟中作三峽新灘尤險今已平矣

江路桃花浪已生。新灘穩過失崢嶸。九年行半九州地。三峽歸無三日程。繫纜便增筇杖興。倚窗時聽棹歌聲。衰遲未覺詩情減。又擬吳淩賦楚城。

舟出下牢關

大舸凌驚濤。飛度青玉峽。虛壁雲濛濛。陰洞風颯颯。拂天松蓋偃。入水山脚插。炎曦忽摧破。亭午手忘筆。懸知今夜喜。月白宿沙夾。曠哉七澤遊。盟鷗不須歆。

峽口夜坐

三峽至此窮。兩壁猶峭立。估船無時行。婦盍有夜汲。風生樹影動。月碎水流急。草根綴微露。螢火飛熠熠。吾行已四旬。纔抵楚西邑。浩歌散鬱陶。還舟覺衣溼。

峽州甘泉寺

江上甘泉寺。登臨擅一州。山亭喜無恙。老子得重遊。灘急常疑雨。林深欲借秋。歸途更清絕。倚杖喚漁舟。

峽州東山

十年不踏東山路。今日重爲放浪行。老矣判無黃鶴舉。歸哉惟有白鷗盟。新秧刺水農家樂。修竹環溪客

眼明已駕巾車仍小駐。綠蘿亭下聽鶯聲。

江上觀月

暗浪衝舟艫聲。夷陵城下正三更。十分傾酒禁風力。一點無雲與月明。久坐不知衣露溼。浩歌時有水禽驚。詩成莫駕長鯨去。自是虛皇白玉京。

初發夷陵

雷動江邊鼓吹雄。百灘過盡失途窮。山平水遠蒼茫外。地闊天開指顧中。俊鶴橫飛遙掠岸。大魚騰出欲凌空。今朝喜處君知否。三丈黃旗舞便風。

舟中夜坐

風露浩無際。星河淡欲傾。遙知並船客。聞我詠詩聲。水鳥橫江去。漁舟背月行。神清不成寐。隱几待窗明。

初到荊州

萬里泛仙槎。歸來鬢未華。蕭蕭沙市雨。淡淡渚宮花。斷岸添新漲。高城咽晚笳。船窗一樽酒。半醉落烏紗。

醉歸

持酒江頭到夕霏。愁城頓覺解重圍。澄波宜月移船看。醉面便風走馬歸。末路已驚添白髮。故人頻報上黃扉。彊隨官簿真成嬾。乞我吳松舊釣磯。

出遊

萬里崎嶇蜀道歸。荊州非復壯遊時。行吟自怪詩情減。坐睡人驚酒量衰。卷地風號雲夢澤。黏天草映伏

波祠一枝藤杖平生事。擊鼓開帆未恨遲。

大堤

日晚大堤行。莽然千里平。天低垂曠野。風壯撼高城。列肆居茶估。連營宿戍兵。鼎鼎北門堠。淚盡望神京。

荊州距東都。纔十七八程。

阻風

沙市三日風。萬鼓鳴船頭。欲去不得發。臥對青燈幽。聽兒誦離騷。可以散我愁。微言入孤夢。恍與屈宋遊。睡起銅瓶響。欣然喚茶甌。吾道無淹速。風伯非所尤。

初發荊州

淋漓牛酒起。櫓千健。騰飛如插羽。翰破浪乘風。千里快開頭。擊鼓萬人看。鶴聲不斷朝陽出。旗脚微舒宿雨乾。堪笑塵埃洛陽客。素衣如墨據征鞍。

泊公安縣

秦關蜀道何遼哉。公安渡頭今始回。無窮江水與天接。不斷海風吹月來。船窗簾捲螢火鬧。沙渚露下蘋花開。少年許國忽衰老。心折柁樓長笛哀。

劉郎浦夜賦

平生遠遊心。睥睨萬里窄。今年下三巴。放浪浮七澤。菰蒲無遠近。但覺風索索。浪高星辰溼。天碧河漢白。十年散醉髮未易。著朝幘守符倘可乞。來作瀟湘客。

小雨極涼舟中熟睡至夕

舟中一雨掃飛蠅半脫綸巾臥翠藤清夢初回窗日晚數聲柔艣下巴陵

岳陽樓

身如病鶴短翅翎雨雪飄灑號沙汀天風忽吹不得住東下巴峽泛洞庭軒皇張樂雖已矣此地至今朝
百靈雄樓岌嶸鎮吳楚我來舉手捫天星帆檣纜放已隱隱雲氣亂入何冥冥龜鼉出沒蛟鱗橫浪花遮
盡君山青黃衫仙翁喜無恙袖劍近到城南亭眼前俗子敗人意安得與翁同醉醒

再賦一絕

江風吹雨濯征塵百尺闌干爽氣新不向岳陽樓上醉定知未可作詩人

乘大風發巴陵

雪濺浪方作翠颭山欲浮奇哉萬頃湖著我十丈舟三老請避風叱去非汝憂神物識忠信壯士憎滯留
擊鼓催挂帆揮手別岳州仰視羣鶴翔下闌百怪囚衡湘清絕地恨不從此遊聊須百斛酒往醉庾公樓

通濟口

朝發嘉魚縣晚泊通濟口睡起喜微涼船窗一盃酒長魚吹浪聲恐人巨鼉露背浮翁淪今夕風生月復
晴寄語舟人更添纜

醉書

青草渡頭波接天山翁吟嘯自悠然朝餐偶過賣魚市晚泊時逢迎荻船投老未除游俠氣平生不作俗

人緣一椀酌罷玻璃酒。高枕窗邊聽雨眠。偶餘眉州酒一樽。獨酌遂醉。

南樓

十年不把武昌酒。此日關邊感慨深。舟楫紛紛南復北。山川莽莽古猶今。登臨壯士興懷地。忠義孤臣許國心。倚杖黯然斜照晚。秦吳萬里入長吟。

黃鶴樓

手把仙人綠玉枝。吾行忽及早秋期。蒼龍鬬角歸何晚。黃鶴樓中醉不知。江漢交流波渺渺。晉唐遺迹草離離。平生最喜聽長笛。裂石穿雲何處吹。

頭陀寺觀王簡栖碑有感

舟車如織喜身閑。獨訪遺碑草棘間。世遠空驚閩陵谷。文浮未可敵江山。老僧西逝新成塔。舊守東歸正掩關。笑我驅馳竟安往。夕陽飛鳥亦知還。庚寅適武昌與太守張之彥遊累日時頭陀有老僧持律精苦

夜熱

觸熱行萬里。煩促詎可論。泊船鄂州步。終日如炮燔。搖扇腕欲脫。揮汗白雨翻。推枕再三起。散髮臨前軒。秋近更漏長。天旱星宿繁。甘澍何時來。太息憂元元。鄂州頗閔雨。

舟中偶書

老子西遊萬里回。江行長夏亦佳哉。晝眠初起報茶熟。宿酒半醒聞雨來。漢口船開催疊鼓。淮南帆落亞高桅。四方本是丈夫事。白首自憐心未灰。

燈下讀書

少年喜書策，白首意未足。幽窗燈一點，樂處超五欲。而況黃州路，小雨漁村宿。蕭蕭兼葭聲，爲我洗暑毒。琅然誦經史，少倦兒爲續。何必效萊公，長夜醉畫燭。

泊三江口

遲明離武昌，薄暮次黃岡。勿言觸熱行，一雨三日涼。北窗荻蕭蕭，南窗江茫茫。玄雲一池墨，碧綫半篆香。尙無車馬塵，況復爭奪場。徐行勿挂帆，此樂殊未央。

自雪堂登四望亭因歷訪蘇公遺迹至安國院

我醉飛屐登孱顏，拄杖出沒風煙間。三山葱蘢蛟鱗靜，九關肅穆虎豹閑。幾年金骨煉綠髓，此日始得窮躋攀。老仙歸侍紫皇案，空有野水流淙潺。蜿蜒翠阜圍綠野，似嶺非嶺山非山。向來龍蛇滿雪壁，雷電下取何時還。名花亦已天上去，居人指似題詩處。九十一翁不識公，我抱此恨知無窮。定惠院已廢，海棠亦不復在。安國老僧景滋年九十一，自言東坡去黃後四年方生。

月下步至臨臯亭

芒鞋踏松陰，迨此船未發。清遊豈無伴，三友風露月。山川鬱盤紆，鷗鷺浩滅沒。當年老先生，想像散醉髮。浮生等昨夢，久已埋玉骨。吾儕幸彊健，何事拘簪笏。

發黃州泊巴河遊馬祈寺

南望武昌山，北望齊安城。楚江萬頃綠，著我畫舫橫。雲帆不須挂，鼙鼓不須鳴。澹然隱曲几，山水相逢迎。

疎雨漏薄日。非陰亦非晴。晚泊巴河市。小陌聞屐聲。紫髯刑馬地。一怒江漢清。中原今何如。感我白髮生。

舟行蘄黃間雨霧得便風有感

天青雲白十分晴。帆飽舟輕盡日行。江底魚龍貪晝睡。淮南草木借秋聲。好山縹緲何由住。華髮蕭條只自驚。莫怪時人笑疎嬾。宦情元不似詩情。

南烹

十年流落魄南烹。初見鱸魚眼自明。堪笑吾宗輕許可。坐令羊酪借葦羹。

泊蘄口泛月湖中

炎天倦長路。月夕泛平湖。晃漾披銀闕。清寒住玉壺。釣絲繫藻荇。蓬艇入菰蒲。自別蜻蜓浦。斯遊十載無。予故廬在蜻蜓港東南。暑月常與客泛舟至中夜。

初見廬山

從軍憶在梁州日。心擬西征草捷書。鐵馬但思經太華。布帆何意拂匡廬。計謀落落知誰許。功業悠悠定已疎。尚喜東林尋舊社。月明清露溼芙蕖。

六月十四日宿東林寺

看盡江湖千萬峯。不嫌雲夢芥吾胸。戲招西塞山前月。來聽東林寺裏鐘。遠客豈知今再到。老僧能記昔相逢。虛窗熟睡誰驚覺。野碓無人夜自舂。

舟過小孤有感

小孤山畔峭帆風。又見煙鬟縹緲中。萬里客經三峽路。千篇詩費十年功。未嘗滿筍蒲芽白。先看堆盤繡纓紅。商賈人生爲何事。一裘從此入空濛。

雁翅夾口小酌

墟煙淡將散。江雨細欲無。回風吹衣襟。晴光滿菰蒲。隱几樂此時。清和如夏初。犬吠船丁歸。小市得美蔬。歡言酌清醪。侑以案上書。雖云泊江渚。何異歸林廬。

長風沙

江水六月無津涯。驚濤駭浪高吹花。鷗聲已出雁翅浦。荻夾喜入長風沙。長風自古三巴路。樯竿參差雜煙樹。南船北船各萬里。淒涼小市相依住。歌呼雜沓燈火明。黃昏風死浪亦平。勞苦舟師剩沽酒。安穩明朝到池口。

泛小舟姑熟溪口

姑溪綠可染。小艇追晚涼。棹進破樹影。波動搖星芒。荻深漁火明。風遠水草香。尙想錦袍公。醉眼隘八荒。坡陁青山家。斷碣臥道旁。悵望不可逢。乘雲遊帝鄉。溪東南卽青山太白墓。

明日再遊又賦

舟中如飯炊。端坐畏暍死。未能踏增冰。且復呼艇子。纖纖新月低。玉鈎沈野水。微風生蘋末。塵袍真一洗。可憐黃山塔。突兀暮煙裏。依然十年前。看我行萬里。兩槳且勿搖。橫舟小灘尾。得詩偶長吟。宿鷺爲驚起。過采石有感。

短衣射虎早霜天。歎息南山又七年。唾手每思雙羽箭。快心初見萬樓船。平波漫漫看浮馬。一作深鳥高柳陰陰聽亂蟬。明日重尋石頭路。醉鞍誰與共聯翩。

將至金陵先寄獻劉留守

梁益羈遊道阻長。見公便覺意差彊。別都王氣半空紫。大將牙旗三丈黃。江面水軍飛海鶴。帳前羽箭射天狼。歸來要了涪溪頌。莫笑狂生老更狂。

登賞心亭

蜀棧秦關歲月逾。今年乘興卻東遊。全家穩下黃牛峽。半醉來尋白鷺洲。黯黯江雲瓜步雨。蕭蕭木葉石城秋。孤臣老抱憂時意。欲請遷都涕已流。

夜泊龍廟回望建康有感

我醉行水上。身輕如飛煙。魚龍互悲嘯。伴我夜不眠。羽扇揮浮雲。月挂牛斗間。河漢橫復斜。風露方浩然。坡陁石頭城。寂莫七百年。世事感予懷。竦身入青天。

將至京口

臥聽金山古寺鐘。三巴昨夢已成空。船頭坎坎回帆鼓。旗尾舒舒下水風。城角危樓晴鶴碧。林間雙塔夕陽紅。銅瓶愁汲中澗水。不見茶山九十翁。頃在京口管取中澗水。寄曾文清公。

荆谿館夜坐

河漢無聲天正青。三三五五滿天星。草根冷露黏濕螢。幽人岸巾坐津亭。憶下瞿唐浮洞庭。陽臺繫船夢

娉婷朱門重重夜不扃。四山猿鳥啼青冥。人生無帶風中萍。幸我夢斷狂已醒。繡鞵金絡帶萬釘。何如故山鋤茯苓。

沂谿

射的峯前禹廟東。短篷三扇臥衰翁。閑攜清聖濁賢酒。重試朝南暮北風。水落痕留紅蓼節。雨來聲滿綠蒲葦。衝煙莫作匆匆去。擬看溪丁下釣筒。

歸雲門

萬里歸來值歲豐。解裝鄉墅樂無窮。飯炊飽雨湖菱紫。篋絡迎雷野柿紅。壞壁塵埃尋醉墨。孤燈餅餌對鄰翁。微官行矣闕山去。又寄千巖夢想中。

月下自三橋泛湖歸三山

素壁初升禹廟東。天風爲我送孤篷。山橫玉海蒼茫外。人在冰壺縹緲中。茅舍燈青聞吠犬。蘋汀煙淡見驚鴻。白頭尙耐清寒在。安得終年伴釣翁。

懷成都十韻

放翁五十猶豪縱。錦城一覺繁華夢。竹葉春醪碧玉壺。桃花駿馬青絲鞵。鬪雞南市各分朋。射雉西郊常命中。壯士臂立綠條鷹。佳人袍畫金泥鳳。椽燭那知夜漏殘。銀貂不管晨霜重。一梢紅破海棠回。數蕊香新早梅動。酒徒詩社朝暮忙。日月匆匆送賓送。浮世堪驚老已成。虛名自笑今何用。歸來山舍萬事空。臥聽糟牀酒鳴瓮。北窗風雨耿青燈。舊遊欲說無人共。

湖村秋曉

劍閣秦山不計年，卻尋剡曲故依然。盡收事業漁舟裏，全付光陰酒棹邊。平野曉聞孤唳鶴，澄湖秋浸四垂天。九關虎豹君休問，已向人間得地仙。

夜夢與字文子友譚德稱會山寺若餞予行者明日黎明得子友書感歎久之乃作此詩

夜夢集山寺，二三佳友生。相顧慘不樂，若有千里行。在門僕整襪，臨道驩嘶鳴。我友顧謂我，天寒戒晨征。遲速要當到，徐驅勿貪程。丁寧及藥餌，依依有餘情。鄰鐘忽驚覺，鴉翻窗欲明。作詩謝我友，有使頻寄聲。

寒夜

小隱謝城市，新寒尋褐袍。秋燈依壁暗，夜雨挾風豪。俗自隨時異，身寧與世塵。殘年更何事，持蟹酌松醪。

偷閑

老向人間未拂衣，偷閑聊喜息塵機。丹楓斷岸秋來早，淡日孤村客到稀。偶憶雪溪攜鶴去，卻從雲肆買裘歸。酒徒莫笑生涯別，久矣淵明悟昨非。

冬夜聞雁有感

從軍昔戍南山邊，傳烽直照東路谷。軍中罷戰壯士閑，細草平郊恣馳逐。洮州駿馬金絡頭，梁州毬場日打毬。玉杯傳酒和鹿血，女真降虜彈箜篌。大呼拔幟思野戰，殺氣當年赤浮面。南遊蜀道已低摧，猶據胡牀飛百箭。豈知躑躅還江邊，病臂不復能開弦。夜聞雁聲起太息，來時應過桑乾磧。

書懷

愁向東華蹋軟紅。暫歸舊隱樂無窮。石池洗藥涓涓水。漁艇投竿嫋嫋風。盡日醉醒菱唱裏。鄰家來往竹陰中。何須列戟長安第四面。雲山擁此翁。

湖中暮歸

弄機漁舟水濺衣。興闌卻傍柳邊歸。風平別浦沈新月。日落前村鎖夕霏。乍起鷺行橫野去。欲栖鴉陣暗天飛。詩情自合江湖老。敢恨功名與願違。

題齋壁

蒼得湖邊屋數椽。茅齋低小竹窗妍。墟煙寂歷歸村路。山色蒼寒釀雪天。性懶杯盤常偶爾。地偏雞犬亦翛然。早知栗里多幽事。虛走人間四十年。

新葺門屋

林棲四壁空。百事從簡易。缺籬寒未補。幽戶夜不閉。東偏欲廣屋。厚費敢輕議。設關力可具。稚子請遂事。呀然兩竹扉。寧復志容駟。西山正當前。浩蕩納空翠。下臨漁樵路。橫鎖風月地。惟愁俗客來。剝啄驚午睡。

吾廬

吾廬雖小亦佳哉。新作柴門斷綠苔。拄杖每闌歸鶴入。釣船時帶夕陽來。墟煙隔水霏霏合。籬菊凌霜續續開。千里安期那可得。笑呼鄰父共傳杯。

冬夜泛舟有懷山南戎幕

釣船東去掠新塘。船進篷低露鏡香。十里澄波明白石。五更殘月伴清霜。飄飄楓葉無時下。嫋嫋菱歌盡

意長。誰信梁州當日事。鐵衣寒枕綠沉槍。

夢至成都悵然有作

春風小陌錦城西。翠箔珠簾客意迷。下盡牙籌閑縱博。刻殘畫燭戲分題。紫氍毹暖帳中醉。紅叱撥驕花外嘶。孤夢淒涼身萬里。令人憎殺五更雞。

又

宦途元不羨飛騰。錦里豪華壓五陵。紅袖引行遊玉局。華燈圍坐醉金繩。階前汗血洮河馬。架上霜毛海國鷹。世事轉頭誰料得。一官南去冷如冰。

月夕

開戶滿庭雪。徐看知月明。微風入簾竹。復作雪來聲。俗塵不待掃。凜然肝肺清。村深無漏鼓。鶴唳報三更。將入閩夜行之雲門

東鷺並偏門。籃輿兀睡昏。紡燈穿壁罅。吠犬闖籬根。久客悲行役。清愁怯夢魂。餘生猶幾出。回首付乾坤。

山中觀殘菊追懷眉山師伯渾

空山菊花瘦如棘。傾倒滿地枝三尺。陰風冷雨不相貸。爛草蒼苔共狼藉。人雖委棄渠自香。詎必泛酒登華堂。君不見仁人志士窮死眉。山陽空使後世傳文章。

自雲門之陶山肩輿者失道行亂山中有茅舍小塘極幽邃求見主人不可意其隱者也

陂池幽處有茅堂。井臼蕭條草樹荒。小鴨怯波時聚散。病蔬傷蠹半青黃。童兒衝雨收魚網。婢子聞鐘上

佛香我亦暮年思屏迹。數椽何計得連牆。

冬夜聽雨戲作

少年交友盡豪英。妙理時時得細評。老去同參惟夜雨。焚香臥聽畫簷聲。

又

遠簷點滴如琴筑。支枕幽齋聽始奇。憶在錦城歌吹海。七年夜雨不曾知。

適園

春殘猶看少城花。雪裏來嘗北苑茶。未恨光陰疾响。日驚世界事可少。功名藝外心空壯。詩酒樽前髮已華。官柳弄黃梅放白。不堪倦馬又天涯。

欲行雨未止

幽幔依燈影。空階送雨聲。暫歸仍客路。投老倍鄉情。眼澀書難讀。心搖夢易驚。病多常怕醉。酒盡卻思傾。比作陳下瓜。麴釀成奇絕。屬病瘍不敢取。醉小斲而已。

翠蔓扶疎采擷忙。麴生系出古淮陽。踢成明月團團白。釀作新鵝淡淡黃。醅甕秋淒驚凜冽。糟牀夜注愛淋浪。西齋幽事新成譜。首爲高人著此方。酒方昔得之胡基仲。

大雨中離三山宿天章寺

苦雨催寒不肯晴。晚來餘勢更縱橫。雲如山壤長空黑。風似潮回萬木傾。要借關河供遠眼。不辭泥淖困初程。解衣一笑僧窗下。幾兩青鞋了此生。

早飯干溪蓋干吉故居也

劍外歸來席未溫。南征浩蕩信乾坤。峯回內史曾遊地。竹暗仙人舊隱村。白髮孤翁鉏麥壟。黃鶯小婦閉籬門。行行莫動鄉關念。身似流槎豈有根。

贈楓橋化城院老僧

老宿禪房裏。深居罷送迎。爐紅豆蕺火。糝白芋魁羹。竊衲年年補。紗燈夜夜明。門前霜半寸。笑我事晨征。

雙橋道中寒甚

裂面霜風快似鎌。重重裘袴晚仍添。梅當官道香撩客。山逼籃輿翠入簾。男子坐爲衣食役。年光常向道途淹。古來共說還家樂。豈獨全軀畏楚鉗。

行牌頭奴寨之間皆建炎末避賊所經也

今朝霜薄風氣和。霽色滿野行人多。沙平水淺木葉下。搖櫂渡口生微波。建炎避兵奔竄地。誰料白首重經過。四十餘年萬事改。惟有青嶂高嵯峨。安得西國葡萄酒。滿酌南海鸚鵡螺。借以吳松長絲之玉鱸。送以邯鄲齒齒之清歌。向來喪亂汝所記。大地凜凜憂干戈。偶然不死到老大。爲底苦惜朱顏酡。

早發奴寨

暖徹衣篝蠟炬明。鄰雞喔喔促殘更。丈夫雖有四方志。客子終悲千里行。月落龍蛇蟠木影。山空風雨起灘聲。上車莫恨晨霜冷。又得脩途一日晴。

題繡川驛

繡川池閣記會遊。落日欄邊特地愁。白首卽今行萬里。淡煙依舊送孤舟。歸心久負鱸魚鱸。春色初回杜若洲。會買一蓑來釣雨。憑誰先爲謝沙鷗。

夜行宿湖頭寺

臥載籃輿黃葉村。疎鐘杳杳隔籬門。清霜十里伴微月。斷雁半行穿亂雲。去國不堪心破碎。平戎空有膽輪困。泗濱樂石應如舊。誰勒中原第一勳。

衢州道中作

耿耿孤忠不自勝。南來清夢遶觚稜。驛門上馬千峯雪。寺壁題詩一硯冰。疾病時時須藥物。衰遲處處少交朋。無情最恨寒沙雁。不爲愁人說杜陵。

過靈石三峯

奇峯迎馬駭衰翁。蜀嶺吳山一洗空。拔地青蒼五千仞。勞渠蟠屈小詩中。

又

曉日曛曛雪未殘。三峯傑立插雲間。老夫合是征西將。胸次先收一華山。

宿仙霞嶺下

吾生真是一枯蓬。行徧人間路未窮。暫聽朝雞雙闕下。又騎羸馬萬山中。重裘不敵晨霜力。老木爭號夜谷風。切勿重尋散關夢。朱顏改盡壯圖空。連日風霜可畏。自去梁州未嘗有此寒也。

道中病場久不飲酒至魚梁小酌因賦長句

我行浦城道。小疾屏杯酌。癯瘠何足言。亦復妨作樂。此身會當壞。百歲均電雹。胡爲過自惜。憊臥困鍼烙。未嘗膽噉嚼。況敢烹郭索。今朝寓空驛。窗戶寒寂寞。悠然忽自笑。頓解貪愛縛。紅燭映綠樽。奇哉萬金藥。

宿魚梁驛五鼓起行有感

憶從南鄭客成都。身健官閑一事無。分騎霜天伐狐兔。張燈雪夜擲烏盧。百憂忽墮新衰境。一笑難推舊酒徒。投宿魚梁溪邊屋。五更聽雨擁篝爐。

又

少時談舌坐生風。管葛奇才自許同。閉戶著書千古計。變名學劍十年功。酒醒頓覺狂堪笑。睡起方知夢本空。它日故人能憶我。葛仙磯畔覓漁翁。若耶溪有葛仙公釣磯。

夢藤驛

倦馬投孤驛。一峯青壓門。蕭條秋浦路。荒陋夜郎村。地瘴霜常薄。林深日易昏。百年常作客。排悶近清樽。

又

又入千山去。真成萬里行。今年自成都。八千餘里赴行在。又千餘里入關。履霜常早。駕乘炬或宵征。古驛怪藤合。荒陂羣鴈鳴。客中常少睡。歸夢若爲成。

梅花絕句

空谷佳人洛浦仙。洗粧真態更嬋娟。廣平莫倚心如鐵。撩起清愁又破禪。

又

月中疎影雪中香。只爲無言更斷腸。曾與詩翁定花品。一丘一壑過姚黃。曾文清公嘗問予。梅與牡丹孰勝。予以此答。

又

折得梅花愧滿顏。文書堆案正如山。輸君一覺儻然夢。長在清泉白石間。

又

濯錦江邊憶舊遊。纒頭百萬醉青樓。如今莫索梅花笑。古驛燈前各自愁。

又

蜀王小苑舊池臺。江北江南萬樹梅。只怪朝來歌吹鬧。園官已報五分開。成都合江園。蓋故蜀別苑。梅最盛。自初開。監官日報。府報至開五分。則府主來宴。遊人亦競集。

又

湖上梅花手自移。予所居在山陰鏡湖。小橋風月最相宜。主人歲歲常爲客。莫怪幽香怨不知。

又

吾州古梅舊得名。雲蒸雨瀆綠苔生。一枝只好借窗看。莫售千金入鳳城。古梅枝幹皆苔蘚。都下甚貴重之。

又

探春歲歲在天涯。醉裏題詩字半斜。今日溪頭還小飲。冷官不禁看梅花。

又

池館登臨雪半消。梅花與我兩無聊。青羊宮裏應如舊。腸斷春風萬里橋。

又

今年真負此花時。醉帽何曾插一枝。漸老情懷多作惡。不堪還作送梅詩。去年在成都嘗賦詩送梅。

卷第十一

對酒

識字記姓名。擊劍一人敵。孫吳相斫書。了解亦何益。不如黃金罍。激激春波碧。欣然對之笑。未飲愁已釋。白頭生黑絲。蒼顏桃李色。金丹空九轉。正恐無此力。朝飲續五斗。暮飲斃一石。寄謝采芝翁。無爲老青壁。

遣興

西州落魄九年餘。濯錦江頭已結廬。誰遣徑歸朝鳳闕。不令小住奉魚書。余將赴樊道。被命東歸。塵埃昧目。詩情盡疾。病侵人酒。與疎寄語。鶯花休入夢。世間萬事有乘除。

建安雪

建路官茶天下絕。香味欲全須小雪。雪飛一片茶不憂。何況蔽空如舞鷗。銀瓶銅碾春風裏。不枉年來行萬里。從渠荔子腴。玉膚自古難兼熊掌魚。

雪晴至後園

病扶藤杖覓殘梅，牢落情懷怕酒盃。約束園丁勤灑掃，新年作意待春來。

又

寶馬東風擁犢車，碧雞坊裏擅豪華。南來強作尋春夢，何處如今更有花。

開元暮歸

白髮書生不自珍，天涯又作宦遊身。谿橋煙淡偏宜晚，野寺花遲未覺春。日暖登山思謝屐，病餘漉酒負陶巾。茹芝卻粒平生事，回首巖扉一愴神。寺在紫芝山下。

書懷

濯錦江頭成昨夢，紫芝山下又新年。久因多病疎雲液，近爲長齋進玉筵。啼鳥傍簷春寂寂，飛花掠水晚翩翩。支離自笑生涯別，一炷爐香繡佛前。

遊鳳凰山

窮日文書有底忙，幅巾蕭散集山堂。一樽病起初浮白，連焙春遲未過黃。坐上清風隨塵柄，歸途微雨發松香。臨溪更覓投竿地，我欲時來小作狂。

園中雜書

蕭蕭慈竹鳥呼風，宛似山光小閣東。剩欲杖藜尋昨夢，更添紅綻綠陰中。山光閣在潭毒閣下。

又

北窗看鏡意凄然，夢斷梁州已七年。獵獵綵旗春日晚，不堪花外見鞦韆。山南鞦韆最盛，若陌處處有之。

筍生密密復疎疎。來看偏宜曉雨餘。乞與人間作圖畫。幅巾短褐小籃輿。

又

又

殘花委地筍掀泥。香梳詩囊到處攜。幽夢欲成誰喚覺。半窗斜日鷓鴣啼。

烹茶

麴生可論交。正自畏中聖。年來衰可笑。茶亦能作病。噎喉廣晨飧。支離失宵暝。是身如芭蕉。寧可與物競。兔脰試玉塵。香色兩超勝。把玩一欣然。爲汝烹茶竟。

病中久止酒有懷成都海棠之盛

碧雞坊裏海棠時。彌月兼旬醉不知。馬上難尋前夢境。樽前誰記舊歌辭。目窮落日橫千嶂。腸斷春風把一枝。說與故人應不信。茶煙禪榻鬢成絲。

北齋

新竹侵幽幔。疎疎散遠汀。研朱朝點易。搗蘘夜潢。一作橫經。巖壑知心賞。琴樽樂性靈。會當煩太史。一奏少微星。

出塞曲

千騎爲一隊。萬騎爲一軍。朝踐狼山雪。暮宿榆關雲。將軍羽箭不虛發。直到祈連無雁羣。躑躅春雷收陣鼓。蜿蜒驚蛇射生弩。落蕃遺民立道邊。白髮如霜淚如雨。褫魄胡兒作窮鼠。競襄胡頭改胡語。陣前乞降

尚前舞徹書夜入黃龍府。

思故山

丁金不須買畫圖。聽我長歌歌鏡湖。湖山奇麗說不盡。且復爲子陳吾廬。柳姑廟前魚作市。道土莊畔菱爲租。一彎畫橋出林薄。兩岸紅蓼連菰蒲。陂南陂北鴉陣黑。舍西舍東楓葉赤。正當九月十月時。放翁艇子無時出。船頭一束書。船後一壺酒。新釣紫鱖魚。旋洗白蓮藕。從渠貴人食萬錢。放翁癯腹常便便。喜歸。稚子迎我笑。遙指一抹西村煙。

送錢仲耕修撰

姑熟溪邊識勝流。十年重見豈人謀。自應交結難爲別。不是陽關作許愁。傑直公看鼈禁月。倦遊我夢鏡湖秋。殷勤爲報中朝舊。睡足平生是建州。

建寧重五

霏微入戶黃梅雨。磊落堆盤碧筒黍。病來一滴不飲酒。但嗅菖蒲作端午。人生忽忽東逝波。白頭奈此節物何。去年已作歸州客。今年建州更愁絕。歸州猿吟鳥啼裏。屈沱醉歸詩滿紙。風沱畫風原故居。楚人謂江之別流爲沱。卽今憶此那可得。西望歸州三歎息。

雨晴至園中

入夏經月雨。園路久已荒。今朝偶一到。蒿艾如人長。豈惟黽隄豪。頗覺蜂蝶狂。悵然懷故山。舍東百本桑。迨此積雨餘。枝葉沃以光。父老適相遇。藉草擇一觴。一觴頽然醉。笑語相扶將。賦詩示兒子。此樂未易忘。

夏日

微風過中庭。庭樹颯有聲。穿簾徐入座。巾屨有餘清。

又

展畫發古香。弄筆娛晝寂。是中亦何好。使我喜忘食。

又

呼兒整吾駕。駕言返林廬。可使臨老眼。常親車文書。

發書晝還故山戲書

昨日遣畫笥。今日發書簾。空齋惟一牀。窗影亂風竹。平生鑽故紙。夙好老尤篤。奇哉掃除盡。蟬蛇三萬軸。豈惟息煩心。亦足養病目。從渠襍穢生。自獻公車牘。

白髮

白髮千莖綠髮稀。臥看鷓鴣刺天飛。平生竊鄙貢公喜。故里但思陶令歸。清坐了無書可讀。近墨還書菊。殘年賴有佛堪依。君看世事皆虛幻。屏酒長齋豈必非。

懷譚德稱

譚子文章舊有聲。幾年同客錦官城。江樓列炬千鍾飲。花市聯鞍一字行。人世絕知非昨夢。天真堪笑博浮名。空齋獨夜蕭蕭雨。枕上詩成夢不成。

客思

千里關山道路賒。可憐客子費年華。杯觴醴醴紅燒酒。風露盈盈紫笑花。孤月有情來海嶼。雙魚無信到天涯。此生那得常飄泊。歸臥東溪弄釣車。

又

兩鬢星星久倦遊。淒涼況復寓南州。未甘蟋蟀專清夜。已歎梧桐報素秋。綺語安能敵生死。熱官正欲快恩讎。空堂飽作東歸夢。夢泊嚴灘月滿舟。舟行還山陰。道出七里灘。

建安遺興

建安酒薄客愁濃。除卻哦詩事事慵。不許今年頭不白。城樓殘角寺樓鐘。

又

錦城重到歎無期。忽憶書臺步月時。白浪黏天蛟鱗橫。夢中識路亦何爲。

又

今歲清詩欠百篇。強尋筆硯意茫然。秋風有句君知否。合在嚴光釣瀨邊。

又

古今清絕沉湘路。臥想蒲帆十幅開。不是避人思遠適。肺肝塵土要詩才。

又

綠沈金鎖少時狂。幾過秋風古戰場。夢裏都忘閩嶠遠。萬人鼓吹入平涼。

又

刺虎騰身萬目前。白袍濺血尚依然。聖時未用征遼將。虛老龍門一少年。

病起偶到復菴

經句羸臥怯登臨。偶憶東菴試一尋。新竹初成迷棧路。菴後依古城有小棧百步。斷雲不散抱城陰。陂池綠靜龜魚樂。亭館蒼涼草樹深。欲把一盃無奈嬾病來。觸目動歸心。

前有樽酒行

虛堂雨過生涼颺。勸君一醉君勿辭。去年不知今歲事。明年萬事今得知。舊時扶牀同戲兒。還鄉問訊令人悲。冢丘累累在者誰。紙錢雨濕抱樹枝。君去六十有幾時。更望七十何其癡。求師學道亦已遲。謝客努力從鷗夷。

又

綠酒盎盎盈芳樽。清歌嫋嫋留行雲。美人千金纈寶蕭。水沈龍腦作燎焚。問君胡爲慘不樂。四紀妖氛暗幽朔。諸人但欲口擊賊。茫茫九原誰可作。丈夫可爲酒色死。戰場橫屍勝牀第。華堂樂飲自有時。少待換胡獻天子。

遊南塔院

小破文書夢。閑成杖履遊。澗幽泉激激。院靜竹修修。病骨涼如洗。歸心浩莫收。船輕不載石。一葉亂沙鷗。

感懷

半年建安城。士友闕還往。出門每太息。還舍猶愴悅。有酒誰與傾。得句空自賞。疎直觸人情。低回泚吾頰。

豈無佳山水，正爾寄夢想。何當載親朋，煙浦搖兩漿。

雨夜

一雨遂通夕，安眠失百憂。窗扉淡欲曉，枕簟凜生秋。畫燭爭棋道，金尊數酒籌。依然錦城夢，忘卻在南州。

夜坐偶書

衰髮蕭疎雪滿簪，暮年光景易駸駸。已甘身作溝中斷，不願人知囊下音。病鶴摧頽分薄俸，悲蛩斷續和微吟。向來誤有功名念，欲挽天河洗此心。

長歌行

人生宦遊亦不惡，無奈從來宦情薄。既不能短衣射虎在南山，又不能鬪雞走馬宴平樂。惟有釣船差具，問君胡爲不歸去。片雲雨暗玉篙峯，斜日人爭石旗渡。渡頭酒壚堪醉眠，白酒醇醲鱸魚鮮。菰米如珠炊正熟，蓴羹似酪不論錢。翁唱菱歌兒舞，權醉耳。那知朝市鬧，城門幾度送迎官。睡擁亂裘呼未覺。

雨夜不寐觀壁間所張魏鄭公砥柱銘

疾風三日橫吹雨，竹倒荷傾可憐汝。空堂無人夜向中，臥看牀前燭花吐。壯懷耿耿誰與論，檣床老龜不能語。世間豈無一好漢，叱咤暗鳴氣吞虜。壁間三丈砥柱銘，貞觀太平如更覩。何當鼓吹渡河津，下馬觀碑馳馬去。

客談荆渚武昌慨然有作

去歲出蜀初東遊，峨舸大扁下荊州。便風轉頭五百里，吟嘯已在黃鶴樓。戲拈鐵笛吹出塞，水涵月落魚

龍愁。明朝喧傳古仙過。碧玉帶束黃綈裘。豈知一官自桎梏。簿書期會無時休。豐城寶劍已化久。我自吐氣冲斗牛。洞庭四萬八千頃。蟹舍正對蘆花洲。速脫衣冠挂神武。散髮爛醉垂虹秋。

書懷

青城結雲巢。擬住三千年。御風偶南遊。萬里棲素煙。翠裘綠玉杖。白日凌青天。招呼方瞳翁。邂逅鳥爪仙。朝詠陰陽歌。暮誦道德篇。玉童持碧簡。笙鶴來翩跹。海邊武夷山。小留賞宿緣。火食非所樂。巾褐常愴然。清時未免出。頗息世俗傳。行矣秋風高。去采玉井蓮。

平生

平生涉世似虛舟。不著胸中一點愁。已用浮雲看富貴。肯緣華屋歎山丘。戴溪寒饜千峯雪。嚴瀨聲酣七里秋。好景人間隨處有。未埋白骨且閑遊。

自詠

遊戲人間歲月多。癡頑將奈此翁何。放開繩墨牛初熟。照破乾坤鏡未磨。日落苔磯閑把釣。雨餘蓬舵亂堆蓑。明朝不見知何處。又向江湖醉踏歌。

池亭夜賦

池上小亭幽。清宵秉燭遊。荷盤時瀉露。螢火早知秋。有感歲時速。無聲河漢流。殊方不堪住。歸夢繞滄洲。

雨夜偶書

高臥空堂風雨來。更闌頻看燭花摧。新涼蕭爽秋期近。多病侵尋老境催。萬事極知終變滅。一官那得久

低回床頭幸有楞伽在。更炷爐香手自開。

思歸

平生無宦情。方外久浪迹。往來梁益間。一笑頗自得。花穠錦城酒。月白瞿唐笛。啾啾下江鶻。跌宕登山屐。巴東煙雨秋。渭上風雪夕。至今客枕夢。萬里不能尺。誰知建安城。觸目非夙昔。冥冥瘴霧細。激激蠻江碧。出門無交朋。嗚呼吾何適。歸哉故山路。詎必須暖席。

客懷

客懷耿耿向誰語。世事茫茫空自知。堅坐癡窮牛渚怪。倦遊何恨雁門騎。眼前客共一盃酒。身後人傳千首詩。報與故交當賀我。計歸猶及菊花時。

伏中官舍極涼戲作

盡障東西日。洞開南北堂。漏從閑處永。風自遠來涼。客愛炊菰美。僧誇瀹茗香。曉來秋色起。蕭蕭滿鶴牀。

夢與劉韶美夜飲樂甚

死生契闊十年餘。欲話交情涕已濡。夢裏偶同清夜宴。醉中猶攬故人鬚。岸巾談笑今誰記。滿腹詩書只自愚。我亦與公同此病。早收身世老江湖。

暑夜

毒暑彌三伏。微涼起二更。月窗風竹亂。煙渚露荷傾。寂莫借書讀。清羸扶杖行。無功耗官廩。太息負平生。

客意

陸放翁集 十 劍南詩藁 卷十一

山行曳杖水擊舟。走遍茫茫禹畫州。蝴蝶夢魂常是客。芭蕉身世不禁秋。早因食少妨高臥。晚憶茶甘作
遠遊龍焙一嘗端。可去無心更爲荔枝留。

夜香

杖老誤乘傳。竊食慙無功。清夜一炷香。實與天心通。忤物雖至愚。許國猶孤忠。一念倘自欺。百年事有終。
上帝職造化。生殺操至公。稽首矢此心。其敢累兒童。

柴懷叔殿院世綵堂

卷服貂冠世間有。榮悴紛紛翻覆手。不如御史老萊衣。世綵堂中奉春酒。北斗爲觴山作豆。鳳竹繁絲太
中壽。今年宗祀降恩綸。太中拜前公拜後。嗚呼人誰無父母。盛事有及公家否。萬鍾苦晚三釜薄。人生此
恨十八九。我欲殺青書孝友。愧非太史馬牛走。聖朝若遣采詩官。尚可爲公圖不朽。

月夜

小醉初醒月滿牀。玉壺銀闕不勝涼。天風忽送荷香過。一葉飄然憶故鄉。

雙清堂夜賦

陸子病少間。獨臥谿上堂。人靜魚自躍。風定荷更香。素月行中天。流螢失孤光。歸鳥飛有聲。度此十里塘。
嗟我獨何事。遲暮客異鄉。太息搔短髮。起視夜未央。

采蓮

薰水朱扉不上關。采蓮小舫夜深還。一樽何處無風月。自是人生苦欠閑。

又
雲散青天挂玉鈞。石城艇子近新秋。風鬟霧鬢歸來晚。忘卻荷花記得愁。

又

帶青天映麴塵波。時有遊魚動綠荷。回首家山又千里。不堪醉裏聽吳歌。

橋南納涼

曳杖來追柳外涼。畫橋南畔倚胡牀。月明船笛參差起。風定池蓮自在香。半落星河知夜久。無窮草樹覺
滅荒碧筒莫惜頽然醉。人事還隨日出忙。

芒屨

芒屨一雙青。筇枝九節輕。登山猶健在。投檄太遲生。滿意竹風冷。入懷溪月明。清秋故不遠。回首憶蓴羹。

荔子絕句

驛騎星馳亦快哉。筠籠露濕手親開。不應相與無平素。曾忝戎州刺史來。

又

放翁遊蜀十年回。病眼茫茫每嬾開。怪底酒邊光景別。方紅江綠一時來。

官舍夙興

朝陽淡淡挂窗櫺。桐葉無風忽自零。不復扶頭傾白墮。但知臨目養黃寧。新蔬帶露來幽圃。脣綆飛泉灑
廣庭。一出文書又圍繞。正應高臥盡頽齡。

山行曳杖水擊舟。走遍茫茫禹畫州。蝴蝶夢魂常是客。芭蕉身世不禁秋。早因食少妨高臥。晚憶茶甘作遠遊。龍焙一嘗端可去。無心更爲荔枝留。

夜香

杖老誤乘傳。竊食慙無功。清夜一炷香。實與天心通。忤物雖至愚。許國猶孤忠。一念倘自欺。百年寧有終。上帝職造化。生殺操至公。稽首矢此心。其敢累兒童。

柴懷叔殿院世綵堂

卷服貂冠世間有。榮悴紛紛覆手。不如御史老萊衣。世綵堂中奉春酒。北斗爲觴山作豆。鳳竹鸞絲太中書。今年宗祀降恩綸。太中拜前公拜後。嗚呼八誰無。父母盛事有及公。家否萬鍾苦。晚三釜薄。人生此恨十八九。我欲殺青書孝友。愧非太史馬牛走。聖朝若遣采詩官。尚可爲公圖不朽。

月夜

小醉初醒月滿牀。玉壺銀闕不勝涼。天風忽送荷香過。一葉飄然憶故鄉。

雙清堂夜賦

陸子病少間。獨臥銘上堂。人靜魚自躍。風定荷更香。素月行中天。流螢失孤光。歸鳥飛有聲。度此十里塘。嗟我獨何事。遲暮客異鄉。太息搔短髮。起視夜未央。

采蓮

薰水朱扉不上關。采蓮小舫夜深還。一樽何處無風月。自是人生苦欠閑。

又
雲散青天挂玉鉤。石城艇子近新秋。風鬟霧鬢歸來晚。忘卻荷花記得愁。

又
帝青天映麴塵波。時有遊魚動綠荷。回首家山又千里。不堪醉裏聽吳歌。

橋南納涼

曳杖來追柳外涼。畫橋南畔倚胡牀。月明船笛參差起。風定池蓮自在香。半落星河知夜久。無窮草樹覺城荒。碧筒莫惜頽然醉。人事還隨日出忙。

芒屨

芒屨一雙青。筠枝九節輕。登山猶健在。投檄太遲生。滿意竹風冷。入懷溪月明。清秋故不遠。回首憶葦莖。

荔子絕句

驛騎星馳亦快哉。筠籠露濕手親開。不應相與無平素。曾忝戎州刺史來。

又

放翁遊蜀十年回。病眼茫茫每嬾開。怪底酒邊光景別。方紅江綠一時來。

官舍夙興

朝陽淡淡挂窗櫺。桐葉無風忽自零。不復扶頭傾白墮。但知臨目養黃寧。新蔬帶露來幽圃。脩鯉飛泉灑廣庭。一出文書又圍繞。正應高臥盡頽齡。

書懷

功名富貴兩茫茫。惟有躬耕策最長。吏牘沈迷妨養疾。囊衣結束待還鄉。洲中未種千頭橘。宅畔先栽百本桑。書寄子公吾自懶。故人不是總相忘。

風月

老來苦無伴。風月獨見知。未嘗費招呼。到處相娛嬉。披襟萬里快。弄影三更奇。淋漓蜀苑酒。散落江樓詩。狂歌撼山川。醉墨飛蛟螭。聊將調俗子。更遣半生疑。

大將出師歌

將軍北伐辭前殿。恩詔催排苑中宴。紫陌驚塵中使來。青門立馬羣公饒。繡旗雜沓三十里。畫鼓敲鑿五千面。行營暮宿咸陽原。滿朝太息傾都羨。天聲一震胡已亡。捷書奕奕如飛電。高秋不閉玉關城。中夜罷傳青海箭。可汗垂泣小王號。不敢跳奔那敢戰。山川圖籍上有司。張掖酒泉開郡縣。還朝策勛兼將相。詔假黃鉞調金鉉。丈夫未遇誰得知。昔日新豐笑貧賤。

婕妤怨

妾昔初去家。鄰里持車箱。共祝善事主。門戶望龍光。一入未央宮。顧盼偶非常。稗齒不慮患。傾身保專房。燕婉承恩澤。但言日月長。豈知辭玉陛。翮若葉隕霜。永巷雖放棄。猶慮重謗傷。悔不侍宴時。一夕稱千觴。妾心剖如丹。妾骨朽亦香。後身作羽林。爲國死封疆。

移疾

朝來移疾臥虛堂。暫屏文書日更長。鷗鷺近人情漸熟。簾櫳欲雨意先涼。紗巾自照清池影。蕊笈閑銷古篆香。莫恨微霜侵綠鬢。爲渠歌盡少年狂。

病中懷故廬

我家山陰道。湖山淡空濛。小屋如舴艋。出沒煙波中。天寒橘柚黃。霜落穉稈紅。祈蠶簫鼓鬧。賽雨雞豚空。我魚有竭作。刈麥無遺功。去年一月留行役。嗟匆匆。今年歸興動。艤舟待秋風。社飲可欠我。寄書約鄰翁。

夏夜不寐有賦

急雨初過天宇濕。大星磊落纔數十。飢鶻掠齋飛磔磔。冷螢墮水光熠熠。丈夫無成忽老大。箭羽凋零劍鋒澀。徘徊欲睡復起行。三更猶凭闌干立。

綠淨亭晚興

綠淨亭邊物色奇。放翁睡起曳筇枝。新涼已似雁來後。微雨卻如梅熟時。綠竹成陰藏細棧。朱闌倒影入清池。登臨獨恨非吾土。不爲城頭畫角悲。

憶山南

貂裘寶馬梁州日。盤槊橫戈一世雄。怒虎吼山爭雪刃。驚鴻出塞避雕弓。朝陪策畫清油裏。暮醉笙歌錦幄中。老去據鞍猶矍鑠。君王何日伐遼東。

又

醉墨淋漓酒百盃。轅門山色碧崔嵬。打毬駿馬千金買。切玉名刀萬里來。結客漁陽時遣簡。踏營渭北夜

何枚十年一夢今誰記。閑置車中只自哀。

夕雨

屣履行莎徑。移牀臥草亭。風聲雜溪瀨。雨氣挾龍腥。奕奕空中電。昏昏雲罅星。徂年又如許。吾髮得長青。

又

獨夜初傳漏。空齋半掩扉。候蟲燈下語。水鳥雨中歸。客舍愁彈劍。京塵怯化衣。故人招隱意。字字莫相違。

試茶

北窗高臥。軒如雷。誰遣香茶挽夢回。綠地毫甌。雪花乳。不妨也道入闕來。

莆陽餉荔子

江驛山程日夜馳。筠籠初拆露猶滋。星毳嫩玉雖奇品。終憶戎州綠荔枝。

初秋書懷

二十年前已二毛。卽今何恨鬢蕭騷。孤燈自伴詩情苦。俗子從嫌醉眼高。煙外暮鐘來遠寺。雨餘秋漲集空壕。思歸更向文書嬾。此手惟堪把蟹螯。

建州絕無夾意頗思之戲作

鄉國雞頭賣。早秋綠荷紅。樓最風流。建安城裏西風冷。白棗堆盤看卻愁。

憶昔

憶昔西遊變姓名。獵圍屠肆押豪英。淋漓縱酒滄溟窄。慷慨狂歌華岳傾。壯士有心悲老大。窮人無路共

功名生涯自笑惟詩在。旋種芭蕉聽雨聲。

客思

裘馬平生喜遠遊。暮年顛顛向南州。文書與睡中分日。歲月如流總自由。燕復尋常看討虎。但思重浦聽呼牛。還家誰道無餘俸。倒囊猶堪買釣舟。

初秋夢故山覺而有作

陂水白茫茫。草煙濕霏霏。牧童一聲笛。落日無餘暉。遙山已漸隱。村巷亞竹扉。老翁延我入。苦謝柿栗微。幸逢歲有秋。一醉君勿違。念此動中懷。命駕吾將歸。

又

犬吠舍前後。月明村東西。岸草蛩亂號。庭樹鳥已栖。我僕城中遠。擔頭有懸雞。小兒勸我飲。村酒拆赤泥。我醉不自覺。頽然葛巾低。著書笑蒙莊。若芋物自齊。

又

昔我東歸時。父老迎船頭。開篷相勞苦。怪我領雪稠。故山何負君。且作數月留。豈知席未煖。疋馬來南州。蠻花四時紅。瘴霧日夜浮。歸哉不可遲。勿與婦子謀。

又

杜宇真吾友。勸去恨不速。忠告輸肝肺。厚意均骨肉。陋哉鸚鵡語。揣我貧念祿。竹雞更鄙淺。泥淖憂車軸。秋風嚴灑清。春雨戴溪綠。行矣勿復疑。照影巾一幅。

寓歎

千載前人每暗同。眼邊俗客馬牛風。作文要可張子布。飲酒思從陳孟公。半世氛埃成潦倒。幾時裘釣入空濛。一菴處處皆堪老。莫怕無山著此翁。

雙清堂醉臥

客裏逢秋醉似泥。空堂獨臥意淒迷。亂號庭樹西風急。斜掛城樓北斗低。末路敢貪詩鶴料。微官久厭襪雞棲。平生玉局經行地。擬乞冰衙隱剡溪。

醉書

半年愁病劇。一雨喜涼新。稍與藥囊遠。初容酒醜親。浩歌驚世俗。狂語任天真。我亦輕餘子。君當恕醉人。

憶唐安

南鄭戍還初過蜀。朝衫與鬢猶爭綠。逢春飲酒似長鯨。醉裏千簷風雨速。唐安池館夜宴頻。激激玉船搖畫燭。紅索琵琶金縷花。百六十絃彈法曲。曲終卻看舞霓裳。嬋嬋宮腰細如束。明朝解醒不用酒。起尋百畝東湖竹。歸吳寂莫時自笑。縱有詩情誰省錄。今年二頃似可謀。去斷雲根結茅屋。

秋懷

暮年身世轉悠悠。又向天涯見早秋。昨夜月明今夜雨。關人何事總成愁。

又

星斗闌干河漢流。建州風物更禁秋。年來多病題詩嬾。付與鳴蛩替說愁。

晝臥聞碾茶

小醉初消日未晡。幽窗催破紫雲腴。玉川七盃何須爾。銅碾聲中睡已無。

月下獨行橋上

新秋未再旬。月露已浩然。放翁一幅巾。與影俱翩僊。飛橋挂澄露。幽竇鳴細泉。開傍纔俛仰。已近搖落天。殊方久滯留。感此歲月遷。歸來看青燈。悄愴不得眠。

夜意

火雲夕方收。草露秋已白。堂堂空燈欲翳。壁壞蟲自噴。四顧寂無人。獨立岸吾幘。窮通何足論。等是百年客。何能爲一飽。半世出下策。布帆幸無恙。誰謂江海迹。

秋夜書懷

斷香漠漠繞藤牀。新月娟娟轉畫廊。鄉遠每勞千里夢。雨慳未放九秋涼。衰遲分作驢伏櫪。斂退敢求雞出囊。剩喜今年有奇事。嚴遵灘下繫歸航。

思故廬

平生一束書。不爲屋廬計。微官寄郵傳。俯仰閱半世。草堂白雲邊。日夜長松桂。柴門入幽夢。落日亂蟬嘒。宦遊有何好。海角愁癘癘。拂衣便可耳。勿使老春齋。

雨夜

小雨初涼夜。殘燈欲暗時。病多愁近酒。心弱怯題詩。舊友殊方少。歸耕晚歲宜。回頭語孤影。此意有君知。

北窗哦詩因賦

二十年來賦遠遊。一窗又復寄南州。雙鶉戲雨陂塘曉。亂葉飄風院落秋。顏鬢蹉跎愁覽鏡。江山重復怯登樓。平生事業詩千首。殘稿從教處處留。

又

露下螢飛仲秋月。山圍水繞建安城。病多不辨酒中聖。身遠且令心太平。數卷蠹書行老矣。一盂蔬飯太憎生。白雲只在簷間宿。聽我清宵詠句聲。

假裝

絕物離人恨未能。聊爲旦過打包僧。蹇驢渺渺秋山雨。孤榻昏昏夜店燈。酒量已隨詩共退。客愁仍與病相乘。頽然衰颯嗟誰識。俠氣當年蓋五陵。

追感梁益舊遊有作

西遊萬里倚朱顏。肯放尊前一笑慳。蜀苑妓圍欺夜雪。梁州獵火滿秋山。晚途忽墮塵埃裏。樂事渾疑夢寐間。浮世變遷君勿歎。劇談猶是詫鄉關。

莆陽昭武延平送兵漸集戲書

鼓聲晨枕枕角聲暮鳴鳴。作官了何事。空歎歲月徂。送兵稍稍集。秣馬脂吾車。風霜迫搖落。殘暑亦已無。野渡明丹楓。破驛吹黃榆。聊收作詩料。未用厭征途。

別建安絕句

三十年來雲水僧，常挑鉢袋繫行蹤。信緣不作癡巢窟，即是吾家無盡燈。

又

楚澤吳山已慣行，武夷從昔但聞名。北巖小寺長汀驛，且喜遊山第一程。

又

軟帽揚鞭晚出城，驛亭燈火向人明。多情葉上蕭蕭雨，更把新涼送客行。

初發建安

小雨初收雲未歸，吾行迨及晚秋時。寒沙新雁無人問，露井殘桐有客悲。征袂拂霜長喚馬，驛窗剪燭夜題詩。悠然且作尋山想，夢裏功名莫自期。

宿北巖院

車馬紛紛送入朝，北巖燈火夜無聊。中年到處難爲別，也似初程宿灞橋。岑參詩云：初程莫早發，且宿灞橋頭。語意至工。

書感

溪路人家尚闔扉，強扶衰體著征衣。百年朝露古所歎，一櫛秋風吾欲歸。楚客長號沾白壁，漢宮太息遺明妃。鑿金消骨從來事，老矣何心踐駭機。

長汀道中

晚過長汀驛，溪山乃爾奇。老夫惟坐歎，造物爲陳詩。鳥送穿林語，松垂拂澗枝。憑鞍久忘發，不是馬行遲。

黃亭夜雨去武夷四十里

未到名山夢已新。千峯拔地玉嶙峋。黃亭一夜風吹雨。似爲遊人洗俗塵。

遊武夷山

少讀封禪書。始知武夷君。晚乃遊斯山。秀傑非昔聞。三十六奇峯。秋晴無纖雲。空巖雞晨號。峭壁丹夜嗽。巢居寄千仞。鴻荒想羲軒。風雨蛻玉骨。難以俗意論。丹梯不容躋。修蔓亦畏捫。泝灘進小艇。愧驚白鷺羣。學道雖恨晚。養氣敢不勤。宦遊非本志。寄謝鶴與猿。

泛舟武夷九曲溪至六曲或云灘急難上遂回

暮年脚力倦躋攀。借得扁舟臥看山。怪怪奇奇何所似。綠蘿溪入下牢關。

又

一葉凌風入峽來。山童指點幾崔嵬。急流勇退平生意。正要船從半道回。

崇安縣驛

驛外清江十里秋。雁聲初到荻花洲。征車已駕晨窗白。殘燭依然伴客愁。

過建陽縣以雙鶉贈東觀道士爲長生鶉觀俯大溪鶉得其所矣武夷險絕處有仙船架崖壁間
數日前大風吹墮船木數寸堅硬如石予偶得之皆此行奇事也各賦一詩

閑泛晴波啜綠萍。卻衝微雨傍煙汀。會稽內史如相遇。換取黃庭一卷經。

右雙鶉

斷崖幽洞白雲深。縹緲仙槎無古今。飛下一峯相勞苦。卻疑天外有知音。

右墮木

紫谿驛信州鉛山縣

他鄉異縣老何堪。短髮蕭蕭不滿簪。旋買一尊持自賀。病身安穩到江南。

又

雲外丹青萬仞梯。木陰合處子規啼。嘉陵棧道吾能說。略似黃亭到紫谿。

鵝湖夜坐書懷

士生始墮地。弧矢志四方。豈若彼婦女。醜醜藏閨房。我行環萬里。險阻眞備嘗。昔者戍南鄭。秦山鬱蒼蒼。鐵衣臥枕戈。睡覺身滿霜。官雖備幕府。氣實先顏行。擁馬涉沮水。飛鷹上中梁。勁酒舉數斗。壯士不能當。馬鞍挂狐兔。燔炙百步香。拔劍切大肉。哆然如餓狼。時時登高望。指顧無成陽。一朝去軍中。十載客道傍。看花身落魄。對酒色淒涼。去年忝號召。五月觸瞿唐。青衫暗欲盡。入對衰涕滂。今年復詔下。鴻雁初南翔。俯仰未閱歲。上恩實非常。夜宿鵝湖寺。槁葉投客牀。寒燈照不寐。撫枕慨以慷。李靖聞征遼。病體更激昂。裴度請討蔡。奏事猶衷創。我亦思報國。夢繞古戰場。

信州東驛晨起

衣上征塵鬢畔霜。信州古驛憩歸裝。悲歌未肯彈長劍。豪氣猶能臥大牀。半暗殘燈搖北壁。常飢老馬臥東廂。鄰雞唱罷衣篝暖。自笑行人日日忙。

陸放翁集 十 劍南詩集 卷十一

四十五

玉山縣南樓晚望

小樓在何許。正在南溪上。空濛過釣船。斷續聞漁唱。征途苦徧仄。舒嘯喜清曠。安得此溪水。爲我變春醞。

玉壺亭

玉壺亭上小徘徊。閑對殘荷把一盃。冠蓋交馳期會急。長官未必辦頻來。

步過縣南長橋游南山普寧院山高處有塔院及小亭縹緲可愛恨不能到

偶扶藤杖過南津。野寺長橋發興新。暫就清溪照鬢髮。不妨翠霧濕衣巾。山縵細棧疑無路。樹落崩崖欲壓人。朝暮有程常猝猝。何因攜酒上嶙峋。

枕上感懷

五更攬轡山路長。老夫誦書聲琅琅。古人已死心則在。度越秦漢窺虞唐。三更投枕窗月白。老夫哦詩聲噴噴。淵源雅頌吾豈敢。屈宋藩籬或能測。一代文章誰汝數。老不能閑真自苦。君王雖賞于菟子。無奈宮中須羯鼓。

晚過招賢渡

老馬骨嶮然。虺虺不受鞭。行人爭晚渡。歸鳥破秋煙。湖海淒涼地。風霜搖落天。吾生平行路。搔首送流年。

臥輿

白首躬耕已有期。鳳城歸路卻遲遲。臥輿擁被聽秋雨。占盡人間好睡時。

奏乞奉祠留衢州皇華館待命

世念蕭然冷欲冰。更堪衰與病相乘。從來幸有不材木。此去真爲無事僧。見丹竈。燒耐辱。豈惟容睡面。暮
言端擬學銘膺。尙餘一事猶豪舉。醉後龍蛇滿剡藤。

寓舍偶題

轉徙身飄梗。淹留等繫匏。雁孤依遠渚。鳩拙寄空巢。寒日頰梨頰。清霜長橘包。平生楚道士。歲晚欲深交。

夙興

客中睡眠少。常以雞鳴興。新炭熾宿火。膏油續殘燈。焚香倚蒲團。外靜中已凝。榮辱兩不到。淡如秋水澄。
出定窗已白。烟炯寒日昇。廚人作芋糝。供此在家僧。

夜坐

老知世事謾紛紛。紙帳蒲團自策勳。一夜北風吹裂屋。石樓無耳不曾聞。

偶得石室酒獨飲醉臥覺而有作

初寒思小飲。名酒忽墮前。素鬢手自傾。色若秋澗泉。浩歌復起舞。與影俱翩僊。一笑遺宇宙。未覺異少年。
詩人不聞道。苦歎歲月遷。豈知汝南市。自有壺中天。河洛久未復。銅駝森然秋。風歸去來虛。老玉井蓮。

午睡

風霜踐殘歲。我乃羈旅人。如何得一室。牀敷暖如春。午枕挾小醉。鼻息撼四鄰。心安了無夢。一掃想與因。
逡巡起頰面。覽鏡正幅巾。聊呼盪眼湯。淪我玉色塵。

贈柯山老人

柯山老人九十餘，亂髮不櫛，瘦如枯。百穿千結一布袴，得酒一吸輒倒壺。自言少年不蓄學，有錢徑付酒家壚。人生辦此真良圖，棄官從翁許我無。

寓館晚興

隨牒人間不自憐，衢州孤驛更蕭然。百年細數半行路，萬事不如長醉眠。髮短經秋真種種，腹寬耐事只便便。晚窗商略惟當飲，安得黃花到眼邊。今年九月將盡，竟未見菊。

葉相最高亭

高亭新築冠菴峯，眼力超然信不同。膚寸法雲澤天下，大千沙一作法界納胸中。春遊到處羣花擁，夜宴歡時百榼空。劉白老來忘世味，只思詩酒伴裴公。裴晉公留守東都，白樂天劉夢得以分務與晉公倡酬。

婺州州宅極目亭

尙書曳履上星辰，小爲東陽作主人。朱閣凌空雲縹緲，青山繞郭玉嶙峋。似聞旋教新歌舞，且慰重臨舊吏民。莫倚闌干西北角，卽今河洛尙胡塵。

謝演師送梅

早梅時節到江南，已判樽前酒滿衫。輸與西鄰明上座，解從大庾嶺頭參。

又

折送江梅意不疎，要教相對鬪清臞。爲君著向明窗下，試問山翁具眼無。

訪毛平仲問疾與其子适同遊柯山觀王質爛柯遺跡

籃輿訪客過仙村。千載空餘一局存。曳杖不妨呼小友。還家便恐見來孫。林潛巖絕秋風瘦。樓堞參差暮
氣昏。酒美魚肥吾事畢。一菴那得住雲根。

月巖

幾年不作月巖遊。萬里重來已白頭。雲外連娟何所似。平羌江上半輪秋。

弋陽縣驛

大雨山中采藥回。子頭巖畔覓詩來。喚船野渡逢迎雪。攜酒溪頭領路梅。久客愁心端欲拆。何時笑口得
頻開。慙慙記著今朝事。破驛空廊葉作堆。

弋陽道中遇大雪

我行江郊暮猶進。大雪塞空迷遠近。壯哉組練從天來。人間有此堂堂陣。少年頗愛軍中樂。跌宕不耐微
官縛。憑鞍寓目一悵然。思爲君王掃河洛。夜聽簌簌窗紙鳴。恰似鐵馬相磨擊。起傾斗酒歌出塞。彈壓胸
中十萬兵。

雪中感成都

憶在西州遇雪時。繡筵處處百花圍。烏絲闌展新詩就。油壁車迎小獵歸。感事鏡鸞悲獨舞。寄書箠雁恨
慵飛。愁多自是難成醉。不爲天寒酒力微。

雪後苦寒行饒撫道中有感

殘雪暮還結。朔風晴更寒。重裘猶粟屑。連酌無辭顏。指直不可握。終日縮袖間。十年走萬里。何適不艱難。

附火財須臾。攬轡復慨歎。恨不以此勞。爲國戍玉關。

對酒

溫如春色爽如秋。一棹燈前自獻酬。百萬愁魔降未得。故應用爾作戈矛。

又

歎息人真未易知。暮年始覺麴生奇。個中妙趣誰堪語。最是初醺未醉時。

梅花 臨州道中見梅數樹。憔悴特甚。

我與梅花有舊盟。卽今白髮未忘情。不愁索笑無多子。惟恨相思太瘦生。身世何曾怨空谷。風流正自合傾城。增冰積雪行人少。試倩鶉鴝爲寄聲。

雪中尋梅

莫遣扁舟興盡回。正須衝雪看江梅。楚人原未知真色。施粉何曾太白來。

又

幽香淡淡影疎疎。雪虐風饑亦自如。正是花中巢許輩。人間富貴不關渠。

江上梅花

老來樂事少關身。猶喜尊前見玉人。豈是淒涼偏薄命。自緣纖瘦不禁春。娟娟月上明江練。黯黯天低糝玉塵。絕斷橋幽獨處。護持應有主林神。

卷第十二

擬峴臺觀雪

垂虹亭上三更月，擬峴臺前清曉雪。我行萬里跨秦吳，此地固應名二絕。山川滅沒雪作海，亂墜天花自成態。狂歌痛飲豪不除，更憶銜枚馳出塞。蘆摧葦折號飢鴻，欲傅粉墨無良工。摩挲東絹三歎息，收入放翁詩卷中。明朝青天行日轂，萬瓦生煙失瓊玉。世間成壞本相尋，卻看晴山暈眉綠。

舊在成都初春無事日訪昭覺保福正法諸刹甚可樂也追懷慨然因賦長句

憶在西川集寶坊，幅巾蕭散日初長。伊蒲塞饌分香積，優鉢羅花散道場。客路逢春增感慨，舊遊回首已微涼。新晴強作尋幽計，有底文書作許忙。

園中賞梅

閱盡千葩百卉春，此花風味獨清真。江邊曉雪愁欲語，馬上夕陽香趁人。慰眼紅苞初報信，回頭青子又生仁。竊遊偏覺年華速，徒倚闌干一愴神。

又

行遍茫茫禹畫州，尋梅到處得閑遊。春前春後百回醉，江北江南千里愁。未愛繁枝壓紗帽，最憐亂點糝貂裘。一寒可賀君知否，又得幽香數日留。

正月十五日出郊至金石臺

漸老惜時節，思遊那可忘。雪晴天淺碧，春動柳輕黃。笑語寬衰疾，登臨到夕陽。未須催野渡，聊欲據胡牀。

又

開歲多休暇。官身亦暫閑。樓臺先晝永。花柳向春慳。啼鳥隨遊轡。和風愜醉顏。更憐歸路好。破墨數峯山。
晚歸見西南諸山如畫。

六日小飲園中。光景鮮妍。紅梅已拆。恍記在果州。偶得絕句。

輕裘駿馬金泉路。金泉蓋謝自然輕舉之地。默數新春又九年。風景不殊人自老。忽驚作夢到臨川。

聞雁

過盡梅花把酒稀。熏籠香冷換春衣。秦關漢苑無消息。又在江南送雁歸。

撫州上元

江月微雲外。街泥小雨餘。人如虛市散。燈似曉星疎。羈雁同身世。新霜上鬢鬚。明年更清絕。魚火對茅廬。

登擬峴臺

層臺縹緲壓城闌。倚杖來觀浩蕩春。放盡樽前千里目。洗空衣上十年塵。繁迴水抱中和氣。平遠山如蘊藉人。更喜機心無復在。沙邊鷗鷺亦相親。

燈夕有感

芙渠紅綠亦參差。睡起燒香強賦詩。萬里錦城無夢到。豈惟虛負放燈時。

庚子正月十八日送梅

滿城桃李爭春色。不許梅花不成雪。世間尤物無盛衰。萬點繁風愈奇絕。我行柯山眠酒家。初見窗前三

四花恨無壯士挽斗柄。坐令東指催年華。今朝零落已可惜。明日重尋更無迹。情之所鍾在我曹。莫倚心腸如鐵石。

初春懷成都

我昔薄遊西適秦。歸到錦城逢早春。五門收燈藥市近。小桃妖妍狂殺人。蜀中入春惟小桃先開。似垂絲海棠。霓裳法曲華清譜。燕妬身輕鶯學語。歌舞更休轉盼間。但見宮衣換金縷。世上悲歡豈易知。不堪風景似當時。病來幾與麴生絕。禪榻茶煙雙鬢絲。

春雨

冬旱土不膏。愛此春夜雨。四郊農事興。老穉迭歌舞。相呼長沮耕。分喜樊遲圃。豐年已在目。亭障靜桴鼓。我歸未有期。一官寄倉庾。幸復寬簡書。不敢恨羈旅。

雨中遣懷

病中草草度年華。睡起匆匆日易斜。抵死愁衾千斛酒。薄情雨送一城花。鏡湖壓水搖朱舫。錦里香塵走鈿車。此夢即今都打破。不妨寂寞往天涯。

又

霏霏春雨細如絲。正是春寒欺客時。心向宦途元淡薄。夢尋鄉國苦參差。樓前新漲綠三尺。牆外尙餘紅幾枝。擺撥簿書呼酒榼。南湖西塔有幽期。

晚晴

水聲瀾灩赴回塘。簾影疎疎遶四廊。靜院數盃傾白墜。幽窗一枕夢清湘。潤侵書笥深防蠹。暖徹衣篝剩得香。解組徑歸應更樂。偷閑猶足傲羲皇。

春晚

五十六翁身百憂。年來轉覺此生浮。山川信美故鄉遠。天地無情雙鬢秋。社後燕如歸客至。春殘花不爲人留。一觴一詠從來事。莫笑扶衰又上樓。

春晚坐講忽夢泛舟飲酒樂甚既覺悵然有賦

夢泛扁舟逸興多。畫樓搖蕩麴生波。微風簌簌生蒲草。小雨霏霏濕芰荷。舞落烏紗從歲去。歌酣白紵奈情何。年來惟覺華胥樂。莫遣茶甌戰睡魔。

遣興

老子癡頑慣轉蓬。殘年嬾復問窮通。敎書雖未除詩債。盟府猶當策酒功。桐嶺市回人踏月。柘岡日落鳥呼風。浮生觸處無真實。豈獨南柯是夢中。

老去

老去時時病。春來日日陰。文書有期會。山水負登臨。倦客風埃眼。孤臣狗馬心。餘寒欺短褐。莫惜酒盃深。

雨夜

百紫千紅占歲華。又隨風雨捲泥沙。卽今空有夢爲蝶。當日曾將命乞花。倦枕殘燈人寂莫。幽窗小草字欹斜。悲歡變滅何窮已。學得山僧自一家。

簡黎道士

滿箔吳蠶繭漸稠。四郊膏雨麥方秋。道人昔是茶山客。病叟新爲藥市遊。蒼蒼凋零誰晤語。篇章瓌潔尚風流。蘭亭刻曲春光好。倘肯相從弄釣舟。

臨川絕無佳酒時得一醉戲書

有酒時劇飲。無酒徒浩歌。庭花五六株。老子獨婆娑。誰云苦寂寞。在我亦已多。管絃萬二千。一笑謝天魔。夢作青城去。翠磴捫松蘿。又爲平羌遊。素月沉煙波。覺來撫几歎。奈此桎梏何。流年不貸人。去去如飛梭。

醉中懷江湖舊遊偶作短歌

無渡河。浪花無蒂高嵒嶮。莫登樓。茫茫芳草難爲情。華軒寶馬只好路旁看。冶金伐石空留後世名。古來惟有竹林諸人稱達生。一醉之外萬事鴻毛輕。可憐癡人競聲利。坐使方寸森五兵。散花洲上青山橫。野魚可膾菰可烹。脫冠散髮風露冷。臥看江月金盃傾。

三月二十一日作

蹴鞠牆東一市譁。鞦韆樓外兩旗斜。及時小雨放桐葉。無賴餘寒開楝花。明月吹笙思蜀苑。軟塵騎馬夢京華。懽懽減盡朱顏改。節物催人只自嗟。

天祺節日飯罷小憩

臥聽午漏隔花傳。籬裏花殘有斷燵。莫放轆轤鳴玉井。偷閑要補五更眠。

思歸

白髮滿青鏡。悵然山水身。那因五斗米。常作半塗人。涉世風波惡。思歸懷抱真。會當求鈍斧。送老鏡湖濱。

齒痛有感

眼暗頭童負聖時。齒牙欲脫更堪悲。暮年漸解人間事。蒸食哀梨亦自奇。

南窗睡起

夢中忘卻在天涯。一似當年錦里時。狂倚寶箏歌白紵。醉移銀燭寫烏絲。酒來鄆縣香初壓。花送彭州露尚滋。起坐南窗成絕歎。玉樓乾鶴誤歸期。

又

晝漏迢迢暑氣清。不妨小倦帶餘醒。夢從隴客聲中斷。愁向湘屏曲處生。風度簾旌紅浪颭。窗明香軸碧雲橫。閑情賦罷憑誰寄。悵望壺天白玉京。

初夏

百葉盆榴照眼明。桐陰初密暑猶清。深深籬幕度香縷。寂寂房櫺聞燕聲。細假詩篩憊裝几。靜思棋劫對楸枰。澆花光景應如昨。回首西州一槍情。花四月十九日也。

讀程秀才詩

程子晚相得。居然一坐傾。新詩欲飛動。病眼爲開明。英妙非凡質。衰遲畏後生。吾徒可相賀。五字有長城。

晨起

一官又寄汝江頭。落魄文園故倦遊。榻上鐸聲悲破夢。簷邊桐葉冷生秋。暮年作吏寧長策。薄祿糜人尚

小留晨起憑欄歎衰甚接羅紗薄髮颯颯

雨夜

兩鬢新霜換舊青。客遊身世等浮萍。少年樂事消除盡。雨夜焚香誦道經。

得京書或怪久不通問

慣向江湖鍛羽翰。雲霄那敢接鷓鴣。百年未必如炊久。萬事真須作夢看。白首據鞍慚俠氣。清燈顧影歎儒酸。手遮西日成何味。還我平生舊釣竿。

水亭

日淡暑猶薄。雨餘風更清。儻然水亭立。試此葛衣輕。曬粉憐孤蝶。穿枝喜晚鶯。誰知簿書裏。也復得吾生。

醉眠

達士如鴟夷。無客亦自醉。癡人如撲滿。多藏作身祟。放翁亦何長。偶自遠聲利。胸中白如練。不著一毫偽。醉來酣午枕。晴日雷起鼻。寄謝敲門人。予方有公事。

感舊絕句

鴨翎墩前山簇馬。雞蹤橋下水連天。金丹煉成不肯服。且戲人間五百年。

又

鵝黃酒邊綠荔枝。鵝黃廣漢酒名絲。荔枝出鉅州。摩訶池上納涼時。冰紈不畫騷鸞女。卻寫江南白紵辭。

又

陸放翁集 十 劍南詩選 卷十二

五十七

南市夜夜上元燈。西鄰日日是清明。青氈帽。車碾花去。黃金馬。鞭穿柳行。

又

十月新霜兔正肥。佳人駿馬去如飛。織腰嫋嫋戎衣窄。學射山前看打圍。

又

半紅半白官池蓮。江潭廟池。半醒半醉女郎船。鴛鴦驚起何曾管。折得雙頭喜欲顛。

又

紅葉琵琶出嘉州。四絃彈盡古今愁。胡沙漫漫紫塞曉。漢月娟娟青冢秋。

又

美人傳酒清夜闌。欲歌未歌愁遠山。蒲萄一斗元無價。換得涼州也是閑。

晝臥聞百舌

雨後郊原已遍犁。陰陰籬幙燕分泥。闌眠不作華胥計。說與春鳥自在啼。江南謂百舌爲春鳥。

寄呂博士

薄宦東西蜀。僑居太少城。休論九年謫。喜識萬人英。別久心常折。書來眼未明。功名君自力。丘壑我平生。

遊疎山

我願匹馬飛騰遍九州。如今苦無驪裘與驂駒。葛陵之龍又難致。兀兀安得忘吾愁。幸餘一事差可喜。雲山萬里芒鞋底。杖行穿罅冢雲。試茶手挹香溪水。江西山水增怪奇。疎山之名舊所知。惜哉不見侏儒。

師尙想薪水俱空時。寺門欲近山若拆。老樹蒼崖含古色。挂包便住吾豈能。一來要是疎山客。

疎山東堂晝眠

飯飽眼欲閉。心閑身自安。樂超六欲界。美過八珍盤。香縷縈簷斷。松風逼枕寒。吾兒原解夢。爲我轉雲團。
是日約子分茶。

山中作

朱墨紛紛訟滿庭。半年初得試山行。燒香掃地病良已。飲水飯蔬身頓輕。日落三通傳浴鼓。雨餘千耦看農耕。故巢光景還如此。爲底淹留白髮生。余書堂在雲門寺西。

觀蔬圃

葱芥可菹芹可羹。晚風啾唧桔槔聲。白頭孤宦成何味。悔不畦蔬過此生。

東堂晨起有感

不解飛車越九州。青鞋處處爲山留。百年未盡且作夢。三日閑行聊散愁。世上幾經華表柱。尊前好在黑貂裘。龍泉幸是無人斲。暮露光芒上斗牛。

金谿道中

雲閣苦竹市。雨來烏石岡。駕犂雙犢健。鬻醪一村香。天地君恩重。風埃吏責忙。敢辭坡路滑。且領筍輿涼。

小憩前平院戲書觸目

道邊小寺名前平。殘僧二三屋半傾。旁分千畦畫楸局。正對一山橫翠屏。修纖弱蔓上幽援。一作拔。堅瘦。

穉柏當前榮。稻秧正青白。鷺下桑椹爛。紫黃鸚鳴。村虛賣茶已成市。林薄打麥惟聞聲。泥行扶犁吒新犢。野饒燒箔炊香粳。十年此樂發夢想。忽然到眼難爲情。上車欲去復回首。那將暮境供浮名。

遣興

小麥登場雨熟梅。閉門病眼每慵開。酒盃不解爲愁敵。書卷纔開作睡媒。骨朽空名垂斷簡。家荒殘碣臥蒼苔。紛紛傾奪知何得。老覺人間但可哀。

雨後獨登擬峴臺

高城斷處開橫空。目力雖窮與未窮。燕子爭泥朱檣外。人家曬網綠洲中。誰能招喚三秋月。我欲憑陵萬里風。更比峴山無湛輩。論交惟是一枝筇。

數日訴牒苦多。懣甚戲作

江南五月暑猶薄。梅子正黃風雨惡。庭中訟牒不貸人。急甚常如虎遭縛。空齋鼠迹留几塵。賦詩飲酒疑前身。脫歸徑臥與壁語。敢恨無人問良苦。

與黎道士小飲偶言及曾文清公慨然有感

臨川稅駕忽數月。嗜睡愛閑常閉門。君詩始愜病僧意。吾道難爲俗人言。秋雨淒淒黃葉寺。春風酣酣綠樹村。曾公九原不可作。一尊破涕誦招魂。

念歸

江城五月初暮雨。雨脚纔收水流礎。酒盃未把愁作病。塵柄欲拈誰共語。有時暫解簿書圍。獨坐藤牀看

香縷林塘渺渺鳩正懽。簾幙陰陰燕新乳。湖山舊隱入我夢。白首忘歸獨安取。一生花裏醉春風。卽今願作扶犁翁。

五月十一日夜且半夢從大駕親征。盡復漢唐故地。見城邑人物繁麗。云西涼府也。喜甚。馬上作長句未終篇而覺。乃足成之。

天寶胡兵陷兩京。北庭安西無漢營。五百年間置不問。聖主下詔初親征。能熊百萬從。鑾駕故地不勞傳。檄下築城絕塞進新圖。排仗行宮宣大赦。岡巒極目漢山川。文書初用淳熙年。駕前六軍錯錦繡。秋風鼓角聲滿天。苜蓿前盡。障障平安火。在交河上。涼州女兒滿高樓。梳頭已學京都樣。

雨夜

牆西泥三寸。牆東草三尺。可憐白鹿泉。蛙黾紛狼藉。濕螢如隕星。入戶黏几席。病夫本嗜睡。況此風雨夕。永懷瀼西寺。更憶山南驛。陳迹不可追。昏然墮吾幘。

又

簷高雨聲壯。堂豁霧氣入。飛螢照畫棟。相逐光熠熠。向來經春旱。蒼耳暗原隰。微官又厚責。撫事百憂集。三日雨不休。四野苗盡立。登高思賦詩。簿書縛人急。

焚香晝睡。比覺香猶未散。戲作。

又

小屏煙樹遠參差。吏散身閑與睡宜。誰似爐香念幽獨。伴人直到夢回時。

燕梁寂寂篆煙殘。偷得勞生數刻閑。三疊秋屏護翠枕。臥遊忽到灩西山。

仲夏小旱方致禱。忽大雨連日。江水爲漲。喜而有作。

早苗垂槁歎何堪。大雨誰知變立談。翠麓青林吞欲盡。惡風白浪戰方酣。江翻龜窟連雲澤。雷挾龍腥起雪潭。從此年豐真少事。炷香終日坐蒲龕。

冒雨登擬峴臺觀江漲

雨氣分千嶂。江聲撼萬家。雲翻一天墨。浪蹴半空花。噴薄侵虛閣。低昂泛斷槎。壯遊思夙昔。乘醉下三巴。

雜庭草

露草煙蕪與砌平。羣蛙得意亂疎更。微涼要作安眠地。放散今宵鼓吹聲。

蛺蝶詞

蛺蝶子。去復來。草長齊腰花亂開。蜜蜂辛苦爲人計。林鶯百轉胡爲哉。嗟爾蛺蝶獨得意。飛來飛去無嫌猜。追花逐絮闌干角。人生安得如汝樂。

大雨踰旬既止復作江遂大漲

牆角蚊雷喧甲夜。溼星昏昏出雲罅。臨堂仰占久歎咤。懸知龍君未稅駕。行人困苦泥沒膝。居人悲啼江入舍。便晴猶可望秋稼。努力共禱城南社。

又

一春少雨憂旱曠。熟睡淋漓渾坐龍嬾。以勤贖嬾謹其短。水浸城門渠不管。傳聞霖潦千里遠。榜舟發粟敢

不勉空村避水無雞犬。茆舍夜深螢火滿。民家避水多依丘阜。以小舟載米賑之。

燒丹示道流

昔燒大藥青牛谷。磊落玉床收箭鏃。扶桑朝暎護火候。仙掌秋露勤沐浴。帶間小瓢鬼神衛。異氣如虹夜穿屋。點成黃金棄山海。揮手人間一裘足。明年服丹徑仙去。洞庭月冷吹橫玉。相逢只恐驚倒君。毛髮麤毳垂地綠。

書感

半世狂疎踐駭機。暮年持此欲安居。會憑香火消前業。已築茆茨認昨非。余村層築小軒。以昨非名之。傳俗慣看翻覆手。憂心空復倒顛衣。煙蓑雪笠家風在。送老湖邊一釣磯。

夏日

病退身初健。時清吏更休。渴蜂窺硯水。慵燕息簾鉤。碁局每坐隱。屏山時臥遊。真成愛長日。未用憶新秋。

寄統

大兒掣藥囊。小兒負書笈。共作蘭亭遊。詎必羣賢集。言此二十年。白首終未踐。汝復守荆扉。經年不相見。楚越天一涯。書疏何由頻。諸弟亦可憐。說兄輒酸辛。江城秋尚遠。桐葉落可增。悵然懷故谿。菱絲雨中老。

自訟

家弊須微祿。年衰尚遠遊。未逃朋友責。更遣吏民羞。采藥思長往。傳書却小留。微風入桐葉。分我一簾秋。夏日晝寢夢遊一院。闕然無人。簾影滿堂。惟燕隔箏絃。有聲覺而聞。鐵鐺風響。璆然殆所夢也。邪。

因得絕句

桐陰清潤雨餘天。簷鐸搖風破晝眠。夢到畫堂人不見。一雙輕燕蹴箏絃。

虛堂

著氣虛堂一點無。爽如秋露貯冰壺。滄州未遽浮舴艋。碧井聊聽放轆轤。肅肅清風生薤簞。酣酣美睡付紗櫺。惱人不奈奴兵輩。環抱文書待日晡。江百率以申初治文書。至暮夜乃已。

夢仙夢初講大官殿。仰視去天甚近星皆大。如月氣候清寒如十月間。時庚子六月一日也。

中宵遊帝所。廣殿綴仙官。天逼星辰大。霜清劍珮寒。賦詩題碧簡。侍宴跨青鸞。惆悵塵緣重。夢殘更未殘。

自嘲

夜作看花夢。朝賦飲酒詩。吾夢固忘矣。詩亦聊自欺。荒園無佳花。牽牛漫疎籬。給酒月四斗。官供酒月止。四斗耳。一觴難屢持。悲歡有定數。夫至誰得知。願從大鈞問。一笑在何時。

長歌行

燕燕尾涎涎。橫穿乞巧樓。低入吹笙院。嗚嗚背咬咬。朝浮杜若洲。暮宿蘆花夾。嗟爾自適天地間。將儔命侶意甚閑。我今獨何爲。一笑乃爾慳。世上悲歡亦偶然。何時爛醉錦江邊。人歸華表三千歲。春入箜篌十四絃。

對酒

簷鐸鳴雜珮。簾旌動微波。我老懶讀書。如此長日何。名酒來清江。嫩色如新鵝。奇俎映玉盤。珍鮓開綠荷。

萬事姑置之。適然甞且歌。宦遊亦何好。且復小婆娑。秋風雲門道。踏月捫青蘿。

自詠

夢歸不恨故山深。霜雪今年已滿簪。報國有心身潦倒。養生無術病侵尋。晨興聊取經遮眼。夜坐時憑易洗心。安用更爲消暑飲。虛堂三復自蕭森。

夏日睡起

簾紋似秋水。含風蹙微漪。帳幅如春煙。縹緲不受吹。團扇墮枕邊。皎皎素月暉。非睡復非覺。心定息自遲。茶熟我亦起。寒泉掬珠璣。浮瓜空把玩。甚矣今年衰。

所居堂極涼。雖三伏常有秋意也。偶得長句。

高棟虛簷六月涼。野人誰遣寄華堂。炎威自避重重幙。清吹時生曲曲廊。白苧出箱開疊雪。甘瓜隨刃落輕霜。憑誰爲報金羈客。滿帽京塵有底忙。

雨後露坐小酌

閉門誰與樂頽年。旋掃桐陰近酒邊。病久一春稀見蝶。雨多六月始聞蟬。官倉求飽真聊爾。山墅懷歸每惘然。從此讀書仍復懶。惟留白眼望青天。

日暮南窗納涼

冠蓋塵沙得我憎。脫巾聊喜髮鬢髥。素娥東湧行空闊。清吹南來掃鬱蒸。團扇正閑看破墨。矮牀欲臥怯文藤。扁舟歸去應尤樂。莫羨金盤賜苑冰。

中夜起登堂北小亭

幽人曳杖上青冥，掠面風輕宿醉醒。
朱戶半開迎落月，碧溝不動浸疎星。
舍聲格磔頻移樹，花影扶疎自滿庭。
歎息明年又安往，此身何啻似浮萍。

登擬峴臺

顛顛思吳客，淒涼擬峴臺。
一年秋欲到，兩鬢老先催。
鼻鼻菱歌斷，翩翩水鳥來。
倚闌哦五字，未穩莫輕回。

夜意

灑地移牀曲檻前，葛衣蕭爽接籬偏。
庭空秋近露沾草，月落夜闌星滿天。
靜待微風停素扇，旋消殘酒漱寒泉。
翛然自與氛埃遠，安用騎鯨學水仙。

道院遣興

微官不復歎頭顛，高棟虛窗樂有餘。
中夜塔鈴空際語，望秋庭樹月中疎。
甌炊青飯留巖客，露點朱毫勸玉書。
猶恨未成歸剡曲，小舟閑采白芙渠。

夜行至白鹿泉上

小雨病良已，新秋夜漸長。
隔城聞鶴唳，出戶逐螢光。
荒徑穿蒙密，遙空望莽蒼。
泉聲落環珮，肝肺爲清涼。

堂中以大盆漬白蓮花石菖蒲翛然無復暑意睡起戲書

海東銅盆面五尺，中貯澗泉涵淺碧。
豈惟冷浸玉芙蓉，青青菖蒲絡奇石。
長安火雲行日車，此間暑氣一點無。
紗幮竹簟睡正美，鼻端雷起驚僮奴。
覺來隱几日初午，碾就壑源分細乳。
却拈燥筆寫新圖，八幅冰

綃瘦蛟舞。

初秋

溼螢相逐照高棟。又見一年風露秋。流落江湖常踽踽。掃平河洛轉悠悠。簿書終日了官事。尊酒何時寬客愁。擬倩天風吹夢去。浩歌起舞散花樓。

書懷絕句

不到天台三十年。草菴猶記宿雲邊。老僧曉出松門去。手挈軍持取澗泉。

又

憶過棲賢見蜀僧。雲堂十月冷生冰。定回蔌蔌聞窗雪。一椀琉璃照佛燈。蜀僧左縣海辨也。

又

丈人祠西山谷盤。麻姑洞前松櫟寒。仙翁欲覓渺無處。聞在青溪浴大丹。仙翁謂隱先生。

又

早佩黃庭兩卷經。不應靈府雜羶腥。憑君爲買金鴉背。歸去秋山斲茯苓。

又

未駕青鸞返帝鄉。三江七澤路茫茫。看山看水無程數。漁艇爲家茨作糧。

狂吟

浮世何須宇宙名。一狂自足了平生。秋風湘浦紉蘭佩。夜月綠山聽玉笙。學劍慣曾遊紫閣。結巢終欲隱

青城年來自笑彌耽酒。百斛蒲萄未解醒。

聞雨

潭底垂龍喚不應。騶陽似欲敗西成。虛堂永夜耿無睡。起聽四郊車水聲。

初秋小疾效俳諧體

宿疾逢秋劇。衰容逐日添。專房一竹几。列屋萬牙籤。今年傳書頗多。遣悶憑清聖。忘情付黑甜。晚來風月好。一笑捲疎簾。

雨後極涼料簡篋中舊書有感

日映小雨不至晡。雨雖未足涼有餘。細泉冷冷咽幽竇。清吹策策驚高梧。笠澤老翁病蘇醒。欣然起理西齋書。十年燈前手自校。行間顛倒黃與朱。區區樸學老自信。要與萬卷歸林廬。爾來世俗喜變古。鑿空飾詐無根株。愀然撫几三太息。力薄抱恨何由祛。蘭臺漆書非已責。且爲籤籙除蠹魚。

秋夜

湖海秋初到。房櫺夜轉幽。露濃驚鶴夢。月冷伴蛩愁。生計依微祿。年光墮遠遊。嚴灘已在眼。早晚放孤舟。去年欲自三衢舟行。泛七里瀨。歸山陰。今竟當爲此行也。

抄書

書生習氣重。見書喜欲狂。擣蕺潢剝藤。辛苦補散亡。且作短檠伴。未暇名山藏。故家借籤帙。舊友餉朱黃。借書于王韓。吳曾諸家。而呂周輔。宇文子友。近寄朱黃墨。皇墳探八索。奇字窮三蒼。儲積山崇崇。探求海

茫茫一笑語兒子。此是却老方。

晚自白鹿泉上歸

坐穴藜牀愧未能。酌泉聊喜曳枯藤。詩從病後功殊少。酒到愁邊量自增。事業何由垂竹帛。笑談空覺負交朋。興闌却逐棲鴉返。寂寞西窗已上燈。

秋旱方甚七月二十八夜忽雨喜而有作

嘉穀如焚稗草青。沉憂耿耿欲忘生。鈞天九奏簫韶樂。未抵虛簷瀉雨聲。

秋日小雨有感

七月江邊暑已微。虛窗臥看雨霏霏。淒涼罽伴草根語。憔悴誰從天上歸。志士酒酣看寶劍。美人淚盡倚鴛機。嗟予亦有新秋感。遙憶蒼苔滿釣磯。

書李商叟秀才所藏曾文清詩卷後

隴蜀歸來兩鬢絲。茶山已作隔生期。西風落葉秋蕭瑟。淚灑行間讀舊詩。

碧海行

碧海如鏡天無雲。衆真東謁青童君。九奏鏗鏘洞庭樂。八角森茫龍漢文。共傳上帝新有詔。蚩尤下統旄頭軍。徑持河洛還聖主。更度遼陽清妖氛。幽州禮埜一炬盡。安用咸陽三月焚。藝祖騎龍在帝左。世上但策雲臺勳。

道院遣興

陸放翁集 十 劍南詩集 卷十二

滿鏡新霜老可驚。十年煙隴廢春耕。黃絲黑髮有歸夢。白髮蒼顏無宦情。浮世不堪供把玩。安心隨處是修行。尙嫌未到無爲地。酷愛朝鐘暮磬聲。

夜酌

遙夜澆愁賴麴生。燈前忽見臥長瓶。比紅有句狂猶在。染白無方老已成。園徑露螢黏溼草。塔簷風鐸亂疎更。悲愁要是騷人事。未必忘情勝有情。

言懷

莫笑生涯似斷蓬。向來諸俠避豪雄。報仇使氣風塵裏。吹竹彈絲錦繡中。樂事眼看成昨夢。倦遊心伏作衰翁。論交尙喜筠枝在。白鹿泉邊溯晚風。

送客城西

倦客憑鞍半醉醒。秋光滿眼歎頽齡。日斜野渡放船小。風急漁村攤網腥。客思不堪聞斷雁。詩情彊半在郵亭。歸來更恨城笳咽。烟火昏昏獨掩屏。

雨夜

庭院蕭條秋意深。銅爐一炷海南沉。幽人聽盡芭蕉雨。獨與青燈話此心。

病中作

浮世寄酣枕。勞生居漏船。已悲身老大。更著病沈綿。親奮動千里。歡娛無百年。牀頭周易在。端擬絕韋編。

社日小飲

社日西風吹角巾，一尊彊醉汝江濱。
杏梁燕子還堪恨，歸去匆匆不報人。

晚到東園

岸幘尋青士，憑軒待素娥。
官身苦日短，荒圃得秋多。
醉眼輕浮世，羈懷激浩歌。
功名從蹭蹬，詩酒且婆娑。

秋晚登擬峴望祥符觀

放翁局促留江干，愛此樓前煙水寬。
雨昏回望殿突兀，秋晚剩覺山蒼寒。
中原未復淚橫臆，故里欲歸身屬官。
雲外飛仙故不遠，喚渠小爲駐青鸞。

秋思

黃落梧桐覆井牀，莎根日夜泣寒螿。
老生窺鏡鬢成雪，俊鶻呼鷹天欲霜。
波勢誰持白羽扇，從軍曾擁綠沈槍。
壯心自笑何時豁，夢遶祁連古戰場。

病日廢書終日危坐

肺渴常止酒，目昏復捐書。
蒲團坐袖手，一窗寬有餘。
心知世緣薄，分與鐘鼎疏。
湛然千仞淵，養此徑寸珠。
光明照憂患，何適不自娛。
白雲可與友，晴空閑卷舒。

感昔

常記東園按舞時，春風一架晚薔薇。
尊前不展鴛鴦錦，只就殘紅作地衣。
成都小東門外趙氏園。

又

八陣原頭縱獵歸，割鮮藉草酒淋漓。
誰知此夕西窗裏，一盞青燈獨詠詩。
八陣原在成都廣漢之間。

視陵至崇仁村落

津亭徙倚客衣單。秋盡江南亦已寒。雁翅不禁疎雨溼。楓林初染早霞丹。少年已歎儒冠誤。暮境更知行路難。倦馬歸來踏殘日。長吟聊得寫憂端。

馬上

客遊多感慨。老病少歡欣。去去穿村市。翻翻吹帽簷。天低落平野。雁遠入寒雲。漸覺江城近。秋笳馬上聞。

寄周洪道參政

半生篷艇弄煙波。最愛三湘欸乃歌。擬作此行公勿怪。胸中詩本漸無多。

又

菱舟煙雨久思歸。貪戀明時未拂衣。乞與一城教睡足。猶能覓句寄黃扉。

北窗

白首微官只自囚。青燈明滅北窗幽。五更風雨夢千里。半世江湖身百憂。壯志已孤金鎖甲。倦遊空攬黑貂裘。灞亭夜獵猶堪樂。敢恨將軍老不侯。

登擬峴

翠阜圍平野。朱樓壓綠牆。風回半汀雁。雲護一天霜。有地聊容拙。無方可療狂。白頭詩興在。吟罷意差強。

休日

賜休暫許養衰殘。靜院愴然晝掩關。釀酒移花調護悶。弄琴洗硯破除閑。與人多忤讒消骨。報國無功愧

滿顏一寸歸心向誰說。小屏依約刻中山。

別張教授歸獨登擬唄

小閣敞朱扉。停車暫息機。行人呼晚渡。幼婦浣秋衣。霜樹欹危堞。風鴉滿落暉。登臨客愁裏。況是送將歸。

晚晴至索笑亭

中年苦肺熱。臍喜見新霜。登覽江山美。經行草樹荒。堂空響棋子。盞小聚茶香。興盡扶藜去。斜陽滿畫廊。

新釀熟小酌索笑亭

新酒黃如脫殼鵝。小園持盞暫婆娑。文章不進技止此。仕宦忘歸人謂何。宿業簿書昏病眼。夢遊煙雨溼漁蓑。醉中笑向兒童說。白髮今年添幾多。

乾道初子自臨川歸鍾陵李德遠范周士送別于西津是日宿戰平風雨終夕今自臨川之高安復以雨中宿戰平悵然感懷

故人已作山頭土。倦客猶鄣陌上塵。十五年間真一夢。又騎羸馬涉西津。

又

十五年前宿戰平。長亭風雨夜連明。無端老作天涯客。還聽當時夜雨聲。

村舍小酌

野性安衡茅。傑屋愁兢兢。上不補縣官。下有肉食慚。雖非策雲驥。實鄙作繭蠶。失計不容悔。漁蓑換朱藍。少壯尙可力。老大真難堪。今朝意頗豁。村舍寄半酣。玉版烹雪菊。金苞擘霜柑。豈惟寫我憂。亦以稅我騷。

弄筆作一笑。何用與客談。逡巡上車去。溼翠浮煙嵐。

白塔道中乘臥輿行

小疾載臥輿。獨飲亦薄醉。朝離戰平館。午過白塔市。清寒正宜懶。搖兀更益睡。所嗟下程早。不得究此味。忽憶從軍時。雪夜馳鐵騎。壯心誰復識。撫事有餘愧。

宿城頭舖小飲而睡

亭傳臨江澗。牀敷息我勞。屋茅殘月冷。庭樹北風塵。墟市饒新兔。村場有濁醪。氣衰仍病著。小飲不能豪。

豐城村落小憩

霜信催寒力。尙微郵亭繫。馬旋添衣。平郊極目冬耕遍。小婦簪花晚餉歸。孤官每隨征雁遠。故人已似曉星稀。上書自效真須猛。菰正堪炊蟹正肥。

再題

柴門數頃秋。半日爲遲留。老驥厭伏櫪。飢鷹思下韉。野橋危欲斷。山雨落還收。何許丹青手。端能寫此愁。

發豐城縣

豐城古縣已再遷。出郭十步江渺然。冷雲四合欲下雪。柔櫓數聲初放船。孤村燈火照破驛。客子何以娛今夕。不辭金盃醉十分。要看玉花深一尺。

豐城高安之間憩民家。景趣幽邃爲之慨然懷歸。

數家聚雲根。細路入叢薄。濺濺石渠水。來往一略約。有無鄰里通。笑語婦子樂。濁醪時相就。青蔬缺鹽酪。

日暮歸閉門。續火星煜燄。先期畢租稅。老不入城郭。嗟予獨何事。早插紅塵脚。故山未成歸。悵望有餘作。

宿華嚴寺

夜宿華嚴寺。人扶到上方。喚僧同看畫。避佛旋移牀。小雨不成雪。烈風還作霜。鐘殘燈漸暗。趺坐默焚香。

寄奉新高令

小雨催寒著客袍。草行露宿敢辭勞。歲饑民食糟糠窄。吏惰官倉鼠雀豪。只要閭閻寬筆楚。不須亭障肅弓刀。九重屢下丁寧詔。此責吾曹未易逃。

高安州宅三詠

丹井神仙李八百煉丹處

丹成人已仙。遺竈亦已平。尙餘松根井。鏘然環玦聲。我來試一啜。槁面還童嬰。祝君勿關鑰。人人道長生。并有闌楯護之。

劍池李八百洗劍處

我壯喜學劍。十年客蹉岷。毫髮恐未盡。屠釣求隱淪。今年獨何幸。見此度世人。夜深來較術。雷雨戰江津。

偃松

巨松偃青蓋。閱世歸獨存。頗疑古仙翁。藏丹在其根。或是結靈藥。百尺有伏龍。終隨風雨化。不死何足言。

與高安劉丞遊大愚觀壁間兩蘇先生詩

野性縱壑魚。官身墮穿虎。適得建溪春。頗憶松下鬪。微霜初變寒。短景已過午。佳客能聯翩。老宿相勞苦。

懷哉兩蘇公。去日不可數。泉扃一埋玉。世事幾炊黍。吾儕生苦晚。佇立久惻楚。尙想來遊時。黃鍾廣大呂。

卷第十三

宿黃仙觀。兵火焚蕩之餘。惟一殿突兀。猶在黃仙蓋與許旌陽同時飛昇者。

拔宅翛然上碧虛。神仙豈亦愛吾廬。重門不改雲山色。古殿猶存劫火餘。翠木蕭森高蔽日。黃冠貧饜自畦蔬。殘年安得長來此。一碗松肪讀隱書。

玉隆得丹芝

何用金丹九轉成。手持芝草己身輕。祥雲平地擁笙鶴。使自西山朝玉京。

贈西山老人

生世不把筆。殘年惟灌園。賃春來並舍。賣畫到前村。勤苦供租稅。清貧遺子孫。從來棲遁志。剩欲與翁言。

病酒宿土坊驛

少時見酒喜欲舞。老大畏酒如畏虎。一日飲酒三日病。客路那堪夜聞雨。雨聲蕭蕭宿空堂。不寐始知更漏長。賣藥思從伯休隱。愛花卻笑拾遺狂。

十一月上七日蔬飯驛嶺小店

新秬炊飯白勝玉。枯松作薪香出屋。冰蔬雪菌競登槃。瓦鉢氈巾俱不俗。曉途微雨壓征塵。午店清泉帶脩竹。建谿小春初出碾。一碗細乳浮銀粟。老來畏酒厭芻豢。卻喜今朝食無肉。尙嫌車馬苦糜人。會入青

雲騎白鹿。

進賢驛感懷明日當歸至臨川

環走幾千里。馳歸亦再旬。征途饒感慨。訟牒費精神。風雪常欺客。文章本誤身。小詩無傑思。猶得常吟呻。

入臨川境馬上作

投老糜身簿領間。卻因馬上得偷閑。兼旬敢恨常爲客。一飯何曾不對山。銅鏡無情欺白髮。霜風有力散酡顏。今宵要看浮橋月。儘放征驂晚入關。

別楊秀才

歲暮江頭又語離。淡煙衰草不勝悲。俗人憤憤寧知子。心事悠悠欲語誰。燈暗想傾澆悶酒。路長應贈行詩。人生但要身疆健。一笑相從自有時。

發臨川

見客道傍店。添衣江上村。陂長風浩浩。山遠霧昏昏。虛日人聲合。凶年菜色繁。扶衰歸北闕。何以報君恩。

早行

江路迢迢馬首東。臨川一夢又成空。日高未泫晨霜白。風勁先消卯酒紅。山市人經饑饉後。孤生身老道途中。著身穩處君知否。射的峯前臥釣篷。

白干舖別傅用之主簿

我行忽百里。送客亦已空。傅子獨眷眷。且暮隨此翁。謝之不肯去。瘦馬衝北風。泥濘及馬臚。霜飛逼裘茸。

茅店得小語。慨然念年凶。不作兒女悲。道義相磨礱。我歸亦何爲。魚鳥愁池籠。君乃臺閣人。鸞鳳儀笙鏞。若耶遠青山。予草堂在若耶溪上。天祿摩蒼穹。此別各努力。出處何必同。

過茱萸舖青松朱戶前。臨大道絕似西陲亭驛。悵然有作。

茱萸小驛夕陽愁。搔首臨風感舊遊。渾似軍行散關路。但無鼓吹動涼州。

青溪道中行古松間。因少留滄茶而行。

露溼青松細細香。旋呼拄杖踏斜陽。三生舊發遊山願。一卷新傳辟穀方。雲外未論笙鶴近。塵中實厭簿書忙。拾樵汲礪俱清絕。聊爲煎茶一據牀。

弋陽縣江上書觸目

縣前奇哉一江水。日暮風吹碧鱗起。客恨征塵忽如洗。不用金篦刮眸子。丹楓岸邊雪色蘆。下有老翁方捕魚。欲求妙思貌畫圖。王維鄭虔今世無。

乾封驛早行

己已被驛書。乙亥戒徂徠。扶衰犯霜露。疲憊不可狀。夜行星滿天。晨起雞初唱。槁枝燒代燭。凍菜攝供餉。三年走萬里。天幸苟亡恙。深知賦材薄。自笑得名妄。宣溫望玉座。何以待諮訪。春江色如藍。歸舟行可榜。

過江山縣浮橋有感

堪笑行人日日忙。又扶衰病過浮梁。灘流急處水禽下。桑葉空時村酒香。枯枿敢懷貪雨露。飢鴻自憫犯風霜。宦途商賈無安處。早晚歸耕剡曲旁。

衢州早行

鄰雞已三號，殘燭無一寸。參差發行囊，迢遞望前頓。滿靴霜若雪，破面風抵刃。敢辭行路難，漸喜京邑近。少年奉朝請，親見堯授舜。飄然如脫葉，踴躍垂七閩。風埃暗征袍，歲月集衰鬢。餘生迫歸休，周行愧英俊。

航頭晚興嚴州

山色蒼寒野色昏，下程初閉驛亭門。不須更把澆愁酒，行盡天涯慣斷魂。

又

落葉孤村晚下程，癡雲殘日半陰晴。篝爐火煖牀敷穩，臥聽黃鸝穀穀聲。

行至嚴州壽昌縣界得請許免入奏仍除外官感恩述懷

曉傳尺一到江村，拜起朝衣漬淚痕。敢恨帝城如日遠，喜聞天語似春溫。翰林惟奉還山詔，湘水空招去國魂。聖主恩深何力報，時從天末望修門。

桐廬縣泛舟東歸

桐江艇子去乘月，笠澤老翁歸放慵。一尺輪囷霜蟹美，十分潏潏社醅濃。宦遊何啻路九折，歸臥恨無山萬重。醉裏試吹蒼玉笛，爲君中夜舞魚龍。

予欲自嚴買船下七里灘謁嚴光祠而歸會灘淺陸行至桐廬始能泛江因得絕句

客星祠下渺烟波，欠我扁舟舞短蓑。不爲窮冬怕灘惡，正愁此老笑人多。

又

桐廬縣前舫聲急。蒼烟茫茫白鳥雙。亂山日落潮未落。勝絕不減吳松江。

漁浦

桐廬處處是新詩。漁浦江山天下稀。安得移家常在此。隨潮入縣伴潮歸。

又

漁翁持魚叩舫賣。炯炯綠瞳雙臉丹。我欲從之逝已遠。菱歌一曲暮江寒。

蕭山

素衣已免染京塵。一笑江旁整幅巾。入港綠潮深蘸岸。披雲白塔遠招人。功名姑付未來劫。詩酒何孤見在身。會向桐江謀小築。浮家從此往來頻。

辛丑正月三日雪

開歲尙殘冬。佳哉雪意濃。潤歸千里麥。聲亂五更鐘。簾隙收初密。牆隅積已重。龍團笑羔酒。狐腋襲駝茸。危檻臨欹竹。幽窗聽墮松。忽思西戍日。憑堞待傳烽。予從戎日嘗大雪中。登興元城上。高興亭。待平安火至。

正月二十八日大雪過若耶溪至雲門山中

山中看雪醉騎驢。清賞真成十載無。高壓孤峯增峭絕。斜傾叢竹失枝梧。松肪火暖眠僧榻。芋糝羹香擁地爐。病骨雖癯猶健在。未應遽作臥遊圖。

雪中登雲泉上方

滌滌雲堆上。茫茫雪海中。煎茶誇坐客。打竹課蠻童。冰谷鳴飢鶴。烟汀立斷鴻。歸來更堪喜。封火滿爐紅。
僧以詩爲火。

衝雪至餘慶覺林雪連日不止

策蹇清吟涉若耶。灞橋猶恨近京華。山前千頃誰種玉。座上六時天散花。林雀無聲溪釣斷。炊煙不動竹籬斜。勝遊更覺平生少。未羨銀河泛客槎。

大雪歌

若耶溪頭朝暮雪。鴉鵲墮死長松折。橫飛忽已平屐齒。亂點似欲粧簾纈。放翁憑閣喜欲顛。摩娑拄杖向渠說。莫辭從我上嵯峨。此景與子同清絕。銀盃拌蜜非老事。石鼎煎茶且時啜。題詩但覺退筆鋒。把酒未易生耳熱。扶衰忍冷君勿笑。報國寸心堅似鐵。漁陽上谷要一行。馬蹄蹴踏河冰裂。

雪齋歸湖上過千秋觀少留

縱轡不嫌遠。逢山猶一登。夕陽陂渺渺。殘雪塔層層。折竹橫遮道。飢鳥下啄冰。欲歸還小駐。倚杖對峻嶒。

二月四日作

早春風力已輕柔。瓦雪消殘玉半溝。飛蝶鳴鳩俱得意。東風應笑我閒愁。

新築山亭戲作

危檻凌風出半空。怪奇造化欲無功。天垂繚白縈青外。人在紛紅駭綠中。日月匆匆雙轉轂。古今杳杳一飛鴻。酒酣獨臥林間石。未許塵寰識此翁。

春晴出遊

一春彊半病。頗廢山澤遊。今晨忽良已。風日亦清柔。朝飧具冷餅。瘦骨辭重裘。穉荷出溝港。芳杜滿河洲。勿言酒苦薄。一笑失百憂。且當詠尋壑。詎必賦登樓。

題山家壁

山中無傳漏。猿鳴知既夕。芳藤上幽援。素月照高壁。主人殊喜事。歡若有夙昔。稚子繫竹槃。炊黍持餉客。卜鄰雖未辨。清嘯聊自適。衰病久廢詩。筆端歎荆棘。

春晚風雨中作

箕踞藜牀岸幅巾。何妨病酒住湖濱。駕風浪作連三日。掃地花空又一春。樂事清宵當秉燭。畏途平地有摧輪。頽然耐辱君無怪。元是人間澹蕩人。

北窗

九陌黃塵早暮忙。幽人自愛北窗涼。清吟微變舊詩律。細字閑抄新酒方。草木扶疎春已去。琴書蕭散日初長。破光臨罷搗頤久。又破銅匱半篆香。

山中晚興

薄酒亦陶然。偃蹇澗石側。巾墮拄杖橫。意象頗自得。青山受落日。忽作玻璃色。躊躇不忍去。下磴天已黑。

夜登山亭

飛觀崢嶸天宇寬。幽人半醉凭闌干。三山渺渺鸞鶴遠。七澤茫茫蓑笠寒。清吹拂林橫玉笛。紫雲覆鼎熟

金丹童顏綠鬢無人識。回首塵寰一夢殘。

西村醉歸

俠氣崢嶸蓋九州。一生常恥爲身謀。酒寧剩欠尋常債。劍不虛施細碎讎。見孟東野詩岐路凋零白羽箭。風霜破弊黑貂裘。陽狂自是英豪事。村市歸來醉跨牛。

自詠

三十年前接俊遊。卽今身世寄滄洲。俚聲不辦諧韶護。暮氣寧能徹斗牛。綠酒可人消永日。黃鸝多事管閑愁。吹笙跨鶴何時去。剩欲平章太華秋。

閑中頗有四方之志偶得長句

世論紛紛枉見仇。吾身自計本悠悠。讀書漸嬾惟思睡。壓酒初成不怕愁。蜀棧冷雲侵瘦馬。楚江籠月繫孤舟。興來會作飄然去。更續騷人賦遠遊。

遣興

綠髮凋零白髮多。山林未死且婆娑。無端忤俗坐狂耳。甚欲讀書如嬾何。雨過亂葦堆野艇。月明長笛和菱歌。此中得意君須領。莫愛車前印幾窠。

又

遠簷新葉著啼鶯。睡起東窗一榻橫。愁袞袞來疑有約。春堂堂去恨無情。鶻飛局上新棋勢。龍吼牀頭古劍聲。莫歎柴荆無客到。綠尊還對暮山傾。

醉題

坎止流行五十秋。胸中不解著閑愁。浩歌野渡驚雲起。狂舞空庭挽月留。性本自然憎截鶴。器非大受愧函牛。平生最愛嚴灘路。早晚貂裘換釣舟。

小園

小園烟草接鄰家。桑柘陰陰一徑斜。臥讀陶詩未終卷。又乘微雨去鋤瓜。

又

歷盡危機歎盡狂。殘年惟有付耕桑。麥秋天氣朝朝變。蠶月人家處處忙。

又

村南村北鶉鴉聲。水刺新秧漫漫平。行遍天涯千萬里。卻從鄰父學春耕。

又

少年壯氣吞殘虜。晚覺丘樊樂事多。駿馬寶刀俱一夢。夕陽閑和飯牛歌。

步虛

微風吹碧海。細細生龍鱗。半醉騎一鶴。去謁青華君。歸來天風急。吹我過緱山。鏘然哦詩聲。清曉落人間。人間仰視空浩浩。遠孫白髮塵中老。初見姬翁禮樂新。九百年如電掃。

又

瀛海日月淵。蓬壺仙聖宅。駕鶴一時遊。海面日夜窄。人生蜉蝣耳。一閔瓦甃中。天地廣如許。誰能發其蒙。

丹書千卷藏一塵。子能求之勿從人。晴窗趺坐春滿腹。崑崙待得丹芝熟。

又

曩者過洛陽。宮闕侵雲起。今者過洛陽。蕭然但荒壘。銅駝臥深棘。使我惻愴多。可憐陌上人。亦復笑且歌。世事茫茫幾成壞。萬人看花身獨在。北邙秋風吹野蒿。古冢漸平新冢高。

又

一瓢小如醮。芳醪溢其中。醉此一市人。吾瓢故無窮。不言術神奇。要是心廣大。觴豆有德色。笑子乃爾隘。岳陽樓中橫笛聲。分明爲子說長生。金丹養成不自服。度盡世人朝玉京。

醉中登避暑臺

半醉行歌上古臺。脫巾散髮謝氛埃。但知禮豈爲我設。莫管客從何處來。剡曲烟波菱蔓滑。耶溪風露藕花開。老來世事渾成嬾。一襪幽尋未擬回。

立秋前三日夜坐庭中偶賦

絳闕清都待宴還。天風搖珮夜珊珊。月輪桂滿蟾初冷。星渚橋空鵲尙閑。一鶴每臨雲雨上。幾人虛老市朝間。試將綠髮窺清鏡。未愧僊妹玉鍊顏。李文饒詩云。河漢女。玉鍊顏。雲駉往往到人間。

南堂臥觀月

河漢橫斜星宿稀。臥看涼月入窗扉。恍如北戍梁州日。睡覺清霜滿鐵衣。

夜坐獨酌

陸放翁集 十 劍南詩彙 卷十三

玉宇沉沉夜向闌，跨空飛閣倚高寒。一壺清露來雲表，聊爲幽人洗肺肝。

夜興

鶴瘦龜飢與靜宜，更闌徙倚並清池。月當三五初盈夜，河直西南欲落時。浩浩醉歌羣鷺起，翩翩孤影角巾欹。飛仙授我青瑤簡，索賦山中夜興詩。

月夜泛小舟湖中三更乃歸

落日愁思把釣鉤，南鄰借得采菱舟。湖心月上明如晝，樹杪風生冷逼秋。壯歲功名慚汗馬，暮年心事許沙鷗。桐江一葉真奇策，莫爲兒曹作滯留。

無題

半醉凌風過月旁，水精宮殿桂花香。素娥定赴瑤池宴，侍女皆騎白鳳凰。

又

出繭脩眉淡薄妝，丁東環佩立西廂。人間浪作新秋感，銀闕瓊樓夜夜涼。

自山中夜行還湖上

火雲嵯嶮水車鳴，行人畏熱不敢寧。蕭然一馬兩園丁，缺月照我影伶仃。荒鷄起早忽再唱，北斗低盡餘三星。扁舟菱歌正嫋嫋，叢冢鬼火何熒熒。迎人漸見鏡湖白，回首已失秦山青。道邊野店得小憩，一盃濁酒傾殘瓶。登盤絕愛畦韭美，轆釜未厭谿鱗腥。丈夫所要飽辛苦，文叔尙困蕪葦亭。

大風

今年毒熱不可支。白汗如雨愁纖絲。皇天悔禍爲一洗。秋風作意來如期。聲如怒濤撼坤軸。夜半折我南
齋竹。幽人晨起得奇觀。鳳尾幟擺一窗綠。

新秋

天河漸近鵲橋時。一夜風吹斗柄移。金井梧桐元未覺。畫廊蟋蟀已先知。青燈耿耿還相伴。白髮蕭蕭只
自悲。猶勝玉門關外客。臥聽沙雁數歸期。

月夕睡起獨吟有懷建康參政

月上虛堂一榻橫。斷香漠漠欲三更。隔簾清露挾秋氣。繞樹驚鴉啼月明。只怪夢尋千里道。不知愁作幾
重城。苦吟更恨知心少。西望金陵闕寄聲。

病瘧後偶書

秋色已蕭然。曲肱清夜眠。孤燈欺病後。薄酒慰愁邊。藥物從人乞。文章畏客傳。惟應一蓬艇。湖海送凋年。

秋日聞蟬

斷角斜陽觸處愁。長亭搔首晚悠悠。世間最是蟬堪恨。送盡行人更送秋。

感秋

南山射虎漫英雄。投老還鄉一秃翁。世味掃除和蠟盡。生涯零落併錐空。秋驚蠹葉凋殘綠。病著衰顏失
舊紅。笠澤松陵家世事。一竿惟是待西風。

南軒

今年秋早涼。七月已蕭然。南軒修竹下。枕簟終日眠。時將半殘夢。聽此欲斷蟬。推枕起太息。四序忽已遷。功名墮渺莽。衰疾方沈綿。新月獨多情。窺窗澹娟娟。

夜坐

虛堂夜無寐。顧影歎鈴蟬。露溼螢黏草。雲迷雁落汀。舊書開蠹簡。濁酒倒殘甌。流落知無憾。危機實飽經。

新涼書事

臥看烏篆印蒼苔。窗戶涼生亦樂哉。鳴樹亂蟬催日落。拂堦飛葉報秋來。病餘已覺身如寄。醉裏卻憐心尙孩。排日從今占幽事。折殘籬菊探溪梅。

聞蟬思南鄭

昔在南鄭時。送客褒谷口。金羈叱撥駒。玉盃蒲萄酒。醉歸涉漾水。鳴蟬在高柳。回鞭指秦中。所懼壯心負。人生豈易料。蹭蹬十年後。蟬聲恍如昔。而我已白首。逆胡亡形具。輿地淪陷久。豈無好少年。共取印如斗。

憶昔

憶昔浮江發劍南。夕陽船尾每相銜。楠陰暗處尋高寺。荔子紅時宿下巖。高寺在邛州。下巖在雲安軍城。口烹猪賽龍廟。沙頭伐鼓挂風帆。區區陳迹何由記。惟有征塵尙滿衫。

病中夜興

病瘡秋來久。未平草堂遙。夜不勝清。疾風遞響。驚林葉。列宿收芒。避月明。百計不能逃。白髮。一生堪笑。役虛名。釣車。且作桐江夢。莫念安西萬里行。

秋夜

秋氣侵帷夢不成。一燈西壁翳還明。風高露井無桐葉。雨急煙村有雁聲。擊筑誰同燕市飲。賃舂方作會稽行。從來自許知何等。堪歎江湖白髮生。

謝張時可通判贈詩編

聖朝中興六十年。君家文武何聯翩。先生劍履冠麟閣。後嗣簪裳陪甘泉。流傳到君愈卓犖。投我千篇皆傑作。未分玉帳萬貔貅。且擅詩人一丘壑。爾來士氣日靡靡。文章光燄伏不起。君今已似驥衛雲。更看他年鯤擊水。

酬莊器之賢良見贈

先朝六科親策士。事業功名何壯偉。元祐復科才數年。所得四三俄復止。中興思賢形夢想。屢詔自是朝廷美。紈袴小兒壞人事。賜帛西歸困嘲詆。諸公相視歎才難。一士臥雲誰挽起。跨驢過我時共語。晁董千年元不死。高談疊疊有脈絡。橫得虛名吾可恥。烏巾白紵塞路衢。砥柱頽波望吾子。

舟過樊江憩民家具食

旅食何妨美蕨薇。夕陽來叩野人扉。蕭蕭短髮秋初冷。寂寂空村歲薦饑。蓼岸刺船驚雁起。煙陂吹笛喚牛歸。詩情剩向窮途得。踏蹬人間未必非。

舟中作

斷岸飲穀棘。清波跳唼喙。紅橋未斜日。白塔已昏鐘。詩律與年邁。客愁如酒濃。宋公題壁處。橫竊抱孤峯。

釋心寺有宋考功詩而予所未到望之慨然。

九月三日泛舟湖中作

兒童隨笑放翁狂。又向湖邊上野航。魚市人家滿斜日。菊花天氣近新霜。重重紅樹秋山晚。獵獵青帘社酒香。隣曲莫辭同一醉。十年客裏過重陽。予自庚寅至辛丑始見九日于故山。

霜天晚興

薄霧門巷不勝清。小立湖邊夕照明。紅穎帶芒收晚稻。綠苞和葉摘新橙。閑評琴價留僧話。靜聽松聲領鶴行。壯志消磨潭欲盡。西風莫動玉關情。

九月六日小飲醒後作

短劍悲秦俠。高歌憶楚狂。酒醒愁袞袞。香冷夢悵悵。屋老垣衣茂。池深石髮長。地爐須早計。衰病怯新霜。

書悲

今日我復悲。堅臥腳踏壁。古來共一死。何至爾寂寂。秋風兩京道。上有胡馬跡。和戎壯士廢。憂國清淚滴。關河入指顧。忠義勇折激。常恐埋山丘。不得委鋒鏑。立功老無期。建議賤茸職。賴有墨成池。淋漓豁胸臆。

又

丈夫孰能窮。吐氣成虹霓。釀酒東海乾。累麴南山齊。平生拳旗手。頭白歸扶犁。誰知蓬窗夢。中有鐵馬嘶。何當受詔出。函谷封丸泥。築城天。山北。開府蕭關西。萬里掃塵煙。三邊無鼓鼙。此意恐不遂。月明號荒雞。

中夜起出門月露浩然歸坐燈下有賦

月白萬瓦霜，露重四山雨。開門忽驚歎，秋色已如許。去蜀如昨日，坐閱四寒暑。無才屏朝蹟，有罪宜野處。平生萬里心，收斂臥環堵。朱顏逝不留，白髮生幾縷。人言尺蠖屈，要有黃鵠舉。功名非老事，歲晚忍羈旅。

新寒

病怯新寒欲不禁，南窗擁褐夜愔愔。江湖跌宕送餘日，書劍蕭條孤壯心。杜曲新愁隨斷雁，遼陽遺恨入疎砧。此懷擬向何人說，賴有昏燈伴苦吟。

幽居

松陵甫里舊家風，晚節何妨號放翁。衰極睡魔殊有力，愁多酒聖欲無功。一編蠹簡晴窗下，數捲一作掩疎籬落木中。退士所圖惟一飽，諸公好爲致年豐。

醉中步月湖上

閨餘時節早，天氣已凄冷。悠悠曳杖行，樂此清夜永。霜風鏤病骨，林月寫孤影。新詩得復忘，薄酒吹易醒。浮生役聲利，百歲常鼎鼎。清遊倘可繼，終老謝人境。

東村

塘路東頭烏柏林，偶攜藤杖得幽尋。桃源阡陌自來往，輞口雲山無古今。遠浦過帆供極目，暮天橫雁入微吟。歸來更覺愁無那，剩放燈前酒椀深。

西村

湖塘西去兩三家，杖履經行日欲斜。蹙蹙水紋生細縠，蜿蜿沙路臥修蛇。旱餘蟲蠹園蔬葉，寒淺蜂爭野

菊花老去郊居多樂事。脫巾未用歎蒼華。

題張幾仲所藏醉道士圖

千載風流賀季真。畫圖髣髴見精神。邇來祭酒皆巫祝。眼底難逢此輩人。

又

臥聽牀頭壓酒聲。起行籬下摘新橙。一尊久欠敲門客。風味何人似麴生。

山園草間菊數枝開席地獨酌

屋東菊畦蔓草荒。瘦枝出草三尺長。碎金狼藉不堪摘。掃地爲渠持一觴。日斜大醉叫墮幘。野花村酒何曾擇。君不見詩人跌宕例如此。蒼耳林中留太白。

湖村月夕

客路風塵化素衣。閑愁冉冉鬢成絲。平生不負月明處。神女廟前開竹枝。

又

錦城曾醉六重陽。回首秋風每斷腸。最憶銅壺門外路。滿街歌吹月如霜。

又

金尊翠杓猶能醉。狐帽貂裘不怕寒。安得驂騑三萬疋。月中鼓吹渡桑乾。

又

誰持綠酒醉幽人。鶴鬢筇枝發興新。今夜湖邊有奇事。青山缺處涌冰輪。

卯酒徑醉走筆

少時憑酒剩狂顛。摘宿緣雲欲上天。才盡氣衰空自笑。一盃纔放已頽然。

山中望籬東楓樹有懷成都

五門西角紅樓下。一樹丹楓馬上看。回首舊遊如夢裏。西風吹淚倚闌干。紅樓蜀工所作。在五門西南隅。

暮秋有懷王四季夷

鏡湖西畔小茅茨。紅葉黃花秋晚時。天闊素書無雁寄。夜闌清夢有燈知。功名蹭蹬初何憾。朋舊乖離未免悲。遙想扁舟五湖口。阻風中酒又成詩。

幽居

老子堪哈老轉癡。幽居喜及早寒時。芋魁加糲香出屋。菰首萑羹甘若飴。菰首。萑白也。顛倒朱黃思誤字。縱橫黑白戲拈棋。此懷敢向令人說。骨朽諸賢卻見知。

有懷

筇杖斜倚素屏。北窗遙夜冷如冰。何時得與平生友。作字觀書共一燈。

對酒

醫從和扁來。未著卻老方。吾晚乃得之。莫如麴蘖良。一盃臉生春。況復累十觴。坐令桃花紅。換盡霜葉黃。看鏡喜欲舞。追還少年狂。但恨寶釵樓。胡沙隔咸陽。芳華雖無恙。萬里遙相望。寶釵樓。咸陽旗亭也。芳華樓在成都合江園。感歎徑投枕。悲歡兩茫茫。

初冬

鉏犁滿野及冬耕。時聽兒童叱犢聲。逐客固宜安散地。閑民何幸樂昇平。雪花漫漫蕎將熟。綠葉離離麥可烹。飯飽身閑書有課。西窗來趁夕陽明。

書寢夢一客相過若有舊者夷粹可愛既覺作絕句記之

夢中何許得嘉賓。對影胡牀岸幅巾。石鼎烹茶火煨栗。主人坦率客情真。

書歎

多病文園苦滯留。時時浩歎攬貂裘。縱無夜雨何曾寐。不爲秋風也自愁。今歲頓驚絲髮改。此生難繼錦江遊。欲談舊事無人共。日落鴉歸又倚樓。

督下麥雨中夜歸

細雨闌村墟。青煙溼廬舍。兩兩犢並行。陣陣鴉續下。紅稠水際蓼。黃落屋邊柘。力作不知勞。歸路忽已夜。犬吠闌籬隙。燈光出門罅。豈惟露沾衣。乃有泥沒脰。誰憐甫里翁。白首學耕稼。未言得一飽。此段已可畫。

霜曉肩輿行湖上

去去出柴關。巾車古陌間。晨霜染丹葉。宿霧淡青山。登覽身猶健。歌呼酒每慳。殷勤鏡湖水。聊爲照衰顏。

杜門

寂寞山深處。崢嶸歲暮時。燒灰除菜蝗。設如橫字去聲。送芋謝牛醫。覓水晨澆藥。燈窗夜覆棋。杜門君勿怪。遲暮少新知。

橫塘

橫塘南北埭西東。拄杖飄然樂未窮。農事漸與人滿野。霜寒初重雁橫空。參差樓閣高城上。寂歷村墟細雨中。新買一蓑苔樣綠。此生端欲伴漁翁。是日偶買蓑衣甚妙。

書事寄良長老

素屏烏几野人廬。山色蒼寒十月初。雨足四郊耕欲遍。霜高萬木脫無餘。一尊窗下澆愁酒。數卷牀頭引睡書。寄語住菴劉老宿。不應隨俗向人疎。

食齋十韻

舍東種早韭。生計似庾郎。舍西種小菓。戲學蠶叢鄉。惟齋天所賜。青青被陵岡。珍美屏鹽酪。耿介凌雪霜。采擷無闕日。烹飪有祕方。候火地爐煖。加糝沙鉢香。尙嫌雜筍蕨。而況汗膏粱。炊菰及鬻甍。得此生輝光。吾饑實易足。捫腹喜欲狂。一掃萬錢食。終老稽山旁。

冬煖頗有春意追憶成都昔遊悵然有作

濯錦江邊罨畫樓。金鞭曾護犢車遊。紛紛萬事反乎覆。落落一身淹此留。刻燭賦詩空入夢。傾家釀酒不供愁。探春歌吹應如昨。亦有朋儕記我不。

忽忽

忽忽復悠悠。頻驚歲月遒。若無船貯酒。將奈斛量愁。列炬燕宮夜。成都故蜀時。燕王宮。今屬張氏。海棠爲一城之冠。呼鷹漢廟秋。南鄭漢高帝。廟予從戎時。多獵其下。凋年莫多感。夢境付滄洲。

醉書山亭壁

物外陽狂五百年。扁舟又繫鏡湖邊。
飛昇未抵簪花樂。遊宦何如聽雨眠。
綠蟻澆尊芳醞熟。黑蛟落紙草書顛。
忽拈玉笛橫吹去。說與傍人是地仙。

十月旦日至近村

鴨腳葉黃烏臼丹。草煙小店風雨寒。
荒年人家雞黍迕。芋羹豆飯供時節。
村童上牛踏牛鼻。吹笛聲長入雲際。
今年雖飢卻少安。縣吏不來官放稅。

蔬圃絕句

擬種蕪菁已是遲。晚菘早韭恰當時。
老夫要作齋孟備。乞得青秧趁雨移。

又

百錢新買綠蓑衣。不羨黃金帶十圍。
枯柳坡頭風雨急。憑誰畫我荷鋤歸。

又

青青蔬甲早寒天。想像登盤已墮涎。
更欲鉏畦向東去。園丁來報竹行鞭。

又

瓦甃浮屠盆作池。池邊紅蓼兩三枝。
貪看忘卻還家飯。恰似兒童放學時。

又

小橋只在槿籬東。溝水穿籬曲折通。
煙雨空濛最堪樂。從教打濕敗天公。

又
衝雨衝風不怕寒。晚來日出短裘乾。邊畦拾塊真爲樂。莫作陶公運甓看。

又

嬾隨年少愛花狂。且伴羣兒鬪草忙。行遍山南山北路。歸時新月浸橫塘。

冬夜不寐至四鼓起作此詩

秦吳萬里車轍遍。重到故鄉如隔生。歲晚酒邊身老大。夜闌枕畔書縱橫。殘燈無焰穴鼠出。槁葉有聲村犬行。八十將軍能滅虜。白頭吾欲事功名。高麗有讖云。當有八十老將平之。李英公實應是讖。

蔬圃

山翁老學圃。自笑一何愚。磽瘠才三畝。勤劬賴兩奴。正方畦畫局。微潤土融酥。翦關荆榛盡。鋟犂磊塊無。過溝橫略約。聚甃起浮屠。拾圃中瓦礫。作小塔。隙地成瓜援。餘功及芋區。如絲細生菜。似鴨爛蒸壺。此事今真辦。東歸不爲鱸。

夢中作

拓地移屯過酒泉。第功圖像上凌煙。事權皂纛兼黃鉞。富貴金貂映玉蟬。油築毬場飛駿裏。錦裁步障貯嬋娟。擁塗士女千層看。應記新豐舊少年。

村居酒熟偶無肉食。羹菜羹飲酒。

歌風俚俚類楚狂。長轡齷齪笑蒙莊。著書幸可俟後世。對客從曠臥大牀。三畝青蔬了盤筋。一缸濁酒具

孟觴。丈夫窮達皆常事。富貴何妨食萬羊。李文饒嘗遇異人云。平生當食萬羊。

辛丑十月諸公餽酒偶及百榼戲題長句

喜事諸公尙見存。尺書時到爵羅門。已邀風月成三友。聊對湖山倒百尊。醉墨淋漓動高壁。狂歌悲壯落前村。悠然睡起西窗黑。一點青燈又斷魂。

灌園

少孺一劍行天下。晚落空村學灌園。交舊凋零身老病。輪囷肝膽與誰論。

幽居

破屋頽垣霧雨昏。幽人終日掩柴門。因鋤衰草通南阜。偶洗叢篁見北村。短褐奇溫等狐腋。寒蔬脆美敵熊蹯。冬來酒戶微增舊。萬事應須付一尊。

日出入行

吾聞開闢來。白日行長空。扶桑誰曾到。崦嵫不可窮。但見旦且升。天東。但見暮暮入。地中。使我倏忽成老翁。鏡裏衰鬢成霜蓬。我願一日一百二十刻。我願一生一千二百歲。四海諸公常在座。綠酒金尊終日醉。高樓錦繡中天開。樂作畫鼓如春雷。勸爾白日無西頽。常行九十萬里胡爲哉。

午醉徑睡比覺已甲夜矣

自我歸城西。已復再見冬。雖未挂衣冠。其實則老農。好事或餉酒。石室酒最醲。一醉輒至暮。臥聞湖寺鐘。心安病自除。衾煖夢欲重。化作孤鶴去。雲崦巢長松。

簡蘇訓直判院莊器之賢良

行盡天涯白髮新。橫籬竹屋著閑身。讀書達旦失衰病。食菜終年安賤貧。正使寄聲無薛孟。不妨同里有荀陳。從今杖履時相過。花柳村村次第春。

醉眠曲

老夫暮年少嗜好。但願無事終日眠。斜風急雨勢方橫。低窗小閣且幽妍。爐紅酒綠足閑暇。橙黃蟹紫窮芳鮮。一盃一盃意忽倦。徑撥紙帳投燈氈。鼻間鼾聲欲撼屋。手中書冊正墮前。不知校事白中聖。那惜門生嘲腹便。讀書萬卷晚乃悟。妙哉此訣祕不傳。是醒是醉人莫測。非夢非覺中了然。駸駸百年露電速。鼎鼎一世膏火煎。金丹九轉顧未暇。且向人間稱睡仙。

冬夜

歲晚風霜惡。將如遙夜何。殘燈挑更暗。寒犬吠偏多。支枕成孤詠。懷人起浩歌。梅花不解飲。誰伴醉顏酡。

又

忽忽流年恨。悠悠獨夜情。向人燈欲語。透舍露如傾。夢每輕千里。愁偏怯五更。殷勤桑落酒。好爲解餘醒。

夜話贈華師

少喜洛陽俠。今成衡嶽僧。深培地爐火。明照佛龕燈。衰鬢晨霜白。禪心古澗澄。猶能遍參在。爲我買行滕。

臥病書懷

衰衰年光挽不留。即今已白五分頭。病中對酒猶思醉。夢裏逢人亦說愁。青海戰雲臨賊壘。黑山飛雪灑

貂裘丈夫有志終難料。憔悴漁村死即休。

病中絕句

酒釵自昔從人乞。詩思出門何處無。青籜織蓬菅織席。此生端欲老江湖。

又

半脫貂裘雪滿鞍。慣將豪舉壓儒酸。病來意氣渾非昨。一炷香煙帳底看。

又

酒味醺人睡味濃。午時高枕到昏鐘。經旬不見西窗日。世上應無嬾似儂。

又

造物今年憫我勞。微痾得遂閉門高。黃紬被暖青氈穩。不怕郊原雪意豪。

又

青燐猶有佛燈明。點滴時聞竹露聲。欲睡不成還起坐。麗譙風順報三更。

又

少時談舌挾風雷。病後逢人口嬾開。安得東臯隱君子。相看無語只銜盃。

蔬園雜詠

菘

雨送寒聲滿背蓬。如今真是荷鋤翁。可憐遇事常遲鈍。九月區區種晚菘。

蕪菁

往日蕪菁不到吳。如今幽圃手親鉏。憑誰爲向曹瞞道。徹底無能合種蔬。

葱

瓦盆麥飯伴隣翁。黃菌青蔬放筯空。一事尙非貧賤分。老羹僭用大官葱。鄉圃有大官葱。比常葱差小。

巢

昏昏霧雨暗衡茅。兒女隨宜治酒榼。便覺此身如在蜀。一盤龍餅是菟巢。蜀中雜蔬。肉作巢。餠頭佳甚。唐人正謂餠頭爲龍餅。

芋

陸生晝臥腹便便。歎息何時食萬錢。莫謂蹲鴟少風味。賴渠撐拄過凶年。

卯飲醉臥枕上有賦

天寒朝泥酒熟醉臥蓬窗。雨勢平吞野。風聲倒卷江。漁蓑傲狐腋。菜把美羊腔。常笑潮陽守。南征畏下瀧。

又

一榻臥空舍。四山風雨聲。病多書倚閣。寒極酒施行。孤憤歌彌放。端憂涕易橫。羣胡滿河洛。志士若爲情。

陸放翁集

劍南詩藁

卷第十四

十月二十六日夜夢行南鄭道中既覺恍然攬筆作此詩時且五鼓矣

孤雲兩角不可行。望雲九井不可渡。蟠家之山高插天。漢水滔滔日東去。高皇試劍石爲分。草沒苔封猶故處。將壇坡陀過千載。中野疑有神物護。我時在幕府。來往無晨暮。夜宿沔陽驛。朝飯長木舖。雪中痛飲百榼空。蹴踏山林伐狐兔。魍魎北山虎。食人不知數。孤兒寡婦讎不報。日落風生行旅懼。我聞投袂起。大呼聞百步。奮戈直前虎人立。吼裂蒼崖血如注。從騎三十皆秦人。面青氣奪空相顧。國家未發渡遼師。落魄人間傍行路。對花把酒學醞藉。空辱諸公誦詩句。卽今衰病臥在牀。振臂猶思備征戍。南人孰謂不知兵。昔者亡秦楚三戶。

雨晴步至山亭欲遂遊東村不果

村陋垣屋頽。歲晚風雨橫。泥塗絕還往。殮粥養衰病。藥糞雜書卷。白髮滿清鏡。一榻臥兼旬。不踐牆下徑。烏鵲忽報晴。霜重節候正。厭供凍硯愁。頗動蠟屐興。山楹快遠眺。松吹愜幽聽。地瘦藥苗稀。葉脫木枝勁。東村未爲遠。腳力不濟勝。三歎入荆扉。跣趺學僧定。

喜晴

衡門病臥動經旬。歲晚況堪風雨頻。晴日一窗殊慰眼。清霜萬瓦更宜人。開書頓失昏花墜。試茗初看白乳新。南埭東陵從此好。剩將紅蕊插烏巾。

對食

人苦不知足。貪欲浩無窮。豹胎日糜飲。萍蠶卻時供。飲豚以人乳。萬乘亦改容。方其未遇時。鵝鶩動英雄。哀哉王相國。計墮飯後鐘。所以賢達士。一視約與豐。我亦蹭蹬者。羈遊半生中。木饜飽藜覓。美與玉食同。口腹嗟幾何。曾是役我躬。放箸一笑粲。賦詩曉愚公。

不睡

城遠不聞鐘鼓傳。孤村風雨夜騷然。但悲綠酒欺多病。敢恨青燈笑不眠。水冷硯蟾初薄凍。火殘香鴨尚微煙。虛窗忽報東方白。且復緜經繡佛前。

睡

紙帳青氈暖有餘。昏昏信腳到華胥。凍膠有力勤推挽。春茗無端苦破除。半熟擁衾聞急雨。乍回推枕覺殘書。箇中得意君知否。萬戶一作異生封未必如。

憶荊州舊遊

書劍萬里行翩翩。度關登隴常慨然。射麋雲夢最樂事。至今曠快思楚天。落筆千言不加點。班荆百榼命割鮮。有時憑陵呼五白。笑人辛苦作太玄。君不見將軍昔忍跨下辱。京兆晚爲人所憐。功名富貴自古只如此。不如馳射樂飲終殘年。

五雲門晚歸

高城帶遠林。落日動寒砧。行客自朝暮。青山無古今。衰遲慙逸氣。憂患足危心。溪汜滯歸艇。何時春水深。

冬暖

今年歲暮無風雪。塵土肺肝生客熱。經旬止酒臥空齋。吳蟹秦酥不容設。日憂疾疫被齊民。更畏螟蝗殘宿麥。濃霜薄霰不可得。太息阿詩見三白。老夫壯氣橫九州。坐想提兵西海頭。萬騎吹笳行雪野。玉花亂點黑貂裘。

歲暮

吳中寒氣薄。歲暮亦和風。移樹木村北。尋僧渡港東。露葵收半綠。霜稻杵微紅。一飽無餘念。吾生正不窮。

雪夜

書卷紛紛雜藥囊。擁衾時炷海南香。衰遲自笑壯心在。喜聽北風吹雪牀。

又

村路雪泥人斷行。佛燈一點絳紗明。山前栖鶴歸何晚。磔磔風傳勁鬪聲。

禪室

早誇劇飲無勍敵。晚覺安禪有宿因。赫赫心光誰障礙。緜緜鼻息自輕勻。蒲龕紙帳藏身穩。香碗燈籠作夢新。勿爲霜寒憶溫暖。少林立雪彼何人。

炭盡地爐危坐至夜分戲作

短景窗易黑。長宵爐少紅。直令貧到骨。未害氣如虹。志士元謀道。儒生敢諱窮。霜嚴雞喔喔。但愧讀書功。

夜汲井水煮茶

病起罷觀書。袖手清夜永。四鄰悄無語。燈火正凄冷。山童亦睡熟。汲水自煎茗。鏘然轆轤聲。百尺鳴古井。

雪後尋梅偶得絕句十首

雪晴蕭蕭散曳筇。枝小塢尋梅正及時。臨水登山一年恨。十分說似要渠知。

又

青帝宮中第一妃。寶香薰徹素綃衣。定知謫墮不容久。萬斛玉塵來聘歸。橋中四叟博輸玉塵九斛。

又

銀燭檀槽醉海棠。老來非復錦城狂。疎梅對影太清淡。爲拂焦桐彈履霜。

又

雪裏芬芳亦偶然。世人便謂占春前。飽知桃李俗到骨。何至與渠爭著鞭。

又

雙鶻飛來噪午晴。一枝梅影向窗橫。幽人宿醉閑欹枕。不待聞香已解醒。

又

竹籬曲曲水邊村。月澹霜清欲斷魂。商略前身是飛燕。玉肌無粟立黃昏。

又
相逢未易可疎親。不是登牆宋玉鄰。林下風標許誰比。直須江左謝夫人。

又
春近山中日漸長。重重雲崦闕幽香。神仙不飲塵凡酒。素面看人醉後狂。

又
蕊殿仙姝下界遊。偶來稅駕剡溪頭。君看月裏橫枝影。盡是蒼龍與翠虬。

又
清霜夜夜奈寒何。賴是知心有素蛾。枉道疎枝不禁笑。主人歡意自無多。

寄朱元晦提舉

市聚蕭條極。村墟凍餒稠。勸分無積粟。告糴未通流。民望甚飢渴。公行胡滯留。徵科得寬否。尙及麥禾秋。

村居冬日

溪轉樵風路。林藏禹會村。簷冰垂玉塔。山月涌金盆。畏客常稱疾。耽書不出門。尙嫌城市近。更擬卜雲根。

寓天慶觀有林使君年八十七方燒丹云一黍米大可化汞一斤爲黃金梅道人年八十五善醫

世路崎嶇久已忘。道腴禪悅度年光。故攜開士降龍鉢。來寄高人夢蝶牀。只道燒金有劉向。不知賣藥是韓康。日長坐覺非塵世。庭檜花開降蜜香。

宿天慶道院

衰病厭多事，清遊諧夙心。
夜深樓突兀，歲晚柏蕭森。
汲井洗靈藥，焚香橫素琴。
身閑境自勝，城市亦山林。

贈林使君

使君物外閱年華，厭聽奴兵早暮衙。
雙履踏雲呼野渡，一瓢邀月醉梅花。
紅爐點汞閑消日，烏几緡經不憶家。
我亦岷山有歸處，約君同載泝三巴。

又

松檜陰中百步廊，我來剝啄叩琳房。
魚腸寶劍餘蛟血，鴉嘴金鋤帶藥香。
弱水蓬萊風浩浩，赤明龍漢劫茫茫。
何妨付與神丹訣，教跨青鸞到帝鄉。

冬夜

窮巷蕭條早閉門，北窗燈火夜昏昏。
老子俗事不挂眼，愁憶故人空斷魂。
急雪打窗飛磔細，狂風卷野怒濤翻。
土牀紙帳寒無寐，彊把村醕不厭渾。

宴坐

身寄窮山裏心安，一事無新傳小止。
觀漸解半跏趺，急雪鳴窗紙。
孤燈耿地爐，老來元少睡。
且復兀枯株。

夢中作

路平沙軟淨無泥，香草丰茸沒馬蹄。
擣紙聲中春日晚，恍然重到浣花溪。

夜寒遣興

道人頽然寄北窗，愁魔百萬一笑降。
夜闌酒渴有奇夢，吞楚七澤吳三江。
孤村蕭蕭雨解雪，寒犬噉臥飢。

鼠齧擁衾危坐待天明。白首忍窮心似鐵。

雪後出遊戲作

小巘平岡雪陸離。幽人又賦探春詩。典琴沽酒元非俗。著屐觀碑又一奇。大度乾坤容落托。多情風月笑衰遲。吾生也似梅花淡。燕未歸來蝶不知。

歲暮

半生浪走跨秦吳。白首還如筮仕初。凍芋濁醪邀里巷。昏煙溼雪暗郊墟。窮空敢恨寒無褐。憂患元因出有軍。笑掩陳編聊自慰。古來富貴羨樵漁。

記夢

世事紛紛觸眼新。何由常作夢中身。遠遊萬里纔移刻。豪飲千場不忤人。鼓吹滿城壺日晚。鷺花如海洞天春。是間可老君知否。莫信人言想與因。

立春後三日作

拂面麴糝卷柳黃。穿簾細細野梅香。春回江表常年早。日向山中特地長。千古事終輸釣艇。一毫憂不到禪房。綠尊掩罷惟須睡。高枕看人舉世忙。

短景

短景迫窮冬。日月如鳥過。衡門窘風雨。衰病不可那。疎疎屋茅漏。獵獵窗紙破。鼠豪冒燈出。人倦掩屏臥。中都舊朋儕。零落今幾箇。弄筆欲遺愁。孤吟誰與和。

風雨句日春後始晴

風吹過雁作斜行。雨洗殘梅只淡香。南浦春回波漸綠。東菴睡起日初長。詩囊屬稿慚新思。博齒爭豪悔昔狂。莫向晴窗對明鏡。朱顏減盡鬢蒼蒼。

乍晴風日已和泛舟至扶桑埭徘徊西村久之

十日風雨今日晴。衰病忽減思閑行。接離一幅煙霧薄。舴艋八尺鳧鷖輕。亭亭孤塔遠天碧。曲曲深巷斜陽明。數家茅屋門晝掩。不聞人聲聞碓聲。身似龐公不入城。東阡南陌饒餘生。新年倘有豐年喜。買酒漁村看太平。

晨起南窗晴日可愛戲作一絕

蕭散山林一幅巾。天公乞與自由身。茅簷不似宮塲暖。日滿南窗也可人。

攜壺尊醉梅花下

楠癭作尊容斗許。擁腫輪囷元媚嫵。肯從放翁來住山。誰云置身不得所。山房寂寞久不飲。作意欲就梅花語。我病鮮歡花更甚。日暮淒涼泣殘雨。人生萬事雲茫茫。一醉常恐俗物妨。正須仙人冰雪膚。來伴老子鐵石腸。花前起舞花底臥。花影漸東山月墮。癭尊未竭狂未休。笑起題詩識吾過。

城西接待院後竹下作

水邊小丘因古城。上有巨竹數百箇。一徑蛇蟠不容腳。平處乃可十客坐。曩曩共看風枝舞。款款時聽春籟墮。古佛不粧香火冷。瘦僧如腊袈裟破。門前西去長安路。日夜舳舻銜尾過。老夫本乏臺省姿。且就清

陰曲肱臥。

夜飲示坐中

胡雁叫羣寒夜長，蟬噪北斗天中央。達人
大觀眇萬物，烈士壯心懷四方。縱酒長鯨
渴吞海，草書瘦盡飽經霜。付君詩卷好收
拾，後五百年無此狂。

夜從父老飲酒村店作

旗亭濁酒典衣沽，盤舍老翁折簡呼。夜中
醉歸騎草驢，嵬昂不須宗武扶。丹徒布衣
有籌略，漁陽突騎莫枝梧。牀頭金盡何足
道，肝膽輪囷橫九區。

壬寅新春

半生常是道邊人，歲晚初收事外身。濁酒
一樽聊永日，小園三畝亦新春。尙無枕寄
邯鄲夢，那有衣沾京洛塵。門外煙波三百
里，鏡湖三百里，此心惟與白鷗親。

幽居春夜

暮景催人雪鬢雙，十年始復反吾邦。雲
逢佳月每避舍，酒壓閑愁如受降。三弄
笛聲初到枕，一枝梅影正橫窗。要知清
夢遊何許，不釣桐江卽錦江。

讀書

放翁白首歸剡曲，寂寞衡門書滿屋。藜
羹麥飯冷不嘗，要足平生五車讀。校讎
心苦謹塗乙，吟諷聲悲雜歌哭。三蒼奇
字已殺青，九譯旁行方著錄。有時達旦
不滅燈，急雪打窗聞簌簌。倘年七十尙
一紀，墜典斷

編真可續。客來不怕笑書癡。終勝牙籤新未觸。

晨起

小雨溼清曉。新鶯啼早春。年光驚病眼。節物屬閑身。巴峽東連楚。嶓山北控秦。遠遊端可繼。敢恨素衣塵。

昔在成都正月七日聖壽寺麻子市初春行樂處也偶晨興聞鄰村守麻有感

樂事新年憶錦城。城南麻市試春行。如今老病茅簷底。臥聽兒童嚇鶯聲。

獨孤生策字景略河中人工文善射喜擊劍一世奇士也有自峽中來者言其死于忠涪間感涕

賦詩

憶昨騎驢入蜀關。旗亭邂逅一開顏。氣鍾太華中條秀。文在先秦兩漢間。寶劍憑誰占斗氣。名駒竟失養
大閑身。今老病投空谷。回首東風涕自潸。

早春對酒感懷

探花疇昔喜春回。老大空驚節物催。芳盞旋開新壓酒。好枝猶把未殘梅。書生歲惡甘藜藿。志士時平死
草萊。初聞獨孤策死欲豁孤懷誰晤語。夜彈長劍有餘哀。

曉出湖邊摘野蔬

浩歌振履出茅堂。翠蔓丹芽采擷忙。且勝堆盤供首宿。未言滿斛進檳榔。行迎風露衣巾爽。淨洗羶葷匕
筋香。著句誇張君勿笑。故人方厭太官羊。

游饑之餘復苦久雨感歎有作

道傍襁負去何之。積雨仍愁麥不支。爲國憂民空激烈。殺身報主已差池。屬饜糠粃猶多愧。徒倚柴荆只自悲。十載西遊無惡歲。羨他暇下足踰鴟。予在蜀幾十年。未嘗逢歲歉也。

春晴泛舟

兒童莫笑是陳人。湖海春回發興新。雷動風行驚蟄戶。前一日聞雷天開地闢轉鴻鈞。鱗鱗江色漲石黛。嫋嫋柳絲搖麴塵。欲上蘭亭卻回棹。笑談終覺愧清真。

攜一尊尋春湖上

酒裏真須勉策勳。百年何啻是中分。花梢已點猩猩血。水面初生瑟瑟紋。一世極知均腐骨。萬鍾元自付浮雲。浩歌不恨無人和。但惜鶯飛白鷺羣。

晦前二日夜欲曉自湖上歸對殘月獨酌

小閣對寒蟾。山尊盡更添。方看一輪滿。又歎兩頭纖。脈脈離雲嶠。娟娟傍畫簷。五更清露下。不恨客衣霑。春曉有感

山杏溪桃續續開。緩歌誰與共傳盃。年來只有追歡夢。百舌無情又喚回。

夜觀秦蜀地圖

往者行省臨秦中。我亦急服叨從戎。散關摩雲俯賊壘。清渭如帶陳軍容。高旌繚緲嚴玉帳。畫角悲壯傳霜風。咸陽不勞三日到。幽州正可一炬空。意氣已無難鹿寨。單于合入蒲萄宮。燈前此圖忽到眼。白首流落悲塗窮。吾皇英武同世祖。諸將行策雲臺功。孤臣昧死欲自薦。君門萬里無由通。正令選壯不爲用。筆

墨尚可輸微忠。何當勒銘紀北伐。更擬草奏祈東封。

久雨小飲

春來日日風雨橫。老去時時衰病攻。門外回塘初漲綠。尊前稿面覓生紅。未除豪氣每自笑。欲吐狂言無與同。安得并刀剪鬻溜。憑高萬里望晴空。

有懷獨孤景略

富貴世間元不乏。此君才大獨難成。暗鳴意氣千人廢。嫺雅風流一座傾。韜略豈勞平大敵。文章亦足主齊盟。荒山野水涪州路。腸斷西風雜露聲。

春雨復寒遣懷

去日堂堂挽不回。新年又傍鬢邊來。雨聲欲作海棠祟。書卷只爲春睡媒。村舍瘦蔬供薄酒。地爐微火伴殘灰。浩然忽起金鞭興。漾水嶠山安在哉。

春遊

平生樂行役。不耐常閉戶。今朝新雨霽。一笑整巾屨。青猿導幽蹊。春草伴微步。雖云尊酒薄。蔬果亦略具。辛夷發高枝。楊柳吹墮絮。行歌不知遠。落日呼野渡。橫林已棲鴉。淺水猶立鷺。歸來意頗豪。古錦有新句。

海棠

今日春已半。風雨停出遊。餽中海棠花。數酌相獻酬。尙想錦官城。花時樂事稠。金鞭過南市。紅燭宴西樓。千林誇盛麗。一枝賞纖柔。狂吟恨未工。爛醉死即休。那知茅簷底。白髮見花愁。花亦如病姝。掩抑向客羞。

尤物終動人，要非桃杏儔。東風萬里恨，浩蕩不可收。

寄仗錫平老借用其聽琴詩韻

放翁久矣無此客，闔戶兒童皆動色。寒泉不食人嗚死，素纒銀瓶我心惻。千金易得一士難，晚途淹泊眼愈寒。豈知一旦乃見子，傑語豪筆無僧酸。門前清溪天作底，細細風吹穀紋起。倚欄一笑誰得知，愛子數詩如此水。江湖安得常相從，浩歌相踏臥短篷。功名渠自有人了，留我錦中雙頰紅。

五月十四日夜夢一僧持詩編過予有暴雨詩語頗壯予欣然和之聯巨軸欲書未落筆而覺追作此篇

黑雲塞空萬馬屯，轉盼白雨如傾盆。狂風疾雷撼乾坤，壯哉澗壑相吐吞。老龍騰擊下天關，鱗間火作電脚奔。巨松拔起千年根，浮槎斷梗何足論。我詩欲成醉墨翻，安得此雨洗中原。長河袞袞來崑崙，鶴鵲下看黃流渾。

新塘觀月

攜酒新塘南，中夜欲忘歸。貪看月滿湖，不覺露溼衣。天高鶴聲厲，風急螢火稀。此夕不一醉，行歎破鏡飛。漁家亦喜事，未掩水際扉。皇天有公道，處處皆清暉。

觀張提刑周鼎

他人富貴堆金壁，曼舞妖歌誇坐客。清心好古誰似公，漢庭諸人推博識。一朝得此周廟器，買不論貨空四壁。苦痕洗盡銅色見，坐臥摩挲欲忘食。蠻童捧出客爲起，恍如清廟陪劍履。腹中奇字粲蟲魚，嶧山之

碑那得比。知公原是功名人。看罷握手同悲辛。錦京洛邑在何許。漠漠秋風吹麝塵。

口占送巖師還大梅護聖

放翁白髮已蕭然。黃紙新除玉局仙。寄語山頭老師叔。欲分茅舍度殘年。常禪師偈云。更移茅舍入深層。謂護聖也。

八月十四日夜湖山觀月

長空露洗玻璃碧。紫金之盤徑三尺。忽看擘地出人間。桂樹扶疎如淡墨。攬衣獨立鏡湖邊。風露萬頃秋渺然。開帆詎必入東海。騎鯨便可追飛仙。冰壺玉瀝侵骨冷。醉看孤鸞舞清影。夜闌歸舍人已眠。卻倩天風爲吹醒。

十五夜月色皦然有頃雲生遂不復見

北望但空闊。南望橫羣山。青天無翳行素月。寥寥永夜非人間。九醞漿成老仙醉。六銖衣薄天宮寒。翠眉真人不火食。小立環佩風珊珊。橫空邀我海山去。縹緲萬里矚青鸞。相攜一笑在雲表。徐看玉宇飛金盤。

夜聞秋風感懷

西風一夜號庭樹。起攪戎衣淚濺襟。殘角聲催關月墮。斷鴻影隔塞雲深。數篇零落從軍作。一寸淒涼報國心。莫倚壯圖思富貴。英豪何限死山林。

玉局歌

玉局祠官殊不惡。銜如冰清俸如鶴。酒壺釣具常自隨。五尺新蓬織青籜。倚樓看鏡待功名。半世兒癡晚

方覺何如醉裏泛桐江。長笛一聲吹月落。蔣公新冢石馬高。謝公飛旆凌秋濤。微霜莫遣侵鬢綠。從今二
十四考書玉局。

醉歌

往時一醉論斗石。坐人飲水不能敵。橫戈擊劍未足豪。落筆縱橫風雨疾。雪中會獵南山下。清曉嶙峋玉
千尺。道邊狐兔何曾問。馳過西村尋虎跡。貂裘半脫馬如龍。舉鞭指麾氣吐虹。不須分弓守近塞。傳檄可
使腥羶空。小胡通誅六十載。猶猶獺子勢已窮。聖朝好生貸孳戮。還爾舊穴遶天東。

閉門

寂寂雲山千萬重。閉門不忍歎塗窮。高秋酒熟雪浮瓮。中夜劍歸雷吼空。近報犬羊逃漠北。豈無雞虎定
關中。君王猶記孤忠在。安得英豪共此功。

草書歌

傾家釀酒三千石。閒愁萬斛酒不敵。今朝醉眼爛巖電。提筆四顧天地窄。忽然揮掃不自知。風雲入懷天
借力。神龍戰野昏霧腥。奇鬼摧山太陰黑。此時驅盡胸中愁。搥牀大叫狂墮幘。吳牋蜀素不快人。付與高
堂三丈壁。

野飲夜歸戲作

青海天山戰未塵。即今塵暗舊戎袍。風高乍覺弓聲勁。霜冷初增酒興豪。未辦大名垂宇宙。空成慟哭向
蓬蒿。灞亭老將歸常夜。無奈人間兒女曹。

夜泊水村

腰間羽箭久凋零。太息燕然未勒銘。老子猶堪絕大漠。諸君何至泣新亭。一身報國有萬死。雙鬢向人無再青。記取江湖泊船處。臥聞新雁落寒汀。

幽居

透屋巖巖碧玉峯。個中天道養疎慵。捐書已歎空虛腹。得酒還澆壘塊胸。曲几坐看鏡戶月。短篷臥聽隔城鐘。柴桑自有歸來意。枉道人間不見容。

與鄰翁登山亭

數掩樵籬圍夕照。一間茅舍背陰崖。吾生擾擾實無樂。人事悠悠那可諧。愛患向來侵綠鬢。登臨此日費青鞋。京華舊友凋零盡。野老逢迎一散懷。

無題

纏輓駝車赴密期。追歡最數牡丹時。新春欲近猶貪喜。舊愛潛移不自知。寶鏡塵生鸞悵望。鈿箏絃絕雁參差。玉壺莫貯臙脂淚。從溼泥金帶上詩。

遣興

平生與俗馬牛風。落魄人間亦未窮。綠綺奏終香縷碧。烏絲書罷鬪花紅。夢中吳蜀山川近。醉後周秦戰伐空。投老飄然君勿笑。也勝魚鳥在池籠。

夢宴客大樓上命筆作詩既覺續成之

表裏江山亦樂哉。華纓滿座敵鄒枚。歌從郢客樓中聽。獵向樊姬墓上回。梅蕊香清箋寶髻。熊蹯味美按新醅。眼邊歷歷興亡事。欲賦章華恐過哀。

新塘夜歸

煙月茫茫十里堤。數聲漁唱埭東西。旋燒新兔傾村酒。扶得歸來醉似泥。

古風

少年慕黃老。雅志在山林。火食亦彊勉。寧有婚宦心。失脚墮世網。衰病忽侵尋。放逐適天幸。闕恨山未深。一牀元不睡。儻然橫素琴。開門毛髮冷。湖闊月欲沈。

又

賀鑑未嘗死。江天醉初醒。逸少亦度世。弭節過蘭亭。吾本淡蕩人。轉徙如蓬萍。聊憑一盃綠。駐此雙鬢青。邂逅兩仙翁。笙鶴遊青冥。還家不能食。濁世紛羶腥。

又

功名如博戲。大叫或作盧。文辭組繡耳。初不繫賢愚。負恃已可笑。憎嫉真區區。平生學金丹。我豈斯人徒。嘯歌醉自和。顏鬢老不枯。卻後三百年。煙雨釣鏡湖。

累日無酒亦不肉食戲作此詩

小築精廬剎曲榜。枵然蟬腹與龜腸。酒錢竟處無司業。齋日多來似太常。雲碓旋舂菰米滑。風爐親候藥苗香。明年更入南山去。要試囊中服玉方。

讀書

讀書四更燈欲盡。胸中太華蟠千仞。仰呼青天那得聞。窮到白頭猶自信。策名委質本爲國。豈但空取黃金印。故都卽今不忍說。空宮夜夜飛秋燐。士初許身輩稷契。歲晚所立慚廉藺。正看憤切詭成功。已復雍容託觀覲。雖然知人要未易。詎可例輕天下士。君不見長松臥壑困風霜。時來屹立扶明堂。

自妙相歸將至杜浦堰舟中作

斜陽發東郭。初夜轉西城。寺閣疎鐘動。漁村遠火明。蒼茫林竊滅。撲瀉水禽驚。漸喜吾廬近。遙聞過埭聲。

秋興

樵風溪上弄扁舟。濯錦江邊憶舊遊。豪竹哀絲真昨夢。爽砧繁杵又驚秋。墜枝橘熟初堪剪。浮瓮醅香恰受篘。莫道身閒總無事。孤燈夜夜寫清愁。

哀北

太行天下脊。黃河出崑崙。山川形勝地。歷世多名臣。哀哉六十年。左衽淪胡塵。抱負雖奇偉。沒齒不得伸。老夫實好義。北望常酸辛。何當擁黃旗。徑涉白馬津。窮追殄犬羊。旁招出鳳麟。努力待傳檄。勿謂吳無人。

琵琶

西蜀琵琶選逆槽。梨園舊譜鬱輪袍。繡筵銀燭燕宮夜。一飲千鍾未足豪。故蜀燕王宮。今爲張氏海棠園。

三江舟中大醉作

志欲富天下一身。常苦飢氣可吞匈奴。東帶向小兒。天公無由問。世俗那得知。揮手散醉髮。去隱雲海涯。

風息天鏡平。濤起雪山傾。輕帆入階蕩。百怪不可名。虹竿秋月鉤。巨鯨倘可求。威亦從今折。可看登九州。

短歌行

百年鼎鼎世共悲。晨鐘暮鼓無休時。碧桃紅杏易零落。翠眉玉頰多別離。涉江采菱風敗意。登樓待月雲爲祟。功名常畏謗讒興。富貴每同衰病至。人生可歎十八九。自古危機無妙手。正令插翮上青雲。不如得錢卽沽酒。

悲秋

秋燈如孤螢。熠燿耿窗戶。秋雨如漏壺。點滴連早暮。我豈楚逐臣。慘愴出怨句。逢秋未免悲。直以憂國故。三軍老不戰。比屋困征賦。可使江淮間。歲歲常列戍。

步至西村

一飽無餘事。西村偶獨行。搘筇息微倦。汲井漱餘醒。川闊雁平度。谷虛雲亂生。絕知豐歲樂。笑語隔柴荆。

題接待院壁

笙歌淒咽離亭晚。回首高城半掩門。疊疊遠山橫翠靄。娟娟新月耿黃昏。未嫌雙燭妨欹枕。自是孤舟易斷魂。遙想柯橋落帆處。隔江微火認漁村。

九月晦日作

菊枝傾倒不成叢。柯葉凋零已半空。自是老來多感慨。不應蕭瑟爲秋風。

又

山路清寒近探梅。振衣高處興悠哉。飛鴻杳杳江天闊。一片愁從萬里來。

又

錦城誰與寄音塵。望斷秋江丈六鱗。正使傾家供麴蘖。定知不解醉愁人。

又

炊煙漠漠衡門寂。寒日昏昏倦鳥還。數樹丹楓映蒼檜。天工解作范寬山。

陶山遇雪覺林邊。主見招不果往。

山中大雪二尺彊。道邊虎跡如椀大。衰翁畏虎復畏寒。招喚不來公勿怪。梨花開時好風日。走馬尋公作寒食。不須沽酒引陶潛。箭筈蕨芽如蜜甜。

哭王季夷

迢遙天馬灑注來。萬里修途忽勒回。爽氣卽今猶可想。舊遊何處不堪哀。夢中有客徵殘錦。地下無爐鑄橫財。欲酌一尊身尙病。壑封春露溼蒼苔。

樊江晚泊

碧雲吞日天欲暮。城西揆柁城東路。尊羹菰飯香滿船。正是江頭落帆處。荻洲漁火遠更明。煙水蒼茫聞雁聲。不是綠尊能破悶。白頭客路若爲情。

蛾眉村旅舍作

小雨初收景氣和。青苔狼藉落梅多。曲肱野店睡斜日。濯足溪橋鳴細波。久厭俗情生眼白。近承天詔賜

顏酖。予自壬寅冬兩頰復丹。騎鯨未返蓬壺去。此路猶須幾浩歌。

娥江野飲贈劉道士

春光盎盎催官柳。柳色黃如醴中酒。橋邊微徑愜幽尋。世外高人共攜手。參差茅舍出木末。隱映酒旗當浦口。插花處處引村童。失道時時問耕叟。客堪共醉百無一事不諧心。十常九日斜潮落。不可留孤舟欲上頻搔首。

丈亭遇老人長眉及肩欲就之語忽已張帆吹笛而去

颯颯長眉綠覆肩。欲推壽數意茫然。若非楚國庚寅歲。定是堯時丙子年。銅笛一聲驚宿鷺。蒲帆數幅破晴煙。遙知乘醉江湖去。黃鶴樓頭又放顛。

寓舍聞禽聲

日暖林梢鶉鷓鳴。稻陂無處不青青。老農睡足猶慵起。支枕東窗盡意聽。

春晚

雨足人家插稻秧。蠶生鄰女采桑黃。萬花掃迹春將暮。百草吹香日正長。閒窺啼鶯穿北嶺。戲隨飛蝶過東岡。飄然且喜身彊健。不怪兒曹笑老狂。

題瑩師釣臺圖

羊裘老子釣魚處。開卷令人雙眼明。未可忽忽便持去。夜窗吾欲聽灘聲。

仗錫平老具舟車。迎前天衣印老印。悉遺還策杖訪之作二絕句奉送兼簡平

晝勸盤與不許前。白頭行脚意超然。舜江禹穴千山水。盡在高人拄杖邊。

又

魚鼓聲中白氍毹。南山笏蕨一番新。長安不是無卿相。林下平津獨可人。

湖邊曉行

寒驢清曉掠湖堤。緩轡迎涼帽影低。露圻渚蓮紅漸鬧。雨催陂稻綠初齊。先秋葉已時時墮。失旦雞猶續啼。不是老來忘睡美。戴星南畝慣扶犁。

久雨杜門遺懷

風雨蕭蕭臥掩關。經旬登覽負溪山。也知解送豐年喜。無奈難消永日閑。平野橫吹看凌厲。畫簷高瀉聽淙潺。城闌路斷吾何恨。濁酒枯魚亦破顏。

梅雨陂澤皆滿

雨暗迷行路。溪深沒舊痕。汪汪牛渚白。盎盎酒醅渾。暖浸千畦稻。橫通十里村。羣蛙更堪笑。鼓吹鬧黃昏。

夜意

幌外燈青見鼠行。林梢月黑有鳥鳴。只言中夏夜偏短。萬里夢回天未明。

又

睡覺鄰雞已再啼。蓬窗燈暗雨凄凄。東家寒驢不用借。明日門前一尺泥。

幽事

老境俗緣減，閑居幽事多。去沙通斷澗，插援讓新荷。燕能看山臥，釣歸搖櫂歌。餘年端有幾，風月且婆娑。

對酒戲作

去日奔輪不啻過，凌煙勳業已蹉跎。只言一寸丹心在，無奈千莖白髮何。色比鵝雛京口酒，聲如珠貫渭城歌。身閑取醉真當勉，莫學癡人夢禮窠。

夏雨

清風起湖濱，急雨來天末。蚊蠅遽退聽，松竹例蘇活。奇聲集空庭，爽氣生細葛。素秋雖尙遙，聊喜寬肺渴。

軍中雜歌

三受降城無壅城，賊來殺盡始還營。漠南漠北靜如掃，清夜不聞胡馬聲。

又

秦人萬里築長城，不如壯士守北平。曉來磧中雪一丈，洗盡羶腥春草生。

又

匈奴莫復倚長戈，來款軍門早乞和。鐵騎如山尙可避，飛將軍來汝奈何。

又

名王金冠玉躡躩，面縛纒下聲呱呱。橋街未遽要汝首，賣與酒家錯作奴。

又

三月未春冰塞川，冬月苦寒雪闊天。紫髯將軍曉射虎，嚇殺胡兒箭似椽。

又
北面行臺號令新。繡旗豹尾渡河津。檄書纔下降書至。不用兒郎打女真。

又
漁陽兒女美如花。春風樓上學琵琶。如今便死知無恨。不願番家屬漢家。

又

北庭茫茫秋草枯。正東萬里是皇都。征人樓上看太白。思婦城南迎紫姑。

夏夜舟中聞水鳥聲甚哀若曰姑惡感而作詩

女生藏深閨。未省窺牆藩。上車移所天。父母爲他門。妾身雖甚愚。亦知君姑尊。下牀頭雞鳴。梳髻著襦裙。堂上奉滷掃。厨中具盤飧。青青摘葵莧。恨不美熊蹯。姑色少不怡。衣袂溼淚痕。所冀妾生男。庶幾姑弄孫。此志竟蹉跎。薄命來讒言。放棄不敢怨。所悲孤大恩。古路傍陂澤。微雨鬼火昏。君聽姑惡聲。無乃譴婦魂。

暮歸舟中

五月未劇暑。暮從城市還。斷虹低飲澗。落日遠衝山。蟹舍叢蘆外。菱舟薄霧間。詩情終草草。虛遣鬢毛斑。

又

湖水綠可愛。弄機衝夕霏。林昏漁火壯。山轉寺鐘微。老歎世情惡。窮知心事違。回頭語孤鶴。伴我莫先飛。

夏夜

夏夜忽已半。東岡月初生。起行遶庭樹。愛此露滴聲。漂流憶安臥。局促念遐征。幽懷誰晤語。華釐還自傾。

又

螢火喜暗庭。桐葉矜冷雨。幽人悄不寐。獨夜誰與處。乾坤信無情。歲月遽如許。明發視鏡中。鬢絲添幾縷。

又

庭荒蔓草長。堂豁爽氣入。悠然推枕起。聊作倚杖立。飛螢亦避雨。黏棟光熠熠。南鄰輸稅歸。小婦愁夜汲。

又

結屋在郊墟。翛然謝炎熾。窗扉故闕寂。水竹亦幽邃。飛蟲望燈集。栖燕衝雨至。石枕與葛罽。美哉今夕睡。

北渚

北渚露濃蘋葉老。南塘雨過藕花稀。新秋漸近蟬更急。殘日已沉鴉未歸。銅鏡面顏無藥駐。玉關勳業與

心違。一蓑一笠生涯在。且醉蒼苔舊釣磯。

夏日五鼓起戲書

老雞喔喔桑樹顛。明星磊磊茅屋邊。我與視夜不復眠。坐看朝曦浴虞淵。開窗清風來穆然。拂几洗研盪
蠶編。火雲崔嵬忽滿天。安得羲和徐著鞭。

雨夜

急雨如河瀉瓦溝。空堂臥對一燈幽。老雞多事彊知曉。落葉無情先報秋。身未蓋棺誰可料。尊常有酒莫
閑愁。功名老大從來事。且復長歌起飯牛。

小立

曠懷塵事外，小立綠陰間。舉世皆嫌拙，平生剩得閒。江郊雲易暗，旱歲雨終慳。欲醉尊無酒，悠然對暮山。

徙倚

漁扉夕不掩，徙倚欲三更。月正樹無影，露濃荷有聲。崢嶸歲將晚，悄悄恨難平。坐念中原沒，男兒恐浪生。

居山

涉世緣雖薄，居山味自長。穿雲雙履溼，洗藥一溪香。有酒作臉頰，無愁供鬢霜。遶天渺歸鶴，千載付茫茫。

卷第十五

秋興

白髮蕭蕭欲滿頭，歸來三見故山秋。醉憑高閣乾坤迤，病入中年日月遒。百戰鐵衣空許國，五更畫角只生愁。明朝煙雨桐江岸，且占丹楓繫釣舟。

又

暮境何堪與病遭，西風落葉擁亭臯。極知世上人情惡，且放江邊醉眼高。應俗紛紛何日了，詠詩混混寄吾豪。碧油金鎖平生意，未許人言學楚騷。

八月五日夜半起飲酒作草書數紙

有漏神仙有髮僧，碧幃欹枕對秋燈。忽然起索三升酒，颯颯蛟龍入剡藤。

秋雨漸涼有懷興元

八月山中夜漸長。雨聲登影共淒涼。遙知南鄭風霜早。已有寒熊犯獵場。

又

十年前在古梁州。痛飲無時不慣愁。最憶夜分歌舞歇。臥聽秦女壁筵篋。

又

清夢初回秋夜闌。床前耿耿一燈殘。忽聞雨掠蓬窗過。猶作當時鐵馬看。

秋風曲

秋風吹雨鳴窗紙。壯士不眠推枕起。牀頭金盡酒尊空。櫪馬相看淚如洗。鴻門霸上百萬師。安西北庭九千里。帳前畫角聲入雲。隴上鐵衣光照水。橫飛渡遼健如鶴。談笑不勞投馬箠。堂堂羽檄從天下。夜半斫營屏可鄙。拾瑩讀書定何益。投筆取封當努力。百斤長刀兩石弓。飽將兩耳聽秋風。

送宣書記并寄其兄曇才二公

在吳識曇公。至蜀識才公。彌天宣書記。晚乃得從容。是家固多賢。天遣慰我窮。初秋夏末時。襜子各西東。子獨惜此別。共語夜燭紅。怪我耐逆境。萬事一笑空。子顧知我否。視身如枯蓬。枯蓬未變滅。姑當付之風。家世無高年。我今六十翁。俯仰幾時客。結束已匆匆。那將須臾景。更受憂患攻。願言早來歸。相就煮晚菘。

起晚戲作

地偏身飽閑。秋爽睡殊美。老雞每愧渠。三唱呼未起。廚人罷晨汲。童子愁屣屐。情慵雖可嘲。安靜良足喜。心空夢亦少。酣枕甘若醴。不學多事人。南柯豪業蟻。

飲村店夜歸

致主初心陋漢唐。暮年身世落農桑。草煙牛跡西山口。又臥旗亭送夕陽。

又

澗澗村醪君勿辭。橙椒香美白鵝肥。醉中忘卻身今老。戲逐螢光蹋雨歸。

雨夜感懷

點滴空階雨送涼。青燈對影獨淒傷。身如病木驚秋早。心似鯨魚怯夜長。鑄得黃金猶有術。掃空白髮定無方。蕭然禪榻君休笑。一卷殘書伴枕傍。

寄葉道人

白首不堪憂患纏。要將樂事餞流年。尋山猶費幾兩屐。貯酒真須百斛船。若信王侯等螻蟻。可因富貴失神仙。老杜詩王侯與螻蟻共盡隨。丘墟太白詩富貴與神仙隨。踏成兩失。驚人亦莫廢銅狄。秦華松風足晝眠。

月下小酌

昨日雨邊簷。孤燈對搔首。今夜月滿庭。長歌倚衰柳。世變浩無窮。成敗翻覆手。人生最樂事。臥聽壓新酒。我歸自梁益。零落槍親友。紛紛墮鬼錄。何人得長久。後生多不識。詎肯顧衰朽。一杯無與同。敲門喚鄰叟。

讀袁公路傳

成敗相尋豈有常。英雄最忌數悲傷。蕪妻豆粥從來事。何恨郵亭坐寶床。

鄰曲小飲

早稻喜登場。相呼集野堂。迎霜新兔美。近社濁醪香。茆屋滴殘雨。竹籬圍夕陽。新豐不須作。眞箇是吾鄉。

秋夜觀月

夢回殘燭耿。房櫺杳杳。江天叫斷鴻。病骨不禁風。露重披衣小。立月明中。

又

誰琢天邊白玉盤。亭亭破霧上高寒。山房無客兒貪睡。常恨清光獨自看。

枕上

香冷燈昏夢自驚。清愁冉冉帶餘醒。夜長誰作幽人伴。惟是蛩聲與月明。

秋夕大風松聲甚壯戲作短歌

人生不自憐。坐受外物械。榮華難把玩。俄頃皆變壞。山棲亦何有。耳目差曠快。秋郊多烈風。夜壑起松籟。初聞尙蕭瑟。髣髴聽嚴瀨。忽如倒巨浸。便欲斲大塊。又疑楚漢戰。瀕洞更勝敗。不然六月雨。雷電奔百怪。三更勢稍斂。鐵馬歸入塞。孰能從吾遊。洗汝胸次隘。

明河篇

明河八月轉分明。炯如素練西南傾。年年歲歲見河漢。坊曲曲曲聞碇聲。良人萬里事征行。碇聲中有玉關情。遙遙鐵衣冷如水。指點明河白髮生。磧中草死駱駝鳴。萬里卻望長安城。兒生總角爺未見。歸心頓覺封侯輕。漢家自古有夷狄。付與窮荒何足惜。只願天狼無光太白低。還家爲婦說安西。

夜聞鄰家治稻

二頃春蕪廢不耕，半生名宦竟何成。歸來每羨農家樂，月下風傳打稻聲。

浪迹

浪迹人間四十年，鏡中不覺已華顛。山川慘澹秋多感，燈火青燐夜少眠。壯志已忘榆塞外，高情正在酒壘邊。扁舟不恨無人識，且復長歌入暮煙。

夜步庭下有感

夜遠中庭百匝行，秋風傳漏忽三更。星辰北拱疎還密，河漢西流縱復橫。鷺鷥遠枝棲不穩，冷螢穿竹遠猶明。書生老抱平戎志，有淚如江未敢傾。

題酒家壁

明主何曾棄不才，書生飄泊自堪哀。煙波東盡江湖遠，雲棧西從隴蜀回。宿雨送寒秋欲晚，積衰成病老初來。酒香菰脆丹楓岸，強遣樽前笑口開。

題書齋壁

隨分琴書適性情，乍寒偏愛小窗明。旋煎粟粟留僧話，故種芭蕉待雨聲。丹藥驗方非畏死，文章排悶不求名。是間幽事君知否，莫怪經秋少入城。

贈貓

裏鹽迎得小狸奴，盡護山房萬卷書。慚愧家貧策勸薄，寒無氈坐食無魚。

秋夕

羈魂虛仗些詞招。病骨那禁積毀消。亂葉打窗寒有信。昏燈照幔夢無聊。棧邊老驥心空在。爨下殘桐尾半焦。百感忽生推枕起。碧霄銀漢正迢迢。

秋雨排悶十韻

今夏久無雨。從秋卻少晴。空濛迷遠望。蕭瑟送寒聲。衣潤香偏著。書蒸蠹欲生。壞簷聞瓦墮。漲水見堤平。溝溢池魚出。天低塞雁征。螢飛明開廡。蛙鬧雜疎更。藥釀時須焙。舟閑任自橫。未憂荒楚菊。直恐敗吳秔。夜永燈相守。愁深酒細傾。浮雲會消散。鼓笛賽西成。

小舟航湖夜歸書觸目

雲黑風號不見星。古丘叢木聚精靈。舟人已過微相語。兩兩三三鬼火青。

又

電掣半空雲黯黯。船浮積水浪憑陵。茫然不辨身何處。猶喜東南見塔燈。

又

遙望湖塘炬火迎。纔歸村舍雨如傾。畏途回首知安在。催喚兒童暖酒鐺。

幽居書事

莫歎人間苦不諧。清時有味是歸來。已因積毀成高臥。更借陽狂護散才。正欲清言聞客至。偶思小飲報花開。紛紛爭奪成何事。白骨生苔但可哀。

又

安命知天更不疑。幽居最愛早寒時。手中書墮初酣枕。窗下燈殘正劇棋。鮮鯽每從溪女買。香菰時就釣船炊。山陰清絕君須記。雪裏騎驢未辦詩。

晚霽

雨斷簷餘滴。雲疎日漏明。人其如積潦。天自活疲氓。溪碓春香稻。霜叢剪綠橙。書生久愁臥。作意賦新晴。

又

漲水返舊壑。浮雲歸故山。園丁藝蔬去。鄰婦賃春還。喬木蒼煙外。孤村落照間。莫嫌樽酒薄。且用破愁顏。

雨後散步後園

淡日輕雲未快晴。涓涓溝水去無聲。爲憐一徑新苔綠。別就牆陰取路行。

又

澤國霜遲木未疎。秋來更覺愛吾廬。芭蕉綠潤偏宜墨。戲就明窗學草書。

示客

十年奔走每思歸。剡喜湖邊畫掩扉。社燕免教嘲作客。海鷗曾是信忘機。暉暉晚日收新稻。漠漠新寒試夾衣。留客盤殮君勿笑。一畦蔬甲摘初稀。

甲子晴

今日甲子晴。秋稼始可言。老農喜相覓。隨事具雞豚。掃地設菅席。酌酒老瓦盆。耳熱仰視天。何異傾金尊。

牛羊散墟落，霽色滿衙門。起舞屬父老，勿恨此酒渾。

後一日復雨

一雨三日水抹隄，南村北村雲淒淒。天公約束龍返穴，不忍嘉穀沈塗泥。日光清薄潦未縮，起視又歎行雲西。初纒浙瀝瀉窗戶，俄已湍瀉鳴溝溪。豐凶相乘若翻手，振救小緩輒噬臍。窮閭腐儒不預此，且收芋栗寬兒啼。

紹興庚辰余遊謝康樂石門與老洪道士痛飲賦詩既還山陰王仲信爲予作石門瀑布圖今二十餘年別石門燈前感舊欲消魂。人生萬事皆如夢，自笑區區記劍痕。

又

愛酒黃冠鬢如雪，石門邂逅一樽同。懸知久作此山土，愁對畫圖秋雨中。

雨中遣懷

秋稼連雲飽不疑，寧期一敗莫支持。雨如梅子初黃日，水似桃花欲動時。正晝蚊蟲驅不去，終宵鼃黽怒何爲。凶年氣象堪流涕，不把紛紛滿竹籬。

秋思

秋來情味更堪論，身寄城南五畝園。委轡看山無鐵繡，梅塢餘馬名拾樵。煎茗有青猿，王元之小童名陂塘。夜雨添新漲，原野煙蕪減舊痕。豈是平生少親友，略無人肯訪孤村。

秋雨歎

點點滴滴雨到明。悽悽惻惻夢不成。窗間殘燈暗欲滅。匣中孤劍鏗有聲。少年讀書忽頭白。一字不試空虛名。公車自薦心實恥。新豐獨飲人所驚。太行千仞插雲立。黃流萬里從天傾。遺民久憤汗左衽。屏虜何足煩長纓。霜風初高鷹隼擊。天地下洗煙塵清。投筆急裝須快士。令人絕憶獨孤生。獨孤策蒲人。前歲死於峽中。

雨中小酌

晨起占雲日日西。吾廬煙雨正淒迷。愁看場上禾生耳。且泥盃中酒到臍。窗日幾時飛野馬。甕天惟是舞醴鷄。前村著屐猶通路。自摘金橙擠鱸齋。

衰病有感

衰與病相乘。山房冷欲冰。在家元是客。有髮亦如僧。愁絕窮秋雨。情親獨夜燈。西鄰有甘井。聊得曲吾肱。

又

倦枕先難覺。寒汀伴雁孤。寂寥誰省錄。衰疾且枝梧。鶴骨秋添瘦。龜腸夜自呼。蓋棺吾事定。未敢泣窮途。

又

羈宦一周星。歸如化鶴丁。灰心成寂寂。霜髮失青青。小智空自貴。大愚元不靈。客來應絕倒。扶病講丹經。

雨止頓寒遂有晴意

霧雨昏昏地氣騰。盤中朝暮厭驅蠅。未看霽色排陰翳。先覺清寒洗鬱蒸。喚客喜傾新熟酒。讀書貪趁欲

殘燈明朝樂事真當賀。山北山南曳瘦藤。

秋晴出遊

雨餘清冷近霜天。拄杖閑拖不挂錢。黃葉舞風初蔽蔽。碧渠通溜正濺濺。無情日駁工催老。耐事天公聽放顛。薄暮行歌並湖去。有人偷樣畫癡仙。

悲秋

形骸枯槁病侵陵。少睡長飢一老僧。霜夜羈愁更無賴。莫收書策且留燈。

又

蕭蕭衰鬢點新霜。人靜房櫺易斷腸。等是閉門愁裏過。任教風雨壞重陽。

又

殘年孤寂不禁秋。醉自淒涼醒更愁。富貴空成守錢虜。吾今何止百宜休。司空表聖自言有四宜休。

又

小雨籬櫺慘淡天。醉中偏藉亂書眠。夢回有恨無人會。枕伴橙香似昔年。

久雨道懷

暮年惜日月。木落輒動心。閑居念親友。所願聞足音。風雨斷官道。吾廬沉幽深。渺渺雲水鄉。蕭蕭蘆荻林。草茂豪鳴蛙。天闊無來禽。四顧此何處。悠悠付孤樹。

野步書觸目

陸放翁集

十一

劍南詩集

卷十五

三十五

村落初過雨。園林殊未霜。幽花雜紅碧。野橘半青黃。飛鷺橫秋浦。啼鴉滿夕陽。最憐山脚水。披亂入陂塘。

月下

月白庭空樹影稀。鵲棲不穩繞枝飛。老翁也學癡兒女。撲得流螢露濕衣。

九月十日

不須扇障庾公塵。散地儻然學隱淪。風帽可憐成昨夢。菊花已覺是陳人。昏昏但苦餘醒在。草草久無佳句新。歎息吾生行已矣。老來歲月似奔輪。

秋晴園中山禽絕多有感而賦

九日秋陰一日晴。山禽應喜我閑行。幽吭弄暖閑相命。勁翮凌風遠有聲。熟果啄餘看核墮。細枝衝得欲巢成。名園美蔭不飛去。似比交朋猶有情。

燈籠

我年十六遊名場。靈芝借榻棲僧廊。鐘聲纔定履聲集。弟子堂上分兩廂。燈籠一樣薄臘紙。螢如雲母含清光。還家欲學竟未暇。歲月已似奔車忙。書生白首故習在。顛倒簡牘紛朱黃。短檠雖復作老伴。目力眩晃不可常。平生所好忽入手。麻宰把挈喜欲狂。蘭膏激澗支邊且。秋雨蕭瑟輸新涼。討論廢忘正塗乙。遂欲盡發萬卷藏。所嗟衰病終難勉。非復當年下五行。

舟過南莊呼村老與飲示以詩

我昔過此時。荷花繁雲錦。今我復來遊。霜露已凄凜。鄉鄰福苦薄。積雨敗垂稔。禾頭耳穢穢。熟計難高枕。

所懼憂吾君。歲暮詔發廩。勿言村醴薄。排悶聊共飲。

又

玄雲吞落日。大風東北起。隔林鳴兩鳩。當道行衆蟻。晴來未三日。雨候乃復爾。我場何時乾。嘉穀在泥滓。豐凶歲所有。遊惰古所恥。努力教子孫。天公終可倚。

秋夜獨過小橋觀月

湖上蕭蕭葉落頻。小橋東畔岸綸巾。乍圓素月升寒壁。欲散微雲覺細鱗。有酒便應遺世事。得閑隨處勝官身。笑談但恨朋遊少。安得幽人與卜鄰。

紹興中與陳魯山王季夷從兄仲高以重九日同遊禹廟後三十餘年自三橋泛舟歸山居秋高雨霽望禹廟樓殿重復光景宛如當時而三人者皆下世予亦衰病無聊慨然作此詩

重樓傑閣倚虛空。紅日蒼煙正鬱葱。鄉國歸來渾似鶴。交朋零落不成龍。人生真與夢何校。我輩故應情所鍾。淚漬清詩卻回棹。不眠一夜聽鳴蛩。

雜興

風雨雞喔喔。雪霜柏森森。獨居雖無友。二物感我深。

又

萬物各有時。蟋蟀以秋鳴。我老自少眠。那得惜此聲。

又

漲水入我廬。萍葉黏半扉。日出水返壑。念汝何由歸。

又

清霜染丹葉。秋晚粲如春。回首風吹盡。天公解戲人。

予秋夜觀月得瘡疾枕上賦小詩自戲

貪看霜月步亭臯。不覺寒侵范叔袍。且倚誦詩驅瘡鬼。斷無人寄碧腴膏。唐小說載鄭處妻病瘡。杜子美教誦子車。膿血模糊等句以却之。又元微之謫江陵病瘡。白樂天自長安寄以碧腴膏。

後春愁曲并序

予在成都作春愁曲。頗爲人所傳。偶見舊藁。悵然有感。作後春愁曲。

六年成都擅豪華。黃金買斷城中花。醉狂戲作春愁曲。素屏紈扇傳千家。當時說愁如夢寐。眼底何曾有愁事。朱顏忽去白髮生。真墮愁城出無計。世間萬事元悠悠。此身長短歸山丘。閉門堅坐坐愈生愁。未死且復秉燭遊。

秋花歎

秋花如義士。榮悴相與同。豈比輕薄花。四散隨春風。黃菊抱殘枝。寂寞臥寒雨。拒霜更可憐。和霽浮煙浦。古來結交意。正要共死生。讀我秋花詩。可代丹雘盟。

寄題朱元晦武夷精舍

先生結屋綠巖邊。讀易懸知屢絕編。不用采芝驚世俗。恐人謗道是神仙。

又

蟬蛻巖間果是無。世人妄想可憐渠。有方爲子換凡骨。來讀晦菴新著書。

又

身閑剩覺溪山好。心靜尤知日月長。天下蒼生未蘇息。憂公遂與世相忘。

又

齊民本自樂衡門。水旱那知不自存。聖主憂勤常旰食。煩公一一報曾孫。

又

山如嵩少三十六。水似邛邛九折途。我老正須閑處著。白雲一半肯分無。

病思

夜窗孤影怯青燈。瘦著秋衣欲不勝。光景正如寒圃蝶。情懷卻羨病寮僧。篝爐冷落燒殘葉。禪榻欹斜倚古藤。莫怪頽然遺世事。鬢絲日日鏡中增。

病愈

秋夕高齋病始輕。物華凋落歲崢嶸。蟹黃旋璧饑涎墮。酒淥初傾老眼明。提筆詩情還跌宕。倒牀藥裹尙縱橫。閑愁恰似憎人睡。又起挑燈聽雨聲。

病中忽有眉山士人史君見過欣然接之口占絕句

蜀語初聞喜復驚。依然如有故鄉情。絳羅餅餠玻璃酒。何日臺頤伴我行。眉州以羅裹餅餠。至二十四子。

號運義饒。玻璃春。邪酒名也。亦爲四州之冠。

初寒

我窮不自活。萬事付天公。今年寒苦晚。霧雨常濛濛。雖道裘褐覺。坐念疾病攻。清夜喜不寐。萬木號西風。新霜纔幾何。瘴癘一掃空。曉看烏臼林。已有數葉紅。微雲時去來。寒日猶曛曛。振衣起出戶。一笑尋鄰翁。

出塞曲

北風吹急雪。夜半埋氈廬。將軍八千騎。萬里逐單于。漢家如天臣。萬邦歡呼動地單于降。鈴聲南來金闕鏤。赦書已報經沙漠。

無題

碧玉當年未破瓜。學成歌舞入侯家。如今顚顚篷窗裏。飛上青天妒落花。

道室卽事

一簪殘雪寄林亭。手把黃綫兩卷經。琴調養心安澹泊。爐香挽夢上青冥。隨緣久已均憂喜。玩世惟須半醉醒。溪父園公殊未見。頽然誰與共忘形。

夙興

青燈黃卷擁篝爐。殘髮垂蓬未暇梳。略似諸生勤夜課。絕勝小吏迫晨趨。雞聲喔喔寒猶力。月影離離淡欲無。幽致滿前君不領。枉因留滯歎頭顱。

長安道

千夫登登供版築。萬手丁丁供斲木。歌樓舞榭高入雲。複幕重簾晝燒燭。中使傳宣騎飛鞚。達官候見車
擊轂。豈惟炎熱可炙手。五月瞿唐誰敢觸。人生易盡朝露晞。世事無常壞陂復。士師分鹿真是夢。塞翁失
馬猶爲福。君不見野老八十無完衣。歲晚北風吹破屋。

記夢

夜夢有客短褐袍。示我文章雜詩騷。措辭磊落格力高。浩如怒風駕秋濤。起伏奔蹴何其豪。勢盡東注浮
千艘。李白杜甫生不遭。英氣死豈埋蓬蒿。晚唐諸人戰雖慶。眼暗頭白真徒勞。何許老將擁弓刀。遇敵可
使空壁逃。肅然起敬豎髮毛。伏讀百過聲嘈嘈。惜未終卷雞已號。追寫尙足驚兒曹。

冬夜讀書

茂陵病後非平昔。瘦骨玲瓏短髮疎。紅燭悔從長夜飲。青燈喜對少年書。聖賢親見生非晚。忿慾俱空死
有餘。破屋頽垣君勿笑。更闌絃誦滿吾廬。

遊仙羅澗谷運放翁詩有遊僊七言古詩一首卽飄飄初珥玉殿三絕句合成者附記于此。

飄飄鸞鶴杳難攀。萬里東遊海上山。應有世人遙稽首。紫簫餘調落雲間。

又

鳳舞鸞歌宴藥宮。碧桃花下醉千鍾。紅塵謫滿重歸去。花未開殘宴未終。

又

玄圃春風賜宴時。雙成獨奏玉參差。侍晨飲醕虛皇喜。一段龍綃索進詩。

初珥金貂謁紫皇。仙班最近玉爐香。爲憐未慣遊霄冷。獨賜流霞九醞觴。

又

又

玉殿吹笙第一仙。花前奏罷色悽然。憶曾偷學春愁曲。謫在人間五百年。

過鄰家

今日病良已。筠枝發興新。高居遺世事。一笑過吾鄰。夕照明丹葉。秋風老白蘋。素衣雖化盡。不爲犯京塵。

山園晚興

傳盃誰與豁幽悰。霜晚黃花未滿叢。過雁一聲寒籟外。短籬數掩夕陽中。易雖病裏猶能讀。詩到愁邊始欲工。惟有功名真已矣。嬾將華髮對青銅。

初冬出扁門歸湖上

桑柘枝空葉作堆。斜陽更著角聲催。雲歸玉筍茫茫去。水下蘭亭曲曲來。稻壠受犁寒欲遍。漁船入市晚爭回。貂裘破弊霜風冷。愁對青燈撥瓮醅。

新寒小醉睡起日已高戲作

倦眼矍矍睡易成。華胥稅駕不多程。衾重枕穩當霜夕。氈暖屏深擁宿醒。栩栩蝶魂閑自適。緜緜龜息靜無聲。幽棲豈是忘微祿。正怕條鈴擾五更。

太息

閑將白髮照清溝。太息年光逝不留。動業無期著書晚。此生與世判悠悠。

冬夜讀書

平生喜藏書。拱壁未爲寶。歸來稽山下。爛漫恣探討。六經萬世眼。守此可以老。多聞竟何用。綺語期一掃。幽居出戶稀。衰病擁爐早。青燈照黃卷。作意勿草草。

晚步

地爐附殘火。將夕鳥雀喧。食已了無事。扶杖閑出門。披披歸雲陣。淡淡新月痕。平生足憂患。歲晚信乾坤。緩步牛羊巷。浩歌桑柘村。九原不可作。吾意與誰論。

村舍

空谷人稀到。新寒病頓輕。晨霜催小獵。宿雨潤新耕。草莽秦馳道。雲煙越故城。千年不磨滅。惟有暮山橫。野步至近村。

隨意出柴荆。清寒作晚晴。風吹雁北鄉。雲帶月東行。童稚爭追逐。漁樵習送迎。白頭寧復仕。惟此餒餘生。夜坐油盡戲作。

金樽畫燭少年豪。白首孤燈不厭勞。夜漏雖深書未竟。半缸誰與續殘膏。

又

欲盡殘燈更有情。可憐剪斷讀書聲。區區紙上太癡計。一笑開門看月明。

歲暮

離離井上桐。鬱鬱牆下桑。零落豈不悲。無奈中夜霜。蟋蟀更可念。歲暮依客牀。客亦自孤寂。衣篝歇殘香。一燈挂西壁。耿耿青無光。援筆欲寫愁。三啜不成章。

幽居感懷

偶傍楓林結數椽。東歸也復度流年。汀洲雁下依殘水。墟里人行破夕煙。十月風霜欺客枕。五更鼓角滿江天。散關清渭應如昨。回首功名一愴然。

山中夜歸戲作短歌

駿馬不用換美妾。名酒不用博涼州。霜天飲酒騎馬出。馳獵蹴蹋川原秋。少年意薄萬戶侯。白首乃作窮山囚。箭鋒豈必盡狐兔。胸次聊欲平山丘。夜歸湖上酒初醒。莊舍蕭條燈火冷。解刀自笑太麤生。卻染松煤飛兔穎。

狂歌

少年雖狂猶有限。遇酒時能傲憂患。卽今狂處不待酒。混混長歌老巖澗。拂衣卽與世俗辭。掉頭不受朋友諫。挂帆直欲截煙海。策馬猶堪度雲棧。枵然癡腹肯貯愁。天遣作盡盛衰覓。髮垂不櫛性所便。衣垢忘濯心已慣。眼前故人死欲無。此生行矣風雨散。羞爲塵土伏。轅駒寧作江湖斷行雁。

遲暮

遲暮固多感。況此歲嶢嶸。霜霰忽已集。夜聞絡緯鳴。青燈不解語。依依有餘情。銅瓶煮寒泉。中作笙簫聲。沈憂能傷人。一夕白髮生。蓬萊渺雲海。金丹幾時成。

種秫

種秫供留客。移花待探春。愁邊開樂園。鬧裏作閑身。髻髮今如此。頭顱莫問人。白鷗非避俗。野性自難馴。

擁爐

睡少人人笑。老生擁爐孤。坐欲三更。月移西去。失花影。風自北來。傳漏聲。鼎煎茶。非俗物。雁燈開卷。愜幽情。興來自喜。猶彊健。一紙清詩。取次成。

冬夜吟

昨夜疑霜皎如月。碧瓦鱗鱗凍將裂。今夜明月卻如霜。竹影橫窗更清絕。造物有意娛詩人。供與詩材次第新。飢鴻病鶴自無寐。山窮水絕誰爲鄰。西村梅花消息動。唧唧寒醅漸鳴瓮。儘將醉帽插幽香。此生莫作長安夢。

讀書罷小酌偶賦

歲晚淒涼冰雪晨。頽垣破屋鏡湖濱。浮生亦念古有死。壯氣要使胡無人。黃卷展殘三太息。綠尊酌罷一嘯伸。躬耕不預差科事。猶向清時作幸民。

移花遇小雨喜甚爲賦二十字

獨坐閑無事。燒香賦小詩。可憐清夜雨。及此種花時。

書生歎

君不見城中小兒計不疎。賣漿賣餅活有餘。夜歸無事喚僮侶。醉倒往往眠街衢。又不見壚頭男子手把

鉏丁字不識稱農夫。筋力雖勞憂患少。春秋社飲常歡娛。可憐秀才最誤計。一生衣食囊中書。聲名纔出衆毀集中道不復能他圖。抱書餓死在空谷。人雖可罪汝亦愚。嗚呼人雖可罪汝亦愚。曼倩豈即賢侏儒。

冬夜醉解殘燈煖然起讀書至明賦詩十韻

冬夜厭久坐。頗幸一醉眠。滿酌文學尊。徑臥子敬氈。鼻雷未及作。眼電遽瞭然。孤燈如秋螢。喚我開陳編。初欲限一卷。隨手紛聯翩。歡然不知疲。忽已晨。烏選嗟我行六十衰。病迫殘年仕進今永塞。文章後誰傳。飽食而安寢。此計定自賢。勿學草玄翁。死爲人所憐。

夜行

路長憂炬盡。馬弱畏泥深。腸斷猿啼樹。魂驚鬼嘯林。艱危窮自慣。寒苦老難禁。回首金牛道。加鞭負壯心。
須自小盆還南鄭。夜宿金牛驛時方大寒。人馬俱欲僵仆。今十二年矣。

遊淳化寺

蕭寺久不到。偶來幽興長。蠅穿珠九曲。蜂釀蜜千房。雨過山橫翠。霜新橘弄黃。年衰道不進。珍重一爐香。
僧問拯迷如何是。祖師西來意。師曰。古殿一爐香。拯迷卽淳化也。

餘慶出遊夜歸

杖藜尋勝愜幽情。芒屨如飛病體輕。迎客野梅纔半吐。避人山雉尙徐行。東谿水落灘聲壯。南嶺雲酣雪意成。薄暮歸來僧已定。佛龕獨對一燈明。

遊前山

兀兀無歡意。閑遊未擬回。屐聲驚雉起。風信報梅開。山雪堆僧衲。溪流動鼉雷。平生一桐帽。自惜犯塵埃。

齋前獨坐戲作

閉戶學僧坐。頽然遺世情。虛窗鶴飛影。枯葉犬行聲。雪擁杉灰煖。雲垂紙帳明。清饑不可耐。一笑聽華鯨。

晚同僧至谿上

兢兢臥石熊當道。矯矯長松龍上天。不怕雪雲寒到骨。喚僧扶杖立橋邊。

僧飯

雲碓春杭白。齋廚爨桂香。百窮慚燕頤。一飽慰龜腸。舉世知心少。平生爲口忙。何當棄簪笏。終老掩山房。

山店賣石榴取以薦酒

山色蒼寒雲釀雪。旗亭據榻興悠哉。麴生正欲相料理。催喚風流措措來。

平水小憩

蓐食草菴中。肩輿小市東。霧收山淡碧。雲漏日微紅。酒旆村場近。罾船浦溆通。平生喜行路。小住莫怱怱。

自若耶溪舟行杭鏡湖而歸

換馬亭前煙火微。鬪牛橋畔行人稀。雲山慘澹少顏色。霜日青薄無光輝。新酒釀成桑正落。美人信斷雁

空歸。高樓何處吹長笛。清淚無端又溼衣。

宴坐

鼓樂弦歌萬二千。天魔剩欲破幽禪。道人袖手心如水。一點紗燈夜悄然。

遊山歸偶賦

此生本寄一浮漚。歸臥茅茨又四秋。習氣未除惟痛飲。幻軀偶健且閑遊。買裘山縣雲藏市。橫笛江城月滿樓。與世沈浮最安樂。莫思將相快恩讎。

六十吟

人生久矣無百年。六十七十已爲壽。嗟予忽忽蹈此境。衰髮如蓬面枯瘦。孤松摧折老澗壑。病馬淒涼依棧豆。尙無籌策活目前。豈有功名付身後。壁竦風入燈焰搖。地爐火盡寒蕭蕭。胸中白虹吐千丈。庭樹葉空衣未纒。

舒悲

嗜酒苦猖狂。畏人還醒醒。老病始悔歎。天下無此錯。管葛逝已久。千古困俗學。捫蝨論大計。使我思景略。中原失枝梧。胡塵暗河洛。天道遠莫測。士氣伏不作。煌煌東觀書。無乃太寂寞。丈夫不徒死。可作一丘貉。歲晚計愈疎。撫事淚零落。

山園晚興

病骨初輕野興濃。閑扶拄杖夕陽中。草枯陂澤涓涓水。木落園林浙浙風。楊子淒涼老天祿。馬周顛顛客新豐。壯心未與朱顏改。一笑憑高送斷鴻。

獨立

獨立柴荆外。頽然一秃翁。亂山吞落日。野水倒寒空。憂患工權老。飄零敢諱窮。漁歌亦何恨。悽斷滿西風。

探梅

半吐幽香特地奇。正如官柳弄黃時。放翁頗具尋梅眼。可愛南枝愛北枝。

又

江路雲低糝玉塵。暗香初探一枝新。平生不喜凡桃李。看了梅花睡過春。

遠興

莫言人世足悲傷。只爲詩情合斷腸。窗檻雨晴湖澹澹。郊墟煙重月茫茫。梅花調苦愁三弄。竹葉香清泥一觴。閉戶終年嗟局促。不如新雁到衡湘。

張功甫許見訪以詩堅其約

零落汀蘋露氣清。北窗昨夜已秋聲。書來屢有入東約。坐上極思虛左迎。激烈哦詩殷金石。縱橫落筆走蛟鯨。吾曹此事期千載。老眼相逢剩要驚。

卷第十六

夜夢與數客觀畫有八幅龍湫圖特奇客請予作詩其上書數十字而覺不復能記明旦乃追補之亦髣髴夢中意也

高堂閱畫娛嘉賓。巨幅小卷縱橫陳。其間一圖最傑作。命意落筆驚倒人。奇峯峭立插地軸。飛瀑崩瀉垂天紳。壽藤老木幻荒怪。深潭危棧愁鬼神。忽然白晝起雷電。始覺異物蟠淵淪。陰雲四興誅老魅。甘樹連

夕蘇疲民。豈惟陂澤苗盡立。已活億萬介與鱗。文章與畫共一法。腕力要可回千鈞。錙銖不到便懸隔。用意雖盡終苦辛。君看此圖凡幾筆。一一圓勁如秋尊。乃知世間有絕藝。天造草昧參經綸。吾言未竟且復止。剩發幽奧天公噴。

泛舟

女精鬢鬢帶斜暉。短棹還從剡曲歸。木葉經霜渾欲盡。人家近水自相依。逢迎俗客言多忤。顛沛窮途計易非。雪裏閉門殊不惡。故貂雖弊勝無衣。

夜聞大風感懷賦吳體

故都宮闕汗羶腥。原野久稽陳大刑。未須校尉戍西域。先要將軍空朔庭。意言揮戈可退日。身乃讀書方聚螢。病起窗前髮如雪。夜聞風聲孤涕零。

骨相

骨相元知薄。功名敢自期。病侵彊健日。閑過聖明時。形勝輪臺地。飛騰瀚海師。江湖雖萬里。猶擬綴聲詩。

有感

書生事業絕堪悲。橫得虛名毀亦隨。怖懼幾成牀下伏。艱難何啻劍頭炊。貧監河粟元知誤。乞尉遲錢更覺癡。已下一卷鵝鼻谷。鵝鼻谷在秦蜀山。秦刻石之所屢嶺嶮。可無芝木療朝飢。

又

讀遍名山萬卷藏。殘年肯受俗低昂。正須嘯詠風濤上。未至悲辛酒肉旁。夢裏功名誰復計。閑中日月不

勝長虛皇有詔君知否。盡賜江湖作醉鄉。

城西晚眺

嫋嫋城笳咽。癸癸漁火青。霜凋兩岸柳。水浸一天星。靜看船歸浦。遙聞雁落汀。倚闌幽興極。不敢恨飄零。

苦寒

凍硯時能出苦吟。濁醪亦復慰孤斟。誰知冰雪凝嚴候。自是乾坤愛育心。癩鬼盡驅人意樂。遺蝗一洗麥根深。但嫌景短妨書課。棲鳥紛紛又滿林。

夙興

病後精神殊未減。披衣每起待晨雞。愛書不厭如平整。戒酒新嚴似築堤。莫歎茅茨常局促。猶勝籩簞苦沈迷。迎長漸近丹當熟。已覺溫溫下徹臍。

冬夜讀書甚樂偶作短歌

衰病作書祟。常恨無新功。兔齏供茗粥。睡思一洗空。郊居近城闕。漏鼓傳琴琴。細帙開爛漫。牙籤紛疊重。朱黃參筆墨。照映燈花紅。魯壁汲冢秘。天遣慰困窮。衰衣窺藻火。宗廟聽笙鏞。踞居得至樂。生世豈不逢。藜藿冷未啜。短褐忘嚴冬。拜手謝造物。不須黑頭公。

冬夜月下作

造物寧能因此翁。浩歌庭下答松風。煌煌斗柄插天北。焰焰月輪生海東。皂纛黃旗都護府。峨冠長劍大明宮。功名晚遂從來事。白首江湖未款窮。

感憤

今皇神武是周宣。誰賦南征北伐篇。四海一家天歷數。兩河百郡宋山川。諸公尙守和親策。志士虛捐少壯年。京洛雪消春又動。永昌陵上草芊芊。

蓬戶

蓬戶真堪設爵羅。歲時野老自相過。人情靜處看方見。詩句窮來得最多。枕上長歌時激烈。樽前一笑且婆娑。白頭萬事都經遍。莫爲悲傷損太和。

行後園

霜風吹枯桑。落葉乾有聲。陂池日已涸。沙水見底清。人生非金石。歲暮難爲情。安得天邊鵠。駕之以遐征。
曉出遇獵徒有作

出門萬瓦粲晨霜。忽憶行軍起萋創。賣劍買牛身已老。褰旗斬將夢猶狂。奇才古有潛屠肆。豪氣今誰寓獵場。狐兔草間何足問。合留長箭射天狼。

贈道侶

崎嶇世路久知難。準擬丹成玉鍊顏。十載尋人遍巖穴。一樽隨處對溪山。蘇門晝寂聞舒嘯。函谷秋清候度關。剩欲相招同此事。疑君未辦一生閑。

六言

功名正恐不免。富貴酷非所須。鐵馬未平遼碣。釣船且醉江湖。

又
噉飯一簞不盡。結廬環堵猶寬。常得奉祠玉局。不須草詔金鑾。

又
烏有翁遊貰酒。無何鄉裏尋花。把定東風一笑。今年別是生涯。

又
壯歲京華羈旅。暮年湖海清狂。勿倚新知可樂。笑中白刃如霜。

作雪未故自湖中歸寒甚飲酒作短歌

黑雲垂到地。飛霰如細礫。我從湖上歸。散髮醉吹笛。少年志功名。目視無堅敵。慘淡古戰場。往往身所歷。寧知事大謬。白首猶寂寂。淒涼武侯表。零落陳琳檄。報主知何時。誓死空憤激。天高白日遠。有淚無處滴。

題傳神

鹽車心愧渥洼姿。邂逅風雲妄自期。鬣雪豈無歸漢日。飯牛猶有相齊時。君看短褐琴橫膝。誰許蛾冠劍拄頤。白髮蕭蕭雖德矣。時來或將渡遼師。李英公平遼東時已八十餘。

閏月三夜舍西觀新月

平生絕愛初三月。況是平池浸玉鈞。老去人間朋舊少。一樽誰與話清愁。

獨夜

城上長更續短更。江平天迴雁方征。燈明紙帳雪霜色。火熟銅瓶風雨聲。濁酒未傾心已怯。細書時讀眼

猶明。蕭然一室平生慣。燻下何須擁萬兵。

晚出偏門

一段新愁帶宿醒。半欹烏帽策驢行。村墟香動梅初破。裘褐寒輕雪未成。渡口人爭紅日晚。沙邊雁帶碧煙橫。悠然又覓長堤路。腸斷城樓畫角聲。

意政蜀人謂其實爲薏米。唐安所出尤奇。

初遊唐安飯薏米。坎成不減雕胡美。大如芡實白如玉。滑欲流匙香滿屋。腹腴項鬪不入盤。況復殮醅誇甘酸。東歸思之未易得。每以問人人不識。嗚呼奇材從古棄。草菅君試求之籬落間。

答鄭虞任檢法見贈

臥龍山前秋雨晴。鄭子過我如夙昔。照人眉宇寒巖巖。懸知筆有千鈞力。鏡湖歲暮霜葉空。乃聞載酒同諸公。歸來湖山皆動色。新詩一紙吹清風。文章要須到屈宋。萬仞青霄下鸞鳳。區區圓美非絕倫。彈丸之評方誤人。

舟中曉賦

小艇下滄浪。吳歌特地長。斜分半艙月。滿載一篷霜。香飢炊菰白。醇醪點蟹黃。宦遊元爲口。莫恨老江鄉。

野興

玉門關外何妨死。飯顆山頭不怕窮。春盞已成花欲動。了無一事著胸中。

又

發臂將軍老未衰，氣吞十萬羽林兒。南山射虎自堪樂，何用封侯高帝時。

月夜有感

烟炯水輪升澹澹，玉宇碧。高樓傾美酒，一醉不容失。陸生獨何事，閉戶飽岑寂。年來負風月，豈止此一夕。平生酒邊身，欲老每自惜。夜闌耿不寐，浩歌出金石。

落魄

落魄東吳莫笑儂，今年要不負春風。閑愁擲向乾坤外，永日移來歌吹中。酒浪欲爭湖水綠，花光卻妒舞衫紅。公卿憂責如山重，肯信人間有放翁。

遣興

壯年一箭落雙鷗，野餉如今擷藥苗。寒與梅花同不睡，悶尋鸚鵡說無憀。烏絲闌上詩初就，綠綺聲中酒半消。老去可憐風味在，未應山海混漁樵。

湖村野興

十里疎鐘到野堂，五更殘月伴清霜。已知無奈姮娥冷，瘦損梅花更斷腸。

又

山色空濛雨點微，醉中不覺濕蓑衣。何妨乞與丹青本，一棹橫衝翠靄歸。

看鏡

局促人間百不如，每看清鏡歎頭顱。醉來風月心雖在，老去軒裳夢已無。棋劫正忙停晚餉，詩聯未穩畫

寒爐乘除尚喜身彊健。六十登山不用扶。

塞上

塞上今年有事宜。將軍承詔出全師。精金錯落八尺馬。刺繡鮮明五丈旗。上谷飛狐傳號令。蕭關積石列城隍。不應幕府無班固。早晚燕然刻頌詩。

舟過會稽山下因繫舟遊近村追暮乃歸

六十齒髮衰。歲月如逝波。秦王酒瓮邊。知復幾經過。欣然捨畫楫。人步捫青蘿。一徑入幽谷。四面聞樵歌。白雲忽破碎。翠木相蕩摩。激激春塘滿。柳陰戲雙鵝。浮生百憂中。此樂願豈多。日暮吾其歸。已恐爛斧柯。

人日偶遊民家小園有山茶方開

人日西郊路。晨光射淺灘。停橈喜蕭散。照影歎衰殘。社酒香浮盞。春蔬綠滿盤。山茶雖慰眼。不似海雲看。成都海雲寺山茶花一樹千苞特爲繁麗。

過杜浦橋

橋外波如鴨頭綠。杯中酒作鵝兒黃。山茶花下醉初醒。卻過西村看夕陽。

又

橋北雨餘春水生。橋南日落暮山橫。問君對酒胡不樂。聽取菱歌煙外聲。

上元日晝臥

積雨連上元。孤愁臥空館。宿醒殊未解。飲起意復懶。牀敷蠻氍毹。被擁吳綾暖。殘香碧縷細。軟火紅焰短。

雖云少睡眠。聊喜屢展轉。昏昏忽已暮。一笑呼茗椀。

莊器之作招隱閣項平父諸人賦詩予亦繼作

諸公共賦反招隱。細字斜行肯見傳。語到淮南小山作人如江左永和年。一窗蘿月禁春瘦。萬壑松風撼
晝眠。我亦尙嫌林谷淺。因君更擬斷雲煙。

春夜讀書感懷

荒林梟獨嘯。野水鵝羣鳴。我坐蓬窗下。答以讀書聲。悲哉白髮翁。世事已飽更。一身不自恤。憂國涕縱橫。
永懷天寶末。李郭出治兵。河北雖未下。要是復兩京。三千同德士。百萬羽林營。歲周一甲子。不見胡塵清。
賊酋實屏王。賊將非人英。如何天此時。坐待姦雄生。我死骨卽朽。青史亦無名。此詩尙不作。丹心尙誰明。

宿能仁寺

小雨暗江城。倦客寄僧榻。孤燈如秋螢。清夜自開闔。遙憐萍青青。厭聽澁閣閣。窗明竟無寐。卯酒倒殘榼。
寄題方伯馨遠菴

方侯胸中負經濟。議論源原有根柢。借令不用老山林。尙欲著書垂萬世。百年苦短萬世長。榮利一時真
聚斲。渠曹定自別肺肝。今夕不爲明日計。

雨中宿石帆山下民家

老覺山行倦。閑便水宿幽。雨泥看放鴨。煙草聽呼牛。爨著煩頻勸。窗扉喜小留。餘年竟何事。高枕送悠悠。
中夜雨霽月色入戶起飲酒一杯作絕句

吹盡浮雲天宇清。城頭疊鼓報三更。平生無此一杯酒。玉筍峯頭看月生。玉筍峯在石帆之南。

贈石帆老人

地僻林深客到稀。高春未起閉柴扉。新松鬱鬱三千本。密竹蕭蕭一尺圍。溪叟旋分菰米滑。山童新采蕨芽肥。因君更作長閑想。麟閣雲臺竟是非。

溪上醉吟

行行不知溪路深。但怪素月生遙岑。不辭醉袖拂花絮。與子更醉青蘿陰。

囚山

垣屋參差綠樹邊。囚山光景饒華顛。平川極目思秦地。大澤浮空憶楚天。刺虎射麋俱已矣。舉杯開劍忽悽然。此生終遣英雄笑。棘沒銅駝六十年。

小園

松菊僅三畝。作園真彊名。馴禽驚不去。熟果墜無聲。倦就盤陀坐。閑拈榔栗行。茅亭亦疎豁。憑檻看春耕。鄉人或病予。詩多道蜀中。遨樂之盛適。春日遊鏡湖。共請賦山陰。風物遂卽杯。酒間作四絕句。卻當持以誇西州故人也。

又

嫩日輕雲淡。拖天撲燈過後賣花前。便從水閣杭湖去。捲起朱簾上畫船。

舫子窗扉面面開。金壺桃杏間尊罍。東風忽送笙歌近。一片樓臺泛水來。

又
湖波綠似鴨頭深。一日春晴直萬金。好事誰家鬪歌舞。方舟齊榜出花陰。

又
花光柳色滿牆頭。病酒今朝懶出遊。卻就水亭開小宴。繡簾銀燭看歸舟。

病中

風雨暗江天。幽窗起復眠。忍窮安晚境。留病歷災年。客助修琴料。僧分買藥錢。餘生均逆旅。未死且陶然。

病起

小築

開歲忽六十。病餘閑炷香。春光向客淡。夜漏爲愁長。已老鷄豚社。永遠鷓鴣行。蒼龍西角月。孤夢墮微茫。

記夢

小築茅茨鏡水濱。天教靜處著閑身。平原不復賦豪士。甫里但思歌散人。翠壁微泉時的際。衡門疊嶂曉嶙峋。子虛誤辱諸公賞。萬里輕鷗豈易馴。

久雨排悶

東吳春暮寒猶重。睡美不聞城角動。身雖衰惰怕出門。江山尙入幽窗夢。夢到青羊看修竹。道人告我丹將熟。試求一黍換肝腸。他日重來駕黃鵠。青羊宮在成都南門外浣花道中。

臨放翁集 十一 劍南詩藁 卷十六

五十九

欲官腰項足，痺空歎息。咫尺不得行中庭。讀書窗黑不見字。彈琴絃緩那成聲。老盆濁酒且復醉。兩部鼓吹方施行。

雨中泊舟蕭山縣驛

籬居無策散閑愁。聊作人間汗漫遊。晚笛隨風來倦枕。春潮帶雨送孤舟。店家孤飯香初熟。市擔蓴絲滑欲流。自笑勞生成底事。黃塵陌上雪蒙頭。

夜漏欲盡行度浮橋至錢清驛待舟

潮生抹沙岸。雲薄漏月明。江頭曉色動。鶉起人未行。扶攜度長橋。仰視天宇清。遙憐繫舟人。聽我高屐聲。水檻得小憩。一笑拄杖橫。澄漪弄孤影。微風吹宿醒。湛然方寸間。不受塵事撓。寄語市朝人。此樂未易名。

江頭十日雨

江頭十日雨。雨止春已盡。殘紅如掃空。草木皆綠潤。村墟櫻筍開。節物團圓近。可憐笠澤翁。百憂集雙鬢。賦詩空自清。學道了不進。林間一甌茶。晤語君勿吝。

柯橋客亭

小市初晴已過春。朱櫻青杏一番新。瀟陵老子無人識。暫借郵亭整角巾。

又

梅子生仁燕護雛。遶簷新葉綠扶疎。朝來酒興不可耐。買得釣船雙鱖魚。

小雨舟過梅市

故故催詩襯雨蓬。悠悠破夢隔雲鐘。遙看漁火兩三點。已過暮山千萬峯。老矣自應埋病骨。歸哉莫念抗塵容。停橈小住青楓岸。吳市高人黨可逢。

曉枕

曉枕鶯聲帶夢聽。忽看淡日滿窗櫺。閑愁誰遣濃如酒。醉過殘春不解醒。

巢菜并序

蜀蔬有兩巢。大巢豌豆之不实者。小巢生稻畦中。東坡所賦元修菜是也。吳中絕多名。漂搖草一名野蠶豆。但人不知取食耳。予小舟過梅市得之。始以作羹。風味宛如在醴泉。曩頤時也。冷落無人佐客庖。庾郎三九困譏嘲。此行忽似蠶津路。自候風爐煮小巢。

吳娘曲

鏡奩蠶出千黑蟻。斂梁梅小雙青豆。吳娘十四未知愁。羅衣已覺傷春瘦。閑尋女伴過西家。鬪草歸來日未斜。睡睫濛濛嬌欲閉。隔簾微雨壓楊花。

感舊

醉眼常輕兒女曹。西遊對客尚能豪。縷金羯鼓龜茲樂。鏤玉琵琶邏沙槽。巫峽已回行雨夢。錦江空憶浣花遊。閑情何計都除盡。爲覓并州快剪刀。

晨起閑步

飛紅掠地送春忙。嫩綠成陰帶露香。聽徹曉天鶯百轉。卻隨飛蝶度橫塘。

初夏同桑甥世昌過鄰家

空谷舊生涯蕭條只自嗟。妻饑噴譟笏。兒病失澆花。亦米老能飽。濁醪貧可賒。微科幸差簡。扶杖過鄰家。

寓歎

孤生拙料事。諸老誤知人。世故幾翻覆。此身常賤貧。有書藏禹穴。無地靜胡塵。衰病今年劇。呻吟欲過旬。

春夏雨陽調。適頗有豐歲。之望喜而有作。二十年無亦白囊。人間何地不耕桑。陂塘處處分秧遍。村落家家煮繭忙。野老逢年知飽煖。書生隨例得猖狂。雨餘天氣初清潤。曳履長歌出草堂。

聞虜酋遁歸漠北

幽州遺民款塞來。來者扶老攜其孩。共言單于遠逃遁。一夕荆棘生燕臺。天威在上賊膽破。捧頭鼠竄吁可哀。妄期舊穴得孳育。不知天網方恢恢。老上龍庭豈不遠。漢兵一炬成飛灰。陛下中興天所命。築壇授鉞皆雄才。煌煌九霄揭日月。浩浩萬里行風雷。虢山多獸可遊獵。汝不請命何歸哉。

初夏遊凌氏小園

水滿池塘葉滿枝。曲廊危榭愜幽期。風和海燕分泥處。日永吳蠶上簇時。閑理阮咸尋舊譜。細傾白墮賦新詩。從來夏淺勝春日。兒女紛紛豈得知。庚信詩云。夏淺卻勝春。鏡湖遊人至立夏而止。

偶得北虜金泉酒小酌

草草杯盤莫笑貧。朱櫻羊酪也嘗新。燈前耳熱顛狂甚。虜酒誰言不醉人。高適詩云。胡兒十歲能騎馬。虜

酒千盞不醉人。

又

逆胡萬里跨燕秦。志士悲歌淚滿巾。未履胡腸涉胡血。一樽先醉范陽春。

無題

珠鞦玉指璧筵後。誰記山南秉燭遊。結綺詩成江令醉。囊泉夢斷沈郎愁。天涯落日孤鴻沒。鏡裏流年兩鬢秋。不用更求驅豆術。人生離合判悠悠。

戲贈

簾幕陰陰晝漏遲。鵝黃雪白絡新絲。只應笑殺東鄰女。不見鞦韆到拆時。

題少陵畫像

長安落葉紛可掃。九陌北風吹馬倒。杜公四十不成名。袖裏空餘三賦草。車聲馬聲喧客枕。三百青銅市樓飲杯殘。鬢冷正悲辛。仗內鬪雞催賜錦。

閑居書事

園林綠葉一番新。桃李吹成陌上塵。玩易焚香消永日。聽琴煮茗送殘春。隱居正欲求吾志。大患元因有此身。堪笑癡人營富貴。百年贏得冢前麟。

登臺遇雨避於山亭晚齋乃歸

海暑不堪蝸舍陋。瘦藤扶我上危臺。搏禽俊鶻橫空去。卷雨狂風掠野來。壯觀深知化工妙。幽尋卻踏夕

陽回悠然有喜君知否。屐齒留痕遍綠苔。

村居書觸目

雨霽郊原刈麥忙。風清門巷曬絲香。人饒笑語豐年樂。吏省徵科化日長。枝上花空闕蝶翅。林間葢美滑鶯吭。飽知遊宦無多味。莫恨爲農老故鄉。

訪醫

衰與病相乘。況復積憂慮。眩昏坐輒瞑。疲弱行欲仆。今晨訪之醫。見語疾當去。脈來如泉源。未易測君數。盛衰當自察。信醫固多誤。養氣勿動心。生死良細故。

夏夜讀書自嘲

事業無成去日逾。只今身世付滄洲。風煙慘慘孤蒲老。星斗離離河漢流。寂寞書生學奇字。窮愁客子著春秋。白頭自苦君無笑。骨朽成塵志未休。

夏日小宴

橫吹銅笛蒼龍聲。雙奏玉笙丹鳳鳴。已判百年終醉死。要將一笑壓愁生。旋移畫舫破山影。高捲朱簾延月明。試問炎歊在何許。夜闌翻怯葛衣輕。

送紫霄女道士四明謝君

一別南充十四年。時時清夢到金泉。山陰道上秋風早。卻見神仙小自然。果州金泉山謝自然飛昇之地。

又

道骨仙風凜不羣。清秋采藥到江村。自言家住雲南北。知是遺塵幾世孫。

醉中夜自村市歸

村市夜騎黃犢還。卻登小閣倚闌干。銀河斜界曉天碧。璧月下入秋江寒。吾輩身閑且飲酒。人生事定須闔棺。元自胸中著雲夢。莫驚綠髮耐悲歡。

城北夜

端居厭孤寂。偶繫北城舟。天地淒涼色。江湖汗漫遊。螢光矜暗夜。蟲語報新秋。老去功名意。青燈映布裯。

秋夜舟中作

沽酒黃葉村。炊飯紅蓼岸。居人不孰何。正作漁父看。漁父我所羨。尙恐不得作。讀書端自癡。遊宦亦何樂。四顧澤茫茫。仰視天離離。長歌入雲去。月落斗未欹。

日晚散步湖上遇小雨

暮色蒼蒼日初落。寒聲策策風正作。湖邊倚杖隄上行。病起聊試遊山脚。平生出門輕萬里。老去謝客專一壑。風濤傾洞蛟鱗橫。閭闔崔嵬鬼神惡。春蕪二頃吐黃犢。老學爲農元不錯。兜鍪蟬冕俱掃空。雨笠香新織青篛。

安期篇

我昔遊峨峨。捫蘿千仞峯。丈人倚赤藤。恐是安期翁。贈我一丸藥。五雲出瓢中。服之未轉刻。瑩然冰雪容。素手掬山鶻。綠髮吹天風。丈人顧我喜。共騎一蒼龍。蓬萊亦何求。愛此萬里空。卻來過齊州。嚙堦看青嵩。

曉望海山

暮山青尚淺。曉山如黛染。開窗望海山。天清霧方斂。向來六月中。黑雲齊如截。蒼龍下曳尾。卷雨灑炎熱。造物信老手。忽作萬里秋。刻削此孤峭。巉然消客愁。豈無一布帆。寄我浩蕩意。會當駕長風。清肅遺世事。

山園草木四絕句

紫薇

鐘鼓樓前宮樣花。誰令流落到天涯。少年妄想今除盡。但愛清樽浸晚霞。

黃蜀葵

開時閑淡斂時愁。蘭菊應容預勝流。剩欲持杯相領略。一庭風露不禁秋。

拒霜

滿庭黃葉舞西風。天地方收肅殺功。何事獨蒙青女力。牆頭催放數苞紅。

蓼花

十年詩酒客刀州。每爲名花秉燭遊。老作漁翁猶喜事。數枝紅蓼醉清秋。

賽神曲

叢祠千歲臨江渚。拜祝今年那可數。須晴得晴雨得雨。人意所向神輒許。嘉禾九穗持上府。廟前女巫巫遞歌舞。鳴歌謳坎坎。鼓香煙成雲。神降語大餅如槃。牲腍肥再拜獻。神神不遠。晚來人醉相扶歸。蟬聲滿廟鎖斜暉。

夜中起讀書戲作

髮已凋零齒已疎。忍飢白首臥鴟廬。風聲忽轉蓬窗過。夜半呼燈起讀書。

又

滅虜區區計本疎。水邊喬木擁茅廬。九原定發韓公笑。至老依然一束書。

秋夜出門觀月

六十衰翁適得閑。一秋無事掩柴關。雁來慘淡沙場外。月出蒼茫雲海間。飲酒已衰猶愛客。著書初畢可癡山。此生終羨漁家樂。小艇常衝夕靄還。

雨中買酒鏡湖酒樓

陰風號大澤。暮雨上高樓。愁憶新豐酒。寒思季子裘。登臨天地迥。老病歲時逾。安得急裝去。北平防盛秋。聞虜政衰亂。掃蕩有期。喜成口號。

正朔今年被百蠻。遙知喜色動天顏。風雷傳號臨春水。春水。康都名。貔虎移軍過玉關。博士已成封禪草。單于將就會朝班。孤臣老抱周南恨。壯觀空存夢想間。

又

遺虜遊魂豈足憂。漢家方運輅中籌。天開地闢逢千載。雷動風行遍九州。刁斗令嚴青海夜。旌旗色照鐵關秋。功名自是英豪事。不用君王萬戶侯。

甲辰中秋無月十七夜獨傲然達旦

老覺人間無一欣，窮閭掃軌謝紛紛。已憑白露洗明月，更遣清風收亂雲。棲鷁揀枝寒未穩，斷鴻呼伴遠猶聞。病羸慵踏梧桐影，倚柱長吟夜向分。

悲秋

病後支離不自持，湖邊蕭瑟早寒時。已驚白髮馮唐老，又起清秋宋玉悲。枕上數聲新到雁，燈前一局欲殘棋。丈夫幾許襟懷事，天地無情似不知。

農家秋晚戲詠

鞭地如鏡築我場，破藝玉粒輸官倉。九月野空天欲霜，餽中初喜新粳香。舍邊蕭蕭落葉多，野蠶出繭飛黃蛾。寒蔬種罷醉且歌，隻雞短紙齋園婆。

病中作

老鶴遼天興未窮，此生光景自匆匆。家爲逆旅相逢處，身在嚴裝欲發中。澀眼尙于書有味，孤愁殊覺酒無功。揮戈草檄今誰記，歲晚江邊白髮翁。

秋夜讀書

讀書喜夜長，著書悲齒暮。平生企前哲，凜有庸人懼。吾廬大澤中，地曠北風怒。徂年凋草木，寒氣逼霜露。燈昏老眼開，鈍馬行惡路。投枕卷未終，吾衰歎非故。

病起

頽垣破屋暗藜蒿，病起不知秋已高。晨倚山楹羣木脫，暮臨苔砌百蟲號。力殫編簡初何得，腰折塵埃只

漫勞。賴有濁醪生耳熱。狂歌醉草寄吾豪。

晨起

孤夢忽自驚。小窗初送明。珍禽語庭樹。可愛不知名。向者事宦遊。塵土過半生。傳呼束帶出。矻矻尙殘更。山居雖自由。晨起亦有程。洗硯拂書几。一笑愜幽情。

秋夜

老病龍鍾不入城。濁醪麤飯餒餘生。未霜村舍秋先冷。無月江天夜自明。出塞雖慙平賊手。下帷聊喜讀書聲。山童睡熟青燈暗。自撥殘爐候藥鑪。

雨中過東村

小雨空濛物象奇。偶扶藤杖過東陂。墊巾風度人爭看。蠟屐年光我自悲。窮鬼有靈揮不去。死魔多力到無期。歸來笑向簷門說。且了浮生一首詩。

山寺

寺門壓石危欲崩。槎牙老松挂蒼藤。風傳上方出定磬。雨暗古殿長明燈。宿林野鶻驚復起。爭栗山童呼不應。谿南聞道更幽絕。明日裂布縫行縵。

天王廣教院在戴山東麓。予年二十餘時與老僧惠迪遊。略無十日不到也。淳熙甲辰秋。觀潮海上。偶繫舟其門。曳杖再遊。恍如隔世矣。

遊山如讀書。深淺皆可樂。道邊小精舍。亦自一丘壑。淒涼四十年。始復重著腳。老僧逝已久。講座塵漠漠。

當時童子輩。衰髮亦蕭索。掃壁觀舊題。歲月真電雹。文章卑不傳。衣食窘如昨。出門意惘然。遼海渺孤鶴。

江月歌

放翁平生一釣船。秋水未落江渺然。露洗玉宇清無煙。月輪徐行萬里天。人間聲利何足捐。浩歌看月冷不眠。孤鶴掠水來翩翩。似欲駕我從此仙。我寓紅塵今幾年。俯首輻鎖常自憐。樂哉揮手過月邊。西風未凋玉井蓮。

初寒書懷

嵩雲縹月本閑人。誤落塵中白髮新。萬事看山差入眼。百年把酒獨關身。棧邊老馬行安往。牀下寒龜息自勻。藜杖一枝猶好在。未妨閑探早梅春。

歲暮

小築幽栖與拙宜。讀書寫字伴兒嬉。已無歎老嗟卑意。卻喜分冬守歲時。羹臠芳鮮新弋雁。衣襦輕暖自纒絲。農家歲暮真堪樂。說向公卿未必知。

晨興

倦枕厭寒夜。起尋殘火溫。啾啾衆雞動。耿耿一燈昏。野氣增霜力。窗光淡月痕。早朝非老事。且復灌吾園。

村飲

少年喜任俠。見酒氣已吞。一飲但計日。斗斛何足論。綠草滿雉場。紅旗植毳門。三叫落烏幘。倒瀉黃金盆。銀爐熾獸炭。狐兔紛紛炮燔。浩歌撼空雲。壯志排帝閭。回首今幾時。去日如車奔。朱顏辭曉鏡。白髮老孤村。

鄰翁漉黍酒。稚子供魚殮。功名信已乎。萬事付乾坤。

夜半讀書罷出門。徒倚久之歸賦長句。

浩歌曳杖出柴扉。不管三更露溼衣。擬看林梢殘月上。偶逢浦口斷雲歸。驚鴻脫網寒相倚。飢鶻思巢夜亦飛。卻掩北窗誰晤語。聊憑香盃洗塵鞿。

曝書偶見舊稿有感

日滿晴軒理蠹魚。壯遊回首一欷歔。淒涼王粲從軍作。零落相如諫獵書。歌吹恍思登北固。弓刀誰記渡南沮。虎頭本欠功名相。歸老林間計未疎。

崑崙行

陰雲解駁朝暎紅。黃河直與崑崙通。不駕鸞鳳驂虬龍。徑躡香煙上空中。吾行忽過日月宮。下視積氣青濛濛。寒暑不分晝夜同。嗟峨九關常烈風。凜然蕭森變冲融。不悖不眩身如空。塵沙浩劫劫環無窮。詎須更覓安期翁。

一室

九萬笑鷗搏。幽居一室寬。雨聲便早睡。酒力壓新寒。嬾覺閑多味。衰知死有端。此生吾自斷。不必夢邯鄲。

得所親廣州書

音信連年恨不聞。書來細讀卻消魂。人稀野店山魃語。路僻蠻村荔子繁。毒草自搖春寂寂。瘴雲不動晝昏昏。此生相見應無日。且置清愁近一樽。

幽居戲詠

清泉遠屋竹連牆。回首微官意已忘。小瓮帶泥收洛筍。洛中冬筍貯以小瓮爲遺餉。細鱗穿柳買河魴。黃旗萬里無侯骨。紅燭千鍾有酒腸。欲起九原誰可友。蘭亭修禊晉諸王。

幽事

蕭然四壁野人家。幽事還堪對客誇。快日明窗閑試墨。寒泉古鼎自煎茶。桐凋無復吟風葉。蘋老猶殘泣露花。萬里封侯眞已矣。只將高枕作生涯。

卷第十七

初冬雜題

勛業文章意已闌。暮年不足是看山。江南寺寺樓堪倚。安得身如杜牧閑。

又

莫嫌風雨作新寒。一樹青楓已半丹。身在范寬圖畫裏。小樓西角剩憑闌。

又

風橫雲低雨腳斜。一枝柔艣暮啣啞。昏昏醉臥知何處。推起船篷忽到家。

又

五斗安能解醉醒。蒼騰睡眼怯窗明。策勛賴有春芽在。臥聽山童轉磴聲。

又

荒郊寒雨晚淒淒。四壁穿頽旋補泥。物我元須各安穩。自苦牛屋織雞棲。

又

風雨聲豪入夢中。不知身世寄孤蓬。狐裘毳帽如龍馬。天漢西南小益東。

閉戶

屏居無一事。閉戶常經旬。勿云草舍陋。愛此油窗新。三日不作詩。幽禽語撩人。尺素雜行草。往檄江梅春。

十月四日夜記夢

四客聯轡來。我醉久不知。倒衣出迎客。媿謝前致辭。客意極疎豁。大笑軒鬚眉。禮豈爲我設。度外以相期。袞袞吐雄辯。泠泠誦新詩。共言攜酒壺。埽地臨前墀。意氣相顧喜。忽如少年時。老雞不解事。喚覺空嗟咨。涉世四十年。賢雋常追隨。爾來風俗壞。動脚墮險巇。森然義府刀。誰爲叔度陂。起作四客篇。捕影吾其癡。

西路口山店

日薄霜清十月天。馬蹄聲裏送流年。店當古路三叉處。山似孤雲兩角邊。孤雲兩角在漢中。淹泊自悲窮不醒。衰殘更著病相纏。榆關瀚海知何在。目送飛鴻入暮煙。

題海首座俠客像

趙魏胡塵千丈黃。遺民膏血飽豺狼。功名不遺斯人了。無奈和戎白面郎。

送綽姪住菴吳興山中

陸放翁集 卷十七

七十三

一盃淡粥不煮蔬。韓居山。粥飯外。菜亦不食。自占雲根結草廬。非佛非心猶坐斷。定知不看夾山書。

又

湖海相從十日留。頗哀老子鬢驚秋。目光猶射車牛背。不用殷勤舉話頭。

冬夜與溥菴主說川食戲作

唐安薏米白如玉。漢嘉楫脯美勝肉。大巢初生蠶正浴。小巢漸老麥米熟。龍鶴作羹香出釜。木魚淪菹子盈腹。未論索糞與饋飯。最愛紅糟并魚粥。東來坐閱七寒暑。未嘗舉箸忘吾蜀。何時一飽與子同。更煎土茗浮甘菊。

仗錫平老自郡城回見訪索怡雲堂詩

東華軟塵飛撲帽。黃金絡馬人看好。渠儂胸中誰得知。長禍憂讒鬢先老。舉世輸與平元衡。青山白雲過一生。出門曳杖便千里。白雲不約常同行。敲門剝啄雲沒履。劇談未竟還東去。到山分我一片雲。併遣春風吹好句。

野飲

青山千載老英雄。濁酒三盃失彫窮。訪古頽垣荒塹裏。覓交屠狗賣漿中。平堤漸放春蕪綠。細浪遙翻夕照紅。已把殘年付天地。騎牛吹笛伴村童。

樊江觀梅

莫笑山翁老據鞍。探梅今夕到江干。半灘流水浸殘月。一夜清霜催曉寒。倚醉更教重秉燭。怕寒元自怯

憑欄誰知攜客芳華日。曾費纏頭錦百端。成都合江園芳華樓下梅最盛。

山亭觀梅

與梅歲歲有幽期。忘却如今兩鬢絲。乘淡月時和雪看。斷蒼苔地帶花移。先春瘦損應多恨。靜夜香來更一奇。醉倒欄邊君勿笑。明朝紅萼綴空枝。

射的山觀梅

射的山前雨墊巾。籬邊初見一枝新。照谿盡洗驕春意。倚竹真成絕代人。餐玉元知非火食。化衣應笑走京塵。卽今畫史無名手。試把清詩當寫真。

又

凌厲冰霜節愈堅。人間乃有此癯仙。坐收國士無雙價。獨立東皇太一前。此去幽尋應盡日。向來別恨動經年。花中竟是誰流輩。欲許芳蘭恐未然。

別梅

竹籬數掩傍魚磯。萬點梅花掠地飛。正喜巡簷來索笑。已悲臨水送將歸。影橫月處愁空絕。子滿枝時事更非。自古情鍾在吾輩。尊前莫怪淚沾衣。

憶梅

護惜常愁滿樹開。況無一片在蒼苔。眼高嬾爲凡花醉。腸斷驚聞暮角哀。寫向素綃時拂拭。移來幽圃自栽培。論心竟是明年事。輸與醪醑在酒盃。

新晴午枕初起信筆

閉戶日陶然。晴窗春已妍。華胥夢中國。龍漢劫初年。浩浩塵揚海。茫茫杵倚天。何妨駕孤鶴。小憩華山前。

乙巳早春

故故啼鶯傍曲廊。飛飛戲蝶度橫塘。病來對酒心雖怯。老去逢花眼尙狂。牀擁琴書供枕藉。簾通風月索平章。一丘一壑從來事。起就功名未苦忙。

小雨

細細溼春光。霏霏破夕陽。臥聞驚倦枕。起看入虛堂。映葉鶯猶囀。爭泥燕正忙。閑愁無遣處。誰與共飛觴。

南樓遇大風雨

歎息誰如造物雄。故將意氣壓衰翁。千羣鐵馬雲屯野。百尺金蛇電掣空。身羨漁蓑鳴急雨。心憐鴉陣困狂風。世間變態誰能測。歸路斜陽十里紅。

春晚至山中因訪陳道人

一春衰病集殘骸。太息流塵覆酒杯。僧鉢始知尊菜老。佛瓶初見杏花開。蘋溪小雨成幽討。松院斜陽又獨來。不爲愛閑從野叟。年來萬事學低摧。

小隱

小隱在江干。菲廬亦易安。庖廚供白小。籬落蔓黃團。躑躅馮唐老。飄零范叔寒。世情從迫隘。醉眼覺天寬。

春興

萬事不關身。儻然一幅巾。雖非愛酒伴。猶是別花人。杜詩走覓南隣愛酒伴。白樂天紫萸花詩。不別花人不與看。領略琴書意。掃空車馬塵。東阡與南陌。隨處夢殘春。

會仲躬見過適遇予出留小詩而去次韻二首

地僻元無俗客來。蓬門只欲爲君開。山橫翠黛供詩本。麥卷黃雲足酒材。

又

數樹山花草舍東。想公繫馬落殘紅。那知老子耶溪上。正泛朝南暮北風。

睡起

風約飛花滿曲廊。蕭然無客共焚香。盞醅力重初投枕。鼻鼾聲豪已撼牀。栩栩夢遊心自適。昏昏起坐日方長。靜憑一几吾何恨。笑殺穿簾燕子忙。

病起

山村病起帽圍寬。春盡江南尙薄寒。志士淒涼閑處老。名花零落雨中看。斷香漠漠便支枕。芳草離離悔倚闌。收拾吟牋停酒椀。年來觸事動憂端。

山居戲題

海山縹渺斷雲扃。掃地焚香悅性靈。嫩白半甌嘗日鑄。硬黃一卷學蘭亭。衰顏冉冉臨清鏡。華髮蕭蕭倚素屏。尊酒不容身見在。莫爭天上少微星。

又

病起清羸不自持。年光都上鬢邊絲。昏昏雨細梅黃後。漫漫秧青水滿時。曲几方牀娛永日。矮冠高屐駭羣兒。客來莫笑狂頗甚。此處那容世俗知。

芒種後經旬無日不雨偶得長句

芒種初過雨及時。紗廚睡起角中欒。癡雲不散常遮塔。野水無聲自入池。綠樹晚涼鳩語鬧。畫梁晝寂燕歸遲。閑身自喜渾無事。衣覆熏籠獨誦詩。

久雨喜晴十韻

一雨二十日。頽牆屋弗爛。扶杖出門行。四顧水瀰漫。村迴鳩爭巢。村昏雞失旦。荒庭蛙黽豪。空廡螢火亂。蠶魚敗書編。萍草黏戶半。清風忽東來。一剪雨脚斷。天青日杲杲。河白星燦燦。車轍尋舊途。船步出新岸。稍喜泥潦乾。破窳得炊爨。賤貧固多憂。長歌寄吾歎。

盆池

人生何處不兒嬉。一世元知孰是非。汲井埋盆鑿苔破。敲針作釣得魚歸。蕭蕭菰葉風聲細。嫋嫋蘋花雨點稀。並舍老翁能喜事。爲添拳石象苔磯。盆池初成。隣人吳氏者送小石置池上。

月中過蜻蜓浦

天光水色合爲一。舟出西城猶落日。一規忽見寒壁升。萬頃坐歎溶銀溢。哀哀姑惡訴何苦。熠熠螢火光自失。葦低時見小艇過。水響遙知大魚出。銅壺玉酒我徑醉。短髮垂肩蓬不櫛。緩篙遡月勿遽行。坐待湘妃鼓瑤瑟。

六峯項里看採楊梅連日留山中

綠陰翳翳連山市。丹實纍纍照路隅。未愛滿盤堆火齊。先驚探領得驪珠。斜簪寶髻看遊舫。細織筠籠入上都。醉裏自矜豪氣在。欲乘風露摘千株。

雨中自項里夜至新塘捨舟步歸

樺炬如椽點不明。還家潦水與階平。一盃濁酒頽然睡。恍似金牛夜下程。

又

天如漆黑泥沒踝。老健猶能蹀躞歸。裊裊爐香支枕看。終年只合掩柴扉。

夜聽竹間雨聲

解醒不用酒。聽雨神自清。治疾不用藥。聽雨體自輕。我居萬竹間。蕭瑟送此聲。焚香倚蒲團。袖手坐三更。人苦不自覺。忿忿投隙生。起歛簷間雨。更與此君盟。

泛三江海浦

鼇負三山碧海秋。龍驤萬斛放翁遊。少舒我輩胸中氣。一掃羣兒分外愁。醉斬長鯨倚天劍。笑凌駭浪濟川舟。悠然高詠平生事。齷齪寧能老故丘。

獨酌有懷南鄭

憶從蟠冢涉南沮。笳鼓聲酣醉膽麤。投筆書生古來有。從軍樂事世間無。秋風逐虎花叱撥。夜雪射熊金僕姑。白首功名元未晚。笑人四十歎頭顱。

秋日泛鏡中憩千秋觀

病起重來理釣絲，扁舟迨及素秋時。舊交猶有青山在，幽趣唯應白鳥知。冉冉年光行老矣，茫茫世路欲何之。秦皇酒榼苔封遍，虛負霜螯左手持。湖山之間有石，號秦皇酒瓮。

秋夕虹橋舟中偶賦

解纜初離小市門，放篙衝破一谿雲。露螢合散自成陣，水鳥飛鳴如覓羣。楓落荷疎秋漸老，河傾斗轉夜將分。書生老負功名志，醉裏長歌強一欣。

秋思

一徑苔侵四壁空，北窗支枕聽秋鐘。故人去後登樓怯，白髮多來覽鏡慵。狂憶射麋窮楚澤，閑思釣雪泛吳松。相如病渴年來劇，釀酒傾家畏不供。

自嘲

窮途久矣歎吾衰，雙鬢新添幾縷絲。身是在家狂道士，心如退院病禪師。極知勾漏求丹藥，不及衡陽賣漉醪。習氣若爲除未盡，小軒風月又成詩。

豐年行

秋風蕭蕭秋日薄，築場穫稻方踞作。志士雖懷晚歲悲，農家自足豐年樂。撥醅白酒喚鄰曲，啄黍黃雞初束縛。長魚出網健欲飛，新兔臥盤肥可臠。躬耕辛苦四十年，一飽豈非天所酢。書生識字亦聊爾，莫作揚雄老投閣。

秋夜泊舟亭山下

逢水逢山到處留。可憐身世寄孤舟。一汀蘋露漁村晚。十里荷花野店秋。羽檄未聞傳塞外。金椎先報擊衙頭。聞虜酋行帳爲壯士所攻。幾不免。謬語謂酋所在爲衙頭。煌煌太白高千丈。那得功名取次休。

初秋山中作

萬里西風吹幅巾。卽今眞個是閑人。堆盤菱熟燕脂角。藉藻鱸新淡墨鱗。姥嶺蹇驢尋雪徑。娥江孤艇繫煙津。飄然樂事眞當勉。遠付十年無此身。

秋夜讀書有感

久病長夏枕簟如炮焚。扶持賴藥物。俛仰秋已分。清夜炷爐香。裊裊起孤雲。靈府豁蒙滯。舊學資鉏耜。言念總角初。操觚極艱勤。諸老頗賞識。謂可與斯文。沉痾幸鍼石。輪困勞斧斤。可憐四十年。薄陋負所聞。白首猶著書。逝將獻吾君。太官薦玉食。野人徒美芹。

晚涼登山亭

庭空葉飛秋。村迴鳩喚雨。新涼入巾褐。老子頗欲舞。憑高望稽山。秀色溢天宇。一鏡三百里。水落分別浦。淒涼吊禹穴。秦漢未爲古。世俗誰與歸。吾其老農圃。

夜步

市人莫笑雪蒙頭。北陌南阡信脚遊。風遞鐘聲雲外寺。水搖燈影酒家樓。鶴歸遼海逾千歲。楓落吳江又一秋。却掩船扉耿無寐。半窗落月照清愁。

感秋

秋堂露氣清。蕭爽入毛骨。葛裯耿無寐。坐待山月沒。溼螢飛不起。熠燿依衰草。勁風西北號。落葉紛可墜。老生惜歲月。烈士志功名。登臨送將去。非復兒女情。懸知青海邊。殺氣橫千里。良時不可失。胡行速如鬼。時聞淩會自香草。澁入秋山蓋。遠邁矣。

病中作

一病二十日。直愁難自還。殘書不成讀。長夜只供閑。風舞迎霜葉。雲昏欲雨山。臨窗忽自笑。詩思又相關。

送猷講主赴李明府姜山之招

貫花籤帙壓車轅。惟子窮探到本源。聽法鬼神環麈尾。質疑英俊集龍門。孤舟此日輕爲別。尺素何時遠見存。坐想文殊對摩詰。高談無礙九河翻。

雨中排悶

點點滴滴雨不晴。暗暗淡淡燈不明。皇天胡爲貸此老。病臥垂困今已平。卻慙向者力量淺。鼠肝蟲臂猶關情。百年終歸朝露速。一死正自秋毫輕。明朝且作山中行。青鞋已覺白雲生。豐年處處村酒好。莫教湘湖蓴菜老。湘湖在蕭山縣。蓴菜絕奇。

秋夜歌

書生白首無處著。病臥空齋夜蕭索。茶鑪颺颺候湯熟。燈檠蔌蔌看燼落。山童喚起已復倒。顧影自笑如孤鶴。人言富貴墮駭機。一生窮愁正不惡。架上故裘破。見肘牀頭殘酒傾。到脚問君何以塵。霜風悠然臥。

聽山城角

病起鏡中見白髮。此去七十無十寒暑矣。偶得長句。

短鬢蕭條失故青。人間真似宿郵亭。正令寬作十年夢。安用更留三日醒。覆瓿書成空自苦。擊轅歌罷遣誰聽。客來若覓衰翁處。睡起悠然倚素屏。

初寒宴坐

微火如螢度篆盤。明窗坐敗幾蒲團。羣兒誰信老懷嬾。萬事不禁醒眼看。道在簞瓢端自足。心閑天地本來寬。此生自斷君知否。不辦歸裝也掛冠。

溪行

霜落水初澄。星繁月未升。近村聞夜犬。隔浦見秋燈。多病乃如許。微寒已不勝。平生鄰曲意。移棹避漁罾。

又

疎鐘度莽蒼。遠火耿微茫。歲暮水歸壑。夜寒天實霜。人生一蟲臂。世路幾羊腸。老大忘繩檢。狂歌盡意長。

讀書

遠遯江湖上。端居風雨中。紙新窗正白。爐煖火通紅。籤帙方重整。聲形且細窮。扶衰倘未死。更破十年功。

自嘲用前韻

殘年過六十。寂寞臥山中。病眼驚新暗。衰顏失舊紅。人譏作詩瘦。自憫著書窮。輸與封侯骨。雲臺競策功。病中久廢遊覽。悵然有感。

裘馬清狂徧兩川。十年身是地行仙。歸來訪舊半爲鬼。已矣此生休問天。不恨盃觴無藉在。但悲山水曠周旋。垂虹風月休如昨。安得青錢買釣船。

新釀熟小飲

玉船激激酌鵝黃。菊欲殘時抵死香。似與幽人爲醉地。清笳聲裏一天霜。

又

籬菊猶堪采落英。一尊玉瀝釀初成。今宵要向中庭飲。不展華茵展月明。

題徐淵子環碧亭亭有茶山曾先生詩

茶山丈人厭羸譁。幅巾每訪博士家。小亭談笑不知暮。往往城上聞吹笳。興來傑作粲珠壁。歲久妙墨亡龍蛇。郎君弟子多白髮。回頭日月如奔車。徐卿赤城古仙子。十年四海推才華。覽觀陳迹喜不寐。旋補罅漏支傾斜。曲池還浸古來月。叢莽忽見當時花。重題舊句照高棟。力振風雅排淫哇。席間紵袍已散鶴。堂上講鼓初停撾。速宜力置竹葉酒。不用更滌桃花茶。桃花茶見曾公詩。

雜興

鰾井初生一樓雲。鮑郎山下雨昏昏。鷓聲嘔軋秋空曉。水際人家尙閉門。

又

孤夢初回揭短篷。橋邊曉日已曛曛。太平氣象君知否。盡在豐年笑語中。

又

古寺高樓暮倚闌，野雲不散白漫漫。好山遮盡君無恨，且作滄溟萬里看。

大雪

大雪江南見未曾，今年方始是嚴凝。巧穿簾罅如相覓，重壓林梢欲不勝。氈帳擲盧忘夜睡，金羈立馬怯晨興。此生自笑功名晚，空想黃河徹底冰。

遣興

書生不自憐，老眼付皇天。已飽三升稷，寧堆百屋錢。紅塵忙過日，青嶂醉論年。名字元虛幻，從人謗是仙。

委戀

委戀去悠悠，山窮得渡頭。白雲生碧嶺，翠木擁朱樓。野榼淵明酒，征塵季子裘。自憐詩興在，杜若滿芳洲。

雪中作

竹折松僵鳥雀愁，閉門我亦擁貂裘。已忘作賦遊梁苑，但憶銜枚入蔡州。屬國餐氈真強項，翰林煮茗自風流。明朝日暖君須記，更看青鴛玉半溝。

夢筆驛

朱扉水際亭，白塔道邊寺。扁舟幾往返，每過輒歎歎。經秋病不死，歲暮復口至。少年自喧譁，此老獨顛顛。可憐釣鯨客，終返屠羊肆。吾身行亦無榮辱，安所寄短燈照孤愁。寒衾推殘醉，明當臨大江。一灑壯士淚。

舟中感懷三絕句呈太傅相公兼簡岳大用郎中

浪中鞵鞋雨聲寒，孤夢初回燭半殘。甲子一周胡未滅，關山還帶淚痕看。

雨打孤篷酒漸消。昏燈與我共無聊。功名本是無憑事。不及寒江日兩潮。

又

夢筆亭邊攤鼻吟。壯圖蹭蹬老侵尋。不眠數盡雞三唱。自笑當年起舞心。

西興泊舟

衰髮不勝白。寸心殊未降。避風留水市。岸幘倚船窗。日上金谿海。潮來雪捲江。登臨數奇觀。未易敵吾邦。

錢清夜渡

輕舟夜絕江。天闊星磊磊。地勢下東南。壯哉水所匯。月出半天赤。轉盼離巨海。清暉流玉宇。草木盡光彩。男子志功名。徒死不容悔。坐思黃河上。橫戈被重鎧。晚途雖益困。此志願常在。一日天勝人。醜虜安足醜。

夜歸

晡時振柁離西興。錢清夜渡見月升。浮橋沾酒市嘈嘈。江口過埭牛凌兢。寒齋煮蠶坐茆店。小鮮供饌尋魚罾。偶逢估客問姓名。歡笑便足爲交朋。須臾一飽各散去。帆席健快如起騰。雲間戍樓鼓坎坎。山尾佛塔燈層層。夜分到家趨篝火。穉子驚起頭鬢髻。道途辛苦未暇說。一尊且復驅嚴凝。

江北莊取米到作飯香甚有感

我昔從戎清渭側。散關嵯峨下臨賊。鐵衣上馬蹴堅冰。有時三日不火食。山蕎粟雜沙礮。黑黍黃宋如土色。飛霜掠面寒壓指。一寸赤心惟報國。卽今歸臥稽山下。眼昏臂弱衰境逼。新杭炊飯香出甑。風殭潤

飲何曾識我豈農家志飽暖閉戶惟思事耕織。征遼詔下倘可期。盾鼻猶堪試殘墨。

感興

築室真須待伯夷。起墳仍合近要離。藥來賊境靈何用。米出胡奴死不炊。下石紛紛驚俗薄。絕絃寂寂嘆吾衰。一尊且作尋春計。又見東風浩蕩時。

新春

濛濛煙雨暗江干。新歲還勝故歲寒。酒壓濁清鳴社瓮。菜分紅綠簇春盤。良辰節物元如昨。病客情懷自鮮歡。卻羨村鄰機上女。隔籬相喚祭蠶官。

新年

寄迹人間夢已長。新年脫帽始微霜。坐中使氣如秦俠。陌上行歌類楚狂。掃榻欲招貧與語。杜門聊以醉爲鄉。稽山剡曲雖堪樂。終憶祁連古戰場。

遊鏡湖

禹祠柳未黃。剡曲水已白。魴鱖來洋洋。鳧雁去拍拍。皇天亦大度。能容此狂客。挂席乘長風。未覺湖海泛。讀書五十年。自笑安所獲。昔人精微意。豈獨在簡冊。驥空萬馬羣。裘非一狐腋。超然登玉筍。及此煙月夕。玉筍峯在會稽山南。

初春晚晴

雪盡冰消斂積威。參差碧瓦帶斜暉。土膏漸釋人東作。天氣初和雁北歸。小閣金船嘗臘酒。華堂銀燭製

春衣關心雖有尋梅夢，冷蕊幽香事已非。自占歲多風雪，屢廢觀梅之集。

偶讀山谷老境五十六翁之句作六十二翁吟

三百里湖水接天，六十二翁身刺船。飯足便休慵念祿，丹成不服怕登仙。胸中浩浩了無物，世上紛紛徒可憐。但有青錢沽白酒，猶堪醉倒落梅前。

自開歲略無三日晴戲作長句

新年暗曉覺春慳，變化相乘一瞬間。雨腳稍收初見日，風花忽起又遮山。風欲作則大霧充塞，雨之風花，欲行幽圃還成阻，未脫重裘自笑孱。桃李會開君勿恨，清尊且用破衰顏。

置酒梅花下作短歌

歲月不貸人，綠髮成華顛。此生幾兩屐，念之每悽然。我本塵外客，已絕區中緣。惟當及未死，勤醉梅花前。瘦影寫微月，疎枝橫夕煙。偃蹇巖壑間，欲與松忘年。豈亦薄世俗，忽逐天風翩。吾詩不徒歌，持配湘娥弦。梅花已過聞東村，一樹盛開特往尋之慨然有感。

春晚城南十里陵，亭亭獨立見奇姿。品流不落松竹後，懷抱惟應風月知。旋拂亂雲成小佇，重攜芳榼卜幽期。佳人空谷從來事，莫恨桃花笑背時。

思蜀

老子饒堪笑，珍盤憶少城。流匙抄薏飯，加糝啜巢羹。楫美傾筇籠，茶香出土鎗。西郊有舊隱，何日返柴荆。

書憤

早歲那知世事艱。中原北望氣如山。樓船夜雪瓜洲渡。鐵馬秋風大散關。塞上長城空自許。鏡中衰鬢已
先斑。出師一表真名世。千載誰堪伯仲間。

南窗擘黃柑獨酌有感

放翁潦倒鬢成絲。也把花前酒一卮。何限人間堪恨事。黃柑丹荔不同時。

久雨驟晴山園桃李爛熳獨海棠未甚開戲作

雨霽風和日漸長。小園尊酒答年光。直令桃李能言語。何似多情睡海棠。

臨安春雨初霽

世味年來薄似紗。誰令騎馬客京華。小樓一夜聽春雨。深巷明朝賣杏花。矮紙斜行閑作草。晴窗細乳戲
分茶。素衣莫起風塵嘆。猶及清明可到家。

延和殿退朝口號

雨餘未肯放朝暎。穿仗恭承聖主恩。清蹕傳聲徐御殿。立庭中頃之奏姓名。上乃自東廂出御座。紫衣引
拜許龍門。徘徊漫結堯階戀。零落難招楚澤魂。歸去猶堪誇里巷。桐江新賜兩朱轡。

又

十年短櫂染滄波。強著朝衫棄釣蓑。才薄何堪試馮翊。恩深猶許對延和。空牆煙柳遙迎馬。鞞路春恨欲
澆韓。莫恨此身衰病去。同時朝士久無多。

簡楊庭秀

袞袞過白日，悠悠良自欺。未成千古事，易滿百年期。黃卷閑多味，紅塵老不宜。相逢又輕別，此恨定誰知。

飲張功父園戲題扇上

寒食清明數日中，西園春事又匆匆。梅花自避新桃李，不爲高樓一笛風。

夜泛西湖示桑甥世昌

嗟我客上都，忽已見暮春。騎馬出關門，眯眼吹紅塵。西湖商賈區，山僧多市人。誰令汚泉石，只合加冠巾。黃冠更可憎，狀與屠沽鄰。駒駒酒肉氣，吾輩何由親。少須一閑散，境寂鷗自馴。舉手邀素月，移舟采青蘋。鐘從南山來，來般般浮煙津。鶴髮隱者歟，長樂收釣緝。畏冷不竟夕，恨此老病身。明發復擾擾，吾詩其絕麟。

小舟過御園

聖主憂民罷露臺，春風別苑畫常開。盡除曼衍魚龍戲，不禁芻蕘雉兔來。水鳥避人橫翠竊，宮花經雨委蒼苔。殘年自喜身強健，又作清都夢一回。

又

水殿西頭起砌臺，綠楊鬧處杏花開。簾韶本與人同樂，羽衛纔聞歲一來。鷁首波生涵藻荇，金鋪雨後上莓苔。遠臣侍宴應無日，目斷堯雲到晚回。

自真珠園泛舟至孤山

呼船徑截鴨頭波，岸幘閑登瑪瑙坡。弦管未嫌鶯鷺起，塵埃無奈污花何。宦情不到漁蓑底，詩興偏於野寺多。明日一藤龍井去，誰知伴我醉行歌。

真珠園雨中作

清晨得小雨，憑閣意欣然。一掃羣兒迹，稍稀遊女船。煙波蘸山腳，溼翠到闌邊。坐誦空濛句，予懷玉局仙。

還家

富貴元須早致身，白頭豈復市朝人。數聲鶉鴉呼殘夢，一架醱醱送晚春。疊嶂出雲明客眼，澄江漲雨濯京塵。逢人枉道哦詩瘦，下語今年尙未親。

又

天津橋上醉騎驢，一錦囊詩一束書。作客況當多病後，還家已過暮春初。泥深村巷人誰顧，草滿園畦手自鉏。不爲衰遲思屏迹，此心元向利名疎。

初歸偶到近村戲書

雨過一村暗，風回百草香。刺船過古埭，倚杖立新塘。醉覺乾坤大，閑知日月長。暮歸詩滿卷，雖老尙能狂。

題跨湖橋下酒家

湖水綠於染，野花紅欲燃。春當三月半，狂勝十年前。小店開新酒，平橋上畫船。翩翩幸強健，不必愧華顛。

春遊至樊江戲示坐客

江頭蕭蕭春色暮，柳陰遊魚飽飛絮。毛羹箭筍美如玉，點鼓絲絃滑繁筍。銀鞍烏帽尋春客，朱戶青旗沽酒處。浮生細看纔幾時，一笑自應忘百慮。綠盃到手不肯盡，寶帶照地身何與。醱醱爛熳我欲狂，茗芋還家君勿遽。

暮春

顏頰都門白髮新，歸來一振客衣塵。
啼鶯妒夢頻催曉，飛絮鍾情獨殿春。
湖上風光猶淡淡，尊前懷抱頗
清真。詩成絕恨知心少，自寫吳牋寄故人。

天華寺前遇縣令過避之入寺僧皆盡睡

墮絮飛花掠釣船，天華寺下賞春妍。
縣多官府鳴騶過，僧少叢林避客眠。
出網長魚猶鱗鱗，爭泥新燕欲
翩翩。典衣剩買旗亭醉，已過旗亭六十年。

偶得海錯侑酒戲作

判無神藥斷清冥，放筯那憎海物腥。
滿貯醪醖漬黃甲，密封小盞餉紅丁。
從來一飽忘南北，此去千鍾任
醉醒。添雪更知憑茗椀，山童敲臼隔窗聽。

雨晴遊香山

雨打醮醮夜未拆，一晴柳岸先飄雪。
我搖畫櫂鏡湖中，碧水青天兩奇絕。
長歌縹緲雲不動，橫笛清悲竹
將裂。悠然起舞影零亂，卓爾四顧心激烈。
好山可隱輕捨去，故人已貴長乖隔。
肺渴生塵防酒興，眼暈成
花作書厄。平生所期無一遂，獨有曠快相除折。
夜歸燈火闌湖邊，淡淡西南一鉤月。

春遊絕句

一百五日春郊行，三十六溪春水生。
千秋觀裏逢急雨，射的峯前看晚晴。
自秦望山而北，合三十六溪水
爲若耶溪。

夜行玉筍樵風之間宿龍瑞

野店谿橋供晚餉。吟邊醉裏弄春風。馬行缺月黃昏後。鍾下亂山空翠中。名宦不辭成寂寂。歲時惟恨去
忽忽。頗聞禹穴遺書在。安得高人與細窮。

聞傅氏莊紫笑花開急棹小舟觀之

日長無奈清愁處。醉裏來尋紫笑香。漫道閑人無一事。逢春也似蜜蜂忙。

遊法雲寺觀彝老新葺小園

古寺朱扉榜水開。高僧笑語共徘徊。陰陰曲徑人稀到。一一名花手自栽。竹篔引泉滋藥壠。風爐篝火試
茶盃。此行自喜非生客。二百年間六世來。五世祖太保公捨園地建寺。

鹹齋十韻

九月十月屋瓦霜。家人共畏畦蔬黃。小甕大甕盛滌濯。青菘綠韭謹蓄藏。天氣初寒手訣妙。吳鹽正白山
泉香。挾書旁觀穉子喜。洗刀竭作廚人忙。園丁無事臥曠日。棄葉狼藉堆空廊。泥爲絨封糠作火。守護不
敢非時嘗。人生各自有貴賤。百花開時促高宴。劉伶病醒相如渴。長魚大肉何由薦。凍齋此際價千金。不
數狐泉槐葉麵。磨塋便腹一欣然。作歌聊續冰壺傳。

長門怨

未央宮中花月夕。歌舞稱觴天咫尺。從來所恃獨君王。一日譏興誰爲直。呖只之天今萬里。空在長安一
城裏。春風時送簾韶聲。獨掩羅巾淚如洗。淚如洗。今天不知此生再見應無期。不如南粵匈奴使。航海梯

山有到時

遣興

莫羨朝回帶萬釘。吾曹要可草堂靈。風來弱柳搖官綠。雲破奇峯湧帝青。聽盡啼鶯春欲去。驚回夢蝶醉初醒。從教俗眼憎疎放。行矣桐江醉客星。

晨坐道室有感

一絲青精便有餘。世間萬事總成疎。手揮絃上烏棲曲。口誦巖間鳥跡書。丹氣初升勤沐浴。芝房未熟飽耘鋤。碧霄騰舉人人事。莫戀污渠與臭帑。

晝臥

忽忽見春盡。徂年那更還。香生帳裏霧。書積枕邊山。凌厲心猶壯。沈緜氣已孱。千秋有管葛。看鏡汗吾顏。

雨晴

久雨作我病。今朝身頓輕。花房避初旭。簾影弄新晴。漉酒綸巾折。聽琴拄杖橫。儵然又終日。未覺負平生。

宿石帆山下

卷地東風吹釣船。石帆重到又經年。放翁夜半酒初解。落月啣山聞杜鵑。

又

繫船禹廟醉如泥。投宿漁家月向低。溼翠撲人濃可掬。始知身在石帆西。

小雨泛鏡湖

吾州清絕冠三吳。天寫雲山萬幅圖。龍化廟梁飛白雨。鶴收仙箭下青蕪。菱歌嫋嫋遙相答。煙樹昏昏淡欲無。端辦一船多貯酒。敢辭送老向南湖。鏡湖一名南湖。

小憇村舍

藤梢維艇子。煙際覓人家。小婦夢新麥。羣童摘晚茶。溪雲易成雨。崖樹少開花。聊寄平生快。青鞋到若耶。

平水

水悍溪橋敗。沙頽野徑移。年華入詩卷。心事付筇枝。雨霽鶉鳩喜。春歸鷓鴣知。客庖消底物。麥飯薦菹絲。

初夏山中

又報東皇促駕歸。醉中闕賦送春詩。佛餅是處見紅藥。僧榻有時聞子規。野客款門聊倒屣。谿潭照影一軒眉。年光佳處惟初夏。兒女紛紛詎得知。

雨後

礎潤還成雨。雲收旋作晴。巖花分日發。林筍逐番生。筆硯行常具。軒窗晚更明。塵埃幸不到。那得廢詩情。

雲門溪上獨步

山路聯翩十日陰。晚晴喜得幽尋。殘紅猶有數枝在。漲綠真成一倍深。泉響瓊環鳴闌壑。月明珠壁散疎林。歸來寂寞鐘初動。羞向孤燈說壯心。

雲門過何山

漠漠稻滿陂。濛濛雨霑衣。林花落更新。磻鳥止復飛。我作山中行。十日未擬歸。思酒過野店。念茶叩僧扉。

眠枕松下石。適意無訶譏。心廣體自舒。泰然不肉肥。念昔在官塗。萬事與願違。逢人無一欣。對食或累歎。低回三十年。竟不飽葳蕤。空將書五車。自誑腹十圍。餘日猶幾何。可復貪塵鞿。臍拾柏子香。閉門觀昨非。

明覺院

細路蟠青壁。層軒倚碧空。天香下塵世。僧梵起雲中。藤絡將頽石。松號不斷風。尤憐扶杖處。直下數飛鴻。

自雲門至上竈欲遊一二僧菴以雨不果

道遠晨炊米。風和晝減衣。花殘孔官廟。苔滿葛仙磯。剩欲尋僧話。先判秉炬歸。山昏又成雨。心事固多違。

自上竈過陶山

宿雨初收見夕陽。縱橫流水入陂塘。蠶家忌客門門閉。茶戶供官處處忙。綠樹村邊停醉帽。紫藤架底倚胡牀。不因蕭散遺塵事。那覺人間白日長。

四月

四月江南暑尚微。虛堂初換葛衣時。嬾陪陌上雍容騎。且對窗間膈膊棋。糝徑落花猶片片。拂雲新竹已離離。年來病肺疎盃酌。應接風光賴有詩。

初夏閑居卽事

門巷蕭蕭日正長。方牀曲几傲羲皇。輕風忽起楊花鬧。清露初晞藥草香。對奕兩奩飛黑白。攤書千卷雜朱黃。穿簾語燕能從我。分爾湖邊一夏涼。

夜汲

酒渴起夜汲。月白天正青。銅瓶響寒泉。聞之心自醒。井邊雙梧桐。映月影離離。上有獨棲鷓。細爪握高枝。我欲畫團扇。良工不可求。三歎拊庭楮。浩然風露秋。

排悶

老去知心少。流塵鎖斷絃。尊空問字酒。囊罄作碑錢。掃葉供朝爨。和泥補漏船。胸中元浩浩。白眼望青天。

初夏夜賦

好景入新夏。幽人臥弊廬。廊腰得風遠。樹罅見星疎。門掩鴉棲後。鐘鳴月上初。青燈尙堪近。起了讀殘書。

新霽城南舟中夜興

身是江湖不繫船。雨餘隨處一儂然。浮雲盡歛出青嶂。孤月徐升行碧天。收網漁歌移別浦。隔城塔影落前川。明朝閉就平洲飲。巾履追涼又一年。

泊舟

蘼岸煙波橫畫船。幅巾蕭散餞流年。兩行楊柳吹晴雪。只著啼鶯未著蟬。

又

湖水無風鏡面平。曉曦倒影萬峯青。放翁眼界便疎豁。過盡蘆村泊蓼汀。

飲伯山家因留宿

小醉悠然不作醒。斷雲飛盡卻成晴。月生檐外見簾影。風下城頭聞角聲。岸幘莎庭便髮冷。酌泉桐井覺魂清。雞號忽報明星上。夢破虛皇白玉京。

夜泛蜻蜓浦

四顧水無際。三更月未生。偶成搖櫂去。不減御風行。煙浦漁歌斷。蘆洲鬼火明。還家人已睡。小立叩柴荆。

晨起看山飲酒

愛山入骨髓。嗜酒在膏肓。跌宕風煙外。歌呼麴蘖傍。虛窗天柱曉。書室正見天柱峯。小盞囊泉香。家釀今年試用。坡下漿泉。趙法。垂老叨微祿。無□□忙。

枕上偶賦

初夏暑猶薄。紗幮怯夜深。孤螢入窗罅。斜月下牆陰。靜養觀書眼。窮悲濟世心。吾衰亦久矣。徂歲苦屢寢。

自詠

射的山前一老樵。此生何敢辱旌招。繆緣學道肱三折。不遇知音尾半焦。去蠹區區慙啄木。附高燁燁鄙凌霄。但令窮死心無愧。也勝嗚珂事早朝。

題齋壁

二十餘年此結茆。園公谿父日論交。風翻半浦亂荷背。雨放一林新笋梢。隔葉晚鶯啼谷口。啜花雛鴨聚塘坳。出門行罷還無事。借得丹經手自抄。

又

四顧茫茫水接天。幽居真個似乘船。月窗竹影連棲鷁。露井桐聲帶斷蟬。甘寢每憎茶作祟。清狂直以酒爲仙。形骸那得常羈束。六十年來又二年。

又

昨。魁。爲。家。一。老。翁。陽。狂。羞。與。俗。人。同。夢。回。菱。曲。漁。歌。裏。身。寄。蘋。洲。蓼。浦。中。斷。簡。塵。埃。存。治。道。高。丘。草。棘。閉。
英。雄。旗。亭。村。酒。何。勞。醉。聊。豁。平。生。芥。蒂。胸。

又

稽。山。千。載。翠。依。然。著。我。山。前。一。釣。船。瓜。蔓。水。平。芳。草。岸。魚。鱗。雲。襯。夕。陽。天。出。從。父。老。觀。秧。馬。歸。伴。兒。童。放。
紙。鳶。君。看。此。翁。閑。適。處。不。應。便。謂。世。無。仙。

陸放翁集

劍南詩彙

卷第十八

丙午五月大雨五日不止鏡湖渺然想見湖未廢時有感而賦

朝雨暮雨梅正黃。城南積潦入車箱。鏡湖無復城青秧。直浸山脚白茫茫。湖三百里漢訖唐。千載未嘗廢。陂防屹如長城限。胡羌畜夫有秩走且僵。早年灌注水何傷。越民歲歲常豐穰。洪湖誰始謀不感。使我婦子糜糲糠。陵遷谷變亦何常。會有妙手開湖光。蒲魚自足被四方。煙艇滿目菱歌長。

遊郵

晚雨初收旋作晴。買舟訪舊海邊城。高帆斜挂夕陽色。急艫不聞人語聲。掠水翻翻沙鷺過。供廚片片雪鱗明。山川不與人俱老。更幾東來了此生。

泊上虞縣

鄞江久不到。乘興偶東遊。漲水崩沙岸。歸雲抱縣樓。吟餘聲混混。梳罷髮飈飈。喜見時平象。新絲入市稠。

發丈亭一作長亭

姚江乘潮潮始生。長亭却趁落潮行。參差鄰舫一時發。臥聽滿江柔櫓聲。

又

玄雲垂天暗如漆，鱗聲嘔軋知船行。南風忽起卷雲去，江月已作金盆傾。

明州

豐年滿路笑歌聲，蠶麥俱收穀價平。村步有船銜尾泊，江橋無柱架空橫。海東估客初登岸，雲北山僧遠入城。仗錫平老出山來迎子，風物可人吾欲住。擔頭蕪菜正堪烹。

水亭獨酌十二韻

清風瑞鬱蒸，爽氣生戶牖。客中淡無事，翛然一盃酒。書生拙自料，事業期不朽。少年忝朝跡，蹭蹬今白首。歷觀千載事，和戎固嘗有。定襄伍原間，乃可畫地守。神州在何許，東巡已去久。煌煌一統業，謏訓共可負。太祖嘗書大宋一統字，以賜王溥。荆楚多劍客，宣潤富弩手。孰能用其長，坐使老農畝。譁武幸長楊，勞軍臨細柳。中興望聖時，未死得見否。

坐客有談狄魚眼雁之美者感歎而作

黃雀頭顱羞五鼎，狄魚眼雁參雋永。兩螯何鼻蟹，喪軀一櫛可憐牛。斷領霜刀斫，膾幾許痛。公子方誇醉魂醒，物生怖死與我均。碣汎流丹只俄頃，哀哉堂堂七尺身。正坐舌端成業境，豪華只可誇僕妾。報應那知類形影，世間擾擾何時了一念。超然差若願，不妨瓦鉢飽晚菘。更汲山泉試春茗。

衰病不復能劇飲而多不見察戲作此詩

平生不持面看人，寧作五湖雲水身。忍窮閉門豈自苦，是中有味敵八珍。酒盃激盪鼓吹作，我自悲吒人自樂。更闌坐睡不得去，如應在鞢虎遭縛。丈夫歡樂自有時，遇酒先怯非予衰。萬騎擊胡青海岸，此時意

氣令君看。

或以予辭酒爲過復作長句

陸生酒戶如蠶。痛酒豈能堪大白。正緣一快敗萬事。往往吐茵仍墮幘。爾來人情甚不美。似欲殺我以麴蘖。滿傾不許計性命。傍晚更復騰頰舌。醉時狂呼不復覺。醒後追思空自責。卽今願與交舊約。三爵甫過當亟徹。解衣摩腹午窗明。茶磴無聲看霏雪。

行路難

平生結交無十人。與君契合懷抱真。春遊有時馬忘秣。夜話不覺雞報晨。極知貧賤別離苦。明日有懷就誰語。人無根柢似浮萍。未死相逢在何許。道邊日斜泣相持。旗亭取醉不須辭。君貴堂廚萬錢食。我勸一盃應不得。

千峯樹宴坐

蒼寒千疊擁官居。吏退憑高樂有餘。盡日煙雲窮變化。入秋草木漸凋疎。朱絃靜按新傳譜。黃卷閑披累譯書。聊與邦人共無事。吾僚不用笑迂疎。

喜雨

勢掠郊原飛急雪。聲搖窗戶過奔雷。坐知多稼連雲熟。不獨新涼傍枕來。

又

浙瀝簷聲枕上聞。攬衣起坐對爐熏。萬家歌舞豐年樂。未費烏龍一線雲。

五鼓

樓揆琴鼓。簾櫺煜煜燈。浪名隨牒吏。實似打包僧。衰病元難強。疎慵每自憎。誰知成邊日。秋野正呼鷹。

官居戲詠

萬里飄然似斷蓬。桐廬江上又秋風。判餘牘尾棲鴉溼。衙退庭中立雁空。燈火市樓知酒賤。歌呼村路覺年豐。誰言病守無歡意。也與他人一笑同。

又

說著功名卽自羞。暮年世味轉悠悠。一庭落葉楸梧老。萬里悲風鼓角秋。懷綬不爲明日計。登樓且散異鄉愁。漁舟大似非凡子。能揀溪山勝處留。是日書所見。

又

城頭閑倚一枝藤。病起清羸不自勝。衙鼓有期催晚坐。條鈴無賴喚晨興。愛書習氣嗟猶在。算過工夫愧未能。寂寞已無臺省夢。諸公袞袞自飛騰。

倦服

看書澀似上羊腸。得睡甘如飲蜜房。起坐藤床搔短髮。數聲畫角報斜陽。

拜旦表

一封馳奏效嵩呼。清暉何時返故都。只道建炎巡狩禮。誰知故事自祥符。

早自烏龍廟歸

殘漏聲中聽曳鈴。翩翩吹帽出郊坰。雨餘潤落雙虹白。雲合山餘一髮青。鐵馬蹴冰悲昨夢。朱顏辭鏡感
頽齡。歸來獨對空齋冷。鳥迹蒼苔自滿庭。

上丁

燎火明中庭。老槐泣殘雨。白頭奉祀事。恐懼劇仰俯。三終樂在懸。再拜肉升俎。誰言千載後。恍若到鄒魯。
吾國雖褊小。大社昨茆土。如何儼章綬。日夜臨筮楚。藏書如丘山。及物無一羽。吾其可憐哉。去去老農圃。

新秋

打窗落葉報秋期。病叟頽然兩鬢絲。縱酒已無年少夢。讀書仍負夜涼時。問囚損氣嗟誰念。學道劬心恐
已遲。買鶴清溪歸計足。寄聲先遣故人知。

殘年

殘年迫鍾漏。病骨怯風霜。投幘早當去。強顏徒自傷。文符紛似雨。訟訴進如牆。笑殺滄浪客。微官有許忙。
休日行郡園

南山如黛照朱扉。地接官居到亦稀。寒蝶徘徊掠衰草。孤花閃淡弄斜暉。荒城歌舞難娛客。休日文書且
解圍。猶勝去年窮巷底。臥聞砧杵念秋衣。

登北樹

遠城山作翠濤傾。底事文書日有程。無瀾我爲揮吏散。獨登樓去看雲生。香浮鼻觀煎茶熟。喜動眉間煉
句成。莫笑衰翁淡生活。它年猶得配玄英。方千有千峯樹詩。

小酌

籬外桐疎見露蟬。一壺聊醉嫩寒天。團臍磊落吳江蟹。縮項輪囷漢水鱸。此兩物近頗登盤。投老官遊真漫爾。平生懷抱固超然。文書縛急何由耐。會向長安市上眠。

焚香作墨瀋決訟吏皆退立一丈外戲作此詩

客鬢新添幾縷絲。山城且付一官癡。空爇碧鶻籠香艸。近得一石穴。遠於會。出香如雲。灑灑玄雲起。墨池判牒不妨閑。作草坐衙聊得細哦詩。吏民莫怪秋來健。漸近南山射虎時。

齋中閑詠

風號萬物作濤聲。雲截千峯似几平。多病支離仍老境。暮秋蕭瑟更山城。燕觴久罷塵痕積。庭訟全稀藜暈生。莫道齋中日無事。焚香掃地又詩成。

秋夜聞雨

香斷燈昏小幌深。不堪病裏值秋霖。驚回萬里關河夢。滴碎孤臣犬馬心。清似釣船聞急瀨。悲於靜院聽繁砧。玉峯老去情懷惡。穩受千莖雪鬢侵。韓致光詩云。不知短髮能多少。一滴秋霖白一莖。

自詠

鈍似窗間十月蠅。淡如世外一孤僧。心勞撫字雖亡補。筆判虛空却甕能。厭見文書銜客袖。但思蔬水曲吾肱。何時却宿雲門寺。靜聽霜鐘對佛燈。

秋懷

少時本願守墳墓。讀書射獵畢此生。斷蓬遇風不自覺。偶入戎幙從西征。朝看十萬閱武罷。暮馳三百巡邊行。馬蹏度隴電聲急。士甲照日波光明。興懷徒寄廣武歎。薄福不挂雲臺名。領鬚白盡愈落莫。始讀法律親筭榜。訟氓滿庭鬧如市。吏牘圍坐高于城。未嫌樵唱作野哭。最怕甜酒傾稀餚。平生養氣頗自許。雖老尚可吞司并。何時擁馬橫戈去。聊爲君王護北平。

不寐

閏年九月已重裘。說著功名卽自羞。病骨不禁霜氣峭。高風正送雁聲遒。半盃濁酒如欺老。一點青燈欲訴愁。不寐裁詩眞習氣。輸它睡足向黃州。

醉中戲作

當年買酒醉新豐。豪士相期意氣中。插羽軍書立談辦。如山鐵騎一麾空。玉關久付清宵夢。笠澤今成白髮翁。堪笑燈前如意舞。尙將老健壓諸公。

頽夜夢至南鄭小益之間慨然感懷

身似菴居老病僧。罷參不復繫行藤。夢中忽在三泉驛。庭樹鳴臯鬼弄燈。

又

客枕夢遊何處所。梁州西北上危臺。雪雲不隔平安火。一點遙從駱谷來。

夜雨枕上

秋雨不肯晴。秋夜不肯明。寸心集百憂。厭此點滴聲。歲月不貸人。老病忽至此。丈夫本憂世。兒女乃畏死。

兩夜

蒼雲晝埋山。白雨夜溢渠。虛堂閃風燈。獨處誰與娛。吾生過六十。鬢髮日夜疎。出當飲美酒。歸當讀奇書。可憐兩不遂。兀兀如枯株。明復對胥吏。孤憤何由摅。

安流亭俟客不至獨坐成詠

憶昔西征鬢未霜。拾遺陳迹吊微茫。蜀江春水千帆落。禹廟空山百草香。馬影斜陽經劍閣。鶉聲清曉下瞿唐。酒徒雲散無消息。水榭憑欄淚數行。

秋興

楸槐雨鬢變。鳧雁水拍拍。曉行城南路。落葉滿阡陌。新霜上衰鬢。吾死亦已迫。那將有限身。常作未歸客。長吟側紗帽。萬里一秋色。世俗不足論。天豈無皁白。

又

朝先鳴雞興。夕殿棲鷗還。符檄積几案。寢飯於其間。榜笞督租賦。涉筆駢我顏。忽過白日。胡能慰惓慙。葉脫橫林疎。鬢鬢溪南山。豈無一盃酒。吾事何時閑。

燕堂獨坐意象殊憤憤起登子城作此詩

睡魔困衰翁。白日坐兀兀。忽然振衣起。目瞭尙如鶻。憑高望中原。佳氣未消歇。逆賊稽大刑。痛憤深至骨。新霜下昌陵。草有胡馬齧。羽林百萬士。何日聞北伐。賤臣官有守。不敢叫行闕。夢中涉黃河。太行高碑砢。天河未洗兵。封豕食上國。坐令河洛間。百郡暗荆棘。夷吾非王佐。尙足救左衽。中原消息斷。吾輩何安寢。

世俗苦醜。誰與共此功。安知無奇士。悲歌燕市中。

秋雨北榭作

秋風吹雨到江濱。小閣疎簾曉色分。津吏報增三尺水。山僧歸入萬重雲。飄零露井無桐葉。斷續煙汀有雁羣。了却文書早尋睡。檐聲偏愛枕間聞。

次韻王給事見寄

大手方司一世文。癯儒何敢望餘塵。誰知天上黃扉貴。肯記江邊白髮新。未路愈窮詩有祟。舊書渾忘筆無神。床頭周易尊中酒。猶賴渠儂不負人。

病中夜半

蕭蕭欲脫猶吟葉。耿耿微明未滅燈。夜半不眠閑倚壁。使君清似北山僧。

卽事

組繡紛紛街女工。詩家於此欲途窮。語君白日飛昇法。正在焚香聽雨中。

歲晚懷故人

衰髯白盡無添處。病骨羸然欲折時。客抱琴來聊滄老。吏封印去又哦詩。山橫城上勢如壓。角動樓頭聲正悲。零落斷鴻書不到。歲殘何以慰相思。

焉耆行

焉耆山頭暮煙紫。牛羊聲斷行人止。平沙風急捲寒蓬。天似穹廬月如水。大胡太息小胡悲。投鞍欲眠且

復起漢家詔用李輕車。萬丈戰雲來壓壘。

又

爲着山下春雪晴。莽莽惟有疾藜生。射麋食肉飲其血。五穀自古惟聞名。樵蘇切莫近亭障。將軍臥護真長城。十年牛馬向南睡。知是中原今太平。

丙午初冬得心腹痛疾大下而愈。羸耗不支。方在告臥燕堂。東偏聞民間前一夕被盜者。慨然有感。

悄悄四壁空。宛宛一室奧。雨聲靜更聞。雨氣深不到。下簾設紙屏。篝火支藥竈。勿言此幽陋。足以養衰眊。頗聞閭里間。比夕多狗盜。游徼無乃闕。鏖將孰告。家貧未決去。祿食當念報。臥疴疇敢安。起立擲吾帽。

因王給事回使奉寄

兩昏郡郭連三日。吏報江流忽數回。江每漲津吏輒報。日或三四至。正歎船如天上坐。那知人自日邊來。臂弓腰箭身今老。航海梯山運已開。漢虜不應常自守。期公決策畫雲臺。

病告中遇風雪作長歌排悶

風雪橫街不能出。閉戶垂帷養衰疾。黃昏臥聽打窗聲。聊挽清寒入詩律。公孫布被久有味。子敬青氈暖無匹。石鼎閑烹似爪茶。霜斂旋破如拳栗。蹲鴟足火微點鹽。粟熬湯旋添蜜。龍蛇鱗鱗塞笥束。子母累累丹柿實。玉狸試說涎已墮。石芥纔嘗酒如失。天公付汝亦已厚。飽食長謠抱雙膝。丈夫豈爲口腹計。壯志常恐無時畢。伐胡疏奏端許前。腰領敢辭齊斧鉞。

冬夜戲作

賤貧百年愁。老大萬事倦。起家來牧民。竊語笑丞掾。拘繫拙微科。儉陋省遊宴。不思返江湖。乃爾辱幾句。斯言中吾病。有靦在其面。行當自勅去。暫寓等郵傳。十月夜正長。歲事到冰霰。膏油幸可具。更盡書一卷。

夜坐

曲几蒲團夜過分。頽然半脫鹿皮巾。鷺鴻避弋鳴煙渚。斷角凌風上雪雲。仕宦愈知林下貴。窮愁方策酒中勳。扁舟東去何時辦。昔向金丹幸有聞。

又

山城意象自蕭然。況是高齋作雪天。漸暗玉蟲寒有燼。欲殘金鴨煖無煙。衰容病後如添歲。遙夜冬來抵過年。安得龍綰三丈幅。爲君試寫白雲篇。

遣興

圖書雞犬共扁舟。又續人間汗漫遊。醉眼本輕千古事。釣竿新賜一灘秋。慣看浮世成陵谷。莫露神光上斗牛。老病豈堪常作客。夢尋歸路傍西疇。

登紫翠樓

水落溪聲壯。天寒山色奇。殘雲宿虛閣。馴鷺下清池。簿領消豪氣。功名負聖時。憑高不勝歎。神武迫歸期。

丙午十月十三夜夢過一大家。傍人爲余言此荆軻墓也。按地志荆軻墓蓋在關中。感歎賦詩。

采藥遊名山。物外富眞賞。秋關策蹇驢。雪峽蕩孤漿。遠鄉忽十載。高興寄遐想。夢行河潼間。初日照仙掌。

坡陀荆棘冢。狐兔伏榛莽。悲歌易水寒。千古見精爽。國讐久不復。驚覺此吾類。何時真過茲。薄醉神所鑿。

病起小飲

病起新霜滿鬢蓬。憑高一笑與誰同。酒如淥靜春江水。人有鴻荒太古風。野寺鐘來夕陽外。寒山空插亂雲中。一官正爾妨人樂。只合滄浪狎釣翁。

冬夜讀書

莫笑燈檠二尺餘。老來舊學要耘鋤。寒生點滴三更雨。喜動縱橫萬卷書。本著儒冠那免此。可因吏牘頓拋渠。善和舊賜今猶在。剩采芸香辟蠹魚。

夜坐觀小兒作擬毛詩欣然有賦

北風城頭鼓統統。徂歲蟬燦正多感。老夫假寐角巾低。穉子高吟兩鬢髻。衰遲笑我藏袖手。狂率憐渠滿軀膽。旋炊粉餠裹青箬。新煤餽枝綴紅糝。未言問事漸瀾翻。且賞揮毫能果敢。嗟予曠昔如汝年。萬卷縱橫恣窺覽。即今見汝尚懽欣。此癖真同嗜昌歎。夜闌我困兒亦歸。獨與狸奴分坐毯。

郡齋偶書

白首奉魚書。蕭然一事無。吏閑晨已散。人醉莫相扶。卷野收禾黍。連江下舳舻。山城君勿謂。東北是皇都。

又

翠嶺當城起。清江壁硤流。軻峨商客艫。嘈噴酒家樓。豐歲人元樂。殘年我獨愁。秦吳環萬里。感慨故貂裘。

又

江墮清茄月，霜嚴畫戟門。灘聲寒更壯，山氣旦常昏。搖落悲徂歲，羈遊憶故園。無勞空竊食，何以報君恩。
燈下閱吏牘有感

老眼今年太負渠，義經魯史頓成疎。一爲杜後惠文吏，厭讀司空城旦書。正苦雁行須束縛，不言鼠輩合誅鉏。致君堯舜元無術，黃卷何辭飽蠹魚。

過放生池追懷江公民表諫議池蓋公所創也

釣臺先生諫大夫，建中初元起江湖。是非非玉座側身可死，徒志不渝煙汀月島二十載。白髮短船藏菰蒲，晚蒙滌洗得一障。上奏猶自稱籠疎，公廣濟到任表云不能軟熟，終是齷齪，其不撓如此。此公造處直奇特，竺乾先生分半席，九州看如掌中果。天不遣爲吁可惜，徑歸斂手築陂池也。活龜魚，論萬億骨冷桐山喚不聞，停車悵望春波碧。

園中絕句

梅花重壓帽簷偏，曳杖行歌意欲仙。後五百年君記取，斷無人似放翁顛。

又

溪北溪南飛白鷗，夕陽明處見漁舟。憑誰爲剪機中素，畫取天涯一片秋。

戲作浙西諸郡雜賦無職租

歸臥元知作餓夫，宦遊依舊是癯儒。免教妻子爭杭秫，秋稼連雲一稜無。

縱筆

閑經月下白蘋洲。半脫風前紫綺裘。曾值東風鴛鴦駕。却因南渡看龍舟。年光已付蒼騰醉。天宇誰從汗漫遊。莫怪又成橫笛去。故人期我玉華樓。玉華樓在青城山丈人觀。

又

東都宮闕鬱螻蟻。忍聽胡兒敕勒歌。雲隔江淮翔翠鳳。露霑荆棘沒銅駝。丹心自笑依然在。白髮將如老去何安得。鐵衣三萬騎爲君王取舊山河。

又

行省當年駐隴頭。腐儒隨牒亦西遊。千艘衝雪魚關曉。萬竈連雲駱谷秋。天道難知胡更熾。神州未復士堪羞。會須瀝血書封事。請報天家九世讎。

病中偶得名酒小醉作此篇是夕極寒

一壺花露拆黃滕。醉夢酣酣喚不醒。屏煖半銷香鴨火。窗寒初結研蟾冰。詩囊羞澀悲才盡。藥裹縱橫疊病增。早掛朝衣歸去是。貴人誰記接茵憑。

晨讀道書

家貧悔嗜酒。年邁思學道。雖云善補過。見事恨不早。儒生守章句。忽忽遂將老。巖間得奇書。足以慰華皓。丹液下注臍。黃雲上通腦。海山行當歸。白髮何足掃。

後園獨步有懷張季長正字

斯世元知少賞音。道存何恨死山林。半生去國風埃面。一片憂時鐵石心。閑看斷雲成小立。偶穿修竹得

幽尋。故人已到梁州未。尺紙東來抵萬金。

老將效唐人體

寶劍夜長鳴。金裘老未平。指弓誇野戰。抵掌說番情。已矣黑山戍。悵然青史名。和親不用武。教子作儒生。

書憤

清汗透迤貫舊京。宮牆春草幾番生。剖心莫寫孤臣憤。抉眼終看此虜平。天地固將容小醜。犬羊自慣漬齊盟。蓬窗老抱橫行略。未敢隨人說弭兵。

晨起

衣潤熏籠煖。燈殘漏箭長。鳴雞帶窗月。立馬怯庭霜。病骨陰晴覺。官身早夜忙。火城那復夢。愁絕軟塵香。

雪

但苦奇寒惱病翁。豈知上瑞報年豐。一庭不埽待新月。萬壑盡平號斷鴻。繭紙欲書先研凍。羽觴纔舉已尊空。若耶溪上梅千樹。欠我今年繫短篷。

歲晚書懷

早見龍翔上太清。紹興未。游官玉驛所。卽今孤宦老山城。靈丹不解換凡骨。薄命枉教生太平。積雪樓臺增壯觀。近春鳥雀有和聲。如山吏牘何時了。惆悵西窗晚照明。

晨過天慶

蘿月挂圓壁。松風號急灘。孤燈經院曉。殘雪醮壇寒。賸欲閑扶杖。何妨醉墮冠。詩成興不盡。萬里跨青鸞。

冬夜

翻翻殘曆不滿紙。坎坎疊鼓無停擗。香殘未消古鼎火。燈暗尙結寒缸花。長安故人日已遠。錦江小艇天之涯。拘攣動覺吏有責。幽獨更似僧無家。臥聞沙雁叫空闊。想見雪谷森谿谿。起提一筆掃足紙。入卷颯颯奔龍蛇。

比得朋舊書多索近詩戲作長句

庭下訟訴如堵牆。案上文書海茫茫。酒酸肉冷不得嘗。椎牀大叫欲發狂。故人書來索文章。豈知吏責終歲忙。寒龜但欲事縮藏。病驥敢望重騰驤。日曛稍退冕驚行。小山叢竹堂東廂。呼兒深炷銅爐香。楚騷爲我祓不祥。

休日感興

宦海風波實飽經。久將人世寄郵亭。家無釵澤窮馮衍。身著襦裙老管寧。藥圃按行新蔓綠。書樓徙倚暮山青。偶然得句悲誰屬。零落交朋比曉星。

病中偶書

燈火青熒古屋深。挂冠境界已駸駸。竹枝影瘦橫殘月。藥杵聲寒續暮砧。病覺死生真大事。老知道德愧初心。經龕禪版殊當勉。懶學莎蛩事苦吟。

寒夜

脫葉爭辭木。寒雲巧護霜。羈遊少驪樂。短景極忽忙。吟苦蟲催織。鳴哀雁斷行。幽懷誰晤語。惆悵恨此燈光。

雪中獨酌

金尊玉盞有何好。不堪生世匆匆老。朱顏忽已謝晨鏡。白骨行看閉秋草。駭浪嗔風作之蛟。龍血人以爲嬉。畏塗寄命三十載。賴有痛飲舒吾悲。莫驚醉眼烟如電。假賊猶堪行督戰。指麾突騎取遼陽。雪灑轅門夜傳箭。

送客

長亭柳漸柔。送客當閑遊。江近聞津鼓。雲開見戍樓。簿書來袞袞。歲月去悠悠。閉眼尋歸路。春蕪滿故疇。

新晴

宿雨解殘雪。新春侵故年。和風拆冰鱗。淡日弄窗妍。心事綠尊裏。歲華烏帽邊。今朝我病減。隨處一欣然。

出城

翩飄烏帽出林垌。掠面風微酒半醒。戍火難尋玉關夢。衣塵空愧草堂靈。天晴山雪明城郭。水漲江流近驛亭。客鬢不如堤上柳。數枝春動又青青。

立春日送客郊外

短鬢那禁歲月催。勝邊花底又春回。雪消漸暖青鸞日。冰解初橫玉鑑梅。江驛軒窗臨古道。市樓絃管賣新醅。自憐病守無歡意。一笑常因送客來。

大雪自夜至旦欲午始晴

薄暮雪雲低。清宵氣慘悽。方聽打窗急。已報與階齊。疎箔穿飛蝶。空庭聚戲兒。新晴思訪客。愁絕滿城泥。

雪夜有感

狂膽輪囷欲滿驅。一麾誰憫滯江湖。青衫曾奏三千牘。白首猶思丈二笏。龍虎翔空瞻王氣。大羊度漠避天誅。何時冒雪趨行殿。香案前頭進陣圖。

雪中忽起從戎之興戲作

狐裘臥載錦駝車。酒醒冰髭結亂珠。三尺馬鞭裝白玉。雪中畫字草軍書。

又

鐵馬渡河風破肉。雲梯攻壘雪平壕。獸奔鳥散何勞逐。直斬單于覈寶刀。

又

十萬貔貅出羽林。橫空殺氣結層陰。桑乾沙土初飛雪。未到幽州一丈深。

又

羣胡束手仗天亡。棄甲縱橫滿戰場。雪上急追奔馬迹。官軍夜半入遼陽。

十二月二十七日祭風師歸道中作

虎豹生憎上九關。諸公袞袞遂難攀。面顏已老塵埃裏。精力虛捐簿領間。束帶敢言趨玉陛。橫戈猶憶戍天山。新春自笑摧頽甚。鼓吹東風拜胙還。

春晴

南陌爭牛事已非。綵山又近放燈期。風和已染柳千縷。山冷未開茶一旗。酒病況當人別後。春光偏在雪

晴時道傍笑我清狂在馬上看山細詠詩

丁未正月春色已粲然露坐高風堂北觀種花

苦寒不解歲嶢嶢病守兀坐憂疲氓天風誰遣撼斗柄便覺春色來江城北山賽廟見殘雪東津送客聞新鶯衣裳漸減體殊健簾幙乍捲眼爲明今朝天氣更佳絕淡日微漏雲徐行我移胡床坐庭下幅巾半脫筇枝橫散關旌旗掃昨夢少城絲竹眞前生數株桃杏亦漫種未去與汝聊逢迎

燕堂春夜

南樓統紉下疎更一點紗籠滿院明映月疎梅入簾影讀書穉子隔窗聲呻吟藥裹身事久汛掃胡塵意未平草檄北征今二紀山城仍是老書生游嘗爲丞相陳魯公史魏公樞相張魏公草中原及西夏書檄於都堂

早春池上作

疎嬾元當與世辭殘年況近乞身期一官空作讀書祟五斗不供沽酒資冰拆野塘初澹澹雪殘芳草已離離物華似有平生舊不待招呼盡入詩

感興

文章天所祕賦予均功名吾嘗考在昔頗見造物情離堆太史公青蓮老先生悲鳴伏櫪驥躡蹀失水鯨飽以五車讀勞以萬里行險艱外備嘗憤鬱中不平山川與風俗雜錯而交并邦家志忠孝人鬼參幽明感慨發奇節涵養出正聲故其所述作浩浩河流傾豈惟配詩書自足齊謏誣我衰敢讓此長歌涕縱橫

東齋偶書

華髮蕭蕭不滿簪，強扶衰病著朝衫。寒廳靜似阿蘭若，佳客少於優鉢曇。詩酒放懷窮亦樂，文移肆罵老難堪。棄官若遂飄然計，不死揚州死劍南。顧況詩云：人生只合揚州死，而余嘗有歸蜀之意。

丁未上元月色達曉如晝予齋居屬武車領客

此夕幾年無此晴，碧天萬里月徐行。官廳賣酒傾千斛，市里行歌徹五更。潼酪獨烹曾臥美，蕃鶯弱照佛龕明。頽然坐睡君無笑，寶馬香車事隔生。

自郊外歸北望譙樓

天上何年墮翠蚪，屈蟠爪尾護吾州。重門雨細旌旗溼，危堞風高鼓角遒。漠漠川雲昏佛塔，涓涓野水入農疇。曠懷不耐微官縛，擬脫朝衫換釣舟。

馬上作

平橋小陌雨初收，淡日穿雲翠靄浮。楊柳不遮春色斷，一枝紅杏出牆頭。

還舍

曠欲銜盃樂太平，新愁還續舊愁生。出門始覺春來早，處處簾櫳笑語聲。

杏花

江城開歲風雨頻，閉閣不出俄經旬。忽逢國豔帶卯酒，坐覺天地無餘春。芳敷正當晨露重，盛麗欲擅年華新。數株欹斜傍山驛，一簇深淺臨煙津。徘徊跋馬不忍去，只恐飄墮隨車塵。念當載酒醉花下，破曉啼

鷺先喚人

兩京

兩京煙柳厭胡塵。又見淳熙十四春。薄命遭回猶許國。孤忠懇款欲忘身。蘇君落魄黃金盡。褚令悲傷白髮新。曾向延和隨仗入。至今殿檻夢嶙峋。

贈表弟江參議

襄州參議真豪傑。熟視華途嬾著鞭。奪得鸞篋花裏活。皎如玉樹酒中仙。才高狗監無人薦。句好雞林有客傳。江弟今居四明。老去眼邊親舊少。津亭少爲繫歸船。

讀書

束髮論交一世豪。暮年頗願困蓬蒿。文辭博士書驢券。職事參軍判馬曹。病裏猶須看周易。醉中亦復讀離騷。若爲可奈功名念。試覓并州快剪刀。

夜登千峯樹

夷甫諸人骨作塵。至今黃屋尙東巡。度兵大峴非無策。收泣新亭要有人。薄醪不澆胸壘塊。壯圖空負膽輪困。危樓插斗山銜月。徒倚長歌一愴神。

旬日公事頗簡喜而有賦

社近樓臺晝已長。豐年頗減簿書忙。雨催樹綠吹簫陌。日射塵紅擊鞠場。農事漸與初浸種。吏衙早退獨焚香。晚來別有歡然處。檢教兒書又一箱。杜牧之寄小姪阿宜詩云。一日讀十紙。一月說一箱。

聞鼓角感懷

鼓坎坎角鳴鳴。四鼓欲盡五鼓初。老眼不寐如鰈魚。撫枕起坐涕泗濡。平生空讀萬卷書。白首不識承明廡。時多通材臣腐儒。安懷孤忠策則疎。欲剖丹心奏公車。論罪萬死尙有餘。雷霆願復寬與許。臣指陳輿地圖億萬遺民望來蘇。藝祖有命行天誅。皇明如日詎敢誣。拜手乞賜文二爰。中原煙塵一掃除。龍舟泝泝還東都。

社日小飲

催花初過社。公雨對酒喜烹溪友魚。儘道亂山窮絕處。年華未覺異吾廬。

又

社雨霏霏溼杏花。農家分喜到州家。蒼鵝戲處塘初滿。黃犢歸時日欲斜。

昔日

昔日從戎日。身由許國輕。陣如新月偃。箭作餓鷓鳴。堅壁臨關守。連營並渭耕。至今悲義士。書帛報番情。予在興元日。長安將吏以申狀至。宣撫司皆輟彈方四五寸絹。處中勛息必具報。

新晴

雨斷歸雲急。沙乾步履輕。風花嬌作態。野水細無聲。社酒家家醉。春蕪處處耕。今朝公事少。一笑賦新晴。

倚欄

閑岸紗巾小倚欄。吳中三月尙春寒。蜂脾蜜滿花初過。燕糞泥新雨未乾。老厭簿書思屏迹。病逢節物強

追歡一樽又動流年感。城上斜陽畫角殘。

寄徑山印禪師

市朝聲利戰方酣。眼看紛紛每不堪。但有客誇車九九。了無人問衆三三。會當身返東西蜀。要與公分上下菴。趙州有上菴菴主。下菴菴主語。春枕悠然夢何許。兩枝筇杖喚魚潭。喚魚潭在眉山中巖。客至撫掌。魚輒翠出。

園中歸戲作

醉裏來尋澗上花。已飄殘雪散餘霞。麴生也解欺人老。風伯無端妬物華。不恨童心伴蜂蝶。但愁病眼厭風沙。歸來隱几東窗下。一卷黃庭送日斜。

春曉東郊送客

雨餘氣清潤。迨我送客時。翻翻車蓋風。五里城東陂。初旭斂花房。晨露流桐枝。南山卷溼翠。更覺光景奇。澄潭集魚艇。村路亞酒旗。欲歸且復留。造物成吾詩。

暮春歎

春深桃李爭時節。千團紅雲萬堆雪。東風一夜吹欲空。曲徑平池爛如纈。城門獵獵雙青旗。羲和促轡西南馳。中原未有澄清日。志士虛捐少壯時。

曉雨

平明小雨壓香塵。遠舍扶疎綠漸勻。睡過花時慵著句。老來春事不關身。

東風吹雨送殘春。冉冉年光次第新。君看枝頭如許綠。爭教桃李不成塵。

又

登千峯樹

飛觀危欄縹緲中。聊將醉眼送歸鴻。一生未售屠龍技。萬里猶思汗馬功。王衍諸人寧足責。姜維豎子自應窮。他年弔古憑高處。想見清伊照碧嵩。

晚春園中作

少逢春歸未解悲。千篇曾賦傷春詩。可堪霜點鬢鬢後。更值綠暗園林時。楊花輕墮簷外影。杏子重壓闌邊枝。毬場立馬漏聲靜。綺窗語燕簷陰移。向來春事渺何許。長空鳥跡何由追。鞦韆未拆已寥寞。日暮東風吹綵旗。

北窗

小雨霏霏旋作晴。北窗清潤綠陰成。却緣政拙文書少。臥聽簾櫳燕子聲。

浮生

浮生過六十。百念已頽然。獨有耽書癖。猶同總角年。橫陳糲飯側。朗誦短檠前。不用嘲癡絕。兒曹尚可傳。

小壘

小壘荒寒外。高齋寂寞中。貧妨挂冠快。病減讀書功。橋斷春江白。雲穿夕照紅。悠然扶杖處。歲月歎恩恩。

大閱後一日作假

小院鈞簾掃落花。公餘蕭散似山家。下巖紫壁臨章草。正焙蒼龍試貢茶。塞上遠遊心尙壯。車中深閉髮先華。老來日月真堪惜。愁聽高城咽暮笳。

自嘲

貪祿忘歸祿。自羞一窗且復送悠悠。鏡明不爲人藏老。酒薄難供客散愁。正得虛名真畫餅。元非大器愧函牛。年來事業知君否。高束詩書學問囚。

曉出東城

聽徹清笳聽曉鐘。據鞍漏鼓尙寥寥。西樓落日徑三尺。北嶺亂雲生半峯。蒼磴幽尋過古寺。綠疇小駐勞春農。煙村已遠猶回首。恐有鷓鴣與伏龍。

初夏遇休日園中閑賦

青山園女牆。細草滿毬場。虛簷搖水影。曲檻吹蘋香。房櫳寂無人。雙燕說曉涼。賜休無公事。蕭散寄一床。久苦吏役拘。更知閑味長。桑空繭綴簇。陂滿稻吐秧。良時動人懷。東望一慨慷。寧當戀微祿。如鼠死太倉。

小雨出西門五里至東嶽廟

埋沒文書每自憐。偷閑出郭一欣然。稻陂雨細豐年候。槐陌風清嫩暑天。心似春鴻寧久住。身如秋扇合長捐。平生士雅今亡恙。老病何由共著鞭。

初夏燕堂睡起

歌風平生類楚狂。山城遲暮得深藏。洗春雨過清陰合。掠水風生綠藻涼。晨几硯凹涵墨色。午窗盃面聚

茶香功名到手渾閑事。此與他年未易忘。

晡後領客僅見燭而罷戲作短歌

忍睡出坐衙。扶病起觴客。本來世味薄。況復酒戶迮。譚諄時強語。崑昂已頽帽。燒燭不盈寸。歸臥弄書冊。我來未穫稻。客裏今食麥。恨望稽山雲。飛去無六翮。

讀宛陵先生詩

歐尹追還六籍醇。先生詩律擅雄渾。導河積石源流正。維嶽崧高氣象尊。玉聲漻漻非俗好。霜松鬱鬱有春溫。向來不導無譏評。敢保諸人未及門。

書歎

人生如春蠶。作繭自纏裹。一朝眉羽成。鑽破亦在我。少年不自珍。妄念然烈火。眼亂舞腰輕。心醉笑齒磔。餘齡幸早悟。世味無一可。但憶喚山僧。煎茶陳餅果。

卷第十九

曉出南山

久向人間觸駭機。斂收孤迹早宜歸。亡羊未恨補牢晚。搏虎深知攘臂非。明月長庚天欲曉。新桐清露暑猶微。扁舟蓑笠平生事。莫羨黃金帶十圍。

聞韓无咎下世

書劍飄然去國時。南隴陵郡日題詩。吳波漲綠迎桃葉。穠燭堆紅按柘枝。故友去爲山下土。衰翁何恨鬢邊絲。憑高老淚無揮處。神武衣冠挂已遲。

官居書事

早涉人間足畏塗。一麾投老向江湖。年光已上星星鬢。日力猶供急急符。本自陽狂無藉在。更堪羸病不枝梧。滅胡意氣嗟誰許。淚盡神州赤縣圖。

又

走逼人間老更窮。強尋一笑與誰同。簿書袞袞呻吟裏。歌舞紛紛困睡中。手版倒持悲末路。寒江獨釣媿高風。知心賴有譚夫子。時遣書來問放翁。比較得譚德稱書。

夏日北榭賦詩弈棋欣然有作

異事嚴州省見稀。幅巾闌角立多時。青林白鳥自成畫。急雨好風當有詩。酷信醫方逢酒怯。強驅吏牘坐衙遲。悠然笑向山僧說。又得浮生一局碁。

謁告歸臥晚登子城

此身真是抱官囚。厭見長空赤日流。齋壁曉山千嶂雪。扇紈新雁一汀秋。繫船空作清湘夢。御氣難尋太華遊。菱角藕絲還恨少。強攜玉盞醉高樓。

迓使客出郊夜歸過市樓

山川慘澹作秋霖。雲物徘徊結夕陰。手版向人慚老大。肩輿出郭嘗登臨。二年雪瀨饒羈思。萬里冰河歇

壯心却羨喧呼樓上客。隔簾紅燭醉更深。

秋夜登千峯榭待曉

萬里秋風夜艾時。刻川孤客不勝悲。讀書眼暗定誰許。憂國涕零空自知。欲墜高梧先策策。漸低北斗正離離。倚闌不覺雞號曉。剪燭題詩寄所思。

九月初郊行

九月吳中尚袂衣。江郊策馬踏斜暉。薔花漫漫連山路。豆莢離離映版扉。蒼兔避鷹投罟去。黃鸝脫網傍人飛。農家光景關心事。不爲無才也合歸。

衰病

衰病龍鍾已要扶。誰憐猶作折腰趨。世無魯國真男子。心憶高陽舊酒徒。萬里秋風吹鬢髮。百年世事歎頭顱。桐江久客無奇句。瓜負君王乞左符。

書意

一鳴輒斥不鳴烹。禍福元知未易評。湖海淒涼身跌宕。盆觴豪舉筆縱橫。敢希二頃成高臥。但願諸公致太平。波暖龍舟沂清汴。道邊扶杖眼猶明。

秋懷

策策桐葉風。濛濛菊花雨。空堂一燈青。幽壁百蟲語。嗟余豈願仕。老病歸無所。屈指計歲年。強半墮羈旅。荷戈北戍秦。挂席西適楚。名慚垂竹帛。文不諧律呂。所餘惟一死。忍復類兒女。金丹或可成。青霄渺輕舉。

過村店有感

細篋絡丹柿。枯籬懸碧花。炊煙生旅竈。野水激寒沙。棲鳥爭投樹。歸牛自識家。恍然遊蜀路。搔首憶天涯。

嚴州大閱

鐵騎森森帕首紅。角聲旗影夕陽中。雖慚江左繁雄郡。白樂天詩云。雪川何寂莫。茂苑大繁雄。且看人間。豐鑠翁。清渭十年真昨夢。玉關萬里又秋風。憑鞍撩動功名意。未恨猿驚蕙帳空。

後園閑步

木葉勾萌喜小春。鬢毛蕭颯媿陳人。今朝忽破籀書夢。此地暫還風月身。閉岸綸巾照清淺。却扶藤杖上嶙峋。人生要是便疎豁。金馬銀臺莫問津。

照潺湲閣下池水

平生不鑷白霜雪。滿鬢眉。照水默自笑。已迫溝壑期。慨然念歸休。不計妻子飢。渠飢亦有命。我節詎可移。自我來桐江。實無負。惻整。譏波如崩山。孤迹則已危。陸子定何人。正恐君未知。午枕夢剡曲。秋風吹釣絲。

秋郊有懷

漫漫蕎麥花。如雪覆平野。離離豆子莢。數枝忽堪把。頗憶故鄉時。屏迹謝車馬。水宿依蟹舍。泥行沒牛脰。作勞歸薄暮。濁酒傾老瓦。縷飛綠鮒膾。花簇頰鯉鮓。棄官雖未決。世念亦已已。浩歌續楚狂。幽懷欣獨寫。

又

檐頭買雙兔。市店取斗酒。還家掃北窗。歡言酌親友。家貧氣未餒。禮薄情更厚。高吟金石裂。健筆龍蛇走。

酒闌起出門。孤月挂衰柳。大笑各散歸。吾輩可不朽。官身縛簡書。此樂寧復有。恨望秦稽雲。憑高一搔首。

又

楚人固多孱。妄謂秋可悲。寧知河嶽間。氣俗樂此時。壯士鳴雕弓。健馬嚼枯萁。日馳三百里。榆關赴戰期。陣雲壓龍庭。殺氣搖參旗。熾火燎狐鬼。倒瀉黃金卮。勒銘燕然石。千載鎮胡兒。安能空山裏。凍研哦清詩。

又

秋山瘦益奇。秋水淺可涉。出城西風勁。拂帽吹脫葉。新霜拆栗罅。宿雨飽豆莢。枯柳無鳴蜩。寒花有穿蝶。郊行得幽曠。頗覺耳目愜。斷雲北山來。欣然與之接。挂冠易事爾。看鏡歎勳業。永懷桑乾河。夜渡擁馬鬣。

夙興

喔喔老雞催落月。丁丁殘漏伴斜河。一盃淡口寒燈下。還與山僧不校多。

聽事望馬目山

官身早暮不容閑。塵土堆胸媿滿顏。也有向人誇說處。坐衙常對水南山。

秋興

滿簪白髮不勝繁。竊祿偷安媿主恩。東館煙波秋漸瘦。北山霧雨晝多昏。功名蹭蹬身長棄。籌策瀾翻舌幸存。堪笑此生虛過盡。一秋閉閣聽啼猿。

又

孤城寂寞近江干。處處疎碓送早寒。水落纔餘半篙綠。霜高初染一林丹。民租屢減追胥少。吏責全輕法

令寬偶有一樽聊獨醉。強投黃菊助清歡。

久無暇近書卷。慨然有作。

少年喜讀書。事業期不朽。致君頗自許。書卷常在手。白頭乞鍾釜。坐使此心負。朝衙有達午。夕坐或過酉。文符苦酬對。迎餞厭奔走。直憂先狗馬。豈但凋蒲柳。永懷簡編香。更覺冠冕醜。飢餐一簞飯。悶酌一卮酒。吟哦從所好。貧賤亦何有。余悔已莫追。寄謝故山友。

嚴州多菊。然率過重陽方開。或舉東坡先生菊花開時。卽重陽之語。余謂此猶是未忘重陽者。恐此花不肯也。戲作一絕。

無人喚醒賦歸翁。滿把清香誰與同。但辦對花頻舉酒。莫橫重九在胸中。

地僻

地僻天教養散材。流年沉著鬢毛催。青山自繞孤城去。畫角常隨晚照來。几淨雙鉤摹古帖。鑿香小啜試新醅。乘槎不是英纏遠。無奈先生興盡回。

吏責

吏責何時得暫停。年來減盡鬢邊青。高談正樂催迎客。美睡方酣報掣鈴。安得雲山長在眼。便從樵牧與忘形。詩成不用頻悵悵。自古籠禽例翦翎。

張時可直閣書報已得請奉祠。雲臺作長句賀之。

燈前一笑拆書開。喜見冰銜洗俗埃。丞相苦留猶不住。諸公欲挽固難回。玩鷗有約間何闕。斂版無聊歸

去來千載伏波應。太息輸君談笑上雲臺。

累日文符沓至。悵然有感。

豪氣人言苦不除。固應屏迹向江湖。封侯萬里獨心在。餬口四方何事無。薄俗更堪開眼看。老翁寧辦折腰趨鼠肝。蟲臂今無擇付與乾坤造化爐。

又

白首逢人只累歎。今雖未是昨真非。文章才盡欲焚稿。仕宦興闈當拂衣。浪出自應爲後戒。放言那計墮危機。遼天華表蒼茫裏。千載何人識令威。

又

三十年爲一世人。孤城夢斷洛陽塵。游秦朔述今二十有八年矣。強顏嬾復看人面。何地真堪著此身。白骨久埋金谷友。黃花尙醉葛天民。嚴光釣瀨雖亡恙。除却江山萬事新。

大風

初聞瀕洞怒濤翻。徐聽驂驪戰馬奔。紙帳蒲團坐清夜。恍如身在若耶村。

冬夜讀書

退食淡無事。一窗寬有餘。重尋總角夢。却對短檠書。功業雖蹉跎。光陰且破除。更須求半偈。回向此心初。

再用前韻不以次

壯心雖迫老。吏責未妨書。言議思公瑾。英雄陋本初。移燈近牀榻。聽雨落階除。回首山南戍。流年一紀餘。

思歸

短髮今年雪滿巾。一盃且醉瓮中春。定無術致長生藥。那得愁供有限身。碎枕不求名利夢。挽河盡洗簿書塵。江湖意決君知否。致主唐虞自有入。

喜小兒病愈

喜見吾家玉雪兒。今朝竹馬遶廊嬉。也知笠澤家風在。十歲能吟病起詩。釋紹作病起詩一首。

又

一牀共置朝回笏。百屋常堆用剩錢。何似吾家好兒子。吟哦相伴短檠前。

初冬風雨驟寒作短歌

東園日淡雲容薄。綸巾朝暮闌干角。北風動地萬木號。不料一寒如此惡。豈惟半夜雨打窗。便恐明朝雪平壑。綠酒雖滴亦復醉。早貂已弊猶堪著。所嗟此身老益窮。踏蹬無功上麟閣。久從漁艇寄江湖。坐看胡塵暗幽朔。萬鞭枯蒿憤未平。纒下老會何足縛。要及今年墮指寒。夜擁雕戈度窮漠。

余年二十時嘗作菊枕詩頗傳於人。今秋偶復采菊縫枕囊。悽然有感。

采得黃花作枕囊。曲屏深幌闕幽香。喚回四十二年夢。燈暗無人說斷腸。

又

少日曾題菊枕詩。蠶編殘稿鎖蛛絲。人間萬事消磨盡。只有清香似舊時。

陶淵明云。三徑就荒松菊猶存。蓋以菊配松也。余讀而感之。因賦此詩。

菊花如端人。獨立凌冰霜。名紀先秦書。功標列仙方。紛紛零落中。見此數枝黃。高情守幽貞。大節凜介剛。乃知淵明意。不爲汎酒觴。折嗅三歎息。歲晚彌芬芳。

蕎麥初熟刈者滿野喜而有作

城南城北如鋪雪。原野家家種蕎麥。霜晴收斂少在家。餅餌今冬不憂窄。胡麻壓油油更香。油新餅美爭先嘗。獵歸熾火燎雉兔。相呼置酒喜欲狂。陌上行歌忘惡歲。小婦紅粧穗簪髻。詔書寬大與天通。逐熟淮南幾誤計。

有自蜀來者因感舊遊作短歌

錦城如海行不極。馬迹重重車轂擊。家住城西三十年。聞說城東未曾識。看花走馬宿中路。經月酒徒無覓處。露香風暖海棠開。碧雞坊中倘相遇。放翁顛鬢髮成絲。空有西遊千首詩。今朝雨霽上危樹。意氣頗如年少時。持盃欲作消愁計。酒未著人愁已醉。不成題句寫幽情。一幅蛟緜空寄淚。

東吳女兒曲

東吳女兒語如鶯。十三不肯學吹笙。鏡奩初喜稱蠶出。窗眼已看雙繭成。庭空日暖花自舞。簾卷巢乾燕新乳。阿弟貪書下學遲。獨掠詩章教鸚鵡。

雨夕

歲旱連夏秋。客袂厭塵土。欣然成一笑。愛此清夜雨。瓦檠墮燈燼。銅碗起香縷。心清病良已。境寂句欲吐。東溪久枯涸。想像素蛟舞。分喜到溝池。遊魚命儻侶。

晚遊東園

藥瓢藜杖合施行，獨往山林已畝盟。
傍水斷雲含暮色，拂簷高竹借秋聲。
癡人自作浮生夢，腐骨那須後世名。
莫笑吟哦無闕日，老來未盡獨詩情。

小雨

小雨暗林塘，寒聲透畫廊。
事須求暫假，宜睡稱燒香。
事須二字，蓋唐人公移中語也。

初寒在告有感

掃地燒香興未闌，一年佳處是初寒。
銀毫地綠茶膏嫩，玉斗絲紅墨瀋寬。
俗事不教來眼境，閑愁那許上眉端。
數櫺留得西窗日，更取丹經展卷看。

又

豪舉當年氣吐虹，卽今顛顛一衰翁。
寄懷本自俗塵外，移病何妨寒雨中。
香暖候知銀葉透，酒清看似玉船空。
故人吳蜀音塵斷，安得相攜一笑同。

又

橫林吹葉水生洲，身落窮山古陸州。
到枕雨聲酣旅夢，背窗燈影動清愁。
氣衝星斗有孤劍，力挽棟梁無萬牛。
未減匈奴身已老，此生虛負櫪中籌。

馬上作

白髮憑鞍一老翁，出門漏鼓尚寥寥。
淒涼旅思傳呼裏，零落新詩假寐中。
正苦文移來陸續，何由笠釣入

空濛浮生正自少如意付與秋風吹斷蓬

冬夜聞角聲

嫋嫋清笳入雲雲白頭老守臥中軍自憐到死懷遺恨不向居延塞外聞

又

憶在桑州夜雪深落梅聲裏玉關心山城老去功名忤臥對寒燈淚滿襟

塞上曲

茫茫大磧吁可嗟暮春積雪草未芽明月如霜照白骨惡風卷地吹黃沙駝鳴喜見泉脈出雁起低傍寒雲斜窮荒萬里無斥堠天地自古分夷華青氈紅錦雙奚車上有胡姬抱琵琶犯邊殺汝不遺種千年萬年朝漢家

荊州歌

楚江鱗鱗綠如釀御尾江邊繫朱舫東征打鼓挂高帆西上湯豬聯百丈伏波古廟占好風武昌白帝在眼中倚樓女兒笑迎客清歌未盡千觴空沙頭巷陌三千家煙雨冥冥開橘花映人住多楚人少土鑿爭餉菜莢茶

冬夜讀書

挑燈夜讀書油涸意未已亦知夜既分未忍捨之起人生各有好吾癖正如此所求衣食足安穩住鄉里茆屋三四間充棟貯經史四傍設几案坐倦時徒倚無聲九韶奏有味八珍美癡衲籤硤間自適以須死

豈惟畢吾身。尙可傳兒子。此心何時遂。感歎歲月駛。

寓歎

江上霜風透弊袍。區區無奈簿書勞。衰遲始憶壯遊樂。仕宦更知歸臥高。人怪羊裘忘富貴。我從牛僧得寶豪。俗間問訊真成癩。有手惟堪把蟹螯。

又

劍外歸耕夢不通。公車上疏路何從。有心求縮地。萬里無羽可朝天。九重狂誦新詩驅瘧鬼。醉吹橫笛舞神龍。明當采藥玉霄去。他日君看冰雪容。

燕堂東偏一室頗深暖。盡日率困於吏牘。比夜乃得讀書。其間戲作。

衰衰流年往。匆匆短景過。簾深上燈早。地窄貯香多。書盡還重讀。詩成更自哦。向令無此處。將奈旅愁何。

又

賦性無他好。開編喜欲迷。琴琴傳夜漏。喔喔待晨雞。油滅玉蟲暗。灰深紅獸低。悠然撫書歎。無術濟黔黎。

懷鏡中故廬

永夜東齋裏。人聲靜不譁。衣篝起香穗。書几落燈花。爐暖聽寒雨。窗明送曉鷗。文章空自苦。白首不名家。臨水依山偶。占家數間。芴屋半欹斜。雲邊腰斧入秦望。雨外舞蓑歸若耶。從宦只思乘下澤。忤人常悔讀南華。病來更怯還鄉步。頻驚簾泉試露芽。

書感

丈夫本願脫世鞿。丹成晝日凌空飛。纓冠佩玉朝紫微。白銀宮闕瞻巍巍。不然萬里將天威。提兵直解邊城圍。直宿滿川胡馬肥。掩取不遺一騎歸。苦心文章亦未非。與此二事同一機。寥寥千載見亦稀。莊屈已死吾疇依。哀哉窮子百家衣。豈識萬斛傾珠玑。欲洗薄蝕還光輝。熟睨無力空歎歎。

對酒

新酥鵝兒黃。珍橘金彈香。天公憐寂寞。勞我以一觴。胸中萬卷書。老不施毫芒。持酒一澆之。與汝俱深藏。生當老窮巷。死埋南山岡。古來共如此。已矣庸何傷。

夢歸

老去無餘念。時時夢弊廬。細傾新釀酒。盡讀舊藏書。雲幢鉏奮粟。煙畦挽野蔬。從渠造物巧。賦芋戲羣狙。

蜀使歸寄青城上官道人
輕別青城十二年。至今客枕夢林泉。一盃松屑齋前進。兩卷丹經肘後傳。欲與公爲塵外侶。幾時身上峽中船。世間牛蟻何勞問。輸與雲窗一粲然。上官常稱病。憤對客一笑而已。

寄成都蓮道人

賣藥錦城中。燒丹雪山麓。石竇取鵝管。玉床收箭鏃。紫雲晨覆鼎。白虹夜穿屋。鬼神嚴厲守。沉瀝勤沐浴。此士真可人。高簡遺世俗。江頭十年別。顏色炯在目。使來每寄聲。喜我淡無欲。靈劑何必多。分餉一黍足。寄邛州宋道人宋與余在臨邛鴨舖同遇異人宋遂棄官學道。

鴨翎舖前遇秋雨，獨與宋生棲逆旅。坐門憐悅見老仙，劇談氣欲凌天宇。袖中出劍秋水流，血點斑斑新報仇。我醉高歌宋生舞，洗盡人間千古愁。老仙約我遊太華，是夕當醉蓮峯下。語終冉冉已雲霄，萬里秋風吹鶴駕。我今伶俜踐衰境，不如宋生棄家猛。西望臨邛一慨然，青松偃盡丹爐冷。

小齋壁間張王子喬梅子真李八百許旌陽及近時得道諸仙像，每焚香對之，因賦長句。

山城作吏老堪羞，衫色塵昏髮色秋。斂版那供新貴使，閉門聊與數公遊。至人不死閱千劫，大海無窮環九州。安得相攜從此逝，醉騎丹鳳下玄洲。

芳草曲

蜀山深處逢孤驛，缺甃頽垣芳艸碧。家在江南妻子病，離鄉半歲無消息。長安城門西去路，細鶻斜陽芳草暮。尊前一曲渭城歌，馬蹄萬里交河戍。人生誤計覓封侯，芳草愁人春復秋。只願東行至滄海，路窮草斷始無愁。

烏龍廟

江邊蒼龍背負天，蟠踞千載常蜿蜒。其前橫關爲大州，高城鼓角聲隱然。龍廟於山家於淵，世爲吾州作豐年。老守雖愧筆如椽，潔齋試賦迎神篇。

寒夜移疾

南山北山高嶙峋，朝雨暮雨斷江津。時人正作市朝夢，老子已成雲水身。希世強顏心自媿，閉門謝病客生嗔。天公何日與一飽，短艇湘湖自采蓴。湘湖在蕭山縣，產蓴絕美。

又

走遍天涯白髮生。晚明微祿臥山城。知章自識狂供奉。士季那容醉步兵。斷藥有時攜短鏡。奏書無路請長纓。此心擬說還休去。付與空堦夜雨聲。

寒夜讀書

北窗暖焙滿爐紅。夜半濤翻古檜風。老死愛書心不厭。來生恐墮蠹魚中。

又

韋編屢絕鐵硯穿。口誦手鈔那計年。不是愛書即欲死。任從人笑作書顛。

又

憶昨從戎出渭濱。秋風金鼓震咸秦。齋肩竟欠封侯相。三尺檠邊老此身。

有爲予言烏龍高嶮不可到處。有僧巖居不知其年。予每登千峯樹望之。慨然爲作二詩。

樵子向予說。有僧巢翠微。巖扉雲共宿。錫杖鶴同飛。日暮松明火。天寒樹葉衣。棄官從此逝。非子尙誰歸。

又

嶮絕無微徑。淙澗有細流。寒巖依作屋。墮毳拾爲裘。木客求相識。毛人約共遊。百年如一瞬。塵世幾公侯。

楊庭秀寄南海集

俗子與人隔塵劫。何啻相逢風馬牛。夜讀楊卿南海句。始知天下有高流。

又

飛卿數闋嶠南曲。不許劉郎誇竹枝。四百年來無復繼。如今始有此翁詩。溫飛卿南鄉子九首其工不減
夢得竹枝。

夜坐示桑甥十韻

好詩如靈丹。不雜羶葷腸。子誠欲得之。潔齋戒不祥。食飲屑白玉。沐浴春蘭芳。蛟龍起久蟄。鴻鶴參高翔。縱橫開武庫。浩蕩發太倉。大巧謝雕琢。至剛反摧藏。一技均道妙。桃心詎能當。結纓與易箒。至死猶自強。東山七月篇。萬古真文章。天下有精識。吾言豈荒唐。

夢回

病骨便衾暖。羈懷怯夢回。鐘殘燈燼落。香冷雨聲來。老抱憂時志。狂非濟世材。明朝入冬假。燒兔薦新醅。

醉中草書因戲作此詩

賜休暫解簿書圍。醉草今年頗入微。手挹凍醪秋露重。卷翻狂墨瘦蛟飛。臨池勤苦今安有。漏壁工夫古亦稀。穉子問翁新悟處。欲言直恐泄天機。

閑步至鞠場值小雪

倒盡床頭酒半罍。笑呼筇杖共閑行。梅花照水爲誰瘦。雪片倚風如許輕。孟德遇冬思射獵。廣文垂老謝才名。歸來跨火西窗下。獨數城樓長短更。

張季長學士自興元遣人來因詢梁益間事悵然有感

長記殘春入蜀時。嘉陵江上雨霏微。垂頭驢瘦悲鈴馱。截道狐奔脫獵圍。曉度市橋花欲語。晚投山驛石

能飛。杜鵑言語元無據。梅作東吳萬里歸。

東齋夜興

山城殘角伴疎鐘。擁褐頽然一病翁。紙帳燈明覺龜甲。銅瓶火熟起松風。雨來尤覺睡味美。酒後不知愁思空。忽憶江湖泊船夜。號鳴避弋鬧羣鴻。

烏龍雪

烏龍如真龍。安尾臥江濱。時時登樓望。爪尾略可識。今朝事大異。千嶂忽如失。遙知重雲外。已有雪數尺。頗念采薇人。清坐焉得食。裹飯欲問之。矯首空峭壁。念昔故山時。僵臥風雪夕。靜聞長松折。聲若裂巨石。天晴視巖澗。鳥獸死如積。清夢不可尋。撫楯三太息。

曉出東城馬上作

曉出東城數幟紅。蒙茸狐貉擁衰翁。郊墟歎歲蕭條後。風雪窮冬慘淡中。耐辱已慚非士節。端憂未辦濟民窮。誕欺成俗真當懼。誰挽天河一洗空。

與建子振孫登千峯樹觀烏龍雪

二稊慧堪憐。猶除志學年。能拋竹屐屐。來看玉蜿蜒。百念寬身後。餘生慰眼前。善和書幸在。它日要人傳。

述懷

尺寸雖無補縣官。此心炯炯實如丹。羯胡未滅敢愛死。尊酒在前終鮮歡。亞父抱忠撞玉斗。虞人守節待皮冠。縱言老病摧頽甚。壯氣猶憑後代看。

又

謗譽紛紛笑殺儂。此身本自等虛空。大鵬境界纖塵裏。曠劫年光掣電中。翻動煙霞長鏡在。招呼風月一尊同。是凡是聖誰能測。試問西隣織履翁。禪家所謂睦州陳蒲鞵者。故居在那治之西二百步。

到嚴十五晦朔郡醜不佳。求於郡下既不時。至欲借書讀之。而寓公多秘不肯出。無以度日。殊惘惘也。

桐君故隱兩經秋。小院孤燈夜夜愁。名酒過於求。趙璧異書渾似借。荊州溪山勝處身難到。風月佳時事不休。安得連車載郭輿。金鞭重作浣花遊。

雨中獨酌

僻郡荒山下。高齋寒雨中。微波生酒綠。短焰擁爐紅。學廢悲身老。民窮祝歲豐。厨人羞雉兔。更憶喚鄰翁。維菴登盤。頗懷隣里。

被酒徑臥比覺已五鼓矣

俗事驅人挽不回。經年無地濯氛埃。酒酣稍覺客愁破。睡覺忽聞山雨來。窗外樹寒無鳥宿。壺中水暖有梅開。五更欲起先惆悵。燭下文書已作堆。

燈下讀玄真子漁歌因懷山陰故隱追擬

石帆山下雨空濛。三扇香新翠箸蓬。蘋葉綠。蓼花紅。回首功名一夢中。

又

陸放翁集 十二 劍南詩集 卷十九

晴山滴翠水接藍。聚散漁舟兩復三。橫埭北。斷橋南。側起船篷便作帆。

又

鏡湖俯仰兩青天。萬頃玻瓈一葉船。拈棹舞。擁蓑眠。不作天仙作水仙。

又

湘湖煙雨長暮絲。菰米新炊滑上匙。雲散後。月斜時。潮落舟橫醉不知。

又

長安拜免幾公卿。漁父橫眠醉未醒。煙艇小。釣車腥。遙指梅山一點青。

送客至望雲門外

冬溫頻作雨。晨冷頓催晴。嫩日滿江驛。淡煙籠郡城。憂民懷凜凜。謀已恥營營。投檄真須決。鄰翁約耦耕。

題城南堂故人陳亦顏少游四方。晚乃卜居臨安城南。因以城南名其堂。屬余賦詩。

山林恨與親友別。朝市不堪車馬喧。陳子調高無俗客。一塵卻要近修門。

又

借問城南老居士。新年樂事復何如。春寒催喚客嘗酒。夜靜臥聽兒讀書。

故山葛仙翁丹井有偃松覆其上。天矯可愛。寄題。

葛翁煉丹一千年。翁去丹飛餘此泉。炯如古鏡不拂拭。俯聽缺甃時鏘然。老龍受命護泉臥。蜿蜒直恐從天墮。人言神物老愈靈。夜半聲酣風雨過。放翁還山亦何有。閉門吟歎龍爲友。客來相對聊曲肱。但酌此

泉勝酌酒。

估客樂

長江浩浩蛟龍淵。浪花正白蹴半天。舸峨大扁望如豆。駭視未定已至前。帆席雲垂大隄外。纜索雷響高城邊。牛車鱗鱗載寶貨。磊落照市人爭傳。倡樓呼盧擲百萬。旗亭買酒價十千。公卿姓氏不曾問。安知孰乘中書權。儒生辛苦望一飽。趨趨光範祈哀憐。齒搖髮脫竟莫顧。詩書滿腹身蕭然。自看賦命如紙薄。始知估客人間樂。

楚宮行

漢水方城一何壯。大路並馳車百兩。軍書插羽擁修門。楚王正醉章華上。璇題藻井窮丹青。玉笙寶瑟聲冥冥。忽聞命駕遊七澤。萬騎動地如雷霆。清晨射獵至中夜。蒼兕玄熊紛可藉。國中壯士力已殫。秦寇東來遣誰射。

妾命薄太白作此驚言長門宮事予反之。

妾命薄。早入天家侍帷幄。君王勤儉省宴游。寶柱朱弦塵漠漠。日長別殿承恩稀。肝腸猶聞親萬機。宮中雖無珠玉賜。塞上不見煙塵飛。不須悲傷妾命薄。命薄卻令天下樂。

晚登千峯樹

只道文書無了日。也能擺撥上層臺。窗明山雪暮方作。露白野梅寒未開。老病真慚天下士。窮愁強覆掌中盃。兒曹莫怪憑闌久。得句何妨乘燭回。

晝睡

書獄徵租自笑忙，暫歸聊得憩匡床。屏圍夜雨孤舟句，枕帶秋風九日香。方睡菊花枕，一卷蠶書棲倦手。數聲殘角報斜陽，清泉浴罷西窗靜，更覺茶甌氣味長。

胸次鬱鬱偶取枯筆作狂草遂成長句

酒隱人間六十年，晚途斂板自傷憐。莊周聊寄漆園吏，梅福終爲吳市仙。方外酒徒盟尙在，囊中劍術老當傳。此心鬱屈何由豁，聊遣龍蛇落蜀牋。

休日與客燕語既去聽小兒誦書因復作草數紙

賜沐家居謝掾曹，暫將蕭散慰勤勞。琅琅應節兒書熟，矍矍生風客論高。玉屑名牋來濯錦，風濤奇石出臨洮。託盟翰墨吾安敢，揮灑淋漓自足豪。張季長寄澆研何元立寄蜀紙皆近到新定。

青城大面山中有二隱士一曰譙先生定字天授建炎初以經行召至揚州欲留之講筵不可拜通直郎直祕閣致仕今百三十餘歲巢居嶮絕人不能到而先生數年輒一出至山前人有見之者其一曰姚大尉平仲字希晏靖康初在圍城中夜將死士攻賊營不利騎驥驟逸去建炎初所在揭勝以觀察使召之竟不出淳熙甲午乙未間乃或見之於丈人觀道院亦年近九十紫髯長委地喜作草書蓋皆得道於山中云偶成五字二首託上官道人寄之

寄謝譙夫子今年一出無萬緣隨夢斷，百念與形枯雲護巢松谷神呵瓊藥爐憑高應念我，白首學徵租。

右寄譙先生

太尉關河傑。飛騰亦遇時。中原方蕩覆。大計易差池。素壁龍蛇字。空山熊豹姿。煙雲千萬疊。求訪固難知。

右寄姚太尉

累日多事不復能觀書感歎作此詩

我生無它長。所得靜而簡。出仕三十年。不殖一金產。四方到爲家。所向不容揀。南遊極巨海。西戍掠危棧。爲州亦何好。且復占仕版。俸不給淖糜。況敢事酒琰。晨興坐堂上。符檄高墜墜。藏書三萬軸。一字不到眼。胸中積磊塊。歎息誰爲鎚。浮生固如此。正可付一莞。

北窗

雲開見山雪。院靜聞松風。吏去曲肱臥。疑非塵世中。

讀范文正瀟灑桐廬郡詩戲書

桐廬朝暮苦匆匆。瀟灑寧能與昔同。堆案文書生眼黑。入京車馬漲塵紅。逢迎風月麤生事。彈壓江山毛穎功。二子年來俱埽迹。頽然堪笑一衰翁。

筍中偶得去年二月都下數詩

昨佩魚符入鳳城。春風處處聽鶯聲。欲尋舊友半爲鬼。重到西湖疑隔生。浮世正如投六博。野人何意慕三旌。嚴州戍滿真當老。猶幸爲民死太平。

感寓

人生堂堂七尺身。本與聖哲均稱人。唐虞乃可讓天下。光被萬世常如新。哀哉末俗去古遠。斷喪太朴澆。

全淳。豆羹簞食輒動色。攘竊乃至忘君親。錙銖必先計利害。詎肯冒死求成仁。不欺當從一念始。自古孝子爲忠臣。

征婦怨效唐人作

萬里安西久宿師。東風吹草又離離。玉壺貯滿傷春淚。錦字挑成寄遠詩。擊虜將軍方戰急。押衣敕使尙歸遲。粧臺寶鏡塵昏盡。髮似飛蓬自不知。

雪

瘴癘家家一洗無。更欣餘潤沃焦枯。花壺夜凍先除水。衣焙朝寒久覆爐。松頂積高時自墮。竹枝壓重欲相扶。雲開正值春風早。卻看晴光滿九衢。

寒夜思飲酒不異與綽同歌樂澄魚戲作

我老畏作病。盃酒久不持。讀書寒雨中。比夕頗思之。呼童欲洗酌。願以病自疑。清坐歎寂寞。痛飲愁淋漓。三爵醒醉間。此理當徐思。一掬琴高魚。且復伴吾兒。

縱筆

凍研笑躍儒。雖弓隱獵徒。不成平趙魏。且可老江湖。顛顛頭雖禿。輪困膽尙寬。咸陽呼五白。何遽不能盧。

又

故國吾宗廟。羣胡我寇讎。但應堅此念。寧假用它謀。望駕遺民老。忘兵志士憂。何時聞遣將。往護北平秋。

歲晚盤尊索然戲書

經年薄宦客桐廬。市邑蕭然一物無。名酒不來惟飲溼。長魚難覓且焚枯。支離鶴骨寒添瘦。宛轉龜腸夜自呼。更與兒曹同一笑。燈前短榻拆天吳。

立春前四日謝雪方拜天慶庭中雲復作

珮玉珊珊謁衆真。竟煩一雪慰疲民。未看舞鶴隨飛蓋。先喜飄花集拜茵。耕壟土膏千耦出。市樓酒賤萬家春。使君老去悲才盡。詩句難追節物新。

桐江行

我來桐江今幾時。面骨嶙嶙鬢如雪。怒嗔不復有端緒。譏謗何曾容辨說。十年山棲卻水食。釀桂餐芝自芳潔。作官一飽仰紅腐。坐對盤殮常嘔噎。雪晴宿戒南山遊。剝粟賦詠臨清流。將行復輟卻退坐。臺符吏牘令人愁。胸中崔嵬向誰吐。獨立憑高時自語。文章當以氣爲主。無怪今人不如古。

屢雪二麥可望喜而作歌

苦寒勿怨天雨雪。雪來遣我明年麥。三月翠浪舞東風。四月黃雲暗南陌。坐看比屋騰歡聲。已覺有司寬吏責。腰鎌丁壯傾閭里。拾穗兒童動千百。玉塵出籬飛屋梁。銀絲入釜須寬湯。寒酷發劑炊麩裂。新麻壓油寒具香。大婦下機廢晨織。小姑佐庖忘晚粧。老翁飽食笑捫腹。林下擊壤歌時康。

丁未除夕前二日休假感懷

掛冠神武莫躊躇。家具何妨載鹿車。怨謗相乘真市虎。技能已盡似駘驢。黃金散後猶耽酒。白髮生來更愛書。新歲定尋林下約。一觴一詠未成疎。

又

夢寄梅村竹塢間。不堪客裏見春還。潮生水欲通南澗。雪霽雲猶冒北山。病思過年應小減。官身得假未全閑。變名吳市男兒事。末路低回自笑孱。

假中閉戶終日偶得絕句

雨聲滴滴暮未已。苔暈重重寒更添。知是使君初睡起。清香一綫透疎簾。

又

老夫昔是青城客。酒肉淋漓豈本心。還我山家本來面。數拳春筍薦孤斟。仗錫山寄筍。一名筍兒拳。

又

官身常欠讀書債。祿米不供沽酒資。剩喜今朝寂無事。焚香閑看玉谿詩。

除夜雪

只怪重衾不禦寒。起看急雪玉花乾。遲明欲謁虛皇殿。廐馬蒙氈立夜闌。

又

北風吹雪四更初。嘉瑞天教及歲除。戊申元日卯初立春。半盞屠蘇猶未舉。燈前小草寫桃符。

戊申元日

白頭身世歎羈孤。一念兒時淚已濡。尚記爭先書鬱壘。豈知落後舉屠蘇。盃盤草草思鄰舍。車馬紛紛厭九衢。六十年非心自了。掛冠猶足補東隅。

初春感懷

關河謝遠遊。歲月迫歸休。敢恨驥伏櫪。但思狐首丘。雪明窗誤曉。霜點髮驚秋。羈旅饒愁思。誰憐季子裘。

閉閣

閉閣孤城膽放慵。桐江清絕勝吳松。雲收忽見北山雪。月落正聞西寺鐘。世味老來無奈薄。土思病後不勝濃。專藥豈止方羊酪。輕許平生笑土龍。

潺湲閣小立

飽食何曾補縣官。潺湲閣上倚闌干。水紋靴皺風初緊。花色鞋紅露未乾。薄酒愁邊供醉醒。故人夢裏話悲歡。孤城正在山窮處。過社今朝尙爾寒。

睡起至園中

欲掛衣冠萬事輕。不妨小住向山城。綠尊耐久常相伴。雪鬢纒生便放行。拂枕時時覺幽夢。倚闌日日聽新鶯。夕陽更有欣然處。來看青郊雨後耕。

卷第二十

上書乞祠

上書又乞奉祠歸。夢到湖邊自叩扉。此去敢辭依馬磨。向來真慣擁牛衣。致身途遠年齡暮。報國心存氣力微。誓墓那因一懷祖。人間處處是危機。

春殘

老墮空山裏。春殘白日長。庸醫司性命。俗子議文章。燭映一池墨。風飄半篆香。箇中有佳處。袖手看人忙。

三月二十日晚酌

暫因賜沐作閑身。太息纔餘一日春。委地落花新著雨。穿簾歸燕不生人。衛青此日怪長揖。王翰當年謀卜鄰。商略晚窗須小醉。朱櫻青店正嘗新。

次前韻

烏帽紅塵過去身。荒山野水又經春。殘年欲盡初聞道。薄宦宜休不問人。一局枯棋忘日月。數斟濁酒約比鄰。石帆山下菱歌斷。未歎臨風白髮新。

北窗閑詠

陰陰綠樹雨餘香。半捲疎簾置一牀。得祿僅償賸酒券。思歸新草乞祠章。古琴百柄彈清散。名帖雙鉤揭硬黃。夜出灞亭雖跌宕。也勝歸作老馮唐。

休日留園中至暮乃歸

儘道官身屬太倉。未妨寄傲向林塘。綠波春漲羣魚樂。清露晨流蔓草香。閑試名弓來射圃。醉盤驕馬出毬場。長城萬里知誰許。看鏡空悲兩鬢霜。

北窗病起

一飢可忍萬緣輕。況復幽窗疾漸平。更事天公終賞識。欺人鬼子漫縱橫。道邊塵起頻障扇。門外波清剩

濯纓不爲褊心憎薄俗。客星祠下是歸程。

自東津泛舟至桐溪

潮生東西津。雨暗上下塔。蕭蕭亂菰蒲。拍拍起鳧鴨。吾船雖褊小。尙可著一榻。溪風吹醉頰。高枕墮紗帽。南山浮滢翠。偃蹇呼不答。安得青蓮公。傑句爲彈壓。

遊客至大浪灘上

小蔓瓜蔓綠。短籬梅子黃。曉風掠水來。吹我醉面涼。平生蕭散意。未覺將迎忙。溪山供一笑。客主可相忘。寧當倒手版。聊復據胡床。太平豈無象。麥飯家家香。我歸亦何有。養氣猶軒昂。那因五斗陳。坐覆百鍊剛。

郊行

小雨東郊氣象新。蕭蕭清吹爽衣巾。並谿密竹巧藏寺。夾道新麻高沒人。老厭簿書愁欲睡。病疎盃酌渴生塵。桐君山路無多遠。元自知津莫問津。

夏雨

東風吹雨溪上來。北山出雲以應之。嚴州城中三日雨。朝暮點滴無休時。向來秧底乾欲裂。白水漫漫俄盈陂。豚肩覆豆巫醉飽。龍骨挂壁麈遊嬉。今年蠶麥收數倍。爾大如盆麥兩岐。西成在眼又如此。還鄉鼓腹歌淳熙。待去受代纔四十日。

雨中作

礎潤雲生五月中。山城細雨晚空濛。讀書雖恨此身老。把酒尙思吾輩同。積潤畫圖昏素壁。漬香衣幘覆

熏籠新晴不用占鐘鼓。臥聽林梢浙浙風。

醉題

不學空門不學仙。清樽隨處且陶然。人情正可付一笑。生世元知無百年。白首難陪東閣客。清風自足北窗眠。歸耕只要無人問。安用文章海內傳。

有懷青城霧中道友

雪谷孤松自鬱然。紛紛朝困但堪憐。坐更拂石芥成切。時說鼎臯龍莫年。炎蒼髮篋天送供。羽施藤杖地行仙。笑看王室中興後。更約長安一醉眠。

梅雨初晴遊客東郊

霽色澄鮮已斷梅。江郊隱隱尚輕雷。層巒正對孤城落。健席遙看大鵬來。幼婦髻鬟籜早稻。近村坊店賣新醅。吾行在處皆詩本。錦段雖殘試剪裁。

晚歸

暑雨初晴日。江臯欲暮天。鴉棲沙際樹。人喚渡頭船。病骨羸將折。昏眸困欲眠。市橋燈火鬧。且復喜豐年。

休日登千峯榭遇大風雨氣象甚偉

今日逢休沐。憑高且暫閒。風聲初捲野。雨氣已吞山。疾病臨觴嬾。塵埃得句慳。西征忽在眼。河勢飽壩關。

雨中獨坐

馬目山頭雨。昏龍津橋下浪花翻。年豐郡僻無公事。一炷清香畫掩門。

舊識姜邦傑於亡友韓无咎許近屢寄詩來且以无咎平日倡和見示讀之慨然作此詩附卷末
須溪本作嚴州贈姜梅山

故人玉骨已生苔謂南園公邂逅逢君亦樂哉湖寺繫舟無夢去京塵馳騎有詩來醉中不敢教兒誦看處常須浴手開久矣世間無健筆相期力幹萬鈞回

釣臺見送客罷還舟熟睡至覺度寺

抽身簿書中茲日睡頗足縹緲桐君山可喜忽在目紛紛衆客散杳杳一筇獨昔如脫淵魚今如走山鹿詩情森欲動茶鼎煎正熟安眠簾八尺仰看帆十幅逍遙富春飯放浪漁浦宿送老水雲鄉藁藜勿思肉

泛富春江

雙鱗搖江壘鼓催伯符故國喜重來秋山斷處望漁浦曉日昇時離釣臺官路已悲捐歲月客衣仍悔犯風埃還家正及雞豚社剩伴鄰翁笑口開

宿漁浦

東歸剡曲只三程旅泊還如萬里行燈影動搖風不定船聲穩藉浪初生曳裾非復白頭事瞑目那求青史名歸去若爲消暮境一蓑煙雨學春耕

泝小江飯舟中

老作孤舟客秋濤漲小江林昏見飛鱗村近有驚鳧天濶三更月篷低一尺窗魚殮雖草草聊喜到吾邦

乞祠久未報

陸放翁集 十一 劍南詩集 卷二十

聖朝未許領叢祠，擁褐清羸不自支。鄧禹有靈應笑拙，周公無夢固知衰。得閑要及身安日，到死應無睡足時。七百日來塵滿抱，今朝漸赦有新詩。

七月十日到故山削瓜淪茗儻然自適

鏡湖清絕勝吳松，家占湖山第一峯。瓜冷霜刀開碧玉，茶香銅碾破蒼龍。壯心自笑老猶在，狂態極知人不容。擊壤窮閭歌帝力，未妨堯舜亦親逢。

曉興

亂蟬嘒新秋，老木立清曉。我亦岸綸巾，寄傲萬物表。大千藏粒粟，浩劫過飛鳥。癡子居其間，利欲自纏繞。可憐榮進意，未向蓋棺了。浮名更嚇鬼，白堊寫丹旆。我於斯世事，看破自少小。老矣更何求，歸哉憩林沼。

感秋

會稽八月秋始涼，梧桐葉落覆井床。月明竊樹邊驚鶴，露下溼草啼寒蟻。丈夫行年過六十，日月雖短志意長。匣中寶劍作雷吼，神物那得終摧藏。君不見昔時東都宗大尹，義威百萬虎與狼。疾危尙念起擊賊，大呼過河身已僵。宗汝霖垂死尙部勒諸將北伐，紹大呼過河者三，隨卽殞絕。

秋夜有感

候蟲何唧唧，歲晚聲出壁。不惟嫺婦驚，感此白頭客。壯年事征戍，萬里不得息。揚颿凌秋濤，策馬赴山驛。日照蛟鼉涎，雪印豺虎迹。誰知七尺軀，幸脫九死厄。前年補畿郡，入對瞻玉色。報恩無死所，再拜衰淚滴。卽今故山歸，愈歎老境逼。不眠中夜起，仰視星歷歷。中原何時定，銅駝臥荆棘。滅胡恨無人，有復不易識。

五鼓入城

道旁竹樹露如傾，帶睡悠悠十里行。曉色未分煙尙重，壓城樓閣已惝恍。

飯罷忽鄰父來過戲作

旋炊香稻鬻新菰，飯飽逍遙樂有餘。茶味森森留齒頰，香煙郁郁著圖書。毛皮尙在寧知我，鱗甲深藏莫問渠。賴有鄰翁差耐久，雨畦頻喚共攜鉏。

秋夜讀書

一雨濯殘熱，秋風忽已深。青燈照空廊，重露滴高林。危坐讀周易，會我平生心。夜分徐掩卷，閑弄床上琴。簾外初斜河，屋頭已橫參。人生每如此，利欲安能侵。

夜坐忽聞村路報曉鐘聲

何人叩鐵警農耕，炊飯家家起五更。也似早朝風雪裏，遙聽宮漏下宮城。

又

秋氣淒涼霧雨昏，老書生病臥孤村。五更不用元戎報，片鐵鐸鐸自過門。

白雲自西來過書巢南窗

眠山千里青未了，恨隔長江不到吳。羈雲冉冉吾舊識，安得挽之來坐隅。

贈竹十韻

放翁小築湖西偏，虛窗曲檻無炎天。人間乃有真富貴，遶舍十萬碧玉椽。連林娟娟滋清露，高枝裊裊搖

蒼煙常憂俗客觸新粉。屢戒園丁傷逸鞭。涼生曾學消午醉。聲撼窗扉驚晝眠。春殘斷土得美苗。氣壓卿相食萬錢。爾來作吏若墮穿。每一夢到心悽然。還家再見卻恫怛。塵土何地從飄仙。囊中幸藏餐玉法。欲屏萬事相周旋。更當待月出東嶺。坐石泠泠揮響泉。

雜感

自古文章與命仇。功名身外更悠悠。一從識得元無事。窮死逢人不說愁。

又

小軒幽檻雨絲絲。種竹移花及此時。客去解衣投臥榻。半醒半醉又成詩。

又

少年意氣與春爭。朱彈金鞭處處行。誰信卽今空谷裏。旋租黃犢學躬耕。

又

自洗銅壺試玉醅。小軒風月爲徘徊。此心未與年俱老。猶解逢花眼暫開。

又

側帽垂鞭小陌東。名花迎笑一枝紅。啼鶯驚斷春夢。惆悵新霜點鬢蓬。

入城寓榻開元

羸僮倦馬。困長堤。借榻禪房日未西。熟睡覺來閒隱几。庭楸陰轉乳鴉啼。

夜出偏門還三山

月行南斗邊。人歸西郊路。水風吹葛衣。草露溼芒屨。漁歌起遠汀。鬼火出破墓。淒清醒醉魂。荒怪入詩句。到家夜已半。佇立叩蓬戶。穉子猶讀書。一笑慰遲暮。

四鼓酒醒起步庭下

酒解夜過半。出門步中庭。天高河漢白。月淡煙霧青。重滴竹杪露。疎見樹罅星。境瑟啼寒蟬。深竹明孤螢。秋晚雖未霜。蠶葉時自零。四序逝不留。慨然感頽齡。平生茅一把。不博帶萬釘。鷗滯謝拍拍。鴻路追冥冥。

感憤秋夜作

月昏當戶樹突兀。風惡滿天雲往來。太阿匣藏不見用。孤憤書成空自哀。吾輩赤心本貫日。昔人白骨今生苔。榮河溫洛不可見。青海玉關安在哉。

反感憤明夜讀前作而悲乃復作此自解

膊膊庭樹雞初鳴。嗚嗚天衢雁南征。百年朝露豈長久。萬事浮雲常變更。出處有心終有愧。聖賢無命亦無成。西疇雖薄可自力。雙犢且當乘雨耕。

東齋

著脚紅塵已恨深。便應畢世住山林。貴人自作宣明面。老子曾聞正始音。議論坐狂當永棄。簿書緣病復難任。東齋幽寂憑誰畫。開幔床橫一素琴。

雨夜四鼓起坐至明

門巷冷如冰。生涯淡似僧。小窗愁夜雨。孤影怯秋燈。林鶴棲仍起。山童喚不應。悠然坐待旦。息倦倚書牕。

夜讀兵書

八月風雨夕千載孫吳書。老病雖憊甚壯氣頗有餘。長纓果可請上馬不躊躇。豈惟慶臯蘭直欲封狼居。萬乘久巡狩南京盡丘墟。此實在臣子憂愧何時據。南鄭築壇場隆中顧草廬。邂逅未可知旄頭方掃除。

老歎

百年逝不留萬事本難料。夜行鐘漏迫但取賢達笑。頗疑功名事造物付年少。歸休莫問人。曉鏡勸自照。

秋霽

灑氣明山川霽色滿天地。西風吹我衣。忽有萬里意。中原運當平。所要在得士。餘年猶幾何。棄置復棄置。

齋中聞急雨

一味疎慵養不才。飯蔬亦已能銜盃。衝茆終日人聲絕。臥聽芭蕉報雨來。

老病追感壯歲讀書之樂作短歌

少年志力強文史富三冬。但喜寒夜永。那知睡味濃。庭樹風淅淅。城樓鼓琴琴。自鞭不少貸。凍坐聞晨鐘。探義劇攻玉。擣文笑雕龍。落紙筆縱橫。圍坐書疊重。得意自吟諷。清悲答莎蛩。飢腸得一甌。美如紫駝峯。俯仰五十年。干世終不逢。夜半起飯牛。頽然成老農。束書不更讀。蠶簡流塵封。世無袁伯業。太息吾何從。

閑中戲書

糲飯從來不願餘。還山喜遂此心初。挽河盡洗彈冠念。閉戶閑縫插架書。一棹不妨從客飲。數椽也復是吾廬。少游細看猶多事。安用人間下澤車。

又
少年拜舞綴庭紳。曾見中天日月新。金印終歸妄校尉。白頭仍是斥仙人。修營香火三生願。收拾風波九死身。豈但漁樵與爭席。海邊滬鳥亦相親。

又

釣竿風月寄滄洲。醉髮髣髴荻葉秋。仕進世誰知我懶。功名命不與人謀。衰遲更覺歲時速。疎賤空先天。下憂病骨未銷。讒未已。聊須周易著牀頭。

采藥

簷子編成細箬新。獨穿空翠上嶙峋。丹砂巖際朝曦日。狗杞雲間夜吠人。絡石蒼蒲蒙綠髮。纏松薜荔長蒼鱗。金貂謁帝我未暇。且作人間千歲身。

過猷講主桑瀆精舍

寂寞衡門傍水開。放翁曳杖此徘徊。林疎時見釣篷過。風急忽聞菱唱來。講罷繩床懸麈柄。齋餘童子供茶盃。解衣許我閒摩腹。又作幽窗夢一回。

自桑瀆泛舟歸三山

端爲身閑覺日長。不嫌兒輩笑清狂。湖光潏潏歸舟疾。雨點霏霏醉頰涼。斷約蒼生人喚渡。孤村霜近稻登場。宦情不獨今日薄。游子從來念故鄉。

訪野人家

山入柴門窄，橋通野路長。羣童挑燕筍，幼婦采雞桑。淳古非今俗，留連到夕陽。盤飧敢辭飽，滿箸藥苗香。

塞上曲

秋風獵獵漢旗黃，曉陌霜清見太行。車載氈廬馳載酒，漁陽城裏作重陽。

又

將軍許國不懷歸，又見桑乾木葉飛。要識君王念征戍，新秋已報賜冬衣。

又

金鼓轟轟百里聲，繡旗寶馬照川明。王師仗義從天下，莫道南兵夜斫營。

又

老矣猶思萬里行，翩然上馬始身輕。玉關去路心如鐵，把酒何妨聽渭城。

硯湖井引

余得英石數峯環立，其中凹處可容一盃，因以瀦水代硯滴，名之曰硯湖，且爲賦詩。

羣山環一湖，湖水綠溶漾。微風掠窗過，亦解生細浪。餘流浸翠麓，倒影寫青嶂。自然出天工，豈復煩巧匠。病夫屏盃酌，不遣運酒舫。時時挹清泚，筆墨助豪宕。帖成龍蛇走，詩出雷雨壯。從今凡硯旁，一掃螭螭樣。

泛湖

筆牀茶竈釣魚竿，激激平湖淡淡山。浪說枕戈心萬里，此身常在水雲間。

寓蓬萊館

桐葉吹殘蕉葉黃。驛窗微雨送淒涼。長安許史無平素。莫恨樓樓立路旁。

又

古驛蕭蕭獨倚闌。角聲催晚雨催寒。殘年遇合應無日。猶說新豐強自寬。

夜還驛舍

樓上寥寥初發更。斷雲收雨旋成晴。市橋新漲搖燈影。驛路殘泥壯屐聲。闌闌變遷非曩日。惜懷牢落感餘生。高秋病起猶能醉。剩買官醅樂太平。

舟中大醉偶賦長句

過江何敢號高流。偶與俗人風馬牛。畫楫新搖嚴瀨月。清尊又醉戴溪秋。壯心無復在千里。老氣尙能橫九州。古寺試求三丈壁。爲君驅筆戰蛟虬。

行飯至新塘夜歸

門前徙倚尙餘霞。湖上歸來月滿沙。雲溼一聲新到雁。林昏數點後棲鴉。淒迷離落開寒菊。鄭重比鄰設夜茶。早議挂冠君會否。暮年心念不容差。

雲門感舊

總角來遊老未忘。背人歲月去堂堂。禪松看到偃霜蓋。廢寺憶曾開寶坊。佛几古燈寒焰短。齋廚新粟午炊香。興闌未忍登車去。更倚溪橋立夕陽。

若耶溪上

陸放翁集 卷二十一 劍南詩集 卷二十

微官元不直鱸魚。何況人間足畏途。今日溪頭感心處。自尋白石養菑蒲。

又

九月霜風吹客衣。溪頭紅葉傍人飛。村場酒薄何妨醉。菘正堪烹蟹正肥。

秋雨頓寒偶書

羈懷不醉自昏昏。臥對青燈獨掩門。沙雁帶寒來古澤。林鳩催雨暗孤村。數椽蟹舍償初志。九陌塵衣洗舊痕。自歎一生書裏活。暮年無力濟黎元。

新晴泛舟至近村偶得雙鯪而歸

秋風一夜老汀蘋。剡曲稽山發興新。青嶂會爲身後塚。扁舟聊作畫中人。園林搖落知寒早。父老逢迎覺意真。歸舍不妨成小醉。眼明細柳貫霜鱗。

上書乞祠輒述鄙懷

干祿本代耕。窮達敢自必。早遇高皇帝。九品對宣室。安懷犬馬心。齟齬不暇恤。上恩等天地。腰領免斧鑕。旋屬紹興末。賜谷贍出日。賤臣復何幸。便殿首造膝。煌煌帝堯典。推擇首秉筆。愚忠雖懇款。野性實坦率。飄然去周行。湖海抱沉疾。遠遊客窮塞。亭障秋蕭瑟。聖君終記省。萬里忽乘駟。同朝久凋謝。存者不十一。造廷故抱暗。下殿衰涕溢。蹉跎又十載。憂患豈易述。流年不貸人。白髮日夜密。冠雖未卽挂。馭已不容叱。尙覲公朝恩。養老霑散秩。閉門教子孫。志願真永畢。

泛湖上雲門

三百里湖秋渺然。是間可以著釣船。浩歌莫過石帆下。爛醉夜泊樵風邊。樵風溼在若耶深。鏡湖之間。茫茫沙月忽側墮。曼曼山氣時孤寒。冥鴻遠舉謝斯世。白鷗自放全其天。幽棲幸脫市朝械。捷徑那著功名鞭。人生各自適意耳。稷禹巢許知誰賢。

書歎

世態秦欺楚。交情越視秦。寧教待羝乳。不耐望車塵。書積高圍坐。花繁亂插巾。那須散人號。已是萬天民。

枕上作

寒夜臥林廬。蕭然適有餘。蟲悲號壞壁。燈暗守殘書。養拙天知我。安貧老似初。雖非漆園吏。也作蝶蘧蘧。

老病無復宦情。或者疑焉。作此示之。

病思蕭條豈獨今。十年前已鬢霜侵。舊交略盡形吊影。薄宦宜休口語心。老驥已甘當伏櫪。窮猿況是急投林。別君徑入亂雲去。後日相思何處尋。

拄杖

放翁拄杖具神通。蜀棧吳山興未窮。昨夜夢中行萬里。蓮華峯上聽松風。

北望

北望中原淚滿巾。黃旗空想渡河津。丈夫窮死由來事。要是江南有此人。

歲晚感懷

利名爭奪兩皆非。生世寧殊露易晞。老冉冉來誰獨免。冢纍纍處會同歸。聽歌莫惜終三疊。縱獵何妨更

一圍醉臥日高呼不醒。笑人霜曉束朝衣。

大雨中作

北風撼山勢岌岌。老夫倚杖檐前立。貪看白雨掠地風。飄灑不知衣盡溼。當年入朝甫三十。十丈胡塵叩江急。屬聞蠟彈遣檄書。亟壞布裳縫袴褶。即今白髮不可數。破屋頽垣窘風雨。汝生汝死問者誰。人雖不問心自悲。

繫舟平水步

舟尾參差野岸橫。屐聲穿市得閑行。雨昏茆店炊煙溼。人語蓬窗積火明。枝上橙香初受摘。擔頭菰脆正堪烹。漁樵自是平生意。不爲衰遲薄宦情。

初到行在

六十之年又四年。也騎瘦馬趁朝天。首陽柱下孰工拙。從事督郵俱聖賢。筆墨有時閑作戲。功名到底是無緣。都城處處園林好。不許山翁醉放顛。

還都

平生薄名宦。所願得早休。奔走三十年。鏡中霜鬢秋。歸踏長安道。恍然皆舊遊。處處見題名。始驚歲月遒。西湖隔城門。放浪輸白鷗。當時見種柳。已足繫巨舟。挂冠當自決。安用從人謀。勿以有限身。常供無盡愁。

宿監中偶作

沈落歸來兩鬢絲。此生真媿北山移。數殘宮漏寒無寐。開盡梅花病不知。同舍破甘醒宿酒。故人折簡索

新詩生涯可笑清如許。枉是京塵撲馬時。譚德稱有簡催和詩。

四鼓出嘉會門赴南郊齋宮

客遊梁益半吾生。不死還能見太平。初喜夢魂朝帝所。更驚老眼看都城。九重宮闕晨霜冷。十里樓臺落月明。白髮蒼顏君勿笑。少年慣聽舜韶聲。

題張野夫監簿大招圖

此生只合老漁樵。扶病誰令趁早朝。開卷未終三太息。羈魂零落恐難招。

簡譚德稱監丞

廣都江上送舟行。淚灑春風別少城。冉冉幾經新歲律。依依猶有舊交情。塵冠當挂彈何用。革帶頻移瘦自驚。剩欲約公風雨夜。一燈相對話平生。

致齋監中夜與同官縱談鬼神效宛陵先生體

五客圍一爐。夜語窮幻怪。或誇雷可斫。或笑鬼可賣。或陳混沌初。或及世界壞。或言修羅戰。百萬起睡眠。餘談恣搜抉。所出雜細大。風雲墮皮幘。幽坎窺鐵械。羣號起古聚。孤泣出空廡。妖狐冠髑髏。掩袂弄姿態。空轉伏逸囚。夜半出竊嘍。雖云多聞益。頗犯綺語戒。不如姑置之。投枕休困憊。明當掛衲衣。僕僕愁頭拜。

夜歸

飲酒不盡觴。觀棋不竟局。索馬踏街鼓。仰視月挂木。疾馳沿河隄。不記幾坊曲。到家四鄰寂。往往睡已熟。天香餘鼻息。佛燈猶煜煜。中庭雖一席。緩步意亦足。寒犬吠荆籬。棲鶴起葦竹。市聲從北來。始覺非林谷。

卻尋西窗書。開卷剪殘燭。官閑居更遠。一笑謝羈束。

次韻鄭唐老

宦遊早日闕。相聞一面那。知乃爾勤。秋釣清灘方入夢。曉穿細仗又逢君。驟看落筆驚風雨。便擬同舟臥水雲。作意歸休還會否。暮年無力起斯文。

五鼓赴太社臘祭

骨裂屋瓦。月白射坊門。病骨愁看影。孤吟怯斷魂。飢鷹掣羈縶。老馬伏車轅。不奈清宵夢。殘蕪滿故園。

己酉元日

夜雨解殘雪。朝陽開積陰。桃符呵筆寫。椒酒過花斟。巷柳搖風早。街泥濺馬深。行宮放朝賀。共識暮羹心。以亮陰免賀禮。

送潘德久使薊門

崑崙東分一枝渾。奔蹶砥柱經龍門。羲皇受圖撫上古。神禹治水開中原。三靈寶扶藝祖業。萬國共仰東都尊。羣兒撞壞吁可歎。願使殘廢今遊魂。因君試求出師路。孟津白馬應如故。不須更議繁河橋。北風正可乘冰渡。頗聞盧龍已數盡。復道飛狐合屯戍。轅門倘駐拂雲祠。烽火應過明妃墓。君歸解鞍藉芳草。細談塞北忘子老。讀書飲酒待賊平。萬丈旄頭方下掃。

我夢

我夢入煙海。初日如金鏡。赤手騎怒鯨。橫身當馮龍。百日京塵中。詩料頗闕供。此夕復何夕。老狂洗衰慵。

夢覺坐歎息。杳杳三茆鍾。車馬動曉陌。不覺睡味濃。平生擊虜意。裂皆髮上衝。尚可乘一障。憑樓觀傳烽。

晨起有感

痛飲可以豪。謝病可以高。計之顧不審。老與世俗磨。丈夫本自許。四十擁旌旄。上馬不回顧。賊穴窮腥臊。渭橋恥未雪。孰謂弓可獲。此志竟悠悠。徂歲行滔滔。一官客長安。燭下束弊袍。豈惟歎龍鍾。行恐悲烹蒿。吾曹議古人。後亦觀吾曹。浮雲易變滅。公議終豎牢。

南省宿直

檐角參差散暮霞。重門鎖斷市聲譁。風經綠樹鴉棲穩。月入空廊柱影斜。藤紙靜臨新獲帖。銅瓶寒浸欲開花。誰知今夕幽窗夢。又撈扁舟上若耶。

又

頽然靜對北窗燈。識字農夫有髮僧。但遣奚奴持古錦。何須侍史護青綾。塵埃奔走無由息。疾病侵陵不自勝。猶喜眼中多壯觀。時看雲海化鯤鵬。

卷第二十一

夜歸墻街巷書事

近坊燈火如晝明。十里東風吹市聲。遠坊寂寂門盡閉。只有煙月無人行。誰家小樓歌惱倦。餘響縹緲繁。靡靡苦心自古乏。眞賞此恨略與吾曹同。歸來空齋臥。凄冷燈前病骨燒。曉影獨吟古調。遺誰聽。聊與梅。

花分夜永。

馬上作

三十年前客帝城。城南結騎盡豪英。湖山冷落悲陳迹。文字流傳付後生。衰老更禁新臥病。塵埃時拂舊題名。馬頭風捲飛花過。又得殘春一日晴。

行在春晚有懷故隱

老辱明時乞一官。逢春惆悵獨無歡。舊人零落北音少。市肆蕭疎民力殫。歸計已栽千箇竹。殘年合挂兩梁冠。石帆山路頻回首。箭茁尊絲正滿槃。

儀曹直廬

春晚氣始和。微雲淡朝陽。開軒面小庭。露漬薔薇香。遊絲卷欲盡。忽復百尺長。而我正遺事。枕藉書一牀。讒波雖稽天。未遽妨人狂。惟當傾綠酒。莫待熟黃梁。

讀書

兩兩星躔九九車。天津笑我醉騎驢。床頭正可著周易。架上何妨抽漢書。幸有古人同臭味。不嫌兒子似迂疎。頽然白髮雖堪鄙。耐事禁愁卻有餘。

小昭慶院講僧舊在都下與之相從今沒已久見畫像於院中作詩弔之

曩歲曾陪夜講燈。伏犀插腦齒如冰。假令重見應難識。遺像癯然一老僧。

晨入省中偶書

清風拂畫簾。初日照素壁。花枝蝶小憩。草葉露時滴。房櫺闌無人。潯水聲激激。摩挲語枯筇。伴我住幽寂。

春晚

今年病過春。得健春欲盡。更堪風雨橫。紅溼樓綠潤。一笑本自難。造物復爾吝。榆莢堆平塔。柳絮飛作陣。塵埃生破楫。霜雪滿衰鬢。平生慕陶謝。著語終不近。

觀潮送劉監至江上作

江平無風面如鏡。日午樓船帆影正。忽看千尺涌濤頭。頗動老子乘桴興。濤頭洶洶雷山傾。江流卻作鏡面平。向來壯觀雖一快。不如帆映青山行。嗟余往來不知數。慣見買符官發渡。雲根小築幸可歸。勿爲浮名老行路。

新晴馬上

一劍飄然萬里身。白頭也復走京塵。畫樓酒飾滴殘雨。綠樹鶯聲催暮春。絕塞勒回動業夢。流年換盡市朝人。此生安得常強健。小艇湘湖自采蓴。湘湖在蕭山縣。

過六和塔前江亭小憩

斷岸孤亭日暮時。欄邊聊試葛巾欵。偶親桂席乘潮快。便覺懸車納祿遲。痛飲相如無奈渴。清言叔寶不勝羸。年來親友凋零盡。惟有江山是舊知。

春夕睡覺

破衫羸馬老黃塵。人自衰遲歲自新。積雨恐侵春甲子。昏燈嬾守夜庚申。花枝影轉欹殘月。鼻鼾聲豪撼

四鄰自笑功名猶有夢，散關金鼓震函秦。

送霍監丞出守肝胎

淮浦鱗鱗浸碧天，即今誰料作窮邊。空聞甌脫嘶胡馬，不見浮屠插霧煙。亭障久安無檄到，盃觴頻舉有詩傳。長城萬里英雄事，應笑窮儒飽晝眠。

寄題徐載叔秀才東莊東莊乃藏書之所

次公醒狂何必酒，直諒多聞俱可友。萬籤插架號東莊，多稼連雲亦何有。今年偶入長安城，不識貴人呼作卿。南臺楊見北門學士倒屣迎，郎官酸寒誰肯顧。君來下馬談至莫，東莊雖富未可矜。更要縱橫開武庫。

入省

點點輕花墮綠盃，翩翩羸馬犯黃埃。眼邊好句等閑過，夢裏故人時一來。玉塞請行狂故在，霜髭自照老相催。今朝涼冷文書少，隱几南窗聽轉雷。

出省

五更束帶聽朝雞，出省還家日已西。酒市雨餘青旆重，河橋風爽紫驄嘶。久慙旅飯糜倉粟，常憶新橙擘膾齋。萬事似棋聊爾耳，年來著數不勝低。

和周元吉右司過弊居追懷南鄭相從之作

梁益東西六十州，大行臺出北防秋。閱兵金鼓震河渭，縱獵狐兔平山丘。露布捷書天上去，軍諮祭酒

中謀。豈知今日詩來處。日落風生蘆荻洲。

尤延之侍郎屢求作遂初堂詩。詩未成。延之去國。因以奉送。

印何纍纍。綬若若。只堪人看。公何樂。忽然揜。施開布。颺。懣滿平生。一丘壑。遂初築堂。今幾時。年年說歸真。得歸。異書名刻堆滿屋。欠仲欲起。遭書圍捨之。出遊公豈誤。綠髮朱顏已非故。請將勳業付諸郎。身踐當年遂初賦。

送張野夫寺丞牧滁州

皇天方憂九州裂。建隆真人仗黃鉞。陣雲冷壓清流關。賊壘嘍嚶氣如髮。連誅猾虜入檻車。北風吹乾草頭血。一龍上天三百年。舊事空聞遺老說。金印斗大誰作州。公子玉面蒼髯虬。賦詩健筆夾風雨。論兵辯舌森戈矛。別君帳飲瀚橋頭。長歌爲君寬旅愁。戰場遺迹儘可畫。尺素寄我關河秋。

史院書事是日丞相過局

信史新修稿滿床。牙籤黃靶帶芸香。中人馳賜初宣旨。丞相傳呼早出堂。皇祖聖謨高萬古。諸賢直筆擅三長。孤臣曾趣龍墀對。白首爲郎只自傷。熙寧辛巳嘗蒙恩賜對今三十九年矣。

病中數辱會無逸架閣見問今日忽聞徙居走筆奉簡因致卜鄰之約

病羸不辦攬衣迎。剝啄空慙扣戶聲。凡藥豈能驅二豎。清心幸足制三彭。巷南傲屋儘可問。歲晚囊衣吾亦行。不爲朝天愁路澀。夜窗燈火要尋盟。

喜楊廷秀祕監再入館

陸放翁集 卷二十一

公去蓬山輕。公歸蓬山重。錦囊三千篇。字字律呂中。文章實公器。當與天下共。吾嘗評其妙。如龍馬受韉。燕許亦有名。此事恐未夢。嗚呼大厦傾。孰可任梁棟。願公力起之。千載傳正統。時時醉黃封。高詠追屈宋。我如老蒼鶻。寂寞愁獨弄。杖屨動來遊。雪霽梅欲動。

次韻和楊伯子主簿見贈

齋戒叩頭。賤天公。幸矣使我爲枯蓬。枯蓬於世百無用。始得曠快乘秋風。此生安往失貧賤。白髮蕭蕭對黃卷。今人雖鄰有不覲。古人卻向書中見。援啼月落青山空。舊隱夢寂思東蒙。不願峨冠赤墀下。且可短劍紅塵中。終年無人問良苦。眼望青天惟自許。可憐對酒不敢豪。它日空澆墳上土。文章最忌百家衣。火龍繡被世不知。誰能養氣塞天地。吐出自足成虹蜺。渡江諸賢骨已朽。老夫亦將正丘首。杜郎苦瘦帽擗耳。程子久貧衣露肘。君復作意尋齊盟。豈知衰懦畏後生。大篇一讀我起立。喜君得法從家庭。鯤鵬自有天池著。誰謂太狂須束縛。大機大用君已傳。那遣老夫安注脚。杜與伯高。程有徵文若。皆近以詩文得名於諸公。而尤與予善。

簡何同叔

白髮都門客。青燈夜雪時。盡捐塵世事。細看月湖詩。格律冰霜敵。襟懷猿鶴知。吾儕端後死。此事要深期。

去國待潮江亭太常徐簿宋卿載酒來別

昨解魚符已徑歸。偶隨尺一起柴扉。暫留已媿黔吾突。久住空令緇客衣。外物紛紛何足問。故人眷眷莫相違。從今再見應無日。長與沙鷗共釣磯。

醉中作行草數紙

還家痛飲洗塵土，醉帖淋漓寄豪舉。石池墨瀋如海寬，玄雲下垂黑蛟舞。太陰鬼神挾風雨，夜半馬陵飛萬弩。堂堂筆陣從天下，氣壓唐人折敘股。丈夫本意陋千古，殘虜何足膏碓斧。驛書馳報兒單于，直用毛錐驚殺汝。

雪夜小酌

黃昏雲齊雪意熟，二更雪急聲簌簌。地爐對火得奇溫，兔醢魚鱸窮旨蓄。引盃且作稿面紅，脫帽不管裘發秃。浩歌三終徐自和，藏書萬卷方盡讀。從來本不擇死生，況復區區論禍福。雪晴著屐可登山，與子一放千里目。

卽事

墜壁編茅養病翁，五更擁褐聽霜風。老雞棲冷啼偏早，宿火灰深撥更紅。知我向來惟斷簡，會心終竟在孤篷。東歸已賣腰間劍，魯叟從今不諱窮。

到家旬餘意味甚適戲書

天恐紅塵著脚深，不教經歲去山林。欲酬清淨三生願，先洗功名萬里心。石鼎鷓鴣閑煮茗，玉徽零落自修琴。晚來剩有華胥興，臥看西窗一炷沉。

雨後復小雪

雨雪來無已，冬春忽欲交。賤貧安淡薄，老鈍耐譏嘲。村酒兒能取，農書手自鈔。暮年真箇懶，屋漏旋添茆。

鯉魚行

鯉魚財三尺，淺水不覆脊。雖懷江湖樂，已歎刀几赤。長鯨之長幾千丈，雪蹴山傾萬重浪。縱遊不厭滄海寬，一躍已在青天上。身世局促古所哀，喚啣食餌胡爲哉。人間溝瀆莫更顧，夜半變化乘風雷。

雪夜作

雪重從壓竹，竹折有奇聲。雪深亦莫埽，小窗終夜明。我老尚耐冷，開卷對短檠。龍茶與羔酒，得失不足評。但思被重鎧，夜入蔡州城。君勿輕羸儒，有志事竟成。

晨起

倦枕廉纖雨，幽窗料峭寒。溪柴旋篝火，野蕨鬪登槃。年老衣冠古，身閑宇宙寬。兒孫生我笑，趨揖已儒酸。
鄉市小把柴，謂之溪柴，蓋自若耶來也。

野饋

經年倉粟厭陳陳，天遣香杭饋野人。黃耳葦生齋鉢富，白頭韭出客盤新。此生不復營三釜，一飽何曾羨八珍。尚媿古來高士在，盃羹無糝飯生塵。

醉中浩歌罷戲書

造物小兒如我何，還家依舊一漁蓑。穿雲逸響蘇門嘯，卷地悲風易水歌。老眼閱人真爛熟，壯心得酒旋消磨。傍觀虛作窮愁想，點檢霜髯卻未多。

朝雨

甲夜星照泥。平日雲行西。小屋古澤中。天昏雨淒淒。避溼升我堂。垂翅閱老雞。所欣園中蔬。冒土青滿畦。門無今雨客。路滑愁長堤。一盃且復睡。物理何足齊。

春雨

苦雨何時止。微雲又作陰。傍簷時小立。隱几復微吟。枝重殘紅濕。隄平漲綠深。物華元自好。老病負登臨。

又

春愁無處避。春雨幾時晴。黯黯陰連月。蕭蕭滴到明。窗昏減書課。弦緩咽琴聲。何以娛幽獨。新醅手自傾。

記夢

夢裏都忘兩鬢殘。恍然白紵入長安。硬教紙熟修溫卷。做得驢騎候熱官。紅葉滿街秋著句。青樓燒燭夜追歡。如今萬事消除盡。老眼摩挲靜處看。

野興

紅飯青蔬美莫加。鄰翁能共一甌茶。舍西日緊花房斂。港北風生柳脚斜。筇杖不妨閑有伴。荊簪終勝老無家。自驚七十猶強健。采藥歸來見暮鴉。

又

鬢邊莫笑久星星。造物常鍾我輩情。每帶餘醒躡花影。又和殘夢聽鶯聲。軒窗風過書籤亂。洲渚潮生釣艇橫。韓子未除豪氣在。文章都待不平鳴。

杭州夜歸

昔如架上九秋鷹。今似窗間十月蠅。無復囊韃思出塞。不妨粥飯略同僧。白蘋洲晚初回櫂。綠樹村深已上燈。莫謂陶詩恨枯槁。細看字字可銘膺。

又

野艇迢迢信所之。歸來常及欲昏時。陂塘煙重怨姑惡。林薄月明悲子規。出谷寺鐘初縹緲。穿籬續火已參差。欣然笑向磨門說。又了浮生一首詩。

或問余近況示以長句

天亦知予懶是真。暮年乞與自由身。幽尋東浦鷺迎櫂。獨臥北窗鶯喚人。野卉滿頭狂取醉。草廬容膝樂忘貧。死時是處堪藏骨。不用要離更作鄰。

估客有自蔡州來者感悵彌日

洮河馬死劍鋒摧。綠髮成絲每自哀。幾歲中原消息斷。喜聞人自蔡州來。

又

百戰元和取蔡州。如今胡馬飲淮流。和親自古非長策。誰與朝家共此憂。

初夏郊行

小硯孤吟恐作愁。長堤曳杖且閑遊。破雲山躡千螺翠。經雨波涵一鏡秋。粗糲青紅村步市。闌干高下寺家樓。去年此日君知否。十丈京塵沒馬頭。

重午

業底榴花蹙絳綃。街頭初賣苑池冰。會稽不藏冰。貧者皆自行。在來世間各自有時節。蕭艾著冠稱道時。

夏日

赤日黃塵樵械忙。放翁湖上獨相羊。竹梢露滴驚殘夢。荷蓋風翻送早涼。暑用酒逃猶有待。熱憑靜勝更無方。空齋一榻儻然臥。閑看衣篝起篆香。

睡起見楊花滿庭偶書

斷香裊裊傍窗紗。睡起蒼騰日未斜。堪歎一春風雨惡。今年四月見楊花。

梅雨

沐罷斜簪二十冠。斷雲殘靄暗江干。絲絲梅子熟時雨。漠漠楝花開後寒。剩采芸香辟書蠹。旋春麥麩續家餐。日長倦睫惟思閉。茗椀真須抵死寬。

醉歌

讀書三萬卷。仕宦皆束閣。學劍四十年。虜血未染髻。不得爲長虹。萬丈掃寥廓。又不爲疾風。六月送飛雹。戰馬死槽櫪。公卿守和約。窮邊指淮淝。異域視京雒。於乎此何心。有酒吾忍酌。平生爲衣食。敝版靴兩腳。心雖了是非。口不給唯諾。如今老且病。鬢禿牙齒落。仰天少吐氣。餓死實差樂。壯心埋不朽。千載猶可作。

醉書秦望山石壁

秋雨初霽開長空。夜天無雲吐白虹。擘波浴海出日月。破山卷地驅雷風。崑崙黃流瀉浩浩。太華巨掌摩穹穹。平生所懷正如此。拜賜虛皇稱放翁。放翁七十飲千鍾。耳目未廢頭未童。向來楚漢何足道。眞覺萬

古無英雄行窮禹迹亦安往。聊借曠快洗我胸。濤瀾屢犯蛟鱗怒。澗谷或與精靈逢。黃金鑄就決河塞。俾獻頤利長安宮。不如醉筆掃青嶂。入石一寸豪健驚天公。

秋夜

藥餌扶衰疾。琴書返故園。陶公方止酒。樂令且清言。煙鳥宿沙際。露螢明草根。塵囂不到處。此意與誰論。

夜意

孤夢初回夜氣清。世塵掃盡覺心平。月沉洲渚漁歌遠。人語比鄰續火明。獨汲寒泉鳴細甕。靜聽漏鼓下高城。悠然坐待東方白。卻看軒窗淡日生。

蝸廬

小葺蝸廬便著家。檣籬莎徑任欹斜。爲生草草僧行脚。到處悠悠客泛槎。孤蝶惜衣晴曝粉。穉蜂貪蜜晚爭花。有書懶讀吾堪愧。睡起何妨自澆茶。

予十年間兩坐斥臯。雖擢髮莫數。而詩爲首。謂之嘲詠風月。既還山。遂以風月名小軒。且作絕句扁舟。又向鏡中行。小草清詩。取次成放。逐尙非餘子比。清風明月入臺評。

又

綠蔬丹果薦瓢尊。身寄城南禹會村。連坐頻年到風月。固應無客叩吾門。

題梅漢卿醉經堂

它人爛醉錦瑟傍。君獨醉心編簡香。沉酣骨髓春盎盎。如枕麴蘖羅盃觴。三萬牙籤插高架。五千黃卷撐

枯腸信哉名教有樂地。白首不入無功鄉。

得親舊書問近況以詩代書報之

溪頭日日弄潺湲。敢料餘生竟得全。白簡免勞中執法。青銅罷算小行年。花前一笑頻開口。林下深藏永息肩。欲養金丹還嬾去。身今已是地行仙。

放逐

放逐雖慙處士高。笑譚未減少年豪。青山隨處有三窟。白首今年無二毛。正得筠枝爲老伴。盡將書帙付兒曹。飲酣自足稱名士。安用辛勤讀楚騷。

月下野步

空中磊落斗跨天。道旁荒寒月滿川。行歌驚起鷗鷺眠。三萬里在拄杖邊。敲門索酒太華前。飛渡黃河不須船。袖中短鐵青蜿蜒。昔曾巴丘從老仙。削平巖崖抉雲煙。此妙可得不可傳。雷聲脫股電煜然。已覺遼碣無腥羶。雪花如席登祚連。歸來卻看東封年。

自詠

孤篔渺煙波。衡門暗薜蘿。衣冠醉學究。世有醉學究圖。毛骨病維摩。撫几時長喟。臨牖亦浩歌。無勞問蝸角。蠻觸正橫戈。

午睡起遇急雨

揩眼捫髻破晝眠。闌邊小立獨幽然。叢花雨打無飛蝶。高柳風驚有墮蟬。才略本居元子下。功名那許祖

生先。今朝會意君知否。目送飛雲揮五絃。

夜雨暴至

堂中虛窗雨氣入。堂前叢竹雨聲急。山童束縵走求火。屋漏惟愁打書溼。秋風穉穉九千頃。自鏡湖北際。海鹽地凡九千頃。皆吾鄉上腴也。此夕真成傾玉粒。蹋歌作社約比隣。一飽今年可平揖。

睡起作帖數行

睡餘得清風。起坐傍書几。日長誰晤言。賴此管城子。欣然共游戲。一笑我忘爾。羣鴻偶下集。但怪驚不起。古來翰墨事。著意更可鄙。跌宕三十年。一日造此理。不知筆在手。而況字落紙。三叫投紗巾。作歌識吾喜。

新秋

短髮蕭蕭失舊青。此身已看作郵亭。新秋無限淒涼意。盡付風蟬與露螢。

秋興

去秋尙十日。軒窗夕已涼。露草黏溼螢。壞壁啼寒螿。丈夫志四海。臨書慨以慷。白髮忽如此。惟有歸耕桑。藥餌且枝梧。鄰曲相扶持。豈無甕中酒。老病不能觴。南山有歸處。歲晚柏已行。下從吾親游。此事歲月長。

又

無食苦日長。無衣念秋近。雖云老農圃。未嘗樂堯舜。士生要弘毅。病在墮驕吝。得喪纔幾何。哀哉以身徇。平生最耐事。霜雪亦滿鬢。憂患一洗空。吾道其少進。

幽居

幽居人迹稀，柴扉晝常掩。小池清見底，疎雨時數點。蟬吟秋未衰，花房暮先斂。老大固多傷，年華還冉冉。

山居食每不肉戲作

谿友留魚不忍烹，直將蔬糲送餘生。二升菴粟香炊飯，一把畦菘淡煮羹。莫笑開單成淨供，也能捫腹作徐行。秋來更有堪誇處，日傍東籬拾落英。

自笑

諸公衮袞幾金貂，自笑無材負聖朝。老氣醉中猶跌宕，閒身夢裏亦逍遙。舊書日伴吾兒讀，薄飯時從野叟招。病後秋衣須早製，竹窗殘夜雨蕭蕭。

世上

世上悠悠東逝波，金丹將奈鬢絲何。牆頭楊柳知秋早，窗外芭蕉受雨多。伏櫪自應如老驥，還鄉元欲借明馳。吾碁一局千年事，從使旁觀爛斧柯。

夜歸偶懷故人獨孤景略

買醉村場半夜歸，西山落月照柴扉。劉琨死後無奇士，獨聽荒雞淚滿衣。

秋夜自近村歸

江頭浩歌天宇寬，刺船歸來清夜閒。女貞林黑月上，姑惡聲悲村已寒。不恨故交日零落，本知浮生難控搏。頭童面槁更安往，莫問傍人君自看。

夜聞蟋蟀

布穀布穀解勸耕。蟋蟀蟋蟀能促織。州符縣帖無已時。勸耕促織知何益。安得生世當成周。一家百畝長無愁。綠桑鬱鬱暗微徑。黃犢叱叱行平疇。荆扉積火明煜煜。黍飯香浮浮耕亦不須。勸織亦不須。促機上有餘布。盎中有餘粟。老翁白首如小兒。鼓腹擊壤相從嬉。

秋夜風雨暴至

風聲掠野來。瀕洞如翻濤。雨聲集庭木。桐葉聲最豪。殘暑一洗空。凜然念綈袍。秋穀已登場。欲忘終歲勞。東舍捉鵝鴨。西舍烹豚羔。籬落開寒花。房櫳壓小槽。貧賤何所歡。樂歲成吾高。卻拾牆角粃。拂拭賀汝遭。

月下小酌

草樹已秋聲。郊原喜晚晴。風生雲盡散。天闊月徐行。下箸槎頭美。傳盃甕面清。追歡猶可勉。徂歲不須驚。

鄰曲有末飯被追入郭者憫然有作

春得香秬摘綠萸。縣符急急不容炊。君王日御金華殿。誰誦周家七月詩。

吾廬

吾廬鏡湖上。傍水開雲扃。秋淺葉未丹。日落山更青。孤鶴從西來。長鳴掠沙汀。亦知常苦飢。未忍吞糲粳。我食雖不肉。七箸窮芳馨。幽窗燈火冷。濁酒倒殘瓶。

飲酒望西山戲詠

太白十詩九言酒。醉翁無詩不說山。若耶老農識幾字。也與二事日相關。

小院

小院回廊夕照明。放翁宴坐一筇橫。銅匳暖徹香初過。鐵杵聲清藥欲成。世事熟看無一可。古人不作與誰評。新涼社酒家家熟。便用陽狂了此生。

發篋得故人書有感

衰鬢星星換舊青。世間萬事但堪驚。晨炊欲熟客未覺。夜漏漸殘人尙行。花發且爲無事飲。詩成非復不平鳴。京華朋舊凋零盡。忽見緘題似隔生。

秋光

年年最愛秋光好。病起逢秋合賦詩。叢菊漸黃人醉後。孤燈初暗雨來時。舊書細讀猶多味。老態相尋似有期。早信爲農勝覓祿。一生虛作虎頭癡。

晚秋風雨

儘道漁村陋。秋來物色奇。寒生沽酒興。雨及種花時。狂舞欲誰屬。清吟空自知。茫茫宇宙內。吾道竟何之。

幽居

白髮蕭蕭僅到肩。一枝藤杖日翩躚。草苫牖北棲雞屋。泥補橋西放鴨船。心似枯葵空向日。身如病櫟孰知年。放懷却有偷然處。不養金丹不學禪。

又

面面秋山擁翠屏。天留三畝著雲扃。迎霜南阜楓林赤。飽雨西村菜甲青。散策人驚衰後健。浩歌自覺醉中醒。凌煙冠劍應無爾。布帽襦裙老管寧。

故山

功名莫苦怨天慳。一櫂歸來到死閑。傍水無家無好竹。卷簾是處是青山。滿籃箭茁蠶簪白。壓擔稜梅鶴頂殷。野興盡時尤可樂。小江煙雨趁潮還。鏡湖。

又

禹祠行樂盛年年。繡轂爭先罨畫船。十里煙波明月夜。萬人歌吹早鸞天。花如上苑常成市。酒似新豐不直錢。老子未須悲白髮。黃公壚下且閑眠。禹祠。

又

老尉鴻飛隱市門。千年猶有舊巢痕。陸生於此寓棋局。予二十年前嘗寓居。曾丈時來開酒樽。曾丈稱文清公。渺渺帆檣遙見海。冥冥蒲葦不知村。數僧也復投詩社。零落今無一二存。梅山。

又

落磡泉奔舞玉虹。護丹松老臥蒼龍。霜柑籬角寒初熟。野碓雲邊夜自舂。挈榼人沽村市酒。打包僧趁寺樓鐘。幽尋自是年來嬾。枉道山靈不見容。雲門。

秋晚弊廬小葺一室過冬欣然有作

放翁畢竟合躬耕。剩喜東歸樂太平。碧瓦新霜寒尚薄。明窗嫩日雨初晴。素琴尋得無絃曲。野餉烹成不糝羹。更說市朝癡太絕。一湖秋水濯塵纒。

小室晚酌

病不禁寒怯早霜。東齋隨事具盃觴。清時寬大何妨醉。白首龍鍾未減狂。枝葉扶檠山果熟。鹽醃調適野蔬香。興闌徑覓華胥路。枕藉圖書滿一床。

冬晚山房書事

山澤何妨老太平。嶮巖骨相本來清。月明滿地看梅影。露下隔溪聞鶴聲。未辨藥苗逢客問。欲酬琴價約僧評。胡奴仁祖今俱絕。且學湘纍拾菊英。

又

屏迹山村病日增。烏皮几穩得閑凭。凍雲傍水封梅萼。嫩日烘窗釋硯冰。歲盡光陰饒袞袞。身閑醉夢且騰騰。蠻童采藥歸來晚。客至從噴喚不膺。

村居日飲酒對梅花醉則擁紙衾熟睡甚自適也

江村歲晚掩柴荆。地僻久無車馬聲。孤寂惟尋麴道士。一寒仍賴楮先生。醺頭珠滴愁先破。帳底春回夢易成。莫笑衰翁殺風景。小瓶梅蕊解卿卿。

山居疊韻

禽吟陰森林鹿伏。樸樹木鳴呼吾徒。慙僕逐肉粟。聯翩憐鷲肩。覆餗速戮辱。艱難還山間。獨欲足畜牧。躋梯棲西谿。築屋宿北谷。光芒常當藏。橫玉觸俗目。

寓歎

心已忘斯世。天猶活此翁。嫩湯茶乳白。軟火地爐紅。課婢耘蔬甲。呼兒下釣筒。生涯君勿笑。聊足慰塗窮。

又

久矣門無客。高齋獨掩扉。敢言消壯志。要是息危機。清露夜自滴。孤雲寒不歸。晨炊勿關念。更典篋中衣。

又

裘薄便冬暖。簞空長午飢。隨成乞米帖。看入借車詩。學古心猶壯。憂時語自悲。公卿闕自重。社稷欲誰期。

卷第二十二

贈惟了侍者

水邊剝啄打門誰。滿袖清風一紙詩。驚起放翁蝴蝶夢。半窗寒日欲斜時。

又

雪中僵臥不須悲。徹骨清寒始解詩。一等人間閑草木。月窗君看早梅枝。

題湖邊旗亭

春色初回杜若洲。佳人又典鸚鵡裘。八千里外狂漁父。五百年前舊酒樓。渡口遠山翠黛。天邊新月挂瓊鉤。回頭笑向紅塵說。也有閑愁到此不。

醉臥道邊覺而有賦

太華五千仞。天台四萬丈。一枝古藤如黑龍。天遣飄然寄閑放。莫怪公卿不我知。我自不知渠是誰。史書弄筆後來事。繡鞍寶帶聊兒嬉。旗亭爛醉官道臥。醒後無人數吾過。世間恩怨一時空。且免它年送臨賀。

寓懷

脫粟未爲飢，短褐未爲寒。衆毀心自可，身困氣愈完。菲屋雖三間，趺坐則已寬。濁酒不滿瓢，浩歌有餘歡。祿食妻子樂，功名後人看。成敗兩蝸角，貴賤一鼠肝。芒芒百年夢，底物堪控搏。不如學餐霞，駐此雙頰丹。行披終南雲，飛渡黃河湓。巋然過空城，人言古長安。霜露蒙荆榛，喟然增永歎。

又

蒼壁與黃琮，初非俗所貴。粲然薦纁藉，可對越天地。我豈賣餅兒，自銜三家市。持槃叫道邊，雖售無乃媿。文章等卜祝，王公以儒戲。書成藏名山，此是千載事。

又

我昔浮滄溟，浩渺難具論。華夷辨不辨，日月互吐吞。神龍忽上騰，尾鬣風霆奔。積浪自生火，烈焰焚乾坤。笑謂同舟子，世豈無鵬鯤。聊持豪逸氣，壓汝破碎魂。

又

鮑魚載沙丘，鹿馬獻阿房。泗上老亭長，仿伴起東方。干戈暗寓縣，黥徒化侯王。富貴誠可慕，道隨亦足當。青門獨無恙，種瓜亦何傷。後有阮嗣宗，絕識未易量。楚漢真豎子，孰謂斯人狂。

喜事

武夷老子雪垂肩，喜事何曾減少年。鸚鵡螺深翻細浪，辟邪爐暖起微煙。幽花滴露畫船虎豹九關君，勿歎未妨一笑住壺天。

甜羹菘葷服山藥芋作羹。

山廚薪桂軟炊秬。旋洗香蔬手自烹。從此八珍俱避舍。天蘇甌味屬甜羹。

縱筆

文叔一人知此翁。洛陽城裏又春風。讓他綠髮好年少。二十四歲作三公。

又

一紙除書到海邊。紫皇賜號武夷仙。功名敢道渾無意。暫作閑人五百年。

又

背上嵯峨兩肉山。明駝有債自須還。玉霄峯頭雪。匳鹿。清曉一聲煙雨間。

又

素月徘徊牛斗間。天風吹鶴度函關。一年似此佳時少。喚起陳搏醉華山。

自嘲解嘲

世變真難料。吾癡只自嘲。移山謀畚土。黏日欲煎膠。得句題修竹。烹茶拾墮巢。行年不須算。斷是死衝茆。

又

種稻稽山下。誅茆剡曲傍。鳴雞耐昏早。飛燕異炎涼。古劍寒三尺。殘書亂一床。穹穹與厚厚。能識我非狂。

春雨絕句

恰喜西窗晚照明。虛簷又報雨來聲。端憂不用占龜兆。壞盡花時自解晴。

又
千點猩紅蜀海棠。誰憐雨裏作啼粧。殺風景處君知否。正伴鄰翁救麥忙。

又
天公似欲敗蠶。雨冒南山暮不收。駭女癡兒那念此。貪看科斗滿清溝。

又
今年春半不知春。飛雹奔雷嚇殺人。縫得春衫元未著。免教惆悵洛陽塵。

又
梅中最晚是緗梅。一日來看欲百回。俗絮凡紅終避舍。不妨自向雨中開。

又
蕭條冬令侵春晚。浙瀝寒聲滴夜長。更事老翁頑到底。每言宜睡好燒香。

雨中臥病有感

病臥窮山白髮新。不堪風雨過中春。歌呼空倚一尊酒。零落漸無吾輩人。千載詩書成長物。兩京宮闕委胡塵。非熊老子不復見。誰弔遺魂清渭濱。

舟中作

不遷比景戍交河。三徑歸來得已多。應俗愈疎身老大。讀書漸廢意蹉跎。閑從孫叟蘇門嘯。醉和荆卿易水歌。歌罷却揮孤櫂去。石闌干下買漁蓑。石闌干在荆谿道中。

山園

買得新園近釣磯。旋營菴棟設柴扉。山經宿雨修容出。花倚和風作態飛。世事只成驚老眼。酒徒頻約典春衣。狂吟爛醉君無笑。十丈愁城要解圍。

聞虜亂

運數羣胡盡。煙塵北道昏。百年身易老。萬里志空存。楊柳搖馳道。櫻桃奉寢園。南公忠義薄。此恨與誰論。

題千秋觀懷賀亭

河湟使典珥左貂。曲江相君謝不朝。宮中玉環狐作妖。黠虜旁窺心已驕。天維欲絕地軸搖。有識凜凜憂宗祧。賀公託言師松喬。黃冠徑歸侶漁樵。老馬立仗不自聊。去如鸞鳳冲煙霄。傾都祖餞擁渭橋。賈誼大夫脫塵囂。揚州渡江木蘭橈。入東夜聽錢塘潮。我來故祠竹蕭蕭。黃冠野服傳生綃。詞卑魏匪英瓊瑤。空采蘋藻奠桂椒。虛堂斷香閉寂寥。遺魂零落何由招。

禹祠

我昔下三峽。南賓繫歸舫。渡江謁神禹。拜手薦俎壺。壽藤枝如虬。巨柏腹若剝。門庭雖日荒。殿寢猶枝梧。巴俗喜禱祠。解牛舞羣巫。巍巍黻冕古。食與夷鬼俱。聖度固兼容。臣憤獨不據。還鄉瞻廟貌。羸政久已除。嶽牧儼如生。想像聞都兪。廓清雖可喜。欲退復躊躇。念昔平水土。棋布畫九區。豈知千歲後。戎羯居中都。老虜失大刑。今復傳其雛。直令挽天河。未濯腥羶汙。夷鬼細事耳。披攘直須臾。天下讎不復。大恥何時祛。蚩蚩謂固然。此責在吾徒。揮涕灑庭草。誰憐小臣愚。

樊江

丁中一卷養魚經。又向樊江上草亭。朝雨染成新漲綠。春煙澹盡遠山青。榜舟不厭頻來往。岸幘常須半
醒。賦罷新詩自高詠。滿汀鷗鷺欲忘形。

東關

卬入東關物象奇。角巾老子曳筇枝。蠶如黑蟻桑生後。秧似青鍼水滿時。穿市不嫌微雨溼。過谿難喜壞
傾危。當年野店題詩處。又典春衣具午炊。

又

雲蹙魚鱗襯夕陽。放翁繫纜水雲鄉。一筇疾步人驚健。斗酒高歌自笑狂。風暖市樓吹絮雪。蠶生村舍采
桑黃。東阡南陌無窮樂。底事隨人作許忙。

練塘

微風吹頰酒初醒。落日舟橫杜若汀。水秀山明何所似。玉人臨鏡暈螺青。

娥江市

小聚依江近。支流入浦分。荒寒孤店雨。零亂野祠雲。薄餉炊畬粟。珍烹采澗芹。年來去健羨。摩腹自欣欣。

宿野人家

避雨來投白版扉。野人憐客不相違。林喧鳥雀棲初定。村近牛羊暮自歸。土釜煨湯先濯足。豆蔡吹火旋
烘衣。老來世路渾諳盡。露宿風餐未覺非。

舟中遣懷

三黜歸來結草廬。平生狂態掃無餘。但思下帷授老子。那復騎牛讀漢書。歷歷舊遊渾似夢。蕭蕭殘髮不勝梳。閑中事業君知否。不把漁竿卽荷鉏。

歸次樊江

芳草東西路。綠楊長短亭。人生豈匏繫。吾志本鴻冥。征袖朝霑雨。歸帆夜戴星。長魚幸能買。且復倒殘瓶。

夜過魯墟

中夜過魯墟。船底鳴細浪。月出菱歌長。林闇續火壯。故居不可識。四顧但青嶂。百年幾廢興。撫事一悽愴。士生本耕稼。時來偶擲相。功名亦餘事。所勉在素尚。况吾多難者。久已冥得喪。微祿行當辭。沒身事幽曠。

有感

溫洛榮河拱舊京。從來人物富豪英。報仇雖有楚三戶。守節得無齊二城。胡寇寧能斷地脈。王師行復暢天聲。鳳麟久伏。應爭奮勉爲明時。頌太平。

遊石帆玉笥石旗諸山

暮景苦多病。幽尋寄一欣。溪喧常似雨。石潤易生雲。天迴回鴉陣。林疎過鹿羣。莫談朝市事。吾老厭紛紛。

信步近村

端閑何以永今朝。拈得筇枝度野橋。三畝空園喧啄木。十尋高樹絡凌霄。長飢未必緣詩瘦。多悶惟須賴酒澆。興盡歸來又陳迹。一林風葉暮蕭蕭。

寒食省九里大墓

陌上簫聲正賣錫，監與兀兀雨冥冥。人來平野一點白，山壓亂雲千疊青。石馬朱門松下路，凍齏冷飯柳陰亭。華顛尚記兒童日，撫事興懷涕自零。

平水道中

處處陂水滿，家家巢燕忙。葉舒桑漸闊，穗重麥初昂。高下山花發，青紅粉餌香。亦知時節好，老大自悲傷。
五雲橋在時鏡湖陂，防不廢則若耶溪水常滿，可行大舟至雲門，此橋本跨溪上，今乃在平陸矣。

小雨雲門溪上

好雨疎疎壓暮埃，斷雲漠漠帶春雷。離黃穿樹語斷續，翠碧銜魚飛去來。生菜入盤隨冷麩，朱櫻上市伴青梅。狂吟不是誇強健，老氣如山未許摧。

雲門獨坐

山北山南處處行，回頭六十七清明。如今老去摧頽甚，獨坐焚香聽水聲。

泛湖至東涇

春水六七里，夕陽三四家。兒童牧鵝鴨，婦女治桑麻。地僻衣巾古，年豐笑語諱。老夫維小艇，半醉摘藤花。

又

湖光分別浦，嶺路過前村。泉石相縈帶，雲煙互吐吞。耕犁無易業，隣曲有通婚。試覓誅茆地，吾將遺子孫。

又

細細桃枝竹，疎疎踠眼籬。雪霜燒封夜，月露采菱時。腰斧登山早，移晷出浦遲。關心盡幽事，恨汝不能詩。

舟過梅塢胡氏居愛其幽邃爲賦一詩

稽山翠入家家窗，此家清絕無與雙。丹葩綠樹錦繡谷，清波白石玻璃江。一堤茂草有眼橫，數掩短籬無吠龍。北軒商略可散髮，借與放翁傾酒缸。

北窗

北窗本意傲羲皇，老返園廬味更長。憤健戴星耕白水，蠶飢衝雨采青桑。偃儒朱墨開冬學，廟史牲牢祝歲穰。從此鬢毛雖似雪，未妨擊壤頌虞唐。

聞蛙

科斗忽安在，蛙聲豪有餘。雖成兩部樂，恨失一編書。忿怒緣何事，號呼可奈渠。廚人不遐棄，猶得伴溪魚。

晚春感事

風惡房櫺燕子歸，雨多山路蕨芽肥。青衿旋擣作寒食，白葛預裁充暑衣。稗子日長供課早，故人官遠寄書稀。幽居自喜渾無事，又向湖陰坐釣磯。

又

和風薄靄過清明，減盡重裘覺體輕。正午軒窗無樹影，乍晴阡陌有鶯聲。釀成西蜀鵝雛酒，鷓黃廣漢酒名。煮就東坡玉糝羹，捫腹愴然出門去。春郊何處不堪行。

又

徙倚闌干送落暉。年華冉冉恨依依。護雛燕子常更出。著雨楊花又嬾飛。已爲讀書悲眼力。還因攬帶歎腰圍。親朋半作荒郊冢。欲話初心淚滿衣。

又

少年騎馬入咸陽。鶻似身輕蝶似狂。蹴鞠場邊萬人看。鞦韆旗下一春忙。風光流轉渾如昨。志氣低摧只自傷。日永東齋淡無事。閉門掃地獨焚香。

山居

平生杜宇最相知。遺我巢山一段奇。茶磴細香供隱几。松風幽韻入哦詩。溪邊拂石同兒釣。竹下開軒喚客棋。幾許放翁新事業。不教虛過太平時。

四月三日同子坦子聿遊湖中諸山

我行無所詣。悠颺信舴舲。愛此綠樹村。捨棹度小嶺。路窮忽披豁。恍然得異境。蒼玉立萬峯。清鏡渺千頃。更爲西南行。聊破春晝永。遙看秀遠處。疑足事幽屏。一崦果可人。奇石插碧井。鏘鳴若環珮。其味復甘冷。徘徊不忍去。照我鬢鬢影。須臾日穿林。井面光炯炯。古今勝絕意。正用一笑領。安得絕世喧。於茲慕箕穎。

梅仙塢小隱

綠樹陰陰小嶺西。一翁二子自扶攜。雨前芳嫩初浮盃。臘脚清醇旋拆泥。本欲省緣行買餅。未能去殺向烹雞。二者皆紀是日實事。弄饒莫便尋歸路。湖靜無風日未低。

盟雲

謂雲本無心。企望乃爾奇。謂雲果有心。百變端爲誰。豈憫此翁愁。一出怡悅之。橫截千嶂平。高擎一峯危。銀城突嵯峨。玉海浩渺瀾。或爲羣龍矯。或作孤鶴飛。卷舒閑有態。去來倏無時。滃滃覆松頂。靄靄映水湄。帶雨過僧窗。和月傍釣磯。豈惟困畫工。吾詩固難追。惟當與之盟。畢世相娛嬉。忍飢固易耳。此友不可欺。

示兒

舍東已種百本桑。舍西仍築百步塘。早茶采盡曉茶出。小麥方秀大麥黃。老夫一飽手捫腹。不復舉首號蒼蒼。讀書習氣掃未盡。燈前簡牘紛朱黃。吾兒從旁論治亂。每使老子喜欲狂。不須飲酒徑自醉。取書相和聲琅琅。人生百病有已時。獨有書癖不可醫。願兒力耕足衣食。讀書萬卷真何益。

村居初夏

暮境難禁日月催。臘醅初見拆泥開。壓車麥穗黃雲卷。食葉蠶聲白雨來。薄飯蕨薇端可飽。短衫紵葛亦新裁。宦塗自古多憂畏。白首爲農信樂哉。

又

北陌東阡節物新。往來饋餉走比鄰。出籠鵝白輕紅掌。借菜魚鮮淡墨鱗。笑語相聞豐歲樂。耕桑自足古風淳。頽然一醉茱簷下。且免西曹議吐茵。

又

煮酒開時日正長。山家隨分答年光。梅青巧配吳鹽白。筍美偏宜蜀豉香。風暖緊催蠶上簇。雨餘閑看稻

移秧老夫見事真成晚浪走人間兩鬢霜

又

天遣爲農老故鄉山園三畝鏡湖傍嫩莎經雨如秧綠小蝶穿花似繭黃斗酒雙雞人笑樂十風五雨歲豐穰相逢但喜桑麻長欲話窮通已兩忘

又

故鄉風物勝荆吳流水青山無處無列植園林多美果飽鉏畦壟富嘉蔬橋邊來淬剝桑斧池畔行芟縛櫻菰我有素紈如月扇會憑名手作新圍

城東逆旅

店家乞火燎征衣溼竹生薪不受吹更甚從戎戍邊日正如隨計入關時百年擾擾夢相似萬事悠悠心自知賴有牀頭周易在不妨清坐忍朝飢

江村初夏

紫葢狼藉桑林下石榴一枝紅可把江村夏淺暑猶薄農事方興人滿野連雲麥熟新食麩小裏荷香初賣鮮蘋洲蓬艇疾如鳥沙路芒屨健如馬君看早朝塵撲面豈勝春耕泥沒踝爲農世世樂有餘寄語兒曹勿輕捨

舟中作

湖海飄然避世紛汀鷗沙鷺舊知聞漁舟臥看山方好野店沽嘗酒易醺病骨未成松下土老身常伴渡

頭雲美芹欲獻雖堪笑。此意區區亦愛君。

東關

天華寺西艇子橫。白蘋風細浪紋平。移家只欲東關住。夜夜湖中看月生。

又

煙水蒼茫西復東。扁舟又繫柳陰中。三更酒醒殘燈在。臥聽蕭蕭雨打篷。

少微山

平生一舸艇。幾到少微山。傑觀掃無迹。高人呼不還。崖崩危欲壓。磴斷滑難攀。日暮增幽興。漁歌莽蒼間。

舟行至織女潭

艣枝搖碎碧琉璃。織女潭東白塔西。帶犢吳牛依茂樹。添巢海燕啄新泥。山谿曲折遙通谷。沙水淙潺各赴溪。猶恨兒曹不同載。一尊他日要重攜。

書歎

淩落非時用。棲遲送此生。只知求醉死。何憚得狂名。伏櫪天涯老。吞舟海澨橫。眼前交舊盡。有淚對誰傾。

小園獨立

草香無處覓。花嫩不禁飛。澤國春歸晚。柴門客過稀。新泥添燕戶。細雨溼鶯衣。倚杖臨階久。衰翁氣力微。

觀蘇滄浪草書絹圖歌

天孫獨處河之涘。龍梭夜織冰蠶絲。機頭剪落光陸離。騎鯨仙人醉題詩。字大如斗健欲飛。利刃猛斫生

蛟螭墨渴字燥尤怪奇。百彪潛影神靈悲。嗚呼束雲作筆兮。海爲硯。激水一騰龍野戰。乾坤震蕩人始驚。筆未落時誰得見。

睡起書觸目

壓架藤花重圍枝。杏子稠。渴蜂窺硯水。弱燕集簾鉤。入夏暑猶薄。投閑身自由。午窗初睡起。幽興付茶甌。

曉雨初霽

曉來一雨洗塵痕。濃綠陰陰可一園。燕子聲中寂無事。獨穿苔徑出籬門。

夏雨

連朝暑溽不可過。動地忽有東北風。嗟峨雲壓世界碎。天矯龍卷江湖空。塵沙洗濯草木醒。溝澮激澗舟舸通。更煩造物出壯觀。跨海千丈垂天虹。

自東涇度小嶺聞有地可卜菴喜而有賦

小嶺西南煙水間。頗聞有地百弓寬。誰其云者兩黃鶴。何以報之雙玉盤。竹塢未昏先曉隱。蓬汀當暑亦清寒。一菴何日從吾好。會約高人共倚闌。

露坐

五月暑猶薄。中庭試葛衣。蛙聲經雨壯。螢點避風稀。塵念三生誤。歸心半世違。殘年端有幾。可復負漁磯。

自笑

自笑胸中抵海寬。韭齋麥飯日加餐。住山緣熟塵機息。養氣功深稿面丹。惡路慣曾經澗。浮生何費夢。

邯鄲鏡湖五月秋蕭爽。剩傍灘頭把釣竿。

夜賦

夜窗搔首髮鬢髻。病不勝衣倚瘦藤。堪笑顏回忍飢面。常依韓愈看書燈。殘生已與灰俱冷。舊友誰如几可憑。月落風生忽增氣。掠簷勁翮有歸鷹。

書懷

老死已無日。功名猶自期。清笳太行路。何日出王師。

醉後作小草因成長句

天教老去未全衰。猶欠縱橫萬首詩。家近將軍觴詠地。身如太史滯留時。酒翻銀浪紅螺殼。墨涌玄雲紫玉池。流落不妨風味在。花前醉草寫烏絲。

雨中作

空澗初喜灑欄楹。忽聽空階滴瀝聲。高枕便知宜夕睡。豐年不歎負春耕。多情幽草沿牆綠。無賴羣蛙繞舍鳴。屈指清秋雨句近。却愁徂歲又崢嶸。

詠史

入郢功成賜屬餼。削吳計用載廚車。閉門種菜英雄事。莫笑衰翁日荷鋤。

登鶴鼻山至絕頂訪秦刻石且北望大海山路危甚人迹所罕至也

街頭旋買雙芒屨。作意登山殊不惡。蒼崖無罅竹鞭逸。崩石欲墜松根絡。憑高開豁快送目。歷險崎嶇危

著脚川雲忽起兩蛟舞。瀑水高吹萬珠落。大巖空腔誰所剝。絕壁峭立端疑削。坡平或可坐百人。峽束僅容飛一鶴。蛇蹊岌岌頭自眩。鬼谷慘慘神先愕。秦皇馬迹散莓苔。如鑄非鑄鑿非鑿。殘碑不禁野火燎。造物似報焚書虐。人民城郭俱已非。煙海浮天獨如昨。

六七月之交山中涼甚

城市方炎熱。村墟乃爾涼。拂窗桐葉下。繞舍稻花香。獨鶴警秋露。雙螢明屋梁。臥聞機婦織。感歎夜初長。

幽居

大患元因有此身。百年強半走踈踈。折殘廣武城邊柳。染盡洛陽衣上塵。繞樹鶻孤棲漸穩。支床龜老息初勻。出門不欲摩雙眼。世態年來又一新。

又

百頃菰蒲古澤中。老夫病起恰秋風。流年不貸人皆老。造物無私我自窮。市隱昔曾從嘯父。山栖今欲效園公。芳樽雖匪金丹術。槁面尊前也暫紅。

又

煙水重重際海涯。夜深風雨耿蒹葭。交朋散落歡娛少。憂患侵陵志氣衰。癡腹何由有鱗甲。俗情自未去。毛皮詩書六十餘。年夢更擬傳衣付小兒。

園中雜詠

藝花本無多。過眼那復遺。陰陰一園綠。佳處乃在茲。悠然東窗下。顧與枕簟宜。風輕竹解籜。雨足果壓枝。

陸放翁集

劍南詩案

卷第二十三

七月一日夜坐舍北水涯戲作

兀傲胡床酒半醒。釣筒收盡數舟橫。風生細葛無三伏。月上疎林正四更。北斗離離低欲盡。明河脈脈去無聲。斥仙豈復塵中戀。便擬騎鯨返玉京。

病後登山亭

野客雙蓬鬢。空山一草亭。睡魔欺茗薄。疾豎怯丹靈。治世窮馮衍。殘年老管寧。安居得後死。不敢恨飄零。

覽鏡

白頭漸覺黑絲多。造物將如此老何。三萬里天供醉眼。二千年事入悲歌。劍關曾蹴連雲棧。海道新窺浴日波。未願中興吾未死。插江崖石竟須磨。比自三江航海至丈亭。

遣懷

許國區區不自勝。秋風空羨下韓鷹。青雲夜歎初心誤。白髮朝看一倍增。積憤有時歌易水。孤忠無路哭昭陵。唐制有冤者許哭。昭陵下頭顱自揣今如此。尚欲閑尋紫閣僧。陳希夷奇錄宣靖復招紫閣僧相之。

開元寺小閣十四韻

淵源兩名柄。築閣捫星辰。近山臥蜿蜒。遠山高嶙峋。朝看雨空濛。暮揖雲輪囷。賦詩有宿諾。下語終未親。萬法不孤起。請君作其因。高掛四面窗。淨掃一榻塵。室中絕人聲。門前謝車輪。容我睡半日。兩忘主與賓。緩燒海南沉。細碾建谿春。是間儻有句。可與屈宋鄰。詩如奮螭龍。天矯不受馴。使可造次得。何異池中鱗。世有擾龍手。媿我非其人。時不已。就乎著眼勿逡巡。

寄題趙寬之主簿慈順堂

人間得意盡危機。獨有榮親事未非。魏闕恩光新綠綬。高堂娛侍舊斑衣。牙籤插架書無恙。蘭膳循陔養莫違。况有兩公天下士。爲君百斛瀉珠璣。謝昌國中丞楊廷秀祕監皆嘗有此作。

郊居

平生萬事不容求。惟有郊居志已酬。更漏遠城雞唱曉。歲時無曆葉知秋。潮生小舫行收荻。月落長歌起飯牛。已作幸民仍醉死。人間毀譽判悠悠。

又

索米官倉例坐懸。東方未可戲侏儒。行藏要付他年看。富貴真堪一笑無。等死不過賒歲月。長閑勿更問妻孥。狂豪儘道非平昔。老膽輪囷尙滿軀。

新秋感事

江上清秋昨夜回。漁扉正對荻洲開。志存天下食不足。節慕古人譏愈來。風際紙鳶那解久。祭餘芻狗會堪哀。蕭然散髮聽秋雨。剩領新涼入酒盃。

又
北渚秋風凋白蘋。流年冉冉默傷神。強顏未忍乞播祭。積毀僅逃輸鬼薪。半榼浮蛆初試釀。兩齏斫雪又嘗新。受恩自度終無報。聊爲清時備隱淪。

八月一日微雨驟涼

流汗沾衣喘不供。孰知有此快哉風。新涼忽覺從天下。殘暑真成掃地空。恰轉輕雷過林塢。已吹好雨到簾櫳。幽人病愈閑無事。剩賦歌詩樂歲豐。

秋雨

剡曲高秋一草亭。雨來迨我醉初醒。豪吞平野宜閑望。急打虛窗入靜聽。沙上溼雲號斷雁。籬根衰草綴孤螢。老人嬾復親燈火。臥看爐香掩素屏。

又

赤日黃塵勢已窮。七月中旬後。秋暑尤劇。凄風苦雨却忽忽。盛衰默定見天造。寒暑密移成歲功。阿葉凋零無茂木。羽翰願頽有羈鴻。誰知病客悲秋意。盡在空塔點滴中。

又

冷雨蕭蕭澀不晴。叢篁遮盡小窗明。故衾獨展成酣寢。新釀初嘗得細傾。壁簡積陰添蠹字。牀琴生潤咽絃聲。此時懷抱真難遣。一首清詩信筆成。

月下獨坐

髮根蕭爽受微風。徙倚闌干月正中。天宇了無雲一點。城樓俄報鼓三通。庭臯簌簌吹凋葉。江渚翩翩落斷鴻。回首人間塵土惡。騎鯨聊駐水精宮。

秋日步至湖桑埭西

伏枕衰方劇。搗筠氣忽增。細泉鳴暗竇。疎樹映孤燈。斷雁寒依渚。強魚健脫罾。行纏已無用。卻作在家僧。

秋社

明朝逢社日。鄰曲樂年豐。稻蟹雨中盡。海氛秋後空。不須諛土偶。正可倚天公。酒滿銀盃綠。相呼一笑中。

又

浦溆漁歌遠。蒹茨績火明。新涼迎病起。樂事及秋成。社肉分初至。官壺買旋傾。殘年得家食。何以報時清。

秋思

南鄭歸來二十霜。背人歲月去堂堂。破裘不補知寒早。倦枕無憐厭夜長。年少若爲評宿士。狂生曾是說高皇。慨然此夕江湖夢。猶繞天山古戰場。

又

一生書劍徧天涯。兩歲秋風喜在家。爛醉日傾無算酒。高眠時聽屬私蛙。園林夕照明丹柿。籬落初寒蔓碧花。便擬掛冠君會否。耳根不復耐喧嘩。

又

殘暑偏能著此翁。吹襟剩喜得西風。露滋小徑蘭苔冷。月射高梁燕戶空。衰病呻吟真一洗。醉歌跌宕與

誰同從今日日增幽興。水際先丹數葉楓。

又

半年閉戶廢登臨。直自春殘病至今。帳外昏燈伴孤夢。簷前寒雨滴愁心。中原形勝關河在。列聖憂勤德澤深。遙想遺民垂泣處。大梁城闕又秋砧。

又

雁陣橫空送早寒。白頭病叟住江干。風林脫葉山容瘦。霜稻登場野色寬。萬里關河驚契闊。一尊鄰曲話悲歡。書生餓死尋常事。那得重彈掛壁冠。

又

藥畦蔬圃夕陽中。帶落冠欹一病翁。步蹇每妨行藥輿。眼昏幾廢讀書功。露濃乍警雲巢鶴。風勁先凋玉井桐。欲賦悲秋却休去。鬢絲已是滿青銅。

以事至城南書觸目

十里西風吹帽簷。江城衣杵遠猶聞。路如劍閣逢秋雨。山似爐峯鎖暮雲。原上老翁眠犢背。籬根小婦牧羊羣。百錢且就村場醉。舌本醇醪莫苦分。

舍西夕望

蒹葭菱陂北。柴門藥圃西。奇雲去人近。澹月傍簷低。野迴羊牛下。林昏鳥雀栖。郊墟少遠往。父子自扶攜。

題城侍者峴山圖

漢水沉碑安在哉。千年峴首獨崔嵬。平生不作羊公計。但欲無名死草萊。

題城侍者剡溪圖

暮境侵尋兩鬢絲。湖邊自翫小茆茨。從今步步俱回棹。不獨山陰興盡時。

晚秋農家

老來萬事懶。不獨廢應酬。門前卽湖山。亦復罕出遊。吾廬有真樂。一榻眠高秋。回看世上事。得喪良悠悠。

又

秋雨無時休。令我雙鬢竊。庭荒何由鋤。木落不得掃。道奴入城市。寸步困泥濘。孤首幸可烹。芻豢置勿道。

又

蒙犬使警夜。畜雞用司旦。微警盜所窺。失旦固吾患。豈無糠糶費。施報不可緩。家居亦爲政。發我中夜歎。

又

東鄰稻上場。勞之以一壺。西鄰女受聘。質之以一襦。誠知物寡薄。且用交里閭。努力畢農功。租賦勿後輸。

又

我年近七十。與世長相忘。筋力幸可勉。扶衰業耕桑。身雜老農間。何能避風霜。夜半起飯牛。北斗垂大荒。

又

疎溝架略彴。拾瓦疊浮屠。旣晝蒸韭畦。遂營瓜芋區。鼓香吳鹽白。飽計已有餘。捫腹笑自賀。無羊敗吾蔬。

又

苦寒牛亦耕。甚雨雞亦鳴。物物各有職。忘心其敢萌。我老返農圃。學業付後主。吾已賣新由。勿聚讀書聲。

又

吾里賢長者。蓋有萬石風。少年以利遷。但可哀其窮。仁義亦何常。聖賢與人同。我言不足取。汝豈忘乃翁。

湖上小閣

蒲萄初紫柿初紅。小閣憑闌萬里風。莫怪年來增酒量。此中能著太虛空。

苦雨歎

九淵龍公出忘還。瓦溝垂溜聲淙淙。茫茫大澤北際海。激激平湖南浸山。吾廬四望路俱斷。蛙黽爭雄亂昏旦。蒲牀腐席夜失眠。溼竈生薪朝不爨。今年十分喜有秋。豈知青秧出禾頭。老夫一飽復繆悠。聽兒讀書寬百憂。

遣懷

秋風策策冷吹衣。謝病經年晝掩扉。絕世本來希獨立。刺天不復計羣飛。細思萬古名何用。太息九原誰與歸。葬近要離非素意。富春灘畔有苔磯。

道石吾家舊藏奇石甚富今無復存者獨道石一尚置几案間戲作

秋風嫋嫋雨班班。身隱幽窗筆硯閑。小試靈公縮地術。數峯閑對道州山。

又

林廬靈壁俱尤物。散落人間不復還。投老東歸風味在。春陵小軸伴身閑。

又

誤因祿米棄蓴鱸。一落塵埃底事無。布韞青鞵雖與盡。此峯聊當臥遊圖。

蘭亭

蘭亭絕境擅吾州。病起身閑得縱遊。曲水流觴千古勝。小山叢桂一年秋。酒酣起舞風前袖。興盡回棹月下舟。江左諸賢嗟未遠。感今懷昔使人愁。

小菴村居

昔我作屋時。趣欲庇風雨。菲茨寒自刈。條枚細相拄。庫溼生虵蚋。得煖森翅羽。摧撓自棟梁。朽敗連柱礎。鄰父爲我言。努力謀安處。土堅瓦可陶。步近木易取。豈知七十翁。沉痾久未愈。身世如浮漚。家舍真逆旅。一牀居易足。十歲敢自許。且當復其初。浩歌臥環堵。

書陶靖節桃源詩後

寄奴談笑取秦燕。愚智皆知晉鼎遷。獨爲桃源人作傳。固應不仕義熙年。

有叟

有叟鏡湖邊。菲茨八九椽。憑闌秋萬里。閉戶醉經年。身外浮名小。胸中浩氣全。此生吾自判。造物恐無權。

不寐

老眼睡眠少。林居煙雨昏。百年歸老死。萬事付乾坤。熠熠螢穿幔。錚錚鐵過門。欲明開漉稻。浩歎閱黎元。
遙夜

遙夜凜高秋。蕭條念褐裘。煙江新雁下。竹塢暗螢流。舊友嗟誰在。初心恐不酬。一尊桑落酒。聊得洗吾愁。

秋晚思梁益舊遊

幅巾筠杖立籬門。秋意蕭條欲斷魂。恰似嘉陵江上路。冷雲微雨溼黃昏。

又

憶昔西行萬里餘。長亭夜夜夢歸吳。如今歷盡風波惡。飛棧連雲是坦途。

又

滄波極目江鄉恨。衰草連天塞路愁。三十年間行萬里。不論南北怯登樓。

紹熙辛亥九月四日雨後白龍挂西北方復雨三日作長句記之

長空騫闌如欲夜。白龍騰孳見雲罅。鱗間出火光照江尾。卷風霆雨如射老人百歲見未曾。兒童閉門伏牀下。髮毛慘凜誰復支。性命么微不禁嚇。登場已歎禾生耳。出戶仍愁泥沒膝。皇天生民豈不愛。龍亦何心敗吾稼。父老相看出無策。攪涕頓頰號粉社。移牀避漏我亦忙。秉燭題詩寄悲吒。

蔬圃

蔬圃依山脚。漁扉並水涯。臥枝開野菊。殘枿出秋茶。病骨知天色。羈懷感物華。餘年有幾許。且灌邵平瓜。

農家

南畝勤耒耨。西城謹蓋藏。種蕃乘霽日。斫荻待微霜。谿碓新春白。山廚野蕨香。何須北窗臥。始得傲羲皇。

自喜

半生羈宦走人間。醉裏心寬夢裏閑。自喜如今無一事。讀書纔倦即遊山。

重九後風雨不止遂作小寒

病軀剩喜即新秋。殘暑無端抵死留。風雨掃除雖一快。凋年搖落已堪愁。

又

菊枝欹倒不成叢。井上梧桐葉半空。射虎南山無復夢。雨蓑煙艇伴漁翁。

又

夜長稚子添書課。霜近衰翁憶醉鄉。儘道吳中時節晚。菊花也有一枝黃。

城南上原陳翁以賣花爲業得錢悉供酒資又不能獨飲逢人輒強與共醉辛亥九月十二日偶過其門訪之敗屋一間妻子飢寒而此翁已大醉矣殆隱者也爲賦一詩

君不見會稽城南賣花翁。以花爲糧如蜜蠶。朝賣一株紫。暮賣一枝紅。屋破見青天。盎中米常空。賣花得錢送酒家。取酒盡時還賣花。春春花開豈有極。日日我醉終無涯。亦不知天子殿前宜白麻。亦不知相公門前築堤沙。客來與語不能答。但見醉髮覆面垂髭髻。

甜羹之法以菘菜山藥芋菜蕪雜爲之不施醯醬山庖珍烹也戲作一絕

老住湖邊一把茆。時沾村酒具山肴。年來傳得甜羹法。更爲吳酸作解嘲。

暮秋書事

暮秋風雨卷茆茨。砧杵聲中過雁悲。楓葉欲丹先慘澹。菊叢半倒不支持。旗亭人熟容賒酒。野寺僧閑得

對碁莫怪苦尋林下事，駭機滿地只心知。

早自偏門入城晚，出南堰門以歸。

早從偏門入，暮從南堰歸。鮑郎山前路，空翠浮煙霏。秋令忽已深，病骨頻添衣。向來慕功名，常恐斯心違。乃今知其難，崦嵫迫殘暉。伯鸞與幼安，尚友或庶幾。到家亦既夕，青燈耿窗扉。且復取書讀，父子窮相依。

初寒

蚊蠅掃迹葉飛初，剩喜幽窗讀我書。牆角短檠真耐久，手中團扇又成疎。百年作夢行休去，九月無衣亦晏如。獨恨故人消息斷，寒江誰與倩雙魚。張季長自離吳門未得近書。

小舟自紅橋之南過吉澤歸三山

霏霏寒雨數家村，雞犬蕭然晝閉門。它日路迷君勿恨，人間隨處有桃源。

又

六月芙蓉正盛時，畫船長記醉題詩。世間好景元無盡，霜落荷枯又一奇。

得猫於近村以雪兒名之戲爲作詩

似虎能緣木，如駒不伏鞍。但知空鼠穴，無意爲魚飧。薄荷時時醉，氈毼夜夜溫。前生舊童子，伴我老山村。

晝睡

眼昏妨讀書，不睡復如何。擁被新寒裏，伸腰午飯餘。斷香繁倦枕，疎雨滴前除。未竟華胥樂，茶甌莫喚渠。

戲詠閑適

陸放翁集 十三 劍南詩集 卷二十三

暮秋風雨暗江津。不下書堂已過旬。鸚鵡籠寒晨自訴。狸奴甃煖夜相親。典衣旋買修琴料。叩戶時聞請樂人。說與鄉鄰當賀我。死前長作自由身。

寓歎

荷戈常記壯遊時。齒豁頭童不自知。已分功名非力致。更悲文字與年衰。端居漸覺從人懶。熟睡偏於聽雨宜。自斷歸休君勿怪。一盃薺糲敵瓊糜。

又

醉撫酒壺憐爛矮。臥看香燭愛磷嶙。舊時京洛塵埃面。今作江湖風月民。幻世界中均起滅。太虛空裏孰兔親。可齋入定論千劫。說與天魔任惱人。

獨夜

獨夜迢迢掩素屏。病懷羈思共伶仃。房櫺十月寒初重。風雨三更酒半醒。繁杵有聲時斷續。殘缸無焰尚青熒。恍然喚起西征夢。身臥金牛古驛亭。

記九月二十六夜夢

海山萬峯鬱參差。宮殿插水蟠蛟螭。碧桃千樹自開落。飛橋架空來者誰。桐枝高聳宿丹鳳。蓮葉半展巢金龜。和風微度寶箏響。永日徐轉簾陰移。西廂恍記舊遊處。素壁好在尋春詩。當年意氣不少讓。跌宕醉墨紛淋漓。宿醒未解字猶溼。人間歲月浩莫推。歎驚撫几忽夢斷。海闊天遠難重期。

夢海山壁間詩不能盡記以其意追捕

碧海無風鏡面平。潮來忽作雪山傾。金橋化出三千丈。閑把松枝引鶴行。

又

海上乘雲滿袖風。醉捫星斗躡虛空。要知壯觀非塵世。半夜鯨波浴日紅。

又

一劍能清萬里塵。讒波深處偶全身。那知九轉丹成後。却插金貂侍帝宸。

又

春殘枕藉落花眠。正是周家定鼎年。睡起不知秦漢事。一尊閑醉華陽川。

當食歎

黃鶴舉網收。錦雉帶箭墮。藉藻頰鯉鮮。發奩蒼兔臥。吾儕亦何心。甘味樂死禍。貪夫五鼎烹。志士首陽餓。請言觀其終。孰爲當弔賀。八月黍可炊。五月麥可磨。一飽端有餘。努力事春籜。

睡鄉

有酒君勿廢。入腸作戈矛。有書君勿觀。到眼生君愁。不如睡鄉去。萬事風馬牛。郊墟無來客。風雨送暮秋。昔者蟲唧唧。霜林葉颼颼。是時一枕睡。不博萬戶侯。斗帳裁青氈。重衾擁黃紬。華山希夷翁。千載可與遊。

晨興

未旦雞三號。將旦鵝羣鳴。湖陂地曠快。頗樂聞此聲。回首宦遊日。鈴索攪五更。未言簿書勞。讒謗隨日生。一飢百憂散。灑然懷抱清。雨後初得齋。晨庖有珍烹。豈不念加糝。侈汰恐易萌。且當讀古書。至味敵大羹。

初冬從父老飲村酒有作

父老招呼共一觴。歲猶中熟有餘糧。麴花漫漫渾如雪。豈莢離離未著霜。山路猶歸收兔網。水濱農隙架魚梁。醉看四海何曾窄。蘇子美詩云。吁嗟四海窄。且復相扶醉夕陽。

懷南鄭舊遊

南山南畔昔從戎。賓主相期意氣中。渴驥奔時書滿壁。餓鷄鳴處箭凌風。千艘粟漕魚關北。一點鋒專路谷東。惆悵壯遊成昨夢。戴公亭下伴漁翁。

冬夜讀書

霜雪紛紛滿鬢毛。凋年懷抱獨蕭騷。房櫳夜悄孤燈暗。原野風悲萬木號。病臥極知趨死近。老勤猶欲與書塵。小兒可付巾箱業。未用逢人歎不遭。

余爲成都帥司參議。成將軍漢卿爲成都路兵鈐相從。無虛日。余被召出蜀。漢卿坐法謫居於涪。旣得自便。因卜築爲涪人。今年廣漢僧祖成來山陰。乃言嘗至永嘉樂清縣柳市之廣福寺。有黃先生寓寺中。煉丹及見則漢卿也。余聞之感歎不已。爲賦此詩。

將軍胸中備文武。鐵馬黃旗玉關路。羌胡可滅心自知。富貴有命才可與。奪官置之三峽中。空山猿鳥同朝暮。道逢奇士握手談。明日家人不知處。平生心事一丹竈。萬里生涯兩芒屨。東嘉古寺臥高秋。時有巢仙來叩戶。山中豈識故將軍。但怪英姿凜不羣。電眼蝟鬚長八尺。論丹說劍氣凌雲。

雜題

松肪釀酒石根醉。榭葉作衣雲外行。指點人間一長歎。秋風又到洛陽城。

又

山家貧甚亦支撐。時撫桐孫一再行。朝飯米空烹芋粥。夜缸油盡點松明。

又

羊裘老人只念歸。安用星辰動紫微。洛陽城中市兒眼。情知不識釣魚磯。

又

黍醕新壓野雞肥。茆店酣歌送落暉。人道山僧最無事。憐渠猶趁暮鐘歸。

又

釣魚吹笛本閑身。正坐微官白髮新。著屐此生猶幾納。可令復踏九衢塵。

又

山光染黛朝如溼。川氣鎔銀暮不收。詩料滿前誰領略。時時來倚水邊樓。

思蜀

思蜀寸心折。歸吳雙鬢衰。今年脫虎口。昨夜夢鼉頭。死隔平時友。愁吟別後詩。江山應好在。誰記踏青期。

又

一作劍關客。閑遊將十年。不嫌狂駭俗。自許醉知天。瑞草溪橋路。青衣野廟壩。霜天獵歸處。萬里入橫鞭。

又

來從雲棧北，行度雪山西。故事談金馬，遺蹤訪石犀。閑情淡於水，豪飲醉如泥。壞壁塵封遍，何人拂舊題。

又

玉食峨嵋樾，金齏丙穴魚。常思晚秋醉，未與故人疎。白髮當歸隱，青山可結廬。梅花消息動，悵望雪消初。
余昔在僊爲師伯渾王志夫張功父王季夷瑩上人輩以秋晚來訪樂飲旬日而去。

散吏

拜賜明時散吏名，頭銜字字敵冰清。讀書有味聊忘老，賦祿無多亦代耕。笠澤尊鱸秋向晚，綠山笙鶴月微明。人間樂事今真得，莫恨摧頽白髮生。

題剡溪瑩上人梅花小軸

孤舟清曉下溪灘，爲訪梅花不怕寒。忽有一枝橫竹外，醉中推起短篷看。

夜夢遊驪山

秦楚相望萬里天，豈知今夕宿溫泉。穿雲漱月無窮恨，依舊潺湲古縣前。
溫飛卿詩云：至今湯殿水鳴咽，縣前流。

枕上

簷角查查鵲語輕，銜糴澹澹日痕生。清愁不逐爐香散，旋暖寒齋解宿醒。

五更讀書示子

近村遠村雞續鳴，大星已高天未明。牀頭瓦檠燈煜燭，老夫凍坐書縱橫。暮年於書更多味，眼底明明見

幸謂。但令病骨倚枝梧。半盞殘膏未爲費。吾兒雖黷素業存。頗能伴翁飽菜根。萬鍾一品不足論。時來出手蘇元元。

夜坐

天公似欲假餘齡。鍼石年來幸小停。微火暖爐娛獨夜。斷雲吐月縞中庭。眼前樂事寒醅綠。身後虛名蠶簡青。賴有古人同此志。傍觀不用歎伶仃。

臥龍

危磴盤紆上翠微。倚天樓觀碧參差。雨來海氣先橫鷲。風惡松柯盡倒垂。孤鶴歸巢翅翎重。斷鴻覓伴語聲悲。人間萬事難禁老。醉撫闌干欲暮時。

卷第二十四

野步晚歸

江村十日喜霜晴。草死泥乾拄杖輕。溝港淺來無鷺下。郊原暖處有牛耕。奔馳久厭兒童戲。淪落偏知世俗情。欲向書窗了殘課。歸來猶占夕陽明。

並山東南閒步至野人吳氏居乃歸

信步閒行逼四鄰。擁籬老稚看綸巾。人隨世換朋儕少。志與年衰感慨頻。梅送冷香橫雪岸。雁翻孤影下煙津。豐年何地酬君賜。剩向旗亭作醉人。

晝睡

我年垂七十，齒髮日變遷。初無金丹術，何以追飛仙。惟有一高枕，可以餞餘年。蕭蕭敗榻上，鼻鼾心了然。靜如豹隱霧，湛若珠藏淵。寄語少年輩，未宜嘲孝先。

連日有雪意戲書

壯歲羈遊半九州，卽今顛顛老菟裘。狂心那復繳鴻鵠，世事已如風馬牛。雪作未成增慘澹，葉飛欲盡更颼颼。聊將袖裏平戎事，判斷千巖萬壑秋。

兩蜀故人寄余閩中左縣題名石刻來皆二十餘年矣悵然有感

憶過西州樂飲時，百車載酒萬花圍。只言身外皆餘事，豈信人間有駭機。雪鬢已成新夢境，緇塵空化舊征衣。早知一笑難如此，剩判年光醉不歸。

歲晚

歲晚霜風正怒號，荒村敗屋擁藜蒿。窮猶可勉聖賢事，老豈遽忘鉛槧勞。從宦雖如碁已決，治經猶比繭初纒。閉門養氣淵源在，未敢摧傷學楚騷。

夢斷

夢斷燈殘聞雁聲，攬衣起坐待天明。街頭濁酒不堪醉，窗外疎梅空復情。人欲見臙真砭石，身寧輕用作投瓊。南湖可引春疇美，只合躬耕畢此生。

雨聲

雨聲點滴朝復暮。中有詩人絕塵句。雲門咸池渺千古。斷譜遺音此其緒。雨聲點滴夜不休。中有羈臣去國愁。九疑聯翩湘水秋。忠誠內激涕自流。我今衰病百無念。臥對青燈吐殘焰。支牀納息效寒龜。傍枕長吟笑孤劍。雨聲不斷睡愈美。窗白鴉啼攬衣起。呼兒燒兔傾濁醪。又倚胡牀雨聲裏。

農家

低垣矮屋倚江流。渾舍相娛到白頭。累世不知名宦樂。百年那識別離愁。飯餘常貯新陳穀。農隙閑眠子母牛。聞道少年俱孝謹。未應家法媿恬侯。

夜行湖上

月痕澹欲無。斗柄低半沒。荒陂雁飛鳴。草屋牛臥齧。我行湖邊路。霜冷刮病骨。斷隄沙水溼。屢滑常恐蹶。殘年垂七十。野處猶短褐。窮死士所有。權門不可謁。

冬夜讀書忽聞雞唱

齷齪常談笑。老生丈夫失意合。躬耕天涯。懷友月千里。燈下讀書雞一鳴。事去大牀空。獨臥時來豎子或成名。春燕何限英雄骨。白髮蕭蕭未用驚。

梅花絕句

凜凜冰霜晨皎皎。風月夜南山有飛仙。來結尋梅社。

又

憶昔西戌日夜宿。仙人原風吹野梅香。夢繞江南村。

又 錦城梅花海。十里香不斷。醉帽插花歸。銀鞍萬人看。

又 低空銀一鈎。糝野玉三尺。愁絕水邊花。無人問消息。

又 蘭荃古所貴。梅乃晚見稱。盛衰各有時。類非人力能。

又 子欲作梅詩。當造幽絕境。筆端有纖塵。正恐梅未肯。

又 清霜徹花骨。霜重骨欲折。我知造物意。遣子世味絕。

又 士窮見節義。木槁自芬芳。坐回萬物春。賴此一點香。

又 南村花已繁。北塢殊未動。更賒一月期。待我醉春甕。

又 山月縞中庭。幽人酒初醒。不是怯清寒。愁躡梅花影。

閉戶

簞瓢虛道不堪憂。閉戶方從造物遊。安樂本因無事得。功名常忌有心求。洗除仇怨忘疊觸。收斂光芒靜斗牛。兒報牀頭春甕熟。人間萬事轉悠悠。

小園竹間得梅一枝

若耶溪邊鶴髮叟。流落一生端坐口。如今不怕桃李噴。更因竹君得梅友。嶺頭羈旅萬里愁。江上淒涼一杯酒。枝橫澹月影在地。蕊插烏巾香覆手。交情歲晚金石堅。孤操凜然真耐久。荒山野水終自得。銀燭金壺亦何有。夢魂不接莊周蝶。心事肯付張緒柳。晚來畫角動高城。起舞聊爲放翁壽。

梅花絕句

幽谷那堪更北枝。年年自分著花遲。高標逸韻君知否。正在層冰積雪時。

又

萬瓦清霜夜漏殘。小舟斜月過闌干。老來一事偏堪恨。好看梅時卻怕寒。

得林正父察院書問信甚勤以長句寄謝

折柳湖南別尚新。書來已見柳搖春。故情存此膠投漆。薄俗從渠越視秦。長劍拄頤那復夢。短衣掩脛未全貧。有詩亦欲頻持寄。腸斷西江六六鱗。

蔬食戲書

新津韭黃天下無。色如鵝黃三尺餘。東門葷肉更奇絕。肥美不減胡羊酥。貴珍詎敢雜常饌。桂炊薏米圓。

比珠還吳此味那復有。日飯脫粟焚枯魚。人生口腹何足道。往往坐役七尺軀。羶葷從今一掃除。夜煮白石箋陰符。

歎俗

風俗陵夷日可憐。乞墦鉗市亦欣然。看渠皮底元無血。那識虞卿魯仲連。
晚飯罷小立門外有作

此心何敢慕輕肥。尙媿無功飽蕨薇。浦面烏衝殘鷺去。柳陰人荷一鋤歸。病嗟短髮紛紛白。老覺初心種種非。百步空庭著明月。黃昏手自掩荆扉。

觀梅至花涇高端叔解元見尋

春晴閑過野僧家。邂逅詩人共晚茶。歸見諸公問老子。爲言滿帽插梅花。

又

春暖山中雲作堆。放翁艇子出尋梅。不須問信道傍叟。但覓梅花多處來。

春雪

江雲垂野雪如糝。閏歲春來特地遲。倒盡酒壺終日醉。臥聽兒誦半山詩。

舟過季家山小泊

困睫濛濛渴煮茶。繫船來叩野人家。風翻翠浪千畦麥。水漾紅雲一塢花。健犢破荒耕犖确。幽禽除蠶啄槎牙。尋春非復衰翁事。且伴兒童一笑譁。

送王成之給事

我昔揚帆掠吳楚。夜泊秦淮聽春雨。明朝冠蓋擁長亭。誤辱諸公問良苦。是時衆中初識公。天驥蹴踏萬馬空。知心投分財數語。玉塵謾謾生清風。冶城醉墨鴉棲壁。長干祖道花照席。公方閉戶試諸生。坐歎江山少顏色。爾來俛仰三十春。欲話舊遊無故人。豈知邂逅逢一笑。使我肝膽還輪囷。衰遲少復入城市。虛左屢招慚主意。忽聞上印卻悽然。悔不日日從公醉。朝廷三載虛一相。如公早合鸞臺上。榮河溫洛久胡沙。此段功名勿多讓。

山家

白石青莎一徑斜。斷無人迹到山家。梁間歸燕避微雨。池面游魚爭落花。雪鬢但增新感慨。金轡那復舊豪華。明窗睡起渾無事。篝火風爐自試茶。

送傑上人歸成都

錦城一別鬢成絲。今日山陰送傑師。亂絮飛花撲行路。正如東郭放船時。

又

春夜挑燈話別愁。此心已在錦江頭。舊時處處塵昏壁。想復長吟爲小留。

落魄

落魄江湖七十翁。欲持一笑與誰同。蕭蕭雪鬢難藏老。寂寂蓬門可諱窮。好句尙來欹枕處。壯心時在倚樓中。無涯毀譽何勞詰。骨朽人間論自公。

春晴出遊

芳樹參差葉已成，園林隨處聽鶯聲。遊人正樂還與歎，造物無心卻有情。糝徑落紅猶可藉，漲溪分綠已堪耕。蘭亭禹廟年年好，剩伴鄰鄰醉太平。

題瑩上人二畫

天地又秋風，谿山憶剡中。孤舟幸閑著，借我訪支公。

右剡谿

曉聽楓橋鐘，暮泊松江月。斯人亦可人，淡墨寫愁絕。

右吳江

和張功父見寄

舉世何人念此翁，敢期相問寂寥中。回思舊社驚年往，細讀來書恨紙窮。我用荷鋤爲事業，君將高枕示神通。叮嚀一語宜深聽，信筆題詩勿太工。

又

佐命貂蟬再世孫，手鉏瓜壟傍青門。超騰已得丹換骨，戀著肯求香返魂。功父如夫人逝去，聞頗損眠食。故及之。正復悲秋如騎省，可令病渴似文園。庭前柏樹西來意，握手何時得共論。

山家暮春

遠屋清陰合，綠堤綠草纖。起蠶初放食，新麥已磨鎌。苦筍先調醬，青梅小蘸鹽。佳時幸無事，酒盡更須添。

又
行飯獨相羊，扶藜過野塘。晴光生蝶粉，暖律變鶯吭。妙美羣兒競，蠶飢小婦忙。深知遊宦惡，窮死勿離鄉。

讀王季夷舊所寄詩

燈前忽見季夷詩，淚灑行間不自知。醉別西津如昨日，露晞區域已多時。余在京口與季夷別，遂不復相見。

題岸閣黎二畫

秋山瘦嶙峋，秋水渺無津。如何草亭上，卻欠倚闌人。

右秋景

溪上望前峯，巉巖千仞玉。潭舍喜翁歸，地爐煨芋熟。

右雪景

入雲門小憩五雲橋

穀雨初過換夾衣，園林零落到薔薇。鳴鳩日暖遙相應，雜燕風柔漸獨飛。臺省多才吾輩拙，江湖久客暮年歸。雲門蹋月方清絕，且倚溪橋看夕霏。

黃昉小店野飯示子坦子聿

山林久衰病，生世幾清明。未作松根臥，猶尋溪上行。食新炊麥飯，嘗饅啜蕪羹。孺子雖知學，家貧且力耕。

山園

山園寂寂閉春風。箇裏天教著放翁。萬事已拋孤枕外。一尊常醉亂花中。閑隨戲蝶忘形久。細聽啼鶯得意同。月桂可憐常在眼。小葦時放一枝紅。

入城至郡圃及諸家園亭遊人甚盛

老子何曾慣市塵。今朝也復入城闌。太平有象人人醉。造物無私處處春。九陌鶯花娛病眼。一竿風月屬閑身。不緣興盡回橈早。要就湖波照角巾。

次韻范參政書懷

養氣頽然似木雞。謗讒寧復問端倪。生塵甑煖喜炊黍。轉釜羹香忘糝藜。萬里曾遊雲棧北。一庵今臥鏡湖西。殘年老病侵腰膂。那得隨人病夏畦。

又

已著山林掃塔衣。洗除仕路劍頭炊。心光焰焰雖潛發。領雪紛紛已太遲。度日只今開水牯。知時從昔羨山雌。掩關未必渾無事。擬徧寒山百首詩。

又

身寄蠅蚋欲盡時。且貪餘景伴兒嬉。故應手種竹千箇。醉帽時簪花一枝。蠶飯有書供夙好。衡門無客作新知。羊裘自欠封侯骨。敢道君房徹底癡。

又

感昔傷懷一喟然。事實猶及紹興前。此身頗仆應無日。諸老凋零不計年。客少可羅門外雀。家貧也辦杖

頭錢。插花醉舞春風裏。不學龍翁更問禪。

又

春寒還似暮冬天。敗絮重披有蝨緣。雖欠高僧分白氈。偶蒙暴客怒青氈。濁醪益益貧猶醉。倦枕昏昏晝亦眠。年少從渠笑衰癯。相呼禹廟看龍船。近有偷兒取二釜去。它幸無所失亡。

又

祠祿恩寬亦例沾。屏居懷抱苦厭厭。戊邊事往功名忤。迎客兒扶老病兼。遇興榜舟無遠近。破愁沽酒任酸甜。殘年唯有讀書癖。盡發家藏三萬籤。

又

芋栗多儲煮復煨。一塵那許到靈臺。虹穿道室爐丹熟。龍吼空山匣劍開。躡屨未成遊地肺。掩扉聊欲隱天台。桃花榮謝吾何預。一任劉郎去後栽。

又

探梅方憶雪中歸。轉眼青青子滿枝。築圃漫爲娛老計。褰牋又賦送春詩。乞身何日還初服。坐食終年媿聖時。睡起西窗澹無事。一枰閑看客爭棋。

又

宇內寓形財幾時。西山俄已迫斜暉。百年過隙古所歎。衆口鑠金胡不歸。已是平生行逆境。更堪末路踐危機。夜香一炷無他祝。稽首虛空懺昨非。

又

趙州行脚我安能。閑卻牀邊六尺藤。釣閣臥聽西澗雨。棋軒遙見北村燈。平生愛睡如甘酒。晚歲憂譏劇履冰。剩欲舒懷答清獻。半空鸞鳳媿孫登。

春晚村居雜賦絕句

作堤蜿蜿六百尺。西崦東村成一家。春雨乍晴桑吐葉。秋風初冷稻吹花。

又

鵝兒草綠侵行路。陂子花明照屋除。處處乞漿俱得酒。杖頭何恨一錢無。

又

一篙湖水鴨頭綠。千樹桃花人面紅。茆舍青帘起余意。聊將醉舞答春風。

又

朝書牛券拈枯筆。暮祭蠶神酌凍醪。閑放無憂窮有意。傍人錯羨此翁高。

又

澆書滿挹浮蛆螿。攤飯橫眠夢蝶牀。莫笑山翁見機晚。也勝朝市一生忙。東坡先生謂晨飲爲澆書。李黃門謂午睡爲攤飯。

又

午枕閉門無客攪。夜燈開卷有兒同。若爲賤與天公道。盡乞餘生向此中。

沽垓西酒小酌

垓西小店酒新釀，一醉今朝覺易謀。從曠劫來俱有死，出青天外始無愁。功名未許妨高臥，風月猶能賦遠遊。造物向人元不薄，卷簾萬頃鏡湖秋。

戲詠村居

歌起陂頭正插秧，梯斜籬外又剝桑。日長處處鶯聲美，歲樂家家麥飯香。林杏半丹禁宿雨，叢萱自斂避斜陽。北窗合是羲皇上，已置臨風八尺牀。

又

馬跡車聲斷已無，鄰翁笑語自相呼。衣裁大布如亭長，船設低篷學釣徒。感物欲師僧施食，畏人愁報吏催租。陳蕃壯志消磨盡，一室從今卻掃除。

戲詠閒適

鈔書字細眼猶明，擣藥聲清疾漸平。桐葉雨邊尋斷夢，菊花香裏散餘醒。人間榮辱知難到，紙上興亡看亦輕。惟恨暮年交舊少，滿懷情話向誰傾。

又

剡曲稽山是故鄉，人言景物似瀟湘。三升花露春壺滿，八尺風漪午枕涼。樹合綠陰山鷓鬧，盆鑄紫石水榭香。回思烏帽京塵客，始覺幽居白日長。

又

涉世心知百不能，閉門癩出病相仍。
箠瓢味美如烹鼎，鄰曲人淳近結繩。
半顆鴉殘牆外杏，一枝鵲鼻澗邊藤。
蕭然掃盡彈冠興，敢爲詩情望武陵。

夜與兒子出門閑步

家住黃花入麥村，閑將釋子出柴門。
草根螢墮久開闔，雲際月行時吐吞。
未分悲愛攻齒髮，已將生死付乾坤。
舊書半蠹猶堪讀，糲飯藜羹莫更論。

老景

老景雖無幾，爲農尚有餘。
曾傳種魚術，新得相牛書。
黍酒時留客，菱歌或起予。
平生湖海志，高枕看嚴徐。

初夏

筍生遮狹徑，溪漲入疎籬。
漸及分秧候，還當煮繭時。
雨昏雞共翔，米盡鼠同飢。
村巷無來客，清羸只自知。

晨起

老病少睡眠，臥見天窗白。
棲鳥亦已鳴，一一翻去翮。
我起將何之，且復守書冊。
收斂萬里心，未厭容膝迹。
吾家讀書法，一字亦當覈。
勉哉積新功，莫問幾時客。
王右丞歎白髮詩曰：俯仰天地間，能爲幾時客。

月夜短歌

老夫倚杖當戶立，霜氣青冥月輪溼。
颼颼短髮冷入頂，更覺衣屢清風襲。
月落欲盡夜蒼茫，回顧明星已煌煌。
明星雖高未須喜，三足陽鳥生海底。

小軒

四面山如碧玉城。小軒聊得愜幽情。乍飛乳燕低無力。自落來禽靜有聲。鱗篋殘功成。水晶。蛇圖餘思入棋枰。閑中事業吾能了。未恨林廡送此生。

愛閑

愛閑惟與病相宜。壯歲懷歸老可知。睡熟素書橫竹架。吟餘屋管閉銅螭。水芭蕉潤心抽葉。盆石榴殘子壓枝。堪笑放翁頭白盡。坐消長日事兒嬉。

靜院

靜院房櫺雨送涼。熏籠衣幘潤生香。小屏風疊圖遙碧。古錦囊書揚硬黃。已占江湖寬處老。絕知日月靜中長。敲門無客妨人睡。更覺餘年樂未央。

雨晴

閑曳枯筇自在行。曲廊小閣賞新晴。幽禽葉底吟風久。殘雨枝間照日明。茶映盞臺新乳上。琴橫薦石細泉鳴。亦知老健終難恃。且復蕭然得此生。

讀史有感

英雄自古埋秋草。世上兒童共笑狂。射賊曾飛白羽箭。閉門空枕綠沉槍。隆中高臥人千載。易水悲歌淚數行。讀盡青編窗日晚。一尊聊復弔興亡。

暮歸

意行無所之。偶傍陂頭立。空村犬吠豪。高樹蟬嘒急。風塵一身老。海宇萬感集。還家日已暮。草露青鞋溼。

仰首座求鈍菴詩

鈍菴來問鈍何如。真箇能參鈍也無。掘井及泉那用巧。磨磚作鏡未爲愚。先師鉢袋當傳後。上座蒲團莫負渠。我亦年來念休歇。約君同作鈍工夫。

壁老求笑菴詩

臺省諸公六出奇。江湖狂客一生癡。無人爲問淨光老。撫掌掀髯端爲誰。

又

車馬往來塵暗天。淨光欣喜接諸賢。半甌春茗無多費。且結來生一笑緣。

浴罷

浴罷西軒物色幽。臥看香霧上衣篝。半廊月白初侵夜。一葉桐飛忽報秋。老覺年光殊袞袞。病知心事斷悠悠。碧簫且作池邊醉。玉色新醅手自篘。

夜坐水次

房星縱。心星橫。北斗高掛南斗傾。蓼根爛熳螢火明。葦叢哀哀姑惡聲。我倚胡牀破三更。溪風吹衣月未生。玉門關。拂雲城。何時連營插漢旌。白頭書生未可輕。不死令君看太平。

六月十四日微雨極涼

湖上清秋近。齋中白日長。雲來樹收影。雨過土生香。蓮小紅衣溼。瓜甘碧玉涼。晚來幽興極。移榻近方塘。

十五日雲陰涼尤甚再賦長句

襪。微京塵。觸熱行。豈知世有野堂清。磴茶落雪。睡魔退。激水跳珠涼意生。壘臺清風隨塵柄。悠悠長日付
棋枰。小舟先向蘋汀泊。浴罷還須泛月明。

水亭晚眺

暑雨初晴浦面寬。水亭景物卷簾看。聯舟作陣圍魚隊。屈竹成籬護芡盤。四海諸公半丘壘。百年幾夕倚
闌干。日沈未用忽忽去。待挽銀河濯肺肝。

自詠

萬事不挂眼。終年常避人。荒畦荷鋤晚。環堵結荊新。病馬何勞斥。輕鷗未肯馴。雖漸市門卒。聊作葛天民。
立秋前四日夜泛舟至跨湖橋

短楫追涼十里來。夜深卻御便風回。離離蒲葉先秋老。嫋嫋蘋花帶露開。陌上歌呼籜稻穗。橋邊燈火賣
官醅。時平樂事知何限。未歎流年兩鬢催。

信筆

爲善得禍吁可悲。顏回短命伯夷飢。何人長號血續淚。天自無心君自癡。

又

少年醉眼傲王侯。末路悲歌夜飯牛。濟世有時生一念。鏡中白髮勸人休。

又

急雨初過景物奇。一天雲作細鱗差。畫橈弄水三十里。恰是西村燼暝時。

示兒

斥逐襟被歸。招喚振衣起。此是鄙夫事。學者那得爾。前年還東時。指心誓江水。亦知食不足。但有餓而死。小兒教汝書。不用日十紙。字字講聲形。仍要身踐履。果能稱善人。便可老鄉里。勿言五鼎養。肉食吾所鄙。

青山白雲歌

青山白雲翁。放浪酒中死。埋骨長松根。夜夜聽谿水。松老會作薪。骨朽會作塵。但留千載狂名在。知我他年自有人。

小市

小市狂歌醉墮冠。南山山色跨牛看。放翁胸次誰能測。萬里秋空未是寬。

蓬萊館午睡

驛門繫馬聽蟬吟。翻動平生萬里心。橋畔笛聲催日落。城邊草色帶煙深。關河歷歷功名晚。歲月悠悠老病侵。憶戍梁州如昨日。憑闌西望一霑襟。

夢遊散關渭水之間

平生望眼怯天涯。客裏何堪度歲華。但恨征輪無四角。不愁歸路有三叉。驛窗燈闇傳秋柝。關樹煙深宿暮鴉。叱犢老翁頭似雪。羨渠生死不離家。

秋夜

清夜不成寐。出門還浩歌。斷雲微翳月。薄露不傾荷。絡緯知時早。梧桐奈汝何。非關老懷惡。秋物感人多。

世事

世事本難全。吾生已媿天。借書常稻載。餽酒亦蟬聯。饘粥隨時具。湖山此地偏。殘年更何慕。未死即神仙。

夜半池上作

夜永空齋睡不成。起扶藤杖傍池行。露濃雙鵲移枝宿。風急孤螢墮草明。斷續更籌傳古戍。縱橫河漢接高城。寒泉未漱神先爽。靜聽銅瓶汲井聲。

秋夜將曉出籬門迎涼有感

迢迢天漢西南落。喔喔鄰雞一再鳴。壯志病來消欲盡。出門搔首愴平生。

又

三萬里河東入海。五千仞嶽上摩天。遺民淚盡胡塵裏。南望王師又一年。

夏秋之交久不雨方以旱為憂忽得甘澍喜而有作

亂點灑庭蕪。涼聲集井梧。綠荷傾作汞。翠葦綴成珠。臥聽病良已。行吟愁欲無。天公終老手。談笑活焦枯。

藥圃

少年讀爾雅。亦喜騷人語。幸茲身少閑。治地開藥圃。破荒斲瓦礫。引水灌膏乳。玉芝移石帆。金星取天姥。申椒藜蕪輩。一一粲可數。次第雨苗滋。參差風葉舉。山僧與野老。言議各有取。瓜香躬采曝。泉潔謹炊爨。

老夫病若失。稚子喜欲舞。餘年有幾何。長鏡真託汝。

書歎

只道才高始不容。無才也墮駭機中。市朝回首已陳迹。日月催人成老翁。仗馬自貪三品料。雲鷗方駕九天風。今朝有喜君知否。揀得煙汀下釣筒。

夜興

夜出茆堂自撒扁。烏藤與我兩伶俦。涼蟾吐暈圍千丈。老木移陰可一庭。隔浦呼鳴聞宿鳥。傍簷開闔數流螢。放翁尙友論千載。不取梁鴻卽管寧。

閑中頗自適戲書示客

髮猶半黑臉常紅。老健應無似放翁。烹野八珍邀父老。燒窮四和伴兒童。野八珍見王履道詩。世又有窮四和香法。剪紗新製簪花帽。乞竹寬編養鶴籠。巢許夔龍竟誰是。請君下語勿匆匆。

新涼夜坐有作

老夫任運本騰騰。一念軒裳實未曾。閑似苔磯垂釣叟。淡如村院罷參僧。硯屏突兀蓬婆雪。書几青瑩蓮勺燈。臨邛雪山硯屏。及漢嘉古棧燈檠。皆吾書室中物也。稚子可憐貪夜課。語渠循舊未須增。

荷花

風露青冥水面涼。旋移野艇受清香。猶嫌翠蓋紅粧句。何況人言似六郎。

又

南浦清秋露冷時。凋紅片片已堪悲。若教具眼高人看。風折霜枯似更奇。

醉中作

宦遊三十載。舉步亦看人。愛酒官長罵。近花丞相噴。湖山今入手。風月始關身。少吐胸中氣。從教白髮新。

題齋壁

平生喜蕭散。垂老厭奔走。三千鏡湖上。樂事未曾有。晨開一卷書。暮把一卮酒。病除覺身輕。赤脚自蹋藕。乃知造物意。亦未棄衰朽。今夕月殊佳。出門喚鄰叟。

老將

憶昔東都有事宜。夜傳帛詔起西師。功名無分身空在。猶指金創說戰時。

又

百戰西歸變姓名。悲歌擊筑醉湖城。貂裘換得金鵝鬣。種藥南山待太平。

白髮

疾病侵壯年。髮恐不及白。偶賴針石功。寓世成久客。行年垂七十。霜雪紛滿幘。耳目雖已衰。亦未與人隔。濯纓千頃湖。送老五畝宅。大布縫長衫。東阡復南陌。

小雨

百穀畏秋陽。常恐膏澤吝。大哉天公仁。霰霖來有信。蘋汀水未長。藥壠土先潤。新涼生葛衣。老蠶亦小振。

秋日郊居

山雨霏微鴨頭水，溪雲細薄魚鱗天。幽尋自笑本無事，羽扇筇枝上釣船。

又

行歌曳杖到新塘，銀闕瑤臺無此涼。萬里秋風菰菜老，一川明月稻花香。

又

秋日留連野老家，朱槃鮮饈粲如花。已炊藟散真珠米，更點丁坑白雪茶。藟散米名，丁坑茶名。

又

車蕩比鄰例饋魚，流涎對此四腮鱸。北窗雨過涼如水，消得先生一醉無。

又

今年斟酌是豐年，社近兒童喜欲顛。半醉半醒村老子，家家門口掠神錢。

又

魚鹹滿缶酒新篘，處處吳歌起壘頭。上客已隨新雁到，晚禾猶待薄霜收。剡及諸暨人，以八月來水鄉助穫，謂之上客，以其來自山中也。

又

兒童冬學鬧比鄰，據案愚儒卻自珍。授罷村書閉門睡，終年不著面看人。農家十月乃遣子入學，謂之冬學，所讀雜字百家姓之類，謂之村書。

又

兩翁兒女舊論姻。酒斝羊腔喜色新。不遣交情隔生死。固應世好等朱陳。小兒子輩。聘亡友張叔潛季女。蓋尋舊約也。

七月十七日大雨極涼

吳中七月熱未已。渴烏呀呀井無水。炎官護前不少斂。樹頭敢望秋風起。天公老手亦豈難。雨來黑雲如壞山。瓦溝淙淙萬銀竹。變化只在須臾間。老夫挑燈北窗下。山童夜歸泥過踝。草根促織有底忙。縑衣未贖還慨慷。

雨中作

山雨時時急。谿流日日添。溼苔綠暗壁。腐瓦落頽簷。老至那容卻。狂來未易矜。泥深村路絕。煙樹出青帘。

秋興

天遣幽人儘放狂。醉眠無復客爲妨。墨蛟飛下刻藤滑。蒼壁礮成官焙香。老境雖深身更健。清秋欲半日猶長。閉門莫道都無事。又了移花一段忙。

又

蓬蒿門巷絕經過。清夜何人與晤歌。蟋蟀獨知秋令早。芭蕉正得雨聲多。傳家產業遺書富。玩世神通醉臉醜。如許癡頑君會否。一毫不遺損天和。

又

老子雖貧未易量。風流猶在小茆堂。蒲萄錦覆桐孫古。鸚鵡螺斟玉瀝香。千點荷聲先報雨。一林竹影剩

分涼秋來便有欣然處。新種蓴絲已滿塘。

兩夜南堂獨坐

老夫眼暗牙齒疎。七十未滿六十餘。故人欲盡誰與娛。獨坐默誦小年書。北風日夜吹雨急。空村泥深屋
崩溼。鳳皇覽德乃下集。可憐飛螢常熠燿。

夜不能寐復呼燈起坐戲作

吳中秋半暑未退。今歲雨多如許涼。藥鼎熒熒伴孤寂。三更袖手聽啼螿。

喜晴

久雨羣蛙日夜號。藥哉霽色滿江郊。草書已悟屋漏壁詩句。免悲風卷茆。喚婦晴鳩鳴廢圃。歸林棲鷓補
危巢。泥乾我亦思來客。未暇移書廣絕交。

枕上

守書眼欲闇。投枕乃瞭然。兒曹戒曳履。相語翁正眠。豈知擁敗褐。炯如寒魚鱗。少時笑老人。其事今好還。
蕭蕭雙白鬢。忽忽七十年。豈惟老態出。已覺衰病纏。白晝尚便靜。況此清夜闌。妙處殆難名。睡與不睡間。

新作南門弊廬本西鄉設門紹熙壬子歲始翦開荆棘移門南鄉

荆棘移門未費錢。好山無數碧巉然。病夫憤憤真堪笑。反衣狐裘三十年。

寄成漢卿將軍

燕頤將軍萬里遊。谿山好處即遲留。頗聞南岳度殘夏。寧憶北平防盛秋。君已飛騰丹換骨。我方衰病雪

蒙頭禪龜也有新勛業。百萬魔軍一戰收。

病臥

病臥東齋怕攬衣。年來真與世相違。橫林蠶葉秋先覺。別浦驕雲暝不歸。歲月惟須付樽酒。江山竟是屬漁磯。鄰翁一夕成今古。愈信人生七十稀。村東吳蜀病一夕而卒。

晚晴

今年秋多陰。殊未決豐歉。時時雲一片。復作雨數點。晚來晴頗牢。天宇碧如染。微風過林梢。斜日在山崦。農家築場罷。竭作事收斂。貪睡吾可慙。齋扉晝常掩。

秋雨初晴有感

炎曦赫赫尙餘威。冷雨蕭蕭故解圍。號野百蟲如自訴。辭柯萬葉竟安歸。萋萋菰菜珍無價。上釣魴魚健欲飛。散吏何功霑一飽。高眠仍聽搗秋衣。

獨飲

怪怪奇奇不自懲。晚途猶復氣橫膺。舢船那待清歌勸。酒到愁邊量自增。

小築

小築湖邊避俗囂。幾年于此寓篔簹。雖非隱士子午谷。寧媿詩人丁卯橋。羅雀門庭無俗駕。綠雲磴路有歸樵。詩情酒興常相屬。堪笑傍人說寂寥。

示兒

文能換骨餘無法。學但窮源自不疑。齒豁頭童方悟此。乃翁見事可憐遲。

新晴

積雨已凄冷。新晴還少和。稼收平野闊。木落遠山多。土潤朝畦菜。機鳴夜擲梭。時清年歲好。吾敢歎蹉跎。

晨起坐南堂書觸目

林塘天與占深幽。一把茆輕萬戶侯。漠漠斷雲開復合。纖纖微雨落還收。奇峯角立千螺曉。遠水平鋪正練秋。詩料滿前吾老矣。筆端無力固宜休。

壬子八月癸卯大風雨拔木飄瓦通夕不能寐

我昔浮江坐貪快。六十幅蒲船尾挂。惡風吹到馬當祠。出沒蜿蜒舞澎湃。舟人失色急倒檣。共上蘆灣望祠拜。風雲晝晦性命憂。更復何心問薪菜。顛危僅免葬魚腹。至今常抱垂堂戒。豈知風雨有茲夕。屋破窗鳴紛百怪。直疑屋外卽長江。九轉得生那可再。正襟默坐徐自思。忠信固可當喪敗。鬼神雖惡技有窮。卷地破山真一噫。明朝倚杖看晴雲。茲夕驚心復何在。

秋雨不止排悶

放翁愁坐茆齋裏。泥潦連村不得行。夜夜溼星占雨候。時時老木送秋聲。小詩旋錄兼行草。薄酒新蕝任濁清。身世正如萍在水。略無根柢也能生。

用短

用短定非癡。愛閑真復奇。飯香貧始覺。睡味老偏知。畦地閑栽藥。留僧靜對棋。餘年陋有幾。捨此欲何之。

覽鏡有感

齒如敗屨鬢成絲。七十之年敢自期。閱世久應書鬼錄。強顏那復乞山資。緋衫蔭子踰初望。下澤還鄉負聖時。回首墮溝元有命。不須深計巧丸兒。

哭徑山策老

岌岌龍門萬衲傾。翩翩隻履又西行。塵侵白拂繩床冷。露滴青松卯塔成。遙想再來非四入。尙應相見話三生。放翁大欠修行力。未免人間愴別情。

松風東嶺諸松多。余丙戌歲手種。距今壬子二十有七年矣。

半嶺松風破睡時。起看山月倚筇枝。縱橫滿地髯龍影。盡是當年手自移。

醉歌

佛如優曇時一出。老姥何爲憎見佛。山從古在天地間。愚公可笑欲移山。火其書。廬其居。佛亦何曾可掃除。子有孫孫有子。山竟嵯峨汝何喜。床頭有酒敵霜風。詩成老氣尙如虹。八萬四千顛倒想。與君同付醉眠中。

秋夜讀書有感

鬢毛焦秃齒牙疎。老病燈前未廢書。卷裏光陰能屬我。人間聲利久忘渠。窮山藏拙猶嫌淺。糲飯支羸不願餘。雨露安能澤枯朽。故人枉是費吹噓。時所聞如此。

瀘州亂

陸放翁集 十三 劍南詩集 卷二十五

高寺坡前日照天。南定樓下血成川。從事橫屍太守死。處處巷陌森戈鋌。此州雄跨西南邊。平安烽火夜夜傳。豈知癰疽潰在內。漫倚築城如鐵堅。從來守邊要人望。縱有好謀氣先喪。即今死者端爲誰。姓名至死無人知。

東鄰築舍與兒輩訪之爲小留

甲第潭潭莫羨渠。窮人從昔愛吾廬。菲茨新潔嗟何欠。鄰里追隨故不疎。甕醬芬香盤早免。白齋珍饈膽寒魚。年豐日有攜尊與。家乘從今不一書。黃魯直有日記謂之家乘。

夜坐

瘦骨倚蒲團。燈前影自看。心清便獨夜。酒盡怯新寒。病虎減精采。飢鴻摧羽翰。晚途堪笑閱。猶擬乞祠官。

西鄰亦新葺所居復與兒曹過之

竹屋茆檐煙火微。長歌相應負禾歸。窮居幸可支朝夕。世事何曾有是非。新苗畦蔬經宿雨。半開籬槿弄斜暉。老翁略與吾年等。眷眷遮留莫苦違。

有術士過門謂余壽及九十

形骸鶴瘦復松枯。況是新霜滿鬢髮。醉似在家狂道士。愚于識字老耕夫。敢言萬里封侯事。但問縱文入口無。許我年如伏生比。逢時猶解誦唐虞。

晚眺

秋晚閑愁抵酒濃。試尋高處倚枯筇。雲歸時帶雨數點。木落又添山一峯。鳴雁沙邊驚客鷁。行僧煙際認

樓鐘箇中詩思來無盡。十手傳抄畏不供。

秋日焚香讀書戲作

世事無端自糾紛。放翁隱几對爐熏。好官何恨輸玄保。奇字猶須屬子雲。婆律一銖能敵國。水沉盈握有兼斤。閉門莫怪常終日。不是高人不遣聞。

九月一日夜讀詩稿有感走筆作歌

我昔學詩未有得。殘餘未免從人乞。力孱氣餒心自知。妄取虛名有慚色。四十從戎駐南鄭。酣宴軍中夜連日。打毬築場一千步。閱馬列廐三萬疋。華燈縱博聲滿樓。寶斂豔舞光照席。琵琶絃急冰雹亂。羯手勻風雨疾。詩家三昧忽見前。屈賈在眼元歷歷。天機雲錦用在我。剪裁妙處非刀尺。世間才傑固不乏。秋毫未合天地隔。放翁老死何足論。廣陵散絕遊堪惜。

上書乞再任冲佑

虬枝六尺藤。方屋九寸帽。人間無處著。山水歸寄傲。耳中聞澗明。自我髮未燥。高標不可揖。七十忽已到。明窗置經龕。奧室養丹竈。雖云迫遲暮。要足平昔好。悠然萬念空。快若河卷掃。寄聲幔亭雲。行拜散人號。

秋晚歲登戲作

水落沙痕出。天高野氣嚴。餅香油乍壓。齋美韭新醃。裘褐風霜逼。衛茆醉夢兼。菊花香滿把。聊得擬陶潛。

又

漫漫蕎鋪白。鼎鼎橘弄黃。未論癡腹飽。已覺醉魂香。曳杖行歌裏。拋書倦枕傍。軒車雖已矣。終媿食官倉。

時方謀祠議

舟中望禹祠蘭亭諸山

榦枝飄輒出煙津。醉倚船篷岸幅巾。禹穴探書慚舊學。塗山執玉記前身。雲低野澤號新雁。露溼芳洲老白蘋。逸少亡來欲千載。眼中髣髴見清真。

夜觀嚴光祠碑有感

我昔過釣臺。峭石插江淥。登堂拜嚴子。挹水薦秋菊。君看此眉宇。何地著榮辱。維陽逢故人。醉腳加其腹。書生常事爾。乃復駭世俗。正令爲少留。要非昔文叔。平生陋范曄。瑣瑣何足錄。安得太史公。妙語寫高躅。

閑趣

濯罷銅駝陌上塵。此生長作水雲人。更貧家業猶供酒。未死年光盡屬身。閉戶棋聲聞膈膊。卷簾山色對嶙峋。貴公漫說林間事。東路何人岸角巾。

壬子九日登山小酌

老懷多感鷺佳節。病骨宜寒喜薄霜。玉脰齏中橙尙綠。彩猫餠上菊初黃。幾年虛負登高興。何許重尋落帽狂。淺酌易醒歸薄暮。又成支枕獨焚香。

舍北望水鄉風物戲作絕句

西風沙際矯輕鷗。落日橋邊繫釣舟。乞與畫工團扇本。青林紅樹一川秋。

新黏竹隔作媛閣

骨相元作雁儒酸。况復疾豎乘衰殘。鶉姑聲急雨方作。烏舅葉丹天已寒。封姨青女交作尾。竹君楮生卻憐客。小兒但喜夜爐紅。老夫更愛晨窗白。蝸牛負廬亦自容。是豈不足支窮冬。已勝展鉢三椽下。莫羨直隸萬戶封。

禹跡寺南有沈氏小園四十年前嘗題小闕壁間偶復一到而園已易主刻小闕于石讀之悵然楓葉初丹。榴葉黃。河陽愁鬢怯新霜。林亭感舊空回首。泉路憑誰說斷腸。壞壁醉題塵漠漠。斷雲幽夢事茫茫。年來妄念消除盡。回向禪龜一炷香。

贈鏡中隱者

小築林間避世紛。不妨野叟是知聞。來遊喜有楫迎我。歸臥豈無雲贈君。得鹿夢回初了了。吠獒聲惡尚猜猜。從今雪夜頻相過。紙帳蒲團要策勳。

月夜作

江風吹微雲。長空散魚鱗。秋露洗明月。青山湧冰輪。我病適良已。欣然岸綸巾。索酒惱諸兒。哦詩驚四鄰。頗覺胸次空。未歎白髮新。庭菊臥殘枝。奇香猶絕塵。園梅雖未花。瘦影已可人。方池湛滄瀾。醜石立嶙峋。幸無千金費。亦足終吾身。樂哉何所恨。擊壤從堯民。

記夢

我夢結束遊何邦。小憩野館臨幽窗。千峯廬山錦繡谷。一水蜀道玻璃江。春耕叱犢翁眉龐。曉汲負負盎女鬢雙。忽然夢斷已雞唱。擁衾坐待鄰鐘撞。

感舊

當年書劍揖三公。談舌如雲氣吐虹。十丈戰塵孤壯志。一簪華髮醉秋風。夢回松漢榆關外。身老桑村麥野中。奇士久埋巴峽骨。燈前慷慨與誰同。獨孤景略。死于忠州十年矣。

小園

窄窄柴門短短籬。山家隨分有園池。客因問字來攜酒。僧趁分題就賦詩。晨露每看花蠹坼。夕陽頻見樹陰移。此二事非閑寂不知也。拂衣司諫猶忙在此。趣淵明卻少知。

初冬

已罷彈冠欲挂冠。一菴天遣養衰殘。雨荒園菊枝枝瘦。霜染江楓葉葉丹。藥釜帶鱗烹白小。蓬門和藁繫黃團。夕陽更動閑遊興。十月吳中未苦寒。

閑中樂事

轉老轉迂疎胸中一物無。放言誇酒聖。著論笑錢愚。掃地收松粉。全巢買鶴雛。登臨未應倦。天給短筇扶。

又

得喪略相當。幽居氣味長。五窮雖偃蹇。二豎已奔忙。出飯桃花粳。傾瓢竹葉香。語君真富貴。不是傲羲皇。

小舟

小舟無定處。隨意泊江村。雲氣分山疊。沙汀蹙浪痕。宦途危虎尾。閑味美熊蹯。高詠淵明句。吾將起九原。

九月二十三夜小兒方讀書而油盡口占此詩示之

徹骨貧來累始輕。孤村月上正三更。汝緣油盡眠差早。我亦尊空醉不成。南陌金縷良自苦。北邙麟冢半無名。書生事業期千載。得喪從來未易評。

今年立冬後菊方盛開小飲

胡床移就菊花畦。飲具酸寒手自攜。野實似丹仍似漆。村醪如蜜復如齏。傳芳那解烹羊脚。破戒猶慚擊蟹臍。一醉又驅黃犢出。冬晴正要飽耕犁。

行飯暮歸

宿疾去如掃。出門芒屨輕。菊叢寒蝶鬧。楓葉夕陽明。結陣看鴉集。銜衣喜犬迎。踟躕搔白首。詩句入經營。

晝眠

困睫膏騰老孝先。簷氈布被早霜天。珥貂碧落應無分。且向人間作睡仙。

睡覺聞兒子讀書

夢回聞汝讀書聲。如聽蕭韶奏九成。且要沉酣向文史。未須辛苦慕功名。人人本性初何欠。字字微言要力行。老病自憐難預此。夜窗常負短燈檠。

余得木杖於秦望山中三十年矣隴蜀萬里未嘗相捨戲賦長句贈之

提攜到處覺身輕。楚澤秦關不計程。只道維摩無侍者。誰知上座是同行。青鞵白拂真相稱。湘竹籜藤誤得名。珍重從今常倚壁。住菴吾欲過浮生。

步至近村

藥物扶持疾漸平。布裘絮帽出柴荆。荒堤經雨多牛跡。村舍無人。有碓聲。數蝶弄香寒菊晚。萬鴉回陣夕。楓明。老翁隨意闌成句。不似劉侯要取名。

五鼓不得眠起酌一盃復就枕

栖冷雞聲咽。窗深燭焰明。流年容易過。華髮等閑生。濁挹連醅酒。香搓帶葉橙。殘骸付螻蟻。汗簡更須名。

醉倒歌

曩時對酒不敢飲。側睨旁觀皆貝錦。狂言欲發畏客傳。一笑未成憂禍稔。如今醉倒官道邊。插花不怕顛狂甚。行人喚起更嵬昂。牧豎扶歸猶卓犖。始知人生元自樂。謾計作官常懷懷。秋毫得喪何足論。萬古興亡一酣枕。

冬夜

新醅引睡睡味濃。有如猩脣薦馳峯。屏深氈煖衾稠重。鼻端雷起驚兒童。床頭蘭缸綴玉蟲。雙瓶湯熱爐正紅。夢回起坐夜未中。憑几困睡猶膏膏。霜風凋盡玉井桐。月落翠霧淒房櫳。一盃嬰粟蠻奴供。莊周蝴蝶兩俱空。

默坐

巧說安能敵拙修。焚香默坐一窗幽。煌煌炎火常下照。浩浩黃河方逆流。氣住神仙端可學。心虛造物本同遊。絕知此事不相負。荆棘剪除梨栗秋。

日暮

浙浙風吹葉，淒淒雨作泥。鵲寒猶遶樹，雞晚自歸栖。老病心知有，榮枯理本齊。端居嫌太嬾，拾瓦傍蔬畦。

遺興

勛業如今莫繫懷，開單日日學僧齋。深只有天堪問，憂極渾無地可埋。看鏡已成雙白鬢，登山猶費幾青鞵。晚來詩興誰能那，雀噪空園葉擁堆。

泛舟

去去泛輕舸，飄然興自豪。葉凋山寺出，溪瘦石橋高。草徑牛羊下，煙村鶴鶴號。還家一盃酒，未畏暮風饒。

夜讀范至能覽轡錄言中原父老見使者多揮涕感其事作絕句

公卿有黨排宗澤，帷幄無人用岳飛。遺老不應知此恨，亦逢漢節解沾衣。

初冬掃東山之麓置數石於喬松巨竹間以眺西山甚自適也

護霜天氣半晴陰，小嶺蒼寒薜徑深。翠靄欲成孤鳳舞，青松先作老龍吟。漁歌浦口生高興，騎吹邊頭負壯心。兒報東村蚤梅發，杖藜與汝共幽尋。

南堂脊記乃已三十年偶讀之悵然有感

一住三山三十載，交親漸覺眼前稀。長松鬱鬱偃高蓋，新竹森森添舊圍。沙徑雨餘留鳥迹，柴門日落鎖煙扉。放翁正倚蒲團穩，遼海從渠萬事非。

卷第二十六

醉臥松下短歌

披鹿裘。枕白石。醉臥松陰當月夕。寒藤天矯學草書。天風蕭森入詩律。忽然夢上百尺顛。綠毛邂逅巢雲仙。相攜大笑咸陽市。俯仰塵世三千年。

霜草

入冬已兩旬。澤國霜始實。可憐青青草。一夕生意盡。嗟予蒲柳姿。去日若飛隼。草衰有復榮。我髮寧再鬢。微官雖置散。束帶終自憫。漸退用婦言。千載付一哂。白樂天詩曰。猶教妻兒教漸退。莫求致仕且分司。

冬夜

百錢買菅席。錦茵亦何加。疋布縫毳裘。安用狐腋奢。昨者南山僧。松肪寄一車。可以照讀書。整坐待朝霞。願影爲發笑。山童雙髻丫。一掬琴高魚。聊用薦夜茶。

村東

村西行藥到村東。沙路溪流曲折通。莫問梅花開早晚。杖藜到處卽春風。

小園

新作小溪園。牽藤進縛門。釣船橫北渚。樵路接東村。靜坐依林樾。備眠傍竹根。還家日已夕。棲雀鬧黃昏。

書適

老翁垂七十。其實似童兒。山果啼呼覓。鄉儻喜笑隨。羣嬉累瓦塔。獨立照盆池。更挾殘書讀。渾如上學時。

又

家食身無役。著年力未衰。萬歡那待酒。隨意或成詩。窮達元非我。冤親竟是誰。惟嗟見事晚。枉卻鬢邊絲。

狂夫

狂夫與世本難諧。醉傲王侯亦壯哉。奕奕方收巖際電。酣酣已起枕間雷。回天力在人終歎。入月星來敵自摧。千載鬼雄皆國士。直令窮死未須哀。

白髮

白髮今年一倍增。閉門養此老無能。牛羊被野霜天晚。禾稼連雲歲事登。未午春炊餘脫粟。乍寒包裹有麤絳。自憐未廢詩書業。父子蓬窗共一燈。

檢傷詩偶見在蜀日江濱池醉歸之篇悵然有感

江濱池頭爛醉歸。青旗日晚插城扉。正馳玉勒衝紅雨。又挾金丸伺翠衣。老境漸侵歡意盡。舊遊欲說故人稀。憑高三歎君知否。倦鶴無風亦退飛。

十一月四日風雨大作

風卷江湖雨闌村。四山聲作海濤翻。溪柴火輭蠻籃暖。我與狸奴不出門。

又

僵臥孤村不自哀。尚思爲國戍輪臺。夜闌臥聽風吹雨。鐵馬冰河入夢來。

冬日觀漁獵者

人閑漁獵各相從。南陌東阡處處逢。繡羽觸機餘耿介。錦鱗出網尙噉喙。傍觀扶杖常移日。就買還家足

御冬更待風霜都過盡。卻從春野看春農。

雨晴

山川炳煥似關國。風雨退收如解嚴。老子真成無一事。抱孫負日坐茆簷。

病起

少年射虎南山下。惡馬強弓看似無。老病卽今那可說。出門十步要人扶。

奉祠

明窗松石供琴薦。小鼎山泉煮藥苗。乞得奉祠還自愧。猶將名姓到中朝。

假寐見海山異甚作小詩記之

海如黛色深。浪作雪點濺。數峯黃金山。巉絕出水面。此非想與因。了了目中見。何時真往遊。浮世付掣電。

松下縱筆

自掃松陰寄醉眼。龍吟虎嘯滿霜天。卻思初到人間世。似是唐堯丙子年。

又

老不能閑莫笑予。五千言豈世間書。青松折取當麈尾。爲子試談天地初。

又

種玉餐芝術不傳。金丹下手更茫然。陶公妙訣吾曾受。但聽松風自得仙。

又

髯龍天矯欲飛去。百尺蒼藤羅絡之。應笑此翁才不進。故將老氣起吾詩。

拜勅口號

黃紙如鴉字。今朝下九天。身居鏡湖曲。銜帶武夷仙。日絕絲毫事。年請百萬錢。祠俸錢粟菜。歲計千緡。有時恭惟優老政。千古照青編。

又

扶病中庭拜。君恩抵海深。頓增新祿格。暫拂舊朝簪。心欲先營酒。兒言且曠琴。人生奉祠貴。喜色動山林。僕以官視大痾。監俸給皆增於昔。尤爲忝竊也。

閑居

土鑪茶七椀。瓦甌稷三升。兀兀能言石。騰騰有髮僧。淨巾裁白氎。拄杖采紅藤。尚喜冬來健。逢山得遍登。

十一月十八日蒙恩再領冲佑鄰里來賀謝以長句

綠章封事徹虛皇。黃紙除書降野堂。海上春常探先到。壺中日已不勝長。冰銜再署仙班貴。鶴料重支玉粒香。便掛朝冠亦良易。金銅茶籠本相忘。往時嘗使園者例。餽茶三年。今不請已久。余蓋未嘗落及也。

題老學菴壁

此生生計愈蕭然。架竹苦茆只數椽。萬卷古今消永日。一窗昏曉送流年。太平民樂無愁歎。衰老形枯少睡眠。喚得南村跛童子。煎茶掃地亦隨緣。

冬晴日得閑遊偶作

陸放翁集 十三 劍南詩藁 卷二十六

不用清歌素與蠻，閑愁已似解連環。閨年春近梅差早，澤國風和雪尙慳。詩思長橋寒驢上，棊聲流水古松間。牋天公事君知否，正乞柴荆到死閑。

示元禮

燕居侍立出扶行，見汝成童我眼明。但使鄉閭稱善士，布衣未必媿公卿。

書巢冬夜待旦

掃葉擁塔寒犬行，編茆護柵老雞鳴。風霜漸逼歲時晚，形影相依燈火明。史策千年媿豪傑，關河萬里愴功名。固應死抱無窮恨，老病何由更請纓。

醉後莊門望西南諸山

身是咸陽舊酒徒，龍鍾猶復泥村酤。百年略似夢長短，一醉且隨家有無。登覽未應慚脚力，功名正爾數頭顱。夕陽又凭闌干立，誰畫三山岸幘圖。

著書

平生著書汗馬牛，一事不施今白頭。河洛未清非我責，山林高臥復何求。愚公可笑金堆屋，老子唯須糟築丘。華表無人識歸鶴，煙波底處有馴鷗。

探梅

我遊東村衝暮煙，斷橋流水鳴澌澌。欲尋梅花作一笑，數枝忽到拄杖邊。高標元合著山澤，絕豔豈復施丹鉛。定知曾授餐玉法，不爾恐是凌波仙。錦江賦詩忽萬里，蓬山把酒今三年。相逢風味宛如昨，人生何

者非前緣。頗思取醉極清賞。杖頭幸有百許錢。但判插破烏紗帽。莫記吹落黃金船。

歲暮風雨

颯風起海濫浩蕩東北來。鐵騎掠陣過。秋濤觸山回。老夫北窗下。坐守寒爐灰。處世困憂患。萬事學低摧。便欲滅燈睡。門閉不敢開。並海固多風。汝孱良可哀。念昔少年日。從戎何壯哉。獨騎洗河馬。涉渭夜銜枚。

又

一冬少雨雪。人意常昏昏。夜半有奇事。雨聲卷江村。陸子真老農。破屋依頽垣。扶持衰病身。收召譴逐魂。手烹牆陰藟。美若乳下豚。聽雨取一醉。不厭村酒渾。眼昏燈生暈。衣弊蟲可捫。父子幸相守。萬事何足論。

自夏秋置甚慨然有感

萬卷縱橫眼欲枯。老猶閉戶誦唐虞。故人誰復訪生死。鄰父幸能通有無。雲子翻匙新稻飯。天吳坼繡舊衣襦。時平得掩松根骨。也勝王孫泣路隅。

題四仙像

反虜鯨鯢世共讎。漢公勛業過伊周。市門灑淚塵埃裏。誰與朝廷植委裘。梅福

又

世上年光東逝波。咸陽銅狄幾摩挲。神仙不死成何事。只向秋風感慨多。蘇子訓

又

曾看四嶽薦虞縲。閱歲三千一瞬間。歸臥青山孤絕處。白驢常伴白雲閑。張果

又

蓮花峯下張超谷。此老何曾有死生。聞道風清月明夜。至今鼻息亂松聲。陳搏

自責

窮途敢恃舌猶存。小築城西十里村。未掛衣冠慙士節。免輸薪粢荷君恩。文章跌宕忘繩墨。學問荒唐失本原。仕宦一生成底事。子孫世世記吾言。

自解

四十頭顱已可知。殘年至此復何爲。著書不直一盃水。看鏡空添千縷絲。達官獨驕儒作戲。後生速化吏爲師。有冠當掛無餘說。但恨衰翁見事遲。

午睡起消搖園中因登山麓薄暮乃歸

老病攻百骸。微纒困束縛。頽然一熟睡。如獲萬金藥。窗明竹影亂。林暖鳥聲樂。灰深香欲上。火活湯正作。毫甌羞茗荈。銅洗供盥濯。整巾出庭戶。曳杖歷巖壑。遙岑見木杪。細水齧籬脚。踟躕遂忘歸。清嘯送日落。

羣兒

野行遇羣兒。呼笑運甓忙。共爲小浮圖。嶙峋當道旁。蜺殼以注燈。椀足以焚香。須臾一闕散。無益亦何傷。古來富貴人。峨冠登廟堂。謀謨一悖謬。縣宇失太康。坐令安業民。血喋而屍僵。傳呼一朝罷。遺患日月長。均爲兒戲爾。禍機孰深藏。我作羣兒詩。持用砭世盲。

久疾灼艾小愈晚出門外

老境侵凌病滿軀。火攻下策得枝梧。沽來村酒初判醉。叱去山童不遣扶。霜重木凋鴉可數。溪清魚見鶴相呼。興闌卻掩齋扉臥。閑看青燈照藥爐。

夙興弄筆偶書

憂患熏心少睡眠。雞號窗白一欣然。道旁歲晚貂裘弊。燈下書成鐵硯穿。杜老慣聽兒索飯。鄭公何啻客無氈。春風不解嫌貧病。尙擬花前醉放顛。

縱筆

山合水將窮。真宜著放翁。醉嫌天地迮。老覺歲時公。偃蹇松逃世。翩仙鶴駕風。奮交零落盡。一笑與誰同。冬晴閑步東村由故塘還舍作

故園三徑可婆娑。遇興遵塗負杖歌。霜重天寒山色淡。草枯野曠獵徒多。解刀尙可謀黃犢。揮帖無由致白鵝。自計長閑何所恨。一生心事在煙波。

紅藤拄杖獨相羊。路遠東村小嶺傍。水落枯萍黏蟹椀。鄉人種竹以取蟹。謂之曰椀。雲開寒日上魚梁。洛陽二頃言良是。光範三書計本狂。歷盡危機識天意。要令閑健返耕桑。

十二月八日步至西村

臘月風和意已春。時因散策過吾鄰。草煙漠漠柴門裏。牛迹重重野水濱。多病所須唯藥物。差科未動是閑人。今朝佛粥更相飽。更覺江村節物新。

夜聞湖中漁歌

夢回一燈翳復明。臥聞湖上漁歌聲。嗚嗚年低忽更起。嫋嫋欲斷還微縈。初隨缺月墮煙浦。已和殘角吹江城。悲傷似擊漸離筑。忠憤如撫桓伊箏。放臣萬里憂國淚。戍客白首懷鄉情。峽猿失侶方獨宿。沙雁垂翅猶遐征。巴巫竹枝短亭晚。瀟湘款乃孤舟橫。世間此恨故相似。使我百感何由平。

忽得京書有感

白髮蒼顏七十翁。朽株枯木略相同。如山儲藥難醫拙。齊斗堆金不換窮。昨夢已拋空劫外。殘年全付醉眠中。故人苦未知心事。一紙空煩寄斷鴻。

晚步門外書觸目

數椽茆屋鏡湖傍。喬木蒼煙一徑長。酒賤過門多醉叟。天寒棲畝有餘糧。歌呼草市知人樂。簫鼓叢祠喜歲穰。只道老來詩思盡。未妨擊壤頌時康。

親舊書來多問近況以詩答之

耐辱推頹百不能。居然老病住菴僧。流年速似一彈指。更事多於三折肱。庭樹影中聞夜汲。隣機聲裏對寒燈。沈沈任筆俱忘盡。酒戶新來卻少增。

開書篋見韓无咎書有感

老覺人間萬事非。幽棲幸已脫塵鞿。殘年得飽不啻足。舊友半空誰與歸。開眼不妨成一夢。翦翎何至羨羣飛。龍圖老子今安在。把卷燈前淚滿衣。

夜大雪歌

朔風吹雪飛萬里。三更蔽蔽鳴窗紙。初疑天女下散花。復恐麻姑行擲米。異哉凍硯已生冰。信矣重衾如
灑水。山中臥澗松竹折。庭前蔽地烏鵲死。昨日之煖殊昏昏。桃李欲坼春滿園。陰陽錯繆世或有。物窮則
變古所言。雖云明年幸一麥。凍餒溝壑知誰存。嗚呼。今夕之雪未足論。所憂明日巉嶮高塞門。

寄宇文成州

成州太守比何如。夢裏依然把臂初。復起卿當用卿法。長閑吾實愛吾廬。五湖風雨孤舟夜。萬里關山一
紙書。正使兩翁長隔關。子孫它日莫相疎。

示子聿

我鑽故紙似癡蠅。汝復孳孳不少懲。父子更兼師友分。夜深常共短檠燈。

雪

平郊漫漫覺天低。沉復寒雲結慘悽。老子方驚飛蛺蝶。羣兒已說聚狻猊。中宵鳶墮頻摧木。徹旦雞瘡重
壓棲。只待新晴梅塢去。青鞵未怯踏春泥。

夜坐

耿耿殘燈夜未央。負牆閒對篆盤香。風號東北河冰合。月落西南竹影長。孤鶴欲棲頻繞樹。寒龜無息穩
捲床。頽然坐睡那知曉。推戶朝曦已滿廊。

春雨

午夜聽春雨。發生端及期。世憂殊未艾。天意固難知。士節承平日。人材南渡時。後生聞見狹。撫枕歎吾衰。

夢與數客劇飲或請賦詩予已大醉縱筆書一絕覺而錄之

高談雄辯潑陵酒豪竹哀絲蹴蹋春占斷名園排日醉不教虛作太平人

世事

世事說來猶可厭。宦情夢裏亦應無。山林已結三生願。朝市誰非九折途。醉舞盃盤無藉在。狂吟風月不枝梧。何人今擅丹青藝。爲畫蘇門長嘯圖。

二字

兩楹夢後少真儒。毀譽徒勞豈識渠。孟子無功如管仲。楊雄有賦似相如。敬王事業知誰繼。準易工夫故不疎。孤學背時空絕歎。白頭窮巷抱遺書。

謝郭希呂送石洞酒

從事今朝真到齊。春和盎盎卻秋淒。色如夷甫玉麈尾。價敵茂陵金褱蹄。瑞露頗疑名太過。囊泉猶恨韻差低。山園雪後梅花動。一榼常須手自攜。瑞露桂孟酒得名甚盛。囊泉岐下酒自昔名冠關中。而失之太勁。

飲酒

六十四民安在哉。千八百國俱燼埃。世人一漚寄巨海。對酒不醉吁可哀。平生清狂今白首。芒屨布裘稱野叟。晨興窗几網蛛絲。石洞書來餉名酒。看月直到無月時。尋花直到花片飛。醉中往往花壓帽。鄰里聚看湖邊歸。先生兩耳不須洗。利名不到先生耳。狂歌起舞君勿嘲。青山白雲終醉死。

無題

金鞭朱彈憶春遊。萬里橋東看畫樓。夢倚曉風吹不去。書憑春雁寄無由。鏡中顏鬢今如此。幙下朋儔好在。不似有吳棧三萬箇。擬將細字寫新愁。

雨雪兼旬有賦

冬溫思雨雪稍久已復厭。祁寒人怨咨。千載語猶驗。人心自無常。天命本不僭。積陰勢已極。浮雲會當斂。山花紅酣。踏水綠澗澗。短蓬倘可具。與子東入剡。

北窗睡起

違物離人不計年。萬金難買北窗眠。高懷元在羲皇上。大事已明空劫前。樵路細盤雲外嶺。釣筒倒插水中天。此時消息君知否。千載巢由未足賢。

立春

韶熙又見四番春。春日春盤節物新。獨酌三盃愁對影。例添一歲老催人。菊芽冒土如爭出。柳色搖村已漸勻。身是蘭亭山下客。未容逸少擅清真。

曉枕

殘漏琴琴急。明星磊磊高。一從安枕臥。無復攪衣勞。熨斗生晨火。熏籠覆縵袍。一盃山藥酒。紅日滿亭臯。

落梅

雪虐風饑愈凜然。花中氣節最高堅。過時自合飄零去。恥向東君更乞憐。

又

醉折殘梅一兩枝。不妨桃李自逢時。向來冰雪凝嚴地。力幹春回竟是誰。

閑居無客所與度。日筆硯紙墨而已。戲作長句。

水複山重客到稀。文房四士獨相依。黃金那得與齊價。白首自應同告歸。韞玉面凹觀墨聚。浣花理賦覺豪飛。韞玉。潤。硯名。浣花。蜀名。與闌卻欲燒香。睡闌聽松聲。晝掩扉。

壬子除夕

前村後村燎火明。東家西家爆竹聲。老逢新正幸強健。卻視徂歲何崢嶸。兒時祝身願事主。談笑可使中原清。豈知一出踐憂患。斂縮豈復希功名。雪霜滿鬢覺死近。節物到眼空歎驚。靈官社公正暖熱。春盤難鼓爭施行。蓬門車馬所不至。山僧野叟相逢迎。嗚呼吾曹見事晚。古俗實在蚩蚩氓。茆簷一笑語兒子。明當滿舉屠蘇觥。

癸丑正月二日

朱顏不老畫中人。綠酒追歡夢裏身。堪笑三山衰病叟。閉門寂寂過新春。

又

菊叢抽綠滿枯荻。繞舍梅花已遍開。須信今春春事早。江鄉開歲有奔雷。

避世行

君渴未嘗飲鳩羽。君飢未嘗食烏喙。惟其知之審。取捨不待議。有眼看青天。對客實少味。有口啖松柏。火

食太多事作官。蓄妻孥。陷穽安所避。刀鋸與鼎鑊。孰匪君自致。欲求人迹不到處。忘形麋鹿與俱逝。杳杳白雲青嶂間。千歲巢居常避世。

稽山農余作避世行。以爲不可常也。復作此篇。

華胥氏之國。可以卜吾居。無懷氏之民。可以爲吾友。眼如巖電不看人。腹似鷓夷惟貯酒。周公禮樂寂不傳。司馬兵法亡亦久。賴有神農之學存。至今扶犁近可師。野叟粗繒大布以禦冬。黃梁黑黍身自舂。園畦剪韭勝肉美。社瓮撥醅如粥醴。安得天下常年豐。老死不見傳邊烽。利名畫斷莫挂口。子孫世作稽山農。

牧牛兒

南村牧牛兒。赤脚踏牛立。衣穿江風冷。笠敗山雨急。長陂望若遠。隘巷忽相及。兒歸牛入欄。煙火萌蒼溼。

讀書未終卷而睡有感

暮年綠一嬾。百事俱棄置。今遂嬾到書。把卷輒坐睡。其餘嬾則已。感此獨歎歎。念昔少壯時。日夜痛磨礪。誓言死爲期。身在敢暴棄。寧知未死前。殆欲負此志。顏回稱好學。揚雄乃識字。勉哉慕前修。自畫聖所諱。

早春新晴

柳弄春柔拂小潭。山橫霽色卷浮嵐。飛揚屨脚擲東北。零落梅花餘二三。村店疎燈新賣酒。神祠疊鼓正祈蠶。幽人睡起東園去。芹苗萱芽又滿籃。

枕上聞禽聲

屏掩輕寒酒半消。斷香殘夢兩無憐。開年春意遠如許。破曉一聲婆餅焦。

感舊

憶從南鄭入成都。氣俗豪華海內無。故苑燕開車載酒。名姬舞罷斗量珠。浣花江路青螭舫。槎柳毵場白
雪駒回首壯遊真。昨夢一竿風月老南湖。

夜雨

澤國寒多雨。崎人夜少眠。不緣醒作病。只合醉終年。庭草已爭茁。園梅空自憐。重雲不難挾。無劍倚青天。

又

寒雨連三夕。幽居只數椽。家貧輕過節。身老怯增年。日月悲歌裏。關山淚眼邊。梅花自開落。歎息爲誰妍。

又

人日春猶淺。雞晨夜向闌。殘缸燈暈小。單枕雨聲寒。難補皇天漏。空思后土乾。山家尊酒薄。懷抱若爲寬。

初晴野步

入市路三叉。緣山港半斜。疎籬帶殘雪。幽竇瀉湍沙。好鳥晴相語。芳蘭暖欲芽。病餘無脚力。隨處憩人家。

明日復雨排悶

湖上孤村冷欲冰。更堪衰與病相乘。夢回點滴簷間雨。心折青燐帳外燈。雖有數椽常似客。僅存一肉未
成僧。披衣偶取南華讀。打破愁城喜不勝。

又

此老在家如出家。蒲團趺坐讀南華。溼雲不散雁呼伴。幽室無聲燈墜花。心法先當破窠窟。世緣最忌養

萌芽行年七十方知悔。萬事無涯生有涯。

小室

小室僅容膝。焚香觀昨非。出門寧有礙。知我正須希。霜橘爭棊樂。仙壺賣藥歸。平生釣竿手。不解叩黃扉。

浮世

浮世如流水。滔滔日夜東。百年均夢寐。萬古一虛空。青鳥來雲外。銅駝臥棘中。相逢惟痛飲。令我憶無功。

紅梅

李羅山下越谿女。戲作長安時世粧。白白朱朱雖小異。斷知不是百花香。

又

雪裏溪頭已占春。小園又試晚粧新。放翁老去風情在。惱得梅花醉似人。

湖上

今朝雨初晴。湖上好天色。落梅紛可藉。桑柳亦已坼。老夫病良已。並水散輕策。冉冉春物新。忽忽衰髮白。四方豈不樂。嬾惰畏遠客。惟常勸買酒。東城復南陌。

晴甫一日復大風雨連日不止遣懷

書劍當年隘九州。白頭歸臥一窗幽。染成草色春猶淺。老盡梅花雨未休。得句已無前輩賞。開編時與古人遊。山房小甕今朝熟。不恨尊前自獻酬。

癸丑上元三夕皆大雨雪

兩雪連三日。孤城冷欲冰。泥深唯響屐。風惡更吹燈。空榻追歡客。何關在定僧。一盃嘗鼓煎。寒影對峻嶒。

高歎

人生各自有窮通。世事寧論拙與工。裹馬革心空許國。不龜手藥卻成功。早朝玉勒千門雪。夜坐蓬窗萬壑風。借得奇書且勤讀。小兒能續地爐紅。子坦以新昌木炭二百斤來。

幽興

兩後梅花無復在。老來酒盞頓成疎。身如海燕不逢社。家似瓜牛僅有廬。短髮垂肩懶中散。深居謝客病相如。從今何以消長日。剩種芭蕉學草書。

細梅

疎影橫斜事已非。小園日暮鎖芳菲。素綃應怯東風思。故著重重淺色衣。

又

香似海沉黃似酒。不禁風雪最遲開。放翁欲作梅花譜。蠟屐搯筇日日來。

又

紅梅眼看風吹盡。更有細梅亦已無。天與色香天自愛。不教一點上蜂鬚。

卷第二十七

僧廬

僧廬土木塗金碧。四出徵求如羽繳。富商豪吏多厚積。宜其棄金如瓦礫。貧民妻子半菽食。一飢轉作溝中瘠。賦斂鞭笞縣庭赤。持以與僧亦不惜。古者養民如養兒。勸相農事憂其飢。露臺百金止不爲。尙魏七月周公詩。流俗紛紛豈知此。熟視創殘謂當爾。傑屋大偉無時止。安得疲民免飢死。

春日

節節足足雀噪檐。朱朱白白花窺簾。坐旁設酒隨時飲。床上堆書信手拈。寓世無求猶役役。杜門不病亦厭厭。春濃日永有佳處。睡味著人如蜜甜。

春遊

鏡湖春遊甲吳越。鶯花如海城南陌。十里笙歌聲不絕。不待清明寒食節。青絲玉瓶挈新釀。細柳穿魚初出浪。花外金羈絡雪駒。橋邊翠幙圍螭舫。怕雨愁陰人未知。時時微雨卻相宜。養花天色君須記。正在輕雲嫩鷺時。

懷昔

昔遇高皇帝。華纓接俊遊。年光一彈指。世事幾浮漚。故國但青嶂。羈臣今白頭。平生笑李廣。癡絕望封侯。

記夢

夢不出心境。曠然成遠遊。花殘杜城醉。木落華山秋。戰血磨長劍。塵痕洗故裘。那知覺來處。身臥五湖舟。

春陰

老境三年病。新春十日陰。孤舟鏡湖客。萬里玉關心。出岫雲多態。呼風鳥獨吟。讀書惟恐盡。傾酒卻愁深。

睡起行至門外有賦

窗黑停書課。屏深養病眸。雨聲工破睡。酒力不禁愁。兀兀披衣起。昏昏曳杖遊。柴荆晚未閉。隔水數歸牛。

早春

舊學樊遲稼。新通汜勝書。不成籀國論。且復愛吾廬。

又

具牛將犢行。野雉挾雌鳴。農事不可緩。閑人亦勸耕。

又

近陂牛渾白。遠浦鴨頭青。一櫂悠然去。東風吹酒醒。

又

西村一抹煙。柳弱小桃妍。要識春風處。先生拄杖前。

醉吟

少日沉迷汗簡青。如今毀譽兩冥冥。書生弄筆如何信。只合花前醉不醒。

又

驅使難憑赤丁子。傳呼底用蒼頭兒。世間如夢身如寄。春去花空欲泥誰。

又

牽經引禮人誰聽。是古非今世共憎。何似對花傾綠酒。自歌一曲醉騰騰。

贈劉改之秀才

君居古荊州。醉膽天宇小。尚不拜龐公。况肯依劉表。胸中九淵蛟。龍蟠筆底六月冰。鸞寒有時大叫脫。烏
幘不怕酒盃如海寬。放翁七十病欲死。相逢尙能刮眼看。李廣不生楚漢間。封侯萬戶宜其難。

蓬門

莫笑蓬門雀可羅。老農正要養天和。穿林裊裊孫登嘯。叩角鳴鳴寧戚歌。睡美到明三展轉。飯甘捧腹一
摩挲。床頭更聽糟床注。造物私吾亦已多。

龍鍾

龍鍾一老寄荒村。鼎食山樓久已分。平日氣吞雲夢澤。暮年緣在武夷君。槍榆敢羨垂天翼。倚市從嗤刺
繡文。幸有筆床茶竈在。孤舟更入剡谿雲。

送佛照光老赴徑山

大覺住育王。拗折拄杖強到底。佛照住育王。挑得鉢囊隨詔起。從來宗門話。只要句不死。說同說異菴外
人。若是吾宗寧有此。日日風青今日晴。萬里春光入帝城。傳宣江上走中使。開堂座下羅公卿。御香鶴鶴
雲共布。法音浩浩潮收聲。報恩一句作麼道。常遣山林見太平。

春社有感

顏頰前朝白髮郎。祠堂賦祿玷恩光。寸心未與年俱老。萬事惟憑酒暫忘。穿仗兩曾觀揖遜。扶犁獨幸返
耕桑。耆年凋落還堪歎。社飲推排冠一鄉。三山百家之聚。年莫余先者。

春社

桑眼初開麥正青，勃姑聲裏青冥冥。今朝有喜君知否，到處人家醉不醒。

又

社肉如林社酒濃，鄉鄰羅拜祝年豐。太平氣象吾能說，盡在琴琴社鼓中。

又

柴門西畔枕陂塘，社雨新添一尺強。臺省諸公方袞袞，故應分喜到耕桑。

又

太平處處是優場，社日兒童喜欲狂。且看參軍晚蒼鶴，京都新禁舞齋郎。

村夜

寂寂山村夜，悠然醉倚門。月昏天有暈，風軟水無痕。迹爲遭讒遠，身由不仕尊。敢嗟車馬絕，同社自雞豚。

山園遣興

輸逋告糴走比鄰，恤患分災累故人。安得此身無一事，林中數筍過殘春。

次韻陳機宜見贈

邂逅今年得若人，儵然不染庾公塵。思幽屈子歌山鬼，語妙陳王賦洛神。初接笑談忘老懶，熟觀風度愛

清真。花時飛盡頻行樂，莫學衰翁睡過春。

野意

隄長逾十里，村小只三家。山客弛樵擔，溪翁鳴釣車。花深迷蝶夢，雨急散蜂衙。衰疾新年減，青鞵上若耶。

戒殺

物生天地間，同此一太虛。林林各自植，但坐形骸拘。日夜相殘殺，曾不置斯須。皮毛備裘褐，膏血資甘腴。雞鶩羊彘輩，尚食稗與芻。飛潛何預汝，禍乃及禽魚。豺虎之害人，亦爲飢所驅。汝顧不自省，何暇議彼歟。又於人類中，各私六尺軀。方其忿怒時，流血視若無。我欲反其源，默觀受氣初。挺刃之所加，慘若在我膚。朝飯一盂豆，暮飯一盃蔬。捫腹茆簷下，陶然歡有餘。

余年四十六入峽忽復二十三年感懷賦長句

當年弔古巴東峽，雪灑扁舟見早梅。宋玉宅邊新酒美，巫山廟下暮猿哀。樵柯爛盡棋方劇，客飯炊成夢未回。已把癡頑敵憂患，不勞團扇念寒灰。劉夢得團扇歌曰：當時初入君懷袖，豈念寒燄有死灰。

山行

七十衰翁短鬢斑，藥瓢藤杖伴清閑。平生惡路羊腸阪，晚歲羸軀飯顆山。一寸塔餘青竊外，數聲鐘下翠微間。往來處處皆奇絕，莫道先生興盡還。

雨中排悶

一春苦沈陰，未省見桃李。已逢暗寒食，更值雨甲子。重雲失南山，寸步困泥滓。籛龍已蠟織，一飽差可喜。杜敬叔寓僧舍開軒松下，以虛瀨名之來求詩。

君不見洛陽八節灘，未至一舍聞驚湍。生綃六幅誰所畫，入眼能令三伏寒。又不見桐廬七里瀨，灘雪跳

珠躡澎湃。羊裘老子去千年。絕世孤風凜如在。杜陵之孫。今勝流。飄然不必事遠遊。結茆古寺聽松吹。坐擅洛水桐江秋。放翁百念俱已矣。獨有好奇心未死。約君少待秋月明。抱琴來宿寫灘聲。

贈徑山鋁書記

徑山老將無勍敵。百萬魔軍俱掃迹。座下何人策雋功。籌略縱橫鋁記室。鋁公聲名滿吳會。惟有放翁最先識。奕奕揮毫王粲詩。翩翩插羽陳琳檄。風雷東海起伏龍。纒藉園丘薦蒼壁。徑山入門第一義。萬口諱言真稱職。我謂鋁公豈止此。徑山鉢袋渠能得。一枝白拂倘付之。會見青天飛霹靂。

五月一日作

處處稻分秧。家家麥上場。敢悲身老大。獨幸歲豐穰。酪美朱櫻熟。菰青角黍香。儵然一竹尺。飽受北窗涼。春夏之交。衰病相仍。過芒種始健。戲作。

藥裏關心百不知。可憐筆硯鎖蛛絲。倒壺猶有暮春酒。開卷遂無初夏詩。戶外逢人驚隔闥。燈前顧影歎支離。癡頑未伏常愁臥。鼓缶長謠樂聖時。

自嗟

青疏半畝老生涯。霜鬢蕭蕭只自嗟。勛業蹉跎空許國。文詞淺俗不名家。殘骸皆作麒麟植。舊友仍非處士牙。收得平生釣竿手。長安西日更須遮。

枕上述夢五月十二日雞鳴時作

江湖送老一漁舟。清夢猶成塞上游。生馬駒馳鐵蹏腕。古鏡歌奏錦衣構。玉關雪急傳烽火。青海雲開見

戍樓白首不侯非所恨，
啾嚶床簀死堪羞。

雨中排悶

潤入盆山綠葉稠，
倦攤書帙小窗幽。
浮雲不卷時時雨，
薄酒無功日日愁。
積潦漲來妨蹠履，
好山遮盡罷登樓。
青秧搖蕩湖堤決，
一飽前知未易謀。

小軒夏夜涼甚偶得長句呈杜叔高秀才

遙夜籠櫺已借秋，
闌干星斗挂檐頭。
鵲翻清影移枝宿，
螢弄孤光拂簾流。
榻上琴書紛枕藉，
髮根風露冷颼颼。
故人莫笑幽居陋，
此夕真從造物遊。

憶昔

憶昔西征日，
飛騰尙少年。
軍書插鳥羽，
戍壘候狼煙。
渭水秋風夜，
岐山曉雪天。
金鞮馳叱撥，
繡袂舞嬋娟。
但恨功名晚，
寧知老病纏。
虎頭空有相，
麟閣竟無緣。
壯士埋巴峽，
孤身臥海壖。
安西九千里，
孫武十三篇。
歎蘇秦弊，
鞭憂祖逖先。
何時聞詔下，
遣將入幽燕。

夏日晚興

高掛虛窗對綠池，
鳥啼聲歇柳陰移。
含風珍簾閑眠處，
疊雪輕衫新浴時。
泉冷甘瓜開碧玉，
手香素藕買一作雪，
長絲夕陽四面漁歌起，
又赴鄰翁把釣期。

老翁

老翁垂七十，
不復歎頭顛。
浩蕩新漁艇，
凋零舊酒徒。
嚴徐元袞袞，
管葛亦區區。
獨有欣然處，
登山未用扶。

困甚戲書

官如枝頭乾。不受雨露恩。身如水上浮。泛泛寧有根。刈茆以苦屋。縛柴以爲門。故人分祿米。鄰父餉魚殮。前門吏徵租。後門質襦褲。不敢謀歲月。且復支朝昏。雨餘幽花坼。亦可侑清尊。吾生信已乎。終老此山村。

歲晚

日月忽其逝。吾生猶幾何。不從屠狗醉。卽和飯牛歌。斧鉞稽天討。金縢約虜和。無情恨荆棘。歲晚暗銅駝。

戲詠山陰風物

萬里秦吳稅駕遲。還鄉已歎鬢成絲。城邊綠樹山陰道。水際朱扉夏禹祠。項里楊梅鹽可徹。太白梁園吟云。玉盤楊梅爲君設。吳鹽如花皎白雪。不知楊梅酸者乃藟以鹽佳品未嘗用也。湘湖蓴菜鼓偏宜。蓴菜最宜鹽鼓。所謂未下鹽鼓者。言下鹽鼓則非羊酪可敵。蓋蓴首蓴羹之美。爾圖經草草常堪恨。好事他年采此詩。

老健

才智不足狂有餘。此身老健更誰如。齒牢尚可決乾肉。目瞭未妨觀細書。不怪模稜噉了了。但驚紛擾勸徐徐。曉看瓜瓞初牽蔓。一笑呼兒勿廢鋤。

六月晦日作

長夏忽云過。徂年行且休。川原方渴雨。草木已驚秋。露臺晨猶泫。風蟬暮更遒。明窗對清鏡。世事判悠悠。

喜雨

雷車隆隆南山陽。電光煜煜北斗傍。急雨橫斜生土香。草木蘇醒起仆僵。芭蕉抽心鳳尾長。薜荔引蔓龍鱗蒼。葛屨竹簟夜更涼。超然真欲無羲皇。常年七月蚊股廊。今夕肅肅疑飛霜。水車罷踏屏斗藏。家家買酒歌時康。

門外納涼

玄雲障落日。早得數刻涼。寒泉灑門前。浴罷倚胡床。蟬聲晚愈壯。藕花凋更香。嘯詠忽已久。野色來蒼蒼。新月淡無輝。大星森有芒。水鳥亦歸宿。飛鳴掠橫塘。人生各有時。何至終身忙。撫髀三太息。墜露溼衣裳。贈蘇趙叟兄弟。

君家真德門。才傑生袞袞。託契則甚深。所恨相識晚。攜文數過我。每讀必三反。譬如天旆駒。真是渥洼產。閉門萬卷讀。更要極源本。才難聖所歎。期子敢不遠。

癸丑七夕

風露中庭十丈寬。天河仰視白漫漫。難尋仙客乘槎路。且伴吾兒乞巧盤。秋旱時聞桐葉墜。夜涼已怯紵衣單。民無餘力年多惡。退士私憂實萬端。

共語

喬嶽成塵巨海枯。欲求共語一人無。黃金已作飛煙去。廢漢終身守藥爐。

書歎

少年志欲掃胡塵。至老寧知不少伸。覽鏡已悲身潦倒。橫戈空覺膽輪囷。生無鮑叔能知己。死有要離與

卜鄰西望不須措病眼長安冠劍幾番新。

秋曉倚闌

雲罽纖纖玉一鈎。小庭風露更清柔。老來朋舊凋零盡。獨倚闌干特地愁。

癸丑七月二十七夜夢遊華嶽廟

驛樹秋風急。關城暮角悲。平生忠憤意。來拜華山祠。

又

牲碑僞正朔。祠祝虜衣冠。神亦豈堪此。出門山雨寒。

僕頃在征西大幕登高望關輔樂之每冀王師拓定得卜居焉暇日記此意以示子孫

八月殘暑退。秋聲滿庭樹。豈無四方志。衰病迫霜露。遼東黃頭奴。稔惡天震怒。南北會當一。老我悲不遇。子孫勉西遷。俗厚吾所慕。約已收孤嫠。教子立門戶。黍稌暗阡陌。鶉雉足七箸。永爲河渭民。勿憚關山路。

讀陶詩

我詩慕淵明。恨不造其微。退歸亦已晚。飲酒或庶幾。雨餘鋤瓜瓞。月下坐釣磯。千載無斯人。吾將誰與歸。

秋夜感舊十二韻

冷螢綴蓬根。忽復照高樹。年光逝不留。百感集遲暮。往者秦蜀間。慷慨事征戍。猿啼鬼迷店。馬嘶飛石鋪。鬼迷店在大散關下。飛石鋪在小益道中。常有崩石危嶺高入雲。朽棧劣容步。天近星宿大。江惡蛟龍怒。意氣頗自奇。性命那復顧。最懷清渭上。衝雪夜掠渡。封侯細事爾。所冀垂竹素。兜鍪竟何成。豈獨儒冠誤。

當時妄校尉。旗纛今照路。浩歌遂成章。聊慰老不遇。

幽居

海濱結茆新。退藏常畏人。已侵垂老境。尙愛不貲身。丹灶長生藥。巢居上古民。秋來有奇事。鷗鷺日相親。

醉題

勿笑山翁病滿軀。胸中俠氣未全無。雙瞳遇醉猶如電。五木隨呼盡作盧。代北胡兒富羊馬。江南奇士出菰蘆。何由親奉平戎詔。蹴踏關中建帝都。

雨涼小飲戲作

孤村小院雨輪涼。團扇流塵篔簹床。蛩思感秋吟壞壁。螢光乘暗遠高梁。巾箱字細成襤褸。醞醖盃深斷送狂。坐睡覺來人已散。籬櫺時度玉簪香。玉簪花名。

題齋壁

迹是滄浪客。家居穉樵村。秋菘萐蕪滑。社酒帶醅渾。助業知難遂。文章不更論。惟餘此身在。分付與乾坤。

書憤

山河自古有乖分。京洛腥羶實未聞。劇盜曾從宗父命。遺民猶望岳家軍。上天悔禍終平虜。公道何人肯散羣。白首自知疎報國。尙憑精意祝爐熏。宗澤守東都巨盜來歸百萬號宗爺岳家軍蓋紹興初語。

秋興

秋風又滿會稽城。有客飄然萬事輕。久向林間得佳趣。不知身外有浮名。蒲萄雨足初全紫。烏柏霜前已

半賴欲把一盃終覺嬾。老來懷抱爲誰傾。

雨夜排悶

羸病愁燈影。羈懷怯雨聲。新秋忽已半。垂老若爲情。金印兒嬉事。青編身後名。何如破窗下。袖手送餘生。

又

村巷時時雨。江城夜夜砧。沉憂羈客夢。孤憤遠臣心。身病常須藥。囊空未贖琴。月明竟不覺。飽受草鞋侵。

秋日出遊戲作

箬帽蓑衣自道宜。不論晴雨著無時。半醒半醉人爭看。是聖是凡誰得知。

又

薄雲縞日未成雨。野水齧沙爭赴溪。書冊懶看聊作伴。酒壺不飲亦常攜。

雨中夕食戲作

高秋滴塔雨。作泥黃昏爭林雀。欲棲。隔窗一飯頗簡快。半升脫粟澆黃齏。

又

粗飯寒菹到手空。屬饜也與八珍同。家人見慣渾閑事。笑殺新來兩鬢童。

又

粳粒微紅愧食珍。蔣芽初白喜嘗新。摩挲便腹無憂責。我是人間得計人。

自警

墮髮滿晨梳。荒畦入晚鉏。涼生團扇底。病退短筇踈。聖道功殊淺。塵緣習未除。青燈幸如故。勉近讀殘書。

寄方瞳胡先生

形槁神彌王。心虛腦自疑。平生一酒榼。萬里兩行滕。安枕存玄牝。齋居養絳陵。他年喬嶽下。正晝看飛騰。
古仙人飛升皆在五嶽名山。故人少見者。

雨夕焚香

芭蕉葉上雨。催涼蟋蟀聲。中夜漸長。繡十二經真太漫。與君共此一爐香。

秋雨初霽徒倚門外有作

三十餘年此結廬。客來不用笑迂疎。前身已預蘭亭會。老眼曾窺禹穴書。浮瓮社醅香出屋。登場秋稼穗盈車。蕭蕭蓬髮雖衰矣。追逐鄉鄰尚有餘。

雨中作

野外偏於看雨宜。映空澆水細如絲。川雲借潤支琴石。澗水分流洗藥池。未肯高眠成老態。卻緣危坐得新詩。悠然更助鄰丁喜。漸近收蕎下麥時。

贈老雞

峨峨赤幘先羣輩。喔喔長鳴蓋四郊。意氣雖雌無處用。風霜從我老衡茆。

又

場中啄粟樹頭棲。三唱明星出尚低。關路元無孟嘗客。吳兒莫議會稽雞。

秋晚閑步鄰曲以予近嘗臥病皆欣然迎勞

放翁病起出門行。續女窺籬故豎迎。酒似粥釀知社到。餅如盤大喜秋成。歸來早覺人情好。對此彌將世事輕。紅樹青山只如昨。長安拜免幾公卿。

雨夜

歲晚蕭爽劣自容。齒搖將脫髮將童。心遊萬里關河外。身臥一窗風雨中。醫不可招惟忍病。書猶能讀足忘窮。夜闌睡覺蛩聲裏。時見燈花落碎紅。

醉臥道傍

爛醉今朝臥道傍。鄉間共爲護牛羊。高懷那遣羣兒覺。至理真能萬事忘。喚起瘦軀猶鬼賊。扶歸困睫更芒洋。凍齧快嚼茆簷下。拍手從人笑老狂。

枕上聞急雨

枕上雨聲如許奇。殘荷叢竹共催詩。喚回二十三年夢。燈火雲安驛裏時。

又

酒病羈愁一洗空。長歌高枕雨聲中。傳聞谿港深三尺。明日扁舟處處通。港濶久不通舟楫。兩日雨殊可喜也。

得趙若川書因寄

澤居路絕人不到。晨起忽傳雙鯉魚。儲淚一升悲世事。減愁三尺看君書。龍擘對策言傷直。山邑迎親計

未疎。老病閉門誰省錄。因風時肯問何如。

夢至洛中觀牡丹繁麗溢目覺而有賦

兩京初駕小羊車。顏頰江湖歲月賒。老去已忘天下事。夢中猶看洛陽花。妖魂豔骨千年在。朱彈金鞭一笑譁。寄語氍毹莫癡絕。祈連還汝舊風沙。

閑居對食書媿

遊宦無功坐免歸。誰令盤筯極甘肥。錦鱗差尾魚登俎。繡羽駢頭雉觸機。桑落滿壺春盎盎。雨前轉磴雪霏霏。殘年何地酬君賜。自古羈臣厭蕨薇。

又

老病家居幸歲穰。味兼南北餼枯腸。滿脾蜜熟餽饌美。下棧羊肥饋餼香。潑刺河魴初出水。迷離穴兔正迎霜。山僧一鉢無餘念。應笑先生爲口忙。

秋夜獨酌

壯志隨年減。羈愁與夜長。月高寒暈淡。花坼露叢香。仕畏譏銷骨。歸判酒腐腸。青燈寫孤影。相勸盡餘觴。

風雲交作戲題

雲脚如龍爪。空中挾雨來。何關風伯事。欲到卻吹回。

自嘲

歲月推遷萬事非。放翁可笑白頭癡。此生竟出古人下。有志尙如年少時。僻學固應知者少。長歌莫問和

予誰自嘲自解君毋怪。老大從人百不宜。

書室

客來莫笑席塵凝。靜處工夫卻少增。黑蟻常繙魯壁簡。瘦蛟時落越溪藤。尙能豪健如霜鶴。未遽衰殘學凍蠅。更喜論文有兒子。夜窗相對短檠燈。

數日秋氣已深清坐無酒戲題長句

漸近重陽天氣嘉。數椽茆竹淡生涯。山童擁篲掃黃葉。鄰女傍籬收碧花。避俗要生輪四角。出門何管路三叉。晚窗酒盡無多歎。試問前村好事家。

五更起坐

世間醉夢過浮生。誰肯披衣坐五更。燈煜心光回自照。縣縣踵息浩無聲。古人得意捐糟粕。癡子何知墮化城。七十老翁須努力。鄰雞纔唱又窗明。

谿上雜言

谿上之丘吾可以休。谿中之舟吾可以遊。一裘雖弊可度風雪虐。一簞雖薄未有旦夕憂。媿於此心鼎食其敢飽。負其所學蟬冕增吾羞。古人誰謂不可見。黃卷猶能親生面。百穀薤薤知稷功。九州茫茫開禹甸。巍巍成功亦何有。治亂但如翻覆手。逢時皆可致唐虞。比身管樂寧非苟。樹桑釀酒蕃雞豚。是中端有王業存。一朝遇合得施設。千載始知吾道尊。

厭事

厭事便微疾。貪眠幸早寒。人雖笑疎懶。天實閱衰殘。韋布何曾賤。芣茨本自寬。黃花插烏帽。一醉有餘歡。

方池

莫笑方池小。清泉數斛寬。照花紅錦爛。洗研黑蛟蟠。日取供茶鼎。時來擲釣竿。秋風過欄角。也解作微瀾。

癸丑重九登山亭追懷頃在興元常以是日獵中梁山。下樂甚慨然。賦詩。予於是生六十有九年矣。

生年六十九重陽。輒逼秦吳歲月長。南鄭從戎嗟尙壯。中梁縱獵最難忘。離披雉拂雕鞍墮。獨俟狐穿古冢藏。夢斷酒醒今萬里。亦逢佳節重悲傷。

卷第二十八

感懷

老病與世絕。屏迹三家村。我居一何陋。舉手屋可捫。客至不能迎。堅坐度朝昏。一窗修竹下。超然傲羲軒。外物自變遷。內景常默存。黃流不注海。浩浩朝崑崙。妙道本自得。至言初不煩。功成出緒餘。猶足康黎元。

又

卜居鏡湖上。一菴環翠屏。竹林藏谿篔。嶺路蟠青冥。鸞騰立奇石。嶄絕瞻危亭。車馬雖掃迹。猿鳥與忘形。我行半九州。踴盡芒屨青。豈知雪滿鬢。子茲傲雲扃。丹砂收箭鏃。茯苓斲人形。遼天渺歸鶴。一瞬三千齡。

又

平生喜栽花，賴以娛寂寞。小園財一畝，粲粲萬跗萼。典衣買紫桂，輟食致紅藥。阡眠香草茂，掩萼煙柳弱。踏雨探花開，障風畏花落。雖慚童心在，終勝塵事縛。今日疾稍間，天氣亦清廓。啼鳥寒不歸，可以侑吾酌。

又

殘年迫衰謝，嬰疾歸鄉粉。諸賢渡江初，總角幸有聞。才非楚倚相，亦能讀典墳。夫豈或使之，後死與斯文。世儒鑿戶牖，道術將瓜分。孤陋守一說，百氏殆可焚。後來豈無人，鼻聖誰揮斤。巍巍貞觀治，房魏出河汾。

出遊

采藥今朝偶出遊，溪邊小立喚漁舟。未須著句悲搖落，嫩日和風不似秋。

又

朝行躡屨穿幽谷，暮返褰裳涉亂流。提起短筇成一笑，每煩上座爲分憂。

讀杜詩偶成

一念寧容事物侵，天魔元自是知音。拾遺大欠修行力，小吏相輕尙動心。

秋夜卽事

鳥宿牛歸戶欲扃，燈前老子影伶仃。溼雲不散初聞雁，深竹微明尙有螢。一卷舊書開蠹簡，半升濁酒倒餘瓶。乘閑欲擬歸來作，小草斜行滿曲屏。

物有可欺者，因戲作數語以識之。

雞棲及我未掩扉，犬雖遠出暮自歸。司晨警夜職交舉，簸糠粟粒報亦微。查查雙鵲更婉汝，庭樹夜宿常

相依豈憐主人老寂寞。暖熱蓬戶不忍違。養鷗甚恩健卽去。養鷹雖久飽亦飛。嗟哉物性厚薄異。使我隱几空歎歎。

老懷

身見高皇再造初。名場流輩略無餘。舊書科斗纔存字。薄業蝸牛僅有廬。迂士豈堪新貴使。少年自與老人疎。荒園寂寂堆霜葉。抱瓮何妨日灌蔬。

對酒

古今共有死長短。無百年方其欲瞑時。如困得熟眠。世以生時心。妄度死者情。疑其不忍去。一笑可絕纒。區區計生死。不如持一觴。一觴澆不平。萬事俱可忘。待酒忘萬事。猶是役於酒。醉醒不到處。天魔自奔走。

東村散步有懷張漢州

扶杖村東路。秋來始此回。寒鴉盤陣起。野菊臥枝開。憂國丹心折。懷人雪鬢催。房湖八千里。那得尺書來。

晚寒自東村步歸

夕陽下平野。落葉滿荒街。村店賣麪。人家燒豆豉。溪風透布褐。草露溼芒屨。骨相元如此。何由與世諧。

排悶

丈夫結髮志功名。大事真當以死爭。我昔駐車籌筆驛。孔明千載尙如生。

又

曾攜一劍遠從戎。秦趙關河顛盼中。老去功名無復夢。凌煙分付黑頭公。

又

四十從軍渭水邊。功名無命氣猶全。白頭爛醉東吳市。自拔長刀割麋肩。

又

西塞山前吹笛聲。曲終已過雒陽城。若能洗盡世間念。何處樓臺無月明。

又

萬里風中寄斷蓬。古來虛死幾英雄。拔山力與回天勢。不滿先生一笑中。

又

風霜九月冷飈飈。湖海飄然一布裘。親見宓穉初畫卦。轉頭三十萬春秋。

初寒病中有感

楚水楓林霜露新。白頭一叟正吟呻。牛衣未起王章疾。馬磨何傷許靖貧。治道本來存簡冊。神州誰與靜煙塵。新亭對泣猶稀見。況覓夷吾一輩人。

放歌行

君不見汾陽富貴近古無。二十四考書中書。又不見慈明起自布衣中。九十五日至三公。人生窮達各有命。拂衣徑去猶差勝。介推焚死終不悔。梁鴻寄食吾何病。安用隨牒東復西。獻諛耐辱希階梯。初無公論判溼涓。使徒新貴於雲泥。稽山一老貧無食。衣破履穿面黧黑。誰知快意舉世無。南山之南北山北。

山頭石

秋風萬木實。春雨百草生。造物初何心。時至自枯榮。惟有山頭石。歲月浩莫測。不知四時運。常帶太古色。老翁一生居此山。脚力欲盡猶躑躅。時時撫石三歎息。安得此身如爾頑。

有客

有客隱華山。學道忘歲月。靈苗生絕壁。光景中夜發。斷根食之盡。倏爾換金骨。通籍虎豹關。日預通明謁。綠章奏封事。誤字坐責罰。後身幸不忘。去日苦飄忽。白首三入朝。未省及黔突。方逃申公鉗。已取下和朋。福微不盈督。罪衆幾擢髮。上天豈憐之。寸步使屢蹶。拔其利欲根。還之山水窟。洗心謝宿愆。世事等胡粵。

幽居

窮老苦畏事。雅意在丘壑。結茆鏡湖上。卒歲安寂莫。有門常嬾開。壁間挂雙屨。猶恨未遠人。靜夜聞城角。

又

來客無僮奴。剝啄自叩戶。主人亦蕭然。茗飲不能具。清言正絕倒。日暮亟散去。更欲盡所懷。衣薄畏霜露。

又

山園手栽花。日夜數花時。花開亦已落。一歡自無期。勸君強自娛。勿作兒女悲。春風染柳條。不染君鬢絲。

又

種菜三四畦。畜豚七八個。永言給賓祭。且復課慵惰。霜清黃犢健。土潤小雨過。冬耕不可失。努力勿安臥。

又

放翁家山陰。其貧蓋一國。骨相異虎頭。祠祿真雞肋。有米薪未具。坐待至曠黑。躬耕豈所難。一飽非爾力。

野興

身似孤鴻鐵羽翰。悲鳴飲啄住江干。酒闌客思多新感。病起衰顏失故丹。倦枕忽聞中夜雨。疎砧又報一年寒。幽窗晤語無來客。空倚詩情強自寬。

又

老去癡頑百不能。非醒非醉日騰騰。敲門惟有徵租吏。好事元無送米僧。舊俗不還誰復念。古書雖在漸難憑。平生意氣今如此。惆悵西窗半夜燈。

又

殘水涓涓入野塘。菊花猶放數枝黃。悶思野步便晴日。病怯冬溫喜薄霜。湯餅鬻成新兔美。膾齏擣罷綠橙香。人間富貴知何得。商略山林卻味長。

又

水作縠紋微起伏。天如卵色半陰晴。偶來竹下揩頤坐。卻向藤陰曳杖行。西埭人喧荻船過。東村燈上緯車鳴。幽居應接真無暇。莫訝經年嬾入城。

買油

習氣年來掃未平。夢回猶喜讀書聲。冬裘不贖渾閑事。且爲吾兒續短絛。

繫舟

繫舟江浦待潮平。歎息無人共月明。歷盡世間多少事。飄然依舊老書生。

又

地曠月明鋪素練，霜寒河淺拂輕綃。手扶萬里天壇杖，夜過前村禹會橋。

初冬至近村

南國霜常晚，初冬葉始紅。曠懷牛屋下，美睡雨聲中。沮水憶浮馬，西鄰軍行溪過獨。皆浮而濟，嶧山思射熊。何由效唐將，八十下遼東。

古築城曲

築城聲酸嘶，漢月傍城低。白骨若不掩，高與長城齊。

又

長城高際天，三十萬人守。一日詔書來，扶蘇先授首。

又

百丈築城身，千步掘城壕。咸陽三月火，始悔此徒勞。

又

嶧山訪秦碑，斷裂無完筆。惟有築城詞，哀怨如當日。

山園

山泉引派漲清池，野蔓移根絡短籬。藝果極知非老事，接花聊復效兒嬉。提壺言語開顏聽，斲木衣襦緩步窺。莫笑題詩還滿紙，小園幽事要君知。

將軍行

將軍入奏平燕策，持笏揚前親指畫。天山熱海在目中，下殿即日名烜赫。馳出都門雪初霽，直過黃河冰未坼。纒旗方掠桑乾渡，羽檄已入金臺陌。勇士如鷹健，欲飛屏王似兔免。何勞擗戎服，押俘獻廟社。正衙第賈頰，詔冊端門賜。酺天下慶，御觴尚恨滄溟淺。從來文吏喜相輕，聊遣濡毫書竹帛。

古別離

孤城窮巷秋寂寂，美人停梭夜歎息。空國露溼荊棘枝，荒蹊月照狐狸迹。憶君去時兒在腹，走如黃犢益不識。紫姑吉語元無據，况憑瓦兆占歸日。嫁來不省出門前，魂夢何因識酒泉。粉絲磨鏡不忍照，女子盛時無十年。

寄子虞

吾兒適淮壖，送之梅市橋。三年安得過，思汝雙鬢凋。今年當代歸秋色，已蕭蕭。迎汝不憚遠，夢泝錢塘潮。人事不可料，邑民挽歸橈。郡牧部使者，交章聞之朝。增秩復使留，此事久寂寥。念汝未育子，大女方垂髫。小女聞學行，想像扶牀嬌。汝少知讀易，外物莫能搖。但願早舉孫，不必七葉貂。歸來郎罷前，相從樂簞瓢。泛舟自中堰入湖。

水縮沙洲出，霜清木葉丹。鷺羣橫澹靄，鴉陣報初寒。冷落人情見，衰遲世念闌。惟留一句子，村舍話團圓。

夜歸舟中作

意薄楊脩喚小兒，孤舟自笑髮成絲。放開癡腹無非夢，拈起幽懷總是詩。霜下忽驚桐葉盡，灘生更覺水

聲奇。餘年那恨驅黃犢。除卻爲農百不宜。

蓬萊閣聞大風

天風搖蕩萬松聲。卷海頽山得我驚。觸澗堆秋起柂。塵鼻闌下夜還營。荷戈老氣縱橫在。看劍新詩欸
唾成。興盡卻尋湖上路。醉看月墮斗杓傾。

小出塞曲

全師出雁塞。百戰運龍韜。金絡洮州馬。珠裝夏國刀。度沙風破肉。攻壘雪平壕。明日受降處。甲齊熊耳高。

冬日園中作

園荒闕掃除。籬敗且枝梧。久旱池萍死。新霜野草枯。寒爐殊未議。濁酒卻時酤。飛動郊原興。飢鷹待指呼。

登山亭

新得天台古澗藤。強扶衰疾躡峻嶒。登高臨遠雖多感。歎老嗟卑卻未曾。紙上是非難盡信。人間禍福有
相乘。早知等是枯魚肆。乞水何須望斗升。

拄杖歌

道人四壁空無有。一炷清香閑袖手。牀邊獨有拄杖子。疾病相扶真我友。禪房按膝秋聽雨。野店敲門暮
除酒。畏途九折歷欲盡。世上誰如君耐久。老矣更踏千山雲。何可一日無此君。歸來燈前夜欲半。露柱說
法君應聞。

冬晴

吳中霜雪晚。初冬正佳時。丹楓未辭林。黃菊猶殘枝。鳴雁過長空。織鱗泳清池。氣和未重裘。隨水照鬚眉。悠然據石坐。亦復出門嬉。野老荷鋤至。一笑成幽期。

冬夕

犬吠驚飄葉。禽喧換宿枝。墮空霜蕭蕭。垂地斗離離。野叟讀書罷。高城吹角悲。功名渾錯料。老病卻如期。

又

不寐起中夕。披衣增慄慄。千金空市骨。三沐竟列腸。世事能識。吾生安用長。布裘茆屋底。死去亦芬芳。

十月十五夜對月

離海月盈丈。寒光萬里明。衆星斂欲盡。一鏡獨徐行。重露滴松鬣。高風吹鶴聲。老來殊畏冷。不盡倚闌情。

久疾

久疾無時已。殘年莫更論。流離魂未返。窮困舌空存。耕墾關心事。祠官荷主恩。但愁垂老眼。不見定中原。

又

殘年仍臥疾。窗戶夜愔愔。一日且復過。久生非所欽。暗塵侵藥笥。微月伴衣砧。萬里懷良友。前盟可得尋。

又

幽屏元無事。沉繇自鮮歡。脛長猶可截。冠挂豈容彈。擣藥香塵細。尋書蜜炬殘。晚來差覺健。風月小庭寬。

舍北望牛頭山。有延勝寺。先太傅書堂在焉。六年前嘗泛小江往遊。寺焚於陸寇。書堂無復存矣。

太傅讀書處。秋風會問途。江如青弋險。山似白鹽瓜。山形絕巖府之白鹽。但差卑小耳。峇盤豈豎嶺。林
開忽見湖。草堂無復識。流涕想規模。

十月十九日大風作寒閉戶竟日

霜風捲地起。落葉擁蝸廬。終日澹無事。一窗寬有餘。坐多知力耗。食少覺心虛。懶情無新句。松聲忽起予。

寄天封明老

浪迹天台一夢中。距今四十五秋風。勝遊回首似昨日。衰病侵人成老翁。聖寺參差石橋外。仙蓬縹緲玉
霄東。因君又動青鞵興。目斷千峯翠倚空。

村居

衰病汗朝著。恩寬得免歸。處能心自信。不恨世相違。草市寒沽酒。江城夜擣衣。是中堪送老。高枕謝招麾。

又

自笑觸藩羝。人嘲失旦雞。囊慳衣任短。山冷屋便低。宦拙譏銷骨。言狂悔噬臍。自今焚筆研。有手但扶犁。

十日下午暄甚戲作小詩

老怯霜風盡日眠。素屏紙帳擁燈毼。爲君小試回春手。便似暄妍二月天。

霜天雜興

楓葉全丹。柰葉黃。江城殘角伴斜陽。琴書自足閑中樂。天地能容醉後狂。老死山林初不憾。夢遊河渭獨
難忘。穀城黃石今安在。取履猶思效子房。

又

萬鼓風聲吼屋邊。老人裘袴旋裝綿。晨梳墮髮知衰甚。夜枕聞雞尙慨然。身後文章空飽蠹。眼前交舊半沉泉。飯蔬飲水平生慣。恥向天公更乞憐。

又

少學愚公一味愚。暮年仍似病相如。閑吟寄友惟生紙。草具留僧只野蔬。雨澀溪流殊未足。霜高木葉已無餘。潭州丞相憐衰疾。細字時收尺素書。

連日風雨寒甚夜忽大風明日遂晴

萬里浮雲一掃空。碧天無際日曛曛。歡聲四起春風裏。恰似祥符景德中。

懷昔

昔者戍梁益。寢飯鞍馬間。一日歲欲暮。揚鞭臨散關。增冰塞渭水。飛雪暗岐山。悵望釣璜公。英概如可還。挺劍刺乳虎。血濺貂裘殷。至今傳軍中。尙媿壯士顏。豈知墮老境。槁木蒙霜菅。澤國氣候晚。仲冬雪猶愜。囊事空夢想。擁褐自笑孱。胡星未實地。大弓何時彎。

寄題王俊卿看山堂

廣文風度絕清真。一代論交不數人。車馬到門常謝病。北山雖遠卻相親。

又

閉戶終年懶出遊。北山山色可消愁。何時一掃胡塵盡。更約同吟太華秋。

絕歎

老屋環青障。衰翁臥白頭。殘書且遮眼。薄酒不澆愁。世故真難料。吾生愈覺浮。餘年更須惜。幸得返山丘。

風雨

風雨連三日。衰翁不下堂。弄書聊自適。與世已相忘。坼栗經霜飽。搓橙帶露香。地爐供小飲。亦足慰淒涼。

晚過鄰曲

陽狂跌宕送年華。信步來尋野老家。淺瀨水清逢立鷺。橫林葉盡數栖鴉。書生一飽依耕耒。壯士孤愁入戍笳。王績但思酣美酒。葛洪不復問丹砂。

莫仲謙挽詞

懷器潛山澤。逢時起薜蘿。星辰占實劍。雷雨化龍梭。禹穴書雖富。涪溪石未磨。門閭更須築。有子繼三科。

病起

一病輒經旬。幾病能不死。誠知迫頽年。暫健亦自喜。半窗風竹影。晴景極清美。讀書雖益懶。尚可日百紙。引鏡整角巾。病思真一洗。悠然度朝晡。萬事如覆水。

晚興

一聲天邊斷雁哀。數蕊籬外蚤梅開。幽人耐冷倚門久。送月墮湖歸去來。

贈粉鼻畜貓名也。

連夕狸奴礙鼠頻。怒髯噴血護殘囷。問渠何似朱門裏。日飽魚殮睡錦茵。

與兒輩論李杜韓柳文章偶成

吏部儀曹體不同，拾遺供奉各家風。未言看到無同處，看得同時已有功。

夢至小益

夢覺空山淚漬衿，西游歲月苦巖巖。葭萌古路綠雲壁，桔柏浮梁暗樸林。坐上新聲猶蜀伎，道傍逆旅已秦音。荷戈意氣渾如昨，自笑摧頽負壯心。

懷紹興間往還諸公

早歲從諸傑，森然盡國華。辭工出月脇，筆健拔鯨牙。道在窮何減，年徂生有涯。湖山元不改，老淚溼風沙。

磨衲道衣

久脫朝衣學道裝，溪雲野鶴作身章。何時九轉丹砂熟，卻插金貂侍紫皇。

溪上作

落日溪邊杖白頭，破裘不補冷飈飈。慙愚酷信紙上語，老病猶先天下憂。未俗陵遲稀獨立，斯文崩壞欲橫流。紹興人物嗟誰在，空記當年接俊遊。

又

僂僕溪頭白髮翁，暮年心事一枝筇。山銜落日青橫野，鴉起平沙黑蔽空。天下可憂非一事，書生無地效孤忠。東山七月猶關念，未忍沉浮酒醜中。

小憩

徐行散腰膺。小憩蓄精神。休養觀書眼。調娛宴坐身。青氈我家舊。紅粟太倉陳。溫飽無餘事。寒龜息自勻。
癸丑十一月下旬溫煥如春晦日忽大風作雪

今年一冬晴日多。草木萌甲風氣和。百錢布被未議贖。老翁曝背兒行歌。吾儕小人慮不遠。積雪苦寒來豈晚。青天方行三尺烏。不料黑雲高巖嵒。明朝雪惡凍復餓。兒啼頰皴翁噤臥。九重巍巍那得知。關門催班百官賀。

占城樓竹拄杖

參雲氣壓葛陵龍。跨海來扶笠澤翁。八十尙思行脚在。與君處處現神通。

西城

市步羣鷺散。關門夕照明。河流倒橋影。雪野聚鳥聲。繁杵聞深巷。寒煙下廢城。匆匆船盡發。爭趁早潮平。

東城

墟落斂暮煙。林梢偃新月。河橋燈漸鬧。柳岸船猶發。薄酒吹欲無。佇立搔短髮。誰知七十翁。歲晚念裘褐。

斯道

斯道有顯晦。所憂非賤貧。乾坤均一氣。夷狄亦吾人。朋黨消廷論。鉏耰洗戰塵。清時更何事。處處是堯民。

病起山居日有幽事戲作

靈府超然外物輕。靜中談笑卻三彭。晴窗風竹參差影。霜樹山禽格磔聲。客出異苗咨藥品。僧攜奇篆乞書評。幽居亦未全無事。更用人間有姓名。

又

鶴骨龜腸欲不禁。扶衰初喜罷呻吟。盆山冰釋書窗暖。藥竈香濃道院深。筆健乍臨新獲帖。手生重理舊傳琴。閉門局促還堪恨。雲海何時豁此心。

蝸廬

蝸廬四壁空。也過百年中。葺火朝供爨。蘆綿夕禦風。不憎窮有祟。自以放名翁。但恨村醪薄。衰顏只暫紅。

冬夜讀書有感

一指頭禪用不窮。一刀七藥去凌空。汗牛充棟成何事。堪笑迂儒錯用功。

又

胸中十萬宿貔貅。早覩黃旗志未酬。莫笑蓬窗白頭客。時來談笑取幽州。

十二月九日枕上作

入德百舌語。籬籠已是新春不是冬。堪歎老來如許病。正令無病亦無驚。

記夢

黃河袞袞抱潼關。蒼翠中條接華山。城郭丘墟人盡老。藥爐依舊白雲間。

又

西巖老宿雪垂肩。白石爲糧四百年。喜我未忘山下路。慙慙握手一欣然。

又

三髻山童喜欲顛。下山迎我拜溪邊。松陰拂罷蒼苔石。接竹穿雲理舊泉。

鏡湖女

湖中居人專舟楫。家以舟作生業。女兒粧面花樣紅。小繖翻翻亂荷葉。日暮歸來月色新。菱歌縹緲泛煙津。到家更約西鄰女。明日湖橋看賽神。

JR

742/38

15)




書叢本基學國

集翁放陸

(三)

著游陸



行發館書印務商

書叢本基學國

集翁放陸

(三)

著游陸

行發館書印務商

陸放翁集

劍南詩彙

卷第二十九

水村曲

山村今年晚禾旱，
奏下民租獨太半。
水村雨足米狼戾，
也放三分慰長意。
官府老翁猶記軍興時，
汝輩少年那得知。

石洞餉酒

忘愛自古無上策，
欲飲家貧酒盃空。
今朝鵲喜報遠餉，
未圻赤泥先動色。
魚長三尺催膾玉，
巨蟹兩螯仍斫雪。
勿言地僻少過從，
清風明月俱吾客。
驅除二豎走三彭，
零落眼花生耳熱。
陶然酣臥聽松聲，
魏爾公卿足憂責。

病退

病退身仍健，
春回日漸長。
神訶金鼎藥，
龍出玉函方。
美睡三竿日，
安禪半篆香。
殘年已如許，
幸復起膏肓。

偶書

身放江湖遠，
年推里巷尊。
鄰翁分酒子，
羽客借桐孫。
泱泱冰消澗，
纖纖柳映門。
小車非漢相，
時亦到前村。

讀史



南言蕞菜似羊酪。北說荔枝如石榴。自古論人多類此。簡編千載判悠悠。

飲石洞酒戲作

酣酣霞掌力通神。澹澹鵝雞色可人。一笑破除垂老日。滿懷搖蕩隔年春。梅花的的吹初破。楊柳纖纖染未勻。醉倒橋邊人不怪。西曹免護相君茵。

霜寒

霜重晨簷滴。薪乾夜焙溫。老惟便布褐。病不出柴門。瓶裏梅花墜。窗間鶯語喧。閑人信無事。午睡到黃昏。

賽神曲

擊鼓坎坎吹笙鳴。綠袍槐簡立老巫。紅衫繡裙舞小姑。烏臼燭明蠟不如。鯉魚糝美出神廚。老巫前致詞。小姑抱酒壺。願神來享常驩娛。使我嘉穀收連車。牛羊暮歸塞門閭。雞鶩一母生百雛。歲歲賜粟年年獨租。蒲鞭不施。園土空虛。束草作官。但形模。刻木爲吏。無文書。淳風復遠。羲皇初繩。亦不結。況其餘。神歸人散。醉相扶。夜深歌舞。官道隅。

涼州行

涼州四面皆沙磧。風吹沙平馬無迹。東門供帳接中使。萬里朱宣布襖勅。勅中墨色如未乾。君王心念兒郎寒。當街謝恩拜舞罷。萬歲聲上黃雲端。安西北庭皆郡縣。四夷朝貢無征戰。舊時胡虜陷關中。五丈原頭作邊面。

望夫石

送君遠成交河北，男兒自以身許國。不能彎弓騎惡馬，欲隨君去何由得。登山矯首西北雲，形容雖變心猶存。月明夜夜照淚痕，鐵心石腸輸與君。

江村道中書觸目

短籬曲曲對開門，脩竹陰陰不見村。別浦回潮魚滬密，孤舟春近雁沙溫。路逢行客時交轡，店賣新醅一舉樽。忽過亂山幽絕處，恍如白帝到東屯。

采蓮曲

采蓮吳姝巧笑倩，小舟點破煙波面。雙頭折得欲有贈，重重葉蓋羞人見。女伴相邀拾翠羽，歸棹如飛那可許。傾鬟障袖不應人，遙指石帆山下雨。

兀坐頗念遊歷山水戲作

萬里當時寄一官，十年客枕不曾安。鬼愁灘下扁舟晚，蝮退陵前古驛寒。昔歎遠遊生雪鬢，近緣多病學金丹。功名非復衰翁事，獨有江山興未闌。鬼愁灘在安慶，溪江中。蝮退陵在蘄施兩郡之間，皆長途也。然山水特奇。

五雜組

五雜組，山雉羽，往復還，江頭路，不得已，貴臣去。

又

五雜組，機上綺，往復還，冶遊子，不得已，富兒死。

漁扉

湖上千峯翠作圍，正應佳處著漁扉。迂疎自計難謀食，老病誰令未拂衣。萬里滄波鷗乍沒，千年華表鶴重歸。一盃粟飯吾何恨，自古高人自有薇。

詠史

夜雨燈前感慨深，爲邦一土重千金。風雲未展康時略，天地能知許國心。劍忽拄頤都將相，帽曾壓耳隱山林。英雄自古常如此，君看隆中梁甫吟。

烏棲曲

楚王手自格猛獸，七澤三江爲苑囿。城門夜開待獵歸，萬炬照空如白晝。樂聲前後震百里，樹樹棲鳥盡驚起。宮中美人謂將旦，髮澤口脂費千萬。樂聲早暮少斷時，莫怪棲鳥無穩枝。

古別離

君北遊司并，我南適熊湘。邂逅淮陰市，共飲官道傍。丈夫各有懷，窮達詎可量。臨別一取醉，浩歌神激揚。勳業有際會，風雲正蒼茫。亂點劍峯血，苦寒芒屨霜。死即萬鬼鄰，生當致虞唐。丹雞不須盟，我非兒女腸。

書歎

夜深青燈耿窗扉，老翁稚子窮相依。齋鹽不給脫粟飯，布褐僅有懸鶉衣。偶然得肉思共飽，吾兒苦讓不忍違。兒飢讀書到雞鳴，意雖甚壯氣力微。可憐落筆漸健快，其奈瘦面無光輝。布衣儒生例骨立，紈袴市兒皆瓠肥。勿言學古徒自困，吾曹捨此將安歸。作詩自寬亦慰汝，吟罷撫几頻歎歎。

十二月二十六夜聽雨

新春尚七日，小雨暗江城。菲簷夜點滴，已作春雨聲。輕黃上柳枝，嫩綠抽菊萌。造物本何心，誰主此發生。頗疑重雲外，斗杓已東傾。老至不可卻，一尊忘濁清。

起晚

榜簷百舌語玲瓏，已覺新春在眼中。欲起未成還小睡，忽看初日滿窗紅。

陳少監餉澄清堂酒

酣暢年來豈易逢，齋湯蜜汁亦時中。玉醅忽逐春風至，一吸懸知百榼空。

雪中作

黑風卷地連三日，密雪穿簾又一回。衰病不禁天色惡，笑談誰共酒尊開。忍寒瘦馬嘶空廐，覓食飢鴉啄廢臺。笑遣蠻童撼園竹，輟羹分火待歸來。

甲寅元日子七十矣酒間作短歌示子

我昔自蜀歸，百年已過半。觀棋未終局，回視斧柯爛。飽知山林樂，富貴何足換。退休失健決，正坐闔且懦。齒髮日衰殘，歲月難把玩。蕭朱尙或隙，籍湜固宜畔。出門無一欣，撫事有三歎。新年遂七十，推敬媿里閭。眷眷惜茲夕，凜凜畏明日。豁然忽大笑，愁若春冰泮。窮達真兩忘，生死付一貫。清尊既激盪，碩果亦璀璨。擁門紛鼓笛，上壽列童冠。老翁亦忘疲，起舞影零亂。不獨誇癡頑，自足洗患難。投床判宿醒，美睡到日肝。

七十

七十殘年百念枯。桑榆元不補東隅。但存隱具金鴉髻。那夢朝衣玉鹿盧。身世蠶眠將作繭。形容牛老已垂胡。客來莫問先生處。不釣娥江卽鏡湖。

正旦後一日

七十今年是連朝樂未休。比鄰更頌禱。親黨共遲留。羊映紅纒酒。花簪絳帕頭。從今日有喜。農事起西疇。絳帕頭。蓋以絳帛飾巾纒之類。

立春

探花枝上寶旛新。看遍秦山楚水春。村舍不知時節換。榜檐百舌苦撩人。

老境

髮白未及童齒搖。未及脫。正如一席飲。燒燭將見跋。谿山環草舍。霜露侵布褐。文章雖自力。亦已強弩末。寧將垂老耳。更受世事聒。匡廬入我夢行。已寄瓶鉢。

偶懷小益南鄭之間。慨然有賦

西戍梁州鬢未絲。嶓山漾水幾題詩。劍分蒼石高皇迹。嶓冢廟傍有高皇。試劍石中分如識。巖擁朱門老子祠。三泉道上有老君。洞景趣幽邃。燒兔驛亭微雪夜。騎驢棧路早梅時。登臨不用頻悽斷。未死安知無後期。

再用前韻不依次

憶昨從戎丞相府。元瑜書檄仲宣詩。雲屯騎士臨邊日。魚貫降胡獻捷時。史冊誤人悲壯志。關河回首負

初期。豈知二紀身猶在。衰鬢星星老侍祠。

北坡梅開已久。一株獨不著花。立春日忽放一枝戲作。

日來尋坡上梅。枯槎忽見一枝開。廣寒宮裏長生藥。醫得冰魂雪魄回。

八日

新歲逢人日。老夫持道齋。斷冰浮野水。微綠發枯荄。壽景豐年象。今年元日至。人日皆晴。閑吟曠士懷。春旂已陳迹。鬪巧笑吳娃。前一日立春。

夜讀呂化光文章。拋盡愛功名之句。戲作。

玉關西望氣橫秋。肯信功名不自由。卻是文章差得力。至今知有呂衡州。

遇術士飲以卮酒。

行藥來村北。觀魚立水邊。忽逢長揖客。能算小行年。酒薄聊傾頰。囊空闕贖錢。時清君未死。訪我華山前。

閑趣

老子卽今雙白鬢。鏡湖自古幾青山。半窗蘿月獨欹枕。滿院松風常掩關。天地許寬誰礙汝。琴尊是處可開顏。將行亦莫買春草。幸有一筇相伴閑。

正月二十日晨起弄筆

深院窗扉曉色遲。新愁宿醉兩參差。雨聲欲與夢相入。春意不隨人共衰。零落殘梅臨小釣。縱橫野水赴清池。物華撩我緣何事。以恐新年漸廢詩。

春夜讀書

枉是儒冠遇太平。窮人那許共功名。枯腸不飽三升稷。皓首猶親二尺檠。寓世已爲當去客。愛書更付未
來生。夜闌撫几愁無奈。起視離離斗柄傾。

春晴泛湖入城

春色初回杜若洲。隔煙時見鷓鴣。嵩雲綠月年年夢。楚柁吳檣處處愁。魚躍銀刀論網買。酒傾綠蟻滿
盃浮。前生杜牧吾身是。又向江南遍倚樓。

書齋壁

老病人扶氣力微。闌干西角立斜暉。流年冉冉功名誤。新冢纍纍故舊稀。仗馬曾鳴宜永棄。牧羝雖乳敢
言歸。住菴活計無多子。只要筇枝與衲衣。

又

落魄人間不記年。晚營茆棟鏡湖邊。室空惟是四壁立。面瘦漸生雙頰頰。地僻門無殘客到。歲豐路有醉
人眠。君看朝市紅塵鬧。始信吾曹是地仙。

春日睡起

睡起悠然弄衲琴。銅猊半燼海南沉。淒涼故里逢春處。忠憤孤臣許國心。水滿鳧鷖初拍拍。雨餘花木已
陰陰。吾兒振施淮邊未。歸近清愁轉不禁。子虞書報月離古齋。

老病謝客或者非之戲作

病侵腰臂兩經秋。欲下繩床不自由。客至難令三握髮。佛來僅可小低頭。安禪還我閑蒙納。怒氣從渠勇
挾鞬。亦欲署門還嬾去。死生貴賤本悠悠。

永日無一事作詩自詒

目昏罷觀書。足蹇停遊山。二事差可樂。造物乃復慳。得非閱我老。作意鑄其頑。掃除盡宿習。使得終日閑。
閑亦何負汝。刻曲茆三間。奇石玩犖角。清流聽淙潺。勿言村醪薄。數酌可解顏。儻然日已夕。臥看飛鳥還。

窗前作小土山藝蘭及玉簪最後得香百合併種之戲作

芳蘭移取徧中林。餘地何妨種玉簪。更乞兩叢香百合。老翁七十尙童心。

泛舟觀桃花

花溼二月桃花發。霞照波心錦裏山。說與東風直須惜。莫吹一片落人間。花溼桃花最盛處。

又

桃源只在鏡湖中。影落清波十里紅。自別西川海棠後。初將爛醉答春風。自梅仙塢至花溼恰十里。

又

種桃亦解比封君。世故紛紛寂不聞。九轉金丹應已熟。全家仙去隱紅雲。

又

湖南小山花更多。不醉將如春色何。釣得鮮鱗堪斫脍。任教微雨溼漁蓑。湖南山名在柯山之南。

又

鄰曲一生花裏活。村翁疑是古遺民。初來自被春留住。枉道當時爲避秦。

新開小園

人生如意每難全。草草園池卻自然。世事已拋高枕外。春風常在短筇前。墮空花片紛紅雨。徧地苔痕長綠錢。酒戶漸增詩興在。天容此老剩狂顛。

又

西戍歸來鬢已霜。生兒又過乃翁長。眼明身健殘年足。飯軟茶甘萬事忘。學廢僅能書姓字。客來懶復倒衣裳。山園寂寂春將晚。酷愛幽花似蜜香。

又

席地幕天君勿嘲。隨宜野蔌與山肴。幽花避日藏深葉。歸燕尋人理舊巢。曲水詠觴空念昔。斜川鄰曲自論交。清貧尙媿茶山在。送老湖邊有把茆。曾文清至效常寓僧舍。

又

新展山園半畝強。笑人車馬出籠坊。山翁乍暖慙勸語。野花無風自在香。點點水紋迎細雨。疎疎籬影界斜陽。出門遙向鄰翁說。釋未相從共一觴。

又

東軒嫩日上疏櫺。吹盡浮雲作意晴。林暖牆頭雙鶯語。水清池面小魚行。畦添藥品誰能別。架引藤陰忽已成。倚杖怡然便終日。老夫那復不平鳴。

又

衲祿塵人未棄官。春深幽國有餘歡。筍生遮道妨行藥。果熟圍枝礙整冠。煮酒垢泥初澆盞。生綃裁扇又團圓。退飛風際由來事。莫羨青霄刷羽翰。

上巳小飲追憶乾道中嘗以是日病酒留三泉江月亭懷然有感

零落殘花一兩枝。綠陰庭院燕差池。隔牆笑語鞦韆散。惆悵三泉驛裏時。元微之詩。三泉驛內逢上巳。

晚步門外散懷

大千沙界一浮漚。成壞元知不自由。寓迹箇中誰耐久。問君底事不歸休。春陂欲雨黃鸝鬧。晚渡無人白鷺浮。七十之年何啻足。戲憑藥物小遲留。

又

萬化紛紛本一機。不爲腐骨欲安歸。彭殤共盡執脩短。堯桀兩忘無是非。滯首極知當痛飲。剪翎那復許羣飛。江郊未解春寒惡。高柳吹花又滿衣。

欲出遇雨

東風吹雨惱遊人。滿路新泥換細塵。花睡柳眠春自嬾。誰知我更嬾於春。

飢坐戲詠

衰鬢蕭然滿鏡霜。一菴歸老鏡湖傍。有懷每恨交朋遠。無食方知日月長。落筆未妨詩袞袞。閉門猶喜氣揚揚。晚來袖手蒲團穩。笑喚兒童代夜香。

蔬食

今年徹底貧，不復具一肉。日高對空案，腸鳴轉車軸。春齋忽已花，老筍欲成竹。平生飯蔬食，至此亦不足。孰知讀書卻少進，忍飢對客談堯舜。但令此道窟有傳，深山餓死吾何恨。

山亭

風惡闌回雨，天寒勒住花。尋幽扶柳栗，息倦倚榭牙。分韻僧吟苦，爭棋客笑譁。相逢仍草草，歸路並山斜。

久不得張漢州書

儘道三巴遠，那無一紙書。衰遲自難記，不是故人疎。

春晚村居

一事元無可得忙，悠然半醉倚胡牀。牡丹枝上青春老，燕子聲中白日長。身世已如風六鷁，文章仍似闕黃楊。太平有象無人識，南陌東阡擣麝香。

遊雲門諸蘭若

花過木陰合，溪雲生暮涼。牛行響白水，鷺下點青秧。古寺宛如昔，禪松森已行。道傍松及三十年，則僧輒伐去，復種小者，予自幼歲至今，已見三種矣。著年不下榻，童子爲燒香。

與子坦子聿遊明覺十四韻

我自何山來，覓路占樓鐘。聯翩兩葛巾，跌宕一短筇。深谷已曠黑，夕陽猶半峯。堂中千歲師，磊砢如古松。殘僧三四輩，斗粟各自舂。長廊久寂寞，香火亦闕供。頗聞在世時，一鉢制惡龍。時時出雷雨，百里常年豐。

宿緣忽云盡。獻供無春農。饑鳥晨攫飯。飢鼠夜穿墻。而況我輩人。生世本不逢。胡不安汝分。終年抗塵容。靜觀興廢事。可洗芥蒂胸。一笑下山去。村塢煙重重。

淨智西窗

一窗新綠愜幽情。袖手哦詩取次成。牆外蜜蜂來又去。可憐終日太忙生。

小僧乞詩

風前掩苒草吹香。溪上霏微雨送涼。萬里安西無夢到。卻尋僧話破年光。

西窗睡起

老便寂寂厭紛紛。借得禪房臥看雲。夜宴怕逢觥錄事。秋山傭伴獵將軍。餘年敢望十寒暑。夙習正須三沐熏。斜日滿窗誰喚起。數聲啼鳥隔溪聞。

平水

旅飯風埃小市傍。卻呼拄杖踏斜陽。可憐陌上離離草。一種逢春各短長。

三月二十五夜達旦不能寐

愁眼已無寐。更堪衰病嬰。蕭蕭窗竹影。磔磔水禽聲。捶楚民方急。煙塵虜未平。一身那敢計。雪涕爲時傾。

又

憂國心常折。觀書眼欲枯。百年終坎壈。一飯且枝梧。忽忽殘春過。迢迢清夜徂。壯心空萬里。老病要人扶。

園中小飲

此老胸中萬頃寬。小園幽徑日追歡。寧教酒欠尋常債。恥就人求本分官。高柳陰濃煙欲暝。叢花紅溼露初溥。時月桂方盛開。要知澤國年光晚。已過清明尚淺寒。

舟中夕望

船掠湖堤不入城。葛巾羽扇試春行。女牆迤邐橫輕霧。佛閣嵒嶙倚晚晴。樹冒藤花堆故繡。風吹鶯語送新聲。細思造物何由報。遣作閑人過此生。

四月一日作

桃李逢春次第開。坐看零落付蒼苔。壓車麥穗黃雲重。食葉蠶聲白雨來。鏡裏頓驚年事速。天邊誰挽斗杓回。可憐團扇塵侵損。又見生綃月樣裁。

舟行過梅市

新換單衣細葛輕。儂然隨處得閑行。綠陰浦口維舟處。霽日場中打麥聲。醉叟臥途知酒賤。耕農滿野喜時平。老來無復雕龍思。遇與新詩取次成。

山園雜賦

初夏未覺暑。微陰殊勝晴。藤冠稱新沐。蓴菜解餘醒。偶據盤陀坐。還扶柳栗行。平生志勛業。今日一毫輕。

又 藤陰初覆架。藜藿漸穿萍。水繞雞根綠。山從樹罅青。長辭帝所夢。不媿草堂靈。賴有黃醅法。終年任醉醒。

又

一日老一日。一年貧一年。元無肉食相。且作地行仙。本不營三窟。何須直一錢。村墟櫻筍鬧。剩放醉中顛。

又

芳莖真妙士。霜菊亦奇才。邂逅心生敬。慙慙手自培。扶持新長桂。護惜欲殘梅。此意何人解。頽然付酒盃。

西窗

西窗偏受夕陽明。好事能來慰此情。看畫客無寒具手。論書僧有折釵評。葺宜山茗留閑暇。跋下湖蓴喜共烹。酒肉朱門非我事。諸君小住聽松聲。

山頭鹿

呦呦山頭鹿。毛角自媚好。渴飲澗底泉。飢齧林間草。漢家方和親。將軍灞陵老。天寒弓力勁。木落霜氣早。短衣日馳射。逐鹿應弦倒。金槩犀筋命有繫。翠壁蒼崖迹如掃。何時詔下北擊胡。卻起將軍遠征討。泉甘草茂上林中。使我母子常相保。

夏四月馮雨恐害布種代鄉鄰作插秧歌

浸種二月初。插秧四月中。小舟載秧把。往來疾於鴻。吳鹽雪花白。村酒粥面濃。長歌相贈答。宛轉含幽風。日暮飛漿歸。小市鼓琴琴。起居問尊老。勤儉教兒童。何人采此謠。爲我告相公。不必賤民租。但願常年豐。

雲童董行

雲童董挾雨來。雨未濡土雲已開。不能爲人斂浮埃。山南山北空聞雷。青秧欲槁吁可哀。

董逃行讀古樂府擬作

漢末盜賊如牛毛。千戈萬槊更相鏖。兩都宮殿摩雲高。坐見霜露生蓬蒿。渠魁赫赫起臨洮。僵屍自照膽中膏。危難繼作如崩瀉。王朝荒穢誰復薶。臨城散走墜空壕。扶老將幼山中號。昔者羣枉根株牢。衆憤不能損秋毫。誰知此亂亦不遭。名雖放斥實遁逃。平民陪死聲嗷嗷。今茲受禍乃我曹。

閔雨

黃沙白霧晝常昏。嗣歲豐凶詎易論。寂寂不聞秧鼓動。啞啞實厭水車翻。粟困久盡無遺粒。淚席嘗沾有舊痕。聞道憂民又傳詔。蒼生何以報君恩。有詔禱雨天竺山。

又

赤日黃塵江上村。徵租惟有吏過門。微風敢喜北窗臥。大旱恐非東海冤。千載傳巖疑可致。一篇洪範向誰論。青蔬半畝垂生死。且喚鄰翁共灌園。

喜雨

楚巫奔走畏天愷。變化寧知轉盼間。初夜電光搖北斗。父老以北斗下有電候雨。平明雲氣冒南山。坐令沃野新秧遍。已覺豐年舊觀還。白首老農愁破處。夢回高枕聽潺潺。

初夏

已作梅黃雨。猶餘麥秀寒。穿林紅練帶。拔地碧琅玕。酒向愁邊薄。衣從病後寬。所欣消渴減。乳酪正甘酸。

村舍

門巷桑麻暗。庖廚筍豉香。僮奴課鋤菜。婢子學燒糠。貧任青春過。閑知白日長。非關愛疎懶。無事可成忙。

鳥啼

野人無曆日。鳥啼知四時。二月聞子規。春耕不可遲。三月聞黃鸝。幼婦鬻蠶飢。四月鳴布穀。家家蠶上簇。五月鳴鴉舅。苗稚憂草茂。人言農家苦。望晴復望雨。樂處誰得知。生不識官府。葛衫麥飯有。卽休湖橋小市酒。如油。夜夜扶歸常爛醉。不怕行逢灞陵尉。

感舊

廢隴荒陂。泥濘耕生無助。業死無名。衰頹日甚。君休問。三十年前白髮生。紹興壬午。壬午年三十八。與查元章。王危叟。同出垂拱殿門。二君指予問曰。子亦有白髮耶。相與太息。今三十二年矣。

讀書至夜半燈盡欲睡慨然有感

白髮蕭蕭老空谷。人歎厄窮心自足。東郊曉射墮錦雉。北嶮春耕叱黃犢。區區世事何足論。未死斷知常閉門。關河好在萬里路。理亂不至三家村。夜分燈暗月入戶。賦詩肯道儒冠誤。飢鷹勁翮高有聲。橫截陂湖正南去。

遣興

壯歲元多病。長年敢自期。賤貧交易絕。憂患夢常悲。續食叨微祿。寬心賴小兒。平生鏡湖上。天乞小菰茨。

農舍

農舍雖云苦。君恩詎可忘。繭稠初滿簇。麥熟已登場。渺渺荆村路。登登築野塘。但須時雨足。擊壤詠時康。

四月晦日小雨

陸放翁集 十四 劍南詩集 卷二十九

十七

霏霏亂點暗朝光。蔌蔌奇聲渡野塘。一浦未輸新漲綠。四郊聊壓早塵黃。風生團扇清無暑。衣覆熏籠細有香。竹屋茆簷得奇趣。不須殿閣詠微涼。

泛舟過吉澤

蕭蕭菰蒲如荻林。五月已覺秋意深。煙波滅沒無漁艇。浦溆飛鳴多水禽。稽山出雲極奇變。陸子岸曠方微吟。一聲菱唱起何許。洗盡萬里功名心。

書歎

高廟衣冠月出遊。中原父老淚交流。諸公誰效回天力。散吏空懷恤緯憂。雨細漁菴晨舉網。月明耕隴夜驅牛。神州克復知何日。北望飛蓬萬里秋。

五月得雨稻苗盡立

城郭迎龍鼓吹喧。甘膏三夕慰黎元。草荒當日經行路。水到前村舊漲痕。黃犢盡耕稀曠土。綠苗無際接旁村。家家足食山無盜。安枕何勞夜閉門。

薄醉遣懷

跼蹐蝸廬近。蕭條鶴髮新。途窮貧入夢。身老病欺人。帶索忘三組。羹藜抵八珍。蓬窗一盃酒。自覺膽輪困。

卷第三十

五月十一日夜坐達旦

莫笑耽書不計年。寒儒業定幾生前。讀經今日韋編絕。作賦當時鐵硯穿。公路晚悲身至此。令威歸歎塚
纍然。三更聽雨蓬窗底。又作鰥魚夜不眠。

題陽關圖

誰畫陽關贈別詩。斷腸如在渭橋時。荒城孤驛夢千里。遠水斜陽天四垂。青史功名常蹭蹬。白頭襟抱足
乖離。山河未復胡塵暗。一寸孤愁只自知。

新暑書事

城中五月汗露衣。吾愛吾廬喜氣微。珍簾合風來遠餉。輕羅疊雪出鳴機。艾人當戶佳時過。筒黍堆盤舊
俗非。漫欲題詩還懶去。老來百事與心違。去歲業正則餉薪。豐得以聚暑今年。蠶事僅得五六分。遂辦暑
服。

時雨

時雨及芒種。四野皆插秧。家家麥飯美。處處菱歌長。老我成惰農。永日付竹床。衰髮短不櫛。愛此一雨涼。
庭木集奇聲。架藤發幽香。鶯衣溼不去。勸我持一觴。即今幸無事。際海皆農桑。野老固不窮。擊壤歌虞唐。

示客

桑柘成陰百草香。纈車聲裏午風涼。客來莫說人間事。且共山林夏日長。

南堂默坐

日日樹頭鶉鴉鳴。夜夜谿邊姑惡聲。堂中老子獨無語。寂然似可終吾生。大鵬一舉九萬程。下視海內徒

營營秋蟲春鳥非我類。何至伴渠鳴不平。

夏日

燕子生雛梅子黃。斷雲殘雨過林塘。孤舟正作笳笳夢。九陌難隨櫓櫓忙。團扇與來閑弄筆。寒泉漱罷獨焚香。太平處處熏風好。不獨宮中愛日長。

小酌

白髮蕭然海上村。猶能草草置清樽。今年項里楊梅熟。綠李來禽不足言。

夏夜

露溼芙蓉冷。月明蔞蔔香。殘醉吹欲無。颼颼髮根涼。豈惟棄世事。形影亦相忘。空憶南山下。新秋射虎場。

又

我昔在南鄭。夜過東駱谷。平川月如霜。萬馬皆露宿。思從六月師。關輔談笑復。那知二十年。秋風枯首宿。

看鏡

凋盡朱顏白盡頭。神仙富貴兩悠悠。胡塵遮斷陽關路。空聽琵琶奏石州。

又

七十衰翁臥故山。鏡中無復舊朱顏。一聯輕甲流塵積。不爲君王戍玉關。馬正慙公喜功名。每日辛未甚衰。若有邊警。願預征行。得良馬數疋。輕甲一聯足矣。

明妃曲

漢家和親成故事。萬里風塵妾何辜。掖庭終有一人行。敢道君王棄憔悴。雙駝駕車夷樂悲。公卿誰悟和戎非。蒲桃宮中顏色慘。雞鹿塞外行人稀。沙磧茫茫天四圍。一片雲生雪即飛。太古以來無寸草。借問春從何處歸。

思遠遊

我志日已衰。詩亦無傑句。正如隨翅鶴。悵望遼海路。雖云須藥物。幸未迫霜露。裂裳裹兩踵。此詩亦已屢。燧峨青城雲。慘淡蟠家樹。秋風吹短裘。萬里入三壘。

太息

太息重太息。吾生誰與歸。那知暮景迫。但覺故人稀。避禍歸猶因。憂譏默亦非。今年貧徹底。擬賣舊漁磯。

六月二十六日夜夢赴季長招飲

少城駿馬逐春風。二十年間萬事空。清夢都忘雙鬢改。繡筵還喜一尊同。烏巾掩冉簪花重。羯鼓敲鐃列炬紅。安得此歡真入眼。碧油幢擁主人翁。

夜分不寐起坐園中至早

涼氣蘇衰疾。幽情入杖藜。月驚孤鶴起。天帶衆星西。松菊今彭澤。山川古會稽。清吟殊未愜。喔喔已晨雞。

露坐

此手乃可憐。經月不把酒。著書又苦晚。何以圖不朽。空庭坐三更。磊落垂北斗。向來歷關河。萬里空回首。豈知三十年。竟作越中叟。後生雖滿眼。非復舊交友。形體迫衰謝。妻子亦何有。悵望懷古人。吞聲死農畝。

晨起

心安已到無心處，病去渾如未病前。晨起更知秋色好，一庭風露聽鳴蟬。

散步東邨

偶從北崦繞東崗，曳杖行歌踏夕陽。一徑入雲多鹿跡，數家臨水共漁梁。野風蕭瑟知秋早，社酒淋漓喜歲穰。鄰曲不須憐老憶，尙能尋句答年光。

早秋

涼颼浙浙撼庭柯，微雨蕭蕭集浦荷。草閣檐虛覺山近，蓬窗地迥得香多。謀身自拙窮無鬼，閉戶長閑睡有魔。臺省諸公盛冠劍，固應老子得婆娑。

又

秋入房櫳夜漸長，紗厨笛簟怯新涼。螢光得意穿簾隙，桐葉知時拂井牀。世事本來誰得鹿，人生何處不亡羊。燈前笑向吾兒說，又過銅匱半篆香。

又

落魄巴江號放翁，斯名歲晚亦成空。酒醒遙夜孤舟雨，睡美清秋一榻風。駭浪千重無死地，神丹九轉有新功。雲端不遇飛仙過，誰顧幽人寂莫中。

又

貂裘塵土憶東周，瓜隴風霜隱故侯。爛似老雞頻失旦，衰如蠹葉早知秋。壺觴非復平生友，歲月空添客

子愁病起筆端猶健在。未妨揮灑賦登樓。

七月二十一日午睡夢泛江風濤甚壯覺而有賦

夢中不記適何邦。風飽蒲颿入大江。久矣眼中無此快。賦天雪浪濺船窗。

幽居戲贈鄰曲

暮年遠屏天所借。落魄倒冠如得謝。雖無壺酒助歌呼。幸有蠶書供枕藉。市聲不聞耳差靜。車轍掃空身轉暇。雨慳葵葉未吐甲。露重榴房初坼罅。深紅菱角密覆水。爛紫蒲桃重垂架。直令掩關避世俗。未嘗煎茶喚鄰舍。蕭蕭雞犬衡門晚。寂寂燈火幽窗夜。勸君切勿縱高談。性命如絲不禁嚇。

遣興

失馬真成福。移山未必愚。故園三徑廢。餘俸一錢無。望道心常渴。觀書眼欲枯。宦遊歸自好。不必爲菴鱸。

又

療飢惟恃粥。動步已須人。欲午猶支枕。經旬不過鄰。鵲棲寒自穩。鷗沒遠難馴。莫笑謀身拙。黃冠學季真。

步至湖上寓小舟還舍

淒涼懷古地。慘澹喜秋天。紅樹秦馳道。青山禹廟壩。湖風飄斷角。墟日起孤煙。老恨功名晚。無人共著鞭。

又

山居苦無事。攜稚出門行。酒賤逢人醉。農閑到處耕。巷牛聽晚笛。池鷺啜枯萍。東望生秋興。樓臺壓綠城。

又

病墮支離境。閑尋漫浪遊。湖平天鏡曉。山峭石帆秋。除酒家家許。看花處處留。歸途倦扶杖。卻上釣魚舟。

又

萬壑爭流地。身閑得縱觀。未能容蟹舍。聊得寄漁竿。遠浦樵風急。空山笠石寒。踟躕不知晚。碌碌有歸輪。

又

細浪隨搖撼。新涼入岸巾。斷行初到雁。空擔暮歸人。漫道貧非病。誰知嬾是真。疎鐘起詩思。迢遞度煙津。

送王仲言倅泰州絕句

汝陰太史萬籟藏。酸棗先生六世芳。豹尾屬車留不住。卻尋陳迹海陵倉。晁景迂與先太史。有海陵剛唱。

又

紫微傑作傳千載。物色分留待下車。老病難陪曳裾客。因來時寄一行書。劉賈甫嘗爲泰倅。

醉中作

舴艋爲家雲作友。流年盡付樽中酒。清獻穿林鸞鳳吟。草書落紙龍蛇走。人間無復王景略。千載風雲常。

寂寞安得熊羆十萬師。蹴踏幽并洗河洛。

秋夜書感

闌干斗插西。慘淡河絡角。開歲財屬爾。草木忽搖落。平生歷畏塗。赤手犯蛟鱓。幸收垂盡日。歸臥一丘壑。

鄉鄰怪此老。翫讎尙如昨。使無湖海寬。朝市何處著。諸公方袞袞。一士要譎譎。謀食古所羞。終身美藜藿。

八月三日驟涼有感

殘暑侵人畏汗霑。清秋乍見月纖纖。自燒熟火添香獸。旋把寒泉注硯蟾。佳客誤占簷入戶。遠書空喜鶴鳴簷。悠然獨對清燈臥。誰念柴門老病兼。俗以盤飛入室爲有客至之兆。

南堂與兒輩夜坐

殘暑初歸肺病蘇。胡床清夜集前除。風高木葉危將脫。月上天河淡欲無。鵲影繞枝棲未穩。荷盤擎露重相扶。淒然又起流年感。兩鬢如蓬日夜枯。

泛舟至魯墟

南蕩東陂弄夕霏。葛巾鶴屐試秋衣。纖纖新月迎船出。兩兩珍禽背水飛。病思漸蘇開酒戒。宦情已絕謝塵鞿。郊居是處堪乘興。不怕城笳苦喚歸。

園蔬薦村酒戲作

身入今年老。囊從早歲空。元無擊鮮事。常作啜醢翁。菹有秋菘白。羹惟野苋紅。何人萬錢筭。一笑對西風。

雨夕排悶

買牛耕剝曲。舉世笑迂疎。流落愈愛國。衰殘猶讀書。滔滔安稅駕。耿耿獨愁余。破屋秋多雨。情懷用底據。

又

煙雨暗郊墟。頽然臥草廬。蟲喧夢回枕。燈伴讀殘書。短褐頻關念。荒畦久廢鋤。更堪湖水漲。累日食無魚。

雨中作

社瓮醅香燕子歸。陰風吹雨暗郊扉。疏溝園叟方攜鋤。采藥蠻童已溼衣。山雉尾垂衝霧去。水雞翅重闖波飛。憑闌一笑君知否。肺渴秋來勢漸微。

讀易

揖遜干戈兩不知。巢居穴處各熙熙。無端鑿破乾坤祕。禍始羲皇一畫時。

郊行夜歸有感

小市歌呼散。幽人悄獨行。斷鴻沙際冷。重露草根明。信古癡常絕。酬恩命本輕。還家掩屏臥。衰涕浩縱橫。

醉歌

三十六策醉特奇。竹林諸公端可師。秋風蕭蕭吹鬢絲。蟹螯正可左手持。醉倒村路兒扶歸。瞠目不識問是誰。浩歌起舞夜何其。北斗磊落明河移。貴人惜醉渠自癡。黃金絡馬誇市兒。一朝禍來莫支持。新州如山不可移。

買酒

放翁病起不禁愁。買酒看山自獻酬。八月吳中未搖落。誰令衰髮早知秋。

秋雨歎

淙淙雨聲鳴高秋。稻梁浸瀾雨不休。志士仁人萬行淚。孤臣孽子無窮憂。一身窮困未暇恤。如此無事理。有不聖言古訓。舉不驗。簡編可用汗馬牛。嗚呼有粟吾得食。夜睡何時得安席。我生猶及宣和年。建炎以來身所歷。高皇一言感天地。盜賊千羣掃無迹。疽囊雖慘固可醫。誰爲聖代施鍼石。

憂國

恩許還山已六年，誓憑耕稼餽華顛。養心雖若冰將釋，憂國猶虞火未然。議論孰能忘忌諱，人材正要越拘攣。羣公亦采芻蕘否，貞觀開元在目前。

夜意

居家元是客，在俗亦如僧。點滴檐間雨，青燐帳外燈。壯心終蹭蹬，去日捷飛騰。不及寒沙雁，來時下杜陵。

大風雨中作甲寅八月二十三日夜

風如拔山怒，雨如決河傾。屋漏不可支，窗戶俱有聲。烏鳶墮地死，雞犬噤不鳴。老病無避處，起坐徒歎驚。三年稼如雲，一旦敗垂成。夫豈或使之憂，乃及躬耕。鄰曲無人色，婦子淚縱橫。且抽架上書，洪範推五行。

題齋壁

閉門無事不勝閑，心境超然一室寬。香燭火深生細蘂，硯池風過起微瀾。睡餘但欲依書几，坐久還思弄釣竿。擾擾平生成底事，鏡湖歸隱老黃冠。

又

手斲雲根結草廬，平生心事滿無餘。二升菘米晨炊飯，一碗松燈夜讀書。天理直須閑處看，人謀常向巧中疎。煙波有趣君知否，裂網伸鉤也得魚。

窮途

窮途多感慨，老境少知聞。酒裏閑消日，書中自策勳。全軀希碌碌，掃軌厭紛紛。每愧吾鄉老，頭童念致君。

先友博公給事。暮年髮髯。每酒酣脫幘。覽鏡歎曰。吾其已乎。

貧病

行年七十尚攜鉏。貧悴遠如白紵初。好事鄰僧勸送米。過門谿友強留魚。客來旋過齋頭酒。睡起閑抽架上書。要信榮枯元不動。胸中浩浩著空虛。

秋晚

春糴入瓶香炊玉。壓酒鳴槽滴碎珠。甲第朱門漫豪侈。山家風味定應無。

又

新築場如鏡面平。家家歡喜賀秋成。老來懶惰慚丁壯。美睡中間打稻聲。

又

秋菰出雪白於玉。寒蕢繞牆甘若飴。正是長齋豈不可。凜然大節固難移。

又

竹竿坡面老別駕。飯顛山頭瘦拾遺。自古詩人例如此。放翁窮死未須悲。

山村書所見

老枳垂藤晝常黑。雛鷹聲作嬰兒啼。伐薪歸來遇急雨。石路下山如踏梯。

又

荒坡茫茫牧牛童。坂角上背捷如風。腰間一枝擔枯竹。橫吹短笛過村東。

三年前嘗與兒輩步過東涇小嶺得勝處可營別墅貧不能成偶復至其地悵然有感

前年度嶺踏斜陽。曾卜松陰置草堂。只倚氣吞雲夢澤。竟無錢買雪堆莊。煙脂菱角空頻摘。火齋楊梅已再嘗。事不如心居十九。往來常羨捕魚郎。山多楊梅。有合抱者。下臨鏡湖。皆菱蕩。

園中秋夕

季秋哉生明。風露正悽冷。放翁澹無事。樂此清夜永。飢應棲不穩。勁翹起東嶺。湖邊千樹柳。何處寄幽影。人生寓宇內。俯仰一炊頃。此心無媿負。章食均五鼎。許身豈稷禹。終亦輸箕穎。天風倘可乘。采蓮登玉井。

秋晴每至園中輒抵暮戲示兒子

老翁七十如童兒。置書不觀事遊嬉。園中墨瓦強名塔。庭下埋盆聊作池。青蒲紅蓼共掩映。病棕瘦竹相扶持。衰頰已作老驥臥。來往尚如黃犢馳。但知身存百無害。莫問老健能幾時。汝勤挾筴乃堪笑。且共飯豆羹秋葵。

醉睡初覺偶作

小圃醒還醉。幽窗起復眠。虛明炷香地。清潤斲花天。老去才雖盡。窮來志益堅。阿瞞那可語。平日笑橋玄。

汪茂南提舉挽詞

學已三冬富。書猶萬卷藏。名場雖蹭蹬。朝論極揄揚。小試襦袴詠。遂辭鷓鴣行。秋風九原路。挽鐸倍淒涼。

又

往者紹興末。江淮聞戰鼙。上流煩舊德。下客辱深知。陳迹成今古。追懷每涕洟。郎君雖不識。撫事亦增悲。

先相公督師荆襄游首蒙招致幕府會留樞屬不克行

謝徐居厚汪叔潛攜酒見訪

我雖生亂離猶及見前輩衣冠方南奔文獻往往在幸供掃灑役迹忝諸生內話言猶在耳造次敢不佩
殘年趨死近孤學與時背妄出更何求終老事耕耒史君稽古學力大障橫潰廣文亦偉士名字震當代
同舟肯過我陳與前脩配憂時抱忠鯁論事極慷慨嗟予雖益衰耳目幸未廢何當卜鄰牆早暮聆警歎

喜鄭唐老相過

鄭子有書癖對書百事忘頭亂不暇櫛鬢冷不暇嘗持此金石心力求古文章吟哦屈宋作蚤夜聲琅琅
方揮卻日戈恥窺及肩牆不見今六年所得非復常扁舟夜過我劇論神激揚徐出二三篇稊米於太倉
已足起衰懦黑絲生鬢霜使得盡見之殆可斂膏肓願子繼自今勿惜傾錦囊因來數爲寄歲晚慰所望

秋晚散步門外

栗里歸栽菊青門隱賣瓜羸軀病天色衰鬢怯年華野曠鳥聲樂溪清雁影斜門前秋潦退也擬築堤沙
涼水環道數丈方與鄰曲共修之

寄徐秀才斯遠并呈莊賢良器之

徐子作別十年餘無人可寄一紙書閉門美睡畏剝啄自怪一念常開渠西風蕭蕭吹槁葉秋光正滿蝸
牛廬讀書易倦出無友撫几恂恍空愁子蜀莊之孫住南郭亦復迹遠非情疎何時同載過老子共飯赤
米羹青蔬

閑中

閑中高趣傲羲皇。身臥維摩示病床。活眼硯凹宜墨色。長毫甌小聚茶香。門無客至惟風月。案有書存但老莊。問我東歸今幾日。坐看庭樹六番黃。

秋霽

驅除雲霧極知難。敢意天公不作慳。汛掃中庭待明月。攀躋危榭望青山。取琴理曲茶煙畔。看鶴梳翎竹影間。不爲新晴宜著句。擬將幽事破除閑。

晨起

晨起梳頭拂面絲。行年七十豈前期。此生猶著幾兩屐。長日惟消一局棋。空釜生魚忍貧慣。閑門羅雀與秋宜。區區名義真當勉。正是先師戒得時。

筵篔簹二首寄季長少卿

庭樹非不榮。霜質萬葉枯。朋友豈我棄。漸遠勢自疎。中夜起太息。發篔簹舊書。塵昏蠹蝕損。行缺字欲無。一讀色已變。再讀涕淚濡。卷書置篔簹中。寧使飽蠹魚。

又

少壯離別時。回顧日月長。會合終有期。何恨天一方。我齒如敗屐。君髮如新霜。餘日復幾何。萬里遙相望。欲泣老無淚。欲夢不可常。寄書何時到。江漢春茫茫。

悶極有作

貴已不如賤。狂應又勝癡。新寒壓酒夜。微雨種花時。堂下藤成架。門邊枳作籬。老人無日課。有興卽題詩。

自詠

常記當年入洛初。華燈百萬擲樽蒲。平生意薄刀筆吏。投老身爲山澤臞。已罷向空書咄咄。尙能擊缶和鳴鳴。今朝客至無尋處。正伴園丁斲芋區。

夢范參政

夢中不知何歲月。長亭慘淡天飛雪。酒肉如山鼓吹喧。車馬結束有行色。我起持公不得語。但道不料今遽別。平生故人端有幾。長號頓足淚迸血。生存相別尙如此。何況一旦泉壤隔。欲懷雞黍病爲重。千里關河阻臨穴。速死從公尙何憾。眼中寧復見此傑。青燈耿耿山雨寒。援筆詩成心欲裂。

乞奉祠未報食且不繼

富貴常求繫日繩。陋窮卻羨棄家僧。強顏始覺貧爲害。對鏡方嗟老可憎。出戶風霜欺短褐。讀書父子共昏燈。聖師夢奠二千載。一卷遺書終可憑。

山寺

信步得佳寺。入門吹斷香。林深栗鼠健。屋老瓦松長。弔古增悽愴。憑高寄慨慷。忽忽興未盡。新月映方塘。

太師魏國史公挽歌詞

早擅淵源學。常懷懇款忠。雲龍際千載。典冊冠三公。論諫寧中止。謀謨不苟同。此心誰復識。志士泣秋風。

又

位歷公卿貴，身兼將相榮。珥貂儀一品，錫帶價連城。入告推忠厚，躬行本志誠。斯民何以報，萬里徧春耕。

又

道德補天石，勛勞夾日龍。犯顏無不盡，造膝略皆從。歲貢來戎幣，秋防滅塞烽。畫圖麟閣上，猶足折遐衝。

又

舊弼初收召，惟公力贊揚。都亭移供帳，全魏徹封疆。大度寧猜阻，羣言自中傷。拳拳虛左意，猶可資穹蒼。
公初授附，卽力薦張忠獻。公于壽王，如賜館都亭，尋超封魏國公。皆公密奏，且誓乞用張公爲首相而已佐之。

又

壘干勞久戍，大將未班師。抗議回天意，忘身爲聖時。人心驗莫測，時事遠難知。汗簡方傳信，孤生欲語誰。
吳璘成德順軍師老欲還，不敢自請，公爲相察其情，卽力請班師。西鄙賴以無事。後議者乃指公爲棄地公不辨也。

三峽歌

乾道庚寅，予始入蜀。上下三峽屢矣。後二十五年，歸耕山陰，偶讀梁簡文巴東三峽歌，感之，擬作九首。實紹熙甲寅十月二日也。

又

神女廟前秋月明，黃牛峽裏暮猿聲。危途性命不容恤，百丈牽船侵夜行。

不怕灘如竹節稠。新灘已過可無憂。古粧峨峨一尺髻。木盞銀盃邀客舟。

又

十二巫山見九峯。船頭彩翠滿秋空。朝雲暮雨潭虛語。一夜猿啼明月中。

又

錦繡樓前看賣花。麝香山下摘新茶。長安卿相多憂畏。老向夔州不用嗟。

又

險詐沾沾不媿天。交情回首薄如煙。東遊萬里雖堪樂。瀕灩瞿唐要放船。

又

蠻江水碧蓮花紅。白舫黃旗無便風。浩萬四時常避水。棚居高出亂雲中。

又

亂插山花簪子紅。蠻歌相和漉西東。忽然四散不知處。踏月捫蘿歸峒中。

又

萬州溪西花柳多。四鄰相應竹枝歌。問君今夕不痛飲。奈此滿川明月何。

又

我遊南賓春暮時。蜀船曾繫挂猿枝。雲迷江岸屈原塔。花落空山夏禹祠。

十月三日泛舟湖中作

桑落可釀酒。草枯可呼鷹。平生當此時。意氣十倍增。卽今境界別。千錢買短篷。鏡湖三百里。往來寒日中。小飯炊彫胡。玉食無此美。臥聞水鳥聲。世念去如洗。知此恨太晚。享此恐不足。南山忽已昏。更就漁村宿。

早行

寒漏參差斷。晨雞次第鳴。匆匆半枕夢。草草一盃羹。澤國多逢雨。閑人不計程。雲間出寸塔。迎我有餘情。

晚泊

樓上鳴鳴角。橋邊點點燈。聚沙新到雁。趁渡獨歸僧。日隱山光暗。天低海氣蒸。居人笑老子。醉髮亂鬢髻。

遣懷

暮年世事轉悠悠。攬涕悽然類楚囚。不道渾無排遣處。病觀周易悶梳頭。

舟行戲書

世事無窮膏火煎。羈魂病骨久羸然。覺時不及夢差樂。死去始嗟生可憐。慷慨知非請纓日。推移忽及挂冠年。揚帆海浦差強意。臥看秋濤蹴遠天。

卷第三十一

久雨

黃葉雨中盡。飢鴻煙際來。時艱歲仍惡。身死病相催。西埭無行路。南山有疾雷。囊空罷沽酒。一醉轉悠哉。偶得長魚巨蟹。命酒小飲。蓋久無此舉也。

老生日日因塵臺，異味樓魚與楮錢。敢望槎頭分縮項，況當霜後得團圓。堪憐安出綠香餌，尚想橫行向草泥。東睡夜來梅已動，一樽芳醞徑須攜。

泛舟湖山間有感

我似人間不繫舟，好風好月亦閑遊。歸來華表千年鶴，滅沒煙波萬里鷗。歲晚客貂那復歎，時艱琴瑟未忘憂。野人只欲安耕釣，江左夷吾可見不。

望永思陵

綠衣迎拜屬車塵，草木曾霑雨露春。三十五年身未死，卻爲天下最窮人。

又

肝食憂民宴樂疎，太倉幾有九年儲。賈生未解人間事，北闕猶陳痛哭書。紹興庚辰辛巳間，游屢買費賈略蒙施用。

糟蟹

舊交髯簿久相忘，公子相從獨味長。醉死糟丘終不悔，看來端的是無腸。

霜夜

梅花欲動夢魂狂，橙子閑搓指爪香。莫怪草堂清到骨，一梳殘月伴新霜。

又

黃甘磊落圍三寸，赤蟹輪囷可一斤。更喚東陽麴道士，與君霜夜策奇勳。時東陽餽酒。

又

澹月窺窗似有情。更堪梅影向人橫。放翁不受天魔惱。獨擁青氈睡到明。

書室明煖終日婆娑。其間倦則扶杖至小園。戲作長句。

放翁老手竟超然。俗子何由與作緣。百榼舊曾誇席地。一窗今復幻壺天。夢回橙在屏風曲。雨霽梅迎拄杖前。吾愛吾廬得安臥。笑人思穎憶平泉。李衛公憶平泉山居。歐陽公思穎詩。皆數十韻。

又

美睡宜人勝按摩。江南十月氣猶和。重簾不捲留香久。古硯微凹聚墨多。月上忽看梅影出。風高時送雁聲過。一杯太淡君休笑。牛背吾方扣角歌。

初冬

老客人間百事慵。樂哉閉戶過今冬。朝爐獸炭騰紅焰。夜榻蠻氈擁紫茸。蠟刺坼蓬新栗熟。鵝雛弄色凍醅濃。題詩正自消閑日。本不爭先萬戶封。

買屐

一雨三日泥。泥乾雨還作。出門每有礙。使我慘不樂。百錢買木屐。日日繞村行。東阡與北陌。不問陰與晴。青鞋豈不佳。要是欠耐久。何當踏深雪。就飲湖橋酒。

十月晦日作

藤疎不覆架。桐落欲平溝。閏歲風霜晚。衰年日月逾。觀書方坐石。把釣又登舟。不是無羈束。閑人得自由。

贈道友

凡骨已脫身自輕，勃落葉上行無聲。華陰市樓醉舞罷，卻上蓬峯看月明。

又

憶在長安爛漫遊，大明宮闕與雲浮。今朝偶上慈恩塔，北望茫茫禾黍秋。唐會光殿與慈恩塔南北相直。

又

當時辛苦學長生，準擬中原看太平。今日醉遊心已足，一瓢歸去隱青城。

又

二盃兀兀復騰騰，服氣燒丹總不能。借問生涯在何許，孤舟風雨伴漁燈。

又

零落殘碑草棘中，北邙蕭瑟又秋風。舊時憶在鵝行裏，幾見宣麻拜相公。

示子聿

儒林早歲竊虛名，白首何曾負短檠。堪歎一衰今至此，夢回聞汝讀書聲。

老境

平生百不遂，惟有老如期。眼澀觀書夜，心衰把酒時。僧分新掘藥，客誦舊題詩。四十年前我，回看定是誰。

予所居三山在鏡湖上，近取舍東地一畝種花數十株，彊名小園，因戲作長句。

出郭西南十里過，小園風月得婆娑。翠屏三扇恰相倚，玉鏡一奩誰爲磨。投鐮未嫌衰髮白，插花聊喜醉

顏醜。耶溪更盡青鞋興。免使將軍怒脫靴。

被命再領沖佑有感

殘骸日益衰。晨夜抱疾痛。地爐得微火。終日不喜動。讀書舊成癖。今但坐作夢。未能追鴻冥。乃復分鶴俸。風霜舍邊柳。合抱皆手種。眼中人盡非。欲話誰與共。

冬夜戲書

東歸刻曲寄彷徨。閑日雖冬亦自長。梅瘦有情橫淡月。雲輕無力護清霜。長魚通印鹽花白。珍鮓披絲麩。糝香一飽喟然還。自憫彊顏垂老食官倉。

又

將挂衣冠彊小留。期年畢竟是歸休。青氈獨擁欺霜夜。濁酒頻傾洗客愁。鶴影冷翻丹井月。雁聲遙帶玉關秋。一生自笑閑中過。不爲功名也白頭。

又

老樹霜餘已盡紅。縱橫落葉滿庭中。一鈞澹澹西南月。萬鼓憑憑東北風。賒酒每慚添舊券。賣書何計策新功。蓬窗坐睡權頽甚。隔竹敲茶賴小童。

幽居

落葉紛紛可掃。幽花寒自開。困空無雀噪。門靜有僧來。孤學時方棄。窮途勢莫回。呼兒了租賦。莫待縣符催。

又

兩鬢雞栖早。風高雁陣斜。園丁刈霜稻。村女賣秋茶。缺井磨樵斧。枯桑繫釣槎。客來那用問。此是放翁家。

送蘇召叟秀才入蜀效宛陵先生體

士勇赴知己。義重身固輕。魯公況有命。子得辭此行。結廬出門去。迢迢過蠻荆。泝江卜風色。入峽聽猿聲。萬里一紙書。南寄孤雁征。山陰在何處。計子難爲情。願言早來歸。鄰曲當出迎。橫舟柯橋市。一棹手自傾。

寄題哲上人漫堂

老子從來任運行。愛君堂以漫爲名。北邙大有英雄骨。枉用工夫過一生。

冬夜獨酌

寒水茫茫浸月明。疎鐘杳杳帶霜清。一樽濁酒有妙理。十里荒雞非惡聲。物外雖增新跌宕。胸中未洗舊崢嶸。頽然坐睡蒲團穩。殘火昏燈伴五更。

夜坐燈滅戲作

冷飯黃齋傲太平。鬢絲原不爲愁生。忽因燈死得奇觀。明月滿窗梅影橫。

艾如張

錦膺繡羽名山雞。清泉可飲林可栖。稻梁滿野棄不啄。雖有奇禍無階梯。東村西村煙雨晚。蕭艾離離林薄淺。翩然一下駭機發。汝雖知悔安能免。漢家天子南山下。萬騎合圍窮日夜。犬牙鷹爪死不辭。觸機折頸吁可悲。

上之回

咸陽宮闕天下壯。五更衛士傳雞唱。重門洞開鑾駕出。回中更在雲霄上。雲霄一路蟠青冥。車聲隱隱曉
雷霆。宓妃穿仗王母下。何必軒皇居大庭。君王遊幸無終極。萬年盡是歡娛日。文成已死方不讎。茂陵松
柏秋蕭瑟。

雜詠園中菓子

不酸金橘種初成。無核枇杷接亦生。珍產已從幽園得。濁醪仍就小槽傾。

又

漿石榴隨餽作節。蠟櫻桃與酪同時。兩株偶向池邊種。可喜今年墜折枝。

又

架垂馬乳收論斛。滂種雞頭采滿船。龜鼎若爲占食指。麴車未用墮饒涎。

又

山杏谿桃本看花。蠶纒成實亦堪誇。鹽收蜜漬饒風味。送與山僧下夜茶。

閉戶

聲利能令智者愚。放翁閉戶養迂疎。地爐枯葉夜煨芋。竹窻寒泉晨灌蔬。徇俗不如翻著屨。愛山只合倒
騎驢。今朝更有欣然處。萬里知心一紙書。蜀兵來得張季長歸。唐安江原書。

又

冠蓋長安幾番新。放翁只似向來貧。滿窗紅日價無敵。半陸新醅香動人。宴坐心光無蔽障。橫眠踵息自

清勻世間不用詢名字，身是無懷土古民。

連日大寒夜坐復苦飢，故作短歌。

翁飢不能具小殮，兒凍何由成複襜。藏書充棟讀至老，困頓少出蘇黎元。念當萬事度可否，肯使一根蠶乾坤。古來賢達少晚繆，千載遺笑綺與園。老翁肝心等鐵石，他年骨朽此固存。村沽難薄亦取醉，起看江月傾金盆。

園中對酒作

偃僂衰翁雪滿顛，愛花耽酒似當年。嗟無錦障七十里，也有青銅三百錢。數掩竹籬分小徑，一泓沙井貯寒泉。菘紅接白株株活，坐撥春工太平權。

孝宗皇帝挽詞

大道本生知，崇高志不移。凝神超事物，觀妙極希夷。訪藥三山遠，遺弓萬國悲。神孫昔鍾愛，天作太平基。

又

代邸膺圖日，臨朝涕泗橫。誠心非外飾，至孝化羣生。高廟聯龍袞，思陵接柏城。平生奉親意，一理貫幽明。

又

便殿諮詢早，深宮宴樂稀。欲頒傳位詔，猶索未明衣。壽損名方永，身癯國愈肥。孤臣泣陵柏，心折九虞隳。

小兒入城

小兒破帽出求師，老父寒爐夜畫詩。不耐青燈寫孤影，聊呼薄酒慰長飢。我今僅守詩書業，汝勿輕捐少

壯時。但恨北風如許惡。湖橋歸路想流漸。

夜坐

萬蠹披書卷。孤螢引篆香。病思無事樂。老悔少年狂。南渡衣冠盛。西征道路長。如今俱夢破。高枕看人忙。

又

葉盡木無聲。天高夜自明。映窗燈半滅。掠野雁孤征。瓦裂人間事。雲浮身後名。惟應托長鏡。寂寞送浮生。

縱筆

惰游不能耕。心媿新春白。獻傲茅三間。主人終勝客。

又

朝士腰下黃。山僧鼻端白。放翁俱笑汝。飽飯作閑客。

又

溫溫地爐紅。皎皎紙窗白。忽聞啄木聲。疑是敲門客。

又

雪晴麥甲紅。雨足韭頭白。雖無萬錢具。野飯可留客。

又

小兒勿大勤。使汝髮早白。長爲南畝民。殊勝東閣客。

郊行夜歸書觸目

陸放翁集 十四 劍南詩集 卷三十一

老翁病起厭端居。隨意東西不問途。霜野草枯鷹欲下。江天雲溼雁相呼。空垣破甍逃租屋。青帽紅燈買酒壚。未畏還家踏泥燎。園丁持炬小兒扶。

閉戶

老人閉戶動經月。嬾就東家借麩糴。身後有名豈如酒。體中不佳聊讀書。秦王開關見匕首。漢相徇市載廚車。人間憂怖古如此。莫怪荒畦常荷鋤。

十一月五日夜半偶作

草徑江村人迹絕。白頭病臥一書生。窗間月出見梅影。枕上酒醒聞雁聲。寂寞已甘千古笑。馳驅猶望兩河平。後生誰記當年事。淚灑龍牀請北征。

晴和出遊湖山間

日出氣稍和。呼船渡煙津。微風西南來。水面生魚鱗。適此一日佳。聊娛百年身。捋鬚俯船舷。一笑彼何人。閨餘春事早已覺。陽和新梅花處處開。幽香襲衣巾。久病喜我出。問訊傾鄰鄰。舟回不須速。看滷白玉輪。

病思

賣劍還山學老農。不堪衰與病交攻。將軍閉戶方鋤菜。處士攜家欲賃舂。殘齒彊留終脆脆。病腰扶拜苦龍鍾。壯遊誰信梁州日。大雪登城望夕烽。

寄子虞

老自安故鄉。況復觸罪罟。五年三奉祠。每請幸聽許。貧家似破屋。隨事且撐拄。雖殊乞墻肉。已近掘野鼠。

平生膽力薄，不敢犯張禹。有時一言失，恐懼氣如縷。念此思挂冠，白首冀安處。吾兒哀乃翁，歲暮忍羈旅。何時得斗粟，歸舍聊共煮。便草北關書，乞骸歸卒伍。

紙閣午睡

紙閣甌爐火一杓，斷香欲出礙蒲簾。放翁不管人間事，睡味無窮似蜜甜。

又

黃紬被煖青氈穩，紙閣油窗晚更妍。一飽無營睡終日，自疑身在結繩前。

夜分復起讀書

愁極不成寐，起開窗下書。似囚逢縱釋，如癢得爬梳。燈火夜過半，風霜歲欲除。平生濟時意，卻作愛吾廬。

效蜀人煎茶戲作長句

午枕初回夢蝶牀，紅絲小磴破旗槍。正須山石龍頭鼎，一試風爐蟹眼湯。巖電已能開倦眼，春雷不許殷枯腸。飯囊酒瓮紛紛是，誰賞蒙山紫筍香。

書逆旅壁

百憂襲暮年，懷抱日騷屑。雖云歸故鄉，何異萬里客。窮冬迫寒餓，凍有在陳厄。駕言適近村，慘慘天欲雪。人沽村市酒，馬齧山坡麥。旅炊雜沙土，得飽何暇擇。手敲若龜兆，面槁無人色。士窮自其分，所幸全大節。功名已領墮，身世真瓦裂。不學玉關人，飢鷹方夜掣。

嬾趣

謝病掩柴荆。年來懶趣成。舌根茶味永。鼻觀酒香清。已矣馳驅息。悠然磊砢平。高眠得三昧。夢斷已箇明。

閑中富貴

要信人生各有緣。閑中富貴亦關天。綠窗靜對千梢竹。翠實新疏一脈泉。愛百衲琴常鎖匣。買雙鉤帖不論錢。箇中得意君知否。不換金貂與玉蟬。

又

天爲疎慵剩與閑。一菴青嶂白雲間。衲僧過別歸廬阜。羽客來尋說華山。冬筍生林龍鱗鱗。寒泉落甌瓊珊瑚。俗人自是無因到。雖設柴門不上關。

書近況寄蜀中道舊

遺事復遺榮。空齋一榻橫。宿醒投未正。新句煨初成。山曉傳梅信。天窗送雪聲。戲題勻碧紙。遺鶴報青城。

醉中自贈

富貴猶宜早退休。一生齟齬更何求。賦形未至欠壬甲。語命寧須增斗牛。栗里收身貧亦樂。平陵埋骨死無憂。狂歌醉舞真當勉。剩折梅花插滿頭。

明日自和

二頃元知未易求。不如馬磨學文休。正令未死有幾日。那得殘年盡百憂。霜野挾弓朝射雁。煙坡吹笛暮呼牛。興來醉倒尋常事。莫信兒童笑白頭。

雪中至近村

荒山風雪歲將殘。貸粟迢迢犯苦寒。急燎征裘憩牛屋。旋占村酒挂鹽醃。清貧徹骨初無憾。老健逢人盪
自寬。深夜還家未能睡。解囊吹火取詩看。

歲暮感懷以餘年諒無幾休日。館已迫爲韻。

昨暮送客歸。短檝過魯墟。故廬有遺趾。青山透牆隅。桑竹雖鬱然。舊植已無餘。瓦礫不可求。而況屋壁書。
繫舟問鄰人。搔首久躊躇。行當挂朝衣。躬耕返吾初。

又

我家釋耒起。遠自東封前。詩書守素業。蟬聯二百年。長老日零落。念之心惕然。每恐後生輩。或爲利欲遷。
我少亦知學。蹭蹬及華顛。訟過豈不力。壽非金石堅。

又

我壯已早衰。晨鏡每惆悵。藥物姑自持。耆老曷敢望。造物有乘除。貧悴博無恙。歸鄉更多感。朋舊盡凋喪。
客來多避席。謂我丈人行。此意詎敢忘。報子以直諒。

又

士生始志學。固爲聖人徒。人人可稷卨。世世皆唐虞。仰事與俯育。治道無絕殊。孔孟之所傳。世俗願謂迂。
申韓尙刻薄。老莊競虛無。爾輩非不良。盍行九軌途。

又

江左謝太傅。高臥頗自喜。東山豈不佳。惜也終一起。阿堅偶自敗。元子亦適死。區區疑勝中。勳業端有幾。

當時嘲小草，雖戲實中理。所以山中人，至今笑園綺。

又

家世本無年，甲子近一周。小子獨何幸，七十今平頭。往者收朝迹，亟欲求歸休。厚恩許奉祠，得祿歲愈憂。三釜不及親，願爲妻子留。何由洗此媿，欲挽天河流。

又

高皇昔中興，風雨躬沐浴。一士未嘗遺，萬里皆馳驅。廉聽關言路，慮懷詢得失。孤臣實草芥，亦獲對宣室。龍顏宛在目，德不報萬一。橋山松柏寒，淚盡史臣筆。

又

王師宿梁益，行臺護諸將。腐儒忝辟書，萬里至渭上。旌旗照關路，風雪暗戎帳。堂堂鐵馬陣，齏齏木牛餉。誰知骨相薄，空負心膽壯。回首二十年，撫事增悲愴。

又

在昔祖宗時，風俗極粹美。人材兼南北，議論忘彼此。誰令各植黨，更仆而迭起。中更夷狄禍，此風猶未已。臣不難負君，生者固賣死。儻築太平基，請自厚俗始。

又

井地以養民，整整若棋畫。初無甚貧富，家有五畝宅。哀哉古益遠，禍始開阡陌。富豪役千奴，貧老無寸帛。困窮禮義廢，盜賊起叠迫。誰能講古制，壽我太平脈。

桐江哲上人以端硯遺子聿纔寸餘而質甚奇天將雨輒先流泚予爲效宛陵先生體作詩一首
吾兒得巖硯其徑甫踰寸奇哉掌握物乃有琮璧潤器寶備才德初不以形論汝能忘山林懷之可嘉懸

立春前三日作

春近寒尤苦先生不下堂烏皮蒙燕几白拂挂禪牀書架斜斜設梅花細細香悠然睡遠起已覺日徹長
贈應秀才

過宋不見元城公渡淮不見陳了翁當時人人皆太息至今海內傾高風老夫七十居鄉縣輾轉龍鍾何
足見辱君雪裏來叩門自說辛勤求識面我得茶山一轉語文章切忌參死句知君此外無他求有求事
踏三山路

春耕

今年液水滿西疇父老人人卜有秋只要耕犁及時節裹茶買餅去租牛

首春連陰

入春十日九日陰積雪未解雨復霑西家船漏湖水漲東家驢病街泥深去秋宿麥不入土今年米貴如
黃金老嫗哭子那可聽僵死不覆黔婁衾州家遣騎餽春酒欲飲復止吾何心出門空歎歲華速已見微
綠生高林

夜坐

衰翁不出門歲月過電雹窗明地爐煖袖手坐寂寞可憐瓶中梅爛漫幾開落小園亦數樹曾未破一萼

三更北風急。雨雪恐復作。且當勸舉杯。莫恨浮蟻濁。

新春

老境三年病。新元十日陰。疎籬枯蔓綴。壞壁綠苔侵。憂國孤臣淚。平胡壯士心。吾非兒女輩。肯賦白頭吟。
得季長書追懷南鄭幕府慨然有作

從戎昔在山南日。疆半春光醉裏銷。綠樹啼鶯窺帽影。畫橋飛絮逐鞭梢。花經小雨開差晚。筆怯餘寒澀未調。惆悵流年又如許。羈魂欲仗楚詞招。

正月十一日夜夢與亡友譚德稱相遇於成都小東門外。既覺慨然有作。
當年與子別江干。漸老心知後會難。豈料今宵清夢裏。東門交轡說春寒。

送陳吏部還朝

邂逅稽山許攬鬚。塵埃時得近冰壺。不辭我老雞豚社。且喜公歸櫻筍廚。滿室琴書懷燕几。一川風雨送行艫。勉哉早了功名債。要畫騎牛第二圖。先賢良與劉凝之有廬山騎牛圖。

觀棋

一枰翻覆戰枯棋。慶弔相尋喜復悲。失馬翁言良可信。牧豬奴戲未妨爲。白蛇斷處真成快。黑幟空時又一奇。斂付兩奩來對酒。冷泠聽我誦新詩。

春行

鶻帽絲絲雨。芒鞋策策泥。柳斜風帶北。花斂日平西。社酒誇新壓。春蕪喜遍犁。深村無客過。父子自扶藜。

雨霽春色粲然喜而有賦

應接年光老漸慵。猶能一飲百分空。半霑蝶粉簾櫳雨。遠送鶯聲巷陌風。千縷麴塵楊柳綠。萬枝猩血海棠紅。從來造物陶甄手。卻在閑人詩句中。

幽思

雲際茅茨一兩間。春來幽事日相關。臨窗靜試下巖硯。歌枕臥看靈壁山。紅練帶飛俱意得。錦熏籠煖尙香慳。錦熏籠謂瑞香。今朝社過添惆悵。高棟巢空燕未還。

贈持鉢道人

青鐵作小冠。白紵縫短褐。右扶九節杖。左執七綴鉢。何嘗有定止。到處可生活。惟有烈士心。白刃不能奪。相逢一笑粲。滯思得披豁。揮袂去若飛。歧望已天末。

柳

楊柳春風綠萬條。憑鞍一望已魂消。當年鳳集城邊路。曾愛纖纖拂畫橋。

又

西園雨打杏花稀。便面章臺事已非。只恐無情堤上柳。又將風絮送春歸。

山園雜詠

祠祿留人未挂冠。山園三畝著身寬。百年竟向愁邊老。萬事元輸靜處看。花徑糝紅供晚醉。月天生暈作春寒。汗青事業都忘盡。時賴吾兒舉話端。

又

殘春終日在林亭。散髮披衣醉復醒。科斗已成蛙閣閣。櫻桃初結子青青。魚遊滄海寧濡沫。禽竊雕籠卽
翦翎。薄晚東風吹小雨。笑攜長鏡伴畦丁。

又

桃花爛熳杏花稀。春色撩人不忍違。俗客年來真掃迹。清梅日暮獨忘歸。魚行池面紅雲散。鶻起枝頭綠
雪飛。莫道顛狂無訴處。臥看香篆掩齋扉。

又

已過社雨尙春寒。小醉初醒柱倚欄。柳帶花移宜土潤。鶴和雞養要籠寬。孤翁白首投村社。諸彥青雲接
羽翰。誰信幽居多樂事。晚窗兒女話團圓。

又

春光何止二分空。寒食都無數日中。密葉成陰花寂寂。舊巢添土燕怱怱。紙鸞收線愁風惡。秧馬掀泥喜
雨濛。堪歎今年衰更甚。蒼顏縱醉不成紅。

卷第三十二

雨夜書感

宦遊四十年。歸逐桑榆暖。皇恩念黎老。一官猶置散。春殘桃李盡。風雨閉空館。有懷無與陳。萬事付酒碗。

近代固多賢，吾意終不滿。可憐杜拾遺，冒死明房瑄。慷慨詎非奇，經綸恨才短。羣胡穴中原，令人歎微管。

又

儒生不自貴，執藝等卜祝。詩書定何物，爲汝市爵祿。唐虞雖日遠，凜凜猶在目。誰能舉其要，治功端可復。平生竊知此，俛仰髮已禿。一豪不獲施，老病死巖谷。安知萬世後，終無可封俗。願廣稽古心，端拱咨嶽牧。

鏡湖

躬耕新一飽，閱閱望有年。水旱適繼作，斗米幾千錢。鏡湖洗已久，造禍初非天。孰能求其故，遺迹猶隱然。增卑以爲高，培塿使之堅。坐復千載利，名託亡窮傳。民愚不能知，仕者苟目前。吾言固應棄，惜愴夜不眠。

舟中戲書

平生萬事付之天，百折猶能氣浩然。試問軟塵金絡馬，何如柔櫓月侵船。英雄到底是癡絕，富貴但能妨醉眠。三百里湖隨意住，人間真有地行仙。

春晚懷山南

梨花堆雪柳吹絲，常記梁州古驛前。二十四年成昨夢，每逢春晚卽悽然。

又

壯歲從戎不憶家，梁州裘馬鬪豪華。至今夜夜尋春夢，猶在吳園藉落花。

又

梁州一別幾清明，常憶西郊信馬行。桃李成塵總閑事，梨花楊柳最關情。

又

身寄江湖兩鬢霜。金鞭朱彈夢猶狂。遙知南鄭城西路。月與梨花共斷腸。

春晚書齋壁

海棠已成雪。桃李不足言。纖纖麥被野。鬱鬱桑連村。稭蠶細如蠶。杜宇號朝昏。展墓餼餌美。坐社黍酒渾。早筍漸上市。青韭初出園。老夫下箸喜。盡屏雞與豚。幽居亦何樂。且洗兩耳喧。呼兒燒柏子。悠然坐東軒。

七十一翁吟

七十一翁心事闌。坐叨祠祿養衰殘。樽中無酒但清坐。架上有書猶縱觀。吏部齒搖心悵望。將軍脾滿淚洶瀾。客來共飯增羞澀。小摘山蔬不揜槃。

山茶一樹自冬至清明後著花不已

東園三日雨兼風。桃李飄零掃地空。惟有山茶偏耐久。綠叢又放數枝紅。

晨起

初日破蒼煙。零亂松竹影。老夫起燒香。童子行汲井。平生水雲身。不墮車馬境。願言學龐公。全家事幽屏。

春晚雜興

人寂野人家。柴扉傍水斜。僧分晨鉢筍。客共午甌茶。燕戶添新土。蛛絲罨落花。悠然便終日。惟此送年華。

又

澤國固多雨。暮春猶薄寒。兒童葺茶舍。婦女賽蠶官。閱世年唯主。爲農興未闌。得途得一飽。亦足慰艱難。

又

池面萍初紫。牆頭杏已青。攜兒撐小艇。留客坐孤亭。相法無侯骨。生年直酒星。正須遺萬事。莫遣片時醒。

又

小市湖橋北。幽居石埭西。蒲深姑惡哭。樹密祢歸啼。山茗封青箬。村醅拆赤泥。平生汗簡手。投老慣扶犁。

又

病瘍無意緒。閉戶作生涯。草草半盂飯。悠悠一盃茶。笑穿居士屨。閑看女郎花。唐人謂辛夷為女郎花。園中有此花。一叢二百朵。莫問明朝事。忘家即出家。

又

青梅薦煮酒。綠樹變鳴禽。處世已如客。傷春無復心。焚香惟默坐。曳杖亦幽尋。一日悠然過。深慚惜寸陰。

齋中雜題

別屋蛾眉不足誇。可齋別自是生涯。閑將西蜀團窠錦。自背南唐落墨花。

又

小醉微吟過一春。人間儂是最閑人。龜毛拂子長三尺。拈起風光處處新。

又

柴几硯函鸚鵡眼。古奩香斲鷓鴣斑。絕知造物慙勤意。成就衰翁到死閑。

又

幽居厭見凡花草。紅紫紛紛不復裁。自斷蒼苔換黃土。南山移得玉芝來。書外新移雲門玉芝一本甚茂。

老疾戲自贈

年過七十日夜衰。羸然骨立不支持。一身百病作無時。飯且不足那論醫。鏡中之人定是誰。面骨突兀鬢成絲。買棺作家計已遲。一旦寧免累諸兒。門前湖山可邀嬉。心雖欲往力不隨。左車牙脫吁可悲。問汝何不食肉糜。

夜坐聞湖中漁歌

少年嗜書竭目力。老去觀書澀如棘。短檠油盡面自佳。坐守一窗如漆黑。漁家鼻鼻起三更。哀而不怨非凡聲。明星已高聲未已。疑是湖中隱君子。

上巳書事

單衣初著下湖天。飛蓋相隨出郭船。得雨人人喜秧信。祈蠶戶戶斂神錢。黃雞煮醢無停筯。青韭淹菹欲墮涎。丞相傳聞又三押。衡茅未改日高眠。

對酒

手摘醯醢翦牡丹。山家草草亦杯盤。溪頭一夜風吹雨。又作殘春幾日寒。

自規

陸君拙自謀。七十猶糲食。著書雖如山。身不一錢直。默自觀我生。困弱良得力。轉喉畏或觸。睡面敢自拭。世路方未夷。機穽寧有極。但能常閉門。尊拳貨難肋。

窮居有感

孤村煙草暮。蓬蓬笠子衰。衣自架。犂生計似蛛。聊補網。弊廬如燕旋。添泥。人亡者舊多。時學地廣。陂湖失古隄。迂闊自知無著處。敢因窮厄怨推擠。

春夏之交風日清美欣然有賦

日鑄珍芽開小缶。銀波衰酒湛華觴。槐陰漸長籬欄暗。梅子初嘗齒頰香。戶戶祈蠶喧鼓笛。村村乘雨築陂塘。年光何預衰翁事。伴蝶隨鶯也解狂。

又

天遣殘年脫馬鞵。功名不恨與心違。綠陂細雨移秧罷。朱舫斜陽擘紙歸。花市丹青賣團扇。象牀刀尺製單衣。白頭曳杖人爭看。共歎浮生七十稀。

又

芳潤園林不似貧。年光無盡逐番新。來禽顏色不禁雨。搏黍語言如惜春。身外豈關吾輩事。鏡中已換昔時人。神仙定未超塵俗。猶插金貂侍帝晨。

夜歸

疎鐘渡水來。素月依林上。煙火認茅廬。故倚船篷望。

農家歎

有山皆種麥。有水皆種秔。牛領瘡見骨。叱叱猶夜耕。竭力事本業。所願樂太平。門前誰剝啄。縣吏徵租聲。

一身入縣庭。日夜窮笞撻。人孰不憚死。自計無由生。還家欲具說。恐傷父母情。老人僅得食。妻子鴻毛輕。三月十一日郊行

到處人家可乞漿。槐陰巷陌午風涼。水陂漫漫新秧綠。山壠離離大麥黃。父子力耕春漸老。婦姑共績夜猶長。堯民擊壤雖難繼。芹美懷君未敢忘。

初夏行平水道中

老去人間樂事稀。一年容易又春歸。市橋壓擔蓴絲滑。村店堆盤豆莢肥。傍水風林鶯語語。滿原煙草蝶飛飛。郊行已覺侵微暑。小立桐陰換夾衣。

初夏幽居偶題

放逐還家一老翁。癡頑自笑更誰同。倚欄風月黃昏後。攜杖園林綠潤中。泳水小魚依藻荇。覓巢輕燕拂簾櫳。此身要豈堅牢物。莫遣須臾酒盞空。

又

展盡高槐日漸長。了無蜂蝶爲花忙。青梅旋摘宜鹽白。衰酒初嘗帶臘香。林下光陰無一事。水邊窗戶有餘涼。應門不用辭衰疾。車馬何由到野堂。

又

昔如轉戰墮重圍。今幸寒翎脫駭機。曉樹好風鶯獨語。夜窗細雨燕相依。安居不恨蝸廬在。得食寧論鶴料微。更喜暮年彊健在。又看刀尺製縑衣。

又

朱櫻羊酪喜新舊。碧井桐陰轉午涼。書几得晴宜試墨。衣篝因潤稱熏香。枯龜自覺支牀穩。老馬安能試草長。半世學騷終不近。空餘清夢上沅湘。

晨起

青青水中萍。粲粲牆下草。開歲纔幾時。已歎春事老。鳴禽傍窗戶。怪我倦幽討。長吟感人懷。病枕起亦早。下牀呼獠奴。浩蕩恣灑掃。綠陰列蒼石。芳樽得頻倒。客來但與飲。談天有何好。亦莫雕肺肝。吟哦學郊島。

小圃

剡曲西邊築草堂。小園聊復寄相羊。魚行水際汀蘋動。麝過林中野草香。寬句有時攜筆硯。遣懷隨事具杯觴。少年朋舊凋零盡。不獨思人亦自傷。

幽居

青門不種故侯瓜。揀得湖山便寄家。老境一塵依水竹。壯遊萬里犯風沙。氣衰那辦飲無算。病著更知生有涯。莫道吾廬全索寞。牆東新補數株花。

夜賦

小齋寂寂似禪寮。臥數更籌覺夜遙。帳外殘燈欺不寐。梁間棲燕伴無聊。江湖蹭蹬朱顏改。憂患侵凌壯志消。挂旆天山少年事。此身終負聖明朝。

閨中書事

病過新年逐日添。清愁殘醉兩厭厭。惜花萎去常遮日。待燕歸來始下簾。堂上清風生玉塵。洞中寒溜注銅蟾。一生留滯君休歎。意望天公本自廉。

又

一畝山園半畝池。流年忽遽挂冠期。賣花醉叟剝紅桂。種藥高僧寄玉芝。午枕爲兒哦舊句。晚窗留客算殘棋。登庸策免多新報。老子癡頑總不知。

初夏

紛紛紅紫已成塵。布穀聲中夏令新。夾路桑麻行不盡。始知身是太平人。

又

翦韭醺醞粟作漿。新炊麥飯滿村香。先生醉後騎黃犢。北陌東阡看戲場。

又

稻未分秧麥已秋。豚蹄不用祝甌窰。老翁七十猶疆健。沒膝春泥夜叱牛。

又

買得新船疾似飛。登飢遙望采桑歸。越羅蜀錦吾何用。且備幽人卒歲衣。

又

槐柳成陰雨洗塵。櫻桃乳酪併嘗新。古來江左多佳句。夏淺勝春最可人。夏淺卻勝春。徐陵詩也。

又

杜鵑血盡啼未歇，蝴蝶夢殘心更狂。我自人間少情者，老來十倍惜年光。

又

賜食金盤出寶閣，玄熊掌映紫駝蹄。侯家但詫承恩澤，豈識山廚苦賣蔬。

又

隋家古寺郡西南，寺廢殘僧只二三。藜藿滿庭塵閣佛，時聞鏡鼓賽春蠶。

又

渺渺荒陂古埭東，柳姑小廟柳陰中。放翁老憊扶藜杖，也逐鄉人禱歲豐。

又

老翁賣卜古城隅，兼寫宜蠶保麥符。日日得錢惟買酒，不愁醉倒有兒扶。

四月旦作時立夏已十餘日

京塵相值各匆忙，誰信閑人日月長。爭葉蠶飢鬧風雨，趁虛茶嬾鬪旗槍。林中晚筍供廚美，庭下新桐覆井涼。堪笑山家太早計，已陳竹几與藤牀。

春夏之交鳴鳥百族，惟布穀聲最悲急，動人戲作十韻。

春風捨人去，陸子歎以驚。欲挽春使回，無奈布穀聲。春亦何負汝，旦暮聲不停。或謂布穀者，一氣感使鳴。春老自當去，微禽彼何情。上天運四時，斗柄亦輝燦。奈何獨私春，欲使久不傾。南風吹衆綠，一掃紫與頰。此時豈不佳，乃爾懷不平。勿作兒女態，起視東郊耕。

倚杖

倚杖柴門外，踟躕到日斜。兒童拾筍箨，婦女賣茶芽。掠岸過漁艇，隔籬聞緯車。年來詩料別，滿眼是桑麻。

野步

蝶舞蔬畦晚，鳩鳴麥野晴。就陰時小息，尋徑復微行。村婦窺籬看，山翁拂席迎。市朝那有此，一笑慰餘生。

竹窗晝眠

初夏暑雨薄，但覺白日長。向來萬里心，盡付一竹牀。新筍出林表，森然羽林槍。時聞解箨聲，鑿府生清涼。平生喜晝眠，此志晚乃償。安枕了無夢，孰爲蝶與莊。徐起掬寒泉，中有菱絲香。清獻送落日，與世永相忘。

騰騰

騰騰吾喪我，兀兀我忘吾。萬事皆墮甌，一身真朽株。江天號鶴鶴，村巷暗楸梧。薄酒猶堪醉，歸來稚子扶。

幽棲

閑人了無事，地僻稱幽栖。師米留雞食，移琴避燕泥。桐生窗欲暗，筍長徑還迷。不作容車計，門閭儘放低。

又

誰謂幽棲陋，茅茨足庇牀。雨便梧葉大，風度練花香。浴佛兒童喜，纏絲婦女忙。竭來三十載，吾鬢固宜霜。乾道丙戌，始卜居鏡湖之三山，今甫三十年矣。

睡起

虛堂四簷竹，脩脩朱夏正。午如高秋，八尺風漪雲碧稠。一榻寬如禹九州，屈信展轉俱自由。息以兩踵無

與嗔。世方窘若魚吞鉤。我獨超然鷹脫鞵。一物不向靈臺留。非睡非覺以神遊。青城紫閣多朋儔。相逢握手笑不休。

愁坐忽思南鄭小益之間

當年蜀道秦關。萬里飄然往還。酒病曾留西縣。眼明初見南山。

又

籌筆門前芳草。回龍道上青山。萬里猶能夢到。再遊未信天慳。

四月十三夜四更起讀書

七十未捐書。正恐死乃息。起挑窗下燈。度此風雨夕。

夏雨初霽題齋壁

楸花練花照眼明。幽人浴罷葛衣輕。燕低去地不盈尺。鵲喜傍簷時數聲。對奕軒窗消永晝。曬絲院院落喜新晴。忽驚重五無多日。采縷纏筒弔屈平。

東窗

萱草石榴相續開。數枝晚筍破蒼苔。背人紅練穿林去。直是無情不再來。

聞鼻

兩忘堯桀自心平。此念胡爲掃復生。幸是安眠無一事。苦憐鶯語惡鼻聲。

雨中示子聿

窮閭父子自相依。寂寂茅廬映竹扉。瓜蔓水生初抹岸。練花寒動卻添衣。吾玄自笑豈尙白。汝瘦元知能勝肥。苦學勿爲干祿計。宦途雖樂不如歸。

山園屢種楊梅皆不成。枇杷一株獨結實。可愛戲作長句。

楊梅空有樹團圓。卻是枇杷解滿盤。難學權門堆火齊。且從分子拾金丸。枝頭不怕風搖落。地上惟憂鳥啄殘。清曉呼僮乘露摘。任教半熟雜甘酸。枇杷盡熟時。鷓鴣不可復窠。故熟七八分則取之。

夢遊山寺焚香煮茗甚適。既覺悵然以詩記之。

平日居山恨不深。蹇來差足慰幽尋。僧歸共說道逢虎。院靜惟聞風滿林。毫蓋雪濤驅滯思。豪盤雲縷洗塵襟。此行殊勝邯鄲客。數刻清閑直萬金。

夏日

柴扉晝掩竹林幽。坐使炎天變素秋。扇月團圓似秋滿。簾波細細欲平流。朋儕零落關河阻。疾病沉羸歲月遒。賴有澄湖常在眼。虎頭不用畫滄洲。

巢山

巢山避世紛身隱。萬重雲。半谷傳樵響。中林過鹿羣。蟲蝨葉成篆。風蹙水生紋。不隔溪橋路。仙凡自此分。

又

短髮巢山客。人知姓字誰。穿林雙不惜。取水一軍持。渴鹿羣窺澗。驚猿獨裊枝。何曾畜筆硯。景物自成詩。

四月二十三日作

颺颺荷離水，翩翩燕出巢。苔添雨後暈，笻放露中梢。世路千重浪，生涯一把茅。歛門僧亦絕，無句鍊推敲。

又

莫笑茅廬迳，何曾厭日長。飯餘殮酪滑，浴罷葛巾涼。落日桐陰轉，微風梔子香。貧家猶裹粽，隨事答年光。

觀月

清風發疎林，澷月上素壁。悠然倚庭楯，愛此風月夕。人間好時節，俯仰成宿昔。少年不痛飲，老大空歎息。

溽暑

溽暑雨將作，南風來解圍。幽花臨砌坼，乳燕傍巢飛。腰斧剝桑去，攜籃采藥歸。翻憐少年老，疊雪詫宮衣。

晨起

衰老少睡眠，睡晚覺常早。五更攬衣起，漏鼓猶考考。青燈耿孤影，不睡坐亦好。讀盡一編書，南窗朝日杲。

閑思

溝水細無聲，窗扉晚更明。簾開燕雙入，人靜鶻羣行。青李求初至，黃醅釀已成。出門無奈嬾，不是傲公卿。

又

小雨時時作，幽花續續紅。新蟬落庭樹，癡燕集屏風。傍枕拋書卷，臨池下釣筒。閑中有真樂，那得歎途窮。

梅天

稻壠移初遍，梅天澀未晴。輕陰昏茗色，餘潤咽琴聲。時傍菱塘立，還尋沙徑行。杜門終此世，更誓未來生。

夜坐

燈暗一室幽。鳥鳴四山靜。道人坐倚壁。度此清夜永。少時志功名。癡絕如捕影。造物遺以窮。磨礪發深省。坐令盆盎淺。涉涉波萬頃。雖未造道真。南轅終至郢。

麥熟市米價減鄰里病者亦皆愈欣然有賦

凶年已度麥方秋。學道從來幸寡求。荷鋤自隨身若寄。漚籬可賣飯何憂。鄰翁瀕死復相見。村市小涼時獨遊。不怕歸時又侵夜。新添略約跨清溝。

雨中作

風聲如翻濤。雨點如撒菽。皇天念此老。一爲洗煩促。呼童取短檠。聊展舊書讀。悽然對孤影。感歎衰鬢秃。兀如老病馬。關河久在目。伏櫪雖已疲。連雲思首宿。

夜雨

齒牙搖動鬢毛疎。四壁蕭然臥草廬。急雨聲酣戰叢竹。孤燈焰短伴殘書。壯心未減從戎日。苦學猶如覓舉初。自笑堅頑誰得似。同儕大半已丘墟。

乙卯重五

重五山村好。榴花忽已繁。粽包分兩髻。艾束著危冠。舊俗方儲藥。羸軀亦點丹。日斜吾事畢。一笑向杯盤。

夏夜風雨極涼枕上口占

北窗八尺臥文藤。夜雨生涼洗鬱蒸。裊裊清愁鬢斷角。悠悠孤夢伴殘燈。羸軀垂老嗟焉往。公論猶存似可憑。聊向斯文圖不朽。未甘粥飯學山僧。

窮居

半世僂僂信所之。窮居仍抱暮年悲。燒金術誤囊衣薄。種黍年凶酒味醜。大厦萬間空有志。後車千乘更無期。掩書常笑城南杜。麻屨還朝授拾遺。

思蜀

白首躬耕遇游鱗。江南自笑欲疇依。凌煙勳業無人許。濯錦園林有夢歸。心似遊僧思遠適。身如敗將陷重圍。客來彊欲相寬釋。每說人生七十稀。

五月二十三夜記夢

夜漏欲盡雞初唱。夢到神仙信非妄。泉流直春碧澗底。松根橫走蒼崖上。徐行林際遇飛橋。峭壁驚濤臨萬丈。非惟履險足踉蹌。已覺處幽神悄悄。空巖滴乳久化石。寶蓋珠璣紛物象。鬼神慘澹疑欲搏。龍蜃蜿蜒誰敢傍。長眉老仙乘白雲。握手授我綠玉杖。三生汝有世外緣。一念已斷塵中障。雖云曩事不復憶。憐汝腫子神猶王。何須更待熟金丹。從我歸哉住崑閬。

送葉尙書

囊藏榜扁舟。萬里歸自蜀。五月下瞿唐。六月過浮玉。於時始識公。一笑忘暑毒。羽扇臨清流。華觴跋紅燭。一別十五年。去日如電速。孤生晚還朝。欲退慚陸陸。要津非所冀。見公心自足。斥歸又七載。衰病將就木。造物哀其窮。公來位嶽牧。每見語諄諄。與世異寒燠。聖朝方急賢。登用及鈞築。如公實舊德。顧豈待夢卜。初聞一札下。已報四輩趣。懸知新天子。虛懷須啓沃。願公論其大。始爲天下福。卽宜垂拱麻。寧復攜文宿。

路傍曲

冷飯雜沙礫，短褐蒙霜露。黃葉滿山郵，行人跨驢去。

又

大道南北出，車輪無停日。彼豈皆奇才，我獨飢至夕。

又

淒涼路傍曲，朱門人不知。秋街槐葉落，正是斷腸時。

贈汪叔潛

火雲嵯峨如疊障，百病攻衰非一狀。低簷小屋桑竹村，忽辱君來問亡恙。蹶然攬衣起闔門，裹飯仍煩遠相餉。歲饑野外無供給，差澀餘糧不盈盎。我守此窮三十年，尙恐死前無力量。君誠不以老棄予，苦語見規宜勿讓。

出遊

莫笑衰殘百不能，一枝筇杖捷飛騰。山空野火焚秦冢，日澹煙蕪逼禹陵。小浦漲潮迎釣艇，疎鐘出谷送行僧。踟躕不覺歸途晚，村落人家已上燈。

卷第三十三

立秋後四日雨

天爲新秋故作涼，海風吹雨入虛堂。涼生庭樹陰陰綠，潤襲華衣泜泜香。杯泛鵝兒供小飲，碓舂雲子喜新嘗。一年又見星橋近，未信仙家日月長。

夙興

老眼無眠覺夜長，攬衣不復待窗光。明星漸淡避初日，秋露已濃生曉涼。出草幽花紅紫雜，穿林啼鳥去來忙。是中有趣君知否，喧寂年來已兩忘。

存養堂爲汪叔潛作

絳帳先生見處別，少年立節如冰雪。胸中凜凜萬卷書，一字不爲庸人說。存心養性以事天，人知不知渠晏然窮經日夜廢。寢飯不怕諸生嘲腹便，三旌五鼎俱忘掉。致一工夫在存養，我今老病死卽休。未死尚欲從公講。

感昔

三著朝冠入上都，黃封頻醉渴相如。馬慵立仗寧辭斥，蘭偶當門敢怒鋤。富貴尙思還此笏，衰殘故合愛吾廬。燈前目力依然在，且盡山房萬卷書。

又

五丈原頭秋色新，當時許國欲忘身。長安之西過萬里，北斗以南惟一人。往事已如遼海鶴，餘年空羨葛天民。腰間白羽凋零盡，卻照清溪整角巾。

病稍平示兒輩

人與鴉俱曉。天憑雁送秋。極知生意盡。彊爲汝曹留。藥餌傾殘囊。風霜迫故裘。倚屏搔短髮。且復寄悠悠。

野堂

野堂蕭颯雪侵冠。歷盡人間行路難。病馬不收煙草腹。孤桐半落井牀寒。長瓶濁酒猶堪醉。敗篋殘編更細看。此興不隨年共老。未容城角動憂端。

又

姓名無復世人聞。靜處何妨獨策勳。久矣不堪東閣客。歸哉無媿北山文。橫林霜近有丹葉。平野雨餘多斷雲。更喜鷓鴣來漸熟。一溪煙水與中分。

又

野堂地僻無車馬。草徑柴門晝亦扃。栗里雖貧儲舊粟。玉川終老抱遺經。病身凜凜殘秋葉。故友寥寥欲旦星。賴有吾兒堪暖眼。夜闌常共一燈青。

又

鼓缶酣歌樂太平。野堂窗戶極疎明。棄官正爲愚無用。謝客新緣病有名。閑入鄉人賽神社。時從長者放魚行。驪然要有關心處。打稻家家趁晚晴。

七月下旬得疾不能出戶者十有八日病起有賦

秋風吹海氣。氣候頗不令。昏昏七十翁。擾擾半月病。著書殊未成。卽死目不瞑。扶持賴藥物。僅得全性命。雨添苦暈青。風入桐枝勁。深巷無人聲。搢頤發孤詠。

夢有餉地黃者味甘如蜜戲作數語記之

有客餉珍草。發奮驚絕奇。正爾取嚼齏。炮製不暇施。異香透崑崙。清水生玉池。至味不可名。何止甘如飴。兒喜喜語翁。雪領生黑絲。老病失所在。便欲棄杖馳。晨雞喚夢覺。齒頰餘甘滋。寄聲山中友。安用求金芝。

秋夜

燈欲殘時酒半消。斷碁疎雨共無憀。老來萬事渾非昔。惟有詩情似灞橋。

又

夜雨淒涼客思迷。聞磴卻是夢回時。人人解說悲秋事。不似詩人徹底知。

病起憶甚有歎

殘年迫衰謝。一病不枝梧。書情傍人讀。行須稚子扶。真心付天地。畢世釣江湖。無米博佳傳。虛名那可圖。

小舟晚歸

扶病尋溪友。忘憂泛釣槎。渚寒無宿鷺。月白有啼鴉。敗壁青燈暗。幽窗稚子譁。無生未暇說。且復議桑麻。

又

秋晚吾廬好。柴門映斷山。潮生魚箔短。木落雉媒閑。纒縹蒼茫外。漁舟浩蕩間。客來常謝病。老鈍耐嘲訕。

夜坐

老眼清無寐。孤懷默自傷。思人交舊盡。撫事歲時長。籬犬吠殘月。江楓凋早霜。放翁殊耐事。掩卷撥爐香。

幽事

老夫病起日支離。幽事關心只自知。社近鄰翁餽新釀。客歸童子拾殘棋。功名已付來生了。筆墨尤非晚歲宜。餘習可憐除未盡。移花引水伴兒嬉。

病後衰甚非笠輿不能出門感歎有賦

酒興詩情尚自如。形骸可怪頓成疎。平生只倚雙鳧鳥。此日常須一鹿車。寂寂豈惟慚鄧禹。厭厭更覺類曹蜍。晚窗弄筆聊瀟灑。數首清詩手自書。

秋思

人生四十歎頭顱。久矣心知負壯圖。未死皆爲閑日月。無求儘有醉工夫。風凋木葉流年晚。秋入窗扉病骨蘇。信步出門湖萬頃。季鷹不用憶蓴鱸。

題村店壁

五十年來命壓頭。卽今殘髮不禁愁。亂鴉陣起霜天晚。落葉聲乾古渡秋。小市歡醺聊兀傲。長亭秣蹇得遲留。一身自處窮如許。幸是無因爲國謀。

病去

病去身差健。秋高氣漸寒。未甘常伏几。時作一憑闌。玉粒炊粳軟。香塵搗藥殘。欣然顧兒輩。燈下語團圓。

白首

白首稱祠吏。清時作幸民。招呼林下客。遊戲夢中身。山路烏驄穩。煙波畫櫂新。村村有花柳。無事卽尋春。

書病乙卯七月二十二日臥病兩旬始平。九月二日作此詩。

暮年雖病不甚劇。啜藥啜粥猶自力。今年七月風眩作。兒子在前不能識。杯中藥冷呼不醒。全家相顧無人色。昏昏但思向壁臥。盪臂鼠肝寧暇醫。巫技殫欲斂手。天高鬼惡吁莫測。偶然得活出望外。扶杖下牀猶屢踏。讀書心在目力短。袖手堅坐到窗黑。無功歲食四十年。歎息此責何由塞。

舍北晚眺

紅樹青林帶暮煙。並橋常有賣魚船。樊川詩句營丘畫。盡在先生拄杖邊。

又

日日津頭繫小舟。老人自爨出門遊。一枝筇杖疎籬外。占斷千巖萬壑秋。

夜閱篋中書。偶得李德遠數帖。因思昔相從時所言。後多可驗。感歎有作。

早歲傳聞月旦評。殿門邂逅眼偏明。當時一坐推談止。今日叢林見話行。老臥煙村身偶在。夜開蠹紙淚如傾。豈知三十餘年後。河洛胡塵訖未平。予送德遠歸臨川詩。有肝食煩明主。胡沙暗舊京之句。頗爲前輩所稱。時紹興辛巳春也。

登東山

漆園傲吏養生主。栗里高人歸去來。俱作放翁新受用。不妨平地脫塵埃。松崖壁立臨樵塢。竹徑蛇蟠上獻臺。送盡夕陽山更好。與君踏月浩歌回。

貧樂

蕭然曲肱地。自號直心翁。淨名書云。直心是道場。拙直三災過。勞生一笑空。新蔬經雨綠。晚稻得霜紅。飽

食真無事。浩歌明月中。

乙卯重九

九日村醅熟。逢迎不用呼。樽前狂起舞。陌上醉相扶。殘髮新霜白。衰顏落葉枯。明年何足問。且復插茱萸。

縱步近村

病去身輕試杖藜。滿村籼麥正離離。照溪自歎尙微瘦。趁渡人言殊未衰。草塞瓶頭沾濁酒。花簪笠頂引羣兒。衰回不恨歸差晚。正愛青燈映竹籬。

題齋壁

看盡人間利與名。歸來始覺此身輕。禍機不敗漁舟興。樂事渾輸地確聲。破篋雖無衣可典。寒畦已有芋堪烹。餘年且健貧何害。剩與鄰翁醉太平。

范參政挽詞

屢出專戎闔。邁歸上政途。勳勞光竹帛。風采震羌胡。籤帙新藏富。園林勝事殊。知公仙去日。遺恨一毫無。

又

孤拙知心少。平生僅數公。凋零遂無幾。遲暮與誰同。瓊樹世塵外。神山雲海中。夢魂每復接。慟哭向西風。

病後往來湖山間戲書

周公居東三食新。夷吾在魯丘厄陳。聖賢憂患尙如此。況我本是羈窮人。今秋危病輒不死。餘業自笑堅頑身。結茅所幸得佳處。石帆天鏡無纖塵。捫蘿峭壁上。采藥腰斧長歌行。負薪尋僧獨泛若。耶月攜友共

采湘湖蕓蠶亡鉅金陋勾踐。斯頌刻石憎嬴秦。不如一醉禹祠去。惡衣菲食真吾鄰。禹祠在吾廬東南十餘里。

秋夜遣懷

六年歸臥水雲鄉。本自無閑可得忙。羸病豈知身尚健。迂疎真與世相忘。霜清水落年華晚。月黑梟鳴夜漏長。瑣瑣并蛙何足計。一篇秋水笑蒙莊。

初冬暄甚

吳中十月雪霜慳。風景暄妍葉未殷。杲日還看浴東海。薄雲不解冒南山。蛙鳴閣閣荒池曲。蠅出營營食案間。安得玄冥正時令。紅爐綠酒一開顏。

贈湖上父老十八韻

一鏡三百里。環以碧玉峯。天公賜我厚。極目爲提封。煙收見石帆。雨霽望臥龍。嵯峨寶林塔。迢遞天章鐘。興來思一出。霜晴及初冬。父老捨杖迎。衣冠頗嚴恭。語我相識久。幸未棄老農。間者傳伏枕。喜聞足音聲。貧舍有盤食。勿責異味重。齏麩新油香。黍酒甕面濃。已遣買撲握。亦可致險喁。願公領此意。秣蹇聊從容。我起爲太息。厚意敢不從。吾生行逆境。平地九折卬。況今又老退。如子豈易逢。但願從今健。衰疾緩見攻。遇興卽叩門。草具煩炊春。但恐乘月來。妨子睡味濃。

初冬感懷二首

落葉掃還積。斷鴻飛更鳴。羸軀得霜健。老眼向書明。水瘦河聲壯。其枯馬力生。竟爲農父死。白首負功名。

庭蕪失故綠。園樹染新丹。病思闕支枕。詩情獨倚闌。帶移頻覺瘦。貂弊不禁寒。惟有牆陰薺。離離又滿盤。

讀杜詩

城南杜五少不羈。意輕造物呼作兒。一門耐法到孫子。熟視嚴武名挺之。看渠胸次隘宇宙。惜哉千萬不一施。空回英概入筆墨。生民清廟非唐詩。向今天開太宗業。馬周遇合非公誰。後世但作詩人看。使我撫几空嗟咨。

記九月三十日夜半夢

一夢邯鄲亦壯哉。沙堤金轡絡龍媒。兩行畫戟森朱戶。十丈平橋夾綠槐。東閣羣英鳴珮集。北庭大戰捷旗來。太平事業方施設。誰遣長難苦喚回。

小舟遊近村捨舟步歸

數家茅屋自成村。地確聲中晝掩門。寒日欲沉蒼霧合。人間隨處有桃源。

又

借得漁船泝小谿。繫船浦口卻扶藜。莫言村落蕭條甚。也勝京塵沒馬蹄。

又

不識如何喚作愁。東阡南陌且閑遊。兒童共道先生醉。折得黃花插滿頭。

又

斜陽古柳趙家莊。負鼓盲翁正作場。死後是非誰管得。滿村聽說蔡中郎。

蜀僧宗傑來乞詩三日不去作長句送之

看遍東南數十州。寄船卻泝蜀江秋。孤雲兩角山亡恙。斗米三錢路不憂。今年所在皆大稔。萬里得詩長
揖去。它年挈笠再來不。放翁爛醉尋常事。莫笑黃花插滿頭。

義農

義農去不反。釋老似而非。太息衆皆醉。逝將誰與歸。經時忘肉味。盡日掩柴扉。安得同心者。燈前語道微。
冬夜不寐

十月

蒙眼睡眠少。空村霜露淒。鉦鉦聞叩鐵。喔喔數鳴雞。月入知窗破。衾單幸屋低。明晨炊米盡。吾起不容稽。
塞向傾書櫃。開爐積豆萁。林居得溫暖。天遣養衰遲。甕盎藏蔬後。鉏耰下麥時。農家冬最樂。我老頗能知。
讀易

又

羸軀抱疾時時劇。白髮乘衰日日增。淨掃東窗讀周易。笑人投老欲依僧。
老喜杜門常謝客。病惟讀易不迎醫。冬來更愧乖慵甚。醉過收蕎下麥時。

聞雁

霜高木葉空。月落天宇黑。哀哀斷行雁。來自關塞北。江湖稻梁少。念汝安得食。蘆深洲渚冷。歲晚霰雪逼。
不知重雲外。何處避畢弋。我窮思遠征。羨汝有羽翼。

悲歌行

士如天馬龍爲友。雲夢胸中吞八九。秦皇殿上奪白璧。項羽帳中擡玉斗。張綱本不問狐狸。董龍何足方
難狗。風埃踏踏不自振。寶劍牀頭作雷吼。憶遇高皇諸隆準。豈意孤臣空白首。卽今埋骨丈五墳。骨會作
塵心不朽。胡不爲長星萬丈掃幽州。胡不如昔人圖復九世讎。封侯廟食丈夫事。齷齪生死眞吾羞。

村飲

吳中霽霜晚。冬草有未衰。坐令老病叟。遂失凋年悲。翩翩烏紗帽。裊裊殘菊枝。雖無車馬客。時與鄰翁期。
新醅壓尙渾。雉兔亦及時。自覺勝淵明。但醉不賦詩。

鏡湖西南有山曰外山民某氏居之其居少西小潭受飛泉羣山環合真異境也爲作短歌

漢東九十九重岡。武都九十九脈泉。豈如君家環翠阜。小潭珮玦聲鏘然。我欲從君乞菴地。開軒下看泉
中天。金丹九轉太多事。服水自可追飛仙。雲孫相遇不相識。笑問塵世今何年。掬泉弄月清歡罷。卻折玉
井秋風蓮。

十月十七日子生日也孤村風雨蕭然偶得二絕句子生淮上是日平旦大風雨駭人及子墮地

雨乃止

少傅奉詔朝京師。橫船生我淮之涓。宣和七年冬十月。猶是中原無事時。

又

我生急雨暗淮天。出沒蛟鼉浪入船。白首功名無尺寸。茅簷還聽雨聲眠。

遊山舟中遇風雨戲作

龍驤萬斛去如鴻。巨浪惟能窘短篷。不是山靈嫌俗駕。一生常值打頭風。

一齒動搖似不可復留有感

晚境常憂豁可憎。苦留終不受丁寧。主貧何恨客辭去。木老元知葉自零。未害菜頤臨肉俎。但妨叩齒讀仙經。從今有酒須勤買。莫學騷人耍獨醒。

山行

老翁七十亦何求。尙賴山行散百憂。擻耳帽寬新小疾。獨騎車穩正閑遊。酒旗滴雨村場晚。茶甕炊煙野寺秋。若論人間長久事。高吟何啻傲封侯。

老學菴予取師曠老而學如乘燭夜行之語名菴

窮冬短景苦慙忙。老學菴中日自長。名譽不如心自肯。文辭終與道相妨。吾心本自同天地。俗學何知溺糝糠。已與兒曹相約定。勿爲無益費年光。

枕上偶成

放臣不復望脩門。身寄江頭黃葉村。酒渴喜聞疎雨滴。夢回愁對一燈昏。河潼形勝寧終棄。周漢規模要細論。自恨不如雲際雁。南來猶得過中原。

舍北閑望作六字絕句

潘岳一篇秋興。李成八幅寒林。舍北偶然倚杖。盡見古人用心。

題菴壁

竹間僅有屋三楹。小菴後兩間。雖號吾廬實客亭。已斷雨聲重點滴。欲殘燈影更晶荧。酒惟排悶難中聖。茶卻名家可作經。頭眩減來還病蹇。何時徹底得康寧。

又

身似蝸牛蠹有廬。卻緣無用得安居。地爐封火欺寒雨。紙閣油窗見細書。麤熟山僧分饋飪。船來溪友餉薪樗。閉門莫笑衰頽甚。讀易論詩亦未疎。

縱筆

老眼輕千乘。枯腸卻八珍。直令身潦倒。未害膽輪囷。酒裏遺浮世。書中見古人。平生笑園綺。老蹋帝城塵。

又
壯歲志天下。崎嶇無一施。高談對鄰父。朴學付癡兒。補柵憐雞冷。分糧慣雀飢。吾生忽至此。惆悵鏡中絲。

又

天道何時定。人生固有涯。壯年行出塞。晚歲病還家。積憤憑誰豁。孤忠祇自嗟。今朝茅屋底。隱約聽霜笳。
十月二十八日夜雞初鳴時夢與數女仙遇其一作詩示予頗哀怨如人間語惟末句稍異予戲之曰若無此句不可為神仙矣其一從傍戒曰汝當勿忘此規作詩者甚有愧色予頗悔之既覺

賦兩絕句以解嘲

玉妹眉黛翠連娟。弄翰閑題小碧牋。人世愁多無著處。故應分與蕊宮仙。

又

虹作飛橋屢吐樓。羣仙來賦海山秋。玉姝定自多才思。更與人間替說愁。

山行

綠崖曲曲羊腸路。傍水疎疎麁眼籬。舉起短鞭成一笑。吾詩正是策勳時。

又

眼邊處處皆新句。塵務經心苦自迷。今日偶然親拾得。亂松深處石橋西。

貧甚作短歌排悶

閒何闊。逢諸葛。畏人常憂不得活。事不諧。問文開。不踴權門更可哀。卽今白髮如霜草。一飽茫然身已老。惟有躬耕差可爲。賣劍買牛悔不早。年豐米賤身獨飢。今朝得米無薪炊。地上去天八萬里。空自呼天天豈知。

過張王行廟

烈士生不遇。栖栖爲旅人。英魂死不沒。凜凜爲明神。明神受帝命。廟食福我民。牲酒何足言。壓抑姑少伸。火旱千里赤。與人下雷雨。落水不反壑。談笑出平土。善人錫之福。姦僞亦擊汝。豈若世上人。吞聲氣如糝。

秋月曲

舊時家住長安城。萬戶千門秋月明。紫陌朱樓歌吹海。酣宴不覺銀河傾。受降城頭更奇絕。莽莽平沙千里月。選兵夜出打番營。鐵馬蹴冰冰欲裂。塞月未落成。功回腰鼓橫。笛如春雷。長安高樓豈不樂。與此相

去問遼哉。丈夫志在垂不朽。漆胡骷髏持飲酒。舉頭雲表飛金盤。痛飲不用思長安。

卽事

蕭騷白髮滿綸巾。猶是人間詩酒身。湖上悲秋新有作。眼邊敗意絕無人。稻梁栖畝雁初下。煙水粘天鷗自馴。堪笑推移成老大。時時几杖接鄉鄰。

悲歌行

感慨常自悲。發爲窮苦辭。偏仄不少伸。夢中亦酸辛。脂車思遠道。太息令人老。中原宋輿圖。今乃傳胡雛。此責在臣子。諸公其可已。談笑復舊京。令人憶西平。

讀李泌事偶書

莘渭當時已誤來。商山芝老更堪哀。人生若要常無事。兩顆梨須手自煨。

晨起

晨起梳頭懶。披衣立草堂。霧昏全隱樹。氣暖不成霜。灘急回魚隊。天低襯雁行。新春猶一月。已覺日微長。

喜雨

一秋未雨冬未雪。坐使肺肝生客熱。不惟裘褐藏篋笥。臥毯坐氈俱未設。樽中有酒不敢嘗。小甕黃齏卻時啜。新春距今一月爾。便恐蝗生殘宿麥。天公老手真可人。夜雨蕭蕭洗旱塵。北風吹雪定不晚。喜入三

山湯麴梳

閑趣

堅閉門來又過冬。一裘且復擁龍鍾。不辭陋巷如糝冷。自愛新醅似粥釀。迎婦橋邊燈煜煜。賽神林外鼓
寥寥。豈惟自得閑中趣。要遣兒孫世作農。

自警

人生非金石。壽夭不自知。一日復一日。亦或至耄期。方其未死間。早夜勿自欺。嗟彼陷溺者。太山起毫釐。
努力戒惰偷。堯舜可庶幾。我今齒髮弊。彊健復幾時。一寸學古心。自視猶可爲。雞鳴推枕起。爲善亦孳孳。
天定終勝人。吾世或未衰。素業果有傳。三復吾此詩。

雨後

鏡湖歸隱老黃冠。布褐蕭然一室寬。燈影青燐人未睡。雨聲點滴夜將闌。四朝出處朋儕盡。半世漂流骨
相寒。青史無名端可恥。著書留與後人看。

又

蕭蕭殘髮雪侵冠。冉冉清愁用底寬。把卷昏眸常欲閉。投牀睡興卻先闌。惟須酒沃相如渴。未分人哀范
叔寒。雨霽定知梅已動。佩壺明日試尋看。

窗黑

風雨窗常黑。衰翁罷讀書。縱橫慚七略。廢惰失三餘。宴坐工夫熟。多聞習氣除。韓公未解此。誤謂腹空虛。
雨止行至門外戲作

簷雨收殘滴。溪雲弄晚晴。出門還浩歎。幾屐了吾生。

野飲

綠岸波生染麴塵。碧天雲細蹙魚鱗。山居剩得舒長日。野飲自無拘忌人。元結詩云。坐無拘忌人。勿限醉。
興。曠酒壺石邊。孤店晚。樵風溪畔。早梅春。懷章正可驚奴輩。未勝行歌獨負薪。

雨夜有懷張季長少卿

放翁雖老未忘情。獨臥山村每自驚。鼎鼎百年如電速。寥寥一笑抵河清。梅初破。蠹行江路。燈欲成。花聽雨聲。正用此時思劇飲。故交零落愴餘生。

雨中熟睡至夕

擁爐聽雨生睡思。澀眼營營惟欲閉。丈夫少壯要自力。飽食養慵真可媿。我今不睡欲何爲。常恐兒曹落吾事。蠻氈紙帳方施行。五鼎八珍無此味。

又

少陵今雨無客至。寂寞衡門晝常閉。孝先酣枕夢周公。弟子雖嘲可無媿。世上紛紛榮辱多。不如睡中差省事。小兒忽報煎茶熟。起擁寒爐究餘味。

憶昔

憶昔輕裝萬里行。水郵山驛不論程。屢經漢帝燒餘棧。曾宿唐家雪外城。壯志可憐成昨夢。殘年惟有事春耕。西窗忽聽空階雨。獨對青燈意未平。

燈下看梅

風雨經旬怯倚闌。梅花折得就燈看。有情應寄去年別。無寐不禁清夜寒。病起捲箔幽興在。春遲載酒後期寬。籬東數樹尤奇絕。日遣蠻童候路乾。

程泰之尙書挽詞

文古唐元結。經明漢仲舒。三朝八座貴。千載九丘書。早接遊從末。常聞議論餘。死生今永訣。追恨寄聲疎。

又

昔在紹興末。同趨行殿門。方思尋宿好。忽已奉遺言。詩行曲臺議。飾終明主恩。高皇舊朝士。今復幾人存。

雨夕獨酌書感

數掩蘆藩常不開。飢鴉兩雨啄青苔。雨來十日未成雪。歲盡一枝初見梅。池上晚行攜獨鶴。燈前夜酌撥新醅。漁村老景今如許。駿馬舊遊安在哉。

白首

白首元無一事成。朝來大笑絕冠纓。花飛早已知春減。漏盡寧容更夜行。蕭散且爲無算飲。猖狂未免不平鳴。玉關青海今安在。麥野桑村送此生。

客言來自上臯道中以其語作一絕

日曬霜融作淺泥。酒家卻在斷橋西。五陵今代無豪俠。獨臥茅簷聽午雞。

睡起

老怯年華速。閑知晝漏長。已回酣枕夢。未過古匳香。洗面宮眉綠。開茶帶勝方。山家風味在。雖病意差強。

卷第三十四

歲暮

案閒官曆喜更端。鬢畔羅幃巧耐寒。篩辣擣香箋臘酒。染紅絲綠簇春盤。衰容未覺餘年迫。佳日猶思一笑歡。太息兒童癡過我。鄉鄰雖陋亦爭看。

殘臘二首

破臘春先到。微陰日易醺。鳥聲猶寂寂。木意已欣欣。雲起山分疊。風生水蹙紋。斷腸何處笛。偏向醉中聞。殘臘無多日。吾生又一年。林塘明夕照。墟落淡春煙。山色危欄角。梅花綠酒邊。歲時元自好。老病獨悽然。

一壺歌

悠悠日月沒根株。常在人間醉一壺。傾倒欲空還澁澁。不曾教化不曾沾。

又

先生醉後卽高歌。千古英雄奈我何。花底一壺天所破。不曾飲盡不曾多。

又

自從軒昊到隋唐。幾見中原作戰場。三十萬年如電掣。不曾記得不曾忘。

又

恥從緣牧立堯庭。況見商周戰血腥。攜得一壺閑處飲。不曾苦醉不曾醒。

又

長安市上醉春風。亂插繁花滿帽紅。看盡人間興廢事。不曾富貴不曾窮。

屬疾

白頭屬疾臥丘園。藥物枝梧且僅存。月黑淺山開鵬嘯。窗明高樹送鴉翻。諛欺薄命深消骨。憂集窮途黯斷魂。回視少時真隔世。但餘一念在元元。

新歲

風入鞭梢緊。春從草色深。山坡臥新犢。園木轉幽禽。勳業少年夢。關河遊子心。爾來都掃盡。濁酒帶醉斟。

早春

數聲屋角聽鳴禽。紅糝青梢忽滿林。雨過東臯一犂潤。冰消南澗半篙深。逢僧竹院閑評藥。攜鶴山村醉擁琴。青史功名黃閣貴。有時應不到如今。

太古

太古安知慮與堯。茹毛飲血自消搖。不須追咎爲書契。初結繩時俗已澆。

春夜

老儻生如寄。春寒夢亦孤。燈花時自墜。鼻語迭相呼。萬里書難得。三年病未蘇。窗深不知曉。但覺動林烏。

正月六日作

上天四序分寒煖。以漸相尋不相瀆。今年立春七日耳。暖景溫風何迫促。羣蛙怒鳴蚊蚋出。蚍蜉插翅飛

滿屋兒童便欲覓團扇。我亦汗垢思湯沐。山坡梅花常恨晚。一夕開盡如雪谷。籬邊已放桃蕊紅。庭下頓長萱芽綠。小人識淺喜欲舞。輕衫冷翹相追逐。春深癘鬼不貨人。此暖但憂非汝福。

寄題吳斗南玩芳亭

北斗以南有吳侯。人物知非第二流。讀書不放一字過。閉戶忽驚雙鬢秋。平生離騷讀千遍。屈泥秭歸要親見。歸來落筆愈驚人。宋玉景差俱北面。玩芳亭中蘭茝芳。朝回解帶春晝長。愛君憂國有奇作。坐令壯觀還沅湘。老人壘亦同此趣。甚欲閑題玩芳句。無奈生涯今已別。倒壑枯楠忘歲月。

春初驟暄一夕梅盡開明日大風花落成積戲作

暖逼梅花爛漫開。飄零便恐付蒼苔。更堪連夜風如許。似妒愁人把一杯。

又

殘梅零落不禁吹。真是無花空折枝。堪笑老人風味減。三年不作送梅詩。予往歲多有送梅之作。今聞筆已累年。

又

年年爛醉萬梅中。吸酒如鯨到手空。花欲過時常惜別。今年此別更匆匆。

讀老子傳

巍巍闕里與天崇。禮樂詩書萬世宗。但說周公曾入夢。寧於老氏歎猶龍。

示元用

德孫學語已驚人，悶裏時時一笑新。老子已應如樞轅，此郎端恐是天麟。會看神授如椽筆，莫改家傳折角巾。汝叔不癡當愛汝，夜窗燈火勉相親。

春思

七十老翁身退耕，可憐未減舊風情。典衣取酒那論價，秉燭看花每到明。江浦時時逢畫檝，寺樓處處聽新鶯。此生無復陽關夢，不怕樽前唱渭城。

春望

天地回春律，山川掃積陰。波光迎日動，柳色向人深。霧灑憂時淚，飛騰滅虜心。人扶上危榭，未廢一長吟。

丙辰上元前一日

弊裘破帽髮鬢髻，宛似山房罷講僧。身病不禁連夜雨，家貧只挂舊年燈。修椽柳外掀樓角，危檻雲間露塔層。自笑閑遊本無定，興闌隨處倚枯藤。

夜雨思栢蒼遊

道心退惰如風鶴，世念堅彊似火牛。安得短篷湖海去，夜深聽雨琵琶洲。

春陰

麴塵柳色正遮門，石黛江流曲抱村。小院春光方盎盎，遠山雨氣又昏昏。傍簷林鳥驚幽夢，極目煙蕪掩燒痕。只道餘寒尙如許，不知生意滿乾坤。

寒夜歌

陸子七十猶窮人。空山度此冰雪晨。既不能挺長劍以抉九天之雲。又不能持斗魁以回萬物之春。食不足以活妻子。化不足以行鄉鄰。忍飢讀書忽白首。行歌拾穗將終身。論事憤吐目若炬。望古踴躍心生塵。三萬里之黃河入東海。五千仞之太華磨蒼旻。坐令此地沒胡虜。兩京宮闕悲荆榛。誰施赤手驅蛇龍。誰恢天網致鳳麟。君看煌煌藝祖業。志士豈得空酸辛。

正月十六日園中偶賦

又向柴荆過上元。豪華前事不須論。偶逢花發閑持酒。不得人扶嬾出門。薄技號山曾獻玉。榮途染指亦嘗鼃。年來洗盡東陵夢。瓜壠蕭蕭老故園。

陵霄花

庭中青松四無鄰。陵霄百尺依松身。高花風墮赤玉蕊。老蔓煙溼蒼龍鱗。古來豪傑人少知。昂霄聳壑擊寧自期。抱才委地固多矣。今我撫事心傷悲。

懷舊

鶴鳴山下竹連雲。鳳集城邊柳映門。當日不知爲客樂。如今回首卻消魂。

又

駿驛西過雨漫天。千里江山在眼邊。二十四年如昨夢。憑誰問訊帶伽仙。

又

狼煙不舉羽書稀。幙府相從日打圍。最憶定軍山下路。亂飄紅葉滿戎衣。

又
翠崖紅棧鬱參差。小益初程景最奇。誰向豪端收拾得。李將軍畫少愛詩。

又

回龍寺壁看維摩。最得曹吳筆意多。風雨塵埃昏欲盡。何人更著手摩挲。

又

疇冢山頭是漢源。故祠寂寞掩朱門。擊鮮藉草無窮樂。送老那知江上村。

夜坐

蓬窗夜半竹騷然。坐守殘編悄不眠。辛苦空成左傳癖。逍遙常媿大慈仙。風寧可繫功名誤。日不能黏歲月邊。明旦覓船湖上去。西村桃李淡春煙。

入城舟中作

權邊離岸撥藍水。蓬外橫空破墨山。更著灘頭一行鷺。此身真在畫圖間。

寓蓬萊館

朱門高柳畫橋南。掠面風埃喜解驂。霽日偶逢春盎盎。野人不慣屋潭潭。堂中剩喜鸞裾集。樓上時聞鼓角酣。明發扁舟覓歸路。趁時吾欲事農蠶。

過能仁光孝寺欲訪昕老會府中速客遂不果入

春日城南過寶坊。馳驅不得駐車箱。高門臨道淨如拭。傑屋凌空勢欲翔。齋近鐘魚初送響。風微松檜自

生香暫來堪笑忙如許。坐羨高人白晝長。

夜二鼓留西城門歸三山

秉炬夜離驛。戴星出西關。舟人飛畫檝。門鎖響銅環。漁火明遙浦。溪風解醉顏。鄰家亦驚起。迎我笑堅頑。

讀杜詩

千載詩亡不復刪。少陵談笑卽追還。常憎晚輩言詩史。清廟生民伯仲間。

蘇軾光節推挽歌詞

才名京兆掾。門閥魏公孫。遇事雖骯髒。接人終靜溫。寧吟灞橋雪。不掃舍人門。二妙凋零盡。衰翁慨獨存。

軾光與詔直吏部下世相距三年。

村翁

放翁真箇是村翁。釣渭耕莘事不同。蹴蹋煙雲兩芒屨。憑陵風雪一蓬籠。屢經駭浪身終免。遍閱浮漚壽未窮。幸有春衣堪換酒。道邊醉臥示神通。

寄子布

釣灘耕壟雪盈簪。從入新年病至今。遠使有書常灑淚。長宵無夢更傷心。何由老眼迎歸櫂。空爲秋風感暮碁。一紙新詩千萬恨。臨風悵望獨長吟。

落花

朱朱白白不禁吹。老未忘情作許悲。瑞錦已殘猶有夢。明霞初散可無詩。人應偷樣傳圖本。天亦收香付

蜜脾榮悴相尋君看取。曉來青子已團枝。

南窗

身輕婚嫁畢。耳靜市朝疎。襖帶脫烏幘。一窗寬有餘。

排悶

白髮無端日日新。自憐猶作百憂身。孤燈聽雨常終夜。一棹尋花又送春。旋壓麥饑邀父老。時分菜把餉比鄰。不須頻起陳人歎。已是清朝六世民。

過鄰家戲作

老脫朝冠岸幅巾。時時乘興過比鄰。瓶無儲粟吾猶樂。步有新船子豈貧。醅盞香浮花露熟。藥欄土潤玉芝新。玉芝謂鬼白山家多有之。相從覓笑真當勉。又過浮生一歲春。

看花

好樹典衣買新花。扶杖看村醪。雜清濁。山果半甘酸。家事貧尤簡。詩情老未闌。鷓鴣閑似我。日暮立清灘。

閑趣

同儕零落曉星稀。久住人間豈自期。衰病已成垂白叟。春寒又到牡丹時。溪邊喚客閑持釣。燈下留僧共覆棋。一日轉頭還過卻。紛紛世事不須知。

春盡遣懷

鼻鼻爐香晝掩扉。殘年真是解塵機。青飴旋擣通鄰好。白葛新裁製暑衣。避日小魚穿藻去。倚風輕燕拂

簾飛。要知名宦非初意。三十年前已念歸。予以乾道乙酉卜築湖上。今三十有二年矣。

二友

清芬六出水榭子。堅瘦九節石菖蒲。放翁閉門得二友。千古夷齊今豈無。

半丈紅盛開

滿酌吳中清若空。共賞池邊半丈紅。老子通神誰得似。短筇到處卽春風。

感事

雞犬相聞三萬里。遷都豈不有關中。廣陵南幸雄圖盡。淚眼山河夕照紅。

又

堂堂韓岳兩驍將。駕馭可使復中原。廟謀尙出至導下。願用金陵爲北門。

又

渭上晝昏吹戰塵。橫戈慷慨欲忘身。東歸卻作漁村老。自誤青春不怨人。

又

捫蝨當時頗自奇。功名遠付十年期。酒澆不下胸中恨。吐向青天未必知。

豐年行

南村北村春雨晴。東家西家地碓聲。稻陂正滿綠針密。麥隴無際黃雲平。前年穀與金同價。家家涕泣伐桑柘。豈知還復有今年。酒肉如山賽春社。吏不到門人晝眠。老穉安樂如登仙。縣前歸來傳好語。黃紙續

放身丁錢。

四月一日夜漏欲盡起坐達旦

春歸不可留。斗柄已蟬。老至不可卻。雪鬢森千莖。少年所讀書。廢忘如隔生。舊交死欲盡。存者萬里程。高談無與廢。欲語輒吞聲。悠悠一飽計。泯泯千載名。逝將山丘歸。不見河雒清。挑燈坐待旦。攬筆衰涕傾。

蓬萊行

山峭插雲海。樓高入煙霄。不知何宮殿。東望鬱嵒巖。是時青童君。初散通明朝。風濤中破裂。涌出黃金橋。授我玉芝房。服之塵念消。凡骨一朝換。八極坐可超。

馮縣丞挽歌詞綱字仲柔

尊公同故里。季父接周行。晚熹烏衣巷。重逢玉樹郎。名流多賞識。榮路正騰驤。愁絕河梁上。風煙暮莽蒼。

幽居初夏

湖山勝處放翁家。槐柳陰中野徑斜。水滿有時觀下鷺。草深無處不鳴蛙。籊龍已過頭番筍。木筆猶開第一花。歎息老來交舊盡。睡餘誰共午甌茶。

又

藤冠草屨病支離。門外紛紛百不知。解箨有聲驚倦枕。飛花無力點清池。閑思舊事惟求醉。老感流年只自悲。綠樹陰中紅練起。一翬香亂壓燕脂。

又

長歌嫋嫋插秧天。小繖飄飄入市船。高棟巢乾初乳燕。綠槐陰密已鳴蟬。只言未俗人情惡。未廢先生日晏眠。推枕起來閑弄筆。銅蟾手自挹寒泉。

又

鬢毛禿盡齒牙疎。難受人間折簡呼。詩酒本來無藉在。形骸況復不枝梧。槐陰漸密能鄣日。池水新生可浴龜。移得太行終亦死。平生常笑北山愚。

出蜀十九年故交零落殆盡慨然有作

西遊邂逅得諸君。落筆千言酒百分。聚散亦知元有數。死生豈料不相聞。平羌空憶吟江月。小益何由度棧雲。一事與君聊自慰。兒曹或可付斯文。

憶天彭牡丹之盛有感

常記彭州送牡丹。祥雲徑尺照金盤。豈知身老農桑野。一朵妖紅夢裏看。

五月七日夜夢中作

征行過孤壘。寂寞已千年。馬病霜膏瘦。狐鳴古冢穿。煙塵身欲老。金石志方堅。零落英雄盡。何人共著鞭。

又

霜露薄貂裘。連年塞上留。蘆笳青冢月。鐵馬玉關秋。振臂忘身儘。憑天報國讎。諸公方袞袞。好運幄中籌。

急雨

急雨清風發土香。靈臺如受寶犀涼。華膏一枕遽然覺。卻聽蟬聲送夕陽。

夜中步月

夜半不成寐。起尋微月行。風生驚葉墮。露重覺荷傾。兀兀酒中趣。悠悠身後名。興闌還掩戶。坐待日東生。

晨起

齒豁不可補。髮脫無由裁。清晨明鏡中。老色蒼然來。餘年亦自惜。未忍付酒杯。抽架取我書。危坐闔復開。萬世見唐堯。夔龍獲親陪。寥寥三千年。氣象挽可回。豈以七尺軀。願受世俗責。道在無不可。廊廟均蒿萊。

枕上聞布穀聲

老去惟思日月遲。更堪青鬢總成絲。無端催取流年去。最恨溪頭布穀兒。

雨夜

北風吹雨亂疎鐘。蔌蔌燈花破碎紅。孤夢正行天一握。高城俄報鼓三通。衰遲空抱屠龍技。豪俊誰收汗馬功。但願輿圖早來復。白頭敢望起雲中。孤雲兩角。去天一握。蓋窺斜道上也。

焚黃

啼呼梨棗憶兒時。駒隙頻經日月馳。早歲已興風木歎。餘生永廢蓼莪詩。燎黃恩重空垂泣。戴白身存敢自期。足蹇僅能成拜起。籃輿歸路不勝悲。

卽事

陶令常耽酒。龐翁不出家。安貧炊麥飯。省事嚼茶芽。池滿浮雞鴨。庭荒噪謁蛙。詩成賞音絕。自向小兒誇。

失鷓鴣

不見池邊整羽衣。繞村散覓走羣兒。卑飛正恐爲人得。徑去何須報我知。久憶蘋洲應自喜。尙餘菰米亦堪悲。放翁未到忘情處。日暮憑欄獨詠詩。

贈童道人蓋與子同甲子

吾儕之生乙巳年。達者寥寥窮此肩。退士一生藜藿食。散人萬里江湖天。忍貧不變我自許。挾術自營君豈然。一事尙須煩布策。幾時能具釣魚船。方謀買一小舟。未到也。

上方鉅老求宿蘆詩宿蘆蓋所寓室名以其似漁舟也

一曲亭前水接天。放翁短棹弄風煙。宿蘆縱有江湖趣。猶是人間賈釣船。

夜坐園中至夜分

岸巾閑倚胡牀坐。步履還扶拄杖行。漸近秋清知病減。盡捐世累覺心平。翻翻雙鶴風枝爽。熠熠孤螢露草明。更欲裴回盡幽興。鐘譙傳漏報三更。

六月二十四日夜分夢范至能李知幾尤延之同集江亭諸公請予賦詩記江湖之樂詩成而覺忘數字而已

露箬箱筠織短篷。飄然來往淡煙中。偶經菱市尋路友。卻揀蘋汀下釣筒。白菌菖香初過雨。紅蜻蜒弱不禁風。吳中近事君知否。團扇家家畫放翁。

晨起

月澹知將曉。風清喜近秋。狂吟詞跌宕。新沐髮颺颺。桐葉危先墮。蟬聲斷更遒。達生隨處樂。自笑替人愁。

村飲示鄰曲

七年收朝迹，名不到權門。耿耿一寸心，思與窮友論。憶昔西戍日，孱虜氣可吞。偶失萬戶侯，遂老三家村。朱顏捨我去，白髮日夜繁。夕陽坐溪邊，看兒牧雞豚。雕胡幸可炊，亦有社酒渾。耳熱我欲歌，四座且勿喧。卽今黃河上，事殊曹與袁。扶義孰可遣，一戰洗乾坤。西醉吳玠墓，南招宗澤魂。焚庭涉其血，豈獨清中原。吾儕雖益老，忠義傳子孫。征遼詔儻下，從我屬囊韃。

醉歸

十畝春蕪手自犁，瓜牛廬在鏡湖西。禪心每笑彈棋局，道眼長捐刮膜篋。絕食就官分鶴料，無車免客笑雞栖。頃獨有一竹輿，今亦壞矣。旗亭酒賤秋風近，夜夜歸來醉似泥。

二愛并序

陶淵明詩云：孟夏草木長，遶屋樹扶疎。衆鳥欣有託，吾亦愛吾廬。孟東野亦云：遠岸雪難暮，勁枝風易號。霜禽各嘯侶，吾亦愛吾曹。予暇日詠二詩有感，作二愛詩。

結屋不袤丈，著身還有餘。破壁作小窗，亦足陳吾書。無酒當飲水，無肉當飯蔬。知止乃不殆，此語良非虛。古人造道處，正自無絕殊。願君勿它求，且復愛吾廬。門外秋水深，日日集鷗鷺。是豈相與期，正以同類故。殘年過七十，朋舊半丘墓。非吾濟世心，歎息莫予助。人生非金石，去日如脫兔。三復東野詩，獨立悲歲暮。

靖艇浦

舍北蜻蜒浦。新秋偶一來。菱絲煙際老。芡背露中開。漁火明還滅。沙禽去卻回。吾行與無盡。舟子莫相催。

題韓運鹽竹隱堂絕句三首茂卿字立道

鄉下王孫今勝流。相逢三伏凜生秋。未嘗一日可無竹。似是前身王子猷。

又

塵埃車馬日駸駸。誰解從君一散襟。待我清秋有閑日。抱琴來寫萬龍吟。

又

靜處知君解策勳。爐香鼻鼻起微雲。岸巾不住尋青士。敲枕還應對墨君。

哭杜府君

叔高初過我。風度何玉立。超然衆客中。可慕不待揖。入都多賓友。伯高數來集。質如琮璧潤。氣等芝蘭襲。晚乃過仲高。午日曬行笠。忽忽遽別去。悵望空快悒。有如此三高。青紫何足拾。豈無知之者。相視莫維繫。窮魚雖相憫。可媿吐微溼。亦知尊公賢。何止蓋鄉邑。向風每拳拳。識面眞汲汲。秋風忽聞訃。執書歎以泣。造門不自決。追悔今何及。又聞著書富。手澤溢巾笈。哀毀要無益。遺稿勸綴緝。

初秋夜坐

徂歲又如許。吾生真若浮。露蟬鳴達曉。風葉墮先秋。野迴星辰大。天空河漢流。胡牀幸亡恙。且復寄悠悠。

冥坐自午至暮

身外寥寥掃怨恩。胸中浩浩納乾坤。飽經世事常高枕。慣見人情不署門。孤日夜生海底。百川秋漲沂。

河源瑀貂碧落從來事。東訪蓬萊不足言。

舟中詠落景餘清暉。輕橈弄溪渚之句。蓋孟浩然耶溪泛舟詩也。因其句爲韻賦詩。

獨鶴還故鄉。踴然但城郭。出門無與遊。所至苦寂寞。裹飯事幽討。此計殊不惡。薄暮宿漁家。蒼煙帶墟落。

又

維舟入谷口。信步造異境。隔籬雞犬聲。滿地梧楸影。瓦甌炊香稻。石泉汲新井。人間苦偏仄。愛此須臾景。

又

老圃髮如霜。見客能廢鋤。與坐使之年。自云八十餘。老身六朝民。草舍數世居。力守遠祖言。一字不學書。

又

沿溪得茅店。酒旗出柴荆。杖頭錢已空。一醉何由成。主人語鄭重。手把甕面清。勸我姑小留。溪魚亦可烹。

又

秦皇酒壘邊。古有釣魚磯。我來必竟日。時挈雙鯉歸。白鷺真可人。常先孤棹飛。高詠江練句。令人憶玄暉。

又

鏡湖三百里。風止鏡面平。持以照吾心。俗塵安得生。散髮鷗鷺間。萬事秋毫輕。誰能拂東絹。寫我孤舟橫。

又

朝發雲根寺。暮宿煙際橋。冷螢溼不飛。潛魚驚自跳。菱船歌鼻鼻。荻浦風蕭蕭。平明宿鳥起。我亦理歸橈。

又

古祠照滄波。老木闕雲洞。輕舟不搖楫。正用一風送。汲井漱甘液。掃榻寓幽夢。所恨山未深。城笳聽三弄。

又

禹穴探斷簡。樵風泛清溪。倒影森松桂。避船散鳥鷺。塵中有異境。十里青玻璃。高塔忽招人。湖邊日未低。

又

溪行已清秋。還舍尙殘暑。天公爲解圍。籠櫺過疎雨。青蔬喜小摘。紅粒亦新杵。一飽坐北軒。蘋花泣煙渚。

陸放翁集

劍南詩集

卷第三十五

浮生

浮生真是寄郵亭。短鬢忽忽失故青。睡少始知愁有力。病增方歎藥無靈。謀生嬾似逢秋燕。訪舊疎於欲
旦星自笑若爲銷。此恨濁醪聊復倒餘瓶。

秋夜

高屐枯筇一老翁。燈前自笑髮如蓬。冷冷月浸荒庭竹。淅淅風凋古井桐。病思未蘇秋尙淺。醉魂初醒夜
方中。故人萬里無消息。便擬江頭問斷鴻。

秋夜紀懷

缺月淡欲盡。老雞鳴苦遲。聊爲待旦坐。不作感秋悲。魯叟一王法。幽人七月詩。平生經世志。老死欲誰期。

又

矍矍起西城。老氏奮中州。談理一家說。憂民千載憂。橫流當有自。獨立豈相仇。垂世詩書在。兒童勿外求。

又

北斗垂莽蒼。明河浮太清。風林一葉下。露草百蟲鳴。病入新涼減。詩從半睡成。還思散關路。炬火驛前迎。

書懷

蕭颯先秋鬢，龍鍾未死身。不惟今日老，已是一生貧。食菜從兒瘦，關門任客嗔。世間餘一念，河雒尙胡塵。

林居秋日

桔槔引水透荒畦，病臥蠅廬不厭低。小聚數家秋竊裏，平波千頃夕陽西。亭臯草木猶蔥蒨，天上風雲已慘悽。適負如山炊米盡，終年枉是把鉏犁。

七月二十四日作

閑拂青銅一惘然，此生應老海雲邊。涼颺入袂詩初就，幽鳥呼人夢不全。天上鶴歸星渚冷，月中桂長露華鮮。射胡羽箭凋零盡，坐負心期四十年。

枕上作時聞臨海四明皆大水

撫枕時時猶歎歎，厄窮已極畏凶饑。雨聲浙瀝孤齋冷，客夢蕭條萬里歸。山邑風雷移厓穴，海城水潦半民扉。如雲秋稼方相賀，一飽還憂與願違。

書懷

漫道年來未極衰，窮途憔悴實難支。半分臂減休文瘦，七尺軀存曼倩飢。尙憶青衫陪衆薦，寧期白首負明時。悠然萬里煙波興，卻卻沙鷗總不知。

秋陰至近村

村店閑尋酒筇枝，瘦倚肩。雲齊龍卷雨，野曠鶴盤天。露井飄桐後，清觴泛菊前。欲歸還小立，搔首意悠然。

閑居自述

自許山翁癩是真紛紛外物豈關身。花如解笑還多事。石不能言最可人。淨掃明窗憑素几。閑穿密竹岸烏巾。殘年自有青天管。便是無錐也未貧。

秋雨初霽試筆

墨入紅絲點漆濃。閑將倦筆寫秋容。雨聲已斷時聞滴。雲氣將歸別起峯。斜日半穿臨水竹。好風遙送隔城鐘。遠遊更動輕舟興。太息何人解見從。

幽懷

苦茅架竹亦吾廬。病起幽懷得小摠。愛酒已捐身外事。閉門猶讀死前書。鄰家人喜添新穉。小市奴歸得早蔬。但使身安歲中熟。敢辭老境落樵漁。

雨後出門散步

細水穿沙溜。殘雲扶雨歸。不成遊酒市。且作倚漁扉。老大徂年速。羈窮壯志違。破裘雖百結。猶勝泣牛衣。

又

病葉常先竄。寒潮只暗生。扶衰賴藥石。隨意出柴荆。細路牛欄濕。疎籬積火明。枯榮不須計。千古一蒿枿。

秋夜示兒輩

吳下當時薄阿蒙。豈知垂老歎途窮。秋砧巷陌昏昏月。夜燭簾櫳裊裊風。縮項鱸魚收晚釣。長腰粳米出新甔。兒曹幸可團樂語。憂患如山一笑空。

七十二歲吟

七十人言自古稀。我今過二未全衰。讀書似走名場日。許國如騎戰馬時。秋晚雁來空自感。夜闌酒盡不勝悲。涓濱星實逾千載。一表何人繼出師。

雨夜讀書

風雨瀟瀟吞孤村。讀書擁褐不出門。歷觀忠邪見肝肺。直與治亂窮根原。傳巖之野感帝夢。此事難以今人論。危冠長劍一見用。萬里耕桑吾道尊。

又

一燈如螢雨滂滂。老夫讀書蓬戶間。但與古人對生面。那恨鏡裏凋朱顏。功名本來我輩事。人自踰蹉天何慳。君看病驥瘦露骨。不思仗下思天山。

秋晚

聚落蕭條古埭東。蘆藩蓬戶臥衰翁。井桐葉盡新霜後。衣杵聲繁夕照中。身似敗棋難復振。心如病木已中空。村醪酸澀君無笑。也解燈前作臉紅。

新菊

已過重陽十日期。菊蕊初破兩三枝。自憐短鬢蕭蕭白。不似黃花驛裏時。黃花驛在岐風間。予嘗過之。

又

老去流年不耐催。微霜又見菊花開。莫言冷落西風晚。也有飛飛小蝶來。

九月二十八日五鼓起坐抽架上書得九域志泫然有感

一事無成老已成。不堪歲月又崢嶸。愁生新雁寒初下。睡起殘燈曉尚明。天地何由容醜虜。功名正恐屬書生。行年七十初心在。偶展輿圖淚自傾。

題橋南堂圖

平生不識橋南路。閒道清流帶煙樹。今朝開卷一欣然。恍若身親到其處。徐郎獨立巖如山。招不能來麾不去。舊居萬瓦碧浮煙。結茅卻就橋南住。雪盡春生水似藍。想君清獻釣魚菴。道上缸臺高十丈。斷無一點到橋南。

題吳參議達觀堂勝蓋朱希真所作也僕少亦辱知於朱公故尤感慨云

中原遺老雒川公。鬢鬢白盡雙頰紅。揮毫爲君作齋勝。想見眼中餘子空。餘子碌碌何足數。獨付莊周賈生語。看君踐履四十年。始知此公不輕許。公今度世爲飛仙。開卷使我神凜然。清時臺省要才傑。諸公誰致雒川客。

舍北搖落景物殊佳偶作

今年冬候晚。仲月始微霜。野日明楓葉。江風斷雁行。窮塗多藉躡。老境易悲傷。自笑詩情嬾。蕭然舊錦囊。又
路擁新霜葉。溪餘舊漲沙。栖鳥初滿樹。歸鴨各知家。世事元堪笑。吾生固有涯。南村聞酒熟。試遣小僮賒。

小聚鷗沙北。橫林蟹舍東。船頭眠醉叟。牛背立村童。日落雲全碧。霜餘葉半紅。窮鱗與倦翼。終勝在池籠。

又

屋角成金字。溪流作縠紋。斜通小橋路。半掩夕陽門。孤艇衝煙過。疎鐘隔塢聞。杜門非獨病。實自厭紛紛。

又

草徑人稀到。柴扉手自開。林疎鴉小泊。溪淺鷺頻來。簷角除瓜蔓。牆隅斲芋魁。東鄰麝肉至。一笑舉新醅。

自嘲

身見紹興初。改元百濯敢料至今存。生涯破碎餘龍具。學問荒唐守兔園。獨立未除還芻氣。餘生猶待闔棺論。北窗燈暗霜風惡。且置孤愁近酒樽。

作夢

作夢今逾七十年。平生懷抱尚依然。結茅杜曲桑麻地。覓句灞橋風雪天。驪騎向來求作佛。淮南末路望登仙。世間妄想何窮盡。輸與山翁一醉眠。

夜坐

杳杳霜鐘十里聲。娟娟江月半窗明。陳編欲絕猶堪讀。微火相依更有情。九曲煙雲新散吏。時方被命再領武夷祠。祿百年鉛槧老諸生。頽然待旦君無笑。尚勝聞雞賦早行。溫岐詩云。雞聲茅店月。人迹板橋霜。蓋人早行絕唱也。

北園雜詠

西村林外起炊煙。南浦橋邊繫釣船。樂歲家家俱自得。桃源未必是神仙。

又

舍北橋東幽事多。老夫飯飽得婆娑。簷茅日落聞春相。荻浦煙深有樵歌。

又

小橋密接西岡路。支徑深通北嶺村。老子意行無遠近。月中時打野人門。

又

東吳霜薄富園蔬。紫芥青菘小雨餘。未說春盤供采擷。老夫湯餅亦時須。

又

鉏麥家家趁晚晴。築陂處處待春耕。小槽酒熟豚蹄美。剩與兒童樂太平。

又

闌伴鄰翁去荷鋤。林疎歷歷見村墟。怪生白鷺飛無數。水落灘生易取魚。

又

短筇行樂出柴荆。雪意闌珊卻變晴。林際已看春雉起。屋頭還聽歲猪鳴。

又

歲殘已似早春天。隔水橫林一抹煙。聞道埭西梅半吐。攜兒閑上釣魚船。

又

白髮蕭蕭病滿身。凍雲野渡正愁人。揚鞭大散關頭日。曾看中原萬里春。

又

暮年身似一虛舟。付與滄波自在流。垂地雪雲吹不散。且傾桑落贈槎頭。

龜堂獨坐遺悶

髮已凋疎齒已搖。高談誰與慰無聊。苦心雖嘔何由出。病骨非譏亦自銷。玉雪細塵烹瑞草。煙脂小把斲靈苗。防風苗色紅如藤脂。可作葯。賀公吳語吾能似。太息遺魂不可招。

又

放逐還山八見春。枯顛槁項雪霜新。大牀不解除豪氣。凡眼安能識貴人。食有渾糜猶足飽。衣存短褐未全貧。北窗坐臥君無笑。拈起烏藤捷有神。

復竊祠祿示兒子

得飽不啻足。閉門還讀書。翁猶糞不糝。兒固食無魚。衰繡曷加我。簞瓢常晏如。人生隨所遇。勿替此心初。

隴頭水

隴頭十月天雨霜。壯士夜挽綠沉槍。臥聞隴水思故鄉。三更起坐淚數行。我語壯士勉自彊。男兒墮地志四方。裹尸馬革固其常。豈若婦女不下堂。生逢和親最可傷。歲盡金絮輸胡羌。夜視太白收光芒。報國欲死無戰場。

雪歌

黑雲黯黯如翻鷗，急散颯颯疑投沙。初聞萬竅號地額，已見六出飛天花。寧論異事吠羣犬，且喜和氣連千家。穿簾投隙矜嫵媚，平坑塞谷迷浥笏。遙遙林塔出玉筍，渺渺江路蟠脩蛇。扣門方擬貰鄰酒，篝火更欲尋僧茶。懸知朝士集闕角，靴聲入賀趨正衙。吾衰久矣尙何說，所幸一稔均幽遐。

春近

短褐枯筇老病身，龍鍾也復喜新春。已知不解多年住，且作都無一事人。簷角鳥聲呼醉夢，室中花氣襲衣巾。朝來更有欣然處，一筇山蔬勝八珍。

望永阜陵

聖主乘乾臨斧屐，小臣承詔上丹墀。寧知齒豁頭童後，更遇天崩地陷時。泣至眼枯無血續，夢隨魂斷獨心知。白頭才盡空濡筆，寧繼生民下武詩。

初拜再領洞宮之命有感

黃紙初開喜可知，追懷平昔卻成悲。生當京國承平日，仕及皇家再造時。小草出山初已誤，斷雲合雨欲何施。兒孫賀罷仍無事，卻赴幽人把釣期。

醉中信筆作四絕句既成懼觀者不知野人本心也復作一絕

麥野桑村有酒徒，過門相覓醉相扶。朱門日日教歌舞，也有儂家此樂無。

又

過得一日過一日，人間萬事不須謀。鄰家幸可賒芳醞，紅蕊何曾笑白頭。

今朝寶殺得青錢。自出街頭買麩肩。草火燎來香滿屋。未容下筯已流涎。

又

老覺人間足畏塗。怕人渾似怕於菟。晴明頗動青鞵興。先探門前有客無。

又

治道巍巍本易成。狂言安得略施行。太平事業人皆見。不計封倫死與生。

臘月十九日午睡覺復酣臥至晚戲作

枕痕著面眼芒羊。欲起元無抵死忙。擁被卻尋初斷夢。掩屏重撥欲殘香。雪雲雖散寒猶緊。春意將回晝已長。老去此身無著處。華胥真恐是吾鄉。

睡起至園中

春風忽已遍天涯。老子猶能領物華。淺碧細傾家釀酒。小紅初試手栽花。野人易與輸肝肺。俗語誰能挂齒牙。更欲世間同省事。勾回蟻戰放蜂衙。

北園籬外散步

北園西出路逶迤。荆作門扉枳縛籬。鋤麥正忙人滿野。營巢未定鷦爭枝。招呼父老嘗新釀。約束兒童築壞陂。適興閑行便終日。隔溪續火已參差。

歲暮獨酌感懷

明時頻忝武夷仙。俯仰人間只自憐。總角回思如昨日。挂冠過限已三年。病多暗日思行藥。睡少清宵學坐禪。更歎衰孱不禁酒。地黃一盞卽頽然。

盆池

雨送疎疎響。風吹細細紋。猶稀綠萍點。已映小魚羣。傍有一拳石。又生膚寸雲。我來閑照影。一笑整綸巾。

對食

蓬壺生庭葉擁塔。經旬飯豆爨枯藍。煙霄舊謂行夷路。薪水今悲繫病懷。夢裏百年元易過。人間萬事苦難諧。癡兒自墮罔黎計。歡喜聞鐘已過齋。

踏蹬

少慕功名頗自奇。一生踏蹬髮成絲。市樓酒美貧何預。斗柄春回老不知。黑幟遊魂應有數。白衣效命永無期。魚梁東畔牛欄北。舉世誰能識此悲。

海棠圖

人間奇草木。天必付名流。菊待陶元亮。竹須王子猷。我爲西蜀客。辱與海棠遊。再見應無日。開圖特地愁。

丁巳正月二日雞初鳴夢至一山寺名鳳山其尤勝處曰味軒予爲賦詩旣覺不遺一字。已窮阿閣勝。更作味軒遊。不盡山河大。無根日月浮。吾身元是幻。何物彊名愁。久覓卓菴處。是間應可留。

初春

誰把鵝黃染柳絲。似催鄰曲蹋青期。已忘萬里封侯志。但憶千回上樹時。朝雨池塘光澈澹。暮煙樓觀碧

參差紫姑一作行羈欲問還休去。身世從來心自知。

雨中作

三日雨頻作。昏昏曉睡眠。泥深散酒市。風惡惱燈天。茅屋松明照。茶鑪雪水煎。山家自成趣。無怵寄悠然。

又

浙浙連江雨。惜惜一室幽。茶甘留齒頰。香潤上衣裘。泥滓將雛鴨。林焚喚婦鳩。短章雖漫興。聊足散吾愁。

又

短鬢白如絲。梅花似舊時。掩屏愁入夢。隱几雨催詩。病爲陰天劇。春緣閨歲遲。非關畏車馬。衰甚實難支。

縱筆

氣本充天地。書非汗馬牛。人人見堯舜。世世有巢由。朝市紅塵鬧。山村白髮稠。所欣吾道在。江漢古東流。

題慧老芋巖

煨芋當時話已新。如今拈出更精神。十年相國非吾願。半顆君當別付人。

立春日

江花江水每年同。春日春盤放手空。天地無私生萬物。山林有處著衰翁。牛趨死地身無罪。梅發京華信不通。數片飛飛猶臘雪。村鄰相喚賀年豐。去年無雪今年以正月十日已時立春而平旦有雪數片猶臘雪也。

病中作

老軀百病集。頽然仰天呼。汝病勿怨天。藥石幸可扶。寓形天地間。疾病誰能無。不從酒色來。病自無根株。但使元氣在。雖劇行當蘇。哀哉忿慾子。永棄元化爐。

又

牧羊知治民。解牛得養生。一理儻造微。何事不可明。我老抱病久。頗窺古人情。唐堯授四時。帝道所以成。周家七百年。王業本農耕。造端無甚奇。至今稱太平。人生正如此。默默要無營。心君但高拱。萬物安能擾。花壓烏巾酒滿卮。舊逢春日恨春遲。如今病臥孤村裏。過了新春也不知。

又

慶元丁巳春來晚。人日初過近上元。空對一樽三太息。無人爲戴縷金旛。

北望

中原墮胡塵。北望但莽莽。蒼年死已盡。童稚日夜長。羊裘左其衽。寧復記疇曩。豈無豪俊士。憤氣塞穹壤。我欲友斯人。悲詔寄遐想。夢行黃河濱。雲開見仙掌。

上元夜作

百年古謂風前燭。我逾七十飯不足。只知生世無工拙。久向人間耐榮辱。今年上元燈滿城。十里東風度。絲竹蓬窗溼薪不禦寒。獨取殘書伴兒讀。忽然得意見古人。半碗凍齋甘勝肉。書生蓋棺事未定。論著儻存終見錄。富貴無名豈勝數。意氣空能驕世俗。君不見柱天柱地邢君牙。不如詩人窮賸張太祝。

長歌行

不羨騎鶴上青天。不羨峨冠明主前。但願少賒死。得見平胡年。一朝胡運衰。送死桑乾川。胡星澹無光。龍庭爲飛煙。西探過葱嶺。東戍踰朝鮮。巍巍天王都。九鼎奠澗瀍。萬國朝未央。玉帛來聯翩。黃頭汝小醜。汗我王會簞。盡誅非無名。不足煩戈鋌。遠汝以舊職。牧羊遼海邊。

讀書

兩眼欲讀天下書。力雖不迫志有餘。千載欲追聖人徒。慷慨自信寧免愚。置書不讀談虛無。誰其始爲此創疽。古時澤被禽與魚。博施所以爲唐虞。正使老釋信不誣。爲我未免近揚朱。高軒大旆塞路衢。臺閣尊顯來于于。安得禹臯日。陳謨沾濡四表無焦枯。坐令事業見真儒。老農不恨老耕鋤。

枕上作

龍鍾七十豈前期。矮帽枯筇與老宜。愁得酒卮如敵國。病須書卷作良醫。登山筋力雖猶健。閉戶工夫頗自奇。今日快晴春睡足。臥聽簷鳥語多時。

書志

往年出都門。誓墓志已決。況今蒲柳姿。俯仰及大耋。妻孥厭寒餓。鄰里笑迂拙。悲歌行拾穗。幽憤臥齧雪。千歲埋松根。陰風蕩空穴。肝心獨不化。凝結變金鐵。鑄爲上方劍。豈以佞臣血。匣藏武庫中。出參鬣頭列。三尺粲星辰。萬里靜妖孽。君看此神奇。醜虜何足滅。

夜賦

簷滴新春雨，窗昏半夜燈。病無詩一字，窮賴酒三升。郡中月設折酒九斗，日恰得三升，世路澀如棘，祠官冷欲冰。殘年只此是，年少解飛騰。

晚步

晚步清溪上，微陰忽快晴。鴉棲先小泊，魚暖已羣行。藥餌扶垂老，耕桑樂太平。非關戀鄉社，久客倦遐征。

漁歌

斜陽收盡暮煙青，嫋嫋漁歌起遠汀。商路野人何所恨，數聲哀絕不堪聽。

殘夢

少時鐵馬蹴河冰，老去摧藏百不能。風雨滿山窗未曉，只將殘夢伴殘燈。

書憤

白髮蕭蕭臥澤中，祇憑天地鑒孤忠。阨窮蘇武餐麩久，憂憤張巡嚼齒空。細雨春蕪上林苑，頽垣夜月落陽宮。壯心未與年俱老，死去猶能作鬼雄。

又

鏡裏流年兩鬢殘，寸心自許尙如丹。衰遲罷試戎衣窄，悲憤猶爭寶劍寒。遠戍十年臨的博，壯圖萬里戰皋蘭。關河自古無窮事，誰料如今袖手看。

小舟遊西涇度西岡而歸

小雨重三後，餘寒百五前。聊乘瓜蔓水，閑泛木蘭船。雪暗梨千樹，烟迷柳一川。西岡夕陽路，不到又經年。

春行

九日春陰一日晴。強扶衰病此閑行。猩紅帶露海棠溼。鴨綠平堤湖水明。社子美曉看紅溼處。花重錦官城。李太白蜀江紅且明。用選字明字。可謂春造化之功。世未有拈出者。酒賤柳陰逢醉臥。土肥稻壘看深耕。山翁莫道渾無用。解與明時說太平。

姜總管自築墓舍名繭菴求詩

君不見鬻翁退隱真皇時。繭室遺名星日垂。雖無豪士千車送。不媿高人一錫隨。又不見貞觀故人有王顯。抵老權頹不作繭。一時戲語今尙傳。人生窮達誰能免。繭菴知君出游戲。壽過期頤乃常事。青松手種三千本。會看半空翻鼓吹。人老則衰君不然。快瀉玉船鯨吸川。釣璜遠祖應相似。八十方爲筮仕年。

湖上今歲遊人頗盛戲作

龍船看罷日平西。柳闇花穠步步迷。射的山前朱舫小。樵風溼上紫騮嘶。

又

畫船鼓吹載涼州。不到三更枉出遊。忽有歌聲出霄漢。誰家開宴五雲樓。

又

翠阜青林煙疊重。朱樓畫閣雨空濛。禹祠西走蘭亭路。一片湖山錦繡中。

又

臺府官醅歲歲新。蘭亭春勝鏡湖春。三山小瓮雖堪笑。也向湖邊作醉人。

賞花至湖上

吾國名花天下稀。園林盡日敞朱扉。蝶穿密葉常相失。蜂戀繁香不記歸。欲過每愁風蕩漾。半開却要雨霏微。良辰樂事真當勉。莫道忽忽一片飛。

暮春

季子黃金盡。安仁白髮新。無情五更雨。便送一年春。難續西樓夢。空存北陌身。海棠應似舊。惆悵又成塵。

又

綠葉枝頭密。青蕪陌上深。江山妨極目。天地入孤吟。身已雙蓬鬢。家惟一素琴。世情君莫說。頭痛欲涔涔。

暮春

數間茅屋鏡湖濱。萬卷藏書不救貧。燕去燕來還過日。花開花落卽經春。開編喜見平生友。照水驚非曩歲人。自笑滅胡心尚在。憑高慷慨欲忘身。

卷第三十六

九里

破曉憑鞍野興濃。鷺飛先我過村東。綠鍼細細稻浮水。絳雪紛紛花舞風。陌上鞦韆喧笑語。擔頭榘杖簇青紅。誰知老子裴回意。絕愛山橫淡靄中。

清明

陸放翁集 卷三十五 劍南詩集 卷三十六

氣候江吳異。清明乃爾寒。老墳丘墓感。貧苦道途難。燕子家家入。梨花樹樹殘。一春回首盡。懷抱若爲寬。

一百五日日行

一百五日日東郊。時陂塘水滿。雨如絲。人家青煙不禁火。俚俗豈復思子推。舊墳年多木已拱。新墳積土高。蠶熟老鴉飛。鳴啣肉去。紙錢雨溼。挂樹枝深。松茂柏死。自樂地下。應笑生人。悲眼中青山身後塚。此事決定君何疑。風吹雲破。日下照。小灘碎礫。光陸離。停車暫憩道傍舍。解囊且補殘春詩。

送李憲被召舊與其先侍郎遊從

早謁龍門鬢未秋。暮年乃復接英遊。海瀕已幸見公子。瓜壘仍煩訪故侯。霖雨卽陪諸老進。德星肯爲一方留。西城柳色青如許。欲挽長條特地愁。

初夏

已過浣花天。行開解粽筵。店沽浮蠟酒。步橫載秧船。古俗交情久。豐年樂事偏。出波蕝菜滑。上市鱖魚鮮。僧關梅山麓。漁扉禹廟壩。丹青不可畫。得句一欣然。

幽居

社結山林友。家藏種樹書。蔽牀卜宅。容駟笑高閭。薄飯頻蔬韭。單衣旋製練。東家借蹇罷。南市買船初。美景遊俱遍。鄰翁好不疎。時時得乘興。豈獨愛吾廬。

閑適

朝讀易一卦。時鈔史數行。花開聊把酒。睡起獨焚香。寂寂市聲遠。悠悠村日長。吾衰尙何恨。兒女解耕桑。

病中夜賦

客如病鶴臥。還起燈似孤螢闔。復開。首宿花催春事去。梧桐葉送雨聲來。滎河溫洛幾時復。志士仁人空自哀。但使胡塵一朝靜。此身不恨死蒿萊。

閑身

炊烟漠漠閉柴荆。聊用閑身答太平。重碧飛觴心未老。硬黃臨帖眼猶明。吳蠶滿箔含桃熟。蠟麥登車搏黍鳴。補則息跡今有地。問君何處用虛名。

書感

奪壁元知價不饜。屠龍誰信本無求。哦詩聲裏歲時速。憂國淚邊天地秋。已欠謝安俱泛海。況無王粲與登樓。此身著處憑君記。萬里烟波沒白鷗。

衰病

衰病集餘日。推移成老翁。衡門隱者趣。大布古人風。几杖呻吟裏。山川莽蒼中。從來世緣薄。不是坐詩窮。

雜題

少談王霸謀身拙。晚好詩騷學道疎。賴有一籌差自慰。閉門不作子公書。

又

莫笑花前白髮新。官和人醉慶元春。何時道路平如砥。卻就清伊整幅巾。

又

三生元是出家人。一念差來墮薦紳。二寸楮冠雙草屨。天公還我水雲身。

又

黃庭兩卷伴身閒。盤篆香殘日未殘。茫茫孤身似萍葉。始知天地不勝寬。

又

年華偃蹇留不住。鬢雪縱橫耘更多。樂天不生夢得死。恨無人續竹枝歌。

又

年來世事掃除盡。猶有閑吟頗自奇。安得陟釐九萬箇。爲君盡寫暮年詩。

自傷

朝雨暮雨梅子黃。東家西家鬻蘭香。白頭老練哭空堂。不獨悼死亦自傷。齒如敗屨髮如霜。計此光景寧久長。扶杖欲起輒仆牀。去死近如不隔牆。世間萬事俱茫茫。惟有進德當自強。往從二士餓首陽。千載骨朽猶芬芳。

雨後絕涼偶作

槐陰日色薄。桐葉雨聲長。林下有餘適。城中無此涼。浮瓜寒水碧。斲藥小鉏香。未許陶潛達。華簪何足忘。
陶詩云。聊用忘華簪。

村居

黍酒濃浮瓮。瓜菹綠映盤。老便藜粥美。病喜粟漿酸。紗帽新裁穩。絕袍舊製寬。村居亦何好。聊用發詩端。

久雨

水長平侵岸，雲低半失村。菰蒲亂鳧鴨，泥潦困雞豚。弄筆排孤悶，煎茶洗睡昏。荒郊多狗盜，及早閉柴門。

七十三吟

七十三年事事新，涵濡幸作六朝民。髮無可白方爲老，酒不能賒始覺貧。末路已悲身是客，此心猶與物爲春。柴門勿謂常岑寂，時有鄉鄰請藥人。

會稽

海近風雲惡，城高鼓角雄。山川橫慘淡，樓閣半虛空。故國千年鶴，征途萬里篷。餘生猶幾日，盡合付杯中。

泛舟

山照澄波髮鬢青，新蒲梢上立蜻蜓。孤舟每爲尋詩出，輸與漁翁醉不醒。

夜觀子虞所得淮上地圖

閉置空齋清夜徂，時聞水鳥暗相呼。胡塵漫漫連淮潁，淚盡燈前看地圖。

水村

豕住煙波似畫圖，殘年不復歎頭顱。深深竹塢見螢度，翳翳菰叢聞鳥呼。十里笳聲上雲漢，一空星影落陂湖。天公著我非無地，卻悔從來錯怪渠。

題菴壁

萬里東歸白髮翁，閉門不復與人通。綠梅浮蟻狂猶在，黃紙棲鴉夢已空。薄技徒勞真刻楮，浮生隨處是

飛篷湖邊吹笛非凡士。儻肯相從寂寞中。每風月佳夕。輒有笛聲起湖之西南。莫知何人。意其隱者也。

又

俠氣當年蓋五陵。今成粥飯在家僧。身在此倚貧非病。齒落方慚豁可惜。踏月閑穿雙仙屨。聽琴橫按一枯藤。年來萬事都經遍。強笑看人獨未曾。

晚歸舟中作

路入芙蓉浦。家依穰稻村。急灘雙鷺立。平野萬鷗翻。市散人爭渡。僧歸寺掩門。淒涼謫新句。招得欲殘魂。

送嚴居厚棄官歸建陽溪莊

曼容不過六百石。淵明僅留八十日。寥寥千載有兩公。海內至今推絕識。放翁貪祿老始歸。自今不作一錢直。見人勇退輒欣喜。亟欲起拜忘衰疾。吾廬近在官道傍。門外未掃車馬迹。溪莊有地肯見分。會結茅齋傍青壁。

次朱元晦韻題嚴居厚溪莊圖

鶴俸元知不療窮。葉舟還入亂雲中。溪莊直下秋千頃。贏得閑身伴釣翁。

夢中遊禹祠

湖上無人月自明。夢中髣髴得閑行。庭空滿地楸梧影。風壯侵雲鼓角聲。世異客懷增慘愴。秋高歲事已尋燦。長歌忽遇騎鯨客。喚取同朝白玉京。

感懷

老抱遺書隱故山。鏡中衰髮似霜菅。規模肯墮管蕭亞。夢想每馳河渭間。竹帛竟孤千載事。江湖敢恨一生閑。殘功賴有吾兒續。把卷燈前爲破顏。

酒熟

侯印何由得酒泉。小槽新熟亦欣然。放翁遠處過彭澤。客自在傍吾自眠。

病起遊近村

老人摧頹絕造請。門設常關草生徑。一年三百六十日。三百五十九日病。一日不病出忘歸。繞村處處扣柴扉。水東溪友新酒熟。舍北園公菘菜肥。平生養氣心不動。黜陟雖聞了如夢。從今病愈卽相尋。共聽糟牀滴春瓮。

秋夜讀書示兒子

久病少睡眠。往往中夕起。呼燈取書讀。不能盡數紙。喟然置之歎。生世後闕里。持蠹欲測海。遽復迫老死。人生各有業。唐虞本吾事。詩書脫秦厄。天意固在此。異端塞穹壤。作俑孰爲始。神禹逝不還。吾其如涿水。

秋晚書感

丘塚相望故窟空。放翁猶復寄瀟中。少眠危坐待窗白。得酒細傾生頰紅。雖喚蛟龍起雲雨。尙勝魚鳥困池籠。秋來莫道無遊興。野渡村橋處處通。

王成之給事挽歌辭

昔游黃牛峽。曾經白鷺洲。從容參步武。談笑極風流。晚預蓬萊客。時從禊祓遊。揮毫看半醉。追想只添愁。

又

詩驪湘水客。風度曲江公。一夕南樓去。千秋東省空。囊封震朝右。墨敕絕宮中。贈極文昌貴。君恩厚飾終。

書南堂壁

偶築湖邊舍。侵尋四十春。山丘未埋骨。詩酒尙關身。樵路霜侵屐。漁舟雨墊巾。忝蒙鄉黨敬。六聖有遺民。
予生於宣和乙巳歲。

又

荒寒淺村步。隱翳小茅茨。偶逐漁樵住。都忘歲月移。閑惟接僧話。老始愛陶詩。耆齒猶須幾。羸然敢自期。

秋晚

寒渚雁新下。壞牆蛩夜吟。庭莎欲無色。園樹不成陰。霑灑孤臣淚。馳驅壯士心。明朝鏡中髮。飽受雪霜侵。

晨起待子聿歸

老人鹽櫛罷。坐待汝晨省。忽思隔重關。懷抱增耿耿。小雨暗北簷。誰與慰淒冷。卷書默袖手。奈此清晝永。
懸知河橋下。亦已喚舴艋。長路歸當飢。呼童具湯餅。

信筆

吾生本暫寓。無日不可死。區區遲速間。何地著愠喜。朝移一株石。暮引一脈水。是中亦何樂。一笑聊爾耳。

又

有酒或一醉。無酒終日閑。雨足通南澗。木落見西山。飯飽出柴門。本散腰脚頑。偶然遇野人。笑語欲忘還。

龜堂東窗戲弄筆墨偶得絕句

身如蠶老已三眠。一繭何妨自裹纏。豆飯藜羹支永日。檣籬竹屋送餘年。

又

一樽且復罄幽歡。不是癡頑強自寬。死去何憂累兒子。千錢可買市成棺。

又

北菴睡起坐東廂。無事方知日月長。天與詩人送詩本。一雙黃蝶弄秋光。

又

老衰有驗詩先退。勸業無心夢漸稀。淺浦小山孤絕處。數家烟火自相依。

又

老人孤寂似無家。午枕初回日已斜。偶得風和身亦健。舍南舍北探梅花。

次呂子益韻

呂子奇才非復常。詩來起我醉中狂。大音誰和陽春曲。真色一空時世妝。東閣獻諛無轍迹。西湖寄傲有

杯觴。病懷正待君滄賦。墨妙時須寄數行。

舍北行飯書觸目

晚爐初撥一甌茶。杖屨閑行興未涯。烟樹參差墨濃淡。風鴉零亂字橫斜。夕陽偏傍平橋路。寒蝶猶依晚菊花。堪笑衰翁耐荒寂。短衣霑露未還家。

又

落雁昏鴉集遠洲。青林紅樹擁平疇。意行舍北三叉路。開看橋西一片秋。小婦破烟撐去艇。丫童橫笛喚歸牛。形容野景無餘思。自怪癡頑不解愁。

明日復得五字

羸病偶不死。端居思出遊。山寒麥苗短。天闊雁聲遒。學劍元癡絕。脂車久罷休。鄰翁獨眷眷。同好自相求。

又

腰痛今朝愈。囊囊野興長。黃鸝號亂篠。碧蝶繞枯桑。陂壞良疇廢。村空舊路荒。十年逢九潦。誰與問蒼蒼。

十一月二十二日夜待子聿未歸

寒爐火半銷。壞壁燈欲死。人行籬犬吠。月出林鵲起。吾兒信偶非。長路老子可憐煎百慮。人人父子與我同。立朝勿遣交河戍。

南窗

眩妍一窗日。的皪數枝梅。小鼎煎茶熟。幽人作夢回。新春又將近。晚景但堪哀。用底舒懷抱。殘書闌復開。

幽居

衰鬢蕭條笑舊青。一枝棲穩寄餘齡。徐行不媿衣露肘。安臥何妨席見經。視客恰如堂上燕。捐書那願案頭螢。時時閒說前賢事。聊遣鄉閭識典刑。

春近山中即事

乞得松楠手自栽。結茅聊喜避風埃。百年孰與夢長短。萬事只如雲去來。雪後梅花初半吐。身閑樽酒盍頻開。錦官城外青羊路。常記當年小獵回。

又

節物貧家有故常。春盤臘粥逐時忙。悠悠歲月催雙鬢。草草雞豚薦一觴。人意自殊平日樂。梅花寧減故時香。小園新展西南角。挂樹青蘿百尺長。

又

世亂王孫泣路隅。時平野老醉相扶。種橙正可三年大。愛竹何曾一日無。細路迢迢上雲雨。輕舟渺渺入菰蒲。暮歸剩欲談幽勝。安得丹青爲作圖。

雪夜感舊

江月亭前樺燭香。龍門閣上默聲長。亂山古驛經三折。小市孤城宿兩當。晚歲猶思事鞍馬。當時那信老耕桑。綠沉金鎖俱塵委。雪灑寒燈淚數行。

將進酒

我欲挽住北斗杓。常指蒼龍無動搖。春風日夜吹草木。只有榮盛無時凋。我欲剗斷日行道。陽烏當空月杲杲。非惟四海常不夜。亦使人生失衰老。如山積麴高崔嵬。大江釀作蒲萄醅。頽然一醉三千杯。借問白髮何從來。

歲暮懷張季長

已迫桑榆景。況逢梅柳時。功名終自誤。老病獨如期。醉眼嫌天迥。孤吟覺鬼悲。唐安在何許。無字寄相思。

謝朱元晦寄紙被

木枕藜牀席見經。臥看飄雪入窗櫺。布衾紙被元相似。只欠高人爲作銘。

又

紙被圍身度雪天。白於狐腋軟於綿。放翁用處君知否。絕勝蒲團夜坐禪。

送王季嘉赴湖南漕司主管官

它人作陵邑。榜笞朝暮急。王子乃不然。袖手萬事集。它人西入都。競裁丞相書。王子掉頭去。長沙萬里餘。問子謀身無乃左。凜如霜松姿磊砢。屈原賈誼死有靈。計此兩人心獨可。

菴中夜興

示菴維摩無侍者。夜闌自掩草菴門。有情梅影半窗月。相應雞聲十里村。紙帳擁裘尋斷夢。地爐撥火煖殘樽。扶衰又踐新春境。萬事元知不足論。

初春欲散步畏寒而歸

峭寒漠漠入重貂。酒力欺人髮不消。春困苦多無處賣。客魂欲斷情誰招。一溪水淺梅枝瘦。四野雲酣雪意驕。欲到前村無奈嬾。卻尋歸路度西橋。

憶昔

憶昔從戎出渭濱。壺漿馬首泣遺民。夜樓高冢占星象。晝上巢車望虜塵。共道功名方迫逐。豈知老病只

逡巡燈前撫卷空流涕。何限人間失意人。

戊午元日讀書至夜分有感

七十年來又四年。兩聲燈影故依然。未收浮世風漚夢。尙了前生蠶簡緣。老學辛勤那有補。舊聞零落恐無傳。先師鉢袋終當付。歎息誰能共著鞭。

又

強戴羅幡怯歲增。光陰堪歎捷飛騰。簷間點滴新春雨。窗下青燐半夜燈。傍架討尋書散亂。倚屏吟嘯髮鬢髻。極知老境惟當伏。絕學端居恨未能。

雜感

志士山棲恨不深。人知已是負初心。不須先說嚴光輩。直自巢由錯到今。

又

勸君莫識一丁字。此事從來誤幾人。輸與茅簷負隨叟。時時睡覺一頻伸。

又

世事紛紛無已時。勸君杯到不須辭。但能爛醉三千日。楚漢興亡總不知。

又

百年鼎鼎成何事。寒暑相催卽白頭。縱得金丹真不死。摩挲銅狄更添愁。

又

世間魚鳥各飛沉。茅屋青山無古今。畢竟替他愁不得。幾人虛費一生心。

又

一杯濁酒卽醺然。自笑閑愁七十年。今日出門天地別。此身如在結繩前。

又

山人那信宦塗艱。強著朝衣趁曉班。豪氣不除狂態作。始知只合死空山。

又

老子傾囊得萬錢。石帆山下買烏犍。牧童避雨歸來晚。一笛春風草滿川。

又

故舊書來訪死生。時聞剝啄叩柴荆。自嗟不及東家老。至死無人識姓名。

又

忍窮待死十年間。老子誰知老更頑。溪友留魚供晚酌。鄰僧送米續朝餐。

歎老

朋儕什九墮丘墟。自笑身如脫網魚。委命已悲吾道喪。垂名真負此心初。齒殘僅可決滯肉。眼澀知難讀細書。家事豈容關老子。兒曹努力事耕鋤。

朝飢食齋麵甚美戲作

一杯齋餽餽老子。腹膨脝坐擁茅簷日。山茶未用烹。

又

一杯齋餽飢。手自芼油葱。天上蘇陀供。懸知未易同。

漁隱堂獨坐至夕

斜倚筇枝岸。幅巾閉門久。已謝知聞。中庭日正花無影。曲沼風生水有紋。三尺桐絲多靜寄。一樽玉瀝足幽欣。世間萬事都忘盡。惟向閑中屢策勳。

讀書

讀書肝膽尙輪囷。蠹簡堆中著此身。飽識三千餘歲事。已爲七十四年人。鏡中衰鬢難藏老。海內虛名不救貧。只欲從今都掃盡。剩沾春酒答新春。

北望

昔我初生歲。中原失太平。寧知墓木拱。不見塞塵清。京洛無來信。江淮尙宿兵。何時青海月。重照漢家營。

蘭

南巖路最近。飯已時散策。香來知有蘭。遯求乃弗獲。生世本幽谷。豈願爲世娛。無心託階庭。當門任君鋤。

古梅

梅花吐幽香。百卉皆可屏。一朝見古梅。梅亦墮凡境。重疊碧薜蘿。天矯蒼虬枝。誰汲古澗水。養此塵外姿。

山脚散步由舍北歸

偶散東岡步。因成北渚遊。鴉昏先小泊。魚暖欲羣浮。緩曳紅藤杖。斜披紫綺裘。閑身病亦可。隨處得無愁。

幽徑欣行樂。衰年困負薪。梅殘香更遠。草動綠初勻。魚似濠梁樂。鷗如海上馴。度橋成一笑。微健及新春。

又

空碧升團月。江郊弄夕霏。生涯今始是。年事古猶稀。冰解魚初躍。風和雁欲歸。興來忘遠近。草露已沾衣。

寄題連江陳氏拂石軒李似之曾有歌詞。

平生聞說西江水。百丈齋淪深見底。漁舟來去白鷗飛。上有綸巾隱君子。作詩自許輩陶謝。歎傲煙雲弄。清泚紛紛聲利滿人間。耳本不聞安用洗。李公過江號高流。逸氣凜凜橫清秋。沙邊一笑偶邂逅。掃石蔭松相獻酬。浩歌聲斷七十載。尙寄萬壑風颼颼。放翁老憊狂未歇。買船欲作西江遊。

得張季長書以大蓬見稱蓋以予寄祿官視昔祕書監也因作五字寄之

老病江湖上。煩公問死生。仙蓬雖誤到。殘錦只虛名。近歲裁損。蓋恩所謂十色錦者。所存亡。點滴三更雨。淒涼萬里情。向來遺恨極。不遂隱青城。

病足累日不能出菴門折花自娛

頻報園花照眼明。蹒跚正廢下堂行。擁衾又聽五更雨。屈指元無三日晴。不奈病何拋酒醜。纔知春在賴鶯聲。一枝自浸銅瓶水。喜與年光未隔生。

書意

帝命煌煌敕百神。方傾天漢洗胡塵。但須荊州一好漢。安用南山四老人。竹帛恐貽千古笑。江湖未愧百

年身此心欲與何人說。病足呻吟又過春。

新燕

天工不用翳刀催。山杏溪桃次第開。要信今年春事早。社前十日燕新來。

北巖采新茶。用忘懷錄中法煎飲。欣然忘病之未去也。

槐火初鑽燧。松風自候湯。搗籃苦徑遠。落爪雪芽長。細嚼襟靈爽。微吟齒頰香。歸時更清絕。竹影踏斜陽。

連日至梅仙塢及花涇觀桃花抵暮乃歸

千載桃源信不通。鏡湖西塢擅春風。舟行十里畫屏上。身在西山紅雨中。俗事挽人常故故。夕陽歸櫂莫忽忽。豪華無復當年樂。爛醉狂歌亦足雄。

又

桃花塢近釣魚磯。不比劉郎萬里歸。水底紅雲迷醉眼。樽前絳雪點春衣。病依几杖猶能出。老愛風光未忍違。天借清遊每窮日。夜深炬火候柴扉。

卷第三十七

病中作

破裘縫更暖。糲食美無餘。靡詰病說法。虞卿窮著書。身羸支枕久。足蹇下堂疎。今日晴窗好。幽懷得好據。

題郭太尉金州第中至喜堂

陸放翁集 十五 劍南詩集 卷三十七

安康甲第天下傳。玉題繡井摩雲煙。落成鼓吹震百里。意氣欲壓秦山川。第中築堂最宏麗。奎畫岌岌蛟龍纏。知公所喜在勇退。顧視解組如登仙。公心雖爾天未可。終倚北伐銘燕然。十年宿衛功第一。小却臥護長淮邊。帳前犀甲羅十萬。幕下珠履逾三千。願公小緩高枕計。卽今河雒猶腥膻。出師雖鹿獐皂纛。畫象麒麟峨玉蟬。是時公喜客亦樂。爲公滿瀉黃金船。

暮春

山陰又見暮春初。禁火園林社雨餘。世事不妨隨日改。年光未遽與人疎。鼓香下箸嘗尊菜。鹽白開齋得製魚。草草一杯終可喜。數間茅屋亦吾廬。

小園新晴

散髮陽狂不計年。園林只在小窗前。斷虹千尺卷殘雨。新月一鉤生暮天。臘醜坻泥留客醉。山茶落磴喚兒煎。物華心賞元無盡。剩住人間作地仙。

又

衰病猶煩藥石功。殘春終日在園中。地偏幽草爲誰綠。雨霽新花如許紅。足蹇扶持須稗子。杯深暖熱賴鄰翁。此身雖向閑中老。若比休休却未同。司空表聖休亭歌曰。休休休。莫莫莫。伎倆雖多性靈惡。賴是常教閑處著。

春晚感事

據鞍千里何曾病。閉戶安眠百病生。每憶嘉陵江上路。插花藉草醉清明。

又

寒食梁州十萬家。鞦韆蹴鞠尚豪華。犢車轆轤歸城晚。爭碾平蕪入亂花。

春晚園中作

杏子青青梅子酸。山園轉眼又春殘。老懷豈復少年樂。病骨不禁清曉寒。學術背時甘義墮。功名無路久心闌。蠶收麥熟吾何恨。但道銀杯似海寬。

題夷堅志後

筆近反離騷。書非支諾皋。豈惟堪史補。端足擅文豪。馳騁空凡馬。從容立斷鼇。陋儒那得議。汝輩亦徒勞。

幽居

小舫藤爲纜。幽居竹織門。短籬圍蕪蕩。細路入桑村。魚膾槎頭美。醅傾粥面渾。殘年謝軒冕。猶足號黎元。

聞鳥聲有感

小市提壺酌濁酒。東陂脫袴插青秧。歸來靜臥茅簷底。如覺閑中白日長。

又

流年冉冉去無情。日夜溪頭布穀聲。城郭雖存人換盡。令威應悔學長生。

與子虞子坦坐龜堂後東窗偶書

時鳥朝暮鳴。芳草日夜生。春風捨我去。歲律俄崢嶸。綴簇繭白白。出陂稻青青。鳴機織苧葛。暑服亦已成。小兒結山房。窗戶頗疎明。萬事不挂眼。朱黃浩縱橫。佳哉東北風。吹下讀書聲。功名詎敢望。且復慰父兄。

是日午間聞子聿在山半讀書相與欣然。

行年

行年過七十與世兩相忘。墨沼龜魚樂。藥園芝朮香。吾生一過臂。世路幾羊腸。楮弁新裁就。備然學道裝。
新作兩豬冠。

東窗小酌

烏帽翩僂白苧涼。東窗隨事具杯觴。流年不貸世人老。造物能容吾輩狂。藤葉成陰山鳥下。檜花滿地蜜蜂忙。何人畫得農家樂。咿軋車隔短牆。

又

市塵遠不到林塘。嫩暑軒窗晝漏長。蠶妾趁時爭鹽繭。農去得雨正移秧。徒行有客驚頑健。爛醉無人笑老狂。卻掩菴門徑投枕。鼯聲雷起撼藜牀。

西林傅菴主求定菴詩

粥後鐘魚未動時。夜燈仍對碧琉璃。不須更說能生慧。枯木寒灰也自奇。

又

業力驅人舉世忙。西林袖手一爐香。未能成佛渾閑事。十劫看渠坐道場。

夏日

將雛燕子漸離巢。過母龍孫已放梢。日出並湖初曬網。雨餘乘屋旋添茅。家貧舊業元知廢。身老微官久

合拋。莫恨門前車馬絕。豈無農圃與論交。

又

過眼春光久已空。曬絲擣麥又匆匆。新泥滿路梅黃雨。古木號山月暈風。角黍菱新間罇俎。靈符墨澤照房櫳。歲華不爲翁衰駐。且付餘生一笑中。

又

吳中五月暑猶微。竟日南堂坐掩扉。綠樹露一作霧香鴛獨語。畫廊風惡一作急燕雙歸。三千界內人人錯。七十年來念念非。投老萬緣俱掃盡。從今僧亦不須依。

又

雨斷雲歸旋作晴。尙餘紅溼在簾旌。燕雛掠地飛無力。梅子臨池墜有聲。米糲解包供午餉。萍齋傍枕析朝醒。此翁不負頑軀處。捫腹時時繞舍行。

又

梅雨初收景氣新。太平阡陌樂閑身。陂塘漫漫行秧馬。門巷陰陰挂艾人。白葛烏紗稱時節。黃雞綠酒聚比鄰。掀髯一笑吾真足。不爲無錐更歎貧。

夜酌

酒綠孤燈夜。梅黃細雨天。聊成顧影醉。復作曲肱眠。腰下蘇秦印。囊中趙壹錢。丈夫隨所遇。底處不陶然。

夏夜

夏夜誰知亦自長。幽居渺在水雲鄉。月侵竹簟清無暑。風度衣篝潤有香。棲鶴自驚移別樹。流螢相逐過橫塘。放翁尚苦餘醒在。細綆銅餅落井牀。

又

山崎風生鶻嘯悲。柴門月上樹陰移。熏衣汗雨初乾後。把卷蚊雷不動時。孤悶難禁終歲病。浮生易滿百年期。釣竿只待清秋近。一棹煙波信所之。

又

展轉紗幮睡不成。一藤扶櫛繞廊行。月昇雙鶴移枝宿。露下孤螢綴蔓明。汲井忽驚人已起。開門堪歎事還生。羽衣道帽從吾好。柏子煙中起磬聲。

又

龜息綿綿破五更。起扶藤杖並南榮。擇栖孤鶴尚三匝。司旦老雞俄一鳴。移坐徐看山月吐。脫巾聊受水風清。不知竟是真仙未。夜夜神遊白玉京。

泛舟

水鄉元不減吳松。短襪沿洄野興濃。鬱鬱冬青森翠葆。離離夜合散紅茸。水涯多此二樹村。深初度穿林。笛寺近先聞出塢。鐘歸路夕陽猶滿岸。憑舷一笑覽衰容。

感舊

要識梁州遠。南山在眼邊。霜郊熊撲樹。雪路馬蒙氈。慘淡遺壇側。拜韓信壇至今猶在。蕭條古廟墟。河陽

有蜀後主所立武侯廟。百詩猶可想。歎息遂無傳。予山南雜詩百餘篇。舟行過望雲灘。墜水中。至今以爲恨。

又

夜涉南沮水。朝過小益城。梯山天一握。度棧土微平。雨近秦雲暗。霜高隴月明。至今孤夢裏。嗚馬有遺聲。
嗚馬皆七字韻語。聞之悲愴動人。

又

早發金堆市。更衣石櫃亭。灘聲秋後壯。山色雨餘青。道滯愁車轍。橋危避駝鈴。功名竟何在。撫事感頽齡。

又

塵土暗貂裘。森然白髮稠。年光真袞袞。吾事竟悠悠。馬宿平沙夜。軍中馬及殿。卒夏夜皆露宿沙上。烽傳絕塞秋。平安火並南山來。至山南城下。故人零落盡。追寫只添愁。

又

凜凜隆中相。臨戎遂不還。塵埃出師表。草棘定軍山。壯氣河潼外。雄名管樂間。登堂拜遺像。千載愧吾顏。

又

我思杜陵叟。處處有遺蹤。錦里瞻祠柏。綿州弔海榕。蹉跎悲權輿。感會失雲龍。生世後斯士。吾將安所從。

書喜

雨足郊原正得晴。地縣萬重盡春耕。陰陰阡陌桑麻暗。軋軋房櫓機杼鳴。亭鼓不聞知盜息。社錢易斂慶

秋成。天公不負書生眼。留向人間看太平。

自詠

平生萬事付愁癡。兀兀騰騰到死時。夜踏亂雲過略略。曉分寒溜注軍持。東巖山客招烹石。渡海番僧乞製碑。作個生涯君勿笑。拄天勳業亦兒嬉。

露坐立秋前五日。

旋削甘瓜進酒卮。斷雲漠漠斗離離。北臨積水風來壯。東恨長林月上遲。秋近不堪聞急杵。夜涼已復怯輕絺。天孫老抱河梁恨。豈獨人生事可悲。

又

岸曠臨窗意未便。又拖筇杖出庭前。清秋欲近露霑草。皎月未升星滿天。過埭船爭明日市。蹋車人廢徹宵眠。齊民一飽勤如許。坐食官倉每惕然。

親舊或見嘲終歲杜門戲作解嘲

十年蕭散住林間。只是幽居不是閑。續得茶經新絕筆。補成僧史可藏山。詩題紫閣憑雲寄。藥報青城附鶴還。自笑何曾總無事。枉教人道閉柴關。

北窗

寒泉斷藕素絲長。紋簾開瓜碧玉香。午睡覺來桐影轉。無人可共北窗涼。

新秋以窗裏人將老門前樹欲秋爲韻作小詩

殘暑無多日。幽居近小江。酒醒中夜起。松月入山窗。

又

陸子江海人。所願守節死。潮生釣瀨邊。月落菱歌裏。

又

小智每自私。大患緣有身。孰能忘彼己。吾將友斯人。

又

野艇千錢買。明當泛渺茫。但能容一榼。家具不須將。

又

立朝紹興間。猶及見諸老。魂夢不可逢。丘嫂閉秋草。

又

朝真方捨杖。步月始開門。零落山花後。經旬掩綠樽。

又

唐虞雖已遠。至道豈無傳。度日一編裏。懷人千載前。

又

秋風昨夜來。聲滿梧桐樹。故人渺天末。此夕誰與度。

又

少年雖婚宦，淡然本無欲。娑娑三畝園，自歎不啻足。

又

無食妨何事，吾兒可散愁。焚香正巾褐，聽汝讀春秋。

食新有感，貧居久蔬食，至是方稍得肉。

壯遊車轍遍天涯，晚得祠官不去家。優老每慚千載遇，食新又歎一年加。出波魚美如通印，下棧羊肥抵臥沙。捫腹笑歌仍索酒，不嫌鄰舍怪譁譁。

秋夕露坐作

銀河半落露華清，南斗闌干北斗明。冉冉方悲老將至，纖纖又歎月初生。酒牀細滴香浮瓮，衣杵相聞聲滿城。萬卷讀書無用處，却將耕稼報昇平。

有年

不向神林乞雨晴，天公自解相西成。急符收盡無逋賦，新酒沽多足笑聲。外戶徹扃停夕柝，齊民相勸力春耕。傳聞夜市連三鼓，却恨龐公不入城。

大雨

北風挾驕雲，突起塞宇宙。赫日初未西，盼轉失白晝。翻空黑幟合，列陣奇鬼鬪。雨鏃飛縱橫，雷車助奔驟。平階水入戶，溝瀆不能受。對面語不聞，持繖避屋漏。兒童抱圖書，衣屢那暇救。縱暴理豈長，忽已收滂霽。比鄰更相勞，拊拾如過寇。老子獨癡頑，長歌對醇酎。

東西家

東家雲出岫，西家籠半山。西家泉落澗，東家鳴珮環。相對籬數掩，各有茆三間。芹羹與麥飯，日不廢往還。兒女若一家，雞犬意自閑。我亦思卜鄰，餘地君勿慳。

子自春夏屢病至立秋而愈作長句自賀

良藥扶衰抵萬金，漸加糜粥輟呻吟。溪風拂簟有秋意，山影半庭生夕陰。薄俗只成驚老眼，幽居正得遂初心。岸巾待月欄干曲，更覺天公愛我深。

七月十一日雨後夜坐戶外觀月

浴罷淡無事，岸幘臨前軒。雷雨始退散，雲月相吐吞。風蟬斷還續，枝間終夕喧。露螢闔復開，熠熠綴草根。殘暑會當去，孰敢厭炮燔。四時莽相代，所歎歲月奔。歡襟挽不留，白髮生無根。兒女日夜長，子且復有孫。澗松偶未薪，野鶴猶孤蹇。華表幸來歸，餘事何足言。

王與道尙書挽詞

朗朗百間屋，汪汪千頃陂。直能彰主聖，清不願人知。許國多艱日，逢辰獨斷時。人猶望霖雨，殄瘁不勝悲。

又

昔遇開藩日，嘗叨下榻榮。從容陪議會，傾倒及平生。借譽言猶在，懷知涕易橫。終慚五字句，不盡百年情。

初秋

雨氣排殘暑，風聲送早秋。拂窗開葉落，繞井看螢流。臥起須人助，炊春尙自謀。蕭條歲將晚，百慮入搔頭。

感秋

秋色關河外。秋聲天地間。壯士感此時。朝鏡凋朱顏。一身寄空谷。萬里夢天山。噫嗚怒皆裂。憤激悲涕潸。古來真龍駒。未必置天閑。長松倒澗壑。委棄同葑菅。得志未可測。談笑濟時艱。凜然出師表。一字不可刪。

北窗試筆

老來日月速。去若弦上箭。方看出土牛。已復送巢燕。清晨覓縑衣。正午廢紈扇。北窗小雨餘。盆山鬱葱蒨。病體爲之輕。一笑玩筆硯。雖無顏柳工。揮灑亦忘倦。紙窮墨漸燥。蛇虺爭入卷。屬兒善藏之。勿遺俗子見。

秋思

秋毫不受俗塵侵。隨處悠然一散襟。天際挂虹初斷雨。雲頭翳日已成陰。引泉北澗長澆竹。拂榻西窗自斲琴。藥石掃空身便健。始知萬事要無心。

又

雨長蒼苔滿釣磯。坐令秋暑斂餘威。天高月破殘雲出。野曠風驚蠶葉飛。終歲鉏犁猶不飽。萬家礎杵獨無衣。早知竟坐儒冠誤。射虎南山未必非。

又

身似癯翁不出家。一窗自了淡生涯。山薑零落初成子。石竹淒涼半吐花。寒澗挹泉供試墨。隨巢篝火喚煎茶。掩關本意君知否。兩耳衰年不耐譁。

又

老懷不慣著閑愁。信脚時爲野外遊。過雁未驚殘月曉。片雲先借一天秋。村醅似粥家家醉。社肉如林處處留。七十已稀今又過。問君端的更何求。

新涼

山居謝來客。病體喜新涼。幽草上牆綠。落花霑土香。捐書心自息。聽雨夢偏長。菰葉鄰人餉。欣然獨舉觴。

又

孤首初離水。蓋芽淺漬糟。粳香等炊玉。韭美勝炮羔。露下殘蕪濕。風生萬木號。從今更何事。痛飲讀離騷。

自遣

蹊蹊人間未死身。鄉閭共敬六朝民。睡無由著緣多感。醉不能成坐一貧。幽屏最憎蟲弔夜。狂吟略似鳥鳴春。也知世俗誰知我。猶待君王獵渭濱。

自規

曲肱飲水彼何人。汝獨何爲厭賤貧。大節勿汗千載史。少時便盡百年身。圖書幸可傳遺業。雞黍何妨約近鄰。今日仲秋還小雨。剝鉏麥壘待新春。鄉人謂八月一日得雨宜來年麥。

感舊末章蓋思有以自廣

庚寅歲入巴東峽。臥聽清猿月下聲。二十九年窮未死。卻思當日似前生。

又

百室小益最初程。朱棧青崖照眼明。十日經行圖障裏。時時馬上聽鶯聲。

又

路入梁州似掌平。鞦韆蹴鞠趁清明。未論日遠長安近。且喜南山天際橫。

又

青城山裏屏風疊。太華峯頭腰帶鞶。跨鶴橫空吾欲去。九秋月露看青冥。

秋日獨酌

草木秋始繁。黃碧照籬落。雖云各有時。意緒終索莫。老人固多感。對此聊命酌。風霜肅萬物。過雁在寥廓。吾當識其大。微物不足託。何以豁曠懷。短章可時作。

夙興

草堂風雨少睡眠。骨冷始覺非壯年。水鳥長鳴聲戛然。庭中棲鴉亦已翩。老人清餓如龜蟬。起坐甚愛小窗妍。一生宦遊膏火煎。歸來杜門氣蘊全。人看雖不直一錢。知我自有穹穹天。賦詩橐成棄不傳。殘鐘斷磬知誰編。

身世

身世浮沉等一漚。臥看校尉例封侯。青燈微火藥鐺夜。淡月淒風衣杵秋。醉裏不辭嘲兀兀。吟邊時得寄悠悠。卽今老眼無開處。又向城南倚寺樓。

憶昔

憶自梁州下益州。身閑處處醉紅樓。早知虛起彈冠意。悔不常爲秉燭遊。詩思已慚馳陣馬。目光猶覺射

車牛蓮釜日觀何時到下看人間萬里秋。

豐歲

豐歲驩聲動四鄰。深秋景氣粲如春。羊腔酒擔爭迎婦。鼙鼓龍船共養神。處處喜晴過甲子。家家築屋趁庚申。老翁欲伴鄉閭醉。先辦長衫紫領巾。

村居

孤村淺浦近江城。西折坡陁一嶺橫。墟落煙生含暮色。園林風勁作秋聲。年豐租稅無逋負。酒熟鄉鄰遞送迎。老病愈知難報國。只將高枕送餘生。

中秋夜半後無雲而月色微淡尤爲絕景

輕煙薄靄九霄寒。素月渾如隔縠看。此夕洞庭應更好。誰能從我跨青鸞。

夜賦

老人不食覺魂清。恍若身遊白玉京。夜靜月驚林鶴起。水涼風颭露荷傾。昏燈一點窺孤夢。畫角三終轉五更。欲醉海山還懶去。且攜羽扇憩青城。

遣興

學廢文章傳世少。身閑車馬過門疎。壯心易盡處肩酒。義氣肯貪鱸掌魚。列聖仁恩深雨露。兩京宮闕尙丘墟。素懷華涓嗟誰問。且作狂歌楚接輿。

秋賽

柳姑廟前煙出浦。冉冉縈空青一縷。須臾散作四山雲。明日來爲社公雨。小巫屢舞大巫歌。士女拜祝眉相摩。芳茶綠酒進雜遝。長魚大載高嵯峨。常年徵科煩筆楚。縣家血涇庭前土。妻啼兒號不敢怨。期會常憂累官府。今年家家有餘粟。縣符未下輸先足。木刻吏蒲作鞭。自然粟帛如流泉。儲積不愁無九年。

寄題周丞相平園

先生道心平如砥。秋毫忿怒何曾起。漫將周易著牀頭。本不洗心那洗耳。先生國論如砥平。三朝倚之作權衡。泰階兩兩元不動。自然萬里無機槍。如今歸來曲肱臥。世事無窮俱看破。不栽桃李不鋤蘭。山僧野叟時來過。吾儕七十固已壽。更到期頤亦何有。倘知生死本自平。拈放一邊如把酒。

雨三日歌

秋風戒寒雨三日。空村無人暮蕭瑟。北窗書生萬卷書。齒豁頭童真可惜。輪囷新盤黃欲滿。磊落香橙綠堪摘。興來尙能氣吞酒。詩成不覺淚漬筆。土生蓬矢射四方。掃平河雒吾儕職。湖中隱士倘可逢。握手與君談至夕。

戲作治生絕句

治生何用學陶朱。少許能攄便有餘。惜酒已停晨服藥。省油仍廢夜觀書。

龜堂雜題

龜堂端是無能者。妄想元無一事成。最後數年尤可笑。飽齏甘寢送浮生。

又

癡頑老子老無能。遊惰農夫酒肉僧。閉著菴門終日睡。任人來喚不曾應。

又

長腰玉粒出新春。秋獲真成畝一鍾。衣食蠹供官賦足。何妨世世作耕農。

又

冷雨蕭蕭澀不晴。亂書圍坐正縱橫。忽聞小洗新醅熟。急喚兒童洗破觥。

偶讀陳無已芍藥詩云一枝剩欲簪雙髻。未有人間第一人。蓋晚年所作也。爲之絕倒。戲作小詩。

少年妄想已癡絕。鏡裏何堪白髮生。縱有傾城何預汝。可憐元未解人情。

村舍

過埭六七里。竝江三四家。潮生魚滬短。風起鴨船斜。世守桑麻業。長無市井譁。

雨中作

雨聲可愛秋方見。睡味無窮老始知。半醉擁衾支倦枕。誰能三復放翁詩。

江郊

白草江郊暮。青帘野店秋。喧呼估船客。鬼瞰飲家流。老豈題橋柱。愁惟倚寺樓。更傷昏澀眼。煙際數歸牛。

閑趣

被擁聽秋雨。兒扶上夜香。甑炊霜後稻。糟漬社前薑。馬病空思路。僧歸却住房。風扉久嘔軋。錯認鷓鴣聲。

又

飯滿七綴鉢。香凝百柄筥。雨聲酣曉枕。燈燼落秋缸。疾豎元知遜。天魔亦已降。超然對兒子。未媿鹿門龐。

又

老至衰滋劇。秋高病尚侵。坐看兒學字。臥聽客彈琴。困滿雀方鬪。栖寒雞欲瘖。世情元自嬾。不是事違心。

小飲

莫笑放翁顛。歌呼覆酒船。雙螯初斫雪。珍羞已披緜。寒雨連旬日。新橙又一年。更須重九到。作意菊花前。

作字

整整復斜斜。刷如風際鴉。書成半行草。眼倦正昏花。未辦倉盛筆。寧能錐畫沙。老夫端可媿。頭白不名家。

晝睡起偶賦

蝴蝶與蒙莊。頽然寓一牀。日隨香篆過。夢逐雨聲長。酒喜新篘綠。橙如故歲黃。昏昏還隱几。誰識老龜堂。

小舟過吉澤效王右丞

澤園霜露晚。孤村煙火微。本去官道遠。自然人迹稀。木落山盡出。鐘鳴僧獨歸。漁家閑似我。未夕閉柴扉。

湖山雜賦

門前天鏡倒千峯。舍後菰蒲與海通。乘興出遊無遠近。煙波何處覓孤篷。

又

一生到處賈胡留。身屬官倉不自由。白首歸來更何恨。十年爛醉石帆秋。

又

東西相望兩湖橋。來往無時一畫橈。買酒每尋村市步。煮蔬時就野僧寮。

又

不到梅山二十霜。望中常似隔他鄉。一杯罌粟紗燈下。最憶初寒宿上方。梅山寺與甌崖南北相望無二十里然不到最久。

又

煙中一棹小江秋。憶上牛頭倚寺樓。今日籬邊殘照裏。却從西北望牛頭。

太息

早歲元于利欲輕。但餘一念在功名。白頭不試平戎策。虛向江湖過此生。

又

書生忠義與誰論。骨朽猶應此念存。砥柱河流僂掌日。死前恨不見中原。

又

自古才高每恨浮。偉人要是出中州。卽今未必無房魏。埋沒胡沙死卽休。

又

關輔堂堂墮虜塵。渭城杜曲又逢春。安知今日新豐市。不有悠然獨酌人。

學書

九月十九柿葉紅。閉門學書人笑翁。世間誰許一錢直。窗底自用十年功。老蔓纏松飽霜雪。瘦蛟出海擊

虛空。卽今譏評何足道。後五百年言自公。

晚興

壯遊車轍遍天涯。晚落農桑不自知。許國雖堅身遽老。讀書未倦眼先衰。雲深嶺路樵歸晚。雨細江亭渡發遲。一事猶堪慰孤寂。錦囊傾倒有新詩。

秋晴見天際飛鴻有感

新晴天宇色正青。羣鴻高塞在冥冥。兒童相呼共仰視。我亦扶杖來中庭。豐年到處稻梁滿。胡不暫下栖沙汀。應須江海寄曠快。肯爲霜雲差飄零。書生可笑不自喜。憔悴久翦籠中翎。鷗波萬里每媿杜。鶴化千載知非丁。風前哀號漫激烈。月下孤影常竚躑。詩成欲寫復懶去。誦似溪友聲泠泠。

初寒獨居戲作

開殼一作罨。得紫栗。帶葉摘黃甘。獨臥維摩室。誰同彌勒龕。宗文樹雞欄。靈照掣蔬籃。一段無生話。燈籠可與一作自可談。

夢觀牡丹

忘卻晨梳滿把絲。棘花嫌不似臙脂。起來一笑看清鏡。惟插梨花卻較宜。

書喜

水際柴荆鍵不開。野人相覓漫敲推。寒雅陣黑疑雲過。老木聲酣認雨來。酒價日低常得醉。官租時辦不勞催。平生未省如今樂。却笑傍觀誤見哀。

又
今年端的是豐穰。十里家家喜欲狂。俗美農夫知讓畔。化行蠶婦不爭桑。酒坊飲客朝成市。佛廟村伶夜作場。身是閑人新病愈。賸移霜菊待重陽。

又
滿川秋穫重頰肩。拾穗兒童擁道邊。夜夜江村無吠犬。家家市步有新船。簞囊不復憂山越。安樂渾疑是地仙。惟有衰翁最知遠。避胡猶記建炎年。

小飲罷行至湖塘而歸

社酒真如粥而濃。朱顏頃刻換衰容。霜輕已覺樹搖落。雲起始知山疊重。梅市魚歸衝雨棹。寶林人定隔成鐘。此翁大似遊僧樣。爐煖窗深又過冬。

病雁詞祿將滿幸臘支朝夕遂不敢復有講而作是詩

蘆洲有病雁。雪霜摧羽翰。不辭道路遠。置身湖海寬。稻梁亦滿目。鳴聲自辛酸。我正與此同。百憂雙鬢殘。東歸忽十載。四忝侍祠官。雖云幸得飽。早夜不敢安。乃知學者心。羞愧甚飢寒。讀我病雁篇。萬鍾均一簞。

澤居

澤居僅足不求餘。曠快真同縱壑魚。平日酷憎蠅附驥。暮年肯作鶴乘車。齒搖但煮陵山芋。眼澀惟觀胃監書。此際自應還往絕。本無心與俗人疎。

秋穫歌

牆頭累累柿子黃。人家秋穫爭登場。長碓擣珠照地光。大甑炊玉連村香。萬人牆進輸官倉。倉吏衝冷不暇嘗。訖事散去喜若狂。醉臥相枕官道傍。數年斯民阨凶荒。轉徙溝壑殍相望。縣吏亭長如餓狼。婦女怖死兒童僵。豈知皇天賜豐穰。畝收口鍾富萬箱。我願鄰曲謹蓋藏。縮衣節食勤耕桑。追思食不脛糟糠。勿使水旱憂堯湯。

戊午重九

朋舊相望天一涯。登高結伴只鄰家。秋風自欲吹紗帽。衰髮何曾泥菊花。藥市神仙思益部。饅盤節物記京華。自憐病後歡惊薄。小醉歸來日未斜。

重九懷獨孤景略

昔逢重九日。初識獨孤君。竝轡洮河馬。聯詩劍閣雲。已悲吳蜀遠。更歎死生分。安得持卮酒。澆君丈五坟。

晨鏡

晨起覽清鏡。有叟鬢已皤。鹹黃色類椀。面皺紋如鞞。熟視但驚歎。初不相誰何。久乃稍醒悟。舉手自摩挲。與汝周旋久。流年捷飛梭。生當老病死。求脫理則那。切勿彊撐拄。據鞍效廉頗。惟須動把酒。暫遣衰顏醜。

秋霽遣懷

陸生少日心膽壯。萬里憑陵寄疎放。玉關曾誓馬草裏。滄海豈愛魚腹葬。人生富貴本細事。釣築逢時俱將相。正令不遇亦何慊。藥錢丹爐老青幃。今年秋晚苦多雨。三十六溪新綠漲。極知世事不足論。霽日小舟行可榜。

屏迹

昔者航濤江。雲山迎我東。擊楫誓江神。永託冥冥鴻。十年桑榆暖。萬事馬牛風。邇來愈屏迹。庭戶深蒿蓬。就甕挹新醅。傍畦搗晚菘。鄰曲或念我。小鮮亦時供。喟然撫几歎。恨今已龍鍾。向使早十年。何愧柴桑翁。

初寒

今日霜露冷。凜然悲暮秋。垂帷跨微火。發篋出輕裘。徂歲逝將換。殘生愈覺浮。一杯還自閔。小獵記梁州。

風雨

風雨從北來。萬木皆怒號。入夜殊未止。聲亂秋江濤。渺然老書生。白頭臥蓬蒿。閉門不敢出。裂面風如刀。鄰人閔我寒。牆頭過濁醪。時哉一昏醉。新橙宜蟹螯。

龜室自詠

龜室一老翁。短褐立秋風。時過同籬菊。身衰似井桐。新霜萬瓦白。朝日數樞紅。且復尋書卷。悠然度歲窮。

又

采藤持織履。剝楮治爲冠。看劍心空壯。騎驢骨本寒。病多辭酒伴。老甚解祠官。予十月奉祠歲滿不復敢請。賴有扁舟在。秋濤萬里寬。

閑居初冬作

香枕蒲團又一新。天將閑處著閑身。東窗換紙明初日。南圃移花及小春。婦女晨炊動井臼。兒童夜誦話比鄰。早知閭巷無窮樂。悔不終身一幅巾。

陸放翁集

十五 劍南詩彙 卷三十七

五十五

病中排悶

面骨嶮嶮雪新承。平版籍有遺民。予生於宣和中。心雖願繼無傳學。力不能支已廢身。開卷眼昏如隔霧。擁爐肺渴欲生塵。老龐亦有兒孫念。付與天公不問人。

季秋已寒節令頗正喜而有賦

霜降今年已薄霜。菊花開亦及重陽。四時氣正無愆伏。比屋年豐有蓋藏。風色蕭蕭生麥隴。車聲碌碌滿魚塘。老夫亦與人同樂。醉倒何妨臥道傍。

卷第三十八

秋懷

形骸歲歲就枯朽。意氣時時猶激昂。永遠浮鷗方浩蕩。霜高殘菊更芬芳。人皆有舌是非在。劫未成灰時世長。三百里湖行自復。子孫努力事耕桑。鏡湖廢百七十餘年。故吾鄉多凶。會有復之者。

吳體寄張季長

九月十月天雨霜。江南劍南途路長。平生故人阻攜手。萬里一書空斷腸。人生彊健已難恃。世事變遷那可常。兩家子孫各長大。他年窮達毋相忘。

嘲畜貓

甚矣翻盆暴。嗟君睡得成。但思魚壓足。不顧鼠縱橫。欲騁銜蟬快。先憐上樹輕。胸山在何許。此族最知名。

俗言貓爲虎舅。教虎百爲惟不教上樹。又謂海州貓爲天下第一。

立冬日作

室小財容膝。牆低僅及肩。方過授衣月。又遇始裘天。寸積篝爐炭。銖稱布被綿。平生師陋巷。隨處一欣然。

初冬

志士逢秋已自傷。老人況復惜年光。正看溪碓春粳滑。又見山坡下麥忙。桐落井牀多槁葉。菊殘衫袂尚餘香。讀書有課真當勉。剩貯明膏伴夜長。是日方買油。

醉題

生來避世傲公卿。海內無人識姓名。九節筇邊秋萬里。長明燈下雨三更。心安白髮何勞掃。藥熟黃金固可成。只待蓬壺賦詩罷。卻來京洛看昇平。

新作火閣

旋設篝爐下紙簾。樂哉容膝似陶潛。囊中佩藥無時服。架上堆書信手拈。似玉秋菰殊未老。如雲宿麥不須占。掃空祠祿吾何欠。陋巷簞瓢易屬厭。祠祿止此月。

又

山路霜清葉正黃。地爐火煖夜偏長。中安煮藥膨脱鼎。傍設安禪曲象牀。木槁不知年自往。雲閑已與世相忘。更闌坐穩人聲靜。時聽風簾響暗廊。

舍北行飯

蔓絡疎籬草滿塘。飽嬉聊復步斜陽。一霜驟變千林色。兩犢新犁百畝荒。野寺僧殘尙鐘鼓。官堤舟過見帆檣。歸來笑補空囊課。寒日誰知亦自長。

遣興

轍迹當年遍九州。晚歸始解臥林丘。愛身每戒玉抵鵠。養氣要如刀解牛。柔櫓搖殘天鏡月。短筇領盡石帆秋。儘言未辦常局戶。竟是吾身得自由。

又

出仕穉堪斗大州。初歸便擬築糟丘。虛名大似月蟾兔。榮路久如風馬牛。唧唧悲蛩常弔夜。蕭蕭蠹葉更禁秋。靜觀世事頻興歎。千載前時有許由。

舟中

柂邊潮水落還生。篷底寒燈滅復明。約束長年牢繫纜。報人風雨有鼙鳴。

又

蕭蕭風雨小江秋。不是愁人亦合愁。忽聽疎鐘知寺近。笑尋沙路上牛頭。

又

龜山古戍更漏聲。白塔小市燈火明。六十年間幾來往。依然惆悵館路傍情。

雨夜感舊

雨來猛打窗。燈暗猶照壁。老人耿不寐。撫事悲夙昔。風生桔柏渡。馬病金牛驛。梟枝猿下飲。登樹熊自擲。

危巢窺鶻栖，深雪見虎跡。至今清夜夢，猶想嶠山碧。廢棄謝功名，老疾輟行役。賦詩雖不工，聊用慰今夕。

夜聞落葉

我行出柴門，初喜春草生。俯仰幾何時，落葉終夜聲。嗟我日益老，抱疾況未平。晨興就盥櫛，顧亦彊支撐。齋中有兩童，熟視不能名。定非張睢陽，大笑頽冠纓。死至人所同，此理何待評。似有一可恨，不見復兩京。

閉門

閉門高臥鏡湖傍，元自無閑可得忙。泛罷杯觴餘菊苦，玩殘指爪帶橙香。燈昏共度空階雨，蛩冷偏依丈室牀。不待衰年宦情盡，未來如雁到衡陽。

祠祿滿不敢復請作口號

今年高謝武夷君，飯豆羹藜亦所欣。參透莊生齊物論，掃空韓子送窮文。心如脫鞵奔林鹿，迹似還山不雨雲。猶幸此身強健在，鄰鄰爭看布襦裙。

又

洞庭八載竊榮名，一飽心知合自營。牘後落銜便手倦，月頭鐫棒喜身輕。弊衣不補惟頻結，濁酒難謀且細傾。賴有東臯堪肆力，比鄰相喚事冬耕。

又

白首還山不自存，天書四降海邊村。慚非故將前侯比，誤辱優賢養老恩。龜壽自應能食氣，鶴歸那得更乘軒。從今再草公車奏，惟有挂冠神武門。

過鄰家

扶杖過吾鄰。相誇自在身。年豐稱貸少。酒賤往來頻。羣散雞歸柵。聲喧雀噪囷。丁寧語兒子。切勿厭沉淪。

舍北野望

短景妨遊興。長歌慰作勞。葉凋西埭近。水落北橋高。病每隨時劇。衰難與世鏖。旗亭新釀美。萬事一秋毫。

又

斷壠圍蔬圃。枯桑繫釣查。經行橋獨木。佇立路三叉。野卉棲孤蝶。平川起亂鴉。搘筇無定處。興盡卽還家。

又

溪行通西崦。山蹊繚北村。殘篋明水面。落葉擁籬根。野父編龍具。樵兒習兔園。吾今并蛙耳。敢復慕鵬鷺。

又

早歲遭逢異。中年促召頻。馳驅猶許國。臥起已須人。藥石三秋病。風波萬里身。籬門殘照裏。慘淡易傷神。

書感

常記當年賦子虛。公卿交口薦相如。豈知鶴髮殘年叟。猶讀蠅頭細字書。出處幸逃千載笑。功名從負此心初。荒園落葉紛如積。日暮歸來自荷鋤。

冬夜爐邊小飲

擁爐可使曲身直。飲酒能回槁面紅。若使金丹真入手。飛騰亦在立談中。

龜堂獨酌

幅巾蕭散餘齡。江左諸賢可乞靈。護枕小屏圖紫閣。映窗矮卷寫黃庭。曠懷與世元難合。幽句何人可
遣聽。一酌蘭溪遺萬事。時看牆底臥長瓶。偶得蘭溪十餘樽。潯醜烈殆不可名。

又

一棹蘭溪自獻酬。徂年不肯爲人留。巴山頻入初寒夢。江月偏供獨夜愁。越石壯心雞喔喔。子卿歸信雁
悠悠。天生我輩初何用。病骨支離又過秋。

冬夜作短歌

飢鼠窺殘燈。寒犬踏枯葉。小室擁燎爐。清笳下危堞。老人素多疾。舉動常畏怯。衣裘視寒煖。日夜自調變。
食必按本草。下箸未嘗輒。體安疾自去。藥石無此捷。敢學李輕車。灞亭夜遊獵。況如馬新息。萬里聽驚謁。
欲求神氣往。先戒事物接。寧爲子光瘡。不效雷夫喋。明晨一杯粥。跣坐橫白甌。無魚何足道。爲爾歌長缺。

病愈

倦榻呻吟每自哀。占著來告一作吉。出餘災。自能洗研拂書几。時亦折花尋酒杯。久類寒蛟潛蝸穴。忽如
老馬噴風埃。霜晴爛熳東窗日。一笑山坡訪早梅。

自遣

枳籬茅屋枕孤峯。偃盡初來手種松。睡少未成千里夢。愁深先怯五更鐘。中天日月逢真主。數畝桑麻伴
老農。世事古今誰料得。不堪陂水照衰容。

感舊

君不見資中名士有李石。八月秋濤供筆力。初爲博士不暖席。晚補臺郎俄復斥。諸公熟睨亦太息。摧壓至死終不惜。生前何曾一錢直。沒後遺文價金璧。後之視今猶視昔。此事誠非一朝夕。山城舊處暗荆棘。羸然諸孫守墳籍。撫孤我負朋友責。萬里詩成淚空滴。

又

君不見蜀師渾甫字伯渾。半身高臥墓頭村。才不得施道則尊。死已骨朽名猶存。文章落筆數千言。上友離騷下招魂。望之眉宇何軒軒。高談浩若洪河翻。范尹敬如綺與園。方飾羔雁登衡門。小人謗傷實不根。妄指拱壁求瑕痕。窮通在公豈足論。浮雲終散朝陽暉。安得此老起九原。入贊國論蘇黎元。范至能帥成都。欲以道逸起之。幕客有沮之者。遂不果。

寒雨中偶賦

鬢毛蕭颯齒根浮。但歲翩翩肯暫留。窮巷多泥誰問疾。空階滴雨又經秋。自營可笑誇三窟。善守寧須築百樓。但使胸中機事盡。一樽隨處送悠悠。

又

暮年心事與誰同。到處飄然一病翁。斷夢淒涼燈影裏。殘詩零落雨聲中。莫驚顏鬢渾非昨。略數朋儕已半空。祠祿上還猶負媿。何功班綴冠仙蓬。予官視聽書監。

壽考如富貴

壽考如富貴。初亦不自知。邂逅偶不死。亦或至期頤。予少多疾患。五十已遽衰。齒搖頰頹白。蕭然蒲柳姿。

俛仰忽二紀，臥病實半之。富貴不可求，壽亦豈汝私。萬事付自然，孰爲樂與悲。惟當老益學，易簣以爲期。

午飯

我望天公本自廉，身閑飯足敢求兼。破裘負日菲簷底，一椀藜羹似蜜甜。

又

民窮豐歲或無食，此事昔聞今見之。吾儕飯飽更念肉，不待人嘲應自知。

題王仲信畫水石橫幅

王郎書逼楊風子畫，亦憑陵蜀雨孫。豈是天公憎絕藝，一生憔悴向衡門。

治圃

槁蔓殘蕪滿幽圃，多具鉏耨課僮豎。非惟吾圃要翦除，亦恐爾輩成憎厭。老桂盤壑飽風霜，修篁當軒弄煙雨。一松孤立信豪傑，兩槐對植如賓主。珍禽揀枝春欲動，蠹穴掃空吾甚武。蘼蕪芽蘖已暗長，甘菊根芽亦潛吐。山蕒潤蒲乃微草，露葉參差看仰俯。世間安得有遺才，位置要須令得所。

冬日感興十韻

霧雨天昏曉，破湖地阻深。蔽空鴉作陣，暗路棘成林。有客風埃裏，頻年老病侵。夢魂來二豎，相法欠三壬。舊憤開孤劍，新愁感斷砧。唐衢惟痛哭，莊鳥正悲吟。瘦跨秋門馬，寒生夜店衾。但思全舊壁，敢冀訪遺簪。樓上蒼茫眼，燈前破碎心。長謠傾濁酒，慷慨壓層陰。

冬日出遊十韻

吳會寒常薄，冬深略未冰。荒郊觀雉鬪，大澤見魚騰。釣艇頻容借，籃輿漸可乘。有時穿密篠，隨處倚枯藤。金石奉遺刻，衣冠禹舊陵。叢祠祈臘雪，小市試春燈。問路鉏耰叟，爭橋乞供僧。疎狂違俗久，衰疾與年增。干祿雖知恥，懸車媿未能。陪官有微俸，醉髮任鬢鬢。

思蜀

園廬已卜錦城東，乘驛歸來更得窮。只道驪驅開道路，豈知魚鳥困池籠。石犀祠下春波綠，金雁橋邊夜燭紅。未死舊遊如可繼，典衣猶擬醉郵筒。

又

二十年前客錦城，酒徒詩社盡豪英。才名吏部傾朝野，意氣成州共死生。吏部郎宇文紹奕，自成都守宇，文字震子友。廢苑探梅常共醉，遺祠訪柏亦俱行。即今病臥寒燈裏，欲話當時涕已傾。

又

譚侯才氣敵文園，國子監丞譚季王德稱。日日銀鞍畫戟門。奇句入神聞鬼泣，巨觥如海看鯨吞。一官胄監能令死，萬里銘旌忍更論。湖上秋來頻入夢，憑誰詞翰與招魂。

作雪

雪雲寒不動，林鳥噤無聲。病起衰何劇，囊空醉不成。中原亂方作，弱虜運將平。臺省多賢俊，常談媿老生。

又

荒村雪欲作，耄叟病無聊。樹暝烏鳶集，茆深雉兔驕。溪灘觀趁渡，嶺路數歸樵。卽死無它憾，終身負聖朝。

戲詠山家食品

牛乳抨酥淪茗芽，蠶房分蜜漬棕花。舊知石芥真尤物，晚得萋蒿又一家。疎索鄉鄰綠老病，團圓兒女且喧譁。古人不下藜羹糝，斟酌龜堂已太奢。

耕罷偶書

新溉東臯畝一鍾，烏犍纒足事春農。灞橋風雪吟雖苦，杜曲桑麻興本濃。老大斷非金谷友，生存惟冀酒泉封。莫嘲野餉蕭條甚，箭筈蓴絲亦粗一作且供。

雨夜

末路蕭條客子心，不堪徂歲更沉陰。低簷雨滴睡眠少，敗壁燈殘感慨深。不辦典衣謀盡醉，尙能擁鼻作微吟。交朋一散如天遠，試向今宵夢裏尋。

巷中晨起書觸目

山重水複怯朝寒，一卷窗間袖手看。朱檐長瓶列雲液，絳囊細字拆龍團。數峯移自侏儒國，一研來從黠淡灘。要識放翁頑鈍處，胸中七澤著猶寬。雲液揚州酒名，近淮帥餉數十尊。營道小山及劍峴，得自張季長。張仲欽適在案間。

又

暉暉初日上簾鉤，漠漠清寒透衲裘。雪竦並棲雙鷓鴣，金環斜絆一猿愁。廉宣臥壑松楠老，王子穿林水石幽。戲事自憐除未盡，此生行欲散風漚。唐希雅畫鶴易元吉畫猿，廉宣仲老木王仲信水石，皆蕪中所

蓬小翰

又

賦形不使面團團。聳膊心知到骨寒。晏子元非枕鼓士。杜生那有切雲冠。時扶遷客桃榔杖。日厭詩人百
指盤。賴是平生憎阿堵。今年初解待祠官。

又

初歸蒼墓老鄉邦。手結茆茨近小江。北渚露霑行藥屐。東廡日射勸書窗。孤忠自信丹心折。萬事成雪
鬢雙。長媿宗人白崖老。贈行期我鹿門龐。予自成都召還。禱射洪白崖陸使君祠。使君以杜詩為箋。予得
全家照鹿門之篇。

三山杜門作歌

我生學步逢喪亂。家在中原厭奔竄。淮邊夜聞賊馬嘶。跳去不待雞號旦。人懷一糲草間伏。往往經旬不
炊爨。嗚呼亂定百口俱得全。孰為此者寧非天。

又

高宗下詔傳神器。嗣皇御殿猶揮涕。當時獲綬鷓鴣行。百寮拜舞皆歔歔。小臣疎賤亦何取。即日趨召登
丹陛。嗚呼橋山歲晚松柏寒。殺身從死豈所難。

又

中歲遠遊險劍閣。青衫誤入征西幙。南沮水邊秋射虎。大散關頭夜聞角。畫策雖工不見用。悲吒那復從

軍樂嗚呼人生難料老更窮。麥野桑村白髮翁。

又

晚入南宮典牋奏。濫陪太史牛馬走。忽然名在白簡中。一櫪還家傾臘酒。十年光陰如電掣。綠蓑黃犢從鄰叟。嗚呼古來骯髒例倚門。況我本自安丘園。

又

寬恩四賦仙祠祿。每忍慚顏救枵腹。五秉初辭官粟紅。一瓢自酌巖泉綠。天公乘除不負汝。宿疾微平歲中熟。嗚呼字字細讀逍遙篇。此去八十有幾年。

老境

白髮短欲盡人嗤。心尙孩埋盆池激激。累瓦塔崔嵬。輾飯三春米。醇醪九醞醅。忽然拈筆起。記著早梅開。

又

今日霜殊重。衰翁老可憐。朝晡兩炊火。覆藉一牀氈。人客容稱疾。兒童不攪眠。雲開見殘日。更愛小窗妍。

記戊午十一月二十四夜夢

街南酒樓粲丹碧。萬頃湖光照山色。我來半醉躡危梯。坐客驚顧聞飛屐。長緝短帽黃絕裘。從一山童持藥笈。近傳老仙嘗過市。此翁或是那可識。遂巡相請或稽首。爭獻名樽冀餘濕。我欲自言度不聽。亦復軒然爲專席。高談方縱驚四座。不覺鄰雞呼夢破。人生自欺多類此。撫枕長謔識吾過。

六經示兒子

陸放翁集 卷三十八

六十七

六經如日月，萬世固長懸。學不趨卑近，人誰非聖賢。馬能龍作友，鱗乃鱗爲天。我老空追悔，兒無棄壯年。

舍北晚步

漠漠炊煙村遠近，瑟瑟鼙鼓隸西東。三叉古路殘蕪裏，一曲清江淡靄中。外物已忘如棄屣，老身無伴等羈鴻。天寒寂寞籬門晚，又見浮生一歲窮。

對酒

老子不堪塵世勞，且當痛飲讀離騷。此身幸已免虎口，有手但能持蟹螯。牛角挂書何足問，虎頭食肉亦非豪。天寒欲與人同醉，安得長江化濁醪。

夜坐求酒已盡喟然有賦

澹月微霜夜漏徂，披裘不睡附寒爐。清笳嫋嫋已三弄，殘火熒熒纔一銖。報國無期心欲折，讀書自力眼將枯。麴生作態年來甚，不受閒人折簡呼。

食粥張文潛有食粥說謂食粥可以延年予竊愛之

世人箇箇學長年，不悟長年在目前。我得宛丘平易法，只將食粥致神仙。

寒夜

堅冰塞川厚莫測，斷雁叫羣聲可哀。草園小墜酒未熟，霜壓瘦枝梅不開。稊子忍寒守蠶箔，老夫忘睡畫爐灰。低頭就世吾所諱，千載伯鸞安在哉。

梅花

五十年間萬事非。放翁依舊掩柴扉。相從不厭隨風月。只有梅花與釣磯。

又

山村梅開處處香。醉插烏巾舞道傍。飲酒得仙陶令達。愛花欲死杜陵狂。

又

一花兩花春信回。南枝北枝風日催。爛熳卻愁零落近。丁寧且莫十分開。

又

廣寒宮中第一仙。情深不礙韻超然。勸君莫作兒女態。但向花前傾玉船。

又

秭歸江頭煙雨昏。客舟夜繫梅花村。相逢萬里各羈旅。不待猿啼已斷魂。

又

青羊宮前錦江路。曾爲梅花醉十年。豈知今日尋香處。卻是山陰雪夜船。

三山下居今三十有三年矣。屋陋甚而地有餘。數世之後當自成一村。今日病少間作詩以示後

人

印累累。綬若若。換君朱顏君不覺。冠如箕。劍挂頸。蒼頭盧兒笑君癡。不如短褐歸鄉舍。上畢租庸下婚嫁。橫波引水蒔禾黍。高陸墜荒種桑柘。比鄰畢出觀夜場。老稚相呼作春社。雞爭春米茅簷底。犬吠行人槿籬罅。數椽幸可傳子孫。此地它年名陸村。藜藿一飽能世守。殊勝養牛并上尊。

又

再見封侯未爲快。一擲成盧安用再。世間得意固多矣。堪笑窮人事常敗。我生出仕四十年。寸進恰如船。上埭卽今臥病茅簷裏。回首窮通竟何在。荆山之下玉抵鵲。兩京春齊論斤賣。蘇秦煌煌佩六印。尼父栖栖厄陳蔡。玄傑美官輒見思。東野出門常有礙。躬耕至老豈不佳。子孫當以吾爲戒。

南園觀梅

小嶺清陂寂寞中。綠樽歲晚與君同。高標賴有詩人識。絕豔眞窮造物工。正喜參差橫夜月。又驚零落付春風。老語世事寧多歎。身自人間一轉蓬。

歲盡苦寒

曉寒無賴透重裘。三日江雲暝不收。歲月推移吾輩老。交朋零落此生浮。東臯苦潦猶中熟。舊疾雖存亦小瘳。禹廟蘭亭俱在眼。剩沾春酒破春愁。

己未新歲

餽歲愁雖劇。迎年喜亦深。桃符帶草寫。椒酒過花斟。車馬久無迹。兒孫聊慰心。更欣春意早。處處有鳴禽。

歲首書事

東風入律寒猶劇。多稼占祥雪欲成。雲陰作雪彌旬至。開齒雪意愈濃。明日戊初立春。猶可爲臘雪也。鬱壘自書誇腕力。屠蘇不至歎人情。今歲無餽屠蘇者。呼盧院落譁新歲。鄉俗歲夕案博。謂之試年。庚寅困兒童起五更立春。未明相呼喪春困。亦舊俗也。白髮滿頭能且健。剩隨鄰曲樂昇平。

又

扶持又度改年時。毫齒侵尋敢自期。中夕祭餘分餽飴。鄉俗以夜分舉祭亭。長幼共飯其餘。又歲日必用湯餅。謂之冬餽。餽。年餽。餽。黎明人起。換鍾馗。春盤未抹青絲菜。今年正月二日立春。壽學先酬白髮兒。開道城中燈絕好。出門無日歎吾衰。客來多言府中今歲上元燈甚盛。

初春

元日人日來聯翩。轉頭又見試燈天。且欣一雪壓災癘。不怕連陰咽管絃。陌上漸多酌酒舍。岸邊初理下湖船。紫姑擬卜元無事。只問今春幾醉眠。

菴中獨居感懷

身愈龍鍾髮愈稀。流年冉冉迫殘暉。讀書十紙勤雖在。上樹千回事已非。仗馬曾鳴宜取斥。牧羝雖乳亦忘歸。餘生自笑知何似。萬里遼天老令威。

又

自閉菴門不點燈。慵耕村叟罷參僧。一生已是嚙毡日。沒老安能夏造冰。頑面敢辭乾汝唾。蔬餐聊得曲吾肱。高春睡熟無多笑。那有禪師解放鷹。

又

無錢溪女亦留魚。有雨東家每借驢。麥粥數匙晨壓藥。松肪一椀夜觀書。黃袖被暖閑無厭。白布衫長遊有餘。南陌東阡春事動。放翁作計未全疎。

戲作貧詩

垂老貧彌甚。虛教遇太平。竈閑無馬穴。釜冷有魚生。妾病常停織。兒飢屢輟耕。癡頑惟此老。未廢浩歌聲。

又

左券頻稱貸。西成少蓋藏。苦飢炊稻種。綠病賣桑黃。土焙憐煙煖。藜羹愛糝香。君看首陽叟。窮死亦何傷。

春日園中作

杏花開過尙輕寒。盡日無人獨倚闌。久別名山憑夢到。每思舊友取書看。塵埃幸已賒腰折。富貴深知欠面圍。老去逢春都有幾。一杯行復送春殘。

中春連日得雨雷亦應候

誰言白首意低摧。老子逢春亦樂哉。犂畔方吹社公雨。壠頭又轉阿香雷。睡餘支枕聽鶯語。醉裏題窗記燕來。更有山家堪喜事。吾孫上樹欲千回。德孫幼病足。今已行步健甚。

雨後微陰光景益奇復得長句

結轍軒車已掃空。揮犀談笑與誰同。日消淺醉閑吟裏。春在輕陰薄霧中。百尺遊絲喜風定。一雙新燕說泥融。天工只費須臾力。開遍東園半丈紅。

春日小園雜賦

久矣雲霄鐵羽翰。小園聊得賦春寒。魯望有春寒賦。風生鴨綠紋如織。露染猩紅色未乾。不向山丘歎零落。且從兒女話團圓。人言麥信春來好。湯餅今年慮已寬。

又

市廛不到放翁家。繞麥穿桑野徑斜。夜雨長深三尺水。曉寒留得一分花。悶從鄰舍分春瓮。閑就僧窗試露芽。自此年光應更好。日驅秧馬聽纜車。

簡鄰里

今年意味報君知。屬疾雖頻未苦衰。獨坐空齋如自訟。三舍法行時暫上書言事者。屏置一齋曰自訟。小鵝殘俸類分司。樂天詩。猶彼妻孥教漸退。莫求致仕且分司。閑撐野艇漁蓑溼。亂插山花醉帽欹。有興行歌便終日。逢人那識我爲誰。

客叩門多不能接。往往獨坐至晚。戲作

貧舍久疎羅酒漿。客來不復倒衣裳。官情已盡詩情在。世味無餘睡味長。紅棘帶飛穿柳去。錦薰籠暖撲簾香。蕭然自笑渾無事。漁唱聲中又夕陽。

園中偶題

綠衣粲粲味微丹。映葉穿枝立畫欄。莫戀主人驚不去。五陵年少有金丸。

又

春深無處不春風。數樹桃花乃爾紅。鶯蝶紛紛自常事。不應也著白頭翁。禽名

又

憶向彭州取牡丹。蠟封馳騎露初乾。如今歷盡人間事。縱有姚黃亦懶看。

又

九日春陰一日晴。不堪風駕浪花生。畫船欲解還歸臥。寂寂窗扉聽鳥聲。

北窗偶題

兩叢香百合。一架粉長春。堪笑龜堂老。歡然不記貧。

又

曉晴林鵲喜。晝暖蜜蜂喧。我老詩情盡。逢春亦一言。

又

簾外燕翩翩。歸時在社前。不辭飛渡海。來看養豐年。

又

煙波兩鵝鷗。宜爲放翁來。菰米猶能給。蒼顏得屢開。

沈園

城上斜陽畫角哀。沈園非復舊池臺。傷心橋下春波綠。曾是鶯鶯照影來。

又

夢斷香消四十年。沈園柳老不吹綿。此身行作稽山土。猶吊遺蹤一泫然。

戲贈園中花

橫風疾雨爲花厄。霽日暄風又不禁。我欲小施調變手。酌中寒暖半晴陰。

春思

兀兀治鬢酒未醒。霏霏潑火雨初晴。愁看入戶桃花片。閑聽爭巢燕子聲。百疾侵陵成老大。一春轉盼又清明。蘭亭禹廟潭如昨。回首兒時似隔生。

贈燕

燕來我何喜。感此中春時。燕去亦何有。無奈凋年悲。四序如循環。萬物更盛衰。我亦寓斯世。如客會當歸。驪車已在門。戀戀終何爲。達人付無心。欣厭兩俱非。豈有天壤間。會合無別離。對花不爛醉。燕子笑汝癡。

雨闕示兒子

東吳春雨多。略無三日晴。濛濛平野暗。浙浙空階聲。百花雨中盡。三月未聞鶯。重裘坐奧室。時序真強名。亦欲借驢出。泥淖沾衣纓。撫事每累歎。濁醪聊獨傾。景運今方開。關輔一日平。我家本好疇。瀟灑可躬耕。買酒新豐市。看花下杜城。會當與汝輩。藉草作清明。

讀晉書

諸公日飲萬錢廚。人乳蒸豚玉食無。誰信秋風雒城裏。有人歸棹爲蓴鱸。

春晚苦雨

垂老臥村墅。餘寒欺病身。雞猶未忘旦。雨欲不容春。忽忽花時過。茫茫草色勻。蓴絲已上市。一飯未傷貧。

燕

春晝花明映柳纖。燕歸勝事始能兼。爭梁諍語驚幽夢。掠地斜飛避畫簾。雖食得蟲應自喜。巢泥經雨更頻添。去來要是知時節。常怪人嘲作附炎。

夜雨

空階雨聲夜轉急。壁竅窗破淒風入。一燈嫋嫋吹欲滅。老生獨傍書架立。取書欲讀輒復休。卻行出門搔白頭。市樓賣酒日千斛。衆人皆樂君胡憂。

寒食日九里平水道中

曉雨絲絲熟食時。泥深轍斷客行遲。亂雲重疊藏山寺。野水縱橫入稻陂。馬鬣松陰封舊隴。龜趺道左立新碑。扶衰此出知能幾。清淚臨風不自持。

春晴自雲門歸三山

乍行春野眼增明。漸減春衣體倍輕。人賣山茶先穀雨。鴉隨幡祭過清明。柳塘水滿雙鳧戲。稻隴泥深一犢行。晚到三橋泛舟去。掩關不復畏重城。

于數年不至城府丁巳火後今始見之

陳迹關心已自悲。劫灰滿眼更增欷。山川壯麗昔無敵。城郭蕭條今已非。幸睹招提俱昨夢。祝融回祿尚餘威。故交減盡新知少。縱保桑榆誰與歸。

晚自北港泛舟還家

舒嘯蓬籠底。經行略約西。水深鶉唳草。雨細犢掀泥。醉倚乾坤大。閑知物我齊。衡門觸冠過。聊得賦幽棲。

書懷

羸馬常愁趁早朝。斥歸幸復侶漁樵。青黃未勝溝中斷。宮徵何殊爨下焦。心樂簞瓢同鼎食。身安山澤謝

弓招。數間茅屋誰知處。煙雨濛濛隔斷橋。

初夏

淡霧輕颺入夏初。一窻新綠鳥相呼。出門易倦常歸臥。著句難工但自娛。花徑蝶閑無墮蕊。酒樓人散有

空墟。閩川茶籠猶舊罍。及肺渴朝來頓欲蘇。閩中真餘茶。初至。

小築

散翁小築寄江郊。屋破隨時旋補茅。暮看白煙橫水際。曉聽清露滴林梢。生來不啜猩猩酒。老去那營燕

燕巢。目斷鹿門三太息。龐公千載可論交。

喜雨

幽人睡覺夜未央。四簷懸溜聲浪浪。樂哉甘澍及時至。九衢一洗塵沙黃。明朝鄰曲各驩喜。賽廟沽酒割

猪羊。不勞轆轤蹋龍骨。轉盼白水盈陂塘。呼兒掃地設菅席。與汝一醉歌時康。豈惟磨鍊待收麥。小飯已

覺吳粳香。

晨起

天公擇地養衰殘。著向桑村麥野間。曉色入簾初濕漾。幽禽窺戶已閒關。酒徒散去稀中聖。詩思衰來媿

小山。一炷沉煙北窗底。曲肱臥看不勝閑。

五月初病體益輕偶書

世事紛紛了不知。又逢燕乳麥秋時。經年謝客常因醉。三日無詩自怪衰。乘雨旋移西嶼藥。留燈重覆北窗棋。但將生死俱拈起。造物從來是小兒。

己未重五時已請老。

門楣束艾作神人。團糴盤中節物新。安用丹書禳赤口。風波雖惡不關身。

五月七日拜致仕勅口號

剡曲東歸日醉眠。冰銜屢忝武夷仙。恩如長假容居里。官似分司不限年。一札疏榮馳厩置。兩兒扶拜望雲天。坐糜半俸猶多愧。月費公朝二萬錢。

又

黃紙東來墨未乾。孤臣恩許挂朝冠。小兒扶出迎門拜。鄰舍相呼擁路觀。白首奉身歸畎畝。清宵無夢接鷄鸞。從今剩把花前酒。憂患都空量自寬。

致仕後卽事

休官拜命不勝榮。墨溼黃新照眼明。絡繹交親來作賀。羊腔酒擔擁柴荆。

又

敕過鸞臺鳳閣來。清晨初拆驛書開。繡箱香案近門拜。身著朝衫止此回。

又

山村處處晴收麥，鄰曲家家午曬絲。正用此時身得謝，十分壽酒不須辭。

又

白髮三朝執戟郎，賜骸偶值歲豐穰。村東已種千畦麥，舍北新添百本桑。

又

老民一日脫朝衣，回首平生萬事非。赤脚婢沽村釀去，平頭奴馭草驢歸。

又

一生病鶴寄樊籠，此去鴻冥萬里空。未論尊羹與羊酪，新杭要勝太倉紅。

又

沉緜分已餒餘生，造物奇留未遣行。今日下牀還健在，一編來就小窗明。

又

清靜全勝欲界天，逍遙不減地行仙。衆中莫怪人嫌老，十五年前本命年。

又

一盃麥飯掩柴關，坐久不堪腰脚頑。拖得瘦藤閑信步，小橋東北望螺山。

又

問門前客元無迹，諛墓中人本不工。猶有鄰僧能送米，未妨竊比玉川公。

又 歸耕所願雜民編。乍脫朝衫喜欲顛。但得吾兒能力穡。不請半俸更超然。

又 湘湖蓴菜勝羊酪。項里楊梅敵荔枝。八帙開來今過半。一杯引滿若爲辭。

又 不嫌雞瘦濁醪酸。草草杯盤具亦難。食指忽搖方竊喜。小兒來請賽鄱官。

又 甌中白飯出新春。貧裏黃齋細筆葱。一飽坐兼南北美。始知造物念衰翁。

又 多事車前要八騁。老人惟與一藤遊。未教變化爲龍去。更踏人間萬里秋。

讀後漢書

又 貧春老子吾所慕。垂世文章寧在多。詩不刪來二千載。世間惟有五噫歌。

又 季英行年九十八。猶灌園蔬授六經。我欲圖之置齋壁。世無顧陸善丹青。

新裁道帽示帽工

故帽提攜二十霜。別裁要作退居裝。山人手段雖難及。老子頭圍未易量。花插露落那暇惜。塵侵鼠齧却

須防。妾時嬾復呼兒問。一匣菱花每在傍。

新製道衣示衣工

良工刀尺製黃紬。天遣家居樂聖時。著上朱門應不稱。裁成烏帽恰相宜。客携小艇招垂釣。僧掃虛窗約對棋。寶帶貂冠雖看好。定知不入野人詩。

兩翁歌

君不見塞上失馬翁。馬去安知不爲福。又不見新豐折臂翁。臂廢身全老鄉國。陸翁多難類兩翁。著書滿屋身愈窮。十年力耕遇水旱。老不能耕年始豐。人言翁窮可閔笑。霍食鶉衣天所料。翁方自謂實幸民。對人抱膝惟清嘯。卽今羣公佐明主。長劍拄頤來接武。向非老病又不才。縱欲歸休寧見許。

五月中連夕風雨氣候如高秋枕上有賦

擁被微吟短髮秋。孤燈殘漏共悠悠。雨聲不貸三更夢。酒力寧禁萬里愁。身寄湖山鄰剡曲。心遊河嶽過關頭。世間可恨知多少。虛弊當年季子裘。

前詩感慨頗深猶吾前日之言也明日讀而悔之乃復作此然亦未能超然物外也

身世今如一老僧。病餘殘髮雪鬢鬢。湖桑埭下漁舟雨。道樹山前野店燈。澗水潺湲供洗鉢。松風蕭颯入行簾。世人欲覓何由得。覲面相逢喚不應。

雨後過近村

賦罷淵明歸去來。紵衣桐帽一時裁。歲華新筍初成竹。天氣停雲未斷梅。江路醉歸常崑嶷。僧窗閑過即

徘徊。老人剩有凋年感。寄語城笳莫苦催。

銘座

天下本無事。庸人實擾之。吾身本無患。衛養在得宜。一毫不加謹。百疾所由滋。人生快意事。噬臍莫能追。汝顧不少忍。殺身常在斯。深居勿妄動。一動當百思。每食視本草。此意未可嗤。賦詩置座右。終身作元龜。

致仕後述懷

彈冠紹興末。解組慶元中。澁瀕危塗過。邯鄲幻境空。閑傳相牛法。醉挾鬪雞翁。衝雨歸來晚。山花滿笠紅。

又

壯歲江湖去。還朝六十餘。輩流俱已盡。勳業固知疎。遽走寧黔突。長閑祇荷鋤。如今更何憾。終作愛吾廬。

又

生理雖貧甚。胸中頗浩然。常辭問字酒。屢卻作碑錢。寧有駱堪鬻。尙無車可懸。小須梅雨霽。散髮醉江天。

又

昔自臺郎斥。頻年困負薪。四叨優老祿。十送故鄉春。衰瘁寧知活。蕭條敢厭貧。惟思逢樂歲。擊壤學堯民。

又

韋布還初服。蓬蒿臥故廬。所慚猶火食。更恨未巢居。叱叱驅黃犢。行行跨白驢。交親各強健。不必問何如。

又

店店容陰酒。家家可乞漿。白陵時雨足。綠樹午陰涼。病爲休官減。門緣謝客荒。今朝遇鄰叟。滿意說豐穰。

蝶

庭下幽花取次香。飛飛小蝶占年光。幽人爲爾憑窗久。可愛深黃愛淺黃。

戲贈酒棹

老去臥湖海。白髮朝朝新。賴有小道士。時來中聖人。形模雖簡古。風味絕清真。何當秋雨夕。傾倒見情親。

題菴壁

破屋颼颼雀鼠穿。邇來四壁愈蕭然。錢多孰謂可使鬼。人衆何嘗能勝天。秃尾驢遊雲外寺。長鬚奴引竹間泉。更餘一事猶當勉。讀易從今十絕編。

又

孤村寂寂潮生浦。小院昏昏雨送梅。蔬食一簞宜面槁。畏塗九折自心灰。古人骨朽有書在。今雨泥多無客來。散髮陽狂非寄傲。世間萬事本悠哉。

泛舟澤中夜歸

無窮煙海接空濛。秦望稽山醉眼中。虹斷已收千嶂雨。鶴歸正駕九天風。漁舟容與橫沙際。水鳥號鳴傍葦叢。與盡還家忽三鼓。半輪殘月斗杓東。

書嬾

此身不覺老侵尋。殘髮蕭蕭雪滿簪。那有新詩書觸目。亦無閑話問安心。塞垣西戍茫如夢。省戶東歸病至今。一嬾便知生世了。午窗酣枕敵千金。

晨起

清晨推枕起，盥面吾事足。豈無掃灑役，出市待歸僕。小殮亦已省，尙進藥盈掬。整衣登北堂，危坐巾一幅。徐行梧楸陰，愛此雨餘綠。幽鳥東山來，鏘鳴若琴筑。靜聽與未聞，穉子報飯熟。欣然往從之，寧計食不肉。

夜坐

仲夏苦鬱蒸，既夕熱未解。浴罷坐柴門，汲井痛掃灑。覆野天穹穹，垂地星磊磊。明河落無聲，北斗低飲海。三更缺月升，草木盡光彩。漁舟在何許，斷續聞欸乃。百憂集老境，坐歎雙鬢改。誰能擁雕戈，遺虜何足醜。

白樂天詩云：倦倚繡牀愁不動，緩垂綠帶鬢髮低。遼陽春盡無消息，夜合花前日又西。好事者畫之爲倦繡圖，此花以五六月開，山中多于茨棘人殊不貴之爲賦，小詩以寄感歎。

王室東遷歲月賒，兩京漠漠暗胡沙。繡牀倦倚人何在，風雨漫山夜合花。

蜉蝣行

蜉蝣至細能知時，春風禮雨占無遺。蜻蜒滿空乃不知，庭除一出無歸期。樂哉蜻蜒高下飛，蜉蝣未盡何憂飢。蒼間蜘蛛亦伺汝，吐絲織網腹如鼓。

望霽

夜雨勿厭空階聲，天公欲作明朝晴。明朝甲子最畏雨，榜舟入市聞古語。今年雨暘俱及時，麥已入倉粟四垂。雨來不駛亦不遲，大點如菽細如絲。徐徐雲開見杲日，晚禾吹花早禾實。但令有米送官倉，豆飯藜羹甘似蜜。

久雨路斷朋舊有相過者皆不能進

今年風雨多平陸成沮洳吾廬地尤下積水環百步客從城市來熟視卻復去僮奴笑欲倒繳屐知無路計其各還家對竈燎衣袴嗟予久退藏蓬藿生庭戶誰如數子賢裹飯肯來顧清言雖不接亦足慰遲暮

散步至三家村湖桑埭西村名

人情簡朴古風存暮過三家水際村見說終年常閉戶仍聞累世自通婚舂船歸處魚殮美社瓮香時黍酒渾記取放翁扶杖處渚蒲煙草溼黃昏

村東晚眺

興來信步過東陂最愛村東物象奇藤杖穿雲秋望處葛衣霑露夜歸時殘聲淒斷蟬移樹孤影荒寒鵲透枝自揣今年還得飽一川新稻已離離

又

飽食無營過暮年筇枝到處一蕭然清秋欲近露霑草新月未高星滿天遠火微茫沽酒市叢蒲窸窣釣魚船哦詩每恨工夫少又廢西牕半夜眠

露坐

星稀避月明河白映天青入夜蟬逾急先秋葉自零花枝栖露蝶簾罅度風螢欲喚鄰翁坐漁舟醉不醒

又

落月無留照殘河亦已傾墜枝雙鶻鳥黏草一螢明暑令忘三伏涼颼逼五更爲憐荷瀉露故起繞池行

致仕後歲事有望欣然賦詩

聖時恩厚賜餘生，日與鄉閭樂太平。已棄胡牀無長物，尚攜拄杖有同行。新栽烏帽人爭看，小摘青蔬手自烹。買得水車無用處，絕知造物相歸耕。

夜聞姑惡

湖橋東西斜月明，高城漏鼓傳三更。釣船夜過掠沙際，蒲葦蕭蕭姑惡聲。湖橋南北煙雨昏，兩岸人家早閉門。不知姑惡何所恨，時時一聲能斷魂。天地大矣汝至微，滄波本自無危機。秋菰有米亦可飽，哀哀如此將安歸。

村舍雜書

我本杞菊家，桑苧亦吾宗。種藝日成列，喜過萬戶封。今年夏雨足，不復憂螟蟲。歸耕殆有相，所願天輒從。

又

中春農在野，蠶事亦隨作。手種臨安青，桑名可飼蠶。百箔累累繭滿簇，繹繹絲上簞。老子雖安眠，衣帛可無忤。

又

舍北作蔬園，敢辭灌漑勞。輪囷瓜瓠熟，珍愛敵豚羔。晨殮戒樹人，全項淨去毛。雖云發客笑，亦足慰老饕。

又

舍南種胡麻，三日幸不雨。晨起親按行，已見青覆土。窮人如意少，喜色漏眉宇。兒童勿惰偷，造物不負汝。

又

五月新麪成。六月甘瓜熟。作麪及良時。火見金始伏。懸知桑落後。醅面釀如粥。再拜謝天公。無功叨美祿。
予家釀用宛丘瓜麪法。

又

折蓮釀作醴。采豆治作醬。開歷揆日時。汲井滌釜盎。上奉時祭須。下給春耕餉。咨爾後之人。歲事不可曠。

又

東山石上茶。鷹爪初脫鞵。雪落紅絲磴。香動銀毫甌。爽如聞至言。餘味終日留。不知葉家白。亦復有此不。

又

逢人乞藥栽。鬱鬱遂滿園。玉芝來天姥。黃精出雲門。丹苗雨後吐。綠葉風中翻。活人吾豈能。要有此意存。

又

我居大澤中。一舟不可無。短篷挾兩槳。疾若波中鳧。來往菰蘆村。按行瓜芋區。浮家亦可樂。何必愛吾廬。

又

軍興尙戎衣。冠帶謝褒博。禿巾與小裋。顧影每懷怍。及今反土服。始覺榮天爵。出入阡陌間。終身有餘樂。

又

讀書乃一癖。我亦不自知。坐書窮至老。更欲傳吾兒。吾兒復當傳。百世以爲期。君看北山公。太行尙可移。

又

爵祿九鼎重。名義一羽輕。人見共如此。吾道何由行。湖山有一士。無人知姓名。時時風月夕。遙聞清嘯聲。逃暑小飲熟睡至暮

桑落香浮榭。葉杯甘瓜綠。李亦佳哉。虛堂頓解汗。揮雨高枕。俄成鼻股雷。靜聽風聲生。檻竹徐看日影轉。庭槐晚涼更動扁舟興。北渚紅蕖已半開。

又

槐影桐陰欲滿廊。綸巾羽扇自生涼。新荔玉溼陳雙榼。平展風漪可一牀。馳騎遠分丹荔到。大盆寒浸碧瓜香。湖邊誰謂幽居陋。也愛迢迢夏日長。

夜坐庭中達旦

老矣常嗟去日適。病來更覺此生浮。庭花無影月當午。蒼樹有聲風報秋。足倦獨行驚蹶蹕。髮稀久坐怯鸚鵡。雞號日出閑無事。又向清溪弄釣舟。

讀前輩詩文有感

我無前輩千鈞筆。造物爭功謝不能。已分文章歸委靡。可憐意氣尙憑陵。鸞旗廣殿晨排仗。鐵馬黃河夜踏冰。此事要須推大手。蟬嘶分付與吳僧。

自嘲

天公大度一河奇。養此無能老白癡。窗疾閑愁俱掃盡。美餐甘寢更無時。蛙鳴庭草可曾問。水半門扉亦不知道。似嬰兒猶有恨。小軒風月獨哦詩。

余讀元次山與漢溪鄰里詩意甚愛之取其間四句各作一首亦以示予幽居鄰里

峯谷互回映

北起成孤峯。東蟠作幽谷。中有十餘家。蘆藩映茆屋。土肥桑柘茂。雨飽麻豆熟。比鄰通有無。并稅先期足。煙中語相答。月下歌相續。兒童不識字。未必非汝福。張芸叟過鄭公故莊詩曰。兒童不識字。耕稼鄭公莊。

誰家無泉源

泉聲百步聞。泉脈高下通。潺湲亂雲外。屈曲明月中。八月稻登場。引之作機舂。羨流灌蔬畦。全家飽芥菘。洗沐及澣濯。蚤莫靡不供。斗水百憂寬。悲哉杜陵翁。

夾路多修竹

黃茆持覆屋。溪石運作垣。桑麻有餘地。家家養龍孫。春雷初起蟄。切玉供盤殮。一朝解風籜。鬢髮蒼雲屯。我來倚拄杖。恐是辟疆園。千畝倘可致。封君何足言。

扁舟皆到門

千錢買輕舟。不復從人借。樵蘇晨入市。鹽酪夕還舍。豈惟載春秧。亦足穫秋稼。有時醉村場。老稚相枕藉。常侵落月行。不畏惡風嚇。無爲詫軒車。此樂予豈暇。

東山避暑用轆轤體

避暑穿林隨所之。一奴每負胡牀隨。望秋槁葉有先隕。未暮赫日無餘暉。輪囷離奇澗松古。鉤輅格磔巖禽悲。北巖竹間最慘慄。清歎倚石真忘歸。

喜雨六月二十七日

去年禹廟歸梅梁。今年黑虹見東方。巫言當豐十二歲。父老相告喜欲狂。插秧正得十日雨。高下到處水滿塘。六月欲盡日杲杲。造物已命摧驕陽。夕雲如豚渡河漢。占書共謂雨至祥。南山雷車載膏澤。枕上忽送聲淋漓。猛思濁酒大作社。更想紅稻初迎霜。六十日白最先熟。食新且領晨炊香。六十日白。稻名常以六月下旬熟。

得故人書偶題

小築稽山下。狂歌剡曲傍。鄉鄰共雞黍。童穉學農桑。白首餘年促。青編後日長。此心誰復許。三歎付書囊。

喜雨歌

不雨珠。不雨玉。六月得雨真雨粟。十年水旱食半菽。民伐桑柘賣黃犢。去年小稔已食足。今年當得厭酒肉。斯民醉飽定復哭。幾人不見今年熟。

老學菴井

老學菴北井。六月寒如冰。大旱不涸雨不增。凜如人以常德稱。日濟千人不驕矜。置而不汲渠自澄。轆轤三丈青絲繩。對之已足涼肺膺。使我終日臥曲肱。願謂此井真良朋。蕩除炎歊却塵垢。宜有鬼神來護守。嗚呼涇水一石泥數斗。正使逢時亦何有。

長歌行

我無四目與兩口。但在人間更事久。死生元是開闔眼。禍福正如翻覆手。消磨日月幾綳屐。陶鑄唐虞一

杯酒既非狗馬要蓋帷。那計風霜悴蒲柳。竈突無煙今又憤。龜蟬與我成三友。判知青史無功名。只用忍飢垂不朽。

七月二日夜賦

鄙人志趣在漁樵。四十年來負聖朝。本恥彈冠良易挂。未嘗刻印敢煩銷。盈盈微月生江渚。嫋嫋清茄下。郡譙衰病逢秋真。一洗井牀桐葉已先飄。

自述

二畝新蔬圃。三間舊草堂。病除身小健。秋近夜微涼。薄酒時醒醉。殘書半在亡。老懷常自笑。無事忽悲傷。

又

睡美不知旦。氣衰先覺秋。有時浮小艇。隨意宿滄洲。未恨名風漢。惟求拜醉侯。更須多種竹。搔首送悠悠。

項羽

八尺將軍千里騅。拔山扛鼎不妨奇。范增力盡無施處。路到烏江君自知。

曹公

二袁劉表笑談無。眼底英雄不足圖。赤壁歸來應歎息。人間更有一周瑜。

卷第四十

夜雨

濃雲如澗墨。急雨如飛鏃。激電光入牖。奔雷勢掀屋。漏濕恐敗書。起視自秉燭。移牀願未暇。盆盎苦不足。不如卷茵席。少忍待其復。飛螢方得意。熠熠相追逐。姑惡獨何怨。孤叢聲若哭。吾歌亦已悲。老死終碌碌。昔人有畫醉僧。醉道士。醉學究者。皆見于傳記及歌詩中。予暇日爲各賦一首。

醉僧

殘雪覆枯顛。手扶短御栗。透酒無蘇州。一醉未易得。青旗獵獵吹風次。長瓶一吸亦足奇。但辦道傍常醉。倒不須解作藏真草。

醉道士

落托在人間。經旬不火食。醉後上江樓。橫吹蒼玉笛。大口如盆眼如電。九十老人從小見。曾攜一鶴過岳陽。滿城三日聞酒香。

醉學究

聖師飲百觚。儼然常齋莊。弟子習禮餘。兕觥躋公堂。至今遺風被洙泗。諸生雅歌老儒醉。衣冠簡朴未可輕。安知中無魯二生。

次季長韻回寄

野人蓬戶冷如霜。問訊今惟一季長。舊好自均親骨肉。新知何怪薄心腸。開書字字論疇昔。遣使年年有故常。萬念知公掃除盡。見衰底事獨難忘。

溪上小酌

岸幘出籬門。投竿俯溪瀨。魚聚忽千百。鳥鳴時一再。新涼社瓮香。亦有雉兔賈。歡言洗杯酌。又破止酒戒。

齋中夜賦

高居終日掩齋扉。幽事常多俗事稀。露重叢篁時自瀉。風高脫葉有先飛。秋衣漸製聞砧杵。社肉初分謝
歲薇。卻笑老身閑不得。一燈明滅亂書圍。

讀舊稟有感

我少則嗜書。于道本無得。譬如昌歆莛。乃自性一癖。老來百事廢。惟此尙自力。豈惟絕慶弔。乃至忘寢食。
吟哦雜誦詠。不覺日既夕。文辭顧淺懦。望古空太息。世俗不可解。更爲著金石。收斂固已遲。雖悔終何益。
君看老農夫。法亦傳后稷。持此少自寬。陶然送餘日。

新秋

秋氣入清笳。旗亭酒可除。長歌穿小市。短帽插幽花。溪女留新蟹。園公餉晚瓜。誰知閑老子。解作醉生涯。
陳阜卿先生爲兩浙轉運司考試官時。秦丞相孫以右文殿修撰來就試。直欲首送阜卿得子文。
卷權置第一。秦氏大怒。予明年旣顯黜。先生亦幾蹈危機。偶秦公薨。遂已。予晚歲料理。故書得先
生手帖。追感平昔作長句以識其事。不知衰涕之集也。

冀北當年浩莫分。斯人一顧每空羣。國家科第與風漢。天下英雄惟使君。後進何人知大老。橫流無地寄
斯文。自憐衰鈍辜眞賞。猶竊虛名海內聞。

書喜

乞得身歸鏡水濱。此生真作葛天民。眼明身健何妨老。飯白茶甘不覺貧。瓮酒又甕三斗熟。園花時報一枝新。挂冠更作黃冠計。多事常嫌賀季真。

又

已向煙霞著脚深。世間萬事不關心。舊攜鴉背供鉏藥。新典魚須用買琴。井上引藤初滿架。地南移竹漸成陰。話行不必須今日。五百年間有賞音。

幽居

萬家水竹右山陰。揀得幽居愜素心。梁燕委巢知社近。井桐飄葉覺秋深。琴緣廢久塵常積。書爲開稀蠹漸侵。幸自杜門無一事。不須清夜感衣砧。

雜興

病養精神過服藥。貧知儉約勝營生。臯夔事業今何有。且與心君致太平。

又

東家飯牛月未落。西家打稻雞初鳴。老翁高枕葛藟裏。炊飴熟時猶駢聲。

又

暮年常草睡爲祟。好事新分安樂茶。更得小瓢吾事足。山家風味似僧家。曾召南提鞋近遠。安樂茶來。

又

蛟龍垂涎歷畏塗。如今歡喜去擔鋤。一生患難休回首。雅似元符曾上書。

贈鷺

雪衣飛去莫匆匆。小住灘前伴釣篷。禹廟蘭亭三十里。相逢多在暮煙中。

贈鷓

爲梁星渚自何年。毛羽摧傷不怨天。知我齋餘常施食。翩然飛下北窗前。

東堂睡起

置身事外息吾黥。猶臥空堂一榻橫。簷影漸移知日轉。樹梢微動覺風生。每從山寺開經帙。間就園公辦藥名。若論胸中淡無事。八珍何得望藜羹。

五鼓起坐待旦

睡覺初聞雞一鳴。披衣危坐待窗明。殘軀已向閑中老。癡夢猶尋熟處行。南北迢迢悲往事。古今莽莽歎浮生。伯倫一鍤君休笑。冢象祁連亦已平。

功名

少年妄意慕功名。老眼看來一髮輕。金甲雖如朝邑尉。羊裘終愧富春生。連娟落月依山盡。寂寞寒潮漲岸平。要識放翁新得意。蓼花多處釣舟橫。

搔首

玩畫無餘易。聞歌已盡詩。古人不可作。此理孰能推。白髮秋風裏。青燈夜雨時。初心竟當負。搔首歎吾衰。

小雨釣歸

陸放翁集 十五 劍南詩集 卷四十

九十五

雨點鳴叢葦。雲頭冒遠山。兒曹出籬望。老子榜舟還。潤入園畦裏。涼生窗戶間。秋陽方可畏。徙倚一開顏。

曉賦

八月江湖風露秋。時聞脫葉下梧楸。離離斗柄西南指。爛爛天河今古流。人語正譖過古壞。湖桑壞。五鼓聞挽船聲。喧甚角聲。三弄下。誰樓百城已共豐年樂。一老猶懷卒歲憂。

急雨父老謂雲逆風則必雨驗之信然

雲從西南興。風自東北至。老農占雨候。速若屈伸臂。亂點俄打窗。新涼已生袂。經旬苦肺渴。得此亦少慰。呼兒持故襦。買酒具一醉。薄言煮園蔬。雉兔未可議。

遣興

幾看人間歲月新。釣船猶繫鏡湖濱。會穿高帝朝元仗。卻作山陰版籍民。留病三分嫌太健。忍飢半日未全貧。早知畫繡能爲祟。翁子終身合負薪。

又

湖海元爲汗漫遊。誤恩四領幔亭秋。掃空薄祿始無媿。閉上衡門那得愁。湯漱雪濤翻茗椀。火溫香線上。衣篝牀頭亦有閑書卷。信手拈來倦卽休。

又

掃盡衣塵喜不勝。村居終日醉騰騰。閑投鄰父祈神社。戲入羣兒鬪草朋。幽徑有風偏愛竹。虛堂無暑不憎蠅。悠然又見江天晚。隔浦人家已上燈。

又

久矣微官絆此身。柴車歸老亦逢辰。阮咸臥摘孤風在。白堕閑傾一笑新。萬里馳驅曾遠戍。六朝涵養忝遺民。清閑卽是桃源境。常笑淵明欲問津。

讀林逋魏野二處士詩

君復仲先真隱淪。筆端亦自幹千鈞。閑中一句終難道。何況市朝名利人。

紙墨皆漸竭戲作

官庫誰能餉陟釐。漢宮無復賜險巖。不如掃盡書生事。閑伴兒童竹馬嬉。

讀隱逸傳

終南處士入都門。少室山人補諫垣。畢竟只供千載笑。石封三品鶴乘軒。

泛舟至東村

野水如天遠。漁舟似葉輕。颼颼風漸冷。淡淡月初生。沙際樵蘇路。籬間語笑聲。還家已薄暮。燈火照柴荆。

自詒

健忘閑何害。貪眠老正宜。本心惟泥酒。餘習略存詩。未廢春農業。猶堪幼學師。微官何所戀。請老五年遲。

野興

荷鋤通北澗。腰斧上東峯。秋水清見底。曉雲深幾重。琴琴傳社鼓。渺渺度樓鐘。歸覓村橋路。詩情抵酒濃。

讀書

平生愛客如愛書。力雖不逮意有餘。門前車馬久掃迹。老病又與黃卷疎。人情冷煖可無問。手不觸書吾自恨。今年入秋風雨頻。燈火得涼初可近。年過七十眼尚明。天公成就老書生。舊業雖衰猶不墜。夜窗父子讀書聲。

客有見過者既去喟然有作

鬢毛俱白盡事不補秋毫。去死今無幾。歸耕無足高。已如陶止酒。徒勸屈鋪糟。惟有滄溟去。揚帆觀雪濤。

又

永日安耕釣。餘年迫耄期。研朱點周易。飲酒和陶詩。帶箭歸飛鶴。搗牀不眠龜。此生君看取。死是出門時。

秋陰

淡日披朝霧。輕雲結暮陰。孤蒲溪路暗。松竹草堂深。妙墨雙鈎帖。奇聲百衲琴。古人端未遠。一笑會吾心。

八月九日晚賦

薄晚悠然下草堂。綸巾鶴氅弄秋光。風經樹杪聲初緊。月入門扉影正方。一世不知誰後死。四時可愛是新涼。從今覓醉其當勉。酒似鶉兒破殼黃。

燕坐

赫日曠曠湧海門。黃流混混湧河源。功成一日書仙籍。鍊骨成金不足言。

村飲

不來東舍卽西家。野老逢迎一笑譁。試說暮年如意事。細傾村釀聽私蛙。

又
無念無營飽卽嬉。老翁真箇似嬰兒。昏鐘未動先酣枕。日上三竿是起時。

又
買來新兔不論錢。釣得鮮鱗細柳穿。野店渾頭更醇醪。一杯放手已醺然。

又
淡煙孤榜繫村橋。疊疊沙痕印落潮。最是一年秋好處。踏泥沽酒不辭遙。

秋雨益涼寫興

秋氣蕭蕭暑已歸。晚雲更送雨霏微。牀收珍簟敷管席。笥疊織絺換熟衣。遣醉縱橫馳筆陣。乘閑談笑解棋圍。出門未免流年歎。又見湖邊木葉飛。

薪米偶不繼戲書

仕宦不諧農失業。敗屋蕭蕭書數篋。藜羹不糝未足嗟。爨竈無薪掃枯葉。丈夫窮空自其分。餓死吾肩未嘗吝。世間大有乞墻人。放翁笑汝驕妻妾。

牧牛兒

溪深不須憂。吳牛自能浮。童兒踏牛背。安穩如乘舟。寒雨山陂遠。參差煙樹晚。聞笛翁出迎。兒歸牛入圈。

與兒子至東村進父老共語因作小詩

桑竹穿村巷。衡茅隔土垣。海氛成物象。秋氣肅川原。豆芋行將熟。雞豚亦已繁。豐凶歲所有。農事更深論。

賦
微雨午寢夢憩道傍驛舍若在秦蜀間慨然有賦

吳中秋晚雨冥冥自笑閑愁又爾馨身世已歸南北陌夢魂猶寄短長亭濁醪可釀樽餘綠明鏡無情鬢
失青賴有釣船堪送老一汀鷗鷺共忘形

晨起對鏡

雙鬢成絲高頰頽曉窗臨鏡意茫然朱顏豈是一朝去暗鏤潛消五十年

村思

搯分新辭祿扶衰又度秋已將窮博健更賴學忘憂船謹煙陂鴨欄歸草徑牛作勞何以慰茅店問新蕪

秋夜

倦叟投牀早昏燈落燼頻鵲翻驚缺月犬吠逐行人未喪詩書業猶存老病生菊花行可醉作意插烏巾

醉中書懷

既老心愈空新涼體差健登山每曠扶對案亦強飯平生百事懶惟酒不待勸迨此桑落時一醉適我願
羸然雲水身本非朱紫植少猶恥枉尺老敢欺方寸但令死瞑目餘事無足論不見鹿門翁全家事潛遜

次韻鄭盱眙見寄并簡其甥劉君

衣上空嗟京洛塵故交半作白頭新衆中初得見吾子東觀已疑無若人仗馬極知非久斥沙鷗要時弱
能馴兩章英妙同時到趙壹囊中却未貧

書齋壁

平生憂患苦縈纏，菱刺磨成芡實圓。俗謂因折多者謂菱角磨作雞頭天下不知誰竟是，古來惟有醉差賢。過堂未悟鍾將覺，睨柱寧知壁偶全。自笑爲農行沒世，尚如鷺雀落空弦。

一老

太平一老醉騰騰，南陌東阡喜不勝。民力甚衰哀自己，土崇名節首方興。詩城山去詩猶遠，射虎歸來氣頗增。莫道幽棲交舊絕，月中亦有打門僧。

戲用方外語示客

紅粟青錢一掃空，篋籬行賣學龐翁。身居本地風光裏，愁擲它方世界中。剩欲劇談明不二，誰能太息賞無同。踞牀一喝君聞否，三日猶應覺耳聾。

秋晚

西山破曉兩眉青，南浦無風一鏡平。食盡不容添鶴口，身閑且免負鷗盟。霜前草樹已無色，雨到菰蒲先有聲。只怪勝遊頻入夢，今朝蜀客話青城。故人范中立巨山自青城來見訪。

又

辭祿始知貧有味，杜門不覺老相催。寒鴉已占雁前到，黃菊猶須霜後開。團扇塵埃高掛壁，短檠書史亂成堆。羸軀自笑癡頑甚，撐拄新寒又一回。

又

世事無窮似奕棋，不如常采故山芝。蕭蕭雞犬三家聚，莽莽風煙十里陂。幸有濁醪從客醉，常憂黠鬼笑

人癡。清秋樂處君知否。庭下幽花漸可移。

次金溪宗人伯政見寄韻

道義流聞意已傾。豈知晚歲託齊盟。六經日月未嘗蝕。千載源流終自明。汝水家家書有種。吾宗世世士知名。讀君長句還增氣。俗耳那聞韶護聲。

新寒

碧蝶飛過短籬。山薑石竹有殘枝。誰知老子閉眼處。恰是新寒細雨時。

又

安石榴房初小坼。南天竺子亦發子。子所美莫莫謂次已垂也。照亂去奇開。南燭草本。俗謂之南天竺。李端叔取以名僧軒。蓋用俗語也。

村鄰會飲

陸子白首安耕桑。樂事遠數烏能詳。長羅家家雪作麵。畫楫處處青分秧。迎荻船歸潮入浦。祈蠶會散月滿廊。有時鄰曲苦招喚。茅簷掃地羅壺觴。堆盤珍膾似河鯉。入鼎大嚼勝胡羊。披緜黃雀麴糝美。斫雪紫蟹椒橙香。老人飽食可無患。摩挲酒瓮與飯囊。兒孫扶持遞相送。笑語無間歌聲長。人間哀樂不可常。掠剩有鬼在汝傍。常憂水旱虞螟蝗。力行孝悌招豐穰。

試筆

烹葵飯豆飽還休。弄筆翻書歲又秋。靈府湛然如止水。擬將何地著閑愁。

又
紅絲玉斗紫毫銚。歲晚相從味更長。不似樂天歸老日。柳枝駱馬兩堪傷。

孤村

老寄孤村裏。悠然臥曲肱。算貧先放鶴。嫌鬧併疎僧。古戍高秋笛。寒窗半夜燈。平生差詭遇。多獲豈吾能。

絕祿以來衣食愈不繼。小兒力圖之。殊未有涯。予謂不若痛節用。爾示以此詩。

處世吾傷拙。營生汝亦疎。如謀道邊舍。似信枕中書。甕隔居疑泰。藜羹食敢餘。晏嬰元學墨。勿負此心初。

予宿疾多已失去。獨氣痛時作賦詩。自寬。

疾久難全去。扶持度歲年。垣牆完罅隙。匕筯禁芳鮮。漸減觀書課。常儲買藥錢。鄉人多不識。誰與問沉疴。

秋懷十首末章稍自振起。亦古義也。

皇天本無心。萬物各有時。飛鴻何預人。南翔每如期。仰看霜露墜。俯歎草木衰。英英籬下菊。秀色獨滿枝。豈無一樽酒。相與斟酌之。蓋老天所佚。行歌復何疑。

又

暑退財幾時。忽已迫霜露。西風一何厲。落葉紛滿路。老翁衰可笑。日夜念墟戶。衣裘先關懷。膏火亦當具。酒尤不可緩。傾聽糟牀注。供饗柿栗耳。何敢議雉兔。

又

雨滴大梧葉。風轉孤蓬窠。秋色固悽愴。二物感人多。日月行黃道。倏過如飛梭。大計百年間。貴賤俱銷磨。

東家及西舍更代哭與歌。若無杯中物。如此搖落何。

又

身如行腳僧。放包卽爲家。家如道邊店。蕭然寄天涯。居室如小舟。風扉艣謳啞。坐傍陳琴書。庭下栽雜花。檢陋雖可笑。在我則已奢。何以善吾生。念念思無邪。

又

遇酒幸一醉。遇飯幸一飽。或遇空無時。豈復有他巧。鄉鄰哀其窮。叩戶餽糜粝。欣然出舍傍。菘韭青落爪。飢羸曾未起。吟諷已稍稍。袖手北窗前。枯腹困搜攪。

又

秋高天薄寒。夾衣已出笥。團團素紈扇。時至自當棄。明年機中練。與我亦何異。宮妾感物悲。此豈丈夫事。吾嘗一出門。所遇皆有義。夷齊死千年。高風遂難嗣。

又

辟塵當以屨。濯纓當以水。龜堂一炷香。世念去如洗。人生天地間。太倉一稊米。哀哉不自悟。役役以至死。孰能從我遊。趺坐燔柏子。夜半清磬聲。悠然從定起。

又

改朔甫再宿。月見西南隅。織織一銀鉤。掛空疑有無。我行青楓岸。遠水浮雙鳧。新寒入短衣。感此風霜初。頗欲呼小艇。東村行芋區。衣薄且言歸。煙火望吾廬。

又
短裘榜輕舟。時過野僧舍。長衫挂數珠。亦入法華社。平生無揀擇。生死均早夜。餘年猶幾何。久已付造化。常嫌樂天佞。卻肯退之罵。君看佛骨表。自是無生話。

又

我昔開關中。水深土平曠。涇渭貫其間。沃壤誰與抗。桑麻鬱千里。黍林高一丈。潼華臨黃河。古出名將相。淪陷七十年。北首增慘愴。猶期垂老眼。一覩天下壯。

九月七日子坦子聿俱出斂租穀雞初鳴而行甲夜始歸勞以此詩

仲秋穀方登。螟生忽告飢。艱難冀一飽。俯仰事已非。貧糧助耕耘。客主更相依。一旦忽如此。欲語涕屢揮。共斂螟之餘。存者牛毛稀。吾兒廢書出。辛苦幸庶幾。夜半聞具舟。憐汝露濕衣。既夕不能食。念汝戴星歸。手持一杯酒。老意不可遠。稊瘦酒味薄。食少雞不肥。頗聞吳中熟。多稼徹王畿。亦欲就飽處。無羽能奮飛。官富哀我民。榜笞方甚威。渠亦豈得已。撫事增歎歎。

醉題埭西酒家

陣陣新寒入布裘。偶乘小醉得閑遊。丹楓落日野橋晚。斷雁溼雲江路秋。馬得一鳴何恨斥。金經百鍊豈容柔。不知千載塵埃裏。更有吾曹強項不。

又

桑麻蒙翳不通鄰。耽酒頽然一老民。遣客方眠那是醉。有衣可典未爲貧。曠飢斜日鷓來熟。印跡平沙雁

到新君看此間何境界。癡人猶說吐車茵。

秋晚

庭草猶殘綠。溪楓已半丹。誰知此翁健。又見一年寒。幻境槐安夢。危機竹節灘。如今渾過盡。糜腹且加餐。

省事

省事漸捐書。甘貧學藝蔬。心安閑夢少。病去俗醫疎。兀爾遊方外。超然到物初。此身猶是幻。況復愛吾廬。

晨起頗寒飲少酒作草數幅

衣食無多悉自營。今年真箇是歸耕。屏居大澤羣鷺息。乍得清寒百體輕。橋北涼收波淺碧。隸西霜近葉微頹。一杯弄筆元無法。自愛龍蛇入卷聲。

往事

海內橫流日。吾猶及建炎。衆醫雖共視。久疾固難痊。黠虜方觀釐。行宮未解嚴。時平逾五紀。話此涕常霑。

步至東莊

澤國寒雖晚。霜天已迫冬。蘂花雪無際。稻米玉新春。身已風中葉。人方飯後鐘。兒能哀老子。努力事春農。

秋思

門巷蕭條秋色深。黃花始欲慰孤斟。久貧自笑不妨樂。過足固知非所欽。琴調已忘還漸省。詩聯未穩更常吟。吾兄西上無多日。安得相從老故林。時子處將調官臨安。

又

日落江城聞擣衣，長空杳杳雁南飛。桑枝空後醅初熟，豆莢成時兔正肥。徂歲背人常冉冉，老懷感物倍依依。平生許國今何有，且擬梁鴻賦五噫。

讀退之人不知古今馬牛而襟裾之句有感

書生獨占世間癡，過計私憂無已時。知盡古今成底事，空將血淚向人垂。

病愈看鏡

鏡中稍復舊朱顏，一笑衰翁乃爾頑。三百縑縶消未盡，不知更著幾年還。舊傳賈士死，見陰吏爲言當還魂。有三百縑縶祿料未應。

讀韓致光詩集

渺莽江湖萬里秋，玉峯老子弄孤舟。猶勝宿直金鑾夜，凜凜常懷潑醉憂。

逆旅書壁

驢鞍懸酒榼，僮背負衣囊。但說市朝變，不知岐路長。下程先施藥，拂榻靜焚香。明旦又西去，河橋秋葉黃。

又

騎驢萬里行，歲一過秦城。下杜賈春酒，新豐聞曉鶯。綠槐新巷陌，白骨幾公卿。欲覓曲江水，連雲禾黍生。

初寒老身頗健戲書

一身百病老難支，病減身輕偶此時。窗暖不妨聊假寐，囊空久已罷招醫。山爐曉絕香生岫，鑿研坡陀墨滿池。箇裏生涯君莫厭，癡人至死不曾知。

又

過雁聲悲落葉稠。孤村景物更禁秋。窮諳客路風塵惡。老判人間歲月遒。酒號賢人真古語。疾爲豎子豈
吾憂。山房幸有初寒備。且傍篝爐擁褐裘。

子龍求煙雨軒詩口占絕句

烏柏迎霜已半丹。哦詩終日合憑欄。霜高木落應尤好。長挂西窗更怕寒。

又

規模正似釣魚菴。把酒纔容客二三。若比東偏參倚室。此中猶自覺耽耽。參倚蓋子車書室名也。

陸放翁集

劍南詩藁

卷第四十一

居室甚隘而藏書頗富率終日不出戶

掩關小室動經旬。蠶簡如山伴此身。百億須彌藏粒芥。大千經卷寓微塵。危機已過猶驚顧。惡夢初回一欠伸。此段神通君會否。聽風聲雪待新春。

又

椰子微軀有百窮。平生風際轉枯蓬。豈知蟬腹龜腸後。更寄蜂房蠹穴中。學儉久判羹不糝。憚煩惟欲寐無聰。積書充棟元無用。聊復吟哦答候蟲。

無酒歎

不用塞黃河。不用出周鼎。但願酒滿家。日夜醉不醒。不用冠如箕。不用印如斗。但願身強健。朝暮常飲酒。造物不少恕。虐戲逐段新。坐令古銅槿。經月常生塵。平生得酉任。無敵百福林。滴風雨疾。造物欲以醒。困之。此老醒狂君未知。

讀書

古人已死書獨存。吾曹賴書見古人。後之視今猶視古。吾書未泯要有取。賈生痛哭漢文時。至今讀之有

餘悲魏徵嘻笑封德彝。生亦豈責絳灌知。窮秋風雨臥孤館。萬世悠悠百年短。垂死成功亦未晚。安知無
人歎微管。

醉賦

霜楓照茅屋。露菊插紗巾。今古無窮事。江湖未死身。直令依馬磨。終勝拜車塵。我亦輕餘子。君當恕醉人。

掩扉

久臥空山獨掩扉。迂疎不恨世相違。新霜巷陌鳥烏樂。小雨園畦菘芥肥。驥病極知當伏櫪。鷗閑誰與共
忘機。一編蠹簡從吾好。又見西窗掛夕暉。

六經

六經聖所傳。百代尊元龜。諄諄布方冊。一字不汝欺。抱書入家塾。自汝兒童時。老乃幸不驗。愚哉死何悲。
又

秦人燔六經。非與經爲仇。方其勇決時。亦爲子孫謀。斂金鑄巨人。豈復畏鉏耰。千載惡名在。尙與黃河流。
舟中作

沙路時晴雨。漁舟日往來。村村皆畫本。處處有詩材。炊黍孤煙晚。呼牛一笛哀。終身看不厭。岸曠興悠哉。
秋晚

門巷清如水。情懷淡似秋。詩吟唐近體。談慕晉高流。託命須長鏡。浮家只小舟。江南煙雨岸。何處不堪留。

又

木落寺樓出，江平沙渚生。牛羊下殘照，鼓角動高城。寒至衣猶質，憂多夢自驚。羣胡方闕穴，河渭幾時清。

西窗獨酌

却掃衡門歲月深，殘骸況復病交侵。平生所學爲何事，後世有人知此心。水落枯萍黏破塊，霜高丹葉照橫林。一樽濁酒西窗下，安得無功與共斟。

冬初薄霜病軀益健欣然有賦

古服追隨野老歡，豎裁布褐縮縫冠。霜清頓洗肺肝熱，木落更知山澤寬。斗酒敢言嫌魯薄，杯羹聊得學吳酸。一貧自是書生分，忍媿看人却似難。

一錢

萬事紛紛不足論，滿庭枯草閉柴門。一錢留得終羞澀，持買餛飩引福孫。

燈下讀書戲作

吾生如蠹魚，亦復類熠燿。一生守斷簡，微火寒自照。區區心所樂，那顧世間笑。閉門謝俗子，與汝不同調。

遊近山

羸病知難賦遠遊，尙尋好景送悠悠。亂山孤店雁聲晚，一馬二童溪路秋。掃壁有僧求醉墨，倚樓無客話清愁。殘年敢望常強健，到處臨歸爲小留。

示兒子

祿食無功我自知，汝曹何以報明時。爲農爲士亦奚異，事國事親惟不欺。道在六經寧有盡，躬耕百畝可

無軌最親切處今相付熟讀周公七月詩

寄溧陽周丞文璞周寄詩卷殊可喜

滿握珠璣何自來。晴窗初喜拆書開。信哉天下有奇作。久矣名家多異才。隔閩經年如許進。超騰它日若爲陪。山陰道上霜天好。安得相從賦早梅。

旅思

支遁山前看月明。葛洪井上聽松聲。廢亭草滿青驪健。野店燈殘寶劍鳴。萬事竟當歸定論。寸心那得愧平生。悠然酌罷無人語。寄意孤桐一再行。

東村步歸

野渡霜風冷。茆簷夕照明。催科弊亭長。聚學老書生。山果紛丹漆。村醪任濁清。路回家忽近。柳外小橋橫。

又

風陣鴉翻黑。霜林葉半丹。筋骸欣小健。裘褐戒初寒。代步雞栖足。充飢鶴料寬。平生自如許。況已掛吾冠。

觀方外書

司馬遺書有坐忘。顛翁止觀略相當。龜堂閉戶常終日。時得相從一炷香。

午睡初起

曲腰柔上午雞鳴。喔喔還如報五更。睡起展書摩病眼。油窗喜對夕陽明。

又

舍中未報壓新醅。閑弄流塵榼。杯得醉固佳。醒亦好了。無一事到靈臺。

暮秋遣興

改盡朱顏白盡頭。杜門亦復弊貂裘。斷鴻影外玉關月。病驥嘶中青海秋。孤坐向空書咄咄。閑吟隨處送悠悠。如虹壯氣終難豁。安得雲濤萬里舟。

又

平生南地慣竊遊。放浪常同不繫舟。誰作夜風經沌口。鶴鳴秋雨宿航頭。方傾意氣輕秦俠。俄困悲傷類楚囚。買屋數間聊作戲。豈知真用作菟裘。

種蔬

老翁老去尙何言。除却翻書卽灌園。處處移蔬乘小雨。時時拾礫繞頽垣。江鄉地暖根常茂。旱歲蟲生葉未繁。四壁愈空冬祭近。更催穉子牧鷄豚。

起晚戲作

睡到僧廊響木魚。莊周蝴蝶兩蘧蘧。數聲林下華亭鶴。一卷牀頭笠澤書。雲子甌香炊熟後。露芽甌淺點嘗初。若論身逸心無事。臺省諸公恐不如。

老歎

八十未滿七十餘。山巔水涯一丈夫。長鳴未免似野鶴。生意欲盡如枯株。臨安官闕經營初。銀鞍日日醉西湖。不須細數舊酒徒。當時兒童今亦無。

新治暖室

小堂穩暖紙窗明，低幌圍爐亦已成。日閱藏經忘歲月，時臨閣帖雜真行。詩才退後愁酣戰，酒量衰來喜細傾。從此過冬那復事，夜深時聽雪來聲。

暖閣

柔軟勝狐白，爐溫等鴿青。宮中供爐炭，用胡麻文鴿鷄膏。紙屏山字樣，布被隸書銘。養目簾稀卷，留香戶每扃。日晡濃睡起，盥濯誦黃庭。

自詠

朋舊凋零盡，乾坤偶脫遺。食新心竊喜，話舊語多悲。泥醉醒常少，貪眠起獨遲。閉門誰共處，枕藉樂天詩。
王元之自言在商州讀老莊外，枕藉白樂天詩。

夜坐

白首仍多病，青燈獨掩扉。雲低聞雁過，雨急待兒歸。

初冬有感

衰髮蕭蕭滿鏡絲，情懷非復似平時。風霜十月流年感，磁杵三更游子悲。閩嶠故人消息惡，傳聞方伯讓荆卒蜀江遺老素書遲。張季長居唐安，歲常通書。一簞豆飯休嫌薄，賦分羈窮合自知。

又

戴冠本願致唐虞，白首那知墮腐儒。碌碌不成千載事，駸駸又見一年徂。無僧解轡齋廚米，有吏頻徵瘦

地租。要信此翁頑到底。只持一笑了窮途。

題酒家壁

智若禹行水道如丁解牛。遼遼幾春夢。泛泛一虛舟。事定憂何益。狂來醉始休。青帘誇酒美。且復共登樓。

冬初出遊

風聲如雨曉颼颼。萬葉丹楓滿瓦溝。西望牛頭三十里。一枝柔艣作閑遊。

又

寒驢渺渺涉煙津。十里山村發興新。青旆酒家黃葉寺。相逢俱是畫中人。

早飯後戲作

湯餅滿盃肥豕香。更留餘地著黃梁。解衣摩腹西窗下。莫怪人嘲作飯囊。

又

髯鬚主簿方用事。冰壺先生來解圍。蠻童取火炷香椀。不讀南華誰與歸。

擬古

牛跡可使圓。羊角可使直。惟使剛者柔。造物不可得。世方貴軟熟。剛實不可爲。爲剛死道傍。已矣何所悲。

又

君看一釣絲。能得幾日絡。君思幾州鐵。打此一大錯。目前豈不快。後悔將奈何。我非通神明。比汝更事多。

又

寧忍日日飢野葛不可烹寧枉百里途捷徑不可行自古風俗壞善事亦淪胥橘柚禹包貢後世稱木奴

又
坐臥北窗下百事廢不治脫粟與大布衣食裁自支温飽豈不欲違道子心悲地下見先人所冀尙有辭

東村
野人知我出門稀男輟鉏纒女下機掘得苾荔炊正熟一杯苦勸護寒歸

又
野人喜我偶閑遊取酒忽忽勸小留舍後攜籃挑菜甲門前喚擔買梨頭村人謂小梨爲梨頭

倚闌
滿庭晴日破朝寒粥罷披裘小倚欄殘菊抱叢香欲盡一株南燭獨如丹

霜寒不能出戶偶書
垂老仍多病濃霜得快晴猶能撥菊醉今年菊晚十月未猶有花但負探梅行篝火烘裘暖油窗潑眼明

小兒殊可喜和我讀書聲
冬晴與子坦子聿遊湖上

又
湖邊細竊弄霏微柳下人家晝掩扉乘暖冬耕無遠近小舟日晚載翠歸

又
村南村北紡車鳴打豆家家趁快晴過盡水邊牛跡路嶺頭猿鳥伴閑行

又
道邊白水如牛渚。知是山泉一脈來。會挈風爐并石鼎。桃枝竹裏試茶杯。

又
海山山下百餘家。垣屋參差一帶斜。我欲往尋疑路斷。試沿流水覓桃花。

又
老僧八十無童子。禮佛看經終不能。雙手丫叉出迎客。自稱六十六年僧。

又
一棹無時可醉吟。一藤隨處得幽尋。先須挽取銀河水。淨洗人間塵霧心。

夢蜀

夢飲成都好事家。新粧執樂雁行斜。頰肩郫縣千筒酒。照眼彭州百馱花。醉帽傾歌歌未闋。罰觥激盪笑方譁。霜鐘喚覺晨窗白。自怪無端一念差。

歲晚

無窮世事浩難量。歲晚沉綿臥草堂。短褐拆圍移曲折。故書經蠹失偏傍。賣刀擬買春耕犢。挾筴曾亡舊牧羊。點檢生涯還自笑。菜畦殘葉帶新霜。吳中冬蔬常茂。

又

扶藤撐几久支離。敢料駸駸迫鬢期。面槁自丹天所借。齒搖復住力何施。花前鯨吸猶堪酒。窗底蟬嘶未

廢詩浮世極知誰不死。比君終校幾年遲。

讀老子

道德五千言。巍巍衆妙門。管窺那見豹。指染僅嘗醞。正爾分章句。誰歎達本源。蜀莊猶不死。過我得深論。
世傳莊君平不死。時在人間。讀老子。

貧病

窮愁病思兩茫茫。衰髮元知合變霜。酒要解醒猶有策。食求祝噎更無方。凋零坐上親朋少。寂寞人間歲月長。默計有時還自幸。幼安垂老始歸鄉。

洪雅葛仙硯探竊中物作題

異硯出漢嘉。溫潤蒼玉質。因形作獸背。得墨如點漆。才高德亦全。終月不更筆。蠻溪大沱壑。昔蜀硯之得名者。烏敢相甲乙。從我歸吳中。略計將萬日。摩拂不去手。有若琴在膝。名晦知者稀。體重盜計窒。惟當草太玄。不污管商術。

冬日讀白集愛其貧堅志士節病長高人情之句作古風

君子亦有慕。不慕要路津。君子亦有恥。不恥賤與貧。風俗未唐虞。詩書非一秦。展轉不能限。臥聽雞唱晨。

又

天下不難一。孰能疑使堅。自古功已成。或散如飛煙。惟唐用房魏。規模三百年。至今河潼路。過者猶泫然。

漢禍始外戚。唐亂基宦寺。小人計已私。頗復指他事。公卿恬駭機。關河入危涕。草茅豈無人。死抱經世志。

又

成童入鄉校。所願爲善士。富貴本邂逅。不遇亦已矣。生輕名義重。固守當以死。堂堂七尺軀。勿使污青史。

又

勁風東北來。芴屋吹欲裂。出門有奇觀。湖上千峰雪。日高炊未具。歲晚衣百結。士豈無一長。所要全大節。

又

吾常慕昔人。石介與王令。挑燈讀其文。奮起失衰病。吾徒宗六經。崇雅必放鄭。人衆何足云。少忍待天定。

又

郊居四十年。草木日夜長。喬松已偃蓋。穉松出莖莽。儒生學仁義。敢廢自培養。鬱鬱棟梁姿。拔地當百丈。

又

仕如柳柳州。賤奏典儀曹。君恩篤始終。賜骸老東臯。歷觀親黨間。如我亦已遭。世世當斂退。里門不須高。

又

鏡湖有隱者。莫知何許人。出與風月遊。居與猿鳥鄰。似生結繩代。或是葛天民。我欲往從之。煙波浩無津。

又

卜日家祭竈。牲肥酒香清。分胙雖薄少。要是鄰里情。衆起壽主人。一觥激澀傾。氣衰易成醉。睡覺齒已明。

十一月四日夜半枕上口占

小室愔愔夜向分。幽人殘睡帶殘醺。蒼間雨滴愁偏覺。枕畔橙香夢亦聞。鷺雁數聲投野澤。悲笳三疊上霜雲。年來萬事俱拋盡。自笑詩中尙策勳。

齋中弄筆偶書示子聿

左右琴樽靜不譁。放翁新作老生涯。焚香細讀斜川集。候火親烹顧渚茶。書爲半酣差近古。詩雖苦思未名家。一窗殘日呼愁起。曩曩江城咽暮笳。

飢寒吟

夜寒每達旦。懷抱安得寬。朝飢或過午。忍此良亦難。飢寒誠吾憂。憂有甚飢寒。彈琴不終曲。推去發永歎。大兒破綠襦。三歲待一官。小兒學耕稼。飯牛歌夜闌。老翁垂八十。捫壁行蹒跚。傍觀勿嘲笑。窮死心所安。

病愈小健戲作

路入江村跨蹇驢。鞍前分挂兩囊書。興來到處沽新酒。不爲閑愁要破除。

又

入市歸村不跨驢。蠅頭細字夜鈔書。身安自勝閑官職。不是虛名暗破除。

祭竈與鄰曲散福

已幸懸車示子孫。正須祭竈請比鄰。歲時風俗相傳久。賓主歡娛一笑新。雪鬢坐深知敬老。瓦盆酌滿不羞貧。問君此夕茅簷底。何似原頭樂社神。

湖水盃縮戲作

瓜瓞從來幾邵平。鏡湖復有一玄英。今秋雨少煙波窄。堪笑沙鷗也敗盟。

夜坐

夜永霜濃睡不成。團欒兒女話無生。金蓮妄想消除盡。一枕松肪徹曉明。

夢中作遊山絕句

霜風吹帽江村路。小蹇迢迢委轡行。忽到雲山幽絕處。穿林啼鳥不知名。

又

寺樓已斷暮鐘聲。照佛琉璃一點明。不道溪深待船久。老僧驚怪太遲生。

大姪挽辭前知黟林州博白縣釋。

束髮已青袍。終身州縣勞。一官常飢餓。萬里忽烹蒿。竟負昂霄志。空傳擲印豪。君在博白。與郡爭辨職事。袖印還之而去。兩疎心不遂。遺恨寄滔滔。

書幸

富貴不可爲。禍機發須臾。貧賤不可爲。飢寒死路衢。我亦貧賤者。死期幸少紓。春雨兩耕犢。西疇破煙蕪。秋風一釣舟。南浦宿菰蒲。辛勤異退之。亦復有室廬。堂北鑿明窗。可以東琴書。文章不傳世。自適亦有餘。

又

我身匪兕虎。豈是曠野物。生非洪水時。胡爲在巢窟。向來三入朝。薄命不黔突。未嘗識許史。況敢交平勃。滄波渺黏天。遠逐輕鷗沒。今年君恩厚。幸許賜骸骨。既逃申公鉗。又異卞和別。放懷歌鳴鳴。寧暇書咄咄。

退居

溪煙漠漠弈碁軒。篔簹水瀑湧種藥園。醫爲疾平新掃跡。客知睡美空敲門。談餘白拂懸牀角。飲散空樽臥壁根。賜帛更蒙優老詔。此生何以報君恩。比有詔書。賜致仕官。羊酒粟帛。丁寧甚至。

北望感懷

榮河溫洛帝王州。七十年來禾黍秋。大事竟爲朋黨誤。遺民空歎歲時遒。乾坤恨入新豐酒。霜露寒侵季子裘。食粟本同天下責。孤臣敢獨廢深憂。

白髮

蕭蕭白髮濯滄浪。剡曲西南一艸堂。飲水讀書貧亦樂。杜門養病老何傷。已成五畝扶犁叟。誰記三朝執戟郎。正似籬邊數枝菊。歲殘猶復耐冰霜。

老歎

事與年俱往。心於世轉疎。曼膚銷欲盡。鬢髮變無餘。野店通賒酒。鄰翁伴荷鋤。尙嗟餘習在。夢課吏鈔書。

作竹籬成因把酒其間戲題四十字

今日偶暄暖。臥聞林鳥呼。雖思大白飲。未免小蒼扶。柳色動籬外。梅花來座隅。夕陽紅滿野。更復倒殘壺。

新養白雞毛羽如玉殊可愛

赤幘峨峨玉羽明。籬間新織竹籠成。老人從此知昏曉。不用元戎報五更。

新籬

新籬三面北通門。藤架陰中細路分。天字淡青成卵色。水波微皺作靴紋。參差村舍穿林出。縹緲漁歌隔浦聞。忽覺楚鄉來眼底。欲題幽句弔湘君。

龜堂雜興

朝來地確玉新春。雞蹠腥肩異味重。便腹摩挲更無事。老人又過一年冬。

又

曳杖東岡信步行。夕陽偏向竹間明。丹楓吹盡鴉聲樂。又得霜天一日晴。

又

閩溪紙被輒於綿。黎峒花紬暖勝氈。一夜山中三尺雪。未妨老子日高眠。

又

三分帶苦檜花蜜。一點無塵柏子香。鼻觀舌根俱得道。悠悠誰識老龜堂。

又

方石斛栽香百合。小盆山養水黃楊。老翁不是童兒態。無奈菴中白日長。

又

少年身寄市朝中。俗論紛紛聒耳聾。清絕寧知有今日。高眠終夜聽松風。

又

二三鄰曲偶相尋。小醉悠然臥竹陰。醒後自看還自笑。溪雲猶未是無心。

又

蒲團安坐地爐溫。無位真人出面門。世上不知何歲月。斷鐘殘角送黃昏。

又

道妙從來亦纔聞。閉門方用十年勤。筆端小技深知悔。舊藁如山欲盡焚。

又

散樸澆淳萬事新。腐儒空有涕沾巾。唐虞不是終難致。自欠臯夔一輩人。

卷第四十二

己未冬至

老人畏添歲。每歎時序速。今朝陽始生。在易得來復。扶衰奉先祭。拜起賴童僕。兒曹亦壽我。魚兔隨事足。歡言爲一醉。家釀及新熟。占年當得稔。冬至後九日遇壬。法當有年。喜笑動鄰曲。冀從宿麥始。載重車折軸。明年秋社時。處處壓酒肉。

冬至夜坐作短歌

一陽萌生從此日。老人堅坐午達夕。渾渾上泝河流黃。赫赫內視神珠赤。愛如嬰兒未離乳。危若遊絲曷千尺。君不見宣房塞河百萬人。一旦橫流由蟻隙。

新裁短褐接客以代戎服或以爲慢戲作

世事巧相違。殘年幸許歸。雖云裁兔褐。不擬出漁扉。拂石襟靈爽。搗笳氣力微。朝衣曾圭卯。兒輩著皮衣。

冬夜

多病睡眠少。長閑懷抱清。昏燈照殘夢。寒漏下高城。落月澹將沒。棲禽靜復驚。誰言冬夜永。輾轉已窗明。

書感

壯歲功名妄自期。晚途流落養成絲。臨風畫角曉三弄。釀雪野雲寒四垂。金鎖甲思酣戰地。皂貂裘記遠遊時。此心炯炯空添淚。青史它年未必知。

書意

領霜久矣不勝耘。殘髮今年白十分。憂國雖忘整婦緯。愛君敢進野人芹。牀頭酒滴空階雨。爐面香橫出袖雲。已向人間齊物我。不教驚起白鷗羣。

試茶

強飯年來幸未衰。睡魔百萬要支持。難從陸羽毀茶論。寧和陶潛止酒詩。乳井籬泉方徧試。柘羅銅碾雅相宜。山僧剝啄知誰報。正是松風欲動時。

對酒懷丹陽成都故人

勞生常羨獨醴樂。死時卻悔生時錯。花前有酒不肯狂。回首朱顏已非昨。君看古來賢達人。終日飲酒全其真。世間萬事竟何有。金樽翠杓差關身。放翁少日無凡客。飛鷲縱樂皆豪傑。清歌一曲梁塵起。屢鼓百面春雷發。故人仙去蓬萊宮。鸞絲鳳竹醉春風。石帆山下孤舟雪。一段清愁付此翁。

三山下居三十有四年矣。老身七十有五兒輩亦頗官學未爲非吉也。偶作五字示諸兒。買地不占龜。心知百世宜。西鄰梅福隱。南望項王祠。菴小僧僧樣。陂長按古規。保家無異法。一念勿萌欺。

村興

身老交情見。孫生口數添。園丁上牛米。村婢博蠶鹽。妝奩堆蠶白。餠餠出釜甜。閉門君勿語。衰病正相兼。

枕上

迢遞孤村夜。淒涼半篆香。懷人悲夢短。聽雨怯更長。有術乾盤汞。無方掃髮霜。高吟擬排悶。吟罷更侵侵。

得建業倅鄭覺民書言虜亂自淮以北民苦徵調皆望王師之至。邦命中興漢天心大討曹風雲助開秦河渭蕩腥臊日避揮戈勇山齊積甲高。煌煌祖宗業。只在馭羣豪。

兩夜讀書

農家多少事。無地肆吾勤。急雨生新健。陳編寄一欣。高風感莘渭。善治仰華勳。老死今朝夕。何由誦所聞。

夢中作已未十二月五日夜作。所書皆夢中事也。

長隄行盡古河濱。小市人稀霧雨昏。樞馬垂頭鬣管草。驛門移路避槐根。斷碑零落苔俱徧。漏壁微茫字半存。催喚廚人燎狐兔。強排旅思舉清樽。

題傳神

雪鬢蕭然兩頰紅。人間隨處見神通。半醒半醉常終日。非士非農一老翁。樞驥雖存千里志。雲鷗已息九天風。曉曉骨法吾能相。難著凌烟劍佩中。

紀懷

未斷要離家畔雲。僧牛得食寄鄉粉。修身本欲善吾死。臨事豈忘尊所聞。時序管寧親饋奠。江山龐老上丘墳。飾巾家寶從來事。萬種悠悠莫苦分。

新作柴門戲書

雖設常關果是麼。開門終日有誰過。從來不省多車轍。此際真宜置爵羅。尚許漁樵時剝啄。偶逢風月亦婆娑。炎炎炙手須臾事。也比柴荆較幾何。

炊飯

米分齋鉢供。薪拾墮巢枝。偶爾成幽事。欣然慰午飢。炊時珠瀉飯。嘗處雪翻匙。欲作明朝計。還須賣漉籬。

愛閑

今日先生病體輕。愛閑猶有舊心情。帖看貞觀行間印。琴記中郎囊下聲。衣焙溫溫香欲透。雪簷滴滴日初晴。客來一笑明窗底。枉道爲農事耦耕。

與子聿讀經因書小詩示之

經中固多趣。我老未能忘。似獲連城璧。如傾九醞觴。信能明孔氏。何暇傲羲皇。努力晨昏事。躬行味始長。

登東山

老慣人間歲月催。強扶衰病上崔嵬。生爲柱國細事爾。死畫雲臺何有哉。熟計提軍出青海。未如喚客倒金盃。明朝日出春風動。更看晴天萬里開。

己未歲暮

七十六年將到時。龍鍾猶復強支持。寒燈照影始知瘦。薄酒作醒方覺衰。春日尙能持冷麵。花時未礙插繁枝。癡頑應有傍觀笑。自課園丁補槿籬。

冬夜讀書示子聿

宦途至老無餘俸。貧悴還如筮仕初。賴有一簪勝富貴。小兒讀遍舊藏書。

又

易經獨不遭秦火。字字皆如見聖人。汝始弱齡吾已耄。要當致力各終身。

又

古人學問無遺力。少壯工夫老始成。紙上得來終覺淺。絕知此事要躬行。

又

簡斷編殘字欲無。吾兒不負乃翁書。絕勝鎖向朱門裏。整整牙籤飽蠹魚。

又

聖師雖遠有遺經。萬世猶傳舊典刑。白首自憐心未死。夜窗風雪一燈青。

又

殘雪初消薺滿園。糝羹珍美勝羔豚。吾曹舌本能知此。古學工夫始可言。

又

讀書萬卷不謀食，脫粟在傍書在前。要識從來會心處，曲肱飲水亦欣然。

又

世間萬事有乘除，自笑羸然七十餘。布被藜羹綠未盡，閉門更讀數年書。

幽興

午倦便高枕，朝飢美小殮。時穿幽圃屐，常掩小菴門。溪憶鷗盟約，花迷蝶夢魂。餘生猶幾許，萬事付乾坤。

寓歎

眼底誰爲耐久朋，倚肩按膝一烏藤。虛名但可欺橫目，薄俗何時復結繩。浮世百年悲冉冉，閉身萬事付騰騰。年來更歎龍鍾甚，欲探梅花病不能。

夢題驛壁十二月二十七日夜

半生征袖厭風埃，又向關門把酒杯。車轍自隨芳草遠，歲華無奈夕陽催。驛前歷歷埃雙屐，陌上悠悠人去來。不爲途窮身易老，百年回首總堪哀。

新春

柳淡春初破，梅寒瘦不禁。羈愁醉後減，睡思雨中深。閑試新收硯，重尋久廢琴。何時見朋舊，細話別來心。

庚申元日口號

數行晴日照青鴛，春入屠蘇激澗樽。兒報山僧留刺去，未爲無客到吾門。

又

黃紬五丈裁衫襪。黑黍三升作飯香。造物要教無塊作。一身溫飽出耕桑。

又

南陌東阡自在身。老年喜見歲華新。洛中九老非吾侶。且作山陰十老人。

又

晚塗初入長生運。新歲仍當大有年。剩與鄉鄰同覓醉。市樓酒賤不論錢。

又

去年迎客已蹒跚。今歲人扶出亦難。堪笑此翁衰到底。重裘絮帽尙言寒。

又

仁和館外列鷓行。憶送龍舟幸建康。舍北老人同甲子。相逢揮淚說高皇。

視東臯歸

抱耒新湖葑。燒畬古廟墻。宦遊悲骭髀。歸臥困沉綿。日隱啼鴉戍。舟回落鴈天。衰殘知迫死。不忍負青編。

晚步舍東

遇興穿叢竹。尋香折野梅。暮天寒欲雪。幽徑綠生苔。栖雀爭枝噪。歸牛並蹏來。高城角聲動。不盡古今哀。

入日東園

歲首未入春。風氣已稍和。我睡意慵起。如此鳴禽何。駕言之東園。落梅亦已多。江南無堅冰。綠池生微波。挹彼蒲萄醅。酌我鸚鵡螺。雖無絲與竹。倚樹自高歌。矯首東南望。稽山鬱嵯峨。兒曹幸力穡。老子得婆娑。

逆旅行

古者謂死爲歸入。此身未死均是客。家爲逆旅身在途。久寓遽歸初不擇。逆旅相看道薄厚。非意相干寧足責。世間何處無谿山。得酒盡醉當墮幘。傍觀嘲諷亦其宜。東海定非蠡可測。

小雨初霽

歸來偶似老淵明。消渴誰憐病長卿。小雨染成芳草色。好風吹斷畫簷聲。剪燈院落晨猶冷。買酒樓臺晚旋晴。莫道此翁遊興懶。蘭亭禹寺已關情。

獨夜

村路泥淹雪。虛簷水結冰。長征荷戈客。暫到放包僧。妖鷲鳴高樹。飢鼯觸閣燈。誰能問良苦。衰病正相乘。

忍窮

短褐財遮軀。孤烟僅續炊。久窮方有味。古語不吾欺。堅坐忘昏旦。殘年迫耄期。尙餘書滿屋。手校付吾兒。

開歲半月湖村梅開無餘偶得五詩以煙濕落梅村爲韻

斷岸通別浦。孤舟入春煙。與梅本無期。忽到醉眼邊。折花插紗帽。花重覺帽偏。居人空巷看。疑是湖中仙。

又

我來梅花村。倚杖久佇立。惜哉風雨餘。零落綠苔濕。往年賦詩人。去袂不可執。明朝梅亦空。感舊百憂集。

又

梅花如高人。妙在一丘壑。林逋語雖工。竟未脫纏縛。乃知尤物側。天下無傑作。老我懷不紓。樽前幾開落。

又

斗柄忽東指。開盡湖邊梅。偉觀天下無。四顧雪千堆。時至當斂退。勿受曉角催。安知桃李輩。於子無嫌猜。

又

昨日春已來。盎盎滿江村。落梅亦多情。點點浮清樽。語離聊一醉。不恨村酒渾。人生共如此。已矣兩忘言。

老病

湖上歸耕一病翁。此心非復少年同。讀書初恨歲時速。聞道始知身世空。匠石不能材社稷。弋人何意慕冥鴻。新春愈覺支離甚。又付生涯藥裹中。

三二年來夜夢每過吾廬之西一士友家觀書飲酒方夢時亦自知其爲夢也

西鄰好友工談笑。每見明知是夢中。樽酒不空書滿架。何時真得與君同。

又

清言疊疊岸繪巾。久矣吾遊無若人。自怪夢中來往熟。抱琴攜酒過西鄰。

上元雨

城中酒壚千百所。不憂不售惟憂雨。今年上元燈滿城。曲巷深坊鬧歌舞。天公不借一日晴。風吹燈死雨如傾。家家移牀避屋漏。不聞人聲聞屐聲。

雜興

造物乘除理固然。許將窮悴博頑堅。曠衰伏櫪心千里。龜冷撻牀壽百年。好事時供沽酒費。擁途爭笑插

花顛漁村宿願雖償盡。猶恨僧房欠晝眠。

又

散髮林間萬事輕。夢魂安穩氣和平。只知秋菊有佳色。那問荒雞非惡聲。達士招呼同嘯傲。福人分付與功名。一篇說盡逍遙理。始信蒙莊是達生。

初春書喜

我生本癡絕。萬事不繫懷。一朝蛻形去。豈問乘與羶。遊宦三十年。所向無一諧。偶然有天幸。自退非人排。黃紙如鴉字。君恩賜殘骸。剡溪回雪舫。雲門散青鞵。兩犢掀春泥。一鉢隨午齋。更當攤布被。高枕聽鳴蛙。幽居無一事。戲作

長鬚僅有玉川奴。秃尾猶無漫漢驢。萬事已隨春枕斷。故人何啻曉星疎。出乘微雨鋤畚粟。歸傍荒畦擲野蔬。一字不著方匯美。任人搜去帳中書。

贈道流

煙雲深處作生涯。回首人間歲月賒。留得朱顏憑綠酒。掃空白髮賴丹砂。七絃指下冷冷久。雙袖風中獵獵斜。他日相尋不知處。會從漁父問桃花。

病中作

牀席呻吟裏。衡茅隱約中。空與年往歎。未著日新功。世遠言猶在。身危道豈窮。但能無媿怍。天地本來公。

病愈偶書

枯蓬萬里寄飄風。晚落江頭號放翁。冉冉流年秋鏡裏。悠悠殘夢曉笳中。掃除藥裏病良已。棄置酒杯愁自空。閑處固應容老子。臥看年少起新豐。

小圃獨酌

少時裘馬競豪華。豈料今爲老圃家。數點露微社公雨。兩邊閑淡女郎花。詩成枕上常難記。酒滿街頭卻易除。自笑邇來能用短。只將獨醉作生涯。

飯罷戲示鄰曲

今日山翁自治廚。嘉穀不似出貧居。白鵝肉美加椒後。錦雉羹香下豉初。箭筈脆甘欺雪菌。蕨芽珍嫩壓春蔬。平生責望天公淺。捫腹便便已有餘。

春日

開盡梅花柳漸青。東風又滿會稽城。放翁晨起有佳思。姪姪林鶯初試聲。

又

方池潑潑碧波平。曲徑纖纖細草生。席地幙天君但醉。苦無多日是清明。

又

桃花輕薄柳花狂。蛺蝶翩翩燕子忙。惟有龜堂無一事。閉門白日不勝長。

又

巷口東風吹酒旗。老人也惜早春時。雨來三日泥沒踝。過盡梅花渾不知。

又
雪山萬疊看不厭。雪盡山青又一奇。今代江南無畫手。矮牋移入放翁詩。

又
怕見公卿嬾入城。野橋孤店跨驢行。天公遣足看山願。白盡髭鬚卻眼明。

新晴野步

吹盡浮雲旋作晴。郊原高下水縱橫。煙蕪漫漫如添色。谷鳥關關已變聲。迨酒賤時須痛飲。得人扶處儘閑行。隔湖遙指蘭亭路。鄰叟追隨羨眼明。

湖上作

鵝兒涇口曉山橫。蜻蜓港頭春水生。蘭亭之北是茶市。柯橋以西多櫓聲。

又

東涇西涇花極望。紅雲照波錦裏山路似。掌平身自倦。酒如土賤篋常愜。
夜行過一大姓家。值其樂飲戲作。

村豪聚飲自相歡。燈火歌呼鬧夜闌。醉飽要勝飢欲死。看渠也復面團圓。

枕上作

水漲池新滿。山寒屋儘低。愁多憎夜雨。睡少喜晨雞。社肉初分胙。春蕪已再犁。明朝尋父老。不怕踏街泥。

又

山雨蕭蕭過。沙泉咽咽流。夢中無遠道。醉裏失孤愁。貧賈相如騎。寒思季子裘。兒童報新霽。裹飯出閑遊。

悽悽行

悽悽重悽悽。惻惻復惻惻。我媿師曠傍。人誰子思側。與邦在人材。巖穴當物色。如何清廟器。老死山南北。小儒雖微陋。一飯亦憂國。豈無一得愚。欲獻懼非職。

春齋

食案何蕭然。春齋花若雪。從今日老硬。何以供采擷。山翁垂八十。忍貧心似鐵。那須萬錢筓。養此三寸舌。輕炊香秬飯。幸免頰祝噎。一瓢亦已泰。陋巷時小啜。

答客

人生各有營。爲吏最無策。其間小黠者。但肯乘下澤。絕筆光範書。掃迹翹才客。早收畏塗身。未老歸阡陌。嗟予昧擇術。誤計真累百。衰病始知悔。泯默每自責。孤舟寄涉莽。尙恨江湖迮。客來勿多談。窮命不禁嚇。

閑中自詠

小艇上時皆綠水。短筇到處卽青山。二十四考中書令。不換先生半日閑。

又

聲名本自不關身。富貴元知與禍鄰。但恨平生閑不足。再來眞作臥雲人。

甲申雨

老農十口傳爲古。遇春甲申常畏雨。風來東北雲行西。雨勢已成那得禦。山陰洗湖二百歲。坐使膏腴成。

瘠齒。陂塘遺迹今悉存。歎息當官誰可語。甲申畏雨古亦然。湖之未廢常豐年。小人那知古來事。不怨豪家惟怨天。

今歲遊花溼差晚戲作

滿地殘紅點綠苔。花溼弭棹小裴回。春風又作忽忽別。老病無端袞袞來。亦悟百窮緣骯髒。終羞萬事學低摧。吾文自欲忘憂耳。那博人間水一杯。

枕上口占

五十年前詩酒身。山陰風月尚如新。閑愁已是無闌障。一枕春寒更惱人。

又

蹣跚敲門覓季夷。髮髭同和仲高詩。回思五十年前事。恰似今宵夢裏時。

又

五十年間萬事空。懶將白髮對青銅。故人只有桃花在。惆悵無情一夜風。

贈謝正之秀才

君家麻源第三谷。我在鏡湖分一曲。平生夢亦不相接。忽然懷中瀉珠玉。誠齋老子主詩盟。片言許可天下服。長歌爲君定聲價。賞音但須一夔足。踢泥過我君豈誤。拱壁何至求凡目。只愁明日遽來索。北窗連夜挑燈讀。

連日往來湖山間頗樂卽席有作

晚春光景亦佳哉。野老蒼顏一笑開。莫問此生猶幾屐。但知相遇且銜杯。偶攜兒女祈蠶去。又逐鄰鄰賽麥回。不信年華如轉轂。城頭君聽角聲哀。

贈猫

鹽裹聘狸奴。常看戲座隅。時時醉薄荷。夜夜占黠鼯。鼠穴功方列。魚殮賞豈無。仍當立名字。喚作小於菟。

歎老

小築依林藪。殘年迫耄期。衣寬方覺瘦。步蹇始悲衰。食飲常多忌。方書動自隨。園花幾分在。睡起問吾兒。

殘春

章甫從諸老。今爲兩世人。惟書尙開眼。非酒孰關身。遠水涵清鏡。晴雲盛細鱗。籬邊花未盡。作意醉殘春。

東村

雨霽山爭出。泥乾路漸通。稍從牛屋後。卻過鶴巢東。泱泱沙溝水。翻翻麥野風。欲歸還小立。爲愛夕陽紅。

晚步舍北歸

昨日海棠開。今朝燕子來。偶行沙際去。卻傍柳陰回。酒是治愁藥。書爲引睡媒。吾生不之此。外物信悠哉。

記夢

夜夢遊名山。翠壁開巖扉。主人喜迎客。劇談皆造微。下臨萬里空。渺渺一鶴飛。安得棄家去。丹竈常相依。

寄題揚州九曲池

清汴長淮莽蒼中。揚州畫戟擁元戎。南連近甸觀秋稼。北撫中原掃夕烽。茶發蜀岡雷殷水。通隨苑月

溶溶懸知帳下多豪傑，一醉何因及老農。

投老

投老百無成，山林送此生。薄才元易盡，古道竟難行。陋巷牛羊迹，衡門鳥雀聲。新年幸差健，作意事春耕。

茅亭

終日坐茅亭，蕭然倚素屏。兒圓點茶夢，客授養魚經。馬以鳴當斥，龜緣久不靈。詩成作吳詠，及此醉初醒。

貧甚賣常用酒杯作詩自戲

桃李成塵渾不數，海棠也作胭脂雨。清明未到春已空，枝上流鶯替人語。逢春日日合醉歸，莫笑典衣窮杜甫。生時不肯澆舌本，死後空持酌墳土。門前三百里湖光，天與先生作醉鄉。銀杯羽化不須歎，多錢使人生窟郎。

春晚泛湖歸偶賦

十日雨晴湖水深，暖催新綠上橫林。分泥海燕穿花徑，帶犢吳牛傍柳陰。夏近漸低遊舫價，日斜殊費寺樓吟。歸來支枕還無事，一縷微煙看水沉。

卷第四十三

東園小飲

少年萬里走塵埃，歸臥柴荆晝不開。十事真成九敗意，一春知復幾銜杯。波清潏澗觀魚樂，風緊鉤簾待

燕回催喚比鄰同晚酌。旋燒筍筍摘青梅。

又

入東又見幾春風。菲屋蘆藩寂寞中。道業雖如詩不進。世緣已與夢俱空。高枝濯濯辛夷紫。密葉深深臘
躑紅。村巷斷無軒蓋到。一樽猶得伴鄰翁。

又

三月園林日漸長。閑從鄰曲答年光。醲醑獨殿羣芳後。醲醑能令萬事忘。下鼓蕞蕞誇舊俗。供鹽梅子喜
初嘗。烏靴席帽知何樂。自古京塵眯眼黃。

又

乞得殘骸老故山。草亭終日對孱顏。孤雲百尺起江際。幽鳥數聲鳴竹間。衆死一身今獨健。人忙萬物本
常閑。此心欲語知誰聽。賴有漁樵日往還。

病退願思遠遊信筆有作

平日身如不繫舟。曾從楚尾客秦頭。風生江浦千帆曉。月落山城一笛秋。萬事只能催白髮。百年終是臥
荒丘。扶衰強項君休笑。倚憶人間汗漫遊。

春晚閑步門外

病退扶行力尚微。悠然隨意出荆扉。蜂貪釀蜜爭花去。燕喜分泥榜水飛。午渴坼瓶嘗煮酒。晴暄開筍換
單衣。躊躇已久歸猶懶。更向溪頭坐釣磯。

嘲布穀

時令過清明。朝朝布穀鳴。但令春促駕。那爲國催耕。紅紫花枝盡。青黃麥穗成。從今可無語。傾耳舜弦聲。

題齋壁

出郭無十里。結廬纔數間。每將窮博健。不遣樂妨閑。賣藥雲邊市。尋僧雨外山。何妨搖櫂去。却作跨驢還。

龜堂晚興

九日春陰一日晴。回塘閑院愜幽情。小魚出水圓紋見。輕燕穿窬折勢成。今日掩關真佚老。向來涉世亦遺名。巡簷更有欣然處。新筍初抽四五莖。

長干行

裙腰綠如草。衫色石榴花。十二學彈箏。十三學琵琶。寧嫁與商人。夫婦各天涯。朝朝問水神。夜夜夢三巴。聘金雖如山。不願入侯家。郵袖庭花下。東風吹鬢斜。

養生

受廬故里老爲氓。三十餘年學養生。情盼作妖狐未慘。肥甘藏毒醜猶輕。忠言何啻千金藥。赤口能燒萬里城。陋巷藜羹心自樂。傍觀虛說傲公卿。

園中觀草木有感

木筆枝已空。玉簪殊未花。頽桐時更晚。春盡始萌芽。老人多感慨。俯仰悲歲華。兩曜如奔輪。疾去不可遮。城頭插雙旗。疊鼓催清笳。兀然一室間。不復過鄰家。午睡或至暮。亂髮垂彭彭。所嗟瘦僧死。莫致茶山茶。

茶山僧道省錢餽新茶。今死已再歲矣。

恩賜龜紫

憶昔青衫上赤墀。領間未有一莖絲。豈知晚拜金龜賜。却是霜髯雪鬢時。

又

已挂朝衣神武門。暫紆紫綬拜君恩。兒孫賀罷還無事。兩笠煙蓑自灌園。

自警

少年不自量。妄意慕管葛。晚節雖知難。猶覲終一節。悲哉老病馬。解縱誰復秣。既辭簞轡勞。始愛原野闊。飲澗齧霜菅。亦可數年活。勿復思長途。嘶鳴望天末。

獨夜

一生食太倉。蠶耗均雀鼠。雖云久置散。飢飽尚撐拄。兩年失微祿。始覺困羈旅。傾身營薪米。得食已過午。人觀不堪憂。意氣終自許。藜羹若大庖。草廬如萬礎。平生師顏原本自。藐管楚。悠然臥北窗。殘燈翳還吐。

雨夕枕上作

鬢毛日夜雪霜稠。冉冉年光逝肯留。酒力但資愁作祟。雨聲偏與睡爲仇。銘旌官職眼前事。史冊姓名身後憂。畢竟此生何處是。江湖萬里有孤舟。

喜晴

澤國風雨多。春盡尙裘褐。閉門不能出。飽受鳩婦聒。今朝雲忽歸。溝水清活活。偶爲東園行。魚鳥閒何闊。

婦女蠶事終。桑柘光如潑。布穀汝勿憂。吾袴真可脫。

觀運糧圖

王師北伐如宣王。風馳電擊復土疆。中軍歌舞入洛陽。前軍已渡河流黃。馬聲蕭蕭陣堂堂。直跨井陘登太行。壺漿箪食滿道傍。芻粟豈復煩車箱。不須絕漠追敗亡。亦勿分兵取河湟。但令中夏歌時康。千年萬年無餽糧。

宇文衮臣吏部子在蜀日與之遊至厚契闊死生二十年矣庚申三月忽夢相從如平生愴然有

賦

英姿爽氣字邛州。雖古人中豈易求。六月長途將渴死。一天風雹起龍湫。

阿姥

城南倒社下湖忙。阿姥龍鍾七十強。猶有塵埃嫁時鏡。東塗西抹不成粧。

初夏

雨足移秧後。風和剝繭初。昏昏時就枕。賈賈却尋書。晚步身須杖。晨興髮廢梳。滿城車馬客。誰復問何如。

讀書

稽古衰猶力。翻書夜達晨。思人頻掩卷。感事忽霑巾。世閱幾春夢。身今一老民。忍窮端已慣。蔬食又經旬。

喜晴

江湖春暮多風雨。點滴空階實厭聽。剩喜今朝有奇事。一窗晴日寫黃庭。

初夏北窗

作墨無聲紫玉池。年光又入放翁詩。風和柳岸吹綿後。雨足瓜畦引蔓時。病酒相如無奈渴。清言叔實不勝羸。此生豈復功名事。付與城頭畫角悲。

又

水際柴荆晝不開。臥聽微雨雜輕雷。春蠶滿箔眠初起。社燕爭巢去復來。海檜屈蟠依怪石。山榴零落點蒼苔。一樽及此風光美。車下長坡底用推。

寄適

老人去健羨。飯足便有餘。此外一壺酒。薦以園中蔬。手種數畦花。時開一編書。近者苦足蹇。復營一柴車。時時訪溪父。亦或遊僧廬。上下山澤間。視身等禽魚。既歸則浩歌。幽抱亦少摅。一笑謂兒子。不須起犁鋤。

幽居初夏

路緣長隄北。家居小市西。陂塘晨飲犢。門巷午鳴雞。婦喜蠶三幼。鄉中謂蠶眠爲幼。兒誇雨一犁。衰翁亦放浪。未怕屐露泥。

又

梅塢青黃子。草陂紅紫花。雙鶴朝戲浦。羣鴨暮還家。赤腳挑殘筍。蒼頭摘晚茶。出門逢野老。滿意說桑麻。

又

詰曲穿桑徑。謳啞響竹門。疏泉灌藜莧。倚杖牧雞豚。江步橫新舸。茅簷弄幼孫。太平端有象。誰與畫吾村。

又

大盞光陰短。南詛日月長。松枯宜倒壑。龜老慣撐牀。寂寂三升稷。悠悠百本桑。飢寒猶醜隣。何術砭吾盲。

獨醉

老伴死欲盡。少年誰肯親。自憐真長物。何啻是陳人。江市魚初上。村場酒寒醇。頽然北窗下。不覺墮紗巾。

獨立

午醉初醒後。回廊獨立時。斜陽明雨葉。乳鶴島風枝。遠俗雖堪笑。師心頗自奇。傍人疑徙倚。向道是尋詩。

高臥

省戶歸來不計年。悠然高臥鏡湖邊。釣簾每對千峯雨。接竹新分一脈泉。學問誠身元有道。阮窮知我豈非天。虛名自古能爲累。正恐人看直一錢。

趙彥庸修撰挽辭

朝路英聲早。宗盟宿望尊。譏談推醜藉。大筆擅雄渾。許國心猶壯。安邊策具存。悽涼故時客。痛哭望秋原。

讀香奩集詩戲效其體

金鋪一閉幾春風。咫尺心知萬里同。麝枕何曾禳夢惡。玉奩空解貯啼紅。畫愁延壽丹青誤。賦欠相如筆墨工。一事目前差自慰。月明還似未央中。

野步至村舍暮歸

草徑盤紆入廢園。漲餘野水有殘痕。新蒲漫漫藏孤艇。茂樹陰陰失近村。拄杖敲門求小憩。老盆盛酒瀉

微渾興闌却覓橋邊路。數點歸鴉已帶昏。

述悲

屏居不出門。終歲袖手坐。但怪意氣衰。那覺日月過。故人爲冢丘。老伴餘幾個。天高鬼神惡。回天夷齊餓。遺魂一零落。豈復聞楚些。且當醉濁醪。吾夢行亦破。

江東韓漕晞道寄楊庭秀所贈詩來求同賦作此寄之

三朝巍巍韓侍中。爛然彝鼎書元功。西戎北狄問安否。九州萬里涵春風。子孫繼踵皆將相。我猶及拜西樞公。顧憐通家賤。勞問教誨均兒童。西樞有孫又奇偉。凜然太華摩蒼穹。小試玉節江西東。文書如海到手空。政成蒲轡亦不用。地上錢流倉粟紅。君持此手上廊廟。折衝禦侮知從容。桑乾不勞尺箠下。榆關正可丸泥封。却歸故里訪遺老。應記山陰九十翁。

雨夜

麥熟家家喜墮涎。龜堂依舊突無煙。雨中更覺淒涼甚。一點殘燈守蠹編。

小橋

漠漠輕陰隱隱雷。石榴半落點莓苔。小橋西北闌干角。獨岸綸巾待雨來。

自笑

三間茅屋寄滄浪。烏出樊籠馬脫羶。灑灑陂塘秋水滿。陰陰門巷麥風涼。蔬盤旋采溪毛滑。篋艇新編露箸香。捐盡浮名方自喜。一生枉是伴人忙。

入梅

微雨輕雲已入梅。石榴萱草一時開。碑價宿諾淮僧去。卷錄新詩蜀使回。墨試小螺看斗碗。茶分細乳玩
毫杯。客來莫謂兒嬉事。九陌紅塵更可哀。

雨夜

小雨收仍落。孤燈翳復明。衰殘書易忘。憂患夢多驚。熠熠螢舂暗。翻翻雀轉更。閉門行老死。亦足慰平生。

燕

初見梁間牖戶新。銜泥已復哺雛頻。只愁去遠歸來晚。不怕飛低打著人。

午枕

茅簷一杯淡藜粥。有底工夫希鼎餗。書中至味人不知。傷永無窮勝梁肉。老夫享此七十年。每愧天公賦
予偏。清泉洗甌煎山茗。滿榻松風清晝眠。

項里觀楊梅

山前五月楊梅市。溪上千年項羽祠。小繖輕輿不辭遠。年年來及買梅時。鄉俗謂楊梅止曰梅。

又

隔歲租園不計錢。楊梅海裏過年年。癡人只說閑名利。那信三山是地仙。

又

溪流曲曲樹陰陰。人語煙中覺塢深。把定山僧同一笑。明年強健更相尋。

又

山中戶戶作梅忙。火齊驪珠入帝鄉。細織筠籠相映發。華清虛說荔枝筐。鄉俗謂選擇楊梅爲作筐。

夜歸

城角傳三弄。桑村喜獨歸。雨多螢滿野。徑狹露沾衣。食儉鹽醃薄。年衰氣力微。青燈對兒女。撫事一歎歎。

五月十一日睡起

病眼慵於世事開。虛堂高臥謝氛埃。籬櫺無影覺雲起。草樹有聲知雨來。茶碗嫩湯初得乳。香篝微火未成灰。儵然自適君知否。一枕清風又過梅。

示客

世間可笑走踐踐。誤認虛空作汝身。已覺餘名潤枯骨。更謀厚積遺何人。風旛畢竟非心境。瓦礫何妨是道真。新藕出泥瓜上市。爲君一醉隋紗巾。

雨中作

雨聲一滴不肯住。客夢欲成還自驚。白水陂邊破茅屋。亂書堆裏老儒生。出行豈復有流輩。未死尙能躬釣耕。十日無魚亦何歎。新菰幸可配吳粳。旬日來溪水泛溢。魚不可得。

舟中遣興

湖海渺雲濤。浮家得養高。方牀展新篔簹。短褐束廊條。酒裏亦何好。人間聊可逃。酣歌柂樓底。萬事一秋豪。
自嘲

少讀詩書陋漢唐。暮年身世寄農桑。騎驢兩脚欲到地。愛酒一樽常在傍。老去形容雖變改。醉來意氣尚軒昂。太行王屋何由動。堪笑愚公不自量。

齋中雜興十首以丈夫貴壯健。慘戚非朱顏爲韻。

成童入鄉校。諸老席函丈。堂堂韓有功。英概今可想。從父有彥遠。早以直自養。始終臨川學。力守非有黨。紛紛名佗師。有批在其類。二公生氣存。千載可畏仰。

又

士生學六經。是爲聖人徒。處當師顏原。出當致唐虞。斯文陣堂堂。臨敵獨撓枹。異端滿天下。一掃可使無。乃知立事功。先要定規模。彼雖力移山。安能奪匹夫。

又

公議在天下。如人有元氣。平居失護養。一旦可勝諱。神丹卒難求。百疾起如蠅。奄奄息僅屬。熟視吁可畏。大義在春秋。遺跡悲漢魏。君看徐孺子。底物視富貴。

又

昔我自蜀歸。耆舊已凋喪。後來二三公。尙慰天下望。千里一紙書。殷勤問亡恙。嗚呼亦已矣。遺語寄悲愴。我亦迫桑榆。便恐無輩行。夜窗對青燈。力儘心尙壯。

又

餘齡垂八十。雖體猶強飯。正如老病馬。風沙時一噴。玉關眇何許。道里何啻萬。目中埃歷歷。欲進不能寸。

矯首望秋空。徒羨霜鶴健。羶骨亦何悲。吾非麒麟楮。

又

琅琅誦詩書。尚記兩髦髫。誰料七十年。沉滯終坎窞。炊突映茅廬。日暮煙慘慘。忍窮端已熟。撫事空自戚。狂言悔噓臍。衆譽驚破膽。尚有愛書心。還如嗜茗歎。

又

去國已酉冬。忽見十頰歷。衰殘口兩齒。困阨家四壁。時看溪雲生。飽聽簷雨滴。悠然度寒暑。何處著欣戚。幽人豈知我。月夕聞吹笛。何當五百歲。相與摩銅狄。湖中風月佳時。每聞笛聲。異甚。莫知何人。意其隱君子也。

又

扁舟東下碇。日月去若飛。當時筆硯舊。久已晨星稀。俊逸如伯渾。簡詣如知幾。天高鬼神惡。回首萬事非。我欲泝黃牛。買屋居青衣。九原不可作。哀哉誰與歸。

又

荷鋤草堂東。藝花二百株。春風一朝來。白白兼朱朱。南列紅薇屏。北界綠芋區。偃蹇雙松老。森聳萬竹隴。除地不忍葑。插援引瓠壺。何當拂東絹。畫作山園圖。

又

閑居寂無客。柴門晝常關。孤舟小於葉。放浪煙水間。樹暗楊梅村。露下白蓮灣。釣魚樵風溼。買酒石帆山。

向來支許輩，恐亦無此閑。道逢若耶叟，握手開蒼顏。

夏五月方閔雨，忽大風，雨三日未止。

海風一夕狂，拔木山雨三朝猛。穿屋向來望雲眼，欲枯雨甚還憂敗嘉穀。今年旱勢連吳中，吾州乃獨勞神龍。稽首龍公要斟酌，收雲歸山水歸壑。

又

五月晝晦天欲雨，街中人面不相覩。風聲撼山翻怒濤，雨點飛空射強弩。一雨三日姑可休，龍其玩珠歸故湫。千里連雲慶多稼，牲肥酒香作秋社。

遺興

外物元知等一塵，浮生何事最關身。江山好處得新句，風月佳時逢故人。有酒一樽聊自適，藏書萬卷未爲貧。聖賢自古無如命，君看居東與在陳。

又

老向人間怯路歧，感今懷昔不勝悲。詩無傑思知才盡，酒有殘杯覺氣衰。縣郭燈疏尋店夜，津亭雨細待船時。筋骸尙給春耕在，便買烏犍亦未遲。

六月一日曉賦

視夜明星高，蟬聲滿庭樹。殘骸幸差健，散髮穿兩屨。屣屣手自開，曳杖得徐步。碧瓦浮青煙，圓荷瀉殘露。草木無俗姿，雞犬共幽趣。兒來問晨炊，一笑揮使去。

露坐

冷冷野水赴橫塘。坐久松風入髮涼。月淡星疏天欲曉。未妨清嘯倚胡牀。

夜賦

月暈知將雨。風聲報近秋。暗廊行熠燿。深樹嘯鴝鷄。老幸傳家事。狂猶爲國憂。相齊雖已矣。且復飯吾牛。

乙夜納涼

幽人新製葛衣成。二寸藤冠覺髮輕。淨掃中庭延月色。緩拖拄杖聽蟬聲。微涼便欲疏紈扇。小醉何妨倒玉罍。八尺風漪真美睡。故應高枕到窗明。

五鼓

夢斷華胥夜艾時。邊廊蕭散曳筇枝。長空漸見明河落。短調猶殘畫角吹。世事又隨朝日出。釣船莫負早秋期。南湖五畝新菰熟。此味惟應老子知。

老態

齒如強留客。雖住無久理。目如新募兵。臨敵烏可使。齒廢疏梁肉。目澀屏書史。浮世真幾何。老態遽如此。啜粥習安坐。用短亦自喜。作詩記吾衰。聊用調穉子。

枕上聞風鈴

毒暑今年倍故常。蠶聲四合欲昇牀。老人不辦搖團扇。靜聽風鈴意已涼。

又

流汗沾衣熱不勝。饑蚊乘勢更縱橫。夢回忽覺南風起。時聽鉦然一兩聲。

寄贈湖中隱者

高標絕世不容親。識面無由況下鄰。萬頃煙波鷗境界。九秋風露鶴精神。子推綿上終身隱。叔度顏回一輩人。無地得申牀下拜。夜聞吹笛度煙津。

觀畫山水

古北安西志未酬。人間隨處送悠悠。騎驢白帝城邊雨。挂席黃陵廟外秋。大網截江魚可膾。高樓臨路酒如油。老來無復當年快。聊對丹青作臥遊。

六月十八日立秋未旦起行山園口占

北斗離離柄漸西。披衣出戶聽晨雞。豈惟蒲柳先搖落。坐覺風雲已慘悽。斷簡不妨重料理。清樽隨處可提携。穿林莫惜衣霑露。爽徹靈臺勝寶犀。

新秋

衰髮成絲奈若何。更堪日月疾飛梭。梧桐敗葉飄僧少。蟋蟀離籠賣已多。歲樂喧呼沽酒市。夜涼悽斷采菱歌。老夫亦動秋風興。欲倩鄰翁買釣蓑。

晨起自山園歸書室

世事苦紛紛。村墟寂不聞。穿林拾蟬蛻。隔浦數鷗羣。搖落初飄葉。高春未散雲。歸來書滿眼。猶足肆吾勳。

初秋小雨

陸放翁集

十六 劍南詩集 卷四十三

雨來一洗肺肝熱。風過遠吹禾黍香。誰識山翁歡喜處。短檠燈火夜初長。

出遊

舉世誰能伴我閑。出遊隨處一開顏。繫船扛鼎將軍廟。秣塞流傷內史山。小市況經搖落後。高城回望莽蒼間。歸來燈火湖塘晚。指點柴門未上關。

對酒

平生但信緣。作計每不審。春炊官倉粟。一飽輒甘寢。二年乘微祿。溝壑方懷懷。藜藿關鹽酪。豆飯雜沙塹。偶然餓不死。得酒猶痛飲。振回灑灑施。喚省邯鄲枕。

自勉

曩歲讀隱書。妄意慕陶葛。芝房及乳石。日夜躬采掇。飛舉固未能。死籍或可脫。那知事大謬。髮齒將禿豁。神僊豈棄汝。正坐自迂闊。餘年尙努力。勿待燭見跋。

新涼

初卷含風八尺漪。井桐已復不禁吹。蟬聲未用催殘日。最愛新涼滿袖時。

醉中題民家壁

壯歲竊遊厭故棲。暮年却愛草堂低。交情最向貧中見。世事常於醉後齊。松吹颼颼涼短髮。芒屨策策響新泥。吾詩戲用寒山例。小市人家到處題。

秋景

雨泣蘋花老。風搖稗穗長。昏林喧宿鳥。秋院咽啼螿。舊學成迂闊。初心墮渺茫。顏齡尙餘幾。誰與問蒼蒼。

舟中作

會稽城上角鳴鳴。日落煙村暝欲無。千載虛名笑張翰。一官元不直尊鱸。

雜興

足弱僅能行。齒搖常欲墮。扶持賴藥物。苟幸一日過。事來強酬答。其實惟欲臥。平生許文休。歲晚依馬磨。

又

蘭臺遺漆書。汲冢收竹簡。辛勤萬卷讀。不負百年眼。園座浩縱橫。插架高巖巖。一笑顧吾兒。銀艾何足綰。

又

壽年本偶爾。亦與富貴同。一日復一日。遂作八十翁。儿杖稱大耋。貂蟬號三公。信手忽成盧。孰爲拙與工。

又

少年豈知酒。借醉以作狂。中年狂已歇。始覺酒味長。湛湛瘦樽綠。酌以紅螺觴。醒醉不可名。兀坐萬事忘。

自詠閑適

殘年鄰曲幸相依。真似遼天老鶴歸。荷浦未疎魚正美。鄉俗謂夏秋魚爲荷葉下魚。豆畦欲暗雉初肥。款門路近時看竹。送酒人多不典衣。最喜夕陽閑望處。數家垣屋鎖煙霏。

近村暮歸

莫笑山翁雪鬢繁。歸休幸出上恩寬。蠶樽恰受三升醞。龜屋新裁二寸冠。蠶樽卽皮甕美所云調陸樽也。龜屋

予近以龜巖作冠，高二寸許，僧閣鬻茶，同淡話。漁舟投釣，卜清歡。還家欲作諸孫贈，村路壘藥柿未丹。

秋興

扶衰又見素秋過，未死其如造物何。破屋頽垣那敢議，濁醪麤飯已爲多。佩刀但可償黃犢，作字安能博白鵝。龜紫拜恩如夢寐，殘年其實一漁蓑。

讀史有感

不肯低頭就世事，亦不作牋與天公。惟須痛飲以醉死，亂山深處聽松風。

又

昔人識不過十字，富貴封侯渠自如。龜堂閉門萬卷讀，一字不肯供時須。

又

蘇門長嘯不可親，鹿門采藥更絕塵。老死故山雖自許，掩書未免愧斯人。

卷第四十四

讀何斯舉黃州秋居雜詠次其韻

造請非所長，一帶每懶束。揖客雖小殊，亦未勝僕僕。正須駕柴車，歸藝東籬菊。故山甘水泉，羣飲友麋鹿。

又

少從長者遊。麤聞聖人道。日食雖一簞。頗覺顏色好。辛勤五十年。猶乘後凋操。風俗日已移。令人惡懷抱。紛紛堪一哈。驕我以旗纛。豈知江湖間。世襲散人號。

又

全家寄能舡。結茅非始謀。江市得煙蓑。不博千金裘。道散俗日薄。老聃出衰周。治身去健羨。如稼必去蠹。吾身一隙塵。斯世一客郵。君能通其說。生死真浮休。

又

衆星麗長空。惟月最爲傑。峨峨大圓鏡。粲粲白玉玦。穿林散珠玑。入戶凜霜雪。世方喜繁華。我獨慘不悅。清光真可友。肝肺冰欲結。彼哉市朝人。忿慾生內熱。

又

夜靜我欲歌。四座且勿喧。堯舜本得道。富貴何足捐。聖人久不作。學者墮語言。著書各專門。百家散如煙。一身有不知。況察魚與鳶。安得天下士。相與明忘筌。

又

古人處丘園。如彼不嫁女。終身秉大節。敢恨老環堵。嗟予晚乃覺。乞骸歸卒伍。去就講已熟。穴居宜知雨。百尺持汲綆。道長畏天暑。先見雖有慚。愛身亦自許。

又

賦性本剛褊。直欲棲深山。晚乃稍悔悟。自恨不少寬。胡越本一家。禍福環無端。少忍萬事畢。孰爲熱與寒。

我友爲我言冠蓋滿長安。人人不如君。八十猶朱顏。

又

倚牆有鉏耰。當戶有杼軸。雖云生產薄。桑麻亦滿目。況承先人教。藏書令汝讀。求仁固不遠。所要念念熟。喟然語兒子。勿愧藜藿腹。亦勿慕虛名。守此不啻足。

又

人生天壤間。出處本異趣。釋耒入市朝。徒失邯鄲步。昔人亦有言。刻足以適屨。奈何不自反。忽已迫霜露。我躬尙不闕。況爲子孫慮。歲晚故山寒。地爐可煨芋。

又

少年去國時。不忍輕出晝。晚歸補省郎。但覺慚列宿。人豈不自揣。幸矣老雲岫。知止詎敢希。要且避嘲詬。誰將有限身。遺臭古今宙。人誅雖或逃。陰陽將汝寇。

讀蘇叔黨汝州北山雜詩次其韻

暑耘日炙背。寒耕泥沒脚。衆人占膏腴。我獨治礪确。力盡功未見。厥土但如昨。豈惟窘糠粃。直恐轉溝壑。今年雨暘時。天如相耕穫。屋傾未暇扶。且復補籬落。

又

舊絮補破襦。生薪續微火。惇孤有凍死。自視亦已過。鄰翁冒風雪。斗酒持飲我。尖團擘霜蟹。丹漆釘山果。欣然共笑語。何止寬寒餓。布被擁更闌。招魂不須些。

又
三山鏡湖上。出郭無十里。結廬非所擇。但取便薪水。間亦出從宦。安能慕園綺。地主卜林塘。亦復異子美。遺餘方丈室。僅足容臥起。吾意本扁舟。陸居聊爾耳。

又
祠官粟一囊。不贍軀七尺。前年蒙寬恩。例許乞骸骨。聯翩三兒子。俱作鶴雀碧。賦祿雖尙遠。亦足慰衰白。縹巾菲簷下。稱病謝來客。從今門前路。永掃車馬迹。

又
舍北有漁磯。下臨清溪流。柳陰出朱橋。蓮浦橫蘭舟。葦絲二三畝。采掇供晨羞。魚蝦雖瑣細。亦足贍吾州。人生常如此。安用萬戶侯。綠蓑幸可買。金印非所求。

又
寓形百年中。如臂屈伸頃。少壯幾何時。已復墮衰境。老人喜自潔。臨澗漱綠淨。佛龕香事已。僧鉢供煮甗。山茶試芳嫩。野果薦甘冷。不學萬錢廚。長魚取淮穎。

又
巖石著幼輿。風月思玄度。老子放浪心。常恐迫遲暮。安得世外人。握手相與語。吾宗甫里公。奇辭賦漁具。高風邈不嗣。徒有吟諷苦。霜風吹短衣。何山不堪住。

久病臥江村。髮白面黧黑。艱難念溫飽。日夜積涓滴。聚壤蕪園桑。荷鋤耘墾麥。苟失一日勤。農事深可惜。小兒念乃翁。卒歲共欣戚。跂望明年春。社雨泥一赤。

又

德孫秀眉宇。慨然修初服。枯腸貯詩書。十飯九不肉。成童將覓舉。想見袍立鶴。先澤儻未衰。豈無五乘粟。汝能記吾言。併以告阿福。閉門勿雜交。一經萬事足。

又

吾幼從父師。所患經不明。何嘗效侯喜。欲取能詩聲。亦豈劉隋州。五字矜長城。秋雨短檠夜。掉頭費經營。區區宇宙間。捨重取所輕。此身儻未死。仁義尙力行。

新治火閣

老子今朝喜有餘。房櫺新畢得安居。爐紅氈暖不出戶。木落窗明常讀書。浮蟻撇管人散後。蹲鴟煨熟晝飛初。頽然自適還終日。殊勝隆中臥草廬。

枕上作

無地容錐四壁空。浩然亦未愴途窮。夢回倦枕燈殘後。詩在空塔雨滴中。徂歲易成雙鬢禿。故人難復一樽同。唐安萬里音塵絕。誰爲寒沙問斷鴻。張季長今年尙未通書。

又

蕭蕭白髮臥扁舟。死盡中朝舊叢流。萬里關河孤枕夢。五更風雨四山秋。鄭虔自笑窮耽酒。李廣何妨老

不候。猶有少年風味在。吳淦著句寫清愁。

初睡起有作

喔喔曉雞鳴。迢迢殘漏聲。敲衾幽夢斷。褰幌小窗明。僚婢篝衣暖。山童擁篲行。老夫徐下榻。負火聽鉶笙。

示友

道向虛中得。文從實處工。凌空一鶴上。赴海百川東。氣骨真當勉。規模不必同。人生易衰老。君等勿忽忽。

述懷

宦遊輕用不貲身。斂退今爲省事人。唾俟面乾元不校。囊憂手爛更誰噴。時分鄰瓮甕瓶綠。見張右史詩。永謝官倉五斗陳。最好暮秋溪上路。柴門月色向人新。

枕上

殘燈熠燿露螢明。落葉蕭蕭寒雨聲。堪笑衰翁睡眠少。小詩常向此時成。

又

斷香猶在夢初回。燈似孤螢闔復開。怪底詩情清徹骨。數聲新雁枕邊來。

病足久敗遊山之興。山中道人多見問。戲作示之。

病侵腰股作蹒跚。九折途生布武間。東姥自無緣見佛。北公那有力移山。買來芒屨真虛費。扶上籃輿亦漸艱。賴有春陵數峯在。虛留高臥看孱顏。

舟中作

三百里湖新月時，放翁艇子出尋詩。城頭屢閣煙將合，波面虹橋柳未衰。漁唱蒼茫連禹穴，寒潮蕭瑟過娥祠。祖龍虛負求僊意，身到蓬萊却不知。

追懷胡基仲墓在雲門顯聖寺後

高潔胡徵士，當時已絕無。門庭謝殘客，薪水斥常奴。遺棄何由見，英魂不可呼。誰憐墓上草，又是一年枯。

十月八日九日連夕雷雨

雨聲聒耳不停點，雲氣冒山殊未開。敢恨終年惟短褐，但驚十月有奔雷。牽蘿且復補菲屋，飯豆何妨羹芋魁。莫笑賦詩無傑句，年來萬事學低摧。

西村

今年四月天初暑，買養曾向西村去。桑麻滿野陂水深，遙望人家不知路。再來桑落陂無水，閉門但見炊煙起。疑是羲黃上古民，又恐種桃來避秦。

感事示兒孫

人生讀書本餘事，惟要閉門修孝悌。畜豚種菜養父兄，此風乃可傳百世。我聞長安官道傍，至今人指魏公莊。北方俗厚終可慕，一字不識勤耕桑。長安有魏鄭公舊莊，衛孫皆力耕，無識字者，張雲叟嘗過之。

或遺木瓜有雙實者香甚戲作

宣城繡瓜有奇香，偶得並蒂置枕傍。六根互用亦何常，我以鼻嗅代舌嘗。

十月

十月霜侵季子裘。吾詩又送一年秋。風回斷續聞樵唱。木落參差見寺樓。久已浮雲看富貴。固應華屋等山丘。江邊海際多幽致。擬跨青驄處處遊。

初晴

袖手東窗初日明。殘編未負老書生。不勝多病畏寒雨。正得一霜方快晴。客戶尚疑是赤墜。在月以隳魚之屬。來鶴謂之送翼。鄰家借碓擣新秬。柴荆莫怪無車馬。恰要無人識姓名。

梅花

造物作梅花。毫髮無遺恨。楚人稱芳蘭。細看終不近。

又

五年作竹梢。十年作梅枝。九泉子廉子。此語今誰知。廉宣仲自言以五年之功作竹梢。十年之功作梅枝。

又

欲與梅爲友。常憂不稱渠。從今斷火食。飲水讀僊書。

又

春信今年早。江頭昨夜寒。已教清徹骨。更向月中看。

又

江上梅花吐。山頭霜月明。摩挲古藤杖。三友可同盟。

對酒戲詠

陸放翁集 十六 劍南詩集 卷四十四

淺傾西國葡萄酒。小嚼南州豆蔻花。更拂烏絲寫新句。此翁可惜老天涯。

冬夜

北斗挂屋角。西風驚雁羣。山寒歲云暮。人靜夜中分。酒滴糟牀雨。香生紙帳雲。眼花書課減。舊學失鋤耘。

冬晴稍理舊學有感于懷

天公元不吝光陰。付與書生遂本心。老已爲民猶學問。向雖作吏半山林。百年斷棄傳三世。一日晴窗抵萬金。努力更思恢道術。酒杯雖把不須深。

蒼小圃及東齋

山翁作園沼。安樂及禽魚。凡草猶當養。芳蘭可得鋤。初非治一室。亦豈愛吾廬。暮境雖云迫。心期故有餘。

讀經示兒子

通經本訓詁。講字極聲形。未盡寸心苦。已銷雙鬢青。懼如臨戰陣。敬若在朝廷。此是吾家事。兒曹要細聽。

出遊不果

天柱峯前水亂流。石碁渡口葉飛秋。青鞋已是前身事。縱有籃輿亦懶遊。

夢行秦晉間有作

夜店袖衾暖。晨廚粟飯香。驢肩雙酒榼。童背一琴囊。冰拆河聲壯。郊平塔影長。古今均夢境。不用弔興亡。

聞雞鳴自警

爲善孳孳進德新。雞鳴每念舜何人。此身強健直須勉。一日會當無此身。

嘲子聿

講誦多吳語，鉤提學佐書。夜分燈未徹，晨起髮慵梳。飽食園官菜，少留溪友魚。能憐乃翁病，身自舉籃輿。

馬上口占

大蓋光陰豈自期，即今堪喜亦堪悲。關河隔絕初心負，憂患侵尋舊學衰。羸馬涉溪孤店路，栖鷓滿樹曉霜時。憑鞍殘夢悠然覺，又得浮生一首詩。

幽居

莫笑茅茨陋，岡形接臥龍。連娟鏡湖月，縹渺寶林鐘。閑釣魚池釣，眠聽碓舍舂。他年好事客，過此訪遺蹤。

感事

陋巷何須歎一瓢，朱門能守亦寥寥。衲衣先世曾調鼎，野褐家聲本珥貂。若悟死生均露電，未應富貴勝漁樵。千年回首俱陳迹，不向杯中何處消。沈義倫丞相裔孫爲僧劉仁瞻侍中裔孫爲道人皆孤身死紹興中二公之後途絕。

初寒

逐祿天涯半此生，明時寬大許歸耕。山園魚市寒無色，雨掠蓬窗夜有聲。白髮青燈身潦倒，殘蕪落葉歲峰嶸。爾來有喜君知否，買得烏犍萬事輕。

寄題季長飾菴

近詔還中秘，新文記飾菴。主盟君勿讓，賈勇我何堪。木落山容瘦，雲齊雪意酣。何由共杯酒，把蟹擘黃甘。

對食書媿

連年寬水旱。天若相懸車。蟲有芋魁豆。併忘熊掌魚。先生飯不足。賢者食無餘。老我知何幸。晨盤厭美蔬。

戲題酒家壁

漫道江南倚寺樓。豈如煙雨弄扁舟。并刀不剪清愁斷。楚練難磨白日留。湖上采菰甘似蜜。街頭買酒滑如油。金丹九轉何時畢。且對梅花一醉休。

又

送了春歸又送秋。人間隨處寄悠悠。百年此際成遺老。萬里當時賦遠遊。筆力日衰慚陣馬。江天歲晚狎冥鴻。潯狂自笑無詩歇。又犯新寒上市樓。

又

朋舊存亡寂不聞。年年江海愴離羣。時平酒價賤如水。病起老身閑似雲。飽食每慚荒舊學。後生誰可付斯文。案頭清鏡塵昏盡。殘髮知添白幾分。予老甚髮乃有未白者。

十月二十八日夜風雨大作

風怒欲拔木。雨暴欲掀屋。風聲翻海濤。雨點墮車軸。柱門那敢開。吹火不得燭。豈惟漲溝谿。勢已卷平陸。辛勤菽宿麥。所望明年熟。一飽正自艱。五窮故相逐。南鄰更可念。布被冬未漬。明朝甌復空。母子相持哭。

夜寒燃火有感

墮篋拾桐枝。微火吹孤螢。風火一相得。須臾細煙青。暖地遂騰上。凜冽回玄冥。君看金鼎火。其初亦熒熒。

至理存藁籥，奇功挾風霆。笑談縛三彭，指顧役六丁。超然出塵世，豈獨制頽齡。勸君勿虛死，萬過誦黃庭。

農事休小菑東園十韻

歸老心常逸，新寒體亦康。幸當農事隙，稍治舊園荒。翦關西山出，築回北徑長。作欄扶弱蔓，換土植孤芳。霜霰質螢碧，風煙薜荔蒼。蝶來翻小翅，鳥下囀幽吭。疏剔巖泉集，耘鋤藥草香。溪藤裁酒榼，番錦製詩囊。坐久雲生石，歸遲月滿廊。人間胡不樂，拔宅笑君房。

開東園路北至山脚因治路傍隙地雜植花草

清溝東畔翦葶菅，雖設柴門盡日關。遠引寒泉成碧沼，稍通密竹露青山。幽花泣露開仍落，好鳥穿林去復還。更上橫岡吾所愛，小兒試覓屋三間。

又

魏野林逋久已僊，放翁寄傲鏡湖邊。松根偃蹇支琴石，巖竇潺湲洗藥泉。半祿掃空雖在我，殘年健甚豈非天。遙遙桑苧家風在，重補茶經又一編。

又

憶自南昌返故鄉，移家來就鏡湖涼。鶴雛養得冲霄漢，松樹看成任棟梁。手版永拋貧亦樂，肩輿時上老何妨。平郊東望江城近，隱隱清笳送夕陽。

又

父子追隨一笑傾，東園東畔路初成。夾栽芳草如繩直，前出籬門似砥平。春近野梅香欲動，雨餘溝水細

無聲。今朝有恙誰能識。不用人扶亦自行。

又

病眼逢人每嬾開。正須此地洗氛埃。數枝梅向林梢出。一脈泉從嶺背來。藤杖有時緣石磴。風爐隨處置茶杯。殘軀自笑如春草。又喜天邊斗柄回。

又

避俗從來恨不深。家園栽種偶成陰。西連幾曲菖蒲澗。東接無窮薜蘿林。烏柏谷寒迎野步。金沙泉冷洗塵襟。清音可寫吾詩拙。它日君來試抱琴。

連日治圃至山亭又作五字

薤圃課僮奴。爭前不待呼。水泉經雨壯。葦莽得霜枯。高樹鳴雙鶻。清池下兩鳧。暮年惟樂此。餘念一毫無。

又

富貴尋常事。天奚獨汝慳。十分教蠹拙。百倍與清閑。放鶴雲千頃。釣魚溪一灣。此詩雖信筆。它日不須刪。

又

好竹千竿翠。新泉一勺冰。殘蕪襯落日。老木上寒藤。細磴欹難過。危欄曲可憑。歸時忽已暮。點點數漁燈。

寒夜

門開度略杓。路盡上坡陁。農隙閑耕犢。樵歸起醉歌。青煙舞鸞鳳。白石伏龍鼈。剩有筠枝興。窮冬氣已和。

敗屋頽垣對短檠。課書聊自限三更。蕭條草木寒無色。窳率狐狸出有聲。半棹濁醪求火暖。一篇疑義與兒評。未須遽起窮愁歎。明日尋梅雪正晴。

掩卷有感

少年雖讀書。每恨性疎嬾。中年頗自勵。已歎歲月短。學不到聖賢。此意終未滿。飢空不憂飢。衣垢不思浣。區區管晏事。端可付一莞。羸然八十翁。風雪臥空館。

閑遊

出糶羊牛牧。歸隨烏雀栖。聊持數匙飯。就乞半盂齋。浩蕩凌原野。崎嶇歷澗溪。閑遊豈不好。客意自淒淒。

野寺

閑行入野寺。僧飯鼓其鐺。慘慘風撈面。暉暉日滿廊。去來元自在。賓主兩相忘。却下山坡路。樵歌出隴長。

三江

三江郡東北。古戍鬱嵯峨。漁子船浮葉。更人鼓應鼙。年豐坊酒賤。盜息海商多。老我無豪思。悠然寄醉歌。

讀老子

放翁晨興坐龜堂。古銅匱燒海南香。隨目接手精思牀。身如槁木心如牆。八十一章獨置傍。徐起開讀聲琅琅。恍然親見古伯陽。快屬關尹肩庚桑。孰能試之出毫芒。未俗可復躋羲黃。陰符偽書實荒唐。稚川金丹空有方。人生忽如瓦上霜。勿恃強健輕年光。

新泉絕句二首

掃石蔭雙松。岸巾穿萬竹。爾來又一奇。巖泉寒可掬。
澗泉可淪茗。就泉可洗藥。楚人曾未知。但謂纓可濯。

風雨

七十年來樂太平。白頭父子事春耕。因思世事悲身事。更聽風聲雜雨聲。四海故人強半死。一襟清淚對誰傾。新春要覓燒丹處。不住青城住赤城。

題菴壁

萬壘青山繞鏡湖。數椽自愛野人居。風來松度龍吟曲。雨過庭除鳥迹書。小疾不妨尋酒去。豐年偶及挂冠初。有金可散還多事。四壁蕭然計未疎。

又

衰髮蕭疎雪滿巾。君恩乞與自由身。身并猿鶴爲三友。家託煙波作四鄰。十日風號未成雪。一年梅發又催春。漁舟底用勤相覓。本避浮名不避人。

讀僊書作

與世已如風馬牛。松風終日聽鸞廳。一爐丹熟定不死。半盞酒香安得愁。腰帶羸前秋萬頃。香爐峯下水交流。人間事事皆須命。惟有神仙可自求。

讀淵明詩

淵明甫六十。遽覺前途迮。作詩頗感慨。自謂當去客。吾年久過此。霜雪紛滿幘。豈惟僕整鬣。已迫牛負轆。

奈何不少警。玩此白駒隙。傾身事詩酒。廢日弄泉石。梅花何預汝。一笑從渠索。願以有限身。兒戲作無益。一牀寬有餘。虛室自生白。要當棄百事。言從老朋役。

寒夜枕上

屋老霜寒睡不成。迢迢漏鼓過三更。烏啼林外月初上。天吹水邊船夜行。市有歌呼知歲樂。亭無枹鼓喜時平。吾詩欲寫還慵起。臥看殘燈翳復明。

新晴出門閑步

一夜風號作快晴。披裘扶杖出門行。青山繞舍雪封盡。丹葉滿街霜染成。廢寺僧寒多晏起。近村農惰闕冬耕。窮人旋畫膨脝計。自買蹲鴟糞糞羹。

聞笛

雪飛數片又成晴。透瓦清霜伴月明。一曲忽聞高士笛。臨窗和以讀書聲。

鳴禽

小徑霜泥結凍時。幽人十日廢筇枝。新晴池館春來早。簾外鳴禽聖得知。

食晚

日高得米喚兒舂。苦雨園蔬久闕供。省事家風君看取。半飢半飽過殘冬。

午坐戲詠

貯藥葫蘆二寸黃。煎茶橄欖一甌香。午窗坐穩摩癢腹。始覺龜堂白日長。

戲詠鄉里食物示鄰曲

山陰古稱小蓬萊，青山萬疊環樓臺。不惟人物富名勝，所至地產皆奇瑰。茗芽落磴壓北苑，藥苗入饌逾天台。明珠百斛載芡實，火齊千擔裝楊梅。湖湖蕹長涎正滑，秦望厥生拳未開。箭萌蟄藏待時雨，桑葦菌蠢驚春雷。櫻花蒸餾醴醬，薑苗披剝醃糟醅。細研罌粟具湯液，濕裹山積供炮煨。老饕自覺筆力短，得一忘十真堪哈。從今置之勿復道，一瓢陋巷師顏回。

歲暮貧甚戲作

得米遠求澗底薪，始知天地有窮人。年開八秩寧賒死，官及三兒不救貧。藥盡無如醫偃蹇，囊空那辦酒逡巡。柳條萱草添愁思，不似尋常見早春。

汪叔潛教授挽辭

江南有奇士，英譽早飛騰。未見心先契，相從氣倍增。時煩問字酒，屢共讀書燈。下榻延徐孺，同舟得李膺。百年期永好，一旦失良朋。稚子初何取，龍門亦許登。流光疾於鳥，舊社冷如冰。欲作千言誄，衰遲愧未能。

汪給事太夫人程氏挽辭夫人內外二族享壽八九十者至二十餘人。

時色恩榮盛，鄉閭譽望尊。儒科傳累葉，上壽萃高門。軒茂新栽柏，堂餘舊樹萱。故民何以報，沾灑望秋原。

太恭人諱氏挽辭壽人生於紹聖二年，沒於慶元六年，壽九十六。自太孺人至太恭人，皆特恩封。

耄齒人誰及，高門世共榮。始終膺備福，稔老遇昇平。綸綵褒嘉事，鄉閭惻愴情。吾詩儻傳世，亦足見平生。

路乾

日曬霜融步步泥。旬餘不到石泉西。連朝和暖得乾路。喚取鄰翁來杖藜。

寒夜

閉戶歲云暮。翻書夜向闌。足僵知火盡。目鈍覺燈殘。躍浦魚驚獺。穿林犬逐獾。三年納微祿。無媿得心安。

乍晴至園中

藥笈漁竿每自隨。枯筇短帽恰相宜。投林但有窮猿喜。伏櫪元無老驥悲。巖溜甘寒通碧沼。野梅清絕隔疎籬。放翁老甚情懷懶。那辨題詩寄所思。

卷第四十五

十二月三日夜橋上看月

常時新月有無間。今夕清暉抵半環。柳外橋高最堪望。憑闌目送下西山。

流年

流年及老敢前期。浮世如漚只自知。多貯閑愁持抵酒。剩遊好景擬供詩。海東藥到寬衰疾。屢下書稀愴別離。陳州簡人委張季長久不得書。約束春盤莫草草。又當梅發兩京時。

山家

風月寬閒地。溪山隱遯身。雲邊安井臼。竹裏過比鄰。洗甌分巖瀑。烹芝束澗薪。柴門敲不應。疑是避秦人。

又

種藥爲生業。彈琴悅性靈。中宵養白石。平旦誦黃庭。茶熟眼初起。兒扶酒半醒。意行無定處。猿鳥共忘形。

又

長生固非道。得道自長生。書不傳關尹。言誰契廣成。羅浮觀日出。句曲聽松聲。聞說長安好。何妨醉太平。

又

陶葛金丹訣。千年祕不傳。人皆肖天地。世豈乏神仙。擾擾生趨死。悠悠食復眠。微言誰復領。浩歎撫遺編。

又

清絕更誰如。松風小閣虛。攪巾參几杖。鶴毳落琴書。新鑿淘丹井。常攜斲藥鉏。身閑隨處樂。何況是吾廬。

小舟白竹篷。蓋保長所乘也。偶借至近村戲作。

茅簷細雨濕炊煙。江路清寒欲雪天。不愛相公金絡馬。羨他亭長白篷船。

又

雪雲無際暗長空。小市孤村禹廟東。一段荒寒端可畫。白篷籠底白頭翁。

稻飯

買得烏髀遇歲穰。此身永免屬官倉。塘南塘北九千頃。八月村村稻飯香。鎮湖下至海。凡種稻九千頃。

殘臘

殘臘無多寒漸薄。新春已近日微長。棊枰散後軒窗靜。梅塢歸來襟袖香。海霧籠山青淡淡。河堤籬水白茫茫。鷺飛前導生遊興。笑岸綸巾上野航。

又

殘臘去春纔十日。衰翁告老已三年。乳糜但喜分香鉢。銀勝那思映綵鞭。萬里當時嗟漫浪。一窗此日困
沉綿。清泉白石無人到。且結梅花淡淡緣。

書志

著書汗馬牛。不如守道力。賣文取卿相。詎是儒者職。孔光豈不學。千載汗簡冊。通塞本細事。于我奚失得。
袁安臥空廬。亦度風雪夕。如何慕溫飽。撓節不自惜。我突無炊煙。或至日中昃。小兒抱遺經。衣短兩脛赤。
吟誦何琅琅。聲如出金石。掩卷語乃翁。聖有陳蔡厄。

數日不出門偶賦

衰甚身如作繭蠶。經旬不省出茅菴。老僧道信分茶串。隱士敲門致酒甌。看鶴松陰賞高潔。疏泉石罅得
清甘。地偏心遠無車馬。賴有吾兒與劇談。

又

十二年來一日同。飯蔬略似誦經翁。居家不擬依鄰富。報國惟思祝歲豐。冰澗乍通寒溜碧。蘭叢新放露
芽紅。閑門萬化俱觀盡。那用瞿曇更說空。

又

湖上鳩廬僅自容。寸懷無奈百憂攻。補衣未竟追秋露。待飯不來聞午鐘。稚子挾書勤質問。鄰翁釋耒聞
過從。今朝一笑君知否。滿瓮新醅粥面醲。

寄題嚴居厚伴釣軒

人生有至樂，莫若江湖中。千錢買短舫，青箬織孤篷。潮生鼓棹去，煙波浩無窮。長歌送夕陽，回首萬事空。伴釣君已奇，我乃真釣翁。君出羊裘家，散人亦吾宗。一見即定交，正以氣味同。何時溪莊路，共醉蘆花風。環莊蓋居厚所居。

寄趙昌甫并簡徐斯遠

我詩非大手，我酒亦小戶。得遊名勝間，獨以用心苦。趙子乃宿士，山立誰敢侮。寓名祝融祠，蓑笠臥煙雨。高吟三千篇，一字無塵土。朱先少許可，書每說昌甫。雖云忍飢瘦，得喪亦相補。嗟君與斯遠，文中真二虎。我老日益衰，想像氣如縷。

南園觀梅

幽徑疎籬洗世塵，眼明見此數枝新。橫斜恰受三更月，璀璨先回萬物春。洛浦凌波矜絕態，嶺山騎鶴想前身。放翁著句煩君記，畫在生綃却未真。

老身

老身無處著，登望憶閑遊。白浪浮天遠，黃雲出塞秋。百年殊鼎鼎，萬事只悠悠。歲晚長亭路，寒侵季子裘。

獨處

老夫閉門衰疾嬰，小兒適有南山行。一奴入市暮未返，惜惜不聞烏雀鳴。地爐火死凍腳硬，欲作薄粥愁空銷。平生遺日賴詩句，久矣無復吟哦聲。但餘一點真正念，照了萬象猶精明。欲論此事向何許，乘中倘

遇千人英。

醉中歌

文章日益近衰陋。風節久已嗟陵夷。元祐大蘇逝不返。慶曆小范今誰知。閉門學古人共笑。低頭就俗我
却疑。脫衣幸可買漁艇。爛醉浩歌隨所之。

排悶

人間歲月莽悠悠。老大悲傷只涕流。民歷稍榛寧細事。俗忘節義更深憂。涼歸宿麥猶難望。雪少同雲未
易求。自歎此生真已矣。且偷暇日弄孤舟。

庚申十二月二十一日西和州健步持子布書報已取安康襄陽路將至九江矣悲喜交懷作長
句

吳蜀相望萬里程。征鞍忽報近湓城。角巾已入三更夢。老眼先增十倍明。告至徧爲親舊問。勞還深媿里
閭情。追思二紀睽離事。惠極翻成涕泗橫。

又

萬里東來雙鯉魚。衰翁悲喜得兒書。聞過峴首已冬至。想到匡廬將歲除。辛苦山行穿雪履。淒涼旅飯嚼
冰蔬。此行身歷艱難遍。莫厭東臯共荷鋤。

園中作

幽禽啼不去。紅蕊落還開。意適時時醉。身閑日日來。著書增小品。披句覓橙栽。消息吾兒近。扶衰又上臺。

子布約二月初到鄉里

足疾

足疾惟妨拜。登臨故自如。深知造物意。遣遂此心初。東塢閑看竹。西溪獨釣魚。暮歸猶未倦。把卷邊前除。

歲暮書懷

世事從來不可常。把茆猶幸得深藏。牀頭酒瓮寒難熱。瓶裏梅花夜更香。薄命元知等蟬翼。畏途何處不羊腸。詩成讀罷仍無用。聊滿山家骨董囊。

又

憶昔初辭鷓鴣行。慨然誓墓老耕桑。夢汀夜宿夢魂爽。梅塢暮歸襟袖香。窮巷每多閑日月。小兒時誦古文章。吾儕窮死從來事。敢變胸中百鍊剛。

除夜

守歲全家夜不眠。杯槃狼藉向燈前。相看更覺光陰速。笑語逡巡卽隔年。

修路

雨霽道壞困泥塗。木石紛然賴里閭。但使僅堪行便足。我無長戟與高車。

金丹

子有金丹鍊卽成。人人各自具長生。施行要使俗仁壽。收斂猶能心太平。劇飲似鯨身不倦。細書如蠅眼常明。更餘一事君難學。富貴眞同涕唾輕。

平昔

平昔飄然林下僧。更堪衰與病相乘。殘年已任身生死。一念猶關道廢興。皎皎初心質天地。兢兢晚節踏淵冰。子孫勿厭藜羹薄。此是吾家無盡燈。

二月三日春色粲然步至湖上

不窺衰翁雪鬢新。出門也復整烏巾。梅花隔水香撩客。野鳥穿林語喚人。長日難消惟泥酒。災年不死又違春。吾兒已到新安未。想掬清溪洗客塵。子布度將至新安。

計子布歸程已過新安入畿縣界

憶昔初登下峽船。一回望汝一凄然。夢魂南北略萬里。人世短長無百年。強遣老懷終兀兀。忽聞歸騎已翩翩。今朝屈指無窮喜。歷盡江山近日邊。

東園觀梅

出世仙姝下草堂。高標肯學漢宮粧。數苞冷蕊愁渾破。一寸殘枝夢亦香。問訊不嫌泥濺屐。端相每到月侵廊。高樓吹角成何事。只替詩人說斷腸。

喜得建茶

玉食何由到草萊。重盃初喜拆封開。雪竇庚嶺紅絲磴。乳泛閩溪綠地材。舌本常留甘盡日。鼻端無復甯如雷。故應不負朋遊意。手挈風爐竹下來。

春雨

臨放翁集 十六 劍南詩藁 卷四十五

七十一

細雨吞平野。餘寒勒早春。未增豪飲興。先著苦吟身。幽徑萱芽短。方橋柳色新。閉門非爲老。半世是閑人。

春雨

擁被聽春雨。殘燈一點青。吾兒歸漸近。何處宿長亭。

又

湖上新春柳。搖搖欲喚人。多情今夜雨。先洗馬蹄塵。

初春感事

馬跡車聲是處忙。經旬無客到龜堂。水初泛溢黏天綠。梅欲飄零特地香。世事紛紛人自老。歲華冉冉日初長。百錢不辦旗亭醉。空愛鶉兒似酒黃。

又

一樹紅梅已半殘。破裘也復敵春寒。忍窮過日却嗟易。負媿終身良獨難。活火靜看茶鼎熟。清泉自注研池寬。人生樂處君知否。萬事當從心所安。

道室書事

五十餘年讀道書。老來所得定何如。目光焰焰夜穿帳。胎髮青青晨映梳。二事曾相實。甚畏螻蟻事斷手。已烹熊掌敢兼魚。春燕二畝扶犁去。空憶高皇賜對初。

先少師宣和初有贈晁公以道詩云奴愛才如蕭穎士。婢知詩似鄭康成。晁公大愛賞。今逸全篇。偶讀晁公文集泣而足之。

仕不逢時勇退耕。閉門自號景汪生。遠聞佳士輒心許。老見異書猶眼明。奴愛才如蕭穎士。婢知詩似鄭康成。早孤遇事偏多感。欲續殘章涕已傾。

春日雜題

梅花三十本。圍以疎竹籬。入春甫十日。開遍南北枝。少年輕節物。老大復苦衰。坐見零落盡。一杯初未持。

又

春雨路易乾。雨止即可行。梅花落無餘。蘭芽亦已生。好鳥何山來。向我飛復鳴。行矣東郊路。藉草作清明。

又

野水如棋枰。所至各成村。炊煙出茆屋。碓聲隔柴門。樹陰同戲兒。多已長子孫。安居無暴斂。何以報國恩。

又

春陰不成雨。正作卯色天。花開路無塵。楊柳搖輕煙。佳哉冷海時。槐芽雜豚肩。長安墮胡虜。況說野狐泉。

又

客路行無窮。漁唱聽不厭。濤江西限吳。雲岫南入剡。蹇驢過小市。高柳擁孤店。去去望前村。鴉歸煙欲斂。

又

蒲柳深復淡。桃李白間紅。東皇一稅駕。萬物酣春風。煙村在何許。小屏圍扇中。一笑喚稚子。相扶上短篷。

春日暄甚戲作

桃杏酣酣蜂蝶狂。兒童相喚踏春陽。老人自笑還多事。預恐明朝雨壞牆。

春日

遲日園林嘗美酒，和風庭院晚新絲。已過燕子穿簾後，又見鮑魚上市時。排闥與兒聯小句，破開留客戰枯萋。殘年自寬安排處，除却歸休總不宜。

書室獨夜

忽忽新春過，悄悄一室幽。銅燈立雁趾，石鼎揭龍頭。老媿人扶拜，貧無食足謀。退居消日月，太平付莊周。

追感往事

太平翁翁十九年，紹興中，禁中謂秦太師爲太平翁翁。父子氣焰可熏天，不如茅舍醉村酒。日與鄰翁相枕眠。

又

世事紛紛過眼新，九衢依舊漲紅塵。桃花夢破劉郎老，燕麥搖風別是春。

又

渡江之初不暇給，諸老文辭今尙傳。六十年間日衰靡，此事安可付之天。

又

文章光焰伏不起，甚者自謂宗晚唐。歐曾不生二蘇死，我欲痛哭天茫茫。

又

諸公可歎善謀身，誤國當時豈一秦。不望夷吾出江左，新亭對泣亦無人。

書意

我本三生世外人，幻軀其實強冠巾。稍能閉戶學種菜，時亦長歌行負薪。一醉却非身外事，百年終是冢中塵。君知夢境無根底，莫信人言想與因。

又

病眼猶堪閱世人，難將雪鬢著烏巾。囊中錢盡罷沽酒，澗底雨寒愁束薪。老子那辭徙牛屋，癡人自喜拜車塵。窮通要是兒嬉事，懶就山僧講宿因。

清都行有序

辛酉二月十四日夜雞初鳴夢與故人查元章竝轡行大道中前望宮闕甚壯麗元章言吾輩嘗同預大議論予與約勿爲身謀元章拊掌稱善遂覺作清都行一首

積雨初收曉塞重，野人忽作清都夢。宮牆柳色綠如染，仰視修門岌飛動。元章久已葬岷山，安得翩翩竝馳輕。春光如昔交舊少，肺肝欲寫誰堪共。頗聞天闈有疑事，通明殿下方僉議。約君切勿負初心，天上人間均一是。

春來食不繼戲作

久臥窮閭困負薪，何妨掃盡太倉陳。瘦如飯顆吟詩面，飢似柴桑乞食身。穢象未應殊斷木，江湖底處有窮鱗。大冠長劍人看好，不換茅簷一幅巾。

紹興辛酉予年十七矣距今已六十年追感舊事作絕句

常憶初年十七時，朝朝烏帽出從師。與許子威輩同從鮑季和先生，晨興必具帽帶而出，忽逢寒食停供課，正寫誓書作履碑。

獨坐視老奴灌園

東窗日晚獨愁予，眼闌年來頗廢書。賴有吾家老阿對，相從引水灌園蔬。

雨晴風日絕佳倚門外

一雙芒屨伴筇枝，不用兒扶自出嬉。貪看南山雲百疊，曾西溪上立多時。

又

茶甌無端廢午眠，杖藜信步到門前。青裙溪女結靈卦，白髮廟巫催社錢。

又

章老三年病方死，吳翁一夕呼不醒。獨有此身頑似鐵，倚門常看暮山青。章吳皆郡人以去冬死

春遊

春風堤上草萋萋，草軟沙平護馬蹄。似蓋微雲纔障日，如絲細雨不成泥。千秋觀裏逢新燕，九里山前聽午雞。追憶舊遊愁滿眼，綵船曾繫畫橋西。

春雨

狼籍殘花滿地紅，擁衾孤夢雨聲中。人生十事九堪歎，春色三分二已空。但有老盆傾濁酒，不辭衰鬢對青銅。長貧博得身強健，久矣無心咎化工。

又

藥爐茶竈淡生涯。聽雨猶能惜物華。蘸岸頓添三尺水。沾泥不貸一城花。閑摩病眼開書卷。時傍危欄弄釣車。稚子孤行八千里。喜聞炊熟可還家。家僮自行在來。製子布寒食前可到。家唐人以寒食前一日爲炊熟。

又

自笑平生嬾是真。閉門高枕動兼旬。海棠千片已隨水。杜宇一聲無復春。綠酒盈樽足忘老。朱櫻上市正嘗新。今朝雨止通溪路。又向沙頭岸幅巾。

書懷

謝客元無疾。深居似有憂。向空書咄咄。對竹送悠悠。出每思安臥。歸還念遠遊。春衣典已慣。斗酒不難謀。

三月十六日至柯橋迎子布東還

江國常年秋雁飛。吾兒遠客寄書稀。道途一見相持泣。鄰曲聚觀同載歸。草草杯盤更起舞。匆匆刀尺旋裁衣。從今父子茅簷下。回首人間萬事非。

又

我似傷禽帶箭飛。更憐汝作雁行稀。異時恐抱終身恨。此日寧知徒步歸。萬里外應勞遠夢。三年前已挂朝衣。斷編蠶簡相從老。絕念功名亦未非。

題施武子所藏楊補之梅

補之寫生梅。至簡亦半樹。此幅獨不然。豈畫橫斜句。

食野菜

野蕨山蔬次第嘗。超然氣壓太官羊。放翁此意君知否。要配吳粳曉飯香。

又

萬里蕭條酒一杯。夢魂猶自度瑯邪。可憐龍鶴山中菜。不伴莪眉楫脯來。

予十許歲。卽往來雲門諸山。今復與諸子來。追念悽然。

經行猶記髮髭初。所至潭如過故墟。橋廢夕陽空鶴表。碑亡春草沒龜趺。荒郊渺渺羊牛下。叢木蕭蕭鳥雀呼。可恨一衰今至此。右攜筇杖左人扶。

雲門道中

度嶺穿林一徑斜。旋篝新火試新茶。箬包粉餌祠寒食。雨溼青巖上若耶。石罅微泉來滴瀝。溪涯老木臥槎牙。不須苦覓東柯谷。是處雲山可寄家。

龍瑞

多年不闕陽明路。今日重來院院行。好在千秋馮觀主。修廊一見眼偏明。

禹寺

暮春之初。光景奇。湖平山遠最宜詩。尙餘一恨無人會。不見蟬聲滿寺時。

寄題張仲欽左司槃澗

劍谿之南有佳處。山靈尸之不輕付。張公鼻祖晉司空。談笑得地開窗戶。谿光如鏡新拂拭。白雲青嶂無朝暮。伏几讀書時舉頭。萬象爭陳陶謝句。公今仙去有嗣子。關塞崎嶇方叱馭。山城何曾歎如斗。傲傲不受世俗汗。君不見。任文往者勢如山。朝士幾人無汗顏。尊公遺事不須述。但看當時出處間。

園中晚興

世故誰能必。書生妄自期。年光卷中過。心事髮邊知。零落花隨水。輪囷筍突籬。晚晴山盡出。徙倚獨移時。

送陳希周赴安福令

補吏鶴嶺邊。尊公方玉立。超遙翳風雲。餘子那可及。天高鬼神惡。聞訃三日泣。晚途見嗣子。握手悲喜集。乘桴掠鯨波。信矣勇可習。巉巖風骨峭。颯霧不能襲。謂當上臺省。豈復論等級。如何困無津。俛首臨一邑。願嗟六朝民。龍鍾垂八十。肯來野水濱。半月解書笈。吾杯僅容命。安得看鯨吸。佇立送歸鞍。霽日滿原隰。

春晚久雨排悶

積雨暗村墟。幽居雜蠹蚓。泥潦欲升階。几席或生菌。壯年多重腿。沉我抱宿疢。下牀躡高屐。顧影輒自哂。客來入我戶。亦復爲歎憫。胡不徙高原。再拜謝不敏。

甲子日晴

澤國春多雨。閱月殊未止。皇天俄悔禍。畀以晴甲子。山川相炳煥。桑柘鬱千里。壠麥行可穫。吳蠶亦三起。牀頭醅瓮香。大杓瀉浮蟻。醉醒日已晡。長歌識吾喜。

三月二十日兒輩出謁孤坐北窗

園林春已空。陂港雨新足。泥深黃犢健。桑老紫樵熟。豐年逋負少。村社壓酒肉。微風吹醉醒。起和飯牛曲。

又

歲月不相貸。布穀忽已鳴。新夏亦自佳。北窗綠陰成。讀書老易倦。披衣繞塔行。摩挲枕榔杖。與汝樂太平。
陳希周自海外歸。送桃榔拄杖一枝。

春盡記可喜數事

微雨洗浮埃。蒼顏一笑開。僧招行藥圃。兒報得琴材。病退初嘗酒。春殘已過災。鄰家賽神會。自喜亦能來。
卜者謂予今春當病。幸不甚驗。

立夏前二日作

晨起披衣出草堂。軒窗已自喜微涼。餘春只有二三日。爛醉恨無千百場。芳草自隨征路遠。遊絲不及客愁長。殘紅一片無尋處。分付年華與蜜房。

老民

乞得不貲身。林間號老民。兒因作詩瘦。家爲買書貧。村僕欺謾少。鄰翁語笑真。今朝鹽酪盡。齋糲更宜人。

又

老民無一事。終日臥柴扉。鑿沼觀魚樂。鉤簾待燕歸。架高藤葉密。土潤藥苗肥。休退真吾分。無心學息機。

貧甚自勵

忍病停朝藥。捐書省夜燈。都門下第客。山寺退居僧。天每臨幽隱。人何與廢興。能輕馬千兩。肯慕稷三升。

衡門

小聚風煙外。衡門水竹間。疏濤分北瀾。翳木見南山。人笑謀生拙。天教到死閑。猶存拄杖子。遇與卽敲攀。

遊法雲

放船三家村。進棹十字港。雲山互吞吐。水草遙莽蒼。沙鷗下拍拍。野鶩浮兩兩。蕭蕭菰蒲中。小艇時來往。匡山如香爐。藍水似車輞。夢魂不可到。于此寄遐想。瘦僧迎寺門。爲我掃方丈。指似北窗涼。此味塊專享。我笑謝主人。聊可倚拄杖。吾廬已清絕。敢取魚熊掌。

舟中作

短篷搖檝暮山昏。老怯年華易斷魂。夾港蒲聲知小雨。隔林續火認孤村。奉祠累歲慙家食。謝事終身負國恩。惟有慙忠窮未替。尙餘一念在元元。

貧居

囊空如客路。屋窄似僧寮。得飯多菰米。烹蔬半藥苗。草生初失徑。笱放欲干霄。不道弓旌誤。虞人自畏招。

初夏野興

得意煙霞不諱窮。一菴聊寄寂寥中。山從樹杪參差見。水遶花陰曲折通。閑倚胡牀遡新月。時停團扇受微風。元知夢境無真實。不待邯鄲覺後空。

又

披衣清曉倚闌干。龜屋裁成二寸冠。盆檜雨餘抽嫩綠。研池風過起微瀾。愛書自笑心常在。去死懸知日

尙寬。回視前修似無媿。不教一字入長安。

又

扇墮巾欹午夢回。鳴鳩又喚雨絲來。數行褚帖臨窗學。一卷陶詩傍枕開。糠火就林煨苦筍。密甕沉井漬青梅。艾人行復巍然出。老大難堪節物催。

卷第四十六

孟夏方渴雨忽暴熱雨遂大作

蒸溽殊未解。雨來那可涯。鵲驚無穩樹。燈暗不成花。處處躡秧馬。家家閑水車。兒童伴翁喜。聚首話桑麻。

小池

荷鋪庭中破嫩苔。清溝一派引泉來。剪刀草長浮萍合。無數遊魚去復回。

衡門

曲徑衡門短短籬。槐楸陰裏倚筇枝。老來百事不入眼。惟愛青山如舊時。

海上作

厭逐紛紛兒女曹。挂帆江海寄吾豪。鯨吞蠃作渾閑事。要看秋濤天際高。

朝飢示子聿

水雲深處小茅茨。雷動空腸慣忍飢。外物不移方是學。俗人猶愛未爲詩。生逢昭代雖虛過。死見先親幸

有辭八十到頭終強項。欲將衣鉢付吾兒。

養氣

養氣安心不計年。未嘗一念任愁邊。才疎屢掃朝中迹。命薄翻成世外緣。耐老尙能消劫石。放狂聊復醉江天。他知句曲羅浮路。不訪初平卽稚川。

示友

黃卷青燈自幼童。長年頗亦有新功。尙嘲孟顛遲成佛。那計辛毗不作公。學問更當窮廣大。友朋誰與共磨礪。諸君果未捐衰老。鄙語人當致一通。

早涼熟睡

靈臺虛湛氣和平。投枕逡巡夢卽成。屋角鳴禽呼不覺。手中書冊墮無聲。百年日月飛雙轂。千古山河戰一枰。賴有蓮峯遺老在。白雲深處主齊盟。謂陳希夷

初夏

麥秀微寒後。梅黃細雨前。湖灘初集鷺。堤柳未鳴蟬。琴帶輕陰潤。巾因小醉偏。晚來幽興極。又上釣魚船。

夏雨

忽聞疎雨滴林梢。起看油雲滿四郊。行蟻君臣初徙穴。鳴鳩夫婦正爭巢。鏡陂處處移新稻。乘屋家家補破茆。堪笑此翁惟美睡。孝先便腹任譏嘲。

倚樓

千里江山入倚樓。高吟聊復寫吾憂。詩書幸有先人業，貧賤初非學者羞。數掩檣籬端可老，一杯藜粥尚何求。東陂未插青秧遍，且與鄰翁卜雨鳩。

晚興

偶扶藜杖過傍村，卻倚禪牀坐小軒。日落鴉栖樹樹暗，人歸鶴踏釣船翻。挽弓從笑識丁字，刺繡終勝倚市門。羹芋一杯吾自飽，諸兒強爲置盤飧。是日五耶等置食參倚。

又

身如病鶴謝樊籠，白盡衰髯臉尚紅。蒲葦陂塘新漲後，梧桐門巷夕陽中。遺名要耐千年看，快飲方誇百榼空。造物閱隣君會否，放教折臂老新豐。

晨雨

過雲生谷暗，既雨卻窗明。低燕爭泥語，浮魚避水行。山川增秀色，草木有奇聲。處處青秧滿，長歌樂太平。

戲作絕句以唐人句終之

雨細穿梅塢，風和上柳橋。山居無曆日，今日是何朝。

又

靜對煎茶竈，閒疏洗藥泉。回頭問童子，今夕是何年。

述懷

情懷猶是昔年人，豈料侵尋八十身。燈下看書方覺老，花前闕酒始知貧。玉非風朴何勞辨，魚與熊蹯各

自珍萬事回頭已陳迹。爲君一笑落紗巾。

閑中自詠

鶴羨清羸鷗羨閑。衡門正在水雲間。無求尙恨時除酒。有癖應緣酷愛山。細繞坡頭行犖角。別分泉脈聽淙潺。三更不睡看江月。恐有高人夜叩關。

晨興

小雨過郊墟。晨興一事無。殘榴重結蕊。新燕續生雛。書細猶能讀。行遲漸要扶。蔬畦恐蕪沒。且復課僮奴。

自詠

愈老愈知生有涯。此時一念不容差。身如病鶴長停料。心似山僧已棄家。高枕時時聞解纜。卷簾片片數飛花。飯餘解帶摩便腹。自取風爐煮晚茶。

又

行年耄及臥蝸廬。山水登臨亦已疎。無可奈何猶食粟。未能免俗學澆蔬。蓬門時接漁樵話。塵几聊存種樹書。強欲入城還自笑。世間那有鶴乘車。

西村

亂山深處小桃源。往歲求漿憶叩門。高柳簇橋初轉馬。數家臨水自成村。茂林風送幽禽語。壞壁苔侵醉墨痕。一首清詩記今夕。細雲新月耿黃昏。

漁父

楚江茫茫新雨霽。殘雲疊作魚鱗細。老翁短楫去若飛。我欲從之已天際。從之不可況共語。醉眼知邊輕
一世直鉤去餌五十年。此意寧爲得魚計。

放歌行

少年不知老境惡。意謂長如少年樂。朝歌夜舞狂不休。逢人欲覓長生藥。三二十年底難過。屈指朋儕餘
幾個。就令未死身日衰。朱顏已去誰能那。人間萬事如弈棋。我亦曾經少壯時。兒曹紛紛不須校。歲月推
遷渠自知。

苦貧

老作清時版籍民。深耕迨及故山春。熟思豈是天貧我。妄計還憂鬼笑人。但使甑中餘麥飯。何妨澗底采
荆薪。此窮正坐清狂爾。莫向瞿曇問宿因。

晨起至參倚齋示子聿

似仙猶火食。比古未巢居。老子處全節。小兒能著書。下簾留乳燕。投飯出潛魚。幸好隆中客。無爲起草廬。

夏夜對月

薄雲歸欲盡。殘雨久猶滴。月入疎林間。庭戶粲珠璧。梅天苦蒸鬱。爽氣始此夕。豈無一舴艋。放浪江天碧。
散髮黃鶴樓。醉弄白玉笛。眞當舞魚龍。詎止裂金石。

夏夜

酒力初消睡未厭。臥看香縷繞疎簾。月高樓鶻重移樹。風勁流螢自入簷。長夏迢迢秋尙遠。瓜酪冉冉兩

相兼老人本是山中客。掃迹元非畏楚鉗。

五月十日曉寒甚。聞布穀鳴有感。

弊符久當脫。短褐竟未送。吳中諺語曰。未喫端五糲。布襖未可送。俗謂典質曰送。老怯五更寒。重衾擁殘夢。羣蠶方得意。飽血藏衣縫。竹簾何時陳。紈扇殆無用。長夏壘壘來。歲月疾飛輪。安懷歎。嗚呼。憂太息。欲誰控。

老歎

人生易衰老。萬事海濤翻。但恨芳尊在。寧悲雪鬢繁。諸儒輕古學。遺虜盜中原。有語誰能聽。毋矜舌尚存。

閉戶

收身歸死鏡湖傍。閉戶悠悠白日長。巷僻斷非容駟路。腸枯那有蹴蔬羊。書生正可蹈東海。世事漫思移太行。睡起不知天早暮。坐看螢度篆盤香。

長飢

病臥窮閭負聖時。本來吾道合長飢。朝不及夕未妨樂。死何如生行自知。早年羞學仗下馬。末路幸似泥中龜。煙波一葉會當逝。吹笛高人有素期。

山齋書事

山榴子結又重開。巢燕雛飛卻續回。燕有三生雖乃去者。雨足人畦千頃稻。日長風舞一庭槐。浩歌縱酒愁仍在。作意觀書睡已來。常恨流年不相貸。若爲更著暮蟬催。

贈道流

賣藥會稽市。不知今幾年。身常雜庸保。世果有神仙。辭帽簪花舞。漁舟聽雨眠。放翁獨識子。肯向俗人傳。

避暑松竹間

雙松五丈高。萬竹一尺圍。上有林蟬鳴。下有礪鳥飛。正午不見日。我來每忘歸。清詩忽陳前。永與世俗違。直北有異境。煙汀連釣磯。何當霜雪時。散髮擗葉衣。

連日大雨門外湖水渺然

趁朝把笏著烏鞵。不似歸來買短蓑。尙鄙朱公養魚術。肯爲寧戚飯牛歌。逢時有命求何益。觸事無心得最多。樂處卻嫌兒輩覺。出門十步卽煙波。

午睡

槐楸陰裏綠窗開。天與先生作睡媒。流汗未乾衣上雨。大聲已發鼻端雷。枕鑄松石分翠薦。簾織風漪取笛材。卻起岸巾看汲井。人間車馬正氛埃。

窮居

匏窳心自樂。寂寞道常尊。老病頻辭客。嬉遊不出村。淳醪均列鼎。徒步當華軒。不但終吾世。猶堪遺子孫。

梅雨

殘雨收還滴。低雲去復留。誰憐憐弱燕。喚婦笑鳴鳩。碓米春初滑。園蔬摘復抽。誰知泥沒蹠。也有客相求。

村居書事

困厄難希飽煖家。未妨隨事作生涯。白鹽赤米已過足。早韭晚菘猶恐奢。鴨放競浮新漲水。牛歸正及暝棲鴉。年逾七十方辭祿。敢望高人挂齒牙。

閑中信筆二首其一追和陳去非韻其一追和王履道韻

我看浮名如脫髮。誓墓收身老巖穴。座延窮鬼心不疑。鑿鍾橫財渠自別。樂哉今爲八十翁。神交園綺商山中。烹葵剝棗及時序。爛醉黍酒歌邪風。

又

小江之上千峯立。潮回艇子爭來集。飄風忽起白浪高。急雨橫吹綠蕩溼。歲豐斗酒纔百錢。茆店無人驚醉眠。醒來徑入亂雲去。異日出看東封年。

題齋壁

鏡水西頭破茅屋。紹興初載舊書生。門無車馬終年靜。身臥雲山萬事輕。三釜昔傷貧藉祿。一廛今幸老爲氓。斷蓬不是無飛處。莫與飄風抵死爭。

夏日雜題

疎疎窗似秋蛩室。疊疊書如春鵲巢。大蓋何妨尙絃誦。小詩時亦雜談嘲。

又

耽耽醜石巖當道。矯矯長松龍上天。滿地凌霄花不掃。我來六月聽鳴蟬。

又

情懷萬里長征客。身世連牀且過僧。熟計書空成咄咄。不如任運去騰騰。

又

一枝黎峒枕榔杖。二寸羊城躡蟬冠。萬里來爲老人壽。始知天地不勝寬。

又

天隨手不去朱黃。辟蠹芸編細細香。今夕短檠須暫設。北窗風雨送微涼。

又

身閑欲出無如懶。酒薄雖傾不敵愁。殘暑從今無一月。剩儲詩思待新秋。

又

懔懔衡門一秃翁。回頭無事不成空。可憐萬里平戎志。盡付蕭蕭暮雨中。

又

衰疾沉綿短鬢疎。淒涼圯上一編書。中原久陷身垂老。付與囊中飽蠹魚。

夏雨歎

蝸舍入門楣觸額。黃泥壁作龜兆坼。雨多潦水欲上堦。臥聽鳧鴨聲拍拍。日高糴米奴未回。坐知薄飯未容索。仕羞捷徑耕不力。自取囊空欲誰責。富貴危機復可畏。世間果無第一策。雖然胸中有事在。片言可壽天下脈。

物外雜題

南墟沽斗酒。獨酌復高歌。一笑語觀者。比君更事多。

又

當年下沔鄂。回首幾秋風。景物渾如昨。千帆落照中。

又

曉入姑蘇市。閭門繫短篷。老人元不食。買餅飼山童。

又

送客停山步。尋僧立寺門。青鞵慣泥潦。卻愛雨昏昏。

又

粉堞臨江渚。朱橋枕市樓。長吟策小蹇。又度一年秋。

又

銅鑪留野店。買藥入山城。興盡飄然去。無人識姓名。

又

高城今曠野。比屋昔朱門。道上傳呼過。遙遙幾世孫。

又

過市摩雙眼。驚嗟閱盛衰。朱樓倚霄漢。曾見始成時。

過村舍

確舍臨山路。牛欄隔草煙。問今何歲月。恐是結繩前。

晝臥初起書事

歲華病思兩侵尋。靜看槐楸轉午陰。待睡不來聊小憩。煨詩未就且長吟。遠山久洗天涯恨。謝事新諧物外心。忽有故人分祿米。呼兒先議贖雷琴。

夜雨有感

斷虹不隔江郊雨。東方虹見則雨止。俗語謂之隔雨。今歲獨不爾。一酸昏燈夜半時。多感生悲那爲酒。積衰成瘦錯冤詩。空堪點滴何由止。倦枕淒涼只自知。平日故人零落盡。寄書誰與敘睽離。

偶作夜雨詩明日讀而自笑別賦一首

俗情向者未全忘。洗以縈籬一縷香。得失故應常浩浩。是非正可付蒼蒼。殘蟬不斷知秋近。雙燕歸來伴晝長。誰識龜堂新力量。東家卻笑接輿狂。

舍西晚眺示子聿

秋濤常記犯靈胥。季子雙髦尙髮如。薄飯不爲明日計。短檠相對十年餘。嗟予久合墮鬼錄。憐汝猶能讀父書。西望牛頭渺天際。永懷吾祖起家初。牛頭山在小江西。北有先大傅讀書堂尙存。

自訟

年少寧知道廢興。搏風變化羨鯤鵬。貪求但欲攀分寸。痛定方慙乞斗升。靈府已能澄似水。俗緣更覺薄於僧。挂冠且喜身蕭散。二頃寧須退可憑。

讀唐人樂府戲擬思婦怨

一自門前征馬嘶。此心常與斷雲西。雙飛空羨雉朝雊。獨泣忍聞烏夜啼。遼海晝昏塵漠漠。杜陵春到草萋萋。孤愁可爲鄰姬說。只有臨樽醉似泥。

南堂納涼

環坐列胡牀。兒曹共此涼。風生桐葉墜。露下稻花香。老幸返初服。窮宜歸故鄉。已無櫻可濯。清嘯對滄浪。

又

浴罷閑無事。悠然寄一牀。水風涼醉頰。松月上虛廊。岸久烏紗側。熏餘細葛香。今宵一美睡。何止傲羲皇。

中庭納涼

紅映衡門夕。照明翠浮村。巷暝煙生搖搖楸。線風初緊。颭颭荷盤露欲傾。數酌濁醪留客醉。一編疑義與兒評。須臾散去人聲寂。獨數城頭長短更。

又

散髮江天懶出遊。衡門日落鎖梧楸。火雲突兀方蒸暑。銀漢縱橫已報秋。熠熠露螢黏徑草。瑟瑟漏鼓下譙樓。追涼明日無奇策。聊向林間卜雨鳩。

待旦

東方星磊磊。西舍雞喔喔。萬慮集五更。吾睡無由著。世事如飲酒。不獻自無醉。開窗起危坐。送月西南落。

又

是身如浮煙，久聚要當散。吾年七十七，寒暑凡幾換。夏夜亦自佳，何必厭揮汗。推枕坐南窗，悠然待清旦。

晨興

冬夕宜晚睡，夏日思晨興。磊落明星高，蒼涼朝日昇。正襟坐堂上，有兀不敢憑。陳前聖人書，凜如蹈淵冰。平生不苟利，豈獨畏友朋。長飢君勿謂，人各有不能。

又

欲曉不能寐，亟起坐北堂。齋莊對斷簡，左右陳朱黃。湛湛一池墨，鼻鼻半篆香。老生不自逸，幸此夏日長。奇哉長頭兒，好勇不可當。安得數年健，與兒講虞唐。

晚涼述懷

末學常憂墮吝驕，晚知鵬鷲本逍遙。屏醫卻藥疾良已，破械空囹盜自消。父子終身美藜藿，交遊大半是漁樵。衡門日落清風起，又著藤冠度野橋。

湖塘晚眺

綠樹暗村墟，青山繞草廬。奉祠神禹舊，馳道暴秦餘。浦色沉煙網，蛙聲入雨鉏。清秋又如許，幽憤若爲摅。

又

病起閑無事，時來古渡頭。煙中賣魚市，月下采蓮舟。帆鼓娥江晚，菱歌姥廟秋。長吟無傑句，聊以散吾愁。

小集

烏柏遮山路，紅蕖滿野塘。病蘇身漸健，秋近夜微涼。杯酌隨宜具，漁歌盡意長。兒曹娛老子，圍坐說豐穰。

出門與鄰人笑談久之戲作

少時已歎少驩娛。衰病經旬一笑無。今日出門逢父老。欣然隨衆強盧胡。

又

暮僮昏昏半掩扉。偶逢鄰叟荷鋤歸。且令閑說鄉村事。莫問渠言是與非。

又

菽水欣欣每盡歡。仁賢不必襲衣冠。出門邂逅移時語。未害龜堂取友端。

又

屋角時聞黃犢鳴。相逢但可說春耕。一言誤及城中事。讖罰應須便酌觥。

魚池將涸車水注之

清波溜溜入新渠。鄰曲來觀樂有餘。試手便同三日雨。滿陂已活十千魚。喜如雷動風行際。快若天開地

關初。萬物但令俱有託。吾曹安取愛吾廬。

一齒動搖已久然餘皆堅甚戲作

病齒元知不更全。漂浮杙杙已三年。一朝正使終辭去。大嚼猶能盡處肩。

晚至新塘

青鞵隨意出柴荆。聊向南塘曳杖行。歸鳥已從煙際沒。斷虹猶在柳梢明。城頭層塔凌空立。浦口孤舟並岸橫。向道有詩渾不信。爲君擁鼻作吳聲。

夜泛湖中

水鴨鷓鴣拍拍飛，菰蒲深處弄煙霏。
喚回二十年前夢，半醉姑溪棹月歸。

立秋後作

宋玉悲秋千載後，詩人例有早秋詩。
老夫自笑心如石，三日秋風漫不知。

覽鏡

此頭那可著貂蟬，瘦似騎驢孟浩然。
一事比渠差省力，閉門無句與人傳。

早秋南堂夜興

水注橫塘蘂行香，候蟲唧唧滿空廊。
風前落葉紛可掃，天際疎星森有芒。
夜漏漸長愁少睡，秋衣未製怯新涼。
明朝卻有欣然處，寫得黃庭又幾行。

菱歌

海內知心人漸少，眼前敗意事常多。
問君底事渾忘卻，月下菱舟一曲歌。

聞角

河白如銀天淡青，角聲中有玉關情。
早知送老桑麻野，悔失安西萬里行。

湖隄

新月纖纖淡欲無，時聞魚躍隔菰蒲。
籃輿小放湖隄上，信有人間白玉壺。

秋旦

將且溪風急。新秋天宇寬。涼生豎裁褐。爽入縮縫冠。拊翼雞頻唱。爭枝雀正譖。一簞吾已足。芋豆亦加餐。

龜堂晨起

培火螭爐起寶熏。滴泉鑿研聚玄雲。屏圍燕几成山字。簾展涼軒作水紋。絕口不談浮世事。洗心聊策退
居勳。老年猶健非無自。一卷丹經受鄭君。

柳橋秋夕

柳疎橋盡見水落路全通。衣杵家家月。漁舟浦浦風。眼明無俗物。步蹇有枯筇。野逸誰能那。悠然西復東。

道室雜題

早訪丹砂上峒嶼。晚提河派沂崑崙。陰符後出君無忽。三百奇文要細論。

又

聞說湖中有釣舟。煙波出沒雜輕鷗。一聲清嘯去已遠。我欲從之何處求。

又

山中有草名長生。丹砂可死金可成。服之刀圭齒髮換。要看東封告太平。

又

勘書窗下松明火。采藥溪頭槲葉衣。只在人間人不識。秋風又見雁南飛。

陸放翁集

劍南詩彙

卷第四十七

儒生

儒生安義命。所遇委之天。用可重九鼎。窮寧直一錢。雖云髮種種。未害腹便便。高臥茅簷下。羹藜法不傳。

秋夜

老病睡眠少。如斯秋夜何。長庚未配月。織女已斜河。莎徑蟲吟苦。柴門葉落多。誰知窮甯戚。不作飯牛歌。

寺開

三豎初得牧牛童。兩扇新成釣舸篷。偶訪野僧過射的。卻衝微雨上樵風。登山未減青鞵興。到手俄驚綠酒空。自笑此身猶健在。試憑重閣送飛鴻。

秋暑夜興

寂寂空廊絡緯鳴。消搖岸幘近南榮。閑眠篔作波紋冷。新浴衣如蟬翼輕。微雨已收雲盡散。衆星俱隱月徐行。呼童持燭開藤紙。一首清詩取次成。

漁父

千錢買一舟。百錢買兩槳。朝看潮水落。暮看潮水長。持魚換鹽酪。縣郭時下上。亦或得濁醪。不復計瓶盎。

浩歌忘遠近。醉夢墮莽蒼。玄真不可逢。悠然寄遐想。

省事

車馬聲都絕。比鄰迹麻疎。淺傾家釀酒。細讀手鈔書。薄飯惟羹芋。閑遊不借驢。有時還自笑。省事更誰如。

新涼書懷

烏帽圍寬帶。眼移閉門憤。忍日長飢。文章雖媿聲名誤。志節寧隨血氣衰。天地無私非困我。聖賢可學有餘師。短檠正歎經時別。涼入郊墟喜可知。

又

藥物扶持病少蘇。殘年不恨老菰蘆。潦收溪堰魚爭售。歲樂村場酒易沽。無日橙林無墜葉。橙木自夏至秋。日有落葉不可勝掃。有時燕戶有新雛。今年燕屢生雛。七月望猶未止。秋風剩起扁舟興。安得州家復鏡湖。

又

鄰曲今年又有年。垂髫戴白各欣然。先輸官庾無通賦。共賽神祠有社錢。退傳寄聲情縝密。連得周丞相書。緝字蒲帽。晦翁入夢語蟬聯。昨夕夢米元晦甚款。燈前細與兒曹說。蠶簡猶堪數世傳。

又

山川遺迹晉唐餘。水竹相望許洛居。朱希貞嘗言山陰富水竹。有洛陽許下梨桑。一齒屢搖猶決肉。雙眸雖澀尚耽書。郊原夜夜驅耕犢。村店時時秣蹇驢。客問若爲娛老境。吾兒未與短檠疎。

七月十七晚行湖塘雷雨大作

電火雷車下九關。我行暮出郊原間。鬢髮暗樹類奇鬼。突兀黑雲如壞山。江湖默應鰻岫溢。鐵鑊自脫梅梁遠。今夕虛簷瀉懸瀑。預知高枕聽淙潺。

七月十八夜枕上作

電擊光如畫。雷轟意未平。亂雲俄卷盡。孤月卻徐行。露草蛩相語。風枝鷓自驚。一涼吾事足。美睡到窗明。

梅市

梅市柯山小繫船。開篷驚起醉中眠。橋橫風柳荒寒外。月墮塵鐘隱渺邊。客思沉經孤驛路。詩情又入早秋天。如今老病知何恨。判斷江山六十年。

秋思

利欲驅人萬火牛。江湖浪迹一沙鷗。日長似歲閑方覺。事大如山醉亦休。衣杵相望深巷月。井桐搖落故園秋。欲舒老眼無高處。安得元龍百尺樓。

小舟湖中夜歸追和孟浩然夜歸鹿門歌

山光漸淡川氣昏。急雨亂打荷葉喧。小舟橫掠湖邊村。人家收網半閉門。吾廬未見見堤樹。舟人指點孤燈處。蒲叢姑惡最可哀。衝雨飛鳴背人去。

酒盞

飲酒但飲濕。吾聞之老坡。渠非惜酒錢。無如欠窮何。我窮乃過之。空罍倒餘濕。日來彌可笑。濕亦不可得。

平生忍飢多，得飯已有餘。父子茅簷下，清坐談詩書。

燒香

寶熏清夜起，氤氳寂寂中。庭伴月痕小，新海沉非弄。水旋開山，麝取當門。蜜房割處春方半，花露收時日未暝。安得故人同語語，一燈相對看雲屯。

自述

寄懷魚鳥臥煙汀，結友松筠醉草亭。拜賜龜章紆舊紫，予蒙恩錫服。篋中有守郡時，故袍用以拜命。養成鶴髮掃餘青，遺經在櫝傳家學。大字書牆作座銘，浪迹江湖遂終老。此身何啻一浮萍。

又

意望天公本自廉，甘餐美睡偶容兼。一生憂患如山重，此日安閑抵蜜甜。拙宦雖無齊虜舌，早歸亦免楚人鉗。但餘一味疎慵在，儲藥千斤未易砭。

風雨

風搖北斗柄欲折，雨溢天河浪正生。一盞昏燈北窗下，腐儒未輟讀書聲。

白露前一日已如深秋有感

匹馬曾防玉塞秋，豈知八十老漁舟。非無丈二爰堪請，只恐傍人笑白頭。

又

護塞寧須右北平，拂雲祠是受降城。誰知此志成虛語，白首燈前聽雁聲。

東村晚歸

蜀道還吳鬢已絲。歷年二紀固應衰。寧知秋思沉綿日。又見秋風搖落時。錦雉白魚供野餉。青林紅樹入新詩。東村寂寂風煙晚。酒挂驢肩又一奇。

秋望

快哉一雨洗浮塵。卻喜郊原霽色勻。野火已亡秦相冢。江濤猶託伍胥神。登臨頓覺清秋早。流落空悲白髮新。東望思陵鬱葱裏。老民猶及見時巡。游會能記高皇建炎巡幸。

郭西

鵲下川原黑。船行浦溆空。橋燈搖水影。樓角散天風。野眺飛埃外。漁歌冷翠中。不須嘲病翼。要是脫樊籠。

舍北

支徑秋原上。衡門夕照中。野煙山半失。溪漲浦橫通。髮禿難藏老。衣穿可諱窮。浩歌終自得。心事寄冥鴻。

夜坐示子聿

久客誠當去。無心偶小留。掃空閑夢想。閱盡舊朋儔。學術非時好。文章幸自由。蘇黃門閥姪孫元老詩有云。從此文章始自由。不嫌秋夜永。問事有長頭。

柳橋晚眺

小浦聞魚躍。橫林待鶴歸。閑雲不成雨。故傍碧山飛。

秋興

陸放翁集 十七 劍南詩藁 卷四十七

秋風吹我夜。植杖溪橋側。木葉雖未凋。慘澹無顏色。

又

功名不垂世。富貴但堪傷。底事杜陵老。時時矜省郎。

又

秋暑勢已窮。風雨縱橫至。白鷺立清灘。與我俱得意。

又

胸中萬卷書。一字用不著。歸休始太息。竟是爲農樂。

又

酌酒桑陰下。邪風入醉歌。何須繩檢外。名教樂還多。

嘉泰辛酉八月四日雨後殊凄冷新雁已至夜復風雨不止是歲八月一日白露

殘暑方炎忽痛擢。無情風雨亦奇哉。但嗟不爲貧人計。未動秋砧雁已來。

又

仲秋四日雁橫天。閉戶垂帷意已便。方歎今年時候早。夜深風雨更凄然。

近村民舍小飲

秋風吹細雨。蕭然濯炎熾。老夫疾頓平。甘食仍熟寐。春物財幾何。搖落已復至。昔人喻死生。謂若屈伸臂。愚公顧不靈。白首沒榮利。嗟予幸學道。了此直差易。三拜散人號。退志獲早遂。絃歌萬二千。盡力不能崇。

瘦骨可數，渺渺入空翠。霜蟹初把螯，絲蓴小添豉。平生笑巨君，老齧乾肉糲。異味幸滿前，萬事付一醉。

閑適

飲酒不至狂，對客不至疲。讀書以自娛，不強所不知。一箇袖手坐，往往畫漏移。初非能養生，簡事頗似之。

四寺俱可喜，最好新秋時。柴門傍野水，鄰叟閑相期。

又

陸子居山陰，杜門輒經年。有時思出遊，兩屨凌風煙。長錢斲靈苗，大瓢挹飛泉。眼長不及寸，能著萬里天。不飲顏常丹，不食腹果然。金丹亦棄置，我是地行仙。

夜歸

今年寒到江鄉早，未及中秋見雁飛。八十老翁頑似鐵，三更風雨采菱歸。

又

茭浦菱陂夜半時，小舟更著疾風吹。青燐一炬楓林外，鬼火漁燈兩不知。

自詠

宦遊疇昔徧天涯，萬里東歸歲月賒。古道泥塗居士屨，荒畦煙雨故侯瓜。園公谿父逢皆友，野寺山郵到即家。病思漸輕重九近，又將烏帽插黃花。

老歎

一齒危將墮，雙瞳久已昏。謀生賴蔬圃，養拙閉柴門。多病從來慣，虛名不足論。自憐餘一念，猶欲濟元元。

秋社

雨餘殘日照庭槐。社鼓寥寥賽廟回。又見神盤分肉至。不堪沙雁帶寒來。書因忌作閑終日。酒爲治饔醉一杯。記取鏡湖無限景。蘋花零落蓼花開。

晨起

雞已參差唱。窗纔曉。明高林風不止。叢竹露如傾。夢爲多難記。詩緣嬾少成。晨興了無事。散髮遶堦行。中夜睡覺兩目。每有光如初日。歷歷照物。晁文元公自謂養生之驗。予則偶然耳。感而有作。

人情所願欲。莫若貴與富。是皆有命焉。非力可成就。予昔未有聞。無與發其覆。趨趨強干祿。時命適大謬。六十歸爲郎。數月草章奏。夫豈或使之。擊去惟恐後。嗟彼亦何心。喜溫出選道。還山惟自訟。衡茅屏幽陋。乘除得少健。上下歷巖岫。得飽豈復擇。百口同飯糗。寒龜久猶息。野鶴老益瘦。又如已放馬。寧當夢華廐。造物念途窮。畀以樗櫟壽。雖無熊鳥術。坐空陰陽寇。兩臂若有光。夜視如正晝。物生稟定數。此語聞自舊。置冰鳥覆翼。棄野於菟穀。偶然當後死。鬼錄自遺漏。山陂粟屢收。池水麻可漚。鄰父相歡娛。席地醉醇酎。錢道人不飲酒。食肉囊中不畜一錢。所須飯及草屨二物。皆臨時乞錢買之。非此雖強與不取也。萬里飄如不繫船。空囊短褐過年年。食時無飯芒鞋破。只向街頭旋乞錢。

又

誤辱君王賜鏡湖。身隨鷗鷺寄菰蒲。行年八十猶強健。欲伴先生去得無。

枕上

呼兒初夜上門關。怕冷貪眠自笑孱。月色橫分窗一半。秋聲正在樹中間。暮年不復樽前樂。浮世無如枕上閑。鍊句未安姑棄置。明朝追記尙班班。

山園書觸目

山近雲生易。人稀鳥下頻。瘦篔穿石竅。古蔓絡松身。熟摘巖邊果。乾收澗底薪。經過不相識。喚作避秦人。

苦貧戲作

五窮作祟不容支。蟬腹龜腸旋過時。客散難求門外轍。衣穿徒有鬢邊絲。兒能解事甘藜藿。婢苦無薪脫屣屣。箕踞浩歌君會否。書癡終覺勝錢癡。

秋曉書感

天公息我半生勞。寄傲江湖亦足豪。淡盡月痕知夜艾。飄殘桐葉喜秋高。讀書時亦挂牛角。對酒正須持蟹螯。縱有故人終自絕。安能從汝望綈袍。

秋夜

抱病齒髮非。閱世城市換。朋儕家壘壘。在者亦雲散。窮居嬾出戶。俯仰秋已半。疎鐘到倦枕。微火耿幽幔。平生疑著處。忽若河冰泮。百年寓逆旅。萬事真既灌。紛紛彼方寢。袖手不須喚。羅月忽滿窗。悠然付長歎。

村舍

藤屋楓林下。山中人以篠。置舍厚密過于茅。柴門茨浦旁。先鳴雞。膺膊徐上日。蒼涼服藥貧。寧輟觀書老。

有常仍須教童穉。世世力耕桑。

又

生理嗟彌薄。吾居久未完。蝶飛窗紙碎。龜拆壁泥乾。小雨牛欄濕。微霜碓舍寒。晚禾蟲獨少。鄰里共相寬。
今年晚禾苦蟲虹。子鄉而免。

天涼時往來湖山間有作

萬壑千巖自古傳。青鞋布襪更誰先。泛舟菰脆鱸肥地。把酒橙黃橘綠天。秦冢舊碑荒草棘。禹書遺穴慘風煙。誰知陸子登臨日。已近浮生八十年。

雨夜歎

秋雨何曾住一滴。老夫危坐欲三更。開元貞觀事誰問。溫洛榮河塵未清。豐年猶有餓死慮。破屋自愛讀書聲。刺經作制豈不美。無奈人間痛哭生。

病足晝臥夢中譖諄乃誦尚書也既覺口占絕句

唐虞已遠三千歲。每誦遺書涕泗漣。濟濟允官十二枚。我獨不得居其間。

又

人能不食十二日。趙岐柳開皆曾不食十二日。不死惟書安可一日無。唐虞雖遠典謨在。病臥蓬窗時嚼嚙。

新買啼雞

峨峨赤幘聲甚雄。意氣不與其曹同。我求長鳴久未獲。一見便覺千羣空。主人燒神議已決。知我此意遠見從。秋衣初縫惜不得。急典三百新青銅。憐渠亦復解人意。來宿庭樹不待籠。狐狸熟睨那敢犯。蕭蕭清露和微風。五更引吭震戶牖。橫挺無復須元戎。明星已高啼未已。雲際騰上朝陽紅。老夫抱病氣已索。賴汝豪壯生胸中。明朝春黍得碎粒。第一當册司晨功。

幽棲

幽棲少人客。積病得衰殘。身納分司祿。兒須遠次官。新寒換衣典。閑日借書觀。更歎秋來瘦。晨興覺帽寬。

又

自卜幽棲地。類驚歲月移。鄉鄰崇禮讓。子弟習書詩。喔喔雞鳴樹。狺狺犬吠籬。謀生已過足。富貴亦何爲。

秋日雜詠

都門初出若登仙。弄水穿雲喜欲顛。只恐光陰已無幾。不知又過十三年。

又

五百年前賀季真。再來依舊作閑人。一生看盡佳風月。不負湖山不負身。

又

菰蒲風起暮蕭蕭。煙斂林疎見斷橋。白蟹梨魚初上市。輕舟無數去乘潮。

又

葉底珍禽不受呼。弄風小蝶點殘蕪。舍南舍北秋光好。到處皆成一畫圖。

又
紅莧如丹照眼明。臥開石竹亂縱橫。騷人見處終然別。只說清秋采落英。

又

桐葉吹殘柳亦稀。溪頭倚杖立斜暉。誰知老子無窮喜。待得吾兒小艇歸。

又

久雨初晴喜欲迷。青鞋踏徧舍東西。忽然來到柳橋下。露濕蓼花紅一溪。

又

十里秋風畫角哀。夕陽光景亦佳哉。正疑白鷺歸何晚。一片雪從天際來。

望永阜陵

龍飛回首尚如新。忽閱人間四十春。聖主已嚴天上駕。孤臣歸作道傍民。傾河尚恨難供淚。衛社何由得致身。獨立秋風吹白髮。感恩肝膽漫輪囷。

排悶

悠然不覺歲時遷。楚水楓林繫釣船。貧悴只如行卷日。衰遲忽過挂冠年。閑遊野寺騎驢去。倦擁殘書聽雨眠。賴有一簞差自慰。小兒筆墨日翩翩。

秋日晨起

翻樹鴉知旦。橫空雁戒寒。但欣蘇肺渴。未暇議衣單。粥鼎湯初沸。香篝火半殘。讀書心漸懶。顧影一長歎。

出遊暮歸戲作

終年兀兀復騰騰。眼看朱門幾廢興。造物偶容窮不死。衆人共養老無能。逢山自有閑遊侶。入寺寧無淡話僧。莫道歸來卻岑寂。小兒同守短檠燈。

自詠

荒園風煙入荷鋤。孤村巷陌看騎驢。少年曾縱千場醉。老境惟存一束書。作意買山雖已矣。忍慚乞米獨何歎。所欣肺病秋來減。白髮蕭蕭可自梳。

予出蜀日嘗遣僧則華乞籤於射洪陸使君祠使君以老杜詩爲籤予得遣興詩五首中第二首其言教戒甚至退休暇日因用韻賦五首

我幼入家塾。結髮知苦心。稍長謬聞道。篤守至於今。淡然朱絲絃。三歎有遺音。詎敢負所學。枉尺求直尋。彼哉孔光輩。千載污儒林。

又

童子丹元家。湛然居靈府。世人不少悟。役役徒自苦。江湖豈不廣。魚乃投數罟。是身如璞玉。要經大火聚。萬卷讀丹經。孰能精去取。

又

少壯不自料。慷慨志四方。謝病還故山。始覺白日長。命薄類蟬翼。功名安可望。狐狸不足問。力不當豺狼。惟有臥釣船。仰看白鷺行。

又
孤雲起江郊。萬木酣天風。水鳥何所恨。終夜號菰葦。我與視中庭。北斗挂寒空。誰言秋夜長。明星已生東。
丈夫老憂國。百慮蟠胸中。

又

我昔遊青城。萬仞窮躋攀。巢居上官翁。許我分半山。且言牡丹平。可卜茅三間。報國未能忘。承詔遂東還。
踰躓意何成。看雲徒汗顏。

悲歌行

有口但可讀離騷。有手但可持蟹螯。人生墮地各有命。窮達禍福隨所遭。嗟予一世蹈勝數。洵如八月秋。
江濤。尊拳纒奮肋已碎。曹射箭盡弓未弣。形骸骨悴吹可倒。摧拉未足稱雄豪。一身百憂偶得活。殘年幸。
許歸蓬蒿。時時照水輒自笑。霜顛雪領不可薙。脫身仕路棄衫笏。如病辭疥逢爬搔。見事苦遲已莫悔。豈。
戒尙可貽兒曹。勉騎款段乘下澤。州縣豈必真徒勞。

秋夜讀書

門前客三千。帳下兵十萬。人生可意事。隨手風雨散。不如一編書。相伴過昏旦。豈惟洗貧病。亦足捍患難。
老夫垂八十。巖籠尙爛爛。孤燈對細字。堅坐常夜半。吾兒幸能繼。書亦未殘斷。安知不遭時。清廟薦玉瓊。
不然老空山。亦足化里閭。我死斯言存。觀者有追歎。

對食戲詠

一飽欣逢歲小穰。時憑野餉誑枯腸。橙黃出白金齋美。菰脆供盤玉片香。客送輪囷霜後蟹。僧分磊落社前薑。秋來幸是身強健。聊爲佳時舉一觴。

懷昔

偶住人間日月長。細思方覺少年狂。衆中論事歸多悔。醉後題詩醒已忘。蠶作鯨吞吁莫測。谷墮山墜浩難量。老來境界全非昨。臥看繁簾一縷香。

偶得雙鯽

今朝溪女留鮮鯽。灑掃茅簷旋置樽。養老不須煩祝鮠。從來楚俗慣魚殮。

又

酒興森然不可回。重陽未到菊先開。一雙鱗刺明吾眼。催喚廚人斫鱸來。

秋懷十首以竹藥閉深院琴樽開小軒爲韻

我非王子猷。賦性亦愛竹。舍外地十畝。不藝凡草木。長吟雜清嘯。觸目皆此族。更招竹林人。枕藉糟與麴。

又

短裘入重雲。長鏡求靈藥。人獲四體具。枸杞羣吠惡。采實去條枚。摘花棄跗萼。長嘯忽躡空。天台赴幽約。

又

惟王居法宮。玉帛來四裔。一朝啓戎心。邊城或晝閉。養生能體此。皆可閱千歲。利欲喜乘人。日夜勤自勵。

又

飲酒可不病。自酌隨淺深。處世可無患。惟勿欺此心。此心實通天。一念天所臨。子能守吾言。可度豺虎林。

又

吾道久寂寞。不絕如一線。至人隱市塵。我輩何由見。安得世外士。與之共談醞。僧話亦或佳。聊可過竹院。

又

小人方盛時。瓦礫視黃金。及其大勢去。或不遺一簪。郿塢今尚存。遺戒豈不深。所以栗里翁。惟蓄一素琴。

又

世事本何常。賀弔更在門。棄爲溝中斷。亦何羨轎樽。禍福要其終。愚智始可言。君看驪山墓。何若楊王孫。

又

今日天微寒。處處菊花開。永懷杜拾遺。抱病起登臺。古路逢僧過。溼雲聞雁來。我亦秋風客。詩成有餘哀。

又

天鏡環千峯。蒼翠立雲表。漁舟破浪來。泛泛一葉小。雲門若耶間。迨此素秋杪。登覽不可遲。去若孤鴻矯。

又

丈夫素所學。致主齊義軒。恨無同志人。徒欲起九原。痛哭驚世俗。著書成空言。歲月去袞袞。吾其死空村。

示客

枳縛藩籬刺作門。蕭條何以致諸君。歸休正得求吾志。老病猶能誦所聞。紫蟹迎霜徑盈尺。白魚脫水重兼斤。一杯漱澀無辭醉。秋稼登場合策勛。

秋晚村舍雜詠

村巷醫桑麻。蕭然野老家。園丁種冬菜。鄰女賣秋茶。啄木矜奇服。牽牛蔓碧花。一樽雖草草。笑語且喧譁。

又

秋晚年中熟。湖鄉未寂寥。步頭橫畫舫。柳外出朱橋。潮壯知多蟹。霜遲不損麩。家家新釀美。鄰里遞相邀。

臥病累日羸甚偶復小健戲作

病忽追旬日。衰如增十年。難求秦緩藥。空負宋清錢。微火秋先跨。閑房晝亦眠。偶除書鬼錄。遇酒又陶然。

又

伏枕瀕九死。下牀如再生。幸回蒿里駕。猶作越吟聲。拂几嗟塵積。開書覺眼明。淖糜方自養。未敢憶南烹。

又

行年當大耋。臥病涉高秋。丸藥作奇驗。傲裝仍小留。輕漚元泛泛。破屋已飗飗。尙有江湖興。沙頭問釣舟。

卷第四十八

縱筆

莫笑畸翁迫耄期。從來不許俗人知。繫船慣聽巴東雨。畫策曾從渭北師。袖劍客同樓上醉。爛柯人看洞中棋。如今更欲滄溟去。鯨浪浮天信所之。

又

常笑相如賦上林。肯爲子政鑄黃金。心光自發誰能障。踵息無聲不厭深。搖齒復牢堪決肉。枯顛再茁已勝簪。老松澗底雖終棄。霜雪元知不解侵。

又

拖得烏藤到處行。看山看水眼猶明。但期少健遊潼華。豈必長生似老彭。一編青桂吾事了。半甌綠酒萬緣輕。安知不作希夷叟。生長兵間老太平。予生于宣和末。過陝。問關東歸。又避地數年。

又

未說無功爵位叨。昔人所畏在功高。印如斗大寧常保。劍拄頤長祇自勞。酒社極知身可隱。獵場猶得氣差豪。世間見透渾無事。狐貉安能詫縵袍。

村興

折花持博酒。種菜賣供家。請藥人何壅。爭棋客正譁。漁翁足蹠蹕。牧豎手丫叉。短景匆匆晚。橫林又宿鴉。

賽神

歲熟鄉鄰樂。辰良祭賽多。荒園拋鬼飯。高杙置神鵝。村人謂祭神之牲曰神猪。神鵝。人散叢祠寂。巫歸醉臉酡。飢鴉更堪笑。鳴噪下庭柯。

小立

紅樹園廬晚。碧花籬落秋。荒陂船護鴨。斷岸笛呼牛。酒賤村村醉。山寒寺寺幽。聊須岸鳥幘。小立隸西頭。

窮老

窮老寧須歎。吾生得已多。風埃棄朝幘。煙雨弄漁蓑。富屋烏爰止。閑門爵可羅。人生只此是。得酒且高歌。

晚步舍東

籬槿花開柿葉丹。土溝東去過牛欄。草煙漠漠天將暮。布褐蕭蕭客正寒。

述野人語

白米乾薪好井泉。甘餐美睡若登仙。從來不慣嘗鹽酪。席下何須有一錢。

又

重重大布敵風霜。籬外桑陰五月涼。軟飯一盂千萬足。那知世有郭汾陽。

戲答野人

日飲雲根一脈泉。知君骨相自應仙。曲肱閑臥茅簷下。買斷南山不用錢。

又

木葉凋疎天欲霜。老懷多感易淒涼。得君數語開人意。徑就湖橋醉夕陽。湖橋有村店酒甚美。

建安陳希周官海南爲予致兩拄杖其一促節竹其一桄榔也

兩漬嵐侵薜蘿重。石砮楛天正相同。取從萬里鯨波路。來伴三山鶴髮翁。雪一作雲。上有時留醉草。花前隨處打殘紅。化龍徑去吾何憾。且與人間作歲豐。

排悶

棄官謂逍遙。勞苦殊未既。荒疇須墾闢。破屋欠塗墍。疾深藥難求。食盡穀暴貴。安能作經營。但覺睡有味。

秋高霜露逼。更苦薪炭費。雖云未遽死。飢凍亦可畏。頗思從李廣。小獵聊吐氣。復恐瀟亭歸。邂逅逢醉尉。

九月十二日折菊

黃菊芬芳絕世奇。重陽錯把配萸枝。開遲愈見凌霜操。堪笑兒童道過時。

表姪江炯種竹名筠坡來求詩

奉常遺緒冷如秋。閉戶知君頗好修。千里可嗟妨晤語。兩書猶喜免沉浮。但令有竹能醫俗。何患無天可寄愁。一事卻須常自勉。勿容凡子得同遊。

微雨

晡後氣殊濁。黃昏月尚明。忽吹微雨過。便覺小寒生。樹杪雀初定。草根蟲已鳴。呼童取半臂。吾欲傍堦行。

秋晚寓歎

荷葉枯已盡。菊花殘更香。帶醒嘗野橘。和夢聽啼螿。髮畔流年速。燈前舊話長。寒龜且未死。不必恨搗牀。

又

野處仍多病。經年無與遊。僧庸幾市井。醫傲過公侯。不睡愁逢夜。無衣怯到秋。一端聊自慰。問事有長頭。

又

幽夢難呼覺。孤愁雨滴成。天高那可問。年往若爲情。孱廢猶遺育。神州未削平。登高西北望。衰涕對誰傾。

又

老歎交朋盡。時知日月長。著書終覆瓿。得句漫投囊。霜樹昏鴉黑。風簾小蝶黃。村醪如水薄。也復答年光。

又

十里丹楓岸。三家小麥村。山多妨極目。秋晚易消魂。火舉船過埭。人行犬吠門。窮愁已如許。那更雨昏昏。

又

行年垂大耋。久矣少朋儔。舊事同誰說。新詩或自酬。廢書眠過日。泥酒醉經秋。遲速皆當死。時來莫預愁。

秋晚湖上

已過西成賽廟期。家家下麥不容遲。夕陽遍野人歸後。秋水生灘鷺集時。靈藥不治懷抱惡。好詩空益鬢毛衰。從來未識蘇司業。愁絕西風滿酒旗。

縱遊歸泊湖橋有作

西蜀東吳到處遊。千巖萬壑獨吾州。短篷載月娥江夜。小蹇尋詩禹寺秋。村酒可賒常痛飲。野人有興即相求。何由喚得王摩詰。爲畫湖橋一片愁。

九月十八日至山園是日頗有春意

烏藤真好友。伴我出荆扉。落葉紛如積。鳴禽暖不歸。露濃松鬣長。土潤朮苗肥。未盡幽尋興。還家趁夕暉。

明日又來天微陰再賦

烏臼赤於楓。園林九月中。天寒山慘淡。雲薄日曛曛。旋摘分猿果。寬褰養鶴籠。身閑足幽事。歸臥莫匆匆。

又

河岸風檣遠。村陂牧笛長。短籬圍鹿眼。幽徑繚羊腸。照水鬚眉見。搓橙指爪香。衣裘又關念。礎杵滿斜陽。

雨後至近村

夜雨曉方止，朝雲猶作陰。山餘一寸碧，溪長半篙深。臥泛白鷗渚，行穿黃葉林。老農能共語，真率會人心。

又

年耄身猶健，秋高疾已平。鄰翁思問訊，蔬圃要巡行。竹杖輕無迹，芒鞋捷有聲。相逢無別語，努力事冬耕。

雨復作自近村歸

夜聽蕭蕭未漲溪，朝行澆澆已成泥。可憐鳩取招麾速，誰似雲知出處齊。野菊枝長半狼藉，江楓葉落正淒迷。行人也識龜堂老，小榼村醪手自攜。

兩寒戲作

掃園收榭葉，搭地甃磚爐。幸有藜烹粥，何慚紙作襦。

衡門晚眺

幽居端似玉川生，茅屋支撐不更營。青旆荒寒增酒興，錦囊零落負詩情。殘蕪色襯斜陽遠，落葉飛如野鳥輕。徂歲崢嶸忽如許，雁來又過會稽城。

不寐

麗譙聽盡短長更，幽夢無端故不成。寒雨似從心上滴，孤燈偏向枕邊明。讀書有味身忘老，報國無期涕每傾。敢爲衰殘便虛死，誓先鄰曲事春耕。

示子虞

好學承家夙所奇。蠶編殘簡共娛嬉。一婚倘畢吾無累。吾今年爲一子自蜀歸者。聘媿無復。媿嫁之責。三
釜雖微汝有期。子真明秋當赴旬金。事弟元知是難弟。德兒稍長豈常兒。要令舟過三山者。弦誦常聞夜
艾時。

弊廬

弊廬雖陋甚。鄙性頗所宜。歌傾十許間。草覆實半之。碓聲隔柴門。續火出枳籬。縛木爲甌牢。附垣作雞埒。
黃犢放林莽。蒼鵝戲陂池。傭耕食於我。客主同爨炊。瓦盎設大杓。蕘萑羹園葵。一飽荷鋤出。作勞非所辭。
上以奉租賦。下以及我私。有錢卽沽酒。阡陌恣遊嬉。亦有扶持者。婢跣奴髻椎。欲畫恨無人。後世考此詩。
予未冠卽交諸名勝。今無復在者。感歎有作。

早歲鄉閭接勝流。老來零落歎山丘。欲尋共語人難得。卻是封侯印易求。數酌不能成兀兀。一桴且復寄
悠悠。世間只有身差重。惆悵今年白盡頭。

夜雨

吾詩滿篋筒。最多夜雨篇。四時雨皆佳。莫若初寒天。紙帳白於氈。紙被輭於綿。枕傍小銅匱。海沉起微煙。
是時聞夜雨。如絲竹管弦。恨我未免俗。吟諷勸雕鐫。南朝空塔語。妙出建安前。意謂奮造化。百世莫比肩。
安知梧桐句。乃復與並傳。夜雨何時無。奇語付後賢。

題嚴州王秀才山水枕屏

我行天下路幾何。三巴小益山最多。翠崖青嶂高嵯峨。紅棧如帶繫巖阿。下有駭浪千盤渦。一跌性命委

蛟龍日馳三百一烏騾。雪壓披氈泥滿鞵。驛亭沃酒醉臉酡。長笛腰鼓雜巴歌。大散關上方橫戈。豈料世
變如翻波。東歸輕舟下江沱。回首歲月悲蹉跎。壯君落筆寫岷嶓。意匠自到非身過。偉哉千仞天相摩。谷
裏人家藏綠羅。使我恍然越關河。熟視粉墨頻摩挲。

小飲示座中

鏡裏蕭蕭兩鬢衰。閑人正與老相宜。誰知翦燭焚香夜。恰是撻橙破橘時。莫道閉門無逸氣。尙能爲客誦
新詩。君看江海寬多少。是處皆堪理釣絲。

搖落吟

素秋欲盡風雨惡。千林如掃俱搖落。年運而往秋復冬。念念元知已非昨。癡人顧欲吝此生。放翁憫汝笑
絕纓。髮毛爪齒俱外物。天地大化終無情。我貧無以遺兒子。惟有一言持付爾。仕宦要能當百挫。爲農飢
死無遊惰。

插花

有花君不插。有酒君不持。時過花枝空。人老酒戶衰。今年病止酒。虛負菊花時。早梅行可探。家醞綠滿卮。
君不強一醉。歲月復推移。新詩亦當賦。勿計字傾欹。

雨過行視舍北菜圃因望北村久之

蔬畦躡履愜幽情。檢校園丁日有程。得雨尙慳須灌溉。我來時聽桔槔聲。

又

吳牛鬻草臥斜陽。烏臼青紅未飽霜。急趁路乾來寓目。十分閑事卻成忙。

居三山時方四十餘。今三十六年久已謝事。而連歲小稔。喜甚有作。

自問湖邊舍。衰殘俛仰中。謀身悲日拙。造物假年豐。稅足催科靜。禾登債負空。社醅邀里巷。臘肉飲兒童。衣及霜晨賸。爐先雪夜紅。陂塘趨版築。垣屋訖宮功。盜息時雍象。人淳太古風。退夫無一事。鼓缶伴鄰翁。

幽居

百事徒勞無一成。幽居偶得稱幽情。傍籬叢枳寒猶綠。遠舍流泉夜有聲。飢坐炮燂多巨粟。醉歸懷袖有新橙。愛閑自是從來癖。敢竊區區納祿名。予自俄曹罷歸十年不出戶。乃請挂冠。

曉晴肩輿至湖上

多稼如雲穫併空。牛欄樵擔畫圖中。梧桐已逐晨霜盡。烏臼猶爭夕照紅。脫網唼鳴奔遠浦。避鷹撲握保深叢。旗亭人語燈初上一醉。何妨野老同。

戲作野興

省事貧猶富。寬懷客勝家。充虛一簞飯。遣睡半甌茶。有興閑垂釣。逢歡醉插花。皋橋亦可死。處處是生涯。

又

擾擾亭中客。悠悠局上棋。所遭元有命。自苦竟何爲。馮衍深尤婦。陶潛過責兒。奇文雖可貴。瀆語豈非癡。

又

久已挂吾冠。江邊歲又殘。心惟無媿怍。身取不飢寒。小酌三杯足。安居一席寬。東岡有泉脈。攜杖試尋看。

又

今年病微減，耕稼樂江村。燈火耿破屋，歌呼圍老盆。常時但葵菹，盛饌有雞豚。客散茅簷寂，蹒跚自閉門。

又

出月語鄰叟，與卿同一愚。逢人卽如舊，臨事不勝迂。髮白花猶插，囊空酒亦沽。同漁五十載，何處有榮枯。

又

有酒皆堪醉，無山不可廬。遂初成近賦，孤憤悔前書。湘寺分經鉢，廬山寄藥鉏。江頭霜葉滿，詩興屬騎驢。

道室書事

榻上一琴橫，中函太古聲。丹砂燒已死，芝草種初生。道勝魔軍破，方靈疾豎平。明朝有蜀使，細字報青城。

行飯至潮桑堰東小市

飽食無營是處遊，偶然來到棗東頭。芒鞋也似雙鳧快，漁艇真如一葉浮。樵擔行歌衝暝色，酒旗遮路賣

新筍。任朱二老今安在，歎息黃茅擁故丘。任朱皆居堰旁，與予同乙巳生，今死矣。

負日戲作

困來兩臂似膠黏，底怪吳人號黑甜。安得他生不識字，朝朝就日臥茅簷。世傳楊大年見老兵，夏日不覺

曰快活，因問汝識字否，對曰不識。大年曰：如此更快活也。

遊西村

昨夜雨多溪水渾，不妨喚渡到西村。出遊始覺此身健，無食更知吾道尊。藥笈可賒山店酒，筇枝時打野

僧門歸來燈火茅簷夜。且復狂歌鼓盎盆。

初冬

平生詩句傾梳光。絕愛初冬萬瓦霜。楓葉欲殘看愈好。梅花未動意先香。暮年自適何妨退。短景無營亦自長。況有小兒同此趣。一窗相對弄朱黃。

遣懷

寬袂新裁大布裘。低篷初買小漁舟。舊交只有青山在。壯志皆因白髮休。漫道臥龍吞貉子。安能浙米向矛頭。山園芋栗秋方熟。一飽今知本易謀。

策杖

山翁老病入腰膺。坐覺諸兒行步奔。暫出衡門須策杖。千回上樹更堪論。

汲東山下井

從來耽酒須微祿。絕祿三年酒盞疎。百尺轆轤新浚井。一杯聊慰渴相如。

園中作

誰采桄榔寄一枝。北來萬里爲扶衰。風光最愛初寒候。懷抱殊勝未老時。閑引微泉成曲澗。盡除枯蠹補疎籬。花前自笑童心在。更伴羣兒竹馬嬉。

又

病侵衰境頻須藥。日漏寒雲旋作晴。幽鳥喚回殘枕夢。蠻童扶下野堂行。書生本自安窮處。豐歲何妨樂

太平新買西村兩黃犢。閑招鄰曲議春耕。

園中

霜凋檉柳枝無葉。風坼安榴子滿房。多日園林元自好。老人懷抱自多傷。

短篷

射的山前繫短篷。快如魚鳥出池籠。試臨清鏡枯顏面。不待丹砂兩頰紅。逐妄百年真自苦。造微一日有餘功。不須更說岷峨約。已覺蓬壺在眼中。

自適

遠遊思里巷。久困念耕桑。家釀傾醇碧。園蔬摘矮黃。小槽用黍豆。麴饌黃吳中。菜名。利名因醉遠。日月爲閑長。今歲雖中熟。吾徒亦小康。

堂東小室深丈袤半之戲作

小室舍東偏。滿窗朝日妍。研池生細浪。香岫起微煙。欲極圖書樂。少須冰雪天。猶勝禪榻上。僅僅占三椽。
禪僧自謂三椽椽下。六尺單前。

獨處二首

蓬門終日閉。寂寂少人聲。納祿知身貴。傳家覺責輕。朝餐烹芋糲。夜坐爇松明。刻卻彈棋局。此心如砥平。白甍敷牀穩。烏藤倚壁斜。灰深惟畫字。燈暗不成花。似客猶居里。如僧未出家。孤村夜無月。何事有啼鴉。

探梅至東村

乞得殘骸已累年，柴車破弊不堪懸。閑愁正要供詩思，小疾何妨省酒錢。忍事漸多心混混，貯書雖少腹便便。今朝偶有尋梅興，春色爭來拄杖前。

讀史

青燈耿耿夜沉沉，掩卷凄然感獨深。恤緯不遑罄婦歎，美芹欲獻野人心。孤忠要有天知我，萬事當思後視今。君看宣王何似主，一篇庭燎未忘箴。

漁翁

船入蘆花日暮時，雙瞳炯炯鬢如絲。世間豈少礮溪叟，老向煙波人不知。

又

文叔君房兩故人，可憐俱作白頭新。桐江歸伴鄰翁醉，一笑相看意卻真。

寓言

濟劇人才易，扶顛力量難。爲謀須遠大，守節要堅完。氣與秋天杳，胸吞夢澤寬。方知至危地，自有泰山安。

又

出仕謝招慶，還家美蔽薇。深居全素志，大路息危機。世變生呼吸，人情忽細微。牀頭周易在，捨此欲安歸。

又

山海三家市，風煙五畝園。藜羹均玉食，茅屋陋朱門。耕釣此身老，乾坤吾道尊。故交淪落盡，至理與誰論。

夜四鼓睡覺起行簷間觀新作南籬

陸放翁集 卷四十八

二十九

星斗闌干天宇清。起披短褐繞廊行。葉聲颯颯飛霜重。籬影疎疎落月明。沙冷斷鴻投別浦。風高殘漏下孤城。衰遲自笑情猶在。一首新詩取次成。

客去追記坐間所言

征西幘罷幾經春。歎息兒音尙帶秦。每爲後生談舊事。始知老子是陳人。建隆乾德開王業。溫洛榮河厭虜塵。倘得此生重少壯。臨危敢愛不貲身。

疇昔

行路悲疇昔。驅車每戴星。數殘雙隻屐。歷盡短長亭。飛蓋交迎餞。聽歌半醉醒。至今湖海夜。猶夢隴山青。

飲牛歌

門外一溪清見底。老翁牽牛飲溪水。溪清喜不污牛腹。豈畏踐霜寒墮趾。舍東土瘦多瓦礫。父子勤勞藝黍稷。勿言牛老行苦遲。我今八十耕猶力。牛能生犢我有孫。世世相從老故園。人生得飽萬事足。捨牛相齊何足言。

牧羊歌

牧羊忌太早。太早羊輒傷。一羊病尙可。舉羣無全羊。日高露晞原草綠。羊散如雲滿川谷。小童但搯竹一杖。豈必習詩知考牧。

生日子聿作五字詩十首爲壽追懷先親泫然有作十月十七日。

我生尙及宣和末。頽曆頻驚歲月移。負米養親無復日。蓼莪廢講豈勝悲。渡江百口今誰在。抱恨終身祇

自知文字虛名何足道。樽前媿汝十章詩。

園中書觸目

氣候今年晚。濃霜始此回。殘梧未全槁。晚菊有初開。烏柏先楓赤。寒鴉後雁來。西窗夕陽暖。摘橘薦新醅。烏柏未霜而葉丹。寒鴉必得霜乃至。

養生

武丁命傅說。治國如和羹。天亦命放翁。用此以養生。抑過補不足。輔相其適平。千歲汝自有。不必師廣成。

齋中雜興

八十頽齡安所歸。蕭然終日掩柴扉。清心始信幽棲樂。窮理方知俗學非。山果滿筐猿食足。石泉通篔簹。苗肥衰翁莫道渾無事。掃葉歸來又落暉。

又

倒掩衡門手自關。老身著在亂書間。有詩尙作清宵祟。無事能妨白日閑。薄暮上樓聊試步。經旬止酒自醜顏。兒曹莫笑衰翁嬾。擬遍淮南大小山。

江上

禹會橋頭江渺然。隔江村店起孤煙。冷雲垂野雪方作。斷雁叫羣人未眠。萬里漂流歸故國。一生蹭蹬付蒼天。暮年尙欲師周孔。未遽長齋繡佛前。

追憶征西幙中舊事

大散關頭北望秦。自期談笑掃胡塵。收身死向農桑社。何止明明兩世人。

又

小獵南山雪未消。繡旗斜卷玉驄驕。不如意事常千萬。空想先鋒宿渭橋。

又

憶昨王師戍隴回。遺民日夜望行臺。不論夾道壺漿滿。洛筍河魴次第來。在南鄭時。關中將吏有獻此二物者。

又

關輔遺民意可傷。蠟封三寸絹書黃。亦知剪法如秦騎。列聖恩深不忍忘。關中將校密報事宜。皆以蠟書至宣司。

冬夜

鷓鴣黃葉欲辭枝。況著霜風抵死吹。投老難逢身健日。讀書偏愛夜長時。孤村月白聞衣杵。破竈煙青煮芋糜。不是用心希陋巷。爲儒自合耐寒飢。

冬日

室中恰受一蒲團。也抵三千世界寬。上策莫如扃戶坐。苦閑猶復取書看。蔬青飯輒枝梧老。窗白爐新準備寒。堪笑此翁幽獨慣。卻嫌兒女話團圓。

冬朝

風入園林徹夜鳴。曉看黃葉與堦平。篝爐火著衣初暖。爨釜薪乾粥已成。潔己工夫先鹽齋。正心事業始冠纓。聖賢雖遠詩書在。殊勝鄰翁擊磬聲。釋氏謂銅鉢爲磬。

冬暮

曉角昏鐘爲底忙。豈容老子更禁當。乘除富貴惟身健。補貼光陰有夜長。臨水小軒初見月。滿庭殘葉不禁霜。巴江尺素何時到。剩著新詩寄斷腸。張梓州書久不至。

風月

鏡中日日鬢毛衰。八十還思七十時。風月不知人意緒。酒醒夢斷又催詩。

落葉

萬瓦清霜伴月明。臥聽殘漏若爲情。無端木葉蕭蕭下。更與愁人作雨聲。

邪風

少學詩三百。邪風最力行。春前耕犢健。節近祭猪鳴。簷日桑榆暖。園蔬風露清。金丹不須問。持此畢吾生。

擁爐不出輒終日自嘲

柴門木落葉成堆。十日元無一再開。書坐歲多爲飽祟。詩緣吟苦作窮媒。兒言山圃當收栗。僧約溪橋共探梅。堪笑此翁推不動。地爐無火畫寒灰。

嘲梅未開

梅蕊如紅稻。中藏無盡香。何時來鼻境。更待幾番霜。

卷第四十九

自嘲

僻學論交少，貧居卜地偏。不逢方謝事，垂老旋希仙。兀兀醒如醉，昏昏晝亦眠。卻慚農與圃，一飽饒餘年。

解嘲

一壑棲遲久，多生習氣消。行藏無媿怍，夢覺兩逍遙。情鶴傳山信，疏泉洗藥苗。晚來幽興極，乘月過溪橋。

野興

晨炊畬粟薦園蔬，默計生涯已。有餘舉世方誇稽，古力滿懷空貯活人書。悶呼赤腳行沽酒，出遣蒼頭旋傲曠。不爲歸休習疎懶，愛閑元與市朝疎。

枕上

送盡小窗月，數殘孤戍更。清詩時自至，幽夢久方成。衣杵斷還續，燈花落復生。細衾騰得暖，紙帳不知明。

遠遊

老子平生喜遠遊，流塵不惜關貂裘。江亭吹笛三巴夜，關路騎驢二華秋。但使澄心同止水，自知幻境等浮漚。悠然飽聽松風睡，勾漏丹砂底用求。

晚遊

垣屋參差出，溝谿曲折通。亂鶉空際黑，落日竹間紅。軋軋與竿語，搖搖撼腳風。吾行本無定，隨意入空濛。

夜坐

落落知聞絕，歸休寵辱空。酒狂寧限老，詩思正須窮。活火生新焰，殘燈委碎紅。平生會心處，正在兀然中。

酒熟醉中作短歌

陸子壯已窮，百計不救口。蜀道如上天，十年厭奔走。還鄉困猶昨，負郭無百畝。雖云飢欲死，亦未喪所守。虛名一畫餅，陳迹幾芻狗。但思從壯士，大獵雲夢藪。長戈白如霜，爛漫載牛酒。箭穿乳虎立，車轆蒼兕吼。歸來數禽獲，毛血灑戶牖。人生貴適意，富貴安可苟。

冬夜讀書有感

落葉殘蕪又一冬，老人光景易匆匆。不論病惰耕桑業，但恨貧分學問功。馬昔騰騰離冀北，鶴今憔悴返遼東。六經未與秦灰冷，尚付餘年斷簡中。

散步湖上至野人家

湖上霜高水落時，一藤信步出尋詩。妄誇強健真堪笑，喚作清閑亦自欺。西埭又隨牛迹去，東村常望鶴巢知。漁翁留客頻辭謝，雞瘦難烹酒味漓。

對食戲詠

瘦棹傾桑落，毫杯點雨前。冰梨頰似頰，霜栗大如拳。洗瀼烹蔬甲，搗鉏斲筍鞭。餘年只此是，切勿念腥羶。

昨非

溫飽從來與道違，書生只合臥牛衣。老狐五百生前錯，孤鶴三千歲後歸。舌自生肥勝玉食，腰常忘帶況

金園一官彭澤曾何有元亮還家悔昨非

遂初

貧士善用短屏居常自如出尋鄰叟語歸讀古人書過店亦沽酒登山時跨驢非關傲塵世聊欲逐吾初

雲生海澨初飛雨日滂山椒旋作晴箬笠芒鞋橋下路兒童爭逐放翁行

書喜

堪笑龜堂老更頑天教白髮看青山家居禹廟蘭亭路詩在林逋魏野間略計未嘗三日醒細推猶得半生閑今年況展南湖面朝借樵風暮可還時方有朝命復鏡湖

書房雜書

斂版一何久懸車已後時狂醒醒始悔窮獨老方知世外乾坤大林間日月遲猶須采藥去不媿鹿門期

又

面槁髮鬢衰殘百不能夜房侵戶月晨硯滿池冰藥債多於酒蔬餐薄過僧年深拄杖折自斫澗邊藤

寒夕

夜扣銅壺徹旦吟了無人會此時心燈殘焰作孤螢小火冷灰如積雪深風急江天無過雁月明庭戶有疎碁此身畢竟歸何許但憶藏舟黃葦林

讀經

半升粟飯養殘軀。晨起衣冠讀典謨。莫謂此生無用處。一身自是一唐虞。

讀史

民間斗米兩三錢。萬里耕桑罷戍邊。常使屏風寫無逸。應無烽火照甘泉。

讀劉蕡策

志士仁人。一作人人。氣薄雲。唐家惟有一劉蕡。看渠放逐蛇龍手。那肯驅蠅與拍蚊。

雨霰作雪不成。大風散雲。月色皎然。

數間茅屋寄蓬蒿。天遣來歸息我勞。月可一庭陳素練。風酣萬木起驚濤。病侵齒髮才雖盡。酒挾江山氣尚豪。安得人間掣鯨手。共提筆陣法莊騷。韓文公以騷配莊。古人論文所未嘗及也。

中夜苦寒

困窮全素節。羸老愈剛腸。報國永無日。飯蔬那自傷。布衾如鐵冷。冬夜抵年長。推枕歌梁甫。中庭月似霜。

示子孫

爲貧出仕退爲農。二百年來世世同。富貴苟求終近禍。汝曹切勿墜家風。

又

吾家世守農桑業。一挂朝衣卽力耕。汝但從師勤學問。不須念我叱牛聲。

早梅

東塢梅初動。香來託意深。明知在籬外。行到卻難尋。

陸放翁集 卷四十九

縱筆

晨炊躬稼米。夜讀世藏書。俯仰無多慚。心知死有餘。

又

破困供飯足。陋屋著身寬。小蹇勤芻秣。時時一跨鞍。

歲暮雜感

衰髮如枯菅。殘齒如敗屐。取米鬻薄糜。便足度晨夕。欲知死遠近。不必訊龜筮。四序忽已過。如數候雙雙。發裝陌上亭。具食水邊驛。會當一日歸。豈有終作客。

又

天風吹雪片。大者如飛鷗。豈惟平溝坑。直恐墮馬牛。百錢買薪蒸。千錢贖褐裘。雖無狐貉溫。要免溝壑憂。小兒爲我言。幸可具杯甌。園蔬亦復佳。過足翁豈求。

又

歲盡霜雪稠。相望僵萬木。天豈私梅花。獨畀此芬馥。高標我自。有何憾。老空谷。人言和羹實。晚或參鼎餼。哀哉世論卑。汗我塵外躅。誰能滿被之。寫真配修竹。

又

我少雖嗜書。賦性實慵惰。初志略未酬。白髮已無那。吾兒猶好勇。世事如棄唾。呻吟編簡中。徹旦或未臥。爾來愈自勵。日讀易一過。勉終大學功。吾道要負荷。

自責

晨起登堂正幅巾。蕭然聊欲養吾神。凡心未免更詩字。習氣猶思議古人。買屐爲登山寺去。徹燈緣愛月窗新。何時一切消除盡。終作無懷上古民。

懷舊用昔人蜀道詩韻

曩自白帝城。一馬獨入蜀。晝行多水涓。夜宿必山麓。時聞木客嘯。常愛射工毒。蜿蜒蛇兩頭。蹠蹠襲一足。豈惟耳目駭。直恐性命促。稍歷葭萌西。遂出劍閣北。奴僮不敢訴。馬病猶盡力。我亦困人客。一日帶屨束。最憶蒼溪縣。送客一亭綠。豆枯狐兔肥。霜早柿栗熟。酒酸壓查梨。妓野立土木。主別意益勤。我去疲已極。行行求旅店。借問久乃得。溪聲答歌長。燈焰照影獨。村深寒更甚。薪盡燒簣竹。須臾風雨至。終夕苦漏屋。於時厭道途。自誓棄微祿。猶幾三十年。始謝祝史職。予四竊祠祿。乃謝事。君思念篤老。內閣使寓直。亦思秋豪報。力億藝黍稷。卻尋少時書。開卷有慚色。

出遊

僧院軒窗酒市樓。過門自入不須留。恰來竹下尋棋局。又向沙邊上釣舟。詩放不能諧律呂。書狂猶足走蛟虬。秦碑禹窆風煙外。一弔興亡萬古愁。

辛酉冬至

今日日南至。吾門方寂然。家貧輕過節。身老怯增年。鄉俗謂喫冬至飯卽添一歲。畢祭皆扶拜。分盤獨早眠。惟應探春夢。已繞鏡湖邊。

冬至後一日書

霜霰新冬後。年齡大耋時。功名久無夢。文字略存詩。丘壑歸何憾。琴書付有兒。癡人癡到底。更欲數期頤。

客至

何處軒車客。能來桑麥村。一奴先入市。此老自應門。野果嘗皆澀。村醪壓尚渾。殘年亦何恨。治世作黎元。

子聿入城

小硯寒生凍。孤燈翳復明。衰翁守微火。稚子隔重城。日落林無影。舟行水有聲。詩家忌草草。得句未須成。

降魔

老閱人間久。曾降百萬魔。悲憂誠害性。喜悅亦傷和。省事常須勉。忘懷得最多。當年未知此。無奈月明何。

冬日

故里躬耕後。頽齡耄及前。開門無客至。得句有僧傳。忽忽身如夢。迢迢日似年。會當乘小雪。夜上剡溪船。

又

客至惟清坐。真貧不是慳。援琴排遣悶。合藥破除閑。引鶴時穿屐。逢梅一破顏。怪來寒徹骨。夜雪冒南山。

客去

相對蒲團睡味長。主人與客兩相忘。須臾客去主人覺。一半西窗無夕陽。

自勉

妄出真成錯。歸耕惜已遲。褐溫貧始覺。飯美淡方知。身外元無易。情中自有詩。窮源那得止。瞑目以爲期。

又

自信直如弦。殘年偶得全。老猶強佞佛。貧亦諱言錢。旦暮勤鞭策。塵埃痛洗滌。仍須語兒子。此事要家傳。

又

臂弱傳鈔少。心煩記問衰。讀書猶自力。愛日似兒時。章句分無憾。聲形講不遺。明年幸強健。閉戶有餘師。

又

歸老寧常逸。時時學荷鋤。室雖無長物。圃尚有餘蔬。壯志誠衰矣。貧居亦晏如。爲農當世業。安用築門閭。

午晴至園中

老不禁寒起每遲。出門蕭散午晴時。春回九地梅先覺。霜實千林竹不知。藥圃采苗芒屨溼。石泉照影角巾欹。歸來未過西齋日。袖手悠然獨詠詩。

七姪歲暮同諸孫來過偶得長句

雨墊林宗一角巾。蕭條村路並煙津。四朝遇主終身困。八世爲儒舉族貧。行摘殘蔬循廢圃。臥聞飢雀噪空園。封胡羯末皆佳甚。剩喜團欒一笑新。

苦寒

終日頻添季子裘。經旬不上仲宣樓。摩挲酒榼雖堪喜。疎索梅花未免愁。正苦冰生退吟筆。卻思雪作潤耕疇。乘除擾擾殊多事。獨擁青氈覓睡休。

閑中書適

陸放翁集 十七 劍南詩集 卷四十九

棋廢機心息。書摺美睡多。客來時淡話。酒後亦高歌。甚欲江湖去。無如老病何。平羌半輪月。依舊照漁蓑。

又

乞得殘骸久。天涯一秃翁。瓢分春瓮綠。甑絕太倉紅。短褐便冬暖。長歌樂歲豐。老腰那可折。步步賴枯筇。

復湖

世事相尋敗與成。湖中春鏑浩縱橫。共知陂壞行當復。敢恨臺高旣已傾。小隱山園在湖中。近聞亭觀皆廢。天鏡忽看孤月墮。樵風長送片帆輕。下臨萬頃如雲稼。從此年年有頌聲。

梅花絕句

體中頗覺不能佳。急就梅花一散懷。衝雨涉溪君會否。免教塵土涴青鞋。

又

高韻知難折簡呼。溪頭掃地置芳壺。梅如解語應惆悵。昔日名流一箇無。

又

折得梅花古渡頭。詩凡卻恐作花羞。清樽賴有平生約。爛醉千場死即休。

又

疎枝冷蕊誰能畫。楊叟江西舊擅名。今日東窗閑拂拭。去人一尺眼先明。

跋馮氏蘭亭

堂堂淮陰侯。夫豈噲等伍。放翁評此本。可作蘭亭祖。唐古石刻本。

又

繭紙藏昭陵。千載不復見。此本得其骨。殊勝蘭亭面。中山舊本。山谷有句云俗書喜作蘭亭面。

十二月二日夜夢與客並馬行黃河上憩於古驛

並轡徐驅百里中。雲開太華翠摩空。是間合有神靈在。七十餘年墮犬戎。

又

河濱古驛開重門。雉兔紛紛黍酒渾。吾輩豈應徒醉飽。會傾東海洗中原。

倚樓初三日

暮雲細細鱗千疊。新月纖纖玉一鉤。歎息化工真妙手。衝寒來倚水邊樓。

讀書

先親愛我讀書聲。追慕慈顏涕每傾。萬事到前心盡燼。一編相向眼偏明。致君正使違初志。爲己猶當舉此生。更祝吾兒思早退。雨蓑煙笠事春耕。

讀史

夜對遺編歎復驚。古來成敗浩縱橫。功名多向窮中立。禍患常從巧處生。萬里關河歸夢想。千年王霸等棋枰。人間只有躬耕是。路過桑村最眼明。

閑遊

已破梅花一兩枝。並溪穿塢每歸遲。老軀健似中年日。鄉俗淳如太古時。上疏清狂非復昔。據鞍矍鑠欲

誇誰一端尚被鄰翁笑。無事長吟費撚髭。

日暮

樸學無關道廢興。更堪衰與病相乘。眼看白日西南去。繩繫膠黏總不能。

省事

老去終年臥草廬。事皆省盡略無餘。塵留鼠跡猶噴拂。風作瓢聲固不除。興發舊醅何害醉。詩成拙筆亦堪書。投牀睡美悠然覺。作計今知本不疎。

雪中作

鬢毛無奈歲華催。一笑登臨亦樂哉。平地忽成三尺雪。遠湖何啻萬株梅。雲山疊疊朝憑闕。簾幕沉沉夜舉杯。節物鼎來方自此。酥花綵勝待春回。

夢韓无咎王季夷諸公

積雪欲照夜。老雞方唱晨。諸公逝已久。幽夢忽相親。話舊慰勸意。追歡見在身。悠然又驚覺。撫枕一悲辛。

晴窗讀書自勉

今日雪始晴。遠舍鳥烏樂。老來少睡眠。雖病亦早作。豈無案上書。可與共寂寞。弦歌始風雅。次第窺灑灑。高明仰河漢。曲折窮脈絡。唐虞誠未遠。洙泗亦如昨。委佩聞都兪。避席承博約。膏肓幸施砭。幽悶欣納鑰。天全魯壁藏。不墮秦火虐。吾生百世餘。其敢負所託。

冬夜讀史有感

短檠膏酒夜將殘。感事懷人與未關。酌酒淺深須自度。圍棋成敗有傍觀。斷酒作飯終年飽。大布裁袍稱
意寬。世上閑愁千萬斛。不教一點上眉端。

大寒

大寒雪未消。閉戶不能出。可憐切雪冠。局此客膝室。吾車適已懸。吾馭久罷叱。拂塵取一編。相對輒終日。
亡羊戒多岐。學道當致一。信能宗闕里。百氏端可黜。爲山儻勿休。會見高峯嶺。頽齡雖已迫。孺子有美質。

自詠

滿梳晨起髮凋零。亭午柴門未徹扃。萬事忘來尙憂國。百家屏盡獨窮經。補枯倒壑雖無用。龜老搯牀故
有靈。夢裏騎驢華山去。破雲曉絕數峯青。十二月十二夜夢實有此故識之。

晚興

斲芋挑蔬自糶羹。雪簷收滴暮寒生。不嫌終日無來客。時聽荒園斲木聲。

雪後寒甚

日破重雲出。春從淺步來。未融樓北雪。先綻水南梅。屏護清吟硯。缸鳴乍熟醅。平生羨李愬。入蔡夜銜枚。
雪晴步至舍傍。

訪隱者

雪消還似雨。冰釋旋成泥。視菜荒陂北。尋梅小塢西。牆陰新犢臥。庭際午雞啼。幽興殊無極。歸來日已低。
湖曲有隱者。時時容叩門。人如釣渭叟。地似避秦村。笑語覺塵遠。衣冠古製存。山寒歸路晚。相與盡瓢樽。

村野

村野易過日，閉門心自欣。一身猶逆旅，萬事固浮雲。病厭詩爲祟，閑憑酒策勳。灌園雖舊業，隨事不須勤。

初夜

初夜多幽興，危關偶獨憑。月陸星盡沒，風勁雪重凝。身似遊邊客，心如退院僧。奇寒不可耐，歸對北窗燈。

雙松父老言紹興中所植

東岡天矯兩蒼龍，千尺蟠空黛色濃。六十餘年松若此，誰知我更老於松。

兀兀

兀兀孤村客，悠悠兩世人。夢忘身潦倒，醉覺膽輪囷。故里簪纓換，都門巷陌新。聞臨安火後，興葺漸畢，餘年猶有幾，撫事一傷神。

殘曆

殘曆不盈紙，苦寒侵弊裘。歲豬鳴屋角，雛鼓轉街頭。未死猶當學，長貧肯復憂。雪晴農事起，且復議租牛。

戒言

饒舌憂患始，銘膺勸戒深。談空摩詰默，對酒子光瘖。久已忘齊語，何嘗解越吟。悠然嫌未足，更撫絕絃琴。

聞松風有感

重位每憂身後罵，虛名不救眼前飢。直須采藥名山去，日夜松風無歇時。

道興

侯印從來非所圖，赤丁子亦不容呼。著低怯對新棋敵，量減愁逢舊酒徒。生世豈能常役役，酣歌且復和鳴鳴。扁舟到處皆吾境，莫問桐江與鏡湖。

又

家住城南剡曲傍，門前山色蘸湖光。三朝執戟悲年往，二頃扶犁樂歲穰。名姓已隨身共隱，文辭終與道相妨。子孫勉守東臯業，小飯吳粳底樣香。

有道流過門留與之語，頗異口占贈之。

萬里縱橫自在身，偶然來看剡溪春。取將月去閑娛客，攜得雲歸遠寄人。縮地不妨遊汗漫，移山隨處對嶙峋。須君更出囊中劍，爲闕河洗虜塵。

閑記老境

謝事久懸車，爲農嬾荷鋤。破裘寒旋補，殘髮短猶梳。槁木忘榮謝，閑雲任卷舒。心知老當逸，先罷夜觀書。

又

嫌鬧不入市，怕寒稀出門。擁爐愁兀兀，投枕睡昏昏。柳色新如染，梅花香滿村。猶嗟未免俗，薄酒誑空樽。

小飲梅花下作

脫巾莫歎髮成絲，六十年間萬首詩。予自年十七八學作詩，今六十年得萬篇，排日醉過梅落後，通宵吟到雪殘時。偶容後死寧非幸，自乞歸耕已恨遲。青史滿前閑卽讀，幾人爲我作蒼龜。

門外野望十二月二十五日

野迥浮煙碧。門深反照紅。柳邊雙鷺渚。天際萬鴉風。僧眼家禪瘦。神船社送窮。豐年隨處樂。忘卻鬢如蓬。

自題傳神

識字深村叟。加巾下版僧。檐挑雙草屨。壁倚一烏藤。得酒猶能醉。逢山未怯登。莫論明日事。死亦亦騰騰。

僧頌云。今日騰騰任運。明日任運騰騰。

歲暮貧甚戲書

阿堵元知不受呼。忍貧閉戶亦良圖。曲身得火纔微直。槁面持杯祇暫朱。食案闌干堆首蓐。褐衣顛倒著天吳。誰知未減麤豪在。落筆猶能賦兩都。

晚晴閑步鄰曲間有賦

湯沐身輕念出遊。近春原野霽煙浮。樓陰雪在玉三寸。雲罅月生銀一鉤。窮巷客稀常足睡。暮年詩退不禁愁。鄉鄰無事冬耕罷。獨倚籬門數過牛。

誦書示子聿

乃翁誦書舍東偏。吾兒相和山之巔。翁老且衰常早眠。兒聲夜半方泠然。楚公著書數百編。少師手校世世傳。我生七十有八年。見汝任此寧非天。

又

易傳三聖至仲尼。炎炎秦火乃見遺。經中獨無一字疑。正須虛心以受之。世衰道散吁可悲。我老欲學無碩師。父子共讀忘朝飢。此生有盡志不移。

十二月二十九日夜半雨雪作披衣起聽

臘雪瑞豐登。春雨相發生。二者皆可賀。愛此打窗聲。披衣起靜聽。蕭蕭亂疎更。豈惟肺渴蘇。耳目爲一清。孤燈不結花。相對翳復明。明朝遂除夕。歲月驚峰嶸。

辛酉除夕

衰境遇白雞。自分墮幽墟。造物偶見寬。俯仰復歲除。駸駸迫耄期。凜凜無根株。孰知尙堅頑。壯者有不如。銅瓶垂碧井。手自浸屠蘇。松煤染兔穎。秉燭題桃符。登梯挂鍾馗。祭竈分其餘。僮奴歎我健。卻立不敢扶。新春無五日。節物傾里閭。羅旛插紗帽。一醉當百壺。

除夕

六聖涵濡作幸民。明朝七十八年身。門前西走都城道。臥看無窮來往人。

卷第五十

開歲

綠襪新畫衛門扉。賀刺相欺可累欬。賣困不靈仍喜睡。送窮無術又來歸。相尋蠶市人何在。爛醉蟆津事亦非。惟有禹祠春漸好。從今剩判典春衣。蠶市成都正月初故事。蟆頭津在眉山。亦邗人正月宴遊之所。

箕卜

孟春百草靈。古俗迎紫姑。廚中取竹箕。冒以婦羃襦。鑿子夾扶持。插筆祝其書。俄若有物憑。對答不須臾。

豈必考中否。一笑聊相娛。詩章亦間作。酒食隨所須。興闌忽辭去。誰能執其祛。持箕畀竈婢。業筆臥牆隅。几席亦已徹。狼藉果與蔬。紛紛竟何益。人鬼均一愚。

梅花絕句

幾年不到合江園。說著當時已斷魂。只有梅花知此恨。相逢月底卻無言。

又

當年走馬錦城西。曾爲梅花醉似泥。二十里中香不斷。青羊宮到浣花溪。

又

開道梅花圻曉風。雪堆遍野滿四山中。何方可化身千億。一樹梅前一作花。一放翁。

又

小亭終日倚闌干。樹樹梅花看到殘。只怪此翁常謝客。元來不是怕春寒。

又

亂簾桐帽花如雪。斜挂驢鞍酒滿壺。安得丹青如顧陸。憑渠畫我夜歸圖。

又

紅梅過後到細梅。一種春風不並開。造物無心還有意。引教日日放翁來。

立春前一日作 壬戌開歲四日立春

開年化日已舒長。漸見風和鳥變吭。冒土萱芽抽嫩綠。拂橋柳色弄輕黃。重溫壽酒屠蘇醖。探借春盤餅

餌香不入城門今幾歲。遙知車馬正匆忙。

立春日

日出風和宿醉醒。山家樂事滿餘齡。年豐臘雪經三白。地暖春郊已遍青。菜細蕨花宜薄餅。酒香浮蠹瀉長瓶。湖村好景吟難盡。乞與侯家作畫屏。

送子龍赴吉州掾

我老汝遠行。知汝非得已。駕言當送汝。揮涕不能止。人誰樂離別。坐貧至於此。汝行犯胥濤。次第過彭蠡。波橫吞舟魚。林嘯獨脚鬼。野飯何店炊。孤糧何岸糶。判司比唐時。猶幸免笞箠。庭參亦何辱。負職乃可恥。汝爲吉州吏。但飲吉州水。一錢亦分明。誰能肆譏毀。聚棒嫁阿惜。擇士教元禮。我食可自營。勿用念甘旨。衣穿聽露肘。履破從兒指。出門雖被嘲。歸舍卻睡美。益公名位重。凜若喬嶽峙。汝以通家故。或許望燕几。得見已足榮。切勿有所啓。又若楊誠齋。清介世莫比。一聞俗人言。三日歸洗耳。汝但問起居。餘事勿挂齒。希周有世好。敬叔乃鄉里。豈惟能文辭。實亦堅操履。相從勉講學。事業在積累。仁義本何常。蹈之則君子。汝去三年歸。我儻未卽死。江中有鯉魚。頻寄書一紙。

正月五日出遊

久作閑人不慣愁。新春天氣更清柔。未爲遼海千年別。且繼斜川五日遊。細柳拂頭穿野徑。落梅黏袖上漁舟。此身走去神仙近。倚遍江南賣酒樓。

六日雲重有雪意獨酌

遍遊數澤一漁舸。盡歷風霜只緼袍。天爲念貧偏與健。人因見懶誤稱高。地連海澨濤聲近。雲冒山椒雪意豪。偶得名罇當痛飲。涼州那得真蒲萄。

閑甚戲作

酒盡枵腹書拋。委架塵。漸能閒過日。始覺老催人。玉麈王夷甫。金龜賀季真。若論方外事。終媿葛天民。

莫笑

莫笑窮閭叟。人生亦已稀。衆中容後死。險處得先歸。初服還章布。晨飧美蕨薇。牀頭周易在。捨此復疇依。

初春雜興

戲續春寒賦。閑磨午醉詩。煎茶小石鼎。酌酒古銅卮。曝日龜浮沼。營巢鷓墮枝。村深無客過。幽興與誰期。

又

水長鷗初泛。山寒茗未芽。深林聞社鼓。落日照漁家。渡遠呼船久。橋傾取路斜。客愁慵遠眺。不是怯風沙。

又

間途來野店。秣蹇憩山郵。何處無詩思。平生慣旅愁。翩翩下鷗鷺。點點散羊牛。傳入王孫畫。千金未易酬。

又

故歲愁聽雨。新春剩得晴。暖催紅蕊鬧。漲入綠池平。遊馬行爭路。華燈賣滿城。江村獨無事。戶戶及時耕。

又

老病倦遊涉。偶尋溪友期。殘冰擁魚笱。新暖入桑枝。山崦巨然畫。煙村摩詰詩。何人爲收拾。媿我不能奇。

春曉

喔喔雞號野。昏昏月挂樓。夢隨殘漏斷。愁伴宿醒留。壯志看清鏡。春寒著弊裘。拂窗新柳色。最憶錦江頭。

書感

投老羈孤久。臨觴感慨頻。關河疎舊友。風雨敗新春。事固少如意。天終能勝人。所悲頭上髮。不與柳條新。

壬戌正月十四日

老子居然健。上元如許晴。湖平波不起。天闊月徐行。散髮漁舟穩。臨風野笛清。安能擁笳鼓。萬里將幽并。

十五日

誰推圓鏡上天東。桂影婆娑滿鏡中。天宇更無雲一點。誰門初報鼓三通。兒童草草杯盤喜。鄰曲紛紛笑語同。逐祿豈能無聚散。明年誰復伴衰翁。

高枕

高枕閑看古篆香。世間萬事本茫茫。偶亡塞馬寧非福。太察淵魚恐不祥。每與諸兒論今古。常思百世業耕桑。危機正在黃金印。笑殺初心繆激昂。

送施武子通判

初入修門養未秋。安期千里接英遊。退歸久散前三衆。邁往欣逢第一流。只道升沉方異趣。豈知氣類肯相求。龍鍾不得臨江別。日斷西陵煙雨舟。

老學菴自規

堯德被四表。其本在身修。江河水稽天。發源乃涓流。人忍於搏螫。習熟且解牛。象箸與玉杯。漆器實其由。斯須失兢畏。惡名溢九州。始乎爲善士。終可蹈軻丘。孰置汝太山。孰擠汝污溝。降福孰汝私。得禍孰汝讎。聖狂在一念。禍福皆自求。易簪汝所知。垂死勿情偷。

雨夜

斷岸輕煙著柳條。孤村小雨夜蕭蕭。荒雞隔浦聲相續。短燭無風焰自搖。朴學元知廢歲月。殘生竟是老漁樵。最憐鬢畔千莖雪。日日春風吹不消。

子聿以剛日讀易柔日讀春秋。常至夜分每聽之。輒欣然忘百憂。作長句示之。

朱顏已去鬢絲稠。知復人間幾歲留。正可牀頭著周易。安能車上說春秋。齋鹽日昧從兒好。弦誦更闌解我憂。時發一言常中理。絕勝問事不能休。

記夢

信命從來不問天。經旬無酒亦陶然。夢爲估客揚州去。水調聲中月滿船。

夜賦

八十衰翁久挂冠。今年無酒敵春寒。亂雲入戶雨方急。斷雁叫羣燈未殘。囊簡幸存隨意讀。鳩廬雖小著身寬。支離自笑心猶壯。愛國憂家慮萬端。

杜叔高秀才雨雪中相過留一宿而別。口誦此詩送之。

久客方知行路難。關山無際水漫漫。風吹欲倒孤城遠。雪落如飈野寺寒。暮挈衣囊投土室。晨沽村酒挂

躡鞍文章一字無人識。胸次徒勞萬卷蟠。

曉賦

雞晨非一唱。鴉旦每三鳴。萬物各有役。吾生何所營。書編猶未掩。窗紙已微明。稊子勇過我。琅琅誦易聲。雪後龜堂獨坐。丈夫自重如拱壁。安用人看一錢直。簞食豆羹不虛受。富貴那可從人得。讀書萬卷行婉心。幽有鬼神爲君惜。龜堂樂處誰得知。紅日滿窗聽雪滴。

又

兩手龜坼愁出袖。閉戶垂帷坐清晝。朝陽破雲雪漸消。點滴無窮聽簷溜。士生百行雖相補。第一要能安飯糗。詩書幸可教兒童。勿使後人憐晚謬。

又

牙齒欲落何足惜。爛齧藜藿自堪食。屋穿不害氣吐虹。客至從驚瘦如腊。天公鑿汝亦已至。春風裂面雪三尺。濁醪傾罷仰屋歌。尙友孫伴與徐積。

又

閉門屋漏不可居。出門雪泥深尺餘。興闌已回剡溪棹。路滑罷借東家驢。竹窗兀兀無與語。澆愁賴有酒一壺。眼花耳熱睡至夜。吹火起讀殘編書。

二月一日作

浪藉梅花委道傍。山櫻已復占年光。簷消積雪時聞滴。衣覆殘爐賸得香。老馬已衰寧識路。寒龜未死且
拚林。柴荆終日無來客。賴有陶詩伴日長。

過東鄰歸小憩

籃輿過鄰曲。綠野喜新晴。暖日生花氣。豐年入碓聲。築陂鄉竭作。買犢戶深耕。歸舍還尋睡。殘書傍枕橫。
寄呂子和南廂

聖代多名德。君家不乏公。還看短袍綠。來蹋軟塵紅。小忍便無事。力行方有功。官閑能念我。時寄尺書東。

自述

藜藿安貧陋。柴荆俯莽蒼。露晞朝筮易。掃地晝焚香。美睡天教嬾。長歌客怒狂。歡然送餘日。醉死亦何傷。

呂氏子夔郎求詩

乃祖身兼將相崇。諸孫玉立有家風。此郎已復塵埃外。它日相期氣類中。行已勤勤須自省。讀書疊疊要
新功。果能哮吼如獅子。一瓣香應嗣放翁。

新晴

兼旬不雨亦常陰。一日新晴抵萬金。浦面波紋春穀細。橋頭柳色麴塵深。關山滿眼愁千斛。歲月催人雪
一簪。猶有強寬懷抱處。午窗睡起聽鳴禽。

晚步湖堤歸偶作

酒盡知難折簡呼。出門仍苦要人扶。殘梅委地香誰惜。歸雁穿雲遠欲無。日落牛羊猶被野。農閑畚鍤正

開湖。遠家寂寞西窗晚。旋燎枯枝擁地爐。

春來食不足戲作

飢臥誰能羨屬餒。高懷飽食豈容兼。分司祇在終難取。卿監致仕當得分司職。須自請乃給。遂置之。束帛恩深。獨不霑。頃有敕令。賜致仕者粟。帛羊酒。郡獨格不行。衰謝形容無藥駐。奔馳日月欠膠黏。兒童拍手看翁醉。山杏溪桃簇帽簷。

散步湖隄上時方濬湖水面稍渺瀰矣

老覺人間萬事輕。不妨閑處得閑行。西山鳥沒暮雲合。南浦隄平春水生。孤操不渝無鶴怨。淡交耐久有鷗盟。先民幸處吾能勝。生長兵間老太平。邵堯夫自謂生於太平。老於太平。爲太平之幸民。彼豈知幸哉。若予生於亂離。乃老於太平。真可謂幸矣。

老學菴

老學衡茅底。秋毫敢自欺。開編常默識。閉戶有餘師。大節艱危見。真心夢寐知。唐虞元在眼。生世未爲遲。

春曉

強尋殘夢苦難成。推枕搯藤繞舍行。新漲生波漁艇活。晨曦送暖客衣輕。煙迷芳草蒼茫色。鵲占高枝嘯暗聲。老病自憐猶嗜學。誦書家塾羨諸生。新館一客。誦孫長興入學。誦書頗盛。

龜堂雨後作

澤國春多雨。龜堂病少惊。雖名舊朝士。其實老耕農。一點葦間火。數聲煙外鐘。詩材故不乏。處處起衰慵。

隴放翁集 十七 劍南詩集 卷五十

五十七

書感

我欲哭窮途。所懼世俗驚。出門復入門。掩淚且吞聲。唐虞邈難繼。周孔不復生。承學百世下。我輩責豈輕。楊墨斥已殫。釋老猶縱橫。拔本塞其源。力盡志未平。吾道如皦日。薄食終必明。一木雖獨立。可支大廈傾。夷風方變夏。孰能作長城。卓哉易簣公。垂死猶力行。

後書感

貧賤終身志不移。閉關涵泳賴書詩。唐虞未遠如親見。周孔猶存豈我欺。力學正須忘寢食。少年誤計事文辭。爾來朋友皆雲散。考質從誰盡所疑。

村居書喜

紅橋梅市曉山橫。白塔樊江春水生。花氣襲人知驟暖。鵲聲穿樹喜新晴。坊場酒賤貧猶醉。原野泥深老亦耕。最喜先期官賦足。經年無吏叩柴荆。

中春偶書

鄰曲祈蠶候。陂塘浸種時。春寒新炭爇。雨霽鼓鐘知。驢更衝泥怯。魚鷺食釣遲。衰翁一味懶。耕養媿吾兒。

夜泊

小聚近江干。中春尙爾寒。釣船隨鷺宿。煙月伴鐘殘。冉冉歲時速。茫茫天地寬。推蓬一搔首。無處著悲歡。

東岡櫻桃已過殊不知

病著寒侵怕出門。蕭蕭煙雨暗江村。一樽闕與梅花別。過盡櫻桃不足言。

別嚴和之

器之魂逝已難招。尚有和之慰寂寥。今夜月明空歎息。想君孤棹泊溪橋。

又

千里風煙行路難。旅舟應過子陵灘。人間富貴知何物。莫負君家舊釣竿。

齋中雜題

湖水日益長。柳色日益深。好鳥西山來。飛鳴過前林。年華挽不留。陳迹曠難尋。花開少共賞。酒熟惟孤斟。王謝今編氓。曲水空山陰。一樽欲弔古。已矣予何心。

又

屯雲失南山。三日吹細雨。歲月不貸人。鼃聲遽如許。一年復一年。老至不可禦。下溼病在脾。餘息僅如縷。枯皮裹瘦骨。半屬松下土。屋壞要當頤。安能強撐拄。

又

書生每苦飢。得飯已可賀。黃齋三百盃。自是天所破。有時尙不繼。得米無暇簸。昨者雪塞門。煙絕但僵臥。雖云迫溝壑。老學不敢惰。夜分喚鄰翁。我歌爾當和。

又

西窗日過中。飢坐生眼花。援筆課小詩。墨燥字傾斜。須臾忽滿紙。翩翾若風鴉。雖無古人法。簡拙自一家。乃知雨漏壁。未媿錐畫沙。俄報豆飯熟。投筆喜莫涯。呼童拾潤薪。試我家山茶。

春晚

萍葉青浮水。蛙聲鬧徹明。川雲時聚散。天氣半陰晴。杏子爭梅結。鳩巢後鵲成。吾儕亦有役。過社更深耕。

社日小飲

人生當惜老年時。醉插山花壓帽欹。世事恰如風過耳。微醺自好不須治。

山茶

雪裏開花到春晚。世間耐久孰如君。憑闌歎息無人會。三十年前宴海雲。成都海雲寺山茶。開故事宴集甚盛。

春夜

寂寂春將暮。迢迢夜未央。膏殘燈焰短。杵急藥塵香。困思棲雙曉。羸軀寄一牀。養慵新有味。初志悔軒昂。

春遊

右軍不復見清真。賞會猶須我輩人。幽夢斷時雞唱曉。短章成處鳥呼春。出山茶筍村墟鬧。上市蓴鱸匕筯新。速覓一壺隨處醉。風吹紅紫半成塵。

北窗睡起

杏梢紅溼晝初長。睡過窗間半篆香。久厭客遊歸自好。本無才術老何傷。依蒲不去羣魚樂。點草還驚小蝶忙。堪笑放翁無一事。強將詩句占年光。

北窗懷友

中年妄意慕軻雄，白首終希尺寸功。落落要居流俗外，兢兢恐墮異端中。仰天俯地猶多媿，飯豆羹藜已過豐。幸有北窗堪講學，故交零落於誰同。

舟中作

城西西路石帆東，身寄鷗波浩蕩中。疊疊沙痕留浦岸，疎疎日影透漁篷。詩人無復同盟在，酒債何時一洗空。已迫老年宜易感，人生五十卽稱翁。

又

晤語無人與遣愁，出門聊復弄輕舟。山穿煙雨參差出，水赴陂塘散漫流。隔葉雄雌鳴谷鳥，傍林子母過吳牛。數家清絕如圖畫，炊黍何妨得小留。

湖村春興

桑柘相望雨露新，桃源自隱不緣秦。稻陂正滿初投種，蠶子方生未忌人。酒借鵝兒成淺色，魚憑雲母作脣鱗。賽神歸晚比鄰醉，一笑猶關老子身。

鄰餽

結隊同秋穫，連牆聽夜舂。薄持聊共飽，熱啜却煩供。炊玉吳粳美，浮蛆社酒醲。時平多樂事，莫厭數從容。

久雨

風雨連旬日，屢空猶晏如。敢言苦及榻，僅免釜生魚。齋糝朝供鉢，松肪夜照書。百年如此過，作計未全球。

登山

困厄身垂老，登臨意未平。暮煙迷草色，宿雨壯溪聲。往古飛鴻沒，浮名脫髮輕。平生五字律，自笑尚關情。

讀易

大易中含造化機，王何元未造精微。乾坤要自吾身看，臥聽雞鳴起索衣。

村居書事

四十餘年食太倉，賜骸恩許返耕桑。長絲出繭專羹美，白雪翻匙稻飯香。酒戶知貧焚舊券，醫翁憐病獻新方。春殘睡足東窗下，聞道長安依舊忙。

又

藥物枝梧病漸蘇，門前野老笑相呼。春深水暖多魚婢，雨足年豐少麥奴。小飲杯盤隨事具，閑行巷陌倩人扶。題詩非復羌村句，誰與丹青作畫圖。李伯時有光月圖傳於世。

春晚書村落間事

千古會稽城，閭閻樂太平。豐年觀米價，霽色聽禽聲。俗儉憎浮侈，民淳力釣耕。幽詩有七月，字字要躬行。

雜興

秦漢區區了目前，周家風化遂無傳。君看八百年基業，盡在東山七月篇。

又

羲和分職授人時，斷自唐虞意可知。獸舞鳳來餘事耳，西成東作要熙熙。

又

老無深處仍逢病。春欲殘時未減寒。架上漢書渾忘盡。牀頭周易卻常看。

又

一身連負愁除酒。滿眼關山海上樓。子細推來惟合睡。五更風雨已如秋。

又

面顏日瘦口眼大。氣血頓衰鬢髮癯。不用凌煙寫冠劍。一蓑煙雨事春耕。

又

故交零落形弔影。陳迹淒涼口語心。辛苦一生成底事。祈招空解誦惜愔。

南堂獨坐

晨坐南堂雙眼明。南山山色滿柴荆。片雲忽過失簾影。急雨初來聞竹聲。鸚鵡螺深生酒興。蟾蜍滴古助詩情。野人頻約天台去。幾緡青鞋了此行。

春雨示鄰曲

春來天氣苦蕭森。如縷雲升便作霖。寒溜何曾任一滴。綠陰忽已遍千林。蓴絲箭茁垂垂老。蓼浦菱塘澱澱深。聞道南山花尚在。約君攜酒試同尋。

讀書

堯廷君相都俞盛。闕里師生博約深。我讀殘編食忘味。朱絃三歎有遺音。

新晴賞牡丹

陸放翁集 十七 劍南詩集 卷五十一

六十三

杜門睡榻長蒼苔。滿眼新晴亦樂哉。小市忽逢葦菜出。曲欄初見牡丹開。不嫌雨後泥三尺。且趁春殘醉幾回。自揣明年猶健在。東箱更覓茜金栽。茜金。近出牡丹名。

對酒

神仙豈易學。富貴不容求。百歲儻未盡。一樽差可謀。鐘鳴上方晚。桂發小山秋。處處多幽趣。攢眉勿浪愁。

病起遇晴有作

十日春雨霪。百疾投間作。呻吟雖甚苦。飲啗尙自若。筋骸則已疲。正氣亦消鑠。行年垂八十。所恃豈在藥。魔軍累百萬。指顧可盡縛。君看仁義師。何至用韜略。川雲忽破散。平地見日脚。無人畫此翁。縹緲立孤鶴。

定命

定命元知不可移。更兼狂疾固難治。屢穿衣弊窮居日。齒豁頭重大耋時。耕釣詩多悲境熟。功名夢少感年衰。今朝雨歇春泥散。剩伴兒童鬪草嬉。

假山小池

擊池容斛水。壘石效遙岑。鳥喜如相命。魚驚忽自沉。風來生細縷。雲度作微陰。便恐桃源近。無人與共尋。

又

蓮嶽三峯峙。桃源一路分。池偷鏡湖月。石帶沃洲雲。魚隊深猶見。禽聲靜更聞。巖幽林篔簹。疑可下湘君。

春欲盡天氣始佳作詩自娛

浮雲飛盡見青天。拄杖閑拈瘦倚肩。漸喜綠秧分穉稻。又看畫柱坼鞦韆。雞豚雜遝祈蠶社。鼓笛喧譁競

渡船。惟有此翁無一事。閉門贏得日高眠。

自詠

生草覆蝸廬。長鬚駕鹿車。貧猶思施藥。老不廢觀書。登覽攜童稚。歌呼和里閭。躬耕亦何得。聊以遂吾初。

西村勞農

川雲散盡十分晴。繚出溪頭信意行。片片飛花隨步遠。離離芳草上蘿生。村深日暖單衣爽。路轉沙平雨屨輕。腠肉芬香坊酒醞。因來聊得餉春耕。

題廬陵蕭彥毓秀才詩卷後

詩句雄豪易取名。爾來閑澹獨蕭卿。蘇州死後風流絕。幾許工夫學得成。

又

法不孤生自古同。癡人乃欲鍊虛空。君詩妙處吾能識。正在山程水驛中。

舍北溪上垂釣

大蓋還家萬事非。垂竿好在綠苔磯。風和山雉挾雌過。村晚吳牛將犢歸。春漲新添塘澗澗。夕雲仍帶雨霏霏。此生自笑狂顛足。依舊人間一布衣。

三月二十二日作

雨過草爭出。溪湍魚逆行。輕舟摘蓴菜。小市聽鶯聲。萬事已無夢。一樽猶有情。吾兒能講學。不必說無生。

卷第五十一

書感

頭顱已可知。牙齒今復落。十步或再休。啜粥不及勺。身依一蒲團。壁挂兩芒屨。對客輒坐睡。有問莫能醉。念昔少壯時。心慕宦遊樂。初登平津館。晚入征西幙。雨暗駱谷烽。霜清散關柝。登高望中原。氣已吞雍雒。寧知事大謬。憔悴理征裳。單車去梁益。健席下沔鄂。還朝見故人。大馬黃金絡。後來固多士。鷺鷥照臺閣。婆娑郎吏間。祇自取嘲噓。歷思從來事。無錢可打錯。幸得還故園。快若解束縛。閭里通有無。情厚不爲薄。泥行事春耕。日曝畢秋穫。隔牆喚鄰翁。濁酒聊共酌。

寒食

小市禁煙餘。東郊展墓初。桐陰覆碧井。泉脈入清渠。貧悴停遊舫。龍鍾廢荷鋤。西窗斜日在。且復勸殘書。鄉人貧甚者。每自謂不能下湖。則其貧可知。

西村暮歸

天氣清和修禊後。土風淳古結繩前。村村陂足分秧水。戶戶門通入郭船。亭障盜消常息鼓。坊場酒賤不論錢。行人爭看山翁醉。頭枕槐根臥道邊。

舍外彌望皆青秧。白水喜而有賦。

此地天教著放翁。舍傍煙樹晚空濛。一無可恨得歸老。寸有所長能忍窮。東作已趨堯舊俗。南薰方詠舜遺風。謝安勳業能多少。枉是忽忽起剡中。

寄題太和陳誠之秀才遠明樓

宦遊再有江西役，南望廬陵每慨然。未見高樓出雲雨，但驚妙語雜風煙。諸公何止元和盛，獨我初非正始賢。筆力深知太遼絕，此詩它日勿同編。樓有榜，廷秀大蓬所作記及周丞相以下諸公題跋。

蝸舍

蝸舍茨生草，龜腸飽淖糜。麥因多雨損，蠶遇閏年遲。徙義憂無勇，求仁戒自欺。此生雖欲盡，吾志未應衰。

東岡

東岡竹千竿，大者圍過尺。微風生其間，蕭蕭夏寒碧。我閑適一到，散髮坐磐石。萬事不累心，清獻遂至夕。此君本傲世，獨我有夙昔。老情恐作疎，時來寓琴奕。

首夏

亂山深處著柴荆，岸幘披衣露氣清。宴坐有書聊作伴，出遊無客獨題名。陰陰密樹花初盡，灑灑方池水已平。幾許人間堪笑事，今朝百舌頓無聲。

贈會溫伯邢德允

髮似秋蕪不受耘，茶山曾許與斯文。回思歲月一甲子，游獲從文請公時。距今六十年，尚記門牆三沐熏。卷裏聖賢能覲面，人間富貴實浮雲。二君才氣俱超絕，豈待衰翁誦所聞。

自述

古井無由浪，浮雲一掃空。詩書修孔業，場圃嗣幽風。懼在飢寒外，憂形瘡痍中。吾年雖日逝，猶冀有新功。

又

舊業遺耕釣。殘年迫耄期。筋骸衰後覺。力量夢中知。客約溪亭飲。僧招竹院棋。未爲全省事。終勝官遊時。

又

屏迹歸休後。頽生寂寞中。忍貧辭半俸。學古得全功。西埭村醅釀。東陂小釣通。經行有佳趣。稚子也能同。

示客

一點昏燈兩部蛙。客來相對半甌茶。典衣未贖身饒蝨。治米無工飯有沙。每爲采菱浮野艇。時因賣藥宿山家。青鞋到處堪乘興。不獨雲門與若耶。

對食戲作

香粳炊熟泰州紅。莖甲蓴絲放箸空。不爲休官須惜費。從來簡儉作家風。

又

米如玉粒喜新春。菜出煙畦摘供。但使胸中無媿怍。一餐美敵紫駟峯。

對酒戲作

杖頭高挂百青銅。小立旗亭滿袖風。莫笑村醪薄無力。衰顏也得暫時紅。

又

亂插醅醲壓帽偏。鵝黃酒色映鰲船。醺然一枕虛堂睡。頓覺情懷似少年。

夏初湖村雜題

市遠村深客到稀。草堂終日掩柴扉。釀成新蜜蜂兒靜。分盡殘泥燕子歸。

又

嫩日輕風夏未深。曲廊倚杖得閑吟。地偏草茂無人迹。一對交雞下綠陰。

又

寒泉自換菖蒲水。活火閒煎橄欖茶。自是閑人足閑趣。本無心學野僧家。

又

日落溪南生暮煙。幅巾蕭散立橋邊。聽殘養廟琴琴鼓。數盡歸村隻隻船。

又

胎髮茸漆不如。夏初安健勝春初。雙瞳爛看公卿面。卻解燈前讀細書。

又

從來抵死愛湖山。敢料天教半世閑。杜曲桑麻雖苦薄。瀟橋風雪如相關。

又

幽禽兩兩已成巢。新竹森森漸放梢。稻壠作陂先蓄水。野堂防漏卻添茅。

又

門巷蕭條長綠苔。經旬清坐罷傳杯。麴生風味那忘得。少待吾家芍藥開。吾鄉有陸家芍藥。其品甚高。

溪上露坐

水際風生爽拂裾。比鄰自集不勞呼。昏鴉杳杳飛初定。遠樹離離望欲無。新竹出林時解箨。小荷翻露已成珠。橋東一徑蒼苔滑。歸舍還須稚子扶。

北齋書志示兒輩

初夏佳風日。頽然坐北齋。百年從落魄。萬事忌安排。徐仲車聞安定先生莫安辨之教。所學益進。鄉俗能尊老。君恩許賜骸。飢寒雖未免。何足繫吾懷。

作盆池養科斗數千戲作

小小盆池不畜魚。題詩聊記破苔初。未聽兩部鼓吹樂。且看一編科斗書。

枕上

風竹無時靜。月窗終夜明。時時聽鶯鵲。一一數殘更。吳楚民猶困。燕齊虜未平。功名天所命。吾志固難成。

晨起

終夜厭姑惡。經春無秭歸。今歲不聞杜宇。溪雲生慘慘。林日澹暉暉。物外孤懷勝。人間百慮非。鄰翁剗中去。爲我買漁衣。

喜晴

葛衣初著喜新晴。寂寂虛堂一榻橫。乍拆孤花藏葉罅。晚歸雙燕拂簾旌。舞空不斷游絲直。掠地還飛落絮輕。剩欲倚闌尋好句。清笳已復動高城。

讀夏書

巨浸稽天日沸騰。九州人死若丘陵。一朝財得居平土。峻宇雕牆已遠興。

幽栖

何處是幽栖。城南路少西。楊花穿戶入。燕子避簾低。碁局聊相對。茶爐亦自攜。溪頭雲易合。晚雨又成泥。

閑詠園中草木

剪刀葉畔戲魚回。帳子花頭舞蝶來。領略年光屬閑客。一樽自勸不須推。

又

麝香萱草移東郭。錦子葵花買上原。兒喚乃翁閑一看。欣然曳杖出籬門。

又

一樹山櫻鳥啄殘。懸鉤半舍亦甘酸。兒童采得爭來餉。應念衰翁舌本乾。

又

綠侵小徑蔓衣草。青絡疎籬鬼帶藤。未暇開編尋本草。且將名品問山僧。

又

日高未辦續晨炊。一碗村醅且療飢。槃箸索然君勿笑。桑間紫椹正蠶纍。

又

仲夏園中百草靈。風吹露拆各青青。勸君辦取金鴉髻。不問昌陽與豨苓。

夜雨

初夏雨淋漓。簷聲繞四廊。感深頭易白。睡少漏偏長。紅捲簾旌溼。潤生衣焙香。清吟欲排悶。三歎不成章。

晨起

海燕翻將乳。戎葵粲已繁。魚船初入市。蓴擔未過門。年耄停朝課。家貧省小殮。近以病後。晨讀書。又以糜粟不繼。遂罷食粥。所欣行樂處。秧稻遍村村。

放翁

拜賜頭銜號放翁。家傳不墜散人風。問年已過從心後。遇境但行無事中。馬老豈堪空冀北。鶴飛猶得返遼東。道傍跌宕煩君看。閱盡時人臉尚紅。

過鄰家

老病在臂蹠。終日不喜動。溪雲忽過前。袖手以目送。今晨光景佳。霽色入鳥嘒。駕言出柴荆。暫作湖山夢。東村望鶴巢。西阜過獮峒。父老意欣然。爲我撥春瓮。豈惟澆舌燥。亦用輒脚痛。形骸去繩檢。談笑得少縱。吳蠶初上簇。陂稻亦已種。端五數日間。更約同解纜。

東園

晨起東園去。消磨夏日長。隨鋤泉眼出。上爪藥苗香。琴挂山齋壁。龜搗道室牀。始知彭澤令。真足傲羲皇。

曉出至湖桑埭

殘年孤寂不堪言。時喚平頭駕短轅。老氣猶能作鶻臥。壯懷誰復記鴻軒。樞歌縹渺城西路。煙樹參差埭北村。堪笑怪奇消未盡。夜來還夢屬囊鞬。

雨夜觀史

讀書雨夜一燈昏。歎息何由起九原。邪正古來觀大節。是非死後有公言。未能劇論希捫蝨。且復長歌學叩轅。它日安知無志士。經過指點放翁門。

雨後作

今日雲歸恰喜晴。小池忽見水紋生。窗昏又輟雜書課。臥聽蕭蕭打葉聲。

園中

稚竹侵簷綠。新桐覆井涼。閑身少羈束。隨處得徜徉。山鵲惺惚語。藤花掩冉香。吾詩有餘思。小復立西廡。湖上遇道翁。乃峽中舊所識也。

大罵長歌儘放顛。時時一語卻超然。掃空百局無秦敵。倒盡千鍾是酒仙。巴峽相逢如昨日。山陰重見亦前緣。細思合辱先生友。五十年來不負天。

老學菴北作假山既成卽雨彌月不止

古者封禪歲。乾封輒枯旱。不言絕民食。徒欲矚日觀。我今作小山。纔及仞有半。下瀦數斗水。草木稍蔥蒨。叢爾何足言。造物亦幽贊。冥冥一月雨。陰翳迷昏旦。芳草爭抽萌。珍木亦擢幹。龜魚出復沒。鳥雀聚仍散。彼天初何私。遺我耳目玩。遂令閭巷間。日厭鷓鴣喚。淖深樵蘇絕。有米不能爨。爲小乃害大。未可以理斷。憂懼塞胸中。當食屢興歎。培塿固易平。荷鍤媿吾懶。

苦雨

盡道迎梅雨。能無一日晴。窗昏愁細字。簷滴亂疎更。未怪蛙爭席。真憂水冒城。何由收積潦。簫鼓賽西成。

又

煙水茫無際。空塔滴不休。一窗閑隱几。四月澹如秋。宿冷蠶遲績。泥深麥未收。家貧村酒薄。曷解老農憂。

五月初作

鄰舍春新麥。家人拾晚蠶。推移逢夏五。賦與歎朝三。遣日須棋局。忘憂賴酒甌。幽居有高致。多取未爲貪。

遊西村贈隱者

水清沙淨見遊魚。槐柳陰陰五月初。人似登仙惟火食。俗如太古欠巢居。熱聞高臥常扃戶。剩欲頻來共荷鋤。從此夢遊端有地。淵明不獨愛吾廬。

徜徉

家世由來出楚狂。湖山垂老得徜徉。讀書坐嬾常中廢。得句因衰已旋忘。萬化隨緣寓蟲臂。百年何處異羊腸。忍飢到死知無恨。免使人嘲作飯囊。

碌碌

碌碌初何取。悠悠信所之。安貧無鬼笑。守道有天知。暑服黃縑製。晨殮赤米炊。今朝潦水退。村路得遊嬉。

讀陳蕃傳

莫笑書生一卷書。唐虞事業正關渠。漢廷若有真王佐。天下何須費掃除。

夏日晨起

華胥歸路萬山青。拈得烏藤繞舍行。兩背尙餘殘睡美。一襟初受曉涼生。陰陰院落新桐影。寂寂房櫺乳燕聲。已罷小殮停卯酒。龜腸蟬腹不勝清。

醉舞

短帽蓂花舞道傍。年垂八十尙清狂。茸茸胎髮朝盈櫛。炯炯神光夕照梁。令尹閱人三仕已。太山在我一豪芒。藥苗麥飯初何欠。全取愚儒百鍊剛。

北窗微陰

露滴林梢花送香。風吹池面雨輸涼。蠹書一卷作老伴。麥飯半盂支日長。學道莫如心自肯。杜門真與世相忘。君恩不報雖知媿。穉米安能益太倉。

夏夜

乞骸安晚節。養疾臥空村。月暗鼻鳴樹。船歸犬吠門。藜羹加糝美。黍酒帶醅渾。稚子能勤學。燈前與細論。

村居

鷓鴣穿林語。鳴鵝並水鳴。飽糲憐道喝。裹飯助鄰耕。零落橋危斷。欹斜屋半傾。君毋笑偷惰。猶足盡吾生。

晚興

羸病時時劇。歡悰日日疎。睡憑書紹介。愁賴酒驅除。小蹇追涼處。輕衫出洛初。無人堪晤語。且復狎樵漁。

溪上

散髮倚胡牀。風生水面涼。單衣縫白紵。雙屨織青芒。道家有青芒屨。荷葉猶微赤。藤花已半黃。歸來村路

晚漁火耿蒼茫

貧甚戲作長句示鄰曲

百屋堆錢四壁空。人生志願孰能同。蕭條齒髮難藏老。冷落杯盤可諱窮。斷筭不思鄣夏日。典衣那計禦霜風。知心幸有鄰翁在。一笑相從草莽中。

縱筆

冉冉殘年迫耄期。眩雖三折未成醫。北山愚公世方笑。東郭順子吾所師。萬里元非破賊手。一生無奈造物兒。梅雨初晴湖水滿。未妨把酒細哦詩。

入都

萋萋登盤酒可賒。豈知扶病又離家。朝行打岸潯頭惡。夜宿垂天斗柄斜。不恨山林淹歲月。但悲道路困風沙。鄰翁好爲看耕隴。行矣東歸一笑譁。

開局

八十年光敢自期。鏡中久已髮成絲。誰令歸謁京塵路。又見新開史局時。予三作史官。皆初開局。舊吏僅存。多不識。殘編重對只成悲。免朝愈覺君恩厚。閑看中庭木影移。

感舊

四十三年夢。今朝又喚回。平橋穿小市。細雨壓輕埃。老喜詩情在。慵愁史牒催。時時還自笑。白首接鄰枚。

贈陸伯政

夜窗燈火老徒勤。自憫何時可策勳。未喪斯文天壽我。豈無餘子我思君。約通殘譜言猶在。細讀新詩筆欲焚。早晚皇恩許歸去。相呼同臥石帆雲。

雨夜

暮雨濯殘熱。史官非坐曹。忍慙靡粟帛。偷暇近詩騷。屋老孤燈闌。風顛萬木號。明朝有奇事。江閣看秋濤。

自局中歸馬上口占

幼輿只合著山巖。誤被恩光不蓋慙。人怪衰翁頰尺一。心知道物賦朝三。飛騰豈少摩雲鶴。蹙縮方同作繭蠶。安得公朝閱枯朽。早教歸臥舊茆菴。

秋雨

久占煙波弄釣舟。業風吹作鳳城遊。不知苑外芙蓉老。但見牆陰苜蓿秋。黃把裏書俄復至。朱顏辭鏡不容留。晚窗又聽蕭蕭雨。一點昏燈相對愁。

秋夜

庭院蕭條夜氣清。臥聽宮漏下宮城。旅懷生怕還鄉夢。留取殘燈伴雨聲。

求月桂

重重汗簡擁衰翁。百里家山夢不通。病眼可令常寂寞。煩君爲致數枝紅。

秋思

烏帽翩翩九陌塵。杖藜誰記岸綸巾。遺簪見取終安用。弊帚雖微亦自珍。廊廟似聞憐老病。雲山漸欲屬

閑身。牆隅首着秋風晚。獨倚門扉感慨頻。

又

霜露初侵季子裘。山川空賦仲宣樓。夢回最怯聞衣杵。病起常憂負酒籌。日月往來雙轉轂。乾坤成壞一浮漚。書生事業無多許。二寸毛雞老未休。

史院書懷

後死與斯文。猶能讀典墳。雖慙千載事。要是一生勤。石磴霏霏雪。銅爐裊裊雲。扶衰又秋晚。何以報吾君。

楚辭所謂桂數見於唐人詩句及圖畫間。今不復見矣。作二絕句。屬山僧野人試求之。

小山桂枝今所無。一生到處問樵夫。細思不獨人間少。月裏何曾有兩株。

又

丹葩綠葉鬱團團。消得姮娥種廣寒。行盡天涯年八十。至今未遇一枝看。

雨夜

細雨催扃戶。昏燈照擁衾。倦知秋漏永。瘦怯曉寒深。林鶻依簷宿。莎蟲入戶吟。此時搔短髮。誰會欲歸心。

九月初作

菊佩糕漿節物催。老懷撫事一悠哉。年光半付殘編去。詩句時從倦枕來。零落朋儕今孰在。寂寥事業世方賒。兩叢月桂門前買。自下中庭破綠苔。

又

九月都門凜欲霜。羸軀思免立鵝行。細書付吏牒初稟。和藥呼兒對古方。隨巷閉門常謝客。高齋掃地獨焚香。此生自計終何取。似有山林一日長。寶錄有初稿二稿。

又

碧海仙蓬感舊遊。暮年心事轉悠悠。登高此去無多日。扶病重來又過秋。十里樓臺迷巷陌。萬家磁杵戒衣裘。平生剩欠觀書債。四庫留人未許休。

又

富貴功名未足云。平生一飯不忘君。哦詩高韻淒金石。把釣幽情渺水雲。落葉打窗秋已暮。歸鴉泊樹日將曛。欲知老病常多感。革帶今年減幾分。

暮秋

十日都門雨。風煙已暮秋。甌香新菽粟。篝煖故衣裘。意氣臨書健。形骸顧影愁。何時刻中路。秣菴憩山郵。
重九不出遣懷

人生各自適。飛潛魚腹鱗。踏豈得兼。並舍晚風傳藥杵。小窗殘日射書籤。昏瞶但怪花爭墜。衰鬢應無白可添。采菊泛觴終覺懶。不妨閑臥下疎簾。

暇日

身健官閑荷主恩。蕭然不異在家園。一池新墨生吟思。半篆殘香入夢魂。舊友無書知獨冷。小兒有命會瓜蓀。藜羹足餘何事。鍾動三茅又斂昏。

憶三山

柳橋南北弄煙霏。門不常關客自稀。遣僕遠馱黃藥出。呼兒閑取白鷗歸。片雲忽起迷丹竈。潦水初生沒釣磯。一出可憐時屢變。又看刀尺製秋衣。

示子聿

故山誰伴隱茅茨。幸有吾家大耳兒。雨暗小窗分夜課。雪迷長鑷共朝飢。名場未捷寧妨學。史限雖嚴不廢詩。我死汝應傳鉢袋。勉持愚直報明時。

車中作

秋天近霜霰。吳地少風塵。時駕小車出。始知閑客真。新交孰傾蓋。往事漫霑巾。處處皆堪隱。桃源莫問津。

初寒偶出

霜氣凋關樹。晴光入市樓。閑人無造請。佳日亦遨遊。湖白方新出。淮蟻亦易求。秋來幸無病。作意試新裘。

史院晚出

已乞殘骸老故丘。誤恩重作道山遊。龍津雨過橋如拭。鳳闕煙消瓦欲流。直舍小眠鐘報午。歸途微冷葉飛秋。心知伏櫪無千里。縱有王良也合休。

贈洞微山人

我年六十四。獲譴輸鬼薪。束書出東門。揮手謝國人。笑指身上衣。不復染京塵。時有一老翁。祝我當自珍。卻後十五年。迎君浙江濱。我笑語是翁。豈說他生身。事果不可知。邂逅如隔辰。鶴髮無餘鬢。鶉衣仍苦貧。

秋風旱河頭。握手一笑新。買酒烹雞豚。往事得具陳。試數同朝舊。零落增悲辛。與翁雖俱老。肝膽猶輪囷。千里亦命駕。何況託近鄰。秋高佳風月。相過莫厭頻。

九月十四日夜雞初鳴。夢一故人相語曰。我爲蓮華博士。蓋鏡湖新置官也。我且去矣。君能暫爲之乎。月得酒。千壺亦不惡也。既覺。惘然作絕句記之。

初寒對酒

晨起常教置一壺。色如鵝醪滑如酥。侍郎取榼不須笑。司業與錢還復醑。霜路預愁騎款段。雪舟每憶釣菰蒲。寒花滿帽君無笑。醉倒偏宜稚子扶。

午晴試筆

葉脫園林夜夜霜。風和巷陌日猶長。軒車但怪容孤鶴。稊米安能益太倉。此去得非窮李廣。向來元是老馮唐。明窗攬筆聊揮灑。颯颯驚蛇又數行。

夜吟

似睡不睡客欹枕。欲落未落月挂檐。詩到此時當得句。羈愁病思恰相兼。

又

六十餘年妄學詩。工夫深處獨心知。夜來一笑寒燈下。始是金丹換骨時。

卷第五十二

閑詠

身似地行仙，心非欲界天。輿竿聲軋軋，巾角影翩翩。買菊穿苔種，懷茶就井煎。歸來書邊坐，隨處一欣然。

又

久入春農社，新腰老衲包。紙裁微放矮，硯斲正須隨。髻簿能爲祟，方兄任絕交。吾詩無傑句，聊復當談嘲。

遊張園

冷局歸差早，名園得緩行。穿林山驟出，度峽路微平。霜近柳無色，風生蒲有聲。出門還愜悅，滿路夕陽明。

客至

官閑身自得，客至眼殊明。靜算棋生死，閑分酒濁清。悠然劇談罷，偶爾小詩成。但恨桑麻事，無人與共評。

客去

客來拈麈尾，客去拂牀眠。孤夢歸湖上，殘書墮枕邊。幽禽窺戶語，落日傍窗妍。暫爾名朝士，終然是地仙。

無客

今日了無客，儻然塵柄閑。硯涵鴿鷺眼，香斲鷓鴣斑。木落風初勁，雲低雨尚慳。西湖未暇到，臥看曲屏山。

次韻黃宮教見贈景說

士固未易料，世乃有若人。高標與曠懷，豈復容疎親。邂逅京塵中，握手一笑新。我雖讀古書，妙處媿斲輪。敢學狂接輿，歌風笑泣麟。空持鼻端壘，庶幾遇郢斤。獨立臨洪流，欲濟茫無津。君其幸教之，勿棄老病身。

書直舍壁

三黜媿公議。再來仍冷官。志無重奮發。身有轉衰殘。加飯支餘息。添衣禦早寒。歸休應漸近。不是強心寬。

又

道山西下路。杳杳歷重廊。地寂聞傳漏。簾疎有斷香。渠清水馬健。屋老瓦松長。欲出重欹枕。無何見故鄉。

韓太傅生日

珥貂中使傳天語。一片驚塵飛輦路。清霜粲瓦初作寒。天爲明時生帝傅。黃金飾奩雕玉觴。上尊卻食傳恩光。紫駝之峯玄熊掌。不數沙苑千羣羊。通天寶帶連城價。受賜雍容看拜下。神皇外孫風骨殊。凜凜英姿不容畫。問今何人致太平。蘇地萬里皆春耕。身際風雲手扶日。異姓眞王功第一。

懷故山

老怯京塵化素衣。無端拋擲釣魚磯。碧雲又見日將暮。芳草不知人念歸。萬事莫論羈枕夢。一身方墮亂書圍。岷山學士無消息。空想燈前語入微。張季長祕閣久不得書。

西齋遣興

桐葉秋先賈。菊花寒更香。酒邊聊兀兀。身外本茫茫。小憩元非睡。長吟偶似狂。忽然思把卷。一笑就窗光。

雨夜作

十月多蚊蚋。昏昏氣未平。正須三日雨。卻用一霜晴。閉館蕭條意。空階點滴聲。鐘殘撫枕歎。歸夢幾時成。

掩戶

蕉漿那解破餘醒。一讀南華眼自明。香縷映窗疑不散。墨丸入硯細無聲。太山蟻垤初何有。佛國魔宮本亦平。此段光明誰障得。曠懷還與老書生。

臥疾

舊疾乘衰作。長貧與嬾宜。羈愁惟付酒。史課未妨詩。兩入殘更滴。霜逢閏歲遲。新春真筆及。不用卜歸期。

晚歸

無事經秋別鏡湖。詩囊隨處累奚奴。樓頭寒日低將盡。陌上殘泥踏欲無。軒冕豈容關喜慍。簞瓢亦未費枝梧。畫橋綠浦歸來晚。一盞昏燈得自娛。

寂寂

接客厭紛紛。客去喜寂寂。今朝下簾坐。疎雨時一滴。地爐擁破褐。自笑嬾無敵。新春儻得歸。更面九年壁。獨坐有懷杜伯高。

畫橋通小市。深院欲黃昏。愛月先移燭。留香每閉門。李侯有佳句。樂令善清言。老病貪搢枕。何由共一樽。

李允蹈判院送酒四斗予答書乃誤以爲二斗作小詩識媿

冷官誰顧雀羅門。一紙惟君肯見存。堪笑放翁昏至此。乘壺誤寫作朋樽。

感舊贈超師

一聲清蹕出行宮。百尺黃旗繡戲龍。我赴文場君受戒。道邊曾共望高宗。

雜書

世味漸闌如嚼蠟。惟詩直恐死方休。四時風月元無盡。萬里江山更擬遊。

又

一身頂踵無非病。兩飯齋鹽亦闕供。正可清言學夷甫。不須豪氣似元龍。

又

枳籬莎徑入荆扉。中有村翁百結衣。誰識新年歡喜事。一雞一犬伴東歸。雞犬皆實事。

又

身似匡廬老病僧。閉門一衲坐騰騰。雨聲驚斷長安夢。惆悵西窗夜半燈。

送子虞赴金壇丞

與汝爲父子。忽逾五十年。平生知幾別。此別益酸然。念汝髮亦白。執手河橋邊。西行過臨平。想汝小繫船。悠悠揚羨路。渺渺雲陽川。京江昔所遊。想像在目前。今茲兩使君。幸有宿昔緣。汝雖登門晚。世好亦牽聯。顧於賞罰間。其肯爲汝偏。夙夜佐而長。努力忘食眠。醉如新豐酒。清若鶴林泉。棠宜使可愛。蒲正不須鞭。

今日史牒偶少暇。戲作五字

仲夏入都門。堂瓦忽已霜。史館方檢才。我亦廁其傍。三日敗一筆。手脈視芒芒。吏來督日程。炎冷不及嘗。今辰偶少靜。掃地欲焚香。市聲塞我門。騶呼過我牆。鄙性不耐喧。愴悅意欲狂。天生兩窮耳。只堪聽啼螿。

入局

殘年困簡牘。靜坐憶漁樵。鄙意慙輕出。殊恩免早朝。微霜凋綠樹。寒日滿朱橋。悵望滄波友。弓旌豈易招。

鏡湖西南有隱士。人不可得而見。

縱筆

胸中略無一點事。眼底常展數行書。半飢半飽便可爾。衣食何須求有餘。

又

小兒讀書耕且養。老夫入朝仕易農。明春史成許歸去。父子相逐歌年豐。

又

晝倦夜常成美睡。病多老卻未全衰。歸從冊府猶披卷。了卻官書更賦詩。

又

坊遠不聞宮漏聲。三茅鐘殘窗欲明。山童睡熟呼不應。添水拂書翁自行。

送襄陽鄭帥唐老

鄭侯骨相非復常。伏犀貫額面正方。聲名赫奕動天子。家世富貴連椒房。武能防秋北平道。文合落筆中書堂。畿西謀帥國大事。當宁久弄黃金章。一朝丹詔自天下。兩班仰首看騰驤。鄭侯此行端可羨。繡旗皂纛戈如霜。三更傳令出玉帳。平旦按陣來毬場。宿兵萬竈盡貔虎。牧馬千羣皆驍驍。酒酣賦詩幕府和。縱橫健筆誰能當。雖然鄭侯志意遠。虎視直欲吞北荒。榆林雁門塞垣紫。孟津砥柱河流黃。出師有路吾能說。直自襄陽向洛陽。

掩門

身瘦不勝笏，官閒常掩門。漢廷雖好老，楚澤未招魂。硯潤蟾疎滴，香殘鴨尚溫。箇中殊會意，恨欠阿戎言。

又

簌簌落高槐，陰陰長綠苔。只言門晝掩，不道客誰來。足痹思尋壑，愁生欠撥醅。吾兒能問事，梨栗且炮煨。

又

舉手可及屋，積書高拄頤。忽聞疎雨滴，恍記故山時。點染聊成字，呻吟僅似詩。不關才思盡，碌碌本亡奇。

又

寡求忘市遠，易足任囊空。院吏催呈史，家僮笑認窮。鬢毛驚盡白，倉粟飲陳紅。賴有三莪夢，時時到枕中。

自嘲

野老家風子未知，天教甫里出孫枝。遍遊竹院尋僧語，時拂楸枰約客棋。是處登臨有風月，平生跋歷半宮祠。卽今箇事渾如昨，喚作朝官卻自疑。予仕宦幾五十年矣。歷崇道玉局武夷今又忝佑神之命。

乍晴出遊

八十山翁病不支，出門也賦喜晴詩。小樓酒旆闌街處，深巷人家曬練時。本借微風歇帽影，卻乘新暖弄鞭絲。歸來幸有流香在，剩伴兒童一笑嬉。流香盞賜酒名。

送客至湖州市

偶駕雞栖送客行，迢迢十里出關城。誰知小市蕭條處，剩有豐年笑語聲。聊借野風吹醉頰，更憑陂水濯塵纓。故廬想見春回近，鄰曲家家已遍耕。

題史院壁

命薄謀常拙。年衰力轉微。鷓飛元合退。瓶乳偶成歸。汗簡慙靡日。流塵怯染衣。無端霜夜月。應照舊苔磯。

又

精木忘榮謝。閑雲任卷舒。慵爲繞枝鶻。寧作畫魚。羈旅心常折。親朋夢亦疎。溪頭釣船在。恐負此心初。

又

白髮無餘鬢。蒼顏失故丹。旅遊多敗意。大屋每饒寒。出畏霜侵褐。歸乘日暖鞍。若非時得句。何以慰衰殘。

又

苦楚平分路。銅環半掩扉。殘蕪寒不死。敗葉落還飛。責重何由塞。愁生但念歸。非無茅一把。世事苦相違。

寄二子

大兒新作鶴林遊。仲子經年戍吉州。日日望書常至暮。時時入夢卻添愁。得官本自輕齊虜。對景寧當似楚囚。識取乃翁行履處。一生任運笑人謀。

訪客至北門抵暮乃歸

北郭那辭十里遙。上車且用慰無聊。九衢浩浩市聲合。四野酣酣雪意驕。清鏡新磨臨綠浦。長虹橫絕度朱橋。歸來熟睡明方起。臥聽鄰牆趁早朝。

恩除祕書監

羣仙鶴駕去難追。白首重來不自知。才藝荒唐癡獨絕。功名蹭蹬老如期。海邊鄭叟窮耽酒。吳下韋郎曉

學詩扶上木天君莫笑。衰殘不似壯遊時。

寄題儒榮堂朝散大夫徐夢莘著北盟錄上之除直祕閣詞辭有儒榮之語因以名堂來求賦詩
軍容基禍廟謀疎。尙記文登遣使初。只道大功隨指顧。至今遺種費銖鋤。還朝不遣參麟筆。寓直空聞上石渠。剩辦殺青君記取。龍庭焚盡始成書。

夙興

鐘已樓頭動。燈猶帳外殘。霜濃愁枕冷。病起覺衣寬。鶴怨憑誰解。鷗盟恐已寒。君恩等天地。應許納微官。

館中書懷

流落逢明主。恩光集晚途。題名驚手戰。拜閣藉人扶。枉辱三華組。國史實錄及策府。凡忝三職。終歸一腐儒。庫書時取讀。猶足補東隅。

雜興十首以貧豎志士節病長高人情爲韻

仕宦徧四方。每出歸愈貧。寒暑更質衣。笑倒鄰里人。今年作史官。坐糜太倉陳。無如思歸何。日夜望絕麟。區區牛馬走。覬覦蟻蝨臣。恩深老不報。肝膽空輪囷。

又

孟子闢楊墨。吾道方粲然。韓愈排佛老。不失聖所傳。伐木嘗伐根。攻敵當攻堅。坐視日月食。孰探天地全。一木信難恃。要愛大廈顛。安得孟韓輩。出爲吾黨先。

又

聖人固多能。藝乃以不試。嗟予少貧賤。日月成坐棄。矧今耄已及。甘食而美睡。道衰朋友散。斯文凜將墜。閉戶輒竟日。孰與講仁智。厭厭生意盡。何暇議李志。

又

少年喜結交。患難謂可倚。寧知事大謬。親友化虎兕。出仕五十年。危不以讒死。始畏囊中錐。寧取道傍李。老來多新知。英彥終可喜。豈以二三君。遂疑天下士。

又

昔我遊廬山。夜遇東林雪。灰深火正熟。膏減燈半滅。童驚林虎過。僧惜澗松折。至今每追想。可解肺肝熱。那知蓬山夢。忽繼此清絕。殊勝蘇子卿。餐氈持漢節。

又

觀人如觀玉。拙眼喜譏評。得失顧在人。玉固非所病。慶曆嘉祐間。人才於斯盛。王回僅一招。石介棄不聽。乃知天下士。成敗各有命。願君姑安之。天定豈不勝。

又

兩山如峨眉。一水若車輞。吾昔廬其間。百里臨莽蒼。少年手藝木。條幹日夜長。啞啞駕獨轅。迢遞搖兩漿。平生會心地。今乃奇夢想。何時喚鄰翁。煙水行布網。

又

貨財不可居。祿位不可養。我爾本一家。何至臯蘭塵。小夫謀人國。紛紛日煎熬。或謂性本惡。或謂經無褒。

誤人方自此。孰如飲醇醪。清言亦自佳。遺事非徒高。

又

魯山粹而博。韶美曠且真。石渠東觀中。久矣無若人。飛仙騁鳳鸞。豈久混世塵。空餘文章在。常與日月新。我雖不足數。疇昔忝交親。尚想秋燈下。對影歆幅巾。陳山魯山劉儀鳳韶美

又

君子尚大節。又甚惡不情。魯運故可人。用意終近名。千載高夷齊。采薇忘其生。周公述易象。所以貴幽貞。去聖雖已遠。江左見淵明。我讀飲酒詩。朱弦有遺聲。

送任夷仲大監元受之子

往者江淮未徹兵。丹陽邂逅識耆英。叩門偶綴諸公後。倒屣曾蒙一笑迎。敢意癡頑成後死。相從髣髴若平生。小詩話別初何有。一段清愁伴鷓聲。游昔在京口。與陳應求馮園仲查元章張欽夫諸人。從先提刑遊。今三十九年矣。

謝韓實之直閣送燈

玉作華星綴絳繩。樓臺交映暮天澄。東都父老今誰在。腸斷當時諫浙燈。

又

舊友年來不作疎。華燈乃肯寄蝸廬。寧知此老蕭條甚。二尺檠前正讀書。

道山直舍

身世從來一蠶魚。討論猶記八朝初。自憐報國無他技。又領蘭臺四庫書。

館中營繕方一新。而右文殿生芝草甚異。

丹碧參差盛一時。殿楹三秀見金芝。漢庭漫道多才傑。天馬何勞作頌詩。

戲述淵明鴻漸遺事

桑梓榮桑一世豪。區區玩物亦徒勞。品茶未及毀茶妙。飲酒何如止酒高。

雪夜

雪屋透窗明。風簾撮夜聲。披衣擁爐坐。忘卻在都城。

直舍獨坐思成都

錦城花絮送吳船。屈指東歸又幾年。羣玉峯頭身老矣。百花潭上夢依然。青衫尙記稱狂客。白髮寧知作老仙。所恨酒腸非復昔。閑遊空負杖頭錢。

歎老

鏡裏蕭蕭白髮新。默思舊事似前身。齒殘對客豁可恥。臂弱學書肥失真。漸覺文辭乖律呂。豈惟議論少精神。平生師友凋零盡。鼻壘揮斤未有人。

冬晚

思免宵興趁曉班。養慵終覺媿吾顏。浮名半世虛催老。高臥何時復得閑。兩岸夕陽漁浦市。數峯寒霧沃洲山。扁舟來往無窮樂。此事天公豈所悭。

有懷梁益舊遊

土塢鬢髮復雙。悠然殘夢對寒缸。亂山落日葭萌驛。古渡悲風枯柏江。虎印雪泥餘過跡。樹經野火有
空腔。四方行役男兒事。常笑韓公賦下滄。

孤坐無聊每思江湖之適

世上元無第一籌。此身只合臥滄洲。鸛搖漁浦蒼茫月。帆帶松江浩蕩秋。有酒人家皆可醉。無僧山寺亦
閑遊。老來閱盡榮枯事。萬變惟應一笑酬。

夢韓无咎如在京口時既覺枕上作短歌

隆興之初客江臯。連棹結驪皆賢豪。坐中无咎我所畏。日夜酬倡兼詩騷。有時贈我玉具劍。間亦報之金
錯刀。舊遊忽墮五更夢。舉首但覺鐵瓮高。樽前美人亦黃土。吾輩鬼錄將安逃。死生一訣信已矣。所恨膏
火常煎熬。平生不愛葱嶺話。方術亦陋葛與陶。但當東歸棄百事。爛醉海上觀雲濤。

出東城並江而歸

上車容假寐。出郭當閑遊。遠笛臨風起。高帆到岸收。人歸花市路。客醉酒家樓。徑就東窗臥。孤燈欲話愁。

子聿欲暫歸山陰見乃翁作惡遂不行贈以此詩

鐘鳴豈復夜行時。文字相娛賴此兒。欲去復留知汝孝。未言先泣歎吾衰。兩篇易象能忘老。百畝山畝可
免飢。但報家僮多釀酒。一欄紅藥是歸期。明年春晚史院共書必得歸矣。

題趙生畫趙生名廉宣和末得幸廉宣仲爲子言

陸放翁集 十七 劍南詩集 卷五十二

東都畫手排浮萍。天子獨賞一趙生。幅縑尺紙皆厚賜。衆史妬媚都人驚。爾來一筆不復見。好事往往空聞名。奇哉此獨出劫火。論價直恐千金輕。老廉博士最別識。一見自謂雙眼明。老夫寓居旱河上。矮軸正向幽窗橫。飯餘捫腹看不厭。林外重閣高崢嶸。憑誰喚住兩禪客。水邊共聽煙鐘聲。

題宣律師畫像

秀目大頭顱。英姿舉世無。平生一瓦鉢。何處有天廚。

暇日弄筆戲書

天地爲我廬。江山爲我客。北斗以酌酒。恨我飲量窄。人生但閉戶。烏用分菽麥。贈君玉函方。憤憤無皂白。

又

草書學張顛。行書學楊風。平生江湖心。聊寄筆硯中。龍蛇入我腕。疋素忽已窮。餘勢尙隱鱗。此興嗟誰同。

又

胸懷幾雲夢。形骸一槁木。雖客長安城。未始忘退縮。古來豪傑士。強半死空谷。耐事勿動心。貧賤豈汝獨。

立春前後連日風雨

河岸春生綠。齋扉雨送昏。手鈔書半淡。巾漉酒微渾。餅餌連春日。歌呼近上元。所嗟今夕夢。不在石帆村。

武林

皇輿久駐武林宮。汴雒當時未易同。廣陌有風塵不起。長河無凍水常通。樓臺飛舞祥煙外。鼓笛喧呼明月中。六十年間幾來往。都人誰解記衰翁。紹興癸亥子年十九以試齋書來臨安今六十年矣。

立春後十二日命駕至郊外戲書觸目

身兼老病常歸臥。天半陰晴偶出遊。鸚鵡碧籠當戶外。鞦韆畫柱出牆頭。年華冉冉飛雙翼。夢境悠悠寄一區。旅食都門那可久。少留應爲賦春愁。

又

宮雲縹渺漏聲遲。夢裏華胥卻自疑。春淺風光先盎盎。時平節物共熙熙。書籬不捲聞人語。玉勒徐行避酒旗。閱盡蜚流身獨健。恍如隨計入都時。

又

丹成不服怕升天。豈料乘風到日邊。九陌樓臺生細靄。萬家絃管送流年。香車寶馬沿湖路。繡幕金罍出郭船。折簡亦思招客醉。不堪春困又成眠。

春夜

客向燈前老。愁從枕上生。雨聲添好睡。花氣散餘醒。舊事談誰聽。新詩鍊不成。惟當速歸老。鄰父待同耕。

訪客至近郊

訪客西郊路。停車小苑門。閑雲寧有雨。淡日不成暄。鷺下青蘋浦。鴉啼綠樹村。還家未索寞。隨分具魚殮。

車中作

雨過未生塵。寒輕不著人。斷雲飛苑路。高柳暗天津。憔悴非平日。呻吟又一春。絲毫寧有補。空負耦耕身。

倦飛

倦飛何意閉樊籠。冉冉年光過眼空。酒盡不妨沽巷口。詩成多是在車中。曾腰白羽心猶壯。不羨丹砂頰自紅。所歎暮年交舊盡。燈前情話與誰同。

遺興

馬跡車塵不到門。暮年萬事付乾坤。讀書浪苦只取笑。識字雖多誰與論。骨相元非金馬客。夢魂空繞石帆村。濁醪幸有鄰翁共。莫厭從來老瓦盆。

癸亥正月十日夜夢三山竹林中筓出甚盛欣然有作

新春身不到家園。東崦西村役夢魂。一夜四山雷雨起。滿林無數長龍孫。

卷第五十三

謝徐志父帳幹惠詩編

平生聞若人。筆墨極奇峭。相望二千里。安得接談笑。一朝獲其詩。驚喜踰素料。夜窗取吟諷。寒燈耿相照。春容清廟歌。縹緲蘇門嘯。蹴天浙江濤。照野楚山燒。每篇十過讀。玩味頭屢掉。正如啜名酒。雖愛不忍醜。看君亦華髮。氣壓萬年少。昔從茶山辱。賞三語妙。文章老不進。顛賴今可弔。誰知牛車鐸。黃鐘乃同調。願君時來過。勿恤俗子誚。

河橋晚歸

曲巷連新市。層樓近小橋。青帘猶滴雨。綠浦恰通潮。簾影晴方見。笙聲冷未調。斜陽覓歸路。偏愛玉驄驕。

謝王子林判院惠詩編王從楊廷秀甚久

文章有定價議論有至公。我不如誠齋。此評天下同。王子江西秀。詩有誠齋風。今年入修門。軒軒若飛鴻。人言誠齋詩。浩然與俱東。字字若長城。梯衝何由攻。我望已畏之。謹避不欲逢。一日來叩門。錦囊出幾空。我欲與馳逐。未交力已窮。太息謂王子。諸人無此功。騎驢上灞橋。買酒醉新豐。知子定有人。詎必老鈍翁。紹興癸亥。余以進士來臨安。年十九。明年上元。從舅光州通守唐公仲俊招觀燈。後六十年。嘉泰壬戌。被命起造朝明年。癸亥。復見燈夕。遊人之盛感歎有作。

出謁晚歸

萬卷縱橫眼。欲盲。偶隨尺一起。柴荆。淵魚脫水知難悔。野鶴乘車只自驚。苑路落梅輕有態。御溝流水細無聲。紅塵朝暮何時了。促駕歸來洗破觥。

思歸示子聿

平生愛山水。遊陟老不厭。此外惟讀書。垂死尙關念。方昔少壯時。萬里攜一劍。自從還故山。日夜就收斂。蒙恩置三館。寒灰忽光焰。龍鍾氣纔屬。筆力安得贖。同舍多賢豪。揣分無乃玷。春來百疾作。沉痾困鍼砭。思歸入夢寐。歷歷數過店。問津始管濤。繫纜望禹窰。小江齋餅美。梅市將酒醺。雲破山嶙峋。雨足湖潏潏。二月柳勝棗。三月花如染。拄杖幸可扶。吾生尙何欠。更當與稚子。晨暮事鉛槧。天爵古所尊。榮名勿多占。上元後連數日小雨作寒戲作

呼兒取酒敵春寒。病起驕裘剝覺寬。萬事不妨高枕臥。始知老子耐悲歡。

又

春風催暖入園林。一片雲生又作陰。留得梅花三日住。誰云造物本無心。

又

煙籠天闕青鷺溼。水漲官河畫鷁浮。解賦春陰三十首。不應惟有宋鄆州。

又

擬撥殘書出郭行。浮雲忽已敗春晴。窮閭今雨無車馬。臥聽深泥濺屐聲。

出湧金門

出湧金門一黯然。初來猶是紹興前。都人百萬今誰在。惟有西湖似昔年。

書志示子聿

誤上蓬山亦已叨。所悲故里隔胥濤。還家未失屠羊業。報國元無汗馬勞。載筆敢言宗史漢。閉門猶得讀

莊騷。小兒頗與翁偕隱。正恐聲名未易逃。

入春念歸尤切有作

六朝覆育忝遺民。扶德歸來雪鬢新。對酒無歡翻作病。愛詩何得但窮人。腰錢自昔妨騎鶴。絕筆何時到

獲麟。鄉俗嬉遊重端五。剩烹糲糗喚比鄰。筮者。君子五月可遷故山。

書房雜詠

賦性無他嗜。傳家但古書。堯咨洪水際。羲畫結繩餘。異學方攘斥。浮文亦掃除。挑燈北窗下。聊得遂吾初。

又

久客思鄉井。殘軀怯歲年。家能常食粥。口固不言錢。鐵補曾穿硯。韋聯屢絕編。臥聞兒講學。起坐失沉懸。

獨立思故山

露水初生與岸平。橋頭新柳已藏鶯。詩緣遇興玲瓏和。酒爲逢知爛熳傾。青箬買來衝雨釣。烏犍租得及時耕。今朝獨立東風裏。歎息無人會此情。

高歎

俗心浪自作。莽絲世事元知似弈棋。舊業蕭然歸亦樂。餘年至此死何悲。古人可作將誰慕。造物無心豈汝私。已決殘春故溪去。短蓑垂釣月明時。

後寓歎

貂蟬未必出兜鍪。要是蒼鷹憶下鞲。彭澤往歸端爲酒。輕車已老豈須侯。千年精衛心平海。三日於菟氣食牛。會與高人期物外。摩挲銅狄瀟城秋。

新歲頗健寄青城故人

驕氣年來痛自鋤。似能略契度關書。神光出背夜穿帳。胎髮滿頭晨映梳。吾道元知非土苴。此身那可付丘墟。岷山幸有丹爐在。青壁何時共結廬。

新年七十有九

中歲抱沉絲。詎敢望七十。造物偶脫遺。俯仰老已及。寧知辱弓旌。扶櫬去鄉邑。受恩不知報。懷抱空快悒。天門邈難窺。地芥亦爛拾。隨身一詩囊。副以兩藥笈。何當復得謝。浩蕩脫維繫。擘浪畫楫飛。穿雲青鞵溼。餘年尚有幾。登覽當汲汲。狂吟題寺廊。大筆蘸墨汁。

春日訪客於逆旅及郊寺感而有賦

底事經年客帝鄉。風光淡沲日初長。野歌作氣老猶壯。花氣撩人醒亦狂。店壁拂塵尋舊字。寺樓極目送斜陽。告歸不過殘春事。杜曲桑麻亦未荒。

二月二日夢中作

零落薔薇委道傍。更堪微雨漬殘香。象牀玉尺人何在。腸斷新裁錦一方。

對酒作

羨門安期何在哉。河流上泝崑崙開。白雲不與隱居老。孤鶴自下遼天來。春江風物正閑美。綠浦潮平柁初起。暮吹長笛發巴陵。曉挂高帆渡湘水。世間萬變更故新。會當太息摩銅人。脫裘取酒藉芳草。與子共醉壺中春。

西湖春遊

靈隱前。天竺後。鬼削神剜作巖岫。冷泉亭中一尊酒。一日可敵千年壽。清明後。上巳前。千紅百紫爭妖妍。琴瑟鼓聲鞠場邊。鞦韆一蹴如登仙。人生得意須年少。白髮龍鍾空自笑。君不見。灞亭耐事故將軍。醉尉怒訶如不聞。

春晚用對酒韻

吾今歸哉復歸哉。草堂正對湖山開。座銘漆園養生主。屏列柴桑歸去來。一閑可敵八珍美。驪駒在門端可起。不緣老病日日增。世味從來淡如水。故人誰非白頭新。況復眼中無故人。但餘一恨未免歎。掩關睡過今年春。

題館中直舍壁

幾年顛顛去清班。敢辱君恩誤賜環。但厭軟塵隨倦馬。不愁弱水隔神山。下帷寢飯羣書裏。退食雍容衆僚間。行矣東歸竟何補。低回未免媿吾顏。

春晚懷故山

吾廬煙樹間。正占湖一曲。遠山何所似。鬢鬢千髻綠。近山更何人。連娟兩眉蹙。澗蟠偃蓋松。路暗圍尺竹。海棠雖妍華。態度終不俗。最奇女郎花。宛有世外躡。雖云爛出遊。閉戶樂事足。年來殊失計。久耗太倉粟。淖糜不救口。斷簡欲滿屋。兀兀不知春。青燈伴幽獨。

春社日效宛陵先生體

社雨

開歲纔幾時。春社忽已及。茫茫草色深。蕭蕭雨聲急。扶犁行白水。不惜芒屨溼。村童更可憐。赤脚牛背立。

社鼓

酒旗三家市。煙草十里陵。林間鼓瑟瑟。迨此春社時。飲福父老醉。曳我相扶持。君勿輕此聲。可配豐年詩。

社酒

農家耕作苦。雨暘每關心。種黍踟躕。終歲勤收斂。社盞雖草草。酒味亦醇醲。長歌南陌頭。百年應不厭。

社肉

社日取社豬。燔炙香滿村。飢鴉集街樹。老巫立廟門。雖無牲牢盛。古禮亦略存。醉歸懷餘肉。露遺徧諸孫。

局中春興

天知病眼困風沙。借與蓬山闕物華。微暖已迎新到燕。輕陰猶謹欲殘花。幽窗寂寂書圍座。倦枕時時夢過家。立馬庭前還小駐。不妨閑試半甌茶。

久客

顛頓開坊底。蕭條久客心。燕歸知社過。葉密覺春深。燈火愁殘史。塵埃歎素琴。餘生猶有幾。去日苦駸駸。

幽居

花過鶯初懶。泥新燕正忙。病餘猶止酒。睡起獨焚香。拄杖嫌圍窄。棋枰喜日長。北窗元可樂。不是傲羲皇。

春日絕句

吏來屢敗哦詩興。雨作常妨載酒行。忽見家家插楊柳。始知今日是清明。

又

二十四番花有信。一百七日食猶寒。眼中不是無春色。歎息衰翁自鮮歡。

又

門前喚擔買芳菲。白髮猶堪插一枝。舊厭蛙聲今喜聽。繡陰特地作盆池。

又

故園蛺蝶最多種。百草長時花亂開。窮巷春風元不到。一雙誰遣過牆來。

又

桃李吹成九陌塵。客中又過一年春。餘寒漠漠城南路。只見鞦韆不見人。

又

便恐東皇促駕回。小軒無事且啣盃。不知何處桃花落。一片飛從屋角來。

又

介亭南畔排衙石。剝蘚剝苔覓舊題。讀罷南豐數行字。滿山煙雨共淒迷。

又

楊家園裏醉殘春。醉倩傍人拾墮巾。紅紫飄零不須歎。東君渠自是行人。

歎老

晨起梳頭滿鏡霜。豈堪著脚少年場。酒徒分散情疎索。姦敵憑陵意頡頏。寓世極知均醉夢。餘生只合老耕桑。石帆山下暮絲長。待我還東泊野航。

春雨中偶賦

老子年來百事慵。不妨詩課尙能供。殘花已覺胭脂淡。衰酒初嘗琥珀濃。羸病不堪連日雨。孤愁偏怯五

更鐘舊交只有烏藤在。且伴禪牀莫化龍。

戲詠落花

終年栽接待新春。一日隨風委路塵。愁殺主翁渠不管。爭如只作看花人。

思歸示兒輩

睡味甜如蜜。人情冷似漿。流年垂及耄。客子固多傷。興發雞豚社。心闌翰墨場。吾兒姑力穡。莫羨笏堆牀。

東軒花時將過感懷

小軒風月得婆娑。盡付流年與嘯歌。細數一春今過半。正令百歲亦無多。還家常恐難全璧。閱世深疑已爛柯。只欲閉門搥倦枕。晚風無奈落花何。

又

社雨晴時燕子飛。園林何許覓芳菲。江山良是人誰在。天地無私春又歸。殘史有期成汗簡。修門即日挂朝衣。人生命念皆堪悔。敢效淵明歎昨非。

江亭

千載濤江上。書生誦所聞。鑄形尊越蠡。扶眼悼荆員。高鳥衝煙沒。輕舟壓浪分。何由從此逝。揮手謝諸君。

對食

天賦元無滿谷羊。不煩梁肉汗龜腸。忽逢客釜藜羹美。遙憶山廚麥飯香。正有一簞元自足。縱嘲三韭亦何傷。江邊煙岫參差路。便喚漁舟莫治裝。

飽食

飽食無功。媿汗青燈前。顧影歎伶俜。馬衰猶養疑知路。龜久當捐爲不靈。腰下徒誇綬若若。鏡中何止髮星星。石帆回首初非遠。要及清秋斲茯苓。

記夢

旅夢遊何地。分明禹廟傍。不嫌村餉薄。但愛野蔬香。筍市連山塢。菱歌起夕陽。一蓑元所樂。枉道纈衣裳。

初夜暫就枕

街鼓寥寥欲斷時。官閑惟與睡相宜。寒帷臥看初升月。轉枕重思未穩詩。偃仰少安真得策。欠伸徐起頓忘疲。悠然已在羲皇上。莫遣兒曹取次知。

次林伯玉侍郎韻賦西湖春遊

西湖一別不知年。陳迹重尋麥嶺邊。山遠往來雙白鷺。波平俯仰兩青天。殘骸自覺難支久。一笑相從亦宿緣。旅食京華詩思盡。羨公落筆思如泉。

湖中微雨戲作

槎罷青梅指爪香。一盃聊復答年光。莫言老子無人顧。猶得西施作淡粧。

與兒輩泛舟遊西湖一日間晴陰屢易

逢著園林卽款扉。酌泉鬻筍欲忘歸。楊花正與人爭路。鳩語還催雨點衣。古寺題名那復在。後生藏面自應稀。傷心六十餘年事。雙塔依然在翠微。

贈呂次翁詩

君得金丹雖未仙，放翁邂逅與忘年。空能處處誇詩句，不解時時贈酒錢。馬駿極知生冀土，鶴飛會見上
遼天。爾來筆硯塵埃滿，剩欲相從乞一聯。

得子聿到家山後書

日日春陰愁出戶，汝今恰遇十分晴。桑林紫葢纍纍熟，稻壠青秧漫漫平。夢好定知行路健，書來深慰倚
門情。柯橋道上山如畫，早晚歸舟聽榜聲。

題齋壁

小屋閑坊旋卜居，老人也看作吾廬。客知貪睡多留刺，兒未來歸自檢書。草賦萬言那直水，屬文三紙尙
無馮。京塵日念家山樂，況值腰鎌割麥初。

又

殘髮蕭蕭不滿簪，衰年亦自惜光陰。作碑諛墓已絕筆，袖史藏山猶苦心。穿破綠錢多稗筍，驚飛紅雨有
幽禽。北窗睡起摩挲眼，更覺清風直萬金。

又

一櫂秋風去已遲，釣竿恐失野人期。朝回補睡尋幽夢，客去偷閑練近詩。浮世本知緣苦薄，頽齡已與志
俱衰。平生所慕孤山老，剩欲懷茶奠舊祠。

小飲

門生嘲喜眠官長，罵就酒。人生自適爾，嘲罵亦何有。蒸我乳下豚，翳我雨中韭。盃盤雖不豐，吾兒起爲壽。
車馬滿長安，誰肯顧衰朽。作詩付汝藏，千金珍幣帚。

贈傅神水鑑

寫照今誰下，筆親喜君分。得臥雲身口，中無齒難藏。老頰上加毛，自有神。誤遣汗青成國史，未妨著白號。
山人它時更欲求奇迹，畫我溪頭把釣綯。

春晚

新綠成陰小雨時，幅巾蕭散與閑宜。燕歸赴訴經年別，鶯晚分疏出谷遲。曉枕呼兒投宿酒，暮窗留客算殘茶。愴然此意風塵表，正恐羲皇未必知。

天竺曉行

三茆聽徹五更鐘，二竺穿窮九里松。無復官樓沽酒美，但煩湖水照衰容。

又

筍輿啣軋水雲間，慙愧忙身得暫閑。堪笑風中一黃葉，知看天外幾青山。

初見石榴花

吳中四月尚餘寒，細雨霏霏怯倚闌。老子真成興不淺，榴花折得一枝看。

夢遊

太華峯頭秋氣新，醉臨絕壁岸綸巾。世間萬事惟堪笑，禹跡茫茫九片塵。

又
九秋風露洗頭盆。萬里雲煙腰帶羶。小瓮松醪知已熟。與君爛醉不須醒。

又
客途幽夢苦凄凄。滿眼山川意卻迷。條華朝驅雲外騎。河潼夜聽月中雞。

江亭晚思

本自無閑況有忙。遠坊兀兀送年光。太空不礙雲舒卷。高枕寧論夢短長。山破霽煙千萬疊。鳥橫潮浦兩三行。年來自笑詩情減。愁絕奚奴古錦囊。

上章納祿恩畀外祠遂以五月初東歸

身似霜松老不枯。乞骸猶得侍清都。百錢濁酒渾家醉。六月飛蟲徹曉無。美睡不愁閑客擾。出遊自有小兒扶。買山尚恐巢由笑。敢問君王覓鏡湖。

又

黃紙淋漓字似鴉。即今真箇是還家。園廬漸近湖山好。鄰曲來迎鼓笛譁。籩實榜籬收豆莢。盤蔬臨水采芹芽。皇家養老非忘汝。不必青門學種瓜。

又

羣玉峯頭孤夢斷。五雲溪上野舟回。傍人鷗鳥自然熟。到處藕花無數開。麥飯不糜常面槁。柴門閑掩自心灰。雨來正作盆山地。不怕冥冥半月梅。

又

身是風前一斷蓬。經年竊食竟何功。倚天青嶂迎船出。撲馬紅塵轉眼空。網戶餉魚勝丙穴。旗亭送酒等

又

此身惟有一躬耕。乞得餘年樂太平。東觀並遊收昨夢。西湖重到付來生。一堤草露明晨照。半浦荷風颭晚晴。歷歷歸途皆勝事。江亭先聽櫂歌聲。

江亭

旅食京華興已闌。喜扶衰憊出重關。江波蘸岸綠堪染。山色迎人秀可餐。濠上觀魚非至樂。管中窺豹豈全斑。此行便問天台路。剩采靈芝換病顏。

題三茆邵道士雲隱

興盡當年句曲秋。卻歸罨畫弄扁舟。有時信脚來沙際。拾得殘雲補破裘。

又

尙嫌勾漏養丹砂。況種劉郎去後花。罨畫溪頭雲萬頃。不知何處是君家。

受外祠敕

放浪江湖迹已陳。今朝剩喜結銜新。讀騷未敢稱名士。拜賜猶應號散人。歸去還騎款段馬。醉顛重岸接離巾。行行漸近雲門寺。愈信人生有宿因。

感寓

人生難控搏。古謂七十稀。壽夭雖小異。要亦同所歸。君看銜山日。耿耿有餘暉。投牀方息偃。晨起復求衣。萬家同一役。負水關門扉。知叟與愚公。畢竟孰是非。

又

老氏有至言。所貴知我稀。鄙夫急自銜。豈復擇所歸。君看啄在淵。草木借光輝。所以古達人。懷玉被褐衣。吾廬大澤中。歲苦水半扉。朱門固自好。我亦未必非。

肉食

平生愛枯淡。老病未免肉。殺戒苦難持。貪境則易熟。鄙夫五鼎少。達士一瓢足。紛紛刀机間。斷者豈復續。習聞謂當然。乍見可痛哭。長安多貴人。得此試一讀。

贈成封州鋪

綠髮臨邊固已奇。不應顛顛客京師。極知自有封侯骨。但要無忘耕壠時。意氣覆甌書捷布。風流橫槊賦新詩。平生每恨相從少。滿眼關山又語離。

予以壬戌六月十四日入都門。癸亥五月十四日去國。而中有閏月。蓋相距正一年矣。慨然有賦三百六十日。扶衰得出都。略無新伎倆。仍是舊形模。世事蠻攻觸。人情越事吳。勿言蓴菜老。橫櫂醉湘湖。

又

一百七十里。我行誰謂賒。期年初去國。度宿卽還家。事似談春夢。身如寄客槎。石帆村好在。重理舊桑麻。

雨中別同朝諸公

今日別交舊，街泥盈尺深。極知當作惡，追恨闕相尋。笑語關幽夢，江山入苦吟。新秋纔一月，留句待清砧。

又

雨點萬珠落，水聲羣馬奔。纔能脫危歸，未遽定驚魂。一掃枕中夢，卽歸江上村。村醪莫嫌薄，隨事有雞豚。

出城

羈枕不成寐，羸驂曉出城。驛門深閉草，苑樹密藏鶯。老病安閑散，疎慵負聖明。津亭凝望久，惟是待潮平。

宿北錢清

晡時理舟楫，甲夜泊錢清。蠶餅依然美，店家麪有香。已六十年矣，漁燈特地明。酒旗闌道出，風浪拍船鳴。未說鄉間喜，江山亦有情。

老伶

老伶頭已白，相識不論年。時出隨童稚，猶能習管絃。煙林梅市路，風幔放翁船。餘酒堪同醉，君無惜醉眠。

舟行錢清柯橋之間

逾年夢想會稽城，喜挂高帆浩蕩行。未見東西雙白塔，先經南北兩錢清。兒童鼓笛迎歸艦，父老壺觴敘別情。想到吾廬猶未夜，竹間正看夕陽明。

寓蓬萊館

道山方夢斷，稅駕復蓬萊。海上羝應乳，遼東鶴已回。客驚添鬢雪，自笑久心灰。底事妨人睡，樓頭暮角哀。

乍自京塵中得歸故山作五字識喜

門巷如秋爽，軒窗抵海寬。初還綬若若，已覺面團團。引睡拈書卷，偷閑把釣竿。人生快意事，五月出長安。

初歸雜詠

雪滯漁蓑雨墊巾，超然無處不清真。胸中那可有一事，天下故應無兩人。騎馬每行秋棧路，喚船還渡暮江津。酒樓僧壁留詩徧，八十年來自在身。

又

齒豁頭童儘耐嘲，卽今爛飯用匙抄。朱門漫設千盃酒，青壁寧無一把茅。偶爾作官羞問馬，頽然對客但稱貓。此身定向山中死，不用磨錢擲卦爻。磨錢擲卦爻，蜀龍昌期語也。

又

八十可憐心尙孩，看山看水不知回。輒炊香飯桃花飯，淺酌清尊竹葉醅。平地本知多陷阱，羣兒隨處覓梯媒。曠懷只待秋風起，十丈蒲帆海上開。

又

換盡朱顏兩鬢皤，流年如此奈君何。早從學問求開益，晚悟文章要詆訶。每憶壯遊成獨笑，聞逢老伴亦高歌。更餘一恨君知否，千載涪溪石未磨。

又

窗下初收剝啄基，疎籬窳地晝陰移。下巖石潤揮毫後，正焙茶香落磴時。癯老入朝元是錯，期年決去已

爲遲。天公賦子誰能測。只吝功名不吝詩。

又

小園五畝翦蓬蒿。便覺人間迹可逃。盡疏珍禽添爾雅。更書香草續離騷。藥苗可斲攜長鏡。黍酒新成壓小槽。老入鷓鴣行方徹悟。一官何處不徒勞。

又

乞得身歸且浩歌。蕭然生世寄漁蓑。茶甘半日如新啜。墨妙移時不再磨。山寺蹋雲頻獨往。鄰家穿竹自相過。棊枰勝負能多少。堪笑傍人說爛柯。

陸放翁集

劍南詩彙

卷第五十四

湖上急雨

谿煙一縷起前灘。急雨俄吞四面山。造化等閑成壯觀。月明卻送釣船還。

夏日獨居

平生本清淨。垂老更蕭然。已罷客載酒。亦無僧說禪。空庭朝下鵲。密樹晚鳴蟬。長日君無厭。新秋近眼邊。

溪上夜釣

少時妄意學金丹。八十谿頭把釣竿。露溼菱葦姑惡哭。煙深沙渚鷺鷥寒。登臨每歎乾坤大。強健猶應歲月寬。作意清吟未須厭。如山殘藁後人看。

幽事

曳杖驚林鵲。投竿冒澗花。若非詩滿卷。只道夢還家。開士分朝飯。鄰翁喚午茶。悠然吾事足。歸路竝山斜。

夙興

幽夢回千里。高城轉五更。窗虛送月落。竹動喜風生。自笑行安往。猶思坐待明。郊居少僮僕。手自闢柴荆。

文章

文章在眼每森然。力弱才疎挽不前。前輩不生吾輩老。恐留遺恨又千年。

閑遊

觸熱辭行在扶衰。返故丘。亂蟬催落日。病葉報新秋。秣蹇投山驛。尋詩倚寺樓。不因行萬里。那信此生浮。

又

剡縣有佳處。吾行無定期。橫塘供晚釣。孤店具晨炊。約客同看竹。留僧與對茶。人生得自在。更老未爲遲。

又

我出亦何急。輟行還悵然。輕裝幸已具。老健更誰先。野飯聊支日。山蔬不直錢。此生終樂死。何以報皇天。

又

已破京塵夢。還尋剡曲遊。戴星離古戍。衝雨憩山郵。壁認曾題字。門橫昔渡舟。經行固多感。隨處寄悠悠。

夏日

赫赫炎威日正中。冰紈笛簟欲無功。一心願伴沙頭鷺。百計難呼木杪風。纖手削瓜刀似水。小罍分酒甕如空。洗心幸有高樓月。少待寒光出海東。

靖疑浦夜泊

風雨忽如秋已深。短篷今夜繫楓林。溪翁那問市朝事。蔬食不生盃炙心。橫截煙波飛健鶻。遠投沙渚落羈禽。斯遊誰道傷幽獨。猶有殘鐘伴苦吟。

幽興

微官那得繫疎慵。幽興渾如社酒濃。掃盡塵埃無一點。洗空幻翳有千重。百年到處俱羈客。萬里從來付短筇。身在有餘真妙語。盃羹何地欠秋菘。

避暑近村偶題

乞得身歸荷聖時。登臨筋力未全衰。楚祠草合三叉路。項羽廟在項里。隋寺苔侵半折碑。安隱院也。孤店不妨乘月宿。扁舟頻爲看出移。紅塵冠蓋真堪怕。還我平生白接羅。

南堂夜坐

老來日月駛秋令。俄更端蟬號晚愈壯。螢火流空圍西風。吹衣裳。蕭然謝炎官。飽食一事無。散髮坐前軒。河漢西南流。北斗何闌干。坐久光彩髮。缺月涌金盆。欲睡復躊躇。草棘露已圓。徂歲何足道。死生付乾坤。立秋前一夕作。

憶昔

憶昔西遊兩鬢青。卽今鏡裏雪千莖。蛾眉風月猶關念。濯錦鶯花已隔生。避暑有時移枕簟。畏人終日閉柴荆。此懷恨欠詩千首。且寄秋泉一再行。

自嘲

外澤裏常粗元知似瓠壺。仕因無援困學爲。背時孤軒。盡愁城市。風煙落道途。它年遊萬里。不必念歸吳。

夜坐庭中

大澤秋初到，荒庭夜自明。風雲生有候，河漢落無聲。病得新涼減，詩因少睡成。高枝有烏鵲，栖穩若爲驚。

養生

稟賦本不強，四十已遽衰。藥裏不離手，對酒盤無梨。豈料今八十，白間猶黑絲。咀嚼雖小艱，幸未如牛同。昔雖學養生，所遇少碩師。金丹既茫昧，鸞鶴安可期。惟有庖丁篇，可信端不疑。愛身過拱壁，幸以無缺虧。孽不患天作，威惟憂自貽。攀躋豈不苦，害猶在四支。二豎伏膏肓，良醫所不治。衣巾視寒煖，飲食節飽飢。虎兇雖在傍，牙爪何由施。老人不妄語，聊賦養生詩。

飲酒近村

放翁睡多少，行立人扶往。赴鄰里集，痛飲山花插。鬢紅醉歸，棘露霑衣溼。紗巾一幅何翩翩，庭中弄影不肯眠。莫欺此老今衰甚，曾見高皇符越年。

遊山

蕭散湖山路，天教脫羈羈。蟬聲入古寺，馬影度荒陂。樵唱時傾耳，僧談亦解頤。偏門燈火鬧，不敢恨歸遲。

偏門會稽城西南門名。

又

久客喜歸舍，況逢秋氣新。聊乘行屐子，閑覓住菴人。道士青芒屨，高僧白氎巾。更須苔井水，一爲濯京塵。

又

病退行猶倦，山坡每少休。高枝聞鶯語，淺瀨見魚游。偶有堪乘興，元無可遣愁。悠然又終日，爭路有歸牛。

又
古寺不來久。入門空歎嗟。僧亡猶見塔。樹老已無花。世事雖難料。吾生固有涯。懸懸一梳月。十里伴還家。

聞蛩

蟬聲未斷已。蛩鳴。徂歲崢嶸得我驚。八十光陰猶幾許。勉思忠敬盡餘生。

又

稽首周公萬世師。小儒命薄不同時。秋蟲卻是生無憾。名在齋人七月詩。

入秋遊山賦詩略無闕日。戲作五字七首。識之以野店山橋送馬蹄爲韻。

束髮初學詩。妄意薄風雅。中年困憂患。聊欲希屈賈。寧知竟鹵莽。所得纔土直。入海殊未深。珠璣不盈把。老來似少進。遇興頗傾瀉。猶能起後生。黃河吞鉅野。

又

我昔西遊邊。萬里持一劍。風殄不自恤。露宿未嘗厭。棧危餘漢燒。山斷有秦蹇。敢誇胡羊美。但懷巴酒醜。回首四十年。遠遊每關念。秋風跨蹇驢。尙喜道傍店。

又

周南太史公。道家蓬萊山。塵凡不可料。亦復居其間。屢奏乞骸骨。寬恩許投閑。羽衣碧玉簡。尙綴仙官班。黃精掃白髮。面有孺子顏。簡寂吾家舊。飄然時往還。

又

我行剡中路。茆店連谿橋。驢弱我亦飢。解鞍雨蕭蕭。投牀得小憩。炊黍烹藥苗。舉手謝主人。去路盤山腰。沃洲在何許。秋葉紅未凋。遊僧不可逢。聊須問歸樵。

又

怕事真驚癡。老作入都夢。頭顛今何似。尙復堪自送。聯裾預登瀛。策馬從上雍。年衰當亟去。恩大容力控。雖言解朝藉。尙予侍祠俸。明年卽八十。日月難把弄。著書則已矣。努力謀社稷。

又

吾才如塞人。何計逐奔馬。吾文如醜女。惟藉粉黛假。向來已歸休。畢志向林下。塊然一愚公。初不繫用捨。國恩定難報。衰涕時一灑。人本不勝天。豈復論衆寡。

又

驢病比已損。秋風輕四蹄。朝遊支遁寺。莫涉千吉谿。青嶂環孤村。綠波溢橫隄。吾行本無定。所至窮攀躋。細推亦何樂。正類好鍛嵇。自今當務本。春蕪飽鉏犁。

村居

白首歸來亦灌畦。任教鄰里笑栖栖。道心寧感兩雌雉。生計惟存五母雞。不恨閑門可羅爵。本知窮巷自多泥。暮聞鼓角猶人境。更欲移家入剡溪。

又

游子從來念故鄉。我歸仍得值豐穰。粗繪裁製襜褕暖。肥烹烹調餽飴香。對客不妨依几杖。呼兒時與話

耕桑卻慙未解真齊物。猶揀山村靜處藏。

又

青藜杖出氛埃外。白版扉開水竹邊。造物與閑仍與健。鄉人知老不知年。齋居每袖持螯手。妄想寧流見麴涎。昨夜小庭風露冷。菊花消息已先傳。

又

石帆山下樂誰如。八尺輕舸萬頃湖。能讓人家分小榼。愛棊道士寄新圖。條枚積地樹雞柵。溝港接筒澆芋區。父子還家更何事。斷編燈下講唐虞。

六藝示子聿

六藝江河萬古流。吾徒鑽仰死方休。沛然要似禹行水。卓爾孰如丁解牛。老僮簡編猶自力。夜涼膏火漸當謀。大門舊業微如綫。賴有吾兒共此憂。

七月十七夜五更起坐至旦

秋容淡如水。昨暮到江城。世事違高枕。年華入短檠。書中固多味。身外盡浮名。倚壁方清嘯。蓬窗已送明。

書懷

不飢不寒萬事足。有山有水一生閑。朱門莫管渠癡絕。自愛茅茨三兩間。

又

老人舉動須扶掖。跣婢椎奴少得閑。從此漸須都畫斷。正如避難在空山。

又
蝸廬自稱野人居。三尺明窗已有餘。從此要當常省事。時時小喜欲何須。

又

首宿堆盤莫笑貧。家園瓜瓠漸輪囷。但令爛熟如蒸鴨。不著鹽醃也自珍。

湖上秋夜

湖上山銜落月明。釣筒收罷葉舟橫。不知身世在何許。一夜蕭蕭蘆荻聲。

書感

俗學方譁世。遺經寔已微。斯文未云喪。吾道豈其非。拔本寧餘力。迷途幸識歸。新涼起衰疾。燈火耿郊扉。

示兒

得道如良賈。深藏要若無。冶金寧輒躍。韞玉忌輕沽。儒術今方裂。吾家學本孤。汝曹能念此。努力共枝梧。

書適

北嶠千梢竹。東軒八尺牀。徧行欣老健。熟睡領新涼。海石陳書几。陶詩貯藥囊。時時一到眼。亦足傲羲皇。

海石。英石也。東坡詩云。海石來珠浦。

又

心清絕慾早。才薄去官多。月下時閑釣。雲邊每浩歌。野堂青草覆。山市白驢過。也有成功處。新降百萬魔。

放慵

往者耕仍養。中間仕易農。屢辭身老病。每荷上矜從。進塊門三載。歸無畝一鍾。扶持得良藥。更放幾年慵。

登臨

虛道竊懷惡。登臨亦解顏。健嫌山路淺。狂恨酒尊慳。親友多疎索。漁樵自往還。有詩仍嬾記。零落水雲間。

寓歎

有位方憂失。無家豈念歸。賢愚竟難得。今昨兩皆非。世事無長算。人情忽駭機。細思如意處。惟有釣魚磯。

居家

爲吏心雖嬾。居家力尙餘。刈茅支屋漏。栽棘補籬疎。就井磨樵斧。持錢鍛藥鉏。毋勞歎徒步。野鶴豈堪車。

舟中作

野老元無事。乘閑偶一來。微風市樓笛。落日寺街槐。梨大圍三寸。鱸肥疊四腮。鄰船不識面。呼與共銜盃。

築舍

築舍水雲鄉。蕭然似淨坊。粥鑪菘米滑。羹釜藥苗香。素壁圖嵩華。明窗讀老莊。與人元淡淡。不是故相忘。

雜感

孔欲居九夷。老亦適流沙。忠信之所覃。豈間夷與華。況我州閭間。相視等一家。老稚各自力。勉蹈思無邪。

又

十月可釀酒。六月可作醬。兒曹念乃翁。左右日供養。比鄰有老疾。亦復致一餉。老老以及人。此義古所尙。

又

肉食養老人古雖有是說修身以待終何至陷饕餮晨烹山蔬羹午漱石泉潔豈役七尺軀事此膚寸舌

又

一氣不遺變雨霽皆有符死非一旦至小疾爲前驅人能謹察之豈有倉卒虞哀哉不知此雖悔良難圖

又

養生孰爲本元氣不可虧秋毫失固守金丹亦奚爲所以古達人一意堅自持魔鬼雖百萬敢犯堂堂師

送陳懷叔赴上臯酒官卻還都下

奇才初試發礪刀正馬秋風到上臯地近雖同三輔重時平無復五陵豪極知穩步煙霄路卻要微知郡

縣勞歸去平津開首燕吐茵應復忤西曹

歸三山入秋益涼欣然有賦

藥物扶持美食眠鏡湖仍遇素秋天一年強起歸猶健百口相看喜欲顛碧瓦朱甍無傑屋烏篷畫楫有新船道山頂上雖清絕萬頃煙波始是仙

子聿至湖上待其歸

舍北大吹迎歸航老翁待兒樓胡牀碧雲忽起欲吞日黃葉自凋非實霜十風五雨歲則熟左殮右粥身其康豈無深谷結茅屋文字讀易消年光

晚行舍後

略約東邊一徑深杖藜行飯當登臨稷山竝每出遙望馬次生雲或暮陰殘我自與遊子感少年誰解老

人心歸來燈火參差夜。倦倚胡牀續短吟。

秋夜讀書有感

妄意斯文力弗勝。苦心猶欲付雲仍。數編魯壁家傳學。一盞吳憎夜講燈。南犬回應多吠雪。夏蟲那得解知休。但令吾道常無墜。飲水何妨枕曲甌。

又

齒髮凋殘志有餘。一編聊復遂吾初。老來每恨無同學。夢裏猶曾得異書。家世偏憎暮青紫。兒童切莫話龍豬。正令世世皆農圃。康讓何妨化里閭。

治圃

小圃漫經營。栽培抵力耕。土鬆宜雨點。根稚怯鉏聲。紅粟方當熟。清陰亦漸成。每來常竟日。聊得暢幽情。

村醉

髮已凋零齒已疎。飽諳成敗更誰如。貴人豈得常金屋。丞相那知起草廬。久泛江湖知釣術。晚歸壠畝授農書。一尊徑就村翁醉。未肯英雄許本初。

病臥

蕭條風雨又經旬。病臥真成不覲鄰。跨馬難酬四方志。就書空盡百年身。碧花引蔓綠疎竹。黃雀呼羣啄破囷。君見此時風味否。肯辭人笑藁裝貧。

書悔

衣食須耕稼。無端浪出遊。客途南北雁。世事兩晴鳩。蓬轉何時已。灰寒善自謀。江湖千萬里。何處欠漁舟。

航海

我老臥丘園。百事習慵惰。惟有汗漫遊。末語意先可。或挂風半帆。或貯雲一舸。趁潮亂鳴榔。過嶺細扶柁。近甌凌煙海。自笑一何果。邂逅得奇觀。造物豈付我。古湫石蜿蜒。孤島松磊砢。雁蕩大龍湫。石如騰龍東。漢無境有巨松。傳爲堯舜時物。湘竹闕娥祠。淮怪深禹鑿。鬼神駭犀炬。天地赫龍火。瑰奇窮萬變。鯤鵬尙么麼。紛紜旋或忘。追記今亦頗。作詩配齊諧。發子笑齒瓊。

黃犢

賣刀買黃犢。用以事耕稼。淒風山北秋。缺月溪西夜。小童摺竹枝。相呼聊一跨。秋來作欄成。參差出林罅。青煙起草積。微火近茅舍。未言東作功。此景已可畫。

秋夜

老覺人間歲月逾。悄悄窗戶一燈幽。讀書已廢虛長夜。護塞無期負盛秋。病齒何堪食梁肉。殘軀惟念製裘裘。重陽臥看登高侶。滿把茱萸只自愁。

自昏頗廢觀書以詩記其始時年七十九矣

少時業詩書。慕古不自量。晨暮聞弦誦。左右紛朱黃。積書山崇崇。探義海茫茫。同志三四人。辯論略相當。落筆輒千言。氣欲吞名場。忽焉六十年。綠鬢久已霜。食必觀本草。不療病在牀。今秋又病目。始覺閑味長。車馬既不至。亦無書在傍。一坐漏十刻。甚倦則倚牖。蝴蝶蟻吾前身。華胥吾故鄉。童子亦聽睡。不復呼燒香。

假山擬宛陵先生體

疊石作小山埋瓮成小潭。旁爲負薪徑。中開釣魚菴。谷聲應鐘鼓。波影倒松楠。借問此何許。恐是廬山南。

秋興

拒霜慘淡數枝紅。石竹凋零不滿叢。小蝶一雙來又去。與人都在寂寥中。

又

足力蹒跚少迎客。目視昏短常廢書。賴是門前秋水長。沙鷗未遠與人疎。

湖上夜歸

滿鏡新霜奈老何。扁舟日日醉顏酡。樂如逐兔牽黃犬。快似磨兵卷白波。霜近菊花猶未見。雨餘橙子已堪搓。湖桑小市人無數。爭看山翁擊楫歌。

晨起

戒婢簪衣徹屣屐。呼兒滌硯作噏麈。須臾開卷東窗下。卽是先生無病時。

飯飽晝臥戲作短歌

爲農得飯常半菽。出仕固應甘脫粟。藜藿自美何待糝。況復畏人嘲首菘。今年還東已八十。視聽雖存髮先禿。安能賣藥謀助道。道流賣藥自給名。日助道。但有知分堪養福。水車轆轤鄰餽魚。社鼓琴琴衆分肉。可憐老子暫膨脝。午睡窗邊自捫腹。里中車蕩取魚舊例以所得分遺。

孤學

孤學雖遠俗。猶爲一腐儒。家貧占力量。夜夢驗工夫。正復安三徑。寧忘奏六符。殘年知有幾。自怪尙區區。

自嘲

儒生窮事業。老去轉荒唐。長日中分睡。殘年有底忙。書常爛終卷。詩亦少成章。忽棄蓬窗去。花前又一觴。

試筆

清談數語猶疑過。平地徐行亦慮危。酌酒淺深須在我。更衣單複要隨時。

秋思

烏柏微丹菊漸開。天高風送雁聲哀。詩情也似并刀快。翦得秋光入卷來。

又

水際柴門一扇開。白頭羸病亦堪哀。阿誰得似桃榔杖。肯爲閑人萬里來。

又

蒼顏莫怪少曾開。觸目人情但可哀。死去肯爲浮世戀。此身元自不應來。

晨起偶得五字戲題棗後

推枕悠然起。吾詩忽欲成。雖云無義語。猶異不平鳴。有得忌輕出。微瑕須細評。平生五字句。垂老媿長城。

野步

場圃農功畢。村鄰醉叟多。野風吹慘澹。海氣起嵯峨。婦女窺籬看。兒童拾穗歌。身閑不自樂。如此暮年何。

喜晴

一夜霜風掃積陰。檐間喚起有鳴禽。滿窗零亂梧桐影。鄰巷蕭條雞犬音。文史漸宜精討閱。湖山仍得飽登臨。園丁也解娛翁意。瓊果移花已滿林。

自箴

帶寬非復昔年腰。頰上餘丹日日消。切勿更爲兒戲事。解猿放鶴各消搖。

自喜

身閑仙不遠。食足富何加。庭臥長生續。園開手種花。狂歌聲跌宕。醉草筆橫斜。八十明年是。衰殘豈復嗟。

自詒

病中看周易。醉後讀離騷。不解書驢券。安能問馬曹。身隨遊宦困。氣爲屏居豪。清旦南堂坐。稽山秋更高。

又

莊語畏如排。端居要若齋。清虛集心腑。枯槁見形骸。自計恐無用。何傷老不諧。人生須廣大。勿作井中蛙。

對酒示坐中

綠橙丹柿鬪時新。一笑聊誇老健身。大度乾坤容縱酒。多情風月伴垂綸。初生京洛逢時泰。幼度江淮避虜塵。八十年間窮不死。猶能潤底束荆薪。

秋晚衰疾稍平聊識喜懷

世事紛紛博局中。豈知造物貨衰翁。短筇倚壁知身健。小甌炊粳喜歲豐。霜近平郊多雁落。雨頻斷港有船通。更餘一事生詩興。烏柏新添數葉紅。

偶出至近村

神爽無酣寢，身閑有劇焚。說詩橫柳粟，除酒挈鴟夷。寺古殘香冷，溪深獨木危。往來元信步，不是赴幽期。

書宛陵集後

突適元和作，巍然獨主盟。諸家義皆墮，此老話方行。趙璧連城價，隋珠照乘明。粗能窺梗槩，亦足慰平生。

鄉居

客問鄉居事，久居君自知。度橋徹士悔，過社旅人悲。社散家分肉，農閑衆築陂。牆東新洗竹，我亦補藩籬。

重九無菊有感

重陽未見一枝菊，它日菊開生我愁。高興亭中香滿把，令人北望憶梁州。高興亭在南鄉子城西北，正對南山。

南山。

卷第五十五

記東村父老言

原上一縷雲，水面數點雨。夾衣已覺冷，秋令遽如許。行行適東村，父老可共語。披衣出迎客，芋栗旋烹煮。自言家近郊，生不識官府。甚愛問孝書，請學公勿拒。我亦爲欣然，開卷發端緒。講說雖淺近，於子或有補。耕荒兩黃犢，庇身一茅宇。勉讀庶人章，淳風可遠古。

試筆

用筆如用人。利鈍烏可常。必欲責其全。無乃廢所長。宣城與晉陵。聲價略相當。不知今何年。森然集龜堂。和墨若蟹黑。擣紙如銀光。心手適調一。運此紫毫鋒。前卻俱稱意。六驥馳康莊。聊復取一快。詎必師鍾張。

曠懷

曠懷何啻等沙鷗。外物相挺劇火牛。若信本心無一事。始知平地起閑愁。每逢達士惟長歎。欲棄浮生尙小留。今日微霜好風日。短筇且領鏡湖秋。

夢行小益道中

稜雲零亂馱鈴聲。驛樹輪囷樺燭明。清夢不知身萬里。只言今夜宿葭萌。

又

釋柳林邊候吏迎。血塗草棘虎縱橫。分明身在朝天驛。惟欠嘉陵江水聲。

秋樹

秋風一夜吹橋樹。明日來看已非故。吳中九月霜尙薄。落葉半隨飛鳥去。老人心事感凋零。只欲逢秋醉不醒。范寬用意真難解。偏寫丹楓作畫屏。

雜感

鶴乘軒車已堪歎。狐載鬪饅何可親。勸君一笑掃除盡。來作人間百歲人。

又

讒口安能作福基。吾曹與廢豈無時。向來何事令公怒。問著渠儂自不知。

又

艱危寧度瘦驢嶺，奔走莫隨肥馬塵。困厄終身元自好，可憐癡子恨無津。
瘦驢嶺在綿州，前輩或有作驢嶺，蓋誤也。

又

一尊易致蒲萄酒，萬里難逢鸛鶴樓。何日羣胡遺種盡，關河形勝得重遊。

又

老境睡多行立少，浮生會少別離多。安得此身重壯健，一盃朋舊共高歌。

又

苦熱惟憂不復涼，轉頭忽已見清霜。道人若悟無寒暑，墮指流金總道場。

柳橋秋夜

帝青萬里月輪孤，掃盡浮雲一點無。正是吾廬秋好夜，上橋渾不要人扶。

訪隱者不遇

秋高山色青如染，寒雨霏微時數點。蘭亭在眼久不到，每對湖山輒懷歎。雅聞其下有隱士，漠漠孤煙起松庵。獨攜拄杖行造之，枳籬數曲柴門掩。笛聲尙近人已遯，日曷薄糜終不貶。何如小住共一尊，山藜野芋分猿嘍。

蒼檜

北風捲野天晝晦。雨如弩鏃穿屋背。老夫下牀行踞屐。稚子抱書坐持蓋。豈無長楸與巨竹。幹折枝摧共顛沛。孰能不動安如山。屹立庭前獨蒼檜。

農家歌

村東買牛犢。舍北作牛屋。飯牛三更起。夜寐不敢熟。茫茫陂水白。纖纖稻秧綠。二月鳴搏黍。三月號布穀。爲農但力作。瘠鹵變衍沃。腰鎌卷黃雲。踏碓舂白玉。八月租稅畢。社瓮釀如粥。老稚相扶攜。閭里迭追逐。坐令百世後。復覩可封俗。君不見朱門玉食烹萬羊。不如農家小飯吳粳香。

君子非好異

君子非好異。本意亦從衆。居然迫所媿。難復趨一闕。孟軻遇齊王。夫豈不欲用。萬鍾養弟子。乃似以利勸。惟其有辭受。百世尊道統。豈惟聖賢哉。學者固所共。

獨登東巖

早慕功名已絕癡。晚耽筆墨愈無奇。牧羝未乳身先老。化鶴重歸語更悲。朋舊在亡成斷夢。山河與廢入孤吹。悠然獨倚闌干笑。又過簪萸泛菊時。

灌園

八十身猶健。生涯學灌園。溪風吹短褐。村雨暗衡門。眼正魔軍怖。心安疾豎奔。午窗無一事。梨棗弄諸孫。

晨起

老尚貪書課。黎明卽下牀。不驚天乍冷。更覺意差強。蠅滴初添水。螭爐旋炷香。浮生又一日。開卷就窗光。

龜堂

莫笑龜堂老殘年所得多。賦詩傳海估。說法度天魔。天矯竹如意。鱗皴松養和。拈來示諸子。無事數相過。

蜀漢

蜀漢崎嶇外。江湖莽蒼中。冷官家世事。獨立古人風。已老學猶力。久窮詩未工。悠悠千載後。此意與誰同。

客有言太山者因思青城舊遊有作

我登青城山。雲雨顧在下。月色縞巖谷。欲睡不忍捨。明朝下半嶺。頗怪哀湍瀉。山麓雲未歸。平地泥沒踝。乃知宿處高。所恨到者寡。有客談泰山。昔嘗宿石室。夜分林采變。鳴谷看浴日。九州皆片塵。盛夏猶慘栗。我聞思一往。安得飛仙術。但願齊魯平。東封扈清蹕。

遊近村

度壑穿林脚愈輕。憑高望遠眼猶明。霜凋老樹寒無色。風掠枯荷颯有聲。泥淺不侵雙草屨。身閑常對一茶椀。茆檐蔬飯歸來晚。已發城頭長短更。

疎雨

檐間秋雨時一滴。絕似漢嘉方響泉。不聽此聲三十載。夢回搔首一凄然。

秋曉

菅席多年敗見經。布衾木枕伴殘更。嚙嚙天際雁初度。喔喔舍傍雞亂鳴。貸米未回愁竈冷。讀書有課待窗明。一秋最恨空塔雨。滴破羈懷是此聲。

癸亥初冬作

開歲忽八十古來應更稀。我存人盡死。今是昨皆非。愛酒陶元亮。遺鄉丁令威。目前尋故物。惟有釣魚磯。

兀坐久散步野舍

澗洞風號木蕭條。雨滴堦。忽思穿雨屐。聊用散孤懷。赤脚春畬粟。平頭拾澗柴。先師有遺訓。萬事忌安排。

胡翼之先生教徐節孝曰。莫安排。

法雲寺

不到法雲久。秋高初一來。樹供孤白美。池蘸水紅開。橋畔逢遊衲。雲邊數過梳。同遊恨歸早。珍重約尋梅。

小徑登東山繚行自西北至溪上是夕子聿置酒

行穿犖确度崆嶒。小立風中客袖斜。衰草雙雙點飛蝶。長空一一送栖鴉。荻洲薄暮收魚網。茆舍初寒響轉車。誰道老人多感慨。未妨尊酒樂年華。

美睡

老來胸次掃崢嶸。投枕神安氣亦平。漫道布衾如鐵冷。未妨鼻息自雷鳴。天高斗柄闌于曉。露下雞鳴隔膊聲。俗念絕知無起處。夢爲孤鶴過青城。

逆旅

秋晚南山行小蹇。就店秣我亦念少休。無奈市兒聒。嗟爾亦坐飢。鏹銖苦爭奪。其心計亦厭。陷溺無自脫。我欲救其本。汝勿謂迂闊。要傾江海大。一洗錐刀末。人生顧須幾。卒歲惟一褐。有地即可耕。何山不堪活。

東園

今日天霽霜。又見一日晴。晴寒病良已。扶杖東園行。瓦鼓息我倦。靜聽幽鳥鳴。花菓四十株。手自培養成。疎密無行列。東園蓋強名人。看不滿笑。聊用適我情。

雜感

買薪賃粟不曾知。一事無營盡日嬉。蓋老卻如童稚日。早眠晏起食無時。

又

古言忍字似而非。獨有癡頑二字奇。此是龜堂安樂法。大書銘座更何疑。

又

平生所聞宋華子。病忘乃與知道鄰。老夫歷盡世間事。始覺此公真可人。

又

羲皇一晝開百聖。學者即今誰造微。文詞害道第一事。子能去之其庶幾。

渡頭

蒼檣丹楓古渡頭。小橋橫處繫孤舟。范寬只恐今猶在。寫出山陰一片秋。

小飯賞菊

菊得霜乃榮。性與凡草殊。我病得霜健。每卻稚子扶。豈與菊同性。故能老不枯。今朝喚父老。采菊陳酒壺。舉衰舞翩僊。擊缶歌烏烏。秋晚遇佳日。一醉詎可無。

與兒輩小集

老子秋來樂事稠。吳杭新漕酒新瀉。矮黃不待園官送。小白每煩溪女留。頓飽可憐頻夢與。半酣自喜有兒酬。不如意事何窮已。且放團欒一笑休。

舍北晚眺

平野沉寒日。遠村生暮煙。離離立紅樹。點點散烏犍。暫出不逾歲。告歸仍一廛。江湖初見雁。著眼送雲邊。書室獨處欣然有詠。

鑿空學道本無師。歇盡狂心頗自奇。閑坐始知冬日永。高談未覺老年衰。治棺準備膏肓日。釀酒枝梧雨雪時。常笑祖龍癡到底。一生辛苦覓安期。

冬初至法雲

曉日曛曛露未乾。東中十月始微寒。牛閑處處農功畢。米賤家家酒盞寬。煙浦白鷗迎鼓柁。漁村紅樹入憑闌。歸舟莫恨無人語。手把陶詩側臥看。

感憤

形勝崎嶇在。英豪趙魏多。精兵連六郡。要地控三河。慷慨鴻門會。悲傷易水歌。幾人懷此志。送老一漁蓑。

記老農語

霜清楓葉照溪赤。風起寒鴉半天黑。魚陂車水人竭作。麥壟翻泥牛盡力。確舂玉粒恰輸租。籃挈黃雞還作貨。歸來糠糶常不糜。終歲辛勤亦何得。雖然君恩烏可忘。爲農力耕自其職。百錢布被可過冬。但願時

清無盜賊。

村舍

剝啄敲村舍。丫又揖主人。新牆拆龜兆。疎瓦斷魚鱗。紅粒炊畬粟。青煙鬱澗薪。得牀思熟睡。寒犬苦猶狺。

自述

偶策青驢出。還將白鶴隨。鍊丹留日觀。采藥上天池。送客清秋棹。留僧靜夜棋。從來閑姓字。不遣世人知。

泊舟湖橋酒樓下

縹緲雲邊罨畫樓。空濛雨外木蘭舟。誰知老子清狂甚。獨占城南十里秋。

菴中雜書

蒲龕坐久暖如春。紙被無聲白似雲。除卻放生并施藥。更無一事累天君。

又

謀生安用苦區區。豆飯藜羹未遽無。若使天年猶合活。不妨自有穀於菟。

又

萬物竝作吾觀復。衆人皆醉我獨醒。走徧世間無著處。閉門鋤菜伴園丁。

又

茅茨一室有餘樂。轍環四海誰知心。鞭耕墾上鴻鵠志。長嘯山中鸞鳳音。

連日暴下。蕭然不支。戲作

老子心如行脚僧。秋風久已辦行藤。紙衾夜夜江湖夢。小復遲留待判懲。

大風

風大連三夕。衰翁不出門。兒言卷茅屋。奴報徹蘆藩。狼籍鴉鷓壑。縱橫葉滿園。乘除有今日。紅日上東軒。

野興

掃盡紅塵閉是非。舍傍好在舊苔磯。壺中春色松肪酒。江上秋風檝葉衣。一片共知雲偶出。千年誰識鶴重歸。勿言野外無供給。雪後連山藥草肥。

又

樓蘭助業竟悠悠。聊作人間汗漫遊。半谷雲霞丹竈熟。一天雷雨劍池秋。倘伴藥市經旬醉。問訊巢仙數夕留。卻過故廬應一歎。岸邊猶繫采菱舟。

若耶村老人

昔聞若耶村。意象乃物外。皤然阡陌間。來往幾貽背。無論百歲翁。甲子數至再。我來親見之。殊未輟耕耒。曩事一一言。多聞雜諄誨。回頭指丁壯。此是曾玄輩。有翁又過我。家有孫五代。指呼取斗酒。山果雜細碎。願我使之年。慙縮不能對。恭惟大父行。不覺投杖拜。養生惟一齋。此在吾術內。翁能信踐之。成就乃爾大。我今纔耄及。耳目已憤憤。長庚雖餘輝。敢與明月配。

霜曉

霜有連蕩白。林無一葉青。紙衾圍栗烈。風響送東丁。酒盡尊餘滴。灰深火撥星。蓬窗了無事。默坐養黃庭。

山澤

我本山澤人，散誕傲簪裳。宦遊五十年，天遣還農桑。東阡南陌間，吾亦愛吾鄉。楚祠坐秋社，隨寺觀夜場。醉迷采蒼耳，旅飯炊黃粱。自疑太古民，百年樂未央。有時閑暇時，頗復誦老莊。亦嘗遊岷峨，略聞度世方。氣爲東道主，主安客自長。卻後五百年，見我瀟城旁。

遠遊

姓字不須通，從來號放翁。月明登暑雪，木落過秋風。成都武擔山，暑雪堂歸州。巴東縣江上，秋風亭皆絕。景處題僧壁，時時臥釣篷。始知侯萬里，未必是英雄。

北窗

破屋頽垣嘯且歌，一窗隨處寄婆娑。閩人每歎同儕少，遇事方知去日多。雲溼沙洲秋下雁，雨來荻浦夜鳴鼉。何時更續扁舟興，剩載鄣筒醉綠蘿。綠蘿溪在夷陵。

醉題

目光炯炯射車牛，何至隨人作浪愁。身處江湖如富貴，心親魚鳥等朋儔。孤帆滅沒三湘曉，野店荒寒二華秋。醉墨不容塵土汗，憑君試訪寺家樓。

幽居

練褐藤冠物外裝，下簾留住欲殘香。瀟湘客過誇漁具，瀟皖僧來說藥方。詩未遽衰猶跌宕，書雖小退亦軒昂。不緣厭靜尋幽事，老去無如白日長。

連陰欲雪排闥

先生經旬飯坐塵。藜羹不汚白氈巾。魯連敢謂天下士。摩詰要是山中人。王維自稱山中人。溪從灘瘦愈刻厲。山自木落增嶙峋。雲重惟愁雪欲作。梅花忽報一枝春。

示子聿

古學尊皇極。淫辭斥異端。人才如爾少。老健及吾難。身退桑榆暖。家貧菽水歡。人生粗足耳。衣食不須寬。

項里溪上見珍禽。曰溪鵲相隨數十步不去。涉溪來過東溪老。斷枝槁葉紛如掃。忽逢溪鵲昔未識。言語惺惚羽毛好。異哉馴狎若可呼。迹雖甚疎情有餘。上穿蒼煙立高樹。下踏白石窺遊魚。老夫日日溪頭行。見此不妨雙眼明。定交物外從今始。豈獨沙鷗可與盟。

冬夜對書卷有感

人生如夢終當覺。世事非天孰可憑。萬卷雖多當具眼。一言惟恕可銘膺。所聞要足敵憂患。吾道豈其無廢興。白髮蕭蕭年八十。依然父子短檠燈。

項王祠

項里溪水聲潺湲。溪上青山峨鬢髮。煙村人語墟市合。石橋日落漁樵還。堂上君王凜八尺。大冠如箕熊豹顏。築祠不知始何代。典祀千載誰敢刪。蕭清亭障息剽奪。掃蕩螟螣囚神奸。范增玉斗久已碎。虞姬粧面留餘潛。小人平生仰遺烈。近廟欲結茅三間。時時長歌拔山曲。醉倒聊慰窮途艱。

入城

宿凍迷車轍。晨霜縞瓦溝。路長休小驛。風勁透重裘。質質殘軀健。芒芒去日遒。親交喜握手。隨處小遲留。

出城

病鶴寒彌瘦。孤松老不枯。非關畏軒冕。本自樂江湖。古錦添詩句。羸驂入畫圖。兒孫候門久。喚取倒殘壺。

不入城半年矣作短歌遣興

我居城西南。渺渺水雲鄉。舟車皆十里。來往道豈長。今夏我來時。天風吹荷香。再來已孟冬。慘然天實霜。市南兩株柳。葉盡萌已黃。乃知多事人。歲晚虛悲傷。名藍墮劫火。鞠爲瓦礫場。河橋比一新。華表照康莊。成壞莽相尋。推理海茫茫。疾豎造物兒。吾手扼其吭。砥柱天下險。一革乃可杭。養氣倘能全。斯言豈荒唐。先大父以元祐乙亥寓居妙明僧舍。後百餘年當嘉泰癸亥游。復假榻一夕。感歎成詠。

楚公仙去幾秋風。巷陌蕭條舊隱空。遺老卽今無處覓。斷香殘照淚痕中。

志學

聖門志學豈容差。山立方當斥百家。早忝授經聞博約。晚羞同俗陷浮華。風勢槁面寒無褐。雷轉飢腸飯有沙。漫道衰慵貪睡美。五更和夢聽城笳。

晚行舍北

逆旅將歸客。扶衰取次行。霜濃木葉盡。水落岸痕生。鶩雁浮寒浦。牛羊滿晚晴。東村隔煙寺。杳杳送鐘聲。

幽居述事

曾會蘭亭醉墮簪。後身依舊住山陰。琴傳數世漆文斷。鶴養多年丹頂深。滌硯灘頭無漬墨。吹簫月下有遺音。小詩戲述幽居事。後有高人識此心。

又

頽然掩戶不妨奇。又賦幽居第二詩。大藥鼎成令虎守。精思牀穩用龜摺。壺中自喜乾坤別。局上元知日月遲。更就羣童閑鬪草。人間何處不兒嬉。

又

落葉平溝日滿廊。幽居又賦第三章。喜無俗事干靈府。恨不終年住醉鄉。上樹榜船雖老健。疏泉移竹亦窮忙。山僧欲去還留話。更盡西齋一炷香。

又

柞艇東歸喜遂初。頻拈枯筆賦幽居。細燒栢子供清坐。明點松肪讀道書。蒼爪嫩芽開露茗。紅根小把瀹煙蔬。年來自許機心盡。頗怪飛鷗自作疎。

十一月五夜風雪寒甚燃薪取暖戲作五字

束薪從潤底。及此不時求。力比鵝黃酒。功如狐白裘。分才具糜粥。餘事煖衾綈。復恐成驕惰。三更起飯牛。

魯墟先太傅舊宅

魯墟無復壞垣存。偶榜舟來入亂雲。杜曲桑麻猶鬱鬱。桃源雞犬亦欣欣。青園舊墅千峯立。綠引官河一脈分。我卜數椽差不遠。得歸何以報吾君。

曉雪

邊湖誰琢玉爲屏。換卻南堂萬疊青。老子醉狂還自笑。持竿畫字滿中庭。

又

觀雪剡溪天下勝。題詩常恨不能奇。未應便許疑之語。此與何曾有盡時。

養生

西遊曾受養生書。晚愛煙波結草廬。兩眸神光穿夜戶。一頭胎髮入晨梳。邀雲作伴遠忘返。與鶴分窺寬有餘。占盡世間閑事業。任渠千載笑迂疎。

夜讀鞏仲至閩中詩有懷其人

詩思尋常有。偏於客路新。能追無盡景。始見不凡人。細讀公奇作。都忘我病身。蘭亭盡名士。逸少獨清真。

獨意

酒似交情薄。愁隨夜漏長。常貧且撙拄。多病不禁當。偶讀書終卷。閑臨帖數行。翻憐市朝客。擾擾爲誰忙。

十一月十三日夜作

風雪正相乘。蕭然一點燈。擁爐蒙衲破。就壁倚枯藤。火降神方王。河潮腦自凝。鄉雞太多事。三唱請晨興。

故人趙昌甫久不相聞。寄三詩皆傑作也。輒以長句奉酬。

海內文章有阿昌。數能著句寄龜堂。就令覲面成三倒。未若冥心付兩忘。道義極知當負荷。風波那得易禁當。相思命駕應無日。且約陶然寓醉鄉。

夢中賦早行

夜分秉炬治裝。費千里霜風入馬蹄。擁褐卻尋孤驛夢。垂鞭時聽近村雞。荒煙漫漫沉殘月。宿莽離離上古隄。天色漸分寒更力。道傍沽酒拆官泥。

兀兀

兀兀初何有。偃偃不自知。偶然登耄及。便欲數期頤。把釣秋風夕。騎驢晚雪時。江湖遊已徧。更作灞城期。

哺猿

有書常嬾讀。有酒常嬾醉。惟有默坐佳。又以睡爲祟。不如捨之起。扶杖來東園。摘此幽澗菓。哺我高枝猿。食菓飲清泉。猿計亦何闕。但恐夜霜時。腸斷巴山月。

與子坦子聿元敏犯寒至東園尋梅

北風吹人身欲僵。老翁畏冷晝閉房。梅花忽報消息動。意氣凜立非復常。二兒一孫奉此老。瘦藤天矯凌風霜。幽禽白頰忽滿樹。似與我輩爭翺翔。溝絕無聲凍地裂。耿耿寒日青無光。歸來相視不得語。小棹一寫鵝兒黃。

示諸孫

蝸舍鶉衣老可哀。衰顏時爲汝曹開。朱門莫羨煮羊脚。糲食且安羹芋魁。家塾讀書須十紙。山園上樹莫千回。但令學業無中絕。秀出安知有後來。

題齋壁

偉偉太平民。堂堂大蓋身。乾坤一旅舍。日月兩車輪。義貴超三品。蔬甘敵八珍。明年真耄矣。爛醉海山春。

又

力穡輸公上。藏書教子孫。追遊屏裘馬。宴集止雞豚。寒士邀同學。單門與議婚。定知千載後。猶以陸名村。

雜言示子聿

福莫大於不材之木。禍莫慘於自躍之金。鶴生於野兮。何有於軒。桐爨則已兮。豈慕爲琴。古今共戒玉自獻。卷舒要似雲無心。廬室但取蔽風雨。衣食過足豈所欽。我今餘年忽八十。歸耕幸得安山林。逢人雖歎種種髮。入塾尙憶青青衿。吾兒殆可守孤學。相與竭力窮幽深。

夜坐聞大風

天曠穹廬覆。風豪野戰酣。詩成飛醉墨。棋罷縱高談。奇怪空堪笑。低摧亦未甘。東浮雲海去。會載酒千甌。

歸老

歸老何妨駕鹿車。平生風雪慣騎馱。鬢毛白盡猶耽酒。目力衰來轉愛書。止足極知于道近。癡頑更喜與人疎。著身莫怪無閑處。地肺天台儘有餘。

懷舊

扇子峽中有隱士。清江一曲照柴荆。當時船急失一見。至今空憶暮猿聲。

又

青城之西谿谷深。道翁巢居獨鼓琴。一盃松麪留我宿。夜半虎嘯風生林。

又
劍溪百里徹底清石闌干裏眞人行大丹一粒擲溪水禽魚草木皆長生。

卷第五十六

道室雜詠

烏化雙鳧杖化龍雲山回首不知重藥園夜曠丹臺月酒市秋聽紫閣鐘豈但煙霄隨步武故應冰雪換形容小童開戶驚奇事野鶴來巢砌下松。

又

莫怪先生閱事多人間何處不經過天山八月霜枯草陽谷三更日浴波酒熟春風歸掌握丹成神物共誰何散人本帶江湖號四百年來一釣蓑

又

身是秋風一斷蓬何曾住處限西東棋枰窗下待瑣瑣丹竈巖間夜吐虹采藥不辭千里去釣魚曾破十年功白頭始悟願生妙盡在黃庭兩卷中

偶與客飲客去戲作

多泥窮巷破茆屋人不堪憂心自足有時負日向門前手把南華日中讀若教開門與客游擾擾依前懷百憂平生自計亦已熟惟有釣魚湖水頭舊聞仲長子光可與友瘡不能言但耽酒安得此友常過門一

語不交傾數斗

故里

故里淳風比結繩。歸耕況遇歲豐登。已侵鐘漏行安往。略有園廬退可憑。萬事寧容魏天地。一心常若蹈
澠冰。區區僻見君無怪。人固終身有不能。

齟齬

人生天地間。本非金石堅。況復歷歲久。蠹壤無復全。齟齬雖小疾。頗解妨食眠。昨暮作尤劇。頰輔相鈎聯。
欲起嬾衣裳。欲睡目瞭然。恨不棄殘骸。蛻去如蛇蟬。或當學金丹。揮手凌雲煙。逢師定悠悠。丹成在何年。

冬夜

悠悠孤夢伴餘醒。窗下寒燈驛關明。雪意欲成風正惡。漁舟忽過雁羣鳴。志衰但有徂年感。身沒應無後
世名。猶幸耄期身粗健。天公元不負書生。

枕上

鐘鼎初何有。山林亦足雄。行思絕大幕。歸但醉新豐。雁過荒寒外。燈殘寂寞中。蒼顏無鏡對。那覺是衰翁。

寒暑

寒暑侵陵日夜衰。坐令齒髮不支持。愛憎徇物去忘反。神氣養形誰復知。布帔九條晨入靜。柏牀五尺夜
精思。舊交勿恨江湖別。雲海神山會有期。

長溪東山容老索月谷幽賞詩

人間底處無明月，只要青山爲發揮。林裏枝寒無鵲立，水邊路白有僧歸。

右月谷

清泉白石君家物，美竹名花可旋移。幽賞定知隨處勝，更須時展放翁詩。

右幽賞

梅

若耶溪頭春意溼，梅花獨秀愁空山。逢時決非桃李輩，得道自保冰雪顏。僊去要令天下惜，折來聊伴放翁閑。人中商略誰堪比，千載夷齊伯仲間。

歲晚幽興

梅出疎籬柳拂池，流年已迫早春時。壯心卓犖猶欺酒，老業呻吟未廢詩。眼暗觀書如棘澀，齒疎嚼飯似牛同。風爐欲試蒼鷹爪，自向林間拾墮枝。

又

殘年欲遂迫期頤，追數朋儕死已遲。卜塚治棺輸我快，染鬚種齒笑人癡。近聞有醫以補種墮齒爲業者，野梅墮地草生後，街柳拂鞍冰泮時。滿眼雲山不須買，剩傾新釀賦新詩。

又

萬里風波行路難，君恩尙許綴祠官。中庭鬱鬱藥苗長，絕壁巖巖松吹寒。泥巷有人尋杜甫，雪廬無吏問袁安。清晨對鏡增幽致，龜屋新裁二寸冠。

又

短髮元知不久青。況開九帙數餘齡。全家共保一忍字。累世相傳三住銘。時泛孤舟過梅市。卻穿雙屨上蘭亭。擁爐莫恨無僧在。滿院松風要細聽。先太傅親受三住銘于施肩吾先生。授游曰汝其累世相傳毋忽。因即以傳事處諸子。

寄題胡基仲故居

憶昔公來一束書。蕭然不復畜僮奴。浮雲每歎成蒼狗。空谷誰能繫白駒。才氣沙塵埋巨闕。文章林壑吼於菟。旅墳三尺雲門寺。又見離離長綠蕪。

雪夜

雪聲如飛沙。風聲如翻濤。三更天地闇。雪急風愈豪。頗疑虛空中。鬼神戰方塵。勝負要一決。利兵未肯囊。我如墮重圍。百計無由逃。僵縮不能寐。起坐擁故袍。自歎老益貧。庭草常不薶。惟酒不憚費。賃券如山高。園蔬甘且柔。味不減豚羔。醉此風雪夕。聊慰抱瓮勞。

聽雪爲客置茶果

病齒已兩旬。日夜事醫藥。對食不能舉。况復議盃酌。平生外形骸。常恐墮貪著。時時鄰曲來。尙不廢笑謔。青燈耿窗戶。設茗聽雪落。不釘栗與梨。猶能烹鴨脚。

獨夜

燈花寒自結。雪片夜方深。瘦影參危坐。清愁入苦吟。江湖身汗漫。藥石病侵尋。朋舊凋零盡。何人識此心。

寄題王才臣山居

王子自少無他娛，求佳山林結草廬。頭童齒豁已衰矣，衣弊屨空常晏如。出遊恥懷襦衡刺，歸臥盡讀倚相書。他日叩門傾白墜，要看著句到黃初。

夜賦

練色亭臯月，江聲木杪風。開書燈煜煜，傳漏鼓摐摐。流落諸生老，呻吟四壁空。生涯君勿笑，談話有兒同。

雪後

雪後晴初快，春前日漸長。菊根萌已動，梅蕊意先香。禽語驚幽枕，冰消漲野塘。衰殘難出戶，不是懶衣裳。

又

冰開地沮洳，雲破日曛曛。鴻入青冥際，草生殘燒中。方欣畢公稅，已復始農功。稻壠牛行處，泥翻夕照紅。

寒夜讀書

老去無他嗜，書中獨有欣。月窗雞喔喔，霜野犬狺狺。雖歎吾何適，猶尊昔所聞。從今倘未死，一日亦當勤。

對食戲作

霜餘蔬甲滂中甜，春近靈苗嫩不歛。采掇歸來便堪煮，半銖鹽酪不須添。

又

白鹽赤米了朝餽，拗項何妨煮瓠壺。一種是貧吾尚可，鄰家稗飯亦常無。

又

春前臘後物華催。時伴兒曹把酒盃。蒸餅猶能十字裂。餛飩那得五般來。

又

枱櫚子嫩供香飯。卓筴芽新簇冷淘。常使先生飽捫腹。其餘萬事一秋毫。

又

冰壺欲著先生傳。髯簿卑凡豈得書。常恨當年定交晚。枉教渴死老相如。

又

黃昏來扣野人扉。笑語欣欣意不遲。葑火正紅煨芋美。不妨秉炬雪中歸。

甲子立春前二日作

頭風初愈喜身輕。書卷時開覺眼明。養熟大雞隨坐起。性靈烏鶴報陰晴。非愁釘餽春盤好。芝朮纏和臘藥成。自笑衰殘殺風景。燈時不擬入重城。

家居自戒

曩得京口俸。始卜湖邊居。屋財十許間。歲久亦倍初。羲花過百本。嘯詠已有餘。猶媿先楚公。終身無屋廬。

又

平居少愧怍。動以直自遂。雖墮虎兕羣。我已無死地。神仙果可學。道藏有神仙。可學論吾輩。恐差易。勿言

聞道晚努力補踪剿

又

世人無奈愁。沃以盃中酒。未能平磊塊。已復生堆阜。治水不治源。九載亦何有。不如讀周易。一卷常在手。

又

疾病當治本。神醫古難遭。哀哉有限身。日與利慾磨。大嚼徒爲貧。劇飲豈足豪。淡薄以養壽。亦非慕名高。

又

饑寒陷侵暴。其實可憐傷。一事百自反。忿心冷如霜。恕物學者心。省事慮亦長。吾過固多矣。責彼何暇詳。

又

霜嚴雞報晨。月落犬警盜。遺粒與棄糠。每媿不足報。椎奴事樵汲。跣婢勤爨爨。有過姑教之。箠楚置勿道。

感貧

經歲無兼味。窮冬止破裘。翁將貧博健。兒以學忘憂。士固安天命。吾寧爲食謀。八荒如可望。時亦上高樓。

鄰曲

濁酒聚鄰曲。偶來非宿期。拭盤堆連展。誰人以名參。餠洗醮煮黎。邴人以名豆。腐烏特將新。積青桑長嫩。枝豐年多樂事。相勸且伸眉。

送客

有客相與飲。酒盡惟清言。坐久饑腸鳴。殷如車輪翻。烹粟煨芋魁。味美敵熊蹯。一飽失百憂。抵掌談羲軒。意倦客辭去。乘炬送柴門。林間鳥驚起。落月傾金盃。

夜寒起坐待旦

懽悅不成寐。攬衣寒夜中。青燐煨芋火。韃韞鼓籬風。巷犬聲如豹。見王維與裴迪書山童首似蓬。悠然束書坐。徐待日生東。

信手翻古人詩隨所得次韻

病起瘦可驚。峻嶒夜窗影。八十遂當至。何止踐衰境。食簞幸能盡。藥裹亦已屏。汲泉煮日鑄。舌本味方永。士苦不自晦。常若雖見穎。叔度獨何人。長陂渺千頃。

右夜坐

孔門春服成。弟子從沂浴。老氏坐中庭。莊生記新沐。古聖自潔清。如日浴暘谷。豈比流俗人。蟻蝨生絳牖。老人喜時節。良夕當爆竹。未濯三生垢。湯沐意亦足。豈惟寓蕭散。亦以洗榮辱。悠然獨酌罷。投枕睡已熟。

右除夜沐浴

甲子歲元日

飲罷屠蘇酒。真爲八十翁。本憂緣直死。卻喜坐詩窮。米賤知無盜。雲霧又主豐。一簞那復慮。嬉笑伴兒童。閑識微陰不雨法。當有年。

初春書懷

六十餘年慕古人。卽今方近葛天民。見人各是元非想。遇事皆安豈怨貧。小圃鉏耨聊過日。扁舟煙雨尙關身。出門未覺龍鍾在。禹廟蘭亭又見春。

又

毫及光陰古更稀。自今惟有數期頤。食觀本草雖多事。醉讀離騷自一奇。物外有人開始見。山中可樂老方知。武陵好在桃千樹。短檝相尋亦未遲。

又

數掩蘆藩並水居。一家全似業樵漁。春寒例謝常來客。老病猶貪未見書。馴雀正緣拋食慣。芳蘭肯爲礙門鋤。藥苗滿鉢無人共。賴有溪僧爲破除。

又

甫及初春日已長。偶同鄰曲集山房。囊盛古墨靴紋皺。箬護新茶帶勝方。老境不嫌來冉冉。流年直恐去堂堂。清泉冷浸疎梅蕊。共領人間第一香。

又

底處人間無駭機。超遙且喜謝招麾。千年澗底孤松秀。萬里天邊獨雁歸。服氣昔常憎火食。遊山近已製荷衣。青城況有幽人約。會守丹爐隱翠微。

又

納祿貧如筮仕初。歸來依舊臥蝸廬。半池墨瀆臨章草。一盃松肪讀隱書。長鏡僅供饑子美。清江不療渴相如。耄期自許詩情在。雪裏猶能跨蹇驢。

又

愚公不解計安危。行盡人間惡路歧。難似車登蛇退嶺。險如舟過馬當祠。平生憂患常難測。送老安閑敢

自期一事不成應有命。惟將知止報明時。

初春紀事

窗檮無日影。庭樹無風聲。微雲淡天宇。非陰亦非晴。美哉豐年祥。入我屠蘇觥。父老亦共喜。驢背叩柴荆。一飽已有期。惟當力春耕。遣兒牧雞豚。作社賽西成。

又

經多少雨雪。所至苦水涸。園蔬葉多蠹。山步船半閣。入春一再雨。喜氣滿墟落。又聞湖邊路。已破小桃萼。一尊儻可攜。父子自斟酌。

送子虞吳門之行

相送何由插羽翰。淡煙微雨暗江干。孤懷最怯新春別。病骨難禁昨夜寒。尊酒汝寧嫌舊薄。釜羹翁自絮吳酸。此詩字字俱愁絕。忍淚成篇卻怕看。

法雲僧房

八十衰翁有底忙。水邊山際亦徬徨。清溪橋斷舟橫岸。小塢梅殘雨漬香。數點青燈經野市。一爐軟火宿僧房。自嫌尙有人間念。卻爲春寒怯夜長。

陌上

陌上長歌任笑狂。此生得喪略相當。天將毫齒償貧悴。身坐虛名撥謗傷。溪水漸生朱舫活。野梅半落綠苔香。新晴快上蘭亭路。莫待春殘始一觴。

獨立

白髯蕭颯一愚公，獨立濛濛細雨中。
羊踏寒蔬新少夢，魚生空釜久諧窮。
殘編幸有聖賢對，閑話豈無鄰
曲同。銜鸞才名非老事，小詩信筆不能工。

春陰

數間茅屋傍楓林，常負平生萬里心。
老去逐年增老病，春來無日不春陰。
麴塵離岸波初漲，握血團枝色
已深。欲到東園還嬾起，卻和殘睡聽鳴禽。

閑咏

身似枯禪謝世塵，豈容收斂強冠巾。
庾郎三韭不妨飽，晏子一裘何恨貧。
栖冷每憐雞唱早，雲開初見月
痕新。閑中有味君知否，熊掌駝峯未是珍。

聞虜亂代華山隱者作

滿谷松風枕石眠，中原戰血又成川。
但思秦鑄銅人日，不記齊成柏寢年。
大藥一爐噉晚日，孤桐三尺寫
秋泉。何妨狂舞旗亭下，乞與人間畫醉仙。

春日

車馬閑中絕，衣襦病後寬。
改詩消晝永，除酒敵春寒。
柳細搓難似，花新染未乾。
歸鴻與來燕，各自管悲歡。

寄子虞

十里城南路，蕭然一秃翁。
舊書衰易忘，新句嬾難工。
山色春寒淡，溪流宿雨通。
街頭有良醞，思汝一尊同。

送子坦

老境寧容別。諸兒仕爲貧。一春多臥病。幾度送行人。五斗方須祿。千金且愛身。長安雖可樂。憐汝正思親。

送子適初欲赴春筵。以兄弟皆出故輟行。

隔一濤江路。豈遙躊躇。不覺欲魂銷。寄書勿遺過三日。發渡何曾無兩潮。睡少不關茶作祟。愁多卻賴酒時澆。柯橋西畔斜陽岸。誰爲離人惜柳條。

醉眠初起書事

身世元知似斷蓬。流年分付酒盃中。饑寒未解士先老。風雨欲收花已空。泥補舊巢梁燕喜。水生支港釣船通。睡魔正費驅除力。隔竹敲茶賴小童。

見蜂采檜花偶作

來禽海棠相續開。輕狂蚊蝶去還來。山蜂卻是有風味。偏采檜花供蜜材。

對酒戲詠

不管詩人太瘦生。但念酒徒稀醉眠。憑誰爲畫畢吏部。縛著鄰家春瓮邊。

又

長安市中多美酒。一斗財當三百錢。堪笑書生消幾許。有錢十萬醉經年。

夜興

鼻呼作人聲。月出如野燒。推枕中夜起。殘燈尙餘照。難從公榮飲。獨效孫登嘯。八十推不僵。平昔豈所料。

空廊病馬臥，枯草老牛隳。明朝語俗人，與汝不同調。

老甚自詠

殘年真欲數期頤，一事無營飽即嬉。身入兒童鬪草社，心如太古結繩時。騰騰不許諸人會，兀兀從嘲老子癡。亦莫城中買鹽酪，菜羹有味淡方知。

又

羨生常笑古人癡，俛仰那知迫耄期。鏡裏鬢無添白處，尊前顏有暫丹時。客眠終歲常稱疾，兒訝經旬懶賦詩。枉卻愁過強健日，身閑何往不熙熙。

夜過魯墟

晡時發柯橋，申夜過魯墟。燈出籬落間，七世有故廬。門低不容驅，壁壞亡遺書。高樹宿羈鳥，廢沼跳驚魚。移船過古埭，水面涵星疎。安得病良已，畢世澆春蔬。

園中小飲

造物伏我老，畀以江湖寬。俯仰六年間，得請兩挂冠。鬢毛雖蕭颯，脚力未蹉跎。記書過十張，噉飯空一簞。開歲忽兩月，感此春事殘。杳靨笑牆頭，鶯聲入雲端。掃地設菅席，相與勸加餐。村酒瀉濁清，野果嘗甘酸。鄰里語蟬聯，兒孫話團圞。雖無萬錢筭，浩歌有餘歡。

幽居春晚

雲歸禹穴賞新晴，酒買蘭亭散宿醒。竹帶鞭移俄盛出，鶴全窠買已長鳴。故山雖媿收身晚，外物元如脫

髮輕只恐村鄰成間闊。杖藜隨處叩柴荆。

又

老廢書病廢詩。晝閑惟與睡相宜。未尋內史流觴地。又近龐公上塚時。花發遊蜂喧院落。筍長馴鹿入藩籬。石帆山下春如許。野老來招不用辭。

梅花過後遊西山諸菴

乞得身歸喜滿顏。柴門雖設不曾關。無如梅作經年別。且就僧分半日閑。樵斧曉穿雲外去。釣船夜向月中還。君看老子無窮樂。一笑知非造物慳。

梅僊塢花溼觀桃李

妖妍天遣占年華。歎息人間有許花。十里織成無罅錦。半天留得未殘霞。欲題直恐無才稱。不見何由信客誇。醉後又驚春事晚。湖隄煙柳已藏鴉。

家園賞花

白首扁舟返舊邦。逢春直欲倒千缸。紅雲夾路薔薇障。翠羽成層薜荔幢。鶯語枝頭常盡日。蝶迷葉底不成雙。閑人爛醉尋常事。中聖先判臥北窗。

聞金谿陸伯政下世

久矣望來使。濟然開計書。兩家通絕譴。千里泣靈車。亦悟古皆死。所悲天祝余。泉扃生氣在。故不羨曹蜍。一春風雨太半有感。

忽忽春將老，寒暄尚未齊。雨昏雞唱晚，風惡鵲巢低。寫物才殊退，尋芳思欲迷。餘年不須較，只是死秦稽。

山行贈野叟

垂白衰翁住道邊，突間猶喜續炊煙。壁如龜筮難占卜，瓦似魚鱗不接連。幼學及時兒識字，官租先乘吏無權。與君俱長宣和日，握手相看一悵然。

又

莫笑孤村生理微，茅茨煙火自相依。客來旋掃青苔榻，日在先關白版扉。婦女憂蠶租葉去，兒童耘麥荷鉏歸。散人世襲江湖號，剩欲溪頭借釣磯。

雲門道中

川瀟林霽翠欲浮，散人心事寄沙鷗。暮投野店孤燈起，曉涉清溪小蹇愁。嶺路窮時縈細棧，山形缺處起重樓。釣游陳迹渾如昨，一念悽然不自由。

讀書有感

洙泗諸生尊所聞，豈容兀者亦中分。焚經競欲愚黔首，亡史誰能及闕文。吾道固應千古在，幾人虛用一生勤。世間倚相何曾乏，會與明時誦典墳。

六言雜興

世界菴摩勒果，聖賢優鉢曇華。但解折衷六藝，何須和會三家。

又

夢裏明明周孔胸中歷歷唐虞。欲盡致君事業。先求養氣工夫。

又

語道無如孔孟。佛莊雖似非同。倘有一人領會。何須客滿坐中。

又

失馬詎知非福。亡羊不妨補牢。病裏正須周易。醉中卻要離騷。

又

舉足加劉公腹。引手捋孫郎鬚。士氣日趨萎靡。賴有二君掃除。

又

廣平作梅花賦。少陵無海棠詩。正自一時偶爾。俗人平地生疑。

又

瘦馬羸僮道路。清泉白石山林。常有衣換酒。不愁無法燒金。

又

一夜雨來可佈。五更雲散無餘。傳舍僧窗雖異。不妨隨處觀書。

又

熟讀大小止觀。精思內外黃庭。直使超然有得。豈若淵源六經。

春晚出遊

風急名花紛絳雪。土鬆香草出瑤簪。且呼野艇西村去。未必微雲便作陰。

又

王孫草生與階齊。女郎花發乳鶯啼。街頭賣酒處處賤。信脚覓醉無東西。

又

柳暗人家水滿陂。放翁隨處曳筇枝。村深麥秀蠶眠後。日暖鳩鳴鵲乳時。

又

禹吾無間聖所歎。治水殆與天同功。三千年事一炊頃。空石嵯峨煙靄中。

又

岌岌高丘近道邊。寂寥翁仲臥荒煙。生前意氣今何在。寒食無人挂紙錢。

又

鳴機裂素製春衣。煮酒香清雁鶩肥。倒社相呼共行樂。三搥鼓近是船歸。

卷第五十七

北窗

老人日夜衰。臥起常在背。窗間一編書。終日聖賢對。東臯客輸米。粲粲珠出碓。南山僧餉茶。細細雪落磴。吾兒亦解事。稀甲自鉏菜。一饑既退舍。百念皆卷旆。閉身去俗遠。澄念與道會。宿痾走二豎。美睡造三昧。

挂冠反布章。上印謝錄艾。庭中石蒼然。此客真度外。

幽居雜題

開歲頻風雨。清明氣始和。遊山書半廢。耽酒睡常多。客去孫登歎。牛疲甯戚歌。餘生猶有幾。盡底付漁蓑。

又

雅意元知止。過歸喜遂初。久閑棋格長。多病釣徒疎。漬藥三升酒。支頭一束書。兒曹看翁懶。切勿厭蝸廬。

又

忽忽年光逝。悠悠世事非。曉猶明續火。晝永啓漁扉。施食禽魚熟。疏溝杞菊肥。寂寥何所歎。父子自相依。

又

獨往成初志。安居謝世紛。名書硬黃紙。古硯裂焦紋。雨作占琴薦。風來散鷺羣。豈無朝市事。塞耳未曾聞。

題旅舍壁

泥淖停牛屋。風埃坐簀牀。絳人難諱老。楚客自嫌狂。浪迹江湖大。回頭日月長。村村有餠餌。正可不賣糧。

又

地曠風號木。天高日脫雲。村名步頭換。縣界驛前分。蒿艾春侵路。雞豚暮識羣。敲門就炊爨。一飯敢忘君。

出行湖山間雜賦

老入新年健。春逢小雨晴。偶因尋酒去。又作繞村行。塘水蒼鵝戲。郊原黃犢鳴。閑身有樂事。倚杖看農耕。

又

新釀學鵝黃。幽花作蜜香。客邀閑卽去。病起醉何傷。野寺無晨粥。村伶有夜場。吾心靜如水。隨事答年光。

又

徑繞茶岡北。橋連艾浦東。蟲銜烏桕葉。露溼豨歛叢。燒地春蕪綠。漁扉夕照紅。君恩那可報。惟是祝年豐。

又

魚市樵風口。樵風溪港名。茶村穀雨前。柳邊煙掩苒。堤上草芊眠。墓掃鴉銜肉。人歸鷺導船。東風吹短髮。得句爲誰妍。

上巳

殘年登八十。佳日遇重三。簾幙低新燕。房櫳起晚蠶。名花紅滿舫。美醞綠盈甌。春事還如昨。衰懷自不堪。

筍絕句

列仙閱世獨清癯。雪谷冰谿老不枯。輸與錦棚孩子輩。千金一束入天廚。

贈蘇召叟

蘇子出儂輩。翩如天際鴻。才華刮眼膜。文字愈頭風。豈止千人見。眞當四海空。老夫雖耄矣。此論不妨公。

贈趙去華

趙子毫端萬斛珠。眼前百輩不枝梧。盛名豈待他年見。公論何曾一日無。我老杜門惟足睡。君豪折簡固難呼。此詩強欲相題目。堪笑衰翁膽滿臚。

道室述懷

養心功用在還嬰。肯使秋毫有妄情。二寸藤冠狂道士。一編蠶簡老書生。狐妖從汝作人立。金價在吾如土輕。地肺終嫌近朝市。明年泝峽上青城。

春晚雨中作

冉冉流年不貸人。東園青杏又嘗新。方書無藥醫治老。風雨何心斷送春。樂事久歸孤枕夢。酒痕空伴素衣塵。畏途回首濤瀾惡。賴有雲山著此身。

晚行湖上

飽來捫腹繞村嬉。北陌東阡信所之。女手采餘桑鬱鬱。煙蕪生遍冢纍纍。高林日暮無鶯語。深巷人歸有犬隨。東走郡城逾十里。好風勞送角聲悲。

欲卜菴居未有勝地作詩識之

破裘百結鬢垂蓬。旋過流年旋已空。魔眷屬如雲盡散。性光明似日方中。極知萬事不勞問。欲住一菴誰與同。會向巢居明月夜。五弦橫膝寫松風。

東窗遣興

東窗徙倚當閑遊。水長池魚自滿溝。花氣襲人渾欲醉。鳥聲喚客又成愁。百年光景輸歌枕。萬里風煙入倚樓。欲寫烏絲還懶去。詩名老去判悠悠。

獨酌

一棹芳醪手自斟。從來戶小酒杯深。已於醉醒知狂聖。又向淳漓見古今。濡首固非吾輩事。逢生猶得昔

人心醱醱欲過香差減。且據胡牀坐綠陰。

舟中作

誤長僊蓬不滿年。恩容歸老白雲邊。草枯病馬停朝秣。子已納碑水冷鱖魚廢夜眠。混俗豈須名赫赫。耐嘲唯可腹便便。柯橋梅市花俱好。且典春衣醉放顛。

衰疾

衰疾憐新鬼。狂豪尙故吾。甚常先客著。行不許兒扶。硯潤閑蟾滴。香殘冷鴨爐。自憐風味在。尙欲泛江湖。

示兒

聞義貴能徙。見賢思與齊。食費甘脫粟。起不待鳴雞。蕭索園官菜。酸寒太學齋。時時語兒子。未用厭鉏犁。

野興

溪漲侵菴路。山光壓釣磯。荒畦荷鉏去。小艇載犁歸。世態那堪看。吾言可自違。從今謝人事。終日掩荆扉。

閑遊

遊徧名山日月長。結廬獨占水雲鄉。醉中卽是逃名地。閑外應無度世方。檜蜜滿脾餘小苦。木苗溫露有

奇香。肺腸自與人間別。堪笑酩缸與飯囊。

又

高會揮金媿二疎。食貧只似布衣初。終年老健緣儲藥。隨分窮忙爲著書。弔古何時過梁宋。題詩且欲徧衡廬。不須更擬乘風去。水有煙帆陸筍輿。

又

過盡僧家到店家。山形四合路三叉。清明漿美村村賣。穀雨茶香院院誇。困臥幽窗身化蝶。醉題素壁字棲鴉。夕陽不盡青鞋興。小立風前鬢脚斜。

又

夙興蓐食戒山行。策蹇迢迢過故城。露葉未乾明曉日。風蒲初勁借秋聲。綠陰渡口孤鶯語。白水陂頭兩犢耕。遙望炊煙疑可憩。試從行路問村名。

炊米不繼戲作

敢羨晨興費萬錢。口邊縱理信前緣。高年雖獲殿諸老。一飽常如登九天。架上有書吾已矣。甑中無飯亦陶然。蓬門一閉還旬日。實怕閑人攪晝眠。

暮行

志士能輕萬戶封。野人自愛一枝筇。行窮綠岸呼船渡。纔得黃梁就碓舂。林外人家明遠火。月邊僧閣下疎鐘。江村不用愁孤絕。小店茅簷儘見容。

小雨

小雨過巖扃。殘雲傍野亭。花光相映發。鶯語苦叮嚀。舉酒和神氣。彈琴悅性靈。索居朋友絕。得句遣誰聽。

急雨方侵幔。斜暉忽滿廊。塵清添草色。衣潤省篝香。婦織將收繭。農功已下秧。諸孫入家塾。親爲授三蒼。

送辛幼安殿撰造朝

稼軒落筆凌鮑謝，退避聲名稱學稼。十年高臥不出門，參透南宗牧牛話。功名固是券內事，且喜園廬了婚嫁。千篇昌谷詩滿囊，萬卷鄴侯書插架。忽然起冠東諸侯，黃旗皂纛從天下。聖朝仄席意未快，尺一東來煩促駕。大材小用古所歎，管仲蕭何實流亞。天山挂旆或少須，先挽銀河洗嵩華。中原麟鳳爭自奮，殘廢犬羊何足嚇。但令小試出緒餘，青史英豪可雄跨。古來立事戒輕發，往往譏夫出乘鱗。深仇積憤在逆胡，不用追思瀚亭夜。

初夏

白白窈窕美，青青米果新。蜀人名粽爲窈窕，吳中名糗妝爲米果。衰遲重時節，薄少遍鄉鄰。梅市花成幄，蘭亭草作茵。極知歡意盡，強起伴遊人。

自警

放翁原憤憤，徂歲復駸駸。社稷終無用，秋蟲漫苦吟。拍蚊違殺戒，引水動機心。老耄誰規我，忠言抵萬金。

枕上

病叟少安枕，驚禽無穩棲。傭占賈誼鵬，空感祖生雞。野勢風號北，窗痕月過西。元非破賊手，只合架牛犂。

野步至近村

耳目康寧手足輕，村墟草市徧經行。孝經章裏觀初學，麥飯香中喜太平。婦女相呼同夜績，比鄰竭作事

春耕勿言野饑無鹽酪，筍蕨何妨淡煮羹。

書懷示子遒

平生山林幾緇屐，何意隨人戴朝幘。口言報國直妄耳，斷簡圍坐晨至夕。道山堂東直廡冷，手種疎篁半窗碧。但虞風波起平地，豈有毫髮能補益。成書朝奏暮請老，入耳幸免煩言噴。東望故山百餘里，父老歡忻來接跡。白羊綠酒爭下擔，長笛腰鼓紛如織。迢迢梅市過魯墟，觀者所至空巷陌。爾來呻吟又春盡，周視室中惟四壁。但令糲飯麤撐拄，猶勝朱門常蹀躞。小兒助我理孤學，終歲伏几心如石。問看飲酒詠離騷，何似焚香對周易。

三月三十夜聞杜宇

斗轉春歸不自由，韶華已逐水東流。子規獨抱區區意，血淚交零曉未休。

夜大雨連明晨起乃知之

黃紬被穩枕慵移，夜雨淋漓了不知。水長壞陂初復後，鳩鳴去婦卻還時。芳蹊入夏多青子，白髮今年有黑絲。剩欲披衣湖上去，滿村芳草正離離。

聞虜亂次前輩韻

中原昔喪亂，豺虎厭人肉。輦金輸虜庭，耳目久習熟。不知貪殘性，搏噬何日足。至今磊落人，淚盡以血續。後生志撫薄，誰辨新亭哭。藝祖有聖謨，嗚呼寧忍讀。藝祖嘗爲大宋一統四字賜大臣，今藏祕閣。

壯士吟次唐人韻

士厭貧賤思起家。富貴何在髮已華。不如爲國戍萬里。大寒破肉風卷沙。誓捐一死報天子。兜鍪如箕鏝如水。男兒墮地射四方。安能山棲效園綺。塞雲漠漠黃河深。涼州新城高十尋。風殞露宿寧非苦。且試平生鐵石心。

衰疾

衰疾猶能飯一簞。葦絲孤首亦加餐。舊明刻印俄銷印。老媿彈冠亟挂冠。自怪嵇康如許癩。人憐范叔不勝寒。得錢剩買青芒屨。采藥名山與未闌。

書日用事

左右數書冊。朝夕一草堂。家貧自能儉。病愈不求方。盛饌豚肩美。常庖筍苗香。園丁報花坼。亦復命靈觴。

又

一裘良已暖。半菽可無飢。養氣戒多語。端居如有思。私心須自勝。己過遣誰知。耄齒尤當勉。常憂寸晷移。

初夏出遊

去去衝朝霧。行行弄夕霏。移秧晴竭作。坐社醉扶歸。細草迷行徑。殘花點釣磯。犂牛將犢過。雄雉挾雌飛。野寺煙鐘遠。村墟續火微。諸孫殊可念。相喚候柴扉。

初夏晝眠

好景逢初夏。閑身得晝眠。書橫竹架上。冠墮素屏前。葱蒨小山桂。潺湲幽竇泉。危巢出乳燕。高樹集新蟬。強健關天命。逍遙近地仙。晚窗思茗飲。自取雪芽煎。

農事稍閒有作

架犁架犂喚春農。布穀布穀督歲功。黃雲壓檐風日美。綠針插水霧雨濛。年豐遠近笑語樂。浦漲縱橫舟楫通。東家築室窗戶綠。西舍迎婦花扇紅。我方祭竈徹豚酒。盤箸亦復呼鄰翁。客歸我起何所作。孝經論語教兒童。教兒童莫忽。願汝日夜勤磨礱。烏巾白紵待至公。

夜雨

暮雨蕭蕭集瓦溝。空階點滴送清愁。何由乞得須臾睡。直到窗明滴未休。

朝晴

宿雨初收雲四歸。小山草木麗朝暉。翩然雙鶻從簷下。言語分明訴濕衣。

北窗

簾影參差午漏前。盆山綠潤雨餘天。詩無傑句真衰矣。酒借朱顏卻悵然。海燕理巢知再乳。吳蠶放食過三眠。名泉不負吾兒意。一掬丁坑手自煎。子虞寄惠山泉丁坑蓋日鑄流亞也。

遊山戲作

晚境頻辭祿。窮居旋學耕。量衰添酒敵。才盡減詩名。風月成交友。溪山管送迎。登車雨先止。天豈相吾行。

遣興

聒聒鳴鳩莫笑渠。百年我亦旋枝梧。病知藥物難爲驗。老覺人間不足娛。茆屋何妨度寒暑。蔬餐且可遣朝晡。釣船一出無尋處。千頃江邊雪色蘆。

又

老荷君恩許醉眠。散人名號媿妨賢。久叨物外清閑福。纔識詩中造化權。風月四時隨指顧。乾坤一氣入陶甄。新秋更欲浮滄海。臥看雲帆萬里天。

細雨

細雨重雲漸入梅。陰陰門巷長新槐。壯心已與年俱逝。脫髮應無術可栽。美睡常嫌鶯喚起。清愁卻要酒闌回。年來百事非平昔。信手題詩嬾剪裁。

初暑

槐陰清潤麥風涼。一枕閑眠晝漏長。山鵲喜晴當戶語。海桐帶露入簾香。酒綠久病常辭酌。茶爲前衙偶得嘗。雲北雲南動遊興。速呼小豎治輕裝。

夙興

夙興短蓬髮。幽步豁煩襟。翠碧停闌角。顰黃語柳陰。書殘頻補緝。琴廢細追尋。未是全無事。猶堪養道心。

新堂

湖上新堂氣疎豁。三面嵐光翠如潑。都門歸來病相屬。鄰里怪我問何闊。蓴絲作羹飯雕胡。廚人斫鱸絕殊。何由喚得左元放。銀盤釣出松江鱸。

卽席

穉荷出水榴花開。長笛圓鼓送舉杯。村鄰相樂君勿笑。要是安健無凶災。

又 醉中起舞遞相屬。坐上戴花常作先。要知吾輩不凡處。一吸已乾雙玉船。

又 長魚腹腴羊臂臠。餓想久矣無秋毫。今朝林下煨苦筍。更覺此君風味高。

又 小山榴花照眼明。青梅自墮時有聲。柳橋東岸倚筇立。聊借水風吹宿醒。

生涯 久矣冥行墮嶮巖。樂哉偶得謝招麾。放懷身世相忘地。夙駕山林獨往時。縱老豈容妨痛飲。更慵亦未廢新詩。超然自喜生涯別。始歎龜堂見事遲。

落花 桃李擅春事。醱醲爲之殿。豈不欲周旋。過日如掣電。大風連三月。吹盡無餘片。留之豈有策。佇立情眷眷。空令腸九回。竟欠語一轉。流年付芳草。樽酒孤勝踐。鶯聲入碧雲。簾影滿深院。消搖綠陰間。風流屬團扇。

四月二十二日微雨中次前輩韻 語訛覺齒疏。冠倒感髮稀。屢爲曼容免。遂賦淵明歸。今日天氣佳。雨絲弄斜暉。起居惟所適。單複時易衣。出遊叩僧廬。歸臥掩漁扉。一笑顧兒子。正爾良未非。

夜雨

點滴茅檐雨。長宵不肯晴。殘缸待雞唱。倦枕厭鼻鳴。已踐衰殘境。况兼羈旅情。晨興亦何事。惟髻繞廊行。

夏日

入戶桐陰漸覆牀。乍敷篔簹北窗涼。筇枝倚壁知身健。衣焙殘香覺日長。雨霽斷雲時聚散。風來纖草久低昂。蝶衣粉濕猶飛翅。小駐闌干就夕陽。

久雨

梅子青青苦未黃。經旬積雨欲頽牆。蠹生書帙時須火。潤入衣篝剩得香。鄰舍相逢驚間闊。通宵不寐聽淋浪。定知又發韓公笑。有底鳴蛙兩股長。

又

梅天一日幾陰晴。對酒無聊醉不成。巧曆莫能知雨點。孤桐那解寫溪聲。林深鳥爵來無數。草茂鋤耨去卽生。明日雲開天萬里。御風吾欲過青城。

舟中

青楓湖上村。綠蓑舟中客。雲與山疊見。海近地勢拆。悠然滄洲趣。宛與塵世隔。雖云食不足。麤免婚嫁責。渥丹未辭鏡。衰白幸滿幘。明當鼓枻行。放浪窮七澤。

繫船

高樹滴殘雨。叢蘆生夕風。惰遊貧有自。老鈍學無功。歲月詩編裏。江湖旅色中。煙村繫船處。邂逅得漁翁。

復雨

催喚兒童掃綠苔。長歌清嘯興悠哉。林間子墮知梅熟。水面痕生驗雨來。往事已成孤枕夢。故人誰共一樽開。自憐未負年華在。素扇團團月樣裁。

書適

清和巷陌單衣後。綠潤軒窗午餉餘。曲曲素屏圍倦枕。斜斜筠架閣殘書。松陰坐石閑看鶴。山寺尋僧晚跨驢。此段家風君試看。京塵撲帽獨何歎。

村社禱晴有應

叢祠牲酒走村村。賴是龍歸爲解紛。爽氣收回騎月雨。俗謂二十四五間有雨往往輒成霖潦謂之騎月兩快風散盡滿天雲。數峯縹緲如屏面。一浦漣漪作簾紋。猶勝楚人簫鼓裏。九歌哀怨下湘君。

題北窗

束擔還山讀舊書。斷編終日見唐虞。千莖白髮年華速。一點青燈夜漏徂。厚價異時空市骨。大呼從昔不成盧。細思天賦原非薄。跬步門前萬頃湖。

又

不噴人作腐儒看。斷簡堆中興未闌。更事愈懷愛國切。苦心始覺著書難。流泉激激人聲遠。修竹蕭蕭暑令寒。四海諸公常共處。北窗何地著身寬。

晝坐聞牆外人聲殊敗幽思戲作

老人氣衰凋髮齒。歲月翩翩來有幾。晨興食米不一溢。日課讀書猶十紙。雖云喧寂無二觀。終嫌蝸蝻喧

吾耳亟起振衣欲出門。赤日常空汗如洗。撥灰未炷瓦爐香。汲井先換銅匱水。也勝太史落南時。短檠夜對屠牛机。黃魯直自言遷宜州時夜寓市中直屠牛之机用雞毛筆作字。

晨起行園中

老病厭囂煩。晨興步小園。草深移舊路。竹茂失頽垣。未暇從魚樂。惟思與石言。人家尋每得。拄杖印苔痕。

葺舍

蟻知將雨先移穴。燕護新雛迭守巢。補漏支傾吾可笑。呼奴乘屋更添茅。

次韻林伯玉登臥龍

一紙臨門喜欲顛。詞源滾滾瀉長川。旗旄外闔新元帥。風月名山古洞天。自笑屏居依近郭。每煩登望指孤煙。雄篇三復空興歎。窮乃工詩似不然。

道室雜詠

精神有限惟當齋。造化無心不汝移。此事安須知決擇。雞鳴勿後老人期。

又

黃褐長條七尺身。袖中一劍隱紅塵。城門萬屢日來往。衆裏安知無此人。

又

冰霜難與夏蟲語。晦朔豈容朝菌知。忿忿至前能小忍。人人券內有期頤。

又

萬法元須一理通。長生極治本同功。廣成千歲無它術。祇在唐虞二典中。

又

莫緣侯印學陰謀。生世惟須一釣舟。輕用鑊錙終折缺。善刀何止解千牛。

又

放翁耄齒猶朱顏。一物不留方寸間。已吞八九雲夢澤。更著百億須彌山。

湖塘夜歸

漁翁江上佩笭簪。一卷新傳范蠡經。鬱鬱林間桑椹紫。芒芒水面稻苗青。雲邊築舍分南北。陌上逢人半醉醒。莫恨西村歸路遠。行前點點有飛螢。

東軒

僻巷地無喧。閑人慮不煩。刺舟回北渚。岸幘倚東軒。乳鶻行苔徑。馴鸞觸筍藩。作勞憐野老。喚取倒清樽。

夏日

例謝門前客。深藏篋裏書。衣穿但重補。飯足不求餘。山溜鳴庭際。藤陰接屋除。阿勞厭三伏。俯仰卽秋初。

斫脰

玉盤行膾簇青紅。輸與山家淡煮菘。要識坐堂哀殼棘。試來臨水看嶮喙。

野飯

六十日白可續飯。三千年清何與人。堪笑此翁頑似鐵。還山又食一番新。

村酒

亂山落日漁歌長。平疇遠風粳稻香。酒旗搖搖截官道。歸家未遲君試嘗。

避雨

雲如壞山欲塞海。樹似奇鬼將搏人。急投民家雨隨至。燎衣不覺雞唱晨。

雨中短歌

昨夕雨大如車軸。今旦雨細如牛毛。人言愈細愈澤物。天公爲此非徒勞。泥深入市路欲絕。壞籬敗壁風蕭騷。豈惟蠶眠矜得意。坐覺藜莠無由薶。剝牀供爨嗟婢子。持傘上學憐兒曹。村場酒貴賒不得。且解布囊尋弊袍。

散懷

少年已遂遯山林。何況霜毛兩鬢侵。習氣尙存詩入夢。病根未去藥關心。猿知秋近啼先苦。鶴閱年多頂漸深。不忍頓疏風月在。蠶能扶杖卽登臨。

南堂

空堂寂寂暑氣清。祇有燕雀無人聲。雲頭忽移簾影失。雨點亂集荷盤傾。溝坑水溢魚歡喜。庭戶風送蛟龍腥。衣巾汗垢爲一洗。呼奴舉榻臨前楹。取泉石井試日鑄。吾詩邂逅亦已成。何由探借中秋月。與子同遊白玉京。

門屋納涼

機裂齊紈如素月。牀敷蕪篔起微瀾。行人遠不分眉目。過鳥高猶響羽翰。新長庭槐夾門綠。無窮陂稻際天寬。今年項里楊梅熟。火齊驪珠已滿盤。

幽居

孤村野徑不曾鋤。惡草從來一寸無。每爲遊魚疏港澗。更緣啼鳥植楸梧。閑門猶有僧時到。殘產渾無賦未輸。浪走人間真誤計。暮年猶足補東隅。

露坐

殘月久方上。幽花時自零。風枝驚宿鳥。露草濕流螢。浩氣吞雲夢。危途塞井陘。菱歌何處起。及我醉初醒。

暑中久不把酒盆。池千葉白蓮。忽開一枝欣然小酌。因賦絕句。

千葉芙蓉白玉膚。一樽沆瀣碧琳腴。極知俱出氛埃外。我亦秋風山澤臞。

又

我讀淵明止酒篇。知渠未識玉池僊。誰言見面無多子。高壓天魔萬二千。

卷第五十八

老馬

貧家畜老馬。枯其風雨隴。本非百金產。安用三品料。馬固忘華廐。士亦安蓬習。兩窮適相遭。萬事付一笑。少游御款段。作計無此妙。可憐杜陵翁。妄想追風驪。

大熱

五月頗閱雨。炎風吹旱塵。氣羸不給喘。流汗沾衣巾。呼婢使具浴。報以未買薪。汝事雖不恪。亦坐乃翁貧。汲井掬寒泉。自足忘我噴。譬如寓逆旅。百事聽主人。

大雨

今年景氣佳。有禱神必答。時時雖閱雨。顧盼即霑洽。縣地千里間。四月秧盡插。季夏雨三日。淒爽欲忘筮。潞水如塞河。決水如放閘。几席亂盡罷。庭除泳鵝鴨。舍邊魚受釣。戶外鷓可狎。飛螢最得意。終夕自開闔。蕭蕭菰蒲聲。恍若船入夾。嗟予亦耐事。堅坐書滿榻。懸知穰稔收。已足供伏臘。會約張志和。清風泛茗罍。

午睡

梅黃雨足喜初晴。投枕華胥夢已成。帳底香雲凝未散。手中書卷墮無聲。簾紋似水飛蠅避。鼻息如雷稚子驚。癡腹便便竟何有。已將嘲弄付諸生。

書意

疎慵久已臥郊扉。暫出入間輒免歸。梵志放花常恨晚。士師分鹿又成非。平生舊學寧常負。同志良箴亦重違。說與吾兒勤念此。負禾勿恨露沾衣。

卜居三山已四十年矣。暇日有感聊賦五字。

薄宦非初志。幽居不計年。稚松成偃蓋。小豎亦華顛。生理憑耕稼。光陰付醉眠。從來慕園綺。一著要爭先。

又

泥古衰猶學。開荒夜亦耕。屋芟生草蓋。釜插野蔬烹。白稻雨中熟。黃鸝桑下鳴。殘雲忽吐日。喜對小窗明。

北窗

北窗無俗物。三伏有餘涼。玉麈消長日。風漪可一牀。盡分新作茗。爐撥欲殘香。卻岸紗巾去。儻然野水旁。

睡起已亭午終日涼甚有賦

飯罷頽然付一牀。曠懷真足傲羲皇。松棚盡日常如暮。荷沼無風亦自香。倚杖月生人影瘦。岸巾露透髮根涼。頗聞王旅徂征近。敷水條山興已狂。

殘雨

五更殘雨滴檐頭。探借天公一月秋。只道風吹雲散盡。數聲桑下又鳴鳩。

溪上避暑

暮年事業轉悠悠。盡日投竿杜若洲。世上漫言天愛酒。古來寧有地埋憂。全家只合雲山老。萬事空驚歲月遒。襖帶脫冠猶病渴。正平頗憶著岑牟。

又

短髮醜醜徹頂涼。悠哉隨處據胡牀。但憐鵲影翻殘月。不恨蟬聲送夕陽。門巷陰陰桐葉暗。汀洲漠漠藕花香。寓形字內終煩促。安得騎鯨下大荒。

龜堂避暑

縹緲紗幮覆象牀。蠻童擎粥進黃梁。硯池湛湛一泓墨。衣焙霏霏半篆香。團扇題詩無滯思。清泉灑地有

餘涼更須風伯開雲陣，準擬今宵月滿廊。

旅舍偶題

野店山橋策蹇驢，浩然聊喜遂吾初。童顏幾歲已辭鏡，胎髮今朝還入梳。小盃謾營秋社酒，斷編閑理小年書。白雲可笑猶多事，常向人間耐卷舒。

溪月

天風吹髮冷颼颼，獨向沙邊上釣舟。愁絕平羌江上月，向人依舊半輪秋。

疋患

儲藥如丘壘，人患未易醫。信書安用盡，見事可憐遲。錯自彈冠日，憂從識字時。今朝北窗臥，句句味陶詩。

雜興

早遇齊侯遊柏寢，晚從漢帝祀甘泉。不須苦學飛騰術，更看泥金檢玉年。

又

南山手自斲蒼苔，竹閣柴扉次第開。二十里間雲不斷，豈容一點市塵來。

又

靈府寧容一物侵，此身只合老山林。何由挽得銀河水，淨洗羣生忿慾心。

又

赤米熟炊元自軟，黃齏頻倒不多酸。縱令酒負尋常債，也勝人求本分官。

又
冰壺冷浸玉芙蓉。三伏炎蒸一點無。淨洗硯池瀦墨瀋。乘涼要答故人書。

又
硯傳百歲璽闕角。筆擅一時錐出囊。予所用硯百年前物一角微闕筆姑蘇能竅作頗佳紙欲窮時瘦蛟舉已看雷雨跨蒼茫。

又
扁舟夜載石帆月。雙屨曉穿天柱雲。八十老翁能辦此。不須身將渡遼軍。謂李勣。

又
犀象本安山海遠。榼楠豈願棟梁材。伏波病困壺頭日。應有嚴光入夢來。

又
粟無人餽方差快。門有僧敲未絕幽。豈是耄荒深絕物。從來不慣惹閑愁。

又
瞿聃楊墨寧非學。治獄行兵亦有師。惟是儒生知擇術。百年窮達守書詩。

病瘡兩作而愈

久出天魔境。胡爲瘡鬼來。亦知無妄疾。畢竟不爲災。引睡須書卷。支羸賴粥杯。微風起秋色。樽酒亦時開。
露坐

略約方塘北。簣管小塹東。荷盤傾夕露。芙蓉坼秋風。礫礫禽移樹。芒芒月墜空。詩材隨處足。盡付苦吟中。

戲詠

歲曆還逾半。人生但可悲。此身猶老健。隨處且兒嬉。累瓦初成塔。埋盆又作池。惟應上庭樹。不及髭髭時。

初秋書感

流年冉冉不容追。餘息厭厭只自知。馬革裹尸違壯志。鹿門采藥卜幽期。林蟬委蛻仙何遠。巢燕成雛去已遲。觸事爾來多感慨。北窗閑賦早秋詩。

湖上

石帆山下舊苔磯。回首平生念念非。秋早明河低接地。夜深白露冷侵衣。風生古戍笳爭發。月過橫塘鷓獨飛。卻看宦途傾奪地。恍然敗將脫重圍。

枕上

紗幮竹簟不勝清。臥看殘釭翳復明。兩樹梧桐鳴急雨。一林鸚鵡噪疎更。靜無狂蝶妨幽夢。嫩有羣鷗責舊盟。待旦欲尋梅市路。小舟先向步頭橫。

書懷

無事自能心太平。有爲終蔽性光明。史牘脫盡見真理。梁肉掃空甘菜羹。處處浮家成野宿。時時策蹇作山行。平生常笑羊裘老。史冊猶存後世名。

游昭牛園

陸放翁集 十八 劍南詩集 卷五十八

游昭木石師李唐。畫牛乃自其所長。出欄初聽一聲笛。意氣已無千頃荒。客居京口老益困。衣不揜脛鬚眉蒼。時時弄筆眼力健。蹏角毛骨分毫芒。我無沙隄金絡馬。拂拭此幅喜欲狂。乞骸幸蒙優詔許。置身忽在煙林旁。日落飲牛水滿塘。夜半飯牛天雨霜。俚醫灌藥美水草。老巫訶禁放不祥。願我孫子勤農桑。願汝生犢筋脈強。確聲驚破五更夢。歲負玉粒輸官倉。

唐希雅雪鵲

烈風大雪吞江湖。巨木摧折竹葦枯。鳥鳥瑟縮墮地死。豈復能顧卵與雛。棘枝拔出亂石罅。凜凜生氣獨有餘。耐寒兩鵲亦異稟。羽族有此山澤癯。神疑氣勁中自足。不待晴日相鳴呼。深知畫手亦怪偉。用意直刮造化爐。毳毛雖細爪翻健。落筆豈獨今所無。我評此畫如奇書。顏筋柳骨追歐虞。

菖蒲

雁山菖蒲崑山石。陳叟持來慰幽寂。寸根蹙密九節瘦。一筇突兀千金直。清泉碧缶相發揮。高僧野人動顏色。盈山蒼然日在眼。此物一來俱掃迹。根蟠葉茂看愈好。向來恨不相從早。所嗟我亦飽風霜。養氣無功日衰稿。

吾廬東北皆修竹茂木羽族來栖者不可數計感而有作

遠舍皆茂林。萬數栖鳥雀。詰旦輒爭鳴。未暝紛已泊。清陰交欲暗。丹實熟可啄。吾廬少人迹。媿爾肯見託。雖無惠養德。亦免彈射虐。結巢俯可窺。淳風今豈薄。

秋夜聞蘭亭天章寺鐘

絕湖上蘭亭。不過一炊頃。湖廢繚隄行。往返常畢景。猶有古寺鐘。迢迢下重嶺。煙雲含莽蒼。風露共凄冷。蕭然草堂臥。度此清夜永。百念一洗空。於焉發深省。

閱雨

歲秋固多雨。每恨不及時。黃塵蔽赤日。苗槁已不遲。踏車聲如雷。力盡真何爲。天豈不念民。雲族風散之。窮民守稼泣。便恐化棘茨。妻子不望活。所懼尊老飢。我願上天仁。顧哀民語悲。鞭龍起風霆。尙繼豐年詩。徒行短歌次前韻

江樓次前韻

風吹短衣雙鬢白。老人徒步歸鄉國。數樹丹楓野店西。一川紅蓼溪橋北。芒屨有賣百無憂。過盡青山到渡頭。更求款段真多事。堪笑當年馬少游。

七月四日夜賦

樓角西南月一鉤。晚瓜落刃酒新籌。仙家又憶銀河別。太史新班玉曆秋。衰病歲時良冉冉。窮愁身世轉悠悠。莫因乞巧嘲兒女。我亦飄然水上浮。

出近村歸偶作

朝騎小蹇涉煙村。擁路爭看八十身。似我猶爲一好漢。問君曾見幾閑人。楊梅線紫開園晚。葦菜絲長入

市新莫笑堅頑推不倒。天教日日享常珍。

送子修入閩

士生萬里合鷗搏。憔悴青衫且自寬。薄祿及親雖共喜。遠途將父亦誠難。關山可厭風塵惡。蓬華應思菽水歡。只道老年心似鐵。詩成也作鼻辛酸。

書志

飲水蕭然臥曲肱。桑村麥野醉騰騰。老身長子知無憾。泛宅浮家苦未能。南畝服勞勝乞食。腐儒垂死恥依僧。柴荆常閉斜陽裏。剝啄雖聞亦懶應。

秋雨

雨聲疎復密。窗影暗還明。赤米香炊飯。青蔬淡鬻羹。閑中長棋格。病後減詩情。惟有桑麻事。鄰翁與細評。

雨後涼甚

並海寬閑野。清秋搖落天。微涼供美睡。穩字入新聯。陋屋蕭蕭雨。修筒細細泉。晚窗生酒興。洗酌一陶然。

屏迹

屏迹亂山中。觀身槁木同。桑麻安舊業。薪水付村童。不散嬰兒樸。常存太古風。一錢無用處。那復計囊空。

又

飯熟起開鉢。困來徐倒牀。無狂安取聖。有短始知長。養道褐懷玉。露才錐出囊。聊須喚兒稚。細細話耕桑。

書事

聞道輿圖次第還。黃河依舊抱潼關。會當小駐平戎帳。饒益南亭看華山。饒益寺南亭。盛得太華之勝。

又

關中父老望王師。想見壺漿滿路時。寂寞西溪衰草裏。斷碑猶有少陵詩。華州四溪。卽老杜所謂鄭縣亭子者。

又

鴨綠桑乾盡漢天。傳烽自合過祁連。功名在子何殊我。惟恨無人快著鞭。

又

九天清蹕響春雷。百萬貔貅扈駕回。不獨雨師先灑道。汗流浹浹入淮來。

雨後

雨後涼生病體輕。閑拖拄杖出門行。槐花落盡桐陰薄。時有殘蟬一兩聲。

幽居

早歲猶奇怪。中年痛掃除。華堂基陸廢。名馬宴遊疎。散帙身忘倦。畦蔬手自鋤。寥寥千載後。誰此訪幽居。

書事

北征談笑取關河。盟府何人策戰多。掃盡煙塵歸鐵馬。剪空荆棘出銅駝。史臣歷紀平戎策。壯士遙傳入塞歌。自笑書生無寸效。十年枉是枕瑠戈。

秋夜感遇十首以孤村一犬吠殘月幾人行爲韻

月生東山口。宿鳥驚相呼。我起立蒼茫。况在白玉壺。飢鴝掠危巢。大魚躍平湖。作意賦新詩。佳夕不可孤。

又 今日天氣佳。駕言適山村。種枳作短籬。疊石成高垣。牲酒賽秋社。簫鼓迎新婚。所願在仕者。努力蘇元元。

又 長康有三絕。吾獨得其一。寓世八十年。一癡萬事畢。世間所謂黠。正類禪中蟲。燂湯會有時。爲計誰得失。

又 我夢遊異境。烏帽跨小蹇。桑麻夾阡陌。山川曠何遠。俗有太古風。蕭散到雞犬。鐘鳴忽驚覺。所造恨猶淺。

又 謁作朝築陂。獨勞暮鉏菜。草廛欄犢臥。船響籬犬吠。殘年迫耄及。農事不敢廢。兒曹強學餘。努力事春礎。

又 願曆如昨日。俯仰芳歲殘。蝸蝓方鳴秋。礎杵已戒寒。書生賦子薄。何適不艱難。梁肉固所美。食淡心始安。

又 前年蒙趣召。渡江當六月。顧慚衰病軀。觸熱朝行闕。君恩雖屢下。恐懼乞骸骨。飄然返柴荆。所愧已黔突。

又 畏首復畏尾。吾身其餘幾。雖云食不足。健決豈不偉。蓬窗對親舊。情話來塵壒。何以永今朝。沽酒刺圈豨。

又

昔遇高皇帝。同朝多偉人。哀哉逝不留。焜蒿返蒼旻。存者纔一二。相望不得親。秋風聞雁過。老淚霑衣巾。

又

唐虞治巍巍。洙泗道益明。豈知秦漢後。佛老起縱橫。詩書雖僅存。韶箴無遺聲。書生幸有聞。未死猶力行。

草書歌

吾廬宛在水中沚。車馬喧囂那到耳。一堂儻然臥虛曠。蟬聲未斷蟲聲起。有時寓意筆硯間。跌宕犇騰作
談詭。徂徠松盡玉池墨。雲夢澤乾蟾滴水。心空萬象提寸毫。睥睨醉僧窺長史。聯翩昏鷓斜著壁。鬱屈瘦
蛟蟠入紙。神馳意造起雷雨。坐覺乾坤真一洗。小兒勸我當自珍。勿爲門生書菜几。

自微

牛解謹藏刀。羊亡密補牢。達人憂祿厚。奇禍出名高。所要懷全璧。寧當恥緼袍。世間俱疥疥。何事苦爬搔。

新秋

遠浦平郊弄夕霏。曲籬幽徑鎖秋暉。馴盛巧占蒼苔臥。驚鷓斜穿密篠飛。浴罷小軒成美睡。雨餘老火斂
餘威。未言風月供詩思。汗幘塵衣且解圍。

又

蟬聲滿院送流年。又見秋風到海邊。舊友死來頻入夢。新詩愁絕少成篇。步頭野水雙飛鷺。林外人家一
點煙。顧影自驚如許瘦。囊空無藥起沉綿。

憫俗

蚩蚩之氓不自覺。顧笑吾曹安淡薄。搗女數千行間法。腰錢鉅萬仍騎鶴。豈知此事不兩得。芻豢何可參。毒藥野狐出林作。百態擊下濁醪渠。自忤老氏五千本清辭。揚雄太玄惟寂寞。但能於此尊所聞。萬卷丹經盡糟粕。

塊坐齋中有感

敗席凝塵嬾拂除。況能作意去庭蕪。讀書眼力衰難強。對酒心情薄欲無。野寺鐘魚思下檐。山郵鞍馱憶登途。頽然坐睡誰驚覺。寂寞西窗日又晡。

新涼示子通時子通將有臨安之行

竹簾紗幘事已非。秋清初換熟練衣。鵲驚山月栖還起。螢避溪風墮又飛。老眼漸昏書嬾讀。壯心雖在事多違。夜窗剩欲挑燈語。日倚柴門望汝歸。

秋雨

毒熱秋未衰。吾廬沉淺迫。雖云日一浴。流汗沾衣幘。蕭蕭三日雨。出此炮烙厄。瀟湘應更佳。恨我無六翮。

又

吾廬多美蔭。最茂楸與梧。百鳥集其間。下上更嗚呼。秋風忽動地。搖落日日疏。何如澗底松。終歲無榮枯。

講學

遷善以美身。講學以盡性。能爲可行爾。用舍固有命。天方斲斯文。魯叟虛歷聘。黎元則可哀。窮死吾何病。

野興

來日無多去日遒。朱顏那肯爲人留。鶯聲點滴無時雨。野氣蒼茫極目秋。朝出釣魚來北渚。夜耕驅犢上西疇。此心所要常無媿。寂寞衡門死即休。

又

江湖蕭散爲天民。敕放還山一幅巾。老去飢羸惟恃粥。病來舉動每須人。道窮舉世知心少。學進吾兒著語親。更有一端差自慰。短檠不作白頭新。

又

早見高皇帝。宙新。老年猶作太平民。虛名僅可欺橫目。臆論曾經犯逆鱗。原野暮雲低欲雨。陂湖秋水浩無津。蕭條生計君無笑。一鉢藜羹敵八珍。

又

飽見人間行路難。暫陪鷓鴣鷺意先闌。集仙院裏三題石。神武門前兩挂冠。飢臥了無千里志。倦飛元怯九霄寒。客來莫笑蓬窗陋。若比巢居已太寬。

示元敏

學問參千古。工夫始一經。寧論綬若若。且喜佩青青。汝業方當進。吾言要細聽。仍須知稼穡。勉爲國添丁。

八月四日夜夢中作

太華曉曉敷水長。白驢依舊繫斜陽。山深乳洞藥爐冷。花發雲房醅瓮香。鄰叟一樽迎谷口。蠻童三髻拜溪旁。中原俯仰成今古。物外自閑人自忙。

明日復理夢中意作

白盡鬢髮兩頰紅。頽然自以放名翁。客從謝事歸時散。詩到無人愛處工。高挂蒲帆上黃鶴。獨吹銅笛過垂虹。閑人浪迹由來事。那計猿驚蕙帳空。

又明日復作長句自規

大學淵源不易窮。古人立志自童蒙。醉猶溫克方成德。夢亦齋莊始見功。痛哭孰能悲陷溺。力行猶足變雕蟲。太空雲霧終當散。吾道常如日正中。

示子孫

累葉爲儒業不墜。定知賢傑有生時。學須造次常於是。道豈須臾或可離。我老已無明日計。心存猶惜寸陰移。巍巍夫子雖天縱。禮樂官名盡有師。

秋夕

承學雖云淺。初心敢自輕。飄零爲祿仕。蹭蹬得詩名。撫事悲長劍。懷人感短檠。不堪秋雨夕。鼓角下高城。

徂歲

徂歲風煙慘。幽居市井遙。飯香炊薏米。泉潔煮芎苗。野廟迎神晚。村船過埭遲。西窗一樽酒。亦足慰無聊。

村居遣興

追數交朋略散亡。臂屨足蹇固其常。一年又見秋風至。孤夢潛隨夜漏長。不辨誦書如倚相。頗能噉飯勝張蒼。回看薄宦成何味。只借朝衫作戲場。

又
萬里征途興已闌，三間破屋住猶寬。山蒼著雨房重斂，南燭先霜實半丹。野市秋陰更蕭瑟，書生老瘦轉酸寒。掩關也有消愁處，一卷騷經醉後看。

又
野堂疎豁近江皋，喜見南山秋氣高。野外漸寒羣木脫，草根薄暮百蟲號。築陂濬畝更相勉，伐荻剝桑敢愛勞。亦念耄荒當自佚，欲將世業付兒曹。

甲子秋八月偶思出遊往往累日不能歸或遠至旁縣凡得絕句十有二首雜錄入稿中亦不復詮次也

留雪猶能活窖中，僮牛亦可隱牆東。來歸里社當知幸，萬卷書邊一老翁。

又

小兒緣天摘列宿，老子含飴弄穉孫。郊居得此豈不樂，無奈催租人打門。

又

早攜書劍三隨計，晚辱弓旌四造朝。心媿石帆山下叟，一生不識浙江潮。

又

筋骸未廢寧爲老，煙火猶通豈是貧。時跨一驢山縣去，園丁野老盡相親。

又

著囊藥笈每隨身。問病求占日日新。向道不能渠豈信。隨宜酬答免違人。

又

藥麤野老偏稱效。詩淺山僧妄謂工。懷餅裹茶來問訊。不妨一笑寂寥中。

又

家居愈老厭拘纏。旅舍僧房意自便。乞菜作羹殊有味。借牀小憩即成眠。

又

鄉閭敬老意常勤。一味甘鮮必見分。大誡在前無箸食。始知富貴本浮雲。

又

市樓嘈囂知豐歲。驛樹輪囷傲早霜。六十年間凡幾到。剩沽新酒對斜陽。

又

燂湯具浴僧留暖。春黍供炊旅甌香。自笑平生爲客熟。關山千里一衣囊。

又

胡麻刈罷下麪初。引水家家灌晚蔬。但有茅簷隨處好。淵明可獨愛吾廬。

又

秋風敗葉委蒼苔。小蹇閑遊始此回。溪上風煙爭晚渡。縣前燈火賣新醅。

卷第五十九

遊山

四序雖悉佳。莫若新秋時。已脫烹煮厄。未與搖落悲。露集水落渚。鵲爭風墮枝。煙村烏柏丹。晚日望最奇。豈無一舴舨。往赴幽人期。婆娑下堂迎。壞衲顛倒披。丹果垂中庭。碧花蔓疎籬。秋高才一來。怪我今年衰。

對酒

天上何曾許寄愁。酒中正自可忘憂。不能上樹作巢飲。尙辦滿船供拍浮。神仙可學君豈信。衣食裁足吾何求。但憶人如王粲輩。相攜一笑賦登樓。

遣舟迎子適因寄古風十四韻

今日拆汝書。一讀眼爲明。知汝卽日歸。明當遣舟迎。想汝片帆東。翩若飛鴻征。薄暮過梅市。啜謳雙櫓聲。到家亦尙早。城樓初發更。草草一尊酒。爲汝手自傾。夜分不能寐。頓忘衰病嬰。豈惟病良已。白頭黑絲生。暫別亦不惡。益重父子情。自今日相守。北窗同短檠。六經焰久伏。百氏方縱橫。世俗擯孤學。未易口舌爭。此責在學者。草萊勿自輕。汝壯父未死。相勉在力行。

重寄子適

秋風日日望歸裝。忽報來期喜欲狂。衰病無因檝迎汝。夢隨殘月過浮梁。

飯後偶題

環堵蕭然百慮忘。天教得飯飲枯腸。長橋鮮美桃花嫩。北苑茶新帶勝方。漠漠寒花欲晚照。翩翩孤蝶弄

秋光解衣捫腹西窗下。賴有新詩破日長。

秋興

流光冉冉迫晡嗷。常抱秋風宋玉悲。才盡已無楓落句。身存又見雁來時。自憐閉戶龐眉叟。初對還家大耳兒子。遠方自行在歸。一盞青燈照寒影。不妨細舉別來詩。

又

世事元看等一毫。紛紛寵辱陋兒曹。雁行橫野月初上。桐葉滿庭霜未高。細考蟲魚箋爾雅。廣收草木續離騷。更餘一事君知否。臥聽牀頭滴小槽。

舍北行飯

飯飽逍遙信所之。芙蓉塘圃遍遊嬉。梧楸凋落風高後。瓜瓠輪困雨足時。犬喜人歸迎野路。鶻營巢穩占低枝。晚來嬾復呼童子。自掩柴門上屐屨。

舍南野步

枯蔓絡荆籬。幽花映荻扉。馴鸞驚不起。歸鶴倦猶飛。野色連收網。邊愁入搗衣。壯圖空自笑。事事與心違。

感昔

行年三十憶南遊。穩駕滄溟萬斛舟。常記早秋雷雨霽。柁師指點說流求。

又

馬瘦行遲自一奇。溪山佳處看無遺。酒壚強挽人同醉。散去何曾識是誰。

又

負琴腰劍成三友，出蜀歸吳歷百城。最是客途愁絕處，巫山廟下聽猿聲。

又

岳陽三伏正炎蒸，爽氣淒風見未曾。白浪蹴天樓欲動，當時恨不到黃陵。

又

行遍天涯只漫勞，歸來登覽興方豪。雲生神禹千年穴，雪捲靈霄八月濤。

病齒

似病多病臂已瘳，當墮未墮齒難留。一杯藜粥吾所美，幸可自辦不待求。既無齧骨犯曲禮，亦免祝饁煩成周。形骸外物付悠悠，那將老境供閑愁。

揮手

揮手羣玉府，說駕石帆山。偶與片雲出，卻隨孤鶴還。松風暮蕭瑟，石溜夜淙潺。阿敏讀書處，更添茆一間。

過鄰家

初寒偏著苦吟身，情話時時過近鄰。嘉穉連雲無水旱，齊民轉壑自酸辛。室廬封鏽多逋戶，市邑蕭條少醉人。飯未生塵羹有糝，吾曹切勿怨常貧。

甲子秋八月丙辰雞初鳴時夢劉韶美示詩八篇高古可愛明且作此詩志之

韶美仙去三十年，一念及之常悵然。秋窗忽夢接顏色，萬里老鶴歸遼天。贈詩温其似玉瓊，我亦竊識關

雖亂建安黃初不足言。筆端直覺無秦漢。

山居

客至何曾共劇談。行藏獨有老農諳。覓官肯信山居樂。食淡方知飯味甘。一脈泉通澆藥圃。萬重雲鎖釣魚菴。好奇自笑心無厭。行遍江南憶劍南。

歸老

兩脚走萬里。歸老樵風溪。雖遠京雒塵。窮巷還多泥。壘壘喪家狗。喔喔失旦雞。幸非徒比景。何恨棲會稽。今年更可笑。偃僂自灌畦。榮雖不滿眼。悔亦免噬臍。萬事付一尊。師友阮與嵇。

送子坦赴鹽官縣市征

父子團樂笑語諱。豈知雲散各天涯。長亭結束秋將晚。別酒淒涼日易斜。我坐羸年艱就養。汝非仰祿肯離家。遊山尚有平生意。試爲閑尋一鹿車。臘中欲作一小肩輿。輕駛堅實。雨夫可舉者。以備山行。

寄子坦

目斷西陵細鷺中。津亭想汝繫孤篷。頗憂昨暮雲吞日。俗以黑雲接落日爲風雨之候。猶幸今朝雨壓風。就食亦知難戀戀。挂帆終恨太匆匆。寒沙不是無來雁。頻寄書歸問老翁。

書感

老荷寬恩許退耕。絲毫無報亦何情。民貧樂歲尙艱食。道喪異端方肆行。黨禍本從名輩出。弊端常向盛時生。古人骨冷青松下。誰起英魂與細評。

白扁門歸

橋樑纍纍未著霜。陂塘渺渺度秋光。長橋虹臥當官道。重閣鸞飛出女牆。煙際遠舟俄已隱。天邊鷺雁不成行。歸來有底誇兒輩。笑指奚奴古錦囊。

遺興

兔徑遊觀足。蝸廬臥起寬。垂名千古易。無愧寸心難。燈火娛清夜。風霜變早寒。一經家世事。吾與未應闌。

詩酒

詩酒平生樂。無如老病侵。才衰愁韻險。量退酒杯深。宿露滋金盞。微霜點纈林。呼鷹五陵路。惆悵少年心。

晚秋野興

病骨支離不耐秋。今年九月即輕裘。細書燈下幸能讀。舊友夢中時與遊。連夕夢紹與問同朝諸公。官賦畢輸無吠犬。農功已息有閑牛。不知冠蓋朝天客。也得心安似我不。

又

徹底無能徹骨貧。自憐虛作六朝民。學因病廢捐長日。志與年衰媿古人。露濕亂螢飛暗廡。霜清飢雀噪空園。一生眼境常如此。草賦憑誰問大鈞。

舟中口占

養生妙理本平平。未可常談笑老生。業力頓消知學進。人情愈薄喜身輕。鶴雛日長丹砂頂。巖溜時聞玉珮聲。最是扁舟暮歸處。一川風月遠相迎。

閉門

閉門何所樂。聊息此生勞。霜薄殘蕪綠。風酣萬木號。研朱點周易。飲酒讀離騷。斷盡功名念。非關快剪刀。

暮秋

多雨今秋水渺然。溝溪無處不通船。山回忽得煙村路。始信桃源是地仙。

又

閑傾清聖濁賢酒。穩泛朝南暮北風。射的山前雲幾片。一秋不散伴漁翁。

又

百年大耋龍鍾日。九月初寒慘淡天。嶺谷高低明野火。村墟遠近起炊煙。

又

舍前舍後養魚塘。溪北溪南打稻場。喜事一雙黃蛺蝶。隨人來往弄秋光。

又

九月山村已驟寒。看雲殊怯倚闌干。一杯濁酒栽培睡。不覺春雷起鼻端。

又

清秋又是一年新。滿眼丹楓映白蘋。海內故人書斷絕。汀洲鷗鷺卻心親。

農舍

三農雖隙亦匆忙。穡事何曾一夕忘。欲曬胡麻愁屢雨。未收蕎麥怯新霜。

又
神農之學未爲非。日夜勤勞備歲饑。雨畏禾頭蒸耳出。潤憂麥粒化蛾飛。

又
萬錢近縣買黃犢。襤褸行當東作時。堪笑江東王謝輩。唾壺麈尾事兒嬉。

又
杜門雖與世相遠。未許人嘲作計非。長綆雲邊牽犢過。小舟月下載犁歸。

九月十日夜獨坐

蓬窗燈火耿疎籬。正是寒沙雁到時。頭少二毛真篤老。口無縱理亦長飢。朝開夕死固當勉。幼學壯行嗟已遲。小豎夜闌私怪我。儼然危坐若深思。

述意

憂患無窮生有涯。惟須百事屏紛華。人誰敢侮修身士。天不能窮力穡家。頻喚老僧同夜粥。間從鄰叟試秋茶。結茅林下從來事。瓦屋三間已太奢。陸士衡兄弟共居瓦屋三間。

小疾自警

老來土弗強。舉箸輒作病。造物蓋警之。何啻三下令。而我不自珍。若與疾豎競。豈惟昧攝養。實亦闕忠敬。顛踣乃自詒。何用死不瞑。自今師古訓。念念貴清靜。羔豚昔所美。放斥如遠佞。淖糜煮石泉。香飯炊瓦甑。采蔬摘藥苗。巾篲相照映。膨脝亦宜戒。僅飽勿憚剩。隱書有至理。要使氣常勝。因之戒友朋。苦語君試聽。

白龍

九月癸酉暮。白龍見西方。是時久晴明。日落天正蒼。玉宇無纖雲。凌空獨高翔。蜿蜒久乃隱。父老歎未嘗。清臺占五行。此事實殊常。我非劉子政。聊記以短章。

學易

卒歲勿多求。壺殮與楊裘。心安由自足。身貴爲無求。易化千年鶴。難馴萬里鷗。閉門方學易。未暇揖浮丘。

又

學古忘衰疾。齋心洗昨非。拳拳奉天理。坦坦息心機。改過先幽隱。收功在細微。毫期猶自警。俯仰惜餘暉。

閑中作

呼童按摩罷。倚壁欠伸餘。棋局可忘老。鳥聲能起予。掃簷憐胃蝶。投餌出潛魚。向晚明窗下。還來讀舊書。

枕上

噓噓初聽雁。南征。喔喔俄聞雞。一鳴。夢境往來雙隻。瘳。官途與廢短長。檠。何由生計。裁能足。不願人間過。取名飯。輟茶甘。吾事了。但愁無酒酌公榮。家貧不能釀酒。而官豈多醜。

出遊

一樽隨處可開顏。此事深疑造物慳。地可登臨多恨遠。身常強健又須閑。山園小市煙初斂。霜著橫林葉

半殷。徙倚闌干君勿厭。日斜猶及棹舟還。

又

漁村酒市本無期。小寨扁舟信所之。丹葉滿林霜落後。紫萍黏塊水枯時。山林閑寂歸雖早。齒髮衰殘病已遲。努力及時謀自適。錦囊多貯暮秋詩。

又

山有監輿步有舟。放翁身健得閑遊。羊牛點點日將夕。蒲柳蕭蕭天正秋。細徑僧歸雲外寺。疎燈人語酒家樓。歸途更愛湖橋月。獨倚闌干爲小留。

又

霜氣蕭條木葉黃。佳時病起意差強。雲煙古寺聞僧梵。燈火長橋見戲場。一枕清風幽夢斷。數匙旅飯野蔬香。道邊莫笑衰殘甚。獨往山林興未央。

又

禹窆胥濤中路分。畫橋衝破一川雲。柯橋僧閣凌空起。梅市漁歌帶月聞。蟹束寒蒲大盈尺。鱸穿細柳重兼斤。酒家報我新醅熟。且撥閑愁寄一欣。

家居

清世念遺民。常情重老人。饋漿煩郡府。分胙媿鄉鄰。穫稻黃雲卷。舂粳玉粒新。膨脝自摩腹。一笑欲忘貧。

老阮詩名減。登臨笑口開。醞泉爲酒熟。倩鶴附書回。紗帽方簪菊。筇枝又探梅。清狂君勿笑。曾是薄蓬萊。

又

蒲葦村深地。風霜歲晚天。溪柴勝熾炭。小束柴自若。那溪出名溪柴。黎布敵純綿。客有遺黎布者甚輕暖。有客問奇字。無人嘲晝眠。誰言此翁老。懷抱尙超然。

贈隱者

疇昔從君處。玄都太古墟。月高旛影直。霜重珮聲寒。鶴駕三山近。壺天萬里寬。相逢初未省。但認切雲冠。

又

力量超終古。光明破積昏。獨行寧有待。妙用本忘言。神定嬰兒戲。丹靈豎子奔。緒餘應不靳。小出濟元元。

貧中自戲

種枳爲籬草。結廬人間知。足更誰如。澗深松老忘榮謝。天闊雲閑任卷舒。門冷併無殘客跡。家貧常讀絕編書。有金可散還關念。多事從來笑漢疎。

風雨夜坐

寒風淒緊雨空濛。舍北新丹數樹楓。欹枕舊遊來眼底。掩書餘味在胸中。松明對影談玄客。篠火圍爐采藥翁。君看龜堂新境界。固應難與俗人同。

示村醫

玉函肘後了無功。每寓奇方曠傲中。衫袖翫橙清鼻觀。枕囊貯菊愈頭風。新詩吟罷愁如洗。好景逢來病欲空。卻羨龍鍾布裘客。埭西賣藥到村東。

秋雨

一秋風雨蔽白日。積水鬼神愁太陰。寒蟄悲鳴草根溼。水鳥暝哭菰葦深。殘年不覺日月逝。病骨惟愁霜
露侵。常有淖糜支旦暮。一毫寧復少年心。

雜興

散步持書卷。閑眠枕藥囊。馴鸞隨几杖。癡蝶入衣裳。病起年光速。身閑日景長。爲憐紅樹好。久立向西廂。

又

客間維摩疾。人衰范叔寒。詩囊負童背。藥笈挂驢鞍。野果攢眉澀。村醪振齒酸。老雞殊可念。旦旦報平安。

又

愛物停垂釣。劬身自荷鋤。時從鄰父飲。日授稚孫書。尚棄登山屐。寧須下澤車。平生雙不借。投老伴歸歟。

又

平生獨何幸。命若與人謀。疲懦逃深責。空疎得早休。位卑輕得喪。迹遠少恩讎。莫怪歸耕樂。文園久倦遊。

又

倒囊得千錢。從人買釣船。秋風宿村步。暮雪醉江天。得意鷗波外。忘歸雁浦邊。平生笑嚴子。猶有姓名傳。

又

澤居憂下溼。老病覺中乾。違俗恐不免。倚天聊自寬。受規如獲藥。喜退甚彈冠。不是憎勳業。心知骨相寒。

江亭

野市逢虛日。江亭候暮潮。蟲號霜後草。人立雨中橋。病骨羸將折。殘魂黯欲消。無心作村醉。酒旆苦相招。

晚歸

梅市橋邊弄夕霏。菱歌聲裏棹船歸。白鷗去盡還堪恨。不爲幽人暖釣磯。

懷昔

奮透窮閭本甚微。刺天何敢慕羣飛。業文僅與驅書券。學射纔因鼠發機。罟獲縱橫真脫命。風波瀕洄尚餘威。朝冠挂了方無事。卻愛山僧百衲衣。

初寒示鄰曲

村北村南數十家。陂池重複谷谿斜。荻叢缺處見漁火。蓬戶閉時聞紡車。淺瀨水清雙立鷺。橫林葉盡萬棲鴉。是中佳興無窮極。爛著青鞵上若耶。

夢中作并序

甲子十月二日夜雞初鳴。夢宴客大樓上。山河奇麗。東南隅有古關。尤壯。酒半樂闋。索筆賦詩。終篇而覺。不遺一字。遂錄之。亦不復加竄定也。

富貴誇人死。卽休。每輕庸子。覓封侯。讀書歷見古人面。好義常先天下憂。獨往何妨刀買犢。大烹卻要鼎函牛。坐皆豪傑。眞成快。不負凌雲百尺樓。

初寒

老遇初寒候。貧當絕祿時。衣裘俱在笥。薪炭不愆期。鶉滿羣童網。魚浮百石陂。比鄰每分餉。捫腹可無飢。

又

重簾禦晚吹。密瓦護晨霜。小室今年冬初增瓦三百箇。三面窗皆設紙簾。焙焙煎爐火。霏霏石鼎香。行遲
依木杖。坐久穴藜牀。晝亦無聊甚。胡爲厭夜長。

鉏菜

江湖霜雪薄。終歲富嘉蔬。菘韭常相續。蒿蔓亦有餘。家貧闕梁肉。身病忌鱸魚。幸有荒畦在。何妨日荷鋤。

對酒

賦性雖耽酒。其如老病身。氣衰成小戶。醅濁號賢人。疏廣矜君賜。劉伶畏婦嗔。蘭亭獨超絕。千載擅清真。
夜臥久不得寐。復披衣起呼燈。作草書數紙。乃復酣枕明旦。作此詩記之。

才下多阨窮。地偏罕人客。半生走四海。竟無第一策。暮年忽大悟。惟有緊閉門。朝作一池墨。弄筆招鶴魂。
初若奔騖駿。忽如掣蛟鯨。鬼神森出沒。雷雨更晦明。飛揚輿已極。投筆徑就牀。酣酣一枕睡。不覺幽夢長。
手攜避秦人行。上腰帶鞶。下視河流黃。仰看天宇青。大呼自驚覺。夜半燈欲死。茆簷雨點滴。身乃在萬里。
挑燈影突兀。顧問汝是誰。留侯雖強食。輕舉亦何疑。

孤雲

四十年來住此山。入朝無補又東還。倚闌莫怪多時立。爲愛孤雲盡日閑。

自閔

破帽羸騖厭垢氛。挂冠歸伴放溪雲。年光疾病占強半。日景睡眠居七分。廬冢蕭條頻實涕。交朋零落久
離羣。殘年豈復行孤學。自閔猶尊昔所聞。

贈雞

青銅三百買烏雞，關地牆東爲擇棲。更聘一雌全物性，莫辭風雨五更啼。

子通爲其長兄置酒予亦與焉作五字示之

烏衣兄弟集，我亦據胡牀。晚菊數枝在，小園幽興長。霜清桑落熟，湯嫩雨前香。草草雖堪笑，他年未易忘。

太息

太息貧家似破船，不容一夕得安眠。春憂水潦秋防旱，左右枝梧且過年。

又

禱廟祈神望歲穰，今年中熟更堪傷。百錢斗米無人要，賈朽何時發積藏。

又

北陌東阡有故墟，辛勤見汝昔營居。豪吞暗蝕皆逃去，闕戶無人草滿廬。

代鄰家子作

社日淋漓酒滿衣，黃雞正嫩白鵝肥。弟兄相顧無涯喜，扶得吾翁爛醉歸。

山行

山光秀可餐，溪水清可啜。白雲映空碧，突起若積雪。我行溪山間，靈府爲澄澈。峻嶒崖角立，蟠屈路九折。黃楊與冬青，鬱鬱自成列。其根貫石罅，橫逸相糾結。上捫鵲巢，下歷豺虎穴。流泉不可見，鏘然響環玦。出山日已暮，林火遠明滅。小憩得樵家，題詩記幽絕。

行過西山至柳姑廟晚歸

倚杖西山麓，褰衣古廟壖。斷雲依釣浦，細雨壓炊煙。廢學慙詩退，安貧覺氣全。霜天日易晚，鐘鼓隔城傳。

月夕幽居有感

五嶽名山采藥身，可憐騎馬踏京塵。浮名本是挺災物，謝事寧非得道因。出岫每招雲結伴，巢松仍與鶴爲鄰。劍南舊隱雖乖隔，依舊柴門月色新。

寒夜將旦作

白髮垂肩無二毛，胸中消盡少年豪。河傾月沒夜將旦，木落草枯秋已高。窗下燈殘候蟲語，牆隅棧冷老雞號。曲肱不復更成寐，起視寒空如斷鰲。

舍北獨步

霜露霑衣迫歲徂，天公欲爲老人娛。斷雲新月供詩句，蒼檜丹楓列畫圖。風葉蕭蕭歸獨鶴，煙波渺渺漾雙鳧。孤村薄暮誰從我，惟是詩囊與酒壺。

山村道中思蜀

當年萬里客西南，藥市題詩倚半酣。偶爲三遊羣玉府，遂妨重到百花潭。剡溪謾說思安道，函谷誰能識老聃。空乞丹青作橫幅，半堤寒日策羸驂。

不如茅屋底

鑄印大如斗，佩劍長挂頤。不如茅屋底，睡到日高時。

南伐踰銅柱，西征出玉關。不如茅屋底，高枕看青山。

又

火齊堆盤起，珊瑚列庫藏。不如茅屋底，父子事耕桑。

又

列鼎賓筵盛，籠坊從騎都。不如茅屋底，醉倒喚兒扶。

菜羹

青菘綠韭古嘉蔬，蓴絲菰白名三吳。臺心短黃奉天廚，熊蹯駝峯美不如。老農手自闢幽圃，土如膏肪水如乳。供家賴此不外取，撥糶寧辭走煙雨。雞豚下箸不可常，況復妄想太官羊。地爐篝火菜香，舌端未享鼻先嘗。

十月墮甚人多疾十六日風雨作寒氣候方少正作短歌以記之

昔我從行臺，宿師南山旁。仲秋已戒寒，九月常竄霜。入冬即大雪，人馬有仆僵。土牀熾薪炭，旃毳如胡羌。果蔬悉已冰，熟視不得嘗。獵騎荷戈歸，爭獻狐與狼。是時意氣快，豈復思江鄉。邇來四十載，餘景迫耄荒。結茅鏡湖曲，氣候歲靡常。殘暑排不去，單衣作重陽。霜晚木未丹，地煖草不黃。玄冥失號令，瘴鬼意頡頏。忽焉風雨惡，縱擊勢莫當。頗疑地撼軸，又恐河決防。和泥補竅穴，乞火燎衣裳。霰雪雖未作，疾癘幸退藏。風爐齋糝美，瓦甑粳飯香。比鄰共安健，相與歌虞唐。

冬夜題齋壁

髮不能勝二寸冠。天教送老向江干。倚牆筇杖伴人瘦。縞瓦清霜爭月寒。壯志追思良可悔。危途逼歷始知難。一身著了餘何事。茅屋三間已太寬。

自遣

蔬食任無魚。山行可借驢。指攀猶把釣。眼澀未捐書。客少勝紛若。家貧亦晏如。時時顧影歎。頑似十年初。

蕩蕩

蕩蕩唐虞去日遙。孔林千載亦荒丘。六經殘缺幸可考。百氏縱橫誰復憂。釋書恐非易論語。王迹其在詩春秋。君臣父子未嘗泯。吾道尙傳君但求。

晨起

曉枕初興白髮翁。弊裘百衲封爐紅。獨居漫受書狐媚。滯思難幹筆陣雄。舊學蟲魚箋爾雅。晚知稼穡講豳風。一身自喜無餘事。且度殘年風雪中。

陸放翁集

劍南詩稿

卷第六十

述感

斷簡承孤學。窮閭負壯心。方憂一齒落。時一齒方搖動。何止二毛侵。買地開幽圃。招僧理廢琴。浮生祇如此。感慨不須深。

甲子歲十月二十四日夜半夢遇故人於山水間飲酒賦詩既覺僅能記一二乃追補之

拂衣金馬門。稅駕石帆村。喚起華山夢。招回湘水魂。心親頻握手。目擊欲忘言。最喜藤陰下。儵然共一樽。

又

小山緣曲澗。路斷得藤陰。忽遇平生友。重論一片心。興闌棋局散。意豁酒杯深。雞唱俄驚覺。悽然淚滿襟。

舟中夜賦

千里風塵季子裘。五湖煙浪志和舟。燈殘復吐惱孤夢。雨落還收生旅愁。城上霜笳入霄漢。煙中漁火耿汀洲。牧之未極詩人趣。但謂能輕萬戶侯。

舟中曉賦

木落霜清水鳥呼。扁舟夜泊古城隅。吹殘畫角鐘初動。低盡寒空斗欲無。浪迹已同鷗境界。遠遊方羨雁

程途高橋健席從今始。遍歷三湘與五湖。

漁家

江上漁家水蘸扉。閉雲片片傍苔磯。釣收鷺下虛舟立。橋斷僧尋別徑歸。海近岡巒多迤邐。天寒霧雨正霏微。羊裘老作桐江叟。點檢初心幸未違。

遠遊

少年遊宦日。骯髒恥沉浮。見虎猶攘臂。逢狐肯叩頭。力行雖自許。早退豈人謀。予年六十餘。卽退閑故山。小艇煙波上。飄然得遠遊。

與兒孫小飲

歲暮寒多雨。村深早閉門。荒園摘葵芥。近市買雞豚。短褐聯三世。幽窗共一樽。吾曹常得此。餘事不須論。

遂初

狂本類三閭。歸仍慕二疎。何由滿人笑。但可遂吾初。奕奕沙堤馬。栖栖下澤車。細看俱外物。俛首老犁鋤。

與村鄰聚飲

冬日鄉閭集。珍烹得徧嘗。蟹供牢九美。膾人恐德言。雜賦中所謂牢九。今包子是。魚羹膾殘香。雞跖宜菹白。豚肩雜韭黃。一歡君勿惜。豐歉歲何常。

又

交好貧尤篤。鄉情老更親。爇香紅糝熟。齎美綠椒新。俗似山川古。人如酒醴醇。一杯相屬罷。吾亦愛吾鄰。

夜坐示子處

裘薄知霜重。燈殘覺夜闌。爲農宜廢學。謝事等無官。疎懶貧難醒。沉綿死有端。大兒千里至。聊復爲加餐。

行飯暮歸

甕置觀書不耐閑。飄然梅塢竹籬間。霜風盡脫千林葉。雲氣平沉一面山。笑喚筇枝扶蹇步。聊憑村酒借朱顏。廟墻牆下歸來晚。宿鳥紛紛已漸還。

寒雨中夜坐

江村風雨晚冥冥。閉戶添衣愴客情。爐爇松肪如蠟爨。鼎煎茶浪起灘聲。團鑊賴有兒同話。剝啄應無客可迎。聊舉一杯生耳熱。頽然酣枕到窗明。

枕上

世間命薄有誰如。僵臥空山夢亦孤。三尺窗前燈半死。萬重雲外雁相呼。久貧僅守殘書友。未死猶須幾酒壺。趣辦一棺那得緩。古人四十揣頭顱。

卽事

心與巖泉靜。形如野鶴羸。朝餐美藜藿。夜學講唐虞。婢老無釵澤。僮寒闕袴襦。所欣惟一事。無吏督殘租。

又

糲飯流匙滑。葵羹出甕香。有時留野客。亦復餉鄰牆。老圃傳占法。行僧遺藥方。未爲全絕物。終勝利名場。

雜感

買馬當可乘。築舍當可居。快馬多覆敗。傑屋鬼所狙。徒行與露坐。安穩無後虞。所以古達人。秋風憶尊鱸。

又

士生誦二典。悅若生唐虞。陞降奉玉帛。可否開吁俞。闕里得其傳。功與造化俱。孰知千載後。乃尊重譯書。

又

擁裘南窗下。堅坐試定力。爐香亦不散。伴我到曠黑。絕交近爲我。遊世易顛踣。默默何所爲。且復自休息。

又

上峽聞竹枝。入秦聞烏鳥。奏曲未及終。涕淚淒已濡。還山風月夕。菱唱起鏡湖。雖無遠遊感。白首亦窮途。

又

吾聞之古方。有病當辭食。如其不能爾。金丹亦無益。我老更事多。此語知造極。子房從赤松。千載推達識。

又

夢育小兒女。便有無窮愛。謁醫問疾恙。對客誇醫邁。晨雞忽喚覺。此愛復安在。人生困糾纏。一笑脫囚械。

閑中自嘲

鏡湖西畔有漁扉。竊比玄英似庶幾。風月定交殊耐久。煙波得意可忘歸。曾行萬里求微祿。亦伴諸公踐駭機。試問卽今成底事。晨飧依舊北山薇。

暇日坐山麓松石間作

偶曳枯筇出槿籬。松間盤石坐移時。飢蟿齧草無餘綠。乳鶴營巢有墮枝。幽事類分皆可譜。高情辭達自

成詩莫嗟寂寂終吾世。正是他年一段奇。

得子虞臨安舟中書因寄

口水悠悠雙鯉魚。眼明初拆入關書。殘年已覺口如客。一念還成淚漉裾。春近預憂歸夢短。潮回莫遣寄聲疎。何時可棄微官縛。五畝荒畦共荷鋤。

書喜

龍犀元知不足驚。退居兀兀饒餘生。水魚可釣蕪材足。霜稻方登糶價平。鄰媪已安諸子養。閩氏繼以賢。其業諸子而去。今始得復歸園。丁初葺數畧。戎韓氏得風湖上。以種蔬爲樂。鄉閭喜事吾曹共。一醉寧辭洗破甃。

又

十月東吳草未枯。村村耕故可成圖。歲收儉薄雖中熟。民得闕除已小蘇。家塾競延師教子。里門罕見吏徵租。老昏不記唐年事。試問元和有此無。

老學菴夜興

冷臥空齋枕曲肱。飢鷹驚起髮鬢蒼。煙霞華嶽逃名客。風雪廬山入定僧。櫛葉蔽身勝衣帛。金丹照室不燃燈。秃翁自笑無名字。聊向江湖襲舊稱。取江湖散人之意。

感昔

百丈庚寅上峽時。至今猶健豈前期。家人暗換吾何歎。鏡裏衰翁復是誰。上峽骨內在者。四子爾今皆出。

仕。

又

神女祠前猿夜鳴。相公溪上草初生。重遊惟有西窗夢。一點燈青夢不成。

又

白帝城邊鷺亂啼。憶騎瘦馬踏春泥。老來感舊多悽愴。孤夢時時到漢西。

又

小益晨裝雨作泥。南沮涉水馬長嘶。山腰細棧移新路。驛壁流塵開舊題。

又

曾從征西十萬師。白頭回顧只成悲。雲深駱谷傳烽處。雪密嶓山校獵時。

又

老看洞外小朱扉。雲壓寒空雪欲飛。結陣弓刀邊壘去。挂鞍狐兔獵場歸。

又

少時失脚利名間。寸步何曾不險艱。造物恐人渾忘卻。夢中憂患尚如山。

孤村

少年誤計落人間。晚臥孤村日掩關。小室易溫爐火省。幽窗常暗架書閑。梅橫籬落春初動。雪闌川原雪尚慳。欲喚一藤同勝踐。恨無傑句壓溪山。

村舍書事

紙窗百納地爐紅。圍坐牛醫卜肆翁。時節杯盤來往熟。朝晡鹽酪有無通。男丁共結春耕耦。婦女相呼夜
賃司。老子頽然最無事。客歸自策讀書功。

小菴居舍

野水楓林下。殘年亦自存。刈茅支漏屋。插棘補頽垣。把釣襟靈爽。爭棋笑語喧。晚窗幽興極。共酌黍醪渾。

冬至

老遇陽生海上村。川雲漠漠雨昏昏。鄰家祭徹初分胙。賀客泥深不到門。萬卷縱橫忘歲月。百年行止付
乾坤。明朝晴霽猶堪出。南陌東阡共一樽。

夜坐示子邁兼示元敏

微霰不成雪。大風俄散雲。孤燈翳還吐。斷雁遠猶聞。冉冉新春動。遙遙清夜分。兒孫未須睡。吾與汝論文。

客懷

客懷病思雨。淒淒瘦馬長。離濺雪泥道。左忽逢曾宿驛。壁間閑看舊留題。村醪酸薄陳山果。旅飯蕭條嚼
凍齏。何處人間非夢境。恍然重到劍關西。

雜書幽居事

抱瓮窮園叟。還山老布衣。死邊常得活。閑處偶容歸。釣恐魚吞餌。棋憂客墮機。此心君會否。洗盡百年非。

又

淡薄齊榮辱。恢疎略怨恩。爐常養丹母。手自斲桐孫。炎火下照海。黃河高沂源。道翁來不速。一笑倒吾樽。

又

庭曠多延月。齋空半貯雲。松聲行路共。泉脈近鄰分。采藥九蒸噀。朝真三沐熏。林間有叢杞。繞屋夜猿羶。

又

貧困雖終老。胸中尚浩然。直令頭搶地。未害鼻撩天。種菜慳三畝。苦茅僅數椽。布衾常不暖。夜夜亦安眠。

又

卜築南湖上。梅花幾度春。身緣作詩瘦。家爲買山貧。野步維漁艇。江樓岸醉巾。誰知會稽叟。不媿葛天民。

題齋壁

門前枯葉滿荒街。堂下殘蕪擁土階。蓬蓽蕭條如旅店。豆蔬淡薄學僧齋。晝存真火溫枵腹。夜挽黃流灌病骸。喚取鄰翁同結社。他年仙去與君偕。

探梅

歲月相尋豈有窮。早梅喚醒醉眼翁。坐中酒量人人別。花底春風處處同。白帝城邊微雪過。青衣江上夕陽紅。錦囊空復殘詩在。分付悲歎一夢中。

新移竹栽喜於得雨而池中瀾漚乃以水溢而去戲以長句記之

霧雨三日天沉陰。西溪水長二尺深。土濡新竹有生意。池滿文禽無住心。竹根蘇活賴此雨。禽亦歸飛戲煙浦。去留雖異各欣然。抽萌哺子全其天。

讀宛陵先生詩

李杜不復作，梅公眞壯哉。豈惟凡骨換，要是頂門開。鍛鍊無遺力，淵源有自來。平生解牛手，餘刃獨恢恢。

勉學

學力艱危見，精誠夢寐知。衆人雖莫察，吾道豈容欺。雷雨含元氣，蒼龜決大疑。爲儒能體此，端不負先師。

道室試筆

浮雲萬事不到眼，千歲人間心尙孩。屏風疊下看花落，扇子峽中聞雪來。

又

兜羅繚雲常滿谷，勃落葉衣無四時。中原百戰血塗野，此老醉眠初不知。

又

事來得失若山重，放下始知前日狂。一枝藜杖一盞酒，何處人間無醉鄉。

又

吾家學道今四世，世佩施眞三住銘。一窗蘿月照孤詠，萬壑松風吹半醒。

又

死來尙戀遊金谷，病廢猶難放柳枝。等是胸中不浩浩，樂天莫笑季倫癡。

又

明明行路有神仙，世上求仙卻不然。貪冒苦多廉讓少，恐君未得盡天年。

治心

治心無他法。要使百念空。秋毫作其間。有若海颶風。颶風孰能止。三日力自窮。我徐躡其後。杲杲日出東。向來一噫者。畢竟誰爲雄。萬里靜海氛。一望開天容。會從安期生。高會蓬萊宮。

夜夢遇老人於松石間若舊嘗從其遊者再拜敘間闊老人亦酬接甚至云

遼海曾從化鶴丁。百年塵土汚巾瓶。萬山深處遇行李。再拜起時如醉醒。綠樹巖前開藥笈。白驢背上指丹經。雲霄平步尋常事。不用求方更解形。

過鄰家

病去詩情動。寒深酒戒開。兒孫扶每出。鄰里喚還來。雲重時飛雪。春遲未見梅。山園多芋栗。夜話且燔煨。

村飲

舊隱青山在。衰顏白髮新。推移忝前輩。疎懶似高人。擊鼓驅殤鬼。吹簫樂社神。家家皆有酒。莫吐相君茵。

市飲

學道無多事。消陰服衆魔。春雷驚蟄戶。海日浴鯨波。大勇收全勝。靈襟襲太和。何妨會稽市。取酒獨酣歌。

社飲

東作初占嗣歲宜。蠶官又近乞靈時。傾家釀酒無遺力。倒社迎神盡及期。先醉後醒驚老僮。路長足蹇歎歸遲。西村漸過新塘近。宿鳥歸飛已滿枝。

舟中作

一葉輕舟一破裘。飄然江海送悠悠。閑知睡味甜如蜜。老覺羈懷淡似秋。失侶雲間孤雁下。耐寒波面兩
扁浮。年逾八十真當去。似爲雲山尙小留。

風雲晝晦夜遂大雪

大風從北來。洶洶十萬軍。草木盡偃仆。道路暝不分。山澤氣上騰。天受之爲雲。山雲如馬牛。水雲如魚鱗。
朝聞翳白日。暮重壓厚坤。高城岌欲動。我屋何足掀。兒怖牀下伏。婢恐堅閉門。老翁兩耳聾。無地著戚欣。
夜艾不知雪。但覺手足皸。布衾冷似鐵。燒糠作微溫。豈不思一飲。流塵暗空樽。已矣可奈何。凍死向孤村。

大雪

海天踏踏萬重雲。欲到前村路不分。烈風吹雪深一丈。大布縫衫重七斤。

雪夜

病久湖邊五畝園。雪風一夜拆蘆藩。燈爐薪炭衣篝暖。圍坐兒孫笑語溫。菜乞鄰家作菹美。酒賒近市帶
酪渾。平居自是無來客。明日衝泥誰叩門。

雪霽

米盡囊空莫問渠。天公自解養迂疎。雪泥壅路斷來客。朝日滿窗宜讀書。漸暖橫林聞語鳥。乍晴幽圃富
嘉蔬。東家小蹇那須借。早晚吾兒送鹿車。子坦欲作一小無子來。

雪後

雨解平簷雪。風收際海雲。根蘇萱出土。冰斷水生紋。遊舫家家喜。行歌巷巷聞。太平元有象。端爲謝東君。

夜寒與客燒乾柴取暖戲作

槁竹乾薪隔歲求。正虞雪夜客相投。如傾漱漱蒲萄酒。以糶重重貂鼠裘。一睡策勳殊可喜。千金論價恐難酬。他時鐵馬榆關外。憶此猶當笑不休。

排悶

殘雪融成雨。寒燈結作花。睡稀聽鬪鼠。坐久送棲鴉。食似關僧鉢。居如寓店家。餘年不須問。卽此是生涯。

席上有舉呂居仁詩者因次其韻示坐客

是身如鼠穴太倉。七十始辦求深藏。扶衰復拜求舊詔。入對講殿瞻顛昂。期年蒙恩許謝病。家居更辱鄉黨敬。今夕不醉無庸歸。此老餘年君所知。

予使江南時以詩投政府丐湖湘一麾會召還不果偶讀舊稿有感

文字塵埃我自知。向來諸老誤相期。揮毫當得江山助。不到瀟湘豈有詩。

柳橋

村路初晴雪作泥。經旬不到小橋西。出門頓覺春來早。柳染輕黃已蘸溪。

鷗

海上輕鷗何處尋。煙波萬里信浮沉。今朝忽向船頭見。消盡平生得喪心。

鷺

雪霽春回亦樂哉。棋軒正對小灘開。翩翩飛鷺真吾友。肯爲幽人一再來。

感物

日落烏將數子歸。風和雉挾兩雌飛。不如村舍安孤寂。父子飄然兩褐衣。予齋居已久。又諸子曾出仕。猶與子猶相對。如世外人。

甲子歲暮

世間巧拙亦何施。萬事難禁歲月移。遲死幾時天有意。要令自悟不須師。

出遊至僧舍及逆旅戲贈絕句

山僧邂逅即情親。野叟留連語更真。淡淡論交端有味。一彈指頃百年身。

又

飯炊適熟如延客。犬喜來迎似到家。雨滴茅簷草煙溼。不妨笑語暫隨譚。

歲暮出遊

殘曆消磨無半紙。一年光景又成非。瓦溝雪水滴欲盡。江路梅花開尙稀。竹院篝燈留度宿。旗亭誇酒勸無歸。此身自笑知何似。萬里遼天一鶴飛。

出遊所至皆欣然相迎口占示之

寓館兼山澤。行裝半雨晴。隨宜分藥物。投老惜人情。邂逅成新識。慇懃講舊盟。農家尤可念。迎勞輟春耕。

題旅舍壁

老子殘年未易量。出門隨處得徜徉。窗櫺日淡僧房暖。竈突煙青旅飯香。濁酒可求敲野店。舊題猶在拂

頽牆閑來又取丹經讀。夜就松明解布囊。

野人舍小飲

梅市波光遠。柯橋柳色新。百年情分熟。數酌笑言親。沙上人爭渡。街頭婦賣薪。擘擘隔林鼓。歲暮賽江神。

自近村歸

雪晴村路尚殘泥。茅屋清寒正要低。野渡船虛飛鳥集。煙村路近蹇驢嘶。堅頑那復愁空囊。老健猶能伴架犁。蹴榻不僵君會否。更須百瓮享黃齋。

夢華山

古松偃蹇谷谿僻。太華峯前野老家。久客未歸丹竈冷。碧桃八十一番花。

歲暮與鄰曲飲酒用前輩獨酌韻

出會稽南門。九里有聚落。雖非衣冠區。農圃可共酌。野實雜甘酸。草具無厚薄。小童能擊筑。一笑相與樂。徒手出叢花。空中取丸藥。王禮雖可笑。衆客亦起酌。聊持綴宿好。未用嘲淡泊。窮達則不同。亦隨真率約。予年過八十。故物但城郭。避御名從書。文作詩記清歡。未媿華表鶴。

山中飲酒

百屋堆金錢。萬戶封公侯。富貴人所羨。熟計終繆悠。有酒君但飲。有山君但遊。雖云亦夢事。要是勝一籌。獨醉新豐市。遺魂招馬周。清獻蘇門山。曠度交公休。爛爛目如電。凜凜氣愈遒。騎鯨歸東海。已矣吾何求。

客亭

荻浦煙汀並海涯。一枝柔艣語啞啞。久從野老非生客。慣寓僧廬勝在家。乘興村村俱有酒。逢春處處可尋花。朝來雪霽梅初動。又向郵亭閱歲華。

除夜

野水楓林屋數椽。寒爐無火坐無氈。殘燈耿耿愁孤影。小雪霏霏送舊年。椒酒辟瘟傾漱澀。藍袍俛鬼舞蹁躚。從今供養惟春齋。莫羨愚公日萬錢。

卷第六十一

乙丑元日

好在屠蘇酒。扶衰把一卮。家貧爲壽賂。曆閏換年遲。薦廟須扶拜。題門強綴詩。惟思買春困。熟睡過花時。
俗有賣春困者。予老憊思睡。故欲買之。

元日讀易

伏羲三十餘萬歲。傳者太山一毫芒。春秋雖自魯麟絕。禮樂蓋先秦火亡。孟軻財能道封建。孔子已不言鴻荒。於虜易學幸未泯。安得名山處處藏。

自開歲陰雨連日未止

江雲漠漠雨昏昏。歸老山陰學灌園。十里羊腸僅通路。三家鐘腳自成村。應時餽餽聊從俗。耐久鍾楮儼在門。近縣傳聞頗多盜。呼兒插棘補頽垣。
俗有年餽餽之語。予貧甚。今歲遂不能易鍾楮。

枯菊

翠羽金錢夢已闌。空餘殘葉抱枝乾。紛紛輕薄隨流水。黃與桃花一樣看。

又

積雪嚴霜轉眼空。春回無處不春風。欲知造物無窮妙。但看萱根與菊叢。

村舍雜興

冉冉年華速。昏昏睡思濃。廢書心自愧。謝病客能容。雨急鐘微度。溪湍碓自舂。可憐燈下影。隨處伴衰慵。

又

堅臥非由病。端居不是齋。世情元自薄。人事固多乖。晨飯炊稀米。宵行點豆豉。昔人言可用。第一忌安排。
徐仲車有詩問于安定先生。先生曰。莫安排。

又

白首返吾鄉。功名罷激昂。掃除麈眷屬。芟髮病膏肓。老圃勤供菜。蠻童解炷香。黃昏那用問。且喜日舒長。

又

粥罷重投枕。晨起粥後再睡最佳。燈殘起讀書。閉門常自得。作計更誰如。箭茁白於玉。櫻花長比魚。盤殮有此味。勿怪食無餘。

又

遊宦風波惡。還家日月長。厭煩思病忘。避俗欲陽狂。絕意功名會。收身翰墨場。著書吾豈敢。尙可述農桑。

夜興

窮巷行人絕。高城漏鼓稀。劇談頻翦燭。久坐旋更衣。飢鼠衝人過。啼鴉冒夜飛。客歸吾未睡。孤影自相依。

示鄰曲

北陌東阡好弟兄。老年幸復主齊盟。同嘗春韭秋菘味。共聽朝猿夜鶴聲。百世不忘耕稼業。一壺時釀里閭情。諸孫識字吾真足。安用鵬搏九萬程。

夢中作

華山敷水本閑人。一念無端墮世塵。八十餘年多少事。藥爐丹竈尙如新。

春雨

倚闌正爾受斜陽。細雨霏霏渡野塘。本爲柳枝留淺色。卻教梅蕊洗幽香。小霑蝶粉初何惜。暫溼鶯聲亦未妨。造物無心寧徧物。憑誰問與問東皇。

草堂

幸有湖邊舊草堂。敢煩地主築林塘。辛幼安每欲爲築舍。予辭之遂止。漉殘醅。瓮葛巾溼。插遍野梅紗帽。香風緊。春寒那可敵。身閑晝漏不勝長。浩歌陌上君無怪。世譜推原自楚狂。任陸氏舊譜云。本出接輿後。

道室

筮遇風山第六爻。愴然盡謝俗間交。謀生舊買雲三頃。託宿新分鶴半巢。露下丹芽生藥壠。月明金粉落松梢。眉間喜動君知否。借得丹經手自抄。

旅次有贈

黃鶴樓前逢劍客，青衣江口見詩人。天涯莫起漂零感，物外終爲自在身。賣馬求船雖少日，阻風中酒動兼旬。中原早晚胡塵靜，緜月嵩雲要卜鄰。

雜感五首以不愛入州府爲韻

莘渭二老人，耕釣俱白首。功烈在人間，如天有北斗。方其未遇時，自處固不苟。夫豈邀虛名，欲眩千載後。降及秦漢王，望古猶培塿。猶能守所聞，外物不得誘。君看魯二生，亦豈聖人偶。凜然諸儒間，人可我獨不。

又

山棲天與癖，酒復甚所愛。雖云慙黃綺，亦慕稽阮輩。失腳落人間，二事略皆廢。晚歸臥雲壑，謂此在券內。如何疾屢作，大與初意背。好山雖在眼，動步輒有礙。酒戒復堅持，如隄憂蟻潰。何以遣餘年，閉戶淡菹菜。

又

鸞鳩搶榆枋，枯魚過河泣。鷓鴣九萬里，此豈汝所及。丈夫志古人，絕世而獨立。遠遊馬蹏穿，高臥劍鋒澀。其初所抱負，固自高業屐。安能與兒曹，俛首就維繫。君看折腰趨，孰若舉手揖。芝老尚可餐，修門戒輕入。

又

洛水初平時，草木充九州。禽獸孳育繁，與人爲敵讎。于時聖人作，日夜爲民憂。思有以勝之，食肉而服裘。然後人莫居，禾黍歲有秋。豈知千載後，戕殺無時休。一食刀几赤，百味供膳羞。豪侈方相誇，哀哉非始謀。

又

我年甫三十，出身事明主。狂愚斥不用，晚辟征西府。踴躍過錦城，邂逅客嚴武。十年醉郭筒，陽狂頗自許。青城訪隱翁，西市買幽圃。如何復不遂，歸聽鏡湖雨。結廬三間茅，泛宅一枝櫂。天真儘可全，吾其老煙浦。

自詠絕句

雙鬢蕭條失故青，躬耕猶得養餘齡。明時恩大無由報，欲爲鄉鄰講孝經。

又

深村人有結繩風，晚歲身爲帶索翁。啜粥茹蔬茅屋底，誰知也過百年中。

又

不淪鬼錄不登仙，遊戲杯觴近百年。小市跨驢寒日裏，任教人作畫圖傳。

又

逆旅門前撥不開，先生醉策蹇驢來。未言乞得囊中藥，一見童顏且壓災。

又

遠遊索手不賣糧，薪米臨時取道傍。今日清明行亦好，經旬風雨住何妨。

又

一條紙被平生足，半盃藜羹百味全。放下元來總無事，雞鳴犬吠送殘年。

又

平生寧獨愛吾廬，何處茅簷不可居。晝闕僮奴停接客，夜無膏火罷觀書。

又
睡著何曾厭夜長。老人少睡坐何傷。無燈無火春寒惡。破絮氈毳卽道場。

風月吟

去日如馳。衰有驗。萬事惟當就收斂。可憐未與酒相忘。風月婆娑猶不厭。有時清夜行中庭。幅巾藜杖影
踰躡。松風十里吹殘夢。羅月三更照半醒。河傾雞唱吟未已。爽透髮根清入齒。晨光底事不貸人。轆轤汲
水啼鷓起。

年光

無賴年光逐水流。人間隨處送悠悠。千帆落浦湘天晚。孤笛吟風鄆縣秋。小市鶯花時痛飲。故宮禾黍亦
閑愁。久留只恐驚凡目。又向西涼上酒樓。

龜堂

莫笑龜堂陋。生涯實有餘。春寒擁重褐。晨飯富藏蔬。薄技雕蟲爾。虛名畫餅如。兒時論語在。敢負此心初。

春晴

春如人易老。愁與漏俱長。酒著多思睡。花熏直欲狂。新晴乾蝶翅。微暖滑鶯吭。誰見龜堂叟。捲藤送夕陽。

閉門

殘髮凋零不滿巾。閉門聊得養天真。恐傷藥草停除地。爲惜松槎禁伐薪。獨木架成新路約。一峯買得小
嶙峋。蕭然便覺渾無事。談笑時時過近鄰。

又

衰疾厭厭不易醫。閉門惟與睡相宜。狂曾忤物慵迎客。瘦不勝衣悔作詩。數簡隱書忘世味。半甌春茗過花時。寂寥終歲君無謂。正是幽居一段奇。

有所感

世事真成風馬牛。細思愈覺此生浮。舊交散後知心少。行路難來出戶愁。氣節陵夷誰獨立。文章衰壞正橫流。魯中狂士今安有。淚盡朱雲草滿丘。

八十一吟

八千古云毫。吾今不啻過。山程兩芒屨。水宿一漁蓑。雞唱劉琨舞。牛疲寧戚歌。春寒欺短褐。將奈此翁何。

高吟

食少支撐惟恃粥。力衰舉動輒須人。誰知造物猶遺漏。擁鼻高吟又一春。

湖上作

耳目聰明手足輕。應酬幽事未忘情。百年日向漁樵過。千里雲從几席生。樽酒每招鄰父共。圖書時與小兒評。但餘煙水無儕侶。堪笑沙鷗欲抗衡。

黃花

湖上花光何處尋。朱朱白白自成林。衰翁何預傷春事。閑客猶懷愛物心。欲墮每愁風驟起。正開卻要日微陰。蘭亭禹廟平生事。一棹芳醪莫厭深。

園廬

天假殘年使荷鋤。白頭父子守園廬。四朝曾遇千齡會。七世相傳一束書。物理從來多倚伏。人情莫道得親疎。功名自有英雄了。吾輩惟當憶遂初。

乍晴行西村

堤樹叢祠北。煙村古埭南。買魚論木盎。挑蕒滿荆籃。積潦經旬月。晴光見二三。農功殊可念。保麥復祈蠶。

書歎

塵飯炊香粟。贏僮策蹇驢。自從行卷日。直至挂冠餘。搯分元知止。求官實抱虛。園蔬幸無恙。父子日擔鋤。

新製小冠

淺醉微吟獨倚闌。輕雲淡月不多寒。悠然顧影成清獻。新製柈欄二寸冠。

又

柈欄冠子輕宜髮。練布單衣爽辟塵。縱不能詩亦堪畫。年餘八十水雲身。

書逆旅壁

市遠過三里。店孤無四鄰。窄纔容一客。久或住經旬。病軀求風藥。樵兒餽糲薪。人情愈諳熟。來往不辭頻。

倚樓

曲曲闌干縹緲間。哦詩本欲破除閑。無端又起天涯感。淡墨生綃數點山。

又

樓上憑闌小立時。淡煙漠漠雨絲絲。年光日日有佳處。不解春寒偏入詩。

小雨

小雨明復闌。餘寒去又來。新苔綠砌上。殘杏過籬開。垂老身餘幾。逢春心尙孩。江天近寒食。林外過輕雷。

書歎

無能自號癡頑老。尙健人驚鬢鏤翁。未向松根藏病骨。尙尋花底醉春風。翩翩孤影如歸鶴。冉冉流年付斷蓬。曾謁高皇識隆準。傷心無復一人同。紹興朝士自周丞相下。世猶予尙在甬。

遷雞柵歌

烏雞買來逾歲年。庭中赤幘何昂然。吾孫初生長晨唱。家人共議欲汝捐。鳥窮必啄奴豈憚。雞賣將烹吾所憐。貴人賤畜雖古訓。物理寧不思兩全。舊棲沈亦苦沮洳。新柵幸可圖完堅。東園稍去房奧遠。挾雌將雛從此遷。竹簾朝暮有餘粒。瓦缶亦自盛清泉。啣啣風雨守汝職。臚膊勿恤驚吾眠。

春興

暖靄催桑眼。晴光長草心。沙平看臥犢。密葉聽鳴禽。買酒貧爲祟。登山病不禁。終年惟一褐。捫蝨又春深。

小園

蕭散遺塵事。栽培得小園。土鬆花意活。林暖鳥言繁。殮酪供晨鉢。蒹葭薦晚樽。餘年君莫問。送老向孤村。

二月晦日夜夢欲卜居近邑道遇老父告以不利欣然從之

夢中行卜居。道遇白髯叟。一面出苦言。戒我棄勿取。人之生實難。失脚墮虎口。我深感其言。解衣奉杯酒。

豈知立談間。得此直諒友。起坐心茫然。天闕樓挂斗。

新晴

苦雨幾終月。新晴喜夕陽。扶行呼稚子。隨意下茅堂。草茂知蠶健。巢新覺燕忙。與閑歸亦好。袖手獨焚香。

病中作

苦雨侵衰骨。餘寒著弊裘。病多辭社飲。貧甚輟春遊。日日親蔬圃。時時弄釣舟。回頭語造物。與子兩無求。

示子適

敢恨吾生後聖賢。六經雖缺尙成編。本來堯舜身親見。孰謂丘軻道不傳。妙理豈求逢服外。淳風寧在結繩前。此身未死還堪勉。更伴吾兒學數年。

窮居

羸病無時已。窮居只自悲。巾偏非雨墊。衣弊豈塵縑。米盡時炊稗。樽空慣啜漓。逐貧雖有賦。乞食未成詩。

春晚自近村歸

山陰道上柳如絲。策蹇悠悠信所之。曲水已過修禊集。餘寒不減試燈時。貧猶自力常謀醉。病不能開日賦詩。誰道茅簷苦幽獨。一鉤新月是相知。

開孫滿月

夜夢奇童拜且言。今乃幸得生高門。夢後一日得開孫。虎兒墮地百獸奔。未論頭角與眉宇。但聽啼聲誰敢侮。就令長大未必奇。亦作人間孔文舉。

小築

西郊小築臨煙汀。南山秀色入窗櫺。朝鐘暮鼓在何許。乃是會稽山陰之蘭亭。堂中老人白鬚髮。手扶藤杖垂九齡。客來不語坐至夕。往者絕物今忘形。牆隅老雞新樹柵。長號催上東方星。老人亦起穿兩履。巖泉漱齒讀黃庭。

春晚歎

一風已快晴。微雲復成雨。盛麗女郎花。坐看委泥土。蜂房蜜已熟。科斗生兩股。堂堂一年春。結束聽杜宇。老夫久臥疾。乃復健如許。便當裹米糲。醉爛作端午。

鷓鴣

翾然一鷓鴣。升條爾一鷓下。非惟飽殘餘。亦可免彈射。巡簷攬肺腑。入舍掠膾炙。嗟汝無盈厭。坐是取驅嚇。物情真能改。一嘗亦可賞。併語黃雀羣。勿輕敗吾稼。

舍東四詠

疎籬

數掩圍柴荆。王維畫不成。尤憐月中影。特地起詩情。

松棚

松棚尋丈地。客至共開顏。堪笑杜陵老。坐思千萬間。

盆池

寒溜初通後。新荷未長時。誰持大圓鏡。爲我照鬢眉。

小徑

環遶無十步。捷行財半之。安西九千里。自有著鞭時。

示元敏

學貴身行道。儒當世守經。心心慕繩檢。字字講聲形。吾已鬢眉白。汝方衿佩青。良時不可失。苦語直須聽。

暮春

掠面微風吹宿醒。送春空有不勝情。風煙老盡王孫草。時聽桑間小婦聲。

又

辛夷海棠俱作塵。鯨魚蓴菜亦嘗新。一聲布穀便無說。紅藥雖開不屬春。

又

市橋岸下泛湖舟。雕檻珠簾半上鈎。春事幾何君惜醉。明朝亦幟插譙樓。遊湖至立夏止。

又

袂除已過暮春初。綵舫相銜十里餘。浮蠟喜嘗新店酒。流塵閑拂壞垣書。

書感

楚些難招去幹魂。正令舌在向誰論。中分白日歸欹枕。全付青春與杜門。凜凜啞人愁履虎。區區染指畏
嘗龍。殘年誓報嗟何有。虛負明時養老恩。

晨起出南堂

曉枕華胥誰喚回。下堂拄杖一悠哉。啼鴉已逐晨光起。飛鷺初衝宿鶴來。石路少行生蔓草。柴扉多閉長莓苔。身閑亦未全無事。檢校幽花幾樹開。

春晚小飲

病臥虛齋一味慵。今年春事又成空。籊龍奮迅風雷際。木筆凋零霧雨中。平野草深黃犢健。斷溪水長畫船通。小兒偶得官樓酒。罌醢醺乾一醉同。

殘春

江薰堆盤拒妝香。山家節物亦窮忙。桑間葢紫蠶齊老。水面秧青麥半黃。吾輩以催春事去。遊絲不以客愁長。鄉村年少那知此。處處喧呼蹴鞠場。

又

過了清明日愈遲。年華不復在辛夷。誰知綠葉陰成處。正是青天露坐時。茂草滿庭喧鼓吹。嫩湯出鼎試槍旗。衰翁敢作明年計。剩與東君惜語離。

聞山步有虎

芡屋穿蒲雨送春。村路斷絕虎嗔人。采桑鋤麥皆結伴。兒童出門翁媪噴。

久雨初霽

兩月溼溼雨不休。今年春盡尙重裘。水深草茂羣龍怒。日出風和宿麥秋。陂壞隄防誰與築。市遙鹽酪絕

難求。農家辛苦尋常事。賣劍方當更買牛。

初夏幽居雜賦

雨霽逢初夏。胡牀蔭綠槐。半酣方覓我。假寐忽哈臺。小穗閑簪麥。微酸細嚼梅。衰翁不禁老。更著物華催。

又

過盡一春雨。園林氣少和。偶然扶柳栗。復爾坐盤陀。小草數行字。殘花一曲歌。公卿非傲汝。無奈愛閑何。

又

水際閑將鶴。林間獨擁琴。披叢采香草。映樹看珍禽。正使居無屋。猶勝突不黔。過春差覺健。處處得幽尋。

又

籬落魚池北。房櫺道院東。水紋藤坐榻。山字素屏風。采藥松岡近。投竿荻浦通。悠然搔短髮。心事寄冥鴻。

又

曲曲羊腸徑。疎疎甕眼籬。渴蜂窺硯水。狂蝶入書帷。一枕輕安夢。數聯蕭散詩。餘生已過足。不必到期頤。

又

開地翦蓬蒿。何曾歎作勞。藥名尋本草。蘭族驗離騷。北澗穿籬過。南山出屋高。回頭看富貴。何啻一秋毫。

又

修名寧復冀。餘日苦無多。已歎堂堂去。將如寂寂何。編籬護香草。埋盎貯清波。兒戲君無笑。相從且浩歌。

雨

家近蓬萊白玉京。草堂登望不勝清。初驚野色昏昏至。已見波紋細細生。殘醉頓消迎亂點。微吟漸苦入寒聲。只愁今夕虛簷滴。又對清燈夢不成。

自閔

主人元是客。儒士卻成僧。垂老貧如昔。經春醉未曾。囊衣身偃偻。顧影髮鬢鬢。忽憶東岡路。捫蘿試一登。

蔬食

牆陰春薺老。筍蕨正登盤。野饅元無婦。村醪不屬官。何由取熊掌。幸免買豬肝。猶勝煩秦相。綈袍閱一寒。

讀阮籍傳

天生父子立君臣。萬世寧容亂大倫。籍輩可誅無復議。禮非爲我爲何人。

杜宇行

杜宇行。鄉中以杜宇早鳴爲蠶麥不登之候。

去年杜宇號阡陌。家家聚首憂蠶麥。豈惟比屋衣食憂。縣家亦負催科責。今年略不聞杜宇。蠶收麥熟人歌舞。豈惟襦新湯餅寬。隣里相約先輸官。

捕虎行

捕虎行。自故歲有三虎出上皇天衣山谷。近者尤爲人害。捕之未獲。

道輿

山村牧童遭虎噬。血肉俱盡餘雙髻。家人行哭覓遺骨。道路聞之俱掩涕。州家督尉宿山中。已淬藥箭攢長弓。明朝得虎徹檻穿。纒絲擣麩歌年豐。

陸放翁集 十九 劍南詩集 卷六十一

無餘燈前卻有欣然處。稚子談經屢起予。

三齒墮歌

一葉落知天下秋。三齒墮矣吾生休。詩人未脫執袴態。尙樂華屋悲山丘。蓼花荻葉可以解我憂。鷓鴣白鷺可以從我遊。君看貂蟬與兜鍪。等爲岑岑壓我頭。豈知石闌干下買鷓笠。一棹飄然煙雨舟。不須強預家國憂。亦莫妄陳帷幄籌。功名富貴兩悠悠。惟有杜宇可與謀。

龜堂初暑

淪漪一曲遠茅堂。葛帳紗巾喜日長。多事林鳩管晴雨。依人海燕度炎涼。深枝著子纍纍熟。幽草開花冉冉香。安得此時江海上。與君袖手看人忙。

衰歎

十年三墮齒久矣。歎吾衰。聲聲循天理。兢兢到死時。窮空顏子卷。勤苦董生帷。道遠餘生趣。常憂日影移。

初夏閑步村落間

薄雲輻日不成晴。野水通池漸欲平。綠葉忽低知鳥立。青萍微動覺魚行。醉遊放蕩初何適。睡起逍遙未易名。忽遇湖邊隱君子。相攜一笑慰餘生。

夜興

鬢毛飽受雪霜侵。一褐蕭條寄故林。簷雨滴回羈枕夢。城笳喚起塞垣心。平生恥露囊中穎。垂老甘同蠶下琴。燈燼欲殘看瘦影。不妨袖手坐惜愔。

卷第六十二

寄十二姪

庚寅吾入蜀。西過齊安城。雪堂拜老仙。眉宇寒崢嶸。微泉尚如昔。激激琴筑聲。龍蛇入筆力。斷石臥縱橫。反戊奉詔追。觸熱萬里程。歸途抵齊安。歲月浩可驚。三日乃東下。鼓角遙送迎。安國有老僧。元祐初載生。蟬聯說舊事。耳目猶聰明。徒行就船別。耿耿惻愴情。豈知二紀後。汝乃爲此行。追懷昔遊地。未語涕已傾。念汝雖並塞。殘虜方守盟。職雖在警盜。枹鼓寂不鳴。惟當奉法令。日夜撫孤惻。官卑俸入薄。切勿厭藜藿。勇如赤壁戰。節若江水清。人誰不汝知。況事賢公卿。二山與七家。相望兩柴荆。歸來講學暇。撥棹同春耕。出塞四首。借用秦少游韻。

北伐下遼碣。西征取伊涼。壯士凱歌歸。豈復賦國殤。連頸俘女真。貸死遺牧羊。犬豕何足讎。汝自承餘殃。

又

煌煌藝祖業。土宇盡九州。當時王會圖。豈數汝黃頭。所謂黃頭女真。今茲縛纊下。狀若殼棘牛。萬里獻太社。裨將皆通侯。

又

符離旣班師。北討意頗闌。志士雖有懷。開說常苦難。諸將初北首。易水秋風寒。黃旗馳捷奏。雪夜奪榆關。

又

小醜盜中原，異事古未有。爾來閩左起，似是天假手。頭顱滿沙場，餘骸飼豬狗。天網本不疎，貸汝亦已久。

命駕

命駕清晨出射堂，筇枝羽扇受微涼。鷓鴣將數子窺苔井，桐引新枝出粉牆。岸幘影邊茶正熟，投壺聲裏日初長。興闌卻踢湖隄去，十里山花滿袖香。

遊山遇雨

千秋觀前雨溼衣，石帆山下叩漁扉。鷓鴣苦道行不得，杜鵑更勸不如歸。

東籬雜題

終日在東籬，清和適此時。鶯聲如妬夢，花氣欲撩詩。愛客茶新碾，留僧飯別炊。流年隨手過，不覺近期頤。

又

深居遠悔客，簡事養精神。曳杖一蕭散，待茶時欠伸。風生叢竹嘯，露挾野花新。自作東籬後，經旬不過鄰。

又

昨日一花坼，今朝一草生。深林鳩婦聒，高棟燕巢成。熟果檐間墮，殘書枕畔橫。菴居澹無事，作意領新晴。

又

南陌歸雖久，東籬興又新。無求覺身貴，好儉失家貧。引水常終日，栽花又過春。桃源不須覓，已是萬天民。

又

溝聲流激激，籬影立疎疎。平旦來澆藥，臨昏尙看魚。比鄰怪疎索，風月伴躊躇。安得王廉誥，憑渠畫草廬。

書事

本來只道千鈞重。看破元無一羽輕。日月光明天廣大。不妨獻傲過平生。

又

燕雛學母飛初熟。梅子團枝亦半黃。麈尾唾壺俱屏去。尙存餘習炷爐香。

乙丑重五

盤中共解青菰粽。衰甚猶簪艾一枝。寂寞廢詩仍止酒。今年真負此佳時。

又

飛棹中流救屈平。俚歌寧復楚遺聲。危冠更在門楣上。但覺蕭敷與艾榮。

夏夜枕上

臥聽殘更下麗譙。雖非遙夜亦迢迢。正令展轉無安枕。猶勝龍鍾趨早朝。

石帆夏日

石帆山下雨冥冥。閉岸紗巾憩草亭。單複箠衣時脫著。甜酸園果半黃青。鰥魚無隊依蒲藻。病鶴長鳴鏜

翅翎。自笑若爲消永日。異書新錄相牛經。

又

短棹飄然信所之。茶園漁市到無時。風從蘋末蕭蕭起。月過花陰故故遲。蓴菜羹羹吳舊俗。竹枝度曲楚

遺辭。頗聞項里楊梅熟。鄰曲相招莫後期。

仲夏風雨不已

南陌東阡自在身。一年節物幾番新。鱗魚出後鷺花開。梅子熟時風雨頻。冠蓋敢同修禊客。桑麻不減避秦人。夕陽更有蕭然處。照影清溪整葛巾。

幽居

旌節庭下萎。鼓吹池中蛙。坐令灌園公。忽作富貴家。浮生均一閱。事過但興嗟。蚩蚩彼何人。欲摘空中花。牆隅蔬可挽。巷口酒可賒。疎懶遂吾性。不買東陵瓜。

齒落

昔聞少陵翁。皓首惜墮齒。退之更可憐。至謂豁可恥。放翁獨不然。頑頓世無比。齒搖忽脫去。取視乃大喜。譬如大木拔。豈有再安理。咀嚼浩無妨。更覺麤肩美。

雨中排悶

殷殷雷繞村。浙浙雨鳴砌。禽魚各自適。草木亦得意。顧此菴中人。老病獨顛顛。飯遲每嬾索。兀兀方坐睡。平生飽憂患。性命已屢試。但得過今朝。明日可徐議。

逆境

步步常由逆境行。極知造物欲其成。磨礱久又盡芒角。烹煮豈容重發生。死到面前猶覺小。事於身外孰非輕。出門不必名山去。但見風煙已眼明。

夜興

脫冠殘髮冷飈颼。北斗闌干河漢秋。木末有風栖鵲起。亭臯無月亂螢流。酒慳僅得時時醉。詩退難禁夜夜愁。欲睡不妨還小立。一聲菱唱起滄洲。

寄題李季章侍郎石林堂

林慮靈壁名宇宙。震澤春陵稍居後。翟公黃鶴得數峯。對客掀髯詫奇秀。我行新灘見益奇。千巖萬竇雷雨垂。古來豈無好事者。根株盤踞不可移。侍郎築堂聚衆石。坐臥對之盱忘食。千金博取直易爾。要是尤物歸精識。君不見牛奇章與李衛公。一生冰炭不相容。門前冠蓋各分黨。惟有愛石心則同。崎嶇宦路多危機。凜然石友人間稀。它時橫棹華亭岸。更看全窠買鶴歸。

流年

冉冉流年迫耄期。心情漸減舊兒嬉。唾壺塵尾已從省。茶竈筆牀猶自隨。昨日客招東浦釣。今朝僧約北軒棋。敢將輕健誇鄰里。一笑元知要及時。

雨中鋤藥

庭中正苦日卓午。水面忽看雲過西。老子不辭衝急雨。小鋤香帶藥畦泥。

自嘲

壯歲耽書廢夜眠。窗明猶在短檠前。如今自笑摧頽甚。臥看兒曹理斷編。

世事

世事如今盡伏輸。面能乾唾況其餘。詩才退後愁強韻。眼力衰來怯細書。斂迹已思焚筆硯。作勞敢避把

鞦韆。晴空萬里寬多少。一片閑雲足卷舒。

悲齒落自解

年還而往君自寬。此生畢竟有衰殘。語訕囉麼尋常事。只作兒童礪齒看。

送十五郎適臨安

求祿亦常事。出門寧自由。苦留雖惜別。細話卻生愁。雨急投村市。鐘殘過寺樓。祇應今夕夢。先汝到江頭。

幽居夏日

茅舍參差煙籬中。超然高與誰同。形骸已與流年老。詩句猶爭造物功。子母瓜新間尊俎。公孫竹長映簾櫳。日長愈覺閑無事。隱具成書又一通。

又

內史蘭亭晚卜鄰。永和風月凜如新。功名不入閑人夢。詩酒猶關老子身。簷淺時時聞寶籟。池清一一見潛鱗。正令未逐飛仙去。要是巢居太古民。

大雨

北窗欲化莊生蝶。睡思濛濛酒倦賒。川雲忽帶急雨來。萬點縱橫打荷葉。坐收爽氣入詩律。更借涼颺吹醉頰。壞簷腐瓦凜欲墮。積潦中庭深可涉。兒愁漏濕廢夜課。婦長泥塗停早饅。老翁自笑獨爾頭。更喜煙波搖短檝。

思雲門

一身膏脂略瘦盡。萬卷簡編如隔生。祇欲移家若耶去。亂雲深處聽灘聲。

夏夜

散髮荒池上。秋聲滿綠蒲。燐飛乘月暗。鼻語似人呼。學問無新得。功名負壯圖。拾薪炊麥飯。隨事且枝梧。

觀身

欲去浮華累。先觀老病身。濁醪何負汝。淡飯最宜人。意氣隨年往。工夫媿日新。祇將閑送老。虛作太平民。

養氣

學道先養氣。吾聞三住章。屏除金鼎藥。糖糝玉函方。凜凜春冰履。兢兢拱壁藏。高談忘力守。此病最膏肓。

日用

日用無淵奧。其中妙理存。但能明物性。不必學玄門。盡力扶元氣。精思去病根。昔人由此道。推己及元元。

村市醉歸

伏櫪元知免駭機。翦翎豈復慕羣飛。坐中客滿知心少。囊裏詩多得意稀。小市雨餘尋酒去。野橋日落策蹇歸。不辭十里行空翠。終勝京塵化客衣。

夏日感舊

北窗枕簟臥陶翁。樹樹鳴蟬葉葉風。睡覺殘書棲嬾架。浴回細葛覆熏籠。一藤未遂名山去。半卷還驚舊歷空。妄想金丹君莫笑。清班曾是長仙蓬。

又

五侍仙祠兩挂冠。此生略有半生閑。嘯歌雨笠煙蓑底。來往山村縣郭間。一粒何當換凡骨。數盃且復駐顏顏。胡塵掃盡知何日。不隱箕山即華山。予仕宦歷歷宮祠崇道玉局武夷佑神太平凡五任。

又

吳人那慣粟漿酸。茶盃聊霑舌本乾。身病不堪閑客擾。日長惟憶異書看。流年冉冉誰能駐。長夏迢迢亦已殘。步有新船君賀我。西風先夢上嚴灘。近修小舟訖事村鄰多來賀。

又

獨居無復客嘲邊。終日頽然飽即眠。護視小屏山縹緲。搖風團扇月嬋娟。桐陰忽見翻雙鶻。石罅時聞落細泉。避暑不須河朔飲。轉頭即見早秋天。

雨後

甘澍慰羣望。浮雲還故墟。新涼生枕簟。餘潤入犁鋤。簾上翩翩燕。蒲新鱖鱖魚。素秋猶半月。團扇意先疎。

東軒

榴花零落滿蒼苔。舊匄忘憂亦已開。湖海片帆先已具。少安無躁待秋來。

寄子虞子適

大兒再度吳門秋。小兒錢塘逾月留。恨身不能插兩翅。與汝相守寬百憂。聞鐘時宿雲外寺。待月亦上湖邊樓。但常保此豈不樂。路難悠悠非善謀。

寄張季長

髮不勝簪短褐寬。每因臨鏡歎衰殘。未嘗三日不服藥。雖滿百年終闔棺。舊友豈知常阻闊。一尊那得敘
悲歡。錦官花重應如昔。直欲凌風借羽翰。

夏夜

鳴蜩斷復續。宿鳥久始安。觸熱汗沾衣。暮夜猶未乾。梧桐獨知秋。一葉墮井闌。行矣戒礎杵。四序環無端。

又

落月不滿窗。驚鷓屢移樹。沉憂少睡眠。亦以衰疾故。五更忽作夢。立馬青衣渡。白首厭山村。郵亭憶征步。

讀趙昌甫詩卷

蝸虺溽暑不可過。把卷一讀趙子詩。如遊麻源第三谷。忽見梅花開一枝。寄書問訊不可得。握臂晤語應
無期。惟當飲水絕火食。海山忽有相逢時。

海氣

浴罷來水澗。適有漁舟橫。浩然縱棹去。漫漫菰蒲聲。海禔乃爾奇。萬象空際生。驂驛牧龍馬。天矯騰蛟鯨。
或如擎大旗。或如執長兵。我欲記其變。忽已天宇清。成壤須臾間。使我歎且驚。世事正如此。何者非強名。

村居

舍後盤高岡。舍前面平野。防盜枳作藩。蔽雨篠代瓦。村人以簦覆。屋如孝。數家相依倚。百事容乞假。薄暮
耕樵歸。共話衡門下。

戒殺

郊居去市遠。豬羊稀入饌。既畜雞鶩羣。復利魚蟹賤。暴殄非所安。擊鮮况親見。那得屠殺業。爲客美殺膳。餘年尙有幾。過日如露電。豈無園中蔬。敬奉君子宴。

庭中夜賦

流汗沾衣不自支。庭中散髮立多時。烏鳥畫角凌風起。淡淡銀河拂地垂。浮玉閑遊。白樂。澆花小築亦何疑。東歸萬里君知否。要了滄洲一段奇。

秋近

石榴萱草併成空。又見牆陰莧葉紅。茶礪頗妨千里夢。簾涼初怯五更風。新瓜落刃冰盤裏。晚燕添巢畫閣中。身健流年俱可樂。故人自欠一尊同。

歎老

齒墮因廢談。髮短不入把。餘年似殘尊。欲盡不禁灑。出門見鄉曲。每恨識面寡。往昔同戲兒。鬢髮塚盈野。

殘暑得小雨頗涼

午暑不可觸。忽驚如許涼。軒窗雲作暝。草木雨生香。蒲葉先秋實。蟬聲入夜長。自欣無一事。岸幘倚胡牀。

乙丑夏秋之交小舟早夜往來湖中戲成絕句

橫林渺渺夜生煙。野水茫茫遠拍天。菱唱一聲驚夢斷。始知身在釣魚船。

又

河漢橫斜斗柄低。啼鴉掠水未成栖。怪生淒爽侵肌骨。船繫秦皇酒甕西。

又

鷓門鼓角寺樓鐘。一一風傳到短篷。喚得放翁殘酒醒。錦囊詩草不教空。

又

小市易散無人行。茫茫湖橋惟月明。老夫解醒不用酒。自有千頃菰蒲聲。

又

雞頭纍纍如大珠。紅草綠荷風味殊。天與楊梅成二絕。吾鄉獨有異鄉無。

又

城南天鏡三百里。繚以重重翡翠屏。最好長橋明月夜。寄船策蹇上蘭亭。

又

酒旆搖搖出竹籬。扁舟遠赴野人期。一天風雨晚來惡。落盡白蓮渾不知。

又

七月湖中風露新。臨流閑照白綸巾。荷花折盡渾閑事。老卻蓴絲最惱人。

又

恰聽殘蟬禹寺門。又看新月石帆村。後來復有龜堂老。千載猶應此意存。

又

娥江道上欲三更。垣屋參差閉月明。倚柁賦詩無傑思。斷腸分付棹歌聲。

又 秋來湖闊渺無津，旋結漁舟作四鄰。滿眼是詩渠不領，可憐虛作水雲身。

又 夢筆橋東夜繫船，殘燈耿耿不成眠。千年未息靈胥怒，卷地潮聲到枕邊。

初秋

又 生世元浮脆，人言七十稀。耄期今已及，氣力固應微。食冷常憂過，追涼每念歸。入秋纔幾日，卷簾換縑衣。

又 藉草沾衣露，沿溪掠面風。桐凋無茂綠，蓮老有疎紅。小酌欹危度，鄰園曲折通。新秋得強健，一笑莫匆匆。

又

又 初夜月猶淡，入秋風已清。螢孤無遠照，蟬斷有遺聲。命薄慚勛業，才疎負聖明。青鞵若耶路，亦足慰平生。

又

又 兀兀終年醉，空空四壁窮。那知雙雪鬢，又度幾秋風。高枕三峯老，深衣獨樂翁。騎驢向何許，指筆有蠻童。

秋陰出遊

又 遮日雲生忽復收，黃鸝鳴喚伴林鳩。也知雨意逢秋作，未害山翁竟日遊。陌上驛亭雙隻振，煙中漁釣兩三舟。歸遲不是尋詩料，秣蹇民家偶小留。

杜宇

杜宇雖微禽。用意舉世稀。念昔春盛時。天地皆芳菲。杜宇默無聲。不畏百鳥譏。東君將促駕。乃獨號鳴悲。日夜不肯休。流血沾其衣。念言身尚存。乃使春獨歸。飲啄雖如昔。此身當疇依。月明抱樹枝。敢忘此歎歎。雖無精衛勞。區區亦庶幾。寄言天壤間。勿謂斯禽微。

養生

衰病猶弱國。地與齊楚隣。朝憂羽書來。暮畏戎車塵。奔命不敢辭。所懼殘吾民。羸老正類此。日夜憂其身。起居飲食間。恐懼自貴珍。一念少放逸。禍敗生逡巡。所以古達者。訓戒常諄諄。不死正爾得。成眞非有神。

初秋夜賦

北斗垂欲盡。明河淡不流。低回半枕夢。蕭瑟一窗秋。老益尊儒術。閑仍爲國憂。孰云生死大。卻已付悠悠。

又

炎熇猶未伏。清絕忽新秋。露氣房櫺冷。砧聲歲月遒。悲蛩草根語。孤燐竹間流。聞道河南北。飛蝗暗百州。

殘年

殘年垂八十。高臥豈逃名。泥巷多牛迹。茅簷有碓聲。炊菹觴父老。養棗哺雛嬰。遣戍雖傳說。何時復兩京。

記夢

環立江頭千萬峯。夢中於此倚枯筇。青冥誰見欹巾角。碧澗閑將洗筆鋒。一卷素書雲笈貯。數升松粉水機春。正呼鶴駕凌風去。驚覺西山煙外鐘。

村飲

白稻登場喜食新。太倉月廩厭陳陳。蕘祠懷肉有歸遺。官道橫眠多醉人。小市孤村真送老。浩歌起舞最關身。鹽醃乞貸尋常事。惱亂比鄰莫媿頻。

老嫗

水際山前有老嫗。終年無事亦非閑。淵源師友簡編上。土木形骸魚鳥間。零落斷雲依釣瀨。連娟新月照柴關。葵羹稗飯悠然過。一飽元非造物慳。

對食作

賤士窮愁殆萬端。幸隨所遇即能安。乞漿得酒豈嫌薄。賣馬僦船常覺寬。少壯已辜三釜養。飄零敢道一袍單。飯餘捫腹吾真足。苜蓿何妨日滿盤。

七月十九日大風雷雨電

雷車動地電火明。急雨遂作盆盎傾。強弩夾射馬陵道。屋瓦大震昆陽城。豈獨魚蝦空際落。真成蓋履舍中行。明朝雨止尋幽夢。尙聽飛濤潑瀑聲。

湖上

三伏無多暑漸微。登臨清曉試絺衣。風高病木初凋葉。潦退流萍尙半扉。白首重來空感昔。清尊相屬欲忘歸。猶憐不負湖山處。好在平生舊釣磯。

欲雨

正苦中天赫日流。房櫺忽復變飈飈。雲生江浦初成暝。葉下亭臬剩作秋。移穴旅行憐蟻蟻。爭巢婦去歎

林鳩人間寒暑何窮已。礎杵行聞治褐裘。

秋懷

少年萬里度關河。老遇秋風感慨多。草聖詩情元未減。若無明鏡奈君何。

又

園丁傍架摘黃瓜。村女沿籬采碧花。城市尙餘三伏熱。秋光先到野人家。

又

迢迢枕上望明河。帳薄簾疎奈冷何。不惜衣篝重換火。卻緣微潤得香多。

又

詩如水淡功差進。身似雲孤累轉輕。落葉擁籬門巷晚。一枝藤杖且閑行。

食新

龍鍾好在夢中身。剩喜今年又食新。不用更煩人祝鯁。輪囷瓜瓠是常珍。

予初仕爲寧德縣主簿而朱孝聞景參作尉情好甚篤後十餘年景參下世今又幾四十年忽夢

見之若平生覺而感歎不已

白鶴峯前試吏時。尉曹詩酒樂新知。傷心忽入西窗夢。同在村村折荔支。增音述。

讀書

憶昔年少時。把卷惟引睡。情遊過日月。自咎輒涕泗。老來百事廢。卻覺膏多味。豈惟時有得。聖域可坐致。

譬如入武庫。慷慨不暇視。淺陋安能名。出門但驚喟。天球及河圖。千古所共秘。幸今發其藏。雖老敢自棄。

諭鄰人

鄰曲有米當共舂。何至一旦不相容。爲善何嘗分士農。堯民皆當變時雍。

又

相攻本出忿與疑。能不終訟固已奇。訟端可望君試思。歲時鄰里相諧嬉。

又

世通婚姻對門扉。禍福飢飽常相依。忿爭得直義愈非。不如一醉懷牒歸。

示小廝

偷閑打睡汝何尤。罵詈榜笞我所羞。但措一鞭隨小蹇。不妨村路共閑遊。

又

晨興略整案頭書。十日庭中始掃除。未免下簾惟一事。臨池莫釣放生魚。

卷第六十三

秋雨

老火阻餘威。賴此一雨洗。一雨豈遽涼。涼亦自此始。陂湖菱芡熟。小市新酒美。行歌多醉人。驩意溢閭里。懸知婁豐年。絲穀賤如水。呼兒具筆牘。作詩識吾喜。

江村

江村一雨喜塵清，隱隱雷車意未平。莽蒼郊原來暮色，颼颼林壑起秋聲。書希簡古終難近，詩慕雄渾苦未成。白首愈悲知我少，從今一技不須名。

又

誤著儒冠不更論，白頭且喜臥江村。林深棲鳥逐更噪，埭近過舟終夜喧。病起日惟翻斷簡，愁來時亦倒清尊。自嫌未絕知聞處，尚有僧敲月下門。

山行

南出柴門即是山，青鞋踏破白雲間。旋償酒券何時足，罷諾僧碑盡日閑。三尺古琴餘爨迹，一枝禪杖帶湘斑。吾廬北望雲煙裏，又伴紛紛宿鳥還。

天王寺迪上人房五十年前友人王仲信同題名尚在

綠遶青圍古會稽，城東河上古招提。已公茅屋曾遊處，渭北山人半醉題。暫憩不妨停畫楫，幽尋還得杖青藜。舊人死盡惟殘屋，竹密雲深步步迷。

東窗偶書

東窗終日靜悄悄，消盡平生幻妄心。秋氣未催羣木脫，老懷先感百蟲吟。屏風墨墨思蘆阜，冠子峯峯憶少林。安得吾身且強健，一藤隨處更幽尋。

又

萬事何曾有速淹。熊蹯魚腹自難兼。山川置掌猶能取。日月無膠可得黏。稚子幸堪持几杖。老生元自慣齋鹽。清晨臨鏡還三歎。雪領今年無處添。

乙丑七月二十九日夜分夢一士友風度甚高一見如宿昔出詩文數紙語皆簡淡可愛讀未終而覺作長句記之

客中得友絕清真。蓋未傾時意已親。枕冷不知清夜夢。眼明喜見老成人。河傾斗落三傳漏。霧散雲歸兩幻身。心亦了然知是妄。覺來未免一酸辛。

示子適

翁老兒窮不自支。此心幸與古人期。勞兼薪水奴初去。典到琴書事可知。藥杵無聲工忍病。米囤可掃恥言飢。餘年有幾須相守。萬里煙霄付異時。

小雨

赤日炎熇勢未回。川雲忽起亦佳哉。鴨銜細雨橋陰出。蝶弄微風草際來。榉柳不禁朝暮久。芙蓉猶有二三開。一年光景煩君看。何怪昆池有劫灰。

舟中作

避蔭作帆三版船。漁燈夜泊閩門邊。煙波四萬八千頃。造物推排作水仙。

又

山蔬藥苗滿箸香。超然下視太官羊。更憑語與劉文叔。豆粥從來味最長。

漁父

食糲雖薄尚羹藜。且喜今朝酒價低。一擢每隨潮上下。數豕相望埭東西。團圓箬笠偏宜雨。策策芒鞋不怕泥。應笑漆園多事在。本來無物更誰齊。

又

數十年來一短裘。死期未到且婆娑。敲門賒酒常酣醉。舉網無魚亦浩歌。片月又生紅蓼岸。孤舟常占白鷗波。人間各自生涯別。文叔君房媿汝多。

讀書示子遙時子遠方敗舉

我生無它營。半世隨宦牒。讒波方稽天。憂與愁相接。中間稍自覺。萬事付馬曹。告歸幸見聽。泊與淡相遭。日晏突無煙。垢面有爪痕。讀書則未置。可笑習氣存。造物哀其窮。畀之大耳兒。兒亦好古學。乃不售有司。謂當薦瑟縮。乃如鶴昂藏。父子共薄飯。忍飢講虞唐。豐凶有常數。穠衰當自力。古言不吾欺。歲晚於汝食。

秋夕

西山樵路隔重雲。溪水微風起縠紋。暑退忽驚秋漸晚。夜長已與晝中分。菰蔣入饌渾家喜。礎杵催寒並舍聞。新作篝燈學僧樣。與兒同策讀書勳。

醉中錄近詩因題卷後

鵜兒色淺酒醺人。雞距鋒圓筆絕倫。滿引一盃書數紙。要知林下有閒身。

貧甚戲作絕句

陸放翁集 十九 劍南詩彙 卷六十三

四十九

俸祿無餘退卽耕。市人指笑太清生。從今惜取青鞋底。祇向雲邊水際行。

又

處窮上策更誰如。日晏猶眠爲腹虛。飢則臥不起。貧者之常也。尙闕鄰僧分供米。敢煩地主送園蔬。

又

貸米東村待不回。鉢盂過午未曾開。飢腸雷動尋常事。但誤生臺兩鵲來。

又

北齋孤坐破三更。庭戶無人有月明。數種袴襦秋未贖。羨他鄰巷搗衣聲。

又

竈突無煙甑有塵。頽垣破屋越溪濱。老鏗狂怪誰噴責。日日行歌獨賣薪。

又

行徧天涯等斷蓬。作詩博得一生窮。可憐老境蕭蕭夢。常在荒山破驛中。

又

讀書但覺慚輪扁。補吏非能去箭張。白髮歸爲林下叟。固應飢不壓糟糠。

又

糴米歸遲午未炊。家人竊閱乃翁飢。不知弄筆東窗下。正和淵明乞食詩。

自傲

出仕每辭榮。歸休但力耕。儉勤貧亦足。戒懼禍終輕。學自不欺始。智由無事行。書紳及銘座。勉勉盡吾生。

又

經術吾家事。躬行更不疑。仁常爲己任。清每畏人知。古訓必三復。危途仍十思。兢兢死方已。寧論迫期頤。

雨後極涼

金微未壯長。火老尙餘燼。可憐茅舍翁。瞑目困藉蹠。蕭蕭得一雨。天氣頗清潤。豈惟爽襟靈。亦足祛疾疢。浮生日月駛。老死纔一瞬。聖賢邈不嗣。利欲以身徇。孰能痛澡雪。此道庶少進。閉門君但學。妙理天豈吝。

醉題

來往人間今幾時。悠悠日月獨心知。尋僧共理清宵話。掃壁閑尋往歲詩。疋馬秋風入條華。孤舟暮雪釣湘漓。只愁又踏關河路。荆棘銅駝使我悲。

秋感

畏塗歷盡百年中。老臥窮閭一秃翁。衣杵淒涼常帶月。井桐零落不禁風。空文久悔雕蟲技。大學方施習射功。佛書云。如人習射久。久方中。萬一死前能少進。九原猶可見先公。

鼠敗書

雲歸雨亦止。鴉起窗旣白。秋宵未爲永。不寐如歲隔。平明亟下榻。亦未暇冠幘。檢校案上書。狼籍鼠齧迹。食篋與果籩。攫取初不責。侈然敢四出。乃至暴方册。坐令漢篋亡。不減秦火厄。向能畜一貓。狡穴詎弗獲。緘藤又蕩然。追咎亦何益。情儉當自戒。鼠輩安足礙。

秋望

千里郊原俯莽蒼。三江煙水接微茫。橫林蟲鑿無全葉。新雁風驚有斷行。神禹祠庭遺劍珮。先秦金石古文章。一尊莫恨盤殮薄。終勝登樓憶故鄉。

秋夕

浴罷紗巾出草堂。一枝瘦杖倚桃榔。蟬吟古柳聲相續。月入幽扉影正方。頻約僧茶秋漸健。稍增書課夜初長。亦知桑落宜釀酒。太息何時辦一觴。

出遊

八月石帆秋。聊爲汗漫遊。本因尋友去。卻爲看山留。小草題僧壁。長吟上驛樓。月能從劇飲。天可寄閑愁。高下評泉品。縱橫記酒籌。花開遇門入。水長信船流。飢餓人雖棄。脂韋我自羞。此心君不信。試往問沙鷗。

病中戲詠

八十行加二。清秋住故山。新涼足眠睡。舊疾害躋攀。雪白紛殘鬢。梳黃染病顏。疲牛臥斜日。羸馬噉枯菅。貧廢兒孫學。慈生僕妾頑。贖衣時已迫。貸米歲方艱。齋鉢僧嘲薄。盤殮客笑慳。從今謝還往。惟有掩柴關。

喜書

歎斜古屋枕江干。恩賜殘骸許挂冠。杵臼有聲聊足食。羊牛識路自歸闌。不求客恕陶潛醉。肯受人憐范叔寒。兒輩漸還家。暖熱預知燈火語。團圓子龍初自江西歸。子虞亦今冬當罷官矣。

春耕

去蜀歸吳會。真成萬里行。窮通竟安在。恩怨兩皆平。文字妨求道。金觴害養生。餘年猶有幾。買犢事春耕。

秋思絕句

煙草茫茫楚澤秋。牧童吹笛喚歸牛。九衢不是風塵少。一點能來此地不。

又

榮悴元知豈有常。紛紛草木占年光。霜風一掃知何在。楚客從來枉斷腸。

又

一片雲生便作陰。東軒草樹共蕭森。秋風豈必關人事。自是衰翁感慨深。

又

枳棘編籬畫掩門。桑麻遮路不知村。平生詩句傳天下。白首還家自灌園。

又

胸次本來容具區。自私益益一何愚。片帆忽逐秋風起。聊試人間萬里途。

又

黃蛺蝶輕停曲檻。紅蜻蜒小過橫塘。老人未肯殺風景。睡起熏籠重炷香。

秋興

節物喜更新。清秋最可人。徐行曳藤杖。小立岸紗巾。煙雨迷衰草。汀洲老白蘋。鶴巢時託宿。猿果每分珍。羽客期燒藥。毛人約卜鄰。蘭亭故不遠。千載見清真。

寓歎

五畝煙蕪過半生。還山自笑又躬耕。春炊不繼兒啼飯。烹飪無方客聚羹。遊宦人間身愈困。讀書燈下目
幾盲。退之已老當更事。猶向時人說善鳴。

北窗

垂老乞骸骨。飄然辭聖朝。竹頭那足用。桐尾不禁焦。短褐縫練布。晨殮采藥苗。風霜征雁路。燈火衲僧寮。
甯客詢安否。狸奴伴寂寥。北窗鳴落葉。愁絕夜迢迢。

閑思

睡美精神足。心空忿欲輕。讀書無定課。飲酒不成醒。日日東軒坐。時時北渚行。最奇烏柏下。側帽聽秋鶯。

秋光

小圃秋光潑眼來。老人隱几興悠哉。翩翩蝴蝶成雙過。兩兩蜀葵相背開。雨足疎籬引荒蔓。人稀幽徑長
新苔。貧家竈冷炊煙晚。待得鄰翁賣藥回。

秋夜思南鄭軍中

五丈原頭刁斗聲。秋風又到亞夫營。昔如理劍常思出。今作閑雲不計程。盛事何由觀北伐。後人誰可繼
西平。眼昏不奈陳編得。挑盡殘燈不肯明。

湖上

飄然世外更何求。終日橋邊弄釣舟。回視老身猶長物。縱無炊米莫閑愁。煙生墟落垂垂晚。雁下陂湖處

處秋。欲覓高人竟安在。又聞長笛起滄湖。湖中有隱士。月夜必吹笛。人莫有見者。

讀王摩詰詩愛其散髮晚未簪道書行尚把之句因用爲韻賦古風十首亦皆物外事也

我生本江湖。歲月不可算。采藥遊名山。所歷頗蕭散。一逢巢居翁。見謂於我館。酌泉啖松柏。每得造膝款。行道不自力。殘髮日已短。海山故不遠。謫限何時滿。

又

仕宦五十年。所至不黔突。取魚固捨熊。挾兔那恨鶻。退歸息厭厭。誰敢書咄咄。屋穿每茨草。驢瘦可數骨。秋風忽已厲。落葉襯殘月。脫巾坐中庭。清冷入毛髮。

又

我愛古竹枝。每歌必三反。孤舟上荆巫。天末未覺遠。最奇扇子峽。恨不遂高遼。荆棘蜀故宮。煙水楚廢苑。至今清夜夢。百丈困牽挽。人生如寄爾。勿歎流年晚。

又

往歲著朝衫。晨起事如曩。告歸臥孤村。枯淡有餘味。閉門絕外慕。自謂真富貴。蕭然畢吾生。地下亦增氣。里翁戀兒女。小疾輒憂畏。惟寤可賒死。我在君亦未。

又

萬金築華堂。千金教新音。不知憂患場。著脚日愈深。今人喜議古。後亦將議今。使汝有子孫。聞之亦何心。鄧通擅銅山。死日無一簪。未死汝勿喜。五溪多毒淫。

又
住者遊青城。猶及二三老。稽首出世師。數語窮至道。妻子真弊屣。棄去恨不早。俯仰幾幾時。殘骸日衰朽。吾兒有奇骨。亦復至幽討。金丹儘可成。白髮何足掃。

又
稚川師鄭君。纔及一卷書。書大僅如箒。度世蓋有餘。想其所論說。妙極軒昊初。內篇今雖存。亦復飽蠹魚。我欲探其原。蹇步空趑趄。安得插兩翅。從公遊太虛。

又
隱書有三景。字字當力行。寸地與尺宅。可以久汝生。沂流歸崑虛。堅守臨長城。一旦告成功。河塞黃金成。笙鶴適綠山。貂蟬朝玉京。卽今修行地。千古名還嬰。子道室以還嬰名之。

又
行年過八十。形悴神則旺。往來江湖間。垂老猶疎放。滄波浩無津。天遣遂微尚。剡溪挂風帆。漁浦理煙榜。奇雲出深谷。新月生疊障。興懷晉諸賢。誰能續遺唱。

又
二十遊名場。最號才智下。踰蹉六十年。亦有菲一把。典衣租黃犢。乘雨耕綠野。西成得一飽。敢計泥沒踝。住久鄰好深。百事通乞假。秋高小瓮香。相喚注老瓦。

夢行益昌道中有賦

朱棧青林小益西。早行遙聽隔村雞。龍門閑畔千尋壁。江月亭前十里堤。酒舍胡姬歌折柳。江津洮馬惜
陳泥。倦遊重到會來處。自拂流塵覓舊題。

自規

忿慾俱生一念中。聖賢本亦與人同。此心少忍便無事。吾道力行方有功。碎首寧聞怨飄瓦。關弓固不
冥鴻。老翁已落江湖久。分付餘年一短篷。

幽興

蘭渚前頭湖水清。了無俗事敗幽情。雨淋茅屋隨時補。日射油窗特地明。庭樹晚鶯窺戶語。鄰園秋菊過
籬生。芥菘漸美鹽醃足。誰共貧家一釜羹。

記前輩語

曠昔見諸老。從容聞至言。馬非求路寢。木豈願犧尊。臥起數椽尾。嘯歌三畝園。人生正應爾。雲夢不須吞。
貧居卽事

筮易常逢坎。推星但值箕。老雖齋渭叟。窮不減湘纍。巷月鳴衣杵。庖煙爨豆萁。秋深病良已。且復強伸眉。

又

地偏人罕到。秋晚日猶長。病去筇枝贅。家貧菜粥香。流泉通藥壺。積雨潤書囊。欲譜幽居事。疎慵久未遑。

又

月黑鳥鳴樹。燈殘鼠穴牆。牀空圍紙被。室靜蕪楓香。不恨言傷直。惟憂慾敗剛。回頭顧名利。百世永相忘。

米竭炊煙靜。村深客屨稀。庭除荒宿莽。籬落帶斜暉。風惡披書卷。鷗馴傍釣磯。鄰家殊耐久。相伴荷鋤歸。

又

緒喪家狗。形骸槁木枝。曲肱雖自適。縱理固當飢。買絮初寒後。畦蔬小雨時。窮途何用卜。吾道卽蒼龜。

又

守道常違俗。存心不愧天。終年飢過半。動步謗居前。力倦少行立。氣昏多睡眠。今宵風月好。扶杖到溪邊。

自詠

素慕巢居穴處民。久爲釣月臥雲身。經行山市求靈藥。物色旗亭訪異人。高枕靜聽棋剝啄。幽窗閑對石磷皴。吾廬已是桃源境。不爲秦人更問津。

枕上作

一室幽幽夢不成。高城傳漏過三更。孤燈無焰穴鼠出。枯葉有聲鄰犬行。壯日自期如孟博。殘年但欲慕初平。不然短楫棄家去。萬頃松江看月明。

秋曉聞禽聲五韻

秋曉風露佳。天宇曠以清。鳥雀當此時。意樂有和聲。人獨不自喜。乃欲鳴不平。世事雖萬端。但可笑絕纓。君看郊與島。徒自殘其生。

對酒

素月度銀漢。紅粟斟玉露。染丹梨半頰。所喜蟹雙螯。詩就吟逾苦。盃殘興尙豪。閑愁翦不斷。剝欲借并刀。

又

密篠持苦屋。寒蘆用織簾。疏肩柴熟卷。東坡煮豬肉。訣云淨洗鍋。少著水。柴頭罨煙。焰不起。葦菜豉初添。黃甲如盤大。紅丁似蜜甜。街頭桑葉落。相喚指青帘。

示鄰里

古學陵夷失本原。讀書萬卷誤元元。從今相勉躬行處。士庶人章數十言。

重示

篤學仁何遠。窮居道亦行。能充氣剛大。誰蔽性光明。家世艱難業。鄉閭宿昔情。歲殘相勞苦。惟是語春耕。

雨夜起行室中

老疾逢秋體自輕。披衣暫起繞牀行。隙風不斷燈將滅。簷雨如傾階欲平。縲叟何嘗愁枕冷。病夫未免待窗明。拂書洗硯龜堂上。幽事誰知日有程。

閏月辛酉壬戌連日風雨癸亥早晴

殘雨在簷猶點滴。斷雲銜日正蒼涼。清愁偏向暮年覺。少睡不禁秋夜長。簾影漸生禽語樂。杵聲初動藥塵香。諸兒作吏俱安否。那得乘風至汝傍。予諸子伯叔季皆出仕。

秋思

少日猖狂不自謀。卽今垂死更何求。簡編不隔聖賢面。夢寐時爲河嶽遊。濁酒未傾心已醉。長歌欲發涕

先流石帆射的煙嵐晚。過雁聲中又一秋。

又

十日秋陰滿徑苔。蓬門那有客敲推。水邊丹葉已如許。籬下黃花猶未開。空見遊僧銜綠去。難逢新雁社。陵來溪雲一片閑。舒卷戀著漁磯不肯回。

閑遊

江邊小市舊經過。歲月真如東逝波。茶蘼酒壚多識面。少留賣藥買漁蓑。

又

溪橋偶與僧遊話。草市來尋逆旅炊。自笑一生爲客慣。捉鱸小豎訴朝飢。

又

祓除情累煙波上。放蕩胸懷詩酒中。禹會橋邊潮落處。夕陽幾度繫孤篷。

對鏡

面大如盤七尺身。珥貂自合上麒麟。詩家事業君休問。不獨窮人亦瘦人。

幽居書事

老人初起厭羶喧。塵几從教鼠迹存。赤脚平頭俱遣去。倚牆危坐嚙朝暄。

又

買魚賒酒皆高興。野店溪橋圖畫中。從此衰翁自行耳。不須多事喚蠻童。

偶與客話峽中舊遊

我昔旅遊秋雨細。建平城東門欲閉。主人迎勞語蟬聯。小婦春炊繡衣袂。長年三老半醉醒。蜀估峽商工。算計須與燈闇人。欲眠泊船卸馱猶相繼。山深水險近蠻獠。往往居民雜椎髻。卽今屈指四十年。懷抱淒涼真隔世。

讀老子次前韻

平生好大忽瑣細。焚香讀書戶常閉。少年曾預老聘役。晚歲欲挹浮丘袂。力探玄門窮衆妙。肯學陰謀畫奇計。言狂不獨人共排。志大仍憂後難繼。君看淡掃出繭眉。豈比一尺春風髻。著書勿恤飽蠹魚。會有子雲生後世。

作籬

生世八十餘。日夜迫衰老。中年所築舍。傾壞當官道。每逢風雨夕。性命凜莫保。況此蘆竹藩。何恃不摧倒。今朝手自葺。不暇避塗潦。雞豚有限隔。門巷得鋤掃。豈惟禦盜竊。亦足慰懷抱。陰雲忽四垂。見事幸差早。

寓歎

老生讀書百絕編。日晏忘食夜廢眠。孝經一生行不盡。況有六籍陳吾前。華軒玉食非素願。廣廈高墉實郵傳。經營歸計笑時人。我老但須書數卷。

衡門感舊

蒼煙屯不散。正素橫郊原。雨細不濕衣。著水始見痕。躊躇意自佳。未遑掩衡門。一一送歸鴉。楓林猶未昏。

念昔壽州歸，紹興初紀元。闔門過百口，一身今獨存。不死實有命，送老三家村。躬耕幸得食，萬事不足論。

客中作

江天雨霽秋光老，野氣川雲淨如掃。投空飛鳥雜落葉，極目斜陽襯衰草。平沙爭渡人鷓立，長亭下馬障泥濕。纍纍紅果絡青篾，未霜先摘猶酸澀。客中雖云貪路程，買薪糴米常留行。茆檐獨坐待僮僕，不聞人擊聞碓聲。

讀書示子遜

我性苦愛書，未始去几案。生雖後三代，意尙卑兩漢。世衰道術裂，年往朋友散。澤居貧民骨，霜冷衣露肝。獨能樂其樂，肯發窮苦歎。爾來更可笑，身糴兒炊爨。一飽輒欣然，弦誦等雕泮。望古雖天淵，視俗亦冰炭。阿通可憐生，相守忘夜旦。孤學當世傳，歲月不可翫。

老懷

老懷常易感，秋雨苦難晴。羈枕悲歡夢，高城長短更。榮枯一蠹垤，成壞幾棋枰。抱疾茅檐下，行人肯寄聲。昨日得李孟達書。

沉絲

沉絲久未平，寂寞閉柴荆。危葉先霜墜，殘螢冒雨明。記書由默誦，得食出躬耕。此事吾親驗，方當告後生。

遊近村

行歷茶岡到藥園，却從釣瀨入樵村。半衰半健意蕭散，不雨不晴天晏溫。蕨隲傍籬寒引蔓，菖蒲絡石瘦

生根。參差燈火。茆檐晚。童稚相呼正候門。

又

被髮行歌雪滿膺。夕陽顧影亂鬢蒼。乞漿得酒人情好。賣劍買牛農事興。社鼓賽秋聞坎坎。塔燈照夜望層層。歸來閉指烏藤說。個是人間耐久朋。

小亭

除地編茅作小亭。一川風露對青冥。殘螢欲盡猶穿戶。落葉初飛已滿庭。樸老無心求匠石。鬼靈有說拒奴星。餘年默數能多少。盡付黃庭兩卷經。

記夢

少日飛揚翰墨場。憶曾上疏動高皇。寧知老作功名夢。十萬全裝入晉陽。

又

老來百事不關身。北陌東阡一幅巾。忽夢行軍太行路。不惟無想亦無因。

卷第六十四

養疾

齒耆嬰新疾。才衰減舊名。短筇扶蹇步。小院愜幽情。卜叟言災退。醫翁賀脈平。飯香炊糲粳。羹美醃蕪菁。菊穎寒猶小。楓林曉漸頰。清詩披客贄。佳著指僧椀。家塾燈前課。村陂雨外耕。從今尙何事。賴此遣浮生。

客從城中來

客從城中來，相視慘不悅。引盃撫長劍，慨歎胡未滅。我亦爲悲憤，共論到明發。向來酣鬪時，人情頗少歇。及今數十秋，復謂須歲月。諸將爾何心，安坐望旄節。

暮秋中夜起坐次前韻

東吳秋令遲，得雨亦良悅。中庭有流螢，烈風吹不滅。披衣起坐久，鼓角參差發。西成雖作勞，農事亦漸歇。老怯歲律殘，俛仰忽九月。蟋蟀鳴壁間，婉汝知時節。

閑遊

白石牀平偶小留，青芒屨穩復閑遊。微丹點破一林綠，淡墨寫成千嶂秋。竹院頻分齋鉢飯，苔磯時把釣魚鉤。要知此老神通否，二十年來不識愁。

自規

老疾今俱至，艱難亦備更。個中無障礙，何處欠光明。一日能用力，三年亦有成。脩身在我爾，勉勉盡餘生。所謂三年有成者，豈獨爲國哉。

自笑

學道功賒歲月馳，平居自笑著鞭遲。安心未竟夜饒夢，與世雖疎秋尙悲。藥圃幽尋芒屨濕，棋枰愁戰角巾欹。只愁今夕西窗夢，又買長筒到古鄆。

泛舟至鏡湖旁小市

久著朝衫負此湖。扁舟剩喜補東隅。市樓合樂醕新熟。寺壁殘詩字欲無。常日不堪愁宛轉。此行猶得笑須臾。夕陽鷗鷺皆相識。更覺人間是畏塗。

懷舊

身是人間一斷蓬。半生南北任秋風。琴書昔作天涯客。蓑笠今成澤畔翁。夢破江亭山驛外。詩成燈影雨聲中。不須強覓前人比。道似香山實不同。

道院述懷

學道已非生死流。極知心外更何求。理窮性盡命亦至。氣住神全形自留。大藥一爐真度世。孤桐三尺可忘憂。故人怪我歸來晚。太華峯頭又素秋。

又

八十年前一炷香。依然餘習未全忘。舊緣入靜多扃戶。近爲精思別置牀。篝火古鑪煎檜蜜。汲泉小盃釀松肪。老翁正似遼天鶴。更覺人間歲月長。

秋雨

雨滴何由止。人眠不復成。雲深無雁影。村近有砧聲。草草殘年夢。寥寥後世名。太山并燈瑤。俱向酒中平。

又

秋晚兼旬雨。雨晴當有霜。頗思遊近縣。亦已戒輕裝。珍鯈披蘇美。寒醅撥雪香。菊花常歲有。所喜及重陽。

聽雨

髮已成絲齒半搖。燈殘香燼夜迢迢。天河不洗胸中恨。却賴檐頭雨滴消。

畏事

畏事偷安百不能。飯蔬聊得曲吾肱。舊交夢裏時時見。宿疾秋來日日增。遣悶自鉏幽圃藥。扶衰猶賴故溪藤。不因顧見鬚髻影。全是深山退院僧。

刈穫後書事

鄰里西成例少蘇。貧家生業得徐圖。雖非五鼎豈無食。未辦復禪猶著襦。牢疏漸肥堪奉祭。耕牛已買不求租。卻思流落天涯日。要是家居勝道途。

又

耄歲誰知困不蘇。每虞黠鬼笑狂圖。陶公老去但濁酒。管老歸來惟白襦。不逐兒童覓兼味。且隨鄰曲了殘租。細思自有欣然處。高謝人間九折途。

秋夜五鼓初起坐堂上至旦

蒸鬱不可過。開門星滿天。身還倚藤杖。手自酌巖泉。雞唱猶相續。鴉飛忽已翻。事隨朝日出。佳思復茫然。

習懶自咎

習懶多遺事。時能害睡眠。猶驕殘竹筍。鼠橫絮牀氈。獮子巡籬落。狸奴護簡編。人間有俊物。求買敢論錢。

雨夜枕上作

雨點滴我心。雨氣傷我魂。但憂草廬破。敢思布被溫。市壇酒如山。不濕老瓦盆。天其遂吾心。窮死三家村。

晚飯後步至門外並溪而歸

徐行摩腹出荆扉，掠面風尖酒力微。市步空船迎荻去，湖隄輕擔賣魚歸。潺潺沙竇鳴殘水，莽莽平蕪襯落暉。商略最關詩思處，滿村砧杵搗秋衣。

文章

文章如奕棋，分量固有極。學不盡其才，識者爲太息。古來名世士，亦或墮此域。至今讀其文，曷嘗不追惜。士生千載後，夙慕當自力。如其不能然，歸哉事耕織。

枕上口占

白首區區道未明，故山悔不蚤歸耕。勇如搏虎但堪笑，學似累棋那易成。殘雨墮簷時一滴，老雞棲樹已三鳴。村居孤寂知何憾，兩耳猶勝聽市聲。

之

乙丑九月三日晚久雨驟晴西南新月如玉鉤，重陽以八月置閏菊花粲然滿園喜甚作一絕記之。

寓歎

初三新月見如期，重九黃花又及時。俱是人間稱心事，典衣一醉更何疑。

村興

蕭疎殘髮數莖絲，勝負渾如未算棋。萬里旌旗無昨夢，一蓑煙雨有新詩。潛消暗換人誰在，小醉闌眠我自奇。二十四年能幾許，汾陽回首亦成癡。

結宇楓林下。久窮吾所安。村深事自簡。累少食差寬。雨鬧牛眠屋。泥深鴨滿闌。呼兒擣粉餌。準擬養鄱官。

夜聞埭東賣酒鼓聲諱甚

烏柏森疎照溪赤。寒鴉翻翻蔽天黑。鮮鱸出網重兼斤。新蟹登盤大盈尺。年年此際清霜夜。飯罷讀書聲滿舍。豈惟父子講家學。亦有朋儕結經社。誰令屠沽聚里中。鼓聲終夜聒老翁。嗚呼安得寐無聰。不但杜老左耳聾。

燈下晚殮示子適

家貧短衣不掩胛。空庖淒淒竈不爨。老翁八十忍饑熟。兀坐空堂日常盱。今年閏餘九月寒。那敢避議南山炭。艱難幸復致一殮。舖歎燈前百憂散。適子挾册于子來。時與乃翁相論難。但令歆向竟同歸。門前籍湜何憂畔。

秋晚書懷

七澤三巴日月長。卽今萬事付茫茫。結廬窮僻新知少。屬疾沈痼舊學荒。中夜飯牛初上阪。千年化鶴復還鄉。自憐尙覺身爲累。剩蓄荆薪待雪霜。

又

頽然兀兀復騰騰。萬事惟除死未曾。無奈喜歡閑弄水。不勝頑健遠尋僧。喚船野岸橫斜渡。問路雲山曲折登。卻笑吾兒多事在。夜分未滅讀書燈。

初寒

久雨重陽後，清寒小雪前。拾薪椎髻僕，賣菜掘頭船。薄米全家粥，空牀故物氈。身猶付一畝，名字更須傳。
掘頭船見張志和詩。

黃昏小雨中，慙慙蒼頭在。傍云初未嘗得，瞑子乃甚適。若熟寐者，作五字記之。

人看初無寐，形勢幸少休。夢魂雖栩栩，鼻息未駒駒。輕若風中絮，浮如水上漚。死生君了否，試向此中求。
乾道之初卜居三山，今四十年，八十有一感事抒懷。

乾道之初結草廬，三朝六見紀元初。年光拋擲雖加倍，生計蕭條愈不如。目暗欲盲停夜課，髮殘無幾怯晨梳。市聲風便猶關耳，未死終當更徙居。

視東泉歸小酌

築陂下麥晚歸來，圍火烘衣始此回。但得諸孫傳素業，真無一事挂靈臺。井桐葉落垂垂盡，籬菊花殘續續開。不負初寒蟹螯手，牀頭小瓮撥新醅。

又

少年誤計慕浮名，更事方知外物輕。身誓生生辭祿食，家當世世守農耕。授時堯典先精讀，陳業幽詩更力行。最好水村風雪夜，地爐煙暖歲豬鳴。

梅市道中

去去浮官浦，悠悠數客檣。蓼花低蘸水，楓樹老經霜。蕭鼓迎神鬧，鉏耨小麥忙。城西小市散，歸艇滿斜陽。

又

雨暗山陂路。人喧古渡頭。廟垣新畫馬。村笛遠呼牛。買飯諳爭席。迎潮競解舟。平生苦吟處。又送一年秋。

古寺

秋草荒無路。來遊感廢興。殘僧僅粥飯。古像冷香燈。扶病驚重到。題名記昔曾。自量難笑汝。一歎倚枯藤。

夢中作

繫馬朱橋上酒樓。樓前敷水拍堤流。春風又作無情計。滿路楊花覩雪毵。

又

大慶橋頭春雨晴。行人馬上聽鶯聲。祥符西祀曾迎駕。惆悵無人說太平。

舟行魯墟梅市之間偶賦

短髮蕭蕭久挂冠。江湖到處著身寬。梨花不逐蘋花老。桐葉常先槲葉殘。未卜柴荆臨峭絕。且謀蓑笠釣荒寒。閑人尙媿沙鷗在。始信煙波得意難。

衰疾

衰疾支離負聖時。猶能采菊傍東籬。捉衿見肘貧無敵。登膊成山瘦可知。百歲光陰半歸酒。一生事業略存詩。不妨舉世無同志。會有方來可與期。

惜昔偶見張安國周子充劉韶美王景文陳德召任元受遺集爲之感憤作長句紆緜不知潮酒之集也

憶昔高皇繼柄臣。招徠賢雋聚朝紳。寧知遺恨忽千載。追數同時無一人。薤骨九原應已朽。殘書數帙尙

如新。此身露電那堪說。也復燈前默槍神。

雨後寒甚

陂澤連山脚。風煙接海濱。孤鴻悲遠客。殘菊伴陳人。酒盡瓶枵腹。爐寒客曲身。老翁殊耐事。一笑自回春。

入冬病體差健而貧彌甚戲作

乞骸自喜脫風塵。北陌東阡負未身。夢裏相逢無豎子。面間時出有真人。閑憑曲几還終日。不出衡門動過旬。送老齋鹽君勿笑。天教成就一生貧。

蜀漢

憶昔遨遊蜀漢間。蹉跎五十尚朱顏。呼鷹雪闢天回路。采藥雲迷御愛山。舊事已無人共說。征途猶與夢相關。夕陽不覺憑闌久。待得林鴉接翅還。

新開小室

並檐開小室。僅可容一几。東爲讀書窗。初日滿窗紙。衰眸頓清澈。不畏字如蠅。琅然絃誦聲。和答有稚子。餘年猶幾何。此事殊可喜。山童報炊熟。束卷可以起。

初冬絕句

鱸肥菰脆調羹美。糴熟油新作餅香。自古達人輕富貴。例緣鄉味憶還鄉。

又

道途冬暖衣裘省。村落年豐鼓吹喧。下麥種蠶無曠土。壓桑接果有新園。

卽事

雲起山容改。潮生浦面寬。寒鴉先雁到。烏柏後楓丹。年邁狐裝帽。時新豆搗糲。非關嗜溫飽。更事耐悲歡。

又

遯居無外事。白日不勝長。詩爲窮差進。琴雖老未忘。映窗精試墨。閉閣苦留香。年少無相誚。功名事更狂。

又

日上小窗東。禽鳴高樹中。樂哉容膝地。著此曲肱翁。香奩常遲散。兒來亦旋通。所慚貪坐睡。鉛槧少新功。

又

紙潔晴窗暖。粳新午飯香。嗜眠爲至樂。省事是奇方。孤蝶弄秋色。亂鴉啼夕陽。詩情隨處有。信筆自成章。

又

井稅無餘負。川原已飽犂。樵歌歸市步。帆影過河堤。野實丹兼漆。村醪蜜與齋。雖云有豐約。不廢醉如泥。

又

還鄉吳語熟。伏枕越吟悲。接客寒溫簡。過鄰几杖隨。獨嗟親舊少。不覺歲時移。陌上人爭看。風欹白接羅。

閑吟

閑吟可是治愁藥。一展吳牋萬事忘。不惜暮年酬倡絕。猶能作意答秋光。

自遣

衣冠尙作閑身祟。梁肉終非退士宜。惟有褐裘并豆飯。尙能相伴到期頤。

記乙丑十月一日夜夢

夢裏江淮道上行。解裝掃榻喜新晴。店門遙遞綈袍客。共把茶甌說養生。

又

旋糴街頭米數升。黃昏看上店身燈。明朝山路聞饒石。買得烏驄喜不勝。

縱遊

人事元知不可諧。名山踏破幾青鞋。百錢拄杖無時醉。一鉢隨身到處埋。驛壁讀詩摩病眼。僧窗看竹散幽懷。亦知詩料無窮盡。燈火蕭疎過縣街。

村居書事

過門車馬誰曾入。塞路蓬蒿不復鋤。雨漏日惟支敗屋。鼠餘時自緝殘書。

又

矮餅煮粥猶難繼。小飯蒸饅豈解常。偶得鹽醃便豪侈。晨飡滿舍野蔬香。

又

架橋築路村翁事。裂網伸鉤老嫗心。自笑年來足衰態。軒昂故步懶重尋。

又

書收鼠齧猶堪讀。柿拾鴉殘亦自甜。動念不如姑省事。智謀老健恐難兼。

又

修身世世詩書業。營利明明市井人。安得後生俱自好。百年門戶本來貧。

又

文辭苦思徒妨睡。官職虛名不療飢。垂老始知安樂法。紙鳶竹馬伴兒嬉。

湖堤暮歸

出郭並湖無十里。我歸蟹舍過魚梁。川雲蒼白不成雨。汀樹青紅初著霜。俗孝家家供菽水。農勤處處築陂塘。樂哉追逐鄉三老。半醉行歌詠歲穰。

題塌本姜楚公鷹

憶昔呼鷹塞草枯。妖狐狡兔笑談無。明窗見畫空三歎。恍若霜郊遇獵徒。

又

弓面霜寒斗力增。坐思鐵馬蹴河冰。海東俊鶴何由得。空看縣州舊畫鷹。

書巢五詠

銅之在人間。細大各有境。散爲五銖貨。聚作九牧鼎。天祿與辟邪。乃復參泓穎。致用孰相須。寒泉出金井。

右硯滴

古者貝爲貨。庶物賴以通。後世貴銅臭。退處書几中。楮生借光輝。文字傳亡窮。言利古所羞。孰謂汝不逢。

右研蠶

時來偶見收。過時自當退。豈惟裁紙尾。亦或用牘背。人情有貴賤。志士感興廢。庫中九萬張。視我猶前輩。

右故紙

驚膠擠松煙。成此金石姿。雖以剛故折。挺特終不移。微功在簡冊。敢惜身蹈危。雖非破硯文。永世亦有辭。

右折墨

銅壺受五升。中貯太古醇。相從亦已久。一朝委流塵。我豈少恩哉。白頭刀如新。誰知矮道士。亦作斥仙人。

右空酒壺

感遇

仕宦五十年。終不慕熱官。年齡過八十。久已辦一棺。結廬十餘間。著身如海寬。此外皆長物。簡去心始安。稱意多怒曠。易可出艱難。我無狐白裘。短褐亦禦寒。

又

士方貧賤時。藜藿苦不足。一朝得富貴。奴僕糜梁肉。大噉食亞夫。空器餽荀彧。何如蒲欂下。父子共饘粥。我生有至願。世世謝寸祿。有子復有孫。無榮亦無辱。

又

人之所甚患。饑渴與寒暑。粗免則已矣。過計安用許。自奉非其分。三彭將嫉汝。寓形天壤間。大抵皆逆旅。但能飽菜根。何地不可處。堂堂七尺軀。切勿效兒女。

又

我以善勉汝。汝謂出嘗毀。置之不復言。意又不能已。爲善如築臺。成功由積繫。中休猶不可。況本無基址。

未言破萬卷，日且讀十紙。學雖在力行，要是從此始。

又

我初居三山，同里數十人。尊酒相勞苦，言辭亦諄諄。去來四十年，皆成塚中塵。子孫雖或存，敗屋賣作薪。此亦何罪哉，不過坐一貧。我幸未至此，亦復拙謀身。無飯可哺汝，觸目成悲辛。

又

人與人爲徒，事我蓋有緣。司晨與警夜，異類亦可憐。舐糠啄遺粒，要使全其天。人則當教誨，見善或能遷。盛怒姑小忍，雖蒲豈非鞭。事過我亦喜，陶然送流年。

幽興

老向浮生意漸闌，飄然俟死水雲間。龜支牀穩新寒夜，鶴附書歸舊隱山。無意詩方近平淡，絕交夢亦覺清閑。一端更出淵明上，寂寂柴門本不關。

題詹仲信所藏米元暉雲山小幅

俗韻凡情一點無，開元以上立規模。鏡湖老監空揮淚，想見楚江清曉圖。徽宗見元暉楚江清曉圖，大加賞歎。

又

一棹朝南暮北風，奇峯倒影綠波中。定知漸近三山路，認得漁翁是放翁。

詹仲信以山水二軸爲壽，固辭不可，乃各作一絕句謝之。

策蹇渡橋春雨餘。亂山缺處草亭孤。不知何許丹青手。畫我當年入蜀圖。

右春山

雪崦梅村一徑斜。茆檐煙火兩三家。眼明見此幽栖地。卻恨吾廬已太奢。

右雪山

有所懷

鏡裏形模日夜衰。三峯師友久睽離。芝房又失耘鋤候。丹劑常思沐浴時。雷雨未成龍起晚。海天無際鶴歸遲。午窗一鉢青精飯。揀得香薪手自炊。

自嘲老態

世念秋毫盡。渾如學語兒。得牀眠易熟。有飯食無時。紗帽簪花舞。盆池弄水嬉。從今轉無事。靜坐不吟詩。

十月十四夜夢與客分題得早行

麝食寒燈下。脂車小市傍。驛門猶淡月。街樹正清霜。觸目關河異。興懷道路長。丈夫當自力。雙鬢易蒼蒼。紹興中予初仕爲寧德主簿與同官飲酒食蠟房甚樂後五十年有餉此味者感歎有賦酒海者

大勸盃容一升當時所向也

昔仕閩江日。民淳簿領閑。同寮飛酒海。小吏擘蠟山。夢境悠然逝。羸軀獨爾頑。所嗟晨鏡裏。非復舊朱顏。

病中雨夜

蹭蹬今如此。沈緜不復支。心隨形共賴。年與智俱衰。雨急孤燈暗。雲深斷雁悲。舊書空滿架。惆悵負明時。

讀呂舍人詩追次其韻

士生始從學，取友實先務。吾聞諸古人，傾蓋有如故。漢宮長生藥，至取雲表露。治身當何如，而受一塵污。

又

有過當相規，有善當相告。豈惟定新交，亦以篤舊好。勢利古所羞，置之勿復道。霜竇萬木凋，孰秉歲寒操。

又

少壯如昨日，忽已及耄期。舊友散莫收，亦復少新知。言歸鏡湖上，日日醉東籬。自笑如寒蝶，裴回殘菊枝。

東籬予小圃名。

又

道士成金丹，青雲可接翼。小夫豈知此，危坐學數息。如持一畚土，自謂河可塞。生不遇碩師，幾何不自賊。

又

三沐復三熏，佩玉懷明珠。何至不自珍，欲效豕負塗。傳呼雖甚寵，正可誇羣奴。君看魏徵孫，世世爲農夫。

庵中晚思

小庵壓腹獨彷徨，俗事紛紛有底忙。雲影忽生鶉蔽日，雨聲不斷葉飛霜。經綸正復慚伊傅，雜駁猶能陋漢唐。卷盡殘書窗已晚，笑呼童子換爐香。

枕上

熒熒地爐火，煮藥土牀前。高帝老朝士，長安舊少年。松高露時滴，城遠鼓猶傳。拋擲百年事，且安殘夜眠。

冬夜

把菊家風有自來。充饑藜糲不盈盃。雲迷野渡一聲雁。雪暗山村千樹梅。宴坐何妨面卷壁。長吟且復畫爐灰。歲殘尙恨新春遠。欲挽天邊斗柄回。

雜興

陋巷無心長草萊。柴門偶自不曾開。餘齡漸迫諸孫長。徂歲將窮積雪來。且欲燎衣無宿燼。暮思頽頽但空臺。孰知自有忘憂處。逸坐新書正作堆。

又

此身漂蕩等流槎。又向江村送歲華。急雨遇寒疑作雪。明燈無炮結成花。座懸鏡古森毛髮。甌聚茶香爽齒牙。況是貧家多樂事。阿開漸學手吒叉。

卷第六十五

稽山行

稽山何巍巍。浙江水湯湯。千里巨大野。勾踐之所荒。春雨桑柘綠。秋風秔稻香。村村作蟹棹。處處起魚梁。陂放萬頭鴨。園覆千畦薑。春碓聲如雷。私債逾官倉。禹廟爭奉牲。蘭亭共流觴。空巷看競渡。倒社觀戲場。項里楊梅熟。采摘日夜忙。翠籃滿山路。不數荔枝筐。星馳入侯家。那惜黃金償。湘湖蓴菜出。賣者環三鄉。何以共烹煮。鱸魚三尺長。芳鮮初上市。羊酪何足當。鏡湖瀆衆水。自漢無旱蝗。重樓與曲檻。激澗浮湖光。

舟行以當車，小繖遮新粧。淺坊小陌間，深夜理絲簧。我老述此詩，妄繼古樂章。恨無季札聽，大國風泱泱。
贈論命周雲秀才

周郎顧然市中隱，精神卓犖秋天隼。忽來過我論五行，袖出詩卷如束筭。人生一息不自保，況我耄期真待盡。君今盛爲談未來，我亦聽之俱可驪。雖然此心猶未泯，何至死去同蠹蟊。地下不作修文郎，天上亦爲京兆尹。

自嘲

受福元無一羽輕，豈知造物假餘生。抱痾不死躋高壽，遇亂能全見太平。投箸斷鴻常自閱，營巢倦鶴固難成。乘除亦有堪慚處，記誦文辭誤得名。

自寬

兀兀空齋靜掩扉，篝爐香細著秋衣。簷頭殘雨晴猶滴，欄角羈雲晚未歸。支枕口和心共語，挑燈形與影相依。卷書未覺唐虞遠，知我何妨舉世稀。

唐虞

唐虞雖遠愈巍巍，孔氏如天孰得違。大道豈容私學裂，專門常怪世儒非。少林尙忌隨人轉，老氏亦尊知我稀。能盡此心方有得，勿持糟粕議精微。

幽事絕句

死生歸有命，榮悴出無心。苔井閑磨劍，松窗自斲琴。

又
矮紙來吳下，長毫出宛陵。自書霜夜句，持寄剡中僧。

又
昨夕風掀屋，今朝雨壞牆。雖知炊米盡，不廢野歌長。

又
煙畦朝斲藥，雪澗夜淘丹。仄徑何曾險，單袍不覺寒。

又
新傳服氣訣，舊喜步虛吟。兒女不難棄，雲山何處深。

又
客生聞吠犬，草茂有鳴蛙。日暎方炊飯，秋深始采茶。

寄題廬陵王晉輔先輩桂堂
楚人記草木，桂在椒蘭中。我懷小山句，妙絕窮化工。唐人作山水，亦以桂配松。丹葩間綠葉，錦繡相疊重。

不知始何時，巖桂開秋風。楚人所稱者，委棄等蒿蓬。嗚呼各有時，士豈怨不逢。我作桂堂詩，廣子雲夢胸。

寄題王晉輔專春堂前皆種牡丹
三月風光不貸人，千紅百紫已成塵。牡丹底事開偏晚，本自無心獨占春。

鼠屢敗吾書，偶得狸奴捕殺無虛日，羣鼠幾空爲賦此詩

服役無人自炷香。狸奴乃肯伴禪房。晝眠共藉牀敷暖。夜坐同聞漏鼓長。賈勇遂能空鼠穴。策勛何止履胡腸。魚殮雖薄真無媿。不向花間捕蝶忙。道士李勝之畫捕蝶獅貓以訊當世。

讀唐書忠義傳

志士慕古人。忠臣挺奇節。就死有處所。天日爲無色。大義孰不知。臨雖欠健決。我思臬卿髮。可配嵇紹血。

病後作

骨相坐一寒。仕宦經百譎。晚入文昌省。又坐煩言噴。詔書復收召。付以大典冊。期年甫奏篇。皇恐亟自劾。歸來稽山下。三食新穫麥。草屨布裙襦。徒步老阡陌。今年疾屢作。恍若將歸客。道士言犯土。拜章安舍宅。巫言神去幹。翦紙招魂魄。把臂忽自悟。此豈屋漏脈。盡去囊中藥。默觀鼻端白。正氣徐自還。鬼子何足磔。

山中

草閣留雲宿。溪橋引鶴行。身閑詩曠逸。心靜夢和平。石乳無時滴。松肪徹夜明。山中足幽趣。不是傲公卿。

夜思

風掃浮雲作快晴。窗聲終夜雜簾聲。月明滿院鶻鷲起。霜冷壓栖雞懶鳴。名字虛稱舊朝士。門庭元是老書生。尙餘一事猶堪喜。北陌東阡醉太平。

晨起

晨起梳頭雪滿膺。可憐衰與病相乘。浮名何足欺橫目。真樂聊須付曲肱。仕有俸錢渠亦好。退無耕壟我何憑。具牛力盡殊堪閱。買犢東村恨未能。

老態

破檣愁春近。空園畏日長。頭風便菊枕。足痺倚藜牀。冉冉殘年逼。悠悠萬事忘。有兒堪晤語。無客亦何妨。

又

寡欲貧何損。無才老更宜。挂牆多漢刻。插架半唐詩。飯已頻摩腹。兒來暫解頤。尚悲吳蜀遠。未免故人思。

枕上

夜雨一再作。燈前獨詠詩。影看孤鶴瘦。吟答斷蛩悲。幽夢悠然覺。清笳何足吹。殘年猶幾日。已矣媿明時。

贈過門道人

朝行市塵中。奔馬不可及。暮涉清溪流。芒屨了不濕。巖扉一丹竈。山路兩書笈。白驢可置堂。童子亦絕粒。邂逅安期生。電逝不暇揖。太華獨巍然。萬仞道傍立。

道院雜興

江上霜風吹角巾。東歸不獨爲吳尊。掃除長劍華纓夢。收拾孤飄短棹身。勾漏丹砂開竈晚。商顏芝草滿山春。東封敢擬迎鑾仗。且作行歌陌上人。

又

征途暗盡舊貂裘。歸臥林間喜自由。體倦尙憑書引睡。心安不假酒攻愁。丹爐弄火經年熟。竹院聽琴竟日留。今日理髻還一笑。白間時有黑絲抽。

又

早歲知聞久已空。巋然猶有灞城翁。東樓誰記傾春碧。敘州蓋古戎州也。有東樓廚醴。本名重碧。范至能
易爲春碧。北嶺空思驛晚紅。北嶺在福州。予少時與友人朱景參會嶺下僧舍。時秋晚。荔子獨晚。紅在冉
冉流年霜鬢外。纍纍荒塚綠蕪中。琳房何日金丹熟。老鶴猶堪萬里風。

又

龜堂有叟富神通。白髮何妨兩頰紅。先取山川來掌上。卻移天地入壺中。鶯花不老非塵世。風月常新奪
化工。近作東籬君未見。一尊少住莫恩恩。

山村經行因施藥

閑行偶復到山村。父老遮留共一尊。曩日見公孫未晬。如今已解牧雞豚。

又

耕傭蠶婦共欣然。得見先生定有年。掃灑門庭拂牀几。瓦盆盛酒薦豚肩。

又

兒扶一老候溪邊。來告頭風久未痊。不用更求芩芷輩。吾詩讀罷自醒然。

又

臚肩每帶藥囊行。村巷歡欣夾道迎。共說向來曾活我。生兒多以陸爲名。

又

逆旅人家近野橋。偶因秣蹇暫消搖。村翁不解讀本草。爭就先生辨藥苗。

歎老

身歷還回事萬端。天教林下養衰殘。文編似是他人作。書卷如曾隔世觀。久已悠悠置恩怨。況能一一記悲慳。牀頭周易真良藥。不是書生強自寬。

卽事

秃尾驢嘶小市門。側蓬帆過古城村。此生感慨知何限。斗酒新豐不足論。

又

草衣木食更何求。穴處巢居過卽休。尙恨未能全省事。一竿風月釣滄洲。

自賀

胎髮茸茸綠映巾。歸耕猶是太平民。流觴內史招同社。扛鼎將軍與卜鄰。窮居去藺亭項里。皆甚邈。曾冠六鰲非俗吏。已開九秩是陳人。一盃剩約梅花醉。又見開禧第二春。

天氣作雪戲作

八十又過二。與人風馬牛。深知老當逸。孰謂死方休。細衲兜羅襪。奇溫吉貝裘。閉門薪炭足。雪夜可無憂。

家風

春耕秋釣舊家風。門巷荒寒屋壁空。四海交情殘夢裏。一生心事斷編中。買魚日待攜籃女。裹藥時從挾籛翁。俗謂買藥爲裹藥。便廢閑吟亦未可。吾徒豈獨坐詩窮。

十二月二日夜夢遊沈氏園亭

路近城南已怕行。沈家園裏更傷情。香穿客袖梅花在。綠蘸寺橋春水生。

又

城南小陌又逢春。只見梅花不見人。玉骨久成泉下土。墨痕猶鎖壁間塵。

江干

霜晴忽念到江干。小蹇羸童路已乾。骨相豈能當富貴。髮毛聊喜耐悲歡。客途冬暖衣裘薄。村市年豐酒醖寬。殘臘卽今無十日。剩求芹蓼助春盤。

獨行過柳橋而歸

寒雲覆江干。慘慘雪欲作。草枯狐兔見。鷹隼方縱搏。老翁臥蓬戶。疾痛在腰脚。忽覺意稍佳。快若解束縛。呼童扶下堂。西北度略約。浮波見鳧雁。決起驚烏鵲。籬根犬迎吠。碓下雞俛啄。霜餘桑葉積。春近柳枝弱。徐行過傍舍。醉笑盛酬酢。歲暮農事休。羨爾羣飲樂。

戲遣老懷

平生碌碌本無奇。況是年垂九十時。阿囷略如郎罷老。稗孫能伴太翁嬉。花前騎竹強名馬。階下埋盆便作池。一笑不妨閑過日。歎衰憂死卻成癡。

又

清羸正怯倚闌干。紗帽還驚半指寬。日漏雲端纔欲暖。風催梅信又成寒。尋僧竹院逢茶熟。引鶴溪橋及

雪殘。只道捐書差似達。庖丁數紙尙須看。

又

兒時萬死避胡兵。敢料時清畢此生。已迫九齡身愈健。熟觀萬卷眼猶明。深深小塢梅初動。激激清溪水欲平。安得飄然從此逝。緱山風月聽吹笙。

又

舊襲家風號散人。晚承恩詔賜閑身。放狂泥酒都忘老。厚價收書不似貧。霜曉方驚羣木脫。春晴又喜一花新。先生偶出人難遇。陌上爭先看角巾。

又

本意歸來老故丘。閉門飯足尙何求。閑雲一片自舒卷。幽鳥數聲相應酬。但得有書時到眼。正令無酒亦忘憂。東籬偃仄纔尋丈。已敵征西萬戶侯。

對鏡

歲月雖邁邁。形容未苦癯。髮如新沐潤。顏似半酣朱。書讀常終卷。山行亦却扶。悠悠隨日過。不復歎頭顱。

晨起

客枕畏霜氣。曉窗收月痕。芸芸萬物作。皎皎一心存。老已忘開卷。貧猶力灌園。兒孫能繼此。亦足報君恩。

吾年過八十

吾年過八十。久已棄朝簪。化蝶有殘夢。焦桐無賞音。溪聲喧夜旦。野色變晴陰。欲講平生學。茫然不可尋。

又

八十又過二自言名放翁。斧斤遺壽樑。雲海寄冥鴻。酒挂驢鞍側。詩投藥笈中。瀟城逢薊叟。共語莫匆匆。

述志

椎牛醜酒千人帳。破浪凌風萬斛船。常恨書生無此快。一生低首短檠前。

又

新豐買酒慰無聊。衝雪騎驢上灞橋。鬚老尙堪吞緡子。松風何至羨山苗。

排悶

吹盡梅花了不知。化工也誤老人期。離離新草隨愁出。漠漠餘寒與睡宜。古錦一聯吟舊句。文楸數著理殘棋。波生澄澗君何怪。禪榻從來映鬢絲。

舟中作

林麓重重霧雨昏。扁舟晚過郡南門。鑄金越相遺祠古。執玉塗山王氣存。官道蒼茫多水驛。客遊飄泊厭風飈。剡中此去無多地。會約支公聽斷猿。

丙寅元日

標緜初聞寺閣鐘。霏微零雨兆年豐。家家椒酒歡聲裏。戶戶桃符霽色中。春枕方濃從賣困。社醅雖美倦治驛。從今萬事俱拋擲。且作人間百歲翁。

新晴

夜雨空塔滴到明。山雲忽斂作新晴。門前月淡有檐影。牆外泥乾無屐聲。與世日疎愁易遣。入春得暖疾差平。便當剩作滄洲趣。寄語沙鷗勿敗盟。

新歲

改歲鍾馗在。依然舊綠襦。老庖供餽飣。跳婢暖屠蘇。載糗送窮鬼。扶筇迎紫姑。兒童欺老聵。明燭聚呼盧。

簡邢德允

邢子襟靈舊絕塵。爾來句法更清新。淡交喜得山栖友。傑作疑非火食人。豈但僕奴看屈子。直須塗改到生民。與君兩世交情厚。剩欲燈前對角巾。

簡蘇邵叟

君家文獻歷十朝。魏公莢冕加金貂。孫支得君愈雋發。貴名突兀凌煙霄。居吳入蜀三十載。諸公孰能折簡招。澗松意氣極磊砢。天馬毛骨何超遙。鼎來行卷十九首。緜山明月聞吹簫。沉香亭畔未須說。想見風雪上灞橋。老夫誦之羣玉府。學士如堵不敢驕。爾來一編愈妙絕。繁若新霽騰斗杓。出爲龍首子何有。老穿豹尾我亦聊。湖邊酒樓無十步。胸次漣漣思同澆。

東村

信脚村墟路。歸來日未西。波清魚隊密。風小鷓巢低。白水初平岸。青蕪亦徧犁。市墟多美酒。飲具不須齎。

新曆歎

新曆在手心怕開。日月聯翩相續來。黃金散盡自一快。白髮不貸真可哀。無爲健羨廣成子。千二百年終

有死，膠不可黏西去日。刀何由剪東流水。酒無醉醺但痛飲。市醜上尊俱醉耳。堂堂七尺死卽休。不飽烏
鳶飽螻蝻。

雪中

忽忽悲窮處。悠悠感歲華。暮雲如潑墨。春雪不成花。眼澀燈生暈。詩成字半斜。殘尊已傾盡。試起問東家。

又

春晝雪如篴。清羸病起時。跡深驚虎過。煙絕閱僧飢。地凍萱芽短。林寒鳥哢遲。西窗斜日晚。呵手斂殘棋。

早春出遊

微雲薄鷲新晴後。小蓋輕輿古道遙。林杪幽禽初學囀。牆陰凍雪未全消。酒罈日暮收青旆。市步人歸擁
畫橈。欹帽捫髻常半醉。逢人誰與話無憀。

又

人生何適不艱難。賴是胸中萬斛寬。尺宅常朱那待酒。上池頻飲自成丹。楚祠花發呼舟去。禹穴雲生倚
杖看。更有新春堪喜事。一村簫鼓祭靈官。

東籬

東籬深僻嬾衣裳。書卷縱橫雜藥囊。無吏徵租終日睡。得錢沽酒一春狂。新營茅舍軒窗靜。旋煮山蔬七
筍香。戲集句圖書素壁。本來無事却成忙。

又

漫道深居晝掩關。東籬栽接不曾閑。每因清夢遊敷水。自覺前身隱華山。花發時時攜綠酒。客來往往羨朱顏。藥爐安著猶無地。擬展茅茨一兩間。

又

東偏隙地作疎籬。遇興無非一笑時。陪客投壺新罰酒。與兒鬪草又輸詩。山桃溪杏栽俱活。藥鑊漁竿動自隨。家事猶令罷關白。固應黜陟不曾知。

村市醉歸

明時乞得水雲身。白首扶衰又見春。橫木門幽謝來客。獨轆車小避行人。湘湖水長菰絲滑。蘭渚泥融箭茁新。處處酒壚皆可醉。不辭微雨墊吾巾。

村夜

入春雨雪無休日。雨止猶陰未快晴。萬竅怒號風不定。半輪斜照月微明。百年辛苦農桑業。五處睽離父子情。但得平安已爲幸。孤燈殘火過三更。時子虞調官行在。子龍阻風四陵。子修在閩。子坦在海。昌子與子布子通守舍。

旅思

百病集殘骸。閑遊且散懷。旅裝如遠役。蔬食似長齋。買藥停山步。求醫過縣街。春寒殊未已。閉戶夜燃薪。

對酒作

憑閣風吹帽。穿林雨墊巾。相呼十日飲。不負百年身。陌上金羈馬。墳前石琢麟。於吾竟何有。笑殺武陵人。

遊東村

露草衝門曉。風松一塢幽。新春有佳日。老子得閑遊。鷗爲忘機下。魚緣得計浮。歸途無遠近。一葉亂漁舟。

晨起

老境真無事。深居每畏人。喔咿雞失旦。姪姪鳥鳴春。過擔銀鑊白。擎盤鉅杓新。出門還可喜。一笑語比鄰。

夢中作

世事何由可控搏。故山歸臥有餘歡。澗泉見底藥根瘦。石室生雲丹竈寒。人遠忽聞清獻起。山開頻得異書看。一朝出赴安期約。萬里煙霄駕紫鸞。

春雨

片片紅梅落。纖纖綠草生。無端夜來雨。又礙出門行。

又

春陰易成雨。客病不禁寒。又與梅花別。無因一倚欄。

又

胸懷阮步兵。詩句謝宣城。今夕俱參透。焚香聽雨聲。

又

疎點空階雨。長明古殿燈。廬山岑寂夜。我是定中僧。

村店

水汎輕搖楫。山行穩跨驢。朝暝半晴雨。閭里雜樵漁。野鷺浮寒浦。飢鴉集老樗。店家看壞壁。忽見昔年書。

久雨薪炭食飲俱不繼戲作

澤國春饒雨。書生老益貧。固難誇練炭。亦豈擇勞薪。鹽盡纔供暮。醃微尙惱鄰。人嗤信書誤。癡絕望常珍。

溪上

偶就澄溪照幅巾。蘭亭遺韻想清真。功名不入山林夢。詩酒猶關老病身。萬事只增思魯歎。百年常媿避秦人。超然聊喜高情在。手挈長條貫細鱗。

謝君寄一犁春雨圖求詩爲作絕句

說著功名我自羞。喜君解劍換吳牛。莫將江上一犁雨。輕博人間萬戶侯。

又

老農雖瘠喜牛肥。回首紅塵萬事非。耕罷春蕪天欲暮。小舟衝雨載犁歸。

二月一日夜夢

夢裏遇奇士。高樓酣且歌。霜鬪輕管樂。王道探丘軻。大指如符券。微瑕互琢磨。相知殊恨晚。所得不勝多。勝算觀天定。精忠壓虜和。眞當起莘渭。何止復關河。陣法參奇正。戎旃相蕩摩。覺來空雨泣。壯志已蹉跎。

新晴

寂寂房櫺鳥雀聲。熏籠茶竈正施行。繁花滿樹春纔半。斜日穿雲雨乍晴。引睡書橫猶在架。圍棋客散但空枰。病懷莫道傷幽獨。小榼芳醪手自傾。

又

挂冠湖上遂吾初。捫腹消搖適有餘。羹藜野蔬元足味。屋茨生草亦安居。市墟分熟通賒酒。舍情深許借廬。更喜新晴滿窗日。籤題重整一牀書。

望永思陵

高帝中興萬物春。青衫曾忝綴廷紳。仕爲將相却常事。年及耄期能幾人。早幸執戈觀北伐。晚叨秉筆記東巡。歸耕况復蒼梧近。鬱鬱葱葱佳氣新。紹興未翼辛金陵。游適在朝列。淳熙末。上命羣臣齊集文華閣。修高宗實錄。游首被選。

燈下小酌

江湖雙鬢禿。宇宙一身窮。酒浪搖輕碧。燈花落碎紅。交情元易見。春事半成空。尙覩身強健。煙畦攬芥菘。

春遊

杏花天氣喜新晴。白首書生樂太平。小陌鞦韆離隔世。名園祓禊尙關情。山林自古流觴地。杖管誰家送酒聲。蕪菜鱉魚初滿市。莫將羊酪敵南烹。

又

窮愁終日竟胡爲。老健人間自一奇。每駕柴車遊古寺。間騎竹馬伴羣兒。登臨蘭渚流觴地。蘭亭本名蘭渚。蕭散狐泉冷澗時。練布單衣白羽扇。路傍人總道相宜。

春日雜賦

羈懷病思正厭厭。詩卷漁竿信手拈。老境何嘗忘一笑。春風也解到窮闕。殘花滿地無餘毒。新筍掀泥已露尖。轉老轉窮君勿笑。熊躡魚腹豈容兼。

又

鬢毛八九已成霜。此際逢春只自傷。苦雨不容花抵敵。餘寒猶賴酒禁當。退紅衣焙熏香冷。古錦詩囊覓句忙。堪笑散人閑事業。西窗容易又斜陽。唐樂府云。床上小氈籠。鄆州新退紅。

又

江湖放浪水雲人。藥物枝梧夢幻身。移竹南窗初試筍。掃花北陌旋成塵。窮忙自笑常終日。老健猶能不負春。未遂初心惟一事。乞薪賒米惱吾鄰。

又

乞得身歸剡曲邊。衡門茅舍共蕭然。向來誤計守書冊。此日遺愁無酒錢。俗客妬閑來袞袞。流年欺老去翩翩。梨花楊柳清明過。且向江村剩放顛。

又

人生覓飯元多術。最下方爲祿代耕。脫却朝衫猶老健。快如苦雨得春晴。鳥聲頻喚五更夢。花氣頓醒三日醒。最喜晨興聞剡啄。吾兒書札到柴荆。

悲歌行

讀書不能遂吾志。屬文不能盡吾才。遠遊方樂歸太早。大藥未就老已催。結廬城南十里近。柴門正對湖

山開。有時野行桑下宿。亦或慟哭中途回。檀公畫計三十六。不如一篇歸去來。紫駝之峰玄熊掌。不如飲豆羹芋魁。腰間纍纍六相印。不如高臥鼻息轟。春雷安得寶瑟五十弦。爲我寫盡無窮哀。

梅市暮歸三山

日日蠻童佩一壺。壺乾時亦復村酤。橫林露塔遠猶見。暮鶴籠山淡欲無。綠浦例憑孤竹界。畫橈常遣鷺前驅。此身元是滄浪客。敢學高人乞鏡湖。

龜堂偶題

文章何物求渠力。詩亦安能使汝窮。春水一池花百本。此生未易報天公。

又

細肋臥沙來左輔。巨螯斫雪出東吳。不知一飽摩便腹。得似茅檐齋糲無。

泛湖

白鷺雙飛導我前。自疑身是水中仙。放舟漢客樵風裏。擲釣秦皇酒瓮邊。山寺雲間傳講鼓。漁家浦口起炊煙。個中得意君知否。買盡煙波不用錢。

卷第六十六

園中作

疎籬圍中庭。野水赴方塘。春雨路易乾。徐步躡夕陽。黯黯紅杏梢。忽已占年光。我老來日短。乃復不自量。

接花待其成。鄰里共笑狂。萬事孰能料。社樗老不僵。磊磊盤中果。安知不獲嘗。作詩遣閑愁。一笑無留餘。

寄題求志堂

古人不輕出。出則堯舜。其君民。古人不輕隱。隱則坐使風俗淳。孰知後世乃不然。唐虞日遠如飛煙。異端欲出六籍上。裔夷直居中。夏先窮。居求志。達行道。儻不塞責。真負天。士固不可苟富貴。願亦豈可徒貧賤。如其一念有愧心。寧不終身戴慚面。老夫少年鐵鑄碣。欲窺聖門終未見。祝君勿恃來日長。八九十年如掣電。

贈過門道人

賈藥人間兩屢輕。飄然雲水不論程。曉經浦口亂流渡。夜宿山家乘月行。

春晚

門巷蕭條老病侵。春晴方快又春陰。啄吞自笑如孤鶴。導引何妨効五禽。雨洗杏花紅欲盡。日烘楊柳綠初深。雛鷺寧有平生舊。也傍荊櫓送好音。

又

村巷泥深晝掩門。倚欄搔首一消魂。花經風雨人方惜。士在江湖道更尊。壁浪忽看魚對躍。入雲時見鶴孤鶩。向來莘渭今安在。歎息誰能起九原。

梨花

開向春殘不恨遲。綠楊率地最相宜。征西幕府煎茶地。一幅邊鸞畫折枝。宣司靜鎮堂屏上。有邊鸞梨花。

又 粉淡香清自一家。未容桃李占年華。常思南鄭清明路。醉裏迎風雪一枝。

又 嘉陵江色嫩如藍。鳳集山光照馬銜。楊柳梨花迎客處。至今時夢到城南。

農桑

農事初興未苦忙。且支漏屋補頽牆。山歌高下皆成調。野水縱橫自入塘。

又

水長人家浸稻秧。蠶生女手摘桑黃。差科未起身無事。鄰曲相過日正長。

又

采桑蠶婦念蠶飢。陌上忽忽負籠歸。却羨鄰家下湖早。畫船青繖去如飛。

又

蠶如黑蠟稻青鍼。夫婦耕桑各苦心。但得老親供養足。不差布袂與蒿簪。

自嘲

野叟身常雜傭保。蒲園荒庭自鋤掃。小兒耕養薑薑足。大兒游宦垂垂老。朝餐未破百蠶蠶。晚餉猶存兩困聚。春粳但備翁作糜。儲帛纔堪孫裂襖。賢愚元自一王尊。癡鈍寧論萬漏道。可憐對客猶自於。談道能令君絕倒。

春晚

寂寞又過桃李時。東園微雨草離離。破困食外有餘粟。殘髮白中生黑絲。小疾已能忘藥石。餘年寧復關
蒼龜。飾巾待盡從來事。閉戶燒香更不疑。

又

正見山陂草木芽。狂風忽掃萬枝花。病懷久已忘春事。老眼猶能惜物華。枕上有詩頻自啟。尊中無酒不
妨賒。昔人漫道傷幽獨。野鶴分巢即是家。

閉戶

乞身林下養衰殘。閉戶寧容外物干。正使有爲終淡泊。未能無疾已輕安。寸陰息念如年永。丈室端居抵
海寬。老子爾來深達此。却嫌兒女話團圓。

晨起

初聽高枝鶉鴉鳴。旋聞深井轆轤聲。煙籠小閣猶疑雨。日射東窗頓作晴。古洗注湯供頽溜。春畦摘菜助
煎烹。老人頽惰雖堪笑。終勝胸中懷不平。

出遊

九日陰霾一日晴。此行處處是丹青。斷雲零落江郊路。壽木輪囷古驛亭。饒婦微行望耕壟。漁歌相和起
煙汀。拔山意氣今何在。猶有遺祠可乞靈。路過項羽廟。

又

近過父老遠尋僧。病起經行力漸增。織室關機鳴軋軋。稻陂瀦水築登登。淺深村落時分徑。高下川原自作層。薄暮到家還熟睡。隔林鐘鼓報晨興。

又

吳地清明未減寒。梨花初動杏花殘。平沙漫漫人爭渡。微雨蕭蕭客跨鞍。野寺吹螺作春會。山郵糴米具朝餐。已開九帙吾何覲。時說金丹強自寬。

又

東阡陌適逢晴。小蹇輕裝短作程。白水滿陂秧馬躍。綠陰遶舍犂車鳴。過村小婦憑牆看。入寺高人攬袖迎。剩情東風吹柳絮。放翁詩到此時成。

曳杖

曳杖寄彷徨。徐行轉曲廊。病知貪酒害。老悔愛花狂。庭樹雲收影。簾旌雨浥香。悠然有佳處。物我兩相忘。

自詠

曾著杞菊賦。自名桑苧翁。常開羅爵網。不下釣魚筒。租稅先期畢。陂塘與衆同。士章八十字。世世寫屏風。

雜興

謀生在衣食。不仕當作農。識字讀農書。豈不賢雕蟲。婦當娶農家。養蠶事炊春。晨耕候春廬。夜織驚秋蛩。畦蔬勝肉羹。社酒如粥醲。毋爲慕朝幘。諂笑求見容。

又
家世本臞儒。自奉至儉薄。肉食固難期。間亦闕鹽酪。賓朋飯芋豆。時節糞藜藿。偶然設鷄豚。變色相與作。家居常守此。自計豈不樂。蔬園畏蹴躡。切勿思大嚼。

又
家本徙壽春。遭亂建炎初。南來避狂寇。乃復遇強胡。于時髡兩髻。幾不保頭顱。亂定不敢歸。三載東陽居。人事固難料。今乃八九餘。努力未死間。讀我先人書。

又
讀詩讀七月。治書治無逸。王業與農功。事異理則一。此外復何爲。齊民有遺術。一飽不啻足。切勿爲利誅。大屋起道傍。百鬼闕其室。曷不觀陸翁。食菜開九帙。

又
三吳氣候異。開歲固多雨。今年已暮春。霽日僅可數。寒氣薄腴理。沉痛結心膂。遣奴買藥物。日夜事炮煮。端居情懷惡。欲出泥淖阻。安得平生歡。駕言問良苦。

雜感
病臥踐衰境。躬耕歸故園。怒蛙號廢沼。妖鷲嘯荒村。里巷魚殮薄。坊場黍酒渾。相逢欲話舊。意極轉忘言。

又
道進身垂老。方靈病已侵。知難逃死籍。猶得遂歸心。星斗開孤劍。塵埃拂素琴。安庸常袞袞。誰與論幽深。

又

雨霽花無幾。愁多酒不支。淒涼數聲笛。零亂一枰棋。蹈海言猶在。移山志未衰。何人知壯士。擊筑有餘悲。

又

草徑纔容步。茅廬僅庇牀。原貧道尊顯。回天死芬芳。弦誦喧清曉。鉏耨滿夕陽。此風能不墜。章布亦何傷。

又

早仕譏銷骨。遲歸悔噬臍。短衣猶掩脛。窮巷固多泥。婢喜蠶三幼。鄉中謂蠶眠爲幼。奴貪雨一犁。衝茅明我眼。刮膜謝金篦。

又

春晚晴還雨。村深醉復醒。溪添半篙綠。山可一窗青。藥品隨長鏡。花名記小屏。閉身幸無事。吟嘯送餘齡。

兩壁

吾園畜兩壁。善驚未易馴。及今纔幾時。弭耳常依人。飢食園中草。渴飲溝澗濱。時時覈餘糧。亦未耗吾困。吏或無佳政。盜賊起齊民。孰能撫以德。坐還三代醇。

書感

疋馬曾爲塞上遊。東歸幾見剡川秋。故城廢市古今歎。斷角殘鐘朝暮愁。尺寸無功真碌碌。老期未死轉悠悠。阿奴尙喜強人意。三日於菟氣食牛。開孫以二月二十日筆時盤。

書意

萬事馬牛風。蕭然破屋中。忍貧增力量。耐辱見神通。道進天魔散。心安客疾空。微言施魚鳥。一一脫池籠。

讀唐書

力行可使金如土。篤好能徠馬若龍。斗米三錢本常事。風雲千載自難逢。

雜題

省中得味如殮蔗。語下明心似到鄉。對客欲談潭忘却。笑呼童子替燒香。

又

半飽半飢窮境界。知晴知雨病形骸。軒昂似鶴那求料。枯槁如僧不赴齋。

又

傳家只要存書種。學道當知養聖胎。寧使終身遜比景。莫令一物汙靈臺。

又

大兒都門久栖栖。小兒調官今復西。鄰家父子我所羨。泥水沒膝扶耕犁。

栽牡丹

攜鋤庭下剛蒼苔。墨紫猩紅手自栽。老子龍鍾逾八十。死前猶見幾回開。

夜聞姑惡

學道當於萬事輕。可憐力淺未忘情。孤愁忽起不可耐。風雨溪頭姑惡聲。

哭開孫

學步漸扶牀。乘車已駕羊。虛稱砌臺使。不遇玉函方。杳杳天難問。茫茫夜正長。寂寥誰伴汝。蕭寺閉空房。

晚春東園作

雨餘木葉綠成陰。一日身閑直萬金。習氣自嫌除未盡。鳥啼花落尙關心。

又

女郎花開春事闌。王孫草長思婦歎。蜂釀蜜脾猶未熟。雨催梅頰已微丹。

禽聲

布穀布穀天未明。架犁架犁人起耕。宦途不似農家樂。東作西成過此生。

秦皇酒瓮下垂釣偶賦

酒瓮山邊古釣磯。沙鷗與我共斜暉。目前雖有小得喪。天下豈無公是非。滄海橫流何日定。古人復起欲誰歸。道邊醉倒君奚憾。豈失風塵一布衣。

出遊歸鞍上口占

渺渺煙波飛檝去。迢迢桑野策驢還。寄懷楚水吳山外。得意唐詩晉帖間。每惜好春如我老。誰能長日伴人閑。世間自是無兼得。勸業元非造物慳。

閑詠

本志常思退。前緣剩得閑。聽猿來剡縣。采藥上稽山。超絕風塵表。瑩然冰雪顏。向來香火地。五綴羽衣班。

雨

曉望橫斜映水亭。暮看飄灑濕簾旌。不嫌平野蒼茫色。實厭空階點滴聲。上策莫如常熟睡。少安毋躁會當時。且將稿事傳童稚。未插秧時正好耕。

立夏

赤幟插城扉。東君整駕歸。泥新巢燕鬧。花盡蜜蜂稀。槐柳陰初密。簾櫳暑尚微。日斜湯沐罷。熟練試單衣。

孤寂

晚境諸兒少在傍。書堂孤寂似僧房。家居不減旅懷惡。夏夜尙如寒漏長。數筍筍盡甘淡薄。半盂麥飯喜豐穰。愚儒幸自元無事。日課朱黃自作忙。

明日觀孤寂詩不覺大笑作長句自解

獨處將如長夜何。直將寂寞養天和。愛身不情如懷璧。守氣無虧似塞河。塵篋空存獲麟筆。煙波嬾和夜牛歌。年來助業君知否。蠶下新降百萬魔。

初夏出遊

早緣疎拙遂歸耕。晚爲沉緜得養生。藥鑊釣竿緣已熟。海村山市眼偏明。安西萬里人何在。廣武千年恨未平。但使蓮峯歸路穩。亦無閑手揖公卿。

又

平生與世曠周旋。惟有清遊意獨便。小竈炊菰山市口。東菑秣鷺海雲邊。春融恨欠舒長日。秋爽已悲搖落天。首夏清和真妙語。爲君誦此一欣然。

又

泥黠樓鞋雨。整巾閑遊。又送一年春。長歌聊對聖賢酒。羸病極知朝暮人。廢堞荒郊。閑吊古。朱櫻青杏正
嘗新。桃源自愛山川美。未必當時是避秦。

自詠

編屋裁小冠。鹿皮製短裘。陸駕少游車。水泛淵明舟。山澤與城市。有路即可遊。或時一飯去。間亦旬日留。
方見草木萌。忽已天地秋。洵丹雲澗冷。采藥乳穴幽。逢人亦欣然。有問乃不酬。摩挲金銅人。千載寄悠悠。

五更聞雨思季長

幽巖鳴姑惡。高樹號杜宇。驚回千里夢。聽此五更雨。展轉窗未明。更覺心獨苦。天涯懷故人。安得插兩羽。

醉中作

小市鐘聲斷。高樓月色新。醉眠當大路。狂舞屬行人。有客要元亮。無妻諫伯倫。山花信手插。不復惜烏巾。

溪園

跌宕欲忘形。溪園半醉醒。靜看猿哺果。閑愛鶴梳翎。矮榻水紋簾。虛齋山字屏。更須新月夜。風露對青冥。

初夏閑居

雪液初鑄小。麝香風漪乍。展北窗涼。巢乾燕乳。蟲供哺。花過蜂閑。蜜滿房。閉戶不知春已去。鈔書但覺日
方長。所嗟詩思年來減。虛負奚奴古錦囊。

又

川雲漠漠雨冥冥。濁酒閑傾不滿瓶。蠶簇尙寒憂繭薄。稻陂初滿喜秧青。王師護塞方屯甲。親詔憂民已放丁。病起自憐猶健在。不須求應少微星。

又

松棚踏踏接虛堂。掃地燒香旋置牀。密葉留花供淺酌。斷雲障日作微涼。高城薄暮聞吹角。小市豐年有戲場。白首史官閑盡歲。祇將搜句答流光。

又

城上朱旗夏令初。溪頭綠水蘸菰蒲。花貪結子無遺萼。燕接飛蟲正哺雛。簫鼓賽蠶人盡醉。陂塘移稻客相呼。鄉中爾備耕者爲客。長安青蓋金羈馬。也有農家此樂無。

又

啜茗清風兩腋生。西齋雅具愜幽情。熏衣過後篝爐冷。展卷終時嬾架橫。巢燕何曾擇貧富。鳴鳩元不爲陰晴。但能與物俱無著。小草新詩取次成。

又

野水楓林久寄家。慣將枯淡作生涯。小樓有月聽吹笛。深院無風看磴茶。靜岸葛巾穿薜荔。閑拖筇杖入谿谿。平居每與兒孫說。切勿人前一語誇。

又

水邊茆屋兩三間。野叟幽人日往還。兩卷硬黃書老子。數峯破墨畫廬山。功名會上元須福。生死津頭正

要頌。試說龜堂得力處。向來何啻半生閒。

又

養酒青梅次第嘗。啼鶯乳燕占年光。蠶收戶戶繅絲白。麥熟村村搗麩香。民有袴襦知歲樂。亭無桴鼓喜時康。未嘗一事橫胸次。但曲吾肱夢自長。

子坦今秋鹽官市征當滿作絕句寄之

八十老翁頭似雪。柯橋送汝淚頻揮。殘年豈料猶強健。却向柯橋接汝歸。

子邁調官得永平錢監待次甚遠寄詩寬其意蓋將與之偕行也

黃紙起家陞仕籍。青衫遡闕拜恩光。署衙汝勿憎銅臭。就養吾方喜飯香。世事極知多倚伏。人生正要小回翔。但令父子常相守。斂版扶犁味總長。

送韓立道守池州

千里江山控上流。省郎懷綬去爲州。才華故在諸公右。談笑遙分聖主憂。月墮麗譙喧鼓角。雨餘綠野徧鋤耰。萬家歌舞春風裏。秋浦如今不似秋。

野興

寓館無常地。輕裝不宿謀。迷途問耕叟。過渡上漁舟。野飯香炊玉。村醪滑瀉油。還家亦無事。隨處送悠悠。

又

小雨迎藜杖。微風入葛巾。寧甘結襪系。不作拜車塵。施藥鄉鄰喜。忘機鳥雀馴。家山又初夏。好在不自身。

又

山豁逢孤寺。林窮渡小溝。松聲亂僧梵。雨點雜魚遊。阜隴三軍帥。金章萬戶侯。人生各有願。未肯換扁舟。

又

去去歷山村。行行並廟垣。湍流鱸魚小。夕徑鮮花繁。白鷺飛如導。青蘿險可捫。歸途不寂寞。迎笑有諸孫。

東齋雜書

吾廬雖甚陋。窗扉亦疎明。開卷冬日暖。曲肱暑風清。昨日一鳥鳴。今日一木榮。欣然與之接。悲慨何由生。

又

吾貧無時醒。日月忽遄邁。空林春采菘。荒墉秋種稗。孤學有自來。飢死奚足怪。著書充棟宇。一字不肯賣。

又

負負無可言。上上不須說。天壤大如許。我獨身子子。苟合不可爲。萬事聽瓦裂。年登麥飯足。得酒且勤歡。

又

有客可劇談。有酒可盡醉。老夫老更窮。終日惟坐睡。旣無客款門。酒亦未易致。頽然北窗下。兀兀有餘味。

又

下帷聽雨聲。開戶延月色。霏霏半篆香。湛湛一池墨。徐行舒血脈。危坐學踵息。吾聞諸先賢。養生莫如齋。

又

門低不通車。室隘劣容膝。掩脛無全衣。作字用挫筆。親朋孰可望。門內自相恤。一笑語吾兒。汝奴未須叱。

又 區芊常願雨。秋菜常願晴。吾兒行渡江。晨起愁風生。人生各徇私。夫豈造物情。孰能均此意。萬里皆春耕。

又

吾居魚鱉鄉。戒食兼鮮葷。雞鷄以御客。乃者亦一掃。區區仁愛心。殆可質蒼昊。物情豈遠哉。我亦吝肝腦。

又

又 蕝花恨不茂。薤草欲其盡。心常墮貪愛。否則近殘忍。蝶網猶翩翩。蚓斷更菌蠢。君其等觀之。何者非可閔。

又

又 藥與疾相當。何恙不能已。良醫善用藥。疾去藥亦止。晨晡節飲食。勞佚時臥起。藉曰米長生。盡期直易爾。

又

又 養生有妙理。省事與寡言。於此能力守。衆說皆其瀋。擾擾斲汝本。饒饒傷汝魂。要當俱置之。息深踵自溫。

又

又 學者學聖人。斯須不容苟。百年樂箠瓢。千載仰山斗。家庭盛弦誦。父子相師友。但令書種存。勿愧耕壟畝。

梅市

沙際人家半掩扉。借炊小住不相違。水生溪面大魚躍。風定草頭雙蝶飛。竹院遊僧聞鼓集。煙畦老圃荷鋤歸。浩然物外真堪樂。回首浮生萬事非。

初夏幽居

日長巷陌曬絲香。雨霽郊原割麥忙。小擔過門嘗冷粉。微風解籜看新篁。傍籬鄰婦收魚笱。叩戶村醫送藥方。欲到湖邊還懶動。悠然扶杖立斜陽。

又

虛堂一幅接羅巾。竹樹森疎夏令新。瓶竭重招麴道士。牀空新聘竹夫人。寒龜不食猶能壽。弊帚何施亦自珍。枕簟北窗寧有厭。小山終日對嶙峋。

又

野草幽花無歇時。一窗終日對東籬。病猶獨醉雖堪笑。老未全衰亦自奇。古紙硬黃隨晉帖。矮牀勻碧錄唐詩。箇中疑是忘憂處。問著山翁却不知。

又

東園梅熟杏初丹。老子披襟每不冠。右硯坡陀塵煤綠。小山蔥蒨石盆寒。移牀剩欲眠松塢。鼓枻還思泊蓼灘。未用絲毫辨差等。黃塵終勝勝客長安。

泛舟至近村茅徐兩舍勞以尊酒

小舸悠颺亦樂哉。迢迢故取北村回。山從樹外參差出。水自城陰曲折來。樂歲共忘東作苦。殘租不待急符催。舊鄰父老睽離久。喚取開顏把一杯。

再次前韻

少壯卽今安在哉。輕舟訪舊莫輕回。兒童擁岸迎舟入。婦女窺籬喜客來。多難只成雙鬢改。流年更著暮

笏催放懷魚鳥平生事。少住茅檐盡此杯。

題陳伯子主簿所藏秦少游像

晚生常恨不從公。忽拜英姿繪畫中。妄欲步趨端有意。我名公字正相同。

入梅井序

吳俗以芒種後得壬日爲入梅。今年正以此日重雲蔽天。比夜乃雨。父老以爲有年之候。賦詩以識之。

今年入梅日。雲脚垂到地。芬香小麥麩。展轉北窗睡。甲夜聞雨聲。起拜造物賜。三登於此卜。一飽可坐致。語兒高爾困。戒婦豐爾饋。擊壤歌太平。門無督租吏。

北窗雨中作

鬱蒸作不解。風雨來有信。豈惟窗戶清。更喜草木潤。簡編旣陳前。燈火亦可近。跂予望聖賢。傾河洗麤吝。扶衰幸未死。吾道其少進。安得平生歡。懷抱爲君盡。

戲書觸目

經奴閑占薰籠臥。燕子橫穿翠徑飛。我亦人間好事者。憑欄小立試單衣。

四月二十八日作

四月欲盡五月初。九十未及八十餘。開口何曾談世事。收身且復愛吾廬。

又

行偏人間病不禁。鬢毛飽受雪霜侵。茅檐一夜蕭蕭雨。洗盡平生幻妄心。

A2

742138

(5)



書叢本基學國

集翁放陸

(四)

著游陸



行發館書印務商

書叢本基學國

集 翁 放 陸

(四)

著 游 陸

行發館書印務商

陸放翁集

劍南詩藁

卷第六十七

倚筇

老翁愈老欲安歸。歸臥稽山飽蕨薇。未免解牛逢肯綮。豈能相馬造精微。
靈山有士拈花笑。闕里何人鼓瑟希。我亦倚筇桑竹下。白髯蕭颯滿斜暉。

薄暑


冲夏暑尚薄。孤村日尤長。僧坊初施浴。行路亦饋漿。老我絕人事。終日坐虛堂。
南北兩松棚。細細吹清香。堂中無長物。獨置湘竹牀。我睡僕亦休。睡覺誰在傍。起坐拭兩臂。
小山鬱蒼蒼。安得烏有生。俱老無何鄉。晝寢倦腕擎書忽墮前。心清無夢腹便便。丹成未要排雲去。且住人間作睡仙。

又

困睫芒羊。一欠伸。頽然忽已墮紗巾。鼻端雷動君無怪。路熟華胥不問津。

睡起

睡起偃偃扇。嬾搖枕痕著。面未全消。山丹石竹俱零落。孤蝶飛來伴寂寥。



又

蒲萄換葉欲成陰。歲月催人感慨深。安得門前無俗客。岸巾臨水聽蟬吟。

林間書意

三三兩兩市船回。水際柴門尚未開。垂綠笏梢風正惡。弄黃梅子雨初來。紅螺盃小傾花露。紫玉池深貯麝煤。領取林間閑富貴。向來誤計伴鄒枚。

又

小山草木一窗秋。團扇江山萬里愁。不讀狐書真僻學。未登鬼籙且閑遊。少隨官牒嗟無策。晚脫朝衫喜自由。半嶺嘯聲驚阮籍。要知天下有高流。

示子遙

吾家太傅後。衿佩盛青青。我忝殿諸老。汝能通一經。學先嚴詰訓。書要講聲形。夙夜常相勉。諸孫待典刑。

追涼小酌

綠樹暗魚梁。臨流追晚涼。持盃屬江月。散髮據胡牀。苦蕒醃齏美。菖蒲漬蜜香。醉來呼稚子。扶我上南塘。

暑夜泛舟

暑氣方然一鼎湯。聊呼艇子夜追涼。微風忽起髮根冷。闕月初升林影長。漸近場中聞笑語。卻從隄外看帆樯。超然自適君知否。身世從來付兩忘。

又

烈暑元知不可逃。天將清夜付吾曹。小舟行處浦風急。健鶴歸時山月高。愚智極知均腐骨。利名何啻一秋毫。等閑分得吳松水。安用并州快剪刀。

短歌行

冠一免。不可以復冠。門一杜。不可以復開。山林兀兀但俟死。臺省袞袞吁可哀。巨材倒壑亦已矣。萬牛欲挽真難哉。阿房銅人其重各千石。回首變化爲風埃。吾曹浮脆不自悟。乃欲冠劍常崔嵬。勸君飲勿用盃酌。但當手提北斗魁。挹乾東海見蓬萊。安用俛首爲低摧。

小江

細霧斜陽一片秋。數家茅屋小江頭。鶻聲遠入菰蘆夾。鳥陣斜飛蘭杜洲。暫住便成閑嘯詠。欲歸更復小遲留。老翁脚力猶能健。明日重來倚寺樓。

歸興

輕雷。輕轆斷梅初。殘籀縱橫過笏餘。鄉語謂梅雨有雷爲斷梅。又謂笏出林爲過笏。飽有期程新買犢。睡無厭足久捐書。白蘋滿渚閑揮榜。綠樹連村獨跨驢。夏日儘長歸亦暮。水邊燈火已疎疎。

又

古道迢迢人跡稀。羸驂欹帽遠村歸。正看日暮羊牛下。又見月明烏鵲飛。僧院疎鐘出林岫。漁家微火耿窗扉。閑遊要是幽人事。草露從教溼短衣。

自春來數夢至閩中。蒼溪驛五月十四日又夢作兩絕句記之

騎驢夜到蒼溪驛。正是猿啼月落時。三十五年如電掣。敗牆誰護舊題詩。

又

亭臯敗葉先秋實。城上驚烏半夜啼。自笑遠遊心未已。年來頻夢到蒼溪。

自嘲

長日淡無事。虛堂來遠風。愛眠從病蹇。厭事懶治髯。猫健翻憐鼠。庭荒不責童。爾來添日暗。又免送歸鴻。

又

身臥孤村日。年當大耋時。貧憂債酒券。懶悔許僧碑。輸稅質耕犢。飯醫烹伏雌。勞生不須歎。隨事且支持。

雨霽

一雨洗炎蒸。危闌偶獨憑。涼颼生萃蔌。爽氣入鬢鬢。庭下宵遊燐。盤中晝掃蠅。絕勝塵土裏。馬上嚼寒冰。

大雨

萬壑風聲遠。千林雨脚長。溝盈懸爨竈。屋漏徙衣裳。未說豐年喜。先便永夜涼。清秋病小愈。起柁上瀟湘。

社飲

世上升沉一轆轤。古來成敗幾樗蒲。試看大醉稱賢相。始信常醒是鄙夫。淵明詩云：一士常獨醉。一夫終年醒。起舞非無垂白伴。暮歸仍有髭鬚扶。即今不乏丹青手。誰畫三山社飲圖。

采藥有感

兼葭記霜露。蟋蟀謹歲月。古人于物理。瑣細不敢忽。我少讀蒼雅。衰眊今白髮。中間嬰疢疾。過日常卒卒。

潤毛春可求。山藥秋可掘。雖云力探討。疑義未免闕。屏居朋友散。奧妙誰敢發。窮理已矣夫。置繯當自觀。
觀邸報感懷

六聖涵濡壽域民。老年肝膽尚輪囷。難求壯士白羽箭。且岸先生烏角巾。幽谷主盟猿鶴社。扁舟自適水雲身。卻看長劍空三歎。上蔡臨淮奏捷頻。

送子適至梅市而歸

梅市長隄槍別情。魯墟歸路當閑行。日沉菱浦看魚躍。煙合菰叢聞鷓鳴。蘸水門扉初半掩。擁橋炬火已先迎。停橈不奈清愁得。獨倚闌干待月明。

述閑

披衣按壓罷。披榻欠伸餘。香爇翻心字。茶凝出草書。客稀門每閉。意悶髮重梳。賴有盆山樹。幽情得少據。

幽居

謝病言歸一鹿車。短籬數掩護幽居。樹枝南畔有飛鷗。蓮葉東邊多戲魚。倦枕積成驚斷夢。斜風吹落讀殘書。興來偶曳枯筇出。父老逢迎卻未疎。

午暑

笛材纖篔涼如水。霧縠縵幘薄若空。更著高安竹根枕。不妨專享北窗風。

舟過道士莊

江蘿芳杜滿沙汀。道士莊前酒半醒。上下風煙還竟日。往來魚鳥各忘形。歸人薄晚常爭渡。病葉先秋亦

日暮興欲盡時猶小住。北村漁火看青燄。

晨興

晨興未櫛盥。扶杖並檐立。斷雲方東行。庭草露猶溼。朝飢神益爽。清虛自來入。可憐數雞雛。隨母啄遺粒。蝶殘蚬蜃喜。鼠腐鷓鴣集。吾當一洗之。漱泉開玉笈。

對酒

斷簡殘編不策勛。東臯猶得肆微勤。榮枯一枕春來夢。聚散千山雨後雲。煙水幸堪供眼界。世緣何得累心君。牀頭小瓮今朝熟。撥置閑愁且一欣。

泛舟

水長芳洲沒。風生釣艇橫。偶尋東埭去。卻作北村行。宿鳥昏方定。流螢雨更明。歸來未覺晚。傳漏下重城。

地僻

地僻臨滄瀾。門幽長綠苔。客書疑誤達。僧刺媿虛來。清露蘋花坼。斜陽燕子回。自憐猶有恨。佳日對空壘。

東軒

終日在東廂。閑消百刻香。一枰分黑白。雙視列朱黃。荷氣侵籬覆。桐陰覆井涼。前知今夕夢。孤榜上蘆湖。

季夏雜興

蟻鬪知將雨。蟲鳴覺近秋。衰翁非愛酒。無計奈孤愁。

又

曉曉瘦驢嶺，莽莽老牛陂。嶺在施黔間，陂在汝州。四海均羈旅，何人感此詩。

又

熟睡一炊頃，清談數刻間。未言能近道，要得暫身閑。

又

疏泉澆藥壠，枕石聽松風。此樂慚專享，無因與客同。

夏夜暑毒不少，解起坐庭中。

窗間有螢過，枕上見星流。欲睡不堪熱，長歌起飯牛。

又

風從高樹下，蟲抱短莎鳴。小據胡牀坐，還扶拄杖行。

素飯

放翁年來不肉食，盤箸未免猶豪奢。松桂輒炊玉粒飯，醃醬自調銀色茄。時招林下二三子，氣壓城中千百家。緩步橫摩五經笥，風爐更試茶山茶。晉樂道近餽茶山茶。

老態自遣

似見不見目愈衰，欲墮不墮齒更危。誰令汝年八九十，常欲強健寧非癡。目昏大字亦可讀，齒搖猶能決滯肉。若知用短百無憂，此理正如夔一足。矐矐脆脆俱有味，笑侮莫聽傍人喙。但令孫曾能力耕，一飽不妨還美睡。

耒陽令會君寄耒譜農器譜二書求詩

歐陽公譜西都花。蔡公亦記北苑茶。農功最大置不錄。如棄六藝崇百家。會侯奮筆譜多稼。儋州讀罷深咨嗟。一篇秧馬傳海內。農器名數方萌芽。令君繼之筆何健。古今一一辨等差。我今八十歸抱耒。兩編入手喜莫涯。神農之學未可廢。坐使末俗慚浮華。

雨夜

羸軀對影愴餘齡。追念平時只自驚。夏木正濃桐葉墜。秋風未起草蟲鳴。蠹魚似是三生業。汗馬難希百世名。時王師方出塞。小雨迎涼何所作。北窗還對短燈檠。

柴門

寂莫柴門不徹扃。槐花細細糝空庭。晚梅摘得鹽供飰。濁酒沽來草塞瓶。病已廢耕拋耒。閑猶持釣愛簑簪。經旬莫恨無來客。交舊疎如欲旦星。

賽神

落日林間籥鼓聲。村村倒社祝西成。扶翁兒大兩髦髻。溉水渠成千耦耕。家受一廬修本業。鄉推三老主齊盟。日間淮潁歸王化。要使新民識太平。

菖蒲

古礪生菖蒲。根瘦節蹙密。仙人教我服。刀匕濁百疾。陽狂華陰市。顏朱髮如漆。歲久功當成。壽與天地畢。

又

菖蒲古上藥，結根已千年。聞之安期生，采服可以仙。斯人非世人，兩耳長垂肩。松下語未終，竦身上青天。

迂拙

迂拙宜歸早，乘除得死遲。老稀朝市夢，窮足道途詩。諱世無它技，忘懷自一奇。故溪幽絕處，惟許白鷗知。

夏夜

六尺筇枝膝上橫，中庭岸幘聽蠶更。露零金掌漢宮曉，月度銀河秦塞明。齒蒼晚花香未減，梧桐病葉墮無聲。關河又見新秋近，風指流年一歎驚。

夏末野興

半世天涯倦遠遊，還鄉不減旅人愁。數聲相應鳩呼雨，一片初飛葉報秋。山塢風煙僧院路，河梁燈火酒家樓。絕知雪鬢宜蓑笠，分付貂蟬與黑頭。

又

漠漠川雲闔復開，天公試手挽秋回。參差小市林邊出，縹緲疎鐘雨外來。土墺飯香供晚餉，布帘字大賣新醅。歸舟自逐輕鷗去，不用城笳抵死催。

示子孫

茆屋惟須補漏穿，家人衣食亦隨緣。豈容一事相關白，已過傳家十二年。

夜雨

藩籬處處蔓牽牛，薏苡叢深稗穗抽。只道物生常茂遂，一宵風雨又成秋。

劇暑

六月暑方劇。喘汗不支持。逃之願無術。惟望樹影移。或謂當讀書。或勸把酒卮。或誇作字好。蕭然卻炎曦。或欲溪上釣。或思竹間碁。亦有出下策。買簟傾家貲。赤脚踰增冰。此計又絕癡。我獨謂不然。顛子少置思。方今詔書下。淮汴方出師。黃旗立轅門。羽檄晝夜馳。大將先擐甲。三軍隨指揮。行伍未盡食。大將不言飢。渴不先飲水。驟不先告疲。吾儕獨安居。茂林蔭茅茨。脫巾濯寒泉。臥起從其私。于此尙畏熱。鬼神其可欺。坐客皆謂然。索紙遂成詩。便覺窗几間。颯颯清風吹。

六月十夜風月佳甚起坐中庭有作

曼膚汗雨不勝揮。夜景冷然暫解圍。漱罷寒泉甘齒頰。夢回斜月入窗扉。荷翻小浦孤螢度。露溼危巢鶴歸。我亦馭風思遠適。岳陽樓上醉湘妃。

古井

道傍有古井。久廢無與汲。鄰里共浚之。寒泉稍來集。獨言欲漱濯。冀遠塵土襲。躊躇復棄去。綆短安能及。

菴中紀事用前輩韻

掃灑一卷躬瑣細。蓬戶朝昏手開閉。荒山斲藥須長鑿。小竈煎茶便短袂。空中咄咄安用書。身外悠悠固難計。山僧野叟到卽留。麥飯葵羹貴能繼。久貧奴婢多散去。豈有跣足并椎髻。負薪長歌過此生。直疑身在鴻荒世。

急雨

觸熱支離老病增。忽看東北片雲興。疾雷載雨輸膏澤。茂樹生風洗鬱蒸。采藥喜逢屐下客。說詩曾對剡中僧。坐令身在羲皇上。繞坐何煩更設冰。

舍東追涼

驕陽收火傘。清露貯冰壺。海湧四更月。風生千頃蒲。歌狂忘老境。意豁失窮途。所恨朋儕盡。無人爲攬鬚。

酒藥

愁憑酒破除。病藉藥枝梧。焦革死已久。宋清今亦無。幽情寄魚鳥。小艇雜菰蒲。海上秋風早。懸知肺渴蘇。

六月十七日大暑殆不可過然去伏盡秋初皆不過數日作此自遣

赫日炎威豈易摧。火雲壓屋正崔嵬。嗜眠但喜蘄州簟。長酒不禁河朔盃。人望息肩亭午過。天方悔禍素秋來。細思殘暑能多少。夜夜常占斗柄回。

急雨遽涼

急雨消殘暑。曠然天地秋。露螢矜熠熠。風葉送飈飈。涼簟惟添睡。明河不洗愁。流年又如此。隨處住登樓。

縱遊深山隨所遇記之

行穿犖确度谿谿。路跨清溪一木斜。歷盡艱危到平地。壞垣欹屋兩三家。

又

山徑欹危細棧通。孤村小店夕陽紅。竹郎有廟臨江際。木客無家住箬中。

又

道逢山客束荆薪。口眼雖肝賂似人。試問村名誰不語。割然長嘯上嶙峋。

又

古寺蕭蕭不見僧。飛甍滿屋老梟鳴。空房終夜無燈火。斷木支門睡到明。

感中原舊事戲作

蜂兒園裏香塵細。燕子樓中寶瑟斜。惟有天知太平事。乞傾東海洗胡沙。

小涼

羸軀一夏困沉緜。不在林間卽水邊。高臥已忘浮世事。小涼漸近早秋天。枯槁軋軋鳴幽圃。舴艋遙遙入暮煙。餘日無多那諱得。逢人自笑說明年。

村居

人笑無才自笑狂。權籬竹塢得深藏。自從病後辜風月。未免愁中讀老莊。行圃數畦秋菜長。泛溪十里晚荷香。叢書坐嬾無由續。且補忠州手錄方。

城東

出郭溶溶細縠波。平生此地幾經過。祭餘野廟啼烏樂。酒賤村墟醉叟多。亭午疎鐘離石佛。斂疎微雨泊曹娥。采蓮艇子愁衣溼。不爲人家惜綠荷。

初秋露坐作短歌

房星縱。心星橫。斗牛闌干河漢明。青天露坐性所樂。不覺庭樹秋風生。秋風搖落君勿悲。明年花開還滿

枝。人生衰謝則已矣。寧復鬢髮童顏時。

池上

旋移吟榻並池橫。欲出柴門復懶行。樹罅忽明知月上。竹梢微動覺風生。貧無醉日惟堅忍。疾遇涼秋亦漸平。二尺燈檠元好在。便思相伴聽蛩聲。

秋稼漸登識喜

門外新場滑似油。早禾已慶十分收。虹霓不隔郊原雨。蠶蝨爭催巷陌秋。人樂風傳迎社鼓。路長水漲采蓮舟。老翁自笑無它事。欲隱牆東學僮牛。

野渡用前韻

十里平沙到渡頭。溪山合向畫圖收。老僧赴供袈裟古。醉叟行歌襍穉秋。斷岸煙迷耕處草。孤村雨送釣時舟。龍泉不斷元無恨。莫放神光上斗牛。

秋後一日風雨

炎歎數日劇蕩滌。及秋初。病葉風吹盡。鳴蟬雨打疎。趁涼謀社酒。乘潤理園蔬。分喜寧無處。蒲中鱖鱖魚。

感事

會事高皇接雋遊。君恩天地若爲酬。濟時已負終身媿。謀己常從一笑休。在昔風塵馳廐置。卽今煙雨暗耕疇。孤愁欲豁寧無地。野店逢僧每小留。

久無客至戲作

瘦影支離雪鬢繁，頻年老病臥孤村。雍容那有客聯騎，剡啄尙無僧叩門。濁酒香浮新社瓮，晚瓜味敵故侯園。茅檐蓬戶風煙晚，小酌欣然對子孫。

乍涼

涼風蘇病骨，搖落起詩情。一病輒數日，幾詩終此生。招呼丹竈客，結束玉霄行。預想溪橋路，三更待月明。

閑趣

絕迹市朝外，結廬雲水間。心平詩淡泊，身退夢安閑。有酒旋尋伴，無門那說關。桐江故不遠，日暮趁潮還。

溪上

溪上秋來風露清，蕭然浴罷葛衣輕。看雲舒卷了窮達，見月虧盈知死生。老去關心惟藥裹，閑中消日付棋枰。故人書札頻相問，何日芒屨上赤城。

秋詞

東吳七月暑未艾，川雲忽與天晝晦。蔽空雨點弩發機，平地成渠屋穿背。早禾玉粒自天瀉，村北村南喧地確。大牲如阜酒如江，相喚龍祠作秋賽。

又

八月暑退涼風生，家家場中打稻聲。穗多粒飽三倍熟，車軸壓折人肩頰。常年縣符鬧如雨，道上卽今無吏行。鄉閭老稚迭歌舞，鼃釜日饜豬羊烹。

又

暮收功成將整駕。萬頃黃雲收晚稼。公私逋負一洗空。懷抱喜看兒姪姪。從來婚聘不出鄉。長自東家適西舍。年豐人樂我作詩。朝耕夜織誰能畫。

秋思

詩人本自易悲傷。何況身更憂患場。烏鷄成橋秋又到。梧桐滴雨夜初涼。江南江北堠雙雙。燈暗燈明更短長。安得平生會心侶。一尊相屬送年光。

老學菴北窗雜書

本慕修真謝俗塵。中年蹭蹬作詩人。卽今恨養金丹晚。且向江湖把釣緇。

又

偶任人間遂許時。殘骸自笑尙支持。直須消破黃齏盡。始是浮生結局時。

又

茅齋遙夜養心君。靜處工夫自策勛。正喜殘香伴幽獨。鴉鳴窗白又紛紛。

又

小龍圍與長鷹爪。桑李玉川俱未知。自置風爐北窗下。勒回睡思賦新詩。

又

定交魚鳥欲忘形。獨岸綸巾坐草亭。不恨囊中無赤仄。且欣案上有黃庭。

又

松棚接屋得陰多。石徑生苔奈滑何。盡道疎籬宜細雨。晴時最好晒漁蓑。

又

龜常曳尾豈非樂。鶴已鍛翎徒自傷。造物今知不負汝。北窗夜雨默焚香。

親舊見過多見賀強健戲作此篇

偶向人間脫駭機。玉池中夜自生肥。據鞍馬援雖堪笑。強飯廉頗亦未非。道貌安能希粹盎。世緣但可付猗違。它年不死君須記。會在天津看落暉。元微之贈老人詩云天津橋上無人識獨倚闌干看落暉。

小病兩日而愈

病骨羸然山澤臞。故應行路笑形模。記書身大以耶子。忍事裏生如狐壺。美酒得錢猶可致。高人折簡孰能呼。不如淨掃茅齋地。臥看微香起瓦爐。

秋興

脩蔓叢篁步步迷。山村東下近魚陂。釣歸恰值秋風起。棋罷常驚日景移。病葉辭枝應有恨。候蟲吟壁故知時。殘年我亦悲搖落。薄暮空囊又有詩。

又

八十仍當過二時。加餐安寢豈前知。晨梳脫髮雖無數。社瓮新醅已有期。偶爲買花經廢圃。時因蹋藕下清池。尙餘一事終關念。安得兒孫少別離。

日用

舊好疎毛穎，新知得麴生。幽居無一事，枕臂聽松聲。

又

春穀灌園蔬，日長閑有餘。何妨忍揮汗，合藥施鄉閭。

又

貧知藜糝美，渴愛粟漿酸。食少從奴去，人稀苦屋寬。

又

空舍封書篋，多年飽蠹魚。還家貧不死，讀盡舊藏書。

卷第六十八

七月十一日見落葉

葉影非一日，盛夏則已然。一葉復一葉，及此搖落天。晨起坐堂上，散若飛鳥翩。昔時可藏鴉，今欲不庇蟬。顧視庭中草，亦復非阡眠。百穀秋皆成，是謂造化權。豈爲草木計，而欲求兩全。物理貴見微，勇退差爲賢。龜堂一隅，開窗設榻，爲小憩之地。

枿欄簷，葡萄障，斜陽旋置臨階。八尺牀，小展窗扉，無大費。略加苔蓋，有餘涼。老來愈覺歲時速，夢裏不知途路長。試問神遊，向何處。月明揮榜上瀟湘。

南門晚眺

笑奴前負一胡牀。門巷楸梧已漸黃。不歷塵埃三伏熱。孰知風露九秋涼。蕭蕭浦溆漁歌晚。漠漠陂塘稻穗香。勿恨行雲吞素月。夢回正愛雨淋漓。

進德

進德工夫在日新。正如更歷自知津。迷時誤認毒爲藥。定後始知天勝人。四壁不妨身落魄。萬夫誰敵膽輪囷。遺經在匱君毋厭。燈火青熒漸可親。

次韻邢德允見贈

人間榮瘁固難窮。歲月推遷卽老翁。馬駿初非凡眼識。源深終與大川通。細思渭北希高價。終勝淮南竄發蒙。莫學三山頑鈍叟。一生空耗太倉紅。

秋懷

居在三家聚門纔。一木橫。用寬緣歲樂。斂薄爲時平。疎樹葉遲落。遠村燈更明。題詩雖草草。亦足寫幽情。

又

村晚歸牛下。林昏宿鳥喧。微升天際月。半掩水邊門。衣杵悲邊信。漁歌斷客魂。老人交舊盡。此意與誰論。

又

客思殘荷外。農功晚稻前。祭多巫得職。稅足吏無權。浦溆家家釣。村墟點點煙。歸舟葛衣薄。始覺是秋天。

又

典琴沽市釀。賣劍買吳牛。雞黍隨時具。江山到處留。隨僧日一浴。笑吏月三休。安得沅湘客。相從賦遠遊。

又
心常凝不動。形要小勞之。活火閑煎茗。殘枰靜拾棋。隴書朝日出。丸藥晝陰移。意適還休去。悠然到睡時。

又
曩得治中俸。湖山偶卜居。身嘗著禾譜。兒解讀農書。遇事絕欣厭。接人均戚疎。乾坤雖浩浩。等於一蘧廬。

又
秋暑雖猶在。晨興氣已清。蠻童掃荒徑。獠婢滌空鐙。病樹有凋葉。殘蟬無壯聲。書生守故態。已復理燈檠。

又
種樹清陰滿。鈔書蠹字穿。老身猶在世。屈指不知年。棄紙儲詩稿。長筒聚藥錢。一生如一日。正可付之天。

又
望遠目猶明。登高腳更輕。每思遊赤壁。時夢上青城。燈下書如蟻。花前飲似鯨。古仙曾歷考。強半出儒生。

又
昨者風雨過。浩然天地秋。年光雙雪鬢。生計一漁舟。賣藥來查浦。聽猿到沃洲。平生畏暑毒。八月記初遊。

出遊

來往人間不計年。一枝筇竹雪垂肩。掃除身外閑名利。師友書中古聖賢。支遁山前饒石水。葛洪井畔慘風煙。小癡大黠君無笑。買斷秋光不用錢。

又

行路迢迢入谷斜。繫驢來憩野人家。山童負擔賣紅果。村女緣籬采碧花。篝火就炊朝飯飯。汲泉自煮午甌茶。閑遊本自無程數。邂逅何妨一笑誇。

東窗獨坐書懷

秋豪外物不關心。竹塢梅村惜未深。蓬戶夜涼燈煜煜。盆山雨潤木蕭森。潔齋入靜三熏沐。宴坐降魔七縱擒。但恨圖書闕調護。不勝鼠齧與蟲侵。

書歎

齊民困衣食。如疲馬思秣。我欲達其情。疎遠畏強聒。有司或苛取。兼并亦豪奪。正如橫江網。一舉孰能脫。政本在養民。此論豈迂闊。我今雖退休。嘗綴廷議末。明恩殊未報。敢自同衣褐。吾君不可負。願治甚飢渴。

荷鋤

五畝畦蔬地。秋來日荷鋤。何曾笑爾輩。但覺愛吾廬。膽怯沽官釀。曠昏讀監書。區區尙多事。未解雜樵漁。

病臥

老境偏饒臥。秋天不肯晴。愁憑書解散。病仗藥支撐。果熟烏鳥樂。村深雞犬聲。邊頭定何似。頗說募新兵。

秋夜獨坐聞里中鼓吹聲

收盡浮雲見素娥。青天脈脈映明河。時平里巷吹彈鬧。歲熟人家嫁娶多。高會不知清夜永。散歸想見醉顏酡。小窗燈火晶熒處。也有人廣七月歌。

老歎

老翁終日飽遠嬉。常拾兒童竹馬騎。食爲齒搖艱咀嚼。冠因髮少易傾欹。烏鳥歌罷人誰問。咄咄書成自不知。堪笑殘生似蒲柳。秋風未到已先衰。

草堂

南出湖塘有廢堤。草堂只在鶴巢西。清風滿榻眠初起。落葉平溝路欲迷。新酒已知迎社熟。秋鶯猶作傍簷啼。鄰翁相遇饒言笑。共喜年豐米價低。

齋中讀書罷有感

少時學問苦匆匆。絃誦光陰轉手空。聖域淵源雖自力。故交零落與誰同。荒村莫恨身垂老。後世元知論自公。但掩齋扉憑曲几。忘憂正在寂寥中。

雨欲作步至浦口

雨作千山暗。風來萬木號。放懷忘世事。徐步出亭臯。野處惟知遯。心期不復豪。宋清捐善藥。須賈遺綈袍。寧乞陶翁食。難舖楚客糟。精心窮易老。餘力及莊騷。杖屨時行樂。鋤耰慣作勞。正令朝夕死。猶足遂吾高。

鏡湖有鳥名水鳧鳴於春夏間若曰打麥作飯偶有所感而作

人生天地中。賦子各有限。所享過所賦。鮮不貽後患。玉食害而家。此語禹所難。麥飯勿謂薄。耕時泥及胼。土墮竹爲挾。鹽酪調藜覓。吾媿人豈知。尙以陋見訕。恨亦見事遲。失腳墮名宦。千載梁伯鸞。巍然言無間。

自述

早畏危機避巧丸。長安未到意先闌。心如老馬雖知路。身似鳴蛙不屬官。閑駕柴車無遠近。旋沽村酒半

甜酸。羣兒何足勞情怒。胸次從初抵海寬。

秋興

晨興秋色已淒淒。呼喔猶聞隔浦雞。說與應門謝來客。要乘微雨理蔬畦。

又

村酒甜酸市酒渾。猶勝終日對空樽。茅齋不奈秋蕭瑟。颺雨來敲野店門。

又

困儲亦米枝梧飯。篋有青氈擬擬寒。政使堆金無處用。不須常貯一錢看。

又

病起殘骸不自支。旋烹藜粥解飢羸。一編蠹簡青燈下。恰似吳僧夜講時。

又

莫笑門庭草棘荒。也能隨事答年光。半瓶野店沽醇碧。一畚鄰園餉矮黃。

又

白頭韭美醃蠶熟。頰尾魚鮮斫鱸成。卻對盤殮三太息。老年一飽費經營。

又

淹速從來但信緣。襟懷無日不超然。喚船渡口因閑立。待飯僧牀得暫眠。

又

惡藥吹盡豈其非。亡羊補牢理所宜。白頭始訪金丹術。莫笑龜堂見事遲。

又

赫赫能令京兆死。沾沾正坐魏其愚。何如陸子山行樂。臚膊常懸酒一壺。

又

放翁老矣欲何之。采藥名山更不疑。但入剡中行百里。姓名顏狀有誰知。

又

樵客高僧兩斷蓬。偶同煙榜泛秋風。栖賢雪夜匆匆別。豈意相逢在剡中。

又

鼙鼓華鯨響寺廊。殘蕪落葉弄秋光。塞驢繫著門前柳。閑覓題名拂敗牆。

秋夕書事

秋夕初多露。漁家半掩扉。鵲飛山月出。犬吠市船歸。影瘦悲形瘁。冠偏感髮稀。眼中無宿土。老我欲疇依。

又

寂寂青楓岸。蕭蕭白版扉。端居常懶動。偶出卻忘歸。時秦徵科簡。師還驛置稀。江村日無事。煙火自相依。

薄粥

薄粥枝梧未死身。飢腸且免轉車輪。從來不解周家意。養老常須祝饒人。

拄杖

吾嘗評拄杖妙處在輕堅。何日提攜汝。同登入峽船。

小築

小築清溪尾。蕭森萬竹蟠。蒼廬雖偈仄。庭戶亦平寬。摘果觀猿哺。開籠放鶴盤。澹然還過日。無處著悲歡。

又

小築隨高下。園池皆自然。鋤山得靈藥。斲坎遇寒泉。幽檻花房斂。深林果蒂駢。鄰翁亦好事。相伴送流年。

一編

一編垂首北窗前。皎皎寧當逐物遷。道有廢興何與我。心無婉怍始知天。昔嘗西戍八千里。今復東歸三十年。死去雖無勳業事。九原猶可見先賢。

埭北

煙村湖埭北。魚市廟墻東。急雨時時作。輕舟浦浦通。新鴛聚津口。簫鼓隔林中。烏桕禁愁得。來朝數葉紅。

風雨

殘暑時嘗盡。清風勢自回。重雲輻日月。大雨挾風雷。老樹不自保。毀巢吁可哀。卻愁新雁到。暮境更禁催。

解嘲

心如頑石忘榮辱。身似孤雲任去留。酒瓮飯囊君勿謂。也勝滿腹貯閑愁。

識喜

本自怕沾京洛塵。固應不吐相君茵。偶逃鼯作鯨吞地。幸保詩狂酒病身。傲世曾歌楚人鳳。著書久絕魯

郊麟山村且試筇枝興。風月秋來正一新。

寓興

窮巷無來客。秋風獨浩歌。壯年閑處老。佳日病中過。甚欲攜長鑷。仍思擁短蓑。逢山皆可隱。不必上三峨。

老馬行

老馬虺隤依晚照。自計豈堪三品料。玉鞭金絡付夢想。瘦稗枯其空咀噉。中原蝗旱胡運衰。王師北伐方傳詔。一聞戰鼓意氣生。猶能爲國平燕趙。

農家

吳農耕澤澤。吳牛耳溼溼。農功何崇崇。農事常汲汲。冬休築陂防。丁壯皆雲集。春耕人在野。農具已山立。房櫓鳴機杼。煙雨暗蓑笠。尺薪仰有取。斷屨俛有拾。洪水昔滔天。得禹民乃粒。食不知所從。汝悔將何及。孩提同一初。勤惰在所習。周公有遺訓。請視七月什。

對酒作

齒落不廢嚼。足跛尚能履。書生之所遭。僥倖有如此。自知窮事業。元不直杯水。徒行若車安。蔬食如肉美。或時得斗酒。亦復招鄰里。不肯歌烏鳥。行矣呼起起。

秋分後頓凄冷有感

今年秋氣早。木落不待黃。蟋蟀當在宇。遽已近我牀。況我老當逝。且復小彷徨。豈無一樽酒。亦有書在傍。飲酒讀古書。慨然想黃唐。耄矣狂未除。誰能藥膏肓。

卽事示子邁

四十已悲非少年。耄期何事每歡然。遊山夜雨眠僧院。沽酒秋風上釣船。諸友詩章來疊疊。小兒筆勢亦翩翩。眼邊不是常蕭索。終憶巢居訪老仙。青城上官道人。結巢古松杪。數十年。

醉中絕句

有山有水登臨地。無病無愁獻傲身。世念秋毫除未盡。麴生應恨白頭新。

又

左殮右粥年年飽。南陌東阡處處閑。幸免催租敗幽興。豈容對酒惜酡顏。

種麥

墾地播宿麥。飯牛臨野池。未能貪佛日。正恐失農時。屹屹鋤耰力。勤勤祝史辭。嘉平得三白。吾飽豈無期。

秋晚

梧桐落井牀。蟋蟀在書堂。徂歲聿云暮。攬衣慨以慷。一生常蹭蹬。萬事略更嘗。賴有銘心語。南華論坐忘。

又

身世呻吟裏。園廬寂寞中。家貧憂酒券。才盡畏詩筒。陂水瀦猶滿。山苗穫欲空。兒孫更力作。勿媿禹遺風。

秋穫後卽事

多稼如雲接百城。村村鼓樂賽西成。頓寬公賦私逋責。一洗兒啼婦歎聲。社酒粥醲供晚酌。秋菘玉潔茗晨烹。放翁醉飽摩便腹。自炙毫氈試雪坑。

又

秋穫春耕力尙餘。雨中撥糗種寒蔬。築居正可茨生草。出市何妨借蹇驢。老境朝晡數匙飯。腐儒生死一編書。敲門忽有峻山使。慚愧交情未作疎。是日得張季長書。

行飯至湖上

行飯消搖日有常。青鞋又到古祠傍。殘蕪滿路無多綠。落葉投空不待黃。只道詩書能發冢。豈知博籒亦亡羊。此身只合都無事。時向湖橋看戲場。

晨出

味爽睡醒足。起扶藜杖行。關山開曉色。草木度秋聲。市晚船初發。奴勤地已耕。道邊多野菜。小摘助晨烹。

老境

一生幸免踐危機。老境還山飽蕨薇。智士固知窮有命。達人元謂死爲歸。臨窗蜀紙謄詩草。出戶郿條繫褐衣。堪笑街頭小兒女。問予君是伯休非。

憶昔

憶昔梁州夜枕戈。東歸如此壯心何。蹉跎已失邯鄲步。悲壯空傳勅勒歌。今日扁舟釣煙水。當時重鎧渡冰河。自憐一覺寒窗夢。尙想浯溪石可磨。

自嘲

清心不醉猩猩酒。省事那營燕燕巢。惟有著書殊未厭。暮年鐵硯亦成凹。

解嘲

我生學語卽耽書。萬卷縱橫眼欲枯。莫道終身作魚蠹。爾來書外有工夫。

新寒

小雨戒新寒。衡茆已怯寬。飯香炊紫角。門靜挂黃團。扶杖穿茶塢。移舟傍釣灘。欲知秋有信。霜髮不勝繁。

夜歸

野店晡炊飯。溪橋夜據鞍。天回河絡角。海闊斗闌干。牧舍牛生犢。蔬園犬逐獾。今年時序早。九月已清寒。

夢中作

萬里行求藥。三生誓棄官。鶴巢投暮宿。松夢續朝餐。進火金丹熟。凌風玉宇寒。人間日月速。歲歷又將殘。

自勵

中年已懼小人歸。況是駸駸耄及時。氣憤欲歸思友助。學衰不進賴兒規。無功追媿清時祿。有命何憂晚節飢。羸病今年能未死。潛心更下董生帷。

九月一日未明起坐

病骨清羸八十餘。空齋淒冷五更初。忽聞雲表新來雁。起讀燈前未竟書。坐久屢傳雞喔喔。夢殘猶化蝶。遶窠。農功漸畢身無事。約束家童種晚蔬。

小疾偶書

書生本願致時康。自怪秋來疾在牀。胸次豈無醫國策。囊中幸有活人方。但知元氣爲根本。正使長生亦

糝糠豎子何勞一除掃。區區猶欲恃膏肓。

初寒晨起

推枕悠然起。寒燈誰與同。曉窗俄已白。宿火尙能紅。老境呻吟外。年華寂寞中。長飢亦何恨。聊復固吾窮。

霜降前四日頗寒

草木初黃落。風雲屢闔開。兒童鋤麥罷。鄰里賽神回。鷹擊喜霜近。鶴鳴知雨來。盛衰君勿歎。已有復然灰。

題驛壁

輪囷古柳驛門前。糴米歸遲突未煙。隨計入都今四紀。驢寒僕瘦只依然。

閑遊

大冠長劍已焉哉。短褐禿巾歸去來。五世業儒書有種。一生任運仕無媒。麥經小雨家家下。菊著新霜處處開。自笑閑遊心未歇。青鞋蹋碎白雲堆。

貧舍寫興

深山木食猶堪飽。上古巢居亦自安。麥飯草廬吾已過。故應高臥有餘歡。

又

粲粲新霜縞瓦溝。離離寒菜入盤羞。賢童擁篲掃枯葉。曠婢挑燈縫破裘。賢曠皆紀實。

秋晚雨中作

新雁南來歲又殘。蕭蕭風雨暗江干。客疎似悉爾來病。酒薄不禁如許寒。草絡籬頭花尙碧。樹當浦口葉

初丹醉來且擁黃紬睡。莫問何時后土乾。

待旦

晨光殘淡月。急點殺寒更。歷歷記孤夢。悠悠帶宿醒。攬衣推枕起。亂髮遶牀行。歎息人間事。還隨初日生。

夜意

浮雲掃盡天如水。十里疎鐘到野堂。窗紙月明人不睡。屋茅霜冷夜初長。歸休固已師沮溺。承學猶能陋漢唐。安得子孫常念此。不妨世世業耕桑。

湖村

四十來居湖上村。翩翩七見改初元。風梢解籜竹過母。露葉成陰桐有孫。渴鹿出林窺藥井。馴鷗掠水傍棋軒。老人不用誇頑健。時看孫曾浴盥盆。

連夕熟睡戲書

投幘塵機息。捐書困味長。早眠猶有日。晚起已無霜。蝶入三更枕。龜摺八尺牀。昏昏君莫笑。差勝醉爲鄉。

小軒

礎杵聲中去日逾。小軒風露一簾秋。人間走徧心如石。分付寒蟄替說愁。

曉寒

悠悠殘夢伴殘更。萬木風號曉氣清。雞唱欲闌聞井汲。月痕漸淺覺窗明。突煙騰碧炊初動。衣焙堆紅火已生。小閣翻書裘褐暖。早朝霜滑媿公卿。

次韻朝陵葉院察時見寄

憶昨翩然別衆仙，秋風吹鬢感凋年。虛齋無復客滿座，敗橐空餘詩百篇。高誼未忘林下約，清吟重結社中緣。不教落在塵埃地，萬頃煙波一釣船。

書意

巢山遠下溼，止酒謝中乾。蠱得養生妙，孰能非意干。挂冠身始貴，屏藥疾方安。自笑猶多事，時時把釣竿。

九月下旬卽事

霜晚知鬢熟，山寒喜酒釀。黃絲聽夜織，赤米看晨舂。儲藥扶持老，收薪準備冬。兒扶還客拜，顧影歎龍鍾。

城南

城南亭榭鎖閑坊，孤鶴歸飛只自傷。塵漬苔侵數行墨，爾來誰爲拂頽牆。

舟中記夢

石帆山下一漁翁，風雨蕭蕭臥短篷。幽夢覺時還自笑，閩州城北看蠶叢。

送周郎

我居山陰古大澤，四顧茫茫煙水白。平時轍跡所不到，玉樹郎君肯來客。衡門僅可俛首過，陋室真成容膝迤。木盤設食菜數箸，共飽知君不予責。期年相從無夜旦，一日復有千里隔。送君津頭淚如綆，老身恨不生羽翮。江湖道險非一二，曷處就良真良策。從今日望平安書，我欲燈前手親拆。

村舍得近報有感

莫謂山村僻。時聞詔令傳。寬民除宿負。募士戍新邊。霜重瓦欲裂。月明人少眠。殘年抱遺恨。終媿祖生鞭。

貧歎

老叟年年病。書生世世貧。盜寧窺破囊。雀亦棄空囷。屋壞須撐拄。衣穿厭補紉。今朝風日美。且復過比鄰。

明日復作一首自解

霜寒衣絮薄。日暮爨煙微。冀北馬空老。遼東鶴幸歸。飄零舊交少。衰疾壯心違。每顧兒童笑。吾貧未解圍。

子虞調官行在寓餓圍巷初冬遼寒甚作兩絕句寄之

歲晚江湖行路難。一樽何日共開顏。汝方僵臥餓圍巷。我亦飢吟飯顆山。

又

知汝彈冠意易闌。苦貧未免覓微官。餓圍巷口殘燈火。愁絕霜風十月寒。

卷第六十九

初冬步至東村

八月風吹粳稻香。九月蕎熟天始霜。男耕女饁常滿野。宿麥覆塊皆蒼蒼。豐年比屋喜迎客。花底何曾酒杯遑。家人但覓浩歌聲。不在東阡在南陌。

南門散策

結宇溪一曲。兩山左右之。橫木以爲門。斷竹作短籬。本無剝啄客。門牡固不施。蹊路壞莫補。石罅生棘茨。

野蔓不知名。丹實何纍纍。村童摘不訶。吾亦愛吾兒。

又

槐楸陰最茂。秋晚惟空枝。今日晴無風。散步適其宜。右扶青溪杖。左挾斜川詩。石琢四腰鼓。可以休我疲。清言出正始。不雜世論卑。野僧何處來。成此一段奇。

思北鄰韓三翁西鄰因菴主南鄰章老秀才

韓翁生不識官府。半醉長歌老煙浦。因師老乃學長齋。白飯青蔬自炊煮。二君要是可喜人。未嘗一語欺其鄰。有過無過姑置之。後生孰能如此真。

又

鄉閭耆宿非復前。老章病死今三年。朝來出門爲太息。不見此翁催社錢。我比翁雖差識字。向來推擇嘗爲吏。事功自計無一毫。尙不如翁終日醉。

二毀

茶杯得之久。石硯日在前。一朝忽墜地。質毀不復全。附著以膠漆。入用更可憐。杯猶奉飲歡。硯不廢磨研。向使遂破碎。亦當歸之天。動心則不可。此物何足惜。

大風不能出戶

昨日欲出病見留。今日可出風復作。室虛窗白爐火暖。閉戶幸有圖書樂。一杯淡粥飽則已。下箸豈復思藜藿。山禽念我太寂寥。故作叩門聲剝啄。

晚菊

蒲柳如懦夫。望秋已凋黃。菊花如志士。過時有餘香。眷言東籬下。數株弄秋光。粲粲滋夕露。英英傲晨霜。高人寄幽情。采以泛酒觴。投分真耐久。歲晚歸枕囊。

舍南雜興

浙浙暮風生。暉暉殘月明。開門喜閑望。扶杖得徐行。霜薄樹多綠。泉流溝有聲。兒童殊可念。晝地作棋枰。

又

莎徑依山曲。柴扉並水開。不因行藥出。卽爲覓詩來。戒婢挑蔬甲。催兒斲芋魁。隨宜也能飽。漂母未須哀。

又

麻菽連枝熟。柴荆盡日關。臨池鷺鷥起。倚柱待雲還。倦憩石腰鼓。行攜銅博山。老人無定意。所到卽開顏。
石工琢石作杖鼓。槩以坐。

自詒

足蹇須人慣。顏衰著蠶多。飯遲惟靜臥。酒至亦高歌。蝗死繁蔬甲。霜清長樂窠。經旬鄰父病。且喜復來過。

又

莫笑幽棲僻。謀生亦未疎。殘困具薄粥。半俸補殘書。均節貧無患。安恬疾可除。雖云苦寒近。隨手蓄薪樗。

風霜

天上風霜慘。人間日月遄。江湖南北雁。原野雨晴鳩。莽蒼新阡陌。凋零舊壟流。惟應赤藤杖。伴我送悠悠。

十月

紅樹平沙十月天。放翁今作水中仙。琴琴林外迎神鼓。隻隻溪頭下釣船。世事極知吾有命。俗人終與汝無緣。菊花枯盡香猶在。又付東籬一醉眠。

記夢

久任人間豈自期。斷砧殘角助淒悲。征行忽入夜來夢。意氣尙如年少時。絕塞但驚天似水。流年不記髮成絲。此身死去詩猶在。未必無人聽見知。

幽興

池水車初滿。荆籬補已成。身閑詩簡淡。心靜夢和平。雁後寒鴉至。楓先柏葉頽。居然足幽興。未歎歲嶢嶢。

夜聞雨聲

我似騎驢孟浩然。帽邊隨意領山川。忽聞風雨掠窗外。便覺江湖在眼前。路過郵亭知幾處。身如估客不論年。未妨臙擁寒衾臥。贏得孤吟入斷編。

訪山家

捨舟步上若耶溪。藁屨修藤路欲迷。僧院倚山馴栗鼠。野塘漲水下菱雞。草侵古路迢迢遠。雲傍行人故故低。薄暮但尋遺屐去。山家正在鶴巢西。

自法雲回過營墟故居

積籬數掩閉柴扉。白碓聲中煙火微。雪暗杜陵無雁下。雲迷遼海有人歸。耕疇且復償初願。官路那知脫

駭機更有冬來歡喜事，芋魁豆兩不勝肥。

旅舍

寺鐘吹動四山昏，繫纜來投江上村。木落不妨生意足，水歸猶有浪痕存。爐紅手暖書差健，鼎沸湯深酒易溫。勿爲無年憂寇竊，狺狺小犬護籬門。

書几試筆

鬢毛蕭颯齒牙疎，九十侵尋八十餘。屋小苦寒猶省火，窗明新霽倍添書。解梁已報偏師入，上谷方看大盜除。藥笈箸囊辛無恙，蓮峯吾亦葺吾廬。偶見報西師復關中郡縣，昔予常有卜居條華意，因及之。

道室偶書

置心常在結繩前，縱未登仙亦永年。秦不及期周過曆，灼然由我不由天。

觀渡江諸人詩

中朝文有漢唐風，南渡詩人尙數公。正使詞源有深淺，病懷羈思亦相同。

村居閑甚戲作

人厭塵囂欲學仙，上天官府更紛然。不如嘯傲東籬下，且作人間過數年。

又

題詩本是閑中趣，卻爲吟哦占卻閑。我欲從今焚筆硯，與來隨分看青山。

夜投山家

鷲溝上阪到山家。牧豎應門兩髻丫。葑火正紅煨芋熟。豈知新貴築堤沙。

又

夜行山步鼓鼙鼙。小市優場炬火紅。喚起少年巴蜀夢。岩渠山寺看蠶叢。

又

生草茨廬荆作扉。數家煙火自相依。大兒飼犢舍邊去。小兒捕魚溪口歸。

又

房櫳深深續火明。垣屋蕭蕭鷓鴣聲。作官覓飽最繆算。羨爾爲農過一生。

聞西師復華州

西師驛上破番書。鄠杜眞成可卜居。細肋臥沙非望及。且炊黍飯食河魚。

又

青銅三百飲旗亭。關路騎驢半醉醒。雙鷺斜飛敷水綠。孤雲橫度華山青。

舟中

振柂柯橋北。維舟草市西。月添霜氣峭。天帶斗杓低。浦凍無魚躍。林深有鷓棲。不嫌村酒惡。也復醉如泥。

得趙昌甫寄予及子通詩

去國雙蓬鬢。還山一鹿車。壯歎稽古淺。老悔養生疎。俗態慵開眼。高吟獨起予。青燈對余子。併爲問何如。

飯後登東山

飯已茶未成。褰裳步山徑。雖云筋力衰。持杖猶濟勝。天高樓塔麗。霜落溝港淨。豈惟野實丹。已覺林筍迸。井桐亦強項。葉脫枝愈勁。啼鳥久不去。將無助幽興。盤紆穿翠谷。欹仄下危磴。所嗟無客來。誰與持麈柄。

東村

今日風日和。衰病亦少平。出門無所之。攜幼東村行。吳地冬未冰。濺濺溝水聲。山卉與野蔓。結實丹漆并。雞犬亦蕭散。如有世外情。舉手叩柴扉。病叟喜出迎。從我語蟬聯。未寒疇昔盟。解囊付之藥。與爾偕長生。

石堰村

木落山不蔽。水縮洲自獻。寒日晚更明。村巷曲折見。小婦鳴機杼。童子陳筆硯。農家雖苦貧。終勝異鄉縣。君看宦遊子。豈無墳墓戀。生死在故鄉。切勿慕乘傳。

袖手

袖手地爐傍。身閑日自長。窗明蠹簡字。簾約篆盤香。道士傳琴譜。山僧送藥方。自然塵事遠。不用濯滄浪。

幽居遣懷

大患元因有此身。正須枵腹對空困。扶持接客事嗟老。質貸迎醫未厭貧。碓下罕遺雞啄粒。席間不掃鼠行塵。時時笑顧兒曹說。縱有煙膏莫問津。

又

斜陽孤影歎伶仃。橫案烏藤坐草亭。閑久更知貧有味。病多那責藥無靈。農書甚欲從師授。忍字常須作座銘。更喜友生能餉酒。欣然一醉倒長瓶。東陽郭希呂饋石洞酒。

又

習氣深知要掃除。時時褊忿獨何歟。呼童不應自生火。待飯未來還讀書。世態詎堪閑處看。俗人自與我曹疎。作詩未必能傳後。要是幽懷得小摭。

湖上晚歸

蓬山再別四經秋。來日翩翩去日遄。無酒可傾殊省事。有詩渾忘亦良籌。梅花遮路如撩客。櫛葉飄風已滿溝。湖上榜舟歸薄暮。斜陽紅入寺家樓。

宿村舍

臚瘦童僵小作程。村翁也復解逢迎。霜林已熟橙相餽。雪窖初開芋可羹。土榻圍爐豆藉暖。荻簾當戶布機鳴。解囊自取殘編讀。何處人間無短檠。

村飲

雪前雪後梅初動。街北街南酒易賒。身健不妨隨處醉。有家未必勝無家。

又

醉插江梅老更宜。猶能卜樹揀繁枝。假令住世十小劫。應愛此花無厭時。

食野味包子戲作

珍餉貧居少。寒雲萬里寬。疊雙初中鵠。牢九已登盤。放箸摩便腹。呼童破小團。猶勝瀼西老。菜把仰園官。

醉中作

名醞羔兒垢密封。香粳玉粒出新春。披綿珍饈經旬熟。斫雪雙螯洗手供。吟罷欲沉江渚月。夢回初動寺樓鐘。爐煙裊裊衣篝暖。未覺家風是老農。

感老

人生六十已爲衰。況我頽齡及耄期。對酒尙如年少日。愛書不減布衣時。意逢孫助辭家與。大藥方從出世師。但向青編觀彙事。英雄何代不兒嬉。

寺壁偶題

斷山支徑得行吟。度磭穿林不厭深。雉挾兩雌飛谷口。烏將數子下牆陰。前三喜接高人語。方寸寧容俗慮侵。少待新春好風日。不妨攜客更相尋。

贈道流

羽人邂逅飲旗亭。自說經年醉不醒。曾伴翰林遊赤壁。仍邀內史寫黃庭。古琴蛇蚺許無價。寶劍魚腸託有靈。太華何時尋此約。九霄風露宿青冥。

冬夕閑詠

柳眼梅鬢漏泄春。江南又見物華新。終年幽興遺身世。半夜孤吟愴鬼神。客有疎親俱握手。酒無賢聖總濡唇。放翁自命君無笑。家世從來是散人。

飯後自嘲

歲熟家彌困。天寒酒闕傾。僅能炊稻飯。敢望糝藜羹。一榻解腰臥。四廊摩腹行。詩人更疎瘦。此日媿膨脗。

感舊

憶昔初乘上峽船，雪灘雲岫過聯翩。忽忽不暇尋高隱，遺恨于今四十年。屈子峽有隱士。

又

雕鞍送客雙流驛，銀燭看花萬里橋。三十三年真一夢，茆簷寒雨夜蕭蕭。

村老留飲

乘興出遊眺，初不言所之。家人固難求，我亦不自知。投杖卻人扶，疾步莫能追。荒寒野廟墟，枯酒漚菅池。過門爭邀留，具食不容辭。濁醪小瓮釀，香飯別甌炊。瓦盆進豚肩，石臼擣花糝。新冬不易見，醉倒理亦宜。舉手謝主人，外強中實衰。一觴可以起，它日更爲期。

醉歌

草書大叫寫成圖，博塞隨聲喝作盧。何似卽今雲海上，千鈞強弩射天吳。

又

百騎河灘獵盛秋，至今血漬短貂裘。誰知老臥江湖上，猶枕當年虎鬪髀。

力耕

力耕歲有一困米，殘棒月無三萬錢。莫怪窮空心不動，正緣憊拙氣差全。學經疊疊懸車後，秉禮拳拳易簣前。猶恨未能忘筆硯，小兒收拾又戎編。予適編予詩續稿成四十八卷，卷有百篇。

春近

開禧忽見第三春。身寄楓林野水濱。吾道幸逢天道在。物華又與歲華新。郊原處處堪行樂。道路人人可問津。剩辦青鞵并布襪。若耶已報綠生鱗。

夜坐聞鼓聲

村居樂飲鼓琴琴。亭障無虞歲屢豐。誰道喧呼妨熟睡。老人自愛地爐紅。

小室

地偏焚香室。窗昏釀雪天。爛炊二命飯。側枕一肱眠。身似嬰兒日。家如太古年。狸奴不執鼠。同我愛青氈。

老景

老死知無日。天公偶見寬。疾行逾百步。健啖每三餐。身瘦短裁褐。髮稀低作冠。年來更小點。不據伏波鞍。

夜坐

地僻少行跡。屋低便老人。爐紅得清坐。酒綠慰孤斟。吠犬驚飄葉。栖禽換暗林。人間固多難。感慨不須深。

晨起

小疾獨除盡。閑愁壑闕空。時光雞唱裏。生計碓聲中。戒婢儲猿果。看奴織鶴籠。老人新得道。處處見神通。

貧述

寒生肌粟苦衣單。瘦減頭圍覺帽寬。荒寂在家猶逆旅。窮空養老亦蔬餐。柴青竈突騰煙細。膏盡燈缸照

字難。猶喜新醅三斗熟。半窗梅影助清歡。

自述

勃落爲衣隱薜蘿。掃空塵抱養天和。過期未死更強健。與世不諧猶嘯歌。野市蕭條殘葉滿。酒家零落廢
墟多。石帆山下孤舟雨。借問君如此老何。

十一月廿七日夜分披衣起坐。神光自兩臂出。若初日。室中皆明。作詩志之。

靈府無思踵息微。神光出背射窗扉。大冠長劍竟何有。尺宅寸園今始歸。憂患過前皆夢事。功名自古與
心違。三峯二室煙塵靜。要試霜天柵葉衣。

歲暮遣興

昔慕騷人賦遠遊。放懷蜀棧楚山秋。橘中尚可著四老。海外誰云無九州。薄酒時須燒舌本。閑愁莫遣上
眉頭。幅巾短褐吾差便。實厭衣冠裹沐猴。

又

病著愁侵併不支。孤村況遇歲殘時。水軒客散成舒嘯。山寺僧來得劇棋。銅鴨香生風嫋嫋。竹雞聲斷雨
絲絲。新詩煅煉功何似。問著衰翁自不知。

道室卽事

看盡吳山看蜀山。歸來不減舊朱顏。宣和遺老凋零盡。況說祥符景德間。

又

松根茯苓味絕珍。飯中枸杞香動人。勸君下筯不領略。終作邛山一窖塵。

又

徧遊海嶽卻歸秦。除卻南山萬事新。長劍高車何足道。金人十二已成塵。

又

黃金堆屋無處用。甲第連雲誰與居。莫笑先生無僕馬。風雷萬里跨鯨魚。

泛舟過金家埭贈賣薪王翁

水生浦溆多浮鴨。風急汀洲有斷鴻。渺渺江天無限景。一時分付與樵翁。

又

老人不復事農桑。點數雞豚亦未忘。洗脚上牀真一快。稚孫漸長解燒湯。

又

賣薪自可了鹽酪。治地何妨栽果蔬。我老鈍頑請平半俸。比渠只有不能如。

又

輒炊豆飯可支日。厚絮布襦聊過冬。閭巷家家歌聖澤。子孫世世業春農。

冬晴

歲暮常年雪正豪。今年暄暖減絺袍。春回山圃梅爭發。睡足茆簷日已高。倉庾家家儲舊穀。笙歌店店賣新醪。太平氣象方如許。寄語殘胡早遁逃。

寄隱士

乳竇寒猶滴。巖扉夜不扃。奇書窺鳥跡。靈藥得人形。浩浩天風積。冥冥海氣清。儻逢王內史。更爲乞黃庭。

幽事

老大常愁節物催。東皇又挽斗杓回。江天慘慘不成雪。山驛蕭蕭初見梅。隱士寄雲從地肺。遊僧問路上天台。戲書幽事無時闕。古錦詩囊暮暮開。

去新春纔旬餘霽色可愛

宦遊強半待僊祠。況是懸車耄及時。厚薄人情窮易見。陰晴天氣病先知。綠樽一醉真當勉。白髮千莖莫自疑。野渡山村梅柳動。身閑何處不熙熙。

作雪遇大風遂晴

雪作風散之。雪止風亦定。霽日上窗扉。明暖起我病。去春財十日。共喜時序正。晨興盥頰罷。白髮滿清鏡。門前無客至。默臥弄塵柄。叢竹如有情。代我發孤詠。

冬夜

我生何多艱。場地皆九折。君恩許歸休。幸與世俗絕。幽居鄰不覩。奚止掃車轍。地爐清夜中。危坐燈欲滅。開門月滿庭。皓皓如積雪。隔溪聞鶴鳴。靈府爲澄澈。

書意

飲酒以散愁。服藥以去病。區區賴外物。豈足語性命。清晨坐堂上。萬事一袖手。愁病初無根。孰謂藥與酒。掀髯笑嵇阮。舉袂謝和緩。氣住則神住。時至骨自換。

又

解牛悟養生。牧羊知治民。通一萬事畢。我每思古人。小園財三畝。手自藝嘉木。先當培其根。又戒無欲速。老松臥澗底。千歲隄冰霜。我豈樽檮哉。但取無伐傷。

又

唐堯授人時。妙用均造化。我讀七月詩。周室亦其亞。彼用治四海。我斂之一身。至理之所在。太山等微塵。鍊氣以成真。豈復有它術。譬如尊六經。百氏當盡黜。

山房

擾擾人間歲月移。山房幾度換茅茨。身遊與世相忘地。詩到令人不愛時。老鶴初來未丹頂。穉松親種已虬枝。東塗西抹非無意。斂面朱鉛太不宜。

卽事

老來百事似嬰兒。美睡甘餐只自知。陋屋略如營窟世。淳風不減結繩時。

又

鴻冥固自辭矰繳。樽散猶能謝斧斤。況是溪山幽絕地。有人高臥百重雲。

又

閑行靜坐樂誰知。紅飯青蔬美有餘。常笑癡人不更事。時時愁歎欲何須。

又

有人叩戶皆吾友。得屋施牀卽我家。緩步東西行飯耳。元非看竹探梅花。

又

了事如何省事奇，無心始覺有心癡。三更急雨紙窗破，正是擁爐危坐時。

又

高人鬻路放柳枝，豪士駿馬換蛾眉。人間解事誰如我，小蹇山童自謂宜。

戍兵有新婚之明日，遂行者予聞而悲之，爲作絕句。

送女忽忽不擇日，綵繞羊身花照席。暮婚晨別已可悲，猶勝空房未相識。俗有夫出未返而納婦，謂之空婦晨。

又

夜靜孤村聞笛聲，溪頭月落欲三更。不須吹徹陽關曲，中有征人萬里情。

夢中作

野鶴翩僂啄粒微，碧桃縹緲著花稀。海山又見春風到，丹竈苔封人未歸。

啜茶示兒輩

團坐團樂且勿諱，飯餘共舉此甌茶。麤知道義死無憾，已迫耄期生有涯。小園花光還滿眼，高城漏鼓不停過。閑人一笑真當勉，小榼何妨問酒家。

雨中示鄰里

寒風吹細雨，白晝見日罕。經旬廢讀書，天豈成我懶。比鄰各無聊，會面苦不款。未嘗燒茶鑪，而況把酒盃。

高談極奇趣，散去意亦滿。癡黠未易名，要是工用短。

記出遊所見

我行初無折簡招，出門十里未覺遙。憩裝蕭蕭北垞寺，策蹇渺渺西村橋。眉頭那可遣愁到，舌本正要著酒澆。寒風朝作入裘褐，荒祠暮過奠桂椒。平郊煙斂見聚落，細路日落逢漁樵。安得丹青王右轄，爲寫此段傳生綃。

立春前七日聞有預作春盤邀客者戲作

蓼芽蔬甲簇青紅，盤筋紛紛笑語中。一餅不分空恨望，暮年知有幾春風。

春前六日作

夜枕夢回春雨聲，曉窗日出春鳥鳴。典衣沽酒莫辭醉，自有梅花爲解醒。

卷第七十

立春後作

春不遺窮僻，天如念寂寥。鳥鳴知節換，池溜覺冰消。冷甃供新齋，輕裘換故貂。豐年無疾苦，鄰曲遞相招。

舟中

江天雲斷漏斜暉，靡迤羣山翠作圍。帆影似經吳赤壁，鼙聲如下蜀青衣。臥聞裂水長魚出，起看凌風健鶴飛。禹會橋邊最清絕，憶曾深夜叩漁扉。

小園春思

小軒愁入丁香結。幽徑春生荳蔻梢。若論此時吟思苦。縱磨鐵硯也成凹。

又

重臺諼草初離土。百葉緗梅已滿枝。莫道山家殺風景。也能醉倒向東籬。東籬予小園名。

禹祠

祠宇嵯峨接寶坊。扁舟又繫畫橋傍。鼓添滿筋蓴絲紫。蜜漬堆盤粉餌香。團扇賣時春漸晚。夾衣換後日初長。故人零落今何在。空弔頽垣墨數行。

今年開歲三日上元。三夕立春。人日皆大晴。

今歲晴和歷歲無。江城歌舞溢通衢。天心只向人心下。不用慇懃問紫姑。

題野人壁

身如魚鳥出池籠。常在陂湖葦莽中。簫鼓相聞村社密。桑麻無際歲時豐。市墟買酒何人識。僧閣煎茶欠客同。久欲瀟湘寄清嘯。它年一棹莫匆匆。

小市

春風小市畫橋橫。橋北橋南次第行。絕景惟詩號勍敵。閑愁賴酒作長城。樓臺到處靈和柳。簾幙誰家子晉笙。薄暮歸來漁火鬧。放翁自笑欲忘情。

柳

春來無處不春風。偏在湖橋柳色中。看得淺黃成嫩綠。始知造物有全功。

見事

流光莫恨去聯翩。見事還疑勝昔年。細改新詩須枕上。少留劇飲待花前。陰陰竹塢安茶甌。淺淺蘋汀著釣船。物外家風吾豈敢。散人名號亦充員。

夜雨

江邊依舊釣舟橫。萬事何曾有一成。空憶廬山風雨夜。自吹小竈煮蔓菁。

自詒

一塵東近會稽城。鑿破煙蕪侶侶耕。上藥養神非近效。善言銘座要躬行。論書尙欲心先正。學道寧容氣不平。天付吾儕元自足。滿園春齊又堪烹。

初春幽居

滿棖芳醪手自攜。陂湖南北埭東西。茂林處處見松鼠。幽圃時時聞竹雞。零落斷雲斜日霏。微過雨未成泥。老民不預人間事。但喜農疇漸可犁。

又

小築園林淺鑿池。身閑隨事得遊嬉。幽花折得露猶溼。嘉木移來根不知。小蝶弄晴飛不去。珍禽喜靜語多時。風光未忍輕拋擲。聊付詩囊與酒卮。

自勉

學詩當學陶。學書當學顏。正復不能到。趣鄉已可觀。養氣要使完。處身要使端。勿謂在屋漏。人見汝肺肝。節義實大閑。忠孝後代看。汝雖老將死。更勉未死間。

春遊

梅市移舟過古城。此行亦未闕逢迎。負薪野老無妻子。施藥山人隱姓名。風雨偏宜宿茅店。鹽醃不遣到藜羹。宜和版籍今誰在。似是天教樂太平。

畫坐

早春風雨暗江干。羔酒狐裘不敵寒。輸與蒲籠深袖手。一爐真火養金丹。

正月十六日送子虞至梅市歸舟示子適

策府還山白盡頭。一塵隨分喜菟裘。看燈雖幸新春健。無食猶懷卒歲憂。稚子與翁俱襁褓。大兒出塞習兜鍪。它時別作謀生計。賣藥惟當學伯休。

聞百舌

春鳥雖儂言。春盡能齧舌。秋蚓與寒蟬。亦各知時節。微物顧能此。人乃獨不然。君看甘陵黨。作孽非由天。畜一雞報曉。聲清圓而鳴。每晚戲書絕句。

雞鳴平旦未爲遲。恰是山房睡覺時。著屐起尋溪上路。野梅猶有未殘枝。

書村落間事

東巷南巷新月明。南村北村戲鼓聲。家家輸賦及時足。耕有讓畔桑無爭。一村婚媾皆鄰里。婦姑孝慈均。

母子兒從城中懷肉歸。婦滌鑿釜供刀匕。再拜進酒壽老人。慈顏一笑溫如春。太平無象今有象。窮虜何地生煙塵。

行歌

孤村小市負薪歌。造物其如此老何。靈藥已能驅疾豎。醇醪不用戰悲魔。

開歲頗思江湖遊適

健筆當年賦遠遊。卽今局促但堪羞。雖爲月下孤舟客。未醉天涯七澤秋。丹熟竟當金換骨。客來從笑雪蒙頭。龍泉本約同歸隱。肯爲春耕欲換牛。

憶昨

入蜀還吳迹已陳。蘭亭道上又逢春。諸君試取吾詩看。何異前身與後身。

又

當年落魄錦江邊。物外常多宿世緣。先主廟中逢市隱。丈人觀裏識巢僊。蓬道人賣藥成都市中。某僮謂

上官先生

又
萬里曾爲汗漫遊。豈知白首弄漁舟。會騎一鶴凌風去。何處人間無酒樓。

排悶

抱耒返東皋。初非憚作勞。飢寒凜未免。老病適相遭。開卷無如嬾。飛觥豈復豪。不辭窮到死。猶足竊名高。

識喜

齒搖徐自定。髮脫卻重生。意適簪花舞。身輕捨杖行。僧招決棋戰。客讓主詩盟。尙欲瀟湘去。煙帆不許程。

枕上作

謝事還家一老農。悠然高臥聽晨春。雖無客共樽中酒。何至僧鳴飯後鐘。采若未能浮楚澤。思鱸猶欲釣吳松。自餘萬事慵開眼。知結宗門案幾重。

近村

去去柴車十里中。竹林密處路纒通。漸聞水磴知村近。遙望禾田喜歲豐。漁艇往來春浪碧。人家高下夕陽紅。百錢又向旗亭醉。自笑吾生亦未窮。

讀史

人間著脚盡危機。睡覺方知夢境非。莫怪富春江上客。一生不厭釣漁磯。

又

柴悴紛紛醉夢中。轉頭何事不成空。全家采藥鹿門去。我憶襄陽龐德公。

羸臥

羸臥將如老景何。小園風月且婆娑。茶因春困論交密。酒爲家貧作態多。馬上元無聽雞句。原頭那有飯牛歌。自憐遠屏猶多事。賣藥歸來買釣蓑。

春感

老厭紛紛嬾入城。長亭小市近清明。隨頭下漏初芸草。陌上吹簫正賣餻。多病更知生是贅。九原那恨死無名。但餘一事猶關念。萬里唐安關寄聲。張季長久不遇書。或傳其臥病甚耿耿也。

八十三吟

石帆山下白頭人。八十三回見草春。自愛安閑忘寂寞。天將強健報清貧。枯桐已爨寧求識。弊帚當捐卻自珍。桑苧家風君勿笑。它年猶得作茶神。

小園花盛開

厭任愁城徙醉鄉。春風也肯到山房。鴨頭綠漲池平岸。猩血紅深杏出牆。淡薄相遭心已嬾。修行無力夢猶狂。更嗟著句多虛思。慙愧溪藤似截肪。

出遊歸臥得雜詩

江天缺月西南落。村路寒雞一再鳴。自笑此身羈旅慣。野橋孤店每關情。

又

江村何處小茅茨。紅杏青蒲雨過時。半幅生綃大年畫。一聯新句少游詩。

又

眼明未了觀山債。力在猶能涉水行。莫笑軒然誇老健。身存終勝得浮名。

又

壯歲經春在醉鄉。老來數酌不禁當。正須獨倚蒲團坐。領略明窗半篆香。

又

兒扶行飯出柴扉。偃僂方嗟氣力微。道側偶逢菘麥叟。倚鋤閑話兩忘歸。

又

久讀仙經學養形。未容便應少微星。一枝新鍛金雅髻。更向名山斲茯苓。

又

薺花如雪滿中庭。乍出芭蕉一寸青。老子掩關常謝客。短蓑鋤菜伴園丁。

又

晚交數子多才傑。誰肯頻來寂寞鄉。但寄好詩三四幅。絕勝共笑億千場。

感舊

自蜀還吳會。先憑劍換牛。掃除狂習氣。謝絕醉朋儔。去死時猶遠。餘生已覺浮。卽今真蘊矣。閉戶尙何求。

寄龔立道

龔子吳中第一流。老農何幸接英遊。難逢正似玉忤日。易散便成風馬牛。清夜話端思滾滾。暮年心事恐悠悠。何由喚得闔門權。一醉千巖萬壑秋。

寓歙

五福惟無富。嗟予得已多。禪房時託宿。酒市每酣歌。詩瘦慵看鏡。棋塵恐爛柯。殘年猶有幾。切莫負漁蓑。

春晚

客夢初回夜漏殘。東村想見杏花繁。未能便逐啼鶯起。自掩屏風護曉寒。

又

湖上春寒雁已歸。宿醒殘夢兩依依。也知晨起元無事。窗白爐紅且攪衣。

幽事

跌宕人間歲月遷。賞心幽事故依然。潮通支浦漁舟活。露溼繁花醉帽偏。才盡賦詩愁壓倒。氣衰對弈怯饒先。光陰風月空如昨。悵望蘭亭祓禊年。

又

塵抱年來盡掃空。柴門幽事與誰同。水生初漲一溪綠。花落已浮千點紅。愁賴囊泉存舊法。予家釀用岐下囊泉麴法。困憑願渚策新功。故人岷下無消息。尺素憑誰寄斷鴻。謂張季長。

讀李杜詩

濯錦滄浪客。青蓮澹蕩人。才名塞天地。身世老風塵。士固難推挽。人誰不賤貧。明窗數編在。長與物華新。

煙波卽事

短髮垂肩不裹巾。世人誰識此翁真。阻風江浦詩成束。賣藥山城醉過春。

又

煙波深處臥孤篷。宿酒醒時聞斷鴻。最是平生會心事。蘆花千頃月明中。

又

家浮野艇無常處。身是閑人不屬官。但有濁醪吾事足。浮名不作一錢看。

又

落雁沙邊艇子斜。分明清夢上三巴。眼明一點炊煙起。不是漁家卽酒家。

又

雕胡炊飯麥荷衣。水退浮萍尙半扉。莫爲風波羨平地。人間處處是危機。

又

夢筆橋邊聽午鐘。無窮煙水似吳松。前年送客曾來此。惟有山僧認得儂。

又

浪迹人間數十年。紹興間自剡中入天台。始有放浪山水之興。年年散髮醉江天。岳陽樓上留三日。聊與

瀟湘結後緣。

又

煙水蒼茫絕四鄰。幽棲無地著纖塵。蕭條雞犬楓林下。似是無懷太古民。

又

歸老何須乞鏡湖。秋來日日飽尊鱸。正令霖雨稱賢佐。未及煙波號釣徒。

又

父子團圓樂到死時。漁家可樂更何疑。高文大策人皆有。且聽煙波十絕詩。

茅舍

茅舍晨雞復暝鴉。暮年別自是生涯。貪眠久已遺人事。對酒猶能惜物華。出有兒孫持几杖。歸從鄰曲話桑麻。日長亦莫憎春困。小窻何妨自煮茶。

子適入城三宿而歸獨坐悽然示以此篇

吾兒早自立。所懼非飢寒。我歸自仙蓬。再疏請挂冠。明恩華其行。汝亟忝一官。得祿寧甚遠。懼違救水歡。我年且九十。亦覺去汝難。生死要相守。豈憚聯征鞍。但恐老益衰。千里愁關山。官期猶累歲。言之已辛酸。村醪瀉益盆。山果亦滿盤。春風吹桃李。一笑且團圓。

暮春新路至湖上示元敏

時雨作未成。蒸溽思出門。湖塘直東西。行人各歸村。翻翻烏投林。杳杳鐘鳴昏。羊牛爭迳路。煙火出短垣。吾兒望未到。誰與共盤飧。幽獨多惻愴。且復攜斯孫。歸來蓬窗下。聊可與晤言。

閔雨

臘雪不濡土。春風吹早塵。東吳貴粳稻。布種當及晨。千里方翬鷺。坐視膏澤屯。民孽實自作。所賴天公仁。何時見秋穫。如山築高閤。

春和初遷坐堂中

九月天始霜。澤中多烈風。東廂尋丈地。聊以安我躬。薪炭南山來。地爐晨暮紅。二月春始和。如蟲思舊蟄。草堂雖褊小。門戶隨事葺。關窗對小山。峯嶂爭藥屐。筆硯陳橫几。圖書羅矮牀。頽頽燕雀聲。左右蘭茝芳。

有時苦頑痺。杖藜寄相羊。折花與弄水。自適亦何常。

春晴暄甚花開略無餘矣賦以寓感

常年看花時。輒苦風雨厄。今年獨異此。遊人滿阡陌。翩翩出聯騎。往往醉墮幘。轉盼桃杏空。遂見辛夷拆。海棠尤可念。不耐暖日炙。臙脂成白雪。其意亦自惜。曾未淹旬時。春事欲掃迹。安得愛花心。堅頑如鐵石。

春晚

南陌東阡自在身。黃塵不污接羅巾。無方可染星星鬢。有酒能留盎盎春。下豉已添葶菜美。啣泥又見燕巢新。作公何益辛毗事。且是人間九十八。

春陰溪上小軒作

午醉初醒倚釣軒。悠然無與共清言。風微僅足吹花片。雨細纔能見水痕。杳杳暝鐘浮遠浦。離離煙樹識孤村。故人萬里岷山下。安得書來慰斷魂。比遣書問張季長消息於郡下未報。

散策至湖上民家

曳杖翩然入莽蒼。人間有此白雲鄉。風傳高樹珍禽語。露溼幽叢藥草香。農事正看春水白。客途漸愛午陰涼。餘年且就無羈束。社鼓琴琴樂未央。

枕上聞雨聲

小雨廉纖不濡土。忽聞簷溜喜無窮。斷知不作西山餓。多稼如雲在眼中。

聞里中有鬪者作此示之

陸放翁集 二十 劍南詩集 卷七十

老翁無所長，惟是更事多。生世與人處，烏可傷至和。秋毫不能忍，平地尋干戈。唾面聽自乾，彼忿自消磨。鄉鄰皆世舊，何至誓弗過。最說養子壽，它年住雞窠。

春寒

漁艇水流去，柴門風自開。餘寒爲醉地，多病作慵媒。莎草鋤還出，鷗羣去復來。流年殊袞袞，殘髮不禁催。

石帆山下

久矣移家住鹿門，偶然信腳到桃源。尙嫌名挂東林社，那問塵生北海樽。才盡極知詩草草，睡多常覺氣昏昏。舊聞福地多靈藥，安得高人與細論。

餘寒

漠漠餘寒透客衣，江村倍覺失春期。頡頏燕比常年晚，開落花爭數日遲。

自九里平水至雲門陶山歷龍瑞禹祠而歸凡四日

桐帽緇裘擁半酣，肩輿啾軋轉城南。牛過野水將新犢，女采柔桑起稚蠶。遺老年光重九十，故鄉春事及重三種花。築室知難辦，惜地猶能結草菴。

又

細雨如絲映晚暉，店家小憩換征衣。春農耕罷負犁去，村社祭餘懷肉歸。黃犢自依殘照臥，白鷗爭傍小灘飛。道邊舊識凋零盡，誰記遼天老令威。

又

老子無心老尚狂。山程隨處寄優優。雲歸岫穴初收雨。水入陂塘正下秧。野客就林煨燕筍。蠶家負籠采
雞桑。遠遊萬里知何樂。卻喜東歸住故鄉。

又

老子山行肯遽回。直穿拳礪上崔嵬。未誇腳力如平昔。且喜眉頭得暫開。廟後故梁龍化去。山前遺箭鶴
銜來。囊錢已盡君無笑。草草猶能把一杯。

又

我來恰值暮春初。晝漏微長小雨餘。苔蝕秦碑亡舊刻。龍歸禹穴護遺書。燕巢已墨泥猶溼。花片雖殘葉
尚疎。到處不妨俱可樂。詩人爲底愛吾廬。

又

輿似雞栖寄兩竿。山程三月尙春寒。麥苗吐穗初成實。梅子生仁已帶酸。買飯猶勝乞播客。看耕僮學勸
農官。還家莫道虛懷袖。筍蕨隨宜亦滿槃。

又

點點桃花糝綠苔。入門倚杖意悠哉。數聲茶飯齋初散。一片溪雲雨欲來。老宿龍鍾嗟獨在。高松磊砢憶
新栽。世間萬事俱難料。未死重遊更幾回。

又

我行隨處叩巖扉。覓得生薪旋燎衣。道士已驂鸞鶴去。山僧初自水雲歸。釜頭酒壓松肪熟。盤裏蔬供藥

秉肥老覺論心須世外。溪陰回首尚依依。龍瑞馮道士。二月中逝去。餘慶澤菴主自天童歸。亦二月也。

春早得雨

春早得甘澍。村鄰喜欲狂。天公終老手。處處出新秧。

又

稻陂方渴雨。蠶箔卻憂寒。更有難知處。朱門惜牡丹。

春晚

窗戶迎新燕。階除集乳鷗。欲知春已暮。地上亦無花。

又

思與春爲別。忽忽置一樽。明年尙強健。扶杖候柴門。

春晚南堂晨起

秋風樹瘦勁。春露葉扶疎。夙興立堂上。短髮未暇梳。高謝世俗撻。遊於物之初。青黃災斷木。三四調羣狙。長生豈有巧。要令方寸虛。今年幸差健。小雨聊荷鋤。

又

春陽染柳條。春風落花片。化工本無心。誰與催漏箭。俯仰財幾時。梁間有雛燕。人亦隨物遷。蒼然鏡中面。要當心鐵石。先登酣百戰。我豈兒女哉。秋風感團扇。

見鷓補巢戲作

臥看銜枝鵲補巢。方知此老懶堪嘲。山村四十餘年住。未省曾添一把茅。

予素不工書故硯筆墨皆取具而已作詩自嘲

我昔生兵間。淮洛靡安宅。統髦入小學。童叟聚十百。先生依靈肘。教以兔園冊。僅能記姓名。筆硯固不擇。竈煤磨斷瓦。荻管隨手畫。稍長遊名揚。麤若分菽麥。偶覓文房書。雖喜無由憂。筆惟可把握。墨取黑非白。硯得石卽已。殆可供擣帛。從渠膏梁子。竊視笑啞啞。

春晚卽事

桑麻夾道蔽行人。桃李隨風旋作塵。煜煜紅燈迎婦擔。擘擘畫鼓祭蠶神。

又

小時抵死願春留。老大逢春去卽休。今歲禹祠穰一到。安能分日作遨遊。分日作遨遊。王摩詰詩也。

又

漁村樵市過殘春。八十三年老病身。殘廢遊魂苗渴雨。杜門憂國復憂民。

又

龍骨車鳴水入塘。雨來猶可望豐穰。老農愛犢行泥緩。幼婦憂蠶采葉忙。

懷昔

高皇帝網收鳳麟。我得定交猶數人。陳山清真王逸少。李石風流賀季真。

書感

一是端能服萬人。施行自足掃胡塵。南州不可無高士。東國何妨有逐臣。

夜中獨步庭下

山月明如畫。江風冷借秋。衰遲亦可歎。幽獨自成愁。斗柄垂江渚。笳聲下戍樓。我惟詩思在。從此亦宜休。

卷第七十一

憶昔

憶昔紹興中。束帶陪衆彥。沐浴雨露私。草木盡葱蒨。一朝窮達異。相遇忘慶唁。遠官楚蜀間。寂寞返鄉縣。於時同舍郎。貴者至鼎鉉。數奇益自屏。短褐失貧賤。俯仰五十載。未媿金百鍊。忍飢菘蘆間。生理僅如絃。窮交誰耐久。晨暮一破硯。歎歌楓林下。萬事付露電。惟有孤舟興。所至多勝踐。衡茅無定止。何處非郵傳。炊煙起沙際。跳魚裂波面。嘔啞車鳴。隱翳漁火見。簫鼓樂水神。鐘梵鬧竹院。我詩雖日衰。得句尙悲健。巍巍闕里門。未嘗棄狂狷。放浪終餘年。造物不汝譴。

雜詠

仕困風波歸可樂。生如疣贅死何悲。極知此手終無巧。那得隨人儘作癡。

又

鏡中顏狀年年改。海內交朋日日疎。一勸寢門生意盡。從今無復季長書。近聞張季長物故。

又

女郎花樹新移種。官長梅園亦探租。作盡人間兒戲事。誰知空囊一錢無。鄉人謂楊梅止曰梅官長其高品也。

又

一日日窮窮不醒。一年年老老如期。黃河卻有逢清日。白髮應無返黑時。

又

世間萬事本悠悠。自古詩人易白頭。莫羨老夫垂九十。一年添得一年愁。

又

夸士騎牛著鐵冠。往來城市擁途觀。爭如老子無奇怪。惟是蓑衣伴釣竿。

又

家園菜肥忘肉食。村場酒美勝官壺。終年醉飽無憂責。莫怪愚公老不枯。

又

官途所至尙偷閑。何況湖邊晝掩關。未愛好風吹醉袖。且貪微雨養盆山。

又

斜風吹雨晚空濛。獨立溪邊兩鬢蓬。便過此生何所恨。百年強半水雲中。

又

病起清臞不自持。紗巾一幅倚筇枝。水沉香冷紅蕉晚。恰似道山羣玉時。

曉思

暮年多感愴。孤夢久不成。殘燈暗無焰。宿雨滴有聲。食少夜常飢。展轉空腸鳴。老雞雖三號。山窗終未明。默誦舊記書。更覺負平生。披衣搔短髮。壯志浩縱橫。

幽居

策府還家又五年。心常無事氣常全。平生本不營三窟。此日何須直一錢。雨霽桑麻皆沃若。地偏雞犬亦翛然。閉門便造桃源境。不必秦人始是仙。

又

橫草無功負主恩。一生強半臥衡門。蠹書身世元無憾。伏櫪光陰不更論。春雨負薪蘭渚市。秋風采藥石帆村。更思旋糴場中麥。暖熱塵埃老瓦盆。

幽居卽事

采藥鹿門山。釣魚富春渚。君看此氣象。何止輩伊呂。直令終不偶。後人會知汝。亦不妨著書。世世祕囊褚。

又

野寺促晨裝。古驛休破橐。雖云行役苦。客子心獨樂。家山幸歸來。未免歎拘縛。安得萬里天。翩然下孤鶴。

又

暮年乞殘骸。窮巷事幽屏。長與定一章。身未改五鼎。終日無再食。奈此夏晝永。枯腸不禁攪。戒婢罷煮茗。

又

小磴落雪花。修鯁汲牛乳。幽人作茶供。爽氣生眉宇。年來不把酒。杯榼委塵土。臥石聽松風。蕭然老桑苧。

又

日鑄歲幾何。苞苴遍權門。野人求其類。金塊實弟冕。超然高世韻。何獨驅睡昏。安得如吾宗。坐致顧渚園。

又

酒能忘事物。不過在醉時。麴蘖力既盡。萬緒如盤絲。阿堵雅見疎。歡伯難與期。自憐善用短。時誦止酒詩。

又

薰艾割蜜房。荷鋤掘吳朮。誰烹彌明鼎。來薦維摩室。厚味不腊毒。上藥能愈疾。今夕風月佳。良會不可失。

又

古人在山林。躬自事樵汲。我雖迫耄期。勤慎亦在習。掃地拂几硯。何遽力弗給。卻笑杜陵翁。多臥少行立。

又

屏居江海涯。杳杳菰蒲深。俛仰夏令中。澤國正多陰。桑椹熟以紫。水鳥時遺音。偶得一瓢酒。鄰里聊相尋。

醉歸

夜分飲散酒家墟。歸路迢迢月滿湖。小豎竊言翁未醉。入門猶記露菖蒲。

又

烏柏陰中把酒杯。山園處處熟楊梅。醉行踈蹕人爭看。蹋盡斜陽蹋月來。

書南堂壁

數間破屋住荒郊。暑雨時須自補茅。多病篇章無傑思。長閑樵牧有新交。荒唐但向先師媿。翫罷寧辭薄俗嘲。偶有會心成獨笑。一林春筍放煙梢。

又

心源元知面合團。愚公骨相卻酸寒。雲山萬疊猶嫌淺。茆屋三間已覺寬。菜長何妨供小摘。花開聊得助幽歡。今朝忽有西村興。著起芒鞋不作難。

五月雨

空蒙五月雨。景氣一番新。換盡園林葉。洗空衢路塵。山郵惱行客。野渡滯歸人。獨有龜堂叟。涼風吹角巾。

蠶麥

村村桑暗少桑姑。戶戶麥豐無麥奴。又是一年春事了。纔絲擣麥笑相呼。

早至園中

湖上空濛雨。熟梅清晨岸。幘一悠哉。幽花不恨草埋沒。密樹豈知禽去來。舊爲愛茶分水器。近緣炊爨得琴材。小丘僅見山如髻。尙媿韓公八尺臺。

憶雲門諸寺

三百六十日。安可日日愁。四百八十寺。要須寺寺遊。雲門若耶間。到處可淹留。金像闕古殿。霜鐘發重樓。臨澗見魚躍。穿林聞鹿呦。亦有疎豁處。白鷺下綠疇。僧固非盡佳。終勝從公侯。夜闌煎蜜湯。豈不賢盃甌。澤居厭溽暑。慨思風露秋。晴雨俱可人。亦莫占鳴鳩。

贛士曾與宗字光祖以其居篔簹谷圖來求詩

高人心虛萬物宗。家世常以仕易農。買山本愛坡上竹。手種已偃巖前松。瀑泉三伏凜冰雪。谷聲十里聒笙鏞。了知自是一丘壑。不與金精爲附庸。地與金精山背牛。峽爲隣。

以菜茹飲酒自嘲

山澤有臞儒。殘年病滿軀。拙疎難救藥。貧困不枝梧。海客留苦肺。山僧餉筍枯。筍枯出伏錫山。衰顏得村酒。猶解整時朱。

五月二十一日風雨大作

風雨縱橫夜徹明。須臾更覺勢如傾。出門已絕近村路。對面不聞高語聲。銜舳江關多蜀估。宿師淮浦飽吳粳。老民願忍須臾死。傳檄方聞下百城。蜀盜已平。淮壩胡賊亦遁去。

寄題栝蒼陳伯予主簿平楚亭

琵琶洲上暮山奇。五十餘年役夢思。與子定交雖可樂。念身垂老亦成悲。遠遊倦似風枝鵲。愁思多於繭盎絲。安得往尋平楚約。一樽相屬醉題詩。

卽事

歸臥已如狐首丘。不妨解劍換吳牛。掃空身外閑榮辱。閱盡樽前舊輩流。學道漫希僧坐夏。憂時常媿士防秋。一年曆日開強半。歎息人間歲月遒。

梅雨初霽

梅雨忽已過。松風來颯然。吟多錦囊富。影瘦角巾偏。客祝加餐飯。兒愛少睡眠。衰骸累人久。撫事感餘年。

夏日雜題

東吳五月黃梅雨。南浦孤舟白髮翁。貂插朝冠金絡馬。多年不入夢魂中。

又

午夢初回理舊琴。竹爐重炷海南沉。茅簷三日蕭蕭雨。又展芭蕉數尺陰。

又

新縫細葛作蟲糊。簾展風漪凜欲秋。啼鳥一聲呼夢斷。依然書卷在牀頭。

又

簷前桐影偏宜夏。葉底蟬聲漸報秋。莫道衰翁怯風露。也能覓醉水邊樓。

又

溽蒲經雨送微馨。野鶴凌風有墮翎。歸入衙門天薄暮。清溝淺浸兩三星。

又

一葉兩葉病木實。一點兩點疎螢流。水底星河秋脈脈。髮根風露夜飈颼。

晚興

地荒蓬壑與人齊。局促何曾厭屋低。村市船歸聞犬吠。寺樓鐘暝送鴉栖。山童新斫朱藤杖。僮婢能醃白芡齏。政欲出門尋酒伴。霏霏小雨又成泥。

急雨

蝸廬四壁僅容身。赫赫炎曦不貸人。正喜風清三伏暑。已看雨壓九衢塵。寒泉不減中瀟味。貢茗初嘗正焙新。安得凌空雙健羽。徑隨猿鶴上嶙峋。

聽雨

老態龍鍾疾未平。更堪俗事敗幽情。紗幮笛簟差堪樂。且聽蕭蕭暮雨聲。

窮居戲詠

賦分雖云薄。謀生亦自疎。但令書有種。敢恨食無餘。身病慵行立。庭荒廢掃除。寒溫雖泛禮。猶辱問何如。旬日速得二三故人書。

讀窮居五字慨然有感復作一首自解

布褐營身足。茅茨置榻寬。食非依漂母。菜不仰園官。小蹇鞍韉黑。羸僮骨相酸。丹青能寫此。千載尙傳觀。

蒙恩封渭南縣伯因刻渭南伯印

旋著朝衫拜九天。榮光夜半屬星躔。渭南且作詩人伴。敢望移封向酒泉。唐詩人趙嘏爲渭南尉時。謂之趙渭南。

題門壁

四十年來住此村。勝衣拜起有曾孫。市墟分熟容賒酒。鄰舍情親每饋殮。居似窮邊荒馬驛。身如深谷老桑門。幸知歲惡緣陵廢。安得農官與細論。頁郭及近縣。頗有患水處。

雨霽

雨霽禽魚樂。風生草木香。老鷺時易失。閑覺日偏長。閣閣誰何怒。翩翩蝶許忙。閉門真得計。切勿變軒昂。

西村晚歸

小塢花垂盡。平隄草次迷。日長鶯語久。風定絮飛低。子響聞碁院。舟橫傍釣溪。歸途不知處。依約埭東西。

連日雲興氣濁。雨意欲成。西南風輒大作。比夜月明如晝。

考古

鳩自呼鳴。蚓自歌。二者鄉人以爲雨候。何時甘澍一滂沱。封姨漫妒陽臺夢。卻付長空與素娥。

殘春無幾述意

考古無長晝。憂時少熟眠。偷生迫鍾漏。戰死魏兜鞬。莫報乾坤施。空驚歲月遷。藜藿安用糝。吾事本蕭然。

又

試筆書盈紙。烹茶睡解圍。新蔬供冷麵。熟練製單衣。雛燕飛初穩。殘花見漸稀。年衰學不進。默默認吾非。

南堂晨坐

衰疾來無已。流年過若馳。家貧食易美。身老夢常悲。草長增蛙怒。花空失蝶期。不堪多難日。更賦送春詩。

記悔

鏡湖清絕似瀟湘。晨起焚香坐草堂。日暖遊絲垂百尺。花殘新蜜釀千房。綠桑糝宿開蠶食。白水翻車浸稻秧。莫道村翁殺風景。也能沽酒答年光。

我悔不學農。力耕泥水中。二月始穡事。十月畢農功。我悔不學醫。早讀黃帝書。名方手自繕。上藥如山儲。不然去從戎。白首掉塞壩。最下作巫祝。爲國祈豐年。猶勝業文辭。志在斗升祿。一朝陪衆雋。所望亦已足。豈知賦命薄。平地成怨仇。生爲馬伏櫪。死爲狐首丘。已矣何所悲。但悔始謀錯。賦詩置座傍。聊以志吾作。

東園晚興

宿葉自脫新葉生。東園忽已清陰成。老夫東行復西行。烏藤瘦勁青鞋輕。竹雞羣號似知雨。鶉鴉相喚還疑晴。萋萋幽草上牆綠。瀼瀼細水循堦鳴。蕭然濯手坐盤石。心地平安體舒適。青山缺處紅日沉。杳杳長空送歸翮。

晨起行園中

晨日未出林。庭戶有爽氣。僮奴課薪水。老子自攤簪。稻陂方閱雨。草木亦顛顛。羣蛙汝何心。尙復作鼓吹。

雷雨

雲昏失南山。雷過撼北戶。天其哀此民。畀以三日雨。未言高下足。十已得四五。雨勢殊未已。喜色徧農圃。稽手謁龍公。願言終有秋。民飢不敢辭。懼貽明主憂。

戲書燕几

平生萬事付天公。白首山林不厭窮。一枕鳥聲殘夢裏。半窗花影獨吟中。柴荆日晚猶深閉。煙火年來只僅通。水品茶經常在手。身疑是竟陵翁。

又

飽知此手合鋤犁。剩喜東歸老故栖。僧乞新詩題院壁。人扶半醉下樓梯。少通朝籍讎銷骨。晚畏京塵悔噬臍。尚有遠遊心未死。夢攜猿鶴渡敷溪。

喜雨

一雨洗早塵。吾廬氣疎豁。土潤竹萌出。水長漁舟活。桑麻鬱千里。夾道光如潑。憑高望歸雲。更覺原野闊。沉憂寬旅食。分喜到僧鉢。但仰皇天慈。不必尤旱魃。

閑適

閉門萬事不相關。飽受人間一味閑。琴薦潤生譜雨至。衣篝香冷歎春殘。早曾寄傲風煙表。晚尚鍾情水石間。小市酒旗能喚客。試尋鄰曲共開顏。

早晴

老病常貪睡。蕭蕭厭雨聲。翩然兩烏鵲。爲我報新晴。

翦牡丹感懷

雨聲點滴漏聲殘。短褐猶如二月寒。閉戶自憐今伏老。聯鞍誰記舊追歡。欲持藤槥沾春碧。自傍朱欄翦牡丹。不爲挂冠方寂寞。宦遊強半是祠官。

偶觀舊詩書歎

吾道運無積。何至墮畦畛。醜雞舞蓬天。乃復自拘窘。外物豈移人。子願不少忍。鶴井與狐妖。正可付一哂。繁華夢境開。零亂空花實。可憐愁書生。尙學居易積。我昔亦未免。吟哦啄肝腎。落筆過白雨。聚稿森束筍。

幸能悟差早。念念常自憫。安得從碩儒。稽首謝不敏。

聞蜀盜已平獻馘廟社喜而有述

北伐西征盡聖謨。天聲萬里慰來蘇。橫戈已見吞封豕。徒手何難取短狐。學士誰陳平蔡雅。將軍方上取燕圖。老生自憫歸耕久。無地能捐六尺軀。

晚雨

萬里雙芒屨。終年一布裘。病侵消壯志。醉著失閑愁。琴料憑僧問。巢居與鶴謀。晚來疎雨過。探借北窗秋。

雨晴

早曠常思雨。沉陰卻喜晴。放船蓮蕩遠。岸幘竹風清。淮浦戎初遁。興州盜甫平。爲邦要持重。恐復議消兵。

起晚自嘲

辛苦一生何所獲。老向東阡與南陌。頭眩眼昏牙齒疎。能作人間幾時客。爾來偷惰更可笑。臥聽場中打新麥。老雞失旦也似儂。引頸一呼窗已白。

閑中偶詠

斷編殘稿本徒勞。橫得虛名亦已叨。不識狐書那是博。尙分鶴料敢言高。巢山且欲營丹竈。跨海何當看雪濤。與世不諧終自許。笑人苦勸學舖糟。

又

舉世紛紛名利間。天公偏賦此身閑。屢衣濯罷滄浪水。茅舍歸來會計山。鄰舍擊盤分麥飯。野人曳杖叩

柴關酒逋詩債何時了。未死何妨且旋還。

晚步湖塘少休民家

瓜蔓綠籬竹。蘆芽刺岸沙。橫陂浮雁鷺。古道暗桑麻。適遇扶犁叟。同休織屨家。村童亦可念。喚客手吒叉。

獨酌罷夜坐

不見麴生久。忽然相與娛。安能論斗石。僅可具盤盂。聽雨蒙僧衲。挑燈擁地爐。勿生孤寂念。道伴有狸奴。

雨中出門閑望有作

急雨初來已瀉簷。清香欲散更穿簾。年開九秩尙不死。坐對一編殊未厭。人老結髮具得半。自憐貧病每相兼。說梅古謂能蠲渴。戲出街頭望酒帘。

示二子

豈不懷榮畏友朋。一生凜凜踏春冰。任真雖笑拘邊幅。達節寧容出準繩。自喜殘年如白傅。更憐諸子慕崔丞。耄期尙有江湖興。頑健人言見未曾。時子龍調官東陽丞。子坦調彭澤丞。

道室秋夜

江上窮秋日。菴中獨夜時。丹靈馭豎子。神定出嬰兒。梁熟猶餘夢。柯摧未畢棋。神仙元可學。往矣不須疑。

又

道室生虛白。仙經寫硬黃。晨杯擊石髓。夜几照松肪。眼力新生懶。心源百鍊鋼。何當登日觀。萬里看扶桑。

醉題

雲棲澗飲未爲高。起舞行歌亦足豪。試問食時觀本草。何如酒後讀離騷。遊山不待飛雙鳥。翦水無因得快刀。熟睡市壚君勿笑。年來隨事學鋪糟。

自詠

忽忽殘年及耄期。清晨對鏡不須悲。遠行久立雖差倦。未到人扶見客時。

又

食飲從來戒失時。衣裳亦復要隨宜。老人最索調停處。正在初寒與半飢。

秋晴

身健心閑百慮輕。秋晴未必減春晴。晨窗暖日烘花氣。午枕微風送鳥聲。韞玉硯凹宜墨色。冷金牋滑助詩情。少年風味嗟猶在。虛道歸休學力耕。

門外獨望

離離遠樹傍煙津。又見清秋一歲新。老眼厭看南北路。流年暗換往來人。鑄金遺像誰能記。執玉來朝適已陳。況我風中斷蓬耳。夕陽空復一傷神。

貧歌

壽居福之首。貧爲士之常。造物賦我貧。乃以壽見償。處常而受福。每恐不得當。掬澗以沃渴。屑柏以爲糧。雖云未免飢。何至死道傍。猶勝遼東丁。化鶴還故鄉。

秋晚雜興

汀樹猶青未著霜。壠間稗穗已先黃。放翁皓首歸民籍。爛醉狂歌坐簟牀。

又

昔遇高皇起衆材。姓名曾得廁鄒枚。年踰八十猶賒死。卻伴鄰翁斲芋魁。

又

老病侵凌不可當。時時攪鏡自悲傷。西風吹散朝來酒。依舊衰顏似葉黃。

又

冷落秋風把酒杯。半酣直欲挽春回。今年菰菜嘗新晚。正與鱸魚一併來。

又

置酒何由辨咄嗟。清言深媿淡生涯。聊將橫浦紅絲磬。自作蒙山紫筍茶。鄉老舊謂碾磨茶爲作茶。

又

洗耳高人恥見堯。看渠應不受弓招。精神徇物那能久。刀礪君看日日銷。

又

石帆山下醉清秋。常伴漁翁弄小舟。箬笠照溪吾自喜。貂蟬誰管出兜鍪。

又

煙波萬頃鏡湖秋。清嘯雖聞不可求。自是世間知者少。山林何代乏巢由。隱者。

又

禹巡吾國三千歲。陳迹銷沉渺莽中。豈獨江山無定主。苦磯知換幾漁翁。禹廟。

又

江東誰復識重瞳。遺廟欹斜草棘中。若比啣嚙念如意。烏江戰死尙英雄。項羽廟。

又

漠漠漁村煙雨中。參差蒼檜映丹楓。古來畫手知多少。除卻范寬無此工。

又

渺渺風煙接小江。卽錢清江別名。牛頭山色滿蓬窗。門前西走錢塘路。也有閑人似老龐。

霜風

霜風近海夜颼颼。敢效庸人念褐裘。關吏雖通西域貢。王師猶護北平秋。黃旗馳奏有三捷。金印酬功多列侯。願補顏行身已老。區區馱畝亦私憂。

贈丐士

志士寧聞畢世窮。此間從古混蛇龍。尙能忍恥墻間祭。安用追慚飯後鐘。

贈目眇者

達人所遇有生涯。高臥窮閭自一家。閱世正嫌巖下電。開樽且看霧中花。

卷第七十二

閑遊所至少留得長句

畫橈艇子短驢鞦。野店山郵每小留。瓜蔓水生初抹岸。梅黃雨細欲遮樓。遼東邂逅從歸鶴。海上逢迎得狎鷗。豈是人間偏好異。暮年難復作沉浮。

又

垣屋參差桑竹繁。意行漫漫不知村。眼明可數遠山疊。足健直窮流水源。鷺引釣船經荻浦。牛隨牧笛入柴門。試尋高處休行李。清絕應須入夢魂。

又

太平人物自諧嬉。及我青鞋布襪時。丁壯趁晴收早粟。比鄰結伴絡新絲。圓鞞坎坎迎神社。大字翩翩賣酒旗。晤語豈無黃叔度。欲尋幽徑過牛醫。

又

已過樵塢到漁村。逢著人家即叩門。僧釜藜羹加糝美。市壚黍酒帶醅渾。顏齡更媿才能薄。故里方知輩行尊。身迫九原兒亦老。一經猶欲教諸孫。

又

高僧宴坐雪蒙頭。閑牧從來水牯牛。深院陰陰四簷雨。高堂寂寂一簾秋。光明本自無餘欠。夢幻何曾有去留。我亦翛然五湖客。不妨相與試茶甌。

晚雨

春旱久閔雨。夏潦復望晴。米盡薪亦絕。漲水與堦平。山信得新粟。欣然聽春聲。書生易滿足。筆硯還施行。南風柱礎乾。西照窗戶明。雨其遂已乎。努力趣秋成。

翌日早晴

澤居傍海壖。暑雨困積潦。四顧路俱絕。所至泥浩浩。坐臥敗屋中。兀若在孤島。得米無束薪。端憂令人老。今朝復何朝。浮雲散如掃。一蟬鳴高槐。兩蝶點平草。欣然受涼颺。便欲事幽討。呼童羈我駒。東走天台道。

一雨二十日

一雨二十日。雨意殊未闌。我廬大澤中。四顧煙水寬。東家有小舟。借我不作難。鷗鷺與鳩鵲。自是平生歡。更作十日期。水淺生小灘。相與極幽賞。勿待江月殘。

入夏多雨雖止復作六月甲寅始大晴

兼旬大雨無晝夜。積潦深虞敗吾稼。豈惟一飽墮渺茫。直恐下溼侵腰胯。南風忽從木末來。新月徘徊出雲罅。州家出符縣家喜。泄水漸空梁可架。放翁亦復扶病起。旋築頽牆補茆舍。便合觀身作老禪。安心穩坐今年夏。

題尊信齋并序

吾友陳希真求序名其書齋。予告之曰。韓文公言讀孟軻書。然後知孔子之道尊。晚得揚雄書。益尊信孟氏。因雄書而孟氏益尊。予謂孔子豈待人而尊。孟子亦豈待人而信。韓之言則過矣。然尊信孔孟者。實學者之本務也。請以名君齋。且爲詩以終吾意。

於虛孔孟何其卓。如天日月地海嶽。正令舉世皆楊墨。邪正豈復勞商榷。雖然此道久橫流。執熱其誰不思濯。魯鄒遺書世皆讀。要以尊信爲善學。吾友希真蓋其人。不肯俯首爲齷齪。羹藜飯豆欲老矣。功雖未竟志則愨。我居山陰子在閩。闕然不見千里遠。澤中久雨道路絕。叩戶忽聞聲剝啄。尊信二字子所知。妙質豈復須斤斲。伏生九十語已訛。失旦自慚猶喔喔。

夏日雜詠

閑居自無客。況復暑如焚。百折赴溪水。數峯當戶雲。幽尋窮鹿徑。靜釣雜鷗羣。舊愛南華語。今方踐所聞。

又

兀兀從誰語。曠曠寄一牀。不嗟頭似葆。但苦汗如漿。欹枕風生竹。鈎簾日轉廊。非由靜勝熱。本體自清涼。

又

蒲葦蕭蕭晚。楸梧蕭蕭陰。山童驚大野。林鳥伴微吟。登視深瀟墨。吳淩熟擣砧。新詩與醉帖。自笑尙童心。

又

省事心君靜。忘情眼界平。食便殮酪美。浴試葛衣輕。鶴整千年駕。鷗尋萬里盟。秋風卽在眼。作意上青城。

夏日

颼颼風露髮根涼。月落菱歌盡意長。分得鏡湖纔一曲。喫虧堪笑賀知章。

又

新闢虛堂痛掃除。蕭然終日屏僮奴。此間恐是維摩室。除卻藜牀一物無。

又
平明一浴汗無餘。坐覺胸中合太虛。春玉作糜天所賜。不妨數筯進山蔬。

又
草芝方出峨眉老。力比金丹似更多。秦不及期周過曆。始知養壽在中和。伏中方製神芝丹。此方出史載之學士家。

苦熱

炎歊行中天。曼膚汗翻水。纖絺薄如霧。不異鎧被體。散髮垂兩肩。萬事棄不理。寸陰若度歲。日暮何可俟。頗聞交廣間。暑又烈於此。此如不可耐。彼豈皆暈死。聊當扶短策。北澗弄清泚。豈必拜賜冰。恩光動閭里。

予頃遊青城數從上官道翁遊暑中忽思其人

往年屢遊丈入祠。上官八十如嬰兒。自言少年醫不治。芝房松鬣可無飢。叩之不答但解頤。德人之容端可師。我聞學道當清思。畢世不可須臾離。公雖泯默意可知。亡羊要是緣多歧。逝從公遊亦未遲。聯杖跨海尋安期。

龜堂

障日松棚正策功。幅巾聊得受微風。蟬聲不斷草堂靜。潦水已歸村路通。拄杖閑行穿荦确。孤雲時見起纒從。東陽醇酎無由到。知負今年幾碧筒。郭希呂。呂子益兩友。歲餽酒。今以故不至。

夢中作

試說山翁事。諸君且勿譁。百年看似夢。萬里不思家。夜艾猶添酒。春殘更覓花。卻嗟勾漏令。辛苦學丹砂。

又

平羌江上月。伴我故山來。幽興依然在。浮雲正爾開。清秋纔幾日。黃葉已成堆。未醉江樓酒。扁舟可得回。

秋近頗有涼意

平旦麪數箸。晡時飯一杯。枝梧長日過。悵望早秋來。團扇尋詩寫。緇巾借樣裁。惟應水邊坐。待得市船回。

夜坐中庭涼甚

銀漢迢迢夜氣澄。都忘朝暮困蚊蠅。月從東浦行空闊。風自南來洗鬱蒸。渴解似嘗仙掌露。魂清如近玉壺冰。誰知此際超然處。不減廬山入定僧。

東偏小室去日最遠每爲逃暑之地戲作五字

蕭蕭蒼陰轉。冷冷窅水鳴。高墉日氣遠。方簞午風清。渴愛殮漿美。慵便葛屨輕。新秋忽在眼。結束問山程。

野寺

僧壁題名半闕訛。重來歎息屢摩挲。林蟬欲斷暮復急。竹露如傾秋更多。半俸漸償孫酒券。故衫已換釣魚裘。西窗一看枯棋罷。歸去還憂爛斧柯。

南堂雜興

車馬無聲晝漏長。野人與世已相忘。屏除長物軒楹爽。洗濯塵襟肺腑涼。秋近平郊鳴鶴鶴。日斜荒徑下牛羊。興來欲喚筇枝去。更盡銅爐一炷香。

又
新涼一夜入郊墟。晨起衣巾爽有餘。燕欲委巢雛盡去。燕有三生雛者。及秋雛方去盡。扇猶在手意先疎。
題詩又滿牛腰束。采藥常攜鷓鴣鋤。湖上從今風月好。不妨隨處命籃輿。

又
蛩聲每續蟬聲起。桐葉仍兼柳葉凋。懶惰心情疎筆硯。久長生計屬漁樵。鬚茅旋補東廂屋。伐石新成北
港橋。物外高人來往熟。等閑折簡也能招。

又
耄齒東歸息故廬。聊持頑健託鄉閭。未忘麈尾清談興。常讀蠅頭細字書。貧甚尚能耕有犢。步輕那歎出
無驢。南堂又見秋風起。臥看溪雲自捲舒。

又
奔走當年一念差。歸休別覺是生涯。茆簷喚客家常飯。竹院隨僧自在茶。紹興初僧喚客茶。各隨意多少。
謂之自在茶。今遂成俗。禪欠遍參寧得髓。詩緣獨學不名家。如今百事無能解。只擬清秋上釣槎。

又
十里城南禾黍村。白頭心事與誰論。情儉已墜先人訓。迂拙仍辜聖主恩。病退時時親蠹簡。興來往往出
柴門。斜陽倚杖君知否。收點雞豚及未昏。村老人不能耕者。以牧雞豚爲事。村隣皆然。

年過八十更應稀。又向清秋聽擣衣。一片雨來書幔黑。數聲鐘斷釣船歸。酒壚好事能焚券。盞甕無情未解圍。剩欲出門尋一笑。故人零落歎躊依。

又

北連大澤驚秋早。東限連林覺曉遲。數筍藥苗留客話。一爐松火約僧棋。人間掃跡雖堪笑。物外論心頗自奇。有恨未償猶絕歎。青城交舊待多時。

新秋往來湖山間

車似雞栖舟似葉。百里何曾勞步履。朝遊樵風弄笛此。暮泊石帆登岌巖。旅飯雖春纔脫粟。僧羹無菜寧用挾。歸來村落未上燈。除卻御風無此捷。

又

會稽山下樵風溪。翠屏倒影青玻璃。尤奇峭壁立千仞。行子欲上無階梯。商山坐看紫芝老。武陵無奈桃花迷。人間得意妄自喜。一閔憐汝真醜雞。

又

禹祠巍巍閱千代。廣殿修廊半傾壞。屹然遺空每摩挲。石長昔侵字猶在。去年已媿曳杖來。今者更用兒扶拜。聊持一酌薦丹衷。衰疾龍鍾神所貸。

又

健席高橋梅市路。朱橋綠樹蘭亭步。兒時釣遊略可記。不料老年猶此處。漁歌相和葦間起。菱船遠入煙

中去世間萬事等浮雲。耐久誰如兩芒屨。

北崦

毒熱憚輕出。新涼尋舊盟。西郊猶近市。北崦漸謀耕。松菊有佳色。山林無俗情。行行望積火。一點隔林明。

小室避暑

千頃菰蒲萬里風。漁翁散髮臥孤蓬。何如此室纔尋丈。常在冰壺雪窖中。

秋雨中作

燈前劇論與誰同。中歲朋儕亦已空。行道敢希千載上。會心聊付一編中。雨侵壞甃新苔綠。秋入橫林數葉紅。莫怪又生湖海興。此身元自是孤蓬。

目昏有感

兩眸眇昏八十餘。爾來觸事覺空疎。何由四目如蒼頡。讀盡當年倚相書。

幽居

一曲清溪帶淺山。幽居終日臥林間。丹經在昔曾親授。死籍從今或可刪。人笑拙疎安淡泊。天教強健享清閑。秋來漸有佳風月。擬與飛仙日往還。

初秋卽事

簾櫳雨過不勝清。秋氣依依似有情。高棟尙餘雙燕宿。短莎先放百蟲鳴。挑燈剩欲開書帙。擘蟹時須近酒觴。卻媿隣家常作苦。探租黃犢待寒耕。

又

老來閱世苦匆匆，又見流年入鬢蓬。
山徑溼螢黏露艸，井牀病葉實秋風。
隣翁每共藜羹味，穉子能終汗簡功。
造物於人元不薄，未須抵掌歎囊空。

山庖

新春糴糶滑如珠，旋壓鞞郗軟勝酥。
更翦藥苗挑野菜，山家不必遠庖廚。

題道傍壁

晚境那禁歲月催，幽花又見澗邊開。
莫辭賸買旗亭酒，恐有騎驢李白來。

又

湖磨財存十二三，拍隄漲水尚如藍。
吾廬隱翳初非意，頗欲臨流結艸菴。

訪野老

農事元知要細評，野人有舊得尋盟。
林深未見果蔬地，舍近先聞雞犬聲。
春水築塘謀渴作，陽坡臥犢約同耕。
老來常歎人情薄，深媿今朝倒屣迎。

書適

架竹苦茅屋數椽，推開窗戶卽江天。
微飢未遽愁長日，小疾何妨度厄年。
孤鶴入秋偏警露，斷山欲雨自生煙。
囊中妙法君知否，買斷清閑不用錢。

憶蜀

憶昔西遊日，嘔餓勝事繁。題詩古柏廟，載酒海棠園。世故紛難料，年光浩莫論。所欣身尚健，短褐醉江村。

生涯

生涯數畦菜，心事一溪雲。樵擔斜陽下，漁歌靜夜聞。門無俗駕到，廚有遠泉分。但了麪糲事，功名烏足云。

又

身世茫如夢，門庭冷似冰。逢迎賣藥叟，辭謝乞錢僧。羸疾時時劇，衰顏日日增。人扶亦可出，要是藉烏藤。

又

舊業桑麻在，頽齡耄耋過。虞卿著書晚，伏叟授經訛。井上磨樵斫，村東買釣蓑。傾身營一飽，自笑又蹉跎。

又

殘年端有幾，寂寞寄滄洲。烏宿千林暮，蟲鳴四壁秋。風廊動礎杆，月壠把鉏耰。衣食隨宜具，何心復浪求。

對食作

潦餘多稼猶中熟，種晚嘉蔬亦半收。黃耳葷生殊自喜，白頭韭長復何求。比量磅舍慚溫飽，誦詠農書傲墮偷。偶有一樽難獨啜，過門誰肯小遲留。

曉思

昏昏斷夢帶餘醒，散髮披衣坐待明。城角吹殘河漸隱，海氛消盡日初生。老農自得當年樂，癡子方爭後世名。莫怪閉門常懶出，即今車蓋爲誰傾。

戲書

柳下人家枳作籬。小姑不畫入時眉。緯車聲出窗扉裏。正是新涼夜永時。

梅市舟中作

漕渠北向小橋通。漸入蒼茫大澤中。造物將無知我醉。故吹急雨打船篷。

孤店與兒孫。送五郎爲淮西之行。小飲民家是日雲興。頗憂雨。

孤店門前千萬峯。酒濃不抵別愁濃。明朝晴雨吾能卜。但聽蘭亭古寺鐘。

過魯墟先太傅舊隱

桑竹蕭條帶夕陽。故居依約古河傍。頽垣壞甃無尋處。父老猶言學士莊。

步月

鷗鷺論交有舊盟。越山勝處著柴荆。只思小閣焚香臥。偶作長堤蹋月行。湖闊煙鐘來縹渺。林疎漁火見

分明。店家已賣新篘酒。一醉今宵似可成。

拄杖示子遜

拄杖相從四十年。交情耐久獨依然。西窮巫峽岷江路。北抵岐山渭水邊。早已歸休弄泉石。老猶緩步歷風煙。會同鉢袋并禪版。付與兒孫世世傳。

讀道書

一境有神龍。歲不畏枯旱。爲國常得賢。百世不可亂。吾讀黃老書。掩卷每三歎。正使未長生。去死亦差緩。如何不自力。白首猶漫漶。友朋死略盡。日月難把翫。豈無獨往願。兒孫苦羈絆。安得葛與陶。相從明此段。

秋日睡起

白露已過天益涼。練衣初覆篝爐香。天其閱我老且臆。付以美睡聲撼牆。離騷古文傍倦枕。砥柱巨刻懸高堂。睡餘一讀搔短髮。萬壑松風秋興長。

書意

屋漏徙我牀。窗破補其罅。衣穿傲狐貉。食淡忘膾炙。人生老可哀。百事就衰謝。我喜在得歸。味美如啖蔗。雖云茅茨陋。豈不賢傳舍。兒能牧雞豚。身自種桑柘。市壚酒易賒。鄰廐驢可借。睡任門生嘲。醉無官長罵。見書眼先閉。惰懶亦自赦。卻後五百年。林間作佳話。

寄題龔立道崑山樓閑堂

我居山陰古大澤。出門尙恨風煙迤。欲求曠快舒眼力。夢中去作棲閑客。棲閑主人計不疎。萬卷讀盡家藏書。平時不喜入城府。況肯自屈承羽盧。德難束帶誰不爾。明時可仕君獨止。不妨借地作園林。買山豈是巢由事。園廬皆借地營之。

秋雨書感

新春赤米摘青蔬。一飽從來不願餘。門外久無溫卷客。架中寧有熱官書。濁醪未廢時歡。短髮猶須日。日梳。自笑少年風味在。滿川煙雨正愁予。

又

晨起開門雪滿簷。東崗一徑得幽尋。斷雲殘雨歲華晚。丹竇碧花秋意深。林下已悲身老病人間。猶與俗。

浮沉牀頭小甕今朝熟。又喚隣翁共淺斟。

弄筆

少學文章竟不成。暮年腕弱字欹傾。抽毫欲下還休去。棊几空憐似砥平。

睡覺作

世言黃帝華胥境。千古秦荒孰再遊。但解消搖化蝶翅。不須富貴慕蚍蜉。

又

邯鄲夢事豈關身。未熟黃梁迹已陳。輸與烏衣老鈴下。日中睡覺一顰伸。

秋思

露濃壓架葡萄熟。日嫩登場穉稻香。商略人生如意事。及身強健得還鄉。

又

三三兩兩戲魚行。香餌纔投去若驚。騎與扁舟五湖客。只當遠引過平生。

又

一篇舊艸天台賦。六幅新傳太華圖。占盡人間清絕事。紫藤香起竹根爐。磔香近出廬山。

又

村南村北鷓鴣鳴。小雨霏霏又作晴。拂枕欲眠不成夢。卻拖藤杖出門行。

又

出門東行復西行，處處人家打稻聲。小甕秫醅雖未熟，後園楮葦已堪烹。

又

看雲廬阜屏風疊，采藥嵩山冠子峯。行盡四方心未快，不如一榼醉吳松。

又

桑竹成陰不見門，牛羊分路各歸村。前山雨過雲無迹，別浦潮回岸有痕。

又

隣砧落日數聲殘，汀樹秋風幾葉丹。冉冉清愁來不斷，無方能使酒腸寬。

又

老子齋居罷擊鮮，木盤竹筴每隨緣。隣僧不用分香鉢，蓮火猶堪過半年。

又

存神止慮自長年，黃老遺書漢尚傳。妙語雖傳人不省，卻從丹竈覓神仙。漢武帝賜平津侯詔曰：君其存精神，正念慮，補助醫藥，以自持。那侯與楊王孫書曰：願存精神，省思慮，遂近醫藥，厚自持，其語悉同。疑出於黃老遺書，至漢尚傳也。

秋來苦貧戲作

閉門高臥養吾真，說著生涯笑倒人。奴閔囊空辭雇直，婢愁爨冷拾炊薪。羹能有糝猶爲泰，地到無錐始是貧。飯不妨支一日，讀書常媿晤比隣。

晚晴

雨餘殘日入疎籬。變化相乘乃爾奇。千嶂暮雲收盡後。一年秋暑洗空時。如山酒券不相貸。隔巷衣砧如許悲。剩欲出門紆滯思。交親零落與誰期。

對月

遠客厭征路。流年逢素秋。不知今夜月。還照幾人愁。

又

艸艸治杯盤。三更月露寒。茆簷雖隱翳。終勝客中看。

出近村晚歸

松枝代如意。練布製單衣。出每沾晨露。歸當送夕暉。野花當路發。沙鳥背人飛。到舍燈初上。茅簷聞踏機。

又

苦雨秋將晚。羈愁酒易醺。百年終腐骨。萬事盡浮雲。果熟多猿噉。林疎過鹿羣。亦思書觸目。老嬾不成文。

秋晚

雞聲喔喔頻催曉。木葉颼颼已變秋。憂患縱多終強項。飢寒未至且優游。老鶻尙欲身當道。乳虎何疑氣食牛。時黑孫方生半午。但有一愁消未得。大兒白髮戍邊頭。

犬雞

小犬一何警。日夜吠籬落。老雞則不然。平旦方喔喔。勤惰各其性。於我何厚薄。糠糶一施之。且復慰寂寞。

賣藥翁

老翁如我老。賣藥以代耕。得錢付酒家。一毫不自營。浩歌和隣叟。苦語誨後生。我欲爲作傳。無人知姓名。

書里中事

事近接耳目。誕信良易知。頗疑有定數。一惑不可移。坐視非所安。忠告反取疑。雖抱愚直意。妄發悔曷追。

書室雜興

秋水淺出灘。秋葉落成陣。方喜風露清。已歎霜霰近。衰疾雖向平。不死亦董董。燈青地爐冷。吾學其少進。

又

衣多藏之筒。食餘積之困。我享既有限。富亦豈勝貧。布褐本自溫。筍蕨固已珍。君看梁伯鸞。寄食終其身。

又

老眼觀細書。紛然黑花墜。不如袖手坐。嘿誦舊所記。但恨志弗強。編簡頗失次。後身作書生。努力究此事。

又

學書五十年。其進不及寸。未能踐繩墨。況敢說豪健。雖然亦有用。尙足博麤飯。開學教牛經。坐市寫驢券。

秋感

瘦盡腰圍白盡頭。悲蛩聲裏落梧秋。短檠且慰經年別。豎褐猶懷卒歲憂。天地無私嗟獨困。風霜有信又殘秋。頑軀安得常強健。更倚東吳寺寺樓。

秋夜

秋色滿江干。江楓已半丹。身閑詩簡淡。道勝夢輕安。偃蹇憐腰折。清癯鄙面團。何妨杵衣夜。又見歲將殘。

又

落葉鳴遙夜。啼螿送暮秋。不知何許笛。故作此時愁。清海三年戍。黃旗萬里侯。如石帆下煙。雨釣滄洲。

卷第七十三

秋日村舍

會稽城南古大澤。霜晴水落煙波迤。寒風蕭蕭凋榭柳。暖日暉暉秀麴麥。傳聞新詔募新軍。復道公車納羣策。忠誠所感金石開。勉建功名垂竹帛。

又

川雲慘慘欲成雨。宿麥蒼蒼初覆土。辛肥一本可專車。蟹壯兩螯能敵虎。村村婚嫁花簇檐。廟廟禱祠神降語。兒孫力稼供賦租。千年萬年報明主。

村遊

閉戶苦無懣。行行不覺遙。人稀廢古井。水退築新橋。野店聽山雨。僧廚餽藥苗。湖中有高士。折簡恐難招。

吳歌

勝負兩蝸角。榮枯一蟻窠。人情苦翻覆。吾意欠蹉跎。困睡憑茶醒。衰顏賴酒酡。坐人能聽否。試爲若吳歌。

秋感

扶杖龍鍾迫耄期。江湖木落更堪悲。醉中光景似得志。夢裏朋儕如少時。落筆龍蛇仲蒙帖。茵圓器一字
仲業。滿懷風月季長詩。前朝名勝凋零盡。百歲關心只自知。

又

聖世優容許乞身。歸來猶幸齒齊民。漁家那有懸車地。蔬食何施祝饌人。獠婢臨溪漂衣絮。蠻童掃葉績
炊薪。生涯如此仍秋暮。賴是從來慣處貧。

紹興辛未至丙子六年間。予年方壯。每遇重九。多與一時名士登高於叢山。宇泰閣。距開禧丁卯
六十年。憂患契闊。何所不有。追數同遊諸公。乃無一人在者。而予猶強健。慘愴不能已。賦詩識
之。

故里登高接舊遊。卽今不計幾番秋。一樽尙與菊花醉。萬事不禁江水流。薄命雖多死閭巷。逢時亦有至
公侯。若論耄歲朱顏在。窮達皆嘗輸一籌。

結茅

結茅湖曲兩三間。客少柴荆盡日關。插架圖書娛晚暮。滿灘鷗鷺伴清閑。壁龕吳晉千年字。斷地得吳永
安晉太康中。古甌窻納秦瀟萬壘山。自怪堅頑推不倒。時來臨水照蒼顏。

老健

年垂九十身猶健。竹屋荆扉不厭低。挈榼自沽深巷酒。擁衾遙聽別村雞。家添豚柵還堪賦。路認牛欄每
不迷。惟恨窮秋開霽少。晚來小雨又成泥。

幽居卽事

壯歲本亡奇。頽齡又及斯。極知身有幾。惟是醉相宜。燒艸溫新犢。編籬護伏雌。謀生未忘念。笑語路傍兒。

又

晚日照茅茨。西風吹接籬。貧思止酒易。老悔養丹遲。斷地秋畦藥。焚香夜撰書。呼兒具舟楫。吾欲上湘漓。

秋晚書感

機象初心豈願才。溝中雖斷不須哀。吾生自信雲舒卷。客態誰論燕去來。夕露正看沾艸棘。晨霜已見落楸槐。老年閉戶真無憾。葑火更闌熟芋魁。

小市暮歸

愛酒行行訪市酤。醉中亦有穉孫扶。林梢殘葉吹都盡。煙際孤舟遠欲無。野餉每思羹苜蓿。旅炊猶得飯雕胡。青山在眼何時到。堪歎年來病滿軀。

寓歎

日夕羊牛下。月明烏鵲飛。林林皆有託。買獨安歸。疾痼方求藥。秋高未製衣。眠峨不遂隱。更恨昔謀非。

又

交世非初志。謀生又絕疎。家貧思辟穀。人忌悔知書。門異回軒巷。乘無禿尾驢。老頑君勿怪。萬事有乘除。

又

短髮不禁搔。紆悲賴濁醪。潦收溪瀨急。木落寺樓高。善飯餘何欠。看雲亦足豪。今朝有奇事。江浦得霜螯。

題僧菴

細路穿雲塢，危橋渡野塘。人稀土花碧，屋老瓦松長。憂患雙蓬鬢，裝資一布囊。燒薪藉餘暖，今夜有新霜。

哭季長

峴山剡曲各天涯，死籍前時偶脫遺。三徑就荒俱已老，一樽相屬永無期。寢門哀勵今何及，泉壤從遊後不疑。邂逅子孫能記此，交情應似兩翁時。

又

我荷鋤時君賜環，君歸我復造清班。無由促席暫握手，每得寄聲聊解顏。造物不令成老伴，著書猶喜在名山。季長晚著書數百卷，半年僅得陳蓴鱠。白首臨風涕自漉。

魔境作頗思遠適賦此自遣

夜夜燃燈旦旦香，修行老尙墮微茫。齋居自許塵心盡，遇事方知業力強。兩屨生雲入滌皖，孤舟載月上瀟湘。道人行李君毋笑，惟是著筒與藥囊。

枕上

窗紙蕭蕭印月痕，數聲新雁過江村。孤愁不與夢俱斷，羸老豈知身尙存。世事萬端歸蠹簡，秋風百感集清樽。荷鋤家圃知何憾，猶勝生求入玉門。

讀函詩

我讀函風七月篇，聖賢事事在陳編。豈惟王業方興日，要是淳風未散前。屈宋遺音今尙絕，咸韶古奏更

誰傳吾曹所學非章句。白髮青燈一泫然。

北窗

半世蟬嘶坐北窗。老年依舊守殘缸。買書安得黃金百。覓句如求白璧雙。老氣尚思吞夢澤。壯遊曾是釣巴江。寒生事業秋毫盡。筆力終慚鼎可扛。

小圃醉中作

搖落園林探借春。耄期詩酒肯輸人。狂時湖海猶嫌在。達處羲農亦未淳。木葉蔽身如盛服。藜羹加糝卽常珍。巢由尙隱唐虞代。漫道桃源可避秦。

秋冬之交雜賦

蓬戶終年閉。靈臺一事無。貧猶能自活。衰未藉人扶。兒學無歡異。孫啼有啓呱。東隣麴道士。折簡也能呼。

又

霽日收殘靄。微霜作早寒。桐凋無宿葉。水退出新灘。室小纔容膝。門低每觸冠。平生只此是。何物動憂端。

又

避俗嫌林淺。安貧覺屋寬。地爐燒葑火。土榻藉蒲團。稚子誇蓂糝。高僧輟芋殘。霜寒固難出。不怕笑蹒跚。

又

嶺下晨炊黍。津頭暮繫船。寒潮吞別浦。老木慘蒼煙。市徙新山步。耕侵古廟墀。閑人不蓄幘。散髮醉江天。

又

霧雨林塘晚。風霜聚落寒。衣冠存簡朴。農圃備艱難。春蠶麤供餌。蒸炊豆作團。此心如古井。無地起漣瀾。

又

碓舍臨寒水。漁舟弄夕暉。烏將九子過。雉挾兩雌飛。浮世萍無蒂。流年弩發機。常思南鄭日。縣驛跨驄歸。
漢中西縣村落。下臨灑水。景物頗似吾鄉。

海山

補落迦山訪舊游。菴摩勒果隘中州。秋濤無際明人眼。更作津亭半日留。

飲村酒

湘浦騷人詠。潒漓黃州飲。濕又增奇。紛紛坐客評。清濁我已昏。然睡不知。

觀諸將除書

百鍊剛非繞指柔。貂蟬要是出兜鍪。得官若使皆齊虜。對泣何疑效楚囚。

捫腹

身如椰子腹瓠壺。三畝荒園常荷鋤。著萬卷書雖不足。容數百人還有餘。

醉歌

卻日莫揮戈。君當聽我歌。花殘狂有限。酒熟悶無多。生理憑長鑱。幽情寄短蓑。江湖秋萬里。未死且婆娑。

自歎

惡殺常根食。安貧但緼袍。消搖敢言達。簡默本非高。入剡逢飛雪。遊吳看怒濤。平生笑漁父。苦語勸餽糟。

村翁

不入城門三歲餘，亦無車馬過吾廬。食常羹芋已忘肉，年迫蓋棺猶愛書。處處叩門尋醉叟，時時臨水看遊魚。半生名宦終何得，作箇村翁計未疎。

不寐

一竿江渚寄沉冥，衰疾侵凌失鬢青。困睡日中常欲閉，夜闌枕上卻惺惺。

書志

平生不喜作鵬搏，常伴寒螿語夜闌。一椀淖糜支日過，數椽破屋著身寬。衰殘雖已歎垂白，憂患未容侵渥丹。後五百年吾話在，笑君虛坐幾蒲團。

東偏紙閣初成

蚍蜉占雨解移穴，蟋蟀畏寒先近牀。我亦聯屏爲燠室，一冬省火又宜香。

小豎醉

漫道樽中酒不空，歌呼誰解和衰翁。可憐小豎如猿獾，卻有平陽吏舍風。

雜興

寸陰可惜子所知，尺宅治生今未遲。虛費年光作閑事，人間信有白頭癡。

又

堯舜桀紂皆腐骨，王侯螻螻同丘墟。麥苗覆塊鳩喚雨，常恨無人同荷鋤。

又
一春妍暖無多日。八十康強有幾人。學不名家空自苦。路邊醉倒卻關身。

又
詩人肝肺困雕鏤。往往壽非金石堅。我獨適情無傑句。化工不忌遣長年。

示兒孫輩

咎忝諸生後。初非一世豪。但希卿有秩。敢望郡功曹。敝版寧爲辱。扶犁亦足高。兒孫勿妄想。底處不徒勞。

雜賦

養疾清溪曲。風林幾著霜。細書如助嬾。薄酒不成狂。老歎朋儕盡。閒知歲月長。柴門偶一出。倚杖立斜陽。

又

孤學遠流俗。危機歷畏途。逢人增懍愴。看鏡失膚腴。閉戶書圍坐。移燈影向隅。空懷四方志。泯默死東吳。

又

家業貧原憲。年齡老伏生。但悲鸞獨舞。那羨雁能鳴。釀酒秋常醉。驅牛夜亦耕。此身當自貴。勿用作投瓊。

又

貴固不如賤。狂應未勝癡。閉門真已矣。命駕欲何之。碧縷生香袖。清漪漲硯池。是中有佳處。不覺晝陰移。

又

海上魚鹽聚。煙中雞犬聲。耕農叱牛去。醉叟策驢行。斂薄民差樂。烽消盜略平。悠然聽松下。我亦有幽情。

又

梳髮晨興後，寬腰午餉餘。講明窮理學，嘗校養生書。倚杖聽啼鳥，臨池看戲魚。怡然又終日，底事解愁予。

幽居

人間歲月苦駸駸，白首幽居不厭深。嬾愛舉杯成美睡，靜嫌對弈動機心。山村野渡雙芒屨，夜雪晨霜一布衾。不到匡廬三十載，夢攜中鉢上東林。

連日作陰頗有雨雪意

十分曆日過八九，徂歲迫人殊可驚。霜木蕭蕭臨古道，雪雲慘慘冒高城。山頭曉雀無生意，水面飢鷺有墮聲。剝歷新醅供旨蓄，從今次第問春耕。

山房

四紀移家刻曲傍，自茨生艸作山房。寒侵夜艾知霜重，行遍天涯覺夢長。戒婢無勞事釵澤，課奴相率補陂塘。無衣已免幽人歎，數箔春蠶歲有常。

梅市暮歸

老境惟閉門，不與事物接。時逢佳山水，尙復快登涉。山程策小蹇，水泛搖短楫。今茲稅駕地，佳事喜稠疊。雲生濕行縵，風細掠醉頰。旅羹芼玉糝，僧飯敷白氈。葑火煨芋魁，瓦甌炊豆莢。經行出幽圃，懷抱頗自壓。枯籬絡丹實，深澗堆黃葉。白雲橫谷口，綠篠穿山脇。還家寧迫暮，取路羞徑捷。何當倚蒲龕，一坐十小劫。

法雲寺

法雲古蘭若。西走錢塘路。帆影梅市橋。人語柯山聚。吾家昔爲隣。來往無晨暮。十世三百年。散徙非復故。修廊與廣殿。亦已化煙霧。經營久不倦。大體始略具。鐘魚以時鳴。軒檻有幽趣。中庭掃蕪穢。斷碣起顛仆。老我絕世緣。隨身惟兩屨。願言治北窗。寂寞同子住。

郊居

郊居本寡如。觸事自多感。況當搖落時。雲重天慘慘。路窮非通途。地偏無遠覽。殘蕪連古道。槁葉滿幽坎。老來厭了了。萬事付黠闇。地爐熾生柴。喚客烹薺糝。

作雪不成獨詠

淡日朝穿霧。濃雲夜護霜。風聲空浩蕩。雪意愈微茫。棗兒閑臨帖。銅爐靜炷香。悠然踐殘歲。不是傲羲皇。

聞雁

蜻蜒浦中聞雁聲。寒侵短褐客愁生。忽思大散關頭路。雪壓蒙氈夜下程。

泛舟至蜻蜒浦小泊漁村

醉泛蜻蜒浦。啞啞一榜聲。陂塘秋水瘦。墟落暮煙生。野店曾留醉。樵翁不記名。相逢雖惘惘。懷抱已先傾。散策門外隣。叟怪其瘦。

書警

八十衰翁力既窳。強扶藤杖出門前。朝晡待粥何勞歎。齒脫牙搖已數年。束帶接一客。伸紙報一書。未爲甚疲勞。已覺不枝梧。惟有袖手坐。儼然如齋居。尙懼精神衰。藥石以自扶。

又

情慾雖害人。要是自感溺。吾親日用事。飲食真勍敵。乃知七箸間。其禍甚衽席。堂堂六尺軀。勿爲口腹役。

園中

殘菊無復花。遊籛抱枯藁。我老復多疾。寄迹窮巷中。開門無客至。安取樽不空。夕陽掛高樹。此日還忽忽。

冬晴行園中

冬溫光景如春妍。暮年強健勝壯年。手推園門拂石坐。豈暇爲客思無甞。殘蕪未死更鬱鬱。晚菊欲槁猶鮮鮮。閑愁正得酒彈壓。此夕預知當熟眠。

又

桔槔灌蔬固已非。竹筧澆花宜見譏。杏繁梅瘦種性別。一氣生殺均天機。細推物理孰不爾。搏風未可嘲。卑飛君其置之且共酌。白酒方熟黃雞肥。

懷青城舊遊

宦途到處不黔突。惟有劍南糜歲月。屢遊老澤蒼玉嶂。疑是虛皇白銀闕。松肪擣麩具晨餐。擲葉作衣勝短褐。泥飲不容繁杏落。浩歌常送寒蟬沒。水邊洞口適有遇。握手一言換凡骨。少陵老子未識真。欲倚黃精除白髮。

晚立

倦憑小豎立柴門。殘角疎鐘欲斷魂。傷雁養翎依荻浦。渡牛浮鼻望煙村。壯心已覺隨年往。孤學何由與

俗論數點雨聲催返舍。小窗燈火對壺殮。

志喜

雪鬢蕭蕭九十翁。短檠猶喜策新功。斲輪自得傳處。治水本行無事中。山市兒童隨小卷。江村煙雨宿孤蓬。更知衰疾從今減。萬里塵清蜀藥通。

窮居

仕宦初何得。窮居半土農。清宵叔夜鍛。平日伯鸞舂。馬磨猶支日。牛衣亦過冬。湖中有嘯父。何計得相從。
湖中隱士。月夜棹舟。其疾如飛。並湖有聞其嘯歌者。

冬暖園中萱艸蒼然。海棠亦著花。可愛作路浚。井皆近事也。

暖景變嚴冬。誰知造化功。少留萱艸綠。探借海棠紅。築路橫塘北。疏泉小嶺東。欣然得佳處。忘卻歲將窮。

卽事示兒輩

今歲霜遲殊未寒。籬東烏柏葉纔丹。病輕漸喜免求藥。老甚難誇能據鞍。隣舍僧貧分米少。酒坊人熟督錢寬。晚來笑向兒孫說。且得無生一話圓。

小雨頗寒

冬溫初喜一寒新。紙閣磚爐養病身。殘雨已收猶點滴。斷雲欲散更輪囷。衣裳可典寧留箇。口腹雖饑肯累人。一事明朝差似樂。探梅閑岸接羅巾。

題舍壁

身寄瓜牛廬。手持科斗書。尚憎鷺懸棧。肯羨鶴乘車。富貴何加我。山林亦宴如。年來常去殺。不歎食無魚。

又

神沒孔明廬。塵流倚相書。家居四立壁。出駕獨轎車。窮達本無擇。死生良自如。鏡湖三百里。處處侶禽魚。

仲冬書事

邊頭無警少鈴聲。病得新霜亦已平。赤脚聽蛩勤夜績。蒼頭租犢待冬耕。發奩雙兔駢頭臥。溢棹芳醪徹底清。里巷紛紛誇節物。春盤儼鼓漸關情。

醉舞

渭城朝雨不須歌。爛醉江頭舞短裘。自是先生眼根鈍。天狐伎倆本無多。

思蜀

白帝城邊八陣碛。青城山下丈人祠。英雄不生僊又去。零落艸間多折碑。

又

蜀莊鳴飛隘九區。超然豈止山澤癯。荒臺古井無處所。行子但覓房公湖。

次韻李季章參政哭其夫人

飛蓋傳呼入省門。依然殘夢浣花村。遙知最是傷心處。衫袂猶霑掃黛痕。

又

焚香黃閣退朝歸。道話時時正要提。九十老翁緣底健。一生強半是單栖。

又
萬里氈車入鳳城。豈知遽已迫斜曛。似聞後院思遺愛。掩淚人人說小君。

又
佛供齋僧冀萬分。幽明路絕竟難論。若爲可慰重泉念。觸事平心無怨恩。

又
煮蒿一去杳難知。數紙遺書手自披。切勿輕爲歸蜀夢。竹枝忍復聽吾伊。

又
害道無如狗愛噴。養生尤要畜精神。祝公少置空閨憶。天下安危在此身。

又
富貴思歸豈坐迂。峴山種芋已成區。獨歸它日公無憾。天際煙帆與石俱。李公買石甚富。將載以歸。

試筆

人間元無第一手。萬事端如屈伸肘。但能看破即超然。何代商山無四叟。老民自視中何有。傾身經營一杯酒。此外管城差可人。相從且作明窗友。

屠希筆

屠希一筆價必千。紹興初載海內傳。高皇愛賞登玉几。求書蚤暮常差肩。一朝希死子孫弱。歲久僅可售百錢。宣城晉陵競聲價。外雖甚飾中枵然。嗚呼世事每如此。使我太息中夕眠。

寒夜吟

仕宦孰不願美官。無如兩膊聳聳寒。可憐誤信紙上語。至死功名心未闌。飢餓得倚門。矍鑠猶據鞍。何如百年中。盡付一漁竿。布襦可以度雪夕。麥飯可以支朝餐。但知禪龜著身穩。莫和詩人行路難。

記夢

衣紳飄舉髮颺隨。一鶴聊爲太華遊。每過名山思小憩。天風浩浩不容留。

霜夜

月淡霜清夜漏遲。疎鐘杳杳度南陂。燈殘有恨欲誰語。雞老無聲如我衰。使入蜀川方在道。書傳淮浦定何時。若爲可遣閑愁得。獨擁寒爐煮豆箕。時方附蜀中便舟寄書張季長家又未得古齋書每開懷。

又

土牀紙帳臥幽寂。枕上細聽城上更。檣柝燒殘地爐冷。嗚呼聲斷天窗明。風霜欲透茅茨屋。鹽酪不下齋糲羹。猶恨扶犁老無力。向來枉是請躬耕。

歲暮

歲暮風霜慘。村深艸棘稠。力衰行每蹇。衣薄鼻多飢。久矣當長往。悠然尙小留。兒童報炊熟。得飽且忘憂。

與野人散策門外

春意侵寒律。川雲結夕陰。閑人了無事。隣叟偶相尋。廢沼萍黏塊。孤村雀滿林。世間真夢耳。何物可關心。

十一月十一日夜聞雨聲

入冬殊未寒。塵土冒原野。溝溪但枯涸。不聞清湍瀉。今夕復何夕。急雨鳴屋瓦。豈惟宿麥長。分喜到菜把。明朝開衡門。想見泥濺蹀。豐年儻可期。擊壤歌幽雅。

自述

怡然氣貌漸還嬰。淡飯麤裘過此生。儘道無方能縮地。夢中夜夜上青城。

又

齒脆復牢能咀嚼。足孳漸愈可跣跣。短檠非復衰翁事。且與兒孫共地爐。

歲暮老懷

粥美忘流歡。燈孤伴獨吟。衾寒知夜艾。身痛卜天陰。薪炭常憂絕。杯觴不厭深。故人今已矣。三歎有遺音。
謂季長也。

書況

垂白渭南叟。深居湖上村。貧知蔬食美。閑覺布衣尊。琴譜從僧借。茶經與客論。探梅來直步。沽酒到偏門。細織籠安鶴。頻求果飼猿。舊書編未絕。猶足教諸孫。

陸放翁集

劍南詩彙

卷第七十四

書道室壁

餘生天地一飛蓬。學道年來似有功。習氣掃除空劫外。精神深雪隱書中。種瓜谿父時時見。賣藥壺公處處同。莫謂與人緣苦薄。相隨拍手有兒童。

書志

蓬矢桑弧射四方。豈知垂老臥江鄉。讀書雖復具隻眼。貯酒其如無別腸。疋馬揚鞭遊鄴杜。扁舟捩柂上瀟湘。自悲此志俱難豁。且復狂歌破夜長。

雪夕

目視曠曠左耳聾。吾衰略與昔人同。移燈自看玲瓏影。取酒時澆磊砢胸。東郭稍能師順子。北山未敢笑愚公。空村雪虐風饕夜。袖手悠然政策功。

書枕屏

西域兜羅被。南番篤耨香。慣眠三丈日。不識五更霜。

又

陸放翁集 二十一 劍南詩彙 卷七十四

心若冰將釋，貌如兒未孩。青城上官叟，時入夢中來。

又

甘菊縫爲枕，疎梅畫作屏。改詩眠未穩，開雪醉初醒。

又

星斗闌干曉，窗扉曬曉明。金門與茅店，一種是雞聲。

二友

剩儲名酒待梅開，淨掃虛窗候月來。老子幽居得二友，人間萬事信悠悠。

寄五郎兼示十五郎

八十九老可驚，白髮森然憎鏡明。身當遊宦尙少駐，書欲藏山殊未成。大兒爲國成絕塞，季子伴翁親短檠。古人已矣不可作，夜闌撫几歎平生。

鄰曲相過

鄰曲集山家，相看一笑譁。扶行足蹠蹠，半落齒槎牙。農圃乖生理，風霜感歲華。老來情話少，更盡此甌茶。

東窗

臘近寒何薄，秋衣著尙宜。年光祈雪見，節物賣燈知。川日初沈後，樓鐘欲動時。東窗對兒子，更與細論詩。

曉寒

落月銜山口，澹霜倒菊叢。青氈壓衾暖，熨火滿爐紅。起晚書虧課，愁多酒策功。杜陵如昔否，誰與問征鴻。

小雪

簷飛數片雪。瓶插一枝梅。童子敲清磬。先生入定回。

書感

夢裏逢無咎。天涯哭季長。吾生亦有幾。且復釣滄浪。

家釀頗勁戲作

千古英雄骨作塵。不如一醉卻關身。鼎來雖恨王陵贖。熟味方知孟子醇。試問浩歌遺世事。何如酣枕養天真。竹林嵇阮雖名勝。要是淵明最可人。

食齋糝甚美蓋蜀人所謂東坡羹也

齋糝芳甘妙絕倫。啜來恍若在峨眉。尊羹下豉知難敵。牛乳抨酥亦未珍。異味頗思修淨供。祕方常惜授廚人。午窗自撫膨脝腹。好住煙村莫厭貧。

雜興

鋤草春愈茂。養草秋亦衰。不如兩置之。榮悴渠有時。

又

栖雞未旦鳴。粒食固宜報。林鳥何預人。曉曉欲誰告。

又

碩果墜池響。魚隊散無迹。空弦可落雁。此事蓋自昔。

又
齋硯欲其潔。磨鏡欲其明。願君試思之。與己孰重輕。

幽情

免歸又破六年閑。每寄幽情煙水間。清鏡不藏新白髮。芳樽猶惜舊朱顏。一編蠹簡心空在。百瓮寒蠶債未還。莫爲眠峨勞夢想。故鄉隨分有名山。

醉歌

不癡不聾不作翁。平生與世馬牛風。無材無德癡頑老。爾來對客惟稱好。相風使帆第一籌。隨風倒柁更何憂。亦不求作佛。亦不願封侯。亦不須脫裘去換酒。亦不須賣劍來買牛。甲第從渠壓梁肉。貂蟬本自出兜鍪。變理陰陽豈不好。纔得閑管晴雨如鶉鳩。辛苦築壘拂雲祠。不如吟歎風月登高樓。爾作楚舞吾齊謳。身安意適死即休。

霜冷

梅花消息動江邊。漸見新春換故年。莫道孤翁心似鐵。友來霜令透青氈。

讀書雜言

書亦何用於世哉。聖人之言如造化。巍巍地闢而天開。淵源虞唐至周孔。黃河萬里崑崙來。天不使諸儒爲戰國血。又不使六藝爲亡秦灰。豁如巨擘見曠日。快若鸞聒聞春雷。插空秦華起突兀。垂天雲漢森昭回。奈何後世獨不省。願捨夷路趨邛邲。不知開眼蹈覆轍。乃欲歸罪車輪摧。福有基。禍有胎。一朝產禍吁。

可哀。

東嶺

雲罽漏斜日。駕言東嶺行。鴉翻半天黑。鸞起一川明。小立照潭水。欲歸聞角聲。君看浮世事。何處異棋枰。

雪戒

我幼事父師。熟聞忠厚言。治身接物間。要使如春溫。鞭朴不可弛。此語實少恩。但能交相愛。餘亦何足論。家貧賴奴婢。炊汲與應門。餘力具茗藥。夕飯或至昏。有過尙當寬。况可使頽冤。出仕推此心。所樂在平反。寧坐輓弱廢。促歸駕丘園。吾老死無日。作詩遺子孫。

書齋壁

煙水雲山千萬重。散人名號繼吾宗。買雞養沈中尊。合子說。茂。區。蓋。公。父。老。年。年。同。社。酒。兒。孫。世。世。作。春農。晚窗睡覺添幽事。臥聽蘭亭古寺鐘。

雪意

風吼江郊雪意濃。雲如兩陣決雌雄。山寒酒過平時量。窗黑書虧半日功。閑話更端茶竈熟。清詩分韻地爐紅。不須遽覓華胥路。更俟天花落坐中。

山房

何處合題詩。山房病起時。晨光鳥先覺。春信柳偏知。陋學勤何益。虛名悔可追。布衾新絮暖。惟與睡相宜。

晨起

勸業文章謝不能。生涯分付一枝藤。身同湘浦孤舟客。心羨廬山下版僧。倦枕厭聞窗外雨。殘膏猶在壁間燈。草芝要及清晨服。深媿蠻童爲扣冰。草芝丹眉山史載之舉士方。

兩雁

兩雁東西來。合羣以南翔。鏡湖接天台。海闊天茫茫。冥飛遠縵弋。長路踏冰霜。君看此氣象。豈復謀稻粱。正爾下杜陵。已復掠瀟湘。超遙萬里程。燕雀安能量。

書文稿後

上蔡牽黃犬。丹徒作布衣。苦言誰解聽。臨禍始知非。

題唐執中書樓

吾州唐子他州無。閉戶徧讀家藏書。志氣頗聞已山立。神仙固自多樓居。終日坐忘對熊几。自侍出遊騎蹇驢。人生如此自可爾。勿羨新貴高門閭。

歲晚

雲暗郊原雪意稠。天公似欲富來甦。布衾歲久真如鐵。詎敢私懷一己憂。

又

不學空門不學仙。端居胸次自超然。絳人甲子君休問。新歲吾兒本命年。

又

戒殺家庖罷饋魚。病脾亦復禁寒蔬。莫慚鄰里嘲枯淡。出餽香粳玉不如。

又

小岫嶙峋炷寶熏。卷書閑對一窗雲。雁聲忽向天邊過。起立中庭看斷羣。

又

小塢梅開十二三。曲塘冰綻水如藍。兒童鬪采春盤料。蓼茁芹芽欲滿籃。

又

久矣功名不上心。亦無心要老山林。鹿門采藥悠然去。千載龐公是賞音。

雀啄粟

坡頭車敗雀啄粟。桑下餉來烏攫肉。乘時投隙自謂才。苟得未必爲汝福。忍飢蓬蒿固亦難。要是少遠彈射辱。老農輟耒爲汝悲。豈信江湖有鴻鵠。

老翁

老翁睡少知遙夜。貧士衾單怯苦寒。閭裏不嫌村酒薄。瘦來偏覺舊衣寬。籬門遇健時能出。書卷乘閑亦取看。深愧野人憐寂寞。放鋤相喚共朝餐。

寄子虞

人生恨無年。我老已爛熟。退耕鏡湖上。風雨有茅屋。事君闕補報。得此不啻足。餘年尙幾何。孀嫗風中燭。大兒戍塞垣。馳馬佩矢箠。去家千餘里。辛苦就微祿。書來續三紙。語悲不忍讀。適弟在我傍。亦復淚盈目。門戶嗟日衰。持守賴家督。雪雲暗淮天。念汝方露宿。

雜詠

少日狂疎觸怒嗔。每緣憂患喪吾真。晚收咄咄書空手。卻作騰騰任運人。

又

得過一日且一日。安知今吾非故吾。衰手明窗讀周易。不辜香餌一齋盂。

又

松防燎火滿爐紅。粟粟煎湯到手空。試問齋居守丹竈。何如醉臥聽松風。

又

舊聞五岳多靈藥。晚遇高人得祕文。夢境此身常是客。幾時歸臥華山雲。

曉起折梅

織女斜河漏已殘。長庚配月夜將闌。小橋幽徑無人見。折得梅花伴曉寒。

累日濃雲作雪不成。遂有春意。

釀雪經旬竟不成。一霜卻作十分晴。雲歸岫穴千峯立。暖入郊原萬耦耕。莖葉離離豐歲候。梅花眷眷故人情。道傍孤店新醅熟。已有幽禽一兩聲。

晚晴出行近村閑詠景物

雪雲吹盡木陰移。正是先生曳杖時。老特行將新長犢。空桑臥出寄生枝。醫翁暮過囊探藥。筮叟晨占手布蓍。誰謂人間足憂患。未妨古俗自熙熙。

道室戲詠

道身隱太華，壯歲客青城。采藥何辭遠，燒丹久未成。傳生已醉死，韓子得狂名。猶有殘詩在，他年遺後生。

書感

人生百憂坐一官，况與羣飛接羽翰。兩具吳牛給耕足，三間茅屋著身寬。烹蒿悽愴會不免，簡儉寂默差可安。康莊坦坦不整駕，可憐平地生澆瀾。

又

舞非得譜拍拍錯，行未知津步步危。刳石消磨會當盡，太行突兀乃可移。清晨瓦釜煮藜粥，遙夜地爐燒豆萁。此中正自有佳處，區區外慕寧非癡。

又

茅檐住穩勝華屋，芋糝味甘如大烹。靜觀萬事付一默，掃空白髮非黃精。丈人祠西鶴傳信，小姑山前鼉報更。興闌卻揮短棹去，曉渡清伊聽玉笙。

臘月

今冬少霜雪，臘月厭重裘。漸動園林興，頓寬薪炭憂。山陂泉脈活，村市柳枝柔。春甦吾何患，嘉蔬日可求。

雪作

今年冬暖異常時，造物收功乃爾奇。平野忽看吹雪片，清池俄復結冰澌。飛蝗掃地無遺種，瑞麥連雲有兩歧。想見市樓增酒價，深居袖手歎吾衰。

卽事

雲本無心木不材。平生得喪信悠哉。釣魚每過桐江宿。賣藥新從剡縣回。山圃萬蔓晨灌溉。地爐芋栗夜燼煨。人情萬變吾何預。笑口何妨處處開。

或遺以兩大瓢。因寓物外興。

糲葉爲衣草結廬。生涯正付兩葫蘆。名山歷徧家何有。塵念空來夢欲無。野鶴巢雲元自瘦。澗松埋雪定非枯。悠然但覓高樓醉。何處人間無酒徒。

歲未盡前數日偶題長句

老向人間迹轉孤。參差煙火出菰蒲。數畦綠菜寒猶茁。一勺清泉手自斟。穀賤窺籬無狗盜。夜長暖足有狸奴。歲闌更喜人強健。小草書成鬱壘符。

又

短褐蕭蕭一幅巾。明時乞與水雲身。平生不售屠龍技。投老真爲種菜人。釜粥芬香餉鄰父。闌豬豐腴祭家神。聯翩節物驚人眼。鼙鼓停撾又見春。臘月八日。以粥相餽。北俗也。蜀人豢豬供祭。謂之歲豬。

又

枅欄小弁野人裝。八十三年舊話長。真笑形骸無藉在。本知生世不牢強。茅檐啼鳥初相命。煙渚歸鴻漸著行。想得城中盛冠蓋。家家來往薦椒觴。

又

風號四野雲如墨，徂歲消磨不滿旬。瑞雪便應平地尺，野梅又報一年春。長河斷渡冰將合，古寺題詩手爲皴。僵臥閉門行路絕，安知今代獨無人。

又

漸近新年日愈長，不辭扶病舉椒觴。了無一事干靈府，只合終身住醉鄉。鬪釘春盤兒女喜，攜糲藥婢奴忙。蜀州白首猶癡絕，更爲梅花賦斷腸。

余得蘆竹拄杖於舍傍民家，似蘆堅勁，輕滑色如栗玉，入手錯然微有聲。它杖莫及作五字唐律記之。

八十四吟

輕堅蘆竹杖，入用自龜堂。挺節冰霜後，論交歲月長。心空無寵辱，時異有行藏。老病登臨少，何妨日倚牀。

又

新歲八十四，自宜形影孤。睡憑書檜相，愁賴酒枝梧。兒問離騷字，僧傳本草圖。執言生計薄，種芋已成區。

歲暮

七十人稀到，吾過十四年。交遊無輩行，懷抱有曾玄。飲敵騎鯨客，行追縮地仙。城南春事動，小蹇又翩翩。

又

書房儻得蝸廬樣，僅僅能容老病身。紙被蒙頭方坐穩，卻愁轉眼又新春。

陸放翁集 二十一 劍南詩集 卷七十四

十一

又

挹泉石鼎煎崖蜜。候火銅爐炷海沈。一坐便應論十劫。不知歲月去駸駸。

又

久衰豈是見人時。健忘偏于養性宜。噉飯著衣常苦癯。爲誰欲理一團絲。

又

燕脂斑出古銅鼎。彈子窩深湖石山。老去柴門誰復過。天教二友伴清閑。

又

少慕浮名百種癡。老知世事盡兒嬉。從今春困不須賣。睡到日高三丈時。

書感

襁負客淮穎。鬢髦逢亂離。中原遂乖隔。北望每傷悲。泛渭題新賦。遊嵩續舊詩。死生雖異世。此意未應移。

書適

細讀養生主。長歌歸去來。山僧借水品。溪父送琴材。病退稀求藥。身閑日探梅。今宵喜無寐。曉下有書回。

學道

學道知專氣。尊生得養形。精神生尺宅。虛白集中扃。出岫孤雲靜。凌霜老柏青。晨興取澗水。漱齒讀黃庭。

冊中作

東浦菰蒲合，南莊桑柘繁。皆村落名。潮生無斷港，寺廢有頽垣。糴米尋山步，移舟泊水村。野人多舊識，相對兩無言。

得蜀信

齒髮凋零志氣衰，強臨尊酒祇成悲。少年半是投閑日，春事常當臥病時。憂患頗疑書作祟，功名不似老如期。青城舊友頻相約，歸養金丹尙未遲。

送蘇趙叟赴省試

關路誰非觀國賓，此君肝膽獨輪囷。故家遺俗欲墜地，博士議郎方要人。久矣扁舟弄江月，往哉駿馬踏京塵。勅中墨色如鴉溼，日待東歸一笑新。

新春感事八首終篇因以自解

九陌風和不起塵，平湖冰解欲生鱗。往來朝暮紛如蟻，得見新春有幾人。

又

興來遊衍不辭遙，吹帽風輕過畫橋。猩血未看開露蕊，麴塵先已上煙條。

又

一年最好早春天，風日初和未脫綿。坎坎圓聲養神社，翩翩小繖下湖船。

又

憶到夔門正月初，竹枝歌舞擁肩輿。當時光景應如昨，綠鬢治中八十餘。夔府。

又

錦城舊事不堪論。回首繁華欲斷魂。繡轂金羈三十里。至今猶夢小東門。

又

玻璃江上柳如絲。行樂家家要及時。只怪今朝空巷出。使君人日宴藝頤眉州。

又

梁州陌上女成羣。銅綠春衫罽畫裙。相喚遊家園裏去。鞦韆高挂欲侵雲。興元。

又

烏藤卽是碧油幢。百萬天魔指顧降。酣枕不知霜縞瓦。下牀已見日烘窗。

自歎

晨興袖手觀空寂。飯罷寬腰習按摩。堪歎一生閑日月。爲身時少爲人多。

初春

春入陂湖已折冰。流年誰解繫長繩。土膏動後麥苗長。桑眼綻來蠶事興。稅足了無徵欠吏。飯香時有乞

齋僧。開正父老頻占候。已決今年百稼登。

又

漠漠春寒罷對棋。霏霏春雨卻催詩。梅花一樹映疎竹。茅屋三間圍短籬。醉倒幸無官長罵。出遊自有老

人期。年光滿眼吾何憾。又近吳蠶浴種時。

簡傅十八官漢璣

朋舊凋零盡，新交得雋人。文章諧律呂，議論足精神。甚欲邀聯騎，無如困負薪。蘭亭修禊近，爲記永和春。

開歲愈貧戲詠

謝事貧過筮，仕初歸裝僅。有一柴車，筒衣盡典，仍耽酒。困米無炊，尙買書。澗底飽觀苗鬱鬱，夢中聊喜蝶。遼遼商山幾許功名事，老子如今卻笑渠。

戊辰立春日

昨夜風搖斗柄回，典衣也復一傳盃。故人久作天涯別，新句空從枕上來。清鏡豈堪看鬢色，小園剩欲覓桃栽。頽然卻恨貪春睡，不盡城頭畫角哀。

又

臥聽城門出土牛，羅旛應笑雪蒙頭。但須晨起一卮酒，聊洗人間千種愁。處處樓臺多俠客，家家船舫待春遊。梅花未徧枝南北，定爲餘寒得小留。

早春出遊

地爐久厭撥寒灰，一笑真成病眼開。不恨城笳催日落，且欣巷柳報春回。寒驢破帽人人看，南陌東阡處處來。聞道禹祠遊漸盛，也謀隨例一持盃。

春寒

故歲無多雪，新春乃爾寒。柴車歸里社，茅舍老江干。客熱沾鷓啜，孫癡索飯搏。更憐菘芥長，殊勝仰園官。

園居

欲出還中止。微陰卻夾晴。藍花棧蓋活。籠鳥教初成。身寄江湖久。心知富貴輕。還嬰吾所證。手自寫菴名。
近名小室曰還嬰。

郊行

山色埽石黛。江流漲麴塵。春晴不終日。老病動經旬。竹密有啼鳥。村深多醉人。東阡與南陌。處處寄閒身。

野望

偶攜一小豎。徒倚望南山。船笛爲誰怨。溪雲如我閑。洲長歸雁下。天迴暮鴉還。安得一竿去。終年煙水間。

又

日高霜漸釋。睡起髮猶蓬。小圃經行外。新蔬檢校中。水開聞躍鯉。天遠看飛鴻。粥熟還歸舍。吾生亦未窮。

午坐

茶盃凝細乳。香艸起微雲。樹影窗間見。禽聲屋角聞。流年易拋擲。舊學失鋤耘。師友今零落。何人爲運斤。

卷第七十五

自警

生世如夢境。淹速無定時。少壯不可恃。况汝迫耆期。五官及百骸。自揣日益衰。客來能送迎。要是強支持。百口皆新人。所至無舊知。紹興同朝者。掃地靡復遺。雖云窮耐久。造物豈汝私。餘日真幾何。得酒且伸眉。

春雨

春陰不肯晴。春雨斷人行。慘澹柴荆色。蕭條雞犬聲。香分豆子粥。美啜芋魁羹。猶勝梁州路。蒙氍夜下程。

春寒

冉冉年華過上元。梅花如雪照江村。雲歸翠竇初收雨。人怕清寒懶出門。香燼已殘爐未冷。客談方劇酒重溫。尙嫌塵境妨幽致。過埭船聲暮正喧。湖桑埭去路。廬里許。

日喜

了了復惺惺。著龜未是靈。閑中有富貴。壽外更康寧。身備鄉三老。家傳子一經。春回元不記。出戶四山青。

又

身寄人間世。心常古鏡如。喚醒狂蝶夢。掃盡老狐書。年出鄉閭右。貧過仕宦初。村村是桃李。豈獨愛吾廬。

簡湖中隱者

夫子終年醉不醒。若爲問我故丁寧。書因遣僕馱黃蘗。詩許登山斲茯苓。嗜昔但知悲驢老。卽今誰不羨鴻冥。清宵定許敲門否。擬問黃庭兩卷經。

短歌示諸稚

流年去不還。老狀來無那。雖甚顏原貧。尙勝夷齊餓。再歸又六年。疲馬欣解馱。姑幸簞罄空。敢復希豆莖。好山懶出遊。敗屋得偃臥。飢能儲粟盎。病亦有藥裹。酒蟻溢罇罍。茗雪落小甌。香火失惰偷。編簡謹程課。豈惟洗幻妄。亦以起衰憊。向來名宦事。回首如棄唾。義理開諸孫。閑閱待其大。賢愚未易知。尙冀得一個。

如其盡爲農，亦未可弔賀。歸耕豈不佳，努力求寡過。

王子猷謂竹爲此君白樂天謂酒爲此君余野處無客每對竹獨酌得小詩

新種疎篁對小軒，旋沽薄酒實空尊。門無車轍亦何恨，有此兩君堪與言。

會稽行

我欲遊蓬壺，安得身插羽。我欲隱嵩華，歎息非吾土。會稽多名山，開跡自往古。豈惟頌刻秦，乃有廟祀禹。山形舞鸞鳳，泉脈流鍾乳。家家富水竹，處處生蘭杜。方舟泛曹娥，健席拂天姥。朱樓入煙霄，白塔臨雲雨。修梁看龍化，遺箭遺鶴取。茶薺可作經，楊梅亦著譜。湖尊山巖壑，一一難遽數。終年遊不厭，冰玉生肺腑。誦詩有樵童，乞字到俚嫗。况復青青衿，盛不減鄒魯。古詩三千篇，安知闕吳楚。土風聊補亡，吾言豈夸翫。

野飲

春雨行路難，春寒客衣薄。客衣薄尚可，泥深畏驢弱。溪橋有孤店，村酒亦可酌。彘此小甌炊，丹柿青篾絡。人生愛患窟，駭機日夜作。野飲君勿輕，名宦無此樂。

作野飲詩後一日復作此篇反之

世事如海沙，巧曆不能數。身居憂患中，殆若墮窵虎。又如住敗屋，岌岌日撐拄。中夜風雨至，摧壓固其所。孰能知其然，徙義以爲主。要于一念間，不敢欺仰俯。兢兢日三省，寧可自莽鹵。君看昔先師，乃媿不若禹。

春晴

雨斷雲歸兩作晴，夕陽鼓角動高城。客愁正得酒排去，草色直疑煙染成。鶯爲風和初命友，鷓綠水長飲

尋盟不須苦問春深淺。陌上吹簫已賣餉。

又

常年春日少春晴。拂面今朝暖吹輕。水閣家家橫小舫。園亭處處聽新鶯。桃花不管詩人老。菖葉空催野叟耕。自笑此生餘幾許。銅駝荆棘尙關情。

遣興

莫笑龜堂確碗胸。此中元可貯虛空。尙饒靈運先成佛。那計辛毗不作公。采藥偶逢丹井客。買蓑因過玉霄翁。不須更問歸何許。散髮飄然萬里風。

又

我是仙蓬舊主人。一生常得自由身。退歸自合稱山長。變化猶應侍帝晨。得酒不妨開口笑。學人難作捧心顰。塵中且復隨緣住。又見湖邊草木新。

開歲屢作雨不成。正月二十六日夜乃得雨。明日行家園有賦。

東風催雨破天擘。行圃歸來剩解顏。百草吹香蝴蝶鬧。一溪漲綠鷺鷥閑。老來每歎論心少。貧甚方知覓醉艱。猶賴籃輿無恙在。呼兒結束入南山。

書屋壁

築室鏡湖濱。于今四十春。放生魚自樂。施食鳥常馴。土潤觀鋤藥。燈清論養真。桃源處處有。不獨武陵人。

又

鳥道經行穩。巢居臥起寬。鹿衣裁短褐。龜屋製危冠。舊幕嵒中散。今師靖長官。蛟龍雲雨上。未必勝泥蟠。

與兒孫同舟泛湖至西山旁憩酒家遂遊任氏茅菴而歸

過埭維舟古柳根。卻扶拄杖入煙村。印泥接迹牛羊過。投宿爭林鳥雀喧。酒保殷勤邀淪茗。道翁僿儂出迎門。郊居不與人間事。惟有耕桑得細論。

日暮自大滙村歸

筍輿伊軋暮山昏。水敗陂塘路僅存。出谷鐘聲知過寺。隔林人語喜逢村。廟壩荒寂新犁地。堤草淒迷舊燒痕。兒子念翁霜露冷。遙持炬火出柴門。

八十四吟

八十仍逾四。遲留未告行。箴言災退散。醫脈和平耕。牧猶能力。癡頑每自驚。所嗟經學廢。心媿濟南生。

晚步至湖上

柴車無與駕。篷艇亦須人。賴有拄杖子。能扶羸病身。雲山翠屏合。煙月玉鉤新。蕭散湖塘路。微風吹葛巾。

春陰

窗昏不見字。今日罷觀書。迹寄浮生內。心遊曠劫初。太山均蟻垤。聖域亦蘧廬。兀坐還成倦。荒畦去荷鋤。

題野店壁

斷橐投衣囊。殘壺挂馬鞍。寺荒尋店久。橋敗涉溪寒。道里逢人問。題名拂壁看。平生慣行役。隨處得加餐。

題寺壁

菴居渾似罷參僧。除卻癡愁百不能。意倦有時憑曲几。興來隨處曳枯藤。雲山直去寧須伴。薜磴高攀不計層。聞道鷓鴣天欲雨。松門小住看雲興。

題幽居壁

青山四抱路盤紆。天與先生卜草廬。雲冷數聲聞斷雁。溪清百尺見遊魚。新醪薄薄閑尋醉。殘髮蕭蕭悶憶梳。莫謂躬耕便無事。百年京洛尙丘墟。

又

聲利場中偶解圍。悠然高枕謝招揮。山前曳杖尋僧去。林下收茶送客歸。城市氛埃那許到。比鄰煙火自相依。纓冠束帶前身事。散髮今惟勃落衣。

思夔州

老來百念盡消磨。無奈雲安入夢何。壯憶公孫劍器舞。愁思賓客竹枝歌。

又

武侯八陣孫吳法。工部十詩韶護音。遺蹟故祠春草合。略無人解兩公心。

梅開絕晚有感

年年踏雪探梅開。二月今年始見梅。從此逢春心轉懶。小詩不擬覓花栽。

又

尋梅不負雪中期。醉倒猶須插一枝。莫諱衰遲殺風景。卷中今歲欠梅詩。

園中晚飯示兒子

一飽何心慕萬鍾。小園父子自相從。蚍蜉布陣雨將作。蛟螭成團春已濃。潤底束薪供晚爨。街頭糴米續晨舂。盤餐莫恨無兼味。自繞荒畦摘芥菘。

自詰

修行力量淺。觸事常寡。端居本無事。奈此百憂攻。今晨默自詰。世豈不汝容。漱濯臨清流。歡歌蔭長松。緩步有夷途。遠眺多奇峯。野叟時相尋。村酒亦自釀。于道忽少進。一掃芥蒂胸。轉釜本常情。寧說飯後鐘。

野飲

農事未興思一笑。春薺可采魚可釣。霏霏小雨忽已晴。堤上相攜踏殘照。村場酒薄亦有力。把醴相娛不辭醜。眼花耳熱言語多。霍然已醒如過燒。人生百年會有盡。世事萬變誰能料。酒空人散寂無聲。爲君試作蘇門嘯。

茆亭

讀罷楞伽四卷經。其餘終日坐茆亭。靜聽溪碓春雲母。細斲松根采茯苓。大道粗嘗聞海若。高情未至媿山靈。寒泉新渌甘于乳。晨起何妨挈半瓶。

身世

身世飄然似斷雲。時人誤許與斯文。旋償碑債動千里。強理詩情無一分。子美舊悲殘酒炙。幼安今老白襦裙。餘生自喜渾無事。清夜銅爐炷寶熏。

家有兩瓢分貯酒藥出則使一童負之戲賦五字句

長物消磨盡。猶存兩大瓢。藥能扶困憊。酒可沃枯焦。童負來山店。人看度野橋。畫工殊好事。傳寫入生綃。

禹寺

禹寺荒殘鐘鼓在。我來又見物華新。紹興年上會題壁。觀者多疑是古人。

旅遊

壯志蹉跎雪滿頭。久將餘日付滄洲。閑雲不入老人夢。鄰笛似知孤客愁。小築聊須傍蘭渚。片帆那復到樟樓。生涯草草真堪笑。三十年來一破裘。

又

本自無心落市朝。不妨隨處狎漁樵。螺青點出暮山色。石綠染成春浦潮。縣驛下時人語鬧。寺樓倚處客魂消。流年不貸君知否。素扇團團又可搖。

貧歎

貧到今年極。蕭然四壁家。弊袍生蟻蝨。粗飯雜泥沙。浩浩乾坤大。茫茫歲月賒。故鄉煙水窟。別擬卜生涯。

東窗

九折危途寸步艱。至今回首向心寒。元來自有安身處。茆屋三間似海寬。

又

才薄常爲世俗輕。還山力不給躬耕。卽今贏得都無事。袖手東窗聽雨聲。

又 俗事紛紛意不據。兀如頭垢念爬梳。東窗且復焚香坐。閑看微雲自卷舒。

又

寂寂東窗午夢殘。更堪春雨作春寒。蠶童未報煎茶熟。一卷南華枕上看。

近村

家居每思出。出亦無與遊。江山豈不佳。乃復生我愁。不如適近村。家家業農疇。深巷鳴雞犬。長陂下羊牛。桑熟稻當穫。桑落酒可篋。事無賓祭須。柿栗良易求。醫翁日過門。得藥疾自瘳。婚嫁不出村。百世加綢繆。我來每絕歎。恨不終歲留。人生正應爾。底事須王侯。

石帆山下作

石帆山下古苔磯。回首人閒萬事非。能飲上池何患死。不營尺宅欲安歸。寒龜瑟瑟縮摺牀。老倦鶴翩遷帶。箭鷲堪笑年來殊省事。就憑樵女綻春衣。

旦起

殘燈冷火待窗明。稍覺今朝病體輕。已賴林鳩知宿雨。更煩鶯鶯報新晴。

又

地爐晨起撥寒灰。困曉濛濛尚嬾開。正倚蒲團覓殘夢。一聲啼鳥又驚回。

書况

自從請老鏡湖濱。萬事不關林下人。鴉去鴉歸還過日。花開花落又經春。官微也過千重浪。身在依然一幅巾。晨突有煙吾事了。濁醪不復惱比鄰。

閩中戲賦村落景物

遊宦才能薄。還山日月長。買牛捐寶劍。取酒解金章。泉脈疏供啜。松肪煉按方。北窗貪兀傲。南陌喜彷徨。僧過傳善法。醫來寄藥囊。泛舟經姥廟。策蹇上僧塘。燼似嵇中散。癡如顧長康。人間須掃迹。隨處是羊腸。

結廬僧壩皆湖上地名

又

覆篠初成屋。編荆旋作門。孤雲生釣瀨。微雨過棊軒。柳種來傍縣。旗子爲取柳木子餘姚茅氏花栽乞近村石欹聊可坐。地褊不成園。酒榼列楓瓊。香爐斷竹根。海鷗呼可下。隴鳥教能言。搏飯迎雙鶴。聯網繫小猿。山家雖寂寞。隨事有盤飧。

子好把酒常以小戶爲苦戲述

我非惡旨酒。好飲而不能。方其臨觴時。直欲舉斗升。若有物制之。合會已不勝。豈獨觀者笑。心亦甚自憎。正如疾逆虜。憤切常橫膺。蹭蹬忽衰老。何由效先登。上天無長梯。繫日無長繩。可歎固非一。壯志空飛騰。

春日對花有感

天天枝頭花。鬱鬱地上草。方春萬物遂。我乃獨衰槁。少時喜方藥。晚亦學黃老。又非愛名宦。壯歲迹已掃。如何過八十。尙復未聞道。僮行阡陌間。齒搖而髮縞。名山可巢居。決去恨不早。冥坐精思牀。猶能養梨棗。

出遊遇雨而返

柴門方出雨霏霏，未到湖邊促駕歸。深炷爐香掩屏臥，誰知不爲溼春衣。

又

荒山前頭野水邊，東行西行不自憐。天公豈亦哀老子，風雨留教終日眠。

記閑

白雲堆裏看青山，猿鳥爲鄰日往還。黃綺後身應我是，再來依舊一生閑。

二感

狸奴睡被中，鼠橫若不聞。殘我架上書，禍乃及斯文。乾鵲下屋簷，鳴噪不待晨。但爲得食計，何曾問行人。惰得暖而安，飢得飽而馴。汝計則善矣，我憂難具陳。

題柴言山水

陰陰山水合，幽處著柴荆。喧中有靜意，水車終日鳴。春

又

懸水三十仞，疾雷聞數里。正暑凜生秋，倚杖者誰子。夏

又

高秋風雨天，幽居詩酒地。君看此氣象，其可折簡致。秋

又

草亭臨峭絕。霜嶂起嶙峋。危磴儻可上。老夫思卜鄰。

草亭獨坐

掃地垂簾坐草亭。東風吹頰醉初醒。睡蛇死後魔無力。疾豎降來藥有靈。在手殘梅香淡泊。傍檐幽鳥語丁寧。老人不是神通妙。世事元來要飽經。

修居室賦詩自警

荒園二三畝。敗屋八九間。初至如逆旅。忽逾四十年。屋日已朽蠹。我老不自還。茅可刈之野。木可伐之山。尙復不能具。日夜憂其顛。况我虛幻身。念念隨化遷。齒墮髮亦禿。鏡中失朱顏。其危甚于屋。何恃能牢堅。豐汝梨與棗。養汝汞與鉛。防疾如待敵。愛氣如守關。謀于履霜初。懼在橫流前。書紳銘席端。雖老尙可全。

遜迹

遜迹荒村慣忍貧。秋毫不使喪其真。家居亦以古爲鑑。事過始知天勝人。臨食致思方下箸。讀書有得每書紳。放翁耄矣當知幸。布褐藜羹畢此身。

春晴登小臺

不管筇枝破綠苔。閑穿萬竹上荒臺。幽花經雨自開落。啼鳥喜晴時去來。河岸家家裝彩舫。兒童處處唱青梅。誰知老子癡頑甚。看改新元十一回。

魯墟舟中作

春浦南來元不到。畫檣偶復入鷗羣。人家遠火林間見。船底微波枕上聞。山口正銜初出月。渡頭未散欲

歸雲錦囊詩草新寥落。得句猶堪寄一欣。

貧病戲書

得米還憂無束薪。今年真欲甑生塵。椎奴跣婢皆辭去。始覺盧仝未苦貧。

又

頭痛涔涔齒動搖。醫驕折簡不能招。亦知客疾無根柢。少健還能起負樵。

又作二首自解

盡日溪邊艇子斜。治生不種邵平瓜。已分鄰舍紅蓮米。更賸僧房紫筍茶。

又

靈府安平四體和。經時止酒頰常醜。老生要是常談爾。吐納餘閑卽按摩。

挾書一卷至湖上戲作

買地孤村結草廬。蕭然身世落樵漁。一編在手君無怪。曾典蓬山四庫書。

謝客相過

我力日愈衰。人事不敢倡。窮巷春多泥。何以稅客鞅。諸君顧何取。勤懇問亡恙。賦詩代尺書。跛望徒悵悵。

書辛

土盎常餘菜。山庖不絕煙。罷醫翻少疾。無術自長年。小舫煙波宅。閑身陸地仙。東窗最佳處。日對坐忘編。

書歎

髮鬢承學紹與前。歷看人間七十年。撲滿終歸棄道側。鷓夷猶得載車邊。釣船夜泛吳江月。醉眼秋看楚澤天。造物未容書鬼錄。殘春又藉落花眠。

古興二首各五韻

草衰何預人。每起徂年悲。日月纔幾何。又見青青時。青青雖滿眼。行矣當復衰。盛衰還無端。其理可前知。人生死則已。千載無還期。

又

月出橫林上。宿鳥無定枝。物生各長禍。所託輒蹈危。老人倚壁坐。大野驚羣兒。雖云差自適。見事亦太遲。猶有一可喜。永謝世俗羈。

病中有述二首各五韻

萬事有常理。中智皆能知。禍福如白黑。不待諷蒼龜。疾患初萌芽。未有旦夕危。每能自省察。百鬼安能窺。一怠生百疾。速死乃自貽。

又

爲國恃久安。變起最莫測。釋楚爲外懼。此實計之得。吾儕學養生。事事當自克。老無聲色娛。戒懼在飲食。要須銘盤盂。下箸如對敵。

黃鶉吟

嗟哉黃鶉。一何陋。性喜隱翳。藏荒圃。煙深翅重。飛不起。鳴聲穀穀。知雨候。夜與妖鵩羣。又似惡白晝。羽毛

不足辱彈射。滋味不足登俎豆。捕之既無用。鬻之又不售。譬之人以支離而全。木以擁腫而壽。若予者。智不能如農圃。學不能舉孝秀。名不詳世。動得嘲詬。是亦天下不材之尤。尙何議乎。汝後。

恩封渭南伯。唐詩人趙嘏爲渭南尉。當時謂之趙渭南。後來將以予爲陸渭南乎。戲作長句。

老向人間久倦遊。君恩乞與渭川秋。虛名定作陳驚坐。好句真慚趙倚樓。棧豆十年韜病馬。煙波萬里著浮鷗。就封他日輕裘去。應過三峯處處留。

幽居

宿志在。人外清。心遊物。初猶輕。天上福。那習世間書。壽菜挑供甗。槐芽采作蔬。朝晡兩摩腹。未可笑幽居。肩輿至湖桑埭。

籃輿隨意出。衡門日已沉。山野未昏。小市叢祠湖上路。短垣高柳埭西村。麥苗極目無閑土。塘水平堤。舊痕明。詔裕民。聞屢下。老農何以報君恩。

半俸自戊辰二月置。不復言作絕句。

力請還山。又幾年。何功月費水衡錢。君恩深厚猶慚懼。敢向他人更乞憐。又

俸券新同廢紙收。迎賓僅有一絕裘。日鋤幽圃君無笑。猶勝牆東學僮牛。

頭風戲作

出門處處皆桃李。我獨呻吟一室中。只道有詩歐瘡鬼。誰知無檄愈頭風。

茅齋

菲齋雖絕小老子策新助。磴落霏霏雪。爐生裊裊雲。心將鷗共遠。巢與鶴中分。幾許人間事。吾廬寂不聞。

耕桑

老病雖俱至。耕桑亦未遲。兒童誇體健。婦女閔靈飢。月落梟鳴夜。燈殘鼠留時。但當尋熟睡。萬事不須思。

春遊

方舟衝破湖波綠。聯騎蹋殘花徑紅。七十年間人換盡。放翁依舊醉春風。于年十四始到禹臚龍瑞今七
十一年矣。

又

熟食從來少天色。東吳况是足春寒。城南藉草可痛飲。安得酒腸如海寬。

又

蘭亭路上換春衣。梅市橋邊送夕暉。聞有水仙翁是否。輕舟如葉葉如飛。

又

沈家園裏花如錦。半是當年識放翁。也信美人終作土。不堪幽夢大匆匆。

蔬飯

春事已闌珊。山村未褪寒。宿生初入餠。齋老尙登槃。僧飯時分鉢。園蔬不仰官。枯腸更糝攪。姑置密雲團。

海棠歌

陸放翁集 二十一 劍雨詩彙 卷七十五

三十一

我初入蜀鬢未霜。南充樊亭看海棠。當時已謂目未覩。豈知更有碧雞坊。碧雞海棠天下絕。枝枝似染猩
猩血。蜀姬豔粧肯讓人。花前頓覺無顏色。扁舟東下八千里。桃李真成僕奴爾。若使海棠根可移。揚州芍
藥應羞死。風雨春殘杜鵑哭。夜夜寒衾夢遠蜀。何從乞得不死方。更看千年未爲足。

園中作

湖曲舊誅茆。松陰近結巢。安閑多熟睡。衰退少新交。雨漬丁香結。春生豆蔻梢。良晨不把酒。新燕解相嘲。

書意

整書拂几當閑嬉。時取曾孫竹馬騎。故故小勞君會否。戶樞流水卽吾師。

又

人生祇要常無事。忿欲紛紛喜見侵。贈子祕傳安樂法。秋毫莫遣動吾心。

又

籬角耕桃落漸稀。晚風吹去點苔磯。揮金豈必如疎傅。二畝春秧也是歸。

晚春

世事紛紛不足論。流年去似海濤翻。莫因齒髮悲殘景。且喜柴荆是故園。千里桑麻無曠土。數家雞犬自
成村。鄰翁過我誇秧信。雨後春泥一尺渾。

又

莫笑花前醉墮巾。放翁又看一年春。尋巢燕熟頻穿戶。釀蜜蜂喧不避人。楚廟羔豚初散社。稽山箬蕨正

嘗新。要知不負年光處。南陌東阡自在身。

卷第七十六

湖上

綸巾羽扇影翩翩。湖上徜徉莫計年。桃李已忘疇昔分。禽魚猶結後來緣。山前墟市初多筍。江外人家不
禁煙。莫恨幽情無與共。一雙白鷺導吾前。

卽事

成敗歸青史。悲驪付浩歌。病從今歲減。詩比去年多。高枕觀浮世。持盃養太和。功名亦易爾。難負此漁蓑。

東籬雜書

芳草初侵路。青梅已破枝。雨來鳩逐婦。日出雉求雌。莽莽江湖遠。悠悠歲月移。老人觀物化。隱几獨多時。

又
桃李成塵土。來禽始著花。病夫猶枕上。春事又天涯。巷陌鞦韆夢。簾櫳燕子家。野僧來問訊。強把半甌茶。

又
老厭人間事。閑知道物功。草生三徑綠。花發一窗紅。幽境霧塵外。流年嘯傲中。所嗟情盡盡。論舊只春風。

又
身與春俱老。愁隨日漸長。簾櫳聽語燕。澗谷擷幽芳。酒榼常從後。詩囊亦在傍。閑行無定處。隨意據胡牀。

山行

山鳥啼孤戍。煙蕪入廢亭。隄成陂水白。雨細稻秧青。草市少行旅。叢祠多乞靈。最憐投宿處。微火暮晶荧。

稻陂

白水滿稻陂。投種未三宿。新秧出水面。已作纖纖綠。年來殘俸絕。所望在一熟。見之喜欲舞。不復憂半菽。想當西成時。載重壓車軸。病齒幸已牢。往矣分社肉。

兩夜思子虞

兀兀過遙夜。悠悠擁破衾。峭寒侵病骨。殘雨滴愁心。人別易千里。書來真萬金。醉眠差似可。誰與伴孤斟。

醉中示客

四座無譁聽我歌。百年生計一煙蓑。清尊激激猶狂在。白髮蕭蕭奈老何。遠適安能縮地脈。高眠聊足養天和。吾徒看盡人間事。莫愛車前印幾窠。

散髮

散髮垂肩懶更簪。一窗竹水對蕭森。從來恥作資身策。老去終憂取爾心。書思鼻端火炷白。泉鳴窗外夜橫琴。不緣羸病愁迎客。經歲何人肯見臨。

病中觀辛夷花

餘生垂九十一。病理一衰旬。月不自保。敢作期歲期。粲粲女郎花。忽滿庭前枝。繁華雖少減。高雅亦足奇。持盃酌花前事。亦未可知。明年儻未死。一笑當解頤。

小艇

瓜翁小艇輕如葉，只載蓑衣不載家。清曉長歌何處去，武陵溪上看桃花。

雜題

賀公在朝雅吳語，莊鳥仕楚猶越吟。我幸歸休在閭巷，燈前感慨不須深。

又

卯屋三間已太奢，柴乾米白喜無涯。非賢敢竊優賢祿，願折蓍絲與蕨芽。牛僮自春初不復敢積。

又

野花紅碧自爭春，村酒酸甜也醉人。解放船頭便千里，不愁無處著閑身。

又

湖隄疎瘦水楊柳，村舍殷紅山石榴。推戶本來隨意入，乞漿因得片時留。

閑遊

柴車去去度橫陂，正是春殘入夏時。果熟多藏新密葉，鶯啼偏占最高枝。迷途每就傭耕問，薄飯時從漢

旅炊。隨意題詩無傑思，還家猶足詫吾兒。

病起初夏

頭風間作已全輕，山雨雖頻卻快晴。窗外時時度花片，林梢處處送鶯聲。地偏無客談閑事，麥熟逢人樂

太平。不爲衰遲辜節物，一甌半酪薦朱櫻。

衡門獨立

春歸堪笑又忽忽。水白秧青細雨濛。溪鳥低飛畫橋外。路人相值綠陰中。宋清藥券貧來積。李賀詩囊病後空。惟有劇談能一洗。芳尊那得故人同。

雨夜

吳中地多雨。海角客常愁。羸疾須醫藥。殘年憶輩流。解裝孤驛晚。捩柁小江秋。莫起瀟湘興。無才賦遠遊。

山麓

草合路如線。偶隨樵子行。林間遇磐石。小憩看春耕。

北齋

質衣蒼北齋。欹壞略撐拄。窗扉則虛名。聊足度寒暑。獨學無與論。推覈實勞苦。審觀古人意。十亦得四五。無功與子光。相可豈待語。一床寬有餘。高臥聽簷雨。

禽言

架犂架犂南村北。村雨淒淒夜起飯。牛雞未啼日暮。矻矻行千畦。沒足勿恨一尺泥。西成收薄汝噬臍。架犂。

又

拔筍拔筍入簪不辭風雨窘。養成會見高拂雲。取供口腹初不忍。獨持兩把慰倚門。慈顏一笑如春溫。拔筍。

又

老翁老尚健，打麥持作飯。終歲甕畝間，勞苦孰敢怨。人生爲農最可願，得飽正如持左券。確春樵爨小，飯香豈不勝汝耗。太倉打麥作飯。

又

堂前捉績子，力作忘朝餐。鵝黃雪白相照耀，插茅作簇高如山。蠶女採桑至煮繭，何暇膏沐梳髻髮。績成蜀錦與楚縠，舞妹纒頭不論束。堂前捉績子。

道院偶述

景德祥符草野臣，登封會望屬車塵。已經成住壞空劫，猶是東西南北人。

又

憶在青城煉大丹，丹成垂欲上仙班。飄零未忍塵中老，猶待時平隱華山。

初夏書感

春與人俱老，花隨夢已空。遊蜂黏落蕊，輕燕接飛蟲。桑悴知蠶起，牲肥賽麥豐。爲農當自力，相戒勿忽忽。

贈邢蜀甫

割愁何處有并刀，傾座誰能奪錦袍。堪笑陸翁鄰鬼錄，尙推邢友擅人豪。杜門雖少客載酒，落筆已能奴命騷。安得相從北窗下，丐君膾腹與殘膏。

昔從戎南鄭，日范西叔爲子書。小臥屏今三十有八年矣，愜然有懷。

梁州風月今何在。每憶朋儔淚濺裾。戎幙已如它世事。素屏猶對故人書。

小雨

川雲疊疊密如鱗。山雨霏霏細似塵。未必便爲耕隴喜。天公分付與詩人。

遣懷

出荒荒寒外。門庭寂寞中。厭聞鳩喚雨。常羨鳴知風。逆境嗟行徧。閑愁幸埽空。今晨有奇事。簫鼓賽年豐。

又

風月資吟嘯。漁樵約往還。貧猶能釀酒。病不廢遊山。亂石臥牛馬。流泉鳴珮環。豁除羈旅日。猶有半生閑。

初夏喜事

箕穎元非爭奪場。瀟湘自古水雲鄉。采茶歌裏春光老。煮繭香中夏景長。斂版早知遊宦惡。署門晚悟世情常。茹芝卻粒雖無術。散髮猶當效楚狂。

夢蜀

自計前生定蜀人。錦官來往九經春。堆盤丙穴魚腴美。下箸蛾眉楸脯珍。聯騎雋遊非復昔。數編殘藁尙如新。最憐栩栩西窗夢。路入青衣不問津。

閑遊

一見溪山病眼開。青鞵處處蹋蒼苔。平生長物埽除盡。猶帶筆牀茶竈來。

又

好事湖邊賣酒家。杖頭錢盡慣會賒。壚邊爛醉眠經日。開過紅薇一架花。

初夏

牀有蒲團坐負牆。室無童子自燒香。人圖作佛雖堪笑。我愛逃禪亦太狂。櫻筍久忘晨入省。尊醪猶喜老還鄉。汗青未絕茶經筆。那暇投文弔戰場。

又

梅子生仁已帶酸。楝花墮地尙微寒。室無長物惟空榻。頭不加巾但小冠。鸞篋倚牆絲盡起。稻秧經雨水陂寬。郊原清潤身差健。剩欲閑遊一跨鞍。

野興

東望城闌十里遙。野人生計日蕭條。棋枰棄置機心息。肉食蠲除業境消。送藥時時過鄰父。放魚日日度溪橋。自憐愛物還成癖。門巷春來草沒腰。

又

涉澗穿林信意行。翠崖朱棧愜幽情。關關幽鳥將雛語。簌簌幽篁解籜聲。藉草一壺消永日。出門幾屐了平生。川雲正作遮山計。浩蕩南風又快晴。

自笑

宦途昔似伏螭駒。退處今如縱鯉魚。手自掃除松菊徑。身常枕藉老莊書。郊居本自依農圃。社飲何妨逐里閭。白髮蕭然還自笑。風流猶見過江初。

喜晴

正厭鳩呼雨，俄聞鵲噪晴。路開知潦退，書展喜窗明。日透疎簾影，風傳暮角聲。兒童競相報，門有賣朱櫻。

過鄰曲

黃雲卷盡綠針齊，夏木陰陰滿古隄。耆老往來無負戴，比鄰問道有提攜。暑天漸近便餐酪，吳俗相傳尙鱸鱉。共喜豐年多樂事，扶躡先判醉如泥。

題蘇虞叟巖壑隱居

蘇子飄然古勝流，平生高興在滄洲。千巖萬壑舊卜築，一馬二僮時出遊。香斷鐘殘僧閣晚，鯨吞鼉作海山秋。極知處處多奇語，肯草吳牋寄我不。

縱筆

騎鶴翩翩過月傍，浩然風露九秋涼。忽聞捲地潮聲起，始覺江山近故鄉。

又

百尺松根結茯苓，千年長養似人形。誰知金鼎烹初熟，恰值山翁醉欲醒。

北窗卽事

衡茅隨力葺幽居，掃地焚香樂有餘。分食時能下檐鶻，作洲常悔誑池魚。遊歸又失相尋客，睡起重開未了書。袖手悠然便終日，不辭世俗笑迂疎。

又

北窗最與懶相宜。世上紛紛了不知。露井甘寒初浚後。小山葱蒨乍晴時。粗餐豈復須鮭菜。蓬戶何曾設
屐屨。幸有牀頭藤杖在。登臨未遽歎吾衰。

感物

提壺勸客飲。架犂課農耕。鳩方喜婦還。蟻又以族行。大化職雨暘。我窗更晦明。芸芸觀萬物。一笑了此生。
園中把酒示鄰曲

長途半世困風波。老返家山得已多。野餉雖無食指動。村醪也解醉顏酡。夢殘正欲還君枕。棋罷那知爛
客柯。松菊未荒風月在。應容老子且婆娑。

又

煮豆烹蔬當果腹。固應盃酌盡陶飽。池塘激激荷浮葉。門巷陰陰筍放梢。三畝荒園存故業。一編遺簡得
深交。弊廬經雨穿將徧。欲向村東自割茅。

書憂

時人應怪我何求。白盡從來未白頭。磅礴崑崙三萬里。不知何地可埋憂。

門外獨立

朝看出市暮看歸。數盡行人尚倚扉。要見先生無盡興。少須高樹挂殘暉。

感事六言

老去轉無飽計。醉來暫豁憂端。雙鬢多年作雪。寸心至死如丹。

又
果儻養來純白。睡蛇死後安眠。但有漉籬可賣。不妨到處隨緣。

又

五尺童知大義。三家市有公言。但使一眠得熟。自餘萬事寧論。

又

麥熟與人同喜。虜騎爲國私憂。身似五更春夢。家如一宿山郵。

又

早歲已歸南陌。暮年常在東籬。短衣幸能掩脛。長劍何須拄頤。

又

高岸眼看爲谷。寸根手種成陰。一卷楚騷細讀。數行晉帖閑臨。

又

李白嶽崎歷落。嵇康潦倒粗疎。生世當行所樂。巢山喜遂吾初。

又

有飯那思肉味。安居敢厭茅茨。未論顏淵陋巷。老農自是吾師。

幽居記今昔事十首以詩書從宿好林園無俗情爲韻

總角入家塾。學經至爾雅。治道本耕桑。此理在不疑。今茲垂九十。謝事居海涯。戴星理農業。未歎筋力衰。

四月築麥場。五月瀟稻陂。乘火去螟蝗。磨刀剪棘茨。西成大作社。歌鼓樂聖時。

又

上世本爲農。輟耕業詩書。我少學不成。固應返其初。冥冥不自揣。鄉校參羣居。中歲偶拔擢。清班久趨趨。典奏入南宮。細書長石渠。及其乞身歸。舊業已丘墟。衰疾或小間。力尙給荷鋤。寄聲謝故人。毋爲笑迂疎。

又

我昔揮短楫。終年釣吳松。亦嘗攜長錢。采藥玉霄峰。爲計晚大繆。朝路偶見容。晨趨大明班。夜聽長樂鐘。白髮迫歸休。居然鮮歡棕。上恩許乞骸。一日收孤蹤。蓬茅略補葺。甌礪動炊舂。故交零落盡。歲晚當誰從。

又

還鄉老未死。舉目少耆宿。邑屋亦或非。所餘但喬木。曩時列鼎家。今不飽半菽。盛衰迭變遷。何者非陵谷。羸然九十翁。世故見已熟。偶能達一理。萬事等破竹。布縷一稱衣。藜煮半釜粥。餘年更何爲。枕藉糟與麴。

又

癸亥辭脩門。拜賜散人號。一出非本心。歡喜歸祭竈。故鄉多名山。幸得遂所好。舟輿雖難具。信步亦可到。清溪無塵滓。奇峯有雲冒。雨墊林宗巾。風落孟嘉帽。豈惟狂故在。望遠亦未眊。一醉儻可謀。敢愛將軍告。

又

入蜀過匡廬。秋風宿東林。月出斷山口。滿窗松竹陰。鼻鼻一枝燭。道人語夜深。亦設麩果供。慰此羈旅心。猶恨非遠公。無酒遣我斟。明日下山去。歎息難重尋。回首四十年。駒隙何駸駸。舊遊不可到。悵望空長吟。

又

昔戍西陲時，憑高望中原。願欲乘天風，往弔綺與園。有志莫能遂，悵望高山魂。遙想山中人，歲時莫芳蓀。夕陽簫鼓散，高柳擁廟門。老來更事多，考古見本根。乃知當時事，禍福未易言。千載信悠悠，浩歎掩尊尊。

又

客舟挂煙帆，千里過楚都。七澤渺無際，大不數具區。浪翻出長蛟，雲拆浮天吳。我來如山，碎船不須臾。江行幸已盡，三峽尤畏途。槎牙人鱗鬣，小失卽見屠。叩頭禱鬼神，已脫猶號呼。願君勤自勵，憂患何時無。

又

昔自京口歸，卜居得剡曲。地偏無市人，民淳有古俗。陋屋僅結茆，粗飯財脫粟。典衣以沽酒，九月未能贖。寧負翁子薪，恥售卞和玉。老身已如此，兒子亦碌碌。藏書幸無恙，自計不啻足。拾穗且浩歌，行矣墮鬼錄。

又

少小喜讀書，終夜守短檠。其實無甚解，不幸誤有聲。勞苦亦何得，空失東臯耕。暮年乃小黠，告歸學養生。采藥作遠遊，把釣適幽情。高樓笛數曲，小軒棋一枰。餘年置勿憂，不卿何由烹。

喜雨

入夏久不雨，旱勢已岌岌。蛙蛤徒自喧，蛟龍臥如蟄。何由白水滿，但守青秧泣。上天忽悔禍，川雲起呼吸。虛簷雨競瀉，平野苗盡立。兒停蹋轉車，婦免憂谷汲。人言雨非雨，乃是傾玉粒。移牀亦細事，敢歎屋漏溼。

初夏雜興

老子今朝不用扶。雨涼百病一時蘇。扇題杜牧故園賦。屏對王維初雪圖。把釣溪頭踢湍瀨。煎茶林下置風爐。箇中真謂無同賞。逋客能從折簡呼。

又

巾脫冠欵八尺牀。竹陰槐影有餘涼。隨風花墮殘棋上。引壺書池捲枕傍。水長沙鷗向人熟。雨餘巢燕哺雛忙。尚嫌未愜幽情在。又喚漁舟渡野塘。

又

自斷殘年莫問天。吾儕何處不隨緣。家貧卻尋身差健。友短可訪晝熟眠。未歷名山采靈藥。且從同社樂豐年。賣絲糶麥償逋負。猶有餘錢買釣船。

又

繆算狂言悔莫追。杜門省事不妨奇。欵傾淡墨詩成後。縹緲烏巾浴出時。筇杖閑行穿密篠。繩牀移坐照清漪。眼邊好景真須惜。漸近浮生結局時。

又

趁雨東園去荷鋤。歸菴卻展讀殘書。幸能胸著雲夢澤。何恨家無擔石儲。水泛時須借篷艇。山行亦或命巾車。嬾心惟怕遊城市。非向交親故作疎。

又

終日頽然囊簡中。門前煙水浩無窮。百年等是一枯塚。四海應無兩放翁。栗玉長枝挑苦菊。胭脂小把翦

防風地偏日永閑無事擬著珍蔬譜一通。

對酒作

飲酒豪如卷白波。遺愁難似塞黃河。多聞只解爲身累。後死空令見事多。未試神仙餐玉法。且廣壯士入關歌。此心不道無人識。雪鬢蕭蕭奈老何。

獨坐閑詠

書生亦有功名願。與世無緣每背馳。一寸丹心空許國。滿頭白髮卻緣詩。

又

深掩柴荆謝世紛。南山時看起孤雲。殘年所幸身猶健。閑事惟求耳不聞。

水亭

水亭不受俗塵侵。萬帳筠牀弄素琴。一片風光誰畫得。紅蜻蜓點綠荷心。

又

莫道山翁老病侵。靜中理得舊傳琴。朝來有喜君知否。兩展芭蕉二尺心。

書興

占得溪山下數椽。飽經世故氣猶全。入門明月真堪友。滿榻清風不用錢。便死也勝千百輩。少留更過二三年。湖橋酒美能來醉。一棹何妨作水仙。

書感

翟公冷落客散去，蕭尹譴死人所憐。輸與桐君山下叟，一生散髮醉江天。

又

驅山不障東逝波，一尊莫惜醉顏酡。斜風細雨若溪路，我是後身張志和。

暑雨

欲雨未雨雷車奔，欲睡不睡人思昏。蠻童正報煮茶熟，忽有野僧來叩門。

又

草茂水長蛙羣鳴，涯深路壞人斷行。故侯老退守瓜蘊，翠蔓黃花偏眼明。

池亭夏晝

造物寧非念老生，池亭幽事悉施行。羣魚聚散忽無迹，孤蝶去來如有情。小礎落茶粉雪片，寒泉得火作松聲。曲肱假寐愴然寤，不爲敲門夢不成。

又

茅舍蘆藩枕小灘，蕭森那復畏炎官。醉牀酒解香初過，懶架書橫夢未殘。饒愛流匙菰米滑，渴便滿杓粟漿酸。兒孫幸有團圓樂，未覺浮生一笑難。

頃歲從南鄭屢往來，與風間暇日追懷舊遊有賦

昔戍益叢北，頻行鳳集南。烽傳戎壘密，驛遠客程貪。春盡花猶坼，雲低雨半含。種畝多菽粟，藝木雜松栢。婦汲惟陶器，民居半草菴。風煙迷棧閣，雷霆起湫潭。城郭秦風近，村墟蜀語參。快心逢曠野，刮目望浮嵐。

考古時興感。無詩日每慙。嘉陵最堪憶。迎馬柳參差。

掃除小園未竟歸臥

竹葉埽仍落。莎根鋤更生。陰陽常代謝。今昔各施行。勛業須時至。衰榮忌力爭。徑歸差省事。高枕聽蟬聲。

暑中北窗晝臥有作

禦疾如治河。但當導之東。下流既有歸。自然行地中。養生如藝木。培植要得宜。常使無天傷。自有干雲時。我少本多疾。屢亦頻危殆。皇天實相之。警告意有在。中年棄嗜慾。晚歲節飲食。中堅却外慕。魔盛有定力。死生雖天命。人事常相參。茫茫九衢中。百禍起一貪。郊虛暑雨餘。巾墜脚不襪。高臥北窗涼。超然寄疎豁。

羈懷

羈懷不復耐悲歡。清鏡朝朝雪鬢繁。謝傅畏逢親友別。龐公思遣子孫安。殘骸累歲歸民伍。半俸今春上縣官。閉戶惟須學堅坐。不知更敗幾蒲團。

自貽

寒暑衣一稱。朝晡飯數匙。錢能禍撲滿。酒不負鴟夷。

又

家風本韋布。生事但漁樵。慣就下鄉食。莫煩東閣招。

又

癡孫護雀雛。饑僕放池魚。懷藥問鄰疾。典衣收舊書。

又
退士憤駙虜。閑人憂旱年。耄期身未病。貧困氣猶全。

卷第七十七

得雨霑足。遂有豐年意。欣然口占。

人事銷沉渺茫中。此身元合付天公。儒生可逐惟求忘。社酒常辭不怕豐。鬱鬱稻苗欣出穗。汪汪陂水告成功。老民莫道渾無用。能爲明時祝歲豐。

浴罷閑步門外而歸

兩扇荆扉數掩籬。幽人浴罷得娛嬉。南臨大澤風來遠。東限連山月出遲。沙上無泥藤屨健。水邊弄影葛巾欹。徑歸卻就東窗臥。要及蟬聲未歇時。

初晴

暑雨初收體爲輕。遠山盡出眼偏明。詩憑寫興忘工拙。酒取澆愁任濁清。綠樹有陰休倦步。澄溪無滓濯塵纓。老人本少凋年感。不奈江城暮角聲。

枕上

青絲玉井輻輳聲。露葉風枝鴨鷓鳴。造物未容閑到死。又從枕上得詩情。

又

冥冥梅雨暗江天。汗浹衣裳失夜眠。商略明朝常少霽。南簷風珮已鏘然。都下新作藥玉。風響如古玉環。
寄張翥孫悉備。

讀史

馬周浪迹新豐市。阮籍興懷廣武城。用捨雖殊才氣似。不妨也是一書生。

今歲六月望後一日立秋故比常年涼意差早

九衢車馬困炎曦。正是山中散髮時。秋近梧桐已搖落。陰生蟋蟀最先知。稻陂水白寧憂旱。竈突煙青幸續炊。誰謂吾廬太岑寂。茶瓜亦有野人期。

異夢

山中有異夢。重鎧奮雕戈。數水西通渭。潼關北控河。淒涼鳴趙瑟。慷慨和燕歌。此事終當在。無如老死何。

貧病

貧至今年劇。真無地置錐。判愁停貰酒。忍病罷迎醫。性懶非關老。天窮豈坐詩。秋風還欲到。便可數期頤。

涉溪

揮汗欲成雨。聚蟲真若雷。山翁在何許。赤腳步溪來。

卽事

身向人閒閱事多。杜門聊得養天和。盛衰莫問蕭京兆。壯老空悲馬伏波。日暮城樓傳戍角。風生巖路下樵歌。君知此段神通否。豎拂能降百萬魔。

又

唐虞千載仰巍巍。太息儒生每背馳。經未盡亡君更考。古無不死我何悲。釣耕本是求賢地。宵旰今逢勵治時。寄謝公卿各努力。爲吾君築太平基。

又

我愛湖山清絕地。抱琴攜鶴任茆堂。藥苗自采盤蔬美。菰米新舂鉢飯香。南浦風煙無限好。北軒雷雨不勝涼。舊交散落無消息。借問黃塵有底忙。

又

放翁老去未忘情。鏡裏森然白髮生。一片常愁見花落。三聲最怕聽猿鳴。年年雙路傍。夜夜短長城。上更晚悟一條差。似可孤舟漁火看潮平。

野性

野性從來與世疎。俗塵自不到吾廬。醉中往往得新句。夢裏時時見異書。稚子那偷服藥酒。家僮尙護放生魚。今朝更有欣然處。引得清泉灌晚蔬。

閑行

出戶莽悠悠。東西本不謀。阻溪因小涉。逢店得中休。鳥沒千山暝。蟬吟一院秋。詩成還自笑。信筆媿冥搜。伏中熱不可過。中夜起坐作詩寄五郎。

衆星若銀礫。老桂臥海底。中夜熱不解。病叟推枕起。悲蟲號草根。孤螢照野水。樹頭風急生。喘汗真一洗。

追憶總角初學古頗自喜。祝身願耆老。常恐抱志死。豈知才術疎。空自凋髮齒。功名永無期。祿不飽妻子。歸耕力又憊。得粟半糠粃。詩書不可賴。如倚折足几。大兒逾六十。逐食走千里。路途况艱梗。累日書一紙。豈不念歸省。屢請輒見柅。幸吾未極衰。汝行姑少止。

暑中自遣

名山處處得幽尋。破硯時時出苦吟。上藥和平無近效。古詩簡淡有遺音。蘇門隱去聞孤嘯。栗里歸來弄素琴。尙恐俗塵除未盡。每思雪夜宿東林。

夜坐中庭

蕭散坐中庭。三更月未生。湖風涼醉頰。汲井濯塵纒。草露沾衣冷。天河隔樹明。表回不能睡。鼓角下高城。

夜坐門外示子通

秋意遽如許。體中殊未佳。灘深無宿鷺。草茂有鳴蛙。棲遯從吾好。吟哦與汝偕。雲門漸可到。剩判幾青鞋。

夜坐小飲

零落槐花已滿溝。江湖又見一番秋。冰輪有轍凌空上。銀漢無聲接地流。丹荔甘寒勞遠致。玉醅醇冽喜新篘。移牀坐對西南甍。好雨心知不待求。

閑思

畢世爲農不復疑。還東六見歲陰移。閉門旋了和詩債。賣藥不償沽酒資。意倦投牀效龜息。齒疎嚼飯類牛呵。兀然過日君無怪。一念功名恐過悲。

書村店壁

裹茶來就店家煎。手解驢鞍古柳邊。寺閣重重出山嶂。漁舟兩兩破溪煙。近秋漸動尋幽興。絕律難營覓醉錢。到處不妨閑著句。他年好事或能傳。

幽居

毒暑流金石。吾廬乃爾幽。松棚香帶露。竹簟冷生秋。盪漿蘋花浦。垂竿杜若洲。非關遺世事。聊以解吾愁。

立秋前九日大雨涼甚

天暑正三伏。雨來俄九秋。寒聲入簷戶。爽氣襲巾禱。山色凝深黛。溪流戰怒虬。身輕更何苦。處處可閑遊。

又

雨暗初疑暮。雲開已變秋。有風生枕簟。無汗漬衣襟。漉酒嘗浮螿。題詩走黑虬。呼兒治書笈。吾欲剡中遊。

寄太湖隱者

青松伐作薪。白玉碎作塵。雖云質已毀。見者猶悲辛。磊砢任棟梁。溫潤中琮璧。豈以捐空山。遂比凡木石。鄙生吏高陽。馬周客新豐。從來豪傑士。大指亦略同。具區古大澤。煙水渺千里。可望不可到。中有隱君子。圖書兼河雒。成毀窮乾坤。有時跨蛟鯨。指攜雷雨奔。嗟我獨何人。乃許望顏色。逝將從之遊。變化那得測。

讀史

緇帙牙籤滿架書。流泉泱泱竹疎疎。人生得志寧無命。一室何妨且埽除。

又

王侯到底是虛名。何物能爲我重輕。徒步出關胡不可。向來常笑棄繻生。

又

男子胸中正要奇。立談能立大平基。君王玉鉞無窮恨。千載茫茫誰復知。

又

自古功名亦偶諧。胸中要使浩無涯。可憐赫赫丹陽尹。數顆檳榔尙繫懷。

病戒

憂身如憂國。畏病如畏亂。此身雖幸健。敢作無事看。禍福在呼吸。恐懼兼寢飯。人所忽不省。我思嘗熟爛。夜臥不安席。晨起寧待旦。雖云親藥石。得失每參半。人情喜一快。往往觸剽悍。收功寧使遲。覆敗不可玩。

夏夜納涼

河漢微茫月漸低。風聲正在草堂西。莎根唧唧蟲相弔。木末翻翻鵲未栖。屯甲近聞如積水。聞淮壩近裏。雄淮軍數萬。守關不假用丸泥。孤臣報國嗟無地。只有東臯更飽犁。

銘座

身退仍懷退。心平更欲平。直嫌繩尙曲。重覺鼎猶輕。力學能除翳。深居可息黥。聖門初豈遠。妙處在躬行。

獨坐絕句二首

蛙鳴乃是怒。鵬嘯固非妖。獨宿空山夜。何妨伴寂寥。輕雷不成雨。闕月卻穿雲。獨倚南齋柱。長吟到夜分。

初秋驟涼

我比嚴光勝一籌。不教俗眼識羊裘。滄波萬頃江湖晚。漁唱一聲天地秋。飲酒何嘗能作病。登樓是處可消憂。名山海內知何限。準擬從今更爛遊。

新涼

家住山陰剡曲傍。一番風雨送新涼。亦知病得清秋健。無奈愁隨獨夜長。日落川原橫慘淡。月明洲渚遠蒼茫。老民無復憂時意。齒豁頭童只自傷。

書幸

才薄無能役窮途。不意全得書媒晚暮。遇藥起沉緜。漂母能分食。偷兒肯恕誣。不知從此去。更度幾年。

獨遊

地僻少人迹。身閑思獨遊。荒村更阻雨。衰鬢不禁秋。斷續呼牛笛。橫斜放鴨舟。殘年澹無事。隨處送悠悠。

記夢

夢遊異境不可識。翠壁蒼崖立千尺。樓臺縹渺出其上。揮手直登無羽翼。門楣扁榜作八分。奇勁非復人間迹。主人鹿弁紫綺裘。相見歡如有疇昔。探懷示我數紙書。妙句玄言皆造極。我即鈔之雜行草。主人儻恍如甚惜。夢中亦復知是夢。意恐覺時無處覓。自量強記可不忘。雞唱夢回空歎息。

初秋自述

平生偶有愛山僻。垂老常無沽酒資。破屋頽垣吾已矣。大冠長劍汝爲誰。郵亭歷歷關河遠。鬢髮蕭蕭歲

月移殘暑不禁隨手過。東籬又近菊花時。

秋暑夜起追涼

漱罷寒泉弄月明。浩然風露欲三更。曲闌干畔踟躇久。靜聽空廊絡緯聲。

又

道士磯邊浪蹴天。郎官湖上月侵船。暮年自度無因到。且與沙鷗作後緣。

小築

小築並湖隄。茅茨不厭低。引泉澆藥圃。斫竹樹雞棲。夕靄山常淡。秋蕪路欲迷。平生草玄手。老去學鉏犁。

喜雨

黑雲橫絕天漢津。父老僉言候當雨。未論秋稼縣千里。且喜滂沱洗殘暑。我起呼兒扶再拜。汗垢得涼真

一快。枯棹抱壺兩置之。日日齋盂飽菘芥。

又

雨聲蕭蕭集庭樹。雨氣森森入窗戶。玉川茆屋久不葺。破漏無復施牀處。我於萬事本悠悠。危坐讀書忘

百憂。明朝秋水增三尺。且復沙邊弄釣舟。

秋夜

大枕空牀夢不成。草堂悄悄四無聲。月明漸見天窗白。風起忽聞簷珮鳴。客子未忘悲故里。老人無念到浮名。江村歲歲先涼冷。且復尋盟向短檠。

白鷗

平生崖異每自笑。一接俗人三祓除。惟有白鷗真我客。爾來底事向人疎。

靜室

靜室牀橫一素琴。爾來殊覺道根深。喚回倦枕功名夢。洗盡浮生幻妄心。兩屨雲煙遊少室。一窗風雪宿東林。細思卻是關身事。無奈殘年老病侵。

秋興

秋眠怯簟冷。晨飯喜蔬香。寧使衣百結。肯儲錢一囊。杜門雖局促。負氣尚軒昂。死去真無憾。曾孫似我長。

欲雨

徙穴中庭蟻爭巢。後圃鳩。物情猶慮患。人事得忘憂。

又

荷鍤決新渠。芟茅補舊廬。共知秋必雨。有備卽安居。

雜感十首以野曠沙岸淨天高秋月明爲韻

呂釣渭水濱。說築傅巖野。雖曰古盛時。得士蓋亦寡。天將啓治亂。人才有用舍。向非萬牛力。孰與成大廈。

又

洙泗日已遠。儒術日已喪。學者稱孔墨。爲國雜伯王。書生幸有聞。力薄不能倡。默默世俗間。汝職無乃曠。

又

我昔下三峽，百丈堆兩車。初發公安城，已過長風沙。早知世路惡，恨不常浮家。至今清夜夢，雙鷺聞謳嗟。

又

斗杓運四序，寒暑忽已換。人生知幾何，去日難把玩。憑高望煙海，青山忽中斷。秋風肺病蘇，爲子巾一岸。

又

磨鏡要使明，拭几要使淨。奈何視吾心，不若几與鏡。垢汙倘未除，秋毫卽爲病。吾曹亦聖徒，可卽學顏孟。

又

天人本一理，禍福常昭然。人衆何足恃，妄謂能勝天。適燕當北轅，調瑟當解絃。五行未可忽，洪範禹所傳。

又

鏡湖一河清，稽山一河高。浙江百里遠，夜枕聞驚濤。子胥死吳下，千載無人豪。遺魂招不來，我欲續楚騷。

又

歸耕無機穰，出戰無兜鍪。已失西疇春，空懷北平秋。提攜一束書，蹭蹬至白頭。鬴中有轆飯，一飽吾何求。

吳人謂飯不炊者爲轆飯，轆音勞。

又

我昔遊劍南，爛醉平羌月。一盃玻璃春，萬里望吳越。豈知有天幸，故山得歸骨。扁舟小江上，夜半看月沒。

又

入東多名山，天台連四明。路窮寺門出，林闕溪橋橫。豈無一月間，結束與子行。會揀最幽處，煨芋聽雪聲。

老足

秋雲易簇日常陰。西望山村每欲尋。屏掩數峰臨峭絕。地蟠一徑入幽深。

又

山步溪橋入早秋。飄然無處不堪遊。僧廊偶爲題詩入。魚市常因施藥留。

又

臨海銅燈喜夜長。新春笛簟怨秋涼。世間生滅無窮境。盡付山房一炷香。台州白銅燈猶絕妙。

又

才不才間未必全。胸中元自要超然。黃金不博身強健。且醉江湖萬里天。

又

牙齒漂浮欲半空。此生已付有無中。一盃藜粥楓林下。時與鄰翁說歲豐。

又

疏泉洗石誇身健。試墨燒香破日長。若得三山安樂法。不須更覓玉函方。

又

傍縣人來激泗翻。蝗災曝虎不堪言。天心似爲衰翁地。飽食安眠獨北村。

又

閑愁正可資詩酒。小疾安能減食眠。一畝旋租畦菜地。千錢新買釣魚船。

又
眼明尙見蠅頭字。暑退初親雁足燈。歷歷胸中千載事。莫將輕比住菴僧。

又

虛極靜篤道乃見。仁至義盡餘何憂。名山采藥恐未免。策蹇孰能從我遊。

雞犬

鄉村年久說農務。秋斂春耕恐失時。我老元無夙興事。懶雞啼曉恰相宜。

又

貧家也復謹朝昏。小犬今年乞近村。糠粃無多深媿汝。猶猶終夜護籬門。

秋來瘦甚而益健戲作

莫笑形羸不自支。清虛正與老人宜。矛頭浙米誰能食。甌裏生塵卻自奇。獨釣又逢秋晚後。安眠常到日高時。邇來久雨牆垣壞。砒竹東岡自作籬。

秋夜

岸幘蕭然病體輕。雨餘郊館已涼生。微風掠面酒無力。明月滿窗眠不成。葉底涓涓秋露滴。草根咽咽暗蛩鳴。屏居未免傷孤寂。賴有鄰翁約耦耕。

秋興

巢燕無情不更回。門庭日日落楸槐。新涼漸喜償碑債。多病還憂欠藥材。社近家方藟濁酒。客來身自掃

蒼苔。道心已熟機心盡。寄語鷓鴣莫苦猜。

閑詠

莫笑結廬魚稻鄉。風流殊未減華堂。茶分正焙新開箬。水挹中澗自候湯。小几研朱鳥點易。重簾墜地畫焚香。個中富貴君知否。不必金貂侍紫皇。青城丈人祠。畫仙官。有服緝繅者。

人壽至耄期

人壽至耄期。如位至王公。非以德將之。往往不克終。非必皆大惡。過取固多凶。吾今垂九十。追逐羣衆中。筋骸勝拜起。耳目未盲聾。強健天所借。正與富貴同。一念媿屋漏。一言誑孩童。老無朋友規。日夜勤自攻。

訪野人

我行城西南。適茲素秋時。風露雖已高。草木鬱未衰。敲門尋野人。一笑萬事非。拂榻意何勤。酒醞雁鶩肥。新涼天所賜。盡醉不足辭。擊壤歌堯年。瞑目以爲期。

薰蠶效宛陵先生體

澤國故多蠶。乘夜吁可怪。舉扇不能卻。燔艾取一快。不如小忍之。驅逐吾已隘。寧聞大度士。變色爲蜂蠶。

吹笛

吳江楚澤閑遊徧。未豁平生萬里心。醉裏獨攜蒼玉筍。岳陽樓上作龍吟。

書幸

破屋頽垣鬼笑窮。暗中調護賴天公。頻年得疾身猶健。百種無營飯不空。

感事

已醉猩猩猶愛屐。入秋燕燕尙爭巢。老夫看盡人間事。欲向山僧學打包。

晚晴

雨如塵點送新涼。雲作魚鱗襯夕陽。蓬戶清閑貧亦好。筍輿安穩病何傷。

農家

寂寂江村數掩籬。吾廬又及素秋時。橫林未脫色已盡。孤鳥欲棲鳴更悲。小釜菁藜初下飯。矮瓶豆粉正燃其。爲農幸有家風在。百世相傳更勿疑。

寓歎

白首還鄉厭蕨薇。偃偃自歎欲疇依。門庭不埽稀迎客。礎杵無聲未贖衣。達士共知生是贅。古人嘗謂死爲歸。耕疇幸可期中熟。又報殘蝗接翅飛。

又

憶昔建炎南渡時。兵間脫死命如絲。奉親百口一身在。許國寸心孤劍知。坐有客瘖堪共醉。身今病忘莫求醫。出門但畏從人事。臨水登山卻未衰。

雨夜

病多漸減燈前課。老甚都忘枕上愁。一段高情誰會得。臥聽簷雨瀉清秋。

秋懷

火食非初志。又 豈非自足。危危陶器預。歸即事。峯棊。連客傳琴調。高僧乞藥栽。人間豈不好。病眼自慵開。

又

吾雨無時止。幽人空復情。少眠知夜永。入病喜秋清。螢傍疎籬度。蛩依壞壁鳴。流年那可接。又見隴菘芽。

又

獨立離人境。幽居察物情。曠知軍陣法。蟲作緯車聲。身老唯貪睡。兒癡亦惰耕。騰騰復兀兀。何以報時平。

又

寓世久成贅。忘家生若浮。安能三太息。惟有四宜休。屋壞無全堵。船輕每信流。鴟夷幸無恙。賴爾可消憂。

小室

窗几窮幽致。圖書發古香。古香見米元章書畫史。尺池魚鱗鱗。拳石樹蒼蒼。老去身猶健。秋來日自長。養
生吾豈解。懶或似稽康。

贈道侶

蕊笈人多有。惟君獨造微。丹成河自塞。吟罷劍俱飛。酒市尋差易。雲山覓更非。何時醉攜手。爲我發玄機。

舟中醉題

風吹蘆荻聲颼颼。晚潮入港浮孤舟。老民已掃市朝迹。造物全付江湖秋。項里廟前是魚市。禹會橋邊多
酒樓。醉來且復過。此日莫爲礎杵悲無柔。

又

鮑郎山前煙雨昏，疎燈小市愁偏門。上船初發十字港，鼓棹忽過三家村。孤鸞對鏡空自感，老龜擔牀何足論。但願諸公各戮力，上助明主憂元元。偏門十字港，三家村皆地名。

出遊暮歸

東行西行日暮歸，川雲漠漠雨霏霏。蝗餘場上禾收薄，酒貴街頭客醉稀。買犢躬耕空自力，灼龜占歲又成非。稚孫索飯殊關抱，憐汝何時得瓠肥。

園中作

紗巾一幅立斜陽，本尙無閑況有忙。雞犬往來空自得，禽魚翔泳各相忘。欲衰莎草無多綠，未落梧桐已半黃。徂歲匆匆成絕嘆，瓦溝行復見新霜。

卷第七十八

感舊

莫笑山翁老欲僵，壯年曾及事高皇。雕戈北出成窮塞，華表東歸悲故鄉。萬事固難輕付度，百年猶有未更嘗。紛紛謗譽何勞問，但覺邯鄲一夢長。齊民要術曰：智如禹湯，不如更嘗。

東園

車馬無聲客到稀，荷鋤終日在園扉。斷殘地脈疏泉過，穿透天心得句歸。對鏡每悲鸞獨舞，繞枝誰見鷓南飛。悠然自遣君無怪，文史如山暫解圍。

秋夜

局促人間每鮮歡。秋來病骨愈酸寒。夾衣尙典雁聲過。斷簡未收雞唱殘。退士鬢毛紛似雪。老臣心事
如丹。燈前握臂無交舊。聊喚清尊少自寬。

驛壁偶題

纍纍驛門堦。杳杳寺樓鐘。葉落樹陰薄。雲生山崦重。交親窮未棄。父子老相從。惟待新粳熟。高眠聽夜
又

去去投山驛。悠悠解羸裝。斜陽穿破廡。落葉滿空廊。舞簡村巫醉。塗朱野女粧。近行吾亦倦。假寢據胡
又

過市未十里。入山知幾重。幽林間格磔。淺瀨見唼喁。小瓮家家酒。衡門世世農。班生定癡絕。辛苦覓侯
夜起思子虛

我久依耕壟。兒方弔戰場。臥聞風浩蕩。起視月蒼茫。老境禱袍暖。貧家菜粥香。惟愁殺風景。無酒作重
秋日次前輩新年韻

孤生雖永棄。要亦是黎元。渺渺煙中路。冥冥海上村。小灘看鷺立。平野送鴉翻。卽欲掩關臥。南山猶未
又

舊交多雋傑。離散各何之。騏驥志千里。鷓鴣巢一枝。青雲迷故步。白首負明時。幸有殘書卷。猶堪付小
又

老人常獨處，一笑比河清。終日無來客，三年不入城。高眠聽酒滴，危坐對雲生。矯首羲皇世，吾其享大羹。

又

浮家久居蜀，下峽晚還東。天際孤帆遠，花前百榼空。旅遊渾似夢，年運遂成翁。欲話羲眉月，無人可與同。

又

殘年垂九十，雪鬢不勝繁。賈履糶炊米，典衣租廢園。山深雲滿屋，夜靜月當門。鄰曲時相過，扶行賴稚孫。

仲秋書事

秋風社散日平西，餘昨殘壺手自提。賜食敢思烹細項，家庖仍禁擘團臍。昔爲僑曹耶兼領膳部每羹且食與三公略等食品中有羊細項甚珍予近以惡殺不食蟹。

又

天心那得與人同，性社家家禱歲豐。料理蝗餘猶十五，殘年亦未委溝中。

又

斷雲歸岫雨初收，茅舍蕭條古渡頭。短褐老人垂九十，松枯石瘦不禁秋。

又

客來深媿里閭情，近爲衰殘罷送迎。旋置風爐煎顧渚，劇談猶得慰平生。

又

舉家食粥顏平原，坐客無氈鄭廣文。不是有心輕富貴，偶然看破是浮雲。

又
書生習氣盡驅除。酒興詩情亦已無。底怪今朝親筆硯。村鄉來請辟蝗符。

又
靈府不搖神泰定。病根已去脈和平。金丹妙處無多子。只要先生兩眼明。

又
省身要似晨通髮。止殺先從暮拍蚊。老負明時無補報。惟將忠敬事心君。

又
杖得輕堅餘可略。酒能醇勁更何求。二君最是平生舊。白首相從萬事休。

又
心明始信元無佛。氣住何曾別有仙。領取三山安樂法。蒲團紙帳過年年。

步屨
名山有志未能酬。步屨東岡當出遊。小閣捲簾驚鷺起。青也。豈叫看魚浮。西風吹葉空多感。落日斷山尚。

後死
小留兒老戍邊歸未得。淮南新雁又經秋。

思刻
後死非初望餘生。只自悲。舊交孤劍在。壯志短檠知。行步雖依杖。光陰未付棋。爲農自當力。不爲學幽詩。

羸疾無休日。清秋適此時。節存施盡落。帶曠眼頻移。吾興復不淺。俗人那得知。會當遊劍去。支許有深期。

故里

漏盡鐘鳴有夜行。幾人故里得歸耕。摧傷自喜消前業。疾恙天教學養生。鄰曲新傳秧馬式。房櫓靜聽緯車聲。羊斟菰首君無笑。老子看來是大烹。

野意

久忝明恩返故鄉。全家衣食出耕桑。詩纔適意寧求好。醉卽成眠不暇狂。小雨荷鋤分藥品。乍涼扶杖看優場。此身已作農夫死。卻媿時賢獨未忘。

意行至神祠酒坊而歸

雨收霽色滿川原。獨曳枯藤出里門。陌上微風搖稗穗。溝中殘水出籬根。繫牲廟柱悲刀几。釀酒村場滿盎盆。與盡還家殊不遠。漁燈續火鬧黃昏。

訪村老

強健如翁舉世稀。夜深容我叩門扉。大兒叱憤戴星出。稚子捕魚乘月歸。骨肉團圓無遠別。比鄰假貸不相違。人間可羨惟農畝。又見秋燈照搗衣。

戲題僧巷

致虛守靜氣當全。家付兒孫命委天。夢事只堪高臥看。危途誰校疾行先。獨轆短棹聊乘興。野草幽花自闢妍。數字漫留僧壁去。與身閑作後身緣。

書意

秋江菰菜喜新嘗，鹽酪親調七箸香。但有長腰吳下米，豈須細肋大官羊。青衫昔悔塵中老，白髮今宜靜處藏。一事尙須深自咎，街頭兒女識韓康。

又

物我年來已兩忘，蕭然湖曲一茆堂。身閑自與俗子遠，睡美不知秋夜長。餘祿正應蠶瓮在，宿醒時臥酒壚傍。老人肘後長生藥，檢盡千金無此方。

南塘晚步記鄰里語

喚舟欲泛湖出門，日已暮。願景遂輟行。老病畏風露，不如上南塘。蕭然散予步，季子挾書卷。仲孫奉杖屨，夏秋多杜門。一出驚行路，鄰里相與言。穡事凜可懼，羣蝗飛蔽日。殘齧到竹樹，惟茲數里間。若有神物護，天菑幸獨薄。豈以此老故，老人亦自笑。病骨日欲仆，鬼神彼何爲。與世殊好惡，相期勤自修。此幸豈可屢。

稽山道中

文章事業初何有，鐘鼎山林本自同。昨暮釣魚天鏡北，今朝采藥石帆東。

又

禹陵草木初露露，謝墅人家已閉門。八十年間幾來往，癡頑不料至今存。

讀近人詩

琢瑀自是文章病，奇險尤傷氣骨多。君看大羹玄酒味，蟹螯蛤柱豈同科。

琴劍

流塵冉冉琴誰鼓。漬血斑斑劍不磨。俱是人間感懷事。豈無壯士爲悲歌。

戲題

莫輕凡骨未飛騰。要勝人間粥飯僧。山路近行猶百里。酒盃一舉必三升。

溪上小雨

我是人間自在人。江湖處處可垂綸。掃空紫陌紅塵夢。收得煙蓑雨笠身。

晚聞庭樹鴉鳴有感

烏鴉棲我庭。將旦輒散去。此豈厭所棲。亦以飲啄故。一飢能驅人。擾擾無晨暮。不然亦已矣。豈樂塵土汙。我有萌三閭。自少鮮外慕。力耕自足食。雞豚亦可具。晚雖誤收召。疾走如脫兔。六年楓林下。不知歲月度。殘骸幸強健。沽酒徧山步。鄉語謂湖山間。小聚爲山步。醉歸每自笑。不負此芒屨。平生愛方外。雖老冀有。遇秋風送片帆。更上剡溪路。

秋夜齋中

木落煙深江上村。暮秋蕭瑟不堪論。雁如著意頻驚枕。月似知愁故入門。營道數峯新石友。近得道石數峯廣陵一曲古桐孫。亦知長物終安取。聊與兒曹洗睡昏。

又

殘年冉冉返丘園。敗屋蕭蕭長子孫。久悔文辭妨大學。偶因憂患得玄門。扶持後死知天幸。容養無能荷

國恩急雨打窗秋。又晚旋挑野菜助盤殮。

識魏路逢野老共語歸舍賦此詩。

幾年羸疾臥家山。牧豎樵夫日往還。至論本求編簡上。忠言乃在里閭間。私憂驕虜心常折。念報明時涕每潸。二句實書其語。寸祿不沾能及此。細聽只益厚吾顏。

秋雨

暮秋木葉已微丹。小雨蕭蕭又作寒。目送斷雲歸谷口。身隨新雁寄江干。濁醪易負尋常債。退士難叨本分官。謝盡浮名更無事。燈前兒女話團圓。

秋來益覺頑健時一出遊意中甚適雜賦五字

旬日雨頻作。一年秋又殘。光陰不少貸。懷抱若爲寬。小瓮聊尋醉。疎砧已戒寒。定知清夜夢。又過石闌干。
剡溪道中佳處。

又

何許是吾廬。南臨古鏡湖。園林垂橘柚。門巷落楸梧。牀穩龜無息。巢新鶴有雛。鄰翁殊耐久。有酒卽相呼。

又

原野無閑土。鄉閭有老人。疾平行已健。秋晚醉差頻。啄黍黃雞嫩。迎霜紫蟹新。百年元任運。一笑卻關身。

又

養食筋骸憶。林廬歲月侵。道窮思故友。力盡悔初心。浩浩天知我。悠悠後視今。飄零君勿歎。古瑟有遺音。

又

輕裝雨衣笈，假寢一胡牀。喚渡江樓下，逢僧縣驛傍。橫林生夕靄，孤蝶弄秋光。老憤人間事，無詩寄斷腸。

又

渡水得魚舍，乞漿敲竹扉。地偏花帶恨，林暖鳥忘歸。獨往非違世，幽居自息機。晚來清興極，更喜雨霏霏。

又

窮阨非由命，從來作計疎。妄營資鬼笑，多愛奪狐書。何事能陶寫，惟當盡破除。霜晴宜著屐，不敢笑無馱。

又

寓世年雖往，安心疾已平。每思丹竈冷，宜覺世緣輕。布被雞催曉，蓬窗鵲噪晴。呼兒淨洗硯，書帖寄青城。

又

萬古無窮夢，餘年欲散雲。身雖迫衰謝，學未廢鉏耰。開卷多新得，逢人有舊聞。伏生雖九十，猶冀與斯文。

又

斯世本無事，古人誰與歸。屏除閑塵尾，收拾舊蓑衣。浩浩觀空劫，拳拳訟昨非。雲開天萬里，遼鶴正孤飛。

遊近山僧菴

臥看香種歎吾衰，起著芒屨信所之。十里溪山最佳處，一年寒煖適中時。眼明竹院如曾到，心許沙鷗卜後期。不是詩人託高興，日長真付一枰棋。

喜晴

三日雨不止。意謂無復晴。泥深不可出。臥聽空塔聲。事有未易料。南風起三更。陣陣浮雲歸。杲杲初日明。稽事既竭作。機杼比屋鳴。天公真老手。談笑功皆成。家家有新釀。歡言相送迎。嗚呼幸掃空。努力謀春耕。

阿通自閩中歸。甫九歲。頗有老成之風。作此詩示之。

通子還家已九齡。從師衿佩兩青青。長成勉作功名計。勿學衰翁老一經。

農家

大布縫袍穩。乾薪起火紅。薄才施吠畝。朴學教兒童。羊要高爲棧。雞當細織籠。農家自堪樂。不是傲王公。

又

盜息無排甲。兵消不取丁。頻過鬪雞舍。閑學相牛經。江浦漁歌遠。人家績火青。遨遊無定處。隨意宿丘亭。

又

東舍女乘龍。西家婦夢熊。翁誇酒重碧。孫愛果初紅。栗烈三冬近。團欒一笑同。營生無繆巧。百事仰天公。

又

租犢耕蕎地。呼船取荻薪。蒼頭供井臼。赤脚解縫紉。僧乞銘師塔。巫邀賽土神。心常厭多事。謝病又經旬。

又

新作地爐成。蓬窗亦自明。油香麪餌脆。人靜布機鳴。縣吏催科簡。豪家督債輕。小康何敢望。生計且支撐。

又

諸孫晚下學。髻脫繞園行。互笑藏鉤拙。爭言鬪草贏。爺嚴責程課。翁愛哺飴餚。富貴寧期汝。它年且力耕。

讀老子有感

左史倚相讀皇墳。學者尙得窺全渾。孰爲武成二三策。寧取道德五千言。巢居結繩事益遠。澆淳散朴忍復論。安得深山老不死。坐待古俗還羲軒。

鄉人送菰菜

張蒼飲乳元難學。綺季餐芝未免飢。稻飯似珠菰似玉。老農此味有誰知。

書喜

莫謂家貧厭舊醅。一尊聊對桂花開。天薑已過無蝗孽。海舶初通有藥材。剩借涼風吹醉頰。况逢急雨洗浮埃。入秋腰脚增強健。山麓從今日日來。

秋日徙倚門外久之

舍前煙水似瀟湘。白首歸來愛故鄉。五畝山園鬱桑柘。數椽茅屋映菰蔣。翻翻小繖船歸郭。渺渺長歌月滿塘。却掩柴荆了無事。篆盤重點已殘香。

雙蝶

庭草何離離。清晨露猶溼。草頭兩黃蝶。爲我小佇立。秋光亦已晚。行見霜霰集。方春不盡狂。汝悔尙何及。吾生更堪笑。去日如電急。功名竟何在。惆悵劍峯澗。

法雲孚上座求詩

老人癡鈍避嫌疑。終日柴門閉不開。堪笑山僧能好事。乞碑纔去覓詩來。近有淨慈僧請來求銘其師塔。

亦寓法雲幾年。

詹仲信出示卜居詩佳甚作二絕句謝之

十里相望亦未遙。何由頻得慰無聊。老來萬事慵開眼。獨喜詩盟不寂寥。

又

年來阻闊動經時。忽見新篇乃爾奇。安得齊紈翦團扇。爲君小草卜居詩。

夜雨

夜雨有殘滴。秋碓無絕聲。得詩旋已忘。覺睡固難成。壯志悲垂老。歸耕願太平。發春纔屬爾。歲事又崢嶸。

晚秋出門戲詠

病叟徜徉古澤邊。橫林搖落暮秋天。鳴鳩雨後卻呼婦。飛雀霜前先著緜。抱被每投僧榻宿。卷書時當酒家錢。秋風想像芝房熟。北望商山一悵然。

又

閑愁那到野人邊。萬事元知合付天。盡醉僅能三盃酒。新寒未辦一銖錢。鄰僧每欲分齋鉢。廟史猶來索社錢。無地置錐眞細事。不妨胸次日超然。

消搖

莫笑非權陌。消搖遂野情。遇魔增道力。因病悟浮生。謀食憑長鑊。論交得短檠。不知從此去。幾見雁南征。

堅頑

小市朝行藥，明燈夜讀書。雖殊帶箭鶴，要是脫鈎魚。有飯已多矣，無衣亦晏如。堅頑君勿怪，豈失遂吾初。

遣檢

息倦登耕隴，乘閑弄釣舟。安能書咄咄，且復送悠悠。窮巷誰來往，村醪自獻酬。何妨晏平仲，歲晚一狐裘。

又

窮每占周易，閑惟讀楚騷。病隨災漸退，嬾與拙相遭。投枕燈初上，披衣日已高。清愁亦可剪，無處買并刀。

又

有志師千載，無方起九原。山園菜常瘦，村店酒多渾。衰疾形詩句，窮愁入夢魂。傍觀任嘲笑，吾道始應尊。

又

雲旂初疑雨，風生忽快晴。半窗松竹影，繞舍鳥烏聲。看劍心猶壯，開書眼漸明。餘年真已矣，不復問君平。

初寒

日月誰能駐，風霜忽已高。公孫分布被，范叔共絺袍。糲糲炊香飯，蒲萄壓小槽。所慚才已盡，孤詠不能豪。

閑行至西山民家

秋林半丹葉，秋草多碧花。隔山五六里，臨水兩三家。鱸魚與伐菘，各自有生涯。平池散雁鷺，繞舍栽桑麻。客至但舉手，土釜煎秋茶。城中不如汝，切莫慕浮夸。

夜與子遜說蜀道因作長句示之

憶自梁州入劍門，關山無處不消魂。亞松託宿逢秋雨，小柏經行聽曉猿。亞松在成都，小柏在三泉閣道。

當日只知悲客路歸來終亦老江村吾兒生晚那知此聊對青燈與細論

村舍

無懷萬太古遺民種畚歸來束澗薪亭長聞名不識面豈知明府是何人

又

雞鳴犬吠相聞地穴處巢居上古風飽飯不爲明日慮酣歌便過百年中

又

露草乾時兒牧羊朝日出時女采桑一牀絮被千萬足不解城中有許忙

又

山高正對燒畚火溪近時聞戽水聲破屋已斜猶可住老牛雖瘠尙能耕

又

莫笑山家拙治生正緣亦足得身輕滿爐葑火渾家暖一盃松肪徹夜明

又

故絮五更偏覺冷薄糜未午已先飢誰知人不堪憂處正是降魔奏凱時

又

氣全自可忘憂患心動安能敵死生若論老人真受用已多稗飯與藜羹

登山西望有懷季長

陸放翁集 二十一 劍南詩集 卷七十八

行年垂九十。舉世少輩行。敢言貧非病。要是老益壯。平時嬾書疏。有答未始倡。張卿獨所敬。夙昔推直諒。迹雖隔吳蜀。相憶每慘愴。使者交道中。萬里問亡恙。忽焉奉赴告。斯文豈將喪。腰經不撫棺。執紼不會葬。送子珉山下。想見車百兩。我徒哭寢門。淚盡氣寒吭。年雖不耄期。仕誰不將相。神明司禍福。于職豈亦曠。霜風九月初。憑高極西望。江原在何許。安得鏗疊嶂。

山行

五尺桃榔杖。二寸栴檀冠。往來山谷中。髮白面渥丹。初非乳石力。所得懷抱寬。入寺不尋僧。自愛松風寒。松風晚少靜。我意殊未闌。却尋歸村路。白石明青灘。

二樂

遊山恨不遠。讀書恨不博。天下多名山。何處無芒屨。束書飽蠹魚。於汝寧不怍。日月如過燒。老病將何若。眼猶給開卷。足尙供尋壑。少勞君勿辭。是中有真樂。

村女

白襦女兒繫青裙。東家西家世通婚。采桑餉飯無百步。至老何曾識別村。

示子遙

我初學詩日。但欲工藻繪。中年始少悟。漸若窺宏大。怪奇亦間出。如石漱湍瀨。數切李杜牆。常恨欠領會。元白纔倚門。溫李真自鄙。正令筆扛鼎。亦未造三昧。詩爲六藝一。豈用資狡獪。晉人謂戲爲狡獪。今國語尚爾。汝果欲學詩。工夫在詩外。

附菊脬有屬

才本無多老更疎。功名已負此心初。鏡湖夜半聞新雁。自起吹燈讀漢書。

又

新雁南來片影孤。冷雲深處宿菰蘆。不知湘水巴陵路。曾記漁陽上谷無。

山村獨酌

腰劍如今不換牛。固應萬事一時休。孤舟慣作瀟湘夢。駿馬寧思鄆杜遊。殺譽要須千載定。功名已向隔生求。石帆山下秋風晚。買酒看雲自獻酬。

小園獨酌

橫林搖落弄微丹。深院蕭條作小寒。秋氣已高殊可喜。老懷多感自無歡。鹿初離母斑猶淺。橘乍經霜味尙酸。小酌一卮幽興足。豈須落佩與頽冠。

卷第七十九

秋思

湖邊一夜霜。庭樹無秋聲。懶不近筆硯。何以紓幽情。但有一睡耳。展轉無由成。起擁地爐暖。坐待天曉明。

又

弊衣但故絮。糲食惟黃齏。餘年如登山。步步勤攀躋。從子念寂寞。千里致鹿麋。秋風石帆下。伴我扶青藜。

又

稽山九十翁，病起無氣力。擁杖牧雞豚，乃是老人職。一盃辛糝羹，孫子喚翁食。既飽負朝陽，自愧爾何德。

又

今日鵲噪籬，邢趙蜀父去。別我西，老懷易感慨。近別亦慘悽，自我臥孤村。海內無輪蹄，垂虹秋愈佳。不得同裝齋。

覽鏡

鏡中老翁誰，非復少年我。誦書如布穀，拈出無一可。又非富貴逼，棄去自不果。無功博一飽，有鼻當萬坐。老境最堪笑，作計日益左。正似鳩拙巢，不及蠶自裹。霜寒衣未贖，瑟縮附殘火。作詩數十年，所得良瑣瑣。弱松困蔓纏，何日見磊砢。洞庭可遠遊，秋風思楫柁。

雨晴

小雨初增氣慘悽，新晴差解病沉迷。虛廊靜院聽松籟，細草甘泉養鹿麕。寒鶻細分山遠近，野歌相應路高低。孰知倦客蕭然意，水品茶經手自攜。

秋盞自遣

息駕江湖上，推移歲又殘。雨添苔暈紫，霜染柏林丹。貧歎耕疇薄，狂依禁網寬。遊山攜一鉢，到寺即開單。

又

老健非頤攝，羈窮爲折除。人情看已慣，身在不論餘。席下錢雖盡，餅中粟有儲。行歌混樵牧，吾計未全疎。

晝臥

我意殊昏然。一日三就枕。目前幸未病。病勢亦凜凜。偶拈一卷讀。美若鳩食菴。雖云嗜好篤。自計亦已審。聖門未能窺。詎敢希在寢。所求養根原。常恐躓塔品。死期誠已迫。尙可支數稔。蕭瑟不廢功。吾其享高廩。

獨坐

博山香霧散。辭袖手何妨。靜掩扉。六十年前故人盡。紹興中往。還朋舊。今乃無一人在。八千里外寄書。稀。自張季長下世。蜀中書問幾絕。昨朝送客桐江去。今日逢僧剡縣歸。欲作小詩。還復懶。海鷗與我兩忘機。

書感

衰顏非復昔年朱。幾過黃公舊酒壚。成敗只堪三太息。是非終付一胡盧。連天煙草迷歸夢。動地風波歷畏途。辛苦一生成底事。躬耕猶得補東隅。

舟中夜賦

問天乞得不負身。常作東阡北陌人。買酒不澆胸礪礪。憂時空覺膽輪囷。寓居尙復能栽竹。羈宦懸知正憶尊。那似石帆山下客。釣船載月泊煙津。

舍傍晚步

蒲團初起定。藤杖偶閑行。鳥語如相命。魚浮忽自驚。麥苗經雨綠。楓葉得霜頰。野老淳風在。悠然不送迎。

又

養疾便居僻。尋幽喜雨晴。偶因將鹿出。遂作放魚行。木落塔初見。潦收灘自生。霜清念遊衍。漸擬問山程。

自詠

紛紛世態但堪悲。一念蕭然我亦奇。醉裏猖狂醒自笑。夢中虛幻覺方知。江湖重複風波惡。齒髮凋零歲月馳。安得中原路如砥。涓川釣伴待多時。

又

茅舍蕭條似寶坊。老人終日對爐香。學荒自笑身空在。祿盡誰知壽更長。陂水蘸隄常灑灑。麥苗覆塊已蒼蒼。經行更有欣然處。四野鉏耰滿夕陽。

初冬

初冬常憶宴梁州。百炬如椽滿畫樓。三十七年猶未死。茅簷霜冷一燈幽。

霜晴

萬瓦新霜白。一窗朝日晴。破裘身亦暖。細字眼猶明。老喜譚諄語。衰常蹠蹠行。登封書不草。力穡報時平。

初寒

新雁來時歲又殘。丹楓數樹照江干。前山雲起忽成隕。陋屋雨來初變寒。身退已收滿禁夢。里居終出上恩寬。作詩老恨無奇思。時取囊中斷稿看。

題傳神

溼雲生兩屨。細雨暗孤篷。悔不桐江上。從初作釣翁。

書感

伐性戕生豈一端。暮年贏得是衰殘。齒牙零落髮大脫。毛髮蕭疎更小冠。階日每驚新曆換。法塞尙覺弊
塵寬。華山阻絕岷山遠。安得冥鴻借羽翰。

宋都曹屢寄詩且督和答作此示之

古詩三千篇。刪取財十一。每讀先再拜。若聽清廟瑟。詩降爲楚騷。猶足中六律。天未喪斯文。杜老乃獨出。
陵遲至元白。固已可憤疾。及觀晚唐作。令人欲焚筆。此風近復熾。隙穴始難窒。淫哇解移人。往往喪妙質。
苦言告學者。切勿爲所怵。航川必至海。爲道當擇術。

獨飲

蕭蕭霜風勁。蕭蕭木葉聲。殘年如寄爾。冷坐太憎生。就市沽新釀。呼兒洗破觥。獨斟還獨醉。無月配長庚。

簡湖中隱者

十里隔天鏡。一菴依翠屏。甘泉勝牛乳。靈藥似人形。處處筇枝健。年年鬢色青。客星猶不作。肯應少微星。

初冬雜詠

重陽已過二十日。殘菊纔存三四枝。對酒插花君勿笑。從來不解入時宜。

又

古書書來言得塔。東陽人到報生孫。一家三處俱強健。且撥閑愁近酒尊。

又

兒時愛書百事廢。飯冷戴乾呼不來。一生被誤終未醒。老作蠹魚吁可哀。

又

微風澹水靴文浪。薄日烘雲卵色天。但恨世間閑客少。江湖底處欠漁船。

又

書生本欲輩莘渭。蹭蹬乃去爲詩人。囊中略有七千首。不負百年風月身。

又

俗緣已斷寧容續。幽事雖多不厭增。折簡迎醫看病鹿。春粳炊飯供遊僧。

又

夜窗父子共煎茶。一點青燈冷結花。村落盜清無吠犬。園林月上有啼鴉。

又

老去胸中百事真。同遊無復白頭新。鵲從熟後頻分食。鹿漸馴來不避人。

老歎

齒髮衰殘久退休。衡茅荒寂更禁秋。一無用力身猶倦。百不關心夢亦愁。遠浦臥看鳧泛泛。深林時聽鹿呦呦。天台日有遊僧過。白鹿黃精不待求。

小園

誰爲閒愁撥不開。小園也復有池臺。清泉白石皆吾友。綠李黃梅盡手栽。衝雨菱雞時上下。近人栗鼠不

驚猜自憐兩屢猶輕捷。不待兒扶日。日來。

冬夜思里中多不濟者愴然有賦

大耋年光病日侵。久辭微祿臥山林。雖無歎老嗟卑語。猶有哀窮悼屈心。力薄不能推一飯。義深常願散千金。夜闌感慨殘燈下。皎皎孤懷帝所臨。

宿近村

病齒漂浮短髮稀。此身猶墮亂書圍。邯鄲倦枕晨炊熟。昌谷空囊晚醉歸。久因厭從人乞貸。力耕頻遇歲凶饑。行年九十窮彌甚。旅舍燈前自綻衣。

梅村野人家小憩

正遣清詩覓菊栽。穿雲涉水又尋梅。萬牛不挽新愁去。一鳥還驚午夢回。老媿逢人說幽憤。窮能隨事學低摧。江邊漂母何爲者。無食王孫未易哀。

寄陳伯子主簿

今年閏餘時。令早十月霜。風吹客倒。老夫畏寒不出門。數步鄰家迹如掃。此時陳子獨何勇。飢僅瘦馬長安道。絕知涵養與人別。吐氣如虹失衰老。孟軻浩然正應爾。豈比區區養梨棗。萬鍾于子本何加。一官未免從人討。世誰不達子獨窮。孰念令人惡。懷抱石渠天祿正。須才往乞揚雄太玄草。

夜半憶剡溪

早睡苦夜長。晚睡意復倦。斂膝傍殘燈。拭背展書卷。時時搔短髮。稍稍磨凍硯。更闌月入戶。皎若舒白練。

便思泛樵風。溪名次第入劍縣。名山如高人。豈可久不見。

道上見村民聚飲

霜風利如割。霜葉淨如掃。正當十月時。我行山陰道。場功俱已畢。歡樂無壯老。野歌相和答。村鼓更擊考。市墟酒雖薄。羣飲必醉倒。雞豚治羹餼。魚蟹雜鮮茗。但願時太平。鄰里常相保。家家了租稅。春酒壽翁媪。

小江

出郭四十里。孟冬。天向和。風生帆力健。木落月明多。小市人聲散。長橋炬火過。吾生幾來往。撫枕獨悲歌。

短歌行

富貴得意如登天。自計一跌理不全。晝食忘味夜費眠。渠過一日如一年。春蠶得衣耕得食。農功初成各休息。賣酒墟邊紛鼓笛。我過一年如一日。二者求兼勢安可。與我周旋寧作我。春城桃李豈不妍。雪澗未妨松磊砢。人生禍福難遽論。廟犧烏得爲孤豚。君不見獵徒父子牽黃犬。歲歲秋風下蔡門。

初寒

重雲蔽白日。陂港日夜澗。秋風纔幾時。已見霜雪作。人生各有分。豈必衣狐貉。吳中冬蔬茂。盤筯不寂寞。薄泥治牆屋。伐篠補籬落。薄酒亦醉人。問子胡不樂。

對鏡

鏡中衰顏失數腴。綠鬢已作霜蓬枯。兩肩聳聳似山字。曳杖更有蠻童扶。自驚何以致此老。亟欲俯敬問起居。徐徐熟視乃大笑。但記昔我忘今吾。今吾雖慙顏神王。飛仙正可折簡呼。遠遊縱未從谿父。醉眼猶

能隘具區。

書劍

書劍當年徧兩川。歸來垂釣鏡湖邊。老皆有死豈獨我。士固多貧寧怨天。物外勝遊攜鶴去。琴中絕譜就僧傳。莫言白首詩才盡。讀罷猶能意爽然。

城南道中有感

行李蕭然一束書。城南觸目更愁予。市門乞食僧持鉢。關路哦詩客跨驢。殘髮無多真已矣。名山未去獨何歎。芒屨可買身猶健。紅樹青霜十月初。

寄子虞兼示子適

書生賦命艱。舉步得憂患。敢論得意事。一笑亦有限。南征度閩嶺。西戍歷蜀棧。吳江聽唳鶴。淮浦送歸雁。歸來耕故山。暮雨泥沒胫。羣鴉下空陂。黃犢鳴絕岸。案飯闕兒啼。乞糶虞妾覿。一裘三十年。破裂不受綻。欲添一把茅。百計亦未辦。大兒急親養。辛苦就遠宦。間出冒虜塵。短甲中夜振。小兒奉親驢。野果采溪澗。勉使就微祿。未對涕先潛。觀汝兄弟意。豈復厭藜苲。兄歸弟不出。定省同夜旦。

一年老一年

一年老一年。一日衰一日。譬如東周亡。豈復須大疾。懶惰已廢書冊久。病來亦復疎盃酒。輒車小住固自佳。佛曲便行亦何有。下床擁火暖有餘。鹹豆數粒粥一盂。平生常笑愚公愚。欲栽墮齒染白鬚。

自東岡繚出舍北

年光豈不好。老境獨無歡。百步未爲遠。一尊聊自寬。澤枯波尚綠。霜薄葉初丹。矯首問來雁。中原應苦寒。

有客

有客南山至。相攜飯野亭。傾籃魚白白。出籠菜青青。米滑溪春碓。醅渾草塞瓶。從今同保社。日醉不須醒。

陳伯予見過喜予強健戲作

寒無氈坐甑生塵。此老年來乃爾貧。兩頰如丹君會否。胸中原自有陽春。

東陽郭希呂呂子益送酒

出岫尋香得早梅。園丁又報水仙開。獨醒坐看兒孫醉。虛負東陽酒擔來。

夜坐

家家積火夜深明。處處新畬雨後耕。常媿老身無一事。地爐堅坐聽風聲。

兩日意殊不擇作短歌自遣

一月得笑纔四五。十事敗意常八九。國中謔說無雙士。天下元無第一手。平生愛酒恨小戶。半世爲文真弊帚。劫灰處處吊興亡。宿草年年哭交友。君看丈夫得意時。大冠如箕印如斗。一朝棄去豈復論。衣破何妨露雙肘。有時采藥二室間。亦或釣魚五湖口。死來萬古一熟眠。安用虛名傳不朽。

戲書日用事

衰病時時作。閑愁日日生。寒添沽酒興。困喜聽茶聲。琴廢還重理。詩成更細評。殘年那望進。且復暢幽情。

獨立

上書不上登封書。乘車但乘下澤車。夕陽獨立衡門外。閑看村童學釣魚。

夢中江行過鄉豪家賦詩二首既覺猶歷歷能記也

梁屋傍江臯。牆垣締結牢。深門蔭楊柳。高架引蒲萄。黍酒歡迎客。麻衫旋束條。兒孫勿遊惰。常念起家勞。

又

蒲席乘風健。江湖帶雨淪。樹餘梢纒迹。崖有刺篙痕。酒醉湘君廟。歌招屈子魂。客途嗟草草。無處采芳蓀。

病中夜思

一病輒兼旬。百憂集雙鬢。藥裹堆床滿。生意垂欲盡。時聞雀翻更。郛中有栖雀。夜鳴爲翻更。頻看燈落燼。平生學六經。白首頗自信。拳拳服仁義。念念去驕吝。所覲未死間。猶有分寸進。

得子虞書言明春可歸

白首相依飽蕨薇。吾家父子古來稀。春秧出水柔桑綠。正是農時望汝歸。

雜賦

地爐夜熱麻蕕煖。瓦甌晨烹豆粥香。不是有心輕富貴。從來吾亦愛吾鄉。

又

病叟胸中一物無。夢遊信脚到華胥。覺來忽見天窗白。短髮蕭蕭起自梳。

又

終日纔堪米一升。生涯略似草菴僧。溼薪不管晨炊晚。留得松肪代夜燈。

又

出門信步作閒遊，野廟村坊到處留。每伴樵夫嘗半舍，更隨牧豎采沿溝。牛舍沿溝皆果名。

又

體不佳時看周易，酒痛飲後讀離騷。騎驢太華三峯雪，鼓棹錢塘八月濤。

又

昔人莽莽荒丘裏，陳迹紛紛朽簡中。畢竟是非誰辨得，舉盃吾欲問虛空。

又

百億須彌理固有，八九雲夢何足吞。天下廣居君識否，一間茆屋寄孤村。

又

夢裏曾作南柯守，少時元是東陵侯。今朝半醉歸草市，指點青帘上酒樓。

又

七十八古來稀，行年九十固應衰。已與工部耳聾歎，更和文公齒落詩。

又

中年畏病盃行淺，晚歲修真食禁多。謝客杜門殊省事，一盃香飯養天和。

又

齊民讓畔不爭桑，和氣橫流歲自穰。君看三山百家聚，更無一壠有遺蝗。今年蝗孽，獨三山過而不下。

不爲笑。

又

得雨郊原已徧耕。東家西舍多逢迎。前山雲起樹無影。別浦潮生船有聲。

散懷

小疾便幽翳。孤懷抱鬱陶。遺文誦史漢。奇思探莊騷。談笑寬吟苦。經行慰作勞。東岡聊一往。突兀古臺高。

書壁

稻草高茨屋。繩樞窄作門。漁樵皆結友。鄰曲自通婚。留客秋茶苦。醺人社酒渾。餘年尙何歎。一飯亦君恩。

又

故里還初服。明恩念老農。方蒙鏡湖賜。又忝渭川封。炊粟猶支日。藏蔬可御冬。霜天病益減。高枕聽鄰鐘。

冬日齋中卽事

讀書雖所樂。置之固亦佳。燒香袖手坐。自足紓幽懷。我生本從人。豈願終不諧。其如定命何。生死一芥齋。

又

一帶常在榜。有暇卽掃地。旣省課童奴。亦以平血氣。按摩與導引。雖善亦多事。不如掃地法。延年直差易。

又

夙與人尙默。衆烏相與言。小語豈不可。何至爾啾喧。吾獨擁燎爐。宿火有餘溫。澹然以自適。喧寂何足論。

又

詰朝澹無營。百事付童子。拂我架上書。注我硯中水。覺睡不復成。取衣乃徐起。卒歲如一朝。底處著愜喜。

又

我老苦寂寥。誰與娛晨暮。狸奴共茵席。鹿麕隨杖屨。歲薄食無餘。恨使鳥雀去。安得粟滿困。作粥餽行路。

又

東園二畝地。重重作藩籬。我豈婦女哉。避客門不窺。要當盡徹去。來往無它歧。飯罷忌久坐。時須曳筇枝。

冬日排悶

老欲躬耕力弗強。但應賣藥似韓康。陳編時見古成敗。舊友不知今在亡。已返山林遺世事。尙憑詩酒答年光。此身自笑如稊米。加損寧能繫太倉。

又

地爐微火伴寒灰。垂野江雲暝不開。欲睡手中書自墮。半齣窗外雪初來。渡頭照影聞征雁。籬角吹香得早梅。佛粥春盤俱不遠。離離斗柄欲東回。

法雲寺主僧妙湛方作鐵樓未成。

勾踐舊國古會稽。南山擁郭分東西。城門大路引繩直。西走百里皆平堤。客行欲曉到梅市。喔喔尙聽城中雞。法雲古寺臨大澤。風皺百頃青玻璃。迎來送往此其地。素壁時見前人題。乖離會合浩莫計。歷觀名氏空含悽。山僧慣見爲客歎。榮悴從來如夜旦。明年吾樓插天半。世事君須倚闌看。

自法雲歸

落日疎林數點鴉。青山闕處是吾家。歸來何事添幽致。小竈燈前自煮茶。

枯菊

龍山落帽未多時。陳迹依然使我悲。粲粲菊花何似好。塔前惟見束枯枝。

聞吳中米價甚貴二十韻

千錢得斗米。一斛當萬錢。嗟汝蚩蚩民。何恃以自全。我欲告父老。食爲汝之天。勿結迎神社。勿飾航湖船。築室勿斲削。但取垣屋堅。婦女省釵澤。野粧何用妍。趨利常處薄。衆役常在前。歲時相勞苦。盛饌一豚肩。近市可致酒。雖薄亦醺然。切勿慕公卿。早朝妨熟眠。亦勿謀高貴。貪吏不汝憐。有負固吹毛。無罪亦株連。豈暇論曲直。挺繁如登仙。短褐與飯豆。溫飽可終年。草廬挂葦宿。乃可數世傳。朱門雖赫赫。變化如飛煙。爲農最得策。本無祿與權。時平自逸樂。奉性祭其先。不幸有散徙。均爲寓民編。吾詩不足徵。請讀七月篇。

寒夜偶懷壯遊書感

曠昔西遊萬里還。狂吟散落滿人間。買空綠水橋邊酒。看徧青城縣裏山。梅蕊疎疎春欲動。川雲漠漠雪猶慳。偶思五十年來事。顧影燈前自笑頑。

夢曾文清公

有道真爲萬物宗。嶢然使我歎猶龍。晨雞底事驚殘夢。一夕清談恨未終。

睡覺

白日悠悠喜意平。夢中歷歷覺魂清。覺時不落晨雞後。靜待天窗一點明。

湖邊小聚

小聚遠塵囂。淳風獨未饒。鳴機燈煜煜。飲饋雨蕭蕭。異味常交致。新醪亦苦邀。人間交道絕。令我慕漁樵。

雨

秋冬久不雨。氣濁喜雲生。麥蘗崇朝潤。茆檐徹夜聲。初來斷幽徑。漸密雜疎更。賴有牆陰薺。離離已可烹。

又

薄晚初沾灑。清晨更慘淒。魚寒拋餌去。鴉溼就簷栖。幽澗濺濺溜。長隄淺淺泥。一盃持自賀。吾事在鋤犁。

雨後快晴步至湖塘

齒豁從教道字訛。負薪陌上且行歌。古人亦自逢時少。吾輩何疑忤俗多。山掃黛痕如尙溼。湖開鏡面似新磨。亦知大有掀髯處。無奈西流白日何。

兩日寒雨作雪不成夜忽大雨遂晴

折木翻濤一夜風。浮雲吹盡日行空。天公豈是真慳雪。三白留來付臘中。

歲窮

困厄身如寄。推遷歲忽窮。百年均昨夢。萬古一飛鴻。夜甕鳴春酒。晨畦擷晚菘。屬壓童子笑。便腹負吾翁。

凍坐

湖海淒涼地。風霜慘淡天。吾其去道近。無酒亦陶然。

古意

千金募戰士，萬里築長城。何時青塚月，却照漢家營。

又

夜泊武昌城，江流千丈清。寧爲雁奴死，不作鶴媒生。

雪意復作

前日作雪風敗之，今日濃雲雪復作。一寒未暇自爲計，宿麥懸知天已諾。灞橋策蹇愁露手，新豐買酒聊
輓脚。胸中正著九雲夢，廊廟何加一丘壑。上書陳事固可笑，服藥求仙亦成錯。不如醉踏一劍騰風雲，跨
海東謁青童君。

醉書

天公賦與五湖秋，風月雲煙處處留。損食一年猶可健，無詩三日却堪憂。

陸放翁集

劍南詩稿

卷第八十

排悶

造物冥冥中，與我無一面。不知獲罪由，動輒被訶譴。又若哀其愚，救以藥瞑眩。我亦揣此心，安受不敢怨。中間成蜀漢，十載困郵傳。騎盞蒙隴干，陣雲暗秦甸。齋糧雜沙糝，掬水以三嚙。傳烽東路谷，倏忽若流電。歸吳獲小休，餘喘僅一綫。意在故鄉終，勝客異縣。夫何命大謬，魔事每交戰。友讐同一波，平地肆蹈踐。么然性命微，日畏讒口煽。舊書不暇視，鼠跡上几硯。負痾不卽死，遂作諸老殿。却觀所更歷，殆是金百鍊。人誰不愛身，悔作青紫楨。短笻入空翠，小艇破江練。漁歌隔浦聞，續火傍林見。苦貧雖至骨，未肯受客暗。君看投林猿，終異巢幙燕。有山皆可耕，焉往失貧賤。

湖山尋梅

鏡湖渺渺煙波白，不與人間通地脈。騎龍古仙絕火食，慣住空山齧冰雪。東皇高之置度外，正似人中巢許輩。萬木僵死我獨存，本來長生非返魂。

又

小雪湖上尋梅時，短帽亂插皆繁枝。路人看者竊相語，此老胸中常有詩。歸來青燈耿窗扉，心鏡忽入造。

化機墨池水淺筆鋒燥。笑拂吳箋作飛草。

作雪寒甚有賦

雲暝風號得我驚。硯池轉盼已生冰。窗間頓失疎梅影。枕上空聞斷雁聲。公子皂貂方痛飲。農家黃犢正深耕。老人別有超然處。一首清詩信筆成。

書嬾

我性本迂疎。養生又無術。憂患自外至。疾病由中出。屏居絕造請。冀補東隅失。今觀世間事。如僧視沐浴。閑身嶺上雲。睡味蜂房蜜。惟思茅簷下。一席臥朝日。

讀唐人愁詩戲作

少時喚愁作底物。老境方知世有愁。忘盡世間愁故在。和身忘却始應休。

又

清愁自是詩中料。向使無愁可得詩。不屬僧窗孤宿夜。卽還山驛旅遊時。

又

天恐文人未盡才。常教零落在蒿萊。不爲千載離騷計。屈子何由澤畔來。

又

我輩情鍾不自由。等閑白却九分頭。此懷豈獨騷人事。三百篇中半是愁。

又

飛雪安能住酒中。閑愁見酒亦消融。山家有方參天地。不放清尊一日空。

讀書至夜分感歎有賦

老人世間百念衰。惟好古書心未移。斷碑殘刻亦在櫝。時時取玩忘朝飢。推尋點畫到曲折。想見落筆縱橫時。豈惟鸞鳳九霽上。景鍾大鼎森陸離。雖然欲學則曷敢。驚馬仰看驂駟馳。正如志士才不稱。心慕伊傅終何施。爾來亦復強點染。子不隨意徒嗟咨。懸知明日天將雨。中夜雲蒸紫玉池。

擁爐

急雨狂風暮不收。燎爐薪暖復□□。傾漱澆鶴黃酒。似擁蒙茸狐白裘。大澤鷓鴣來萬里。高城傳漏過三籌。明朝會看稽山雪。莫爲衝寒怯上樓。

隱趣

歸老家山一幅巾。俗間那可與知聞。舉盃每屬江頭月。贈客時緘谷口雲。行采菖蒲緣薜磴。臥浮鼉鼉入鷗羣。力營隱趣君無怪。作得閑人要十分。

冬夜舟中作

夜榜孤舟掠岸行。村墟頻過不知名。繞枝倦鶴寒無影。脫網奔魚遠有聲。兩紙忽驚殘曆盡。一盃聊慰旅懷情。還家自笑身猶健。又付生涯與短檠。

湖山

逐鹿心雖壯。乘驪勢已窮。終全蓋世氣。絕意走江東。項羽廟。

湖上多甘井。磴泉尤得名。何時枕白石。靜聽轆轤聲。磴山泉。

又

山崦桑麻路。柴門鳥雀聲。老巫祈社雨。小婦餉春耕。客山。

又

坡陁度小嶺。軒豁見平湖。但醉梅花下。民家酒可沽。花徑小嶺。

又

淺井供茶竈。分流浣布沙。此泉吾所愛。百用給山家。項里民家淺井。

又

故堞無遺跡。蕭然數十家。茶煙映山起。酒旆傍隄斜。古城。

又

汀月生眉黛。溪梅試額粧。幽閨元不出。莫道嫁彭郎。柳姑廟。

又

城邊小市聚。煙水淡秋容。南走蘭亭路。迢迢雲外鐘。東跨湖橋。

又

東西二十里。相望兩平橋。傍水多提釣。穿雲有負樵。四跨湖橋。

齒髮

暮境侵尋歲月過。齒搖髮脫又經秋。此身要是歸衰謝。外物何須更固留。阜白從來憎了了。登臨且復送悠悠。嗣宗痛飲圖南睡。萬事輸君此一籌。

古謂不如意事十常八九。雖出於好功名者之言。閑中亦未免此。歎戲作七字一首。

歸志初諧老遽催。良辰常與病俱來。酒雖已熟良無菊。事豈不成空見海。明簷乖離心每折。山川悠邈首頻回。人生敗意無窮達。莫厭相逢笑口開。

幽居歲暮

冉冉忘年往。紛紛厭事來。庭除多草莽。几硯亦塵埃。園爲畦蔬到。門因汲水開。偶聞林鳥語。太息又春回。

却醫翻少疾。辭祿不加貧。嘉木移俱活。村醪釀輒醇。悠悠還過日。盎盎又逢春。狂舞君毋笑。梅花插滿巾。

老去轉無事。室空惟一床。臥時幽鳥語。行處野花香。巷北觀神社。村東看戲場。誰知屏居意。不獨爲耕桑。

燃薪代秉燭。煮茗當傳盃。但恨朋儕少。那知日月催。衣裘任穿穴。芋栗且燂煨。不爲殘年迫。吾心久矣灰。

古井年年浚。荒疇日日犁。刈茅苦鹿屋。插棘護雞栖。閑賴書遮眼。愁須酒到臍。斜陽有常課。緩步上湖隄。

過湖上僧廬

西庵每過未嘗開。邂逅清言始此回。陶令巾車尋壑去。已公茅屋賦詩來。奇香炷罷雲生岫。瑞茗分成乳泛盃。便恐從今往還熟。入門猿鳥不驚猜。

夜坐戲作短歌

畏事如畏虎。避人如避寇。結廬三家村。百事喜寒陋。身閑自爲貴。飯足豈非富。素心憎狐妖。老愈惡銅臭。視之若寒氣。可使客膺膝。卽今知免矣。終歲塞門竇。始知松倒壑。殊勝雲出岫。聊持不動心。更養未盡壽。夜讀南華篇。欣然發吾覆。

書歎

世事紛紜汝所知。欣然領略尙何疑。窮居自是長年術。魔境常爲定力資。人但與遊無德怨。酒皆可醉略醇醪。蘭亭賓主今何在。脩竹依然似曩時。

又

尺椽不改結茅初。薄粥猶艱卒歲儲。鴟子解迎門外客。狸奴知護案間書。深林閑數新添筍。小沼時觀舊放魚。自笑從來徒步慣。歸休枉道是懸車。

日暮自湖上歸

我生本亦與人同。緣薄才疎剩得窮。細水自鳴沙渚外。亂山時出雪雲中。僧歸獨趁殘鐘去。人散遙憐晚渡空。造物陳詩信奇絕。忽忽摹寫不能工。

晚步湖隄

袍裘桐帽野人裝。又上湖隄步夕陽。貧甚不爲明日計。興來猶作少年狂。殘樽倒酒無餘瀝。幽圃尋梅認
暗香。時有行人歎頑健。黑絲黠破領間霜。

夜寒

江雲作雪暗郊原。竟夜風聲萬馬奔。棉面暫朱知酒醞。曲身成直賴爐溫。幼輿正復宜巖石。倚柁猶能讀
典墳。米貴僅供糜粥用。自傷無力濟元元。

感舊

早參太史筆。晚典石渠書。孤立如羈雁。微生等蠹魚。虛名真忝竊。定理有乘除。九十稽山下。荒畦日荷鋤。

小雪

夜臥風號野。晨興雪擁籬。未言能壓瘴。要是欲催詩。跨蹇雖堪喜。呼舟似更奇。元知剡溪路。不減灞橋時。

十二月十日暮小雪即止

夜來急雪打船窗。今夜推窗月滿江。堪恨無情一枝燭。水禽驚起不成雙。

又

夜來一雪苦愆恩。千里濃雲忽來空。換得月明良不惡。未須過計慮蝗蟲。

遣興

鬢鬢魚鹽市。迢迢桑麥村。山家薪炭足。野叟袴襦溫。置兔殘蕪盡。又魚積水渾。詩書老無效。猶擬付兒孫。

貧居時一肉食爾戲作

身老便居僻，山寒喜屋低。時猶預曾米，那肯貸鄰錢。易餅挑春蕒，盤飧設東齋。怪來食指動，異米得豚蹄。

臘月十四日雨

歲晚深居嬾出遊，小窗終日寄悠悠。雨聲到枕助詩律，花氣襲衣生客愁。殘齒不堪添脆脆，瘦肩轉復覺颼颼。春前一雪猶關念，安得瓊瑤積瓦溝。

節物

節物猶關老病身，鄉儺佛粥一年新。檐間百舌還多事，探借園林十日春。

讀書

力不扶微學，心猶守舊聞。壁間科斗字，秦火豈能焚。

春近

曆授人時後，天回斗柄初。農疇與耒耜，家塾盛詩書。縹緲雙鳧鳥，啞啞一鹿車。山翁喜春近，隨處狎樵漁。

讀陶詩

陶謝文章造化侔，篇成能使鬼神愁。君看夏木扶疎句，還許詩家更道不。

夜雨寒甚

萬籟號風如戰鼓，雪意垂垂先作雨。庭中栖鳥驚屢起，窗下殘燈翳還吐。老翁聳膊高過頂，童子觸屏低不語。時聞鄰舍起飯牛，亦有歸樵說逢虎。去年雪薄蝗害稼，今年望雪如望赦。行當三白兆豐年，牲酒如

山作秋社

寄趙昌甫

杳杳雙鶻鳴庭除。東陽吏傅昌甫書。紙窮乃復得傑作。字字如刮造化爐。爾來此道苦寂寞。千里一士如鄰居。小兒得祿在榜邑。我貧初辦一鹿車。過門剝啄亦奇事。拜起幸未須人扶。君看幼安氣如虎。一病遽已歸荒墟。吾曹雖健固難恃。相覓寧待折簡呼。餘寒更祝勤自愛。時寄新詩來起予。

稽山雪爲隱者作。

高人采藥來禹穴。骨瘦巉然鬢眉白。結茅分得野鹿場。一夜北風三尺雪。明朝過午勢愈惡。虎兕交迹人聲絕。虛窗縱橫叢竹入。幽磴荒寂孤松折。凍冷孰窺袁安戶。僵臥禿盡蘇武節。人生飢寒固亦有。養氣不動真豪傑。希名後世吾所恥。姓字寧與身俱滅。班馬復生無自書。我作此歌空激烈。

招鄰父啜菜羹

老境遺人事。窮居硯世盲。茅簷聽雪滴。瓦鼎蒸松肪。不願封侯印。惟求煮菜方。盃羹須及熟。剩欲喚君嘗。

讀論語

壯歲貪求未見書。歸常充棟出連車。晚窺闕里親傳妙。數簡方知已有餘。

晨起

殘夢悠颺不復成。鎗然已有百禽鳴。山童來報溪流長。幽事從今日日生。

雪後

雪消已斷虛簷溜。日暖初催百草生。射的山前春水綠。笙歌又滿會稽城。

示福孫并示喜曾

北商久不通。梨棗罕登盤。山舍惟有橘。瑣細如彈丸。此外則柿栗。收拾猿鳥殘。雖無龐翁話。兒孫亦團樂。今歲雨雪晚。歲暮始大寒。二稚乃可憐。不訴衣襦單。地爐有微火。誦書到更闌。我老多感慨。賴汝差自寬。

微疾

微疾經旬近藥囊。往來巷陌未全妨。時時小雨知春近。處處閑身覺日長。林外鼓歌聞賽廟。懷中茶餅議租桑。兩京梅發今何似。送老流年只自傷。

簡僧求秦望山拄杖

老病龍鍾不自持。飽知藤杖可扶衰。明朝欲入天台去。試就高人乞一枝。

遊山步

蹇驢渺渺過雲邊。旋了三生物外緣。平日視家真逆旅。此行出戶若登仙。飢從野店烹葵飯。困就僧床借枕眠。所恨暮年交舊盡。佳時無與共聯翩。

又

南出平橋十里餘。湖山處處可成圖。水邊更覺梅花瘦。雲外誰憐雁影孤。時喚行僧同煮茗。亦逢樵叟問迷途。破裘不怕春寒峭。小市疎燈有酒壚。

雪晴欲出而路溜未通戲作

欲覓溪頭路。春泥不可行。歸來小窗下。袖手看新晴。

又

雪消重作雨。冰釋又成泥。已敗筇枝興。高眠聽午雞。

春日

冷餅細生菜。老翁殊未衰。仍尋舊旛勝。一笑伴諸兒。

示兒輩

窮居懷抱久無權。猶賴吾兒得少寬。謹視雞豚供老疾。力營薪炭備春寒。舊書綴緝編無絕。小壺調停味不酸。坐使乃翁無一事。高眠常到日三竿。

雪後煎茶

雪液清甘漲井泉。自攜茶竈就烹煎。一毫無復關心事。不枉人間住百年。

夢中作

久向人間隱姓名。看花幾到武昌城。一壺春色常供醉。萬里煙波嬾問程。斜日挂帆堤外影。便風擊鼓驛前聲。丈夫入手皆勛業。廊廟江湖未易評。

破屋歎

我年四十時。築舍受一廬。歲月不貸人。殆將五十年。初非榱桷林。既久理豈全。慘淡窘風雨。亦復補破穿。竹椽與繩樞。豈敢求牢堅。今朝忽自顧。衰疾方沉綿。不知此殘軀。與屋誰先顛。粥藥幸粗給。兒稚滿目前。

斂藏雖甚薄，猶勝死道邊。一笑推枕起，無酒亦陶然。

戊辰歲除前五日作新歲八十有五矣

灰深火可宿，炷小燈耐久。長流故不腐，易成必速朽。我昔遊青城，聞道巢居叟。躬行雖不力，年少過九九。固知適天幸，自養亦差厚。傳家六兒子，其四今皓首。寧聞澗底松，鬱鬱慕蒲柳。大兒新年六十二，仲子六十，季亦近六十。

晨起復睡

衰翁卯飲易上面，澤國春寒偏著人。下榻一盃還就枕，不嫌鼾睡聒比鄰。

梅

三十三年舉眼非，錦江樂事祇成悲。溪頭忽見梅花發，恰似青羊宮裏時。

又

俗事常妨把一盃，等閑開過小園梅。自傷惟有尋春夢，百舌無情又喚回。

小疾治藥偶書

禦戎虛上策，治疾闕全功。安得如神禹，常行無事中。

又

振苗農害稼，過劑藥傷人。此理君能造，無爲萬□□。

子適讀書常至夜，分作此示之。

我爲無才老把鉏。汝窮亦復坐迂疎。夜燈詠史蟲吟草。朝几陳書蠹祭魚。未至苦飢依馬磨。不妨相守臥
蝸廬。業成自有能知賞。家世從來典石渠。先太傅先楚公皆久在三館。予亦入館二十年。晚忝大蓬之命。

歲暮作

魚貫長條兔臥盤。往來聊續里閭歡。舊符又擬新年換。殘曆都無半紙看。梅影橫斜春尙淺。角聲悲壯夜
將闌。堅頑敢望今如許。戲說期頤強自寬。

除夕

熾炭爐中百藥香。屠蘇煎酒代椒觴。明朝賴是無來客。雪後泥深一尺強。

己巳元日

曾孫新長奉椒觴。兒女冠笄各綴行。身作太翁垂九十。醉來堪喜亦堪傷。

初春

裝罷桃符又剪燈。新年光景捷飛騰。老翁掃盡兒童事。卻學禪床入定僧。

新年書感

早歲西遊賦子虛。暮年負未返鄉間。殘軀未死敢忘國。病眼欲盲猶愛書。朋舊何勞記車笠。子孫幸不廢
菑畬。新年冷落如常日。白髮蕭蕭悶自梳。

開歲連日大雪

開歲大雪如飛鷗。轉盼已見平蒼溝。村深出門風裂面。況復取醉湖邊樓。從來春雪不耐久。臥聽點滴無

時休去年久旱縣千里。犁不入土蝗蟲稠。今年冬春足膏澤。天意似欲滋農疇。豈惟養豬大作社。更賣寶劍添耕牛。

飲酒

我酒本小戶。痛飲乃有時。意氣不相值。終日持空卮。醉或能齋莊。不醉或狂逸。乃知老子狂。非自麴蘖出。今日雪始晴。行歌官道傍。超然醒醉間。非莊亦非狂。

詩酒

我生寓詩酒。本以全吾真。酒既工作病。詩亦能窮人。每欲兩忘之。永爲耕樵民。周旋日已久。棄去終無因。齒髮益衰謝。肝膽猶輪囷。吟哦撼四壁。鬼瞰頽烏巾。江上處處好。風月年年新。正爾豈不樂。浩歌終此身。

人日雪已巳元日至人日雨雪間作

病臥江村不厭深。貂裘無奈曉寒侵。非賢那畏蛇年至。多難却愁人日陰。嫋嫋孤雲生翠壁。霏霏急雪灑青林。一盃飯罷無餘事。坐看生臺下凍禽。

春寒

滔天來泝水。震瓦戰昆陽。此敵猶能禦。春寒不可當。

又

高樓墜綠珠。惡客碎珊瑚。未抵春寒夜。貧翁喪故襦。

雨雪久無來客亦不能出作長句排悶

造物無情豈我私。從來不使墮危機。青雲路近常排去。白浪堆高亦脫歸。殘稿尙存空自許。故人略盡欲誰依。新春雪暗山村路。且復焚香獨掩扉。

書毫

我老毫已及。終日惟冥行。鄰里少聞闔。便若昧平生。家人每過前。亦或忘其名。昏昏等作夢。兀兀如病醒。不知張睢陽。何以記一城。愚知各自適。得失未易評。

初暮遣興

閑愁長與病相依。晨起梳頭感髮稀。春事鼎來風更惡。晨光已滿雪猶飛。江梅有恨論年別。旅雁無情計日歸。剩欲江邊踏青去。憑誰爲解亂書圍。

讀書

少從師友講唐虞。白首襟懷不少舒。舊謂皆當付之酒。今知莫若信吾書。朱黃參錯雞鳴後。鐵峽從橫月墮初。撫几欣然時有得。此翁作計未全疎。

雜興

灰中火如螢。燎原從此始。元氣一點存。危疾亦不死。

又

炷香火要深。作墨手當緩。淺子務成速。所以多後患。

又

庖丁悟養生。輪扁議讀書。彼特一技爾。聖智有不如。

又

鏗爾捨瑟作。曝然放杖笑。浩浩太古音。與俗不同調。

後雜興

臘雪瑞我麥。春雨嘉我穀。老農無他求。一飽萬事足。

又

日上明我窗。月出縞我庭。朝暮得佳時。一榼醉復醒。

又

會合惜日短。別離愁夜長。人老愛吾廬。客歸悲故鄉。

又

但醫刀七藥。老巫半榼酒。拜况不敢忘。淡薄最耐久。

自詠

道本治吾身。緒餘方及人。神清綠食少。事簡爲家貧。薄酒如重醞。寒蔬抵八珍。村村花柳動。且復岸綸巾。

又

謝事客誰過。閑遊吏不訶。家人爭稗粥。鄰叟和畬歌。靜夜詩成祟。新春睡有魔。年光本無盡。未用歎蹉跎。

晚窗

一塢梅花已盡空。數瓴春雪未全融。晚窗忽有題詩興。落筆縱橫半醉中。

卷第八十一

遠遊二十韻

早歲志遠遊。萬里攜孤劍。所至必弔古。如疾得鍼砭。荒寒過吳宮。摧剝觀禹窾。及仕楊潤間。挂席度天壑。梁宋不可遊。北望每懷歎。會有蜀漢役。奇嶮日窺覘。築壇訪遺址。燒棧想烈焰。轅門俯清渭。徹底綠可染。舊史所登載。一一嘗考驗。胡羊美無敵。黍酒實醇醲。枕戈南山下。馳獵久不厭。比參劍南幕。壯志就收斂。卜鄰揚雄宅。遂欲老鉛槧。但愛古柏青。肯顧海棠豔。人生不易料。白首東歸剡。稽山秋峨峨。鏡水春激激。餘俸買扁舟。月下采菱芡。湖山最奇處。容我釣石占。婚嫁幸已畢。百事不關念。但當勤醉歌。一死不汝欠。

對酒

社醅又借醉顏醄。手挽鄰翁作浩歌。江月偏能照蓬戶。京塵終不汗漁蓑。苦吟且復歌吾帽。對奕真嘗爛汝柯。回首紛紛俱夢耳。人間何處有天魔。

夜雨

正看飛雪暗江天。不覺新春已粲然。花氣襲人娛獨夜。雨聲遶舍送豐年。樵風未改山川舊。禊事空悲歲月遷。一棹可營身尚健。故應先治下湖船。

己巳正月十八九間雪復大作不止。

早衰常畏雪。況復在江干。三日不能出。數年無此寒。捲簾驚濕漾。下榻覺蹒跚。稚子應憐我。孤吟興未闌。

寄子虞

汝官南壽春。我居東會稽。疋馬謐秋塞。兩轡翻春泥。淮天沙雁過。江村雪雲低。書來動半年。相望常愴悽。父子不共耕。此悔真噬臍。明年城西社。爛醉相扶攜。

書夢

我夢舉有司。雞唱起裹飯。又夢趁早朝。漏舍坐待旦。既寤兩無有。撫枕徒浩歎。今雖去爲農。飯牛亦夜半。何曾得放慵。美睡到日旰。一笑俱置之。浮生固多難。

示子適

家貧不學儉。物理有固然。要是善用短。足以終其年。我家稽山下。粟賦良奇偏。敢言中人產。日或無炊煙。有兒更耐窮。伴翁理遺編。短檠幸能繼。竟夜可忘眠。

對食有感

盃酌以助氣。匕筋以充腹。沾醉與屬饜。其害等嗜慾。歡醜有餘歡。食淡百味足。養生所甚惡。旨酒及大肉。老翁雖無能。更事嗟已熟。勿歎茆三間。養汝山林福。

又

我老雖無家。其實如客耳。食至舉匕箸。飽則捨而起。厨人有勤惰。我豈形慍喜。園畦摘青蔬。地確舂赤米。勞人固已多。坐享類常此。作詩本自規。亦以告閭里。

雪夜

荒郊質買行。斷壘侶侶耕。常情所藉躡。豈復懷不平。歸來臥破屋。中惟一牀橫。且燒生柴火。靜聽溼雪聲。

又

今年春苦寒。風雪塞戶牖。况我窮閭士。袴敝衣見肘。正須小忍之。此事豈得久。努力辦一壺。西村看花柳。

又

瓦疎雪墮簷。窗破風吹燭。短裘不及肘。手脚盡皸瘃。猶勝南鄰叟。一褐竟未贖。薄酒城中來。清夜聊相屬。

初春

柳拂朱橋湖水生。園林處處聽新鶯。亦知人世當行樂。無奈春陰不肯晴。走馬章臺身縱老。看花杜曲眼猶明。只應詩思年來減。預怯同遊議罰觥。

春日雜興

方塘盎盎帶泥渾。遠草青青沒燒痕。只道雨晴春晝永。歸時不覺已黃昏。

又

南村北村鼓麥琴。剗羊刺豕祭潭龍。一生衣食財取足。百世何妨常作農。

又

小甌有米可續炊。紙鳶竹馬看兒嬉。但得官清吏不橫。即是村中歌舞時。

又

夜夜燃薪煖絮衾。禺中一飯直千金。身爲野老已無責。路有流民終動心。聞有流移人到城中。

又

出仕常騎秃尾驢。歸休自駕折轅車。今朝偶遇村夫子。借得齊民一卷書。

又

更事多來見物情。世間常恨太忙生。花開款款寧爲晚。日出遲遲却是晴。

又

一枝筇杖一山童。買酒行歌小市中。莫笑摧頽今至此。當年萬里看春風。

又

四十餘年學養生。誰知所得亦平平。體孱不犯寒時出。路溼常尋乾處行。

又

攪擾禽聲曉傍簷。泥人花氣午穿簾。穠情老去年年薄。困思春來日日添。

又

陰晴不定春猶淺。困健相兼病未蘇。見說市樓新酒美。杖頭今日一錢無。

又

乍晴乍雨忽經旬。半醉半醒還過春。春臥不知菴外事。閑吟聊適夢中身。

又

行人陌上思悠悠。十里斜陽古渡頭。一片落花無覓處。只教芳草管閑愁。

小霧乘竹輿至柳姑廟而歸

殘雲斷處瀟斜陽。草滿平隄柳著行。颺颺畫船來北港。翻翻青繖度南塘。行人相賀新年健。逃戶雖窮舊業荒。感物興懷空絕歎。才衰無語付詩囊。

春曉

初見天窗一點明。旋看曉色到簷楹。衾裯溫煖留殘夢。鳥雀呼鳴報快晴。雖喜心隨年愈老。卻愁事與日俱生。平川漫漫煙蕪綠。筋力猶堪給耦耕。

肩輿歷湖桑堰東西過陳灣至陳讓堰小市抵暮乃歸

堤遠沙平草色勻。新晴喜得自由身。芋羹豆飯家家樂。桑眼榆條物物春。野店茶香迎倦客。市街犬熟傍行人。牆頭婦女更相語。認到先生折角巾。

又

貪看西南一面山。不知信步到陳灣。未言散釋經旬病。且要消磨半日閑。蔬糲過寒常鬱鬱。鳥聲迎暖已關關。斜陽不爲行人駐。十里鐘來翠鶴間。

書適

疇昔花前醉放顛。卽今不飲亦陶然。太平固自多遺老。獨往何妨是斥仙。扶杖每觀南畝鮒。解衣時作北窗眠。人間賢俊方雲集。我遇龍蛇豈厄年。

陳讓堰市中遇吳氏老自言七十六歲與語久之及歸送予過市猶戀戀不忍去

就店煮茶古堰邊。偶逢父老便忘年。嗟予空忝十年長。聞道慚無一日先。壯子當門能碌碌。諸孫承業亦翩翩。熟思遊宦終何得。悔不從公曝背眠。

午炊

江路初晴日。煙蕪古廢城。青鍼秧稻出。黑螳稚蠶生。山際牛羊路。林間雞犬聲。午炊聊小憩。野老解蓬迎。

古風

機象薦清廟。餘材棄溝中。二者雖甚遠。殘生其實同。人當貴其身。豈復論窮通。寧爲原上草。一寸搖春風。

又

木生雖拱把。鮮不困斧斤。枯朽亦可全。又以瘞故焚。嘉禾終銜艾。豈獨草見耘。此理講已熟。要當尊所聞。

肩輿至石堰村

偶上籃輿踏夕陽。醉魂困思兩佺佺。潤薪旋拾供茶竈。詩稿初成寄藥囊。村舍藝麻驅鳥雀。牧童隨草放牛羊。歸來徒倚衡門久。始覺中春已日長。

睡起遣懷

百事不能能荷鋤。不鋤菜畦鋤芋區。身存那用十年相。陂壞且爲凶歲儲。百事不學學作詩。不作白紵作竹枝。黃陵廟前風浪惡。青衣渡口行人悲。老病閉門常憤憤。手不復鋤詩亦廢。客來剝啄喚不應。一味人間占閑退。今朝一日三倒牀。歎息春晝如年長。摩挲困睡喜湯熟。小瓶自折山茶香。

春晴

柳未吹絲筍未抽。春郊風日正清柔。疎疎簾影供高臥。裊裊與芋爛出遊。無客共謀良夜醉。有花空動故年愁。雲生祇恐還成雨。自向園頭聽鷓鴣。

書感

鴨子陂頭看水生。蜂兒園裏按歌聲。天公用意誰能測。未許吾曹醉太平。

野興

莽莽寬野間。悠悠曠達身。氣從林下吐。言向醉中真。社樸元當壽。江鷗豈易馴。興來無遠近。隨處岸綸巾。

野步

堤上淡黃柳。水中花白鵝。詩情隨處有。此地得偏多。

又

水生已抹堤。草長復侵路。小蝶仍可憐。欲下却飛去。

稽山

我識康廬面。亦撫終南背。平生愛山心。於此可無悔。晚歸古會稽。開門與山對。奇峯縮鬢髮。橫嶺掃眉黛。豈亦念孤愁。一日變萬態。風月娛朝夕。雲煙閱明晦。一洗故鄉悲。更益吾廬愛。東偏得山多。腹食鮮不在。寧無度世人。談笑見英概。銜風倘可留。爲我傾玉盞。

緋桃開小酌

我廬城南村。家無十金產。種花雖歷歲。名品終有限。頗欲及暇時。著譜書之簡。今朝緋桃開。歡喜洗酒盞。鄰翁亦喜事。爲我一笑莞。但恨首宿盤蔬薄。欠佳饌。往來見已熟。勸揖忘媿赧。一事粗可言。似具識花眼。

夜中獨步

春半寒初退。更闌睡不成。裘裳偶獨起。曳履得徐行。月上烏未宿。水深鼃亂鳴。踟躕忽已久。殘漏下高城。

春寒復作

春寒已解忽復作。病思不堪當語誰。青燈熒熒耿欲滅。殘雨滴滴休無期。故人已死夢中見。壯志未忘心自知。青絲玉井聲纏繞。又是窗白鴉鳴時。

大雨排悶

地潤礎流水氣蒸。人脫裘。前知暴雨至。孰解老農憂。

又

三日斷行路。束薪無處求。牀頭周易在。且復送悠悠。

室中屏去長物戲作

久從昭代乞殘骸。荷鍤隨行偶未薶。四壁盡空君勿怪。纔留一物卽關懷。

對酒

酒非攻愁具。本賴以適意。如接名勝遊。所挹在風味。庸子墮世紛。但欲斬一醉。麴生絕俗人。笑汝非真契。

曝舊畫

故篋開絨一愴情。斷縑殘幅尚知名。翩翩戲鵲如相語。洵洵驚濤覺有聲。柳暗正當煙未斂。花穠仍值雨初晴。百年手澤存無幾。蟲蠹塵侵祇涕橫。

予以淳熙戊戌歲自蜀歸時年五十四今三十有二年矣猶復強健得小詩自賀

入玉門關到酒泉。昔人相望若登天。豈知萬里西征客。歸臥家山三十年。

花下小酌

柳色初深燕子回。猩紅千點海棠開。紫魚莼菜隨宜具。也是花前一醉來。

又

雲開太華插遙空。我是山中採藥翁。何日胡塵掃除盡。敷溪道上醉春風。

夜酌

我有一瓢酒。與君今夕同。鳴簷社公雨。捲野沛歌風。閱世花開落。觀身劫壞空。北邙丘壠盡。太息幾英雄。

數日不作詩

吾詩鬱不發。孤寂奈愁何。偶爾得一語。快如疏九河。黃流舞浩蕩。白雨助滂沱。門外無來客。花前自浩歌。

幽居示客

嗜睡疎茶盃。逢春愛麴車。聊將枕流耳。靜聽屬私蛙。林下閑成癖。人間懶莫加。孫登欲長嘯。四座且無譁。

又

齒髮雖俱弊。神明尚有餘。幽扉鍊奇藥。細字錄仙書。野水鳴苔徑。長松蔭草廬。客來多謝病。深媿問何如。

春日登小臺西望

九十衰翁身尚健。流年過眼如奔電。憶昔初來對行在。衫鬢青青接英彥。中間亦嘗走梁益。萬里憑高望鄉縣。散關驛近柳迎馬。駱谷雪深風裂面。東歸却尋書生事。誤長諸儒集賢院。乞身七年罪未除。君恩尙許寬嚴譴。癡頑亦復病不死。春到故園家釀美。雨餘草長四野青。日落煙生半山紫。

醉賦

我疾多自愈。初非遇奇方。我生固多難。欲慮忽已忘。頽然亂書中。不知歲月忙。有時或得意。炙冷不暇嘗。乃今又大悟。萬事付一觴。書中友王績。堂上祠杜康。

卽事

我本區中士。偶來湖上居。時尋一枕夢。閑展數行書。得醉常歡甚。無炊亦晏如。今朝好天氣。一笑命柴車。

落花

山杏溪桃次第開。狂風正用此時來。未妨老子憑欄興。滿地殘紅點綠苔。

春日

春來日日困春醒。狙歲如馳得我驚。山寺餽茶知穀雨。人家插柳記清明。登階勃窣晨雞老。侵路縱橫野草生。堪歎筋骸猶健在。強隨丁壯事深耕。

戲詠園中春草

離離幽草自成叢。過眼兒童長顧空。不印鴉窠入畫屐。可以燕麥搖春風。

又

童子爭尋鵝鵝飯，醫翁日曝蝦蟆衣。
欲贖楚客詠殮菊，却媿周人歌采薇。

二月二十四日夜大風異常

天青無雲星錯落，大風忽自西南作。
壽藤老木不自全，門外豈容存略約。
翁媪驚呼兒女泣，屋瓦飛空吁可愕。
巢傾共閱烏鵲死，空黑還疑鬼神惡。
南鄰僅有瓜牛廬，轉盼卷去無遺餘。
腐儒自笑獨耐事，一燈焚燼猶讀書。

雨夜與鄰翁飲用前輩韻

老人閱世真悠哉，八十已過九十來。
茆檐參差映煙樹，蕭條雞犬三家聚。
一樽鄰翁迭賓主，醉語豈憂多謬誤。
我作吳歌君起舞，夜雨莫辭泥沒屨。

雜感

壯遊回首海茫茫，默數方驚歲月長。
舊事莫論齊柏癡，殘軀方似魯靈光。

又

天際晴雲舒復卷，庭中風絮去還來。
人生自在常如此，何事能妨笑口開。

又

射的山前花柳新，典衣買酒過殘春。
但甘身作噲等伍，莫信人間髡絕倫。

又

陸放翁集 二十二 劍南詩集 卷八十一

禍福雖云不可猜，人生要豈願爲才。憫體正使非王樂，犧象何疑是木災。

讀史

蕭相守關成漢業，穆之一死宋班師。赫連拓跋非難取，天意從來未易知。

又

顏良文醜知何益，關羽張飛死可傷。等是人間號驍將，太山寧比一毫芒。

出遊

社近頻逢雨，春深却喜晴。畚煙傍山起，神鼓隔林鳴。客駐觀農饁，兒歸遺母羹。豐年多樂事，何以報時平。

又

綠樹魚鹽市，青蕪雉兔場。采桑村女集，入學幼童忙。戶賽祈蠶願，家藏問孝章。村坊多美酒，爛醉答年光。

夜與戲作

遙夜寂無譁，江城鼓屢撾。榜牆行蹀躞，脫帽髮髭髻。詩和玲瓏韻，燈開頃刻花。會心有佳處，不寐到啼鴉。

酒熟書喜

小槽春夜壓春醪，天與龜堂慰作勞。喜似繫囚聞縱釋，快如苛瘼得爬搔。未陳尊杓心先醉，傍睨江山氣已豪。久厭羶薰愁下筯，眼明湖上得雙螯。

湖上

寒食初過穀雨前，輕衫短帽影翩翩。獨轆碾破新堤路，雙稻盈殘古廟壩。萬事不禁劉毅擲，諸人誰著祖

生糲市墟處處誇新釀。且就花陰一醉眠。

春晚

落絮飛花又滿城。年光大半付春醒。蹇驢閑後詩情減。陣馬拋來諱肉生。少日雕蟲真小技。暮年畫餅更虛名。囊中幸有黃庭在。安得高人與細評。

食酪

南烹北饌妄相高。常笑紛紛兒女曹。未必鱸魚莖孤菜。便勝羊酪薦嬰桃。

六言

愛馬能成一癖。結髦可忘百憂。我亦時時自笑。開編萬事俱休。

又

遇合生封萬戶。阨窮不直一錢。此是由來事爾。正須到處欣然。

又

豪士以妾換馬。耕農賣劍買牛。我看浮雲似夢。却貪山水閑遊。

又

風細飛花相逐。林深啼鳥移時。客至旋開新茗。僧歸未拾殘棋。

又

覓飽如籌大事。擁書以墮重圍。誤喜敲門客至。出看啄木驚飛。

又
香煙觸籬不散。燈焰無風自搖。獨倚蒲團寂寂。忽聞山雨蕭蕭。

書意示子孫

我聞人間久。深知理惡盈。莘莘訓來裔。董董作儒生。仕勿卑曹掾。書纔記姓名。茆茨不啻足。此外盡浮榮。

暮春龜堂卽事

風日初和晝漏長。蕭然巾屨集茆堂。雨餘千壑巖山綠。茗客一瓢餘水香。新簡賣中塵委積。故人墓上草荒涼。爾來幸有寬懷處。病退牀頭減藥囊。

又

躑躅花開照眼明。綏扶藤杖繞廊行。流年又見一春過。苦雨略無三日晴。覓句未應妨熟睡。漱泉聊足解餘醒。鹿麕雉子常追逐。誰識山翁及物情。

又

日月無根去若馳。故園又見落花時。盃中綠酒不肯飲。鏡裏蒼顏應自知。千丈新堤湖水滿。五更殘漏角聲悲。暮年父子難乖隔。淮浦書來苦覺遲。

又

東皇促駕又天涯。一片難尋墮地花。瘦策穿林數新筍。素屏圍枕聽鳴蛙。蠶房已裹清明種。茶戶初收穀雨芽。欲把一盃壺已罄。漫搜詩句答年華。

莫辭酒

勸君莫辭酒。酒能解君愁。勸君勸采藥。藥可使疾瘳。此外莫廢書。書亦豈君誤。古來敗人事。正以不學故。愁去疾亦平。便腹如瓠。壺努力貯萬卷。無此令君慮。

懷友

酒家旗下分攜久。山驛燈前感慨頻。人事已隨雙鬢改。柳條又見一年新。

蘭亭道上

湖上青山古會稽。斷雲漠漠雨淒淒。籃輿晚過偏門市。滿路春泥聞竹雞。

又

蘭亭步口水如天。茶市紛紛趁雨前。烏笠遊僧雲際去。白衣醉叟道傍眠。

又

陌上行歌日正長。吳蠶捉績麥登場。蘭亭酒美逢人醉。花塢茶新滿市香。蘭亭官廳名也。花塢。茶名。

又

箭箠弓弦小獵回。壯心自笑未低摧。前身家近盤閩路。曾看吳王射雉來。

殘年

殘年光景易駸駸。屏迹江村不厭深。新麥熟時蠶上簇。晚鶯啼處柳成陰。短檠已負觀書眼。孤劍空懷許國心。惟有雲山差可樂。杖藜誰與伴幽尋。

春老

春色垂垂老。山家處處忙。丁賣孤白蠶。妾采桑黃。候雨占秧信。催兒築麥場。醉眠官道上。人爲護牛羊。

睡起

睡起披衣弄素琴。房櫳槐柳綠成陰。春殘鶻鴂如多恨。雨惡醱醑欲不禁。羸病強行常蹉跎。癡愚多慮每噫喑。行年九十獨除死。誰測高高厚厚心。

自規

立志常如塞決河。犀編鐵硯未爲過。文難稱意古所恨。學不盡才今亦多。四海交朋常隔闕。一生光景易蹉跎。老年尚欲鞭吾後。太息無人爲詆訶。

夜聞雷雨大作

暗空霧雨無時已。卷地風雷却是晴。九十老翁更事久。寄言兒女不須驚。

卷第八十二

賞山園牡丹有感

雄揚牡丹面徑尺。鄜時牡丹高丈餘。世間尤物有如此。恨我總角東吳居。俗人用意若侷促。目所未見輒謂無。周漢故都亦豈遠。安得尺箠驅羣胡。山陰距長安三千七百四十里。距雒陽二千八百九十里。

山居

平生絕愛山居樂。老去初心亦漸償。直道本知天可恃。曠懷真與世相忘。徑穿脩竹衣巾爽。盤設靈苗七箸香。但恨相逢無魯叟。浩歌小試擬興狂。

閑詠

蕭蕭華髮映烏巾。五十年前故史臣。正使老來無老伴。未妨閑處作閑人。按行池水知增耗。點檢庭花見故新。更有菴中策勛事。投牀鼻息聒比鄰。

又

事業無聞負聖時。滄波自照角巾欹。養成林下無窮懶。占盡人間徹底癡。小麥繞村苗鬱鬱。柔桑滿陌槩纍纍。醫翁笠叟真堪友。搜索殘尊與共持。

又

謝事歸來一把茅。村深樵牧日論交。未言客路塵衣化。最恨書窗鐵硯凹。戀戀故袍誰復念。便便癯腹敢辭嘲。卜居雖僻吾猶悟。失却岷山理鶴巢。

又

白頭羈客更堪論。身寄城南桑竹村。一榻琴書春寂寂。四山霧雨晝昏昏。常情共笑門庭冷。好事虛推壺行尊。燒笱炊糲真過足。兒曹不用致魚膾。

又

危途九折浩無津。晚幸收身作散人。俸祿既空憂患少。酒穀雖薄笑歌頻。多添布褐方知老。淨掃茆衡不

覺貧南陌東阡元在望。柴車嬾駕動經旬。

讀樂天詩

放姬霽駱初何有。常笑香山恨不搃。輸與此翁容易死。一身之外更無餘。

讀許渾詩渾居丹陽丁卯橋其詩丁卯集

裴相功名冠四朝。許渾身世落漁樵。若論風月江山主。丁卯橋應勝午橋。

時鳥

日出鳴布穀。月落鳴子規。一氣之所感。彼亦不自知。架犂最晚至。適當農事時。丁壯戴星出。力作孰敢遲。鳴者既有警。聞者得以思。乃知失時輩。強聒終何爲。百舌亦能言。今默乃其宜。我作時鳥篇。用繼幽人詩。

齒髮歎

樂天悲脫髮。退之歎墮齒。吾年垂九十。此事已晚矣。髮脫妨危冠。齒墮廢大嚼。晨興對清鏡。何以慰寂寞。造物本無心。豈欲使汝衰。曷不望長空。兩曜無停時。

送春

新葉張翠幄。落花作紅茵。山蔬旨且柔。家釀清而淳。以我垂老境。送此將歸春。我固惜流年。春亦記陳人。江山處處佳。風月日日新。寒驢度松岡。短檝橫煙津。蘭亭人已遠。遺韻猶清真。卻下木柵市。天風吹角巾。

初夏

新綠陰中燕子飛。數家煙火自相依。童誇犢健浮溪過。婦閤蠶飢負葉歸。地煖小畦花汞長。泥融幽徑藥

苗肥却居樂事何勝數。一醉旗亭又典衣。

又

江鄉初夏暑猶輕。霽日園林有晚鶯。聊置尊罍師北海。盡除屏障學東平。綠槐露溼單衣爽。紅藥風翻病眼明。每感流年成絕歎。白頭自笑未忘情。

初夏卽事

夏景遽如許。先從草木知。朱纓連帶剪。紅藥帶花移。病起單衣怯。身閑晝漏遲。空齋無長事。簾影看參差。

古壽人至聞五郎頗有老態作長句自遣

齒落髮斑兒亦老。志衰力惰我寧悲。埋盆便可爲池看。折竹何妨作馬騎。點誦內篇莊叟語。長歌半格白公詩。此身未死須安頓。除却山村百不宜。

郊行

春郊無處不堪行。滿路人家笑語聲。賣劍買牛知盜息。乞漿得酒喜時平。西村日落川雲暝。東嶺虹收海氣清。農事方興戒遊惰。爲君來往主齊盟。

小園

小園草木手栽培。表丈清池數尺臺。拄杖倦時閑倚壁。芳醪熟後喜傳盃。春蕪滿地鹿忘去。夏木成陰鶯自來。堪笑山童漸飽食。時時_{寺主}報一_一花開。

初夏雜興

陸放翁集 二十二 劍南詩集 卷八十二

三十五

隱趣與誰論。深居湖上村。避關寧改路。惜箭不開園。庭草饒生意。溪沙記漲痕。愁來時淺酌。隨事有雞豚。

又

避寂諸緣息。安貧百慮寬。嬾如常抱疾。退似本無官。皎潔鶴翎扇。嵯峨龜屋冠。何勞問唐舉。徹屋是清寒。

又

咄咄無窮事。騰騰暫寓身。月生知改朔。花盡覺經春。市闕朝沽酒。巫歌夜樂神。興來隨衆出。一笑不妨新。

又

移花得微雨。晒藥遇新晴。悶裏家書到。貧時糴價平。身方抱沉疾。天乃相餘生。莫恨村醪薄。燈前與細傾。

又

倦甚惟思睡。閑來却要行。疏泉入幽圃。映樹覘流鶯。藥品從僧問。琴材就客評。轉頭還一日。正爾送餘生。

思子虞

里嶽迢迢阻問津。年光冉冉苦催人。未能免俗予嗟老。豈不懷歸汝念親。家釀湖蕪誰共醉。江雲淮月又經春。新詩題罷無從寄。獨倚危闌一愴神。

偶思蜀道有賦

天回驛畔江如染。鳳集城邊柳似篔。萬事已隨流水去。一尊將奈夕陽何。是非無定言何益。窮達徐觀得孰多。幸有漁蓑歸故里。不妨高枕且酣歌。

書意

養得山林氣。籟全。此懷無處不超然。日長琴奕。荊櫨下。歲晚江湖。箬帽前。天上本令星主酒。俗間妄謂世無仙。今年茶比常年早。笑試西峯一掬泉。今年清明前數日。山中已有新茶。

贈倪道士

羽衣暫脫著戎衣。坐定方驚語入微。歸隱玉霄應不出。他年容我扣巖扉。

又

我坐虛名剩得窮。百年身墮畏途中。看君一棹煙波樂。悔不常爲采藥翁。

哭李孟達

舊交多已謝明時。孟達奇才最所思。晚歲立朝雖小試。平生苦學竟誰知。尊前一笑終無日。地下相從却
有期。慟絕寢門霜日暮。短篇聊爲寫餘悲。

送黃文叔守福州

黃公天下士。遇主紹熙年。議論前修似。聲名九牧傳。巨舟夷險濟。拱璧始終全。勇退先諸老。榮歸總十連。旌旄照關路。冠蓋盛離筵。內閣恩光重。宸毫墨色鮮。任方分斧鉞。歸即珥貂蟬。病叟難爲別。臨期一悵然。

初夏雜詠

揮袖謝人間。一窗如海寬。鹿麝爲老伴。松屑當朝餐。自悟達生理。儘容非意干。却嫌孤寂甚。支龜學燒丹。

又
病退身仍健。年侵趣更高。芳醪溢蟹螯。短褐束鄒緇。本不營三窟。何由挫一毫。烟帆幾時掛。長嘯破秋濤。

又 屐路綠虛壁，棋軒枕小灘。玄言不媿藉，熟睡却輸搏。咄咄書常爛，便便腹本寬。山園時節好，杏子已微丹。

又

去日驚鑽燧，窮途困負薪。故人天末遠，薄俗眼邊新。踽踽飄零客，悠悠賸長身。寸心知已矣，端欲爲誰陳。

又

昔日江湖上，飄然無定居。頻傾京口酒，亦食武昌魚。北首心空壯，東歸憤不據。豈知齒牙落，送老一茆廬。

卽事

鷲里山河拱至尊，羽林鐵騎若雲屯。羣公先正不復作，故國世臣誰尙存。河洛可令終左袵，蓟蕪何自達脣門。王師一日臨榆塞，小醜黃頭豈足吞。

漁屏

頭艇浦上一漁屏，回首人間萬事非。賣藥山城攜鶴去，看碑野寺策驢歸。偶因束帶慙腰絨，常爲梳頭或髮稀。午睡定知無客攪，曲肱閑看雨霏霏。郊居遇雨作，則無客至。

山行見三十年前題名悵然有賦

白年村落半丘墟，垂老經過一柅車。金石闕說秦漢舊，謂秦始皇刻石及再望上漢碑。山川絕勝晉唐餘。醉題墨淡塵昏壁，詩社人亡淚濺裾。名宦半生成底事，早時恨不學犁鉏。

山房

柴門不掩俗人稀，成就山房一段奇。木葉最宜新雨後，鳥聲更勝暮春時。家貧屢罄綠耽酒，宿習猶存爲愛詩。別有一條差自慰，木苗芎苗正離離。

縱筆

兀兀一無爲，冥冥百不知。倦多惟嗜睡，食晚遂忘飢。開卷渾如夢，逢人不省誰。何須覓知識，木石卽吾師。

又

一點湛空明，吾侬萬事盈。寒元券勾定，草豈畏流行。幻覺終可在，金丹本自戎。言能如是解，土苴亦長生。

又

薤草除枯葉，勞人亦動心。無愁疎把酒，習懶罷彈琴。濯垢臨溪水，追涼就木陰。常尋省力處，外物孰能侵。

又

夢事飽曾經，靈臺了不驚。窺親同一妄，魔佛兩皆平。應物如風過，投林卽鼯聲。晨興拂几視，猶恨太勞生。

窗下戲詠

飛來山鳥語惺惚，却是幽人半睡中。新竹成陰無彈射，不妨同享北窗風。

又

三尺清池鏡面平，剪刀葉底戲魚行。吾曹安得如渠樂，傍渚跳波過此生。

又

何處輕黃雙小蝶，翩翩與我共徘徊。綠陰芳草佳風月，不是花時也解來。

隸西小聚

瓦盎盛蠶蛹。沙鼎煮麥人。三家小聚落。兩姓世婚姻。父老衣冠古。閭閻風俗淳。不應陶靖節。獨號葛天民。

老歎

步遲腰偃僂。面瘦骨嶢嶸。貧病消前業。耕樵樂太平。有歌悲易水。無酒醉湖城。何許容身得。門前釣艇橫。

衰甚書感

髮殘不勝冠。齒墮欲廢嚼。譬如亭臯木。秋至葉自落。豈惟形骸變。意氣已非昨。牀隅倚拄杖。壁上挂雙屨。經旬不出戶。薄飯羹藜菘。居然遠霜露。因得養腰脚。年衰固應死。延促未可度。人之生實難。壽終固爲樂。開卷思千載。閱世等六博。志士有蹈海。儒生亦投閣。何如釀濁醪。遇興時獨酌。半酣望青天。萬事付一嘆。

山行過僧菴不入

垣屋參差竹塢深。舊題名處嬾重尋。茶壚煙起知高興。碁子聲疎識苦心。淡日曛暉孤市散。殘雲漠漠半川陰。長吟未斷清愁起。已見橫林宿暮禽。

山行

閑人日日得閑行。況值今朝小雨晴。水淺遊魚渾可數。山深藥草半無名。臨溪旋喚罾船渡。過寺初聞浴鼓聲。小醉未應風味減。滿盤青杏伴朱櫻。

夜窗

性中汝本具光明。蔽障除時道自成。手刈茆苫數椽屋。身鉏菜煮一盃羹。天人迭勝誰能測。禍福無常不

待許惟有吾心終可恃。夜窗袖手聽松聲。

送邢芻甫入閩

兩窮相值每相憐。聞子南遊一愴然。莫道此行非久別。衰翁何敢望明年。

又

君行正及荔枝丹。想見臨觴爲破顏。此外但宜烹茗雪。傷生不用擘蠻山。

從邢芻甫求桃竹拄杖

拄杖當年盛得名。一枝尙覺百金輕。老人不復須春草。只要攜渠處處行。

老雞

老雞擁腫不良行。將旦猶能效一鳴。碓下糠粃幸不乏。何妨相倚過餘生。

還東

還東寒暑幾推移。漸近黃梅細雨時。窗下興闌初掩卷。花前技癢又成詩。囊錢不貯還成癖。官事都捐未免癡。賴是病軀差勝舊。一盃藜粥且扶衰。

行東山下至南巖

穿林了不厭崎嶇。邂逅幽懷得少摠。昔媿出山成小草。今知流水羨遊魚。呦呦馴鹿隨輕策。泱泱流泉入野渠。坐覺塵襟眞一洗。正如頭垢得爬梳。

書幸

謀身從昔本迂疎。豈料餘年却晏如。盤箸無時闕佳菜。首金道事有舟車。放衣已敝月三院。短髮雖殘日一梳。里巷浮沉亦何憾。見賢猶及渡江初。

放言

酒熟固可喜。酒盡亦陶然。有客則劇談。無客枕書眠。飢噉羹不糲。閑玩琴無絃。摘嗅砌下花。搦弄欄底泉。啄木抱蠶枿。搏黍鳴桑顛。欣然爲一笑。世故何足捐。無人罵鄭虔。亦無嘲孝先。回顧三角童。吾與汝忘年。

晚步門外

槐葉已成陰。楸花亦離離。日暮門無人。迨我消搖時。左持漆園書。右挾栗里詩。風從湖面來。成此一段奇。石路雖甚狹。雅稱拖筇枝。少頃山月明。照我角巾欹。

夏夜

風便更漏明。室虛蟲納靜。筋骸日益衰。厭事樂幽屏。清燈北窗下。突兀寫孤影。進學無新功。賦詩聊自警。

甕池

藟甕東階下。醞醞一石水。買魚畜其間。鱖鱖三十尾。力微思及物。爲惠止於此。無風水不搖。得志魚自喜。涵泳藻與蒲。永不畏刀几。飯罷時來觀。相娛從此始。

種菜

菜把青青間藥苗。或香鹽白自烹調。須臾徹案呼茶碗。盤箸何曾覺寂寥。

又

老農飯粟出躬耕。捫腹何殊享大烹。吳地四時常足菜。一番過後一番生。

又

白苣黃瓜上市稀。盤中頓覺有光輝。時清閭里俱安業。殊勝周人詠采薇。

又

引水何妨藝芥菘。圃功自古補三農。恨君不見岷山芋。藏蓄猶堪過歲凶。

白首

白首歸來老故園。索居情味更堪論。關河悠邈夢魂到。親舊凋零書札存。身病自憐詩思退。家貧客笑酒醅渾。昏昏只欲投牀睡。兒勸孫扶強出門。

東窗遣興

巷陌過從少。園林景物新。羣魚時戲藻。馴雉每依人。映戶槐陰密。堆盤麥餌珍。殘春又陳迹。撫事一傷神。

又

巾屨長閑客。簾櫳薄暑天。巢空重乳燕。葉密未鳴蟬。壺箭看多算。圖書理斷編。悠然已日夕。卻上采菱船。

又

夏淺清陰滿。村深白日長。言多思寂默。酒醒悔猖狂。老馬漫知路。鈍錐寧出囊。此翁真老矣。懶放亦何傷。

北窗

晏嬰長不滿五尺。淳于飲能至一石。老無功名未足歎。滑稽玩世亦非昔。當年交友傾一時。誰料蓬門今

寂寂陳山李石千載士。早死當爲天下惜。斯文顛晦端有命。道悠運促非人力。我今稽山一老農。百歲不死知何益。後生可畏要有人。誰能隱若一敵國。狂言勿發心自驚。歸臥北窗還默默。

小酌

偶向東園把一盃。不辭團坐墮蒼苔。野花經雨自凋落。山鳥穿林時去來。皂白正天沈莽。青黃要與水爲災。今年秋後猶能健。賸乞梅栽與李栽。

夏日

暑雨初晴晝漏遲。江鄉樂事有誰知。村村蠶麥登場後。戶戶吳蠶拆簇時。

又

齒髮凋零奈爾何。年光暗裏易消磨。街槐正喜清陰密。巷柳還驚蠶葉多。

又

竹根斷作眠雲枕。木癭剝成貯酒尊。怪怪奇奇非著意。自無俗物到山村。

又

動身尙懶那堪事。學古無成罷讀書。枕上側眠聽語燕。池邊小立看游魚。

又

悶欲遠遊身苦懶。病思閑話客誰過。北窗一枕差堪樂。無奈茶盃作祟何。

又

黃葛蚊虻睡欲成。高槐陰轉暑風清。倚牀奴子垂頭坐。搖手孫兒小步行。

又

新取溪藤便作香。煉成崖蜜旋煎湯。蕭然巾履茅堂上。不畏人間夏日長。

又

謝客捐書日日閑。行穿密竹臥看山。巖前恨欠煎茶地。安得茆茨一小間。

又

蘋生洲渚微風起。梅熟園林細雨來。咫尺柴門常嬾出。不教拄杖損蒼苔。

又

側臥橫眠百不知。軒窗寂寂雨絲絲。豈無布襪青鞋興。過卻梅天出未遲。

又

幽花姪姪開還斂。小蝶翩翩去復留。貪睡畸翁俱不領。被人錯喚作閑愁。

又

山下柴荆晝不開。苦生古井暗楸槐。新詩哦罷閑無事。移取藤牀睡去來。

睡起

不恨無人到野堂。惟將美睡答年光。風經荷葉翻翻綠。雨溼松枝細細香。薄俗空成土龍笑。長歌未盡接
興狂。掬泉弄石愴然晚。又得今年一夏涼。

雨中作

湖曲雨淒淒，茆檐觸額低。衡門元少客，窮巷况多泥。解渴黃梁粥，嘗新白苣齏。吾生真自足，不恨老鉏犁。

感物

物情豈願歲時逾，一氣潛移不自由。日出鶉鴝還喚雨，夏初蟋蟀已吟秋。今年四月聞蟋蟀鳴。

又

小園清曉岸綸巾，物態年光日日新。綠葉自生黃自落，不應秋至始愁人。

舟中有賦

一枝柔櫓聽擘擘，啞炊稻來依野老家。山寺日中齋鼓動，江樓風急酒旗斜。綠梢嫋嫋搖新竹，翠鬣離離熟早瓜。閑客去留隨所遇，不知何處送棲鴉。

晨起獨行綠陰間

楸槐陰裏漏朝暉，芳草離離露漸稀。不恨過時嘗美酒，且欣平日著生衣。病逢鍼藥如差減，貧比簞瓢尙庶幾。惟是未能忘習氣，亂書隨日又成圍。

獨至遯菴避暑菴在大竹林中

赤日黃塵厭垢紛，竹林深處寄幽欣。如聽嵩雒風前笛，似看瀟湘雨後雲。園鹿知時新解角，池魚得意自成羣。悠然一笑誰能識，坐勝天魔百萬軍。

又

世俗元非不汝忘。汝歸安取醉爲鄉。藥苗野藪山家味。柏子松房道室香。一卷隱書爲日課。數聲啼鳥謝年光。客來莫笑茆茨陋。占盡炎天一味涼。

短歌行

上樽不解散牢愁。靈藥安能扶死病。千鈞強弩無自射虛空。六出奇計終難逃定命。人生斯世無別巧。要在遇物心不競。憂忘寢食怒裂眦。孰若憑高寄詠詠。炎天一萬冬。一裘藜藿飯糗勿豫謀。耳邊閑事有何極。正可付之風馬牛。

山寺

路盡初逢寺。行行獨叩扉。民貧稀送供。僧老少完衣。日正樓鐘動。溪深藥草肥。吾衰亦久矣。捨此欲曷依。

明日復欲出遊而雨再用前韻

小艇爭浮浦。幽人獨倚扉。新泥添燕壘。細雨溼鶯衣。葦紫桑新暗。秧青水正肥。欣然語鄰父。投老得相依。

暇日登東岡

雙履青芒滑。輕衫白苧涼。雲生半巖潤。麝過一林香。童子持碁局。廚人饋粟漿。歸來更清絕。淡月滿林塘。

暴雨

黑雲如龍爪。白雨如博棊。老屋處處漏。此夕將何之。豈惟多木蓬。治次懸釜炊。憂憂舍中人。具食不以時。兒女乃可憐。赤脚啼午飢。語兒姑少忍。開霽會有期。

幽事

衰翁喜幽事。闔戶不升堂。酒僅三蕉葉。琴纔一履霜。東坡自能飲三蕉葉。范文正公酷好琴。止彈履霜一曲。時謂之危履霜。好遊力不給。愛客病相妨。獨有詩情在。年來亦漸忘。

又

野館多幽事。畸人無俗情。靜分書句讀。豆戲習酒章程。藥褚藏難見。棊枰算未成。悠然寄孤歎。吾豈固逃名。

卷第八十三

病起雜言

國不可以無菑管。身不可以無疾。疾無菑之國亂。或更速。無疾之身死。或無日。昆夷獯豸無害於周之王。關土富國無救於隋之亡。壯夫一臥多不起。速死未必皆羸尪。古來惡疾棄空谷。往往更得度世方。我年九十理不長。况復三日病在牀。天公念之亦已至。儻戒不使須臾忘。起居飲食每自省。常若嚴師畏友在。我傍躋民仁壽則非職。且爲老儻鍼膏肓。

雨後

小築濤江外。微涼暑雨餘。傾囊致歡伯。信脚到華胥。芳草翩翩蝶。清池潑潑魚。此翁雖老矣。作計未全疎。

又

一友李童月。長與巧爾京。翁魚者彘性。草木自次香。微潤生琴薦。纖塵避筆牀。悠然北窗興。真欲傲羲皇。

示客

久泛煙波不問津。騰騰且復養吾真。每持盃酒呼江月。殊勝征衣化路塵。半枕何人遊蟻垤。立談爲汝脫狐身。挂帆莫恨瀟湘遠。是處相逢一笑新。

蒸潯作雨排悶

柱礎生微潤。籬櫺轉薄陰。蟻遷都邑改。鳩逐怨恩深。菌萑新離水。芭蕉半展心。掩屏惟熟睡。誰與續愁吟。

夏中雜興

梳髮高春後。投牀甲夜初。語艱愁對客。手倦怕催書。美睡那思覺。甘餐不願餘。更應慙造化。無事到幽居。

又

小響風吹葉。微痕雨點池。興來閑弄笛。客散自收碁。忽忽尋殘夢。時時足小詩。出門俄已暮。忘卻野人期。

又

出赴盟鷗社。歸尋夢蝶牀。愚爲度世術。閑是養生方。休歇書中癖。消磨酒後狂。遠遊亦已矣。不復解輕裝。

又

處世如灰冷。持心似砥平。盤飧無宿戒。香火有常程。樵父供藜杖。陶人售瓦甃。經旬常苦雨。嘯傲送餘生。

又

心慕羲農世。躬行黃老言。采椽聊築舍。橫木卽爲門。短髮冠龜屋。空牀枕竹根。從來薄世味。染指肯嘗醢。

又

遣信邀鄰父。隨宜具小殮。草燔豚肉美。釜壓酒醅渾。易致商山皓。難招楚澤魂。嗟予亦衰矣。心事與誰論。

卽事

翁自析薪兒負薪。一生不似此年貧。折除卻得常強健。天定方知果勝人。

又

楸垂落索槐吐花。溪女採蓮蠶抱瓜。一年光景又將半。愈老愈知生有涯。

又

煙雨淒迷晚不收。疎籬曲几寄悠悠。一雙蛺蝶來何許。點盡青青百草頭。

又

生來骨相本酸寒。天遣沙頭把釣竿。但稱山人擲耳帽。敢希楚客切雲冠。

又

魚鱸羣出天將雨。鼃黽爭鳴草滿庭。莫道歸休便無事。時時襪袴伴園丁。

又

幽鳥飛鳴翠木陰。小魚游泳綠波心。滿前好句無人領。堪笑寒窗費苦吟。

又

小閣憑欄望遠空。天河黃貫斗牛中。他年鼓角隴關路。馬上遙看與此同。

又

幽鳥呼人出睡鄉。層層露葉漏朝陽。臨池只欲消殘醉。無奈鶉兒似酒黃。

夏日幽居

赤日黃塵一點無。負山臨水是幽居。爽如瑞露零仙掌。清似寒冰貯玉壺。孤艇過時驚宿鷺。溼煙深處亂風蒲。倘然欲棄人間去。天際聯翩誰與俱。

枕上

小疾知閑樂。微涼與睡宜。膏騰如欲覺。展轉復多時。四壁人聲寂。疎簾日影移。詩囊與藥裹。一步不相離。

題望海亭亭在臥龍絕頂

瑞龍千丈何蜿蜒。蒼鱗翠鬣翔江邊。路達鏡湖乃下駐。玩珠不去知何年。七州元帥權畫戟。全家終日樓居仙。霜筍一曲入銀漢。碧瓦萬壘浮嵐煙。其間望海最傑觀。疎豁坐占蓬萊先。風雲變化几席上。蛟鼉出沒闌干前。手捫心房倚北斗。眼中萬象俱森然。尚書喚客共領略。遠坊十里聞管絃。從容賦詩出妙思。超絕欲拍微之肩。主中有客垂九十。追逐無路空自憐。夜闌客散公歸院。笙歌隱隱在半天。向來老客今何處。菱唱三更起釣船。

露坐小飲

寂寂柴門閉嫩苔。門前有路走天台。近秋河漢西南落。欲雨風雲東北來。旋摘甘瓜青帶蔓。新搗玉醴冷傳盃。亦知野外無供給。且復相逢笑口開。

小憩臥龍山亭

山高風浩浩。堂豁海冥冥。綠李分猿曠。蒼苔墮鶴翎。松寒詩思健。茶爽醉魂醒。安得丹青手。傳摹入素屏。

晚涼

笛簾平鋪八尺牀。脫巾高臥對疎篁。近村得雨知何處。此地無風亦自涼。

夏日六言

退士自應客少。幽居不厭椽低。未說盤堆玉脰。且看白搗金蠶。

又

醉面貪承夕露。釣竿喜近秋風。借問孤舟何處。深入芙蓉浦中。

又

溪漲清風拂面。月落繁星滿天。數隻船橫浦口。一聲笛起山前。

又

我是百年遺老。埽空一夢浮名。未到終南二華。且入天台四明。

招客看山

今日清明宜看山。約君來上釣魚船。微雲點破尙堪恨。何況城中塵漲天。

舟中作

平生剩有煙波興。釣瀨時時小艇橫。欲暮山光先慘淡。未秋河漢已分明。捕魚時見連江網。迎荻遙聞過壑聲。想得今宵清絕夢。又攜猿鶴上青城。

消暑

穿竹清我魂。散髮吹我頂。虛窗聽鳴蟬。小檻看汲井。掃地長物空。漱泉齒頰冷。廚人具漿粉。童子鬻山茗。微雲未必雨。且喜收樹影。殘書置不視。樂此清晝永。既夕卽榜舟。門外綠千頃。世事何足論。平生慕箕穎。

五月下旬大熱晦日夜得雨明日涼甚

一雨蕭然洗睡昏。清晨屣履自開門。豈惟爽氣生山袂。坐覺涼颼入髮根。浦口魚多來野鶴。林梢果熟下山猿。吾廬清絕君知否。釣雪寒江不足言。

黃氏冲和堂

冲和堂中和氣。襲堆笏滿牀。羣從集宜州。太史一紙書。百年筆墨猶山立。使君所學何超然。要是胸中不負天。王畿奉使纔廿日。忠厚風流天下傳。國家多事民力困。正要設施先百郡。但令一念與天通。河南南陽亦可問。

暴雨

蒼龍挂東南。天矯擊萬仞。雖然雜雲氣。爪尾略可認。明日暴雨來。繼以雷大震。平地成江河。吞卷纔一瞬。吾廬久傾壞。不歷真董董。所欣顛顛中。一飽天不吝。餘功到場圃。草木皆綠潤。蕭然岸角巾。三歎撫庭楯。

書意

策蹇若華駟。歡滴如上尊。人皆可堯舜。身自有乾坤。逢客亦共語。無人還閉門。千年道術裂。誰復見金潭。

又

養生慕黃老。爲治法唐虞。耆壽緣憂懼。危亡坐燕娛。大川宜利涉。蔓草戒難圖。退士惟身慮。銘膺豈敢無。

又

委順天知我。經營鬼笑人。定知窮至死。敢恨病經旬。愛酒陶元亮。還鄉賀季真。扁舟吾事畢。遺世亦遺身。

浴罷

浴罷淡無事。出門隨意行。相如知渴減。叔寶覺神清。新月參差影。殘蟬斷續聲。躊躇遂忘去。風露欲三更。

水鄉泛舟

終朝流汗浹衣襟。悵望何時枕簟秋。作雨未成徒益熱。舉盃不醉更添愁。悲歌易水輕燕俠。對泣新亭笑楚囚。別有生涯君會否。煙波無際弄孤舟。

又

亦日黃塵不自聊。泛溪且用沃枯焦。隔林犬吠村墟近。掠面風來酒力消。遠火微茫知夜續。長歌斷續認歸樵。扁舟不盡凌風興。却著青鞵踏野橋。

閑詠

平生到處足間關。天遣殘年樂故山。社日連村逐酉勾。豐年無盜犬布首。秋來梁燕將雛去。雨過林鳩喚婦還。我亦葛衣新浴罷。爲君滿意說清閑。

江樓夜望

江樓百尺倚高寒。上盡危梯宇宙寬。秋近漸看河落角。天回更覺斗闌干。茫茫浦口煙帆遠。坎坎城頭漏

鼓殘。要得故人同蹠屐。一尊相屬話悲歡。

連日作雨苦熱

天地一氣。爾陰陽司閭開。鬱蒸以爲雨。回薄以爲雷。久鬱無所泄。造化安在哉。方其欲雨時。雖天不能回。此豈降自天。其實有自來。所以屈宋輩。千載有餘哀。

門外追涼

羽扇綸巾一味涼。曠懷非醉亦非狂。橫林點點喜傷集。平壘雖雖新稻香。山月出時閑弄影。水風清處旋移牀。學仙到此無餘說。更覺金丹墮糝糠。

夏夜泛溪至南莊復回湖桑歸

不求奇骨可封侯。但喜枯腸不貯愁。數點殘燈沽酒市。一聲柔櫓採菱舟。元知澤國偏宜夜。已就天公探借秋。歸過三更風露重。紗巾剩覺髮飈颺。

雨後殊有秋意

天地新秋入苦吟。詩書萬古付孤斟。愛君憂國孤臣淚。臨水登山節士心。只歎鼻端無妙斲。豈知絃外有遺音。剗中勝踐今猶昔。安得高人支道林。

寓規

百疾皆有源。雖愚猶自知。惟其忽不念。所以悔莫追。微隙爲無傷。一壞誰能支。宴安比鳩毒。先民不吾欺。

又

分量各有窮。升僦不受斗。滿盈靡懷懼。覆敗乃自取。衣笥無複禪。食案有三韭。貧狹雖可嗤。比汝差耐久。

又

人生孰無疾。治疾惟欲瘳。疾瘳藥不止。乃有過劑憂。節食戒屬屢。養氣常致柔。金丹無此功。往哉勸自修。

新涼

儘道新涼好。無如晝漏長。奇文窺楚屈。妙理玩蒙莊。靜臥貧猶樂。高歌醒亦狂。翩翩雙蝶子。也似惜年光。

又

月入楸梧徑。風生蘆荻林。脫巾涼入髮。臨水爽披襟。寒暑推移久。江湖感慨深。功名雖已矣。猶得寓孤吟。

追涼至安隱寺前

枕石何妨更漱流。一涼之外豈他求。寺樓無影月卓午。橋樹有聲風變秋。殘曆半空心悄悄。岸巾徐步髮飈飈。定知從此清宵夢。常在沙邊伴白鷗。

湖上夜賦

冉冉秋將至。沉沉夜向晨。河隨天漸轉。露洗月如新。瘦竹過眉杖。輕紗折角巾。漁歌四面起。煙水浩無津。

又

清絕追涼地。平生得未曾。似嘗仙掌露。如嚼玉壺冰。狂學菱舟曲。閑尋竹院僧。更思生羽翼。散髮醉巴陵。

書適

萬事罷經營。悠然心太平。甘餐隨日足。美睡等閑成。處處佳風月。人人好弟兄。神仙不須學。券內有長生。

羸老

羸老幸未死，敢嗟生理微。牛閑牧童臥，犬吠市船歸。月落見收網，燈青聞踏機。時時語鄰里，并曰幸相依。

即事

羸老無近用，芝朮少奇功。上壽當徐致，沉疴忌力攻。醫傳三世久，事歷百年中。長與庸人說，終身託病醫。

晚興

並簷幽鳥語瓊瓏，一榻蕭然四面風。客散茶甘留舌本，睡餘書味在胸中。浮雲變態吾何與，腐骨成塵論自公。剩欲與君談此事，少須明月出深東。

郊行

淒風吹雨過江城，緩策羸驂並水行。古路初驚秋葉墮，荒郊已放候蟲鳴。壯心耿耿人誰識，往事悠悠恨未平。斜日半竿羌笛怨，西陵寂寞又潮生。

喜雨

雨氣侵人暮不休，雨聲逼枕冷颼颼。方欣草木有生意，已報溝池無涸流。避溼入簷憐病鶴，爭巢逐婦欺鳴鳩。老農自喜知時節，夜半呼兒起飯牛。

劉道士贈小葫蘆

葫蘆雖小藏天地，伴我雲山萬里身。收起鬼神窺不見，用時能與物爲春。

又

貴人玉帶佩金魚。憂畏何曾頃刻無。色似栗黃形似繭。恨渠不識小葫蘆。

又

短袍楚製未爲非。況得藥瓢相發揮。行過山村傾社看。絕勝小劍壓戎衣。

又

箇中一物著不得。建立森然卻有餘。盡底語君君豈信。試來跳入看何如。

自傲

學當盡力去浮華。從事文辭但可嗟。造道淺深看應物。修身勤惰驗齊家。

雨中

孤村風雨連三日。秋暑如焚一洗空。睡覺房櫳燈漸暗。卻尋殘夢雨聲中。

書歎

遺蝗出境樂秋成。多稼登場喜雨晴。暗笑衰翁不解事。猶懷萬里玉關情。

又

雨夜孤舟宿鏡湖。秋聲蕭瑟滿菰蒲。書生有淚無揮處。尋見祥符九域圖。祥符中曾詔王曾等修九域圖

題畫薄荷扇

薄荷花開蝶翅翻。風枝露葉弄秋妍。自憐不及狸奴黠。爛醉籬邊不用錢。

又

一枝香草出幽叢。雙蝶飛飛戲晚風。莫恨村居相識晚。知名元向楚辭中。

秋興

誰敢輕他萬戶侯。一生賦分在滄洲。屋穿泥值雨騎月。俗謂二十四五間雨爲騎月。雨主霖霖不止。路惡更堪風打頭。此世極知同逆旅。吾身亦是懸疣。乞錢買取青芒屨。爛醉三條二華秋。

又

斂盡殘雲見夕陽。門前穰稔漸登場。經年都得幾回醉。一雨頓驚如許涼。耐事尚能心似鐵。放歌仍忘髮成霜。願生底用從人問。此是山翁肘後方。

又

五十年來住鏡湖。白頭仍是一臞儒。朝眠每恨妨書課。秋穫先令入酒壚。江路伶俜形弔影。草菴寂默我忘吾。雨窗忽有高談興。筮叟醫翁亦可呼。

又

萬事何曾挂齒牙。只將放浪作生涯。有時掬米飼馴鹿。到處入林求野花。鄰父築場收早稼。溪姑負籠賣秋茶。等閑一日還過卻。又倚柴扉數暮鴉。

晝睡

體中小不佳。惟睡可以休。睡笑自成夢。去爲萬里遊。萬里遊尚可。乃復有得喪。漂搖一葉舟。掀舞千重浪。午雞忽驚起。向夢安在哉。童子解原夢。篝火具茶盃。

得子虞濠上書

日暮坐柴門，懷抱方煩紆。鈴聲從西來，忽得濠州書。開緘讀未半，喜極涕泗俱。父老子惜別，況經患難餘。羈旅易生疾，霜露行載塗。思歸雖甚苦，且復忍須臾。時濠州軍亂，子虞適來攝運，列身率將士力戰平之。

庭草

階前西風搖百草，鬱鬱逢秋殊未槁。雪霜要當次第來，恰似人生怕衰老。百草榮悴則有時，人於養生當自知。金丹九轉爐火辟，前收中狀，良臣而，壽國小夫，豈處死。二豎眉端先盜喜，但令神氣常守形。莫畏夢中呼起。

文章

文章本天成，妙手偶得之。粹然無疵瑕，豈復須人為。君看古彝器，巧拙兩無施。漢最近先秦，固已殊淳漓。胡部何爲者，豪竹雜哀絲。后夔不復作，千載誰與期。

秋日遣懷

離離上藥苗，鬱鬱靈芝榮。我昔逢異人，瑣細皆能名。擊石以取火，薪桂持前□。五雲夜覆鼎，談笑得長生。

又

胸中何所有，世界如河沙。區區吞雲夢，何至爲客誇。初見賣苑冰，青門已無瓜。天河正不遠，秋風乘客槎。

又

西來浮瀉江，東眺俯鏡湖。其中縣千里，鬱鬱桑麻區。禹葬有遺窆，寧亡無故墟。秋風吹短褐，望古空躊躇。

野風聲如潮。溪水色可染。浮雲時翳日。亦作雨數點。行歌雖放浪。未至越繩檢。蕭然茅三間。送老此山岫。

又

秋夜坐東窗。殘雨時一滴。四壁無人聲。心境兩虛寂。吾方遊物初。超然謝形役。一毫儘未盡。何往非勅敵。

又

自我歸故山。不知歲月徂。念雖迫霜露。憂國猶區區。老不能上疏。泰階陳六符。安得子元子。同歌子蔞于。

又

今年秋氣早。風露應時令。晨起換熟衣。殘暑已退聽。松聲滿庭戶。蕭然失衰病。人衆何足言。天固不可勝。

又

晨几手作墨。午窗身磴茶。豈惟要小勞。亦以禦百邪。兒童不解此。傾心逐紛華。君看如山禍。萌在一念差。

自傲

惡石從來豈汝仇。安居無患卻堪憂。不須更守庚申夜。留取三彭傲惰偷。

又

世事如雲日日新。瓦盆黍酒卻關身。細思只有窮居好。寄語玄翁莫逐貧。

生世

乾坤成毀由來事。生世眞同黍一炊。嗟我已過三萬日。餘年有幾自應知。

秋雨

山深草木久已荒。晝昏風雨殊未止。看書不覺向壁臥。煎茶欲罷推枕起。清心正付竹爐香。漱齒每挹巖泉水。與世不諧元有命。閉門自適差可喜。少年癡絕晚乃悟。束縛殊濡均一死。悠然袖手倚蒲團。洗盡玉關心萬里。

思蜀

西遊陳迹浩無窮。回首真同一夢中。柳拂驛牆思鳳集。鼓喧市里憶蠶叢。故人丘壟秋蕪碧。舊隱園林夕照紅。自閔未能忘感慨。浩歌彈劍送飛鴻。

病思

短髮蕭蕭不滿簪。更堪衰疾日侵尋。數匙淡飯支殘息。一篆清香印本心。小徑古苔遺鶴毳。空堂壞甃有蟲吟。悠然更起扁舟興。秋水門前□尺深。

術家言予今歲畏四孟月而秋尤甚自初秋小疾屢作戲題長句

一生強半臥窮閭。糲飯藜羹似蜜甜。毫齒覺衰嗟已晚。孟秋屬疾□□□。危途本自難安步。□石何妨更痛砭。堅忍莫□□□□。蘿猶足待茅苫。

秋夕書事

垂老雖堪歎。爲謀亦未疎。閑除鄰巷酒。閑讀後身書。大嚼寧須肉。徐行可當車。秋來歡喜事。菽粟有新儲。

又

點點秋燈晚。翻翻宿鳥還。雨添羈枕。書伴小窗閑。僧閣荒寒外。漁村縹緲間。晝工今代少。誰爲寫家山。

小疾

小疾有根柢。忽之當日深。養苗先去草。省事在清心。蟻夢能看破。狐妖可坐擒。一盃藜粥罷。聽雨擁秋衾。

又

老不禁當病。經旬臥一牀。亦知非疥癬。幸未至膏肓。水落灘初出。秋深草漸黃。非關畏人事。晚歲合深藏。

又

避人便小疾。省事喜閑身。並海魚鹽聚。入秋風雨頻。元知器苦窳。空有膽輪囷。轉飯聊同飽。知君不笑貧。

病中作

此事明明在默存。一身元有一乾坤。不憂豎子居膏上。已見真人出面門。力守誰能發底火。深潛自足美
□□。用功若到無功處。千載乘雲不足言。

縱筆

天下本無事。吾生行且休。關心惟酒盞。入眼獨漁舟。雁過三湘曉。雲開二華秋。慙慙驛樓柱。小草記曾遊。

又

相馬失之瘦。知人良獨難。雖居環堵室。未廢切雲冠。暮雨潼關暗。秋風渭水寒。深蕪埋壯士。千古爲悲歎。

卷第八十四

自立秋前病過白露猶未平遣懷

門冷荒車轍。囊空別醉鄉。嬾行眠亦好。倦話默何傷。野叟占幽夢。山僧送祕方。病懷雖忽忽。隨事答年光。

又

飢能堅志節。病可養精神。不動成鶻臥。微勞學鳥伸。功名知幻境。憂患笑前身。藥裹吾何厭。秋燈作夢新。

聖門

聖門妙處不容思。千古茫茫欲語誰。髭髮庭中新沐後。舞雩沂上詠歸時。研求豈足窺微指。博約何由遇碩師。小疾埽空身尙健。蓬窗更作數年期。

書齋壁

幅巾短褐野人裝。洗盡黃塵早暮忙。地僻漁扉常隱翳。身閑靈府自清涼。雨中鬱鬱垣衣綠。澗底纖纖石髮長。老嫗只思眠踢壁。一尊到手又成狂。

病後小健戲題

行年九十未龍鍾。慙媿天公久見容。醉解病人詩解瘦。不如世世作春農。

新晴

雨葉玲瓏曉日明。經旬風雨得初晴。歌眠歇盡人間念。時聽幽禽一兩聲。

夢中作

征途遇秋雨。數士集郵亭。酒拆官壺綠。山圍草市青。劇談猶激烈。瘦影各伶仃。四海皆兄弟。悠然共醉醒。

又

一客若蜀士。相逢意氣豪。偶談唐夾寒。遂及楚城臯。二者皆所論。事頓洗風塵。惡都忘筮藝。勞蟬嘶笑餘。子辛苦學離騷。

疾小愈縱筆作短章

治疾如治盜。要使復其常。藉曰用戈矛。全之寧欲傷。彼盜皆吾民。初非若胡羌。奈何一朝忿。直欲事毆攘。毆攘雖快心。少忍理則長。華陀古神醫。煎洗到肺腸。取效雖卓犖。去死真毫芒。君審欲除盜。惟當法龔黃。撫摩倘有道。四境皆耕桑。我亦以治疾。不減玉函方。

病少愈偶作

蕭條白髮臥蓬廬。虛讀人間萬卷書。遇事始知聞道晚。抱疴方悔養生疎。高門赫赫何關我。薄俗紛紛莫問渠。羸疾少蘇思一出。夕陽門巷駕柴車。

又

病入秋來不可當。便從此逝亦何傷。百錢布被斂首足。三寸桐棺埋濁崗。但恨著書終草草。不嫌徂歲去堂堂。今朝生意纔絲髮。硬擬街頭醉放狂。

書生

書生事業苦難成。點檢常憂害至成。夢寐未能除小忿。文辭猶欲事虛名。聖言甚遠當深考。古義雖聞要力行。漢世陋儒吾所斥。若為青紫勝歸耕。

古驛

古驛橋邊艇子橫。每因羈旅愜幽情。窗間月落無花影。枕上潮來有鷓聲。舊友凋零歸夢想。新詩邂逅得天成。今朝有喜君知否。秋雨晴時小疾平。

夜讀劉伯倫傳戲作

生本無心死可知。徐徐掩骨未爲遲。一奴僅可供薪水。那得閒人荷鍤隨。

湖上晚望

閒人無處破除閒。待得漁舟一一還。峯頂夕陽烟際水。分明六幅巨然山。

村居卽事

西成東作常無事。婦媿夫耕萬里同。但願清平好官府。眼中歷歷見幽風。

又

炊甑生塵榻長苔。柴門日晏未曾開。載醪問字今牢落。猶有鄰翁裹飯來。

又

長笛圓韋曲調新。東家西舍送迎神。不因豐歲人情樂。淡殺溪頭老病人。

夜興

夜闌扶策繞中庭。雲罽三三兩兩星。安得南風卷雲盡。爛然河白映天青。

夢華山

路入河潼喜著鞭。華山忽到帽裙邊。洗頭盆上雲生壁。腰帶鞞前月滿川。丹竈故基誰復識。白驢遺跡但相傳。夢魂妄想君無笑。尙擬今生得地仙。

寓歎

窮居諧世故。了了不如昏。萬事慵挂眼。終年思杜門。雲閒忘出岫。葉落喜歸根。熟計惟當醉。寧論社瓮渾。

又

小隱終非隱。休官尙是官。早知農圃樂。不見道途難。故國雞豚社。貧家菽水歡。至今清夜夢。猶覺畏瀟瀾。

又

事外癡頑老。人中賸長身。開顏時賴酒。閉口不言貧。淡話常終夕。閒遊動歷旬。漁翁偶相遇。疑是武陵人。

又

老闍市朝久。紛紛長厭看。人紆綬紫艾。家擁穀朱丹。不羨官曹熱。惟憐眼境寒。東塗與西抹。感奮一長歎。

嘉定己巳立秋得膈上疾近寒露乃小愈

獨立溪橋看落暉。殘蕪漠漠蝶飛飛。從來澤國秋常晚。歎息衰翁已衲衣。

又

今年病老遂難禁。二豎奔逃豈易尋。風雨三更僮僕睡。自持殘燭檢千金。

又

窮銷壯歲功名志。病過新秋賞詠時。自古世間如意少。天公寧肯爲君私。

小詩苦思憑誰賞。綠酒盈尊每獨傾。老境情襟例如此。不須惆悵感餘生。

又

又

一枕鳥聲殘曉夢。半窗竹影弄新晴。屏深室煖秋垂老。粥美蔬香疾漸平。

又

半飢半飽隨時過。無客無書盡日閒。童子貪眠呼不省。狸奴戀煖去仍還。

又

粥香可愛貧方覺。睡味無窮老始知。要識放翁真受用。大冠長劍只成癡。

又

小詩閒淡如秋水。病後殊勝未病時。自翦矮牋謄斷稿。不嫌墨淺字傾欹。

又

八月吳中風露秋。子鵝可炙酒新篘。老人病愈鄉閭喜。處處邀迎共獻酬。

又

清泉白米山家有。鹽酪猶從小市求。寸步須扶本常事。細書妨讀卻閒愁。

又

束書不觀萬事休。誰令識字惹閒愁。胸中作祟知何物。不是當年老督郵。

又

客疾無根莫浪憂。今朝掃盡不容留。飯囊酒瓮非吾事。只貯千巖萬壑秋。

病中臥聞春聲

丘嫂羹存先夏釜。山僧齋竟始鳴鐘。孰知造物獨憐我。一日未嘗無夕春。

又

妄想說梅猶止渴。真聞春米固忘飢。未論炊熟香生飯。已覺杪來雪滿匙。

病小減復作

一身真贖長。兩月抱沉縣。吟作楚人語。聳成山字肩。災從季主卜。藥欠宋清錢。彌老彌堪笑。藜羹且信緣。

又

衛養元無術。衰殘只自悲。扶行十步地。強坐一炊時。枕藉漆園語。呻吟栗里詩。災年未易過。那敢望期頤。
卜者言今秋來春皆災。過此壽未艾。

又

晨粥半茶碗。秋衣一布裘。酒惟詩裏見。山向夢中遊。卜繇兒能測。藥方僧爲求。重陽無半月。尙泥菊花不。

病思

水碓春粳滑勝珠。地爐燔芋軟始酥。老來自愛盤飧美。安得高人共破除。

又

殺物求君舌本肥。是非豈復待深思。卽今不足何時足。小飯香粳日兩炊。

又

江上秋風蘆荻聲。魚蝦日日厭煎烹。病來作意停鮮食。留得青錢買放生。

又

行攜馴鹿寄消搖。共飽山蔬與藥苗。本自入山緣服玉。不應忘味待聞韶。

又

西山雪外巢松客。南岳巖前洗鉢僧。平日奇懷常在此。秋風剩欲辦行蹤。

又

窗扉寂寂秋將晚。燈火昏昏夜向闌。不是暮年能耐病。道人心地本來寬。

病中自遣

孤燈如露螢。熠熠北窗下。我亦氣僅屬。厭厭迫衰謝。平生更事熟。生死等晝夜。行年八十五。八十九已化。雖云病惱侵。處此亦閒暇。人扶時出門。清溪帶茆舍。

又

一鴉振羽鳴。窗色忽已縞。衆鳥次第來。各矜語言好。病夫正擁被。宛若兒在襁。跣婢職衣襦。丫童護除壩。紅日已入簾。吾豈尙恨早。悠然一盃粥。頑鈍聊自保。

又

少時揣無才。一意守貧賤。窮閭依馬磨。小石寫驢券。中年更可笑。顛顛客異縣。何曾得一飽。塵土空滿面。卽今況已病。百衰相俱見。雖然亦自重。未忍悲秋扇。

八月二十三夜夢中作

道士上天鶴一隻。老僧住菴雲半間。去來盡向無心尋。錢賸相余則趁閒。江山千里互明晦。魚鳥十年相往還。高巖縹緲人不到。醉中爲子題其顏。

病少間作

身如木有漚。病如雲無根。方其未散間。妄謂有我存。漚壞水渺然。雲滅寧遺痕。回首乃可笑。妄想生怨恩。念我曩昔時。一笏朝帝闈。旣老復何爲。釣魚石帆村。今年病臥久。慘痛不可言。一念忽超詣。二豎皆忙奔。吾居本廣大。談笑決其藩。還持一尊酒。往醉湘水魂。

秋晚幽居

吳中秋晚氣猶和。疾豎其如此老何。鳥語漸稀人睡美。木陰初薄夕陽多。埽園日日成幽趣。撫枕時時亦浩歌。車轍久空君勿歎。文殊自解問維摩。

病中思出遊

病境雖猶在秋天。已自清閒思尋酒伴。嬾長主詩盟。煙艇桐江去。籃輿剡縣行。會心隨處住。便足了餘生。

九月初作

莫笑衡茆陋。幽情得細論。客疎慙歆醢。僧熟認敲門。杳杳煙中剡。昏昏雨外村。登高負今歲。老病易消魂。

四日夜雞未鳴起作

放翁病過秋忽起作醉墨正如久蟄龍青天飛霹靂。雖云墮怪奇要勝常惘默。一朝此翁死千金求不得。

臥病雜題

吟咀初成藥啞啞半掩扉。病知身健樂閒覺宦遊非。小澗看猿飲枯筇擁鶴歸。今朝更堪喜書札得淮泥。是日得五郎廬州書。

又

鷓鴣馴亭沼琴書悅性靈。身叨鄉祭酒孫爲國添丁。煙浦收菰菜秋山斲茯苓。虛名吾所薄未應少徵星。

又

陋室施牀進窮閭問疾疎。加餐惟是粥弄筆不成書。盎盎新篘酒青青小摘蔬。客來邀褰帶聊示小勤渠。

又

終日常辭客經秋半在牀。愛窮留作伴。諳病與相忘。竈婢工烹粥園丁習寫方。久病家人作粥遂佳。晝朝夕晝爲之也。又有山僕本不識字。因久合藥遂能寫藥方數大篇。今朝有奇事。久雨得窗光。

又

人間跛男子物外病維摩。病中差率聊病右足。但可妨趨拜。何因廢歎歌。菜羹醯醬薄。村巷棘茨多。舉手謝鄰父。非君誰肯過。

讀華陀傳

六籍雖殘聖道醇。中更秦火不成塵。華陀老黠徒驚俗。吾豈無書可活人。

家山

鹿食華時猶命侶。鶴冲霄後尙思歸。家山不忍何山隱。稽首虛空讎昨非。

九月十一日疾小間夜賦

清夜房櫺燈火微。此心病起更依依。空驚牀下莎蟲語。不見梁間巢燕歸。蒼硯有池殘墨在。白頭不櫛亂書圍。可憐未遠忘風月。猶夢華觴插羽飛。

又

病後衣巾盡覺寬。挈提裘領喟然歎。孤燈不焰熒熒碧。小雨無聲慘慘寒。只道清心災自退。豈知非意病相干。平生最愛秋搖落。惆悵今年怯倚欄。

一病七十日

一病七十日。其疑無復生。隄全河漸復。師濟寇將平。縹緲香雲散。鸚鵡藥鼎鳴。庭前有殘菊。自笑尙關情。

西郊

七十辭北闕。五畝寄西郊。泳水魚依藻。摩雲鶴結巢。丐僧時問疾。卜叟或論交。社稷天全汝。寧當歎繁匏。

蔬食

肉食從來意自疑。齋盂況與病相宜。老瓶昔作春蔬祟。斷稿今無晚釣詩。陌上煙苔誰采采。牆陰風葉正離離。人生飢飽初何校。一斛檳榔笑汝癡。

乙巳秋暮獨酌第一首六韻

孤雲驚不定野鶴籠難馴。賣藥句曲秋。沽酒天台春。中原幾流血。四海一閒人。邀月對我影。折花插我巾。花月成三友。江海爲四鄰。何敢忘吾君。巢由稱外臣。

又

安期與羨門。秦漢迹已陳。不如東平公。一劍隱紅塵。醉歌題市樓。墨色粲如新。叱咤興風雲。約束山川神。從我者誰歟。夜渡黃鶴津。

又

山陰老道士。寄情魚鳥中。幽戶綠蘿月。孤舟白蘋風。豈無小瓮熟。尊杓誰與同。遊遁得知心。一見歎猶龍。

又

湖中有隱士。或謂千歲人。大兒嚴子陵。小兒賀季真。姓名莫能知。況可得疎親。有竿不釣魚。秋晚香粳新。

秋晚

春將愁並至。秋與病相終。過望猶賒死。扶衰又入冬。撥香開社瓮。帶睡聽晨鐘。懶放君無謂。天公儘見容。

病中遣懷

人生長短無百歲。八十五年行九分。堪笑癡翁作點計。欲將繩子繫浮雲。

又

放生何足爲愛物。施藥因行聊結緣。山舍老翁無事業。只將閒事占流年。

又

鮮肥莫事膚寸舌。蕭散何辜七尺軀。山路豈無孤店宿。渡頭亦有小舟呼。

又

家貧不與身添業。病久寧非天做予。壻盡世間慙忿。小園煙雨種春蔬。

又

菘芥煮羹甘勝蜜。稻梁炊飯滑如珠。上方香積寧過此。慙媿天公養病夫。

又

開盤紫栗如拳大。帶葉黃柑染袖香。天與山家講鄰好。江天昨夜有新霜。

六言

滿帽秋風入剡。半帆寒日遊吳。問子行裝何在。帶間笑指葫蘆。

又

不慕生爲柱國。何須死向揚州。但願此身無病。天台剡縣閒遊。

野興

著草晨占大易爻。松肪夜借隱書抄。飢時每就猿分果。宿處時從鶴寄巢。旋賣荆薪持取醉。偶逢野叟卽論交。頽然坐閱人間事。耐辱禁愁卻自嘲。

遠遊

壯年不作故山歸。老去方知浪走非。挂日片帆吳赤壁。嘶風疋馬蜀青衣。交遊雖廣知心少。香火徒勤頭力微。堪笑只今成底事。青燈無恙且相依。

反遠遊

賈卻貂裘買釣舟。久將身世付悠悠。行歌西郭紅橋路。爛醉東關白塔秋。昔山陰近郊地名。夜泊驛亭觀月上。曉登僧閣聽猿愁。一生身屬官倉米。剩喜殘年得自由。

病著

病著今年劇。衰來次第新。茅茨安久處。芻豢罷前陳。零落閒逸句。逍遙事外身。村東褚草葦。一笑得常珍。

梅市

小雨長隄古寺西。不容羸馬惜障泥。時平道路鈴聲少。歲樂坊場酒價低。煙樹淺深山驛近。野歌斷續客魂迷。殘軀不料重來此。一首清詩手自題。

梅市書事

羸馬孤愁不可勝。小詩未忍付蒼騰。一聲客枕江頭雁。數點商船雨外燈。

病減

病減停湯熨。身衰賴按摩。書牕平日課。睡比故年多。龜卜占休泰。醫方較闕訛。有時還一笑。隔浦起漁歌。

幽居卽事

山崦可伐薪。稻壠可負耒。但令二事集。一飽已有在。霜林兩株橘。春圃數畦菜。仁哉造物心。乞我肯不愛。

炊烹付樵青。鉏灌賴阿對。乃翁亦自爲。高枕聽晨碓。

又

書几積流塵。硯池漬淺墨。老夫自省事。童子豈不力。人生適可爾。過計亦何得。胡爲棄梨棗。日夜長荆棘。洗汝修汰心。去汝驕吝色。一菜飽有餘。奚取萬錢食。

羸疾

羸疾止還作。已過秋暮時。但當名百藥。那更謁三醫。強飯幸如昨。清遊元有期。新霜宜野店。行矣不須疑。

九月二十五日雞鳴前起待旦

堪笑枯腸漸畏茶。夜闌坐起聽城笳。爐溫自撥深培火。燈暗猶垂半結花。斷夢不妨尋枕上。孤愁還似客天涯。掃塵拾得殘詩稿。滿紙風鴉字半斜。

秋夕排悶十韻

湖海雙歸棹。蓬蒿一病翁。幽居天鏡北。別墅石帆東。雲岫翳孤鶴。煙汀渺斷鴻。一從生白髮。幾見落丹楓。獨立中庭月。欹眠滿院蛩。藜羹晨糝白。葑火夜爐紅。物外緣雖薄。塵中念已空。放魚從長者。累塔伴羣童。野寺觀冬臘。叢祠禱歲豐。行歌與坐睡。處處現神通。

宴坐

氣住卽存神。心安自保身。誰歟二豎子。卓爾一真人。氣泝如潮上。津流若酒醇。幽居幸無事。莫玩物華新。

又

周流惟一氣。天地與人同。天道故不息。人爲斯有窮。蛟龍上雲雨。魚鳥困池籠。宴坐觀茲理。吾其若發蒙。

小室

術淺難醫恙。文疎不送窮。詩囊逢厄運。藥裹少新功。小室香凝碧。明窗日射紅。鄰翁來問疾。少話莫匆匆。

舟次浦口

吾輩本自作。此生元有涯。三江去浩蕩。一舸任嘔啞。賣藥村村市。炊粳處處家。相逢喜亡恙。不敢厭喧譁。

開爐

餘疾三分在。閑愁一點無。書能伴孫讀。身欲卻人扶。露日鴉鳴樂。清霜草臺枯。南山送僧炭。隨事且開爐。

散懷

東行西行一日過。深酌淺酌萬事休。亦知衣食將不繼。老甚安能懷百憂。

又

中年絕慾不復念。今日肉食夫何難。天公賦與本來薄。一概掃空力少安。

卷第八十五

子虞當以十月離滬上喜而有作

十月霜侵客子衣。帆計已發淮淝。山林獨往我何敢。州縣徒勞兒未非。傳舍方寒索調謔。里門終日待來歸。解裝且共燈前語。萬事真當付一欸。

病來

抱病雖可驗，應接每安徐。正使須彈塞，寧當快掃除。寡言防禍始，省事養災餘。一飽吾何欠，香粳薦美蔬。

舟中晨起

天宇清寒病體輕，煙波聊復事宵征。艣橫舟尾霜如抹，犬走籬根葉有聲。蕭尹威名空赫赫，班侯智略本平平。不如歸結迎神社，長笛圍韃送此生。

江村

江村連夜有飛霜，柿正丹時橘半黃。轉枕卻尋驚斷夢，檢爐偶見蕪殘香。醫無絕藝空三易，死與浮生已兩忘。拈得一書還嬾看，臥聽孫子誦琅琅。

兀兀

兀兀心非睡，惺惺口不言。齒津生頰舌，鼻息撼牆垣。書婢兒童間，年叨里巷尊。貧家有喜事，黍酒帶醅渾。

道懷

織罷化吾梭，棋終爛汝柯。藥靈刀七足，語妙立談多。檀浦吹橫笛，桐江買短蓑。白鷗真可友，萬里渺煙波。

柯山道上作

道路如繩直，郊園似砥平。山爲翠螺踊，橋作彩虹明。午酌金丸橘，晨炊玉粒粳。江村好時節，及我疾初平。

病後自詠

狂豪掃去得衰殘，數掇勞醪與亦閑。閉戶交朋疎索盡，捐書日月破除難。盤除鮮食生蔬美，衣鑿吟肩束

帶寬賴有一條差自慰。高眠常到日三竿。

十月九日

酒開甕面撲人香。菊折霜餘滿把黃。我是化工君信否。放遲一月作重陽。

三三孫十月九日生日翁翁爲賦詩爲壽

正過重陽一月時。龜堂驪喜抱孫枝。葉禰已足驚關吏。堆笏寧惟取世資。落筆千言猶細事。讀書萬卷要深期。汝翁豪傑非今士。不用擔簦更覓師。

江路

江路最初程。飄然兩屨輕。少留雲際宿。徐待月明行。雁起平沙影。泉輕斷岸聲。誰知遊剡興。不減上青城。

初冬

落葉紛紛十月時。今年霜比去年遲。山猿引子飲幽澗。野鶴結巢爭墮枝。嶺北片雲生峭絕。橋東殘水漾淪漪。病衰自怪詩情盡。造物撩人乃爾奇。

又

落葉窗前已作堆。地爐微火撥殘灰。夢中無祟敗蔬園。飯後有歌誇芋魁。長長清笳催日晚。蕭蕭新雁帶寒來。更寬十日可閑出。會挈一壺尋早梅。

夜坐

餅餌支遙夜。薪蒸禦早寒。臥聞風浩蕩。起視寸闌干。雞怯飛霜重。鴉驚出月殘。挑燈搔短髮。顧影發吾歎。

又

藥裏關心處。篝燈照影時。文書用遮眼。粟粟可無飢。素業存農圃。顏齡迫耄期。宦官萬事已。准負國恩私。

殘菊

殘菊一枝香未殘。夜窗拈起百回看。過時只恐難相笑。我是三朝舊史官。

久病

臥疾關三時。冥冥不自持。婢諸曾製藥。犬識舊迎醫。質貸交親厭。呻吟里巷知。有時推枕起。清歡尙能奇。

病小愈喜晴

雲邊采藥喜身輕。燈下觀書覺眼明。擾擾已空浮世事。依依還作苦吟聲。又爲天地幾年客。頓覺軒窗三日晴。深媿山童憐寂寞。風爐傳法煮蕪菁。

租稅

占星起飯犢。待月出輸租。遇險頻呼侶。扶轆數戒奴。畏飢懷餅餌。愁雪備薪樗。意象今誰識。當年賦兩都。

初寒

雨霽林猶滴。泥新路易乾。蕭條山步晚。顛頓客衣單。小女收魚筍。童兒放鴨欄。初寒豈不好。衰病自無歡。

呻吟

呻吟半歲掩柴扉。性命惟存氣力微。夙業豈能逃馬麥。窮居賴是慣牛衣。濁清且復分賢聖。今昨誰能論是非。一段光明君記取。要知無念是真歸。

山墅

煙水煙林老結廬。人間用短更誰如。輕蒲穩背供危坐。小幟障燈便細書。莫欺衰病歸山墅。曾領諸儒上石渠。貞觀開元嗟已遠。爲君試說紹興初。

十月二十四日夜夢中送廬山道人歸山

平生不到三公府。晚歲歸來五老菴。夙土極知成殿後。吾曹所賴作司南。孤舟夜泊灘聲惡。小瓮晨香筆意酣。笑語林隅拄杖子。卽今惟汝是同參。

病後晨興食粥戲書

蝴蝶莊周安在哉。達人聊借作嘲談。不知自此隨緣住。更把晨窗粥盞盃。

贈僧

松間數語淡交成。不喜將身世上行。安得北窗風雪夜。地爐相對煮蕪菁。

又

長明燈下三更雨。且過寮前萬里身。止使未能超佛祖。也應小勝市朝人。

遊山

一生萬里著行踪。抖擻塵埃尚未能。不怕語音時帶劍。敢辭生計略如僧。疎梅漸動清溪曲。霽雪遙看古塔層。喚起故年清絕夢。數聲柔櫓下巴陵。

又

蕭然破帽伴枯藤。逢著青山不厭憎。家似江淮歸業戶。身如湖嶺罷參僧。煨柴夜宿寒爐火。洗甌晨敲古澗冰。果向此中能得趣。官途捷徑不須曾。

又

九十衰翁心尚孩。幅巾隨處一悠哉。偶扶拄杖登山去。卻喚孤舟過渡來。酒市擁途觀鬼戲。僧廬借榻寄吟臺。吾生清絕煩君看。不枉人間夢一回。

農圃歌

我不如老農。占地畝一鍾。東作雖有時。力耕在茲冬。張燈觀夜織。高枕聽晨舂。時喚鄰里。旨蓄亦可供。我不如老圃。父子日相從。一鋤萬事足。不求定遠封。春泥剪綠韭。秋雨畦青稞。放筍有餘味。豈不烹噉嚼。乃者半年病。清鏡滿衰容。塵生一鞞履。壁倚一枝筇。惟有呻吟聲。和合牀下蛩。青燈照兀兀。布衲聊自縫。

贈拄杖

歷險橫空捷有神。得來元自剡溪濱。同爲萬里江湖客。共見三生風月身。不怕雲中伴鳧鳥。只愁雨後長龍鱗。何妨更悟無生理。露柱燈籠一話新。

贈貓

執鼠無功元不効。一簞魚飯以時來。看君終日常安臥。何事紛紛去又回。

宮詞

秋露蕭蕭洗秋月。夢斷陳宮白銀闕。臨春結綺底處所。回首已成狐兔穴。

病中雜詠十首各四韻第八首二韻

半年不讀書。顧影疑非我。乃知百年中。如此過亦可。書能作汝祟。識字果非福。明年倘未死。樂哉駕黃犢。

又

伐性無蛾眉。腐腸無旨酒。齋居亦得疾。果無第一手。才不如嵇康。疎嬾則過之。雖有絕交書。不作幽憤詩。

又

華陀囊書久已焚。思邈玉函祕不聞。從醫火攻固下策。遣化飯香方普熏。觸人正自坐懸直。學道今當輸拙勤。勿言將智耄已及。後死或可與斯文。

又

擊壤林間送此生。欣欣東作到西成。泥深宿麥苗初長。葉落柔桑眼已生。枹鼓無聲盜衰息。文書簡出吏清平。西遊攜得蹲鴟種。且共山家玉糝羹。

又

身是人間一老樵。城南煙水寄逍遙。尋人偶到金家曠。取米時經杜浦橋。小市狐村雞喔喔。斷山幽谷雨蕭蕭。吾曹自養無能爾。楚客應無隱可招。

又

身似頭陀不出家。杜陵歸老有桑麻。茶煎小鼎初翻浪。燈映寒窗自結花。殘藥漸離愁境界。亂書重理淡生涯。等閑一事遠超俗。斷紙題詩字亂斜。

又
天遠不可問，將如此老何。老驚詩思退，貧欠藥錢多。刻縣尋僧宿，桐江買酒歌。市橋新柳色，又是一年過。

又
半黃半綠柳滿城，欲開未開梅有情。放翁一病又百日，回視新春如隔生。

又
久病身猶困，閑遊性已成。未停湯熨事，卽理水雲程。投宿忘街陌，論交失姓名。醉憐花塢好，恐是牡丹坪。

又
自我居湖曲，漁樵日往來。只知年屢改，不覺老相催。小浦潮痕長，長隄草色回。逢春心自在，莫道已成灰。

雪

一夕山陰道，真成白玉京。衰殘失壯觀，擁被聽窗聲。

自笑

左車第二牙辭去，見韓文公詩。團坐無生活，又新堪笑。按摩并洗沐，未忘貪愛夢中身。臘月五日，溪沐按
摩機半日，最早。左車第二牙脫去。

絕句

山遮水隔重重塚，雨練風柔處處花。一病半年能不死，又將此恨醉天涯。

題藥囊

陸放翁集 二十二 劍南詩藁 卷八十五

殘暑纔屬爾，新春還及茲。眞當名百藥，何止謁三醫。半夜瞰朝日，晨興飲上池。金丹有門戶，草木爾何知。

未題

平日尤閑老更閑，一毫世事豈相關。孤雲不散來歸岫，細水無聲自出山。支徑過僧纔百步，小樓藏藥可三間。客來不肯通名姓，熟視吾廬爲破顏。

又

一身只付雞棲上，萬卷眞藏椰子中。嘉定三年正月後，不知幾度醉春風。

病中示兒輩

去去生方遠，冥冥死卽休。狂思攘鬼手，危至服丹頭。有劍知誰與，無香可得留。惟應勤學謹，事事鑑恬侯。

夢中行荷花萬頃中

天風無際路茫茫，老作月王風露郎。只把千尊爲月榭，爲嫌銅臭雜花香。

示兒

死去元知萬事空，但悲不見九州同。王師北定中原日，家祭無忘告乃翁。

陸放翁集

放翁逸稿目錄

卷上

賦七首

禹廟賦

紅梳子華賦

焚香賦

思故山賦

記二首

闕古泉記

辭五首

水龍吟

月照梨花

如夢令

卷下

虎節門觀雨賦

豐城劍賦

自閔賦

南園記

夜遊宮

又

律詩四十三首

成材將還盱江幕以詩四章爲脫次韻其二以識別歲在改元孟夏二十有三日書于臥龍方丈之西壁二首 送李舍人赴闕 寄鄧志宏五首 大溪灘折柁二首 羅山平雲閣 中閣 沖虛宮 羅浮山 寶積寺 祈雨二首 秋日山居四首 戲作三首 余邦英惠小山新芽作小詩以謝三首 寄彥成 榮歸 翠微堂 閑居七首 夜坐 新秋晚歸 懷王美 感事 客舍對梅 春日

續添

古詩六首

閩婆餅焦 種桑 夜聞鷓聲 離家示妻子 黃山塔 送三兄赴秦邸

律詩十四首

閩角 寄楊濟伯 幽事 葺圃 幽事 北極 贈徐相師 寄姜梅山雷字詩 採菊 吳娃曲四首 過江至蕭山縣驛東軒海棠已謝

陸放翁集

放翁逸藁

卷上

禹廟賦

世傳禹治水得玄女之符。予從鄉人以暮春祭禹廟。裴回于庭。思禹之功。而歎世之安。稽首作賦。其辭曰。嗚呼。在昔鴻水之爲害也。浮乾端。浸坤軸。裂水石。卷草木。方洋徐行。瀾漫平陸。浩浩蕩蕩。奔放洄洑。生者寄丘阜。死者葬魚腹。蛇龍驕橫。鬼神夜哭。其來也。組練百萬。鐵壁千仞。日月無色。山嶽俱震。大堤堅防。攻斃立盡。方舟利楫。辟易莫進。勢極而折。千里一瞬。莽乎蒼蒼。繼以饑饉。於是舜謀于庭。堯咨于朝。寤羲和。憂臯陶。伯夷莫施于典禮。后夔何假乎驚詔。禹于是時。惶然孤臣。耳目手足。亦均乎人。張天維于已絕。極救命于將湮。九土以奠。百谷以陳。阡陌鱗鱗。原隰畇畇。仰事俯育。熙熙終身。凡人之類。至于今。不泯者。禹之勤也。孟子曰。禹之行水也。行其所無事也。天以水之橫流。浩莫之止。而聽其自行。則冒沒之害。不可治已。于傳有之。禹手胼而足胝。官卑而食菲。娶塗山而遂去。腎不暇視。其呱泣之子。則其勤勞亦至矣。然則孟子謂之行其所無事。何也。曰。世以己治水。而禹以水治水也。以己治水者。己與水交戰。決東而西。溢堤南而北。圯治于此。而彼敗。紛萬緒之俱起。則溝澮可以殺人。濤瀾作于平地。此鯀之所以殛死也。以水治水者。內不見己。外不見水。惟理之視。避其怒。導其駛。引之爲江。爲河。爲濟。爲淮。匯之爲潭。爲淵。爲沼。爲沚。

蓋滄子性之所安而行乎勢之不得已。方其懷山襄陵。駕空滔天。而吾以見其有安行地中之理矣。雖然。豈惟水哉。禹之服三苗。蓋有得乎此矣。使禹有勝苗之心。則苗亦悖然有不服之意。流血漂杵。方自此始。其能格之于羽之間。談笑之際耶。夫人之喜怒哀樂。始生而具。治水而不憂。伐苗而不怒。此禹之所以爲禹也。禹不可得而見之矣。惟澹然忘我。超然爲物者。其殆庶乎。

虎節門觀雨賦

南方旣秋兮暑弗歸。老火干時兮秋金微。赫赫炎炎兮炮烙之威。赤雲如山兮其高巍。魏陽鳥三足矣。中天流輝。吳牛喘臥兮海鳥勸飛。水泉枯竭兮桔槔息機。禾欲茂而槁死兮婦泣而子歎。曾纖絺之不御兮。如被裘衣。吾一夕而三起兮。汗如寫其屢揮。昏然投牀兮。飲饑蚊之方飢。倏清風之颯來兮。視庭日其蒼蒼。乃命吾駕兮。登古城以徜徉。雲與東山兮。灩漫入荒。披吾襟而脫吾帽兮。受萬里之涼。雨勢飄忽兮。其陣堂堂。甚銳且整兮。遇者辟易而莫當。翻江倒海兮。沃除驕陽。天地晦冥兮。日月翳光。如天戰之初酣兮。壯士顏行。飛白羽之箭兮。攢綠沉之槍。旣散復合兮。奇正靡常。乘高督戰兮。吾氣甚揚。俄霧霈之霽止兮。煙斂雲藏。海山呈嫵兮。天水蒼茫。泉流泱泱兮。塵清土香。草木蘇醒兮。興起仆僵。晨夫起舞兮。歲以大穰。九衢行歌兮。厥聲洋洋。又如旣勝兮。底定一方。氛翳廓清兮。寇戎披攘。岡巒靡迤兮。亭障驚翔。奏凱而歸兮。竹帛焯焯。嗟夫。世有絕景。然後發馳騁怪偉之辭。士有奇志。然後悟超絕詭特之觀。昔人文章之妙兮。固與造化者同。夫一端風霆之奔聖兮。震薄九關。追寫以筆墨兮。固知其難。彼黃塵赤日兮。車馬衣冠。得斯賦而讀之兮。亦足以發胸中之高塞也。

紅梔子華賦

余讀五嶽之書。始知蜀之青城。歲癸巳之仲冬。天界予以此行。極山中之奇觀。乃稅駕乎雲扃。挹瀑泉之甘寒。味芝朮之芳馨。濯肺腑之塵土。凜毛骨其淒清。乃步空翠之間。而聽風松之聲。觀一童子衿佩青青。手持異華。六出其英。以爲薜蘿。則色丹。蓋莫得而強名。方就視而愛歎。已絕馳而莫及。忽矯首而清獻。猶舉袂而長揖。援脩蔓而上騰。攀峭壁而遽入。數變滅于轉盼。久儻恍而佇立。有老道士笑而語予。人皆可以得道。求諸已而有餘。顧捨是而外慕。宜見欺于爰且。嗟予好學而未道。有書而無師。誰隨遠于聲利。實未免夫喜奇。請書先生之言。用爲終身之規。

豐城劍賦過豐城縣作

在晉太康。觀星者曰。夕有異氣。見于牛斗之躔。時方伐吳。或曰。吳未可平。彼方得天。獨張華之博識。排是說之不然。迨孫皓之啣璧。氣益著而不驚。于是雷煥附華之說。曰。是寶劍之精。維太阿與龍泉。卒之斷礎于豐城之獄。變化于延平之川。世皆以爲是矣。千載之後。有陸子者。喟其永歎。夫占天知人。本以考驗治忽。卜運命之促延。彼區區之二劍。曾何與于上玄。若吳亡而氣猶見。其應晉之南遷。有識已悲宗廟之丘墟。與河洛之腥羶矣。華不此之是懼。方飾智而怙權。鳴摩負重名。位大吏。俛仰羣枉之間。禍敗不可以旋踵。而顧自謂優游以窮年。夫九鼎不能保東周之存。則二劍豈能救西晉之顛乎。使華開大公。進衆賢。徙南風于長門。投賈誼于羽淵。則身名可以俱泰。家國可以兩全。彼三尺者。尙何足捐乎。煥豈非所責。予將酌卮酒。賦此以弔吾茂先也。

焚香賦

陸子起玉局。收新定。至郡彌年。困于簿領。意不自得。又適病青。厭喧嘩。事幽屏。卻文移。謝造請。閉閣垂帷。自故于宴寂之境。時則有二口之几。兩耳之鼎。爇明窗之寶炷。消畫漏之方永。其始也。灰厚火深。燼雖未形。而香已發聞矣。其少進也。縣縣如鼻端之息。其上達也。飄飄如山穴之雲。新鼻觀之異境。散天葩之奇芬。旣卷舒而縹緲。復聚散而輪囷。傍琴書而變滅。留巾袂之氤氳。參佛龕之夜供。異朝衣之晨熏。余方將上疏挂冠。誅茅築室。從山林之故友。娛菴蓋之餘日。暴丹荔之衣。莊芳蘭之苗。徙秋菊之英。捨古柏之實。納之玉兔之臼。和以檜華之蜜。捲紙帳而高枕。杜荆扉而簡出。方與香而爲友。皮世谷其奚。血潔我靈。傷散我籤帙。非獨洗京洛之風塵。亦以慰江漢之衰疾也。

自閔賦

余有志於古兮。聘自壯歲。慕殺身以成仁兮。如自力於弘毅。視闔室其猶康莊兮。禎昭昭之可畏。敢以不贊之身兮。差冒沒于富貴。嗟止不自推兮。草奮如葷。余旁晚而竊怪兮。抵掌戲歎。吐狂喙之三尺兮。論極涇渭。徒戒齋而潔芳兮。蹈道則未。念國中孰知我兮。去而遠遊。窮三江而浮七澤兮。莫維余舟。赤甲崇嶺兮。白鹽會會。東屯之下兮。清泉美疇。是可以置家兮。予卽而謀。忽馳騁而北首兮。道阻且悠。宕渠葭萌兮。石摧車軌。雲棧劍閣兮。險名九州。遂戍散關兮。北防盛秋。登高以望兮。慷慨涕流。畫策不見用兮。寧鐘釜之是求。歸過蜀而少休兮。卜城南之丘。築室鑿井兮。六年之留。或挽而出兮。遺以百愛。奚觸而忿兮。起爲寇讎。惟節士以見疑兮。趨以卽死。豈摧辱之不置兮。尙馳騫而弗止。彼賤丈夫之希世兮。頑鈍亡恥。雖鉗

于市其猶安受兮。何有于詆訾。毀吾車兮殿門。逝□老子故里。

思故山賦

陸子爲嚴州逾年。困于吏役。悒然不樂。日有秦稽之思。乃作思故山賦。其詞曰。仲秋之杪。木葉既落。殘暑告歸。霖雨未作。川原奇麗。天宇澄廓。風蕭蕭而未厲。日暉暉而淺薄。陸子于是被白葛之單衣。躡青芸之雙屨。抱嶧陽之寶琴。引華亭之鷓鴣。出衡茆。度路約。榜一葉之輕舟。凌浮天之。大壑。白鷺下落。文魚出躍。荷蓋摧柄。竹枝隕籜。松鬢翳以藏寺。柳疎疎而帶郭。行欲盡而更賒。望若邇而逾逸。俄而披煙霞。觀嶽粵。千峯峩嶢。萬嶂聯絡。或聳起而鳥騫。或怒奮而獸搏。或離容而暇豫。或峭厲而刻削。或方行而巖立。或將前而復卻。連者如隄。斷者如笮。廣者如屋。銳者如梁。泄雲如靄。蓄雨如囊。或平如燕居之几。或壯如行軍之幟。或筋脈奇瘦。如夔魘之欸。見或竅穴穿空。如渾沌之初鑿。豈惟西壓青城。北揜紫閣。固已擅雄秀于三□。適□里之旁礪矣。□乃涉淺澗之淙澑。步蒼崖之犖确。擷幽巖之凋蘭。掇孤洲之芳若。歷市聚之雞犬。望塔廟之丹牒。耕壠參差。蔬畦交錯。則有野父樵童。迎揖而勞苦。道翁藥叟。一笑而相握。拂蓼牀以延坐。持黍酒而請酌。秬饋粟餌。牛醢雉臠。陳升果蔬。調羹醪酪。超世俗之澆偽。有太古之簡朴。或驚齒髮之衰殘。或喜精神之矍鑠。或護宿志之久負。或諛浮名之奚樂。嗟餘日之幾何。將舍此而焉託。予仰而歎。俛而作。楚祭而起。謝曰。僕所謂自用而愚。寡要而博。貌智而中。蠱類強而實弱者也。凡子言者。敢不敬諾。請謝曩昔之過。更堅後日之約。可乎。今子年過六十。血氣已索。春憂重腿。秋長痺。瘡飲不離。飢食不加。勺衣食之奉。減于市藥。雖富貴而執享。矧刑禍之可愕。冒平地之濤瀾。忽闖首之蛟。

鶴以吾真之至貴。就華纓而自縛。旌搖搖而靡定。舟泛泛而安泊。逝將歸而卽汝。尙農圃之可學。指白日以爲盟。挽天河以自濯。冀晨春之相開。亦社酒之共釀。春原出而耦耕。秋場築而借穫。僕之念歸。如寒魚之欲就箔也。若曰金棄于躍治。足別于獻璞。退居之言。因而後醉。識謝獨見。機昧先覺。則敢不斂衽正容。以拜父老之罰爵。

閱古泉記

太師平原王韓公府之西。緣山而上。五步一磴。十步一壑。崖如伏龍。徑如驚蛇。大石礪礪。或如地踊以立。或如翔空而下。或駟如將奮。或森如欲搏。名葩碩果。更出互見。壽藤怪蔓。羅絡蒙密。地多桂竹。秋而華敷。夏而籀解。至者應接不暇。及左顧而右盼。則呀然而江橫陳。豁然而湖自獻。天造地設。非人力所能爲者。其尤勝絕之地曰閱古泉。在溜玉亭之西。繚以翠麓。覆以美蔭。又以其東向。故浴海之日。旣望之。月泉輒先得之。袤三尺。深不知其幾也。霖雨不溢。久旱不涸。其甘飴蜜。其寒冰雪。其泓止明靜。可鑿毛髮。雖游塵墮葉。常若有神物呵護。屏除者。朝暮雨暘。無時不鏡如也。泉上有小亭。亭中置瓢。可飲可濯。尤於烹茗。釀酒爲宜。他石泉皆莫逮。公常與客偕伴泉上。酌以飲客。游年最老。獨盡一瓢。公顧而喜曰。君爲我記此泉。便後知吾輩之游。亦一勝也。游按泉之壁。有唐開成五年。道士諸葛鑑。元八分書題名。蓋此泉湮伏弗耀者。幾四百年。公乃復發之。時閱古蓋先忠獻王以名堂者。則泉可謂榮矣。游起於告老之後。視道士爲有愧。其視泉尤有愧也。幸且暮得復歸故山。幅巾短褐。從公一酌。此泉而行。尙能賦仁。嘉泰三年四月乙巳。山陰陸游記。

南園記

慶元三年二月丙午。慈福有旨。以別園賜今少師平原郡王韓公。其地實武林之東麓。而西湖之水匯于其下。天造地設。極山湖之美。公既受命。乃以祿入之餘。嘗爲南園。因其自然。輔以雅趣。方公之始至也。前瞻卻視。左顧右盼。而規模定。因高就下。通壑去蔽。而物象列。奇葩美木。爭效于前。清流秀石。若顧若揖。於是飛觀傑閣。虛堂廣廳。上足以陳俎豆。下足以奏金石者。莫不畢備。高明顯敞。如蛻塵垢。而入窈窕。邃深疑于無窮。既成。悉取先得魏忠獻王之詩句。而名之。堂最大者曰許閒。上爲親御翰墨。以榜其顏。其射廳曰和容。其臺曰寒碧。其門曰藏春。其關曰凌風。其積石爲山。曰西湖洞天。其瀦水藝稻。爲園爲場。爲牧羊牛畜雁鷺之地。曰歸耕之莊。其它因其實而命之名。則曰夾芳。曰豁望。曰鮮霞。曰矜春。曰歲寒。曰忘機。曰照香。曰堆錦。曰清芬。曰紅香亭之名。則曰遠塵。曰幽翠。曰多稼。自紹興以來。王公將相之園林相望。莫能及南園之髣髴者。公之志。豈在於登臨游觀之美哉。始曰許閒。終曰歸耕。是公之志也。公之爲此名。皆取於忠獻王之詩。則公之志。忠獻之志也。與忠獻同時功名富貴。略相埒者。豈無其人。今百四五十年。其後往往寂寥。無聞韓氏子孫。功足以銘彝鼎。被絃歌者。獨相踵也。逮至于公。勤勞王家。勤在社稷。復如忠獻之盛。而又謙恭抑畏。拳拳志忠獻之志。不忘如此。公之子孫。又將嗣公之志。而不敢忘。則韓氏之昌。將與宋無極。雖周之齊魯。尙何加哉。或曰。上方倚公如濟大川之舟。公雖欲遂其志。其可得哉。是不然。知上之倚公。而不知公之自處。知公之勳業。而不知公之志。此南園之所以不可無述。游老病謝事。居山陰澤中。公以手書來曰。子爲我作南園記。游竊伏思公之門才。築新葺也。而顧以屬游者。豈謂其愚且老。又已挂

衣冠而去。則庶幾其無諛辭。無侈言。而足以道公之志歟。此游所以承公之命而不獲辭也。中大夫直華文閣致仕賜紫金魚袋陸游謹記。

水龍吟

摩訶池上追遊客。紅綠參差春晚。韶光妍媚。海棠如醉。桃花欲煖。挑菜初開。禁煙將近。一城絲管。看金鞍爭道。香車飛蓋。爭先占新亭館。惆悵年華暗換。黯銷魂。雨收雲散。鏡奩掩月。斂梁拆鳳。秦箏斜雁。身在天涯。亂山孤壘。危樓飛觀。春來只有楊花和恨。向東風滿。

夜遊宮 宴席

宴罷珠簾半卷。畫簷外。蠟香人散。翠霧霏霏。漏聲斷。倚香肩。看中庭。花影亂。苑是高堂館。寶奩炷。麝煙初煖。璧月何妨。夜夜滿。擁芳柔。恨今年。寒尙淺。

月照梨花 閨思

霧景風軟。煙江春漲。小閣無人。繡簾半上。花外姊妹相呼。約樽蒲。修蛾忘了。章臺樣。細思一餉。感事添惆悵。胸酥臂玉消減。擬覓雙魚。倩傳書。

又 閨思

悶已禁損。那堪多病。幾曲屏山。伴人晝靜。梁燕做起猶慵。換熏籠。新愁舊恨。何時盡。漸凋綠鬢。小雨知花信。芳牋寄與。何處繡閣珠櫺。柳陰中。

如夢令 閨思

獨倚博山峰小，翠霧滿身飛繞。只恐學行雲，去作陽臺春曉。春曉，春曉，滿院綠楊芳草。

渭南文集皆放翁未病時手自編輯者，其不入韓侂胄園記亦董狐筆也。予已梓行久矣，牧齋師復出賦七篇相示，皆集中所未載。又云閱古南園口記，雖見疵于先輩文實可傳，其飲青衣泉獨盡一瓢，且曰視道士有媿，視泉尤有媿，已面唾侂胄，至于南園之亂，惟勉以忠獻事業，無諛詞，無侈言，放翁未嘗爲韓辱也。因合鑄之，併載詩餘幾闕，以補渭南之遺云。湖南毛晉識。

卷下

成材將遠，盱江幕以詩四章爲脫次韻，其二以識別歲在改元孟夏二十有三日書于臥龍方丈之西壁。

漂泊干戈到粵山，不妨還正七雲冠。乾坤策內窺真象，龍虎爐中養舊丹。靜愛白雲歸遠岫，時邀明月下層巒。此身已作長閑計，祇願朝廷四海安。

又

文場妙譽古推高，卜仕尤從州縣勞。野鶴未應羣雁鷺，幽蘭終不敵蓬蒿。歲寒挺節無霜霰，海運搏風有羽毛。好去江南吐奇策，從來功業屬吾曹。

送李舍人赴闕

執簡曾聞侍玉螭，謫仙才調盡推奇。能將苦語康時病，更遣丹誠動主思。北闕親朋瞻舊德，東吳山水入

新詩。知公自有經綸術。會見飛翔集鳳池。

寄鄧志宏五首

三徑從來半草萊。席門那爲故人開。自慚不是梧桐樹。安得朝陽鳴鳳來。

又

彭澤思歸意未成。折腰五斗謾勞生。何如張翰秋風起。便憶鱸魚蓴菜羹。

又

厭從薄宦思蓬幕。思見故人映玉山。須信人生貴適志。相逢樽酒且開顏。

又

筆下文章信有神。西來避地不無因。要看銀漢從天落。一洗人間萬古塵。

又

中原回首涕沾裳。誰是當時柱石強。會喚謫仙天上去。扶將日轂出扶桑。

大溪灘折柁舟行至大溪而折柁中流危甚舟人皆懼作笑謂德夫兄曰吾輩豈當死于此耶已

而幸獲濟處因成二絕

溪流亂石似牛毛。雨過狂瀾勢轉豪。寄語河公莫作戲。從來忠信任風濤。

又

葦江初漲浪翻狂。一葉輕舟泛渺茫。我愧人非跛男子。安能與世作津梁。

羅山平雲閣

上方高閣與雲齊，
臘屐穿雲步步躋。
卻恐此身生羽翼，
不從平地作塔梯。
九門路接青霄近，
四望山連碧海低。
徒倚闌干重回首，
疎林煙暝野猿啼。

中閣

萬仞仙山插太空，
山腰依約見蓮宮。
人寰隔絕無人到，
洞府深沉有路通。
石隙生雲埋柱礎，
海光浮日映簾櫳。
野僧罷憑闌久，
千里秋毫入望中。

沖虛宮

林館松門白晝扁，
參鸞人去已千齡。
基存舊宅樓臺古，
地有遺丹草木靈。
滿洞曉雲春釀雨，
一池秋水夜涵星。
麻姑仙取今何在，
檻外孤峯晚更青。

羅浮山

十里山光翠障開，
重遊何事徘徊。
石樓自向雲中見，
仙島誰知海上來。
丹竈尙能含日月，
龍潭還解起風雷。
天涯爲郡空華髮，
十二年閒到兩迴。

寶積寺

偶來遊古寺，
景逐眼前生。
巖上高僧坐，
林間野客行。
望窮滄海遠，
吟久暮雲平。
此境真難到，
登臨暫適情。

祈雨

折腰爲米顏常覩，
負耒躬耕意自甘。
積谷千牛多骨相，
年年禱雨到雲菴。

又

至德無私不我欺。精新未効莫輕疑。但令葵蕘勤傾向。會有風雲感會時。

秋日山居

晏起

年年睡債苦相關。好夢長隨苦角殘。作意歸來償宿負。透牕遮莫已三竿。

野步

漠漠秋園暮景孤。綸巾羽服從奚奴。風流畫手無摩詰。寫作龍山野步圖。

午枕

茗椀兵休戒老兵。客來剝啄急須應。爲言余正理公事。半落烏紗枕曲肱。

夜坐

老懶開編早欠伸。強搔短髮照青燐。二十年前夢。尙想長郎撼夜鈴。

戲作

颯颯松韻生魚眼。洶洶雲濤湧兔毫。促膝細論同此味。絕勝痛飲讀離騷。

又

束書舊隱棋巖下。慣碾春風傲北牕。喚起口生塵土夢。賴君圭璧一雙雙。

又

建苑誇豪如貴冑，棋巖晦迹類羅仙。倘憑閱闕定人物，耕野釣溪難自賢。

余邦英惠小山新芽作小詩三首以謝

家園破社得鷹爪，舌本初參便到口。忽喜雲腴來建苑，坐令渴肺生華滋。

又

正焙如觀詩大雅，小山當似變風論。脫今風格不類古，終有先王禮義存。

又

平時共語不成些，癡坐空彫藜莧腸。誰遣春風入牙頰，詩成忽帶小山香。

寄彥成

交舊天涯曉宿稀，年來獨子付心期。滿牀文史對談處，萬里風霜並鬱時。雨滴空墻憐夜榻，吟牽芳草夢春池。合沙橋下東流水，雙鯉何時上釣絲。

榮歸

車馬填門撥不開，吾宗得雋凱歌回。折將蟾苑一枝桂，泛入萱堂百歲杯。雅望素欽山竦岳，芳名中占斗中魁。先登賴子光邦族，繼踵行看袞袞來。

翠微堂

萬頃青山只一溪，此中聊欲效真栖。尋深巧被閑雲到，破靜時聞幽鳥啼。羞有卑功追管晏，慚無高節比夷齊。困眠飢食真吾事，寶篆香殘日又西。

閑居

小隱輕華屋。深山自結茅。亂苔侵石磴。疎竹映花梢。泉瀨含清韻。風來慰淡交。閉門燒柏子。好把道書抄。

又

溪澗桃源路。門連小華峯。虹霓橫水檻。羽蓋偃巖松。日月詩魂迴。煙霞道氣濃。欲尋鍾呂去。世外說從容。

又

厨給胡麻粒。山供鹿脯盤。掃門遲客至。入郭借書看。種竹添風韻。留松老歲寒。一生無別事。雞犬戀劉安。

又

自得窮通樂。而無寵辱驚。豁光聊混俗。去知默陶情。毛竹蒼龍瘦。雲衣白鶴輕。時敲朝斗磬。林外玉聲清。

又

野水明牕几。通渠遶屋流。鷺衝煙織素。魚避月沉鉤。草闊蚊蚋市。林昏蝙蝠秋。開懷覺清曠。萬象入冥搜。

又

生計淡無味。終焉樂有餘。灌畦親抱甕。種秫學拈鋤。擇木翔歸鳥。臨澗聚戲魚。地偏心更遠。靖節愛吾廬。

又

剪葉霜風勁。關門謝遠遊。深村梅映雪。前浦水明樓。蜜熟蜂衙放。犢殘蟻陣收。地爐無獸炭。衣背補衣裘。

夜坐

懷抱何蕭爽。涼風掃鬱蒸。寒蛩喧敗草。飢鼠嚼枯藤。蝶入誰家夢。花殘半夜燈。無人論道德。長嘯愧孫登。

新秋晚歸

玉粒嘗新稻。金風作好秋。馮回沙漠信。蟠噪夕陽愁。立久雲生岫。歸遲月滿樓。吟余露華冷。砧杵起江頭。

懷王美

理髮侵霜白。醜顏借酒紅。故人千里別。何日一樽同。魂夢徒勞蝶。音書不見鴻。抱琴雖有意。無語倚西風。

感事

今古成何事。興亡迹已陳。干時無上策。避世且全真。就日思朋主。看雲憶老親。到頭垂白早。徑醉曲生春。

客舍對梅

野迥林寒一水傍。密如疎蕊正商量。半霜半雪相仍白。無蝶無蜂自在香。月過曉牕移影瘦。風傳殘角引聲長。還憐客路龍山下。未折一枝先斷腸。

春日

平生過眼萬芳菲。晚景收心與世違。枯槁形骸元自瘦。膏腴田土爲誰肥。

據放翁子子虞跋云。先君編前藁于舊詩多所去取。其遺存者尙七卷。別名遺藁。惜今不傳。余刻劍

南詩藁成。復從牧齋師案頭見續藁二册。又得未刻律詩八句者二十三首。四句者二十首。但春日

一章。雖編入斷句。而語意未了。疑亦八句。而缺其後。遂詮次作逸藁下卷。聊補劍南之遺云。湖南毛

晉識。

續添

聞婆餅焦

黃泥嶺。松森森。幽鳥穿枝時一吟。汝聲一何森。汝語惻我心。連邨麥熟餅餌香。我母九泉那得嘗。

種桑

孔明百畝桑。景略十具牛。豈無子孫念。飽暖自可休。種桑吾廬西。微徑出南陌。三月葉暗園。四月椹可摘。戴勝枝上鳴。倉庚葉間飛。飛鳴各自□。人生□不歸。歸家力農桑。慎莫愁貧賤。婚嫁就比鄰。死生長相見。

夜聞櫓聲

啜啜雙櫓聲。淒切遊子情。豈無一杯酒。孤舟誰與傾。清愁不可耐。霜月照潮平。

離家示妻子

明日當北征。竟夕起復眠。悲蟲號我傍。青燈照我前。婦憂衣裳薄。紉線重敷綿。兒爲檢藥籠。桂薑手炮煎。墩墩默可數。一念已酸然。使憂能傷人。我得復長年。同生天壤間。人誰無一廬。傷哉獨何辜。遑遑長可憐。破屋不得住。風雨走道邊。呼天得聞否。賦與何其偏。

黃山塔

風吹旗脚西南開。掛帆鼙鼓何快哉。轉頭已失望如石。黃山孤塔迎人來。黃山勸汝一杯酒。送往迎來殊耐久。明年我作故鄉歸。還對黃山一搔首。

送三兄赴秦邸

兄年十七弟始生。弟今白髮森千莖。所期相就畢此世。一尊濁酒得共傾。往年雖窮猶半菽。兩年糠覈苦不足。書生志欲及天下。貧賤不得收骨肉。過悲復恐兄意傷。忍涕不覺涕已滂。早朝霜露成衣薄。願書此語歡或忘。閉門病衰百無用。日里已書了字樣已忘此目之別耳。莫寺異時思少游。

開角

小閣柴門近。黃昏畫角聲。時時逐風散。嫋嫋伴愁生。天地清秋暮。關河歲月明。湖南賊未破。獨立久含情。

寄楊濟伯

聞道皇華使。來從萬里回。五溪春薺老。三峽暮猿哀。昔日文昌省。頻年滙潁堆。問君何地險。斟酌寄聲來。

幽事

日日營幽事。時時有好懷。雨園殘竹粉。風砌落花斂。伴蝶行苔徑。聽蛙傍水涯。窮通了無謂。不必更安排。

葺圃

種樹書頻讀。齊民術屢窺。曾求竹醉日。更問柳眠時。盧橘初非橘。蒲葵不是葵。因而辨名物。甘作老樊遲。

幽事

幽事春來早。晨興卽啓關。掃梁迎燕子。插棧護龍孫。數日招賓友。先期辦酒尊。淋漓衣袖溼。不管漬春痕。

北檻

北檻近中堂。綠堦物自芳。晨清花拱露。地僻藜侵廊。坐久時開卷。吟餘或炷香。終朝無客至。一枕到羲皇。

贈徐相師

許負遺書果是非。子憑何處說精微。使君豈必如柳大丞相。元來要瓠肥。袖闊日常籠短刺。肩寒春未換單衣。□頭布袋挑詩卷。也道遊京賣術歸。

寄姜梅山雷字詩

章臺官柳映宮槐。寶馬蹄輕不動埃。只怪好詩無與敵。誰知古學有從來。江山常逐客帆遠。歲月不禁衙鼓催。剩約東林投淨社。高情千載有宗雷。

采菊

秋花莫插鬢。雖好亦淒涼。采菊還揜卻。空餘滿袖香。

吳娃曲友有妾而內不容。戲爲作此。因得不去。

滿地花陰不閉門。琵琶抱恨立黃昏。妾身不似天邊月。此夜此時重見君。

又

忘憂石榴深淺紅。草花紅紫亦成叢。明年開時不望見。只望郎君不著儂。

又

二月鏡湖水拍天。禹王廟下鬪龍船。龍船年年相似好。人自今年異去年。

又

臂上燒香拜佛前。願郎安穩過新年。多情已是長多病。莫要留心在妾邊。

過江至蕭山縣驛東軒海棠已謝

星星兩鬢怯年華。幽館無人江月斜。惆悵過江留一夕。曉風吹盡海棠花。

先君刻逸叢後六十餘年。屢購得別本。渭南集五十二卷。其前後與家刻略同。祇少入蜀記六卷。而多詩八卷。細檢劍南集中。除其重複。又得未刻詩二十首。并續添於後云。汲古後人毛辰識。

跋

先君太史。晚自號曰放翁。紹興辛巳間。及事高宗皇帝。累遷樞密院編修官。孝宗皇帝嗣位之初。召對便殿。賜進士第。時始置編類。太上皇帝聖政所。妙柬時髦。先君首預其選。擢檢討官。久之。以忤貴倖自免去。五爲州別駕。西泝夔道。樂其風土。有終焉之志。蜀之名卿巨儒。皆傾心下之。爭共挽留。晁公子止侍郎欲捐其別墅以舍之。先君諾焉。而未之決也。嘗爲子虞等言。蜀風俗厚。古今類多名人。苟居之。後世子孫。宜有與者。宿留殆十載。戊戌春正月。孝宗念其久外。趣召東下。然心固未嘗一日忘蜀也。其形于歌詩。蓋可考矣。是以題其平生所爲詩卷曰劍南詩稿。以見其志焉。蓋不獨謂蜀道所賦詩也。後守新定。門人請以鏡梓。遂行于世。其戊申己酉後詩。先君自大蓬謝事歸山陰。故廬命子虞編次爲四十卷。復題其籤曰劍南詩續稿。而親加校定。朱黃塗攢。手澤存焉。自此至捐館舍。通前稿。凡爲詩八十五卷。子虞假守九江。刊之郡齋。遂名曰劍南詩稿。所以述先志也。其他雜文論著。季弟子遜亦已刊之深陽。會子虞上乞骸之請。且暮且去。故有所未暇。初先君在新定時。所編前稿。子舊詩多所去取。其所遺詩。存者尙七卷。念先君之遺之也。意或有在。且前稿行已久。不敢復雜之卷前。故別其名曰遺藁。云嘉定十三年十二月之望。男朝請大夫知江州軍州事。借紫子虞謹書。

孝宗一日御華文閣。問周益公曰。今代詩人。亦有如唐李太白者乎。益公以放翁對。由是人竟呼爲小太白。篇什富以萬計。今古無雙。或評如怒猊抉石。渴驥奔泉。或評如翠嶺明霞。碧溪初月。何足盡

其勝概耶。近來坊刻，寡陋不成帙。劉須溪本子亦十僅二三。甲子秋，得翁子虞編輯劍南詩稿，又吳
讓兩先生嚴訂。天者，真名祕本也。亟梓行之，以公同好。其命名次第，具載跋語云：湖南毛晉記。

南唐書序

天曆改元。余待罪中執法。監察御史王主敬謂余曰。公向在南臺。蓋嘗命郡士戚光纂輯金陵志。始訪得南唐書。其於文獻遺闕。大有所考證。裨助良多。且爲之音釋焉。因屬博士程執等。就加校訂。鈔板與諸史並行之。越明年。余得告還金陵。書適就。光來請序。按南唐本紀。李昇系出憲宗四世間。關阨。纔有江淮之地。僅餘三十年。卒不復振。而宋滅之。雖爲國褊小。觀其文物。當時諸國莫與之並。其賢才碩輔。固不逮蜀漢武侯。而張延翰。劉仁贍。潘佑。韓熙載。孫忌徐。鏞之徒。文武才業。忠節聲華。炳耀一時。有不可揜。矧其間政化得失。與衰治亂之跡。有可爲世鑒戒者。尤不可泯也。竊謂唐宋未契。丹雘盛。虎視中原。晉漢之君。以臣子事之。惟謹。顧乃獨拳拳於江淮小國。聘使不絕。嘗獻橐駝并羊馬千計。高麗亦歲貢方物。意者久服唐之恩信。尊唐餘風。以唐爲猶未亡也。邪。宋承五季周統。目爲僭僞。故其國亡。而史錄散佚。不彰。然則馬元康。胡恢等。迭有所述。今復罕見。至山陰陸游著成此書。最號有法。傳者亦寡。後世有能秉春秋直筆。究明綱目統緒之旨者。或有所考而辯之。姑識其端。以俟君子。余前忝史館。朝廷嘗議修宋遼金三史。而未暇。他日太史氏復申前議。必將有取於是書焉。集賢大學士奎章閣大學士光祿大夫知經筵事趙世延序。

陸放翁集

南唐書目錄

卷一

烈祖本紀

卷二

元宗本紀

卷三

後主本紀

卷四

宋齊丘列傳

卷五

周徐查邊列傳

卷六

周柴何王張馬游刁列傳

卷七

陸放翁集 二十三 南唐書目錄

徐高鍾常史沈三陳江毛列傳

卷八

三徐三王二朱胡申屠喬睦列傳

卷九

劉高盧陳李廖列傳

卷十

張李皇甫江歐列傳

卷十一

馮孫廖彭列傳

卷十二

孟陳韓朱列傳

卷十三

劉潘李嚴張龔列傳

卷十四

郭張林盧蒯二陳列傳

卷十五

周鄭李三劉江汪郭伍蕭李盧朱王魏列傳

卷十六

后妃諸王列傳

卷十七

雜藝方士節義列傳

卷十八

浮屠契丹高麗列傳

陸放翁集

南唐書

卷第一

烈祖本紀第一

烈祖光文肅武孝高皇帝。名昇。字正倫。小字彭奴。徐州人。姓李氏。唐憲宗第八子建王恪之玄孫。恪生超。早卒。超生志。仕爲徐州判司。卒官。因家焉。志生榮。榮性謹厚。喜從浮屠遊。多晦跡。精舍。時號李道者。帝以光啓四年十二月二日生於彭城。六歲而孤。遇亂。伯父球攜帝及母劉氏。避地淮泗。至濠州。乾寧二年。淮南節度使楊行密。見而奇之。養以爲子。行密長子瀝惡帝。不以爲兄弟。行密乃與大將軍徐溫曰。是兒狀貌非常。吾度瀝終不能容。故以乞汝。遂冒姓徐氏。名知誥。帝事溫。盡子道。溫妻李氏。以其同姓。鞠養甚至。及長。身七尺。方頰隆準。脣上短下。語聲如鐘。精采鑠人。常緩步。而從者疾行。莫能及。溫有疾。與其婦晨夜侍旁不去。溫益愛之。行密亦謂溫曰。知誥雋傑。諸將子皆不逮也。天祐六年六月。自元從指揮使遷昇州。防遏使兼樓船軍使。治戰艦於昇。七年五月。授昇州副使。知州事。九年。副柴再用平宣州。以功遷昇州刺史。時江淮初定。守令皆武夫。專事軍旅。帝獨褒廉吏。課農桑。求遺書。招延四方士大夫。傾身下之。雖以節儉自勵。而輕財好施。無所愛吝。以宋齊丘。王令謀。王翊。主論議。曾禹。張洽。孫飭。徐融。爲賓客。馬仁裕。周宗。曹儵。爲親吏。十一年。加檢校司徒。始城昇州。十四年五月。城成。溫來觀。喜其制度壯麗。徙治焉。而以帝爲

檢校太保、潤州團練使。帝本意在宣州，不悅。時溫子知訓以內外馬步都軍副使，專制楊氏，驕淫失衆。宋齊丘納說曰：「知訓旦暮且敗，是行天所贊也。」十五年，朱瑾殺知訓，馬仁裕自蒜山渡，馳告帝。帝卽日帥師入廣陵，定亂。遂代知訓爲淮南節度行軍副使，內外馬步都軍副使，勤儉寬簡，盡反知訓之政。上下悅服。吳王建國，以帝爲左僕射，參政事。國人謂之政事僕射。乘剽亂之後，曾未期歲，紀綱憲度，粲然並舉。溫雖遙執國政，而人情頗已歸屬於帝。有徐玠者，事溫爲金陵行軍司馬，工揣摩捭闔，密說溫曰：「居中輔政，豈宜假之它姓？請更用嫡子知詢。」帝刺知皇恐，表乞罷政事，出鎮江西。表未上，而溫疾亟，遂止。溫卒，知詢嗣爲金陵節度使，諸道副都統，數與帝爭權。帝乃使人誘之來朝，留爲左統軍，悉奪其兵。而帝以太尉中書令出鎮金陵，如溫故事。吳命帝開大元帥府，置僚屬，進封齊王，用天子制度，改名誥。

昇元元年冬十月，吳帝禪位於我甲申，卽皇帝位。改吳天祚二年爲昇元元年。國號齊。以十二月二日爲仁壽節。尊吳帝爲高尙思，弘古讓皇帝。上冊稱受禪老臣，誥追尊考溫爲太祖武皇帝。丙申，以平章事張延翰爲右僕射，兼門下侍郎。同平章事。門下侍郎張居詠，中書侍郎李建勳，皆爲同平章事。以建康爲西都，廣陵爲東都。改尙書省爲尙書都省，東都尙書省爲留守院。丙戌，改齊明門爲朝元門。丁亥，封弟知證爲江王，知諤爲饒王，戊子，降吳太子璉爲弘農郡公，辛卯，降吳建安王球、江夏王璘等十一人爵一等。而加官增戶邑。詔獄訟未經本處論決者，毋得詣闕訴。乙未，降吳公主爲國君。甲午，立王后宋氏爲皇后。丙申，封女弟杞國君爲廣德長公主。庚子，遣使如滇閩，吳越荆南告卽位。辛丑，追封吳歷陽公濬爲臨川王，諡曰靈，以禮改葬。戊申，封子景通爲吳王，諸道副元帥，判六軍諸衛事。十一月庚戌朔，改東都舊第爲

崇德宮癸丑改承宣院爲宣徽院丙辰追册故妃魏國君楊氏爲順妃丁巳追封長子景遷爲高平郡王長女爲豐城公主改辭狀司爲清訟院立姪景邁爲晉陵郡公景遜爲上饒郡公景逸爲桂楊郡公景逸爲平陽郡公封女五人爲盛唐太和永興建昌玉山公主戊午立子景遂爲吉王景達爲壽陽郡公以景遂爲東都留守江都尹赴東都已未陞東都海陵縣爲泰州割鹽城泰興如皋興化縣屬焉丁卯高從誨表請置邸建康從之己巳吳越王使將軍袁韜來賀卽位乙亥追封故高平王景遷妃吳上饒公主爲燕國君諡貞莊十二月庚寅上太祖武皇帝陵曰定陵追尊高祖以下皆爲公王而稱宗配皆稱國君及妃墓皆稱陵惟武皇帝之配李氏曰明德皇后丙午有星孛北方

昇元二年春正月己酉朔日有食之避殿停朝賀甲子高從誨使龐守規來賀卽位甲戌詔臣僚三品以上追贈父母將相贈三世二月壬戌閩使內客省使朱文進來賀卽位夏五月讓皇屢請徙居南平王李德誠等亦引漢隋故事有請戊午改潤州州治爲丹陽宮以平章事李建勳充迎奉讓皇使己未漢使集賢殿學士鄒禹謨來賀卽位甲寅徙讓皇居丹陽宮丁卯廣濟倉災焚米二十萬石作渾天儀六月庚辰月入太微西華門犯右執法辛巳犯東垣上相甲申陞池州爲康化軍是月高麗使正朝廣評侍郎柳勳律來朝貢秋七月壬申以左丞相宋齊丘爲平章事八月戊寅陞洪州瀟灘鎮爲清江縣不隸州丁亥契丹使梅里祿盧古來聘冬十月丙子立太學命刪定禮樂癸未新羅使來朝貢壬辰命吳王瓌勒步騎八萬講武銅駝橋十二月辛丑讓皇殂詔不視朝二十七日帝率百官素服舉哀是歲徙吳王瓌爲齊王昇元三年春正月庚戌江王知證饒王知諤表請帝復姓李氏不許癸亥右丞相齊丘平章事居歎建勳

樞密使同平章事宗等表請復姓。甲子。御札許議復姓。乙丑。齊丘等議宜如所請。從之。丙寅。至壬申。齊王璟等三上尊號。曰應乾紹聖文武孝明皇帝。不許。詔曰。適者干戈相尋。地蕪而不莪。桑殖而弗蠶。衣食日耗。朕甚閱之。民有嚮風來歸者。授之土田。仍給復三歲。二月乙亥。改太祖武皇帝廟號義祖。己卯。帝御興祥殿。復姓。爲考妣發哀。與皇后皆服斬縗。居廬。如始喪禮。服考妣喪各二十七日。凡五十四日。不視朝。且暮臨。詔國事。委宋齊丘。惟軍旅以開。羣臣固諫。詔以墨縗聽政。帝初欲更名昂。以犯文宗諱。乃名晃。或云朱全忠名也。又更名坦。御史王鶴言。字從旦。犯睿宗諱。庚寅。詔更名昇。甲午。月犯南斗第六星。乙未。契丹使曷魯來。以兄禮事帝。蜀使來賀。卽位。追尊高祖建王恪曰定宗。孝靜皇帝貞妃程氏曰貞靜皇后。曾祖超曰成宗。孝平王配崔氏曰平貞妃。祖志曰惠宗。孝安王配盧氏曰安莊妃。考榮曰廢宗。孝德皇帝配劉氏曰德恭皇后。庚午。作南郊行宮于間。夏四月庚辰。朝享於太廟。辛巳。有事於南郊。以高祖神堯皇帝配。用上辛也。大赦。百官進位。將士勞賜有差。民三年藝桑及三千本者。賜帛五十疋。每丁墾田及八十畝者。賜錢二萬。皆五年勿收租稅。詔曰。朕以眇躬。託於民上。常懼弗類。以羞高祖太宗之遺業。羣公卿士。願欲舉上尊號之禮。朕甚不取。其勿復以聞。戊子。進封李德誠趙王。徐知證韓王。知諤梁王。辛亥。進封景遂壽王。景遂宣城王。丙寅。以齊王璟爲諸道兵馬大元帥。丁未。吳越王使左武衛上將軍沈縉文。荆南高從誨使王崇嗣來賀南郊。作北郊於玄武湖西。癸惑犯月。秋七月丙午。放諸州所獻珍禽奇獸於鍾山。命有司作昇元格。與吳令並行。甲寅。歲星晝見。自五月不雨。至於閏七月。冬十月丁丑。御後樓。閱戰馬。昇元四年春二月。詔罷營造力役。毋妨農時。三月丁未。頒中正曆。曆官陳承勛所撰也。丙戌。漢人閩人來

聘夏五月晉安州節度副使李金全來降六月癸亥罷宣州歲貢木瓜雜果太師中書令趙王李德誠卒
秋八月立齊王璟爲皇太子仍兼大元帥錄尚書事璟固讓從之丁卯月掩歲星九月戊辰契丹使梅里
掠姑米里來聘獻狐白裘冬十月癸巳朔日癸感填歲星聚於南斗壬寅以齊王璟讓儲貳赦殊死以下
京師賜醢內外諸軍給優賜禁表奏言聖睿二字違者以大不敬論乙巳詔幸東都命齊王璟監國庚戌
帝自保德門御舟辛亥次迎鑾鎮甲寅至東都入建元門帝感念疇昔泫然流涕不已遣使問東畿士民
不能自存者已未高麗使廣評侍郎柳兢質來貢方物十一月乙丑宴羣臣於崇德宮故第也以聽事爲
光慶殿庚辰改東都文明殿爲乾元殿英武殿爲明光殿應乾殿爲垂拱殿朝陽殿爲福昌殿積慶宮爲
崇道宮西都崇英殿爲延英殿凝華內殿前爲昇元殿後爲雍和殿興祥殿爲昭德殿積慶殿爲穆清殿
乙酉賜東畿高年疾苦俸獨米人二石漢使都官郎中鄭翺閩使客省使葛裕吳越使刑部尚書楊巖來
賀仁壽節十二月丙申帝至自東都

昇元五年春二月己未殺秦州刺史褚仁規五月戊辰契丹使來秋七月詔曰右僕射兼中書侍郎同平
章事監脩國史李建勳幸處台司且聯戚里靡循紀律敢竊彝章其罷歸私第八月有星孛於天市長數
尺七十日沒遣使振貸黃州旱傷戶口是歲吳越水民就食境內遣使振恤安集之

昇元六年春正月甲子月犯填星退行在畢閏月甲申朔改天長制置使爲建武軍庚寅漢使區延保來
聘癸巳閩使尚食使林弘嗣來聘都下大水秦淮溢東都火焚數千家二月己丑以左丞相太保宋濟丘
知尚書省事初齊丘累求預政帝許中書視事又以兩省事多委給事舍人劇務多在尚書省又求知省

事許之。夏五月，左丞相太保宋齊丘罷爲鎮南軍節度使。六月，常宣歙三州大雨，漲溢。漢使蕭規來告哀。廢朝三日。庚午，契丹使掠姑米里來聘，獻馬五駒，大蝗自淮北蔽空而至。辛未，命州縣捕蝗。癸亥，焚感犯房次將。辛巳，禁節度刺史給攝署牌。秋八月甲申，漢使法物使公孫惠來謝襲位。九月庚寅，頒昇元刑定條。冬十月，詔曰：前朝失御，四方崛起者衆，武人用事，德化墜而不宣，朕甚悼焉。三事大夫，其爲朕舉用儒者，罷去苛政，與吾民更始。十二月，閩使徐弘績、漢使滕紹英、吳越使右武衛大將軍蔣璠來賀仁壽節。

昇元七年春正月，契丹使達羅千等二十七人來聘，獻馬三百，羊三萬五千。二月庚午，帝崩於昇元殿。年五十六。十一月壬寅，葬永陵。帝臨崩，謂齊王璟曰：德昌宮儲戎器金帛七百萬，汝守成業，宜善交鄰國，以保社稷。吾服金石，欲延年，反以速死。汝宜視以爲戒。帝生長兵間，知民厭亂，在位七年，兵不妄動，境內賴以休息，性節儉，常躡蒲履，用鐵盆盥，暑月寢殿施青葛帷，左右官婢裁數人，服飾樸陋。建國始，卽金陵治所爲宮，惟加鷓尾，設闌檻而已。終不改作。元宗爲太子，欲得杉木作板障，有司以聞，帝曰：杉木固有之，但欲作戰艦，以竹作障可也。江淮間連年豐樂，兵食盈溢，羣臣多請恢拓境土，帝歎息曰：吾少在軍旅，見兵之爲民害深矣，誠不忍復言，使彼民安，吾民亦安矣。吳越國大火，焚其宮室，帑藏兵甲幾盡，將帥皆言乘其弊，可以得志。帝一切不聽，遣使厚持金幣，贈之仁厚恭儉，務在養民，有古賢主之風焉。

論曰：昔馬元康、胡恢皆嘗作南唐書，自烈祖以下，元康謂之書，恢謂之載記。蘇丞相顯得恢書而非之曰：夫所謂紀者，蓋摘其事之綱要，繫於歲月，屬於時君。秦莊襄王而上，與項羽皆未嘗有天下，而史遷著於

本紀。范曄漢書。又有皇后紀。以是質之。言紀者。不足以別正閏。陳壽三國志。吳蜀不稱紀。是又非可法者也。蘇丞相之言。天下之公言也。今取之。自烈祖而下。皆爲紀。而用史遷法。總謂之南唐紀云。

卷第二

元宗本紀第二

元宗明道崇德文宣孝皇帝名璟。字伯玉。烈祖長子。母曰宋皇后。初名景通。風度高秀。幼工屬文。起家駕部郎中。累進諸衛大將軍。烈祖爲齊王。立爲王太子。固讓昇元初。烈祖受禪。封吳王。徙齊王。四年八月。立爲皇太子。復固讓曰。前世以嫡庶不明。故早建元良。示之定分。如臣兄弟友愛。尙何待此。烈祖爲下詔稱其守廉退之風。師忠貞之節。有子如此。予復何憂。赦殊死以下。臣民奉踐齊王。如太子禮。七年二月。烈祖病疽。祕之人皆莫知。庚午疾亟。大醫吳廷紹密遣人告帝。帝馳入宮侍疾於東閣。是夕烈祖崩。祕不發喪。而下詔命帝監國。大赦。頒賚有差。丙子。始宣遺詔。

保大元年。春三月己卯朔。烈祖殂。已旬日。帝猶未嗣位。方泣讓諸弟。奉化節度使周宗。手取袞冕衣。帝曰。大行付陛下神器之重。豈得固守小節。是日卽皇帝位。大赦。改元。不待逾年。遽改元。識者非之。百官進位二等。將士皆有賜。獨民逋負租稅。賜繇寡孤。獨粟帛。尊皇后爲皇太后。立妃鍾氏爲皇后。以鎮南軍節度使宋齊丘爲太保兼中書令。奉化軍節度使周宗爲侍中。徙封壽王。景遂爲燕王。宣城王。景達爲鄂王。閩使來吊祭。升濠州爲定遠軍。秋七月。徙燕王。景遂爲齊王。鄂王。景達爲燕王。仍以景遂爲諸道兵馬元帥。

居東宮。景遂爲副元帥。仍詔中外以兄弟傳國之意。八月乙卯。立弟景暹爲保寧王。冬十月庚戌。有星孛於東方。嶺南妖賊張遇賢犯虔州。詔遣洪州營屯都虞候嚴恩帥師討之。以通事舍人邊鑄監其軍。其後擒遇賢。及其黨黃伯雄曹景全斬於金陵市。十二月。以太保中書令宋齊丘爲鎮海軍節度使。

保大二年春正月。待中周宗。罷爲鎮南軍節度使。左僕射兼門下侍郎平章事張居詠。罷爲鎮海軍節度使。辛巳。詔齊王景遂總庶政。惟樞密副使魏岑查文徽得奏事。餘非召對不得見。初。烈祖尤愛景遂。帝奉先志。欲傳以位。故有是詔。宋齊丘。蕭儼。皆上書切諫。未見聽。侍衛都虞候賈崇叩閣請見曰。臣事先帝三十年。孜孜詢察。下情猶患壅隔。陛下始卽位。所委何人。而頓與臣下疎絕如此。因嗚咽流涕。帝感悟。命坐賜食。遂收所上詔。夏五月。閩將朱文進弑其君曦。自稱閩王。遣使來告。帝囚其使。將討之。議者謂閩亂由王延政當先討。乃釋閩使遣還。秋九月庚午朔。日有食之。冬十二月。樞密院使查文徽請討王延政。詔以文徽爲江西安撫使。往覘建州。文徽固請。乃以邊鑄爲行營招討。共攻延政。敗績於蓋竹。

保大三年春二月。以何敬洙爲福建道行營招討。祖全恩爲應援使。姚鳳爲諸軍都監。會查文徽進討。秋七月。星見而風雨。八月甲子朔。日有食之。克建州。執王延政歸於金陵。拜羽林大將軍。升建州爲永安軍。冬十月。皇太后宋氏殂。是歲。升建州延平津爲劍州。以建州之劍浦汀州之沙縣隸焉。

保大四年春正月。以青陽公宋齊丘爲大傅兼中書令。昭武軍節度使李建勳爲右僕射兼門下侍郎。及中書侍郎。馮延巳皆平章事。夏五月。以樞密使陳覺爲福建宣諭使。使諭李弘義入朝。不克。覺擅發汀建撫信州兵趨福州。帝遂命王崇文魏岑。馮延魯會攻福州。秋九月。淮南蟲食稼。除民田稅。冬十月庚辰。圍

福州改漳州爲南州。

保大五年春正月立齊王景遂爲皇大弟。徙燕王景達爲齊王。拜諸道兵馬元帥。徙南昌王弘冀爲燕王副元帥。晉密州刺史皇甫暉。棣州刺史王建。來歸。契丹耶律德光以滅晉來告捷。且請會盟於境上。帝不從。遣工部郎中張易聘之。請命使者如長安。脩奉諸陵。契丹亦不從。三月己亥。吳越救福州兵自海道至。我師與之戰。敗績。諸營皆潰。夏四月壬申。詔卽軍中斬陳覺。馮延魯。餘將帥皆赦不問。已而復詔械覺。延魯。還都。旣至。貸死。覺流蘄州。延魯流舒州。五月。帝聞契丹棄中原。遁歸。詔曰。乃眷中原。我之故地。以李金全爲北面行營招討使。六月。聞漢入汴。兵遂不出。而金全猶不能。秋。閏七月丁丑。夜有彗出東方。近濁。其尾迹近側。掃少微及長垣。至八月壬辰。乃沒。八月。太傅兼中書令宋齊丘。罷爲鎮南軍節度使。

保大六年夏六月庚寅朔。日有食之。九月。漢護國軍節度使李守貞。間道表求援師。以鎮海軍節度使李金全爲北面行營招討使。救河中師次沂州。冬十一月。退保海州。

保大七年春正月。淮北盜起。以神衛都虞候皇甫暉。將軍張巒。蕭處質。監軍散騎常侍張義方。帥師萬人。出海泗。招降。納亳州蒙城鎮將成師朗等。以歸。夏六月癸酉朔。日有食之。冬十月。我師度淮。攻正陽。敗績。十二月。泉州刺史劉從効。兄南州刺史從願。殺刺史董思安。據南州。自稱刺史。我不能問。因升泉州爲清源軍。以從効爲節度使。

保大八年春正月。李金全始罷北面行營招討使。二月。福州道謀者詣建州。留後查文徽。告吳越戍卒亂。殺李弘義。棄城去。文徽信其言。襲福州。大敗。被執。而別將建州刺史陳誨。以戰棹敗福州兵。執其將馬先。

進俘於金陵。秋七月，歸馬先進於吳越，而求查文徽。八月，尚書郎周濬等三人奔漢。九月，楚朗州節度使馬希萼表請師，詔加同平章事，賜以鄂州。今年租稅，命楚州團練使何敬洙帥師援之。冬十月，越歸查文徽。十一月甲子朔，日有食之。十二月，馬希萼攻陷潭州，弑其君馬希廣。楚將李彥溫、劉彥瑫各以千人來歸。

保大九年春二月，楚王希萼使掌書記劉光翰來貢方物。三月壬戌朔，以右僕射孫晟、客省使姚鳳爲楚王策禮使。又以洪州營屯都虞候邊鎬爲湖南安撫使，便宜進封淮南畿。夏五月辛未，有星大如五升器，自西北流墜西南，光燭地，聲如雷。六月，楚靜江軍指揮使王達執朗州節度使馬光惠，歸於金陵。推辰州刺史劉言爲朗州留後，來請命。秋九月，楚將徐威等廢其君希萼，命邊鎬出萍鄉以討楚亂。冬十月壬寅，武安留後馬希崇請降，鎬入潭州。癸丑，武昌節度使劉仁贍帥舟師取岳州。湖南遂平、南漢來攻，陷郴州。周兗州節度使慕容彥超來乞援師，從之。

保大十年春正月，陸洪州高安縣爲筠州，以清江萬載、上高三縣隸焉。援兗州之師，敗績於沐陽。周人執我指揮使燕敬權。二月，周人歸敬權，使來言曰：吾賊臣背叛，爾國助之，豈長計哉！且使穎州郭瓊遣我壽州劉彥貞書曰：自古有國，皆惡叛臣，貴邦何爲常事招誘吳中多士，無乃淺圖。帝頗悔其言，以翰林學士江文蔚知禮部貢舉，放進士王克貞等三人及第，旋復停貢舉。三月，以太弟太保馮延巳爲左僕射，前鎮海節度使徐景運爲中書侍郎，及右僕射孫忌，並同平章事。帝以南漢乘楚亂，據桂、宜等州，將取之。以知全州張繼兼桂州招討使。夏四月丙戌朔，日有食之。命統軍侯訓帥五千人，會張繼攻桂州，敗績於城下。

訓死之。鬱收餘衆保全州。周興順指揮使白進福以族來歸。秋九月。召朗州劉言入朝。冬十月。劉言將王遠周行逢攻潭州。王辰拔益陽寨。戍將李建期死之。丙申。潭州節度使邊鎬棄城遁。辛丑。劉言將蒲公益攻岳州。刺史宋德權監軍任鎬棄城。十一月。劉言盡據故楚地。詔流邊鎬於饒州。斬宋德權。任鎬於太社。斬裨將申洪。秦尹建於都門外。平章事馮延巳孫忌皆罷。爲左右僕射。十二月。零都令趙暹奔周。洪州大都督楚王馬希萼來朝。留不遣。是歲大旱。

保大十一年春三月。以左僕射馮延巳同平章事。金陵火逾月。焚官寺民廬數千間。復設貢舉。夏六月。不雨。井泉竭。淮流可涉。旱蝗民饑。流入周境。冬十月。築楚州白水塘。以溉屯田。遂詔州縣陂塘湮廢者皆脩復之。於是力役暴興。楚州常州爲甚。帝使親吏車延規董其役。發洪饒吉筠州民牛以往。吏緣爲姦。強奪民田爲屯田。江淮騷然。百姓以數丈竹去節焚香於中。仰天訴冤者不可勝數。知制詔徐鉉因奏事白之。帝曰。吾國兵數十萬。安肯不食捍邊事。有大利。則舉國排之。奈何。鉉又力陳其弊。帝乃遣鉉行視利害。鉉至楚州。悉取所奪田還民。詰責車延規。欲榜之。百姓感悅。而帝左右交譖。以爲擅作威福。帝大怒。趣歸。將沉之江中。既至。怒少解。流舒州。而白水塘等役亦賴以止。

保大十二年春正月。有大星貫於西北。聲如雷。二月。命吏部侍郎朱彥知禮部貢舉。自十一年六月。至於今年三月。大饑疫。命州縣鬻粥食餓者。秋七月。契丹使其舅來聘。夜宴清風驛。盜斬契丹使。亡去。捕之不得。或以爲周人也。自是契丹遂不至。

保大十三年春二月。以中書侍郎知尚書省嚴續爲門下侍郎平章事。夏六月。周攻秦鳳。蜀使間使來告。

難周下詔罪狀我。遣將李穀、王彥超、韓令坤等侵我淮南。攻自壽州。帝乃以神武統軍劉彥貞爲北面行營都部署。帥師三萬赴壽州。奉化節度使同平章事皇甫暉爲北面行營應援使。常州團練使姚鳳爲應援都監。帥師三萬屯定遠縣。召鎮南節度使宋齊丘入朝謀難。冬十二月。以安定郡公從嘉爲沿江巡撫使。是歲天裂東北。其長二十丈。

保大十四年春正月壬寅。周帝親征。劉彥貞與周師戰於正陽。敗績。彥貞戰死。二月。周師兼道襲清流關。皇甫暉敗保滁州。周師破城。俘暉及姚鳳以歸。壬戌。有星孛於參芒。東南指。帝遣泗州牙將王承朗奉書至徐州。求成於周。稱唐皇帝奉書於大周皇帝。願以兄事。歲獻方物。大弟景遂亦移書周將帥。皆不報。己卯。遣翰林學士鍾謨、文理院學士李德明使周奉表。至下蔡。行在。貢金器千兩。銀器五千兩。錦綺紋帛二千疋。及御衣犀帶茶藥。又奉牛五百頭。酒二千石。犒軍。請罷兵。乙酉。周師陷東都。執副留守馮延魯。丁亥。左神衛使徐象等十八人。自壽州奔周。天長制置使耿謙。以城降於周。遣園苑使尹廷範。護遷讓皇之族於潤州。廷範殺其男子六十人。誅廷範。以謝國人。周師陷泰州。刺史方訥棄城逃。帝遣間使求援於契丹。至淮北。爲周人所執。吳越侵常州。宣州靜海制置使姚彥洪奔吳越。三月。遣司空孫晟及禮部尙書王崇質使周。削去帝號。奉表請爲外臣。猶不許。光州兵馬都監張延翰。以城降於周。刺史張紹遜還。丁酉。周師陷舒州。刺史周弘祚赴水死。蘄州將李福。殺知州王承雋。降於周。戊戌。天成軍使蔡暉。自壽州奔周。周師陷和州。詔斬李德明於都市。坐奉使請割地也。吳越陷常州之鄂。執團練使趙仁澤。燕王弘冀遣龍武都虞候柴克宏救常州。王子大敗吳越兵於常州。斬獲萬計。俘其將數十。至潤州。弘冀悉斬之。壬戌。壽州軍

校陳延貞等十三人奔周。是月命諸道兵馬元帥齊王景達拒周。夏四月復秦州。五月周帝北還。秋七月復東都舒靳光和滌州。惟壽州之圍愈急。冬十月周人害我行人孫晟。從者二百人皆死。獨貸鍾諤以爲耀州司馬。是歲詔省淮南屯田之害民者。

保大十五年春二月乙亥周帝親征齊王景達自濠州遣邊鎬許文積朱元帥兵數萬援壽州。景達用監軍使陳覺言謀奪朱元兵以楊守忠代之。元遂舉寨降周。裨將時厚卿獨不從。見殺。壬辰周師盡破我諸寨。執邊鎬許文積楊守忠餘衆悉奔潰。景達亦還歸金陵。是役也所喪四萬人。三月誅朱元妻子。丁未壽州劉仁贍病革副使孫羽等代仁贍署表降於周。辛亥晝晦雨沙如霧。夏四月周帝北還。冬十一月周帝復親征。十二月濠州刺史郭廷謂泗州刺史范再遇皆舉城降。帝知東都必不守遣使焚其官私廬舍。徙其民於江南。周師入揚州。丁丑周師攻陷秦州都城大火。一日數發。

交泰元年春正月改元中興。丙戌周師陷海州。壬辰周師陷靜海軍。丁未陷楚州。防禦使張彥卿兵馬都監鄭昭業死之。周師屠其城焚廬舍殆盡。周師次雄州。刺史易文贊舉城降。州天長縣也。三月大赦。改元交泰。以皇太弟景遂爲天策上將軍。晉王立燕王弘冀爲皇太子。參治朝政。丁亥周帝次揚州。辛卯遂至迎鑾鎮。壬辰耀兵江口。帝懼周師南渡遣樞密使陳覺奉表貢方物。請傳位太子弘冀。以國爲附庸。周帝始采唐報回紇可汗故事。答帝璽書稱皇帝致書敬問江南國主。帝遣閣門承旨劉承遇上表。稱唐國主盡獻江北郡縣之未陷者。鄂州漢陽汝川二縣在江北亦獻焉。歲輸土貢數十萬。乞海陵鹽監南屬不許。後歲給贍軍鹽三十萬石。庚子周帝賜書許帝奉正朔罷兵而不許傳位太子。甲辰遣平章事馮延巳等

使周犒軍及買宴。夏五月，下令去帝號，稱國主。去交泰年號，稱顯德五年。置進奏邸於汴都。凡帝者儀制皆從貶損，改名景，以避周信祖諱。告於太廟，告廟之日，金陵大霧，通夕不解。左僕射平章事馮延巳罷爲太子太傅，門下侍郎平章事嚴續罷爲太子少傅。己酉，周帝遣太府卿馮延魯、衛尉少卿鍾謨，賜國主御衣金玉帶錦帛羊馬及犒軍帛十萬。凡士卒俘於周者皆遣還。凡五千七百五十八人。冬十月甲午，周帝歸。我臣馮延魯、許文稹、邊鎬、周廷構，國主皆不復用。十一月己亥，暴宋齊丘、陳覺、李徽古罪，放齊丘歸九華山，覺安置饒州，徽古削官爵。覺徽古尋皆賜自盡。齊丘明年正月亦幽死。

顯德六年秋七月，鑄大錢，文曰永通泉貨。一當十，與舊錢竝行。又鑄唐國通寶錢。二當開通錢之二。九月丙午，太子弘冀卒。冬十一月，建洪州爲南都南昌府。

建隆元年春正月，遣何荏誅鍾謨於饒州，誅張巒於宣州。大宋太祖皇帝受周禪，放江南降將三十四人來歸。二月，始鑄鐵錢。三月，遣使朝賀於京師。秋七月，遣禮部郎中龔慎儀朝於京師，貢乘輿服御。自是貢獻尤數，歲費以萬計。冬十月，宋楊州節度使李重進叛來求援，不許。十一月丁未，太祖平李重進。國主遣右僕射嚴續犒軍，蔣國公從鑑、戶部侍郎馮延魯朝貢。

建隆二年春二月，國主遷於南都，立吳王從嘉爲太子，留金陵監國。國主舟行，旌麾仗衛，六軍百司，凡千餘里不絕。所過勞問，高年疾苦，大宴於當塗。至宋家汭，暴風飄國主舟，幾至北岸。翼日，從官皆乘輕舟奔問。三月，國主至南都。太祖以國主遷都，遣通事舍人王守貞來勞問。南都迫隘，羣下皆思歸。國主亦悔遷。北望金陵鬱鬱不樂，澄心堂承旨秦承裕常引屏風障之。復議東遷，未及行。國主寢疾，不復進膳，惟啜蔗。

梁。喚稱華。六月己未。疾革。親書遺令。留葬西山。累土數尺爲墳。且曰。違吾言。非忠臣孝子。夕有大星。置於南都。庚申。殂於長春殿。年四十六。後主不忍從遺令。迎喪還。秋八月。至金陵。丁未。殯於宮中。萬壽殿告哀於京師。且請追復帝號。太祖許之。

三年正月戊寅。葬順陵。元宗多才藝。好讀書。便騎善射。在位幾二十年。慈仁恭儉。禮賢睦族。愛民字孤。裕然有人君之度。少喜栖隱。築館於廬山瀑布前。蓋將終焉。迫於紹襲而止。然自以唐室苗裔。詎於斥大境土之說。及福州湖南再喪師。知攻取之難。始議弭兵務農。或曰。願陛下十數年勿復用兵。元宗曰。兵可終身不用。何十數年之有。會周師大舉。寄任多非其人。折北不支。至於蹙國降號。憂悔而殂。悲夫。

論曰。元宗舉閩楚之師。境內虛耗。及契丹滅晉。中原有隙可乘。而南唐兵力。國用既已弗支。孰視而不能出世。以爲恨。予謂不然。唐有江淮。比同時割據諸國。地大力強。人材衆多。且據長江之險。隱然大邦也。若用得其人。乘閩楚昏亂。一舉而平之。然後東取吳越。南下五嶺。成南北之勢。中原雖欲睥睨。豈易動哉。不幸諸將失律。貪功輕舉。大事弗成。國勢遂弱。非始謀之失。所以行之者非也。且陳覺馮延魯輩用師閩楚。猶喪敗若此。若北鄰而爭天下。與秦晉趙魏之師戰於中原。角一旦勝負。其禍可勝言哉。故予具論其實如此。後之覽者。得以考覈焉。

卷第三

後主本紀第二

後主名煜。字重光。元宗第六子。初名從嘉。母曰光穆皇后鍾氏。從嘉廣穎豐類駢齒。一目重瞳子。文獻太子惡其有奇表。從嘉避禍。惟覃思經籍。歷封安定郡公。鄧王。文獻太子卒。徙吳王。以尚書令知政事。居東宮。建隆二年。遂立爲太子。元宗南巡。太子留金陵監國。以嚴續。殷崇。義輔之。張洎主牋奏。六月。元宗殂。太子嗣立於金陵。更名煜。居喪哀毀幾不勝。赦境內尊鍾后曰聖尊后。以后父名太章也。立妃周氏爲國后。徙信王景遷爲江王。鄧王從善爲韓王。立弟從諶爲鄧王。從謙爲宜春王。從信爲文陽郡公。從度爲昭平郡公。從度景遷子也。令諸司四品至九品無職事者。日二員。待制於內殿。以右僕射嚴續爲司空。平章事。餘進位有差。遣中書侍郎馮延魯於京師。奉表陳襲位。太祖賜詔答之。自是始降詔。秋九月。太祖遣鞍轡庫使梁義來吊祭。冬十月。太祖遣樞密承旨王文來賀襲位。初。元宗雖臣於周。惟去帝號。他猶用王者禮。至是國主始易紫袍。見使者使退。如初服。十二月。置龍翔軍以教水戰。

建隆三年。春三月。遣馮延魯入貢京師。泉州節度使中書令晉江王劉從効卒。子紹鑑自稱留後。四月。泉州將陳洪進。執紹鑑歸金陵。推副使張漢思爲留後。六月。遣客省使翟如璧入貢京師。太祖放降卒千人南還。冬十一月。遣水部郎中顧彝入貢京師。

乾德元年。春正月。太祖遣使來。賜羊馬橐駝。三月。太祖出師平荆湖。國主遣使犒軍。夏四月。泉州副使陳洪進。廢張漢思。自稱權知軍府。來告國主。即以洪進爲節度使。秋七月。太祖詔國主。遣還顯德以來中朝將士在江南者。及令揚州民遷江南者。還其故土。十二月。國主表乞罷詔書不名之禮。不從。

乾德二年。春三月。行鐵錢。每十錢。以鐵錢六。權銅錢四。而行。其後銅錢遂廢。民間止用鐵錢。末年。銅錢一

直鐵錢十比國亡。諸郡所積銅錢六十七萬緡。命吏部侍郎脩國史。韓熙載知貢舉。放進士王崇古等九人。國主命中書舍人徐鉉覆試舒雅等五人。雅等不就。國主乃自命詩賦題以中書官蒞其事。五人皆見黜。秋八月。太祖於江北置折博務。禁商旅過江。九月。立子仲寓爲清源郡公。仲宣宣城郡公。十月甲辰。仲寓卒。國后周氏已寢疾。哀傷增革。遂亦卒。十一月。太祖遣作坊副使魏丕來吊祭。

乾德三年夏五月。司空平章事嚴續。罷爲鎮海軍節度使。秋九月。雨沙。聖尊后鍾氏殂。冬十月。太祖遣染院使李光圖來吊祭。

乾德四年秋八月。國主遣龔慎儀持書使南漢。約與俱事。中朝九月。慎儀至番禺。被執。

乾德五年春。命兩省侍郎諫議。給事中。中書舍人。集賢勤政殿學士。更直光政殿。召對咨訪。率至夜分。

開寶元年春三月。戊申。以樞密使右僕射殷崇義爲左僕射。同平章事。境內旱。太祖賜米麥十萬石。冬十一月。立國后周氏。

開寶二年三月。以游簡言爲左僕射。兼門下侍郎。同平章事。夏五月。簡言卒。是歲右僕射同平章事殷崇義。罷爲潤州節度使。同平章事。

開寶三年夏。太白晝見。二日相觸。

開寶四年冬十月。國主聞太祖滅南漢。屯兵於漢陽。大懼。遣太尉中書令鄭王從善朝貢。稱江南國主。請罷詔書不名從之。有商人來告。中朝造戰艦數千艘。在荆南。請密往焚之。國主懼不敢從。

開寶五年春二月。國主下令貶損儀制。改詔爲教。中書門下省爲左右內史府。尚書省爲司會府。御史臺

爲司憲府。翰林院爲文館。樞密院爲光政院。大理寺爲詳刑院。客省爲延賓院。官號亦從改易。以避中朝。初金陵殿闕皆設鴟吻。元宗雖臣於周。猶如故。乾德後。遇中朝使至。則去之。使還復設。至是遂去不復用。降諸弟封王者皆爲公。從善楚國。從益江國。從諤鄂國。內史舍人張佖知禮部貢舉。放進士楊遂等三人。清耀殿學士張洎言佖多遺才。國主命洎考覆。遺不中第者。於是又放王倫等五人。閏月癸巳。太祖命遣奉使楚國公從善爲泰寧軍節度使。留京師。賜第泮陽坊。示欲召國主入朝也。國主遣戶部尙書馮延魯謝從善爵命。延魯至京師。疾病不能朝而歸。

開寶六年夏。太祖遣翰林院學士盧多遜來。國主聞太祖欲與師。上表願受爵命。不許。以司空殷崇義知左右內史事。冬十月。內史舍人潘佑上書切諫。佑素與戶部侍郎李平交厚。國主以爲事皆由平始。先以平屬吏遣使收佑。佑自殺。平縊死獄中。皆徙其家外郡。

甲戌歲秋。國主上表求從善歸國。不許。太祖遣閣門使梁迥來。使從容言曰。天子今冬行柴燎之禮。國主宜往助祭。國主不答。九月丁卯。復遣知制誥李穆爲國信使。持詔來曰。朕將以仲冬有事。國主思與卿同閱犧牲。且諭以將出師。宜早入朝之意。國主辭以疾。且曰。臣事大朝。冀全宗祀。不意如是。今有死而已。時太祖已遣潁州團練使曹翰率師先出江陵。宣徽南院使曹彬。侍衛馬軍都虞候李漢瓊。賀州刺史田欽祚。率舟師繼發。及是又命山南東道節度使潘美。侍衛步軍都虞候劉遇東。上閣門使梁迥。率師水陸並進。與國信使李穆同日行。冬十月。國主遣江國公從益貢帛二十萬疋。白金二十萬斤。又遣起居舍人潘慎修。貢買冥帛萬疋。錢五百萬。築城聚糧。大爲守備。閏十月。王師拔池州。國主於是下令戒殿去開寶紀。

年稱甲戌歲辛未王師進拔蕪湖及雄遠軍吳越亦大舉兵犯常潤國主遣吳越王書曰今日無我明日豈有君一旦明天子易地賞功王亦大梁一布衣耳吳越王表其書於朝王師次采石磯作浮橋成長驅渡江遂至金陵每歲大江春夏暴漲謂之黃花水及王師至而水皆縮小國人異之國主以軍旅委皇甫繼勳機事委陳喬張洎又以徐元瑀刁衍爲內殿傳詔而遽書警柝日夜狎至元瑀等輒屏不以聞王師屯城南十里閉門守陴國主猶不知也初烈祖有國凡民產二千以上出一卒號義軍分籍者又出一卒號生軍新置產亦出一卒號新擬軍客戶有三丁者出一卒號拔山軍元宗時許郡縣村社競渡每歲重午日官閱試之勝者給綵帛銀碗皆籍姓名至是盡取爲卒號凌波軍民奴及贅壻號義勇軍募豪民以私財招聚亡賴亡命號自在軍至是又大蒐境內自老弱外皆募爲卒號排門軍民間又有自相率拒敵以紙爲甲農器爲兵器號白甲軍凡十三等皆使捍禦然實皆不可用奔潰相踵

乙亥歲春二月壬戌王師拔金陵開城三月丁巳吳越攻我常州權知州事禹萬誠以城降誅神衛都指揮使皇甫繼勳禁出五車色白長五尺夏六月轉見西方犯太微六十日滅王師及吳越圍潤州留後劉澄以城降吳越遂會王師圍金陵洪州節度使朱令贇帥勝兵十五萬赴難旌旗戰艦甚盛編木爲棧長百餘丈大艦容千人令贇所乘艦尤大擁甲士建大將旗鼓將斷采石浮橋至皖口與王師遇傾火油焚北船適北風反焰自焚我軍大潰令贇及戰艦都虞候王暉皆被執外援旣絕金陵益危蹙王師百道攻城晝夜不休城中米斗萬錢人病足弱死者相枕籍國主兩遣徐鉉等厚貢方物求緩兵守祭祀皆不報冬十一月白虹貫日晝晦乙未城陷將軍尚彥馬承信及弟承俊帥壯士數百力戰而死勤政殿學士鍾

舊朝服坐於家。亂兵至。舉族就死。不去。光政使右內史侍郎陳喬。請死不許。自縊死。國主帥司空知左右內史事殷崇義等。肉袒降於軍門。明年正月辛未。至京師。乙亥。授右千牛衛上將軍。封違命侯。太宗卽位。加特進。改封隴西公。太平興國三年七月辛卯。殂。年四十二。是日七夕也。後主蓋以是日生。贈太師。追封吳王。葬洛陽北邙山。後主天資純孝。事元宗盡子道。居喪哀毀。杖而後起。嗣位之初。屬保太軍興之後。國削勢弱。帑庾空竭。專以愛民爲急。蠲賦息役。以裕民力。尊事中原。不憚卑屈。境內賴以少安者十有五年。憲司章疏。有繩糾過。訐皆寢不下。論決死刑。多從末減。有司固爭。乃得少正。猶垂泣而後許之。常獵於青山。遠如大理寺。親錄繫囚。多所原釋。中書侍郎韓熙載奏。獄訟有司之事。囹圄非車駕所宜臨。幸請罰內庫錢三百萬。以資國用。雖不聽。亦不怒也。殂。問至江南。父老有巷哭者。然酷好浮屠。崇塔廟。度僧尼。不可勝算。罷朝。輒造佛屋。易服膜拜。以故頗廢政事。又置澄心堂於苑內。引能文士及徐元機。元楹。元樞。兄弟居其間。中旨由之而出。中書密院。乃同散地。兵興之際。降御札。移易將帥。大臣無知者。皇甫繼勳。誅死之後。夜出萬人斫營。招討使但署牒遣兵。竟不知何往。蓋皆澄心堂直承宣命也。長園既合。內外隔絕。城中之人。惶怖無死所。後主方幸淨居室。聽沙門德明。雲真。義倫。崇節。講楞嚴圓覺經。用鄱陽隱士周惟簡。爲文館詩易侍講學士。延入後苑。講易否卦。賜惟簡金紫。羣臣皆知國亡在旦暮。而張洎猶謂北師已老。將自遁去。後主益甘其言。晏然自安。命戶部員外郎伍喬。於圍城中。放進士孫確等三十八人及第。其所施爲。大抵類此。故雖仁愛。足以感其遺民。而卒不能保社稷云。

卷第四

宋齊丘列傳第一

宋齊丘字子嵩世爲廬陵人父誠與鍾傳同起兵高駢表傳爲洪州節度使以誠副之卒官因家洪州齊丘好學工屬文尤喜縱橫長短之說烈祖爲昇州刺史齊丘因騎將姚克瞻得見暇日陪燕游賦詩以獻曰養花如養賢去草如去惡松竹無時衰蒲柳先秋落烈祖奇其志待以國士從鎮京口入定朱瑾之難常參祕畫因說烈祖講典禮明賞罰禮賢能寬征賦多見聽用烈祖爲築小亭池中以橋度至則撤之獨與齊丘議事率至夜分又爲高堂不設屏障中置灰爐而不設火兩人終日擁爐畫灰爲字旋即平之人以比劉穆之之佐宋高祖然齊丘資躁褻或議不合則拂衣徑起烈祖謝之乃已義祖獨惡其爲人每欲進拔輒不果浮沉下僚十餘年義祖末年議者多請以徐氏諸子執國政烈祖聞之亟欲自請出鎮齊丘請徐之俄而義祖殂自殿直軍判官擢右司員外郎進右諫議大夫兵部侍郎居中用事且倚以爲相齊丘自以資望尙淺或不爲國中所服乃告歸洪州改葬因入九華山累啓求致仕不許時元宗已爲大將軍烈祖以吳主命命元宗躬往迎之於是齊丘託不得已而起遂拜中書侍郎遷右僕射平章事烈祖出鎮金陵以元宗入輔委齊丘左右之初烈祖權位日隆舉國皆知代謝之勢吳主謙恭無失德烈祖懼羣情未協欲待嗣君與齊丘議合已而都押衙周宗揣微指請急至都以禪代事告齊丘齊丘默計大議本自己出今若遽行則功歸周宗欲因以釣名乃留與夜飲亟遣使手書切諫以爲時事未可後數日馳至金陵請斬宗以謝國人烈祖亦悔將從之徐玠固爭纒黜宗爲池州副使玠乃與李建勳等遂極言宜從

天人之望。復召宗還舊職。齊丘由是頗見疎忌。留爲諸道都統判官。加司空。無所關預。從容而已。數請退。烈祖以南國給之。俄而齊國建。猶以勳舊爲左丞相。而不預事。李德誠周本自廣陵持吳帝詔來。行傳禪。齊丘謂德誠子建勳曰。尊公吳室元勳。今日掃地矣。獨稱疾臥家。不預勸進。烈祖旣受禪。徐玠爲侍中。李建勳爲中書侍郎。同平章事。周宗爲樞密使。齊丘但遷司徒。中懷不平。及宣制至。布衣之交。忽抗聲曰。臣爲布衣時。陛下亦一刺史耳。今爲天子。可不用老臣矣。烈祖優容之。嘗夜燕天泉閣。李德誠曰。陛下應天順人。惟宋齊丘不悅。因出齊丘諷止勸進書。烈祖卻之曰。子嵩三十年故人。豈負我者。齊丘頓首謝。自是爲妾媚計。更請降讓皇爲公侯。絕吳太子璉婚。久之。表言備位丞相。不當不聞國政。又自陳爲人所間。烈祖大怒。齊丘歸第。白衣待罪。而烈祖怒已解。謂左右曰。宋公有才。特不識大體爾。孤豈忘舊臣者。命吳王璟持手詔召見。遂以丞相同平章事。寔復委任。兼知尙書省事。與張居詠。李建勳。更日入閣議政。契丹耶律德光遣使來。齊丘陰謀間契丹。使與晉人相攻。則江淮益安。密請厚其原幣遣還。至淮北。潛令人刺殺之。契丹與晉人果成嫌隙。齊丘親吏夏昌圖盜庫金數百萬。特判傳輕典。烈祖命斬昌圖。齊丘慚稱疾。求罷省事。許之。遂不復朝謁。帝遣壽王景遂勞問。許鎮故鄉。始入朝。因召與宴飲。齊丘酒酣。輒曰。陛下中興實老臣之力。乃忘老臣可乎。烈祖怒曰。太保始以游客干朕。今爲三公足矣。齊丘詞色愈厲。曰。臣爲游客時。陛下亦偏裨耳。今不過殺老臣。遂引去。烈祖頗悔。明日手詔曰。朕之性。子嵩所知。少相親。老相怨。可乎。拜鎮南節度使。至鎮。起大第。窮極宏麗。坊中居人皆使修飾垣屋。民不堪其擾。有逃去者。初赴鎮。烈祖曰。衣錦晝行。古人所貴。賜以錦袍。親爲著之。遂服錦袍視事。元宗卽位。召拜太保。中書令。與周宗並相。齊丘

之客。最親厚者陳覺。元宗亦以爲才。馮延巳延魯。魏岑。查文徽。與覺深相附結。內主齊丘。時人謂之五鬼。相與造飛語。傾周宗。宗泣訴於元宗。而岑覺又更相攻。於是出齊丘爲鎮海軍節度使。齊丘怏怏。力請歸九華。舊隱從之。賜號九華先生。封青陽公。食青陽一縣租稅。元宗欲傳位齊王景遂。詔景遂總庶政。惟魏岑。查文徽得奏事。餘非特召不得見。國人大駭。齊丘自九華上疏。極論不可。會言者衆。元宗乃收所下詔。或謂齊丘先帝勛舊。不宜久棄山澤。遣馮延巳召之。不起。遣燕王景達再持詔往。乃起。拜太傅。中書令。封衛國公。賜號國老。奉朝請。然不得預政。益輕財好客。識與不識皆附之。薦陳覺使福州。諭李弘義入朝。覺至福州。不敢言。而專命出兵敗事。僉謂必坐誅。齊丘上表待罪。置不問。覺亦不死。齊丘方且怒韓熙載。議其黨與。黜之。元宗不悅。復使鎮洪州。周侵淮北。起齊丘爲太師。領劍南東川節度使。進封楚國公。與謀難。齊丘固讓。仍爲太傅。建議發諸州兵。屯淮泗。擇偏裨可任者將之。周人未能測虛實。勢不敢輕進。及春水生。轉饒道阻。彼師老食匱。自當北歸。然後遣使乞盟。度可無大喪敗。元宗惶惑不能用。又力陳割地無益。與朝論頗異。及明年暑雨。周棄所得淮南地北歸。議者謂扼險要。擊可以有功。且懲後。齊丘乃謂擊之。怨益深。不如縱其歸以爲德。由是周兵皆聚於正陽。而壽州之圍遂不可解。終失淮南。方是時。陳覺李徵古同爲樞密副使。皆齊丘之黨。躁專肆。無人臣禮。自度事定。必不爲羣臣所容。若齊丘專大柄。則可以無患。覺乃乘間言。宋公造國於艱危如此。陛下宜以國事一委宋公。元宗意謀出齊丘。大銜之。會鍾謨使還。挾周以爲己重。所言率見聽。而謨本善李德明。欲爲報仇。屢陳齊丘乘國危殆。竊懷非望。且黨與衆。謀不可測。元宗遂命殷崇義草詔曰。惡莫甚於無君。罪莫深於賣國。放歸九華山。而不奪其官爵。初命穴牆給。

食俄又絕之。以餒卒。諡醜繆。覺徵古皆誅死。未幾。元宗燕居。見齊丘爲厲。叱之不退。遂遷南都。後主立。召其家還金陵。廩給甚厚。方齊丘敗時。年七十三。且無子。若謂窺伺謀篡竊。則過也。特好權利。尙詭譎。造虛譽。植朋黨。矜功忌能。飾詐護前。富貴滿溢。猶不知懼。扭於要君。闇於知人。覺隙遂成。蒙大惡以死。悲夫。論曰。世言江南精兵十萬。而長江天塹。可當十萬國。老宋齊丘機變如神。可當十萬。周世宗欲取江南。故齊丘以反間死。方五代之際。天下分裂。大亂。賢人君子。皆自引於深山大澤之間。以不仕爲得。而馮道有重名於中原。齊丘擅衆譽於江表。觀其人。可以知其時之治亂矣。周師之犯淮南。齊丘實預議。雖元宗不盡用。然使展盡其籌策。亦非能決勝保境者。且世宗豈畏齊丘機變而間之者哉。蓋鍾謨自周歸。力排齊丘殺之。故其黨附會爲此說。非其實也。予論序齊丘事。盡黜當時愛憎之論。而錄其實。覽者得詳焉。

卷第五

周徐查邊列傳第二

周宗。字君太。廣陵人。少遇亂。孤窮。事烈祖爲給使。闕於擯。相辭令。方時艱難。每使四方。輒稱職。端敏可仗。恩顧日洽。烈祖鎮金陵。爲都押衙。時用宋齊丘議。迎吳讓皇。都金陵。繕府治爲宮。馬步都虞候蔡弘業爲宮城營奉使。徙都統府於古臺城。使都教練使孔昌祚營之。都統府成。凡二千四百間。環一千五百步。烈祖已徙居。且迎讓皇矣。宗請問曰。若主上西遷。則公當東駕。勞費方始。怨嗟將日聞矣。烈祖納之。託以歲不利而止。自是宗益預議論。齊丘始忌之。一日。烈祖臨鏡。理白鬚。太息曰。功業成而吾老矣。奈何。宗適侍

側。悟微指。乃請如廣陵。諷讓皇以禪代事。亦請諭齊丘。齊丘心忌。大議自宗發。及其將還。留與飲酒。而遣騎以手疏切諫。烈祖得之。大悔懼。後數日。齊丘馳至金陵。爲險語動烈祖。請斬宗以謝國人。烈祖將從之。徐玠固爭。事乃已。但黜宗爲池州副使。玠又與李建勳等言。天人之望已集。密定大計。復召宗還舊職。烈祖受禪。宗躡進至內樞。使同平章事。遷侍中。時以樞密爲內樞者。猶避吳武王諱也。烈祖常召宗。及宋齊丘。馬仁裕。宴於崇英院。歎燕道舊爲樂。他將相莫預。然待宗尤親厚。不甚以職務嬰之。宗亦能澹然。畏遠權勢。居家節儉。俸賜皆積不用。故齊丘黨雖日讒之。不能害。久之。乃罷爲江州節度使。有俞文貞者。早遊烈祖幕府。宗及馬仁裕皆趨走執事。左右及宗出鎮。文貞仕宦躡躡。猶爲其州巡官。方旅見。輒越次問曰。馬押衙亡恙。宗曰。馬相公已鎮廬州。文貞願同列。匿笑而退。他日。預公設。宗勸以酒。文貞俛首曰。下官小戶。令公所熟知也。聞者大駭。而宗怡然不動。其寬厚如此。徙宣州節度使。入覲。賜宴。元宗親爲摺襟。頭脚以表殊禮。復出留守東都。請老。以司徒致仕。歸金陵。馮延魯代爲留守。會周師陷廣陵。延魯自髡而逃。見執於周人。束縛桎梏。僅得免死。時人益以宗享福終始爲異。俄而宗病卒。年七十餘。宋齊丘時以太傅奉朝請。撫其棺。哭曰。君大黜。來亦得時。去亦得時。元宗聞之。不平。宗二女皆爲後主后。

徐鍇。字楚金。會稽人。父延休。字德文。風度淹雅。故唐乾符中進士。昭宗狩石門。無學士草詔。延休來調官。適在旁。近逆旅。左右言其工文詞。卽召見。命視草。昭宗善之。及還長安。不得用。梁蔣玄暉辟爲其佐。延休棄去。依鍾傳於洪州。吳取江西。得延休。仕至光祿卿。江都少尹。卒。二子。鍇。鍇遂家廣陵。鍇四歲而孤。母方教。鉉就學。未暇及鍇。鍇自能知書。稍長。文詞與鉉齊名。昇元中。議者以文人浮薄。多用經義法律取士。鍇

恥之。杜門不求仕進。鉉與常夢錫同直門下省。出錯文示之。夢錫賞愛不已。薦於烈祖。未及用。而烈祖殂。元宗嗣位。起家祕書郎。齊王景達奏授記室。時殷崇義爲學士。草軍書。用事謬誤。錯竊議之。崇義方得君。誣奏錯泄禁省語。貶烏江尉。歲餘召還。授右拾遺。集賢殿直學士。論馮延魯有罪無才。人望至淺。不當爲巡撫使。重忤權要。以祕書郎分司東都。然元宗愛其才。復召爲虞部員外郎。後主立。遷屯田郎中。知制誥。集賢殿學士。改官名。拜右內史舍人。賜金紫。宿直光政殿。兼兵吏部選事。與兄鉉俱在近侍。號二徐。初。錯久次當選中書舍人。游簡言當國。每抑之。錯乃詣簡言。簡言從容曰。以君才地。何止一中書舍人。然伯仲並居清要。亦物忌太盛。不若少遲之。錯頗快。快。簡言徐出。妓佐酒。所歌詞皆錯所爲。錯大喜。乃起謝曰。丞相所言。乃錯意也。歸以告鉉。鉉嘆息曰。汝癡絕。乃爲數闕歌。換中書舍人乎。錯凡四知貢舉。號得人。後主寔所製文。命爲之序。士以爲榮。錯酷嗜讀書。隆寒烈暑。未嘗少輟。後主嘗得周載齊職儀。江東初無此書。人無知者。以訪錯。一一條對。無所遺忘。其博記如此。既久處集賢。朱黃不去手。非暮不出。少精小學。故所雜書尤審諦。每指其家語人曰。吾惟寓宿於此耳。江南藏書之盛。爲天下冠。錯力居多。後主嘗嘆曰。羣臣勳其官。皆如徐錯。在集賢。吾何憂哉。李穆來使。見錯及鉉。嘆曰。二陸之流也。嘗夜直。召對論天下事。因及用人。才行孰先。後主曰。多難當先才。錯曰。有人才如韓彭。而無行。陛下敢以兵十萬付之乎。後主稱善。時國勢日削。錯憂憤鬱鬱。得疾。謂家人曰。吾今乃免爲俘虜矣。開寶七年七月卒。年五十五。贈禮部侍郎。諡曰文。著說文通釋。方輿記。古今國典。賦苑。歲時廣記。及他文章。凡數百卷。錯卒。逾年。江南見討。比國破。其遺文多散逸者。

查文徵歙州休寧人。幼好學。能自刻苦。手寫經史數百卷。稍長。任氣好俠。聞人困乏。雖不識。必濟之。家本富。坐是窮空。不悔也。或遺以金帛。一夕盜入其家。盡取去。文徵不言。雖鄰里莫知者。久之。盜敗於旁邑。移文訊驗。人始知之。咸推其量。烈祖輔政。初入謁。烈祖召與語。偉其論。宋齊丘亦稱薦之。徐知諤領浙西。以文徵爲其判官。或獻玉盃。知諤喜。詩以饒百萬。趣開宴。出盃行酒。至文徵。偶墮地碎。一坐皆驚。而文徵自若。烈祖受禪。入爲監察御史。元宗立。進諫議大夫。中書舍人樞密副使。閩主延義與其兄延政相攻。延政以建州建國稱殷。而延義爲其下所殺。推立大將朱文進。元宗欲討文進。文徵以爲延政首亂。當先致討。有翰林待詔臧循者。與文徵同里巷。少嘗爲賈入閩。習知其山川險易。爲陳進兵之策。文徵本好言兵。遂請行。元宗乃以爲江西安撫使。令至境上。審觀可否。文徵銳於成功。至上饒。復命。盛言必克。詔發洪州屯兵。以邊鎬爲將。從文徵攻建州。建人厭王氏之亂。伐木開道。迎我師。行次蓋竹。遇建州兵。至。又聞泉漳汀州皆歸。延政恐懼。退保建陽。時臧循亦爲別將。屯卻武。延政襲破之。獲循。斬於建州。軍聲大。元宗遣何敬洙等來援。敬洙鎬與建州兵相持。文徵得建之降將孟堅。使潛師出其後。擊之。建州兵大敗。潰去。遂傳其城。雖下建州。諸軍無紀律。殺掠不禁。民始失望。有叛志矣。元宗知而置不問。策功。遷撫州觀察使。又拜建州留後。由是文徵益自用。時李弘義挾吳越兵據福州。僞遣謀來告福州亂。文徵喜。率劍州刺史陳誨赴之。誨將舟師至福州城下。擊敗其兵。執吳越將馬先進等三人。文徵以步騎繼至。弘義陽遣卒數百人出迎。而設伏西門以待。文徵傳令徑入其城。陷伏中。大敗。墜馬被執。送錢塘。將士死者萬人。元宗遣使歸馬。先進於吳越。而求文徵。吳越王遣使將發。爲置酒。實毒。歸至金陵。毒始作。元宗使醫視之。醫以珠置口。

中。有頤珠色變黑。醫曰。疾不可爲。然猶十年乃死。文徽遂病瘖。以工部尙書致仕。朱元降周。坐親黨安置。宣州卒年七十。距遇毒之歲。正十年云。諡曰宣子元方。元規。元素。元範。元實。元方事後主。爲水部員外郎。吉王從謙掌書記。從謙朝京師。太祖命知制誥。盧多遜燕從謙於館。多遜弈棋。次顧元方曰。江南竟何如。元方敏枉曰。江南事大朝十餘年。極君臣之禮。不知其他。多遜推枰愧謝曰。勿謂江南無人。使還。通判建州。盧絳據歙州。傳檄至建元方立斬其使。及絳平。太祖聞元方所爲大悅。擢殿中侍御史。知泉州。卒。官元方子道。龍圖閣待制。始徙家海陵。純厚長者。以文行稱於時。道從兄陶。及事後主。國亡入朝。仕至祕書少監。知審刑院。與道尤極友愛。自金陵破。士族流離。多貧困失職。惟道兄弟盡力收恤。聚食常數百人。得任子恩。皆以與族人。以少長爲先後。無親疏之間。異姓亦分俸給之。時其婚姻。由是常苦貧。而查氏至今爲海陵望族。許國籊皆其後也。

邊鎬。金陵人。少事烈祖爲通事舍人。以通敏稱。保大初。循州人張遇賢。本羅縣小吏。有神降於縣之刻杉鏡。語人曰。張遇賢非常人。當事我。遇賢往事之。會州境羣盜起。各擁衆數百。無所統。相與禱於神。神又大言曰。張遇賢汝主也。遇賢遂稱王。改元。置百官。度嶺襲虔州。節度使賈浩閉門登陴。不敢出。遇賢據白雲洞。衆十餘萬。元宗遣洪州營屯都虞候嚴思。率所部討之。鎬爲監軍。虔有書生白昌裕。沉密有謀。鎬引與定計。刊木開道。襲白雲洞。會遇賢所事神棄去。不復降語。賊衆遂潰。其裨將李台執之以降。策功。遷洪州營屯諸軍都虞候。二年。查文徽以樞密副使出師伐建州。詔鎬爲行營招討。洪撫饒信歙等州諸指揮都虞候。從文徽行。然衆纒數千。戰敗退舍。元宗聞之。遣何敬洙祖全恩。姚鳳來援。敬洙與鎬進兵奪其險要。

自崇安進次赤嶺。與建兵方相持。爲背水陣。文徽使騎緣出建兵之後。與敬洙鏘夾擊。大破之。遂取建州。降王延政。復取漳州。事平。諸將皆爭功。鏘獨無一言。七年。楚馬氏兄弟相攻。希萼雖勝。而尤無道。元宗知楚難方殷。以鏘爲信州刺史。領屯營兵。兼湖南安撫使。駐袁州。萍鄉有警。許便宜從事。楚人果復廢立。鏘自萍鄉帥師入潭州。遷馬氏之族。及文武將吏於金陵。遂拜潭州節度使。南漢將潘崇徹攻彬州。鏘出兵爭之。敗績。遂失彬州。鏘懼南漢寇邊未已。請除道全二州刺史。詔以廖偃爲道州刺史。張繼權知全州。然湖湘之憂。實不在南漢也。自馬氏廢立以來。密藏空竭。土地旣歸我。馮延巳爲相。於平楚之功。不欲取費於國。專拮斂楚人。以給經費。人心已離。鏘柔而無斷。日飯沙門希福。紀綱頽弛。不之問。初。成師朗來歸。以其所部爲奉節軍。從鏘入楚。屢給薄於楚之降卒。偶語怨望。而糧料使王紹顏。每給奉節糧。輒刻削之。軍校孫朗欲殺紹顏。紹顏匿困下得免。官屬請斬紹顏。以謝將士。鏘不聽。朗乃謀殺鏘。及紹顏。據湖南。歸中原。夜率所部。取草燒府門。火輒不發。良久。傳漏者覺之。以告鏘。出銜兵與鬪。勝負未決。鏘命吹角。亂兵少。以爲將旦。亟斬關奔朗州。盡以潭州虛實告劄言。言久懷叛志。得朗言大喜。遣其將王進遠。周行逢來攻。鏘亦備言已。而聞人謂忠順傾意信之。及言兵已拔益陽。遂夜棄城出奔。列城皆潰。盡喪楚地。坐削官流饒州。而他將棄城者皆斬。湘中謠言馬去不用鞭。至是而驗。十四年。周師大入齊。王景達爲元帥。出兵援壽州。起鏘爲大將。戰敗被執。世宗命爲右千牛衛上將軍。及元宗割淮南地請盟。世宗乃歸鏘。卒於金陵。

卷第六

周柴何王張馬游刁列傳第三

周本舒州宿松人。漢南郡太守瑜之後。瑜葬宿松。卽墓爲祠。子孫居其旁者。猶數十家。本少孤。羈貧。有勇力。嘗獨格虎殺之。吳武王起。隸帳下。勇冠三軍。每奮躍先登。攻堅摧鋒。蒙犯矢石。身無完膚。戰罷。輒自燒鐵烙其創。食飲言笑自如。累遷至淮南馬步使。武王取江西。撫州刺史危全諷。率諸州兵十萬來爭其地。屯象牙潭。楚人圍高安。以援全諷。江西守將劉威。警書至。武王謀可將者。列官嚴可求薦本。時本從軍取蘇州。不能下。恥之。稱疾臥家。可求自往強起本。本曰。吳門之役。非賊果強。徒以我將帥權輕。下皆專命。故無功。今必見起。勿用偏裨。乃可許之。得精卒七千。晨夜兼行。武王初命之解高安圍。本曰。楚人非欲下高安。第爲全諷聲援爾。今先敗全諷。楚人必棄高安走。何足擊哉。乃馳至象牙潭。急擊之。大破其軍。擒全諷。楚人亦遷。吉州刺史彭玕。信州刺史危仔昌。皆棄城去。江西之地始定。本之初至也。卽揮兵進。劉威欲留宴犒。不許。或曰。敵兵盛。宜審觀形勢。何遽如此。本曰。賊衆加我十倍。使我兵知之。戰先奪氣矣。急乘其鋒用之。乃可有功。已而果如所料。武王奇其能。遂用爲信州刺史。吳越將陳璋。據衢州歸款。越人圍之。武王遣本迎璋。越人解圍出璋。而列兵不動。本遂以璋還裨將呂師造。曰。越有輕我心。必息請擊之。本不可。越人躡我軍至中道。宿夜半。本陽驚。棄輜重走。而設伏於旁。越人果急追。伏發。前後夾擊。盡殲其衆。唐莊宗入洛。吳遣司農卿盧蘋往聘。還言。莊宗知本名。由是召爲威武統軍。俄出鎮壽州。改廬州。加安西大將軍。大尉中書令。西平王。本不知書。然能尊禮儒士。遇僚屬以禮。士民愛之。性朴拙。無他才。惟軍旅之事。若生知者。烈祖將受吳禪。徐玠。周宗等。以本及李德誠名位隆重。諷之使率羣臣勸進。本已昏老。其子祚懼家

禍代暑表上之。本初不知。猶謂所親曰。我受吳室厚恩。老矣。復能推戴異姓乎。吳宗室臨川王濛。廢居歷陽。聞將傳禪。乃殺監守者。與親信兩人。走詣本。本即欲出見之。祚固執不可。本怒曰。我家郎君也。奈何不使我一見。祚拒閉中門。令外人執濛告之。濛遂誅死。本愧恨。屬疾數月。卒。年七十七。本晚好飲酒。樂施子。或曰。公春秋已高。宜少儲積。爲子孫計。本曰。吾繫芒屨事吳武王。位至將相。何人所遺乎。既卒。太常言。準令廢朝三日。烈祖以本舊將。命有司講求優典。禮官言。前朝嘗爲汾陽王郭子儀。廢朝五日。詔用之。諡恭烈。葬給鹵簿。子鄴。

鄴。本長子也。少驍勇。每從其父征討。本爲信州刺史。略地至建州。道經阨。被圍垂困。鄴躍馬救之。手殺數十人。翼本而出。建人駭懼。潰去。事烈祖。典親軍。出爲滁州刺史。暴猛狠戾。常蓄飛揚之志。烈祖以本故優容之。聞歷陽公楊濛被執。歎憤逾月。國人亦以此稱其好義。本卒。後仕至廬州節度使。昇元六年卒。柴克宏。父再用。事吳有功。至德勝軍節度使。克宏以父仕爲郎將。嘗爲宣州巡檢使。初至城。塹皆堙圯。不治。吏云。自田頴王茂章。李遇相繼叛。無敢爲守備者。克宏嘻笑曰。豈有是哉。大加營繕。後吳越兵至。賴以得全。積遷泗州刺史。罷歸。爲龍武軍都虞候。好施子。不事產業。故家常窮空。然性豪舉。博奕縱酒。自若也。時元宗自謂唐後。規取中原。復舊業。羣臣多爲大言。以迎合主意。克弘獨未嘗一語及軍旅。人亦不以爲知兵。以故不遷。久之。出爲撫州刺史。時淮南交兵。吳越伺間來寇。克宏乃請効死行陣。元宗嘉之。授右衛將軍。遣與右衛將軍袁州刺史陸孟俊。同救常州。精兵悉在江北。克宏所將。財贏卒數千。樞密副使李徽古。給戈甲皆朽鈍。克宏言於徽古曰。卒已非素練。得器械堅利。猶可用。奈何所給乃此等。徽古謾罵之。見

者皆忿。克宏知徵古狂生，不足與較，是非怡然不少動。至潤州，徵古終不快，白召克宏歸。以神武衛統軍朱巨業代之。燕王弘冀獨以爲克宏可任，卒遣行。克宏帥師至常州，徵古猶遣使趣其歸。克宏曰：「吾計日破寇，爾何爲者？」必錢氏所遣奸人也，命斬之。使者曰：「受李樞密命來。」克宏曰：「李樞密來，吾亦斬之。」遂斬使者。以狗然後勒兵進。大破吳越兵於常州，斬萬級，獲其將數十人。自保大來邊事大起，克敵之功，莫先克宏者。拜奉化軍節度使。復上疏請援壽春，行至泰興，發瘍數日卒。國人莫不痛惜。諡威烈。或云：「初，克宏母自表其子可爲將，徵古抑之。母又言克宏有父風，苟不勝任，分甘孛戮。」元宗始用焉。及徵古誅死，詔暴其罪，亦以折辱克宏爲言云。

何敬洙，廣陵人。幼遇亂，吳將楚州刺史李簡得之，給事左右。簡酷暴，僕使有小過，率置之死。不少貸。敬洙與其伍戲小廳下，有持簡所寶硯過焉。顧曰：「孰敢毀此者？」敬洙時被酒，奮曰：「死生有命，何不敢之？」有奪硯擲石階上，碎之。翼旦，簡視事退，聞硯毀，詰主者，具以實對。卽命擒至，皆謂必死矣。簡妻素奇敬洙，匿之堂奧。旬日，簡謂已逃去，亦置不問。會有烏逐簡而噪，避之，亦隨至。大怒曰：「恨何敬洙不在此。」敬洙善射，命中無所遺。故思之，語未畢，敬洙挾朱彈鐵丸拜於前，拜起，一發斃之。簡大喜，不復詰毀硯事。有善相者，簡使相諸子曰：「雖皆善，然無及公者。」獨指敬洙曰：「此人殆過公。」簡由是益愛之。及長，用爲軍校。簡卒，事烈祖爲裨將。進天威軍都虞候。建州之役，爲行營招討長步軍都指揮使。會查文徽進討，敬洙堅謂閩地僻陋，不足勞大兵。文徽開譬之，不得已而行。及平建州，敬洙功最諸將。然以功推王建封，無吝色。拜楚州團練使。敬洙自以初事李簡於是州，尤自感觸。常微服遊里巷，察民疾苦，有科調輒先爲經畫。民不知勞，坐聽事。

與實佐譚謙。民有訴事者，立引入，親自剖折曲直，皆厭服而出。保大八年，楚朗州節度使馬希萼來附，且乞師。元宗命敬洙援之，遷武昌軍節度使。周人侵淮南，命武安軍節度使王進逵領所部州師入江南境，進逵奉詔行，且遣部將潘叔嗣爲先鋒，取鄂州長山寨，殺三千人。元宗命敬洙清野入保，敬洙格詔出城，除地爲戰場，曰：敵至，吾與丘民俱死於此。丈夫豈能備備閉門自守邪？會叔嗣自長山回，戈襲朗州，進逵狼狽而去。人重其決，加鎮國將軍、中書令。後主嗣位，以病足乞解官，授右衛上將軍、芮國公，致仕，給全俸。第門列戟。乾德二年二月卒。年七十七。廢朝三日。命樞密使、中書侍郎朱鞏持節冊贈鄂州大都督、左衛上將軍，諡威烈。

王會，廬州廬江人，本名安，少事吳武王。王嘗臨戰，升高冢望敵，安捧唾壺侍側，左右皆注目前視，忽有卒持稍徑趨王，莫能禦者，會置壺於地，引弓射之，一發而殪。徐納弓，破中，復捧壺立，色不變。王喜，撫其背曰：汝器度如此，他日必富貴。積功至袁州刺史。烈祖代吳，用爲百勝軍節度使。虔州與嶺南地接，南漢使者往來，節度使當燕勞問遺，而會故名，犯漢王祖諱，乃賜今名。昇元五年卒。年七十三。

張延翰，字德華，宋州睢陽人。故唐之末，任爲陝州司馬，從父慎思，擢徐州留後。延翰往省之，告以北方將亂，欲避地江淮，以全家祀，慎思是其言，慨然遣之。入吳，爲鹽城令，有治績。烈祖以平章事領江州，封潯陽侯。表延翰爲江州觀察、巡官、通判軍府事。烈祖代吳，入爲侍御史，判臺事。張宣爲左衛使，恃功驕暴，延翰廷劾之，強豪屏跡。進禮部侍郎，自以起疏遠，遭時被知，得盡己才，感槩自盡。時未設貢舉士，有獻書論事者，第其優劣，選用。烈祖悉以委延翰，號爲精覈稱職。兼選事務，進孤貧，吏不敢爲奸利。元宗輔政，謂人曰：

張君議論公正。處事悉有條理。吾得傾心聽之。由是六司綜領殆遍。時望歸重。拜中書侍郎同平章事。時年財五十餘。人猶以爲柄用晚。屬疾益侵。不復能治事。烈祖以爲國器。方一意任之。不許其去。遣使勞問。賜良藥。勞午於道。卒。年五十七。贈太傅。

馬仁裕。徐州人。唐北平王愬裔。孫世爲武寧軍校。仁裕母方娠。夢傳呼北平王來歸。及生。紫氣充庭。數歲。學兵法。通解若素習。遇亂南奔。事烈祖爲昇州牙吏。烈祖領潤州。仁裕監蘇山渡。首開朱瑾之亂。馳入白之烈祖。卽日渡江定亂。以功遷左領軍將軍。歷楚州刺史。右金吾衛大將軍。烈祖代吳。拜潤州節度使。徙廬州。爲政寬簡。廉平。甚得民心。昇元六年卒。於鎮。初烈祖左右小臣親信者。惟周宗及仁裕兩人。任遇略等。宗力贊禪代事。遂輔政。其後富盛冠一時。仁裕資長者。獨退然安於外鎮。晚益貧窶。不悔也。卒年六十。三諡曰匡。

游簡言。字敏中。建安人。父恭。吳駕部員外郎。知制誥。簡言少孤。力學。起家祕書省正字。烈祖鎮金陵。以爲戶曹參軍。典元帥府書檄。遷觀察推官。烈祖代吳。爲中書舍人。元宗嗣位。遷翰林學士。禮部侍郎。貞介。獨不附權要。元宗頗重其爲人。命判中書省兼吏兵部選事。裁抑僥倖。憎疾者衆。選人卽唐試判不中。上書言簡言父恭嘗爲鄂州林洪掌書記。洪獎成朱溫篡弒。恭預其謀。簡言逆臣子。當斬。請正國法。元宗怒。唐挾私忿。誘譖。決杖流饒州。及淮南交兵。吳越亦伺釁攻常州。執團練使趙仁澤。歸於錢塘。仁澤見吳越王。責以敗盟。吳越王怒。挾其口至耳。方議遣使詰責。吳越羣臣畏懼。莫敢往。元宗以命簡言。簡言不辭。見其子懋。爲千牛備身。將發。拜中書侍郎。未出境。召還。及遷都豫章。立吳王爲太子。留西都監國。以簡言爲輔。

簡言力辭。言久備近臣。不忍去帷幄。元宗嘉其一心事主。無微後福意。卽從其請。更用嚴續。而後主亦由是賢之。拜吏部尙書。知省事。簡言親治簿書。督責嚴峻。人或以事請托。必固違拂。雖直亦不得伸。議者譏其過。拜左僕射。兼門下侍郎。同平章事。疾已篤。不及視事。卒。年五十七。

刁彥能字德明。上蔡人。父禮。遇亂。徙家宣州。彥能少孤。事母篤。孝家貧。無以養。乃事節度使王茂章。茂章叛吳歸吳。越彥能以帳下當從。乃使家人扶其母俟於道左。彥能泣告茂章曰。彥能有老母在此。不能捨而從公。敢請死。茂章哀其意。許之。乃馳還宣州。而城中已亂。彥能登城。以劍招之曰。我從王府來。大軍已近。爾輩無妄動。衆信之。稍定。義祖聞而嘉之。以爲軍校。事其子知訓於廣陵。知訓狂恣。彥能每切諫。不聽。然亦不加罪。牙將馬謙以衆擁吳主登宮門。將殺知訓。彥能從朱瑾入手。斬謙。以獻。賞賚甚厚。然彥能警敏。觀知訓必敗。而人望在烈祖。心常附焉。知訓忌列祖。數欲害之。嘗與列祖飲酒。而伏劍士室中。彥能行酒。以爪語烈祖。列祖悟。亟起去。又嘗從知訓宴。列祖於山光寺。復欲加害。弟知諫摘語列祖。列祖亦馳去。知訓取佩刀授彥能。使追殺之。及於途。舉刀示先主。乃還。以不及告。及知訓死。義祖見彥能諫書。歎異。復使事。知諫於潤州。遷裨將。烈祖代吳。入爲環衛。遷至天威軍都虞候。左衛使。金陵數大水。秦淮溢。東關尤被害。彥能請築隄爲斗門。疏導之。水患稍息。元宗嗣立。出爲饒州節度使。徙信州。又徙建州。留後撫州。節度使。彥能好讀書。在鎮。委任文吏。頗有治稱。好作詩。嘗與李建勳相答贈。建勳因燕見及之。元宗笑曰。殊不知彥能乃西班牙學士也。性矜莊。燕居。容服不少惰。時貴宴飲。或蓬首裸袒。彥能在坐。則皆肅然。保大末卒。年六十八。子衍。事後主爲祕書郎。集賢校理。以文翰見知。擢直清輝殿。閱中外章奏。國亡入朝。仕至兵

部郎中直祕閣崇文院檢討淳淡夷粹恬於仕進暇日鼓琴圍碁不交人事衍孫約亦名士久在三館晚築室潤州號藏春塢王安石蘇軾皆尊愛之

卷第七

徐高鍾常史沈三陳江毛列傳第四

徐玠字蘊圭彭城人事帥崔洪爲軍吏洪避朱全忠南奔遣玠先見吳武王因得事吳累居右職師出江西爲糧料使江西平授吉州刺史玠初爲小校以幹敏稱及治郡貪狠不治烈祖輔政罷之而義祖悅其善事人引以爲副使遂見親狎玠挾宿怨且希義祖意每與嚴可求言烈祖疏財結士不宜久執國權請以嫡子知詢代之事垂行而義祖歿知詢繼立玠本詭譎多智善揣摩非能爲徐氏計也至是察知詢必敗反持其長短自結於烈祖翹祖亦遂愛之盡忘前事鎮金陵以爲行軍司馬與周宗李建勳孫忌等參代吳祕計遂以佐命拜右丞相出爲宣州節度使徙洪州兼中書令復召爲司徒右丞相然徒崇以名位不復預政老而益貪鄙所至人患苦之好神仙之說嘗以下價市丹砂惡者治丹人以爲笑保太元年五月卒年七十六贈高平郡王

高審思失其家世鄉里少以驍勇事吳武王從劉信平虔州有功爲人重厚沉默烈祖愛之用爲神武統軍出鎮壽州兼侍中在鎮治守備常如有警或曰以公威略守堅城何太懼邪審思曰事變無常不可不遇爲之備及保太末周人來侵諸郡往往一鼓而下惟壽州能堅守以世宗英武將士皆精練然逾年極

兵力不可取。雖劉仁贍善守，亦審思之遺績也。卒於鎮。年七十五。廢朝三日。贈太師。諡曰忠。初術者悉言審思位不至刺史。嘗受命刺常州。固辭不敢行。而其後位兼將相。終始富貴。術之不足信有如此。

鍾謨字仲益。會稽人。徙建安。李德明失其家。世鄉里。保大中俱爲尙書郎。敏於占對。元宗愛之。而天資皆浮躁。沾沾自銜。反覆嶮巇。朝士側目。號爲鍾李。時魏岑已斥復用。姦諛彌甚。謨德明雖與岑若不同。至爲惡。則合若符券。戶部員外郎范冲敏。隨使軍帥王建封。上書歷詆之。請選用正人。元宗大怒。謂建封武人。握兵不當。輒議國政。流建封池州。未至。殺之。冲敏棄市。謨德明自謂君寵可怙。愈縱肆。旁若無人。德明嘗奏事別殿。取元宗所御筆記事。元宗不能堪。曰。卿它日自可持筆來。德明亦自若。謨遷翰林學士。戶部侍郎。德明遷工部侍郎。文理院學士。元宗雅稱兩人有詞辨。欲令說周罷兵。遣如壽州城下。賁御服及犒軍牛酒。世宗前知其欲以口舌游說。大陳兵衛。戈戟以見之。謂曰。江南自謂唐室苗裔。衣冠樂禮。異於它國。與朕隔一水。未嘗遣使修好。惟航海通北虜。此何禮也。今又比朕六國愚主。謂可說使罷兵。何其不知朕也。歸語若主。必臣事我。則兵可罷。不然。徑往金陵。借府庫犒軍。若君臣得無悔乎。兩人股栗。不敢出言。惟曰。寡君震畏天威。願獻壽濠泗楚光海六州。及歲輸方物。世宗以淮南諸州繼陷。欲盡取江北地。不許。德明見周師急攻壽州。度旦暮且下。乃曰。寡君未能知大國兵力。乃爾。願寬臣數日之誅。歸國取表。盡獻江北郡縣。世宗遣德明歸。以書諭江南君臣。語多諂讓。陵肆國人已不堪。而德明方盛稱世宗威德。請必割地。元宗惡其言。宋齊丘力詆割地爲亡益。陳覺言德明賣國以悅敵。不可赦。德明佻薄。語多過實。知割地之說不行。攘袂大言。謂周師必克。元宗益怒。遂斬德明於都市。不復議割地。謨因留不得歸。及孫思之死。

也。謨亦在召中，得不死，貶爲耀州司馬。及元宗割地稱臣，如謨德明初議，世宗乃召謨至京師，授衛尉卿，賜黃金五百兩，遣諭指於元宗，往復數四，謨旣於肆，以爲世宗聽其言，江左可藉以無恐，元宗亦方賴其力，心雖憾之，體貌皆厚，以爲禮部侍郎，判尙書省，而三省之事，靡不預之，勢焰赫然，宋齊丘陳覺李徵古之死，皆出其計。又白請雪德明之罪，贈光祿卿，諡曰忠。太子弘冀參總庶政，謨薦其客閭式爲司議郎，百司關啓必由之，俄而世宗崩，謨自揆無所恃，頗若有失，元宗遇之亦寢薄，初李德明被誅，唐鎬預其事，至是鎬懼修怨，不自安，會鎬以納賄聞，謨面詰其狀，鎬愈懼，信州刺史張巒入爲天威軍都虞候，謨素與之善，每屏人共語，或至中夜，又嘗請使巒帥帳下兵巡都城，鎬廉得之，因密言謨往來兩國，挾周人以脅制朝廷，今與典兵者交結，又請令巡徼釐下，其包藏殆不可測，謨微聞之，念無以爲奇貨，會弘冀卒，後主以母弟當立，而謨嘗與元宗愛子從善同使周，相與親厚，乃言後主器輕志放，無人君之度，因盛稱從善才，不知元宗建儲之意已決，更以此忤旨，乃暴其交結張巒等罪，貶國子司業，又貶著作佐郎，安置饒州，遣中使領侍衛軍十人，即日督促乘驛而去，謨時方病風眩，在途賦詩十章，語皆悽愴，巒出爲宣州副使，建隆元年正月，元宗聞太祖受周禪，乃遣使如饒州，賜謨死，問曰：卿昔與孫忌使周，忌死而卿獨生，還何也？謨頓首伏罪，遂縊殺之，巒亦坐誅，謨有女，感家禍，不嫁，爲道士，名守一，博通孔老書，尤善講說，端拱中京師建洞真宮，召守一爲道職云。

常夢錫字孟圖，扶風人，或曰京兆萬年人也。岐王李茂貞不貴文士，故其俗以狗馬馳射博奕爲豪，夢錫少獨好學，善屬文，累爲秦隴諸州從事，茂貞死，子從儼襲父位，承制補寶雞令，後唐長興初，從儼入朝，以

夢錫從。及鎮汴。爲左右所譖。遂來奔。烈祖輔吳。召置門下。薦爲大理司直。及受禪。擢殿中侍御史。禮部員外郎。益見獎遇。遂直中書省。參掌詔命。進給事中。時以樞密院隸東省。故機事多委焉。夢錫重厚方雅。多識故事。數言朝廷因楊氏霸國之舊。尙法律。任俗吏。人主親決細事。煩碎失大體。宜修復舊典。以示後代。烈祖納其言。頗議簡易之法。元宗在東宮。有過失。夢錫盡言規正。無所撓。始雖不悅。終以諒直多之。及即位。首召見。慰勉欲用爲翰林學士。以自近。宋齊丘黨惡。其不附己。坐封駁制書。貶池州判官。及齊丘出鎮。召爲戶部郎中。遷諫議大夫。卒以爲翰林學士。復置宣政院於內庭。以夢錫專掌密命。而魏岑已爲樞密副使。善迎合。外結馮延巳等。相爲表裏。夢錫終日論諍。不能勝。罷宣政院。猶爲學士。如故。乃稱疾。縱酒。希復朝。會鍾謨李德明分掌兵吏諸曹。以夢錫人望。言於元宗。求爲長史。拜戶部尙書知省事。夢錫恥爲小。人所推薦。固辭不得請。惟署牘尾。無所可否。延巳卒。文致其閨門罪。貶饒州團練副使。夢錫時以醉得疾。元宗憐之。留處東都。留守周宗力勸夢錫止酒。治疾。從之。乃少瘳。召爲衛尉卿。改吏部侍郎。復爲學士。交泰元年。方與客坐談。忽奄然卒。年六十一。卒後財逾月。齊丘黨與敗。元宗歎曰。夢錫平生欲去齊丘。恨不見之。贈右僕射。諡曰康。夢錫文章典雅。有承平之風。歌詩亦清麗。然絕不喜傳於人。剛褊少恕。每以直言忤物。嘗與元宗苦論齊丘輩。元宗辯博。曲爲解釋。夢錫詞窮。乃頓首曰。大姦似忠。陛下若終不覺悟。家國將爲墟矣。元宗不答。而心善之。及割地降號之後。公卿在坐。有言及周以爲大朝者。夢錫大笑曰。汝輩嘗言致君堯舜。何故今日自爲小朝邪。衆皆默然散去。每公卿會集。輒暗鳴大咤。驚其坐人。以故不爲時所親附。然旣沒。皆以正人許之。雖其仇讎。不敢訾也。

史虛白字畏名世家齊魯虛白隱居嵩少著書中原喪亂與北海韓熙載來歸時烈祖輔吳方任用宋齊丘虛白誦言曰吾可代彼齊丘不平欲窮其技能召與宴飲設倡樂奕棊博戲酒數行使製書檄詩賦碑額虛白方半醉命數人執紙口占筆不停綴俄而衆篇悉就詞采磊落坐客驚服虛白數爲烈祖言中原方橫流獨江淮豐阜兵食俱足當長驅以定大業毋失事機爲他日悔烈祖不能從虛白乃謝病去南遊至九江落星灣因家焉常乘雙犢版轆掛酒壺車上山童總角負一琴一酒瓢以從往來廬山絕意世事保大初熙載爲史館修撰薦虛白可用元宗召見訪以國事對曰草野之人漁釣而已安知國家大計賜宴便殿醉溺於殿陛元宗曰真隱者也賜田五頃放還山及元宗南遷豫章次蠡澤虛白鶴裘藜杖迎謁道旁元宗駐蹕勞問曰處土居山亦嘗有所賦乎曰近得谿居詩一聯使誦之曰風雨揭却屋潭家醉不知元宗變色厚賜粟帛上樽酒徐鉉高越謂之曰先生高不可屈肯使二子仕乎虛白曰野人有子賢則立功業以道事明主愚則負薪捕麋以養其母僕未嘗介意也不敢以累公鉉越媿歎卒年六十八將終謂其子曰官賜吾美酒飲之略盡尙留一榼吾死置藜杖及此酒於棺中四時勿用祭享無益死者吾亦不欲子皆從之孫溫天聖中仕爲虞部員外郎獻虛白文集仁宗皇帝愛之追號虛白冲靖先生

沈彬洪州高安人唐末浪迹湖湘隱雲陽山好神僊喜賦詩句法清美烈祖輔吳表授祕書郎與元宗遊俄懇求還山以吏部郎中致仕元宗遷南都彬年八十餘來見曰臣久處山林不預世事臣妻曰君主人郎君今爲天子何不一往臣遂忘衰老而來元宗命毋拜厚賜粟帛以其子爲祕書省正字彬先歲嘗策杖郊原手植一樹識之語其子曰吾當藏骨於此及卒伐樹掘地至丈餘得一石槨製作精麗光潔可鑑

蓋上有篆云。開成二年壽標舉棺就之。廣袤中度。次子廷瑞。有道術。嗜酒却粒。寒暑一單褐。數十年不易。跣行。日數百里。林棲路宿。多在玉筍浮雲二山。老而不衰。後不知所終。

陳況。閩人性夷澹。隱於廬山四十年。衣食之絕。不以動心。苦思於詩。得句未成章。已播遠近。元宗聞其名。召見。時方祁寒。元宗見其衣單薄。降手札曰。欲以綾綺衣賜卿。卿必不受。今賜朕自服。絢縑衣三十事。俄授江州士曹掾。固辭歸。卒於山。中年七十餘。

陳曙。蜀人。嘗舉進士。唐末。避地淮南。多遜於蘄州山中。鄉人有會集。或祭神。曙不待召而至。醉飽乃辭去。由是人多設虛座。陳酒肴以俟之。同日或至數家。舍中惟一榻。素書數卷。與蛇虎雜居。不設牖戶。雨雪滿室。亦自若。人有乘其出往關之者。曙必自外來。凡數十年。顏鬢不少異。元宗命中書舍人高越召之。不肯起。後徙居鄂渚。及洪之西山。不知所終。

陳陶。嶺南人。少學長安。昇元中南奔。將求見烈祖。自度不合。乃隱洪州西山。歎曰。世豈無麟鳳。國家自遺之耳。保大末。有星孛於參芒。指東南。陶語人曰。國其幾亡乎。果失淮南。元宗南遷豫章。至落星灣。將訪以天象。恐陶不肯盡言。以其素嗜鮓。乃使人僞言賣鮓。至門。陶果出。啗鮓。喜甚。賣鮓者曰。官舟至。落星矣。處士知之乎。陶笑曰。星落不還。元宗聞之不懌。遂不復問。是歲果晏駕。西山產靈藥。陶與妻日斲而餌之。不知所終。開寶中。南昌市有一老翁。丫結被褐。與老嫗賣藥。得錢則沽酒市鮓。相對飲啗。既醉。歌舞道上。其歌曰。藍采和。藍采和。塵世紛紛事更多。何如賣藥沽美酒。歸去青崖拍手歌。或疑爲陶夫婦云。

江夢孫。字聿修。潯陽人。烈祖輔吳。表爲祕書郎。夢孫數自言迂儒無裨益。平生讀書欲小試於治民。求爲

總令方是時。士之客於烈祖者。率以功名富貴自許。而夢孫言獨如此。烈祖以爲不情。不之許也。求不已。而補天長令烈祖先持告身示之曰。今日受此。明日趨走庭下矣。曰。此素志矣。庸何傷。乃授之。至天長吏白縣署正寢有淫厲。不可居。夢孫不從。是夕果有怪並出。夢孫起焚香曰。夢孫受命爲令。常治事於此。鬼神有祠廟丘壟。胡不各歸其所。吾行不欺暗室。奚畏君等。語訖。皆斂迹。夢孫治縣寬簡。吏民安之。逾年。棄官去。縣人號泣送之數十里。還家。事繼母盡孝。早暮潔衣冠。視膳羞母食。旣徹。爲諸生講禮。凡至疑義。輒斂衽曰。此科先儒猶多異同。夢孫安敢輕言。諸君自擇所長可也。保大中卒。年八十五。贈國子司業。

毛炳。洪州豐城人。隱居廬山。時爲諸生講。得錢卽沽酒。嘗醉臥道旁。有里正掖起之。炳瞋目呵之曰。醉者自醉。醒者自醒。亟去。毋撓予。睡後徙居南臺山數年。忽書齋壁曰。先生不住此。千載惟空山。因大醉。一夕卒。與炳同時。又有酒禿者焉。酒禿姓高氏。駢族子。棄家祝髮。博極羣書。善講說。而脫略跌宕。無日不醉。後主召講華嚴。梵行一品。資金帛甚厚。玄寂卽日盡送酒家。日夜劇飲。醉則從小兒數十。浩歌道中。歌曰。酒禿酒禿。何榮何辱。但見長生正茂。不見工可變。瘦谷。一日醉死石子岡。

卷第八

三徐三王二朱胡申屠喬睦列傳第五

義祖生六子。知訓。知詢。知誨。知諫。知證。知諤。及烈祖開國。惟知證。知諤。在餘皆前卒。

徐知證。義祖第五子也。事吳。歷州刺史。至節度使。烈祖初尊義祖爲太祖。復姓改義祖封。拜徐氏與李氏。

同。知證王江。改王魏。元宗嗣位。尤見尊禮。內宴用家人禮。起舞拜跪爲壽。知證亦以叔父自處。無所讓。卒年四十二。

徐知諤。義祖第六子。在吳亦爲節鎮。代知詢爲金陵尹。烈祖初。封饒王。進王梁。鎮潤州。兼中書令。好奇寶怪物。所蓄不可計。有蜀估持鳳首至。自言得之徼外蠻夷。狀如雄雞。廣五寸。冠上正平。可用爲枕。朱冠金喙。文彩煥爛如生。人咸異之。一日遊蒜山。除地爲場。連虎皮爲大幄。號虎帳。與賓僚會飲其中。忽暴風至。裂帳。盡碎如飛蝶。知諤懼而歸。屬疾數日卒。平生常語客曰。人生七十爲大限。吾生長王家。窮極歡樂。一日可敵世人二日。年三十五。其死乎。至是如其言。廢朝七日。烈祖悲悼。復詔不視朝者七日。斂以袞冕。及上方祕器。諡曰懷。十子皆貴顯國中。所著文賦歌詩十卷。號閣中集。

徐遊。知誨子也。初名景。遊避元宗名。去景字。知誨於元宗有舊恩。故元宗待遊及兄汝南郡公遼。尤親厚。出入宮省。備顧問。預籌畫。專典宮室營繕及浮屠事。當時言蠹政者以兩人爲首。後主嗣位。好爲文章。遊復以能屬文見昵。封文安郡公。燕飲則流連酣咏。更相倡和。雖后妃在席。不避也。昭惠后好音。時出新聲。或得唐盛時遺曲。遊輒從旁稱美。有三閣狎客之風。閒居講論古今得失。後主設問。遊具以所聞對。或遊有疑。以請。後主亦引經義。或古事。稱制答之。君臣相矜。至國亡不悟也。遊有巧思。欵器之制。久不傳。人無知者。遊獨以意創製。皆合古法。太平興國中。蘇易簡爲學士。得之。暇日。試於玉堂。太宗皇帝聞而取視之。歎賞不已。方金陵之將亡也。徐錯屬疾。忽夢巨人持大鐵篋。取已及兄鉉。并遊。同納篋中。篋之錯與遊皆墜地。而鉉獨否。俄錯遊皆以疾卒云。

王建封上元人。少從軍。以任俠驍勇知名。元宗取建州。建封爲先鋒橋道使。焚建州外郭。克之。王延政降。何敬洙功最諸將。建封忿曰。我縱火先登克城。諸軍乃能入。我功當第一。敬洙因推之曰。君言是也。具以聞諸朝。第賞拜信州刺史。人皆多敬洙而薄建封。陳覺。馮延魯。魏岑攻福州。李弘義圍之。敗吳越援兵。福州援絕。危蹙。且拔矣。而覺延魯岑各欲功在己。不相應接。偏裨莫肯用命。故未能克。覺奏請建封濟師。建封率五千人會之。破福州版寨。入東武門。而建封亦與諸將爭功。遽斂兵先退。弘義乘之。我軍復敗。遂潰而歸。元宗深銜建封。顧方治覺等擅與未及治也。建封內不自安。元宗懼其作亂。召爲天威軍都虞候。付以親軍。建封遂泰然。恃恩僭侈。無復顧憚。戶部員外郎范冲敏疾魏岑。鍾謨。李德明用事。就建封上書。歷譏岑等。請更用正人。元宗遂發怒。謂建封武臣。握精兵。敢干國政。謀進退柄臣。其漸不可長。流池州。未至。殺之。冲敏棄市。未幾。岑覓冲敏爲厲。請道士上章訴天。數月竟死云。

王彥儔。蔡州上蔡人。少爲州軍校。唐同光末。諸郡多亂。彥儔亦樂禍。思奮會同列六人者。來與謀曰。四郊恟恟。能者得富貴。我輩不可後人。彥儔許諾。且曰。今夕吾直府中。公等可持兵來。吾亦裹甲爲內應。既夜。六人者如約俱至。彥儔伏壯士盡捕斬之。持其首叩帳門。告刺史曰。姦盜竊發。幸已伏誅。懼有伏黨。爲變。願公亟號令以安衆心。刺史驚喜而出。彥儔卽斬之。歸其罪於六人者。翼日。悉族六家。據蔡州。無敢動。唐兵來討。彥儔自計不能守。匿其妻子於村舍。奉父母來奔。烈祖輔吳。以爲都押衙。歷和州刺史。始遣間使迎妻子南歸。彥儔有政績。善撫境內。和遂爲富州。入拜統軍。自以發迹兇亂。於是務爲恭謹。烈祖嘉之。嘗陞堂拜其父。開國以爲池州節度使。常夢錫自給事中。以直諫貶判官。彥儔事之。如在朝廷。人士稱之。卒。

於鎮。

朱匡業。廬州舒城人。父延壽。以姊爲吳武王夫人。故自少得幸。從征討。摧堅陷陣。功冠諸將。好以寡擊衆。不勝而返者。必盡戮之。嘗與梁戰。遣二百人持大劍斫陣。將行。指一卒留之。卒請行。延壽以違命立斬之。其令出必行。皆類此。然每得賞賜。悉分贐其下。無以入家者。唐昭宗在岐。下聞其名。遣使問道。授延壽蔡州節度使。武王疑其難制。誘殺之。出夫人使更嫁。然猶以舊功貸其妻子。時匡業尙幼。稍長。授以官。烈祖輔吳。拔爲軍校。積功至諸軍都虞候。嗜酒使氣。烈祖優容之。出爲歙州刺史。有政績。改建州留後。還朝。授神衛統軍。周侵淮南。中外震駭。盜投縛多竊發。以匡業爲內外巡檢使。嚴而無私。犯令無所貸。中外肅然。夜戶不閉。正陽喪師。朱元叛。元宗議親征。召匡業及統軍劉存中。問以方略。匡業輒對曰。運數之興。天地皆助。大事若去。雖英雄亦無如之何。存中從旁贊之。元宗怒。貶匡業撫州團練使。流存中饒州。後主襲位。召拜神武統軍。加中書令。卒。子崇俊。短陋羸瘠。而妙於騎擊。馳突若神。早卒。

朱令贇。大將軍。業從子。少從軍。椎額鷹目。趨捷善射。積遷至鎮南節度使。開寶中。後主見討王師。兵已圍金陵。召令贇赴難軍。至湖口。與諸將謀曰。今爲前進。則北軍據我後。上江阻隔。進未破敵。退絕餽餽。奈何。乃檄南都留守柴克貞赴軍。欲俟其至。使代拒湖口。及發。而後主危急。飛書督兵者接踵。令贇不能守。初議。乃與戰。棹都虞候王暉乘流而前。自潯陽湖編木爲大棧。長百餘丈。大艦至。容千人。將突下。斷采石浮梁。會江水涸。舟楫艱阻。王師得設備。比至虎踞洲。合戰。令贇所乘艦尤大。建大將旗鼓。王師舟小。聚攻之。令贇以火油縱燒。王師不能支。會北風。反焰自焚。水陸諸軍十五萬。不戰皆潰。令贇惶駭。赴火死。糧米戈

甲俱焚。無子遺。烟焰不止者旬日。自是金陵外援遂絕。以至於亡。是時王師上露布稱生獲令贊。則非也。論曰。金陵之被圍也。以守備任皇甫繼勳。以外援付朱令贊。繼勳既懷貳心。而令贊孺子。復非大將才。其亡宜矣。使林仁肇不以間死。盧絳得當攻守之任。胡則申屠令堅。輩宣力圍城中。雖天威臨之。豈易遽亡哉。然則江南雖弱。曹彬等所以成功者。獨乘其任人乖刺而已。吾以此知伐國之難也。

王崇文父綰。吳大將。崇文以門地選尙烈。祖妹廣德公主。歷百勝永安二鎮。廬陵民尙氣喜訟。以先止爲怯。素號難治。崇文一以法治之。不少貸。認爲衰息。建州初平。崇文安集之。民忘其亂。又涉武昌。自南唐興。崇文內典禁兵。出更藩任。位兼將相。終始富貴。而平居被服儒雅。風度夷曠。在武昌方閣。騎士於鞠場。傍古屋數十間。崩塌聲震數里。聞者莫知所爲。崇文指揮使令。訖事不失常度。竟亦不問。後主初立。上疏歷陳朝政。賜書褒之。加中書令。卒。

胡則不知其世家。後主末爲江州指揮使。金陵陷。曹彬喻後主以手書命郡縣。悉以城降。書至江州。刺史謝彥賓集將佐視之。謀納款。則憤形於色。亟出謂其下曰。吾屬世受李氏恩。安可負之。且都城久受圍。此書真僞不可知。刺史不忠。欲污吾州。爾輩能從我死忠義乎。衆皆曰善。乃帥同列宋德明等大譁入攻。彥賓懼。逃簷霽中。執而殺之。衆推則爲刺史。號令肅然。莫敢不聽。則嘗爲壽州裨將。從劉仁贍城守。累年。盡得其方略。乃日夜閱丁壯勒部伍。爲堅壁。死守計。太祖命南面行營招安巡檢使曹翰攻之。城帶江負山。樓櫓高險。堅不可破。屢遣使諭降。則誓死不從。翰軍死傷者衆。詔書切責督戰。會則疾革。不能起。城始陷。衆猶巷鬪。雪涕奮擊不少退。翰軍尤多死。則臥牀上。翰執之。數其違命之罪。對曰。犬吠非其主。爾何

怪也。卽昇置木驢上。將磔之。俄死。腰斬其屍以狗。并殺宋德明。而隳其城七尺。使後不可守。時右補闕張霽。被命知江州。與翰偕行。旣入城。翰軍士掠民家。民訴於霽。霽按誅軍士。翰因發怒屠城。死者數萬人。取其屍投井。坎皆滿溢。餘悉投江流。因誣奏霽。太祖薄霽罪。徙知饒州。民家貨貨鉅萬。翰悉取之。初。太祖聞江州城垂破。遣使持詔賜翰。使勿多殺。使者至獨樹浦。大風斷渡。比至。已無蹤類矣。

申屠令堅。山東人。少無賴。勇敢絕人。晉漢間。嘗爲盜。被獲。以計脫。來歸。保大末。禦周師於壽春。破城南大。碧有功。擢神武都虞候。劉茂忠。吉州安福人。本名徹。或謂之曰劉徹。乃漢武帝也。非人臣所能名。乃改焉。少亦爲羣盜。會赦。書募盜爲兵。茂忠出應募。且請擒盜。自洗滌。乃詐亡命入盜中。自言工風雲。占盜信之。乃密約吏爲內應。悉擒無遺者。惟廬陵鷓鴣洞賊帥吳先。狡有謀。且據巖險。不可捕。茂忠鞭二卒。使伴爲得罪。奔先。示以鞭創。先乃納之。月餘。斬先。其黨皆潰。積功爲吉州兵馬都押衙。開寶中。令堅爲吉州刺史。茂忠爲袁州刺史。金陵破。後主歸京師。兩人者相約。不以主存亡易節。誓死報國。前二年。令堅爲吉州刺史。與人鬪。大呼而寤。乃聚侍婢歌舞。喧笑達旦。始能寐。至是。若與人搏擊於帳中者。踰時而卒。茂忠度不能獨奮。遂降。將行。悉燔州縣軍輿料。斂文籍。所留田稅簿而已。袁人德之。入朝。舟次淮口。謁關吏。稱袁州刺史。吏擲刺於地。曰。此亡國之俘。何刺史也。叱令執杖庭參。至京師。授登州刺史。關吏抵罪。適編管登州。茂忠見之。曰。乃汝耶。日責拜謁兩衙。必令植立庭下。吏慚憤死。茂忠還朝。病金瘡卒。

喬匡舜。字亞元。高郵人。弱冠能屬文。以典贍稱。烈祖輔吳。用爲祕書省正字。開國。宋齊丘辟置幕中。十餘年。歷大理評事。屯田員外郎。齊丘喜人諛己。而匡舜真率。故雖賞其文藝。未嘗薦拔。烈祖獨知之。嘗詔公

卿舉可親民者。意齊丘且舉匡舜。奏上。竟不及。烈祖喟然。謂常夢錫曰。吾不意其捨匡舜也。夢錫與韓熙載素惡齊丘。每相語曰。宋公誤識亞元。正可怪也。久之。齊丘出鎮豫章。始表爲節度。掌書記保大中。召爲駕部郎中。知制誥。進中書舍人。周侵淮南。諸將無功。元宗議親率六軍拒之。匡舜上疏切諫。帝怒。坐以沮國動人心。流撫州。然亦卒不能親行也。後主嗣位。復起爲司農少卿。歷殿中監。修國史。給事中。兼獻納使。知貢舉。放及第樂史輩五人。多久滯名場者。時稱得人。而少年輕薄子嘲之。謂之陳橋成榜。遷刑部侍郎。老病。乞骸骨歸。後主憫其貧。給俸終身。開寶五年卒。年七十五。謚曰貞。

陸昭符。金陵人。不知所以進。保大中。爲常州縣刺史。當吳越之衝。屢交兵。城邑荒殘。昭符爲政寬簡。招納流亡。未幾遂富實。一日坐廳事。雷雨暴至。電光如金蛇。遶案。吏卒皆震仆。昭符不懼。撫案叱之。雷電遽散。及舉案。惟得鐵索。重百斤。昭符亦不變色。徐命舉索。納庫中。顯德五年。元宗旣稱藩於周。秋八月。命昭符爲進奏使。置邸大梁。太祖受周禪。昭符乃更名。後主嗣位。御宮門。立金雞竿。降赦如天子禮。太祖聞而怒。召昭符詰之。色甚厲。昭符徐以鄙語對。太祖爲笑。因置不問。然昭符常往來金陵。時後主數貢奉。帑藏空竭。昭符市於富民。石守信家。得絹十萬。後主大悅。太祖已遣李穆召後主入朝。因問昭符曰。汝度汝主來否。對曰。君命召。不俟駕安有不來。及後主稱疾。王師致討。昭符又言於太祖曰。臣主必死。社稷已而後主降。罷奏邸。不得調卒。初名匡符。建隆初改。以避上名云。

卷第九

劉高盧陳李廖列傳第六

劉彥貞，兗州中都人。父信，初爲羣盜，戰敗奔吳。事武王，數有功。王遇之厚，嘗召信計事，醉不能言。王嬖罵之，信卽仗一劍棄去。左右請追之，王曰：「信醉耳，醒當復來。」明日果至，積功至鎮南軍節度使。宣王建國，加征南大將軍。唐莊宗滅梁，遣諫議大夫薛昭文使闕，假道洪州。信燕勞之，謂昭文曰：「皇帝知有信否？」昭文曰：「主上新平河南，未知公之名。」信曰：「漢有韓信，吳有劉信，一等人也。」因指牙旗銀首，舉酒屬昭文曰：「幸而中此，願爲我飲。」一發中之，烈祖受禪，以舊故贈太師。彥貞，信第四子，以父任爲大理評事。遷屯田員外郎。父喪，起復將軍，運刺海楚二州善騎射，矢不虛發。軍中號曰「劉一箭」。吏事亦以強濟見稱。遷濠州節度使，移善州。始鬻貨，自殖市肆，不問貧富，概出資助之，而收其贏。州有安豐塘，溉田萬頃，以故無凶歲。彥貞託以浚城濠，決水入濠中，民田皆涸，而督賦益急，皆賣田去。彥貞擇尤膏腴者，以下價售之，乃復潞塘。水如初歲，入不可勝計。時南唐政衰，用事者多貪墨，彥貞廣賂遺，以致聲譽。於是魏岑等雜然推倡，其用兵治民之能，以爲一面長城。在鎮久，疑當受代，輒妄造邊遽，以固其位。久之，乃入爲神武統軍。及周師侵淮南，拜北面行營都部署，帥三萬人援壽州。次來遠，鎮兵車旗幟巨數，百里戰艦銜尾蔽淮而上。周將李穀、盧我師、斷浮橋，腹背受敵，燒營退保正陽。彥貞雖名將家子，生長富貴，初不練兵事。裨將武彥暉、張延翰、成師、朗皆鬪將，無籌略。見周師退，以爲快，惟恐不得速戰。士未及朝食，卽督以進。遇周將李重進於正陽東，彥貞置陣，橫布拒馬，聯貫利刃，以鐵繩維之。刻木爲猛獸攫拏狀，飾以丹碧，立陣前。號捷馬牌，又以革囊貯鐵葉，裹布於地。周兵望而笑其怯，銳氣已墜。一戰，我師大敗，師朗等皆被擒。彥貞死于陣，南唐喪地千

里國幾亡。其敗自彥貞始。雖死王事。議者不與也。後數年。贈中書令。諡曰壯。亦不復錄其孤云。
高越。字冲遠。幽州人。精詞賦。有名燕趙間。盧文進鎮上黨。具禮幣致之。初以客從。及文進徙安州。越又從之。遂爲其掌書記。文進仲女有才色。能屬文。號女學士。因以妻越。文進奔吳。亦與俱行。吳以爲祕書郎。烈祖受禪。遷水部員外郎。改祠部。浙西營田判官。與江文蔚俱。以能賦。擅名江表。時人謂之江高。保大初。文進卒。有欲傾其家者。越上書訟之。黜爲蘄州司士。參軍。語在文進傳。就遷軍事判官。與隱士陳曙爲物外交。淡然不志榮利。久之。仍徙廣陵。令還判吏部。歷事御史知雜。元帥府掌書記。起居郎。中書舍人。淮南交兵。書詔多出越手。援筆立成。詞采溫麗。元宗以爲稱職。不徙官者累年。後生立。始遷御史中丞。勤正殿學士。左諫議大夫。兼戶部侍郎。修國史。卒年六十二。諡曰穆。貧不能葬。後主爲給葬費。世歎其清。兄子遠。遠字攸遠。父操。袁州別駕。遠少孤。爲人夷雅冲淡。而遇事有奇節。杜門力學。不交人事。烈祖受禪。招來四方秀傑。得遠。以爲祕書省正字。保大初。遷校書郎。兼太常修撰。遂爲太常博士。淮南兵興。元宗召見。賜金紫。使典戎府書檄。歷禮部員外郎。樞密判官。侍御史知雜。史館修撰。起居郎。知館事。遂爲勤政殿學士。國初。命兵部尚書陳澹修吳史。未成而卒。其後預史職者多貴游。或新進少年。纂述殆廢。遠自保大中預史事。始撰烈祖實錄二十卷。敘事詳密。後主嗣位。遠猶在史館。與徐鉉喬匡舜潘佑共成吳錄二十卷。遠又自撰元宗實錄十卷。未及上。會屬疾。取史稿及他所著書凡百餘卷。悉燔之。卒年五十七。贈給事中。諡曰良。後主欲修國史。訪稿于其家。無復在者。遠有精識。方邊鎬入潭州。湖南悉平。百官入賀。遠獨曰。我乘楚亂。取之甚易。觀諸君之才。守之實難。聞者愕然。以爲過。及後如所料。乃皆服其先見。

盧文進字大用幽州人。事後唐明宗。至安州節度使。事具五代史。晉高祖起晉陽。與契丹耶律德光約爲父子。文進少嘗事契丹。娶虜公主。爲其平州刺史。明宗時。率衆數萬來歸。至是不自安。且本燕人。尙氣。不詔屈於晉。乃決計歸吳。時烈祖輔吳爲齊王。將受禪。吳遣將祖全恩以兵二千陣於安州近境。俟文進出。殿之。而至。拜天雄統軍。宣潤節度使。委任賓佐。政績甚美。潤州市大火。文進使馬步使救之。益熾。文進怒。自出府門。斬馬步使。傳聲而火止。人皆異之。召還。以左衛上將軍兼中書令范陽郡王李朝請。猶給藩鎮俸卒。馮延巳惡文進。文進亦以素貴不少下。及卒。乃誣以陰事。盡收文進諸子。欲籍其家。文進以女妻高越。越乃上書訟文進冤。指延巳過惡。詞氣甚厲。時延巳方用事。人頗壯之。元宗怒。以越屬吏。貶斬州司士參軍。而盧氏亦賴以得全。文進在金陵爲客言。昔陷契丹。嘗獵於郊。遇晝晦。如夜。星緯燦然。大駭。偶得一胡人問之。曰。此謂之笄日。何足異。頃自當復。良久。果如其言。日方午也。又嘗至無定河。見人脛骨大如柱。長可七尺云。

陳覺揚州海陵人。烈祖以東海王輔吳。作禮賢院。聚圖書萬卷。及琴奕遊戲之具。以延四方賢士。政事之暇。多與之講評古今。覺亦預焉。烈祖居金陵。以次子景遷留東都。爲同平章事。知左右軍。使輔政。命覺爲之佐。謂曰。吾蚤莫與賢士相接。今老矣。尙未達天下事。景遷年少當國。故屈君子。無憚也。景遷卒。還朝。爲直徽副使。烈祖晚多暴怒。近臣多得譴罰。覺心懼。稱疾家居。累月。以宣遺詔日入朝。判大理寺。蕭儼劾之。元宗不從。遷光政院副使。太僕少卿。覺有兄居鄉里。時海陵已爲泰州。覺兄犯法。刺史褚仁規笞之。覺挾私怨。密譖仁規貪殘。侍御史王仲璉亦劾之。元宗薄其罪。止罷刺史。仁規忿。上章自訴。元宗命覺馳往鞠

之仁規惶恐伏罪。覺還條其罪狀甚衆。詔賜死。覺之竊弄威福蓋始於此。覺與李徵古皆宋齊丘客。徵古者袁州宜春人。於齊丘有中外事。齊王景達爲宮官。齊丘告歸九華。逾年不召。徵古使其僚謝仲宣諷景達言于元宗曰。齊丘先帝布衣之舊。雖不用。不當棄之。齊丘旣召歸。益以腹心寄覺。欲使立功以取柄。任時唐兵初得建州。諸將請用其鋒。攻取福州。齊丘獨薦覺爲宣諭使。召節度使李弘義入朝。可不勞寸刃。盡得閩地。元宗意方向覺。遂遣之。旣至。弘義倨甚。覺氣折。不敢言歸。至劍州。恥于無功。矯詔召弘義。自稱權福州事。擅興汀建撫信州兵。及戍卒命馮延魯將之。攻福州。敗績衆潰而歸。死者萬計。亡失金帛戈甲之類。不可勝數。朝論謂必死。元宗亦怒。欲寘軍法。齊丘上表待罪。實營救覺等。馮延已助之。於是財貶斬州。逾年復起任事。始與徵古爲死黨。相倡和。如出一口。淮南兵與我師屢北。度不可復支。元宗遣鍾謨。李璣。明孫忌。王崇質使周世宗。請獻壽濠泗楚光海六州。以罷兵。世宗不許。而壽州日危。璣。德明懼。乃白世宗。示言願寬臣數日之誅。歸白寡君。盡獻淮南地。周乃遣德明。王崇質先還。德明至金陵。盛稱周兵之彊。請必割地。元宗不悅。齊丘覺徵古素惡忌。及德明。搆語王崇質。使異其詞。覺徵古因極言德明賣國。德明褊恣。見見排擯。袂大言周師必克。元宗遂斬德明于都市。覺徵古勢焰益熏灼。道路以目。德明旣誅。不復議請盟。乃命齊王景達率大兵拒周。而以覺爲監軍使。軍政皆出覺。聚兵五萬。無決戰意。朱元數有功。覺忌之。奪其兵。元遂叛降周。諸軍悉潰。覺歸爲樞密使。如故。而徵古爲副使。不以敗事自咎。方相與挾齊丘爲。厠久計議事。元宗前橫甚。元宗嘗言及家國。感慨泣下。徵古輒曰。陛下當以兵力拒敵。涕泣何爲。飲酒過。重耶。乳保不至耶。帝色變。左右股栗。而徵古驚然自若。司天言天文變異。人主宜避位祈禳。元宗曰。此固。

吾意第不知孰可付耳。覺徵古遂以爲誠言。輒曰：天命如此，宜使宋公攝政。陛下深居禁中，俟國事定，歸政未晚。元宗亟召中書舍人陳喬草詔，實出于憤怒。喬固陳不可，元宗嘻笑而止。周師益進，世宗駐迎鑾。元宗遣覺奉表貢方物，覺至迎鑾，見周之戰艦，陳列江津，且南渡矣。大懼，請遣人取本國畫江爲界表。世宗可之。覺頓首謝退，遣其屬劉承遇南還以告。畫江稱藩奉正朔之議遂決。周亦班師，遣覺還，錫賚豐渥。覺將發，獻詩一首，敘感別，賜金器百兩。初，覺徵古以德明請割地爲賣國誅死，及是覺身自爲之，使還以兵部尙書致仕。徵古先出爲洪州節度副使，時晉王景遂爲帥，不堪徵古之傲狠，常欲斬之，自拘於有司。左右力諫，乃已。鍾謨自周還，屢言齊丘覺徵古之罪不可容，覺嘗傳世宗之語告元宗曰：聞江南拒命，謀出其相嚴續，當殺續以謝我。元宗知覺與續有宿怨，疑之，謨請至周覆實其事。元宗遣謨行，以手表引咎，且言非續之罪。世宗省表大驚曰：嚴續能拒命，乃忠臣，朕爲天下主，其肯教人殺忠臣乎？謨還具奏之。元宗大怒，齊丘既斥，覺亦責授國子博士。饒州安置，遣殺之。徵古削奪官爵，賜自盡于洪州。

李德誠，廣陵人，少事宣州節度使趙錙，爲給使。吳攻宣州，錙出降，德誠與韓球俱從之，不去。城中復推立裨將周進思以拒吳，錙使德誠入城，說進思降。將行，暴得疫疾，委頓不克往，乃改命球。球既至，進思斬之，擲其首城外。德誠是日即愈，人皆異之。錙死，事吳武王，常從征討，積功爲江南馬步軍使。與諸將圍潤州，安仁義諸將每見仁義臨城督戰，必嫚罵之。德誠獨否，及城破，仁義操弓矢坐城上，衆莫敢近。德誠至，仁義忽顧曰：汝見我獨不失禮，且有奇相。他日將大貴，吾以爲汝功。即擲弓矢就執。武王即拜德誠潤州刺史。歷撫虔洪三鎮，節度使平南大將軍。中書令烈祖受禪，拜太師，封南平王。進封趙王。德誠事吳最久，至

南唐之興。又爲佐命。首與周本勳進。初無大勳勞。特以際會至高位。富貴壽考。世罕及者。然爲人謙恭沉厚。終始如一。自洪州入覲。烈祖命宮人逆勞于途。百官班謁於都門。入對日。朝堂設次以待之。昇元四年卒。年七十八。廢朝五日。諡忠懿。子二十八人。第四子建勳。

建勳字致堯。少好學。能屬文。尤工詩。德誠在潤州。嘗秉燭夜出。候者以告。義祖疑有變。徙江州。德誠猶慮讒間。遣建勳入謁。義祖見之。釋然。妻建勳以女。所謂廣德公主也。建勳家世將相。又娶于徐氏。爲其國貴游。然杜門不預世事。所與交皆寒賤。裘馬取具而已。烈祖鎮金陵。用爲副使。預禪代之策。拜中書侍郎。同平章事。加左僕射。監修國史。領滑州節度使。自開國至昇元五年。猶輔政。比他相最久。烈祖鑒吳之亡。由權在大臣。意頗忌之。而建勳無引退意。會建議政事當更張者。且言事大體重。不可自臣下出。請以中旨行之。烈祖雖從之。未有命也。建勳遽命舍人草制。給事中常夢錫劾奏。建勳擅造制書。歸怨于上。烈祖得奏。適會本意。乃降制放還私第。廣德宮主剛果有智。入謂烈祖曰。吾父亡恙時。兄亦嘗求見與李郎書。今何見負。烈祖曰。此自國事。吾與李郎骨肉之情。固無間也。召見慰勉焉。未幾復相。元宗嗣立。以開國勳勞。又聯姻戚。尊遇之與宋齊丘埒。每謂爲史館而不名。聽朝之暇。多開延英殿。召公卿議當世事。人皆欣然。望治。建勳獨謂所親曰。上寬仁大度。優於先帝。但性習未定。宜得方正之士。朝夕獻替。不然恐未必能守先朝基業也。出爲撫州節度使。建州之役。諸將無復紀律。建勳請官出金帛贖俘掠。還其家。見聽。及出師。平湖南國人相賀。建勳獨以爲憂。曰。禍始於此矣。召拜司空。稱疾乞骸骨。以司徒致仕。賜號鍾山公。營別墅於山中。放意泉石。或謂之曰。公未老。又無大疾恙。遽爲此舉。欲復爲九華先生耶。建勳曰。吾平生笑宋

公輕出處。何至效之。自知不壽。欲求數年閑適爾。疾革。遺令曰。時事如此。吾得全歸幸矣。勿封樹立碑。貽世日毀。斷之禍。保大十年五月卒。贈太保。諡曰靖。及南唐亡。公卿塚墓。鮮不發者。惟建勳不知葬所。宋齊丘當國。深忌同列。少所推遜。然獨稱建勳曰。李相清談不待潤色。自成文章。曰。李建勳非不智也。知湖南之師必敗。知其國且亡。皆如著龜。然其智獨施之一己。故生則保富貴。死猶能全其骸於地下。至立於羣枉間。一切無所可否。唯諾而已。視覆軍亡國君父憂辱。若己無與者。方區區請出金帛以贈俘虜。真婦人之仁哉。

居素將樂人。仕烈祖元宗之間。爲人堅正。不爲當國者所喜。困校書郎二十年。始得大理司直。後主嗣位。稍遷至瓊林光慶使。檢校太保判三司。後主屏昏。而羣臣方充位保富貴。國益削。居素獨慷慨驟諫。冀彼主一悟。終不見聽。乃閉門却食。服朝衣冠立死井中。已而得手書大字于篋。笥曰。吾之死。不忍見國破也。余著爲文弔之。以比屈原伍員。後幾百年。將樂父老猶叩頭稱之。盱江李觀爲之傳云。

卷第十

張李皇甫江歐列傳第七

張義方。不知其所以進。烈祖代吳。用爲侍御史。義方既就職。卽上疏曰。古之任御史者。非止平獄訟。肅班列也。有怙威侮法。棄忠賊義。樹朋黨。蔽聰明者。得以糾彈。至於人主好遊畋聲色。說奢侈佞媚。賞非功。罰非罪。得以論爭。使諸侯不敢亂法。百司不得盜權。則御史爲不失職。今文武材行之士。固不爲乏。而貪墨

陵犯傷風教。棄仁義者。猶未革心。臣欲奉陛下德音。先舉忠孝深廉。請頒爵賞。然後繩糾乖戾。以正典刑。小則上疏論列。大則對仗彈奏。臣每痛國家之敗。非獨人君不明。蓋官卑者畏罪而不言。位尊者持祿而不諫。上下苟且。至于淪亡。今臣誠不忍忘君親之義。有所不盡。惟陛下幸赦之。疏奏。烈祖親札曰。孤始受禪。任義方以風憲。乃能力振朝綱。詞皆謙切。可宣示朝野。賜義方衣一襲。以旌直言。義方始名元達。烈祖方倚以肅正邪。應取前朝王義方名。以易之。故義方得盡忠焉。後之議者。謂義方爲御史。彈劾奸邪。諫正過失。則可。若請舉善。頒爵賞。則爲奪輔相權矣。然所言凜然守正。有漢唐名臣之風。惜其事跡散落。不得盡載云。

李金全。其先吐谷渾人。事唐明宗爲厮養。以戰功貴。事具五代史。晉高祖時。爲安州節度使。任中門使。胡漢榮。漢榮貪戾專政。失軍民心。高祖遣賈仁沼代。歸京師。金全奏。漢榮病不任行。仁沼至。醜殺之事。聞高祖。乃以馬全節代。金全鎮安州。漢榮懼。給告曰。御史劉珂。密遣人馳報。朝廷召公有異處。分金全權。使其從事張緯。奉表詣金陵。請降。烈祖命鄂州屯營使李承裕。段處恭。帥兵三千人。逆金全。陳于城外。俟金全出。殿之。而東承裕等至之夕。金全帥數百人來奔。而承裕違命。輒大掠城中。得金帛不可計數。乃還。晉將安審輝。追敗之于馬黃谷。處恭死於陣。承裕帥餘兵。扼雲夢橋。復爲審輝所敗。執而殺之。金全至。拜天威統軍。出爲潤州節度使。漢隱帝時。李守貞以河中叛。來乞師。魏岑查文徽。議宜爲出師。劉彥貞以攻取自任。元宗欲籍金全宿將威望。以爲北面行營招討使。救河中。彥貞副之。文徽爲監軍使。岑爲沿淮巡檢使。師出沐陽。次沂州。金全曰。諸君以河中在何處。而欲自此轉戰以前。耶。勢必不相及。徒爲國生事。爾嘗會。

食帳中候騎告北兵數百並潤皆羸弱諸將欲掩擊之金全下令曰敢言過潤者斬及暮伏兵四起旗幟蔽日金鼓聲聞十餘里諸將乃服金全善料敵逾月退保海州遂引歸金全曰吾全軍而還不得爲無功矣拜右衛聖統軍領義成軍節度使兼侍中保大八年八月卒於金陵年六十多內寵子男女凡三十二人元宗命少府監王仲連持節冊贈中書令諡曰順金全卒後閩楚之役與用事者皆少年不更軍旅覆敗相踵周人乘我罷弊攻取淮南國遂衰削不復能振人始思金全恨其已卒云

皇甫暉魏州人唐晉事具五代史契丹入中原暉時爲密州刺史與棣州刺史王建俱來奔元宗遣使具舟楫逆之將至暉念本起盜賊不自安至秦淮赴水不死舟人援出之自言如履大石入朝歷歙州刺史神衛軍都虞候江州節度使加同中書門下平章事周師攻淮南爲北面行營應援使會劉彥貞姚鳳兵以行彥貞舉動躁撓人測其必敗暉獨持重部分甚整士亦樂爲用周人頗憚之及彥貞敗死暉鳳退保清流關周世宗親帥衆盡銳攻壽州而分兵襲清流暉陳山下周兵出山後要擊暉大敗猶收兵且戰且行入潞州潞州刺史王紹顏已委城遯暉無所歸方斷橋自守周兵涉水踰城而入執暉鳳送壽州行在見世宗曰臣力憊欲暫坐及坐曰欲暫臥不俟命而臥神色自若曰臣非不盡力國事南北勇怯不敵臣在晉屢與契丹戰安能如今日大朝兵甲之盛昨退保潞州城不意大軍攀堞如飛而入臣智力俱殫故被擒耳世宗賜之馬及衣帶數日創甚暉不肯治而死子繼勳繼勳少從暉兵間爲軍校以父死難擢將軍歷池饒二州刺史頗以吏事稱入爲神衛統軍都指揮使諸老將繼死繼勳雖尙少且無戰功徒以家世遂爲大將資產優贍名園甲第冠于金陵多蓄聲妓厚自奉

養及開寶中大兵傅城繼勳保惜富貴無効死之意第欲後主亟降聞諸軍敗績則幸災見于詞色偏裨有募死士謀夜出奮擊者輒鞭而囚之自度罪惡日聞稀復朝請後主召議事亦辭以軍務不至內結傳詔使一切蔽塞及後主登城見王師旌旗壘柵彌徧四郊始大駭失色繼勳從還至宮乃以屬吏始出宮門軍士雲集轡之斯須皆盡

江文蔚字君章建安人博學工屬文後唐明宗時擢第爲河南府館驛巡官坐秦王重榮事奪官南奔烈祖輔吳用爲宣州觀察巡官歷比部員外郎知制誥國初改主客郎中拜中書舍人烈祖殂元宗以喪亂之後因恤舊典散亡命文蔚以給事中判太常卿事與韓熙載蕭儼共加討論時稱其精練保大初遷御史中丞持憲平直無所阿枉馮延巳嘗國與弟延魯魏岑陳覺竊弄威福及伐閩敗績詔斬覺及延魯以謝國人而延巳岑置不問文蔚對仗彈奏曰賞罰者帝王所重賞以進君子不自私恩罰以退小人不自私怒陛下踐阼以來所信重者馮延巳延魯魏岑陳覺四人皆擢自下僚驟升高位未嘗進一賢臣成國家之美陰狡圖權引用羣小陛下初臨大政常夢錫居封駁之職正言讜論首羅譴逐棄忠拒諫此其始也奸臣得計欲擅威權於是有保大二年正月八日敕公卿庶僚不得進見屢霜堅冰言者恟恟再降御札方釋羣疑御史張緯論事忤傷權要其貶官敕曰罔思職分傍有奏論御史奏彈尙爲越職況非御史執政正言嚴續國之感里備位大臣不附奸險尙遭排斥張義方上疏僅免嚴刑自是守正者得罪朋邪者信用上之視聽惟在數人雖日接羣臣終成孤立陛下深思遠慮始信終疑復常夢錫有密擢蕭儼侍從授張緯亦令羣小疑懼與酷吏司馬正彝同惡相濟迫脅忠臣高越之子盧氏義兼親故受其寄託痛

其侵陵。訴於君父。乃敢蔽陛下聰明。枉法竄逐。羣凶勢力。可以回天。在外者握兵。居中者當國。師克在和。而三凶邀利。迭爲前卻。天生五材。國之利器。一旦爲小人忿爭妄動之具。使精銳者奔北。饋運者死亡。鎗帛戈甲。委而資寇。取弱鄰邦。貽譏海內。同列之中。有敢議論。則馮魏毀之於中。正彝持之於外。構成罪狀。死而後已。今陳覺延魯雖已伏辜。而魏岑猶在本根。未殄枝幹。復生馮延己善柔其色。才業無聞。憑恃舊恩。遂階任用。蔽惑天聰。斂怨歸上。高審知累朝宿將。墳土未乾。逐其子孫。奪其居第。使輿臺竊議。將率狐疑。陛下方以孝理天下。而延己母封縣太君。妻爲國夫人。與弟異居。捨棄其母。作爲威福。專任愛憎。咫尺天威。敢行欺罔。以至綱紀大壞。刑賞失中。風雨由是不時。陰陽以之失序。傷風敗俗。蠹政害人。蝕日月之明。累乾坤之德。天生魏岑。道合延己。蛇豕成性。專利無厭。逋逃歸國。鼠奸狐媚。讒疾君子。交結小人。善事延己。遂當樞要。面欺人主。孩視親王。侍燕諂諛。遠近驚駭。進俳優以取容。作淫巧以求寵。視國用如私財。奪君恩爲己惠。上下相蒙。道路以目。征討之柄。在岑折簡。帑藏取與。繫岑一言。先帝卑宮勤儉。陛下守之勿失。而岑營建大第。廣役丁夫。孽子之居。過于內殿。亭觀之侈。踰于上林。前年建州勞還。文徽入覲。西旅會燕。捨爵策勳。岑披猖無禮。狂悖妄言。與延己用意多私。行恩不常。俾軍士懷恨怒之志。受賞無感。勵之心。將校爭功。誼動京邑。奸謀詭計。誑惑國朝。致漳州屠害使者。福州違拒朝命。百姓肝腦塗地。國家督轡空虛。福州之役。岑爲東南面應援使。而自焚營壁。縱兵入城。使窮寇堅心。大軍失勢。軍法逗留畏懦者。斷律云。主將守城爲賊所攻。不固守而棄去。及守備不設。爲賊掩覆者。皆斬。敕赦諸將。蓋以軍威政令。各非己出。岑與覺延魯更相違戾。互肆威權。號令並行。理在無赦。烈祖孝高皇帝。櫛風沐雨。勤勞二紀。成世

屢募付之陛下。比諸鄰邦。我爲強國。奈何賞罰大柄。肆奸宄之謀。軍國資儲。爲凶狡所散。昨天兵敗。內震驚。將雪宗廟之差。宜醢奸臣之肉。已誅二罪。未塞羣情。盡去四凶。方祛衆怒。今民多饑饉。政未和平。東有伺隙之鄰。北有霸強之國。市訛言。遐邇危懼。陛下宜軫慮殷憂。誅鉅惡。延已不忠不孝。在法難原。魏岑同罪異誅。觀聽疑惑。請行典法。以謝四方。文蔚將上疏。先具小舟。載老母。以待左降。元宗果怒。賤江州。司士參軍而覺。延魯以宋齊丘救解。復皆不死。延已雖暫罷。旋復柄用。方宣延已制。百官在廷。常夢錫大言曰。白麻雖佳。要不如江文蔚疏耳。逾年召還。南唐建國以來。憲度草創。言事遇合。卽隨材進用。不復設禮部貢舉。至是始命文蔚以翰林學士知舉。略用唐故事。放進士盧陵王克貞等三人。及第。元宗問文蔚。卿知舉取士。孰與北朝。文蔚曰。北朝公薦私謁相半。臣一以至公取才。元宗嘉歎。中書舍人張緯。後唐應順中及第。大銜其言。執政又皆不由科第。進相與排沮貢舉。遂復罷矣。保大十年卒。年五十二。諡曰簡。

歐陽廣。吉州吉水人。保大中。詣闕上書曰。臣近遊潭州。伏見節度使邊鎬。偶逢聖代。初非將才。措置乖刺。大失人心。致奉節兵。乘夜呼噪。共焚譙門。會明而遁。不然。幾致大變。是仁不足。惠下也。朗陵近在肘腋。曾不爲虞。乃圖桂林。以取奔敗。是智不足。謀遠也。與監軍使昌延恭不相協和。動輒疑阻。是義不足。和衆也。幕府無贊才。是禮不足。得士也。號令朝出夕改。是信不足。使人也。五者無一。長考之前古。未或不敗。請擇帥濟師。以全境土。書人不省。及失湖南。元宗思廣言。命授以官。執政請召試。廣言非人主尊賢待士之意。不肯就試。乃授本縣令。亦辭不受而卒。

卷第十一

馮孫廖彭列傳第八

馮延己字正中一名延嗣。廣陵人。父令頤。事烈祖。至吏部尚書致仕。嘗爲歙州鹽鐵院判官。刺史滑言病篤。或言已死。人情頗詢。延己年十四。入問疾。出以言命謝將吏。外賴以安。及長。以文雅稱。白衣見烈祖。起家授祕書郎。元宗以吳王爲元帥。用延己掌書記。與陳覺善。因覺以附宋齊丘。同府位高者。悉以計出之。於是無居己右者。元宗亦頗悟其非端士。而不能去。延己負其材藝。狎侮朝士。嘗謂孫忌曰。君有何所解。而爲丞郎。忌憤然答曰。僕山東書生。鴻筆藻麗。十生不及君。談諧歌酒。百生不及君。諂媚險詐。累劫不及君。然上所以賓君於王邸者。欲君以道義規益。非遣君爲聲色狗馬之友也。僕固無所解君之所解者。適足以敗國家耳。延己慚不得對。給事中常夢錫屢言延己小人。不可使在王左右。烈祖感其言。將斥之。會晏駕。元宗立。延己喜形於色。未聽政。屢入白事。元宗方哀慕。厭之。謂曰。書記自有常職。餘各有司存。何爲不憚煩也。乃少止。保大初。拜諫議大夫。翰林學士。遷戶部侍郎。翰林學士承旨。又進中書侍郎。四年。同平章事。集賢殿大學士。罷爲太子少傅。頃之。拜撫州節度使。以母憂去。鎮起復冠軍大將軍。召爲太弟太保。領潞州節度。俄以左僕射同平章事。延己數居柄任。揣元宗不能察其奸。遂肆爲大言。謂己之才略。經營天下有餘。而人主躬覽庶務。大臣備位安足致理。元宗果謂然。悉委以政。凡事奏可而已。延己初以文藝進。實無他長。紀綱頹弛。吏胥用事。軍旅一切。以委邊帥。無所可否。愈欲以大言蓋衆。而惑人主。至譏笑烈祖戢兵。以爲齷齪無大略。嘗曰。安陸之後。喪兵數千。輟食咨嗟者旬日。此田舍翁。安能成天下事。今上暴

師數萬於外。宴樂擊鞠。未嘗少輟。此真英雄主也。九年。湖南平。而朗州劉言叛。勢張甚。元宗亦知用兵之難。謂延己與孫忌曰。湖湘之役。楚人求息肩。吾之出師。不得已耳。今若授劉言旄節。使和其民。吾亦得休養。衡湘之民。國其庶幾乎。忌卽欲奉行。延己方以克楚爲功。乃曰。本朝出偏帥。平一國。寓縣震動。今一旦三分棄其二。傷威毀重。非所以示天下。且諸將行奏功矣。持不下。又不欲綠軍與取資于國。以損其功。遣使于長沙。調兵賦。苛征暴斂。重失民心。言遂取長沙。盡據故楚地。周人亦伺釁而動。朝論籍籍。延己力求去。而元宗待之如初。及周師大入。盡失江北地。始罷延己。猶爲太子少傅。數月。復相。會疾。改太子太傅。建隆元年。五月乙丑卒。年五十八。諡忠肅。延己工詩。雖貴且老。不廢。如宮瓦數行。曉日。龍旗百尺。春風。識者謂有元和詞人氣格。尤喜爲樂府詞。元宗嘗因曲宴內殿。從容謂曰。吹皺一池春水。何干卿事。延己對曰。安得如陛下。小樓吹徹玉笙寒之句。時喪敗不支。國幾亡。稽首稱臣於敵。奉其正朔。以苟歲月。而君臣相譴。乃如此。延己晚稍自厲。爲平恕。蕭儼嘗廷斥其罪。及爲大理卿。斷軍使李甲妻獄。失入。坐死。議者皆以爲當死。延己獨揚言曰。儼爲正卿。誤殺一婦人。卽當以死。君等今議殺正卿。他日孰任其責。乃建議。儼素有直聲。今所坐已更赦。有宜加弘貸。儼遂免。人士尤稱之。弟延魯。延魯字叔文。一名謐。少負才名。烈祖時。與兄延己俱事元帥府。元宗立。自禮部員外郎爲中書舍人。勤政殿學士。有江州觀察使杜昌業者。聞之。歎曰。封疆多難。駕御賢才。必以爵祿。延魯一言。合指。遠實高位。後有立大功者。當以何官賞之。然元宗愛其才。不以爲躡進。嘗內宴。出寶器貯龍腦數斤。賜羣臣。延魯曰。臣請効陳平均分之比。遍賜。猶餘其半。輒曰。敕賜錄事。馮延魯拜舞。懷之。元宗爲驩笑。而罷。保大中。師出平。

建州以延魯爲監軍使。諸將欲乘勝遂取福州。樞密使陳覺欲自爲功。乃請銜命宣慰。召李弘義入朝。既見弘義不敢發。還至劍州。矯詔起邊兵。命延魯將之。元宗雖怒覺之專。兵業已行。因命延魯爲南面監軍。使陳覺及王崇文、魏岑會攻福州。取其外郭。會吳越將余安援兵自海道至白蝦浦。將捨舟而澤。淖不可行。方布竹簣登岸。我軍曹射之。簣不得施。延魯曰：弘義不降。恃此援耳。若麾我軍稍退。使吳越兵至半地。盡勦之。城立降矣。裨將孟堅爭曰：援兵已陷死地。將盡力與我戰。勝負殆未可知。延魯不聽。頃之。吳越兵至岸。鼓噪奮躍而前。與城中夾擊我。延魯敗走。俘馘五千人。孟堅戰死。諸軍遂大潰。死者萬計。委軍實我器數十萬。國帑爲之虛耗。延魯引佩刀自刺。人救之。不殊。朝廷議。部軍中斬延魯及覺。既有命矣。會宋齊丘以薦薦覺使福州自効。乃詔械延魯。覺還金陵。屬吏皆止流竄。延魯流舒州。會赦。復少府監。元宗擇廷臣爲巡撫使。分按諸州。延魯在焉。右拾遺徐鉉上疏論其多罪無才。不足辱臨。遣不聽。使還。遷中書舍人。以工部侍郎出爲東都副留守。周師南侵。分兵下東都。延魯窘蹙。自髡。衣僧服而逃。被執。世宗釋之。賜衣冠。授給事中。問江南事。占奏詳華。賜予加厚。留大梁。累年。遷刑部侍郎。得還。拜戶部尚書。宋興。揚州節度使李重進叛。伏誅。元宗遣延魯朝于行在。太祖將乘兵鋒南渡。旌旗戈甲皆列江津。厲色詰延魯曰：爾國何爲敢通吾叛臣。延魯色不變。徐曰：陛下徒知其通謀。未知其事之詳也。重進之使館於臣家。國主令臣語之曰：大丈夫失意而反。世亦有之。但時不可耳。方宋受禪之初。人心未定。上黨作亂。大兵北征。君不以此時反。今內外無事。乃欲以數千烏合之衆。抗天下精兵。吾寧能相助乎。太祖初意。延魯必恐懼。失次。及聞其言。乃大喜。因復問曰：諸將力請渡江。卿以爲何如。延魯曰：重進自謂雄傑。無與敵者。神武一臨。敗不

旋踵。况小國。其能抗天威乎。然亦有可慮者。本國侍衛數萬。皆先主親兵。誓同死生。固無降理。大國亦損數萬人。乃可况大江天塹。風濤無常。若攻城未下。饋道不繼。事亦可虞。太祖因大笑曰。朕本與卿戲耳。豈藥卿遊說哉。會捕重進叛卒。日戮數十人。延魯因奏事。言曰。叛者獨一重進乎。亦衆人乎。謂衆人。則陛下應天順人。烏有此理。獨一重進。則脅從者何罪。太祖感悟。後獲者皆貸不誅。厚賜遣延魯歸。南渡之師。由是亦輟。後主嗣位。延魯頗自伐。奉使之功。嘗晏內殿。後主親酌酒賜之。飲固不盡。誦詩及索琴自鼓。以侑之。延魯猶自若。後主優容不責也。楚國公從善入朝。太祖授旄節。留之闕下。後主復遣延魯入謝。疾作。不能朝。太祖待之素厚。至是尤憐之。遣使挾太醫護視。詔放還金陵。卒於家。子僕。韓熙載知貢舉。放及第。覆試被黜。後與其弟侃。儀。价。伉。入宋。繼取名第。南唐公卿家莫能及者。价仕至殿中丞。知福州。至道咸平間。歷典藩郡。以政績聞。延魯銳于仕進。然喜言高退事。嘗早朝集漏舍。歎曰。元宗賜漢監三百里鏡湖。非僕所敢望。得賜玄武湖。亦遂素意。徐鉉笑答曰。上於近臣。豈惜一玄武湖。恨無知章爾。延魯不能對。

孫忌。高密人。一名鳳。又名晟。少舉進士。始濟陽爲進士者。例修遶幅。尙名檢。忌豪舉跌宕。不能蹈繩墨。遂亡去。渡河。客趙魏間。唐莊宗建號。以豆盧革爲相。革雅知忌。辟爲判官。遷著作郎。明宗天成中。與高聲同事。秦王從榮。從榮收。忌亡命至正陽。未及渡。追騎奄至。亦疑其狀偉異。脫之。忌不顧。坐淮岸。捫弊衣。齧齋。追者乃捨去。渡淮。至壽春。節度使劉金得之。延與語。忌陽瘖。不對。授館累日。忽謁漢淮南王安廟。金先使人伏神座下。悉聞其所禱。乃送詣金陵。時烈祖輔吳。四方豪傑多至。忌口吃。初與人接。不能道寒暄。坐定。辯辯鋒起。人多憎嫉之。而烈祖獨喜其文辭。使出教令。輒合指。遂預禪代。祕計每入見。必移時乃出。尤務

謹密人莫窺其際。烈祖受禪。歷中書舍人。翰林學士。中書侍郎。元宗立。齊王景遂排之。出爲舒州節度使。治軍嚴。有歸化卒二人。正晝挺白刃入府。求忌殺之。入自西門。吏倉卒莫能禦。適忌間行在東門。聞亂。得民家馬乘之。奔桐城。叛卒不得忌。乃殺都押衙李建崇而逸。忌坐貶光祿卿。元宗素重之。不以爲罪。累遷右僕射。與馮延巳並相。每鄙延巳。梅誚之。卒先罷。保大十四年。周師侵淮南。圍壽州。分兵破滁州。擒皇甫暉。江左大震。以忌爲司空。使周奉表。請爲外臣。忌見延巳曰。此行當屬公。然忌若辭。則是負先帝也。旣行。知不免。中夜歎息。語其副禮部尚書王崇質曰。吾思之熟矣。終不忍負永陵一坏土。周世宗以樓車載忌于壽州城下。使招仁贍。仁贍望見忌。戎服拜城上。忌遙語之曰。君受國恩。不可開門納寇。世宗詰之。忌謝曰。臣爲唐大臣。豈可教節度使外叛。於是遣王崇質歸。而留忌。會暑。兩班師。忌亦從至大梁。館都亭驛。遇入閣。使班東省官後。屢召見。飲以醇酒。問江南事。忌但言寡君實北面無二心。周將張永德與李重進不相能。倡言重進且反。唐人聞之。以爲有間。可乘。遣蠟丸書招重進。重進表其書於世宗。皆斥瀆反間之言。世宗遂發怒。時鍾謨亦奉使在館。俱召見。責讓忌。正色請死。無撓辭。又問江左虛實。終不肯對。比出命都承旨曹翰。護至右軍巡院。猶飲之酒。數酌。翰起曰。相公得罪。賜自盡。忌怡然。整衣索笏。東南望。再拜曰。臣受恩深。謹以死謝。從者二百人。亦皆誅死於東相國寺。世宗性暴急。莫敢救者。忌已死。乃始追悔。元宗聞之。流涕贈太傅。追封魯國公。諡文忠。厚恤其家。擢其子爲祠部郎中。賜名魯嗣。論曰。南唐之衰。劉仁贍死於封疆。孫忌死于奉使。皆天下偉丈夫事。雖敵讎不敢議也。區區江淮之地。有國僅四十年。覆亡不暇。而後世追考。猶爲國有人焉。蓋自烈祖以來。傾心下士。士之避亂失職者。以唐爲

師烈祖於宋齊丘字之而不敢名齊丘一語不合則挈衣笥望秦淮門欲去追謝之乃已元宗接羣臣如布衣交問御小殿以燕服見學士必先遣中使謝曰小疾不能着幘欲冠帽可乎於虜是誠足以待士矣苟舍血氣名人類者焉得不以死報之耶傳曰君之視臣如手足則臣視君如腹心詎不信夫

廖偃彭師曷皆楚馬殷之臣偃虔州虔化人祖爽父匡圖仕皆至刺史偃少倜儻喜奇節通左氏春秋班固漢書馬殷有國自祕書郎爲裨將戍衡山縣殷子希萼與弟希崇爭國希萼敗見執師曷不知其世家目殷時爲將與希萼有舊怨希崇避殺兄名於是命師曷幽希萼於衡山使甘心焉師曷歎曰留後欲使我弑君耶吾豈爲是哉至衡山偃在焉相與護視希萼甚謹未嘗失人臣禮希崇意不快復遣召希萼歸長沙終欲加害偃擇勇士百人執兵衛希萼晝夜擊柝以警非常遂築行府與師曷率希萼爲衡山王請偃于金陵元宗爲出師定楚亂希萼遂入朝偃師曷俱從行而偃爲部署輜重指揮使尤勤瘁希萼流涕曰吾遂於逆豎非偃盡忠豈能免禍至金陵元宗召見兩人歎獎之授偃左殿直軍使萊州刺史師曷殿直都虞候而使偃守道州以備南漢會朗州叛潭州亦潰偃所部多潭人中夜作亂偃率親卒力戰不能支極罵而死元宗下制哀悼贈右領衛大將軍寧州刺史諡曰節而師曷不見用卒於金陵後主時徐鉉爲史官有豐城令劉虛己移書明偃大節云

論曰史之失傳者多矣廖偃彭師曷之事可謂盡忠所事者而五代史則以爲馬希崇遣師曷偃囚希萼而師曷率希萼爲衡山王是偃亦同受囚希萼之指而師曷獨能全之也江表志則以爲師曷且從希崇害希萼偃百計誘諭而寢其謀及衛希萼也師曷之計乃無所施是師曷實欲害希萼獨賴偃以全耳嗚

呼。何其異也。惟十國紀年言兩人者俱有功。差可考信。故多采之。大抵忠于故君。兩人實同。而僂功爲多。不可誣也。張巡許遠之事。著若日星。兩家子弟。猶有異論。况僂師焉耶。

卷第十二

孟陳韓朱列傳第九

孟堅始事建州王延政爲將。保大初。查文徽討王氏之亂。堅來降。文徽卽以兵付之。出奇屢擊有功。及馮延魯之攻福州也。堅亦在兵間。吳越援兵自海道至。阻淖不得登岸。延魯不知兵。急於破敵。欲斂兵誘而蹙之。堅諫曰。吳越兵進退俱不能。方致死於我。使得至平地。未見可勝也。延魯大言曰。吾自擊之。無預君事。吳越兵得平地。果不可制。李弘義兵自城中出。盡銳夾擊。延魯大敗。棄軍逃。堅力戰以死。延魯雖貶。而其黨方盛。故堅之死事不見錄。國人哀之。

陳誨建州人。生數月。趨健能馳走。其父異之。名之曰阿鐵。長。事王延政爲將。唐師攻建州。傅其城。誨數出挑戰。先鋒橋道使王建封克外。郭擒誨將斬之。已解衣伏鎖。忽脫身絕馳。追者數十百輩。莫能及。自歸大將查文徽。文徽駭異。用爲戰棹指揮使。領故部曲。從攻福州。馮延魯敗走。諸營皆潰。死者萬計。委軍實戎器。不可勝計。誨獨殿後。收所棄金帛二十萬。以歸。文徽鎮建州。誨爲劍州刺史。諜者告吳越戍兵乘福州。誨文徽暗而貪功。卽率誨俱進。誨以戰艦入閩江。適春雨江水暴漲。一夕七百里。抵城下。擊敗福州兵。獲其將馬先進。葉仁安。鄭彥華。始知福州未嘗有變。誨親故多在城中。方遣間使招之。文徽勒步騎亦至。福

州來迎。文徵傳令入城。誨以所聞告。且曰。僕閩人也。豈不能料閩人之情。宜先立寨整衆。俟所招親故來。得其實。徐圖之。文徵曰。狐疑且生變。乘機據城。上策也。遂入。誨知其必敗。植旗鳴鼓。列兵江干。以須之。文徵果敗。被執。誨全軍還劍州。獻馬。先進於金陵。用鄭華爲將。唐兵兩取福州。皆大敗。塗地。誨在兵間。皆有功。號名將。遂爲建州節度使。兼侍中。訓兵積穀。隱然爲大鎮。嘗破福州兵于南臺。江軍聲大震。由是朝廷委以南方事。而名其軍曰忠義。及周兵入淮南。誨遣子德誠率鎮兵赴難。諸將多敗。惟德誠頗有戰功。拜和州刺史。建隆三年六月。誨引病求罷。朝論難其代。乃以弟劍州刺史謙爲留後。召誨還都。後主親臨視。七月卒。諡忠烈。閩之亂。士民幾殲焉。惟誨之宗族益盛。謙與德誠。後亦繼領建州旄節。諸子悉至。顯官。韓熙載字叔言。北海人。少隱嵩山。唐同光中。擢進士第。父光嗣。平盧節度副使。軍中逐其帥符習。推光嗣爲留後。明宗卽位。討亂。光嗣坐死。熙載來奔。時烈祖輔吳。方修明法。令熙載年少放蕩。不守名檢。補和常滌三州從事。時人士自中原至者。多已擢用。熙載在京洛。早負才名。乃獨落魄不偶。亦不以介意。烈祖受禪。召爲祕書郎。使事元宗於東宮。諭之曰。以卿早奮名場。疎雋未更事。故使歷州縣之勞。今用卿矣。宜善自修飾。輔吾兒也。熙載亦不謝。在東宮。談燕而已。不嬰世務。元宗卽位。拜虞部員外郎。史館修撰。兼太常博士。乃慨然曰。先帝知我而不顯用。是以我爲慕容紹宗也。始數言朝廷事。所當施行者。展盡無所回。陳宋齊丘馮延巳等皆側目。元宗意獨嘉之。命權知制誥。書命典雅。有元和之風。與徐鉉齊名。時號韓徐契。丹入汴。晉少帝北遷。熙載上疏曰。陛下有經營天下之志。今其時矣。若戎主遁歸。中原有主。則不可圖矣。不省。陳覺馮延魯福州喪師。初議軍法。齊丘爲之請。止削官遷外郡。熙載上疏請無赦。又數言齊丘黨。

與必基禍亂。熙載不能飲酒。齊丘誣以酒狂。貶和州司士參軍。徙宣州節度推官。復入爲虞部郎中。史館修撰。遷中書舍人。周太祖有天下。用事者猶譏北伐。熙載曰。北伐吾本意也。但今已不可耳。郭氏奸雄。曹馬之流。雖有國日淺。守境已固。我兵妄動。豈止無功耶。言雖切。而朝廷關於機會。經營中原之意。終不已。周人果以籍口。兵入淮南。齊王景達以兵馬元帥臨邊。陳覺爲監軍使。熙載言出師大事也。當先正名。莫信於親王。莫重於元帥。安用監軍使哉。亦不從。熙載才氣逸發。多藝能。善談笑。爲當時風流之冠。尤長於碑碣。他國人不遠數千里。輦金幣求之。然性忽細謹。老而益甚。蓄妓四十輩。縱其出。與客雜居。物議閤然。熙載密語所親曰。吾爲此以自污。避入相爾。老矣。不能爲千古笑。端坐託疾。不朝。貶右庶子。分司南都。熙載盡斥諸妓。後主喜。留爲祕書監。俄復故官。欲遂大用之。而去妓悉還。後主歎曰。孤亦無如之何矣。宿直宮中。賜對多所弘益。後主手教褒之。進中書侍郎。卒年六十九。後主謂侍臣曰。吾竟不得相熙載。欲贈平章事。古有是或對曰。晉劉穆之贈開府儀同三司。卽故事也。乃贈右僕射同平章事。廢朝三日。諡文靖。命葬梅嶺岡。謝安故墓側。著格言。及後述三卷。擬議集十五卷。定居集二卷。初熙載嘗使周。及歸。元宗歷問周之將相。熙載曰。趙點檢。顧視非常。殆難測也。及太祖受禪。人服其識。

朱元。潁州沈丘人。本姓舒。少儻。通左氏春秋。與楊訥同爲河中李守貞客。守貞叛。俱來乞兵。楊訥者。李平也。語在平傳。元旣留事南唐。以駕部員外郎待詔文理院。數上書論事。言今幸中原多故。苟支歲月。非所以爲國。當取湖湘閩越錢塘。以固基本。且請專任軍旅。以次討定。用事者嫉其言。共譖之。以爲遠人謀。握兵包藏莫測。遂罷待詔。元失意。縱酒不事事。朝廷亦優容之。保大末。周師入淮南。元請對言兵事。元宗

大悅。命從齊王景達救壽州。元善撫士卒。與之同甘苦。每臨戰誓衆。詞指慷慨。流涕被面。聞者皆有効死。赴敵之意。破舒和二州。以功加淮南西北面行營應援都監。與邊鎬許文縝柵紫金山軍聲頗振。益柵且及壽州。元恃功。時或違景達節制。監軍使陳覺與元素有隙。且嫉其能。屢表元本學縱橫。不可信。不宜付以兵柄。元宗乃命楊守忠代之。守忠至。元帥府景達檄元計事。元憤怒欲自殺。其客宋均曰。丈夫何往不可。乃爲妻子死耶。遂舉寨萬餘人降周。由是諸軍皆潰。邊鎬許文縝楊守忠皆被擒。壽州不守。遂盡江請盟矣。元在江南娶查氏文徽女。至是伏誅。文徽累表乞貸死。不從。以珠襪覆尸於市。哭之。隕絕。觀者皆爲垂泣。元歸周。復姓舒。世宗愛其驍果。以爲蔡州團練使。其母猶在沈丘。遂迎養焉。太祖受禪。遷汀州防禦使。太平興國初卒。

論曰。亡國之君。必先壞其紀綱。而後其國從焉。方是時。疆場之臣。非皆不才也。敗於敵。未必誅。一有成功。讒先殺之。故強者玩寇。弱者降敵。自古非一世也。南唐如陳覺。馮延魯。查文徽。邊鎬輩。喪敗塗地。未嘗少正典刑。朱元取兩州於周。兵將遽之時。固未爲僇功。而陳覺已不能容。此元之所以降也。元降。諸將束手無策。相與爲俘。繫以去。而唐遂失淮南。臣事于周。雖未卽亡。而亡形成矣。欲知南唐之亡者。當於是觀之。

卷第十三

劉潘李嚴張龔列傳第十

劉仁瞻。字守惠。淮陰洪澤人。父金。事吳武王。有戰功。至濠州團練使。長子仁規。娶武王女。貴於其國。嘗爲

清淮軍節度使仁贍略通僑術。好兵書。有名於國中。事烈祖。歷黃袁二州刺史。入爲龍衛軍都虞候。拜鄂州節度使。元宗伐楚。仁贍帥州師克巴陵。撫納降附。甚得人心。保大中。湖湘戍兵潰歸。復失故楚地上。書者多謂周人有南侵之謀。淮上石偶人言。元宗聞而惡之。斷其首。自六月至冬。不雨。長淮可涉。民流入周邊城。遮殺之。不能禁。唐亦與屯田。修邊備。以壽州最爲要地。十三年。徙仁贍爲清淮軍節度使。自楊氏有吳。歲暮淮涸。輒增戍以備侵軼。謂之把淺。監軍吳廷紹。以爲無事。徒費糧糗。罷之。仁贍表陳不可罷。未及行。周已遣將李穀。王彥超。韓令坤等帥師大入。詔書暴我納李金全。援李守貞。慕容彥超。結契丹太原之罪。報至。上下失色。仁贍獨部分號令。宴勞吏士。閒暇如平時。十一月。出兵破城南大柵。殺周兵數千人。元宗遣神武統軍劉彥貞將三萬人救壽州。十四年正月。彥貞至來遠鎮。距壽州二百里。軍容甚盛。李穀燒營夜遁。保正陽。彥貞率戰艦數百艘。泝淮而上。仁贍曰。敵已畏君矣。當持重。養盛以俟。聞若遽求戰。而不能勝。則大事去矣。彥貞不從。仁贍曰。周人遜。必設伏。遇之。將敗績。乃率勵其下。益兵固守。彥貞果大敗。沒於陣。伏尸三十餘里。亡戈甲三十萬。周世宗自將攻城。屯於城西北。淝水之陽。徵宋亳陳穎許秦徐宿州丁夫數十萬。備攻城雲梯洞屋。下臨城中。數道同時進攻。填塹陷壁。晝夜不少休。如是者累月。每鼓角四發。聲震牆壁。皆動。我援兵在外者。見利輒進。常陷伏中。以故屢敗而終不悟。仁贍雖知外援之敗。意氣益壯。胡世宗在城下。據胡牀督攻城。仁贍素善射。自引弓射之。箭去胡牀數步。輒墮。世宗命進胡牀於箭墮處。後箭復遠數步而墮。仁贍知之。投弓於地曰。若天果不佑唐耶。吾有死於城下耳。終不失節。於是世宗遣中使來諭曰。知卿忠義。然士民何罪。又親駕臨城招之。皆不從。自正月至四月。不可下。世宗還京師。楊

秦滁和舒蘄諸州皆復爲唐守。渦口定遠周兵戍守者亦皆爲我師襲破。江左幾復振。而壽州之圍獨不解。元宗遣元帥齊王景達以兵數萬來援。分重兵據紫金山。列寨十餘處。與城中傳烽相應。築甬道抵城。通餽餉。六月。仁贍出兵殺周兵數百。焚攻城洞屋甚衆。周將李重進等兵力頗屈。仁贍因請乘世宗之歸。以邊鎬守城。自出決戰。景達畏懦。又方任陳覺。固不許。仁贍憤鬱得疾。少子崇諫夜泛小舟渡淮。謀紓家禍。爲軍校所執。仁贍命腰斬之。監軍使文德殿使周廷構哭於中門。又求救於仁贍妻薛氏。薛氏曰。崇諫幼子。固所不忍。然貸其死。則劉氏爲不忠之門。促命斬之。然後成喪。聞者皆爲出涕。十五年二月。世宗復親征。屢戰皆克。唐軍被俘馘者四萬人。餘衆不能復整。朱元朱仁裕孫璘皆降。周仁贍聞之。扼吭憤歎。世宗知壽州且下。心獨嘉仁贍之忠。恐城破殺之。乃下詔諭使自擇禍福。三月甲辰。又耀兵城北。而仁贍已困篤。不知人。監軍周廷構營田副使孫羽等爲仁贍表請降。戊申。世宗次城北受之。昇仁贍至幄前。撫勞嘉歎。拜天平軍節度使。兼中書令。命還城養疾。辛亥。晝晦。雨黃沙如霧。世宗在下蔡。疑有變。馳騎覘之。乃仁贍卒。年五十八。州人皆哭。偏裨及士卒自剄以殉者數十人。世宗遣使弔祭。追封彭城郡王。錄其子崇讓爲懷州刺史。賜莊宅各一區。元宗聞仁贍死。哭之慟。贈太師。中書令。諡忠肅。嘆曰。仁贍有知。其肯捨我。而受周命耶。是夕。夢仁贍若拜謝。庭中加封衛王。後主立進封越王。開寶中。仁贍子崇諒爲進奉使。太祖嘉其忠臣之後。特命爲都官郎中。仁贍至今廟食壽春不絕。

論曰。政和中。先君會稽公爲淮西常平使者。實請於朝。列仁贍於典祀。且名其廟曰忠顯。後又嘗寓家壽春。方世宗攻下壽州。廢爲壽春縣。而徙壽州於下蔡。故壽春父老喜言仁贍死時事。言其夫人不食五日。

而卒。今傳記所不載。廟在邑中。歲時奉祀甚盛。乾道淳熙之間。予遊蜀。在成都見梓潼令金君所藏周世宗除仁贍天平軍節度使告身。白紙書。墨色印文皆如新。金君言。仁贍獨一裔孫。賣藥新安市。客死無後。故得之。其詞與王溥所修周世宗實錄皆合。若歐陽氏五代史所稱盡忠所事。抗節無虧。前代名臣。幾人可比。予之南伐。得汝爲多。蓋摘取制中語載之。本不相聯屬。又頗有潤色也。以仁贍之忠。天報之宜如何。而其後於今遂絕。天理之難知如此。可悲也夫。

潘佑。幽州人。祖貴。事劉仁恭爲將。守光殺之。父處常。脫身南奔。事烈祖。爲散騎常侍。佑生而娟潔。閉門苦學。不交人事。文章議論。見推流輩。陳喬輩薦於元宗。起家祕書省正字。後主在東宮。開崇文館。以招賢。佑預其間。及嗣位。遷虞部員外郎。史館修撰。議納后禮。援據精博。遷知制誥。召草勸南漢書。文不加點。遷中書舍人。後主以潘卿稱之。酷喜老莊之言。嘗作文曰。莊周有言。得者時也。失者順也。安時處順。則哀樂不能入也。僕佩斯言久矣。夫得者。如人之有生。自一歲至百歲。自少得壯。自壯得老。歲運之來。不可卻也。此所謂得之者時也。失之者。亦如一歲至百歲。暮則失早。今則失昔。壯則失少。老則失壯。行年之去。不可留也。此所謂失之者順也。凡天下之事。皆然也。達者知我無奈何物。物亦無奈何也。其視天下之事。如奔車之歷蟻蛭也。值之非得也。去之非失也。燕之南。越之北。日月所生。是爲中國。其間含齒戴髮。食粟衣帛者。是爲人。剛柔動植。林林而無窮者。是爲物。以聲相命。是爲名。倍物相聚。是爲利。彙首而芸芸。是爲事。事往而記於心。爲喜爲悲。爲怨爲恩。其名雖衆。實一心之變也。始則無物。終復何有。而於是強分彼我。彼謂我爲彼。我亦謂彼爲彼。彼自謂爲我。我亦自謂爲我。終不知孰爲彼耶。孰爲我耶。而世方狗欲嗜利。繫心

於物局促若轅下駒。安得如列禦寇莊周者。焚天下之轅。釋天下之駒。浩浩乎復歸於無物歟。此吾平昔所言也。足下之行。書以贈別。開寶五年。更官名。改內史舍人。初與張洎親厚。及俱在西省。所趨既異。情好頓衰。每歎曰。堂堂乎張也。難與並爲仁矣。時南唐日衰削。用事者充位無所爲。佑憤切上疏。極論時政。歷詆大臣將相。詞甚激訐。後主雖數賜手札嘉歎。終無所施用。佑七疏不止。且請歸田廬。乃命佑專修國史。悉罷他職。而佑復上疏曰。三軍可奪帥也。匹夫不可奪志也。臣乃者繼上表章。凡數萬言。詞窮理盡。忠邪洞分。陛下力蔽姦邪。曲容諂僞。遂使家國憤憤。如日將暮。古有桀紂孫皓者。破國亡家。自己而作。尙爲千古所笑。今陛下取則姦回。敗亂國家。不及桀紂孫皓遠矣。臣終不能與姦臣雜處。事亡國之主。陛下必以臣爲罪。則請賜誅戮。以謝中外。詞既過切。張洎從而擠之。後主遂發怒。以潘佑素與李平善。意佑之狂直。多平激之。而平又以建白造民籍爲所排。乃先收平屬吏。併使收佑。佑聞命自剄。年三十六。徙其家饒州。處士劉洞賦詩弔之。國中人人傳誦。爲泣下。及王師南征。下詔數後主殺忠臣。蓋謂佑也。子華仕宋。至屯田員外郎。以疾致仕。景德中。真宗皇帝憐佑之忠。起華於家。授故官。

論曰。佑學老莊。齊死生。輕富貴。故其上疏。縱言詆訐。若惟恐不得死者。雖激於一時忠憤。亦少過矣。後主非強懷雄猜之君。而陷之於殺。諫臣使佑學聖人之道。知事君之義。豈至是哉。不幸旣死。同時諸臣。已默默爲降虜矣。猶醜正嫉言。視之如仇。誣以狂愚。惑溺淫祀。左道之罪。至斥爲人妖。雖後之良史。有不能盡察其說者。於戲悲夫。

李平。本姓名曰楊訥。少爲嵩山道士。與汝陰布衣舒元共學。數年業成。同游蒲中。客於節度使李守貞。守

貞叛漢使兩人懷表間行乞師於金陵元宗爲出師數萬爲之聲援甫出境而守貞叛兩人無所復命且唐遇之厚因留事唐而訥始自稱李平元亦易姓朱元宗皆以爲尙書郎吳越侵常州欲以平爲將固辭遷衛尉少卿周兵取蘄州不能有復棄而歸乃以平爲刺史朱元叛元宗以平本與元同歸唐慮其不自安召還金陵使者失指械平以歸元宗大驚慰勉之拜建州節度使召爲衛尉卿潘佑好老莊平少爲道士習其說因相與遊平請復井田法造民籍復造牛籍課民種桑後主本好古務農甚悅其言使判司農寺平急於成功施設無漸人不以爲便後主亦中悔罷之而佑歷詆一時公卿獨稱薦平請以判司會府羣議益不平會佑以直諫得罪因坐以與平淫祀鬼神事繫平大理獄縊死獄中

嚴續字興宗馮翊人祖實仕故唐爲江淮水陸轉運判官徙家廣陵父可求爲吳武王謀臣及景王宣王嗣立又皆有功宣王建國可求爲尙書左僕射同平章事大和二年卒續十餘歲以父蔭補千牛備身遷祕書郎尙烈祖女生長富貴而性恭謹歷兵部侍郎尙書左丞元宗卽位進禮部尙書中書侍郎出牧池州復拜中書侍郎兼三司使又出爲江州節度使數年復入知尙書省遂爲門下侍郎同平章事初續之未出池州也宋齊丘專國公卿多附之惟續持正不爲屈翰林學士常夢錫嘗指言齊丘過咎元宗語之曰大臣惟嚴續能自立然才短恐不能勝其黨卿宜助之夢錫退諭指於續續因與夢錫親厚然不能盡用其言也卒爲黨人所排與夢錫俱補外及爲相雖自以肺附盡忠不貳然寡學識聽用多非其人不能稱職或作螃蟹賦以譏切之是時以軍興百司政事往往歸樞密院續言多不見用求罷拜鎮海軍節度使屬疾還都已革猶不亂與客言論如平時後主使內夫人問之歷陳羣臣邪正某當進某當退辭氣慷慨

慨不及其私。翼日卒。年五十七。諡曰懿。初續以不學見輕。同列遂力教子弟。諸子及孫。舉進士者十餘人。張易字簡能。魏州元城人。高祖萬福。故唐金吾將軍。後徙萊州掖縣。易性豪舉。尙氣。少讀書。於長白山。又徙王屋及嵩山。苦學自勵。食無鹽酪者五歲。齊有高士王達。靈居海上。博學精誦。少許可。易從之遊。數年。入洛。舉進士。不中。以昇元二年南歸。授校書郎。大理評事。時方重赤縣。拜上元令。元宗立。以水部員外郎。通判歙州刺史。朱匡業平居甚謹。然醉則使酒。陵人果於誅殺。無敢犯者。易至。赴其宴。先已飲醉。就席。酒甫一再行。擲杯推案。攘袂大呼。詬責鋒起。匡業尙醒。愕然不敢對。惟曰。通判醉甚。不可當也。易巍峨暗鳴。自若。俄引去。匡業使吏掖就馬。自是見易加敬。不敢復使酒。郡事亦賴以濟。太弟景遂初立。高選官僚。召爲贊善大夫。景遂召飲。以玉杯行酒。因與坐客博玩。至易。忽大言曰。殿下有重寶。輕士之意。何耶。抵於柱礎。碎之。坐皆失色。其他規正皆類此。景遂不爲忤。待易益厚。遷刑部郎中。判大理寺。周人南侵。時江淮久安。人不知戰。我師屢北。上下震恐。易獨揚言。朝路曰。國家被山帶海。守奕世之業。昔者夫差以無道之兵。威陵齊晉。孫權以草創之國。勢遏曹劉。今若上下併力。敵何足畏哉。元宗聞而異之。召使宿直。禁中議事。然亦不能用也。陳覺李徵古方用事。朝野側目。易一日朝退。歎曰。吾忝廷尉。職誅邪孽。當手斃二豎。以謝曠官。俄以吳越犯邊。出爲宣欽招諭使。判宣州。前刺史方築州城。役徒數萬。一切罷遣之。曰。自守者弱。遠圖者強。何以城爲。吳越聞之。懾服不敢復犯。後主封吳王。召易爲吳王司馬。東宮建。又爲左庶子。後主卽位。遷右諫議大夫。復判大理寺。尋乞解大理。改勤政殿學士。判御史臺。采武德至寶曆君臣問對。及臣下論奏骨鯁者七十事。爲七卷。曰諫奏集。上之。註太玄。未成。卒。年六十一。

龔慎儀。後主時爲給事中。開寶三年。高祖欲封南漢。未決。詔後主諭劉鋹。令奉正朔。後主乃遣慎儀持書使南漢。書曰。僕與足下叨累世之盟。雖疆畿阻闕。休戚實同。敢奉尺書。敬布腹心。昨大朝伐楚。足下疆吏弗靖。遂成罅隙。初爲足下危之。今弊邑使臣入貢。皇帝幸以此宣示曰。彼若能幡然改圖。單車之使。造廷則百萬之師不復出矣。不然。將有不得已者。僕料大朝之心。非貪土地也。怒人不賓而已。且古之用武。不計強弱。小大而必戰者。有四。父母宗廟之讎一也。彼此烏合。民無定心二也。敵人進不捨我。退無守路。戰亦亡。退亦亡三也。彼有敗亡之勢。我乘進取之機四也。今足下與大朝無是四者。而坐受天下之兵。決一旦之命。有國家利社稷者。固如是乎。夫疆則南面而王。弱則玉帛事大。屈伸在我。何常之有。遠天不祥。好戰危事。天方相楚。尙未可爭。而況今日之事耶。地莫險於劍閣。而蜀亡矣。兵莫強於上黨。而李筠失守矣。竊意足下國中必有矜智好謀之臣。獻尊主強國之策。以謂五嶺之險。非可遽前。堅壁清野。絕其饋道。依山阻水。射以強弩。彼雖百萬之兵。安能成功。不幸而敗。則輕舟浮海。猶足自全。豈能以萬乘之主。而屈於人哉。此說士之常談。可言而不可用。異時王師南伐。水陸並舉。百道俱進。豈暇俱絕其饋道。盡保其壁壘。或用吳越舟師。自泉州航海。不數日。至足下國都矣。人情恟恟。則舟中皆爲敵國。忠義效死之士。未易可見。雖有巨海。孰與足下俱行乎。敢布腹心。惟與大臣執計之。史館修撰潘佑之辭也。儀得書。怒。因慎儀不遣。後主表聞。太祖遂決與師。南漢平。乃得歸。後主之亡也。慎儀爲徽州刺史。會昭武留後盧絳聞國破。提兵自宣州欲入福建。過歙。慎儀閉城拒守。絳怒曰。慎儀吾故人。何爲見拒。遣裨將馬雄攻之。慎儀朝服而出。爲雄所害。

卷第十四

郭張林盧嗣二陳列傳第十一

郭廷謂字信臣彭城人父全義仕爲濠州觀察使廷謂幼好學善書札騎射補殿前承旨出爲濠州中門使全義卒擢莊宅使卽爲州監軍周侵淮南廷謂與州將黃仁謹約以死守籍州民不逞者聚於僧寺嚴兵守之日給食隨所能使造守具故周師終不知城中虛實久不可下元宗歎其忠因大發戰糧命與林仁肇援壽州周世宗聞之徒下蔡浮橋於渦口築壘夾淮東西以謹橋扼濠壽之衝暑雨淮漲廷謂掩不備輕舟泝流急趨渦口將麾兵斷筓周人覘知設伏待之廷謂將至揣得其情駐軍不進襲敗周將武行德周務勅於定遠斬首數百行德挺身逃卒焚浮橋周兵死者不可計遂盡焚軍資取良馬數百進武功殷使就遷州刺史猶以爲賞薄又遷團練使兼上淮水陸應援使及紫金山戰唐將帥多降於周廷謂獨還軍守濠州治壁壘繕戈甲爲守備世宗復南征廷謂表金陵請援且言周師日張願卑辭請和以俟機會夜出敢死士千餘襲破周營焚雲梯洞屋周人大驚相蹂踐死者甚衆然援師不至世宗親攻城焚戰艦數百艘殺二千人進攻羊馬城又殺數百人遣諜持詔諭降廷謂廷謂度不能支奉表於周懇言世受本國爵命家在江南欲遣使稟命國主世宗許之爲緩攻及廷謂使還知金陵卒不能救集將士於壘門南嚮慟哭再拜乃降世宗見廷謂賜宴勞之曰兵興以來江南敗亡相踵惟卿能犯渦口浮橋破定遠寨足報國矣濠州小城使汝自主守豈能固哉賜襲衣金帶良馬及器皿萬餘拜亳州防禦使以其弟廷讚

爲和州刺史。因命帥濠州兵東攻天長。下之。遷樓櫓戰權左右廂都監。入朝。官至靜江軍節度。觀察留後。知梓州。代歸。賜第東都。卒年五十四。廷謂事母孝。朝夕束帶立侍。寒暑不變。爲政亦有惠愛。方廷謂降周時。令其錄事參軍鄧李延鄒草降表。延鄒責以忠義。不爲具草。廷謂愧其言。然業已降。必欲得表。以兵脅之。延鄒投筆曰。大丈夫終不負國。爲叛臣作降表。遂遇害。元宗聞之。召見延鄒子。命以官。

張彥卿史失其鄉里世家。保大末。周世宗南侵。彥卿爲楚州防禦使。周師銳甚。旬日間。海泰州靜海軍皆破。元宗亦命焚東都官寺民廬。徙其民渡江。世宗親御旗鼓攻楚州。自城以外皆已下。發州民潘老鶴河。遣齊雲戰艦數百。自淮入江。勢如震霆烈焰。彥卿獨不爲動。及梯衝臨城。鑿城爲窟室。實薪而焚之。城皆摧圮。遂陷。彥卿猶列陣城內。誓死奮擊。謂之巷鬪。日暮。轉至州廡。長短兵皆盡。彥卿取繩。牀搏戰。及兵馬都監鄭昭業等千餘人皆死之。無一人生降者。周兵死傷亦甚衆。世宗怒。盡屠城中諸民。焚其室廬。然得彥卿子光祐。不殺也。元宗下詔。贈彥卿侍中。天長縣時陞爲雄州。刺史建武軍使。易文贊亦固守。聞楚州陷。遂降。彥卿馬元康書以爲彥能亦莫知孰是也。

論曰。彥卿守楚州。孤壘無援。當百倍之師。身可碎。志不可蹙。雖劉仁贍殆不能過。而史家傳載獨略。至其名亦或不同。於虜何其重不幸也。

林仁肇建陽人。事閩爲裨將。沉毅果敢。文身爲虎。軍中謂之林虎子。閩亡。久不見用。會周侵淮南。元宗遣使至福建募勇士。得仁肇。及陳德誠。鄭元華。皆拔爲將。仁肇率偏師援壽州。攻城南大寨有功。又破濠州水柵。推淮南屯營。應援使。時周人正陽浮橋初成。扼援師道路。仁肇率敢死士千人。以舟實薪芻。乘風舉。

火焚橋。周將張永德來爭。會風回。火不得施。我兵少卻。永德鼓噪乘之。遂敗。仁肇獨騎一馬爲殿。永德引弓射之。屢將中。仁肇輒格去。永德驚曰。此壯士不可逼也。遂捨之而還。及割地。元宗以爲潤州節度使。徙鄂州。又徙南都留守。開寶中。密言於後主曰。宋淮南諸州戍守單弱。而連年出兵。滅蜀平荊湖。今又取嶺表。往返數千里。師旅罷弊。此在兵家爲有可乘之勢。請假臣兵數萬。出壽春。渡淮。據正陽。因思舊之民。以復故境。彼縱來援。吾形勢已固。必不得志。兵起之日。請以臣舉兵。外叛。聞事成。國家饗其利。不成。族臣家。明陛下不預謀。後主懼不敢從。時皇甫繼勳。朱全贇。掌兵柄。忌仁肇雄略。謀有以中之。會朝貢使自京師回。隨使言仁肇密通中朝。見其畫像於禁中。且已爲築大第。以待其至。後主方任繼勳等。惑其言。使人持觥往毒之。仁肇少病風。口氣常臭。醫云肺掩不正。及遇醜家人。怪其不臭。俄卒。初。仁肇尤爲陳喬所知。至是。喬歎曰。國勢如此。而殺忠臣。吾不知所稅駕也。然不能白其誣。仁肇卒。逾年。後主遂見討。又逾年。國爲墟矣。

盧絳。字晉卿。宜春人。自言唐中書舍人。歙州刺史肇之後。初名克。慕晉魏絳。更焉。讀書略通大指。喜論當世利病。然脫略細檢。每以博弈角觝爲事。舉進士。不中。爲吉州回運務計吏。盜庫金。事覺。當伏危法。乃更儒服。亡去。至新淦。客於土豪陳氏。與其子弟共學。絳好縱橫。兵書。日夜讀之。陳氏察其非士流。謂曰。朝廷方求賢豪。吾子其可久留此乎。因厚具裝遣行。絳將還宜春。中途飲博。盡費其裝。比至家。母及兄弟皆鄙詭之。絳乃入廬山白鹿洞書院。猶亡賴。以屠販爲事。多脅取同舍生金。又持推貨。誣山中浮屠。以邀賄謝。人皆患苦之。與諸葛濤。蒯鼈。號廬山三害。朱軻爲國子助教。將捕治其罪。復亡去。往來金陵。丹陽間。遇大

寒平地躍起。折簷桷爲薪。以自濟。守倉吏召歸。使躍倉簷。自氣樓入倉中盜米。一夕往返數十。久之。乃上書論事。未報。詣樞密使陳喬。口陳所上書詞。辨從橫。喬聳然異之。用爲本院承旨。授沿江巡檢。募亡命習水戰。使馬雄王川軍等分將之。要吳越兵於海門。屢獲舟艦。以善戰聞。開寶中。密說後主曰。吳越仇讎。腹心之疾也。他日必爲北兵鄉導以攻我。臣屢與之角。知其易與。不如先事出不意滅之。後主曰。然則大朝且見討奈何。絳曰。臣請詐以宣歙叛。陛下聲言伐叛。且賂吳越乞兵。吳越之兵勢不得不出。俟其來拒擊之。而臣躡其後。國可覆也。滅吳越則國威大振。北兵不敢動矣。後主不聽。及王師來討。以絳爲凌波都虞候。沿江都郡署。守秦淮水柵。戰屢勝。諸將忌其能。共說後主遣絳出援潤州。乃授昭武軍節度留後。帥八千人陣於潤州城下。北軍不敢逼。入城拒守。而節度使劉澄謀因計事斬絳。以城降。絳覺之。澄乃謂絳曰。都城危甚。萬一不守。守此何爲。絳曰。君爲守不可棄城。宜赴難者。絳也是夕。澄遣裨將出送降款。絳帥部下馳出。欲冒圍入金陵。圍堅不可入。乃走保宣州。金陵城陷。諸郡皆下。絳獨不降。謀南據閩中。過歙州。怒刺史龔慎儀不出迎。殺之而行。太祖使絳弟襲招絳。絳初欲殺襲。以明不屈。已而卒降。至京師。授冀州團練使。遇龔慎儀兄子贊善大夫頴於朝。詬絳曰。是殺我叔父者。執至殿。陞訴冤。詔屬吏樞密使曹彬言其才略可用。願宥其死。使自效。太祖曰。是貌類侯霸。何可留也。斬於西市。絳臨刑大呼曰。陛下不記以鐵券誓書招臣乎。霸榮河東將。嘗來降。已而復叛。歸弑其主。劉繼恩者。故太祖深惡之。

劉鼐。宣城人。善屬文。南唐承唐末。文體纖麗之弊。士率不能自振。鼐獨不事華藻。以理趣爲本。有承平餘風。然居鄉飲博。無行不爲。人士所容。迺去。入廬山國學。亡賴尤甚。免乃勵風操。尙信義。一言之出。必復而

後已嘗蓄龍尾硯友人欲之而不言菴亦心許之未及予也一日友人不告而歸菴悔恨徒步數百里追及授硯而還猶以素行爲有司所擯終國亡不仕久之遊京師擢進士第仕至殿中丞樊若水欲薦於朝菴恥之亟致仕歸隱廬山數年卒

陳喬字子喬廬陵玉笥人父濟事吳爲翰林學士烈祖時以兵部尙書卒喬幼敏悟文辭清麗事親以孝聞濟死撫恤族黨均財給之親疏無間起家爲太常寺奉禮郎歷屯田員外郎中書舍人淮南兵興元宗憂蹙不知所爲陳覺李徵古請以宋齊丘攝政元宗怒度羣臣必持不可乃促召喬草詔如覺徵古言喬請對未報排宮門入頓首曰陛下旣署此則百官朝請皆歸齊丘尺地一民非陛下有陛下縱脫屣萬乘獨不念先帝中興大業之艱難乎讓皇幽囚丹陽宮陛下所親見也他日垂涕求爲田舍翁不可得矣元宗笑而止引喬入見后及諸子曰此忠臣也及齊丘黨與皆斥喬與齊丘尤親厚獨得不坐遷都豫章以喬輔太子留金陵後主嗣位歷吏部侍郎翰林學士承旨樞密副使遂以門下侍郎兼樞密使貶制度故右內史侍郎兼光政院使輔政喬風度淹雅小心守法度然短於才略吏胥多交通權倖侮文法不能察也太祖遣使召後主入朝後主欲往以喬爲介喬曰往必見留如社稷何後主懼見討喬曰陛下不得已當以臣爲解及兵圍金陵太祖又遣進奉使江國公從鑑諭指欲後主自歸且命曹彬緩攻以俟之而喬堅持不可劉澄以潤州降後主方惶惑欲置其家不問喬憤切曰人臣受重寄一旦開門迎敵此豈可容悉取其父母妻子斬之於是人皆知喬必死國事矣及城將陷後主自爲降款命喬與清源郡公仲寓詣曹彬喬持款歸府投承露中復入見云自古無不亡之國降亦無由得全徒取辱耳請背城一戰而死後

主握喬手涕泣不能從。喬曰：如此則不如誅臣。歸臣以拒命之罪。後主又不從。乃掣手而去。至政事堂。召二親吏。解所服金帶與之曰：善藏吾骨。遂自縊。二吏徹榻瘞之。金陵平。家人謀改葬。求尸不獲。或見一丈夫衣黃半臂。舉手障面。及發瘞。如所見云。

陳起。新州人。性剛硬。尤惡妖異。昇元中。以進士起家。爲黃梅令。時縣境獨木村有妖人諸佑。挾左道。自言數世不食肉。能使富者貧。貧者富。但民稍稍從之。初有徒數十人。積數年。從者至數百。男女無別。號曰忍辱。夜行晝伏。取資於盜。相與倡言。佑有神術。能升虛空。入水火。州縣亦憚之。不敢問。起到官。邑人畢賀。佑獨偃蹇不至。起乃按戶籍。取佑爲里正。不服。媿言曰：吾且斷令頭。起告巡檢使周鄰。出兵捕佑等。獲之。不能神。皆就執縛。搜其家。得乘輿服器。遂斬之。鄰欲宥其婦女童稚。起曰：此皆濱亂人倫。不可使有遺育。乃併斬之。起由是知名。官至監察御史卒。

卷第十五

周鄭李三劉江汪郭伍蕭李盧朱王魏列傳第十二

周惟簡。鄱陽人。隱居明易。後主聞其名。召至金陵。起布衣。爲集賢殿侍講。以虞部郎中致仕。還山。金陵受園間。道召還。入後苑。講否卦。後主思得奇士。能使兵間者。張洎薦惟簡。可以譚笑和解。乃授給事中。副徐鉉使京師。後主手疏言惟簡託志妙門。存心道典。伴臣修養。不預公途。蓋爲之聲價。冀動朝聽。比至。太祖召見。詰責。鉉猶懇奏不已。惟簡惶恐。反言曰：臣本野人。未嘗仕宦。李煜強遣來。未嘗預聞。使指伏聞。終南

山多靈藥。願得棲隱。太祖許之。金陵平。命爲國子周易博士。判監事。或謂曰。終南之言不誦。且得罪。惟簡不得已。上表求解官。以遂初志。改虞部郎中致仕。授其子繕京兆鄠縣主簿。使就養。太平興國中。復表求仕。授太常博士。遷水部員外郎。卒。繕後舉進士中第。仕亦至尚書郎。

鄭彥華。福闈人。祖父世爲福建諸州刺史。彥華少隸節度使李弘義帳下。常射殺乳虎。以勇聞。元宗出師。攻福州。大將王崇文遣卒李興。登樓車罵弘義。弘義不勝憤。募生得興者。彥華請行。夜縋出城外。伏壕傍。興猶慢罵不已。彥華操長鉤。得興。挾以登城。城上皆鼓譟。弘義得興而甘心焉。崇文不能下城。遯去。歲餘。劍州刺史陳誨。以水軍來攻。彥華適出屯候官。以所部降誨。誨與語。奇之。署軍校。南唐與周師相拒。淮南。彥華大小百餘戰。身被五十餘創。累遷至鎮海軍節度使。加同平章事。後主見討王師自采石作浮梁。渡江。後主命彥華督舟師萬人。又遣別將杜貞率步兵萬人同逆戰。後主親遣行。戒之曰。水陸兩軍相表裏。則吾事濟矣。比與王師遇。貞以所部力戰。彥華擁兵不救。貞敗而潰。金陵聞之。喪氣。遂閉壘自守。以至國破。亦不能正彥華之罪矣。彥華從後主入朝。爲右千牛衛將軍。太宗征大原及幽州。用彥華爲將。無功。猶歷諸衛將軍。至左千牛衛大將軍。卒年七十三。子文寶。初仕後主。以文學選爲清源公仲寓掌書記。遷校書郎。歸朝。南唐故臣皆許錄用。文寶獨不自言。後主以環衛奉朝請。不納。客謁文寶。乃被篋荷笠。作漁者。以見。寬譬久之。後主嘆其忠。後中進士第。仕至兵部員外郎。國史有傳。

李貽業。故唐時平章事。蔚從曾孫。父戴。唐末第進士。奔吳。爲起居郎。貽業事烈祖。至翰林學士。烈祖晏駕。大臣欲奉宋后臨朝。命中書侍郎孫忌草遺制。貽業獨奮曰。此姦人所爲也。大行常謂婦人預政。亂之本。

也。安肯自爲此。若果宣行。貽業當對百官裂之。會宋后亦不許。於是臨朝之義遂寢。元宗語貽業曰。疾風知勁草。於卿見之。保大中以兵部侍郎卒。諡曰簡。初。戴爲人簡率。無威儀。貽業又甚於父。平居頽然。不言是非。國有大議。必首斷之。尤好飲酒。常折簡招親友曰。今夕佳月。能相過乎。比客集。貽業已大醉。指酒壺曰。本用相待。酒興忽來自倒之矣。其疎豁大抵如此。

劉崇俊。字德修。楚州山陽人。祖全。以功臣爲濠州刺史。有威名。全卒。子仁規繼其任。爲政苛虐。及李崇俊繼之。盡反仁規之政。人懷其惠。數年。漸專恣不法。多畜不逞。使過淮。剽掠。獲美女良馬。以自奉。元宗陞濠州爲定遠軍。因拜崇俊節度使。以其子節尙太寧公主。然元宗亦惡其爲人。會壽州姚景卒。崇俊厚賂權貴。求兼領壽州。元宗乃陽若不解其意。命移鎮壽州。而遣楚州刺史劉彥貞馳入濠州代之。崇俊自悼失計。頗革心循法度。未幾得疾。卒。年四十。贈太尉。諡曰威。

劉洞。廬陵人。隱居廬山二十年。能詩。長於五字唐律。自言得賈島法。後主嗣位。尤屬意詩人。或以洞言者。洞遂獻詩百篇。卷首石城篇。其詞石城古渡頭。一望思悠悠。幾許六朝事。不禁江水流。後主讀之。感愴不怡者久之。因棄不復觀。洞亦不復見省。金陵受圍。洞猶在城中。國亡。洞過故宮闕。徘徊賦詩。多感慨悲傷。不以不遇故有怨懟語。未幾卒。與洞同時有夏寶松者。亦隱廬山。相與爲詩友。洞有夜坐詩。寶松有宿江城詩。皆見稱一時。號劉夜坐夏江城云。

江爲宋人。避亂徙閩。元宗初設貢舉。爲屢爲有司所黜。嘗有題白鹿寺詩。元宗南遷。過而愛之。爲由是愈自負。放脫一時。卒無薦引者。居懷憤積。東書欲東走吳越。爲同謀者所發。按得其狀。伏誅。

汪召符歛人能屬文烈祖初嘗上書論事合指宋齊丘頤仰之召符貽齊丘書謂其疾己才齊丘大怒密使人誘召符乘舟痛飲至石頭餓殍下沉殺之

郭昭慶廬陵人博學能自力嘗著唐春秋三十卷保大中獻所著治書補揚子尉辭不受後主時復獻經國治民論擢著作郎時方奉中朝凡歲慶賀貢方物牋表及廷勞宴餞之辭率命昭慶爲之一日方晨起造朝暴卒

伍喬廬江人居廬山國學數年力於學詩調寒苦每有瘦童羸馬之歎山中浮屠夢仰視見一大星芒色甚異旁有人指之曰此伍喬星也既覺訪得喬乃傾資奉之使入金陵舉進士及試畫八卦霽後望鍾山詩故事中選者主司必延之陞堂置酒時有宋貞觀者首就坐張洎續至主司覽其文揖貞觀南坐引洎坐於西酒至數行喬始上卷主司歎其傑作乃徙貞觀處席北洎處席南以喬居賓席又覆考勝出喬果爲首洎貞觀次之時稱主司精於衡鑑元宗亦大愛喬程文命勒石以爲永式仕至考功員外卒

蕭儼廬陵人幼舉童子中其科稍長命爲祕書省正字烈祖初歷大理司自刑部郎中以平恕稱烈祖晚服金石藥多暴怒近臣數被譴罰宣徽副使陳覺不自安稱疾在告者數月及聞遺詔卽以其日造朝儼劾奏覺傾耳私室以幸禍變宜重置於法不報烈祖輔吳設法禁以良人爲賤至是馮延巳延魯欲廣置妓妾輒矯遺制託稱民貧許賣子女儼駁曰昔延魯爲東都判官已有此請大行以訪臣臣對曰陛下納麓之初出庫金贖民孰不歸心今寶運中與人仰德澤奈何欲使鬻子資豪家役使乎大行以臣言爲然將罪延魯臣曰此但智識淺陋耳非有他也罪之且塞言路大行乃斜封其奏抹三筆持入宮願求之宮

中既而果得留中章奏千餘。皆斜封。有一抹至三抹者。遂得延魯奏。然大臣亦方以豪侈相高。利於廣聲色。因共謂遺制已宣行。不當追改。遂已。元宗初以國讓景。遂羣下持不可。乃以景遂爲諸道兵馬元帥。景遂副之。宜告國中。以兄弟相傳之意。儼極諫。謂夏殷以來。天下爲家。父子相傳。不易之典也。景遂景達亦固讓。不敢當。然元宗意愈確。不之聽。江文蔚韓熙載典太常禮儀。議烈祖稱宗。儼獨建言。帝王己失之。己得之。謂之反正。非己失之。自己復之。謂之中興。中興之君。廟宜稱祖。先帝與己暨之業。不應屈而稱宗。文蔚亦以儼議爲當。遂用之。保大二年。元宗終欲傳位景。遂下詔命總庶政。惟樞密使魏岑查文徽許奏事。餘非特召不得對。儼上疏力爭。會宋齊丘賈崇皆以爲不可。遂收所下詔。其後元宗於宮中作大樓。召近臣入觀。皆歎其宏麗。儼獨曰。比景陽但少一井耳。元宗怒。貶舒州副使。孫忌爲觀察使。遣州兵給儼。實防衛之。儼謂忌曰。僕以言獲罪耳。顧命之日。君持異議。幾危社稷。君之罪。豈不重於僕乎。反見防何也。忌慚。卽撤去。俄召還。後主初嗣位。數與嬖倖弈棋。儼入見。作色投局於地。後主大駭。詰之曰。汝欲效魏徵耶。儼曰。臣非魏徵。則陛下亦非太宗矣。後主爲罷弈。南唐亡。儼以老病歸鄉里。杜門數年。卒年七十餘。

劉承勳失其鄉里。以善心計。事烈祖爲糧料判官。遷德昌宮使。德昌宮者。蓋南唐內帑別藏也。自吳建國有江淮之地。比他國最爲富饒。山澤之利。歲入不貲。烈祖勵以節儉。一金不妄用。其積如山。太子嘗欲一杉木作版障。有司以聞。烈祖書奏。後曰。杉木不乏。但欲作戰艦。以竹代之可也。然德昌宮簿。頗委無由勾校。承勳獨任其事。盜用無算。保大後。貢奉事興。倉猝取辦。愈得以爲姦利。畜妓樂數十百人。每置一妓。價數十萬。教以藝。又費數十萬。而服飾珠犀金翠。稱之又厚。以寶貨賂遺權要。故終無發其罪者。太祖平荆。

湖詔江南具舟漕其米入京師。承勳狡黠。計後主終不能有其國。欲預自結中朝。爲異時計。乃請行督巨艦。自長沙抵迎鑾。千柁相銜。太祖覺其意而惡之。及國亡。承勳歸京師。首自陳漕米事。太祖曰。此汝主動王耳。汝安得有勞。叱出。特命勿絀用。久客無資。裸袒乞食。不勝凍餒而死。

李元清。濠州人。徙金陵。趨健善走。能及奔馬。常步入梁宋刺事。開寶中。後主以吉州永新與湖南隣。命元清爲永新制置使。每數月一託疾。不坐衙。輒微服入湖南境。人無知者。以故敵人動息。皆知之。累年邊障晏然。國亡。歸京師。元清心不欲仕。二國僞稱失明。召驗之。揮刃將及頸。而目不瞬。乃放歸濠州卒。

盧郢。金陵人。工屬文。有勇力。好吹鐵笛。乾德中。後主命韓德霸爲都城烽火使。警察非常。怙權暴橫。國人望其前驅。莫不奔避。郢嘗遇之。調笛自若。德霸叱左右捕執。郢奮臂擊十餘人。皆顛墮。乃直前摔德霸。墜馬毆之。敗而傷目。德霸入訴。後主叱之出。顧近侍笑曰。我帥遇一措大。不能自全面目。尙敢訴耶。遂罷其職。從郢舉進士。試王度如金玉賦。擢第一。徐鉉娶郢姊。嘗受後主命。撰文累日未就。郢曰。當試爲君杼思。適庭下有石。千夫不得舉。郢戲取弄之。有頃。索酒頓飲。數升。復弄如初。忽顧筆吏口占使書。不覩易一字。鉉伏其工。後主亦以爲適俊。可愛。國亡。歸朝。知金州卒。

朱弼。字君佐。建州人。舉明經第一。授國子助教。知廬山國學。盧絳蒞。諸葛濤欲博不逞。患苦諸生。學官依違無收問者。及弼至。一切繩以禮法。每升堂講說。座下肅然。絳等亦愧服。引去。徒自四方來者。數倍平時。國亡。捕衡山縣主簿。秩滿。求爲南嶽廟令卒。

王輿。合淝人。少與兄綰俱事吳武王。輿初爲小校。從周本攻危全諷。臨戰。本視成水滸部分諸將。指旁山

頭一小營謂輿曰爾往爲我取彼輿唯唯而色不欲行本曰爾憚往耶輿曰公必不以輿爲不武請得此柵破之捨而趨彼何爲本大喜曰爾亦知此爲必爭之地耶吾本自行今爲爾功勞而遣之輿乘輕舟襲破其前鋒遂排柵入諸軍繼進賊大潰積功遷至諸軍都虞候烈祖輔吳以腹心所寄進控鶴都虞候持重有謀甚見倚任久乃出爲光州刺史初輿兄子爲海州刺史叛附梁聞輿在光山遣間使通問輿執以歸金陵因求罷郡入爲左宣威統軍歷鎮海節度留後金吾衛大將軍武昌節度使與監軍甄廷堅不相得會廷堅被誣告有貳志烈祖遣使械廷堅屬吏未至輿刺知之密告廷堅因爲謀曰今獨可卽日乘輕舟歸闕待罪毋與中使遇廷堅恐懼不暇爲他謀卽從其計至金陵遇赦且以其先自歸得免人推其長者元宗嗣位加同平章事保大二年卒年七十四輿少從軍攻潤州爲巨弩所射中右耳矢自左耳出又中旁一人猶立死輿扶歸營臥百餘日復起耳至老不聵亦無癰瘡攻潁州倚營門仗劍驅士卒登城城上礮石發中營門及鎧之半皆糜碎而輿不傷莫不異之兄綰亦至虔州節度使

魏岑字景山鄆州須城人善詔諛學揣摩尤爲宋齊丘所知薦授校書郎保大中驟進至諫議大夫元宗自以唐子孫慨然有定中原復舊都之意有司請行南郊禮元宗曰俟天下爲一然後告謝天地岑遂與陳覺馮延巳延魯更相倡和爲拓境事嘗侍燕自言臣少遊元城樂其風土陛下還長安日乞爲魏博節度使元宗欣然許之岑趨下殿再拜謝侍衛皆竊笑覺延魯攻福州岑爲監軍應援使三人者暗懦專恣如一軍敗元宗初欲按軍法誅覺延魯而貸岑御史中丞江文蔚對仗彈奏請並岑誅之於是貶太子洗馬俄復還故官李守貞叛漢乞師岑乃力請出兵赴救於是元宗從之因以岑爲涇州巡檢使無功而

還岑自復進。姦諂彌甚。鍾謨李德明亦用事。其趨向與岑雖異。而迷國則均。戶部員外郎范沖敏懷不平。愾大將王建封上疏。請盡逐之。更用正人。元宗怒。併置沖敏建封於死。岑自謂得主眷。愈無所憚。壽州節度使劉彥貞以厚賂結岑爲與援。岑所得不可數知。遂肆言稱彥貞爲將如韓白。治民如龔黃。其敢爲誕欺如此。元宗方倚以柄任。會見沖敏爲厲。召道士上章訴天。未幾卒。

卷第十六

后妃諸王列傳第十三

烈祖元敬皇后宋氏。小名福金。父韞。江夏人。后幼流離亂兵中。昇州刺史王戎得后。烈祖取戎女。后爲媵。得幸。生元宗。王氏早卒。義祖命烈祖以爲繼室。封廣平郡君。晉國君。治內有法。不妄言笑。義祖殂於金陵。烈祖在東都。將奔喪。后密以大計諫止焉。烈祖爲齊王。封正妃。及受禪。立爲后。從容裨贊。多所弘益。烈祖嘗曰。吾思有未達。后已悟矣。昇元末。烈祖服金石藥。多暴怒。賴后以免譴者甚衆。及殂。中書侍郎孫忌。權魏岑。馮延巳。延魯。以東宮舊僚用事。欲稱遺詔。奉后臨朝聽政。后不許曰。此武后故事。吾豈爲之。元宗即位。尊后爲皇太后。保大三年十月卒。祔葬永陵。

烈祖後宮种氏。名時光。性警惠。年十六。入宮。列樂部中。俄得幸。生景暹。烈祖以受禪後所得子。甚愛之。种氏寵日盛。烈祖性嚴整。嘗大怒。聲如乳虎。殿門環爲震動。左右皆喪魂魄。种氏左手持食。右手進匕。從容如平時。烈祖怒亦頓解。他日。烈祖幸齊王宮。遇王親理樂器。大怒。數日未解。种氏負籠。輒乘間言景暹才

過齊王。烈祖正色曰：子有過，父教之，常禮也。若何敢爾！叱下殿，去簪珥，幽於別宮。數月，命度爲尼。景邊愛亦弛，終烈祖世，獨不加封爵。元宗卽位，始封景邊保寧王，許种氏就養於景邊宮中，封王太妃。宋后挾舊怨，屢欲加害，元宗力解之，乃止。

元宗光穆皇后鍾氏，父太章，事吳爲義祖裨將。義祖謀誅張灝，令嚴可求喻太章，伏死。士二十輩斬灝於府。太章許諾，義祖疑其怯，夜半往止之，曰：僕母老，懼事不成，欲徐圖之，如何？太章勃然曰：言已出口，豈有可已之理！明日遂誅灝。後頗恃功，頡頏。烈祖疑其難制，義祖曰：昔者吾亦族之禍，間不容髮，使無太章，豈有今日富貴耶？奈何以薄物細故疑之？乃命以太章次女配元宗。卽后也。昇元中，封齊王妃。元宗卽位，立爲皇后。後主卽位爲太后，以父名改稱聖后。后寢疾，後主朝夕侍側，衣不解帶，藥必親嘗，乃進。乾德三年十月卒。是日雨沙於金陵。後主毀瘠骨立，杖而後能起，哀動左右。葬順陵。

後主昭惠國后周氏，小名娥皇，司徒宗之女。十九歲來歸，通書史，善歌舞。尤工琵琶，嘗爲壽元宗前。元宗歎其工，以燒槽琵琶賜之。至於采戲奕棋，靡不妙絕。後主嗣位，立爲后，寵嬖專房，創爲高髻織裳，及首翹鬢柔之妝，人皆効之。嘗雪夜醮燕，舉杯請後主起舞。後主曰：汝能創爲新聲，則可矣。后卽命牋綴譜，喉無滯音，筆無停思。俄傾譜成，所謂邀醉舞破也。又有恨來遲破，亦后所製。故唐盛時，霓裳羽衣最爲大曲，亂離之後，絕不復傳。后得殘譜，以琵琶奏之。於是開元天寶的遺音復傳於世。內史舍人徐鉉聞之，於國工曹生鉉亦知音，問曰：法曲終則緩，此聲乃反急，何也？曹生曰：舊譜實緩，宮中有人易之，非吉徵也。後主以后好音律，因亦耽嗜，廢政事，監察御史張憲切諫，賜帛三十疋，以旌敢言。然不爲輟也。未幾，后臥疾，已革。

猶不亂。親取元宗所賜燒槽琵琶。及平時約臂玉環。爲後主別。乃沐浴粧澤。自內含玉。卒於瑤光殿。年二十九。葬懿陵。後主哀甚。自製誄。刻之石。與后所愛金屑檀槽琵琶同葬。又作書檄之與訣。自稱嫖夫煜。其辭數千言。皆極酸楚。或謂后癡疾。小周后已入宮中。后偶褻幔見之。驚曰。汝何日來。小周后尙幼。未知嫌疑對曰。旣數日矣。后悲怒。至死。面不外向。故後主過哀。以揀其迹云。

後主國后周氏。昭惠后妹也。昭惠卒未幾。後主居聖尊后喪。故中宮久虛。開寶元年。始議立后。爲繼室。命太常博士陳致雍。考古今沿革。草具婚禮。又命學士徐鉉。史官潘佑。參定。文安郡公徐遊訐。其異同。遊多是佑議。遂施用之。逾月。遊病疽。鉉懟其不主己議。戲語人曰。周孔亦能爲厲乎。后少以戚里。間入宮掖。聖尊后甚愛之。故立焉。被寵過於昭惠。時後主於羣花間作亭。雕鏤華麗。而極迫小。僅容二人。每與后酣飲。其中國亡。從後主北遷。封鄭國夫人。太平興國二年。後主殂。后悲哀不自勝。亦卒。

後主保儀黃氏。江夏人。父守忠。事湖南馬氏。爲偏裨。邊鎬入長沙。得黃氏。納後宮。後主見其美。遷爲保儀。以工書札。使專掌宮中書籍。二周后相繼專房。燕暱。故保儀雖見賞識。終不得數御幸也。元宗後主俱善書法。元宗學羊欣。後主學柳公權。皆得十九。購藏鍾王以來墨帖至多。保儀實掌之。城將陷。後主謂之曰。此皆先帝所寶。城若不守。汝即焚之。無爲他人得。及城陷。悉焚無遺者。保儀亦從北遷。卒於大梁。又有宮人流珠者。性通慧。工琵琶。後主演念家山破。及昭惠后所作邀醉舞。恨來遲。二破久而忘之。後主追念昭惠。問左右無知者。流珠獨能追憶。無所忘失。後主大喜。後不知所終。

烈祖五子。宋皇后生元宗。楚王景遷。晉王景遂。齊王景達。種氏生江王景湯。

景遷字子通。幼警敏。讀書一覽輒不忘。烈祖輔吳。景遷尙吳公主爲駙馬都尉。歷衛內馬步軍都指揮使。海州團練使。左右軍都軍使。遂以左僕射參政事。留東都輔政。時甫成童。尋加同平章事。知左右軍使。寢疾。罷歸金陵。爲諸道副都統。以景遂代輔政。景遷病逾年。竟卒。年十九。諡曰定。無子。初。術士皆謂景遷貴不可言。故烈祖在諸子中尤愛之。及是始悟術士之妄。

景遂仕吳爲門下侍郎。烈祖受禪。封壽王。純厚夷淡。有士君子之操。讓皇之喪。景遂受命往護喪事。望柩哀慟。觀者嗷歎。烈祖殂。元宗以位讓景遂。大臣固持之而止。明年。又命景遂總庶政。已降詔。僉謂不可。乃收所下詔。久之。又以爲太弟。凡太子官屬。皆改爲太弟官屬。景遂固辭。雖不得命。終恐懼不敢安處。乃取老子功成名遂身退之意。自爲字曰退身。以見志。平居好客。善屬文。燕集無虛日。贊善大夫張易。峭直喜盡言。景遂嘗賦詩。頗纖麗。易面規之。景遂敬納。又嘗怒碎玉杯於坐。景遂亟推謝。無逆色。及易出使契丹。景遂上言力諫。以爲易國士也。宜夙夜納誨。今使航不測之淵。報聘遠夷。非國之利。元宗報之曰。易固奇士。海神當畏之。竟遣行。景遂在東宮十三年。屢乞歸藩。交泰元年三月。始改授天策上將軍。江南西道兵馬元帥。洪州大都督。太尉。尙書令。晉王以樞密副使李徵古爲鎮南節度副使。佐之。徵古習騎嫖。至鎮。專恣尤甚。景遂積久不能堪。欲斬之。而自拘有司。左右諫止。初。景遂之出鎮也。弘冀爲太子。弘冀嘗被譏於元宗。有復立景遂之意。景遂在鎮。亦頗忽忽。多忿譟。嘗以忤意殺都押衙袁從範之子。弘冀知之。乃使親吏持醜遺從範。使毒景遂。景遂擊鞠而渴。索漿。從範毒漿以進之。暴卒。年三十九。未斂。體已潰。元宗素友愛。聞訃悲悼。左右欲少慰釋之。因妄曰。太弟初得疾。忽語人曰。上帝命我代許旌陽。元宗始少解。故破

醜之事，竟不之知。廢朝七日，贈太弟，諡文成。

景達生於吳順義四年，是歲大旱，烈祖方輔政，極於焦勞。七月既望，零而得雨，景達以是日生，烈祖喜，故小名雨師，稍長，神觀爽邁，異於他兒。烈祖深器之，受禪封信王，烈祖欲以爲嗣，難於越次，故不果。烈祖殂，景遷已前死，元宗稱疾，固讓景遂，欲以次及景達，承先帝遺意，既迫於羣下之議，不得行，乃立景遂爲太弟，景達自燕王徙封齊王，爲諸道兵馬元帥，中書令。景達孝友純至，嘗從遊後苑，泛舟池中，元宗舟覆，景達在他舟，初不善泅，遽躍入水中，負元宗出人，以爲精誠所感，性剛正，疾惡，朝廷嚴憚之，帝每召宗室近臣，曲宴，馮延巳、延魯、魏岑、陳覺輩，憑寵笑呼，旁若無人。景達屢訶詰之，復極諫元宗，他日宴於東宮，延巳愧，二弟之命不出於己，欲以虛辭爲德，陽醉，撫景達背曰：爾勿忘我，景達不勝其忿，拂衣入，奏請斬延巳。元宗諭解久之，乃已。張易語景達曰：殿下力未能去羣小，而數面折之，使之懼而自謀，豈易測哉。景達悟，自是畏禍，遇曲燕輒以疾辭，保大末，淮南交兵，景達以元帥督師，陳覺爲監軍，使軍政皆決於覺，景達署牘尾而已。朱元叛壽州，陷皆覺爲之，景達亦不能詰，初出師五萬，而俘死亡叛者四萬，景達及覺引殘兵歸金陵，上還印綬，元宗恐其無功自愧，乃拜天策上將軍，浙西節度使，景達不敢當，要鎮，力辭，改撫州大都督，臨川牧，在鎮十餘年，後主嗣位，加太師，尙書令，甚尊禮之，卒於鎮，年四十八。在烈祖諸子中，最爲壽矣。贈太弟，諡昭孝，遺命留葬江州廬山，初，景達好神仙道家之說，記室徐鉉獻述仙賦以諷，行於世。景暹，字宣遠，烈祖初受禪，以十二月二日爲仁壽節，景暹以是日生，故小名仁壽，烈祖甚愛之，母种氏得譴，宋皇后鞠養，景暹如己出，元宗嗣位，封保寧王，徙封信王，出爲虔州節度使，簡易節儉，虔人安其政，贛

令卒尉邵繼良攝令以令成喪日張樂宴飲景邊立奏黜之每有小過掌書記孫峴苦言規正之景邊大重之峴卒言及必流涕厚卹其孤後主立進封江王加兼中書令元宗後主皆酷好浮屠羣臣化之政事日弛景邊獨尊六經名教排斥浮屠不少撓在鎮十一年卒年三十一贈中書令諡昭順

元宗十子弘冀弘冀後主從善從謙從慶從信凡八人可見而從慶從信失其官封又二人並逸其名鍾皇后生弘冀後主從善從謙自弘茂以下皆不知其母

弘冀元宗長子故唐之末民間相傳讖曰東海鯉魚飛上天而烈祖果育於徐氏因信符讖又有讖曰有一真人在冀州開口張弓向左邊元宗欲其子應之乃名之曰弘冀初封東平公徙王南昌元宗嗣位以弟景達爲兵馬元帥景達爲副元帥誓於烈祖梓宮前約兄弟相傳而出弘冀留守東都及景達爲太弟又徙鎮潤州封燕王弘冀爲人沉厚寡言周師陷廣陵吳越亦攻我常州元宗念弘冀尙少不習軍旅事遣使召還都部將趙鐸曰王雖富於春秋然元帥之重衆心所持忽棄其師而歸則部下必亂歸欲何之弘冀善其言聞於元宗即日大爲戰守之備部分諸將皆愜服士心元宗使龍武都虞候柴克宏右衛將軍陸孟俊救常州至潤州樞密副使李徵古白以神衛統軍朱匡業代克宏歸弘冀察克宏有才略謂曰君第前戰吾當拒守表言克宏決可破賊常州危在旦暮臨敵易將兵家所忌臣請以身保其功克宏亦感激思奮馳至常州果大破吳越兵斬首萬級獲其將佐數十人俘於潤州弘冀以時方艱危悉驅出轅門斬之人壯其決然元宗以其專誅殺不悅者久之及太弟景達力請歸藩而景達爲元帥奔潰南歸獨弘冀有功遂立爲太子參決政事元宗仁厚羣下多縱弛至是弘冀以剛斷濟之紀綱頗振起而元宗復

怒其不遵法度。一日怒甚。以打毬杖笞之曰。吾行召景遂矣。弘冀大懼。故景遂遇旣。語在其傳。元宗旣請盟於周。以在位久。恥於降屈。屢遣使請於世宗。欲傳位弘冀。使爲大國附庸。世宗賜書力止之。其詞曰。皇帝致書敬問江南國王。茲睹來章。備形綽旨。敝此日傳讓之意。述向來高尚之心。仍以數載以來。交兵不息。備陳追悔之事。無非克責之辭。雖古者省責躬。因災致懼。亦無以過也。況君血氣方剛。春秋鼎盛。爲一方之英主。得百姓之驩心。豈可高謝君臨。輕辭世務。與其慕希夷之道。孰若懷康濟之誠。且天災流行。國家代有。昔之聖哲。所不能逃。苟盛德之日新。斯景福之彌遠。諒惟英敏。必照誠懷。書詞溫潤。略似敵國。元宗乃已。世宗遣使至。亦別賜弘冀國信。以爲常。顯德六年七月。弘冀屬疾。數見景遂。爲厲。九月丙午卒。有司謚曰宣武。旬容尉張洎上書。謂世子之德。在侍膳問安。今標顯武功。垂示後世。非所以防微杜漸也。洎知元宗猶銜弘冀專殺事。其說蓋出於揣摩。元宗果大以爲然。改謚曰文獻。而洎由此進用。

弘茂。字子松。元宗第二子。幼穎異。善歌詩。格調清古。年十四。爲侍衛諸軍都候。封樂安公。騎射擊刺。皆精習。又領兵職。然不喜戎事。每與賓客朝士燕遊。惟以賦詩爲樂。初弘冀剛嚴。人多憚之。故時望歸弘茂。保大九年七月卒。追封慶王。弘茂之幼。有異僧言人壽夭禍福多驗。元宗使視弘茂。僧書九十一字以獻。及卒年一十九。

從善。字子師。元宗第七子。器度凝遠。封紀國公。使周。會帝卽位。厚其禮。遣翰林學士王著送之。初從善與鍾謨相附結。謨輒請以從善爲嗣。元宗雖不從。然意亦自愛從善。其遷南都也。使主扈從諸軍。元宗殂。未御梓宮。從善輒從。徐遊求遺詔。遊厲色拒之。至金陵。具以事聞。後主素友愛。略不以介意。愈加輯睦。進封

韓王及貶制度。降南楚國公。開寶四年。遣朝京師。太祖已有意召後主歸闕。即拜從善泰寧軍節度使。留京師。賜甲第汴陽坊。封其母凌氏吳國太夫人。後主聞命。手疏求從善歸國。太祖不許。以疏示從善。加恩慰撫。幙府將吏皆授常參官。以寵之。而後主愈悲思。每憑高北望。泣下霑襟。左右不敢仰視。由是歲時遊燕。多能不講。常製御登高文曰。玉辇澄醴。金盤繡餼。菜房氣烈。菊蕊香豪。左右進而言曰。惟芳時之令月。可藉野以登高。矧上林之伺幸。而秋光之待褒乎。予告之曰。昔予之壯也。意如馬心。如猿情。槃樂恣驢。賞忘勞。情心志於金石。泥花月於詩騷。輕五陵之得侶。陋二秦之選曹。量珠聘妓。綴綵維艘。被牆宇以耗帛。論丘山而委糟。年年不負登臨節。歲歲何曾捨逸遨。小作花枝金翦菊。長裁羅被翠爲袍。豈知荏葦乎性。忘長夜之靡靡。宴安其毒。累大德於滔滔。今予之齒老矣。心懷焉而切切。愴家艱之如燬。繫離緒之鬱陶。陟彼岡兮。跂予足。望復關兮。睇予目。原有鴿兮。相從飛。嗟予季兮。不來歸。空蒼蒼兮。風淒淒。心躑躅兮。淚連洏。無一驪之可作。有萬緒以纏悲。於戲噫嘻。爾之告我。曾非所宜。從善妃屢詣後主。號泣。後主聞其至。輒避去。妃憂憤而卒。國人哀憐之。國亡。改授右神武大將軍。太平興國初。改右千牛衛上將軍。雍熙四年。卒。年四十八。

從鑑。元宗第八子。初封舒國公。改封蔣。太祖親征揚州。李重進遣從鑑朝行在。進封鄧王。出鎮宣州。後主宴餞綺霞閣。與近臣俱賦詩。而後主自爲序。及貶制度。降江國公。太祖以不朝來討。後主遣從鑑貢帛二十萬疋。白金二十萬斤。大兵悉已南渡。從鑑留京師。館懷信鐸。捷奏至。百僚稱賀。閣門趣隨班入。邸吏亦謂當有貢獻。其介潘慎修以爲國被討。瀕亡。而使者旅賀。非禮。但奉方物以待罪。太祖嘉其知禮。爲易供。

輟。加賜性。上樽。命知制誥李穆送從鑾歸國。諭指令後主亟自歸。仍命曹彬等緩攻以俟之。而後主卒不行。以至城陷。從鑾從後主北歸。改名從浦卒。

從謙。元宗第九子。數歲爲奕棋詩。有思致。後主賞歎之。歷封鄂國公。宜春王。進吉王。及貶制度。降鄂國公。歸朝。爲右神武大將軍。淳化五年九月。以本官出爲安遠行軍司馬。後不知其所終。

從慶。失其官封。

從信。逸其行實。

後主二子。仲寓。仲宣。皆昭惠周后所生。

仲寓。字叔章。初封清源郡公。國亡北遷。宋授右千牛衛大將軍。居後主喪。哀毀逾制。太宗臨朝。遣使勞問。

終喪。賜積珍坊第一區。久之。自言族大家貧。求治郡。拜郢州刺史。在郡以寬簡爲治。吏民安之。淳化五年。

八月卒。年三十七。子正言。好學。亦早卒。於是後主之後遂絕。初江南聞後主凶。問父老皆巷哭。及是其嗣。

續歿絕。遺民猶爲之興悼云。

仲宣。小字瑞保。與仲寓同日受封。仲宣封宣城公。三歲。誦孝經不遺一字。宮中燕侍合禮。如在朝廷。昭惠。

后尤愛之。宋乾德二年。仲宣纔四歲。一日戲佛像前。有大琉璃燈。爲貓觸墮地。劃然作聲。仲宣因驚。顛得。

疾。竟卒。追封岐王。謚懷獻。時昭惠后已疾甚。聞仲宣夭。悲哀更遽。數日而絕。

雜藝方士節義列傳第十四

吳廷紹爲大醫令。列祖因食飽喉中噎。國醫皆莫能愈。廷紹尙未知名。獨謂當進楮實湯。一服。疾失去。馮延己苦腦中痛。累日不減。廷紹密詰廚人曰。相公平日嗜何等。對曰。多食山雞鷓鴣。廷紹曰。吾得之矣。投以甘豆湯。亦愈。羣醫默識之。他日取用。皆不驗。或扣之。答曰。噎因甘起。故以楮實湯治之。山雞鷓鴣。皆食烏頭半夏。故以甘豆湯解其毒耳。聞者大服。

潘辰往來江淮間。自稱野客。嘗依海州刺史鄭匡國。不甚見禮。館之馬廐旁。一日。從匡國獵近郊。匡國妻行至廐中。因視展所居。四壁蕭然。韋席竹筥而已。發筥。覩二錫丸。亦頗怪之。展歸。大驚曰。何物婦人。觸吾劍。賴吾攝其光芒。不然。身首殊矣。或以告匡國。匡國竦然曰。殆劍客也。求學其術。展曰。姑一試之。乃俱至靜院。探懷出二錫丸。置掌中。俄而氣出指端。如二白虹。旋繞匡國頸。有聲錚然。匡國汗下。如雨。曰。先生之術神矣。觀止矣。展笑引手收之。復爲錫丸。匡國表薦於烈祖。召居紫極宮。數年卒。

李冠。善吹洞簫。悲壯入雲。元宗將召之。會軍旅事興。不暇。司徒李建勳亦知音。絕款賞之。冠輒不遇。周顯德中。北遊梁宋。每醉輒登市樓長嘯。後不知所終。

某御廚者。失其姓名。唐長安舊人也。從中師至江表。未還。聞崔胤誅北司。遂亡命。而某留事吳。及烈祖受禪。御膳宴設。賴之。略有中朝承平遺風。其食味有鷺鷥餅。天喜餅。臨蹄餠。春分餠。密雲餅。鑄精炙。瓊瑰餠。紅頭簍。五色餛飩。子母饅頭。舊法具存。

申漸高。優人。昇元中。爲教坊部長。時關征苛急。屬饑內旱。一日。宴北苑。烈祖顧侍臣曰。近郊皆得雨。獨都

城未雨何也。得非刑獄有冤乎。漸高遽進曰。大家何怪。此乃兩畏抽稅。故不取入京爾。烈祖大笑。明日。下詔弛稅額。信宿大雨霑洽。周本自吳時。有威望。烈祖慮其難制。因內宴。引鵝酒賜本。本覺之。輒取御杯。均酒之。半以進。曰。願以此上千萬壽。庶明君臣一心。烈祖失色。左右莫知所爲。漸高託俳戲。舞袂升殿。曰。勅賜臣。漸高併飲之。納杯懷中而出。烈祖密遣中人持藥解之。不及。腦裂而卒。至元宗時。又有李家明。亦優人。宋齊丘止一子。輒死。悲哭踰月。齊王景達勉之。不從。家明曰。是易喻爾。作紙鸞。大書其上曰。一子不能捨。如讓皇。百口何縱之。墜其第中。齊丘取觀。爲拭淚而止。元宗失江北。遷豫章。龍舟至趙屯。舉酒望皖公山。曰。好青峭數峯。不知何名家。明對曰。此舒州皖公山也。因獻詩曰。皖公山縱好。不落御觴中。元宗太息。罷酒去。

譚紫霄。泉州人。幼爲道士。初有陳守元者。亦道士。剽地得木札數十。貯銅盎中。皆漢張道陵符篆。朱墨如新。藏去而不能。用以授紫霄。紫霄盡能通之。遂自言得道。陵天心正法。効鬼魅。治疾病。多效。閩王王昶尊事之。號金門羽客正一先生。閩亡。遁居廬山。棲隱洞。學者百餘人。武昌節度使何敬洙嘗殺女奴。投尸井中。人無知者。遇疾。召紫霄。中夜被髮仗劍。考治。見女厲自訴。詰且屏人。以語敬洙。乃丹篆符遣之。疾卽愈。廬山僧關路。有大石。堅不可鑿。紫霄往視曰。此固易爾。索杯水。噴之。命工施鑿。應手如粉。後主聞其名。召見。賜官階。辭不受。俄無疾卒。年百餘歲。今言天心法者。祖紫霄。

史守冲。潘辰。皆不知何許人。烈祖嘗夢得神丹。既覺。語左右。欲物色訪求。而守冲適詣宮門。獻丹。方展亦以方繼進。烈祖皆神之。以爲僊人。使鍊金石爲丹。服之多暴怒。羣臣奏事。往往厲聲色。詰讓。嘗以其藥賜

李建勳建勳乘間言曰。臣服甫數日。已覺炎躁。此豈可常進哉。烈祖笑曰。孤服之已久。寧有是事。諫者皆不從。俄而疽發。遂至大漸。臨終。謂元宗曰。吾服金石求長年。今反若此。汝宜以爲戒也。

耿先生者。父雲。軍大校。耿少爲女道士。玉貌烏爪。常著碧霞帔。自稱比丘先生。始因宋齊丘進。嘗見宮婢持糞掃。謂元宗曰。此物可惜。勿令棄之。取置鑪中。烹煉良久。皆成白金。嘗遇雪擁。索金盆貯雪。令宮人握雪成錠。投火中。徐舉出之。皆成白金。指痕猶在。又能燭麥粒成圓珠。光彩粲然。奪真大食國進龍腦油。元宗祕愛。耿視之曰。此未爲佳者。以夾纈囊貯白龍腦數斤。懸之。有頃。漉液如注。香味逾於所進。遂得幸於元宗。有娠。將產之夕。雷雨震電。及霽。娠已失矣。久之。宮中忽失元敬。宋太后所在。耿亦隱去。幾月餘。中外大駭。有告者云。在都城外二十里方山寶華宮。元宗亟命齊王景遂往迎。太后見與數道士方酣飲。乃迎還宮。道士皆誅死。耿亦不復得入宮中。猶然往來江淮。後不知所終。金陵好事家。至今猶有耿先生寫真云。

古史官書忠義孝行列女各爲傳。南唐樞方短世。又史牒放逸。不能盡見。撫其僅可書者。合爲節義傳。段處常。失其鄉里家世。保大中。爲兵部郎中。周侵淮南。元宗命處常浮海使契丹。乞援。處常爲契丹陳利害。甚辨。契丹本通南唐。徒持虛辭。利南方茶藥珠貝而已。至是了無出師意。而留處常不遣。處常怨其無信。誓死國事。數面誚虜主。虜主亦婉其言。優容之。以病卒於虜。趙仁澤。失其鄉里家世。保大中。爲常州團練使。周人來侵。吳越乘間出兵攻常州。仁澤朝服朝歸之。錢唐仁澤見吳越王不拜。責之曰。我烈祖皇帝中興。首與先王結好。儻

先王廟乎。吳越王怒，以刀抉其口至耳。丞相元德昭、嘉仁澤之忠，以良藥傅瘡，獲愈。後不知所終。張雄失其鄉里家世，周人來侵淮南，民自相結爲部伍，以拒周師，謂之義軍。而雄所將最有功。元宗命爲義軍首領，及割地，徙之江南。歷袁汀州刺史。後主見討，保大中，舊將無在者，乃擢雄統軍使。雄謂諸子曰：「吾必死，國難爾輩不從，吾死非忠孝也。」諸子泣受命，與田欽祚戰於溧水，敗績。他將皆遁，士卒死者萬餘人。雄與其子力戰，俱死。不同行者，亦死於它陳。父子八人無生存者。時金陵已危蹙，不復議贈卹國人哀之。

陳褒，江州德安縣人。唐元和中，給事中。京之後，十世同居。長幼七百人，不置奴婢。日會食堂上，男女異席。未冠笄者，別又爲一席。畜犬百餘，共以一船貯食飼之。一犬不至，則羣犬皆不食。築書樓，延四方學者，鄉鄰化其德。獄訟爲之衰息。昇元初，州以聞，詔復徭役，表門閭。同時見旌者，尙數家。皆五世同居云。

永興公主，烈祖女也。嫁吳睿帝太子璉，及禪代，宋齊丘請離婚。烈祖不聽。公主自以爲吳室家婦，而國亡，中懷憤悵，聞人呼之爲公主，輒悲傷流涕。烈祖愧之，乃以璉爲中書令，池州節度使。璉卒，公主哭之過哀，亦感疾卒。

余洪妻鄭氏，洪爲閩將，唐師下建州，裨將王建封得鄭氏，以其有色，而自持堅貞不撓，不敢犯。獻之大將查文徽，文徽欲納之。鄭大罵曰：「王師弔伐，當褒錄節義，以表勵風節。建封出行伍，尙知見憚，君元帥也，乃欲爲禍首耶。」文徽大慚，亟訪其夫歸之。

吳媛，浚儀人。唐史官兢之後，父志野，義不仕梁，南遊吳，遂家廬陵。媛適段甲，生子未晬，段卒，父母以媛少。

議嫁之。媿務面自誓。事舅姑極備敬謹。教所生子爲善士。韓熙載使江南。表其節云。

卷第十八

浮屠契丹高麗列傳第十五

嗚呼。南唐偏國短世。無大淫虐。徒以饑寒而亡。要其最可爲後世監者。酷好浮屠也。初。烈祖輔吳。吳郡廣陵。而烈祖居建業。大築其居。窮極土木之工。旣成。用浮屠說。作無遮大齋。七會爲工匠役夫死者。薦福。俄有胡僧。自身毒中印土來。以貝葉旁行及所謂舍利者爲贊。烈祖召豫章龍興寺僧智玄。譯其旁行之書。又命文房書華嚴論四十部。查峽副焉。並圖寫製論。李長者像。班之境內。此事佛之權輿也。然烈祖未甚惑。後胡僧爲姦利。逐出之。國人則寢已成俗矣。及其末年。溧水大興寺桑生。木人長六寸。如僧狀。右袒而左跪。衣械昔備。其色如純漆。可鑑。謂之須菩提。懸提置龕中。以仁壽節日來獻。烈祖始不驚異。迎置宮中。奉事甚謹。其徒因夸以爲感應。而識者按譙氏五行書。知且有大喪。不三月。烈祖殂。及元宗後主之世。好之遂篤。幸臣徐遊。專主齋祠事。羣臣和附。惟恐居後。宮中造佛寺十餘。出金錢募民及道士爲僧。都城至萬僧。悉取給縣官。後主退朝。與后頂僧伽帽。服袈裟。課誦佛經。胡跪稽顙。至爲瘡贅。手常屈指作佛印。僧尼犯姦淫。獄成。後主每曰。此等毀戒。本圖婚嫁。若冠笄之。是中所所欲。命禮佛百而捨之。奏死刑日。適遇其齋。則於宮中佛前燃燈。以達旦爲驗。謂之命燈。未旦而滅。則論如律。不然。率貸死。當人賂宦官。竊續膏油。往往獲免。上下狂惑。不恤政事。有諫者。輒被罪。歙州進士汪渙。上封事。言梁武惑浮屠而亡。陛下所知。

也。奈何効之後主。雖擢渙爲校書郎。終不能用其言。開寶初。有北僧號小長老。自言募化而至。多持珍寶怪物。賂貴要爲輿助。朝夕入論天宮地獄果報之說。後主大悅。謂之一佛出世。服飾皆縷金羅縵。後主疑其非法。答曰。陛下不讀華嚴經。安知佛富貴。因說後主多造塔像。以耗其帑庾。又請於牛頭山造寺千餘間。聚徒千人。日給盛饌。有食不能盡者。明旦再具。謂之折倒。蓋故造不祥語。以搖人心。及王師渡江。卽其寺爲營。又有北僧立石塔於采石磯。草衣藿食。後主及國人施遺之。皆拒不取。及王師下池州。繫浮橋於石塔。然後知其爲間也。金陵受圍。後主召小長老求助。對曰。北兵雖強。豈能當我佛力。登城一塵。圍城之師爲小卻。後主真以爲佛力。合掌歎異。厚賜之下。令軍民皆誦救苦菩薩。聲如江濤。未幾。梯衝環城。矢石亂下如雨。倉皇復召小長老。稱疾不至。始悟其姦。殺之。羣僧懼。併坐誅。乃其乞授甲出鬪。死國難。後主曰。教法其可毀乎。弗許。及國亡。後主入朝。過臨淮。往禮普光王塔。施金帛。猶以千計。其後弟從鑑之子祝髮爲僧。名惟淨。景德祥符中。天下治安。西域獻佛書甚衆。惟淨博聞通梵學。繙譯精審。莫能及者。積官。試光祿卿。譯經三藏。亦南唐之餘習云。

契丹事見唐書本傳及五代史四夷附錄。今取其事之繫南唐者爲傳。

烈祖昇元二年。契丹主耶律德光及其弟東丹王各遣使以羊馬入貢。別持羊三萬口。馬二百匹來鬻。以其價市羅紈茶藥。烈祖從之。於是翰林院進二丹入貢圖。詔中書舍人江文蔚作贊。其詞曰。皇帝建西都之歲。神功邁於三古。皇風格於四裔。華夷咸若。駿奔結軌。粵六月。契丹使梅里捺盧古。東丹使兵器寺少令高徒煥奉書致貢。咸集都邑。公卿庶尹。拜手稽首。稱賀以爲文德所服。受命之符也。若酒鴻荒以降。曠

步相侔。耀武以信威。有所不及。任算以御物。有所不從。詩頌太原之師。則用伐矣。漢開朔方之地。則崇力矣。若我宣猷大麓。僊德無私。刑於朝廷。以及於荒服。旃裘左袵。捧日分光。殊方異產。充庭納寶。曰垂衣裳。而天下治。斯之謂矣。有司紀美。烈於績事。傳曰。主上明聖而德不聞。有司之過也。臣職在翰墨。親覩隆平。敢獻贊曰。赫矣聖武。纂堯之緒。要荒之長。駿奔臣附。伏波之柱。單于之臺。遺孽徒費。獻琛靡來。我后穆穆。我網恢恢。重譯日貢。皇哉唐哉。四年。德光遣使獻馬百匹。於是烈祖遣通事舍人副四方館事歐陽遇。借鴻臚少卿使契丹。假道於晉。高祖不可。遇及境而復。元宗嗣位。遣使者公乘鎔航海繼好。既至。而契丹主兀欲被殺。弟述津遣元宗書曰。大契丹天順皇帝。謹致書大唐皇帝。闕下貴朝使公乘鎔等。自去秋以達。東京海岸。適遭國禍。今年二月二十六日。部署一行。並諸儀物兵鎧。已至燕京。茲蒙敦念。先朝踐修舊好。既增摧痛。又切感銘。貴國長直官王朗陳篆。取問道先回。用附咨報。公乘鎔等已遣伴送使陳植等同回。止俟便風。卽令引道。而公乘鎔亦以蠟封帛書。其詞曰。臣鎔自去年六月離罌油。七月至鎮東關。遣王朗奉表契丹。九月。乃有番官夷離畢。部牛車百餘乘。及鞍馬治路置頓。十月。至東京。留三日。契丹主遣閑廐使王廷秀。稱詔勞問。兼述泰寧王燕王九月同行大事。兀欲卽世。母妻併命。又遼東以西。水潦壞道。數百里。車馬不通。今年正月。方至幽州館於愍忠寺。先迎御容入宮。言元欲識唐皇帝面。乃引見如舊儀。問國中機事。臣卽述奕世歡好。當謀分裂之事。契丹主喜。問復有何事。臣云軍機別有密書。契丹主接置袖間。乃云。吾與唐皇帝一如先朝往來。因置酒合樂。又諭臣曰。使人遠泛巨海而至。不期骨肉間。倏起此事。道路所聞。必亦憂恐。手斟一玉鍾酒。先自啜。乃以勸臣。令飲。自且至日。哺始罷。自是數遣使宣勞。三日。

一賜食。謹遣王朗齋。穀號子歸。聞奏。穀號子不知何等語也。初宋齊丘謀間晉。會契丹使燕人高霽來聘。歸至淮北。唐陰遣人刺殺之。霽有子乾。從行。匿之濠州。於是契丹頗信以爲霽之死。出於晉人。保大十二年。述律遣其舅來夜宴。清風驛起更衣。忽仆於地。視之失其首矣。厚賞捕賊不得。乃知周大將荆罕儒知契丹使至。思遣刺客刺之。以間唐。乃下令能得吾枕者賞三百緡。俄有劍客田英得之。卽給賞如約。仍屏人語之曰。能得江南番使頭賞三千緡。英果得之。自是唐與契丹遂絕。及世宗兵出淮南。勅暴我罪曰。蓋爾淮甸敢拒大邦。跋扈飛揚。垂六十載。幸累朝多事。與北虜交通。厚起戎心。誘爲邊患。所罪狀我。雖非一裔。在江南猶尊之。不敢與他國齒。南唐亦頗恃以自驕。其實相結約。撓中原。皆虛辭。非能爲南唐助也。高麗事具唐書及五代史四夷附錄。今書南唐所載異聞。及高麗通南唐之見於傳記者。

高麗至五代初。國名曰大封。其王高氏名躬。又晚年果於誅殺。吳順義二年。當梁之龍德二年。爲海軍統帥。王建所殺。建自立。去大封之名。復稱高麗。以開州爲東京。平壤爲西京。吳天祚二年。當晉之天福元年。敗新羅百濟。於是倭耽浮羅。於羅鐵勒。東夷諸國皆附之。有二京六府九節度百二十郡。內列十省。四部官。朝服紫。丹緋。綠。青。碧。以年序遷。綠以上。選才能。賜之俸祿。賦以田租。尙冠禮。略如古制。婚姻男女執手。自相媒許。俗重匾頭。生男且旦。按壓其首。惟恐不匾也。昇元二年。遣使來貢方物。所上書稱。晟大略云。今年六月內。當國中原府入吳。越國使張訓等回伏聞大吳皇帝已行禪禮。中外推戴。卽登大寶者。伏惟皇帝陛下。道契三無。恩涵九有。堯知天命已去。卽禪瑤圖。舜念歷數在躬。遂傳玉璽。速風惟庸。笈

獲託生成。所恨沃日波遙。浮天浪闊。幸遇龍飛之旦。阻申燕賀之儀。無任歸仁戴聖。鼓舞激切之至。儀式如表。而不稱臣。烈祖御武功殿。設細仗。見其使。自言代主朝覲。拜舞甚恭。宴於崇英殿。出龜茲樂作番戲。召學士承旨孫忌侍宴。三年。又遣其廣評侍郎柳勳。律來貢方物。其後史册殘缺。來與否不可考矣。

是書凡馬令胡恢陸游三本。先釐云。馬胡詮次。識力相似。而陸獨逾邁。得史遷家法。今馬本盛行。胡本不傳。放翁書一十八卷。僅見於鹽官胡孝轅祕册函中。又半燼於武林之火。庚午夏仲。購其焚餘板一百有奇。斷蝕不能讀。因簡家藏抄本訂正。附梓於全集逸稿之末。至若與馬玄康異同繁簡。已詳見胡沈兩公跋語云。湖南毛晉識。

南唐書音釋

習氏明晉紹漢比宋論乃章漢事失於陳志唐尙有是書威光既校之并音釋

本紀一之三

南唐書一之三

烈祖第一鼻首舟日光貌明也憲宗第八子唐書宗凡二十子見城昇州古金陵唐稱昇州城始東南勝蒜山在鎮江城掉蘭掉運作樞附也鬼谷子有銅駝橋五代史及金陵志里文橋據蒨音蒨草豐草南郊山有西三里

廢宮址相傳爲太廟尼寺是其址玄武湖見滿延鍾山在城東北十五里即蔣迎鑾鎮州見揚馬元康胡是山見浮屠傳

宋陵陽人宋華州推官醫家太學錄十卷宋太宗烈祖徐鉉湯悅皆唐舊臣命撰之吳元祐曰王安道撰道傳未成卒焚其草故多遺落江南北界元春亡論之於易名宋龍裝凡八卷陳彭年撰吳館載四主傳鄭家

蘇州刺史王顯撰起天祐乙丑錄十卷宋太宗烈祖徐鉉湯悅皆唐舊臣命撰之吳元祐曰王安道撰道傳未成卒焚其草故多遺落江南北界元春亡論之於易名宋龍裝凡八卷陳彭年撰吳館載四主傳鄭家

死至亡國之際不言其君之過但以其曆數存亡論之於易名宋龍裝凡八卷陳彭年撰吳館載四主傳鄭家

唐近事二卷江表傳三卷並鄭文寶撰江南北界元春亡論之於易名宋龍裝凡八卷陳彭年撰吳館載四主傳鄭家

凡十卷他書陸游徧取折衷以私著也游亦

元宗第二璟俱永切邊字通近濁唐天文志流星尾長丈餘出濁際西流有聲如雷

行至濁際六月朔日食五分至酉一刻虧見東南方出濁不見六月分在東井度中至五刻復以日二分半入

年戊辰晉岐淮南六年己巳晉七年庚午晉岐吳岐王承制八年辛未晉岐吳岐化○蜀永九年壬甲晉十年
 癸酉晉十一年岐吳岐十二年癸亥晉岐吳岐十三年蜀通正元年○十四年漢元年漢乾亨元年○蜀天十五
 年蜀光元年○十六年己卯晉岐○吳武義十七年庚辰十八年辛巳晉岐○吳順義十九年晉岐同
 光元年改元岐署內屬唐二年甲三年乙天咸元年○丙戌明宗立改元二年乾貞元年○吳三年戊子○漢四
 年太和元年○吳長興元年庚二年卯三年壬四年巳應順元年甲午閔帝立遇弒清泰二年乙未○吳天祚
 年三年丙申○石敬瑭因契丹立號晉天昇元年丁酉烈祖即位○古今之亂唐末極矣然清泰方二
 年廣政元年蜀三年永隆元年閩四年庚五年辛六年壬光元元年漢七年殷天德元年立改元保大○保大二
 年晉開三年乙四年丙五年丁未○六年戊申○漢七年巳八年庚戌○九年辛亥○周十年壬十一年
 運元年三年乙四年丙五年丁未○六年戊申○漢七年巳八年庚戌○九年辛亥○周十年壬十一年
 癸十二年顯德元年周十三年卯十四年丙十五年丁巳○北漢中興元年戊午初改交泰元宗十六年始
 至是二十二年天祐至是則五十五年自武王道以資之則三十二年矣使○周顯德六年元宗十七年始
 元宗能安天命事大國以存宗祏周能世教王道以資之則三十二年矣使○周顯德六年元宗十七年始
 陵七年○宋建隆元年庚申○宋建隆二年位仍奉其正朔宋又始稱詔子唐三年後主壬戌乾德元年三年
 癸二年後主甲子三年後主乙丑四年後主丙寅五年後主丁卯開寶元年後主戊辰二年後主己巳三年後主
 後主辛未五年後主壬申六年後主癸酉○甲戌歲宋開寶七年○乙亥歲後主十五年庚午四年
 周至是三年凡三十九年自高祖至是凡三百五十九年殷
 周革命而祀宋國隨之世梁竊稱焉宋之君度不達世宗矣

柴克宏第三頤藥又音贊

王會破音羽弓衣也

游簡言誦音讀慈

刁彥能舉刀示先主先主蓋奮書文

鍾謨第四沾沾自銜沾音碑輕薄也漢魏其傳也

朱匡業第五朱元叛元宗議親征按元本作烈祖今其事正之

朱令贊贊見元宗紀

江文蔚第七拾爵策勳出左氏捨舍去聲

馮延巳第八類見上柴延魯玄武湖在金陵城北南唐近事湖周運十數里每府雜龍蔣山環鑿左右

下數千云柴湖宋王安石開爲田今成平陸矣

孫忌豆盧姓出北地

彭師鬻鬻字通作暗曠

韓熙載第九梅嶺岡在城南郭志謝公墓上慕容紹宗澄案北史紹宗初事爾朱歸高歡命其子

劉仁贍第十壽州本漢壽州故治立壽春縣忠正軍宋置安豐軍於壽春縣今安豐路也

潘佑元見上馬

嚴續肺相見漢書劉向衛音傳肝肺

張易崑莪即魏鬼暗嘔懷怒氣也漢書作音烏辟噓晉灼曰音烏噓怒聲也

郭廷謂第十筓通作符音昨以竹索為

林仁肇摘音別挑也發也漢趙廣漢傳察姦隨伏攝

盧絳新淦漢縣附以屬吉州宋以屬臨江軍

陳喬脫屣作騰履不蹶根也履所寄切又通

李元清第十趨音騎善走

魏岑忱見上元宗

元宗子從善第十悃蓋兼絹柱捐委之義

雜藝方士吳廷紹第十餽音怡

潘辰紫極宮南唐近事辰後紫極宮臨終上育乞桐棺葬近地後當尸解上從之使人陰奪其法諱不復能劍云

中元宗命親信發家親

耿先生燒火乾也亦 方山在城東南三十里外吳葛仙翁所居有丹井一名天印山

節義

史諫諫通作驪禮也。

吳媛

媛媛音媛又通作娟。醉祖對切子。

浮屠

第十身毒蓋身音捐又音乾。毒音篤國在大夏東南。今呼天竺。

王導指為天關者

契丹旃俗作黃徐刃切會禮之財也。通。

高麗

倭倭音丘慈○已上音釋。姑擗所知亦。

衣被語出佛書被音牛頭山在城南三十里卽音

陸放翁集

老學庵筆記

卷第一

徽宗南幸。至潤郡。官迎駕於西津。及御舟抵岸。上御棕頂轎子。一宦者立轎旁。呼曰。道君傳語。衆官不須遠來。衛士臚傳以告。遂退。

徽宗南幸還京。服栗玉並桃冠。白玉簪。赭紅羽衣。乘七寶輦。蓋吳敏定儀注云。

高宗在徽宗服中。用白木御椅子。鑲大主入覲見之。曰。此檀香椅子耶。張婕妤掩口笑曰。禁中用胭脂阜莢多。相公已有語。更敢用檀香作椅子耶。時趙鼎張浚作相也。

建炎苗劉之變。內侍遇害至多有秦同老者。自揚州被命至荆楚。前一日還行在。尙未得對。亦死焉。又有蕭中道者。日侍左右。忽得罪。緹爲外郡監。當前一日出城。遂免。

臨安父老言。苗劉戕王淵在朝天門外。今都進奏院前。然日曆及諸公記錄皆不書。但云死於路衢而已。邵彪所錄。謂死於第。尤非也。

鼎澧羣盜如鍾相楊么。鄉語謂幻爲么。戰船有車船。有槳船。有海鯨頭。軍器有擊子。其語謂擊爲鱈。有魚叉。有木老鴉。擊子魚叉。以竹竿爲柄。長二三丈。短兵所不能敵。程昌萬部曲雖蔡州人。亦習用擊子等。遂

屢擄木老鴉一名不藉。木取堅重。木爲之。長財三尺許。銳其兩端。戰船用之。尤爲便捷。官軍乃更作灰礮。

用極脆薄瓦罐。置毒藥石灰鐵蒺藜於其中。臨陣以擊賊船。灰飛如烟霧。賊兵不能開目。欲效官軍爲之。則賊地無罅戶。不能造也。遂大敗。官軍戰船亦倣賊車船而增大。有長三十六丈。廣四丈一尺。高七丈二尺五寸。未及用。而岳飛以步兵平賊。至完顏亮入寇。車船猶在。頗有功云。初張公之行。趙元鎮丞相以詩送之云。速宜淨掃妖氛了。來看錢塘八月潮。

鼎澧羣盜。惟夏誠劉衡二砦。據險不可破。二人每自咤曰。除是飛過洞庭湖。其後卒爲岳飛所破。蓋語識云。

趙元鎮丞相謫朱崖。病亟。自書銘旌云。身騎箕尾歸天上。氣作山河壯本朝。

靖康二年。浙西路勤王兵。杭州二千人。湖州九百一十五人。秀州七百一十六人。平江府一千七百三十八人。常州七百八十五人。鎮江府六百人。一路共六千七百五十四人。以二月七日起發。東都之陷已累月矣。

集英殿宴金國人使。九盞。第一肉鹹豉。第二爆肉雙下角子。第三蓮花肉油餅骨頭。第四白肉胡餅。第五羣僊衛太平畢羅。第六假圓魚。第七柰花索粉。第八假沙魚。第九水飯鹹豉。旋餅。瓜薑看食。棗。錮子。髓餅。白胡餅。饅餅。淨照。

紹興辛酉與虜交兵。虜遜議者謂當取壽。穎。宿三州屯重兵。然後淮可保。淮可保。然後江可固。惜其不用也。

建康城。李景所作。其高三丈。因江山爲險固。其受敵惟東北兩面。而壕塹重複。皆可堅守。至紹興間。已二

百餘年所損不及十之一。漢人入仕，有以貲爲郎者，司馬相如張釋之是也。有入錢入穀賞以官者，卜式黃霸是也。入錢穀，則今買官之類，以貲則非也。

秦會之在山東，欲逃歸，舟楫已具，獨懼虜有告者，未敢決。適遇有相識稍厚者，以情告之。虜曰：何不告監軍？會之對以不敢。虜曰：不然，吾國人若一諾公，則身任其責，雖死不憾。若逃而獲，雖欲貸不敢矣。遂用其言告監軍。監軍曰：中丞果欲歸耶？吾契丹亦有逃歸者，多更被疑。安知公歸而南人以爲忠也？公若果去，固不必顧我。會之謝曰：公若見諾，亦不必問某歸後禍福也。監軍遂許之。

黃元暉爲左司諫，論事忤蔡氏，謫昭潭。後復管勾江州太平觀，謝表曰：言之未盡，悔也。奚追。

張芸叟作漁父詩曰：家住未江邊，門前碧水連。小舟勝養馬，大畧當耕田。保甲元無籍，青苗不著錢。桃源在何處，此地皆神仙。蓋元豐中謫官湖湘時所作。東坡取其意爲魚蠻子云。

張德遠誅范瓊於建康獄中，都人皆鼓舞。秦會之殺岳飛於臨安獄中，都人皆涕泣。是非之公如此。政和中大饑，下桂府進面具，比進到，稱一副，初訝其少，乃是以八百枚爲一副。老少妍陋無一相似者，乃大驚。至今桂府作此者，皆致富。天下及外夷皆不能及。

京師承平時，宗室戚里歲時入禁中，婦女上犢車，皆用二小鬟持香毬在旁，而袖中又自持兩小香毬，車馳過，香烟如雲，數里不絕，塵土皆香。

明州江瑤柱有二種，大者江瑤，小者沙瑤。然沙瑤可種，逾年則成江瑤矣。海檜亦有二種，海檜天矯，堅瘦。

皆天成。又有刻削蟠屈而成者。名土音杜。檜海檜絕難致。凡人家所有。大抵土檜也。

晁以道爲明州船塢。日日平旦。具衣冠焚香占一卦。一日有士人訪之。坐間小雨。以道語之曰。某今日占卦有折足之象。然非某也。客至者當之。必驗無疑。君宜戒之。士人辭去。至港口。踐滑而仆。歷癘折。療治累月乃愈。

國初士大夫戲作語云。眼前何日赤。腰下幾時黃。謂朱衣吏及金帶也。宣和間。親王公主及他近屬戚里。入宮。輒得金帶關子。得者旋填姓名賣之。價五百千。雖卒伍屠酤。自一命以上。皆可得。方臘破錢唐時。朔日。太守客次有服金帶者數十人。皆朱勳家奴也。時諺曰。金腰帶。銀腰帶。趙家世界朱家壞。

仁宗賜宗室名。太祖下曰。世。太宗下曰。仲。秦王下曰。叔。皆兄弟行。世。卽長也。其後世字之。曾孫又曰。伯。則失之。

淳熙己酉十月二十八日。駕車幸候潮門外大校場。大閱。是日上早膳。畢出郊。從駕臣僚及應奉官。並戎服。擲帶子著靴。大閱畢。丞相親王以下。賜茶。是日。駕出麗正門。入和寧門。沿路官司免起居。

建炎中。平江造戰船。略計其費。四百料。八艘戰船。長八丈。爲錢一千一百五十九貫。四艘海鶴船。長四丈五尺。爲錢三百二十九貫。

荆公素輕沈文通。以爲寡學。故贈之詩曰。儵然一榻沈書臥。直到日斜騎馬歸。及作文通墓誌。遂云公雖不常讀書。或規之曰。渠乃狀元。此語得無過乎。乃改讀書作視書。又嘗見鄭毅夫夢仙詩曰。授我碧簡書。奇篆蟠丹砂。讀之不可識。翻身凌紫霞。大笑曰。此人不識字。不勘自承。毅夫曰。不然。吾乃用太白詩語也。

公又笑曰。自首減等。

祕閣有端硯。上有紹興御書一頌字。唐有準勅惡詩。今又有準勅頑硯耶。

潘子賤題蔡奴傳神云。嘉祐中。風塵中人亦如此。嗚呼盛哉。然蔡實元豐間人也。仇氏初在民間。生子爲浮屠。曰了元。所謂佛印禪師也。已而爲廣陵人國子博士李問妾。生定。出嫁鄰氏。生蔡奴。故京師人謂蔡奴爲鄧六。

紹聖元符間。汪內相彥章有聲太學。學中爲之語曰。江左二寶。胡仲汪藻。仲字彥時。亦新安人。終符寶郎。曾文清夙與論語語一篇。終身未嘗廢。

先左丞言荆公有詩正義一部。朝夕不離手。字大半不可辨。世謂荆公忽先儒之說。蓋不然也。

靖康國破。二帝播遷。有小崔才人與廣平郡王道君幼子。名捷。俱匿民間。已近五十日。虜亦不問。有從官餽以食。遂爲人所發。亦不免。不十日。虜去矣。城中士大夫可罪至此。

金賊劫遷宗室。我之有司。不遺餘力。然比其去。義士匿之。獲免者猶七百人。人心可知。

國初韻略載進士所習有何論一首。施肩吾及第。勅亦列其所習何論一首。何論蓋如三傑佐漢孰優。四科取士何先之類。

嘉興人聞人茂德名滋。老儒也。喜留客食。然不過蔬豆而已。郡人求館客者。多就謀之。又多蓄書。喜借人。自言作門客。牙充書籍行。開豆腐羹店。予少時。與之同在勸局。爲刪定官。談經義。滾滾不倦。發明極多。尤達於小學云。

張芸叟過魏文貞公舊莊居者猶魏氏也。爲賦詩云：破屋居人少，柴門春草長。兒童不識字，耕稼鄭公莊。此猶未失爲農。神宗夜讀宋璟傳，賢其人，詔訪其後，得於河朔。有裔孫曰宋立，遺像譜牒，告身皆在。然宋立者已投軍矣，欲與一武官，而其人亦不願，乃賜田十頃，免徭役雜賦云。其微又過於魏氏，言之可爲流涕。政和未議改元，王黼擬用重和，既下詔矣，范致虛間白上曰：此契丹號也，故未幾復改宣和。然宣和乃契丹宮門名，猶我之宣德門也。年名則實曰重熙，遼建中靖國後，遼避天祚嫌名，追謂重熙曰重和耳，不必避可也。

建炎維揚南渡時，雖甚倉猝，二府猶張蓋搭掖坐而出。軍民有懷輒狙擊黃相者，既至臨安，二府因言方艱危時，臣等當一切貶損，今張蓋搭坐，尙用承平故事，欲乞並權省去，候事平日依舊，詔從之。實懲維揚事也。

林自爲太學博士，上章相子厚啟云：伏惟門下相公有猷有爲，無相無作。子厚在漏舍，因與執政語及大罵云：遮漢敢亂道如此。蔡元度曰：無相無作，雖出佛書，然荆公字說嘗引之，恐亦可用。子厚復大罵曰：荆公亦不曾奉勅許亂道，况林自乎。坐皆默然。

靖康末，括金路虜，詔羣臣服金帶者，權以通犀帶易之，獨存金魚。又執政則正透，從官則倒透。至建炎中，與朝廷草創，猶用此制。呂好問爲右丞，特賜金帶，高宗面諭曰：此帶朕自視上方工爲之，蓋特恩也。紹興三年，兵革初定，始詔依故事，服金帶。

建炎初，按景德幸澶州故事，置御營使，以丞相領之。執政則爲副使，上御朝，御營使副先上奏本司事，然

後三省密院相繼奏事其重如此。

張晉彥才氣過人。然急於進取。子孝辭在西掖時。晉彥未老。每見湯岐公自薦。岐公喜之曰。太師尙書令兼中書令。是公合作底官職。餘何足道。所稱之官。蓋輔臣贈父官也。意謂安國且大用耳。晉彥終身以爲憾。

紹興末。巨公丁丑生者數人。或戲以衰健放榜。陳福公作魁。凌尙書景夏末名。張魏公黜落。

紹興末。朝士多饒州人。時人語曰。諸公皆不是癡漢。又有監司發薦京官。狀以關節欲與饒州人。或規其當先孤寒。監司者憤然曰。得饒人處。且饒人。時傳以爲笑。

王嘉叟自洪倅召爲光祿丞。李德遠亦召爲太常丞。一日相遇於景靈幕次。李謂王曰。見公告詞云。其鑄月廩。仍褫身章。謂通判借牙緋。入朝則服緋。又褫薄也。王答之曰。亦見君告詞矣。李曰。云何。曰。具官李浩。但知健羨。不揆孤寒。既名右相之名。又字元樞之字。蓋謂史丞相張魏公也。滿座皆笑。

予去國二十七年復來。自周丞相子充一人外。皆無復舊人。雖吏胥亦無矣。惟賣卜洞微山人亡恙。亦不甚老。話舊愴然。西湖小昭慶僧了文。相別時未三十。意其尙存。因被命與奉常諸公同檢視郊廟壇壝。過而訪之。亦已下世。弟子出遺像。乃一老僧。使令見其人。亦不復省識矣。可以一歎。

晏尙書景初作一士大夫墓誌。以示朱希真。希真曰。甚妙。但似欠四字耳。然不敢以告。景初苦問之。希真指有文集十卷字下曰。此處欠。又問欠何字。曰。當增不行於世四字。景初遂增藏於家三字。實用希真意也。

秦會之丞相卒，魏道弼作參政，委任頗專，且大拜矣。翰苑欲先作白麻，又不能辦，假手於士人陳豐。豐以其姓魏，遂以晉絳和戎對鄭公論諫，久之，道弼出典藩，而沈守約、萬俟卨、元忠並拜左右揆。翰苑者倉猝取豐所作制，以與沈公，而忘易晉絳鄭公之語。實錄例載拜相麻，予在史院，欲刪此一聯，會去國不果。

陳福公長卿，重厚粹美，有天人之相。然議者擬其少英偉之氣，予爲編修官時，一日與沈持要尹少稷見公于都堂閣，公忽盛怒曰：「張德遠以元樞，輒受三省樞密院，訴牒雖是，勳德重望，亦豈當如此！」方言此時，精神赫然，目光射人，退以告朝士，皆云平生未嘗見此公怒也。古人有貴在于怒者，此豈是耶？

李莊簡公泰發，奉祠還里，居于新河。先君築小亭曰千巖亭，盡見南山。公來必終日，嘗賦詩曰：「家山好處尋難遍，日日當門只臥龍。」欲盡南山巖壑，勝須來亭上，少從容。每言及時事，往往憤切，與歎。謂秦相曰：「咸陽一日來坐亭上，舉酒屬先君曰：『某行且遠，謫矣。咸陽尤忌者，某與趙元鎮耳。』趙既過嶺，某何可免。然聞趙之聞命也，涕泣別子弟，某則不然，青鞵布襪，即日行矣。後十餘日，果有藤州之命。先君送至諸暨，歸而言曰：『泰發談笑慷慨，一如平日，問其得罪之由，曰：『不足問，但咸陽終誤國家耳。』咸陽指槍。」

張樞密子功，紹興末還朝，已近八十，其辭免及謝表，皆以屬予，有一表用飛龍在天，對老驥伏櫪，公皇恐語。周子充左史託言于予，易此二句，周叩其故，則曰：「某方丐去，恐人以爲志在千里也。」周笑解之曰：「所謂志千里者，正以老驥已不能行，故徒有千里之志耳。公雖筋力衰，豈無報國之志耶？子功亦笑而止。蓋其謹如此，又嘗謂予曰：「先人有遺稿滿篋，皆諸經訓解，字畫極難辨，惟某一人識之。若死，遂皆不傳，豈容不亟歸耶？」

汪廷俊從梁才甫辟爲大名機幕。專委以修北京宮闕。凡五年乃成。歲一再奏功。輒遷數官。五年間。自
宣教郎轉至中奉大夫。其濫賞如此。

予在南鄭。見西陲俚俗謂父曰老子。雖年十七八。有子亦稱老子。乃悟西人所謂大范老子。小范老子。蓋
尊之以爲父也。建炎初宗汝霖留守東京。羣盜降附者百餘萬。皆謂汝霖曰宗爺爺。蓋此比也。

陳登中遷謫後。爲人作石刻。自稱除名勒停送康州編管陳某撰。劉季高得罪秦氏。坐賊廢。後雖復官。去
其左字。季高緘題及作文。皆去左字。不以爲愧也。孫仲益亦坐以賊罪去左字。則但自稱晉陵孫某而已。
至紹興末。復左朝奉郎。乃署銜。

予嘗與查元章讀太宗實錄。有侯莫陳利用者。予問有對否。元章曰。昨虜使有烏古論思謀。可對也。予曰。
虜人姓名五字者固多矣。元章曰。不然。侯莫陳可析爲三姓。烏古論亦然。故爲工也。

毛德昭名文。江山人。苦學至忘寢食。經史多成誦。喜大罵極談。紹興初。招徠直諫。無所忌諱。德昭對客議
時事。率不遜語。人莫敢與對。而德昭愈自若。晚來臨安赴省試。時秦會之當國。數以言罪人。勢焰可畏。
有唐錫永夫者。遇德昭于朝天門茶肆中。素惡其狂。乃與坐。附耳語曰。君素號敢言。不知秦太師如何。德
昭大駭。亟起掩耳曰。放氣放氣。遂疾走而去。追之不及。

北方多石炭。南方多木炭。而蜀又有竹炭。燒巨竹爲之。易然。無烟耐久。亦奇物。邛州出鐵。烹鍊利於竹炭。
皆用牛車載以入城。予親見之。

杜少陵在成都。有兩草堂。一在萬里橋之西。一在浣花。皆見於詩中。萬里橋故迹。湮沒不可見。或云。房季

可園是也。

蜀人糞薪皆短而脆。束縛齊密。狀如大餅。不可遽燒。必以斧破之。至有以斧柴爲業者。孟蜀時。周世宗志欲取蜀。蜀卒袒面爲斧形。號破柴都。

謝景魚名倫。滌硯法。用蜀中貢魚紙。先去墨。徐以絲瓜磨洗。餘漬皆盡。而不損硯。

青城山上官道人。北人也。巢居食松。年九十矣。人有謁之者。但粲然一笑耳。有所請問。則託言病。一語不肯答。予嘗見之于丈人觀道院。忽自語。養生曰。爲國家致太平。與長生不死。皆非常人所能然。且當守國使不亂。以待奇才之出。衛生使不夭。以須異人之至。不亂不夭。皆不待異術。惟勤而已。予大喜。從而叩之。則已復言暗矣。

呂周輔言。東坡先生與黃門公南遷。相遇于梧藤間。道旁有鬻湯餅者。共買食之。餅惡不可食。黃門置箸而歎。東坡已盡之矣。徐謂黃門曰。九三郎。爾尙欲咀嚼耶。大笑而起。秦少游聞之曰。此先生飲酒。但飲溼而已。

魏道弼參政使金人軍中。抗辭不撓。虜酋大怒。欲于馬前斬之。揮劍垂及頸而止。故道弼頭微偏。

使金舊。惟使副得乘車。三節人皆騎馬。馬惡則蹄齧。不可羈。鈍則不能行。良以爲苦。淳熙己酉。完顏璫嗣僞位。始命三節人皆給車。供張飲食。亦比舊加厚。

淳熙己酉。金國賀登寶位。使自云。悟室之孫。喜讀書。著作郎權兵部郎官鄧千里。館之。因遊西湖。至林和靖祠堂。忽問曰。林公嘗守臨安耶。千里笑而已。

謝子肅使金回云。金廷羣臣。自徒單相以下。大抵皆白首老人。徒單年過九十矣。又云。虜姓多三兩字。又極怪。至有姓斜卯者。己酉春。虜移文境上曰。皇帝生日。本是七月。今爲南朝使人冒暑不便。已權改作九月一日。其內鄉之意。亦可嘉也。

楊廷秀在高安。有小詩云。近紅暮看失燕支。遠白青明雪色奇。花不見桃惟見李。一生不曉退之詩。予語之曰。此意古人已道。但不如公之詳耳。廷秀愕然問古人誰會道。予曰。荆公所謂積李兮縞夜。崇桃兮炫晝是也。廷秀大喜曰。便當增入小序中。

卷第二

張廷老名琪。唐安江原人。年七十餘。步趨拜起健甚。自言夙興必拜數十。老人血氣多滯。拜則支體屈伸。氣血流暢。可終身無手足之疾。

魯直在戎州作樂府曰。老子平生。江南江北。愛聽臨風笛。孫郎微笑。坐來聲噴霜竹。予在蜀見其稿。今俗本改笛爲曲。以協韻非也。然亦疑笛字太不入韻。及居蜀久。習其語音。乃知瀘戎間謂笛爲獨。故魯直得借用。亦因以戲之耳。

秦會之初得疾。遣前宣州通判李季設醮于天台桐柏觀。季以善奏章自名。行至天姥嶺下。憩小店中。邂逅一士人。頗有俊氣。問季曰。公爲太師奏章乎。曰然。士人搖首曰。徒勞耳。數年間。張德遠當自樞府再相。劉信叔當總大兵捍邊。若太師不死。安有是事耶。季不復敢與語。卽上車去。醮之明日。而聞秦公卒。

英州石山。自城中入鍾山。涉錦溪。至靈泉。乃出石處。有數家。專以取石爲生。其佳者。質溫潤蒼翠。叩之聲如金玉。然匠者頗闕之。常時官司所得。色枯槁。聲如擊朽木。皆下材也。

葉相夢錫嘗守常州。民有比屋居者。忽作高屋。屋上覆蓋鄰家。鄰家訟之。謂他日且占地。葉判曰。東家屋被西家蓋。仔細思量。無利害。他時折屋別陳詞。如今且以壁爲界。

蜀人任子淵好謔。鄭宣撫剛中自蜀召歸。其實秦會之欲害之。鄭公治蜀。有惠政。人猶觀其復來。數日。乃聞秦氏之指。人人太息。衆中或曰。鄭不來矣。子淵對曰。秦少恩哉。人稱其敢言。

秦會之以孫女嫁郭知運。自答聘書曰。某人東第華宗。南宮妙選。乃肯不卑於作贅。何辭可拒于盟言。其夫人欲去作贅。字曰。太惡模樣。秦公曰。必如此。乃束縛得定。聞者笑之。

張子韶對策。有桂子飄香之語。趙明誠妻李氏嘲之曰。露花倒影柳三變。桂子飄香張九成。

王荆公作相。裁損宗室恩數。於是宗子相率馬首陳狀。訴云。均是宗廟子孫。且告相公看祖宗面。荆公厲聲曰。祖宗親盡。亦須逃遷。何況賢輩。於是皆散去。

呂正獻平章軍國時。門下客因語次。或曰。嘉問敗壞家法。可惜。公不答。客愧而退。一客少留。曰。司空尙能容呂惠卿。何況族黨。此人妄意迎合。可惡也。公又不答。既歸。弟子請問二客之言如何。公亦不答。

西山十二真君各有詩。多訓誡語。後人取爲籤。以占吉凶。極驗。射洪陸使君廟。以杜子美詩爲籤。亦驗。予在蜀。以淳熙戊戌春被召。臨行。遣僧則華往求籤。得遺與詩曰。昔者龐德公。未曾入州府。襄陽耆舊間。處

士節獨苦。豈無濟時策。終竟長網罟。林茂鳥有歸。水深魚知聚。舉家隱鹿門。劉表焉得取。予讀之。惕然。願

迫貧從仕。又十有二年。負神之數多矣。

李知幾少時。祈夢于梓潼神。是夕夢至成都天寧觀。有道士指織女支機石曰。以是爲名字。則及第矣。李遂改名石。字知幾。是舉果省。

伯父通直公。字元長。病右臂。以左手握筆。而字法勁健過人。宗室不微亦然。然猶是自幼習之。梁子輔年且五十。中風。右臂不舉。乃習用左手。逾年。作字勝于用右手時。遂復起作郡。

趙廣合肥人。本李伯時家小吏。伯時作畫。每使侍左右。久之。遂善畫。尤工作馬。幾能亂真。建炎中陷賊。賊聞其善畫。使圖所擄婦人。廣毅然辭。以實不能畫。脅以白刃。不從。遂斷右手。拇指遺去。而廣平生實用左手。亂定。惟畫觀音大士而已。又數年乃死。今士大夫所藏伯時觀音。多廣筆也。

禁中舊有絲鞋局。專挑供御絲鞋。不知其數。嘗見蜀將吳玠。被賜數百緡。皆經奉御者。壽皇卽位。惟臨朝服絲鞋。退卽以羅鞋易之。遂廢此局。

今上初卽位。詔每月三日。七日。十七日。二十七日。皆進素膳。

舊制。皇帝曰御膳。中宮曰內膳。自壽成皇后初立。懇辭內膳。詔權罷。今中宮因之。

駕頭舊以一老宦者抱繡囊。兀子于馬上。高廟時猶然。今乃代以閣門官。不知自何年始也。

王聖美子韶。元祐末。以大蓬送北客至瀛。賜宴罷。有振武都頭卒。不堪一行人須索。忽操白刃。入斫聖美。其子冒死直前護救。中三刀。在臂幾斷。虞候卒繼至。傷者六人。死者一人。聖美腦及耳皆傷甚。明日不能與虜使相見。告以冒風得疾。虜使戲之曰。曾服花蒸石散否。

前輩傳書多用鄂州蒲圻縣紙云厚薄緊慢皆得中又性與麴黏相宜能久不脫劉韶美在都下累年不以家行得俸專以傳書書必三本雖數百卷爲一部者亦然出局則杜門校讎不與客接既歸蜀亦分作三船以備失壞已而行至秭歸新灘一舟爲灘石所敗餘二舟無他遂以歸普慈築閣貯之

陸輿中議者多謂文武一等而輒爲分別力欲平之有劉御帶者輒建言謂門狀榜子初無定制且僧道職醫皆用門狀而武臣非橫行乃用榜子幾與胥史卒伍輩同雖不施行然曉曉久之乃已

饒德操詩爲近時僧中之冠早有大志既不遇縱酒自晦或數日不醒醉時往往登屋危坐浩歌慟哭達旦乃下又嘗醉赴汴水適遇客舟救之獲免

徐師川長子璧字待價豪邁能文辭嘗作書萬言欲投匭極言時政無所諱避師川偶見之大驚奪而焚之早死

王性之讀書真能五行俱下往往他人纔三四行性之已盡一紙後生有投贄者且觀且捲俄頃卽置之以此人疑其輕薄遂多謗毀其實工拙皆能記也既卒秦熺方恃其父氣餒熏灼手書移郡將欲取其所藏書且許以官其子長子仲信名廉清苦學有守號泣拒之曰願守此書以死不願官也郡將以禍福誘脅之皆不聽熺亦不能奪而止

先君言舊制朝參拜舞而已政和以後增以喏然紹興中予造朝已不復喏矣淳熙末還朝則迎駕起居閣門亦喏唱喏然未嘗出聲也又紹興中朝參止誓折遂拜今閣門習儀先以笏叩額拜拜皆然謂之瞻

笏亦不知起于何年也。

德壽宮德壽殿二額皆壽皇御書。旁署臣某恭書四字。今重華宮重華殿二額亦用此故事。今上御書予初見梁歐陽頴傳稱頴在嶺南多致銅鼓獻奉珍異。又云銅鼓累代所無。及予在宣撫司見西南夷所謂銅鼓者皆精銅極薄而堅文鏤亦頗精叩之鏦鏦如鼓不作銅聲秘閣下古器庫亦有二枚此鼓南蠻至今用之于戰陣祭享初非古物實不足辱祕府之藏然自梁時已珍貴之如此不知何理也。

杜牧之作范陽盧秀才墓誌曰生年二十未知古有人曰周公孔子者蓋謂世雖農夫卒伍下至臧獲皆能言孔子而盧生猶不知所以甚言其不學也。若曰周公孔子則失其指矣。

酉陽雜俎云茄子一名落蘇今吳人正謂之落蘇或云錢王有子跛足以聲相近故惡人言市子亦未必然。

錢王名其居曰握髮殿吳音握惡相亂錢塘人遂謂其處曰此錢大王惡發殿也。

乾道末夔路有部使者作中興頌刻之瞿唐峽峭壁上明年峽漲有龍起峽中適碎石壁亦可異也。方刻石時有夔州司理參軍以恩榜入官權教授出賦題曰歌頌大業刻金石或惡其佞謂之曰韻脚當云老子文學乃克爲之聞者爲快。

秦會之當國有殿前司軍人施全者伺其入朝持斬馬刀邀于望僊橋下斫之斷轎子一柱而不能傷誅死其後秦每出輒以親兵五十人持挺衛之初斬全於市觀者甚衆中有一人朗言曰此不了事漢不斬何爲聞者皆笑。

呂元直作相治堂吏絕嚴一日有忤意者遂批其頰吏官品已高慚於同列乃叩頭曰故事堂吏有罪當送大理寺準法行遣今乃如蒼頭受辱某不足言望相公存朝廷事體呂大怒曰今天子巡幸海道大臣皆著草屨行泥濘中此何等時汝乃要存事體待朝廷歸東京了還汝事體未遲衆吏相顧稱善而退秦會之問宋朴參政曰某可比古何人朴遽對曰太師過郭子儀不及張子房秦頗駭曰何故對曰郭子儀爲宦者發其先墓無如之何今太師能使此輩屏息畏憚過之遠矣然終不及子房者子房是去得底勳業太師是去不得底勳業秦拊髀太息曰好遂驟薦用至執政秦之叵測如此

洪駒父竄南島有詩云關山不隔還鄉夢風月猶隨過海身

北戶錄云嶺南俗家富者婦產三日或匝月洗兒作團油飯以煎魚蝦雞鵝猪羊灌腸蕉子薑桂鹽豉爲之據此卽東坡先生所記盤遊飯也二字語相近必傳者之誤

護聖楊老說被當令正方則或坐或睡更不須覓被頭此言大是又云平旦粥後就枕則粥在腹中煖而宜睡天下第一樂也予雖未之試然覺其言之有味後讀李端叔詩云粥後復就枕夢中還在家則固有知之者矣

陂澤惟近時最多廢吾鄉鏡湖三百里爲人侵耕幾盡閩州南池亦數百里今爲平陸只墳墓自以千計雖欲疏濬復其故亦不可得又非鏡湖之比成都摩訶池嘉州石堂谿之類蓋不足道長安民契券至有云某處至花萼樓某處至含元殿者蓋盡爲禾黍矣而興慶池偶存十三至今爲弔古之地云故都時定器不入禁中惟用汝器以定器有芒也

遂寧出羅謂之越羅亦似會稽尼羅而過之。耀州出青瓷器謂之越器似以其類餘姚縣彫色也。然極麗
樸不佳惟食肆以其耐久多用之。

故都李和燭栗名聞四方他人百計效之終不可及紹興中陳福公及鏡上閣出使虜庭至燕山忽有兩
人持燭栗各十裹來獻三節人亦得一裹自贊曰李和兒也揮涕而去。

往時執政簽書文字卒著帽衣盤領紫背子至宣和猶不變也。

予童子時見前輩猶繫頭巾帶于前作胡桃結背子背及腋下皆垂帶長老言背子率以紫勒帛繫之散
腰則謂之不敬至蔡太師爲相始去勒帛又祖妣楚國鄭夫人有先左丞遺服一篋袴有繒者白地白繒
鵝黃地鵝黃繒裹肚則紫地阜繒祖妣云當時士大夫皆然也。

先左丞平居朝章之外惟服衫帽歸鄉墓客來亦必著帽與坐延以酒食伯祖中大夫公每赴官或從其
子出仕必著帽遍別鄰曲民家或留以酒亦爲盡歡未嘗遺一家也其歸亦然。

成都諸名族婦女出入皆乘犢車惟城北郭氏車最辭華爲一城之冠謂之郭家車子江濱廟西廂有壁
畫犢車廟祝指以示予曰此郭家車子也。

吳幾先嘗言參寥詩云五月臨平山下路藕花無數滿汀洲五月非荷花盛時不嘗云無數滿汀洲廉宣
仲云此但取句美若云六月臨平山下路則不佳矣幾先云只是君記得熟故以五月爲勝不然止云六
月亦豈不佳哉。

仲翼有書名而前輩多以爲俗然亦以配周越予嘗見其飛白大字數幅亦甚工但誠不免俗耳。

慈聖曹太后工飛白蓋習觀昭陵落筆也。先人舊藏一美字徑二尺許筆勢飛動用慈壽宮寶今不知何在矣。

賈表之名公望文元公之孫也資稟甚豪嘗謂仕宦當作御史排擊姦邪否則爲將帥攻討羌戎餘不足爲也故平居惟好獵常自飼犬有姜焦氏者爲之飼應鶴寢食之外但治獵事曰此所以寓吾意也晚守涇州翁彥國勤王不進久留涇上表之而叱責之且約不復餉其軍彥國媿而去及張邦昌僞赦至率郡官哭於天慶觀聖祖殿而焚其赦書僞命卒不能越涇而南所試纔一郡而所立如此許穎之間獵徒謂之賈大夫云

淮南諺曰雞寒上樹鴨寒下水驗之皆不然有一媪曰雞寒上距鴨寒下嘴耳上距謂縮一足下嘴謂藏其味于翼間

陳亞詩云陳亞今年新及第滿城人賀李衙推李乃亞之舅爲醫者也今北人謂卜相之士爲巡官巡官唐五代郡僚之名或謂以其巡遊賣術故有此稱然北方人市醫皆稱衙推又不知何謂

字說盛行時有唐博士粗韓博士兼皆作字說解數十卷太學諸生作字說音訓十卷又有劉全美者作字說偏旁音釋一卷字說備檢一卷又以類相從爲字會二十卷故相吳元中試辟雍程文盡用字說特免省門下侍郎薛肇明作詩奏御亦用字說中語予少時見族伯父彥遠和霄字韻詩云雖貧未肯氣如霄人莫能曉或叩之答曰此出字說霄字云凡氣升此而消焉其奧如此鄉中前輩胡浚明尤酷好字說嘗因浴出大喜曰吾適在浴室中有所悟字說直字云在隱可使十日視者直吾力學三十年今乃能造

此地近時此學既廢。子平生惟見王瞻叔參政。篤好不衰。每相見必談字說。至暮不雜他語。雖病亦擁被。指畫誦說不少輟。其次鼈子止侍郎亦好之。

先伯祖中大夫平生好墨成癖。如李廷珪張遇以下皆有之。李黃門邦直在真定。嘗寄先左丞以陳瞻墨四十笏。盡以爲伯祖壽。晚年擇取尤精者。作兩小篋。常置臥榻。愛護甚至。及下世。右司伯父舉篋以付通判叔父曰。先人所寶。汝宜謹藏之。不取一笏也。

承平時滑州冰堂酒爲天下第一。方務德家有其法。

亳州太清宮檜至多。檜花開時。蜜蜂飛集其間。不可勝數。作蜜極香。而味帶微苦。謂之檜花蜜。真奇物也。歐陽公守亳時。有詩曰。蜂採檜花村落香。則亦不獨太清而已。

柳子厚詩云。海上尖山似劍鏗。秋來處處割愁腸。東坡用之云。割愁還有劍鏗山。或謂可言割愁腸。不可。但言割愁。亡兄仲高云。晉張望詩曰。愁來不可割。此割愁二字出處也。

字所以表其人之德。故儒者謂夫子曰仲尼。非媿也。先左丞每言及荆公。只曰介甫。蘇李明書張橫渠事。亦只曰子厚。

唐道士侯道華喜讀書。每語人曰。天上無凡俗仙人。此妙語也。仙傳載有遇神仙得仙樂一部。使獻諸朝。曰以此爲大唐正始之音。又有僧契虛過異境。有人謂之曰。此稚川仙宮也。正始乃年號。稚川是人字。而其言乃如此。豈道華所謂凡俗仙人耶。

崇寧間。初興學校。州郡建學。聚學糧。日不暇給。士人入辟雍。皆給券。一日不可緩。緩則謂之害學政。議罰。

不少貸。已而置居養院。安濟坊。漏澤園。所費尤大。朝廷課以爲殿最。往往竭州郡之力。僅能枝梧。諺曰。不養健兒。卻養乞兒。不管活人。只管死尸。蓋軍糧乏。民力窮。皆不問。若安濟等。有不及。則被罪也。其後少緩。而神霄宮事起。土木之工。尤盛。羣道士無賴。官吏無敢少忤其意。月給幣帛。硃砂紙筆。沉香乳香之類。不可數計。隨欲隨給。又久之。而北取燕薊。調發非常。動以軍期爲言。盜賊大起。騷至虜亂。而天下州郡。又皆添差歸明官。一州至百餘員。通判鈐轄。多者至十餘員云。

本朝廢后入道。謂之教主。郭后曰金庭教主。孟后曰華陽教主。其實乃一師號耳。政和後。羣黃冠乃敢上道君尊號。曰教主。不祥甚矣。孟后在瑤華宮。遂去教主之稱。以避尊號。吁可怪也。

靖康初。京師織帛。及婦人首飾衣服。皆備四時。如節物。則春旛燈毬。競渡艾虎雲月之類。花則桃杏荷花。菊花梅花。皆併爲一景。謂之一年景。而靖康絕元。果止一年。蓋服妖也。

卷第三

任元受字盡言。事母盡孝。母老多疾病。未嘗離左右。元受自言老母有疾。其得疾之由。或以飲食。或以燥溼。或以語話稍多。或以憂喜稍過。盡言皆朝暮候之。無毫髮不盡。五臟六腑中事。皆洞見曲折。不待切脈而後知。故用藥必效。雖名醫不迫也。張魏公作都督。欲辟之入幕。元受力辭曰。盡言方養親。使得一神丹。可以長年。必持以遺老母。不以獻公也。況能捨母而與公軍事耶。魏公太息而許之。

僧法一宗杲。自東都避亂渡江。各攜一笠。杲笠中有黃金數。每自檢視。一伺知之。杲起登廁。一亟探。斂擲

江中。杲還亡斂，不敢言而色變。一叱之曰：「與汝共學了生死大事，乃眷眷此物耶！我適已爲汝投之江流矣。」杲展坐具作禮而行。

今人謂賤丈夫曰漢子，蓋始于五胡亂華時。北齊魏悅自散騎常侍遷青州長史，固辭之。宣帝大怒曰：「何物漢子與官不就，此其證也。」承平日有宗室名宗漢者，自惡人犯其名，謂漢子曰：「兵士舉官皆然，其妻供羅漢。」其子授漢書，宮中人曰：「今日夫人召僧供十八大阿羅兵士，大保請官教點兵士書都下，闕然傳以爲笑。」

會稽天寧觀老何道士，喜栽花釀酒以延客，居于觀之東廊。一日有道人狀貌甚偉，款門求見，善談論，喜作大字，何欣然接之，留數日乃去。未幾有妖人張懷素號落托者，謀亂，乃前日道人也。何亦坐繫獄，以不知謀得釋，自是畏客如虎。杜門絕往還，忽有一道人亦美風表，多技術，觀之西廊，道士曰：「張若水介之來謁，何大怒曰：『我坐接無賴道人，幾死于囹圄，豈敢復見汝耶？』因大罵，闔扉拒之。而此道人蓋永嘉人林靈噩也，旋得幸，貴震一時，賜名靈素。平日一飯之恩，必厚報之。若水乘驛赴闕，命以道官至蕊珠殿校籍，視殿脩撰，父贈朝奉大夫，母封宜人，而老何以嘗罵之，朝夕憂懼，若水爲揮解，且以書慰解之，始少安，觀中人至今傳笑。

老葉道人龍舒人，不食五味，年八十八，平生未嘗有疾，居會稽舜山，天將寒，必增屋瓦，補牆壁，使極完固，下帷設籬，多儲薪炭，杜門終日，及春乃出，對客莊敬，不肯多語。弟子曰：「小道人極愿懃，嘗歸淮南省親，至七月望日，鄰有住菴僧，召老葉飯，飯已，亟辭歸，問其故，則曰：『小道人約今日歸矣。』僧笑曰：『相去二千里，

豈能必如約哉。葉曰不然。此子平日未嘗妄也。僧乃送之歸。及門。小道人者已弛擔矣。予識之已久。每訪之。殊無他語。一日默作意欲叩其所得。纔入門。卽引入臥內。燒香具道其遇師本末。若先知者。亦異矣。夫韓退之詩云。夕貶潮陽路八千。歐公云。夷陵此去更三千。謂八千里。三千里也。或以爲歇後。非也。書弼成五服。至于五千。注云。五千里。論語。冉有曰。方六七十。如五六十。注亦云。六七十。五六十里也。

秦會之有十客。曹冠以教其孫爲門客。王會以婦弟爲親客。郭知運以離婚爲逐客。吳益以愛壻爲嬌客。施全以刺刃爲刺客。李季以設醮奏章爲羽客。某人以治產爲莊客。丁禩以出入其家爲狎客。曹詠以獻計取林一飛遺。作子爲說客。初止有此九客耳。秦旣死。葬于建康。有蜀人史叔夜者。懷雞絮號慟墓前。其家大喜。因厚遺之。遂爲弔客。足十客之數。

鄉里前輩虞少崔言得之。傳丈子駿云。洪範無偏無黨。王道蕩蕩。無黨無偏。王道平平。無反無側。王道正直。會其有極。歸其有極。八句。蓋古帝王相傳以爲大訓。非箕子語也。至曰皇極之敷言。以曰發之。則箕子語。傳丈博極羣書。少崔嚴重。不妄。恨予方童子。不能詳叩爾。

辛參政企李守福州。有主管應天啓運宮內臣武師說。平日郡中待之。與監司等。企李初視事。謁入。謂客將曰。此特豎璫耳。待以通判。已是過禮。乃令與通判同見。明日。郡官朝拜神御。企李病足。必扶掖。乃能拜。旣入。至庭下。師說忽叱候卒退曰。此神御殿也。企李不爲動。顧卒曰。但扶自當具奏。雍容終禮。旣退。遂奏待罪。朝廷爲降師說爲泉州兵官云。

秦會之初。賜居第時。兩浙轉運司置一局曰箔場。官吏甚衆。專應付賜第事。自是訖其死十九年。不能所

費不可勝計。其孫女封崇國夫人者，謂之童夫人。蓋小名也。愛一獅貓，忽亡之。立限令臨安府訪求。及期，貓不獲。府爲捕繫鄰居民家。且欲劾兵官。兵官惶恐，步行求貓。凡獅貓悉捕致，而皆非也。乃賂入宅，老卒詢其狀，圖百本於茶肆。張之。府尹因嬖人祈懇，乃已。其子燻，十九年間，無一日不鍛酒器，無一日不背書畫碑刻之類。

張文潛言王中父詩，喜用助語，自成一體。予按韓少師持國亦喜用之。如酒成豈見甘而壞，花在須知色即空。居仁由義，吾之素處。順安時理則然，不盡良哉。用空令識者傷，用舍時焉耳。窮通命也歟。

岑參在西安幕府詩云：那知故園月，也到鐵關西。韋應物作郡時，亦有詩云：寧知故園月，今夕在西樓。語意悉同，而豪邁閒澹之趣，居然自異。

童貫既有詔誅之命，御史張達明持詔行。將至南雄州，貫在焉。達明恐其聞而引決，則不及正典刑。乃先遣親事官一人，馳往見貫。至則通謁拜賀于庭。貫問故，曰：有詔遣中使賜茶藥，宣詔大王赴闕。且聞已有河北宣撫之命，貫問果否。對曰：今將帥皆晚進，不可委寄。故主上與大臣熟議，以有威望，習邊事，無如大王者。故有此命。貫乃大喜。顧左右曰：又卻是少我不得。明日達明乃至，誅之。貫既伏誅，其死所忽有物在地，如水銀鏡，徑三四尺。俄而斂縮不見。達明復命，函貫首自隨，以生油水銀浸之，而以生牛皮固函行。一二日，或言勝捷，兵有死士欲奪貫首。達明恐亡之，乃置首函於竹轎中，坐其上。然所傳蓋妄也。張達明雖早歷清顯，致位網轄，然未嘗更外任。奉祠居臨川，郡守月旦謁之。達明見其騁導，歎曰：人生五馬貴。

阮裕云。非但能言人不可得。正索解人亦不可得。呂居仁用此意作詩云。好詩正似佳風月。解賞誰知已不凡。

湯岐公自行宮留守出爲會稽。朝士以詩送行甚衆。周子充在館中。亦有詩而亡之。岐公以書再求曰。頃蒙贈言。乃爲或者藏去。子充極愛其遺辭之婉。

黃魯直有日記。謂之家乘。至宜州猶不輟書。其間數言信中字者。蓋范寥也。高宗得此書真本。大愛之。日置御案。徐師川以魯直甥召用。至翰林學士。上從容問信中謂誰。師川對曰。嶺外荒陋無士人。不知何人。或恐是僧耳。寥時爲福建兵鈐。終不能自達而死。

范寥言魯直至宜州。州無亭驛。又無民居可僦止。一僧舍可寓。而適爲崇寧萬壽寺。法所不許。乃居一城樓上。亦極湫隘。秋暑方熾。幾不可過。一日忽小雨。魯直飲薄醉。坐胡牀。自欄楯間。伸足出外。以受雨。顧謂寥曰。信中吾平生無此快也。未幾而卒。

華州以華山得名。城中乃不見華山。而同州見之。故華人每曰。世間多少不平事。卻被同州看華山。張芸叟守同。嘗用此語作絕句。後二句云。我到左馮今一月。何曾得見好孱顏。蓋同州亦登高乃見之爾。

淳化中。命李至張洎張洙宋白脩太祖國史。久之。僅進帝紀一卷而止。咸平中。又命宋白宋湜舒雅吳淑脩太祖國史。亦終不成。元豐中。命曾鞏獨脩五朝國史。責任甚重。然亦僅進太祖紀敘論一篇。紀亦未及進。而鞏以憂去。史局遂廢。

僧行持。明州人。有高行。而喜滑稽。嘗住餘姚。法性貧甚。有頌曰。大樹大皮裹。小樹小皮纏。庭前紫荊樹。無

皮也。過年後住雪竇。雪竇在四明。與天童育王俱號名利。一日同見新守。守問天童覺老。山中幾僧。對曰千五百。又以問育王。王曰。對曰千僧。末以問持。持拱手曰。百二十守曰。三刹名相。亞僧乃如此不同。耶。持復拱手曰。敝院是實數。守爲撫掌。

處士李璞居壽春山。一日登樓。見淮灘雷雨中。一龍騰擊而上。雨霽。行灘上。得一蚌。頗大。偶拾視之。其中

有龍鱗之迹。宛然。鱗鬣爪角悉具。先君嘗親見之。晏安恭爲越州教授。張子韶爲僉判。晏美髯。人目之爲晏鬚。一日同赴郡集。晏最末至。張戲之曰。來何晏乎。滿座皆笑。

晏景初尙書請僧任院。僧辭以窮陋不可爲。景初曰。高才固易耳。僧曰。巧婦安能作無麪湯餅乎。景初曰。有麪則拙婦亦辦矣。僧慙而退。

蜀俗厚。何耕類省試卷中有云。是何道也。夫道夫耕字也。初未必有心。耕有時名。會有司亦自奇其文。遂以冠蜀士。士亦皆以得人相賀。而不議其偶近暗號也。師渾甫。本名某。字渾甫。旣拔解。志高退。不赴省試。其弟乃冒其名以行。不以告渾甫也。俄遂登第。渾甫因以字爲名。而字伯渾。人人盡知之。弟仕亦至郡。碎無一人議之者。此事若在閩浙。訟訴紛然矣。

杜起。幸自蜀入朝。不以家行。高廟聞其清脩。獨處甚愛之。一日因得對。褒諭曰。聞卿出局。卽蒲團紙帳。如一行脚僧。真難及也。起幸頓首謝。未幾。遂擢爲諫官。張真父戲之曰。吾蜀人如劉詔。美孺。園仲及僕。蓋皆無妻妾。塊然獨處。與君等耳。君乃獨以此見知。得拔擢。何也。當獨登聞鼓。訴之。因相與大笑。而罷。起幸方

爲言事官。而真父戲之如此。雖真父豪氣蓋一時。亦可見向來風俗之厚。

吳人謂杜宇爲謝豹。杜宇初啼時。漁人得蝦。曰謝豹蝦。市中買筍。曰謝豹筍。唐顧況送張衡尉詩曰。綠樹村中謝豹啼。若非吳人。殆不知謝豹爲何物也。

徽宗南幸。還至泗州。僧伽塔下。問主僧曰。僧伽旁白衣持錫杖者何人。對曰。是名木叉。蓋僧伽行者。上曰。可賜度牒與披剃。

宣和中。保和殿下種荔枝成實。徽廟手摘以賜燕帥王安中。且賜以詩曰。保和殿下荔枝丹。文武衣冠被百蠻。思與廷臣同此味。紅塵飛鞚過燕山。

瀘州自州治東出芙蓉橋。至大樓曰南定。氣象軒豁。樓之右。繚子城數十步有亭。蓋梁子輔作守時所創也。正面南下臨大江。名曰來風亭。亭成。子輔曰。枕簟其上。得未疾歸。雙流蜀人謂亭名有徵云。

筇竹杖。蜀中無之。乃出徼外蠻峒。蠻人持至瀘。敝間賣之一枝。纔四五錢。以堅潤細瘦。九節而直者爲上品。蠻人言語不通。郡中有蠻判官者。爲之貿易。蠻判官蓋郡吏。然蠻人懽服。惟其言是聽。太不直。則亦能

羣訟于郡庭而易之。予過敝訪山谷。故迹于無等。毛本有侍字。佛殿西廡有一堂。羣蠻聚博其上。骰子亦以骨爲之。長寸餘而匾。狀若牌子。折竹爲籌。以記勝負。劇呼大笑。聲如野獸。宛轉鼉上。其意甚樂。椎髻獠

面。幾不類人。見人亦不顧省。時方五月中。皆被毳毳。臭不可翫。

孔安國尙書序言爲隸古定。更以竹簡寫之。隸爲隸書。古爲科斗。蓋前一簡作科斗。後一簡作隸書釋之。以便讀誦。近有善隸者。輒自謂所書爲隸古。可笑也。

宜和間。雖風俗已尚詔諛。然猶趣簡便。久之乃有以駢儷。賤啓與手書俱行者。主於賤啓。故謂手書爲小簡。然猶各爲一絨。已而或厄于書吏。不能俱達。於是駢絨之謂之雙書。紹興初。趙相元鎮貴重。時方多故人。恐其不暇盡觀雙書。乃以爵里或更作一單紙直敘所請而併上之。謂之品字封。後復止用雙書。而小簡多其幅至十幅。秦太師當國。有詔者嘗執政矣。出爲建康留守。每發一書。則書百幅。擇十之一用之。于是不勝其煩。人情厭患。忽變而爲劄子。衆稍便之。俄而劄子自二幅增至十幅。每幅皆具銜。其煩彌甚。而謝賀之類。爲雙書。自若。紹興末。史魏公爲參政。始命書吏鏤版。從邸吏告報不受雙書。後來者皆循爲例。政府雙書遂絕。然賤啓不廢。但用一二矮紙。密行細書。與劄子同。博封之。至今猶然。然外郡則猶用雙書也。

元豐中。王荆公居半山。好觀佛書。每以故金漆版書藏經名。遣人就蔣山寺取之。人士因有用金漆版代書帖。與朋儕往來者。已而苦其露泄。遂有作兩版相合。以片紙封其際者。久之。其製漸精。或又以縑囊盛而封之。兩人謂之簡版。北人謂之牌子。後又通謂之簡版。或簡牌。予淳熙末。還朝。則朝士乃以小紙高四五寸。闊尺餘。相往來。謂之手簡。簡版幾廢。市中途無賣者。而紙肆作手簡賣之甚售。

士大夫交謁。祖宗時用門狀。後結牒。右件如前。謹牒。若今公文。後以爲煩而去之。元豐後。又盛行手刺。前不具銜。止云某謹上謁某官。某月日。結銜姓名。刺或云狀。亦或不結銜。止書郡名。然皆手書。蘇黃置張諸公皆然。今猶有藏之者。後又止行門狀。或不能一一作門狀。則但留語闌人云。某官來見。而苦于闌人匿而不告。紹興初。乃用勝子直書銜及姓名。至今不廢。

石藏用名用之。高醫也。嘗言今人稟賦怯薄。故按古方用藥。多不能愈病。非獨人也。金石草木之藥。亦皆比古力弱。非倍用之。不能取效。故藏用以喜用熱藥。得勝羣醫。至爲謠言曰。藏用權頭三斗火。人或畏之。惟藏以道大喜其說。每見親友蓄丹。無多寡。盡取食之。或不待告主人。主人驚駭。急告以不宜多服。以道大笑。不顧。然亦不爲害。此蓋稟賦之偏。他人不可效也。晚乃以盛冬伏石上書丹。爲石冷所逼。得陰毒傷寒而死。

予族子相。少服兔絲子凡數年。所服至多。飲食倍常。氣血充盛。忽因浴去背垢。背覺腫。急視之。隨視隨長。赤焮異常。蓋大疽也。適四五月間。金銀藤開花時。乃大取。依良方所載法飲之。兩日至數斤。背腫消盡。以此知非獨金石不可妄服。兔絲過餌。亦能作疽如此。不可不戒。

初虞世字和甫。以醫名天下。元符中。皇子鄧王生月餘。得癘疾。危甚。羣醫束手。虞世獨以爲必無可慮。不三日。王薨。信乎醫之難也。

佛經戒比丘非時食。蓋其法過午則不食也。而蜀僧招客暮食。謂之非時。董仲舒三年不闕園。謂勤苦不遊嬉也。館中著庭有園。每會飯罷。輒相語曰。今日闕園乎。此二事甚相類。

范丞相覺民拜參知政事時。歷任未嘗滿一考。

宣和中。百司庶府。悉有內待官。爲承受實專其事。長貳皆取決焉。梁師成爲秘書省承受。坐于長貳之上。所不置承受者。三省密院學士院而已。

趙高爲中丞相。龔澄樞爲內太師。猶稍與外庭異。童貫眞爲太師。領樞密院。振古所無。

吳玠守蜀如和尙原殺金平仙人原潭毒關之類皆創爲控扼之地。古人所未嘗知。可謂名將矣。
蜀孟氏時苑中忽生百合花一本數百房。皆並蒂。圖其狀於聖壽寺門樓之東。頰壁間。謂之瑞花圖。至今尙存。乃知草木之妖無世無之。

曹孝忠者以醫得幸。政和宣和間。其子以翰林醫官換武官。俄又換文。遂除館職。初蜀人謂病風者爲雲。畫家所謂趙雲子是矣。至是京師市人亦有此語。館中會語及宸翰。或謂曹氏子曰。計公家富有雲漢之章也。曹忽大怒曰。爾便雲漢坐皆惘然。而曹肆罵不已。事聞。復還右選。除開門官。
宣和末。婦人鞋底尖以二色合成。名錯到底。竹骨扇以木爲柄。舊矣。忽變爲短柄。止插至扇半。名不徹頭。皆服妖也。

种彞叔靖康初。以保靜節鉞致仕。居長安村墅。一夕。旌節有聲甚異。旦而中使至。遂起。五代時安重誨王峻皆嘗有此異。見周太祖實錄。二人者皆得禍。彞叔雖自是登樞府。然功名不成。亦非吉兆也。方彞叔赴召時。有華山道人獻詩曰。北蕃羣犬窺籬落。驚起南朝老大蟲。
崇寧中。長星出。推步躔度長七十二萬里。

卷第四

謁丞相。雖三公亦入客次。故相入朝。以經筵或內祠奉朝請。班退。亦與從官同捲班而出。三公無班。若不秉政。惟立使相班。與貴戚諸人雜立。

故相前執政入朝。當張蓋。史魏公始撤去。見任執政爲宣撫使。舊用劄子關三省樞密院押字而已。王公明參政始改用申狀。

百官入殿門。閣門輒促之曰。那行。那音。予去國二十七年。復還朝。儀寔有不同。唯此聲尙存。

四川宣撫使置司利州。或興元府。以見任執政爲之。而成都自置四川制置使。制置使移文宣撫司。當用申狀。而倔強不伏。又以見任執政無用牒之理。於是但用申宣撫某官。不肯申宣撫司。此當拒而不受。或聞之朝廷。而宣撫使依違不能問也。

李公擇孫莘老。平時至相親厚。皆終於御史中丞。元祐五年二月二日。公擇卒。三日。莘老卒。先後纔一日。曾子宣以大觀元年八月二日卒。其弟子開以三日卒。先後纔一日。

蔡京祖某。父準及京。皆以七月二十一日卒。三世同忌日。

張文潛三子。拒結和。皆中進士第。拒結在陳。死于兵。和爲陝府教官。歸葬二兄。復遇盜見殺。文潛遂亡後。可哀也。

予年十餘歲時。見郊野間鬼火至多。麥苗稻穗之杪。往往出火。色正青。俄復不見。蓋是時去兵亂未久。所謂人血爲燐者。信不妄也。今則絕不復見。見者輒以爲怪矣。

太母。祖母也。猶謂祖爲大父。熙寧元豐間。稱曹大皇爲太母。元祐中。稱高太皇爲太母。皆謂帝之祖母爾。元符中。謂向太后爲太母。紹興中。謂韋太后爲太母。則非矣。

末。鄭伸自檢校太師。忽落檢校爲真太師。國初以來所無有也。

曹僧以太皇太后之弟。且英宗受天下于仁祖。故神廟所以養慈聖光獻者備極隆厚。僧官至中書令。會慈聖上僊。僧解官行服。服闋當還故官。而官制行。使相不帶三省長官。例換開府儀同三司。于是特封僧濟陽郡王。及薨。追封沂王。外戚封王。自僧始。然僧之例。後豈可用哉。

建炎大駕南渡後。每邊事危急。則住常程。謂專治軍旅。其他皆權止施行。又急則放百司。謂官吏權聽自便。幸明州時。呂相欲并從官。聽自便。高宗不可。乃止。

建炎初。大駕駐蹕南京揚州。而東京置留守司。則百司庶府爲二。其一曰在京某司。其一曰行在某司。其後大駕幸建康。會稽而六宮往江西。則亦分爲二。曰行在某司。行宮某司。已而大駕幸建康。六宮留臨安。則建康爲行在。臨安爲行宮。今東京阻隔。而臨安官司。猶曰行在某司。示不忘恢復也。

郭子儀三十年無總麻服。人或疑其不然。安厚卿樞密逾二紀。無功總之戚。乃近歲事也。

故都紫宸殿有二金狻猊。蓋香獸也。故晏公冬宴詩云。狻猊對立香煙度。鸞鴛交飛組繡明。今寶玉大弓之盜未得。而奉使至虜庭。率見之。真卿大夫之辱也。

南齊胡諧之。謫梁州刺史。范柏年于武帝曰。欲擅一州。柏年已受代。帝欲不問。諧之曰。見虎格得。而放上山。于是賜死。紹聖中。謫元祐大臣過嶺。呂吉甫聞之。嘻笑曰。捕得黃巢。笞而遣之。顏夷仲爲少蓬。尙無出身久之。乃賜第除西掖。

予在嚴州時。得陸海軍節度使印。藏軍資庫。蓋節度使鄭翼之所賜印也。翼之南渡後死。辰沅靖州蠻有犵狫。有犵獠。有犵獠。有山獠。俗亦土著。外愚內黠。皆焚山而耕。所種粟豆而已。食

不足。則獵野獸。至燒龜蛇啖之。其負物。則少者輕。老者重。率皆束于背。婦人負者尤多。男未娶者。以金雞羽插髻。女未嫁者。以海螺爲數珠。挂頸上。嫁娶先密約。乃伺女於路。劫縛以歸。亦忿爭叫號求救。其實皆僞也。生子。乃持牛酒拜女父母。初亦伴怒卻之。鄰里共勸。乃受飲酒。以鼻一飲。至數升。名鈎藤酒。不知何物。醉則男女聚而踏歌。農隙時。至一二百人爲曹。手相握而歌。數人吹笙在前導之。貯缸酒于樹陰。饑不復食。惟就缸取酒恣飲。已而復歌。夜疲。則野宿。至三日。未厭。則五日。或七日。方散歸。上元。則入城市觀燈。呼郡縣官曰。大官。欲人謂己爲足下。否則怒。其歌有曰。小娘子。葉底花。無事出來吃盞茶。盞竹枝之類也。諸蠻。惟狔狔頗強。習戰鬪。他時或能爲邊患。

童貫平方寇時。受富民獻遺。文臣曰。上書可采。武臣曰。軍前有勞。並補官。仍許磨勘。封贈爲官戶。比事平。有司計之。凡四千七百人。有奇。

吳元中丞相在辟雍。試經義五篇。盡用字說。援據精博。蔡京爲進呈。特免省赴廷試。以爲學字說之勸。及作相。上章乞復春秋科。反攻王氏。徐擇之時。爲左相。語人曰。吳相此舉。雖湯武不能過。客不解。擇之曰。逆取而順守。元中甚不能平。

姚平仲謀劫虜寨。欽廟以詢神蘇叔。蘇叔持不可甚堅。及平仲敗。蘇叔乃請速再擊之。曰。今必勝矣。或問平仲之舉。爲虜所笑。奈何。再擊蘇叔曰。此所以必勝也。然朝廷方上下震懼。無能用者。蘇叔可謂知兵矣。蘇翰林叔厚謝宮祠表云。雜宮錦於漁簑。敢忘君賜。話玉堂于茆舍。更覺身榮。時歎其工。又有一表云。欲挂衣冠。尙低回于末路。未先犬馬。儻邂逅於初心。尤佳。

秘書新省成。徵廟臨幸。孫叔詣參政作賀表云。蓬萊道山。一新羣玉之構。勾陳羽衛。共仰六飛之臨。同時無能及者。

錢遜叔侍郎。少時泝汴。舟敗。溺水。流二十里。遇救。得不死。旬日。猶苦腰痛。不悟其故。視之。有手迹。大如扇色。正青。五指及掌。宛然可識。若擊其腰間者。此其所以不死也耶。

遼相李儼作黃菊賦。獻其主耶律弘基。弘基作詩題其後。以賜之。云。昨日得卿黃菊賦。碎翦金英填作句。袖中猶覺有餘香。冷落西風吹不去。

會稽法雲長老。重喜爲童子時。初不識字。因掃寺廊。忽若有省。遂能詩。其警句云。地爐無火客囊空。雪似楊花落歲窮。拾得斷麻縫壞衲。不知身在寂寥中。程公闢修撰守會稽。聞喜名。一日召之。與游蕺山上。方

院索詩。喜即吟云。行到寺中寺。坐觀山外山。蓋戲用公關體也。

呂吉甫在北都。甚愛道。以道方以元符上書。謫官。吉甫不敢薦。謂曰。君才如此。乃自蹈罪籍。可惜也。以道對曰。詠之無他。但沒著文章處耳。其恃氣不撓如此。

道以道與其弟季比。同應舉。以道獨拔解時。考試官葛某眇一目。以道戲作詩云。沒與主司逢。葛八賢弟。被黜兄薦發。細思堪惜。又堪嫌。一壁有眼半壁瞎。

張文潛生而有文。在其手曰。未故以爲名。而字文潛。

張文潛虎圖詩云。煩君衛吾寢。起此蓬華陋。坐令盜肉鼠。不敢窺白晝。譏其似貓也。

白樂天有忠州木蓮詩。予遊臨邛。白鶴山寺佛殿前。有兩株。其高數丈。葉堅厚。如桂。以仲夏發花。狀如芙

蕉香亦酷似。寺僧云：花坊時有聲如破竹。然一郡止此二株，不知何自至也。成都多奇花，亦未嘗見。舊制兩省中書在門下之上，元豐易之。

舊制丞相署敕皆著姓，官至僕射則去姓。元豐新制，以僕射爲相，故皆不著姓。

徐敦立言：往時士大夫家，婦女坐椅子兀子，則人皆譏笑其無法度。梳洗牀、火爐牀，家家有之。今猶有高鏡臺、蓋施牀，則與人面適平也。或云：禁中尙用之，特外間不復用耳。

頃歲駁放秦塤等科名，方集議時，中司誤以駁爲劒，衆雖知其非，畏中司者謹前。遂皆書曰劒，可以一笑。余深罷相，居福州第中，有荔枝初實，絕大而美，名曰亮功紅。亮功者深家御書閣名也。靖康中，深講建昌軍，旣行，荔枝不復實。明年深歸，荔枝復如故。乃知世間富貴人，皆有陰相之者。

紹聖中，蔡京館遼使李儼，蓋泛使者，留館頗久。一日，儼方飲，忽持盤中杏曰：來未花開，如今多幸。京卽舉梨謂之曰：去雖葉落，未可輕離。

宣和末，黃安時曰：亂作不過一二年矣。天使蔡京八十不死，病亟復蘇，是將使之身受禍也。天下其能久無事乎？

唐拾遺耿緯下邳，喜叔孫主簿鄭少府見過詩云：不是仇梅至，何人問百憂。蘇子由作續溪令時，有贈同官詩云：歸報仇梅省，文字麥苗含。穉欲蠶眠，蓋用緯語也。近歲均州刻本，輒改爲仇香。

僧宗昂住會稽能仁寺，有故相寓寺中，已而復相。宗昂被敕住持，郎官馬子約題詩法堂壁間，白十年衰病臥林泉，鷓鴣羣飛競刺天。黃紙除書猶到汝，固知清世不遺賢。

慎東美字伯筠。秋夜待潮于錢塘江沙上露坐。設大酒樽及一杯。對月獨飲。意象傲逸。吟嘯自若。顧子敦適遇之。亦懷一杯。就其樽對酌。伯筠不問。子敦亦不與之語。酒盡各散去。伯筠工書。王逢原贈之詩。極稱其筆法。有曰。鐵索急纏蛟龍。蓋言其老勁也。東坡見其題壁。亦曰。此有何好。但似篋束枯骨耳。伯筠聞之。笑曰。此意逢原已道了。今惟丹陽有戴叔倫碑。是其遺迹。

予爲福州德寧縣主簿。入郡。過羅源縣。走馬嶺。見荆棘中有崖石。刻樹石二大字。奇古可愛。卽令從者雍除觀之。乃才翁所賞樹石六字。蓋蘇舜元書也。因以告縣令項膺。服善作欄楯護之云。

銅色本黃。古鐘鼎彝器。大抵皆黃銅耳。今人得之地中者。歲久色變。理自應耳。今郊廟所製。乃以藥薰染令蒼黑。此何理也。

曾子開封曲阜縣子。謝任伯封陽夏縣伯。曲阜今仙源縣。陽夏今城父縣。方疏封時。已無二縣矣。司封殆失職也。

蔡京爲太師。賜印文曰公相之印。因自稱公相。童貫亦官至太師。都下人謂之媪相。

館職常苦俸薄。而吏人食錢甚厚。周子充作正字時。嘗戲曰。豈所謂省官不如省吏耶。都下舊謂館職爲省官。故云。

趙相初除都督中外軍事。孫叔詣參政。時爲學士。當制。請曰。是雖王導故事。然若兼中外。則雖陛下禁衛三衛皆統之。恐權太重。非防微杜漸之意。乃改爲都督諸路軍馬制。出趙乃知之。頗不樂。

呂居仁詩云。蠟燭堆盤酒過花。世以爲新。司馬溫公有五字云。煙曲香尋篆。盃深酒過花。居仁蓋取之也。

茶山先生云。徐師川擬荆公細數落花因坐久。緩尋芳草得歸遲。云細落李花那可數。偶行芳草步因遲。初不解其意。久乃得之。蓋師川專師陶淵明者也。淵明之詩。皆適然寓意。而不留於物。如悠然見南山。東坡所以知其決非望南山也。今云細數落花。緩尋芳草。留意甚矣。故易之。又云。荆公多用淵明語。而意義如柴門雖設。要常關。雲尙無心能出岫。要字能字。皆非淵明本意也。

傅丈子駿。奏事誤稱名退。而移文閣門。請彈奏。閣門以殿上語。非有司所得聞。不受。子駿乃自劾。詔放罪。從舅唐仲俊。年八十五六。極康寧。自言少時。因讀千字文。有所悟。謂心動神疲四字也。平生遇事。未嘗動心。故老而不衰。

永清軍者。貝州也。王則據州叛。既平。改州曰恩州。而削其節鎮。及宣和中。復幽州。乃建爲永清軍節度。以命郭藥師。藥師果亦叛。蓋不祥也。

紹聖中。貶元祐人蘇子瞻儋州。子由雷州。劉莘老新州。皆戲取其字之偏旁也。時相之忍。伎如此。

魯直詩有題扇草色青青柳色黃一首。唐人賈至。趙嘏詩中皆有之。山谷蓋偶書扇上耳。至詩中作吹愁去。嘏詩中作吹愁卻。卻字爲是。蓋唐人語。猶云吹卻愁也。

周子充言。退之黃陵廟碑。辨陟方事。非也。古蓋謂適遠爲陟。書曰。若陟遐必自邇。猶今人言上路也。豈得云南方地勢下耶。

常璩字子然。河朔人。本農家。一村數十百家。皆常氏。多不通譜。子然既爲御史。一村之人。名皆從玉。雖走史下令。皆然。無如之何。子然乃名子曰任。佚美尙。謂周任史。佚子美。叔尙也。意使人不可效耳。

湯丞相封慶國公命下。湯公謂此仁宗賜履之國。自天聖以來無封者。欲請避之。或曰。何執中嘗封慶國公矣。湯公曰。執中不知引避。此何足爲法哉。卒辭之。改封岐。

古所謂長夜之飲。或以爲達旦。非也。薛許昌宮詞云。畫燭燒闌煖復迷。殿帷深密下銀泥。開門欲作侵晨散。已是明朝日向西。此所謂長夜之飲也。

王逸少筆經曰。有人以綠沉漆竹詩及鑲管見遺。老杜所謂苔臥綠沉槍。蓋謂是也。

歐陽公梅宛陵王文恭集。皆有小桃詩。歐詩云。雪裏花開人未知。摘來相顧共驚疑。便須索酒花前醉。初見今年第一枝。初但謂桃花有一種早開者耳。及遊成都。始識所謂小桃者。上元前後卽著花。狀如垂絲海棠。曾子固雜識云。正月二十開。天章閣賞小桃。正謂此也。

王定國素爲馮當世所知。而荆公絕不樂之一日。當世力薦于神祖。荆公卽曰。此孺子耳。當世忿曰。王羣戊子生。安得謂之孺子。蓋羣之生與同天節同日也。荆公愕然不覺退立。

汪彥章草赦書。敍軍興征斂。其詞云。八世祖宗之澤。豈汝能忘。一時社稷之憂。非予獲已。最爲精當。人以此陸宣公興元赦書。然議者謂自太祖至哲宗。方七世。若并道君數之。又不應曰祖宗。彥章亦悔之。信乎文之難也。

童汪錡能執干戈以衛社稷。本謂幼而能赴國難耳。非姓童也。翟公巽作童貫告詞云。爾祖汪錡誤也。或云。故以戲之。

劉長卿詩曰。千峯共夕陽。佳句也。近時僧懶可用之云。亂山爭落日。雖工而窘。不迫本句。

李後主落花詩云。鶯狂應有限。蝶舞已無多。未幾亡國。宋子京亦有落花詩云。香隨蜂蜜盡。紅入燕泥乾。亦不久下世。詩識蓋有之矣。

隋唐嘉話云。崔日知恨不居八座。及爲太常卿。於廳事後起一樓。正與尚書省相望。時號崔公望省樓。又小說載御史久次不得爲郎者。道過南宮。輒回首望之。俗號拗項橋。如此之類。猶是謗語。予讀鄭畋作學士時金鸞坡上南望詩云。玉晨鐘韻上空虛。畫戟祥煙擁帝居。極目向南無限地。綠煙深處認中書。則其意著矣。乃知朝士妄想自古已然。可付一笑。

今世所道俗語。多唐以來人詩。何人更向死前休。韓退之詩也。林下如曾見一人。靈澈詩也。長安有貧者。爲瑞不宜多。羅隱詩也。世亂奴欺主。年衰鬼弄人。海枯終見底。人死不知心。杜荀鶴詩也。事向無心得。章碣詩也。但有路可上。更高人也。行龔稼詩也。忍事敵災星。司空圖詩也。一朝權入手。看取令行時。朱灣詩也。自己情雖切。他人未肯忙。裴說詩也。但知行好事。莫要問前程。馮道詩也。在家貧亦好。戎昱詩也。漢隸歲久。風雨剝蝕。故其字無復鋒鏗。近者杜仲微。乃故用秃筆作隸。自謂得漢刻遺法。豈其然乎。曾子宣丞相。嘗排蔡京于欽聖。太后簾前。太后不以爲然。曾公論不已。太后曰。且耐辛苦。蓋禁中語。欲遣之使退。則曰耐辛苦也。京已出太原復留。

趙正夫丞相薨。車駕臨幸。夫人郭氏哭拜請恩澤者三事。其一乃乞于諡中帶一正字。餘二事皆卽許可。惟賜諡事。獨曰待理會。平時徹廟凡言待理會者。皆不許之詞也。正夫遂諡清憲。

富鄭公初請功德院。得勅額曰奉親。已而乃作兩院。共用一名。謂之南奉親院。北奉親院。

陳魯公薨。以其遭際龍飛。又薨于位。與王岐公同。于是詔用岐公元豐未贈典。超贈太師。其他恩數。皆視岐公猶可也。及其家請諡。遂特賜諡曰文恭。蓋亦用岐公諡。用他人之諡。以爲恩數。自古烏有此事哉。諺有曰。濮州鐘。世不知爲何等語。嘗有人死。見陰官。濮州人也。問以此。亦不能對。予案此事。見周世宗實錄。顯德六年二月丁丑。幸太清觀。先是乾明門外。修太清觀成。上聞濮州有大鐘。聲聞十里。乃命徙之。以賜是觀。至是往觀焉。

予參成郡議。幟攝事漢嘉。一見荔子熟。時凌雲山安樂園皆盛處。剎曹何預元立。法曹蔡迨肩吾皆佳士。相與同樂。薛許昌亦嘗以成郡幕府來攝郡。未久罷去。故其荔枝詩曰。歲杪盛州曾見樹。時新入座但聞名。蓋恨不及時也。每與二君誦之。

東坡守杭法外刺配顏巽父子。御史論爲不法。累章不已。蘇公雖放罪。而顏巽者。竟以朝旨放自便。自是豪猾益甚。以藥塗鹽鈔。而用既毀抹。賂主者浸洗之。藥盡而鈔不傷。雖老于其事者不能辨。他不法尤衆。有司稍按治。輒劫持之曰。某官乃元祐奸黨。蘇某親舊。故觀望害我。公形狀。時治黨籍。方奇峻。雖監司郡守。得其牒。輒畏縮解縱。乃已。大觀中。胡奕修爲提舉鹽事。會計已毀抹鹽鈔。得其姦。奏之。驗竄化州。籍沒貨產。一方稱快。

天下名山。惟華山。茅山。青城山。無僧寺。青城十里外。有一寺。曰布金。洪水壞之。今復葺于旁里許。僧可遵者。詩本凡惡。偶以直待衆生。總無垢之句。爲東坡所賞。書一絕於壁間。繼之山中。道俗隨東坡者。甚衆。卽日傳至圓通。遵適在焉。大自矜詡。追東坡至前途。而塗中又傳東坡三峽橋詩。遂卽對東坡自言。

有一絕。卻欲題三峽之後。旅次不及書。遂朗吟曰。君能識我湯泉句。我卻愛君三峽詩。道得可嘆不可漱。幾多詩將豈降旗。東坡既悔賞拔之誤。且惡其無禮。因促駕去。觀者稱快。遵方大言曰。子瞻謹短見我詩好甚。故妒而去。徑至栖賢。欲題所舉絕句。寺僧方礮石刻東坡詩。大詬而逐之。山中傳以爲笑。

卷第五

種微君明逸既隱。操不終。雖驟登侍從。眷禮優渥。然常懼讒嫉。其寄懷詩曰。子生背時性孤僻。自信已道輕浮名。中途失計被簪紱。目覩寵辱心潛驚。雖從鷓鴣共班序。常恐青蠅微有聲。清風滿壑石田在。終謝吾君甘退耕。其憂畏如此。又有寄二華隱者詩曰。我本厭虛名。致身天子庭。不終高尚事。有媿少微星。北闕空追悔。西山羨獨醒。秋風舊期約。何日去冥冥。然其後卒遭王嗣宗之辱。可以爲輕出者之戒。世傳常夷甫晚年悔仕。亦不足多怪也。

宋太素尙書中酒詩云。中酒事俱妨。偷眠就黑房。靜嫌鸚鵡鬧。渴憶荔枝香。病與慵相續。心和夢尙狂。從今改題品。不號醉爲鄉。非真中酒者。不能知此味也。

紹興中有貴人好爲俳諧體詩。及箋啓詩云。綠樹帶雲山。晝畫斜陽入。竹地銷金。上汪內相啓云。長楸脫卻青羅帳。綠蓋千層。俊鷹解下綠絲條。青雲萬里。後生遂有以爲工者。賴是時前輩猶在。雅正未衰。不然。與五代之體何異。此事繫時治忽。非細事也。

承平時。鄜州田氏作泥孩兒。名天下。態度無窮。雖京師工效之。莫能及。一對至直十縑。一床至直十千。一

床者。或五或七也。小者二三寸。大者尺餘。無絕大者。予家舊藏一臥者。有小字云。廊時田玘製。紹興初。避地東陽山中。歸則亡之矣。

隆興間。有揚州帥貴戚也。宴席間。語客曰。諺謂三世仕宦。方解著衣喫飯。僕欲作一書。言衣帽酒殺之制。未得書名。通判鮮于廣蜀人。卽對曰。公方立勳業。今必無暇及此。他時功成名遂。均逸林下。乃可成書耳。請先立名曰逸居集。帥不之悟。有牛策判者。京東歸正官也。輒操齊音曰。安撫莫信。此是通判罵安撫。飽食緩衣。逸居而無教。則近于禽獸。是甚言語。帥爲發怒。頰面而通判欣然有得色。

鼃子止云。曾見東坡手書四州環一島詩。其間茫茫太倉中一句。乃區區魏中梁。不知果否。蘇季真云。寄張文潛枕榔杖詩。初本云酒半消。其下云江邊獨曳枕榔杖。林下閒尋葦撥苗。盛孝章又誤爲孝標。已而悟。故盡易之。雖其家所傳。然去今所行亡字韻殊遠。恐傳之誤也。

范至能在成都嘗求亭名于予。予曰。思鱸。至能大以爲佳。時方作墨。卽以銘墨背。然不果築亭也。臨邛夾門鎮山險處。得瓦棺。長七尺。厚幾二寸。與今木棺略同。但蓋底相反。骨猶不壞。棺外列置瓦器。皆極淳古。時靖康丙午歲也。李知幾及見之。

市人有以博戲取人財者。每博必大勝。號松子量。不知何物語也。亦不知其字云何。李端叔爲人作墓志。亦用此三字。端叔前輩也。必有所據。

今官制。光祿大夫轉銀青。銀青轉金紫。金紫轉特進。五代以前。乃自銀青轉金紫。金紫轉光祿。光祿轉特進。據馮道長樂老序所載甚詳。

莊文太子初封鄧王。予爲陳魯公史魏公言。鄧王乃錢俶歸朝後所封。又哲宗之子早薨。亦封鄧王。當避此不祥之名。二公曰。已降詔俟郊禮改封可也。莊文竟早世。

東坡贈趙德麟秋陽賦云。生于不土之里。而詠無言之詩。蓋寓時字也。

尹少稷強記。日能誦麻沙版本書厚一寸。嘗於呂居仁舍人坐上。記歷日。酒一行。記兩月。不差一字。

蕭王與沈元用同使虜。館於燕山愍忠寺。暇日無聊。同行寺中。偶有唐人碑辭。皆偶儻。凡二千餘言。元用素強記。卽朗誦一再。蕭王不視且聽。且行。若不經意。元用歸。欲矜其敏。取紙追書之。不能記者闕之。凡闕十四字。書畢。蕭王視之。卽舉筆盡補其所闕。無遺者。又改元用謬語四五處。置筆他語。略無矜色。元用駭服。

靖康兵亂。宣和舊臣。悉已遠竄。黃安時居壽春。歎曰。造禍者全家盡去。嶺外避地。卻令我輩橫屍路隅。耶。安時卒死於兵。可哀也。

高宗除喪。予以禮部郎入讀祝。至几筵殿。蓋帝平日所御處也。殿三楹。殊非高大。陳列几席。樞枷之類。亦與常人家不甚相遠。猶想見高廟之儉德也。

夜涼疑有雨。院靜似無僧。此潘道遙詩也。

田登作郡。自諱其名。觸者必怒。吏卒多被榜笞。於是舉州皆謂燈爲火。上元放燈。許人入州治遊觀。吏人遂書榜揭于市曰。本州依例放火三日。

劉隋州詩。海內猶多事。天涯見近臣。言天下方亂。思見天子而不可得。得天子近臣。亦足自慰矣。見天子

近臣。已足自慰。况又見之於天涯乎。其愛君憂國之意。鬱然見于言外。

紹興間。復古殿供御墨。蓋新安墨工戴彥衡所造。自禁中降出。雙角龍文。或云米友仁侍郎所畫也。中官欲于苑中作墨竈。取西湖九里松作煤。彥衡力持不可。曰：松當用黃山所產。此平地松。豈可用。人重其有守。

祖母楚國夫人。大觀庚寅在京師。病累月。醫藥莫效。雖名醫如石藏用輩。皆謂難治。一日有老道人。狀貌甚古。銅冠緋氅。一丫髻童子。操長柄白紙扇。從後過門。自言疾無輕重。一灸立愈。先君延入。問其術。道人探囊出少艾。取一靛灸之。祖母方臥。忽覺腹間痛甚。如火灼。道人自言九十歲。遂徑去。追之。疾馳不可及。祖母是時未六十。復二十餘年。年八十三。乃終。祖母沒後。又二十年。從兄子楫。監三江鹽場。偶飲于士人毛氏。忽見道人。衣冠及童子。恐如祖母平日所言。方愕然。道人忽自言京師灸靛事。言訖。遽遜去。遍尋不可得。毛君云。其妻病。道人爲灸屋柱十餘壯。病脫然愈。方欲謝之。不意其去也。世或疑神仙以爲渺茫。豈不謬哉。

齊民要術。有鹹杔子法。用杔木皮漬鴨卵。今吳人用虎杖根漬之。亦古遺法。

曹詠爲浙漕。一日坐客言徽州汪王靈異者。詠問汪王若爲對。有唐永夫者在坐。遽曰。可對曹漕。詠以爲工。遂愛之。會觀字純甫。偶歸正官蕭鷓巴來謁。既退。復一客至。其所狎也。因問曰。蕭鷓巴可對何人。客曰。正可對曾鞞。鞞以爲媿已。大怒。與之絕。然鷓巴北人。實謂之札八。

實爲太師用廣南龔澄樞故事。林靈素爲金門羽客。用閩王時譚紫霄故事。嗚呼異哉。

元豐間。建尙書省于皇城之西。鑄三省印。米芾謂印文背戾。不利輔臣。故自用印以來。凡爲相者悉投竄。善終者亦追加貶削。其免者蘇軾相頌一人而已。蔡京再領省事。遂別鑄公相之印。其後家安國又謂省居白虎位。故不利。京又因建明堂。遷尙書省于外以避之。然京亦竄死。二子坐誅。其家至今廢。不知爲善而遷省。易印以避禍。亦愚矣哉。

王黼作相。請朝假歸。咸平焚黃。畫舫數十。沿路作樂。固已駭物論。紹興中。秦熺亦歸金陵焚黃。臨安及轉運司舟舫。盡選以行。不足擇。取於浙西一路。凡數百艘。皆窮極丹雘之飾。郡縣監司迎餞數百里。不絕。平江當運河。結綵樓數丈。大合樂官妓舞于其上。縹緲若在雲間。燿燿之自若。

秦太師娶王禹玉孫女。故諸王皆用事。有王子溶者。爲浙東倉司官屬。郡宴必與提舉者同席。陵忽玩戲。無所不至。提舉者事之反若官屬。已而又知吳縣。尤放肆。郡守宴客。初就席。子溶遣縣吏呼伎樂伶人。卽皆馳往。無敢留者。上元吳縣放燈。召太守爲客。郡治乃寂無一人。又嘗夜半遣廳吏叩府門。言知縣傳語。必請面見。守狼狽攬衣秉燭出問之。乃曰。知縣酒渴。聞有鹹盞。欲覓一甌。其陵侮如此。守亟取遣之。不敢較也。

司馬安四至九卿。當時以爲善宦。以今觀之。則謂之拙宦可也。彼汨喪廉恥。廣爲道徑者。不數年至公相矣。安用四至九卿哉。

蔡京賜第。有六鶴堂。高四丈九尺。人行其下。望之如蟻。

故都里巷間人言利之小者曰八文十二。謂十爲謔。蓋語急。故以平聲呼之。白傅詩曰。綠浪東西南北路。

紅欄三百九十橋。宋文安公宮詞曰。三十六所春宮館。一香風送管絃。釐以道詩亦云。頌君一日慙。勸
意示我十年感。遇詩則詩家亦以十爲謔矣。

周宇文護與母閻書曰。受形稟氣。皆知母子。誰知薩保如此不孝。此乃對母自稱小名。南齊武帝崩。鬱林
王卽位。明帝謀廢立。右僕射王晏盡力助之。從弟思遠謂晏曰。兄荷武帝厚恩。一旦贊人如此事。何以自
立。因勸之引決。及晏拜驃騎。思遠兄思徵曰。隆昌之末。阿戎勸吾自裁。若用其語。豈有今日。思遠曰。如
阿戎所見。猶未晚也。此乃對兄自稱小名。畢景儒幕府燕閒錄。載蘇易簡初及第時。與母書。自稱岷岷。亦
小名也。從伯父右司小名馬哥。在京師省祖母楚國夫人。出上馬矣。楚國偶有所問。自出屏後呼馬哥。親
事官聞之。白伯父曰。夫人請吏部。蓋此輩亦習聞之也。今吳人子弟稍長。便不欲人呼其小名。雖尊者亦
以行第呼之矣。風俗日薄如此。奈何。

宋白石燭詩云。但喜明如蠟。何嫌色似蠟。獨出延安。予在南鄭數見之。其堅如石。照席極明。亦有淚如蠟。
而煙濃。能熏汗帷幕衣服。故西人亦不貴之。

胡基仲嘗言韓退之石鼓歌云。羲之俗書趁姿媚。狂肆甚矣。予對曰。此詩至云。陋儒編詩不收入。二雅編
迫無委蛇。其言羲之俗書。未爲可駭也。基仲爲之絕倒。

王廣津宮詞云。新睡起來思舊夢。見人忘卻道勝常。勝常猶今婦人言萬福也。前輩尺牘有云。尊候勝常
者。勝字當平聲讀。

拄杖斑竹爲上竹。欲老瘦而堅勁。斑欲微赤而點疏。賈長江詩云。揀得林中最細枝。結根石上長身遲。莫

嫌滴瀝紅斑少。恰是湘妃淚盡時。善言拄杖者也。然非予有此癖。亦未易賞音。

唐韓翃詩云。門外碧潭春洗馬。樓前紅燭夜迎人。近世晏叔原樂府詞云。門外綠楊春繫馬。床前紅燭夜呼盧。氣格乃過本句。不謂之剽可也。

張文昌成都曲云。錦江近西煙水綠。新雨山頭荔枝熟。萬里橋邊多酒家。遊人愛向誰家宿。此未嘗至成都者也。成都無山。亦無荔枝。蘇黃門詩云。蜀中荔枝出嘉州。其餘及眉半有不。蓋眉之彭山縣。已無荔枝矣。况成都乎。

先太傅自蜀歸。道中遇異人。自稱方五。見太傅曰。先生乃西山施先生肩吾也。遂授道。蓋施公陸州桐廬人。太傅晚乃自睦守挂冠。蓋有緣契矣。

張文昌紗帽詩云。惟恐被人偷翦樣。不曾閒戴出書堂。皮襲美亦云。借樣裁巾怕索將。王荊公子富貴聲色。略不動心。得耿天隲鷲竹根冠愛詠不已。予雅有道冠拄杖二癖。每自笑歎。然亦賴古多此賢也。

故都時御爐炭。牽斲作琴樣。胡桃紋。鶉鷄青。高宗紹興初。巡幸臨安。詔嚴州進炭。止令用土產。勿拘舊制。東坡自儋耳歸。至廣州。舟敗亡墨四篋。平生所寶皆盡。僅於諸子處得李墨一丸。潘谷墨兩丸。自是至昆

陵捐館舍。所用皆此三墨也。此聞之蘇季真云。

世言東坡不能歌。故所作樂府詞多不協。鼙以道云。紹聖初。與東坡別于汴上。東坡酒酣。自歌古陽關。則公非不能歌。但豪放。不喜裁翦。以就聲律耳。

山谷水仙花二絕。淡掃蛾眉簪一枝。及只比江梅無好枝者。見于李端叔集中。恐非端叔所及也。賀方回

作王子開挽詞。和璧終歸趙。干將不葬吳者。見于秦少游集中。子開大觀己丑卒于江陰。而返葬臨城。故方回此句爲工。時少游已沒十年矣。水仙花則不可考。然氣格似山谷。晚作不類端叔也。

吳武安玠。葬德順軍隴干縣。今雖隔在虜境。松楸甚盛。歲時祀享不輟。虜不敢問也。玠謚武安。而梁益間有廟。賜額曰忠烈。故西人至今。但謂之吳忠烈云。

姚福進者。兗麟之祖也。德順軍人。以挽強名於秦隴間。至今西人。謂其族爲姚硬弓家。

曲端。吳玠。建炎間。有重名于陝西。西人爲之語曰。有文有武是曲大。有謀有勇是吳大。玠能書。今閬中錦屏山壁間。有其書。奇偉可愛。

成都江濱廟北壁外。畫美髯一丈夫。據銀胡床坐。從者甚衆。邦人云。蜀賊李順也。

邛州僧寺中版壁。有趙諗題字。字旣凡惡。語亦淺拙。不知當時何以中第如此之高。蓋希時事力。詆元祐。故有司不復記其文之工拙也。

永康軍導江縣迎祥寺。有唐女真吳彩鸞。書佛本行經六十卷。予嘗取觀之。字亦不甚工。然多闕唐諱。或謂真本爲好事者易去。此特唐經生書耳。

利州武后畫像。其長七尺。成都有孟蜀時后妃祠堂。亦極脩偉。絕與今人不類。福州大支提山。有吳越王紫袍。寺僧升椅子舉其領。猶拂地。兩肩有汗迹。

老杜海樓詩。在左縣所賦。今已不存。成都有一株。在文明廳東廊前。正與制置司簽廳門相直。簽廳乃故錦官閣。聞潼川尤多。予未見也。

成都石筍其狀與筍不類乃累疊數石成之所謂海眼亦非妄。悉謬至今有得之者蜀食井鹽如仙井大專猶是大穴若榮州則井絕小僅容一竹筒真海眼也石犀在廟之東階下亦粗似一犀正如陝之鐵牛但望之大概似牛耳石犀一足不備以他石續之氣象甚古

承平日甚重宮觀宣和中竈以道知成州有請吏部報云照會本官歷任已曾住宮觀不合再有陳乞遂致仕而歸

唐夔州在白帝城地勢險固本朝太平興國中丁晉公爲轉運使始遷於瀘西瀘西地平不可守又置瞿唐關使於白帝屯兵下臨瀘西使有事宜多置兵則夔帥不能親將指臂倒置若少置兵則關先不守夔州必隨以破可謂失策大抵當時蜀已平乃移夔州晉已平乃移太原皆不可曉若使晉蜀復爲豪傑所得彼能據一國獨不能復徙一城以就形勝耶若雖有外寇而其地尙爲我有乃捨險就易此何理也忠州在陝路與萬州最號窮陋豈復有爲郡之樂白樂天詩乃云唯有綠樽紅燭下暫時不似在忠州又云今夜酒醺羅綺煥被君融盡玉壺冰以今觀之忠州那得此光景耶當是不堪司馬閒冷驟易刺史故亦見其樂爾可憐哉

曾子宜林子中在密院爲哲廟言章子厚以隱士帽紫直掇繫條見從官從官皆朝服其強肆如此上曰彼見蔡京亦敢爾乎京時爲翰林學士不知何以得人主待之如此真奸人之雄也

祖宗故事命官鑠廳舉進士者先所屬選官考試所業通者方聽取解至省試程文紕繆者勒停不合格者亦贖銅放永不得應舉天聖間方除前制然未久又詔文臣許鑠廳兩次武臣止許一次其嚴如此近

歲泛許人應博學宏辭。遂有妄以此自稱。或假手作所業獻禮部。亦許試。而程文繆不可讀。亦無以懲之。殆非也。

秦所作鄭白二渠。在今京兆府之涇陽。皆以涇水爲源。白渠灌涇陽高陵櫟陽及耀州雲陽三原富平。凡六縣。斗門百七十餘所。今尙存。然多廢不治。鄭渠所灌尤廣。袤數倍于白渠。涇水乃絕深。不能復入渠口。渠岸又多摧圯填淤。比之白渠。尤不可措手矣。

唐人喜赤酒甜酒。灰酒皆不可解。李長吉云。琉璃鍾。琥珀濃。小槽酒滴真珠紅。白樂天云。荔枝新熟雞冠色。燒酒初開琥珀香。杜子美云。不放香醪如蜜甜。陸魯望云。酒滴灰香似去年。

李虛己侍郎。字公受。少從江南先達學作詩。後與曾致堯倡酬。曾每曰。公受之詩雖工。恨啞耳。虛己初未悟。久乃造入。以其法授晏元獻。元獻以授二宋。自是遂不傳。然江西諸人。每謂五言第三字。七言第五字。要響亦此意也。

沈義倫證恭惠。其家訴於朝。欲帶一文。字議者執不可而止。張知白證文節。御史王嘉言請改證文正。王孝先爲相。亦不肯改。歐陽文忠公初但證文。蓋以配諱文。公常夷甫方兼太常。晚與文忠相失。乃獨謂公有定策功。當加忠字。實抑之也。李邦直作議不能固執。公論非之。當時士大夫相謂曰。永叔不得證文。公此證必留與介甫耳。其後信然。

本朝進士。初亦如唐制。兼探時望。真廟時。周安惠公起始建糊名法。一切以程文爲去留。李允則真廟時。知滄州。虜圍城。城中無礮石。乃鑿冰爲礮。虜解去。近時陳規守安州。以泥爲礮。城亦終不

可下。

信州龍虎山。漢天師張道陵後。世襲虛靜先生號。蜀賦役。自二十五世孫乾耀始。時天聖八年也。今黃冠輩謂始于三十二代。非也。又獨謂三十二代爲張虛靜。亦非也。

卷第六

太宗朝。胡祕監周甫。貶坊州團練副使。擅離徒所。至鄜州謁宋太素尙書。被劾。特置不問。元祐中。陳正字無已。爲徐教官。亦擅離任。至南京。別東坡先生。諫官彈之。亦不加罪。祖宗優待文士如此。今上初登極。周丞相草儀注。稱新皇帝。蓋創爲文也。

歐陽公記開寶錢文曰。宋通。予按周顯德錢文曰。周通。故國初因之。亦曰宋通。建隆乾德中皆然。不獨開寶也。至太平興國以後。乃以年號爲錢文。至今皆然。歐公又謂寶元錢文曰。皇宋。按實錄所載亦同。然今錢中又有云聖宋者。大小錢皆有之。大錢折二。始於熙寧。則此名乃或出於熙寧以後矣。

周世宗時。李景奉正朔。上表自稱唐國主。而周稱之曰江南國主。國書之制曰。皇帝致書恭問江南國主。又以君字易卿字。至藝祖於李煜。則遂賜詔如藩方矣。仁宗時。册命趙元昊爲夏國主。蓋用江南故事。然亦賜詔。凡言及卿字處。卽闕之。亦或以國主代卿字。當時必有定制。然不盡見於國史也。

歐陽文忠公立論。易繫辭當爲大傳。蓋古人已有此名。不始於公也。有黠僧遂投其好。偕作韓退之與僧大頰書。引繫辭謂之易大傳。以示文忠公。公以合其論。遂爲之跋曰。此宜爲退之之言。予嘗得此書石刻。

語甚鄙。不足信也。

今僧寺輒作庫。質錢取利。謂之長生庫。至爲鄙惡。予按楚甌彬管以束苧就長沙寺庫質錢。後贖苧還於苧束中。得金五兩。送還之。則此事亦已久矣。庸僧所爲古今一揆。可設法嚴絕之也。

先君入蜀時。至華之鄭縣。過西溪。唐昭宗避兵嘗幸之。其地在官道旁。七八十步。澄深可愛。亭曰西溪。蓋杜工部詩所謂鄭縣亭子澗之濱者。亭旁古松間。支徑入小寺。外弗見也。有柁木版。揭梁間甚大。書杜詩。筆亦雄勁。體雜顏柳。不知何人書。墨挺然出版上。甚異。或云墨着柁木皆如此。

宗正卿卿祖宗因唐故事。必以國姓爲之。然不必宗室也。元豐中始兼用庶姓。而知大宗正事設官。乃於濮安懿王始權任甚重。頗鑄損云。

京師溝渠極深廣。亡命多匿其中。自名爲無愛洞。甚者盜匿婦人。又謂之鬼樊樓。國初至兵與常有之。雖才尹不能絕也。

祥符東封。命王欽若。趙安仁。並判兗州。二公皆見任執政也。慶曆初。西鄙未定。命夏竦判永興。陳執中。范雍。知永興。一州二守。一府三守。不知當時如何分職事。旣非長貳。文移書判之類。必有程式。官屬胥吏。何所稟承。國史皆不載。莫可考也。然當時諫官御史。不以爲非。諸公受之。亦不力辭。豈在其時亦爲便於事耶。宣和中。復幽州。以爲燕山府。蔡靖知府。郭藥師同知。旣增同字。則爲長貳。與慶曆之制不同。

鼂以道讀魏書。以爲魏收獨無刑禍。旣以壽終。又贈司空。尙書左僕射。諡文貞。以此攻韓退之。避脩史之說。然收死後。竟以史筆多憾於人。齊亡之歲。冢被發。棄骨於外。得禍亦不輕矣。

王荆公父名益。故其所著字說無益字。蘇東坡祖名序。故爲人作序。皆用敍字。又以爲未安。遂改作引。而謂字序曰字說。張芸叟父名蓋。故表中云。此乃伏遇皇帝陛下。今人或效之。非也。

古謂帶一爲一腰。獨今謂衣爲一領。周武帝賜李賢御所服十三環金帶一腰是也。近世乃謂帶爲一條。語頗鄙。不若從古爲一腰也。

黃巢之入長安。僖宗出幸。豆盧瑑。崔沆。劉鄩。于琮。裴諗。趙縱。李溥。李湯。皆守節。至死不變。鄭棊。鄭係。義不臣賊。舉家自縊而死。以靖康京師之變言之。唐猶爲有人也。

晉語兒人二字通用。世說載桓溫行經王大將軍墓。望之曰。可兒可兒。蓋謂可人爲可兒也。故晉書及孫綽與庾亮牋。皆以爲可人。又陶淵明不欲束帶見鄉里小兒。亦是以小人爲小兒耳。故宋書云。鄉里小人也。

晉人所謂不意永嘉之末。復聞正始之音。永嘉正始。乃魏晉年名。胡武平上呂丞相啓云。手提天鐸。鏘正始之遺音。夢授神椽。擯奪朱之亂色。蓋不悟正始爲年名也。

俗說唐五代間事。每及功臣。多云賜無畏。其言甚鄙淺。予兒時聞之。每以爲笑。及觀韓偓金鑾密記云。面處分自此賜無畏兼賜金三十兩。又云。已曾賜無畏卿宜凡事皆盡言。直是鄙俚之言。亦無畏以此觀之。無畏者。許之無所畏憚也。然君臣之間。乃許之無所畏憚。是何義理。必起於唐末耳。

國初舉人對策。皆先寫策題。然策題不過一二十句。其後策題變多。而寫題如初。舉人甚以爲苦。慶曆初。賈文元公爲中丞。相奏罷之。

故事臺官無待經筵者。賈文元公爲中丞。仁祖以其精於經術。特召侍講邇英。自此遂爲故事。秦會之當國時。諫官御史必兼經筵。而其子燿亦在焉。意欲搏擊者。輒令燿於經筵侍對時論之。經筵退。彈文即上。予與尹少稷同作密院編脩官。時陳魯公史魏公爲左右相。一日過堂。見魯公語少款。少稷忽曰。穉便難活。相公面上人。又云穉是右相薦。右相面上人。又云穉是相公鄉人。處處爲人關防。魯公笑答云。康伯往年使虜。有李愈少卿者來迓客。自言漢兒也。云女真契丹奚皆同朝。只漢兒不好。北人指曰。漢兒。南人卻罵作番人。愈之言。無乃與君類耶。一座皆笑。

吳處厚字伯固。既上書告蔡新州詩事。自謂且顯擢。時已爲漢陽守。比秩滿。僅移衛州。予少時嘗見其謝表。曰。今李常已移成都。則餘人次第復用。臣有兩子一塔。俱是選人。到處撞見冤讎。何人更肯提挈。處厚本能文。而表辭鄙淺如此者。意謂太母見之易曉耳。

王黼在翰苑嘗病疫。危甚。國醫皆束手。二妾曰豔娥素娥侍疾。坐於足。素娥泣曰。若內翰不諱。我輩豈忍獨生。惟當俱死耳。豔娥亦泣。徐曰。人生死有命。固無可奈何。姊宜自寬。黼雖昏臥。實具聞之。既愈。素娥專房。燕封至淑人。豔娥遂辭去。及黼誅。素娥者驚悸。不三日亦死。曩日俱死之言遂驗。

蜀老言紹興初。漕粟嘉陵以餉邊。每一斛至軍中。計其費爲七十五斛。席大光胡承公爲帥。始議轉船摺運。於是費十減六七。向非二公。蜀已大困矣。故至今蜀人謂承公爲湖州鏡。王性之記問該洽。尤長於國朝故事。莫不能記。對客指畫誦說。動數百千言。退而質之。無一語謬。予自少至老。惟見一人。方大駕南渡。典章一切掃蕩無遺。甚至祖宗諡號。亦皆忘失。祠祭但稱廟號而已。又因討

論御名禮部申省言未尋得廣韻方是時性之近在二百里內非獨博記可詢其藏書數百篋無所不備盡護致剗山當路巍然不問也

王伯照長於禮樂歷代及國朝議禮之書悉能成誦亦可謂一時之傑紹興末爲太常少卿遷禮部侍郎猶兼少卿事可謂得人俄坐臺評去近時不惜人才至此

都下賈婢謂未嘗入人家者爲一世人喜其多淳謹也予在蜀中與何措之同閱報狀見新進驟用者措之曰渠是一生人宜其速進予怪而詰之措之曰曾爲朝士者旣爲人所忌嫉又多謗故惟新進者常無患蓋有激也

杜詩夜闌更秉燭意謂夜已深矣宜睡而復秉燭以見久客喜歸之意僧德洪妄云更當平聲讀烏有是哉

謝景魚家有陳無己手簡一編有十餘帖皆與酒務官託買浮炭其貧可知浮炭者謂投之水中而浮今人謂之桴炭恐亦以投之水中則浮故也白樂天詩云日暮半爐桴炭火則其語亦已久矣

四方之音有訛者則一韻盡訛如閩人訛高字則謂高爲歌謂勞爲羅秦人訛青字則謂青爲萋謂經爲稽蜀人訛登字則一韻皆合口吳人訛魚字則一韻皆開口他放此中原惟洛陽得天地之中語音最正然謂絃爲玄謂玄爲絃謂犬爲遣謂遣爲犬之類亦自不少

予遊邛州天慶觀有陳希夷詩石刻云因攀奉縣尹尙書水南小酌回捨轡特叩松扇謁高公茶話移時偶書二十八字道門弟子圖南上其詩云我謂浮榮真是幻醉來捨轡謁高公因聆玄論冥冥理轉覺塵

寢一夢中。末書太歲丁酉。蓋蜀孟昶時。當石晉天福中也。天慶本唐天師觀。詩後有文與可跋。大略云。高公者。此觀都威儀何昌一也。希夷從之。學鎖鼻術。予是日。迫赴太守宇文寰。約飯。不能盡記。後卒不暇再到。至今以爲恨。

予遊大邑鶴鳴觀。所謂張天師鶴鳴化也。其東北絕頂。又有上清宮。壁間有文與可題一絕曰。天氣陰陰別作寒。夕陽林下動歸鞍。忽聞人報後山雪。更上上清宮上看。

京口子城西。南月觀在城上。或云卽萬歲樓。京口人以爲南唐時。節度使每登此樓。西望金陵。嘗呼遙拜。其實非也。京口記云。晉王恭所作。唐孟浩然有萬歲樓詩。見集中。

水流天地外。山色有無中。王維詩也。權德輿晚渡揚子江詩云。遠岫有無中。片帆烟水上。已是用維語。歐陽公長短句云。平山闌檻倚晴空。山色有無中。詩人至是。蓋三用矣。然公但以此句施於平山堂爲宜。初不自謂工也。東坡先生乃云。記取醉翁語。山色有無中。則似謂歐陽公創爲此句何哉。

世言荆公四家詩。後李白以其十首九首說酒及婦人。恐非荆公之言。白詩樂府外。及婦人者實少。言酒固多。比之陶淵明輩。亦未爲過。此乃讀白詩不熟者妄立此論耳。四家詩未必有次序。使誠不喜白。當自有故。蓋白識度甚淺。觀其詩中。如中宵出飲三百杯。明朝歸揖二千石。揄揚九重萬乘主。譴浪亦擲金鎖賢。王公大人惜顏色。金章紫綬來相趨。一別蹉跎朝市間。青雲之交不可攀。歸來入咸陽。談笑皆王公。高冠佩雄劍。長揖韓荆州之類。淺陋有豪客之風。集中此等語至多。世俱毛本作俱。以其詞豪俊動人。故不深考耳。又如以布衣得一翰林供奉。此何足道。遂云嘗時笑我微賤者。卻來請謁爲交親。毛本作致。宜其

終身坎壤也。

杜牧之作遺俗僧詩云。雲髮不長寸。秋寒力更微。獨尋一徑葉。猶挈衲殘衣。日暮千峯裏。不知何處歸。此詩蓋會昌廢佛寺時所作也。又有斫竹詩。亦同時作云。寺廢竹色死。官家寧爾留。霜根漸隨斧。風玉尙敲秋。江南苦吟客。何處寄悠悠。詞意悽愴。蓋憐之也。至李端叔遺俗道士詩云。問道華陽客。儒衣謁紫微。舊山連藥竇。孤鶴帶雲歸。柳市名猶在。桃源夢已稀。還家見鷗鳥。應媿背船飛。在道士遺俗。非不得已者。故直譏之耳。

聞人茂德言沙糖。中國本無之。唐太宗時。外國貢至。問其使人。此何物。云以甘蔗汁煎。用其法煎成。與外國者等。自此中國方有沙糖。唐以前書傳。凡言及糖者。皆糟耳。如糖蟹糖薑皆是。

漢嘉城西北山麓。有一石洞。泉出其間。時聞洞中泉滴聲。良久一滴。清如金石。黃魯直題詩云。古人題作東丁水。自古東丁直到今。我爲改名方響洞。要知山水有清音。

成都藥市。以玉局化爲最盛。用九月九日。楊文公談苑云。七月七日。誤也。

馬鞭擊貓。筇竹杖擊狗。皆節節斷折。物理之不可推者也。

亳州出輕紗。舉之若無裁。以爲衣。真若煙霧。一州惟兩家能織。相與世世爲婚姻。懼他人家得其法也。云自唐以來名家。今三百餘年矣。

禁中有哲宗皇帝宸翰四大字。曰。罰弗及嗣。更無他語。此必紹聖元符間。有欲害元祐黨人子孫者。故帝書此言。祖宗盛德如此。故老言。大臣嘗從容請幸金明池。哲廟曰。祖宗幸西池。必宴射。朕不能射。不敢出。

又木工楊琪作龍舟極奇麗或請一登之哲廟又曰祖宗未嘗登龍舟但臨水殿略觀足矣後勉一幸金明所謂龍舟非獨不登亦終不觀也

唐人本謂御史在長安者爲西臺言其雄劇以別分司東都事見劇談錄本朝都汴謂洛陽爲西京亦置御史臺至爲散地以其在西京亦號西臺名同而實異也

唐人本以尙書省在大明宮之南故謂之南省自建炎軍興蜀士以險遠許就制置司類試與省試同間有願赴行在省試者亦聽之蜀士因謂之赴南省以大駕在東南也尤非是

北戶錄云廣人於山間掘取大蟻卵爲醬名蟻子醬按此卽禮所謂蜃醢也三代以前固以爲食矣然則漢人以醢祭宗廟何足怪哉

祖宗以來至靖康間文武臣僚罷官或服闋或被罪絀復到闕皆有期限如有故須自陳給假至建炎初以軍興道梗始有三年之限後有特許從便赴闕猶降旨云候邊事寧息日依舊然遂不復舉行矣

今人書某爲△皆以爲俗從簡便其實古某字也穀梁桓二年蔡侯鄭伯會於鄆范寧注曰鄆△地陸德明釋文曰不知其國故云△地本又作某

江鄰幾嘉祐雜志言唐告身初用紙肅宗朝有用絹者貞元後始用綾予在成都見周世宗除劉仁贍侍中告乃用紙在金彥亨尙書之子處

嘉祐雜志云峨眉雪蛆治內熱予至蜀乃知此物實出茂州雪山雪山四時常有積雪彌遍嶺谷蛆生其中取雪時并蛆取之能蠕動久之雪消蛆亦消盡

會稽鏡湖之東地名東關有天花寺呂文靖嘗題詩云賀家湖上天花寺一一軒牕向水開不用閉門防俗客愛聞能有幾人來今寺乃在草市通衢中三面皆民間廬舍前臨一支港與詩殊不合豈陵谷之變遽已如此乎或謂寺本在湖中後徙於此

蘇叔黨政和中至東都見妓稱錄事太息語廉宣仲曰今世一切變古唐以來舊語盡廢此猶存唐舊爲可喜前輩謂妓曰酒糾蓋謂錄事也相藍之東有錄事巷傳以爲朱梁時名妓崔小紅所居

張真甫舍人廣漢人爲成都帥蓋本朝得蜀以來所未有也未至前旬日大風雷龍起劍南西川門揭牌擲數十步外壞南字爪迹宛然人皆異之真甫名震或爲之說曰元豐末貢院火而焦蹈爲首魁當時語曰火焚貢院狀元焦無能對者今當以雷起譙門知府震爲對然歲餘真甫以疾不起方未病時府治堂柱生白芝三詔者謂之玉芝予按酉陽雜俎芝白爲喪真甫當之

自元豐官制尙書省復二十四曹繁簡絕異在京師時有語曰吏勳封考筆頭不倒戶度金倉日夜窮忙禮祠主膳不識判硯兵職駕庫典了襜袴刑都比門總是冤魂工屯虞水白日見鬼及大駕幸臨安喪亂之後士大夫亡失告身批書者多又軍賞百倍平時賂賄公行冒濫相乘饑軍日滋賦斂愈繁而刑獄亦衆故吏戶刑三曹吏胥人人富饒他曹寂寞彌甚吏輩又爲之語曰吏勳封考三婆兩娼戶度金倉細酒肥羊禮祠主膳淡喫齏麵兵職駕庫敵蓋呷醋刑都比門人肉餛飩工屯虞水生身餓鬼高宗行幸揚州郡人李易爲狀元次舉駐蹕臨安而狀元張九成亦貫臨安時以爲王氣所在方李易唱第時上顧問此人合衆論否時相對曰易乃揚州州學學正必合衆論人笑其敷奏之陋

唐以來，皇子不兼師傅官，以子不可爲父師也。其後失於檢點，乃有兼者。治平中，賈黯，章東陽郡王顯檢校太傅制，建明其失。自後皇子及宗室，舉行合兼三師者，悉改爲三公。政和中，省太尉司徒司空之官，而置少師少傅少保。皇子乃復兼師傅，自嘉王楷始。

今參知政事恩數，比門下中書侍郎，在尙書左右丞之上。其議出於李漢老。漢老時爲右丞，蓋暗省轉廳，可徑登揆路也。呂丞相元直覺此意，排去之。然自此遂爲定制。

蔚藍乃隱語天名，非可以義理解也。杜子美梓州金華山詩云：「上有蔚藍天，垂光抱瓊臺。」猶未有「蔚藍」蒼乃云水色，天光共蔚藍，乃直謂天與水之色，俱如藍耳。恐又因杜詩而失之。

胡子遠之父，唐安人家饒財，常委僕權錢，得錢引五千緡，皆僞也。家人欲訟之，胡曰：「幹僕已死，豈忍使其孤對獄耶？」或謂滅其半價予人，尙可得二千餘緡，胡不可曰：「終當誤人，乃取而火之。」泰然不少動心，其家暴貴宜哉。

杜子美梅雨詩云：「南京犀浦道，四月熟黃梅。湛湛長江去，冥冥細雨來。茅茨疎易溼，雲霧密難開。竟日蛟龍喜，盤渦與岸回。蓋成都所賦也。今成都乃未嘗有梅雨，惟秋半積陰，氣令蒸溽，與吳中梅雨時相類耳。豈古今地氣有不同耶？」

卷第七

熙寧癸丑，華山阜頭峯崩，峯下一嶺一谷，居民甚衆，皆晏然不聞。乃越四十里外，平川土石雜下，如簸揚。

七社民家壓死者幾萬人。壞田七八千頃。固可異矣。紹興間嚴州大水。壽昌縣有一小山。高八九丈。隨水漂至五里外。而兩旁草木廬舍。比水退。皆不壞。則此山殆空行而過也。

韓魏公家不食蔬。以脯醢當蔬盤。度亦始於近時耳。

曾子宣丞相家。男女手指。皆少指端一節。外甥亦然。或云襄陽魏道輔。家世指少一節。道輔之姊嫁子宣。故子孫肖其外氏。

故都殘暑。不過七月中旬。俗以望日具素饌。享先。織竹作盆盎狀。貯紙錢。承以一竹。焚之。視盆倒所向。以占氣候。謂向北則冬寒。向南則冬溫。向東西則寒溫得中。謂之盂蘭盆。蓋俚俗老嫗輩之言也。又每云盂蘭盆倒。則寒來矣。晏元獻詩云。紅白薇英落。朱黃槿豔殘。家人愁溽暑。計日望盂蘭。蓋亦戲述俗語耳。歐陽公謫夷陵時。詩云。江上孤峯蔽綠蘿。縣樓終日對嵯峨。蓋夷陵縣治下臨峽江。名綠蘿溪。自此上泝。卽上牢下牢關。皆山水清絕處。孤峯者。卽甘泉寺山。有孝女泉及祠在萬竹間。亦幽邃可喜。峽人歲時遊觀頗盛。予入蜀。往來皆過之。韓子蒼舍人泰輿縣道中詩云。縣郭連青竹。人家蔽綠蘿。似因歐公之句而失之。此詩蓋子蒼少作。故不審云。

秦會之。跋後山集。謂曾南豐脩英宗實錄。辟陳無己爲屬。孫仲益書數百字詆之。以爲無此事。南豐雖嘗預脩英宗實錄。未久卽去。且南豐自爲吏屬。烏有辟官之理。又無己元祐中。方自布衣命官。故仲益之辨。人多是之。然以予考其實。則二公俱失也。南豐元豐中還朝。被命獨脩五朝史。實許辟其屬。遂請秀州崇德縣令邢恕爲之用。選人已非故事。特從其請。而南豐又援經義局。辟布衣徐禧。例乞無已檢討。廟堂尤

難之。會南豐上太祖紀敘論不合上意。脩五朝史之意寢緩。未幾南豐以憂去。遂已會之。但誤以五朝史爲英宗實錄耳。至其言辟無已事。則實有之。不可謂無也。

前代夜五更至黎明而終。本朝外廷及外郡悉用此制。惟禁中未明前十刻更終。謂之待旦。蓋更終則上御盥櫛。以俟明出御朝也。祖宗勤於政事如此。

予兒時見宋脩撰輝爲先君言。某艱難中以轉餉至行在。時方避虜海道。上大喜。令除待制。呂相元直雅不相樂。乃曰。宋輝係直龍圖閣。便除待制。太超躐。欲且與脩撰撰與待制。亦只爭一等。候更有勞。除待制不晚。遂除祕撰。宋公言之太息曰。此某命也。頃予被命脩高宗聖政及實錄。見日曆所載。實有此事。自昔大臣以私意害人。此其小小者耳。

高廟駐蹕臨安。艱難中每出。猶鋪沙藉路。謂之黃道。以三衛兵爲之。紹興末。內禪。駕過新宮。猶設黃道。如平時。明日壽皇出。卽撤去。遂不復用。

族伯父彥遠。言少時識仲殊。長老東坡爲作安州老人食蜜歌者。一日與數客過之。所食皆蜜也。豆腐麵。飭牛乳之類。皆漬蜜食之。客多不能下箸。惟東坡性亦嗜蜜。能與之共飽。崇寧中。忽上堂辭衆。是夕閉方丈門。自縊死。及火化。舍利五色。不可勝計。鄒忠公爲作詩云。逆行天莫測。雉作瀆中經。溷滅風前質。蓮開火後形。鉢盂殘蜜白。爐篆冷烟青。空有誰家曲。人間得細聽。彥遠又云。殊少爲士人。遊蕩不羈。爲妻投毒羹。載中幾死。啖蜜而解。醫言復食肉。則毒發不可復療。遂棄家爲浮屠。鄒公所謂誰家曲者。謂其雅工於樂府詞。猶有不羈餘習也。

晏元獻爲潘郡，率十許日乃一出廳，僚吏旅揖而已。有欲論事，率因親校轉白，校復傳可否以出。遂退。呂正獻作相，及平章軍國事時，於便坐接客，初惟一揖，卽端坐自若。雖從官亦以次起白，及退復起一揖，未嘗離席。蓋祖宗時，輔相之尊嚴如此，時亦不以爲非也。

東坡詩云：大昭一弛何緣穀，已覺翻翻不受檠。考工記：弓人寒奠體注曰：奠讀爲定。至冬膠堅，內之檠中，定往來體。釋文：檠音景。前漢蘇武傳：武能網紡繳，檠弓弩。顏師古曰：檠謂輔正弓弩。音警。又巨京反。東坡作平聲叶，蓋用漢書注也。

豐相之於舒信道，鄒志完於呂望之，其爲人似不類，然相與皆厚甚，不以鄉里及同僚故也。相之爲中司時，猶力薦信道。志完元符中進用，則實由望之薦也。及以直諫遠竄，望之坐薦非其人，褫官謝表云：臣之與浩，實匪素交，以其嘗備學校之選於先朝，能陳詩賦之非於元祐，比緣薦士，遂取充員。豈期螻蟻之微，自速雷霆之譴，其敝陳終不以志完爲非，亦不易矣。

宋白集有賜諸道節度觀察防團刺史知州以下賀登極進奉詔書云：朕仰承先訓，續嗣丕基，眷命曆之有歸，想寰區之同慶。卿輟由俸祿，恭備貢輸，遙陳稱賀之誠，知乃盡忠之節。省覽嘉歎，再三在懷。實真廟登極時詔書也。乃知是時貢物，皆守臣以俸祿自備。今旣以庫金爲貢，而推恩則如故，可謂厚恩矣。

前輩遇通家子弟，初見請納拜者，旣受之，則設席望其家，遙拜其父祖，乃就坐。先君尚行之。前輩置酒飲客，終席不褫帶，毛達可守京口時尚如此。後稍廢，然猶以冠帶勸酬，後又不講。紹興末，胡邦衡還朝，每與客飲，至酒勸，必冠帶再拜。朝士皆笑其異衆，然邦衡名重行之自若。

元豐七年秋宴神廟舉御觴示丞相王岐公以下忽暴得風疾手弱觴側餘酒霑汗御袍是時京師方盛歌側金盞皇城司中官以爲不祥有歌者輒收繫之由是遂絕先楚公進裕陵挽詞有云輅從元朔朝時破花是高秋宴後委二句皆當時實事也

天聖明道間京師盛歌一曲曰曹門高未幾慈聖太后受冊中宮人以爲驗矣其後宣仁與慈聖皆垂簪攝政而宣仁實慈聖之甥以故選配英廟則徵兆之意若曰曹門之高當相繼而起也何其神哉

趙相挺之使虜方盛寒在殿上虜主忽顧挺之耳愕然急呼小胡指示之蓋闕也俄持一小玉合子至合中有藥色正黃塗挺之兩耳周匝而去其熱如火既出殿門主客者揖賀曰大使耳若用藥遲且拆裂缺落甚則全耳皆墮而無血扣其玉合中藥爲何物乃不肯言但云此藥市中亦有之價甚貴方七直錢數千某輩早朝遇極寒卽塗少許吏卒輩則別有藥以狐溺調塗之亦效

遼人劉六符所謂劉燕公者建議於其國謂燕薊雲朔本皆中國地不樂屬我非有以大收其心必不能久虜主宗真問曰如何可收其心曰斂於民者十減其四五則民惟恐不爲北朝人矣虜主曰如國用何曰臣願使南朝求割關南地而增戍閱兵以脅之南朝重於割地必求增歲幣我託不得已受之俟得幣則以其數對減民賦可也宗真大以爲然卒用其策得增幣而他大臣背約纔以幣之十二減賦民固已喜及洪基嗣立六符爲相復請用元議洪基亦仁厚遂盡用銀絹二十萬之數減燕薊租賦故其後虜政雖亂而人心不離豈可謂虜無人哉

仁宗皇帝慶曆中嘗賜遼使劉六符飛白書八字曰南北兩朝永通和好會六符知貢舉乃以兩朝永通

和好爲賦題。而以南北兩朝永通和好爲韻。云出南朝皇帝御飛白書。六符蓋爲虜畫策增歲路者。然其尊戴中國尙如此。則盟好中絕誠可惜也。

王荆公素不樂滕元發。鄭毅夫。目爲滕屠鄭酷。然二公資豪邁。殊不病其言。毅夫爲內相。一日送客出郊。過朱亥冢。俗謂之屠兒原者。作詩云。高論唐虞儒者事。賣交負國豈勝言。憑君莫笑金槌陋。卻是屠酤解報恩。

予幼時待先君避亂東陽山中。有北僧年五十餘。慧朴無能。自言沈相義倫裔孫。攜遺像及告身詔勅甚備。且云。義倫之後。惟己獨存。欲訴於朝。求一官還俗。不知竟何往也。

詩正義曰。絡緯鳴。嫩婦驚。宋子京秋夜詩云。西風已飄上林葉。北斗直掛建章城。人間底事最堪恨。絡緯啼時無婦驚。其妙於用事如此。

孫少述一字正之。與王荆公交最厚。故荆公別少述詩云。應須一曲千回首。西去論心有幾人。又云。子今此去來何時。後有不可誰予規。其相與如此。及荆公當國數年。不復相聞。人謂二公之交遂際。故東坡詩云。蔣濟謂能來阮籍。薛宣真欲吏朱雲。劉舍人貢父詩云。不負與公遂初賦。更傳中散絕交書。然少述初不以爲意也。及荆公再罷相歸。過高沙。少述適在焉。亟往造之。少述出見。惟相勞苦。及弔元澤之喪。兩公皆自忘其窮達。遂留荆公置酒共飯。劇談經學。抵暮乃散。荆公曰。退卽解舟。無由再見。少述曰。如此更不去奉謝矣。然惘惘各有惜別之色。人然後知兩公之未易測也。

杭僧思聰。東坡爲作字說者。大觀政和間。挾琴遊梁。日登中貴人之門。久之。遂還俗。爲御前使臣。方其將

冠巾也。蘇叔黨因浙僧入都。送之詩曰。試誦北山移。爲我招琴聰。詩至已無及矣。參參政和中老矣。亦還俗而死。然不知其故。

陶淵明遊斜川詩。自敘辛丑歲年五十。蘇叔黨宣和辛丑。亦年五十。蓋與淵明同甲子也。是歲得園於許昌西湖上。故名之曰小斜川云。

夏文莊初證文正。劉原父持以爲不可。至曰。天下謂竦邪。而陛下證之正。遂改今證。宋子京作祭文。乃曰。惟公溫厚粹深。天與其正。蓋謂夏公之正。天與之。而人不與。當時自有此一種議論。故張文定甚惡石沮。徠証之甚力。目爲狂生。東坡譏學校貢舉狀云。使孫復石介尙在。則迂闊矯誕之士也。可施之於政事之間乎。其言亦有自來。歐公作王洙源叔參政墓誌曰。夏竦卒。天子以東宮恩。賜證文獻。洙爲知制誥。封還曰。此僖祖證也。於是太常更證文莊。與他書異。

壹貳叁肆伍陸柒捌玖拾。字書皆有之。參正是三字。或讀作七南反耳。柒字音唐人書或作漆。亦取其同音也。

三舍法行時。有教官出易義題云。乾爲金。坤又爲金何也。諸生乃懷監本易至籐前請云。題有疑。請問。教官作色曰。經義豈當上請。諸生曰。若公試。固不敢。今乃私試。恐無害。教官乃爲講解。大概諸生徐出監本復請曰。先生恐是看了麻沙本。若監本則坤爲釜也。教授皇恐乃謝曰。某當罰卽輸。罰改題而止。然其後亦至通顯。

老杜哀江頭云。黃昏胡騎塵滿城。欲往城南忘城北。言方皇惑避死之際。欲往城南。乃不能記孰爲南北。

也。然荆公集句兩篇，皆作欲往城南望城北，或以爲舛誤，或以爲改定，皆非也。蓋所傳本偶不同，而意則一也。北人謂向爲望，謂欲往城南，乃向城北，亦皇惑避死不能記南北之意。

先夫人幼多在外家，晁氏言諸晁讀杜詩，穉子也能賒，晚來幽獨恐傷神，也字恐字，皆作去聲讀。

蜀人石者公言蘇黃門嘗語其姪孫，在庭少卿曰：哀江頭，卽長恨歌也。長恨冗而凡，哀江頭簡而高，在庭曰：常武與桓二詩，皆言用兵而繁簡不同，蓋此意乎？黃門搖手曰：不然。

姓但者，音若檀，近歲有嶺南監司曰但中庸，是也。一日朝士同觀報狀，見嶺南郡守以不法被劾，朝旨令但中庸根勘，有一人輒歎曰：此郡守必是權貴所主，問何以知之？曰：若是孤寒，必須痛治，此乃令但中庸根勘，卽是有力可知。同坐者無不掩口，其人悻然作色曰：拙直宜爲諸公所笑，竟不悟而去。

今人解杜詩，但尋出處，不知少陵之意，初不如是。且如岳陽樓詩，昔聞洞庭水，今上岳陽樓，吳楚東南拆，乾坤日夜浮，親朋無一字，老病有孤舟，戎馬關山北，憑軒涕泗流，此豈可以出處求哉？縱使字字尋得出處，去少陵之意益遠矣。蓋後人元不知杜詩所以妙絕，古今者在何處，但以一字亦有出處爲工，如西崑酬倡集中詩，何曾有一字無出處者，便以爲追配少陵，可乎？且今人作詩，亦未嘗無出處，渠自不知，若爲之箋注，亦字字有出處，但不妨其爲惡詩耳。

壽皇時，禁中供御酒，名蓋薇露，賜大臣酒，謂之流香酒，分數旋取，旨蓋酒戶大小，已盡察矣。

韓魏公聲雌，文潞公步碎，相者以爲二公若無此二事，皆非人臣之相。

慶曆中，河北道士賈衆妙善相，以爲曾魯公脊骨如龍，王荆公目睛如龍，蓋人能得龍之一體者，皆貴窮

人爵。見豫章黃庠手曰。左手得龍爪。雖當魁天下。而不仕。若右手得之。則貴矣。庠果爲南省第一。不及廷對而死。

俞秀老紫芝。物外高人。喜歡謳。醉則浩歌不止。故荆公贈之詩曰。魯山眉宇人不見。只有歌辭來向東。借問樓前躡子鸞。何如雲臥唱松風。又云。暮年要與君攜手。處處相煩作好歌。不知者以爲賦詩也。紫芝之弟清老。欲爲僧。荆公名之曰紫琳。因手簡目之爲琳公。然清老卒未嘗祝髮也。

臨江蕭氏之祖。五代時。仕於湖南。爲將校。坐事當斬。與其妻亡命焉。王捕之甚急。將出境。會夜阻水。不能去。匿於人家。靈槽中。湘湖間。謂靈爲覓天。將旦。有扣覓語之曰。君夫婦速去。捕者且至矣。因亟去。遂得脫。卒不知告者何人。以爲神物。乃世世奉祀。謂之覓頭神。今參政照鄰乃其後也。

晁以道明皇打毬圖詩。宮殿千門白晝開。三郎沈醉打毬回。九齡已老韓休死。明日應無諫疏來。又張果洞詩云。怪底君王慚漢武。不誅方士守輪臺。皆偉論也。

歐陽公早朝詩云。玉勒爭門隨仗入。牙牌當殿報班齊。李德芻言自昔朝儀未嘗有牙牌報班齊之事。予考之。實如德芻之說。問熟於朝儀者。亦惘然。以爲無有。然歐陽公必不誤。當更博考舊制也。

王荆公所賜玉帶。闊十四摺。號玉抱肚。眞廟朝。趙德明所貢。至紹興中。王氏猶藏之。曾孫奉議郎璿始復。進入禁中。

舅氏唐居正。意文學氣節。爲一時師表。建炎初。避兵武當山中。病歿。遺文散落。無復存者。獨滁州漢高帝廟碑陰尚存。今錄於此。濼之西曰豐山。有漢高帝廟。或云漢諸將追項羽。道經此山。至今土俗以五月十

七日爲高帝生日。遠近畢集，薦殺觴焉。某嘗從太守侍郎會禱雨於廟，因讀庭中刻石，始知昔人相傳，蓋以五月十七爲高帝忌日。按漢書高帝十三年四月甲辰崩於長樂宮，五月丙寅葬長陵。注自崩至葬凡二十四日，疑五月十七日必其葬日，又非忌日也。以曆推之，自上元甲子之歲，至高帝十二年四月晦日，是年歲在丙午，凡積一百九十三萬六千三百六十三年二千三百九十四萬九千五百九十一日七億七百二十四萬六千八百十五日。以法除之，算外得五月朔己酉十七日乙丑，則丙寅葬日乃十八日也。班固記漢初北平侯張蒼所有顛帝曆，晦朔月見弦望滿虧多非是，故高帝九年六月乙未晦日食，夫日食必於朔，而此食於晦，則先一日矣。豈非丙寅乃當時十七日乎？不然，歲月久傳者失之也。遂以告公，命書其碑陰。紹聖二年五月旦記。

劍門關皆石無寸土，潼關皆土無拳石，雖皆號天下險，要之潼關不若劍門。然自秦以來，劍門亦屢破矣，險之不可恃如此。

曾子宜丞相，元豐間帥慶州，未至，召還，至陝府，復還慶州，往來潼關，夫人魏氏作詩戲丞相曰：使君自爲君，恩厚不是區區愛華山。

南豐曾氏享先用節羹醢鵝鴈粥，建安陳氏享先用肝串子猪白割血羹肉汁，皆世世守之，富貴不加，貧賤不廢也。

蘇子由晚歲遊許昌，買文元公園，作詩云：前朝輔相終難得，父老咨嗟今亦無。蓋謂方仁祖時，士大夫多議文元，然自今觀之，豈易得哉！其感慨如此。

卷第八

國初尙文選。當時文人專意此書。故草必稱王孫。梅必稱驛使。月必稱望舒。山水必稱清暉。至慶曆後。惡其陳腐。諸作者始一洗之。方其盛時。士子至爲之語。曰。文選爛。秀才半。建炎以來。尙蘇氏文章。學者翕然從之。而蜀士尤盛。亦有語曰。蘇文熟。喫羊肉。蘇文生。喫菜羹。

學士院移文三省。名咨報。都司移文六曹。名刺。

蜀人見人物之可誇者。則曰嗚呼。可鄙者。則曰噫嘻。

張邦昌旣死。有旨。月賜其家錢十萬。於所在州勘支。曾文清爲廣東漕。取其券繳奏。曰。邦昌在古法當旌誅。今貸與之。生足矣。乃加橫恩如此。不知朝廷何以待伏節死事之家。詔自今勿與。予銘文清墓。載此事甚詳。及刻石其家。乃削去。至今以爲恨。

興元城固縣產礬石。不可勝計。與凡土石無異。雖數十百擔。亦可立取。然其性酷烈。有大毒。非置瓦罍中煨三過。不可用。然猶動能害人。尤非他金石之比。千金有一方。用礬石。輔以乾薑烏頭之類。名匈奴露宿丹。其酷烈可想見也。

陰平在今文州。有橋曰陰平橋。淳熙初。爲郡守者大書立石於橋下。曰。鄧艾取蜀路。過者笑之。建炎三年。春。車駕倉卒南渡。駐蹕於杭。有侍臣召對者。旣對。所陳劄子。首曰。恭惟陛下。歲二月。東巡。陟。至於錢塘。呂相隨。浩見之。笑曰。秀才家識甚好惡。

淳熙中黃河決入汴。梁宋間謔言謂之天水來。天水國姓也。遺民以爲國家恢復之兆。

史魏公自少保六轉而至太師。中間近三十年。福壽康寧。本朝一人而已。文潞公自司空四轉。蔡太師自司空三轉。秦太師自少保兩轉而已。

鄭康成自爲書戒子益。其末曰。若忽忘不識。亦已焉哉。此正孟子所謂父子之間不責善也。蓋不責善。非不示於善也。不責其必從耳。陶淵明命子詩曰。夙興夜寐。願爾斯才。爾之不才。亦已焉哉。用康成語也。目唐至本朝。中書門下出勅。其勅字皆平正渾厚。元豐後。勅出尙書省。亦然。崇寧間。蔡京臨平寺額作險勁體。來長而方短。省吏始效之。相跨尙謂之司空勅。亦曰蔡家勅。蓋妖言也。京敗。言者數其朝京退送及公主改帝姬之類。偶不及蔡家勅。故至今勅字。蔡體尙在。

東坡海外詩云。夢中時見作詩孫。初不解。在蜀見蘇山藏公墨迹。疊韻竹詩後題云。寄作詩孫符。乃知此句爲仲虎發也。

紹興末。謝景思守括蒼。司馬季思佐之。皆名伋。劉季高以書與景思曰。公作守。司馬九作倅。想郡事皆如律令也。聞者絕倒。

東坡牡丹詩云。一朵妖紅翠欲流。初不曉翠欲流爲何語。及遊成都。過木行街。有大署市肆曰。郭家鮮翠。紅紫鋪。問土人。乃知蜀語鮮翠。猶言鮮明也。東坡蓋用鄉語云。蜀人又謂糊臆曰泥臆。花蕊夫人宮詞云。紅錦泥臆遶四廊。非曾遊蜀亦所不解。

東坡先生省試刑賞忠厚之至論。有云。臯陶爲士。將殺人。臯陶曰殺之三。堯曰宥之三。梅聖俞爲小試官。

得之。以示歐陽公。公曰。此出何書。聖俞曰。何須出處。公以爲皆偶忘之。然亦大稱歎。初欲以爲魁。終以此不果。及揭榜。見東坡姓名。始謂聖俞曰。此郎必有所據。更恨吾輩不能記耳。及謁謝首問之。東坡亦對曰。何須出處。乃與聖俞語合。公賞其豪邁。太息不已。

宋白尙書詩云。風騷墜地欲成塵。春鎮南宮入試頻。三百俊才衣似雪。可憐無個解詩人。又云。對花莫道渾無過。曾與常人舉好詩。大抵宋詩雖多疵類。而語意絕有警拔者。故其自負如此。

白樂天詩云。四十著緋軍司馬。男兒官職未蹉蛇。一爲州司馬。三見歲重陽。本朝太宗時。宋太素尙書。自翰苑謫鄜州行軍司馬。有詩云。鄜州軍司馬也。好畫爲屏。又云。官爲軍司馬。身是謫仙人。蓋北晉司字作入聲讀。

故事謫散官。雖別駕司馬。皆封賜如故。故宋尙書在鄜時詩云。經時不巾櫛。慵更佩金魚。東坡先生在儋耳亦云。鶴髮驚全白。犀圍尙半紅。是也。至司戶參軍。則奪封賜。故世傳寇萊公謫雷州。借錄事參軍綠袍拜命。袍短纔至膝。又予少時見王姓之曾夫人言。曾丞相謫廉州司戶。亦借其姪綠袍拜命云。

紹興十六七年。李莊簡公在藤州。以書寄先君。有曰。某人汲汲求少艾。求而得之。自謂得計。今成一聚枯骨。世尊出來也。救他不得。一聚枯骨。出神仙傳老子篇。某人者。前執政留守金陵。暴得疾卒。故云。

秦丞相晚歲權尤重。常有數卒卓衣持挺立府門外。行路過者。稍顧視警效。皆呵止之。嘗病告一二日。執政獨對。既不敢他語。惟盛推秦公勳業而已。明日入堂。忽問曰。聞昨日奏事甚久。執政惶恐曰。某惟誦太師先生勳德。曠世所無。語終卽退。實無他言。秦公嘻笑曰。甚荷。蓋已嗾言事官上章。執政甫歸閣。子彈章

副本已至矣。其伎刻如此。

韓魏公罷政以守司徒兼侍中鎮安武勝軍節度使。公累章牢辭。至以爲恐開大臣希望僭忒之階。遂改淮南節度使。元豐間。文潞公亦加兩鎮。引魏公事辭。卒亦不拜。紹興中。張俊。韓世忠。乃以捍虜有功。拜兩鎮。俄又加三鎮。二人皆武人。不知辭。當時士大夫爲之語曰。若加一鎮。卽爲四鎮。如朱全忠矣。奈何。大駕初駐蹕臨安。故都及四方士民商賈輻輳。又勅立官府。扁榜一新。好事者取以爲對曰。鈐轄諸道進奏院。詳定一司。勅令所。王防禦。契聖眼科。陸官人。遇仙風藥。乾溼脚氣。四斤丸。偏正頭風。一字散。三朝御。裏陳忠翊。四世儒醫。陸太丞。東京石朝議。女壻藥。駐泊藥。鋪西蜀費先生。外甥寇保義。卦肆。如此凡數十聯。不能盡記。

高廟謂端硯如一段紫玉。瑩潤無瑕。乃佳。何必以眼爲貴耶。晁以道藏硯。必取玉斗樣。喜其受墨濇多也。每曰。硯若無池。受墨則墨亦不必磨。筆亦不須點。惟可作枕耳。

呂吉甫問客。蘇子瞻文辭似何人。客揣摩其意。答之曰。似蘇秦張儀。呂笑曰。秦之文高矣。儀固不能望。子瞻亦不能也。徐自誦其表語云。面折馬光於講筵。廷辯韓琦之奏疏。甚有自得之色。客不敢問而退。

陳師錫家享儀。謂冬至前一日爲冬住。與歲除夜爲對。蓋閩音也。予讀太平廣記三百四十卷。有盧瑣傳云。是夕冬至除夜。乃知唐人冬至前一日。亦謂之除夜。詩唐風。日月其除。除音直慮反。則所謂冬住者。冬除也。蓋傳其語而失其字耳。

老杜寄薛三郎中詩云。上馬不用扶。每扶必怒曠。東坡送喬全詩云。上山如飛曠。人扶皆言老人也。蓋老

人諱老故爾。若少壯者，扶與不扶皆可，何曠之有。

宣和末，有巨商捨三萬緡，裝飾泗州普照塔，煥然一新。建炎中，商歸湖南，至池州江中，一日晨興，忽見一塔十三級，浮水上南來，金碧照耀，而隨波傾颺。若欲倒者，商舉家及舟師人人見之，皆驚怖誦佛。既漸近，有僧出塔下，舉手揖曰：元是裝塔施主。船淮上方火災，大師將塔往海東行化去，語未竟，忽大風作，塔去如飛，遂不見。未幾，乃聞塔廢於火，舒州僧廣勤與商船同行，親見之。

段成式酉陽雜俎言揚州東市塔影忽倒，老人言海影翻則如此。沈存中以謂大抵塔有影必倒，予在福州見萬壽塔，成都見正法塔，蜀州見天目塔，皆有影，亦皆倒也。然塔之高如是，而影止三二尺，纖悉皆具，或自天窗中下，或在廊廡間，亦未易以理推也。

唐彥徵硯錄言青州紅絲石硯，覆之以匣，數日墨色不乾。經夜，即其氣上下蒸濡，着於匣中，有如雨露。又云：紅絲硯必用銀作匣，凡石硯若置銀匣中，即未乾之墨氣蒸上騰，其墨乃著蓋上，久之蓋上之墨復滴，硯中亦不必經夜也。銅錫皆然，而銀尤甚。雖漆匣亦時有之，但少耳。彥徵貴重紅絲硯，以銀爲匣，見其蒸潤而未嘗試他硯也。

賀方回狀貌奇醜，色青黑，而有英氣，俗謂之賀鬼頭。喜校書，朱黃未嘗去手。詩文皆高，不獨工長短句也。潘邠老贈方回詩云：詩束牛腰藏舊稿，書託馬尾辨新籀。有二子曰：房曰廩，於文房從方廩，從回蓋寓父字於二子名也。

翟耆年字伯壽，父公巽參政之子也。能清言，工篆及八分，巾服一如唐人，自名唐裝。一日往見許顯彥，周

彥周整髻着幘鼻樞。躡高屐出迎。伯壽愕然。彥周徐曰。吾晉裝也。公何怪。

元祐七年。哲廟納后。用五月十六日。法駕出宣德門。行親迎之禮。初。道家以五月十六日爲天地合日。夫婦當異寢。違犯者必夭死。故世以爲忌。當時太史選定。乃謂人主與后。猶天地也。故特用此日。將降詔矣。皇太妃持以爲不可。上亦疑之。宣仁獨以爲此語俗忌耳。非典禮所載。遂用之。其後詔獄既與。宦者復謂若廢后。可弭此禍。上意益不可回矣。

政和以後。斜封墨勅盛行。乃有以寺監長官視待制者。大抵皆以非道得之。晁叔用以謂視待制。可對如夫人。蓋爲清議貶黜如此。又往往以特恩賜金帶。朝路混淆。然猶以舊制不敢坐。故當時謂橫金無絀。猶與閣門舍人等耳。

蕭山胡直孺同爲都司。一日過堂。從容爲蔡京言道流之橫。京慨然曰。君等不知耳。淫侈之風日熾。姑以齋醮少間之。不暇計此曹也。京之善文過如此。

蔡京賜第宏敞。過甚。老疾畏寒。幕帟不能禦。遂至無設牀處。惟撲水少低。間架亦狹。乃卽撲水下作臥室。秦熹作狀元時。蔡京親吏高棟猶在。謂人曰。看他秦太師。吾主人乃天下至繆漢也。棟當蔡氏盛時。官至拱衛大夫。領青州觀察使。靖康臺評所謂厮養官爲橫行是也。有王侁者。與之同列。官亦相等。靖康間。俞停廢。棟猶以武功大夫爲浙東副總管。遂終其身。不復褫削議者亦置之。或自有由也。

沈存中辨雞舌香爲丁香。疊疊數百言。竟是以意度之。惟元魏賈思勰作齊民要術第五卷。有合香澤法。用雞舌香。注云。俗人以其似丁子。故謂之丁子香。此最的確可引之證。而存中反不及之。以此知博洽之

難也。

顏延年作靖節徵士誄云。徽音遠矣。誰箴子闕。王荆公用此意。作別孫少述詩。子今去此來何時。後有不
可誰子規。青出於藍者也。

先君讀山谷乞貓詩。歎其妙。鬼以道侍讀在坐。指聞道貓奴將數子一句。問曰。此句何謂也。先君曰。老杜
云。暫止啼烏將數子。恐是其類。以道笑曰。君果誤矣。乞貓詩數字當音色。主反。數子。謂貓狗之屬。多非一
子。故人家初生畜必數之。曰生幾子。將數子。猶言將生子也。與杜詩語同。而意異。以道必有所據。先君言
當時偶不叩之以爲恨。

翟公巽參政。靖康初。召爲翰林學士。過泗州。謁僧伽像。見鬚忽涌出長寸許。問他人。皆不見。怪之。一僧在
旁曰。公雖召還。恐不久復出。公扣之曰。鬚出者。須出也。果驗。

唐人詩中有曰無題者。率杯酒狎邪之語。以其不可指言。故謂之無題。非真無題也。近歲呂居仁陳去非
亦有曰無題者。乃與唐人不類。或真亡其題。或有所避。其實失於不深考耳。

翟公巽參政。守會稽。日命工塑真武像。既成熟視。日下以不以。罪日設之。別塑。今告成。觀西廡小殿立像
是也。道士賀仲清在旁親見之。而不敢問。

古所謂揖。但舉手而已。今所謂喏。乃始於江左諸王。方其時。惟王氏子弟爲之。故支道林入東。見王子猷
兄弟。還人問諸王何如。答曰。見一羣白項烏。但聞啞啞聲。卽今喏也。

荆公詩云。閉戶欲推愁。愁終不肯去。劉賓客詩云。與老無期約。到來何等閑。韓舍人子蒼取作一聯云。推

愁不去還相覓。與老無期稍見侵。比古句蓋益工矣。

四月十九日成都謂之流花。邀宴於杜子美草堂滄浪亭。傾城皆出。錦繡夾道。自開歲宴遊。至是而止。故最盛於他時。予客蜀數年。屢赴此集。未嘗不晴。蜀人云。雖戴白之老。未嘗見流花日雨也。

明州護聖長老法揚。藏其祖鄭舍人向所得仁廟東宮日回賀歲旦書。稱皇太子某狀。用太子左春坊之印。舍人是時猶爲館職也。

湯岐公初秉政。偶刑寺奏牘。有云。生人婦者。高廟問此有法否。秦益公云。法中有夫婦人。與無夫者不同。上素喜岐公。顧問曰。古亦有之否。岐公曰。古法有無。臣所不能記。然生人婦之語。蓋出三國志杜畿傳。上大驚。乃笑曰。卿可謂博記矣。益公陰忌。獨謂岐公純篤。不忌也。

北方民家吉凶。輒有相禮者。謂之白席。多鄙俚可笑。韓魏公自樞密歸鄴。赴一姻家禮席。偶取盤中一荔支。欲啗之。白席者遽唱言曰。資政喫荔支。請衆客同喫荔支。魏公憎其喋喋。因置不復取。白席者又曰。資政惡發也。請衆客放下荔支。魏公爲一笑。惡發猶云怒也。

唐自相輔以下。皆謂之京官。言官於京師也。其常參者曰常參官。未常參者曰未常參官。國初以常參官預朝謁。故謂之升朝官。而未預者曰京官。元豐官制行。以通直郎以上朝預宴坐。仍謂之升朝官。而按唐制去京官之名。凡條制及吏牘。止謂之承務郎以上。然俗猶謂之京官。

唐所謂丞郎。謂左右丞六曹侍郎也。尙書雖序左右丞。上然亦通謂之丞郎。猶今言侍從官也。俗又謂之兩制。指內制而言。然非諭苑西掖。亦曰兩制。正如丞郎之稱。契丹僭號。有高坐官。亦侍從之比。坐字本犯

御嫌名。或謂丞郎爲左右丞中書門下侍郎。亦非也。
唐高祖實錄。武德二年正月甲子。下詔曰。釋典微妙。淨業始於慈悲。道教沖虛。至德去其殘暴。況乎四時之禁。母伐麋卵。三驅之禮。不取順從。蓋欲敦崇仁惠。蕃衍庶物。立政經邦。咸率斯道。朕祗膺靈命。撫遂羣生。言念亭育。無忘鑿味。殷帝去網。庶踵前修。齊王捨牛。實符本志。自今年正月五月九月十日。並不得行刑。所在公私。宜斷屠殺。此三長月。斷屠殺之始也。唐大夫如白居易輩。蓋有遇此三齋月。杜門謝客。專延緇流。作佛事者。今法至此月。亦減去食羊錢。蓋其遺制。

卷第九

蜀父老言。王小幡之亂。自言我土鍋村民也。豈能竊一方。有李順者。孟大王之遺孤。初蜀亡。有晨興過摩訶池上者。見錦箱錦衾覆一襁褓嬰兒。有片紙在其中。書曰。國中義士爲我養之人。知其出於宮中。因收養焉。順是也。故蜀人惑而從之。未幾。小幡戰死。衆推順爲主。下令復姓孟。及王師傅毛本作薄城。城且破矣。順忽飯城中僧數千人。以祈福。又度其童子亦數千人。皆就府治削髮。衣僧衣。晡後分東西門兩門出。出盡。順亦不知所在。蓋自髡而逃矣。明日。王師入城。捕得一髻士。狀頗類順。遂誅之。而實非也。有帶御器械張舜卿者。因奏事。密言。臣聞順已逸去。所獻首蓋非也。太宗以爲害。諸將之功。叱出將斬之。已而貸之。亦坐免官。及真廟天禧初。順竟獲於嶺南。初欲誅之。於市。且令百官賀。呂文靖爲知雜御史。以爲不可。但卽獄中殺之。人始知舜卿所奏非妄也。蜀人又謂順逃至荆者。入一僧寺。有僧熟視曰。汝有異相。當爲百

日偏霸之主。何自在。此汝宜急去。今年不死。尙有數十年壽。亦可怪也。又云。方順之作。有術士拆順名曰。是一百八日有西川耳。安能久也。如期而敗。

太宗太平興國四年。平太原。降爲并州。廢舊城。徙州於榆次。今太原則又非榆次。乃三交城也。城在舊城西北三百里。亦形勝之地。本名故軍。又嘗爲唐明鎮。有晉文公廟甚盛。平太原後三年。帥潘美奏乞以爲并州。從之。於是徙晉文公廟以廟之故址爲州治。又徙陽曲縣於三交。而榆次復爲縣。國史所載頗略。方承平時。太原爲大鎮。其輿勝。人人能知之。故史亦不備書。今陷沒幾七十年。遂有不可詳者矣。

唐小說載有人路逢奔馬入都者。問何急如此。其人答曰。應不求聞達科。本朝天聖中。初置賢良方正等六科。許少卿監以上奏舉。自應者亦聽。俄又置高蹈丘園科。亦許自於所在投狀求試。時以爲笑。予少時爲福州寧德縣主簿。提刑樊茂實以職狀舉予曰。有聲於時。不求聞達。後數月再見之。忽問曰。何不來取奏狀。予笑答之曰。恐不稱舉詞。故不敢。茂實亦笑。顧書吏促發奏。然予竟不投也。

成都士大夫家法嚴。席帽行范氏自先世貧而未仕。則賣白龍丸。一日得官。止不復賣。城北郭氏賣葷亦然。皆不肯爲市井商賈。或舉貨營利之事。又士人家子弟。無貧富皆着盧心布衣。紅勒帛。袂如一指大。稍異。此則其嘲笑以爲非士流也。

周禮燭氏注云。燭。今御所食。禮也。漢書霍光傳。亦有丞相擅減宗廟羔菟。此何等物。而漢人以供玉食。及宗廟之薦耶。古今事不同如此。

真宗御集有苑中賞花詩十首內一首龍柏花。李文饒平泉山居草木記。有藍田之龍柏。宋子京又有真

珠龍柏詩。劉子儀。晁以道。朱希真。亦皆有此作。予長於江南。未嘗見也。或云。本出鄜坊間。

舒煥堯文。東坡公密。建炎中猶在。有子爲湖南一縣尉。遇盜燒死。堯文年九十矣。憂悸得病而卒。

陳無己子豐。詩亦可喜。晁以道集中有謝陳十二郎詩卷是也。建炎中以無己故。特命官李鄴守會稽。來從鄴作攝局。鄴降虜。豐亦被繫。壘而去。無己之後。遂無在江左者。豐亦不知存亡。可哀也。

劉道原壯與。載世藏書甚富。壯與死無後。書錄於南康軍官庫。後數年。胡少汲過南豐訪之。已散落無餘矣。

行在百官。以祠事致齋於僧寺。多相與徧遊寺中。因遊旁近園館。或齋於道宮。亦然。按張文昌僧寺宿齋詩云。晚到金光門外寺。寺中新竹隔簾多。齋官禁與僧相見。院院開門不得過。乃知唐齋禁之嚴如此。今律所云。作祀事悉禁是也。

韓子蒼詩喜用擁字。如車騎擁西疇。船擁清溪尙一樽之類。出於唐詩人錢起。城隅擁歸騎也。政和神霄玉清萬壽宮。初止改天寧萬壽觀爲之。後別改宮觀一所。不用天寧。若州城無宮觀。卽改僧寺。俄又不用宮觀。止改僧寺。初通撥賜產千畝。已而豪奪無涯。西京以崇德院爲宮。據其產二萬一千畝。賃舍錢園利錢。又在其外。三泉縣以不隸州特置。已而凡縣皆改一僧寺爲神霄下院。駸駸日張。至宣和末方已。

天下神霄。皆賜威儀。設於殿帳座外。面南。東壁從東第一架六物。曰錦繖。曰絳節。曰寶蓋。曰珠幢。曰五明扇。曰旌。從東第二架六物。曰絲拂。曰旛。曰鶴扇。二曰金鉞。曰如意。西壁從東第一架六物。曰如意。曰玉斧。

曰鶴扇。二曰旛。曰絲拂。西壁從東第二架。曰旌。曰五明扇。曰珠幄。曰寶蓋。曰絳節。曰錦繖。東南經兵火。往往不復。在蜀中多徙於天慶觀聖祖殿。今猶有存者。

神霄以長生大帝君青華帝君爲主。其次曰萊蓬靈海帝君。西元大帝君。東井大帝君。西華大帝君。清都大帝君。中黃大帝君。又有左右仙伯。東西臺吏二十有二人。繪於壁。又有韓君丈人。祀於側殿。曰此神霄帝君之尙賓也。其說皆出於林靈素張虛白劉棟。

天禧中。以王捷所作金寶牌。賜天下。至宣和末。又以方士劉知常所鍊金輪頰之天下神霄宮。名曰神霄寶輪。知常言。其法以汞鍊之成金。可鎮分野兵饑之災。時宣和七年秋也。遣使押賜天下太常。方下奉安寶輪儀制。而虜寇已渡河矣。

本朝康保裔。真廟時爲高陽關都部署。契丹入寇。戰死。祖志忠。後唐明宗時討王都。戰死。父再遇。太祖時爲將。討李筠。戰死。三世皆死國事。

天聖初。宋元憲公在場屋。日夢魁天下。故事。四方舉人集京師。當入見。而宋公姓名偶爲衆人之首。禮部奏舉人宋郊等公大惡之。以爲夢徵止此矣。然其後卒爲大魁。紹興初。張子韶亦夢魁天下。比省試。類榜坐位圖出。其第一人。則張九成也。公殊怏怏。及庭試唱名。亦冠多士。與元憲事正同。

王冀公自金陵召還。不降詔。止於茶藥合中。賜御飛白王欽若三字。而中使口傳密旨。冀公卽上道。至國門。輔臣以下皆未知政。和中。蔡太師在錢塘。一日中使賜茶藥。亦於合中得大玉環。徑七寸。色如截肪。京拜賜。卽治行。後二日詔至。卽日起發。二事略相似。然非二人者。必無此事也。

孫策傳。張津常著絳帕頭。帕頭者巾幘之類。猶今言幘頭也。韓文公云。以紅帕首。已爲失之。東坡云。絳帕蒙頭。讀道書。增一蒙字。其誤尤甚。

貴臣有疾宜醫。及物故勅葬。本以爲恩。然中使挾御醫至。凡藥必服。其家不敢問。蓋有爲醫所誤者。勅葬則喪家所費。至傾竭貲貨。其地又未必善也。故都下諺曰。宜醫納命。勅葬破家。慶曆中。始有詔。已降。指揮勅葬。而其家不願者聽之。西人云。姚麟勅葬。乃絕地。故其家遂衰。

范文正公喜彈琴。然平日止彈履霜一操。時人謂之范履霜。

韓子蒼和錢遜叔詩云。叩門忽送銅山句。知是賦詩人。姓錢。蓋唐詩人錢起賦詩。以姓爲韻。有銅山許鑿錢之句。

撫州紫府觀真武殿像。設有六丁六甲神。而六丁皆爲女子像。黃次山書殿榜曰。感通之殿。感通乃醴泉觀舊名。至和二年十二月賜名。而像設亦醴泉舊制也。

東坡先生在中山作戚氏樂府詞。最得意。幕客李端叔跋三百四十餘字。敘述甚備。欲刻石傳後。爲定武盛事。會謫去不果。今乃不載集中。至有立論排誣。以爲非公作者。識真之難如此哉。

予在成都。偶以事至犀浦。過松林甚茂。問殿卒此何處。答曰。師塔也。蓋謂僧所葬之塔。於是乃悟杜詩黃師塔前江水東之句。

南朝詞人。謂文爲筆。故沈約傳云。謝玄暉善爲詩。任奩昇工於筆。約兼而有之。又庾肩吾傳。梁簡文與湘東王書。論文章之弊曰。詩既若此。筆又如之。又曰。謝朓沈約之詩。任昉陸倕之筆。任昉傳又有沈詩任筆。

之語。老杜寄賈至嚴武詩云。賈筆論孤憤。嚴詩賦幾篇。杜牧之亦云。杜詩韓筆愁來讀。似情麻姑癯處抓。亦襲南朝語爾。往時諸晁謂詩爲詩筆。亦非也。

東蒙蓋終南山峯名。杜詩云。故人昔隱東蒙峯。已佩含景蒼精龍。故人今居子午谷。獨在陰崖結茅屋。皆長安也。种明東蒙新居詩亦云。登遍終南峯。東蒙最孤秀。南士不知。故註杜詩者。妄引顯史爲東蒙主。以爲魯地。

紹興初。程氏之學始盛。言者排之。至譏其幅巾大袖。胡康侯力辨其不然。曰。伊川衣冠。未嘗與人異也。然張文潛元祐初贈趙景平主簿詩曰。明道新墳草已春。遺風猶得見門人。定知魯國衣冠異。盡戴林宗折角巾。則是自元祐初爲程學者。幅巾已與人異矣。衣冠近古。正儒者事。譏者固非。辨者亦未然也。

晁氏世居都下昭德坊。其家以元祐黨人及元符上書籍記。不許入國門者數人。以道其一也。嘗於鄭洛道中遇降羌。作詩云。沙場尺箠致羌渾。玉陛俱承雨露恩。自笑百年家鳳闕。一生腸斷國西門。方是時。士大夫失職如此。安得不兆亂乎。

鄭介夫喜作詩。多至數千篇。謫英州。遇赦得歸。有句云。未言路上舟車費。尙欠城中酒藥錢。絕似王元之也。

元祐初。蘇子由爲戶部侍郎。建言都水監本三司之河渠案。將作監本三司之修造案。軍器監本三司之甲冑案。三司今戶部也。而三監乃屬工部。請三監皆兼隸戶部。凡有所爲。戶部定其事之可否。裁其費之多寡。而工部任其工之良楛。程其作之遲速。朝廷從其言爲立法。及紹聖中。以爲害元豐官制。罷之。建中

靖國中或欲復從元祐已施行矣時豐相之爲工部尙書獨持不可曰設如都水監塞河軍器監造軍器而戶部以爲不可則已矣若以爲可則併任其事可也今戶部吝其費裁損之乃令工部任河之決塞器之利鈍爲工部者不亦難乎議遂寢相之本主元祐政事者然其言公正不阿如此可謂賢矣

徽宗嘗乘輕舟泛曲江有宮嬪持寶扇乞書者上擣筆亟作草書一聯云潛蓮參法駕沙鳥犯鈞陳俄復取筆塗去犯鈞陳三字曰此非佳語此聯實李商隱陳宮詩亦不祥也李耕道云

東坡在黃州時作西捷詩曰漢家將軍一丈佛詔賜天闕八尺龍露布朝馳玉關塞捷烽夜到甘泉宮似聞指麾築上郡已覺談笑無西戎放臣不見天顏喜但覺草木皆春容一丈佛者王中正也以此詩爲非東坡作耶氣格如此孰能辦之以爲果東坡作耶此老豈魯王中正者蓋刺之也以三百篇言之君子偕老是矣

南朝謂北人曰僞父或謂之虜父南齊王洪軌上谷人事齊高帝爲青冀二州刺史颺清節州人呼爲虜父使君今蜀人謂中原人爲虜子東坡詩久客厭虜饌是因目北人仕蜀者爲虜官晁子止爲三榮守民有訟資官縣尉者曰縣尉虜官不通民情子止爲窮治之果負冤民旣得直拜謝而去子止笑諭之曰我亦虜官也汝勿謂虜官不通民情聞者皆笑

紹興末予見陳魯公留飯未食而揚郡王存中來白事魯公留予便坐而見之存中方不爲朝論所與予年少意亦輕之趨幕後聽其言會魯公與之言及邊事存中曰士大夫多謂當列兵淮北爲守淮計即可守因圖進取中原萬一不能支卽守大江未晚此說非也士惟氣全乃能堅守若俟其敗北則士氣已喪

非特不可守淮，亦不能守江矣。今據大江之險，以老彼師，則有可勝之理。若我師克捷，士氣已倍，彼奔潰不暇，然後徐進而北，則中原有可取之理。然曲折尚多，兵豈易言哉！予不覺太息曰：老將要有所長，然退以語朝士，多不解也。

東坡在嶺海間，最喜讀陶淵明柳子厚二集，謂之南遷二友。予讀宋白尚書玉津雜詩，有云：坐臥將何物，陶詩與柳文。則前人蓋有與公暗合者矣。

凌霄花未有不依木而能生者。惟西京富鄭公園中一株，挺然獨立，高四丈，圍三尺餘，花大如杯，旁無所附。宣和初，景華苑成，移植於芳林殿前，畫園進御。

政和宣和間，妖言至多，織文及纈帛，有遍地桃冠，有並桃香，有賽兒，而道流爲公卿受錄，議者謂桃者逃也，佩香者背鄉也，賽者塞也，錄者戮也。蔡京書神霄玉清萬壽宮，及玉皇殿之類，玉字旁一點，筆勢險急，有道士觀之曰：此點乃金筆，而鋒芒侵玉，豈吾教之福哉！侍晨李德柔勝之親聞其言，嘗以語先君。又林靈素詆釋教，謂之金狄亂華，當時金狄之語，雖詔令及士大夫章奏碑版，亦多用之，或以爲靈素前知金賊之禍，故欲廢釋氏以厭之，其實亦妖言耳。

近世士大夫，多不練故事，或爲之語曰：上若問學校法制，當對曰：有劉士祥在。問典禮因革，當對曰：有齊聞韶在。士祥聞韶，蓋國子監太常寺老吏也。史院有竊議史官者曰：史官筆削有定本，個個一樣，或問何也，曰：將吏人編出日曆，中臣僚上言字塗去上字，其後奉聖旨依字亦塗去，而從旁注從之二字，卽一日筆削了矣。

政和後。道士有賜玉方符者。其次則金方符。長七寸。闊四寸。面爲符。背鑄御書曰。賜某人。奉以行教。有違天律。罪不汝貸。結於當心。每齋醮。則服之。會稽天寧萬壽觀。有老道士盧浩真者。嘗被金符之賜。予少時親見之。

世傳唐呂府君勅葬碑。呂名惠恭。僧大濟之父。大濟代宗時內道場僧也。官至殿中監。故惠恭贈官爲兗州刺史。而官爲營葬。宣和中。會稽天寧觀道士張若水。官爲蕊珠殿校籍。贈其父爲朝奉大夫。母封宜人。嘗見其母賜語云。嘉其教子之勸。寵以宜家之號。詩人林子來。亦有贈道官萬大夫焚黃詩。然二人者。品秩猶未高。若林靈素。以侍晨恩。數視執政。則贈官必及三代矣。大抵當時道流濫恩。不可勝載。中更喪亂。史皆不得書。此偶因事見之耳。

北都有魏博節度使田緒遺愛碑。張弘靖書。何進滔德政碑。柳公權書。皆石刻之傑也。政和中。梁左丞子美爲尹。皆毀之。以其石刻新頒五禮新儀。

近世名士李秦發。光一字秦定。晁以道說之。一字伯以。潘義榮。良貴一字子賤。張全真。守一字子固。周子充。必大。一字洪道。芮國器。燁一字仲蒙。林黃中。奕一字寬夫。朱元晦。系一字仲晦。人稱之多以舊字。其作文題名之類。必從後字。後世殆以疑矣。

王荊公熙寧初召還翰苑。初侍經筵之日。講禮記會參易簣一節。曰。聖人以義制禮。其詳見於牀第之間。君子以仁行禮。其勤至於垂死之際。姑息者且止之辭也。天下之害。未有不由於且止者也。此說不見於文字。予得之於從伯父彥遠。

卷第十

世多言白樂天用相字。多從俗語。作思必切。如爲問長安月。如何不相離是也。然北人大抵以相字作入聲。至今猶然。不獨樂天。老杜云。恰似春風相欺得。夜來吹折數枝花。亦從入聲讀。乃不失律。俗謂南人入京師。效北語。過相藍。輒讀其勝曰。大厮國寺。傳以爲笑。

中貴楊戩於堂後作一大池。環以廊廡。扁鐸周密。每浴時。設浴具及澡豆之屬於池上。乃盡屏人。躍入池中游泳。率移時而出。人莫得窺。然但謂其性喜浴於池耳。一日。戩獨寢堂中。有盜入其室。忽見牀上乃一蝦蟆。大可一牀。兩目如金。光彩射人。盜爲之驚仆。而蝦蟆已復變爲人。乃戩也。起坐。握劍問曰。汝爲何人。盜以實對。戩擲一銀香毬與之曰。念汝迫貧。以此賜汝。切勿爲人言所見也。盜不敢受。拜而出。後以他事繫開封獄。自道如此。

廟諱同音。署字常怨。反樹字殊遇。反然皆諱避。則以爲一字也。北史杜弼傳。齊神武相魏時。相府法曹辛子炎。謫事。云取署字。子炎讀署爲樹。神武怒其犯諱。杖之。則署爲樹音不同。當時雖武人亦知之。而今學士大夫乃不能辨。方嘉祐治平之間。朝士如宋次道。蘇子容輩。皆精於小學。亦不以爲言。何也。

東坡素知李廌方叔。方叔赴省試。東坡知舉。得一卷子大喜。手批數十字。且語黃魯直曰。是必吾李廌也。及拆號。則章持致平。而廌乃見黜。故東坡山谷皆有詩在集中。初廌試罷。歸語人曰。蘇公知舉。吾之文必不在三名後。及被黜。廌有乳母年七十大哭曰。吾兒遇蘇內翰知舉不及第。他日尚奚望。遂閉門睡。至夕

不出發。壁視之。自縊死矣。虜果終身不寤。以死亦可哀也。

楊文公云。豈期遊岱之魂。遂協生桑之夢。世以其年四十八。故稱其用生桑之夢爲切當。不知遊岱之魂。出河東記。章齊休事。亦全句也。

閩中有習左道者。謂之明教。亦有明教經甚多。刻版摹印。妄取道藏中校定官名銜贊其後。燒必乳香。食必紅草。故二物皆翊貴。至有士人宗子輩。衆中自言。今日起明教齋。予嘗詰之。此魔也。奈何與之遊。則對曰。不然。男女無別者爲魔。男女不親授者爲明教。明教遇婦人所作食。則不食。然嘗得所謂明教經觀之。謾讀無可取。直俚俗習妖妄者所爲耳。又或指名族士大夫家曰。此亦明教也。不知信否。偶讀徐常侍禱神錄云。有善魔法者。名曰明教。明教亦久矣。

菱。菱也。今人謂卷荷爲伎荷。伎立也。卷荷出水面。亭亭植立。故謂之伎荷。或作菱。非是。白樂天池上早秋詩云。荷菱綠參差。新秋水滿池。乃是言荷及菱二物耳。

蔡大師作相時。衣青道衣。謂之太師青。出入乘轎。頃轎子。謂之太師轎子。秦大師作相時。裏頭巾。當面偶作一摺。謂之太師錯摺。樣第中窗上下及中一二眼。作方眼。餘作疎縷。謂之太師窗。

張魏公有重望。建炎以來。置左右相多矣。而天下獨目魏公爲張右相。丞相帶都督亦數人。而天下獨目魏公爲張都督。雖夷狄亦然。然魏公隆興中再入。亦止於右相領都督。乃知有定數也。

東坡絕句云。梨花澹白柳深青。柳絮飛時花滿城。惆悵東闌一株雪。人生看得幾清明。紹興中。予在福州。見何晉之大著。自言嘗從張文潛遊。每見文潛。哦此詩。以爲不可及。余按杜牧之有句云。砌下梨花一

雪。明年誰此憑闌干。東坡固非竊收之詩者。然竟是前人已道之句。何文潛愛之深也。豈別有所謂乎。聊記之以俟識者。

今人謂後三日爲外後日。意其俗語耳。偶讀唐逸史。裴老傳。乃有此語。裴大曆中人也。則此語亦久矣。嚴州建德縣有崇勝院。藏天聖五年內降劄子。設道場云。皇太后賜銀三十兩。皇太妃施錢二十貫。皇后施錢十貫。朱淑儀施錢五貫。有仁廟飛白御書。今皆存。蓋院有僧。嘗際遇真廟。召見賜衣及香燭故也。猶可想見祖宗恭儉之盛。予在郡初不聞。迫代歸始知之。不及刻石。至今爲恨。

徐致立侍郎頗好譴。紹興末。嘗爲予言。柳子厚非國語之作。正由平日法國語爲文章。看得熟。故多見其疵病。此俗所謂沒前程者也。予曰。東坡公在嶺外。特喜子厚文。朝夕不去手。與陶淵明並稱二友。及北歸。與錢濟名書。乃痛詆子厚。時令斷刑四維。貞符諸篇。至以爲小人無忌憚者。豈亦由朝夕紬繹耶。恐是非國語之報。敦立爲之抵掌絕倒。

蔡攸初以淮康節領相印。徽宗賜曲宴。因語之曰。相公公相子。蓋是時京爲太師。號公相。攸卽對曰。人主主人翁。其善爲諧給如此。

白樂天云。微月初三夜。新蟬第一聲。晏元憲云。綠樹新蟬第一聲。王荊公云。去年今日青松路。憶似聞蟬第一聲。三用而愈工。信詩之無窮也。

蘇子容詩云。起草才多封卷速。把麻人衆引聲長。蘇子由詩云。明日白麻傳好語。曼聲微繞殿中夫。蓋昔時宣制。皆曼延其聲。如歌詠之狀。張天覺自小鳳拜右揆。有旨下閣門。令平讀。遂爲故事。

蔡元長當國時。士大夫問軌革。往往畫一人戴草而祭。輒指之曰。此蔡字也。必由其門而進。及置貫用事。又有畫地上奏樂者。曰。土上有音。童字也。其言亦往往有驗。及二人者廢。則亦無復占得此卦。紹興中。乘會之專國柄。又多畫三人各持禾一束。則又指之曰。秦字也。其言亦頗驗。及秦氏既廢。亦無復占得此卦矣。若以爲妄。則紹興中。如黑象輩。畜書數百冊。對人檢之。予親見其有三人持禾者在其間。亦未易測也。祖宗時。有知樞密院及同知簽署之類。治平後避諱。改曰簽署政和。以後宦者用事。輒改內侍省都知曰。知內侍省事。都知曰。同知內侍省事。押班曰。簽署內侍省事。蓋僭視密院也。建炎中。始復舊。近有道士之行天心法者。自結銜曰。知天樞院事。亦有稱同知簽署者。又可一笑也。

考工記弓人注云。臚亦黏也。音職。今婦人髮有時爲膏澤所黏。必沐乃解者。謂之臚。正當用此字。司馬侍郎朴陷虜後。妾生一子於燕。名之曰通國。實取蘇武胡婦所生子之名。名之而國史不書。其家亦諱之。

太祖開國。雖追尊僖祖以下四廟。然惟宣祖昭憲皇后爲大忌。忌前一日不坐。則太祖初不以僖祖爲始。祖可知。真宗初罷宣祖大忌。祥符中。下詔復之。然未嘗議及僖祖。則真宗亦不以僖祖爲始。祖可知。今乃獨尊僖祖。使宋有天下二百四十餘年。太祖尙不正東向之位。恐禮官不營久置不議也。

與國中靈州貢馬。足各有二距。其後靈州陷於西戎。宣和中。燕山府貢馬亦然。而北虜之禍遂作。周越書苑云。郭忠恕以爲小篆散而八分生。八分破而隸書出。隸書悖而行書作。行書狂而草書聖。以此知隸書乃今真書。趙明誠謂誤以八分爲隸。自歐陽公始。

太宗時史官張洎等撰太祖史。凡太宗聖諭及史官采摭之事。分爲朱墨書以別之。此國史有朱墨本之始也。元祐紹聖皆嘗修神宗實錄。紹聖所修既成。焚元祐舊本。有敢私藏者。皆立重法。久之。內侍梁師成家。乃有朱墨本。以墨書元祐所脩。朱書紹聖所脩。稍稍傳於士大夫家。紹興初。趙相鼎提舉再撰。又或以雌黃書之。目爲黃本。然世罕傳。

先太傅慶曆中。賜紫章服。赴閣門拜賜。乃塗金魚袋也。豈官品有等差歟。

史丞相言高廟嘗臨蘭亭。賜壽皇於建邸。後有批字云。可依此臨五百本來看。蓋兩宮之篤學如此。世傳智永寫千文八百本。於此可信矣。

晉人避其君名。猶不避嫌名。康帝名岳。鄧岳改名嶽。

唐初不避二名。太宗時猶有民部。李世勣虞世南皆不避也。至高宗卽位。始改爲戶部。世南已卒。世勣去世。惟名勣。或者尙如古卒哭乃諱歟。

唐王建牡丹詩云。可憐零落蕊。收取作香燒。雖工而格卑。東坡用其意云。未忍汚泥沙。牛酥煎落蕊。超然不同矣。

張繼楓橋夜泊詩云。姑蘇城外寒山寺。夜半鐘聲到客船。歐陽公嘲之云。句則佳矣。其如夜半不是打鐘時。後人又謂惟蘇州有半夜鐘。皆非也。按於鄴囊中卽事詩云。遠鐘來半夜。明月入千家。皇甫冉秋夜宿會稽嚴維宅詩云。秋深臨水月。夜半隔山鐘。此豈亦蘇州詩耶。恐唐時僧寺自有夜半鐘也。京都街鼓。今尙廢。後生讀唐詩文及街鼓者。往往茫然不能知。況僧寺夜半鐘乎。

宋王安公自禁庭謫鄜時詩云九月一日奉急宣連忙趨至閣門前忽爲典午知何罪謫向鄜州更慙然蓋當時謫黜者召至閣門受命乃行也

宋王安公集中有省油燈盡詩今漢嘉有之蓋夾燈盡也一端作小竅注清冷水於其中每夕一易之尋常盡爲火所灼而燥故速乾此獨不然其省油幾半邵公濟牧漢嘉時數以遺中朝士大夫按王安亦嘗爲玉津令則漢嘉出此物幾三百年矣

祥符中有布衣林虎上書真廟曰此人姓林名虎必尙怪者也罷遣之宣和中有林虎者賜對徽宗亦異之賜名於虎上加竹然字書初無此字乃自稱墳篋之篋而書名不敢增但作篋云

吳中卑薄斷地二三尺輒見水予頃在南鄕見一軍校火山軍人也言火山之南地尤枯瘠鋤鑿所及烈焰應手涌出故以火山名軍尤爲異也

楚語曰若武丁之神明也其聖之睿廣也其治之不疚也猶自爲未艾荆公嘗摘取睿廣二字入表語中蔡京爲翰林學士議神宗諡因力主睿廣二字而忘其出楚語也范彝叟折之曰此楚語所載先帝言必稱堯舜今乃捨六經而以楚語爲尊號可乎京遂屈韓丞相師朴亦云睿廣但可作僧法名耳時亦以爲名言

今人謂貝州爲甘陵吉州爲廬陵常州爲毗陵峽州爲夷陵皆自其地名也惟嚴州有嚴光釣瀨名嚴陵瀨嚴陵乃其姓字瀨是釣處若謂之嚴瀨尙可今俗乃謂之嚴陵殊可笑也

唐質肅公參禪得法於浮山遠禪師嘗作贈僧詩云今日是重陽勞師訪野堂相逢又無語籬下菊花黃

今人謂娶婦爲索婦。古語也。孫權欲爲子索關羽女。袁術欲爲子索呂布女。皆見三國志。

元豐間有俞充者。諂事中官王中正。中正每極口稱之一日充死。中正輒侍神廟。言充非獨吏事過人。遠甚。參禪亦超然悟解。今談笑而終。略無疾恙。上亦稱歎。以語中官李舜舉。舜舉素敢言。對曰。以臣觀之。止是猝死耳。人重其直。

古所謂路寢。猶今言正廳也。故諸侯將薨。必遷於路寢。不死於婦人之手。非惟不瀆。亦以絕婦寺矯命之禍也。近世乃謂死於堂奧。爲終於正寢。誤矣。前輩墓誌之類。數有之。皆非也。黃魯直詩云。公虛采蘋宮。行樂在小寢。按魯僖公薨於小寢。杜預謂小寢。夫人寢也。魯直亦習於近世。謂堂爲正寢。故以小寢爲妾媵所居耳。不然。既云虛采蘋宮。又云在小寢。何耶。

王黼作相。其子閔孚。作待制。造朝財十四歲。都人目爲胡孫待制。

晉人所謂見何次道。令人欲傾家釀。猶云欲傾竭家貲以釀酒飲之也。故魯直云。欲傾家以繼酌。韓文公借以作簞詩云。有賣直欲傾家貲。王平父謝先大父贈簞詩亦云。傾家何計效韓公。皆得晉人本意。至朱行中。舍人有句云。相逢盡欲傾家釀。久客誰能散棗金。用家釀對棗金。非也。

錢總字穆。范祖禹字淳。皆一字。交友以其難呼。故增父字。非其本也。

錢穆父風姿甚美。有九子。都下九子母祠。作一巾紵。美丈夫坐於西偏。俗以爲九子母之夫。故都下謂穆父爲九子母夫。東坡贈詩云。九子羨君門戶壯。蓋戲之也。

保壽禪師作臨濟塔銘云。師受黃髮印。可尋抵河北鎮州城東臨滹沱河側小院住持。名臨濟。其後墨君

和太尉於城中捨宅爲寺。亦以臨濟爲名。墨君和名唐書及五代史。其事甚詳。近見呂元直丞相燕魏錄。載眞定安業坊臨濟院。乃昭憲杜太后故宅。按保壽與臨濟。乃師弟子。不應有誤。豈所謂臨濟院者。又嘗遷徙耶。

謝任伯參政。在西掖草蔡太師誦散官制。大爲士大夫所稱。其數京之罪曰。列聖詒謀之憲度。掃蕩無餘。一時異議之忠賢。耘鋤略盡。其語出於張文潛論唐明皇曰。太宗之法度。廢革略盡。貞觀之風俗。變壞無餘也。

呂進伯作考古圖云。古彈棋局。狀如香爐。蓋謂其中隆起也。李義山詩云。玉作彈棋局。中心亦不平。今人多不能解。以進伯之說觀之。則粗可見。然恨其藝之不傳也。魏文帝善彈棋。不復用。指第以手巾角拂之。有客自謂絕藝。及召見。但低首以葛巾角拂之。文帝不能及也。此說今尤不可解矣。大明龍興寺佛殿。有魏宮玉石彈棋局。上有黃初中刻字。政和中取入禁中。

昭德諸晁謂壻爲借債之倩云。近世方訛爲倩。予幼小不能叩所出。至今悔之。

紹聖元符之間。有馬從一者。監南京排岸司。適漕使至。隨衆迎謁。漕一見怒甚。卽叱之曰。聞汝不職。正欲按汝。何以不亟去。尙敢來見我耶。從一惶恐。自陳湖湘人。迎親竊祿。求哀不已。漕察其語。南音也。乃稍霽。威云。湖南亦有司馬氏乎。從一答曰。某姓馬。監排岸司耳。漕乃微笑曰。然則勉力職事可也。初蓋誤認爲溫公族人。故欲害之。自是從一刺謁。但稱監南京排岸而已。傳者皆以爲笑。

蔡太師父進葬臨平山。爲駝形。術家謂駝負重則行。故作塔於駝峯。而其墓以饒塘江爲水。越之秦望山。

爲案，可謂雄矣。然富貴既極，一旦喪敗，幾於覆族，至今不能振，俗師之不可信如此。

該開錄言皮日休陷黃巢，爲翰林學士，巢敗被誅。今唐書取其事，按尹師魯作大理寺丞，皮子良墓誌稱曾祖日休，避廣明之難，徙籍會稽，依錢氏官太常博士，贈禮部尚書，祖光業爲吳越丞相，父璨爲元帥府判官，三世皆以文雄江東，據此則日休未嘗陷賊爲其翰林學士被誅也。光業見吳越備史頗詳，孫仲容在仁廟時仕亦通顯，乃知小說謬妄，無所不有，師魯文章傳世，且剛直有守，非欺後世者，可信不疑也。故予表而出之，爲襲美雪謗於泉下。

鄒忠公夢微廟賜以筆作詩記之，未幾疾不起，說者謂筆與畢同音，蓋杜牧夢改名畢之類。唐小說載李紆侍郎罵負販者云：頭錢價奴兵，頭錢猶言一錢也。故都俗語云：千錢精神頭錢賣，亦此意云。

楊朴處士詩云：數箇胡虓徹骨乾，一壺村酒膠牙酸。南楚新聞亦云：一標豔根數十皴，盤中猶自有紅鱗。不知皴何物，疑是餅餌之屬。

白樂天寄裴晉公詩云：聞說風情筋力在，只如初破蔡州時。王禹玉送文太師詩云：精神如破貝州時，用白語而加工，信乎善用事也。

茲集向編稗海函中人，爭謂其拾得小碎，如五色線西陽雜俎之類。讀至仁宗飛白，哲宗宸翰，張德遠誅范瓊於建康獄中，都人皆鼓舞，秦會之殺岳飛於臨安獄中，都人皆涕泣，王仲信守父書而不顯，官秦熿任元受視母病而不肯就魏公諸則，真足補史之遺，而糾史之謬，寧僅僅杜宇爲謝豹不

律爲綠沈。多識於鳥獸草木之名耶。湖南毛晉識。

陸放翁集 二十四 老學庵筆記 卷十

九十五

家世舊聞

太傅諱軫字齊燾。性質直。雖在上前。不少改。昔爲館職時。嘗因奏事。極言治亂。舉笏指御榻曰。天下奸雄。睥睨此座者多矣。陛下須好作。乃可長保。明日。仁祖以其語告大臣。取陸軫淳直如此。

楚公諱旬。字農師。使虜歸。攜所得魏。至京師。先君言。猶記其狀。如大鼠而極肥。臍甚畏日。偶爲隙光所射。輒死。性能糜肉。一鼎之肉。以魏一爵投之。旋即糜爛。然虜人亦不以此貴之。但謂珍味耳。楚公使虜時。館中有小胡。執事甚謹。亦能善言。因食夾子。以食不盡者與之。拜謝而不食。問其故。曰。將以遺父母。公喜。更多與之。且問識此何物也。曰。人言是石榴。意其言食餽也。又虜人負載隨行物。不用兵夫。但遇道上行者。卽驅役之耳。一日。將就馬。一擔夫訴曰。某是燕京進士。不能負擔。公笑爲言而遣之。

祖母楚國鄭夫人。撫視庶子。與己子等。先君與四十二叔父。提舉公諱棠。字元珍。同歲。方懷孕時。祖母作襁褓二副。付侍者曰。先產者先用之。已而八月。祖母生先君。九月。柱支婆生叔父。相距才二十餘日也。先世以來。虛母皆稱支婆。

楚公言。遼人雖外竊中國禮文。然實安於夷狄之俗。南使過中京。舊例有樂來迎。卽以束帛與之。公以十一月二十日。至中京。遼人作樂受帛。自若也。明且。迺使輒止不行。曰。國忌行香。公照案牘。則虜忌正二十日也。因移文問。虜曰。去年昨日作忌。今年今日作忌。何爲不可。蓋利束帛。故徙忌日耳。又西遼。送使聞其主喪。而不能作哀也。但以墨滅幘頭之光。行數日。旣除服。則佩服如常矣。獨副使哀洗幘頭。見者大笑。公

平生待物以誠。雖於夷狄不變也。因從容與話。使洗之。副使亟謝。
先君諱寧字元約。言青州王沂公所居坊有榜曰三元文正之坊。又嘗見沂公初登第。報其父書曰。曾今
日殿前唱名。遂忝第一。皆先世積德。大人教訓所致。然此亦世間有底事。大人不須過喜。因言楚公登科
時。第四人張中在殿廷喜甚。挈楚公手曰。如何得鄉里知去。楚公不答。及歸。密謂親曰。此殆非遠器也。中
爲明州象山縣官。坐私與高麗人朴寅亮倡和詩。停官終身沈滯。雖一時不幸坐法。亦器宇非遠大也。
宣和末。蔡京病篤。人皆謂必死矣。獨晁叔用冲之謂先君曰。未死也。此老敗壞至此。若使晏然死。牖下備
極哀榮。豈復有天道哉。已而果然。

先君言蔡京自少好方士之術。其在錢塘。嘗遇異人。以故所至輒延道人輩。崇寧初。作相。卽爲徽廟言。泰
州徐神翁能知未來事。元祐中。蘇軾知揚州。遣人往求字。神翁大書曰。泄慢墮地獄。禍及七祖。神翁雖方
外士。而能疾元祐人所宜褒顯。其可笑如此。然上頗喜之。羣閣又言。元符中。哲宗嘗遣人密問聖嗣。神翁
曰。吉人君子。吉人者。上名也。於是召至都下。上用太宗見陳搏故事。御縑褥。卽便殿。以賓禮接之。又有劉
混康者。茅山道士。其師祖朱自英。以傳錄著名。章獻名肅。太后臨朝時。嘗召至京師。從受法籙。故混康亦
得召。混康頗有識。善劾鬼神。然未嘗行。每日安能敲枷擊鎖。作老獄吏耶。二人者。既至。皆物故。上疑其變
化仙去。益求其類。初京爲眞定帥。道人王老志自言鍾離權弟子。嘗許京必貴極人臣。至是。物色得之。京
館之後園。引與見上。老志敢大言。熱視上曰。頗記老臣否。上亦自記。嘗夢游帝所有仙官贊拜者。其面目
眞老志也。恩禮尤渥。車駕游幸。老志輒羽衣導駕。言有非常。輒能知之。未幾。老志夜叩京門。告以鍾離公

怒我語涉欺誣。行當墮落。公福亦不終矣。明日得疾。力辭歸河朔而死。自是方士自言有異術者相踵。而林靈素最後出。尤爲魁傑。素字靈通。叟。本名靈璽。温州人。少嘗事僧爲童子。嗜酒不檢。僧笞辱之。發憤棄去。爲道人。頗知小術。亦時時自寫所爲歌詩遺人。然筆札詞句皆鄙惡。了無可觀。旣得幸。其徒黠者稍潤色之。然靈素本庸夫。每升高座說法。肆爲市井俚談。聞者絕倒。或擇日施符水。爲人治病。車駕間幸其所居。設次臨觀。則陰募京師無賴數十人。曲背爲偃。扶杖爲盲。噤口爲暗。曳足爲跛。旣嘔水扶符。則偃者伸背。盲者捨杖。暗者大呼。跛者疾走。或拜或泣。各言得疾二十年或三十年。一旦都除。歡聲動地。上爲大悅。靈素以爲未足。則又倡言神霄事。謂天有九霄。神霄最尊。上爲神霄帝君。實玉帝長子。下降世間。而其貳曰青華長生二帝君。實治神霄府事。每齋醮。上必親劄辭表。以禱上帝君。或久無靈響。亦禱焉。好事者或謂青華爲上。長生爲鄆王。蓋過矣。然宮觀設醮。亦或言見上御道家冠服。跨金龍。冉冉自空而降。呼奉祠官及道士與處。其事祕不可知也。惟擲果自空而墜。則往往得之。果皆絕大異常。靈素又自謂己乃神霄計吏。褚慧有兄曰褚嘉卿。位至右極仙。嘉卿今亦生世間。是爲王黼。黼和御製詩有曰。君王猶記褚嘉卿。者是也。其他如蔡京則左元仙伯。范致虛則東臺典籍。王孝迪則西臺詳閱真文史。靈素與王革有隙。則曰革旣吏也。常與帝君馭馬。其他有名者甚衆。是時明節劉后方幸。又曰。后在神霄爲九華玉真安妃。蔡京曲讖詩曰。保和前殿麗秋暉。恩許塵凡到綺闌。曲讖酒闌傳密詔。玉真軒裏見安妃。是也。安妃名在真誥。蓋天之高真。而靈素敢演冒如此。又嘗密奏兩靈真裔將誕。蓋明節方就館耳。靈素賜號蕊珠殿侍長。金門羽客通真達靈先生。上刻玉爲降真召靈之寶。自用之。而錫靈素塗金印。文曰通真達靈之印。班視

執政錫賚至不可計。有弟子姓丁，自言謂之四世孫，上爲下詔，贈爲少保。士大夫無恥者，日萃其門，所奉進皆卽拔擢。又著令道士居僧上，而道士入僧寺，輒據上席。已而遂冠笄僧尼矣。先是宮中數有物怪，或見一老媪，黃帽黃衫，抱十餘歲兒，紅袍玉帶，乘輿鳴蹕而出。媪兒皆有悲泣容，其將見，必先有聲如雷，宮中爲之雷去聲。上常手札賜靈素，略曰：元符三年冬，內人自秦陵還，摘皂莢一籠入宮門，籠輒自躍，皂莢皆跳出，是祟物顯行，宜善治之，勿爲髡徒所笑。靈素竭其術，不效。既久，上益厭之，遂放靈素歸故郡。宣和末，病死。靈素之遲懞釋氏也，每爲金狄亂華，又創圖宮殿爲仙女騎麟鳳之狀，名之曰女真，皆妖言也。

余於放翁逸詩遺文，凡史籍載記及稗官野冊，撫拾幾盡。又訂正南唐書及老學庵筆記附之意，謂放翁小碎，亦無遺珠矣。旣簡說鄂學海，又得家世舊聞若干，則喜而讀之，真不啻登積書巖者。第其卷末載蔡京述妖異事，獨詳不解何也。湖南毛晉識。

齋居紀事

研每遇磨墨用畢，卽以蓋覆之。或謂北方多塵，故須覆。此說殊不然。墨不覆以易乾，乾必屢磨，故墨滯而損筆。又研不免近窗，故昔人用研屏以障日氣，畏速乾也。筆用訖亦當滌之，常置一小器水於研旁，加榻貴筆常潤，又倉卒便可使，亦自省筆不可不知。

研水必日一換，仍用清泉。塵多處密覆乃佳。

漆研匣茶奩之屬，勿以冷水洗，水能敗漆，當戒。

畜筆用以椒濃煎湯，以少許拌膩粉，如薄麪，胡故反蘸筆鋒。

藏墨用綿包置奩中，時一出暴。

凡紙必作筒收，每筒不過二十五幅，入箱中，卓頭太高者，先裁令適宜，使動者置面上，則不壓扁。

遼巡麪法，用白麵，扞古罕反，作薄麪，銚中煒熟，頻翻，勿令焦，醫燥乾，杵羅令細，貯之，要用時，旋以冷熱湯

調作麪，厚薄隨意，急用冷水亦可。

每年芒種以前，乘好日色，設牀暴書，令極燥，入廚篋，厚伎紙羅罽，勿通風過小，暑乃開，仍去羅。

筆墨碑畫匣，皆以梓木爲之，匣深其筭，匣內切勿用漆，能致蒸溼，梅月仍以厚紙鋼罽乃佳。

照書燭必令蠹而短，勿過一尺，蠹則耐短，則近書燈，勿用銅盞，惟瓦盞最省油，蜀有夾盞，盞注水於盞唇

竅中，可省油之半，燈檠法，高七寸，盤闊六寸，受盞圈徑二寸半，擇與圈稱者。

禮草茶法。必先滌濯。令無舊茶氣。風日中曝極燥。擇去茶子小黃葉枝梗。以疎布巾裹建茶一隻盛茶。手撼頓之。盡徒去白毛。更略見火。乃入磴。少下而急轉。如雪花麩片。乃佳。仍用始沸湯點湯。老則味澀。茶須旋磴。正可三五日。用過此。香味皆損。茶遇梅月。須朝暮以慢火焙之。常時亦須三兩日一焙。但切忌熾火。及有烟火。又忌與香藥同貯。皆當躬自屢省。勿委齋僕。

梭魚。二月以前。取在腐中成塊段者。去枝祇湯煮令熟。下燻香蔥。薑油并椒。然後以酢水相半煮沸。微加鹽醬。櫻欄樹皮中子。

圍廬中當作月狀。以石灰泥之。榜置瓦。整四菴。後作小茅屋三五間繞之。凡菴之茶藥。蔬果器并薪炭。及齋僕之廬具焉。亦當簡約。非甚不可已者。勿蓄。

烏豆粥。用新好大烏豆一斤。炭火燻一日。當糜爛。可作三升米粥。至極熟。下豆。入糖一斤。和勻。又入細生薑。葶子四兩。一法。燻豆熟後。以熬熟麻油浸之。豆上油深寸半。密覆之。文武火燻。候露出豆。卽以匙拌轉。更燻令泣盡。油方止。每燻成粥一釜。可下豆三四碗。攪勻。入糖如前。不用薑葶子。

地黃粥。用地黃二合。候湯沸。與米同下。別用酥二合。蜜一合。炒令香熟。貯器中。候粥欲熟。乃下。

枸杞粥。用紅熟枸杞子。生細研。淨布搥汁。每粥一碗。用汁一盞。加少煉熟蜜。乃燻。

紫餠飩。用新烏豆。燻濃汁。漉麵作湯。麩。借筍。搗汁。芫。以葷菜。至佳。

苦筍冷淘。用慢火煨苦筍。候熟。細裂之。以薑油醃。醬拌和勻。作冷淘。此蜀名士劉夷叔望之法也。

朝晡食粥飯湯餅之屬。皆當令腹中有餘地。魚肉僅僅。可以下飯。按酒則已。多尤爲害。若偶食一物。多則

當減一物以乘除之。如湯餅稍多，則減飯。飯稍多，則減肉。要不過此數。食罷，行五七十步。然後解襟褫帶，低枕少臥。此養生最急事也。

孟子離婁篇言：待我以橫逆一節，以爲當自反。最爲要論。然不免有怒心。如此亦妄人及與禽獸奚擇之。言是也。要當終自反而已。

拭布常常置陰處。近火則堅燥不可用。若拭酒食，必隨手洗濯令淨。

拄杖唯蘆竹最佳。尋常用作筆管者是也。一節疎，二節勁，三色白，四至輕，五易得。

米元章言：春和手不皴，可自洗研作字。有精神，墨不自研，筆不自滌，紙不自□，研水不自汲，亦如之。

□□書作字就食案洗研就蹟。□□香用炊籠踢爐火點茶用銅鐵。□□貧者用石銚沙餅可也。

宋人書以李西臺蔡端明爲第一。至蘇內翰黃太史米南宮超軼奔放，姿態橫生，尤爲卓絕。南渡後，惟石湖放翁猶有前輩筆意。下是無足觀矣。放翁家會稽，遺墨多流落人間。此帖宜爲僧石溪所寶。

字文公諒謹題

右放翁齋居紀事帖稿真迹，內多塗抹。余近得於洞庭陸氏。陸氏得於會稽鬻古書者，欲便觀覽，因錄置几席。嘉靖丙戌蠟月四日，是日雪片如手，與之所至，呵凍作書，殊不覺寒也。中臬子袁葵尙之，在臥雪齋漫志。

先君搜裒放翁著作，可謂備矣。但不得老學菴續筆記，以爲欠事。屢近讀袁尙之嘉藝錄中，有齋居紀事一焉，從放翁真跡抄出者，并刊附於後。焉末缺字，想係渝敝處嘉藝錄者尙之手錄其家。

藏及所見法書名畫題識都爲一册亦朱性甫鐵網珊瑚之流也但其記本之紙絹軸之大小橫立以及若何設色今昔收藏姓氏視性甫爲詳密云汲古後人毛扆識

中華民國二十二年五月初版

(二〇四九四)

國學基
本叢書
陸放翁集四冊

每部定價大洋肆元

外埠酌加運費匯費

著者 陸游

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

版 翻
權 印
所 必
有 究

82
76-38
ct

